





29, 083/B

A. xxxiii. o







Digitized by the Internet Archive  
in 2018 with funding from  
Wellcome Library

[https://archive.org/details/b30532905\\_0002](https://archive.org/details/b30532905_0002)

55350

FRIDERICI  
HOFFMANNI  
MEDICINÆ  
RATIONALIS  
SYSTEMATICÆ

TOMUS QUARTUS.

QUO SPECIALIS MORBORUM PATHOLOGIA  
& huic superstructa solida Therapia cum medendi methodo  
cautelis Clinicis & morborum enarrationibus adjuncta  
Epicrifi exhibentur.

PARS PRIMA

DOCTRINA DE OMNIS GENERIS FEBRIBUS  
*tam intermittentibus, quam continuis & acutis inflammatoriis  
perspicua & demonstrativa methodo tradens.*



*B. Trigi Langgendi*

VENETIIS. MDCCXXXVII.

EX TYPOGRAPHIA BALLEONIANA.

SUPERIORUM PERMISSU, AC PRIVILEGIO.





JUVENI EGREGIO  
**FRIDERICO HOFFMANNO**

CANDIDATO ARTIS MEDICÆ DOCTISSIMO

*Strenuo & solerti rerum Physicarum Mathematicarum  
& Medicarum cultori.*

**FILIO SUO DILECTISSIMO**


**NEC NON**

**OMNIBUS DISCIPLINÆ SUÆ ALUMNIS**

**DOCTIS ET SEDULIS**

Utilissimum hunc Librum dicat & plurimum  
commendat

**AUCTOR.**





# P R Æ F A T I O .

**T**ANDEM prodit in lucem promissus diu & expectatus quartus Medicinæ rationalis systematicæ tomus, qui morborum pathologicam & practicam specialem disquisitionem, cum cautelis & observationibus clinicis, nec non morborum curationumque historiis complectitur, & quidem prima ipsius pars, de omnis generis febribus. Multa quidem scripsi & plura edidi, ex quo per triginta & septem fere annos Professoris munere hac in Academia functus sum; sed a primo statim tempore firmum cepi propositum, maturæ tandem ætati reservare Medicinæ systema, non quod nutanti hypothesium sustentaculo, sed veritatibus inter se connexis & methodo demonstrativa propositis, niteretur, ad artem nostram, multis, in pathologicis præsertim & medendi methodo, laborantem imperfectionibus, perficiendam & certam ipsius rationem adstruendam. Ante decem igitur annos evulgavi primum hujus operis systematici tomum, qui philosophiam corporis humani vivi & sani, & doctrinam sanitatem tuendi vitamque conservandi tractat, ac haud ita pridem auctior & emendatior recusatus est. Successit dein secundus tomus, quo philosophiam corporis humani ægrotantis tradidi, & varii generis causas, quibus functiones in corpore varie læduntur, congruo ordine, accurate & copiose exposui, ut Medicus rerum insalubrium, quæ morbis ingenerandis velificantur, cognitionem haberet exquisitam. Novissime in tertio tomo id egi, ut viam sternerem, ad recte ac penitus percipiendam, & pathologiam, & therapiam. Hinc docui, quo pacto morborum historiæ colligendæ, morbi dignoscendi & perire de iis judicandum, genuinam medendi methodum, ex naturæ legibus, arti imitandis & exsequendis, monstrandis, & redactis in generales quatuor classes remediis cunctis, longo usu probata selegi eorumque physico-mechanicum in corpus operandi & dextre applicandi modum, candidè exposui. Restitit itaque adhuc quartus tomus, speciatissimam morborum ætiologiam & therapiam, pro tot indi-



viduorum & causarum morbificarum varietate, exhibiturus, ejus nunc primam partem, febrium doctrinam habentem, eruditorum & saniorum Medicorum judicio publice expono, in non poenitendum, uti spero, usum eorum, qui in artis operibus versantur. Neque vero me poenitet, editionem practici hujus operis diu distulisse, & ad hoc usque tempus, quo longa & sufficienti experientia instructus, certa ubique cum ratione id elaborare possum. Ego enim non sine animi indignatione & ægritudine vidi, quam temere laudant de hominum corio medentum imperiti & quot quantaque damna inconconsulta medicina inferant. Tædet etiam prorsus multorum, immo plurimorum practicum librorum, qui immaturo adhuc judicio, & insufficiente, aut plane nulla experientia, ex aliis compilati conscribuntur, erroribus decumanis reperi, qui sic cum magno ægrotantium detrimento in vulgus emanant. Ad condendum vero practicum systema, quod firmis & demonstrativis principiis nitatur, ante omnia amplissimo observationum practicarum apparatu opus esse, quisque judicio pollens intelliget facile. Vera enim pathologia, quæ generationem morborum ex concurrentibus variis causis, genuinum est therapie certæ, in curandis & arcendis morbofis afflictionibus occupatæ, fundamentum ac basis. Sanare quoque nihil aliud est, quam causas morborum proximas eorumque effectus tollere & præservare a morbis idem, ac primas morborum origines earumque antecedentes causas, avertere, vel per congrua remedia remove. Ideo necessarium quam maxime est, ut causæ nocentes morbificæ, quæ innumerabiles & mirum natura ac operatione differunt, sufficientes & penitus cognoscantur, ut deinceps, remediorum, causis morborum ceu contraria opponendorum, quæ innumera pariter sunt & natura ac efficacia, pro corporis dispositione, admodum diversa, vires & facultates indagentur & intime perspiciantur. Ad obtinendam autem hanc cognitionem, via datur alia nulla, quam per numerosa observata clinica, cum cura notata in tot individuis, ratione ætatis, sexus, nativitatis, hæreditariæ dispositionis, consuetudinis, victus & vitæ generis, sensibilitatis, valetudinis perpeßæ, differentibus, & quod maximum.



ximum in morbis non tantum simplicibus & solitariis, verum etiam, qui frequentissimi, complicatis. In ipsa curatione id utique certum, nec ullum morbum curari posse eadem methodo in genere, sed quemvis, propter differentem causarum & individuorum indolem, curandi rationem poscere diversam, individualement scilicet & specialissimam. Quæ quum firmum requirat iudicium, quo observatis & expensis curate circumstantiis singulis, quid de morbo sentiendum, quomodo curatio instituenda, quibus auxiliis utendum & quo ordine ac dosi hæc adhibenda? omnino necessarium est, ut ex numero pluribus observationibus addiscatur hæc & colligatur. Interim solæ observationes, etiam cautissime conscriptæ, ne utquam sufficiunt, ad evitandos tam in iudicando, quam usu remedium errorum, sed clave opus est, quæ rerum in historiis obviarum facti causas eruere, detegere, aperire, clare demonstrare, tandemque ex observatis particularibus plurimis, axiomata universalis, magnæ ad pathologiæ & therapiæ incrementa utilitatis, elicere possimus. Jam hæc clavis nihil aliud est, quam illa rerum medicarum scientia, quæ deprompta est ex principiis in sensum & conceptum cadentibus, anatomicis nempe & physico-mechanicis, ita ut illorum ope ea, quæ ad corporis humani ejusque partium intimam structuram & ex hac dependentes singularum functiones pertinent, & horum beneficio, indoles & facultate rerum corporearum, quæ non pro arbitrio, sed ex necessitate a summo creatore indita immutabili, in corpus agunt, ac unice vitam, sanitatem, mortem & morbos, horumque & præservationem, & curationem, dispensant, cognoscantur. Præ omnibus tamen opus est deducta ex his principiis pathologia vera, quæ si quis destituitur, nihil solidi, nihil recti, de medicamentorum viribus, an in hoc vel illo morbo & individuo, salubria sint, vel insalubria? judicare valet. Quam manca autem & hiulca sit, quamque infirmis fundamentis nitatur, & veterum, & recentiorum plurimorum pathologia, nemo qui penitus eandem sine præjudicio expendit, inficias ire poterit, sed dicere illud & palam scribere, tam odiosum est, quam veritatem eloqui. Ita tamen omnino est. Et ne gravius aut ex affectu forsitan scriptum videatur, exemplo sint definitiones, ubi vis obvia. Ve-



ras has & reales, genuinum ac firmum esse principium, ex quo conclusiones & demonstrationes, de essentia, causis & differentiis definiti formandæ, accuratiores Philosophi, profitentur & asserunt omnes. Quæ autem in medica disciplina passim circumferuntur, de arte inprimis medica, de vita, sanitate, morbis, morte, de febre, inflammatione, morbo spasmodico hypochondriaco definitiones, ita sunt comparatæ, ut vix ulla sit, in qua non multum desiderari queat. Quin, quum in physiologicis cerebri & systematis nervosi functio & usus, pensi habetur & a plurimis tantum non ignoretur; ultro innotescit, morbos ex horum vitio etiam ignorari, & mutilam præterea admodum esse, non modo morborum, sed & symptomatum ætiologiam. De therapia porro, nostro tempore receptæ, imperfectione testimonio est indubio, illa propudiosa inter Medicos vicens dissensio, de remediorum viribus & usu. Lacerantur hac passim maximæ virtutis auxilia, venæsectio, fonticuli, vesicatoria, purgantia, emetica, martialia, adstringentia, inprimis chinæ cortex, camphorata, volatilia, opiata & mercurialia, quæ nonnulli in totum, nonnulli sub certa tantum conditione rejiciunt, alii vicissim mire laudant ac concelebrant. Luculentius hanc in therapeuticis ignorantiam prodit ingens illa remediorum supellex atque farrago, simplicium & compositorum, Galenicorum & Chymicorum, quam tamen plurimi necessariam judicant ad oppugnandos tam multos & varios morbos. Alii contra universalia tantum crepant, & paucissima numero in usum vocanda esse, contendunt. Ab utraque vero parte diætetica & quasi domestica, illa maximarum in chronicis morbis virium præsidia, quibus Veteres, Chymia & Pharmacia ignari, gravissimos morbos debellarunt, aqua nimirum, vel pura fontana, vel mineralis, lac, serum lactis, ptisanæ, decocta & infusa specierum vegetabilium, balnea, frictiones, abstinencia quoque & inedia, vel plane ignorantur, vel minimum negliguntur, neque ex merito æstimantur. Sed sic obvios nævos atque defectus Medicinæ, uti hodie fere est, tetigisse sufficiat & iterum inculcasse, quæ satis inculcari possunt nunquam. Jam quo pacto lapsus hi vitandi & quam ego ob id hoc in opere servaverim tractationis rationem, ostendam. Sane quum



vita & sanitas res sit adeo pretiosa & inæstimabilis, princeps & præcipua omnino esto cura, ne quippiam admittatur, quod eandem ullo modo labefactare, multo minus destruere, queat. Eo potius summo enitendum est studio, ut morbi & præmatura mors arceantur. In hoc enim præcipuum medentis positum est officium, tum quod magis in ipsius potestate situm, tum quod ex centum, vix unus eam attingit ætatem, ut ex scientia rerum salubrium & insalubrium, præsentem morbum depellere tuto & certo norit. Ut itaque officio suo recte satisfaciat artifex, per remedia, quæ ipsius manus & instrumenta, nihil plane agere debet ex opinione, quæ secundum *Hippocratem de decent. orn.* in crimen verti debet eam adhibentibus, sed simplex sectanda veritas, cujus genuinus character, si ex indubiis & inconcussæ veritatis principiis, apta connexionem ita potest deduci & demonstrari, ut animum convincat, nec dubitatio amplius supersit. Ur sit hanc demonstrationem serio jam primus artis conditor, *Hippocrates*, passim. Sic enim graphice scribit *epist. XXVII. ad Athen.* oportet non solum dicere, sed etiam demonstrare, quod verum est in Medicina. Idem *lib. de art. pag. 9.* vult, ut morborum tam manifestorum, quam obscurorum, certæ & infallibiles medelæ sint. Et *lib. de loc. in hom. pag. 398.* constans, ait, & firma est tota Medicina & doctrina optime in ea compositæ, minime fortuito casu egere videntur. Atque etiam ego existimo, medicam disciplinam ad demonstrationes conficiendas omnium esse aptissimam. Magnus enim est numerus causarum naturalium, non naturalium & præternaturalium, quæ concurrere debent ad proximam causam, a qua functiones læduntur immediate & morbus fit. Quo vero major rerum vel causarum series & ordo, eo pulciores, pleniores & perfectiores conficiuntur demonstrationes. Jam, uti supra dictum, secundum optimos demonstrandi magistros, definitiones reales sunt illud principium & fundamentum, ex quo conclusiones firma argumentatione deducendæ, & in quod veritates singulæ tandem resolvuntur. Quare in adornanda hac morborum pervestigatione, hanc mihi præfixi methodum, ut primo loco veram morbi definitionem collocarem, per quam ipse morbus



bus ejusque causa cognosci & ab aliis ratione suæ essentiæ dignosci possit. Dein subjunxi statim generalem morbi historiam, completam cum omnibus necessariis circumstantiis, depromptam partim ex propria, partim aliorum peritissimorum Medicorum experientia, eumque in finem magno cum fructu usus sum ex antiquissimis *Hippocratis & Aretæi*, neque minus *Celsi*, *Cælii Aureliani & Tralliani* scriptis, qui accuratius recentioribus morborum consignarunt historias, e quibus ob id eximiora loca passim inferui. Enarrata historia, in proximam & adæquatam cujusvis morbi causam, quæ symptomatum genitrix, inquisivi, & simplici simul ac facili methodo cum hac connexi causas antecedentes remotas, item naturales & præternaturales, ostendendo apte & intelligenter, qua ratione hæc ad primam in effectum traducendam conspirent. Tum exposui signa e quibus de morbi eventu judicandum perite, ac, ut sedes morbi & mortis causa innotesceret, addidi demum, quæ in cadaveribus defunctorum reperiuntur. Sic tradita morbi theoria, accessi statim ad medicationem & curatorias indicationes, quæ perperam plerumque seorsim tractantur. Curatio enim & medendi methodus opponi debent causis, ideoque etiam proxime cum iis connecti, quo eo melius in oculos incurrant & animo infigatur, Prisca hæc fuit *Hippocratis* sententia, quam *lib. de flat. pag. 400.* sic prodidit: *si quis causas corporis affecti probe cognovit, potens est valde ea afferre, quæ corpori commodent, nimirum contraria, morborum natura perspecta. Est enim secundum naturam Medicina, idest, Medicina in naturalem statum debet reducere ægrotum. Sed in medicatione merito tenendum: nec Medicum, nec medicamenta, sed ipsam naturam, per quam nihil aliud intelligo, quam corporis machinam potentiis motricibus in solidis & fluidis, nec non ex variis secretoriis & excretoriis artificiosissime constructam, solum sæpe, morrem sanare, causasque ipsius debito tempore & ordine per congrua emunctoria eliminare. Hanc itaque methodum, hunc ordinem naturæ & leges, Medicus ceu peritus ipsius minister cum cura observare & imitari, ac si deficit, in motibus eandem juvare, vel si excedit, ad moderamen & æquilibrium reducere debet.*



debet. Quod, quo pacto recte sit faciendum, leges quaedam, naturæ legibus conformes omnino, tradidi & uberius exposui in *Med. ration. system. tom. III. Sect. II. cap. I. & II. pag. 388.* quæ tamen in ratione fundatæ, quam multiplici experientia sunt comprobatæ. Has qui in medicatione omni observabit curate, peccabit nunquam; qui autem deliquit, certissime contra harum præceptum impegit. Quare omnibus & singulis qui artis exercitio manum admoveere volunt, aut jam in eo versantur, sedulo legenda, perpendenda & probe tenenda commendo etiam atque etiam, quæ in citato *tomo tertio*, maximeque *Sect. 2. cap. 1. 2. 3. & 4. seqq.* attuli. Inde enim amplissimum fructum ad resolvendas morborum historias & danda salutaria consilia percipient, & intelligent, specialia hoc in opere practica præcepta, niti universalibus illis omnia. Habeant præterea disciplinæ meæ alumni sibi commendatos casus, quo cuivis capiti subjunxi, cum addita epicrisi. Heic enim, ubi recte actum, perspicient applicationem præceptorum, ubi secus factum esse, candide sine ullius injuria dixi, aliorum damno sapere & cautiore fieri discent. Videbunt etiam ex historiis deprompta salutaria monita, amplissimi in similibus casibus usus. Omnia autem erunt incitamento, ut diligentes sint in annotandis curate morborum historiis, e quibus, ope theoriæ solidæ, ad usum accommodæ, ipsi eruere poterunt canones atque cautelas ad incrementa & pathologiæ & therapiæ longe utilissimas. Nolo tamen, ut mea tantum sectentur, sed ut ex aliis etiam decerpant, quæ vera & ad usum scripta eademque cum prudentia sibi imitanda proponant. Quem in finem habeo ut commendem *Hippocratem, Aretæum, Trallianum & Celsum*, ex veteribus, ex recentioribus *Gallis, Ballionium & felicissimum Practicum Riverium*; ex *Italis* optimum *Hippocratis scholiasten, Mercurialem* nec non *Lancisium & Baglivum*; ex *Anglis Villisium, Sydenhamum & Mortonem*, ex *Belgis Sylvium & Boerhaaven*; ex *Germanis Sennertum, Hildanum ac Ettmullerum*, non neglectis eorum laboribus, qui novissime in nostra æque ac aliis Germaniæ Academiis, veris principiis & sufficienti experientia instructi, scripserunt. Hæc tam in genere, quam de



scribendi ratione & usu hujus libri monuisse sufficiat. Optassem quidem, ut practicum opus universum, uti animo concepi, luci publicæ simul exponere potuissem, sed late nimis patuit campus, quam ut uno semestri, in tanta ægrotorum, & domi, & foris, consilium & opem exquirentium, in tanta negotiorum & causarum, ex magistratu quem gero academico, multitudine, & sub valetudine adversa, qua sub initium anni longius quam per mensem fui detentus, eundem potuerim emetiri. Selegi igitur potissimam de febribus doctrinam eandemque in prima hac parte mihi summi explanandam. Dabo tamen operam, ut quam primum fieri poterit, reliquorum adhuc morborum, eodem modo instituta tractatio, & si DEUS vitam viresque concesserit, vertente forsan anno, lucem aspiciat. Interim ut hic noster labor in medentium & ægrotantium fructum cedat amplissimum, voveo. Scribeb. Halæ Magdeb. Idibus Maji, anni 1709.



CONSPECTUS  
PARTIS PRIMÆ  
SECTIO I.

De febribus intermittentibus tam simplicibus, quam  
compositis & anomalis Catarrhalibus item Exanthem-  
maticis & Malignis nec non Erysipelacea,

PROLOGOMENA.

De Febrium natura in genere.

Caput I. De febre tertiana.	pag. 4
II. De febre quartana.	27
III. De febre quotidiana.	45
IV. De febribus intermittentibus epidemicis anomalis mali moris.	56
V. De febre semitertiana.	60
VI. De febre catarrhali benigna.	65
VII. De febre variolosa.	74
VIII. De febre morbillosa.	97
IX. De febre purpurata rubra & alba miliari.	107
X. De febribus epidemicis exanthematicis catarrhalibus sive petechiantibus.	120
XI. De febribus petechialibus veris.	137
XII. De febre pestilentiali.	151
XIII. De febre erysipelacea.	161

S E C T I O II.

De Febris acutis inflammatoriis, item lentis putridis  
hecticis nec non symptomaticis.

Caput 1. De febribus inflammatoriis in genere , speciatim de febre acuta sanguinea , Græcis synocha.	pag. 172
II. De febre ardente , nec non cholERICA.	182
III. De febre sto machica inflammatoria.	198
IV. De angina.	208
V. De febre phrenetica , sive phrenitide.	217
VI. De febribus pneumonicis , sive pleuritide & peripneumonia.	227
VII. De febre hepatica , sive hepatitide.	239
VIII. De febre nephritica.	246
IX. De inflammatione vesicae.	255
X. De inflammatione & febre uterina.	261
XI. De inflammatione oculorum , cum & sine febre.	278
XII. De febre intestinorum inflammatoria ex mesenterio.	286
XIII. De febribus lentis & hæcticis.	295
XIV. De febribus symptomaticis.	315



S E C T I O I.  
D E  
F E B R I B U S  
I N T E R M I T T E N T I B U S

Tam Simplicibus quam Anomalis atque Compositis  
item Catarrhalibus , Exanthematicis &  
Malignis, nec non Erysipelacea.

P R O L E G O M E N A  
D E  
F E B R I U M N A T U R A  
I N G E N E R E.

§. I.

*Febris  
frequē  
& gra-  
vis mor-  
bus.*

**S**I ullus morbus recte meretur ap-  
pellari universalis, certe est ipsa  
febris. Hæc enim universum nervo-  
rum genus vehementer exagitat, om-  
niumque in corpore partium functio-  
nes graviter pervertit, ut nec solidor-  
um, cordis & arteriarum motus,  
æquabilis sit atque legitimus, nec fan-  
guinis reliquorumque humorum pro-  
gressus liber & naturalis, nec saluber-  
rimæ secretiones & excretiones recte  
succedant, neque etiam ipse animus  
sibi omnino constet, sed quandoque  
febrili impetu turbatus, deliret pla-  
ne. Deinceps omnibus omnino ho-  
minibus ex æquo incumbit hic mor-  
bus, cujuscunque sint ætatis, sexus  
Tom. IV.

& temperamenti, quocunque sub cœ-  
lo vivant & quocunque etiam victu &  
vitæ regimine utantur. Quin epide-  
mice haud raro grassatur multosque  
simul magna corripit atrocitas ac me-  
dentibus multum faceffat negotii. Ne-  
que tantum per se sanitatem subvertit  
& morbus est primarius, sed sæpe  
etiam aliis passionibus, uti cachexiæ,  
scorbuto, phthisi, lvi venereæ, hy-  
dropi, accedit ceu symptoma, eas-  
demque acerbiores reddit & periculo-  
siores. Ut adeo, calculo exactius sub-  
ducto, decima mortalium pars, mor-  
bo vix alio tollatur e medio, quam  
febrili.

§. II.

Licet autem febris humano generi  
A tam

*Sæpe  
tamen  
salu-  
taris.*



## 2 Sectio I. Prolegomena de febrium natura in genere.

tam infestus & pernicialis sit morbus; hanc tamen peculiarem obtinet facultatem, & motu intestino & progressivo quo absolvitur auctiori causam suam destruat ac seipsum sanare possit, immo aliis & gravibus & longis morbis superveniens, eosdem vincat atque expugnet. Ipse *Hippocrates* & *Celsus* febrem habuerunt medicinam & morborum præsidium, quo magni etiam morbi curantur, paralyses, epilepsiæ, convulsivi motus, affectus spasmodici, sic dicti hypochondriaci, quin consultum duxerunt, suppressa citius febre, novam accendere. Et testantur etiam observationes, quod valetudinarii, post febrem, firmam & longam sanitatem fuerint adepti, quin, quod temperamentum & mores fuerint immutati, qua de re latius videri potest dissertatio nostra de febrium salubritate.

### §. III.

Febris  
descri-  
ptio.

Quum igitur febris tantam potentiam, tam ad mortem, quam sanitatem habeat; in proclivi est judicare, ipsius veram & intimam, quoad indolem, generationem atque effectus cognitionem, utilem esse Medico & scitu necessariam. Jam, secundum logicas regulas, vera rei cujusdam definitio, naturam, differentiam & causas ipsius comprehendens, verum & optimum est demonstrandi principium, ex quo reliqua phænomena apte deducenda. Hinc omnino etiam de vera, adæquata & reali febris definitione debemus esse solliciti. Sed pudet & tædet dicere tam multas tamque varias Veterum æque ac recentiorum proflare febris definitiones; & tamen vix ullam, ullius, aut nonnisi exigui esse momenti, ad genuinam ipsius indolem verasque causas exponendas. Mihi itaque ad veritatem accommodatè sic definiendam esse febrem videtur: quod sit spasmodici universi systematis nervosi & vasculosi affectio, juncta cum omnium in corpore functionum læsione orta a causâ nervosas partes ad intensiorem

contractionem irritante, ita quidem, ut accedente ipsa, fluida vitalia primum ad interiora, cor & majora vasa ab externo ambitu agantur, & postea, aucta cordis & arteriarum systole, celeriter cum æstu per strictiora vasa iterum extrorsum pellantur, donec spasmolaxato excretiones succedant & febris desinat.

### §. IV.

Affero igitur, formalem febris rationem, sive, ut ita loquar, fundamentalem causam, consistere in spasmodica universi generis nervosi & fibrosi affectione, quæ maxime ex spinali medulla procedit, & successive ab exterioribus ad interiores partes vergit. Docui id pluribus & momentosis rationibus in *dissertatione, de vera motuum febrilium indole ac sede*. Idem vero etiam luculenter arguunt omnia, quæ in febre præsto sunt pathemata atque phænomena, dolor scilicet dorsi, præsertim circa lumbos, horror, rigor, frigus, præsertim extremorum, tremor, unguum livor, vasorum in manibus & pedibus detumescencia, cutis contracta & arida oscitatio, pandiculatio, pallidus & lividus faciei color, tremens & palpitans cordis motus, præcordiorum anxietas, spiratio ægra, inquietudo, corporis jactatio, sensus ebullientis circa præcordia sanguinis, pulsus contractus, parvus ac debilis, nausea & inclinatio ad vomitum, alvi & perspirationis suppressio, cum urina tenui & aquosa.

### §. V.

Hinc prona jam fuit consequentia, quod omnia, quæ totum nervosarum & vasculosarum partium systema ad spasmos irritare & sollicitare possunt, ad ingenerandam febrem sint aptissima. Horum classem ducunt vehementes animi commotiones, terror, imprimis & ira, materia venenata & subtilis caustica, vel intus genita, vel per contagium suscepta, intercepta perspiratio, sudores critici cohibiti, exanthemata retropulsa, materia purulenta

Causa  
formalis.

Causa  
materiales  
variae.



rulenta ulcerofa, paſſim in partibus obhæreſcens, alimenta nimis acria, corruptæ & bilioſæ primis in viis hærentes cruditates, nimix vigilix, dolor vehemens ac nervoſarum partium tenſio, in inflammationibus, tumoribus & abſceſſibus, læſiones nervoſarum partium ab acuto inſtrumento, ab acri & corroſivo pharmaco, balnea frigida & viciffim nimis calida, aut adſtringentia. Sed pro differente harum cauſarum indole & vario quo nervoſum genus infeſtant modo, differunt etiam prognatæ inde febres, ut nonnullæ ſint benigniores, nonnullæ maligniores, aliæ continuæ, ſimplices, vel compoſitæ, regulares, vel anomalæ, exanthematicæ, putridæ, heſticæ, vellentæ, ut porro quædam facilius, vel difficilius ſanationem admittant, quædam cito decurrant, quædam longius extrahantur, quædam etiam hominem perimant. De qua febrium origine earumque cauſis & differentiis, pluribus egi in *difſertatione de generatione febrium*.

§. VI.

Febris  
duplici  
motu  
abſol-  
vitur.

Neque vero omnis celerior cordis & arteriarum ſyſtole, expulſu frequentiori cognoscenda, & auctus cum calore intenſiori ſanguinis circuitus, febris eſt. Sæpe enim talis a vehementi corporis exercitatione, vel ſanguinis per calida & ſpirituofa commotione, accidit. Sed ille tantum intenſior fluidorum circuitus & illa auctior cordis & arteriarum ſyſtole, febris dicenda, quæ a cauſis internis inducitur & ſequitur horrorem, rigorem & frigus partium externarum. Duplex enim in febre ſociatus motus, unus qui a peripheria ad centrum, ſive a partibus externis ad internas, cor & pulmones, vergit; alter qui hunc ſequitur contrarius, a centro ad corporis peripheriam. Illi junctus pulſus parvus, contractus, debilis, cum præcordiorum anxietate & ſpirandi anguſtia; huic auctior arteriarum motus, pulſus magnus & ætus, ex-

tremas etiam corporis partes occupans. Duplicem hunc febrem abſolvere motum pridem jam notavit primus artis noſtræ parens *Hippocrates*, eundemque diſertis verbis fuſe deſcripſit *l. de flat.* hunc in ſenſum: in febre per horrorem ſanguinem ab extremis corporis partibus, quæ exſanguæ & propter frigus palpitant, decedere & concurrere ad locos maxime calidos, & ob ſanguinis ibi collecti abundantiam fuſcitari calorem, ad externa demum tranſeuntem.

§. VII.

Duplex hic motus diverſæ plane indolis atque virtutis. Primus ille, a peripheria ad centrum, minus ſalutaris, ſed *κατ' ἐξοχήν* morboſus, quin interdum mortifer. Qui enim moriuntur ex febre, ſive continua ſit, ſive intermittens, acuta, ſive chronica, pereunt ſub ſpafmo, frigore, horrore & rigore partium externarum convulſionibus, quia cor, pulmones & cerebrum, ſanguine intus congeſto nimium obruta, eundem ob debilitatem amplius repellere nequeunt. Alter vero ab interioribus & centro, ad circumferentiam & minima vaſcula motus, ſalutaris eſt & vitalis, immo medicinalis & conſervatorius. Sub hoc enim & per hunc, ipſa materia, ſpafmum febrilem ciens, ſucceſſu temporis corrigitur, diſcutitur, ejicitur & ipſa febris ſolvitur.

uno  
mor-  
boſo.

Altero  
ſaluta-  
ri:

§. VIII.

Nimirum quum cauſa motus febrilis ſit ſpafmus univerſalis, nunquam penitus ceſſat ille, niſi hic fuerit ſolutus. Hunc autem ſolutum eſſe indicatur, ſi perſpiratio ſit liberior, mado, vel ſudor in cute apparet, pulſus antea durus, impetuoſus & celer, mollior ſit, moderatus ac tardior, ſi ruina ſedimentum ponit & vires ſucceſſive redeunt. Hæc junctim apparentia, morbi ſolutionem nunciant & criſis nomine veniunt, quia ex iis medicus judicium de morbo ferre poteſt. Hoc etiam ſenſu exponenda Veterum definitio febris; quod ſit lu-

Febris  
ſolu-  
tio.



Et cum morbo. Quod si scilicet spasmus, succos ad interiora urgens, validior est cordis & arteriarum motu ad externa repellente, morbus vincit & mors incidit. Si autem motus per spasmum retrogradus superatur a vitali cordis & arteriarum systole extrorsum sanguinem trudente, morbus abigitur & sanitas redit. Quæ quidem naturæ post luctam hanc victoria, certis, septenario potissimum numero computatis diebus, accidit, qui ob id vocantur critici, quibusque medico de morbi eventu judicandum.

## §. IX.

*Per hanc*  
*turam*  
*et ar-*  
*te præ-*  
*stantia.* Ineffabilis igitur divina providentia merito celebranda, quæ corporis nostri machinam animalem, tam sapienter potentiis & facultatibus instruxit motricibus, ut ipse morbus, qui nunquam non cum læsione functionum partium & vitæ sanitatisque periculo accidit, ad expugnandam ipsam suam causam suique curationem sapissime vergat & vergere possit. Atque adeo, quum ipsa natura sit optima morborum, etiam ipsius febris, medicatrix, perniciosum omnino est molimen, febriles in salutem tendentes motus, imprudenter medicina suspendere, suppressere, aut plane tollere velle. Secundandum potius naturæ saluberrimum opus, quod per auctiorem progressivum humorum motum, ad correctionem & resolutionem materiæ morbificæ ipsiusque tandem excretionem dirigitur. Id quod optime perficitur diluentibus, humectantibus, temperantibus, aperientibus, roborantibus & nitro-  
*sis,* nec non iis, quæ, tempore præsertim intermissionis, congruas excretionem promovent.

## §. X.

*Conclu-*  
*sio.* Hæc est nostra sobria & rationalis febrium theoria, causis manifestis, intellectui obviis & ex necessitate agentibus, physicomachanicis, nitens. Ex qua omnia, quæ circa febrilium motuum negotium occurrunt, phænomena, symptomata & effectus,

ordine concinno & apta connexionem deduci possunt & explicari. Quod quo pacto sit faciendum, & qua ratione etiam ex hac theoria methodus medendi congrua elicienda causisque opponenda remedia, uberius patebit ex iis, quæ in speciali quarumvis februm tractatione, jam dicemus.

## CAPUT PRIMUM.

## De Febre Tertiana.

## Theses Pathologicæ.

## §. I.

**N**ulla febris est, quæ tam exacte motus febrilis in genere, qui & vasa, & nervosas partes infestat, & Hippocrati Græcisque rigoris nomine quasi per excellentiam venit, naturam ac genium manifestat & quæ tam frequenter affligit, nec ulli ætati, temperamento vel sexui parcat, quam quæ alternis diebus cum rigore & horrore invadit, subsequente celeri, qui ex frequentia cognoscitur pulsu, nec non anxio & ardenti calore, ac tertiana dicitur.

*Tertiana quæ dicitur?*

## §. II.

Hæc, præsertim si regularis & legitima, his incedit symptomatibus. Caput primum dolet, artus languent, lumborum percipitur dolor circa primam dorsalem vertebra, qui per dorsi longitudinem versus epigastrium ascendit, cum dolorifico tensionis in hypochondriis sensu alvique strictione, accedit partium externarum, præsertim narium & aurium, refrigeratio, pandiculatio, oscitatio & horror, membra sæpius graviter concutiens, pulsu simul parvo, contracto & debili, interdum quoque ægro sitiente. Sequitur dein nausea, cum inani ad vomendum conatu, vel etiam ipsa vomitio materiæ biliosæ & pituitosæ, quandoque viridis, juncta sæpius tussi molesta cum pituitæ rejectione, ex stomachi cruditatibus acido viscidis oriunda. Tum universum corpus fervor,

*Ipsius decursus symptomata.*



vor, five anxius, ardens & siccus calor occupat, facies antea collapsa & pallida, cutis contracta & rigida vasaque in manibus ac pedibus inanita resurgunt, rubescere ac tumescere incipiunt, arteriarum quoque pulsus major, plenior & citatior micat, inquietudo intensior spiritusque difficilior fit & ægri oculis vix clausis aliena multa loquuntur. Decrescunt postea sensim hæc symptomata, æstus mitescit, cutis laxatur & madescit, urina emittitur flammei coloris, qualis compareret in destillatione spiritus nitri, vel aquæ fortis, sine sedimento tamen, arteriæ simul mollius tangentis manum feriunt & sudore prorumpente paroxysmus discedit, qui tamen pro differentia naturarum & causæ morbificæ quoad durationem varius, ita quidem, ut in quibusdam ad decem vel undecim, in quibusdam ad viginti horas protrahatur. Subsequenti intercalari die; corpus quidem adhuc languet, frigidiusculum est, facileque inhorrescit, pulsus tamen sub febris impetu citatus & vehemens, tardius jam & debilis undulat & urina quoque crassior mingitur ac sedimentum ponit, vel minimum nubeculam, quæ dispositio ad sedimentum, exhibet.

§. III.

*Causa  
Forma-  
lis.*

Sic decurrens paroxysmus febrilis, ipsa symptomatum ratione teste, quam optime ad motus nervosarum partium universi fere corporis spasmodico-convulsivos referri meretur, quo etiam fit, ut omnia ea, quæ nervosas partes ad motus anomales irritant, uti quidem faciunt animi affectus, fortiora cathartica, nec non cum cibis vel aere susceptæ materiæ acres, causticæ & venenatæ, item omnia adstringentia, frigida & quæ nervis inimica sunt, quin clysteres acres, quos purgantia validiora ingrediuntur, tum ad generationem, tum recidivam, vel minimum exacerbationem febris, plurimum omnino conferant.

Tom. IV.

§. IV.

Causam horum motuum febrilium in tertiana Veteres quidem bilem intemperatam, ab aliis humoribus separatam & extra venas in imo ventre nidulantem, esse censuerunt: est vero potius materia quæ illos excitat & fovet excrementitia salino-sulphuræ & activæ indolis, quæ nostro quidem iudicio, sedem potissimum habet prima in regione, partim in biliariis hepatis ductibus, partim in flexura duodeni. Scilicet hoc in cavo humores bilioli, salivales, præsertim pancreaticus, jam tum vitiiati, mutua cum cruditatibus ex prava digestionem fermentatione ipsaq; diuturniori mora & stagnatione, ejusmodi virulentam gignunt materiam, quæ hinc successive per vasa lactea ad sanguinem & cum hoc ad nervosas capitis, medullæ spinalis, ventriculi, intestinorum & nerveas aliorum ductuum secretiorum & excretiorum tunicas sufficienti quantitate delata, universalem ejusmodi spasmus ciet, sub quo sanguis ad interiora & vasa majora primum urgetur, postea vero aucto systaltico cordis & arteriarum motu, totius massæ sanguinis & humorum progressus intenditur, obstructiones in minimis nervosarum partium canaliculis expediuntur, & remittente spasmō relaxatisque excretoriis, febrilis quæ insedit materia per cutis spiracula, perspiratione, aut sudore opportune ejicitur insultusque cessat, donec par rursus hujus excrementitiæ materiæ quantitas ex primis viis ad sanguinem tunicasque nervosas denuo fuerit translata novumque inducat paroxysmum.

*Materia-  
ialis.*

§. V.

Expedita autem hujus materie ipsiusque tertianæ genesis est in corpore exquisitoris sensus, cholericæ constitutionis, ad spasmos animique motus proclivi, in ætate plus consistente, quam infantili & senili, regnante ætate nimis fervida & flantibus ex austro & euro ventis, præsertim si potio

*Causæ  
ante-  
ceden-  
tis.*

A 3

frigida



frigida fuerit ingurgitata vel corpus tempore vespertino, aut nocturno, aëre frigidiori & humidiori, aut plane insectorum minimorum copia circa compluvia & stagna refertæ, diutius expositum, multo magis quando venter cruditatibus oppletus, vel cibi gravis materiæ, aut adstringentis facultatis, & maxime omnium cum nausea, assumti.

## §. VI.

¶ pro-  
caſar-  
tica,

Neque minus frequenti experientia confirmatum habemus, corpora spongiosiora tempore vernali post largiorem sanguinis missionem, facile in febres tertianas nothas, vel catarrhales incedere, eo facilius, quando, præsertim graſſantibus jam febribus, pluvioso & humido cœlo committuntur & stomachus cibo minus solubili infarcitur. Novimus quoque a purpura frigore externo repulsa, a scabie linimentorum mercurialium & sulphuratorum ope intempestive siccata, ab improvido acidulorum & aquarum mineralium, neglecto simul regimine & assumtis rudioribus alimentis, potu, nec non a percalido Carolinarum, quæ adstringentis virtutis, thermarum, vel aliorum balneorum, corpore præsertim plethorico, impuro & crudelitibus referto, usu, febrem tertianam, interdum continuam, interdum duplicem & anomalam, accessisse.

## §. VII.

¶ Divi-  
ditur  
in legi-  
timam  
& no-  
tham.

Ex his incunabulis pro gnata tertiana, non semper una eademque facie incedit, sed discrepat ideoque merito a Medicis in varias dispescitur species. Est quippe vel legitima, vel notha. Illa potissimum adoriri solet homines biliosæ constitutionis & sensu exquisitiori pollentes, inprimis sub præcalida aeris æstivi intemperie, acerbioribus etiam paullo stipatur symptomatibus, horrore scilicet, calore, capitis dolore, siti, vomitu & anxietate, urina secedente intensius flammea, breviori tamen temporis spatio solvitur atque discedit. Hippocrates quidem

exquisitam hanc duodecim horis defervere & septimo paroxysmo finiri, passim asserit, sed tam exactæ periodi febres in septentrionalibus nostris humidioribus & frigidioribus regionibus non observantur, & recte hinc perhibet *Mercurialis prælect.* Bonon. pag. 190. rarissime tertiana exquisita Hippocratis invenitur, neque ego vix vidi, & jam quadraginta anni sunt, quod praxin exercui: id quod ipse etiam asseverare possum. In notha autem, sive spuria, mitiora quidem præsto sunt pathemata, calor non tam ardens, vomitus non ita frequens, urina non adeo flammei coloris, sed diutius extrahitur & vacuo etiam die virium languor, artuum lassitudo cum inappetentia relinquitur. Ad hæc segnioris magis naturæ homines, sequiorem sexum & qui spongiosioris sunt habitus, autumnali maxime tempore, infestat.

## §. VIII.

Regularis dein est, vel irregularis, sive anomala & confusa. Illa typum servat æqualem, tam ratione temporis invasionis, quam solutionis, longitudinis ac brevitatis paroxysmi & suetis ceterum incedit symptomatibus. In hac vicissim tempus accessionis inordinatum, mox ante, mox post meridiem, jam circa vespeream, quin mediam noctem, ipse paroxysmus, modo brevior, modo longior, urina remissionis, vel intermissionis tempore, nihil dimittit, sudor vel nimis largus, vacuo etiam die adest & passionibus complicantur insolitæ, pro naturarum diversitate diversæ, ut vel alvi fluxus, vel narium hæmorrhagiæ, vel enormes stomachi etiam subversiones, aut graves capitis dolores, mentis alienationes, anxietates cardialgicæ summæ, artuum dolores ventrisque tormina præsto sint. Et tales irregulares febres quæ typum non servant, sunt plerumque epidemicæ, ex præternaturali & insolita æstatis vel autumnal constitutione provenientes, ut plurimum continuæ, quales

Regu-  
larem  
& irre-  
gula-  
rem.



quales etiam elapso 1727. anno per universam fere Germaniam, post intensam atmosphærae per multos menses siccitatem & caliditatem, populi habuerunt circuitus.

§. IX.

*Simpli-  
cem &  
dupli-  
cem.* Nonnunquam porro simplex, nonnunquam duplex observatur. Simples paroxysmi alternis diebus recurrunt, duplex autem quotidie accedit, interdum quoque bis, uno die vacuo. Distinguenda tamen duplex a quotidiana, qua accessionis tempora quotidie fervat æqualia, quum in illa paroxysmi recursus alternis diebus respondeat.

§. X.

*Conti-  
nuam.* Continua quoque occurrit tertiana, his dignoscenda signis: adoritur cum horrore, anxietate, vomitu, æstu & ingenti languore, nec sequenti die symptomata hæc prorsus intermittunt, sed tantum remittunt, pulsuumque manet adhuc frequentia, cum æstu & languente debilitate, paroxysmi autem die, præcedente levi externorum refrigeratione, omnia iterum exasperantur & ingravescent. Et talis febris, si epidemia, durat quandoque per duas vel tres hebdomades antequam in legitimam intermittentem concedat: fit autem crebrius, ut tertiana primum per aliquot dies sit continua & postea in intermittentem bono transeat omine, malo contra, ex intermittente in continuam.

§. XI.

*Epidemi-  
am &  
en-  
demiā.* Plerumque tam simplices & regulares, quam duplices & anomalæ, sunt epidemicæ & ex insolita temporum tempestatumque, æstate imprimis constitutione proficiunt. Endemiæ quæ audiunt, familiares & quasi propriæ sunt certis quibusdam locis, depressioris scilicet situs, uliginosis, piscinis pladibusque cinctis, culicum & insectorum proventu infestis, ita prorsus, ut incolæ rarius annum a febre immunes transigant & advenæ crebrius exerceantur ac difficulter ex toto liberentur.

§. XII.

Omnia hæc febris tertianæ genera *Tertianæ  
næ mi-  
tior ac-  
cedit.* mitius primum accedunt, repetentibus autem paroxysmis vehementia invalescunt, manifesto indicio, inordinatis istis, solidorum & fluidorum sub impetu motibus, magis adhuc inquinari magisque intemperatos reddi corporis succos, qui immixto intermissionis diebus perspirationis & excretionum successu, peiorem adhuc successive indolem contrahunt.

§. XIII.

Singuli paroxysmi, laxata jam cutis compage, madore, vel sudore solvuntur, urina die intercalari crassior mingitur & nubeculam exhibet, vel plane sedimentum ponit, quod eo copiosius, quod plus corpus sanguine & succis abundat. Si vero sub declinatione sudor non prodit, urina etiam tenuis & aquosa die vacuo secedit alvi que siccitas impensior, uti hypochondriacis maxime solemne, adest, valde affectum esse spasmi a materia rebeli febrili nervosarum partium systema arguunt.

§. XIV.

Tertio ut plurimum vel quarto paroxysmo ulcuscula circa labia produnt & lotium cum ardore quodam redditur, tumque symptomata notabiliter mitescent. Optime autem & securissime hæc febris a natura vel sola, vel arte adjuta, ex toto solvitur, erumpente bilioso copioso alvi fluxu & auctiori excretionis cuticularis die a febre immuni successu, quod ex magnitudine & vigore pulsus viriumque incremento cognoscitur. Qui tamen epidemicis & anomalis laborant, soluta licet febre, difficilius convalescent & vires recuperant, ideoque diæta exactiori indigent.

§. XV.

Nulla ex febrium genere, calore & auctiori sub paroxysmo motu interno, tam celeriter corpus succulentum exsiccat & obesum emaciat, tantamque biliosorum recrementorum, quæ per vomitum, alvum & urinam secedunt,



dunt, copiam ingignit, ac tertiana, intensiori ac diuturniori æstu stipata. Et hæc fuit procul dubio ratio, quod Veteres febrem hanc a bile intemperata, exsuperante derivarint, licet hæc redundantia potius effectus quam causa sit.

## §. XVI.

*Quæ cõ-  
tumaci-  
or.* Longiores & contumaciores sunt autumnales & hiemales tertianæ, tum vero maxime, quando viscera male constituta prima regio spasmi & flatibus referta, alvus strictior, æger vorax multumque, præsertim ante accessionem, ingerit, nec non ubi conveniens regimen in paroxysmo & post eum, supprimendo sudorem, negligitur, vel etiam medicatio perperam instituitur, uti plerumque evenit in plebeis & qui manuum ministerio victum parant, confirmante hæc ipso Hippocrate Sect. I. aph. IX. Breviores contra minusque ancipites sunt, si astate incidunt, prima regio & viscera ad sanitatem disposita & regimen diæticum æque ac diaphoreticum tempore vacuo rite observatur.

## §. XVII.

*Male  
tracta-  
ta alios  
adducit  
morbos.* Licet omnis intermittens non adeo periculosa sit, vix tamen ulla circumspectiori diætæ ratione & tam provida methodo excipienda, quam tertiana & quartana. Quod, si non servatur, in truculentos & immedicabiles morbos adducit ægrotantes, febrem nempe lentam, hecticam, subitum pedum tumorem & hydropem, contracturas & acerbos dolores artuum, malum flatulentum & hypochondriacum variique generis morbos spasmodico convullivos, infantes in lethalem plane epilepsiam, qui omnes morbi facile succrescunt post præposterum ac nimium adstringentium, ante sufficientem materiæ excrementitiæ correctionem & evacuationem, usum. Hinc apprime ad veritatem Trallianus lib. 12. cap. 6. tradit: tertiana, inquit, facilis quidem curatu, quum autem a Medicis illis, qui non recta ratione & via utuntur, male

tractatur, non modo difficilis curatu, sed & insanabilis interdum redditur.

## §. XVIII.

Ex facili quoque tertiana per Medici & laborantis errorem in aliam febris speciem transit, simplex scilicet in duplicem, quandoque triplicem, immo in quotidianam & lentam, vel plane continuam, aut cholericam.

## §. XIX.

Crebrius demum & facilius quam ullus alius morbus redit tertiana & quartana, inprimis præpostera medicatione suppressa. Simulac enim corpus a febre haud ita pridem liberatum aeri paullo frigidiori & humidiori ventoque asperiori ex septentrione spiranti exponitur, vel stomachus copioso, aut insalubri cibo plus justo aggravatur, vel quidam animi motus, ita potissimum aut terror, incidunt, vel etiam purgans paullo acrius propinatur, protinus spasmi febriles, dolor in capite, cum refrigeratione partium ipsius externarum, aurium & narium, oscitatio, pandiculatio, dolor circa primam lumbarem vertebra, & languor artuum, hypochondriorum cum anxietate & alvi strictura, tensio, horripilatio & refrigeratio, cum subsequente æstu, accedunt, quamvis sub prima repetentis morbi accessione, non secus ac in principio omnis febris intermittens, mitiora sint hæc & sequentibus paroxysmis exacerbentur.

M E T H O D U S  
Præservatoria.

## §. I.

Quum itaque febres tertianæ plerumque epidemicæ sint & populariter grassentur, earumque causa antecedens febrem ingignens, potissimum in aeris vitio, vel diuturna intemperie, nec non in cohibita excretionem per cutim & cruditatem prima in regione sentina, contineatur; facile patet, tempore quo circumeunt, intemperatum, impurum & vappidum aerem esse fugiendum, vitando maxime



xime omnium vespertinam humidior-  
rem auram, neque cibo copioso aut  
gravi stomachum onerandum, ne-  
que potum largiorem, multo minus  
spirituosum, vel acescentem ingeren-  
dum, neque etiam animi affectibus  
indulgendum.

§. II.

Per re-  
media.

Inter remedia quæ a febrili insul-  
tu defendunt, æstate nimis fervida ex  
usu sunt pulveres leniter nitrosi, ab-  
sorbentes & diaphoretici, decocta  
etiam temperata & diluentia, ex ra-  
dice cichorii, scorzonæræ, rasura cor-  
nu cervi, hordeo mundo, ad potum  
ordinarium proficua, nec non acidu-  
læ Selteranæ, vel Wildungenses, quæ  
simul alvinam excretionem liberam  
reddunt. Expedit porro quoque ma-  
ne infuso theiformi, ex herba sangui-  
nem depurante, ut scordio, veronica,  
post somnum excretionem per cutis  
poros elicere ac promovere. Neque  
enim facile febris alvo soluta & per-  
spiratione libera accedit, ut potius  
quandocumque illa præter morem ad-  
stringitur corpusque languens & frigi-  
diusculum est, febrem præstolari, haud  
fallaci judicandum sit augurio.

INDICATIONES

Curatoria.

§. I.

Quæ in-  
dicen-  
sur in  
genere.

In curatione vero omnis medentis  
intentio ad causarum proximarum re-  
motionem dirigenda. Atque adeo,  
quum potissimum tenuis, acris, mo-  
bilis & biliosus humor, nervosarum  
partium & tunicarum vasorum syste-  
ma universum, ad universalem spas-  
mum & strictionem excitulans in  
causa sit: recte utique colligitur, ge-  
nerales medendi intentiones his con-  
tineri momenti: 1) ut subtilis illa &  
caustica acrimonia temperetur & e-  
mendetur; 2) ut correctæ & præpara-  
ta materia peccans, quæ a perspiratio-  
ne intercepta in corpore & genita fuit  
& relictæ, per cutis inprimis spiracu-  
la leniter diffletur & evacuetur; 3)

ut vehementia spasmodum, qui præ-  
sertim sub frigore & horrore sevä con-  
citant symptomata, mitigetur; 4) ut  
cruditates acido-viscido-bilioas, in  
duodeno potissimum stabulantes, quæ  
nidum & hospitium præbent materiæ  
febrili, tempestive invertantur & ex-  
purgentur; 5) ut vigor motuum post  
paroxysmum solidus reddatur & ex-  
cretionum successus servetur, ne, uti  
quidem post omnem vehementem  
morbi impetum & partium nervoso-  
musculosarum spasmus solenne, ato-  
nia & motuum languor succrescat,  
nec inde sanguinis & humorum pro-  
gressus unacum secretionibus & excre-  
tionibus elanguescant & hac ratione  
de novo materia febrilis generetur,  
foveatur & accumuletur; & denique  
6) ut, quum hæc febris ex facili re-  
deat, cessante jam hac ipsa, novæ  
materiæ ad inducendam recidivam  
aptæ generatio, studio impediatur &  
præcaveatur summo.

§. II.

Ad obtinendum itaque primæ indi-  
cationis scopum. acrimoniam nempe *Humor-  
res bi-  
lios  
tempe-  
randi*  
biliosam, quæ ob intensiorem æstum  
succos successive collutulat omnes,  
contemperandam, nihil efficacius ni-  
tro, vulgari tantum rite depurato,  
quippe quod sulphur volatile, a quo  
motus intestinus cietur, figendo, æ-  
stum extinguit & longe præstantioris  
effectus est acidis, quæ calorem qui-  
dem reprimunt, sed humores simul  
inspissant, quum illud eosdem fluxiles  
potius servet ac tenues. Egregie quo-  
que acrimoniam sulphuream biliosam  
obtundunt diluentia & humectantia,  
potui destinanda, cujus generis sunt  
ptisanæ ex hordeo, radice scorzone-  
ræ, rasura cornu cervi, succo & cor-  
ticibus citri, ex aqua pura debito mo-  
do decoctis, item decoctum avena-  
ceum, vulgo *Der Daber Crandt* se-  
rum lactis dulce, aquæ Selteranæ, vel  
etiam cerevisiæ tenues, bene coctæ ac  
diureticiæ. Et hæc quidem in paroxys-  
mo potissimum ex usu sunt.

§. III. Ex



## §. III.

*Ter po-  
ros eva-  
man-  
di.* Ex præscripto secundæ indicationis id agendum medenti quo humores tenues, excrementitios, biliosos, præparatos nunc & correctos, laxata post paroxysmum porosa & cribrosa cute, blande educat. Perficitur hoc apprimie diaphoreticis lenioribus, cerussa scilicet antimonii, antimonio diaphoretico, cornu cervi usto & philosophice præparato, nec non infuso theiformi, quod scordium, vel carduum benedictum & cortices citri habet, item essentia scordii, vel cardui benedicti, probe quidem saturata, non tamen adeo spirituosa, cum liquore nostro anodyno minerali permixta.

## §. IV.

*Spasmi  
in paro-  
xysmo  
mitigā-  
di.* Tertia indicatio vehementiæ spasmodorum ipso in paroxysmo mitigandæ dicata est. In qua quidem explenda præstans utique jam laudatus usus nitrosorum refrigerantium, lenium diaphoreticorum & diluentium blandumque madorem elicientium. Inprimis egregia hoc nomine virtus liquoris nostri anodyni mineralis, vel qui ipsi surrogari potest, spiritus nitri dulcis bene præparati, quippe qui blando suo & naturæ amico anodyno sulphure effrenes fluidi nervei & solidarum nervosarum & musculosarum partium motus compescit, eo felicius, quando is vel cum pulveribus fixis, vel essentis diaphoreticis maritatur & cum aquis, quæ pariter sedativæ virtutis, florum scilicet sambuci, tiliæ, primulæ veris, liliorum convallium, chamomillæ vulgaris, rosarum, acaciæ, ulmaria, item cerasorum nigrorum, propinatur.

## §. V.

*Sordes  
prima  
regionis  
acide  
obtu-  
nenda.* Quumque prima corporis regio sordibus maxime excrementitiis & biliosis scatens mineram & fomitem materiæ febrili præbeat, eo, ut quarta præcipit indicatio, quam maxime annitendum, quo confluentes huc ex universo corpore intemperati & vitiosi succi attemperentur & eliminantur. Hinc ubi acidæ cruditates exuberant,

sola absorbentia, tam terrea alcalina, quam salina, utramque absolvunt paginam, & inter hæc spectatæ potissimum & securæ virtutis lapides & chelæ cancrorum, nec non testæ ovorum, quæ ut teneriora & facile solubilia, merito anteferenda marinis, rudioribus & ægrius liquefcentibus cumque acido in adstrictivam plane facultatem transfuntibus.

## §. VI.

Quando biliosa porro præsto est a-  
*Biliose  
viscidæ  
corri-  
genda.* credo, nitro, uti meminimus, nihil superius; si vero lenti ac tenaces, viscidæ succi intus consistunt, salium neutrorum laudata virtus, tartari quippe vitriolati, salis digestivi Sylvii, ex capite mortuo spiritus salis ammoniaci, ex æquali parte salis tartari & salis ammoniaci, confecti, salis quoque ipsius ammoniaci depurati. Quæ certe, maxime in robustioribus & victui crasso, duro, marino assuetis. Suecis, Batavis, Westphalis, quibus ut plurimum diuturnæ esse solent febres, commendari merentur, opus autem est, ut cum sufficienti aqueo vehiculo diluta exhibeantur. Hæc quippe, si repetita, vel majori *Et eva-  
cuanda  
per in-  
ferio-  
ra.* dosi præbentur, præter effectum incidentem, alvum quoque movent & sordes efficaciter evehunt, eoque nomine nostro jam tempore haud mediocrem salubritatis laudem adepta salia, ex aquis medicatis parata, Sedlicense scilicet, Egranum, & ad horum imitationem confectum sic dictum Ebshamense sal, quæ ad unciam dimidiam & plus in aquæ mensura liquata, viscidas & excrementitias primarum viarum sordes detergendo & exturbando, spectati adversus intermittentes & qui ex ventriculo oriuntur morbos sunt usus. Idem præstat detecta a nobis aqua Sedlicensis amara, ad mensuram dimidiam, diebus intercalariis ter vel quater hausta, ut vel hac solâ tertianas sæpe curatas viderim. Quandoque tamen tenerior ventriculi constitutio & spasmodorum in ipso cum acidis ponticis succis,



fuccis frequentia, uti ſolenne in infantibus, ſenibus & paſſione hypochondriaca & cardialgica affectis, ſalium, præſertim copioſe datorum, uſum interdicit, eaque propter, mannam tantum ad unam vel duas uncias, cum, vel etiam ſine rhabarbaro, adiecta una vel dimidia terræ foliatæ drachma & aliquot olei de cedro guttis, potius offerre expedit.

§. VII.

Superiora.

Ubi demum ipſum duodenum copioſo, bilioſo & vitioſo humore oppletum, vel plane biliarii ductus lentis & pravis ſuccis ſarcti, ut per ſuperiora emeticorum ope evacuatio inſtituatur, e re eſt. Hunc in finem tene-rioribus exhibenda radix ipecuanha nodosa, robuſtioribus autem hæc tartaro emetico ad granum unum vel duo admixto, ipſe quoque tartarus emeticus ſolus, vel, qui melius adhuc, julepus noſter emeticus, ex aqua corticum citri ſpirituosa, julepo roſarum & tartaro emetico ſoluto confectus. Quod ſi vero non tantum ſuperiora, verum etiam inferiora inteſtina a recrementis liberare, in ingluvie maxime deditis, neceſſarium, utrumque commodè obtineri poteſt infuſo mannato, quod unciam unam vel unam cum dimidia mannæ, terræ foliatæ tartari drachmam & tartari emetici unum vel duo grana, habet.

§. VIII.

Debiles partes roboranda.

Correctis ſic & evacuatis noxiis per varia excernicula humoribus ad quintæ indicationis normam eo dirigenda medicatio, quo univerſum ſolidarum partium, maximeque ventriculi & inteſtinorum ſyſtema, ob diuturnos ſpaſmos & paroxyſmos a robore dejectum firmetur iterum. Verſatur in hoc rite perficiendo præcipuum curationis intermittentium momentum, ita prorſus, ut uſurpatis quantumvis diu alterantibus, aperientibus, amaris & evacuantibus, paroxyſmus tamen nihilo ſecius perſiſtat, accommodis contra roborantibus debito modo uſurpatis, remittat ac ceſſet. Scilicet

reddito nervoſis, vaſculoſis & muſculoſis partibus robore, non tam pronæ ac promptæ ſunt ad concipiendas humorum ſtagnationes, ſpaſmorum inſultantium cauſas, ſed liberior potius ſanguinis omniſque generis ſuccorum fit circuitus, pulſus auctior & reſpiratio cum ſecretionibus & excretionibus vegetior, ut non modo paroxyſmi ſiſtantur, ſed & nova febrilis ſpaſmi minera diſpellatur, quæ alias, languente vacuo die perſpiratione pulſuque tardo, ſuccreſcit.

§. IX.

Ex omnibus vero, quæ huic uſque innotuerunt ſpecificis antifebrilibus, adſtrictiva vi agentibus, corticibus nempe & radicibus adſtringentibus, nec non ex marte vel alumine confectis, quin etiam paullo calidioribus, nullum quod magis accommodatum, temperatum, omnibus ætatibus, temperamentis & ſexui idoneum ac vel mille auſpicatis experimentis comprobatum, quin tota, ut ajunt, ſubſtantia medicatum pluribuſque indicationibus ſatisfaciens, quam cortex ille Peruvianus, China Chinæ nomine notus, quippe qui, ſi convenienti tempore, modo ac regimine uſurpatur, ut excretiones naturales non ſuſflaminet, ſed potius promoveat, propter terreum lene adſtringens elementum & baſſamicam amaritiem, omnibus aliis palmam præripit, & aliquot doſibus tantum vel ad miraculum, febriles compescit paroxyſmos. Longe tamen efficacior eſt in pulvere & ſubſtantia, quam in decocto, infuſo, eſſentia, aut extracto, ipſoque ſic ceteris paribus tempore vacuo exhibitio; pulſus fit vividior, calor cum perſpiratione auctior, alvus, præſertim in cholericis, fluidior, manifeſto fauſtæ operationis indicio. Mihi quidem in frequenti uſu electuarium, cujus ope innumeros febrientes perſanavi, hac ratione concinnatum: Recipe rob ſambuci unciam unam, corticis chinæ drachmas quinque, pulveris florum chamomillæ vulgaris drachmas duas,

Optime per corticem chinæ



duas, extracti centuarii minoris, pulveris caryophyllorum ana drachmam semis: sirupi acetositatis citri unciam semis. M. f. electuarium. D. Admiscere etiam quandoque ad facilitandum perspirationis successum soleo antimonii diaphoretici, theriacæ veteris, vel etiam salis ammoniaci drachmam dimidiam, & finito paroxysmo, singulis binis horis, ejusmodi electuarium ad drachmæ dimidiæ pondus exhibere. Iis autem, qui tenerioris naturæ & stomachi, cortex in formam liquidam redactus, propinandus, hunc in modum: Recipe corticis chinæ unciam unam, corticis chascarillæ, cinnamomi acuti, salis tartari singulorum drachmam unam, aquæ florum chamomillæ vulgaris libram unam, vini tantundem; digerantur leni calore, colat. adde sirupi corticum aurantiorum unciam semis. M. D. S. Potio antifebrilis; binis quibuscvis horis ad unciam unam sumenda.

## §. X.

*Recidiva præcavenda.* Ad præscindendas, quod sextæ indicationis scopus, admodum frequentes intermittentium & maxime quidem tertianæ recidivas, certior vix datur ratio, quam qua omnia quæ ad generationem febris faciunt evitantur ac monita superius in præservatione inculcata curate observantur. Et quum exhausto per febrem corpore, appetitus hac discedente impensior esse soleat, ventriculus autem & natura adhuc imbecillior, sæpius certo evenit, ut novus cruditatum primis in viis fiat proventus & febre vel lentæ, vel superaræ recidivæ ortum præbeat. Hinc consultum omnino ducimus, ut qui mox a febre convaluerunt, levio-rem cœnam & facilis digestionis cibos assumant, ac præterea ad fulciendum ventriculi robur, ducendas prima ex regione sordes, nec non detergendas, si quæ super sunt, morbi reliquias, efficacibus utantur præsi- diis. Nos quæ hunc in finem commendemus habemus potissimum moderatum, sed eo crebriorem usum pi-

lularum nostrarum balsamicarum confortantium, deglutiendo alternis singulis diebus mane, vel vesperi, novem, vel undecim earundem. Totum quippe corpus inde robur nanciscitur, status summa cum euphoria discutiuntur, & alvus clementer movetur, aucta subinde sub pulsu vegetiori ipsa perspiratione. Deinde egregii etiam usus elixirum stomachum roborans, sumendum ante prandium 30. vel 40. guttis, eaque in rem elixir nostrum balsamicum, in notis ad Poterium descriptum, elixir stomachale Michaelis, in adjuncto clavi Schroederianæ thesauro pharmaceutico inveniendum, vel nostra methodo præparata essentia stomachica, aut etiam essentia gentianæ rubræ, salivolatili oleoso nupta, apprime proficiunt.

*Methodus medendi specialis.*

## §. I.

Quando saburra vitiosorum humorum in stomacho ac duodeno efficacem postulat depletionem, quod ex prægressa ingluvie, præcordiorum anxietate, nausea, ructibus & oris amaritie conjicendum, mox in principio, finito primo vel secundo paroxysmo, die vacuo offerendum emeticum, quale supra commendavimus. Vel, si firmior ventriculus & non modo per superius, sed & inferius os vitiosa sentina exturbanda, talem etiam præscripsimus formulam: Recipe salis Sedlicensis, vel Ebshamensis unciam dimidiam, tartari emetici grana duo, vel tria. M. F. pulvis, dissolvendus in libra una aquæ puræ tepidæ & duabus a finito paroxysmo horis sumendus, facilitando postea evacuationem successio largiori potu jusculi avenacei tenuioris, pinguedine liberalius imbuti. Recuperatis autem post evacuationem quodammodo viribus, sine mora electuarii superius descripti antifebrilis aliquot doses sumendas suasi, quo sæpissime factum est, ut in prima quasi

*Præcavenda.*

*rum electuario.*



quasi herba jugulata febris cesserit, & subjuncto exquisito in regimine & victu moderamine, nunquam repetierit.

§. II.

*Per salina.*

Contra ea, si quæ fuerunt, quæ excretionem anotericam interdixerunt, multi tamen serosi & crudi succi intus desituerunt ac sufficientem evacuationem exegerunt, salibus deterfivis alvum aperientibus medicationem sum aggressus hunc conficiendo pulverem: Recipe salis Sedlicensis unciam dimidiâ, salis ammoniaci, vel digestivi Sylvii, lapidum cancerorum ana drachmas duas, nitri purificati drachmam unam. M. F. pulvis, de quo binis quibusvis horis drachma una in uncis aliquot aquæ puræ, vel chamomillæ vulgaris, aut ptisanæ, ingerenda, superbibendo semper vasculum infusi thee. Quo postquam aliquoties diebus interjectis egregie, blande tamen & per epicrasin, alvus totusque intestinorum canalis expurgatus, febris tamen nec depulsa, nec quoad vehementiam imminuta, vel corticem chinæ salibus æquali pondere admiscui, vel solum electuarium nostrum interponere iussi, & sic etiam brevi tempore tertianas expugnaui, epidemice etiam grassantes & autumnales.

§. III.

*per clysteres & leuissima.*

Quod si vero æger affectioni hypochondriacæ obnoxius, inflati stomachi, alvi obstructioris, exquisitoris sensus, impatiens & ad animi motus proclivis, nec emeticis, nec purgantibus salibus, præsertim liberaliori manu, utendum est, sed commodissimam tum locant operam clysteres, ex temperatis carminativis & emollientibus conflati, item pilulæ nostræ balsamicæ, refractori dosi, ad novem vel undecim, tempore intermissionis deglutitæ, præmittendo aliquot horis, vel postponendo pulveris digestivi, ex cancerorum lapidibus, terra foliata tartari, tartaro vitriolato & nitro depurato, usum.

§. IV.

*Quid faciendū in?*

In accessione febris ipsoque paro-

xyismo, & maxime quidem rigore, nihil plane a Medico tentandum. Abstinentum tum etiam a potione, præsertim frigida, licet sitis ipso sub frigore præsto sit. Increcente vero sensim æstu, eoque ad vigorem deducto, potum utique, & quidem sufficientem, præbere decet, non tamen magnis haustibus, sed crebrius interpolatis, studendo simul, ut palato non sit ingratus. Propinanda hinc quæ supra commendavimus decocta & infusa, & quæ maxime accommoda ptisana, seu decoctum hordei, cum scorzonera, adjecto limonum, vel rubidæi sirupo, nec non spiritu nitri dulci & oleo de cedro. Ad æstum quoque & sitim extinguendam ex usu est pulvis temperans, ex duabus lapidum cancerorum & una nitri parte, repetito cum ptisana exhibitus.

§. V.

Erumpens remittente æstu & soluto paroxysmo mador, vel etiam sudor, tam lecti & hypocausti temperie, quam internis quoque adminiculis blande proritandus, eumque in finem, præter jam memorata, egregii usus infusum theiforme ex herba scorzonæ, herba scordii & corticibus citri. Postquam vero febris penitus deferbuit, corpus ab omni tam interna, quam externa refrigeratione defendendum, & curandum potius, ut jugi servetur perspiratione, quod impetratur accommoda exercitatione & crebriori potuum calidorum usu.

*Ex-  
tra pa-  
roxys-  
mum?*

*Cautela & observationes  
Clinicæ.*

§. I.

In perita medicamentorum adversus tertianam, simplex sit, sive duplex, aut continua, administratione, ante omnia observandum a Medico, initium paroxysmi ejusque finis, judicando illud ex refrigeratione partium extremarum, pandiculatione, oscitatione, horrore & pulsu in celeriorrem & contractum mutato, & solutionem

*Initiū  
& finis  
paroxysmi  
ratio  
habenda.*



tionem ex pulsu molliori, remissione æstus, madore, vel sudore. Etenim nunquam in accessione, vel mox ante ipsam, sanguinem mittere, vomitorium, purgans, corticem chinæ, aut aliud roborans & adstringens exhibere licet; defervente vero impetu, sudor, ubi expedit, commode promovendus, & tempore demum a febre prorsus vacuo, diaphoretica, evacuantia, vel etiam pro renata specifica præbere optimum & accommodatissimum.

## §. II.

*Quid si ut continua accedat?* Quum tertiana in principio, præsertim in calidioribus, sæpe febrem continuam & ardentem mentiatur, nonnisi temperantia, diluentia & modice leniter salina, digestiva, nitrosa conveniunt, omittendo tum emetica, vel acriora calida sudorifera, donec in tertianæ typum concesserit.

## §. III.

*contumax & in quorundam transit?* Si contumax est, ut autumno, vel in quotidianam transit, antifebrilis illa potio, quam primus *Crollius* & ex hoc *Riverius* commendat, ex aqua scilicet destillata, ut cardui benedicti, sale absynthii & spiritu vitrioli confecta, bis vel ter quotidie data, egregium affert levamen, eo certius, quando pillularum nostrarum balsamicarum usus interponitur. Monendum tamen, hanc servandam esse enchiresin, ut spiritus vitrioli non immediate cum sale absynthii commisceatur, sed miscela in aqua adornetur. Ego quoque sali absynthii oleum tartari per deliquium surrogare soleo, videndo, ut connubio punctum saturationis exacte tangam. Et talis potio similem, immo superiorem aquis mineralibus, acidulis dictis, aperientem virtutem possidet.

## §. IV.

*vel nimis biliosa astringendū.* Eadem potio in tertiana nimis biliosa, vel in cholericis ex iracundia enata, admodum proficua vitanda vicissim amara, sudorifera, alexipharmaca, acriora, aromatica, multo magis salia volatilia, & usurpanda potius temperatissima salina, nitrosa & præcipitantia.

## §. V.

Chinæ cortex optimum certe anti-febrile, ejusque virtutem etiam in grassantibus epidemice febribus præstabilem apprehendi atque securam; semper tamen securior in sensibilibus, calidioris & vegetioris naturæ subiectis, nec non ubi urina sedimentum ponit ac per cutis poros excretio succedit, quam in segnioribus, melancholicis, phlegmaticis, vel mensium suppressione laborantibus, ac ubi excretionum defectus & urina cruda. Hinc recte ipso assumpto, motus corporis, quantum fieri potest, imperandus & potus non frigidus, sed calefactus exhibendus.

## §. VI.

Quandoque ante correctionem & sufficientem materiæ morbiferæ evacuationem, paroxysmos per specifica & corticem chinæ compescere oportet; ut postea longe meliori effectu mineræ febris & corrigendæ & eliminandæ congruis præsiidiis aliquamdiu insisti possit.

## §. VII.

Quando æstus & pathemata gravius urgent viresque exhauriunt, corticem chinæ, nitro nuptum, in forma electuarii, intermissionis tempore, cum bonis ægrorum rebus datum fuisse, multis confirmatum habeo exemplis, ita prorsus, ut mox symptomatum mitigatio & virium incrementum successerint. Tenendum tamen, hoc facto, materiæ febrili & temperandæ & expurgandæ, medicationem adhuc esse accommodandam.

## §. VIII.

Purgantia acriora, uti, ob spasmodum quod cient incrementum, nunquam in tertiana propinanda; ita eo minus, quando paroxysmi a cortice chinæ, vel aliis remediis cessant, eo quod facile febrem revocant. Sed quando alvus subsistit, clysteribus, vel pillulis nostris balsamicis, interposito salium usu, officii admonenda.

## §. IX.

Emetica, si indicatio adest, statim in

*China quando secuta.*

*interdum statim offerenda.*

*nitro jungenda.*

*Purgantia non citius.*

*Emetica circa danda.*



in principio, quo citius, eo melius, offerenda, nec gratis expectandum, donec materia fuerit concocta, sed proxima via exturbanda, priusquam noxam latius diffundat. Quod si enim febris corpus jam aliquamdiu detinuit, æstus ille solennis nimius ventriculum ad inflammationem concipiendam disponit, ab emetico postea facile procurandam. Interim quando paroxysmus, sæpius, licet mitius, recurrit, & febris vel ex neglecto regimine diætetico, vel perperam instituta medicatione, ad aliquot menses extracta, utilissime sæpius dedi vomitorium. Id duntaxat servandum; minorem tum, ac in principio, sufficere dosin, eademque magnam biliosorum humorum colluviem e duodeno exturbari, tam salubri effectu, ut licet febris non penitus cesset, ex facili tamen postea specificis antifebrilibus, & maxime quidem chinæ cortice, subjuncto debito in vita & victu moderamine, abigi possit, ac perfanari.

§. X.

Vena  
sectio  
quando  
condu-  
cat.

Sanguinis missio in tertiana summa cum cautione instituenda. Nimirum quando febris primum accedens continuæ speciem refert, ingens æstus cum delirio urget, æstas regnat, æger ætate vicens sanguine abundat, biliosus, ad iram pronus & diætæ vinosæ assuetus, utiliter utique vena pertunditur. Præmittenda tamen primarum viarum repurgatio & eligendum tempus a febre immune. Sorbillandum etiam paucis ante, vel post sectionem horis, infusum theiforme, inprimis ex floribus chamomillæ vulgaris, singularis plane adversus febres virtutis, partim quo sanguis tenuior redditus eo liberius circumferatur, partim quo motus spastici, quibus tota febrium natura continetur, quodammodo placentur. Contra quando prima regio crudita- tum sentina fordescit, corpus non sanguine abundat, nec reliqua præsto sunt phænomena, sanguinem mittere nocivum, eo quod excretionibus salutaribus, maxime ea quæ fit per cutis poros, in-

de sufflaminantur, ipsaque febris, experientia teste, obfirmatur magis, & chronica fit.

§. XI.

Ab opiatibus & anodynis, quorum in numero etiam sunt pilulæ Wildegansii & de cynoglossa, in intermittentibus prorsus abstinere consultum, quippe quæ infido effectu paroxysmum quidem mitigant, vel interdum suspendunt, sed vires simul deiciunt totumque febris decursum cum salutari crisi turbant, ut morbi causa majores acquirat vires & paroxysmus longe gravior postmodum accedat.

§. XII.

Aluminosa, martialia & vitriolacea etiam febrium paroxysmos sistunt, sed si quis forsan in plebeiis iis uti velit, opus est, ut post eorum usum sudor decocto, vel infuso theiformi calide sumto eliciatur, vel corpus motu exerceatur; quo alias nocens facultas earundem quodammodo averti potest. Post præposterum enim tam horum, quam aliorum eminentius adstringentium usum, plura subsequuta fuisse incommoda annotavi, maxime in iis, qui excretionibus sanguineis assueti, ita ut hæ inde penitus fuerint suppressæ.

§. XIII.

Cortex chaccarillæ accommodatissimum etiam in intermittentibus est remedium, ob principium quo instructus est balsamicum & sulphureum anodynum terreumque adstringens. Sed quia sanguinem exæstare & calorem accendere solet, in biliosis & ad motuum impetus pronis subiectis minus, & nonnisi in refracta dosi, ex usu est, in segnioribus vero in phlegmaticis & mulieribus magis, & tunc commodissime cum cortice chinæ miscetur.

§. XIV.

Absorbentium spectatus quidem in febribus effectus, nihilominus tam moderate, quam cum delectu, sunt usurpanda. Copiosius quippe ingesta, solventibus in ventriculo succis minus obediunt, sed integra relictæ, eundem

Sedati-  
va no-  
cent

Adstrin-  
gentia  
insecu-  
ra.

Chac-  
carilla  
quibus  
condu-  
cat.

¶ no-  
cent

Absor-  
bentia  
cum de-  
lectu  
¶ mo-  
derate  
usur-  
panda.

one-



onerant, quin in lentam plane pastam coeundo, anxietates & nauseam cient. Rudiora vero illa, ex marinis maxime deprompta, ægrius non modo liquantur, sed & adstrictivam plane postea sortiuntur virtutem.

## §. XV.

*Topica.* Sæpius evenit, ut in paroxysmo, præsertim accedente, a sanguine ad caput, potissimum in plethoricis, congesto, exquisita oriatur cephalalgia, cum sensuum & phantasiæ turbatione, cui non promiscue topicis occurrendum. Vidi enim epithemata illa domestica, ex absynthio, ruta, cumino, baccis juniperi, sale communi & pane trito, ob vaporem, quo caput replent, plus nocuisse, quam profuisse. Multo minus vero cephalica & nervina, ut balsamum nostrum vitæ, quod alias in doloribus capitis egregii usus, porrigenda sunt.

## §. XVI.

*Potus calidus circumspicere dandus.* In paroxysmo potus calidus, ut herbæ thee, fabarum coffee, non confert, quia humores acres, biliosos, plus justo in sanguinem agit & æstum, nec non anxietates, mirifice auget; sed potius concedenda potio temperate calida, aut tepida. Recte enim Hippocrates lib. III. de morb. præcipit: tertianis potus calidus non confert, sed frigidus. Extra paroxysmum autem calidæ ejusmodi potiones commode inveniunt locum, præsertim quando excretio alvina libera est.

## §. XVII.

*Depulsa febre quid faciendū.* Quando febris per specifica depulsa, non omittenda penitus sunt sanitatis præsidia, sed vitanda sedulo corporis refrigeratio, in appetitu moderamen servandum & aliquandiu tam pilularum balsamicarum, quam elixirii stomachici usui insistendum, uti jam superius in sexta pluribus monuimus indicatione.

## §. XVIII.

*Oedema.* Quod si vero contigerit, ut ob ingestum largius frigidum potum vel data præpostere adstringentia, tumores succedant oedematosi, neutiquam in

usum vocanda acriora purgantia, martialia, aut salia volatilia, sed omnis medicatio salibus abstersivis, pilulis balsamicis & temperato lignorum decocto conficienda. Ubi etiam anasarca corpus obsidet, emeticum cum extracto panchymagogo Crollii, vel helilebori nigri, oblatum, miram aquarum copiam evehendo, insigniter juvat.

## §. XIX.

Senes plethoricos & venæ sectioni assuetos, a refrigeratione in atrocem colicum dolorem subsequente, tertiana continua epidemice grassante, incidisse, crebrius observavi, quibus sanguinis missio admodum fuit proficua, chinæ cortex autem, mature nimis datus, perniciosus, ita prorsus, ut quotidiana hæcticæ similis funesta inde fuerit enata.

## §. XX.

Pueris octavum vel decimum ætatis annum agentibus, febre tertiana correptis, exoptato cum successu dedi potiunculam emeticam, & post hanc clysteres ex antifebrilibus, centauro minori & cortice chinæ, applicare jussi, febre ex toto quiescente, nec unquam repetente.

## §. XXI.

Feminæ ex mensium suppressione cachecticæ febrientes, magna circumspeditione tractandæ, rejectis penitus omnibus validioribus evacuantibus, æque ac roborantibus, emmenagogis quoque; quæ quidem temperata, sed febre nonnisi discedente, locum inveniunt. Clysteres vero ex leniter laxantibus, amaris & carminatis, nec non infusa blande alvum subducentia, quæ simul amara, corticem chinæ & limaturam martis habent, opem fecerunt præstabilem.

## §. XXII.

Puerperæ intermittentibus affectæ febribus, gravissime inde luunt & sæva pathemata hysterica incurrunt, nisi lochiorum curate habeatur ratio, tanto magis quando hæc cum febre per absorbentia marina, vel præcipitantia



tia marina, vel præcipitantia rudioris texturæ, conchas, corallia, cum, vel sine acido, nimis cito supprimuntur. Tum potius insigni virtute splendent, pilulæ nostræ balsamicæ tonicæ, quæ morbis ex uteri vitio apprimè medentur.

ENARRATIONES  
MORBORUM.

OBSERVATIO I.

*Tertiana in bilioso perperam salibus excepta.* Incidit vir quinquaginta annorum, cholericus & in iram admodum proclivis, æstivo tempore in tertianam, quæ per aliquot hebdomadam decursum perstitit, ægerque variis interea animi pathematibus, angore, cura, solitudine, quin ira affectus, in paroxysmis subinde conatus ad vomendum persensit. Vocatus in consilium Medicus, non alia exhibuit medicamenta, quam salia, arcanum quippe duplicatum, sal ammoniacum, sal tartari, nitrum & id genus plura, hæc quidem liberali admodum manu & repetitis dosibus. Sed tantum abfuit, ut his, quantumvis diu usurpatis, febris fracta fuerit vehementia, ut potius symptomata magis increverint, angustia præcordiorum cardialgicæ intensiores, facies admodum contracta, pallida & livida, extremorum etiam die vacuo refrigeratio, cum perpetuo ad tussim siccam stimulo, vomendi conatu, quin singultus accesserint, & simulac quicquam, esculenta fuerint, sive potulenta, in ventriculum delatum, illico pejus habuerit æger. Nostræ hinc commissus medicationi, omnia salina seposuit, a vino quoque, licet ejus potui antea assuetus, abstinuit & crebrius jacula hausit ex pullo galinaceo, cremore hordei & vitello ovorum, nec non decoctum florum chamomillæ vulgaris. Exterius ante paroxysmum epigastrii regioni impolita est vesica speciebus emollientibus repleta, & alvo injectus clyster ex lacte & manna, adjecto stimuli loco nitro  
Tom. IV.

& sale. Mitigatis autem hinc symptomatibus, electuarium ex cortice chinæ, julepo rosarum, theriaca & nitro, intercalari die aliquoties modica dosi dedimus, tam salubri effectu, ut febris penitus discederet nec unquam rediret.

*Epicrisis.*

Notatu utique dignum est, salium, præstantis alias in intermittentibus virtutis, usum, tam male hoc in ægro cessisse, & inflammatoriam quasi in ventriculo adduxisse erosionem, ut hinc omnia illa quæ affligerunt insolita pathemata pullularint. Ratio tamen peculiaris hujus effectus in proclivi. Scilicet cholericæ constitutionis erat corpus, æger ad iram pronus & sub ipsa febre animi affectibus agitabatur. Jam vero nihil tam prompte & celeriter ventriculum cum tenuibus intestinis spasmus afficit, dispositionem ad inflammationem ibi ingignit & bilem acrem ipsiusque effusionem causatur, quam ira, in subiecto præsertim plethorico. Dein notum etiam est, salia, cujuscunque fuerint generis, nervosas ventriculi & intestinorum tunicas mirum in modum irritare magisque ad spasmos sollicitare. Atque adeo, his tam exquisitis sentientibus & spastica jam strictura affectis partibus, non potuerunt non malum augere & sinistrum plane effectum edere hæc salina remedia, tanto magis copiose & iterato oblata. Contra ea optimum certe fuit consilium, afflictas has partes mulcere temperantibus, spasmos complacare & febriles demum motus, diu jam corpori inhaerentes, sistere atque compescere.

OBSERVATIO II.

Vir quidam generosus, ruri degens, vegetus natura, robustus, sanguine succique plenus, sexaginta & sex annos habens, postquam nocturno aeri sese incautius commisisset & sudorem improvida refrigeratione repulisset, tertiana corripiebatur exquisita. Vo-

*Febris in plethorico gravibus symptomatibus stipata sine V. S. sana.*



cabar accedente tertio paroxysmo ego, ægrumque frigore deprehendebam omni fere sensu privatum, delirantem, tremantibus ob anxietatem summam manibus pedibusque, cum corporis irrequieta jectigatione; facie inflata & bruni coloris; ac pulsu contracto, duro ac celeri. Metuebam hinc gravem capitis morbum & ex adstantibus quærebam: annon vena fuerit secta? sed regerebant: ob impensam naturalem quandam aversionem, nunquam ægrotum ut sanguinem mitteret induci potuisse, neque ipsum, quantumvis plethoricum, unquam spontaneum sanguinis ex narium, vel ani venis expertum esse fluxum. Ter interea tam graviter febri- citans pituitam maxime lentam, instar gelatinæ, saturato bilis colore tinctam, alvo deiciebat, & postquam frigus per tres horas durasset, succedebat æstus sex horarum, remittentibusque sensim pathematibus, erumpebat demum mador, ægro intercalari die bene se habente. Sitis autem sub frigore & horrore erat impensior, quam sub calore, & urina in paroxysmo rufa sine sedimento secedebat, quod tamen intermissionis die deponerat. Quum igitur æger omnem penitus sanguinis missionem respueret, ut exæstuationem & congestionem sanguinis ad caput omni modo præscinderem, operam dedi, eaque propter loco cerevisiæ, quæ crassior erat & lupulata nimis, ptisanam potui præbendam suasi, & in paroxysmo potionem temperantem, ex aquæ florum acaciæ, sambuci, tiliæ, cardui benedicti ana unciis quatuor, pulveris nostri polychresti, bezoardici dicti drachmis duabus, temperantis nitrosi drachma, succi citri cochlearibus binis & sacchari uncia dimidia, cujus etiam per intervalla crebrius aliquot pro dosi cepit cochlearia. Declinante impetu, ad madorem eliciendum, infusum ex scordio & corticibus citri sorbillavit, & extra paroxysmum pulverem ex lapidibus cancrorum, terra

foliata tartari & nitro, cum sufficienti quantitate ptisanæ, subinde assumpsit. His aliquandiu usurpatis, symptomata post nonum paroxysmum multum mitescebant & urina multum crassæ dimittebat materiæ. Quare quum ægrum duabus mannæ unciis & salis polychresti drachmæ dimidio, in jure carnis dissolutis, purgassem prius, ad sistendum paroxysmum electuarium antifebrile, consueta methodo & idoneo regimine exhibui. Quo, semel adhuc admodum leni insultu subsequente, febris penitus demum corpus deseruit, usurpatis postea aliquoties alternis diebus pilulis nostris balsamicis, cum pulvere salino aperitivo. Et ita perfecte cum sanitate sine recidiva in gratiam rediit æger, & in hunc usque diem ad septuagesimum septimum annum sanus pervixit.

#### *Epicrisis.*

I. Sub gravibus & insolitis capitis in hoc ægro pathematibus, ab affecto graviter præter naturam nervorum systemate oriundis, singulari omnino naturæ beneficio evenit, ut minimum bis, vel ter, lentos biliosos succos copiose excerneret, & credibile merito, alvo simul adstricta, ancipitem subsequuturum fuisse capitis morbum.

II. Si febrientes plethorici, nec tamen venæsectionem admittunt, optimum consilium, æstum temperantibus leniterque alvum subducen- tibus uti.

III. In corpore plethorico, denegata sanguinis missione & urina cruda prodeunte, febris nunquam cito per specifica jugulanda, sed tutius est decem minimum opperiri paroxysmos, qui quasi remedium adversus succorum abundantiam, donec sponte mitescant symptomata & urina coctam ingatur, ac tum demum, præmissis adhuc alvum moventibus, ad febre transire depulsandam.

#### OBSERVATIO III.

Quadragenarius quidam, sangui-  
neo-

*Tertia:  
na sim-  
plex*



*præpo-  
stera  
medi-  
catione  
in du-  
plices  
conver-  
sa.* neo-melancholicus, a longo jam tem-  
pore inordinata usus diæta, æstate,  
qua jam tum febres grassabantur, ira  
gravius incitatus & corpus auræ ve-  
spertinæ frigidiori liberius commit-  
tens, incidit in artuum lassitudinem,  
cum somno inquieto, dolore dorsi,  
capitis & hypochondriorum tensione,  
succeedente horrore & post hunc calo-  
re. Tertia die idem redit insultus, &  
licet frigus non adeo esset intensum,  
æstus tamen & reliqua pathemata lon-  
ge erant acerbiora, anxietas intensis-  
sima & mentis plane quædam aliena-  
tio. Secatur a Medico vena, offertur  
emeticum, unum tantum vomitum  
ciens, & post quartum paroxysmum,  
febris cortice chinæ sistitur. Prodit  
hinc post aliquot dies in publicum æ-  
ger & in horto fluvio adiacente bene  
cœnatur & potat quidem, sed recidit  
in febrilem longe vehementiorem pa-  
roxysmum, stipatum summa præcor-  
diorum angustia & æstu, nec non vo-  
mitione, ita ut non modo potum,  
sed & ipsa medicamenta reiiceret.  
Porriguntur hinc elapsis quatuorde-  
cim diebus bis pilulæ ex cortice chinæ  
& floribus salis ammoniaci martia-  
tis, tam infelici effectu, ut tertiana  
simplex in duplicem degeneraret &  
vires ægri mirifice attereret. Notaba-  
tur præterea circa ventriculi regionem  
tumor, ingesta omnia vomitu redde-  
bantur, anxietas erat vix toleranda,  
pulsus etiam extra paroxysmi tempus  
celer, urina non semper eadem, in-  
terdum crassa cum sedimento, inter-  
dum flava tenuis, nonnunquam plane  
rufescens, & clystere injecto, alvus  
copiosa mucida, foetida & biliosa di-  
mittebat.

*Epicrisis cum curatione.*

Est hæc febris tertiana duplex, cum  
metu inflammationis ventriculi, quam  
imminentem maximæ anxietates,  
perpetuæ stomachi subversiones, alvi  
constipatio, pulsus continuo celer &  
tumor ventriculi haud dubie præsa-  
giant. Nec levis notæ error in medi-  
catione commissus fuit, quod non mo-

do emeticum in febre tanto æstu &  
angore stipata oblatum, sed & ante  
sufficientem materiæ febrilis corre-  
ctionem & primarum viarum expur-  
gationem, paroxysmus præmature  
primum cortice chinæ depulsus, & re-  
petens postea, pilulis ex floribus salis  
ammoniaci, eminentius adstringente  
virtute præditis, oppugnatus. Ut igitur  
inducta hinc noxa præscinderetur  
ipsaque febris persanaretur, hoc mo-  
do medicationem aggressus sum. In  
infuso theiformi ex scordii manipulo,  
florum chamomillæ vulgaris, sum-  
mitatum millefolii ana pugillis qua-  
tuor, seminis fœniculi uncia dimidia,  
exhibui liquorem anodynum cum eli-  
xirio stomachali. Deinde ad potum  
ordinarium commendavi decoctum  
rasuræ cornu cervi cum radice scorzo-  
neræ, cum quo quandoque propina-  
tus hic pulvis: Recipe pulveris Mar-  
chion. drachma, lapidum cancerorum,  
nitri depurati ana drachma dimidia,  
pulveris castorei grana X. M. F. Pul-  
vis D. S. *Pulver auf etliche mahl.* Po-  
stea sal absynthii cum succo citri obla-  
tum. Exterius vero cataplasma, quod  
habebat florum sambuci, chamomil-  
læ vulgaris, Romanæ, salviæ, hor-  
mini, anethi singulorum pugillos sex,  
herbæ menthæ crispæ manipulum, nu-  
cis moschatae, cardamomi, seminis  
fœniculi ana unciam semis, reductis  
omnibus cum fermento panis, spiritu  
vini & aceto rosaceo in formam cata-  
plasmatis, calide regioni ventriculi  
appositi. Quo per universum corpus  
sudor obortus & anxietas cum vomitu  
cessavit, ac mitiori quoque sensim fa-  
cto febris impetu, tandem electuario  
ex cortice chinæ floribus chamomillæ  
& sirupo acetositis citri, morbus fe-  
liciter persanatus.

OBSERVATIO IV.

Senex generosus, septuagesimum  
& quartum ætatis annum agens, sanus  
alias adhuc & vegetus, intermiserat  
consuetam vere sanguinis missionem,

*Tertiana  
con-  
tinua  
in sen-  
sue-  
sta.*

B 2

& post



& post impensam totius corporis refrigerationem, atroci primum abdominis dolore infestabatur, cum extremorum frigore & tremore, ad viginti fere horas persistente. Succedebat postea æstus, cum sensuum perturbatione, pulsu vehementi, delirio viriumque prostratione. Tandem quidem superveniente leni madore, hæc inducias dabant, sed elapsis aliquot horis levis denuo eveniebat partium extremarum refrigeratio, iisdem quam antea symptomatibus stipata, ut non amplius obscurum esset, laborare ægrum febre, tum temporis epidemica, tertiana continua. Accitus hinc Medicus, cui solennis, statim etiam in principio intermittentium, electuarii, cujus basis cortex chinæ, usus, & idem hoc suum remedium suadet, sed absumpta licet successive dimidia hujus libra, plus tamen increvere, quam remissere symptomata, subsequuta enormis virium prostratio, continens capitis dolor, sitis, summa præcordiorum anxietas somnique defectus, pulsu semper magno, pleno, citato, interdum plane intermittente. Nono morbi die advocabar ego, ægrumq; offendebar imbecillimum, graviter de sinistro electuarii, biduo jam omissi, effectu conquerentem, ideoque sanguinis missionem, quæ in principio, meo & aliorum Medicorum judicio, summopere fuisset necessaria, instituere nolui, & nil nisi analeptica & temperantia, cum leniter diaphoreticis suasi. Aderat quidem quotidie symptomatum ad sex vel septem horas remissio, sed totalis virium prostratio pessima ominabatur, ideoque capitalem fore morbum prædixi, ægro etiam elapsis aliquot diebus, ipso sub paroxysmo obeunte.

*Epicrisis.*

Quamvis specifica antifebrilia, quorum potissimum cortex chinæ, necnon reliqua quæ mera adstrictione agunt, martialia scilicet, cortex fraxini & *Hartmanno* familiaria aluminosa, in moderandis, vel plane sedan-

dis febrilibus motibus, non contemnenda prudenter usurpata polleant efficacia; nihilominus tamen ego nunquam non gravissimam inde notavi noxam, in corporibus plethoricis, spasticis obnoxiiis vehementioribus stricturis, hypochondriacis & hystericis, & ubi nondum humorum acrimonia emendata, nec æstus mitigatus. Tanto vero magis cum cautione danda sunt senibus, quanto major in his ut plurimum humorum spissitudo & crassities, alvi obstipatio, immo haud raro sanguinis redundantia.

OBSERVATIO V.

Annus currebat 1719. quum Charlotteburgi, (quod amœnum prope Berolinum secessui regio dicatum oppidum, sed ob paludum & stagnorum circumjacentium copiam, febrium quotannis ibi grassantium provenitum, infestum,) plures ex aulicorum ministrorum numero, propter ciborum ingluviem, vespertinum improvide admissum frigus & aerem noxiis effluviis refertum, tertianæ implicarentur, consuetis symptomatibus stipatæ. Ex his plures qui me utebantur medicatione hac ratione ad sanitatem reduxi. Superato scilicet tertio paroxysmo, intermittente die potionem emetico laxantem porrexi, ex manna & tartaro emetico, in aqua veronicæ, vel florum acaciæ solutis, qua ingens vitiosorum humorum coluvies per inferiora & superiora exturbata. Hoc facto, tribus, vel quatuor, ante subsequentis paroxysmi accessionem, horis, ad lenem provocandum sudorem, exhibui potionem ex tribus aquæ cardui benedicti unciiis & dimidia uncia aquæ theriacalis, cum drachma salis tartari & triginta spiritus vitrioli guttis. Tum extra paroxysmum cort. chinæ & flores chamomillæ vulgaris, vel in forma electuarii, vel potionis, binis quibusvis horis, præbui, quibus per aliquot dies usurpato, febris discessit, injuncta post-

*Tertiana cito  
& tuto  
sanatæ.*



postmodum, ad arcendam novæ materiæ febrilis generationem, pariori victus ratione, cum elixirii nostri stomachici usu.

*Epicripfis.*

Multiplici edoctus sum experientia, specifica intermittentium præsidia, horumque princeps, corticem Peruvianum, felici cum successu dari, vel statim in principio febris, perpurgatis prius probe primis viis, vel declinante post aliquot paroxysmos jam sua sponte ipsa febre, neque tam facile nocere, ac si natura per decem, vel plures paroxysmos imbecilliori reddita, demum usurpatur. Tum enim magis noxa timenda & majori opus est prudentia, eo quod per crebriores paroxysmos, motu tam intestino, quam tonico auctiori, tota sanguinis & humorum massa in excrementitias sordes fatiscit, quæ nisi prius sufficienter expurgatæ fuerint, per adstrictivam specificorum facultatem intus retentæ, peioris notæ recidivas, vel novos alios morbos, ingignunt.

OBSERVATIO VI.

*Tertia-  
na epi-  
demica.*

Ex præcalida, diuturna, insueta plane aeris tempestatumque constitutione, elapso & qui jam labitur 1727. anno, plures febrium species universam fere Germaniam infestarunt & laborantes nimio, fere continuo æstu, virium prostratione, anxietate, capitis dolore & nonnunquam plane delirio, mirifice afflixerunt ita quidem, ut frequentissimæ ex illis essent tertianæ continuæ, symptomatibus non penitus intermittentibus, sed tantum remittentibus, donec lapsu temporis, successive vel in quotidianas, vel tertianas legitimas, vel etiam quartanas, transirent. In harum perlanatione ego quidem felici cum successu hac usus sum methodo. Sub febre, tribus singulis horis, duo circiter cochlearia præbui potionis ex aquæ florum sambuci, tiliæ, ceraforum nigrorum ana uncis duabus, pulveris præcipitantis

Tom. IV.

& bezoardici ana drachma una, succi citri & julepi rosarum ana uncia dimidia. Remissionis tempore oblatum laxans ex mannæ uncia cum dimidia, vel duabus, nitri puri & salis polychrestiani granis XV. in jure carnis vel aqua destillata solutis. Fœminis autem spasmodicis affectibus obnoxiiis, clysteres injicere jussi, leniter discutientes & demulcentes. Perpurgata his prima regione, ad electuarii usum accessi, hac tamen cum differentia, ut ad temperandum æstum nitrum adjicerem. Fracta hinc postero mox die febris atrociora, ut per aliquot adhuc dies hujus remedii usui insisterent & alvum clysteribus apertam servarent, febre autem penitus evanescente, exactum in vita & victu tenerent moderamen & subinde pilulas nostras balsamicas confortantes degluterent, injunxi. Et sic brevi tempore, divino auxilio, ægri convaluerunt, quum alii, iisdum febribus laborantes, adhibitis variis remediis, venæsectione, emeticis, salibus, amaris & essentiis alexipharmacis, diu fuerint afflicti, viribus adeo consumptis, ut longo tempore omnique arte eadem vix potuerint recuperare.

*Epicripfis.*

Febres quæ accedentes gravibus stipantur symptomatibus, intenso æstu, siti, virium & appetitus dejectione, nisi sint acutæ, sed notabiles servant remissiones, melius in principio specifica febris præsidia ipsumque chinæ corticem ferunt, ac illæ ex tertianis & quartanis, quæ lenius invadunt & lentius procedunt. In illis quippe expedit utique effrenes solidorum & fluidorum motus, roborantibus & antispasmodicis moderari, vel plane sedare; in his vero languesciente jam naturæ motu & ad removendam in viscerum infarctu & glandularum obstructione repositam morbi causam non sufficiente, idem perficere oppido nocivum. Ego certe multis confirmatum habeo exemplis, longe melius antifebrilia propinari in tertianis legi-



timis, cholericæ & juvenilia corpora graviorum symptomatum insultu infestantibus, quam ubi segniora & phlegmaticæ constitutionis nothis implicantur. Nec infrequens in illis fuit observatum, post Americani corticis usum, alvum fluxisse, sudorem largius manasse, pulsum intermissionis tempore cum virium incremento increbuisse, quin ipsum salivalem latitem stillasse.

## OBSERVATIO VII.

*Ex tertiana a. postema musculorum abdominis.*

Prehendebatur verno tempore tertiana epidemica, vir quidam quadragenarius, laxioris habitus, qui militiæ deditus, tam propter effusum per crebriora vulnera sanguinem, quam ab usum vinorum Italicorum, corpus infirmum atque causarium reddiderat. Advocabatur Medicus, febremque ardentem & malignam, propter intensum ardorem & sitim, fore judicans, porrigebat alexipharmacum, ex spiritu cornu cervi & tinctura bezoardica. Sed increfcebat inde ardor cum siti & accedebat delirium plane, ut æger nudum etiam corpus in paroxysmo frigido subiiceret aeri, gelidamque largiter ingurgitaret aquam. Concedebat tamen febris in tertianæ intermittentis typum æstusque remittebat, debilitas autem insignis, magna ad sudorem proclivitas & mira paroxysmorum anomalia succedebat. Discedebat tandem penitus febris tertiana, sed sudor cum tussi affligebat perpetua & quotidie febrilis quædam, licet sine horrore & adeo notabili calore, præsto erat commotio, ac præterea infra cordis scrobiculum, in media cartilagine ensiformi, tumor quidam prædurus eminebat. Conflictabatur cum hisce pathematibus per binos fere menses æger, ac interea a multis Medicis exquirebat consilia, quorum quisque de affectu & medicatione peculiarem promebat sententiam, uno febrem esse hæcticam, altero tertianam duplicem, tertio hy-

dropem, quarto glandularum omenti tumorem, affirmante. Errabant autem omnes. Increfcebat enim subinde tumor & exquisitus pungitivus cum ardore dolor jungebatur, & apostema potius intra musculos, non cavum abdominis, latitare coniciebam. Reiectis igitur discutientibus externis emplastris, solum diachylon simplex fuit admotum & super hoc positum cataplasma emolliens. Sic elapso tri-duo, attolli & mollescere cœpit tumor purisque subtus undulatio locum incisionis monstravit, qua quinto die facta, pus foetidissimum, ad tres minimum mensuras, pauco cruore intermixto, effluxit sensim. Inde mitior illico factus calor, somnus quietus redditus, & abscessu iniectis balsamicis sensim ad consolidationem perducto, pristinam demum æger recepit sanitatem.

*Epicrisis.*

Sanguineum corpus apostemati concipiendo quam maxime est opportunum, ob succos in laxa fibrarum textura ex facili subsistentes. In hoc quidem, potus ille frigidus, sub paroxysmo copiose ingestus, cum improvida abdominis refrigeratione sub fervido calore, sanguinem & succos in musculis abdominis consistere fecerunt. Horum exstasi enatum apostema, factus tumor & materia contenta computruit, quæ sanguini præterlabenti remixta, continuum lentum calorem cum languore induxit, & aperto apostemate, tam foetidum exspiravit odorem.

## OBSERVATIO VIII.

Æstate qua varii generis febres circumibant, vir quadragenarius, post gravem iram, præcordiorum summas anxietates, cum vomendi conatu, incurrebat. Excipiebat hæc posteris diebus icteritius color, in oculi albo quam maxime conspicuus, nec non ferina tussis, noctu potissimum affligens somnumque interturbans. Nihilominus, postu-

*Tertiana cum ictero & tussi curata.*



postulante sic quo fungebatur munere, iter suscipiebat, sub quo vero ob auram frigidiusculam & delicta quæ committebat diætetica, febrem nanciscebatur tertianam. Stipabatur hæc solitis pathematibus, major tamen in paroxysmo erat anxietas & inquietudo, urina saturate tincta, sine sedimento, æstus productior, per viginti fere horas persistens, & tussis quoque, noctu præsertim & sub frigore, vehementior. Consulebatur Medicus, qui propinabat emeticum, ex tribus tartari emetici granis, quo sexies pituitosus tantum bile leviter remixtus humor ejectus. Hoc facto dabatur electuarium ex radicibus alexipharmacis, pimpinella, gentiana, angelica, addita theriaca veteri & sirupo acetositis citri. Hinc vero mirum exasperabatur febris fereque reddebatur continua, somnus cum appetentia intercedebat & continuus sine frigore persistebat æstus, sub quo Medicus ad sitim extinguendam Martisbürgensem suadebat, cerevisiam. Advocabar ego & causam febris cum symptomatibus curatius expendens, rejectis, quæ a Medico præscripta fuerant cunctis, contrariam plane medendi ingrediebar viam. Pro potu quippe suadebam decoctum avenaceum, idque etiam cum seminibus quatuor frigidis & papaveris albi in emulsionis formam redigere, & adiecta convenienti nitri portione, pro lubitu liberaliter ingerere præcipiebam. Pulverem dein absorbentem nitrosum, ex antimonio diaphoretico, lapidibus cancrorum, nitro & tartaro vitriolato, bis vel ter quotidie, in & extra paroxysmum sumendum, commendabam. Bis etiam quotidie liquor noster anodynus mineralis ad guttas 20. in superiori decocto offerebatur. Redditis per hæc mitioribus cunctis, elapsis quinque diebus, electuarium antifebrile ex rob. sambuci uncis duabus, corticis chinæ drachmis sex, sirupi acetositis citri uncis duabus, pulveris florum chamomillæ drachmis duabus, antimonii

minoris, nitri, singulorum drachma, quovis bihorio ad drachmas duas, per quatrimum exhibitum. Quo ex toto cessavit febris, cum omni æstu ac siti, ferina tussis conquievit, urina, secus ac per totum morbi decursum, ex bruno rubicundo colore flavescens sedimentum dimisit, appetitus cum viribus rediit & flavus in facie & corporis superficie color successive disparuit. Demum vero, ne ex ciborum ingluvie recidiva gigneretur, crebriorem pilularum balsamicarum & salis digestivi ex arcano duplicato, sale digestivo & sale tartari usum, cum abstinentia, serio injunxi, & sic æger, vitata simul omni refrigeratione corporis, animique commotione, quæ facile recidivam creare possunt, maxime si negligitur primarum viarum evacuatio, quæ demum septimo a febre die molienda, ad perfectam rediit sanitatem.

*Epicripis.*

I. Hoc in ægro omnia primum in motu spastico excessivo fuerunt constituta, acris etiam subtilis materia potius in vitio fuit, quam crassioris & rudioris humoris moles, testantibus id origine febris ab ira, symptomatibus, ut tussi ferina, & icteritia, ex spasmo ductuum biliariorum. Perperam igitur a Medico datum emeticum & electuarium calefaciens, quibus motus spastici cum intestino aucti & pathemata exacerbata. Ex usu potius fuissent motus complacantia & acrimoniam diluentia ac temperantia, cum iis quæ per cutis poros subtiles fordes eliminant. Quod demum cum successu decocto diluente & humectante, pulveribus absorbentibus nitrosis & temperante diaphoretico electuario, a nobis confectum.

II. Magna omnino est cognatio inter subitanæ ex spasmo icteritiam, tussim ferinam convulsivam & inter motum febrilem intermittentem, qui nostra sententia in spastica quadam universalis vasorum & nervosarum partium systematis strictura consistit.



Hinc etiam factum, ut iisdem remediis, terna hæc mala & symptomata omnia simul & semel funditus fuerint sublata.

## OBSERVATIO IX.

*Tertia. na cura. ta & in continu. am con. versa u. no. reme. dio.* Miles quidam robustus, postquam in coena ad satietatem usque ingessisset & noctu aere nebuloso excubias egisset, præcedente horrore, nausea & conatu ad vomitum corripitur, subsequente æstu & anxietate. Redeunt hæc pathemata tertio die acerbiora, ideoque ad Chirurgum properat, qui die vacuo primum dat emeticum, septem ante paroxysmum horis, quo strenue pituitam cum bile evomit. Febrili die, tribus ante paroxysmum horis, idem morbi artifex piperis albi grana 15. stercoris muris grana 10. & lapidum cancrorum drachmam dimidiam in aliquot cochlearibus spiritus vini porrigit, & jubet, ut desuper biberetur cerevisia probe calefacta. Miles lecto inclusus sudat inde fortiter, paroxysmus fugatur, & repetito aliquoties hoc remedio, cura feliciter absolvitur. Accidit vero haud ita multo post, ut juvenis cholericus, in iram pronus & liberaliter vini potui indulgens, tertianæ implicaretur. In consilium vocatur idem Chirurgus & idem remedium exhibet, sed tam sinistro effectu, ut continua inde fere fieret febris, æstus augeretur, æger deliraret & de exquisito ardoris, quasi carbonis igniti, sensu, in scrobiculo cordis conquereretur. Parata igitur emulsio ex aqua florum sambuci, tiliæ, papaveris rhæados, feminibus quatuor frigidis & papaveris albi, quæ tam sola, quam cum pulveribus absorbentibus & diaphoreticis, nitrosis, sumta, ac demum adjunctus usus electuarii jam descripti, quem excepit liberalis alvi fluxus, tam salubri eventu, ut febris discederet, symptomata quiescerent & æger sanitatem reciperet.

## Epicrisis.

Luculentum hoc exemplum, non omnia omnibus prodesse. Nam si tertiana in corpus robustum, minus agile ac sensibile incidit, idque ob saburram in ventriculo & transpirationem impeditam; emetica quidem, & postea calidiora ante paroxysmum, eximie sunt utilitatis. Sed ubi corpus ætivum & motus magis, quam qualitas & quantitas humorum, peccat, contraria plane medendi methodus & sedantia adhibenda medicamenta. Et in ejusmodi quidem cholericæ indolis ad iram pronis subiectis, singularis plane est ex chinchina paratorum effectus, eo quod summa cum euphoria crebras & biliosas alvi dejectiones proritare solent.

## OBSERVATIO X.

Sexagenarius robustus & plenus, sanguineo phlegmaticus, calculi renalis doloribus ab aliquot annis subinde obnoxius, flatibus præterea & ructibus divexatus, nanciscebatur anno abhinc tertianam tum epidemiam. Post tertium paroxysmum, molestiarum pertæsus a Medico ut febrem abigeret poscit. Paret hic, & electuario, ex rob-juniperi, cortice chinæ & sirupo acetositis citri, post sex dies, febrem ex voto, uti videbatur, profligat. Sed sequitur postea inflatio ventriculi, cum ructibus & borborygmis ventris, præsertim post pastum & alimenta gravis materiæ. His jactatus æger meo ex consilio usus est mane pilulis balsamicis & vesperi pulvere salino aperitivo, ex arcano duplicato, sale Sedlicensi & cancrorum lapidibus, per sex dies, & postea ante prandium essentia carminativa Wedelii, cum æquali parte spiritus nitri dulcis remixta, felici cum successu. Quum vero elapsis vix quatuordecim diebus medicamenta reiiceret, eadem a flatibus & ructibus expertus est incommoda, eaque propter ad priora medicamina confugit, succedente ex voto effectu.

Epi-



*Epicrisis.*

Quando tertiana corpus impurum, succis repletum & chronicis passionibus jam affectumprehendit, in medicinam cedit, motu intestino & progressivo auctiori obstructions referando, viscidos humores attenuando & sordes subtiles difflando. Quando vero cito nimis specificis compescitur, noxia materia remanens & deterior reddita, in disposito jam corpore, flatulentias creat malumque exacerbat. Et licet opposita his pathematibus præsidia leniter educendo vitiosam materiam ac tonum ventriculi & intestinorum roborando, egregie profuerint; expertus tamen scribo: non facile ejusmodi pathemata cessare, nisi aquæ minerales, præsertim Carolinæ thermæ, in auxilium vocentur, ac vere, vel æstate, debito cum regimine usurpentur.

OBSERVATIO XI.

*Tertiana in senectute.* Superiori vere, quo tertianæ erant admodum frequentes, vocabar ad septuagenarium vegetum adhuc & strictioris corporis habitus, qui eodem decumbebat morbo, & adhibitis licet pulveribus digestivis salinis, elixiriis amaris, pilulis etiam polychrestis, decimumquartum jam paroxysmum erat passus. Percontatus de omnibus, vires quidem prostratas, stomachum mire languentem & fastidientem & urinam sine sedimento esse, comperio, habitum tamen corporis expendens & pulsum in paroxysmo plenum adhuc & fortem offendens, electuarium offerre non dubito. Sumtum illud bihorio quovis ad drachmas duas, bibendo postea aliquot cochlearia vini, auspicato cum effectu, ita, ut subsequens illico paroxysmus mitior longe esset, nec nausea, nec capitis dolore, neque anxietate, ut antea, stiparetur, secundus vero penitus emaneret, urina crassa mingeretur, vires redirent & æger optime convalesceret. Ne autem recidiva accideret, ut eo-

dem electuario, parcius tamen, adhuc uteretur, elapsis septem diebus, bis pilulas balsamicas cum sale aperitivo deglutiret, ingluviem ciborum & feria negotia vitaret, temperate calidum potum assumeret & corpus ab omni refrigeratione solícite defenderet, serio præcepi.

*Epicrisis.*

Chinæ cortex non tam nocens ut vulgo creditur, sed ipsis etiam senibus cum fructu datur. Neque etiam sine exceptione illa practica regula: quod nunquam sit offerendus, antequam urina compareat cocta. Ego enim multiplici compertum habeo experientia, nunquam ipsum nocuisse, si primæ viæ prius probe expurgatæ, si corpus non impuris succis scatet, viscera sanguinea integra, & nullus inflammationis internæ metus. Multo magis innocens hujus corticis & salutaris effectus, in ægro activæ indolis, fibrosi & amplioribus vasis instructi habitus. Longe præsentio rem etiam expertus sum ipsius efficaciam in corpore quodammodo jam per febrem debilitato fibrarumque tono remissiori, ac si vires adhuc vegetæ & motuum vigor, nisi forsan expectationem interdican circumstantiæ.

OBSERVATIO XII.

Rari sunt in thermis Carolinis diu febricitantes. Simulac enim febris impetit, intercalari die largiter ingerunt aquas thermales, quæ primas vias efficaciter deplent, sudorem etiam & urinam liberaliter eliciunt. Si post quintum paroxysmum febris non discedit, corticem Peruvianum die vacuo adhibent, vel in electuarii forma, vel decocto, hunc in modum: recipe corticis chinæ unciam, radicis gentianæ rubræ unciam semis, herbæ cardui benedicti manipulum, centaurii minoris tantundem, vini Gallici mensuram; coque leni calore, cola & adde sirupi menthæ unciam, M. de quo tribus quibusvis horis extra paro-



paroxysmum duas uncias bibunt, forbillando mane in lecto infusum theiforme & sudorem eliciendo, Sic feliciter ut plurimum ex toto febrem percurant. Mihi ansam hoc dedit, ut eadem methodo subinde uterer, & surrogata Carolinis Sedlicensi aqua, purgationem ventris molirer, & post eam decoctum illud præberem: auspicio pariter successu in tertiana & quartana, præsertim æstiva ac vernali.

*Epicrisis.*

Compendiosa & facilis est hæc intermittentes curandi methodus, solennis non modo in Carolinis, sed & iis locis, ubi acidulæ purgantes saliant. Nec male medentes eidem viæ insistent & primas vias crudis & biliosis fordibus obsessas salibus deplent. Salia enim reliqua ex regno vegetabili purgantia securitate & prompta efficacia longe superant. Tanto vero magis proficua sunt, quando in sufficienti quantitate humidi soluta assumuntur. Hinc si copia non est aquæ ejusmodi medicatæ, ego ad imitationem ipsius aquam paro laxantem, adiiciens uni aquæ mensuræ olei tartari per deliquium unciam dimidiam & in lagena angusti orificii instillans eo usque spiritum vitrioli, donec nulla amplius eveniat ebullitio. Vel dissolvo in mensura aquæ unciam senis salis polychrestii, ex sulphure & nitro calcinatis confecto. Usurpato aliquoties liquore hoc salino, descendo tandem perquam secure ad specifica roborantia, quæ inter primas tenent, cortex chinæ, cascarillæ, tamarisci & omnia amara & ex marte rite parata.

OBSERVATIO XIII.

*tertiana in puero per chlo-  
na cor-  
ticem  
funesta.* Puer facie florens, indole vividus, complexione sanguineus, a biennio aliquoties hæmorrhoidarius, cum abdomine tumido, ceterum valens, post æquinoctium autumnale, tertianam, quo ex diætetico errore nescio, incurrit, eademque ob paroxysmi vehementiam, stomachum penitus lan-

guentem somnumque turbatum, graviter decubuit, urina simul clara & sine sedimento comparente. Excepit hanc Medicus aperientibus, crudos succos corrigentibus turissimisque febrifugis. Sed quum decem paroxysmos passus esset æger, parentes percarum natum vitæ discrimen subire metuentes, inconsulto Medico ab Empirico quodam potius quam Medico opem quæsiverunt, qui electuarium, cujus basis tormentillæ radix, prompte porrexit, ac ut tribus singulis horis, intercalari die, dosis castaneæ magnitudine deglutiretur, præcepit. Mitior inde facta febris, sed continuato aliquandiu adhuc pharmaco, paroxysmi tempore, tremor ac frigus totum concussit corpus, cum collisione dentium & labiorum, sequuta mox convulsio epileptica universalis, per viginti horas, frustra datis omnibus antepilepticis, persistens, ægro sub ipsa extincto.

*Epicrisis.*

Ego quidem permultis confirmatum habeo exemplis, hæmorrhoides in infantibus ac pueris jam prodeuntes, accedentibus pubertatis, vel juventutis annis, raro alium quam sinisterum ac ut plurimum funestum sorti eventum. Ipsum hoc enim ataxiam motus circulatorii in visceribus abdominis prodit, ex qua facile labem & vitium contrahere possunt. Neque ea propter dubium est, quin hoc in puero, infimi ventris viscera, hepar, lien, vel pancreas, fuerint facta & obstructa. Motus autem febriles præsidio potius fuissent, imprimis quum intermittentes per annum sæpe infantes detineant, modo medicatio rite instituat, nec tamen adeo sint detrimento, ut potius corpus firment & longævum efficiant. Perperam igitur adstringentibus salutares hi motus sedati & causa febris altius visceribus impacta, spasmi quoque tam ex hæreditate a matre hysterica, quam ex ipsa febre jam præsentibus, & ex alvi strictura ac limpida urina cognoscendi satis,



fatis, ita adaucti, ut in convulsivos plane degenerarint funestos. Memoratu etiam dignum videtur, quod hic puer multos annos insolita voracitate laboravit.

Has practico-clinicas de tertiana observationes adduxisse sufficiat, plures passim reliquis meis scriptis inferui, & quidem uberius enarratas ac evolutas, *Medicinæ consultoriæ*, ex qua hanc in rem conferri poterunt ea, quæ *Tom. II. Dec. I. cas. IV. pag. 32. seqq.* de gravibus & variis symptomatibus ex male curata intermittente, *Dec. II. cas. VI. pag. 86. seqq.* de febre lenta ex male curata tertiana; *Dec. IV. cas. V. pag. 180. seqq.* de spasmo hypochondriaco ex male curata tertiana; *Tom. III. Dec. II. cas. XI. pag. 106. seqq.* de febre tertiana male curata, sæpius recidiva inque erysipelas cum molestis symptomatibus transeunte; *Tom. IV. Dec. III. cas. IV. pag. 167.* de febre biliosa intermittente; *Tom. V. Dec. IV. cas. I. pag. 243.* de multis atrocibus malis post febrem suppressam & puerperium feminam infestantibus, nec non *Tom. VI. Dec. I. cas. VI. pag. 35.* de tertiana duplici cum purpura in gravida, attuli.

C A P. I I.

D E

FEBRE QUARTANA.

§. I.

Quarta-  
tana  
quid?

**T**ertianam, & gravitate, & contumacia, ex intermittentibus longe adhuc superat ea, quæ quarto quovis die, intercalaribus integris binis, corripit, eamque ob causam vocatur quartana.

§. II.

Paroxysmi  
historia.

Scilicet, post meridiem ut plurimum, hora quarta, aut quinta, quandoque etiam citius, quandoque serius, cum notabili corporis languore, pandiculatione capitisque, dorsi, lumborum ac tiliarum contusivo do-

lore, accedit. Pedes hinc cum manibus refrigescunt, corpus universum pallescit, facies & ungues livefcunt, supervenit horror & rigor, huic febris familiaris, lingua & labia tremunt, spiritus difficulter trahitur, præcordia anguntur, corpus inquietudine jactatur & pulsus arteriarum contractus ac durus, quandoque etiam inæqualis plane percipiuntur. Durant hæc omnia per duas plerumque, aut tres horas, ac interea alvus in plurimis stringitur, in nonnullis ad desidendum & meiendum stimulus, in quibusdam, potissimum senibus, conatus ad vomendum, vomitus & alvi secessus. Multis etiam, inprimis ætate gravioribus, caput mirum turbatur & mens sibi non constat, ut aliena multa loquantur. Succedit lentopostea gressu calor, non adeo urens, sed ariditate quam maxime molestus, evanescit rigor, arteriarum ictus ad æqualitatem redeunt, celerioresque ac majores micant, capitis tamen obtusus dolor perstat, cum vertiginosa affectione, & cutis demum pauca saltem humiditate perfunditur, donec elapsis quatuor vel sex horis, & æstus, & pathemata hæc, discedant. Cessante sic febris impetu, duobus qui vacui sequuntur dies, æger quidem semper fere lectum relinquit, restitat tamen sensus quidam doloris in artubus ac pedibus, ipsa ossa quasi tundens atque profundo pondere obterens, osteocopus græco nomine dictus, caput quoque in quamplurimis grave est & animum fastidium renet, urina quæ in paroxysmo tenuis reddita & aquosa, nunc crassa & cum sedimento secedente.

§. III.

Hæc quæ sub paroxysmi impetu subinde obveniunt pathemata, uberior utique testantur, gravissime nervolarum partium systema in universo corpore pati & spasticis constrictionibus agitari. Eamque ob causam immediata & proxima hujus febris causa constituenda omnino in universali & vehem-

Quarta-  
tana  
causa  
proxima.



vehementi spastica nervosarum partium strictura, quæ ex spinali medulla potissimum procedens, non modo tunicas vasorum, sed & totum nervorum ac fibrarum systema, præter naturam afficit, ut motus solidorum & fluidorum inde graviter turbentur.

## §. IV.

*Materialis,*

Materialem vero causam, quæ nervosas partes in tam exorbitantes motus abripit, Veteres quidem humorem melancholicum extra vasa putrescentem esse voluerunt. Sed sicuti in omni febre, sic etiam in quartana, subest materia activæ indolis & caustica acrimonia imbuta, internas sensu exquisito pollentes partes ad spasticas crispaturas sollicitans. Quia tamen ex pancreate ei nupta est materia, quæ ad acido-viscidam indolem accedit, diuturniores dat inducias, nec tam cito colligitur, nec ad membranas spinalis medullæ ex prima regione tam cito appellitur. Quando vero sufficienti quantitate est collecta in primarum viarum latibulo, massam sanguinis successive subiit, & certo interposito tempore, ad spinæ dorsi membranas delata, febriles eodem modo suscitatur motus, ac præcedenti capite de tertiana enumeravimus.

## §. V.

*Antecedens.*

Jam si porro hujus materiæ febrilis natales rimamur, hæc utique primario arcessendæ ex tardo admodum sanguinis per viscera abdominis depuratoria & secretoria, hepar præsertim, lienem & pancreas, progressu, horumque tandem succedente infarctu & obstructione. Hoc enim facto, humores fermentales, gastrici, lymphatici, salivales, a temperata, subtili, spirituosâ indole desciscunt ac fixam & acidam induunt, ut ad intimam ciborum dissolutionem & chyli extractionem minus sint idonei, sed cruditatam acidarum & viscidarum ingens fiat proventus. Quibus ipsa mora pejorem indolem contrahentibus & ab accidentibus aliis externis causis acrimoniam induentibus, ipsa demum excluditur febris.

## §. VI.

Videlicet languidiorem sanguinis per abdominis vasa cursum in causa esse, ex eo patet, quod huic febri quam maxime opportuna sint corpora consistentis & provectioris ætatis, melancholici temperamenti, & quæ vita sedentaria nimis, intermissa sanguinis missione, victu duro & insalubri, nimioque acidorum & spirituosorum usu, vel etiam solennium criticarum sanguinis evacuationum suppressione, nec non animi affectuum intemperantia, succorum incurrerunt & abundantiam, & spissitudinem ac impuritatem. Causticam vero simul etiam subesse materiæ indolem nemo negabit, qui novit, quartanam post exclusas sub æstate fervente acres sordes plerumque autumnoprodiere, per scabiem quandoque & purpuram solvi, iisdemque repulsis impetere, variolis erumpentibus discedere, ex tertiana gigni, in tertianam quoque transire, & eodem modo ac tertianam in locis paludosis, aere acrium recrementorum copia referto, frequentem admodum esse ac epidemiam.

*Impeditus humorum per viscera pro-gressus.*

*Et acris materia.*

## §. VII.

Sic quidem generata febris quartana varium subinde exhibet genium. Quandoque scilicet simplex est, quandoque duplex. Simplex, ea, ut jam delineavimus, incedit facie. Duplex vero tum dicitur, quando intra quadriduum bini succedentes accedunt paroxysmi, ita quidem, ut uterque peculiarem suum servet typum & singulare accessionis tempus, alternatim semper præcedenti insultui respondens, tertio duntaxat die a febre penitus vacuo. Id quod sæpius evenit, quando simplex quartana perversa medicatione excipitur, aut in vitæ, vel victus regimine, committitur error.

*Quartana simplex est vel duplex.*

## §. VIII.

Legitima dein observatur esse, vel notha. Illa exactius, quam ullum aliud febrium genus recursus terminum servat, tempore scilicet pomeridiano.

*Legitima vel notha.*



ridiano. In hac contra certum non est reditus tempus, plerumque tamen ante meridiem, æstus quoque impensior ipsoque frigore gravior, urget.

§. IX.

Conti-  
nua

Nonnunquam porro quarto quidem quovis die, præviis ut plurimum pandiculationibus & horripilatione, repetit, statum tamen terminum non adeo exquisitè servat, nec defervescente impetu penitus intermittit, sed diebus in simplici intercalaribus, mitius tantum, quam febrili, affligit, calor naturali intensior adhuc adest, pulsus magis auctus, appetitus languet, vires prostratæ sunt, os siccum, caput temulentum, somnus inquietus & urina rubicunda, crassior, cum sedimento roseo mingitur, eamque ob causam a Medicis quartana appellatur continua.

§. X.

Epidemia

Ut plurimum populares habet circuitus & epidemia est, tum maxime, quando æstas præcessit præter consuetudinem calida & sicca, eaque propter acria & multa biliosa recrementa in corpore genita. Id quod anno 1616. *Sennertus de febb. lib. II. cap. 20.* nec non anno 1652. *Bartolinus cent. I. hist. anat. 95.* contigisse, memorant, & nosmetipsi de annis 1684. 1719. 26. & 28. multiplici experientia edocti testamur. Et quia ob æstum nimium potus frigidus sæpe acescens ingeritur, & noctu frigus accedit, perspiratio sordiam acrium impeditur & humores cum sanguine spissi evadunt.

§. XI.

Endemia.

Nonnullas regiones & tractus endemia lue infestat. Nimirum in Westphalia, Pomerania locisque quæ ad boream vergunt, & incolas alunt, victu duriori, crassiori & crudiori utentes, nullus fere elabatur autumnus, quo non multi quartana prehendantur ac diu admodum eadem detineantur. Idem evenit in locis paludosis, stagnorum & lacuum pravis exhalationibus infestis, in quibus vere tertianæ, autumno quartanæ, lar-

go proventu pullulare & crebro recrudescere solent.

§. XII.

Varium etiam quartanæ exhibere solent genium, pro diversitate corporum, quæ corripunt. Nimirum si incidunt in corpus, quod ob vitam sedentariam victumque crassum & durum, copiosum & crassum sanguinem in venis alit, vel hypochondria male constituta habet, aut diuturnior animi mœror præcessit, graves & contumaces esse suescunt, nec periculo vacant, eaque propter in ægrotante exquisitum victus ac vivendi moderamen, in medente autem magnum in exhibendis remediis poscunt judicium. Ubi caco-chymica dispositio & purpuræ forsan materia simul subest, pathematibus longe acerbioribus incedunt, major virium est prostratio, vigilia, mentis emotio, præcordiorum anxietas ac purpura demum erumpit, qua levi ex causa retrocedente, febriles passionibus increscunt graviusque affligunt.

Paras  
in ple-  
bort-  
els &  
hypo-  
chondria-  
cis.

caco-  
chymica  
cis.

§. XIII.

In subiecto, viribus per senium, valetudinem, pravam vitæ rationem, aut animi pathemata exhausto, facile in continuam transit, quæ ex languore virium post paroxysmum, pulsu frequenti, lento calore & appetentia prostrata, cognoscitur, ægrumque in haud leve discrimen adducit. Quando post intensiorem æstatis fervorem, corpus juvenile & agile invadit, paroxysmus longius perdurat, æstus urens magis in liberalem solvitur sudorem, sitis quoque & stomachi languor impensius urgent. Infantes & pueri, quia ægre medicamenta sumunt, nec diæteticis præceptis obtemperant, noctu, removendo stragula, corpus refrigerant & præterea habitum corporis laxum, ad sufflaminandum perspirationis successum, nec non ventriculum ad colligendam cruditatum saburram aptum, obtinent, diutius hac cum febre conflictantur, crebriores in recidivas incidunt, aut aliis

Infir-  
mis se-  
nibus.

juvent.  
bus.

Infan-  
tibus.



aliis postea morbis patent.

## §. XIV.

*Secura  
tamen  
est.*

Interim quartana hæc febris placida admodum est atque secura, nec facile ingulare solet. Sin secus evenit, corpus aut senile fuit & viribus jam exhaustum, aut tenerum nimis epilepticis insultibus obnoxium, aut ipsa febris, intercurrentibus animi pathematibus, tam suscitata, quam exacerbata fuit, aut etiam, vel medentis, vel ægrotantis accidit delictum, quo in quotidianam, aut longum alium funestum morbum fuit transmutata.

## §. XV.

*Sed con-  
sumatur.*

Gravitate tamen & contumacia securiorem hunc decursum compensat. Diu enim trahi, ac sæpius, ceu verum medicorum scandalum, omnia eludere solet remedia. Evenit hoc maxime in ea, quæ autumnino oboritur, & per hiemem persistens, raro admodum prius discedit, quam solstitii vernalis tempore, quo poris adaperitis succisque ob aeris ferenitatem tenuioribus factis, sponte fere evanescit. Rebells etiam maxime est, quando in visceribus, præsertim hepate, liene & pancreate, vitium altius radices egit, vel tota humorum massa spurca & impura, vel etiam systema nervorum admodum debile ac ad anomalos ejusmodi motus, & concipiendos, & fovendos, dispositum. Tanto magis, quando æger voracitate materiam febris colligit semper & auget.

## §. XVI.

*Facilis  
curatio  
est.*

*ex die-  
ta vi-  
ale.*

Contra ea si vernali, vel æstivo tempore incidit quartana, facilis & explicata ipsius curatio, quia aeris temperies & tenuitas multum medicationi velificatur. Quæ etiam ex inordinata diætâ & cruditatibus in prima regione collectis, integris autem visceribus, aut valde prohibita transpiratione succrescit, ex facili, vel unico sæpe vomitorio, vel diaphoretico, ante accessionem dato, discutitur. Et illa pariter, quæ juvenile & viribus pollens corpus detinet, præ-

sertim si bilis plus, quam humor tenax, acidus peccat, ut potissimum fit in epidemicis æstate grassantibus, nisi ægri vel medentis culpa ingravescat, ex facili medicationem admittit.

## §. XVII.

Neque etiam quartana anomala, quæ typum non servat, incerto tempore redit, aut ex simplici in duplicem concedit, adeo est pertimescenda, uti quidem vulgo censent. Ipsum hoc enim indicio est, succos vitiosos non tam lentos & visceribus alte impactos, sed ad emotionem adhuc promptos esse, naturam quoque vegetam in amolienda quæ morbum facit materia. Ne dicam, paroxysmos rite decurrentes, multum facere ad dissolvendos viscidos & discutiendos subsistentes humores, adeoque quo crebrius recurrunt, eo citius causa febris eliditur, & natura ministrante, curatio paucis congruis perficitur.

## §. XVIII.

Licet quartana solenniter nullam criticam servet excretionem, fit tamen quandoque, ut erumpentibus pustulis, maculis, ulcusculis & scabie per universum corpus diffusa, nec non prodeunte hæmorrhoidum fluxu, feliciter solvatur. Vidi quoque in infantibus eam cum auspiciato successu desisse in variolas. Et de gravidis compertum habeo, quod quartanam non prius evaserint, quam superato partu, infante vero eadem affecto.

## §. XIX.

Quin præsidio quandoque est hæc febris & adversus alios, præsertim chronicos morbos, remedio. Auctus enim ille sub impetu solidorum & fluidorum motus lentos succos circumagendo attenuat, latibulis suis elidit & ad veteres obstructions, quæ in minimis vasculis, glandulis & nervosis partibus altius consistunt, expediendas & excutiendas multum confert. Hinc prisca jam medicinæ principes, Hippocrates, Asclepiades, Galenus & Celsus, se quartana remedio uti, affirmarunt. Et certe ad expugnanda hypo-

*Irregu-  
laris  
etiam.*

*Quan-  
doque  
excre-  
tionibus  
sol-  
vitur.*

*Non-  
nun-  
quam  
adver-  
sus  
morbos  
præsi-  
dio est.*



hypochondriaca pathemata spectata ipsius est virtus, quam etiam in epilepsia & convulsivis motibus mire de-  
prædicat *Hippocrates lib. VI. epid.* Ab asthma quoque convulsivo, item calculo, podagra, si feliciter decurrit & prudenter a Medico dirigitur, quartanam liberasse historiæ loquuntur. Dumque corpus ab inhærentibus viscerum vitiis liberat, post discessum suum illud mirifice firmat, ut non tam facile morbis pateat, aut pristinis attentetur denuo, uti experientia suffragante ex *Platone* jam habet *Gellius noct. Att. lib. 17. cap. 12.* Et nos plures novimus, qui post quartanam longævitatē nacti fuere. Quo magis admiranda DEI providentia, quæ ipsis etiam morbis plane incomparabilem & medicinalem virtutem tribuit.

§. XX.

*Sed diuturna.* Sed ubi longius quam par est extrahitur morbus, succi concipiunt dy-  
scrasiam, & si humores tenues ac biliosi sunt, purpura excluditur, vel partibus spirituosus, roscidis, nutritiis diffatis, lentescunt reliqui, corrumpuntur & longos morbos invehunt. Si etiam perversa medicatione excipitur, in graves & capitales degenerat *peram excepta morbos facit graves.* passionēs, cujus generis sunt maxime hydrops, anasarca & ascites, cachexia scorbutica, tumores œdematosi, febris lenta & hæctica, continua, asthma siccum, icterus, tussis ferina, in senibus affectus comatosi & hemiplexia, in junioribus affectio hypochondriaca & in infantibus sævi convulsivi motus, spinam dorsi, antrorsum & retrorsum miseranda facie distorquentes. Et in his quidem omnibus conspicuum post mortemprehenditur viscerum vitium, hepatis nempe, lienis, pancreatis, nec non glandularum mesaraicarum, obstructio, infarctus & corruptio.

§. XXI.

*Quibusdam fœnesta est,* Qui vero quartana febre intereunt, sub frigoris rigore & mente turbata decedunt. Tum enim, qualia duo exempla vidi, in adultioribus adeo

increscit spasmodorum atrocitas, ut nullus plane subsequatur æstus, sed symptomata veneni prorsus æmula adsint demumque interimant. Et in infantibus, spastica strictura in convulsivos plane motus degenerant, funestos.

§. XXII.

Qui demum evadunt, habent utique, ut in vitæ victusque ratione exactum servant postea per aliquod tempus moderamen. Refractaria enim admodum est hæc febris, pristinaque sedem, data levi occasione, ex facili repetit. Sane qui superata ipsa gulæ indulgent corpusque extenuatum largo, tanto magis insalubri cibo, farcire nituntur, promptissime recidivam, ex congesta denuo cruditate saburra, incurrunt. Idem experiuntur, qui saluberrimam illam per cutis spiracula excretionem pensi habent & corpus aeri frigidiori & humidiori incautius committunt, vel frigidum potum ingerunt. Neque minus ex facili iteratoprehendit eos, qui affectuum intemperantia jactantur, ac inprimis impensiori tristitiæ diutius indulgent. Et, quod tamen rarius est, repulsa præpostere, quæ ad habitum corporis cum salute acta fuerat, & per scabiem, pustulas, ulcera & purpuram expulsa, materia, illico impetit denuo, qui sedatus fuerat inde febris impetus.

*Methodus medendi generalis cum indicationibus curatoriiis.*

§. I.

Quo pacto intermittens febris sit arcenda, superiori capite sub methodo præservatoria tam fuse exposui, ut supervacaneum ducam illud hoc loco iterum tradere. Indicationes autem curatoria, causis quartanæ oppositæ, huc redeunt. I. Ut cruditates viscidæ, acidæ, biliosæ ex primis viis, cum chylo & lymphâ successive ad ad sanguinem abeuntes ac in nervosarum partium systemate febriles motus suscitantes, & corrigantur, & per con-

*Facile recidivam.*

*Indicationes quatuor.*



congrua emunctoria evacuentur. II. Ut sanguinis per abdominis viscera, præſertim ad quæ vena portæ excurrit, progressus liber præſtetur, congestio verò, infarctus & obſtructio expediatur, vel minimum major impediatur. III. Ut ſpaſtica vehementior in genere nervoſo conſtrictio, ceu acerbiorum ſymptomatum cauſa, leniatur. Et IV. ut dejectum viſcerum, ſtomachi, nervoſarumque partium robur reſtituatur, ſicque tum ulterior acceſſio, tum recidiva, præſcindatur.

## §. II.

Prima  
perſi-  
cienda  
tempe-  
ranti-  
bus, in-  
cidenti-  
bus &  
vacuan-  
tibus.

Primæ igitur indicationi exſequenda ſerviunt ea remedia omnia, quæ acidum obtundendi, lentos ſuccos incidendi, acres contemperandi, & primam maxime regionem expurgandi facultate pollent. Splendent autem hac virtute alcalina pharmaca, uti ſunt ſalia plantarum per incinerationem parata, ſal potiffimum abſynthii & cardui benedicti. Commendanda etiam ſalia neutra, maxime ſal ammoniacum depuratum, terra foliata tartari, ſal digeſtivum *Sylvii*. Quibus ad bilioſam acrimoniam infringendam, addenda abſorbentia tene-riora, cancroſorum lapides, conchæ, vel cornu cervi ſine igne paratum. Et ſi præterea educendi ſcopus, ſalia fontium medicatorum, Egranum, Ebſhamenſe, Sedlicenſe, aucta doſi, aut ipſa etiam aqua Sedlicenſis, per alvum craſſiores, tartarea verò, per urinarias vias ſubtiliores ſalino ſulphureas ſordes, efficaciter evehunt. Habet etiam purgantem facultatem in quartanariis magnesia alba, quæ acidum primarum viarum imbibendo, tranſit in ſal amarum, ſali cathartico Ebſhamenſi ſimile.

## §. III.

Secunda  
amaris.

Ad obtinendum ſecundæ indicationis ſcopum, egregie faciunt amara, quæ baſamico ſuo fixiori ſulphure bilis baſamum reſtituunt, acidos ſimul ponticoſque humores obtundunt & lenem quandam ſpiritualeſcentiam ſuc-

cis conciliant. Talia ſunt extracta amara, fumariæ, abſynthii, cardui benedicti, gentianæ rubræ, trifolii fibrini, centaurii minoris, eſſentia, vel extractum rhabarbari, nec non pilulæ baſamicæ, ſecundum exemplar *Beccheri* conſectæ, ex aloë bene depurata, extractis amaris & gummatibus reſinoſis baſamicis temperatis, quæ præter facultatem alvum laxantem, etiam attenuantem lentos & ſpiſſos ſuccos obtinent, præſertim ſi earum uſus interponatur ſupra laudatis ſalibus. Pertinet huc quoque conveniens cum debito regimine thermarum & acidularum uſus. Sin vero inveterata nimis obſtructio viſcerum, præſertim pancreatis, quod in quartana rebelli non inſons eſt, lenioribus expugnari nequit, in uſum vocanda penetrantiora magiſque activa mineralis proſapiæ pharmaca, mercurius quippe dulcis, vel noſtra methodo diaphoreticus ſolaris, nec non anti-quartium *Riverii*, quod ex mercurio, antimonio & auro, deſuper abſtracta aliquoties aqua regia & poſtea ſpiritu vini accenſo, paratur. Ex antimonialibus, regulus antimonii medicinalis, panacea Glauberiana & Conerdingiana, item ſulphur noſtrum antimonii correctum, ſine præcipitatione cum acido conſectum.

## §. IV.

Spaſticas generis nervoſi ſtricturas remittunt I. linimenta antiſpaſmodica & nervina, ſpinali medullæ cum frictione calida admota, ex axungia humana, oleo ſpicæ, lavendulæ, rutæ, ſalviæ, baſamo Peruviano; II. clyſteres ex herbis nervinis, carminativis & antiſpaſmodicis, addita ſufficienti quantitate oleorum demulcentium, parati; III. balnea aquæ dulcis, Veteribus inprimis ante paroxyſmi acceſſionem uſitata; IV. epithe-mata & linimenta ex ſpirituofis & aromaticis parata, ſub horrore & rigore regioni epigaſtricæ appoſita.

## §. V.

Ultimæ demum indicationi apprime ſatis-

& mi-  
nerali-  
bus.

Tertia  
lini-  
menta.

clyſte-  
ribus,  
bal-  
neis.

epithe-  
mati-  
bus.

Quarta



amaris  
adstri-  
ctivis.

satisfaciunt omnia amara, quæ simul balsamica quadam adstrictiva virtute pollent. Nobiles hac virtute sunt chinæ & chaccarillæ cortices, nec non cortex capparum, item tamarisci, cinnamomi, rasura fantali rubri & essentia ex amaris plantis extractæ, quæ cum liquore martiali acuata, omnibus fere palmam præripiunt. Instar omnium vero erit electuarium nostrum antifebrile, cujus descriptionem superiori jam capite suppeditavimus.

§. VI.

Eplecar-  
plis di-  
scutien-  
tibus.

Peculiaris etiam virtutis adversus quartanam habentur emplastra carpis manuum applicata, quæ inter famigeratissimum est a *Strobelbergero* dictum. Concinnari autem possunt ex iis, quæ tam aromatico balsamico, quam irritante principio, motum & stimulum fibræ addunt, ut materiam altius partibus nervosis impactam hærentem excutiant, & promptius die vacuo sanguis circumagatur.

§. VII.

Potissi-  
mum  
præsta-  
bile vi-  
nosum  
infu-  
sum.

Præter ea vero quæ hætenus adduxi quartanæ præsidia, non possum, quin bina subiungam adhuc remedia, quæ miram efficaciam mihi olim in Westphalia præstiterunt, propter quam etiam eadem jam *dissertationi de felici quartanæ curatione*, inserui. Primum est infusum vinosum, omnibus curatorii indicationibus satisfaciens, de quo matutino tempore quotidie liberalis haustus sumendus. Recipe fibrarum hellebori nigri, polypodii querni, foliorum sennæ sine stipitibus singulorum unciam, herbæ absynthii, centaurii minoris, cardui benedicti, trifolii fibrini, ana manipulum dimidium, rasuræ ligni colubrini, corticis chinæ, aurantiorum recentium ana drachmas tres, limaturæ martis unciam semis, tartari tartarifati tantundem. Conc-cont. irrorentur drachmis duabus spiritus salis ammoniaci urinosi, misceantur & duabus vini mensuris infundantur.

§. VIII.

Alterum hic est pulvis: Recipe corticis chinæ drachmas tres, reguli antimonii medicinalis drachmas duas, mercurii dulcis, (qui non terendus cum pulvere propter salia, sed cuspi- de tantum cultelli miscendus) croci martis tenuissimi, arcani duplicati, singulorum drachmam, olei menthæ guttas quatuor. M. f. pulvis, cujus drachma dimidia, aut una, cum rob sambuci & julepo rosarum in electuarii formam redacta, mane & vesperi poterit assumi. Et certe egregii usus est hic pulvis in quartana, quæ altas in viscerum penetralibus egit radices, requirit tamen corpus paullo robustius, cum exacto in diætâ & vitæ ratione regimine. Licet etiam molestam quandoque lenem moverit salivationem; ex voto tamen cessit febrisque rebellis fuit expugnata. Ceterum plura de speciali huic febre mendedi methodo, infra observatione X. nec non capite IV. de febribus epidemicis, afferemus.

Et pul-  
vis re-  
solvens  
ac robo-  
rans.

Observationes & Cautelæ  
Clinicæ.

§. I.

Quartana, ex morbis fere contumacissimus, ægri patientiam & Medici expectationem poscit: inprimis ea quæ corpori melancholicæ constitutionis, senibus, hypochondriacis & ubi languidior sanguinis per venas mæfaraicas progressus, viscera infarcta & autumnus adultus, accidit. Non itaque impetuose in his aggredienda, aut violentis pharmacis urgenda curatio. Si secus fit, plus detrimenti, quam emolumenti sperandum.

Quar-  
tana  
contu-  
max  
mor-  
bus.

§. II.

In principio quidem morbi, natura si robusta, validiora resolvendi & colliquandi atque evacuandi virtute pollentia locum inveniunt. Ubi vero morbus inveteravit, corpus tenerum & exquisite sentiens, multaque acria & biliosa recrementa præsto sunt, mi-

Lenio-  
ribus  
tamen  
excipie-  
ntur.



rum inde exacerbatur febris & haud raro ex simplici in duplicem, aut quotidianam plane transit. Temperata potius, plus diætetica, quam pharmaceutica, cum iis quæ lenimento sunt generi nervoso, infestis spasmodis jam affecto, in usum vocanda.

## §. III.

*Et quæ-  
doque  
fuga-  
tur.*

Neque enim adeo refractaria est quartana omnis, ut non sæpius lenissimis cedat. Ego certe plures novi, qui solo usu elixirii temperati balsamici, quod cum aqueo lixivio ex amaris extractis & rhabarbaro, adjecto vino Hungarico, paratum, eandem feliciter evaserunt. Alii solo oleo tartari per deliquium, frequentius cum potu assumpto & hausto ante paroxysmum vino veteri Rhenano, cum, vel sine amaris, subjuncto postea vehementiori corporis motu, ab eadem sunt liberati. Nonnulli balneorum aquæ dulcis usu quotidiano, instituta simul ante accessionem corporis ad sudorem usque exercitatione, curati sunt.

## §. IV.

*Facilius  
sub celi  
favore  
sana-  
tur.*

Semper tamen longe facilius atque felicius quartanæ curatio succedit, si cælum eidem velificatur, & aer purior, subtilior & rarefactus est, uti tempore verno, æstivo sereno. Tum quippe veteres viscerum obstructions promptius expediuntur lentorque succorum liquatur, & perspiratione æquabili atque constanti, acres per apertos cutis poros lordes distantur. Quin novi quosdam, qui non prius convalescerunt, quam mutato cælo & in locum salubriorem secessu, vel alio vitæ victusque genere instituto.

## §. V.

*Potus  
muta-  
tionem  
poscit.*

Potissimum in quartana febre, sicut omnibus longis morbis, ut potus mutetur ex usu est, & decoctum ex radice sarsaparillæ, eichorei, herba cardui benedicti, passulis minoribus & semine fœniculi, tam loco cerevisiæ frigidum quam loco infusi thee calidum bibatur, declinante paroxysmo. Conducibiles quoque sunt pro potu temperatæ acidulæ, uti Selteranæ,

quippe quæ cum dimidia, aut tertia vini parte potæ, in diluendis crassis & evehendis per urinarios ductus impuris succis, effectum præstant saluberimum.

## §. VI.

Studiosè etiam providendum, ut per cutis poros acres subtiles fordes perpetuo eliminentur. Perficiendum hoc tam ante, quam post paroxysmum, & obtinendum, non per potentia sudorifera, sed ea, quæ solidorum tonum intendendo, progressum sanguinis accelerant sicque sudorem eliciunt. Singularis hunc in finem virtutis est validior corporis motus, per equitationem, saltationem, aut ambulationem, aliquot ante paroxysmum horis institutus, quo ego quartanam multoties discussam esse novi. Priscum enim jam *Celsi lib. 3. cap. 15.* hoc est præceptum: *quo die quis febrem expectat, ante surgere & exercere dareque operam oportet, ut in ipsam exercitationem tempus febris incurrat. Sic enim sæpe illa discutitur.* Mira etiam hac in re virtus mixturæ innumeris experimentis comprobatæ hujus: recipe aquæ cardui benedicti uncias quatuor, theriacalis unciam semis, salis cardui benedicti drachmam, antimonii diaphoretici drachmam semis, spiritus vitrioli guttas viginti ad triginta, sirupi cardui benedicti drachmas duas. M. de qua, modo prius probe prospectum fuerit primis viis repurgandis, tribus, vel quatuor horis ante paroxysmum, dimidia, & defervescente hoc, reliqua dimidia portio sumenda.

## §. VII.

Declinante quoque febre, quum defervescente æstu sponte corpus madescit, cavendum, ne sudor externa refrigeratione, vel potu frigidus intercipiatur. Si secus fit, febris non modo diuturnior redditur, sed & facile succedunt contracturæ, nec non tumores pedum œdematosi. Consultum potius, temperato externo calore & diluente

*Nec non  
perspi-  
ratio-  
nis suc-  
cessum  
ante*

*& post  
paroxy-  
smum.*



diluyente calido potu , ipsum placide  
promovere .

§. VIII.

Cum di-  
stinctio-  
ne ad-  
mittit  
venæ-  
sectio-  
nem.

Sanguinis per venam sectam missio,  
auferendis quartanæ causis directe qui-  
dem non respondet ; nihilo tamen se-  
cius , ubi suspicio est , febrem ab im-  
pedito sanguinis per abdominis visce-  
ra progressu sustentari , uti in iis qui  
pathematibus hypochondriaco-hyste-  
ricis obnoxii , fluxum hæmorrhoida-  
lem antea aperti , aut molimina ad  
hunc persentiscunt , utiliter utique  
vena in pede pertunditur , adeo ut uni-  
cæ venæsectione quartanam contuma-  
cem penitus discussam esse , observa-  
verim . Quum etiam gravidæ tantum  
non omnes sint plethoricæ , venæse-  
ctionem , si quartana corripitur ,  
utiliter non modo ferunt , sed & po-  
scunt , ne intenso per spasmos febriles  
sanguinis motu , uterus ad præmatu-  
ram exclusionem sollicitetur . Consi-  
deranda igitur morbi tempora , ipsa  
corpora , vires & fluidorum ac solido-  
rum dispositio , ne perperam instituta  
sanguinis subtractione , sanatio diffi-  
cilior fiat & spasmi febriles accessionis  
tempore incrementum , uti pluribus in dis-  
sertatione , *observationes clinicæ circa  
curationem quartanæ* , inscripta , mo-  
nui . Notabile autem est , quod san-  
guis e quartanariorum vena emissus  
conspicuum exhibeat vitium ac flave-  
scente lenta pituita in superficie obdu-  
ctus compareat , cuiusmodi crustam  
albam pituitosam in venis etiam quar-  
tana defunctorum se invenisse testatur  
*Schenckius* .

§. IX.

Et vo-  
mito-  
ria .

Vomitoriorum usus in quartana pa-  
riter cum distinctione admittendus .  
Quando enim crudorum ac viscido-  
rum succorum colluvies primis , ex  
nimia ingluvie , est in viis ac ad vo-  
mendum proclivitas ; expedit omni-  
no , ut brevissima via per emeticum  
exturbetur , antequam sanguinem  
subeat & systema nervosum afficiat .  
Consultius tamen est , ut nonnisi adhi-  
beantur , quam si viscera salva , ven-

tricus non adeo tener , genus nervo-  
sum non nimis sentiens & debile , ac  
pulmones nulla labe infecti . Præferen-  
da etiam tutiora & appropriata . Ex il-  
lis palmam fert radix ipecuanhæ , quæ  
propter vomitum moventem , aroma-  
ticam & balsamicam habet faculta-  
tem . Et inter hæc antimonialibus an-  
teponenda venerea , vitriolum maxi-  
me cyprium , vel album , eo quod tam  
biliosos & glandulosos ductus simul  
constringendo , ulteriori affluxui mate-  
riæ febrilis aditum præcludunt , quam  
etiam fibras adducendo , & stimulan-  
do , ut firmitus impacta nervosis parti-  
bus materia excutiat , faciunt . U-  
traque vero sociata , in temperamen-  
tum quasi rediguntur , ut medicina  
emergat , tum ad stomachum deplen-  
dum , tum febrem expugnandam , ap-  
prime utilis .

§. X.

Chinæ cortex , cum ratione usurpa-  
tus , spectatæ adversus quartanam est  
utilitatis . Tenendum tamen , non  
prius ad ipsius usum esse descenden-  
dum , quam perpurgatis probe primis  
viis , demta plethora visceribusque in-  
tegris atque apertis . Tutior etiam est  
in quartana biliosa æstiva , quam quæ  
autumno vergente grassatur & visce-  
rum vitio succisque tenacibus fovetur .  
Tum conducibilis ipsum in decocto  
ex vino porrigere , adiectis amaris ,  
aperientibus & diaphoreticis , uti sunt  
summitates centaurei minoris , herba  
cardui benedicti , radix gentianæ ru-  
bræ , pimpinellæ & sal tartari . Ex-  
pedit quoque interdum in hac febre  
virtutem ipsius adjecto martis croco  
& chaccarillæ cortice intendere . In-  
terim si debito tempore , debita dosi  
& quantitate exhibebitur & cum dia-  
phoreticis & solventibus rite permi-  
scebitur , nocebit nunquam . De quo  
pluribus evolvendam commendo dis-  
sertationem , *de recto corticis chinæ usu  
in febribus* .

Optime  
fert  
chinæ  
corti-  
cem ,

§. XI.

Ad minuendos præterea , vel sisten-  
dos plane paroxysmos , in quartana ,  
præ-

Nec non  
epicar-  
pia .



præsertim autumnali & rebelli, nec non quæ segniores naturas infestat & sopore stipatur, admodum efficacia reperi epithemata, ex acrioribus, stimulantibus leniterque vesicantibus composita & manuum carpis applicata. Plebeii quidem allio hunc in finem utuntur, sed ingratus nimis est inde foetor, ideoque optime ejusmodi epicarpiæ concinnantur ex terebinthina, fuligine, sale ammoniaco, araneis contusis, pipere atque theriaca.

## §. XII.

*Mineralibus aquis quomodo utendum & quando*

Minerales aquæ, acidulæ præsertim ac thermæ, meo quidem judicio, tam ad præsertim preservationem, quam curationem intermittentium faciunt. Sed ante paroxysmum & in ipso plane ab iis abstinendum, & videndum, ut ante accessionem febris, aqua per emunctoria congrua jam sit evecta, ne motus febriles inde exacerbentur. Loco potus tamen temperatæ, uti superius meminimus, semper possunt potari.

## §. XIII.

*Alvus clysteribus aperienda.*

Si alvus in hac febre pertinacius clausa atque constricta, expedit eandem potius clysteribus, quam internis pharmacis sollicitare. Optima horum enematum ingredientia sunt, quæ præter vim emollientem, paregoricam & spasmos sedantem obtinent, ut summitates millefolii, flores chamomillæ vulgaris, sambuci, tiliæ, semen cumini, brodium carnis vitulinæ, vitellus ovi, cum pauxillo falis gemmæ. Opportune etiam quandoque iisdem specifica quædam antifebrilia, amara, nervina & roborantia commiscentur. Inter Gallos enim ab aliquot jam annis mos increbuit, intermittentes curandi per decoctum chinæ chinæ, crebrius per anum injectum. Idem tamen etiam cum aliis succedit antifebrilibus, ut carduo benedicto, centauro minori, radice gentianæ, nec non herba majoranæ, roris marini, abrotani & salviæ. Et certe apprime hæc methodus ex usu est in infantibus & qui ventriculum

minus firmum & facile nauseantem obtinent, hac tantum servata cautione, ut alvus prius emolliente & salino solvatur clystere, quam nervinus & roborans iniiciatur.

## §. XIV.

Capitis dolores sævi, qui hisce febribus in provectionis præsertim ætatis personis, junguntur, ægre levantur. Potissimum lenimen sperandum ab iis, quæ alvum liberiores reddunt, nec non a pediluviiis, quæ sanguinis impetum a capite ad inferiora trahunt. Inter externa vero acetum rosaceum, item rutaceum, cum sale & nitro mixtum, pani inditum & applicatum, optimum affert solatium.

## §. XV.

Quo demum pacto, ne quartana, uti frequenter fieri assolet, recurrat, sit præcavendum, egregium sane Celsi est consilium, lib. 3. cap. 16. sic habens: *si febris quievit, diu meminisse ejus diei convenit, eoque vitare frigus, calorem, cruditatem, lassitudinem. Facile enim revertitur, nisi a sano aliquandiu timetur.* Hinc, paroxysmi inprimis die, vitare oportet ventos boreales, aerem compressum frigido-humidum, qualis esse solet in humilioribus, paludosis & subterraneis locis, & perspirationis successus custodiendus. Victus etiam exquisita habenda est ratio, ne nimium ingeratur, tanto minus ex alimentis difficilis solutionis. Animus quoque in tranquillitate servandus, & providendum, ne ira & terrore commoveatur, quo febrem quartanam sanis etiam compluries inductam novimus.

## §. XVI.

Tum stomacho subveniendum & elixiriis stomachicis, ex amaris & aromaticis confectis, digestio secundanda; crebro quidem ac diu, sed parcius iisdem utendo, ne debile jam corpus præter naturam exæstuent. Inprimis curandum, ut per alvi secessum, denovo succrescentes crudi succi, blande subducantur, eamque ob causam crebrius utendum pilulis balsamicis, vel nostris

*Quibus levandus capitis dolor.*

*Recidiva arceda ex diateticis.*

*Et phar. maceuticis.*



nostris cinnabarinis, item de ammoniaco *Quercetani*, quibus, si per chinam febris suppressa, salis digestivi usus jungendus. Et his præsidii non modo pessimæ recidivæ, sed & aliæ sæpius deteriores passionēs, lentæ præfertim febres, opportune præscinduntur.

ENARRATIONES  
MORBORUM.

OBSERVATIO I.

*Quartana in gravi-  
da curata.*

Generosa foemina sanguinea, macilenta, quinto mense gravida, Septembri, posteaquam in nocturno, frigido, nebuloso aere iter fecisset, incidit in quartanam, cui præter sœta symptomata, vehemens cephalalgia, summæ præcordiorum anxietates, vomendi conatus & inquietudo, juncta. Medicus amaram essentiam cum alexipharmaca, in & extra paroxysmum, quotidie ad guttas minimum sexaginta, porrexit, eo cum effectu, ut bini sequentes paroxysmi longe gravius impeterent & superius dictis pathematibus intensissimus æstus, ventris tormina ac dorsii dolores accederent, & abortus plane esset metus. Meum hinc rogatum consilium & quæsitum: an venæsectioni, quam reformidarat primus Medicus, locus? Ego vero expensis circumstantiis, eandem oppido necessariam judicavi. Administrata igitur fuit sequenti post febre die & sanguis impetuose exsiliit. Tum mixturæ calefacienti nimis substituti pulveres temperantes nitrosi, cum emulsione analeptica. Inde sequens paroxysmus mitior factus, & usurpatis per aliquot adhuc dies iisdem, demum electuario nostro, parce, sed iterato exhibito, penitus abacta fuit febris, salvis & matre, & foetu.

*Epicrisis.*

Sicuti tempestitiva sanguinis missio gravidis, quæ ordinario plethoricæ, ad præcavendum abortum pernecessaria; ita multo magis ex usu est, quan-

Tom. IV.

do motu febrili calido, vel medicamento exæstuante, sanguis in vehementem orgasmum, sive motum intestinum expansivum, coniicitur. Feliciter igitur in hac febriente non potuit non succedere febris curatio, posteaquam sanguis subtractus, calida rejecta & surrogata quæ æstum sanguinis restinguunt. Corticem autem chinæ gravidis etiam non nocere, sed circumspecte datum insigniter prodesse, tum hoc, tum aliis multis in comperto est exemplis.

OBSERVATIO II.

Quinquagenarius obesus, vini ac cerevisiæ potator, hinc cachecticus, autumno quartana corripiebatur epidemica eademque per mensem detinebatur, pedibus simul tumidis, alvo adstricta, cum sopore ac torpore in paroxysmo. Frustra datis multis, chinæ cortex tandem in usum vocatus in decocto. Quo per hebdomadem usurpato, febris siluit, sed tumor dextri pedis cum dolore obortus, & enatum, initio superficialium, postea profundius ulcus, supra malleolum. Discussus tamen ligaturis & externis constringentibus aquosis tumor, ulcus quoque consolidatum. Brevi autem post rediit quartana & adhibitis incassum omnibus, per semestre spatium persistit, ægro interim diætæ incurio & lac in paroxysmo copiose ingurgitante. Intumuit hinc venter, urina parce stillavit, spiritus angustus factus, scrotum quoque cum pedibus tumefactum, superiora autem tabida, sequutus hydrops ascites, quo æger extinctus.

*Quartana in cachectico in fune-  
stum hydro-  
pem terminata.*

*Epicrisis.*

Perperam tumor pedis vi repressus & ulcus siccatum, quum quartanæ haud raro his terminentur, iisdemque repulsis, & siant primum, & repetant. E re potius fuisset, cachexiam & viscerum labem oppugnare, & internis magis, quam externis morbo occurrere. Sic omnino



recidiva declinari & æger servari potuisset.

## OBSERVATIO III.

*Quartana ex tertiana, cum salivatione.* Juvenis literatus, computationibus in seram noctem subinde indulgens, autumnno pluvioso sub itinere incurrit tertianam primum. Cujus æstus, quum pomis citriis in taleolos discissis & julapiis copiosis restingeret, successit quartana, cum exquisito contusivo artuum dolore, capitisque ac pedum quasi rigore, alvo simul clausa & urina cum ardore stillante. Diu hæc febris & medicos & medicamenta elusit. Tandem datus hic pulvis: recipe coralliorum, salis absynthii, mercurii dulcis ana drachmam, olei caryophyllorum guttas sex, laudani opiatigrana quatuor. Sumtus is quotidie, bis, eodemque intra triduum consumto, salivatio oborta, post quam febris discessit. Sed periculi non expers erat salivæ fluxus, quum per quatuordecim integros dies, quotidie sæpe ad mensuras duas, succederet, æger neque somnum capere, nec solidi quicquam assumere posset, manus & pedes frigerent, faucium & gingivarum caro mirum tumeret, foetidissimus exspiraretur halitus, corpusque debile & marcidum redderetur. Hinc pedes immissi ter quotidie pediluvio, ex vino, aqua & herbis aromaticis. Alvus subducta clystere ex floribus chamomillæ, herba melissæ, origani, salviæ, oleo chamomillæ cocto, cum sale communi. Interius laxante ex manna, cassia, rhabarbaro & foliis sennæ. Potui datum decoctum ex sarsaparilla, china radice, ligno juniperino & mastiche, cum regimine sudorifero. Fauces elotæ decocto salviæ, menthæ crispæ, florum rosarum rubrarum, balaustiorum sambuci & radice plantaginis, ex vino, adiecta postea essentia mastiches & myrrha. Et circa somni tempus oblatus pulvis bezoardicus cum theriaca coelesti & oleo ligni sassafras. His intra mensem sub-

lata omnia & æger ad sanitatem ductus.

*Epicrisis.*

I. Abusus acidorum & pomorum citriorum tertianam in quartanam commutavit utique. Fixiorem enim & lentam reddidit febris materiam, simulque primas vias acidorum & ponticorum succorum copia opplevit. Et hinc etiam ratio subsequenti in commodum petenda.

II. Ex vero scribit *Willisius de febb.* quartanarios promptos esse ad salivationem, ex levi etiam mercurialium dosi, & quartanam etiam sæpe salivatione solvi. Utrumque confirmatur hoc casu. Ratio vero cur tam facilis sit in quartana, ac uti ego observavi in tertiana etiam, salivatio, hæc mihi videtur, quod, qui eadem decumbunt primam regionem, salis, acidis partim, partim biliosis acribus succis, gerunt obsessam, a quorum falsedine mercurialiumvis mire intenditur. Neque tamen reticendum, enormis in nostro ægro salivationis causam potissimum fuisse, quod mercurius dulcis cum coralliis in calcem ustis & sale absynthii intensius tritus fuerit atque commixtus. Inter omnis enim generis salia, fixa potissimum acalina, cum mercurialibus pessime miscentur, & validiori tritu, drasticam, humores salivales & lymphaticos fortiter commoventem facultatem, acquirunt. Memini etiam paratum a medico in contumaci quartana decoctum, ex cortica chinæ, sale tartari, terra foliata tartari, mercurio dulci & aqua communi, vix coercibilem concitasse salivationem. Idem contigisse novi in quartana ab oblato mercurio dulci cum specifico *Mynsichti*. Hinc auctor sum, ut, qui tuto uti velit mercurialibus, eadem nunquam triturando exactius misceat cum salibus, vel salia prorsus omittat.



OBSERVATIO IV.

Quarta.  
na chi-  
na cor-  
tice &  
corru-  
pta &  
sanata.

Robustus & plethoricus vir, vitæ sedentariæ cum crassiori victu additus, animi affectibus indulgens & ab anno hæmorrhoidarius, Octobri mense, sine præcedente externa causa, inhorrescere coepit, lassitudine corporis & contusivo artuum dolore affligi, pituitam viridem copiosam evomere, cum insigni præcordiorum angore, subsequutus calor universi corporis, cum cephalalgia, cuti arida & urina naturali. Quarto die hæc recurrerunt, ideoque Medicus quartanam esse iudicavit & elixirum amarum cum spiritu salis ammoniaci, nec non infusum herbæ thee, ante paroxysmum, largiter ingerere iussit. Sed ingravescente inde morbo, ad specifica magis descendit, & chinam chinæ, tam intermissionis, quam paroxysmi tempore, liberali manu porrexit. Licet etiam pectus inde longe gravius opprimeretur & vires corruerent, eodem tamen institit, eo cum effectu, ut alvus pertinacius obstiparetur, vomitus in paroxysmo cum mirifica anxietate erumperet hocque non succedente, lypothymia plane ingrueret ac febris in continuam videretur mutata. Ascitus igitur alius medicus, qui venæ sectionem instituens, paroxysmum effecit illico mitiorem. Intercalaribus postea diebus infusum leniter evacuans, ex foliis senæ, radice cichorei, herba taraxaci, passulis, tartaro tartarifato, & sirupo rosarum solutivo, ex vino, per quatuor vacuos a febre dies sumendum suavit. Præcepit etiam ut clystere emolliente alvina regio expurgaretur ac ipso in paroxysmo dorsi spina & pedes linimento nervino inungerentur. His deferbuit magis adhuc febris, dolor osteocopus sublatus, urina reddita largior & sudor liberalius prodire coepit. Transactis autem sic quatuor septimanis, pulverem supra descriptum ex martis limatura, cortice chinæ, mercurio dulci &c. duodecim dosibus

obtulit, expirante sensim febre & agro, consumto hoc pulvere, ad perfectam sanitatem redeunte.

*Epicrisis.*

Docet hæc historia, perniciosum esse specificorum usum ante correctionem & evacuationem humorum nocentium, præstabilem vicissim leniter evacuantium, nec non pulveris ex aperientibus metallicis cum chinchina, facultatem. Et certe tutissimus cortex hic est, si cum laxantibus & diaphoreticis propinatur. Neque enim alia ipsius ratio ac opii, cujus soporifera virtus adjectis purgantibus, sudoriferis, vel etiam diureticis & analepticis, ita cicuratur, ut in innoxium quasi temperamentum redigatur. Hinc serio auctor sum, ut febrifugum hoc, præsertim in corporibus viscerum obstructione & infarctu laborantibus, nunquam solum, sed aperientibus præmissis, vel iis nuptum, exhibeatur.

OBSERVATIO V.

Quum anno 1719. ob siccum & calidum per integros fere quinque menses regnantem aerem, heic grassarentur febres varii generis, quartana etiam correpta fuit juvencula sanguinea mollioris & laxioris carnis. Post quartum paroxysmum Chirurgus per sectam in brachio venam largiter sanguinea, subtraxit & die post pilulas dedit valide purgantes, quibus intra nycthymeron vigesies dejectum. Perstitit hic alvi fluxus per aliquot dies cum torminibus, licet non tam numerosis sedibus, ac demum sanguis plane cum muco secessit. Febris autem inde mitior facta & postea plane discussa. Cruentum etiam alvi profluvium, potibus demulcentibus, ex floribus chamomillæ, sambuci cum lacte, item pulvere antidynterico *Klapperbeinii*, ex bolo Armena & cortice chacarillæ composito, feliciter sublatum.

Quarta  
tana  
purgat  
tione  
curata

*Epicrisis.*

Frequentes hoc anno erant & dysenterix,



lenteria, & varii generis febres, ex una eademque causa, impuris nempe, excrementitiis, acribus, biliosis for-  
dibus in corpore genitis perspiratione suppressa retentis atque in primis viis & duodeno potissimum collectis, quæ postea transmissæ ad sanguinem vel per habitum corporis motu febrili, critice quasi expulsæ fuerunt. Secta igitur in febriente hac vena, perspiratio fuit imminuta, per drastrictum purgans autem impetus humorum ad intestina proritatus, factaque ibi majori acris biliosæ materiæ excretionem, febrilis spasmus, ab hac suscitari solitus, cessavit. Nam sub eadem epidemica febrium affectione observavimus, dysenteriam præpostere cohibitam, febres curatu admodum difficiles induxisse.

## OBSERVATIO VI.

*Quarta-  
na se-  
pius re-  
cidivã  
curata.* Sub principio autumnii, quò frequens erat quartana, invasit etiam solitis pathematibus plebejum juvenem, post copiose ingestum potum corporisque refrigerationem statim ab ira. Superato quinto paroxysmo, tria tartari emetici & quindecim tartari vitriolati grana, sex ante accessionem horis data, quibus cum magna præcordiorum anxietate pituitosum liquamen cum bile evomuit. Ex eo in quotidianam quæ typum non servabat conversa est febris. Oblati igitur pulveres absorbentes, salini, nitrosi & cinnabarini. Inde febris brevior & mitior, alvus fluxa & sudor declinante impetu largus. Elapsis aliquot hebdomadibus, debito tempore ac dosi usurpatum electuarium febrifugum & febris successive abacta. Sed quum liberatus obvia quævis ingereret, corpus a frigore non defenderet, rediit febris, quæ tamen post aliquot paroxysmos, balsamo vitæ ad 30. guttas, in duabus aquæ menthæ uncis, tam ante, quam post paroxysmum, sumto, iterum discussa. Breves autem & hæ erant induciæ. Reconva-

lescens quippe appetitui liberalius indulgit, nec a frigore sibi cavet, ideoque in eundem recidit morbum. Dedi hinc consilium, ut grana 15. piperis albi leniter contusi, cum aliquot cochlearibus spiritus vini, quatuor ante paroxysmum horis ingereret & in lecto sudaret. Quo demum quater usurpato, factum, ut febris penitus discederet.

*Epicrisis.*

I. Febres, præsertim quartanæ, in nullis frequentius recidivant, quam in plebeiis. Hi enim neque diæteticis legibus obtemperare, neque ex præscripto Medici vivere suescunt. Unde plerumque tam ob cohibitam perspirationem, quam ingestos multos & graves cibos, promte iterum fomes colligitur febrilis. Ne igitur in morbum erumpat, vel emeticis superius, vel salinis deterfivis & balsamicis laxantibus inferius, educendus, vel etiam medicamento digerente stomachico præscindendus, cujus generis maxime est piper, in plebeiis summo-  
pere proficuum.

II. Sudor ante paroxysmum convenienti remedio atque regimine prole-  
ctus, neququam nocet, sed ad febrem vincendam ejusque insultum ar-  
cendum, quam maxime salutaris, secus ac communis Medicorum fert sententia. Ego certe multis confirmatum habeo exemplis, sudore ante paroxysmum per accommodata medicamenta provocato, modo prima regio a fermento febrili prius exquisite depleta fuerit, cutis inhorrescentiam & spasmus, sine quo nullus subsequi potest æstus, fuisse prohibitum ipsamque febrem fugatam. Decumanus etiam error est, febrilem materiam demum paroxysmo finito expelli sudore. Tantum enim abest, ut febrem sudoribus post paroxysmum, vel intercalari die largis, cum salute terminatam viderim facile unquam, ut potius, ipsi hi largi sudores debilitatem partium & atoniã cutis indicarint, corpus ad novum paroxysmum disponentem.

OBSER-



OBSERVATIO VII.

*Quarta-  
na in  
quoti-  
dianam  
sepe re-  
deunte  
mutata.* Puer decennis, facie lividus & pal-  
lescens, abdomine turgidus, appe-  
tens tamen ciborum, ex refrigeratio-  
ne sub aura vespertina contraxerat  
quartanam. Opponebantur amara in  
essentiam redacta. Sed aucta inde ap-  
petentia corporisque nocturna denu-  
datione accedente, in quotidianam  
post decem paroxysmos transiit febris.  
Hinc data alternis diebus pilulæ no-  
stræ in vehiculo liquatæ, & cerevisiæ  
potandæ mensuræ indita bina cochlea-  
ria liquoris ex salis tartari, nitri, salis  
ammoniaci, arcani duplicati ana dra-  
chmis duabus, in aquæ fontanæ libra  
liquefactis & decem extracti croci gra-  
nis adiectis. His intra trium hebdo-  
madum decursum febris discussa, ab-  
domen detumuit, atque ex facie live-  
scens color deterfus. Sed post quatuor  
hebdomades rediit febris quotidie,  
quæ quidem iisdem brevi profligata,  
post duos autem menses denuo repe-  
tiit, iisdemque iterum fuit abacta.  
Quia autem animadverti, causam tam  
crebræ recidivæ esse neglectum post  
febrem remediorum usum & diætam  
insalubrem, serio dulcibus, acidis,  
lacticiniis, caseo, fructibus horræis  
interdixi, ac præcepi, ut ternis mini-  
mum diebus aliquandiu pilulis & li-  
quore superius dicto insisteretur. Sic  
demum febris expugnata & puer ex  
voto convaluit.

*Epicrisis.*

Ægre ex quartana levantur pueri,  
crebras experiuntur, etiam post lon-  
gum tempus, recidivas, vel alios lon-  
gos ex ventriculi imbecillitate mor-  
bos, vel etiam catarrhales defluxiones  
lentasque febriculas incurrunt. Inter-  
est igitur, ut tempestive statim in  
principio imminencia mala præscin-  
dantur. Ego quidem ut plurimum va-  
cuantibus medicationem cum successu  
exorsus sum. Ad alvum purgandam  
frequens mihi fuit pulvis Cornachi-  
nus, ex cremoris tartari drachma, an-

timonii diaphoretici granis 12. & dia-  
grydii sulphurati grani sex, cui inter-  
dum nitri paucillum addidi. Hunc in  
tres doses divisum, ter, sex horis an-  
te accessionem porrexi. Si vero nausea  
& conatus vomendi adfuit simul, di-  
midium tantum tartari emetici gra-  
num uni dosi admiscui. Sic expurgata  
sordium colluvie, infusum roborans,  
die vacuo omni bihorio ad cochlear  
unum, dedi sic paratum; recipe cor-  
ticis chinæ unciam semis, chacarillæ  
terræ foliatæ tartari, salis tartari ana  
drachmam, infunde unciis octo aquæ  
cardui benedicti, colaturæ adde julepi  
resarum unciam semis. M. Si his fe-  
bris non discessit, indicio fuit infar-  
ctus viscerum, aut obstructionis glan-  
dularum in abdomine. Ad hanc sub-  
movendam usurpavi liquorem sali-  
num supra descriptum, parca, sed re-  
petita, dosi, simulque pro potu præ-  
bui decoctum diluens atque aperiens.  
Præparatis autem hac ratione primis  
viis & visceribus reſeratis, non dubi-  
tavi, præsertim mitiore & brevior  
jam facto paroxysmo, febrilem com-  
pescere spasmus. In quo quidem con-  
ficiendo, tam in puerili, quam juve-  
nili ætate, tutissimam inveni metho-  
dum *Helvetii*, per clysterem ex deco-  
cto corticis chinæ, bis, vel ter, in-  
tercalaribus diebus iniectam, præ-  
misso tamen, ad educendas prius for-  
des, clystere emolliente. Sic percu-  
rata fuit febris demum, neque un-  
quam rediit, si modo convalescentes  
sibi caverunt a refrigeratione, inflan-  
tibus & alvum constipantibus.

OBSERVATIO VIII.

Senex generosus octogenarius, per *Quarta-  
na in  
sepe  
fun-  
sta.* omnem vitam rarius morbis affectus,  
vesperi, post improvium terrorem  
superingestum cibum, horrore & fri-  
gore corripiebatur, quod sequebatur,  
calor, ut noctem duceret insomnem.  
Redibant hæc quarto die graviora,  
capitis dolore, artuum languore &  
præcordiorum anxietate stipata. In-  
terim



terim vacuis diebus sic satis bene habebat æger, somnum & cibum capiebat. Post septimum paroxysmum consultebatur Chirurgus, qui bis ante paroxysmum porrigebat emeticum, intermedio tempore pulveris acris salinis, cum zingibere & radice ari, febrem oppugnabat & potui suadebat decoctum lignorum temperatum. Invalescebant hinc paroxysmi, inquietudo, sensuum torpor ac mentis plane emotio accedebant, die vacuo etiam persistebat capitis dolor, virium & artuum languor, cum calore præternaturali, & appetentia ciborum plane intercidebat. Vocabar nunc ego ad ægrum per binos jam menses febre decumbentem, nil vero ob plenariam & alimentorum & medicamentorum nauseam efficere poteram. Interim quia alvus adstricta & inflatio ventriculi cardialgica angebat, suadebam ut clyster iniiceretur emolliens, cum carminativis & stimulo salino, quo levamen & somnus procuratus. Carpis etiam emplastrum ad imitationem Strobelbergeriani imponi jubebam, quo mitior fiebat accessio. Interne nil nisi elixir temperatum balsamicum dabam, inprimis quum a salinis deterfivis majores semper præcordiorum anxietates oboriri viderem. Sed deficiente, ob nauseam ciborum, alimonia, febrisque, quæ in continuam quasi concedebat, diuturnitatem, vires demum penitus exhaustæ & mors sequuta, ita quidem, ut bini penultimi paroxysmi, intenso ac diuturno horrore rigore, anxietate, anhelosa spiratione, mentis emotione corporisque jactatione, per quatuor vel quinque horas, cum pulsu admodum contracto & debili, insisterent, succedente postea calore & pulsus in celeriore mutatione, ultimus autem eadem quidem impeteret vehementia, sed nullus plane sequeretur æstus, & æger in ipso rigore atque frigore interiret.

*Epicrisis.*

Quartana febris, Hippocratis &

Celsi effato, per se quidem secura est & neminem facile jugulat, immo, si rite decurrit, ad longævitatē ducit. Sed visceribus inflammatis, aut labe affectis, recte monente Galeno in lib. 3. epid. enecat quamplurimos, sive ob aquam intercutem, sive omnimodam cibi abstinentiam. In pessimis enim est plenaria ejusmodi ciborum averfatio, & ego quidem putrescens tum quoddam viscus esse observavi. Dumque nihil alimenti assumitur, corpori viribusque subtrahitur pabulum, ut illud emacietur & hæc elanguescant penitus. Tanto magis id accidit senibus & febre jam diu attritis. Dein senibus longæ ejusmodi febres, ex animi affectu ortæ, admodum sunt infestæ, & licet vires primum non adeo languidæ, cautissime tamen tractandæ, quum commissos in diætā, aut medicatione, vel leves errores, decrepiti graviter, haud raro capite plane, luant. Qui vero intermittentibus decedunt, sub vehementia febrilium spasmodum, qui fluida ad caput & interna vitalia organa urgent, ibique succos penitus consistere faciunt, pereunt, id quod non modo in quartanis, sed & quotidianis, si continuæ factæ, animadvertitur.

#### OBSERVATIO IX.

Juvenis, literarum perquam subvita sedentaria studiosus, Septembri mense, ære pluvioso vespertino, iter suscipiebat, in diversorio bene prandebat, vinumque austerum, non adeo bonæ notæ largiter bibebat. Vespertinum rediens, paroxysmo afficiebatur febrili, cum artuum languore, qui quarto die gravior & cum majori præcordiorum anxietate redibat. Sumebat hinc ex consilio medici pulverem digestivum salinum, & in paroxysmo, temperantem nitrosum. Alvo inde sexies sine torminibus soluta, febris defervescebat & levior reddebatur. Quum vero quinto post die, vesperti tempestate frigido-humida medicum

rela-

Quartana  
simplex  
primū  
postea  
duplex  
acuta  
triplex  
cum sudore  
pedum  
crata



relaturus successum ipse adiret, domum reversus, ex improvise novum febrilem experiebatur insultum, priori longe acerbior. Redibat idem postero die, tertius erat vacuus, quartus paroxysmus primi, quintus secundi respondentem, inferebat, ut sic quartana esset duplex. Alvus præterea erat stricta, ventriculus cardialgia premebatur, pedes tuebant ad genua usque, totiusque corporis & faciei aspectus erat turgidus. Exhibebatur ipsi liquor salinus, alcalinus nitrosus, in & extra paroxysmum, & die intercalari pilulæ balsamicæ. Quibus alvus bis soluta & in simplicem rursus mutata febris. Insistebatur iisdem eadem ratione remediis, & subsequēbatur copiosus alvi fluxus, cum exquisitis circa umbilicum torminibus, & tam acia nocturnæque ac interdum secedebant, ut anus fere eroderetur. Durabat hæc diarrhœa per aliquot dies febrisque mitiorem insultum faciebat, sed tumor pedum cum gravitate & languore lumborum incresebant potius. Post usum mixturæ ex tinctura antimonii tartarifata, essentia chaccarillæ & spiritu cornu cervi succinato, adhuc quidem febris mitescebat, sed languor corporis, cum inappetentia, lurido aspectu & pedum tumore, metum incutiebant haud levem. Datum igitur extra paroxysmum electuarium ex rob sambuci & juniperi, cortice chinæ & calcarillæ, extracto centaurii minoris, cerussa antimonii, sale cardui benedicti, cum spiritu salis ammoniaci, quo æger illico sensit virium incrementum, stomachus melius appetiit, obtusus & gravativus artuum dolor discessit, febris, post unum adhuc mitissimum paroxysmum, penitus cessavit, tumor quoque pedum sensim subsedit & elapso a primo insultu mense, integra reddita fuit sanitas. Ad quam conservandam, præter exquisitam vitæ ac diætæ rationem, pilularum balsamicarum & elixirii stomachici usus commendatus, & sex jam elapsis septimanis, nihil pla-

ne visum est incommodi.

*Epicrisis.*

Plura ex hac observatione in usum decerpenda. Elucescunt inde procatarticæ causæ, quibus conspirantibus, intermittens febris excludi possit, aeris nempe conditio, sub qua tertianæ & quartanæ jam erant frequentes, imbecillis ex studiorum intemperantia & vita sedentaria ventriculus, perspiratio ab aere vespertino, frigido humido intercepta & stomachus cibi ac potus minus salubris copia refertus. Alvo dein, & naturæ, & medicamentorum ope, soluta, paroxysmus fractus, concessione autem in auram vespertinam frigido-humidam rediit mox, eo quod recrementa halitiosa ac sulphuræ indolis, per poros elabi solita, retroacta & ad primas vias ceu imbecilles partes delata, febrilem rursus constituerunt fomitem. Quod autem simplex quartana in duplicem concessit, id mea quidem sententia, factum a nimis copiosa sentina succorum vitiosorum, in ventriculo, propter ipsius imbecillitatem confluentium. A quibus tamen natura suo robore, arte adjuta, per crebriores sedes se exoneravit, junctis simul ventris torminibus. Porro notabile & hoc, quod succedente copioso alvi secessu, tumor tamen enatus fuerit, imo increverit, luculento indicio, copiosas affuisse cruditates, magnamque viscerum ac partium externarum atoniam. Hinc sumto electuario insigniter robore, redditoque per illud ventriculo & primis viis robore, vires sensibilibiter cum appetitu restitutæ, febris fugata, tumor successive subsedit & sanitas perfecte revocata. Ut adeo pateat, tumorem pedum, sub ipsa febre oborientem, non sic esse pertimescendum, ac eum, qui post febrem, præsertim male curatam, succedit. Specificorum etiam antifebrilium & roborantium, quæ inter primas utique tenet chinæ & chaccarillæ cortex, usum, felicius longe succedere, si corporis partes ipseque ventriculus atonia



nia potius, quam strictura affectæ, & humorum potius copia, quam virulentæ indolis exiguæ molis materia, in vitio est.

## OBSERVATIO X.

*Aucto-  
ris me-  
thodus  
curandi  
quarta-  
na.*

Plures hætenus speciales, de felici, æquæ ac infelici quartanæ curatione, enarravi practicos casus. Quibus addenda adhuc illa observatio, quam in *Medicina consultatoria* tomo 4. Dec. 5. cas. 7. pag. 321. de quartana in gravida feliciter curata, adduxi. Jam non abs re erit, brevibus adicere, qua ego in sananda hac febre ut plurimum usus sim methodo. Nimirum primum fuit, ut ad contemperandos acidos salios, & liquandos viscidos succos, nec non obstructions referandas, ter vacuo die, & una vel altera ante paroxysmum hora, cum haustu cerevisiæ tenuis, præberem cochlear liquoris salini, ex sale tartari, ammoniaco, nitro, tartaro vitriolato, sive arcano duplicato & cortice cascarillæ singulorum uncia semis, soluta in libris duabus aquæ cardui benedicti, sive chamomillæ vulgaris, adiecta demum drachma dimidia extracti croci. Superato tertio paroxysmo, elixirio usus sum antifebrili, ex radice pimpinellæ albæ, contrayervæ, vinetoxici, ligno colubрино, cortice chaccarillæ ana uncia semis, extracto cardui benedicti, scordii, salis tartari ana drachmis duabus, extractis cum spiritus theriacalis & liquoris anodynii mineralis ana uncia, spiritus vini tartarifati octo, aquæ florum sambuci quatuor unciis. Dando illud post paroxysmum ter quotidie, ad quinquaginta, vel sexaginta guttas, cum potu calido, ad sudorem placide eliciendum. Discessit hinc sæpe febris. Quando vero perstitit, infusum laxans superius descriptum, diebus intercalariis mane exhibui, & vesperti modo dictum liquorem salinum. Post aliquot autem dies electuarium febrem fugans, ex rob sambuci, juniperi ana

uncia, corticis chinæ, chaccarillæ ana uncia semis, extracti centuarii minoris, salis ammoniaci, antimonii diaphoretici ana drachma, julepi rosarum uncia una cum dimidia exhibui tempore a paroxysmo vacuo, bihorio quovis, magnitudine nucis moschatæ. Si etiam interea alvus officii oblita, clystere domestico eam ducere jussi, vel elixirium, ex massæ pilularum balsamicarum uncia semis, soluta in unciis quatuor aquæ fumaris, cum uncia olei tartari per deliquium, ad centum guttas porrexi. Discussa sic febre, ad recidivam declinandam, octiduo semel deglutitæ pilulæ balsamicæ, vel a robustioribus efficaciores, ex gummi ammoniaci, extracti hellebori nigri, croci, mercurii dulcis, cinnabaris ana drachma, trochiscorum alhandal drachma dimidia, triginta granorum pondere sumtæ. Usurpatum præterea quotidie elixir stomachale & injunctum exactum in vita victuque moderamen. Nunquam fere sic rediit febris. Si vero forsan id factum, vecte opus fuit. Ideoque aggressus eam sum emetico, ex radice hypecuanhæ, vitriolo cyprio & croco, ac subjungendo statim electuarii usum, penitus expugnavi. Qua etiam ratione, me multoties quartanam epidemicam & ex ingluvie ortam, in plebeiis potissimum, prima in herba jugulasse, testor.

*Epicripsis.*

Methodo hac frequentius summo cum fructu quidem usus sum, nihilominus illud adiciendum in gratiam eorum, qui praxin cum judicio & sufficiente ratione exercere nituntur, putavi, ut non talem methodum in ullo morbo universalem medendi dari autument, quæ perpetua sit & in omnibus casibus & circumstantiis promiscue applicari possit. Illud enim satis serio inculcare soleo meis auditoribus, nec remedia adversus morbum, certæ semper efficacis, nec unam eandemque medendi dari methodum, sed individualem & specialissimam, ex sollicita



licita hiftoriæ morbi & maxime corporis ægrotantis & morbificæ cauſæ exploratione, prævia ſufficienti meditatione & deliberatione, invenientiam eſſe, quæ in eo conſiſtit, ut non modo remedia, quibus utendum ſit, cognoscantur, ſed & quo ordine, quadoſi, quo tempore & quamdiu cum iis continuandum, exquiſita ratione & experientia, qua optime vires & remediorum virtutes perſpiciendæ & addiſcendæ, judicetur.

C A P U T I I I.

De Febre Quotidiana

Theſes Pathologicæ.

§. I.

Quotidiana quæ diſcitur.

**E**T quartana, & tertiana, ex intermittentibus rarior eſt quotidiana, quæ ſcilicet ſingulis diebus accedit & ſolvitur, ſubſequenti poſtea aliquot horarum intermiſſione.

§. II.

Legitt-  
ma ty-  
pus &  
hiſto-  
ria.

Accessio hujus febris primo mane, hora circiter quarta, aut quinta, evenit, cum frigore & horrore, ſine rigore tamen. Sub hoc cardialgica præſto eſt naſea & ventris inflatio, in nonnullis capitis dolor, in aliis animi defectio, in plurimis vomitus, vel alvi ſeceſſus, vel etiam utrumque. Excipit poſtea calor magis lentus, quam mordax, cum ſiti minus intenſa. Pulſus, inordinatus antea & debilis, increbeſcit, non adeo durus tamen eſt, ſed mollior. Neque urina flammea, ſed potius cruda ex citrino turbida. Multis etiam inſuperabilis fere in ſomnum proclivitas. Paucus demum prodit ſudor. Et elapſis decem, vel ultra horis, diſcedit paroxyſmus, corpus hebes & grave relinquens, ſtata poſtero die hora reverſurus.

§. III.

Quandoque notis & va-  
ga.

Sic quidem incedit & decurrit febris exquiſita quotidiana intermittens. Quæ vero typum hunc non ſervat,

ſed vel meridie, vel circa vesperam, vel etiam vago invadit tempore, notha appellatur, erratica, aut anomala.

§. IV.

Irregularis hæc quotidiana, haud raro obſervatur epidemica. Tum nempe, quando irregularis ac inordinata diuturna temporum anni fuit conſtitutio. Ego quidem, poſt continuum intenſum æſtate anni 1727. & 28. calorem, obortas vidi, pro diverſa corporum conſtitutione, tam diarrhœas & dyſenterias, quam varii generis intermittentes febres, & inter has potiſſimum quotidianas.

§. V.

Intermittens autem eſt, de qua agimus quotidiana, ideoque non permittenda cum quotidiana continua. Quæ quidem pariter prima luce cum frigore accidit, ſed calor & languor, cum pulſu celeri ac debili, inappetentia & interdum colliquativus ſudor, per totum reliquum tempus durant. Et ſi longior, ut plurimum funeſta, ægris, fractis penitus viribus, ſub ipſo frigore pereuntibus.

§. VI.

Neque etiam confundenda cum catarrhali. Hæc quippe benigna, vespere cum leniori refrigeratione accedit, mane deferveſcit & catarrhoſis defluxionibus ſatis eſt conſpicua. Et maligna ex repentina inſigni virium proſtratione, & agrypnia facile innotefcit, neque penitus intermittit, ſed tantum remittit.

§. VII.

Differt quoque ab aliis intermittentibus. Quando enim ex tertiana ſimplici fit duplex, ſingulis etiam diebus impetit paroxyſmus, ſed inſultus tempora alternatim ſibi reſpondent, aliæ ſunt cauſæ, alia medicatio.

§. VIII.

Si ex quartana inſultus quotidianus, triplex dicitur quartana, & paroxyſmus non quotidie eadem hora venit, ſed quarto quovis die, quoad acceſſionis terminum, conſpirat, diverſa etiam, ob

Epidemica.

Differt a quotidiana continua.

A catarrhali benigna & maligna.

Tertiana duplici.

Quartana triplex.



ob diversas causas, ineunda medendi ratio.

## §. IX.

*Et lenta.* A lenta demum febre distinguitur, quod illa post partum & circa noctem sine horrore obrepit, cum calore in volis manuum plantisque pedum, noctu etiam magis affligat sudore stipata, mane vero tepescat, nec tamen penitus intermittat.

## §. X.

*Ejus causa.* Jam sicuti omnis febris proxime nervosi generis est affectio; ita formalem pariter quotidianæ rationem spastica nervosarum partium & systematis vasorum agitatione absolvi, indubium plane. Hic autem præternaturalis febrilis motus, per materiam, a naturali & blanda humorum vitalium indole plane alienam, ad sanguineum delatam, nec tamen cum ipso miscibilem, inducitur.

## §. XI.

*Ex vitio viscerum.* Nimirum primæ sic dictæ viæ, ventriculus, duodenum & potior jejuni valvulosi portio, sunt illud latibulum, in quo vitiosa materia fermenti instar hospitatur. Inde per vasa lactea ad sanguinem & succos transmittitur, & cum his ad sentientes internas partes delata, easdem exagitat & ad extraordinarium motum exstimulat. Et certe in quotidiana etiam febre, primam maxime regionem, varii generis vitiosorum, corruptorum, viscidorum, acido-bilioforum succorum saburra, scatere, plura sunt quæ uberius evincunt. Etenim junguntur ipsi ordinario fere ructus, nausea, cum conatu vomendi, inappetentia, cardialgica inflatio, præcordiorum angustia & pectoris oppressio, interdum tensivus, pungitivus ac morficans dolor, ad dorsum excurrens. Fœdus dein ut plurimum & ingratus sapor in ore percipitur, quandoque amaricans, aliquando subdulcis nauseosus, nonnunquam nidorosus plane. Ipsa demum febris naturæ beneficio per crebriores dejectiones alvi sponte haud raro solvitur, in artificiosa autem me-

dicatione, per superius & inferius os evacuantia, cum stomachicis, utramque faciunt paginam.

## §. XII.

Quia tamen longior ut plurimum hæc est febris & ad plures sæpe menses trahitur, iusta utique suspicio est, labem in imi ventris penetralibus subesse firmitus radicatam. Organa quippe secretoria, glandulæ & glandulosæ intestinorum tunicae, remissa nimis sunt atque laxata, ideoque loco subtilis lymphatici salivalis succi, copiosum serosum impurum plorant. Reliqua quoque sanguinis depurationi dicata viscera, hepar, lien & pancreas, ob dejectum robur & languidiorem per ipsa sanguinis progressum, succum lymphaticum & biliosum minus purum in digestionis officinam mittunt. Hinc alimentorum solutio & chyli elaboratio turbatur, multæque serosæ & corruptæ cruditates prima in regione & gignantur, & cumulantur, quæ ipsa mora deterioris indolis factæ, & ad sanguinem delatæ, febrilem uti diximus faciunt motum.

## §. XIII.

Quod autem crebrius, quam in aliis intermittentibus, febris insultus in quotidiana impetat, ob eminentiorem primarum viarum imbecillitatem fieri arbitror. Hæc enim quam maxime cruditatum proventui favet, & facit, ut promte eadem istuc confluant, cito ibi colligantur, breviori etiam tempore sanguinis massam subeant & ad nervosas spinalis medullæ membranas deferantur.

## §. XIV.

Hinc igitur porro est, quod omnia quæ viscerum flacciditati inducendæ & crudorum ac impurorum succorum proventui favent, ad hanc febrem sternant viam. Insidiatur potissimum hominibus segnioribus, otiosis, inordinata & cruda diæta utentibus, crapulæ ex cerevisia, nec non mœrori ac curis nimium indulgentibus, item qui debilem ob prægressos morbos, vel sanguinem effusum, nacti ventricu-

*Sedet in primis vis.*

*Cur quotidiana insultus.*

*Cause antecedentes & subiecta.*

lum



lum : Frequentius etiam infestat hiberno, autumnali nubilo cœlo, senes magis & pueros, feminas plus quam viros, pituitosos, phlegmaticos & sanguineos, præ biliosis & melancholicis. Ex aliis quoque intermittentibus prompta ipsius genesis. Tum scilicet, quando æger incongrua vorat, vel crebrius animo movetur, quando purgantibus & emeticis validioribus stomachi robur atteritur, anodyna, calida & spirituosas usurpantur, aut pensi habita primarum viarum repurgatione, adstringentia & specifica præpostere adhibentur.

§. XV.

*Exquisita longæ, vagon.* Ceterum quotidiana exquisita, ex viscerum atonia oriunda, longius ut plurimum trahitur, multumque negotii Medico faceffit. Quæ vero vaga, populares habet circuitus & succorum tantum vitio debetur, facilius sanationem recipit.

§. XVI.

*Contingit pro-  
pinqua  
magis  
anceps.* Minus dein periculosa est, quæ plenariam paroxysmi habet intermissionem. Sed quæ ad continuæ indolem inclinat, & soluta febre, languor tamen virium, cum pulsuum debilitate & frequentia persistit, corpusque sudore diffluit, ita, si ad aliquot menses producit, vires enervat, ut æger haud raro succumbat.

§. XVII.

*Ex intermittentibus periculosa.* Quæ etiam ex intermittentibus, præsertim quartana, succrescit, rebellis & periculi plena est, prisco jam *Celsi libr. 3. c. 15.* testimonio : *quartana, inquietis, neminem jugulat, sed si ex ea facta quotidiana, in malis æger est.* Magnum enim viscerum vitium subesse indicat & continuæ plerumque est propinqua.

§. XVIII.

*Si excretionibus ad-  
sunt,  
bonum.* Quando incipiente accessione biliosi & pituitosi vomitus, vel secessus, eveniunt, bonum, nisi forsan ex febris diuturnitate vires jam nimium fuerint exhaustæ. Sudor quoque declinante paroxysmo placide erumpens & urina post febrem copiosior cum sedimento

secedens, vehementiam insultus minuunt febrisque felicem solutionem nunciant.

§. XIX.

Contra ea, ubi excretio nulla, febris etiam per longum nimis tempus detinet, viscera demum labem contrahunt & cachexiæ, febres lentæ & hæticæ, tabes, in dispositis etiam phthises, succedunt.

§. XX.

Idem perquam facile evenit, quando adstringentia & specifica febrifuga præpostere adhibentur. Et si calidioribus sudoriferis & essentiis alexipharmacis spirituosas acria ex prima regione recrementa in sanguinem aguntur, expeditus in continuam, cum sudore perpetuo & virium jactura, est transitus.

§. XXI.

Qui autem hac febre demum decedunt, in his frigus longe intensius ac magis diuturnum, cum rigore, virium prostratione mentisque turbatione. Hoc plerumque bis adhuc excipit calor, sub tertio autem insultu, pulsuum ictus debiles manent & inæquales, ipsumque frigus in rigorem transit emortualem.

INDICATIONES

Curatorie.

Cum Methodo medendi Generali.

§. I.

**Q**Uum itaque causæ quotidianæ intermittētis, cruditarum ferroso viscidarum prima in regione saburra, viscerum & glandularum flacciditate & impedito sanguinis peritum ventrem progressu contineantur; omnis omnino medicatio merito eo dirigenda: ut I. impuri illi & pravi succi e primis viis, præparati prius, per congrua emunctoria proscribantur; II. viscera a tono dejecta roborentur & sic cruditarum ulterior proventus arceatur; & III. liber sanguinis per viscera abdominis & intestinorum



finorum canalem, tanquam digestionis & chyli elaborationis officinam, circulatio restituatur.

## §. I I.

*Profundius  
salia  
neutra.*

Primum ut ex voto perficiatur, laudata est virtus incidentium & abstergentium, & quidem salium neutrius generis, inter quæ primas tenent sal ammoniacum depuratum, digestivum *Sylvii*, ex capite mortuo spiritus salis ammoniaci urinosi, tartarus vitriolatus, arcanum duplicatum, sal Ebshamenſe, Sedlicenſe, nitrum antimoniatum. Dein commendanda etiam quæ fale acri aromatico pollent, uti radix ari, calami aromatici, pimpinellæ albæ, costi veri, zedoariæ, canella alba, zingiber, piper album. Quæ in pulverem redacta, salibus dictis mixta, & adiecta una vel altera guttula olei carminativi, egregiam suggerunt medicinam antifebrilem.

## §. III.

*Pilula  
balsamica  
cum salibus.*

Ad primæ æque ac secundæ indicationis scopum obtinendum, exturbandas nempe leniter per alvum sordes, roborandum simul tonum ventriculi & intestinorum eorumque turbatum motum restituendum, salubritatis laudem merito ferunt, pilulæ balsamicæ Beccherianæ, Stahlianæ & nostræ, massa etiam pilularum aloephanginarum, de succino *Cratonis*, item *Solenandri*, præsertim si una cum ipsis salibus offerantur.

## §. IV.

*Amara  
& roborantia.*

Potissimum vero ad reddendum visceribus abdominis robur ac impediendum impurorum succorum in digestionis officinam affluxum, ex usu sunt elixiria amara cum martialibus mixta, uti quidem est meum temperatum balsamicum, sine spiritu vini paratum, cum liquore alkalino. Vel essentia chaccarillæ cum essentia gentianæ mixta. Vel etiam elixiria stomachica, uti nostrum, vel *Michaelis*, additis aliquot guttis tincturæ martialis, ex floribus salis ammoniaci martialibus, cum spiritu corticum aurantiorum rectificato factæ.

## §. V.

Et his quidem etiam promovetur egregie sanguinis per abdominis vasa ipsamque digestionis officinam progressus. Interim si refractaria admodum febris, repetit & ab inordinata diætâ sustentatur, omnia salubritate antecellunt medicatæ aquæ, thermæ potissimum atque acidulæ, uti *Carolinæ* & *Egranæ* tepesactæ, quæ debito cum regimine, intermixtis amaris, balsamicis & anticachecticis, usurpatæ, viscidas sordes diluunt, per alvum & urinam cum serosis evehunt, infarctus expediunt liberumque sanguini reddunt com meatum.

## §. VI.

Specialis autem medendi cum hisce præfidiis methodus, pro temperamentorum, ætatum, anni temporum ratione, corporum constitutione, dispositione primarum viarum, sexu morbiq; causa, instituenda, & singulis his, tam dosi remedium, quam sumendi ratio accommodanda. In genere tamen tenendum: horis a paroxysmo vacuis pulveres salinos cum incidentibus esse exhibendos, tertio vel quarto die ventrem solvendum pilulis, ita tamen, ut operatio earum accedente paroxysmo jam sit absoluta, declinante paroxysmo erupturum sudorem quiete & calido potu esse promovendum, ac demum subjungenda roborantia, amara, martialia & antifebrilia. De quo tamen plura in cautelis & morborum enarrationibus.

*Therapia  
in  
primis  
& acida.*

*Methodus  
medendi.*

## Observationes &amp; cautela clinica.

## §. I.

Quotidianæ intermittentes circumspecte sunt tractandæ, ne in alios longos & ancipites morbos tranſeant. Inprimis aspernantur adstringentia & sopientia, præcipitantia terrea larga, item omnia purgantia drastica & sudorifera, nec non validiora emetica.

*Medicatio  
caute  
instituen-  
da.*

## §. II.

Multum tam ad quotidianæ curationem, quam recursum ipsius arcendum

*Visus  
& vis  
ratio  
habenda.*



dum facit, vitare animi commotiones, moerorem inprimis ac diuturnam solitudinem; cum insalubri cibo, ac vini potu, nec non refrigerationem, præsertim abdominis.

§. III.

*Albina excretio promouenda.* Quum natura ipsa hanc febrem critico alvi fluxu sæpe solvere soleat; ipsius ductui insistendum ipsaque iuvanda ab artifice. Unde ægri non ad regimen sudoriferum, aut pharmacis ad sudorem cogendi, sed potius eo annitendum, ut materia vitiosa ipsæque primæ viæ ad alvi fluxum salutarem præparentur ac disponantur. Quod quidem egregie perficitur, quando aliquot ante paroxysmum horis, lene laxans, pulvis cornachinus, vel pilulæ balsamicæ, cum sale præbentur.

§. IV.

*Vomitus secundus.* Quia porro vomitus huic morbo jungitur, cum bonis ægrorum rebus succedens: e re est, ut idem debito tempore & convenienti medicina secundet. Hinc expedit interdum omnino stomachi subversionem per emetica ante paroxysmum data provocare. Ego quidem memini, me aliquoties in febre exquisitè quotidiana, quæ hora quinta matutina invadere solebat, porrexisse circa noctis tempus, prius quam cruditates ex digestionis officina ad sanguinem delatæ, lene vomitorium, ex radicis ipecacuanhæ granis ʒ. cum dimidia parte pulveris cornachini. Proritus inde felici cum successu fuit vomitus, nonnunquam alvi fluxus, & febris minimum mitior facta, aliis postea facile expugnanda.

§. V.

*Etiam in diuturna.* Si etiam quotidiana febris diu perstitit per mensem, vel longius, ac in lentam ferme degenerare videtur, commode offerri potest granum unum tartari emetici soluti. Quo biliosum stagnantem, succum, cum levamine, incredibili fere copia, fuisse exturbatum, novi.

§. VI.

*Externa ventriculo.* Quando dolor ventriculi pressorius, vel inflatio & ciborum fastidium jun-

Tom. IV.

gitur, regioni epigastricæ sacculi ex herba menthæ, absynthii, rorismarini, floribus spicæ, chamomillæ Romanæ, caryophyllis & nuce moschata, vel sicci, vel ex vino cocti, applicandi. Qui, ubi finita etiam febre imponuntur, perspirationem & sudorem efficaciter eliciendo, egregie profunt.

§. VII.

Frigus, quum nimis acre partes externas exagitat, tum sacculi modo dicti, tum etiam spiritus vini purus, cum oleo menthæ in duplicato linteo stomachali regioni apponuntur cum fructu.

§. VIII.

Cum febrifugis caute in hac febre mercandum. In quotidiana tamen epidemica & erratica, præter superius dicta, specifica etiam antifebrilia, ipsum quoque electuarium, cujus basis chinæ & chaccarillæ cortex, tuto adhibentur. Provocata inde, observatorum etiam fide, alvi sæpe laxitas & copiosæ summa cum euphoria sedes. Chaccarillæ autem cortex in hac febre merito præferendus chinchinæ, quia magis roborans & adstringens est.

§. IX.

Sanguinis missionem raro admittit quotidiana. Jam enim præsto est in primis ventriculi imbecillitas & plerumque cachectici quippiam complicatur. Quod si autem eminens plethora, præsertim æ mensum, vel hæmorrhoidum suppressione, urina præterea tincta & æger vini potui assuetus, in principio statim vena secanda, ne febris inde ingravescat, ac uti observata Medicorum testantur, lentæ, hæcticæ apostematicæ febres, subsequantur.

Enarrationes morborum.

OBSERVATIO I.

Illustrissima persona, triginta annorum, inordinatum diu sectata fuerat vitæ genus, multa incongrua edulia ingesserat, fructus horæos, lacti-

Quotidiana rebellis Caroli nis expugnata,

D

cinia,



cinia, acetaria, variaque conchyliorum genera, Vina etiam potentia & aquas sic dictas vitæ liberaliter potarat, prandium ad vespeream, & cœnam ad mediam usque noctem produxerat, & præterea corpus frigido aeri autumnò crebrius exposuerat. Incidebat hinc, prægresso frigore in febrem, quæ mane quotidie accedebat, cum præcordiorum anxietate, cardialgia, capitis dolore, artuum lassitudine & vomitu pituitoso affligebat, ad tertiam vel quartam pomeridianam durabat, somnum turbabat, & post aliquot insultus, largo stipabatur sudore. Appetitus tamen non adeo erat dejectus, sed æger in cœna subinde cibos sumebat, inprimis intrita cum vino. Insistebat hæc febris per quatuor & quod excedit hebdomades, corpusque admodum hebes & languidum reddebat, licet interim variis remediis, purgantibus cum emeticis, salinis pulveribus, etiam cum floribus salis ammoniaci martialibus oppugnaretur, donec infuso corticis chinæ cum comis absynthii, ex vino, abigeretur. Sed quum appetitui redeunti indulgeret æger multaque minus salubria assumeret, rediit, elapsa vix hebdomade, febris, majori cum symptomatum vehementia. Opponebantur eadem & evacuantia & antifebrilia, febrisque discedebat, brevi autem post eandem ob causam repetebat, idque minimum sexies factum, ut semestre interea afflueret spatium, quo corpus ob nocturnos sudores tabidum factum ac vires mirum exhaustæ. Alii igitur accersiti Medici, qui de thermis Carolinis, sub exactiori diætâ & regimine usurpandis, consilium dederunt. Allata etiam in lagenis vitreis magnis impensis thermalis aqua, & tepesacta ante paroxysmum, mane æque ac vespere, pota. Sed quum intermedium tempus brevius esset, quam ut aqua ante accessionem corpore posset evehi, gravior primum inde fiebat paroxysmus. Ideo febriles motus specificis prius compositi fuerunt & postea per binos menses

Carolinæ singulis diebus matutino tempore usurpatæ, interpositis simul medicamentis amaris stomachicis & pilulis balsamicis. Quibus demum effectum, ut febris contumax expugnaretur, nec unquam rediret.

#### *Epicrisis.*

Voracitas & inordinata diætâ rebellem facit intermittentem omnem, tanto magis quotidianam, quæ, ex imbecillitate stomachi & crudorum copia oriunda, novum inde semper nanciscitur fomitem. Dein quum longa febris sedem potissimum habeat in visceribus imi ventris, a crasso sanguine fartis, quæ tracta diutius febre, magis magisque robore exuuntur, in illustrissimo etiam hoc ægro viscera debilia fuisse atque oppleta, certum, unde crebriorum recidivarum origo. Nihil igitur salubrius fuit decenti thermarum usu, quæ partim salino aperitivo, partim terreo martiali principio roborante instructæ, crudos succos efficaciter evehunt, infarctus expediunt & sic lentam febrem, nec non cachexiam, quam optime præscindunt. Sunt tamen thermæ æque acidulæ cum cautione in intermittentibus in usum vocandæ, & providendum, ne paroxysmus in earum operationem incidat, emunctoria claudat, & aquis retentis, anxietates cum gravibus symptomatibus inferat. Hinc tutius, iisdem, composita febre, ad recidivam arcendam uti, & tum, adjunctis medicamentis stomachicis & balsamicis, opem ferunt certe laudatissimam.

#### OBSERVATIO II.

Generosa erat femina, triginta circiter annorum, sanguinea, vegeta & tenera, quæ quarto mense gravida abortum cum enormi hæmorrhagia & post hunc mensem suppressionem experta, pallida hinc facta fuerat atque cachectica, cum alvo adstricta & appetitu dejecto. Hæc postquam ostreas in cœna comedisset & vespere sole occi-

*Quotidiana  
recidivans  
curetis*



occiduo in horto deambulasset, nocte insequente febre corripiebatur, cum anxietate, nausea & ingente artuum languore. Remittente febre dabatur ipsi quidem elixirium stomachale, sed noctu eodem tempore iterum redibat febris gravior paullo. Porrigebatur ob suspicionem cruditatum vomitorium, ex tartari vitriolati granis XII. & radicis hypecuanhæ granis 25. quo crassam viridis coloris pituitam evomebat. Nihilominus stato repetebat tempore febris, majori adhuc compressorio in epigastrio sensu vomendique conatu, quæ silente etiam febre persistebant. Aperiebatur quidem vesperi alvus stricta clystere emolliente; febris tamen & ventriculi spasmus per aliquot dies insistebant & facies icterica plane comparebat. Exhibebatur ipsi mixtura ex aqua cardui benedicti unciis tribus, theriacalis, cinnamomina uncia semis, salis cardui benedicti, antimonii diaphoretici ana scrupulis duobus, spiritus vitrioli guttis 20. sirupi papaveris rhœados drachmis duabus, cujus dimidiam partem vesperi sex ante paroxysmum horis, sumfit, imposito simul ventriculo sacculo, ex speciebus stomachicis & carminativis in vino coctis, quo sudor ante invasionem largus & febris mitior. Instante sequenti paroxysmo, alteram reliquam mixturæ sumfit partem, qui emanfit prorsus & spasmus quoque cardialgicus laxatus. Quum vero ægra convalescens appetitui indulgeret, fructibusque horæis ac marinis piscibus vesceretur, quinto post die iterum in febrem incidit, majori fere anxietate, vomendi conatu animique quadam defectione stipatam & vesperi accedentem. Solvebatur hinc alvus, mixtura & externa adhibebantur, sed incassum fere. Persistebat enim potius fervor & languor cum magna debilitate, etiam superato paroxysmo, ut metus esset continuæ. Injiciebatur rursus clyster & vomitorium supra dictum porrigebatur, sequente & vomitu, & alvi secessu. Mitescebant inde

symptomata cum febre, & pulvere ex corticis chaccarillæ, tartari vitriolati & salis ammoniaci anatica portione confecto & per septem dies, quatuor quibusvis horis, ad drachmam dimidiam usurpato, discussa demum omnia, ventriculo & corpori robur redditum, mensium quoque fluxus in ordinem redactus.

*Epicrisis.*

Caveant sibi omnes, qui ex sanguinis immodica profusione languent, a prava diæta & corporis refrigeratione. Tum enim, ob imminutum corporis ipsiusque ventriculi robur, perspirationem quoque imminutam, prompta febrium genesis. Deinceps in quotidiana, cujus causa ingens cruditatum in stomacho & primis viis saburra, magis quam ulla alia intermittente, conducibile est, ventriculum, præmissio blando enemate, leni emetico deplere. Tum spasticas ventriculi stricturas nihil promptius laxat, quam placidum elicere sudorem, quam in rem spirituosæ regioni epigastricæ calide applicata egregie conferunt. Tandem expurgata prima regione, chaccarillæ cortex cum salibus, non modo ad febrem fugandam, sed & digestionis successum fulciendum, utiliter adhibetur.

OBSERVATIO III.

Senex, sexagenario major, macilentus, sanguineo melancholicus, continuis laboribus per multos annos sub vita sedentaria distentus, superiori anno, quo solennes erant intermittentes, corripiebatur tertiana, posteaquam peregre profectus, liberali convivio exceptus & noctu sub cœlo valde humido & pluvioso frigido redux factus esset. Placide hæc admodum decurrebat, & adhibitis prius pulveribus salino digestivis, post quintum paroxysmum electuario expedite discutiebatur. Nolebat tamen pristinus vigor & appetitus redire, sed a sumto cibo pressorius semper in epigastrio ur-

*Quotidiana ex tertiana electuario sanata.*



gebat dolor, nec somnus adeo erat quietus. Dabatur quidem, ad digestionem secundandam, quotidie bis, ac drachmam semis, pulvis ex radice ari, pimpinella alba, gentiana rubra, semine cymini & macis. Sed præter opinionem quotidiana post aliquot dies accedebat febris vesperi. Promtum statim habebat Medicus electuarium ex rob juniperi, cortice chaccarillæ & sirupo acetositis citri, idque omni bihorio deglutire jubebat. Sumto hoc, repetebat quidem paroxysmus, sed sub illo & post eum copiosæ prodibant dejectiones, vel decem numero, ut æger firmiter crederet, validum se accepisse purgans. Continuabatur igitur pariori dosi electuarii usus, tam salubri effectu, ut febris discederet & æger penitus convalesceret.

#### *Epicrisis.*

Enata procul dubio hæc ex tertiana quotidiana fuit, quod sub illa, prima non sufficienter expurgata regio. Unde reliquæ materiæ febrilis, accepto per malam digestionem incremento, induxerunt quotidianam. Plane peculiaris etiam heic fuit corticis chaccarillæ effectus, canalem intestinorum efficaciter vacuans, febrisque fomitem simul & semel tollens. Is tamen non ubique perpetuus, sed peculiari primarum viarum dispositioni tribuendus. Alias inter omnes constat, corticem hunc potius ad compescendas nimias dejectiones valere. Ut adeo pateat: unum remedium, pro diversa naturæ & corporis habitudine, alium atque alium, & diversum, contrarium plane, exserere posse effectum.

#### OBSERVATIO IV.

Quotidiana  
anoma-  
la post  
hyper-  
cathar-  
sin.

Nobilis quædam tenerior & sanguinei corporis femina quinquagenaria, regnante Sirio & instante mensium fluxu, gravi exagitata fuit ira, cum extremorum tremore. Porrexit Medicus paullo post purgantes pilulas, quibus tanta hypercatharsis suscitata, ut intra 24. horas plus quam quinquage-

giesies, & postero adhuc die, vigesies fere, deiceret. Fractum inde mirifice corporis robur, artus languerunt, ingruit animi, præsertim erecto corpore defectio, periit appetitus, somnus turbatus & pæne omnis intercidit. Exactis inter hæc aliquot diebus, vesperi accessit anxietas summa, cum levi duntaxat horrore & frigore, inquietudo & syncoptica affectio, ut jam animam agere videretur. Subsequenti pulsus ictus celeres, æstus corporis, oris siccitas, & mador corporis, per duodecim horas halans, symptomatum attulit levamen. Habuit postea tantisper melius. Febrilis tamen commotio modo vesperi, modo noctu, jam gravior, jam levior, rediit quotidie, tussis sicca, & ante, & post illam affligente. Ægre tulit fere omnia stomachus, analeptica, salina, balsamicas pilulas, elixiria stomachica, alimenta ipsa, & quamvis suspensa manu datis, sequuta anxietas, æstus, pressio, strictura & ardor ventriculi, nec non tormina ventris. Sic decubuit per mensem, ac interea nihil melius ferre potuit, quam emulsiones ex amygdalis dulcibus, semine papaveris albi, aqua florum acaciæ, liliorum convallium, tiliæ & ceraforum nigrorum, quibus tantillum pulveris bezoardici nitrosi subinde inditum. Potui datum præterea decoctum avenaceum, nonnunquam in levem emulsionem cum amygdalis redactum. Et ad alvum obstructam solvendam, enemata leniens injectum. Elapso autem mense, quodammodo commodius excepit ventriculus medicamenta. Hinc sumsit quandoque decem tantum pilulas ex nostris, quibus alvus cum euphoria laxata. Exhibitum quoque elixirium nostrum balsamicum, parca pariter dosi. Remanserunt nihilominus febriles commotiones, licet mitiores & sine angore. Ad has igitur componendas oblatus ter quotidie hic pulvis: recipe lapidum cancrorum, antimonii diaphoretici, arcani duplicati, corticis chaccarillæ, ana drachmam.



mam. M. f. Pulvis, dividatur in decem partes æquales. Et ad alvum subducendam usurpatum elixirium purgans, ex massa pilularum balsamicarum in tenui lixivio soluta. His demum intra quadraginta dies sensim febris sublata, vires cum appetitu & sanitate integra redierunt.

*Epicrisis.*

Perniciosum utique fuit molimen, post iram & ingruente mensium fluxu, purgans dare, quia tum jam in motu natura & spastica in nervosis partibus stricturæ adsunt. Neque dubium est, quin sub proritata inde vehementiori purgatione & affluxu fucorum impurorum ab ambitu ad interiora, & erosio, & levis inflammatio intestinis fuerit inducta, quibus effectum, ut, nec medicamenta, nec alimenta, sine incommodo, anxietate & æstu suscipere potuerit. Febrilis etiam irregularis insultus, quotidie bis interdum accedens, cum tussi, suscitatus omnino fuit a levi intestinorum inflammatione, sub qua semper stimulus spasmodicus & vitiata occultatur digestio. Hæc igitur partium & morbi causæ dispositio, nec correctoriam, nec evacuantem, nec roborantem aliam admisit medicinam, quam lenientia & demulcentia. Febri autem, quotidianæ typum servanti, accommodatius fuit nihil, quam chaccarillæ cortex, eximie roborans, mixtus cum aperientibus salinis, absorbentibus leniterque diaphoreticis. Cujus generis pulveres in quotidiana febre, etiam lenta & quæ ex vitio primarum viarum maleque digestorum succorum colluvie oritur, virtutis sunt certe laudatissimæ.

OBSERVATIO V.

*Quotidiana exquisita diuturna.* Quadragenaria circiter femina, sanguineo-cholericæ laxiorisque corporis constitutionis, quæ in iram prona, inordinata diætâ cum fructibus horæis usa & infusum thèe large nimis ingurgitans, stomachi sibi contraxerat lan-

*Tem. IV.*

guorem, paullo post mensium experiebatur suppressionem. Hos quum proprio artificio pellentibus urgeret, febrem incurrebat quotidianam, ordinariis symptomatibus comitatam, Medici tamen ope, exactis tribus mensibus, ab eadem liberabatur. Non autem ita multo post, emanentibus semper mensibus & alvo stricta, in eundem recidit morbum, quem complures in auxilium vocati Medici, nec pharmacis, nec aquis medicatis, Egranis æque ac Lauchstadiensibus, neque etiam lactis asinini usu, depellere potuerunt. Perstitit potius idem jam a triennio immedicabilis, & quotidie prima luce accedit febricula, quam comitatur sudor colliquativus pæne, ad decimam usque antemeridianam manans, & pomeridie sequitur languor cum dolore lumborum. Præterea extra paroxysmum corpus totum tactu frigidum, vix vesperi ex cibis quicquam assumere valet & tum etiam ad incongrua magis fertur appetitus. Pallida quoque facies totusque corporis habitus tumidus quasi & inflatus. Obambulat tamen & domestica obit negotia.

*Judicium cum consilio.*

Quotidianam veram exquisitam, non secus ac quartanam ex longis esse morbis, & ad unum, immo plures annos, trahi nonnunquam, hæc docet historia. Causa vero diuturnitatis inordinata omnino vivendi ratio ægræ, quæ animi affectibus indulget, palato accepta ingerit cuncta & extra paroxysmum in liberum qualemcunque regnantem aerem concedit. Neque enim omnis diuturna intermittens gravem in visceribus supponit labem. Sed per ipsum febrilem motum nova semper gignitur vitiosa materia, quæ quando intermissionis tempore perspiratione non excluditur & insalubri victu augetur potius, novum semper induci paroxysmum non mirum. Jam quidem morbus in habitum



gebat dolor, nec somnus adeo erat quietus. Dabatur quidem, ad digestionem secundandam, quotidie bis, ac drachmam semis, pulvis ex radice ari, pimpinella alba, gentiana rubra, semine cymini & macis. Sed præter opinionem quotidiana post aliquot dies accedebat febris vesperi. Promtum statim habebat Medicus electuarium ex rob juniperi, cortice chaccarillæ & sirupo acetositate citri, idque omni bihorio deglutire jubebat. Sumto hoc, repetebat quidem paroxysmus, sed sub illo & post eum copiosæ prodibant dejectiones, vel decem numero, ut æger firmiter crederet, validum se accepisse purgans. Continuabatur igitur pariori dosi electuarii usus, tam salubri effectu, ut febris discederet & æger penitus convalesceret.

#### *Epicrisis.*

Enata procul dubio hæc ex tertiana quotidiana fuit, quod sub illa, prima non sufficienter expurgata regio. Unde reliquæ materiæ febrilis, accepto per malam digestionem incremento, induxerunt quotidianam. Plane peculiaris etiam heic fuit corticis chaccarillæ effectus, canalem intestinorum efficaciter vacuans, febrisque fomitem simul & semel tollens. Is tamen non ubique perpetuus, sed peculiari primarum viarum dispositioni tribuendus. Alias inter omnes constat, corticem hunc potius ad compescendas nimias dejectiones valere. Ut adeo pateat: unum remedium, pro diversa naturæ & corporis habitudine, alium atque alium, & diversum, contrarium plane, exserere posse effectum.

#### OBSERVATIO IV.

*Quotidiana anomala post hypercatharsin.* Nobilis quædam tenerior & sanguinei corporis femina quinquagenaria, regnante Sirio & instante mensium fluxu, gravi exagitata fuit ira, cum extremorum tremore. Porrexit Medicus paullo post purgantes pilulas, quibus tanta hypercatharsis suscitata, ut intra 24. horas plus quam quinquagesies, & postero adhuc die, vigesies fere, deiceret. Fractum inde mirifice corporis robur, artus languerunt, ingruit animi, præsertim erecto corpore defectio, periit appetitus, somnus turbatus & pæne omnis intercidit. Exactis inter hæc aliquot diebus, vesperi accessit anxietas summa, cum leviantur duntaxat horrore & frigore, inquietudo & synoptica affectio, ut jam animam agere videretur. Subsequenti pulsus ictus celeres, æstus corporis, oris siccitas, & mador corporis, per duodecim horas halans, symptomatum attulit levamen. Habuit postea tantisper melius. Febrilis tamen commotio modo vesperi, modo noctu, jam gravior, jam levior, rediit quotidie, tussi sicca, & ante, & post illam affligente. Ægre tulit fere omnia stomachus, analeptica, salina, balsamicas pilulas, elixiria stomachica, alimenta ipsa, & quamvis suspensa manu datis, sequuta anxietas, æstus, pressio, strictura & ardor ventriculi, nec non tormina ventris. Sic decubuit per mensem, ac interea nihil melius ferre potuit, quam emulsionem ex amygdalis dulcibus, semine papaveris albi, aqua florum acaciæ, liliorum convallium, tiliæ & cerasorum nigrorum, quibus tantillum pulveris bezoardici nitrosi subinde inditum. Potui datum præterea decoctum avenaceum, nonnunquam in levem emulsionem cum amygdalis redactum. Et ad alvum obstructam solvendam, enemata leniens injectum. Elapso autem mense, quodammodo commodius excepit ventriculus medicamenta. Hinc sumisit quandoque decem tantum pilulas ex nostris, quibus alvus cum euphoria laxata. Exhibitum quoque elixirium nostrum balsamicum, parca pariter dosi. Remanserunt nihilominus febriles commotiones, licet mitiores & sine angore. Ad has igitur componendas oblatus ter quotidie hic pulvis: recipe lapidum cancrorum, antimonii diaphoretici, arcani duplicati, corticis chaccarillæ, ana drachmam.



mam. M. f. Pulvis, dividatur in decem partes æquales. Et ad alvum subducendam usurpatum elixirium purgans, ex massa pilularum balsamicarum in tenui lixivio soluta. His demum intra quadraginta dies sensim febris sublata, vires cum appetitu & sanitate integra redierunt.

*Epicrisis.*

Perniciosum utique fuit molimen, post iram & ingruente mensium fluxu, purgans dare, quia tum jam in motu natura & spastica in nervosis partibus stricturæ adsunt. Neque dubium est, quin sub proritata inde vehementiori purgatione & affluxu fucorum impurorum ab ambitu ad interiora, & erosio, & levis inflammatio intestinis fuerit inducta, quibus effectum, ut, nec medicamenta, nec alimenta, sine incommodo, anxietate & æstu suscipere potuerit. Febrilis etiam irregularis insultus, quotidie bis interdum accedens, cum tussi, suscitatus omnino fuit a levi intestinorum inflammatione, sub qua semper stimulus spasmodicus & vitiata occultatur digestio. Hæc igitur partium & morbi causæ dispositio, nec correctoriam, nec evacuantem, nec roborantem aliam admisit medicinam, quam lenientia & demulcentia. Febri autem, quotidianæ typum servanti, accommodatius fuit nihil, quam chacarillæ cortex, eximie roborans, mixtus cum aperientibus salinis, absorbentibus leniterque diaphoreticis. Cujus generis pulveres in quotidiana febre, etiam lenta & quæ ex vitio primarum viarum maleque digestorum succorum colluvie oritur, virtutis sunt certe laudatissimæ.

OBSERVATIO V.

*Quotidiana exquisita diuturna.* Quadragenaria circiter femina, sanguineo-cholericæ laxiorisque corporis constitutionis, quæ in iram prona, inordinata diætâ cum fructibus horæis usa & infusum thèe large nimis ingurgitans, stomachi sibi contraxerat lan-

*Tem. IV.*

guorem, paullo post mensium experiebatur suppressionem. Hos quum proprio artificio pellentibus urgeret, febrem incurrebat quotidianam, ordinariis symptomatibus comitatam, Medici tamen ope, exactis tribus mensibus, ab eadem liberabatur. Non autem ita multo post, emanentibus semper mensibus & alvo stricta, in eundem recidit morbum, quem complures in auxilium vocati Medici, nec pharmacis, nec aquis medicatis, Egranis æque ac Lauchstadiensibus, neque etiam lactis asinini usu, depellere potuerunt. Perstitit potius idem jam a triennio immedicabilis, & quotidie prima luce accedit febricula, quam comitatur sudor colliquativus pæne, ad decimam usque antemeridianam manans, & pomeridie sequitur languor cum dolore lumborum. Præterea extra paroxysmum corpus totum tactu frigidum, vix vesperti ex cibis quicquam assumere valet & tum etiam ad incongrua magis fertur appetitus. Pallida quoque facies totusque corporis habitus tumidus quasi & inflatus. Obambulat tamen & domestica obit negotia.

*Judicium cum consilio.*

Quotidianam veram exquisitam, non secus ac quartanam ex longis esse morbis, & ad unum, immo plures annos, trahi nonnunquam, hæc docet historia. Causa vero diuturnitatis inordinata omnino vivendi ratio ægræ, quæ animi affectibus indulget, palato accepta ingerit cuncta & extra paroxysmum in liberum qualemcunque regnantem aerem concedit. Neque enim omnis diuturna intermittens gravem in visceribus supponit labem. Sed per ipsum febrilem motum nova semper gignitur vitiosa materia, quæ quando intermissionis tempore perspiratione non excluditur & insalubri victu augetur potius, novum semper induci paroxysmum non mirum. Jam quidem morbus in habitum



quasi transisse videtur. Vegeta tamen natura & corporis extra paroxysmum motus, in causa fuit, quod deteriores hucusque non sequuti morbi alii. Ego quidem, rebus sic comparatis, vix aliam medendi rationem esse, sentio, quam ut ægra curatius ex regularum diæticarum præscripto vivat, parcius, & cibos nec graves, nec fermentescibiles, sed leves, facile solubiles edat. Perspirationis dein successum custodiat ac secundet, nec obambulatione in aere libero frigido interturbet. Tum ad contemperandos & liquandos pravos in prima regione succos, salino superius descripto liquore utatur. Blandis porro laxantibus intestinorum canalem expurget eumque in finem, bis octiduo, balsamicas nostras pilulas deglutiat. Stomachi præterea languorem & digestionis vitium elixirio stomachali, crebrius inter cibos sumto, emendet. Ac demum, tam ad promovendam cuticularem excretionem, quam compescendam successive febrilem habituales commotionem, pulvere ex antimonio diaphoretico, cornu cervi philosophice præparato, tartaro vitriolato & cortice chaccarillæ, bis quotidie ad drachmæ dimidium, per octo dies utatur. His, nisi gravius quid interea acciderit, morbum rebellem, expugnari adhuc posse, speramus.

## CAPUT IV.

*De Febris Intermittentibus Epidemicis Anomalis Mali Moris.*

Theses Pathologicæ.

## §. I.

*Ex tempestatū constitutione insoliti varii morbi*

**S**uperioribus annis 1726. 27. & 28. plane irregulares & insolitæ erant, temporum ac tempestatum constitutiones, ingentes potissimum siccitates & ardores, complures menses perseverantes. Variis hinc languoribus corpora humana affligebantur, diarrhæ-

is, dysenteriis, intermittentibus febribus variis, simplicibus & duplicibus, quæ nulli temperamento, sexui, aut ætati parcebant. Maxime omnium vero æstate & autumnō regnabant febres, partim intermittentes plane, partim remittentes tantum, anomala & irregulares, vagum & incertum typum habentes, facile inter se mutabiles, ut plurimum insuetis & gravibus symptomatibus stipatæ, contagio infestæ nonnullosque per multos menses detinentes, quosdam etiam plane e medio tollentes.

## §. II.

Ambigunt quidem adhuc Medici, nostri æque ac prisca ævi: an intermittentes dentur malignæ febres? Re tamen paullo accuratius considerata, non dubitamus affirmare, intermittentes alio tempore esse benigniores, alio utique maligniores, non secus ac alii morbi ac febres epidemice grassantes. Nam prout variæ temporum & tempestatum sunt constitutiones, magis, vel minus regulares, boni & mali moris progigni & grassari morbos, jam olim noster prodidit *Hippocrates*. Experientia quoque stabilit atque confirmat, dari certis temporibus intermittentes, quæ indolem malignam, seu virulentam, referunt, cujus indicia & quasi characteres hi sunt, si insolitis symptomatibus stipatæ & maxime omnium virium junctam habent prostrationem eminentiorem, si epidemice grassantur & contagio etiam inficiunt disposita corpora, sique earum ferocia exanthematibus in summa cute erumpentibus, pustulis, ulcusculis in labiis, naribus, facie, purpura, vel maculis purpureis, vel etiam scabie mitescit. Hæc enim omnia exiguae molis, sed valde vehementis & virulentæ indolis materiam tenuissimam, ventriculo & nervosis maxime partibus inimicam atque infestam, in qua potissimum veneni ratio & natura fundata est, subesse, & subitas sævas commotiones atque alterationes concitare, luculenter arguunt.

*Maxime intermittentes malignæ & anomala*

## §. III.



§. III.

*Sympto- mata e- plemi- carum & bi- ſoria.* Sic febres, quæ ſuperioribus annis noſtris locis, immo univerſæ fere Ger- mania, fuerunt infeſtæ, anomalæ valde exſtiterunt. In quibuſdam ſemel uno die, in aliis bis, acceſſio fa- cta. In nonnullis primis diebus com- paruerunt, continuæ, & tertio vel quarto die in intermittentes conceſ- ſerunt; in aliis viciffim primis tempori- bus intermiſſionem habuerunt, poſtea vero, peſſimo omine, factæ ſunt con- tinuæ. Aliqui enormes experti ſunt per ſuperiora, vel inferiora pituitoſas & bilioſas dejectiones, quidam remit- tente, vel intermittente paroxyſmo, continuo ſudarunt, cum ingenti lan- guore. Nonnulli etiam ſe ipſa in fe- bre, & calere, & algere ſimul, con- queſti ſunt. Juniores in paroxyſmo interdum valde delirarunt & ſimulac- clauſerunt oculos inſomniis agitati maleque coherentia ſunt loquuti. Se- nibus cum ſomnolentia accidit febris. Omnes vero de anxio & compreſſorio dolore circa ventriculi regionem, de dolore lumborum, pedum contuſivo, capitis etiam, ſunt conqueſti, & in- termiſſionis tempore, de dolore ex nucha per totum ſpinæ tractum ad ſca- pulas porrecto. Prodeuntibus demum in facie puſtulis, aut in ambitu exan- thematibus purpureis, ſymptomata complacabantur. Et ſi purpura junge- batur ſcorbutica, diutius durabat fe- bris; ſi vero ſuperveniebat alba, fu- neſtum erat ut plurimum.

§. IV.

*Contag- io in- fecerāt.* Obſervatum fuit, & id maxime Magdeburgi & in Ducatu Brunsvi- cenſi, complures in una domo, non ſecus ac in variolis, vel morbillis fieri ſolet, ſucceſſive eodem morbo fuiſſe affectos, & præſertim poſt ſanguinis miſſionem, fortem purgationem, fe- minæ maxime inſtante menſium flu- xu, multi ſi animi affectu immodera- to commoti fuerunt, timore potiffi- mum & triſtitia.

§. V.

*Quomo- do ter- minata.* Licet vero, pro diverſa natura æ-

grotantium, ratione ætatis, tempe- ramenti, naturæ magis, vel minus robuſtæ, mitiora, vel ſæviora fue- rint ſymptomata, & nonnulli intra quatuordecim dies, alii intra menſem demum convaluerunt, perpauci ta- men mortui, niſi ingenti errore Me- dici, aut ægrotantis admiſſo.

*Præſervatio & Curatio.*

§. I.

Frequentes quam maxime fuerunt *Quomo- do ar- cendæ hæ fe- bres.* hæ malignitatis ſuſpectæ febres in lo- cis paludoſis, humidis & aquarum ſta- gnis irriguis, uti noſtris in confiniis ſunt pagi Oſtrau & Dieskau. Frequen- tius etiam infeſtarunt, eos qui poſt æſtatem intenſius fervidam, improba victus ratione uſi, veſperi, aut noctu, aere humido frigido, corpus refrige- rarunt & præterea imbecillioris fue- runt naturæ. Optimum hinc ad decli- nandum epidemicæ hujus febris incur- ſum fuit conſilium: vitare loca humi- lia, uda, multo minus in iis dormire, aeris injuriis ſeſe non exponere, refri- gerium omne, etiam per frigidum potum, fugere, ventriculum nec cru- dis, nec conſtipantibus cibis onerare, animum tranquillum ſervare, omnia- que cum cura tenere, quæ acrimoniæ contemperandæ, ſordibuſque tam per poros, quam alvum leniter educen- dis, ſerviunt ac laudabiles ſuccos in- generant. Neque tamen forti uten- dum purgatione, quæ ab ambitu cor- poris ſuccos trahendo, peſpirationem minuit adeoque noxia eſt, tanto ma- gis quando diarrhœa forſan & dysen- teria jam circumeunt.

§. II.

Quum vero harum febrium mali *Indica- tiones medendi tres.* genii cauſa, partim in inſigni dyscra- ſia & intemperie ſanguinis & humo- rum, a naturali & blanda temperie deſlectente, ſalino-ſulphurea, partim etiam in humore vitioſæ & virulentæ activæ indolis, in prima regione po- tiſſimum hoſpitante, & univerſum nervoſarum & muſculoſarum partium



dicio necesse est. Quæ vercego diversis annis observavi & utilia deprehendi, passim in scriptis meis tradidi. In primis autem circa hoc argumentum evolvi poterit *dissertatio, observationes practicas circa febres intermittentes anno 1699. grassantes, sistens, item observationes hæmotrico-meteorologicæ Sect. ult. de constitutione epidemica anni 1700. nec non Medicina consultatoria Tom. II. Dec. II. cap. 7. pag. 90. seqq. Tom. III. Dec. I. cas. VI. pag. 33. seqq. Tom. IV. Dec. III. cas. IV. pag. 167. seqq. & Tom. VI. Dec. V. cas. X. pag. 355. seqq.*

## CAPUT V.

## De Febre Semitertiana.

## Theses Pathologicæ.

## §. I.

*Semitertiana conposita febris.* Inter epidemicas, quas jam exposuimus intermittentes mali moris febres, haud raro occurrit, quæ ex tertiana intermittente & quotidiana continua confit, eamque ob causam Græco nomine *ἡμιτερτία*, & Latino semitertiana vocatur.

## §. II.

*Quomodo incipiat.* Accedit hæc plerumque ante meridiem, cum frigore & horrore gravipulsuque contracto. Succedit postea cum pulsum frequentia calor aliquot horarum, sudore erumpente tepescens, non tamen penitus intermittens. Intenditur potius, post refrigerationem lenem, circa noctem æstus, cum pulsum celeritate, & postero die lenior persistit, sine siti, donec vesperti, præcedente leviori horripilatione, denuo ingravescit. Tertio autem die horror iterum impetit, cum intensiore calore, eademque, ac primo die, ratione, decurrit. Ut sic semper quidem adsit febris gliscens, vesperti ipsius exacerbatio & tertio die mane hæc cum rigore maxime conspicua. Vires præterea sunt dejectæ, appetitus languet, somnus deficit, urinæ minguntur te-

nues crudæ, post tertianæ vero paroxysmum crassæ & tinctæ, exspuuntur cum tussi pauca cruda, & dorsi, nec non abdominis dolor haud raro jungitur, cum hujus intumescencia. Plurimi accedente tertianæ paroxysmo nausea premuntur & cardialgia, quidam vomunt plane, nonnulli animi defectionem patiuntur, alii delirant prorsus.

## §. III.

Ignota fere nostris hæc est febris & plerumq; intermittentem malignam esse putant. Sed multum ab hac utique discrepat, quum neque contagiosa sit, neque exanthematibus stipetur, neque etiam tam enormi virium prostratione, & præterea peculiarem tertio quovis die cum horrore habeat conspicuam exacerbationem.

## §. IV.

Alia eam cum tertiana continua permutant, perperam pariter. Hæc enim secus ac semitertiana, tertio tantum die, non vero vesperti simul ingravescit, neque tota continua est, sed licet primum continuo calore impetat, tertio tamen ut plurimum die vehementiam ponit, ac in tertianam intermittentem transit.

## §. V.

Neque etiam cum tertiana duplici confundenda est semitertiana. Licet enim illa quovis etiam die accedat, insultus tamen alternatim sibi respondet & febris ipsa perfecte intermittit. In hac autem nulla plane intermissio, sed tantum remissio, vespertinus quotidie paroxysmus & tertio semper die duplex.

## §. VI.

Composita igitur ex duplici febre est hemitritæ febris, ideoque duplex omnino erit ipsius focus, causa duplex. Nimirum continuæ nidus in mesenterio, ex intercepto per ipsius compagem transitu sanguinis ejusdemque hinc in contiguis tunicis nervosis oborta inflammatoria stasi. Ille autem alternis diebus accedens paroxysmus gravior, non secus ac ipsa tertiana.

*Differre ab intermittente maligna.*

*Tertiana continua.*

*Et tertiana duplici.*

*Continua causa ex mesenterio.*

*Intermittens ex prima regione.*



tiana, sedem ac causam habet in intestinis, maximeque duodeno. In cuius flexuoso cavo, ex glandulis, hepate & pancreate, lymphatici & biliosi, ob mesenterii vitium pariter vitiosi humores, nec non ex stomacho crudi succi, confluentes, mineram conficiunt morbosam, quæ sanguini immixta & ad nervosas spinæ membranas delata, motum inducit præternaturalem febrilem.

§. VII.

Quibus  
ex  
cau-  
sis  
acci-  
dit.

Inter ea vero, quæ feбри huic ingnenda apta, connumeranda omnia, quæ succos spissos & impuros reddunt primamque potissimum regionem atque mesenterii vasa sordibus opplent. Eveniunt hinc quam maxime iis, qui salubris vitæ rationis incuriosi, cibos dulces, acidos & fermentescibiles, farinaceos cum butyro, saccharo & ovis frixos, ingerunt, vitam otiosam colunt & nimis sedentariam, parcius justo bibere solent, vel vina dulcia nimis amant & animi affectibus, præfertim tristitiæ, indulgent. Ex facili etiam eas incurrunt, qui brevi ex morbo convaluerunt, alvum habent strictam, qui crebrius utuntur purgantibus drasticis, quibus etiam hæmorrhoides, vel menses suppressi. Autumno, qui ferax febrium perniciosarum, propter varietatem & inæqualitatem perspirationi saluberrimæ valde inimicam, præterea frequentior quam aliis anni temporibus. Et haud raro accidit iis, qui corpori æstuanti frigidum ingerunt potum, aut sudantes in locum frigidum humidum cedunt.

§. VIII.

Quibus-  
dam  
re-  
gionibus  
fa-  
milia-  
rior.

In quibusdam quoque regionibus frequens magis esse observatur. De Italia testantur hoc cum *Galeno*, *Spirægelius* atque *Baglivus*. Et certe regnans ibi interdiu æstus acria recrementa gignit multa, frigidior noctu aura horum exclusionem impedit & frigidus, quem amant & vel injecta glacie incolæ parant, potus, facit, ut subsistant in mesenterio, ubi minor

resistentia & languidior progressus, succi, statim concipiant inflammatoriam & sic febris continua, intermittens vero a succis corruptis ex mesenterio ad intestina delapsis, gignatur. Idem evenit in Hungaria, ubi eadem cæli conditio & præterea usus vinorum dulcium spirituosorum liberalior, hanc febrem frequentissime accendit.

§. IX.

Quia igitur semitertiana hæc febris, præter communem intermittentium prima in regione causam, fundamentum habet inflammationem & indolem continuam ut nec symptomatum adsit magna remissio, nec ad vires reparandas spatium, admodum anceps, & intermittente simplici longe est periculosior.

§. X.

Præcipitis etiam hanc ob causam est decursus, & plerumque nono, aut decimotertio die finem attingit, vel in salutem, vel transitu in alium morbum facto, vel etiam in mortem.

§. XI.

Ubi longius extrahitur, aut in suppurationem inflammatio, & morbus in hecticam potissimum, vel lentam febrem concedit, aut si firmior in mesenterio obstructio, in hydropem, aut, rarius tamen, oppleta nimium sordibus prima regione, in intermittentem simplicem quandoque, quandoque duplicem.

§. XII.

Quando vero non modo declinante paroxysmo, sudor erumpit, sed & septimo critico die, aut post eum, alvus turbatur & fluxus oboritur vel biliosus ac pituitosus, vel etiam cruentus plane, bonum & morbi solutionem nunciat. Vel si etiam dolores in ventre acerbiores, certis plerumque horis ingravescentes, accidunt, iisdem discutitur morbus, aut subsequente postea diarrhæa saniosa & purulenta, aut sanguine copioso nigro secedente, solvitur.

§. XIII.

Contra ea, quando nihil horum

Semitertiana  
periculosa.

Brevi  
decurret.

Longior  
in alios  
morbos  
transit.

Quomodo  
solvatur.

Mala  
signa.



evenit, sed potius ardor circa præcordia, tensio & dolor in tota ventriculi regione, vomitus, singultus, inquietudo, jactatio & tremor manuum, animadvertuntur, malum præbent omen & inflammationem latius ad ipsum quoque ventriculum serpsisse produnt.

## §. XIV.

*Sphacelo necat.* Qui semitertiana decedunt, subaccessione gravioris paroxysmi, tertianæ typum servantis, succumbunt, inflammatione late diffusa & in putredinem conversa. Quam etiam mortis causam *Spigelius* se semper invenisse testatur, *lib. de semitertian. cap. 14.* disertis verbis scribens: *quotiescumque mecum repeto, quæ in dissectionibus mortuorum a semitertiana observavi, toties nil aliud potui agnoscere, quam putredines semper in vasis constetisse. Erant enim in dissectis cadaveribus inflammationes, ex sanguine bilioso & pituitoso factæ, circa jecoris cavam partem, in ventriculo, intestinis, tam crassis, quam tenuibus, mesenterio, omento, liene, & sæpius in una partium commemoratarum, aut pluribus, aliquando etiam in omnibus quæ celeris mortis causæ erant, superveniente gangrena, vel sphacelo alicui loco, etiamsi quandoque exigua esset, partium prædictarum.*

## CURATIO.

## §. I.

*indicationes curato-riæ bina.* Duplici potissimum fundamento semitertianis medendi methodus nititur, I. ut inflammatoria in mesenterii & intestinalibus tunicis hærens stasis, vitæ periculum intentans, prompte vel discutiatur, vel ne latius serpat impediatur, II. ut materia febris, quæ intermittit, corrigatur & placide evacuetur, servando simul motuum criticorum rationem.

## §. II.

*inflammatio quibus discutienda.* Ad primum obtinendum egregie proficiunt pulveres diaphoretici, leniter, nitrosi, parca, sed crebriori

manu dati. Formula esse poterit hæc: recipe cerussæ antimonii, matris perlarum, lapidum cancrorum ana drachmam, solutionis oculorum cancri, nitri depurati ana drachmam semis. M. f. pulvis, de quo tribus quibusvis horis quindecim grana propinari possunt cum decocto ex radicis scorzonæræ uncis duabus, rasuræ cornu cervi uncia, passularum minorum tantundem, radicis cichorei uncia semis, in quatuor aquæ mensuris per horæ dimidium coctis. Idem præstant mixturæ resolventes & diaphoreticæ, ex aquis diapnoicis & analepticis, liliorum convallium, galegæ, card. ben. scorzonæræ, ceraforum nigrorum, cum aceto destillato, lapid. cancrorum, antimonio diaphoretico, mixtura simplici & syrupo cardui benedicti, ternis singulis horis, ad unum vel alterum cochlear exhibitæ.

## §. III.

His contemperantur etiam & diluuntur primæ regionis sordes intermittentem facientes, ad quas deinde expurgandas omnium optima, soluta manna cum cremore tartari, nec non rhabbarum, cum passulis & salis polychresti portione. Quippe quæ sine sanguinis commotione, sine stimulo nervosarum partium, sine virium dejectione, intestinorum canalem evacuant & ad mesenterii quoque infarctum expediendum multum conferunt. Conducunt tamen etiam pilulæ, balsamicæ, ex amaris extractis, gummatibus resinosis balsamicis & aloe rite depurata, cum pulvere præcipitante nitroso, moderate, sed frequentius usurpatæ. Si etiam subtiliores sordes per cutis poros aucta perspiratione evehendæ, essentia scordii, cum æquali liquoris anodynæ mineralis parte, nupta, tutissima pariter & efficacissima.

## Observationes &amp; Cautelæ

## Clinicæ.

## §. I.

Omnis medicatio ita instituenda, ne

*Aluum  
sudor  
quomo-  
do mo-  
vendus*

*Medica-  
tio caute  
institu-  
enda.*



ne unquam motui critico salutari ob-  
sit, sed eundem potius deficientem ju-  
vet & excedentem moderetur.

§. II.

Purgā-  
tia no-  
cent.

Hinc purgantia propinare, tanto  
magis in principio, admodum perni-  
ciosum. Exagitur enim inde mate-  
ria nondum præparata, inflammatio  
augetur & morbus ad funestum citum  
eventum disponitur.

§. III.

Etiam  
salina  
deterfi-  
va

Ipsa salina deterfiva, per se data,  
in hac febre locum non inveniunt,  
præsertim in majori dosi, excepto ni-  
tro antimoniato, cui recte multum  
detulit *Baglivus*, cum sale poly-  
chresto. Habent enim vim aperiti-  
vam, diureticam leniterque laxan-  
tem & commodissime ad grana 15.  
in sufficiente quantitate decocti inter-  
dum dantur.

§. IV.

Alvus  
clysteri-  
bus pri-  
mum a-  
perien-  
da.

Si tamen febris hæc invadit alvo  
clausa, vel etiam sub ipsa hæc stringi-  
tur diutius, clystere tantum, ex pa-  
regoricis & emollientibus, semini-  
busque carminativis cum sapone Ve-  
neto, ducenda. Quo & copia excre-  
mentorum liberentur primæ viæ. Hoc  
enim si negligitur, per superiora na-  
tura viam affectat & vomitum movet,  
præsertim ubi bile acri biliosi in hepa-  
te ductus turgent.

§. V.

Declin-  
ante  
febre la-  
xatione

Declinante autem jam febre, natu-  
ræ ductui, quæ sæpè eandem alvi flu-  
xu solvit, insistendum, & superius di-  
cta laxantia & pilulæ balsamicæ com-  
modissime usurpantur.

§. VI.

Emeti-  
ca caute  
danda.

In emeticis propinandis maxime  
cautus sit Medicus, ne vomitum & sin-  
gultum proritet, vel stomachum ad  
inflammationem disponat. Si vero  
materia per superius os exturbanda  
ipsaque natura eo tendat, potus aquæ  
tepidæ cum sale, aut lenissimo stimulo  
antimoniato, satisfacit.

§. VII.

Penest.  
filent  
raro lo-  
quas.

Sanguinis missio non facile locum  
habet in hac febre, nisi eminens ple-

thora, urgens æstus, in corpore agili  
adhuc & criticarum hæmorrhagiarum  
suppressione affecto. Tum utique per-  
necessaria ad lethalem inflammatio-  
nem intestinorum præcavendam. Sed  
in principio statim administranda, &  
quocitius subtrahitur sanguis, eo ex-  
peditius succedit sanatio.

§. VIII.

Vitanda dein omnia calida, essen-  
tiæ alexipharmacæ & tincturæ bezo-  
ardicæ, ipsum quoque regimen æstuo-  
sum & potus copiosus calidus. Æstus  
enim inde magis accenditur, criticus  
minere morbi per intestina effluxus  
turbatur & vires inter largos sudores  
dissipantur.

§. IX.

Pulveres quoque adstringentes, ni-  
mium fixi, terrei, testacei omittan-  
tur his in febribus, nec non cortex  
chinæ. Observavit enim jam *Bagli-  
vus prax. pag. 51.* iisdem vel inflam-  
mationes lethales, vel lentas & hec-  
ticas febres fuisse inductas.

§. X.

Si etiam dolor in abdomine exqui-  
situs urgeat, vel crebriores quoque  
dejectiones adsint, abstinendum ta-  
men a sedantibus. Exterius tantum  
succurrendum linimentis spirituosius  
roborantibus, abdomini illitis, &  
interius diaphoreticis tumultus com-  
ponendus.

§. XI.

Potui ordinario egregie servit de-  
coctum sub curatione commendatum,  
nec non decoctum avenæ sic parau-  
dum: recipe avenæ mundæ lotæ li-  
bram, radicis cichorii, sarsaparillæ,  
scorzonæ ana unciam, florum pa-  
paveris rhœados pugillos sex, nitri  
antimoniati unciam semis, adde fo-  
liorum scabiosæ manipulum dimi-  
dium, nitri puri drachmas duas, co-  
que in quinque mensuris aquæ com-  
munis ad consumptionem tertiæ partis,  
dulcificetur sirupo cardui benedicti,  
vel papaveris erratici, vel etiam ace-  
tositatis citri.

§. XII.



## §. XII.

*Chamo-* Admodum præterea proficuum hac  
*mille et* in febre deprehendi decoctum florum  
*millefo-* chamomillæ & summitatum millefo-  
*lium* lli, vel etiam confecta ex ipsis extra-  
*profund* cta. Spasmos enim, inprimis hyste-  
ricos, sæpe complicatos, tuto leniunt  
simulque propter amaritiam, singu-  
larem tonicam antifebrilem possident  
virtutem.

## §. XIII.

*Recidi-* Quum vero vix ulla febris æque fa-  
*va quo-* cile redeat ac semitertiana, post eam  
*modo ar-* in diæta & vitæ regimine cum cura vi-  
*cenda.* tanda utique omnia, quæ superius in  
causarum procatacticarum numerum  
retulimus. Temperata tenenda om-  
nia, alvi beneficium clementioribus  
servandum, cruditatum proventus  
stomachicis præscindendus &, quod  
maximum, perspirationis successus  
omni modo custodiendus. Recidivæ  
enim, uti omnium febrium, sic etiam  
hemitritæ, longe deterioris, magis-  
que refractariæ sunt indolis, ac pri-  
mus morbus.

## §. XIV.

*Sigetiã* Hæc sunt generalia naturæ ductui  
*in conti-* & rationi innixa medendi præcepta,  
*nais in* quibus observatis, curatio recte ador-  
*semit-* nanda & ex voto etiam perficienda.  
*sentibus* Individualem autem & specialissi-  
mam methodum, medici suggerat  
judicium, quo pro diversitate circum-  
stantiarum, ex morbi historia agno-  
scendarum, ordinem, dosin, tem-  
pus, & usum remediorum, perite dis-  
ponat ac dirigat. Quumque eadem  
omnino sint, quæ in medicatione in-  
termittentium continuarum, quoti-  
dianæ, tertianæ & quartanæ, præci-  
pi solent ac possunt, eadem in his  
etiam tenenda serio inculto & de iis  
peculiarem tractationem instituere su-  
pervacaneum duco.

## Enarrationes morborum.

## OBSERVATIO I.

*Semiter-*  
*tiana*  
*curata.*

Virgo nobilis viginti annorum, te-

nerior, vitæ sedentariæ & deliciis in  
victu impensius addicta, acetaria,  
fructus horæos, dulcia & lactinia  
crebrius assuinens, autumno incipien-  
te, quum jam per aliquot hebdoma-  
des albo laborasset fluxore, corpusque  
motu exæstuaturn frigidiori nocturno  
aeri exposuisset, primum experta  
est languorem universi corporis, dor-  
si & capitis dolorem. Mane post  
successit horror cum anxietate ma-  
gna, nausea, vomendique & desi-  
dendi stimulo, quem excepit æstus,  
pulsu celeri, exiguo & cuti arida sti-  
patus. Mitescebat tamen cute de-  
mum madescente, sed vesperi ite-  
rum, post levem frigoris sensum,  
ingravescebat. Die post meliuscule  
habebat & urina secedebat cruda,  
tenuis, febriculam autem nihilose-  
cius adesse, calor quem persentie-  
bat internus & os siccum aridum  
prodebant. Post meridiem etiam in-  
crescebat febris & altero die mane  
cum horrore novus accedebat insul-  
tus, eodem modo, ut primus, ince-  
dens atque decurrens. Alternatim  
hæc ad diem usque septimum persi-  
stebant, quo in abdomine oborie-  
bantur murmura, inflatio ventris &  
hypochondriorum tensio, & seque-  
bantur plus quam decem dejectiones  
mucidæ & morsicantes. Fluebat sic  
alvus ultra decimum quartum diem,  
ægra, inprimis noctu, mirum lan-  
guebat, exteriora magis frigebant  
& algebant, interiora vero calebant  
accedebatque tussis ægrum violenter  
exercens, cum somni & appetitus  
defectu. Medicus, quod a principio  
fecerat, insistebat absorbentium, re-  
frigerantium nitroforum usu perpe-  
tuo, nolebant autem pathemata ce-  
dere, sed potius cum ventriculi infla-  
tione cardialgica augebantur. Postu-  
lato igitur meo consilio, dedi mixtu-  
ram hanc diaphoreticam: recipe aquæ  
liliorum convallium, scorzonæ, ce-  
raforum nigrorum ana unciam unam  
semis, theriacalis cum vino unciam,  
lapidum cancrorum, antimonii dia-  
pho-



phoretici, diascordii Fracastorii ana-  
drachmam semis, mixturæ simplicis  
guttas 30. sirupi cardui benedicti, quan-  
tum satis. M. Qua bihorio quovis ad  
tria cochlearia data, dejectiones pau-  
ciores factæ & cutis calido madore  
perfusa. Infusum etiam theiforme ex  
veronica, scabiosa, floribus chamo-  
millæ vulgaris & semine anisi potum,  
& loco ordinarii potus, decoctum  
cornu cervi & hordei citratum. Cum  
quo subinde assumtus pulvis, ex solo  
antimonio diaphoretico & lapidibus  
cancrorum, addita solutione oculo-  
rum cancri & pauxillo nitri. His intra  
binas hebdomades symptomata, tus-  
sis, alvi crebrior dejectio, virium la-  
bor, assidua vigilia & internus æstus,  
sublata. Quum vero metus esset febris  
lentæ, ob gliscentem diutius inter-  
num calorem, præsertim post pa-  
stum, ad præscindendam hanc datæ  
pilulæ nostræ balsamicæ, cum pulve-  
re salino aperiente & elixirium no-  
strum stomachale, felici pariter cum  
successu.

*Epicrisis.*

Febrishæ exacte servavit semiter-  
tianæ typum & septimo etiam die sa-  
lutarem habuit excretionem per al-  
vum. Interim tamen semper etiam  
in hac febre ratio habenda cuticularis  
excretionis. Perperam igitur a primo  
Medico crebriori refrigerantium & ni-  
troforum usu perspiratio fuit impedita  
motusque humorum ad intestina con-  
versus, ex quo omnia pathemata.  
Mixture autem leniter sudorifera ad  
superficiem corporis egit succos hinc-  
que egregie profecit.

OBSERVATIO II.

*Semiter-  
tiana  
cum  
purpu-  
ra sana-  
sa.* Generosa femina quadragenaria,  
tenera, mobilis valde atque sensibilis,  
purpuræ præterea autumnæ ab aliquot  
annis obnoxia, post corporis refrige-  
rationem & animi commotionem, su-  
periori anno, vesperi horripilatione,  
capitis & dorsi dolore corripiebatur,  
succedente æstu sedecim fere hora-

rum. Vix inde septem aut octo ela-  
psæ erant horæ, quum gravis impete-  
ret horror cum præcordiorum anxie-  
tate, vomendi conatu & virium pro-  
stratione, qui paroxysmus cum sub-  
sequente æstu ad viginti fere horas  
producebatur. Superato hoc, melius  
quidem habebat, dormiebat etiam,  
sed exactis vix sex horis, denuo extre-  
morum eveniebat refrigeratio, cum  
anxio æstu magnaue debilitate, vehe-  
mentia tamen symptomatum non  
tam gravi, nec vomendi conatu. Vo-  
cabar in consilium, semitertianam  
agnoscebam, sed ob notam mihi æ-  
græ dispositionem purpuræ, hanc si-  
mul subesse statim conjiciebam, in pri-  
mis quum insignis præsto esset pecto-  
ris angustia & oppressio. Injunctus igitur  
primo clyster, & post hunc ad expel-  
lendam purpuræ materiam, hanc  
ante paroxysmum & remittente eo,  
ad aliquot cochlearia porrexi mixtu-  
ram: recipe aquæ cardui benedicti,  
galegæ, scorzonæ, florum sambu-  
ci ana uncias duas, aceti destillati un-  
ciam, lapidum cancrorum, antimo-  
nii diaphoretici ana scrupulos duos,  
cinnabaris scrupulum unum, spiritus  
nitri dulcis, mixturæ simplicis ana  
guttas 30. sirupi cardui benedicti dra-  
chmas duas. M. Hinc quidem sympto-  
matum atrociam mitigata, febris ta-  
men pristinam adhuc, & vesperi, &  
alterno die, servabat incurSIONem, &  
accedebat præterea abdominis dolor  
cum alvi adstrictione summaque an-  
xietate. Indicio hoc mihi fuit viscidas  
& biliosas multas sordes primis hospi-  
tari in viis, eoque inductus, suasi,  
ut remittente paroxysmo, decem ex  
pilulis nostris balsamicis, cum dosi  
pulveris absorbentis nitrosi sumeret &  
præterea elixirio nostro viscerali in  
decocto pro potu crebrius uteretur.  
Sequuta inde placida alvi solutio, &  
continuatis iisdem remediis per ali-  
quot dies, foetidissimæ secesserunt  
feces pariterque copiosæ. Hoc fa-  
cto, mixtura superius dicta iterum u-  
surpata, nec non pulveres bezoardi-  
ci,



ci, cum pauxillo pulveris corticis chaccarillæ. Sic demum molestus in universo corpore obortus pruritus, purpura effloruit, urina sedimentum posuit, ac intra tredecim dies febris discessit & postea vires etiam recuperatæ.

#### *Epicrisis.*

In omnibus fere morbis epidemicis complicata subesse solet ejusmodi materia exanthematica, qua ad habitum corporis, sub macularum, vel aliarum efflorescentiarum forma propulsa, febris quæ præsto est insigniter mitigatur; non fallaci testimonio, eandem ante ab acri subtili humore ortam fuisse. In hac vero historia commemorabile, quod materia scorbutica salino-acris in corpore delitescens, non statim a mixtura sudorifera ad cutis extrema fuerit expulsa, sed tum demum, quum natura arte adjuncta a sordium sarcina primam liberasset regionem.

### OBSERVATIO III.

*Semitertiana dysenterica fænesta.*

Quum anno 1727. autumnio initian-  
te, circumiret dysenteria, concessit  
in villam suam vir quinquagenarius,  
robustus, plethoricus, cibus duris ac  
falsis cum vini potu assuetus. Eo delatus,  
plurimos ex villicis maligno hoc  
fluxu decumbere percepit. Hinc terrore  
perculsus est haud levi. Bene tamen  
pransit & bibit, in horto etiam  
post prandium deambulavit, leviter  
tantum vestitus, licet aer regnaret  
frigidiusculus. Vesperi horrere coepit  
ac frigere, torminibusque ventris affligi  
cum æstu, qui per totam fere noctem  
perstitit. Mane post misit qui  
Medicum vocarent, interea vero novum  
expertus est frigoris accessum; cum  
nausea, anxietate & ventris tensione,  
subsequente calore. Medicus epidemicam  
luem subesse ratus, ad præscindendum  
ipsius fomitem, purgans dedit  
pharmacum. Quo vel quinquagesies  
dejecit cum acerbis torminibus æger,  
alvumque in latrina,

torrenti domum alluenti superstructa  
deponens, ad ventrem frigus incautius  
admisit. Accensa hinc magis febris,  
alternis semper diebus gravior, alvus  
perpetuo fluxit cruenta, demum  
cadaverosi foetoris, somnus periit,  
æger de ardore interno conqueri, corpus  
jactare & delirare coepit, donec  
sexto morbi die convulsus periret.

#### *Epicrisis.*

Est hæc febris dysenterica inflammatoria, semitertianæ typum habens,  
inducta a terrore, cruditatibus primarum  
viarum, refrigeratione & purgante,  
nec mirum, conspirantibus tam multis  
causis, brevi in funestum morbum  
fuisse adductum hominem sanum atque  
robustum. Hæc vero quam maxime  
proficua fuisset sanguinis missio,  
quam in dysenterico morbo mirifice  
commendat Sydenhamus, Botallus,  
Amatus Lusitanus, cum aliis. Et hac  
sola, adjunctis medicamentis diaphoreticis,  
leniter nitrosis, inflammationem  
discuti, sphacelum arceri & firmum  
alias virum servari potuisse, ego  
quidem arbitror.

### OBSERVATIO IV.

Quadragenarius vir, tenerioris &  
biliosæ constitutionis, multum delectatus  
dulcibus, & in prandio, loco vini,  
subinde sumens aquam sic dictam vitæ,  
jamque ante annum ictericus, incidit  
autumno in semitertianam cum magna  
debilitate, occipitis dolore, siti, calore,  
ciborum nausea & crebrioribus ventris  
torminibus. Septimo die solvebatur alvus  
& per aliquot dies largiter fluerebat,  
febrisque mitescebat. Nihilominus  
Medicus ad sistendum fluxum exhibebat  
pulverem, cum terra catechu, quo  
constitit. Sed factus æger ictericus,  
flavescente per totum corpus colore  
diffuso alvus obstipata, excrementa  
alba, urina nigra & oleaginosa. Interim  
sub icteritia hac priora symptomata  
cessarunt omnia: rediitque appetitus  
cum viribus. Icterus etiam discussus  
pul-

*Semitertiana icterica fænesta.*



pulvere rhabarbari cum speciebus diacurcumæ & liquore aperitivo, ex sale tartari, terra foliata tartari & arcano duplicato, composito. Sicque æger penitus convaluit.

*Epicrisis.*

Orta procul dubio hæc febris a copiosis sordibus biliosis stagnantibus & postea ad intestina delatis, quarum affluxu cum pulvere adstringente ad interiora represso, icteritia supervenit. Adstruitur hinc veritas effati *Hippocratis* & *Celsi*: icteritiam febri succedentem, eam sæpe tollere.

C A P U T IV.

De Febre Catarrhali benigna.

Theses Pathologicae.

§. I.

*Febris catarrhalis quid sit*

**E**X febris lymphaticis & serosis est excutienda nunc catarrhalis, in qua motu solidorum & fluidorum adaucto, serum, ob perspirationem interceptam, superfluum & impurum, per glandulosa, faucium præsertim, narium & bronchiorum organa, critice quasi & salutariter ejicitur.

§. II.

*Ætiologia.*

Incipit hæc, vesperi ut plurimum, cum cutis inhorrescentia, extremorum, imprimis pedum & plantarum refrigeratione, alvi siccitate, stimulo ad mejendum, sed parco mictu, capitis debilitate, languore universi corporis & appetitu adaucto, quasi spurio, nec non siti, difficili deglutatione, stimulo in larynge, narium & faucium calore, sequitur sternutatio, pectoris gravitas, & calor circa noctem cum pulsu celeri auctiori, tussis violenta, cum coryza, ardore faucium, somno inquieto, mane sudor, gravitas & torpor totius corporis appetitusque prostratio.

§. III.

*Causa immediata et sedes.*

Immediata horum pathematum causa est serum, seu lymphæ, acris

Tom. IV.

caustica, in tunicis glandulosis subsistens easdemque inflammans, cum dolore, tumore & rubore. Contingit hoc in tota narium, palati & faucium regione, tota etiam arteria aspera, cum ramis bronchialibus, quinimmo ipso œsophago, ventriculo & intestinis. Has enim simul affectas esse partes, raucedo, tussis, scretus materiæ viscidæ, sternutatio, pectoris gravido, item nausea, quandoque in vomitum erumpens, ardor in præcordiis, tormina ventris, & subsequens salutaris alvi fluxus, testantur.

§. IV.

Hanc autem feri subsistentiam inducit potissimum interceptus perspirationis successus. Hinc enim est, quod vere & autumno, æquinoctii tempore, frequentissimus hujus febris incursus. Tum quippe maxima tempestatum vicissitudo, ex calido in frigidum, sicco in humidum & vice versa, tam varie corporis corticem afficit, ut succedens ibi evacuatio graviter turbetur.

§. V.

Eandem ob causam catarrhi frequentissime accidunt iis, qui subito aerem mutant, ex calido loco in frigidum, vel ex frigido in humidum concedunt; qui corpus autumnali, vel nocturno frigido humido aeri incautus committunt: qui vestitum hibernum vere cito nimis deponunt, vel autumno sepius resumunt; qui etiam æquinoctio sanguinis missionem passi, vel alias circitum largam hæmorrhagiam experti improvide in aerem liberum frigidiusculum se conferunt.

§. VI.

Neque alia subest ratio, quod corpora spongiosa, laxa, phlegmatica & sanguinea, infantes, pueri ac femine, longe frequentius febri catarrhali pateant, quam adulti, viri, strictioris magisque biliosæ constitutionis. Quod etiam magis eadem afficiantur, qui vigiliis indulgent, crapulam sectantur, vinoque aut vini spiritu corpus exæstuant, humidiori & frigidiori aeri postea illud exponunt.

E §. VII.

*Frequentatur autumno.*

*Sub aeris mutatione.*

*post vesperatione.*

*Phlegmaticis & inter perantibus.*



## §. VII.

Post re-  
pulsas  
in cute  
efflore-  
scentias

In iis quoque, qui post crustam la-  
team & tineam capitis, nec non sca-  
biem præpostere siccata, post incu-  
riosius, aut mala medicatione exce-  
ptam coryzam & tussim, febrem in-  
currunt catarrhalem, nulla utique a-  
lia potest suggeri causa, quam repul-  
sum ex ambitu corporis ad interiora  
serum acre & rodens, inflammationi  
inducendæ aptum.

## §. VIII.

Ex aeris  
vitio e-  
pidemi-  
ca.

Non tamen dubitandum, quin quan-  
doque in aere hospitetur subtilis cau-  
stica ejusmodi materia, quæ inspira-  
tione hausta, locis quæ pertransit glandu-  
losis, sese insinuat, eademque do-  
lore, tumore & rubore afficit & fe-  
brem accendit catarrhalem. Prompta  
certa ejusmodi acris materiæ genesis  
vere ineunte, quo liquescente nive &  
regelata glacie, solum aqua inundatur  
effæta, quæ passim stagnans & putre-  
scens, noxia in aerem mittit effluvia  
multa. Quo etiam fit, ut febres hæ-  
tum ut plurimum sint epidemicæ &  
plures uno tempore invadant.

## §. IX.

Quando-  
que con-  
tagiosa.

Quod autem catarrhi & catarrhales  
febres contagiosæ etiam sint & alios  
propinquos atque dispositos contagio  
inficiant, eam utique fit ob causam,  
quod lymphæ potissimum vitio debentur;  
eodem modo ac notum est, om-  
nes qui contagio propagantur morbi,  
lymphæ corruptionem, vappescen-  
tiam, vel putredinem, habere cau-  
sam.

## §. X.

Differt  
a quoti-  
die acce-  
dentibus  
aliis.

Sic incedit & generatur catarrha-  
lis febris benigna, & hæc qui novit,  
ex facili eandem distinguere poterit  
ab aliis quotidie accedentibus febrium  
paroxysmis, lenta, hæctica, quoti-  
diana, tertiana duplici & quartana  
triplici.

## §. XI.

A vene-  
reis &  
scorbu-  
ticis fau-  
cium af-  
fectibus

Facili etiam negotio discrimen per-  
spiciet inter illas glandulosarum in  
faucibus & naribus tunicarum affectio-  
nes, quæ ex lue venerea & scorbuto,

& quæ ex catarrho eveniunt. In illis  
enim sola erosio & ulceratio, a mate-  
ria caustica lymphatico-serosa, sine  
febre; in hac vero, præter arrosio-  
nem, inflammatorii quid subest, ex  
subtiliori sanguinis parte statim conci-  
piente, cum febre.

## §. XII.

Obvia quoque erit differentia, in-  
ter catarrhalem, & eam febrem, quæ  
rheumatismo accedit. Quum in illa  
tunicæ glandulosæ internæ afficiantur  
& excretio subsequatur; in hac autem  
externæ musculorum tunicæ patian-  
tur & morbus evacuatione critica non  
solvatur.

## §. XIII.

Paullo difficilius autem benigna di-  
scernitur a maligna, inprimis ab ini-  
tio, ob plurima, quæ ambæ commu-  
nia habent symptomata. In eo tamen  
differentia, quod hæc, secus ac illa,  
ingentem & subitam inferat virium  
prostrationem, cum vigilia perpetua,  
quam mentis turbatio sequitur, quod  
contagiosa magis sit & plerumque eti-  
am petechias & maculas habeat jun-  
ctas, uti pluribus infra dicetur.

## §. XIV.

Ceterum, quo major sanguinis &  
seri impuri copia, eo graviora adsunt  
pathemata eoq; diutius trahitur mor-  
bus, uti potissimum obvium est in  
scorbuticis, nec non ubi purpuræ ma-  
teria intus delitescit.

## §. XV.

In hypochondriacis, præter diutur-  
nitatem, ob labefactatum ventriculi  
& intestinorum tonum & proclivita-  
tem ad spasticas strictureas & flatulen-  
tias, gravia varia jungi solent pathe-  
mata, anxietates præcordiorum in-  
primis, spirandi angustia & inquietu-  
do, cum inflativo & pressorio in hy-  
pogastrio dolore.

## §. XVI.

Qui sanguine abundant, intempe-  
ranter vivunt, vina non adeo bonæ  
notæ largius potant & acidis falsis ci-  
bis delectantur, majorem circa vespe-  
ram experiuntur ardorem & tussim  
sic.



siccā ferinā, cum somno inquieto.

§. XVII.

*Nec non in men-  
siū sup.  
pressio-  
ne labo-  
rantib.  
bus.* Neque minus feminæ, quæ terro-  
re, vel alia ex causa mensium sup-  
pressionē laborant, magnas in hac fe-  
bre experiuntur præcordiorum anxie-  
tates, intercurrentibus lipothymiis,  
universi corporis notabilem debilita-  
tem & alternantem frigoris & caloris  
in cute sensum, quæ noctu potissimum  
ingravescent.

§. XVIII.

*Per se  
periculi  
expers.* Per se tamen hæc febris benigna o-  
mnino est, & omni periculo, si dex-  
tre in medicatione excipitur, vacat,  
& intra septem, aut quatuordecim  
dies, ut plurimum discedit, omni las-  
situdine sublata. Quin aliæ etiam ca-  
pitis passiones, cephalalgia inprimis  
& hemicrania, succedente catarrho  
& naribus bene fluentibus, optime  
solvuntur.

§. XIX.

*Excre-  
tionibus  
solvi-  
tur.* Solvitur sepe in principio statim au-  
cta perspiratione per sudorem. In a-  
liis post aliquot demum dies, vel co-  
pioso scretu materiæ viscidæ, vel li-  
berali feri mucosi e naribus stillicidio.  
In quibusdam etiam per crebras alvi  
dejectiones & in nonnullis, quando  
urina tenuis antea & parca, larga  
nunc manat & pondere gravis, ut mi-  
nimum duplo majorem materiæ soli-  
dæ quantitatem contineat, ac in na-  
turali statu.

Præservatio & Curatio.

§. I.

*Præser-  
vatio  
quomo-  
do insti-  
tuenda.* Quod igitur ad arcendum catarrho-  
rum insultum attinet, vitanda incul-  
co omnia, quibus induci eosdem su-  
pra dixi, & suadeo, ut vere & autu-  
mno, tempestive sanguis mittatur,  
modicus cibus sumatur, perspiratio  
custodiatur & corpus subinde motu  
exerceatur. In iis autem, qui laxio-  
ris humidioris naturæ ac ætate juve-  
nes sunt, & ob id, notante jam  
*Hippocrate* Secl. VI. aph. 2. frequen-  
ter exercentur catarrhalibus deflu-

xionibus & rhevmaticis affectibus,  
ego multoties cum fructu usus sum hac  
methodo, qua præcepi, ut per qua-  
draginta dies decoctum ex radice chi-  
næ, sarsaparillæ, cortice ligni sassa-  
fras, cum passulis & paucis cinnamo-  
mo, biberent, ac interea ex cibis ni-  
hil fumerent præter carnem assatam,  
cum amygdalis tostis & pane bis co-  
cto, simul etiam aliquoties ad alvum  
subducendam uterentur ptisana man-  
nata, demum finita hac cura, elixir  
stomachale, ad XXX. guttas, cum  
aqua & vino, quotidie ante prandium  
usurparent.

§. II.

Medicatio dein catarrhalium fe-  
brium, triplicem hunc sibi præfixum  
habet scopum: I. ut acrimonia illa sa-  
lina acris lymphæ obtundatur ac tem-  
peretur. II. ut perspiratio turbata,  
quæ primaria congestionis serosæ ad  
interiora causa, promoveatur ac in  
ordinem iterum redigatur; III. ut in  
fine excretio muci viscidæ crassi pro-  
moveatur, ejusdemque ulterior gene-  
ratio impediatur.

§. III.

Acridinem contemperant, præter  
pulveres sic dictos bezoardicos absor-  
bentes, humectantia omnia & oleo-  
sa, instar omnium oleum amygdala-  
rum dulcium, dein sperma ceti, bu-  
tyrum rubrum, lac, cremor lactis,  
emulsionem ex amygdalis, vel pineis,  
cum semine papaveris albi, decoctum  
avenaceum, raparum, hordei, ju-  
scula caponum, gallinarum, cum vi-  
tello ovi. Ex dulcibus liquiritia, ejus  
infusum, essentia & succus Hispanicus,  
ficus quoque & passulæ. Si subtilis ni-  
mis & rodens est acrimonia, leniora  
anodyna locum habent, inter quæ  
aliis palmam præripiunt papaveracea,  
crocus, item pilulæ *Vildegansi*, dia-  
codium *Montani*, pilulæ de styrace,  
quarum compositio & usus antiquissi-  
mus pariter ac probatus, uti patet ex  
*Tralliani lib. V. pag. 247.*

§. IV.

Ad excretionem, præsertim omnium

*Indica-  
tiones  
carate-  
ria*

*Acridi-  
monia  
quomo-  
do tem-  
peranda*

*Perspi-  
ratio  
quibus  
promo-  
venda.*



saluberrimam cuticularem, faciunt infusa calida theiformia, ex herba veronica, hyssopi, radice liquiritiae, floribus sambuci, papaveris rhœados & semine fœniculi. Proficui etiam sunt pulveres diaphoretici fixiores, imprimis cum aquis diapnoicis & antispasmodicis sumti. Nihil quoque ad purgationem feri per cuticulam utilius ipsa exercitatione & motione corporis, quæ ab Hippocrate lib. de insomn. §. 4. item de victu acut. §. 67. mirifice ad sudorem eliciendum, mane post frictionem, commendatur.

## §. V.

Mucus  
quibus  
educen-  
dus e-  
st  
fauci-  
bus.

Educendæ demum, quæ resstat materiæ lentæ, ex faucium glanduloso peristomate, serviunt, pectoralia, ficus & passulæ, cum spiritu vini accensæ & in sirupum quasi redactæ, balsamum pectorale Meibomii, item elixir pectorale, ex gummi ammoniaco, myrrha, radice liquiritiæ, enulæ, croco, benzoe & oleo anisi, cujus resolvens virtus addita tinctura tartari, vel spiritu salis ammoniaci vinoso, adhuc potest intendi. Ad fundendam autem stagnantem in narium civitatibus pituitam, nihil præstantius sale volatili salis ammoniaci sicco, cum aliquot guttulis, olei majoranæ puri, non fœtidi, nec adulterati, essentificato, crebrius illud naribus admo-  
vendo.

## §. VI.

Methodus  
ut  
di  
rem-  
iss.

De applicatione horum remediorum id in genere tenendum: quod matutino tempore expediat perspirationem promoveri potu infusorum ex herbis calidorum, nec non jusculorum & usu pulverum temperantium bezoardicorum. Circa noctem vero anodyna & demulcentia dare. Specialis autem medendi methodus, partim in symptomatum mitigatione, partim etiam in oblatione medicamentorum, ratione doseos & ordinis, consistit, & ad individualem corporum dispositionem est accomodanda, de qua potiora in subjungendis nunc monitis præsticis.

Observationes & Cautelæ  
Clinicæ.

## §. I.

Sicuti omnis febrilis æstus, ita etiam catarrhalis, lenissime & placide tractandus est, æger quoque in moderato calore lecti & hypocaufti semper servandus. Exulent igitur omnia commoventia calidiora & validiora, una cum regimine æstuoso, eo quod materiam acrem magis exagitant, calorem adaugent & ætuosam partibus diathesin conciliant. Vitentur vero vicissim omnia refrigerantia, acida & quæcunque perspirationem turbant. Opiata etiam & theriacalia caute in usum vocentur, tanto magis sic caput debile & grave, si ætas senilis & alvus adstricta.

## §. II.

Cibus sit paucus, potus tepidus & salubris, optimus decoctum hordei excorticati cum rasura cornu cervi, passulis & radice liquiritiæ, item decoctum avenaceum. Vinum autem, nec non vini spiritus, propter acidum stimulans & spiritum qui calorem accendit, nullius in hac febre utilitatis. In declinatione tamen morbi, si excretionibus jam adsunt, vinum bonæ notæ conduxisse, paulo largius etiam sumtum, observatum est, eo quod circulum sanguinis promovet & equalem servat perspirationem.

## §. III.

Si æstus est impensior, uti in pléthoricis atque cholericis, fervor etiam internarum partium percipitur, nitri aliquot grana pulveribus bezoardicis cum fructu admiscantur & emulsione liberalius usurpantur.

## §. IV.

Quando alvus dura nimis & stricta, sub morbo, præter juscula avenacea, mannata, prunata & passulata, nihil convenientius clystere emolliente. Egregium tamen quoque usum præstant pilulæ aloephanginæ, vel Beccherianæ, ad X., vel XII. grana, cum.

Febris  
catarr-  
hali  
leniter  
tractan-  
da &  
caute.

Cibus  
potus  
sit con-  
gruus.

Nitrum  
quando  
profit.

Alvus  
quibus  
ducen-  
da sub  
febre.



cum granis 4. pilularum de styrace, ante lecti introitum sumtæ, eo quod & alvum aperiunt, & violentam ficcam tussim moderantur.

§. V.

Item de  
clinante  
febre.

Si etiam declinante febre tussis humida nimis, copiosa & pertinax, ad humorem pituitosum derivandum & per alvum evacuandum, egregie proficit decoctum mannæ largiori dosi, ad uncias duas vel tres, ex aqua veronicæ. Tum quoque profunt pilulæ balsamicæ *Beccheri*, nec non *Rufi*, ex aloe, myrrha & croco, æquali portione commixtis, paratæ.

§. VI.

In prin-  
cipio  
purgan-  
tia no-  
cent.

In principio vero febris catarrhalis alvum stimulantia non conferunt, præsertim paullo acriora, quia humores ferofos acres ad intestina invitant, tormina & alvi fluxus, non sine periculo febris lentæ, concitant. Quin a mercurio dulci cum resina jalappæ sic dato, in virgine plethorica inflammationem ventriculi inductam fuisse, novi.

§. VII.

Tussis  
ferina  
quibus  
compo-  
nenda.

Ubi tussis ferina & vehemens, componenda est oleo amygdalarum dulcium recenti, cum sirupo capillari Monspeliensi commixto, item hoc electuario: recipe olei amygdalarum dulcium drachmas tres, spermatis ceti drachmam, sacchari canti albi, sirupi violarum ana unciam, croci scrupulum, olei anisi, macis, ligni assafras, ana guttas sex. M. De quo subinde aliquid deglutiendum.

§. VIII.

Quid a-  
gendum  
in men-  
sibus  
suppres-  
sis.

Quando in feminis mensium suppressione affectis superius dicta pathemata ingruunt, alvus congruis clysteribus ducenda & diaphoretica propinanda, quæ sanguinis motum ad superficiem corporis urgent, tumque pulveribus bezoardicis cum fructu adjici potest, croci granum unum, vel aliquot grana florum sulphuris, abstinendum vero ab omnibus expectorantibus & dulcibus.

§. IX.

Quæ hypochondriacis accidunt insolita ex ventriculi potissimum inflatione symptomata, clysteribus emollientibus & carminativis, nec non essentiis carminativis, cum pectoralibus nuptis, quam optime discutiantur.

Item  
hypo-  
chon-  
driacis.

§. X.

Quando superata febre pulmonum restitat laxitas, ut justo largior sit screatus, pulveribus bezoardicis addenda aliquot corticis chaccarillæ grana, vel balsamum nostrum sic dictum vitæ, circa noctem ad aliquot guttas fumendum.

Laxitas  
pulmo-  
nis qui-  
bus sub-  
moven-  
da.

§. XI.

Sanguinis missio, debito tempore & regimine instituta, in plethoricis quam optime frequentem catarrhorum insultum arcet. Sed præsentem jam catarrhali febre, penitus ab ea abstinendum. Tum enim, experientia teste, diuturnitatem catarrhi adducit.

Venefec-  
tio præ-  
serva-  
toria  
non cu-  
ratoria

§. XII.

In tussi violenta & nimis diu durante, pectoralia dulcia, incrassantia, in nimia quantitate oblata, ad cachexiam, immo ad phthisicum affectum, disponunt, appetitum & digestionis vim infringendo & pulmonum tonum valde labefactando.

Pecto-  
ralia  
dulcia  
nocent.

§. XIII.

Quamvis juxta *Hippocratem lib. 6. epid. Sect. III.* his, qui ex capite, gravedine & raucedine laborant, ubi febre correpti fuerint, minus recidivæ fiant, si videlicet morbus cum defluxione recte fuerit solutus; nihilominus tamen ne via sternatur ad alium morbum, pariter ex *Hippocratis l. c.* consilio, suadeo, ut convalescentes victus & ventriculi rationem habeant, & præterea ad perspirationem servandam, potum infusi theiformis mane adhuc aliquandiu continuent, uti pluribus supra in præservatione dictum.

Recidi-  
va quib-  
us ar-  
cenda.



ENARRATIONES  
MORBORUM.

## OBSERVATIO I.

Febris  
catarrhalis  
in hypochondriaco  
pro maligna

Vir macilentus, natura sensibilior, a multis annis hypochondriacis pathematibus obnoxius, præter consuetudinem in convivio stomachum non modo variis eduliis, sed & liberali vini potu onerarat. Aliquot horis post noctu, sub aere vernali humido frigidiusculo, iter fecit, ac domum reversus, correptus est horrore, languore totius corporis magnaue capitis gravitate. Sequuta ingens præcordiorum anxietas, tussis molesta, & præternaturalis æstus, cum alvo tensa & adstricta. Suasu uxoris bibit decoctum chocoladæ, quod excepit intensior anxietas, inquietudo, suffocatoria quasi spirandi angustia, nec non inflativus dolor lateris dextri in regione hypogastrii. Vocatus hinc Medicus, qui febrem non modo malignam, sed & peripneumoniaci quid subesse iudicavit, & tincturam bezoardicam cum spiritu cornu cervi, nec non mixturam ex aqua cardui benedicti, diascordio Fracastorii, lapidibus cancrorum, antimonio diaphoretico & sirupo papaveris rhœados, exhibuit. Sed frustra & perperam. Quarto enim die, quum ob alvum nimis strictam, clyster iniiceretur, evanuerunt quæ metum gravis morbi incusserant symptomata omnia, & tussi tantum, gravativus capitis dolor, raucedo & æstus vesperi increfcens, remanserunt. Ab alio igitur Medico commendatum infusum ex veronica, liquiritia & sceniculo, circa noctem dosis pulveris bezoardici cum grano uno extracti croci & papaveris rhœados, alterno die vesperi dosis pilularum nostrarum pectoralium, interdum aliquot grana nitri & succini cum emulsione, & ad expectorationem electuarium ex oleo amygdalarum, spermate ceti, croco & oleo anisi. His procuratus scretatus

& lenis sudor & reliqua adhuc symptomata fere omnia discesserunt. Venter autem mansit imbecillis, & cibo sumto, gravativum & pressorium fecit dolorem. Tussis etiam noctu fuit acris cum materiæ copiosæ ejectione, quæ interdum etiam vomitum proritavit. Sed quum corpus equitatione exerceret ager, pilulis nostris balsamicis & inter cibos sale volatili oleoso uterentur, & loco tenuis ascentis cerevisiæ, biberet saturatiorem & amaricantem, successive pristina valetudini ex toto fuit reditus.

*Epicrisis.*

Fuit hæc febris nonnisi catarrhali benigna, tum etiam popularis. Sed quia incidebat in hypochondriacum corpus, comparuere insolita pathematata. Stomachus etiam cruditatibus jam plenus non potuit non ægre ferre decoctum succoladæ in copia sumptum, quo tunica villosa & osculis ductuum in ipsa obstructis, inflatio inducta, cui angustia spirandi, præcordiorum anxietas, dolor sinistri lateris tensivus & inquietudo tribuenda. Medicus autem male consuluit famæ, quod præceps nimis in iudicando fuit & hæc sibi imponere passus est. Et quod demum diutius hæc febris persistit, id utique omnibus evenire solet hypochondriacis, in quibus ventriculi robori imminuto convenientibus succurrendum est præterea præsidii.

## OBSERVATIO II.

Quum anno 1709. post acerrimum hiemale diuturnum frigus, Martio mense leniori ex austro spirante vento, nives & gelu solverentur, Aprili & Majo initiantem, Berolini, quo tum degebam, & alibi, quam plurimos corripiebat febris cum horripilatione & æstu, summo languore, tussi ferina, nonnullis quasi suffocatoria, ingenti siti & ciborum nausea. Circa noctem invalescebant hæc omnia & somnus inde mirum turbatur. In quibusdam

Febres  
catarrhales  
epidemicæ.



dam extrema mox calebant, mox horrebant. Quidam diu decumbebant, præsertim ii, ubi ob pravam humorum diathesin, purpuræ scorbuticæ materia intus delitescbat, quæ etiam per vices crebrius maculis rubris & asperis in extrema cute comparebat, ex levi vero causa iterum evanescebat. In nonnullis quarto statim die exanthemate rubra morsicantia, urentia, cum magno pruritu, quasi ab urticis inducta, quæ dicunt *die Nesselsucht*, erumpébant & tussis æque ac caloris mitigationem inferebant. Alii, præsertim feminæ phlegmaticæ sanguinæ provectioris ætatis, exquisitos simul rheumaticos dolores patiebantur. Qui vix convalescentes, in publicum prodibant cito nimis, incurrebant ingentem capitis torporem, gravativum dolorem, vertiginem, gravedinem, *den Otorechnupfen*, languorem corporis cum spirandi angustia & difficili negotio iterum ad sanitatem redibant. Ubi etiam vetus jam erat in pulmonibus vitium ex hæreditate, febre hac discedente, tussis purulenta cum sanguine succedebat sæpe & vera phthisis. Qui porro ab imperitis Chirurgis & Pharmacopœis purgantes accipiebant pilulas, doloribus acerbis ventris affligebantur mirumque debilitabantur, animi defectiones patiebantur cum frigido extremorum sudore, & gravius, & longius, decumbentes. Qui vero & proba victus & regiminis ratione, & dextra medicatione morbo occurrebant, pulveribus inprimis bezoardicis sedulo uterentur, cum uno, vel dimidio grano extracti croci, brevi convalescebat iterum.

*Epicrisis.*

Epidemicæ haud raro sunt catarrhales febres, tum maxime, quando ex tempestatum constitutione insolita ejusdemque subita vicissitudine, ob mutationem ventorum, inprimis quando rigidum boream, mox lenior excipit aura zephyri, subnascuntur. Pejoris etiam tum sunt indolis & ægrius persanantur, qui dyscrasia san-

guinis & humorum, ab aeris intemperie introducta, foveantur. Valde dissimilia quoque, pro dispositione habitus corporis, viscerum, ætatis, temperamentorum, nec non victus ratione, inferunt symptomata, magis, vel minus benigna. In curatione autem omnia, quæ criticum naturæ motum, feri superflui per glandulosam emunctoria, excretioni dicatum, turbant, morbum graviter exasperant & sanationem impediunt, uti potissimum faciunt purgantia cum corporis refrigeratione. Contra ea optimum utique consilium: corpus in perpetua perspiratione servare & usurpare ea, quæ acredinem mulcent, leniunt atque contemperant, ex medicamentis æque ac alimentis, & quod maximum est, ab omni cerevisia & vino abstinere & decoctum temperans bibere, si ne quo refractarii catarrhi difficulter, vel plane non, cedunt.

OBSERVATIO III.

Macilentus, nervosus & animo mobilis vir, quadraginta annos habens, quum Baccho & Veneri strenue subinde litaret, lauto videndi genere uteretur, nec unquam tamen sanguinis missionem admitteret, a longo jam tempore, vere & autumno, crebrius affligebatur catarrhalibus defluxionibus, quæ cum horrore, æstu, extremorum frigore, capitis dorsique dolore, lassitudine totius corporis & inquietudine ipsum invadebant, & accidentibus artuum, coxendicis & nu- chæ doloribus, sæpius per aliquot hebdomades detinebant. A me igitur salubre consilium ad arcendum tam frequentem catarrhorum incursum rogans, obtinuit hoc: ut I. aliquot ante æquinoctium hebdomadibus, venæsectionem cum debito regimine institueret; II. ut bis in anno lac cum minerali leniori aqua, Selterana inprimis, ad mensem portaret, loco cerevisiæ biberet ptisanam; III. ut bis hebdomade, pulverem bezoardi-

*Frequens  
catarrhorum  
incursum  
sublatus.*



cum absorbentem, paullo ante quam cubitum iret, assumeret & mane post in lecto infusum veronicæ, cum liquiritia & semine fœniculi, forbillaret, expectando postea lenem sudorem. Quæ omnia, quum per aliquot annos fecisset, liber fere degit a molestis catarrhosis defluxionibus, & animadvertit, eosdem illico infestasse, simulac sanguinis missionem tempestivam neglexisset.

*Epicrisis.*

Per immoderatum vini ac veneris usum, adeo utique infirmantur corpora, ut postea levi ex causa ægrotent, & potissimum incidente subita cœli mutatione, vere & autumno admodum solenni, catarrhos, gravedinem, coryzam & tussim incurrant, cum febricula. Idem quoque macilentis & plethoricis, post corporis refrigerationem contingere, docet experientia. Venæ sectio autem omnium optime ab his molestiis defendit; si enim sanguine nimis plena sunt vasa, ob difficilem circuitum, non rite depuratur. Hinc serum fit & copiosum, & impurum. Et impedita postea per cutis poros diffatione, ad interiora, maximeque glandulosa loca, falsus agitur humor, catarrhum cum febricula serosa faciens. Ego certe multiplici confirmatum habeo experientia, catarrhis crebrius obnoxios, ab eorum insultu matura sanguinis missione fuisse liberatos. Observavi quoque eos, qui venæsectionem, certo tempore suetam, intermiserunt, affectos fuisse catarrhali febre.

OBSERVATIO IV.

*Catarrhalis febris cum colica V. S. sana.*

Dux quidam militaris quinquagenario major, sanguine & succis plenus, ex Italia ad nostras oras accedens, ob insignem aeris, victus & vinorum mutationem, frequentissime affectus fuit acerbis colicis in abdomine doloribus. Bibit hinc, meo ex consilio, præmissa venæsectione & purgatione alvi per infusum manna-

tum, aquam Sedlicensem, per aliquot hebdomades, quo factum, ut per totum autumnum ac hiemem liber a tormentis ageret. Iterandam igitur hanc curam, medio vere, suasi. Sed antequam id faceret, vino se largius implevit & corpus deambulatione per aliquot horas sub frigido cœlo admodum frigefecit. Inde incidit in febrem, cum coryza, capitis dolore, horrore extremorum, præcordiorum anxietate, æstu, inquietudine, tussi valida, & febre fere continua. Post tres tamen dies remisit febris impetus, sed horror cum subsequente æstu versus noctem accessit adhuc, & quod commemorabile, declinante semper paroxysmo, venter flatibus distendebatur & cruciatus in ipso facti, calore vero oboriente mitigati. Interdum etiam in paroxysmo deliravit paullum, & facies fuit rubicunda. Mane autem febris semper remisit. Consultus ego quarto morbi die, expensis curate cunctis, ex pulsu pleno ac magno judicavi, venam esse secandam. Factum id remittente paroxysmo in pede feliciter. Alvus dein aliquoties clystere carminativo & emolliente subducta, & postea curatio, pulveribus diaphoreticis, temperantibus, leniter nitrosis, cum emulsione ex decocto cornu cervi, amygdalis & semine papaveris albi, sub moderate calido regimine, intra tres hebdomades ex voto confecta, alvo tamen interea bis decocto mannato soluta.

*Epicrisis.*

Venæ sectio in catarrhosis affectibus non quidem directe indicatur; interim tamen, si corpus est plethoricum, si sanguis a calidis & præsertim immoderatiore vini usu incaluit & febris catarrhalis subito invadens continua videtur, non nocet, sed prodest, elapsis etiam jam aliquot diebus. De hoc in casu commemorabile, quod abdominis dolores, jam per annum silentes, accedente hac febre, fuerint resuscitati, & quidem tempore remissionis, discussi vero per febris



calorem. Quod quidem nullam aliam ob causam factum fuisse arbitror, quam quod falsus & acris humor ad intestina delatus eademque moleste affecit, sub æstu vero ad habitum corporis propulsus. Multoties quoque me docuit experientia, pathemata hypocondriaca, colica & spasmodica, in iis qui diu iisdem affecti, catarrhis, tussi, coryza & catarrhali febre fuisse revocata. Et hypochondriacos, eo tempore, quo alii catarrhis vere & autumnio laborant, vehementes tum, quasi paroxysmos mali sui, experiri.

OBSERVATIO V.

*Febris catarrhalis ex usu auri fulminantis funesta,*

Ver erat, quum virgo nubilis, tenerior, sensibilis texturæ & spongiosi habitus, horripilatione, cum calore præternaturali, languore universi corporis, nec non præcordiorum anxietate corriperebatur. Intumescabant circa tertium diem colli glandulæ, faucesque levi afficiebantur inflammatione, aderat etiam simul tussis cum gravidine & raucedine. Vocabatur Medicus, qui auri fulminantis, minus puri, grana sex, cum dimidio scrupuli antimonii diaphoretici propinabat. Sumto hoc pulvere sævissima insequiebantur pathemata, animi deliquium, summa anxietas & inquietudo, extremorum refrigeratio & conatus ad vomendum. Opponebantur quidem bezoardica, & fixa, & volatilia, sed incassum. Sequebantur quatuor dejectiones viridissimæ & vomitu ejusdem indolis materia rejiciebatur. Anxietates vero inde nihil minuebantur, sed persistebant perpetuæ cum animi defectione, ardor etiam & constrictorius dolor in præcordiis fixus urgebat & quovis assumpto exacerbabatur, sudor succedebat frigidus, facies Hippocratica. & septimo die mors ipsa.

*Epicrisis.*

Miranda fane, febris hujus minus periculosa primum visæ, subita cata-

strophe, demum funesta. Orta hinc ingens controversia: utrum per se fuerit maligna? an vero simplex catarrhalis usu pharmaci facta fuerit lethalis? Id minimum verum: medicamina metallica non bene præparata & corrosivo sale adhuc imbuta, quale est aurum fulminans non rite edulcoratum, veneni prorsus induere naturam & funestum edere effectum in personis tenerioribus, & ubi jam ad lenem inflammationem, nervosæ partes, e quibus etiam ventriculus, jam sunt dispositæ. Aurum enim, ob gravitatem suam firmiter ventriculi tunicis inhærendo, eam cui insidet, partem vehementer exstimulat eandemque spastice constringit, haud secus ac venena, quæ pariter stomacho spasmus inducunt, qui postea per nervorum genus diffunditur, totamque œconomiam motuum pervertit. Id quod tanto magis fit in corpore exquisitius sentiente, ubi jam adest febris, quæ nihil nisi universalis fibrarum spastica est contractio. Dein id pariter certum, materiam causticam lymphaticam foris secernendam, forti ejusmodi stimulo retrahi ad ipsum ventriculum & solam ad inducendam ipsi inflammationem esse sufficientem. Ne dicam, primam corporis regionem succis corrosivis acidis biliosis fuisse obsessam, teste ipso colore eorum quæ secesserunt. Hos autem solos corrosivitate sua propria, multo magis corrosivo adhuc pharmaco adjutos, inflammationem parere posse, nemo negabit. Cautissime igitur mercandum cum medicamentis quodammodo corrosivis ex mineralium familia, ubi stomachus ad inflammationem dispositus & saburra erodente acido-bilioforum humorum scatet. Tum enim medicamentum ab aliis sine damno sumtum, veneni naturam induere potest utique.

OBSERVATIO VI.

Literatus & vitæ sedentariæ addictus vir, quadragenarius circiter & corpore

*Catarrhi cum cephalalgia narium fluxu solutis,*



corpore habitior, a multis jam annis vere & autumnno capitis defluxionibus, coryzæ, gravedini, tuſſi cum incaleſcentia quadam febrili fuerat obnoxius. Is initiante Octobre, quum poma cydonia cocta crebro & largiter ediſſet, & alvum inde obtinuifſet ſolito ſtrictiorem, poſtea etiam per aliquot horas liberiori frigido aeri ſeſe expoſuiſſet, ſequenti mox die, circa vesp̄eram, horripilatione corripitur, intercurrente æſtu. Mane ſenſum traſtorium admodum dolorificum percipit in humeris & nucha, nec non acutum in anteriori capitis parte, maximeque fronte, dolorem, naribus quidem calentibus, ſed aridis & ſiccis. Datis medicamentis diaphoreticis, leniter nitroſis, cinnabarinis, miteſcebant ſymptomata pedetentim cum æſtu, dolor autem in fronte perſiſtebat ſupra oculos, omnemque fere adimebat ſomnum. Datum hinc conſilium, ut crebrius naribus admove- ret ſal volatile Anglicanum ſiccum, quod ex ſale ammoniaco & ſale tartari paratur, oleo cephalico, uti eſt lavenderulæ & majoranæ puro, eſſentificatum, non omiſſis infuſis theiformibus, ex herbis cephalicis & diaphoreſin leniter moventibus. Inde mitiora facta tormenta & præter opinionem e naribus fluxit liquor flavescens viſcidus ad aliquot drachmas, idque aliquoties de die, quo facto, biduum omnis evanuit dolor & æger perfecte convaluit.

#### *Epicriſis.*

Heic origo catarrhalis rheumaticæ febris cum gravi capitis dolore deducenda ab alvo obſtructa & perſpiratione prohibita, in corpore, ubi caput debile & ad defluxiones catarrhales jam tum fuit proclive. Locus autem doloris in fronte ſupra oculos fuit in ſinibus oſſis frontis, qui veſtiti intus tunica nervoſa & pituitaria. Huc ſi cum impetu ruit ſanguis, a nimio ipſius affluxu & ſtagnatione oritur dolor, ſerumque acré tranſudat, hocque effluente, dolor diſcedit. Ut ad-

eo verum ſit priſcum Hippocratis eſſatum ſect. 6. aph. 10. cui capite graviter dolenti, pus, aqua, vel ſanguis e naribus profluit, is a dolore liberatur.

## C A P U T VII.

### *De Febre Varioloſa.*

#### *Theſes Pathologicæ.*

### OBSERVATIO I.

**V**arioloſa febris eſt acuta, exanthematica, contagioſa, in qua motu quodam critico, materia valde tenuis, cauſtica, corrupta, inflammans & exulcerans, ad ſummam cutem propellitur, cum gravibus ſæpe ſymptomatibus ſtipata.

#### §. II.

Febrem hanc imminentem indicant laſſitudo corporis, virium languor, ſomnus inquietus, ciborum faſtidium, cum conatu vomendi, capitis dolor, pavor in ſomno, alvus clauſa, ſtimulus ad tuſſim & horripilatio intercurrentes. Hæc per plures ſæpe dies jam præſto ſunt & poſtea ſuccedit æſtus per totum corpus, cum pulſuum celeritate, ſiti, augetur capitis, lumborum & ſpinæ dorſi dolor. Infantes poſſimum, ſæpe ex improviſo, epilepſia & rigor ac tremor artuum invadit. Ætate junioribus delirium familiare. Corpus eſt inquietum & jaſtatur. Intra tertium & quartum diem conſpiciuntur in facie & collo veſtigia macularum rubrarum, quæ pedetentim numero plures efflorefcunt, poſt faciem & collum, pectus, brachia, ac demum etiam abdomen, dorſum cum femoribus pedibusque occupantes. Durat hæc eruptio ad duos uſque dies ſucceſſive, ac interea decreſcit febris cum ſymptomatibus, ut pulſus cum calore ſexto die fere ſit naturalis. Elapſo autem quinto incipit fieri ſuppuratio, eodem modo ut eruptio gradatim a ſuperioribus ad inferiora tranſiens, quæ ubi in vigore conſtituta maximeque

*Variola  
quid?*

*Morbus  
hiſtoricus.*



que in facie manibusque succedit, ob ingentem ardorem & dolorem cutisque tensionem fere intolerabilem, accenditur nova symptomatica secundaria febris, cum siti, vigilia & præcordiorum anxietate. Quæ symptomatica, ubi corpus impurum, pustulæ confluentes & virulenti genii, delirio & convulsionibus accedentibus, nono, vel undecimo die necant. Si vero pauciores & benigniores, pathemata remittunt & fit exsiccatio, donec undecimo & ultra decidant & æger ad sanitatem redeat.

§. III.

*Prima origo ex utero.* Corripiuntur hac febre tantum non omnes homines, cujuscunque sexus, ætatis, temperamenti, quin nationis sint; ideoque in proclivi utique judicare, causam ipsius esse universalem omnibusque communem. Unde vero origo hujus omnibus adeo infestæ materiæ repetenda & ubi ipsius sedes, non æque expeditum. Veteres quidem natales ipsius a sanguinis menstrui, sub ingravidatione retenti, immunditie, foetui communicatæ, duxerunt. Et vero utique simillimum primordia hujus virulenti humoris, non ex aere, victu, aut aliis externis causis, sed ex utero esse materno. Id enim experientia frequenti constat, infantes a matre minus sana & impuris succis scatente progenitos, variolis moris mali & quandoque exitialibus corripi, matre licet sub gestatione vegeta, ob succos pravos in foetum transeuntes. Vicissim etiam in comperto, gravidas, si proba victus ratione & affectuum moderatione, cacochymie, & plethoræ convenienti sanguinis missione, saluberrimæ quoque per alvum & cutem excretioni prospiciant, infantes in lucem edere, qui variolis correpti, non adeo periculose decumbunt, sed paucas ipsas & benignioris indolis, nanciscuntur.

§. IV.

*Sedes causa in humoribus.* Sed neutiquam hujus maligni humoris sedes in ipsa sanguinis & humorum massa videtur ponenda. Etenim,

quamvis per alios morbos exanthematicos, morbillos, purpuram, scabiem, apostemata, tineam capitis, febres quoque, tota succorum massa exagitata fuerit, dissoluta omniaque ipsi involuta extricata, variolarum tamen materia manet & nihilofecius corpus adoritur. Hinc ad veritatem utique proxime accedere videtur, ex succo quidem chyloso lymphatico impuro & corrupto matris, oriri primum subtilem hunc & virulentum humorem, sed viscositate quadam involutum, firmisque tubulis quibusdam impactum, delitescere tamdiu, donec in motum fermentativum sui multiplicativum ab aliis causis deducatur, succis insinuetur & critica quasi despumatione e corpore exturbetur. Nec officit, quod post longum interdum tempus in noxam erumpat. Diu enim malignus quidam humor, in tubulosa partium, immo ipsius cutis substantia, tanquam in latibulo sine noxa hære, & postea demum in motum excitatus, universum systema nervosarum & fibrosarum partium pessime afficere totamque motuum œconomiam pervertere potest. Testatur hoc cancer in glandularum substantia per longum tempus occultatus, testatur venenum canis rabidi, item miasma venereum, quod per lac nutricis infanti communicatum, post aliquot demum sæpe annos reviviscit, vel in adultis per gonorrhœam virulentam suppressam ad interiora pulsam, post longos haud raro annos prodit & virulentiam suam exserit.

§. V.

Latibulum autem virulento huic *sed spl. nali medulla.* qui variolas facit succos, præbent, mea quidem sententia, medullæ spinalis tubuli quidam obstructi. Probabiles minimum quæ id evincunt hæ sunt rationes. Spinalis quippe medulla cum capite omnium primo in utero formatur, & majus præ aliis partibus cito augmentum acquirit. Hoc aliter fieri nequit, quam per liquidum, quod per ejus minimos canaliculos fertur. Quod



Quod si stagnans obstruit quosdam, ex diuturna mora, ut omnis humor occlusus, valde alienam & perniciosam indolem contrahit. Talis humor compedibus postea liberatus & sui juris factus, non aliam sæpe ac veneni naturam & vim prodit, humores fermentando, eorum texturam & crasin immutando, solidas vero partes vehementer stimulando, arrodendo & vellicando. Quod vero ex imis medullæ, maximeque illius portionis, quæ in inferiori regione spinæ, materia quæ variolas efficit, prodeat, hæc confirmare videtur ratio, quod nullus fere morbus tam subito totum systema nervorum & nervosarum partium adoriatur, quam hic ipse. Testatur id febris acuta celeriter invadens, spasmus nempe totius vasculosi & nervosi systematis, quem ego utique a membranis spinalis medullæ deduco. Testatur idem dolor capitis, dorsi & lumborum, individuus fere comes. Testantur epilepsiæ, convulsiones, tremores artuum, deliria, quæ mox statim in principio, secus ac in ulla alia febre, adsunt. Testantur præcordiorum anxietates, item nausea, vomitus, cardialgia, quæ a spasmodicis substantiæ nervosæ ventriculi & orificiorum ipsius proveniunt. Testatur alvus stricta & clausa, quæ semper fere primis diebus est. Testatur demum inquietudo cum vigilia, quæ nonnisi molesta generis nervosi affectio & commotio est.

## §. VI.

*Materia indoles causifica & putrefaciens.* Sed mittimus hanc paullo subtiliore de prima origine & sede causæ variolarum theoriam, quia directe non pertinet ad artis usum & therapiam, quæ magis in eo versatur, ut naturam, genium, facultatem & potentiam operandi virulentæ istius materiæ probe indagemus. Indoles igitur hujus videtur mihi duplex, una acris & inflammans, unde dolor, ardor, rubor, tumor, arrosio & exulceratio, altera causifica & putrefaciens, quæ motu subtiliori intestino, crasin

& unionem partium mixtum constituentium destruit atque corrumpit, & hæc proprie ad ipsam malignitatem, magis spectat, atque quam maxime sese prodit in variolis malignis.

## §. VII.

Optime vero variolæ distinguuntur in benignas, malignas, & quæ sunt inter has mediæ naturæ. Benignæ his cognoscuntur indiciis: si non adeo copiosæ sunt numero, si debito tempore & ordine prorumpunt, suppurantur & exsiccantur; si non nimis profundæ; si bono pure refertæ, sufficienter elevatæ & circulum habent rubicundum; si facta eruptione in superioribus partibus, febris & symptomata notabiliter remittunt & omnia tranquille & placide fiunt. Hæ omni vacant periculo, immo sponte & solius sæpe naturæ beneficio curantur. Tales autem plerumque sunt, quæ temperato vere oriuntur, in corporibus non adeo impuris, nec sero & sanguine repletis, in pueris etiam. Nam acris & caustica materiæ qualitas non modo mediante succo roscido in corpore corrigitur & ad expulsionem incute, præparatur, sed & affluxu ejusmodi succi, in ipso suppuratorio actu plane mitis & blanda efficitur.

## §. VIII.

Vicissim malignum & causticum in variolis subesse virus, inde concludendum: si vel nimis cito, vel nimis tarde prodeunt; si manent depressæ & suppurationem renuunt si plurimæ livescunt & quædam nigri coloris, vel limbum nigrum habent; si pulsus celer, etiam post eruptionem sufficientem, cum inquietudine persistit; si erecti animo facile linquantur; si pustulæ sunt sanguinolentæ, vel diarrhœa cruenta, aut mictus cruentus supervenit. Lethifera hæc sunt indicia, & ex viginti vix unus evadit, qui ejusmodi symptomatibus afficitur. In corporibus demortuis hac specie variolarum sanguis fluidus est totus, nec in serum, nec in coagulum secedit, quod aliquoties observavi, manifesto indicio,



indicio, putrefactione intima ejus crasin plane esse colliquatam & vinculum feri & sanguinis destructum, & hæc est causa ipsius mictionis, nec non dejectionis cruentæ, & quod variolæ sanguinem fundunt. Eiusdem variolæ sunt indolis, quando petechiæ sese miscent, vel etiam pustulæ parvæ miliares asperæ, quæ de intima corruptione sanguinis & lymphæ testantur. In quibusdam porro tardius maligna & putrefactiva variolosi humoris indoles sese ostendit, dum post exsiccationem febris manet lenta & in externis partibus, præsertim articulis, in brachiis, manibus, pedibus, tumores oriuntur & ex iis fiunt fœda, exedentia, fistulosa & ossibus cariem inducentia ulcera, quæ difficillime sanationem recipiunt, & procedente tempore lentam inferum mortem. Interim tamen in genere tenendum, quod malignitas hæc gradu, jam majori, jam minori, differat.

§. IX.

*Virulentæ* Virulentæ ejusmodi variolæ sunt *tales.* plerumque epidemicæ & nascuntur a statu anni temporum plane irregulari, anomalo, diuturno, præsertim sub cœlo diutius nebuloso, pluvioso humido, ventis destituto, longe magis post diluviones & inundationes aquarum, quando diutius eadem supra terram stagnant & aer ob id, & infectorum, exhalationum putridarum copia refertus est, tumque ut plurimum simul grassantur, ipsisque etiam variolis complicantur petechiales & aliæ deleteriæ indolis non expertes febres. Deinceps uti variolæ in corpora impura & cacochymica incidunt & ubi primæ viæ magna impurorum succorum colluvie scatent, plus incrementi capit malignitas. Observamus porro miasma sive contagium uno tempore majorem virulentiam habere, quam altero. Accidit hoc non semper ob manifestam quandam sensibus obviam causam, sed dubio procul ex pernicioso varii generis exhalla-

tionibus & effluviis, quæ ex animantibus & vegetabilibus surgentes, cum aeris particulis salino-sulphureis sese miscent, ut ipsa unione specificam quandam deleteriam virtutem nanciscantur, non secus ac videmus in chymicis, quod sola commixtione rerum, quæ per se non sunt venenatæ, venenum enascatur.

§. X.

Tertium genus est variolarum, *Et inter u-* quas nos mediæ naturæ dicimus, quia *traque medie* non sunt nec adeo malignæ, nec adeo *naturæ* benignæ, sed medio modo se habent, ideoque prudentem Medicum & idoneam medicinam poscunt. Tales sunt, quæ non sparsim, sed confertim, imprimis in facie & manibus, comparent, & confluentes fiunt; item quæ interiora, nares, fauces, interdum etiam œsophagum occupant, ut ægri non bene degultire possint. Anceps etiam facit judicium, quando in suppuratione acris denuo oritur febris, cum æstu, calore & ardore manuum; si caput nimium intumescit & largus salivæ fluxus est, si urinæ porro tenues, copiosæ minguntur & corpus largis sudoribus diffluit. Neque minus ubi novæ semper exsiccatis jam subnascuntur papulæ minores & suppuratio atque exsiccatio nimis protrahitur; ubi cutis tensior & pustulæ profundis sedent, ætas juvenilis, vel virilis, tempus autumnale & hiemale, æstas etiam nimis fervida & sicca præcessit, & præterea non adeo proba victus ratio a decumbente observatur. Et hæc sæpius omnino, nisi solícite præcaveatur, alios relinquunt morbos. Epidemice etiam ut plurimum grassantur, quum benigniores magis sint sporadicæ.

§. XI.

In suspectis quoque signis est, quando statim inter initia & ante eruptionem, acuti & pertinaces dolores in *Suspecta quæ signa* spina, brachiis, pedibus, lumbis, nec non coxendice affligunt; si cito nimis, primo illico, vel secundo die, variolarum vestigia in cute comparent,



rent, tanto magis quum exanthemata aspera, acicularum capita æquantia, interspersa; si staticnem non servant, mox disparent, mox redeunt; si facies non intumescit die tertio vel quarto, vel mox detumescit iterum; si in juvenibus ante eruptionem grave delirium, nec non difficilis deglutitio; si in suppuratione sopor, & post hunc alienatio mentis & incongruus sermo; si etiam nimium salivæ stillicidium.

## § XII.

Alvi  
fluxus  
non adeo  
per-  
time-  
scendus.

Alvi autem fluxus, licet copiosus, non adeo pertimescendus. Eundem enim per totius morbi decursum sine ullo periculo successisse vidi, tantum abest, ut eruptionem impediverit. Atque hanc in rem commemoratu dignum, quod scribit *Amatus Lusitanus Cent. III. pag. 234. pervenere hac æstate ad manus nostras plus minus GL. pueri, variolis & morbillis affecti, e quibus omnes evacuati evaserunt, alii vero, quibus parentum ex culpa evacuationis facta non fuit, vitam cum morte commutarunt, numero tres; alii vero, quatuor in ulcera difficillima & male morigerata pervenerunt, quæ cum aphthis communionem habent & facile in gangrænam abeunt. Iis similis superstes puer, qui ulcus cancriforme & malignum, cubitum dextri brachii occupans, multis foraminibus perforatum habet. Scilicet sicuti in febribus malignis petechialibus, alvi profluvium morbi facit solutionem; sic etiam in mali genii variolis idem evenire experientia docet, quæ etiam *Ballonii in epid. & ephemerid.* sententia.*

## § XIII.

Quando  
& quo  
modo  
mors e-  
veniat.

Qui variolis moriuntur, criticis ut plurimum diebus, nono, undecimo, vel decimo quarto decedunt, & quidem maxime convulsionibus, quas exquisitissimus ardor, dolor ac tensio in brachiis, manibus & facie, præsertim si profundius sedent pustulæ, excitat. Quidam catarrho extinguuntur suffocativo. In nonnullis, inprimis si malignitas subest, quando in situ ere-

cto, vel extra lectum sunt, animi obrepit deliquium, maculæ cum pustulis disparent, & convulsione superveniente, intra aliquot horarum spatium mors excipit. Vidi etiam variolis jam exsiccatis, juvenes quosdam subito insultu apoplectico esse extinctos, posteaquam in ipso morbo capitis gravitate, vigilia & per intervalla mentis emotione laborassent. Novi quoque infantes unius aut duorum annorum, quum absoluta exsiccatione in vado prorsus esse viderentur, macula erysipelacea livido nigricante maligna, quæ totam fere suram, vel pedis regionem occupavit, ex improvviso fuisse affectos & subito mortuos, manifesto sphacelationis & magnæ corruptionis in sanguine indicio.

## § XIV.

De iis autem, qui variolarum morbum superant, multiplici confirmatum habeo experientia, quod pueri qui ante illum valetudine minus firma usi, variis oculorum & aurium defluxionibus, tinea capitis, doloribus artuum, imbecillitate, pedum, rhachitide & tabe, nec non adultiores mensium retentione laborarunt, postea integram sanitatem; corporis robur & nutritionem latiore acciperint. Vicissim vero novi etiam alios, qui antea sani & valentes, in variolis vero perversa medicatione excepti, vel commissis in diætâ erroribus, valetudinarii postea facti, phthisin, febrem lentam, tabem & asthma incurrisse, visus vitia, ophthalmias, epiphoras, maculas & albugines contraxisse, aut ulceribus sordidis in facie & artuum juncturis fuisse affectos.

Post  
vario-  
las alii  
sani

alii va-  
letudi-  
narii.

## § XV.

Ceterum ultimo adhuc loco probe tenendum, quod materia variolarum semper sit indolis fermentativæ & sui multiplicativæ. Unde ne vix ullus alius morbus, excepta forsan pestilentia, adeo contagiosus, ac variolarum. Quo etiam fundamento nititur, cum fructu ab Anglis potissimum instituta variolarum inſtitio, qua purulento ex vario-

Vario-  
la con-  
tagio-  
sa.



variolofo decumbente humore in fauci-  
ciatam sani variolas nondum experti  
hominis cutem immisso, protinus  
idem hic morbus, cum febre omnibus-  
que quibus stipatur symptomatibus,  
suscitatur atque inducitur,

## CURATIO.

### §. I.

*Indica-  
tiones  
curatio-  
nis na-  
turæ du-  
æ sunt  
formæ.* Natura, per quam partium solida-  
rum & fluidarum corporis ad motus  
vitales & excretorios dispositionem,  
intelligimus, tam exactum in hoc  
morbo, si moratus, quam in nullo  
alio servat ordinem & tempus, &  
haud raro sponte, citra artificiosam  
medicationem, eundem percurat,  
quando videlicet crasis sanguinis &  
humorum viscerumque conditio, ita  
comparata; ut correctioni materiæ  
causticæ & expulsionis ejusdem non ob-  
stent. His naturæ viis merito insisten-  
dum Medico, nec aliud agendum,  
quam ut eidem in opere correctorio,  
expulsorio & suppuratorio congruis  
auxiliis subveniat. Igitur ita insti-  
tuenda medicatio, ut I. materia acris,  
vitiosa, caustica contemperetur & ex  
veterum loquendi more coquatur, si-  
mulque effrenes in vasorum & nervo-  
sarum partium systemate primis die-  
bus motus ad moderamen traducan-  
tur; II. ut eruptio secundetur & lan-  
guentes circa eruptionis tempus mo-  
tus erigantur, quo omnis ad corporis  
habitum pellatur materia, accedens  
autem in suppuratione secundaria fe-  
bris moderata fervetur, & graviora  
arceantur pathemata; III. ac demum  
declinationis & exsiccationis tempore  
sanguinis & humorum massa sub mor-  
bo dyscrasia & impuritate affecta, re-  
purgetur, sicque oriundi ex reliquiis  
morbi tempestive præscindantur.

### §. II.

*Quid  
facien-  
dum an-  
te eru-  
ptionem.* Acredinem materiæ mulcent simul-  
que nimiam sanguinis exsultationem,  
ipsam excretionem impredientem,  
blande componunt pulveres tempe-  
rantes, leniter diaphoretici, cujus

generis hic est: recipe cornu cervi phi-  
losophice præparati, usti, antimonii  
diaphoretici, lapidum cancrorum,  
matris perlarum ana drachmam, cin-  
nabaris rite paratæ drachmam semis,  
nitri puri scrupulum. M. f. pulvis, de  
quo pro diversitate ætatis dandum &  
dosis summa est dimidia drachma.  
Propinatur commodissime in vehicu-  
lo ex aqua scorzonæræ, nucleorum ce-  
raforum, florum sambuci, acaciæ,  
herbæ cardui benedicti & scabiosæ.  
Dein eundem in finem utilia decocta  
humectantia & temperantia, avena-  
ceum tenue, cum amygdalis in emul-  
sionem redactum, serum lactis dulce,  
nostra methodo paratum, aqua hor-  
dei cum ficibus decocta. Item emul-  
sio ex decocto scorzonæræ & cornu  
cervi, amygdalis feminibusque qua-  
tuor frigidis cum saccharo. Cui ad  
motuum vehementiam moderandam,  
commode adiicitur sirupus papaveris  
albi.

### §. III.

Quando natura segnior in expulsio-  
ne sub eruptionis tempore, danda *In eru-  
ptione.* hæc emulsio: recipe seminis napi,  
cardui Mariæ, aquilegiæ ana drach-  
mam, aquæ florum sambuci, gale-  
gæ, cardui benedicti ana unciam f. l.  
a. emulsio, adde antimonii diaphore-  
tici drachmam semis, sacchari perla-  
ti quantum satis est. M. Efficaciter  
etiam expellit liquor bezoardicus ad  
mentem Bussii paratus, cum tripla  
portione liquoris nostri anodynii mine-  
ralis nuptus. Item elixirium alexi-  
pharmacum, sine spirituofo menstruo  
sic confectum; recipe radicis dictam-  
ni, angelicæ, vincetoxici, contra-  
yervæ ana unciam semis, herbæ scor-  
dii, cardui benedicti ana manipulum,  
fiat extractio in aqua scordii libra me-  
dica & liquoris anodynii mineralis un-  
ciis tribus, additis prius salis tartari,  
croci & myrrhæ ana drachmis dua-  
bus; de quo viginti minimum & ad  
summum quinquaginta guttæ, præ-  
bendæ.

### §. IV.



## §. IV.

In sup-  
pura-  
tione.

Eadem profunt quando suppuratio lenta nimis & pustule elevari renuunt. Tum quoque utilis hæc mixtura: recipe myrrhæ electæ drachmam dimidiam, croci, salistartari ana scrupulum, aquæ scorzonæræ uncias duas, coquatur, coletur & usui fervetur. De hac dimidium, vel unum cochlear in emulsione, ex aquis analepticiis & diapnoicis cum seminibus quatuor frigidis, præsertim circa noctem, porrigendum.

## §. V.

Et ex-  
siccatio-  
ne.

Sub exsiccatione demum propinanda sunt remedia, quæ putredini resistunt, item quæ sordes relictas, vel sub morbo genitas, per congrua emuntoria evehunt. Utilis tum pulvis ex lapidibus cancrorum, antimonio diaphoretico, pauxillo myrrhæ, succini & croco. Proficuum quoque infusum theiforme ex herba scordii, summitatibus millefolii & semine fæniculi, cui si pectus simul affectum, veronica cum liquiritia addenda. Potissimum hoc tempore interponenda blanda laxantia, balsamicæ simul indolis, uti sunt instar omnium pilulæ Beccherianæ, vel ad earundem exemplar paratæ.

Cautela & Observationes  
Clinicæ.

## §. I.

Quibus  
Vomi-  
tus &  
epilepsia  
compe-  
scenda.

Evenit haud raro, ut in principio, præsertim infantibus, accidant crebræ & anxie vomitiones. Ad has compescendas & spasmus ventriculi laxandum, egregie proficit liquor noster anodynus mineralis, vel cum aliquot guttis spiritus bezoardici Bussiani remixtus. Idem hic noster liquor eximii usus si convulsio epileptica, in lactantibus maxime & difficulter dentientibus periculi non expers, urget nimis. Conducit etiam pulvis Marchionis, cum cinnabari & pulvere lumbricorum terrestrium. Et alvus clystere molliente solvenda, qua clausa in principio epilepticum malum auget.

## §. II.

Quando æstus acrior, nitri dosis in pulveribus augenda & tuto etiam præbenda tinctura rosarum, quatuor florum cordialium, cum phlegmate viatrioli parata, cui multum *Waldschmidtus* atque *Dolæus* tribuerunt. Nec male, quum in corporibus juvenilibus sanguineis, maximeque ubi variolæ mali moris ad putredinem pronæ grassantur, ratione & experientia teste apprime proficit; licet non omnem malignitatem extinguat, neque universale adversus copiosas variolas sit præservativum.

## §. III.

Frequens juvenili inprimis ætati symptoma est salivæ fluxus, qui supurationis tempore ut plurimum effusior accedens, non modo hanc, sed & somnum, non sine periculo, impedit. Moderandus igitur, tam per alvi apertionem mediante clystere emolliente, quam diaphoreticum bezoardicum medicamentum, cui aliquot grana florum sulphuris addenda, & bibendum de super infusum theiforme ex betonica, veronica & floribus chamomillæ officinalis, quo aucta sic perspiratione, a salivæ fontibus divertantur humores.

## §. IV.

Obsident pustulæ variolarum semper fere interiora faucium laringem & pharyngem, ibique ardorem, dolorem & difficilem deglutitionem, quandoque etiam aphthas, excitare solent. Molesto huic accidenti succurrendum gargarismate demulcente, ex decocto hordei & rob diamoron, adjecto pauxillo lapidis prunellæ, quo sæpius os eluendum. Utile quoque decoctum avenaceum, cum butyro infuso, si rupo violarum vel gravatorum, & nitritantillo. Et ad mulcendum ardorem, pustulæ & aphthæ subinde tangendæ & illinendæ mucilagine seminis cydoniorum, cum aqua rosarum facta.

## §. V.

Oculos quoque nonnunquam occupant

Æstus  
mitti-  
gādu.Saliva  
tio mo-  
deran-  
da.Ardor  
& do-  
lor fau-  
cium  
mulcē-  
dus.

Oculi



Defendi.

cupant pustulæ & suppurantes vitium eisdem inducunt. Hinc sub eruptione statim ab iis defendendi, quod optime fit linteo duplicato, cui spiritus rosarum in quo camphora cum croco macerata, instillatus, quod tamen ante applicationem in loco calido tantisper siccandum, quo potior spiritus portio avolet. Mihi frequens, aquam rosarum & florum sambuci, adjectis aliquot liquoris nostri anodynæ mineralis guttis & momento camphoræ, adhibere eademque palpebras inungere. Quod si vero a pustulis pellicula relicta, cito eadem post declinationem absumenda hoc liquore: recipe aquæ rosarum unciam, reginæ Hungariæ drachmas duas, vitrioli cyprini grana quatuor, sacchari saturni grana duodecim. M. quo frequentius cum subtili penna tangenda est exurescentia. Idem hic liquor, omisso tamen vitriolo, egregiæ virtutis, in oculorum acri, calida & ardente defluxione, cum rubore, quæ variolis crebro succedit.

§. VI.

Vene  
sectio  
quando  
prosit.

Pulsuum vehementia & robur, faciei rubor, capitis lumborumque gravitas ac dolor, venarum turgescencia, ætas juvenilis, ingenii activitas, diæta vinosa, sanguinis missio sueta & evacuatio critica suppressa, sanguinis subtractionem in variolis, primo, vel secundo statim die, indicant. Sic evanescunt mox pectoris anxietates & oppressiones, maculæ confertim incute efflorescunt, nec adeo gravia post eruptionem metuenda pathemata. Sæpius enim observavi, nimiam sanguinis redundantiam sufficientem materiæ variolosæ ad corticem corporis propulsionem impedire, & efficere, ut discretæ tantum prodeant pustulæ, intus autem relicta materia, circa declinationem varia symptomata spasmodica, convulsiva, deliria, catarrhos suffocativos, quin apoplexiam, inducat. Contra ea, ubi pulsuum durities, humilitas & exilitas, vasa minus turgent, vires languent,

Tom. IV.

temperamentum phlegmaticum, ætas infantilis & puerilis, corpus obesum, vomitus in principio adest, tussis & alvi fluxus, laborans etiam alias sub sanguinis missione facile animo linquitur, vena non pertundenda, ne nimia sanguinis copia subtracta, materia intus detineatur & eruptio ad plures dies, non sine periculo, protrahatur.

§. VII.

Haud levis inter Medicos est controversia: utrum emetica in principio variolarum prosint, nec ne? Nos ita censemus. Quum variolæ circumeunt, ad præservationem expedit utique dare ea, quæ sordes copiosas & crudos succos non modo ex primis viis, sed & biliosos & vitiosos humores ex hepate eliminant, quibus retentis, iustus metus est, ne graviores reddant morbum. Primo etiam invasionis die locum adhuc habere possunt, quando turgere primam regionem vitiosorum succorum colluvie adsunt indicia, ex egri potissimum voracitate incongruorum liquidorum & solidorum, nausea, oris amaritie & ructibus, desumenda. Tum omnino lene emeticum, tartarus emeticus, solutus prius, ad unum vel duo grana in adolescentibus in aqua menthæ, vel cinnamomi, additis aliquot mixturæ simplicis guttulis, cum fructu datur, evanescentibus postea quæ eruptionem impediunt anxietatibus, ut pustulæ intra tertium & quartum diem promte erumpant. Si alvum simul expurgandi intentio, tartarus emeticus cum infuso mannae dandus, in infantibus ad quartam vel dimidiam partem, aut pondus unius grani. Promiscue autem tale remedium alternis diebus porrigere, empiricum est consilium.

§. VIII.

De purgatione per alvum hæc monenda. Ante morbi insultum omnino sunt utilia laxantia, non vero fortiora purgantia, neque etiam mercurius dulcis, præsertim in infantibus & pueris tenerioribus. Optimum decoctum

Emet-  
ica in  
princi-  
pio pro-  
ficia.

Alvus  
ante e-  
ruptionem tu-  
to sub-  
ducitur.

F

tama-

Et no-  
scat.



tamarindorum cum rhabbarbo, vel manna. Et si suspicio, crassa intestina scybalis, duris esse facta, præmittendum clyisma emolliens & stimulans. Sub totius etiam morbi decursu nunquam permittendum, ut alvina secessio nimis diu, ad octo vel decem dies restitet. Si secus fit, inde potissimum in infantibus, vel suffocativi accidunt catarrhi, vel purpura varicolas, aut erumpentes comitatur, aut suppuratis iisdem, non sine insigni virium jactura & symptomatum vehementia, excipit. Neque hanc ob causam eveniens & per totum sæpe mor-

§. IX.

*In sup-  
puratio-  
ne an  
& qui-  
bus du-  
cenda.* An suppurationis tempore in febre  
secundaria proficua sint alvum ducen-  
tia? inter Medicos Anglos fuit disce-  
ptatum. *Freindius* peculiari scripto  
adstruxit variis observationibus utili-  
tatem, ita tamen, ut nonnisi deco-  
ctum mannæ admittat. Nos etiam  
hanc methodum non improbamus, si  
adsint, quæ purgationem indicant,  
alvus nempe per totum morbi decur-  
sum sicca fuit & constricta, copiosa  
in suppuratione salivatio & pectus co-  
pia humorum obsessum, ut anxia in-  
de & difficilis sit respiratio. Sed ego  
semper laxantibus præferre soleo cly-  
steres, emollientes alvinas duras fe-  
ces & educentes. Qui, si non suffi-  
ciunt, laxantia mannata præsertim  
in infantibus, quibus prima regio &  
præcordia crassis viscidis humoribus  
obessa, commodam omnino locant  
operam. Quin novi, me infantibus  
lactentibus, unius anni, vel ante  
eruptionem, vel in suppuratione,  
quum ob difficultatem & angustiam  
spirandi, suffocationis metus esset,

cum præsentaneo levamine porrexiffet  
lene emeticum , ex fexta , vel quarta  
parte grani tartari emetici , foluti in  
aqua veronicæ , addito pauxillo firupi  
violarum . Ceterum , quam utilia  
mannata in principio & incremento  
variolarum , tam perniciofa effe ali-  
quoties obfervavi , poft declinationem ,  
morbo foluto . Ingentes tum enim  
creant flatulentias , pectus lentis , vi-  
fcidis fuccis obruunt anxietatesque ef-  
ficiunt , quandoque etiam ut ulcera-  
tiones fequantur in ipla cute , faciunt .

§. X.

Ante pustularum eruptionem , & sub ipsa etiam , improbanda porro merito omnia calidiora expellentia , tam quæ vulgo dantur , semina nasturtii & aquilegiæ cum stercoreis , succus nimirum stercoris ovilli & equini , quam etiam tincturæ bezoardicæ , alexipharmacæ , nec non spiritus cornu cervi , cum æstuoso , quoad lectum & conclave , regimine . Inde enim sanguinis & humorum massa mirum exagitur , æstus , anxietas , convulsiones , spasmi , quin delirium , si adest , exacerbantur . Inde materiæ variolosæ major inducitur acrimonia atque subtilitas , ut ex benignis facile fiant malignæ . Et tantum abest , ut his æquabilis & constans eruptio procuretur , ut potius cito nimis minus præparata foras agatur materia , stationem non servatura , sed cum majori damno mox iterum ad interiora reversura . Quin potus tantum calidos , infusa theiformia & decoctum in fabarum coffee , liberalius usurpata , experientia edocti , reiicimus , Nimum enim sanguinis massam dissolvunt & materiam roscidam nutrientem cum viribus inter largos sudores dissipant . Temperatum igitur sit regimen , remedia temperata , Semper tamen distinguendæ naturæ , quæ si segniores , expulsionem juvantia , partitis sed vicibus data , profunt utique , & circa sextum etiam & septimum diem , eruptionem regimine tantisper calidiori secundare licet .

§. XI.



§. XI.

*Aeris puriſſi- ſi An- dendi.* Pariter in variolis oppido nocivum decumbere in loco humiliori, ubi plu- res eodem morbo detenti. Nam ibi aer, qui pabulum vitæ, impuris ac foetidis exhalationibus eſt refertus, quæ reſpiratione attractæ, organa ſubeunt vitalia & internam humorum corruptionem adaugent. Hæc etiam ſubeſt, cum regimine calido, ratio, quod ex plebeiis plurimi, variolis, licet bonæ alias ſint indolis, occum- bant. Hinc præſtat, uti ſæpius cum fructu ſuaſi, aerem gravem, conte- cto prius probe ægro, ex apertis fene- ſtris emittere, purioremque immitte- re. Nec minus ad corrigendum inqui- natum aerem, expedit collo appen- dere camphoræ fruſtulum, vel ſi ca- put odorem ferre nequit, in remotio- ri conclavis loco illud reponere.

§. XII.

*Linthea- mina cante- mutan- da.* An corpore ſudore perſuſo linthea- mina, induſia & lectum mutare li- ceat? non levis ad curationem mo- menti eſt quæſtio. Ego, ut largiſſi- mos ſudores in variolis nunquam ſine periculo eſſe, ſi diu perſeverant, ob- ſervavi: ita longe majus imminere diſcrimen, expertus ſcribo, ex mu- tatione lintheorum, quæ humidum & frigidiuſculum aerem adhuc ſovent. Cavendum itaque ne facile æger in alium lectum transportetur, niſi prius diu in hypocausto calefacto ſteterit. Neque lintheamina & induſia mutan- da, niſi prius calore ſint probe ſicca- ta, vel ab alio geſtata. Si hoc negli- gitur, in exquisitè ſentientibus ejus- modi corporibus, qualia ſunt, quæ effuſius ſudant, cutis quam facile fri- geſcit, maculæ puſtulæ diſparent & cum vitæ diſcrimine recedunt.

§. XIII.

*Receden- tes qui- bus ex- pellenda.* Quandocunque puſtulæ, vel ob de- ficiens naturæ robur, vel ob terrorem, refrigerationem, aut ſitum extra le- ctum diuturniorem erectum, ſubito concidunt, æger in vitæ diſcrimine verſatur certo, & niſi prudente Medi- cus illico analeptico & expellente re-

medio ſuccurrat, mors in propinquo. Ego cum fructu tum dedi liquorem cornu cervi ſuccinatum, cum liquo- re anodyno minerali, in aqua cinna- momi ſine vino & cardui benediſti, ſorbillare juſſi poculum infuſi thee, idque aliquoties iterare & præcor- diis pedibuſque calida applicare fo- menta.

§. XIV.

Mictus ſanguinis, alvus cruenta, hæmorrhagia narium & ſanguinolen- tum ex puſtulis ſerum manans, ma- gnam ſanguinis & humorum acrimo- niam & colliquationem indicant, ac peſſimum, plerumque lethale, præ- bent omen. Hæc ubi præſto ſunt, aci- dula, refrigerantia & acrimoniam demulcentia, uti lac ebutyratum & ſerum lactis, plus opis præſtant, quam cetera omnia exquisitiſſimi artificii re- media.

§. XV.

Periculofum ſymptoma eſt, ſi gra- vidæ variolas nanciſcuntur & circa eruptionis tempus, vel etiam in ſup- puratione, abortus accidit. Sanguis enim cum impetu utero effertur. Ma- jus adhuc periculum ipſiuſque mortis juſtus metus, ſi foetus non cito extur- batur. Vehementius enim ſanguinis fit profluvium, ſub quo animi accedit deliquium, expulſioni materiæ ad- verſum. Si etiam ſanguis parcius ema- nat, ejus motus ad caput convertitur, ſubſequenti inflammatione & delirio. Neque periculo vacat, quando men- ſes primis diebus, vel in ſuppuratione erumpunt copioſiores, id quod eam- plerumque ob cauſam accidit, quod ſanguinis miſſio neglecta.

§. XVI.

Obſervavimus, ſi æſtas nimis ſicca & diu arida, variolas maxime eſſe in- flammatorias & alvi fluxu quam facile ſtipari; qui tamen nullo modo ſiſten- dus, ſed tantum demulcentibus & ter- reis diaphoreticis excipiendus. Vitanda tum quoque omnia calida expellen- tia, cum regimine æſtuoſo, vitanda vero etiam refrigerantia & corporis



refrigeratio. Neque alvi profluvium nocet, quando petechiæ, pariter ob valde irregularem temporum anni constitutionem complicantur, ut potius remedio sit & malignos humores optimè expurget, ideoque providum æ peritum desideret Medicum.

## §. XVII.

*Confluentibus quomodo arceantur.* Quum variolis benignis, non facile quispiam, nisi ex Medici, aut proprio delicto, pereat, sed confluentibus, præsertim si mali moris fuerint, ex centum autem vix unus sit, qui variolas non experiatur: ego certe ut funestæ hæ arceantur, non certius novi consilium, ac eo tempore, quo malæ indolis variolæ grassantur, exquisitam victus & vitæ rationem servare, succos corporis convenientibus evacuantibus & decoctis pro potu temperantibus & mundificantibus a sordibus liberare & ad futurum forsan morbi insulsum præparare. Eundem in finem commendabile novum illud inventum insitionis, seu inoculationis variolarum, quod ex oriente in Europam translatum, numerosis admodum exemplis ab Anglis potissimum Medicis cum successu celebratum, eam tamen lege, ut pus variolosum ex papulis maturis & benignis promatur corpusque ante operationem probe prius præparetur.

## §. XVIII.

*Vesicatoriorum usus.* De vesicatoriorum peculiari in hoc morbo efficacia, quam nostro hoc ævo, Angli inprimis Medici, mirifice collaudant, pro certo ego quidem affirmare possum nihil. Rarus enim eadem adhibui; nisi ubi pueri, vel adolescentes, in ingentem soporem ac torporem inciderant, aut finito morbo, vitium oculi contraxerant, rubore ac defluxione affecti.

## §. XIX.

*Foveæ & cicatrices quibus avertenda.* Quum variolæ præsertim confluentes & profundiores faciem rugis, foveis & cicatricibus mirum deformare soleant; puellæ inprimis pulchritudini studentes enixe ut hoc avertatur rogant. Multi quidem ut faciem a va-

riolis defendant, primis statim diebus ex invento *Sylvii* suadent, ut pedes frequenter pediluvio immittantur & sic materia ex superioribus ad inferiores partes trahatur. Sed ego, ne quid dissimulem, nunquam periculum feci, nec ea propter certum quid de experimento hoc affirmare possum. Interim non penitus rejiciendum censeo, sed frequentibus & circumspèctis id commendando observationibus. Longe minus iis assensum præbere possum, qui papulas in facie pinguibus & oleosis, inungere jubent. His enim pori oblinuntur, diffusio impeditur, profundiores redduntur abscessus & vestigia cicatricum longe magis conspicua. Optimum potius consilium, quando præter superius dicta interna sanguinem depurantia, exterius, antequam penitus arescant papulæ, linimentum applicatur ex humana axungia, spermate ceti, cera alba, pauxillo balsami de Copaiva & camphoræ. Favet etiam nitori ac ruborem tollit aqua florum fabarum, rosarum, radices sigilli Salomonis, tribus partibus remixta cum una parte aquæ sic dictæ sclopetariæ.

## §. XX.

Accidit haud raro, ut exsiccatis jam, quæ primum effloruerant pustulis, ultimis diebus novæ & minores compareant aliæ. Hæ neutiquam negligendæ & refrigeratione aut improba victus ratione excipiendæ. Si enim recedunt, præter spem fieri possunt funestæ. Hinc curandum, ut sub moderata & æquabili perspiratione hæ pariter & maturecant, & arescant.

## §. XXI.

Superatis tandem variolis, providendum est, ne alii peioris indolis, supra jam nominati morbi, succrescant. Hunc in finem inprimis necessarium, ut prima regio a sordibus, tam in morbo, quam post eum ob languidam digestionem contractis, nec semel, sed aliquoties repurgetur, & quidem per laxantia balsamica, acori & corruptioni resistentia, inter quæ eminent rhabarbarina, pilulæ *Aui-*

cenna.



*cennæ, Ruffi & quæ in curatione commendavimus Beccherianæ, quæ commodissime prius in aqua destillata, uti menthæ, solutæ, propinantur. Dein convalescentes non nimis cito in publicum prodeant, sed aliquandiu adhuc vitent aerem liberum, tanto magis humidum & frigidum. Servent potius constantem perspirationis successum, eundemque secudent, tam per pota mane infusa theiformia ex herba veronicæ, scordii, semine fœniculi & anisi, quam etiam pulveres leniter diaphoreticos, per aliquod postea tempus alternis diebus vesperi usurpatos. Fugiant frigidum potum cum gravis materiæ & insalubribus alimentis cunctis, & ad perfectam sanguinis depurationem, abstineant a cerevisia & bibant aliquandiu decoctum temperatum ex radice scorzonæræ, cichorei, sarsaparillæ & semine fœniculi. Neque omittant inter cibos uti iis, quæ languentem stomachi digestionem, ad novos bonos succos ingenerandos necessariâ, fulciunt ac firmant.*

*Enarrationes morborum.*

OBSERVATIO I.

*Variolæ epidemica anni  
MDCXCIX.*

*Consti-  
tutio  
aeris  
præce-  
dens.*

**I**nsolita plane per aliquot ex postremis superioris sæculi annos fuerat tempestatum constitutio. Æstas imprimis, propter crebriores boreales ventos, humida ac frigidior, autumnus fere naturam gesserat, ut raro etiam fructus & uvæ recte potuerint maturescere. Autumnus effusis pluviis & subinde nivibus, cum pruinis ac nebulis incedens, tempus sordidum, aerem densum, cœlum obscurum & modice frigidum attulerat. Et hiems regnarat mirum mutabilis, squalida, sine constanti & acriori gelu. Accesserat præterea vere anni 1698. maxima in tractu nostro ex torrentibus inundatio, & ob stagnantes passim alveis elapas

*Tom. IV.*

aquas, aerem insigniter vitiat. Ut sic perfecta esset ubique ad epidemicum morbum dispositio.

Irruebat igitur hoc anno mense Septembri maxima cum vehementia variolarum morbus, & infantes, pueros, adultos, utriusque sexus, gravidas item, puerperas atque nutrices, inquilinos ac hospites, adoriebatur, ut non facile immunis maneret unus, qui non prius morbo hoc defunctus, & variolosorum numerus fere ad bis millesimum, in nostra hac urbe ascenderet. Nonnullis sine, plurimis ex contagio accidit. Ex illis fuerunt potissimum improbo victui, intemperantiæ & computationibus dediti, iracundia commoti, terrore ex aspectu egrotantium maxime aut mortuorum perculsi, timentes & horrentes morbum, nec non qui circumeuntibus jam variolis præsertim in domo quæ ipsos tenebat, purgantibus illarum incursum arcere susceperunt. Contagium vero penetrans maxime & efficax fuit, quod ex sanie jam suppurantium pustularum venit, idque non tantum in eadem domo commorantes infecit, sed in alias ædes, quin remotiora etiam loca translatum, perniciosam suam vim in dispositis corporibus exseruit, infestum potissimum personis constitutionis sanguinæ, phlegmaticæ, pituitosæ, spongiosi & mollioris corporis habitus.

Sic autem incessit & sic decurrit epidemica hæc variolarum lues. Antequam in conspectum prodiret exanthema, omnes fere conquesti sunt de dolore dorsi, capitis, lassitudine corporis, calore præternaturali, intercurrente horripilatione, cum pulsu frequenti, appetitus prostratione & somno inquieto. In nonnullis infantibus, rarius in adultis, incepit enormibus vomitationibus, quæ per aliquot interdum perstiterunt dies. Qui non vomuerunt, continuum tamen persenserunt conatum vomendi, nauseam & anxietates præcordiorum, modo graviores, modo mitiores. In adultis quibusdam

*Variola  
la po-  
pulares  
en G  
sine cō-  
tagio.*

*Sym-  
ptomata  
an-  
tecedē-  
tia eru-  
ptionē  
bent-  
gnam.*



& infantibus alvus fluxa, eruptionis tempore iterum consistens; in aliis primum adstricta, & tertio, vel quarto die demum aliquoties sine damno fluens. Frequens etiam multis mingendi stimulus, paucioribus urina, sine damno tamen, per aliquot dies suppressa. Tenelli & lactantes inter continuos ejulatus, pavoribus in somno, alvi adstrictione, vel profluvio, corporis calore & circa finem tertii diei levioribus, quandoque epilepticis insultibus fuerunt affecti. Serosis solennis fuit somnolentia, pruritus corporis, ardens & pruriginosus palpebrarum dolor, illacrymatio & sternutatio. Multis compunctorius in dorso & pectore sensus. Pueris circa tertium diem nares saepe sanguinem stillarunt. Ex his etiam primis diebus magnam ascaridum copiam excreverunt nonnulli sine, nonnulli cum periculo. Adulti mirum fuerunt impatientes, subinde aliena multa loquuti delirarunt plane; quod tamen sufficienti narium stillicidio mitigatum insufficienti vero ad auctum.

*Malignarum.*

Hæc pathemata præcesserunt ut plurimum benignas, ubi vero peioris indolis suberant, alia adhuc fuerunt præsto. In infantibus clamores intensissimi, nulla requies, tremores, extremorum mox frigus, mox intensus calor, cum insueto languore, in pessimis fuerunt. In adultis dolor artuum immanis, nec non lumborum, nephriticum & ischiadicum mentiens, gravis præcordiorum angor, delirium cum diarrhœa, punctorius exquisitus in pectore, vel hypochondrio sensus, tremores, horrores, membrorum incurvatio & contractura. Virium autem a primo statim insultu notabilis prostratio, vertigo, vigilia assidua, sub erecto situ lipothymia, pulsus debilis & frequens, effusus sudor, copiosa urina, salivatio & insolita muci e naribus ejectio, malignam plane prodiderunt indolem, licet interdum nec dolor, nec calor notabilis, nec anxietas, nec sitis adessent.

*Signa bona.*

Intra tertium & quartum diem in

benignis contigit eruptio. Nox antecedens plerumque gravis existit & inquieta, anxietatibus, tremoribus, phantasiis, hæmorrhagiis, quin nonnunquam epilepticis commotionibus, quidam etiam bis vel ter dejecerunt. Tum comparuerunt primum maculæ rubræ, magnitudine differentes, quandoque exiles & successive incrementes, quandoque latæ, in distinctas postea pustulas coeunt. Factum id primum in superioribus, postea manibus pedibusque copiosissime, tum cruribus pectore ac dorso parcus & in abdomine parvissime. Cum iis in facie effloruerunt simul in faucium & laryngis internis, labiis & lingua, tumque obortus dolor, ardor, pruritus ac tensio harum partium. In ipsis quidem oculorum tunicis vidimus nullas, sed in superciliis & palpebrarum interna æque ac externa facie collectim confidentes. Unde acerbis oculorum dolor, pruritus & ardor, & sexto die accedente faciei intumescencia, eorum occlusio ad suppurationem usque durans. Interim promte satis successit eruptio, & ubi pauciores quinto, ubi copiosiores, sexto die, penitus fuit absoluta, symptomata vehementiam posuerunt, pulsus antea concitatissimus, nunc tranquillus, æqualis & fere naturalis, somnus placidus, mens sibi constans & pectus ab angore liberum redditum.

Malum autem fuit, quando protinus secundo, vel in principio tertii diei, variolarum apparuerunt in facie vestigia, vel his interjectæ pustulæ varos referentes, vel etiam exanthema miliare, rubrum aut album; & vicissim quando septimo demum vel octavo die, novæ eruperunt ob materiæ copiam & naturæ imbecillitatem variolæ. Malæ etiam fuerunt, quæ non rubicundæ, sed livide, pallidæ, aut fuscæ, sessiles item, duræ & aridæ, cum fovea in medio. Pessimæ, quæ facta eruptione, symptomatum non attulerunt levamen. Seri præterea copiosa effusio, sive per sudorem,

*Et mala la gravitatis.*



dorem, five urinam, in adultis per alvum, five salivationem, cum morbo incipiens & sub eruptionis æque ac suppurationis tempore durans, ut plurimum observata funesta. Mictum tamen cruentum, frequens alias malignarum symptoma, non annotavimus, sanguinem autem ex sinistro oculo, mirum statim tumefcente, in puero quinto die mortuo, manasse, novimus. Quibus prævia horripilatione, sub erecto corporis situ, vel ob animi commotionem, disparuerunt variolæ, ingens accidit anxietas corporisque debilitas & haud leve vitæ periculum. Qui mortui, quinto, sexto, vel septimo die obierunt, vel delirio cum convulsione, vel sopore cum convulsione, aut tetano, posteaquam prævio notabili horrore, evanuisent cuncta ferme exanthemata.

*Suppurationis  
succes-  
sus in  
beni-  
gna.*

Sexto die in benignæ indolis inchoavit suppuratio, ac uti eruptio, gradatim a superioribus ad inferiora processit, nono die ut plurimum, in copiosioribus undecimo, quin decimo demum septimo die, desinens. Elevatæ sunt sensim pustulæ, molles, albæ, rotundæ globosæ comparuerunt, limbum rubicundum & pus bonum ex albo flavescens contraxerunt, cutis interjecta tensa, facies & manus, rarius pedes, intumuerunt, & vultus quidem adeo, ut palpebræ clauderentur. Successit ardor, rubor, dolor & tensio in facie potissimum & manibus, accensa denuo febris cum pulsus celeritate, inquietudine & præcordiorum anxietate, in quibusdam, licet innoxie, extremorum tremore. Fuerunt symptomata hæc jam mitiora, jam vehementiora, pro majori, vel minori, papularum in partibus præsertim extremis copiosa. Leniora etiam eadem observata, in infantibus, feminis, sanguineis sanguineo-phlegmaticis, sero abundantibus & laxiori cutis habitu præditis. Graviora vicissim in adultis, cute stricta, tensa ac dura & ubi pustulæ profundiores. Nonnunquam in adultis complicata frequens

salivæ ejectio, in infantibus diarrhœa, ut quotidie ter vel quater deicerent, interdum cinerei coloris, interdum purulenta plane, sine damno tamen. In vigore suppurationis, in iis maxime, quibus alvus per aliquot dies clausa, prodierunt aphtæ, cum ardore & dolore inflammatorio & viscosorum humorum in os confluxu, externis ut plurimum tēpestive discussæ.

Contra ea mali ominis fuit, quando pustulæ non elevatæ, nec sanie repletæ, sed depressæ manserunt, vacuæ, instar corticis pisi, item si lividæ, cinereæ & viridescentes aut in medio faveola nigricante conspicuæ. Quod postremum quidem non semper lethale indicium fuisse notavimus, aliis benignis symptomatibus concurrentibus; minimum tamen alieni coloris papulæ profundius subiectam cutem eroderunt. Periculosum dein animadvertimus, si in facie, vel manibus, tumor exiguus, aut plane nullus, aut etiam subito iterum disparsens. Quando saliva non bene fluxit, sed viscosa fuit & circa decimum, vel undecimum diem pectus cum suffocationis metu oppressit. Neque minus in ancipiti versati, quibus saliva a primo morbi insultu eo usque copiose effluxit, quibus, licet rarius id factum, diarrhœa accidit, cruentus vomitus, aut alvi secessus. Maximum periculum imminuit a graviore inflammatione, acerbiori dolore sicco, tensione, pulsucito, intensa inquiete & anxietate stipata. Tanto certius, quando frigore & horrore interpolata, ægri de interno ardore & siti & externo frigore conquesti. Inflammatio hæc ut plurimum mortis fuit causa. Febrem enim accendit maxime æstuosam, delirium fecit, vigiliam perpetuam, inquietudinem maximam & corporis in lecto jactationem, quæ demum excipit horror notabilis, pustulas albas reddens ac demum convulsio lethifera. Factum id maxime in adultis, die nono, undecimo, aut decimo quarto. Infantes autem plerumque

*Et man-  
ligne  
indol-  
lis.*



perierunt suffocatione, procul dubio, quod fauces interius copiosis pustulis obsessæ & variolosi humoris acrimonia ipsos nervos pneumonicos tunicalesque nerveas in spasmodicam exitialem adduxit contractionem.

*Singularia in suppuratione.* Ex singularibus observatis fuit, quod sanguis ex papulis suppuratis stillare visus in binis infantibus, uno trium, altero octo annorum, illo evadente, hoc decimo sexto die mortuo, posteaquam die quinto cutis utriusque manus & die nono crurum, colorem ex atro brunum contraxisset, in luculentum sanguinis subsistentis in sphacelum prout indicium. Duo etiam alii servati, qui non debita perfuncti suppuratione, sed ingentem copiam furunculorum ardentium loco hujus in universo corpore nati, simul passim efflorescentibus maculis latis, rubicundis, ardentibus.

*Exsiccationis phenomena.* Qui suppurationem superarunt, in iis, si clementes pustulæ, nono, si copiosiores, undecimo, si copiosissimæ, decimo quarto die, detumuerunt iterum partes, ardor imminutus, pulsus sedatior, somnus quietus, pustulæ sanie turgidæ factæ, maturaverunt, & vel sponte dehiscences, vel perforatæ, pus fuderunt coctum. Id eadem ratione ac in eruptione & suppuratione, factum primum in facie, postea in manibus ac tandem in pedibus. In dorso autem & pectore molliores semper manserunt, nec tanta copia putis repletæ sunt, nec crustas crassas conceperunt, forsan, quod ob poros magis ibi apertos & calorem, materia non tam glutinosa & arida fieri potuerit. Maturæ pustulæ dein sunt corrugatæ, fossulam in medio natæ, exaruerunt demum & deciderunt, non sine ardore & pruritu relicto. Quod, quo citius confectum, eo minus subjecta cutis exesa est & foveis deformata, quo tardius, compactis in unum crustis, extus aridis, subtus saniem putridam habentibus, eo magis nævi & cicatrices deformantes superfuerunt. Contigit id maxime in iis, quæ tem-

pore suppurationis & exsiccationis cinereæ & viridescentes apparuerunt, nec non ex ægrotis his, qui scalptu in tempestivo minus maturas lacerarunt earumque debitam exsiccationem sic impediverunt.

Ab absoluta exsiccatione, orti in quibusdam furunculi & abscessus minuti, omnem corporis ambitum cum dolore, ardore & febrili calore obsidentes. Aliis accidit temporaria manuum pedumque imbecillitas, vel contractura, balneis & linimentis spirituosis promte in plurimis quidem abacta, in nonnullis tamen cacochymicis & maturam opem negligentibus, transiens in ulcera circa articulorum epiphyses ægerrime sanabilia, quæ incongruis remediis in pessimas & tabificas fistulas degenerarunt. In serosis & catarrhosis successerunt tumores glandularum, in primis colli, insignes, duri & renitentes, emplastris tamen emollientibus & discutientibus feliciter cedentes. Infantibus præsertim & adolescentibus, post variolas frequens fuit malum epiphora, sive continuum lacrymarum stillicidium, cum dolore, rubore & luminis intolerantia. Cui, nisi cito occursum, turbidi redditæ oculi & tenues in cornea enatæ tunica, visum quodammodo imminuentes. Qui nimis cibos, gravis materiæ, assumerunt, vel carnes avidius comederunt, aut præmature lecto surgentes, corporis experti sunt refrigerium, incurrerunt de novo anxietates, vomitus, immo diarrhoeas, magna quidem cum debilitate, sed sine periculo.

Jam in debellanda epidemica hac lue ita sum versatus. Incursum quidem ipsius arcere ab iis, qui nondum experti, per remedia fuit irritum, optimum fuga tantum contagii. Id tamen observatum, vitæ temperantiam, victum laudabilem, naturæ cujuscumque accommodatum, abstinentiam a liquoribus spirituosis & calidis inebriantibus & animum tranquillum, tantum effecisse, ut paucæ, benignæ

*Et postea pauciores.*

*Pensatus arceri non potuerunt, sed meliores reddi.*



nignæ & periculi ut plurimum exper-  
tes variolæ in cutem exiverint. Ta-  
nto certius, quando frequens usus pul-  
veris absorbentis, præcipitantis, ni-  
trofi, adjunctus. Ii quoque, qui pri-  
mam regionem aliquoties a sordibus  
repurgarunt, minus copiosas minori  
periculo sunt nañti. Sed clementibus,  
rhabarbarinis, tamarindinatis, man-  
natis & tartareis, non vero aloeticis,  
colocynthiacis, acribus & resinosis,  
id fuit perficiendum, optime ante  
morbum, priusquam sanguis a miaf-  
mate infectus, licet id sine damno  
etiam factum noverim, quum præsto  
jam essent symptomatum nonnulla.  
Vomitoriis autem uti, interdixerunt  
ut plurimum circumstantiæ, licet alio  
tempore eadem alexipharmacis nupta  
apprime proficua deprehenderim. Ne-  
que universalis fuit illa variolarum co-  
piam arcendi methodus, quam post  
*Sydenhamum*, *Waldschmidtus* aliique  
celebres in Hassia Medici dilaudarunt,  
per crebriorem spirituum mineralium  
acidorum bene præparatorum, ante  
infectionem, vel etiam primis morbi  
diebus, usum, sub temperato tan-  
tum regimine. Non enim potuit hoc  
remedium, omni etiam diligentia ad-  
hibitum, extinguere malignitatem  
in nonnullorum sanguine, nec vario-  
las numerosas declinare. Quin obser-  
vavi, complures ex illustribus, ali-  
quot antivariolosi liquoris absunxisse  
ante & post invasionem uncias, nihi-  
lo tamen secius copiosis conspersos  
fuisse pustulis vehementissimis sym-  
ptomatibus stipatis. In quibus id præ-  
terea singulare fuit, quod papulæ sic-  
cescentes magnam exseruerint corro-  
sivitatem, profundius serpendo & de-  
pascendo subjectam carnem, insigni  
cum dolore, ardore & inquietudine.

*Quid fa-*  
*ctum*  
*ante e-*  
*ruptionem.*  
Qui igitur morbo affecti, his æqua-  
bile caloris temperamentum com-  
mendavi, & suasi, ut quamdiu vires  
ferrent, lectum vitarent, aut mini-  
mum culcitris ex corio, minus calen-  
tibus, uterentur. Ab omnibus etiam  
calidis, expellentibus, sic dictis ale-

xipharmacis & bezoardicis, vola-  
tilibus, ipsa bezoardica tinctura, ab-  
stinui, præsertim in juvenili & flori-  
da ætate, in sanguineis atque pletho-  
ricis. Laudatissimus inventus spiritus  
nitri probe dulcificatus, (cujus loco  
jam inventum a me liquorem anody-  
num mineralem, majori adhuc cum  
fructu, usurpare soleo) cum anatica  
portione sirupi papaveris erratici mix-  
tus, additis aliquot mixturæ simplicis  
guttis. Frequens etiam fuit usus pul-  
veris temperantis, ex matre perla-  
rum, antimonio diaphoretico, cor-  
nu cervi sine igne parato, cum tantil-  
lo nitri puri. Et vehiculum præbuit  
aqua scordii, scabiosæ, florum tilia,  
sambuci, papaveris rhœados & cera-  
forum nigrorum. Eadem quoque u-  
surpata ubi malignitatem prodiderunt  
symptomata, & præterea pulveri pro  
una dosi adjectum vel dimidium gra-  
num theriacæ coelestis, vel momen-  
tum camphoræ, cujus præstabilem  
virtutem cum nitro in malignis vario-  
lis deprehendi semper.

Ingruente eruptione, præscripta <sup>Sub ea</sup>  
ut plurimum emulsio, ex aquis florum <sup>ruptionem.</sup>  
sambuci, acaciæ, foeniculi, scabio-  
sæ, scordii; cerasorum nigrorum,  
seminibus napi, aquilegiæ, cardui  
maria, cum matre perlarum & jula-  
pio rosaceo. Tum etiam corpus cura-  
tius a frigoris accessu defendere jussi,  
& calorem, præsertim die quinto &  
circa noctem, tantisper intendere,  
ita tamen, ut subjecti semper habere-  
tur ratio, nec non diversæ ætatis, tem-  
periei, copiae vel motus sanguinis.  
Docuit enim experientia, deficiente  
calore externo sufficiente, eruptio-  
nem, in infantibus potissimum &  
phlegmaticis, minus expedite succes-  
sisse, pustulas jam protrusas iterum  
collabi lenteque refugere cæpisse, re-  
lictæ quadam præcordiorum anxietate.  
Hinc quando in cutem jam ple-  
nius ivissent variolæ, ad expellendum  
reliquum, essentia scordii probe satu-  
rata, vel liquore bezoardico Bussia-  
no, cum liquore anodyno minerali



remixto, cum fructu sum usus, tanto magis in malignis.

*Suppuratione.* Exulcerationis tempore, si ob naturæ segnitiam pustulæ manserunt depressæ & elevationem renuerunt, præstans fuit facultas myrrhæ, aliquot granis, cum pauxillo croci & pulvere bezoardico oblata. Sed nonnisi in principio. In statu enim suppurationis inflammatoria febris a myrrhæ incrementum. Neque unquam usurpata hæc, ubi suppuratio sponte recte successit. Urgente in exulcerationis vigore æstu & ardore, emulsione institui, substituto in locum seminis napi, semine papaveris albi, & in locum julepi rosarum, sirupo papaveris.

*Exsiccatione.* Absoluta suppuratione, siccescentibus jam in facie & manibus pustulis & febre defervescente, proficuum observavi pulverem ex lapidibus cancrorum, antimonio diaphoretico, myrrhæ electa & croco, qui exsiccationem & consolidationem, balsamica & temperante sua virtute egregie promovit. Per totum præterea morbi decursum, loco cerevisiæ, decoctum ex cornu cervi raspatum, radice scorzonæ, hordeo mundo, semine fœniculi & ficibus, tepesfactum (*verschlagen*) bibere jussi, cum emolumento; sed infusa calida herbarum, veronicæ, scabiosæ, herbæ thee, eruptionis & suppurationis tempore, liberaliter pota, minus proficua deprehendi.

*Symptomatum medicatio, hæmorrhagia.* Ex symptomatibus narium hæmorrhagia caute fuit excipienda. Si enim principio statim repressa, sanguis cum impetu ad caput latus, phrenitidem, vertiginem, deliria aliaque horrenda symptomata intulit. Si nimium excretum, defecit vis ad expellendam extrorsum variolarum materiam. Optimum igitur sub profluvio pedes a refrigeratione defendere, interius usurpare diascordium *Fracastorii* tum nitro, & externo, si effusior excretio, naribus attrahere & collo atque temporibus tepide apponere, acetum rosaceum cum camphora.

Ad delirium in eruptionis puncto nimis atrox, nec emissis jam in cutem variolis cessans, componendum, ne in phrenesin mutetur, expertæ virtutis fuit, spiritus vini camphoratus, cum oleo ligni Rhodii, tam naribus haustus, quam tepide iterato fronti & temporibus admotus. Adversus præcordiorum anxietates, tremores, inquietudines, pavores in somno, convulsiones, horrores & variolarum retrocessionem, probati usus hoc: recipe essentia castorei paululum inspissata drachmam unam, camphoræ grana tria, extracti croci granum unum. Quo præsentissimum ægris levamen allatum.

Diarrhœas sistere periculosum fuit; si tamen nimia & virium defectus ur-  
*Diarrhœa.* sit, pulvere bezoardico cum chaccarillæ cortice, id præstitum. Nec prætereunda nitri in compescendis his alvi fluxibus facultas, experientia, contra vulgarem sententiam, multoties confirmata.

Faucium, laryngis & œsophagi ardorem ac dolorem ab insidentibus pustulis, lenire & ab ulteriori inessu defendere jussi decocto florum sambuci, liquiritiæ & ficuum, nec non solo lacte calido, cum ficibus & croco decocto. Si anginosa subsuit inflammatio, juvit aqua florum sambuci, cum robdiamoron, nitro & croco. Aphthæ & labia dolentia inuncta mucilagine seminis cydoniorum. Eadem mucilago cum aqua florum sambuci & rosarum extracta, adjecto croci & camphoræ momento, mirifice profuit in pruritu, ardore & rubore oculorum, nec non ad eos, si clausi, aperiendos. Nares obturate litu olei amygdalarum dulcium, vel lini, adaperitæ.

Crustæ papularum duræ emollitæ & cutis subtus ab acri humore exesa consolidata linimento ex tinctura tartari, essentia myrrhæ, oleo amygdalarum dulcium & camphora. Ad delendas, decisis crustis, cicatricis, conducibile fuit unguentum ex axungia humana, spermatè ceti, saccharo satur-  
*Cutis vitiorum.*



turni, magisterio bismuthi & oleo tartari per deliquium. Restitancia demum ulcera unguento de cerussa camphorato utiliter tractata.

*Observata de N. S. b. piatis & papavera celis.* Ceterum sanguinis missio, neque ad preservationem, neque ad curationem, utilis observata. Ab opiatis & soporiferis interius abstinui, aliorum medicatione edoctus, inde in variolis copiosis majores obortas anxietates, & ante exquisitum suppurationis tempus, periculosum soporem cum tremore & membrorum succussione fuisse suscitatum. Papaveracea autem lenissima, semen papaveris albi in emulsione, aqua papaveris rhœados ejusdemque sirupus, utique fuerunt saluberrima.

*Conclusio.* Atque hæc est illa methodus & hæc sunt remedia, quibus ego usus sum in magno ægrotantium, centum minimum & quinquaginta numero, e quibus aliquot illustrissima multique generosa stirpe geniti, hac in Academia tum commorantes. Felix etiam fuit per DEI gratiam successus, maxima pars evasit & vigesima vix mortua, & ex his maxime qui malignis affecti. Servavi postea eandem semper medendi rationem, & triginta qui inde elapsi sunt annorum experientia confirmatum habeo, vix ulla alia in variolarum morbo proficua esse atque accommodata.

## OBSERVATIO II.

*Pathemata insolita ex alva obstru. & in variolis.* Generosus adolescens, exquisiti sensus, activæ indolis & macilentus, superiori anno variolis affectus est, quæ sine vehementia symptomatum, placide satis & ordine in conspectum venerunt. Quum vero circa sextum diem ad suppurationem accederent, præter opinionem miris afflictus est præcordiorum anxietatibus, conquestus simul de dolore abdominis, inquietus fuit, somnum capere non potuit & desiderandi stimulus ipsum dimidia quavis hora e lecto surgere coegit, sed sine successu. Licet autem hæc ultra diem & no-

stem urgerent, æstus tamen nec intensior, nec pulsus celerior factus. Ego accersitus in consilium, inquisivi, num sub morbo jam dejecerit? responsum tuli: nec in morbo, nec, quantum quidem recordari posset, tri-duo ante ipsum id esse factum. Illico igitur injicere jussi clysterem emollientem, oleosum, cum modico salis, flatuum vero & excrementorum renisus non totum, sed tertiam vix partem admisit; ad sellam tamen expertus est instinctum, ibique persensit inhærens orificio ani stercus durum & grandi mole, licet egerendi irritus esset conatus. Hinc iterato enema infundere jussi, & interius dare non dubitavi ptisanam mannatam, cum cremore tartari & oleo amygdalarum dulcium. Soluta inde alvus & per aliquot sedes incredibilis fere scybalarum induratorum copia egesta, æger etiam a prioribus symptomatibus liberatus, somnum recepit, variolæ rite suppurationem subierunt & cura reliqua ex voto successit.

### Epicrisis.

Quale sit alvi beneficium, in omni morbo quærendum. Si enim quis in morbum, maximeque in variolas & morbillos, in quibus ordinario primis diebus alvus adstricta, incidit, & intestina jam tum stercorum copia facta, magna non possunt non insequi pathemata, quorum causam medicus vix perspicere valet. Hinc in quocunque morbo ab initio statim prospiciendum, ut alvus ab excrementis sit depleta, sive id commodissime fiat per enema, sive per laxans internum.

## OBSERVATIO III.

A matre hysterica, inordinate vivente, sub graviditate autem optime semper valente, procreati erant tres infantes. Has anno cldo. ccxiix. corripuit variolarum morbus publice grassans. Is licet non adeo mali esset in aliis moris, in his tamen insolita habuit pathemata. In uno quippe, pue-

*Variolæ mali mortis ex vitio materni succi.*



puero quinquenni, eruptio, licet febris cum conſuetis ſymptomatibus ad eſſet, per octiduum duravit & ſuppuratio etiam longius quam fieri ſuevit, protracſa fuit. In altero, puero quatuor annorum, ſecundo ſtatim die prodierunt, interſperſis maculis aſterioribus quaſi purpuraceis, æſtus & pulſus per totum morbum fuit idem præternaturalis, puſtulæ manſerunt feſſiles, pus non conceperunt & plurimæ punctulo nigro fuerunt conſpicuæ. Et in ſore, puella ſeptenni, variolæ conſertim occuparunt fauces & guttur, ut vix ſolidi vel fluidi quippiam deglutire, quin ſpiritum trahere poſſet. Nihilominus uſu convenientium & tutiſſimorum remediorum, temporis beneficio, diſceſſit hic morbus. Sed quum appetitu redeunte, plus ingererent, quam debile corpus ferre poſſet, nec rigidam & ventofam auram vitarent, factum eſt, ut in tribus his infantibus paſſim orirentur dolores & tumores in articulis, junctura præſertim cubiti, in digitis manuum, plantis pedum, ipſo etiam in collo, cum febre lenta. Medicus & Chirurgus omnem quidem contulerunt operam, nihilo tamen ſecius nata inde ulcera ferina, carnem exedentia & oſſa cum nigrore corrumptentia, acceſſit tabes & virium maxima proſtratio, ut etiam pueri bini ſub initio tertii menſis ſatis cederent. Puella autem, non adeo malignis ulceribus affecta, ſervata. Ego quippe in conſilium vocatus, pro potu ſuaſi emulſionem ex decocto hordei, ſeminibus cucurbitæ & melonum cum ſaccharo. Sumtus cum hac pulvis noſter bezoardicus, crebriori, ſed parciori doſi, adjectis quandoque aliquot granis reguli antimonii medicinalis, quandoque nitri. Ad alvum laxandam datus ſirupus roſarum ſolutivus cum extracto rhabarbari & mercurio dulci, omniaque hæc per aliquot hebdomades continuata interius. Exterius vero ulceribus putridis injectum baſam noſtrum vulnerarium, cujus

principale ingrediens baſamus ſulphuris antimoniatuſ, cum oleo terebinthinæ paratuſ, idque potiſſimum, remixtuſ cum eſſentia myrrhæ, ſuccini & baſamo Peruviano, miram præſtitit opem in ulcere quatuor foraminibus in olecrano hianſe. Tumoriſ quoque indolentibus ac duris, quibus pedes paſſim obſeſſi, impoſituſ emplaſtruſ *Vigonis* de ranis, aucta mercurii portione & admixtis floribus ſulphuris. Quibus demum intra aliquot menſes ex mortis faucibus erepta puella.

### *Epicriſis.*

I. Feminae valetudinariæ, ſi uterum gerentes minus ægrotant, infantes edere ſolent infirmos & potiſſimum in variolis & morbillis graviter decumbentes, & credibile, confluiſſe in embryonem impuros matris ſuccoſ.

II. Variolarum morbus in ſe ſatis mitis eſt, ſi benignoſ in corpore offendit ſuccoſ earumque materia non adeo eſt virulenta; contra ea, quando in corpus incidit impurum & fermentum a prima nativitate contractuſ malignuſ, peſſimi genii emergunt variolæ, licet tum in aliis admodum ſint benignæ.

III. Ubi exanthemata varioloſa malignæ ex ſymptomatibus cognoſcendæ ſunt indoliſ, nunquam iis ſidendum, etiamſi jam aruerint & lapſæ ſint puſtulæ. Ita enim ſanguiniſ & humorum maſſam inquinare ſolent, ut accedente improba victuſ ratione, perſpiratione intercepta & neglecta repetita primæ regionis & ipſiuſ ſanguiniſ repurgatione, poſtea inſequantur graviffimi & lethaleſ morbi, apoſtemata, abſceſſuſ in internis partibuſ, in meſenterio maxime & pulmonibuſ, cum febre lenta & heſtica, in externis vero peſſima & foeda ulcera cancroſa, exedentia.

IV. Quæ autem tum variolas excipere ſolent mala, non aliter oppugnanda, ac morbi, qui extreme humoruſ corruptioni debentur. Unde



memini, a peritis Medicis & Chirur-  
gis ejusmodi maligna ulcera inunctio-  
ne leviori cum hydrargyro, item mer-  
curio dulci cum laxante dato, nec non  
decoctis temperatis, cum antimonio  
crudo, fuisse perfanata, modo febris  
abstulit.

## OBSERVATIO IV.

*Scabies,* Juvenis literarum studiosus, victus  
*furun-* & vivendi rationis incuriosus, scabie  
*culi,* humida & pustulosa per aliquot men-  
*morbilli* ses laboravit, liberatus decoctis & li-  
*et va-* nimento, quod pro basi habebat flo-  
*riolæ in* res sulphuris. Non ita multo post cor-  
*uno suc-* repta est morbillis, tum epidemicis,  
*cessiva.* quos pariter evasit. Sed post binas  
hebdomades effloruerunt sensim in  
universo corpore furunculi copiosi,  
quorum nonnulli insigni inflamma-  
tione stipati, in profundos ægre sana-  
biles abscessus abierunt, donec deco-  
ctis mundificantibus, laxantibus ap-  
propriatis, maxime mercurialibus,  
& lenioribus diaphoreticis, sanaren-  
tur tandem. Elapso inde circiter men-  
se, denuo in variolarum incidit mor-  
bum, gravibus symptomatibus ince-  
dentem. Erant enim maxima ex par-  
te confluentes, septimo vix die, licet  
febris adesset, comparuerunt, ægre  
quoque subierunt suppurationem, de-  
pressæ potius manserunt, nec post e-  
ruptionem pulsum frequentia ex toto  
remisit. Egregium tamen levamen  
æger obtinuit solutione myrrhæ &  
croci in dilutiore liquore salis tartari,  
a cujus usu ad sensum successit suppu-  
ratio & variolæ cum symptomatibus  
ad legitimum decursum traductæ.  
Continuatus igitur longius hujus re-  
medii usus, siccatis etiam jam & de-  
cidentibus pustulis, & notabile fuit,  
sub ipsa suppuratione alvum quotidie  
sponte vel septies fluxisse, æstumque  
febrilem, qui tum alias auctior, fuisse  
mitigatum. Quo etiam factum, ut  
juvenis hic integram penitus recupe-  
raret sanitatem.

## Epicrisis.

I. Variolarum & morbillorum ma-  
teria, sive, ut ita loqui liceat, fer-  
mentum, neutiquam in massa sangui-  
nis & humorum delitescit, neque eti-  
am a sola impuritate, sive cacochy-  
mia humorum venit. Alias enim re-  
purgatis in hoc juvene per scabiem &  
furunculos sanguine & succis, non am-  
plius potuisset habere locum. Hinc  
potius credibile, materiale horum  
exanthematum causam infixam esse  
firmius tubulis partis cujusdam stabi-  
lis, ibique, haud secus ac cancri &  
canis rabidi virus, tam diu oculi, do-  
nec a contagio, vel specifico quodam  
liquido, vel aere, in actum deduca-  
tur & sui juris fiat.

II. Alvi fluxus, non uti vulgaris  
est sententia, in hoc morbo adeo est  
pertimescendus, nec suppurationem  
semper impedit, nec materiam ad in-  
teriora vocat, sed in variolis etiam  
mali moris, sæpe, expurgando ex-  
crementitios succos, in salutem cedit,  
haud secus ac febres malignas diarrhæa  
haud raro solvi novimus.

III. Solutio myrrhæ, cum croco,  
in liquore alcalino minus spirituofo,  
egregia omnino ad sanguinis depura-  
tionem, sulphur blandum & balsami-  
cum vappidis humoribus reddendum  
& ad præsciendos multos, qui va-  
riolas excipere solent, graves affectus.

## OBSERVATIO V.

Binæ puellæ gemellæ quatuor anno-  
rum, quarum una habitior, grandior,  
animo segnis & torpida, altera maci-  
lentiore, statura minori, animo au-  
tem magis sentiens & vegeta, uno  
tempore eundem variolarum mor-  
bum incurrerunt, sed in alterutra di-  
verso modo & eventu succedentem.  
In utraque erant confluentes, sed in  
obesiori illa tardo admodum, die se-  
ptimo, prodierunt, pus contrahere  
noluerunt, in facie & manibus fue-  
runt sanguinolentæ & apertæ serum  
plorarunt sanguineum, ægram inte-  
rim

*Variolæ  
in ge-  
mellis  
diverse*



rim miræ discruciarunt anxietates, cum febre & siti continua somnique defectu, donec undecimo die exspiraret. Altera vero omnia habuit mitiora, tertio die venerunt papulae, nono aruerunt, deciderunt & ipsa mox convaluit.

*Epicrisis.*

Infantes hieodem succo matris nutriti, eodem victu & regimine usi, eodem morbo impliciti, eodem contagio infecti, eadem methodo iisdemque medicamentis tractati sunt, plane dissimili tamen successu & eventu. Patescit igitur, sanitatem corporis, animi viriumque integritatem, morborum originem, decursum & finem, non tam a causis externis, cibo, potu, aere, regimine, quam medicamentis, dependere, quam potius a peculiari & specifica partium solidarum structura, proportionem & dispositionem, & hanc ob id omnino magis a Medico esse considerandam, quam solam conditionem fluidorum horumque naturam...

OBSERVATIO VI.

*Variolae  
septima  
die fu-  
neste.*

Juvenis succulentus & sanguineus, generosus, cujus familiae variolarum morbus maxime fatalis, degerat ruri & autumnali tempore venationi, & mane, & in seram usque noctem, plus justo sub coelo pluvioso ac nebuloso indulserat, & postea huc delatus, crapula ex vino & esu ostrearum corpus debilitarat & stomacho vim fecerat. Altero die post incidit in variolarum popularem eo tempore morbum. Invasit quippe eundem primum horror & vehemens anxius aestus, insequente nocte admodum inquieta: Die post impatiens fuit, conquestus de exquisito spinæ & capitis dolore, delira & absorta multa protulit & alvus fuit adstricta. Injectus hinc ad avocandos a capite humores clyster, quo alvus respondit. Data quoque aestum refrænantia, acidula, nitrosa, pulveres præcipitantes & absorbentes. Inde

mitigatum delirium & intra tertium & quartum diem eruperunt in facie maculae exiles, aciculae capitis magnitudine, simulque pustulae asperae miliares albae & rubrae. Quinto die manus & pectus occuparunt pustulae, tam numerosae, ut vix spatium inter ipsas esset relictum. Hoc facto, remiserunt quidem symptomata cum aestu, pustulae autem ægre maturuerunt, facies justo minus intumuit, pulsus semper mansit frequens, & septimo die tam exquisitus ardor & dolor tensivus in manibus obortus, ut plane esset intolerabilis, lectum & locum mutare voluit æger frigidaque ad manuum incendium restringendum contrectare, somnus aderat nullus, spiratio vero anxiosa & difficilis & pectus obsessum humorum copia, suffocationem minitante. Applicata enemata, exhibitæ emulsiones cum pulveribus bezoardicis ac temperantibus, sed omnia incassum, eodem potius die accidit extremorum refrigeratio, subsequente convulsione & brevi post ipsa morte.

*Epicrisis.*

Haud adeo infrequens est, variolas certis familiis magis esse infestas atque funestas, cujus tamen causa minus cognita. Id vero incomperto, multum ad pessimam variolarum naturam conferre corporis refrigerationem, ingluviem incongruorum & ebrietatem. Quæ si præcesserunt & paulo post morbus impetit, expedit omnino, antequam tota œconomia motuum turbetur, colluviem ex primis viis idoneo laxante vel emetico exturbare. Primæ enim regionis sordes mirifice impediunt materiae variolosæ salutarem exitum, immo vim morbi augent. Et si tum natura alvi movet fluxum, egregie pro sanitate est. Ut plurimum vero variolosi moriuntur convulsione, quæ suscitatur ab intolerabili aestu ac dolore in suppuratione pustularum, inprimis si cuti profundius insident, corpus juvenile est ac tenerioris texturæ.



OBSERVATIO VII.

*Variolæ  
in la-  
tente  
cum de-  
titione  
sanatæ.*

Subito corripiebatur infans lactans unius anni motibus epilepticis, qui singulis horæ quadrantibus impetentes, per 24. horas insistebant. Pro-  
rumpebant inde dentes canini & aculeos visui & tactui sistebant, die post comparebant etiam variolæ, non ut ordinarie solet, sed primum in manibus & pectore, & postea in facie. Nutrici magis quam tenello dabantur medicamenta. Huic quidem præter pulverem Marchionis, cum specifico cephalico *Michaelis*, fere nihil, & illi pulvis bezoardicus noster cum præcipitante remixtus, elixir pectorale crocatum & liquor ex myrrha, croco & salis tartari solutione. Quibus & dentitio & variolæ successerunt feliciter.

*Epicrisis.*

Non mirum eruptionem, & dentitium, imprimis caninorum, & variolarum, tam atroces præcessisse insultus epilepticos. Quod autem variolæ serius in facie effloruerint, id procul dubio tribuendum spasticis tractionibus & strictionibus ex dentitione in hac regione vigentibus, poris inde nimium coarctatis, materiam impuram non admittentibus. In lactantibus tenellis variolis affectis, medicamenta magis nutrici sunt præbenda talia, quæ acrimoniam imbibendo, succum chylousum & nutritium dulcem ac roscidum reddunt, quo materia caustica, quam optime cicuratur ac temperatur.

OBSERVATIO VIII.

*Variolæ  
malignæ  
post si-  
sum e. e.  
Etiam le-  
thales*

Adolescens generosus incidit in variolas, non quidem confluentes, nec nimis copiosas, nec intensa febre, nec aliis gravibus symptomatibus stipatas; pulsus tamen absoluta etiam ferme eruptione debilis & frequens mansit, somnolentia adfuit fere continua, æger semper & a somno magis languit, pustulæ elevatæ quidem, sed pelluci-

do humore plenæ, in medio complanatæ & nonnullæ punctulo nigro insignitæ. Nono die, æger e lecto, ab adstantibus sternendo, levatus, felle in conclavi calido & stragulis tectus impositus est, sed per quadrantem vix horæ erectus sedens, rogavit, ut in lectum ipsum cito transferrent propter obrepentem animi defectionem. Factum id. Conciderunt tamen subito papulæ, pedes frigefacti, pectus oppressum, spiritus interclusus & subsequuti motus convulsivi, quibus post aliquot horas æger extinctus.

*Epicrisis.*

Malignitatis characteres habuerunt hæ variolæ a principio statim, pulsus, somnolentiam cum virium lapsu, pustulas pellucas in medio depressas & nigricantes. Sub ejusmodi morbi facie & virium languore, semper admodum perniciosum, ægrum paullo diutius in erecto situ servare. Languidior enim cordis pulsus non sufficit ad trudendum perpendiculari via versus caput sanguinem, unde animi fit deliquium, sub quo motus sanguinis elanguescit, ad interiora convertitur, cor obruitur, extrema frigent, cutis contrahitur, materia virulenta ad interiora & nervosas partes repellitur, in capite sanguis stagnat & convulsionem demum facit lethalem.

OBSERVATIO IX.

Generosa virgo, quatuordecim annorum, grassantibus variolis de ingenti capitis & lumborum dolore con-  
querebatur, cum æstu præternaturali, siti & corporis lassitudine, cutis mox horrebat, mox calebat. Medicus vocatus, variolarum morbum subesse conjiciens, mixturam ex spiritus natri dulcis & tincturæ bezoardicæ ana-  
drachma & scupulis duobus sirupi papaveris rhœados, singulis horis, ad quadraginta guttas porrigebat, sed ægra post hujus usum alimenta omnia vomitu rejiciebat, & inquietudo cum anxietate & virium prostratione ad-  
mo-

*Emet-  
cum la-  
næ in  
eruptio-  
ne va-  
riolarum  
cū fru-  
ctu da-  
num.*



modum urgebat. Dabatur igitur hæc mixtura: recipe aquæ florum sambuci, acaciæ, cornu cervi citratæ ana unciam unam semis, theriacalis drachmam semis, lapidis bezoardici orientalis scrupulum, spiritus salis ammoniaci, guttas X. croci grana tria. Qua binis vicibus assumpta, ægra stragulis obtegebatur & in hypocauſto calido ad sudorem cogebatur. Sedabatur vomitus & intra secundum & tertium diem cum æſtu intensiſſimo prodibant maculæ. Sed quum ob calorem ardentem ſtrata removerentur, mox corripiebatur horrore & maculæ illico diſparebant, inſequente ſumma inquietudine, anxietate & vomendi ſtimulo. Eveniebat hæc viciffitudo aliquoties quotidie, ut bis vel ter aucto calore comparerent, & diminuto diſparerent iterum. Medicus certior factus præceſſiſſe malam diætam & ingluviem fructuum horæorum dulcium, lacticiniorum, caſei & acetariorum, ventriculum & primum inteſtinum multa obſeſſum eſſe ſaburra ratus eſt, ideoque, quum præterea alvus per quatuor dies fuiſſet ſtrictior, hanc in uſum vocavit potionem: recipe mannæ electæ drachmas ſex, tartari emetici granum, aquæ cardui benedicti uncias duas, mixturæ ſimplicis guttas decem. M.D. Aſſumpta hac, plus quam decem ſequuti vomitus, pituitæ viſcidæ & ſub viridis, nec non aliquot ſeceſſus. Poſtea data eſſentia theriacalis, cum aqua liliorum convallium, pauliſper ſpirituofa, qua vomitus & alvi fluxus ſedatus, anxietates omnes remiſerunt, & diſfuſo per univerſum corpus calore æquabili, copioſiſſimæ cum impetu quaſi in facie, manibus, pectore & pedibus eruperunt variolæ, ſtationem ſervantes & ſupurationem quam optime ſubeuntes, ſine ſevis ſymptomatibus. Inprimis plantæ pedum variolis fuerunt reſertæ, ſub cute ibi craſſiori deliteſcentibus & ſub exulceratione graves ſuſcitantibus dolores, qui tamen ſpiritu vini camphorato cum oleo amygdala-

rum dulcium deliniti, ſecedente in exſiccatione cute totius plantæ.

#### *Epicriſis.*

Nil certe pejus eſt, ac ſi variolarum morbus invadit corpus in quo ventriculus & primæ viæ cruditatum colluvie obſeſſæ. Inde enim augentur anxietates, ſpaſmi invaleſcunt, & ad extremam cutem diſfuſi, horripilationem ibi faciunt ejuſque conſtrictionem. Inanis hinc labor eſt, tum expulſionem internis & calore externo urgere, quin noxius ante debitum eruptionis tempus, eo quod vi pulſæ variolæ admodum ſunt inſtabiles & cum pathematum exacerbatione iterum recedunt. Utile potius ventriculum convenienti laxante & emetico a ſaburra deplere, quod etiam ipſa natura per naſeam & vomendi deſiderium innuit. Patet igitur, emetica, ante eruptionem data, non tam facile nocere, ſed potius, levata ab onere natura, eandem promovere. Sed imperitus non facile imitetur heic facta cum fructu. Semper enim diſtinguendum eſt inter vomitum & conatum vomendi, qui ab illuvie vitioſorum humorum prima in regione, & inter illum, qui ab acrimonia ſubtili cauſtica nervoſis tumcis inhærente oboritur. In illo utiliſſima vomitoria, in hoc nocentiſſima. Ceterum pluribus tam de ſanguinis miſſione, quam evacuantium uſu evolvendam commendo *Medicinam conſultat. Tom. V. Dec. V. caſ. IIX. pag. 359. ſeqq.*

#### OBSERVATIO X.

Puer quadriennis, graſſantibus in parentum domo variolis, iſdem, quam quibus invadere ſolent, afficitur pathematibus. Mater hinc ipſum includit hypocauſto & lecto calido pedibus. que lagenam aqua fervente plenam admovet. Medicus ſenex conſultus omnia habet rata, & præterea ob pavores & ad promovendam eruptionem ſpiritu cornu cervi cum eſſentia caſtorei porrigit. Sed ſecundo die inſul-

Noxæ  
ex calo-  
re regi-  
minis  
& me-  
dicamē-  
torum  
in va-  
riolis.



tus accedunt epileptici, cum anxia & quasi suffocatoria respiratione, somno terroribus pleno maximaque inquietudine. Me igitur advocant, qui adveni-  
niens fenestras provide aperire & stragula nimia remove jubeo, & loco spiritus cornu cervi, spiritum nitri dulcem, cum sirupo papaveris rhœados, item pulverem Marchionis, cum nitro & cinnabari exhibeo. Inde post paucum tempus symptomatum vehementia mitigata penitusque remittit, maculae placide & copiose prodierunt, totiusque morbi curatio ex voto successit.

*Epicrisis.*

Pessimus, vulgi imprimis, mos est, variolosos calidissimo regimine excipere & pessimum consilium expellentia & sanguinem exagitantia offerre. Pereunt enim hac ratione plures, vel minimum in gravia adducuntur parthematia. Memorabilis de eodem hoc cornucervi spiritu est casus in *Amanni Medicina critica*, de tribus liberis, a paullo liberaliori ejusdem dosi, enectis. Hinc laude merito dignus *Sydenham*, qui primus fere hunc errorem detexit; contrariam plane suavitatem methodum, temperantia nempe, motum sanguinis nimium sedantia, anodyna & acidula temperata, cum moderato regimine.

OBSERVATIO XI.

*Cancro-  
ja cornu  
prio in  
labio  
post va-  
riolas  
dentalis* Diu admodum tertiana laborarat puella quindecim annorum, qua demum discedente, variolae publice circumcumbentes successerunt, ut illa in has tantum non mutata videretur. Pro-  
dibant interim feliciter & sanabantur. Sed exsiccatis iisdem, remanebat macula rubicunda acerbè dolens in labio inferiori, quae aucto paulatim rubore, cum acri ardore in tumorem plane elevabatur. Imposito a balneatore cataplasmate ex albumine ovi & bolo Armena, nigra cum vicina carne comparebat, sine omni sensu. Sphacelum igitur adesse ratus, applicabat deco-

Tom. IV.

ctum sic dictum nigrum, ex herbis amaricantibus, foliis quercus, cum aceto & vitriolo, sed malum longe magis invalescebat & brevi adeo putrida increfcebat corruptio, ut labia cum gingivis penitus absumerentur, ipsiusque dentes nigrore inficerentur. Admovebantur quidem alia putredini efficaciter resistentia, una cum internis alexipharmacis, sed frustra plane, ægra ob id, consumtis post aliquot hebdomades viribus, miserrime pereunte.

*Epicrisis.*

Causa horrendæ catastrophes vix alia, quam quod variolae inciderunt in corpus, in quo per diuturnam febrem & calorem vires consumitæ, & benigni ac temperati succi dyscrasiam viscidam, impuram excrementitiam contraxerunt. Quum enim ipsæ variolae jam ejus sint indolis, ut rosidos corporis succos consumant & putres ulcerationes ob id sæpe relinquant; mirum non est, cancrasiam corruptionem in tam imbecilli & impuro corpore fuisse subortam. Discant autem hinc Medicinam facientes, variolas in sordidis & infirmis corporibus circumspecte esse tractandas, & superatis iisdem, eo quam maxime, enitendum, quo dyscrasia humorum per laxantia, diaphoretica, decocta & infusa, tollatur penitus.

C A P U T VIII.

*De febre Morbillofa.*

*Theses Pathologicae.*

§. I.

**M**orbillofa febris est catarrhalis exanthematica, ut plurimum epidemica, qua motu vitali cordis & arteriarum aucto, materia acris, caustica, inflammans, ex interioribus, nervosis maxime partibus, sub forma macularum rubrarum ad cutem pellitur.

*Morbil-  
lofa fe-  
bris de  
scriptio*

§. II.

In scholis & scriptis Medicorum plurimumque quidem morbilli simul cum variolis pertractantur. Nec negandum,

*Ejus  
diagno-  
sis &  
diffe-  
rentia  
a va-  
riolis.*

G



dum, multum utriſque eſſe affinitatis . Utraque enim febris exanthematica , contagioſa & epidemica , omnibus hominibus perpetienda ; utraque certis temporibus, magis, vel minus benigna & ſequitur quam maxime athmoſphæ- ræ ſtatum , corporis diſpoſitionem ac temperamentum . Sed mihi placuit morbillorum morbum ſeorſim perquirere , quum inſignis tam quoad cauſam , & genium , quam diagnofin & prognofin , utriſque intercedat differentia . In morbillis quippe materia non tam pernicioſa non tam cauſtica , nec exulcerans ut in variolis , febris etiam totuſq; morbus ob id longe mitior , nec tam multos jugulat . Ante eruptionem morbillorum adſunt quidem pariter inquietudines , pavores in ſomno , cordis palpitationes , facta efflorefcentia ceſſantes , ſed materia magis infeſta eſt pulmonibus , ideoque id ſingulare habent , quod indivulſus comes ſit , tuſſis violenta , ferina , qua infantes ſepe per quatuordecim & longius ante dies excruciantur . Præcedit etiam ut plurimum ſeroſi humoris per nares & oculos , cum ſternutatione & palpebrarum intumeſcentia ſecefſio . Et hæmorrhagiæ quoque tam narium , quam in feminis per uterum , cruentus quin vomitus , morbillis longe magis ſolennes , quam variolis . Præterea non modo mitius , ſed & citius decurrit morbillorum morbus & ſæpe primo die , ut plurimum tamen poſt tertium diem , prodeunt maculæ , pro varia corporum ſuccorumque diſpoſitione diverſæ , in aliis latiores & ampliores , in aliis minores , in quibuſdam inſtar morſus pulicum , modo rubicundi & purpurei , modo pallidioris & magis plumbei aſpectus . Maculæ hæ non elevantur in puſtulas , ut variolæ , ſed lenticulari aliquali eminentia planam cutis ſuperficiem excedunt , facies & cutis in extremis minus intumeſcit , & brevi tempore , quinto interdum , vel ſexto die , ruborem ſenſim exuunt , & ſub auctiori perſpiratione iterum evaneſcunt . Quumque nulla eveniat ſup-

puratio , neque dolor & ardor perſentitur , ſed inſignis declinante morbo pruritus in genis , labiis & toto corpore , ægros ad ſcalptum excitans . Neque etiam fœda relinquunt veſtigia , neque ulcera in articulis & partibus externis , ſed ſuperſunt communiter ſquamulæ furfuraceæ , ſucceſſive decedentes .

## §. III.

Hæc qui novit , morbillos ex facili ab aliis cutaneis efflorefcentiis diſcernere poterit . Petechias enim amplitudine & elevatione tantisper notabili ſuperant , longe mitioribus etiam ſymptomatibus ſtipantur & malignitatis ut plurimum ſunt expertes . In purpura alba , ſecus ac in morbillis , ex maculis puſtulæ exiguæ pellucidæ ſurgunt , in rubra eminentiæ miliares ſunt , duræ & aſperæ . Rubeolæ & roſſalia ad eryſipelaceam magis indolem accedunt , febrem habent irregularem & præterea in illis exanthematicæ maculæ minoris amplitudinis , ac morbilli , in his vero majoris , ut in ſtatu univerſum corpus quaſi eryſipelate affectum , videatur . Et ſcorbuticæ maculæ latiores ſunt ac morbillorum , coloris obſcure rubicundi , ut plurimum ſine febre .

## §. IV.

Unde vero huius omnibus communis morbi origo , haud ſecus ac de variolarum cauſa admodum eſt obſcurum . Si tamen probabili ratione concludendum , veri omnino ſimile eſt , materiam morbillorum eſſe ex recrementis primi ſucci nutritii in utero , vel materni lactis extra uterum , glandulis quibuſdam forſan firmiter impaſtis & ex longiori mora corroſiva plane indole imbutis . Sed bona fide hæc ignorare poteſt Medicus , etiam rationalis , dummodo pernicioſam indolem ex effectibus & quo pacto his obviam eundum , ſciat .

## §. V.

Interim morbilli per ſe minus periculi habent , & ſæpius , potiſſimum in plebeiis ſine Medici ope , debito tan-

tum

*Alliſq;  
exan-  
thema-  
ribus .*

*Ejus a-  
rigo  
unde .*

*Quæ  
multa  
gæ .*



tum regimine, iterum diſcedunt. Interdum tamen, ob præcedentem anoma-  
lam, inſalubrem, diuturnam tem-  
porum conſtitutionem, malignam  
habent, epidemici inprimis, indo-  
lem. Vel accidentales etiam poſſunt  
accedere cauſæ, ægros in diſcrimen ad-  
ducentes. Malignitatem autem pro-  
dit virium impenſa proſtratio, extre-  
morum frigus, inquietudo ſumma,  
vomitibus, deglutitio difficilis, mentis-  
que alienatio. Malum dein, quando  
aliæ maculæ, virulentia non exper-  
tes, uti petechiæ, purpura, vel etiam  
puſtulæ ſcorbuticæ, complicantur,  
vel in fine cum vitæ diſcrimine ſu-  
perveniunt. Tuſſis porro continua,  
cum alvi profluviis & inquietudine  
magna, infaſtum præſagire ſolent  
eventum. Neque boni ominis ſunt  
ſudores largi, præſertim in proveſtio-  
ribus, qui ob malam diætam & ſpiri-  
tuorum potum, calidum alunt &  
impurum ſanguinem; ex facili enim  
admiſſo levi frigore, maculæ, fune-  
ſto plerumque eventu, recedunt.  
Finito etiam morbo, ſi tuſſicula cum  
raucedine perſiſtit, niſi cito idoneis  
ſuccurratur remediis, in phthiſin &  
hecticam fit tranſitus.

§. VI.

Quomo-  
do no-  
ceat.

Qui autem morbillis occumbunt,  
maxime ex infantibus, nono plerum-  
que die ſuffocantur, evidenti indi-  
cio, nervoſa & glanduloſa pulmo-  
num bronchia, ob copioſam inflam-  
mantem materiam, ſpſmſis & ſta-  
gnatione humorum fuiſſe affecta &  
ex nimio ſerſi affluxu demum ſuffoca-  
tionem inductam. In quibuſdam ſu-  
perato morbo remanet alvi fluxus  
ad aliquot hebdomades durans, ta-  
bem cum morte demum inducens.  
In nonnullis etiam, præſertim ple-  
beiis, febris ſuccreſcit lenta, cum a-  
trophia & abdominis tumore, fune-  
ſta, ubi poſt mortem ut plurimum  
glandulæ meſaraicæ magnæ & pul-  
mones latentibus vomitibus obſeſſi, de-  
prehenduntur.

C U R A T I O.

Medicatio morbillorum, iſdem *Medi-  
catio.*  
quam variolarum perficienda, acri-  
moniam nimirum temperantibus, di-  
luentibus & demulcentibus, cum iis,  
quæ ſub moderato lecti & hypocausti  
calore, materiam hoſtilem acrem ad  
corporis extima agunt. Proſunt igitur  
pulveres abſorbentes & diaphoretici  
fixiores, leniter cinnabarini, item  
emulſiones & decocta. Quæ, quum  
præcedenti capite jam ſint uberius de-  
ſcripta, ſpecialia autem in cautelis  
dicenda, plura de iis heic afferre ſu-  
pervacaneum.

Cautela & Observationes  
Clinicæ.

§. I.

Si ſuſpicio eſt in infantibus primam *Sub inſe-  
rium  
quæ ſol-  
cienda.*  
corporis regionem copioſis & crudis  
ſuccis redundare, expedit in primo  
inſultu leni emetico, uti ex dimidio  
tartari emetici grano cum ſirupo de  
cichoreo cum rhabarbaro, eandem  
deplere. Quando etiam lumbricis la-  
borant, & metus eſt, incurſuri epi-  
demice jam graſſantis morbi, e re eſt,  
ut inteſtinorum canalis prius a vermi-  
noſa progenie liberetur, quod com-  
modiſſime perficitur pilulis *Ruſi*, cum  
mercurio dulci & ſemine ſantonici.  
Quod ſi negligitur, difficilius morbus  
ſuperatur. In proveſtioris autem æta-  
tis perſonis, ſi ſanguis redundat, ut  
primis ſtatim diebus ſubtrahatur ne-  
ceſſe eſt. Declinantur ſic non modo  
hæmorrhagiæ ominoſæ, ſed vidi eti-  
am, hoc facto, remiſſiſſe illico anxie-  
tates cum inquietudine & prodiſſe per  
univerſum corporis ambitum exan-  
themata.

§. II.

Sicuti impenſius caleſcientia, cum *Calida  
& fri-  
gida  
nocent.*  
nimio externo calore, materiam de-  
terioriorem ac ſubtiliorem reddendo, æ-  
ſtum cum anxietate augendo & vires  
diſſipando, nocent, ita viciffim ni-  
troſa & nimium refrigerantia, in ætate



maxime infantili, oppido damnosa. Retardant enim eruptionem; & retenta materia, ad sphacelum fit dispositio.

## §. III.

*Hysteri-  
ci spaf-  
mi mi-  
tigandi.*

Quando morbilli accidunt feminis, quæ spasmis hypochondriaco-hysteri-  
cis obnoxia, vel mensium instat fluxus, haud raro animi deliquia, spirandi angustia, cum gutturis constrictione & ingenti præcordiorum anxietate, jungi solent, quibus materia incutem exitus præcluditur. Igitur tum neutiquam pellentibus calidioribus eruptio urgenda, sed potius adhibenda ea, quæ spasmos leniunt, enemata ex paregoricis & carminativis parata interdum venæsectio, nec non pauxillum castorei & nitri pulveribus bezoardicis admixtum; brevi post in conspectum veniunt maculæ.

## §. IV.

*Tussis.*

Molestissimum in morbillis symptoma est tussis ferina, ad quam complacandam nihil utilius oleo amygdalarum dulcium, recenter ex non rancidis expresso, cum sirupo capillari remixto & in decocto avenaceo ad dimidium cochlear crebrius porrecto. Conducit etiam pulveribus absorbentibus & diaphoreticis admiscere dimidium granum extracti croci, & uti infuso theiformi, ex herba veronicæ, radice liquiritiæ, floribus papaveris rhæados & semine fœniculi.

## §. V.

*Diarrhœa.*

Diarrhœa si concurrit, provide eadem tractanda, nec facile compescenda. Solvit enim sæpe morbum & multa ac copiosæ sordes e corpore per ipsam secedunt. Ex tutissimis tum ad eluendam ex intestinis acrimoniam, clysteres ex puris demulcentibus parati. Si vero finito morbo pertinacius insistit diarrhœa, commode pulveribus bezoardicis admiscenda aliquot chaccarillæ corticis grana, vel etiam tantillum theriacæ celestis.

## §. VI.

*Quibus  
mederi-  
dū ha-  
morba-  
gle.*

Quum sanguinis profusiones nimia mali sint ominis & plerumque malignitatis indices, easdem cum bonis æ-

grorum rebus moderari non minimæ res est prudentiæ. Exulent cinnia positive adstringentia, item eminentius opiata & anodyna. Ego quidem sæpius cum fructu usus sum hac mixtura: recipe aquæ florum acaciæ, sambuci, tiliæ ana uncias duas, theriacalis drachmas tres, antimonii diaphoretici, diascordii Fracastorii ana drachmam semis, spiritus vitrioli guttas 20. sirupi papaveris rhæados drachmas duas. M. Liquor quoque noster anodynus mineralis, cum pulvere præcipitante nitroso sumtus, exoptatam sæpius præstitit opem. Per amuleta vero fluxum hoc compescere velle, noxium potius, quam salutare deprehendi. Insita enim propria virtute nihil operantur, sed tantum impensiori animi impressione, quæ tamen in periculosis ejusmodi affectibus omni studio evitanda.

## §. VII.

Ubi malignioris sunt indolis, apprimè ex usu est pulvis noster bezoardicus, cujus basis bezoardicum minerale, qui non modo sudorem & eruptionem blande elicit, sed simul etiam humores corruptos imbibendo, sedem movet, cum euphoria. Præstabilem etiam sæpe deprehendi virtutem sulphuris antimonialis, nostra peculiari methodo præparati & ad dimidiam, vel quartam grani partem oblati.

## §. VIII.

Si sudore corpus nimium diffluit, ut linteamina ex toto madescant, provide eadem sunt mutanda, prius probe exsiccanda & leniter calefacienda, ne ab eorum frigore materia exanthematica cum periculo certissimo recedat. Idem in mutatione lecti tenendum. Maximopere etiam cavendum est, ne quis subito ex calido in frigidum concedat. Mortem enim inde intra aliquot horarum spatium vidi.

## §. IX.

Quum plures, qui finita febre & discussis jam maculis præmature liberiori aeri sese committunt & salubrem victus vitæque rationem spernunt, ob retentas sic & adauctas impuras

mor-

*Malle-  
gnitatis*

*Et sudoribus*

*Post  
morbi  
facien-  
da.*



morbi reliquias, in peiores morbos incidant, aſthma, vel ſuffocativum catarrhum, phthiſin & tabem, quin uti obſervavi in contracturam; ſerio monendi ſunt convaleſcentes, ut per aliquot adhuc hebdomades perſpirationem ſolicite cuſtodiant & cum in finem urantur infuſis theiformibus, leniter diaphoreticis & ſanguinem mundificantibus, interpoſito nonnunquam, ad ſordes per alvum evhendas, baſſamicarum pilularum uſu. Viſtum vero habeant tenuem & aliquandiu a cereviſiæ potu abſtineant bibantque decoctum temperans & diluens, ex rad. ſcorzonerae, ſarſaparillæ, cichorei, liquiritiæ, hordeo mundo, cortice ligni ſaſſafras, vel ſemine ſœniculi. Quod ſicuti in omnibus fere morbis, ſic etiam in febribus exanthematicis, utile eſt & maxime ſalutare.

## ENARRATIONES MORBORUM.

### OBSERVATIO I.

*Post mor-  
billoſam  
purpu-  
ragut-  
ta ſere-  
na.* Conquerebatur generoſa puella, duodecim annorum, de laſſitudine, inappetentia, languore virium & doloribus lancinantibus in cruribus & brachiis, præterea lividum & plumbeum faciei offerebat aſpectum. Octiduo poſt corripiebatur horripilatione, ſubſequentæ æſtu & gravi dolore capitis lumborumque. Tertio die poſt in conſpectum veniebant maculæ morbillorum, tum epidemiorum, tuſſis ſimul affligebat moleſtiſſima & propter capitis oculorumq; dolorem continuum, nec ſomnum capere, nec lucis ferre poterat aſpectum. Quinto die ſenſim iterum evaneſcebant maculæ ex totius fere corporis ambitu, ſed dolor capitis & oculorum remanebat, & præterea alvus a primo morbi inſultu erat ſiccior, ut nonniſi clyſtere ſolicitata reſponderet. Quum ſic jam declinare videretur morbus, præter ſpem de novo accidebat ſumma præcordio-

Tom. IV.

rum anxietas, cum æſtu totius corporis, ſiti, virium proſtratione & difficili reſpiratione, prodibat poſtea purpura rubra, intermixta alba, ſive miliari, & dolor in oculis & capite ſupra frontem pertinaciter inſiſtebat. Pugnabatur quidem contra hæc tam gravia mala iis, quæ acredinem humorum cum ſpaſmis mulcere & eruptionem placide promovere poterant. Convaleſcebat etiam, ſenſim remittente capitis dolore, puella. Sed ſuperato morbo viſio erat imminuta, & ſenſim incrementum ſumens, intra menſem in veram guttam ſerenam tranſiit, ita, ut nihil plane viſu diſcernere poſſet; licet oculi integri, & pupilla tantum duplo naturali amplior, comparerent. Multa & probata adverſus hoc oculorum vitium adhibebantur remedia, ſed fruſtra. Eruptionibus autem decimo quarto anno primum menſibus, ſplendorem aliqualem receperunt oculi ruruſus. Hinc in conſilium vocatus, ſuaſi, ut temperatis baſſamicis menſium negotium ſecundaretur, veſicatorium mitius aliquandiu geſtaretur, oculi crebrius quotidie pinguedine viperina recenti inungerentur & cum cibo nonnunquam aliquot guttæ baſſami noſtri vitæ aſſumerentur. Quibus non quidem in totum, ſed tamen in tantum reſtitutus viſus, ut ſub certo oculi ſitu obſecta, & quidem tantum dimidiata facie, conſpicere poſſet, cæterum optime valeret, ingreſſa haud ita pridem matrimonium.

#### *Epiſiſis.*

Semper ſuſpectum in variolis & morbillis, quando ægri diu ante eruptionem male habent & de doloribus artuum, vel certam partem pertinacius inſeſtantibus conqueruntur. Heic ſucceſſit morbillis evaneſcentibus purpura, tam rubra, quam alba. Aut igitur duplex ſpecificæ indolis materia impura intus delituit, quæ non ſimul critico motu, ſed definito & ſucceſſivo fuit expulſa. Aut purpuræ materia forſan per ipſum febrilem in morbillis



sanguinis motum de novo fuit progenerita. Dein nunquam etiam non suspectum, si gravis capitis & oculorum dolor, alias facta eruptione cessans, per totum morbum durat. Grave enim ut plurimum capitis vitium relinquere solet. In hac guttam serenam. Quæ quidem insanabile semper fere vitium, in infantibus tamen & tenerioris texture puellis, accedente menstrua purgatione, & immutata per hanc totius corporis, quoad solida & fluida, natura, discutitur iterum, præsertim si natura sanationem moliens arte juvetur.

## OBSERVATIO II.

*Morbil. li retro. cedentes alvi fluxus so-* Juvenis cholericæ & siccæ constitutionis, qui per aliquot annos in Academia plus Veneri & Baccho, quam Musis litarat, commovebatur aliquando vehementi ira, die post afficiebatur æstu insigni cum languore artuum & dorsi dolore, noctem transigebat infomnem & tussi exercebatur valida, quæ ferina plane fiebat & comites habebat anxietates & cardialgias. Datis ardorem nimium temperantibus, post tertium diem comparabant maculæ numerosissimæ intra 24. horarum spatium universum corporis ambitum occupantes. Mirum autem inquietus erat ager & impatientis, corpus jactitabat, tantum temperatum etiam lecti calorem respuebat, & admissa subinde aura frigidiori, ut maculæ omnes brevi iterum evanescerent faciebat. Oboriebantur hinc anxietates cum magna inquietudine & siti inexhausta, ut intra diem & noctem quatuor minimum pitisanæ & emulsionis amygdalatæ epotaret mensuras. Porrigebatur quidem ad revocandam extus materiam lene diaphoreticum, sed propter ægri impatientiam & jectigationem nihil proficiebat, sitis potius reddebatur intensior, ut vix posset extinguere, & ager vel septem mensuras liquidorum absumeret. Inde incidebat in alvi fluxum &

vel decies intra diem dejiciebat, urina etiam effuse fluebat, ægro tamen de interno ardore, siti & anxietate conquerente largissimeque potum ingurgitante. Fluebat sic alvus per quinque dies, calidus potus cum medicamentis spernebatur, neq; maculæ amplius comparebant. Nihilominus symptomata sensim mitiora fiebant, æger melius habebat & præter spem intra 14. dies convalescebat.

*Epicrisis.*

Singularis plane hic est casus largi alvi fluxus, quo morbillorum morbus, & quidem retrocedentium, solutus. Jam quidem nullum est dubium, quin materia morbillorum sit causticæ & inflammatoriæ indolis, quæ exitu præcluso intus retenta, vel expulsa retrocessit, firmitusque nervosis partibus impacta est, graves, immo exitiales, efficere possit affectiones. In nostro ægro insedit utique ori, faucibus, ventriculi & intestinorum tunicis, ac sitim & ardorem cum leniori inflammatione ibi concitavit. Liquidorum vero & quidem accommodatorum copioso potu, caustica materia, tam intra tunicas hærens, quam in succis hospitans, mitigata atque correctæ fuit, & proritatur alvi fluxus, quo impuri ex universo corpore succi eo confluerunt & evacuati sunt. Ego quippe crebrius observavi, in variolis & morbillis, ob impuros & redundantes corporis succos, malum genium exhibentibus, sponte obortum alvi profluvium, non modo sine periculo, sed & admodum salutare fuisse. Neque etiam facile in periculi plenis morbis desperare debet Medicus, licet ægri magnam potus copiam appetant, modo per alvum, urinam & sudorem iterum emittatur. Plures enim sine, quam cum liquidorum appetentia, occumbunt.

## OBSERVATIO III.

Infans decennis, feliciter, ut videbatur, superarat morbillos, sed tamen

*Post morbillos alvi fluxus, ulcus et mors.*



ea restitabat alvi laxitas, ut quævis assumpta citissime per inferiora transirent, aderantque præterea tormina ventris cum dolore pedum, qui tactu semper erant frigidi. Ad compescendum hunc fluxum, Medicus minus peritus porrexit pulverem ex radice tormentillæ, terra de catechu & unicornu fossili, cum pauxillo laudani opiatum. Inde enim alvus quidem constitit, sed acerbissimus dolor occupavit tibiam sinistram in malleolo, quem mox tumor excepit durus & renitens, qui tandem suppuratus & apertus sanguinem cum copioso ichore fudit. Successit postea serpens ulcus, totum ferme pedem depascens, accessit febris cum tussi & difficili respiratione, quumque ob nimium pectoris infarctum infans non libere spirare posset, suffocativo demum catarrho fuit extinctus.

*Epicrisis.*

Sæpius notavi, in infantibus alvum per totum variolarum & morbillorum morbum, & etiam post eum, sine periculo fluxisse. Neque alia utilia deprehendi, quam diaphoretica fixa, ut cornu cervi philosophice præparatum, ustum, antimonium diaphoreticum, lapides cancrorum, succinum præparatum, quibus pauxillum corticis chaccarillæ admixtum. In usum quoque vocavi juscula ex carnibus cum ossibus contusis, item cornu cervi parata, adjecta semper olei amygdalarum dulcium recentissimi portione quadam. Neque minus clysteres emollientes, ex decocto raparum exsiccatarum una cum butyro infuso, admodum fuerunt proficui, qui omnium optime acredinem humorum, coli membranæ potissimum in ejusmodi diarrhoeis insidentem, contemperant ac mulcent. Contra ea periculosum omnino, alvi hunc fluxum adstringentibus sistere. Sic enim materia acris caustica, intus remanens & succis redita, ad alia sæpius loca relegatur, ubi postea atrocia ciet mala.

OBSERVATIO IV.

Lactans infans unius anni incidit in calorem præternaturalem, cum pavore in somno & vomitu. Die secundo eruperunt morbilli numerosi, sed asperi & cutem quasi stringentes. Die quarto accessit summa respirandi difficultas & pectoris angustia, cum anxietate, inquietudine, vigilia & pavore. Dedi sextam partem grani tartari emetici, cum drachmis duabus aquæ florum tilia & quatuor guttis essentia castorei. Hinc quinquies deiecit infans viridissimam instar glutinis materiam, eoque facto vigor accessit toti corpori, respiratio facta liberior & morbilli rubore perfusi magis. Oblata postea ad calorem temperandum gelatina cornu cervi in tenui decocto hordei, & feliciter evasit tenellus.

*Emericum in morbillis.*

*Epicrisis.*

Colluvies vitiosorum humorum in ventriculo, morbillorum processum turbare & gravia symptomata iis adiacere potest utique. Omnia enim quæ circa quartum diem, quo alias morbus remissior, hoc in infante præstiterunt pathemata, non ex morbillis, sed cruditatibus acido-viscido-biliofis prima in regione stagnantibus atque corruptis, ortum traxerunt. Hinc exterminatis iis per lenissimum emeticum, symptomata non modo protinus conquieverunt, sed & ipsa natura gravi onere levata, eo felicius ipsi potuit succurrere morbo. Quin patet, nec quarto & critico die, ejusmodi in casibus leniora & prudenter exhibitata evacuantia nocere, inter quæ emetica, in infantibus præsertim lactantibus, merito primas tenent.

OBSERVATIO V.

Puer undecim annorum, rubicundus facie, ingenio alacris, sanguine plenus & constitutionis calidæ, correptus est immuni æstu, dorsi capitisque dolore, datis tamen temperantibus

*Morbilis cum hemorrhagica lætæ.*



nitrosis pulveribus, altero die habuit meliuscule. Tertio autem rediit urens æstus & quarto die sequutum narium stillicidium. Hoc quinto remisit, sexto vero effusius reversum. A septimo ad decimum mitiora erant symptomata, & sanguinis fluxus siluit, erumpentibus passim morbillorum maculis. Sed breves induxiæ. Undecimo quippe die, rursus copiosa e naribus facta hæmorrhagia & maculæ evanuerunt. Duodecimo largius adhuc fluxit Sanguis, ita ut vires mirum corruerent & æstus internus invalesceret. Decimo tertio die mitiora pathemata iterum, die autem post cum hæmorrhagia recruduerunt, donec consumtis prorsus viribus, decimo quinto die æger efflaret animam.

*Epicrisis.*

In variolis & morbillis deterioris semper notæ symptoma est, effusior sanguinis, per quæcunque loca, fluxus. Indicat enim vehementes spasticas internarum partium, præsertim viscerum abdominis, strictiones, quibus inæqualis redditur sanguinis progressus & ex uno loco in alterum cum impetu urgetur. Per nimiam etiam profusionem virium inducitur jactura, & minimorum ad extima excurrentium canalium, per quæ in cute eruptio fieri debet, exinanitio & subsidencia. Unde materia caustica retenta, novos ciet spasmos novaq; hæmorrhagias ac demum funesti eventus fit causa. Magnæ itaque prudentiæ est, hæmorrhagias in morbis quorum materia per cutem excernenda, moderari perite, ne deficiat expulsionis facultas. Ego quidem tum commendare soleo, ut omne frigus & frigidus potus vitetur, & partes extremæ, manus & pedes, quæ ordinariè frigidæ existunt & contremiscunt, calore bene foveantur & vel lecto probe obtegantur, vel etiam aquæ calidæ vino mixtæ immergantur, quo revulsio sanguinis a capite fiat, simulque spastica fibrarum contractio laxetur. Deinde eo quam maxime annitendum, quo caustica materia foras mittatur eum-

que in finem danda diaphoretica cum temperantibus, cujus generis hæc mixtura: recipe aquæ cardui benedicti, florum sambuci ana uncias duas, theriacalis unciam semis, diascordii Fracastorii, antimonii diaphoretici ana drachmam dimidiam mixturæ simplicis guttas 20. sirupi acetositis citri drachmas duas. M. D. de qua bina, binis quibusvis horis, cochlearia sumenda, superbibendo semper calidum haustrum. Et si præterea æstus junctus nimius, interponendus est pulvis bezoardicus nitrosus.

OBSERVATIO VI.

Vir generosus, macilentus & fibro- *Morbili  
li retro  
ceden-  
tes su-  
nesti.*  
sæ corporis structuræ, triginta sex annos habens, aulico ministerio fungens, ab aliquot jam annis, vini potui liberaliter indulserat & sæpe interpotatores egerat tantum non heroem. Incidit is in morbillorum, aulicis tum familiarem & ab ipso nondum superatum morbum, sub quo ipsum præter immoderatum æstum & inquietudinem, violenta tussis & summæ anxietates præcordiorum, noctuæque ac interdiu affligerunt, corpore a principio statim sudore diffuente. Medicus aulæ ordinarius in consilium vocatus, quatuor quibusvis horis, triginta guttas essentiæ alexipharmacæ admodum calidæ porrexit, & ad sitim extinguendam liberalem potum cerevisiæ valde spirituosæ concessit. Interim expulsis maculis anxietates remiserunt & spiritus liberior meavit. Quum autem indusum sudore totum madescens & frigidum mutaturus, a ministro imperito recens minusque calefactum acciperet, illico omnes omnino, quibus corpus confertim obsessum, maculæ disparuerunt. Inde tanta sequuta inquietudo, anxietates cum virium jactura, ut omnibus morti videretur proximus. Ego tum temporis præsens accersitus exhibui illico pulverem meum bezoardicum cinnabarinum cum aqua.



aqua analeptica, nec non liquorem anodynum mineralem cum tinctura antimonii temperata & aliquot guttulis spiritus Bussiani, quibus paullo post & sudor & maculae redierunt, æger melius habuit & pulsus antea inæqualis, celer & debilis, plenior ac æqualis redditus. Sed septimo die, quum sudor effusus adhuc manaret & æger in alium lectum ob maiorem se conferret, rursus cuncta evanuerunt exanthemata, extrema frigida facta, accessit anxietas maxima & spiratio difficillima, pulsus etiam contractus & parvus redditus, & brevi post, præcedente rigore & convulsione artuum, est extinctus.

*Epicrisis.*

Morbilli, non secus ac alii morbi exanthematici, sequuntur maxime constitutionem solidarum & fluidarum partium corporis ægotantis, adeo, ut quo intemperatior hæc, eo peioris indolis sit ille. Potissimum, de vini potui deditis, crebriori confirmatum habeo experientia, quod raro ex febribus exanthematicis evadant, eo quod febrilis illa intestina partium sanguinis commotio, in plenariam tandem dissolutionem abit, cujus index largissimus sudor cum insigni virium lapsu. Medicus igitur, calida essentia, quæ estum magis accendit, nocuit potius, quam profuit. Si quoque dissolutorius talis humorum vitalium est status, levis etiam in rebus externis error, uti refrigeratio, lintheaminum mutatio, situs erectus, immedicabilem possunt inducere noxam. Et quo languidiores sunt in exanthematicis vires, eo plus semper metuenda retrocessio materiæ exanthematicæ, qua vitæ nihil est insensius.

OBSERVATIO VII.

*Morbilli ex refrigerantium nitrosorum abusu letales.*

Puelli tres, unus sex, alter quinque & tertius trium annorum, filii viri per illustris Serenissimo Duci in Saxonia inferiori a consiliis, corripiebantur successive morbillis. Comenda-

tione generosæ feminæ in consilium vocabatur novellus Medicinæ Doctor, qui intempestivo nitri amore a præceptoribus imbutus, larga & repetita dosi, præter pulveres refrigerantes nitrosos, exhibebat nihil. Inde retardabatur macularum eruptio, spiratio fiebat angusta & difficilis, tussi continua sine scretu, accedebat asthma intensum & intra septem dies, tres pueri occumbebant, cum ingenti parentum luctu.

*Epicrisis.*

Non ex unius, sed plurium fide dignorum relatione, de tragico hoc casu certior sum factus, & crebrior ac liberalis, refrigerantium nitrosorum usus utique taxandus. Nam licet nitrum purum merito principem teneat locum inter ea præsidia, quæ æstum extinguunt & spasticas commotiones componunt, & ego etiam jam ante quadraginta annos eodem frequentius usus, quin forsan primum, testantibus id variis scriptis, tum dissertationibus, tum *notis ad Poterium*, salubrem nitri facultatem perspexerim & exposuerim; nihilo tamen fecius usus ipsius, haud secus ac aliorum magnæ virtutis remediorum, peritum ac prudentum exigit Medicum, & ex ejus abusu, ab iis, qui Medicinam rationalem nec callent, nec exercent, damna inducta novi, & plura, & gravia. Certe in morbis exanthematicis, ubi non nimis urget æstus, in febribus catarrhalibus, item malignis, in quibus humorum potius corruptio, quam exæstuatio metuenda, in corporibus maxime humidioribus & infantilibus, omni modo a liberali nitri usu abstinendum. Ob nimiam enim refrigerationem remanet intus foras excernenda insensæ indolis materia, atque ut putredinosa dissolutoria humorum corruptio magis augeatur, facit. Et quum materia morbillorum maxime insensæ hujus sit indolis, ut firmiter insideat nervis pneumonicis & tunicis pulmonum nervosis, nullum omnino est dubium, quin in his puellis non emota,



emota, ibi impacta hæserit & suffocatorias humorum stases suscitavit. Ceterum hoc loco monendum duxi, me in infantibus, quando morbilli prodire noluerunt ipsorumque materia altius insidens pulmonum bronchiis suffocativum intentavit catarrhum, insigni cum fructu usum esse vesicatorio, quo sopiti canalium ad expulsionem necessarij motus, quam optime resuscitantur.

## OBSERVATIO VIII.

*Morbil.* Comes illustrissimus, viginti annorum, cholero-sanguineus, nondum venæsectionem passus & pathematibus spastico-hypochondriacis, cum stomachi inflatione & crebriori post cibum vomitu, obnoxius, grassantibus epidemice morbillis languere coepit & conqueri de anxietate præcordiorum, dolore capitis, dorsi ac pedum, tussi sicca, interno æstu, intercurrente horripilatione, cute arida & sicca. Tertio die comparuerunt in fronte stigmata rubicunda nonnulla, pathemata tamen noluerunt remittere, nec plures etiam postero die efflorescere maculæ, pulsu interim pleno cum celeritate vibrante. Vena in pede pertusa, sanguis cum impetu exsiliit floridus, variegatam post refrigerationem contrahens cuticulam, & inde illico anxietates & vehementes capitis dolores remiserunt. Quin licet primum stigmata in fronte disparere viderentur & pulsus admodum celer cum duritie micaret, æger etiam noctem insomnem fere ob æstum & compunctorium in cute sensum duceret; mane tamen in conspectum venerunt in facie & pectore maculæ morbillorum, pallidiores initio, successive autem magis rubentes & reliquas quoque corporis partes confertim occupantes. Discessit hoc facto capitis, dorsi & pedum dolor, cum pectoris angustia, tussi & interno calore, ac æger melius habuit, conquiescit tantum de molesto pruritu arden-

te & tensione cutis. Potissimum vero ipsum excruciauit oculorum ardens dolor cum rubore adnatæ & illacrymatione, ita ut lucem ferre non posset & noctu palpebræ conglutinantur. Nono die obortus sudor largus, decimo etiam manans & acidum foetidum odorem spirans. Undecimo intra nycthymeron sexies deiecit sine torminibus sponte & maculæ ruborem sensim exuerunt, decimo tertio die penitus discussæ, subsequente cutis desquamatione & sanitate.

## Epicrisis.

Quum in iis, qui spasticis hypochondriacis detinentur pathematibus, nunquam non major succorum impuritas & acrimonia esse soleat, huic etiam illustrissimo agro ejusdem constitutionis ea fere unice exhibita sunt, quæ demulcent ac temperant, pulvres nempe temperantes & diaphoretici, leniter nitrosi, emulsiones, exoptato cum successu. Venæsectionem autem, quam pulsus admodum plenus & vasa turgida essent, eruptio quoque retardaretur, necessariam duxi, crebriori experientia edoctus, sanguine nimium redundante, difficillime, eodemque subtrac-to, promptissime, succedere materiæ exanthematicæ expulsionem. Insolitus vero ille oculorum ardor, rubor & fluxus serosus, tribuendus utique eorum debilitati in pueritia jam ex crebrioribus & diuturnis acribus defluxionibus contractæ. In quibusvis enim fere morbis solenne est, ut partes ex prægresso morbo debilitatæ, præ reliquis graviter afficiantur, ob decubitum humorum promptius ibi contingentem.



C A P U T IX.

De febre purpurata. Rubra & alba miliari.

Theses Pathologicae.

§. I.

Purpu-  
ra de-  
scrip-  
tio.

**F**ebbris purpurata est catarrhali æmula, exanthematica, qua motu systematis tam vasculosi, quam nervosi intensiori, materia lymphatica corrupta, specificæ indolis, ex interioribus, maxime nervosis partibus, ad summam cutem, seu conveniens emunctorium, sub forma pustularum minimarum miliarium, asperarum, rubrarum vel albarum, salutariter protruditur.

§. II.

Materia  
exan-  
themati-  
ca dif-  
fert.

Jam omnis quidem materia exanthematica in eo convenit, quod acrimonia sua nervos male afficiat ac in æstuosum intensiorem motum universum genus vasorum & sensibilibus partium extimulet, eoque tandem exterminetur. Attamen sicuti acrimonia caustica in vegetabilium & mineralium venenis peculiarem obtinet indolem, & ob id peculiaris cuivis speciei propria suscitatur pathemata, ita etiam singularem & specificam cuivis exanthematicæ materiæ esse naturam, non tam a priori, quam potius a posteriori, effectibus & phænomenis obviis, innotescit. Scilicet in petechiis, variolis, morbillis, febre urticata, scarlatina, rossaliis, rubeolis, maculis scorbuticis, scabie, herpete, phlyctænis, epinyctidibus, gutta rosacea, impetigine & sudaminibus, subest semper acris quædam materia, quæ modo cum, modo sine febre, per cutis emunctorium proscritur, sed unumquodque ex his exanthemata peculiaribus incedit symptomatibus, de quibus singulis suo loco seorsim.

§. III.

Quibus  
purpu-

Nunc quomodo ab aliis exanthe-

maticis morbis purpuraceus differat, exponendum duntaxat. Hi autem ipsius sunt characteres. Efflorescunt pustulæ minimæ semen milii amplitudine æquantes, numerosissimæ, cum corrugatione, aspritudine & ariditate cutis & spargunt foetorem peculiarem plane. Nullum aliud exanthema tam instabile, crebro ac celeriter retrocedens, iterumque comparens, ac purpuraceum. Nullum etiam, tam crebro intercurrente mox pruritu & punctura stipatum. Alia exanthemata omnibus æque regionibus incumbunt, & nobiliorem æque ac senioreni sexum infestant, purpura autem in certis tantum locis familiaris & quasi endemia, ac præterea feminas magis quam viros, maximeque puerperas, corripit. Alia magis epidemica sunt, contagiosa & sequuntur constitutionem aeris, sed purpura magis ex vitio viscerum & succorum, quam aeris oboritur, nec epidemica est, nec contagiosa adeo,

vs ab  
aliis  
diffe-  
ras.

§. IV.

Ipsa dein purpura inter se differt & definite a Medicis, in rubram & albam dispescitur. Utraque magis, vel minus acuta, benigna, vel maligna. Rubra ob pustulas rubicundas ita dicitur, ac ut plurimum minus periculosa, febris expers & chronica est, ut non modo diutius corpori inhærescat, sed & sæpius statis anni temporibus redeat, de qua inferius sigillatim. Interdum tamen etiam febre stipatur & acutæ indolis esse observatur. Alba vero magis acuta est, nec facile sine febre occurrit, ideoque plus alit periculi. Hæc etiam non tam facile redit ac rubra, puerperasque magis & feminas juniores, teneriores serofas corripit, quam rubra, quæ adultioribus potius, succis & sanguine fertis ipsique viris familiarior est.

Rubra  
est vel  
alba.

§. V.

Nonnunquam porro purpura idiopathica est, nonnunquam symptomatrica, & aliis, maxime continuis febribus, ad exitum vergentibus, supervenit.

Idiopathica  
vel  
symptomatrica  
acuta  
in facie



venit. Admodum enim familiare est, quod purpura rubra, vel alba, vel utraque simul, variolis, morbillis, synochis putridis, ardentibus quoque & petechizantibus aliisque epidemicis, in declinatione accedat, novam febrem accendat, & ægrum, fractis a priori morbo viribus, jugulet. Id quod potissimum evenire solet in iis, qui intemperantius vixerunt, largiori & quotidiano potui indulserunt, veneris nimio exercitio vires consumserunt & peregrinam succis induxerunt diathesin, nec non iis, in quibus sub morbi decursu alvus diutius clausa, aut inconsulta medicatione refrigerantia & julapia nimis liberaliter sunt usurpata. Quandoque etiam in acutis his febribus, maximeque variolis & morbillis, primis statim diebus, cum cutis aspredine apparet purpuracei quippiam, rarissime pariter cum felici morbi eventu. Neque minus catarrhalibus, cum tussi & spirandi angustia, subinde in infantibus sese associat purpura, vomitu, vel etiam alvi fluxu stipata. Quam, si inclinat morbus, pedum & quandoque abdominis intumescencia, cum, vel sine aridura superiorum partium, excipit, donec tandem sudoribus, vel spontaneis, vel arte proleclis, ex toto cedat.

## §. VI.

Idiopathica autem purpura his potissimum incedit symptomatibus. Precedit levis horripilatio, quam subsequitur corporis exæstuatio, cum ingenti languore viriumque interdum ad lipothymiam usque dejectione. Præcordia stringuntur, pectus angitur, adsunt alia suspiria, inquietudines, vigilæ, vel somnus minimum laboriosus & interturbatus. Æstus & compunctorius in dorso sensus percipitur, alternante frigoris, horroris & caloris intra cutem affectione, in vola manuum maxime sensibili. In puerperis lochiorum fluxus retinetur & lac e mammis resorbetur ac stillare cessat. His succedit cutis asperitas & instar anserinæ corrugatio, exsurgentibus

innumeris pustulis, sive albis, sive rubris, sive utrisque sibi in vicem appositis, milii semen figura & exiguitate referentibus, quæ primum collum, deinde pectus & dorsum at postea brachia & manus occupant. His in summa cute efflorescentibus, graviora antea pathemata mitigantur, pulsus durior prius, contractior & celerior, mollius, liberius & remissius undulat, animo vir dejectus redit, arida cutis madescit & alvus ante hac compressa tam firmiter, ut nec flatibus transitus pateret, laxatur, & non solum hos, sed & nonnunquam stercorea, sponte protudit. Postea vesiculæ sensim sensimque explicantur ichore foetido plenæ, urina magis saturata prodit & sudor singularis huic exanthemati proprii foetoris erumpit, sanguinis per lochia fluxus repetit, & intra septem vel plurimum adhuc dierum decursum, cum insigni extremorum pruritu, pustulæ disparent, arefcunt, squamularum instar decidunt, & æger sensim vires recipiens, ad pristinam redit sanitatem.

## §. VII.

Materia porro, quæ exanthematicum hunc morbum proxime facit, ex pravo & corrupto in corpore est succo; ita tamen, ut, quum duplex sit purpuræ genus, duplex hic etiam sit asserendus. Jam uti in macrocosmo, sic etiam in microcosmo, duplex datur liquidorum corruptio, una acido vappida, paullo fixioris indolis, altera sulphurea foetida, indolis magis alcalinæ atque volatilis. Illa cadit in succos qui salino & sulphureo elemento minus instructi sunt, potissimumque in pellucidum, insipidum illum gelatinosum lymphaticum humorem; hæc autem in sanguinem & succos, qui copiosa sulphurea & salina substantia scatent, inter quos quam maxime connumerandus ille, qui sanguini admixtus, spissior tantisper variique coloris atque saporis, serum dictus. Hunc igitur corruptum purpuræ rubræ,

princi-  
pio

nec non  
catarr-  
hali-  
bus ac-  
cedens.

Idiopa-  
thica  
Purpu-  
ra bi-  
soria.

Turpu-  
ra ma-  
teria  
corru-  
ptus in  
corpore  
succens.



bræ, illum vero albæ & miliaris causam esse, censemus.

§. VIII.

*In alba lymphæ acido vapidæ.* Lympham enim alba in purpura acore esse infectam, evincunt plura. Nimirum solennis & tantum non essentialis huic exanthemati est nimia feri secessio, per sudores effusos, urinas copiosas tenues, salivationes quandoq; quandoq; dejectiones aquosæ. Acidi autem is effectus, ut sanguini insinuat, partes ejus crassiores in coagulum mittat, serosis secessum facientibus. Deinde omnis generis acida & refrigerantia, ipsum quin nitrum, largius sumpta nocentissima: quæ vicissim acidum obtundunt & sanguini ac lymphæ blandam spiritualcentiam conciliant, saluberrima. Feminis porro quæ horæis fructibus, acetariis, dulcibus, farinaceis, acescentibus, sub otiosa & sedentaria vita delectantur, frequens quam maxime in puerperio febris miliaris. Ne dicam, multos illos sanguinis grumos, quos in vasis majoribus & thalamis cordis invenerunt, qui purpura alba defunctos disseuerunt, luculenter arguere, præsto fuisse acidum coagulans.

§. IX.

*In rubra serum acre salino-sulphureum, testatur pruritus & ardor cutis, in hac longe impensior, ac in alba.* Idem ex eo patefcit, quod rubrum hoc exanthema, maxime eos invadere soleat, qui sanguinis impuri copiam alunt, scorbuticis, senibus, feminis, quæ menstrui, & viris, qui hæmorrhoidum defectu laborant, diætæ falsa, vinosa, cerevisiis crassioribus & tabaci fumo delectantur, prætereaque laxiori corporis habitu præditi, vitam agunt motus expertem. Quod porro fordes acres serosæ, per cutis poros eliminandæ, ab aura frigidiori, a potu nimis perfrigerato, corpori sudanti ingesto, aut repentino terrore, ad interiora repressæ, frequentissime talem morbum inducant exanthematicum. Quod etiam medicamenta, quæ

salium spicula involvunt, item temperantia, rubram purpuram egregie protelent; calefacientia autem & volatilia, nec non æstuosum regimen, eodem modo ac in scabie aliisque cutis defœdationibus, ex prava, acri & falsa humorum diathesi oriundis, doloris, ardoris & pruritus faciant augmentum.

§. X.

Omnia igitur, quæ succorum & abundantiam & impuritatem ingignunt, ad generationem purpurati mali concurrunt remotius. Evenit autem hoc in iis, qui lauto & pollucibili victu, nonnisi leves cibos, farinacea, placentas, dulcia, fermentescibilia & horreos fructus admittente, item qui potu parco, crasso & aqua quoque impura & squalida utuntur; qui in aere degunt infalubri, minus puro, sed vappido, multisque sordidis & putridis halitibus referto atque corrupto; quo purpuram subinde generari, maligniorem fieri, epidemiam quandoque, nonnullis etiam locis magis familiarem, certisque anni temporibus, Martio imprimis atq; Aprili frequentiore, experientia docet. Frequens porro purpuræ genesis in iis, qui alvum gerunt strictiorem, qui perspirationem incuriosius habent; quibus criticæ suppressæ, aut consuetæ sanguinis evacuationes omissæ, quibus vicissim largius sanguis effluxit, vel subtractus, cum virium defectu, qui animo crebrius jactantur, mœrori imprimis ac diurnæ solitudini indulgent, qui vigiliis & impensioribus meditationibus robur atterunt, qui demum vitam ducunt otiosam motusque expertem. Neque minus præ aliis huic morbo patent, qui laxiorem corporis habitum & temperatum sic dictum sanguineum, vel phlegmaticum obtinent, ætate magis infantibus, quam adultis, senibus quam floridis, sexu, magis feminis, quam viris. Ex feminis, non tam plebeiis & minus delicatis, quam potius teneris ac nobilioribus, fluore albo ante

*Causæ præcautæ & suble-*

te.



te affectis & omnium maxime puerperis.

## §. X.

Cur puerperis infesta purpura alba maxime & maligna.

His autem quod adeo infesta sit purpura, & quidem alba, plerumque maligna, ob peculiare quasdam sit causas. Videlicet feminarum plurimæ redundantius in corpore alunt lymphaticos & aquosos humores, adeoque acidæ potius patent humorum vappescentiæ, quam salino-sulphureæ corruptioni, & ob id purpuram potissimum nanciscuntur albam. In gravidarum dein utero, sanguinis tam progressus, quam regressus, ob nimium eo appulsum & vasorum distensionem, valde languidus est ac tardus. Hinc subsistente ibi diutius sanguine, lymphaticus humor in vasa ipsi vehendo dicata, magna copia secedit. In quorum diverticulis quasi incarceratus hærens, longiori mora vappescit, corrumpitur & acorem contrahit, avolantibus quæ mixtionem conservant spirituosus & subtilioribus particulis. Quandocunque igitur enixo foetu, uterus concidit iterum, neque squalidus lymphaticus humor cum sanguine foeculento lochiali sufficienter expurgatur, accedente ordinario tertio puerperii die, motu febrili, Germanis *das Misch-Sieber*, in vasa majora is reprimatur ipsisque cordi infunditur, ex quo maligni instar fermenti per corpus diffunditur totamque sanguinis & lymphæ massam inquinans, vires deiecit, vigorem animi pessundat, anxietates, pectoris compressiones, suffiria, cordis tremores cum spiritus difficultate facit, sudores colliquativos mucidos, corruptum acorem redolentes, nonnunquam plane frigidus, suscitatur, somnum arcet, donec vel brevi post, die tertio aut quarto a puerperio, interdum septimo, quandoque etiam decimo quarto demum die, in conspectum prodeat album hoc exanthema.

## § XII.

Origo ipsius recens unde.

Sed quum enumeratæ hætenus purpuræ causæ, præsto fuerint jam pri-

dem omnes; disquirendum merito, cur ante aliquot demum lustra prodierit & subinde latius serpat. Jam vero ex iis, quæ succis vitalibus materiam, temperiem & intemperiem largiuntur, nihil novimus immutatum, præter frequentissimum factum potum calidorum, herbæ thee inprimis & fabarum coffee, usum. Experientia etiam docuit, non plebejos & inopes, qui victu simplici & potu sueto utuntur, sed honoratiores, opulentos, qui laute vivunt & potum calidum in deliciis habent, purpura potissimum infestari, & in locis ubi mos invaluit liberalius ejusmodi potum sorbillandi, purpuram etiam plus regnare & propagari, albi non sic. In hunc igitur culpam esse rejiciendam admodum credibile. Non jam dicam, fabas coffee exoticas, peregrini quippiam nostri mixtionis sanguinis minus congruum custodire, sub adustione aliquid sulphuris empyreumatici nervosis partibus minus amici suscipere, ac præterea saccharum cum decocto hoc assumptum copiosius fermentescere & cruditates mucosas, acidas, augere. Id potius minimum pro certo habendum potum sordes intestinorum & scorbatica acria per urinam evehenda in sanguinem agere & una cum hoc ad cutis emunctorium pellere, ubi non ut sudoris materia promte diffilari possunt, sed obhærescunt maculasque live pustulas protrudunt; inprimis quum post ejusmodi calidum potum perspiratio non secundatur, sed concessione in frigidam auram sufflaminatur. Ut adeo neutiquam mirandum sit, quod sub inconsueto alias, jam vero communi abusu frequentissime & statim post cibum assumpti potus calidi, ipsa naturalis mixtio & crasis partium sanguinem constituentium multum immutetur & nova plane ac alia ingignatur, qua in utero cum sanguine materno in foetum transfusa, ipsius purpurati morbi semina & ad illum dispositio jam latius propagentur; uti quidem pluribus docui in

differ-



differtatione de purpura genuina origine, indole & curatione.

§. XIII.

*Purpura quādo periculosa.* Ceterum purpuram albam periculosiorem esse rubra jam diximus. Prognosis vero de successu & eventu hujus morbi ex dispositione corporis laborantis potissimum desumenda. Aegrius quippe sanescit magisque anceps est omnis purpura, quæ cadit in corpus impuris succis fartum. Hinc viri quibus hæmorrhoides & feminae quibus menses resistant, parcius fluunt, aut plane ob ætatis rationem emanent, nec non quibus lochia suppressa, gravius semper & diutius hoc morbo decumbunt. Hinc gravidæ, quæ alvi adstrictioris & sub sedentario vitæ genere, neque medio gestationis tempore, neque ultimis mensibus sanguinem redundantem mittunt, in puerperio majorem purpuræ experiuntur vehementiam. Dein majus etiam semper discrimen in imbecillitate, si ve natura, si ve ex morbo, si ve alia ex causa affectis, omnium vero maxime in iis, qui per crebriores animi commotiones, diuturnam inprimis mœstitiam, genus nervorum reddiderunt debile & ad spasticos anomalos motus concipiendos proclive. Neque minus plus metuenda, quæ sub aeris constitutione insalubri, febres malignas, petechiales passim ingignente, impetit.

§. XIV.

*Signa suspecta.* Inter suspecta vero in purpura signa connumeranda hæc. Quando exanthematibus sufficienter expulsis, pulsus per naturam durus & auctus manet, somnus nullus, inquietudo magna & spiritus difficilis. Quando statim sub initium & per totum morbi decursum sudores effusus manant, urinæ pallidæ copiosæ redduntur, vel continuus ad mingendum stimulus; vel etiam urina crassa antea & tinctoria, subito limpida, tenuis & pallida prodit, nec non quando alvus cum torminibus fluxa nimis, inprimis in puerperis. Mali prælagii est, si pustulæ

purpuracæ modo comparent, modo evanescunt & symptomata vehementia semper infestant eadem. Pejus adhuc, si materia relapsa interioribus firmitus inhærescit omnique expulsionis obsistit, hincque pectoris cum suspiriis oppressio intenditur, fauces stringuntur, virium prostratio increscit & præcordiorum anxietas cum inquietudine augetur. Funesta demum indicia, quum hærente intus deleteria materia, interiora ardent & extrema frigent ac rigent simulque copioso frigido sudore perfunduntur; aut vicissim quando extrema æstuant & in abdomine frigoris sensus percipitur notabilis, Hæc enim ubi præsto sunt, æger ut plurimum lipothymia occumbit lethali, ob inflammationem & sphacelationem, quæ ventriculum, intestina, cerebrum, vel in puerperis ipsum uterum affecit.

*Et funesta*

P R Æ S E R V A T I O E T C U R A T I O.

§. I.

Nullus quidem morbus tam ægre penitus extirpatur ac purpura, quæ plerumque relinquit fermentum ipsam denuo inducens. Sed hoc inprimis proprium chronicæ illi purpuræ, quæ quo pacto sit arcenda, inferius dicetur. Jam de febre miliari. Quæ quum potissimum feminis, & quidem puerperis, sit solennis, quæ ratione hæ ab ipsius incurso defendendæ, tradendum. Sub graviditate igitur exacta victus ratio servanda, corpus motu moderate exercendum, venter a refrigeratione defendendus, sanguinis copia venæsectione, ter, vel quater, in superioribus instituta, minuenda & alvina excretio subinde secundanda per mannata, rhabarbarina & tartarea. Instante dein partu, non per præmaturum nisum vires convellendæ, nec pellentibus humores exagitandi, post partum vero necessarium, quo impurus sanguis expurgetur utero & succi a cacochymia contracta

*Methodus præservandi puerperas.*

*Mala*



tracta liberentur. Sedato hinc secundo die impetu, omnis generis excretiones modeste promovendæ & alternis diebus pilulæ balsamicæ roborantes, vel solæ, vel si citatior adhuc pulsus, cum pulvere temperante nitroso; deglutendæ. Tum quoque conducit cum jusculis tenuioribus dare ea, quæ spasmos leniunt, sanguinem grumulosum dissolvunt simulque perspirationem servant, sperma scilicet ceti, oleum amygdalarum dulcium, infusum theiforme ex floribus sambuci, chamomillæ & summitatibus millefolii, pulveres diaphoreticos, nec non mixturam ex aquis analepticis & diapnoicis, cum aceto destillato, lapidibus cancrorum & sirupo acetositis citri.

## §. II.

Curatio-  
nis in-  
dicatio-  
nes.

Ipse vero purpuræ curatio ad tria hæc redit momenta: I. ut vitiosa quæ subest acris, nervosis partibus infesta materia corrigatur ac temperetur; II. ut spasticæ fibrarum, nervearum inde productæ stricturæ laxentur; & III. præparata materia placide per cutis emunctorium evacuetur, nec retrocedat. Ego quidem has medendi indicationes perfeci hisce ex multis probatissimis auxiliis. Ad acredinem diluendam & nervosas male affectas partes mulcendas, apprime utilia decocta humectantia, ex rasura cornu cervi, radice scorzonæ cum hordeo & liquiritia, gelatina cornu cervi, nec non serum lactis, nostra methodo paratum dulce. Idem faciunt & præterea expulsionem juvant emulsiones, ex aquis diapnoicis & antispasmodicis, cum semine napi, cardui Mariæ & papaveris albi. Inprimis etiam duplici hoc nomine conducunt pulveres temperati bezoardici, cujus generis est *Ludovici* atque *Sennerti*, nec non noster. Quibus ad æstum temperandum & spasmos componendos subinde succum citri instillare, pulverem præcipitantem nitrosus, vel tantillum croci, aut castorei, pro circumstantiarum ratione admiscere, vel

etiam horum usum interdum liquoris anodynæ mineralis dosi interpolare, sicque in vehiculo appropriato ex aquis destillatis propinare soleo. Et si purpuræ eruptio justo impeditior, vel retrocessio metuenda, aut jam facta, instar omnium est idem anodynus liquor, remixtus cum tertia parte spiritus bezoardici, ad mentem *Bussii* parati & a me in *observationibus physico-chymicis Lib. 2. obs. 28. pag. 238.* descripti.

## CAUTELÆ ET OBSERVATIONES CLINICÆ.

## §. I.

Purpura, morbus omnium delicatissimus, nihil plane fert excessivum, in regimine æque ac medicatione. In regimine quidem æger semper in moderato & æquali calore, tam lecti, quam hypocauti, detineatur, eo quod nimis æstuosum vires frangit ac pruritum ardoremque cum anxietatibus auget, frigidius exanthematum eruptionem impedit, subsequente languore & angore; & inæquale expulsionem retardat, vel minimum instabilem facit purpuram. Vitetur etiam stragulorum & indusiorum quantum fieri potest mutatio, ac potius jam trita, sicca & fumigata injiciantur.

Tensa  
in regl.  
mine.

## §. II.

Quam graviter dein calida & alexipharmaca medicamenta noceant, docuit sane uberius experientia, quæ constat, eadem cum æstuoso regimine, in causa esse, quod ingruente primum novo hoc morbo, omnes fere perierint, quum jam sub temperata methodo plurimi evadant. Quin liberalior & tantum infusorum & decoctorum calidorum potus, sudorem nimium movendo & serum plus justo exhaustiendo, officit. Ubi vero metus est retrocessionis, vel hæc jam facta, tum potus calidus præsentis efficaciam & moderata quoque expellentia inveniunt locum utique.

Calida  
& alexi-  
pharma-  
ca  
nocet.

## §. III.



§. III.

*Item re-* Vicissim refrigerantia & intesti-  
*frige-* num motum nimis sedantia intus de-  
*rantia* . tinent materiam , & anxietates ob id  
ac languores cum periculo intendunt .  
Ipsam vinum circumspecte usurpan-  
dum . In alba enim purpura & ubi  
malignitatis indicia , refrigerationes  
externæ cum æstu subinde intercur-  
rente , præsto sunt , ab eo plane absti-  
nendum . In rubra vero purpura , sive  
alba cum rubra conjuncta , ubi inter-  
nus adest æstus , cum siti & pulsuum  
magnitudine , medicamenta diapho-  
retica leniter nitrata omnino accom-  
moda .

§. IV.

*Nec non* Cerevisiæ etiam potum nullus mi-  
*cerevisi-* nus fert morbus quam purpura , eo  
*potum* . quod multas impuras , crassas , &  
heterogeneas partes in sanguinem &  
lympham invehit . Hinc ego quidem  
semper purpura laborantibus auctor  
sum , ut ab omni cerevisiarum gene-  
re abstineant & bibant decoctum ex  
radice scorzonæ , sarsaparillæ &  
cichorii , cum rasura cornu cervi ,  
hordeo mundo & paxillo seminis fœ-  
niculi , vel anisi stellati .

§. V.

*Alvus* Alvus in purpura nec nimis laxa ,  
*aperien-* nec nimis stricta esse debet . Si enim  
*da cau-* diutius retinetur , morbus inde nan-  
*se* . ciscitur pabulum & longius extrahi-  
tur ; si vero purgantibus , quin la-  
xantibus omni virulentia destitutis ,  
intempestive ducitur , materia per  
poros eliminanda revocatur & præ-  
cordiorum angustias , tormina &  
ardores in ventre , nauseam & sto-  
machi subversionem inducit . Hinc  
in purpuratam idiopathica , quam  
quæ aliis exanthematicis acce-  
dit , tanto magis maligna , alvum  
nec paullo ante , nec paullo post eru-  
ptionem irritare licet , sed quando  
vis morbi deferbuit & purpura sicce-  
scere incipit . Neque tum vix aliud  
expedit remedium , quam clyster  
emolliens , injiciendus sub sympto-  
matum remissione , quæ plerumque

Tom. IV.

matutino tempore major , quam  
vespertino , & nocturno .

§. VI.

Sanguinis missio maxima cum pru-  
dentia instituenda . Nam in purpu-  
ra alba & maligna , quam summa *Vene-*  
virium prostratio , cum largis sudo- *sectio*  
ribus & debilitate ac frequentia pul- *cum di-*  
sus , arguit , admittenda est plane *stinctio-*  
non . Contra ea insigniter prodest , *ne ad-*  
quin necessaria est in puerperis , quan- *mitte-*  
do lochiis retentis , symptomata pur- *da*  
puram comitantia ejus incursum nun-  
ciant ; cito tamen administranda .  
Sic enim sæpius observavi , summas  
præcordiorum anxietates , animi de-  
fectiones , laboriosam & anxiam spi-  
rationem feliciter fuisse sublata , &  
mox summo cum levamine in univer-  
so corpore purpuram proripuisse ; id  
quod pluribus docui & adstruxi in di-  
sertatione de venasectionis prudenti  
administratione pag. 18. seqq.

§. VII.

Quum porro vires plerumque hoc *Vitium*  
in morbo admodum sint prostratæ & *ratio*  
ad lipothymias propensio , summo *habenda*  
omnino cavendum est studio , ne æ-  
ger ex lecto surgat , aut diutius ere-  
ctus sedeat , quia facile sic obrepit  
animi defectio , & motu humorum  
ad interiora converso , exanthemata  
cum discrimine disparent . Subinde  
potius vires refocillandæ per mixtu-  
ras analepticas , ex aqua melissæ ci-  
tratae , vel Turcicæ , liliorum con-  
vallium , ceraforum nigrorum , flo-  
rum acaciæ , rubi idæi , cum spiritu  
nitri dulci , matre perlarum & sirupo  
acetositis citri . Quibus pro circum-  
stantiarum ratione lenia diaphoreti-  
ca , uti cornu cervi philosophice præ-  
paratum & antimonium diaphoreti-  
cum ; vel etiam si sudores colliquati-  
vi effusius manant , succus citri &  
species de hyacintho , cum fructu ad-  
jici possunt .

§. VIII.

Vesicator iorum utilitatem in purpu- *Vesica-*  
ra jam dilaudavit *Hamilton de febre* *tia cõ-*  
*miliari* eademque scapulis appare- *ducunt*

H re



re suadet. Recte omnino. Subtrahunt enim humorem serosum impurum & fibras delassatas nerveas ad contractionem extimulant, ut materiam morbificam promte excutiant. Hinc sub tarda eruptione & motu humorum ad interiora ipsumque caput converso, sæpius cum fructu præcepi, ut furis apponeretur vesicatorium, cuiusmodi concinnare soleo ex emplastro de meliloto, pulvere cantharidum cum pauxillo balsami Peruviani.

*Enarrationes morborum.*

OBSERVATIO I.

*Febris purpurata in præcepta fune-  
ra.* Feminam novi viginti aliquot annorum, vegetam & alacrem, sanguineo-cholericam, quæ virgo levi ex causa hysterica experta fuerat pathemata, sub axillis quoque & pedibus largiter sudarat, bene ceterum appetens & corpus domestica negotia obeundo probe exercens. Hæc utero gerens ex hilari præter morem fiebat tristis, sudores sucti succescebant, a medio gestationis tempore perpetuo largus lactis in mammis erat proventus & quinto mense circa hypochondria exquisitus oboriebatur dolor ardens, quasi ex prunis candentibus. Post partum admodum laboriosum ingenti horrore febrili corripiebatur per totum corpus, quem excipiebat capitis dolor & inquietudo. Quinto die lochia sistebantur & accedebant præcordiorum anxietates, cum horripilatione febrili, intercurrente æstu, ardore in ventre & tandem deliriis. Datis diaphoreticis sub temperate calido regimine, in cordis scrobiculo collo & dorso, nec non brachiis, purpura & rubra & alba efflorescebat quidem; sed quum gravi commoveretur iracundia, cutis iterum fiebat arida & sicca, delirium in furem plane transibat, lac post partum etiam copiosissimum, retinebatur, in ventre oboriebantur borborygmi, spiritus intercludebatur ac demum decedebat.

*Epicrisis.*

I. Adduxi utique hunc morbum sanguinis & feri impuri abundantia, ob vitæ genus ex mobili in sedentarium mutatum, sudores suctos suppressos & venæsectionem sub graviditate plane omissam, contracta. Nunquam etiam boni ominis in gravidis, si de ardore & æstu in interioribus abdominis conqueruntur. Signum enim præbet, hisce in partibus congestionis atque infarctus, qui successive ipsum sanguinem magis corrumpit, a quo natura post partum febrili motu se liberare intendit.

II. Nihil certe in morbis acutis deterius gravi animi affectu, inprimis iracundia vehementi. Si enim in sanis corporibus magna horum affectuum nocendi facultas, quidni in ægrotis? Hæc quidem inde sanguinis & humorum motus ad caput conversus, phrenitidem cum morte attulit.

OBSERVATIO II.

Tenera, sensibilis & ad iram proclivis femina, triginta annorum, sterile per decem annos duxerat matrimonium, sana tamen & vegeta. Quum vero maritus inopinata morte extingueretur tempore menstrui, fluxus substitit hic, & misera tota luctui sese dedit, inquieta fuit, nec dormivit, nec appetiit. Paulo post horripilationem cum æstu persensit, nec non tremulam manuum & colli agitationem cum cynico spasmu oris, anxietatibus subinde affecta & lypothymis. Datis antispasmodicis & antihysterics, conquieverunt tantisper hæc symptomata, subinde tamen, licet mitius, repetentia, donec die tandem tertio, cum horripilationis & tractionis in cute sensu, in collo, dorso & universo corpore purpura rubra cum alba prodiret, alvo per aliquot dies ante & sub eruptione clausa. Interim spastica priora symptomata remiserunt, somnus vero non rediit, prætereaque perpetuus ad urinam fuit stimulus, quæ tamen parce stillavit. Sed quum inopinato percelleretur terrore



rore, disparuerunt illico exanthemata omnia, sequuta ingens præcordiorum anxietas, redierunt pathemata hysterica spastico convulsiva ac mentem plane turbare visa sunt. Hinc sanguis e vena missus floridus & datus postea liquor anodynus mineralis cum spiritu bezoardico, ternis singulis horis ex infuso theiformi. Inde tertio die post comparuit iterum purpura, stationem tamen non servavit, sed post corporis refrigerationem & injectum clysterem denuo maxima ex parte recessit hoc facto mentis confusio, ut sine causa subinde vel in cachinnos, vel in lacrymas ægra solveretur. Corpore autem melius habuit, cibos sumsit, somno non penitus caruit, & sensim eo pervenit, ut domestica iterum obire potuerit negotia. Elapso inter hæc semestri spatio, meo ex consilio usa est Carolinis thermis, quibus purpura per omnem corporis ambitum expulsa, quæ post septimum diem squamarum instar secedente, mens restituta, corpus & vires ex voto per DEI gratiam confirmatae.

*Epicrisis.*

Purpuram in sanguineo corpore ex sanguine menstruo repente suppresso generari posse, ex hac historia patet utique. Excrementitia autem purpuræ materia, intus retenta, nervosis quam maxime infesta est partibus, easdemque spasmis & convulsivis plane motibus afficit. Quin diutius delitescens in interioribus, ipsam mentem turbare potest, hanc procul dubio ob causam, quia nervosis cerebri membranis firmius insidet easdemque exagitat. Carolinarum igitur præstans maxime est virtus ad depurandos corporis succos, excrementitiam materiam solidis & fluidis partibus intime insinuatam separandam & per cutis poros expellendam.

OBSERVATIO III.

Purpura alba idiopathica sanata.

Sanguineus ac robustus juvenis corripiebatur horrore, frigore, æstu postea & ingenti præcordiorum anxietate.

Secabatur secundo statim die vena, quarto & quinto totum corpus occupabat purpura alba confertim. Æger in conclavi calido detentus, de molesta gravitate & tractatione in sinistro latere conquerebatur, ad mingendum quidem stimulabatur, sed paucam reddebat cum stranguria urinam, alvo simul per sex dies clausa. Dabatur ipsi loco potus decoctum ex avena, radice scorzonerae, cum semine papaveris albi & cornu cervi usto, ac præterea quater quotidie dosis hujus pulveris: Recipe cornu cervi sine igne parati, oculorum cancri, antimonii diaphoretici ana drachmas duas, cinnabaris antimonii drachmam cum dimidia. M. Inde melius habuit, urinam etiam facilius misit & exanthemata uberius prodierunt in universo corpore. Nono die vespertinae sanguinem stillarunt & alvus sponte soluta. Nihilominus per totum morbum somno fere caruit, hinc data hæc potio: recipe aquæ florum sambuci, acaciæ ana uncias duas, antimonii diaphoretici, oculorum cancri, ana drachmam dimidiam, sirupi papaveris albi drachmas duas, mixturæ simplicis drachmam. M. Qua, continuato simul pulverum bezoardicorum usu, undecimo die ex toto convaluit.

*Epicrisis.*

Purpura alba admodum quidem periculosa, si aliis acutis & exanthematicis morbis accedit, si vero idiopathica cum febre recte prodit & ordinatum servat typum, non adeo est pertimescenda, modo recte temperato regimine & temperatis diaphoreticis excipiat. Hæc quidem sanguinis copia multum fecit ad generationem morbi, ideoque venæ sectio mature administrata commodam locavit operam, quæ in cacochymicis & symptomatica purpura, plus ut plurimum damni, quam emolumenti affert.

OBSERVATIO IV.

Tertio post partum laboriosum die, femina succulenta sanguineo-choleric-



*Purpura post alvi laxationem feliciter soluta.* ca, viginti & aliquot annorum, con-  
 quæta est de capitis, dorsi & totius  
 corticis corporis dolore, *als vven*  
*ihv die Hautsehr veeb thete*, nec non  
 de spastico stupefactivo in manibus  
 sensu & scintillis igneis oculis obver-  
 santibus. Accesserunt dein anxietates  
 præcordiorum, agrypnia, ardor  
 febrilis, virium prostratio, sitis,  
 oculorum rubor & squalor. Datis le-  
 nioribus diaphoreticis cum regimine  
 temperate calido, die quarto erupit  
 purpura, quinto & sexto die omnem  
 corporis ambitum occupans, inter-  
 spersa in pectore, manibus & abdo-  
 mine rubræ alba. A sexto die alvus  
 fuit adstricta & lochiorum fluxus sub-  
 stitit ad nonum usque. Hinc ad alvum  
 solvendam & lochia revocanda data  
 dosi pilularum Becherianarum, quæ  
 lenem fecit laxationem, & data alte-  
 ra dosi, lochiorum fluxus rediit cum  
 magno foetore, sequuti sudores largis-  
 simi, acidi & foetentes ad diem usque  
 undecimum, urina quoque secessit  
 graveolens. His excretionibus solutus  
 morbus, vires successive redierunt  
 cum somno & ægra sanitatem recepit.

#### *Epicrisis.*

Omissa sub graviditate sanguinis  
 missio in sanguineo hoc corpore feri &  
 sanguinis impuri genuit copiam, ex  
 qua purpura. Quia vero a lochiorum  
 itemque alvi suppressione succorum  
 impuritas aucta, optimo utique con-  
 silio, pilulæ Beccherianæ oblatae,  
 quippe quæ primo statim die in puer-  
 perio datæ materiam & causam febris  
 ac purpuræ tempestive præscindere so-  
 lent. Ut adeo pateat, temperata  
 laxantia in purpura non penitus esse  
 reformidanda.

#### OBSERVATIO V.

*Post erysipelas purpuræ ex primarum viarum sordibus.* Femina tres supra triginta annos  
 nata filiolum edidit sanum ac vege-  
 tum & ipsa quoque per tres hebdoma-  
 des optime habuit. Post iracundiam  
 vero & terrorem dextram mammam,  
 sub alvo a triduo adstricta, occupavit

erysipelas, quod tamen pulvere ex fa-  
 rina fabarum, cerussa & floribus cha-  
 momillæ confecto discussum. Tertio  
 die ingens accessit horror ac frigus,  
 subsequente acri æstu per totam no-  
 ctem durante, alvus dura fuit ac ten-  
 sa, somnus parvus & nullus. Dura-  
 runt hæc per tres dies, quarto autem  
 erupit purpura, quæ postquam per tri-  
 dum molesto ardore & dolore pungi-  
 tivo summam cutem divexasset, de-  
 cidit, æstus cum pulsus celeritate vi-  
 riumque dejectione remisit & ægra  
 tandem & morbum & puerperium fe-  
 liciter superavit. Nihil autem aliud  
 usurpatum, quam leniora & fixiora  
 diaphoretica cum humectantibus, cly-  
 steres emollientes ex decocto cremo-  
 ris avenæ cum chamomilla vulgari,  
 addito oleo amygdalarum dulcium &  
 sale communi, & remittente morbo  
 ac febre, subjunctus usus pilularum  
 nostrarum balsamicarum.

#### *Epicrisis.*

Puerperæ hanc etiam ob causam  
 tam frequenter in exanthematicas,  
 erysipelaceas & purpuratas febres in-  
 cidunt, quia primas vias a sordibus  
 graviditatis tempore contractis non  
 convenienti pharmaco expurgarunt.  
 Quando enim prima regio corrupta ac  
 impura materia repleta, vel levis  
 animi affectus, ut ira, terror, vel  
 improvida corporis refrigeratio, illam  
 commovendo & sanguini invehendo,  
 febrem suscitât exanthematicam. In  
 nostra erysipelas primum productum,  
 eodemque repulso, de novo febris ac-  
 censa, subsequente exanthemate pur-  
 pureo.

#### OBSERVATIO VI.

Femina triginta aliquot annorum, puer-  
 foecunda jam plurium liberorum ma-  
 ter, semper fere in puerperio labora-  
 bat purpura, feliciter tamen ean-  
 dem superarat. Quum vero septi-  
 ma vice expectatione citius partus  
 ei, ommissa ultima venæsectione, obti-  
 gisset,



gisset die quinto post experta est horrorem cum subsequente æstu, lochia parcius justo fluentia substiterunt plane, anxietates ipsam infestarunt, somnus defuit, caput doluit & universum corpus languit. Data quidem temperata diaphoretica cum temperantibus & die quarto post sparsim effloruit, inprimis in cordis scrobiculo, purpuraceum exanthema. Symptomata autem discedere noluerunt, sed potius spasmi in artubus & abdomine accesserunt, purpura disparuit iterum, anxietates fuerunt summae, ægra corpus jactitavit, delirare coepit & animo subinde linqui, ut omnia jam conclamata esse viderentur. Hinc vena incisa in brachio & quatuor circiter sanguinis unciae subtrahæ. Quo facto, protinus præcordiorum angor remisit, animi defectio cessavit, ægra ad se rediit, corpus totum calore & madore perfusum ac paullo post erupit copiosissima purpura, quæ debito regimine & congrua medicatione ex voto perfanata.

*Epicrisis.*

Fundatum quidem in experientia est, non tentandam esse sanguinis missionem, ubi purpuræ eruptio instat, aut modo facta; dantur tamen casus, ubi summopere necessarium, ut hoc etiam tempore sanguis mittatur. Nonnunquam enim, lochiis resitantibus, aut parcius justo fluentibus, sanguis redundans, ob spasmos in abdomine, cum impetu urgetur & congeritur ad cor ac cerebrum, ibique atrocia & lethifera suscitatur symptomata, quæ perperam vulgo retrocessioni materiæ exanthematicæ tribuuntur. Hinc si per venæ-sectionem sanguis superfluus subtrahitur, cessant illico pathemata & liberiore ac æquabili facto circuitu, eruptio expedite succedit summo cum levamine.

OBSERVATIO VII.

Judicium & consilium. Purpurata febris, novus & incognitus Veteribus morbus, post quam  
Tem. IV.

circa annum Æ.C. 1552. Lipsiæ primum coepit, successive adeo virescens & longe lateque processit, ut in plurimis, Germaniæ minimum locis, jam notus sit atque solennis. Quo vero penetravit, haud exiguum primum edidit stragem multumque negotii facessivit Medicis, priusquam ipsa edocerentur experientia, cujus esset indolis, quæ ferret, quæ non, in medicatione æque ac regimine. Hinc sapius tam in, quam extra Germaniam, Medici meum exquisiverunt judicium atque consilium, qualis sit incognitus hic morbus & quo pacto eidem feliciter occurrendum. Quum igitur adhuc latius quotidie serpat, non infructuosum erit, heic inserere ea, quæ quum anno 1723. Francofurti ad Mœnum primum comparet, ad meam Medicis perscripta, una cum iis, quæ respondi. Ita autem habebat missa mihi relatio historica: *Infestavit ab aliquo tempore puerperas nostra hac in urbe novus quidam morbus, hunc potissimum in modum incedens atque decurrens. Partum enixæ, secundo vel tertio puerperii die corripiuntur horrore cum subsequente calore, conqueruntur de summa pectoris oppressione & crebrioribus suspiriis, lochii ut plurimum resitantibus. Interjectis aliquot diebus, erumpunt pustulae miliares, inprimis circa cordis regionem conspicuae, excipiunt deliria & nervorum subsultus, & plurimæ ex agris occumbunt, aliæ circa quintum, plures nono morbi die. Lixet autem morbo huic omnibus viribus sit occursum, efficacissimis alexipharmacis, imperata quiete, regimine calido, vesicatoriorum applicatione & cucurbitulis siccis; irrita tamen fuerunt omnia & tritum obtinuit adagium: interdum docta plus valet arte malum. Hinc queritur: qualis sit hic morbus, & qua methodo quibusque medicamentis sit expugnandus?*



## JUDICIUM CUM CONSILIO.

Per scriptam morbi ignoti historiam curate & perlegi & expendi. Est autem is febris maligna miliaris, quæ nostris in oris, imprimis Misniæ tractu, a plurimis annis admodum frequens & puerperis sæpius funesta fuit. Ante sexaginta circiter annos nostris pariter incognitus fuit hic morbus, primum Lipsiæ observatus, ideoque *next & xiv* febris purpuratæ Lipsiensis nomen obtinuit. Jam longius processit ac vires sumsit, ut non modo puerperæ, sed & viri, imprimis tamen feminæ, eodem crebrius decumbant, modo acute & brevius, modo longius, per tres, quin sex quandoque menses. Hinc in chronicam acutam purpuram dispescitur. Illa quidem admodum molesta, sed non periculosa, nec febre stipata; hæc autem semper febrem habet comitem, nec periculo caret. Periculum tamen in hac eo majus est, quo magis corpus quod corripit ex prægressa tempestatum diuturna insalubri constitutione, pravo victu & vivendi genere, nec non aliis causis vel debile est, vel impuris succis repletum. Et chronica illa etiam vehementius & diutius insistit, pro corporis in quod cadit dispositione. Dein purpura, vel rubra est, vel alba. Illa non tam maligna & deleteria indolis quam hæc, quæ, si, ut sæpius evenit, aliis acutis exanthematicis febribus in fine accedit, mortem ut plurimum infert.

Causa hujus tam fontici morbi maxima ex parte corruptæ, vappescenti & corrosivæ lymphæ tribuenda videtur. Quando enim lymphæ in diverticulis & tubulis glandulosis stagnat & diutius subsistit, corrumpitur & acrem corrosivam indolem induit. Quæ postmodum succis & sanguini insinuata & cum hoc ad partes nervosas delata, truculenta illa in purpura obvia pathemata inducit, anxietates præcordiorum, cardialgias, angores, in-

quietudines, dolores, & tractiones in artubus languores, respirationem difficilem, oppressiones pectoris, horrores, lipothymias, pruritus aliaque. Omnia tamen hæc remittunt symptomata, si beneficio naturæ materiæ acris ad corporis superficiem propellitur. Singulare autem habet hoc exanthema illud, quod admodum sit variabile, mox compareat mox evanescat, & hinc symptomata jam leniora, jam graviora inferat.

Chronicam purpuram observavi sæpius in feminis, quæ antea fluorem album expertæ, hunc subito siccarunt, disparente iterum, & hoc repetente, purpura. Dein notavi, feminas, quibus post quinquagesimum annum menses emanferunt, purpuram crebrius incurrisse, purpuram crebrius incurrisse. Frequens quoque idem hic morbus omnibus, qui vitam colunt sedentariam, animi affectibus, ira præsertim ac terrore jactantur, lacticiiniis, dulcibus & placentis delectantur. nec legitimum experiuntur alvi beneficium. In acutis febribus, variolis & morbillis si alvus iusto diutius adstricta, vel diarrhæa contingens subito sistitur, purpura subsequi solet, ob retentas acres, salsas, sulphureas sordes. Maxime omnium vero frequens & anceps est hic morbus in puerperis, eo quod sub graviditate, ob retentos menses, sanguis nimius sit & impurus, tanto certius, si accedit inordinatum vitæ genus, vita sedentaria, animi angor & somnus nimius. Impetere solet purpura vel cum, vel paullo post febrem lacteam, quæ subsistentem passim corruptam lympham e latibulis excutit & in sanguinem agit. Quod autem purpura jam frequentior sit quam antea, id perverso potissimum abusui potuum calidorum, imprimis decocti Coffee, tribuendum. Quamvis enim potus hic, si alvum simul laxat, non facile nocet; certum tamen, quod, si liberalius sub alvo clausa ingurgitatur, multas recrementitias ex intestinis in



sanguinem pellat sordes, & sudori movendo aptus sit, cujus tamen successus post eundem incuriosius habetur, ut succi hinc non possint non sordescere.

Ad arcendum porro hunc morbum nonnulla ante, nonnulla post partum sunt tenenda. Sub graviditate sanguis quantum fieri potest ab impuritate vindicandus. Hunc in finem in sanguineis, quæ bene comedunt & minus corpus exercent, bis vel ter, quarto, sexto & in medio noni mensis, vena pertundenda. Alvus semper in officio retinenda, cujus si obliviscitur, admonenda alimentis, vel pilularum balsamicarum, Becherianarum, Stahlianarum, aut nostrarum usu, nec non potione ex manna cum rhabarbaro & cremore tartari. Perspirationis quoque saluberrimæ successus secundandus per corporis motum, diluentia, juscula, potum tenuem, vitando dulcia, acida, fructus horraos & omnia quæ spissum & viscidum sanguinem ingigunt. Ventriculus, præsertim in coena, non nimia ciborum copia onerandus, somnus longior arcendus & animus in tranquillitate servandus. Ex medicamentis profunt quæ ebullitionem sanguinis componunt leniterque cuticularem excretionem promovent, diaphoretica nempe fixa cum temperantibus & nitro. Post partum e re est, ut sedata sanguinis exæstuatione & pulsus vehementia, secundo post die, dosis pilularum supra dictarum assumatur, quæ non modo intestina, sed & uterum expurgant simulque lochialem fluxum promovent, eaque propter altero iterum die eandem deglutire expedit, imprimis si lochiorum fluxus tardus nimis, vel insufficiens. Tertio demum die, si febris lactea ingruit, necessarium est, quo bis quotidie dimidia drachma pulveris mei bezoardici, cum præcipitante remixti, sumatur.

Quando autem purpura adest, in curatione rite adornanda, ante omnia in lochia inquirendum, an recte

& sufficienter secesserint? Quod si hoc non factum, post pediluvium, vena in pede secanda. Tum vitandum omnis calor, tam in regimine, quam medicatione; vitanda vero etiam refrigeratio & refrigerantia remedia, ipsoque nitro caute utendum, ac nonnisi ubi sanguis æstuat & pulsus celer. Alvus quoque nec nimis sit adstricta, nec intempestive, vel acrioribus irritetur. Inter medicamenta nulla magis proficua deprehendi, quam pulverem meum bezoardicum, præcipitantem & liquorem anodynum mineralem, una cum pulvere castorino cinnabarino. Si pectus cum angore opprimitur, soleo liquorem anodynum, tribus partibus, cum una parte spiritus bezoardici Buffii & dimidia parte essentiae castorei miscere, & alternatim propinare hunc pulverem: recipe pulveris Marchionis drachmam, cinnabaris nativæ præparatæ scrupulum, pulveris castorei grana X. M. f. pulvis, dividatur in doses IV. Loco potus ordinarii præbere suadeo decoctum ex rasuræ cornu cervi, radice scorzonæ, farsaparillæ, ana uncis binis, decoctis in quatuor aquæ mensuris. Infusum theæ autem liberalius bibere non conducibile, sed sufficit aliquot tantum patellas interdum sordillare. Quod si demum alvus nimis sicca, enemate domestico, ex floribus chamomillæ, sale communi & nitro cum decocto avenaceo, subducenda.

Atque hæc sunt medicamenta & hæc est methodus, quibus ego per DEI gratiam multos purpura decumbentes feliciter sanavi. Quæ rogatus candide sic exponere volui, debui Hallæ die 10. Decembr. Anni 1723.



## CAPUT X.

*De Febribus Epidemicis Exanthematicis catarrhalibus sive Petechizantibus.*

Theses Pathologicae.

## §. I.

*Descriptio morbi.*

**F**ebres hę sunt lenes continuę, cum virium prostratione, vigilia, inappetentia & quandoque cum eruptione macularum in summa cute junctę, ortę a feri excrementitii copia & intestina dissolutione, non sine contagio & vitę periculo.

## §. II.

*Infulsus & de carius.*

Ab initio statim immutatur faciei aspectus in morbidum, & ægrotantibus vel quatuor antequam lecto assignantur diebus, conqueri solent, de spontanea lassitudine, gravativo corporis & artuum dolore, quasi ossa contusa essent & fracta, de virium languore, inappetentia, levi animi defectione, nausea cardialgica *Ubel-seyn*, capitis dolore & somno inquieto, alvo simul adstricta. Accedit postea vesperi horripilatio & frigus, sequitur æstus, crescunt symptomata, major virium fit jactura, ut vix imbecilles & teneri erecti manere queant, capitis dolor cum vertigine & inquietudine ingravescit, in quibusdam dorsum, vel etiam latera exquisite dolent, præcordia anguntur, interna ardent, fauces arent, pulsus contractus, celer ac debilis est, urina pallida sine sedimento, & spiritus difficillime trahitur. Tum prodeunt in nonnullis quarto, vel circa septimum diem, in dorso potissimum, pectore & brachiis, cum, vel sine levamine, maculę, in aliis copiosiores, in aliis pauciores, coloris varii, vel, ut in plerisque, purpurei, vel lividi fusci, vel pallidioris rosei, modo latiores, modo minores, in plurimis instar morfus pulicum, a quibus tamen dignoscuntur, dum compressę non relin-

quant vestigium in medio rubicundum. Ob quam macularum diversitatem, febres hę varia sortiuntur nomina, ut vel purpuratę, vel punctulares, vel petechiales spurie, audiunt. Sub hoc morbi statu, sive vigore, acerbiora sunt omnia, inquietudo maxima, corporis jactatio ejusque decubitus insuetus, mens turbata, sermo delirus, somnus nullus, sudor frigidiusculus, angustia spirandi intensior & pulsus contractus, inæqualis, celer & frequens.

## §. III.

His si accedunt tendinum subsultus, *Eventus* sitis defectus, borborygmi in ventre, singultus, faucium ab aphthis inflammatio, convulsiones, aut syncope, cum extremorum refrigeratione & sudore largissimo, certa sunt mortis indicia. Quando autem circa dies criticos, vel in ipsis, septimo, undecimo, vel decimo quarto, liberalius prodit tepidus sudor, per aliquot sæpe dies, licet cum virium languore manans, vel etiam alvus per aliquot dies fluit, salutis est indicium, tanto certius, quando postea pulsus mutatur, antea contractus, increbescit, durus mollescit, celeritatem tantisper ponit magisque æqualis fit, quando animus sit erectior, situs & decubitus corporis quietior, auditus difficilis, urina turbida & sedimentum ponens, quod quidem circa dies criticos certum fere falsi eventus indicium. Hoc quippe facto, successive postea somnus, appetentia & vires redeunt, quod tamen non facile ante diem accidit decimum quartum.

## §. IV.

Veteribus hę febres quotidianę *Formalis* continuę serosę, vel etiam recentioribus catarrhales malignę vocari solent, quia leniter procedunt ab initio & coryza, gravedo pectoris, infarctus, tussis sæpe primis diebus junguntur & vesperi per noctem exacerbationes fiunt. Formalis autem earum ratio consistit maxime in partium sanguinis, vel potius feri dissolutione, *me-*



mediante motu febrili, cuius beneficio impuræ, corruptæ, heterogeneæ partes, si robur adhuc inest naturæ, nec adeo corrupta solidorum & fluidorum dispositio, evolvuntur, earumque subtilior serosa pars per largum sudorem, crassior & mucida per nares, fauces & bronchia, biliosa mucida per alvi secessum, & putrida salinosulphurea, sub forma macularum, per tubulosam & fibrosam cutis substantiam, postea salutariter propellitur. Exanthematicam enim materiam non causam, sed potius effectum neque etiam perpetuum huius febris esse, ex eo patescit, quod morbus non sola efflorescentia exanthematum feliciter & perfecte solvi soleat, sed plures, eadem copiose licet facta, pessime habeant, alii sine ea evadant & decedant quoque, nunquam vero firma salutis spes sit, nisi solennis evacuatio, vel per alvum, vel sudorem, diebus convenientibus criticis fiat. Quod autem dissolutio humorum fiat, intolerabilis & extraordinarius plane foetor foridum, quæ per alvum, sudorem & urinam copiosissime secedunt, planum facit testatumque.

§. V.

*Materialis causa.*

Materialis igitur harum febrium causa, utique ingens & insolita plane humorum excrementitiorum salinosulphureorum & mucidorum corruptibilium impuritas, quæ unionem & mixtionem sanguinis ingressa, eundem in intestinum dissolutorium motum deducit. Sed unde hæc primum haber ortum, disquirendum merito. Nam licet semper, etiam secundum naturam, vitalibus succis insit impurum, per varii generis emunctoria excernendum jugiter: illa tamen impuritas, quæ hunc facit morbum, longe magis a succorum indole aliena est, quam ordinaria, & præterea ita comparata, ut sese intime uniat cum lymphæ & sanguine, eorumque crasin & mixtionem ingrediatur. Interim sicuti omnis morbosa impuritas, sive cacochymia, ab ingestis intemperatis

& incongruis excretionibusque, præsertim per alvum & cutim, suppressis, originem ducit; ita etiam hæc corruptiva impuritas, febrium catarrhali mali moris & exanthematicarum causa, pariter ab ingestis, maxime potu, incongruis simulque excretionibus, præsertim cuticulari, suppressus, oboritur.

§. VI.

Epidemias autem plerumque esse *Ex aere* has febres, experientia docet ac a præternaturali extraordinaria temporum anni tempestatumque constitutione oboriri tali qua multa in corpore gignuntur recrementa, eorumque per cutis poros secessione impedita, accumulatur. Quin aeris constitutionem sequuntur hæc febres epidemicæ, ac inde magis, vel minus deterioris sunt genii, inprimis per multiplicem constat observationem, diu perseverantem aeris australis humidi, calidi, nebulosi & ventis destituti, præsertim vere & autumno, statum, accedentibus postea frigidioribus septentrionalibus ventis; febres mali moris putridas, exanthematicas afferre. Neque minus constat, quod si æstas diutius siccior, autumno, spirante vento boreali, prodeant affatim febres epidemicæ, acutæ, intermittentes, exanthematicæ, petechiales, purpuraceæ & dysentericæ, uti quidem annis c l o l o c x c i x, c l o l o c c x. x v, x x i. & x x i x. factum fuisse novimus. Denique id etiam per experientiam certum, quod tempestatum subitæ ac vehementes vere & æstate, ex frigido in calidum, sicco in humidum & vice versa, vicissitudines, quam maxime generent febres mali moris, quemadmodum evenit elapso insaluberrimo anno, quo ea propter ubique fere plures mortuos, quam natos fuisse, comperimus. Et certe, nihil ad ingerendos perniciosos morbos aptius, quam si tempestatem ferventem, excipit valde frigida, eo quod nimius calor motu intestino accendit sanguinem multaque excrementa salinosulphu-



phurea excludit, frigus autem poros cutis stringendo, intus detinet eadem, gravissimum postea damnum certo inductura. Hinc etiam est, quod in locis, ubi interdiu æstus, noctu frigus regnat, Austria inprimis atque Pannonia, ob varium hunc & insalubrem aeris statum, familiares sunt atque endemiæ exanthematicæ & petechiales malignæ febres. Inde quoque in proclivi judicare, cur in Italiâ, maximeque Romæ, adeo periculosum sit, post diurnum calorem, corpus vespertino frigido humido aeri exponere.

## §. VII.

Ex corporis constitutione

Neque tamen omnes tales febres petechizantes sunt epidemicæ, id est, ex communi vitio aeris veniunt, sed quandoque etiam sine hoc oriuntur, in corporibus præsertim impuris, incongruis & pravis alimentis saginatis, & nimia & crebriori refrigeratione affectis. Inde enim fit, quod febres hæ hieme potissimum grassentur, & eos quam maxime corripiant, qui pravo victu ac regimine uti, ac præterea corpus intensius refrigerarunt. Vidimus id ipsa hac hieme, qua ex civibus nostris multi, intemperantiæ in baccho ac venere indulgentes & traha diutius sub cœlo rigido vecti, inciderunt in has febres & voluptatis dederunt poenas. Neque etiam ea propter effluvia ex iis, qui his exanthematicis febribus graviter decumbunt, aut mortui sunt, omnes inficiunt promiscue, sed eos tantum, qui dispositionem ad huiusmodi morbum, summam nempe succorum impuritatem gerunt, ceteris, qui ab hac immunes, a contagio etiam liberis.

## §. VIII.

Unde symptomatum varietas

Ceterum quia sanguinis impuritas non in omnibus unius ejusdemque indolis; hinc varii generis subinde his in febribus prodeunt exanthemata variaque accidunt symptomata, magis vel minus periculosa. Etenim si deleteria prorsus subest impuritas, ad putredinofam dissolutionem humorum ten-

dens, graviora sunt omnia & petechiæ magis emergunt veræ atque lethales, fusci, vel nigri coloris, de quibus infra. Quando vero non adeo corruptivæ indolis, sed mitioris salino-sulphureæ, symptomata non tam atrocia, sed ordinate magis morbus decurrit maculæque magis sunt purpureæ & rosei coloris, ac febris ob id purpurea, vel petechialis spuria, sive petechizans, audit. Ubi serum falsum acre, recenter a perspiratione prohibita subnatum, sese adjungit, coryza, sternutatio, tussis ferina, cum defluxione salis ad fauces & epiglottidem, complicantur, eamque ob causam febris catarrhalis malignæ nomine insignitur. Quandoque etiam ob copiam partium salino sulphurearum acrium sub ipso motu febrili dissolutorio evolutarum, maculis petechialibus sese associat easque antecedit, vel sequitur purpuraceum exanthema miliare, idque tam rubrum, ex pruritu, ardore, cutis aspritudine & foetore specifico acido cognoscendum, quam, quod pejus adhuc, album, cujus pustulæ miliares nonnunquam in vesiculas ampliores, sero acerrimo turgidas, explicantur. Id quod vero, si declinante morbo, undecimo, vel decimo quarto die, vel serius adhuc, cum magna anxietate, inquietudine, spirandi angustia, animi deliquio & extremorum frigore, accedit, æger ut plurimum, ob vires jam nimium fractas, succumbit.

## §. IX.

Qui naturæ & corporis robustioris, *Extens.* plebeji & vitæ rusticæ addicti, solo sæpe convenienti externo regimine, sine singulari artificio, patienter expectando tempus, melius & felicius evadunt, quam qui naturæ sunt imbecillioris, animi meticulosi, vel merore, curis aut intemperantia potus & ingluvie, desidia quoque, aut nimia mentis fatigatione, corpus reddiderunt morbidum & imbecille. Mali porro ominis effusæ excretiones ab initio statim & extra dies criticos, per-



sudorem, alvum & urinam quoque. Qui autem occumbunt, inflammatione meningum, sive phrenitide, vel faucium & œsophagi, ex aphthis, vel ipsius stomachi, pereunt. Sanguis qui his in febribus extrahitur, conspicuum monstrat vitium & vel valde fluidus & serosus, rubicundus, vel etiam nimis crassus & nigricans, comparet.

## CURATIO.

### §. I.

Curatio  
nititur  
naturæ  
robore.

Felix harum febrium exanthematicarum eventus atque curatio, non tam in arte Medici, quantumvis periti atque sagacis posita, sed potius a corporis naturæ bonitate ac vigore & convenienti regimine pendet. Hinc si enormis succorum impuritas, vires imbecilles, corpus laxum, spongiosum & minus perspirabile, nec selectissima remedia, nec optima inediendi methodus, quicquam proficient. Contra ea quando non tota sanguinis & humorum massa adeo inquinata est, quando vigor adhuc motuum vitalium, animus etiam erectus, corpus nervosum, gracile & pori aperti, feliciter vel levi artificio, vel sponte plane, succedunt omnia. In his enim dissolutoriis, exanthematicis, acutis & periculosis febribus quam maxime valet practicus ille Hippocratis veterumque canon: naturam esse optimam morborum medicatricem, per se doctam, quæ congrua servet & incongrua rejiciat.

### §. II.

Indica-  
tiones  
curatio-  
nis.

Igitur id tantum in medicatione tenendum Medico prudenti, ne motus & excretiones, quæ etiam sine artificio in salutem vergunt, turbet & pervertat, sed placide agat, ab omnibus tam fortiter commoventibus & evacuantibus, quam sedantibus & sistentibus, abstineat, & naturæ opus perite juvet. Proinde hos unice in fines medendi methodus dirigenda: I) ut plenaria dissolutio sanguinis & humorum moderate compescatur & im-

pediatur; II) ut acrimonia salino-sulphurea humorum diluatur ac temperetur, succique simul servantur fluxiles; III.) ut excretiones per alvum, cutim, urinam quoque & sputum, modeste promoveantur; ac IV.) ut vires fractæ foveantur ac restaurentur.

### §. III.

Ad impediendam putridam humorum resolutionem, spectatæ virtutis temperata acidula, quippe quæ putredinosum miasma, ad naturam alcalini sulphurei accedens, cicurant eademque efficaciter resistunt. Hac virtute splendent ex vegetabilibus acetum vini simplex & destillatum, succus citri, limonum, aurantium, berberum, granatorum, ribii & confecti ex iisdem sirupi, nec non succus acetosæ & acetosellæ cum destillatis ex ipsis aquis. Ex mineralibus clyssus antimonii sulphuratus, spiritus vitrioli vulgaris & sic dictus philosophicus, spiritus salis, nitri & maxime omnium sic dicti dulcificati, quos inter ceterum specificum eminet spiritus salis dulcis probe elaboratus, ex oleo vitrioli, cum sale communi & spiritu vini, per cucurbitam destillatus.

Usura  
panda  
acidula

### §. IV.

Dein tam ad dissolutionem corruptivam intercipiendam, quam acrimoniam acidam obtundendam, conducunt blanda diaphoretica & terrea fixiora alcalina, bolus nimirum Armena, terra sigillata, unicornu fossile, lapides & chelæ cancrorum, mater perlarum, cornu cervi philosophice præparatum, nec non ex compositis, pulvis bezoardicus Sennerti, Ludovici, noster, Anglicanus, lapis bezoardicus & lapis de Goa. Quæ porro humectant & acrimoniam diluunt, sunt maxime pro potu usurpanda, decoctum scilicet hordei, cum scorzonera & rasura cornu cervi, nec non succo vel sirupo acetosiratis citri, aqua ipsa pura, vel Wildungensis, cum saccharo, cornu cervi usto & succo citri, ptisana decocta cum cerasis siccis contusis, item juscule tenuia gallinarum.

Tempe-  
rancia

Humo-  
crasie



rum, cum succo limonum, vel aurantiorum, decoctum avenaceum tenue, vulgo *Dabergrube*, nec non cerevisiæ leves diureticæ.

## §. V.

Secunda  
danda  
cuticu-  
laris.

Et alvi-  
na ex-  
cretio.

Vires  
reficien-  
da.

Inter ea quæ excretiones secundant, & quidem per cutem, præter jam dicta bezoardica terrea, aqua scabiosæ, galegæ, cardui benedicti, scordii, florum sambuci; item mixtura simplex, acetum foliis rutæ, cardui benedicti, scordii & galegæ infusum, nec non essentia bezoardica, ex radice vincetoxici, angelicæ, pimpinellæ, dictamni, valerianæ, cortice cascarillæ, herba cardui benedicti & scordii, cum moderate spirituoso menstruo, vel melius adhuc, spiritu salis dulci, nostra methodo confecta. Alvinam vero excretionem juvant tutissime clysteres emollientes domestici, ex decocto avenaceo, oleo amygdalarum dulcium, floribus chamomillæ vulgaris, sambuci, sirupo violarum, sale communi, nitro. Eundem etiam in finem utile decoctum mannatum, circumspecte & tempore debito datum, ex mannæ unciis duabus, cremoris tartari drachma, in aqua scorzonæræ decoctis, addito sirupo violarum & oleo de cedro. Ex iis demum, quæ vires custodiunt atque reficiunt, præter modicum vini cum aliis diluentibus usum, laudem merentur aquæ rosarum, liliorum convallium, florum tilia, rubi idæi, fragorum, mellissæ citratæ, cinnamomi cydoniata, gelatina etiam cornu cervi, cum succo limonum, pomorum Chinesium & saccharo.

## §. VI.

Remedia  
in  
primis  
proba-  
ta.

Potissimum vero polychresta & experta a nobis per multos annos virtutis tria hæc commendamus medicamenta: Recipe antimonii diaphoretici, cornu cervi sine igne parati, lapidum cancrorum, matris perlarum ana drachmam, nitri depurati drachmam dimidiam. M. f. p. Hic pulvis a scrupulo uno, ad drachmam dimidiam, pro dosi sumendus, quandoque solus,

quandoque cum drachma succi citri, ex decocto, vel ptisana, quandoque etiam in hac mixtura: recipe aquæ cardui benedicti, florum sambuci, liliorum convallium, cerasorum nigrorum ana uncias duas, rolarum, cinnamomi sine vino, ana unciam dimidiam, spiritus nitri dulcis guttas 30. sirupi acetositis citri unciam semis. Alterum utilissimum remedium mixtura hæc: recipe aquæ galegæ, cardui benedicti, cerasorum nigrorum, florum acaciæ, ana uncias duas, acetum destillati unciam, lapidum cancrorum, antimonii diaphoretici ana drachmam cum dimidia, cinnabaris scrupulum, mixturæ simplicis, spiritus nitri, vel salis, dulcis, ana guttas 30. sirupi acetositis citri drachmas sex. M. D. S. Mixturæ dabon mobilum gerunt. test alle imen Otund ein Löffel boll zu gehen. Tertium est hæc mixtura bezoardica: recipe tincturæ bezoardicæ, superius descriptæ nostræ, vel *Michaelis*, sirupi papaveris rhœados, liquoris nostri anodynii, ana drachmas duas. M. de qua quadraginta, vel quinquaginta guttæ pro dosi sumendæ.

Cautela & Observationes Clinicae, cum Methodo medendi Speciali.

## §. I.

**M**aximum periculosis hisce febribus rite medendi momentum, regimine continetur congruo. In hoc primum est, ut æger semper in æquali & temperato calore detinea-  
tur per totum morbi decursum. Sub nimio enim æstu dissolutorius in sanguine motus magis intenditur, alvus siccatur, anxietates augentur, impuri & falsi acres humores acuuntur, vires exhauriuntur, sudor fit justo copiosior & cito nimis majorique copia, sine emolumento, ad cutem propelluntur exanthemata. Frigore autem improvide admissio, præsertim ad pedes, perspiratio facile cohibetur, ma-  
cula

Regimen  
sit  
tempe-  
ratum  
& æ-  
quale.



eulæ & exanthemata retroaguntur, tormina in ventre & diarrhœæ cum singultu inducuntur & criticæ evacuationes turbantur. Et ab inæquali regimine ac subita aeris calidi in frigidum, vel contra mutatione, eadem fere, quam ex frigido accidunt incommoda. Interim quia aer impurus continuo haustus inspiratione, viribus infensissimus, cavendum, ne æger in humiliori conclavi vapido aere pleno decumbat, sed aer potius morbidis exhalationibus foetus, provide emittendus & purus admittendus.

## §. II.

Per-  
spira-  
tio  
cus-  
dia-  
tur.

Dein summo providendum est studio, ut corpus in æquali semper maneat perspiratione & quo cutaneum cribrum, in his morbis admodum sensibile, cujus tamen beneficio optime peccantis secretio fit atque excretio, in æquabili semper servetur tono. Hinc fugiendæ omni modo mutationes linteaminum, indusiorum & stragulorum, nec non transitus ex uno lecto in alterum. Ego quidem hanc ob causam interdicare soleo, ut ægri crebro surgant, quin tempore critico & quo exanthemata prorepunt, præsertim si debiles admodum decumbentes, præcipio, ne lectus sternatur, nec, si linteamina nimis madida, nova injiciantur, sed trita antea & exsiccata probe. Est quoque admodum salutare corpus involvere tunicæ talaris manicatæ quam vocant *einen od-  
delasrot* pedesque tibialibus induere sicque in lecto decumbere, quo omnis auræ frigidioris accessus arceatur.

## §. III.

Situs  
erectus  
vitandus.

Tum vitandus erectus corporis & capitis, tam in, quam extra lectum situs, tantò magis, ubi pulsus debilis & summa virium prostratio, nec non ubi morbus in vigore. Inde enim ob debilem cordis pulsus non sufficiens sanguinis copia perpendiculari via ad caput pelli potest, lipothymia facile obrepit, imminuitur, vel sistitur cordis & sanguinis motus, omnes

motus ad interiora vertuntur, fibrosa & tubulosa cutis substantia contrahitur, materia exanthematica, peioris nunc quam antea indolis, retropellitur, & ad nervosas partes delata, convulsiones, deliria, vel etiam sphacelationes funestas paullo post suscitatur. Id quod plurimis exemplis habeo confirmatum & uberius meo ex consilio excussum est in dissertatione *de situ erecto in morbis periculosis no-  
xio*.

## §. IV.

Porro animustranquillus & erectus servandus omnesque occasiones præscindendæ, quæ ad metum pusillanimitatem, iram, vel terrorem egrum permovere aptæ. Mens potius solatio & salutis spe erigenda; quam mortis periculi denunciatione dejicienda. Ego certe novi febribus ejusmodi decumbentes, qui forsan non fuissent mortui, nisi a Theologis & Medicis intempestiva mortis prædictione & inculcatione, horror & metus ipsis fuisset incussus ingens, omnibus postea illico in pejus mutatis.

## §. V.

Præterea neque in principio, neque in declinatione, multo minus in statu morbi, laborantes onerare decet alimentis, quæ ex carnibus, ovis & pinguibus parata, uti sunt illa jusculas sic dicta confortantia, *die Krafft  
Bruben*. Non enim non in manifestum damnum cedere possunt, quia præsentem jam virium defectum & humorum impuritate, vires magis aggravant, cruditates generant, materiamque & fomitem morbi augent. Memori potius mente tenendus verissimus ille practicus *Hippocratis* canon: *corpora impura quo plus nutriveris, eo magis læseris*. Mihi quam plurima nota sunt exempla eorum, quibus remittente morbi & symptomatum atrociam, præpostera liberalitate cibi alibiles oggesti, cum præsentaneo damno, subsequente mox anxietate præcordiorum, inquietudine, virium debilitate, quin ipsa morte.

Animus  
sit tran-  
quillus  
& erectus.

Alimen-  
ta vi-  
tentur.

## §. VI.



## §. VI.

*Phar-*  
*maco-*  
*valida*  
*nocent* In medicamentorum autem usu, ceu perpetuum axioma tenendum, nunquam validiora commoventia & volatilia, emetica, purgantia, diuretica, nec non sudorifera nimis spiritiosa & expellentia, esse propinanda. Nihil enim vi & impetuose hoc in morbo agendum, in quo naturæ quam maxime viget opus, cui omne nimium inimicissimum, temperata vero & moderata amicissima.

## §. VII.

*Medica-*  
*menta*  
*oppor-*  
*tunc*  
*danda* Deinceps quum hæc febres habeant certos suos typos, suas perodos, certis temporibus exacerbationes & remissiones; multum omnino refert, ut Medicus hæc tempora & medendi opportunitatem observet. Quod si non facit, plus damni, quam emolumenti affert. Res enim in medendo maximi momenti, ut quis sciat, quæ tempore exacerbationis, ante, & post hanc, sub declinatione & remissione, danda. Paucis igitur in genere notari velim, quod sub æstu & symptomatum intensione, humectantia, diluentia, pulveres absorbentes nitrosi, superius descripti, nec non acidula, cum valde moderato externo regimine propinare expediat. Finito vero paroxysmo, quando cutis laxa, mollior & ad excretiones disposita, analeptica, excitantia, vel, si opus bezoardica, perspirationem moventia, nec non infusum theiforme ex veronica, scordio & liquiritia, exhibere decet. Et quum alvi fluxu sæpius solvi soleat morbus, is utique nunquam sistendus præsertim circa tempora critica, nec adstringentibus, nec sedativis, nec opiatis, sed si natura ad hanc excretionem inclinant, nec tamen rite succedit, secundanda potius eadem tutissime per laxans mannatum, supra descriptum & tamarindinata.

## §. VIII.

*Corporis*  
*tempe-*  
*ramen-*  
*to ac-*  
*omma-*  
*danda* Quia etiam corpora ægotantium non sunt unius ejusdemque indolis ac temperamenti, sed in quibusdam motus vegetiores & intensiores, humores

quoque calidiores & agiliores; in aliis vicissim motus languidiores & tardiores, ac humores lentiores magisque viscosi; curate utique hæc a prudenti Medico discernenda cum humorum quantitate, & motus ubiq; ad temperamentum convenientem proportionem & æquilibrium reducendi. Hinc ubi nimius æstus internus & externus, oris siccitas cum siti & inde vigiliæ nimia; pertimescendæ; ibi nitrosa & potus diluentes, crebrius, sed moderate, offerre expedit. Contra ea, quando in temperamento segni, phlegmatico, meticuloso, mitis admodum calor, sitis nulla, pulsus debilis & languidus, cum virium prostratione, somnolentia mentisque torpore, a refrigerantibus abstinendum & analepticis potius ac bezoardicis essentis, crebrius item, sed parcius datis, pugnandum. Quum impuritas sulphurea & acetosa in humoribus peccat & exanthemata magis ad rubræ purpuræ naturam accedunt, pulveres bezoardici fixiores, item diluentia, demulcentia, emulsiones & liquor noster anodynus mineralis omnibus fere palmam præripiunt. Et in vappescentia sive corruptione lymphæ acetosa, accedente ea propter alba purpura, præter fixa diaphoretica, liquor bezoardicus *Bussii*, cum liquore anodyno, proficius.

## §. IX.

Quamvis autem in periculosis hisce febris, non adeo scrupulosa symptomatum ratio sit habenda, sed potius affectus primarii, cujus hæc effectus & producta; quandoque tamen necessarium est, ut imminetia eadem arceantur, vel periculum quod præsentia minantur, avertatur. Ex his sunt cephalalgie atque deliria, ad quæ declinanda optimum utique est domesticum remedium, pullos columbarum, vel gallinarum recenter discissos, capiti raso applicare, vel epithema ex pane, cum sale, nitro, camphora, oleo ligni Rhodii & nucleis ceraforum vel persicorum, fronti atque temporibus circumponere. In animi deliquiis, vomiti-

*Symptoma-*  
*tibus*  
*medenda-*  
*dum*



vomitu, singultu, syncope, cardialgia & summis angustiis, emplastrum ex theriaca, oleo nucistæ expresso, camphora, balsamo Peruviano, croco, oleo de cedro & paxillo spiritus vini, præcordiorum regioni applicandum. In faucium ardore & siccitate, gelatina cornu cervi, cum succo limonum & saccharo cantho, sirupus diamoron, nec non oris collutio cum decocto ficuum, sirupo diamoron & nitro, opem ferunt egregiam. Urgente sopore, fricentur suræ & plantæ cum aceto rutaceo, vel vesicatorium nostrum temperatum, magnitudine dimidii thaleri, suris apponatur. Et si purpura retrocedens anxietates facit & inquietudines, liquor bezoardicus *Bussii*, vel liquor cornu cervi succinatus, cum spiritu nitri dulci, vel liquore anodyno minerali, ex usu. In tussi oleum amygdalarum dulcium & croci extractum.

§. X.

Excre-  
tiones  
mode-  
randa.

Inter excretiones quæ metum incutiunt, est sanguinis per nares stillicidium. Prodit hoc sanguinis ad caput jam infirmum congestionem, ex spasmis inferiorum. Hinc si proportionatus & moderatus est fluxus, cum sanguinis in corpore abundantia, non adeo nocet, sed potius graves capitis affectus avertit, id quod tamen rarius evenit. Quando vero paucae tantum sanguinis guttæ stillant, nullum inde levamen, sed potius præsagium delirii & inflammationis faucium. Et ubi effusius manat, vires prosteruntur, excretionescutanæ ad interiora restringuntur & exanthemata quæ adsunt non sine discrimine disparent. Ad avertendum igitur sanguinis ad caput confluxum, pedes semper in moderato calore & madore servandi omneque frigus arcendum. Hunc etiam in finem conducibile vesicatorium, nostra ex inventione temperatum, nec nimis dolens, suris apponere alvumque servare apertam, vel per temperate nitrosa, moderate & crebro data, vel clystere, vel in-

fuso mannato. Et eadem quoque juvant, si hæmorrhagiæ nimix. Ubi vero parcius justo nares stillant, sanguis tamen, testibus oculis rubicundis, torvis & arteriis temporalibus valide pulsantibus, ad caput impetuosius confluit, præter jam dicta revellentia, derivantia & cucurbitulas nuchæ admotas, stillicidium proritare expedit, vel per intrusum naribus stramineum culmum, vel scarificatorio instrumento. Ubi nimius alvi fluxus, pulveribus bezoardicis aliquot tantum grana corticis chacarillæ admiscenda, externis tamen potius, quam internis excretio moderanda & abdomen balsamo stomachali ex oleo nucistæ expresso, menthæ & balsamo de Peru inungendum. In sudore effusiori stragulorum calor quam maxime evitandus, & abstinendum a potu infusorum theiformium, ac usurpandæ species de hyacintho cum nitro. Et si vomitus & singultus urgent, præter commendatum externum linimentum, liquore anodyno cum liquore bezoardico, nihil efficacius.

§. XI.

Venæsectio in exanthematicis hisce febribus cum summa circumspicectione administranda. Magis enim ad præservationem facit, quam ad curationem. Hinc in gravidis & feminis, quæ nimis sanguinis per uterum profluvii obnoxia, quum tempus vernus & hiems præcessit nimis rigida, non sine fructu sanguis mittitur, id quod etiam tenendum de iis, qui purpuræ scorbuticæ patent, & morbi huius insultum metuunt. Vicissim, ubi jam virium enormis lapsus, morbus ex cacochymia ortus, jam præsens est, catarrhosæ affectiones complicantur, febresque ob aerem vappidum nebulosum malignæ & putridæ grassantur, plane a sanguinis missione abstinendum. De primam regionem vacuantibus monendum: quod si morbus invadit corpus, cujus ventriculus, copia alimentorum, præsertim incongruorum, recenter factus,

V. S. e.  
meti-  
ca &  
vesti-  
coria  
cum di-  
stincto  
ac u-  
jurpā-  
da.



Stus, tartarus emeticus, in infuso mannato ad unum, vel duo grana datus, eximie sit proficiuus. Nam licet ejusmodi pharmacum vacuans malignitati non directe resistat, quia tamen materiam & fomitem morbi subtrahit, multum omnino facit ad curationem ipsam. Sed si quid movendum, heic maxime, sapienti *Hippocratis* effato, movendum in principio. Vesicatoriis multum in his febribus tribuunt plures. Ego vero ita censeo: habent locum si metus retrocessionis exanthematum, si natura corporis tarda in excretionem, sopor & torpor adest: Tum novi, a vesicatoriis brachiis, vel suris appositis, mox totum corpus purpura rubra vel alba fuisse conspersum. Sed nostrum temperatum hic etiam commendamus vesicatorium.

#### Enarrationes Morborum.

#### OBSERVATIO I.

Febris Maligna Petechizans anno  
c1010xcix. Halæ  
Epidemica.

Confi-  
susio  
aeris  
præce-  
dens  
insalu-  
bris.

Varium admodum, maxima tamen ex parte nubilum & pluviosum coelum autumnus anni superiori sæculi xcix. regnarat, hieme quoque præter morem tepida & humida, autumnus fere similis fuerat, & ver subsequenti anni 99. pariter justo calidiora & humidiora habuerat aeris statum, ventis semper fere ex austro spirantibus. Hæc autem præternaturalis diuturna & insalubris temporum anni constitutio pessime mortalium affecit corpora. Inde quippe fibræ motrices nimium laxatæ, succorum spirituscentia depressa, vitalis humorum progressus multum retardetur, sed & excretionem, potissimumque omnium saluberrima perspiratio, turbatæ, omnibus succis impuritas ad corruptionem prona inducta corporibusque magna ad morbos dispositio

ingenita. Exceperunt igitur varii morbi, partim putridi & maligni, partim a feri redundantia & in locis glandulosis stasi pendentes. Inter eos, qui populares habuerunt circuitus fuerunt variolæ & febres malignæ petechizantes. Nimirum circa æquinoctium autumnale anni 98. cœpit variolarum morbus, & per sex fere menses tanta institit vehementia, ut vix ullus, qui ipsum nondum expertus, maneret immunis, uti quidem superius *capite 7. pag. 162. seqq.* enumeravimus. Circa æquinoctium autem vernale anni 99. gravior adhuc prodiit lues, adultis præcipue infecta, stragem edidit haud levem, febris nempe maligna, petechiis variisque exanthematibus comitata, cuius genium, ingressum atque decursum, ex propria attenta observatione jam fusius paulo delineabimus.

Scilicet invasit hic morbus ratione ætatis, maxime juvenes & viros, <sup>Quos</sup> <sup>invasit</sup> <sup>rit mor-</sup> <sup>bus &</sup> <sup>quibus</sup> <sup>capita-</sup> <sup>lis.</sup> tenellis, puerili ætati & senibus percipit: ratione sexus majorem edidit stragem in maribus, quam feminis. Dein infestavit potissimum personas constitutionis sanguineæ, item sanguineo-phlegmaticæ, nec non sanguine abundantes, obesos, habitu corporis laxioris, spongiosioris & venis plurimis, angustis tamen & exilibus distincti. Graciliores autem, cholericos & illos, quibus fibræ magis strictæ & venæ amplæ, non tam frequenter eodem affecti. Insensissimus, immo lethalis fuit iis, qui ex nimia intemperantia, præsertim vini generosi abusu, nimia voracitate & crebrioribus animi commotionibus, sanguinis impuritatem & cacoehymiam sibi contraxerunt, vel ex morbis progressis, aut aliis causis corpus obtinuerunt jam imbecille. Sine contagio ipsum hunc morbum fuisse subnatum & intus progeneratum, frequens docuit experientia. Contagii autem vis non in omnes promiscue se exseruit, sed maxime in vicinos atque dispositos, ita ut plures iisdem



in vicinos atque dispositos, ita ut plures iisdem in ædibus simul ægrotarint. Rarissimi fuerunt ex peregre accedentibus qui lue infecti.

*Sym-  
ptoma-  
ta effe-  
cialia.* Omnes autem, quotquot corripuit hic morbus, hisce affectis pathematicis, ex quibus, ceu pathognomonicis signis, cognoscendus ruit. Insignis & subita statim inter initia & per totum decursum morbi durans, adfuit virium jactura atque prostratio, & tanta lassitudo & gravitas detinuit membra, ut ægri præ debilitate nec corpus movere, nec recta statura incedere potuerint, sed illico vertigo, vel leve animi deliquium, non sine insigni vitæ discrimine, accesserit. Pulsus dein arteriarum deprehensus debilis, parvus, frequens tamen, interdum majori, interdum minori celeritate, & inæquabilitate micans. Calor porro ut plurimum visus remissior & minor, sitis quoque non adeo magna & urina sanorum simillima, sed vigilia, aut in aliis somnolentia, perstitit continua.

*Quoad  
tempe-  
ramen-  
ta di-  
versa.* Pro temperamentorum tamen atatumque diversitate, nec non rerum externarum accessione, discreparunt symptomata. In sanguineis confusus & inconstans fuit decursus, dorsi autem dolor major, anxietas præcordiorum gravior, cephalalgia acutior, cum faciei & oculorum rubore, vigilia & delirio, maculæ etiam rubræ affatim in iis fuerunt conspicuæ. Qui sanguinem mobiliorem & biliosum aluerunt, sub strictiori corporis habitu, majorem experti sunt ardorem externum, vigiliam cum æstu, corporis jactatione & inquietudine; accessit etiam in his loquacitas, faucium inflammatio, delirium, oculis simul protuberantibus, ferocibus atque splendentibus. Qui laxiorem & obesum corporis gesserunt habitum, cum sanguine copioso, seroviscido scatente, non adeo mordaci calore, nec siti, nec inquietudine affecti sunt, sed somnolenti, debilissimi & morose taciturni jacuerunt. Somnus vero ut plurimum

Tom. IV.

fuit turbulentus, variisque absonis insomniis interturbatus, a quo male habuerunt & expergefacti leviter ut plurimum delirarunt. In melancholicis similia observata symptomata.

Quoad excretiones etiam diversa *Nec n 6  
excre-  
tiones  
& qui-  
dæ diar-  
rhæas.* annotata phænomena. In nonnullis per totum morbum diarrhœa moderata neque insalutari spumosa & variegati coloris secesserunt. Plurimis accidit id circa dies criticos, septimum, nonum, undecimum, vel decimum quartum, cum copioso sudore, ac critica quam maxime salutaris fuit excretio. Quin, non tantum hoc tempore, sed & alio, quo similes continuæ putridæ febres grassatæ, notavi, semper magis e re ægrorum fuisse, quando alvus lubrica & fluxa, quam si obstructa. Tum enim majores anxietates, cephalalgia, inflammatorii faucium affectus, vel purpura alba, cum vitæ discrimine successerunt.

*Sudores* Sudorum ratio non fuit ubique eadem. Continui quippe & per totum morbum manantes, morbi malignitatem, naturæ imbecillitatem infelicemque significarunt eventum. Lenis autem sudor & mador continuus boni ominis præbuit signum. Quando etiam ægri nono, vel undecimo die copiosius sudare cœperunt, præcedente, vel etiam erumpente simul alvi fluxu; symptomata multum remiserunt, animi rediit vigor atque constantia, nec non pulsum æquales ictus, cum optata spe sanitatis. Nec quisquam fere morbum hunc evadit periculosissimum, quam diarrhœa, vel sudore, vel utroque simul. Interdum tamen effusus & longius manavit sudor, ad hebdomadem fere, ac vires exhauriens hæctici morbi motum incussit.

Narium hæmorrhagia largior ex *Hæmori-  
rhagias* voto non cessit, præsertim crebrius repetens; vidimus tamen, & in principio copiosam, cum diarrhœa simul erumpentem, sine vitæ periculo. Mensium quoque fluxus liberalis ad-



modum tertio, vel quarto morbi die prodiit, innoxius tamen. Sanguinis vero per ani venas stillicidium, quantum quidem novi, visum est in nemine.

*Urinæ*

Urinæ ut plurimum fuerunt sanorum similes, interdum tenues & turbidæ ac pallidæ, sine sedimento, quod circa decimum quartum, immo vigesimum diem, cum aliis faustis præfagii signis, comparuit. A nonnullis tamen urinæ statim post emissionem turbidæ redditæ, non sine foetore. In quibusdam tertio statim morbi die effuse secessit, succedente gravativo simul capitis dolore, torpore mentisque stupore ac turbatione, quæ accedente die septimo copioso sudore, feliciter evanuerunt & ægri servati. Quidam vicissim, maximeque ii, qui diarrhœam, vel vomitum frequentem experti, per aliquot dies parcissime reddiderunt urinam, limpidam instar aquæ.

*Vomitû*

Vomitum cum singultu per totum fere morbi cursum observavimus lethalem. Conatus autem ad vomendum fuit frequentior, præsertim post assumpta medicamenta, vel quando ægri ante morbi insultum gravi terrore perculsi, aut in principio emeticum assumerunt validius. In nonnullis peculiare hoc funesti ominis symptoma visum, quod liquidum assumtum & in stomachum delatum, accedente leviori corporis commotione, vel erectione tantum, iterum in os cum murmure ac borborygmo ascenderit, ac limpidus humor, duo fere cochlearia complens, eructatus. Vidi inprimis hoc cum singultu per aliquot dies in viro honorato, in quo instituta post mortem sectione, hepar in concava parte plane putridum, nigrum, instar picis, nec non in diaphragmate, duodeno, & parte pylori, sphacelosa comparuit corruptio.

*Et exanthematosa.*

Exanthematibus quidam plane caruerunt, quidam confertim obsessi. Hæc in nonnullis antequam lecto affigerentur, quum adhuc nonnisi de lan-

guore conquererentur, inter initia statim comparuerunt, minus fausto eventu. In aliis circa diem septimum, vel nonum in conspectum prodierunt, bono cum omine. Occuparunt autem ut plurimum collum, dorsum, femora, parcius abdomen pedes & manus, rarius etiam faciem, in uno tamen circa frontem, tempora & mentum rubicundæ admodum conspicuæ fuerunt maculæ petechiales. Meliores fuerunt parvæ & rubræ, peiores magnæ, lividæ, & ad viridem, vel violaceum colorem accedentes. Præterea in iis, quibus alvus tensa erat & dura cutisque sicca & arida, nono inprimis, vel decimo morbi die, quum petechiæ disparere inceperunt, maximis cum anxietatibus, extremorum refrigeratione summaque virium & animi defectione, successit exanthema pessimi moris miliare, purpura nempe alba, multosque tam antequam prodiret atrocissimis symptomatibus, quam etiam postquam prodisset, ob vires penitus jam fractas, interfecit.

Rarius morbum evaserunt, continua mortis formidine detenti, nec Signa mala. non qui medicamenta respuerunt, qui obesi fuerunt & copiosum ac impurum aluerunt in venis sanguinem. Funesti ominis fuerunt sudores frigidi, cum pulsu frequenti, debilissimo, & intermittente, respiratione intensa, & acicisa, deliriis, convulsivis motibus, seu tendinum in manuum carpis contractione. Delirium nunciarunt oculi feroces, cum rubedine & illacrymatione, sitis defectus, inquietudo & jactatio corporis, pulsus celer & faciei inflatio. Pessima quoque macularum retrocessio, quæ vel admissio improvide frigore, vel terrore incusso, vel corpore diutius erecto, inducitur. Hac enim facta, mox summa debilitas, corporis refrigeratio, respiratio anhelosa & anxietas præcordiorum gravissima, cum vitæ discrimine. In bonis vicissim fuerunt, quietus bona. corporis decubitus, mentis constantia, sitis, somnolentia, macularum die septimo demum, vel nono processus le-



gitimus, alvus liquida, surditas circa diem criticum eveniens & aliquamdiu perdurans, idque maxime in iis, qui habitu fuerunt graciles, tenues, cum fibris strictioribus.

*Ex tunc.* Qui mortui, die ut plurimum undecimo, nonnulli tamen etiam septimo, diem obierunt. Qui autem sanitatem recuperarunt, die undecimo, vel etiam decimo quarto, quin decimo demum octavo, virium restaurationem & symptomatum remissionem sunt experti. Sex tamen plerumque hebdomadam spatio, antequam perfecte sanarentur, opus habuerunt, ac medio quippe tempore febris soluta est, & reliquum, tam ad tollenda supervenientia accidentia, quam ad vires recolligendas impensum.

*Pistis & regi-  
men.* In regime commendata usura aeris sereni, limpidi, pari, temperate calidi; hypocautia enim nimis calefacta, vel excessivus calor a stragulis, semper fere, vires exhauriendo & excretorios actus turbando, nocuerunt. Cibi, præcipue solidi, admissi nulli, sed in declinatione & post illam, tantum liquidi & facilis solutionis assumpti. Usus vero ciborum liberalis etiam nutrien- tium & jusculorum sic dictorum confortantium, particulis oleosis alibili- bus foetorum, præsentissimum attulit damnum, in primis circa dies criticos, in statu morbi, aut præsentibus eva- cuationibus criticis, & inde mox ma- jor virium jacturam cum excretionum turbatione inducta. Quin novi, largio- rem ciborum solidorum declinante morbo ulum, gravem peperisse recidi- vam. Nihil autem fere magis nocivum fuit, quam situs erectus. De quo quidem silent practicum libri; ego vero non tantum in hoc, sed & aliis malignis & acutis exanthematicis morbis notavi multoties, quod si ægrotantes diutius corpus in erecta servarint statura, sive surgentes, sive in lecto sedentes, vehe- mentia morbi mirifice increverit, quin ipsa mors exceperit. Inde enim illico summa affecti debilitate & animi quasi deliquio, anxietate præcordiorum,

extremorum frigore & maculae in cute conspicuae evanuerunt, cum vitæ peri- culo. Neque hoc, uti vulgo creditur, ob admissum frigus accidit, sed iis etiam, qui in calore detenti, & omnis frigoris accessu probe sunt defensi, ob languidioris sanguinis ex corde perpendicu- lari via ad caput pulsus.

Ex medicamentis alexipharmaca, *Calida alexi-  
phar-  
maca  
nocue-  
runt.* scilicet volatilia, bezoardica calida, & spirituosa, licet ceu efficacissima vulgo commendentur, plus damni, quam e- molumenti attulerunt, præsertim libe- ralius & cum calido regime exhibi- ta. Dissolutionem enim sanguinis e- lementorum promoverunt & ob id majorem petechiarum fecerunt co- piam; vel cephalalgias etiam, anxietates, inflammationes, vel etiam sudores copiosos, suscitaverunt. Quin novimus his ad præservationem cum regime as- sumptis, mox ipso contagio corpus fuisse affectum. Fuit tamen, ubi hæc vo- latilia alexipharmaca analeptici mix- ta, moderate & caute usurpata, ope- tulerunt egregiam, tum nempe, ubi ex macularum retrocessione, vel cor- poris, sive ex terrore, sive ex frigo- ris externi admissione, aut statura erecta, refrigeratione, anxietas, & debilitates infensissimæ subsequutæ. Suasimus etiam moderatum horum usum statim in principio, quum cir- culatio sanguinis adhuc in vigore esset, quo magis materiae peccantis portio cum fructu dissipata. Sudoriferum ta- men non simul injunximus regimen, nec iis usi sumus in plethoricis & caco- chymicis. Neque minus eo tempore, quo crisis institit, vel etiam jam ad- fuit, bezoardica volatilia in modera- ta dosi, criticas evacuationes, debilem & languidum motum resuscitando, egregie secundarunt. Cauti tantum fuimus & parci, ne nimios sudores efficeremus & ad lentas febres induce- remus dispositionem.

Sanguinis missio ad arcendum mor- *De H.S.* bi incursum proficua observata, in corporibus plethoricis & quibus san- guinis evacuationes tam spontaneæ, quam



quam artificiales consuetæ. Contra ea, quando jam debilitas & virium prostratio insignis adfuit, minus feliciter cessit. venæ sectio. Non enim putredinem tollere apta fuit, sed corpora inde magis potius debilitata, ut morbo superando facta imparia.

*De vomitorii:  
vesicæ:  
sibus &  
apertis.*

Vomitoria lenia in iis, quibus prima corporis regio vitiosorum humorum copia obsessa, præservationis ergo ante insultum morbi, opem tulerunt exoptatam. Novi etiam ipso in morbi principio eadem præfuisse, verum circa morbi progressum ac statum, continuum vomendi desiderium, nauseam, ardorem circa regionem cordis & anxietatem cardialgicam suscitarent, vel potius hisce malis præbuerunt causam. Vesicatoria ab aliis nobis eximie laudata, in statu morbi, ubi delirium vel sopor, & convulsiones ægrum affligerunt, cervici admota. Opiata omniaq; soporifera rejecimus, propter pulsum debilem & motus vitales jam languentes, quippe quæ vires magis debilitando & excretiones retardando, majorem efficiunt malignitatem & ad mortem aditum parant placidum quidem, sed certum.

*Materia  
via me-  
dicamē-  
torum.*

Materia vero eorum, quæ a nobis usurpata & salubria deprehensa, fuit hæc: ex aquis, florum sambuci, acaciæ, tiliæ, ulmariae, rosarum, herbæ scordii, scabiosæ, cardui benedicti; ex sirupis: acetositate citri, granatorum, cum julepo rosarum; ex pulveribus: mater perlarum, antimonium diaphoreticum, lapides cancrorum, succinum, terra sigillata, cornu cervi ustum, philosophice præparatum, nitrum purum, ex alexipharmacis: camphora, essentia & extractum scordii, vince-toxici, mixtura simplex, spiritus & tinctura bezoardica; ex acidis: spiritus vitrioli philosophicus & nitri dulcis; ex humectantibus: decoctum scorzonere, rasuræ cornu cervi, item gelatina cornu cervi; ex analeptici: aqua florum aurantiorum, oleum citri recens cum saccharo, confectio alkermes, de

hyacintho, balsamus noster vitæ externæ; ex antispasmodicis: essentia castorei, cinnabaris, spiritus cornu cervi fuccinatus.

Ex his varii generis formulæ pro circumstantiarum ratione concinnatæ & methodus iisdem utendi ita instructa: in principio morbi pulvis bezoardicus, cum nitro & pauxillo camphoræ remixtus, iterato aliquoties exhibitus; per morbi dein progressum & statum, mixturæ ex aquis temperatis, diaphoreticis, analepticis, antispasmodicis & pulveribus cordialibus bezoardicis cum succo citri aliquam diu datæ. Potui inditum nitrum, vel spiritus vitrioli philosophicus, aut clystus antimonii sulphuratus, qui alvum fluidam servat. Et frequens potus decocti cornu cervi citrati, item radicis scorzonæ, calidus & frigidus, admodum proficius notatus. Circa diem criticum leniora alexipharmaca & quæ sudorem promovere poterant adjecta, quando natura ad sudorem movendum se armavit & non suffecit. Hinc vel mixtura, vel tinctura bezoardica, vel essentia scordii, mixturis indita.

Hæc optima & securissima fuit mendendi methodus & plus quam centies probata. Symptomatibus autem hæc obviam itum ratione. In nimio vomitu, anxietate præcordiorum, enormibus diarrhœis & ventris terminibus, externe theriaca cum oleo nucis moschatæ expresso, camphora, oleo caryophyllorum & balsamo Peruviano mixta, regioni stomachali apposta. In diarrhœa etiam nimia vires exhauriente usurpatur pulvis bezoardicus nitrosus, cum momento camphoræ & theriacæ cœlestis. In phrenitide & acuto capitis dolore cum fructu externæ admovimus spiritum vini camphoratum & salis ammoniaci, cum oleo rutæ, lavendulæ. Si alvus nimis adstricta, vel termina in ventre affligerunt, expertissimi fuerunt clysteres lenientes, vel pure oleosi. Ad erigendas vires, spirituosas, confortantia, aromatica, ex-

*Mede-  
di me-  
thodus.*

*Sym-  
ptoma-  
tum  
medi-  
camentorum.*



externe pulsibus & scrobiculo cordis apposita vel naribus suscepta, opem tulerunt egregiam. Ad fallendam sitim egregium fuit electuarium, ex saccharo Canariensi & spiritu nitri dulci.

*Præservatio,*

Qui demum ab epidemica hac lue sibi metuerunt, ii prudenti Medicorum consilio defensi purgationibus lenioribus, pilulis nempe ex extractis balsamicis amaricantibus, rhabarbarinis & aloeticis. Plethoricis sanguinis subtractio rite administrata. Ad sanguinem vero fluxilem servandum, & dyscrasiam cum malignitate arcendam, commendari meruit infusum veronice & scordii, omnibus individuis accommodum. Accedere præterea debuit decens vivendi ratio, cibus & potus esse moderatus, temperatus nec varius; abstinendum ab affectionibus animi, vires omni modo custodiendæ, corpus omni modo a refrigeratione defendendum, & ipse aer humidus vapidus corrigendus accensione lignorum & gummatum resinolorum.

## OBSERVATIO II.

*Constitutio aeris & morborum epidemice anni 1728.*

Ego quidem per omnem vitam non facile memini, ullum annum adeo, quoad tempestatum aerisque constitutionem, ab ordinario statu declinasse & quasi præternaturalem fuisse, quam elapsum 1728. Etenim Martio jam mense cælum regnavit præter morem calidum & subsequenter mensibus calor cum siccitate adauctus sicque ad medium usq; Septemb. duravit. Intervenerunt tamen subinde dies & noctes frigida admodum & rigida, quibus adeo in contrarium mutatus subito aeris habitus, ut præcipitante etiam Aprilis noctu in glaciem a gelu aque densarentur. Autumno postea tempestas ingruit ac persistit humida, & frigidiuscula foecunda. Sub finem demum, Decembri & Januario sequenti, successit præter consuetudinem algidissima hiems, ita ut gelu 6. 7. 10. 12. & 13. Januarii die, intensissimum

*Tem. IV.*

illud post hominum memoriam anni 1709. si non superaret, certo tamen equaret. Frigidissimam autem hanc tempestatem subito iterum excepit lenissima australis die 14. aura, quæ copiosissimam nivem cum glacie mox liquavit, interspersis subinde pluviis. Mira etiam sub hac cœli vicissitudine observata argenti vivi in barometro, ratione descensus & ascensus, crebra & quotidiana fere mutatio, qualem me per 30. annos vix unquam vidisse recordor, adeo etiam, ut vel una nocte, a vigesimo septimo gradu, ad duodecimum, quin octavum delaberetur; luculento indicio, non modo valde subitam ratione caloris & frigoris in thermometro, sed etiam gravitatis aeris, mutationem ac varietatem factam fuisse. Hæc autem insolita & peculiaris aeris annique temporum constitutio, non potuit non ingentem etiam mutationem animalium & maxime humanis corporibus inferre, functiones tam vitales, quam naturales, potissimumque secretorios & excretorios actus, turbare atque prævertere, & materiam & dispositionem ad diversi & insueti etiam generis morbos ingignere. Hinc igitur factum est, ut non modo in universa Germania, sed & Belgio, Anglia & alibi, tam uberi proventus enati morbi, quam vix alio tempore visum unquam. Decurrente quippe vere, æstate & autumno, febres variæ intermittentes, tertianæ simplices, duplices & continuæ, quartanæ simplices & duplices, crebrius recidivantes, valde anomale & irregulares, in quibusdam malignitatis speciem referentes, contagio infestæ, sæpe purpureo exanthemate stipatæ, prodierunt affatim. Variolæ quoque & morbilli non siluerunt, & quidam præterea diarrhœa & dysenteria affecti. Octobre vero & Novembre appetente desierunt intermittentes irregulares & successerunt catharrales, pro diversitate & impuritate corporum, plus minus benigne vel maligne,



ac per Decembrem etiam ac Ianuariam infestarunt, factæ simul contagiosæ, cum exanthematibus, petechiis spuriiis ac purpura. In plurimis cum horripilatione, virium prostratione, contusivo artuum dolore, temulentia capitis, iuncta raucedine, gravedine & pectoris infarctu, inceperunt, & quotidie circa noctem, quæ ut plurimum insomnis fuit, major facta inquietudo cum æstu. In spurcis admodum corporibus, quarto, vel etiam septimo die comparuerunt exanthemata, petechiæ maxime spurix & purpura alba, vel rubra, vel utraque simul, modo cum, modo sine levamine. Optime potius morbus solutus vel sudore largo, vel alvi fluxu, vel copioso sreatu. In benignioribus catarrhalibus cum violenta & convulsiva tussi, faucium tumores, quandoque exulceratione pectoris copioso infarctu, parotidum, quin erysipelaceo faciei tumore, ego diluentibus, sanguinis estum & acrimoniam temperantibus cum fructu sum usus. Evacuacionem alvinam per infusum usitatum mannatum movi, quod sine ulla molestia sex, vel septem sedes proritavit, humorumque a pectore, faucibus & capite impetum efficaciter derivavit. Et postea pulveribus diaphoreticis cum pauxillo extracti croci, nec non infusis theiformibus, cura ex voto absoluta. In iis autem febribus, quæ genii minus benigni visæ, eadem, quam supra expositum, ratione, medicacionem institui.

*Historia  
febris  
pete-  
chialis  
spurix  
et pur-  
pura  
alba.*

Ex his quibus exanthemata iuncta, memorabilis potissimum petechialis mitior, cum purpura alba, cujus historiam, in primis ex observatione numerosissima praxi occupati Medici, sigillatim percensere, operæ erit pretium. Cœpit scilicet hæc in plurimis cum horripilatione & subsequente estu mitiusque per duos aut tres primos dies afflixit, ita ut ægri non penitus lecto affingerentur, sed tantum de doloribus tensivis in dorso & artubus, capitis temulentia, virium appetitusque

prostratione conquererentur. Nonnulli conatum vomendi, quidam etiam vomitus experti, plerique tamen primos hosce dies somnolenti, dormituri magis, quam vigilantes, transegerunt. Accedente autem quarto die, motus febriles graviores accesserunt & vix sequenti mane tantisper remisit æstus, simulque ipso hoc die in quamplurimis sanguinis per nares erupit stillicidium, ac paullo post sub leni madore prodierunt etiam petechiæ. Fuerunt præterea in plerisque quibus alvi circa hoc tempus obtigit lene profluvium, ad septimum usque diem, quin quandoque undecimum durans, quod morbi vehementiam imminuit magis, quam adauxit. Absoluta macularum eruptione, in junioribus potissimum, minus meticulosus & de vita sollicitus, febris postea, sub levi mentis turbatione, placide & tranquille decurrit & circa decimum quartum diem ad faustum exitum pertingit, tantum quod in quibusdam tussis & surdaster status per octo, vel plures dies durans, remansit. Quod si autem post exanthematum efflorescentiam febris impetus cum deliriis increvit potius, undecimo, vel decimo quarto die certo expectanda fuit purpura alba. Quæ priusquam comparuit, ægri summa præcordiorum anxietate, insomnia & stricturis circa collum sunt affecti, ut conquererentur fauces strangulari, se ciste esse inclusos, teneri in alieno conclavi & inter peregrinos versari, rogantes, vincula ut laxentur ipsique suis & quieti redderentur &c. Quod si tamen sub hoc angore & pathematum vehementia purpura in conspectum venit & deliria cum reliquis symptomatibus postea cessarunt, & hi feliciter evaserunt. Sed quibus circa 9. diem tendinum subsultus, motus tremuli, respiratio anhelosa, involuntaria urinæ & alvi excretio acciderunt, licet etiam demum purpura prorereperet, decimo, undecimo, vel decimo tertio die sub convulsivis motibus obierunt. Medendi hisce fe-



bribus methodus fuit hæc. Adultis & qui venæsectioni assueti, simulac conqueri cœperunt, sanguis ad sex, vel octo uncias subtractus in pede omnibusque quies, moderatus calor & abstinentia injuncta. Conclavia semper in æquali tempore servata, nulli, quam poscenti, cibus datus, potus vero ex cerevisia tenui tepidus & parvus haustibus pro lubitu unicuique concessus. In medicatione, rejectis expellentibus & alexipharmacis, ternis singulis horis, exhibitus pulvis temperans, ex absorbentibus, tam simplicibus, quam acido saturatis, cum antimonio diaphoretico & nitro, vel loco hujus portio temperata ex aquis destillatis, cum temperantibus & sirupo acetositis citri. Comparantibus autem exanthematibus, ad impediendam eorum retrocessionem, pulveribus temperantibus, interpositus subinde parvis dosibus, usus essentia bezoardica, infusum theiforme potui datum & regimen diapnoicum injunctum. Alvus quidem in paucissimis adstricta, sed ubi fuit clystere emolliente soluta. Adversus cephalalgias usurpatus spiritus vini camphoratus, vel etiam epithema illud domesticum ex mica panis, baccis juniperi, sale & cumino. Reliquorum symptomatum, ut inappetentia, somni defectus & lassitudinis, minus rationem habuimus & præter analeptica temperata, datum præterea nihil. Ceterum feliciter per Dei gratiam, in omnibus fere qui consiliis medicis in diæta & regimine rite obtemperarunt, curatio successit; ii vero, qui hæc pensi habuerunt, maxima quidem etiam ex parte evaserunt, sed in morbos postea inciderunt corruptos, lentescentes.

*Historia febres malignæ exanthematicæ* Idem hic morbus, iisdem fere symptomatibus, eodem tempore infestavit milites nostros præsidiarios. Scilicet fama percrebuerat, potentissimum Porussia Regem huc venturum, milites lecturum. Hinc præfecti meditationes instituerunt campestres, suosque per aliquot dies ante diluculum in

campum eduxerunt, ut armis luderent. Erat autem October jam adultus, cœlum frigidiusculum, nebulosum ac subinde pluviosum, milites tamen minus adversus aeris injurias ob vestitum leviores muniti. Male inde ipsoꝝ corpora affecta & dispositio ingenita morboſa, in primis quum non deessent, qui liberali vini adusti potu corpus calefacere perperam satagerent. Ex eo igitur languere cœperunt multi & plures ægrotare, alii catarrhis, alii rheumatismis, alii diarrhœis, alii intermittentibus febribus, maximeque quartanis refractariis, affici, donec exeunte Novembre longe plures adoriretur febris continua maligna exanthematica, & successive vel centum inficiens ad finem usque Decembris insisteret. Quotquot hæc corripuit, omnes primum de insolito corporis artuumque languore conquesti sunt, cum capitis gravitate, appetitus defectu & nausea. Sequutus dein horror corporis, quem excepit calor & pulsuum celeres, debiles tamen ictus. Postea nonnullos primum mitius afflixit pectoris infarctus, cum tussi & coryza; alios vicissim mox ita prostravit morbi vehementia, ut lecto affigerentur, & simulac vel caput tantum erigerent, lipothymiis afficerentur. Increbuerunt tum, in primis accedente quarta die pathemata, somnus defuit, nausea urſit, caput & dorsum doluit, pectus oppressum fuit, in nonnullis nares sanguinem stillarunt, aliis vomitus, aliis conatus ad hunc accidit, fuerunt maxime inquieti, delirarunt, corpus jectigarunt, de summo simul angore conquesti. Exactis inter hæc aliquot diebus, circa quintum, ut plurimum tamen septimum diem, prodierunt maculae petechiales, optimæ rosei & purpurei, pessimæ lividi & fusci coloris. Exanthema quoque miliare, maculis hisce quandoque fuit interspersum rubrum, vel album, morbumque multum exacerbavit. Longe pejus tamen fuit, si post nonum, aut undecimum diem hoc accessit, viribus jam nimium attritis; quin die de-



num vigesimo primo uno id contigisse novimus, lethali eventu. In quibusdam critico septimo die sudor manavit; in plurimis vero circa quintum vel septimum diem alvus fluere coepit, ad nonum, vel undecimum usque diem. Et hæc quidem excretiones criticæ ægris in salutem evenerunt. Quod si vero sudor statim ab initio fuit effusior, exanthematibus præsentibus nulla remissio, nullum criticis diebus in urina sedimentum, alvus adstrictior, cutis arida, sitis nulla, malum præbuerunt omen, invalescente haud ita multo post delirio, inquietudine, accedentibus cum singultu convulsionibus ac tandem morte. In medicatione harum febrium regimen injunctum moderatum, potus tepidus sufficiens, ex decocto potissimum hordei, cibus interdictus, rejecta calida & alexipharmaca, vomitoria & purgantia, omissa quoque venæsectio, quæ in binis primum infelicitè cesserat. Dati tantum pulveres temperantes nitrosi ac diaphoretici, modo cum, modo sine succo citri, item potiones ex aquis analepticis ac diapnoicis cum antimonio diaphoretico, matre periarum, cinnabari & aceto. Alvus obstructa emollientibus clysteribus reserata, nimis fluxa calore & pulverum diaphoreticorum usu ad moderamen traducta, & de reliquo eadem fere ratione ac supra dictum symptomatibus ceteris obviam itum. Feliciter etiam cessit curatio, ita ut ex omnibus vix ultra decem mortui, & hi quidem vel nono statim die, vel undecimo accedente purpura. Ceteri fere omnes superato decimo quarto die sensim vires cum somno & appetitu receperunt ac successive cum sanitate in gratiam redierunt. In quibusdam tamen per aliquod adhuc tempus restitit præter languorem tussicula, in aliis etiam passim in carnosissimis externis partibus effloruerunt furunculi admodum molesti, congruis præsidiis demum etiam sanati.

Id igitur ex epidemicæ hujus febris historia notatu dignum: quod a sola paulo intensiori perfrigeratione corporis atque transpiratione prohibita, pro dispositione corporum, quatenus plus vel minus impuros in venis inque prima regione alunt succos, varii generis morbosæ affectiones, plus vel minus mali moris; intermittentes nempe, item catarrhales, rheumaticæ, petechiales & purpuratæ gigni possint. Dein & illud observationem meretur, quod contagiosa cuidam hæc febris fuerit, non tamen omnes, sed tantummodo milites infecerit, qui similem perfrigerationem eo tempore passi, immunibus a contagio & iis, qui in eadem domo habitaverunt, & qui visitaverunt ægros. Quod quidem luculento est testimonio, contagium, ut effectui detur, supponere & requirere corpora, quæ succos ad recipiendum miasma & ejus activitatis obsecundandum dispositos alunt. Tum non prætereundum est, quod milites valde proceræ stature vehementius egrotaverint & difficilius evaserint, quam alii minus proceri. Quia enim in proceræ stature corporibus, ob longum ac difficilem sanguinis per venas perpendiculari via regressum ad cor, circuitus tardior est & languidior ac in parvæ stature, excretionum autem & maxime perspirationis negotium circulum sanguinis tardiores, vel celeriores sequitur, facile patet, sub languidiori sanguinis & humorum circuitu, corpora magis facilius reddi impura & autocratiam quoque nature in vincendis morbis, quæ consistit maxime in circulatione sanguinis vegetiori & promptis excretionibus, valde languidam esse & insufficientem. Tandem memorabile omnino quod venæsectio etiam in principio administrata noxam potius quam opem attulerit, quæ alias non tam facile in robustis hominibus, ut militibus, nocet. At quum a transpiratione prohibita & retentione excrementorum, quæ per cutim diffilantur, primos malum traxit natales, aliquot

Confes  
statis



quot jam septimanis languor & ciborum ante invasionem febris inappetentia adfuit, facile constat, sanguinis missione imbecillitatem adauctam, perspirationem vero magis imminutam fuisse, quod utrumque non potuit non cum damno accidere.

## C A P U T X I.

### *De Febris Petechialibus Veris.*

#### Theses Pathologicae.

##### §. I.

*Descriptio morbi.*

**F**ebres petechiales verae, sunt valde malignae, contagiosae, capiti & viribus quam maxime infestae, cum varii coloris maculis junctae & ortae a succorum vitalium corruptione ac subsequente putrida dissolutione, eaque propter lethales.

##### §. II.

*Nominis ratio.*

Merito haec febres exanthematicae vocantur malignae, seu venenatae. Etenim plerumque a tenuissimo, activae, virulentae indolis vapore, sive miasmate, a corpore decumbentis halante, ortum ducunt & propagantur. Dein difficulter sanationem recipiunt & brevi saepe plures jugulant. Tum vires, a quibus motus vitam sustinentes pendent, & celeriter & graviter, pessundant ac destruunt. Demum, non secus ac maligni homines, mitem prima facie exhibent indolem medicosque cum adstantibus, ac si catarrhales tantum essent, saepe decipiunt, postea vero perniciosum effectum tanto majori exserunt vehementia.

##### §. III.

*Indicia & symptomata.*

His tamen indiciis deleteria indoles morbi cognoscenda. Ab initio statim agri conqueri solent de virium summa prostratione atque debilitate, ut erecti vix consistere, vel pedibus incedere queant, sed mox animo deficiant, quum in aliis continuis & acutis morbis demum in statu & vigore

eiusmodi imbecillitas observetur. Caput ab initio valde dolet, fervet, cum torpore, animus illico dejicitur, anxius & sollicitus est ac salutis spem abjicit, pessima quavis ominatur. Assidua urget vigilia, nec ullus reficiens adest somnus, appetentia plane perit, faciei vigor intercidit, pulsus languidus, parvus & inaequalis micat, decubitus in lecto insolitus est atque incompositus, membris quasi convolutis & corpore huc & illuc jectigato, pectoris est oppressio, quandoque cum tussi sicca, musculorum fibrae undulatorio quasi & tremulo motu convelluntur tendinesque contrahuntur atque subsultant. Plures nec de siti, nec aestu, nec dolore, nec anxietate queruntur, & asseverant potius, nihil mali se perferre, praeter languorem & somni defectum. Urina primum mingitur ut plurimum tenuis sanorum simillima. Quarto, quinto, vel etiam septimo die in conspectum prodeunt maculae, in dorso potissimum & lumbis, plus minus copiosae, varii subinde coloris, plerumque tamen sine levamine, ideoque symptomatae magis, quam criticae.

##### §. IV.

Exanthemata veteres generali denominatione has dicunt maculas. Latino ab Italis idiomate pedicularium petechiarum & petechialium nomine efferuntur, a voce pedechio, pulex, quia pulicum morsus figura aemulantur; a Gallis ob colorem purpuratam, ab Hispanis taberdillo, a colore ex flavo rubro, a Germanis lenticulares, propter lentis quam referunt figuram & colorem, aut punctulares, vernacula *die Reh. Fuche. die hüxige ge Hruft - Krangleheit*. Ab aliis autem exanthematibus praeter figuram in eo discrepant, quod non modo sine omni ardore, sine pruritu, cutis elevatione, asperitate, & exulceratione prodeant, sed & ut plurimum sine levamine, quia materia eorum non est salina caustica, sed potius putrida & corrupta.

*Nomina & differentia.*

##### §. V.



## §. V.

Prognosis.

Tantum hinc abest, ut maculæ hæc salutis spem faciant, ut potius quo copiosiores compareant, eo majorem corruptionis gradum, quin lividi, plumbei & ex atro viridescens coloris, sphacelosa plane corruptionem arguant. Qui etiam evadunt, non cutanea excretionem, sed vel sudoribus largis, foetidum acorem spirantibus, vel alvi fluxibus criticis, convalescunt. Sed nonnisi naturæ benignitate ac robore id accidit, in his, ubi non adeo eminens succorum corruptio, sed temperata adhuc & quasi quodammodo alexipharmaca indoles. Plurimi potius occumbunt, vel sphacelosa corruptione in ventriculo, intestinis & aliis visceribus, vel phrenitide, frequentius anginosa faucium & oesophagi inflammatione, cadaveribus mox post mortem intolerandum plane foetorem spirantibus. Quem funestum eventum signa præfagiunt hæc: si situs vel nulla, vel plane inextinguibilis, si lingua arida, discissa, nigricans, fauces inflammata & squalore obsessæ, cum deglutitione difficili, si post exanthematum eruptionem respiratio anhelosa & pectoris angustia persistit & invalescit, vel post sudorem & alvi fluxum delirium cum aliis pathematibus ingravescit, nec urina turbida fit, demum oculi obscurantur, mens plane delira fit, ægri floccos carpunt, tendines subsultant, excrementa involuntarie elabuntur, sudor frigidus manat & convulsionem accidunt, spiritum cum vita præcludentes.

## §. VI.

Formalis ratio.

Formalis perniciosarum harum febrium ratio consistit in putrida dissolutione, sive colliquatione sanguinis & succorum vitalium, potissimumque in fluidi lymphatici elastici tenuissimi, quod in sanguine contentum, in cerebro ac spinali medulla separatim, per nervos in universum corpus distributum, sensum & motum partibus præstat cunctis, inquinatio &

vitiosa plane diathesi. Etenim venenatum illum vaporem, quo etiam sana corpora inficiuntur, ejus naturæ esse atque potentia, ut non modo sanguini aliisque humoribus putredinosam successive inducat fermentationem, sed & immediate ad interiora cerebri nervearumque partium pervadat fluidumque ibi corrumpat subtilissimum, ex eo planum fit, quod suscepto ipso, illico vires tam naturales, quam vitales & animales languescere incipiant omnes, in perfecte sanis corporibus, salva adhuc sanguinis & humorum crasi, & a corruptione immuni.

## §. VII.

Hoc virulentum multiplicativæ indolis miasma, corpus maxime subit per nares, fauces & bronchia. Nam nullibi tam aperti minusque tecti discurrunt nervi ex prima & secunda conjugatione, ac in narum cavo. Hoc igitur dum pertransit cum aere vectus deleterius vapor, non mirum est, eundem immediate, proxime & intime pertingere ad nervos ipsumque cerebrum & infectos ea propter mox temulentia, capitis torpore, virium languore, nec non vertigine affici. Maxime omnium vero commiscet sese salivæ latici contagiosum miasma & cum hoc descendit ad ventriculum, qui etiam, ceu pars nervosa, primam fere sedem præbet contagiosis hisce febribus. Hinc in ventriculo & præcordiis primum se prodere solent prava symptomata, nausea scilicet cum vomendi conatu, alvi frequens cum torminibus dejectio, vel etiam fortis adstrictio, ciborum fastidium, anxietas præcordiorum, cardialgia, *das Ubelseyn* & frequens copiosæ lymphæ ex stomacho eructatio. Hinc testantur observationes anatomico-practicæ, in his febribus defunctis ventriculum maxima omnium sphacelosa corruptione affici. Dum vero miasma hoc & salivæ in ore & liquori menstruali gastrico & pancreatico in stomacho miscetur, mul-

In corpore  
pus de-  
latum.



multum ejus vis propagativa intenditur. Etenim inter omnes constat, salivales hos succos, intimæ alimentorum digestionis servientes, valde subtilis, spirituosæ, aereo elasticæ fermentescibilis naturæ esse, eaque propter dulcia quibus commiscuntur illico fermentativo motu perciere. Quare quia hi succi in motu intestino fermentativa jam constituti, longe utique facilius obsecundant delato illuc subtilissimo putredinoso miasmati, ut hoc sese propaget & augeat, non secus ac exigua pars fermenti panifici ingentem farinæ massam fermentat.

§. VIII.

*Apo-  
pble-  
gmati-  
fanti-  
bus ar-  
cendum.* Hinc facile jam elucescit ratio, quare ad contagium perniciosi hujus morbi arcendum, nihil præstabilius jam pridem a peritissimis Medicis annotatum, quam ut infectorum, præsertim quum ad extrema & putredinis acumen ventum, halitum facie averfa vitemus, salivam crebrius expuendo rejiciamus, ac ore contineamus ea, quæ salivam eliciunt, radicem angelicæ, zedoaviæ, imperatoriæ, pimpinellæ, aut masticemus, vel fumigemus tabacum. Neque minus inde patescit causa, cur miasma hoc deleterium longe facilius suscipiatur longèque citius perniciosam vim exferat, in ventriculo copiosis cruditatibus, & pituitosis ac salivalibus, sordibus obfesso, & cur vicissim leniora emetica, alexipharmacis nupta, in recentibus infectis, certæ & securissimæ ad præsciendendum prima in herba morbum efficaciam.

§. IX.

*Origo  
ex aere  
insalubri per  
se.* Primam autem harum contagio infestarum febrium originem recte omnino cum Hippocrate ex communi aeris vitio deducendam esse reor. Nimirum diuturnus humidus, pluviosus, nebulosus, nec non austrinus calido humidus aeris status, ob eminentem vaporum aqueorum copiam, vim ætheris vividam, elasticam, expansivam, quæ solidorum & fluidorum ad vitam necessarium in corpore

motum, sustinet, obtundit ac deprimat. Inde salutiferæ excretiones, maximeque perspiratio elanguescunt ac turbantur, inutiles, superflue & corruptæ partes retinentur, quibus in sanguine & succis accumulatis, non potest non summa ad corruptionem & dissolutionem prona ingigni dispositio. Accedit quod sub aliena ejusmodi tempestatum constitutione, ipsa vegetabilia & frumenta alienam naturam corpori inimicam contrahant. Nam notum est, humido & pluvioso coelo diu regnante, in secale potissimum uberem esse proventum lolii esculenti, vernacula aac *Nutter-Korns*, quod noxiæ & tantum non venenatæ est indolis. Neque prognatum hoc tempore secale, tantam copiam spiritus vini per fermentationem præbet, neque tam salubrem & reficientem panem largitur, ac illud, quod temporibus anni siccis & calidis producit. Ut adeo non mirum sit, insalubria & corrupta hinc confecta alimenta ingesta, simul ipsa corpora disponere ad putredinem.

§. X.

Dein aeri insalubritas & ad ingignendos putridos morbos aptitudo inducitur ex crebra ac diuturna aquarum inundatione. Hac enim facta, humor stagnans, accedente imprimis solari calore, putrescere incipit multaque putrida in atmosphæram mittit effluvia. Infectorum quoque varii generis copia circa aquarum stagna succrescit, a quibus causticæ, salinæ, deleteriæ materiæ subtiles multæ in aerem elevantur. Quæ quidem omnia quam sint sanitati intensa, historiarum utique docent monumenta, quibus uberius constat, post aquarum diluviones magnas, contagiosas & tantum non pestilentis naturæ febres fuisse subortas, de quo pluribus evolvenda dissertatio *de temporibus anni insalubribus*, item tom. 2. *Medicin. ration. system. pag. 278.* Eiusdem infestæ naturæ est aer exhalationibus putridis ex cadaveribus inhumatis putrescentibus,



bus, vel excrementis animantium surgentibus, refertus, tanto magis incarceratus & accessio purioris destitutus.

## §. XI.

*Et corporis dispositio.*

Neque tamen aer tantum impurus & insalubris ad generationem horum morborum facit, verum etiam ipsius corporis ad putredinem intus concipiendum habitus ac dispositio. Per ipsam certe experientiam uberius constat, phlegmatico-sanguineos, habitus corporis laxioris & spongiosioris, animo meticulosos & anxios, quorum vires luxuria, ingluvie alimentorum valde incongruorum, ebrietate, venere, fame, diuturna coestitia, vigiliis, laboribus, hæmorrhagiis, fractæ atque exhaustæ, facilius & crebrius gravi hoc modo prehendi, & difficulter quoque evadere, nullam aliam ob causam, quam quod ipsorum corpora impura atque debilia ad putredinem ac corruptionem admodum proclivia. Neque minus de feminis cachecticis, mensium suppressione laborantibus, item de lue venerea, vel minimum hujus reliquiis affecti novi, quod ex facili corripantur, sed ægerrime emergant.

## §. XII.

*Hæc in castris & locis publicis familiæ.*

Quæ quum ita sint, in proclivi sane est judicare, quare contagiosæ hæc febres in militum castris quam maxime circumeant & ob id castrenses appellari soleant. In castris enim omnes quas enumeravimus hujus morbi causæ ferre conveniunt. Ibi quippe milites aeris humido-calidi & postea humido-frigidi experiuntur injurias, sub dio dormiunt in locis uliginosis, humidis sæpe atque palustribus, excrementa animantium & hominum passim non defunt, nec tamen vento ob circumductum vallum aditus ad dissipandos foetidos halitus patet, cibis vescuntur incongruis, nonnunquam plane corruptis, semicoctis, aquas quoque stagnantes & putres bibunt, fame & vigiliis corporis robor atterunt. Hinc quando ex laborioso & difficili hoc vi-

tæ genere in Hibernia concedunt, corporaque quieti dant ac ciborum copia onerant, corruptio interna sensim contracta adeo demum increfcit, ut apertius in capitalem hunc morbum erumpat isque ob id frequentior in Hiberniis, quam castris observetur. Eandem fere ob rationem malignis contagiosis ejusmodi morbis, pauperes, in tenebris & cœno versantes aere fruentes in angustis tuguriolis vappido minusque puro, frequentius afficiuntur, quam opulenti, quibus arctius vivendi genus & sanitatis regulas quoad aerem & victum observandi copia. Idem evenit in nosocomiis, orphanotropheis, & ergastulis publicis, ubi plures simul conversantur, & vitam colunt inopem, corpus ad concipiendum contagium disponentem,

*Præservatio & curatio cum observationibus clinicis.*

## §. I.

Curatio quidem harum exitialium febrium, tam ratione indicationum, quam regiminis, remediorum, mendendique rationis, nec non observationum practicarum, convenit utique, cum iis, quæ capite antecedenti de febribus petechizantibus fuisse satis tradidimus, ut supervacaneum eadem heic etiam exponere foret. Sed longe magis a perito Medico petendum consilium ad arcendum ejusmodi morbum, quippe quod multo tutius multoque certioris effectus ipsa curatione. Præcipuum vero præservationis momentum in eo quam maxime consistit, ut insalubri ad ingignendos mali moris morbos apto anni tempore, sollicite evitetur aer vaporibus & exhalationibus noxiis foetus & vivida, elastica expansione destitutus. Quum dein sub ejusmodi aeris constitutione corpora jam tum admodum debilia & ad morbos contrahendos disposita sint, expedit omnino, temperare sibi

*Præservatio  
vatio  
quoad  
dicationem  
& regimen*



ab omnibus, quæ viribus adversa languidioreſque faciunt excretiones, animi ſcilicet vehementibus commotionibus, mœrore, terrore, cura, impenſioribus meditationibus, vigiliis protractionibus & nimia venere, item corporis refrigeratione, præſertim noctu, cum leviori tempeſtate frigiduſcula veſtitu. Porro præſcindendus curate cruditatum prima in regione proventus, abſtinendum ab ingluvie tanto magis inſalubrium, a crapula, continua tabaci fumigatione & effuſiori potus coffee uſu, qui ſicuti ventriculo, ita longe minus nervoſis partibus & mixturæ ſuccorum vitalium amicus eſt. Ut demum aer purus & ſalubris hauriatur ſtudendum, & fugienda ob id loca humiliora, in quibus aer facile fit vappidus, nec non ædificia quæ ventorum perſlatui minus patent, ac præterea nimia humiditas accenſo igne & ſuſſumigiis ex maſtiche, ſuccino, baccis juniperi, corrigenda.

§. II.

*Vinum optimū præſervativum.*

Inter præſidia porro, quæ ad declinandos hos morbos valent, ego quidem præſtabilius novi nullum, convenienti & moderato vini optimæ notæ, & quidem Rhenani, uſu. Hoc quippe mane, vel etiam inter cibos quotidie potum modice, vires mirifice reficit & ſuſtinet, ſanguinis progreſſum cum excretionibus promovet, ciborum digeſtionem juvat, ac optime putredini ac corruptioni reſiſtit, præſertim quando moderatior etiam corporis motus & alius diluens potus ſimul conjungatur. Ego ſane longiori experientia edoctus, id pro certo affirmare poſſum, graſſantibus populariter morbis ab aeris conſtitutione humida, eos, qui exquiſitam victus rationem tenuerunt & quotidie moderate bono vino uſi, incommodi ſenſiſſe nihil. Ipſa etiam in peſtilentia ex præſtantiffimis præſervativis vinum eſſe teſtantur, qui ex inſtituto de eadem ſcripſerunt. Quin in petechiis quoque, vinum poſtremis die-

bus facta criſi debito modo potum, vires dejectas erigendo & cuticularem excretionem ſecundando, omnia fere alia auxilia ſuperare aſſevero.

§. III.

Ipſa autem in curatione ex omnibus remediis ſtatim in principio optimam openi conferunt acida, maximeque ſuccus citri, ptisanæ potandæ ad extinguendum calorem & arcendam putredinem inditus, item acetum vini, ſive ſimplex, ſive deſtillatum, mixturis ex aquis & pulveribus fixioribus diaphoreticis nuptum. Præter hæc conducunt, quæ vires ſervando ſalivalem etiam laticem colliquant & pectus ab inſarctu liberant. Id enim ego & celeberrimus olim Erfurtenſis Profeſſor, *Cramerus*, quem Præceptorem colui inſignem, obſervavimus, non facile quempiam his in morbis decedere, cui ſaliva & ſputum liberius fertur. Quam ob rem idem hic in arte exercitatiſſimus vir frequentiffimo in uſu habuit mixturas alexipharmacas, quas ingrediebatur, cum aceto deſtillato, vel aceto ſcordii, cinnabaris, interdum bezoardicum minerale & oxymel ſquilliticum. Contra ea peſſimus omnino Practicorum mos eſt, in principio ſtatim volatilia, bezoardica & ſudorifera cum regimine calido & infuſo theiformi fervente exhibere. Sic enim inteſtinus ille putredinoſus motus invaleſcit cum orgasmo, majorque virium ſubſequitur proſtratio.

§. IV.

In morbo declinante nulla magis ſalutaris excretio, quam quæ ſit con-  
*Alvi fluxus ſalutaris.*  
venienti tempore per alvum. Ego certe praxi quadraginta ſex annorum uberius confirmatum habeo, rarius ſolo ſudore & hæmorrhagia, ſed frequentius per diarrhœam ſeptimo, nono, aut undecimo die erumpentem, ſolutos fuiſſe hos morbos, & viciffim nihil pernicioſius fuiſſe diarrhœa gravi ſtatim inter initia, vel alvi fluxu critico cohibito. Neque minus com-  
*gnæ,*  
pertum habeo, ſi catharrales mali-



gnæ, & exanthematicæ alvi fluxu solutæ fuerunt, ægros immunes fuisse a purpuræ albæ incurſu, quæ haud raro pulſu jam æquali facta, declinante undecimo die morbo, non ſine magno periculo ſuperſenit. Perſpexerunt etiam jam pridem ſalubritatem alvini fluxus, artem cum attentione exercentes. Ipſe *Hippocrates lib. epid.* memorat, laborantes huiusmodi acutis febribus, alvi excretionem fuiſſe ſanatos. In quadam peſtilenti conſtitutione diarrhæam admodum ſalutarem fuiſſe *Galenus de atr. bil. cap. IV.* teſtatur. Inprimis *Gerhardus Columba de peſtil. febr.* multus eſt in laudando egregio effectu fluxus alvini, pag. 231. ſic habens: *omnes quibus alvus copioſe ejecit, licet cum ſignis cruditatis fuerit, tandem liberati. Procedente enim alvi fluore, indies coctionis ſigna ſuperſeniebant, morbus evadebat clementior, & tandem alvi fluore perſeuerante fideliter & integre ægri iudicabantur.* Ut mittamus quæ paſſim hanc in rem memoriæ prodita a *Valleriolo obſerv. lib. IV. de febb. Schenckio obſervat. lib. VI. de febb. Riverio obſervat. Cent. I. obſ. XLVII. & LVII. item Cent. II. obſervat. XXXIV. & LXXXVII. Horſtio obſerv. X. Joanne Rodio Cent. II. obſ. LXXXV. Soreta de febre caſtrenſi, maligna cap. IV. pag. 331. cap. pag. 175. Boneto in theſ. pract. de febb. putr. pag. 71. item de cauſa cap. II.*

## §. V.

Hinc  
promovendus

Hæc igitur naturæ via, cui inſiſtendum ab artifice, eademque, ſi deſecit, juvanda. Mihi omnino firmum, & multiplici obſervatione confirmatum, quicquid in putridis, malignis, & peſtilentialibus febribus curandis exſpectandum ab arte, id maxime in eo contineri, ut Medicus convenienti tempore ea uſurpet remedia, quæ ad alvum ſolvendam ſine damno faciant. Sed hoc circa hos maxime dies faciendum, qui audiunt critici, a ſeptimo ad decimum quartum uſque, non primis, quibus ob materiam nondum

coctam & excretioni aptam, parum opis conferunt. Sicuti vero ad alvum vacuandam per totum harum febrium decurſum nil peſtilentius illis pharmaceis, quæ acrimonia quadam cauſtica agunt, nec exceptis ſennæ etiam foliis: ita nil certe hanc in rem magis proficuum iis, quæ nihil alieni & quod vires frangat in mixtione habent, ſed blande, & placide alvum ſubducunt. Eminent hæc inter benedicta illa manna cum cremore tartari, hiſce etiam febribus ob aciditatem non adverſo, nupta & ſufficienti doſi data. Conducibilis quoque ſirupus roſarum ſolutivus, mixtus cum ſalino ſtimulo, ex cremore tartari, ſale polycreſto, vel nitro antimoniato & convenienti doſi ac tempore cum ſufficienti diluto vehiculo, uti ſero lactis noſtra methodo dulci, vel aquis etiam temperatis mineralibus, ut Wildungeniſibus & Antonianis, oblatus. Non minus ſpectata virtus tamarindorum pulpæ, vel decocti ex his cum manna, aut rhabarbaro. Quam egregium enim effectum præſtent hoc in caſu laxantia teſtis eximius eſt *Moræus de malign. febr. parox.* plus quam viginti exemplis confirmans, ſe ad alvum laxandum ſummo cum fructu uſum fuiſſe tamarindorum pulpa, item infuſo ex rhabarbaro, foliis ſennæ, cremore tartari, manna & aqua acetofellæ concinnato.

## §. VI.

De venæſectionis autem utilitate his in febribus diſceptant adhuc medentes. Et certe tanta utique malignarum differentia, ut experientiſſimi etiam Medici in iſdem experiundo demum diſcere cogantur. Id tamen verum: quum eadem plethoricos & plethorico-cachochymicos inſeſtant, commodum omnino in his & præterea ſanguinis miſſioni aſſuetis, diæta lauta & vinoſa utentibus & vitæ ſedentariæ indulgentibus, invenit locum ad præſervationem: Experientia enim ſum edoctus, poſt venæſectionem, vel plane non corripitur, vel lenius

V. S.  
præſervatoriam  
magis



lenius ægrotare, & facilius convalescere, sanguinis subtractionem passos, quam non expertos.

§. VII.

*Recidiva ar-  
cenda  
absti-  
nentia.* Id vero omnibus curate tenendum: quod tam sub, quam declinante hoc morbo, stomachus valde languescens non alimentorum, multo minus insalubrium, præsertim carniū mole sit onerandus. Est hoc familiarissimum, vulgo hominum plebejorum inprimis, præjudiciū, ut credant vires cibis esse reficiendas. Sed ipsum hoc est una ex præcipuis causa, quod ægri in portu sese jam constituto censes, sæpius naufragium faciant, recidivante priori, cum majori vitæ periculo, vel superveniente alio novo morbo.

*Enarrationes morborum.*

OBSERVATIO I.

Historia Febris Petechialis Anno MDCLXXXIII. in Principatu Mindensi grassantis.

Quum anno MDCLXXXIII. copiæ Brandenburgicæ ab expeditione contra Turcas ex Hungaria redeuntes, in Principatum Mindensem hiematum reducerentur, attulerunt simul morbum castrensem, febrem nempe malignam petechialem & successively multos pagos & vicos, in quibus sumserant hiberna, lue infecerunt eadem. Ego juvenis adhuc Medicus provincialis a Serenissimo Electore Brandenburgensi Friderico Wilhelmo constitutus ibi, feci quod muneris postulavit ratio, decumbentes passim visitavi, in morbi hujus maligni statum inquisivi & operam contuli omnem, ut pro mea tunc scientia perniciosam hunc morbum congruis præfidiis oppugnarem & ne latius progrediretur, præcaverem. Excurri igitur & potissimum in præfectura Schlusfelburg, plus quam centum hac febre laborantes offendi, in quibus præter summam

virium prostrationem & consueta alia malignarum symptomata, peculiare fuit, quod plurimi statim in principio atroci & diuturna cephalgia, in sincipite inprimis, cum vertigine, oculorum rubore, oblivione ac postea delirio, afficerentur; conquerentes simul de magno tinnitu & susurro aurium. Quidam de raucedine, pectoris infarctu, faucium ardore & falso catharro conquerebantur. Quibus mox corpus petechiis lividis & flavescentibus obfessum, moriebantur omnes, cum iis qui incongruo, vel nimis calido, vel nimis frigido, regimine excepti & a balneatore alexipharmacis, expellentibus & theriacalibus usi fuerunt. In quibusdam tanta erat corruptionis vehementia, ut ægri surgentes & in pavimento frigido ambulantes aliquandiu, funestum in plantis pedum nanciscerentur sphacelum, ut in duobus vidi. Qui autem paucas & rubras habuerunt maculas, nec non ex plebeis, qui nec medico, nec medicamentis usi, ac minus meticulosi, solo regimine temperato, & potu feri lactis, vel decimo quarto die, remittente symptomatum vehementia, vel per largos & frigidos valde debilitantes sudores, vel per diarrhœam sunt judicati. In bonis fuit status sordaster circa declinationem accedens & aliquandiu persistens. Qui evaserunt, vix intra aliquot menses ad perfectam sanitatem redierunt. In plurimis restitit tumor pedum, vel etiam abdominis, cum lenta febre & appetitus dejectione. Quidam diu stupidi & obliviosi manserunt. Nec defuerunt, qui, præsertim si caput frigidiori auræ nimis cito exposuerunt, post morbum gravitate capitis & difficultate auditus affecti sunt, quin nonnulli facti sunt & manserunt per totam vitam surdi. In pago Raden dicto, eodem morbo infecto, cum morabatur destillator quidam Chymicus, qui gloriabatur, summo se cum fructu uti spiritu nitri, instillatis in mensuram aquæ puræ, vel cerevisiæ Mindensis levis, quin-



quingenta ad manifestam usque aciditatem guttis, dato postea liberaliter tepido potu hoc medicato. Nec contemnendæ virtutis deprehendi hoc experimentum, quo in aliquibus fluxus alvi cruentus quandoque suscitatus, non sine levamine cephalalgiae aliorumque symptomatum, tantum quod qui eodem servati, paullo diutius imbecillitate ventriculi & intestinorum laborarunt, cachectici quasi facti, demum tamen etiam congruis remediis ad sanitatem traducti. Ego vero ad præscindendum ulteriorem contagii progressum, iis, qui nobilioris fortunæ & conditionis erant, præter moderationem & temperantiam, in victu, regimine & animi affectibus, & vitanda refrigeratione, suasi moderatum vini boni usum. Qui sanguine crasso & gravi abundarunt, uti Westphali ob victum durum & crassum fere omnes, his sanguinem subtrahere jussi, & mane alternis diebus assumere dosin tincturæ bezoardicæ, vel pulveris bezoardici, expectando postea sub temperato calido regimine cuticularem excretionem auctiorem. Quæ etiam tam in locis infectis, quam alibi versantibus, egregie profuerunt. Ceterum sanos ab ægrotis, quantum fieri potuit separari jussi: pro medicina pulverem ex cornu cervi usto & lapidibus cancrorum leniter nitrosum, cum pauxillo camphoræ cum roob sambuci, aqua & aceto vini singulis fere assumendum ordinavi: qui in primo morbi insultu sæpius usurpatus alio statim a morbo liberavit.

#### *Epicrisis.*

Nulla fere regio tam ferax morborum acutorum & præsertim febrium catarrhalium mali moris atque petechialium, quam Austria & Pannonia. Unde etiam peculiare & grave hujus morbi genus Hungaria *κατ' ἐξοχήν* febris, audit. Evenit autem hoc plures ob rationes. Æstus interdiu his in regionibus est intensior; etiam autumnus, & vina ob id generosa admodum

& dulcia facit, noctu vero succedit algidior aura, & ob excessivam hanc subitam cœli mutationem excretio salutifera, potissimumque quæ per cutis poros succedit, mirifice turbatur ac interceptitur. Dein victus ibi solennis admodum plenus, ex esu carniæ & vini generosi potu, aquæ autem non adeo salubres; quibus sanguinis facile corruptibilis copia ingeneratur. Hinc non mirum est, quod frequentes ibi corrupti & putridi maligni morbi, inprimis in militibus & qui victus illius insueti, simul inordinate vivunt, semicoctis & male præparatis cibis ventriculum onerant, noctu excubias agunt sub frigida aura & in locis humidioribus & frigidioribus degunt ac dormiunt. Neque etiam mirum, dispositionem ad hos morbos cum militibus huc venientibus alio transportari; sub quiete & ingluvie in hibernis, corruptos succos augeri, cruditates prima in regione accumulari ac tandem in apertum perniciosum morbum, hieme præsertim, erumpere.

Id autem peculiare habet hic morbus, inprimis in iis qui sanguine abundant, ut caput petat, hinc statim in principio venæ sectio suadenda, si vero ex stomacho vitiosorum humorum ex ingluvie & toto corpore huc confluentium colluvie obfesso, eveniat, optimum utique consilium statim in principio, clementi, efficaci tamen emetico, stomachum, vel intestinorum simul canalem expurgare. Quem in finem ego quidem commendare soleo decoctum mannatum, cum dimidia vel una drachma radicis hypecuanhæ, aut infusum mannæ ex vino cum duobus tartari emetici granis. Sic datis post hanc evacuationem bezoardicis & leniter diaphoreticis, cura succedit longe felicius.

Ex singularibus etiam in hac lue fuerunt sudores copiosi, frigidi, per aliquot dies & noctes manantes, vaporem acorem spirantes, non tamen funesti. *Hippocrates* enim *Sect. IV. aph.*



*aph. 37.* malos eos pronunciat & mortis prodromos. Nos quoque largimur, quod sudor frigidus qui internæ visceris cujusdam inflammationis, vel sphacelationis comes & tantum particularis est, internis calentibus & externis frigentibus, plerumque sit funestus. Sed longe aliam ejus frigidi fudoris esse rationem, qui a defectu caloris & virium prostratione oritur, docet experientia. Luculentum hanc in rem est testimonium *Raygeri in schol. observ. Spinaleri obs. XCV.* sic habens: *vicissim sæpius & ego in morbi declinatione post XIV. dies viribus bene constitutis & rite se habentibus, reliquisque bonis signis apparentibus, in calido corpore frigidos observavi sudores, post febres acutas & malignas bene judicatas, cum allevatione magna erupisse & ultra XXIV. horas durasse.* Quanquam autem hujus generis sudores non ad mortem tendant, magnam tamen dissipationem caloris & virium indicant. Hinc si unquam, certe tunc succurrendum analepticiis, diæteticiis & ac pharmaceuticiis, corpus crebrius linteis calidis detergendum & fricandum, quo per externa internus calor excitetur, nec æger in limine recuperandæ sanitatis constitutus deficiat.

Vicissim in pessimis signis fuerunt sudores ab initio & per totum morbum effusius manantes, cum urina perpetuo tenui & copiosa. Hæ enim symptomatice sunt excretiones, manifestumque præbent indicium colliquationis & dissolutionis elementorum sanguinis mixtionem constituentium. Et secedente tam copiose sero, crassior evadit cruor & ad cerebrum delatus, in vasis meningum capillaribus facile stagnat & inflammationem inducit.

Quod præterea spiritus nitri crebro & liberaliter in aqueo vehiculo datus, quibusdam eximie profuerit, partim acido tribuendum, quod putredini resistit optime, partim stimulo quem intulit intestinis, quibus vellicatis

Tom. IV.

sanguinis & humorum impetus a capite ad inferiora vocatus & alvi fluxus cum euphoria proritatus. Sed longetior clyssus antimonii sulphuratus, cum diluente tenui potu sufficienti copia exhibitus, quem ego præstantissimum auxilium deprehendi, & commendando.

Ceterum invadentibus exitialibus hisce morbis, id potissimum peritendum est Medico, ut propagationem & progressum contagii tempestive antevertat. Etenim longe facilius est, corpora ab insultu harum febrium defendere, quam infecta & oppressa persanare. Ac nisi peculiare beneficium naturæ in curatione concurrat, omnia frustra molitur Medicus, quantumvis doctus atque peritus.

#### OBSERVATIO II.

Juvenis robustus, sed ob vitam sedentariam sanguine non adeo puro plenus, animum laxandi causa Januario exeunte ruri exspatiatus, societatem cerevisiam gravem & spirituosam potantium offendit. Assidet cum iis, & vesperi domum iterum concedens, corpus admodum perfrigerat. Die post de molesto dentium conqueritur dolore, cum corporis lassitudine viriumque languore plane insolito. Altero die accedit tussis, cum sreatu, coryza, æstu, non tamen adeo gravi. Aucta vero præterea debilitas, appetentia periit cum somno, intercursarunt subinde horripilationes & extremorum refrigerationes, caput torpidum fuit, licet æger non lectum peteret, sed officio suo fungeretur. Accedente quarto die morbus ægrum affixit lecto, hinc consultus Medicus, qui serum ex lacte cocto succo citri coagulato bibere jussit. Factum id, sed subsequutus alvi fluxus vigesies & ultra ægrum intra diem & noctem ad fellam urgens. Inde vires magis collapsæ, partium tremor cum delirio, alvo quamvis fluente accessit, sub quo quinto die comparuerunt maculæ petechiales,

Febre  
pete-  
chial-  
is sub  
alar-  
ibde  
fane-  
no

K

atro-



atrociam morbi tamen non levantes, sed sexta stercora & urinam sine sensu reddidit, respiratio facta anhelosa & nocte septimum diem antecedente mors excepit.

### *Epicrisis.*

Hanc etiam febrem fuisse ex malignis illis catarrhalibus & petechialibus, quæ per aliquot menses nostra hac in urbe circumviverunt, testatur dentium dolor rheumaticus, coryza, & rauco cum tussi. Malignitatem autem junctam ingens statim virium lapsus, appetitus plane prostratus & somni defectus, cum pulsu celeri, debili atque frequenti, nec non capitis dolor ac torpor faciunt testatum, licet ægroti, adstantes ipsique minus periti Medici, hæc laud raro minus ex æquo attendere soleant. Serum igitur lactis in principio ad alvum laxandam & sistendam sanguinis ebullitionem, non quidem sine fructu commendandum. Sed ubi catarrhales affectus jam per aliquot dies adfuerunt, minus proficua sunt ea remedia, quæ alvum turbant & serum impurum ad interiora ac inferiora vocant. Licet etiam alvi laxitas, in catarrhalibus malignis criticis diebus sponte proveniens, admodum sit salutaris, primis tamen diebus alvum stimulantia nocent. Intus enim retinent materiam malignam, ac ut inflammatio ventriculi & meningum tandem sphacelosa inducatur, faciunt. Tum potius semper perspiratio servanda libera & serum corruptum dissipandum per blanda diaphoretica & regimen moderatum. Neque minus in plethorico ejusmodi corpore ante invasionem admodum proficua fuisset, venæsectio, sub juncta postea moderatiori & longiori diaphoresi.

### OBSERVATIO III.

*Pete-  
chia in  
sorore  
fratre  
diversa*

Virgo triginta aliquot annorum, mensium anomalis ab aliquot annis obnoxia, anno abhinc affecta fuerat

erysipelate capitis, quod in fistulas mali moris, glandulas colli, genus faucesque perforantes, desit. Sanata tamen adhibita omni diligentia a Medico & Chirurgo, sed ab eo tempore languidior mansit & macilenta. Januario hujus anni ineunte subito ipsam infestavit ingens capitis dolor, cum torpore, somnolentia, virium languore, valida quoque tussi sicca. Increvit hæc debilitas indies, nihil plane appetiit, nec dormivit, simul conquesta est de præcordiorum & spirandi angustia, pulsu frequenti, sed debili micante. Sexto die passim in pectore comparuerunt punctula, septimo accessit delirium, sequutæ convulsiones epilepticæ ac mors, post quam maculae magis venerunt in conspectum. Frater demortuæ insperato hoc discessu mirum contristatus, paullo post pariter conqueri cœpit de dolore capitis & artuum, sine catarrhosis defluxionibus, vires conciderunt, appetitus periit, somnusque defuit, quarto die petechiæ visæ ac pathemata mitigata, septimo cum caloris incremento sub inquietudine & anxietate accessit purpura & petechiales maculae disparuerunt. Successive tamen convaluit, terreorum bezoardicorum & absorbentium cum succo citri & aquis diapnoicis & analepticis usu ac potu ptisanæ.

### *Epicrisis.*

In virgine hac orta febris sine contagii suspitione. Sed docet omnino experientia, corpora valetudinaria, imbecilliora & ubi impuritas ex mensibus retentis, gonorrhœa, vel lue venerea in sanguine & succis lymphaticis resistat, facile corripî grassantibus ex communi aeris insalubris vitio morbis & promte quoque suscipere contagium, quod nihil metuentibus a Medicis, Chirurgis & assistentibus contagiosis morbis decumbentibus, affertur. Quod autem ab initio statim exquisitus & continuus capitis adfuit dolor, cui deinde delirium cum convulsionibus epilepticis junctum, id procul dubio ob debilitatem capitis ex per-



perpeſſo eryſipelate exulcerato fa-  
ctum. Dein frequentioris etiam ex-  
perientiae eſt, contagioſis morbis de-  
functorum conſanguineos, ſola ſæpe  
animi perturbatione ac mœſtitia diu-  
turna, in eundem incidere morbum.  
In his vero a ſanguinis miſſione, niſi  
corpus ſit eminentius plethoricum,  
merito abſtinendum, item a valide  
commoventibus & evacuantibus, ac  
vires potius erigendæ, perſpiratio ſe-  
cundanda & ſuccorum vitalium inte-  
gritas conſervanda. Petechias com-  
parente purpura rubra diſparuiſſe, in  
exanthematicis hujus anni febribus  
ſæpe viſum, & quidem ſine damno,  
ſed ubi declinante petechiali morbo  
ſupervenit purpura alba, id ut pluri-  
mum fuit lethale.

#### OBSERVATIO IV.

*Pete-  
chiae in  
ſore  
& fra-  
ne di-  
verſae.* Acres cum commilitone rixas ha-  
buerat adoleſcens viginti annorum,  
ſimulque terrore fuerat percuſſus. No-  
cte inſequenti ſomno caruit, ac debi-  
litate, laſſitudinem appetitusque  
proſtrationem per dies aliquot perſen-  
ſit. Quinto poſt die horrore, præcor-  
diorum anxietate & æſtu præternatu-  
rali affectus eſt, cum pulſu celeri ac  
debili. Medicus in conſilium vocatus,  
ſtatim exhibuit vomitorium, ſangui-  
nem ſubtraxit & ſubjunxit tincturam  
bezoardicam, nec non pulverem be-  
zoardicum cum & ſine nitro. Sexto  
die comparuerunt maculae rubeae &  
nares aliquoties ſanguinem ſtillarunt,  
ſomnus fuit paucus, vel nullus, uri-  
na ſanorum ſimilis, vires tamen non  
penitus viſae proſtratae, ſed æger ſur-  
rexit ſubinde & deſuit quoque deli-  
rium. Bene igitur omnia cenſura ſpes  
fuit & morbus leniſſime bezoardicis  
temperatis tractatus. At quum ſepti-  
mo die e lecto ſurgeret æger & per ho-  
rae quadrantem erectus ſederet in con-  
clavi licet moderate calido & ſufficien-  
ter tectus, ſubito in lipothymiam in-  
cidit cum horrore cutis, pleraeque pe-  
techiae evanuerunt & quæ manſerunt

nigrae comparuerunt, acceſſit ingens  
præcordiorum anxietas cum furore, ita  
ut gladium in adſtantes ſtringere &  
ex fenestra ſe præcipitem dare vellet.  
Uſurpatus quidem pulvis bezoardicus  
cum nitro & camphora, conquievit  
etiam tantisper delirium, ſed debili-  
tas increvit, horripilatio perſiſtit,  
acceſſerunt convulſiones & ſub finem  
diei ſeptimi mors inopina.

#### Epicriſis.

Nunquam periculo carent pete-  
chiae, licet omnia videantur pacata &  
Medicus conferat cuncta. Quod vi-  
enim accidens in pejus omnia mutare  
valet. Heic ſitus erectus tam pernicia-  
lem mutationem, delirium & mor-  
tem adduxit. Qui quantopere in mor-  
bis acutis & exanthematicis ſit no-  
xius, jam pluribus monuimus ac ut  
evitetur iterum monemus iterumque.

#### OBSERVATIO V.

Generoſa femina quadragenaria, *Pete-  
chialis  
febris  
vino  
poroſa  
nata.* corporis obesi, laxi & ſpongioſi, ge-  
nio indulgens variis que eduliis dulci-  
bus, acidis, lacte, vino quotidie de-  
lectata, tempore quo maligne exan-  
thematicae febres circumibant, iſdem  
fere, quam quibus hæ incedebant af-  
fecta fuit pathematibus. Adſuit quip-  
pe corporis laſſitudo cum inquietudi-  
ne, cutis horripilatione, capitis dor-  
ſique dolore, accedente poſtera die  
præcordiorum anxietate, viriumque  
proſtratione. Datum illico lene eme-  
ticum, quod miram vitioſorum humo-  
rum colluviem evexit, & anxietatum  
& cephalalgiae levamen attulit. Ter-  
tio die vena in manu pertuſa & ſan-  
guis largiter eductus, qui frigefactus  
cruſtam glutinoſam in ſuperficie con-  
traxit. Sed poſt venaeſectionem pejus  
habuit, ſopor præſto fuit continuus,  
facies tumida & fauces ſqualidae factae,  
urina vero tenuis naturali ſimilis ſeces-  
ſit. Quinto die ſpiritus factus difficilis  
& poſt noctem admodum inquietam  
prodierunt maculae rubrae in collo,  
dorſo ac manibus, quæ quidem anxie-



tates levarunt, soporem autem non sustulerunt. Interim ob alvum clausam clysteres injecti, qui ingentem foetidorum stercoreum copiam evocarunt. Septimo etiam die largo corpus sudore perfusum. Nihilominus sine sensu ac motu jacuit ægra, appetens vinum, quod ipsi suspensa manu concessum. Quum vero inde melius haberet ac virium animi corporisque sentiret incrementum, post trihorium quatuor iterum vini Rhenani uncia potui data, iisdemque potis, mirifice se viribus refici assueverat. Sequutus postea sudor largior, infuso thee adjunctus, sopor mentisque stupor discessit, corpus quoque cum animo vires recepit, & ægra ad sanitatem demum traducta, alternis semper, vel ternis diebus, alvo laxantibus subducta.

#### *Epicrisis.*

Quo major parvorum succorum prima in regione colluvies, eo graviora etiam in febribus popularibus malioris adfunt symptomata. Urina quoque plerumque minguntur tenues, præcordia anguntur & caput exquisite dolet. Ad hanc igitur circumstantiam artifice cum cura attendendum semper. Tum enim optimum consilium, illico leni emetico sordes expurgare. Merito etiam sanguinis missioni præmittitur purgatio. Venæsectio heic quidem minus feliciter cessasse visa est, sanguine ad caput allecto & soporem faciente. Quare etiam Practicorum plurimi venam in superioribus pertundere dissuadent, ac ut potius in pede id fiat præcipiunt, eo quod inde non facile congestio sanguinis ad caput proritetur. Crusta autem illa glutinosa sanguini emisso innatans non mali fuit ominis. Nam *Baglivus lib. I. opp. pag. 149.* disertis verbis scribit ac testatur: *observamus in xenodochio omnes fere ab acutis evasisse, quorum sanguini venæsectione extracta crusta alba atque chylosa super-*

*crescebat: contra mortuos, quorum sanguis valde rubicundus.* Et certe sanguis consistentia crassior non tam facile dissolutorio motui intestino obsecundat, quam tenuis partibus salino-sulphureis scatens. Demum notandum & hoc, quod vinum temperatius, in malignis, & petechialibus etiam febribus, non noceat, facta petechiarum eruptione & poris adaper-tis, sed quod potius vires refocillando, secretorios, & excretorios actus partium effœtarum egregie juvet. Cavendum vero ab eo, si inflammationis adsunt indicia in ventriculo & primis viis, si phrenitidis, si cutis arida, & sicca.

#### OBSERVATIO VI.

Biennio abhinc febris maligna contagiosa, non quidem epidemice, sed tantum sporadice circumibat potissimumque complures ex domesticis orphanotrophei Halensis infestabat. Eundem hunc morbum nanciscebatur filius Inspectoris hujus orphanotrophei, Theologi, tam eruditione, quam pietate, & moderatione celebris, ipse pedagogii Regii alumnus. Pater impensius hunc suum natum deamans, contristari non modo cœpit & de salute tam capitali morbo correpti angi, sed & crebrius decumbentem visitavit, quin lecti & hypocausti socium fecit, ac cum universa familia eodem in conclavi cibos cepit. Hinc autem factum est, ut omnes successive a contagio inficerentur. Pater quidem statim tertio post die summum virium languorem, capitis artuumque dolorem, somnum inquietum, anxietatem & ardorem circa præcordia, cum plenaria ciborum inappetentia expertus est. Accessit tonsillarum tumor, ardor & æstus faucium, quinto die delirium, postea sudores colliquativi, nono placida mors. Decumbente hoc adhuc, uxorem idem morbus prostravit iisdemq; affectis pathematibus, eodem, altero post obitum.

*Febris  
mali-  
gna co-  
ntagiosa  
venæ-  
sectio-  
ne com-  
pressa.*



tum mariti die, funeſto eventu. Excepit virgo his conſanguinitate juncta, quæ quinto die pariter exſpiravit. Ita ut intra quatrimum tres hæ perſonæ obirent. Medici qui curationi præerant, catarrhalem morbum eſſe cenſuerant & ob id venæſectionem omiſerant. Sed quum morbus ad reliquos etiam domeſticos procederet & rumor paſſim increbeſceret, eundem tantum non eſſe peſtilentem, alius Medicus in conſilium vocatus, qui ob capitis dolores, venæſectionem inſtituendam eſſe in principio ſuaſit. Hinc omnibus quotquot poſtea corripuit, ſimulac conqueri cœperunt, vena in pede pertuſa & conveniens ſanguinis quantitas eduſta, tam felici effectû, ut non tantum morbus mitior incederet, maculæ petechiales cum purpura, ſecus quam in primis compararent, verum etiam ex ſeptem nec unus occumberet, ac ipſe contagioſus morbus ſic deſineret.

*Epicriſis.*

Perquam utique notatu dignum, ſervatoſeſſe qui ſanguinis miſſionem admiſerunt, qui omiſerunt ſub gravi & diuturno delirio periſſe, ad quem tamen eventum ſumma animi triſtitia multum forte contulit. De venæſectione quidem, an in ejuſmodi acutis, malignis contagioſis & exanthematicis febribus proſit vel noceat? Medici adhuc in utramque partem diſceptant. Ego vero cenſeo, abſolute nil poſſe definiri, ſed conſiderandas eſſe a Medico circumſpecto ac perito circumſtantias omnes, quoad indolem, cauſam, ſymptomata & tempus morbi, quoad ſubjectum, corpus ægrotans ſolidorumque & fluidorum in eo diſpoſitionem. Ego quidem multiplici edoctus ſum obſervatione, verum eſſe generalem hunc practicum canonem: ſi corpus eſt admodum plethoricum, amplis vaſis inſtructum, ſanguinis miſſioni aſſuetum, ſi morbus ſanum antea corripuit, nec a comuni ad putredinem inclinante aeris vitio obortus, ſi vehementer ſtatim

*Tora. IV.*

caput petit ac delirium metuendum, tum utique ante invaſionem tam ad præſervationem, quam etiam mox in principio, nunquam nocere poſt moderata ſanguinis miſſio in pede; quin ſub his circumſtantiis in morbo Hungarico ipſaque peſtilentia venæſectio eſt utiliſſima. Subtraſta enim nimia ſanguinis, & humorum copia, cordis & ſyſtematis vaſorum ſyſtole longe liberior redditur atque vegetior, una cum motu humorum ad exteriora, quo per univerſale illud emunctorium cutis nocens materia expellitur atque diſſatur. Neque minus a ſanguinis in partibus inferioribus miſſione inſignis ipſius a capite fit derivatio. Nam res certa eſt experientiæ, ſub acerbo capitis dolore, illico cordis, & arteriarum pulſum immutari, irregularem fieri & inæqualem, & pendentes inde functiones vitium capere, & viciffim ſi caput cum cerebro & nervis a ſanguinis ſtagnatione liberatur, pulſum mox in melius mutari una cum motu humorum progreſſivo vitali. Quod ſi vero adductæ hæ circumſtantiæ deſunt, corpusque minus ſanguine redundat, noxia omnino & pernicialis ſanguinis miſſio intempeſtiva. Quumque pauci ex Medicis præſentia polleant diſcretiva, non mirandum, generoſo hoc remedio plus ſæpe damni, quam emolumenti afferri.

OBSERVATIO VII.

Quum anno MDCLXXXIX. hie-  
mali tempore graſſaretur febris mali-  
gna, quandoque exanthematibus ſti-  
pata, multoſque, præſertim perver-  
ſa medicatione exceptos trucidaret,  
tota domus Conſilarii cujuſdam auli-  
ci eodem infecta eſt, & ipſe cum uxore  
graviter decubuit, noſtra tamen  
opera, benedicente DEO, regimine  
maxime temperato, & lenioribus dia-  
phoreticis, convaluit. Poſtea fratrem  
ipſius ſimilis invaſit morbus, iſdem  
cum ſymptomatibus, virium proſtra-  
tione imprimis, capitis & artuum do-  
lore,

*Febris  
mali-  
gna ex  
anthema-  
tica  
jugula-  
ta emen-  
tico.*



lore, cum inquietudine. Ego statim in principio vocatus, lene exhibui emeticum ex aquæ florum sambuci, cardui benedicti ana uncia, tartari emetici granis duobus, mixturæ simplicis guttis 20. quo assumpto ter vomuit viscidos cum bile humores & post vomitum valide sudavit. Promotus hic sudor circa noctem pulvere ex cornu cervi usti, antimonii diaphoretici, lapidum cancrorum, ana drachma una, cinnabaris, nitri puri ana drachma dimidia, camphoræ granis duobus, qui in sex doses divisus & ter quotidie assumtus. Potui præterea data ptisana ex cornu cervi, scorzonera, cum succo citri. Quibus morbus prima in herba feliciter jugulatus & æger post aliquot dies sanus prodiit ac vegetus. Quumque brevi post famuli bini eodem modo conqueri inciperent, eadem methodo facili & explicita curatione ipsos ex ancipiti levavi.

#### *Epicrisis.*

Attentionem utique hæc meretur observatio, cujus generis plures notavi, malignum scilicet periculosum morbum, præsertim si a contagio accidit corporibus alias bene valentibus, nec adeo impuris, vel imbecillis, mox in principio congruis remediis opprimi posse ac jugulari. Scilicet quum miasma contagiosum primo omnium sese cum salivali latice misceat, sub hoc fermentescibili succo acrem malignam virtutem propaget atque multiplicet, hincque in naribus, faucibus ac oesophago catarrhosi quid simulet, & salivale fermentum destruendo, appetitum obtundat, quin etiam acredine sua nauseam & cardialgiam faciat; sane nihil magis indicatur atque e re est, quam ut istud proxima via per efficax conveniens pharmacum ocys, antequam latius procedat ex primis viis, vomitu & salivatione evertatur, postea vero ministerio accommodi diaphoretici reliquæ miasmatis virulenti per poros cutis evaporent. Sed cavendum omnino ab alexipharmacis, inter quæ

minime connumeranda camphora, præsertim cum nitro remixta. Nam hæc neutiquam, ut vulgaris fert opinio, sanguinem commovet, sed vel unica olei cinnamomi, aut caryophilorum guttula, plus exæstuat, quam camphoræ drachma dimidia. Non tamen prætermittendus potus diluens sufficiens temperatus ex ptisana, ad componendum sanguinis orgasmum. Ego novi, Practicum quendam non infelicem in more habuisse, in principio catarrhalium & malignarum petechialium, simulac languor & ardor corpus infestavit, serum ex lacte cocto cum succo citri factum, largiter, sed per vices potui dare, tam felici effectū, ut post aliquot dies ardor, dolor, languor & gravedo disparuit.

#### OBSERVATIO VIII.

Plures adhuc suppetunt observationes, sed ne nimii simus in historiis, brevitatis causa quædam duntaxat salutaria ex observationibus depromta monita afferemus. Scilicet frequentiori experientia compertum habeo, uti in quacunque exanthematica & contagiosa febre, sic etiam in petechizante & petechiali, non ita multo post contagio tactos fuisse, præsertim ex domesticis, qui ad arcendum morbum laxans, vel purgans assumere. Licet autem alvi subductio in benignioris indolis exanthematicis minus noceat, si tamen peioris naturæ, uti petechiales, præstat utique ab omnibus alvum stimulantibus abstinere. Etenim ad cicurandam veneni contagio concepti indolem ipsumque iterum exturbandum, tum ad præsevationem in metuentibus, tum ad curationem in affectis, nihil aptius & efficacius, quam perspirationem liberam servare & integram, qua, præsertim in imbecillioribus, per alvum vacuantia imminuta, venenum hoc magis detinetur intus. Hinc *Celsus* jam inter præcepta ad pestilentia incursum

*Purgatio ad præsevationem minus proficua.*



cursum arcendum etiam habet hoc : quod alvus non sit movenda , aut si jam per se mota est , comprimenda .

*Ex regimine & diæta per-versa recidiva.* II. Crebriori edoctus sum experientia , declinante ac finito morbo , periculosiores , immo lethales excitari recidivas , quando ægri corpus plus justo auræ frigidiori exponunt , in pavimento nudis pedibus incedunt & ventriculum adhuc languentem nimia ciborum , tanto magis carniū , insalubrium aut semicoctorum copia , simul ac semel onerant . Quare minus etiam sanitati suorum consulunt immedentum , qui nimis cito appetentiam usu elixiriorum stomachicorum , quæ spiritus mineralis acidus ingreditur , excitare contendunt . Et novit utique tum a copiosiori cibo , si non recidivæ , tamen statum quandam cachecticum , cum tumore pedum & abdominis accessisse & tardissime penitus convaluisse ægros .

*Contagium diu delitescere potest.* III. Neque minus experientia constat , diu omnino latitare posse susceptum in corpore contagium , interdum per aliquot septimanas , antequam in actum ducatur & pernicialem vim exerat . Atque hinc fit , ut qui eadem cum ægris domo contenti , sæpe successive unus post alterum aliquot hebdomadam spatio morbo afficiantur , licet jam antea aliquamdiu de lassitudine spontanea & functionum vitalium & animalium languore fuerint conquesti . His igitur cito succurrendum congruis diætetis & pharmaceuticis , præsertim iis , quæ circulum sanguinis & perspirationem placide juvant , quæ putredini resistunt & crasin sanguinis custodiunt , de quibus supra mentio facta , quo ocyus venenum iterum e corpore proscribatur .

*Quæ cum æstus mentis affert.* IV. Sæpius quoque observavi , quod tempore insalubri , quo ob aerem gravem febres mali & benigni moris catarrhales & petechiales populares habuerunt circuitus , ex benigna facta sit præter spem maligna , a contagio , quod Medici a vere malignis & petechialibus decumbentibus , cum vesti-

mento aut capillitio attulerunt . Ut adeo non sine ratione a Principum aulis & persona arceantur Medici , qui curationem malignorum & contagiosorum morborum tractant , & sæpius inter ægros versantur .

## C A P U T XII.

### De Febre Pestilentiali.

#### Theses Pathologicae .

##### §. I.

**F**ebbris pestilentialis est acutissima , a miasmate venenato ex locis orientalibus advecto orta , ac nisi vigore motuum vitalium venenum per bubones & carbunculos cito propellatur , lethalis . *Definitio.*

##### §. II.

Differt in eo hæc pestilentialis ab aliis contagiosis , malignis & exanthematicis febribus , quod omnium sit acutissima , ac interdum primo statim , vel secundo die jugulet . Dein nostris in regionibus nec epidemia , nec sporadica ex prava victus vel vivendi ratione , aut insalubri aeris constitutione prognata , sed sub aere saluberrimo , a solo contagio ex calidissimis jam infectis orientalibus plagis advecto , ortum ducit . Tum hoc habet peculiare , quod non ut aliæ malignæ febres & putridæ , per largos sudores , alvi fluxus , aut alias excretiones , sed tantum quod veneno ad partes externas glandulosas critiche & salutariter protruso , per tumores in abscessus desinentes , solvatur . Porro secus ac in aliis contagiosis & petechialibus quoque febribus , tanta constantia & tenuitas miasmatis pestilentialis est , ut promte adhæreat rebus porosis , & ad multa milliaria , integra manente pernicali sua vi , transferri possit . Demum singulare in hoc miasmate infectivo , quod prava & multiplicativa ipsius indoles intenso frigore non modo cicuretur , sed & plane extinguatur , quo fit , ut tempestate frigida & in regionibus præfrigidis , rarius , vel plane non ,



non, sub calido autem cœlo & vehementissime & frequentissime grassetur.

## §. III.

*12112.* Quemadmodum vero in omnibus contagiosis & malignis febribus miasma venenatum cum aere haustum salivali fermentescibili latici sese insinuat, ac in his quas pertransit partes perniciosam suam vim exserit primum: ita idem etiam quam maxime evenit in pestilentiali contagio. Hoc enim mox caput, cerebrum, nervos & purissimum illud lymphaticum nervorum fluidum petens, capitis torporem, gravitatem, somnolentiam & acerbum dolorem, sensuum stuporem, rerum omnium oblivionem, inquietudinem, vigilias ac virium prostrationem inducit. Per fauces ad ventriculum ventum, ciborum fastidium, nauseam, præcordiorum anxietatem, cardialgiam synocpticam, vomendi conatum, nec non vomitum facit. Dein ad membranas medullæ spinalis tunicasque arteriarum nerveas delatum, horrorem, pulsum languidum, parvum, contractum, frequentem, quin lipothymiam producit. Quæ quidem omnia statim inter initia sunt ordinaria pestis indicia atq; symptomata, tanto vehementiora & celerioris operationis, quo plus venenum pestilentialiale aliorum contagiosorum & malignorum morborum miasma virulentia superat.

## §. IV.

*De cursu morbi.* Quæ dein sub ipso morbo præsto sunt pathemata gravia & multa, nullo libi plenius & accuratius enarrata, ac in prima de hoc morbo descriptione, quam vetustissimus Historicus Thucydides, lib. II. de bello Pelopones. de peste Attica dedit. Retinebimus igitur hac morbi historiam, quam posteaquam dixisset ex Æthiopia in Ægyptum & inde Athenas pervenisse, sic inquit: ego vero quod factum est narrabo; & quibus animadversis, si quando rursus incidat, possit aliquis provisum quippiam non ignorare, hæc monstrabo, qui tum ipse morbo laboravi, tum alios laborantes vidi. Itaque annus ille, ut in con-

fesso est, inter omnes maxime aliorum morborum immunis fuit; quod si quis alio prius morbo laborasset, in hunc omnes decumbebant. Alios vero ex nulla occasione, sed continuo, quum sani essent, primum capitis calores invadebant vehementes, & oculorum rubores, & inflammationes, atque interna partes, & fauces, & lingua sanguinolenta statim erant, spiritus difficilis & sætens exibat. Deinde ex his sternutatio & raucedo succedebant, ac non multo post labor in pectus descendebat cum tussi vehementi. Quod si quando ad cor inbasit, tum id subvertit, tum purgationes bilis, quæcumque a Medicis recensentur, subierant, atque hæc magna cum defatigatione. Plerisque singultus inanis, convulsionem afferens vehementem, quæ non nullis sub hac cessabat, aliis vero multo post. Porro corpus extrinsecus tangenti non admodum erat calidum, neque pallidum, sed subrubrum, lividum, parvis pustulis & ulceribus scædens. Internæ vero partes usque adeo flagrabant, ut ne tenuissimum quidem stragulum, aut linteum impositum, neque aliud quippiam, præter nuditatem, ferrent. Ac jucundissimum plane erat in aquam frigidam se ipsos conjicere; quod multi fecerunt ex iis, in quibus cura non adhibita, qui in puteos se dederunt inexhausta siti vexati; & perinde erat plus ac minus bibere. Atque impotentia quædam, qua iis quiescere non licebat, & vigilie perpetuo comitabantur. Corpus, quamdiu morbus vigeat, non contabescebat, sed præter spem labori obsistebat. Quam obrem vel interierunt plurimi novem & septem diebus ex interno estu, cum aliquid roboris adhuc haberent; vel si effugissent, morbo in ventrem irruente, & exulceratione in eodem facta, & diarrhæa simul immodica subeunte; plerique mox præ imbecillitate perierunt. Etenim initio sursum facto malum, quod in capite primum confederat, universum corpus pervadebat. Quod si quis maxima hæc superasset, huic extremarum partium noxa superveniebat. Malum enim



ad pudenda & ad summas manus & pedes decumbebat; & complures his amissis evaserunt, nonnulli & amissis oculis. Nonnullos etiam, quum primum exsurgerent, cepit oblivio rerum æque omnium, ac cum seipsos, tum amicos ignorabant. Morbus igitur, concludit paucis interjectis, (ut alia multa prætermittamus insolita, quæ cuique seorsum evenerunt, aliis alia) talem in universum habuit ideam. Alius præterea nullus infestavit eo tempore ex iis, qui consueti habentur, si quis autem accidisset, in hunc destinebat. Ac perierunt nonnulli quidem ob negligentiam, alii vero diligenter etiam curati. Neque ullum, fere dixerim, compertum est remedium, cujus usu homines adjutos esse constaret. Nam quod uni opem tulerat, id ipsum officiebat alteri. Jam vero nullum corpus visum est adversus morbum sufficere, quod ad robur & debilitatem attinet, sed sublata sunt omnia, quavis etiam vivendi ratione ad curationem uterentur. Res porro miserrima fuit in universo morbo tum animi dejectio, cum quis se agrotare intelligeret; nam mente protinus ad desperationem conversa, multo se ipsos magis consternebant, neque reluctabantur; tum vero quoniam alter ab altero, dum curationis officio fungerentur, instar ovium occidebant, atque hoc maximam cladis partem attulit.

§. V.

Subje-  
cta. Neque tamen in peste unius ejusdemque indolis semper sunt symptomata, sed multum utique secundum temperamenta & constitutiones corporum variant. Quam diversitatem probe cognoscere & scrutari oportet Medicum. Id vero omnes qui de pestilentiali morbo scripserunt unanimi suffragio confirmant, corpora quæ spongiosioris, rari & prorsioris, nec non obesi sunt habitus, temperamento sanguineos & phlegmatico sanguineos, sexu feminas, ætate juniores ac infantes, animo timidos & abjectos, vitæ genere pauperes, insalubrem dietâ

colentes, crapulis deditos & comestationibus in seram noctem indulgentes, longe celerius corripitur & gravius decumbere hoc modo, quam qui animo fortes ac intrepidi, corpore macilenti, nervosi & amplioribus vasibus dotati, viri, senes, fluxu hæmorrhoidali obnoxii, item qui fonticulos & ulcera gestant aperta. Neque minus per observationes compertum, nihil ad suscipiendum & deleteriam miasmatis virtutem intendendam aptius esse metu, timore mortis animique consternatione, adeo ut etiam quosdam solo terrore peste affectos & extinctos esse constet. Nam hi animi affectus sunt inter omnes præcipui, qui vitalem cordis arteriarum motum cum sanguinis circulo minuunt, destruunt & vires tam vitales, quam naturales & animales dejiciunt, quum tamen motuum beneficio venenum conceptum sit exterminandum.

§. IV.

Cujus autem porro indolis ac specificæ naturæ sit venenum, quod pestem excitat, a priori accurate determinare admodum difficile, qui sensibus minus obvium. Quantum tamen ratione assequi & a posteriori judicare licet, duplicis esse videtur, partim sulphuræ putridæ multiplicativæ, instar fermenti, partim subtilis valde acris & causticæ, plus tamen alcalinæ, quam acidæ, naturæ. Putrida enim valde & peregrina sulphurea indoles ex eo patet, quod omnes maligni ejusmodi morbi præcipue suam originem ab exhalationibus putridis, quæ ex cadaveribus inhumatis, aquis stagnantibus putrescentibus & aliis foetidis excrementitiis sordibus trahant, & quod ipsum hoc miasma illico contaminet nervorum fluidorum, motum solidorum systalticum sistat & corruptionem sphacelosiâ succis inducat. Causticam autem subtilem acrimoniam inesse miasmati ex eo concludendum, tum quod contagiosorum morborum ingressum ut plurimum antecedit copia infectorum sale caustico.



ifico præditorum & ex putredine genitorum, tum etiam, quod nerveas fibrillas vellicando & rodendo, dolorem, ardorem, tumorem & inflammationem causetur, conspicuum factis in bubonibus atque anthracibus.

## §. VII.

*Solutur cruce per tumores*

Pestilentiale hoc intus susceptum venenum, illico, ut supra diximus, omnes omnino in corpore functiones turbat atque pervertit, ac nisi cito ab internis ad externas partes propellatur, certissime necem infert. Neque tamen hoc ut in aliis malignis fit per largos sudores, neque per alvi, aut urine fluxum, neque per hæmorrhoidum, aut mensium profluvium, neque etiam per narium stillicidium, spontaneum æque ac arte proritatum, ut potius, tale, præsertim effusiores excretiones, minentur exitium. Sed salutaris & critica, qua perfecte solvitur pestilentialis morbus, excretio absolvitur per tumores in externo corporis ambitu prodeuntes; ita quidem, ut non secus ac in erysipelate, intra tertium & quartum diem eadem contingat, & quo citius ac melius, ea magis morbi inde mitescat atrocitas. Formale enim venenum his tumoribus contineri atque excerni, vel ex eo patescit, quod si Chirurgus lancetta, qua aperti, venam sani hominis incidat, is illico etiam corripitur peste.

## §. VIII.

*Bubones*

Duplicis autem generis sunt pestilentialia hi tumores, primum a Græci vocatur communi omnium tumorum nomine bubo. Occupant hi bubones maxime glandulosa loca, frequentius inguinales & axillares, quandoque etiam parotides & mammarias glandulas, item maxillares inferiores sub mento, nec non asperæ arteriæ appositæ, ac sese manifestant tumore glandularum duro, dolente, tensivo, cum ardore, ac si boni moris sunt, intumescunt, molliores fiunt & suppurantur. Alterum genus, primo longe deterius, græco nomine audit

anthrax propria significatione carbonem ignitum designans, unde Latinorum diminutivum carbunculus. Celsus quidem lib. 5. cap. 28. sic describit anthracem: *rubor est superque eum non nimium pustulæ eminentes maxime nigra, interdum sublivida, aut pallida. In his sanies esse videtur, infra color niger est. Ipsum corpus aridum & durius quam naturaliter oportet. Circa quod quasi crusta est, eaque inflammatione cingitur, neque in eo loco levare cutis potest, sed interiori carni affixa est. Et Mindererus, qui ipse pesti interfuit & de ea egregie scripsit, ita de carbunculis habet: quando anthrax magnitudine grani sinapis, aut cannabis consedit, contrahit circumlimbum & circulum, aut ardentem halonem, amplitudine orbis mensalis, prout carnem & locum attingit. Caro quam tetigit a sana separatur ac uti eschara, seu caro putrida, excidit, ut hiet cavum ac si lupi exedissent. Ab his carbunculis nulla corporis pars immunis est, obsident tamen quam maxime membranas musculorum & substantiam cutis nervosam ac fibrosam, in dorso potissimum, brachiis ac femoribus. In loco quem afficiunt ægri primo pruritum sentiunt exquisitum, si scalpunt, pustulæ emergunt, coloris vel rubri, vel lividi, vel albo purpurei, vel nigri. Pustulæ compressæ sunt & pure plenæ videntur, ac sub una, vel pluribus exiis, crusta cinerea, vel nigra concrevit, qua ablata, caro corrupta & spongiosa apparet, cum dolore intolerabili & ardore carnis circumjacentis, ac tandem insequitur totalis partis sphacelatio, sive mortificatio.*

## §. IX.

Quibus autem lethalis est pestilentialis morbus, ex his nonnulli primo statim, vel secundo die syncope pereunt, procul dubio ex Panico, quo perculsi terrore. Sed plurimi, quando venenum vel non expellitur, vel expulsum subito relabitur, & nervosis tunicis nobiliorum partium pleuræ, cefo-

*Sphacelatio*



oesophagi ventriculi & intestinorum, nec non meningibus inhærens, inducit sphacelum, qui ocyus ad omnia viscera ipsumque sanguinem serpit, quo fit, ut cadavera illico mire foeteant intumescant & citissime putrescant. Quandoque etiam, quando nimia tumorum pestilentialium copia prodit, ob inflammationem, dolorem & ardorem intolerabilem, ex febre symptomata, non secus ac in variolis fieri solet, occumbunt.

### Præservatio & Curatio.

#### §. I.

*Optimæ præservativæ fuga & semperantia.* Quum in comperto sit, nostris in regionibus pestilentiam non gigni, sed ex remotis locis advenire, non securius utique & certius datur consilium præservatorium quam fuga contagii. Vetus enim jam *Celsi* est præceptum, ut adhuc integer, qui tamen securus esse non possit, naviget & peregrinetur, quod etiam in peste Italica anni 1575. eximie profuisse, testis est *Natalis Comes hist. lib. XX. VII.* Et *Sanctorius Med. stat. Sect. I. aph. 138.* libere profitetur: *qui aliud remedium pro vitanda peste instituunt, quam fugam, vel sunt homines ignorantes, vel volunt ærascere.* Eandem etiam ob causam optime saluti civium consulunt principes, qui tempore pestis advectionem & accessionem contagii modis arcent in omnibus, si vero domus fuerit infecta, sanos illico segregare & omnem mortuorum suppellestem comburere jubent, ne cum ea ad alios transferatur & morbus. Omnibus vero grassante pestilentia temperantissime vivendum, vitandus omnis excessus in rerum non naturalium usu, maximeque animi affectibus, & abstinendum a cunctis, quæ vires ullo modo deicere, perspirationis successum turbare & cruditates prima in regione gignere possunt. In primis animus firmandus, & terror, metus ac pusillanimitas discutienda; quum certum sit, timorem ac terro-

rem plures in peste necare ac ipsum miasma.

#### §. II.

Qui autem inter infectos versari necessum habent, his videndum, ne miasma succos vitales subeat, nec salivales intra primas vias stagnantes humores in sui societatem, quod facile fit, pertrahat. Hunc in finem commendanda frequens exspuitio & oris, cum aceto vini; vel vino collurio, vel horum in nares attractio. Major efficacia ad huc, si scordio, ruta, vel corticibus citri fuerint imbuta. Acidum enim genuina miasmatis putridæ & sulphuræ indolis videtur esse antidotus, quippe quod teste Chymia mechanica sulphur, & salia volatilia figit atque enervat. Quare longe tutius est acida degustare, vel in ore continere, quam radices alexipharmacas zedoariæ, angelicæ, ostruti &c. masticare. Expedit hinc quoque tum vel vinum Rhenanum, vel aceti bezoardici aliquot cochlearia, cum aqua aut vino diluti, assumere. Locuples certe hanc in rem testis est *Forestus*: ego, inquit, cum grassante peste, nusquam trepide, plenus civium studio me ad agros conferrem, illis auxiliis ac potissimum mali citri putamine succulento, dentibus attrito, me munire suevi. Turcæ, memorant *Cole lib. de morb. acut. pag. 88.* regnante pestilentia, frequentius utuntur succo limonum, quem liberaliter omni jasculo instillant.

#### §. III.

Inter externa adversus contagionem præsidia plures commendant fonticulos; inducti forsan primum observatione, qua constat, eos, qui ulcera chronica & scorbutica in artubus gestarunt, a peste & aliis contagiosis morbis fuisse immunes. Multus in primis in laudanda hac fonticulorum virtute est *Hildanus Observ. chirurg. cent. 4. obs. 23.* sic habens: *Neminem autem, quod notandum eorum, qui fonticulos in cruribus & brachiis habuerunt, præter unum aut alterum sum-*  
me

*In acidi-*

*Et fonticulis.*



me cacoehymicum, peste obiisse memini, & proinde præsentaneum præservativum tempore pestis esse, cum in aliis multis, tum etiam in memetipso expertus sum. Et idem mihi quoque a Medicis qui pesti Erfurtenfi interfuerant, relatum olim esse, memini. Ratio tam egregii effectus prophylactici videtur hæc, quod materia suscepti miasmatis, quæ firmiter adhærere solet serosiori sanguinis parti, naturæ vigorem ad partem cui fonticulus insidet, tanquam debiliorem, cum hac ceu vehiculo ablegetur & per hoc emissarium excernatur, unde tum sæpe circa fonticulum insolitus dolor ac tumor observatur. For-  
san etiam confidentia quam gestantes de hoc, tanquam certissimo foveant præsidio, metum excutit & resuscitando animi vires juvat, eodem modo ac de amuletorum adversus pestem virtute censendum.

## §. IV.

Indica-  
tiones  
& cu-  
ratio.

In curatione porro omnia à Medico perito hos in fines dirigenda: I. ut ope naturæ expulsionem suscepti veneni per congruas vias maximeque tumores illos criticos promoveat horumque habeat rationem curare; II. ut virus, quæ cum vita pari passu ambulant, fuscitet & urgentibus symptomatibus occurrat. Sed quum quo pacto & quibus hæc rite sint perficienda, ego ex propria tradere nequeam experientia, aliorum utar, & methodum, quam in curanda peste summo cum fructu adhibuit doctissimus pariter & exercitatissimus Medicus, Joannes Langius, heic inferam, cui postea judicium meum & monita rationi & experientiæ congrua subjun-  
gam. Ita autem gravis hic auctor suam pestem curandi rationem lib. I. epist. 18. describit: Jam tu probe nosti, me multos, de quibus etiam conclamatum erat, in hac pestifera lue hac methodo curasse. Primum, si alvus, aliquot dies ante morbi initium, parum, vel nihil excreverat, tum glande imposita, aut levi enemate eam exone-

ravi. Postea alexipharmacum sudoriferum exhibui, quod pro ratione ætatis ac virium, sudorem duas, vel tres, aut plures horas, promoveret. Cordi epithema applicui. A sudore hora sexta, vel septima, resectis tamen aliquo jussulo viribus, venam opportunam secui, ac mox ab alexipharmaco aliis singulis diebus, mane & vespere, potagia alterantia, quæ sua qualitate & substantia veneno resisterent, exhibui, & eor quoque confortarent qualia sunt, quæ ex succo citri, limonium, aurantium, acetosæ & jugulæ, cum momento aceti & saccharo decocta conficiuntur. In morbi declinatione, si appetitus edendi languebat ad reliquias morbi extirpandas, medicamentum ex rhabarbaro, agarico, cassia, aut rore Syriaco, sive manna & tamarindis Indorum exhibui. Postremo Chirurgis, ne ulceris aut carbunculi consolidationem præcipitarent; coquis vero ut præscripto tempore commoda esculenta & potulenta agro suppeditarent, edixi. Qua curationis ratione ingens agrorum numerus, Deo optimo auspice, convaleuit. Bubonibus, pergit paucis interjectis, vero & carbunculis; si circa emunctoria, juxta aures parotis, sub axillis abscessus, in inguinum ad-  
nibus bubo, virtute expullante eruperit, aut interim carbunculus in brachiis aut cruribus effloruerit, tum festinanter, veluti in vulneribus virulentis, medicamenta quæ venenum extrahunt ac locum applicato, vel cucurbitulas, aut emplastrum ex fermento, theriaca, farina, sinapi & cepa sub cineribus cocta conficito, additis opopanax & galbani gummis, acerrimo aceto solutis, imposito, & abscessum ante maturationem scarifica, aut aperi, vel cauterio adurito. Si vero patiens ignem veretur, cauterium potentiale ex cantharidibus & fermento confectum, aut contusam ex oleo flammulæ radicem applicato, quæ sua virtute calorifica & ardente non modo noxios humores attrahunt, sed & non raro factas ex his collectiones aper-  
iunt.

## §. V.



## §. V.

Intestate  
& vi-  
gente

Est utique hæc pestem curandi methodus rationi consentanea: Nam in omni morborum curatione sedulo tenendum hoc monitum, ut si alvus sub initium per aliquot dies, parum, vel nihil excreverit, leni enemate ducatur, quo ab excrementis liberentur intestina, ne inde tam symptomata exacerbentur, quam remedium virtus obtundatur. Dein probandum merito auctoris institutum quo commodo alexipharmaco sudorem per aliquot horas movit, ut halituosum illud venenum cito exhalaret & per cutem diffilaretur. Neque etiam de nihilo putandum, quod cordi applicuerit epithema. Quamvis enim non proxime tangat & afficiat cor, sed potius dextrum orificium ventriculi ejusque tunicas nervosas & musculosas; multum tamen interest, ut ventriculus, ceu pars maxime nervosa, & exquisiti sensus & quæ cum nervosis universi corporis partibus consensum alit intimum, ac ubi venenum primo omnium perniciosam suam vim exserit, probe defendatur, quod fit per topica, quæ antispasmodica simulque roborante balsamica virtute pollent; quem in finem ego commendare soleo, quæ extheriaca, oleo nucistæ expresso, camphora, croco, castoreo ac balsamo Peruviano concinnantur. Porro post usum alexipharmacorum venam secare jussit, quod omnino proficuum. Initium enim curationis a sanguinis missione facere periculosum, eo quod primo vel secundo post eam die, motus sanguinis ad peripheriam, adeoque etiam perspiratio, semper quodammodo imminuitur, ut venenum intus maneat. Ne dicam, metum & terrorem in peste correptis, protinus motum sanguinis ad corporis ambitum revocare, ut hinc venæsectio, quæ idem efficit, non possit non nocere. Sed admitti utique hæc potest si consuetudo, sanguinis abundantia & victus lautus atque vinosus urget, post usum medicamenti sudoriferi, eo quod

demta sanguinis copia, propulsio materiæ virulentæ ad glandulas facilitatur & promovetur, tanto certius, quando postea lenioribus sanguinis ad exteriora fluxus subinde adjuvatur. Recte etiam laudantur acida, uti succus citri, limonum, acetum &c. quod tota substantia veneno resistent, quippe quæ putredinem humorum & dissolutionem sanguinis valide obtundunt & ob id merito omnibus alexipharmacis & antiloimicis anteponuntur.

## §. VI.

Fractio præterea morbi vigore, sub declinatione alvum expurgat lenioribus. Quod quidem sicuti in principio pestis aliorumque contagiosorum morborum, ob effectum motum humorum ad externa retardantem, admodum nocivum; ita vicissim quam maxime conducibile, in declinatione. Sic enim educuntur sordes sub morbo genitæ perniciosæ, quibus retentis appetitus prostermitur, lentæ, immo purpuraceæ febres de novo inducuntur, vires languent, calor fit lentus, novusque ac capitalis haud raro repullulascit morbus. Ad virus tum extrahendum in tumoribus pestilentialibus suadet cucurbitulas, scarificationem & vesicatorium; ac in eo pariter consentientes habet loimiatros. In primis elegans *Riverii* est observatio *Cent. 2. obs. 20.* quæ ceu expertæ virtutis præsidium laudatur, ut, statim ac quis peste correptus, cantharides cum fermento & aceto pone aures ac in aliis suctis emunctoriis applicentur, ac in lecto postea quieti decumbere jubebantur ægri, eoque facto, post 24. horas effluere humorem atrum serosum & pestilentem morbum post aliquot dies plane discedere. Neque minus probe etiam monet *Langius*, ne præmature ac cito ulcera consolidentur. Evocata potius ad partes externas materia & suppuratione facta, tumor aperiendus, ulcus suctis digestivis mundandum, sed diu apertum servandum admota turunda, quo virus om-

Nec nō  
decli-  
nante  
morbo



ne per illud sufficienter expurgetur & tandem ad cicatricem perducendum.

*Caute, & observationes  
practicæ.*

§. I.

*Pauca  
remedia  
optima.* Perquam attentione dignum est *San-*  
*etorii in Med. stat. aph. 139.* effatum :  
*nobilium fere nemo cum remediis, ple-*  
*bei vero sine iis plures, sanantur.* Nam  
experientia uberius docet, plebejos,  
modo non omnibus subsidiis destituan-  
tur sed temperato regimine & ad fa-  
tietatem levi potu utantur, citius &  
rectius tam in pestilentialibus, quam  
aliis contagiosis malignis febribus  
convalescere, quam opulentos, qui  
Medicorum, & medicamentorum co-  
pia obruuntur plane. In illis quippe  
valens & robusta est natura, cui si ne-  
gotium committitur curationis, longe  
felicius utique succedit, quam si arti-  
ficiofa medicatione, nonnunquam pla-  
ne perversa, impeditur ac turbatur.  
In nobilibus autem, quum per se ob-  
inordinatam vitæ victusque rationem  
jam tum debilior natura, longe magis  
utique medicamentorum multorum,  
variorum, quin sæpe minus congruo-  
rum usu, in opere suo turbatur &  
morbus ad infelicem eventum promo-  
vetur.

§. II.

*Alexi-  
phar-  
maca.  
sola no-  
cent.* Inprimis nihil perniciosus est, quam  
radices sic dictas alexipharmacas, oleo  
volatili calido turgidas, carolinæ, ange-  
licæ, petasitidis, zedoariæ, serpentariæ  
Virginianæ, imperatoriæ, vincetoxici,  
pimpinellæ, ostrutir & ex his præpara-  
tas essentias, elixiria, theriacam quo-  
que & mithridatium, ceu genuinam  
antidotum, liberaliter offerre. Multo  
vero magis detestandi adhuc illi tan-  
topere laudati spiritus volatiles, uri-  
nosi & oleosi, ut cornu cervi, vipe-  
rarum, fuliginis, item salia volatilia,  
nec non balsamum sulphuris. Tantum  
enim abest, ut iisdem noxium expel-  
latur, ut potius intus detineatur &

partibus nervosis altius infigatur.  
Perpetua quippe hæc lex est, secretio-  
nes, quæ antecedunt excretionem re-  
crementorum in corpore, melius sub-  
liberiori & moderatiori ad emuncto-  
ria appulsu succedere, quam ubi hu-  
mores impetuose ac celeriter commo-  
ventur. Augent potius calidiora phar-  
maca anxietates præcordiorum, calo-  
rem intendunt, dissolutionem humo-  
rum promovent & miasma quoque ma-  
lignum facile, & cum impetu ex ven-  
triculo in sanguinem ac nervosas par-  
tes agunt, ut sic multiplici ratione  
sint detrimentosa. Et hæc omnino  
ita esse, loquuntur passim Medicorum  
qui pestilentia interfuerunt scripta,  
e quibus nominasse sufficit *Hildanum*,  
*Chald. de Heradia*, nec non *Thone-*  
*rum*, qui pluribus observationibus  
confirmat, alexipharmacis calidiori-  
bus usos, peste absumptos esse omnes.

§. III.

Neque tamen penitus radicum &  
herbarum sic dictarum alexipharma-  
carum usus in peste damnandus. Tum  
enim non nocent, quando miscentur  
cum iis, quæ vim earum commoven-  
tem nimis & calefacientem cicurant  
& quasi ad temperamentum redu-  
cunt, uti sunt maxime acida, cum  
nitro. Sed relatum mihi est, in pe-  
ste illa, quæ anno 1682. nostram hanc  
urbem infestavit eximie profuisse mix-  
turam ex aquæ cardui benedicti & a-  
ceti vini quatuor cochlearibus, lapi-  
dum cancrorum & theriacæ drachma,  
concinнатam & iterato datam. In pe-  
ste quoque, quæ anno 1576. totam  
fere Lombardiam pervagata, multi-  
passim & præcipue Mediolani conva-  
luisse dicuntur, succo ex ruta capra-  
ria, cum aceto, aqua cardui benedi-  
cti & modico theriacæ hausto, cor-  
pore postea ad sudorem contexto. Ipse  
*Thonerus observ. pag. 21.* testis est;  
nil profuisse in peste, præter acetum  
theriacale, inter initia ad eliciendos  
sudores exhibitum, eodemque hoc  
remedio anno MDCXLIII. grassante  
inter milites febre maligna, inte-  
gram.



gram gregariorum cohortem fuisse servatam, convalescentibus omnibus, quibus tempestive hoc acetum oblatum; exceptis paucis, qui serius a Chirurgo acceperant. In peste quoque Romana tam egregia præstitisse acetum cum ruta, radice pimpinellæ, betonica, allio & bæcis juniperi, addito camphoræ momento infusum, ut quotquot illo usi fuerunt, quamvis inter infectos degerint, pestem evaserint, fidem facit *Kircherus de peste pag. 375.* Quin propter acetum, ceu præcipuum ingrediens, aqua prophylactica *Sylvii*, in malignis morbis, & ipsa peste, magni semper estimata. Et *Gesnerus* ob id *lib. 3. epist. 27.* auctor est, ut omnia alexipharmaca ex vino, cui acetum admixtum, præbeantur. Conveniunt autem hæc alexipharmaca acidis nupta primo maxime die, ubi resolutione ac sudore opus est. Nisi enim, ex vero asserit *Mindererus*, intra viginti quatuor horas ab invasione alexiteria exhibeantur, omnia medica præsidia fore irrita.

§. IV.

*Optima in peste acida & bezoardica fixa.* Inter ea vero quæ præsentissimæ in pestilentiali morbo efficaciæ, communi omnium qui de peste scripserunt suffragio, sunt maxime acida & terrea. *Fracaistorius lib. 3. pag. 246. de morb. contag.* tam ad præservationem, quam curationem commendat hoc: recipe succi acetosellæ uncias duas, citri drachmam, specierum cordialium scrupulos duos, aceti unciam. *Mindererus de pest. cap. 15.* disertis scribit verbis: nulla est putredo, nulla infectio, nulla humorum depravatio, quæ per acida non superetur. Sane, ut liberrime loquar, si mihi vitriolicorum remediorum usus, vel interdiceretur, ego ad curationem pestis nunquam, vel certe inermis, accederem. Idem testatur *Fonsæca de ver. rat. curand. pest.* *Joannes Crato*, inquit, *Augenius de Monte Sancto*, *Martinus Rulandus* & alii in febribus pestilentialibus spiritum vitrioli summopere prodesse testan-

tur. Et ego id testari ingenue possum, me non modo cum sirupis, sed & cum conserva rosarum mixtum, felici cum successu eum exhibuisse. Ex terreis vero & bezoardicis fixioribus singulari virtute pollent antimonium diaphoreticum, bezoardicum minerale lapides cancerum, cornu cervi usum, & philosophice præparatum, succinum, terra sigillata, bolus Armena & cinnabaris. Ex quibus varie concinnari, eademque vel sola, vel acidis nupta, in usum vocari possunt. De quibus tamen omnibus pluribus legendi *Antonius Schneeberg in catal. med. simpl. adv. pest. opera Henrici a Bra. edit. Unzerus lib. 2. antid. pestil. nec non Mindererus de pest. cap. 15.*

§. V.

Deinde inter remedia in pestilentia conducibilia præcipuum fere locum tenent analeptica. Vires enim in atroci hoc morbo, tam propter gravem animi metum & consternationem, quam ob ingentem malignitatem, summopere sunt prostratæ. Hinc Medico quam maxime enitendum, ut removeat ex rebus moralibus & non naturalibus omnia, quæ eadem offendere possunt & in medicatione fugiat anodyna & valde vaporosa, graveolentia. Ad reficiendas autem vires præstabilis aqua confortans, nostra methodo sic paranda: recipe mellissæ Turcicæ manipulos quatuor, rosarum cum sale contusarum, florum liliorum convallium anam manipulum, corticum citri recentium unciam unam semis, cinnamomi acuti unciam, macis unciam dimidiam, affunde vini Rhenani mensuram, aquæ communis mensuras tres & leni igne abstrahe duas cum dimidia mensuras. Potest hæc aqua vel cum tantundem aquæ cardui benedicti remixta, vehiculum præbere sumendis reliquis medicamentis omnibus, vel sola dari, cum sirupo acetositis citri, & spiritu salis acidulata.

§. VI.

Neque minus apprimè in pestilentia  
pro-

Nec nō  
anale-  
ptica.

Item e-  
metica.



proficua sunt emetica . Nam prima & præcipua in medicatione indicatio est, ut venenum susceptum ocys citius e corpore pellatur . Jam vero miasma contagiosum primum omnium salivali sese immiscet latici, cum hoc ad ventriculum descendit & inde ad sanguinem transfertur . Hinc optimum utique consilium, ut venenum brevissima, qua subiit via, iterum exturbetur simulatque cruditates primæ regionis, quæ deleteriam ejus virtutem mirifice intendunt, per stomachi os everrantur . Sed opus est, ut cito id fiat, simulac quis se infectum & languorem cum cardialgia sentit. Sic subjuncto congruo sudorifero, prima quasi in herba jugulari posse morbum multiplici constat experientia, eodem modo ac *cap. 10. & 11.* in aliis malignis morbis id succedere pluribus docuimus . Curiosa non minus quam notabilis hanc in rem observatio *Riverii*, de quodam, qui simulac ex symptomatibus, dolore capitis & nausea, se peste laborare conjecit, illico pennam oleo illitam in fauces immisit, quaeducta per vomitum materia, primum serosa, dein flava, tandem porracea, in lectum se contulit, jusculum sumsit, sudavit, & illico convaluit .

## §. VII.

Sub certa  
ta con-  
ditione  
admis-  
senda  
venæse-  
ctio.

De venæsectionis utilitate non æque inter omnes convenit, sed sunt qui laudant, sunt qui damnant. Optime præcipit *Celsus lib. 3. cap. 4. desiderat*, inquit, *propriam animadversionem in febribus pestilentialibus casus* . In hac minime utile est, fame aut medicamentis uti, aut alvum ducere . Si vero vires sinunt, sanguinem mittere optimum, præcipue si cum dolore febris est . Neque minus fidem facit *Riverius in opp. tit. pest.* se in pestilentiali parotide, quæ plures necavit, venæsectione, moderata tamen, ad uncias aliquot, & repetita, plures servasse . Nos quid de ea censeamus, supra jam in epicrisi ad *Langii* methodum exposuimus . Omnia autem huc redeunt: nunquam in principio post

invasionem statim, ubi terrore & metu ager jactatur, habet locum, sed secundo vel tertio die, si urget plethora & vires sinunt, admittenda moderata .

## §. VIII.

Sic etiam de nitri usu ambigunt medentes . Qui rejiciunt, putant illud nimium refrigerare & expulsionem veneni ob id resistere, pestis etiam venenum jam tum esse stupefactivum, putredinosum ac diarrhœas inde metuendas fere lethales . Qui probant, illud non secus ac in aliis exanthematicis inflammatoriis & malignis febribus, diaphoreticis nuptum, egregie prodesse contendunt . Sed lis facile dirimenda . Spectanda sunt individua eorumque natura & temperamenta & expendenda morbi symptomata . Si corpus est plethoricum, temperamentum cholericum, vel sanguineo-cholericum, æstus acris, febris intensa cum siti & dolore capitis; nitrosa, refracta dosi cum bezoardicis pulveribus data, commodum locum habent omnino . At ubi torpor & somnolentia, pulsus debilis, extrema frigida & timor præcessit ingens, abstinendum a nitrosis esse docet ratio . Semper tamen tutius est, si nitrum sociatur camphoræ, quo conubio camphoræ vaporosa & nitri refrigerans indoles optime cicuratur & medicina emergit, non modo alexipharmaca, sed & inflammationi efficaciter resistens . Memini ego, me olim quum Londini versarer, a peritissimo Chirurgo sene, qui pesti Vienne si interfuerat, audivisse, se summo cum fructu usum esse electuario, quod vocabat nigro, composito ex rob sambuci & mellis ana libra dimidia, pulveris pyrii uncia & camphoræ drachma, ad unam vel duas drachmas dato . Et *Giselerus* quoque se in peste Brunsvicensi summo cum fructu adhibuisse pulverem pyrium affirmat .

## §. IX.

Perite præterea tractandi critici illi tumores pestilentem morbum solventes . Bubones quidem, si cito pro-

rum-

Ac al-  
troso.

Bubon-  
& ap-  
thraci  
tracta-  
tio.



rumpunt & cito maturant, boni, si autem statim redeunt, metuenda aut mors ipsa, aut minimum gravia symptomata, ex inguinalibus paralyfis & gangrena ipsius lateris, ex mento relapsis deglutitio solidorum & liquidorum intercepta, cum angina ut plurimum lethali. Periculosiores etiam qui pone aures, pessimi quibus carbunculus insidet & lethales circulo livido septi. Carbunculi deteriores semper quidem bubonibus, sed quo majores, quo nigriores & quo propiores cordi, eo magis periculosi. In utrisque ex internis optima sudorifera & quæ succos ad ambitum corporis agunt. Exterius in bubonibus, si tardius prodeunt, attrahentia imponere jubent, cucurbitulas, quin vesicatoria. Si protuberant, suppuratio promovenda cataplasmate ex ficibus, radice liliorum alborum, cepis sub cineribus tostis, cum farina lini, melle & croco. Vel imponenda suppurantia simulatque discutientia, emplastrum diachylon tam simplex, quam cum gummatibus, de mucilaginibus, nec non de meliloto. Ubi suppurarunt, aperiendi & balsamo *Arcae* nonnunquam unguento basiliconis remixto, mundandi & consolidandi, ita tamen, ut non nimis cito coeant, sed aliquandiu materiæ saniosæ concedatur effluxus. Anthracibus, quia humor jam corruptioni obnoxius, non admovenda suppurantia, sed curandum, ut crusta decidat, quem in finem Loimiatri confinia digestivo inungere & acre emplastrum superponere jubent. Crusta delapsa unguento *Ægyptiaco*, vel fusco *Vurzii* cum melle rosato tractandi. Quod si autem corruptio sphacelosa adest & latius serpere videtur, prohibendum hoc scarificatione sufficienti & applicatione liquoris, qui potenter inflammationi ac putredini resistit, expertæ sæpius a me virtutis, parandi, ex uncis quatuor spiritus vini rectificati drachmis duabus camphoræ, drachma croci & tantundem nitri artificialis, quod ex spiritu salis ammoniaci urino-

Tom. IV.

so & spiritu nitri confit, ac a vini spiritu perfecte solvitur.

## §. X.

Demum quoad regimen in genere *Regime* adhuc tenendum, quod, sicuti in omnibus acutis exanthematicis morbis, nimius lecti & conclavis calor omnino studio, ceu summopere noxius vitandus, ita multo magis ipsa in pestilentia. Vicissim vero arcendum etiam frigus, ne tumorum eruptio & difflatio subtilioris venosæ materiæ per cutis poros ullo modo intercipiatur. Temperata potius sint omnia, ut jam in antecedentibus passim monuimus iterumque monemus.

## CAPUT XIII.

## De Febre Erysipelacea.

## Theses Pathologicae.

## §. I.

**A**D exanthematicas febres merito *Diser-* etiam refertur erysipelacea, in *ptio* qua sub intensiori sanguinis & humo- *morbi.* rum motu, serum acre, sulphuræ, causticæ naturæ, ad partes extremas, cum tumore, rubore, ardore & dolore propellitur.

## §. II.

Certe non tam levis, innocens & *Malle* simplex est erysipelacea febris ac vulgo *conve-* putatur, sed gravis sæpe, periculosa & *nit cū* non raro lethalis; quia multum affi- *peste.* nitatis alit cum morbo omnium atrocissimo, ipsa febre pestilentiali. Nam sicuti hæc subito cum intenso horrore, aestu, virium prostratione, vehementi dorsi capitisque dolore, vomitu quoque & delirio accedit; ita & sæpissime erysipelas statim in principio iisdem symptomatibus stipatum adoritur. Sicut deinceps in pestilenti morbo inter tertium & quartum diem materia maligna ad corporis ambitum propellitur, remittente postea paululum symptomatum atrocitas; ita similem successum servat erysipelacea febris. Quemadmodum porro pestilentialis

L

ve.



venenata materia maxime glandulas, & quidem inguinales, invadit ibique dolorem primum ac tensionem efficit; sic etiam gravi erysipelate affecti, primo tumorem, ruborem ac dolorem sentiunt in inguinum adenibus, unde postea materia ferventissimæ & adurentis quasi naturæ descendit ad pedes.

Uti quoque materia pestilentialis sedem sæpius figit in glandulis mammariis, axillaribus & parotidibus; ita eadem observantur in erysipelate, quod ubi capiti imminet, patiuntur primum parotides, si mammis, axillares. Pestifera præterea materia in glandulis abscessus format ac partibus extremis facile gangrenam & sphacelum inducit; sacrum autem ignem axillares præsertim & mammarias glandulas sic sæpe adurere, ut pus contrahant & artus foeda corruptione afficere, omnes qui medicinam faciunt uberius norunt. Demum sicuti in peste nil periculosius, quam si materia expulsa ab externis ad interiora relabatur; sic eadem noxa idemque periculum a retrocessione erysipelatis metuendum.

## §. III.

*Differt a peste inflammatione & phlegmone.* In eo tamen erysipelacea a pestilentiali febre differt, quod non ex contagio, sive causa externa, sed interna oriatur, nec contagiosa sit & alios sola exhalatione inficiat, nec tam virulenta sit & cum mortis periculo juncta. Inflammatio autem erysipelacea ab aliis his distinguitur, quod tumor in illa depressior, dolor non tam tensivus, color quoque roseus & floridus, qui in his magis fuscus. Neque minus a phlegmone discernendum erysipelas. Nam in hoc inflammatio magis superficialis, in latum diffusa & pressa colorem exuit, materia quoque pauca & tenuis, in illo autem profundior inflammatio, subjectam non modo cutem, sed & pinguedinem & musculos tangens, attractu ob duritiem colorem non deponens, ac fit a stagnante impuro sanguine, propterea facilis in gangrenam est transitus.

## §. IV.

*Est vel morbum.* Ipsum autem erysipelas a Practicis vulgo distinguitur in verum, quod & scorbuticum vocant. Simplex facilius obsecundat commodis remediis internis & externis ac tantum in superficie cutis hæret; nothum autem magis est chronicum, ob succorum impuritatem altius radices agit, difficile curatu & facile abit in ulceramali moris. Subdividunt igitur hoc iterum in illud, quod cum, & quod sine exulceratione est, in exulcerato plus utique periculi metuendum, & ægris, & medicis, & per longum sæpe tempus detinet ægre consolidandum. Porro erysipelacea febris quandoque idiopathica, sive morbus primarius, quandoque symptomatice & morbus secundarius. In anasarca quippe, ascite, item diuturno ictero, flavo & nigro, accedit haud raro symptomatice erysipelas & cito ægrum jugulat. Sæpe etiam complicatur vulneribus partium nervosarum, præsertim cranii ejusque membranarum, item fracturis ossium, actum quoque in anticipi versatur æger.

## §. V.

*Differt ratione corporum.* Deinceps non in omnibus unitus semper ejusdemq; indolis est erysipelas, ac vehementiæ. Etenim in quibusdam, juvenibus maxime, materia, nec adeo virulenta, nec adeo multa, levius facit atque benignius, quod neque glandulas occupat, neque febrem intensam movet, sed secundo mox die prodit, cum rubore, tumore ac dolore in pedibus, & sub perspiratione debita, vel leni remedio domestico, prompte discutitur. Contra ea in cacochymicis, senibus & impuris corporibus, ubi materia, & copiosior, & deterior, systema nervorum & vasorum gravius exagitur, febris est acrior, dolores & inquietudines acerbiores, ac nisi exquisita medicatione excipiantur, diu affligit & ægrius cedit. Differt quoque erysipelas ratione partium quibus incumbit & variis distinctis stipatur symptomatibus. In pedibus nitorem in-



inducit tibiis, quin, si gravius, cum dolore ad crura usque propagatur & levi attactu exacerbatur. Faciem si occupat, intumescit hæc successive, ru- fescit, interspersis copiosis aqueis ve- siculis, oculi a tumore clauduntur, spiritus difficulter trahitur, nares & fauces aridæ valde sunt & siccæ & tor- por plerumque ac sopor conjunctus est, quin ob propinquitatem cerebri metuendum, ne in phrenitidem, vel lethargum degeneret lethalem. Mam- mas ubi erysipelas tangit, intumescunt, indurescunt, sæpe lapidis instar, cum exquisito dolore & facile sequitur sup- puratio. Sub axillis ibique positis glandulis, acerbissimo stipatur dolore & plerumque in abscessum definit. Umbilicalem regionem in infantibus frequentius infestat ac inde per abdo- men spargitur, cum gravibus pa- thematibus, funesto ut plurimum e- ventu.

## §. VI.

Zoster.

Ex peculiaribus erysipelatis generi- bus est illud nostro tempore paucis co- gnitum & a Veteribus quoque parum notatum, quod *Plinius* vocat zoster, nostri zonam. Gravioribus hoc prodit symptomatibus & supra umbilicum medium corpus ambit instar cinguli, ex præcordiali regione per dorsi tra- ctum, latitudine, ut plurimum aliquot digitorum transversorum, cum inten- sissimo ardore, insidentibus pustulis acribus, instar ignis urentibus. Sed perniciosum est ac interdum necat. Omnium vero, ut ita dicam, mali- gnissimum est, quod post magnum vi- rium languorem in corporibus senili- bus, eminentius cacochymicis, non- numquam etiam in febribus malignis & pestilentialibus, sub papilla & in cordis regione, vel etiam manibus a- liisque exquisitoris sensus partibus, prodit, lividum mox fit, demum a- trum, morte cito subsequente, quod *Platerus* in primis opp. tom. 2. pag. 23. sub nomine maculæ latæ describit.

## §. VII.

Ad causas hujus febris quod attinet,

materialis nequiquam simplicis, bilio- se, vel falsæ, sed potius causticæ, acris & putrefacientis indolis esse videtur. Vehemens enim ipsius in partes ner- vosas operatio, totius corporis œcono- miam functionum illico graviter tur- bans & vigiliam, delirium, inquietudi- nem, anxietatem, corporis jectigatio- nem, vomitum & sensuum turbatio- nem inducens. Longe gravior adhuc, quando expulsa materia recrocedit, quippe quæ tum haud secus ac vene- num, cito deliria, inflammationem in- ternam, asthma convulsivum & spasti- cas strictureas ciet sæpe lethales. Ne di- cam gangrænam & sphacelum, quæ erysipelas in primis male tractatum fa- cile excipiunt, virulentiam materiæ luculenter satis prodere ac indicare. Unde vero hæc materia trahat ortum, non adeo quidem in expedito; ego ta- men crediderim, ex bile variis ex cau- sis vitata & corrupta reddita, in duo- deni flexura stagnante diutius, ibi cum succo pancreatico confermentata quasi & caustica acri facta, eandem conflari, inde successive ad sanguinem & cere- bri spinalisque medullæ membranas ferri, universum nervosarum & vascu- losarum partium systema male affice- re, febrem efficere, donec demum ad ex- ternum corporis ambitum pellatur.

## §. VIII.

Ad concipiendam hanc erysipelatis materiam, dispositi præ reliquis tem- peramento sanguinei & sanguineo- cholerici, plethorici, juvenes viri, nec non feminae gravidæ, in quibus tamen benignioris esse solet naturæ. Sed in scorbuticis, senibus & cacochymicis, item feminis, suppressione, vel emâsio- ne, aut retentione mensium laboranti- bus, deteriore obtinet genium. Cre- brius etiam & facili ex causa eidem ob- noxii, qui a parentibus eodem affectis prognati, & qui semel passi, sæpius po- stea ipsius experiuntur insultum, præ- fertim si senes & scorbutici. Ego qui- dem anniversaria, æquinoctialia, quin singulis mensibus redeuntia erysipela- ta notavi. Sed de his, in senibus maxi-

Causa  
mate-  
rialis.Subje-  
cta.Et ma-  
culala-  
ta.



me & cacochymicis, verum etiam deprehendi *Hippocr. in aphor.* effatum: quod qui sæpe erysipelate corripiuntur, tandem eo moriuntur.

## §. IX.

*Causa  
proca-  
rartice*

Quæ autem hanc intus delitescentem erysipelatis materialem causam evolvere & in actum deducere possunt, ex rebus non naturalibus sunt multa. Inter hæc primum ac præcipuum locum sibi vindicant animi affectus vehementes, ira præsertim ac terror, & consignavit inter alia *Fallopius* exemplum feminae, quæ, quotiescunq; irata, erysipelas nasi incurrit, potu aquæ hordei facile discutiendum. Excludit dein erysipelas aer bimis calidus & intensior solis ardor, nec non vicissim subita & vehemens corporis, vel pedum refrigeratio. Idem facit cibus calidus, potus exæstuans, crebra ebrietas, nec non balneum fervidius. Inprimis vero ad exclusionem hujus mali faciunt evacuationes sanguinis tam artificiales, per scarificationes & venæsectiones omissæ, quam spontaneæ per nares, uterum & sedis venas, interceptæ. Speciatim capitis erysipelas frequentius accidit his, qui diu noctuque in aere humido & pluvioso degunt, item senibus. In mammis solenne est puerperis, præsertim lactantibus, post gravem terrorem, tumque illico sistitur, lactis effluxus, mammae duræ fiunt & a lacte coagulato tumescunt.

## §. X.

*Eventus  
bonus.*

Interim erysipelas, si cito & sine adeo vehementi commotione erumpit, nec corpus sordidum, nec locus nobilior, aut cum nervosis partibus communicans, non tantopere periculofum, sed sub auctiori perspiratione, adhibitis congruis remediis, post unum aut alterum diem, tumor sensim subsidet, ardor ac dolor evanescit, color roseus mutatur in flavum, cuticula finditur, in squammas fatiscens secedit & morbus ex voto solvitur. Quin salubritatis plane notam quandoque fert; ac novi, alios morbos, præsertim asthma convulsivum, nec non colicam convulsi-

vam, erysipelate superveniente, fuisse feliciter sublato.

## §. XI.

Sed ubi erysipelas magnum, profundum, succi corporis eminentius impuri, pars exquisitioris sensus, periculo, uti supra passim dictum, non vacat. Aut enim rubor livorem & nigredinem induit ac brevi in sphacelum transit funestum, aut inflammatio discuti renuit, suppuratur, ac ulcera mali moris, fistulas & gangrænam inducit. Minimum in sanguineo-phlegmaticis & cacochymicis post erysipelas remanet ingens tumor pedis, aut tibia magnitudine tripla naturalem statum excedat, isque tumor difficulter admodum abigitur. Qui autem hoc morbo moriuntur, febre pereunt, quæ ut plurimum juncta est cum difficillima respiratione, interdum cum delirio, aliquando cum sopore & intra septimum plerumque diem catastrophe accidit lethalis.

## §. XII.

Male etiam cedit, quod perversa medicatione excipitur. Nam priscum *Hippocratis aph. 25. Sect. VI.* est dictum, quod si retropellatur, fit perniciosum, quin funestum; id quod sæpius incidit. Novi ego post vomitorium & validum purgans recessisse erysipelas, insequutam ventriculi inflammationem & mortem. A venæsectione etiam ad interiora revocatum esse & vagum postea cum longe majori incommodo factum fuisse, vidi. Observavi quoque repulso ab ipsa camphora cum minio & bolo cruris erysipelate, excepisse febrem intensam, stomachi dolorem intolerandum, respirationem mire laboriosam, vomitum biliosum, viriū languorē appetitusq; prostrationem, nec prius conquievissæ hæc pathemata, quam datis antispasmodicis leniterq; diaphoreticis & revocato ad pristinam sedem per vesicatoriū erysipelate. De capitis erysipelate repellentibus, frigidis, adstringentibus, vel etiam nimis spirituosus, nec non camphoratis linimentis tractato; compertum habeo,



habeo, quod induxerit veritiginem, affectus soporosos, anginam phrenitidem, linguæ paralyfin, quæ mala senioribus & scorbuticis haud raro fuerunt funesta. Neque minus frigida, saturnina, oleosa, linimenta spirituo-  
sa, largiter camphorata, exterius ad-  
mota, malum erysipelatis eventum pro-  
curant ac ut in ulcera mali moris, gan-  
granam & sphacelum degeneret faci-  
ciunt, uti pluribus *Hildanus Cent. I. obs. 82. Moenichen obs. 2. pag. 245.*  
item *Timæus a GuldenKlee lib. 6. cas. 33.* testantur.

Curatio.

§. I.

Indica-  
tiones  
primæ.

Recta erysipelati medendi metho-  
dus tribus his absolvitur indicationi-  
bus: I. ut motus iste febrilis naturæ  
nullo modo impediatur, sed potius  
si deficit, promoveatur, si excedit,  
ad temperamentum reducatur; II. ut  
materia subtilis caustica, nervosis  
partibus insidens, temperetur atque  
ad se & excretionem præparetur; III.  
ut stasis lymphæ putridæ & causticæ  
inflammatoria in partibus externis di-  
scutiatur & ad perfectam expulsionem  
traducatur.

§. II.

Præsidia  
prima.

Inter ea præsidia, quæ motum fe-  
brilem naturæ quodammodo languen-  
tem excitant & promovent, ex classi-  
cis remediis laudem omnino meretur  
mixture simplex, quando cum spiri-  
tu nitri dulci, aut melius adhuc liquo-  
re nostro anodyno minerali, misce-  
tur, vel si essentia scordii, aut pim-  
pinellæ albæ, non adeo spirituoſa &  
concentrata, cum tantundem liquo-  
ris anodyni nostri confunditur & ad  
viginti, vel triginta guttas porrigitur.  
Juvat quoque expulsionem infusum  
theiforme ex herba scordii, floribus  
sambuci & semine fœniculi compoſi-  
tum, nec non ex temperatioribus pul-  
vis bezoardicus noster, aut Ludovi-  
cianus, Motus, spasmosque exceden-  
tes moderatur emulsio, ex aqua flo-

Tom. IV.

rum sambuci, tiliæ, acaciæ cum se-  
minibus quatuor frigidis majoribus,  
nec non semine napi, præsertim si lo-  
co vehiculi usurpetur, cum pulvis no-  
ster bezoardicus, vel solus, vel cum  
aliquot nitri & cinnabaris granis, as-  
sumatur. Idem facit simulatque ex-  
pulsionem sustinet mixtura ex una spi-  
ritus bezoardici Buſſii & tribus liquo-  
ris nostri anodyni partibus. Ubi vero  
motus legitimi, nec nimii, nec defi-  
cientes præsto, utilissimum omnino  
domesticum illud remedium, ex rob  
sambuci uncia, cornu cervi uſti dra-  
chma, ex aqua florum sambuci sum-  
tum, cui ego in calidioribus cum fru-  
ctu adjicere soleo decem, vel duode-  
cim nitri puri grana.

§. III.

Ad demulcendam humorum acri-  
moniam materiamque recte præpa-  
randam, præter jam dicta, spectata  
sunt virtutis decocta loco potius ordi-  
narii sumta, ex rasura cornu cervi,  
radice scorzonæræ, althææ, liquiritiæ  
& chinæ cum semine fœniculi, item  
decoctum avenaceum. Discussio sta-  
leos inflammatoriæ, per externa per-  
ficienda. Sed nihil fere ex his sine pe-  
riculo adhiberi potest ac debet, quam  
pulvis ex floribus sambuci & radice  
liquiritiæ, reſectis omnibus unctuosus,  
spirituosus, terreis, adstringentibus, sa-  
turninis, sub temperato calore lecti &  
hypocausti, subinde inspersus.

Secunda  
& tertia  
indica-  
tiones.

Cautela, & Observationes  
Practica.

§. I.

Perpetua in practicis est regula: in  
acutis & exanthematicis febribus, cor-  
pus semper in blanda & continua dia-  
phoresi esse servandum, quo sangui-  
nis æqualis ad superficiem corporis fiat  
& maneat motus, ac cum hoc ex-  
crementitia materia jugiter adveſta  
diffletur. Hinc merito etiam idem in  
erysipelate tenendum, cum quoad to-  
tum corpus, tum maxime quoad par-  
tem affectam, quo & dolores mitigan-  
tur,

Regi-  
men sit  
sempe-  
ratum  
diapno-  
ticum.



tur, & discussio egregie promovetur.

## §. I.

*In topi-  
cis idio-  
syncra-  
sia spe-  
ctanda.*

In externorum usu cautione opus est maxima, ne noceant & vel repellant, vel in ulcus convertant erysipelas. Quinquum cujusq; fere corporis peculiaris sit idiosyncrasia, sive specifica quædam & individualis sensibilitas, quæ quam maxime in cute, seu parte nervosa, viget; hanc etiam ob causam in vitis cutis eo majori cum circumspeditione topica admoveenda, quia non omnia fert omnis. Observavi enim sæpissime in mammarum erysipelate, admoto innoxio, & in aliis vel centies probato emplastro, brevi tempore auctam potius fuisse cum dolore inflammationem, quæ remoto emplastro illico remisit. Hinc tutissimum nihil applicare, nisi forsan species pægoricas, ex floribus chamomillæ, sambuci, meliloti, radice liquiritiæ, farina fabarum, in forma sacculi, vel pulveris.

## §. III.

*In sup-  
puratione agē-  
da.*

Quo si adhibitis licet efficacibus internis, & externis discutientibus, erysipelaceus tumor tamen manet, rubor livescere incipit, dolor profundius hæret & ad periostium pertingere videtur, ad ulcerationem redit erysipelas. Tum igitur transeundum ad ea, quæ suppurationem promovent, ita tamen, ut simul corruptioni putredinosæ occurratur. Hunc in finem utilissimum emplastrum diachylon simplex, rite confectum, adjecta sufficienti quantitate camphoræ & croci, vel etiam emplastrum Barbettæ saturninum saponatum, superpositis epithematibus balsamicis, quæ corruptionem arcent. Quando his pus contractum & profundius hæret, aperiendus tumor lancetta & pus successive, non sine & semel, evocandum. Ne autem in glandulosis maxime locis abscessus in fistulosa & mali moris ulcera transeat, post materiæ secessionem, injiciendus liquor balsamicus, ex tinctura florum hyperici, essentia balsami Peruviani, myrrha electa & aliquot guttulis spiritus terrebinthinæ.

## §. IV.

Quando erysipelas nimis profundum & magnum, sphacelum, ex colore in bruno rubicundum vergente & symptomatum post expulsionem perduratione, cognoscendum, minatur, præter intera inflammationi & putredini resistentia, nitrum maxime cum momento camphoræ, externe spirituosæ & roborantia, conficienda ex aqua calcis vivæ, spiritu vini camp horato, aceto-vini cum lithargyrio, admixta quoque essentia scordii & myrrhæ, crebrius calide cum linteis duplicatis applicanda.

## §. V.

Sanguinis missio in erysipelate quandoque noxia, quandoque utilis. Ne igitur delinquat artifex, tenendum: si invadit erysipelacea febris plethoricos, potibus spirituosiss assuetos, primis statim diebus vena in brachio pertundenda. Sic enim liberior fit sanguinis progressus & expulsio materiæ ad cutem promovetur. Tanto vero magis utile id est, si caput petit erysipelas, tumque gravia hoc auxilio præscinduntur symptomata. Consultum quoque est interdum loco venæ sectionis, cucurbitulis cum scarificatione in cervice uti. Semper tamen post sanguinis subtractionem curandum, ut expeditus & æqualis manet perspirationis successus.

## §. VI.

In erysipelate scorbutico, quod diu detinet, in usum vocanda sanguinem depurantia & leniter laxantia, cum diaphoreticis, ita quidem, ut per aliquot dies alvina regio expurgetur, dein per aliquot tempus subjungantur diuretica ac diaphoretica, idque alternatim aliquoties repetatur, simulque pro potu ordinario decoctum temperans ex lignis & radicibus mucilaginosi, cum amaris, præsertim cum radice cichorei taraxaci & passulis, bibatur.

## §. VII.

Quod sæpe recurrit erysipelas, non sine periculo est. Hinc eo annitendum

*Sphacelus imminens arcedens.*

*Sanguinis missio conditio-nata.*

*Scorbuticus internis sanandus.*

*Recidivans quibus arcedit.*



dum Medico, ut corpus ab hoc malo vindicaret. Ad quod obtinendum ego quidem nihil efficacius deprehendi, quam debitum sub congruo regimine & victu, præparato prius, sive sanguinis missionem, corpore, institutum aquarum mineralium usum, eoque nomine præ reliquis laudem merentur acidulæ Egræ, thermæ Emsenses, nec non Carolinæ mitiores. His autem deficientibus, venæsectio, vere & autumnæ præsertim, purgationes per epicrasin & ea quæ sanguini repurgando serviunt, cum exacto in vita victuque moderamine, operam locavit commodissimam.

*Enarrationes Morborum.*

OBSERVATIO I.

*Erysipelas exulceratum.*

Vir triginta annorum, pallidus facie & vitæ sedentariæ addictus, gravi terrore ex oborto improvise incendio fuerat perculsus ac per integrum postea diem sub cælo humido & pluvioso degerat. Die post ingens horror per horæ spatium totum concussit corpus, sequutus calor intensus, cum dolore tensivo ac pungente in inguine, lassitudine, impotentia dextrum pedem movendi, conatu vomendi & somno inquieto. Tertio post invasionem die rubicundus & ardens tumor dextrum pedem occupavit. Adhibita hinc varia paregorica externa parabilia & domestica, interne vero nihil præter copiosum & frigidum sub calore potum, datum. Cessavit tandem tumor & dolor pedis, sed collectus alius ingens in malleolo tumor, cum ardore, tensione, rubore & pulsatione. Applicata iterum externe varia emplastra & linimenta spirituosæ, at incassum. Hinc in suppurationem tendit. Ad quam promovendam, admotum cataplasma emolliens. Successit etiam suppuratio, sed stipata febre & atroci circa partem affectam dolore. Apertus demum abscessus & rite balsamicis mundatus fuit & tractatus, ut omnia bene cedere

viderentur. At quum ex improvise ira corripere, die post denuo ipsum incessit horror, intensus per totum corpus ardor, ac obortus in genu sinistro infra flexuram tumor, nulla arte discutiendus. Adfuit simul febris, vigilia perpetua & inappetentia, æger ob tumoris molem ac dolorem nec pedem extendere, nec eo in latere decumbere poterat. Tandem successit suppuratio, sed generatus in femore abscessus, qui ingentem putis copiam ex cavo quod sibi in musculis suprapositis fecerat, fudit, ægro interim penitus contabescente. Nihilominus tamen injectionibus, variis emplastris, externe & interne congruis sanguinem depurantibus adhibitis, æger sanitatis restitutus.

*Epicrisis.*

Cachecticis corporibus frequens malum est erysipelas, neque in his tam facile discutitur ac in sanguineis & cholericis. Ob profundiorum tubulorum obstructionem ferique viscositatem, vel in abscessum, vel si incautius constringentibus, frigidis & quæ tonum partium destruunt tractatur, in sphacelum degenerat. Terror autem vehemens ad interiora, cor nempe & pulmones, pellit sanguinem, eodemque inde postea iterum repulso, febris suscitatur, viscerum humores cum impetu minimis tubulis impacti hærent & inflammationem faciunt, idque facile in pedibus, per quos sanguinis circulus jam tum difficillimus. In hoc quidem erysipelas gravioribus stipatum fuit symptomatibus, ob partes quas occupavit valde nervosas ac tendinosas, quarum irritatio & molesta affectio, ut semper cum exquisitiori doloris sensu juncta, ita febrem, anxietatem, inquietudinem aliaque peperit utique. In his igitur partibus summa semper in usu topicorum cautione opus est, nec nimis calida, nec acriora, nec spirituosæ aut emplastra admovenda; sed potius demulcentia cum diaphoreticis re nervinis, quo impediatur



suppuratio ex qua ulcera difficulter sanabilia emergunt.

## OBSERVATIO II.

*Erysipelae  
in senibus.*

Vir sexaginta & octo annorum, carnosus & habitior, fluxui hæmorrhoidali ante obnoxius, jam a biennio carens, ciborum tamen appetens, tempestate humida & calida fecerat iter & ira commotus largum spiritus vini haustum ingurgitarat. Vesperidomum redux correptus est horrore cum vomitu, quem excepit intensissimus calor, caput occupans, somnum turbans mentisque alienationem inducens. Die post insignem in inguine tumorem & ardorem sensit, ac tertio die dolor, rubor & ardor totum femur cum tibia occupavit. Inde remiserunt quidem priora symptomata, pulsus tamen mansit celer & æger insuperabili sopore oppressus jacuit. Medicus accitus interius porrexit tincturam volatilem bezoardicam, naribus admovit spiritum salis ammoniaci & loco affecto applicuit cataplasma ex aqua florum sambuci, aceto, lithargyrio, myrrha & bolo. Sed sopor discuti renuit, quin adauctus potius, ut plane non excitari posset æger. Sexto quoque die color pedis rubens in brunum & nigrum conversus intumuit, venter a prima statim invasione oclusus, injectos quinque clysteres sine operatione reddidit, die octavo accessit difficilis respiratio & post hanc lethum.

*Epicrisis.*

In senibus & plethoricis erysipelacea febris multum alit periculi. In nostro delirium secundo statim die indicavit congestionem sanguinis & quidem impuri ad caput, quæ postea etiam gravis soporis extitit causa, Medicus vero perperam egit, quod nec primo statim die venam secare, nec alvum subducere iussit, sed potius interne & externe volatilia sanguinem magis exestuantia adhibuit. Male etiam parti affectæ imposuit adstrin-

gentia, quibus discussio & exhalatio non modo impedita, sed etiam stasis obfirmata & sanguis expressus ad caput vergit, præsertim quum intestinorum tunica etiam essent strictæ & alvus obserata, postea tamen decubuit quoque sanguis ad pectus, & ob difficilem per pulmones cursum, anhelosum spiritum & mortem demum induxit.

## OBSERVATIO III.

Feminam novi triginta annorum, *Erysipelae* proceram, teneram ac biliosam, quæ *las co-* per aliquot annos alvum segniorem & *plis* crebriorem iram fuerat experta. Hanc *corru-* initiante autumnno, sub aquilonis tem- *ptu in-* pestateprehendit erysipelas in manu *ternis* sinistra, cum digitorum tumore ac rubore. Applicata topica varia & inter alia albumen ovi cum alumine conquassatum. Depulsum etiam malum, sed brevi post rediit idem, non veropræstiniscedere voluit remediis. Tumor quidem cum rubore discussus, dolor autem lancinatorius, cum formationis sensu in digitis eorumque articulis diu perstitit, quin sub victu minus laudabili crebrioriq; animi commotione increvit quotidie. Ruptus tandem tumor ploravit materiam ichorolam acrem, cutem passim erodentem & ulcus enatum dolens & pruriens, noctu præsertim. Licet etiam varia externa & interna sanguinem depurantia adhiberentur, succrevit tamen alius dolorificus glandulosus in junctura brachii tumor, qui ad digitorum apices radiumque quasi vibrabat, sive lineam rubicundam, cum intensissimo cruciatu. Sumsit postea malum magis vires, digiti intumuerunt, aperti tandem, excrevit caro copiose spongiosa & ichor fetidus rodens exstillavit, appetitu & viribus simul prostratis somnoque deficiente. Admoverant chirurgi imperiti, affectæ parti valde acrida, calida, decoctum ex vino cum spiritu vini camphorato, balsamo sulphuris & oleo tartari fetido; simulque interius deco-



decocta lignorum & pilulas purgantes mercuriales liberali manu dederant sed frustra. Applicarant postea linimentum ex vino myrrha, thure, cerussa, herba chelidonii, floribusque sambuci, cui aliquid mercurii præcipitari admixtum, quo acris defluxio intra binas hebdomades substitit. Tumor quoque in junctura litu cum spiritu vini camphorato, cui balsamum sulphuris admixtum, discussus. Sed non ita multo post femina insignem virium incurrit languorem, plenariam appetitus defectionem, facile animo defecit & obid supina in lecto jacuit, crebrius præterea doloribus in manu, dorso ac pedibus, nec non ventris torminibus afflicta, pulsus quoque justo fuit languidior, cutisque mox frigore, mox volatico æstu perfusa. Ego in consilium vocatus, pulverem ex lapidum cancrorum, antimonii diaphoretici ana drachma, nitri depurati, arcani duplicati ana drachma dimidia, cinnabaris nativæ granis xv. in octo doses divisum, bis quotidie dedi. Pro potu ordinario suasi decoctum ex radicibus temperantibus, & jussi, ut mane in theiformi infuso sumeret quinquaginta guttas mixturæ ex liquoris nostri balsamici uncia dimidia, essentiæ croci, liquoris nostri anodynii ana drachma. Consilium quoque dedi ut subinde pilulis nostris uteretur, & affecto brachio inuri permetteret fonticulum. Quibus per tres hebdomades usurpatis, exspirarunt sensim atrocia pathemata, appetitus rediit, somnus factus quietior, dolor remisit & vires cum sanitate restitute.

*Epicrisis.*

Gravia & insolita pathemata ex impuritate scorbutica, sive feri acris biliosi redundantia, si in partes extremas tendinosas & nerveas critico quasi motu amandatur, pullulare uberius certe hæc docet historia. Periculosum etiam in ejusmodi casibus topicorum usui insistere, quorum non alia vis, quam ut tonum partis affectæ variis modis destruant, materiam a sangui-

ne separatam, vel ad interiora pelant, vel ejus discussionem impediant & statim firmiorem faciant; ut symptomata non possint non aut magis incrementum, aut diutius affligere. Longe tutior & facilior hisce malis medendi ratio est, si internis discrasia humorum emendantur, materiæ acris affluxus divertitur, eademque per alia emunctoria, cutem, urinam, aut alvum, excluditur.

OBSERVATIO IV.

Femina generosa, triginta aliquot annorum, sanguinea, spongiosa, & *Erysi-* carnosa, postquam valens antea & *pelatis* menstruam purgationem etiam recte *creber* experta, venationi interfuisset ante *in cura* & post solis occasum, sub coelo nu- *jus non* bilo, autumnali, pluvioso & corpus *V. S.* ob id non leviter perfrigerasset, brevi *sen Ca-* post subito correpta est ingenti horro- *rolinis* re, quem excepit æstus mordax cum *depul-* inquietudine & tertio die erysipelas *jus.* in crure. Brevi hoc depulsum, ne autem rediret, Medicus ortum ejus ex sanguinis plenitudine arcessens, suavitute pedis vena emitteretur sanguis largiter. Sed quum ægra Octobre peregrinationem institueret, rediit idem malum, & longius quam prius perstitit. Medicus igitur vulgari jam hypothese, omnium morborum causam plethoram esse, addictus, eadem heic etiam subesse opinatus est, eaque propter rursus venam secari jussit, largiterque extraxit sanguinem; nihilo tamen secius post binas hebdomades denuo infestavit erysipelas eundem locum. Licet etiam postea pulveres absorbentes cum nitro, scarificationes & infusum laxans in usum vocaret, aliud tamen effecit, nihil, quam ut binis quibusvis mensibus erysipelas recrudesceret, pedis autem affecti tumor & imbecillitas persisteret semper. Demum ego in consilium vocatus, commendavi Carolinarum internum & externum usum, cum exacto in vita victuque moderamine & abstinen-

tia



ria ab acidis, dulcibus, fructibusque horraïis, quibus mire antea ægra deletata: injunxi quoque frequentem usum elixirii nostri balsamici, ex amaris extractis, corticibus citri & sale tartari cum vino Hispanico confecti, sanguinis autem missionem interdixi. Inde erysipelas primum depulsum, subsequuti vero dolores rheumatici, per aliquot hebdomades affligentes, qui tamen repetito insequenti anno Carolinarum usu, etiam prorsus abacti & ægra perfectam recuperavit sanitatem.

#### *Epicrisis.*

Perperam omnino heic a Medico ad recidivam arcendam commendata sanguinis missio eaque repetita. In nostra enim natale erysipelatis ex perspiratione suppressa, eaque propter hac magis adhuc sanguinis missione imminuta, non potuit non impurorum succorum copia crescere, quæ per erysipelas singulari maturæ vigore expulsa. Recidivæ autem frequentiores, quum de sanguinis impuritate testentur, hæc vero de viscerum maximeque hepatis vitio; ego certe acidularum, vel thermarum, ad sanguinem purificandum & viscera expedienda, & elixiorum balsamicorum, quæ visceribus & succis spiritus ascensionem reddunt, usu, præstantius novi nihi nihil. Quam in rem pluribus *Medicina consultatoria Tom. V. Dec. V. cas. IX. p. 370.* & passim alibi.

#### OBSERVATIO V.

*Erysi-  
pela-  
scorbuti  
cum  
sapere  
redi-  
vans.*

Novi in Westphalia virum sexagenarium, generosum, macilentum, sanguineo-melancholicum, qui deletatus carnibus & piscibus salitis ac infumatis, ab aliquot jam annis, ter vel quater quotannis, in pede sinistro, circa malleolum, passus fuerat erysipelas, quandoque exulceratum. Hic meum petiit adversus hoc malum auxilium. Suasi igitur, ut inter malleolum & genu inureretur fonticulus, qui materiam a malleolo exquisitoris

sensu parte ad tibiam trahit, immunè ab erysipelate & fonticuli & malleoli regione. Tum consilium dedi, ut loco potus ordinarii acidulas Antonianas cum tertia vini parte biberet, a victu duriori abstineret & mane juscula cum radice cichorei, apii & scorzonæræ forbillaret, & pedem debilem & tumidum fascia spiritu vini camphorato madida ligaret arctius. His aliquandiu usurpatis, liber postea diu mansit ab erysipelatis incurso.

#### *Epicrisis.*

Westphalis ob victum durum & crassum semper sanguis spissus lente scens, qui e vena missus, eandem ac apud nos pleuriticorum, exhibet faciem, cum cuticula glutinosa. Hinc etiam ipsis admodum familiares inflammationes maximeque erysipelas scorbuticum. Adversus quod vero optime sese muniunt tempestiva sanguinis missione, potu ipsis frequentissimo feri lactis & vere usu infusi laxantis & resolventis ex vino. Pepes autem, quia lentior in ipsis sanguinis ascensus, perspiratio quoque languidior, ob id maxime & œdematosis & erysipelaceis tumoribus sunt obnoxii.

#### OBSERVATIO VI.

Professor celeberrimus, quinquaginta aliquot annorum, purpura scorbutica crebrius afflictus, post corporis intensam refrigerationem, corripiebatur subito languore virium, inquietudine, somni appetitusque defectu, horripilatione, æstu, cui juncta quædam mentis turbatio. Durabant hæc per tres fere dies, quibus elapsis, nocte antecedenti sensit intolerandum plane ardorem in præcordiali regione, ad dorsum usque excurrentem, mane autem inspecto loco dolente, insolitum comparuit exanthema, rubicunda nempe area, ex præcordiis ad dorsum cinguli instar extensa, cui insidebant confertim pustulæ partim albæ, partim rub. & nigrescentes. Inde quidem symptoma a remiserunt, excepto ex-

*Zona  
ex pur-  
pura  
refrigera-  
tione.*

qui-



quisito ardente dolore, qui tantus erat, ut nec somnum capere, nec locum affectum contingere posset. Medici quorum consilio utebatur, quid hoc rei, nesciebant, & purpuræ peculiare genus aut scorbuticum quoddam exanthema esse volebant, ego vero illico cognovi peioris erysipelatis speciem, & interne diaphoretica temperata & externe in fine oleum ovorum adhibui, quibus aliquandiu usurpatis, intra quatuordecim dies, dolor conquievit, pustulæ aruerunt, cuticula aspera facta, fissa & desquamata.

*Epicrisis.*

Est hic affectus ex rarioribus, paucis visus, plurimis incognitus. Solus fere ex veteribus est *Plinius*, qui ejusdem sub nomine *zoster* meminit. Quam periculosus autem sit, binis exemplis confirmat *Joannes Langius epist. pag. 110.* uno Marchioris Georgii in Onelspachio, qui eodem ex ulcere cruris a Chirurgo intempestive consolidato interiit, altero Comitis

Palatini Otthenrici, qui a lumbis ad genua usque hoc exanthemate circumdatus, febre simul ad delirium usque æstuans, incisa tamen utriusque pedis vena adhibitisque quæ febrem restinguent, a morte adhuc vindicatus. Idem etiam cum hoc esse videtur affectus, quem *Tulpius lib. III. cap. XLIV. observ. medicinal.* sub nomine exedentis præcordiorum herpetis describit, in viro pleni habitus & calidi jecinoris, qui vehementer circa præcordia doluit, cum acri pruritu, insigni dolore & frequentibus pustularum conglomeratarum circulis, primum rubris, mox albicantibus, & comparente in qualibet earum crusta nigra, qua convenienti litu separata, quælibet degeneravit in humidum ulcusculum, cum acri dolore, sudore effuso & interdum tam impetuoso virulentæ materiæ raptu ad interiora, ut animus non secus aliquoties deficeret, ac ipsum occupasset contagiosa aliqua pestilentia.



S E C T I O I I.  
DE FEBRIBUS ACUTIS  
INFLAMMATORIIS  
I T E M  
LENTIS - PUTRIDIS HECTICIS  
N E C N O N  
SYMPTOMATICIS.

---

C A P U T P R I M U M.

*De Febribus Inflammatoriis in genere Speciatim.*

*De Febre acuta Sanguinea,  
Gravis Synocha.*

Theses Pathologicae.

§. 1.

*Inflam-  
matoria  
febres  
inde.*

**U**T ut irritatio generis nervosi  
spastica per omnes solidas ner-  
veas corporis partes, proxi-  
mam causam constituat omnis motus  
febrilis, qui horrore & velociore con-  
tractione cordis & arteriarum absol-  
vitur; pro diversa tamen indole &  
actione materiae genus nervosum præ-  
ter naturam afficientis, diversa emer-  
git febris species, distinctis phænome-  
nis, effectibus & symptomatibus sese  
prodens, ita quidem, ut si stimulus  
sit ab humore acri, putrido, seu cor-  
rupto, quem Veteres vocant icho-  
rem, exanthematice plus minus ma-  
lignæ excludantur, ubi vero sanguis,  
vel alius humor præter naturæ consue-  
tudinem alicubi congestus nervosaf-

que membranas tendit impensius cum  
dolore ac premit, inflammatoriæ  
acutæ, sine exanthematibus, sub-  
oriantur.

§. II.

Jam quidem omnis continua febris <sup>differs</sup>  
inflammatorii quid, sive a qualitate <sup>quoad</sup>  
prava acricaustica, sive a quantitate <sup>loca,</sup>  
nimia molesta, humoris cujusdam,  
alit: attamen proprie inflammatoria  
febris dicitur illa, cujus causa est emi-  
nens vasculorum, secundum naturam  
non sanguinem, sed tenue liquidum  
vehentium, a sanguine oppletio at-  
que distensio. Hoc autem evenit vel  
in pluribus partibus simul, vel in una  
tantum. Hinc febres inflammatoriæ  
vel universales, vel particulares. Ex  
illis sunt, quando omnes fere sensu &  
motu instructæ corporis partes, ma-  
ximæque nervoso-membranaceæ, le-  
viori inflammatione affectæ, quod ac-  
cidit in synochis. Hæ vero sunt, quan-  
do uni tantum certæ parti insident, a  
qua etiam in scholis Medicorum va-  
riam



riam fortiuntur denominationem, adeo, ut si meninges tangat inflammatio, febris audiat phrenetica; si fauces, anginodes; si pleuram, pleuritica; si pulmones, peripneumonica; si ventriculum, stomachica; si duodenum & biliarios ductus, ardens & biliosa; si ileon, iliaca; si renes, nephritica; si mesenterium, mesenterica; si vesicam, vesicalis; si uterum, uterina; si intestinum rectum, hæmorrhoidaria. Deinceps inter febres inflammatorias aliæ sunt idiopathicae primum morbum efficientes, aliæ symptomatice, sive secundariæ, quæ sequuntur alium morbum, sed pessimo plerumque & lethali eventu, uti maxime de febribus continuis constat, qui ut plurimum inflammatione in sphacelum abeunte necant. Jam de singulis seorsim.

§. III.

*Synocha descriptio.* Synocha igitur, sive sanguinea febris, est acuta, continua, suscitata a sanguine in partibus maxime nervo-membranosis nimium congesto, qui, nisi opportune naturæ & artis beneficio discutatur, inflammationem inducit lethalem.

§. IV.

*Subiecta & differentia.* Corripit hæc frequentius plethoricos & succulentos, temperamento sanguineos & sanguineo-cholericos, ætate juvenes ac viros, sanguinis evacuationibus assuetos, idque quovis anni tempore, potissimum tamen vere & æstate. Indicia autem ipsius & signa, quibus ab aliis acutis & inflammatoriis febribus discernitur, huc redeunt. Invadit hæc cum vix notabili horripilatione & leni admodum frigoris sensu, in aliis autem gravis est horror & longius extrahitur frigus. Aliæ mitius primum accedunt sensimque increbescunt, donec ad statum & vigorem perveniant, sed hæc cum gravissimis statim adoriuntur pathematibus. In aliis certis temporibus notabilis observatur synochis rara, vel nulla, ut potius eadem quam sub accessione vehementia usque ad

criticum tempus insistant, eaque propter haud incongrue a quibusdam non continuæ, sed continentes, vocentur. In malignis ab initio pulsus parvus, debilis & contractus, in hac magnus & plenus. In synocha hinc in principio absolute necessaria sanguinis missio, quam aliæ continuæ sæpe non ferunt.

§. V.

Causam hujus febris proximam præbet diffusior sanguinis in partibus ac visceribus internis congestio atque stagnatio. Quam in corporibus, calido sanguine, ex potuum spirituosorum largo usu, corporis exaltatione, animique excandescencia, plenis, ex facili inducit potus ingurgitatus frigidior, corporis extremorumque refrigeratio & perspiratio quacunque ex causa prohibita. Sic enim tubulis & poris in externa superficie constrictis, sanguis cum impetu plus justo urgeatur ad interiora, ibique congestus, moleste afficit nervosarum & fibrosarum partium systema, ex quo symptomatum origo omnium. Nimirum si ad caput vergit impetus ibique colligitur sanguis, facies turgescit, oculi rubent & lacrymas plorant, caput dolet, arteriæ pulsant temporales, vertigo adest, sopor, torpor, vel plane mentis alienatio. Quando cordis ventriculi & vasa pulmonalia a sanguine impetuosius irruente nimium distenduntur, essentielle illud omnium febrium symptoma, respiratio difficilis & crebra, pectoris angustia & anxietas cordisque palpitatio accidunt, juncta simul sæpe virium corporis animique dejectione. In œsophago levior inflammatio & spastica glandularum fauciumque strictura facit sitim, ariditatem & linguæ nigritiem, præsertim si in corpus biliosum, calidum, post iram incidit, tumque vulgo vocatur febris ardens, *das hitzige Fieber*. In ventriculo inflammatoria congestio gignit nauseam, vomendi conatum, quandoque singultum; in intestinorum volumine, inflationes malum graviter exacerbantes, alvi adstrictionem,

*Causa & in-  
depen-  
dentia  
sympto-  
mata.*



nem, vel excrementorum foetidorum ejectionem, in meseraica arteria & venæ portæ vasis, dolorem fixum circa primam lumborum vertebra, in membranis spinalis medullæ, decubitus insuetum, membrorum jactationem, torporem & languorem artuum, quandoque etiam convulsiones.

## §. VI.

*Simplex  
vel pu-  
trida  
est.*

Neque tamen hæc symptomata ad- sunt in omnibus omnia, neque vehe- mentia ubique infestant eadem. Hinc in simplicem a Medicis distinguitur synocha, & putridam, seu malignam. Illa sæpe a sola sanguinis boni extra locum & vias suetas congestione susci- tatur, mitior, hinc brevi discutitur, nec adeo periculosa. Ubi vero cadit in corpora impuris succis plena, viri- bus a morbo præcedenti, diuturno animi angore, nimia venere & inor- dinata victus ratione exhausta gravio- ra longe præsto sunt pathemata, cum virium prostratione, morbus ipse diu- tius, ad decimum quartum, vel vi- gesimum prorsus primum trahitur, & quandoque exanthemata, maculæ fuscæ vel nigræ, excluduntur, non sine præsentis periculo. Datur præterea sy- nochæ epidemica; sed quæ plerumque cum febre catarrhali jungitur & au- tumno maxime ac hieme infestat. Hæc in principio non aliis, quam synochæ suetis symptomatibus adoritur, maxi- me homines sanguine & humoribus plenos, postea vero, si bene tracta- tur, post diem quartum prodit se ma- nifestis signis catarrhalis; per longum adhuc durans tempus & quæ per no- ctem usque ad diluculum calore præ- ternaturali, nec non catarrhosis a ca- pite defluxionibus, coryza, tussi sic- ca & humida infestat, donec tandem discedat.

## §. VII.

*Eventus  
bonus,*

Solvitur morbus, si causa non adeo vehemens, solius sæpe bene valentis naturæ beneficio, sua sponte, die quarto, septimo, vel undecimo, or- dinarie largo sudore, vel secus ac in aliis acutis, optime per liberale na-

rium stillicidium, vel etiam, rarius tamen, ac nonnisi ubi maligni quip- iam complicatum, per alvi fluxum. Quando etiam hæc febris in principio statim, primo, secundo & tertio die, recte tractatur, sanguinis missione & subjunctis refrigerantibus, blandisque diaphoreticis, quarto sæpe die exopta- ta fit solutio. Si vero omittitur, vel detractatur venæsectio, febrem ad decimum quartum, quin decimum septimum diem protractam vidi, per- sistentibus gravioribus symptomati- bus ipsoque delirio, tandem vero na- turæ beneficio, vel per sudorem, vel per alvum fuisse solutam. Sed quibus lethalis est, ii pereunt plerumque in- flammatione meningum, vel etiam *Malus.* aliarum partium, ut ventriculi & in- testinorum sphacelosa, quam uberius testatam facit cadaverum inspectio, in quibus præterea ob sanguinem co- piosum cito in foetidam putrilaginem abeuntem, illico adest insolitus tumor & foetor intolerandus.

## Curatio.

## §. I.

In medicatione febris synochæ pe- rito artificis agenda hæc: I. ut partes vitales a nimium congesto sanguine liberentur, sicque vel levior in iis in- flammatio dispellatur, vel gravior impediatur: II. ut sanguinis exæstua- tio simul atque systematis nervorum spastica affectio componatur: III. ut illud quod stagnat & corruptum est, discutatur & liber sanguinis circuitus, maxime ad corporis superficiem, re- stituatur.

*Indica-  
tiones  
curato-  
rie.*

## §. II.

Quo igitur vasa interiora in visceri- bus, corde maxime pulmonibus, a nimium congesto & stagnante sangui- ne liberentur, vena tempestive per- tundenda & sanguis emittendus suffi- cienti quantitate. Quod quo pacto sit faciendum, dicetur in cautelis. Dein- cept ut impetuosus ille sanguinis suc- corumque orgasmus, vasorum, quam facit,

*Sanguis  
mitten-  
dus &  
orgas-  
mus te-  
peran-  
dus.*



facit, distensione nervosas partes irritans ad contractionem, sedetur, ex usu sunt aquea, diluentia, acida, item nitrosa. Et certe si in ullo morbo, sane synocha, quam maxime conducit frigida potus aliaque refrigerantia, ex aceto succisque fructuum, acidulorum, citri, limonum, ribium. Commendarunt hæc communi suffragio veteres, cui accedunt recentiores omnes. Ego quidem expertæ virtutis hanc habeo potionem: recipe aquæ fontanæ mensuram, aquæ rosarum, sacchari albi ana unciam, succi citri tantundem, vel loco hujus spiritus vitrioli guttas 20. *Riverius in prax. cap. de Synoch. pag. 37.* laudat pulverem ex sacchari uncis quatuor, salis prunellæ uncia, eundemque in sufficienti quantitate aquæ assumere, cui, si sitis impensus urget, spiritum vitrioli instillare, suadet. Nobilis etiam demulcente & refrigerante virtute gelatina liquidior cornu cervi, cum saccharo, succo citri & aqua rosarum confecta. Potissimum tamen profunt loco potus ordinarii usurpanda, serum lactis ex lacte cocto cum succo citri coctum, vel nostra methodo dulce, & cum succo citri, aut spiritu vitrioli acidulatum, item ptisanæ ex hordeo, rasura cornu cervi, scorzonera cum succo & corticibus citri nec non cerevisiæ leviores, imbutæ tinctura violarum, rosarum, papaveris, rhœados, parata cum aqua acetosellæ, spiritu vitrioli acuata, vel instar omnium clysto antimonii sulphurato, de cujus præstabili virtute ita sentit *Baglivus opp. lib. I. pag. 50.* non possum non, inquiens, laudare eximias vires clysti antimonii, cujus subacida virtute febres multæ ex aeris mutatione productæ aliaque ardentiores, tanquam in ovo suffocantur. Hæc acida quoque magnopere conducunt in synocha sic dicta putride, seu maligna, quia omnium efficacissime putredini resistunt, quæ non ab acido, sed alcalico volatili fovetur, quod acida destruunt.

§. III.

Quæ liberiores sanguinis ad superficiem corporis motum procurant, sunt utique blanda diaphoretica, pulveres scilicet, vel bezoardici temperati, vel absorbentes, nonnunquam soli, nonnunquam cum nitro, aut succo citri, assumendi. Idem faciunt infusa theiformia, ex herba veronicæ, scordii, aut cardui benedicti, cum semine fœniculi, quæ inprimis quando quarto die morbus critico sudore solvitur, pulsusque quietior cum somno redit, ad secundandam hanc salutarem excretionem, proficiunt.

*Diapho. resis secundan. de.*

Observationes & Cautelæ Clinicæ.

§. I.

In nulla febre, & veterum & recentiorum omnium consensu, tam necessaria est sanguinis missio, quam synocha, & quidem sufficiens atque matura. Recte enim monet *Trallianus lib. XII. pag. 688.* continentes solerti tractari debere diligentia, præsertim quod sanguinis missionem spectat. Maximum enim incommodum esse, cum in omnibus morbis, tum in his dilationem. Nam febres pergit, vehementiores redduntur & vires imbecilliores, ut non amplius magna præsidia ad curationem admitti possint. Hi vero indigent maxime sanguinis missione, qui urinas habent rubras & turbatas, oculos rubros, totum corpus grave, venas laxiores & earum torulos apertiores, calidioribus magna parte cibis, potibus, vino liberaliore & vetusto canibusque pinguibus usi. Sed non imitandi Veteres, præsertim *Galenus*, & qui presse hunc sectatur *Zacutus Lusitanus*, qui sanguinem ad animi usque deliquium mittere suadent. Mensuram potius sanguinis extrahendi Medicus prudens ex ratione virium, ætatis, sexus & temperamenti, nec non pulsuum magnitudine venarumque amplitudinem, dijudicare debet, ac ubi corpus firmum

*Prodest sanguinis missio.*

suc-



succisq[ue] plenum, præstat iterare altero die venæsectionem, quam simul & semel nimium evocare, quo successive demta copia, perspiratio servetur, & difflatio fordium liberior reddatur. Neque pueri & adolescentes pleni sanguine hoc remedii genus detrectare debent. Qui autem penitus averfantur, his hirudines collo & medianæ ipsi aliquando cum fructu admove-  
 jussi. Quando etiam sanguis cum impetu ad caput fertur & arteriæ intus fortiter pulsant, facies simul tumida est cum oculis & rubicunda ac nares aliquot tantum guttas stillant, provocandum stillicidium, vel veteri Ægyptiorum more scarificatione narium, vel valida intrusione culmi straminei, quo delirium arceatur. Sed qui tali in casu venas sublinguales incidere jubent, minus securum consilium interponunt; eo quod inde aliquoties incompe-  
 scibilem hæmorrhagiam obortam vidi.

## §. II.

*Refrigerantia uti-  
 lissima.*

Deinceps ex præstantissimis in synocha remediis sunt acida, refrigerantia & nitrosa. Et certe in hisce auxiliis, prudenter ac circumspecte, ratione temporis ac mensuræ, pro diversa conditione corporis ægrotantis, usurpatis, præcipuum curationis momentum in synocha æque ac ardente consistit. De quo tamen infra plura dicemus. Id autem singularis planè medico-practiciæ observationis est, quod hæc, quin sola aqua temperat frigida, sufficienti quantitate pota, sudorem moveant & somnum procurent.

## §. III.

*Laxantia conducunt.*

Præstat porro in hac febre, simplex sive sit, sive putrida, alvum servare apertam. Sub febre quidem, non tam internis, quam potius externis, glande, aut clystere molli, ex sero lactis, melle, oleo amygdalarum dulcium, paxillo nitri & salis id perficiendum, quo leniatur fibrarum intestinalium trictura & flatus evocentur, qui intestini coli partem distendendo, anxie-

tates faciunt & perspirationis successum pervertunt. Declinante autem morbo & apparentibus coctionis signis in urina, ad exturbandas materiæ febrilis reliquias, apprime interna ex usu sunt, inter quæ ego in primis utile deprehendi laxans ex manna, cremore tartari, vel etiam cassia & rhabarbaro. Sed absint valida omnia purgantia, multo magis emetica. His enim, tactis jam levi inflammatione visceribus, ex facili inflammatio inducitur funesta. Quin observavi, febre hac sanguinea laborantes, neque ferre posse pilulas alias benignas, quas aloe, vel extractum ellebori ingreditur, uti sunt Becherianæ, aloephanginæ, marocostinæ & id genus plures.

## §. IV.

Ex iis quæ vitanda, sunt maxime omnia calida & spirituosæ, vinum, potus etiam nimis calidi, ut infusum thee nec non regimen æstuosum, ratione lecti & conclavis, quæ omnia sanguinem magis exæstuant, acerbiora symptomata febremque diuturniorem reddunt. Neque etiam synocha putrida, sive maligna ferre potest essentias alexipharmacas, aut tincturam bezoardicam. Cavendum quoque a multitudine & varietate remediorum quæ nunquam utilis, sed semper dam-  
 nosa est, tanto magis, ubi partes nervosæ sensus exquisitioris, leviter inflammatae. Inprimis autem fugiendi sedulo omnes animi affectus, ira præsertim ac terror, quibus inflammatoria jam in intestinis præsens congestio, ingravescit; & inflammatio perfecta, quin sphacelatio, experientia teste inducitur.

## §. V.

Ceterum de morbi decursu atque eventu hæc adhuc monenda. Vidi ego in hac febre sæpius in juvenili ætate ac temperamento sanguineo perpetuam somnolentiam, quæ tamen sine periculo fuit, admoto plantis pedum aceto, cum sale ammoniaco & baccis juniperi, discussa. Delirium etiam frequenter vidi diuturnum



num, post neglectam in principio venæsectionem, sed quando decimo quarto die sedimentum posuit urina, discessit demum & hoc sine damno. Neque enim unquam firma salutis spes, nisi coctio in urina compareat. Sed quando ex præpostera medicatione, sanguinis missione neglecta, daris calidioribus & alvo diutius occlusa, feбри huic sanguineæ, ille acutorum frequens nostro tempore socius, purpura, præsertim alba, accessit, pessimo id accidit omine. Neque minus pessimum & plerumque mortiferum est indicium, quando alvus diu cohibita, sponte miram quantitatem, sæcum biliosarum & corruptarum, simul & semel, junctis torminibus, profundit. Hoc enim sphaceli intestinorum signum esse, ex defunctorum cadaveribus habeo compertum.

*Enarrationes morborum.*

# OBSERVATIO I.

*Synocha  
recidi-  
vans le-  
thalis,*

Adolescens annos habens octodecim, constitutione tener ac sanguineus, vultu floridus, laute vivens, delectatus maxime dulcibus, farinaceis, decocto chocolade cum lacte & in prandio vinum Hungaricum liberaliter bibens, verno tempore, post intensam, ex ambulatione per acclivia & declivia in seram noctem, corporis exæstuationem, postera die corripiebatur horripilatione, ingenti æstu, inquietudine, corporisque totius languore. Datum ipsi de venæsectione consilium, sed noluit admittere. Hinc dati tantum pulveres ex matris perlarum, lapidum cancrorum, ana drachma, nitri puri drachma dimidia, cum succo citri ex aqua frigida sumendi. Loco potus exhibita ptisana ex hordeo, scorzonera, & sirupo acetositis citri, alvus quoque clystere emolliente soluta. Quibus factum, ut quarto liberalis prodiret sudor, pulsus quoad vehementiam & celeritatem sedatior micaret, urina

Tom. IV.

sedimentum poneret & somnus rediret. Morbus igitur ex voto solutus visus. Quum vero æger viribus nimium credens, dulcibus & lacticiiniis indulgeret, potens etiam Hungaricum vinum biberet, post septimum diem eandem rursus incurrit febrem. Sed gravioribus longe stipata erat symptomatibus, insomnia maxime atque delirio. Secta quidem die post vena, sed sine emolumento. Aderant simul tormina ventris & paucabiliofa fecerunt. Clyster quoque infusus animi fere deliquium adduxit. Quarto die accessit forte ex amicis non nemo, qui ægro imprudenter dixit: apparere ex omnibus moriturum, præparet igitur se ad discessum. His adolescens vitæ amantissimus, mirum exterritus, virium illico animi & corporis ingentem expertus est lapsum, & frustra usurpatis omnibus, quæ in priori morbo fuerant utilissima, septimo die vitam posuit.

*Epicrisis.*

Nihil ad ingenerandam exuberantem sanguinis copiam valentius dulcibus, bellariis, cum saccharo & ovis frixis, vinoque Hungarico dolci spirituofo. Atque adeo his etiam nihil aptius ad inducendas febres, quæ sanguinis plenitudini debent natales. Ego certe plures novi juvenes literarum studiosos, qui delectati his dapibus & potibus spirituosiss, accedente corporis refrigeratione, hanc incurrerunt febrem. Omnes autem recidivæ febrium quarum fundamentum inflammatio, admodum periculosa, quin plerumque capitales. Quia enim corpus a priori morbo viribus exhaustum, maximeque partes quæ passæ tono adhuc privata, ex facili iterum concipiunt inflammationem, quæ primis non amplius obsecundant remediis. Accedit quod ipsi ægrotantes recidivam ut plurimum parvi faciant, & ob id Medicum serius in auxilium vocent, pharmacorum pertæsi sint, quorum operatio languente naturæ vigore minus præterea est efficax. Quare declinan-

M

dæ



da summo studio recidivæ, temperanter vivendum, corpus non nimis cibis, multo minus spirituosorum potu aggravandum, nec motu aut animi affectibus exastuandum, ne sanguis urgeatur in vasa ipsius transitui non dicata, ibique subsistat. Vitanda quoque refrigeratio & potius exquisitum servandum regimen. Quam facile enim hæc febris repetat cum vitæ periculo, confirmatum habeo, casu, qui novissime evenit. Inciderat scilicet in synocham artifex ingeniosus ferrarius, eademque graviter decubuerat, post quatuordecim tamen dies præter expectationem ad se redire videbatur, dormiebat & appetebat. Sed quum uxor, quo maritus cito vires reciperet & ad labores redire posset, ipsi apponeret carnem suillam assatam cum placentis, ipsumque ut ederet tantum non cogeret, illico excepit anxietas præcordiorum summa, difficilis spiratio & inquietudo cum plenario virium lapsu, ac post viginti quatuor horas interiit. Et certe vix dici potest quantum noceant cibi copiosi, viribus a morbo adhuc imbecillis. Quia enim ciborum moles in ventriculo languente digerinequit, resolvitur in flatus, qui expandendo ventriculum & tendendo diaphragmatis velum, miras anxietates cum spiritu difficili faciunt. Hinc porro sanguis urgetur ad dextrum cordis ventriculum, ibi congestus systolem sufficientem ac in pulmones pulsum sufflaminat, unde tam ipse cordis ventriculus, quam ob allatum per cavam semper sanguinem auricula dextra, plus justo extenduntur, systole penitus intercipitur & letalis obrepit syncope. Etenim subitæ mortis, sive syncopis lethalis causam esse coagulatum & congrumatum in dextra cordis ejusque auriculæ camera, ob deficiens robur ad contractionem, sanguinem, testantur utique uberius anatomico practicæ defunctorum sectiones.

## OBSERVATIO II.

Virgo honoratissima viginti aliquot annorum, sanguinea, facie florida, laute vivens & liberalius paullo Rhe-  
nanum vinum bibens, solita semper erat ante æquinoctium vernale & autumnale sanguinis missionem admittere. Eo autem qui ipsi emortualis anno præter morem calidum erat veris initium, ipsa tamen noluit discedere a consueto venæsectionis termino, sed tempus exstictavit æquinoctiale & lunæ decrementum. Accidit vero interea, ut ira commoveretur venusta hæc & sanguine plena virgo, eaque propter absente matre & Medico ordinario, post levem cutis inhorrescentiam, dorsi dolorem, æstum, anxietatem, inquietudinem, somnique defectum incurreret. Ipsa consilii inops, suasu cognatæ ad bilem commotam evacuandam, sumsit pilulas, nostris *die gescærfften Haupt-Pillen*, quarum basis trocisci alhandal. Inde quater quidem dejecit, sed conquesta postea de dolore pressorio & ardente sinistri hypochondrii. Quarto die accessit Medicus, qui venam secare jussit, sed sine levamine. Dedit quoque probatissima remedia, quo inflammationi ventriculi, quum singultus arguebat, occurreret, sed incassum. Accessit potius extremorum refrigeratio, mens turbata & septimo die placida mors. Post mortem mirum intumuit corpus, efflorueruntque papulæ amplæ in pedibus atque abdomine, e naribus fluxit serum putridum sanguinolentum & totum corpus mox in foetidam putredinem ruit.

*Epicrisis.*

Communis quidem sed valde dam-nosa passim regnat opinio, sanguinis missionem certis temporibus & sub certa astrorum conjunctione esse instituendam. Videas inprimis plurimos adeo superstitiosos, ut credant, non feliciter cessuram venæsectionem, nisi aliquot ante æquinoctium diebus &

*Synocha  
usu pur-  
gantis  
& omis-  
sa P. S.  
lethali.*



decrecente luna admittatur . Ego vero novi , plures & apoplexia , & febre sanguinea interiisse , antequam præstitutum hoc tempus attingerent . Nam necessitatis nulla lex , sed si sanguis redundans minatur periculum , mittendus , quicumque sit dies , quodcumque tempus . Nostra formosa virgo periit inflammatione ventriculi & intestinorum gravi , quæ utique opportuna sufficienti sanguinis subtractione datisque congruis refrigerantibus potuisset averti , assumpto vero acri purgante adaucta potius . Ut adeo pateat , morbum , alias non adeo periculosum , neglecto tempestivo commodorum remedium usu & mala tractatione , brevi malignum fieri posse atque funestum . Illa vero corporis post mortem cita intumescencia , deformis color , putredo subito succedens & feri sanguinolenti effluxus , luculenter utique testatum faciunt , a succorum plenitudine morbum , & ab eorum putrefactione mortem fuisse inductam .

### OBSERVATIO III.

*Synocha septimo die soluta.* Degebat heic juvenis literarum studiosus , viginti quatuor annorum , sanguineus , succi plenus , vultu floridus , qui hæmorrhagiis narium antehac obnoxius & postea venesectioni assuetus , utramq; vero evacuationem ab anno non erat expertus . Hic verno tempore in palæstra gladiatoria vehementer incaluerat & postea in cellam concesserat , vinum potaturus . Postridie lassitudinem sensit in corpore toto , quam excepit extremorum levior refrigeratio , æstus vero intensus , pulsus celer , præcordiorum anxietas , angustia spirandi & pectoris oppressio . Tertio die temporum arteriæ valide pulsarunt , caput intumuit , doluit , oculi protuberarunt , nox insomnis fuit , urina rufa , sine sedimento & delirare cœpit . Hinc vena secta & minimum septem sanguinis uncia subtracta & data mixtura ex aquæ florum sambuci , acaciæ , cerasorum nigrorum ana uncis duabus ,

aceti destillati uncia dimidia , lapidum cancrorum drachma , nitri puri granis 15 . sirupi papaveris erratici drachmis duabus , de qua singulis binis horis quatuor sumsit cochlearia . Quum etiam quarto die sanguis impetuosius ad caput ferretur , nec tamen hæmorrhagia erumperet , ad discussionem fronti & temporibus sæpius tepide admotum epithema hoc , recipe aceti rosacei uncias duas , spiritus rosarum drachmas duas , camphoræ drachmam , olei ligni rhodii guttas 24 . Ad sitim fallendam æstumq; extinguendum tinctura florum cordialium cum spiritu nitri dulci parata , cerevisiæ tenui pro potu instillata , alvus præterea per aliquot dies clausa , & clystere emolliente , & laxante , ex manna , cremore tartari & rhabbaro soluta quater , eoque facto , urina apparuit cocta & sedimentum incarnati coloris dimisit . Datis demum ulterius bezoardicis temperatis , cum tinctura modo dicta , sensim conquieverunt symptomata & die septimo pulsū celeritas remisit , sudor largus prodit , ægerq; postea ad sanitatem rediit .

#### *Epicrisis.*

Ad præcavendum delirium , longe præstantius epithema discutiens , quam laudata a multis venarum sublingualium sectio , quam incompeabilem hæmorrhagiam induxisse vidi aliquoties . Utilissimum quoque ad sanguinis a capite derivationem alvum strictam mollire atque subducere , non quidem purgantibus ; sed clysteribus & blandis laxantibus , modo id fiat , quando levamen & aliqualis remissio percipitur ; quod secundum nostram observationem , certis diebus , secundo præsertim , & quarto , accidere solet .

### OBSERVATIO IV.

Monachus viginti quinque annorum , quadratus carnosus , vitam colens otiosam , potui cerevisiæ crassioris assuetus nunquam tamen venesectionem passus , verno tempore corpus succis plenum validius paullo in horto

*V. S. quarto die in synochis utilis.*



horto ad seram usque noctem exercue-  
rat: inde illico conquestus est de cor-  
poris lassitudine, inappetentia, somno  
turbulento ac inquieto, alvo simul  
clausa. Incessit ipsum dein levis hor-  
ripilatio, æstus magnus, præcordio-  
rum anxietas, pulsus quoque vehe-  
menter saliit, facies rubicunda fuit &  
urina pellucida, sed rufa. Medicus in  
consilium vocatus, exhibuit tinctu-  
ram bezoardicam volatilem cum regi-  
mine sudorifero. Sed nullus successit  
sudor, anxietas potius adaucta, spi-  
ritus factus difficilior, somno caruit,  
multa absone loquutus & tertio  
die accessit præterea acerbus & ardens  
dolor in faucibus cum deglutitione dif-  
ficili. Accitus igitur Medicus alius, qui  
venæsectionem administrare, clyste-  
rem injicere, gargarisma usurpare &  
exterius epitagma discutiens gutturi  
applicare iussit, ac interius pulveres  
temperantes nitrosos leniter diapho-  
reticos dedit. His discussus primo tu-  
mor faucium & dolor sedatus. Septi-  
mo die post levem horrorem largius  
sanguinem stillarunt nares, quod, ne  
cum damno effusus fieret, cautum est  
mixturis diaphoreticis & pulveribus  
nitrosis, nec non epithemate frontali  
*Observatione III.* descripto. Sic octa-  
vo die æstus deferbuit & sudor erupit  
copiosus, pulsus sedatior factus, uri-  
na sedimentum posuit, & æger succes-  
sive convaluit.

#### *Epicrisis.*

Male hoc in casu omissa in princi-  
pio venæsectio & pessime in corpore  
plethorico data volatilia cum regi-  
mine æstuoso, quibus facillime inflam-  
matio in cerebro & faucibus concilia-  
ta. Neque ea propter quarto etiam  
die nociva fuit venæsectio, sed ad  
avertendam inflammationem admo-  
dum proficua. Ad angustiam vero  
vasculorum laxandam & stagnatio-  
nem sanguinis in faucibus discuti-  
endam, epithema mature applicatum,  
cum internis diaphoreticis, utique  
egregium.

#### OBSERVATIO V.

Quam varia & insolita plane elapso *Synocha*  
anno 1728. aeris tempestatumque fue- *catar-*  
rit constitutio & quam varii quamque *rhialis*  
graves inde succreverint morbi, im- *epide-*  
primis febriles, supra *Sect. I. cap. X. obs.* *mica*  
*II. pag. 156.* pluribus jam dictum. Per- *annis*  
stitit autem eadem hæc extraordina- *1729.*  
ria temporum anni habitudo & atmo-  
sphæræ inæqualitas, insequenti adhuc  
1729. anno, subitamque frigoris in te-  
porem & vice versa teporis in frigus  
mutationem fecit. Scilicet attulit no-  
vi anni exordium acerrimum gelu, æ-  
quale omnino illi intensissimo, quod  
anno 1709. regnavit. Id præstitit ad  
12. usque Januarii diem, mercurio in-  
terim, quod mirandum, in barometro  
demissiorem stationem ad gradum  
tantum 7. servante, quum alias ascen-  
dere tum & gradum 30. tangere so-  
leat. Decimo tertio & quarto die le-  
nior spiravit aura & regelatum. A de-  
cimo sexto ad vigesimum usque ar-  
gentum vivum altius iterum ad 27.  
gradum elatum, & frigus fuit acre. Vi-  
gesimo quarto sublevis mercurius ad  
duodecimum, nonum & octavum gra-  
dum, & sequentibus diebus successive  
remisit gelu, mercurio interim modo  
sublato, modo delapso. Nix præterea  
cecidit copiosa & diu solum obruit,  
donec medio Februarii discuteretur  
iterum, ex quo magnæ aquarum inun-  
dationes. Post has vicissitudines, re-  
mittente hiemis asperitate, Februario  
mense, cepit passim circumire synocha  
febris, non simplex, sed complicata,  
quæ recte dici potest synocha catar-  
rhialis, ita ut intra mensis spatium, vel  
mille, ex divitibus æque ac pauperi-  
bus, eadem hæc decumberent: inces-  
sit quippe hæc febris homines mediæ  
potissimum ætatis, juvenes & viros,  
sanguine & succis plenos, minus infan-  
tes, omnesque quotquot corripuit, sine  
precedenti notabili frigore vel horrore  
affecit totius corporis & capitis gravi-  
tate, inappetentia, somni defectu, viriū  
languore & æstu intenso, cum pulsu ma-  
gno, celeri, quandoq; inæquali. Quibus-  
dam



dam variæ statim in mente observatæ ideæ atque imagines & artus tremuerunt, aliis perpetua accidit somnolentia cum animi ejectione, & omnes situm erectum ferre non potuerunt, sed mox syncopticam quandam debilitatem perceperunt. Quibus vena statim in initio pertusa & sufficiens sanguinis copia, pro ratione corporis & virium, subtracta, subjunctis postea blandis diaphoreticis, diluentibus & orgasmum sanguinis compescentibus, sub æquali & moderato regimine, cito & optime convaluerunt. Sic enim quarto statim die deferbuit febris, symptomata remiserunt, æstus restinctus, pulsus sedatior & corpus quietum factum, ac urina, comite sudore plerumque largo, posuit sedimentum. Restiterunt tamen postea copiosæ defluxiones, a capite ad nares, & fauces & pectus, coryzam & tussim humidam, vel siccam, inducentes, stipatæ quandoque artuum pedumque rheumatismo, quæ circa vespere exacerbata, caloris fecerunt incrementum noctemque inquietam, donec decimo quarto ut plurimum die discederent penitus. Sed in quibus, aut ægri, aut Medici culpa, sanguinis missio neglecta, & usurpata calida bezoardica, hi longe gravius & diutius decubuerunt, delirio & assidua vigilia affecti sunt, catarrhos acres & rebelles experti, quandoque exanthema purpuraceum & febris sæpe ad decimum quartum diem, nonnunquam longius, magna institit vehementia. Quin fuerunt, qui accedente purpuræ albæ, aut petechiali exanthemate, interierunt plane.

*Epicrisis.*

Recte omnino complicata hæc febris dicenda synocha catarrhalis. Nam ipsius incurfus vehemens statim, sine rigore, ipsius decursus sine remissione, ipsius eventus sudore, ipsius medicatio per sanguinis missionem & temperantia cum nitrosis; luculenter testantur, ad synochæ familiam ipsam esse referendam. Catarrhalis au-

Tom. IV.

tem connubium produnt subsequente copiosæ muci & feri falsi, ex naribus, faucibus & bronchiis, cum tussi ac sternutatione ejectiones, nec non febricula vesperi cum calore ingravescent. Natales epidemicæ hujus febris non aliunde, quam ex mira, diuturna aeris inæqualitate ac crebra mutatione, ex calido in frigidum & frigido in calidum, nec non atmospheræ motu gravis & prementis, mox levis & raræ habitu vario, ducendi. Sub his enim vicissitudinibus, non modo universale illud pessimarum sordium emundatorium, cutis, diversimode afficitur ejusque canaliculosa atque porosa compages a naturali topodejicitur, sed & motus illi cordi & arteriarum systaltici, qui vitam sustinent & ab aeris puriori elastica substantia pendent, vitiantur ac mutantur. Ex quo porro si, ut labefactatis sic & sufflaminatis saluberrimis se & excretionibus, multæ impuræ & viscidæ in succis sordes maneant, quæ dein vascula obstruunt ac fomitem febribus populariter circumeuntibus præbent. Neque nos non primum observavimus hanc febrem, sed eandem jam anno 1580. visam esse, Georgius Henischius *Comment. in Aretæum* pag. 315. testis est, sic habens: anno 1580. grassabatur synochus epidemica, non simplex, sed composita, eo quod & catarrhum, & alia symptomata conjuncta habuit, unde & catarrhus cum febre epidemicus fuit appellatus. Eundem etiam ipsius ortum ac decursum fuisse, quam nostræ, idem auctor l. c. pag. 396. subnectit: febris, inquit, hujus catarrhalis epidemicæ, quæ spatio sex septimanarum, omnes fere Europæ gentes affligebat, ex quibus vix vigesimus hujus morbi expertus erat, præsertim in Saxonia, causa, non erat ab alimentis, terra, aut aqua putrida, sed ab aere, vel cælo potius, nempe a magna illius & anni præcedentis aeris inæqualitate, unde copiosa humorum heterogeneorum & ichorum soboles succrevit, quæ facta meatuum consti-



patione & prohibita evacuatione, primum ebulluit, & postea putrescens, hanc febrem excitavit. Quamprimum hæc invadebat; omnes vires languebant, præcordia gravitatem, cor pressuram sentiebant & palpitabat, pulsus parvi, celeres & inæquales erant, anhelitus difficilis; caput erat grave, & ingravescente morbo ita egroti languebant, ut tremere & conciderent. Quidam vigilabant, alii profundioris somnum habebant. Ex capite fluxit acrior & subsalsus humor ad thoracem, qui tussim movebat, in extremis partibus dolores vagos & fugitivos excitabat. Initio horror, & calor totum corpus & caput occupabat, & ad tactum non erat mordax, continuus tamen, cum rubore oculorum & tumore. Urina primum tenuis, mox crassa; aliis sanguis e naribus fluebat; plerisque sudor copiosus prorumpebat, quo & febris finiebatur, quarto ut plurimum die; interdum, sed raro, longius protrahabatur ad septimum, vel nonum diem. Ceterum illud quam maxime notatu dignum, quod synochæ hæc epidemice grassantes & cum magna vehementia invadentes, administrata statim sub initium convenienti sanguinis per venam sectam missione, & adhibitis postea temperantibus & viscidum obstruens collquantibus, tertio mox, & quarto die fuerint solutæ, nec in putridas, aut diuturnas transferint febres, quæ non sine periculo. Et certe dici vix potest, quam insigniter febrium, synocharum æque ac ardentium vehementia in principio illico his præsidii obtundi queat ac frangi. Testis est jam ipse Galenus, meth. med. IX. perite non minus, quam vere scribens: nemo ex synocha in putredinis febrem incidit, qui sanguinem primum detraxit. Quo quidem præsidio neglecto, in summum ægri discrimen perveniunt, nisi eos, vel virium robur, vel largum alvi profluvium, vel sudor ex manifesta phrenitide eripiat copiosus. Ego quoque observavi frequentius, synocham sim-

plicem, juvenes sanguine, & succis plenos, cum magno æstu, & capitis dolore, nec non anxietate, sub pulsu pleno, & crebro, prehendentem, post incisam medianam, & dato ptisanæ largo potu, intra quatrimum sudore, per totum corpus manante, fuisse solutam, remittente mox inquietudine cum æstu ac siti, & somno redeunte. Opus tamen est, ut salutaris hæc diaphoresis per aliquot dies adhuc congruis remediis serveretur, & postea solutivo remedio, ex clementioribus, manna tamarindis, rhabbaro & tartaro, alvus ducatur. Neque etiam omittenda venæsectio in initio hujus febris, si corpus sanguine redundat ac pulsuum adest magnitudo, licet haud ita pridem sit admissa. Aliquot enim exinde mortuos, vel in summum vitæ discrimen adductos novi, quibus Medici ob id sanguinem subtrahere renuerunt, quia ante unum vel binos menses modo factum; quum tamen ex longo usu atque experientia in comperto sit, hac in febre, non semel, sed bis interdum, pro virium robore & sanguinis abundantia, venæsectionem esse administrandam.

## C A P U T I I.

De Febre ardente, nec non  
Cholerica.

Theses Pathologicæ.

## §. I.

**N**Ostra quidem ætate, omnes acutæ & continuæ febres, quæ præcedente rigore, cum ingenti æstu, siti, anxietate & pulsuum celeritate junctæ sunt, vulgo vocari solent ardentes, Germanis hitzige Fieber. Quin ipse artis parens Hippocrates, omnium febrium originem, ex bile plus, minus, vitiosa & meraci deducit, nec sanguinearum, nec synocharum facit mentionem, sed in scriptis suis, febres fere omnes continuas, in-

Arden-  
tes &  
conti-  
nuæ.  
plerum-  
que con-  
fundun-  
tur.



inflammatorias, item synochas, tam simplices, quam compositas, putridas quoque & malignas, appellat ardentes. Nihilominus tamen insignem inter has febres esse differentiam, luculenter omnino attenta observatio incurfus, symptomatum & decursus singularum, nec non curandi ratio diversa, docent.

§. II.

*Ardens  
febris  
quid  
proprie.*

Ardens itaque febris, Græco nomine causus, stricte proprie dicitur illa, quæ cum ardente & igneo quasi calore totius corporis atque siti inextinguibili, lingua simul arida, fissa & nigra, juncta. Binos hos enim pathognomicos causi esse characteres, veteres volunt omnes, & ob id torridam etiam hanc febrem appellant atque urentem. Hippocrates lib. de affection. pag. mihi 167. ita succincte describit ardentem: calor fervidus, sitis fortis, lingua aspera ac nigra, color subbiliosus, & sputum biliosum. Sed Aretæus exactus historiarum morborum scriptor, Lib. II. cap. IV. hanc sistit plenior descriptionem: ignis passim acer & tenuis est, sed intus maxime spiritus tanquam ab igne calidus; aeris vehemens attractio, frigiditudo cupiditas, lingua arida, in labiis & cute squalor, algent extrema, lotium quam biliosissimum, insomnietas, arteriarum motus crebri, parvi, imbecilli, oculi puri, luculenti, subrubri, facies colorata. Quod si morbus ulterius crescit, omnia majora & seviore fiunt. Arteriae minimis motibus, & creberrimis agitantur, ignis aridissimus & acerrimus, mens delirat, neminem agnoscit, siticulosi fiunt, omnia frigida attrectare cupiunt, parietem, vestem, pavimentum, humorem. Manūs frigent, sed palmæ perquam calidæ, ungues lividæ, spiratio crebra est & roscidus humor circa frontem & jugula.

§. III.

*Differet  
ab aliis  
continuis  
&  
inflammato-  
riis.*

Hæc ardentes proprie sic dictæ febres, multum differunt ab aliis continuis. Nam in synocha, tam simplici,

quam composita & cacochymia, non tam acris & ingens calor est, neque tam inexhausta sitis, sed æstus mitior cum madore quodam. Synochæ magis invadunt sanguine plenos, habitus laxioris, laute viventes: idque potissimum tempore verno ac in regionibus temperatis; sed causi adoriuntur macilentos, biliosos, sensibiliores, generantur sub tempestate calida, sicca diuturna, & regnant maxime in locis calidioribus. In ardente porro, secus ac in aliis continuis, facies flavescit, vomitio, vel conatus vomendi cum fastidio ciborum adest, urina flammea, intensius bile tincta mingitur, & per alvum biliosa foetida multa exturbantur. Tum id quoque peculiare habent febres ardentes & quæ a copia & acrimonia bilis subnascuntur, præ aliis continuis inflammatoriis, item sanguineis & malignis, ut diebus imparibus & circa tertium exacerbentur, paribus autem remissiores sint, id quod etiam observatur in tertianis continuis, cholericis, nec non in illis quas Veteres tritæophyas dixere, quæ tertio die sine horrore & rigore periodico exasperantur, qualis observatur in hemitritæis, sive semitertianis. Accedit, quod febres, quibus sanguinis puri, sive impuri copia, complicatur, sæpius quarto statim die solvantur, sudore, vel hæmorrhagia larga, sub facie rubicunda, quum ardentes demum circa septimum diem post rigorem, vel criticum, sudore, vel symptomaticum, inflammatione ventriculi, duodeni & partium, ad quas biliarii ductus pertingunt, funesta, terminentur. Demum ratione curationis adest discrimen. Ardentes quippe potum frigidum, ceu præstantissimum auxilium ferunt, sed non ita aliæ continuæ & inflammatoriæ, multominus malignæ & putridæ. Sanguinis missio in febribus a sanguine in non minimis vasis stagnante oriundis, item inflammatoriis, præsertim quæ occupant partes



& viscera sanguinea, summopere est necessaria; in ardentibus autem veris & exquisitis, eadem non opus, ut potius noceat.

## §. IV.

*Rarior est apud nos sim-plex & vera.* Sed simplices ejusmodi & exquisitæ ardentes febres, frequentissime quidem fuerunt & sunt in Asia, Græcia, Ægypto ac Italia & ob id a priscis Medicinæ parentibus, Hippocrate, Galeno, Aretæo, fuscæ & accurate quoad prognosin & medicationem descriptæ. In temperato autem nostro climate oppido sunt raræ, ac nonnisi a liberaliori potu vini spirituosius valde, æstate ardente, motu & exæstuatione impensiori animi corporisque & cohibita perspiratione, suscitantur. Nostro potius sub cælo & inter nostrates familiares magis ardentes sanguineæ, sive synochæ biliosæ, item cholericæ febres.

## §. V.

*Sed frequens ardens sanguinea.* Synochæ autem biliosæ nobis dicuntur illæ, quæ sine præcedente singulari horrore ac rigore, cum magno ardore, siti, vigilia, anxietate & inquietudine, in corporibus sanguineo-cholericis, copia sanguinis calidi & biliosi refertis, oriuntur, & diebus imparibus, seu criticis, antecedente rigore quodam, terminantur in salutem, vel mortem. In salutem quidem solvuntur sudore, vel ut plurimum hæmorrhagia narium. Hæ enim sunt ardentes illæ, de quibus Hippocrates lib. I. epid. com. 2. notavit, omnes ex iis evasisse, quibus sanguis e naribus aut aliis viis effluxit, reliquis, quibus id non accidisset, pereuntibus. Quando vero funestus eventus, definunt, vel in partium nobiliorum, meningum maxime, pulmonum, ventriculi & intestinorum inflammationem lethalem, vel in lethalem syncopen, ob sanguinem in dextro cordis ventriculo collectum, stagnantem & demum congrumatum.

## §. VI.

*Et cholerica febris.* Alterum nostris familiare ardentis complicatæ genus cholerica febris.

Hæc etiam intenso æstu, siti, angore & inquietudine aggreditur, sed cum vomitu, seu perpetuo conatu vomendi, dejectione biliosa & copiosa, extremorum frigore, ardore interno, anxietate cardialgica jungitur. Sed merito etiam cholerica hæc febris distinguenda in acutissimam & minus acutam. In illa longe major est symptomatum vehementia, dejectiones biliosæ, per superiora & inferiora copiosissimæ, junctæ cum cardialgia etiam syncopatica, & plerumque ante septimum diem necant vehementi ventriculi & intestini duodeni inflammatione, cujus indicia vehemens circa præcordia & fixus igneus ardor, cum extremorum refrigerio, summa inquietudo & anxietas, singultus & eructatio bilis & salivalis liquoris copiosa, icteritius faciei color, nec non facies cadaverosa, sic dicta Hippocratica. Nonnullæ non adeo acutæ, sed longius extrahuntur, ita tamen, ut subinde remissione, vel plane intermissione quadam interpolentur, & vel quotidie, vel tertio quovis die, cum vomitibus, anxietatibus & refrigeratione iterum exacerbentur, merito quotidianæ, seu tertianæ continuæ vocandæ. Sed hæ ipsæ, nisi congruis cito succurratur auxiliis, in lentas febres perquam facile degenerant, & stomachi diuturna vitia, dolores pressorios, ructus, inflationes, ob erosionem ventriculi, aut duodeni, a mordaci bilioso succo, vel superficialiter, vel profundius factam, inferunt.

## §. VII.

Ad causas & generationem harum febrium, quod attinet, illa quidem exquisitè ardens, qua summo fervore & incendio, cum linguæ siccitate & siti clamosa, tam partes internæ, quam externæ, uruntur & exsiccantur, causam non habet aliam, quam celerrimam sanguinis & humorum agitationem, per fibroso vasculosam totius corporis compagem, partim spasmò tensam atque constrictam, sub

quæ vel acutissima.

Et minus acuta.

Causa proxima ardentis.



sub quo motu attritivo solidorum ad fluida & fluidorum ad solida, intestinus partium sulphurearum quoque augefcit, unde inflammatorius calor, fluidas diffilans atque consumens & solidas siccans & adurens, enascitur. Hic vero æstus in corporibus sanguine & succis plenis ob fibrarum mollitiem & laxitatem, lenior est atque remissior, ac febris emergit mitior ardens, minus exquisita, in qua non tam impensa cutis & faucium siccitas, neque etiam sitis adeo urgens. Et in illa ardentis specie, quam cholicam diximus, non tantum, ob partium salino-sulphurearum in succis redundantiam, & minima nonnulla vascula angustata & obstructa, celerior est motio, verum etiam succus biliosus copiosius in hepate secretus ac in duodenum & ventriculum effusus, acrimonia, & mordacitate sua nerveas tunicas acrius sollicitat, lancinat, arrodit & inflamat, ex quo symptomata huic feбри propria, ardor, anxietas cardialgica, nausea, vomendi conatus, impetuosæ per superiora & inferiora biliosæ dejectiones.

§. VIII.

*Causæ antecedentes.* Omnia igitur, quæ sanguinem exæstuant & uberi particularum sulphurearum in sanguine proventui favent, liberum quoque ejusdem per minima partium vascula transitum retardant atque impediunt, ad generationem ardentium febrium faciunt. Hinc est, quod iisdem præ reliquis inprimis pateant, qui biliosæ constitutionis, striatioris habitus, potibus spirituosus indulgent, crebrius animo, præsertim ad iram moventur corpusque vehementiori motu exagitant. Neque minus inde ducenda ratio, quod sub cælo calido & in locis meridionalibus frequentissima sit ardens exquisita, nec non quod apud nos, post diuturnum solis æstate sicca fervorem, succedente autumno frigidiore aura, crebrius incidant, quin epidemicè quandoque cum diarrhœis biliosis, dysenteris, tertianis duplicibus & conti-

nuis grassentur cholicæ febres. Quæ autem ingentiam his ad concipiendum hunc morbum dispositionem effectui dant, sunt maxime perspiratio cohibita & vehemens ira. Nimirum quando succi calidis sulphureis particulis scatent, harum vero per vascula minima exhalantia difflatio, sive per aerem crassiores frigidum, sive improvidam refrigerationem, intercipitur, manent intus, intestinum motum suscitant & febrem accendunt. Vehementis autem iracundiæ is in corpore effectus, ut non tantum in universo systemate nervorum ac vasorum motus intensioem & rigidam spasticam stricturam inducat, sed & præ ceteris in ductus nervoso-musculosos biliarios agat eorumque motum peristalticum fortiter augendo, ex toto systemate horum canalium exprimit biliosum succum eundemque in duodeni cavum trumat copiose & impetuose. In quo flexuoso sinu dum stagnat, cum salivalibus succis & acidis cruditatibus mixtus fermentescit, eoque mordacem & tantum non causticam indolem, acquirit, cujus index est color viridis æruginosus, qualis a commixtione bilis cum spiritu acido corrosivo, ut oleo vitrioli, & aqua forti, emergere solet.

Curatio.

§. I.

In medicatione probe distinguendæ diversæ ardentis species & corporum ratio habenda. Nimirum quando ardentissima est febris in corpore bilioso, macilento, sanguinis & succis minus pleno, non habet locum sanguinis missio. Neque etiam eadem admitenda in febribus cholicis, tam acutis, quam intermittētis typum servantibus & cum numerosis dejectionibus per os & alvum, summa præcordiorum anxietate & extremorum frigore stipatis. Sed ubi juncta ardent sanguinis plenitudo, & febris est nostris frequentissima, quæ ex veterum denominatione synochus biliosa, si-

*Sanguis non in-  
discerni-  
mus.*



ve putrida, recte dicitur, nunquam non pernecessaria est ac utilissima sanguinisconveniens, sufficiens & pro ratione virium & vasorum amplitudinis, proportionata missio. Hæc enim facta, non modo vehementia febris & symptomatum multum frangitur, sed brevis etiam & felix eventus, ceteris paribus, sperandus. Contra ea experientia docet, gravius semper & periculosius decumbere hac febre, feminas inprimis & sanguine abundantes, si in principio omissa sanguinis subtractio. Tum enim natura ipsa superflui sanguinis excretionem, per nares potissimum, molitur, quod si non critico & convenienti tempore fit, nec sufficienter succedit, sanguinis in vasis cerebri subsequitur stasis, phrenitidem valde periculosam membranarum cerebri inducens.

## §. II.

*Æstus  
ac sitis  
tempe-  
randa  
frigido  
potu.*

Post sanguinis missionem omni studio eo annitendum, ut igneus iste totius corporis æstus cum immodica siti & faucium ariditate, removeatur iis, quæ æstuosam illam partium sulphurearum agitationem figunt & temperant, ac præterea fibrarum rigidum spasmus laxant & humores in vasculis minimis stagnantes diluunt, fluxiles reddunt & obstructa referant, ut æquabilis & liberior fiat per loca convenientia & vasa transitus. Hunc in finem veteres omnes dilaudent potum frigida aquæ. *Hippocrates de affect.* §. 2. in ardente febres dandas præcipit potiones frequentes & paullatim quam frigidissimas. *Aretæus lib. 2. c. 3. si biliosus*, ait, vomitus & distensio, adest fastidium, anxietas, virium labefactatio, tunc frigida aquæ cyathi duo vel tres propinandi sunt ad ventris adstrictionem, facile enim frigida in ventre incalescit. Neque minus *Galenus meth. med. lib. 9. cap. 5.* præter venæsectionem, potionem frigidam impense laudat, adjecta ratione, quia extinguit febrem & naturam robustam reddit, ut deinceps per alvum & sudorem expellat, quæ noxia sunt.

Idem sentit *Celsus lib. 3. cap. 13. si*, inquiens, in summo incremento est morbus ardens, utique non ante diem quartum, magna siti accedente, frigida aqua copiose præstanda est, & ad satietatem danda, qua pro medicamento utuntur. Ubi factum est, multa veste operiendus, & collocandus, ut dormiat. Fereque post longam sitim & vigiliam, post multam satietatem, post infractum calorem, plenus somnus venit, per quem ingens sudor effunditur idque præsentissimum auxilium est. Hastamen subnectit cautiones: sed in his tantum, in quibus præter ardorem nulli dolores, nullus præcordiorum tumor, nihil prohibens, vel in pulmones, vel in faucibus, non ulcus, non defectio, non profluvium alvi fuit. Si quis vero in huiusmodi febre leniter tussit, is neque vehementer sitire debet, neque aquam frigidam bibere. Accedit *Alpinus med. meth. lib. 2. ita* habens: in continentibus febribus vehementer æstuosis, Medici omnes largum potum algida aquæ exhibere suscunt, quia calorem nativum concentrat, ut statim inde sitis & calor cesset: roboratur inde totum corpus & aqua epota digeritur & plerumque largissimos sudores frigida aquæ potus suscitatur, nonnunquam vomitus biliosi fiunt & aliquando per alvum copiosi humores profluunt & urinam copiosam excitat. Mirabile est, concludit, quomodo tale præsidium has febres expugnet, nam excretionibus, quas aqua suscitatur, hæc febres finiuntur. Idem auctor *Ægyptiis* hoc in usu, quin inter secreta fuisse de *Med. Ægypt. lib. 4. capit. 15.* tradit, aliqui, scribens, pro secreto habent synochas & ardentes febres, multam aquam anguriæ (quæ cucumeris species) egrotis propinantes, sanare, si modo febricitantes ea multis diebus in cibo ac potu sola utantur. Alii tempore vehementioris æstus, largius frigidam potandam concedunt, quæ epota, egros multis pannis contingentes, sudorem procurant, quæ non paucos audio ibi sanatos fuisse.

## §. III.



§. III.

Vel po-  
tibus a-  
liis re-  
frigerā-  
tibus.

Nec immerito tam magnifice de frigida potu in ardentibus sensisse Veteres, uberius testatur & ratio & experientia. Nisi enim ventriculus, vel alia internæ partes jam vera inflammatione affectæ, nec summa cum extremorum frigore anxietas, neque etiam pulsum contractio & sanguis deficiens adsit, utique aqua bonæ notæ, subfrigida, non prorsus gelida, haustu, non simul & semel, largiter tamen pota, egregie prodest. Nam frigus in humido æstuosum nimis partium sulphurearum & ætherearum in sanguine motum obtundit, fibrasque remissiores adducit nimiumque distentis contractilitatem & elasticitatem justam reddit. Neque etiam a frigore noxa timenda, quia frigidum, successivis haustibus corpus subiens, a calore interno tepescit, qui humidus tepor ad relaxandas spasmis contractas fibras & succos in minimis stagnantes expediendos, apprime proficius, ut hinc sudor & urina copiosius fluant & alvus moveatur. Sed quum in septentrionalibus nostris regionibus admodum raræ leves ejusmodi, puræ & subtiles aquæ, reperiantur, coctione & admixtione congruorum corrigendæ utique. Ipse *Hippocrates* aquam cum hordeo coctam jam in ardentibus laudat. Et *Aretæus* aquam cum lacte mixtam in cholera commendat. Qui nostratibus solennes & proficui deprehenfi frigidi potus, sunt maxime, julapia, ex aqua fontana cum succo citri & saccharo nec non ptisanæ ex rasura cornu cervi, radice scorzonæræ, cum sirupo acetositis citri, vel julepo rosarum & spiritu vitrioli, conditæ, item aqua cum frusto panis cocta. Huc quoque referendum serum lactis dulce, vel acidulum, cum succo citri coactum, item aquæ minerales temperatæ, quo nomine celebres acidulæ Selteranæ, Antonianæ & Vvildungenes.

§. IV.

Ad obtundendam tandem & con-

Acrimonia ob-  
tundenda

temperandam, in cholericis potissimum febribus, acrimoniam acidam causticam succorum biliosorum in ventriculo & duodeno stagnantium, spectatæ virtutis ex compositis pulvis Marchionis maximeque pulveres absorbentes, quæ commodissime ingrediuntur terrea teneriora, lapides cancrorum, mater perlarum, conchæ præparatæ, cornua & ossa philosophicæ præparata, nec non ex commendatione *Langii* atque *Cratonis* crystallus montana. Nobilis quoque ad æstum extinguendum & intestinum motum, componendum nitri virtus quod his pulveribus cum fructu ob id subinde admiscendum. Sed necesse est, ne pulveres ejusmodi temperantes in sufficienti quantitate diluti vehiculi assumantur, crebrius etiam & convenienti tempore. Neque minus ex usu sunt diluentia ac demulcentia, emulsiones scilicet ex amygdalis, seminibus quatuor frigidis, præsertim cucurbitæ, cum aquis florum, quæ paregorica simul virtute pollent, sambuci, rosarum, buglossæ, primulæ veris, tiliæ, liliorum convallium, nec non aqua cerasorum nigrorum. Conducunt quoque hoc nomine gelatinæ ex rasura cornu cervi, lac ipsum cum aqua mixtum, oleum amygdalarum dulcium, serum lactis dulce, item juscula ex pullis gallinaceis contusis & in vase clauso cocta. Et hæc utique remedia apprime proficua sunt ad arcendam inflammationem partium nervoso membranacearum, quæ his morbis eventu demum accedit funesto, modo exhibeantur debito ordine, tempore ac dosi, cum judicio & observatis quibusdam cautionibus jam subnectendis.

*Cautela, & observationes  
præctica.*

§. I.

Sicut in curatione omnium acuta-  
rum febrium; ita maxime ardentium  
& quæ ex inflammatione fiunt, tutis-  
sima

Tempe-  
ries u-  
tilis.



fima & optima methodus est, per totius morbi decursum, placide & moderate procedere, omniaque quæ a temperie & moderamine, quoad pharmaciam æque ac diætam & regimen, recedunt, evitare sollicite. Egregium in primis hanc in rem est *Celsi lib. 3. c. 7. monitum*, ita habens: *etiam amplo conclavi ager tenendus est; quo multum & purum aerem trahere possit, neque multis vestimentis strangulandus, sed admodum levibus tantum velandus est. Possunt etiam super stomachum poni folia vitis in aquam frigidam tincta, ac ne nimia siti vexandus est.* Moderatus quippe & æqualis calor, in febribus hisce, ad materiæ morbificæ correctionem, resolutionem & ex corpore diffusionem, plus præstat, quam omnis, quantumvis pretiosa, medicina. Sed nihil vicissim perniciosius, quam fervido conclavi accendere, vel etiam abstinencia potus intendere, calorem immodicum, qui vires exsolvit, debitam vitiosi humoris a succis vitalibus se & excretionem impedit, & humidum ad expeditum sanguinis & humorum progressum & ad coarctata & repleta minima vasorum aperienda & relaxanda necessarium, absomit. Neque ea propter semper utilis, sed sæpius nocivus, in æstuosis hisce febribus, frequens potuum calidorum & infusorum theiformium usus. Multo vero magis detrimentum procurant ea, quæ calefaciunt, massam sanguinis commovent & positivo sudorem movent.

*Et aer purus.* Deinceps non sine ratione *Celsus l. c.* commendat amplum conclave & aeris puri usum. Nam sicuti subtilior & ætherea elastica in aere substantia, genuinum illum pabulum & fomentum est, quod virtutem vasorum elasticam vitalem systalticam & robur partium sustinet; ita aer multis humidis & pravis effluviis inquinatus & ob id vi elastica spoliatus, vel sanis, tanto vere magis infirmis corporibus, adversus est atque damnosus. Neque aliam subesse causam arbitror, quod

plurimi ex plebejis, quorum natura ad vincendum morbum alia satis valens, in febribus acutis pereant, quam conclavia angusta, humilia, & haud raro nimis calefacta, in quibus, præsertim quando plures decumbunt, aer morbidus & tetrus halitibus gravis est, quem continuo hauriunt.

## §. II.

Natura etiam febrium continuarum medicatrix optima. Igitur hujus motus cum cura attendendi ab artifice. Exserunt autem hi sese maxime per rigorem, qui ex medulla spinali, cum horroris & frigoris sensu, venit, & certis temporibus, diebus maxime imparibus, dimidio quarti, septimo, undecimo & decimo quarto, accidit. Est quippe hic rigor non nisi affectio generis nervosi universi corporis, spasmodica, qua sanguis & humores ab exterioris corporis peripheria, versus interiora, cor, cerebrum & vasa majora, cum quadam vehementia pelluntur, eaque propter extrema refrigerantur, interiora vero sanguine nimis replentur & distenduntur, unde pulsus contractus est, pectus angitur faciesque cum vasis capitis turgescit. Quod si igitur post hunc rigorem, succi intus acti æquali renisu & auctiori cordis & arteriarum systole ad corporis superficiem repelluntur, sæpius tota morbi & causæ morbificæ vis, uno impetu, per largum universi corporis sudorem, aut narium stillicidium, frangitur penitusque eliditur. Sic procedens rigor salutaris est, criticus ob id recte vocatus, post quem arteriarum ictus æquabiles fiunt & molles, circulus sanguinis debitus & vires cum somno redeunt. Sed ubi cordis & vasorum systaltica vis non tam valida est, ut appulsam sanguinem iterum extus agere possit, symptomatikus est rigor & malus. Tum enim nec corpus incalescit rursus, nec pulsus æqualis fit, nec sanguis per nares, nec sudor calidus universalis per poros, sed particularis & frigidus circa caput & collum, effertur, nec corpus cum

*Naturæ motus attendendi.*

ani-



animo reficitur, nec somnus redit. Sanguis potius intus in minimis vasis impactus subsistit, ac in cerebro phrenitidem & convulsiones, circa cor & pulmones, summam præcordiorum anxietatem, spirationem anhelosam, difficilem, viriumque ad animi usque deliquium dejectionem, facit, ut postea nono plerumque die, mors excipiat. Quandoque etiam extra criticos dies accidunt ejusmodi rigores, sed hi pariter sunt symptomati, malumque prælagiunt eventum. Hi itaque naturæ motus, mortem, vel salutem, adducentes, probe a medente attendendi. In hoc enim præcipuum ad prognosin & tempestivum remediorum usum versatur momentum, quia totius doctrinæ practicæ fundamentum, quod optime tenuit primus artis parens *Hippocrates*, quod serio inculcarunt optimi & fidissimi hujus interpretes, *Mercurialis* atque *Duretus*, sed ex nostris norunt paucissimi.

## §. III.

Natur-  
bando  
naturæ  
sed ju-  
vanda.

Quando sic natura motus instituit extraordinarios, quiescendum Medico nihilque movendum. Abstinendum quoque plane a cibo. Et corpus tantum in moderato & æquabili calore conservandum. Si autem naturæ facultas ad expellendum sanguinem & excretiones afficiendas, sola non sufficit, juvanda congruis auxiliis perite, siue interius analeptici & diaphoreticis temperatis, siue exterius derivantibus & discutientibus. Nam profecto nunquam magis, quam in periculosis & acutis morbis, summo opere necessaria maximique momenti est, temporis in agendo opportunitas.

## §. IV.

Caput  
defen-  
dendū.

Ubi igitur post rigorem incidit cephalalgia plethorica, cum incipiente mentis emotione & nares parum sanguinis stillant, epithema nobis usitatum, ex aceto rosarum, aqua rosarum, camphora in spiritu rosarum soluta, nitro & oleo ligni Rhodii, subfrigide, non modo temporibus,

sed & melius raso toti capiti refrigerando, discutiendo, & inflammationi resistendo. Idem hoc epithema, linteo triplicato lato, præcordiis impositum, ad levandam anxietatem, inquietudinem depellendam, & spirationem facilitandam eximii usus. Optimum tamen etiam auxilium ad arcendam phrenitidem expectandum a venarum in naribus, siue id fiat per instrumentum scarificatorium, siue intrusum culmum straminis, apertione, tepesactis simul & frictis pedibus atque femoribus & data interius mixtura discutiente, diaphoretica & analeptica cum aceto stillatitio, aqua cinnamomi, rosarum, cardui benedicti, mixtura simplici, cinnabari, lapidibus cancrorum & bezoardico minerali.

## §. V.

Ad sedandam sitim & humectandas fauces aridas cum lingua, ego non præsentius vidi remedium, quam serum lactis dulce, in cuius mensura nitri puri drachma dimidia soluta, quippe quod crebrius, sed parvis haustibus subfrigide potum, æstum præternaturalem simul extinguit. Os quoque & fauces subinde eluendæ aqua, in qua rob diamoron & nitri sufficiens quantitas soluta. Præbere etiam hæc potest gargarisma. Injectiones vero per syphonem nunquam probo, quia valido attritu augment dolorem & inflammationem. Præterea ad præscindendam anginosam inflammationem, insigniter prodest linteus lente deglutiendus, ex julepi rosarum uncia, nitri puri granis 15. & camphoræ granis tribus, in drachma una olei amygdalarum dulcium solutis.

## §. VI.

Ut ut alvum purgantia, ratione docente & experientia monstrante, in febribus ardentibus, non sine periculo præbeantur; e re tamen est, ut alvus semper sit libera. Sub morbo igitur hoc optime præstant glandes & clysteres, ex solo lacte, melle & pauxillo

alvus  
perite  
movē-  
da.



lo nitri. Facta vero crisi & coctione, ex urinæ sedimento cognoscenda, alvum utique clementioribus laxantibus ducere, tamarindinatis, mannatis, rhabarbarinis, passulatis & tartareis, expeditissimum, quo vitiosi succi, in primis viis per ipsum etiam morbum geniti, exturbentur, ne novo morbo ansam & causam præbeant.

## §. VII.

*Frigida  
potus  
utilis.*

Aquæ frigida potio, a veteribus eximie collaudata, heroicum hoc in morbo & magnæ efficaciam est remedium, eaque propter attentionem & circumspeditionem Medici poscit. Supra tamen satis fusc jam expositum, cur & quando ex usu sit. Heic igitur monuisse sufficiat, nunquam simul & semel magis haustibus præbendum esse frigidum potum, sed successive & crebro; nunquam in principio morbi, sed elapsi jam aliquot diebus; nunquam tempore accessionis, vel exacerbationis, vel etiam sub rigore & pulsu parvo, aut intermittente; nunquam nisi plethora prius soluta. Sed quando extrema calida, pulsus æqualis, celer & magnus.

## §. VIII.

*Acri-  
monia  
tempe-  
randa.*

Si febris est cholericæ, acuta, admodum periculosa, ob succos biliosos mordaces nimium & corrosivos, nerveas ventriculi & intestinorum tunicas arrodentes, celeri & efficaci auxilio est opus. Tum igitur consultum est, pulveres absorbentes ac temperantes, crebro & majori, quam alias moris est, quantitate, propinare cum diluentibus ac demulcentibus. Quo nomine ego nunquam non expertæ virtutis commendo pulverem ex lapidum cancrorum, matris perlarum, cornu cervi sine igne, crystalli montanæ, sive lapidis talci calcinati, ana drachma, nitri scrupulo, de quo singulis horis sumenda drachma una, cum emulsionis amygdalatæ unciis binis, cui drachmæ duæ olei amygdalarum dulcium commixtæ. Ad impetuosas autem biliosas excretiones com-

pescendas, præstabilis virtus est liquoris nostri anodynæ mineralis, præsertim si cum aliquot guttis olei macis essentificetur & cum diluto vehiculo, vel aqua tantum frigida, propinetur. Quia enim nimis celerem systalticum, vel peristalticum motum in ductibus biliariis sistit, efficit, ut minor copia succi biliosi ad duodenum trudatur & ob id copiosior excretio sistatur. Et certe his præsidiiis, debito tempore, congrua dosi & mature usurpatis, & cholicam, & dysentericam passionem, brevi fuisse sublatam, multis exemplis edoctus novi.

## Enarrationes Morborum.

## OBSERVATIO I.

Summus quidam militum præfectus, quem vocant Generalem, quædragenario major, sanguineus & vividus, laute vivens, vinique potissimum potui indulgens, ceterum bene valens, nisi quod vere & autumno, rheumaticis & catarrhosis defluxionibus affligeretur, potarat in convivio liberaliter vinum potens Hungaricum Tockaviense, ad mensuras minimum quatuor, eodemque plenus, vespere sub cælo nubilo & frigido in villam suam vicinam redierat. Redux factus, noctem insomnem & mire æstuans exegit, mane expertus calorem intensissimum, cum pulsu magno & celeri, cephalalgia, virium prostratione, faucium ardore ac siti. Bibit quidem infusum theæ, sed inde anxietas increvit & vomendi conatus accessit. Sumsit pulverem absorbentem & nitrosum, sed symptomata persistenterunt. Admisit quoque venæsectionem in brachio, sed sine levamine. Hinc vocatus ego quarto die, offendi ipsum ingenti æstu affectum & summopere conquerentem de ardore ventriculi ac siti. Illico igitur removi cerevisiam lupulatam valde & spirituosam, male eousque ad sitim extinguendam liberaliter datam. Annuit æger

*Ardens  
copioso  
potu ju-  
lapii  
saturatus.*



æger ac enixe petiit haustum frigide . Ego vero sic condere nolui , sed paravi julapium , ex aquæ fontanæ mensuris duabus , succicitri uncia , cum tantundem julepi rosarum , de quo successive biberet & cum quo sumeret , binis quibuscvis horis , pulverem ex matre perlarum , conchis , nitro & lapidibus cancrorum . Æger impatiens quatuor haustibus julapium ingurgitavit omne , tres etiam assumpsit pulveres ac inde refrigerium sensit internum , melius quævit & parum sudavit . Jussit itaque ut denuo conficeretur julapium , ejusdemque mensuras duas intra aliquot horas me incio ingessit . Inde vero incidit in effusissimum sudorem , sequutæ alvi dejectiones crebriores , somnus rediit , symptomata discussa & convaleuit .

*Epicrisis .*

Veteres , & inter hos maxime Galenus , Aretæus ac Celsus , aquæ frigidæ potum in synocha & ardentissima febre mirifice commendarunt , quin in hujus usu omnem fere salutis spem reposuerunt ; hac tamen cum cautela , ne detur ubi interna jam inflammatio , scirrhus , aut tumor œdematosus est . Ego quoque prætabilem simplicis hujus virtutem multoties expertus sum in cholericis passionibus , ad contemperandum bilis ardorem & acrimoniam , viresque languentes suscitandas . In nostro egregia pariter ipsius fuit facultas , maxime quod sudorem movit . Neque vero etiam nocere hoc in casu magna julapii quantitas potuit , quum sanguis ac copia Hungarici vini vehementer exagitatus esset & quasi incensus . Etenim debet esse proportio quædam inter vim morbi & vires remedii , maximeque huic feбри , perite monente Aretæo , magnum ac celer remedium opponi . De singulari autem aquæ effectu sudorifero notari in primis meretur Riverii testimonium Cent. I. obs. 19. ita habens : *observandum a spiritu sulphuris , vel ejus loco spiritu vitrioli , cum aqua exhibito ,*

*sudores copiosos fuisse provocatos ; quod multis experimentis nobis innotuit , qui plures tertianas curatas vidimus eodem remedio , in summo accessionis aestu & urgente siti exhibito ; unde copiosi sudores provocabantur , a quibus non solum paroxysmus , sed etiam totus morbus integre solvebatur . Minuenda tamen est in minori aquæ quantitate spiritus quantitas , ne minimum acefcat .* Cæterum sicuti aquæ frigidæ potus & refrigerantia efficacissima in febre , quæ a sanguine propter spirituosorum abusum nimium exestuato accenditur ; ita vicissim aquæ calidæ potus , in febre , quæ in sanguineo , pituitosis , ex obstipatis per aerem frigidum & humidum cutis poris inducitur , virtutis est longe saluberrimæ . Vidi ego sæpe plebejos , sub cœlo pluvioso , nebuloso & humido inter labores versantes diu & inde febre correptos , solo potu calido , ex aqua , cum carduo benedicto & scabiosa decocta , adjecto æquali mensura vino , & calide pota hac mixtura , sudore inde oborto , cito ac tuto morbum discussisse . Quod autem frigida etiam sudorem movere possit , ratione non caret . Nam expansum nimis vasorum elaterem adducendo , tonum & robur ipsis restituit . Calorem fervidum restinguendo , impedit feri & lymphæ coagulum , quod ipsis a forti calore induci albuminis ovi exemplo constat . Tenaces autem succi , minima vasculorum excretoriorum obstruentes , liberam evacuationem impediunt . Frigidum quoque æstuantī corpori immissum tepescit , tepidumque factum fluxilitatem humoribus conciliat , & aridas exsuccas partes mollit .

OBSERVATIO II.

Generosissima femina 36 annorum , sanguineo-cholerica , natura sensibili- *synocha caco-* lior , animo in affectus prona , ingenio alacris & sagax , ceterum corpore *chymica cum* nervosa & robusta , ciborum appetens *purpurea* & liberaliter cœnans , ob alvum ad- *ra fu-* *nesta .* stri-



strictiorem & collectas inde cruditates diu conquesta est de doloribus presforiis & inflatione ventriculi ac hypochondrii sinistri, mensium quoque, ob uterum ex crebra & annua fere imprægnatione debilem, fluxum, ratione copiae & temporis, non experta est legitimum. Ad tollenda hæc vitia multis quidem usa est medicamentis & Medicis, sed sine levamine. Aquarum autem medicatarum potum, ob ventriculi imbecillitatem, & atoniam ferre potuit nunquam, melius tamen balneum ex aquis Tœplicesibus. Accidit interea, ut medio vere post gravem terrorem & excarescentiam, præcedente levi horripilatione, incideret in febrem valde æstuosam, quæ sitim cum calore accendit intensissimam, somnum excussit omnem, viresque mirifice prostravit. Accitus primum Medicus loci, qui venæsectionem, ante sex hebdomades vix admissam, reiterare renuit. Quinto die vocatus ego, pulsus fortem & magnum deprehendi, cum æstu intolerando, anxietate circa præcordia, inquietudine, insomnia & dolore dorsi. Pugnavi igitur adversus hæc symptomata diluentibus & refrigerantibus potionibus, pulveribus absorbentibus, nitroso-diaphoreticis, cum succo citri permixtis. Fluxit inter hæc ex utero ichor cum sanguine, ad 25. horas. Sed septimo die incurrit horripilatio, extrema refrigerata, pulsus celer & contractus factus, facies turgida, oculi rutilantes & levis cogitationum aberratio visa. Exactis tamen duabus horis & data mixtura discutiente diaphoretica, ex aqua cardui benedicti, ceraforum nigrorum, theriacali, aceto destillato, antimonio diaphoretico, lapidibus cancrorum, cinnabari & sirupo acetositate citri, rediit calor per totum corpus ad pedes usque, pulsus increbuit, oculi splendorem rutilantem posuerunt, & per universum corpus fausto prodiit omne sudor, quem temperatis diaphoreticis & infuso

theiformi secundare jussi. Inde magna sequuta symptomatum remissio & ægram in vado constitutam esse, visum quidem, sed quia somnus redire noluit, neque æstus penitus remisit, neque etiam vires restitutæ, non sufficientis & omnibus numeris absolutæ criseos fuit indicium. Nec vanus fuit metus. Nono enim die, post lenem rigorem in dorso, novus paroxysmus febrilis incessit, cum magna præcordiorum anxietate, intensiori æstu, inquietudine, spirandi difficultate, ita ut ægra corpus mirum jectigaret & lectum subinde mutaret. Postero die purpura rubra cum alba comparuit & collum totumque pectus obsedit, quæ congruis præsiidiis excepta. Decimo die sanguis rursus profluxit aquosus ex utero, in abdomine oborta tormina & per alvum feces liquidæ & biliosæ, postea etiam sine sensu, secesserunt, & luculenter prodiderunt gravem in intestinis inflammationem eamque sphacelofam, quam præterea borborygmi in ventre post assumptum potum arguebant. Undecimo die, post perpetuas tandem vigilias mens alienari cœpit, pulsus reddi convulsivus, spiratio fieri anhelosa, subsequente paullo post morte, ob vim cordis, & vasorum vitalem elasticam per morbum diuturnum, & vigilias continuas fractam, nunc deficientem adeoque naturam penitus succumbentem.

#### *Epicrisis.*

Febris hæc merito vocanda synochacachomica, sive putrida universi corporis inflammatoria, ex abundantia impuri sanguinis progenita, quæ, si viscera offendit minus integra, ut hic ventriculum & uterum, raro ex voto, sed plerumque funestum, sortitur eventum. Ego vero etiam summo opere improbavi, sed tacitus, ne Medicus primus malum nomen incurreret, ob factum, quod infectum fieri non poterat, quod neglecta in principio sanguinis, missio in corpore plethorico, & cacochymico, sub pulsus vehemen-



menti, duro & magno, unde etiam ipsa natura a copia sese per uterum liberare molita. Licet etiam septimo die criseos indicia comparuerint, somni tamen & virium defectus, cum resistente calore, imperfectam eam fuisse prodidit, & latitare adhuc intus materiam perniciosam. Fuit hæc purpuracea, quæ teste experientia, in corporibus impuris cacochymicis, præsertim feminarum, sub declinatione febris continuæ succedere solet, criticis diebus. Sed funesto plerumque eventu. Natura enim, siue potentia elastica cordis & vasorum, morbi vehementia jam debilis nimium, eandem minus vincere & expellere potest, unde de novo in minimis vasculis fiunt stases inflammatoriarum; tandemque mors excipit. Nostra in ægra insanabiles hæc inflammationes circa uterum & maxime intestina confederunt, easdemque dejectiones aquosæ cum torminibus, præsertim involuntariæ, ob secessum partium serosarum a sanguine coagulato stagnante, abunde satis indicarunt.

**OBSERVATIO III.**

Dux militaris quinquagenario major, sanguineo-cholericus, robustus, sanguine plenus, laute vivens, plus vini, quam cerevisiæ bibens, in iram & vehementes animi affectus, cœlebs, sed veneri vagæ admodum indulgens, postquam ebrius vehementer excaudisset & postea cum concubina habuisset rem, incidit illico in febrem vehementissimam ardentem. Invasit hæc cum artuum tremore, juncta fuit summa præcordiorum anxietas, ætus in pectore ingens, capitis dolor, somnolentia, nec non mentis emotio. Conquestus simul est de dolore lateris dextri & quarto die expuit tussî sanguinem cum pituita mixtum. Secta quidem fuit in principio vena, sed quia inde nullum levamen, vocarunt me. Erat autem æger, quum advenirem, impatiens quandoque & irre-

*Tom. IV.*

quietus, quandoque somnolentia & torpore obrutus, sitis ingens, alvus adstricta, calor vehemens, urina tenuis flammea. Expenfis cunctis inflammationem ventriculi & pulmonum ac minus faustum eventum sum suspicatus; ideoque ad contemperandum iterum illum inflammatorium æstum pro viribus adhibuit præsidia. Clysmata scilicet emolliens & relaxans, ex sero lactis, melle ac oleo amygdalarum dulcium, cum momento nitri alvi injicere jussi ad uncias 12. aliquoties, non tam ad purgandum, quam potius ad humectandas & relaxandas intestinorum tunicas, siquidem clysteres stimulo carentes, aliquoties injecti & diutius retenti, balneum quasi præbent internum. Deinquum pulverulenta averfaretur omnia, emulsionem conficiendam scripti, ex decocti cornu cervi mensura, amygdalarum dulcium uncia una cum dimidia & seminum quatuor frigidorum majorum ana drachmis duabus, additis aquæ cerasorum nigrorum uncis binis totidemque rosarum, matris perlarum, nitri depurati ana drachma, julepi rosarum uncia una. Hanc intra aliquot horas ebibit ac præterea ptisanam ex hordeo, rasura cornu cervi & scorzonera, tam avidè ob urentem sitim ingurgitavit, ut 24. horarum spatio, vel septem ejus mensuras epotaret, idque per aliquot dies. Dedi etiam quandoque jusculum avenaceum cum aliquot cochlearibus olei amygdalarum dulcium. Et exterius thoracem dolentem atque præcordia inungere jussi linimento ex olei amygdalarum dulcium uncia, camphoræ drachma & extracti castorei liquidi drachma dimidia. His æstus restinctus septimoque die urina turbata ac nonnihil ad fundum dimisit. Accessit nono die diarrhœa, ut plus quam decies intra diem & noctem deiceret, cum levibus torminibus in ventre. Successit hic fluxus alvi per quatrimum, ac interea nihil sumit, quam juscula confortantia carniū

N

cum

*Febris  
ardens  
sanguinea  
copiosa  
potius  
etiam.*



cum tantillo vini & macis. Sic felicissime febris soluta, eoque facto, vires redierunt cum sanitate.

*Epicrisis.*

Natura valens & robusta, congruis auxiliis adjuta, utique sæpe miracula præstat, seu effectus extraordinarios plane. Quare ego non facile spem abjicere soleo, in perniciosis etiam & inflammatoriis febribus, quando ægri multum sitiunt & copiose ingerunt liquida, sed commoda. In his enim magna vis, febres cum magno ardore junctas, sanandi. Nam fluxiles & dilutos reddunt spissos humores, qui obstructions vasorum efficiendo, æstum augment liberamque exhalationem, tam in, quam extra corpus, intercipiunt. Aridas quoque & nimis rigidas fibras molliendo, febrem efficiunt mitiorem & corpus disponunt ad excretionem. Nihilominus tamen prudenter etiam se gerat artifex in horum benignorum & innocentium remedium usu, & caveat, ne febrem, quæ naturæ medicatricis opus, quo auctiori sanguinis motu obstructions & stases viscidorum succorum dissolvit, nimium deprimat. Nam in febribus minus æstuosis & corporibus phlegmaticis, diluentia liberalius data plus nocent, quam prosunt. Ubi vero æstus fervidus in sanguineo-chole-  
*Chole-*  
*rica*  
*passio*  
*cito sa-*  
*nata.*lericis, & massa sanguinis copia partium sulphurearum referta, largior liquidorum potus, modo ventriculus eum subigere possit, non nocet, sed præstans est medicina. Nisi enim in his nimius calor sistatur, vires brevi exsolvit & lymphaticos humores incrassando ac coagulando, ipsam gangrenam partibus internis inducit.

OBSERVATIO IV.

Illustrissima femina tenera & exquisiti sensus, 24. annum haud ita pridem egressa, appulerat in Carolinis, potatura thermales aquas. Sed quum tertio die ira percita esset & cerasa cum fragis avidius ingessisset,

in prandio incidit in passionem chole-  
*Chole-*  
*rica*  
*passio*  
*cito sa-*  
*nata.*lericam. Vomuit nempe & dejecit copiose, intra diem & noctem plus quam vigesies, cum anxio æstu & colore circa præcoridia, extremorum refrigerio, magna inquietudine corporisque jectigatione. Accersitus ego lac cum tantundem juris pullorum tepide bibere, binis quibusvis horis pulverem ex cornu cervi sine igne parato, lapidibus cancrorum & pulvere Marchionis, æquali pondere mixtis, ad drachmam unam sumere & exterius abdomen inungere jussi totum linimento, ex tribus olei amygdalarum dulcium partibus, una olei menthæ & dimidia olei destillati confecto, positis supra linteis complicatis calidis. His anxietates & tormina sublata, evacuatio per superius & inferius imminuta, & intra triduum, addito pulveribus cortice chaccarillæ, morbus facili & explicata curatione discussus.

*Epicrisis.*

Nil perniciosius est ira, si stomachus fermentiscibilibus cibis fartus. Hic enim animi motus mox spasmus stringit stomachi & intestinorum tunicas, & facit, ut humores in hoc cavo hærentes, diutius detineantur ac ipsa hac mora mutua quasi confectione, indolem contrahunt sæpe tantum non venenatam. Tanto vero magis omnia hæc nocent, sub aquarum mineralium potu, quippe quo semper ventriculus ipsiusque systaltica vis infirmatur, ut dein eo facilius in ipso hærare & colligi possint incongrui succi & cruditates. Hæc autem vehemens passio, a summa humorum acrimonia, ex viridescente vomitū ejectorum colore cognoscenda, suscitata, celerem opem & efficacem medicinam postulavit. Quare pleniori dosi & crebro data corrigentia & demulcentia. Et licet in principio ingestis largiter lacte subsequerentur vomitus caseosi, acidum in primis viis arguentes, institi tamen hoc remedio, quo etiam effectum, ut vomitu ex-  
tur-



turbata, postea nec virescerent, nec coagulata essent, sed liquida, muco & bile imbuta.

## OBSERVATIO V.

*Cholerica  
ca fe-  
bris po-  
tu fri-  
gido cu-  
rata.*

Quum anno 1684. Mindæ Vvestphalorum Medicinam facitarem, æstate sicca & præcalida regnante, Chiarcha generosissimus incidit in febrem cholicam. In hac miris torquebatur anxietatibus, inquietudine, interno æstu ac crebris dejectionibus, quæ ita vires prosternebant, ut aliquoties animi plane deliquium incurreret. Nil proficiebant pulveres terrei absorbentes, cum momento theriacæ cœlestis, nil diascordium *Fracaistorii*, nil emulsiones ex decocto avenaceo cum amygdalis, nihil etiam exterius linimenta spirituosæ. Tertio potius die excretionum vehementia & virium lapsu ad ultima ventum esse videbatur. Tum æger ob ardentem internum æstum enixe petiit haustum frigidæ. Ego vero propinare renui, & suasi, ut decoctum hordei cum rasura cornu cervi tepide biberet. Discedebam a summe debili & omnem fere salutis spem, irritis huc usque cunctis, adjiciebam. Sed quum post aliquot horas redirem, incredibilem & repentinam interea accidisse mutationemprehendi. Neque enim amplius magno virium lapsu, neque etiam de tanto interno æstu conquerebatur & pulsus quoque plenior & quietior micabat. Æger autem me magnopere hæc omnia admirantem alloquebatur & confitebatur: se ob sitim intolerandam sibi amplius temperare non potuisse, sed, sive mortem, sive salutem procuraret, ebibisse primum vitrum majus unum frigida plenum a ministro porrectum, & post dimidiam horam alterum, sicque mensuram aquæ ingurgitasse. Inde se mox sensisse virium quandam refectionem, adstrictionis quasi sensum in ventriculo, æstus mitigationem & quietem, dejectiones mo-

derationes cutimque antea aridam & siccam nunc etiam madescere. Nec male cessit postea experimentum, sed æger assumtis jusculis confortantibus, ex carnibus cum macere, vires mox iterum recepit, & sic præter omnium opinionem cito convaluit.

*Epicrisis.*

Notabile hac in observatione, nil profecisse præsidia, quæ corrosivam humorum acrimoniam, potissimam passionis cholicæ causam, obtundunt, sed frigidum potum ægrum levasse. Ego quidem frigidam potionem roborantibus accenseo, quæ non tam materiæ, sed potius motuum vitio tollendo apta. Frigus nimirum tonum & elatorem partium vehementi æstu & dejectionum copia valde resolutum, fibras leniter stringendo, & adducendo, reparat & hac ratione facultatem motricem tonicam, in qua virium robur consistit, restituit. Eum enim frigoris esse effectum, ut fibrarum elasticitatem intendat, patet experimento, quo exciso carpionis corde adhuc pulsante, systole illico cessat, si immittitur in aquam calidam, si vero iterum frigidæ injicitur, moveri rursus incipit. Notum quoque est, corpora humana, sub diuturna aeris austrina & humida constitutione, virium experiri resolutionem atque languorem, accedente autem subfrigido & sereno a ventis ex oriente spirantibus aeris habitu, illico in omnibus functionibus robur pristinum recipere. Sed uti cuncta roborantia, exemplo martialium & famosi corticis chinæ, cum magna prudentia usurpanda sunt, & non nisi correcto prius, tam quoad qualitatem, quam quantitatem, materiæ vitio, & meatibus satis patulis, neque etiam primis, sed posterioribus diebus ita etiam id ipsum circa frigidorum potum merito tenendum. Heroicum potius hoc manet auxilium, nec credendum, quod uni, id alteri etiam prodesse. Omnis enim medendi methodus nititur exacta discretionem, non modo morbi ejusque causarum, sed & indi-



viduorum circumstantiarum & quoque temporum. Et quando his minus observatis salutaris subsequitur effectus, ad fortunam potius, quam artem referendus.

## OBSERVATIO VI.

*Ardens*  
*et continua*  
*intermittens*  
*tertiana*  
*mutata*  
Femina honesta, aliquot supra triginta annos nata, corpore robusta, biliosa & animo impatiens, plus inter cibos vini quam cerevisiæ bibens, medio majore incidit in febrem ardentem exquisitam. Medicus ordinarius præbuit bezoardicam tincturam aliquoties intra aliquot horas. Inde pathemata exacerbata, anxietas, scilicet, inquietudo, æstus, vigilia, loquacitas nimia, cum alvi strictura, accesserunt etiam tormina in ventre & deglutitio facta admodum difficilis. Die quarto sanguis quidem ex utero fluxit, symptomata tamen non remiserunt, sed accessit potius, quum incipio Medico largum vini haustum assumsisset, leve delirium. Semper autem major mane, quam vesperi symptomatum fuit vehementia. Septimo die, præcedente horrore & rigore, animam agere videbatur, sub mente emota & respiracione cita anhelosa. Elaplis tamen aliquot horis, ad se rediit, corpus sudore diffluere coepit, & in cute, præsertim dorso, comparuerunt maculæ rubræ, quas petechias esse crediderunt. Ego nunc in auxilium vocatus, suasi, ut alvus per sex dies clausa duceretur clystere & mixtura ex aquis destillatis, cum aceto lapidibus cancrorum, mixtura simpliciter, mihi usitatam, propinavi. Hinc circa decimum quartum diem sensim remiserunt symptomata & ad naturalem statum visa redire omnia. Præter spem autem hæc valde acuta & continua febris, mutata in tertianam intermittentem, quæ solito typo solitisque symptomatibus infestavit, post quatuor tamen accessiones, purgatis decocto mannato & tamarindinato primis viis & pulverum antifebrilium usu, mox discessit.

Quum etiam insequenti anno eadem hæc femina, eodem tempore, iisdem symptomatibus iterum afficeretur, administrata sub initium venæsectione, adhibitis diluentibus potionibus & pulveribus salino-nitrosis cum clementer laxantibus, longe mitius decubuit, circa quantum diem febris intermittentem concessit, mox pariter congruorum usu discussam.

*Epicrisis.*

Taxandus merito venæsectionis in femina plethorica & vini potui assueta neglectus. Notandus etiam vulgaris, admodum tamen perniciosus error practicus, quo primis statim diebus, liberali manu essentias bezoardicas & alexipharmatas porrigere suescunt morborum artifices, ad malignitatem, uti stolidè putant, a corde pellendam. Hæc enim si sanguis redundat, æstum inflammatorium magis augment & febrem graviolem, ac diuturniorem reddunt, quin, si alvus simul diutius clausa, sanguinem nimium resolvendo, exanthema pariunt. Ego quidem hanc febrem in principio fuisse tertianam arbitror, ob intermissam autem sanguinis missionem & data bezoardica, factam esse continuam ardentem, ac tandem decimo quarto die defervescentem, naturam & genium suum repetisse. Nam alias continua prima periodo in intermittentem cedere solet, sed heic id tertia demum periodo factum, proculdubio & Medici & ægrotæ culpa, quæ in ipso etiam morbo vinum habuit in deliciis. Id vero etiam notatu dignum, quod tertianæ paroxysmi non diu durarint, siquidem per priorem morbum jam corpus a pravis succis satis liberarunt.

## OBSERVATIO VII.

Senex septuagenario major, macilentus, sanguinis missionem nunquam per omnem vitam passus, a morbis etiam gravioribus immunis, nisi quod interdum vere & autumno coryzæ & tussim humidam experiretur, Febru. mense, quo frequentes erant synophæ catarrha-

*Febris*  
*ardens*  
*et continua*  
*intermittens*  
*tertiana*  
*mutata*  
*curatio*  
*ne*  
*fusis*  
*antifebrilibus*



les, febre correptus est vehementi, cum pulsu magno, subduro & veloci, adfuit sitis magna, & somnus defuit. Medicus consultus marasimum semilem esse putavit, ideoq; sanguinem non misit, sed ad sudorem movendum dedit tincturam bezoardicam & mixturam simplicem, pro potu suasit decoctum ex sarsaparillæ unciis duabus, radicis chinæ, scorzonæræ, cicchorii & liquiritiæ ac corticis cinnamomi uncia, corticum citri uncia dimidia, & ad fauces aridas mulcendas linctum præbuit ex mucilagine seminis cydoniorum cum sirupo violarum. Sed nihil his profecit ac morbus indies potius exasperatus. Undecimo morbi die vocarunt me, qui ægrum offendi viribus penitus exhaustum, miro ardore æstuantem, cum lingua arida, fissa, nigra & facie fere Hippocratica, conquerentem præterea de ventris torminibus & alvo fluxa. Igitur candide adstantibus illico edixi, inextinguibile esse incendium internum, ægrum moriturum brevi, quod etiam decimo tertio die factum.

*Epicrisis.*

Febris hæc fuit ardens, ex summo æstu, siti magna, lingua arida somnique defectu cognoscenda satis. Est autem hæc senibus plerumq; fatalis. Multum tamen differt ab ipso marasmo lenili. Hic enim hectica species, mitiori æstu stipatur, diutius trahitur, nec intra 14. dies necat. Censendus autem merito Medici error, qui præter sanguinis missionem, statim diluentia, & humectantia cum leniter diaphoreticis, & nitrosis exhibere debuisset. Sic enim intra paucos dies vasculorum minimorum a lento in senili corpore sanguine, obstructions, quæ inflammationis causa, facili tolli potuissent ratione. Notandum præterea ex hoc casu, linguam nigram in ardente febre plerumque prælagire inflammationem in partibus internis, quæ heic fuit ipsis in intestinis. In senibus enim ardentes

Tom. IV.

non facile transeunt in meningum, sed potius in intestinorum inflammationem. Linguae igitur inspectio his in febribus admodum necessaria, quam etiam Hippocrates multum commendat, qui *Coac. c. 7.* habet effatum, quod in nostrum apprime quadrat: *lingua, quæ initiis morborum rigidiuscula est, sed in calore manet, labentibus inde diebus exasperatur, livescit & fit hiulca, mortifera. Ac certe calamitosissima est, nigra & virulenta.*

OBSERVATIO VIII.

Fœmina generosa 30. circiter annorum, cholerica, vegetæ ac sensibilis nature, facie florida, sanguine turpida, ruri degens, post ingesta incongrua multa, iram & nocturnam refrigerationem, nanciscebatur febrem cholicam. Erat quippe æstus magnus, anxietas cardialgica, sitis vehemens, extremorum refrigeratio, corporis jactatio, per vomitum crebrius viridissima & per ani secessum etiam liquida biliosa multæ ejiciebantur. Remittebant quidem paulo post hæc pathemata quoad vehementiam, cutis incalescere & madescere incipiebat, remanebat tamen magna debilitas, cum pulsu languidiori acceleriori omniaque assumpta vomitu reddebant. Tertio etiam die, post levem inhorrescentiam, dicta symptomata redierunt eadem vehementia omnia. Acceperat a Medico pulveres ex lapidibus cancrorum, tartaro vitriolato & nitro, sed ab eorum usu majora in prima regione perfererat incommoda. Hinc post tertiam accessionem me vocare jussit. Veni, ægram mire debilitatam & magnopere conquerentem offendi, quod nil neque ex medicamentis, neq; alimentis retinere possit. Expensa igitur morbi natura & causa, vomitum, qui semper viridescens erat, a motu non tantum ventriculi, sed etiam ductuum biliariorum intensiori & spasmodico-convulsivo, componendum institui, & ob id liquorem

*Febris  
choleric  
ca ter  
tiana  
typum  
habens  
sanatae*



rem meum anodynum mineralem , ternis singulis horis , ad 10. guttas in dimidia uncia aquæ florum tilia frigida exhibui . Sedata inde ventriculi subversione, dedi emulsionem & ptisanam , quam retinuit . Tertio die post redierunt quidem symptomata cum dejectionibus , sed longe mitiora fuerunt . Institi itaque diluentibus, emulsivis , liquoris anodynii & pulverum absorbentium leniter nitroforum usu . Noluit tamen penitus discedere accessio febris . Hinc post nonum demum paroxysmum , descendi ad usum electuarii antifebrilis ex cortice chinae , floribus chamomillæ , rob sambuci & sirupo acetositis citri . Quod quidem ne fieret , clam dissuasit primus Medicus , ex eorum censu , qui chinae corticem frustra perhorrescunt , feliciter tamen sublata febris & ægra perfecte convaluit .

#### *Epicrisis .*

Recte dicenda hæc febris cholericæ & quidem tertiana continua . In cujus curatione omnium maxime agendum id Medico , ut humores acres caustici primis in viis hospitantes , circurentur & obtundantur , simulatque ductuum biliariorum , nec non ventriculi motus spasmodico convulsivus , bilem continuo extundens , sistatur , quo vomitus & sedes compescantur . Sic tandem ad febrilem etiam motum coercendum , sine damno perquam commode dari possunt specifica .

### C A P U T III.

#### *De Febre Stomachica inflammatoria .*

#### *Theses Pathologicæ .*

##### §. I.

*Ex inflammatione particularibus stomacica .*

**D**antur febres ardentes & acutæ universales , ubi totum corpus æqualiter magno æstu & ardore sicco afficitur , propter inflammatoriam , in minimis vasculis , vel obstructis vel spasmis constrictis , stasin , cujus ge-

neris sunt descriptæ modo synochæ & ardentes . Dantur vero etiam ardentes particulares , quæ a certarum tantum partium , præsertim internarum & sensibilibus , inflammatione oriuntur & magno cum dolore ardore interno , æstu , ac functionum vitalium læsione stipantur , neque minus periculi alunt , quam quæ universum corpus occupant . Has interpretæ fere & frequens admodum , parum tamen a Medicis notata est illa , quæ in ventriculi & intestinorum substantiam cadit , Veteribus Epiale & Lipeiria dicta .

##### §. II.

Est igitur stomachica febris , passio *Ejusdem* acuta , ardens & inflammatoria , *o- finitio .* riunda ab inflammatione nervosæ & membranaceæ ventriculi substantiæ , universum nervosarum partium systema afficiens & ob id admodum periculosa .

##### §. III.

Symptomata , individui ipsius comites equibus , ceu pathognomonicis signis , cognoscitur , sunt , vehemens internum incendium , summa anxietas , dolor gravis tensivus in præcordiis , maximeque scrobiculi cordis regione , sitis magna , vigilia , inquietudo , corporis jactatio , extremorum refrigeratio , pulsus subdurus , contractus & frequens , vel etiam inæqualis , spiratio difficilis , creber conatus vomendi & doloris ad omnia assumpta , maxime irritantia & medicamenta , exacerbatio .

##### §. IV.

His etiam distinguitur ab aliis , *Differe- rentia .* quæ in stomachum cadunt passionibus . In cardialgico quippe dolore , sive cardiaca Veterum passione , pariter quidem magna circa præcordia anxietas , dolor pressorius & acutus , usque ad dorsum pertingens , extremorum refrigeratio , assiduus ad vomendum stimulus corporisque inquietudo , sed in ventriculi regione ardor non tam impensus , nec tanta sitis & linguæ ariditas , neque etiam



etiam pulsus tam celer & contractus, melius quoque ferre possunt ingesta tam alimenta, quam medicamenta, spasmus, quam inflammatione ventriculi affecti. Erosio dein stomachi, quæ sæpius biliosas febres, choleram morbum, item iracundiam, excipit, caret febre, non tam subito infestat, sed successive, per intervalla tantum ingravescit, neque dolore tam ardente stipatur & diutius trahitur. Quæ autem in intestinis consistit inflammatio, habet tormina circa umbilicalem magis regionem, cum crebris dejectionibus secum spumosarum, aut leviter cruentarum, æstus quoque totam corporis superficiem, cum pulsuum celeritate & magnitudine occupans, major est, ac si ventriculus inflammatus, ubi extrema, manus, pedes & nasus, magis frigescunt.

## §. V.

Causa proxima.

Causa inflammati ventriculi est sanguinis stasis, non tam in tubulis arteriosis & venosis, qui sanguinem ordinario vehunt, quam potius in lateralibus, qui ob angustiam diametri, non rubicundos sanguinis globulos, sed tantum tenuem lymphaticum humorem secundum naturam admittunt. Hinc etiam partis inflammatae rubedo derivanda. Ardor vero & flammæ quasi in ventriculo sensus fit, dum, partim affluens jugiter sanguis per canales semiobstructos, vel contractos, majori celeritate fertur, partim etiam libero transitu exclusus, ad ramos ampliores regurgitat ibique crebriorem diastolen facit ac systolen; unde magna accidit partium sulphurearum attritio mutua & calor maximus, qui eo sensibilior, quo magis exquisiti sensus membranæ ventriculi nervosæ, in quibus consistit. Et dolor junctus tribuendus pressioni membranarum nervearum, a minimis æque ac majoribus vasis nimium distentis, quæ inter tunicas nervoso-membranaceas collocata.

## §. VI.

Quod autem liber & æquabilis

sanguinis cursus, per minima arteriarum & venarum intercipiatur, isque in exiliora aquosi tenuis humoris receptacula præter naturam impingatur, duplici ex causa accidit. Una, quando extrema arteriolarum venis connexa, a lentis, crassis & glutinosis sanguinis particulis obstruuntur, altera, quando vehemens fibrillarum nervearum strictura & spastica crispatura, capillares subtilissimos canaliculos, potissimum arteriosos, plus justo angustat atq; coarctat.

## §. VII.

Ob id in proclivi est judicare, ventriculum perquam facile posse inflammari, si sanguis, crassus præsertim & glutinosus, vehementiori corporis, aut animi, ab iracundia, commotione, balneis nimis calidis, potu spirituosorum & medicamentis sudoriferis exæstuatur, in vascula minima & angustissima impetuose impellitur, a potu autem super ingestio frigido incarcerationatur & ad stasim cogitur. Neque minus facile patet ratio, quare venena corrosiva, infame potissimum arsenicum, acriora item emetica stibiatata, nec non cathartica valentiora, stomachi inflammatione cito interficiant, dum caustica sua virtute nerveas fibrillas stringunt, vascula coarctant sanguinisque progressum sistunt. Eandem ob rationem ventriculi inflammatione pereunt, qui peste, ardentibus, cholericis & dysentericis febribus, item ex vehementi ira, assumpto potu frigido, vel porrecto emetico, aut purgante, moriuntur. Idem accidit iis, qui variolis, morbillis, petechiis, purpura, podagra & scabie retropulsis decedunt, in quibus materia subtilis caustica ad nervosas ventriculi membranas relapsa, spasmus & constrictionem vehementem vasculorum inducit, sanguinis cursum sufflaminantem. Opiata autem & narcotica, non alio modo, infirmos præsertim, & debiles, necant, quam quod motricibus nerveis fibris stuporem infere-

Causa antecedente

Causa proxima



rant sanguinisque progressum sic sistant.

## §. VIII.

*Differens  
gradu*

Pro differente tamen harum causarum indole & agendi potentia, differt quodammodo inflammatio gradu. Nimirum, quæ a potu frigido corpori æstuanti ingesto, item a bile per iracundiam commota & copiosius in duodenum effusa suscitatur, mitioribus stipatur symptomatibus, non tam facile necat, diutius trahitur & datis inter initia congruis remediis promptius obsecundat. Sæviora vero & periculosiora sunt pathemata, quæ a venenis causticis, ab emeticis acrioribusque drastis inferuntur & celeriter jugulant, nisi cito efficacia opponantur præsidia. Et omnium deterima illa est inflammatio, quæ senibus, infirmis, scorbuticis & diuturno morore confectis, item in fine acutorum morborum accidit, ob succorum vitium inemendabile, & magnam virium impotentiam, medicamentis non tam facile reparandam.

## §. IX.

*Eventus  
funestus*

Sed quando irrequieta est corporis jactatio, potus ingestus eructatur, singultuosa ventriculi & diaphragmatis convulsio accidit, animus deficit, facies comparet Hippocratica, pulsus intermittens est, mens emovetur & artus convelluntur, funestum denunciant ex inflammatione sphacelosa facta eventum. Tum enim secto post mortem cadavere, non modo ventriculus admodum rubicundus & lamini obtentus copiosissimis ramusculis sanguine turgidis distinctus comparet, sed & interdum passim multis nigris maculis latis & parvis obfusus, interdum in fundo cum duodeno & annexis biliariis ductibus ac pancreate, niger, foetidus ac putris, interdum etiam flatibus mirum distentus atque oppletus conspicitur, fluctuantibus simul in ipsius cavo aliquot cochlearibus foetidi & nigricantis ichoris.

## Curatio.

## §. I.

Genuinæ periculosam hanc passionem sanandi indicationes eo tendunt: ut I. obstructions, a tenacibus succis, locis ac tubulis minus congruis impaetis, expediantur; II. ut vascula a spasticis stricturis coarctata amplientur & ipsi spastici motus componantur, quo liber, æquabilis & naturalis sanguinis progressus per ventriculi substantiam restituatur. Quæ ut ex voto obtineantur, commodissimam locant operam diluentia, aquosa, humectantia, demulcentia, antispasmodica, æstum qui fluida incrassat restinguentia, nec non fibras strictas relaxantia. Quum vero non una, sed plures causæ ventriculo inflammato onem inducere valeant, prudentiæ medicæ est, pro diversitate causarum ad eas removendas medicationem dirigere singulisque præsidia opponere congrua.

## §. II.

Igitur, quando ab assumpto veneno caustico, septico, arsenicali, vel acerrimo purgante, emetico, mercuriali, aut metallico medicamento male præparato, inflammatio accidit, non certius, non totius & celerioris efficaciæ est auxilium, quam de mulcentia, oleosa, pingua, lac scilicet, cremor ipsius, oleum amygdalarum dulce, nec non olivarum, crebro & in copia hausta. Horum enim ea est virtus, ut tenuia causticorum intima fibrarum penetrantia spicula obtundant, involvant & quasi inviscent, simulatque fibras rigidas & vasa coarctata laxent, sicque spasmos horridos, inflammationis, symptomatum graviorum ipsiusque mortis causas, sistant. Insuper hæc ipsa, mole sua ventriculum ampliando; salutarem hunc simul exferunt effectum, ut motus peristalticus naturalis, a spasmodorum rigore sufflaminatus, restituatur, stomachus ad vomitum permoveatur & cum hoc simul venenum dilutum

*Indica-  
tiones  
curato-  
ria.*

*Acridi-  
monia  
causti-  
corum  
& bils-  
osa ob-  
tundenda.*

ite.



iterum extundatur. Si a bile acri corrosiva, ut in cholera, metuenda est inflammatio, tunc terrea, absorbentia fixiora & inter hæc maxime ossa & cornua philosophice, uti dicunt, præparata, cum decoctis gelatinosis, uti pedum vituli & vervecis, gelatina cornu cervi, decoctum hordei, avenaceum, cum, vel sine lacte, item cum oleo amygdalarum dulcium, ex usu sunt. Quando porro ab iracundia vehementi obortus in ventriculo spasmus inflammationem minatur, nihil efficacius est pulvere absorbente nitroso, cum liquore anodyno alternatim dato, vel in aqua quadam antispasmodica, vel emulsione ex seminibus frigidis, aut papaveris albi. Postea composito spasma, ad educendas biliosas fordes, accommodatissima rhabarbarina & passulata.

§. III.

Quæ a retrocedente ex corporis superficie recrementitia acri materia, imminet, vel jam inducta ventriculi inflammatio, depellitur optime emulsionibus ex semine cardui mariae, cardui benedicti, napi, quatuor frigidis majoribus, cum pulveribus bezoardicis temperatis, quibus subinde nitrum cum momento camphoræ addendum. Incomparabilem etiam his in casibus ad arcendas inflammationes efficaciam exserit, liquor noster anodynus mineralis, spasticas stricturas remittendo, & dolores sine virium lapsu, vel torpore, quod aliis sedantibus opiatiss solenne, sed potius refectione, complacans. Inprimis egregie se gerit liquor hic, quatuor partibus, cum una parte spiritus bezoardici *Bussii* remixtus & parvis dosibus crebrius oblatus, ac dum stricturam solvit sudoremque placidum mover, efficaciter materiam virulentam exanthematicam ab internis ad corporis superficiem agit. Si etiam miasma pestilentielle, aut aliorum contagiosorum morborum corpus subiit, quod primario ac celeriter vim suam putredinosam & inflammatoriam ventriculo

insinuat, illico lenissimum exhibendum emeticum, ac postea subjungendi pulveres blandi diaphoretici, cum nitro & pauxillo camphoræ, vel oleum bezoardicum *Vvedelii*, ex uncia olei amygdalarum dulcium, in quo drachma camphoræ soluta, ad octo vel decem guttas dandum. Et iisdem his discutientibus quoque depellenda inflammatio stomachi, quæ aliis acutis morbis in statu supervenit.

§. IV.

Præterea exterius diro huic malo omnibus modis obviam eundum. Sed improbo, quæ vulgo stomacho admoventur calidiora, ut spiritus vini camphoratus, olea destillata in spiritibus soluta, emplastra quoque stomachica. Hæc enim calore suo humores stagnantes magis coagulant & exsiccant, quam discutiant & in motum cient, eodem modo ac notum est, albumen ovi a forti calore indurari, a leni autem liquefcere in tenuem humorem. Quare ego quidem magno cum fructu multoties tepide tantum applicare iussi vesicam lacte cum floribus emollientibus & croco decocto plenam. Neque minus admodum proficuum censeo linimentum ex olei amygdalarum uncis duabus & camphoræ drachma, cum quo præcordia frequentius inungenda & superius ponenda lintea calida. Egregium quoque ad discutiendum & sudorem movendum est epithema, ex aceti rosacei uncis binis, spiritus vini camphorati drachmis duabus, essentiæ croci, castorei ana drachma, nitri drachma dimidia, compositum & tepide præcordiis admotum.

Observationes & Cautelæ  
Clinicæ.

§. I.

Venæsectio certum quidem & efficacius remedium in inflammationibus partium & viscerum, quæ copioso sanguine referta; sed ubi partes nervæ ac fibrosæ valde sunt, secundum

*Exterius  
nisi succu-  
rentur  
dum.*

*P. S. non  
javal.*

Ve-

*Materia  
exanthema-  
tica  
contagio-  
sa di-  
scutien-  
da.*



Veteres frigida dicta, cujus generis intestina, vesica & via urinaria, quæ vehementibus spasticis stricturis patient & uberiores sanguinis affluxum non admittunt, vix usus ullus, sed potius damnum inde expectandum. Ad declinandam autem ejusmodi inflammationem, si a dolore gravi colico & cardialgia, nec non post iram imminet, corpus valde est plethoricum, juvenile & vini potui assuetum, inter initia statim cum fructu admit-tenda sanguinis missio.

## §. II.

*Anody-  
na in se-  
cura.*

Sic etiam cavendum est in periculo-  
so hoc affectu ab omnibus sistentibus, anodynis & præsertim quæ opium in-  
greditur. Nam hæc cum sudoriferis mixta, in principio quidem arcere possunt inflammationem, quam minantur atroces dolores ac spasmi. Verum si adest inflammatio & paullo diutius jam duravit, perniciosissima sunt & mortem, spacelum inducendo, accelerant. Quin neque tunc liquor noster anodynus mineralis, longe tamen tutior opiatis, ex usu est, neque etiam ipsa nitrosa, quæ alias in principio egregie resistunt inflammationi.

## §. III.

*Frigida  
& irri-  
tantis  
necesse.*

Quemadmodum porro nihil aptius ad inducendam inflammationem frigidum potu; sic etiam ad augendam si jam adest, eandem, hoc nihil efficacius. Ob id etiam nitrum, quod liberalius sumtum admodum refrigerantis est naturæ, refracta dosi tantum, cum demulcentibus, lacte, vel emulsionibus, repetita vice dare expedit. In gravi autem cardialgico dolore, quum perperam tractatum facile excipit inflammatio funesta, sollicitè cavendum ab omnibus irritantibus, maxime emeticis, purgantibus, immo salibus sic dictis digestivis majori copia oblatis, quippe quæ spasmum magis intendunt & malum exacerbant.

## §. IV.

*Post iram  
quæ fa-  
cienda.*

Ira quoque gravis sæpe funestæ inflammationis mater, quando mox

post eam cibus, præsertim minus salubris & difficilioris digestionis, ingeritur, aut frigidus potus ingurgitatur. Hoc vero ubi accidit, ad arcendum malum in principio nihil conducibilius, quam elicere vomitum, non tamen per valida emetica, sed aquam tantum tepidam, cum oleis ac pinguibus mixtam, & largius potam. Sic novi quosdam post vehementem iram pessime habuisse & in propinquo fuisse inflammationem, usu tamen liquoris nostri anodynini, cum potu aquæ tepidæ, rejectos esse humores biliosos copiosissimos & morbum discussum. Sed de his aliisque in fontico hoc morbo tenendis, pluribus evolvi poterit dissertatio nostra, *de inflammatione ventriculi.*

*Enarrationes morborum.*

## OBSERVATIO I.

Canonicum novi Halberstadii, robustæ constitutionis, ætate adhuc florentem, sub sanitate integerrima subito ac cito lethali ventriculi inflammatione affectum. Quum enim inter rixas ac jurgia vehementissime excanduisset, & paullo post vinum spirituosum, quod vocant Sect, bibisset, insequentem statim die habuit pessime. Incredibiles quippe circa præcordia dolores ipsum torserunt, cum miræ angustia & vomendi conatu. Ardor quoque ipsum excruciatum stomachi & in ipso sensus fuit perquam molestus ac si inhæreret quippiam quod exitum moliretur. Rogatum igitur a Medico, consilium, qui promte vomitorium ex sulphure antimonii aurato dedit. Inde æger ter vomuit valide quidem, sed sine levamine. Adacta potius pathemata, pulsuum ictus parvi & fere imperceptibiles facti, frigidusque sudor malo omine erupit. Subsequuta mox mentis emotio, accesserunt convulsiones, & intra decem horas excepit ipsa mors. Cadavere dissecto, in ventriculo visæ maculæ plures, nigræ

*Ex vomito-  
rio post i-  
ram in-  
flamma-  
tio ven-  
triculi  
lethalis.*

par-



partim, partim rubræ, quarum nonnullæ altius in ipsa substantia constituerunt.

*Epicrisis.*

Quantum valeat ira vehemens ad concitandos in ventriculi regione spasmos, hæc uberius docet historia. In primis hunc animi affectum excipit ut plurimum gravis in illa regione compressio, in qua pylorus ac duodenum situm habent. Quin ipse hic spasmus haud raro ad ductus usque biliarios propagatur, ac ut bilis effusio in duodenum impediatur & ipsa succis reaffundatur facit. Hinc non infrequens observatio, iracundiæ succedere icterum, cui *Sylvius* jam recte non aperientia, sed anodyna & sopientia opponere suadet. Dum vero ira sursum etiam bilem trudit, os semper amaro sapore plenum, & constricto validius pyloro, vomendi fit conatus. Quum igitur tanta spasmodorum post iram vehementia; ipsa sana ratio dictitat, vomitoria convenire plane non, eo quod teneras ventriculi fibrillas magis irritant, & spasmos augendo ad inflammationem pandunt viam. Mors autem tam subita in nostro, non tam inflammationi, seu causæ proximæ, adscribenda videtur, quam potius spasmio violentiori, qui totum systema nervorum & vasorum convellens, liquidi nervei influxum in cordis musculos etiam sufflaminauit ita, ut quatuor mortem novissime antecedentibus horis, vix pulsationis vestigium fuerit observandum. Illa igitur intoleranda anxietas, quæ tam vehementem ventriculi spasmum excipit, non tantum nervosarum partium præternaturali constrictioni, verum maxime nimix distentioni dextricordis ventriculi & arteriæ pulmonalis a nimium congesto sanguine debetur. Quod enim dolor est, a male affectis & distentis nervosis membranis, id anxius etiam ille sensus, quando vasa sanguinea, præsertim circa cor & pulmones, valide deducuntur, & præter naturam affi-

ciuntur. Quum itaque nimia sanguiniscopia, a spasmio & partibus inferioribus ad ipsum cor ejusque cameram & auriculam dextram compellatur, ab ipso quoque hoc spasmio liquidi nervei sufficiens in machinam hanc motoriam, omnes vitales totius corporis humores circumagentem, influxus impediatur ac intercipiatur, quam facile intelligi potest mortis causa, quæ subinde tam subito, sine præcedente sphacelatione, venenum assumptum sequitur.

OBSERVATIO II.

Balneator quidam ultra sortem, ut genius horum hominum, sciolus, feminæ tertianæ laboranti propinarat antimonii vitrum in substantia ad octo grana. Ægra assumpto hoc, accedente febre frequentissime vomuit, discedente tamen febre, vomitus etiam & dejectio iterum constitit, sed restitit virium lapsus ingens. Redunte tertio die febre ejusque comite indivulso frigore, vomitus quoque & purgatio repetiit, summo cum dolore in scrobiculi cordis regione & anxietate tantum non intoleranda. Remiserunt hæc tamen iterum defervescente febre. Quum vero tertia fieret febris accessio, denuo etiam accessit vomitus, & comitem habuit dolorem stomachi omnium acerbissimum & qui suprema instare non obscure significavit. Nec vana fuit suspicio. Paullo enim post summa inquietudo, extremorum frigus, animi defectio, artuum convulsio ac postremo mors miseram feminam occuparunt. Aperitum cadaver, inflammata ostendit inferiorem ventriculi partem, maculis rubris & nigris passim, tam in duodeno, quam annexis intestinis, comparentibus. Et quod magis mirandum, virulentus vitri antimonii pulvis inhærebat adhuc tunicæ crustacæ, ut vel manibus mortis causa posset tangi.

*Ventriculi inflammatione ex vitri antimonii.*



*Epicrisis.*

Similis fere est observatio, quam consignavit *Blasius*, de puella quinque annorum, quæ assumpto croco metallorum, vehementissime vomuit, & convulsionibus demum periiit, in qua ventriculus angustus & contractus repertus, ut vix ovum magnitudine æquaret, & vesicula fellea præter morem turgida. In nostra vero observatione perquam dignum, quod vitri antimonii, virulenta spasticas stricturas excitans facultas conquieverit, accedente in paroxysmo æstu & febris sine, & quod vicissim frigore rursus ingruente recruderit, & effectum vehementer vomitorium exseruerit. Sed notum habetur, accessionem febrilem cum frigore & horrore spasmis deberi, qui ex spinali medulla veniunt totumque genus nervosum, atque adeo etiam ventriculum, afficiunt. His contrarius est motus ad exteriora tendens sub æstu, qui ob id spasmodum, & convulsionum quasi antidotus. Quod autem post paroxysmum quieverit operatio veneni, in universali lege motus microcosmica rationem habet positam. Scilicet valde vehementem, & diutius persistentem spasticam fibrarum stricturam excipere ejusdem partis affectæ resolutionem & atoniam, sub qua actio veneni est frustranea. Ut adeo pateat, ad actionem veneni, æque ac medicamento activi, requiri partium vitalium ad motum dispositionem.

## OBSERVATIO III.

*Ammi-  
ans ex  
arsenico  
ventri-  
culi in-  
flamma-  
tio di-  
gesta.*

Hospes quidam admiscuerat juscule ex errore loco sacchari arsenicum, idque apposuerat convictoribus suis, quorum plurimi generosa & nobili stirpe sati. Vix degustarant juscule, quum omnes pectore angi inciperent, circa stomachum dolere, cum labiorum tremore & vomendi conatu. Advocarunt illico me, veni & cognita mali causa, copiose ingurgitare jussi lac cum oleo amygdalarum dulcium.

Vomuerunt inde per dimidium diei strenue, quidam vel centies, semper tamen denuo ingerere jussi lac, donec nihil amplius veneni superesse videretur, & vomitus quiesceret. Sic evaserunt plurimi brevi & explicita ratione præsentaneam mortem; nonnullis tamen, qui lac & oleosa justo parcius potarant, emollientes adhuc & oleosos clysteres adhibere fuit necessum.

*Epicrisis.*

Optima & præsentanea veneni antidotus heic ex simplici, vili & domestico deprompta. Certe vix cuiquam credibile foret, in lacte & oleo tam notabilem latitare virtutem, nisi experientia ita omnino esse demonstraret. Ea enim mentis humanæ indoles, ut exotica, pretiosa & ægrius obtinenda captet atque velit, domestica autem, parabilia, ubivis obvia, & vilia negligat & contemptui habeat. Sed divina sapientia abjectis hisce longe nobiliorem & fructuosiore indidit facultatem medicam, ac magno pretio, labore & artificio comparandis. Norunt sane in arte exercitati, simplicem aquam calidam, vel frigidam, lac, serum lactis, olea expressa, acetum, nitrum, terrea absorbentia, salia mineralia, ubivis reperienda, optima adversus longos, graves atque rebelles morbos esse præsidia.

## OBSERVATIO IV.

Serenissimus Princeps, ætate florens, sanguine & succis plenus, vinum potens spirituosum liberaliter potarat, postera die corpus sub venatione ad sudorem usque largum vehementer commoverat, sicque æstuans & sitiens magnum cerevisiæ haustum ingurgitarat, frigidæ quoque auræ corpus exposuerat. Inde mox conquestus est de horrore, languore, interno ardore, vigilia & inquietudine, cum vomendi conatu. Medicus accitus, tertianam intermittentem, tum popularem, subesse, ratus, porrexit vomitorium, ex tribus tartari emetici

*Ex potu  
frigido  
& vom-  
itorio  
inflam-  
matio  
ventriculi.*



granis. Hoc assumpto ter vomuit maxima cum anxietate, quæ certis intervallis ita increvit, ut nullibi subsistere ac detineri posset. Aderat præterea virium prostratio maxima, ut non sine animi defectione erectus esse posset, pulsus emicuit languidus, irregularis, interdum celer, ex ore spiravit halitus mirum foetidos, mens tamen exacte sibi constitit. Nocte mortem antecedente incescit ipsum horror ingens ac frigus, accesserunt convulsiones & septimo die syncope quasi correptus obiit. Sectum est post mortem cadaver, in quo ventriculus ferme totus visus inflammatus, & in ipsius cavo, quod omnino rarum, aliquot cochlearia foetidi & corrupti sanguinis, ipse etiam stomachus expansus & corruptioni propinquus, ut ad levem contactum ipsa substantia dehisceret. In venis & maxime separata ab hepate cava, nullus fere sanguis repertus. Lien & sinister ventriculi pars, cum pulmonum lobo sinistro, tota corrupta, nigricantia & foetida. Quumque spongia putridus ichor abstergeretur, is adeo infecit spongiam, ut tota atro & nigricante colore imbueretur, nec calida, nec frigida detergendo.

*Epicrisis.*

Patet igitur, brevi tempore sphaelosa corruptione infici posse viscera, uti heic ventriculum, lienem & lobum pulmonum sinistram, quæ atro colore & foetidissima corruptione nares inficere feriente infecta. Sine dubio tamen, ventriculus primum sphaelatus, viscera infecit reliqua. Ad generationem autem hujus morbi fecit non tantum haustus largus frigidus corpori calenti immixtus, verum etiam improvida emetici assumptio. Nunquam enim certius & gravius damnum a vomitorio metuendum, quam si ventriculus & intestina graviore spasmō, vel inflammatione affecta. Mineralia quippe emetica virulenti quippiam alunt, quo in convulsiones & spasmos ventriculum & totum ner-

vorum genus abripiunt. Hinc pessime agunt Medici, qui tam temerarie ad ipsorum usum descendunt, antequam sedem, vel causam morbi exacte scrutati. Quod si, enim post usum ejusmodi pharmaci symptomata ingravescent, & ventriculus deprehenditur inflammatus, justa omnino hæc conclusio: inflammatio aut jam ante emeticum fuit, aut non; si fuit, male datum emeticum, si non, subsequuta symptomata inductam eam esse testantur. Internas demum partes esse inflammatas recte conjiciendum, quando virium magna est prostratio, ut ægri facile animo deficient, quando evanescente ardore exquisito, conqueruntur de sensu frigoris circa præcordia & saliva subinde eructat in os; quando borborygmi & meteorismi sensu percipiuntur ab assumptis liquidis in abdomine; quando demum oculos ob debilitatem claudunt subinde & dormire videntur, postea vero de majori debilitate & anxietate conqueruntur.

OBSERVATIO V.

Femina quinquaginta & quod excurrit annorum, sanguineo phlegmatica, corpore spongiosa & animi sic satis sedati, omiserat ab aliquot annis suam alias sanguinis missionem, vitam quoque coluerat maxima ex parte sedentariam & tamen appetitui largius paullo indulserat. Hæc gravius irritata corripiebatur ira & post hanc languorem persentiebat virium cum inappetentia. Post aliquot dies denuo iracundia commovebatur simulque assumebat intrita panis cum cerevisia frigida. Inde mox horror ipsam incescit, insequenti nocte ardor intensus, præcordiorum anxietas, inquietudo & punctorius in stomachi regione dolor, ad dorsum usque excurrens, ructibusque exitum præcludens. Medici morbum colicam esse autumantes, carminativa cum anodynis dederunt. Perseverarunt autem anxietates præ-

*Inflam-  
matio  
ventri-  
culi des-  
cimo  
die let-  
thalis*



cordiorum cum maxima inquietudine per totum morbi decursum, intervernerunt subinde convulsi quidam motus, cum manuum tremore, aquosus humor in os eructatus, & pulsus antea celer ac fortis, in debilem & inæqualem mutatus. Quarto die neque de æstu, neque etiam de ardore, sed tantum de siti & maxime quod exquisitum frigoris sensum in cordis regione pateretur, conquesta est. Hinc frigidum non appetit potum, sed calidum semper, maxime infusum thee sorbillavit, ex quo tamen pejus semper habuit. Quieta quidem semper jacuit dormire visa, non tamen dormivit, mens sibi constitit, debilitas autem magis magisque increvit, alvus sine clystere dimisit nihil, nec ullum medicamenta exseruerunt effectum. Septimo potius die accessit singultus, nono refrigeratis prius extremis, per aliquot horas sine sensu jacuit, ac demum placide expiravit.

*Epicrisis.*

Nullum omnino est dubium, quin morbus hic confederit in ventriculo. Hujus quippe nervoso membranacea substantia passa est inflammationem, ex præcedente repetita iracundia, & superingesta frigida cerevisia. Et quoniam corpus fuit cacochymicum, succis crassis & impuris plenum, promta in ipso fuit staseos sanguinis genesis. Factam autem esse inflammationem, horror, æstus, anxietas præcordiorum, dolor pungitivus in stomacho, ructus interclusi & accedens demum singultus luculenter arguunt. Lentius tamen processit & increvit inflammatio, ac demum in sphacelum concessit, quem frigoris in præcordiis sensus, summa debilitas, pulsus languidus & singultus prodiderunt. Notandum enim inflammationem lentius, vel celerius progredi, pro corporis differentia, & differente causarum vehementia. In sensibilibus quippe & post venenum citissime fit & citissime decurrit; in phlegmaticis autem, senibus, ex iracundia & refri-

geratione lentius serpit & septimo demum, decimo & longius die necat. Nihilominus cita semper opus est ope, eodem modo ac in sphacelo exterius imminente. Neque ea propter dubitandum, quin in nostra etiam, adhibitis tempestive congruis præsidiis, funestus averti potuisset eventus.

OBSERVATIO VI.

Vir, circiter quinquagenarius, sanus, robustus & integer, post iram gravissimam, mox afficiebatur tremore, horrore ac refrigeratione extremorum, cum ingenti præcordiorum anxietate viriumque dejectione, noctem etiam sequentem iisdem symptomatibus adhuc persistentibus transigebat, nauseam percipiebat continuam, & vomendi conatum, una cum labiorum tremore & oris amaritie. His jactatus ab advocato Medico importune flagitabat vomitorium, qui primum illud dare renuit, victus tamen continuis precibus, porrexit. Sed quia sumto hoc bis vel ter tantum cum summa anxietate & difficultate pauca biliosa & mucosa vomuerat, ad uberiores evacuationem aliam postulavit dosin, quæ ipsi etiam concessa. Hinc autem non multo post in deterius versa omnia. Adfuerunt quidem singultuosi ructus continui, sed nihil rejiciebatur, afflixit præterea inquietudo summa, oppressio, spirandi difficultas, intolerabilis ardens & anxius dolor in epigastrio, cum extremorum refrigeratione, pulsu parvo & nonnihil intermittente. Peti- tum tandem a me auxilium, qui accedens, ægrum extrema fere agentem inveni, ob spasmodum vehementiam, quæ omnes fere corporis nervosas sensui & motui vacantes partes occuparat. Hæc videns, expendi mecum, & quum a sumto veneno arsenicali eadem symptomata oborta largiori lactis & olei cujusdam expressi potu felicissime sublata laborantesque tantum non e mortis faucibus ere-

*Ex potu  
frigido  
& vo-  
mitorio  
inflam-  
matio  
ventri-  
culi.*

ptos,



ptos, cognitum haberem, pariter lac bubulum tepidum, successive, at copiose, bibendum, suasi. Inde insigniter quidem atrociam hanc symptomata conquiescere & per noctem remittere visa, mane autem ipse æger, infcio Medico, unciam unam salis Ebshamensis, adaperiendam quæ firmiter clausa alvum flatumque & anxietates discutiendas sumsit, pessimo vero successu. Symptomata quippe priora reversa omnia, atrociam longe majori, ut assumptis licet analepticiis, antispasmodicis, animam, intra tertium a sumpto primo emetico diem, efflaverit.

*Epicrisis.*

Vel hanc ob causam commemorabilis hæc observatio, ut Medicorum quisque inde discat, innocens alias remedium emeticum stibiatum, moderatori dosi, uti tartarus emeticus ad duograna datus, pro certa dispositione spasmica ventriculi & partium nervosarum, veri veneni vim habere, & lethalem effectum exferere posse. Quamobrem circumspexit quilibet Medicus, non tam promptus sit ad dandum ejusmodi pharmacum, sed prius scrutetur cum cura corporis ægrotantis cum ventriculo dispositionem ipsamque morbi causam urgentem. Deinceps illa quoque utilissima cautio funesto ex hoc casu elicienda: salia neutra, eaque amaricantia, ut sal Egranum, Ebshamense, Sedlicense, ad deducendos efficaciter & sine molestia per alvum vitiosos humores egregia, tali in casu, ubi primæ viæ spasticis stricturis tenentur, neutiquam esse proficua, ut potius noxam possint inferre & gravissimam & præsentissimam. Sed hanc in rem plura jam attuli in *Diff. de medicina emetica & purgante post iram veneno.*

OBSERVATIO VII.

clivis, ebrius ex largo vini potu rixas habuerat cum nonnemine ac sub his excanduerat vehementissime, postea vero sub cælo algidissimo vesperi traha vectus fuerat. Domum delatus, prævio horrore, incidit in æstum gravem, inquietudinem, præcordiorum anxietatem, ardorem & pectoris in dextro latere dolorem, cum magna spirandi angustia & pervigilio. Irrito usurpatis nonnullis, tertio die secta vena & sanguis extractus crassus ac niger. Nihilominus de internorum ardore perpetuas habuit querelas æger, ac simulac quicquam assumpsit, illico gravem persensit dolorem, screatu materiam cruentam ejecit, pulsus fuit celer, debilis, quandoque plane intermittens, & crescente indies virium lapsu, septimo die e vita discessit. Sub extispicio mox post mortem cadaver abominandum exspiravit foetorem, & scrutantibus mortis causam ventriculus sese obtulit mirum tumidus, inflammatus ac in fundo, cum ipso pyloro ac duodeno, niger, corruptus & putridus. Dexter quoque pulmonis lobus sphacelatus comparuit, & lœda putrilagine affectus, una cum diaphragmatis portione gibbæ partis hepatis.

*Epicrisis.*

Quantum ebrietas, gravior ira & impensior corporis refrigeratio valeant, ad labefactandam sanitatem, sphacelum visceribus internis inducendum & brevi necandum, hic utique testatum facit casus funestus. Certe vix fortissimum venenum tam deleteriam obtinet facultatem, ut tam cito tantam corruptionem sphacellosam invehere queat. Sed adeo nonquam in transversum aguntur mortales, ut cupiditatibus pravis obsecundando vitiaque sectando, mortem sibi procurent ipsi, tanto certius, quando tria, uti heic, simul uno tempore concurrent atque conspirant.

tri, dlan  
phrag-  
matis  
inflam.  
matio  
lethalis

Ventri-  
culi duo.  
deni,  
pulmo-  
nis dex. Juvenis viginti annorum, Juris  
Studiofus, sanguineo-cholericus, ma-  
cilentus & in iram levi ex causa pro-



## CAPUT IV.

## De Angina.

## Theses Pathologicae.

## §. I.

Angina  
defini-  
tio.

**A**ngina est inflammatio faucium, juncta cum ardente dolore, tumore, rubore, respirandi vel etiam deglutiendi difficultate & febre, orta a sanguinis, vel feri visceris acris, in sanguineis, vel lymphaticis tubulis stasi, periculi non expers.

## §. II.

*sedes.* In dignotione hujus morbi, locus ubi consistit, in primis notandus. Est autem sedes in faucibus maximeque iis partibus quæ pharyngem & laryngem occupant & constituunt. Heic occurrunt plures numero & maximus ac sensibilioris indolis partes. Radix scilicet linguæ cum osse hyoides, narium foramina in os hiantia, œsophagi initium, musculi pharyngis, item laryngis interni & externi, quorum numerantur tredecim, glandule porro majores & minores, tonsillæ, musculi maxillas moventes, vasorum sanguineorum & lymphaticorum, nec non teneræ nervorum propagines.

## §. III.

Est vel  
interna,  
vel ex-  
terna.

Prout igitur inflammatio alias atque alias ex his partibus tangit & occupat, gravior, vel levior est, & varia etiam sortitur nomina. Nimirum vetustissima est distinctio anginae generalis in internam & externam, sive manifestam & occultam. Illa in interioribus nerveis & musculosis faucium tunicis consistit & ob id neque in collo exterius, neque in ore, quantum visui patet, tumor & inflammatio conspicitur, sed ardor internus, febris acuta, in graviore casu non modo spirandi, sed & deglutiendi difficultas, multum periculi subest. *Aretæus* ita eam describit, *lib. I. cap. IX.* *lingua extra dentes & labia prominens*

*saliva effunditur, pituita crassissima, facies rubicunda & inflata, oculi exorti, patentes, valde rubent, potus in nares refunditur, dolores acerbi sunt, sed strangulatione vexati, eos obscurius sentiunt, pectus & cor ardent, frigidi aeris desiderium adest & admodum exigue inspirant, eoque donec demum intercluso pectoris transitu strangulentur.* Externa autem magis in oculos incurrit & occupat potissimum musculosas & glandulosas externas partes, amygdalas, linguæ radicem & uvulam, facilius quoque discutitur.

## §. IV.

Specialius ratione partis affectæ considerata angina, gravissima & periculi plenissima esse solet ea, quæ internis laryngis musculis insidet, & in qua exterius non rubor, nil circa cervicem aut collum observatur, sed interne ardens dolor urget, & ob angustatum asperæ arteriæ caput, vox non modo supprimitur, sed & spiritus difficilis redditur, quin quandoque plane præcluditur, & quidem tam celeriter, ut observatorum fide, haud raro intra viginti quatuor horas, vel tertio die necet. Græci hanc vocant cynanchen. Quæ autem ipsis synanche audit, internos pharyngis musculos occupat, pariter sine conspicuo externo tumore & rubore, majori deglutiendi, quam spirandi difficultate stipatur, sed ingesta plerumque cum impetu per nares redduntur. Sed quando tumor & rubor oculos & tantum incurrit, inflammatio, quæ externis pharyngis musculis incumbit, parasyanche, quæ autem laryngis paracynanche, a veteribus appellatur.

## §. V.

Deinceps a Practicis angina distinguitur in veram, sive exquisitam, & notham. Vera oritur a sanguinis stasi, spuria vero magis a congestione feri, quam sanguinis inflammatoria, in faucibus & colli internis. Illa morbus acutus est, nunquam sine rigore & fe-



& febre, hæc autem habet febrem plus lymphaticam & catarrhalem, quam acutam. In exquisita non modo dolor ardens & pungitivus circa interiora faucium observatur, sed & lingua sanguine turgēt, obscuro rubicundo dolore tinctā, facies simul rubet, arteriæ temporales valde pulsant, quandoque cephalalgia, sopor, vel sensuum torpor, jungitur, quandoque lypothymia accedunt, quin si gravior, spiritus difficulter trahitur, anxietas est, maxima inquietudo & extremorum refrigeratio. Citam hinc poscit opem, multumque periculi alit. Sed in spuria gravia hæc pathemata partim plane absunt, partim mitiora adsunt, minus etiam periculi, si rite tractetur, metuendum. Distingui porro angina potest in siccam & valde ardentem, & humidam aut valde mucosam. Illa fit a sanguine, cum febre valde acuta, uti dictum de vera. Hæc autem magis chronica est, febribus catarrhalibus associatur, cacheeticis & scorbuticis familiaris est, atque etiam linguam & fauces crasso viscido muco obducit, cum oris foetore.

§. VI.

*Differt a prunella.* Omnes hæ anginae species merito discernendæ ab aliis faucium affectibus. Vera quidem & sicca non permutanda cum illa inflammatione oris & œsophagi mucosa, quæ vocari solet prunella alba. In hac enim muco albo tota faucium regio & lingua oblitur, lingua fissuras dolorificas contrahit & junctus est simul magnus ardor, qui usque ad præcordia pertingit, proptereaque Germanis audit *die Hertz*, *Braune*. Malignis hæ sæpe accedit febribus, omne plerumque malo, quia præsentem arguit ventriculi, & œsophagi inflammationem. Neque etiam omnis faucium inflammatio est angina, sed ea tantum, quæ cum spirandi & deglutiendi difficultate junctā. Hinc multum utique ab ipsa discrepat levior inflammatio colli & internorum in faucibus, cum tumore & dolore & glandularum, quam

Tom. IV.

nostri dicunt, *die bosen Halse*, quæ frequens admodum est scorbuticis, nec non si malum contumax cum erosione, lue venerea affectis. Vera quoque & interna angina discernenda a solennibus feminis hystericis & hypochondriacis spasmodis, qui faciem constringunt & respirationem æque ac deglutationem reddunt difficilem. Hi enim sine febre sunt, mox remittunt atque recedunt atque etiam discuti possunt facile. Demum angina differt ab ardentibus illis & dolentibus in lingua pustulis, quas dicunt aphthas. Et enim in angina dolor & ardor latius sese diffundit & vicinas partes simul in consensum trahit; aphthæ vero certas duntaxat partes afficiunt, quibus pustulæ cum dolore & rubore insident, neque tam familiarem habent comitem febrem, quam angina.

§. VII.

Causa igitur anginae proxima stasis, vel quandoque congestio seri inflammationis in faucium internis eveniens. Ad hanc autem inducendam faciunt multa. Scilicet observatione constat, eandem frequentius incurrere, quibus evacuationes sanguinis spontaneæ per nares, uterum, hæmorrhoides, aut lochia, suppressæ, aut ommissæ artificiales, per scarificationes, vel venarum sectiones. In his certe prompta ipsius genesis post impensiores sanguinis commotionem, sive per potum spirituosum inebriantem, sive per validam corporis exercitationem, vel etiam nimiam vociferationem, præsertim in aere frigido factam. Observavi quoque a sumto fortiori sudorifero, admissa mox aere frigidiori, item a balneo nimis calido, post haustum potus frigidi, inflammationis anginosæ initia, quæ tamen adhibitis congruis internis & externis, feliciter mox discussa. Neque minus frequens anginae generatio admissis in fauces acerbis, fibras vasaque irritantibus impensius & constringentibus. Sic experientia teste; funesta sæpe faucium inflammatio accidit iis, qui conclavia calce

Q

recen-



recenter inducta inhabitant in iisque dormiunt, quo quidem aliquando plures simul infantes enectos esse novi ego, ac idem notabili exemplo confirmat *Tulpius lib. 3. cap. 41*. Eandem inflammantem venenis causticis ineffe facultatem, inter omnes constat. Ex purgantibus, elleborus albus specifica quasi indole petit fauces & strangulationem facit. Argentum vivum, præsertim male ex ipso præparata pharmaca, fauces male afficere & inflammare pariter constat. Et idem quoque de solano furioso, nec non morsu canis rabidi accidere, Medicorum testantur observata. Inprimis arsenicalium etiam & mercurialium minerarum fumi, item vapores spirituum mineralium, idem hoc malum improvide hausticausantur. Horum quippe omnium subtilissima, & magne penetrantiæ spicula altius sese musculis, qui cartilagine laryngis movent, insinuando, nervosas ibi tunicas stringendo, & liberum sanguinis per vasa transitum intercipiendo, tumore ejusmodi inflammatorium, pulsatorium, cum dolore pungitivo, sæpius excitant funestum. Quod enim res acutæ pungentes, firmitus hisce partibus inhærentes, solam hujus affectus suppeditare possint causam, manifesto testantur spinæ piscium aut ossicula aspera deglutita & faucibus intrusa, a quibus tale malum sæpissime excitatur, de quo notabilis observatio *Hildani Cent. 3. observ. 42*.

## §. VIII.

Sic per se & sua sponte exoritur angina; succedit vero etiam haud raro aliis morbis ceu symptoma. Accidit hoc sæpius in diarrhœa & dysenteria, præsertim si fluxus intempestive cohibetur, de quo memorabile exemplum apud *Hildanum Cent. 3. observ. 27*. Idem evenit, a repulso præpostete erysipelate, aut topicis perperam tractato podagrico dolore. Neque minus in variolis & febribus malignis ac pestilentialibus, cum summo vitæ discrimine, supervenit demum. Inpri-

mis de febre sic dicta Hungarica, observationes anatomico-practicæ testantur, quod ut plurimum inflammationem meningum, & faucium, quæ ad ventriculum & oesophagum extenditur, necet. Sed causa hujus symptomatici insultus plerumque, vel in nimis diuturna alvi constipatione, vel perspiratione, improvide cohibita, vel repulsa præpostere ad interiora materia acri caustica, quærenda. Quando vero epidemicum est malum, aeris vitio tribuendum & plerumque aliquid maligna complicatum. Accidit hoc haud raro, si diuturna aeris pluviosa humida fuit constitutio, si ver est, vel autumnus, præscio jam *Hippocratis Sect. 3. aph. 16. 20. 22*. testimonio, quod verum esse propria observatione confirmat *Bartholinus Cent. 1. obs. 81*. Frequens quoque hujus mali incursus, si aer effluvis sale acerrimo subtili, ob insectorum copiam, refertus, sole præsertim occiduo, hauritur, eamque ob causam Romæ familiarem esse & quandoque pestis instar grassari anginam fidem facit *Hollerius lib. 1. prax. c. 23*.

## §. IX.

Ceterum angina morbus, tam ob febrem haud raro acutam, quam suffocationis metum, multum alit periculi. Periculosissimam autem esse veram, internam & latentem, jam diximus, & de hac valet illud *Hippocratis effatum prædict. lib. 3. cap. 8*. *angina gravissima est, & celerrime interimit, quæ neque in cervice, neque in faucibus conspicuum quid habet. Hac etenim eodem die, & secundo, & tertio, & quarto, strangulat*. Inprimis maximum suffocationis est periculum, quando musculus, qui vocatur thyroarithenoideus, rimæ occlusioni dicatus, affectus. Anceps porro admodum est symptomatica, ob corpus jam debile & materiæ virulentiam raro superanda. Malum etiam, quando tumor in externis subito disparet, non imminutis, sed auctis po-

Quandoque epidemica.

Prognosis de eventu.

Symptomatica etiam est quandoque.



potius symptomatibus. Tum enim ad alias nervosas partes transilit morbus, & vel cerebrum petens, phrenitidem cum convulsionibus, vel ad pulmones delatus, peripneumoniam facit, testimonio *Hippocratis Sect. 5. aph. 10.* lethalem. Sed quando suffocatio strangulatoria remittit, tumor, dolor & rubor magis extrorsum vergit sensimque evanescit, felicem solutionem nunciant. Sin secus, in apostema aut mortem fit transitus. Si in apostema, ac pus in bronchia & pulmones effunditur, teste *Foresto lib. 15. observ. 24.* anceps admodum eventus. Si in mortem, nunciant hanc spuma ante os, lingua valde tumida, purpureo nigra, extremorum rigor, summa præcordiorum angustia atque anxietas, cum pulsu duro, convulsivo & intermittente.

Curatio.

Cum Methodo medendi.

§. I.

Sanguis  
miseren-  
dus.

Ipsa truculenti hujus mali curatio differt, prout variæ ipsius sunt species & singularum causæ differunt, ad quas recte pernoscendas & opportune removendas, unice directæ esse debet medentis intentio. Quando itaque ex manifestis signis eminens sanguinis ad caput congestio observatur, quæ non modo vehementiam inflammationis auget, sed & lethalium symptomatum est causa, protinus & primo omnium hæc debet esse Medici cura, ut impetum sanguinis a parte affecta derivet, id quod commodissime sectione venæ confinis perficitur. In hoc enim auxilio præcipuam & unicam fere salutis spem, inde ab omni ævo, tam Veteres, quam recentiores Medici, collocarunt. Instar omnium sit *Hippocrates*, qui *lib. de loc. in hom. §. 1.* sic anginae tradit curationem: *angina affectis, a sanguine in venis colli collecto & coagulato,*

*sanguinem ex venis brachiorum & pedum detrahes, & simul alvum inferne subduces, quo quod morbum exhibet detrahatur.* Sed quo pacto & ubi id faciendum, non omnes æque consentiunt. Plurimi enim sectionem venarum sublingualium suadent, quam alii rejiciunt, quia si non fiat sufficiens apertio, parum sanguinis effluat, si vero amplum foramen, hæmorrhagia sequatur non raro lethalis. Inter eos qui spernunt, potissimum *Tulpius lib. 1. observ. 51.* hanc ob causam, quoniam sanguis eadem attrahatur ad locum per se angustum & facile suffocatio inducatur, sæpius ab ipso annotata. Alii, uti *Zacutus Lusitanus Hist. Med. princ. lib. 1. hist. LXXVI. Joh. Stephanus in Hippocr. de struct. hom. Trallianus & Ferrius in lib. epid.* sectionem venarum jugularium externarum, præsertim in malo desperato, sique præsens est strangulationis periculum, mirifice commendant. Sunt porro, qui scarificationem dilaudant, in nucha & mento, ut *Platerus lib. 2. pag. 395. Amatus Lusitanus Cent. 3. curat. 28. Zacutus Lusitanus in prax. admirand. Lib. 4. quest. 54. circa laryngem. Riolanus in enchirid. ana tom. lib. 4. pag. 385.* Hirudinum appositionem pone aures atque in cervice *Capivaccius & Hollerius* malunt.

§. II.

Post sanguinis missionem, præcipiente eodem *Hippocrate*, aperienda alvus, quo etiam hujus beneficio humores versus inferiora trahantur & evacuentur. Sed his minime acriora, neque cathartica, in forma pulveris aut pilularum, sed mitiora, & quidem liquida, conveniunt. Ut vero una, quod dicunt, fidelia duo dealbentur parietes, ac non modo superflui humores detrahantur, sed & acres falsi contemperentur, utilissimum erit, decoctum ex mannæ unciiis duabus, nitri antimoniati drachma una cum dimidia & feri lactis unciiis decem. Si autem per os nihil in-

Alvus  
ducen-  
da.



geri potest, enema injiciendum ex lacte, melle, oleo, amygdalarum dulcium & sale communi ac nitro.

## §. III.

*Temperandum & discutientium.* Evacuatis sic tam sanguine superfluo, quam humoribus impuris, opera danda, ut humor sanguineus, vel serofus, tubulis impactus, resolvatur & discutiatur congruis remediis, tam internis, quam externis, & febrilis æstus simul contemperetur. Hunc in finem per quam conducibilis frequens usus mixturæ diaphoreticæ & leniter anodynæ ex aquis antispasmodicis & diapnoicis, florum sambuci, tilix, primulæ veris, acaciæ, galegæ, herbæ cardui benedicti, scordii, cum dialcordio Fracastorii, antimonio diaphoretico, lapide prunellæ, aceto quoque & cancerorum lapidibus, nec non sirupo papaveris rhœados. Conducunt etiam potus diluentes & humectantes paullo liberalius dati, serum quippe lactis dulce & acidulum, cum succo citri & saccharo paratum, ptisana ex hordeo mundo, radice scorzonæ & rasura cornu cervi, cum sirupo acetositis citri, decoctum avenaceum, ipsum lac quoque, tantundem aquæ remixtum & saccharo atque momento nitri conditum.

## §. IV.

*Externis succurrendum.* Externis præterea ancipiti huic morbo obviam eundum, nonnullis quidem in oris cavo, nonnullis exterius in collo atque cervice, quo his etiam dolor & æstus inflammatorius mulceatur, acrimonia humorum temperetur & qui in vasculorum angustis firmiter subsistunt succi dissolvantur. Externe frequentissimi usus sunt cataplasmata ex emollientibus, paregoricis & discutientibus, floribus sambuci, meliloti, chamomillæ vulgaris, verbasci, radice liliorum alborum, ficubus, croco, semine anisi, foeniculi, farina lini, ex lacte coctis, quibus nonnulli, nidos hirundinum & sterco canis, seu specifica,

adjiciunt. Merentur hoc nomine etiam commendationem emplastra lenientia ac mollientia, uti est diachylon simplex, aut de meliloto, malaxatum cum oleo amygdalarum dulcium, vel admixtione spermatis ceti, croci & camphoræ efficacius redditum. Intra os vero non facile suaserim gargarismata, cum injectione per syphonem, ubi magnus dolor & siccus ardor est. Sufficit os subinde colluere, congruo tepido liquore, cui concinnando serviunt plura, rob dianucum, diamoron, sirupus granatorum dulcis, papaveris rhœados, violarum, mucilago seminis cydoniorum, cremor lactis, lapis prunellæ, quæ omnia pro circumstantiarum ratione, vel lacte, vel decocto liquiritiæ, ficuum, aut venæ misceri possunt. Neque minus nobilis est virtus olei amygdalarum dulcis recentis, cum spermate ceti, croco & syrupo violarum, in decocto avenacei dati & aliquamdiu in ore detenti.

Observationes & Cautela  
Clinica.

## §. I.

In angina sanguinea & corpore plethorico, omnium primo per sanguinis missionem succurrendum. Nam si in ullo morbo, certe in hoc, a præsentaneo periculo ipsius mortis liberat. Sed momentosa & præceps est juvandi occasio. Optimum auxilium ex sectione jugularium. Si vero hanc instituendi copia deficit, aperiendæ sublinguales, ita tamen, ut prius secetur brachialis. Et quando angina sanguinea accedit febris ardenti & Hungaricæ simulque phrenitidis metus est, vires tamen imbecilles largiorem sanguinis subtractionem non ferunt, cito sublinguales tantum aperiendæ. Quando autem ab acrimonia caustica nervosis faucium & laryngistunicis inherente hoc vitium oritur, neque manifesta ad-  
est

*In sanguinis missione tenenda*



est sanguinis redundantia, indicatur potius scarificatio in cervice & mento, vel hirudinum appositio. Ubi etiam in cacochymicis & phlegmaticis, a copia feri viscerum, fauces & externas colli partes obsidet tumor cum dolore & leni inflammatione, præferenda venæsectioni, scarificatio, in nucha & scapulis.

§. II.

Usur-  
panda  
in angina  
ar-  
dente.

In usu externorum attendendum merito ad diversa inflammationis in faucibus genera & singulis accommodata opponenda. Itaque in omni faucium inflammatione dolorosa & ardente, julepus rosarum cum nitro & momento camphoræ, deglutitur, eximie conducit. Gelatina quoque cornu cervi rite parata, cum albumine ovi probe depurata ac succo pomorum Chinenfium, nec non saccharo condita, iterato sumta, egregie levat. Si autem fauces ardent, ardent, lingua tumet & respirationis æque ac deglutitionis difficultas est, linctus parandus, ex albuminis ovi in aquam quassati uncis binis, aquæ rosarum uncia, sirupi granatorum, diamorronana uncia dimidia, salis prunellæ granis duodecima, cmi, pro circumstantiarum conditione, viginti vel triginta liquoris anodynii guttæ indendæ. Tum etiam exterius collum & cervix oleo camphorato, ex olei amygdalarum dulcium uncia, olei papaveris albi drachmis duabus & camphoræ drachma dimidia, inungendum.

§. III.

Latente  
sympto.  
matica  
& ab  
acribus  
inducta.

In angina latente interna, valde æstuosa, solo lacte & ejus cremore, addito lapide prunellæ & sirupo papaveris rhœados, os subinde colluendum & frequentius bibendum lactis serum. In œsophagi autem inflammatione, febribus malignis in statu haud raro superveniente, ex usu est pulvis, ex nitri drachma, camphoræ granis tribus & sacchari uncia cum emulsione amygdalarum dulcium, & intus dandus, & exterius in ore aliquamdiu te-

Tom. IV.

nendus. Et ubi ab haustis & inspiratis exhalationibus acribus metallorum, mineralium, calcis etiam vivæ & argenti vivi, suffocationis periculum accidit, nec purgantia, nec venæsectio locum habent, sed commodissimam locant operam humectantia, demulcentia, interna & externa, lac cum nitro, cataplasmata superius descripta, nec non enemata.

§. IV.

Inflammatorius ille dolor, quia *Gargarisma* fero falso acri in glandulosa faucium *ex Jpt-ritu vi-* carne, circa pharyngis & laryngis confinia, fit, cum rubore & copioso salivæ fluxu, sine febre, optime discutitur ab initio statim gargarismo ex spiritu vini Rhenani, vel Franco-nici. Quam præsentanea enim hujus sit virtus disertis verbis testatur *Wala-* *laus meth. med. pag. 112.* inquit, *an-* *gina affectus in principio sese spiritu* *vini gargarizet, omnis gutturis in-* *flammatiō cessabit trium horarum spa-* *tio, sive solus hunc in usum cedat,* *sive cum aliis remisceatur.* Et *Mar-* *tianus* hanc ob causam in cynanche vera commendat actu calida. Ipse quoque novi, faucium inflammatio-nem brevi fuisse discussam, guttulis octo vel decem spiritus vini campho-rati, in quo granum nitri liquatum, lente per fauces dimissis. Quem in finem alii commendant essentiam pimpinellæ albæ, cum spiritu vini confectam.

§. V.

Quando magna colluvies humoris impari serosi ad palati & faucium *In decum-* glandulas decumbit, crebrius usur- *bitu fe-* *brile* *faciens* *da.* panda sunt leniora laxantia manata, rhabarbarina, tartarea & pallulara. Tum etiam apprime conducit gargarisma, quod pro basi habet sal pharyngæum a *Zobelio in tartarologia* descriptum, quod præparatur ex cremoris tartari & nitri uncia, aluminis usti uncia dimidia, solutis in aceto destillato & solutione postea secundum artem coagulata. Sic quippe parati salis drachma, cum duabus drachmis mel-



lis, in quinque unciiis aquæ plantaginis solvenda & cum liquore hoc fauces tam crebro eluendæ, quam idem cum sypnone subinde injiciendus.

## §. VI.

*Empla.* In faucium & glandularum tumoribus inflammatoriis, emplastra emollientia, supra tradita præferuntur merito cataplasmatibus, quibus ob plures difficultates, rarius uti soleo, sed frequentius decocto specierum emollientium ex lacte, vesicæ indito. De gargarismatum vero usu tenendum, quod cum sypnone injecta locum non habeant. Impensiori enim attritu dolorem & inflammationem magis exasperant. Melius igitur ac tutius, os cum liquore ad gargarismum subinde eluere. Quod si autem & hoc propter impotentiam fieri nequit, injectio lenissime tantum adigenda, ne irritatio ad vomitum fiat, caput quoque antrorsum inclinandum, ne retrorsum, ne dilabendo ad asperam arteriam suffocationem minetur, & iterato injiciendum, si magna mucicopia inhæret. Præstat præterea in omnibus hisce faucium affectibus abstinere a loquela, quia crebrier ac fortior linguæ agitatio malum exacerbatur.

## §. VII.

*In suppuratione agn.* Si tumores faucium ad suppurationem tendunt, eadem optime procurari potest caricis pinguibus in ore dententis. Et quando tonsillarum tumor inflammatorius ichore repletus, externe nihil præstabilius deprehendi melle rosato, cum spiritu vitrioli remixto, & sæpius cum pennicillo admotum, quod tumorem minuit, mundat, ulteriorem affluxum impedit & pituitam subsistentem colliquat. In aphthis infantum, quæ linguam cum dolore & ardore obsident, ad hunc mulcendum nihil utilius, quam pustulas subinde illinire cremore lactis cum tantillo nitri imbuto. Interdum etiam expedit ad pituitam colliquandam & arcendum nimium affluxum applicare vitriolum album in aqua

pluviali, vel melius rosarum, aut florum sambuci, liquatum.

## §. VIII.

Demum ne faucium inflammatio, *Recidit.* quod haud raro accidit, repetat, vitanda cum cura omnia, quæ ad inducendam eam facere supra diximus. Potissimum perspiratio custodienda, ac inprimis caput, cervix & collum ab omni refrigeratione defendere ex usu est, ne humores & acris per poros difflanda materia ad interiora agantur ac in molli faucium substantia subsistant. Cavendum quoque ab omnibus quæ succos impensius exagitant, maximeque ab impensiori vociferatione, qua humorum affluxus ad superiora allicitur. Si corpus plethoricum, tempestiva sanguinis missio instituenda, & minus rite succedentibus hæmorrhagiis spontaneis, ut eadem in ordinem redigantur, videndum. Neque minus subinde alvus subducenda, quo & impuritates expurgentur & congestorius versus superiora motus intercipiatur.

## Enarrationes morborum.

## OBSERVATIO I.

Femina triginta annorum, chole- *Angina*  
rica & catarrhosis defluxionibus ad- *alvi flu.*  
modum obnoxia, levius vestita sur- *xx se-*  
rexerat tempore autumnali ex lecto ac *lata.*  
frigida sese auræ incautius exposuerat. Inde nata est raucedinem cum ardore & dolore gutturis, difficulter simul deglutire & loqui potuit, & pulsus, præsertim noctu, fuit celerior. Quam igitur menses restitissent, missus primum e vena brachii sanguis & injectum deinceps clyisma, sed sine levamine. Gargarismata vero, propter dolores, ferre non potuit. Interim gutturis tumor, tam interius, quam exterius, mirum increvit, & parum absuit, quin ægram strangularet. Quinto tamen die subsedit tantisper tumor & dolor mitigatus. Hinc exterius collo admotum emplastrum maturativum,  
ex



ex emplastro de meliloto cum croco, cui impositi sacculi calidi, ac ori inditum decoctum ex emollientibus. His maturuit tumor & noctu inscia ægra etiam feliciter rupit. Sed illapso procul dubio fuerat materia acris pulmonibus, & ob id suffocationem minari visa est. Ad quam dispellendam, aqua hyssopi, cum essentia castorei & liquiritiæ, additis aliquot guttulis spiritus cornu cervi succinati, infusum quoque theiforme ex herba, pectoralibus cum aqua calida, usurpata. Inde sudor erupit per universum corpus simulque materia tenax viscida, sexies minimum quotidie, per alvi secessum ejecta, non sine torminosa ventris contractione. Medicus autem metuens damnosam fore hanc diarrhæam, de supprimenda eadem cogitavit & electuarium ex diascordio *Fracaflorii*, conserva rosarum, pulvere hematitidis & nucista dedit. Cohibitus etiam protinus alvi fluxus, sed sequutus singultus cum ardore per totum œsophagi tractum, sputatione materiæ viscidæ viriumque languore. Hinc alius advocatus Medicus, qui pathemata hæc a perperam suppresso alvi fluxu deduxit & ob id suasit pilulas ex myrrha electa, diagrydio sulphurato, mercurio dulci, croco, castoreo & sale succini, cum vehiculo calido sumendas. His non modo singultus sedatus, & materiæ serosæ per alvum excretio revocata, cum summo ægræ levamine, quæ successive postea ad sanitatem rediit.

#### *Epicrisis.*

Memorabile omnino, quod faucium inflammatio, pituitoso ac seroso alvi fluxu fuerit soluta; quod huius adstrictio præpostera gravia induxerit pathemata & quod hæc revertente illo exspirarint iterum. Sed sæpiissime in inflammatoriis faucium affectibus, œsophagus, quin ipse ventriculus, affligitur, ita, ut eadem quasi labe eodemque vitio laborare videantur. De aphthis sæpius notavi, quod eadem œsophagum & ven-

triculum obsederint. Id enim factum fuisse, ardor, per totum œsophagi tractum usque ad præcordia excurrens, prodidit. Tum etiam ægri salsa, acris & calida plane non ferre potuerunt, sed decoctum hordei, avenaceum, raparum exsiccatarum, infusum theiforme cum lacte, ex usu fuerunt, hisque assumtis, ardores, siccitates & dolores anxii circa præcordia sublati. Vicissim vidi, ex ventriculo, in ardentibus febribus, a venenis, aut acrioribus purgantibus inflammato, inflammationem ad fauces & laryngis musculos fuisse propagatam. Hinc manet utique firmum, in faucium orisque affectibus, præsertim si pituita viscida, crassa fuerint obsessæ, laxantia præsentaneam exferere opem.

#### OBSERVATIO II.

Sexagenarius quidam, diu quartana detentus, hac discedente, cathar- *Synanthe cum rata* ris & ventriculi imbecillitati admodum fuit obnoxius. Is quum noctu aere pluvioso fecisset iter, incidit in faucium difficultatem, ut solida quidem, non autem liquida posset deglutire, ac nonnisi cum magna intensione deglutitionis, anxietate ac subsequente copiosa excretionem phlegmatis. Interius quidem rubescebant nonnihil fauces, sed exterius nihil tumoris comparebat. Judicavimus igitur epiglottidem, quæ instar operculi orificium asperæ arteriæ claudit, sero mucido obsessam esse & turgidam, ut rimam subjectam non exacte claudat, sed liquidum deglutitum in asperam arteriam delabatur & anxietates subsequentes faciat. Quare iussi exterius applicare spiritum vini camphoratum, interius os subinde colluere aqua florum sambuci, mixta cum spiritu salis ammoniaci atque essentia croci, & quotidie usurpare pilulas nostras. His intra aliquot dies malum feliciter sublatum & æger convaluit.



*Epicrisis.*

Proprium anginae symptoma, difficultas deglutiendi, tam solida, quam liquida. Si enim tumor paullo amplior oesophagi principium obsidet illudque angustat, liquida quidem, sed non solida dimittuntur. Si vero tumor hæret in principio gutturis, quod tegit epiglottis, solida quidem, dum comprimunt tumentem epiglottidem, transeunt ad oesophagum, sed liquida minus prementia per hians a tumore spatium asperæ arteriæ illabuntur, ibique magnas creant molestias.

## OBSERVATIO III.

*Angina  
sæpius  
recidi-  
vans  
sanata.*

Putarant Medici feminam quandam venereo infectam esse contagio, eaque propter ipsi mercurialem adhibuerant salivationem. Hinc factum est, ut ipsa postea levi ex causa, ab aere frigido & nebuloso, ab ira, ab assumtis acribus cibis, a refrigeratione capitis, a turbato mensium successu, sæpius incurreret exquisitum palati, nec non in faucium internis, circa pharyngem & laryngem, ardorem atque dolorem, sine febre tamen; sed cum respirationis difficultate. Accidit vero ut dormiret in conclavi humili, noviter exstructo & vaporibus calcis pleno, ac inde non modo capitis dolore, sed & impenso faucium & colli ardore atque dolore, cum inquietudine, spirandi angustia, anxietate & æstu afficeretur. Ego vocatus sanguinis missionem, ob vasa minus turgentia omisi, sed tantum applicare iussi collo cataplasma ex farina lini, floribus sambuci, ficubus, croco, oleo amygdalarum dulcium & lacte. Suasi quoque ut clyster injiceretur ex lacte, nitro, sale communi, melle & oleo. Potui dedi lac, cum dimidia parte aquæ hordei, sive ptisanæ remixtum, adjecta debita quantitate nitri & sirupi violarum, quod copiosius hausit & frequenter ore continuit. His brevi malum discussum. Ad arcendam au-

tem crebriorem recidivam, dedi consilium, ut aquas Spadanas, vel Selteranas cum lacte per mensem & ultra biberet, & quotidie mane fauces gargarizando elueret, vel cum aqua sic dicta sclopetaria, vel decocto plantaginis ex vino.

*Epicrisis.*

Prompta tumoris & affectus anginoidei genesis, quando compages fibrosa, glandulosa & tubulosa faucium debilitate & tono privata, quod heic factum per salivationem mercurialem. Quare qui semel, vel iterum ejusmodi tumore laborarunt, qui non statim congruis præsidis atq; regimine discussus, ex facili postea, per nimiam vocis intensionem, animi affectum, vinum copiose haustum ac frigido-humidum aerem admissum, idem malum rursus nanciscuntur. Optime autem ejusmodi recidivæ præcaventur, quando malum primum statim recte persanatur penitusque tollitur, ne partibus labem inferat, ægre emendandam.

## OBSERVATIO IV.

Virum novi honestum, quinquagenario majorem, sanguineo-melancholicum, robustum, sanguinis missionem nunquam passum, belle tam valentem, licet cerevisiæ lupulata & spiritus ardentis potu admodum delectaretur. Sed quum gravius inter rixas cum uxore excanduisset, in exquisitum capitis incidit dolorem, sub quo arteriæ fuerunt turgidæ, facies rubicunda, oculi torvi, noctes insonnes & arteriæ tam valide pulsarunt, ut de sensu mallei quasi in capite pulsantis æger conquereretur. Hinc admotum cataplasma ex mica panis, bacis lauri, juniperi & aceto rosaceo. Fronti etiam & temporibus ex consilio vetulæ applicatum albumen ovi, cum alumine conquassatum. Sed gestatis his aliquandiu, conquestus est æger de insigni dolore pungitivo faucium, deglutiendi difficultate & spi-

*Angina  
ex re-  
pellen-  
tium  
propo-  
sitione  
su gra-  
vis di-  
scussa.*



spiritu angusto, lingua mirum intumuit, atro colore tincta, siccam linguam ex ore hiantem exseruit, liquida indefinenter appetiit, pulsus celer & vehemens manum vibravit & propter spiritum arctius meatem in erecto semper esse debuit situ. Ad gravissima igitur hæc pathemata depellenda cum fructu usurpata sequentia. Sanguis e vena missus largiter; clyster injectus acrior; cataplasma ex stercore canis, hirudinum nido, ficibus, cepis tostis, floribus sambuci, chamomillæ, melileti, semine cymini, nitro & camphora, cum aqua florum sambuci & vino tepide collo appositum; interius mixtura ex aquæ florum sambuci, rosarum ana unciiis duabus, aceti destillati drachmis sex, lapidum cancrorum drachma, nitri drachma dimidia, camphoræ granis quatuor in oleo amygdalarum dulcium solutis & sufficienti quantitate julepi rosarum, sepius ad aliquot cochlearia data & potum quoque infusum theiforme ex veronica, floribus sambuci & radice liquiritiæ. His feliciter discussum suffocationis periculum. Postea laxans ex sirupo rosarum solativo, cremore tartari, diagrydio & rhabbarbo exhibitum, quo aliquoties deiecit. Os deum frequentius elotum aqua pluviali, in qua nitri ac vitriolum parum & saccharum ad gratiam soluta. Sic brevi explicita ratione anceps hic morbus ex voto depulsus.

#### *Epicrisis.*

Attendenda merito in nostro truculenti hujus mali genesis. Ortum quippe duxit ex sanguinis ad caput congestione; huic opposita exterius constringentia; his sanguis ad interiora repressus ipsasque fauces; heic copiose collectus cruor substitit & dolorem, tumorem, ardorem, aliaque symptomata induxit. Albumen enim ovi cum alumine insigni repellente & vasa constringente virtute pollere, ex ipsius usu in ophthalmia patet. Et ex constrictione in externis, facilem ad

interna esse transitum, docet vasorum mutua communicatio. Sed quum illico venæsectione & internis æque ac externis discutientibus stasis & stagnationi obviam itum, non potuit non feliciter succedere curatio. Nam si occasio præcepta captanda unquam, certe in congestionibus inflammatoriis id faciendum, quæ nisi celerrime removeantur, transitus fit in corruptionem lethiferam & sphacelofam.

### C A P U T V.

#### *De Febre Phrenetica. Sive Phrenitide.*

#### *Theses Pathologicæ.*

##### §. I.

**N**ULLA inflammatio, sive particularis febris, tam magni in medicina momenti, quam quæ in parte omnium nobilissima ipsiusque animæ rationalis domicilio, cerebro, consistit, & tam omnem rationis usum evertit, quam præsentaneum vitæ periculum intentat, ac Græco nomine audit phrenitis. Est igitur hæc phrenitis febris acuta inflammatoria, orta a nimia sanguinis congestionem ejusdemque intercepto, per minimas potissimum membranarum cerebri arteriolas, transitu, juncta cum magno æstu, delirio atque vitæ discrimine.

*Phrenitis definitio.*

##### §. I. I.

Signa imminentis phreneticæ affectionis sic exacte & compendiose exhibet Trallianus lib. 1. cap. 13. phrenitidem, inquit, futuram vigiliæ potissimum continua & intensa somni-que turbulenti præcedunt, ægri exsiliunt & somniorum imaginationibus detinentur, & facile eorum quæ dicuntur obliviscuntur; si respondent, ferociiores ac iracundiores, quam prius, apparent, pulsus habent parvos & duros atque occipitio frequentius indolescent. Si affectus increverit, fixioribus oculis cernunt eosque rubentes habent, nec non lacrymæ ex utrisque fluunt.

*Signa futura.*



*fluunt.* Præsentis autem indicia & pathemata omnium optime ex Veteribus consignavit *Cælius Aurelianus lib. 1. cap. 2. pag. 12.* ita habens: *in phreneticam passionem declives sequitur febris acuta atque pulsus difficile ad superficiem corporis ascendens, sive humilior, tensior, vultus subinflatus, sive plenus, sanguinis per nares destillatio, vigiliæ juges, aut turbatus somnus & insania turbulenta, mentis sollicitudo ac parvitas sine ratione, frequens tergorum est versio jacendi, cum capitis assidua commotione, aliquando etiam sine causa hilaritas, oculorum rubor, cum levi lacrymatione & circumjectio manuum, sine ullo capitis dolore, articulorum frigus, sine tremore, urinæ abundantia flavæ, aquatæ, tenuis & paullatim exclusæ; aliquibus etiam sonitus capitis atque aurium tinnitus, dolor quoque capitis non quiescens, nulla ex manifesta ratione præcordiorum tensio, visus attentus, cor frequenter palpitans.*

## §. III.

*Causa proxima.*

Omnes hæ phrenitidi junctæ functionum in corpore lésiones, pendent a nimio & impetuoso sanguinis ad caput appulsu, ejusdemque ex intercepto per minima libero transitu, stasi & per alias iusolitas vias celerrima trajectione, unde distensiones fiunt vasorum cerebri & faciei, serosus humor secedit, passio obhærescit & cerebrum in functionibus suis, maxime rationis usui servientibus, turbatur prorsus. Ex vero enim *Hippocrates lib. de flat.* & passim alibi tradit: prudentiam & rationem hominis in constanti sanguinis habitu in cerebro, sive rectius ejusdem æquabili motu consistere, adeo ut hoc interturbato, concidat simul & prudentia, & ratio. Et hæc omnino ita esse veramque phrenitidis sedem in cerebro consistere, testatum facit uberius. sectio eadem defunctorum. In his quippe vasa, tam duræ matris cum sinibus suis, quam piæ meningis, mirum distenta & crasso coagulato cruore farta, ipse membra-

næ aride & exsiccate, ut pia mater facillime a cerebri cortice separari queat, reperiuntur, & præterea medulla cerebri multo seroso humore perfusa comparet. Id quod pluribus confirmant *Blancardus in anat. præct. obs. 3. Schenckius lib. 1. fol. 64.* nec non *M. N. C. Dec. 2. A. V. obs. 63.*

## §. IV.

Inter antecedentes causas recte *Cælius Aurelianus l. c.* refert vinolentiam, vel vigiliam, aut jugem in sole moram, mentem natura mobilem, iracundiam, caput per literarum disciplinas debilitatum, ætatem juvenilem. Et certe ad phrenitidem disponunt omnia, quæ caput debile ac imbecillum reddunt, ut deinde in ipsius vasis facile fieri possit sanguinis & humorum mora, nec non quæ sanguinem, crassum præsertim & copiosum, ex partibus inferioribus impetuose ad caput agunt ac congerunt. Hinc observatione medico-practica constat, ad deliras ejusmodi febres admodum esse proclives, qui diuturna mœstitia, cura, studiorum & meditationum profundiorum intemperantia, mentem fatigant, qui vegetetate, constitutione melancholico-cholesterici, sæpius animo per iram aut odium moventur, desideriis vehementioribus jactantur, vigiliæ, inquietudini, crapulæ ex cerevisiis liberaliter lupulatis, vel vino dediti, qui veneri litant, sedentariæ vitæ motus & exercitationis experti indulgent, & ob pravam victus rationem, & copiosum, & impurum sanguinem, in venis alunt. Hinc porro per experientiam in comperto est, a cessante consueto, vel etiam repente suppresso hæmorrhoidali fluxu, emanente quoque aut cohibito mensium, nec non in puerperis lochiorum profluvio, promptam esse, præsertim alvo simul adstricta, phreneticarum affectionum genesin. Tum enim ob stagnationes sanguinis in abdominis visceribus, in nervosis partibus spastice suscitantur stricture, quæ inequalem reddunt sanguinis circui-

*Causæ antecedentes*



cuitum & faciunt, utis cum impetu aliorum ruat ibidemque nimium congeratur. Demum phrenitis etiam haud raro inducitur per violentiam externam. Accidit hoc in vulneratione & contusione capitis per quam facile, inprimis plethorico-cacoehymicis, nisi cito sanguinis missione & discutientibus occurratur, tumque effato *Hippocratis Sect. 7. aph. 14.* eventus sequitur ut plurimum funestus.

## §. V.

Est, vel  
idiopathica.

Merito autem phrenitis distinguenda in idiopathicam & symptomatice. In utraque quidem febris adest acuta, sed ea cum differentia, ut in illa præcedat, in hac vero individuus sit comes. Idiopathica in temperato nostro climate rarior, frequentior autem in calidis siccis & meridionalibus locis, unde etiam Veteres Græci Medici, inprimis *Ætius*, *Trallianus* optime & copiose de hac passione in monumentis suis disseruerunt. Dantur tamen subinde etiam inter nos exempla phreneticæ febris, sine præcedente alia, potissimum a nimia crapula, continua animi iracundia & cerebri per profundas continuas meditationes & vigilas fatigationes, imbecillitate, in sanguineo, vel etiam cholericomelancholicis hominibus & vitæ sedentariæ addictis, hypochondriacis, vel hæmorrhoidariis, præsertim si fluxus imprudenter cohibetur. Sed de hac recte omnino, confirmante id ipsius experientiae suffragio, tradit *Villisius in pathol. cerebri cap. 10. pag. 234.* quod, nisi cito & opportunis remediis discutatur, quam facile in maniam, sive delirium furiosum transeat. Neque etiam infrequens est idiopathica ejusmodi & in maniam degenerans phrenesis, post superatas febres ardentes, item purpuratas, exanthematicas & catarrhales, male tractatas, per nimis æstuosum regimen, per medicamenta volatilia, sanguinem commoventia, opiata etiam, aut repellentia nimis, refrigerantia, nec non incongruas venæse-

ctiones. Id quod eo certius & vehementius fit, quando æger ad iram levi ex causa promptus ac facilis.

## §. VI.

Frequentior tamen apud nos symptomatice. Sæpius enim evenit, ut in febribus malignis & exanthematicis acutis, petechiis, variolis, catarrhalibus malignis, potissimum castrensis & omnium maxime Hungarico morbo, præsertim male tractatis, phrenitis accedat in statu & mortem inferat. Scilicet supervenire solet circa dies criticos, cum rigore, tremore artuum, præcordiorum tensione, externorum refrigerio & urina tenui, vel parcius, vel effuse nimis fluente. Sed quia ob morbum præcedentem & diuturnas vigilas fractæ jam fere penitus vires & tonus quoque vasorum membranarum cerebri nimium labefactatus, stases fiunt in ejus vasis ex sanguine irresolubiles, quas tertio plerumque die mors excipit.

## §. VII.

Licet autem phrenitis sæpius in maniam transeat, veterum etiam, *Hippocratis*, *Cæli Aureliani* & *Aretæi* testimonio, qui illam ob id cum hac plerumque conjungunt, vel plane confundunt; ambo, tamen, multum discrepant. In phrenitide enim semper adest febris, cum pulsu celeri, duro ac parvo, delirium quoque non intermittens prorsus, sed tantum subinde remittens, quo tempore oblivio est omnium quæ sub delirio contigerunt. Sed mania chronica est passio, sine febre acuta, licet cum pulsu præternaturali, duro & inæquali, quandoque magno & celeri. Habet quoque maniacus furor sua intervalla, junctus est ordinario cum magno fastu, ira & odio adversus amicos atque propinquos, & paroxysmo cessante, exquisitam ut plurimum memoriam omnium quæ antea habent maniaci. Deinceps phrenitis etiam differt a leviori illa mentis alienatione, quæ in acutis febribus, ante expulsi-

Vel  
sympto-  
matica.

Differt  
a mania

a levi  
delirio  
in post  
acutis

cri-



criticam exanthematum non raro observatur. Nam hæc facilius transit, neque etiam urinas tenues aquosas, vel rigorem & refrigerationem partium externarum habet comitem. Neque minus, quandoque post declinationem febris acutæ, observatur per aliquot dies, aut hebdomades, quædam desipientia & mentis inconstantia, a phrenesi diversa, quæ propter summam virium & cerebri ex perpeffo morbo debilitatem oritur, & redeuntibus viribus, vel sponte cessat, vel congruis præfidiis facile iterum penitus discutitur.

### Curatio.

#### §. I.

Curatio  
quibus  
perfi-  
cienda.

Quum gravia illa & exitialia pathemata, quæ phrenitidi juncta, a meningum inflammatione, ceu causa proxima dependeant; prima utique & princeps medentis esse debet intentio, ut hæc in præfervatione arceatur & in curatione removeatur. Hujus autem causa quum sit sanguinis in vasculis meningum alibi stasis, alibi cum dolore, tensione spastica & ardore, celerrima trajectio; ipsa certe sana ratio dictitat: ea remedia, quæ effrenem sanguinis impetum ad caput sistunt, ibi congestum derivant, subsistentem expediunt atque discutunt & meninges spasmis constrictas relaxant, omnium esse, ut ita loqui liceat, indicatissima.

#### §. II.

Sanguis  
miten-  
dus.

Jam in phrenitide, & curanda, & præfervanda, principem merito locum obtinet, communi Veterum & recentiorum omnium consensu, sanguinis missio; quam etiam circa affectam partem instituere præcipiunt omnes. *Tralliano* olim & Arabibus frequens jugularis venæ sectio, quæ nostris temporibus perperam exolevit. Nam per experientiam in comperto est, hanc in omnibus capitis a sanguine congesto & stagnante oriundis passionibus, aliarum venarum incisioni

longe multumque esse anteferendam, eo quod hæc vena jugularis externa, cum interna, ex arteriis carotidibus & vertebralibus cerebri proxime sanguinem derivat atque deducit. Nec difficilis adeo & periculosa, ut vulgo putatur, hujus venæ incisio, sed constricto tantisper fascia commoda, ut turgeat vena, collo, facili negotio instituenda. Deinceps magni æstimatur a Medicis in hoc & aliis capitis morbis venarum sublingualium sectio. Inprimis *Ammianus in paræn.* fatetur: ex militibus qui anno 1654. ab expeditione Hungarica redierunt & in nosocomio morbo Hungarico laborarunt, evasisse omnes, quibus tempestive raninæ venæ pertusæ, quibus non, esse mortuos. Atque etiam novi, eandem utilissimam fuisse ad præscindendum imminens in febribus acutis delirium, quinto, vel sexto die, sana adhuc mente, institutam. Sed difficulter admodum perficitur, si delirium jam adest, ac præterea ex foramine nimis amplo, ob sanguinis ad caput impetum, hæmorrhagia metuenda funesta, ex justo minori partum sanguis fluit, & dato ibi spatio, fluxus potius ad cerebrum allicitur. Alii commendant venæ frontalis, constricto prius collo incisionem, eademque potissimum *Trallianus* se magna phrenitide correptum sanasse, testatur. Nonnulli proferunt arteriotomiam in temporibus, quos inter est *Panarolus*, qui *pentec. 1. obs. 19. pag. 18.* testis est: se se arteriotomiam in phrenitide magna cum felicitate expertum, ut ipsa vexari statim resipuerint. *Cælius Aurelianus* scarificationem in toto capite prius raso in usu habuit. Longe magis tamen probandus Ægyptiorum mos nares scarificandi, cujus vices, deficiente commodo instrumento, supplet experimentum, quo culmo straminis, aut bacillo exili acuto, in nares validius truso, sanguinis proritatur stillicidium, quod ego quidem cum præsentaneo commodo aliquoties factum esse vidi. Et



hi in confini affectæ parte mittendi sanguinem modi, tam in phrenitide idiopathica, quam symptomatrica locum inveniunt. Sed quando ex lochiis, nec non mensibus retentis, aut suppressis, malum hoc metuendum, cito in pede vena aperienda & sanguis largius exantlandus. Neque minus, si ex vitio, aut intercepto hæmorrhoidalis fluxus successu, delirium imminet, optimum levamen ex apertione venarum hæmorrhoidalium, per appositionem hirudinum, expectandum.

§. III.

*Alvus ducenda* Post sanguinis evacuationem alvus ducenda, qua adstricta, ad supernas partes, & qua soluta, ad infernas, humorum convertitur affluxus. Scire autem Hippocrates lib. 3. de morb. §. 9. monet: in curatione phrenitidis alvum esse præparandam ut egerat, humectantibus potionibus, quæ tunicas intestinales spasmò constrictas relaxant, quia primarum viarum spasmus frequens deliriorum est causa. Ego instar omnium hunc in finem commendo potiones mannatas, ex mannæ minimum uncis quatuor, solutis in libra feri lactis, cum cremoris tartari drachma, nitri drachma dimidia, & olei amygdalarum dulcium uncia una. Baglivius lib. 1. prax. pulverem Cornachinum commendat, ita pag. 102. scribens: quum pluries observatum fuit, alvi fluxu solutum fuisse delirium, ideo natura id docente, proficuum non semel expertus sum pulverem Cornachini, superbibendo ei longa diluentia, ex decocto hordei limati, salis prunellæ aliisque dulcificantibus, præcipue, si nimius viscerum ardor adsit & interna inflammatio. Si vero celeri opus est auxilio, alvus solvenda leniente & paregorico domestico enemate.

§. IV.

*Humectandum & di-* Ex internis porro adversus phrenitidem præsidiiis, sunt maxime potiones diluentes, demulcentes & humectantes largissima copia datæ, modo, quod rarius fieri solet, ut innuit Are-

teus, phrenetici sitiant. Instar omnium est potus ex fero lactis dulci, vel acidulato, cum succo citri parato & julepo rosarum, vel sirupo papperis albi edulcorato, in cujus mensura cum fructu dissolvitur drachma una nitri depurati, vel salis prunellæ. Utiles quoque emulsiones ex decocto hordei, rasuræ cornu cervi & seminibus quatuor frigidis, cum julepo rosarum, præsertim quando mensuræ duo nitri scrupuli adjiciuntur. Non minus confert lac cum acidulis Selteranis, vel Antonianis remixta, item ptisana. Qui potus omnes quo largius bibentur, eo plus efficaciam in diluendis humoribus, relaxandis constrictis tubulis, expediendis obstructionibus & extinguendo æstu præstabunt. Ex medicamentis autem mixtura diaphoretica & discutiens, capite antecedente descripta, ut in omnibus inflammationibus, sic etiam phrenitide, effectum exserit longe saluberimum.

§. V.

Inter externa quæ caput ab humorum affluxu liberant connumeranda *Externa na usum pande* pediluvia, vel involutiones pedum in lintea humida calefacta, & quæ omnium optima, balnea aquæ dulcis temperata. Horum insignem utilitatem quotidiana uberius confirmat experientia & locuples in primis testis est Trallianus, qui lib. 1. ita differit: lavare eos & perungere convenit, quibus jam vacuatio facta est & quantitas totum corpus non offendit, verum siccitas & vigiliæ plurimæ urgent. Et si febricitet æger; nihil nocebit ei si ita lavetur, præcipue etiam, cum balneum tepidum adhibitum fuerit, ut neque aer sit igneus, neque solum nimis calidum. Qui autem febris metu eos non lavant, maxime offendunt. Nam egri vigiliis magis torquentur balnei abstinencia, adhuc magis etiam animo turbantur. Lavandi igitur sunt, quemadmodum comprehensum est. Sic enim balneo utentes, ad bonam temperiem revertuntur, & in posterum delirio & affectu febrem accendente, liberantur. Dein Veteres,



ac inter hos potissimum Trallianus & Aretæus, post sanguinis & alvi vacationem, caput oxyrrhodo, ex acetorofaceo composito fovebant, ne, uti loquuntur, caput liberalius attraheret humores iisdemque repleretur. Nec male. Interim nos summo cum fructu, in omni delirio, caput totum rasum fovere suavisimus, temperato hoc epithemate: recipe aceti rofacei uncias duas, spiritus rosarum, in quo decem grana camphoræ soluta, drachmas duas, nitri puri scrupulos duos, olei ligni Rhodii guttas 20. M. D.

Cautela, & observationes  
Clinicæ.

§. I.

Regimē  
phrene-  
ticorum

Quam modo tradidimus phrenitidis medicationem, tam in symptomatice, quam idiopathica, & præsertim illa inveterata, quæ in maniacum affectum transire videtur, quam maxime esse accommodatam, expertus scribo, nec quicquam præterea vix potest excogitari, sed opus est, ut aliquamdiu horum usui insistatur. Quæ autem in regimine phreneticorum servanda, egregie tradit sæpe laudatus Trallianus lib. I. pag. 50. sic præcipiens: *considerari debet etiam habitatio, in qua degit ager, ut aerem nec admodum crassum, neque humidum frigidumque, aut nimis calidum habeat, ne capiti meatuum densatio, aut repletio superveniat, sed temperatus existat, quo animalis spiritus temperie ipsius refocilletur ac relaxetur. Sit autem magis lucidus, quam tenebrosus, ut ager per hujus sensum ad consuetorum perceptionem ac conscientiam perveniat. Quare & amici nonnulli admodum familiares ei assistant, ut etiam increpantes ipsum propter ea, quæ facit, reveareatur. Neque vero domesticus, aut cognatus, cujus causa aliquando tristetur, aut cui irascatur, ingredi debet, quippe hoc irritare agros & commovere solet: & ut valde perturbentur, manifestam præbet occasionem. Sed nec*

*amici frequentes & copiosi ad eum ingradientur, quippe turbam ei tantum excitant, præterea aerem quoque crassum efficiunt, frigidos emittentes spiritus. Jam non violenter movendus est, sed leniter, ne in lecto propter imbecillitatem concutiatur. Hoc enim, si quid aliud, ægrum irritat & somnum impedit, iis vero, qui adsunt, omnia ipsius membra citra violentiam teneant, leniterque perfricent, & præsertim inferiora: atque tunc magis, ubi convulsiones ægro oboriuntur, artus vinculis excipiantur. Quippe hoc materiam ad inferna provocat, præterea convulsiones lenit. Satiùs autem est, inferiora quoque, ubi perfricata fuerint, fovere atque sic deligare ut materia, quæ fotu simul & fricatione accita fuerit, ad ima potius derivare possit.*

§. II.

De venæsectione tamen, hæc adhuc tenenda: quod si, ut sæpissime fit, phrenetici eam admittere prorsus renuunt, ego nil præsentius & factu facilius novi, quam ut ex improvviso calamus, aut culmus stramineus valide in narium cavum adigatur, sic enim sanguis sæpius illico liberaliter & cum comodo evocatur. Ad venæ frontalis autem incisionem, si idiopathica & chronica est passio, non prius accedendum, præsertim in corpore plethorico, quam aperta prius brachii, vel pedis vena, ne impetus ad caput crescat. Cavendum etiam sub hac operatione, ne instrumentum adhibeatur acutius, venam perfodiens & pericranium cum detrimento lædens.

De san-  
guinis  
missione  
tenenda.

§. III.

Quæ etiam ex mensium vel hæmorrhoidum vitio & oriundis inde vehementibus spasmodis pullulat phrenetica passio, optime levatur balneis, mineralium aquarum potu & appositione hirudinum ad venas ani, vel uteri, adhibito simul congruo victu atque regimine. Novi enim phrenitidem diu durantem, erumpente mensium, vel hæmorrhoidum fluxu, feliciter fuisse

Phre-  
nitidis  
suppres-  
sis hæ-  
morrho-  
idis &  
materia  
acri.



fuisse discussam. Sed quando phreneticum malum non tam a sanguinis in vasis cerebri congesti copia pullulat, quam potius a materia subtili, acri, virulenta, vel repulsa ab externis, uti in exanthematicis, vel per calidiora & volatilia nimium exaltata, quæ firmiter nervosæ duræ matri impaeta spasmos concitat, liberum sanguinis transitum & ad cor recursum interceptantes, præter venarum quæ capiti propinquæ sectionem, expedit calvariæ rasæ partes & viscera ex animantibus recenter mactatis adhuc calentia, uti pulmones, hepar & omentum, admove, & quando refrixerint calide eadem immergere, quo iterum calefiant.

§. IV.

*Et plica Polonica cura* In Polonia frequens est delirium phreneticum, melancholicum & maniacum ob latentem plicam, hacque erumpente insania cessat. Hinc optimum consilium plicæ egressum elicere, quem in finem usurpare suescunt decoctum ex musci clavati manipulis binis, in duabus aquæ mensuris decoctis. Quodum bis quotidie caput & crines abluunt, intra hebdomadis decursum prodire solent citri, delirium discutientes. Non raro etiam abscessum plicam sequitur crudelis capitis dolor, quem excipit phreneticus furor cum febre ipsaque mania, quæ tamen usu decocti, vel linimenti ex musco clavato in *M. N. C. Dec. I. Ann. 2. obs. 54.* descripti plicam revocantis, promte iterum abigitur.

§. V.

*Abstin. commoventia.* Cavendum autem, sicut in omnibus inflammationibus, sic etiam in phrenitide ab acris & commoventibus, liquoribus spirituosus, a motu animi & corporis fortiori, immo ab omnibus, medicamenta sint, sive alimenta, quæ sanguinem in præternaturalem motum ciere valent. Inprimis nullo modo ad iram irritandi ægri & ob id arcendi ab iis, a quibus læsi & quos ferre nequeunt, domestici sint, sive alieni. Opiata & narcotica absint

penitus, præsertim ubi vires jam imbecilles. His enim deliria quandoque *Narcotica* in febribus induci testatur experientia. *tica* Perite hinc monet *Trallianus* loc. c. si vires, inquit, imbecilles fuerint, tunc maxime vitabis, ne quid torpori somnoque inducendo incommodum exhibeas. Nam in his, qui infirmas vires habent, non mediocris noxa talium potionem comitatur. Vesicantia etiam, *& vesicantia* nonnullis solemnia in phrenitide improbo. Nam cantharides acri quo polent stimulo strictas jam & tensas spasmus membranas irritando, delirium augent & convulsionem facile accersunt. Testatur id diserte *Baglivus*, lib. I. prax. pag. 102. ita scribens: in aere Romano, per adhibita viris vesicantia plures vidimus mortuos, ac sanatos. Proficere autem magis feminis, quam viris, vidimus. Et paullo post sic pergit: delirantibus cum febre acuta, lingua arida, indicium magnæ viscerum inflammationis, si applicentur vesicantia, omnes fere in pejus ruunt, & magna ex parte moriuntur convulsi.

Enarrationes Morborum.

OBSERVATIO I.

Laborabat ardente febre cum intolando ferme capitis dolore, quadragenarius quidam, cui sexto die accedebat alvi fluxus, quem Medicus detrimentosum esse putans, pulvere ex bolo Armena, hæmatite & laudano opiato composuit. Cohibito hoc, dolor capitis gravior factus & ipso præterea vino, cui essentia ambraë instillata, maxime præcordiorum anxietates subsequutæ, fauces cum œsophago inflammatione affectæ magnaque colluvies viscidæ mucosæ materiæ in oris cavo collecta. Successit etiam delirium furiosum, tam vehemens, ut æger vix a quatuor robustissimis viris in lecto contineri posset. Adversus hoc multa quidem & varia adhibita præsidia, vena in pede pertusa, ad-

*Phrenitis ex cohibito alvi fluxu.*

mota



mota epithemata, appositus calens viruli pulmo, sed omnia incassum, perstitit potius per quinque dies delirium non interruptum, donec decimo quarto, a primo morbi insultu die, mors ipsius simulque vitæ faceret finem.

*Epicrisis.*

Nihil profecto perniciosius, quam in ardente biliosa febre, ex colluvie acrimium biliosorum prima in regione succorum oriunda, alvi fluxum, tempore præsertim critico erumpentem, imprudenter sistere. Neque enim hoc factum fieri potest aliter, quam ut materia biliosa retenta, vel inflammationes in ventriculo & intestinis, vel etiam in capite, uti heic factum, suscitetur. Id quod tanto certius accidit, quia a Medico temerarie vini usus concessus, qui nunquam, ubi metus inflammationis in primis viis, etiam in parca quantitate, admittendus. Accessit etiam delirium furibundum alvo suppressa, quia ex spastica primarum viarum constrictione, sanguis cum impetu ruit ad caput, ibique congestus, dolores primum, ac postea, ob meningum inflammationem, delirium, peperit. Atque adeo patescit, imprudentem medicationem, frequentissime atrocium, non modo pathematum, sed & ipsius mortis esse causam, tum maxime, quando eadem criticæ humoris peccantis excretiones supprimuntur, & materia nocens in corpore retinetur.

OBSERVATIO II.

*Phren-*  
*ia in*  
*lenta &*  
*de critica*  
*acutis-*  
*dena.*

In puerpera tenera, ad iracundiam pronâ, cerevisiæ & vini potui assueta, restitabat penitus post partum lochiorum fluxus, cum virium ingenti debilitate, ardore, præcordiorum anxietate & spirandi angustia. Medici igitur ad provocandum sanguinis profluvium pulverem ex myrrha, flavedine corticum aurantiorum, lapidibus cancrorum, succino & oleo cinnamomi propinarunt, ac præterea sal volatile cornu cer-

vi, in aqua cinnamomi solutum, dederunt. Sed his nihil aliud effectum, quam ut anxietates præcordiorum ingravescerent, urina suppresseretur, & alvus dura ac tensa dimitteret plane nihil. Quin post sex dierum pervigilium, oculi fulgidi, & facies rubicunda delirium nunciarunt, quod etiam paullo post successit, tanto cum furore, ut ægra e lecto surgens in plateam excurreret, nullumque frigoris sensum experiretur, sed potius in extremis intense caleret, licet hiems tum regnaret algidissima. Accitus hinc alius Medicus, qui venam in pede pertundere iussit, interius dedit in emulsione seminis papaveris, albi pulverem ex nitri drachma, camphoræ, theriacæ coelestis ana granis sex, in quatuor doses divitum, & exterius temporibus admovit epithema nostrum cephalicum. His ægræ placidus somnus conciliatus, cum sudore largo, ex quo expergefacta, de languore, & debilitate maxima est conquesta, sudor autem ille per totam hebdomadam manavit, sub quo ipsa liberali manu potui datum decoctum cornu cervi cum succo citri. Sic periculosum hunc morbum evasit quidem, sed remansit lenta febris post puerperium, quæ inordinato victu sustentata, & adaucta, tandem degeneravit in hæcticam, quæ circa æquinoctium autumnale attulit mortem.

*Epicrisis.*

Peccant communiter Medici, quando lochiorum fluxum imminutum, vel penitus emanentem, calidioribus & pellentibus urgent, quæ maiorem orgasmum sanguini inducendo, anxietates augent alvumque siccant. Tum potius, in exquisitioris præsertim sensus corporibus antispasmodica, & sanguinis æstum temperantia nitrum & castoreum, ex usu sunt, & longe felicius restitantes fluxum revocant. In nostra maturius mittendus fuisset sanguis, quod præsidium ex optimis in puerperis lochiis destitutus, ad præscindenda pathemata gra-



gravissima. Neque dubitandum, quod neglecta venesectione, sanguis, ob spasmus interiorum, ex urinæ & alvi suppressione cognoscendum, sic ad caput delatus cum impetu, ibique induxerit phrenitidem, quæ deinde aliis convenientibus auxiliis, venesectione, nitrosis & internis æque ac externis discutientibus, depulsa, felicem finem nata per magnum criticum sudorem. Quod autem remanserit lenta febris, id non infrequens in puerperis, præsertim inordinato & incongruo victui indulgentibus. Nam nature robore per puerperium & morbo fracto, ventriculus etiam debilis est, ut postea ingesta non rite digeratur, & comminuat, sed cruditates gignantur multæ novicæ, lentis febribus ansam & causam præbentes.

## OBSERVATIO III.

*Phrenitis ex calidioribus le-geballis.* Sub initium hujus anni, in febrem nobis aliquandiu epidemicam, synocham catarrhalem, cum animi deliquio, horrore, æstu & catarrhis, incidit vir probus & profundæ eruditionis, muneri ecclesiastico haud ita pridem præfectus. Medicus vocatus, ad malignitatem arcendam crebrius exhibuit mixturam simplicem & tincturam bezoardicam, jussit quoque ut æger in lecto & conclavi calido detineretur ac ipsi nihil aliud potui præberetur, quam infusum calidum herbe thee. Quinto die apparuere in cute exanthemata. Hinc continuata eadem remedia, additum oleum bezoardicum *Vvedelii* & interpositi quoque pulveres nitrosi. Ægrum vero a primo morbi initio affligerunt vigilie assidue, sitis intensa, corpus sudore diffluit, jactatum anxietate perpetua ac inquietudine, eademque pathemata persisterunt jugiter, licet purpura esset expulsa firmamque in cute fervaret stationem. Nono die data a Medico ad quietem conciliandam medicina, opii contagium haud obscure prodens; persisterunt tamen anxietates & corporis jectigationes, & æger

Tom. IV.

subinde delirare visus, absurda nonnulla loquutus. Accidit postea, ut, cur nescio, vehementius animo commoveretur æger, quo in furorem per intervalla delirium erupit. Ad quod componendum Medicus alius accersitus undecimo morbi die venam secare jussit, emissis decem circiter unciiis. Inde primum quidem somnus inductus, sed post hunc plane furere coepit æger, ut vix ab aliquot viris in lecto contineri posset, omnia discerperet & domesticos, parentes atque agnatos, diris verbis, quin verberibus exciperet, donec vigesimo primo die mors miseriarum faceret finem.

*Epicrisis.*

Pervenit ad nos tristis hæc historia, eo ipso tempore, quo hæc de phrenitide tractatio typis exscribebatur, quam non levibus causis inducti heic inferendam duximus. Luculentum autem præbet exemplum, quomodo ex præpostera medicatione, regimine nimis æstuoso externo & internis calefacientibus, exanthematica alias benigne indolis materia, malignam & subtilem in intima membranam cerebri penetrantem inducere possit naturam, ad delirium atrox, mania tantum non æquale, inducendum, præsertim ubi cerebrum jam tum imbecille. Dictum igitur hoc sibi putant, juniores in primis Medicinæ Practici, ne unquam in exanthematicis, etiam purpura, calido regimine & calefacientibus pharmacis, suos excipiant, vires pessundent, morbum exasperent & truculenta inducant pathemata. Deinceps venesectio undecimo morbi die largior, levamen afferre potuit nullum, ut potius, uti subinde observavimus, detrimento fuerit. Nam in principio quidem, si vires adhuc valent & corpus sanguine redundat, tutissimum & efficacissimum præsidium est utique; sed ubi vires ob morbum, vigilias & præposterum calidum regimen calidaque pharmaca exhaustæ sunt, rejicienda largior subtractio, quippe quæ vires longe magis prostermit, ad vincendam morbi

P

cau-



causam tamen necessarias. Recte ob id monet *Syndeham in opp.* phreneticis & maniacis, plus interdum succurrendum esse analepticis, quam sanguinis missione. Quod si tamen sanguis in cerebri vasis subsistens ventilationem poscit, satius est, ut eadem proxime per nares procuretur exitus, eo quod ex anatomicis notum est, quod internæ carotidis ramus per os cribiforme, una cum nervo olfactorio ad pituitariam narium tunicam fertur. Hinc ego sæpius cum fructu, ad phrenitidem arcendam, stilo in nares provide, sed alte intruso, stillicidium elicere jussi.

## OBSERVATIO IV.

*Delirium  
post  
phrenitidem  
sanatum.*

Virgo tenera & in iram prona, septendecim annorum, a parciore mensium fluxu febrem incurrit pleuriticam, cui accessit phrenitica. Liberata tamen a mortis periculo liberali narium stillicidio; sed restitit postea mentis alienatio & phantasia corrupta, ut interdum angore ac mœrore afficeretur, interdum furore percieretur, cum crebris tensivis artuum tractationibus. Ego in consilium vocatus suasi Selteranarum cum lacte potum ad mensem cum balneo aquæ dulcis. Peracta hac cura, pro potu dedi decoctum hordei amygdalatum, cum nitro & saccharo conditum, quod largiter bibit. His non modo mens ad constantiam & sanitatem, sed & mensium fluxus in ordinem reductus, ac intra semestre spatium perfectæ reddita est sanitati.

*Epicrisis.*

Dici vix potest, quam spectatæ virtutis in cerebri & nervorum gravibus affectibus, tam convulsivis, quam cum insania junctis, sit diluentium & humectantium usus. His enim humores fluxiles redduntur, obstructions expediuntur, acres succi diluuntur ac temperantur, spasmus crispatae fibræ remittuntur & insigne imbecillis partibus adjicitur robur. Quo

nomine, ego quidem, inprimis celeberrimo balneo aquæ dulcis & lac, si obtinendum, optime asininum, cum aquis mineralibus temperatioribus, alcalino sale foetis, quales sunt maxime Selteranæ.

## OBSERVATIO V.

Adolescens quindecim annorum, phreneticis extrinsecis in chronicam insaniam mutata, curata, litterarum studia intemperantius tractans, iracundus & cum sodalibus inter perpetua jurgia versans, aliquanto diutius a parente verberibus fuerat exceptus & paullo post cibum ceperat. Ex eo male habuit, parum appetiit, minus dormivit, somno infomnis terrificis interturbato, donec post septimum diem in phreneticam pathemata erumperent febrem, cum motibus artuum convulsivis, qui per intervalla gravius afflixerunt. In paroxysmo vehementissime vociferabat, maledicta in omnes eruclabat, cadebat & discerpebat obvia. Licet etiam somnum ad aliquot horas caperet, ut videbatur placidum, delirium tamen manebat idem. Comparuerunt postea nonnullæ pustulæ rubicundæ in dorso ac pectore, urinae secesserunt tenues sine sedimento, & pulsus durus semper fuit, celer & inæqualis. In hoc tam gravi morbo, æger præter ptisanam, cum lacte, sirupo rosarum & nitro, bibit nihil, sed largiter, tam salubri effectu, ut gravia symptomata cum febre discederent. Non tamen perfectæ mentis morbus sublatus, sed incessit animum odium erga propinquos & præpositos, levi ex causa vehementissime excanduit, ut tremere, factus fuit insolens, & domesticos cibos plane respuit. Hinc datum consilium, ut Schvvalbacenses aquas biberet, per mensem, & postea per quatuordecim dies balneo uteretur, ex aquis Schlangenbadensibus, quod etiam tam feliciter cessit, ut sanus, & corpore, & animo, domum rediret. Ut autem integritas hæc servaretur, suasu Medici abstinent



multa postea a cerevisia gravi lupulata, ac ptisanam ex hordeo cum radice scorzonera loco ordinarii potus bibit, mane etiam usus infuso theiformi cum lacte, cui subinde nitrum inditum.

### *Epicrisis.*

Quam noxia post cibum sit ira, ex his uberius patet. Ac uti verum omnino est tritum: ira furor brevis, sic etiam in dispositis ira in febrem facile degenerare potest furibundam. Patet dein quam utilis sit humectantium, & diluentium potus, ut recte adhibitus, curationis punctum absolvat fere omne. Porro notandum, ad abigendam insaniam, multum conferre itinera, ob loci, aeris, & personarum invisionem, corporisque motum. Multum vero etiam præstat, recte jam notante *Hippocrate*, ætatis mutatio, ut sponte sepe, post vigesimum primum ætatis annum, ejusmodi capitis, morbi discedant.

## C A P U T VI.

### *De Febris Pneumonicis.*

Sive

### *Pleuritide & Peripneumonia.*

### *Theses Pathologicae.*

#### §. I.

*De descriptione pleuritis.*

**P**neumonica febris est acuta inflammatoria, orta a stasi sanguinis intra sanguifera vascula pulmonum, vel etiam venæ azygos ramulos in pleura, juncta cum acuta & pungitivo dolore lateris, spirandi difficultate, æstu immodico, pulsu duro & frequenti, tussi sicca, vel etiam humida, quandoque cruenta, periculi nunquam expers.

#### §. II.

*De ratione loci inflammationis.*

Nulla febris inflammatoria est, quæ omnis ætatis, sexus & temperamenti hominibus, in frigidis, æque ac calidis, & temperatis regionibus degentibus, adeo infesta est, & quæ etiam simul plures ob aeris inæqualitatem & in-

temperiem epidemice corripit, quamque in thorace sit, sive in ipsis pulmonibus, sive in musculis intercostalibus, tam internis, quam externis, pleura nervosa interius cinctis. Prout autem inflammatio in thorace partibus insidet diversis, varia non modo accipit nomina, sed & symptomatibus, eventu & curandi ratione, plurimum differt. Veteres quidem, accurata anatomica partium cognitione destituti, subjectum pleuritidis & peripneumonie esse putarunt pleuram, & ob id omnem fere thoracis inflammationem dixerunt pleuritidem. *Hippocrates* tamen distinctionem jam fecit inter pleuritidem & peripneumoniam. Quo forsitan omnes fere prisca & media ævi, quin superiori adhuc seculo Medici, inducti, ut in peripneumonia pulmones, in pleuritide autem vera hos plane, sed tantum pleuram cum musculis quos succingit affici, asseruerint. Falsum autem esse hoc assertum & pleuriticum malum omnino etiam in pulmonibus consistere, pluribus & momentosis rationibus docui in *dissertatione de pleuritide & peripneumonia*. Validissimum enim est argumentum ex sectione pleuriticorum, quam *Petrus Servius* teste *Welfohio* Dec. I. curat. IV. Romæ in nosodochio ad S. Spiritum, vel in trecentis instituit, & semper lobum pulmonis infectum materiaque repletum conspexit, pleura aut nihil omnino ad sensum vitata, aut leviter tantum quodammodo inquinata. Hinc, mea quidem sententia, ita sedes diversa inflammationis in thorace determinanda, ut si externas tantummodo partes occupet; emergat pleuritis spuria, si membranosa pulmonalis substantiæ superficiem, instar erysipelatisprehendat, pleuritis sit vera, & ubi altius in ipsam pulmonum substantiam descendat, gravior sit atque profundior, peripneumoniam excludat.

#### §. III.

Hæ igitur inter se dissidentes in-



Signa  
pleuritis  
spuria.

flammationum in thorace species probe sunt discernendæ a Medico, per notas quasdam essentielles & characterísticas, jam singillatim commemorandas. In pleuritide quippe spuria dolor est valde acutus & pungitivus lateris, qui etiam tactu augetur, decubitus in latere affecto difficilis, tussis sicca, sine ejectione materiæ pituitosæ, vel cruentæ, dolorem tamen, si valida est, exacerbans. Junctæ etiam simul est febris, cum pulsu subduro, depresso & frequente. Causam deinceps ipsi præbet, non tam sanguinis, quam potius seri acris stasis, in finibus arteriolarum & venularum azygæ connexarum, nec non tubulorum lymphaticorum, in pleura, vel etiam pericostio costarum, ubi sensus adhuc est acutior. Hinc nihil aliud quam rheumatismi species, & ob id familiaris illis, qui catarrhis, doloribus rheumaticis, arthriticis obnoxii sunt, vel hemicrania subinde vexantur, præsertim si ex aere nimis calido in frigidum, vel contra tempore potissimum vespertino, concedunt. Neque ea propter sanguinis missionem poscit, nisi eminens admodum urgeat plethora, sed sola diaphoresi & auctiori perspirationis successu, mox & facile iterum, circa septimum plerumque diem, solvitur ac periculi expers est.

## §. IV.

Pleuritis  
vera.

Pleuritis vera inflammatio est sanguinea, a stasi sanguinis in vasculis vasorum bronchialium, quæ superiori seculo detexit Ruyschius, & quæ tantummodo nutritioni membranarum, vesicularum, & vasorum, pulmonum compagem constituentium, serviunt. Atque adeo principaliter ipsi pulmones sunt affecti, sed quoad partem tantum externam superficiei. Et hinc major quam in spuria spirandi angustia, sputum cruentum & quod expectoratione morbus solvatur. Febris etiam junctæ ut plurimum, sed magis acuta ac in spuria, adsunt quoque dolores, sed non tam acerbi, nec tactu exacerbandi, in latere affecto. Trahi-

tur enim simul in consensum pleura thoracem investiens, tum quod exterior pulmonalis membrana pleuræ folioles, tum etiam quod in plurimis hominum pulmones in alterutro minimum latere pleuræ annati atque concreti sint.

## §. V.

In peripneumonia dolor est magis tensivus, obtusus, pressorius, quam acutus & ad dorsum usque & scapulas propagatur. Sed major spiritus difficultas, anxietas, & ægra expectoratio, qua sputum varii coloris ex imo ducitur. Nam in hac vasa pulmonum ipsa, quæ sanguinis cursum ex uno cordis ventriculo in alterum absolvunt, affecta & sanguine crasso, in solidescens naturam abeunte, facta sunt atque obstructa. Quare majori stipatur periculo & facile quos corripit necat, præsertim si senes & tempestiva sanguinis omittitur ventilatio.

## §. VI.

Interim licet Veteres minus exacte distinxerint thoracis inflammationes; quia tamen frequentissimus fuit morbus ubi vixerunt prisci illi medicinæ principes, Trallianus, Aretæus, Cælius Aurelianus & reliqui, ex ipsis morbi symptomatum historia accuratior peti potest, quam forsan ex recentioribus. Mihi præ reliquis placuit Aretæus descriptio, quam l. i. c. 10. de pleuritico morbo consignavit: comitatur, ait, illum dolor acutus, ad jugula ascendens ignis acer. Quibusdam vero & interga, & in scapulas dolor protenditur. Sequitur etiam difficilis spiritus, vigilia, ciborum fastidium, malarum rubor, tussis arida, sputa acre exeuntia, pituitosa, aut abunde cruenta, aut subflava. Pejus est si cruentum sputum non adsit, si delirant, vel comate occupantur. Scribit porro, egros intra septimum, vel decimum quartum diem convalescere, aut perire, pro symptomatum vehementia. Vel si ad vigesimum diem malum extendatur, fieri empyicos. Addit etiam, quod hiems maxime ferax sit, secundo autumnus, ver minus, nisi interdum perfrigidum sit, æstas vero.

Et per  
pneumonia

Morbi  
historia  
ex Aretæo  
140.



to minime. Item quod inter ætates senes maxime huic malo obnoxii sint, pueri minime, vel minus eo periclitentur, quia puerilia corpora rara sint, humida & fluxu, multaque in iis difflatio & exhalatio.

§. VII.

*Ad proximam eam. Jam concurrunt plures.* Quum autem gravia omnia quæ febrem pneumonicam comitantur pathemata, unice fundamentum suum habeant in inflammatione pulmonalis substantiæ; in procinctu est judicare: quod omnia, quæ libero sanguinis progressui per minima pulmonum vascula, vel canalium a copia crassæ materiæ obstructione, vel eorum valida spastica, a materia tenui, acri, constrictione, obicem ponunt, ad ingenerandam inflammatoriam hanc febrem sint aptissima, præsertim quando plures simul causæ, quæ dicuntur antecedentes, procatarctice & remotæ, in unum hunc effectum conspirant. Igitur ii, qui ex victu crasso, impuro, potu, spirituosu, humidi & motus defectu, sanguinem in venis alunt, & copiosum, & spissum, qui recte Sydenhamo *κτ' εζοχiv* dicitur pleuriticus, quam facile, conspirantibus aliis procatarcticis causis, morbum hunc nanciscuntur, tum maxime, quando corpus per intensiorem exercitationem, operosum laborem, balnea item calida, nec non spirituosorum potum, vehementius exæstuatur & postea frigida septentrionali aуре incautius committitur, aut, quod pejus adhuc, subito potus ingurgitatur perfrigeratus. Prompta etiam eandem ob causam hujus passionis genesis in sanguineis, & plethoricis, ommissa tempestitiva sanguinis missione. Idem evenit feminis, quibus menses, vel inordinate, vel justo parcius fluunt, vel etiam ob ætatis rationem plane emanent, nec non viris quibus hæmorrhoidum fluxus non rite obtingit, aut plane suppressus est.

§. VIII.

*Spastica vasorum stricture.* Deinceps non semel, sed sæpius observavi tormina, spasmos, & colicos,

Tom. IV.

nec non hypochondriacos in abdomine & intestinis dolores, cum alvi vehementiori constrictione, sequutam fuisse inflammationem pulmonum, maxime in plethorico-cacochymicis. Nam horum ea est natura atque facultas, ut comprimendo vascula, præsertim venosa, liberum sanguinis iter impediant ejusdemque motum inæqualem, & majorem præter naturam appulsum ad alias, imprimis superiores partes, efficiant. Quo postea nimio appulsu fit, ut sanguis non modo urgeatur ad tubulos, qui ob minorem diametrum sanguinem ordinario nec vehunt, nec capiunt, sed & in hisce vasorum angustiis impactus hærens equabilem & inoffensum progressum intercipiat & omnes functiones quæ fiant secundum naturam perturbet. Et quia corpora hæmorrhagiis admodum obnoxia, plerumq; sanguineæ sunt complexionis & spasticis in imo ventre stricturis patent; hinc fit, ut juvenes qui largas narium hæmorrhagias, sputum cruentum & hæmorrhoides præmaturas experiuntur, perquam facile, accedentibus occasionalibus causis, in pleuriticæ & peripneumonice febres, incidant. Porro frequenti observatione constat & illud, quod a scabie retropulsa, a præpostere cohibito simplici, vel dysenterico alvi fluxu, a consolidatis antiquis ulceribus, a critico consueto pedum, vel totius corporis sudore suppresso, vel purpura chronica ob frigus externum retrocedente, pectoris obortæ fuerint inflammationes. Illa enim materia acris causticæ indolis, recrementitia, nervosis pulmonum & thoracis & tunicis impacta, ob spasticas quas suscitatur stricturas sanguinis progressui obicem ponit eundemque in æqualitate turbat. Neque etiam rarum est, post variolas & morbillos, præsertim male tractatos, gigni in thorace inflammationem, quum hi morbi nunquam non pulmonibus infesti esse, ac in iisdem labem & imbecillitatem relinquere soleant.



## §. IX.

*Epidemica est*

Præterea quandoque ab extraordinaria, & infueta aeris temporumque constitutione, pleuritides, tam veræ quam spuræ, populares sunt & epidemice. Evenit hoc si hiems diuturna nimis rigida regnavit, item quando longam austrinam aeris temperiem & levem atmosphæram, repente frigida & borealis, valde elastica aura excipit. Quod postremum quum in primis vere & autumno contingere soleat, hinc tum febres tam catarrhales, & malignæ & benignæ, quam pleuritice, circumire solent. Post asperam etiam hiemem notavimus grassantes pleuritides crudas, in quibus vix nono & decimo die sputum apparet. *Hippocrates morb. lib. 2.* vocat siccas & in ipsis ægri primis diebus admodum anguntur, viresque dolore & inani tussi admodum concidunt, ut procedente sputo, expectorationi vix sufficiant & ægri difficulter convalescant. Endemiæ etiam dantur peripneumoniæ.

*Et endemia.*

Notum quippe est frequentem admodum esse peripneumoniæ morbum & plures interficere, in VVestphalia, Pomerania, Svecia, Dania & Russia. Id quod vero tam propter solemnem his in regionibus victam durum & crassum, quam propter aerem frigidorem & asperiores, septentrionalibus locis proprium, accidere arbitror.

## §. X.

*Crisis servat.*

Ego quidem vix in ulla febre tam accurate observavi crises, quam in pneumonica, pleuritica scilicet & peripneumonica. Nam in juvenibus & qui paulo vegetiori nature circa quartum plerumque diem sputum prodit cruentum & septimo die morbus sponte sua per sudorem largum solvitur. In phlegmaticis & segnioribus, nec non ubi vitium pulmonibus insidet altius, undecimo, vel etiam decimo quarto die, morbi fit solutio, partim scretu, partim sudore, pulsu facto molliori, accedente somno placido & virium incremento. In imperfecta autem crisi criticis diebus etiam apparet sudor,

sed non sufficiens, ideoque nec ægrum levat, nec morbum solvit. Et ubi symptomata durant ad 21. diem, metus est abscessus in pectore periculosi. Bonum igitur indicium, quando expectoratio ex imo pulmonum succedit bene, evehens materiam viscidam, quarto die cruentam, dein flavedine tinctam, interdum etiam purulentam. Ex quo expeditior scretus, eo major sanitatis spes; quo impeditior, eo minor. Laborandum modo, quando morbus expectoratione materiæ copiosæ virulentæ terminatur, ne in fine phthisis, vel hectica accedat. Nunquam autem tanta crebra alvi fluxio, suspecta etiam urina sine sedimento & minus quoque fausti omnis sudor largus, extra dies criticos, quando tamen undecimo, vel duodecimo die alvi dejectio non nimis copiosa accidit, non adeo pertimescenda, sed purulenta materia, quandoque simul ejicitur. Quando etiam circa diem quartum nature beneficio narium prodit stillicidium, id non sine notabili contingit euphoria.

## §. XI.

Nulla ex inflammationibus tam facile recidivat, ac febris pneumonica, præsertim quæ paullo profundior fuit cum quodam abscessu. Mihi nota sunt exempla, ubi quædam vix convalescentes, inordinata diætâ, potu inprimis copioso vini meracioris, in eundem morbum, elapso vix mense relapsi, lethali plerumque eventu. Quin novi inflammationem hanc, bis, ter, quater & pluries anno, eodem in loco, ubi primum constiterat, recruduisse. Ut adeo, qui semel hoc affectu tentati, ejusdem repetitum insultum exacta vitæ victusque ratione, semper opus habeant arcere cum cura.

## §. XII.

Qui autem inflammatione pulmonum moriuntur, suffocatione pereunt, quia materiam in vesiculis aereis & ductibus bronchialibus hærentem tussi amplius ejicere nequeunt. In sectione.

*Mortis causa.*



ione pulmones inveniuntur inflati, duri, instar hepatis, & ob vasa sanguine crasso tenaci facta, aquæ injecti fundum petunt. Vidi etiam pulmones abscessibus parvis & tuberculis duris obfessos, cum inflammata & sphacelata pleura, pulmonum substantiæ adhærente. Neq; minus nota mihi sunt exempla, ubi polyposæ concrectiones in vena pulmonali, item arteria magna repertæ, obicem posuerunt liberiori sanguinis per pulmones cursui, & inflammationem, ob sanguinem copiosius, quam debebat eo delatum, induxerunt.

Curatio.

§. I.

Indica-  
tiones.  
curatio-  
nis.

Quia igitur sanguinis subsistens & æqualem circulum intercipiens unica proxima hujus morbi causa, palmarium utique in sanando momentum, ut is expediatur iterum atque discutatur. Ad quod perficiendum, hæ sub-ordinate faciunt indicationes: 1.) quando ulterior sanguinis stasis atque stagnatio impeditur; 2.) quando lentor in sanguine pleuriticorum obuius diluitur & colliquatur; 3.) quando pars affecta, per spasmus, dolorem & copiosum affluxum rigida mollitur & laxatur, quo impactus cruor ab appulso sanguine arterioso eluatur ac in motum rursus cieatur; 4.) quando excretio materiæ viscidæ, sanguinolentæ ac purulentæ, in bronchiis pulmonum herentis, per scretum facilitatur simulque abscessus & empyematis generatio præcinditur.

§. II.

Sanguis  
missen-  
dus.

Ad præcavendum inflammationis incrementum, nihil utilius est sanguinis missione, quæ quo citius administratur, eo plus auxilii præstat. Secetur vero vena in brachio, & quidem illius lateris quod affectum. Mittatur etiam liberalius, si plethora eminens & cum impetu exsilit sanguis. Quin ubi serum admodum tenax & glutinosum, emissio sanguini innatat, & respiratio

post sectionem, adhuc valde difficilis urget, confidenter iterato subtractio administranda, præsertim si paullo profundioris staseos inflammatoriæ suspicio.

§. III.

Ex internis quam maxime proficua, quæ sanguinem, serum ac humores tenuiores reddunt ac fluxiles, crassos vero ac spissos colliquant blandamque simul movent diaphoresin. Quod ut obtineatur, conducunt hæc. Infusum theiforme, ex herbæ veronice, cherefolii, salviæ ana manipulis duobus, radicis liquiritiæ uncia, seminis fœniculi drachmis tribus, de quo frequentius patellæ quatuor vel quinque sorbillandæ. Dein mixtura discutiens & diaphoretica, hunc in modum: recipe aquæ cardui benedicti, scabiosæ, florum sambuci, acaciæ ana uncias duas, theriacalis unciam semis, aceti destillati unciam, lapidum cancerorum drachmam, antimonii diaphoretici scrupul. duos, sirupi papaveris, rheados, vel sirupi croci, ex sacchari dissoluti uncia & extracti croci granis octo parandi, drachmas duas. De qua duo vel tria cochlearia, bihorio quovis alternatim danda cum pulvere hoc: recipe antimonii diaphoretici, sive cerussæ antimonii, lapidum cancerorum, mandibularum lucii piscis, dentis hippopotami, solutionis oculorum cancri ana drach. nitri puri drachmas duas, cinnabaris scrup. M. f. pulvis ad drachmæ dimidiæ pondus pro dosi exhibendus. Quando etiam natura paullo segnior & pleuritis epidemia mali moris, pulveri huic addicienda camphora, quæ potenter resistit inflammationibus & ne latius serpant impedit. Tenendum tamen, dimidium granum pro dosi sufficere & de super bibendam esse emulsionem ex seminibus quatuor frigidis majoribus, cardui Mariæ & nucleis pinearum, cum decocto hordei & cornu cervi paratam.

Diluē-  
tia pro-  
sunt &  
discu-  
tientiæ.

§. IV.

Dolores acutos mulcet & rigidas fibras optime remittit, vesica calida do-

Spas-  
mus la-  
mandus  
& spua-  
tum se-



*curandum.* dolenti parti tantum non perpetuo admota, plena decocto emollientium specierum, uti florum sambuci, meliloti, verbasci, chamomillæ, malvæ, liliorum alborum, seminum quatuor carminativorum, croci, ex lacte. Recte enim jam *Aretæus lib. 1.* in curatione pleuritidis præcipit, ut lateri dolenti applicetur vesica calente oleo repleta, modo fons levis sit, ne pondere dolorem efficiat. Et certe hoc topico mirifice levantur dolores, respiratio facilitatur simulque materia ad expectorationem præparatur. Ipsam tandem expectorationem egregie promovet linctus: ex olei amygdalarum dulcium uncia dimidia, spermatis ceti drachmis duabus, croci granis decem, sirupi violarum, sacchari canthi ana uncia una cum dimidia. De quo crebrius quicquam deglutendum, vel cum decocto avenæ excorticate, aut ferro lactis dulci assumendum.

### Cautela, & Observationes Clinicae.

#### §. I.

*Cautela circa venæsectionem.*

Potissimum curationis momentum situm est in sanguinis missione, de qua perite *Aretæus lib. 2. pag. 180* monet: *nullam moram atque dilationis in pleuriticis, quin protinus valenti remedio succurramus, datur occasio, quo primo præcipue die vena secanda est cubiti, & quum mediocriter effluxerit, recreandus homo, interjecto temporis spatio, iterum detrahi potest, si bene habeat, sin minus, postridie.* Hæc quippe non tantum in juvenili ætate utilissima, sed & senili, quia hæc plus sanguine abundat, quam alia, magisque crassum ac tenacem in venis alit, qui inflammationes facit profundiores ægre discutiendas, eaque propter hæc in ætate etiam, si vires patiuntur, venæsectio potest repeti. Imprimis curandum, ut pro viribus & quantitate sanguinis, nec nimium, nec parcius extrahatur. Quod si enim justo plus emittitur, non modo expe-

ctoratio inhibetur, sed & stasis sanguinis dissolvenda obfirmatur magis, vel plane in sphacelum transit. Si autem minus quam par est evocatur, parum juvat, sanguis nato spatio impetuosius affluit & stagnatio cum inflammatione increscit.

#### §. II.

Deinceps curandum quam maxime in his pneumonicis febribus, ut alvus aperta & intestina a spasmis libera maneant. Suadet id jam *Trallianus l. 6.* nec non *Hippocrates lib. 3. de morb. §. 17.* *alvum, inquiens, in primis quatuor aut quinque diebus subducere oportet, & hoc paullo amplius, quo & febres obtusiores sint & dolores leviores.* Non quidem commendamus hunc in finem clysteres emollientes & paregoricos, domesticos, cum oleo amygdalarum dulcium, quibus & alvus reseratur & strictura intestinorum spastica laxatur. Recte etiam *Aretæus l. 6.* præcipit: *medelam inferioribus partibus adhibendam negligere non oportet, viris quidem in anum, oleum rutacium, mulieribus in uterum, insundendum est.* Quod experimentum etiam locum habere potest, si intestina crassa spasmis contracta, vel spasmica uterina passio mulieres detinet.

*Alvi vacuitatem.*

#### §. III.

*Trallianus lib. VI. pag. 269.* majorem in modum in ejusmodi inflammatoriis affectibus commendat, & quidem merito, potus aquoso mulso. Commendat quoque & laudat cremorem ptisanæ, bene decoctum, largiter sumtum, cum amygdalis incoctum, *neque desinas, ait, tepidam adhibere, dum cibus & alie potiones exhibentur, & addit, nullum aliud auxilium pleuriticis ita accommodatum invenies, etiamsi febris adsuerit vehemens.* Ptisanam suam semper etiam laudat *Hippocrates.* Et certe humida tepide sumta, omnibus præferenda esse, expertus scribo. Ad humores vero diluendos, nil utilius decocto avenæ naceo,

*Potus.*



naceo, vel hordeaceo, addita decenti quantitate mellis Prussici, nec non lero lactis dulci. Et quo plus humidi, præsertim si corpus valde sudat, assumitur, eo salubrius est.

§. IV.

Regl-  
as. &  
valida  
evacu-  
antia.

Uti in omni febre inflammatoria, sic maxime pneumonica, abstinendum a regimine nimis calido, quod lectum & conclave, potu etiam nimis calido. Cavendum vero etiam vicissim a refrigeratione & potu frigido. In medicatione exulent omnia fortiter urinam, sudorem, nec non alvum moventia, ne lymphatici tennes humores, quorum beneficio stasis dissolvenda, aliorum trahantur. Nam de alvina excretionem perire jam monet Hippocrates lib. III. de morbo multus humor si infra secedit a quinta die mortem inducit. Etenim supernæ partes refecantur & sputi purgatio sursum non prodit. Oportet igitur & infernam alvum neque valde suppressam esse, ut ne febres sint acute, neque valde egerere, quo saliva sursum educi queat & ager viribus valeat. Quando tamen alvus bis, vel etiam quater sua sponte fertur, minime id est prohibendum.

§. V.

Anody-  
na.

Ad dolores acutos sopiendos commendantur plerumque anodyna & opiata. Sed cavendum ab iis est, præsertim in senili ætate, ubi humorum spissitudo & inflammatio profundior. Fugito, serio monet Trallianus l. c. diacodium & philonium. Nam maxima pericula inducunt, cum humores educiti contumaces reddunt & vires prosternunt redduntque emortuas. Ubi vero impensior dolorum atrocitas in ætate juvenili, ultra papaveracea, emulsionem nempe cum semine papaveris ejusdemque syrupo, vel diascordium Fracastorii, non facile ascendendum, ita tamen, ut semper ipsis admisceantur nitrosa & diaphoretica. Externe autem ad mulcendos dolores ipsamque discussionem secundandam, præter superius commendata, utilis

est totus cum pinguedine caponis calecta, in cujus uncia, dimidia camphoræ drachma soluta.

§. VI.

Expectorantia & dulcia non nimis cito propinari debent, primis scilicet diebus, sed tunc demum, quando materia cocta, viscida, mobilis est & ad excretionem apta; alias major ad pulmones proritatur affluxus. Nonnulli etiam sperma ceti in copia assumunt ad sanguinem dissolvendum commendant. Ego vero, ob nauseam quam parit, plus illud nocuisse, quam profuisse, observavi. Neque etiam hoc tanta dissolutoria facultate pollet, quam acetum cum cancerum lapidibus.

Expe-  
ctoran-  
tia.

§. VII.

Quando die critico, uti sæpius, nisi turbas faciat Medicus, incidit, inflammatio per copiosum sudorem solvitur, quem liberior respiratio, corporis quies & virium incrementum subsequitur, diaphoreticis & diluentibus aliquandiu adhuc insistendum, sed non tam crebro. Exacta quoque victus habenda ratio, ne plus, quam par est & ventriculus debilis subigere potest, assumatur. Quo morbi reliquæ penitus consumantur & recidiva arceatur.

Morbo  
decli-  
nante  
tene-  
nda.

Enarrationes morborum.

OBSERVATIO I.

Juvenis accedens ad annum vigesimum sextum, sanguineo-cholericus, habitus corporis strictioris, ante duos annos singulis fere mensibus sibi applicari curavit cucurbitulas cum scarificatione, postea simul & semel per annum id intermisit. Aliquamdiu nullo notabili incommodo circa pectus fuit affectus, sed Februario mense, hieme tepida, corripitur primum horrore & rigore, corporisque lassitudine, quibus mox accessit dolor in pectore, spirandi angustia, cum prostratione appetitus, virium, calore præ-

Perip-  
neumo-  
nia con-  
missa  
V.S. lea-  
thalis.



præternaturali, pulsu celeri, duro & inæquali somnoque inquieto. Adhibita remedia varia interna pneumonica, omissa tamen venæsectione, incassum. Adaucta enim in pectore angustia cum metu suffocationis, expectoratio fuit difficillima, febris facta intensior, facies rubicunda, oculi feroces & assidua vigilia circa diem septimum delirii præbuerunt indicium, quod etiam eodem adhuc die accidit, cum ipsa morte. Aperto post mortem thoracis cavo, in conspectum venerunt pulmones mirum inflati, distenti & tactu duri. Replerunt hi omnem fere cavitatem & firmissime præterea erant adnati diaphragmati, costis & dorsi vertebri, in utroque latere, ut difficillime cultri acie potuerint separari. Exempli apparuerunt admodum duri instar carnis, vesiculæ quasi carnea crassa rubicunda substantia erant infarctæ, & quum discinderentur, pauca quantitas ichoris putridi sanguinei effluxit, præsentem pure nullo. Lanci impositi gravitatem quinque ponderum exhibuerunt & aquæ injecti semper ad ima descenderunt. Ipsa in aspera arteria spumosa & tenax materia reperta. Arteria & vena polyposis concretionibus, quæ ex corde & auriculis, quarum columnis & fibris firmiter erant connexæ, exemptæ, plus quam duarum unciarum pondus habuerunt. Cordis ventriculi crasso & nigricante cruore penitus erant conferti, & in pericardio sex minimum cochlearia aquæ, instar carnis loturæ, fluctuarunt.

#### *Epicrisis.*

Patet hæc exsectione, in peripneumonia, non semper adesse pus & materiam, sed potius crassam sanguinis substantiam firmissime poris & tubulis pulmonum impingi, & ita tumorem durum, qui omnium symptomatum succedentium causa est, effici. Innotescit deinceps hoc casu, omis- sam consuetam sanguinis subtractionem, in corpore plethorico sanguineo cholerico, gravissime tali san-

guineæ inflammationi ansam præbere posse & occasionem. Porro admodum probabile, polyposam substantiam ex crassiori sanguinis parte concretam & in pulmonalibus vasis hærentem, multum ad generationem hujus affectus contulisse. Testatur enim *Malpighius de polyp.* peripneumoniam sæpenumero induci a polyposis concretionibus in pulmonum vasis hærentibus. Non immerito quidem mirandum, cur, posito hoc sanguinis progressui obice, non perpetua ante peripneumoniæ invasionem difficilis fuerit respiratio. Sed vasa, quibus polypi inhærent, ordinario magis ampliantur, ut sanguis nihilominus præterlabi queat. Quamdiu igitur sanguis placide circumagitur, nec quantitate nimis redundat, liber manet ejusdem per hos etiam tubos transitus, nullumque subsequitur incommodum, ut viderim, polypos ad ulnæ usque longitudinem per arteriæ aortæ, item venæ cavæ truncum superiorem & inferiorem fuisse elongatos, sine ullo sanitatis detrimento atque periculo. Verum si sanguinis copia accrescit nimium, tumultuarius violentus in ipso motus exsurgit, præsertim si ab externis constrictis impetuose ad interna urgetur, congestus circa cor & pulmones cruor, maximeque in tubis, quibus inhæret polyposa massa, stagnans & accumulatus, inflammatorios tumores, præsertim in viscere sanguineo, facillime excitare potest. Tum vero quam maxime necessaria sanguinis missio tempestiva, quo sanguis iterum paretur circuitus, quæ nostro in egro pessimo consilio omissa.

#### OBSERVATIO II.

Quum synochæ & catarrhales febres sub finem elapsi anni milites nostros præsidarios epidemica prorsus ratione infestarent, Januario mense etiam plures, præsertim ex iis, qui contagium vitaturi in circumjectas civitates, sub frigido valde & humido aere.

*Pleuritis  
et  
spu-  
ria  
V.S.  
sanata.*



aere hinc discesserunt, corripuit spuria pleuritis. Ex his triginta commisi sunt curæ Medici, amici & auditoris olim mei, qui febre laborarunt valde gravi, cum acuto dolore lateris alterutrius in thorace, tussi sicca, sed intolerandum dolorem concitante & somni defectu. Omnibus his statim sanguinem mittere iussit in brachio, qui in pluribus cuticula glutinosa obductus comparuit. Potui liberaliter dare præcepit decoctum avenaceum tenue, cuius cocta salvia. Temperatum in omnibus injunxit regimen, & præterea nihil nisi pulveres, ex nitro, antimonio diaphoretico, lapidibusque cancrorum, admixto nonnunquam aceto vini & aliquot uncis aque cardui benedicti, dedit. Et exterius lateri dolenti calida tantum linthea admota. Sic morbus solutus fuit largo sudore, septimo, vel etiam undecimo, aut decimo quarto die. Juenibus nonnullis & quibus non sufficiens sanguinis quantitas subtracta, septimo, vel nono die, nares sanguinem stillarunt cum euphoria, & pulsus per totum morbi decursum magis fuit depressus, quam velox. Quos autem febris longius ad decimum usque quartum diem detinuit, his accidit purpura rubra, quæ vesiculis aquosis albis quasi erat obsita in omni corporis ambitu. Nihil tamen aliud usurpatum, quam pulvis bezoardicus cum nitro, liquor noster anodynus mineralis & decoctum hordei, nec non avenæ ex-corticatæ, tepide largiter potum. His convaluere omnes, mortuus nullus, excepto unico, qui pleuritide cum petechiali febre fuerat affectus.

*Epicrisis.*

Facile in pleuritidem spuriam incidit, qui vestibus non satis munitus, in aere frigido & humido, autumno, vel hieme, diu versatur. Nam ego nullum morbum & inflammatoriam febrem, tam prompte ab aeris intemperie, inæqualitate & mutatione generali, observavi, quam quæ in thorace consistit. Notavi quoque, æsta-

te valde sicca & calida, si admodum frigidus & septentrionalis ventus subito excipit, non tantum destillationes catarrhicas, sed & rheumatismos & pleuritides cum sputo cruento vehementesque lateris dolores fuisse frequentes. Nam aer quam maxime & proxime, propter continuam inspirationem, afficit pulmonum viscus intus, & exterius quoque thoraci & costis, quæ tenuioribus musculis membranis nerveis & vasculis septæ sunt allabatur, eaque propter quam facile spasticas crispaturas inferre & liberum humorum circuitum sistere potest. Recte autem Medicus spuria hac pleuritide laborantibus omnibus secari iussit venam, ob crassum & copiosum qui hieme gignitur sanguinem, quum alias non semper in spuria, si corpus magis serosum, sanguinis missio sit necessaria. Neque etiam in pleuritide notha externe ita accommodata sunt unguenta & linimenta oleosa, vel etiam humida, eo quod perspirationem, qua stagnans humor discutendus & difflandus, impediunt. Præstat tantum partem affectam in temperato & æquabili calore, sub levi calefacto lectulo, servare, inprimis quum nec omnis cutis, eodem modo ac in arthritide & erysipelate, ferre possit topica. Demum quoque notandum, purpuram rubram vesicularem non esse confundendam cum alba miliarum. Illa enim longe benignioris est naturæ, & a sero non tam putrescente & vappido, sed potius acri scorbutico ortum ducit, & ob id, si modeste & perite a Medico excipitur, non tanti est periculi.

**OBSERVATIO III.**

Juvenis literarum studiosus, viginti circiter annorum, spongiosus habitu & sanguine plenus, in prima ætate ob id crebrius narium stillicidium expertus, liberatus vix ante aliquot menses a quartana, qua cum per unum & dimidium annum fuerat con-

*Pleuritis venæ rupta*

*fecta.*



fluctatus, Martio mense, post multos in victu errores, potum vini minus boni & corporis refrigerationem, incidit in pleuritidem veram, symptomatibus stipatam consuetis. Datum in principio purgans, quod aliquot sedes movit, non sine subsequente imbecillitate. Secta etiam in cubito vena, qua exiit sanguis valde spissus, niger, obductus materia tenaci glutinosa. Nihilominus tam impensa fuit spirandi angustia, ut propter suffocationis metum, nec supinus, nec in dextro latere cubare posset, sed erectus semper sedere necesse habere. Pulsus simul erat admodum durus, parvus & celer, vigilia continua, perpetua tussis & sputum quodammodo cruentum, cum exquisito pungitivo dolore rejiciebat. Quinto morbi die vocor ego, & statim lateri dolenti admove-re jussi vesicam speciebus emollientibus ex lacte coctis plenam. Interius dedi pulverem hunc: recipe lapidum cancrorum, mandibularum lucii piscis præparatarum, antimonii diaphoretici ana drachmam, solutionis oculorum cancri, nitri puri ana drachmam semis, cinnabaris antimonii grana 15. M.F. pulvis, de quo ternis singulis horis dimidia drachma oblata, interposito potu infusi theiformis. Ter etiam vel quater quotidie porrigere jussi hanc mixturam: recipe aquæ chærefolii, florum sambuci, cardui benedicti ana uncias duas, aceti destillati drachmas sex, lapidum cancrorum drachmam, mandibularum lucii piscis, antimonii diaphoretici, ana drachmam dimidiam, sirupi jujubini drachmastres. M. Cerevisiæ & frigidum potum interdixi omnem, sed liberaliter præbere jussi infusum herbæ veronicæ, florum sambuci, radicis liquiritiæ, & seminis fœniculi, ex aqua. Septimo die supervenit hæmorrhagia narium, sequutus quoque per universum corpus sudor, & morbus ex voto solutus. Sanius etiam hinc discessit juvenis, sed audivi, eundem postea fere quotannis

eodem malo fuisse affectum ac trigesimo ætatis anno phthisi tandem extinctum.

### *Epicrisis.*

Juvenes sanguinei, qui hæmorrhagiis narium, vel hæmorrhoidum præmature fluxui in juventute obnoxii, a thoracis perfrigeratione facile incidunt in pleuritidem sanguineam: In his vero omne prælidium in sanguinis missione tempestiva. Quæ si negligitur, vel non conveniens quantitas emittitur, maxima spirandi ingruit difficultas. Quod ubi accidit, sanguinis e naribus stillicidium sponte obortum egregio est levamini. Quam salutarem crinetiam in binis pleuriticis gravidis vidi, quæ semel tantum, non vero bis, aut ter, ut in graviditate necessarium, venam sibi pertundi curarant. Deinceps nunquam per totum pleuriticum, & peripneumonicum morbum tuta sunt, quæ alvum ad dejectiones sollicitant, sed clysteres mox in morbi principio ejusdemque progressu, in fine autem laxantia pectori amica possunt admitti. Quæ autem ego adhibui auxilia, a me incomparabili cum fructu semper fere sunt usurpata, imprimis quum Medicinam facerem ante quadraginta annos in Westphalia, ubi endemiæ pneumoniæ febres. Inprimis habeo, quod laudem crebriorem & largiorem potum infusi theiformis superius descripti, sive decocti avenacei cum saccharo & nitro conditi. Neque reticendum, me sæpius circa dies criticos pulveribus diaphoretico-nitrosis unum aut alterum camphoræ granum adjunxisse, eodemque effecisse, ut morbus solveretur sudore & subsequeretur expectoratio. Demum nulla inflammatio tam facile & crebro reddit, quam pleuritica & peripneumonica, nec non ipsa pleuritis spuria, certis præsertim temporibus. Hæc enim rheumatismi genus, quod ad aeris vitia facile incidit. Et ubi semel vel iterum pars quædam per ipsum morbum debilitata & pristino robore pri-



privata, structura quoque viarum & canaliculorum vitiata, accedentibus aliis causis, æquabilem & naturalem sanguinis motum turbantibus, per quam facile præternaturales humorum stagnationes in minimis vasculis accidere possunt.

### OBSERVATIO III.

Peripneumonia ex colica Berol.

Illustrissimus Consiliarius, robustus & habitior, bene appetens & duro victui a longo tempore assuetus, interdum cum euphoria hæmorrhoidalem fluxum passus, mense Januario, coelo algidissimo, ex abdominis refrigeratione & elu. leguminosorum, colicam incurrit, per diem & noctem graviter affligentem. Quum vero Medicus alvum clausam clystere non molliret, sed potionem carminativam cum calidioribus essentiis propinaret, tertio die accessit ingens respirationis angustia, cum febre, inquietudine & tensivo ac pungente dolore, a pectore ad dorsum usque excurrente. Secabatur igitur vena in brachio, ac non ita multo post decoctum mannatum cum aliquot tartari emetici granis porrigebatur. Inde quidem & intestina & stomachus depleta largiter, sed anxietas & spirandi difficultas facta major. Exhibita postea mixturæ pectorales resolventes, sexto die iterum vena pertusa & septimo denuo datum infusum mannatum. Omnia autem incassum, ut potius morbus inde ingravesceret. Exterius tum admotæ thoraci species carminativæ & pectorales, cum aqua calcis vivæ in cataplasmatibus formam coctæ, pariter frustra. Tandem potandas suavit Medicus Tonnsteinenses acidulas, quas æger avide per biduum frigide ingessit, donec undecimo morbi die, suffocatione & syncope superveniente, periret.

#### Epicrisis.

Sæpius observavi, ex solo dolore colico præcedente, qui clysteribus & aliis congruis facile solvi potuisset,

ortam fuisse peripneumoniam, in robustis & crasso sanguine plenis, præsertim senibus. Ob distenta enim a flatibus intestina, sanguis ad cordis & pulmonum vasa validius urgetur, ibique collectus & densatus, ægerriam facit spirationem cum pectoris angustia. Nam quod dolor est in partibus nervosis, id anxietas in corde & pulmonum vasis, a sanguine nimium distentis. Frustranea autem fuit evacuatio per superiora & inferiora, quippe quæ subtraxit humidum sanguinis, genuinam morbi medicinam, coarctatione etiam abdominis sub vomitu, magis sursum ad pectus sanguis est coactus & spiratio difficilius reddita. Potus quoque acidularum frigidus in morbi vigore, caruit ratione omni, ac propter frigus, non potuit non noxam inferre gravem. Fuit autem hic morbi artifex, qui singulari methodo febres petechiales curandi, in *Actis Berolinensibus* inclaruit.

### OBSERVATIO V.

Vir sanguineus, facie floridus, corpore obesus & spongiosus, post aliquot dierum epulas, vino & cibis saginatus, noctu & interdiu, Martio mense, Berolino Mindam Westphalorum iter facit. Peracto hoc, post aliquot dies nanciscitur pleuropneumoniam, febre stipatam intensa. Ego vocatus venæsectione repetita & pulveribus antipleuriticis, nitrosis & cinnabarinis, nec non potu infusi theiformis, a periculosis liberavi ipsum symptomatibus. Remansit autem tussis quædam cum lenta febre, virium languore corporisque marcore, respiratione tamen non adeo difficili. Hinc usurpata auxilia varia diætetica & pharmaceutica, sed nihil per octo hebdomades iisdem profectum, & tussis potius cum dolore pectoris gravativo increvit, parum autem rejecit, & vesperi lenta quædam gliscere visa febricula. Tandem ex improvviso simul

Empyema ex pleuropneumonia curatum.

& sec.



& semel, intra tres, vel quatuor horas, ultra mensuram materię purulentę cum impetu quasi ex ore rejecta respiratio illico facta liberior & febrilis calor remisit. Duravit postea hæc puris expositio per mensem, minori tamen copia, ac æger interea bene appetiit atque dormivit, successive etiam per DEI gratiam sanitati redditus, solo lactis cum saccharo rosaceo cocti potu calido, quotidie ad unam cum dimidia mensuram, interposito usu balsami pectoralis, ex floribus sulphuris, oleo amygdalarum dulcium spermate ceti, terebinthina Veneta, croco & oleo anisi, nec non pulveris pectoralis, ex lapidibus cancerorum, spermate ceti, saccharo, myrrha, radice liquiritiæ in pulverem redactæ & bolo Armenię.

#### *Epicrisis.*

Abscessum pleuritidem & peripneumoniam non sufficienter solutam sequi, passim prisca Medici tradiderunt. Confirmat id quoque experientia, & ego id præsertim observavi in sanguineis, spongiosi & obesi habitus hominibus. In nostro autem memorabile, quod rupto abscessu, pus effluens simul & semel per os exturbatum, quod si in thoracis cavum delabatur, hæticam facile inducit lethalem, nisi educatur paracenthesi, de qua notabile exemplum communicavimus, *in dissertatione de perpetuo succi nutritii ex thorace stillicidio*. Persanari tamen posse talem in thorace abscessum & amplam in pulmonibus cavitatem, monstrat hæc historia. Non vero prætereundum, ægrum hunc postea sæpius de dolore quodam acuto in latere affecto fuisse conquestum, post paullo fortiotem corporis motum, equitationem, largum vini potum ac nimium acidorum usum.

#### OBSERVATIO VI.

Peripneumonia gravis juvenis.

Juvenis generosus, viginti annorum, sanguineo-phlegmaticus, nativum hæmorrhagiis & largis & crebris

ab ineunte ætate obnoxius & ante biennium gravem acutum pectoris morbum passus, Februario mense, postquam corpus saltando vehementius exagitasset & mox postea in prandio cerevisiam frigidam bibisset & legumina cum salita carne avidius ingessisset, obscurum quendam in scrobiculo cordis sensit dolorem, sed magnam cephalalgiam, cum pulsu celeri, contracto, sub alvo adstricta. Datus vesperi pulvis temperans, noctem autem duxit insomnem & mane spiratio fuit laboriosa, cum pectoris angore & dolore in sinistro latere, paullo supra costas spurias. Hinc mane vena in brachio pertusa, sanguis evocatus niger, cuticulam glutinosam in superficie gerens, data quoque mixtura discutiens atque resolvens passim descripta. Subtracto sanguine, melius primum habere visus & dolor capitis discessit, postero tamen die & dolor lateris & pectoris angor rediit, quin magis adhuc increvit, cum virium debilitate, somno inquieto, appetitus prostratione, ut æger spem vitæ abjiceret ipse. Ad dolorem igitur mulcendum imposita vesica decocto ex speciebus emollientibus cum lacte plena, alvus quoque stricta clystere emolliente domestico mollita, flatus multos multaue crassa stercora dimisit, ægro inde aliquod levamen percipiente, inprimis quum subinde ex infuso theiformi sorbillaret, & sputum rejiceret crassum fusci coloris. Septimo autem die iterum pejus habuit, corpus jectigavit, spiritus factus angustior & respiratio accisa, invalescente simul febrili calore & accedente mentis turbatione, inprimis quando oculos clauderat. Interpositi hinc mixturæ pulveres nitrosi cum camphora, quibus pectoris quandam sensit liberationem & tantisper appetente nono die sudavit, sputo semper succedente fusco, jam etiam quadantenus flavo. Post nonum diem accessit levior quidam alvi fluxus, ut quotidie ter vel quater dejiceret, primum crassa.



crassa foetida, postea mucosa & uti dicebant, purulenta. Parum tamen levaminis inde sensit, sed debilior potius factus; donec undecimo morbi die, ex improvise subito largissimus, per universum corpus prodiret sudor, & per bihorium manaret, tam salutari eventu, ut æger post illum somno obrueretur alto, expergefactus virium incrementum & respirationem liberiores perciperet, ac postea, spuito & alvi fluxu cum leni madore per aliquot adhuc dies persistente, sensim cum sanitate in gratiam rediret.

*Epicrisis.*

Sic juvenem hunc generosum in ædibus meis commorantem ante annum curavi. Id autem ex casu hoc in practicum usum convertere licet: quod origo peripneumoniaci mali etiam esse possit ex primis viis, si stomachus flatibus & spasmis detinetur, qui sanguinem nimia copia, ad partes superiores, imprimis thoracem, urgent. Tum quidem, si candide æger delictum confitetur, occasio datur cito præsciendendi gravem futurum morbum, si commodis evacuantibus, lenioribus emeticis, laxantibus, aut clysteribus, primæ viæ a sordibus depleantur. Et hoc in casu ratione non destituuntur Practici nonnulli, uti *Rulandus* atque *Hartmannus*, qui in principio inflammationis pulmonum dare præcipiunt vomitorium, quod, si hæc causa non subest, alias nocentissimum. Porro hac etiam ex historia apparet, non fidendum esse istis excretionibus, quæ in acutis pulmonum morbis fiunt per alvum. Sed quæ genuinæ & saluberrimæ crises, succedunt per sudorem largum.

CAPUT VII.

De Febre Hepatica.

Sive

Hepatitis.

Theses Pathologicae.

§. I.

**Q**uo frequentior quam modo exposuimus pulmonum inflammatio; eo rariores hepatitis inflammationes verae. Quod & cur hoc fiat, primus ego ante aliquot annis multis & validis rationibus adstruxi peculiari dissertatione, de hepatitis inflammatione vera rarissima, spuria frequentissima. Potiora huc redeunt. Inflammatoria febres accidunt quam maxime nervosis & sensu acuto præditis partibus, in quibus ille in incongruis tubulis subsistens sanguis, dolorem movet ac spasmum, qui postea universum nervosarum partium systema in consensum pertrahit, exagitat, sicque febrem accendit. Sanguinea autem minus exquisiti sensus viscera, non tam ægre ferunt sanguinis stagnationem, sed cedunt impetuosius affluenti, nec dolor supervenit, nec spasmus, atque adeo neque etiam febris. Quia igitur hæc inter eminent in primis hepar, quod ex paucis arteriis, sed maximam partem venis, portæ & hepaticæ propaginibus, coagmentatur, & propter tunicarum nervosarum absentiam, in magnam molem potest expandi sine acuto dolore; hinc in ipsius substantiam minus cadit inflammatio.

§. II.

Illa autem hepatitis inflammatio, quam Veteres fusc describunt, merito externa tantum, superficialis, quasi erysipelacea & spuria hepatitis, non secus ac pleuritis spuria, censenda, ejusdemque sedes non in ipsa interna hepatis substantia, sed potius circa convexam partem, in membranis & ligamentis viscus hoc cingentibus & qui-

*Hepatitis vera rarissima.*

*Sed frequentissima sine spuria a Veteribus descripta.*



quibus costis spuris ac diaphragmatis portioni adharet, constituenda videtur. Sic enim *Hippocrates de intern. affect.* §. II hepaticum describit morbum: *dolor acutus in hepar incidit & sub ultimas costas, & in claviculam, & sub mammam & suffocatio fortis tenet, & aliquando lividam bilem revomit, & rigor ac febris primis diebus debilior habet, & dum attingitur hepar, dolet & color ipsius sublividus est, & cibi, quos prius comedebat eger, suffocant ipsum & ingesti urunt ac torquent ventrem. Huic conducunt, ubi dolorem habuerit, tum alia, tum tepesfactoria eadem apposita, quæ etiam pleuritidi profunt.* *Celsus lib. IV. cap. VII.* hæc acuti jecinoris morbi signa esse perhibet: *dextra parte sub præcordiis dolor vehemens est, idemque ad latus dextrum & ad jugulum humerumque partis ejusdem pervenit; nonnunquam manus quoque dextra torpet, horror validus est, bilis evomitur, interdum singultus prope strangulat.* Jam quicumque hæc pathemata curatius expendet, facile perspiciet, illud ab *Hippocrate* delineatum morbum, non tam in ipso hepate consistere, sed potius ad magnam & paulo profundiorum erysipelaceam inflammationem partium externarum, thoracem & hepar investientium, esse referendum, eo quod non modo ultimas costasprehendit, sed & ad humerum, mammam & claviculam sese extendit ac dolor tactu augetur. Cum rigore quoque, febre & vomitu invadit, quæ symptomata inflammatione partium nervosarum solennia. Dolor porro externis mollientibus & fibras laxantibus remittit. Ac respiratio ad suffocationem usque difficilis, a spasmō pleuræ & perritonæi, quæ membranæ diaphragma superne & inferne investiant, idque in consensum trahunt, haud immerito derivanda. Qui autem a *Celso* describitur morbus, non etiam in ipso hepatis, viscere, sed in externis ipsi adherentibus membranoso-nervosis par-

tibus consistere videtur, quæ dolore & spasmō affectæ, nervos diaphragmatis intercostales & qui ad ventriculum excurrunt, per consensum simili afficiunt. Hinc recte monet *Trallianus lib. 8. cap. 1.* considerari oportet, num inflammatio ipsi jecori proprie acciderit, an tunicis ipsius & musculis extrinsecus ambientibus. Quin *Avenzoar lib. I. theiz. tr. 13. cap. 4.* disertis verbis scribit: *aliquando in panniculo hepatis fit extensio, unde sequitur dolor fortissimus, quasi intolerabilis, & apparet patienti, quod hepar sit, quod doleat.*

## §. III.

In corruptionem quidem sphacelofam, ingrato foetore & nigrore cognoscendam, nec non purulentam & apostematicam interdum abire hepar, testatum faciunt observata in dissectione cadaverum, notata passim a *Forestolib. 19. de hep. affect. observ. 10.* *Coitero in obs. anatomico chirurg. M. N. C. Dec. 2. obs. 2.* *Capivacciolib. 3. cap. 23.* *Bartholino Cent. 4. hist. 28. M. N. C. Cent. 3. & 4. obs. 144. Dec. 2. Ann. 9.* Sed tenendum omnino, non omnem sphacelationem supponere inflammationem. Nam illa etiam commode fieri potest a quiete & stasi sanguinis in ramis majoribus, & nullas omnino partes in corpore citius & frequentius sphacelo affici aut apostemate, quam pulmones, hepar, lienem, uterum & omentum, observavi. Eadem quoque corruptio ex facili in hæc viscera transire potest, si contigua pars primum eadem fuit infecta, haud secus ac videmus in externis artuum exiguo loco ortam sphacelationem, subito latius serpere & vicinam carnem, quin integrum amplum membrum, manum & pedem, corripere atque corrumpere.

## §. IV.

Est igitur inflammatorius ille affectus, qui partes externas hepati contiguas & confines frequentius invadit, & ut plurimum cum horrore, frigore, interdum etiam vomitu & febre inci-

Licet  
hepar  
quandoque  
corruptione  
afficiatur.

Hepatis  
symptomata  
& causa  
scilicet.

pit,



pit, ac dein dolore, insomniis, spirandi difficultate, inquietudine & alvi adstrictione stipatur, ac vulgo pro hepatitis inflammatione haberi solet, nihil aliud, quam species febris rheumaticæ, sive rectius erysipelacæ, quæ sit non tam a decubitu & stasi sanguinis, quam potius feri viscerum acrioris, membranas & fibrillas nerveas lancinantis. Propterea eidem quam maxime obnoxii sunt, qui arthriticis & rheumaticis passionibus alias patent, qui potibus spirituosus ac iræ indulgent, quibus sæpe sanguinis evacuationes suppressæ, qui in aere frigido diu versantur, aut plane corpus æstuans eidem incautius committunt, nec non qui diarrhœam potu largiori spiritus vini cohibuerunt. Quod vero dextrum thoracis latus rheumaticis doloribus longe frequentius afficiatur ac sinistram, hanc imprimis ob causam fieri arbitror, quia hepar magnum & ponderosum viscus ibi diaphragmati costisque spuris connexum, quod sub vehementiori corporis motu & respiratione citatiori, has partes jugi tensione debiliores reddit, eoque facit, ut humores ibi discurrentes facilius subsistant & etiam in tubulos incongruos urgeantur. Atque hæc etiam subest ratio, quod per lapsum, ictum, aut emplastrum calidius admotum, nec non cucurbitulas, longe facilius dolores, inflammationes inducuntur in dextro latere, quam in sinistro & alibi.

§. V.

Pleuris  
sial / æ-  
pe com.  
plica.  
tur.

Perquam autem notata digna est observatio practica, quod interdum calus in praxi occurrant, ubi partes membranacæ, supra & infra costas spurias, gravi dolore tensivo, cum febre, tussi sicca & angustia spirandi afficiuntur, ob irritatam graviter ab acri rheumatico confluxu, non tantum pleura supra diaphragma, verum etiam peritonæi membranam infra hoc, ut adeo morbus partim pro spuria pleuritide, partim hepatitide haberi possit. Multum enim affinitatis bini hi morbi alunt, dum in utro-

Tom. IV.

que dolor sæpe ad jugulum & humerum sese extendit, difficultas quoque spirandi adest & tussis sicca, propter consensum non modo diaphragmatis, cui hepar firmiter annexum est cum pleura & peritonæo, sed & nervorum intercostalium, eo excurrentium. Sunt tamen notæ nonnullæ, quibus ambo hi affectus possunt distingui. In pleuritide quippe notha intra veras costas dolor pungitivus & tensivus, cum tussi sicca, febre & doloris sub inspiratione exacerbatione percipitur; in hepatitide autem dolor magis sentitur circa spurias costas, qui sese explicat ad cordis usque scrobiculum, cum febre, præcordiorum anxietate & quandoque vomitu atque singultu. In hepatitide quoque, secus quam in pleuritide, decubitus in sinistro latere semper est difficilis, quia, ut recte notat *Calvus Aurelianus lib. 3. cap. 4.* pondere suspensi hepatis adducuntur dextræ partes membranacæ scilicet, & propterea fiunt punctiones, ob tractam & tensam membranam cui jecur annexum est & quæ cum diaphragmate colligatur.

§. VI.

Neque minus hepatitis merito distinguenda a dolore ardenti & fixo circa scrobiculum cordis versus latus dextrum, cum singultu & vomitu sæpe complicato, qui fit a calculo in ductu cystico, aut cholodocho hærente, & propterea aliam causam obtinet & aliam sedem, prognosin etiam aliam requirit & medicationem. Facile etiam hepatitis permutatur cum dolore tensivo hypochondriorum, nec non qui est in musculis abdominis, de quo jam monuit *Forestus lib. 19. sæpe imponitur tumor dextri hypochondrii Medico, tanquam sit in jecore affectus, quum tamen sit in musculis abdominis.* Sed dolor ille dextri lateris, in hypochondriacis & hæmorrhoidariis admodum frequens, consistit in flexura coli, sine febre est, discedit citius, sæpe repetit, nec symptomatibus febris inflammatoriae, sed malo hypochondriaco solennibus, stipatur, aliam habet causam,

Differe  
rentia  
ab alio  
dextri  
lateris  
affectu  
nibus

Q



nam, medicationem aliam. Et inflammatio musculorum abdominis, præsertim transversorum, qui arctissime alligati sunt peritonæo circa hepatis confinia, sensibus magis est obvia & tumor tactui ac visui sese offert, cutis circumjecta tensa comparet, ut digitis attracta minime sequatur, febris sociata mitior, nec tussis, nec vomitus adest, plerumque etiam sit a violentia externa & contusione, ac nisi mature congruis præsiidiis succurratur, confines partes afficit, inflammatur, in abscessum, febrem lentam & hecticam transit.

## §. VII.

Even-  
tus bo-  
nus.

Interim hæc frequens hepatitis non adeo terrere debet, nec Medicum, nec ægrotum, eo quod si medicatio recte instituitur, non multum alit periculi & raro jugulat, nisi viscera interna labe sint affecta. Ut plurimum enim morbus intra septem, vel undecim dies, finitur largo sudore. Natura quippe ipso febrili motu utitur pro Medicina, cujus beneficio intra certum tempus materia peccans & subsistens attenuatur, resolvitur ac sensim sensimque discutitur. Hinc qui ex inflammationibus convalescunt, hos per febrilem motum rite succedentem evadere, censendum est. Quo sensu merito accipiendus *Hippocratis aphor. 52. sect. 7. quibusque hepar circum circa dolet, iis febris accedens solvit dolorem.* Quando autem spuria hæc hepatis inflammatio, Medici, aut ægroti culpa, non tempestive discutitur, sed diutius persistit, dolor permanet, febris accedit lenta, corpus tabescit, vires cum appetitu prosteruntur, os siccum est, urina tenuis alba, abscessus facti præbent indicium, qui tamen non tam in ipsa interiori hepatis compage, quam potius in externis tunicis, ligamentis, peritonæo, & subjacentibus musculis consistit, gibbam hepatis partem simul afficit, & plerumque funestum facit eventum, testimonio observationum

& sectionum anatomico-practicarum.

## Medendi methodus.

Cum

Cautelis & Observationibus  
Clinicis.

## §. I.

Quam pleuritis & hepatitis multum convenientiæ quoad causam, originem, symptomata, & prognosin alant, ac nonnisi loco differant; hinc modus sanandi hanc parum discrepat ab illius, quem capite antecedenti exposuimus. Quemadmodum vero Medicus in quovis morbo sanando prudentissime semper procedit, si ductum naturæ, quo morbus sponte solvi solet, comiteratione sana sequitur; ita idem hoc in medicatione hujus passionis quam maxime servandum. Jam quia hepatitis eodem modo ac pleuritis per sudorem, congruo critico tempore dimidio nempe septimi & septimo ipso die, sponte solvi solet; eadem viæ merito insistendum, & usurpanda primo omnium ea, quæ ad liberiores perspirationem conferunt, vitanda vicissim, quæ cuticularis excretionis successum, diætetica sint, sive pharmaceutica, ullo modo remorari, & impedire possunt. Quia autem secundum principem illum practicum *Hippocratis* canonem, non cruda, sed concocta movere oportet; hinc principio id agendum, ut serum acre falsum, nervoso-musculosis partibus vasisque minimis impactum, temperetur, diluatur ac resolvatur simulatque viæ ad criticam excretionem sunt præparandæ, iis maxime, quæ fibras rigidas, tensas, spasmō constrictas remittunt, ac molliunt.

Naturæ  
ductu  
in sistē-  
dum.

## §. II.

Igitur omnibus modis commendandus potus diluens, decoctum hordei cum passulis, vel etiam citratum, serum lactis dulce, cum pauxillo nitri & saccharo, nec non emulsionēs ex decocto hordei, vel cornu cervi, cum

Faciens  
da.

amyg-



amygdalis, quæ liberaliter sumta, & temperant & diluunt. Ejusdem dein & adhuc diaphoreticæ virtutis sunt infusa theiformia ex herba veronica, cardui benedicti, floribus bellidis atque sambuci, crebrius forbillata. Diaphoresin movent simulque temperant pulveres, ex antimonio diaphoretico, præsertim ex regulo parato, lapidibus cancrorum, cornu cervi philosophice præparato, nitro, & cinabari, cum aqua cardui benedicti, cerasorum nigtorum, cinnamomi, & florum acaciæ crebrius assumendi. Quibus subinde ad auctiorem perspirationem interponendus usus liquoris bezoardici, vel nostri, vel Buffiani, cum dupla parte liquoris nostri anodynæ mineralis, vel spiritus nitri dulcis. Neque negligenda alvina vacuatio, sed si segnior, clystere emollienti, aut elementi solutivo promovenda. Exterius quoque temperato calido fotu evaporato, & discussio subsistentis humoris secundanda. Quem in finem conducunt decocta ex herbis & floribus emollientibus, cum croco & lacte vesicæ bubulæ indita & parti dolenti admota, nec non sacculi ex speciebus solventibus & discutientibus, herba absynthii, cardui benedicti, floribus sambuci, chamomillæ vulgaris & Romanæ, baccis juniperi, semine anisi & carvi confecti, & in vino, aut aceto vini cocti, ac prævia expressione impositi.

§. III.

*Fugienda.* Abstinendum vero interius ab omnibus opiatis, narcoticis & sopientibus, nec non a sudoriferis calidioribus, quæ febrem accendere, vigilias intendere & delirium suscitare valent. Exterius fugiendum regimen nimis calidum. Neque oleosa & pingua illinenda, quæ poros cutis obstruunt, neque emplastra saturnina, vel epithemata ex aceto & lithargyrio admovenda, quæ nimis refrigerant & constringunt, neque etiam spirituosa applicanda, quæ fibras rigidiores efficiunt ac dolores intendunt. Ipse adeo de-

cantatus camphoratus & crocatus vini spiritus, cautissime adhibendus, ob exsiccationem nimiam, quam partibus æstu ac incendio jam detentis, infert. Si tamen usurpare placet, fiat id statim in principio, ante intensum febrilem æstum, vel eo valde remittente, & maxime quidem in naturis segnioribus.

§. IV.

Præterea ad præscindendum inflammationis incrementum admodum utilis & necessaria est, sanguinis missio *De V.S. repetenda.* inter initia, præsertim in manu vel pede lateris affecti instituta. Quantitas autem sanguinis mittendi, nec non repetenda quandoque venæ sectio, proportionatione plenitudinis vasorum, consuetudinis, virium, ætatis corporisque habitus, dirigenda, & judicio Medici merito relinquenda, ne in excessu, vel defectu peccetur. Interim si quis hæmorrhoidarius, præstat venam seligere in pede & si plethora urget, postea cubiti venam pertundere.

§. V.

Si spasmus in loco affecto tantæ est *Symptomaticum singularem medicatio.* vehementiæ, ut etiam ventriculum, duodenum ipsaque biliaria vasa in consensum trahat, & præcordiorum anxietas, vomitio, singultus & alvi adstrictio id prodat, & externis, & internis, opem ferre expedit. Tum ego sæpius non sine fructu alvo infundere jussi enema pure oleosum, parti dolenti, & præcordiis admoveve vesicam decocto emolliente plenam & interius crebrius dare mixturas diaphoreticas & solventes, quæ aquam cardui benedicti, florum tilia, acaciæ, chamomillæ vulgaris, diascordium Eracastorii, nitrum & liquorem anodynum mineralem habuerunt. Quod si autem infarctus, & obstructio hepatis, ac oriunda inde icteritia, complicantur, ego quidem singularis virtutis deprehendi epithema ex herba cardui benedicti, scordii, absynthii, floribus sambuci, chamomillæ Romanæ & vulgaris, semine levistici ac cymini, in vino coctis & crebro admotum. Idem hoc epithema egregium quoque in declina-



tione morbi ad intercipiendum abscessum cum suppuratione. Sed ubi in inflammatione, a causa potissimum violenta, & externa, suppurationis, vel etiam abscessus indicium præbet materia purulenta, per urinam, aut alvum secedens, cum febre lenta; ea utique adhibere convenit, quæ ad extinguendum æstum febrilem, & suppurationem debite tractandam proficua, de quibus tamen infra pluribus agemus.

*Enarrationes morborum.*

OBSERVATIO. I.

*Hepatitis cum abscessu in hepate.* Vir sexagenarius, militum præfectus, sanguineo-cholericus, in Bacchi & Veneris castris strenue militans, anno abhinc post gravem ex caballo lapsum, per aliquot hebdomades laboravit ingenti & acuto dolore in dextro hypochondrio, cum febre, spirandi difficultate, & alvo adstricta. Curatus tamen fuit, sed dolor remansit obtusior & conquestus fere per annum de virium, & appetitus languore, nec tamen vini potum, nec veneris exercitium intermisit. Accidit vero ut quum equo gradario veheretur, sensum quendam disruptionis internæ perciperet, quo simul, & semel pressorius ille dolor cessavit. In urbem delatus me vocare iussit, magnasque querelas effudit de miro languore, summa spirandi difficultate & præcordiorum constrictione. Ego propius accedens, extrema frigida & frigidum in facie sudorem offendi, pulsum autem arteriarum vix percepi. Suasi igitur ut ægrum in lectum transferrent calidum & animæ Medicum advocarent, meæ enim medicationi non amplius esse locum. Interim secta vena, sed nihil fere effluxit, data analeptica interna & externa, sed frustra, & elapsis decem horis, e vivis discessit. Post mortem venter mirum in modum intumuit, ac in umbilicali regione die post disruptus, effluente sanie putrida

tam foeda, ut tota domus cadaverosa mephiti inficeretur.

*Epicrisis.*

Quemadmodum pleuritis vera, & levior etiam peripneumonia, si ultra vigesimum diem persistit, facile in empyema, siue abscessum admodum periculosum abit; sic & hepatitis, siue inflammatio musculosarum & membranacearum partium circa hepar, si non discutitur, abscessum formare solet, qui ipsam hepatis substantiam labeficit atque corrumpit. Testatum id facit casus, quem ego Mindæ Westphalorum observavi & jam enumeravi. Quia autem hanc observationem egregie illustrat similis a Foresto notata lib. 19. de hepat. affect. non abs erit, si eandem heic inseram. Vir, habet, annos triginta sex natus, dolore hypochondrii dextri per integrum fere annum confectus, cui lenta accessit febris, tabe confectus & plane consumptus est, tota facies citrina & universum corpus flavum evasit. & dolor atrox eum torquebat in dextro hypochondrio, quod durum & valde subtumidum, musculis abdominis plane extenuatis erat, urina tenuis, & ignea, oris siccitas, alvus modo adstricta, modo liquida, cibi fastidium, sitis inexhausta. Incisione facta, materia purulenta fetida emanavit, cum tanto fetore, ut totam domum impleret, ita ut vix quisquam apud ægrum in cubiculo persistere posset. Æger autem paullo post animam efflavit. Cadavere aperto, in tota ventris cavitate reperta est ingens copia puris, peritonæum quoque disruptum & putridum conspiciebatur, hepar durum, ingentis magnitudinis, albicans circa stomachum, sed in gibba sui parte prope costas spurias nigrum, exustum & gangrena infectum. In hepate vero nullum conspiciebatur pus. Præcipue autem corruptio hepatis erat in parte dextra, versus costas spurias & circa musculos intercostales, qui etiam cum costis spuris nigredinem contraxerant, instar carbonis, & facillime frangi poterant.



OBSERVATIO II.

*Hepatitis sine dolore di-  
sensu.* Vir sanguineo-melancholicus, tri-  
ginta circiter annos habens, diu jam  
vitæ sedentariæ addictus, neque cibis  
boni succi usus, vinis vero dulcioribus  
semper delectatus, omissa per aliquot  
annos sueta sanguinis missione, in in-  
gentem per universum corpus languo-  
rem incidit & miram quoque expertus  
est ad iracundiam proclivitatem, ita  
ut a levissima causa commoveretur &  
protinus saporem in lingua perciperet  
amarum. Post mensem correptus est  
insigni dolore in crure & hypochon-  
drio dextro, tensivo partim, partim  
gravativo, qui attractu fuit exacerba-  
tus. Accessit cibi fastidium, inquietus  
somnia infomniis turbatus, calor præ-  
ternaturalis, extrema ab aere frigi-  
diusculo mox refrigerabant, faciei  
color sæpius mutabatur, alvus erat  
quidem fluida, & a pulveribus, quos  
nitrum parca dosi ingrediebatur, fœ-  
tida, & biliosa multa dimittebat, sed  
post alvi secessum semper fere dolor  
acerbior reddebatur, qui etiam sub  
risu & fortiori inspiratione ingrave-  
scebat, urina crassa, rubicunda, cum  
sedimento secedente. Misso primis  
statim diebus ex mediana largiter san-  
guine, dabantur diaphoretica, tin-  
ctura bezoardica bis quotidie ad tri-  
ginta guttas cum infuso veronicæ,  
item pulvis bezoardicus, cum nitro,  
& camphora mixtus, arcanum quo-  
que duplicatum, cum nitro & cinna-  
bary, quo sedes proritati & anxietas  
adauctæ. Septimo die accedente,  
cutis, antea sicca & arida, madescere  
primum coepit & postea sudor eru-  
pit largissimus, per viginti quatuor  
horas manans, quo omnia sympto-  
mata, respiratio difficilis, anxietas,  
horror & extremorum refrigeratio  
discussa, & somnus quoque rediit, ita  
ut post decimum quartum diem æger  
delectum relinqueret. Mense autem  
Augusto idem malum rediit, non qui-  
dem cum tanta symptomatum & do-

Tom. IV.

loris atrociam, sed diutius ægrum deti-  
nuit & lentam febrem reliquit, diætâ  
salubri & congruis remediis post ali-  
quod tempus etiam abactam, ægro  
perfectam sanitatem recuperante &  
expirante simul illa ad iracundiam  
promptitudine.

*Epicrisis.*

Origo hujus morbi merito a crasso  
& copioso sanguine repetenda, quem  
vita sedentaria, victus crassus & cre-  
brior potus vinorum dulcium inge-  
nuit, eaque propter multum simul ad  
infarctum & obstructionem hepatis  
contulit. Accessit postea crebrior ani-  
mi commotio, qui sanguis lentus in  
minima vascula impulsus, statim ibi  
concepit inflammatoriam. Id enim  
curatam meretur observationem,  
quod qui hepatis vitio laborant, ad  
iracundiam admodum sint faciles. Nec  
prius prava hæc dispositio cessat, quam  
sublata hepatis labe. Videtur autem  
hæc inflammatio levior tantum fuisse  
ac in ligamenti, forsan etiam super-  
ficie concavæ hepatis partis, consti-  
tisse, ideoque septimo die sudore di-  
scussa est largissimo, quod tempus or-  
dinarium criticum inflammationum  
esse solet, si discussioni adhuc est locus.

OBSERVATIO III.

Ante aliquot annos vocabar ad ge-  
nerosum virum in vicina urbe degen-  
tem, sanguineo-cholericum, strictio-  
ris habitus & quadragenario jam ma-  
jorem. Is a quinque diebus lecto fue-  
rat affixus, conquestus de acutissimo  
lateris dextri sub costis spuriis, cum  
maxima præcordiorum constrictione  
& anxietate, spiritus difficultate sum-  
ma, febre, vigilia & inquietudine.  
Medici primum in auxilium vocati,  
morbum oppido periculosum, quin  
capitalem fore, propinquis & ad-  
stantibus dixerant. Putarant enim  
hepar ipsum laborare & sphacelosa  
tantum non corruptione esse infe-  
ctum, ideoque, præter interna putre-  
dini resistentia & analeptica, exterius

*Hepatitis sine dolore sensu.*



epithema ex aceto cum lithargyrio cocto, adjecta camphora, apposuerant. Ego vero candide ipsis edixi, non adeo perniciosum esse, ut crederent, morbum, sed partes tantum externas hepatis connexas, non hepar ipsum, pati. Removere hinc iussi primum epithema & apponere lateri dolenti, vesicam cum decocto emolliente. Interius præbui pulverem supra descriptum, nec non mixturam, pro potu ptisanam, item emulsionem ex semine cardui Mariæ, melonum, cucurbitæ & papaveris albi, cum aquis diapnoicis & analepticis, nec non infusum theiforme ex herba veronica, floribus chamomillæ, summitatibus milletolii & semine fœniculi. Usurpatis his, lenis mador in universo corpore obortus, cum symptomatum levamine, undecimo die sudor manavit largus & alvus quoque, sub dolore stricta & vix clystere soluta, sponte aliquoties deiecit. Atque sic æger ex voto convaleuit, adhuc vivens & optime valens. Dedit autem hic casus mihi occasionem scribendi dissertationem academicam, *de hepatis inflammatione vera rarissima spuria frequentissima*, quam epicriseos loco legendam commendo.

## C A P U T VIII.

## De febre Nephritica.

## Theses Pathologicæ.

## §. I.

Descriptio  
nephritidis.

**O**Ritur nephritica febris ex renum inflammatione, juncta cum dolore ardente fixo in lumbis, mictu difficili & aliis pathematibus spasmodicis infimi ventris.

## §. II.

Simplex  
seuior.

Prout autem inflammatio levior est, vel gravior, sive profundior, differunt etiam symptomata aliusque morbi est eventus. Scilicet quando extima & propria renum tunica, innueneris capillaribus vasculis, ex emulgentibus renum vasis prodeuntibus,

perfusa inflammationem patitur, levior hæc est, superficialis & erysipelatis speciem habet, stipatur tamen dolore ardente fixo, acuto, cum pulsu celeri, duro, siti, mictu ardente, urina tenui, cruda & convenienti medicina, cum regimine leni diaphoretico, citra suppurationem, brevi tempore discutitur.

## §. III.

Quando vero inflammatio profundior, febris etiam vehementior, dolor in lumbis ardens diuturnior, mictus difficilior, alvus strictior & præcordiorum anxietas atque angustia major, urina cruda alba secedente. Quod si autem hic dolor ad decimum quartum usque diem persistit, suppurascere incipit, tumque haud fecus ac in aliis inflammationibus in pus mutatis, dolor mitior fit & conquiescit, urina autem prodire solet admodum saturata cum crasso sedimento, quod partim ex purulenta materia, partim muco tartareo conflatum est. Quin sæpe inflammatio tam profunda & inde oriunda exulceratio tanta est, ut per plures annos duret, & successive totam renum substantiam consumat atque depascat, tandemque macie & febre hæctica ægri moriantur, ac post mortem, renis loco, nil quam sacculus reperiatur plenus pure. Quod si perumpit & in cavitatem pelvis delabitur, incredibiles, uti notavimus, facit ante mortem dolores & urinæ retentionem, ob vesicam, ceu partem nervosam & exquisiti sensus ab incumbente pure corrosam, & vehementi spasmu affectam.

## §. IV.

Deinceps datur febris nephritica brevis, & quandoque tantum diaria, quæ cum horrore, dorsi, & partium extremarum rigore incipit, postea cum dolore lumborum & dorsi ardente, cardialgica ventriculi, & alvi strictura decurrit, & tandem sola diaphoresi, & perspiratione aucta, intra 24. horas, sæpe solvitur, secedente per urinam sabulo crasso. Fre-

Gravior  
in ulcus  
transf  
iens.

Brevis  
ex spasmu  
re-

quens



quens hic affectus sanguine plenis, maxime feminis post quinquagesimum annum, & a sola refrigeratione dorsif, præsertim lumborum inducitur. Ibi enim renes antè minus integumentis & tantum musculis transversi sunt obtekti, propterea ex facili frigus penetrat & subjacentibus hisce partibus spasticam infert stricturem. Igitur febris hæc magis est a spasmò, quam inflammatione, & ideo facile etiam converso ab interioribus ad exteriora sanguinis motu, & perspiratione revocata, iterum dissipatur. Quod verò renes spasticis stricturis pateant, ex eo facile concludendum, quod plexus nervorum ex pari octavo & intercostali, renalis dictus, ipsam renum substantiam ingreditur & non modo vasis sanguiferis, sed & ductibus urinariis, tonum, sensum & motum largitur. Et quia idem hic plexus, per ganglion connectitur cum plexu mesenterico & intestinorum, cum stomachi quoque nervis; hinc est, quod renibus, magis adhuc ureteribus, dolore & spasmò affectis, stricture cardialgicæ etiam in ventriculo & intestinis oboriantur, flatus in stomachum cum ructuum elisione urgeantur, & alvus stringatur, quin ob inflatum ventriculum diaphragma prematur & spirandi angustia cum anxia præcordiorum constrictione inducatur. Ne dicam tenues, limpidas & aquosas urinas, quæ sub spasmis minguntur, luculenter testari, quod tubuli illi, qui in renibus liquorem urinosum sequestrant & ad pelvim ducunt, spasmò, seu motu contractili afficiantur.

§. V.

*Calculosa  
loja  
gravis.*

Aliud febris nephriticæ genus, vehemens & ardentem tantum non mentiens, oritur a calculo. Hic quidem quamdiu in rene quiescit, nihil incommodi affert; ubi vero loco movetur & transitum per pelvim ac ureteres molitur, spasmos & dolores gravissimos, febrem & supra memorata inducit symptomata, quæ etiam non

prius quiescunt, quam in vesicam fuerit delatus. Jungitur autem calculosa hæc nephritis sæpius non modo cum dysuria, sed & nonnunquam periculosa urinæ suppressione. Neque etiam prætereundum, non facile calculosam nephritidem gigni, nisi præcesserit nephritis simplex inflammatoria, vel etiam purulenta, in vasculosa & canaliculosa renum substantia, post quam urina extravasata & stagnans, vel puri commixta, sensim dimittit terreas moleculas, e quarum coalitu tandem succrescunt calculi.

§. VI.

Omnis autem nephritica febris & passio, eodem modo ac aliæ febres incipit cum horrore & frigore, quod maxime ex spina dorsali & primis lumborum vertebriis sumit initium, sub quo sanguinis motus convertitur ad interiora, ipsumque cor, eoque a copioso sanguine laceffito, systole postea sequitur celerior. Atque adeo facile innotescit ratio, quare renibus & iis, qui ad nephritidem, sive simplicem, sive calculosam, sive spasmodicam, proclives, nihil sit tam infensum, quam frigus hibernum, regnante vento boreali, aspero & rigido, quo improvide admissio, passionibus hæc promte vel inducuntur, vel recrudescunt illico. Ad ingenerandas vero nephriticas has passionibus & febres disponunt multa, tanto magis quando plura simul concurrunt atque in unum effectum conspirant. Primum inter hæc merito obtinet locum plethora, præsertim in corporibus spongiosis & copiosis exilibus vasis dotatis, item in iis, qui evacuationibus sanguinis spontaneis criticis, vel artificialibus opportuni & assueti, si illæ suppressæ, vel ob ætatis rationem enianferunt, hæc autem aliquamdiu intermissæ. In his expedita mali nephritici genesis, quando conveniunt simul hæreditaria dispositio, vita sedentaria, nimia stomachi repletio, cibi flatulenti, potus crassus non diluens, aut nimis spirituosus, nec non impenior animi moeror.



Tanto magis & citius excluditur, quando plethorica ejusmodi crasso & copioso sanguine farta corpora, vehementi & inconsueto motu, succufante equitatione aut vectura in curru agitantur, vel etiam medicamenta calidiora, urinam moventia, terebinthinata, juniperina, succinata, vel etiam purgantia aloetica, liberalius assumuntur, quibus sanguis crassus cum impetu in subtiles & ultimas renum arteriolas urgetur, ibique subsistens, inflammationem efficit.

## §. VII.

Cur. si-  
nistrum  
renem  
afficiat.

Quod autem sinister ren plustentetur nephriticis passionibus ac dexter, id tribuendum esse videtur tum quod ipse non tam bene tectus & a frigore munitus est, ac dexter, qui sub hepate delitescit, tum quod flexura coli ei proxime adjacet, quæ, uti sæpius quam alibi sit, a flatibus incarceratis distenta, renem & vascula ipsius sanguifera comprimit, ut difficilior fiat per vasa emulgentia sanguinis circuitus, & ab hoc dependens urinæ secretio. Atque hinc etiam est, quod, qui calculi renalis doloribus obnoxii frequentius, insultum eorum illico experiantur, si cibos lentos, & crassos, aut alia flatu procreantia assumerint.

## Curatio.

## Cum cautelis &amp; Observationibus clinicis.

## §. I.

Veterum  
metho-  
dus me-  
dendi.

Quam Veteres servarint in curanda nephritide medendi methodum tradit Hippocrates de intern. affect. pag. 217. si, inquit, *urina prodit velut a carnibus bubulis assatis succus, ex renibus ulceratis, dolore lumborum & vesicæ, mox intensiori, & qui simul descendit ad imum ventrem, hanc insinuat curam: multa calida lavato & tepesfactoria ad dolentem maxime locum adhibeto & forbitione utatur & farina cocta, melle affuso, & reliquo victu utatur quam maxime per alvum sece-*

*dente & vinum bibat album Mende-  
sum, mellei coloris, aut aliud album  
jucundissimum, probe temperatum. Pro  
temporis opportunitate serum & lac bi-  
bat, serum quidem ad purgationem,  
lactis autem potum faciat in tempore  
per 45. dies. Hac si ita feceris, mor-  
bum in melius dispones. Eundem fere  
curandi modum proponit Celsus lib. 4.  
cap. 10. oportet, ait, ubi renes male ha-  
bent diu, conquirere, cubare molliter,  
solvere alvum, si aliter non respondet,  
etiam ducere, sæpe desiderare in aqua  
calida, neque cibum, neque potionem  
frigidam assumere, abstinere ab omni-  
bus falsis, acris, acidis, pomis, libe-  
raliter bibere. Deinde ad dolorem le-  
vandum, immo si renes exulcerati  
sunt, semina cucumeris, nucleorum  
pinearum, crocum cum lacte deco-  
ctum commendat.*

## §. II.

Hæc Veterum curandi ratio ita est <sup>Congrua  
præsi-  
dia.</sup> comparata, ut nephritico morbo admodum sit accommodata ac nil fere in eadem desiderari possit, quum omnia eo conspirent, ut vascula & fibræ tensæ, duræ & a spasmō constrictæ relaxentur & moliantur, humores stagnantes crassi diluantur & obstructiones solvantur. Nos etiam hanc methodum deprehendimus probatissimam, in eaque perficienda his potissimum usi sumus auxiliis, sero lactis dulcis, vel lacte asinino acidulis Selteranis remixto, item ptisana cum lacte confusa & potui data, emulsionibus ex amygdalis amaris, nucleis persicorum, semine cucumeris, cucurbitæ cum aquis florum acaciæ, ulmariae, cerasorum nigrorum; pulveribus ex oculis cancrorum, cornu cervi philosophice præparato, lapide manati & nitro compositis, cum supra dictis, vehiculi loco, sumtis. Infusum quoque herbæ thee, propter blandam suam adstrictionem in omnibus renum affectibus, præservandi & curandi scopo, egregiæ est virtutis & ceu specificum olim maximi semper fuit habitum.

## §. III.



§. III.

Evolutio-  
nis ne-  
phriti-  
dis me-  
dicatio.

Interim quum variæ sint nephriticæ hujus febris species & causæ, diversi etiam gradus; hinc diversimode etiam adornanda erit cura. Itaque in levi illa & diaria sæpe, ex solo frigore & spasmo, renum dolore, nihil aliud agendum, quam ut sacculis lateribusque calefactis, & dorsi, & abdominis regio, & ipsi quoque pedes, probe foveantur exterius, interius vero infusum thee, aut theiforme ex floribus chamomillæ, summitatibus millefolii, semine sceniculi, successive, sed largiter, corpore simul ad sudorem disposito, bibet & alvus stricta validius expediatur clystere ex lacte, nitro, melle & oleo. Inprimis ad dolores mulcendos, & diaphoresin eliciendam spectatæ virtutis liquor noster anodynus mineralis, sitres ipsius partes, cum una liquoris bezoardici *Bussii* parte remisceantur, & bihorio quovis 20. guttæ cum potu calido porrigantur.

§. IV.

Ingravi-  
viores  
asur-  
pando.

Quando dolor ardens & fixus in lumbis diutius tenet, & indicium est, vasa renalia sanguine crasso facta esse atque obstructa, cito solvenda plethora per venæsectionem in pede, vel in dispositis ad hæmorrhoidalem fluxum hirudinum appositionem ad anum. Postea interius danda, quæ æstum sanguinis temperant & liberiores humorum circuitum cum diaphoresi procurant, quo nomine emulsiva, demulcentia, diluentia, antispasmodica, pulveres diaphoretici cum cinnabari & nitro, omnibus aliis palmam præripiunt.

§. V.

Exulsa-  
tota  
gravidia

Ubi vero inflammatio in abscessum transit, ex puris mictu & dysuria cognoscendum, medicatio eo dirigenda, ut pus acre temperetur, abstergatur & etiam fiat consolidatio. Ad hoc perficiendum laudata virtus lactis, vel feri lactis, cum herbis vulnerariis, floribus hyperici, summitatibus millefolii, herba veronicæ, scabiosæ he-

deræ terrestris, consolidæ Saracenicæ & saniculæ decocti. Tum quoque utiles emulsiones ex seminibus quatuor frigidis & amygdalis, quibus adjicienda sufficiens quantitas seminis lycopodii, cujus magna vis est dolorem leniens, exsiccans & consolidans. Sunt etiam qui in renum vitiis multum tribuunt gummi cerasorum in aqua, vel sero lactis soluto & crebrius assumto. In illo etiam renum cum exulceratione vitio, quod plerumque in iis, qui diutius calculo laborarunt præsto est, ab omnibus acris, calidis, spirituosis, diureticis & lithontripticis est cavendum, quia novam facile inflammationem, vel etiam mictum cruentum, excitare possunt. Præstantissimi vero tum usus mel Prussicum album, præsertim cum pulvere nucistæ remixtum & loco sacchari in decocto veronicæ sumtum, vel etiam sirupus dialthæa *Fernelii*, qui certe ceu specificum, in renum labe merito commendari dignus. Præterea malvaticum juniperinum, quod ex vino Malvatico & rob juniperi paratur, in antiquis renum ulceribus, a senibus præsertim, ad aliquot cochlearia, post cibum, sumitur cum fructu.

§. VI.

In nephritide tam inflammatoria, quam calculosa, primum & princeps auxilium in clysteribus demulcentibus ano infusis, qui sine stimulo salino & purgante parandi, ex lacte, sero lactis, vel pura aqua dulci cum floribus sambuci & chamomillæ decocta, adjectis binis vel una tantum uncia sirupi de althæa *Fernelii* & drachma una nitri. Diutius enim enemata debent retineri, quo spasmos laxent & flatibus sic exitum parent.

§. VII.

Quum magna sit consensio & communicatio inter renes, colon intestinum ipsumque ventriculum; adeo ut unius vitium facile transeat & communicetur cum altero, atque etiam inflatio coli, circumflexæ potissimum.

Clyster  
respon-  
sioni.

Flatibus  
discu-  
tiendi.



num ipsius partis circa sinistrum renem, comprimendo hunc, non modo ad ipsius morbos disponat, sed & eos proritet atque exacerbet, hinc tam ad præservandum, quam mitigandum quod in renibus consistit vitium, operam dare oportet Medicum, ut omnia ex iis, quæ flatus cient, & alvum stringente facultate pollent, evitentur, contra quæ eam lubricam fervant, uti oleum amygdalarum dulcium, flatibus etiam discutiendis dicata sunt, usurpentur, e quibus instar omnium est semen cymini cum saccharo obductum & frequentius deglutitum.

## §. VIII.

*Externæ cum di-  
stinctio-  
ne ad-  
hibenda.* Ad externorum usum quod attinet, si ipsa febris cum dolore acuto adest, non facile ego suaserim linimenta pingua, neque etiam applicationem spiritus vini camphorati, multo minus balneum, sed fots temperate calidus, cum vesica semirepleta decocto florum emollientium cum croco ex lacte, longe erit utilior. Si autem febris abest, & labes exulcerationis postea metuenda, vidi emplastrum spermatis ranarum, sumendo uncias ipsius duas, addendo sacchari saturni, camphoræ ana drachmam, olei hyoscyami drachmas duas, dolorem mitigando eximie profuisse.

## §. IX.

*Minera-  
les aquæ  
cum di-  
stinctio-  
ne pro-  
fuit.* Ut ut aquarum mineralium usus in omnibus fere renum vitiis opem spondeat eximiam, sed tamen quum magna sit in hisce ingredientium diversitas, non omnes promiscue in usum trahere convenit, sed utique selectus habendus. Carolinæ thermæ, si in renibus ulcus, propter sal calcarium purgans & diureticum quo pollent minus quadrant, quia nimium abstergendo, cavitatem faciunt majorem. Provide quoque & caute agendum cum acidulis efficacioribus Pyramontanis & Egranis. Emsenses vero thermæ aquæ & ex acidulis Selteranæ, propter sal tenerum alcali & subtilitatem aquarum, magis condu-

cunt. Semper tamen tutior est & acidularum & thermarum usus, si cum dimidia parte lactis mixtæ, usurpentur. Inprimis præstat ad abstergendas exulceratas renum partes, Selteranam, primum per 14. dies solam, postea adhuc per mensem lacti nuptam caprillo, potare & traumatica, decoctum, sive essentiam, interponere.

## Enarrationes Morborum.

## OBSERVATIO I.

Serenissima Princeps, sexagenaria *Nephritis ex-  
ulcerata  
ta sa-  
nata.* ferme, mollioris & sanguineæ texturæ, per aliquot annos nil nisi vinum, ac interdum aquam spirituosam, carminativam, quam vocant Aquavit, bibens, subinde tamen copiose infusum thee potans, ante aliquot annos, post præcedentem corporis exæstuationem per motum, incidit primum in dolorem dorsi & hypochondrii sinistri, cum horrida refrigeratione, febre, anxietate, inquietudine, strictura alvi, dolore in sinistro rene, fixo, subinde tamen de vehementia remittente, sed versus noctem semper exacerbato, sub quo urinæ tenues & albæ secesserunt. Perseverarunt hæc symptomata usque ad undecimum diem, quo tandem mitior dolor redditus & urina postea valde turbida cum crasso multo sedimento & brun-coloris emissa. Medicus disciplinæ meæ alumnus, non destitit per morbi decursum idoneis remediis succurrere & potissimum emulsiones demulcentes & refrigerantes, pulveres temperate diaphoreticos & nitrosos, nec non oleum amygdalarum dulcium interne, & externe fomenta ex emollientibus & unguenta ex oleo amygdalarum dulcium cum camphora in usum vocavit. Ad impediendam quoque ulcerationis incrementum & consolidationem promovendam, suavit postea infusa herbarum vulnerariarum, ut alchymillæ, veronicæ, sum-



mitatum millefolii, florum hyperici, cum lacte per mensem & longius potanda, ac vere demum consilium dedit, ut acidulas Selteranas per sex hebdomades, sub debito regimine biberet. Quibus per Dei gratiam perfecte convaluit Serenissima ægra & etiamnum in exoptata vivit incolumitate.

*Epicrisis.*

Hæc inflammatio sine dubio ab obstructione vasorum minimorum in renibus fuit suborta, quæ in plethoricis, sicut omnes inflammationes, quam facile fieri potest, quando sanguis per motum, aut calidiora in extremitates arteriolarum, qui lympham vel succum nutritium vehunt, urgetur & accedit lumborum refrigeratio. Non facile autem talis inflammatio, præsertim si paullo profundior discutitur, sed in suppurationem abit, id quod certum requirit tempus. Deinde etiam illud in usum practicum hinc discendum, quod cito suppurationi factæ succurrendum sit blandioribus vulnerariis, ne scirrhum, quod longiorem suppurationem sequitur, gignatur, & ulcus postea fiat insanabile.

OBSERVATIO II.

*Nephritis calculosa.* Vir sanguineus, forma venustus, veneris vero & vini potator, natus ex familia nephritidi obnoxia, vigesimo octavo ætatis suæ anno, febre admodum ardente, cum vehemendi dolore in regione lumbari lateris sinistri affectus est, adfuerunt simul cruciatus diri in abdomine, alvus adstricta, ructus crebri, mingendi difficultas & urina exiit pauca, album deponens sedimentum. Medicus consultus febrem ardentem & colicam convulsivam esse putavit, ideoque venam secare iussit & clysteres applicare. Ego vero in auxilium vocatus, quum æger de colore instar pali circa renem sinistram infixi & spasmodico cruris sinistri contractione conquereretur, quæ-

sivi, num olim laborarit calculo? respondit: non, sed ex familia eorum esse, qui calculi cruciatibus obnoxii. Dixi igitur, nephritidem esse calculosam, cum intestinorum doloribus, & exhibui emulsionem ex nucleis persicorum, cerasorum, cucurbitæ, milii solis, papaveris albi, cum aqua graminis, perlarum matre, nitro, & sirupo papaveris albi adjecto. Exterius loco dolenti admoveere iussi vesicam oleo liliorum alborum & chamomillæ cocto plenam & ternis singulis horis injicere clyisma ex sero lactis, oleo amygdalarum dulcium, sirupo dialthæa *Fernelii* & nitro. His alvus soluta, ructus molestissimi intercepti & ventris tormina nonnihil sedata, sed calculus gravissimis doloribus descendit in urethres, ad quos tantisper componendos & spasticam crispaturam in ureteribus remittendam dedi liquorem meum anodynum mineralem cum aliquot guttis laudani opiatum liquidum, quibus in vesicam dimissus & inde etiam ad urethram delatus calculus, ob magnitudinem ibi obhærescens ac instrumenti ope eximendus, sub qua operatione meatus urinarius læsus quodammodo, ut dein ob cicatricem hunc angustantem, per omnem vitam mictio facta difficilior. Ad præservationem igitur postea suam primum potum infusi millefolii, dein acidularum Selteranarum cum vino & usum crebriorem pulveris ex magnesia & nitro. Et his jam per aliquot annos a calculi doloribus degit immunis.

*Epicrisis.*

I. Quoniam doloribus ex calculo non modo febris valde ardens, sed & dolores intestinorum, cum firma alvi obstructione, & ructibus junguntur; hinc in nullo morbo diagnosticam fallax, quam in hoc, præsertim si ægri antea nunquam insultum ipsius experti. Novi calculosam passionem pro ardente febre; pro iliaca passione, pro colica convulsiva, hæmorrhoidali, vel flatulenta, fuisse hæ-



habitam, donec calculi proventus errorem argueret. Interim licite minus exquisitè cognoscatur causa, in remediis tamen propinandis ea propter non multum errabit artifex, quum in omnibus his, non alia possint usurpari, quam demulcentia, sedativa, fibras rigidas laxantia & spasmos remittentia. Quo magis patet, eandem methodum eademque remedia, pluribus morbis sanandis esse posse accommoda.

II. Febris vehemens inflammatoria ex calculo sine subsequente inflammatione esse potest. Sed causa febris tum potius spasmus, quam obstructio vasculorum ab incarcerato sanguine; spasmus enim facilius solvitur, quam obstructio discutitur.

III. Ad arcendam calculosam nephritidem nihil utilius infuso vulnerario, antispasmodicæ simul virtutis, ejus generis est ex millefolio. Selterana dein pota aqua abstergit mucum viscidum & prima calculi rudimenta colliquat sensim ac evehit. Alvus autem laxa, ne ex intestinis male afficiatur ren, prohibet, licet eadem neutiquam movenda sit pilulis, præsertim quæ aloen habent, quibus in sanguineis, præter dolorem calculosum, & colicus, & hæmorrhoidalis, suscitari potest.

### OBSERVATIO III.

*Nephrit. sis male tractata functa.* Femina quadraginta circiter annorum, sanguine & succis plena, facie florida, venæsectioni antea assueta fuerat, a biennio vero omiserat & tamen sedentariam coluerat vitam, plenæ ac vinosæ diætæ indulserat, neque sufficientem uteri purgationem habuerat. Hæc corripiebatur fixo in regione sinistra lumbari dolore, qui per aliquot dies cum virium prostratione, nausea & alvi adstrictione insistebat. Ad hunc leniendum Medicus præbebat pulveres ex antimonio diaphoretico, lapidibus cancrorum & opiato sic dicto laudano, ita ut dosis

laudani haberet granum, eoque obtinebat, ut dolor redderetur obtusior, alvus vero magis obstiparetur, urina supprimeretur, spiritus arctius mearet, vigilia esset assidua & præcordia impensius angerentur. Nihilo tamen secius insistebat papaveraceorum usu & emulsionem non modo cum larga seminis papaveris quantitate, sed & pilulas ex diureticis & opio præbebat. Licet autem his dolorem abigere & somnum inducere niteretur, neutrum tamen obtinebat, sed symptomata potius cum spirandi difficultate ingravescebant, abdomen durum reddebatur actensum & accedebat quoque febris. Alius igitur in consilium vocabatur Medicus, qui ad alvum expediendam & respirationem facilitandam, exhibebat decoctum ex dulcibus, emollientibus, foliis sennæ sine stipitibus atque rhabarbaro, cui ad sitim extinguendam nonnihil spiritus nitri infillatum. Sed omnia frustra. Ægra enim corripiebatur horrore frequenti cum interiorum ardore, subsequebatur syncope cum levi delirio, quumque Medicus sub his emetici granis daret, operatio nulla sequuta, & duabus ab eo assumpto horis, ægra expiravit.

#### Epicrisis.

Imprudenter medicationis hoc est exemplum, qua morbus benignus, in capitalem plane conversus. Expensis enim probe circumstantiis, facile judicandum, malum hoc a nimia sanguinis redundantia in femina alias vegeta, ejusdemque stagnatione in vasis majoribus circa lumbos, nephritidem faciente, ortum traxisse, omneque damnum tempestitiva liberali sanguinis missione, & alvi apertione per clysteres, mature potuisse præscindi.

### OBSERVATIO IV.

Vir quadragenarius, cholericusanguineus, multorum liberorum pater, ac ob mercaturæ negotia, multum

*Nephritica febris ex calculo*



in itineribus versans, postquam autumnalem sanguinis missionem iusto diutius distulisset & novissime curru noctu & interdiu vectus, corporis & succussionem & refrigerationem fuisset passus, domum delatus vespere correptus est horrore, quem excepit æstus & dolor acutissimus in sinistro latere supra ischii os, prope dorsifspinam, cum alvi adstrictione, inquietudine, siti, præcordiorum stricture & ructuum elisione, urina non quidem difficulter, sed alba & tenui secedente. Medicus ordinarius suavit clysterum oleosorum usum & potum olei amygdalarum dulcium cum iusculis. Delinita inde tantisper dolorum atrocitas, mane ob alvum strictiorem ac sponte nec flatus, nec stercora dimittentem, tormina quoque & murmura in abdomine, pilulas purgantes cum croco deglutire iussit, quibus non sine prægressis cruciatibus alvus quidem soluta, dolor autem fixus circa renem sinistram exacerbatus, inquietudo cum calore adaucta, æger assumpta illico revomit corpusque admodum jectigavit, alvo simul denuo arctissime clausa. Ego in auxilium vocatus, ex dolore fixo in renis regione & subinde ad femur usque excurrente cum aliquali hujus rigore, nephriticam febrem esse conjeci, ac propterea primo omnium sanguinem e vena brachii mittere, dein alvo clysterem pægoricum domesticum cum nitro injicere & interius liquorem meum anodynum mineralem, alternatim cum pulvere temperante salino-nitroso præbere iussi, dato simul pro potu decocto avenaceo, nonnunquam cum oleo amygdalarum dulcium, nonnunquam brodium carnis cum citri succo. His æstus restinctus, vomitus compositus, dolor quoque conquievit, per intervalla tamen, vespere præcipue, recruduit. Hinc locum dolentem unguento dialthæa, populeonis, cum oleo juniperi subinde fovere ac bis quotidie liquorem salino-alkalinum ac nitrosam sumere suasi, quibus etiam

effectum, ut post septimum diem alvus sponte solveretur, cutis antea arida madesceret, pulsus mollesceret, urina, sub dolore pellucida, crassa nunc succederet ac sedimentum poneret. Licet autem tunc nec sabulum, nec calculus prodiret, nephriticum tamen morbum fuisse patuit postea, luculentius. Quum enim æger ad vernalem sanguinis missionem sese accingeret & ob id alvum prius purgandi causa decoctum mannatum cum cremore & terra foliata tartari usurparet, inde non modo efficaciter alvus est subducta, sed & post perpeßos vespere leniores in lumbari regione versus pubem excurrentes dolores, mane cum urinam mitteret ex improvviso simul etiam excrevit calculum oblongum, figuræ pyramidalis fere diametri lentis, basi durum, superius autem friabilem atque porosum.

#### *Epicrisis.*

Calculus in renum substantia occultatus, paullo majorem & durior, febrem inflammatoriam cum acerbis doloribus & spasticis symptomatibus, excitare posse, hæc docet historia. Neque tamen id fit, quod irritando vel distendendo partes nervosas spasmos facit, sed quia comprimendo canaliculosam renum substantiam, obstaculum ponit liberiori sanguinis per eorum compagem progressui, & quando tum sanguis abundans cum vehementia per motum succussatorium vehementem in curru autem quo, impetuose ad renes pellitur, nec tamen per venas omnis æque expedite iterum reducit, gignitur demum inflammatio. Illa enim dorso sub vectura aut equitatione succussatio, sanguinem omnino impetuosius agit ad renes; unde novi, feminas curru vectas ad crebriorem urinæ urgeri missionem. Novi etiam validiori hoc motu calculum in renibus quiescentem, esse loco trusum & in urethras cum dolore translatus. In cura autem sic exclusæ nephriticæ febris, optimum & præsentissimum auxilium



in sanguinis subtractione, cuius tamen quantitas merito Medici iudicio relinquenda. Neque etiam ego melius novi in plethoricis renum passionibus obnoxius præservativum, quam venæsectionem tempestive & cum iudicio institutam. Atque hinc petenda est ratio, quod notante dudum *Hippocrate*, ab inflammatoriis ejusmodi febribus, nephriticis, peripneumoniacis & phreneticis, liberi maneant, quibus hæmorrhoidas recte fluunt.

## OBSERVATIO V.

*Nephritis & hæmorrhoidalis dolor cum nephrosi calculorum excretionem* Illustrissimus Comes, 40. circiter annos habens, optimæ & sanguinæ constitutionis, bis quotannis hæmorrhoidum, pariori tamen fluxui obnoxius, in intensum dorsi & abdominis incidit dolorem, ut erectus stare non posset, sed corpus semper incurvare necessum haberet. Aderat simul creber ad mingendum stimulus, & urina secedebat parcior. Medicus huc usque ordinarius ansam hujus doloris esse voluit sanguinem per ani venas exitum molientem & in tunicis intestinalibus stagnantem, eaque propter venam in pede aliquoties secare jussit, pulverem antispasmodicum exhibuit & ad proritandum hæmorrhoidum stillicidium, crebriorem pilularum ad exemplar Beccherianum paratarum usum suavit. Sed inde nihil accessit levaminis, dolores non modo remanserunt, sed & periodice sæpe cum extremorum frigore & subsequente totius corporis æstu, præsertim in regione lumbari, recurrerunt. Adiit igitur Carolinas thermas, ibique me in consilium accivit. Quumque ex sedimento urinæ mucoso & quodammodo tartareo conjicerem, illustrissimum ægrum non esse liberum a calculo, ut temperatas tantum thermales aquas biberet consilium dedi. Potis his optime habuit, & quod mirandum, post potum plures numero, magnitudinis variæ, lapillos subci-

nericio, leves, cum urina excrevit, ut numerus eorum intra aliquot hebdomades, vel ad quadringentos accederet. Postea successive pauciores secesserunt ac quatrIduo ante finem curæ nullus amplius prodiit. Interim licet sub hoc potu dolores essent mitissimi, in itinere tamen recruduerunt acerbiores, nec per annum postea penitus discesserunt, donec usurpatis infusis herbarum vulnerariarum, liquore anodyno minerali, & ad roboranda sub doloribus afflicta membra, Tœplices thermis, liberaretur tam a dorsi, quam renum calculosis passionibus.

*Epicrisis.*

Sanguinæ & formæ venustæ personæ, si corpus jam omne nactum augmentum, ex facili patent internis partium inflammationibus, nec non sanguinis evacuationibus, præsertim per sedis venas. Quæ sanguinis excretio, si deficit, haud raro renum inflammatio & calculosa dispositio excipit. Hinc perite *Hippocrates Sect. 2. aph. 11.* scribit: nephriticis si hæmorrhoides fluunt, bonum. In nostro illustrissimo ægro & hæmorrhoidalis intestinorum, & calculis renum dolor fuit conjunctus, quod haud infrequens est. Thermarum autem Carolinarum ea virtus est atque efficacia, ut renes valide expurgent a sabulosis & tartareis sordibus. Sed cautus sit earum usus, si magna in renibus exulceratio, ne irritando eandem augeant majoremque faciant cavitationem. Optimo consilio in nostro ægro post thermalis aquæ potum in usum vocata decocta & infusa vulneraria, cum pulveribus nitrosis & liquore anodyno minerali. Renes enim male affecti ad consolidationem optime ferunt lenem adstrictionem. Unde ab auctoribus omnes fere herbæ vulnerariæ, in morbis ex renum vitio, quam maxime celebrantur.



## CAPUT IX.

## De Inflammatione Vesicæ.

## Theses Pathologicæ.

## §. I.

Inflam-  
mata  
vesicæ  
partes  
gno-  
mica si-  
gna.

**V**ESICÆ compages, ex quatuor tuni-  
cis, una a peritonæo, altera  
musculari, tertia nervosa, cui quar-  
ta mucosa seu villosa obducta, si spas-  
mo & inflammatione afficitur, haud  
secus ac si ventriculi ejusdem texturæ  
corpus, aut aliæ nervosæ partes ean-  
dem patiuntur, & multis & gravibus  
stipatur symptomatibus, licet aucto-  
res medici recentiores paucam & vix  
ullam hujus passionis injiciant men-  
tionem. Pathognomonica autem &  
essentialia ipsius signa sunt hæc: do-  
lor acutus, ardens & pressorius in  
regione pubis, cum febre, perpetuo  
tenesmo sive desidendi stimulo, &  
continuo ad mingendum conatu.

## §. II.

Causa in-  
flamma-  
tionis.

Inflammationis hujus proxima cau-  
sa sanguinis vel etiam feri impuri in  
extremitatibus arteriolarum stasis est,  
qua sanguifera per vesicæ tunicas di-  
scurrentia vasa, a sanguine copiosius  
congesto nimium replentur, disten-  
duntur & nervosa exquisitissimæ sen-  
sationis tunica, in vehementem spas-  
mum abripitur, ex quo reliquorum  
symptomatum origo.

## §. III.

Item  
sympto-  
matum

Nimirum gravia illa pathemata,  
quæ inflammationi vesicæ juncta,  
dolor ardens pressotius, ani constri-  
ctio, tenesmus, difficilis & continuo  
urgens mictus, borborygmi, ventris  
tormina, summa præcordiorum an-  
xietas, ægra spiratio, inappetentia,  
mala digestio, vomitus, extremorum  
frigus, pulsus durus, inæqualis, con-  
tractus, celer, inquietudo, quandoq;  
etiam convulsio, unice pendent a  
spasmo in vesica, qui, si vehementior,  
ob nervorum communionem, non  
modo rectum, sed & reliqua intesti-

na, ventriculum & diaphragma, ip-  
sas cerebri & spinalis medullæ mem-  
branas, cum universo nervosarum  
partium systemate, in similes spasti-  
cos & constrictorios motus abripit.  
Quam intima enim stomacho cum ve-  
sica intercedat consensio, notavit jam  
Celsus lib. 7. cap. 27. ita habens: non  
ignoramus, orto vesicæ ulcere, sæpe  
affici stomachum, cui cum vesica quod-  
dam consortium est, ex quo fit, ut ne-  
que retineatur cibus, neque, si quis  
contentus est, concoquatur, neque cor-  
pus alatur.

## §. IV.

Non tamen semper unius ejusdem-  
que est vehementiæ, sed quandoque  
levior, quandoque gravior. Levior  
illa superficialis magis est, spuria  
quasi & rheumatica, vel erysipelaceæ  
species, ac propterea brevi etiam &  
facilius ipsa febris per diaphoresin tol-  
litur. Oritur etiam non tam a san-  
guine, sed potius a sero falso, acri,  
impuro inter vascula & fibrillulas  
nervæ hærente. Hinc familiaris  
quam maxime senibus, scorbuticis,  
arthriticis, rheumaticis, hemicra-  
nicis, purpura scorbutica laboranti-  
bus atque cachecticis, tum maxime,  
quando refrigeratione inferiorum a  
rigido & boreali aeris statu, perspi-  
ratio intercipitur ac inoffensus sangui-  
nis & humorum per minimos tubulos  
circuitus sistitur. Quæ autem gravior,  
profundior est, a crasso & impuro  
sanguine in vesicæ vasis uberius colle-  
cto provenit, plethorico-cacochymi-  
cos hinc frequentius infestat, atro-  
ciora habet symptomata & perquam  
facile in suppurationem, exulcera-  
tionem vel sphacelum funestum plane  
transit.

Levior  
est vel  
gravior.

## §. V.

Ex iis quæ ad ingenerandam vesicæ  
inflammationem conferunt, sunt ma-  
xime critica sanguinis evacuationes,  
per menses, vel hæmorrhoides defi-  
cientes, vel plane suppressæ. Magna  
enim consensio vesicæ & intestini re-  
cti, alterutra parte male & spasmo  
vel

Oritur  
a sup-  
pressis  
san-  
guinis  
evacua-  
tionibus.



vel inflammatione affecta, propter hæmorrhoidalia tam interna, quam potissimum externa vasa, e quibus, notante *Vesalio lib. 3. cap. 9. de fabrica C. H. pag. 475.* rami, hypogastricæ propagines, ad vesicæ cervicem abeunt, unde etiam suppuratio & exulceratio ex ruptis sanguiferis vasculis in cervicē ut plurimum observatur magna. In primis in feminis, si, uti haud infrequens, & mensium hæmorrhoidum fluxum experiuntur, ac ille cessat, nec hic recte succedit, sanguis impetuose ruit ad vesicæ vasa & gravia symptomata, febrem, ulcerationem, purulentam mictionem, quandoque cruentam, dysuriam & alia plura incommoda adducit.

## §. VI.

*Nec non a gonorrhœa male tractata* Deinceps non raro inflammationem vesicæ infert gonorrhœa, præsertim virulenta, male per adstringentia, vel etiam nimis calida & acria pellen-  
tia tractata. Attenta enim observatione constat, gonorrhœam sæpius recurrentem, & perversa medicatione exceptam, abire in prostaticam, vesicularum seminalium & ipsius vesicæ ulcus. Prostratæ quippe glandulæ, quæ ut plurimum gonorrhœæ sedes, quando tumore, dolore, inflammatione, & suppuratione afficiuntur, facile labem communicant vesicæ collo proxime adjacenti, ut vitium latius serpat, de quo notabilis conferri meretur casus in *Medicin. nostræ consult. tom. V. Dec. I. cas. VIII. pag. 56. seqq.* Tum vero præter fluxum seminis ex urethra involuntarium, urina mingitur, quæ crassum, copiosum, mucilaginosum purulentum sedimentum ad fundum dimittit, quod ab urina separatum, & exsiccatum flammæ si in-jicitur, tetrum fœtorem, non secus ac sanguis combustus, spargit.

## §. VII.

*Eventu morbi.* De successu, & eventu morbi veritati, & experientiæ omnino congruum *Hippocr. effatum de prænot. pag. 464.* sic habens: *vesicæ duræ, & dolentes penitus quidem horrendæ sunt. & perni-*

*ciosæ; perniciosissima vero, quæ cum febre continua fiunt. Etenim dolores ab ipsis vesicis ad occidendum sufficiunt, & alvi non egerunt hoc tempore, nisi durum quoddam, & hoc coactæ. Solvit autem urina micta purulenta, quæ albam, ac levem subsidentiam habet. Si vero neque ab urina quicquam remiserit dolor, neque vesica molliatur & febris continua fuerit, in primis circuitibus morbi ægrum moriturum esse timor est. Quando autem inflammatio non tempestive discutitur, lentius aut citius necat. Qui cito ex sphacelo pereunt, ac uti testantur observationes anatomico-præcticae, vesica sphacelo affecta, vel vasa ipsius sanguifera varicosa, & nigro cruore facta reperiuntur. Tardius autem mors excipit, quando exulceratio succedit, ex mictu purulento cognoscenda, quæ tandem vel hæctico calore necat, vel latius semper intestinum rectum etiam exedit ac gangrenam inducit funestam.*

## §. VIII.

Interim non omnis urina turbida, & sub mictu difficili & ardore excreta, inflammata, aut exulcerata vesicæ est indicium. Id enim haud raro obvium in senibus, scorbuticis & qui dyscrasia humorum laborant, & accidit sine periculo. Quandoque etiam solus vesicæ spasmus, ab urina acri, calcula asperiori, aut collectione feri impuri in vasis vesicalibus, inductus insignem mucī quantitatem ex villosa tunica exprimit ac urinae insinuat. Neque minus vesicæ spasmus & dysuria sæpe comitatur febrem, quæ plerumque est scorbutica & exanthematica, cum purpura, vel maculis scorbuticis instar petechiarum, nec periculo vacat. Quin aliquoties in purpura scorbutica affectis observavi, quod impedita materiæ purpuracæ per improvidam refrigerationem excretionem, vel hac retropulsa eadem pathematata, spasmus nempe vesicæ ac difficilis mictus, accesserint, nullam aliam ob causam, quam quod constrictis a frigore



gore tubulis subcutaneis, motus sanguinis & humorum ab exterioribus ad interiora conversus, simulatq; recrementitia & acris illa materiæ nervosæ vesicæ illapsa.

Curatio.

§. I.

Spasmus  
vesicæ  
ex san-  
guine.

Nulli morbi difficilius curantur, quam qui in vesica consistunt. Est enim nervosa & exquisiti sensus pars, secundum Veterum loquendi morem frigida, & paucosanguine perfusa, ac urina perpetuo superne affluens consolidationem impendit, præsertim in senibus. Quare vesicæ vitia, uti spasmus, inflammatio, exulceratio, difficilis & dolorosus mictus, facilius arcentur, quam persanantur. Interim, quia spasmus vesicæ primam fere causam omnibus quæ ipsam infestant passionibus subministrat, præcipua utique medentis intentio, ut eundem tempestive præscindat & modis declinet cunctis. Sed quum hic spasmus vesicalibus tunicis vel a sanguine uberius ibi congesto, tendente ac premente, vel ab acri impuro sero eo decumbente, inducatur, causæ hæc probe sunt discernendæ in medicatione. Quod si igitur post suppressum mensem, vel hæmorrhoidum fluxum, tale vitium imminet, optimum consilium, ut excretionem hæc vel revocentur, vel sanguis copiose congestus per sanguinis, præsertim in pede, missionem, deriveatur, quod auxilii genus, iis in primis, quibus ani, aut uteri venæ stillare amplius jam cessarunt, proficuum est. Et hoc in casu verum omnino Hippocratis aph. 68. Secl. 7. dictum: urinæ difficultatem & stillicidium solvere venæsectionem.

§. II.

Ab humore ac-  
cri quibus ar-  
endus.

Quando scorbuticis & iis, qui rheumatismis, arthritide & purpura chronica laborarunt, ulcera antiqua consolidata sunt, aut materia quædam exanthematica retropulsa, senibus quoque ob dyscrasiam sanguinis, &

Tom. IV.

humorum impuram, vesicæ passionem imminet, cito remediis diluentibus, acrimoniam temperantibus blandis diaphoreticis sanguinemque depurantibus est succurrendum. Hunc in finem utilia decocta pro potu ordinario temperantia, ex radice scorzonæ, chinæ, sisere fœniculi, item infusa theiformia ex summitatibus millefolii, floribus malvæ, baccis alkekenigi, & semine dauci parata, cum dimidia parte lactis mixta & sirupo dialthæa Fernelii dulcificata. Neque minus spectata seri lactis dulcis virtus. Quibus si accedit usus emulsionis ex seminibus quatuor frigidis, & pulverum temperantium ex pulvere Marchionis, antimonio diaphoretico, lapidibus cancrorum, matre perlarum, cum nitri tantillo & aliquot guttis olei macis, effectus est exoptatus. Quia tamen puritas humorum multum etiam debita purgamentorum alvi excretionem conservatur, videndum utique, ut hæc præstetur libera, optime alimentis, sin vero minus responderit, mannatis, cum, vel sine rhabarbaro, addito nitro antimoniato, aut clysteribus emollientibus ducenda.

§. III.

Ubi vero inflammatio cum spasmō jam præsto est, præter jam dicta, commendatissimus est usus liquoris anodynī mineralis, ad drachmam unam, remixti cum granis 5. extracti croci & granis duobus camphoræ. Tum etiam pulveres diaphoretici, ac temperantes, aucta nitri dosi, cum emulsionibus ex seminibus quatuor frigidis sunt porrigendi. Et exterius partem affectam antispasmodicis & leniter discutientibus fovere expedit. Nobis hunc in finem usitata vesica decocto florum emollientium plena, vel loco hujus emplastrum ex emplastri de meliloto uncia, spermatis ceti drachmis tribus, croci, camphoræ ana drachma, nec non oleum anodynum camphoræ, ex olei amygdalarum dulcium uncia, hyoscyami drachmis tribus & camphoræ drachma, pubis & perinæ regioni

In m-  
flamma-  
tione &  
spasmo  
profi-  
cua.

R



gioni crebrius illitum. Ubi etiam spasmus solus tenesmus molestus, vel difficilem, dolorosam mictionem efficit, præter balnea aquæ dulcis, omnia alia auxilia virtute superant vapores ex decocto florum meliloti, sambuci, chamomillæ officinalis, malvæ, summitatum millefolii cum lacte in perforata sella ad laborantes pares admissi.

### Cautela, & Observationes Clinicae.

#### §. I.

Minerales aquae utilissimae.

In vesicæ vitiis inveteratis, quæ cachecticis, hypochondriacis, scorbuticis, senibus & hæmorrhoidariis, nunquam non sunt frequentia, ad incrementum eorum præscindendum, per longum usum efficacius deprehendi nihil, quam peritum aquarum mineralium usum. Celebres jam pridem hoc nomine Spadaneæ aquæ, de quibus sic disertis verbis scribit *Henricus ab Heer in Spadacren. hæc fontis Spadani propria ac singularis facultas, ut vesicæ renumque dolores sopiat ac leniat, morbos vero harum partium persanet, ventriculum debilem roboret & ciborum languentem appetentiam excitet*. Quin idem gravis auctor suadet, ut, si renum & vesicæ vitiis affecti liberi ab iis vivere velint, per totum annum hanc medicatam aquam bibant. Neque minus *Tulpius lib. 2. cap. 53.* testis est fide dignus, deploratum vesicæ ulcus, omnibus parum aut nihil proficientibus, continuo aquæ Spadanæ usu, tam feliciter fuisse debellatum, ut summe obstupuerint, quibus id visum certam habere desperationem. Ego vero habeo, quod maxime laudem usum Selteranarum, quarum saluberrima ingredientia penitus inspexi, quarumque virtutem in omni interna pulmonum, renum & vesicæ labe exemplis habeo confirmatam fere innumeris. Hinc suadeo, ut vere semper, & autumnos, per mensem & longius bibantur, vel quod melius inter cibum potus ordina-

rii loco, cum quarta vini Mosellani parte remixtæ, potentur.

#### §. II.

Lacticia quidem per se renum ac vesicæ lesionibus & morbis minus accommoda. Sed si lac ipsum, præsertim asininum, cum Selterana aqua bibitur, vel quod melius adhuc, acidule hæ, ad abstergendam eo melius saniosam & mucosam materiam, per aliquot hebdomades primum solæ, ac postea vel solum lac, vel medicatæ huic aquæ confusum usurpantur, magis quam ullum aliud remedium prodesse expertus scribo.

Lac cum aqua prodest.

#### §. III.

Licet sanguinis missio utilissima sit, tam ad arcenda, quam persananda vesicæ ex sanguinis congectione vitia; multum tamen nocet frequens ipsius administratio, ubi humorum magis impuritas, quam abundantia in vitio est, ac ubi materia acris purpuracea altius sanguini est insinuata. Nam subtracto nimium sanguine, motus ipsius ad corporis ambitum elanguescit, perspiratio simul imminuitur, & morbi causa magis obfirmatur, licet in principio doloris lenimentum inde accedere videatur.

V.S. cum distinc-tione admittenda.

#### §. IV.

Vini potum *Hippocrates l. superius c.* in urinæ difficultatibus commendat; merito tamen tenendum, quod nullum aliud ex usu sit, quam dulce, Malvaticum, Hispanicum, vel etiam Hungaricum, quod moderate & medice potum, tam ad roborandum stomachum, quam ad vires refocillandas, apprime conducit, nisi febris & calor prohibeant. Illa vero vina quæ multum acidi tartarei in sinu foveant, ut Rhenana, item nostratia austera, penitus merito sunt rejicienda.

Vinum dulce non acidum bibendum.

#### §. V.

Quum omne frigidum nervis nervosisque partibus sit inimicissimum, calidum vero amicissimum; hinc in nervosæ vesicæ passionibus summa cum cura etiam vitanda refrigeratio, præsertim inferiorum, frigidus potus ac, præsertim

Frigus nocet, calor temperatus prodest.



tim in senili ætate, remedia nimium refrigerantia, acida & nitrosa. Vicissim quæ corpus, abdomen inprimis & pedes, a frigore defendunt ac in perspiratione servant, ut motus corporis moderatus, potus infusi theiformis, potio calida, item pediluvia & balnea aquæ dulcis, optimum doloris procurant lenimentum. Atque etiam hanc ob causam e re est, ut aquæ medicatæ ipsæ, tam solæ, quam lacti nuptæ, tepidæ potius, quam frigidæ, bibantur.

## Enarrationes Morborum.

## OBSERVATIO I.

*F. Dolor  
vesicæ  
ex san-  
guine  
stagnan-  
te.*

Vir 40. annorum, vitæ sedentiæ ob intemperantiam studiorum additus, intolerabili cruciatu & tormento circa pubis, & perinæi regionem cum magna difficultate reddendi urinam diu sæpe per intervalla afflictus fuit, & propter dolorum atrociam, inquietudinem, anxietatem, vigiliam viriumque defectionem, cum extremorum tremore ac frigore, tam misere decubuit, ut ad desperationem quandoque redactus, cultro filum vitæ abrumpere voluerit. Affligebat hæc miseria interdum per aliquot hebdomades, postea sensim paulatimque remittebat, ut officio suo fungi posset, urina plerumq; pauca & turbida profluebat, crassum sedimentum deponens. Et quum per sex fere annos hoc malo exagitatus esset, viribus tandem penitus consumptis, quadragesimo ætatis anno obiit. Omnes, quos per totam civitatem in auxilium vocarat, Medici, & calculum, & vesicæ exulcerationem, hujus miseræ affectionis causam iudicarunt; sed aliud longe partis affectæ post mortem scrutinium docuit, vesica quippe integra, sine exulceratione, inventa fuit, nec vestigium sabuli aut calculi in ea repertum, ipsum vero vesicæ corpus longe crassius & densius, copiosis & valde distentis vasis sanguiferis, quorum nonnulla calamum scriptorium crassitie equabant, oblitum.

Ut adeo omnium horum cruciatuum nulla alia fuerit causa, quam insolita illa stagnatio & incarceration sanguinis in vasis vesicæ.

*Epicrisis.*

Hæc historia luculenter docet, spasmum vesicæ urinariæ vehementiorem, tantum valere, ut universum nervosarum partium systema in consortium trahere & œconomiam omnium corporis functionum perturbare queat. Dein patescit, difficilem cum ardore & stillicidio mictum, urinam quoque glutinosam, juxta Hippocratem furfuraceam, non semper exulcerationem, vel calculum intus latentem prodere, sed a sola spastica constrictione vesicæ oboriri posse, quæ tunica interior mucosa fortiter compressa mucosum liquidum copiose in cavitationem vesicæ eructat, quod urinæ immixtum, postea cum ipsa excernitur, eodem modo ac notum est, dolorificum illum spasmum, qui sæpe fit in extremitate intestini recti exquisiti sensus, ita compri- mere tunicam cum vasis suis villosam, ut insignis copia muci albi, instar albuminis ovi, cum tenesmo dimittatur, quod vulgo vocant hæmorrhoides albas. Vesicæ autem spasmi causa non tam est in cavitate vesicæ, quam potius intra ejus substantiam. Nam, sicuti a mensium vel hæmorrhoidum fluxu sufflaminato, sanguis regurgitans ad vasa ventriculi & intestinorum, & intra eorum tunicas sentientes stagnans, distractione & compressione, vehementia tormina, anxietates, dolores, convulsiones & spasmos concitat, ita etiam, quando ex vitio & emanatione fluxus hæmorrhoidalis, vel aliis ex causis, sanguis ad vesicæ corpus magna copia delatus ibi stagnat, non mirum est, quod in nervosa ipsius compage spasmos, & quæ ab illis proficiuntur symptomata, producat.

## OBSERVATIO II.

Vir quadraginta annorum, sanguineo-cholericus, ex vitæ genere valde *Ex he- mor- ha- idibus*



*suppres-* inquieto transiens ad quietum & se-  
*sis le-* dentarium, experitur brevi post hæ-  
*thalis* morrhoidalem fluxum, quem præpo-  
*vesicæ* sere remediis adhibitis suppressi cura-  
*inflam-* vit. Sequuta hinc mictio cruenta, sin-  
*matio* gulis fere mensibus rediens, qua celsan-  
te anxietates præcordiorum, dolores  
lumborum, borborygmi ventris, prava  
digestio & inappetentia oborta. Ad tol-  
lenda hæc mala variis usus quidem re-  
mediis thermis, lactis cura, sed non  
cum debito regimine. Accessit hinc  
postea funesta vesicæ inflammatio, co-  
gnoscenda satis ex magno ardore, do-  
lore in regione pubis, mictu difficili  
& dolorifico, febre, præcordiorum an-  
xietate & delirio, ac post mortem ve-  
sica inflammata & sphacelata inven-  
ta fuit.

#### *Epicrisis.*

Hæmorrhoidalis fluxus interdum  
transit in mictionem cruentam, criti-  
cam quoque, quæ nullo modo cohi-  
benda, nisi rursus provocentur hæmor-  
rhoides, alias gravissima subsequuntur  
spasmodica pathemata non modo, sed  
& ipsa vesica tandem inflammatione  
gravi cum febre afficitur, quæ facile  
abit in sphacelum. Nam qui morbis  
vesicæ moriuntur, ii plerumq; pereunt  
sphacelo, qui etiam intestinum rectum  
sæpe afficit, ut hæmorrhoidalia vasa  
sanguine nigro infarcta cum penis li-  
vore compareant.

#### OBSERVATIO III.

*Vesicæ* Summus hujus urbis Theologus, vi-  
*inflam-* ta sedentaria perpetuaque mentis per  
*matio* ardua multa negotia fatigatione usus,  
*materia* a purpura intus delitescente scorbuti-  
*acris le-* ca in gravem primum per intervalla  
*thalis* dysuriam incidit, juncta simul para-  
lysi spuria dextræ manus, quæ, quam-  
diu perstitit, remissior fuit dysuria,  
illa vero evanescente, atrocior vesicæ  
spasmus & dolor, cum assiduo urinam  
mittendi stimulo, illico rediit. Tan-  
dem cum sanitate quidem in gratiam  
redire videbatur, sed quum forte lan-  
guidum adhuc corpus auræ frigidiori

exposuisset, rediere intoleranda mi-  
ctus tormina, quæ vesicæ inflamma-  
tio, ex parte exulceratio febrisque a-  
cuta exanthematica exceperunt, fune-  
sto proh! eventu.

#### *Epicrisis.*

Inflammatiō vesicæ, a sero salso im-  
puro & corrupto, vesicæ tunicis nerveis  
firmius inhærescente, eosque lancinan-  
te, quandoque subnascitur. Vidi non  
ita pridem in sene octogenario, qui  
per aliquot annos summa difficultate  
mittendi cum dolore urinam labora-  
rat, ac demum frustra adhibita omni  
efficacissima medicina, in pede nactus  
est erysipelas, quod reliquit ulcus, icho-  
rem saniosum sat copiose quotidie fun-  
dens, tam salubri effectu, ut ex eo, &  
dysuria, & dolor in pube, omnis eva-  
nuerit. *Dravvitzius* quoque qui ante  
seculum jam omnium fere optime  
germanico idiomate *de scorbuto* inte-  
grum scripsit tractatum, in eo pagina  
350. & seqq. plures affert observatio-  
nes & casus ægrorum, qui de doloribus  
sævis sub urinæ emissionē conquesti,  
quorum causa non vesicæ labes ullā,  
aut calculus fuit, sed humor tantum  
impurus scorbuticus. Memorabilis  
maxime casus, quem consignavit de  
lanione, qui, quum nunquam antea ex  
calculo laborasset, subito atroces in pe-  
dibus persensit dolores, qui hinc depul-  
si, urethram invaserunt, cum intenso  
ardore & difficultate guttatim vix  
mingendi, applicatis tamen discutien-  
tibus cessarunt quidem, sed ad pedes re-  
dierunt, consequente eorum tumore.

#### OBSERVATIO IV.

Fœmina quadraginta circiter anno-  
rum, sanguineæ constitutionis, vitæ  
sessili nimium indulgens, venæsectioni  
alias fuerat assueta, sed per biennium  
eam omiserat, quo factum, ut obstru-  
ctis mensibus, in summos dolores cir-  
ca pubis regionem incideret, cum im-  
pensis præcordiorum anxietatibus, for-  
ti alvi adstrictione, appetitus virium-  
que destructione. Sedati quodam mo-  
do

*Vesicæ*  
*inflam-*  
*matio*  
*opiat*  
*usu fu-*  
*nesta.*



do ab imperito medico per opiata doloribus, mox incidit insyncopen & majores ac vehementiores circa præcordia urserunt anxietates, subsequutum delirium & mors. Inspecto post mortem corpore & vesicam & uterum inflammatio ac sphacelus occupant, ceteris omnibus partibus sanis.

*Epicrisis.*

Instar axiomatis practici hoc loco notari velim: in inflammationibus nervosarum & membranacearum partium, ut in phrenitide, pleuritide, hepatide, item inflammatione ventriculi, intestinorum & vesicæ, nil perniciosius esse & quod tam facile ad mortem perducere queat opiato remedio interno. Stuporem enim hisce partibus facile inducit & in minimis vasculis motum & progressum sanguinis penitus sistit, ut sphacelus ac mors inducatur. Quare cautissime cum ejusmodi remediis etiam exterius applicatis, hisce in morbis agendum esse moneo ac inculco serio, compluribus lethiferis exemplis hanc observationem confirmantibus. Conferunt potius, præter idonea diluentia, discutientia, blanda anodyna cum diaphoreticis mixta, inter quæ liquorem nostrum anodynum mineralem, cum spiritu Bussii mixtum, & reiteratis vicibus, parca tamen dosi, exhibitum, cum blando regimine diapnoico, non satis laudare possum, si prius plethoræ, quando adest, tempestiva sanguinis missione rite fuit prospectum.

C A P U T X.

De inflammatione & febre uterina.

Theses Pathologicæ.

§. I.

**P**eculiaris uteri fabrica & structura, mira scilicet fibrarum totius substantiæ elasticitas, vasorum sanguiferorum copia eorumque tortuosus & serpentinus fluxus, glandulosa & ner-

Tom. IV.

vosâ textura, nec non colli & maxime orificii interni exquisitus sensus, faciunt, ut multis & variis morbis, maximeque etiam acutis & periculosis inflammationibus, oriundis inde abscessibus & mali moris ulcerationibus, pateat hoc viscus. Quin, quia non tam ob nervorum communionem & sensibilitatem, quam potius sanguinis progressum in fibrosa & vasculosa uteri compage interceptum, ipsius in omnibus reliquis corporis partibus motus turbatur atque pervertitur; hinc magna etiam uteri cum nobilissimis corporis partibus, capite, pectore, præcordiis, ventriculo & omni nervorum systemate est consensus, & ipso gravato, aut inflammato sæva in propinquis & remotis partibus accidunt pathemata.

§. II.

Ex his quæ in uterum cadunt passionibus frequens admodum est ipsius inflammatio, cognoscenda ex ardore & dolore fixo in inguine, cum febre acuta, dolore lumborum & imi ventris, abdominis inflatione, stimulo ad urinam & alvum, mictu ardenti & difficili, gravibusque aliis in præcordiis, capite & pectore symptomatibus. Parum hujus morbi reminiscuntur Medici recentiores, sed eo crebrius in monumentis suis Veteres. *Aretæus* quidem sic egregie ipsum delineat cap. 64. inflammatio uteri, in-  
*Inflam-  
matio-  
nisi ac-  
tine  
signa.*  
quiens, fit ex pluribus causis, ex plaga, ex mensium suppressione, & frigidityte, & inflatione, non minus etiam abortu & partu, propter malam partus editionem. Sequitur ad uteri inflammationem febris acuta dolorque capitis ac ejus tendinum & basis oculorum juncturaeque manuum & digitorum, & colli detractio & declinatio, stomachi per consensum, affectio, osculi uteri conclusio, pulsus parvi, densi. Si totus est inflammatus, totus vehementius pulsatorio motu dolet: si posteriores ipsius partes solum inflammata fuerint, dolor circa lumbos fit & stercora supprimuntur ex recti in-



testini compressione ; si partes ejus anteriores , dolor circa pectinem fit & urine stillicidium ac emittenda difficultas ex vesicæ compressione ; at lateribus inflammatis , & inguina tenduntur , & crura gravantur ; si vero fundum ipsius fuerit inflammatum , circa umbilicum maxime dolor consistit cum tumore ; at si circa osculum est inflammatio , circa supernum ventrem dolent & digito immisso durum ac renitens osculum occurrit .

## §. III.

*Differt-  
in inter  
levi &  
gravem*

Hæc uteri inflammatio merito distinguentur in leviores & profundiores . Illa sæpe puerperis accidit , facile gignitur potissimumque crebrius sequitur febrem lacteam , admittit etiam medicationem , si recte & prudenter instituat , ac facili negotio , intra paucos dies , discutitur . Gravior autem , quæ febre intensa & sævis symptomatibus de vehementia non remittentibus stipatur , septimo , nono , vel etiam undecimo sæpe die necat , superveniente maxime purpura alba , quæ pessimum semper præbet omen , atque ex corrupto , putrido , vappescente sero ac sanguine , in uteri latibulis hærente , ortum ducit , immo de corrupto jam & sphacelato utero testatur .

## §. IV.

*Causa  
varia .*

Causa inflammati uteri materialis proxima est inæqualis sanguinis per uterina vasa circulus . Ob oppleta scilicet , coarctata a spasmo & obstructa minima vascula , sanguis majori cum impetu acceleritate fertur per vascula vicina , eorumque ramos laterales , qui cruorem alias non capiunt , unde tumor , rubor & ardor fit , cum pressione & irritatione tunicæ nervosæ . Ad hoc autem vitium concipiendum in genere disponunt læsiones , contusiones & vulnerationes externæ , status plethoricus , cacochymicus , mensium & lochiorum suppressio , copiosior sanguinis ad uterum allapsus atque decubitus , partus laboriosus , animi

affectus , ira maxime & terror , vomitus enormis , vel nisus impensior ad hunc , motus & labor corris plethorici fortior cum subsequente refrigeratione imi ventris , balneorum calidorum abusus , abdominis & uteri refrigeratio externa , potus frigidus , fluentibus in primis mensibus , lochiis aut hæmorrhoidibus , colica quoque convulsiva , nec non affectio spastico-hysterica gravior .

## §. V.

Nunquam vero magis hæc periculosa affectio infestat feminas , quam si in puerperio sunt constitutæ . Post partum enim uterus ab onere levatus , elastica qua pollet virtute iterum in arctius spatium coit & sensim sensimque sese contrahit . Hinc diducta uteri vasa angustantur , contentus in iis sanguis per oscula aperta , secundinis prius continua , exprimitur ac sub nomine lochiorum foras prodit , cum sanitatis emolumento . Simul vero etiam hac angustatione motus & cursus sanguinis aliter dirigitur & quidem ab utero & inferioribus ad superiora ipsasque mammas , quod circa tertium plerumque diem accidit , non sine febrili commotione , & Germanis propterea audit *das Milch-Fieber* . Quod si igitur lochialis sanguinis exitus per stricturas uteri spasticas impeditur , non modo in ipso utero periculosam inflammatoriam stasin concitat , sed & ordinarius ille sanguinis ab inferioribus ad superiora impetus , tam ratione vehementiæ , quam molis sanguinis validius incrementum . Tum enim spasticæ , & dolorificæ in abdomine urgent stricturæ , sanguinis vel mucidi humoris ex utero fluxus restitat , alvus clausa est , pedes frigidi , ad urinam stimulus , dolorosa mictio , caput rubet , tumet , oculi fulgent , nares nonnunquam guttulas quasdam stillant , animus est inquietus , somnus nullus , vel insomniis terrificis turbatus , ac gravia illa symptomata , respiratio difficillima , lipothymia , convulsionnes & delirium phreneticum , de-

*In puer-  
perio  
cur fren-  
que  
sit .*

mum



mum subito sæpius puerperis accidunt funesta.

## §. VI.

quibus  
solennis

Luculentis verbis hæc ita evenire testatur *Hippocrates lib. 1. de morb. mulier. §. 72.* ita tradens: *si inflammata fuerint puerperæ uteri, venter ardet & magnus sit & ad præcordia suffocatio habet, & uterus, ubi puerperii purgamenta intus manserunt a frigore, occulte distenditur. Nec non lib. 2. de morb. mulier. p. m. 489. si, inquit, ignis sacer in utero sit, etiam pectus id percipit, venter intumescit, perfrigeratur, febris habet magna, & rigor supervenit, & spiritus densus, & animi deliquium, & debilitas, & dolor totius corporis, & tristatur, & mente variatur, & affectio ascendit ex inferno ventre ad lumbos, & ad dorsum, & præcordia, & pectora, & collum, caput & stomachum & mortua esse videtur. Experientia autem teste, femine teneræ, exquisitoris sensus, in vehementes animi commotiones pronæ, pathematibus spasmodicis & flatulentis obnoxia, mensium inordinato successu affectæ, alvi adstrictioris, si gravidæ fiunt, post partum quam facile in lochiorum suppressionem cum febre uteri acuta incidunt, non sine summo vitæ discrimine. Interdum etiam inflammatio uteri nascitur, a secundinarum vel totali, vel tantum quoad partem retentione. Hac enim resistente, non tantum sanguinis ex utero exclusio prohibetur, verum etiam succedens putredo febrem movet, vel si hæc jam adest, deteriorem reddit.*

## §. VII.

In sphacelum  
abit aut  
ulcerationem.

Jam sicuti in omni inflammatione, ille subsistens humor, si non discutitur, putrescit & in corruptionem transit, vel sphacelosam, vel ulcerosam; ita idem etiam accidit in ea quæ uterum infestat. Quæ in sphacelum abit, brevi necat & solennis maxime est puerperis, in quibus post sectionem uterus ut plurimum cum vagina durus, coloris ex atro bruni depre-

henditur. Quæ autem suppuratur & ulceratur, diutius trahit, & accidit quam maxime extra puerperium. Patent inflammationi huic suppurationi & femine sanguineæ, mollioris & spongiosioris habitus, præsertim si fluori albo sanguinolento fuerunt affectæ, isque adstringentibus intempestive cohibitus. Frequentius etiam eandem incurrunt, quæ impurum & crassum in venis alunt sanguinem, dietam insalubrem sectantur, fructibus horæis, dulcibus & lacticiis indulgent, inferiora subinde refrigerant, corpore præsertim æstuante, quæ tristitia anguntur, veneris stimulos concubitu obtundere impediuntur, suetam sanguinis missionem intermittunt, aut seniores quietam & ærumnosam vitam ducunt. Ac in his quidem frequentior est inflammatio in collo & orificio interno, quod ex multis fibris nerveis spiraliter est contextum, quam in ipso fundo, eaque propter dolor acerbus & ardens est in pube cum mictu difficili. Signa autem abscessus uteri sic in compendio *Hippocrates lib. 1. de morb. mulier.* exhibet: *si, ait, uteri fuerint ulcerati, sanguis & pus purgatur & fœtor gravis oboritur, & dolor acutus corripit lumbos ac inguina & immum ventrem, & dolor sursum procedit ad laterum mollitudinem, costas & scapulas, aliquando etiam ad claviculas pervenit & caput vehementer dolet deliratque, processu vero temporis intumescit & debilitas ipsum corripit, & animi deliquium, & febris tenuis, & perfrigeratio, intumescunt autem maxime crura. Morbus autem corripit ex abortu, si qua corrupto humore ac putrefacto intus non fuerit expurgatus & calor totum corpus tenet. Corripit etiam ex fluxibus, si in ipsis acria fuerint & biliosa mordeant. Sed plerumque ulcus uteri tandem etiam in gangrænam & sphacelum abit ac interficit. Interdum tamen accidit, ut apostema in utero prognatum interne rumpatur & copiose effluat sanies alba minime*



foetida & ægra evadat, qua de re legi meretur *Forestus lib. XXVIII. obs. XLIV. pag. 693.*

## §. VIII.

*Nec non in can-  
cram in-  
sanabi-  
lem.* Quod si autem exterior uteri pars inflammata, ob frigus externum, quam facile abit in scirrhum, qui ulceratus, cancer uteri recte dicitur ac est insanabilis. Neque adeo infrequens est, glandulas copiosiores circa col- lum uteri, & maxime orificium ejus internum confidentes, mutari in scirrhum tandemque abire in inflam- mationem ulcerosam, quæ haud secus accancer exulceratus, medicationem admittit plane nullam. Recentiores quidem parum hanc uteri affectionem notarunt; ego vero aliquoties obser- vavi, eadem omnino ratione iisdem- que symptomatibus ac pridem jam ex- acte prodidit *Aretæus lib. 2. cap. 67.* ita perhibens: *cancro in utero, par- tim cum, partim sine ulceratione sunt, tumor reperitur circa uteri osculum du- rus, inequalis, præeminens, colore feculentus, rubicundus, quandoque et- iam sublividus & dolent vehementer inguina ad supernum ventrem & pe- ctinem ac lumbos, ægreque ferunt con- tactum & variegatorem medicationem. Si vero ulceratus est cancer, ad dolo- res, durities & tumorem, erosa etiam & inæqualia ulcera conspiciuntur, plerumque quidem sordida oris tumi- da albicantia, turpes crustas inductas habentia. Quæ vero pura videntur, feculenta, livida, rubicunda & cru- enta apparent. Excernitur autem assi- due ab ipso sanies tenuis, aquosa, ni- gra, aut fulva, graveolens, ali- quando etiam sanguis fertur & alia signa ad inflammatum uterum relata. Affectio igitur ipsa incurabilis est, veluti alicubi etiam dixit Hippocra- tes, mitigare tamen oportet, per in- sessus ex sænu græco, malva & per cataplasmata similia.*

Curatio.

## §. I.

Uteri inflammatio, quum nunquam

frequentius occurrat, quam in puer- peris & post abortum, dum vel ab improvvisa obstetricum in partu diffi- cili tractatione & contrectatione vio- lenta, vel a violento nisu sub partus laboribus, sanguinem præsertim im- purum ad uterum pellente, vel a lo- chiorum per dolores & spasmos hyste- ricos, terrorem, aut refrigerationem fluxu impedito, inducitur; necessa- rium omnino est, ad præsertionem æque ac curationem, ut Medicus om- nes has causas probe noscat atque discernat. Quia autem facilius longe est periculosum hunc morbum immi- nentem arcere, quam præsentem per- sanare; hinc medens etiam primo omnium eo eniti debet, ut eundem tempestive præscindat, ejusque incur- sum avertat.

## §. II.

Jam missis illis læsionibus, quæ ab externis & violentis causis iuducun- tur, frequentissimum in artis exerci- tio est, inflammatoriam hanc febrem, post partum, ob excretionem sangui- nis lochialis vel plane deficientem, vel non sufficientem induci. Quare id in primis agendum artifici, ut confe- cto partu, primis statim diebus lochia- rite secedant. Quod ut ex voto perfi- ciatur, ad causas fluxus lochialis in- tercepti removendas, medicatio pe- rite dirigenda. Notum autem est, sub diuturnis & gravioribus, tam ve- hementem fieri partium, & solida- rum, & fluidarum, commotionem & exagitationem, ut quisque ex pul- suum celeritate, totius corporis ar- dore, siti & inquietudine vix aliter judicare possit, quam adesse febrem, sub quo impetu parum etiam vel ni- hil recrementorum putridorum & cruentorum utero effertur. Igitur o- pera danda, ut impetuosus hic post partum motus placide componatur. Fit hoc commodissime, si puerpere in quiete & temperato regimine dia- phoretico servatur iisdemque dilu- entia ac blande æstum sedantia pro- pinantur. Quia tamen sub partu, qui

Curatio  
& præ-  
serva-  
tio cau-  
sis ac-  
commo-  
danda

Post  
partum  
spasmi  
rela-  
xandi



qui nonnisi stricturis spasticis & convulsivis ex spinali medulla absolvitur, per consensum spasmii & dolorificæ stricturæ ad intestina transeunt, quæ superato partu adhuc aliquamdiu persistunt, atque etiam eandem ob consensionem uteri fibras musculosas & nerveas stringendo, liberum sanguinis cursum præcludunt; merito etiam curandum, ut eadem sedentur placide. Hunc in finem utilis pulvis, ex pulveris Marchionis, lapidum cancrorum ana drachma, antimonii diaphoretici drachma dimidia, nitri puri granis 16. cujus quarta pars pro dosi, adjectis nonnunquam, si spasmii hysterici simul impensius urgent, granis sex, vel quatuor pulveris castorei, cum aqua florum chamomillæ vulgaris, destillata cum cerevisia triticea, sumenda. Conducit quoque oleum amygdalarum dulcium, ex recentibus, sine igne paratum, quod vel solum, vel cum quarta parte spermatis ceti remixtum, quotidie ad unam vel dimidiam unciam, cum jusculo pulli gallinacei, aut decocto avenaceo, usurpandum. Externe vero totum abdomen inungendum oleo ex anethini, chamæmelini & morum alborum ana uncia, olei carvi drachmis duabus, vel camphoræ drachma, superposita mappula complicata calefacta.

§. III.

*Lochia promota.* Composito sic tumultu, ad promovendum lochiorum fluxum, vix præstabilius huc usque innotuit remedium, quam pilularum massa, quæ ad imitationem *Beccheri*, ex amaris extractis, gummatibus resinosis temperatis, & aloe probe correctæ concinnata est. Secundo igitur statim die, ceteris paribus, quindecim grana pilulari forma, mane, vel vespere exhibeantur, & pro circumstantiarum ratione, per quinque vel octo dies continuentur. Est enim hoc evacuans clemens maxime & accommodum. Nam roborando, tam intestinorum, quam ipsius uteri, per extensionem nimiam robore exuti, tonum, blan-

de simul stimulando, imum ventrem ac intestina a sordibus, ipsum quoque uterum a stagnante corrupto sanguine repurgat, eoque quam optime & inflammationem, & febrem aliaque sæva a recrementis retentis oriunda pathemata, arceat. Quin eadem hæc curandi ratio apprime ex usu est, quando secundina, ex ipsius pars, aut aliud quoddam exturbandum concretum in utero restitat.

§. IV.

Quod si tamen medentis scopus his expediri nequit, sed febris impetit assidua, venter flatibus attollitur, uteri purgamenta retinentur & spasmii ad superiora vergunt infesti, alia ineunda est medenti via. Scilicet sanguinis copia, sub graviditate justo plus accumulata, minuenda, per venæsectionem, non in superioribus, sed pede institutam. Sæpe enim a nimia vasorum distensione fiunt spasmii, & sanguinis exsuperans moles uteri compagem nimium distendendo, ejusdem systalticæ & expulsi-væ potentiam minuit ac impedit. Hinc venæsectionis remedium omnino maximi, ad promovendum fluxum & inflammationem arcendam, est usus. Quod sicuti in Gallia hunc in finem frequentius quam par est adhibetur; ita perperam in nostra Germania rejicitur, ut plures inflammatoria uteri febre correptæ, pereant, quæ tempestiva sanguinis missione potuissent servari.

*In febre sanguis mittendus.*

§. V.

Præter venæsectionem, ubi jam præsens est inflammatoria febris, id quam maxime agendum, ut sanguis stagnans in motum cieatur, humores ipsi fluxiles reddantur, & stasis discutiatur. Quod ut obtineatur, conducit mixtura hæc: recipe aquæ chærefolii, cardui benedicti, scordii, florum sambuci, acaciæ, aceti destillati ana unciam unam semis, lapidum cancrorum drachmam unam semis, antimonii diaphoretici, vel bezoardici mineralis drachmam semis, spiritu

*Et sanguis stagnans discutendus.*



ritu nitri dulcis sive liquoris anodyni mineralis guttas 20. sirupi cardui bened. drachmas duas. M. de qua binis quibusvis horis, duo vel tria cochlearia porrigenda. Tum etiam pro potu exhibeatur tenue jusculum ex pullo gallinaceo, cum radice scorzonerae, cichorei & rasura cornu cervi confectum, addito ad gratiam succo pomorum aurantiorum. Præbeatur quoque subinde infusum theiforme ex herba veronicae, scabiosae, sonchi, floribus hormini, chamomillae vulgaris, semine fœniculi. Nec omittantur pulveres temperantes ac resolventes, ex lapidibus cancerorum, solutione oculorum canceri, nitro & sale polichresto compositi. Quales præterea Beccherianis, vel ad harum exemplar paratis pilulis, ad lochialem fluxum promovendum & sanguinis a capite impetum divertendum, commode interponuntur. Sint demum in usu clysteres ex sero lactis dulci, vel decocto florum chamomillae vulgaris, herbae artemisiae, salviae, hormini, mercurialis, addito melle, nitro & pinguedine gallinarum.

## §. VI.

Extra-  
puerpe-  
rium  
men-  
struum  
dum ex-  
ternis.

Quando vero extra puerperium in corporibus impuris variis ex causis accidit inflammatio uteri, non tam in fundo, quam potius in collo, cervice atque vagina, præter jam memorata interna, simul in auxilium vocanda præsidia externa, epithemata scilicet pubis regioni admota, injectiones uterinæ ex accommodis paratæ, nec non pessi, item ob loci vicinitatem suppositoria in anum trusa. Epithema egregium est, quod ex aquæ sic dictæ d'arquebousade, (quæ non nisi vinum Rhenanum a herbis vulnerariis in balneo maris ad siccitatem abstractum, ) unciis quatuor, essentia croci, spiritus vini camphorati ana unciis duabus nitri in aqua florum sambuci soluti, drachma, paratur, ac pro circumstantiarum ratione cum aceto rutaceo, aut scordii remixtum, linteis duplicatis sæpius applicatur.

Ad injectionem vero commendo solum lac, vel asininum, vel muliebre, cum floribus sambuci myrrha & croco, adjecto nitro decoctum. Molestissimum demum hujus passionis symptomata tenesmus, præter infessus emollientes, egregie lenit oleum amygdalarum dulcium, vel mucilago seminis psyllii, aut scœnu græci, ad uncias duas, cum duodecim extracti croci granis ano injecta. Et eadem hæc remedia semper etiam ex usu sunt, quando inflammatio abiit in suppurationem.

## §. VII.

Porro non adeo infrequens est, ex <sup>Quibus</sup> fluore albo diuturno, præsertim si <sup>meden-</sup> simul sanguinolentus, male tractato, <sup>dum se</sup> vel imprudenter cohibito uterum <sup>ex fluo-</sup> ejusque partes tumore affici cum dolore, & febre inflammatoria, immo in suppurationem abire & exulcerationem. Tum vero cura admodum perplexa est atque difficilis, inprimis, quando fluor non e glandulis externis, sed interna uteri substantia venit. Ego, si passio chronica, nil præstabilius novi, quam usum thermarum Emsensium, & Carolinarum mitiorum, quippe quæ humores subsistentes efficaciter dissolvunt partemque affectam simul roborant. Sed cavendum a balneis adstringentibus, ipsis etiam Carolinis fortioribus, quæ propter terram calcaream & martialem, adstringente & repellente virtute polent. Infessus vero ex herbis uterinis & aromaticis, cum aqua dulci decoctis profunt utique. Sic laxatis ductibus & humoribus dilutis, cum fructu postea pilulae dantur Beccherianæ, quæ inter specifica uterina locum tuentur præcipuum. Nec rejicienda videtur Hippocratis hæc uteri ulcus curandi methodus, quam lib. 1. de morb. mul. §. 88. sic tradit: *si hic morbus inciderit, multa calida lavato & tepesactoria adhibeto, qua parte fuerit dolor. Et si quidem superne fuerint dolores & mulier fortis est, totam somentato & pharmacum deorsum purgans*



gans bibendum dato, & ubi tempus anni fuerit, serum coctum insuper bibendum præbeto, per dies quinque, si id facere poterit. Si vero non adfuerit serum, lac asininum coquito & per dies tres, aut quatuor bibendum dato. Post lactis autem potum, cum aquis ipsam reficito & cum cibis commodis, carnis ovillis, teneris recentibus, & volucrium, & beta, & cucurbita. Abstineat autem a salsis, & acris, & marinis & caprinis. Et certe lactis serum & asininum lac egregie proficit, non modo ad obtundendam humorum acrimoniam sed & contemperandum calorem hecticum, qui ægros graviter ut plurimum urit.

§. VIII.

*Inflam-  
matio-  
nis a  
causa  
externa  
medica-  
tio.* Quæ demum a violentia externa inducitur uteri inflammatio, cum febre, dolore inguinum, mejendi difficultate, & spasmis in remotis etiam partibus, nec non alvi adstrictione, poscit quam maxime venæsectionem, non modo maturam, sed & repetitam, primo in brachio, ac dein in pede institutam. Opus in hac etiam, ut alvus subducatur clystere, in uterinis morbis nunquam non singularis plane utilitatis. Et exterius imponendum emplastrum ex emplastri de meliloto uncias duabus, spermatis ceti uncia dimidia, gummi ammoniaci drachmis duabus, croci drachma, camphoræ drachma dimidia. Non omittis internis blandis diaphoreticis, & discutientibus.

*Cautela & Observationes  
clinica.*

§. I.

*Præfer-  
ratio.* Quum puerperæ plurimæ in puerperio ex febre inflammatoria uterina moriantur, præsertim si multum sanguinis crassi & impuri in venis alant; hinc optimum certe ad præscribendas capitales ejusmodi affectiones est consilium, quando gravidæ partim salubri diætâ & vitæ regimine, partim

etiam aptis & congruis præsidiis, tam solidas, quam fluidas partes, in debita temperie, quantitate & motus æquilibrio servare student. Nam qualis natura ægrotantium, etiam puerperarum, talis etiam est vix medica- trix, pugna adversus morbum, quin ipsa medicatio, in qua omnino plus præstat natura, quam ipsius ministra ars. Igitur ad antevertendum hoc malum quam maxime necessarium est, ut tempore graviditatis sanitati consulatur tam opportunis sanguinis missionibus, quam debitis laxationibus, per rhabarbarina potissimum, ut etiam gravidæ modicam & laudabilem diætâ sectentur, animi temperantiæ studeant & potus diluentes perspirationem simul sustinentes bibant. Deinceps quum haud raro inflammati in puerperis uteri causam præbeat, potus nimius calidorum & spirituosorum, vini aromatici, crocati &c. ad partum facilitandum datus, præsertim in sanguineis, & quæ non ultimis mensibus sanguinem miserunt: serio omnino monendæ sunt, & obstetrices, & uterum gerentes, ut ab ejusmodi sanguinem exagitantibus remediis abstineant, ac potius venæsectione in pede, item balneis, novissime ante partum duabus vel tribus hebdomadibus, rite usurpatis liberio- rem sanguinis per uterum com- meatum & facilem post partum efflu- xum procurent.

§. II.

In nullo morbo tam infensa & per- nicio- sa animi commotio, per terro- rem potissimum ac iram, quam in uteri inflammatorio. Nunquam etiam nocentior abdominis & ingui- num perfrigeratio, quam post abor- tum & partum. Puerperæ enim, ob continui quæ ipsis accidit solutionem, fibrarum & vasorum dilacerationem humorumque extravasationem, haud aliter sunt considerandæ, quam gra- viter vulneratæ. Quam facile autem dictæ causæ læsis & vulneratis partibus adeoque etiam utero, inflammatio- nem

*Omit-  
te nde*



nem inferre queant, res est nota etiam in vulgus. Quare ut puerperæ, nec non quæ labem in utero gerunt, solite sibi ab his caveant, iterum inculcamus iterumque.

## §. III.

Cautely  
de pel-  
dentibus

Ad emovendum lochiorum fluxum subsistentem, nunquam danda pellen-  
tia fortiora, crocata myrrhata, suc-  
cinata, aloetica, vel calida aromati-  
ca, nec non salina stimulantia, tan-  
to minus, si mox post partum adhuc  
præsto est motuum impetus. Hæc  
enim febrem magis accendunt, spas-  
mum intendunt, sanguinem in lati-  
bulis uteri hærentem, humido ab-  
sumto, plus densant & ad effluxum  
reddunt ineptum, vias quoque &  
emunctoria magis siccant atque occlu-  
dunt. Sed quando spasmus laxari, do-  
lores remittere, viæ patescere inci-  
piunt, & sanguis ex utero ferri, tum  
demum moderate pellen-  
tia, & toni-  
ca propinare expedit. Inter quæ solu-  
tio succini, myrrhæ, rhabarbari,  
croci, non cum spiritu vini, sed aqueo  
lixivioso menstruo parata, nec non  
aqua melissæ, aut artemisiæ leviter  
spirituosa, qualis est quæ cum cerevi-  
siâ triticea destillatur, omnibus pal-  
mam præripiunt fere, si crebris &  
parcis dosibus offerantur.

## §. IV.

Venæse-  
ctione.

Ex præcipuis etiam lochiorum flu-  
xum revocantibus auxiliis est venæse-  
ctio. Nec deterreri se patiatur artifex  
symptomatum gravitate, neque etiam  
ipsa purpura efflorescente, sed confi-  
denter admittat, si indicationes ad-  
sunt, uti jam pluribus superius Sect. I.  
cap. 9. de febre purpurata obs. 6. pag.  
220. monui. Quando autem provida,  
ut ita loquar, natura, cessantem aut  
insufficientem lochiorum evacuatio-  
nem liberali sudore, aut alvi fluxu  
compensat, abstinendum ab iis, quæ  
lochiis proritandis alias serviunt.

## §. V.

Ulceræ-  
tionis  
medica-  
tio.

Quando autem humor ex utero fer-  
tur viscidus, flavus & sanguinolentus,  
haud obscurum præbet indicium

læsæ uterinæ substantiæ & imminen-  
tis inflammationis atque ulcerationis.  
Ad hanc igitur arcendam, vel si jam  
præsens est persanandam, tuta quam  
maxime est ac necessaria crebrior pur-  
gatio & rhabarbaro, tamarindis &  
manna, quæ frequenter iteranda est,  
quo vitiosi ab utero humores diver-  
tantur. Tantum enim hæc ad curatio-  
nem est momenti, ut *Forestus lib. 29. obs. 48.* fidem faciat, quandam Arn-  
stelodamensem nobilem matronam  
ab ulcere uteri sanitati reddidisse, cui  
dederat de quarto in quartum diem  
uncias quinque decocti sennæ, epi-  
thymi, rosarum rubrarum, myroba-  
lanorum. Indorum, saccharo dulco-  
rati & abstergentia decocta in uterum  
injicere jusserat. Si ulcus adhuc cu-  
randum est, post lenes aliquot dierum  
purgationes, decoctum ex santalo,  
lentisco, sarsaparilla, mentha, epi-  
thymo, radice liquiritiæ & ligno  
Rhodio, per viginti quinque dies cum  
regimine sudorifero bibitur cum fru-  
ctu, qua de re pluribus consuli potest  
*Sylvaticus Cent. IV. obs. 68.*

## §. VI.

Ulcus uteri cancri ulcerati naturam Cancer  
auxilla  
æmulatur, tumque sanies putrida &  
lacinia corruptæ uterinæ substantiæ  
cum magno foetore, summo dolore  
gravibusque symptomatibus prodeunt  
& malum fere est incurabile. Quic-  
quid autem agendum, nonnisi de-  
mulcentibus & lenientibus perficien-  
dum. Si spes sanationis adhuc super-  
est, ego quidem habeo quod laudem  
potum lactis, potissimum asinini, nec  
non usum temperatarum mineralium  
aquarum, Wildungensium maxime,  
vel Selreranarum, interposito mane  
& vesperi balneo aquæ dulcis cum fur-  
furibus triticeis, in quo per horam &  
longius desidendum. Vicissim absti-  
nendum ab omnibus acris internis  
& stimulantibus calidis. Caute etiam  
in uteri abscessu ac ulcere adstringen-  
tibus & repellentibus utendum, quia  
iisdem facile scirrhus inducitur. Opti-  
mæ injectiones ex lacte caprillo, cro-  
co



co & aqua florum sambuci. Hippocrates brassicæ usum commendat, sed præstat betæ rubræ succus; crebrius calide injectus.

§. VII.

Dolores  
compla-  
candi.

Immanis sepe dolor exulcerato uteri cancro jungitur, qui vires penitus pessundat omnemque somnum adimit. Ad hunc leniendum optimum solatium in anodynis, cujus generis sunt extractum croci & papaveris, massa pilularum de styrace, de cynoglossa, Wildegansii, Matthiæ, Starckii. Notabilis enim hanc in rem Riverii Prax. cap. 20. pag. 332. locus: *hæc tamen omnia, inquietis, aliquando non sufficiunt ad immanissimum dolorem placandum, qui interdum nullum quieti & somno reliquit locum. Unde cogimur non raro ad narcotica recurrere, quæ in hoc affectu propter intensum humorum fervorem minus nocent. Et vidimus nos mulierem, cancro in mamma laborantem, quæ singulis noctibus, per quatuor menses, laudani grana duo, vel tria, innoxie, cum magno solatio sumebat.*

Enarrationes morborum.

OBSERVATIO I.

Uteri la-  
bes ex  
hemor-  
rhagia  
cabibita

Laborabat per aliquot menses largo sanguinis ex utero profluvio femina sexaginta sex annorum, cholericæ, macilenta & in iram prona, multos in consilium adsciverat Medicos, & variis etiam usæ fuerat medicamentis, sed incassum. Tandem accedens junior quidam Medicinæ Practicus, suavit externa, partim calida & acria, partim adstringentia, & aluminosa. His fluxus quidem cohibitus, sed dolores oborti atrocissimi, ac brevi post loco sanguinis materia faniosa foetidissima effluxit, accessit lenta febris, corporis tabes, summaque imbecillitas. Notabile hæc inter imprimis fuit, quod ægra, quando aliquid de pilulis Anglicanis Matthiæ, quas etiam Starckianas vocant, de-

glutivit, doloris intolerandi senserit aliquod lenimen, hoc autem omisso, illico recruderint tormina acerbiora. Semper etiam aliquid materiæ foetidæ, ex utero secessit, hac autem retenta, accesserunt protinus borborygmi in abdomine, spasmi flatulenti, hysterica pathemata, cardialgiæ & circa præcordia anxietates. Sic ægra per biennium miseram traduxit vitam ac demum macie & febre confecta fati cessit.

Epicrisis.

Imprudens medicationis hæmorrhagiæ uteri hoc est exemplum. Nunquam enim sanguinis profluvium, ubicumque fiat, sive internis, sive externis sistendum, sed potius roborantia cum discutientibus mixta exterius, si interna non suffecerint, parti affectæ laboranti sunt admovenda. Si secus fit & stiptica constringentia in usum vocantur, aliter fieri nequit, quam ut sanguis in coagulum abeat, in vasis subsistat ipsamque uteri substantiam labe inficiat. Anodynis autem dolores quidem tantisper sopiti, sed non in totum sublatis, quia putridæ corruptioni auferendæ non fuerunt idonea. Et quod ab impeditiori materiæ faniosæ effluxu pathemata hysterica oborta, argumento est, non tantum a sanguinis & humorum copia atque stagnatione, verum etiam a materia acri caustica, fibras uterinas irritante, pathemata ejusmodi spasmodico-hysterica suscitari posse.

OBSERVATIO II.

Femina quadragenaria, sanguinea, plethorica, quarto mense gravida, suavit mariti, ut vegetior esset & infantem quoque robustum ac sanum ederet, sumit pulverem Monckii, Ramoneur dictum, qui nihil aliud quam antimonii regulus cum nitro in calcem ustus. Successit autem effectus oppido infelix, ut plus quam vigesies vomeret miramque experiretur debilitatem. Ex eo pessime semper habuit & post

Inflam-  
matio  
suppu-  
ratis ut-  
eri post  
abortum.



& post quatuordecim dies accidit abortus, quem præcessit dolor in inguine atrocissimus, & sub ipso cum lochiis secessit materia graveolens. Passo abortu, perpetuos & fixos in abdomine ac inguine dolores experta est, pulsus semper fuit celer, interdum animi quandam defectionem incurrit, interdum etiam tussi, & articulorum dolore divexata. His symptomatibus, per aliquot menses graviter detenta, nacta est tumorem in abdomine, cum dolore lancinatorio jugi & alvi fluxu torminoso. Sequuta est summa corporis imbecillitas, viriumque prostratio, extremorum refrigeratio, spirandi difficultas & frequentius syncope, donec tandem inter hæc vitam poneret. Dissecto post mortem cadavere, ingens puris ex albo viridescentis copia ad aliquot libras ex abdominis cavo profluxit. Intestina utero propinqua erant erosa, eorumque tunicae comparuerunt quasi abrae. Uterus fuit spongiosus & ita ampliatus, ut in longitudine ad decem, & in latitudine ad octo transversos digitos accederent. In ipso lacunæ fuerunt multo pure repletæ, ex quibus ingens illa puris quantitas fluxerat in abdomen. In vasis sanguiferis majoribus, nullus repertus sanguis, sed omnis fere in puris abierat materiam.

#### *Epicrisis.*

Quam perniciose gravidis sint emetica & quidem validiora, ex hoc casu patescit luculenter. Quæ enim uterum gerunt sunt fere semper plethoricae, eaque propter fortiori illo nisu & pressione diaphragmatis & musculorum abdominis sub vomitu, sanguis cum magno impetu in uteri vasa urgetur, ibique impactus, inducit inflammationem in ulcus transeuntem. Hinc igitur abortus & reliqua gravia pathemata duxerunt ortum. Non tamen dubitandum, quin partu abacto, gravissimum illud malum, uteri apostema, potuisset præscindi, si mature discutientia, solventia & roborantia in auxilium fuissent voca-

ta. Pus autem ex utero effusum in abdominis cavum, tunicas intestinales arrosit, ac erodit, unde obortus alvi fluxus, intensus abdominis torminibus.

#### OBSERVATIO III.

Elapso anno vocabar ad mulierem tertium supra quadragesimum ætatis annum agentem, sanguineo-cholericam, quæ misere decumbebat, conquesta potissimum de dolore in regione pubis pressorio & elisorio quasi atrocissimo, partus dolores longe superante, stipato cum tenesmo, dorsi tensione, ructibus, vomitibus & alvi strictura, somni appetitusque defectu. Inquirenti in morbi causam & originem, dixit: se ante octodecim annos ultimo laborioso admodum partu esse perfunctam, tam male simul ab obstetrice tractatam, ut vestigia digitorum impressa adhuc in pube gerat. Tum menses, antea semper largos & ordinatos, post puerperium primum cum dolore aliquo stillasse, servasse tamen periodum postea & sufficienter etiam fluxisse. Ante sex autem annos se mensium tempore cecidisse in itinere in torrentem. Inde mox constitisse fluxum & sequuta multa & varia pathemata spastico-hysterica, quin post aliquot menses corpus intumuisse totum, cum colore plumbeo. Discussum tamen congruis remediis esse post aliquod tempus tumorem & mensium fluxum etiam repetiisse, excreto multo coagulato crasso & quasi concreto sanguine, ac postea viscida alba & flava materia. Ex eo quotiescunque mensium accederit periodus, se per triduum acerbis in abdomine afflictam esse doloribus, tamdiu insistentibus, donec sanguis prodierit grumosis primis & crassus, dein tenuior, tum aqua sanguinolenta ac demum materia viscida flava. Sic transisse quatuor fere annos, & adhibitis interea variis medicamentis, maximeque pilulis Stahliauis, cum pulvere salino temperante, spem va-

Cancer  
uteri  
lesionis  
lib.

letu-



letudinis melioris fuisse irritam, malum potius increvisse magis. Jam a binis mensibus & dolorem & fluxum sanguinis emanasse, nunc vero eo esse graviores & spasmos quasi convulsivos. Hæc audiens & atrocia pathemata videns, male statim ominari cœpi, ac scirrhum, aut aliud immedicabile uteri vitium subesse sum suspicatus. Interim alvum valide striclam clystere oleoso emolliente cum asa foetida subducere, interius pulverem temperantem cum nitro, cinnabari & castoreo, nec non liquorem meum anodynum mineralem dedi & exterius parti dolenti admoveere jussi vesicam decocto emolliente plenam. His dolorum atrocia primum frangi est visa, & elapsi nonnulli sanguinis grumi, subsequente liquore sanguinolento. Sed post aliquot dies vehementia recruduerunt eadem, ut ægra lamentabili voce uterum extrorsum trahi violenter & jam vaginæ imminere clamaret. Advocata obstetrix, quæ orificium uteri apertum esse eique incumbere durum quoddam corpus dixit. Data priora remedia, sed frustra. Parati infessus, momentaneum levamen afferentes, imposita exterius, ex muliercularum etiam consilio, varia carminativa, spirituosæ & acriæ, incassum tamen, & accessit capitis dolor. Optimum fuit solatium ex pilulis, quæ pilulas aleophanginas ac de styrace cum croco & cinnabari habebant. Sub his doloribus iterum aliquot sanguinis grumi & postea sanguis floridus parvus exiit, stillante postea liquore cruento. Sic decubuit aliquamdiu; doloribus modo gravius, si fluxus resistabat, modo mitius, si excretis sanguinis grumis quibusdam serum manabat sanguinolentum, afflicta, simul quoque tumorem sensit durum in latere sinistro supra inguina. Adhibita interea pro circumstantiarum ratione varia, tandem impositum emplastrum efficacius discutiens atque resolvens, quo admoto, fornicationis quendam in regione tumoris per-

cepit sensum, dolores mitiores affluerunt & post triduum primum iterum sanguis grumofus, tum tenuis & serum non cruentum, sed magis flavescens ichorosum, ac post aliquot dies materia crassa sebacea flavescens profluxit. Secessit hæc materia aliquamdiu ac ægra tolerabilius decubuit, usa interius, infuso ex herbis vulnerariis cum lacte, balsamo quoque ad imitationem balsami *Locatelli* parati, axungia canis cum herbis traumaticis confecta & exterius injectionibus modo lenientibus, modo abstergentibus & balsamicis. Nihilominus tamen latius serpsit labe interna, pus & sanies foetida, quin nonnunquam lacinæ quasi corruptæ carnis prodierunt, vires morbi diuturnitate sensim collapsæ, corpus contabuit, appetitus periit, calor hæcticus increvit, urina per octiduum suppresso cathetere fuit evocanda, somnus intercidit, accessit demum mentis alienatio, quam triduo post excepit mors, elapsis inter hæc tribus mensibus.

*Epicrisis.*

Plurimi certe sunt morbi, etiam ipsius *Hippocratis* effato, qui ex utero prodeunt. Hic enim propter plane singularem vasorum fibrarumque structuram, dispositionem & situm, ita a sapientissimo opifice est fabrefactus, ut non solum ad generationis negotium aptus sit, sed etiam, ut superflui & effœti in corpore muliebri humores ferofi, nec non ipse sincerus nimium exundans sanguis, salutari plane modo & motu, per ipsum foras ejiciantur. Huic scopo maxime quadrat tanta vasorum sanguiferorum copia & serpentinus ac inflexus eorum progressus ac cursus, quo scilicet propter paulo tardiores & difficiliorem sanguinis & humorum per uterum transitum, eo melius inutilis & superflui humoris fiat se- & excretio. Interim propter eundem hunc difficilem ac seignem humorum com meatum, non secus ac in hepate, multæ stases & stagnationes & inde obstructions, indura-



durationes, extravasationes, scirrhotates, foecundissimæ morborum matrices, gignuntur. Quinimo quia in hoc viscere remora & obstaculum sæpe ponitur universo sanguinis libero & æquabili circulo, fit, ut in aliis partibus, propter majorem sanguinis motum & impetum, functiones sæpe totius corporis labascant & vitium contrahant, ut in pathematibus sic dictis hysteris clarum est ac manifestum: Multum itaque ad sanitatem mulierum refert, ut hæc pars salva, sarta & recta omnibus modis & artificis conservetur. Parva enim ibi consistens labes, magnas perturbationes efficere potest: Clarissime id videmus, quando sub partu laborioso atque difficili, præsertim ab imprudenti obstetricum tractatione, labes in parte quadam uteri contracta fuit, quæ sæpius facit, ut ab eo tempore nunquam recte convalescant iterum puerperæ. Atque etiam ea est natura vitiorum, quæ utero longius insident, ut demum post multos annos pernicialem suum effectum prodant, uti quidem etiam ex nostra morbi historia liquet. Morbus autem quo laboravit nostra recte pro cancro uteri, qui ex scirrho demum ulcerato productus fuit, haberi debet. Sed uti ego nunquam exulceratum cancerum, cujusunque partis fuerit, medicamentorum ope curatum vidi: ita eo magis uteri cancer incurabilis est, quia minus commodè externorum topicorum applicationem admittit. Neque etiam aliis symptomatibus incedit uteri cancer, neque aliò modo interficit, quam febre succedente lenta, eodem modo ac is qui in mammis consistit. Præter dolores quippe immanes & putridas foetidæ varii coloris & consistentiæ emanantes sordes, cum sanguine sæpe mixtas, totius corporis languor, prostratio virium, hæticus & consumens calor, somni defectus & animi deliquia accidentia, vitales tandem motus extinguunt. Providendum igitur cum cura ac eo annitendum, quo apto consilio

eiusmodi atrox & funestum malum arceatur. Jam ego certe non aptius ad roboranda uteri vasa & sanguinis cursum liberum & salvum tuendum, adeoque ad omnis generis morbos inde propullulantes præscindendos, maximeque etiam ad hujusmodi scirrhotates valde suspectas amovendas, præstantius & certius novi auxilium, quam post abortum vel post partum, usum laxantium balsamicorum, uti nostræ sunt & aliorum balsamicæ pilulæ, item balnea ex herbis roborantibus & nervinis, vel etiam potum aquarum mineralium cum accuratio-ri diætæ & vitæ regimine. Quare ut Medicus hæc remediorum genera multum, imo plurimum ad averruncandas morbosas, quæ ex puerperio oriuntur, affectiones, commendata sibi habeat, serio inculco.

## OBSERVATIO V.

Generosæ feminae, triginta annorum, sanguine & succis plenæ, quum <sup>Febria</sup> feliciter peperisset & secundinæ etiam <sup>utrina</sup> <sup>Sudore</sup> <sup>Solutæ</sup> prodissent integræ, subsistit mox sanguis lochialis ac tenuis tantum materia profluxit ex utero. Hinc ad emovenda lochia, & a Medicis, & a mulierculis multa calida & pellentia exhibita fuerant medicamenta. Sed frustra, & spasmi potius, ac dolores imi ventris, quin tertio die febris acuta & continua accesserunt & egram in magnum discrimen adduxerunt. Petito a me consilio, suasi, ut primo omnium vena pertunderetur in pede ac clyster postea molliens injiceretur. Factum utrumque & dolores mitigati, febris tamen cum pulsu duro & celeri perstitit. Quum vero septimo die sudor erumperet & per quatrimum ex universo corpore manaret tam largus, ut lectus & linteamina aliquoties mutanda, vires quidem multum dejectæ, sed febris cum omnibus aliis symptomatibus sublata. Hinc sub sudore juscula tantum pullorum cum succo citri data, post eam vires analeptis,

tam



tam pharmaceuticis, quam diæteticis, refectæ & sic sanitas rediit perfecta, ad quam confirmandam, elapsis quatuordecim diebus, uterum infuso laxante rhabarbarino, cum aliis congruis nupto, expurgare consului,

*Epicrisis.*

Notatu dignus ob id hic est casus, quod fere plane defecerit lochiorum fluxus, puerpera tamen servata. Ego vero notavi, difficiliorem semper esse lochiorum effluxum in feminis, quæ vasa gerunt exilia & habitum corporis spongiosum. Sunt tamen hæ pro-niores in sudorem. Hæc provido naturæ instituto factum est, ut febris cesserit in medicinam, cujus beneficio stagnantes in vasculosa uteri compage humores sanguinei, ut in aliis inflammatoriis febribus, resoluti atque diffusi, simul etiam corpus per liberalem sudorem a superfluis humoribus repurgatum saluberrime. Nam recte scribit *Celsus lib. V. cap. 8.* medicamentum sacri ignis fortissimum est febris, quæ humorem noxium absumit. Ita sæpius natura compensare solet defectum excretionis cujusdam in certa parte, per eo uberiores in alio emunctorio succedentem. Igitur cautelæ loco fervetur: nunquam invita natura, vi quadam urgendas esse & movendas excretiones.

OBSERVATIO V.

*Febris  
uterina  
sanata.*

Honestæ fœminæ, teneræ & macilentæ corpore, animo alacris, vigesimo secundo ætatis anno feliciter enitebatur filiolum, altero statim die, post admissam ultimam venæsectionem. Post partum parcius successerunt lochia, graves in abdomine, dorso & inguinibus oborti dolores, quinto die accessit vehemens febris, cum inquietudine, præcordiorum anxietate, insomnia, magna impatentia & interveniente subinde delirio. Datum de venæsectione consilium, sed quia haud ita pridem administrata, admittere noluit. Hinc ob alvum adstrictam injectus clyster emolliens,

*Tom. IV.*

ex decocto avenaceo, cum flor. chamomillæ vulgaris, herba & floribus hormini, oleo chamomillæ cocto addito nitro. Datus postea quotidie, bis, vel ter, cum tenui jusculo dosis pulveris hujus: recipe solutionis oculorum cæcri, salis polychrestæ, nitri puri, lapidum cancrorum ana drachmam. M. dividatur in 12. partes æquales. Circa noctem deglutitæ viginti pilularum harum, recipe pilularum marocostinarum drachmam, extracti rhabarbari scrupulum, extracti croci, castorei grana sex M. f. pilulæ ex scrupulo uno no. 20. His per quinque dies usurpatis, alvus soluta & aliquot sedes quotidie motæ, nono quoque die fluxus humoris putridi & sanguinolenti ex utero adauctus, & successive ægra sanitati reddita.

*Epicrisis.*

Quando natura ex variis, sæpe occultis causis, corruptum sanguinem & humorem ex utero vel plane non, vel insufficienter, post partum emovet, ac inde imminet periculum; Medicus, si non per ordinarias vias potest, per alia congrua emunctoria, noxium expurgare debet humorem. Sed quia febris adest, minus tuta evacuantia, præsertim per alvum. Hinc lenienda tantum hæc, quod optime fit per clysteres atque nitrosa. Stagnantes dein humores resolvendi, quem in finem utilissimus fuit pulvis ille ex neutris salibus, innocentis & tamen præstantissimæ virtutis. Demum tentanda lenior alvi stimulatio, per innoxia etiam & clementia balsamica laxantia. Quod si ex voto succedit & vires decumbentis respondent aliquamdiu est continuandum. Tutius enim semper est puerperas purgare per alvum, quam sudorem. Quam in rem peculiarem laudem sibi vindicant pilulæ Becherianæ, vel ad earum exemplar paratæ correctæ, quæ certe in mulierum morbis, præsertim qui in puerperio accidunt, leni evacuante & simul roborante virtute, omnia reliqua antecellunt, si perite &

S

cum



cum aliis congruis in usum vocantur.

## OBSERVATIO I.

*Febris uterina secundina lochiis retentis sanata.* Femina actioris sensus, macilentata actenera, viginti octo annos nata, pathematibus hypochondriaco-hystericis obnoxia & aliquoties abortum passa, pepererat novissime filiolum laborioso admodum ad tres dies extracto partu, post quem nec secundina eliminata, nec lochia evacuata. Sequenti hinc dolores abdominis totius, præsertim sinistri lateris, cum febre, vomitu, dyspnæa, inquietudine & cardialgia. Ego in consilium vocatus, tertio post partum die secare jussi venam pedis, ad uncias minimum quinque & injicere enema ex sola aqua pluviali tepida, cum una drachma pilularum Becherianarum, mellis cochleari, adjectis duabus olei chamomillæ cocti uncis & dimidia salis Ebshamensis. Sic alvus bis subducta & cardialgici dolores cum vomitu depulsi. Ad æstum autem extinguendum pul. Veres nitrosi dati, & ad mulcendos dolores, sperma ceti cum extracto croci in jussculo avenaceo. Septimo die quum æstus defervesceret, lochialem fluxum promoverè studui per usum pilularum nostrarum balsamicarum, item sale aperitivo ex lapidibus cancrorum, terra foliata tartari & sale polychresto, nec non infuso theiformi ex melissa, pulegio, floribus cheiri, calendulæ & chamomillæ. Quibus male olens sanguinolentus humor e putrefacta secundina, quin integra hujus frustula excreta, & ægra præter omnium spem, infra tres hebdomades, sensim sanitati redita. Quinta demum puerperii hebdomade infusum laxativum roborans uterinum, ex radice vincetoxici, pimpinellæ, rhabarbaro, agarico trochiscato, semine levistici, herba melissæ, floribus salviæ, foliis sennæ sine stipitibus, passulis & tartaro crudo, ad aliquot dies bibendum obtulimus.

## Epicrisis.

Femine quæ spasmis hypochondriaco-hystericis & flatulentis passionibus obnoxia, sensibilibus ut plurimum ingenii, difficulter pariunt & gravius quoque in puerperio ægrotant. Spasmi enim, ad quos natura jam disposita, non modo debitum sanguinis lochialis effluxum, sed & secundinarum exclusionem sæpe intercipiunt. Quin, dum per spasmos sanguis motu inverso urgetur ad superiora, caput, pectus & stomachum, accidunt illa symptomata gravia, dolor sinistri lateris in stomacho, & colli flexura, cardialgia & vomitus. Tum itaque præstabilius non suppetit auxilium, quam venæsectio in inferioribus instituta & alvi subductio, quibus sanguinis motus ad inferiora revocatur simulque materia, quæ oneri naturæ est ac fovet & sustentat sæva illa symptomata, expurgatur. Quum vero pilulæ balsamicæ ad secundinarum & lochiorum emotionem virtutis sint celebratissimæ; propter dolores tamen & vomituritionem ore assumi nequiverint, optimum, ut sæpius expertus sum, fuit consilium, easdem dissolvere & cum clystere per os inferius injicere. Sedato post ea motuum impetu ac æstu, ipsa natura sponte materiæ putridæ ex secundina corrupta egressum est molita. Quem ductum sequi & molimen secundare fuit ex usu. Non tamen prætereundum post septimum diem, nostram affectam fuisse horripilatione quadam & frigore, intercurrente æstu, ac in situ erectiori lipothymia, quod procul dubio ab incipiente corruptione secundinæ accidit. Necessarium autem, sicuti in omni post puerperium morbo, sic etiam in hoc fuit, uterum cum primis viis, ultimis hebdomadibus, quando vires redeunt, convenientibus laxantibus & roborantibus expurgare, non neglectis, pro circumstantiarum ratione, balneis ex herbis nervinis ac uterinis.



OBSERVATIO VII.

Febris  
uterina  
repetita  
venæse-  
ctione  
G. sus  
do. ifero  
strata.

Puerpera habitior, plethorica, ex-  
posuerat quinto post partum die cor-  
pus auræ frigidiori, simulque gravi  
terrore propter exortum incendium  
fuerat perculsa. Mox inde male ha-  
buit, lochiorum fluxus substitit, dys-  
pnœa accessit, dolor acutus sinistri la-  
teris thoracis, cum tussi sicca, pulsu  
duro, celeri & præcordiorum anxie-  
tate. Data mixtura diaphoretica, &  
discutiens & postera die secta in talo  
vena. His respiratio quidem facta li-  
berior, sed fluxus lochialis non revoca-  
tus. Hinc exhibitum crebro infusum  
theiforme ex herba veronicæ, cardui  
benedicti, floribus salviæ & radice li-  
quiritiæ, repetita quoque mixtura  
modo laudata. Nihil tamen profe-  
ctum, pulsus mansit celer, dolor per-  
sistit, nox fuit inquieta, leviter etiam  
deliravit & nares aliquot guttas stilla-  
runt. Quare quum sanguine redunda-  
ret femina, iterum in cubito vena  
pertusa, & postea datus liquor anody-  
nus, cum quartatincturæ bezoardicæ  
parte & grano camphoræ. Quo sudor  
per universum corpus per viginti qua-  
tuor horas manavit effuse, post quem  
alvus clystere molliente subducta. De-  
mum rursus prodierunt uteri purga-  
menta & ægra ex ancipiti est levata.

*Epicrisis.*

Puerperis nil certe perniciosius,  
quam frigus & terror. His enim spa-  
stica infertur strictura, sanguinis mo-  
tus ad caput & pectus convertitur, lo-  
chiorum fluxus sistitur, pedes frigent,  
alvus stringitur, caput rubet & tumet,  
somnia fit turbulentus, delirium leve  
ingruit, ac nisi cito succurritur, aut  
phrenitis, aut lypothymix graves,  
mortis prodromi, accidunt. Hoc si  
evenit, præstantius non est remedium  
venæsectione, etiam reiterata, &  
clysteribus lenientibus iterato, si ne-  
cessitas urget, injectis. Post sangui-  
nem autem missum conducit efficax  
sudoriferum cum regimine congruo

datum. In hoc casu, ubi spasmi &  
dolores symptomatum causa, liquor  
meus anodynus, qui tutissimæ virtu-  
tis sedativæ, cum sudorifero, uti spi-  
ritu cornu cervi succinato, aut spiritu  
bezoardico *Bussi* datus, ad sudorem  
movendum & motum humorum exte-  
rius vertendum, optimum fuit præfi-  
dium. Sola enim anodyna non suffe-  
cissent, neque etiam sola sudorifera,  
sed ambo mixta & quasi ad tempera-  
mentum reducta. Ratio vero, quare  
frigus tam pernicialia in puerperis in-  
ducat pathemata, est acutus sensus  
orificii ipsius uteri, quod ex multis fi-  
bris nerveis & musculosis contextum  
& quo a spasmō gravius affecto, uni-  
versa œconomia motuum salutarium,  
tam secretoriorum, quam excreto-  
riorum potest inverti. Nam ex vero  
scribit *Hippocrates lib. 2. epid.* post par-  
tum os uteri sæpe contorqueri & dolo-  
rem fieri juxta coxam & crus, sed secta  
tali vena liberari. Quem in locum  
*Mercurialis præl. Bonon.* commentatur  
hunc in sensum; contorsionem uteri  
esse affectum, in quo os uteri discedat  
a propria regione. Tandem in nostra  
etiam commemorabile, quod secunda  
venæsectio in cubito plus effecerit,  
quam prima in talo. Est tamen hoc  
non perpetuum. Quod si enim lochia  
subsistunt, præstat semper in inferio-  
ribus sanguinem post pediluvium sub-  
trahere. Sed quando sanguis jam cum  
impetu ad caput delatus, ad arcendam  
phrenitidem, satius est, in loco pro-  
pinquiori impetum derivare. Mihi  
certe aliquot innotuerunt exempla,  
ubi lochii subsistentibus, purpurata  
febris oborta, cum gravissimis sym-  
ptomatibus, lypothymis, præcordio-  
rum anxietatibus, mortem ipsam,  
minitantibus, quæ tamen misso in  
brachio sanguine & derivato a corde  
& appensis ipsi majoribus rubis sangui-  
ne mox per DEI gratiam discussa.



## OBSERVATIO VIII.

*Veteri  
Stillicidi-  
um  
perpe-  
tuum cum  
gravi-  
bus sym-  
ptomati-  
bus.*

Illustrissima persona triginta aliquot annorum, habitu corporis laxo & pleno, sanguinea, antehac optima valetudine usa, sed ab aliquot annis, ob præmaturum conjugis discessum, impenso merore aliisque crebris animi commotionibus affecta, multis quoque arduis negotiis distenta minusque salubrem victum colens, ante quadriennium incidit in pectoris oppressionem & spasticam ventriculi inflationem, quæ tamen interno & externo Carolinarum mitiorum usu abacta, ut postea belle valeret & mensum quoque successus legitimus esset atque sufficiens. Anno autem abhinc, post superatam febrem continuam & perpeffos diuturnos catarrhos, primum turbari cœpit mensium fluxus, modo anticipare, modo postponere semperque cum exquisitis ventris terminibus ac dorsi tensione prodire. Recruduerunt quoque pathemata spastica hypochondriaco-hysterica & accessit stillicidium muci rubicundi ex utero perpetuum, cum virium languore, appetitu prostrato, somno turbato & pulmbeo corporis aspectu. Quin, quum nuncio adverso admodum percelleretur instante mensium periodo, præter superiora pathemata, dolor acutus in hypogastrio obortus, ac si omnia ex imo ventre vi quadam deorsum urgerentur, secedente simul cum difficultate urina turbida feculenta, intermixtis mox cruoris lenti grumis, mox fibris & filamentis cruentis. Potissimum dolor acerbissimus compunctorius consedit fixus in hypogastrio, supra os pubis, in circumscripta regione, magnitudine dimidii uncialis, ex qua antrosum ad vesicam, retrorsum ad sacrum os, inferius versus femora excurrit, superior autem venter flatibus fuit cum molestia obsessus. Interim ad hypochondriaco hysterica pathemata & stomachi vitium tollenda ad Caroli-

nas iterum tendit iisdemque sub debito regimine interius usa est atque exterius. Quibus ventriculi & intestinorum dispositio morbofa emendata, uteri autem vitium nec in deterius interea, nec melius mutatum. Idem potius perstitit, & interjecto aliquo tempore, eo processit morbus, ut post spasmus in internis, temper mox sanguis sincerus, nunc spissior, nunc crassior, mox concrementum quoddam coagulatum & quasi membranaceum secederet, difficultates tamen & modes sub mictione & cacaturitione essent perpetuæ, per alvum mucositates globosæ ac teretes, modo cum, modo sine excrementis, evacuarentur, urina excreta turbida cum sedimento limoso, subroseo & cuticula carulescente puitosa, pulsus maximam partem esset exilis, debilis ac frequens, corporis & faciei habitus pallidus admodum, extenuatus, appetitus inconstans, tussicula sicca agrypnia propter dolores in hypogastrio exquisitos parum cessantes ferme habitualis, post passum phlogoses affligerent, refrigerationes artuum sæpe recurrerent, vires collaberentur & quandoque deficerent plane.

*Epicrisis.*

Ad oppugnandum gravem hunc morbum in consilium vocati Medici multi, & plures forsan quam expediebat, in diversum plane abeuntes. Aliqui enim calculum & nephritidem esse volebant, alii malum hypochondriacum, alii scorbutum, alii affectum hypochondriaco-spasticum hystericum, alii orgasmum furiosum. Ego vero, cum ordinario & celeberrimis binis Medicis censui, vesicam, uterum & rectum intestinum arctius invicem connexa & in cavitate pelvis comprehensa, a sanguine & succis stagnantibus esse infarcta, eorumque vasa & glandulas relaxata partim esse nimiumque distenta, partim læsa, plane erola atque exulcerata, & hinc prodire illum fluxum uteri perpetuum & pressorium illum etiam sub al-



vi & urinæ excretionem dolorem atrocem. Dedit etiam consilium, ut adhiberentur ea, quæ partes affectas & spasmis & inflammatione defendant; quæ nimium humorum affluxum ab iisdem avertant, easdemque tam interiorius, quam exteriorius mulceant, roborent atque consolident, pulveres scilicet temperantes nitrosos, pilulas balsamicas, infusa theiformia, ex melissa & millefolio, potum ordinarium Selteranarum cum quarta vini parte, epithemata & emplastra discutientia & roborantia, injectiones quoque in uterum circumspecte factas demulcentes & balsamicas, & postremo omnium saluberrimum lactis asinini potum aliquandiu continuatum, interposito subinde balneo tepido, ex aqua dulci cum lacte & fursuribus triticeis. Sed uti fieri assolet in principibus personis, ut multi Medici perdant ipsas, ita heic etiam, & multa, & varia, quin nonnunquam incongrua plane, usurpata sunt remedia, & quod præcipuum est in longis ejusmodi vitiis rejectum, diu continuatus accommodorum medicamentorum leniorum usus. Hinc sensim, uti comperi, in pejus ruit malum, pathemata magis adaucta, corpus plane contabuit, vires exhaustæ, & vix alius eventus sperandus, quam quem in simili fere casu supra *observatione 2.* accidisse meminimus.

### OBSERVATIO IX.

Febris  
uterina  
nimia  
venæ  
sectione  
lethalis

Illustris femina, triginta & trium annorum, sana & vegeta, post partum conquerebatur altero statim die de insigni ardore, dolore & tumore in interioribus vaginæ, arudi contestatione obstetricis colli uteri interni, inducti. Exacerbatis postea symptomatibus, accedente febrili æstu & lochius etiam non rite fluentibus, advocabatur Archiater. Is venam secare jussit in brachio. Quo quum nil levaminis accederet, sed præcordiorum anxietates, cordis palpitationes

& inquietudo intenderentur, alvus quoque cum pedum frigore stringeretur, decoctum mannatum cum cassia dedit, & spatio septem dierum, sexies misit, modo in brachio, modo in pede, sanguinem. Sed quum postremo id fieret, ægræ oculi cœperunt obfuscar, ut candelam inferre juberet, quum tam dies esset quam lucidissima, quin brevi post lethali lypothymia correpta obiit. Die post sectum cadaver, nil autem repertum, præter tumorem vaginæ, cui insidebat macula nigra dimidii uncialis magnitudine, ad internum uteri orificium, ac in toto vasorum systemate vix aliquot restitabant sanguinis cochlearia.

#### Epicrisis.

De veritate hujus historię testis ego *αὐτόπτης*. Quilibet autem illico judicabit, temerarie & imprudenter tam crebro administratam esse venæsectionem, a Medico, qui in Gallia hoc artificium edoctus & alias ob peculiarem variolas & petechiales febres curandi modum non est ignotus. Dolor enim & spasmus ac inflammatio facili negotio, applicato parti dolenti epithemate discutiente & datis interiorius blandis diaphoreticis, potuissent abigi. Nimia vero sanguinis subtractione, & lypothymia inducta, & sphacelus contractus, licet unica non nocuisset venæsectio. Nam ipsa inflammatio sufficiens & valido sanguinis appulsu discutienda, eodemque plus justo subtracto, necessario sequitur sphacelus. Igitur sicut plures Medici delinquant in eo, quod in inflammatoriis puerperarum affectibus sanguinis missionem repudient omnem; ita heic in excessu peccatum fuit graviter. Sed medium tenere beati.



## CAPUT XI.

De inflammatione Oculorum cum  
& sine Febre.

## Theses Pathologicae.

## §. I.

*Ophthalmia descriptio.*

**F**requentissima est inflammatio membranarum oculum inveniendum, tunicae praesertim adnatæ, sive albugineæ, græco nomine dicta ophthalmia. Jungitur hæc cum dolore acuto, interdum ut pressorio, ardore, rubore, tumore & feri falsi ex oculis effluxu, nec non visu imminuto, vel plane deperdito. Oritur autem quando vasa arteriolarum lateralia, quæ secundum naturam pellucidum nulloque colore infectum liquorem vehunt, a sanguine valide ad caput congesto implentur, distenduntur & visui sese offerunt. Hanc enim causam esse, patet experimento, quo injecto per siphonem in carotidis ramam liquore spissiusculo rubicundo, adnata oculi tunica, per omnem sui ambitum rufescens, & inflammata comparet.

## §. II.

*Levior est gravior vel gravissima.*

Est autem ophthalmia, vel levior, vel gravior, vel etiam gravissima. Levior albugineæ tantum tunicae insidet, nec tam late diffunditur, facilius discutitur & oritur potissimum a causa externa leviori, insperso pulvere, appulsu asperiori, plaga aut allisu leniori, aura liberius admissa frigida & sudore subito represso, nec non ab administrata cataractæ depositione. Gravior, præter adnatam, etiam confines palpebras infestat totumque oculum exquisito ardore, & dolore afficit, qui ad levem lucis accessum exacerbat. Enascitur hæc maxime a causis internis, feri nempe impuritate & salutaribus excretionibus cohibitis, ac uti ego observavi, a suppresso solenni matutino sudore, a scabie, nec non tineæ capitis intempestive

abacta, a cohibitis mensibus, ulceribus & fistulis consolidatis, item repulsa rosacea gutta, & propterea ægrius nec nisi externis & externis adhibitis, discedit. Gravissima demum profundior est, ad ima oculi & interioris tunicas penetrat. Comitatur hanc dolor acerbissimus cum febre, quandoque etiam cum delirio, sequitur suppuratio & humorum effluxus, remanente cœcitate perfecta. Rarius tamen a causis internis, sed plerumque a contusione validiori inducitur. Vidi ego suppurationem excidente lente crystallina, post idum fortem inter pugillandum oculo inflictum, vidi vero etiam talem casum a tineæ capitis inveterata, subito externis siccata.

## §. III.

Deinceps alia ophthalmia est vera, *Vera vel notha.* alia notha, sive spuria. Veræ causa maxime interna & symptomata graviora, a sanguinis in tubulis stasi, ægrius abigenda. Spuria a causa magis externa, uti pulvisculo in oculos illapso, a vapore acris, ceparum & allii, symptomata hinc sunt mitiora & facilius cedit ipsa. Alia sicca est, alia *sicca; vel humida.* humida. Illa fit a sanguine calido cum dolore acuto, pungitivo ac nil ex oculo effluit. Hæc mitiori quidem stipatur dolore & ardore, sed palpebræ tumet & multum feri acris effluit, ut oculi noctu conglutinentur. Illa frequens sanguineo-cholericis, juvenibus ac æstivo tempore, hæc pueris & infantibus, nec non feminis & phlegmaticis.

## §. IV.

Datur quoque ophthalmia epidemica & periodica. Epidemica enascitur certis anni temporibus a diuturna humida & frigida aeris constitutione, postquam ophthalmicum morbum plures invadere sæpius observavi ac idem testatur *Amatus Lusitanus Cent. VII. obs. 80.* Quæ autem certo quodam tempore, vel quotannis, vel circa æquinoctium, vel singulis mensibus infestat, solennis est, quando lueta san-



sanguinis miſſio intermittitur, men-  
ſes non rite fluunt, aut retinentur,  
quando hypochondriacus affectus ſub-  
eſt & ſanguis in vaſis hæmorrhoidali-  
bus ſtagnans ſtatus & ſpaſmos concit-  
tat in abdomine, quibus ſanguis cum  
impetu urgetur ad caput & oculos.

§. V.

*Cauſa ophthalmia.* Præterea vero quæ jam de cauſis  
ophthalmiæ diximus paſſim, ad ean-  
dem maxime diſponunt crapula, ve-  
nus & vigilia immodica, lucubratio-  
nes cum intemperantia ſtudiorum,  
ventus borealis, crebrior aſpectus  
ignis, ſolis, & colorum ſplendidio-  
rum. Idem faciunt ſumi acres & me-  
tallici, alvus diu & multum adſtricta,  
refrigerationes extremorum immode-  
rata, in primis menſium tempore, item  
præcedentes oculorum morbi, debili-  
tatem quandam relinquentes, oph-  
thalmia ipſa, nec non quam maxime  
variolarum & morbillorum morbus,  
maximam ad oculorum affectus indu-  
cens diſpoſitionem. Quando autem,  
uti haud raro fit, hemicraniæ, inter-  
dum etiam odontalgia, jungitur oph-  
thalmia, ſerum acre ſcorbuticum ſub-  
eſt, idque aliquoties contigiffe novi,  
a podagra retropulſa, ejuſdemque ma-  
teria non modo ad pericranium, ſed  
& oculorum tunicas & perioſtium ma-  
xillæ ſuperioris delata.

§. VI.

*Eſſen-  
tia.* Levem illam ophthalmiam facile  
diſpelli, graviffimam in oculi ſuppu-  
rationem cum cecitate tranſire, etiam  
jam monitum. Gravior autem eſt  
contumacior, durat ſæpius per men-  
ſem & longius, ac haud raro maculas  
in cornea relinquit, ſplendorem ocu-  
lorum obſcuſcat, humores turbidos  
tunicamque corneam craſſiorem, glau-  
cam minusque pellucidam reddit,  
Semper etiam difficilius curatu in pue-  
ris, nec non in ſenibus, in illis ob  
ſuccorum lymphaticorum abundan-  
tiam & partium teneritudinem; in  
his vero ob humorum impuritatem.

Curatio.

§. I.

In medicatione ophthalmiæ tria *Humores de-  
res de-  
rivantur.*  
hæc perficienda: I. ſanguinis, vel  
etiam ſeri acris motus a capite deri-  
vandus: II. ſtaſis inflammatoria di-  
ſcutienda: III. ſymptomata graviora  
arcenda & oculus defendendus a reci-  
diva. Inter ea, quæ humores a capi-  
te divertunt, eſt maxime ſanguinis  
miſſio, quam ex jugulari inſtitutam  
mire laudat *Hildanus Cent. IV. obſ.*  
13. Alii ſublingualium commendant  
ſectionem, ſed ante hanc, ſi ſanguis  
redundat, in brachio aut pede prius  
pertundenda vena. Sunt qui cucurbi-  
tulas cum ſcarificatione in nucha &  
pone aures ſuadent, & veteres appo-  
ſitis hirudinibus multum detulerunt.  
Dein divertunt efficaciter pediluvia,  
quibus ter intra viginti quatuor horas  
uſurpatis, pote ſimul liberaliter in-  
fuſo theiformi feliciter diſcuſſam eſſe  
ophthalmiam, aliquoties vidi. Serum  
porro acre ſaluſum valide ab oculis re-  
vocant veſicatoria, nec non ſi malum  
inveteratum ſetacea, proſunt quoque  
ſinapiſmi, ex ſemine erucæ ſacculis in-  
cluſo, in vino cocto ac in nucha, vel  
ſub axillis admoto. Præterea optime  
caput ab humorum affluxu liberant  
laxantia, vel etiam pro circumſtan-  
tiarum ratione purgantia. Sponte  
enim purgatione ſæpe ſolvi ophthal-  
miam notavit *Hippocrates Seſt. VI.*  
*aph. 17.* Et *Galenus Meth. med. lib. 13.*  
*cap. 2.* gravis teſtis eſt, nonnullos qui-  
bus oculi inflammati ſola purgatione  
per alvum una die ſanatos.

§. II.

Divertens ſimulque diſcutiens egre-  
gia virtus ineſt diaphoreticis quæ li-  
beram perſpirationem procurando,  
non modo ab oculis & capite ad cor-  
poris ambitum humores agunt, ſed  
& ſuccos ab acrimonia ſalfa repur-  
gant. In ipſa autem parte affecta in-  
flammatoria ſtaſis diſcutienda & in-  
ternis & externis. Ex illis omnibus



præferendum infusum theiforme ex radice valerianæ, liquiritiæ, floribus sambuci & semine fœniculi, quod largius potandum & ante potum vapor ipsius consulto sub tecto capite ad oculum admittendus. Inter externa efficax & securum hoc collyrium: recipe aquæ florum sambuci, sclopetariæ ana unciam unam, camphoræ grana tria, sacchari saturnini grana decem. M. quod cum linteo triplicato crebrius tepide oculis applicandum. Quando autem nimis mordens adest acrimonia, mucilaginem corticis medii florum tiliæ, item seminis cydoniorum, cum aqua rosarum, addito paxillo croci, sine vel cum opio, admoveere expedit. De symptomatum medicatione dicetur in cautelis.

*Cautela & Observationes  
clinicae.*

§. I.

*Curatio  
gravi-  
tati ma-  
li acco-  
modan-  
da.* Quia ophthalmia gravitate differt, diversa etiam ineunda medendi methodus. Quam levem diximus, optime fert frigida & repellentia, ac solum albumen ovi, cum aqua rosarum & paxillo aluminis conquassatum, sufficit omnibusque aliis palmam præripit. Gravior non solis externis cedit, sed interna efficacia exigit remedia; quæ serum recrementitium ab oculis divertant, falsos & acros humores diluant atque contemperent eosdemque successive per congrua emunctoria eliminant. Proficua hunc in finem infusa theiformia, serum lactis dulce, aquæ minerales, tam martiatæ, quam alcalinæ, temperantes & diaphoretici pulveres, non omis- sis laxantibus, pediluviiis, nec non urgente plethora & suppressis criticis sanguinis evacuationibus, venæ sectione tempestiva. In gravissima cum febre & ubi periculum est, ne in sup- purationem transeant interiora, e re est, ut repetita venæ sectio institua- tur, aut liberaliter sanguis subtraha-

tur, & hoc quidem omnium optime per venam sectam jugularem. Inter- ius pugnandum diaphoreticis, demul- centibus & resolventibus, inter quæ salubritate antecellunt pulveres be- zoardici, cinnabarini, leniter nitrosi & camphorati, pota simul loco ordi- narii potus ptisana. Exterius vero abstinendum a collyriis refrigeranti- bus & potius aqua sic dicta sclopetaria, cum aqua rosarum & florum sambuci, adjecto paxillo croci & camphoræ, tepesacta, cum linteo duplicato ad- movenda.

§. II.

Non in omni ophthalmia necessa- ria sanguinis missio, sed tantum ubi plethora eminens, venæ sectio aut scarificatio omissa, vel etiam critica quædam hæmorrhagia intercepta. Interim si mali origo a sanguinis re- dundantia, præstat prius venam bra- chii, pedis, aut jugularem aperire, ac postea, si opus est, scarificare pone aures, vel in nucha. Setacea & vesti- catoria non facile applicanda in ple- thoris, nisi soluta prius plethora, & alvo, præsertim in cacochymicis subducta. Neque, si vesicatoria ne- cessaria, ea semel tantum apponere sufficit, sed sæpius, in locis sensibili- oribus, uti nucha, olecrano, carpis Manuum. Hinc præfertur setaceum, cui tamen, quia & dolorosum, & molestum nimis, nos anteponimus vesicatorium temperatum minus, grossi magnitudine, per mensem & longius in nucha gestatum.

§. III.

De purgantium usu tenendum, cor- porum & naturam diversitati eundem esse accommodandum. Si res man- natis, tamarindinatis & tartareis ex- pedire potest, non confugiendum ad a- criora. Alias in torpidioribus & phleg- maticis, pilulæ efficaciores, uti tar- tareæ & de succino *Cratonis*, vel tutius nostræ balsamicæ, aliquoties porrigen- dæ. Diaphoretica egregii usus, sed diutius adhibenda, quando magis fe- rum acre falsum, quam sanguis in- vitio.

*De V.S.  
& vesti-  
catoriis*

*Purgan-  
tibus &  
diapho-  
reticis*



vitio est, tanto magis si ophthalmia symptomatrica alii morbo supervenit, aut jungitur hemicrania.

§. IV.

Regime  
& vi-  
tus.

Quemadmodum in omnibus oculorum morbis, ita maxime in eorum inflammatione, abstinendum est ab omnibus spirituosus, spiritu vini, vino, fumo tabaci, etiam sternutatoriis. Arcendi fumi, ceparum & allii vapor, cum ignis, radiorum solis, lucis & colorum fulgidorum aspectu. Vitandus corporis exæstians motus & nimis crassusque victus. Potus sit aqua pura, vel ptisana, aut decoctum ex semine fœniculi, rasura cornu cervi & hordeo. Colenda sobrietas, victu molli & temperato utendum, ac quiete in loco tenebricoso commorandum.

§. V.

Topica  
noxia.

In administratione topicorum, sive collyriorum, magna opus est cautione. Plures enim, notante etiam *Septalio*, imperito horum usu, cœcitate affectos novimus. Scilicet ut plurimum aut acria nimis sunt, ex aqua calcis vivæ, sale ammoniaco, cum vitriolo albo, vel Cyprio; aut nimis adstringentia, cum alumine, sanguine draconis, bolo Armena, lapide calaminari, tutia & albumine ovi; aut nimis refrigerantia, quæ aquam spermatis ranarum, rosarum, plantaginis, adjecto saturni saccharo habent; aut nimis exsiccantia, ut quæ cum cornu cervi usto, lapide calaminari & tutia confecta; aut etiam nimis laxantia, ex mucilagine seminis psyllii, cydoniorum, fœnu græci, tragacantha & butyro insulso. Omnia autem hæc, licet in aliis oculorum affectibus præstanti non careant usu, in inflammatione tamen, præsertim sanguinea, tantum abest ut prosint, ut potius noceant. Inde enim non modo peior & profundior redditur stasis, sed & ipsi humores oculorum pellucidi sunt turbidi, sequitur oculi tabes corrugatio, suffusio, epiphora chronica,

rubens, sicca & aspera, quin palpebrarum exulceratio.

§. VI.

Ego potius auctor sum, ut seponantur topica omnia ante tertium diem & antequam convenientia interna jam usurpata, exceptis folis sacculis ex paregoricis, & demulcentibus compositis. Postea vero omnium optima quæ supra commendata. Neque tamen etiam in chronica ophthalmia, ubi continuum lymphæ falsæ, acris est stillicidium, inglorium est *Hæchstetteri* medicamentum ophthalmicum, ex butyri recentis insulsi drachmis duabus & vitrioli albi scrupulo, de quo granum pisi majoris magnitudine in oculi canthum subinde indendum.

§. VII.

Quando, quod sæpius fit, ophthalmia tandem discedens relinquit speciem maculæ & visum imminutum, tunc nihil præstantius est axungia viperarum recenti ex Italia allata, & crebrius ad aliquot guttas oculo instillata. Egregie etiam visum turbatum & imminutum restituit sal volatile falsi ammoniaci siccum, oleo majoranæ imbutum & odore crebrius naribus susceptum. Eiusdem virtutis vapor ex decocto radicis valerianæ florum sambuci, seminis fœniculi, ad oculos tecto prius linteo capite, admissus. Sed opus est, ut hæc auxilia mature ac tempestive adhibeantur. Si enim inveteravit & radices egit vitium, difficillime sanescit. Novi tamen, visum fere deperditum ex ophthalmico morbo linimento mercuriali genibus & poplitibus illito interpositisque balneis aquæ dulcis, redditum fuisse. Neque minus potenter viscidos & coagulatos humores dissolvit ac sudorem movet, sulphur nostrum antimonii fixatum, eaque propter in oculorum vitis egregie conducit.

Quæ  
profi-  
cua.

Reli-  
quæ ex  
ophthal-  
mia  
quibus  
delenda.



## Enarrationes morborum.

## OBSERVATIO I.

*Opb-  
thalmia  
ex ictu  
suppu-  
rata.* Juvenis sanguineus, in palæstra gladiatoria æstuans, acceperat forte inter pugillandum ictum cum gladio palæstrico, quem vocant *eim Rappier*, in oculum sinistrum, subsequente mox rubore ac dolore. Ille tamen penſi hæc habens, vesperi largiter ingurgitavit vinum, rixas quoque acres cum sodalibus movit. Inde die post magnus tumor oculum ejusque vicinas partes occupavit, cum dolore pulſatorio, cephalalgia, præcordiorum anxietate ac pulſu celeri. Chirurgus advocatus, non adeo magni momenti eſſe putans, applicuit collyrium frigidum, quo ſymptomata adeo exacerbata, ut ſomnum abigerent omnem. Hinc Medicus in conſilium vocatus, qui ſanguinem mittere & pedibus bursam paſtoris admoveſcere juſſit. Sed incaſſum. Inflammatio potius abiit in ſuppurationem, & quinto ab inſiſto ictu die, ingens puris quantitas ex oculo fluxit; quam ipſi humores ſequuti & ſic oculus cum omni viſu periit. Quin poſtea ſumma cura enitendum fuit, ne hæc inflammatio & exulceratio in ſphacelum degeneraret, quod etiam a Medico applicatione ſpiritus vini camphorati cum eſſentia croci, & data interius tinctura bezoardica, præſtitum eſt.

## Epicriſis.

Nunquam periculo vacat oculi inflammatio profundior, qualis exſurgere ſolet a graviori contuſione, vel vulneratione, quia ejusmodi inflammatio non facile diſcutitur, ſed in ſuppurationem, non ſine ſphaceli ipſiusque vitæ diſcrimine, abit. Noſtro quidem judicio averti potuiſſent gravia hæc ſymptomata, ſi æger non largiori vini potu ſanguinem commoviſſet, majoremque ad partem jam affectam proritaſſet affluxum; ſi dein ſtatim poſt contuſionem ſanguis e bra-

chio miſſus fuiſſet & cataplaſma, ſive ſacculus ex diſcutientibus, uti radice ſigilli Salomonis, ireos Florentinæ, roſarum rubrarum, anthos, lavendulæ, ſambuci, chamomillæ, camphora & croco in vino coctis, fuiſſet admotus, nec Chirurgus inſtillatione frigidi collyrii inflammationem reddidiſſet deterioſorem.

## OBSERVATIO II.

Femina 42. annorum, ſanguinea, *Opb-  
thalmia  
periodica.* obefa, ſcorbutica & glandulas in collo tumefactas gerens, poſt retentum menſium fluxum, corripiebatur oculi ſiniſtri dolore ac rubore, cum ejusdem lateris cephalalgia admodum vehementi. Liberata primum, annum poſtea ſemper, menſe Octobře, hujus mali experta eſt recurſum, ſub quo appetentia erat proſtrata, lucem ferre non poterat, & ſeri ex oculis copioſum ſtillicidium ſemper experiebatur, quod per aliquot menſes perſiſtebat. Pluribus uſa remediis, ſed incaſſum, & notabile erat, quod quoties ſal volatile oleoſum ſumeret, toties ſoporem & torporem ingentem capitis pateretur. Ut itaque hic affectus, qui per triennium ægrum mirum afflixerat, radicitus extirparetur, acidulas Pyrmontanas æſtate ſub debito regimine potabat, quibus etiam alvus & urina optime ſeceſſit & ipſa poſtea a contumaci malo eſt liberata.

## Epicriſis.

Periodica hæc eſt ophthalmia, ex menſibus ſuppreſſis in plethorica femina oborta, menſe maxime Octobře, quo alias ſolennes ſunt ſanguinis excretiones, commotiones & molimina ad excernendum, præſertim per hæmorrhoides. Quare impenſius hoc tempore ſanguis regurgitavit ad caput, ac non tantum oculum, ſed etiam membranas capitis ejusdem lateris male affectis, unde dolores. Sopor vero & torpor ille, qui uſu ſalis volatilis aſſumpti accidit, inde derivan-



vandus, quod hoc remedio; congestus in capite sanguis magis rarefactus, sicque recursus ipsius per venas interceptus. Dein notabile est, quod morbi qui statas servant periodos, plerumque fundamentum habeant in abdominis visceribus, unde optimo consilio ad eradicandos eos, commendari solet usus aquarum medicatarum, thermarum & acidularum, ad removenda viscerum vitia efficacissimus.

### OBSERVATIO III.

Subita  
Inflam-  
matio a  
festuca  
ferrea.

Vir quadragenarius sanguineo-cho-  
lericus, subito affectus est dolore oculi  
ac rubore, quem sibi accidisse putavit,  
a festuca minima ferri, sub ictu clavi  
cum malleo in oculum saliente, licet  
nihil omnino de ea in oculo compare-  
ret. Ipse igitur ad tollendam passio-  
nem oculo subinde instillavit colly-  
rium frigidum, ex aquis ophthalmi-  
cis, qui quidem calor & ardor delini-  
tus, sed bulbus turbidus & obscurus  
comparuit ac omnis visus periit. Me-  
hinc vocavit in auxilium, qui, ne  
cecitas ingrueret perfecta, obviam  
ivi hisce, sal volatile ammoniaci sic-  
cum, oleo majoranæ imbutum, cre-  
brius naribus admove, fronti &  
temporibus emplastrum ex gummi e-  
lemi, animæ, mastiches, olei nuci-  
stæ ana drachmis duabus, camphoræ  
& balsami Peruviani ana drachma,  
applicare & frequentius ac copiose bi-  
bere jussi infusum seminis fœniculi  
cum aqua. Quibus intra aliquot heb-  
domades oculus recepit splendorem  
& visus aciem.

#### Epicrisis.

Si inflammatio subito oculum ado-  
ritur, non injusta est causæ externæ  
suspicio, licet eadem non semper in  
conspectum veniat, quia interdum a-  
deo subtilis, ut visum fugiat, ut fit si  
a fumo acri membranæ oculi male ef-  
ficiuntur. Discimus vero etiam, quam  
nocens sit instillatio frigidi in oculum  
ardentem, nec non quo pacto qui-  
busque remediis oculorum humori-

bus turbidis reddenda sit perspicuitas.

### OBSERVATIO IV.

Juvenis literarum studia intempe-  
rantius tractans, indulserat a longo  
tempore nimium lucubrationibus &  
inde sibi insignem contraxerat visus  
debilitatem. Post annum invasit oculo-  
los dolor gravativus pressorius, non  
sine ardore, adeo ut nec lumen aspi-  
cere, nec citra molestiam legere pos-  
set, sed statim largum oculorum stil-  
licidium experiretur. Medici suase-  
runt purgantia, tabaci fumum, oculo-  
li cum balsamo peruviano inunctio-  
nem externam, nec non fonticulum  
in nucha. Frustra tamen. Quin licet  
purgantia postea fortiora, decocta  
sanguinem purificantia, venæsectio-  
nem in pede, pediluvia cum accurato  
in diætâ & victu regimine adhiberent,  
nihil tamen aliud omnibus effectum,  
quam ut ventriculus debilitaretur insi-  
gniter. Alii de scarificatione admini-  
stranda, fonticulo brachio inurendo  
& pinguedine viperarum instillanda  
oculo dederunt consilium, sed eodem  
frustraneo effectû. Adit etiam æger  
Pyrmontanas acidulas, quibus labe-  
& infirmitas oculi adaucta & nubecule  
visui oblatae, ut cataractæ plane me-  
tus esset. Pariter in vanum laboravit  
Medicus, qui decoctis sanguinem pu-  
rificantibus, vesicatoriis, sternutato-  
riis variisque collyriis pertinax ma-  
lum abigere molitus est. Tandem  
vero solo usu pilularum mercurialium  
cum gummatibus & extractis balsami-  
cis amaris, item infuso theiformi, ex  
semine fœniculi cum anatica lactis  
parte, nec non externe cataplasmate,  
ex mica panis similaginei, cum cremo-  
re lactis, croco & floribus sambuci,  
allatum misero levamen, dolor pres-  
sorius discessit, remansit vero quædam  
visus imbecillitas.

#### Epicrisis.

Hic oculorum affectus non quidem  
ad veram & exquisitam ophthalmiam  
referendus, sed magis ad notham,  
quæ

Oph-  
thalmia  
notha,  
rebelis  
ill.



quæ a stagnatione lymphaticorum humorum in oculis & sanguinis circuitu libero impedito, ortum traxit. Hæc autem causa, quia Chirurgos & Medicos latuit, adhibita præpostere medicamenta nihil profecerunt. Erant enim non tanti, ut vasculorum tenuissimorum obstructionem expedire potuissent. Illa vero postremo usurpata efficacia resolventia, pilulæ mercuriales, nec non exterius cataplasma, accommoda utique fuerunt atque proficua. Igitur multitudo & varietas medicamentorum, prodit ut plurimum Medici ignorantiam, qui, si causam morbi rite intelligit, nec adeo multis, nec variis opus habet remediis, sed paucis, usu probatis, sæpe simplicibus, diutius tamen usurpandis.

## OBSERVATIO V.

*Oph-  
thalmia  
gravis  
cū pur-  
pura  
cornea.* Viro 30. annorum inopinato paucillum succi illius acris, quo capillorum concinnatores, capillos atro colore inficere solent, in oculum ceciderat. Hinc sequutus rubor oculi & dolor acerbissimus; ut patiens nec cibum, nec somnum capere posset, ac ferendo cruciatu fere esset impar. Chirurgus in consilium vocatus, collyrium ex aqua rosarum, plantaginis & tutia, frigide instillandum suavit, hocque nihil plane proficiente, saccharum saturni in aqua rosarum solutum crebrius cum linteo dolenti oculo admoveere iussit. Sed nihil his dolorum atrocitas mitigata, oculi potius bulbus quasi decrevit & minor factus, humores turbati & visus plane periit, in cornea quoque tumor apparuit durus, instar pisi. Admota quidem nuchæ vesicatoria, usurpata quoque purgantia, sed malum plus in deterius, quam melius versum. Hinc Chirurgus desperabundus deseruit ægrum, omnesque adstantes de visu unquam recuperando dubitare coeperunt, imprimis quum præterea palpebra oculi affecti elevari non posset, sed

semper clausa & elevata manusensus expers esset, quin vesiculosus tumor in internis palpebræ compareret, aspectum oculi fere intercipiens.

*Epicrisis.*

Ophthalmia hæc fuit gravissima, cum ruptura corneæ, obortæ a succo acris in oculum illabente, qui arrosiore affluxum sanguinis ac humorum tunicarumque distensionem fecit. Multum vero etiam ad grave malum contulit collyrium frigide admotum, eo quod stasin & stagnationem humorum firmiorem reddidit & graviorem. Nos sequentibus ivimus obviam: spiritus vini camphoratus cum balsamo Peruviano, exhalato prius spiritu, cum linteo duplicato crebrius oculo fuit admotus. Alvus pulvis ex mercurio dulci, gummi ammoniaco, extracto panchymagogo *Crollii*, balsamo Peruviano & sale succini subducta. Adhibita pediluvia. Potum copiose infusum theiforme ex veronica & semine foeniculi. Datum interius discordium *Fracastorii*, cum lapidibus cancrorum & nitro. Et exterius cataplasma, ex pomo assato, croco, mica panis similaginei cum lacte coctum, oculo impositum. His dolor & rubor cum ardore sublatus, palpebræ quoque tumor discussus, sed visus, ob corneam ruptam & humores incrassatos, rediit nunquam. Ut adeo pateat, quantum damni ab improvida collyriorum applicatione est metuendum.

## OBSERVATIO VI.

Juvenis generosus, viginti aliquot *Febris  
ophthal-  
mica.* annorum, constitutionis teneræ & a scorbuticis parentibus genitus, capitis dolores & narium hæmorrhagias crebrius expertus, defluxionibus etiam catharrhalibus & coryzæ sæpius obnoxius, vitæque sedentariæ, litterarum amore ductus, nimium indulgens, incidit in cephalalgiam gravem, cum atroci oculorum dolore, alvo



alvo simul adstricta. Dolor hic erat periodicus, ita ut matutino quotidie tempore cum rubore & feri salsi effluxu, præcedente refrigeratione & subsequente pulsu celeri accederet, per sex circiter horas insisteret ac postea sensim discederet, die post rediturus, ægro interim nec in somno, nec appetitu vitium observante, nisi quod subinde post cibum ructus experiretur. Detinebat singularis hinc affectus per mensem egrum & frustra adhibita fuerunt præsidia varia, collyria, errhina, evacuantia, cephalica, necnon cucurbitulæ, tandem vero a me abactus est hisce. Ter scilicet alternis diebus dedi pilularum harum 20. recipe extracti panchymagogi *Crollii*, gummi ammoniaci, mercurii dulcis, cinnabaris nativæ præparatæ ana drachmam semis, extracti croci, castorei ana grana sex M. f. c. balsamo Peruviano ex scrupulo no. 20. Una ante accessionem hora pedes immittere jussi ad genua usque pediluvio ex aqua fluviali, cineribus clavellatis imbuta, ac dum sic in balneo pedes servabantur, ad mensuram unam bibere infusum theiforme, ex herba melissæ, floribus tilia, radice valerianæ & semine fœniculi, quo sudor projectus copiosus. Vesperis exhibui per aliquot dies pulverem ex pulveris Marchionis drachma dimidia, succini, nitri puri, cinnabaris, antimonii rectificati ana granis octo. Oculo exterius applicare præcepraquam Regine Hungariæ, cum dupla parte aquæ rosarum & camphoræ momento. Crinibus quoque quotidie inspersus pulvis ex succino præparato, radice ireos Florentinæ, caryophyllis aromaticis & cardamomo. Quibus per octiduum usurpatis, discessit malum, sed restitit nubecula quædam, visum quodammodo intercipiens, quæ tamen crebriori instillatione pinguedinis viperinæ recentis, etiam sublata.

*Epicrisis.*

Febris hæc recte dici potest cephalico ophthalmica, cujus causa fuit non

tantum capitis debilitas a longo tempore contracta, verum etiam alvi ob vitam sedentariam adstrictio, qua spasmi in primis viis inducti, quibus ferrosus sanguis ad caput impetuosius actus. Hinc primo omnium in medicatione fuit subducenda alvus, ac postea recte ante accessionem pediluvii & potu infusi theiformis roborantis copioso sudor prolektus per universum corpus. Sudor enim & aucta perspiratio egregie serviunt spasmi & doloribus periodice certis statisque temporibus redeuntibus discutiendis & abigendis. Deinde quoque in pertinacibus ejusmodi capitis oculorumque doloribus cinnabarina & ipse mercurius dulcis, serum lentescens stagnans fundendo & obstructions expediendo, opem ferunt præsentissimam. Errhina vero & sternutatoria, plus nocent quam prosunt, quia humores magis ad oculorum confinia vocant. Varii etiam generis collyria, nisi simul discutiente virtute polleant, in ejusmodi oculorum affectibus plus nocementi, quam emolumenti afferre, multoties observavi. Tandem ad maculas oculorum & nubeculas delendas, pinguedine viperarum efficacius nihil, quam etiam *Ludovici & Wedelius* passim miris ornant encomiis. Habet enim acrimoniam subtilem, blande detergentem. Sed præstat in fine illam exhibere, non in principio, si ardor adhuc & dolor impensius urgent. Ceterum plura tum de ophthalmico, tum aliis oculorum affectibus commentatus sum in dissertatione, *de morbis oculorum præcipuis recta medendi ratione*, nec non in *Medicina consultatoria* Tomo 2. Dec. 4. Cas. 2. pag. 163. seqq. de dolore & imbecillitate oculorum cum suffusione incipiente.

OBSERVATIO VII.

Generosus vir, sexagenarius, macilentus, victui duro & crasso falso assuetus, aliquot per annos singulis fere tribus mensibus, erysipelatis in

*Ophthalmica habet micra-*  
*nia.*

pe-



pede dextro cum horrore & vehementi dolore insultum expertus est, quod tandem in suppurationem & ulcus defuit, ac per annum & ultra ipsum detinuit, postea vero a Chirurgo perito consolidatum fuit. Ex eo tempore singulis fere mensibus circa novilunium, incidit in hemicraniam dextri lateris, quæ simul gravi dolore, profundius in orbita hærente, cum feri salti effluxu stipata, qui circa noctem exacerbatus fuit, & paroxysmus semper invasit cum horripilatione & extremorum refrigeratione, pulsu postea alterato & auctiori facto. Malum autem solvebatur post quartum diem facta crisi, mediante sudore largiore, ægro alias etiam sueto. Mali pertasus, nostro ex consilio usus est Pyrmouranis acidulis, quas olim usurparat, hacque cura absoluta suasi ut loco potus ordinarii decoctum ex radice scorzonæræ, chinæ, sarparillæ, liquiritiæ & passulis, biberet & singulis mensibus infusum ex manna, rhabarbaro & cremore tartari, assumeret, ut victum durum, salsum, aromaticum vitaret & fonticulum etiam dextro brachio inuri permitteret. Quibus remediis quum omni adhibita cura uteretur, liber non modo ab erysipelate, sed & ab hemicrania ophthalmica degit, scabie tamen sicca pruriente divexatus, sicque septuagesimum ætatis annum excessit.

#### *Epicrisis.*

Ophthalmica hæc est hemicrania, in qua notabile, quod cessante erysipelate & ulcere consolidato in pede dextro, materia scorbutica ad dextrum latus capitis & oculum fuerit conversa, certis statisque periodis hunc excitaverit morbum. Quum vero scaturigo tam erysipelatis, quam hemicraniæ & ophthalmiæ, sit quærenda in sanguinis & lymphæ dyscrasia scorbutica, utique potu acidularum, decoctorum & congruorum laxantium usu, universum sanguinis & humorum massam perpurgare expedit & hac ratione in corpus potius ab ejus-

modi vitiis defendere, quam eadem si adsunt abigere.

### C A P U T XII.

#### *De Febre Intestinorum inflammatoria ex Mejenterio.*

#### *Theses Pathologiæ.*

##### §. I.

**I**ntestina, tam tenuia, quam crassa, qua membranosa fere tota, ex tunica prima a peritonæo, altera muscolari, cum fibris longitudinalibus & circularibus, nervosa & villosa contexta, innumeris nervorum & vasorum surculis perfusa & exquisito sensu ac motu instructa, & multis, & gravibus morbis patent, e quibus haud postremus inflammatorius, qui ipsis ex variis causis accidit. Nam atrociorum & lethalia quandoque pathemata, quæ assumpta venena, emetica validiora & drastica purgantia excipiunt, & ab inflammatione in sphacelum transeunte ortum ducunt. Vulnura ac læsiones intestinorum, non aliter, quam inflammatione necant. Febres synochas & ardentes, maxime cholicas, dysentericas, item plurimas malignas, neque minus exanthematicas, inprimis variolas, lethalem sæpe inducere inflammationem, uberior testatur dissectio his morbis defunctorum. Convulsivam etiam colicam, maximeque eam, quæ a podagra retrocedente, ac subsistente, ex cohibito, aut sufflamminato hæmorrhoidali fluxu, sanguine inducitur, iliacam quoque ex hernia incarcerata, aut intestinorum convolutione, passionem, non alia ratione, quam intestinorum inflammatione, lethum inferre, est in comperto. Nihil quippe vitalibus motibus adeo est inferius, quam putredo, quæ excipit inflammationem, ac in nervosis, exquisito motu ac sensu pollentibus partibus, consistit.

*Intest.  
norum  
inflam-  
matio-  
nes fre-  
quentes.*



§. II.

*Minus nota que ex mesenterio,* Sed quia de intestinorum inflammationibus symptomaticis eisdemque complicatis febribus, jam supra actum & adhuc congruo loco agitur; nunc duntaxat pauca tradere libet, de inflammatione febre illa intestinali, quæ proficiscitur ex mesenterio. Jam apud Medicos in confesso est, plures morbosas affectiones, præsertim hæcticas, lentas errantesque febres, nec non apostematata, in mesenterio sedem habere fixam; sed diarrhœas, dysenterias, immo inflammatorias febres intestinorum, pullulare ex mesenterio, id non quæ omnibus patet. Verum qui ex physiologicis novit, sanguinis progressum, in mesenterio & mesocolo, quibus annexa intestina, esse tardissimum, tum quod tunicis nervoso musculosis sanguinem urgentibus destituantur, tum quod venæ portæ, pulsu carens, recipiat sanguinem ex intestinis & tardo flumine vehat ad hepar; is ultro fatebitur, promptam ibi esse genescim stagnationem, & ita seos & amplissimum nidum ad excludendas materiales morborum causas. Quinquam intestina arctius mesenterio sunt connexa, ut ab ipso etiam sociantur membranam, fibrarum quoque in intestinis annularium tendo juxta *VVillisium*, sit mesenterium & vasa ac nervi utrisque sint communes, magnas inter has partes esse communionem, quoad morbosas affectiones, utique certum.

§. III.

*Quæ a. acuta, vel chronica,* Ipsæ tamen febres, quæ ex mesenterio veniunt & nobis cum *Baglivo* audiunt mesentericæ, in duo merito genera sunt dividendæ, acutas scilicet & lentas, sive chronicas. Utrarumque materialis causa ejusdemque sedes in mesenterio, sed febrium & symptomatum generatio quærenda in annexis intestinis membranaceis, ita quidem, ut acutæ & inflammatoriæ in tunicis magis consistant & ibi tyrannidem suam exerçant. Licet enim mesenterium, quod ex duplica-

cata constat membrana, cui interpoliti innumeri arteriarum & venarum rami, vasa lymphatica & lactea, glandulæ quoque copiosæ magnitudinis variæ, nec non nervorum propagines, non omni careat motu ac sensu; hic tamen admodum obrusus ac magis gravativus est, quam acutus, qualis ad concipiendam inflammationem requiritur.

§. IV.

Quare si in infimo ventre ardor, dolor, cum præternaturali totius corporis æstu, pulsu celeri, virium prostratione, anxietate, & inquietudine sese prodit, in intestinis hæc considerare, merito judicandum. Sed pro diversitate locorum, quæ hæc pathematata occupant, varias & certas affectas esse partes, merito concludendum. Scilicet si dolor acutus est supra umbilicum & sub ventriculo cum febre, nausea & vomendi conatu, indicium præbet, laborare eum coli tractum, qui infra stomachum a dextro ad sinistrum latus porrigitur. Qui in dextro hypochondrio sub costis spuris urget doloris sensus, præter naturam affectum & inflammatum esse coli principium, ubi ileo committitur, arguit, quod etiam *Spigelius* in defunctis reperit sphacelatum. Acuti cum febre cruciatus in sinistro latere sub lumbis, ubi psoas musculus, in colo & mesocolo, præsertim ubi peritonæo adhæret, mali esse sedem prodant. Quando vero medium abdomen circa umbilicum cum febre gravius dolet, tenuia utique intestina inflammatione laborare, certum præbet indicium.

§. V.

Febres etiam, quæ cum dolore, ardore, nec non tumore imi ventris junctæ, & tandem per alvi fluxus putridos & copiosos, vel etiam purulentos solvuntur, cum magna intestinorum difficultate, ex mesenterio provenire, nil dubii est. In cachecticis & scorbuticis corporibus, qui proveniunt diuturni alvi fluxus, cum lenta febre, vires & cor-

*Signa eorum & symptomata.*

*Varie sunt generis.*



corpus consumente, & qui non tam facile curationem recipiunt, ex eodem fonte scaturire, non sine ratione censendum. Febres quoque quæ epidemice & certis temporibus invadunt, cum diarrhœis, immo cruentis sedibus, non ex ingestorum alimentorum vitio, sed ex præternaturali aeris, præsertim nimis calidi, & sicci, constitutione oriuntur, quales biennio abhinc ob insolitum diuturnum, ad medium fere autumnii productum calorem, universam propemodum Germaniam sunt pervagatæ, simul etiam grassantes tunc intermittentes anomalæ, vix aliam habent originem, quam quod in mesenterio multi acres & corrupti humores accumulati.

## §. VI.

*Earum origo & causa.* Ad ingignendas autem infestas ejusmodi primis in viis inflammatorias febres, præcipuum momentum habet plethora, vel simplex, vel cacochymica, a suppressis aut deficientibus salutaribus excretionibus oborta. Promte etiam inducuntur ab intentata per fortiora pellentia, hæmorrhoidum, mensium aut lochiorum provocatione, ab usu copioso validiorum purgantium ad superandam contumacem alvi stricturam, nec non, uti observavi, a purgantium & emeticorum acriorum assumptione ad abortum provocandum. Idem facit impensior animi corporisque commotio, ac vicissim improvida abdominis & corporis, præsertim æstuantis, refrigeratio, potus perfrigeratus, & qui opulentioribus in more est, glaciatus. His enim humorum ad interiora, maximeque primam regionem, convocatur partim, partim urgetur affluxus, omniumque facillime fertur ad eas partes, quæ imbecilliores, quibusque ob defectum sufficientis potentiae motricis systalticæ, vel perpendicularem vasorum tractum, difficilior est humorum progressus, quarum in numero potissimum sunt mesenterium; mesocolon & omentum. Quando igitur his in sedibus, maximeque intestinorum tu-

nicis cum mesenterio continuis, inclusus heret sanguis, aut humor acris, febrem ciet inflammatoriam continuam, alvi vero cruentus etiam fluxus, vel ex nimium ampliatis, vel ex esis plane & disruptis vasorum osculis succedit. Hæc enim omnia ita omnino evenire uberius testatur dissectio ejusmodi febribus intersectorum, in quibus *Spigelius de semitert. cap. 8.* se invenisse prodidit: venas hepatis majores sanguine vacuas, ventriculi tunica interiori leviori erysipelate inflammata, venas mesaraicas & quæ ad ventriculum atque omentum tendunt distentas & crassiori sanguine fartas, omentum consumtum & semiputrefactum, durum quoque pancreas & ductum cholodochum obstructum. Idem confirmat *Chiffletius* notabili observatione, de mesenterii inflammatione cum dolore umbilici.

## §. VII.

Merito tamen consistentes his in sedibus inflammationes in leviores & graviores sunt distinguendæ. Leviores exterioribus tantum intestinorum tuni-  
*Differentia inter leviores & graviores.*  
nicis, quæ maxime membranarum mesenterii productiones, insident; graviores vero altius ipsam intestinorum substantiam pervadunt, eorundemque interiora ipsasque glandulas tangunt, ideoque & profundiores sunt, & ampliores. Quæ superficiem occupant, non tantum periculi alunt, sed adhibito laudabili regimine & congrua medicina, intra quartum, vel septimum diem, discutiuntur, quæ autem interiora profundius obsident, nisi per diarrhœam aut sanguinis fluxum solvantur, longius extrahuntur, qui in suppurationem ruunt & in hæcticam desinunt. Ex mesenterio quoque ibique stagnantibus corruptis humoribus prodeunt hemitritæ, sic dictæ sive semitertianæ febres, quæ ex continua inflammatoria & intermitte-  
*pe-*  
tente tertiana sunt compositæ, periculi non expers. Notæ hæc jam fuerunt *Hippocrati & Galeno*, easdemque nitide & accurate descripsit *Spigelius*



peculiari libello. Discrepant tamen a nostris in eo, quod quotidie circa vesperam, & alternis quoque diebus, levi accedente horrore, ingravescant, junctum habeant abdominis dolorem ventrisque tumorem & quandoque ad aliquot hebdomades protrahantur & nonnunquam in febrem lentam & hecticam concedant. Sed quia de harum ortu decursu & curatione jam supra *Sect. I. Cap. 5.* uberius actum, heic plura dicere non attinet.

### Curatio.

#### Cum Cautelis, & Observationibus Clinicis.

##### §. I.

Morbi  
præser-  
vatio.

Quum febres ventriculi & intestinorum inflammatoriæ, propter horum summam sensibilitatem & conspirationem cum nobilissimis corporis partibus, atrocissimis symptomatibus stipatæ & subinde funestæ, medentis cogitationem & intentionem quam maxime ad eas avertendas dirigere expedit. Igitur serio & cum cura sibi commissis Medicus inculcet, ut vitent omnia quæ superius §. VI. ad easdem ingignendas facere diximus. Et quia præterea sæpius observavi febribus ardentibus item biliosis, dysentericis, nec non puerperarum acutis cum purpura, a vehementi ira, vel gravi terrore, accessisse mox gravem intestinorum inflammationem, & sphacelationem, ac lethum brevi tempore attulisse; inprimis necessarium, ut occasiones sævorum affectuum fideli consilio & monito præscindat artifex peritus.

##### §. II.

In cura  
sanguinis  
affluxus  
derivandus.

Si vero jam adest inflammatoria stasis sanguinis, omnibus modis lenior est discutienda, & gravior avertenda. Primus igitur recte medentis erit scopus, ut vehementiorem sanguinis motum ad partem affectam impediatur & hac ratione graviolem inflammationem avertat. Oportinetur id commodissime in plethoricis sanguinis missio-

Tom. IV.

ne, ex venis in superioribus partibus, amplo satis foramine facto, pertusis, qua in colica convulsiva, in diarrhœa & dysenteria, in acuto dolore venarum sedis, gravior inflammatio averti potest utique. Post sectam venam divertunt sanguinis affluxum a loco affecto pediluvia temperata, sed diutius usurpata, quæ solvendo & laxando strictas inferiorum partium fibras, affluxum ad pedes divertunt & invitant.

##### §. III.

Ad discutiendam dein inflammato- *Est stas-  
sis discutienda*  
riam statim, serviunt quam maxime quæ dolores & spasmos sistunt, antispasmodica, humectantia & blanda sedativa, clysteres ex oleosis, gelatinosis & dulcibus compositi, item exterius regioni abdominis applicata epithemata, sacculi, vesicæ oleis expressis, vel pinguedinibus animalium, aut decoctis emollientibus repletæ, pinguedo cati sylvestris, mixta præsertim cum camphora, & pauxillo olei hyoscyami. Interne vero discutiunt & inflammationem arcent quam optime diaphoretica cum anodynis mixta, pauca, sed crebriori dosi per aliquot dies data, quæ inter eminent spiritus carminativus de tribus, aut spiritus tartari, vel bezoardicus *Bussii*, cum liquore anodyno minerali, aut spiritu nitri dulci mixtus. Item mixturæ ex aqua cardui benedicti, florum sambuci, aceto sambuci, rob sambuci, antimonio diaphoretico, nitro & sirupo papaveris rhœados confectæ, nec non pulveres temperantes nitrosi & diaphoretici, cum momento camphoræ & pauxillo laudani. Neque minus huc spectat cautus pilularum *Vildegansianarum* usus. Quæ remedia, cum prudentia, certo tempore & ordine usurpata, etiam in passione iliaca & spastica tunicarum intestinalium corrugatione, quam Græci chordapsum vocant, lenimen afferunt exoptatissimum.

##### §. IV.

In dolore spasmico & febre inflam-

T

ma-



*Alia ad acria, adhibenda, mata mulcentia.* matoria intestinorum, omnia acria stimulantia, etiam salina majori copia data, calida, & purgantia, ceu perniciosissima vitanda. Et culpandus hic communis & detestabilis Practicorum error qui alvo pert nacius adstricta, unum post alterum purgans ingerunt, eoque malum non tantum exacerbant, verum etiam reddunt mortiferum. Neque etiam clysteribus admiscenda salia acrius stimulantia, ut sal gemmæ, vel purgantia, ut extractum colocynthidis, vel catholiconis, sed ex solis emollientibus sunt parandi. Sic enim balnei aut foci instar, crassa eluunt intestina, & in colo tenuibus circumvoluto contenta, ceu vesica decocto emolliente plena, eadem mulcent, fovent & laxant. Parrari igitur possunt, ex solo lacte, mixto cum nitro, vel aqua pluviali, nupta cum sirupo violarum, de althæa Fernelii, rosarum solutivo, aut melle mercuriali. Hæc tamen circa usum clysterum addenda observatio, ut bihorio fere quovis, si necessitas urgeat, injiciantur & paulo diutius retineantur, quod maxime necessarium, si flatus per os eruant & crebræ adsunt vomitiones.

## §. V.

*Ida delat. re. opia. ta. post. em. ro. borat. ta. presunt.* Præmissa, si vasorum plenitudo urget, venæsectione, laxata etiam clysteribus admissis alvo, si atrox dolor cedere nolit; optimo consilio, sine omni metu, anodynum ex opio proficit, quo tormina conquiescunt & spasmi ac sudor sequitur. Sed quiescente & sedata dolorum & spasmorum cum febre ferocia, si summa debilitas corporis viriumque imbecillitas excipit, non ulterius insistendum superius laudatis diluentibus, laxantibus & humectantibus, sed potius nervina & roborantia in usum vocanda, quorum in numero sunt maxime essentia aut spiritus succini, aut mastiches, extracta cum hoc essentia chaccarillæ, elixir nostrum stomachale, pulvis solaris Zellenis, balsamum nostrum vitæ cum liquore anodyno mixtum, quod

balsamum etiam exterius applicatum, levamen insigne affert, tonum resuscitando & robur addendo.

## §. VI.

Quando vero inflammationes & dolores alvi fluxu simplici, aut cruento, maxime hæmorrhoidali, aut etiam, uti quandoque accidit, purulento solvuntur, laxantia leniora, ut passulæ rhabarbarinæ & clysteres, item infusa theiformia, ex speciebus traumaticis & sanguinem purificantibus, scabiosa, veronica, alchymilla, agrimonia, consolida Saracenica & summitatibus millefolii confecta & cum lacte pota, nec non pulveres roborantes, ex cornu cervi philosophice præparato, ulto, cortice cascarillæ & succino, in usum vocantur commodissime.

## §. VII.

Quum diarrhœa & dysenteria epidemica sæpe cum vehementi inflammatione febre invadat juvenilia corpora, non infructuosa est medico-practica quaestio: an conducat venæsectio? Communis quidem Medicorum, Hippocratis & Galeni auctoritate confirmata est sententia; alvo fluente, non esse subtrahendum sanguinem, quia vires prosternat. Neque etiam ego aliter sentio, quum per ipsam experientiam constet, multos, tam lienterico, quam dysenterico alvi fluxu laborantes, sanari, sine sanguinis missione. Sed jam de illa tantum dysenteria sermo est, quæ cum febre acuta, præsertim synocha inflammatoria, conjuncta. In hac utilem & necessariam esse venæsectionem, affirmo utique. Notum enim est, non facile quempiam alvi fluxu, etiam dysenterico diuturno perire, nisi ex inflammatione & sphacelatione intestinorum, quam semper antecedit & comitatur vehemens acuta febris ex pulsu magno & celeri, ardore & siccitate corporis, linguæ ariditate & ingenti inquietudine cognoscenda. Et licet omni dysenteria lenta quædam & levis, quasi erysipela-

*Alvi fluxus super-veniens perire excipiens.*

*Sanguinis missio in dysenteria est utilis.*

cea.



hec inflammatio, sit juncta; multum tamen hæc ipsa differt a synocha inflammatoria febre, in qua proficiam esse sanguinis subtractionem assevero, & consentientes habeo viros amplissima & felicissima praxi celeberrimos. Sane *Sydenhamus in opp.* cordate affirmat *pag. 111.* se semper fere curam dysenteriae cum venesectione auspiciari, quin *pag. 115. seq.* habet exemplum dysenteriae rebellis, quæ nullis plane remediis cedere voluit, sed sola venesectione tandem curata. Idem hoc auxilium mire dilaudat *Riverius*, qui *Cent. 2. obs. 57.* fidem facit, se in dysenteria cum febre acuta, octavo demum die, cum fructu quinque sanguinis uncias e brachii vena extraxisse, & *obs. 64.* testatur, se venesectionem, in muliere, dysenteria cum febre graviter decumbente, septimo & octavo die cum emolumento instituisse. *Amatus quoque Lusitanus Cent. 2. obs. 11. 12.* consignavit exemplum Abbatis, sanguine pleni & multo vini potui dediti, dysenterici & febricitantis simul acute, qui secta vena, longe melius habuit & paucis subjunctis remediis, plenarie convaluit. Maxime omnium vero multus est in adstruenda hujus remedii, singulari utilitate *Botallus*, qui *cap. 4.* plus quam decem exempla narrat, ubi nil ex omni remediorum censu, præter venesectionem, attulit levamen.

### Enarrationes Morborum.

#### OBSERVATIO I.

*Passio* Femina quadragenaria major, ob  
*Spasmodico in-* vitam sedentariam & tacitum animi  
*flamma-* profundum cum iracundia mœrorem,  
*soria* pathematibus colicis & spasmodicis  
*iliacæ* affecta, quum omisisset vere hoc sue-  
*miniæ* tam quotannis circa æquinoctium ver-  
*curata.* nale & autumnale sanguinis missio-  
nem, Martio mense vehementi com-  
mota fuerat ira, ad tremorem usque  
omnium corporis partium, & sumse-  
rat postea vespere pilulas consuetas

purgantes. Hinc noctem transegit inquietam, & die post nulla post pilulas sequuta purgatio, alvus potius firmissime clausa mansit & ipsa æstuo-  
sis anxietatibus circa præcordia atque etiam eructationibus continuis ex ore fuit afflicta & vomitu fere omnia assumpta rejecit, tum medicamenta, tum alimenta. Injunctus ad alvum aperiendam clyster domesticus, qui per horam retentus, integer, nec flatibus, nec stercoribus stipatus, rediit, etiam sine symptomatum levamento. Adhibitum decoctum man-  
natum cum salibus aperitivis & rhabbaro, sed mox vomitu rejectum. Medicus etiam ordinarius, flatum in causa esse putans, dedit carminativa. Irrita tamen fuerunt omnia. Perstiterunt potius symptomata, firma nempe alvi adstrictio, eructatio crebra & vomitus, magna debilitas, inappetentia & somni defectus, tandem quod circa vespeream gravius, circa auroram vero mitius, affligerent, cum crebriori ad urinam stimulo, quæ tamen parca & turbida emittebatur. Tertio die vocatus ego mox venam pedis secare jussi, & emissis, sine ulla virium lætæ, ob vasa sanguine valde distenta, octo uncias, mox meliuscule habuit ægra, conquieverunt anxietates æstuo-  
sæ & eructationes, ut etiam extra lectum versari potuerit. Nihilominus pertinax ventris adstrictio & dolores tensivi abdominis in hypochondrio dextro perstiterunt. Injunctus igitur clyster & data pilulæ nostræ balsamica polychrestæ, sed his nihil e-  
motum; quin quum ad septimum usque diem alvus esset obstipata, & eructationes, & anxietates nocturnæ æstuosæ, cum febricula & dorsi doloribus redierunt. Hinc demum consilium dedi, ut singulis tribus horis clyster injiceretur, ex aquæ plu-  
vialis uncias 12. sirupide altheæ *Fernelii* uncia semis, nitri puri drachma, & abdomini vesica emolliente decocto plena admooveretur. Sic cly-  
ste.



seres injecti semper per horam retinebantur, & postquam quartus esset infusus, flatus primum elisi, per aliquot dies coerciti, & post sextum successerunt etiam faeces, quibus evacuatibus, ructus atque anxietates in abdomine discesserunt, mictio etiam melius successit. Interius vero simul data essentia carminativa, cum liquore anodyno ad unciam dimidiam remixta, instillatis laudani liquidi guttis 15. inductus somnus, sequutus sudor ex cute ante sicca & arida, pulsus antea durus & celer mollior factus & urinæ fluxus liber redditus. Hoc facto, ex mixtura remotum laudanum & sola essentia cum liquore anodyno oblata, donec perfecte convalesceret.

#### *Epicrisis.*

Affectio hæc nonnisi fuit spasmodico-inflammatoria intestinorum, iliacam minitans passionem. A sanguine quippe, ob venæsectionem consuetam omissam, nimium redundante, & vehementi ira, quæ infensissima intestinis, nec non purgante assumpto, ortum duxit hæc passio, & inde omnia quæ jungebantur symptomata derivanda. Ad discutiendam itaque inflammatoriam statim & avertendam hujus pedissequam passionem miserrere mei, ante omnia necessarium duxi, ut sanguinis quantitas subtraheretur, quod etiam quoddam attulit levamen. Sed quum spasmus intestina inferiora fortiter stringens adhuc permaneret, consilium cepi, quod me tali in casu non destruit de clysteribus pure demulcentibus & humectantibus, paullo frequentius injiciendis, qui quasi instar balnei interni sunt, fibras spasmo contractas temperato humido relaxantes, cui fini etiam exterius apposui emolliens remedium. Interius vero discutiens, sive carminativum, cum blando anodyno permiscui, & ita spasmi soluti, discussa sanguinis & humorum inflammatoria stasis & excretiones per alvum & cutem adstrictæ, jam liberius & largius sequuntur.

#### OBSERVATIO IV.

Præfectus militum, natione Gallus, quadragesimum ætatis annum jam e-  
 mensus, vir constitutionis alias robu-  
 stæ, vitæ genus laboriosum & agile  
 cum quieto & sedentario permutarat,  
 interea largiter comedens & liberaliter  
 quoque vinum Gallicum, quod  
 vocant Pontac, bibens. Hinc pri-  
 mum alvi factus adstrictioris & somni  
 inquietioris, post aliquod tempus ve-  
 ro, dolorem lancinatorium in abdo-  
 mine toto atque etiam lumbari re-  
 gione expertus est, cum phlogosi, e-  
 ructatione, pulsum celeritate & de-  
 ficiente somno. Medicus primis die-  
 bus colicum dolorem esse judicans,  
 carminativa fortiora & spirituosæ e-  
 lixiria, cum oleis destillatis remixta,  
 una cum clysteribus usurpavit, sed in-  
 de potius exasperata symptomata; &  
 febre, & inquiete, & dolorum feci-  
 bus accensis. A me quum peteret o-  
 pem, & conquereretur de dolore ten-  
 sivo circa os sacrum acuto, quæsi-  
 vi: an hæmorrhoidali antea fuit obnoxius  
 fluxui? respondit, semel tantum an-  
 te aliquot annos, sed pariori, cum  
 prægressis lumborum & ossis sacri do-  
 loribus. Hinc quum venæsectionem  
 penitus respueret, mutavi tantum  
 medendi methodum & loco calido-  
 rum, interne dedi humectantia &  
 refrigerantia, pulveres nempe diapho-  
 retico-nitrosos, demulcentes & le-  
 nientes clysteres, copiosius applicare  
 jussi, largiter simul & temperate cali-  
 da sumpta ptisana. Levata inde quidem  
 fuerunt symptomata, nihilominus re-  
 mansit dolor in imo ventre, ab osse  
 sacro ad inguinem sese extendens lan-  
 cinatorius, multum incommodi fa-  
 cessens. Exhibui igitur essentiam car-  
 minativam, cum liquore anodyno &  
 pauxillo laudani opiatum, ad mulcendos  
 dolores, & postea dedi drachmam  
 magnesiæ albæ cum drachma dimi-  
 dia nitri in decocto mannato, inde al-  
 vus aliquoties soluta, & quod mirabi-  
 le,

*Inflam-  
 matio  
 intesti-  
 norum  
 cruenta  
 diar-  
 rhæa so-  
 luta,  
 repens  
 letalis*



le, larga portio sanguinis atri, corrupti, foetidi excreta, ita ut intra sex dies aliquot libræ secederent, remittentibus inde mox doloribus & sævis pathematibus. Demum assumptæ pilulæ nostræ balsamicæ, cum pulvere roborante, cujus basis chaccarillæ cortex & succinum. His tum perfecte convaluit, sed vertente anno, adulto jam vere, eundem in morbum cum gravissimis doloribus & intolendis cruciatibus ad dorsum usq; excurrentibus, febre & purpura rubra stipatis, correptus est idem hic vir. Data iterum omnia, quæ levando huic malo antea cum fructu adhibita, administrata etiam in dorso scarificatio, sed frustra. Sexta enim hebdomade, ob somnum plane deficientem, viribus omnibus exutus, vivere desuit.

*Epicrisis.*

Sine ullo dubio vir hic, animo & corpore fortis, intestinorum inflammatione periit. Causa hujus morbi in statum plethoricum, sine sanguinis missione & omissa simul consueta corporis exercitatione, & in copiosum vini rubri, quod adstrictivæ est virtutis, conjicienda, quum alias sanguine & humoribus abundantes: qui corpus nec satis labore exercent, nec sanguinem mittunt, si alvum paulo largius solutam habent, liberi permanere possunt a passionibus ex plethora oriundis. Si vero hæc etiam excretio deficit, grave imminet sanitati periculum. Prior morbus fluxu sanguinis nigri & coagulati, procul dubio in vena hæmorrhoidali interna congesti, feliciter fuit solutus, id quod etiam in aliis similibus casibus notavi. Contra ea videtiam, quod febres intestinales, cum doloribus & spasmis abdominis, aliquot jam per hebdomades durantibus, subinde post excretum putridum & corruptum nigrum sanguinem, brevi mors sequuta fuerit. Ceterum non possum non hoc loco hanc observationem de vini rubri gallici, austeri potissimum, noxa, adjicere, quod ipsius frequentiori potui causa multo-

Tom. IV.

rum morborum, quibus Galli inter nos degentes occumbunt, merito sit adscribenda.

## OBSERVATIO III.

Ruricola habitior & quadratus, pro nus cum ventre ceciderat in truncum acuminatum, & ex eo exquisitum in abdomine, paullo supra umbilicum, persenserat dolorem, cum animi deliquio, accensa simul, præcedente horripilatione & refrigeratione, febre. Post aliquot dies sanguinolentam & saniosam per superius & inferius os ejecit materiam multam, eoque facto, filuit febris, remansit tamen languor & appetentiæ prostratio. Quum vero elapsis circiter 14. diebus, domesticis laboribus manuum admovere inciperet, denuo recrudit abdominis dolor, animi defectione, horrore & febre stipatus, cum extremorum frigido sudore, ut animam agere videretur. Sequuta tamen diarrhoea cruenta & saniosa per aliquot dies, symptomata iterum mitiora facta ac remiserunt. Sed vix septem dierum fuerunt induciæ, quibus circumactis, priora repetierunt symptomata cum febre, obortoque alvi fluxu, conquieverunt rursus. Imploratum igitur meum auxilium, qui crebriorem decocti avenacei usum, cum humana, vel canis axungia, butyro rubro potabili & balsamo Locatelli, suasi, ac demum decocto herbarum vulnerariarum alchymillæ, agrimonie, faniculæ, pyrolæ, fragariæ, veronicæ, florum bellidis, hyperici aliorumque, ex cerevisia, ægrum hunc ad sanitatem, fortunante DEO, traduxi,

*Epicrisis.*

Celebris ille Italorum Medicus Benedictus Sylvaticus, abscessus subinde in mesenterio succrescere notavit; & notatu in primis digna, quæ habet Cæt. 2. obs. 86. ubi sic scribit: *mesenterium sæpe fit sentina multorum excrementorum. Ac obtusi sensus quum sit, diuturnas tolerat affectiones, & in quo non raro sub-*

T 3

oriun-

Diarrhoea  
paralytica  
cum  
febre  
ex-lan-  
guine



oriuntur apostemata suppurantia, qualia frequentissime a me fuerunt observata, quæ tandem subsidebant per dejectiones purulentas, iterumq; statim temporibus recurrebant, & oblitescabant denuo per similes dejectiones, non raro cruentas, ita ut imposuerunt quibusdam, illas pro dysentericis habentibus. In nostro certe ægro, lapsu illo in stipitem acuminatum, quassatus forsan fuit excurrens infra ventriculum supra umbilicum coli tractus, quo inductus dolor, raptis etiam in consensum reliquis intestinis, febrem ciens, & per spasmodicam simul stricturam in mesenterii canalibus sanguinem detinens, qui in purulentam postea corruptionem abiit, perrupit & alvo exiit. Latius vero semper serpsit malum, & relicta iterumq; commota vicina arrodens materia, mali recursum iterato induxit, donec acrimonia ipsius obtunderetur, abscessus abstergeretur, demumq; post semestrem spatium, in robusto & agresti corpore consolidationem reciperet.

## OBSERVATIO IV.

Febris  
iliaca  
inflam-  
matoria

Addolescens 15. annorum, constitutione tener, inde alacris, Bacchanalium tempore, quotidie duas, vel tres, ficas & duriusculas spiras ingesserat, sub pilæ lusu cum sodalibus admodum incaluerat, & postea, depositis vestibus, ad fluvii ripam confidens, corpus perfrigerarat. Inde paullo post atrociam ventris incurrit tormina, cum alvi pertinaci ad aliquot dies strictura. Implorato nostro auxilio, causam a liberali esu spirarum & corporis refrigeratione duximus, imprimis quum in sinistro abdominis latere eminentia quædam dura tactui sese offerret. Suasimus igitur ut alvus occlusa duceretur clystere emolliente, bis alvus stercore dura dimisit, postea dedimus infusum nostrum usitatū mannatum, cum oleo amygdalino, quo sex sedes motæ, tumor subsidere & dolorū vehementia remittere visa. Sed sequenti die tormina cum duro in hypogastrio tumore redierunt, licet flatus multi

eliderentur, accessit præternaturalis æstus, cum pulsum celeritate, somnus inquietus, oris siccitas & ardor, cum lenta pituita. Hinc fauces gargarismatibus elotæ & ad æstum inflammatorium restinguendum oblata emulsio ex seminibus quatuor frigidis, cum pulvere nitroso, interposito ad perspirationem secundandam, liquoris anodynī, cum momento bezoardici remixti usu. Æstu autem crescente, ani os adeo fuit occlusum, ut clysteris tubulum admitteret plane non & a crebriori molimine potius læderetur, circa vespere tamen calor semper fuit intensior ad mediam noctem durans. Adhibuimus pulveres nitrosos cum salibus digestivis, quibus calor mitigatus & scybala cum flatibus multa emota. Sic decubuit ad duodecimum usque diem, quo tanta anxietas, inquietudo, æstus & virium jactura accidit, ut morti videretur proximus, conquerens maxime de atroci dolore in abdomine, ibi potissimum ubi durities illa consistebat. Igitur ad arcendam funestam inflammationem potio discutiens ex aqua cardui benedicti, cum aceto, rhabbaro, antimonio diaphoretico & cancrorum lapidibus data, qua aliquoties usurpata, dolores complacati & sudor prolektus. Imposita etiam ad emolliendum tumorem vesica decocto emolliente plena & clysteres aliquot injecti atque retenti. Hinc ingens stercore copia quotidie secessit cum emolumento & successive ad sanitatem factus est transitus.

## Epicrisis.

Febris hæc recte dici potest iliaca inflammatoria. In ileo enim consedit obstructio, ab esu spirarum siccarum contracta, quæ dolorificos spasmos non tantum in abdomine, sed ad ipsam etiam vesicam excurrentes fecit, ut urina per totum morbi decursum parca & rubicunda tantum cum dolore secederet. Non tam promte autem ex tenui hoc intestino materiam tenacem obstruentem everrere licet, quia clysteres eo non pertingunt & nec laxantia sufficiunt,



ciunt, nec non potus diluentes. Hinc morbus diutius protractus. Interea ut intestinorum inflammatio arceretur, data mixtura & injuncta diaphoresis continua. Quia tamen intestinorum inflammatio quam facile recrudescit, hinc fuasi demum, ut non modo exacta servaret diætam & ab omnibus constringentibus abstinere, animum tranquillum haberet, nec frigidum, nec calidum potum assumeret, verum etiam ad tempus aliquod mane infusum accommodum theiforme potaret in lecto & sudorem blandum expectaret.

## CAPUT XIII.

## De Febris Lentis &amp; Hecticis.

## Theses Pathologicae.

## §. I.

Hectica  
& lente  
quæ di-  
santur.

**H**ECTICÆ febris apud *Hippocratem*, *Arætaum*, veteresque Græcos æque ac Latinos, ipsum *Cornelium Celsum*, mentio nulla. Neq; lentæ febris nomen in primorum Medicinæ parentum monumentis obvium, sed *Celsus* demum lentarum curationem primus tradidit. Quæ autem postea lentæ & hecticæ appellatæ, priscis, longæ, tabidæ, marasmi audiunt. *Hippocrates* imprimis lentas febres *Sect. 5. aph. 64.* vocat febres longas, iisq; affectos non valde multum febrientes, hecticam vero sub nomine tabis passim describit. Nostro tempore lentæ & hecticæ febres dicuntur eæ, quæ diuturnæ sunt & continuo, licet leniori ac remittente, æstu præternaturali, succos corporis consumendo, tabem inferunt viresque debilitant.

## §. II.

Utriusq;  
differe-  
ntia &  
sympto-  
mata.

Magna tamen harum est varietas & differentia, ratione vehementium symptomatum & quoque periculi. Strictè nimirum lentæ febres appellantur illæ, quæ mitiora habent symptomata, æstum leniorem, sudorem sub somno largum, pulsum post somnum & ante meridiem naturalem, non tantam ap-

petitus & virium prostrationem, corporisq; ariditatem & urina livescente, neq; etiam tantum periculi. In hectica autem æstus est continuus, pulsus semper durus, debilis, celer, licet post cibum & vespericalor, celeritas atq; durities increcant, cutis cum lingua sicca, dura & arida, genæ rubent, totum corpus est imbecillum, flaccidum, somnus reficiens nullus, urina rubicunda, inferius cum sedimento, superius cum cuticula cœrulefcente pinguedinosa, corpus contabescit totum, adeo ut ossa ubiq; promineant. Deinceps eminens est lentarum & hecticarum differentia respectu utriusq; causæ. In illis enim vitium magis in fluidis & incipiente mala dispositione solidæ cujusdam; in his vero solidæ potius patiuntur, & ipsa jam labes, aut magna corruptela, adest visceris. Hinc lentæ etiam accommoda medicina adhuc possunt abigi earumq; causa vinci, sed hecticæ difficillime, vel plane non sanationem recipiunt. Hecticæ quippe sunt magis symptomaticæ & gravioribus ulcerationibus, vomitis, abscessibus & viscerum corruptionibus superveniunt. Unde qui phthisi, abscessu, vomica aut exulceratione pulmonum, mesenterii, renum, uteri, & gravioribus suppurationibus in internis, musculis quoq; abdominis latentibus, qui cancro genitalium, mammarum, uteri, item qui cachexia & hydrope, ex induratione, scirrho, corruptione & putredine hepatis, lineis, omenti, pancreatis & glandularum mesenterii moriuntur, hectica febre pereunt omnes.

## §. III.

Causa caloris continui his in febribus, nulla alia, quam humor quidam corruptus, & putridus. Hic enim temperatæ, & naturali sanguinis & humorum vitalium mixtioni penitus est adversus, eandemque intestino alieno motu turbat, immutat atq; dissolvit. Idem hic putris succus infestus plane ac alienus est nervorum fluido nervolisque partibus, & sensibiles has atque motrices partes ad intensiorem contractionem, quæ febris essentiam

Causa  
caloris



absolvit, exstimulat. Igitur quo uberior & diuturnior putridorum & corruptorum ejusmodi succorum ex viscerum vitio insanabili est proventus, eo vehementior febris eoque graviora symptomata.

## §. IV.

*Lentæ  
ex debi-  
litate  
corporis*

Lentæ, sive diurnæ, mitiores tamen febres sunt frequentissime, neque ulli ætati, aut temperamento, sexui, regioni, aut loco parant. Origo vero illarum & causa varia est. Sæpiissime ex morbo præcedente & corpus cum viribus nimium debilitante. Scilicet experientia testimonio in comperto est, qui per contumaces intermittentes, vel continuas, item variolas & morbillos effusiores sanguinis per uterum, anum & nares profluvia, per diuturnum alvi fluxum, simplicem æque ac disentericum, nec non nimiam salivationem, gonorrhoeam & fluorem album diuturnum vires perdidere, qui etiam mœnore, curis, vigiliis & assiduis lucubrationibus & studiorum intemperantia, nec non per famem, labores graves & continuos, veneris etiam crebrius exercitium, corporis robur attriverunt & exhauserunt, in lentescences & longas ejusmodi febres delabi facillime. Ratio hujus generationis in proclivi. Corpora his perfuncta benignis sanguinis & alibilis humoris succis sufficienti etiam purissimi, & nobilissimi nervorum liquidi copia destituuntur, post morbum autem ciborum impensior succedit appetentia, succi tamen intimæ ingestorum dissolutioni servientes spirituosius, fermentescibiles & salivales, nec non biliosi, a naturali habitu descivere, nec adeo sunt efficaces, vigor quoque motus peristaltici in ventriculo & canale intestinorum languidus est, hinc ciborum liberalius ingestorum non exacta perficitur solutio, concoctio atque digestio, sed succus chylosus crassus, rudis minusque subactus elaboratur, ad sanguinis massam truditur & aliena sua natura fluidorum crasin temperatam & solidorum æquabilem naturalem motum

turbat atque pervertit.

## §. V.

Deinceps perpetuæ & uberius confirmatæ observationis est, tabificas ejusmodi febres succedere quæ maxime evacuationibus criticis solennibus deficientibus, aut perperam cohibitis. Nihil certe frequentius, quam ut ii, quibus vacuationes acutos morbos & febres solventes, sudor in primis & aucta perspiratio, interceptæ, vel non sufficienter successerunt, quibus sudor consuetus nocturnus siccatus, quibus fonticuli & ulcera antiqua consolidata, quibus catarrhi aliæque per uterum ceteraque organa defluxiones acres repulsæ, quibus alvi fluxus cohibitus intempestive febribus lentis postea tabescant. Sic enim vitiosi, impuri, inutiles ac superflui humores, cum salute foras excernendi, intus manent vitales temperatos & nutritivos succos inquinant, ut omnis horum massa reddatur intemperata, omnesque in corpore motus ac functiones vitium capiant.

## §. VI.

Porro lentarum & hecticarum febrium nidum frequentissime esse in mesenterio, & ratione, & experientia habemus confirmatum. Recte enim jam pridem notavit Fernel, & ex eo Senert. in nulla universi corporis parte, tam plurimos, latentes etiam morbos, lentas febres, errantes, diarrheas, choleras, scorbutum, melancholiam, cachexiam, hydropem, intermittentes quoque contumaces, figere sedem, quam in mesenterio. Causa autem magne hujus ad morbos concipiendos dispositionis nulla alia, quam quia tardus & impeditus admodum per viscus hoc succorum & sanguinis progressus, stagnationes & stases facillime inducens. Nam vena portæ, pulsu destituta, sanguinem ex mesenterio reducere recipit, ac vice arteriæ fungens, eundem vehit ad hepar, quod quum lentius fiat, in mesaraicis etiam vasis ponitur obex, gignuntur, stagnationes, infarctus, quin quandoque plane extravasationes. Dein hæmorrhoidalis vena, ob perpendicu-

*Ex supra  
pressis  
excre-  
tionibus.*

*In mesenterio  
carum  
lentarum  
cur frequens  
nidus  
mesenterium*

larem



larem ductum & longius ab exortu remotum situm, tarde admodum reducit sanguinem ad portæ venam, ac facit, ut is sæpius in mesocolo, crassis intestinis, maximeque recto, stagnet vasaque cum dolore distendat. Ipso in mesenterio propter nervosarum & musculosarum tunicarum defectum, sanguinis cursus plane non adjuvatur & urgetur, sed vasa potius inter duplicatam cellulosa membranam discurrentia, pinguedine tecta, perpetua relaxatione, toni sunt remissioris & facile cedunt sanguini in ipsis accumulato. Chylosa etiam lymphadum per lactiferos sic dictos canales innumeros, in capillares tubulos circa glandulas fissos, impeditius fertur, ac in ipsis glandulis ab exilissimis venulis recipitur, his in angustiis facile hæret, nec ea propter mirum, mesenterii glandulas sæpe infarciri, intumescere, indurari ac in scirrhus plane degenerare.

§. VII.

Licet autem ipse hic tardior succorum per mesenterii compagem meatus, hanc corpori præstet utilitatem, ut humorum & mole & intemperie peccantium excretioni serviat, & quidem sanguinis per hæmorrhoides internas, ac serosarum, mucidarum ac fermentescibilem sordium, per intestinorum glandulas innumeras; eandem tamen ob causam accidit, ut quævis fere humorum, tam quoad quantitatem & qualitatem, quam etiam motum vitia, in mesenterium redundant idque male afficiant. Inprimis plethora nullam partem gravius lædit quam mesenterium, ac nimia distensione, vasorum tonum & elaterem debilitando, ibi stagnat & cum detrimento plus justo coacervatur. Nam quo major in mesenterio sanguinis stagnatio, eo magis increfcit ipsius impuritas; quo major vero sanguinis & lymphæ sordities, eo magis functiones in corpore labefactantur, nutritio imminuitur, vires elanguescunt, intestinus in succis

motus augetur, arteriæ cum corde ad auctiorem & celeriores motum excitulantur & sic febris accenditur.

§. VIII.

Quæ quum ita sint, ratio est in proclivi, quare suppresso, aut deficiente mensium in feminis fluxu, notante Hippocrate lib. II. prædict. §. XIII. periculosa tabidæ, idest, hecticæ febres, emergant, choloroseos, aut febris ictericæ albæ nomine, passim obviæ. Quare porro in viris subsistente, insufficiente, aut plane præpostere cohibito hæmorrhoidum stillicidio, juxta eundem Hippocratem Sect. VI. aph. XII. tabes, idest hectica, generetur. Cur etiam, ut supra jam meminimus, constipatis salutaribus alvi profluviiis, quibus sæpe acuti morbi finiuntur & quæ crebro critice certis anni temporibus naturæ beneficio succedunt, tabidæ & periculosa febres subnascantur. Neque minus causa patescit, cur tam perniciosum & ad chronicas, lentas etiam & hecticas febres ingignendas nihil sit aptius, quam, si quando in corporibus præsertim plethoricis, cacoehymicis item & hypochondriacis, ubi jam admodum tarda & impedita sanguinis per mesenterium & connexa viscera progressio, intempestive adstringentibus, etiam famigeratissimo chinæ cortice sistuntur febres intermittentes, quæ in his salutarem ad superfluum consumptionem, vasorum obstructions expediendas & liberum sanguinis progressum reddendum habent facultatem quibusque oppressis, infarctus in mesenterii tubulis, oppilationes, humorum stagnatio & impuritas increfcunt, ac postea liberale chronicis & assiduis febribus aliisque morbofis passionibus pabulum præbent.

§. IX.

Neque vero tantum ad stagnationes & obstructions dispositum admodum est mesenterium, verum etiam ad suppurationes & abscessus concipiendos, quibus perpetuo fere

*A supra pressis mensibus hæmorrhoidibus, diarrhæis & febribus*

*Abscessus in mesenterio febrium causa, acce-*

*Propter humorum in eo stagnationem & impuritatem.*



accedit intemperies quædam febrilis. Sunt quidem plures, qui autumant, inflammationes, sine quibus nulla suppuratio, nullusque abscessus fieri potest, in mesenterio non habere locum, quia in eo nec dolor acutus, nec ardor, perpetui inflammationum comites, observentur. Verum essentialis inflammationis ratio non ardore & dolore continetur, sed stasi humoris sanguinei in vasis alienis facta, & staseos potius productum est dolor cum ardore, si illa in parte nervosa, exquisitoris sensus consistit. Stases autem & extravasationes humorum cum oriundis inde supperationibus, perquam commode fieri possunt in mesenterio, ob decubitus ibi solentem, dum vel ex arteriolarum minimis ramulis sanguis sæpe cum impetu in laterales tubulos, e quorum numero etiam pinguedinosi, urgetur, vel etiam ipsa hæc lateralia vascula ab impetu humorum rumpuntur & contentum liquidum effundunt. Ne dicam, nullibi facilius & commodius pus gigni, quam in partibus pinguedine uberius obsessis, eo quod ipsa pinguedo, motu intestino & putrido humoris extravasati, promptissime in liquamen saniosum convertitur.

## §. X.

*Eorum  
signa &  
causa.*

Igitur frequentiores, ut vulgo putatur, in mesenterio sunt abscessus, cognoscendi ex febre continua hectica, dolore gravativo & fixo in abdomine & saniosæ materiæ per alvum cum intestinorum dolore & ardore excretionem. Quæ autem ad ingignendos hos faciunt, notavi multa. Observavi frequentius, in plethoricis, plethorico-cacochymicis, nec non hypochondriacis, a vehemēti ira præsertim paullo ante, vel post cibum, tanto magis accedente simul refrigeratione, corpus languore fuisse affectum universali & successisse febres tabificas exitiosas. Idem vidi in iis, quæ validioribus pellentibus abortum procurare intenderunt, quando Medici mensium suppressione laborantes cali-

dis & fortioribus emmenagogis, vel purgantibus exceperunt, nec non in viris, quando hæmorrhoidalem fluxum, natura repugnante minusque proclivi, aloeticis aliisque calidis pellentibus emovere fuerunt conati. Novi etiam, crebrius subortas esse has ex abscessu febres, in sanguine & succis plenis, a vehementiori insueta corporis ad validum usque sudorem exercitatione, subsequente postea improvida refrigeratione corporis totius, ac imprimis pedum, quorum ingens cum abdomine consensus.

## §. XI.

Nimirum tam valido & vehementi, sive per animi affectus, sive phar- *Generā-  
di ratio  
& de-  
cursus.* maca, sive corporis exercitationem, motu, sanguis in minima mesenterii vascula cum impetu urgetur, stagnat ibi, in alienos tubulos vadit, subsistit ibi atque corrumpitur. Hinc prima origo supurationis, quæ dein propter motum intestinum latius serpit, vicina arrodit, exedit, ut ex abscessu minori fiat major, ampla cavitas magnumque apostema. Quin materia saniosa corrupta, a venis resorpta & sanguini insinuata, sæpe etiam ad alia emunctoria, glandulas tracheales, nec non renes, fertur. Unde amplo in mesenterio apostemati jungitur sæpe urinæ fluxus purulentus, vel etiam sputum purulentum, integris renibus salvoque pulmone. Quandoque ipsum pus pondere suo per mesenterii poros descendit ad intestina connexa, cavum ipsorum subit sicque alvo expurgatur. Quandoque etiam apostema majus dehiscit tandem, & præcedente horrore, interdum etiam rigore, cum superveniente aestu, perrupto involucro, effunditur. Quod si in loco excretioni minus idoneo contingit, atrocia quasi colica tormina oboriuntur, si in cavum abdominis, interanea quæ tangit, male afficit, rodit & gangrænam iisdem inducit, si vero in intestinorum cavitatem, pus copiosum simul & semel per alvum exit. De qua puris excre-  
tio



riane historias consignarunt *Horstius lib. 14. observ. 25. & 26. Bartholinus Cent. 2. epist. 23. Cent. 6. epist. pag. 490. Cent. 4. hist. pag. 96. nec non Tulpius lib. 2. obs. 36.*

§. XII.

Febres autem quæ grandes ejusmodi abscessus in mesenterio eque ac aliis visceribus, hepate, pancreate, renibus, vesica & utero, comitantur & sequuntur, non sunt mites & lenes, sed graves, quæ vires & succos corporis consumunt omnes, hecticæ lethales. Quæ quomodo incipiant, decurrant & quibus symptomatibus stipentur, accurate & ex vero prodidit *Hippocrates lib. de intern. affect. pag. 209. febris, inquit, debilis invadere incipit & rigor, & dolent pectora ad dorsum, aliquando etiam tussis premit acuta & exspuit salivam multam liquidam & salsam. Et hæc quidem in principio morbi; in progressu vero corpus attenuatur, cruribus exceptis. Hæc enim intumescunt & pedes, & ungues contrahuntur, ex humeris autem tenuis & debilis est, & fauces velut lanugine implentur, & velut per arundinem sibilat, & fortiter sitit per totum morbum, & multa impotentia corpus habet. Hic quum sic habuerit, in anno corruptus male perit, verum studium quam maxime adhibere oportet ac reficere.*

§. XIII.

Aliud lentæ remissioris & occultæ febris genus est infantibus familiarissimum. Jungitur cum insigni abdominis tumore, superiorum marcore, tussis sicca, virium prostratione, inappetentia & vago æstu, post cibum sumtum & circa vesperam ingravescente, alvo interdum adstricta, interdum etiam fluxa, alba multa & mucida dimittente. Nascitur hæc febris quandoque a succo chyloso nimis viscido, tenaci, villosam intestinorum tunicam & minima lacteorum oscula obstruente, quo inflatio intestinorum & chylosa diarrhœa inducitur. Nonnunquam ortum trahit a lymphâ ni-

mis viscida, lenta, quæ glandulas mesenterii farcit, obstruit ac magis magisque accumulata mirum distendit. Occasionem autem ad gliscentes hæc febres potissimum præbent nimia infantum voracitas, cibi qui chylum reddunt crassum, defectus tenuis potus, corporisque refrigeratio. Quæ vero corripuerunt, diu detinent corpora, nec sicuti omnes, quæ ex obstructione & glandularum nerveæ substantiæ nimia expansione oboriuntur febres, periculo carent, sed nisi convenienti medicina occurratur cum vivendi ratione, infantes perimunt, inventis post mortem plerumque glandulis mesenterii ingentis magnitudinis, intestinis inflatis & tumidis ac pulmonibus corruptis.

§. XIV.

Quæ senibus solennis atque fatalis est hectica, græco nomine dicitur *μαρμα* *μαρμα* *μαρμα*. In hoc lente attenuatur corpus, appetitus perit, vires sensim consumuntur, ossa carne privantur, ut instar sceleti pelle induti appareant, os siccum est, saliva glutinosa, exterior cutis cortex friget, riget, arefcit, interiora ardent, pulsus durus & frequens est, somnus parvus & non reficiens, spiritus ægre ducitur, vox rauca fit, lingua exsucca & salsa lenta pituita incrustata sæpe, ac omnia hæc sensim sensimque ingravescent, donec post dimidium circiter anni vitam eripiant ipsam. Generatio senilis hujus hecticæ sic nobis concipienda videtur. Senes ob vitam motus expertem & excretionem in omnibus emunctoriis, præsertim subcutaneo, languescunt, alvumque tardiozem, omissam etiam ex vano metu haud raro suetam sanguinis missionem, ingentem subinde sanguinis & impurorum humorum sibi colligunt copiam hac præsentem, tardissima fit succorum per mesenterium, omentum, per hepar quoque, lienem & intestina progressus, vasa farciuntur, obstruuntur, sequuntur indurationes & demum corruptiones, febrium chronica-

Symptomata.

Lentæ infantum.



nicarum pernicialium genitricis paratissimæ.

## §. XV.

*Hæctica  
stomachica  
& intesti-  
nalis.*

Demum lenta febris species adhuc superest, parum ab auctoribus notata, quæ nobis stomachica audit & intestinalis. Ortum hæc ducit a tunicarum ventriculi & intestinorum erosionem, inducitur vel ab acri bilioso mordaci succo, in ipso corpore genito, vel ab assumptis acrioribus, rosiva virtute præditis. Testatur enim experientia, post choleram, vel vehementem iracundiam, item dysentericum morbum, longas sæpe & exitiales succrescere febres. Venena assumpta stomachum cum intestinis corrodere, novit nemo non. De exulcerato stomacho a forti purgante, cum maximo post cibum dolore, testis est *Bartolinus Cent. VI. hist. 21.* Idem faciunt emetica improvide data, ipsa salia amara purgantia, vel sola liberalius exquisitius sentientibus oblata, vel, uti imprudens quorundam consilium, acidulis indita adhuc & sumta. Sed difficulter hæc febres, quoad suas causas & sedem, dignoscuntur & difficulter etiam sanationem admittunt. Nam læsis arrosisque ex parte intestinorum tunicis, omne quod assumitur, præsertim falsedine, aut acore imbutum, vel etiam mole nimium, eadem male afficit, spasmos, eructationes, tormina facit, alvus interdum laxa, interdum stricta est, corpus simul tabescit, mox horror & rigor, mox æstus, mox frigidus, mox calidus sudor tenet, cum celeri pulsu ipsaque symptomata certis horis periodice redeunt & ingravescent, quin nisi congruis remediis tempestive occurratur, morbus fit longus & capitalis.

## §. XVI.

*Signa  
lethalia  
& mortis cau-  
sa.*

Ceterum lentæ hæc & tabificæ febres ex longis sunt morbis, qui ægros diu tenent, & pro constitutione corporis laborantis, modo citius, modo ferius finem sortiuntur. Lenta quidem, si tempestive occurratur, medicatio- nem admittit, hæctica autem raro &

perfecta plane non. Mortis autem indicium in lethali hæctica ferunt, pulsum continuo celeres & debiles ictus, summa appetitus & virium quoque maxima prostratio, ita ut laborantes nec corpus movere, nec in situ erecto permanere possint, facies Hippocratica, urina pauca, rubra, vel oleoginosa, sine sibilo emissa, capillorum defluvium, alvi fluxus, sudor effusus & pedum tumor, quippe quæ de succorum partim consumptione, partim colliquativa dissolutione testimonium præbent. Qui demum moriuntur, magnam & insuperabilem viscerum labem post mortem dissecti exhibent. Quandoque enim adsunt ingentes cum amplis cavitatibus in visceribus abscessus, in pulmone, mesenterio, hepate & pancreate, quandoque etiam in utero, ventriculo, renibus, nec non membranis peritonæi, abscessus deprehenduntur, vel magni tumores scirrhusi, aut ingentis magnitudinis steatomata; quandoque etiam tumores glandularum in mesenterio, vel tubercula & vomicae in pulmonibus, hepatis quoque lienis, vel pancreatis scirrhescentiæ, omenti & intestinorum sphacelationes & putrium humorum extravasationes in interaneis offenduntur.

## Curatio.

Cum  
*Cautelis & Observationibus  
Clinicis.*

## §. I.

Quum variæ tabidarum febrium sint causæ, variæ sedes, hæc primo omnium recte investigandæ & iisdem medicatio accommodanda. Igitur quando ex prava digestionem & indigestionem crudis ac lentis primarum viarum succis, post morbos febris ejusmodi succrescit, cognoscenda ex languore, interno æstu, continua ad sudandum proclivitate, in volis ma-  
num

*Curatio  
lentæ  
ex crudi-  
tati-  
bus.*



num præsertim ac plantis pedum, eo dirigenda curatio, ut prima regio a fordibus, febris fomite, liberetur. Perfici potest hoc pro circumstantiarum ratione leni emetico, quale præbet radix hypecacuanhæ, in pulvere, aut infuso data, & testatur *Lindanus*, se uno vomitorio & hinc cum elixir proprietatis, intra quatuor dies, curasse hecticam. Si autem præstat materiam vitiosam per os inferius educere simulque digestionem prospicere, ex usu sunt salia sic dicta neutra, digestiva, terra scilicet foliata tartari, nitrum antimoniatum, sal polychrestum, tartarus vitriolatus, solutio oculorum caneri, sal Sedlicense, vel sola, vel cum dimidia parte pulveris rhabarbari electi mixta, parcius, sed crebrius, cum sufficiente vehiculo oblata. Eandem blande laxantem simulque egregie roborantem virtutem habent pilulæ balsamicæ, a *Becchero* dictæ, quæ ea propter utiliter aliquoties, sed minori dosi, deglutientiæ. Expurgato autem alimentari canali, subjungenda postea analeptica & stomachica, inter quæ præ reliquis commendamus essentiam chaccarillæ & gentianæ rubræ, item elixir nostrum stomachale, cum spiritu salis, aut nitri dulci, paulo ante cibum quotidie sumenda, non neglecto commodo corporis motu & salubri potu, præcipue harum febrium præsidio.

§. II.

*Post morbos & febres superpressas.* Eadem hæc medendi methodus ap-  
prime est accommodata in principio illarum gliscentium febrium, quæ post intempestive oppressas intermittentes, aut suffocatas præpostere harum recidivas obrepunt. Si autem his nolit discedere lenta febris, optimum est consilium ut ipsa prior febris resuscitetur, tanto magis si suspicio est infarctus viscerum & mesenterii, ut in cachecticis & hypochondriacis. Prisca jam hæc fuit *Celsi* methodus, quam *lib. 3. cap. 9.* describit: *in hoc casu cura Medici esse debet, ut morbum mutet. Fortasse enim curationi opportu-*

*nior fiet. Sape igitur ex aqua frigida, cui oleum sit adjectum, corpus ejus pertractandum est, quoniam interdum sic evenit, ut horror oriatur & fiat initium quoddam novi motus. At, pergit, si diu frigus est, & torpor, & jactatio corporis, non alienum est, in ipsa febre dare mulsi, tres aut quatuor cyathos, vel cum cibo vinum bene dilutum. Intenditur enim saepe ex eo febris, & major ortus calor, simul & priora tollit mala, & spem remissionis, inque ea curationis, ostendit. Sed, concludit, est circumspecti hominis, & novare interdum, & augere morbum, & febres accendere, quia curationem, ubi id, quod est, non recipit, potest recipere id, quod futurum est. Nam sicuti auctior sanguinis circulus in intermittente sapius optima est medicina causæ, quæ febrem efficit: sic etiam lentæ febris causam, quæ frequentissime latibulis partium solidarum, glandulis maxime & vasis mesaraicis altius infixæ est, expedit ac tollit. Hinc si intermittentibus, præsertim quotidianæ succedit lenta febris, intermittens mox revocata, quod aliquoties a vento boreali, aspero, lumbis liberius admissio, accidisse novi, calor intensior redditus, adhibitis simul congruis incidentibus & temperantibus remediis, morbum cum tempore ex voto solvit.*

§. III.

Quando in plethorico-cacochymicis, cachecticis & scorbuticis, a mensium, vel hæmorrhoidum obstructione, nimia voracitate, mala diætæ, potuum spirituosorum abusu corporisque refrigeratione lientescentes hæc febres oboriuntur, alia medendi via ineunda & usurpanda ea, quæ viscera sanguinea, hepar, lien, mesenterium, vasa & glandulas ab obstructione liberant & expeditum sanguinis & humorum per abdominis, & maxime mesenterii vasa, commeatum procurant. Hunc in finem spectatæ virtutis aquarum mineralium, tam acidularum, quam thermalium, usus.



usus. Ipse ego longo usu & experientia edoctus scribo, quod ad eradicandos ejusmodi lentos morbos, non certius deprehenderim auxilium, fontibus medicatis, & idem proprio exemplo confirmat *Thonerus observat. pag. 173.* Præ reliquis autem hoc nomine salubritatis laudem ferunt, ex thermis Emsenses & Wisbadenses, ex acidulis Schwalbacenses & Selteranae. Opus tamen est ut debito ordine, tempore ac dosi usurpentur, junctis simul idoneis remediis, quæ digestionem juvant, spurcis corporis succis temperatam balsamicam indolem reddunt & sordium e corpore egressum secundant. Ubi autem salubrium harum aquarum copia non datur, surroganda alia similis virtutis præsidia. Ego quidem loco illarum sæpe cum fructu usus sum decocto ex jusculo carnis vitulinae tenui, cum radice cichorei, foeniculi, asparagi, graminis, taraxaci & scorzonerae, ita quidem, ut quotidie ejus mensuram, per aliquot hebdomades bibere jufferim, & ante potum assumere medicamentum martiale probe elaboratum, cujus generis suggerit tinctura martialis, cum succo pomorum Borsdorfianorum, cydoniorum, nec non aurantium, item tinctura martis *Zwelferi*, ex vitriolo martis & terra foliata tartari cum spiritu vini extracta, nec non tinctura florum salis ammoniaci martialium, qui cum hæmatite parantur, si cum spiritu vini purissimo, vel melius corticibus aurantium imbuto, in tincturam aurei coloris, saporis gratissimi, virtutis præstantissimæ extrahantur. Sed necessarium est, ut tum sub horum, tum aquarum medicatarum usu, exquisita vivendi ratio & salubris diæta accedat, simulque corporis motus imperetur.

## §. IV.

Ab erosione  
ventriculi &  
intestini  
noium.

Quæ ab intestinorum & ventriculi erosione accidit febris lenta tabescens, omnia acra, salsa, acida, stimulantia, ceu venenum experitur, ipsum

Rhenanum vinum propter acorem non fecta, dulcia etiam & fermentescibilia, nec non omnes difficilioris solutionis cibi, eandem exacerbant. Curatio vero difficillima est, nec alia poscit, quam demulcentia & roborantia. Ego aliquoties decoctum lactis cum ligno sassafras & cascarillæ cortice, aut floribus chamomillæ & summitatibus millefolii, quotidie ad mensuram potum profecisse novi. Tum quoque radices althææ & juscula cum oryza & lacte decocta proficiunt, tragacantha etiam cum aqua menthæ soluta. Conducant præterea clysteres ex lacte, cum vitello ovi, terebinthina & melle, aut alii emollientes cum sirupo de althæa *Fernelii*. Et quando spasmi simul in abdomine urgent, egregie eosdem demulcent pilulæ nobis usitatae, antispasmodicæ, ex extracto chamomillæ, millefolii, oleo nucistæ, extracto croci & castorei.

## §. V.

Porro gliscens illa & tabifica febris, quæ oritur in iis, qui diuturno animi affectu, mœrore, cura, nimio labore, vigilia, inedia, crebro & in-tempestivo veneris exercitio, a nimia salivatione, a fluore albo & gonorrhœa diuturna, ab effusiori alvi profluvio, lactatione nimia, ulceribus multum purulentæ materiæ plorantibus, & vires & roscidos succos perdidderunt, omnia sanguinem commoventia & alvum stimulantia, motum etiam corporis impensiores, alimenta quoque gravis materiæ, nimiumque, ut ita dicam, substantifica, interdicit, & poscit potius animi corporisque quietem, alimenta & medicamenta temperatiora, quæ acrimoniam demulcent, calorem restinguunt, blande nutriunt & vires labascentes refocillant. Horum in numero sunt emulsionem ex amygdalis dulcibus, pineis, seminibus quatuor frigidis majoribus, cum decocto cornu cervi, aqua rosarum & cinnamomi cydoniata confectæ, lac asininum & mu-

A succorum  
& vitrioli  
defectu



& muliebre solum, aut caprillum, vel vaccinum decoctum, cum succo cancrorum fluviatilium, jus pulli cum ptisana mixtum, ptisana decocta cum cancris fluviatilibus, vel etiam testudinibus numerosis contusis, ex commendatione potissimum *Amati Lusitani Cent. 2. curat. 53* qui curavit hecticum per pullorum gallinaceorum testudinibus nemoralibus saginatorum usum & lactis asiniui potum. Sunt qui ostreas commendant, si stomachus fert, & confirmat hoc notabili exemplo viginti annorum ex pulmonum labe hectica, *Lindanus, supra Hartmannum*, quæ largo & diuturno ostrearum esu, tam perfecte convalescit, ut postea diu supervixerit & octo liberos peperit. Vinum nonnisi modice concedatur, & hoc quidem Neccarinum aut Mosellanum, lymphatum. Accedat quoque motio corporis lenis, per gestationes & deambulationem lentam.

§. VI.

*Ab inebriantibus spirituosiorum a-*  
Quando harum febrium origo est a nimio abusu liquorum inebriantium, vini, spiritus vini, aquarum sic dictarum vitæ, vini adusti, cerevisiæ quoque spirituosioris, cum corporis contabescencia; tunc pariter vitentur omnia calefacientia, spirituosiora, analeptica, incidentia pituitam, & stomachica, cum cerevisiæ potu, sed usurpetur loco potus decoctum avenaceum, methodo Loweriana paratum, ex avena, radice cichorei, floribus papaveris rhœados & paxillo nitri antimoniatum. Tum quoque utile ferum lactis, cum paxillo nitri, item lac eburatum, quibus multum tribuunt *Piens de febb. part. 2. pag. 61. & Barbatus de sangu. & sero pag. 110.* His etiam conducunt ptisanæ cum hordeo & cichoreo, & affirmat *Borellus Cent. IV. obs. 89*, multos hecticos, tantum non desperatos, solo frequenti hordeatorum usu, fuisse restitutos. Neque minus locum habere possunt emulsiones dilutiores, ac gelatinosa, cum succo citri condita.

§. VII.

Si, uti frequentius incidit, harum febrium origo in feminis est a subita mensium suppressione, per potum frigidum, refrigerationem, aut terrorem, ocysime vena pedis aperienda & decoctum quoddam resolvens, ex radice cichorei, herba sonchi, floribus bellidis minoris & sambuci propinandum, & omittenda omnia fortiora emmenagoga. Quod si autem prognata ab hac causa lenta vel hectica febris, diu jam corpus tabe & fervore afflixit, neutiquam suadenda, sed potius interdicens est sanguinis missio, quia vires nimium debilitat. Ubi etiam a partus tempore menses plane substituerunt & vera jam adest hectica, cum atrophia, tussi, diarrhœa, pectoris difficultate, universalis corporis languore & calore lento consumente, non de remediis menses pellentibus cogitandum, sed symptomata contrarium potius indicant. Idem tenendum de illa tabifica debilitante febre, quæ a fluxu hæmorrhoidali retento, aut obstructo, ortum ducit. Tum quippe, si vires & succi jam consumiti, imprudens plane est molimen, ad emovendum fluxum evacuantibus & pellentibus albetis, aut sanguinis missione impedire uti. Observavi enim sanguinem valde fluidum & coccinei coloris fuisse evocatum, sed paullo post febrem accensam, vires prostratas, somnum turbatum & citius, quam quidem fieri potuisset, ad lethalem eventum morbum promotum.

§. VIII.

Quæ senibus solennis hectica, *Marasmus* dicta, melius avertitur, quam curatur. Quum vero attenta observatione constet, senes duplici ex causa tabificæ febris implicari, scilicet, vel ex plethora, sive potius sanguine & crasso, & copioso, abdominis viscera ipsumque mesenterium infarciendo & obstruente, vel ex cacochymia, si copia feri impuri falsi, ob insufficientem ipsius, maxime per cutem,



tem, excretionem, ad binas has causas dirigenda utique cura præservatoria. Quod si itaque senex vitæ quietæ & sedentariæ addictus, appetitu tamen ciborum adhuc valens, omissa, vel plane neglecta. fueta alias sanguinis missione, vel emanante etiam spontanea sanguinis excretionem, & metus est, ne incurrat in lentum, continuum, debilitantem & tabefacientem calorem; id quam maxime agendum Medico, ut sanguinis plenitudinem, tempestiva venæsectione minuat, diluentes salubres potus largius bibere suadeat, abstinentiam a cibis nimium nutrientibus ac convenientem corporis motum serio iungat. Si vero senum succi impuris & a blanda naturali indole alienis particulis scatent; nihil aliud agendum, quæ ut per clementissima laxantia, rhabarbarina, mannata & passulata, sordes, spurcitiam humorum foventes, evocentur & temperati roscidi succi rursus ingenerentur, per usum gelatinarum & lacticinia, maximeque asininum lac, quod utique senili ætati, ob demulcentem, aperientem & leniter evacuantem facultatem, est saluberrimum.

## §. IX.

Tabis  
infan-  
tum me-  
dicatio.

Quæ infantili ac puerili ætati infestæ est ac funesta lentescens febris, relinquatur potissimum post variolas & morbillos, ventre simul tumefacto, superioribus autem penitus contabescientibus & in dissectis eadem defunctis, mesenterium plerumque tumoribus duris, scirrhis & steatomatibus, præsertim circa venas quæ ad portam excurrunt, & pulmones tuberculis ac vomicis conspiciuntur obfessi. In hac consultius etiam mali insultum avertere, quam præsens abigere, quod nunquam non irritum esse solet atque frustraneum. Quæ autem tabes in infantibus ortum trahit ex nimia voracitate, sive addiphagia & refrigeratione corporis, medicationem admittit. Ego quidem non certius in hac novi auxilium, quam ex-

terne usum balneorum aquæ dulcis temperaturum aliquandiu continuatum, & interne, ad expediendas obstructions glandularum, venarum, meseraicarum & lactearum, crebriorem, sed parciolem usum liquoris salini aperitivi, ex sale tartari, nitro, arcano duplicato, æquali pondere mixtis, & addita dimidia parte salis ammoniaci, cerevisiæ potandæ instillati.

## §. X.

In omni autem hectica haud potestrema eo tendit indicatio, ut roscidum illud humidum, quod calor continuus non modo ex sanguine, sed etiam ex tubulis solidis, & una cum hoc ipsam tandem carnem atque pinguedinem absumit, resarciatur. Huic scopo quam maxime satisfaciunt, alimenta medicinali simul virtute instructa, inter quæ palmam fert lac ipsum. Nam priscum est Hippocratis Sect. 5. aph. 64. præceptum: *convenit lac exhibere tabescentibus, non valde multum febrientibus & in febribus longis, & debilibus, & præter rationem consumtis*. Optimum humanum, quod promptius consumptum restituit humidum & calorem extinguit, idque ex mammillis suctum, ne ab aere vitietur, quo hecticam curatam esse, fidem facit Forestus lib. 5. obs. 10. Asininum minus quidem nutrit, sed magis refrigerat, calorem temperat, abstergit & aperit, ejusque præstabilem facultatem laudat mirifice Ballonius lib. 1. pag. 236. integro consilio pro illustri Principe, qui pronus erat ad tabem. Cardanus fol. 323. *dubium non est, ait, quin tota sanitas tabidi consistat in adhibitione lactis asinini*. Et Aretæus lib. 2. de cur. acut. tabis curam ita instituire suadet: *si quis in tabem prolabitur, tunc terendum tempus non est quiete & victu tenui, sed ager ad motiones traducendus, per gestationes, frictiones & lavacra, quo vitæ residuum a morte vindicetur, augeatur & recreetur*. Propinandum vero etiam est lac, maxime.



ime mulieris, quæ proxime peperit, puerumque nutrit. Hi namque alimen-  
to, ut nuper in lucem editi pueri, egent.  
Si lactis humani copia non datur, asine,  
quæ non pridem peperit, lac accipito.  
Tenuè est & fluxile huiusmodi lac.  
Efficacius nutrit caprillum & vacci-  
num, sed gravius est multumque ca-  
seosæ substantiæ habet, ideoque ne  
ventriculum male afficiat, corrigend-  
um.

§. XI.

Qua me-  
thodo sit  
a surp-  
dam.  
Mihi præ reliquis placuit Hippocra-  
tis lacte utendi methodus, quam de  
intern. affect. pag. 209. sic tradidit:  
dandum est & lac asinum coctum ad  
suppurgationem, bibat etiam crudum  
lac bubulum, tertia aquæ mulsæ parte  
admixtum, per 45. dies, admixto  
etiam origano. Recte enim gravis hic  
auctor passim ad lenem purgationem  
commendat lac asinum coctum,  
quia sal ipsi inest dulce instar sacchari,  
abstergens leniter & laxans, quod co-  
ctione diffuso humido, concentra-  
tur magis. Origanum autem adjicere  
præcepit procul dubio ad roborandum  
stomachum & genus nervosum debi-  
litatum. Ego, si lac asinum haberi  
nequit, ita lactis curam adornare so-  
leo, ut præcipiam primum, per duos  
vel tres dies mane potare lac, e vaccis  
herbis recentibus & appropriatis pastis  
muletum, ad libram unam, in qua  
uncia mannæ, aut sacchari rosati,  
vel conservæ rosarum dissoluta. Deinde  
mensuram solius lactis quotidie bibe-  
re præcipio, addendo sacchari unciam  
dimidiam & nitri drachmam dimi-  
diam. Pro circumstantiarum ratione,  
præsertim ubi suspicio labis in mesen-  
terio, aut exulcerationis in viscere  
interno, lacti confundo ad dimidias,  
vel tertias, aquam, aut puram fon-  
tanam, ut longe melius Selteranam  
mineralem. Hac vero deficiente, a-  
quam communem infundere suadeo  
cum veronica, foncho, pulmonaria,  
hepatica, musco pulmonario, tussi-  
lagine, hedera terrestri, scolopendrio,  
capillis veneris, floribus hyperici &  
Tom. IV.

rosarum, & infusum hoc cum tan-  
tundem lactis, vel caprilli, vel bu-  
buli calide bibere, adjecto saccharo,  
& pro meliori abstersione, aliquot  
guttis olei tartari per deliquium. Cura  
hæc minimum per sex hebdomades  
continuanda, ac interea vitanda om-  
nia quæ stomachum gravant, debili-  
tant, & lac coagulant. Vinum quo-  
que ex toto circumcidendum, & non  
aliud ad stomachum fovendum conce-  
dendum, quam parcum Hungaricum  
fovendum, aut mulsum ex melle Bo-  
russico confectum.

§. XII.

Antequam tamen cura lactis insti-  
tuatur, videndum est, an ventri-  
culus illud ferre possit. Sunt enim  
nonnulli, qui lac natura penitus aver-  
santur. Notavi etiam, quod qui dix-  
tæ vinosæ dediti, cerevisiam largius  
potant, lac commode ferre nequeant.  
Neque accommodum est hypochon-  
driacis, neque si febris vehementissi-  
ma & cephalalgia juncta. Si stoma-  
chus languidus & obstructa mesariaca  
vasa, corrumpitur, facile in vappam  
abit magnaque creat incommoda.  
Videndum igitur, ne in ventriculo  
desideat, ad quod avertendum, Ga-  
lenus lib. 10. simpl. medic. præcipit,  
ut coquatur & calybsignitus, aut sili-  
ces candentes, injiciantur. Tutissi-  
mum autem lac asinum, sero plus  
redundans, minusque caseosæ sub-  
stantiæ habens, quod etiam Galenus  
in hectica præfert & cujus saluberrimam  
virtutem peculiari dissertatio-  
ne, de mirabili lactis asini usu in  
medendo excussit. Quod si tamen asi-  
nini lactis copia non est, substitui po-  
test serum lactis dulce, methodo a  
nobis descripta in dissertatione de seri  
lactis virtute longe saluberrima para-  
tum. Sunt etiam, qui lactis serum in  
B. M. destillant & protectam destilla-  
tione aquam mirifice dilaudant, ram-  
potam, quam loco vehiculi assamen-  
dorum medicamentorum.

Et sub  
quibus  
cansellis



*Adst. In-  
gentia  
& lent-  
er ro-  
boran-  
tia pro-  
sunt.*

## §. XIII.

Porro in hisce suspectis febribus providendum, ut crasis & mixtio ipsius sanguinis, ab intima dissolutione & colliquatione elementorum, quam continuus calor minatur, vindicetur & æquilibrium inter calidum & humidum conservetur. Hunc in finem salubria, a Medicis passim laudata leniora adstringentia & roborantia. Celebres hoc nomine tincturæ, sive potius solutiones coralliorum, aut matris perlarum, cum acido subtili & naturæ amico, uti est succus citri, berberum, aurantiorum, vel pomorum Chinenſium. Utilis quoque tinctura rosarum, cum aqua rosarum & phlegmate vitrioli parata. Quæ leniter adstringunt & roborant, sunt species de hyacintho, quæ cum aliquot granis coralliorum & nitri, colliquativos sudores egregie compescunt. Magnæ etiam virtutis elixir nostrum balsamicum temperatum, ex gummatibus resinosis temperatis & extractis, sine vini spiritu paratum. Nec omittendus chaccarillæ & ipse quoque chinæ cortex, si cum sirupo acetositate citri, aut nucis Indicæ, adjecto nitro, in electuarii formam redigitur. Proficit etiam bolus rubra fabrilis, cum conserva, vel julepo rosarum subacta. Hæc enim omnia ad levandas ejusmodi lentas febres, si prius humorum & viarum vitio prospectum, eximie virtutis, eorumque rectus usus merito commendandus. Quin novi, plures, & hecticos, & phthificos, his diu fuisse servatos.

## §. XIV.

*Non fa-  
sturnina  
metal-  
lica.*

Quæ autem a Chymiatris ad hecticum calorem & adversus sudores passim laudantur saturnina, enomia minus sustinent, sed propter metallicam, adstrictivam, nervis inimicam virtutem, tono ventriculi & intestinorum sunt contraria & certius ac plus nocent, quam profunt. Hinc rejiciendum saturni saccharum, & quæ præ omnibus celebratur, parata ex hoc antiphthifica tinctura Gram-

mani. Antihecticum vero *Poterii*, si rite ex stanno puro, nitro & antimonio paratur & cum emulsionibus datur, non tam noxium est, ut quidam putant, sed ob blandam roborantem diaphoreticam virtutem, utile omnino. Neque enim stannum, propter blandum quod fovet sulphur, nervis est inimicum, nec adstrictivum, uti quidem plumbum. Gravis de salutari facultate antihectici hujus testis est *Muraltus* disertis verbis in *M. N. C. Dec. 2. An. 1. obs. 109.* ita scribens: *diaphoreticum joviale, sive antihecticum Poterii, ad demulcendam acritudinem humorum matricem, & nervos irritantium, mirum quantum valet. Idem uterum eorum corroborat, sæpe ex emaciatis & debilibus, quadratos & robustos facit.*

## §. XV.

Balneorum in hecticis & lentis frequens, præsertim apud Veteres, commendatio. *Sennertus* ex *Galeno* methodum iisdem utendi pluribus exhibet. Instar omnium vero de eorum vario usu locus est *Alpini, de Med. method. lib. 6.* dignus, qui totus huc transcribatur. *De externis, scribit, medicamentis balnea conveniunt, ex aqua dulci, aut ex aqua alterata althæa, malva, violis & aliis similibus. In Ægypto ex lacte asinino & camelino, vel equino, balnea tepida instituunt pro Magnatibus. Epithemata itidem atque inunctiones commendantur. Ex balneis tepida conveniunt atque frigida. Illa humectant solidas partes; fuligines, sumidaque excrementa digerunt corpusque recte transpirabile reddunt, & remissa caliditate, etiam calorem hebetant. Hæc refrigerant, cutim densant, virtutem, calorem augendo, roborant. Sed non in excarnibus corporibus & valde prælanguidis, tutum erit, uti admodum frigidis balneis, quando nedum hæc calorem augebunt, sed quinimo prælanguidum extinguunt. In robustis vero erunt utilissima. Robusti bis in die, scilicet mane & vespere, ante cibum, hisce*

*Balneo-  
rum usus  
atque  
utilitas*



hisce balneis utentur, semel vero debiles. Nonnulli non vehementer frigida balnea, sed lenissima frigiditatis, utiliora, & magis tuta esse volunt. Ideoque primum agrotos in balneum temperate calidum ducunt & mox in leviter frigidum, ita ut tepidum potius sit, sive leviuscule frigidum. Aegyptii & Arabes uti solent balneis ex aqua Nili fluminis, ex lacte camelino, vel equino, asinino, vel caprino; item thoraci, hepati, ventriculo, renibus, ex lacte, oleo violato rosatoque tepido, aut ex succolactuce, junci, endiviae, portulacae, polygoni, lenticulae palustris, nenupharis & similium, cum modico lactis & croci, ad penetrationem, admovent epithemata. Sed tenendum omnino in genere de balneis: eadem commodè habere locum in principio morbi & quando a viribus fractis pendet, nec non in lenta infantum febre, quia emolliunt, demulcent, rigidas fibras laxant & simul humectant, nihil autem proficiunt in progressu morbi, sique putredo, abscessus & exulceratio interna jam praesto sunt.

§. XVI.

Motus  
commen-  
datur.

Ex praecipuis veteres & molestas has febres expugnandas praesidiis, est motus corporisque exercitatio. Veteres jam Hippocrates & Aretaeus, in tabe curanda mirifice commendarunt varia motuum genera, deambulationem, vecturam, gestationem, peregrinationem & navigationem, quin Hippocrates lib. de intern. affect. §. 34. pag. 238 praecipit: si quis validus fuerit, per triginta dies ad ligna secanda ablegetur, & summis humeris luctetur, & interdum deambulet, & vesperi dormiat. Sed saluberrima & accommodatissima motus species equitatio, aut vectura in curru, quibus, perpetua corporis succussatione, sanguinis progressus per mesenterium egregie adjuvatur. Multi inptimis sunt in laudanda equitationis utilitate celeberrimi Angli, Sydenham & Morton. Ille quidem opp. pag. 524. & 781. non veretur affirmare, equitationem esse in

hectica & phthisi specificum sine pari, eoque certius, quo neque mercurius in lue venerea, neque cortex Peruvianus in febribus intermittibus, efficacius aut certius. Et Morton exercit. de phthisi pag. 26. ita graphice differit: nullum magis conveniens remedium, quam quotidiana ad moderatos usque sudores protracta equitatio est, in febribus lentis, hecticis, ex vitio maxime ventriculi, ex perversa forte febrium intermittentium tractatione, nimio in tempestivoque figentium, praecipitantium & adstringentium abusu, frigido potu calenti corpori superfuso &c. quarum praeternaturalis aestus, corporis laudabiles succos depascit, ex ventriculi, & intestinorum saburra acida lenta simul & viscida, meatus obstruente praeter naturam; utpote qua viscosus lentor, sive effaetus chylus, qui vasa & habitum corporis jam infertit, aequabili succussione discontinuatur, excernitur, ut appetitus iterum restituatur, novus chylus laudabilis & copiosior elaboretur. Expedit tamen innuere, in lentis auctam & frequentem apprimè utilem esse, in hecticis vero strictè sic dictis moderatior sit.

§. XVII.

Tandem, quicquid in lentis his & tabidis praestandum, id mature faciendum omne. Neglecta enim hac opportunitate, accedente medentis, vel laborantis errore & morbo diutius protracto, irrita prorsus atque frustranea est medicatio, & fere semper in hecticam transitus fit lethalem. Qui autem his febribus jam detinentur, autumno semper pejus habent, ob languidiorem naturae in actibus secretoriis & depuratoriis virtutem. Quin, quia circa æquinoctia ordinario subitæ insalubres fiunt aeris & coeli mutationes, plerumque tum non modo gravius agrotant, sed & decedunt hectici incurabiles. Igitur necessarium est, ut circa hæc tempora exactam victus servent rationem, animum tranquillum habeant, aeris in-

Mature  
subve-  
niendum



jurias vitent & a Medico quoque consilium petant.

*Enarrationes morborum.*

OBSERVATIO I.

*Lenta febris in bibulo curata repetens in phthi. sin tran. ill. le. abalem.* Vir quadragenario major, phlegmatico-sanguineus, a multis jam annis computationibus in seram usque noctem indulserat, modo cerevisiam, modo vinum, modo vini spiritum bibens, parum vero appetens. A duobus autem mensibus valida affectus erat tussi, somnum omnem arcente, cum intenso aestu vesperti in-gravescente, agra spiratione, virium dejectione & corporis consumptione, nec non copioso per tussim muci sreatu. Meum per literas exquirebat consilium, sed nolui primum manum admoveere, uti non facile soleo in longis ejusmodi & desperatis morbis & qui jam varia Medicorum artificia experti. Quum autem intercederet vir honoratus, mihi amicissimus, suasi, ut biberet cerevisiam medicatam hanc: recipe herbæ hepaticæ pulmonariæ, hederæ terrestres, scabiosæ, cardui benedicti, veronicæ, agrimonix, tussilaginis, musci pulmonarii, florum hyperici anamanipulos duos, rhabbarbari uncias duas. M. conc. indantur sacculo & ad fermentationem suspendantur in quinquaginta mensuris cerevisiæ recentis. Exhibui quoque pulverem ex matre perlarum, antihectico Poterii, lapidibus cancerorum & nitro, cum emulsione dilutiori ex amygdalis & pineis. Dedi porro consilium, ut largiter sorbillaret juscula tenuia, ex carne vitulina, cum radice scorzonæ & cichorei decocta. His per aliquot hebdomades usurpatis, nuntiatum mihi, egregium accessisse levamen. Hinc suasi, ut usui insisteret adhuc per mensem, quo etiam cum periculoso morbo in gratiam rediit. Sed quum suetum vitæ genus bibulum nihil secius sectaretur, multisque do-

mesticis curis afficeretur, anno circumacto, post gravem iram incidit in hymoptysin, quam sequuta phthisis hectica tandemque mors.

*Epicrisis.*

Qui ex nimio potu sibi phthificum & hecticum morbum contraxerunt, omne lactis genus fastidiunt. Hinc in nostro concessi quidem cerevisiam, sed medicatam, per herbas leniter roborantes, balsamicas, consolidantes & sanguinem purificantes. Hac igitur labes viscerum, maximeque pulmonum atonia, sublata. Sæpe enim hecticum hoc malum in principio a sola atonia pendet, sub qua, & secretiones, & excretiones, rite succedere nequeunt, impuritatum, largius ab ejusmodi bibulis heroibus collectarum. Et profecto ego testari possum quod decocta ejusmodi specierum, ex aqua, vel cerevisia, addito quandoque melle, in chronicis ejusmodi lentis febribus præstiterint mira, si modo aliquandiu continuata, quin longe plus, quam pretiosa, singulari arte & labore confecta. Sed promptus omnino mali recursus, nisi exactæ vitæ victusque ratione, arceatur & viscerum imbecillitas penitus emendetur.

OBSERVATIO II.

Juvenis literarum studiosissimus, obteneram a nativitate corporis constitutionem, in catarrhosas defluxiones, diarrhœas, tusses, phthisin etiam pronus, animo quoque admodum sensibilis, tempore vernali afficiebatur tussi ferina, tum epidemia, primum sicca, dein humida, cum interno aestu, intercurrente horripilatione & accedente virium, ob somni defectum, prostratione. Dabantur leniora laxantia, mannata, rhabbarbarina, linctus pectorales, pulveres item & elixiria pectoralia, sed sine singulari levamine. Exactis sic sex & pluribus.

*Hectica phthisica inclinata curata.*



ribus hebdomadibus, hectica immi-  
nere visa; hinc suasi ptisanæ, ex ra-  
sura cornu cervi, radice scorzonæ,  
hordeo mundo ac semine fœniculi,  
cum æquali parte lactis bubuli, po-  
tum quotidie ad mensuram, ita, ut  
mane dimidiam & pomeridie iterum  
dimidiam biberet. Sed æger, quo  
plus, eo melius, putans, quotidie vel  
duas mensuras ingurgitavit, ventri-  
culo tamen firmo adhuc, haud male.  
Sumsit quoque subinde pulverem ex  
spermate ceti, lapidibus cancrorum,  
floribus sulphuris, saccharo & paxil-  
lo nitri. His paucis & euporistis tan-  
tum profectum, ut notabile paulo  
post sentiret auxilium, sensim postea  
symptomata discesserunt omnia, tussis  
placata, æstus restinctus & appetitus  
cum somno rediit.

*Epicrisis.*

Non penitus, sicut in hydropico,  
sic etiam in hectico malo, desperan-  
dum est, si vitium fluidarum nondum  
transiit in labem & corruptionem  
ipsorum viscerum, inflammationem  
scilicet, ulcerationem, aut scirrhum.  
Felix igitur est Medicus, qui hæc be-  
ne cognoscit. Sic enim curationem  
bonis avibus suscipere potest, quæ, si  
feliciter cedit, famam & gloriam  
inde reportat. Magna adversus diffi-  
ciles & longos morbos facultas in ejus-  
modi temperatis, euporistis domesti-  
cis, diluentibus & humectantibus  
remediis, quin longe præstabilior,  
quam in pharmaceuticis cunctis. Me-  
dici in eo plerumque delinquant,  
quod si tussis humida valida adest,  
phthisin esse putant, eaque propter  
pectoralia multa adhibent, quam  
tamen sæpe sola humorum acrimonia  
horumque ad pulmones remissos de-  
cubitus, causa fit tussis vehementioris  
cum sreatu copioso, & dulcia pin-  
guia relaxantia ob id plus noceant,  
quam profint. Lactis autem cum aqua  
diu continuato usu veteres jam, *Hip-  
pocrates & Aretæus*, tabem persana-  
runt. Extat quoque in *M. N. C. Dec.*  
*2. An. 9. obs. 189.* de viro hectico de-  
*Tom. IV.*

sperato viso, solo potu aquæ frigidæ  
curato observatio *Burgii*, qui B. pa-  
rentis mei anno 1664. fuit discipulus,  
ipsiusque effigiem, clavi pharmaceu-  
ticæ præfixam, carmine decoravit.

OBSERVATIO III.

Miles quidam, facie lividus, cor-  
pore macilentus & languidus, pulsum  
tamen celerem cum quadam duritie  
exhibens, conquerebatur de alvi flu-  
xu per tres continuos menses ipsum  
adeo detinente, ut quotidie, octies,  
vel decies, desiderare cogeretur, sece-  
dentibus nonnunquam, ut naturali-  
ter fieri solet, excrementis, nonnun-  
quam vero saniosa, nonnunquam  
sanguinolenta materia, sine scybalis,  
appetentia ciborum simul imminuta  
faucibusque aridis. Inquirenti in tam  
chronici mali causam, respondit: se  
graviter aliquando in sinistro dorsi &  
thoracis latere verberibus esse percus-  
sum, ut locus etiam sugillatus com-  
paruit & dolor successerit impensus,  
præterlapsis autem aliquot diebus,  
doluisse hypochondrium sinistrum ibi-  
que supra os ilei protuberasse tumo-  
rem, aliquot hebdomades subsisten-  
tem, donec abortis in ventre tormi-  
nibus, alvus sponte fuerit soluta, mul-  
taque saniosa, foetida, atro etiam  
sanguine tincta, copiosis secesserint  
dejectionibus. Ex eo quidem tumo-  
rem subsedisse & dolorem quoque eva-  
nuisse, sed diarrhœam perstitisse &  
adhuc ipsum mirum exercere ac vires  
absumere. Dimissus igitur est consi-  
lio, ut serum lactis dulce, nostra  
methodo paratum quotidie ad mensu-  
ram unam, nec non infusum, ex sca-  
biofa, veronica, fanicula, mentha,  
melissa, millefolio, floribus hyperi-  
ci & papaveris erratici frequentius  
potaret. Quibus etiam effectum, ut  
post aliquot hebdomadam decursam  
rediens, gratus profiteretur, parcio-  
res longe esse dejectiones, corpus  
vegetius, meliora omnia, nec de per-  
fecta impetranda sanitate dubium.

*Mesen-  
teri ab-  
cessus  
diar-  
rhœa  
saniosa  
soluta.*



*Epicrisis.*

Nullum certe est dubium, quin in hoc abscessus fuerit in mesenterii compage obortus, qui demum ruptus, effudit in intestinorum cavum saniem & cruorem, per ani secessum excretum. Qui vero factum, ut a superiorum percussione, in abdominis pentalibus inductum apostema disquisitione omnino dignum. Nos quidem ab impedita sanguinis in partibus plagis gravius contusis circulatione, maliducimus natales, unde factum, ut in homine plethorico sanguis majori copia fuerit delatus ad mesenterii diverticulum, ibidemque collectus, demum putrescere coeperit & in abscessum concesserit. In mesenterio enim sapius oboriri stagnationem, si in remotioribus partibus sanguinis progressus interceptus, non novum. Ipsi novimus, hoc facto, mesenterium cum omento putre & sphacelatum fuisse inventum, vulnere lethali diaphragmati inflicto, cruorem vasa mesenterii perrupisse & abdomen inundasse, & in asthma spasmodico, a polypo in appensis cordi canalibus, mesenterium itidem sanguine multo oppletum, vasa ipsius distenta partim, partim plane disrupta, comparuisse.

## OBSERVATIO IV.

*Hæstia  
phibisi-  
sa le-  
thalis.*

Vir erat macilentæ & cholericæ constitutionis, qui ex hæreditaria quadam & nativa dispositione pulmonum alebat vitium, ac præterea ob nimias lucubrationes vitamque nimis sedentariam variasque animi ex iracommotiones, corporis & stomachi sibi contraxerat imbecillitatem. Hic ab aliquot jam annis magnam pituitæ viscidæ copiam scretu ejecerat, hæcque ejectio mirum demum copia increvit, & per duos fere menses, cum lenta febre, spirandi difficultate, viriumque jactura, nec non exquisito sub urinæ emissionem ardore, duravit. Tum quidem æger emulsionibus, jussulis medicatis & decoctis demulcen-

tibus, interpositis clementer alvum laxantibus, cum sanitate in gratiam rediit; exacto vero circiter anno, eidem malo denuo implicatus est. Alium igitur in consilium adscivit medicum, qui licet semper adfuisset anxia respiratio, tussim tamen non phthificam, sed ex stomacho æstuante & hypochondriacum symptoma esse judicavit, putavitque, cessatura omnia, si tempestivus prodiret hæmorrhoidum fluxus. Variis demum incassum adhibitis, de vena secunda consilium dedit floridumque e pede extraxit sanguinem. Sed eodem adhuc die vesperti ægrum horror per universum corpus incessit, subsequente intenso æstu, nocte insomni, virium jactura gravi & perfecta accessit hectica, qua etiam e vita mense Martio discessit.

*Epicrisis.*

Qui ex parentibus phthificis genitus sunt, iis per totam fere vitam semper debilis corporis constitutio, ut languescat ventriculi digestio, & ipsi incatarrhos, ex levi aeris vitio, lento cum calore, proni sint, quin facillime, nisi regimen circa nonnaturalium rerum usum exquisitè observent, in phthisin & hecticam incidant. Hic æger, Collega & amicus noster valedudinariam diu duxit vitam & aliquoties circa æquinoctia phthifica tussim cum febre laboravit; Dei tamen auxilio, datorum a nobis remediorum ope, convaleuit. Tandem vero se commisit Medico, qui perfectam morbi curationem brevi pollicitus est. Et quum a plethora & hæmorrhoidum fluxu impedito omnia pathemata pululare putaret, a venæsectione cepit initium, sed male hæc cessit. Inde enim mox pessime habuit, & in phthificam hecticamque incidit tussim lethalem, frustra omnibus datis remediis. Discant igitur, qui plethoram ubique crepant: in debili & hectico corpore nunquam utilem esse venæsectionem & salutarem, quia per continuum calorem sanguis jam consumtus & succi potius ingignendi sunt, quam



quam subtrahendi. Sed plura in similibus casibus notavi delicta. Obversatur adhuc animo exemplum serenissimæ personæ vix vigesimum ætatis annum egressæ, quæ a matre phthifica genita & ipsa phthisi periit. Nimirum quum ex puerperio novissime superato admodum debilis, in curru aperto, incitato equorum cursu per aliquot horas vecta, aerem valde frigidum, vento agitatam, ad pectus admisisset, mox de catarrhis, tussi anhelosa, sicca, lassitudine corporis & sudore nocturno conquesta est. Medicus catarrhalem febrem esse autumans, pectoralia opposuit dulcia, indies vero hæc symptomata & calor consumens vires, creverunt. Hinc quia menses nondum iterum prodierant, venam incidere suavit, quo longe debilior facta, & placide haud ita multo post ex hac vita decessit. Errant igitur medici vehementer, qui nullum discrimen faciunt inter mensium obstructionem, quæ a copia sanguinis & infarctu viscerum est, ubi venæsectio juvat, & inter eam, quæ ex sanguinis defectu venit, ut sit in phthisi & hectica, ubi utique sanguinem detrahere, qui ordinare deficit in hecticis, nil aliud est, ac mortem promoveri.

OBSERVATIO V.

*Hectica ex me-  
senterii  
abscessu  
diarrhæa  
purulenta  
soluta* Vir illustris, Regi a consiliis quadenario major, statura longus & macilentus, hypochondriacis pathematibus & pariori hæmorrhoidum fluxui obnoxius, post iram vehementiorem, persensit totius corporis languorem, cum dolore pressorio, circa primam lumborum vertebram, abdominis torminibus, æstu interno, vesperi invalescente, inappetentia, alvo simul clausa & flatibus ructibusque ad superiora regurgitantibus. Secta fuit vena & dati pulveres digestivi, absorbentes atque nitrosi. Nihil tamen opis allatum. Ventris potius dolores cum æstu interno increverunt,

carnes ac vires consumserunt, interdum abdomen mirum intumuit a flatibus, & præcordia tenuit anxietas summa. Sic duos exegit menses, multisque Medicis & medicamentis usus, hecticus visus fuit, tantum non conclamatus. Ipsa tamen natura tandem curationis aperuit viam, secedente per alvum materia saniosa multa, quæ etiam apparuit in urina. Hoc facto, calor quidem & dolor factus mitior, appetitus quoque instauratus. Sed quia purulentus hic alvi fluxus, longius quam per tres menses successit, cum insigni virium debilitate corporisque marcore, indicium præbuit haud fallax grandis in mesenterio abscessus. Interim quum æger exquisitam diætam servaret, juscula gelatinosa, lac asininum, bubulum cum herbis vulnerariis coctum, & caprillum cum Selteranis mixtum, potaret, simulque pulverem ex semine lycopodii, musco pulmonario, urtica mortua, tussilagine, semine cymini, nucista & saccharo, in emulsione ex amygdalis & pineis subinde sumeret, factum est, ut sensim vires redirent, ejectio materiæ per alvum ac tussim minueretur, & ipse, præter spem omnium, convalesceret, injuncto postmodum victu exacto & regimine congruo.

*Epicrisis.*

Hypochondriaci & hæmorrhoidarii in mesenterii morbos, inflammationes & abscessus delabuntur facile. In his enim tam meseraica vasa sanguine farcta & humoribus sunt distenta, tardissimusque per eadem com meatus. Nostro sine dubio a gravi ira, accidit sanguinis extravasatio, inflammatio & inde suppuratio. Parva autem suppuratio, brevi potest ampliari & latius progredi in mesenterii compage, largiter obseffa pinguedine, quæ in liquamen saniosum facile liquefcit. Quod vero purulenta materia alvo expurgata, tribuendum naturæ beneficio. Et quod in urina comparuit pus, a venis resorptum &



per renale crebrum excretum, eodemque modo etiam successit puris scretus, integris pulmonibus renibusque. Quin novi, utero ulcerato, per asperam arteriam rejectum fuisse pus, illæsis plane pulmonibus. Soli etiam naturæ debetur sanitas recuperata. Nec minus providentiæ divinæ, si tam periculose laborans invenit Medicum, qui morbum perite & leniter tractare novit. Sed quia ejusmodi abscessus perquam facile recrudescunt, exacte ad sanitatis regulas vita instituenda & vitanda cum cura cuncta, quæ ad mali recursum facere possunt.

## OBSERVATIO VI.

*Lenta febris post tertianam curata.* Femina triginta annorum, tenera, victum tenuem, mollem, per multos annos suetum, cum crasso & duro permutarat, & carnes infumatas piscis salitos liberaliter ingesserat. Incidit hinc primum in tertianam notam, a qua post mensem liberata, ad stomachum fulciendum usa est tinctura aperitiva *Mæbii*, ex spiritu salis, cum sale tartari, torna solistincta. Hac adeo aucta appetentia, ut vix famem sedare posset. Paulo post persensit virium lapsum appetitusque prostrationem, cum æstu interno ac phlogosi, pulsu vesperi ac post cibum semper multum increbescente, successit tandem languor universi corporis pedumque tumor ac dolor contusivus. Medicum igitur accivit. Qui, quum primam regionem saburra acidorum humorum obsessam esse recte concluderet, lene dedit emeticum, ex tartari emetici uno & dimidio grano, aquæ menthæ uncia & julepi rosarum drachma. Assumpto hoc, ingens copia viscidæ amurcæ viridissimæ, instar æruginis æris, vomitu rejecta, quæ instillato oleo tartari per deliquium, flavum induit colorem, luculento indicio, ex bile & acido corrosivo eandem esse conflata. Mitior inde redditus calor & molestus ossium

dolor complacatus, vires quoque reparatæ. Nihilominus, ad reliquum exturbandum, tertio die iterato datum hoc pharmacum, & evocata tam per superius, quam inferius os, similis indolis recrementa. Postea vero datum elixirium nostrum balsamicum stomachale & pulveres præcipitantes cum duplicato arcano, tam salutaris effectus, ut brevi post febrishæc cum omnibus symptomatibus discederet & ægra cum valetudine in gratiam rediret.

*Epicrisis.*

Ortum duxit lenta hæc febris ex primæ regionis cruditatibus, quas ingenuit voracitas, post febres superatas solennis & usu spiritus salis adaucta. Licet enim aperitiva *Mæbii* tinctura stomachi vitis appetitum excitando & digestionem facilitando, egregie opituletur; ubi tamen ventriculus plus appetit, quam coquere potest, noxam potius affert, quam emolumentum. Recte igitur datum vomitorium, quæ saburra acido-biliosa, morbi causa exturbata, sicque simul sublata symptomata cuncta.

## OBSERVATIO VII.

Novi senem octuagenarium, robustæ naturæ & ob nimiam sanguinis redundantiam singulis mensibus hæmorrhoidum fluxui obnoxium, ceterum bene valentem & bene appetentem, inprimis quum quotidie vini liberalem haustum biberet cum oblectamento. Hic tandem autumno, confecto itinere & pota cerevisia minus defecata, ingestis quoque aliis fermentescibilibus, digestionis turbas & flatulentias expertus est, substitit paulo post hæmorrhoidum stillicidium, appetitus periit, vires successive conciderunt, ructus facti continui, cum conatu ad vomendum, os siccum, alvus obsterata, pulsus celer redditus ac debilis. Hæc durarunt per duos menses, & graviora indies facta, tandem frustra adhibitis omnibus, vitæ attulerunt finem.

*Marasmus senilis.*

*Epi-*



*Epicrisis.*

Senes levi ex causa & errore commisso, in graves, immo funestas, ni mature succurratur, incidere possunt affectiones. Quando enim sanguis hæmorrhoidalis, evacuari solitus, retinetur, neque per tempestivam venæsectionem ad liberum circuitum traducitur, stagnat in visceribus & ad corruptionem vergens, putridum talem febrem, quæ in senibus marasmi nomine venit, ingignit.

OBSERVATIO VIII.

*Hæctica ex corruptione sphaclulosa interna lechalis.* Vir quadragenarius, tener constitutione, post longum animi mœrorem & vitam sedentariam, incidit in languorem virium, corporis marcorem, appetitus prostrationem, caliditatem præternaturalem, cum pulsu debili & frequenti, somno parco & interrupto, facie plumbea, oris siccitate perpetua & sudore matutino. Quum his per sex septimanas fuisset detentus, ob alvum adstrictam sumfit purgans, ex diagrydii sulphurati gr. 2. cum tartaro vitriolato, quo multum deiecit & diutius quam per octiduum. Inde vires adeo conciderunt, ut animus facile deficeret in situ erectiori, calor etiam increbuit & accessit tandem summa præcordiorum anxietas, ad quam levandam vena aperta, & aliquot unciae emissæ sanguinis fluidi & floridi. Licet autem anxietates hoc facto levarentur, æger tamen, ob virium plenarium lapsum, animam haud ita multo post efflavit.

*Epicrisis.*

Hæctica hæc febris est, enata procul dubio, a sphaclulosa visceris cujusdam, ac uti videtur hepatis, corruptione. Non enim novum est, quod in languidioribus & diuturno mœrore affectis, viscera ob sanguinem stagnantem abeant in putredinem, ac teste cadaverum sectione compareant nigra, tanto magis, si

vita accessit sedentaria. Signa ejusmodi corruptionis internæ sunt, plenaria appetitus & virium prostratio, somnus nunquam reficiens, facies livida plumbea, carnes flaccidæ, conatus ad vomendum & colliquativus sudor. In nostro notatu inprimis dignum, quod ab unica exigua purgantis dosi incompefcibilis alvi fluxus inductus. Neque tamen effectus hic tam purgantis virtuti, quam potius intestinorum inflammationi & humorum acredini tribuendus. Caveat igitur Medicus circumspectus, ne, ubi motu intestino continuo vires consumptæ massa sanguinis recrementitiis humoribus gravis, quippiam drastici purgantis præbeat & perversa incurrat judicia.

OBSERVATIO IX.

Femina sexaginta & trium annorum, tenera admodum, ante quinque menses terrore fuerat perculsa gravi & confestim molestanti tractionem & tensionem in artubus perferat. Ante tres menses supra claviculam sub musculo mastoideo in utroque latere exortus tumor, qui rebellis fuit, nec ullis cedere voluit remediis. Interea lenta & vires consumens febricula, ab aliquot jam mensibus ægram incessit, cum ardore, in volis manuum & plantis pedum, præsertim circa mediam noctem affligens. Accesserunt per intervalla capitis pulsantes & tensivi dolores, qui sub cute, modo huc, modo illuc discurrerunt, ad cervicem, quin ad gingivas usque. In artubus sæpe tractiones fibrarum musculosarum, oculis conspiciendæ, cum dolore lancinante adfuerunt. Nausea quoque cum anxietate, nec non tormina ventris obscura, nonnunquam affligerunt, alvi secessu ut plurimum solute. Appetitus fuit prostratus, urina crassa, turbida, rubra cum sedimento & cuticula oleaginosa, præsertim paroxysmo finito secessit. Omnia

*Lenta febris curata*



omnia autem hæc symptomata, mox secundo, mox tertio die invaluerunt, cum pulsu celeriori, qui tamen frequens semper fuit sed exiguus.

*Epicrisis.*

Affectus hic merito lenta consumens febris dicendus. Originem dubio procul traxit a vehementi terrore, cujus tanta vis est, ut, præsertim in cacochymico corpore, totam œconomiam motuum, tam vitalium, quam secretoriorum & excretoriorum, pervertat, nervosarum quoque & fibrosarum partium systema valde debilitet & ad spasmos, contractiones & dolores disponat. Eidem terrori etiam debetur glandularum colli tumor, qui ad lentæ febris generationem multum contulit. *Hippocrates* enim jam eas febres, quæ glandularum tumoribus accedunt, lentas & periculi non expertes judicavit, tum quod sub musculo crasso siti sint intractabiles, tum quod nervos vicinos distendendo, febrilibus spasmodis subministrant occasionem. In curando hoc morbo primum fuit, ut primæ viæ a sordibus repurgarentur. Hinc magnesia cum sale Epsomensi ad drachmam dimidiam data, cum lacte amygdalino mannato, & clyster injectus ex decocto avenaceo, manna & chamomillæ floribus. Mane jejuno ventriculo potum caponis brodium, cui incoctæ radices petroselini, fœniculi, cichorii, herba nasturtii aquatici, addito cancerorum fluvialium succo. Oblatus tum quoque pulvis ex cancerorum lapillis, nitro & solutione oculorum cancri. Potui ordinario serviit ptisana. Exterius glandulis tumidis & dolentibus impostum emplastrum diachylon simplex, cum spermate ceti, oleo hyoscyami, croco & camphora. Et ad artuum dolores complacandos, linimentum discutiens & antispasmodicum inunctum. His ægra per DEI gratiam, intra mensem, ex ancipiti levata & febris perfanata.

OBSERVATIO III.

Juvenis melancholico-cholericus, vigesimum annum egressus, comparisonibus & ebrietati intemperantissime deditus, aliquoties hæmoptisim passus fuerat, cum pectoris angustia & quasi ebullientis sanguinis sensu circa præcordia, semper tamen liberatus tempestiva venæsectione, pediluviiis & congruis temperantibus atque nitrosis. Accidit vero, ut vehementi ira aliquoties commoveretur, quam sequuta notabilis virium & appetitus prostratio, spirandi difficultas, somnus inquietus, sudor matutinus, tussis vehemens, cum copioso ad libram minimum quotidie secreta, pulsus celer, a meridie potissimum ad medium noctis, cum calore in plantis pedum & volis manuum, urina turbida rubra, interdum cum sedimento, interdum tenui, corpore simul contabescente. Sic per duos menses, varia Medicorum consilia expertus est & artificia, ex pectoralibus, antifebrilibus & refrigerantibus, sed frustra. Tandem nostrum petiit consilium, vix tamen dubiam, rebus sic comparatis, salutis spem facere potuimus. Interim lactis suasi potum, quod quotidie bis cum decocto fabarum coffee hausit, loco potus bibit decoctum ex radice scorzonæræ, cichorei & rasura cornu cervi, cum passulis minoribus, potavit quoque Selteranas cum lacte ad mensuram quotidie, sumpsit subinde gelatina cornu cervi, & usurpavit pulverem ex radice ireos Florentinæ, liquiritiæ, lapidibus cancerorum, nitro & saccharo. His per mensem alternatim usurpatis, melius habere coepit, æstus mitior factus & appetitus rediit. Hinc continuavit lactis potum & pulveris usum, subinde quoque juscula ex carne vitulina sumsit, simulque appetentior placentarum, ex iis, quæ minus graves & viscidæ, liberaliter quotidie comedit. Sic

*Hæc in juvene venæbilio curata.*



tandem præter omnium spem sympto-  
mata complacata & æger tantum non  
desperatus, binis mensibus exactis,  
surrexit, sensimque convaluit ac bien-  
nium supervixit sanus & integer. Sed  
quum postea antiquum obtineret &  
liquores spirituosos, cerevisiam, vi-  
num, maximeque spiritus arden-  
tes ingurgitaret effusius, nocte in-  
tempesta perquam frigida e com-  
potatione ebrius domum tendens,  
in platea subito concidit, ac domum  
portatus, morte extinctus est subita.

*Epicrisis.*

Ex raris hecticæ curationibus est  
hæc. Aderant enim omnia hecticæ  
febris signa. Sed quia primum acciti  
Medici adversus phthisicum malum  
pectoralibus & dulcibus tantum pu-  
gnarant, nec humidum deficiens re-  
sarcire, nec humorum acrimoniam  
demulcere laborarant, parum potue-  
runt proficere. Ipse enim eventus  
per remedia procuratus docuit, cau-  
sam hujus febris magis in humorum  
vitio eorumque viscositate & acrimo-  
nia fuisse positam, quam in labe,  
corruptione, aut exulceratione visce-  
ris. Patet igitur, in hectica febre  
non semper spem esse abjiciendam, si  
in juvenili ætate, subito, ex prægres-  
sa mals diæta incidit, uti quidem hec  
factum est.

Ceterum de febribus lentis & hecti-  
cis plures jam prodidi observationes  
in *Medicina consultatoria* Tom. 2. Dec.  
2. cas. 3. pag. 65. de phthisi & hecti-  
ca cas. 6. pag. 86. de febre lenta ex  
male curata intermittente. Dec. 4.  
cas. 6. pag. 185. de febre lenta cum  
cachexia succedente malæ curationi  
febris intermittens. Tom. 4. Dec. 2.  
cas. 7. de febre lenta desperata per lac-  
alimum curata. Tom. 5. Dec. 4. cas.  
8. pag. 291. de hæmoptili cum febre  
lenta post tussim graviolem. Tom. 6.  
Dec. 1. cas. 1. de tussi pulmonali phthi-  
sica cum dolore hectico demum fune-  
sta, quas evolvendas commendo.

C A P U T XIV.

*De Febribus Symptomaticis.*

§. I.

Symptomaticæ febres dicuntur eæ,  
quæ aliis morbis primariis, vel  
fonticis externis læsionibus, seu sym-  
ptomata, ob systema nervorum inde  
male affectum & gravius irritatum,  
accidunt, nec typum exquisitum  
servant. Sicut enim omnis generis  
febres nervosi maxime generis affe-  
ctiones sunt, & a varii generis cau-  
sis, hoc impensius affligentibus, sti-  
mulantibus & commoventibus, ori-  
ginem ducunt; sic etiam eodem ex  
fonte derivandæ symptomaticæ, qui-  
bus inducendis causæ velificantur pa-  
riter multæ.

*Sym-  
ptoma-  
tica fe-  
bres  
quæ dic-  
untur.*

§. II.

Ex iis, quæ aliis morbis adjungun-  
tur, notabilis maxime illa sympto-  
matica, seu secundaria febris, quæ  
in variolis observatur. Nimirum  
quando post quartum diem diem pri-  
maria febris, expulsa ad corporis há-  
bitum exanthematica materia, de-  
ferbuit, nono ut plurimum die, quo  
pustulæ suppurari & maturescere in-  
cipiunt, ob impensum qui inde su-  
scitatur ardorem atque dolorem, no-  
va accenditur febris, cum pulsuum  
celeritate, æstu interno, siti, vigi-  
lia, inquietudine, quin delirio, quæ  
undecimo die haud raro laborantes  
neecat, præsertim si adultiores & con-  
fluentibus obsessi. Dein dolores ar-  
thritici, rheumatici, podagra, chi-  
ragra, ischiatis, nec non erysipelas  
inprimis capitis, semper incipiunt  
cum insultu febrili, frigore & estu,  
sub quo ad cutim, & articulos agi-  
tur ex interaneis acris recrementitia  
materia, ibique acerbos suscitatur do-  
lores, qui novam cient febrem, eo  
graviolem, quo graviores ipsi. In-  
dentium quoque gravi dolore, ma-  
ximeque difficili infantium dentitio-  
ne, jungitur, ob cruciatum, frequen-  
tissi-

*Morbi  
alii  
prima-  
rii re-  
cedens.*



tissime febris symptomatica, quæ periculi non expers, quin in teneris sæpe epilepticæ convulsiones sequuntur. Hæmorrhoidibus porro cæcis impensius dolentibus, sæpe febris, cum horripilatione, vigilia & tremore partium complicatur. Neque minus glandulis induratis, tumentibus & dolentibus febrile symptoma accedere solet. Nullum etiam dubium, quin in pestilentia, si anthrax, seu carbunculus, qui tumor est ardens, & acutissime dolens in musculosis partibus, febris accendatur majusque intentet periculum.

## §. III.

*Vel ex-  
ternis le-  
sionibus*

In puerperis præterea, tertio ut plurimum a partu die, febris supervenit symptomatica, lactea dicta, cujus origo nulla alia, quam quod ob uterum, enixo partu, iterum contractum, magnus sanguinis ad mammas fit appulsus, quo corporibus glandulosis & fibris nerveis male affectis, dolor inducitur tensivus, febrilem insultum ciens. Si abscessus & apostematata fiunt in partibus, præsertim nervosis, & glandulosis, in inguine bubones, aut in axillaribus & mammariis tumores apostematodes complicantur febres, sæpe gravissimæ & cum dolore junctæ. Idem accidit, quando pars exquisitioris sensus ambustionem graviolem & ampliorem patitur. Neque minus ex symptomatidis febribus sunt illæ sic dictæ vulnerariæ, quæ lesionibus ac vulneribus, manuum præsertim, & pedum, nec non aliarum nervosarum partium, pericranii potissimum & meningum, accedunt, quæ etiam fiunt, quando tendines vel nervi sub venæsectione improvide punguntur, vel aliis acutis instrumentis læduntur, eodem modo ac evenire solet, si pleura, peritonæum, aut intestina sauciantur. Quin si vulnera, & læsiones partium acutius sentientium, acribus, & causticis medicamentis, injectis aut inspersis, tractantur, intenduntur non modo dolores, sed, & haud

raro febres ardentes & continuæ ingignuntur. Tanto certius autem tantoque majori cum periculo hoc accidit, quando nervosis partibus communicatur plane venenum, uti fit in in mortu canis rabidi, nec non quando mercurius sublimatus, aut arsenicum, carcinomatibus induntur. Demum non prætereunda illa febris, supra omissa, quæ vermibus & calculo accedit. Non enim ideo insolens in verminantibus febris putrida dicenda merito, quæ irregularis admodum, cum nausea, abdominis torminibus, urina limosa, alvo ut plurimum laxa. Quæ autem calculo jungitur, oritur a doloribus acutis, tum maxime, quando per uretheres nervosas molitur transitum.

## §. IV.

Ita autem omnes hæ symptomatidis & continuæ febres sunt comparatæ, ut universam œconomiam functionum, vitalium inprimis & naturalium, pervertant, vires frangant, multaque exitialia symptomata, deliria, convulsiones & epilepsias, inducere possunt. Plane omni tamen destituuntur utilitate, nec sicuti aliæ febres, removendæ, & vincendæ causæ serviunt, multo minus sufficiunt. Hinc utique peritus Medicus eo dirigere debet in earum curatione medicationem, ut cito anomalos hos febriles motus compescat, eorumque vehementiam ocysime retundat. Longe facilius enim & melius hoc in symptomatidis hisce perfici potest febribus, quam quidem primariis; eo quod illæ tantummodo a tensione & spastica strictura nervosarum partium, tamquam a causa immediata, proficiunt; hæ vero a causa materiali, non cito transeunte, sed permanente, ortum ducunt.

## §. V.

Curatio ipsa sic instituenda, ut causis amoliendis sit opposita. Quod si igitur a læsione, aut vulneratione partium nervosarum & tendinosarum, tam internarum, quam externarum,

*Quid  
utile sit  
a læsione  
partium  
nervosarum  
externarum.*



maximeque ipsius capitis , insultus accidit febrilis , nullum præsentius & securius auxilium , sanguinis missione , & quidem in parte propinqua instituta . Vulnerariæ enim hæ sic dictæ febres oriuntur potissimum a sanguine effuso , in partibus sauciatis decumbente . Expediit vero , ut mature id fiat , præsertim in iis , qui sanguine abundant , post venam sectam , discutientium , resolventium & diaphoreticorum usus longe efficacior ; quam hac neglecta . Nos quæ commendamus habemus potiones ex aqua scorodii , cardui benedicti , chærefolii , scabiosæ , aceto destillato , aqua theriacali , lapidibus cancerorum , antimonio diaphoretico , mixtura simplici cum sirupo acetositis citri , adjecto interdum pulvete lumbricorum terrestrium , interdum sanguine hirci . Melius adhuc vinum bonæ notæ Rhenanum , cum succo cancerorum fluviatilium mixtum , addita lapidum cancerorum drachma dimidia . Sic enim conflatur potio , ad inflammationem & sphacelationem arcendam , virtutis præstantissimæ .

§. VI.

Quando symptomatice febris ab atroci dolore , partium præsertim nervosarum & sensibilium , accidit , omnia quæ sine noxa dolorem levant & sedant ex usu sunt , id est , ea quæ blanda virtute vaporosa anodyna polent . Horum classem ducunt flores aquarum fragrantium , uti tiliæ , primulæ veris , acaciæ , liliorum convallium , alborum , sambuci , rosarum , papaveris rhæados , pœoniæ , nymphææ , nec non blanda papaveracea , emulsio scilicet ex seminibus quatuor frigidis majoribus , cum semine & sirupo papaveris albi , & maxime omnium liquor noster anodynus mineralis . Laudatissimi enim hæc in detentione difficili , calculo & colica cum febre sunt usus . Neque etiam , nisi irritis his , si necessitas urget , confugiendum ad opiata & narcotica , massam pilularum de

cynoglossa , diacodion montanum , laudanum cydoniatum *Helmontii* , *Sydenhami* & quæ plures hujus farinæ compositiones . Quando dolori ex inflammatione supervenit symptoma febris ; interne diaphoretica cum nitrosis mixta , omnia fere reliqua virtute antecellunt , quia nihil magis inflammationem discutit , quam nitrum , præsertim cum fixis diaphoreticis & camphora mixtum , & qua discussa , & dolor cessat , & febris .

§. VII.

Quæ a causa externorum topico-<sup>Extrema</sup>rum usum admittente inducitur symptomatica febris , præter interna ,<sup>etiam</sup> exterius etiam poscit demulcentia ,<sup>profunda</sup> dolorem mitigantia & fibras duras strictas mollientia , & relaxantia . Sunt hæc maxime necessaria in tumoribus venarum hæmorrhoidalium , in tumoribus & doloribus artuum , glandularum inguinalium , tumore venereo , in tumentibus mammis , colli glandulis , nec non si sub infelici venæsectione punctus nervus aut tendo , si animal rabidum , aut insectum intulit læsionem . His in pathematibus eximie conducunt cataplasmata ex ficibus , radice & foliis liliorum alborum , melle , farina fœnu græci , cepis tostis , vitello ovi , lacte & cremore lactis , cum croco ; deinde nobili pollet virtute emplastrum diachylon simplex , mixtum cum sufficienti quantitate croci , vel cum spermate ceti & oleo hyosciami ; porro dolores egregie mulcent & spasmodum laxant vesicæ , decocto emolliente plenè & parti afflictæ crebrius calidæ impositæ , neque ad temperandum ardorem & stricturam remittendam inutilis est mucilago seminis ptyllii , cydoniorum , aut lini , cum aqua rosarum facta & crebrius illita .



## Enarrationes morborum.

## OBSERVATIO I.

*Febris  
vermi-  
nosa.*

Virgo tenerioris constitutionis, quatuordecim annorum, mensium fluxum parcissime experta, incidit in febrem, continuo, lento calore per duas hebdomades affligentem, cum tussi sicca, & alvi fluxu, quo multa foetida cinericei coloris excernebat, languor occupabat totum corpus & facies pallido foedabatur colore, accedebant quoque crebrius dolores acuti circa spurias costas, urina erat pauca, & crassum sedimentum deponebat. Judicabatur lenta febris, a mensium obstructione prognata; ideoque ad emovendos hos varia a mulierculis ingerebantur. Vocatus ego, quæsi: num forsan antea vermibus laborarit? dixerunt, ipsam dulcibus & placentis admodum oblectari, atque etiam ante aliquot menses lumbricos quosdam per alvum excrevisse. Exhibui igitur potionem ex rhabarbari drachma, seminis santonici drachma dimidia, salis tartari scrupulo, aquæ florum acaciæ unciis sex, spiritus vitrioli guttis 20. infusus in calido loco, de qua dimidiam partem pro dosi sumsit. Expurgatis sic leniter primis viis, ptisanam pro potu ordinario dedi hanc: recipe hordei mundi manipulos duos, radicis scorzonæ, rasuræ cornu cervi, radicis cichorei ana unciam, herbæ scordii manipulum unum, coque in aquæ fontanæ mensuris quatuor per horam, colaturam adde sirupi acetositis citri uncias duas. M. Interpositus quoque interdum fuit usus pulveris, ex pulvere seminis santonici, cornu cervi usti, rhabarbari ana drachma una, nitri purificati, salis polychresti ana scrupulis duobus, qui ad scrupulum una vice sumtus. His per mensem & ultra usurpatis, egregie convaluit,

licet nulla amplius lumbricorum succederet excretio.

## Epicrisis.

Febres verminosæ a lentis & hæticis differunt in eo, quod hæ post cibum sumtum & vesperti ingravescent, in illis vero hoc non observatur. Deinde quoque febres ex vermibus junctum plerumque habent alvi fluxum, quo foetida & cinereacrementa secedunt, urina turbida cum limoso sedimento mingitur, in lentis autem & hæticis hæc non præsto sunt. Discernitamen hæ febres inter se debent ex causis antecedentibus, victu maxime, ex dulcibus, lacticiis, aliis viscosis & fermentescentibus, optime vero si jam ante secesserunt lumbrici. In medicatione autem, si febris complicatur cum alvi fluxu, abstinendum ab anthelminticis, validioribus purgantibus, a mercurialibus, a sagapeno, asa foetida, tanaceto, quæ alias specifica adversus vermes, sed utendum acidulis cum amaris mixtis. Acida enim non modo calori, sed & putredini verminosæ egregie resistunt. Plerumque tamen vermes non excernuntur, si febris juncta, quia æstu febrili dissolvuntur in putridum magma. Ego etiam tali in casu cum fructu usus sum potu acidularum Selteranarum, correctarum prius spiritu vitrioli, instillatis mensuræ triginta ipsius guttis, quo laxantem acquirunt virtutem. Quæ pro diversa ratione ætatis & corporis, majori, vel minori dosi quotidie offerri possunt.

## OBSERVATIO II.

Juveni 20. circiter annorum, macilento & sensus exquisitoris, forte scalpellum librarium e manu exciderat in pedis dorsum, partemque hanc tendinosam cuspide acuta pupugerat & sauciarat. Postero die, antea perfecte sanus, incurrit acutum partis læsæ dolorem, cum febre, siti, præcor.

*Febris  
ex punctura  
tendinosæ  
partis.*



cordiorum anxietate, vigilia, quin mentis quadam alienatione. Missus tum, quia plethoricus erat, illico sanguis e brachii vena & data emulsio ex amygdalis dulcibus & semine papaveris albi, cum aqua florum sambuci, tiliæ & acaciæ parata, quam tam solam, quam cum pulvere ex perlarum, lapidibus cancrorum & nitro sumsit. Oblata etiam mixtura diaphoretica & discutiens, cum diafcordio *Fracastorii*. Et exterius vulnuscule partique dolenti impositum emplastrum nostrum discutiens & anodynum. Quibus per aliquot dies usurpatis, febris cum omnibus symptomatibus discessit.

### *Epicrisis.*

Quotidiana testatur experientia, quam periculosa sint nervosarum partium læsiones & quam perniciose invehant symptomata. Nulla autem alia horum omnium reddi potest ratio, quam quod universa nervorum compages, una tantum nervosa parte gravius læsa, consentiat, & motus inordinati vehementes in hac excitati, per totum nervorum systema facile propagentur, uti fusius deduxi in *tomo 3 Medic. ration. systemat. Sect. 1. cap. 5. pag. 175. seqq.* Discimus vero etiam ex hac observatione, morborum causas, non tantum in materiæ nocentis quantitate, aut qualitate consistere, verum sæpius etiam motu vitioso, & inordinato niti. Atque adeo perperam agunt Medici, qui in ejusmodi morbis ad humorum correctionem, aut evacuationem, animum & medicationem dirigunt. Præcipuum potius tum in curando sibi vindicant locum, quæ motibus hisce turbulentis complacandis serviunt, quorum in numero cum reliquis anodynis sunt potissimum opiata correctæ, quæ alias minus quadrant, ubi perniciose quantitas sola, vel qualitati noxiæ nupta, in causa est.

### OBSERVATIO III.

Juvenis viginti aliquot annorum, <sup>Febris</sup> sanguineo-cholericus, in Academia <sup>buboni</sup> solertius Veneri & Baccho, quam <sup>accedens.</sup> Musis litarat, & ante biennium sub conflictu cum sodali vulnus acceperat in thorace, quod consolidatum, pectoris quandam gravitatem & difficilem sub ascensu acclivium, aut ambulatione incitatore, spirationem reliquerat. Hic vere initiante conqueri cœpit de virium languore, capitis dolore, inappetentia, somni defectu, calore febrili, modo vesperi, modo noctu, post levem horripilationem, ipsum infestante, subsequente mane sudore largo, admodum debilitante, cum majori respirationis difficultate & dolore in loco veteris circa mammillam vulneris. Medicum igitur in consilium vocavit, qui mixturis discutientibus & diaphoreticis, emulsionibus demulcentibus & refrigerantibus, pulveribus quoque temperantibus cum succo citri, febrem oppugnavit, interpositis subinde laxantibus blandis mannatis & rhabbarinis & data pro potu ptisana. Sed frustra. Licet enim & capitis dolor evanesceret, sudores matutini & febris vehementia tantisper minuerentur, respiratio quoque liberior redderetur & appetitus melior, insultus tamen febrilis perstitit semper, post mediam noctem accedens & sudore discedens, relicto miro corporis languore & debilitate, ut lecto etiam affligeretur. Hinc Medicus, dissolutionis agri vitæ rationis non ignarus, forsan occultatam causam subesse suspicari cœpit & in eam serio inquirere. Confessus igitur tandem est æger, in inguine dextro, durum quid protuberare, sed levem admodum ex eo se sentire dolorem, & credere, esse forsan ejusmodi tumorem, quem dicunt *eine Wachs-Beule*. Erat autem vene-



venereus bubo, qui impositis emollientibus, maturuit, & apertus magnam fudit puris copiam, quo evacuato, febris sensim magis magisque remisit, omniaque symptomata discesserunt, donec æger, traducto intra tres hebdomades ad consolidationem abscessu, penitus ad sanitatem rediret.

*Epicrisis.*

Ex hac historia id tantum occurrit notandum, quod febres ex glandularum tumoribus ortæ, teste ipso Hippocrate, perniciosæ sint, maxi-

me omnium autem, quando causa tumoris materia virulentæ indolis, uti in bubonibus venereis, ubi incurando, non modo ad febris impetum compescendum, sed & ad venenum e corpore eliminandum respicere decet Medicum. Dein meretur & illud notari, quod partes olim a vulnere quodam læsæ internæ, a contracto postea morbo, vel febre, rursus præ aliis pejus afficiantur & pathemata ibi affligere soleant extraordinaria, manifesto indicio, diu latitare posse partis imbecillitatem & labem, facile exacerbendam.



FRIDERICI  
HOFFMANNI  
MEDICINÆ  
RATIONALIS  
SYSTEMATICÆ

T O M I Q U A R T I,

QUO SPECIALIS MORBORUM PATHOLOGIA  
& huic superstructa solida Therapia cum medendi  
methodo cautelis Clinicis & morborum enar-  
rationibus adjuncta Epicrisi exhibentur,

P A R S S E C U N D A

DOCTRINAM HÆMORRHAGIARUM ET DOLORUM  
*perspicua & demonstrativa methodo tradens.*



VENETIIS, MDCCXXVII.  
EX TYPOGRAPHIA BALLEONIANA.  
SUPERIORUM PERMISSU, AC PRIVILEGIO.







# PRÆFATIO.

**S**ecundam therapiae rationalis partem, veritatis Medicæ capite Lector, Tibi jam exhibeo: cujus maturiorem editionem, occupationum & consultationum, quæ me in senio plurimum urgent, assidua multitudo, quodammodo retardavit. In præsentî hoc libro, difficilem & perplexam admodum maximique in praxi medica momenti materiam, de hæmorrhagiis & doloribus, paulo curatius evolvendam atque observationibus clinicis illustrandam mihi sumsi. Nam primo ex omnibus, quæ in genus humanum incidunt, morbosæ afflictionibus, febres si exceperis, vix ullæ dantur, quæ frequentius invadant, quæ nulli ætati, nulli temperamento, nulli sexui parcunt, quam spontaneæ a natura per varia corporis loca excitatæ sanguinis eruptiones. Hæ, probe consideratis phænomenis & paulo perscrutatus subductis rationibus, iisdem propemodum utuntur non satis completis motibus, quibus febres oriuntur, progignuntur. Nam sicut duo principales motus ad febrem constituendam necessarii sunt, alter qui præcedit & qui ab extima corporis humani superficie ad interiora sanguinem & reliqua fluida urget atque propellit; alter qui sequitur & ab interioribus versus exteriora rursus eundem cum aucta cordis & arteriarum celeritate protrudit; ita similes etiam motuum species in hæmorrhagicis excretionibus concurrere animadvertimus. Etenim a nulla causa interna suscitatur hæmorrhagia præsertim paulo gravior, quæ non extremorum refrigerationem, & spasticam habitus corporis constrictionem, cum alvo plerumque stricta, urina tenui, & pariori per cutis cribrum perspiratione, comitem habeat, sanguinem ad interiora & cor pellendo: quem motum postea celerior & vehementior, non secus ac in febre fit, arteriarum motus & ad certam partem directus sanguinis impetus consequitur. Præterea, quemadmodum motus febriles in se & sua natura motibus vitalibus alieni, per sapientissimam autem DEI providentiam, quam in fabrica corporis humani dilucide demonstravit, subinde salutarem effectum exerunt, causamque ipsam a qua originem habuerunt expugnando, hominem sanitati restitunt; ita etiam sanguinis quæ præter naturam fiunt excretiones, ipsam causam quæ eas excitavit quando subtrahunt, a gravissimis malis & periculo



corporis sæpe vindicant . Cujus rei periodicæ menstruales in sexu sequiori sanguinis profusiones , atque per venas ani in sexu nobiliiori institutæ a natura sanguinæ evacuationes , testimonio esse possunt luculentissimo . Quando autem febrium vel hæmorrhagiarum causæ ita sunt comparatæ , ut neque moribus istis justo intensioribus , neque evacuatoriis tolli possint , quemadmodum fit , si vitium non tam in materiæ mole , quam in perversa & maligna humorum indole , aut visceris cujusdam corruptela vel obstructione , aut in motu animi immoderatiore consistit , nunquam tales motus salutare censendi sunt , eo quod in detrimentum & præsentissimum sæpe exitum convertantur . Et quia ejusmodi motus excretorii hæmorrhagici , incompletæ febriles , non rationali & intentionali quodam actu , multo minus ad salutarem finem destinato , sed ex causis physicis necessitatem affectus quæ inferunt peraguntur ; fit utique , ut non modo vel in excessu vel in defectu sanguinis emittendi peccetur , verum etiam , quod sæpe numero evenit , per partes nobiliores & vias plane convenientes & alienas , conservationi vitali proxime inservientes , ut sunt cerebrum , pulmones , ventriculus , intestina tenuia , vesica , renes , plane perverse & erronee , cum ingenti harum partium corruptela nec non cum summo vitæ discrimine , sanguinis subinde valde copiosi exclusio suscipiatur . Ceterum etiam doctrina hæmorrhagiarum ea de re multum difficultates in usu artis habet , quod aliis iisque gravissimis tam acutis quam chronicis affectionibus sæpissime conjungantur , & supervenientes quandoque , sed rarius , morbum solvant , sæpissime vero in extremum exitum terminentur . Ex quibus omnibus adductis & paulo penitius consideratis facile intelligi posse arbitror , quam difficilis ardua & intricata res sit , prudenter motus hos sanguinis excretorios tractandi , nec non , ut in salutem & conservationem corporis humani cedant , eos convertendi & dirigendi ; atque hæc ipsa difficultas non parum succrescit & augetur , quod nullum in tota rerum natura divina sapientia constituerit remedium , quod tanta polleat efficacia , ut Medicus , pro suo arbitrio & rei exigentia , sanguinis fluxum si deficit , provocare vel restituere cum certo effectu possit . Enimvero Medicus , pro variis indicationibus & præservandi & curandi morbos , multi generis evacuantia possidet , ut pro lubitu excretiones per alvum , per urinam , per sudorem , per nares , per salivam , per expectorationem movere possit ; sed ejusmodi medicamina , quæ sanguinem per certa loca pro Medici arbitrio evacuandi certa potentia instructa sint , plane non reperiuntur . Inter ceteras insuper difficultates non minima est , quod neque ullum certum detur remedium , quod sine majori detrimento enormem sanguinis profusionem expedite compescere possit . Quæ cum ita sint , intelligere quisque poterit facili-



cillime, quare post doctrinam febrium, quæ in priori tomo paulo penitus agitata, & excussa est, intricatam, & plane difficilem hanc in praxi frequentissime occurrentem materiam, paulo curatius præ ceteris evolvendam, & illustrandam utilissimum imo summe necessarium judicaverim. Præter hæc placuit quoque in hoc Tom. II. dolorum pathologiam, & theoriam paulo accuratiori scrutinio committere, & hæmorrhagiarum tractationi subnectere, eo quod inter hæmorrhagias, & dolores magnus sit nexus, magna consensio, & inter causas quoque, & curationem conspiratio. Dolores præsertim acerbiores certis paroxysmis certisque periodis invadere, ac semper fere cum febriculosa quadam partium solidarum, & fluidarum commotione, quam extremorum constrictio, excretionum per alvum, per sudorem quæ fiunt retardatio, pulsumque postea celeritas, & durities subsequitur febribus communis, fieri nunquam non observatur. Et sicuti febrium paroxysmi, per motum sanguinis versus corporis superficiem restitutum, & subsequentem sudorem salutariter finiuntur: ita etiam observamus dolorum tormenta non facile conquiescere vel sopiri, multo minus ex toto abigi, nisi prius sanguinis circulus uberius cum calore, & madoe subsequente ad partes extremas fuerit conversus. Neque iis qui assidue in artis exercitio versantur obscurum esse potest, omnis generis dolores, siue internas siue externas partes infestent, potissimum a sanguinis consuetis excretionibus retardatis vel plane cessantibus aut suppressis originem suam trahere, & vix aliter citius, nisi in ordinem iis prius reductis, perfectam sanationem recipere. Testimonio possunt esse cardialgici, colici, nephritici, & podagrici dolores, qui, in feminis, fluxu mensium, in viris consueto hæmorrhoidum fluxu restituto, insigni allevamentum accipiunt. Denique conspiratio, & harmonia inter hæmorrhagias, & dolores vel exinde elucescit, quod in utroque affectu, non tam sanguinis puri consistentis, & fibrosi, sed potius vitiosi seri intra vasa collecti redundantiam magis peccet atque delinquat. Et quemadmodum porro hæmorrhagiæ in iisdem locis, ubi semel vel iterum proruperunt, reverti solent, ob debilitatem relictam: ita etiam res cum doloribus comparata est, qui, ubi semel radicem egerunt in nervosis quibusdam partibus, quam facile has rursus occupant atque invadunt. Postremo quantum difficultatis atque negotii, hæmorrhagiarum atque dolorum opportuna cura medentibus facessat, & quod plurimorum remediorum efficaciam eludant, ita ut ab anodynis sæpius exacerbentur, in praxi notissimum est. Prægrandes itaque, & justæ causæ hæc fuerunt, quare præ ceteris morbis, maxime præsentibus hoc in secundo tomo, de hisce affectibus paulo curatius agere proposuerim. Et quoniam casus clinici, & completæ de morbis historię unicum, & verum pa-



## P R Æ F A T I O.

thologiæ, & therapiæ rationalis fundamentum constituunt, sine quarum sufficiente apparatu nihil solidi Medicus in theoria statuere, neque in praxi præstare, & efficere potest; cuius morbo notabiliores, quæ mihi ad manus fuere adieci observationes, in quibus fideliter, & candide morbi cuiusvis historiam, & progressum, quæ remedia, quo ordine usurpata, & qualis effectus consecutus fuerit, exposui, atque simul in subnexa epicrisi insignem usum, & fructum observationum ad circumspectam, & auspiciorem praxin exercendam demonstravi. Ego nihil magis in votis habeo, quam ut etiam alii qui ingenio pollent, & in ampla praxi versantur, publicumque bonum promovendi ardorem habent, me hac in parte sequantur. Ceterum nullus dubito, fore, ut plures ex Medicis, si scripta mea practica usque eo in lucem edita, quæ non præcipitavi quinquaginta annorum per DEI gratiam experientia innixus, cum attentione legant, & perlegant, non modicum fructum in misere afflictos redundaturum abundanter percepturi sint. Sin autem invidi quidam aut in praxi rationali minus versati, hæc vel quæcunque alia mea scripta vilipendere velint, id certe parum curabo.



C O N S P E C T U S  
PARTIS SECUNDÆ  
S E C T I O I.

De hæmorrhagiis partium tam externarum  
quam internarum.

P R O L E G O M E N A.

De Hæmorrhagiis in genere.

Caput I. De Hæmorrhagia narium.	pag. 3.
II. De sanguinis fluxu ex pulmonibus.	16.
III. De vomitu cruento, sine & cum secessu nigro, sive morbo nigro Hippocratis.	34.
IV. De hæmorrhoidali fluxu nimio.	44.
V. De uteri hæmorrhagia immoderata.	54.
VI. De hæmorrhagia ex primariis vitis.	66.
VII. De hæmorrhagia cerebri.	82.



# CONSPECTUS.

## SECTIO II.

De Doloribus & spasmis varii generis internis , &  
externis , nec non arthriticis , &  
rheumaticis.

Caput	I. De dolore cephalico.	pag. 93
	II. De dolore cardialgico spasmodico & flatulento.	111.
	III. De doloribus & spasmis præcordiorum , a calculo felleo ortis , & de ejus generatione.	129.
	IV. De dolore & spasmu iliaco.	143.
	V. De intestinorum doloribus , atque in specie , de colica flatulenta & spasmodica.	158.
	VI. De acuto dolore & spasmu ex calculo renali.	182.
	VII. De spasmu & dolore vesicæ & adjacentium partium.	201.
	VIII. De doloribus & spasmis externarum partium rheumaticis , & arthriticis .	217.
	IX. De rheumatismo odontalgico.	242.
	X. De dolore & spasmu otalgico.	252.
	XI. De dolore podagrico & arthritico vero & inveterato.	257.



S E C T I O I.  
DE HEMORRHAGIIS  
P A R T I U M

*Tam internarum quam externarum.*

PROLEGOMENA  
DE HEMORRHAGIIS  
I N G E N E R E.

§. I.

*In quibus locis ordinario hæmorrhagiæ fiunt.*

**P**rimo commemorandum est, quod sanguinis quæ sponte a natura fiunt excretiones, ordinario ex illis locis fiunt, quæ textura gaudent teneriori ac rariori, per quam vasa tenuissima undiquaque dispersa serpunt, neque firmis membranis circumtensa latitant, sed potius in superficie morantur: quo privilegio quam maxime gaudent interior narium pars, pulmonum bronchia, caro gingivarum, ventriculi pars amplior sinistra, intestinum ileum, recti intestini extremitas, exterior uteri & vaginæ substantia; ex quarum partium nimium distentis & apertis arteriis cum impetu sæpe sanguis prorumpit. Verum extraordinarie quandoque fit, ut per alias vias plane insuetas, & in quibus paulo profundius vasa latitant, sanguis sese exoneret. Ita per minimum digitum sanguinem excretum vidit SALMUTHUS cent. 3. obs. 36. lit. HENR. AB HEER. obs. 36. Ex genu & manu pro-

*in quibus ex-ordinariis?*

*Hoffm. System. T. IV. P. II.*

filientem sanguinem menstruum BARTHOLINUS *obs. anat. cant. 1. hist. 30.* & ex mammis saltu eundem prodeuntem PANAROLUS *Pentec. 4. obs. 15.* item AMATUS *cent. 2. obs. 24. & cent. 7. curat. 48.* memorant: menstrui vero in viris per penem profluvii observationes, numero plures in STALPARTIO VANDER WIEL. *cent. 1. obs. 80.* conspiciuntur.

§. II.

Sanguinis eruptiones per quam familiares solent esse iis, qui habitus corporis mollioris, spongiosioris, atque texturæ tenerioris sunt, quorum vasa copioso sanguine & sero turgent, qui secundum veterum denominationem dicuntur sanguinei; his enim hæmorrhagiæ per omnem fere ætatem solennes esse solent. Qui vero sunt cholericæ temperamenti, & vasa ampliora, strictioremque corporis habitum possident, per quorum vasa sanguis celeris fertur & circulator; ii in juventutis annis hæmoptysi maxime sunt obnoxii. San-

*illi dis-ferunt ratione subjecti*

A  
gui-



guineo-melancholicis fluxus hæmorrhoidum frequentior; & sanguineo-phlegmaticis feminis cruentus vomitus familiarior esse solet.

## §. III.

*ætatib.*

Memoratu quoque dignum est diversas excretionum sanguinearum species in diversis ætatibus contingere; quemadmodum id etiam jam olim recte notatum fuit ab HIPPOCRATE Sect. 3. aphor. 27. 29. 30. Videlicet pueri & adolēscētes sanguinis profluvium e naribus potissimum patiuntur; in juvenibus cruor exitum suum per pulmonum vasa magis molitur, unde hæmoptysis & inde orta phthisis huic ætati familiarissima; in viris & qui in consistente ætate sunt constituti, sanguis per venas, in decrepita autem ætate per vias urinarias plerumque exitum affectat.

## §. IV.

*Anni  
tempo-  
rum.*

Annotationem deinceps meretur hæc observatio, quod vere & autumnō, præsertim circa tempora æquinoctialia, sanguis nimium redundans plus quam alio tempore ex alveis suis effundi soleat, atque maxime per nares, in viris per hæmorrhoides, si alias ad hunc fluxum dispositi fuerint, fluat. Sanguineæ quoque apoplexiæ, quæ non nisi eruptiones sanguinis in cerebri medulla sunt, circa hæc tempora & potissimum vere contingunt: vomitiones vero & mitiones cruentas plus autumnō quam vere incidisse, a nobis annotatum est. Atque etiam circa hæc anni tempora solenniter ejusmodi sanguinis excretiones & periodice redire atque reverti solent.

## §. V.

*Subiecta  
hæmor-  
rhagia-  
rum.*

Observamus porro, omnes fere eos, quibus sanguis copiosius & frequentius in primis annis per nares erumpit, natura valde imbecilles, animæ quoque sensibiliores, variisque morborum afflictionibus spasmis & doloribus per omnem fere ætatem subjectos esse rarius etiam vitam diu protrahere: quippe in juventute in-

phthisin inclinant, in consistente ætate in malum flatulento spasmodicum sive hypochondriacum facile incidunt, atque ætate provectiori ad dolores nephriticos, & podagricos multum proclives sunt.

## §. VI.

Dispositio ad hæmorrhagias est plerumque nativa, quæ a parentibus in liberos transfertur; promptissime vero, per causas externas quæ motum validiorem sanguini inferunt, aut ejus intestinam partium agitationem intendunt, in actum deducitur: inter quas omnes animi & corporis motus solito interna ex alimentis vel medicamentis assumpta valde calida acria & spirituosæ, intempestivus quoque balneorum, sudoriferorum, vel purgantium usus, principem sibi locum vindicant.

## §. VII.

Quemadmodum sanguinis excretiones, quando anima vasorum repletionē & sanguinis ac feri redundantia sunt, multum corpori salutis afferunt & promittunt: ita, quando a maligna acrimateria, ut fit in febribus malignis exanthematicis, suscitantur, periculi sunt plenissimæ; & quodcumque a viscerum, præsertim hepatis lienis aut etiam pulmonum obstructionem, indurationem & corruptelam proficiuntur, lethum plerumq; post se trahunt; quandoquidem facile in cachexiam, hydropem, morbum sic dictum nigrum Hippocratis, vel in hæcticam lethalem terminantur.

## §. VIII.

Qui sanguinis boni, & consistentis, fibrosi, purpureo colore præditi abundantiam, pro causa hæmorrhagarum præcipua & proxima materiali agnoscunt, hi multum errare videntur. Nam, qui sanguine valde crasso, denso abundant, quales sunt, qui corpus fibrosum & robustum possident, atque illud ipsum labore strenue exercent, victuque duro utuntur, rarius sanguinis excretiones patiuntur.

*Quæ ple-  
rumque  
heredit-  
arie  
sunt æt.  
que ab  
externis  
suscit-  
antur.*

*Quando  
saluta-  
res, quæ-  
do exi-  
tales?*

*Sanguis  
boni  
abun-  
dantiæ,  
non est  
causa  
proxima  
sed ser-  
vum co-  
piosius.*



tiuntur: ubi vero major & ultra proportionem feri copia in vasis continetur, sicuti fit in corporibus mollioris texturæ vitæ otiosæ addictis & quæ serosioris naturæ sunt, sanguinemque copiosius quam par est e vena emittunt, transpirationem impeditiorem habent, atque plus appetunt quam digerere & excernere possunt; ii quam maxime hisce præternaturalibus excretionibus & ex his provenientius incommodis & morbosis affectionibus subiecti & expositi sunt. Excessiva quoque & incredibilis propemodum sanguinis quæ non raro per nares vel per uterum excernitur copia plethoræ magis serosæ quam sanguinæ testimonium satis firmum exhibet: quod vero per pauca sæpe sit massæ rubicundæ portio, respectu serosæ, id ex eo, quando e vena secta in ejusmodi enormibus hæmorrhagiis emissus sanguis in vasculo colligitur, luculenter demonstrari potest.

§. IX.

*In eujusque partis hæmorrhagiæ singulæ quædam signa præcedunt.* Notabile insuper est, ubicunque in quadam parte plus solito sanguis erumpere gestit, in hac singularius prius quædam phænomena observari, ita totius faciei plus justior rubedo ac calor, tumor quoque cum arteriarum majori pulsatione & distensione sanguinis e naribus profluvium pronunciant. Ante sanguinis per uterum fluxionem, lassitudo corporis, dolor dorsi & lumborum, tensio circa hypochondria, facies pallida, cutis horripilatio, pororumque cutis constrictio, contingunt. In hæmoptycis præcordiorum anxietas spirandi angustia, dolor gravativus undulatorius circa diaphragma, flatulentia in abdomine, extremorum refrigeratio, ante eruptionem percipiuntur. Cruoris vomitum frequentissime, dolor tensivus ac pressorius in hypochondrio sinistro antecedit: quin imo hæmorrhoidum eruptionem, spasticæ quædam stricturæ, flatulentia abdominis, in osse sacro tensivus & pressorius dolor, corporis languor & extima-

rum partium refrigeratio indicare solent.

§. X.

Ex quibus jam abductis & probe invicem expensis, liquido constare arbitror, hæmorrhagias quibuscunque etiam in locis prodeant, neque a sanguinis copia, neque ab ejus nimia turgescencia, exitum per vasa affectante, neque ex feri & sanguinis acrimonia, diæresin producente, aut ab ejus nimia tenuitate per vasorum poros transudante, ut veterum fuit sententia, proxime & directe proficisci; sed potius ab extra ad intus converso motu atque inæqualitate circulationis sanguinis oriri: id quod efficitur, quando certæ partes præsertim extremæ & a corde valde remotæ, intensiori fibrarum strictura ac contractione ita angustantur, ut sanguis per venas refluere nequeat, sed harum aucta systole, majori copia & impetu, ad alia loca inconvenientia transferatur; unde lateralia arteriolarum vasa, quæ ordinario non sanguinem strictè sic dictum, sed tantum tenuem lymphaticum humorem vehunt, plus justo distendantur & tandem aperiuntur, necesse est.

§. XI.

Ceterum causa quoque hæmorrhagarum præsertim enormium & symptomaticarum, quæ aliis morbis præsertim longis accedunt & superveniunt, in vasorum & viscerum infarctu, obstructione, induratione, quæ liberiori cursui obicem ponunt, quærenda erit. Videmus id in hydraulicis machinis, ubi obstructis quibusdam canalibus, fluidum per reliquos apertos majori impetu & celeritate erumpit. Atque idem sit in corpore nostro: nam quando per venas certæ partis spasmus constrictas vel obstructas non libere transire & versus cor circulari potest sanguis, vis & impetus eum impellens crescit in ramis & ramusculis & arteriosis, qui humore purpureo repleti & turgidi in extremitate aperiuntur. Declarant



id maxime sectiones cadaverum, quarum leviter quasdam attigisse sufficiat. Sic in hæmoptico dissecto, latus finistrum pulmonis a tumore obfatum vidit WILLISIUS in *Pharmacia* p. 90. Ita etiam in hæmoptico reperti fuerunt pulmones copiosissima materia argillacea per totum obfati, & ventriculi dextri auricula insignis magnitudinis. vid. M. N. C. Dec. 2. An. 6. obs. 217. BLAMCARDUS in *anatom. præct. obs.* 46. lienem tamen & vasa mesenterii atque omenti sanguine infarcta invenit. In vomitu cruento demortuo. hepar durum & scirrhum, lien quoque tumidus & sanguine impletus repertus fuit ab eodem Auctore l. c. obs. 23. it. 31. conf. B. WEDELIUS in *amæn. mat. med.* BARTHOLINUS in *histor. anatom.* par. 249. it. M. N. C. Dec. 2. ann. 4. obs. 86. Rectissime hinc scribit FERNELIUS *meth. med.* p. 14. quibus viscera. & jecur imbecillum & scirrhum evadit, illis sæpius sanguis e naribus fluit, non secus ac hydropicis: id quod confirmat HEURNIUS *aph. Hippocr.* p. 191. his verbis: quibus facies colore subviridi suffusa est, hepate laborant; & signum est jam adfuturi hydropis frequens in iis cruoris per nares effusio.

## §. XII.

*Quare hypochondriaci hæmorrhoidales.* Quoniam autem, ex spasticis partium contractionibus & venarum angustationibus, sanguinis præternaturales eruptiones plerumque suum ortum & causam mutantur; liquido nunc intelligitur, quare hypochondriaci, in quibus ventriculus & universus intestinorum canalis nervosus, ob motus peristaltici perversionem,

flatulentis distensionibus, spasticis quoque stricturis assidue afflictor, ad motus & fluxus hæmorrhoidales valde sint proclives, atque si sanguis ibi non exitum inveniat, hypochondriacorum pathemata plerimum exasperentur.

## §. XIII.

In genere circa curationem omnis generis hæmorrhagiarum, id velim notetur, inconvenientissimam esse eorum medendi methodum, qui, dum sanguinis rubicundi & *κατέροχα* sic dicti abundantiam pro causa unica materiali & occasionali nunquam non agnoscunt, crebro institutis sanguinis missionibus audacter utuntur; utut, præsertim inter initia, & præservationis gratia, in sanguineis præcipue, tempestivum venæsectionis usum plurimum faciamus. Recta autem medendi ratio, unice in eo reposita est, ut primo impetum sanguinis a parte laborante, opportunis remediis, ut sunt pediluvia, clysteres, externarum partium frictiones ac ligaturæ, calida tegumenta, foci, balnea, derivemus; deinceps ut spasticas nervosarum partium stricturas relaxemus; & demum lenioribus per epicrasin laxantibus, & moderatis diaphoreticis, item inedia sive abstinentia a victu pleno sanguinem ingenerante, nimiam serosi colluviei abundantiam subtrahamus & præcaveamus.

## §. XIV.

Hæc de doctrina hæmorrhagiarum in genere dicta sufficiant: specialior *Epilogus.* & fusior hujus in praxi utilissimi argumenti evolutio & discussio, in sequentibus capitibus conspicienda erit.



## C A P U T I.

## D E

## HÆMORRHAGIA NARIUM

## T H E S E S P A T H O L O G I C Æ.

## §. I.

Narium  
hæmor-  
rhagia  
quomodo  
fiat.

**S**anguinis per nares profusio debetur copiosiori ejusdem per validiorem cordis motum ad caput appulsi, quæ arteriolæ in pituitaria tunica plus justo opplentur, earumque extrema nimium distenta, tandem dehiscunt & sanguinem effundunt.

## §. II.

Nares  
ad san-  
guinis  
erupsio-  
nem pro-  
ducunt.

Narium ea fabrica, ut eruptioni sanguinis facile obsecundent. Etenim in earum interioribus sanguifera vasa in minutissima capillamenta diremta, per tunicam, quæ vomeris os, spongiosa ac ethmoidalia ossa investit, copiose distribuuntur, ac tenui admodum membrana exterius obteguntur. Unde facto validiori sanguinis eo affluxu, is difficulter admodum per venulas refluit, sed ex facili in arteriolaris restitat, harum extremitates ultra modum diducit, perrumpit ac effluit, quin haud raro easdem in exigua aneurismata elevat, quæ postea stillicidium faciunt effusus.

## §. III.

Eruptio-  
nem an-  
tecedit  
copiosior  
eo con-  
fluxus.

Ad nares ipsumque caput validiorem sub hac hæmorrhagia fieri sanguinis & humorum confluxum, cordis & arteriarum vehementior motus, arteriarum in collo ac temporibus potissimum intensa pulsatio, gravativus ex capite sensus, faciei rubor ejusdemque cum capite toto intumescencia, naresque interius siccae & calidae, luculenter faciunt testatum.

## §. IV.

Conges-  
tionis  
causa  
inæqua-  
lis cir-  
culationis.

Hujus congestionis palmaria causa inæqualis sanguinis, per minimos, maxime partium extimarum rubulos,

Hoffm. System. T. IV. P. II.

progressus, tantum per venas non reducens, quantum per arterias adductum. Quo dein fit, ut ad quasdam partes sanguis justo parcius volvatur ibique deficiat, ad alias vicissim copiosius cum impetu ruat, ibidemque canales ad crepaturam usque farciendo, exundet.

## §. V.

Igitur quodcunque inæqualem sanguinis per canales in corpore committitum facit; id etiam ad excludendas hæmorrhagias confert. Jam nullum sanguinis profluvium, maximeque omnium hoc per nares succedens, unquam facile sine cutis partiumque extremitatum stricture, vasorum detumescencia, horripilatione, refrigeratione, sine alvi adstrictione, flatuum retentione, borborygmis in ventre, membrorum lassitudine, doloribusque in ventre contingere solet, ut potius hæc phænomena ipsam profusionem ordinari vel comitari, vel antecedere soleant. Ex quo fit plenum, spasticam fibrarum & vasorum in extremis maxime partibus minimorum stricturem, inæqualis sanguinis circuitus esse causam. Nimirum quando per crispaturam hanc spasticam vascula sanguinem potissimum, tum etiam lympham, aut alios succos revehentia, nec non excretorii illi in cute tubuli per quos juxta naturæ legem serosa sanguinis portio expurgatur, comprimuntur, sanguis ad vasa interna majora regurgitat, quo major citatioque cordis & arteriarum proritat contractio, & ipse sanguis ad partes, præsertim debiliores, vali-

Inæqua-  
lem pro-  
gressum  
facit  
spastica  
stricture-  
ra.



dius appellitur, ubi ejusdem congestio, aut decubitus, demum causam eruptionis sanguineæ, vel aliorum gravium affectum præbet.

## §. VI.

In ple-  
thoricis  
exagi-  
sato sa-  
gulæ.

Quæquum ita sint, expedita nunc est disquisitio, quo pacto aliæ adhuc causæ concurrant ad excludendum sanguinolentum hoc stillicidium. Jam scilicet ex facili reddenda ratio, cur, qui succis & sanguine redundant, quieti ac sedentariæ vitæ indulgent, voraces sunt & laute vivunt, corpus tamen, præsertim pedes, frigori incautius exponunt, accedente impensiori corporis vel animi motu insueto, aut assumtis iis, quæ sanguinem plus exagitant, aromaticis, spirituosiss, cerevisiis, vinis, pharmacis calidis volatilibus, nec non admissis balneis fervidis, sanguinis per nares fluxum crebro & promte incurrant; eo quod is liber ubique & æqualis sanguinis com meatus intercipitur, ut is per minima vasa sæcta ad omnia loca æqualiter distribui nequeat, sed dispositas partes nimium obruendo, ibi erumpat.

## §. VII.

Sub æ-  
ris au-  
tumno  
& vere  
viciissi-  
tudine.

Haud difficulter quoque reperiunda sic causa, cur ad certam aeris atmospherici constitutionem crebro hæc hemorrhagia erumpat. Per observationem enim est in comperto, plures, vere potissimum & autumno circa æquinoctia, in provectiore etiam ætate narium incurrere stillicidium, non sine levamine. Tum quippe inæqualis admodum esse solet aeris habitudo, & frequens ex calido in frigidum, ex sicco in humidum, ac vice versa mutatio. Qui vicissitudine crebriori, quia instratum corpori nervo-vasculosum cutis emunctorium male afficitur & tonus ipsius cum transpirationis successu labefactatur; mirum non est, sanguinis cursum ordinatum turbari & ad sanguinis eruptiones ansam præberi.

## §. VIII.

Eidem causæ tribuendum, quod

narium profluvium quandoque populares habeat circuitus, tum scilicet, quando nimis frigidam & humidam aeris ex austro & septentrione constitutionem, subito excipit in elasticam habitudinem mutatio, vel etiam versa vice vicissitudo succedit. Sic enim illa per cutis poros succedens copiosa humidi exhalatio, turbatur, ferosior sanguinis pars augetur, majori copia ad vasa ampliora ipsumque cor redit, quo validior in his systole & validior quoque fluidorum impulsus, sed inæqualiter procedens, inducitur.

## §. IX.

Et ex  
frigido  
ac hu-  
mido in  
elasticam  
& vice-  
versa  
muta-  
tione.

Neque minus in prono est judicare, qui fiat, ut sanguinis per nares excretionem sæpe incurrant viri, qui rheumaticis, nephriticis, arthriticis & ischiadicis doloribus sunt obnoxii. Absolvuntur enim hi morbi motibus & stricturis spasticis, quibus reddito inæquali sanguinis meatu, ejusdem collectiones & eruptiones in aliis locis præter naturam contingunt. Vide eximium utique Hippocratis lib. de prædict. 2. monitum, præcipientis, ut ex ægris provectæ ætatis ischiadicis & rheumaticis doloribus affectis queratur: num ipsis adolescentibus vel juvenibus ex naribus sanguis fluxerit.

## §. X.

Non adeo insolens porro est, ut resistante in feminis præsertim junioribus, gravidis quoque, mensium & in puerperis lochiorum, nec non in viris hæmorrhoidum fluxu, facta palindrome, narium stillicidium excipiat sanguinolentum. Nulla tamen alia pariter subest causa, quam quod spasmis, quibus omnes hæmorrhagiæ stipari solent, æquilibrium motus sanguinis progressivi tollatur, isque ad loca excretioni dicata cum impetu agatur, ibi vero exitu præclusus, ruat ubi congruum invenit locum ibidemque egrediendi sibi paret viam.

Quibus  
resistan-  
tibus  
alia  
sanguis  
evacuatio-  
ne.

## §. XI.

Frequenter præterea incidit, ut, in iis potissimum, qui tenerum, spon-

gio-



*Qui febribus cum spasmus deſinentur* gioſum & ad hæmorrhagias diſpoſitum corpus naſti, febribus, præſertim ſynochæ exquisitæ, ſeſe aſſociet, nec non quartanæ ſuperveniat, atque etiam in exanthematicis morbilloſis & varioloſis, ante eruptionem accedat, ſanguinis per nares profuſio. Cujus phænomeni ratio, non niſi ſpaſticis nervoſarum partium vehementibus ſtriſturis, tribuenda. Has enim nunquam fere non his in morbis præſto eſſe, quæ antecedere ſolent luculenter indicant, urinæ ſcilicet tenues, alvus ſtriſta, cutis ad levem auram admiſſam horripilatio, refrigeratio, inquietudines & anxietates, donec accedente faciei rubore & inflatione capitisque dolore, erumpat ſanguis.

§. XII.

*Quibus etiam grandius membrum adeo- tum.* Nec prætereundum, Medicorum obſervata ſubinde fidem facere, quod iis, quibus grandius paullo ex corporis membris mutilatum, aut amputatum; frequens eſſe ſoleat, ſanguinis e nari- bus ſtillicidium. Etenim eadem poſtea adhuc eſtque manetque ſanguinis & chyli quantitas, ſpatium vero quo diffundendi ſueci, minus quam antea, unde cruor ſtagnat in minimis, & ut aliorum vergant motus eluctatorii, facit.

§. XIII.

*Anteviſcera ſanguinea obſtructa.* Accedit alia inæqualem ſanguinis motum præter ſpaſmum inducens cauſa, viſcerum ſcilicet ſanguineorum, hepatis & lienis, infarctus atque obſtructio. His enim dum obex ponitur ſanguinis per vaſa cum his viſceribus communicantia com meatui, aliorum convertitur ejus motus ac impetus, ac non raro ſuperiora ipſumque caput petit. Atque hinc accidit, ut inveterato ſcorbuto, hydro- pi & cachexiæ demum, accedat hæmorrhagia ſæpe funeſta. De quo præſeum jam Hippocratis de prædict. testi- monium, magnos lienes comitari hæmorrhagias.

§. XIV.

*Narium hæmorrhagia* Ipſum autem ſic concurrentibus variis cauſis excluſum ſanguinis ſtilli-

cidium, vel ex dextra, vel ex ſiniſtra nare, raro ex utriſque ſimul, ſucce- dit, ac præterea, pro uberiori, vel parci- ori ſanguinis ad caput affluxu, ejusdemque ibi facti decubitu, ratio- ne quantitatis multum differt. Inter- dum enim aliquot tantum ſtillant gut- tulæ, quandoque effluunt aliquot tu- nicæ, nonnunquam vero tam effuſe per aliquot horas manat ſanguis, ut quinque vel ſex librarum pondus æquet.

§. XV.

*Ratione ſucceſſus & fre- quentie* Dein hæc narium hæmorrhagia, ratione ſucceſſus, quibusdam longius, quibusdam brevius accidit. Quosdam etiam ſæpius, quosdam rarius, infe- ſtat. Pueris ſcilicet & adoleſcentibus, familiarior eſt, rari- or viris ac ſeni- bus. Incidit quoque frequentius in virilem quam femininum ſexum, cui exundans ſanguis ſolenniter expurga- tur, per uterina vaſa. Neque minus ut plurimum & crebrius obſervatur in iis, qui ſpongioſiori, copioſis atque exilibus dotato corporis habitu præ- diti, non vero ita in macilentis & amplis vaſis pollentibus, quibus ta- men ſi accidit hæc hæmorrhagia, eſſe ſolet effuſior.

§. XVI.

*Facile redit.* Præterea attentior docet obſerva- tio, eos quibus incunte ætate copioſa mucida & ſeroſa per aures, nares oculoſque exierunt, ſuperatis pubertatis annis, narium hæmorrhagiæ fieri ob- noxios. Hæreditariam etiam ſæpius eſſe hanc ſanguinis evacuationem & a parentibus tranſire in liberos expe- rientia conſtat. Et nullam hæmor- rhagiam tam facile repetere, quam quæ per nares contingit, eſt pariter certum; ita ut elapſo diei, aut tan- tum aliquot horarum ſpatio, ſæpe recrudeſcat.

§. XVII.

*Quam- doque ſaluta- ris eſt plethora.* Jam omnes quidem ſolitæ & fre- quentes ſanguinis fluxiones, debilio- rem naturam, hoc eſt, talem par- tium corporis ſtructuram, quæ impe- ditiori minusque æquabili ſanguinis



progressui favet, indicant. Interim tamen salutare omnino sunt, quando a nimia sanguinis mole, in spongiolo maxime corpore, stagnationum pessimarumque passionum metus est. Nec defunt numerosissima apud observatores Medicos exempla, quibus vertiginem, scotomiam, gravativos capitis dolores, phrenitidem, convulsiones quoque & epilepsiam, per narium hæmorrhagiam soluta, annotarunt. Vicissim quam gravia damna a præpostera hujus excretionis suppressione insequantur, vertigines, apoplexiæ, convulsiones, aurium cum auditus difficultate tinnitus, nec non serena gutta, vel solus primus artis parens *Hippocrates*, passim confirmat, maxime prædict. & in coacis.

## §. XVIII.

*nec non in synocha* Criticæ quoque & salutare sunt ut plurimum narium hæmorrhagiæ, quæ in synocha febre, semicritico die inter tertium scilicet & quartum, vel etiam critico pleno, septimo, erumpunt, & has febres, a plethora ut plurimum ortas, solvunt.

## §. XIX.

*Frequenter nimis pueris juvenibus & adultis morbos inducit* Attenta in artis exercitio observatio docet, & ab *Hippocrate*, jam notatum, eos, quibus in pueritia frequentia fuerunt narium stillicidia, accedente juventute, facile incurrisse pectoris morbos graves, hæmoptysin, pleuritides, peripneumoniam ipsamque phthisin, in provectiori autem ætate virili, hæmorrhoidali fluxui, affectibus rheumaticis, arthriticis, ischiadicis, nephriticis & colicis factos fuisse obnoxios.

## §. XX.

*Enormis ac diuturna necesse* Enormes ac diuturnæ sanguinis per nares profusiones, quando ex vehementioribus internarum partium spasmus pendent, præcedentibus extremorum refrigerationibus & lipothymiis, terminari solent tandem in mortem. Vidimus id ante quadraginta annos in femina generosa, in qua post mortem carotides mirum distentæ & duplo capaciores, inferior autem coli portio

arctius stricta, comparuerunt.

## §. XXI.

Quæ febribus exanthematicis, vel etiam malignis, ubi summa virium prostratio, accedere solet narium hæmorrhagia, monstri aliquid alit semper, viresque magis adhuc dejiciendo, & sanguinis ad corporis superficiem cursum una cum materiæ peccantis expulsionem minuendo, periculum adducit gravissimum. Quæ etiam in chronicis morbis, ubi viscera destructa, erumpit, ad mortem ducit, eaque propter cacheticis, & hydropicis funesta ut plurimum observatur sanguinis per nares evacuatio.

## C U R A T I O.

## §. I.

*Remedia contra opponenda causa* Si enorme sanguinis profluvium præsens est & periculum minatur & nimium destruit vires utiq; auxilio Medici opus est. Versantur autem medendi rationes potissimum in eo, ut perspectis genuinis causis, ea opponamus, quæ illis tollendis sufficere possunt.

## §. II.

*Redundantis sanguinis organa* Quando itaque nimia humorum & sanguinis redundantia atq; expansiva ejus vis & turgescencia liberiores & æqualem per minima vasa transitum impediens, immodicam talem fluxionem causatur, quod præsertim fit in corpore juvenili, verno tempore & a motu corporis paullo fortiori, vel etiam ab ingestis spirituosius sanguinem exagitantibus, præter venæsectionem, quæ etiam simul divertit motum sanguinis a capite, nitrosa omnibus aliis, ad nimium orgasmum compescendum & relaxandas etiam spasticas partium stricturas, palmam præripiunt. Olim jam ipse *Paracelsus*, nec non *Hildanus* hoc sale purificato tantum, in omnibus hæmorrhagiis cum fructu usi sunt. Et *Riverius* in praxi & observationibus suis, hujus remedii efficaciam in sistendis fluxibus sanguineis non satis dilaudare potest. Similis tamen effectus, ut paullo inferioris, sunt ipsa acida, tam

tem.



temperatiora ex vegetabilium familia, ut citri succus, berberum, aqua & succus acetosellæ, quam potentiora ex mineralibus, ut phlegma, seu spiritus vitrioli dilutus, vel tinctura rosarum, & florum bellidis, cum aqua acetosellæ, & spiritu vitrioli præparata, & cum aquæ fontanæ potu, cujus etiam magna vis est, intestinam illam sanguinis elasticam vim componendi, propinata.

§. III.

Spasmodica  
strictura  
re sistit  
da anodyni.

Quia vero in effrenibus ejusmodi, & periculosis sanguinis profluviiis spasmodica quædam nervosarum partium strictura plerumque subest, quam pressa, ut dicunt, pede, inæqualis fluidorum sequitur progressus, præter jam laudata nitrosa, ad blanda anodyna subinde est confugiendum, quorum in numero papaveracea, ut aqua, vel etiam extractum, aut sirupus papaveris rhœados, sirupus papaveris albi, emulsiones quæ semina quatuor frigida, & semen papaveris albi habent, & ex aquis florum acaciæ, sambuci, tiliæ, ulmaria, chamomillæ vulgaris, primulae veris confectæ sunt. Persistente vero pertinacius validiore solidorum impetu, descendendum ad efficaciora, & aliquot grana massæ pilularum de cynoglossa offerenda. Camphora quoque, propter sulphureas quas copiose spargit exhalationes, sedativum præstat effectum, præsertim si cum nitro, antimonio diaphoretico, parcius & refractorius ejus dosis permixta fuerit. Qualis pulvis insignem inprimis locum invenit, si exanthematica quædam materia, ut sæpius evenit, ejusmodi sanguinis profusionis causa fuerit. Ex omnibus vero ad moderandas sanguinis tam per narium, quam alia loca profusiones, vix tutius, & certius datur ullum remedium, liquore meo anodyno minerali, qui sulphure vitrioli anodyno foetus & penitus satur est, solus, sive adhuc melius, pulveri nitroso nuptus, &

cum aqua tantum fontana datus, orgasmum sanguinis illum effrenem protinus compescit.

§. IV.

Præterea urgente gravius malo, ut sanguinis impetus a superioribus divertatur, & alio dirigatur curandum. Hunc in finem proficua plura. <sup>ut ad affluxum divertendus derivantur.</sup> Palmarium venæsectio in parte inferiori instituta. Dein egregia pediluvia temperata, vel immisiones manuum in aquam tepidam, quibus laxantur fibræ, partiumque vasculorum tonus remittitur, & sic quodammodo nimius sanguinis ad superiora affluxus impeditur.

§. V.

Cum porro materia acris biliosa, flatuum, & spasmodorum genitrix, <sup>Alvum laxat.</sup> sæpius, & præsertim in hypochondriacis, immodicæ sanguinis fluxionis causa sit; derivandi scopo certe egregia virtus eorum quæ canalem intestinorum blande expurgant. Quæ interius dantur, sint temperatoria roborandique simul facultate donata, cujus generis sunt rhabarbarina, rhabarbari pulvis in substantia cum aliquot salis polychresti & natri gravis permixtus, vel passulæ rhabarbarinæ. Exteriorius idem præstant clysteres ex emollientibus, carminativis temperatis, & oleosis parati, qui latentes in intestinali canale spasmos, & flatus mulcent ac evehunt.

§. VI.

Divertunt demum etiam nimium sanguinis affluxum simulatque imbecillio rem partem roborant exteriorius applicata fronti, naribus & collo refrigerantia, cum discutientibus mixta, ex quibus probatissimæ virtutis epithema, quod ex aceto rosaceo, rutaceo, nitro, camphora, oleo ligni Rhodii paratur, atque etiam naribus attrahi potest.



Cautela, & observationes  
Clinicæ.Ad præ-  
serva-  
tionem  
servan-  
da per-  
spiratio

## §. I.

**Q**ui impetuosius & frequentiori-  
bus narium hæmorrhagiis ob-  
noxii sunt, ad has præcaven-  
das, corpus, maxime pedes, ipsum-  
que caput, a frigore probe defendere  
debent, ne perspiratio impediatur,  
quæ sicuti ad omnes hæmorrhagias,  
sic etiam hanc, multum confert,  
dum abundantia sanguinis & humo-  
rum etiam impurorum inde progigni-  
tur. Consultum igitur est, præter  
abstinentiam a largo victu, hanc ex-  
cretionem corporis motu, & infusis  
theiformibus, ex herba veronicæ,  
summitatibus millefolii &c. servare  
ac promovere.

Vitæ da-  
corporis  
ex æstua-  
rio &  
el amor

## §. II.

Qui hæmorrhagiis in juventute fre-  
quentius fuere tentati, postea iis ces-  
santibus, & neglecta etiam sangui-  
nis missione, cavere maxime debent  
ab omni vehementiori corporis mo-  
tu, etiam intenso clamore, sermo-  
ne ac voce. Observavi enim in ali-  
quot litteratis docentibus, capitis  
morbos fere immedicabiles, aurium  
tinnitum perpetuum, capitis dolorem,  
paraly sin quoque supervenisse.

## §. III.

Refri-  
geratio  
& terror

Maxime omnium vero post enor-  
mes hæmorrhagias cavendum est a  
refrigeratione corporis, etiam capi-  
tis, nec non a terrore. Hoc enim  
neglecto, ingentem torporem, stu-  
porem, dolorem gravativum capi-  
tis, dum dolore oculorum, visus  
imbecillitate, vertigine subortam ob-  
servavimus, quin summam totius  
corporis debilitatem ipsiusque apo-  
plexiæ metum. Nam quo plus ex-  
haustum sanguine corpus, eo magis  
cavenda sunt ea, quæ sanguinem ab  
externis partibus ad interiores repel-  
lunt.

## §. IV.

Eandem ob causam in profusa hæ-

morrhagia, caute, & quidem statim  
ab initio, mercandum est cum frigi-  
dis & adstringentibus, tam per nares  
attractis, quam epithematis forma  
exteriorius applicatis. His enim incau-  
tius admotis, sanguinis impetus,  
obstructionis naribus, vel ad asperam  
arteriam, & pulmones, suffocatio-  
nis metum, vel ad interiora cerebri  
conversus, apoplexiæ periculum in-  
fert. Tutius potius est & consultius,  
præmissis pediluviiis, & alvo per cly-  
steres soluta, ac venæsectione, si o-  
pus fuerit, in pede administrata, ex-  
ternis hisce demum uti.

## §. V.

Ille sanguinis fluxiones, quæ a  
sanguine nimium redundante, omis-  
sa consueta venæsectione, & defi-  
ciente in seminis menstruali purga-  
tione, velemanente lochiorum ut  
puerperis, aut in viris hæmorrhoi-  
dum fluxu, oboriuntur, & plus sa-  
lutis quam periculi afferunt, nul-  
lo modo sistendæ sunt cum vi. Si ve-  
ro modum exceperint, præter deri-  
vantia jam dicta, corallia cum spe-  
ciebus de hyacintho, & nitro mix-  
ta, ac succo citri imbuta, propina-  
re sufficiet.

## §. VI.

Neque minus maximopere est ca-  
vendum, ne consueta per periodum  
recurrentes ejusmodi hæmorrhagiæ  
subito cohibeantur externis, aut in-  
ternis. Inde enim in senibus lethar-  
gum, imo apoplexiam obortam, non  
semel observavimus.

## §. VII.

Solo frigido aquæ fontanæ in & ex-  
tra paroxysmum potu, modo exter-  
na corporis superficies convenienti fo-  
veatur calore, successive ad duas vel  
tres mensuras singulis diebus hausto,  
narium hæmorrhagias, compositas  
esse novimus, præsertim in cholericis,  
billiosis & ubi intensior partium sul-  
phurearum orgasmus est, qui in hac  
ratione optime complacatur & blan-  
dus plerumque sudor optimo effectu  
suscitatur. Quare non improbandum  
con-

Exter-  
nis qua  
cautione  
utend-  
um.In ple-  
thoricis  
hæmor-  
ragia nō  
visi-  
bitur.N. q. je-  
ciam si  
periodi-  
ca est.In cho-  
lericis  
frigida  
potus  
prodest.



consilium, ut, quæ immodicis, & crebrioribus vexantur hæmorrhagiis, aquam fontanam, sed puram, ordinarii potus loco bibant.

§. VIII.

In symptomatica quid sit etiam

In symptomaticis & raro cum bonis agrorum rebus decurrentibus ejusmodi profluviiis, qualia febres exanthematicas, variolas, morbillos, purpuram scorbuticam, imo ipsas petechias comitantur, non alia convenit exhibere remedia, quam quæ nimium æstum moderando, cuticularem perspirationem blande promoveant, inter quæ frequentis, & probati usus mihi est mixtura ex aquæ florum sambuci unciis quatuor, aceti destillati uncia una, lapidum cancrorum, diascordii Fracastorii, ana drachma una; nitri scrupulo uno addita syrûpi papaveris rhœados sufficienti quantitate; de qua bihorio quovis æger duo cochlearia capiat, & temperato lecti calore se committat. Ac si quippiam malignitatis subest, pulvis antimonio diaphoretico, nitro depurato, & camphora propinandus.

§. IX.

Emanet quibus proritanda.

Quibus in pueritia, & adolescentia sanguis frequentius e naribus stillavit, ii haud raro cessante postea hac fluxione, capitis, oculorum & aurium vitiis, nec non tumore parotidum vexantur, vel etiam gravioribus malis, epilepsia, phrenitide, idiopathica, vel symptomatica, affliguntur. Quod ubi incidit, tum utique commode, si caput ejusque vasa sanguine turgent, nares ad sanguinem fundendum externo artificio irritandæ & aperiendæ sunt, idque plerumque penna, vel stramine in nares fortius intruso, vel instrumento scarificatorio perficitur. Idem cum fructu adornatur, si in febribus synochis & sanguineis ingens sanguinis impetus ad caput, præsto est & gravia symptomata sine ejus effusione efficit.

§. X.

Hæmorrhagiæ impetuosæ, quæ fiunt a gravibus animi affectibus, peculiarem tractationem postulant. Quod si enim ab animi excandescencia sunt, pulveres antispasmodici, nitrosi, cum pura aqua frigida successive dati, eximie profunt; si vero a gravi mœrore oriuntur, diaphoretica cum antispasmodicis mixta, liquor noster anodynus mineralis, cum quarta parte spiritus Bussii, cum regimine blande diaphoretico, omne curationis absolvent punctum.

Ab aut-  
mi affe-  
ctibus;  
quomo-  
do tra-  
ctanda

§. XI.

Cachetica si fuerint corpora hæmorrhagiam hanc incurrentia, rhabarbarina, variis modis crebriusque oblata, sive sola, sive cum salibus digestivis permixta, omnibus aliis id genus remediis præferenda esse experientia didicimus; si vero scorbutica viscerum labes subest, seri lactis cura, interpositis rhabarbarinis, erit omnium optima.

Nec nō  
in ca-  
checti-  
cis &  
scorbu-  
tictis.

ENARRATIONES MORBORUM.

OBSERVATIO I.

**V**Ir sanguineo-phlegmaticus, quadragesimum ætatis annum egressus, a multis jam annis, tam cerevisiæ, quam vini potui nimirum indulgens, & cachecticus redditus, incidit in icterum, qui congruis remediis rhabarbarinis & aperientibus, item discutientibus externis aliquoties sublatus, sæpius rediit, ac tandem cutis nigrore prorsus fuit tincta, simul narium erupit hæmorrhagia, quæ remediis compesci potuit nullis, sed diu noctuque sanguis tenuis, lividus, coagulum prorsus respuens exstillavit, subsequuta virium jactura summa, & extremis semper frigescentibus, mente constanti obiit.

Hæmor-  
rhag. &  
cachec-  
tico  
lethali

Epicrisis.

Omnes sanguinis profusiones in cachecticis corporibus, si modum excedunt,



dunt, atque ex vitio & obstructione hepatis vel lienis fiunt, multum periculi alunt, nec facile admittunt sanationem, duplicem potissimum ob causam. Scilicet propter obstructa alicubi vasa æqualis sanguinis cursus turbatur, & ad aliam partem plus quam secundum naturam debebat, sanguinis convehitur, cui postea facile supervenit eruptio ipsa. Dein si viscus nobilior, quod, uti hepar, sanguinis repurgationi, sulphureas acres portes secernendo, dicam, est obstructum, remanentibus intus hic recrementis, succi in corpore fiunt falsi, acres, impuri ac intemperati, qui postea partim spasmos concitando intensos, partim tenera vascula erodendo, plane hæmorrhagias faciunt incompescibiles. Id quod sæpius evenisse vidi ictero nigro laborantibus, inter quos etiam fuit, cui ex gingivis sanguis tam effuse profluxit, ut nullo modo posset reprimi. Narium quoque hæmorrhagiam ex ictero nigro lethalem annotarunt M. N. C. Dec. 2. ann. 2. obs. 114. pag. 318. Et maxime omnium hanc in rem notandum Heurnii testimonium, quod notis in S. 3. aphor. 20. ita habet: *vidi nonnullos, quum a vini liberali usu æstuarent & in hæmorrhagiam transirent, tandem evasisse icteros moxque in hydropem abiisse calamitosum hoc malum.* Nec non illud quod epid. L. 6. consignavit: *qui vitio lienis laborant, & quibus viridi atroque colore tinctis, nares sanguinem fundunt, malum.*

## OBSERVATIO II.

*Hæmorrhagia narium in puerperâ lethali.*

A triginta & quod excurrit annis a nimo adhuc obversatur memoratu dignum de hæmorrhagia narium lethali exemplum, in femina illustri, tum heic degente. Erat hæc circiter trigénaria, macilenta & natura alvi senioris & cum utero gereret, perpetuas, ultimis præsertim mensibus, habuerat querelas, de calore lento con-

tinuo, vires mirum atterente, cum intercurrente cordis palpitatione, & quandoque tanta pulsuum debilitate, ut vix persentirentur, & ægra vernacula asseveraret: *Ex mare ihr, als menn has Dert gar Krafft hatte und in Basser lage.* Post superatos partus labores lochia manarunt non sufficienter, & successit e naribus fluxus satis largus sanguinis tenuis non coagulum assumentis. Subsistente hæmorrhagia hac interjecto aliquot horarum spatio inceserunt puerperam pathemata spastica truculenta, cum extremorum frigore summisque anxietatibus, sub quibus mens ipsa sibi non constabat animusque desperans erat de salute, donec erumpente rursus e naribus sanguine, pathemata sensim remitterent & mens ad se rediret. Discessit postea hoc sanguinis profluvium iterumque accessit per paroxysmos, ita, ut per duas vel tres horas succederet, postea ad duodecim vel octodecim horas inducias daret, tum præviis anxietatibus, inquietudine, extremorum frigore, & faciei rubore rediret, inter quæ antecedentia pathemata mens semper aliena & desperatis cogitationibus adeo turbata, ut nec divini verbi solatia eidem erigendo sufficerent, quæ tamen extra paroxysmum avidè sibi applicabat decumbens. In hoc tam gravi malo, consilia, & auxilia adhibita multa; venæsectionem natura horruit ægra, laxantia autem, clysteres, pediluvia, frictiones, nitrosa omniaque alias præstantissima fuerunt frustranea. Unde per continuans sanguinis profluvium vires prorsus exhaustæ atque dejectæ, pulsuum ictus facti inæquales, inquietudo perpetua, donec exactis inter hæc quatuordecim diebus, lipothymia tandem sub ipso paroxysmo spastico occumberet lethali.

*Epicrisis.*

Quamvis narium profluvium hoc in casu speciem præbuerit critici & salutaris in locum lochiorum minus sufficienter fluentium succedentis; tamen



tamen propter pathemata in tenera & debili puerpera supervenientia spastica hysterica, utique exitii fuit plenissimum. Tanto certius autem fuit periculum ac damnum, in persona, cuius vires propter æstum, diutius jam corpori inherenter tempore quo uterogessit, crasin sanguinis & temperiem naturalem destruentem, unde etiam sanguis sine coagulo prodiit, jam attritæ, & postea per ipsum profluvium penitus quotidie magis prostratæ sunt atque dejectæ. Nam spasmus semper in corpore viribus destituto graviores sunt & pertinaciores, & vel hæmorrhagias, vel inflammationes, aut congestiones sanguinis, in capite relinquunt. Unde quando gravidæ, ultimis præsertim mensibus, cum æstu interno de virium debilitate valde queruntur, vidi sæpe & prædixi in puerperio pravoseventus. Liqueet etiam ex hac morbi historia, in paroxy smis spasticis redeuntibus, desperabundas illas, & melancholicas anxias mentis alienatæ cogitationes originem suam in femina alias eximie pietatis, a congestionem & stagnationem sanguinis in cerebri vasis, minime vero, ut vulgus autumat, malo demone fuisse obortas, quum fluente sanguine per nares, & spasmis remittentibus, omnia pathemata desperanda simul quoque & semel exspirarint.

### OBSERVATIO III.

*Hæmorrhag. re-  
bellis  
sopiosa  
sanata  
post f. i.  
gide.*

Juvenis perillustis, sanguineæ constitutionis & facie floridus, in pueritia & adolescentia crebro jam fuerat expertus narium stillicidium, & postquam in nostram hanc ante aliquot annos concessisset Academiam, tantam sanguinis e naribus profundis successive copiam, ut sex, vel octo mensuras compleret. Quo inducta ingens virium dejectio, cum appetitus languore visusque hebetudine. Data quidem plura congrua alias remedia, sed frustra. Tandem & ego in consilium vocatus suasi, ut ordinarii potus loco a-

quam fontanam frigidam, cum tintura rosarum, spiritu vitrioli acidulata & sirupo berberum remixta biberet, corpusque exterius, præsertim pedes, probe a frigore defenderet. Quæ cum aliquandiu per quatuordecim circiter dies servasset, substitit sanguinis fluxus, ac posteaquam iusculis nutritibus gelatinosis ex carnibus sanguis exhaustus nimis reparatus, convaleuit æger ex voto & ipsa quoque visus hebetudo cessavit.

#### *Epicrisis.*

Hæmorrhagiis sunt maxime obnoxii juniores, sanguinei & sanguineo-cholesterici, habitus corporis spongiosi, iidemque miram sic sæpe quantitatem sanguinis, citra vitæ periculum, profundunt. Consignatæ sunt ejusmodi largi profluvii historie a *Zacuto Lusitano*, *Valleriola*, nec non *Foresto*. Et nuper admodum retulit mihi Theologus, se per multos jam annos obnoxium esse tam largo narium stillicidio, ut nonnunquam uno die vel 5. mensuras perdat, facie tamen semper rubicunda, pultuque auctiori manente, nequicquam proficere adhibita media, quin cohibito per spirirum vini naribus attractum fluxu, spirandi accedere anxietatem. Sed modo viscera salva sint, sanguis non impurus scorbuticus; restitutionis tamen spes est, licet vires haud leviter per nimiam sanguinis jacturam atterantur. Ex omnibus vero ejusmodi in casibus presentaneæ virtutis frigidus potus, ex aqua tantum simpliciter, sine additione acidorum, eaque sæpius cohibitam e naribus hæmorrhagiam vidi. Id tamen monendum, hoc remedium in iis tantum obtinere locum, qui non ex viscerum obstructionibus, & internarum partium spasticis stricturis, sed ex nimia elasticitate, & expansione partium in sanguine sulphurearum, aconiam vasorum inducente, hoc malum incurrunt. Frigus enim licet cum potu intro admissum, compescit orgasmum fibrasque nimium remissas adducit, eoque facit, ut

san-



sanguis impetus ab affectis locis discedat, & ad exteriora ab interioribus divertatur, ac haud raro sudor erumpat, boni in hæmorrhagiis ominis semper. Eadem hæc medicatio etiam locum habere potest, ubi a fortiori corporis motu, calida tempestate, potu spirituofo atque etiam ardenti in venerem maxime desiderio, sanguis valide exagitatus prorumpit. Quo casu præterea *Hildanus* non sine ratione immissionem in balneum frigidum suadet.

## OBSERVATIO IV.

*Hæmorrhagia in synocha venæsectione turbata cum delirio.* Generosa femina, quinquagesimum sextum ætatis annum ingressa, vegetæ alias constitutionis, per quinquennium admittere noluit suetam alias venæsectionem, sed interea aliquoties hæmorrhoidalium venarum stillicidium fuerat experta. Hæc ante mensem, eo tempore, quo propter aeris constitutionem insalubrem varii generis febres circumibant, etiam paroxysmo corripiebatur febrili, accedente tertio die delirio levi & narium stillicidio parco, quo tamen delirium non remisit, sed perstitit potius, cum leni tamen continuo cutis madore. Medicus in consilium vocatus, dedit nitrosos cinnabarinos pulveres, & quotidie aliquot mensuras aquæ frigidæ ebibere iussit. Accedente sexto die graviora facta sunt cum delirio pathemata, unde Medicus, quod primis diebus faciendum fuisset, venam secare jubet in pede, & decem circiter sanguinis uncias emittere. Idem quidem æstus & pulsus sedatior factus, delirium quoque remittere visum, remansit tamen languor maximus, quin octavo die redierunt pristina pathemata, si non majori, acerbitate tamen eadem. Tandem quoque per uterum & anum excreta fuit ingens non tam sanguinis, quam seri sanguinolenti quantitas. Hinc iterum remittere visa primum morbi atrocitas, sed exacerbata

paullo post denuo. Accessit præterea singultus, quem Medicus frigida aqua clystere ano infusa compressit. Post hunc rursus per uterum magna feri colluvies evacuata, ac postremo satis cessit ægra.

*Epicrisis.*

Ad hanc ægram accersabar die septimo & ego; sed malui spectatorem agere tantum, quam medicacionem suscipere. Expectavi potius exitum, quem prædixi, brevi funestum, tanto magis quum de evacuatione feri sanguinolenti per uterum, & anum redderetur certus. Interim testimonio est hæc morbi historia, venæsectione non interceptum, aut anticipandum esse criticum sanguinis fluxum, qui in synocha febre septimo die solet erumpere. Haud dubia, & fallacia enim fuerunt indicia naturam ejusmodi criticum fluxum fuisse suscitaturam, eaque propter venæsectionem primis, non postremis diebus, fuisset instituenda, naturæ negotium certo turbatura. Vicissim nunquam ego cum bonis ægrarum rebus accidisse novi secessum non sanguinis, sed feri sanguinolenti per uterum. Etenim putrida talis hæmorrhagia labem in utero haud obscure innuit inflammatoriam, tanto certius, quo magis delirium & symptomatum inde oriundorum nullum levamentum fuerunt testimonium.

## OBSERVATIO V.

Juvenis Hebræus, constitutione sanguineus, decimo octavo ætatis anno morbillis correptus, experiebatur simul narium hæmorrhagiam copiosam, cum anxietate præcordiorum, pectorisque oppressione eximia. Vocatus ego dedi mixturam, ex decocti cornu cervi aquæ florum sambuci uncis quatuor, succi citri uncia dimidia, coralliorum drachma, nitri puri, diascordii Fracastorii scrupulis duobus, sirupi acetosissimi.



tatis citri uncia semis. Qua per vices cochleatim assumpta, eruperunt nocte una morbilli, sedata symptomata, compressa hæmorrhagia.

*Epicrisis.*

Morbillis complicati narium stillicidium non adeo rarum est, præsertim in plethoricis. Quin in sequiori sexu non modo per nares, sed vomitum etiam ac uterum sanguinem effusum esse novi, imprimis in iis, quæ exquisitus sentientis & ad iram pronæ naturæ. Sed si in exanthematicis ejusmodi morbis incidit hæc hæmorrhagia, eadem nequitiam sedanda per frigida, sed illa quæ materiam illam acrem causticam nerveis membranis insidentem easdemque ad spasticas stricturas sollicitantem contemperant simulque blande expellere juvant. Et hunc utique effectum adhibita mixtura præstat egregie, de quo præterea multiplicia experientia sunt mihi testimonia.

OBSERVATIO VI.

*Hæmorrhag. cit. quanta. nata.* Puer generosus tener, octennis, ipso hoc anno, quo febres admodum frequentes, incidit in quartanam, quæ licet aliquoties depelleretur, semper tamen rediit, ut æger demum abdomen inflatum, & faciem lividam circumferret, quibus crebriores accesserunt hæmorrhagiæ narium. Minus fausti hæc videbantur ominis; nihilominus adjuvante DEO, infuso rhabarbarino, cum lixivio alcalino & nitroso, admixtis extractis amaris, inter potum dato, febris ex toto quævit, omniaque pathemata cum hæmorrhagia discussa.

*Epicrisis.*

Mala utique fuerunt hæc indicia. Sed in infantibus, non tam facile obstructions, & indurationes viscerum accidunt quam in adultis. Et si etiam adfuerint primordia ejusmodi labis, facilius tamen hæc amaricantibus & salinis iterum disjiciuntur ac tolluntur. Atque eidem causæ tribuendum,

quod in nostro feliciter cesserit medicatio, quum si adultis eadem occurrunt phenomena, ex quartana facilis, quin certus, in cachexiam & hydropem sit transitus.

OBSERVATIO VII.

Virum novi 30. circiter annos natum, spongiosi corporis habitu, & temperamento quod vocant sanguineo, qui a primis ætatis annis frequens expertus fuerat, circa æquinoctia potissimum, narium stillicidium. Adultior postea factus, sanguinis missionem vere & autumnò admisit liberalem, quo narium hæmorrhagia quidem emanavit, sed solennes facti circa idem tempus capitis dolores, sponte tamen iterum descendentes. Quum vero aliorum concedens, ex consilio Medici, suetam omitteret venæsectionem, vere ineunte gravativum capitis incurrit dolorem, cum faciei tumore ac rubore. Nihilominus docentis quod gerebat munere strenue alta, & elata voce fungens, aurium tinnitum & auditus gravitatem passus est cum torpore pedis, & manus in latere dextro, quæ ipsum per multos annos ad mortem usque affligerunt.

*Epicrisis.*

Patet ex hac relatione, consuetas fieri plethoricis, circa æquinoctia præsertim, narium hæmorrhagias, easdemque instituta sanguinis missione posse intercipi. Quia igitur omissa postea venæsectione sanguinis pristina ad caput viam legit, mirum non est, subsequitas ibi stagnationes ipsius & gravativum sensum. Quin, quum per sermonem crebrum elatum magis augetur ad caput affluxus, factum utique, ut a cruore stagnante secederet serosa portio, ad inferiora descenderet, ibique aurium tinnitum atque etiam torporem pedis manusque induceret. Ex quo id in usum practicum tendendum: pessima esse medentium consilia, quæ contra experientiam

*Damna ex omis- sa hæmorrhag. Intercepta. V. S. hæc.*



tiam suadent, ut fueta sanguinis missio, propter vanum decrementi virium metum omittatur.

## CAPUT II.

### De sanguinis fluxu ex pulmonibus.

#### Theses Pathologicae.

##### §. IX.

Hæmo-  
ptysis  
quid.

**I**lla hæmorrhagia, qui sanguis floridus & spumans mediante tussi ex pulmone fertur, recepto in scholis medicis nomine, origine Græco, hæmoptysis appellatur.

##### §. II.

Differt  
a sputo  
eructo.

Non omnis sanguis e faucibus reiectus hæmoptyseos nomine insigniri debet. Nam sæpe e naribus in fauces & pulmones sanguis descendit, ac inde postea sreatu grumofus per os rejicitur, præcedente in palato titillatione, in capite dolore, aut gravitate. Interdum quoque per acrem tenuem distillantem humorem, ab erosione & sanitatis faucium, vel etiam ipsius asperæ arteriæ interioribus ramulis, sputum sanguine, vel sanguinis stiris imbutum, educitur, cum ipsa tussi; proprie tamen hæmoptysis dici nequit, nisi spuriam eam vocare velimus.

##### §. III.

Ab in-  
dulto  
per vio-  
lentiam.

Neque etiam nostræ considerationis hic erit sputum illud subcruentum, quod inflammatum in pleuritide vera pulmonem circa quartum, aut quintum ut plurimum diem, sequitur; neque etiam illud quod a causa externa violenta, vulnere, contusione, vel graviore casu pulmones subnasci conspescit, sed quod a causa interna excitatur, & a læsa vasculari pulmonum substantia oritur, sicque proprie & strictè hæmorrhagia pulmonum dici potest.

Differt  
ratione  
quæ sita.

##### §. IV.

Differt  
a  
læsione  
vasculi

Pro differente vasorum pulmonum læsione, & ejus quoque causa,

varie, tam ratione modi, quam periculi & curationis, hic se habet affectus. Scilicet ubi sanguis spumans, floridus ac tenuis per intervalla, cum tussi, sine dolore, non adeo multos educitur, lateralium vasorum aperitionem id denotat; ubi vero ubertim & magno impetu, quasi vomitu quodam, prorumpit, adeo ut interdum, magna inde pelvis impleatur, grandiore venæ ramum vel in varicem expansum, vel aneurisma arteriæ, quod sæpius accidit, abeuntem, & ab Hippocrate jam animadversum, disruptum fuisse, est indicium. Qui casus, quo frequentius incidit, eo plus habet periculi, & repente nonnunquam tam grandis sanguinis effusio hominem examinat, dum vel intus intra tracheam cohibitus cruor, ob defectum virium, pulmones obruendo suffocat, vel vacuato nimium sinistro cordis ventriculo a sanguine, lethalem excitat syncopem.

##### §. V.

Ut vero ipsa hæc eruptio fiat, aliarum variarum causarum concurrant necesse est. Immediata quidem, sive proxima, est inæqualis, & impeditior sanguinis per pulmonum vasa transitus, seu circulatio, dum majori copia & impetu in arteriam pulmonalem ejusque ramulos affluit, & appellitur, quam venæ eum recipere, & reddere possunt, quo dein successive fit magna tenuium ramorum, qui substantiam cellularem, & vesicularem ipsaque bronchia perreptant, expansio, tandemque varicosa, seu aneurismatica potius intumescencia, & denique violenta ruptio.

##### §. VI.

Confirmant hoc uberius signa, & symptomata, quæ malum hoc solent antecedere ac comitari. Scilicet invadit illud per vices insultibus, & quasi per paroxysmos revertitur sic, ut eger antea percipiat horripilationem incute atque extremis maximeque pedibus refrigerationem, vasa in manibus dispareant, dolor in dorso, lass-

Causa  
hæmo-  
ptyseos  
proxima  
inæqualis  
circulatio.

Quod  
testatur  
figura.



lassitudo & gravitas artuum affligat, borborygmi in imo ventre sint & alvus adstricta, in pectore gravativus sensus cum difficiliore spiritu observetur, donec sequente in faucibus titillatorio, & secundum asperæ arteriæ tractum quasi pruriente sensu, sub calida ebullitione, & undulatorio in dextro latere motu, ipsa eruptio sanguinis accadat. Hæc enim omnia indicant spasticam quandam externarum, & internarum partium stricturam, sanguinisque motum non modo esse inæqualem, sed & a peripheria introverti, ad pectus vasaque majora cogi, ibi plus justo coacervari, impedito libero per pulmones ad cor transitu, regurgitare versus dextrum latus, ibique calidi ebullientis sanguinis undulatorium sensum concitare.

## §. VII.

Inæqua-  
ritas cir-  
culum  
facit  
sanguinis  
orgas-  
mus.

Sunt autem plura, quæ æquabilem illum, & liberum sanguinis progressum, in quo maxime integritas functionis in quacunque parte constat, per pulmones turbant, pervertunt, & sic ad generationem hujus mali conferunt. Nimirum quandoque nimia tantum & simplex sanguinis intra canales, obauctum intestinum partium sulphurearum aereo-etherearum expansivum motum, turgescencia, seu orgasmus subest, quo systaltica & elastica in vasis potentia minuitur ac demitur, unde stagnatio & nimia sanguinis ibi sit collectio, accumulatio, tandemque rami arteriæ pulmonalis apertio, vel ruptura.

## §. VIII.

Partiū  
nervosa-  
rum spa-  
sticæ  
stricturæ

Alia dein ratione per spasticas, tam internarum, quam externarum partium stricturas, pariter æquabilis & liber sanguinis per minima motus impeditur, ejusdemque impetuosus cursus, & appulsus ad alia loca, maximeque pulmones, inducitur. Unde frequens admodum in praxi est observatio, hypochondriaca passione laborantes, nec non pathematibus hystericis obnoxias feminas, in quibus

Hoffm. Syst. T. IV. P. II.

ut plurimum mensium fluxus sub multis & atrocibus spasmodis difficulter succedit, incidere in hunc sanguinis e pulmonibus fluxum, non sine periculo.

## §. IX.

Haud dispar est ratio, & effectus, quando obstructio, vel infarctio viscere sanguineo, præsertim liene, & inde affecto ventriculo quod ex dolore tensivo in hypochondrio sinistro concludendum, incidit hæmoptysis. Etenim intercepto alicubi sanguinis libero per vasa transitu, vi legum hydraulicarum, impetus ejus sic increfcit, ut, ubi minorem resistantiam invenit, copiose confluat, vasa diducat, tandemque perrumpat. Tanto vero certius tantoque gravius hoc malum excluditur, quando ipsis in pulmonibus magna consistit labes, ac vel vomica, aut tubercula, in ipsius substantia, vel polypose concretiones in ramis vasorum majoribus hærent, quibus, dum obex ponitur sanguini transeunti, is utique quæ datur via ruit, aut ubi subsistere cogitur, perrumpit, & hæmorrhagiam facit admodum effusam.

Visceris  
sanguineorum  
nec non  
pulmonis ob-  
structio

## §. X.

Porro de iis quæ remotius ad inducendam sanguinis e pulmonibus eruptionem faciunt, per ipsam experientiam constat: corpora graciliora, tenerioribus fibris & vasis prædita, quæ collo instructa longo, pectore angusto simulque quadantenus depresso, in quibus pulsus celerius micat, cor etiam subinde palpitat, una cum iis, quia parentibus phthisicis progeniti, in iram atque impatientiam sunt proclives, ac in juventute fluxum sanguinis per nares frequenter experti, desinente corporis augmento, & in longum incremento, intra spatium anni vigesimi quinti ad trigessimum quintum usque, accedentibus aliis causis externis, perquam facile in hunc ancipitem morbum prolabi.

Dispo-  
nit ad  
hæmo-  
ptysia  
habitu  
corporis



## §. XI.

*Sanguinis abundantiam cum aliis causis.* Non minus per observationem medico practica in comperto est, ut plurimum & omnium facillime, hoc sanguinis profluvium accidere sanguineis corporibus, & juvenibus nec non cessante sanguinis, sive per nares in adolescentibus, sive per ani venas in provectioris ætatis hominibus spontanea evacuatione, vel etiam omissa artificiali subtractione. Qui effectus tanto certius subsequitur, quando accedit vehementior corporis, & animi motus, aut calidiorum in cibis, potus spirituosus abusus, intensus clamor, tussis vehementior, inflatio diuturna & violenta tubarum, nec non nimius in fetibus vel partu edendo conatus.

## §. XII.

*Aeris quoque constitutio.* Autumno præterea, quando tempestas regnat inequalis maximaque; frigoris & teporis est vicissitudo, tum non modo frequentiores esse solent defluxiones catarrhales, sed maxime etiam subinde sanguinis fluxiones immodicæ variæ, atque etiam in dispositis, illa quæ fit per pulmones. Idem accidit, quando hieme sub-intensissimo gelu corporis superficies stringitur & sanguis ad interiora magis compulsus quæ in pulmonum canalibus accumulatus nimium, facile perumpit. Unde haud raro accidit, ut hæmoptysis sit anniversaria, quæ Februario mense, nec non ante æquinoctium erumpere neque redire solet, atque circa hæc tempora idem hic morbus plures attentet & quasi popularis sit.

## §. XIII.

*Nō in omnibus eisdem periculi.* Ceterum de hoc sanguinis profluvio recte utique scribit Hippocrates Sect. 5. pag. 10. edit Foesian. qui sputis cruentis detinentur, ex his quidam brevi tempore pereunt, quidam vero diutius trahunt; præstat enim corpus corpori, ætas ætati, & affectio affectioni, & anni tempestati, in qua ægrotant, quidam enim morbos facile tolerant, quidam vero omnino tolerare nequeunt.

Etenim non omnibus idem hic morbus eodem modo observatur esse, aut exitialis, aut transitorius. Iis scilicet, quibus hæmoptysis ob solam abundantiam, aut ebullitionem sanguinis accidit, si recte medicatione & vitæ victusque ratione excipiat, nec periculosa est, nec capitalis. Ego certe vidi cessantibus in gravidis mensibus sanguinis expuitionem singulis mensibus redeuntem, partu vero excluso & redeunte menstruo fluxu sponte sine periculo emanentem. Vicissim notavi hæmoptysim tempore graviditatis cessantem & enixo foetu uteroque vacuo prodeuntem & sine periculo per aliquot annos insistentem. Vidi quoque sanguinis sputum periculi expers in iis, quæ parcius justo tributum solvebant lunare.

## §. XIV.

Id vero omnino certum, ex omnibus, quæ præter naturam accidunt hæmorrhagiis, vix ullam esse frequentiore non modo & sæpius redeuntem, sed etiam magis ancipitem, & periculosam, quam hæmoptysin. Nam haud facile secundam valetudinem perfecte recuperant hoc malo semel gravius correpti, nisi qui magna cura vitam postea colunt & sanitatis regulas observant, neque etiam tum speratus semper consequitur sanitatis effectus. Pulmo quippe ex visceribus est nobilissimis, qui dum sanguinem ex uno cordis ventriculo ad alterum transmittit, vitæ servit insigniter, quia vero ea propter dum vita est in continua expansione, & compressionem versatur, vas in ipso ruptum vel sauciatum sanguiferum difficulter admodum coalescere, & consolidari potest. Accedit, quod extravasatus in pulmone sanguis, non facile penitus per bronchia, & asperam arteriam evehatur, sed in vesiculosa substantia rusticans, putrescat, & teste jam Hippocrate in pus, ulcus ac denique in hæticam, & talem lethalem transeat. Quare veritati omnino respondet Trallianus Lib.

*Omni tamen hæmorrhagiæ periculossima.*



*Lib. 7. Cap. 1. testimonium, ita habens: ipsa quidem sanguinis exsecratio per se, dummodo non immoderatam vacuationem inducit, vitam non adimere consuevit, sed pessimorum morborum longorum magna ex parte causa redditur.*

## §. XV.

*Potissimum* Potissimum majus vel minus est discrimen quod infert hæmoptysis ratione causarum & illorum in quæ incidit corporum. Scilicet si senioribus accidit, debilior quantumvis & non tam vehemens quam juvenibus sanguinis evacuatio, major tamen virium sequitur dejectio & facilius putrida pulmonum corruptio, quam excipit hæcticus calor, qui corpus & vires tandem cum vita penitus consumit. Gravius quoque ac certius subest periculum, quando diuturnum profundum merorem insequitur hæc sanguinis evacuatio, quando infirmi ventris viscera una obstructa, atque humores dyscrasia scorbutica acri biliosa simul infecti.

## §. XVI.

*Nec nō* Demum nec sanationi spes, nec medicinæ locus est, si ipsum pulmonum viscus non amplius est integrum, sed vel vomitis resolutionem eludentibus obsidetur, vel vasa polyposas concretiones recondunt, vel etiam varices, vel potius aneurismata in canalibus præsto sunt, quibus crebra, & profusissima sanguinis fit effusio, tandem funesta. Has enim plerumque in hæmoptycis subesse mortis causas, edocet cadaverum sectio, qua patet, non modo pulmones maxima ex parte ut plurimum esse corruptos, a sanguine ibi effuso putrescente, & ipsam substantiam membranaceam solidam depascente, sed & hospitari sæpius polyposas concretiones in vasis pulmonalibus, & quidem magis in iis, quæ plus cum sinistro, quam dextro cordis ventriculo communicant. In iis autem, qui rupto sanguineo tumore pereunt, pulmones a sanguine effuso

multo spumoso obrutos & nigros inveniri restitante adhuc exigua in vasis sanguinis quantitate.

## C U R A T I O.

## §. I.

*Medicæ indicationes* **Q**Uum ut dictum, cause hujus mali admodum differant, diversæ quoque curandi indicationes sint necesse est, præcipuæ tamen illarum redeunt hæc: primo, ut sanguinis orgasmus nimius, vasa plus justo venosa expandens compescatur; secundo, ut ejusdem affluxus copiosior, & impetuosior a pectore ad exteriores corporis partes derivetur; tertio, ut spasticæ illæ stricture, quæ sanguinem ad pulmones validius congerunt, laxentur, & sic liberior reddatur per totum corpus sanguinis circulus; quarto, ut læso pulmonum substantia vasculosa in integrum restitua-  
*Medicæ indicationes* tur, & sic tam mali recursus, quam oriundi ex læsione alii morbi arceantur.

## §. II.

Primum ut perficiatur, & sanguinis ebullitio componatur, apprimunt refrigerantia. Inter hæc potissimum connumerandus aquæ potus frigida, paulatim quidem, sed sufficienter, quotidie hæustus, tecto probe corpore. Novimus aliquot exempla, solo hoc medio, debita cum cautione, & præmissa venæsectione adhibito, periculosum hunc sanguinis fluxum substituisse. Idque tanto felicius succedit, si corpus juvenile calore interno æstuat; quem potus frigidus reprimendo madoremque tepidum in peripheria corporis eliciendo, partes simul sulphureas calidas sanguinis exæstuationem inducentes evehit. Non minus præstans pariter ac probatissima est in reprimenda calido sanguinis partium aereo-ætherearum æstus virtus nitri rite tantum depurati & crystallisati, inprimis si cum aquis refrigerantibus, ut planta-



taginis, portulacæ, aut etiam sero lactis convenienti, parca tamen, sed sæpius repetita dosi, assumatur. Spiritum quoque vitrioli, vel etiam phlegma acidulum, præ omnibus aliis mineralibus, imo vegetabilibus acidis, peculiarem, ad orgasmum sanguinis compescendum, possidere virtutem, experti novimus, tanto certiores, si cum his cum menstruo ex rosæ extrahatur tinctura.

## §. III.

*Sanguinis a pulmonibus quibus divertens*

Ad obtinendum secundæ indicationis scopum & divertendum sanguinis a pulmonibus nimium impetum, præcipuum certe momentum repositum est in venesectione, in brachio, vel etiam in pede instituta. Præstans etiam hoc nomine virtus pediluviorum temperaturarum, nec non immissionis manuum in aquam tepidam. Neque minus ad derivandum proficua ea, quæ alvum expurgandi facultate pollent, inter quæ ex internis præcipuum locum inveniunt tamarindinata, passulata, rhabarbarina, & inter externa, clysteres emollientes, stimulo quodam acuati.

## §. IV.

*Spasticæ stricture quibus laxanda*

Tertium medendi momentum in eo versatur, ut spasticæ stricture, præsertim quæ in minimis vasis sanguiferis & partibus nervosis consistunt, relaxentur. Huic egregie satisfaciunt oleosa demulcentia, ut oleum amygdalarum dulcium, vel etiam lini, sine igne recenter paratum, cochleatim assumptum. Spectatæ quoque virtutis emulsionem ex feminibus cucurbitæ, pineis, semine papaveris albi & aquis quas vocant hypnoticis, ut rosarum papaveris rhœados, nymphæ, liliorum convallium, florum tilia, nec non ceraforum nigrorum paratis, quibus nitri, & syrupi papaveris albi parum adjiciendum. Vel etiam locolharum aquarum ad emulsionem parandas adhiberi potest decoctum cornu cervi, eboris, nec non dentis hyppopotami; quia in his duris animarum partibus singularis que-

dam spasticis motibus resistendi facultas inest. Si vero adeo rebellis hæc strictura est, ut mitioribus hisce cedere, & sanguinis profluvium subsistere nolit, ad paulo valentiora recurrere licet, inter quæ semen hyoscyami albi, ad drachmam dimidiam, cum æquali pondere lapidum canerorum, duodecim nitri granis, & uno camphoræ grano mixtum, omnibus aliis etiam opiatis, palmam præripit. Securiore tamen, ac nihilominus egregii effectus, est mixtura nostra tonica, quæ ex tincturæ antimonii acris, sive tincturæ tartari, liquoris anodynii mineralis ana uncia semis, liquoris nostri bezoardici Bulliani drachmis duabus, & olei macis guttis sex est composita; quippe quæ spasticas non modo stricture mulcet, sed & diuresin, & diaphoresin lenius movendo, sanguinis ad pectus affluxum divertit efficaciter.

## §. V.

Quartum in hæmoptyseos curatione est, ut disrupta vasa consolidentur, tenues acres humores affluxum eo proritantes attemperentur, & incrassentur, ac partis affectæ tonus roboretur. Hoc autem non obtinendum uno eodemque modo ac medio. Quare quæ ego inter plura proficua deprehendi, candide edicam, certus, si cum debito iudicio & congruo tempore adhibeantur, eadem, si medicinæ adhuc locus, non fore frustranea. Est autem ex his primum mixtura, cujus formula hæc: recipe aquæ plantaginis, scorzonæ, veronicæ, scabiosæ, aceti destillati ana unciam, coralliorum rubrorum præparatorum, specierum de hyacintho ana drachmam dimidiam, syrupi papaveris rhœados drachmas duas, M. Quæ mixtura tribus vicibus assumenda, & si vehementius sanguinis profluvium, addenda adhuc pulveris hæmatici drachma dimidia. Alterum remedium, quod tam in hæmoptysi simplici, quam etiam in ea, cui

*Relis quibus tollenda*

com-



complicata est phthisis, conducit, est decoctum, cujus hæc est compositio: Recipe florum bellidis, rosarum rubrarum, chamomillæ vulgaris, summitatem millefolii ana pugillos quatuor, herbæ consolide saracenice, hederæ terrestris, urticæ mortuæ, veronice, saniculæ, pyrolæ ana manipulum, feminis fœniculi, nucistæ ana drachmas duas. Mixta concisa, contusa dentur, signentur species, *danon* 3. *Loth in imets Maab Bies fu Focher*. Tertium quod mihi probati usus fuit auxilium, sunt pilulæ & massæ pilularum de cynoglossa drachma dimidia, & massæ pilularum balsamicarum Becheri drachmis duabus continnatæ, ad scrupulum unum circa lecti introitum sumendæ. Quartum & ultimum quod in hoc gravi morbo commendem, habeo pulverem hunc: Recipe lapidum cancerorum, antimoni diaphoretici, cornu cervi sine igne, dentis hippopotami, lapidis manati ana drachmam, nitri depurati drachmam unam cum dimidia, misce fiat pulvis, optime sic usurpandus, ut scrupulus unus ipsius viginti guttis liquoris nostri mineralis anodynî imbuatur, & cum aqua antispasmodica propinetur.

*Caute, & observationes Clinica.*

§. I.

*Prognosis sit tanta in gravi hæmoptysi.*

**I**n gravi illa, & vera hæmoptysi, qua, ob ruptum majorem arteriæ pulmonalis ramum, magna sanguinis copia per brevissima intervalla erumpit, caveat medicus, ne promissis de restituenda sanitate sit dives, nisi fluxus sanguinis intra triduum convenientibus remediis compescatur. Interim tamen minime vicissim laborantem gravi metu mortis ita percellat, ut indicto magno periculo, omnibus viribus, ut sæpe vidi, eum prioret & mortem acceleret.

§. II.

Si sanguinis abundantia urget, & *Hoffm. Syst. T. IV. P. II.*

manifesta adest vasorum plenitudo, statim inter initia instituenda est, sive in manu, sive etiam in pede, sanguinis missio, & quidem largior ad octo, vel plures uncias, ex amplo foramine; quo sanguinis impetus eo efficacius a loco affecto divertatur, & rupti ac sauciati canales eo melius iterum coire & coalescere possint.

§. III.

Illa quoque anniversaria hæmoptysis, nec non quæ ex hæmorrhoidali fluxu emanante proficiscitur, inferre solet circa tempus annui recursus rheumaticos in pectore dolore, junctos cum sanguinis spato. Habetur hinc a minus peritis morbus haud raro pro pleuritico; sed secta in pede vena, & provocato sic hæmorrhoidum fluxu, non modo sanguinis exspuitio, sed & reliqua pathemata simul & semel solent conquiescere.

§. IV.

Ubi ab acri catarrhali defluxione excitatur cum titillatione in faucium profundo tussis acerrima, qua simul per vices floridus, & spumofus sanguis cum mucro exscreatur, apparentibus nullis plethoræ signis manifestis, emulsio tantum amygdalarum dulcium seminisque papaveris albi pro potu operam locat præstabilem; ac præterea pilulis, nostris balsamicis aliquot grana massæ pilularum de styrace aut de cynoglossa admiscere expedit. Neutiquam vero in usum vocanda consolidantia & adstringentia, quia minima tantum vascula arteriæ bronchialis non vero pulmonalis, sunt sauciata.

§. V.

Quando effusior sanguinis fluxus præsens minatur periculum atque interna auxilia non sufficiunt, confugiendum utique est ad remedium a veteribus frequentius usurpatum, nempe ligaturam artuum. Hic enim sanguis in extremis tantisper retentus, non tam cito ad cor & ex hoc ad pulmones redit, atque adeo imminuto ad pulmones sic fluxu, rupti ramuli

B 3

non

*Nec nō si hæmorrhoides emanant.*

*Si ab acri defluxione sit demulcentia danda.*

*In re bellis ligaturæ uti debent.*

*Si plethoræ adeo sit gurgulio mittendus.*



non ita sanguine implentur, sed concidunt faciliusque coeunt. Ne tamen ex stasi sanguinis partibus ligatis inferatur periculum, hæc adhibenda est cautio, ut sedata hemorrhagia, ligaturæ non omnes simul, sed successive una post alteram solvantur.

## §. VI.

*St ex hy-*  
*po: hō-*  
*drior.*  
*ultio*  
*tepera-*  
*mētorū*  
*habēda*  
*ratio.* Quum hæmoptysis sæpiissime ex primarum viarum & hypochondriorum vitio, intestinis flatibus ac spasmodicis distentis accidat, maxime in adolescentia & juvenili ætate, ob sedentariam nimis vitam, studiorum intemperantiam, vel etiam affectuum impetum; ad hanc utiq; causam dirigenda etiam est in curatione medicatio, ita tamen, ut exquisita temperamentorum servetur distinctio. Quod si enim juvenes sunt cholericæ constitutionis, exquisitioris sensus, ad iram proni, palpitatione cordis subinde afficiuntur, & pulsum exhibent magnum, tum abstinendum est ab omnibus alias egregiis carminativis, stomachicis, salibus volatilibus oleosis, nec non purgantibus acrioribus, ac potius pulvres temperantes nitrosi, ad alvum laxandum mannata, passulata, tamarindinata & ad corrigendam sanguinis intemperiem diluentia, serum lactis caprilli, decocta hordeacea, avenacea & id genus plura, cum fructu adhibentur. Contra ea, ubi peccant humores viscerum, ubi infarctus viscerum, intemperies frigida & humida, & habitus corporis spongiosus, tunc pilulæ balsamicæ polychrestæ, nec non spiritus salis ammoniaci, vel volatilis oleosus Sylvii, cum tinctura tartari mixtus, item essentia temperatiores carminativæ, tincturis martialibus mixtæ, utiliter exhibentur.

## §. VII.

*Adstrin-*  
*gētia*  
*no cent*  
*valida.* Sicuti remedia quæ validiori adstringendi facultate pollent, nunquam ullo in morbo, ita nec in hæmorrhagiis securam operam præstant; omnium vero minime in hæmoptysi, præsertim illa quasi critica, nec non ab

initio & in paroxysmo ex usu sunt. Etenim, licet fluxum ad tempus sistant, relinquunt tamen in pulmonibus vesiculis sanguinis grumulos, qui in corruptionem abeuntes, inflammationem, putredinem, phthisin & hæticam expedito & facili modo inferre possunt. Interim tamen, *Sed tē-*  
*peram*  
*tiora nō*  
*repu-*  
*diāda.* neutiquam ex toto repudianda sunt leniora adstringentia & roborantia, opportune, extra paroxysmum & in fine fluxus, ad tollendas reliquias & præscindendam recidivam. Inter hæc laudem merentur eximiam solutio coralliorum cum succo citri vel aurantiorum facta & in syrupi formam redacta, confectio de hyacinto, conserva rosarum rubrarum cum terra sigillata, aut hæmatis pulvere mixta, Chinæ corticem mirifice commendat *Morton in phthisiologia*, in electuarium cum syrupo rosarum redigendum, cui extractum cascarillæ aquosum, succinum & pulvis nucistæ commodè adjiciuntur. Hæc enim, dum partibus motricibus a robore defectis debitum tonum blande reddunt, ut sanguis per totum corpus promptius & expeditius cum omnibus succis circumbeat simulque cuticularis excretio liberius succedat, faciunt & sic utilitatem præstant. Nec minus eximia est efficacia infusorum theiformium, item decocti roborantis pro potu ordinario. Infusa quidem optime ex vegetabilibus supra memoratis traumaticis, cum herba polygoni, millefolii summitatibus & fœniculi semine concinnari, & quotidie sorbillari possunt. Decoctum vero ex radice sarsaparillæ, chinæ rasura ligni santali rubri, citrini quoque, ligni lentisci, vel loco hujus mastiches, una cum passulis possunt confici.

## §. VIII.

Lactis & lacticiniorum usus omnino præstans est hoc in morbo. *D: la-*  
*Etia-*  
*niti can-*  
*tele.* Novi, solo lacte caprillo cum floribus papaveris rhœados cocto, admixta dimidia aquæ parte, & adje-



Et a portione mellis, quotidie largius assumpto, immodicam etiam ex pulmonibus sanguinis profusionem optime conquievissse primum, ac postea usurpatis simul multo inter cibos confectis ex amylo, ex toto fuisse sanatam. Id tamen de usu lacticinorum omni tenendum: ut non modo ventriculi, an ea ferre possit, habeatur ratio, sed & ne simul & semel, sed parcis & repetitis vicibus, ingenerantur.

## §. IX.

*In senibus re- nēda,* Si seniores hunc morbum incurrunt, haud leve ipsis imminet periculum, licet sanguis non adeo largiter profundatur. Penitus vero in his abstinendum est tam a fortiter adstringentibus, ad sistendam hæmoptysin, quam ab opiatīs ad procurandum somnum, ne vires magis dejiciantur & corruptio in quam senilia corpora ipsorumque sanguis pronus præcaveatur.

## §. X.

*Minera- les aque que præ- sint.* Caveant sibi hæmoptyci omnes, præsertim ubi profusio gravior est & copiosior, ab aquarum mineralium, thermalium & acidularum usu, maxime omnium illarum, quæ sale quodam copioso acri, & principio calcareo alcalino imbutæ sunt, Carolinis, Pyrmontanis, Egranis, Sedlicensibus. Ubi enim partis aut visceris cujusdam internisubstantia læsa est, aut corrupta, labem hæ aque augment & exacerbant, adeoque nunquam profunt. Vicissim acidulæ temperatiores, ut Selteranæ, quæ purum sal alcali recondunt, præsertim si cum lacte, asinino vel caprillo miscentur, usus sunt saluberrimi, eo quod sanguinis & humorum salsam & acrem dyserasiam contemperant non modo, sed & obstructions & infarctus pulmonum referant, simulque acres particulas per urinarias vias, ne denuo noceant, evehunt. Est autem sic institutus acidularum potus tunc quam maxime utilis, quando a scorbutica & icterica sanguinis, & humorum intemperie malum hoc inducitur & fovetur.

## §. XI.

Ultimo loco addendum eximium *In vitæ victus- que re- gimine tenēda.* Celsi Libr. 10. Cap. 4. consilium, de iis, quæ servanda in vita victuque ab hæmoptycis, dum monet: ipsis utilem esse quietem, securitatem, silentium; ut caput sublime cubet, & facies sæpius aqua frigida foveatur: inimica autem ipsis esse, vinum, balneum, venerem, acriora omnia, item calida fomenta, conclavia calida & conclusa, multa vestimenta corporis injecta, etiam frictiones, nisi ubi sanguis bene conquieverit. Hippocrates autem Libr. de internis affectionibus commendat hæmoptysi affectis aquæ potum, item lac bubulum tertia parte aquæ mulæ remixtum, & copiosius assumptum, item lac caprillum, coctum cum semine lini & semine sesami; porro farinam cum lacte coctam. Quæ omnia proficua esse, experientia, & ratio testatur, eo quod tali diætâ humores tenues incrassantur, acres mulcentur, & læsarum partium conglutinatio promovetur.

ENARRATIONE S  
MORBORUM.

## OBSERVATIO I.

*De hæmoptysi mens- trua inde- mni.* Percussa fuerat nobilis femina, 30. annorum, ipso illo quo menses fluebant tempore, terrore ingenti, quo illico substitit sanguis, & inducta pectoris gravitas, præcordiorum anxietas, & cordis palpitatio impensa; Recurrente dein menstrua periodo, rediit quidem sanguinis stillicidium, sed admodum parcum, præcedente pressorio, & tensorio dorsi ac hypochondriorum dolore, pectoris angustia, & gravativo in præcordiis sensu. Accessit vero etiam sanguinis e pectore per tussim ejectio post quadriduum sponte iterum cessans. Quin quotiescunque postea utero purgata, toties per quinque vel sex dies, sanguinis, plus vel minus e pulmonibus ejecit idque per-



novem annos continuos, ita tamen ut quum impregnatione facta menses retinerentur, hæmoptylis etiam quiesceret, post partum autem mox rediret, atque etiam sub ipsa lactatione sueta periodo succederet. Interim nihil inde detrimenti redundavit in sanitatem, nec quicquam incommodi sensit femina, frustrata tamen ad compescendam hanc pulmonum hæmorrhagiam variorum Medicorum conquisivit & consilia, & auxilia.

### *Epicrisis.*

Singulare hoc est hæmoptylæos menstruæ, diuturnæ quidem, sed periculi expertis exemplum, quo aperte confutatur falsa nonnullorum opinio, qua hæmoptylæsin omnem, phthisin habere, aut comitem, aut pedissequam putant. Duxit autem originem ex sanguinis ab utero ad pectus, propter terrorem vehementiam, facta regurgitatione, qua vasa pulmonalia diducta tandem aperta sanguinem eructarunt, sed remittente sanguinis ad interiora mensium tempore solenni restrictione & evacuato superfluo, liberior iterum factus progressus, vasa occlusa, & sic sponte cessavit hæmoptylæsis ad damni intulit nihil. Interim per quas semel iterumque sanguis elatus est vias, ex facili postea relegit, & accedit quasi quædam naturæ consuetudo, certa scilicet solidarum partium dispositio, qua appulso validius sanguini, prompte viam concedunt ac diverticulum, egre postea, ac nisi statim in principia, medicamentis iterum tollenda.

### OBSERVATIO II.

De hæmoptylæsi  
vere & autem  
mno pe-  
riodica

Juvenis 20. annorum, corpore tener, animo ad iracundiam admodum proclivis, per aliquot jam annos circa veris & autumnii ingressum tussis ex pulmonibus ejecerat sanguinem; novissime autem accidit, ut circa idem tempus ira excandesceret vehementius, eoque hæmoptylæsin incurreret largissimam, certis quotidie periodis

accedentem, hora scilicet matutina quarta & vespertina nona. Eruptionem semper ingens præcordiorum anxietas, frigoris notabilis in pedibus ac pressorius, & tensorius in hypochondrio sinistro sensus præcesserunt, postea successit screatus sanguinis, qui per quatuordecim dies perstiterit & octo minimum libras sanguinis evexit, non sine magna virium jactura. Medicus in consilium vocatus, neglecta sanguinis missione, decocta adstringentia, incrassantia & pectoralia, ipsum quoque hæmatis pulverem obtulit, sed frustra prorsus, ac potius sanguinis evacuatio stas suas semper servavit periodos. Advocatus & ego in auxilium, quater nis singulis horis propinavi salis volatilis oleosi genuini 20. guttas ex aqua cerasorum nigrorum; Circa somni tempus pulveris antispasmodici, ex dente hippopotami, unicornu vero, lapidibus cancerorum, ungula alcis, nitro, diaphoretico antimonio, pulvere lumbricorum terrestrium & cinnabari, dosin, cum tantillo massæ pilularem de cynoglossa, sumere jussi; alvum liberam servare emollientibus clysteribus, nitro largius conditis, ac pedes non modo aquæ tepidæ subinde immittere, sed & calidis integumentis a frigoris accessu sollicitè defendere, suasi. Quibus, fortunante DEO, curationem ex voto confeci.

### *Epicrisis.*

Periodica fuit hæc hæmoptylæsis tam ratione recursus vernalis & autumnalis, quam etiam eruptionis ipsius mane & vespere factæ, simulatque testimonio est, quantum valeat iracundiæ affectus ad provocanda sanguinis profluvia. Quia autem periodos servantes morbi fomitem ut plurimum habent sordium in prima corporis regione colluviem, in promptu est judicare, vulgaria illa pectoralia, incrassantia, adstringentia, efficere potuisse nihil, ac præter leniora evacuantia, recte in ulum vocata fuisse ea, quæ spasticas stricturas, in con-



consuetudinem & habitum quasi transeuntes, laxarunt, antispasmodica scilicet, maximeque illam cum cynoglossa confectam pilularum massam. Sed minus obvium erit nonnullis id, quod sal volatile oleosum, cuiusvis sanguinem exestuant & humores commovens alias passim decantata, usurpatum cum fructu. Verum candide profiteamur ac confidenter, nos ipso hoc remedio sæpe sæpius sustulisse cito ac secure nimia sanguinis profluvia, per quaecunque loca facta. Id tamen monendum, neutiquam exhibendum esse efficax hoc auxilium, in, aut mox ante paroxysmum, sed cessante ac remittente fluxu. Etenim quia impensiores spasmos, eruptionis auctores, excipere solet debilitas & relaxatio, ad stagnationem novam adeoque inducendum denuo spasmus postea ansam præbens, hæc utique non melius potest præscindi, quam roborando partes atonia affectas, quod per ejusmodi volatilia oleosa perficitur commodissime.

## OBSERVATIO III.

De hæ-  
moptysi  
alvi sin-  
guinis  
lata.

Theologus, vigesimum quintum ætatis annum egressus, succis & sanguine plenus, incidit postquam e suggestu verba fecisset voce intensa in hæmoptysin largam, qua tantum sanguinis evacuatum, quantum replendæ pelvi integræ sufficiebat. Hinc debilitatus admodum a Medicinæ Studiofo petit consilium, qui tincturam sulphuris vitrioli cum laudano opiato mixtam propinat, eo cum effectu, ut æger post aliquot doses suffocationem cum maxima præcordiorum anxietate incurreret. Ad hanc itaque levandam sanguis subtractus & mixtura data discutiens ex aqua chærefolii, scabiosæ, florum sambuci, destillato aceto, lapidibus canerorum cum litro & diascordio Fracastorii. Quibus quidem urgens malum discussum, sed interpositis aliquot diebus rediit sanguinis creatus, non mediocri copia, cujus

accessum, aliquoties postea factum, æger ex horripilatione & refrigeratione partium externarum, faciei pallore & sensu e dextro pectoris latere calidi sanguinis adscendentis, prænuñciavit. Licet autem huic malo complura præstantissima opponerentur auxilia, & æger etiam aliquod inde acciperet levamen, penitus tamen subsistere noluit sanguis, sed subinde aliquot sanguinis floridi cochlearia eruperunt. Interim accidit, ut æger cibum caperet flatulentum ex pomis terræ, radicis cyclaminis vulgaris, vulgo *Erd Hepsesn*, & stomacho admodum debili existente, inde tormentis in ventre atrocibus afficeretur, quibus incopiosum alvi fluxum solutis, id commodi tulit, ut sanguinis e pulmonibus fluxus prorsus ex eo subsisteret, nec unquam postea rediret, in primis quum decoctis vulnerariis, admixtis balsamicis temperatis, novum accessum declinare satageret. Inter cibos commendavi pulvem crebrius assumendam ex farina farris, *Nocten-Mehl*, aqua & butyro.

## Epicrisis.

Caute mercandum esse cum sipti-  
cis adstringentibus, cujus generis est  
tinctura sulphuris vitrioli, antiphthi-  
sica Grammani, in hoc sanguinis  
profluvio maximeque ejusdem princi-  
pio, uberius confirmat hæc hystoria,  
nisi suffocationem, vel etiam ipsam  
phthisin arcescere velimus, patet  
quoque: tormina & cruciatus imi  
ventris cum alvi copiosis dejectioni-  
bus, sanguinis a partibus superiori-  
bus ad inferiores impetum derivasse,  
& sic mali pertinaciam expugnasse.  
Quo egregie confirmatur insignis uti-  
litas eorum, quæ alvum subducunt  
& biliosum serum educunt in rebel-  
libus ejusmodi pectoris morbis. Si-  
mul vero innotescit: per accidens  
quandoque salubritatem afferre, per  
se nociva, uti in nostris cibis incon-  
gruus flatulentus, tormina impensa  
luscitans. Ceterum hac observatio-  
ne docemur, decocta ex herbis vulne-



rariis, quæ temperata amaritie & adstrictione nimis relaxata vasa firmanant & roborant, ad perfectam huius mali sanationem, ut non amplius redeat, modo viscera adhuc sint integra, utilissimam exhibere efficaciam.

## OBSERVATIO IV.

*Hæmo-  
ptysi  
sæpe re-  
crude-  
scens le-  
nissimis  
curata.*

Theologiæ studio addictus juvenis, temperamento melancholicus, corpore procerus & macilentus, primis quidem ætatis annis sanus fuerat ac vegetus, sed ante sex annos in schola desudans, repente correptus est totius corporis refrigeratione, maxime pedum manuumque, cum virium languore, inappetentia, & nauseabundo anxio circa præcordia sensu, quem nostri vocant *Ubelsenn*, nec non pectoris angustia ac stimulo ad tussim. Nocte insequenti præter opinionem sanguinem exspuit sincerum, idque postea successit per biduum & priora pathemata infestarunt per hebdomades sex, donec Medici ope iterum convalesceret, & per sexennium ab hæmoptiseos recurso degeret liber. Sed quum in Academiam concedens erudiendis liberis operam suam addiceret sæpiusque ob id animo commoveretur, accidit, ut idem morbus, iisdem quam antea symptomatibus rediret, extremorum frigore, præcordiorum anxietate, spiratione difficili, virium & appetitus dejectione somnique defectu. Dato tum pulvere antispasmodico, morbus paulisper inducias dare visus est, sed remansit languor, ac cum ad pristinum docendi munus rediret æger, rediit & morbus, ita, ut per quinque hebdomades quotidie successive sex vel septem sanguinis floridi cochlearia ac intermedio tempore viscidam pituitam pure remixtam, scretu redderet. Adhibita igitur venæsectio in pede, dati pulveres antispasmodici, quindulcis essentia & solaris pulvis, verum frustra, morbus potius perstitit

idem, pulsus præterea fuit inæqualis, celer ac debilis, extrema frigida & tanta virium prostratio, ut vix loqui & corpus loco movere valeret, macilentus simul ob appetitus defectum redditus. Sic rebus fere conclamatis me accersit & meum auxilium imploravit, ego vero renui primum medicationem, parentis tamen precibus demum inductus, bina ipsi suasi auxilia, quorum solo frequenti, per octo hebdomades continuato usu, divina gratia convaluit, ac non modo ab hæmoptysi & omnibus symptomatibus liberatus est, sed & somnum, appetentiam, vires & carnem recepit. Scilicet præter potum ordinarium ex decocto avenaceo cum semine foeniculi, suasi, ut quotidie minimum mensuram decocti temperantis, mane cum tertia parte lactis caprilli, & vespere sine lacte tepide biberet, quod conficiendum ex rasuræ cornu cervi uncis tribus, radicis scorzonæ uncis duabus, herbæ veronicæ manipulo, summitatum millefolii, florum papaveris rhœados tantundem, cornu cervi usti uncia, coquendo binas harum specierum uncias, in tribus aquæ libris. Circa somni autem tempus drachmam fumere iussi ex aqua cerasorum nigrorum huius pulveris: recipe lapidum cancrorum unciam, coralliorum rubrorum præparatorum, matris perlarum, nitri depurati, cascarillæ singulorum drachmas duas, olei de cedro, nucistæ destillati ana gutta sex. M. f. pulvis D.

*Epicrisis.*

Ex hac morbi historia id utique notandum, hoc sanguineæ excretionis genus, quod per pulmones fit, si primis annis infestat & conquiescit dein per aliquot annos, postea ex facili, nimio corporis, vel animi motu, maximeque vociferatione & intensione sermonis excitari posse. In eiusmodi autem debilibus & ad spasticas turbulentas solidorum ac fluidorum motiones pronis corporibus, plus, utique



valent simplicia ac temperato domestica quasi auxilia, continuato usu, quam validiora chymica, concisa dosi danda, ipsa etiam pharmaceutica artificiosa & sic dicta pectoralia. Illa enim agunt mitissime, nec adeo moleste afficiunt sensiles nerveas partes, simul blande acrimoniam diluendo temperant, humores crassos attenuant, nutriunt & sic infirmo corpori præstant robur. Et quoniam non frigida, sed calida sumuntur decocta hæc domestica, id præterea ferant utilitatis, ut sanguinis motum ab interioribus ad exteriora ipsumque cutis emunctorium dirigant. Pulvis autem ille absorbens nitrosus temperat acidam & biliosam acrimoniam, quæ in prima corporis regione hospitans, occasionalem materialem plerumque causam præbet, stimulando & irritando nervosas corporis partes, irregulari sanguinis motui inducendo.

## OBSERVATIO V.

Hæmo-  
ptysis  
hysteri-  
co-cach-  
ectica le-  
thalis.

Generosa virgo triginta sex annorum, sanguineæ complexionis & animi in hilaritatem prona, per quatuordecim & ultra annos inordinatam in aula, ratione victus, somni & animi motuum agens vitam, incidit sæpius in anomalum mensium successum, dum illorum fluxus quandoque nimis, quandoque parvus, quandoque plane deficiens erat. Inde male sæpius habuit in ventriculi regione, ac de anxio pressorio dolore, nausea vomitione, virium collapsu *ader Ubelsenn*, conquerens, potu aquarum spirituosarum, usu elixiriorum stomachicorum, neque minus frequenti esu pomorum citriorum, per integros fere quatuor annos, hisce symptomatibus, succurrere laboravit, sed penitus incassum. Accedente demum gravi diuturno tristitiæ affectu viribus orbata, ante anni dimidium in epilepticum incidit insultum, qui idoneis remediis usurpatis quidem eman- sit, inflationes tamen circa præcor-

dia, cum sensu anxietatis, eructationibus, conatu ad vomitum, alvi strictura perstiterunt. Postea per quatuor fere mensium spatium ex toto mense substiterunt, neque ter celebrata V. S. in pede, neque moderate sumtis balsamicis, & emmenagogis revocari potuerunt. Inde factum est, ut denuo ex fratris subita morte superveniente tristitia, non ita multo post in gravem sanguinis per pulmonem rejectionem incideret, adeo, ut aliquot libræ intra triduum floridi, & spumosi sanguinis cum tussi & sreatu ejicerentur. Sanguis ter in pede missus quidem, sed ex improvviso successit paroxysmus epilepticus, tam gravis & continuus, ut omni sensuum & rationis usus extincto, vitam tolleretur.

*Epicrisis.*

Gravis & lethalis hæc hæmoptysis non ut morbus principalis, sed ut symptomaticus considerari debet, qualis, si cachecticis, spleneticis supervenit, ut plurimum funesta est. Ego bis in simili casu, facta dissectione corporis, lienem magnum & corrupto sanguine turgidum inveni, vasque brevia ventriculi atro sanguine valde distenta, ipsumque ventriculum nimis expansum. Neque dubium est, quin in nostra sedes insultuum epilepticorum, etiam hæmoptyses, in vitiato & corrupto liene & ventriculi ob summam atoniam inflatione constituta fuerit; siquidem intercepto libero sanguinis per vasculosum lienis viscus transitu, per consensum vasorum non modo ventriculus patitur, sed & facile regurgitat sanguis ad ramos superiores magnæ arteriæ & versus cordis sinistrum sinum, unde obice hic posito, sanguinis impetus per arteriam pulmonalem in ipsam substantiam pulmonum vesicularem increfcit, vasa minima a sanguine nimium dilatantur, tandem rupta excretionem sanguinis per bronchia & asperam arteriam efficiunt. Ad hujus mali nec non epileptici generationem, utique nimius usus acetositatis citri



citri & aquarum spirituosarum, ingens quoque tristitia mentiumque defectus plurimum valuerunt. Præterea nobis documentum hæc historia morbi præbet, quod sanguinis missio crebrius instituta, neque ad menses in ordine redigendos, neque ad hæmoptysin sistendam per se efficax, & promptum satis sit remedium, item, quod spasticæ stricture ventriculi, præsertim si lien obstructus fuerit, gravia mala, ut hæmoptysin, epilepsiam, facillime causari possint. Epilepsia vero superveniens hæmoptysi, effato Hippocratis lethalis est, præsertim quando per V. S. multum sanguinis simul amissum fuit.

## OBSERVATIO VI.

Hæmo-  
ptysis  
copiosa  
cum con-  
vulsio-  
nibus  
Jethallo

Prædictæ generosæ virginis frater ante sex menses eodem morbo eodemque fere modo occubuit. Is ante duodecim annos a lapsu equi in terram in sputum incidit sanguineum, quod tamen sanatum. Jam erat ætatis 30. & aliquot annorum, staturæ macilentæ, tristioris animi, faciei pallidæ, & conquerebatur sæpius de anxietatibus & pressurionibus præcordiorum sub costis spuris, præsertim sinistri lateris, cum ardore ventriculi impenso. Passionum harum originem rejecit in potum frigidum forsan calenti, post venationem cui deditus erat, corpori ingestum potum. Accedente postea conjugio & insigni animi tristis affectione, valde est debilitatus, in festivitate vero quadam aulæ solenni, præter morem & consuetudinem corpus vehementer saltatione exercuit, quo factum est, ut elapsis circiter 14. diebus, anxietatem & constrictivum sentiret circa præcordia dolorem, cum vomendi conatu, postea ex improvise sequuta vehemens admodum sanguinis per pulmones ejectio, cum suffocationis metu, sequutæ simul brevi convulsionem epilepticæ satis fortes, quæ intra biduum vitam abstulerunt.

## Epicrisis.

Viscera abdominis sanguinea, ut hepar, lien, si in solitæ magnitudinis sunt sanguine & humore infarcta & obstructa, dum æquabilem sanguinis circulum, obice quasi posito, impediunt, ad immodicas & subinde exitiales sanguinis tam per vomitum & secessum, quam per vasculosam pulmonis substantiam profusiones, disponunt. Quia vero tanto impetu & copia erupit e pulmonibus sanguis, nullum dubium est, quin ipso in pulmone jam vitiosa quædam adfuerit dispositio, quæ & Hippocratis, & nostræ sententia in eo consistit, quod rami arteriæ pulmonalis, dispersi per vesicularem & celluloseam substantiam, nimium distenti in tenera aneurismata diducantur, quæ tandem rupta tantam sanguinis copiam fundunt, ut hærens in trachæa metum injiciat suffocationis. Venam vero secare in tali paroxysmo, subtrahendo plus sanguinis, adhuc magis nocet, quam prodest, & ad movendam magis epilepticam convulsionem, quam ad eam minuendam, confert.

## OBSERVATIO VII.

Theologiæ Studiosus, vigesimum quartum ætatis annum agens, Pomeranus robustus, biennio abhinc febre correptus est autumnali, tum epidemica, postquam insequentis anni mense Februario, sub ascensu scalarum calidam ebullitionem & fluctuationem in sinistro thoracis latere sub mammilla persensit, quam excepit tussis cum spirandi angustia ac demum sanguinis secreta evacuatio, intra duas horas, ad uncias aliquot. Quam ut compesceret, ingessit largam pulveris antispasmodici dosin, ad unam & dimidiam circiter drachmam eo cum effectu, ut sanguis subsisteret & ipse per annum valetudine sic satis commoda frui videretur. Sed anni subsequenter vere rediit sanguinis secretus, ac primo cruor pituita remixtus

Hæmo-  
ptysis  
post fe-  
brem  
sæpe  
repe-  
rens



mixtus, dein noctu sanguis sincerus ad duas libras tussi exturbatus est. Aperta vena, hæmoptysis paulisper siluit, mox autem recruduit, ac per quinque dies, duodecies intra diem & noctem accedens, duravit, tandem tamen usu-pulverum nitroforum cohibita, per tres hebdomades dedit inducias. Quibus exactis 13. Januarii die noctu rediit, & ex eo ad sextum usque Maji diem, singulis veneris diebus periodicum quasi servavit accessum. Ingesta interea pulverum tantum non moles, hæmoptysin cohibuit, sed successit mane ingens sputi viscidum flavescentis rejectio. Initiante vero autumno iterum apparuit in sputo sanguis, ac misso fere ad libram in pede sanguine datisque nitrosis pulveribus, rursus disparuit. Januario sequenti anni rediit hæmoptysis, eodem modo sedata, Martio repetiit iisdemque remediis iterum est depulsa, copiosa autem sputi viscidum rejectio mansit, ac præterea in hypochondrio sinistro sub spuriis e regione ventriculi costis, intolerabiles successerunt dolores pungitivi & spastici, qui in hunc usque diem affligunt. Id vero memorandum, sanguinis expuitionem semper præcessisse cutis horripilationem, manuumque refrigerationem, cum pungitivo in latere sinistro sensu, phlogosi caput & faciem occupante, nec non ructibus. Ut igitur screatum matutinum tolleretur, quam etiam mali recursus anteverteret, accessit æger ad me. Et quum vires non adeo exhaustæ, appetitus etiam adhuc constaret, sub spe successus felicitis suasi usum elixirii balsamici temperati, item mixtura ex liquore anodyno minerali, tinctura tartari & spiritu bezoardico Bussii constantem laxantia ex rhabarbaro, terra foliata tartari, & nitro, loco potus decoctum ex cornu cervi raspatum, radice scorzonera, china semine fœniculi ac passulis, nec non infusum theiforme, ex scolopendrio, melissa, polygono, veronica, scordio, mil-

lefolio, salvia, cum radice glycyrrhizæ & semine fœniculi.

### *Epicrisis.*

Cruenta hæc tussis orta fuit post febrem intermittentem, quæ non modo diuturna, sed & forsan non adeo dextre percurata, vitium reliquit in lienis, aut hepatis viscere. Id quod haud obscure arguit paroxysmi accessus, quem semper cum lateris sinistri dolore & exin propagata quasi fluctuatione, & calida ebullitione in pectus cum phlogosi factum esse, æger asseveravit. Fere semper autem spastica tam exteriorum, quam interiorum partium constrictio hæmoptysin præcedit, qua impedito sanguinis ad externa & libero progressu, ipse in interioribus & majoribus vasis uberiori copia colligitur, accumulatur atque congeritur, unde vasa nimium distenduntur, tandemque dehiscunt ac sanguinem effundunt. Quoad medicationem dein tenendum, medicamenta ex nitro & absorbentibus, item venæsectionem, egregio utique esse præsidio, ad derivandum ac interceptum impetuosum sanguinis ad pectus affluxum, ad cohibendam hæmorrhagiam atque etiam præscindendum novum insultum. Interim minime morbo tollendo penitus sufficit iis tantum instituta curatio, sed temporarium modo præstat levamen ac ceu cura palliativa consideranda. Etenim sanguinis missio in talo instituta liberalius, minuit omnino plethoram & sanguinis impetum a pectore ad inferiora revellit, sed si jam obstructio in vase aut viscere, haud raro fit, ut elanguescente inde pulsu, expediri nequeat is qui impactus hæret sanguis, & effectus sic subsequatur pravus. Nitrosa utilissima, quia intestinum nimium particularum sulphurearum orgasmicum motum componunt, & relaxando ac mulcendo strictas nerveas partes, spasmis occurrunt. Ad non sufficit.



refrænasse impetum & excretionem, sed eo potissimum medicatio dirigenda, ut tollatur fundamentum mali, obstructa viscera, hepar maxime & lien, expediantur, dolores hypochondriorum depulsentur, atque etiam postea relaxati nimium pori ac distenta vasorum orificia in pulmonibus ad naturalem habitudinem reducantur & roborentur, ne ibi fiant stagnationes, quibus tam copiosus screatus, quam etiam effluxus sanguinolenti recursus, merito tribuendus. Hunc igitur in scopum data a me remedia memorata, quibus a prioribus Medicis omisso, spes jam haud vana est melioris effectus. Novi quoque incurato sic hæmoptico morbo ad arcendum phthisicum malum, egregie profuisse lac cum Selteranis acidulis, vel etiam aqua calcis remixtum, & perite dextreque usurpatum.

## OBSERVATIO VIII.

*Hæmo-  
ptysis  
simplex.*

Plethoricus vir quadragenarius, corpore spongiosus, ingenio fecundo & amœno, laute vivens, omissa primum sanguinis missione, vernali semper & autumnali tempore expertus est hæmorrhoidalis fluxus indicia ac cum fecibus quippiam sanguinis excrevit. Hinc ad minuendam plethoram vere & autumnno venam incidi passus est cum euphoria, sed quum æquinoctio vernali omisisset forte suetam sanguinis missionem, post vehementiorem corporis motum & liberaliorem vini Rhenani potum, incurrit hæmoptysin & cum tussi aliquoties sanguinem spumoso & florido rejecit. Admisit igitur sanguinis e tali vena subtractionem largam, ac pulverem præcipitantem nitrosum, cum liquore anodyno minerali sumsit, quibus sanguinis expuitio constitit ac infuso dein veronicæ, melissæ, pulmonariæ, saniculæ, cum semine fœniculi & lacte ita convaluit, ut nec amplius hæmoptysis redierit, neque etiam quicquam incommodi reliquerit.

## Epicrisis.

Simplex recte dicenda hæc hæmoptysis. Quæ enim sic ex sola sanguinis plenitudine & suppressa solenni ejusdem, vel spontanea per menses & hæmorrhoides, vel artificiali excisa vena, evacuatione, sine labe visceris cujusdam, sine cacochymica etiam humorum dispositione, oboritur, palindrone quasi ad pulmones facta, periculo vacat, si cito succurritur. Sed tunc maxime juvat venæsectio, quæ sanguinem copiosum non modo demit, sed & a parte affecta efficaciter revellit impetum. Juvant vero etiam ea remedia, quæ organum sanguinis conteniperant, nitrosum, lactis serum, nec non aquæ frigida perite admissus potus, cum iis, quæ stagnantem in pectore sanguinem resolvunt ac ne putrescat ibi efficiunt; quibus demum subjungenda pectoralia & remissum pulmonum tonum firmantia. Hac methodo ego complures plethoricos, maxime juvenes, ex corporis exæstuatione hæmoptysi affectos, facili, & explicita curatione ad sanitatem reduxi. Sed si differatur medicatio, neque adhibentur remedia sanguinem in pulmones effusum dissolventia, disrupta vasa consolidantia, purulenta gignitur materia, ipsaque phthisis.

## OBSERVATIO IX.

Vir literatissimus, quinquagenario major, cujus fata ob merita illustria adhuc luget nostra hæc academia, nunquam antea hæmoptycus, aut phthisicus, vitæ maxime sedentariæ addictus, quum studiis intemperantius aliquamdiu invigilasset ac præterea animo sæpe multumque ira ac sollicitudine fuisset commotus, neglecta sanguinis per venam subtractione, corpus exagitavit valide & æstuans adhuc frigidum ingessit haustum liberalem. Quo illico sensit virium corporisque languorem, & quum voce elata doceret auditores, incidit

*Hæmo-  
ptysis  
ex labe  
viscerum  
sum fu-  
nesta.*



in hæmoptysin, eaque successive rejecit aliquoties uncias aliquot. Ipse autem periculi ex hoc malo probe gnarus, gravi inde mortis percussus est metu, quo vires conciderunt penitus; erectus tamen paullisper animo, melius habere cœpit, sed variis usus medicamentis, aqua frigida, ferro lactis cum vino cocto, nitrosis, pectoralibus aliisque pluribus, partem quidem habuit sanguinis excretionem, tussis autem cum raucedine restitit, appetentia periit, somnus abfuit, vires indies magis collapsæ, caro consumpta, & febris gliscere cœpit, ex pulsu celeri cum æstu cognoscenda, quæ succidi roscidi prorsus absumti, & mente ad ultimas usque alacri, mors excepit insperata, licet nec pus, neque etiam sputum copiosum antecessisset.

#### *Epicrisis.*

Mortis causa principalis in erudito hoc viro neutiquam fuit sanguinis exspuitio, sed procul dubio tabescentia ac corruptio nobilioris cuiusdam visceris, pulmonis, vel forte lienis. Hanc enim corruptivam labem semper fere prodit appetitus viriumque prostratio enormes, quæ, si in viscere stomacho propinquo, omnem ipsis appetentem & digerentem vim perfundat. Causa vero fatalis huius morbi, nimis curis, labori erudito impensiori, ac potui frigido, corpori calenti ingesto, tribuenda videtur, quo sanguis & omnes corporis succi labe infecti, & in progressu impediti, stagnarunt, ac putrescentes, funestam induxerunt catastrophem.

#### OBSERVATIO X.

*Nemo  
physi  
phobisi-  
ca cum  
hæctica  
verbali.*

Locum tenens generosus, viginti quatuor annorum, sanguineo chole- ricus, corporis constitutione debilis, & ab ineunte ætate morbis, præsertim acutis, crebro afflictus, decimo quarto ætatis anno, ex errore sub somno, incidit in grave delirium periodicum, quod per biennium fere

perstitit, ac tandem iterata sæpius alternis diebus sanguinis missione est abactum. Ex eo natura ita venæsectioni assuefacta, ut quotannis minimum ter vel quater eandem admittere cogeretur, simul pectori inducta morbida ejusmodi dispositio, ut sæpius ex eo laboraret, & pleuritide vera, nec non vehementi spasmodica angustante strictura subinde afficeretur. Quin, quum ipsi ex collato interea militari officio iter longinquum sub frigido & humido coelo faciendi necessitas imponeretur, illico post reditum correptus est tussi vehementi, quæ subinde nonnihil sanguinis floridi ejecit, & post octiduum, admissio adhuc diætetico delicto, successit ipsa hæmoptysis larga, intra quadriduum minimum duas sanguinis spumosi rubicundi libras evehens. Licet autem adhibitis remediis sanguinis recreatus remitteret, remansit tamen tussis molesta, pectoris gravitas, spiratio difficilis & nocturnus sudor admodum infirmans. Tussi per totum morbi decursum valida admodum erat, plus sicca quam humida, paucam quidem materia flavescentem evehens, sed quia dies noctesque vires & corpus nullis cedens remediis convellebat, nihil boni prælagiebat. Nihil vero magis afflixit egrotantem, ac dirus & intolerandus fere sub osse humeri sinistri consistens dolor punitivus & tensivus, qui per vices totum pectus spasmò adeo constringebat, ut omnem fere respirationem ad suffocationem usque tolleretur. Quin dolor hic postea se extendit ad regionem lombarem, sub tussi semper vehementior, adeo, ut æger vix per conclave pedibus incedere posset. Vesperis & maxime post cœnam, frigus cum horripilatione quadam extrema occupabat, quod non vehemens estus, sed effusus per noctem sudor sequebatur, cum pulsu duro & frequenti, urina rubicunda, cum copioso albo sedimento. Lateri sinistro ægre incumbere potuit, ac validior semper in-  
inse-



insequuta tussis. Ceterum tot passionibus indies vires cum carne consumebantur, ac præterea phlogoses interdum cum dolore & sudore in fronte caput occupabant, ac licet Medicus nihil omitteret, tam ex diæticis, quam pharmaceuticis remediis, quod curationi hujus affectus, vel mitigationi symptomatum idoneum, omnia tamen erant frustranea. Demum meum etiam exquisitum ante duos menses consilium, qui pariter tristem exitum ominatus, nil nisi usum feri lactis dulcis commendavi. Invalescente itaque hæctica febre & perseverantibus spasmodis ac doloribus in dorso acerbissimis, æger in delirium tribus ante obitum hebdomadibus incidit, & sic etiam rationis usu privatus obiit. Facta ex decumbentis voluntate post mortem sectione, tota pulmonum substantia, præsertim vero lobi sinistri, scirrhusa, multis vomicis, pure crasso, glutinoso refertis, plena, fuit inventa, ac præterea in arteria pulmonali polypus instar minimi digiti longus & latus. Ipse pulmo non tantum cum pleura, sed & cum pericardio & diaphragmate tam firmiter concretus & quasi conglutinatorus erat, ut vix commode cultro separari potuerit. Tam pertinacis vero & molestissimi in regione lumbari doloris causa nulla alia reperta fuit, quam quod ob firmam cohesionem pulmonis diaphragmate, sub vehementi & pectus concutiente tussi, processus & tendines diaphragmatis lumborum vertebrae annexi nimis vehementer tensi ac distorti.

#### *Epicrisis.*

Hæc morbi historia, paulo curatius inspecta, haud exigua in usum theoriæ & praxeos medicæ præbet argumenta. Scilicet innotescit: quod delirium decimo quarto ætatis anno per duos fere annos integros durans, crebrius & fere alternis diebus repetita venæsectione quidem conquieverit, sed quod eo natura ita assuefacta eadem quin debilitata fuerit, ut ter,

vel quater singulis annis, sanguinem mittere fuerit coactus, neque tamen sua tanta sanguinis imminutione, a rheumatismis in pectore & pleuritide cum febre, congestionibus etiam sanguinis ad partes superiores, potuerit liberari. Deinde id quoque in usum medicum cedere potest, quod post morbum pleuriticum, quum debiles adhuc sunt pulmones, nihil sit deterius, ac corpus diu atmosphæræ frigida & humida exponere, & quod hoc modo hæmoptysis ac phthisis, magna pulmonibus labe & obstructione inducta, ingenerari possit. Deterior porro semper est post hæmoptysin tussis sicca & vehemens, quam humida purulenta & copiosa, quam ego aliquoties in juvenibus sanavi lacte incocto cum speciebus vulnerariis, usurpato balsamo pectorali Meibomii & ordinario feri lactis potu. Præterea patet, quod dolor in lumbis fixus & intolerabilis a tensione nimia processuum diaphragmatis oriri possit; id quod in Principe juvene Cizensi, ante viginti aliquot annos hic mortuo, a copia extravasati puris, processus diaphragmatis comprimantis, observatum. Tandem notabile est, quod delirium in febre hæctica, & phthisi supervenire possit in corpore disposito.

#### OBSERVATIO XI.

Studiosus quinque supra viginti annos habens, constitutionis satis robustæ, ante anni dimidium a motu & exercitatione corporis vehementiori, sub hieme frigida incurrit in ejectionem sputi cruenti, ita ut per vires aliquot cochlearia exscrearet. Administrata in tale sanguinis missione, sponte cessavit malum, quum vero post aliquot menses, in aere frigido & humido pedibus iter faciens, potu spiritus vini repletus, cum sodali graves movere rixas, & ira candens, frigidam cerevisiam copiose superberet; ingentem quantitatem sanguinis spumosi tussi excrevit, ut intra diem

*De hæmoptysi cum inflammatione ventriculi.*



diem & noctem libræ minimum quatuor fuerint rejectæ. Conquerebatur autem simul vehementi incendio circa præcordia & pectus, partibus externis penitus refrigeratis; aderat continua sitis, pulsus durus & vehemens, nullus somnus, & quando sanguinem non expuebat, miram quantitatem pituitæ viscidæ ore rejiciebat. Nihil levaminis a secta vena, ab usu ferilactis, a pediluviiis, a lacte amygdalato cum nitro mixto, nec ab aliis medicamentis inflammationi resistentibus expertus est, sed potius ab omnibus ingestis, major oborta est anxietas, dolor, donec tandem persistentibus symptomatibus & fractis omnibus viribus, decimo quarto ab invasione morbi die, periret.

#### *Epicrisis.*

Videmus ex hac morbi historia quomodo & a quibus causis simul concurrentibus, in homine plethorico & qui jam tum levem hæmoptysin expertus est, gravis hæmoptysis unacum inflammatione ventriculi lethali progigni possint. Nam atmosphæra frigida humida existente, fortior motus, potus copiosus spiritus vini, ira, vociferatio, in homine plethorico, sanguinem in tantam ebullitionem, orgasmum, congestionem & impetum a partibus exterioribus ad interiora urgere & pelere valet, ut ruptis vasis pulmonalibus, hæmorrhagia periculosa, ventriculi vero a potu ingesto frigida inflammatio, nullis levanda auxiliis, accedat. Post excretionem autem cruentam magna phlegmatis ejectio successit in nostro, propter majorem humorum ad pectus affluxum, & nimiam membranæ in bronchiis glandulosæ relationem.

#### OBSERVATIO XII.

Femina generosi stemmatis valde teneri corporis animique mobilioris, annorum quinquaginta, per decem fere annos menstrua caruit purgatio-

*Hoffm. Syst. T. IV. P. II.*

ne & hinc etiam subinde flatulentis, præcordiorum anxietatibus, animi perturbationibus, phlogosis cum strictiore alvo junctis, longo tempore fuit obnoxia. Ante annum & quod excedit, circa os sacrum & in imo ventre dolorem pressorium cum ardore & pruritu ani persensit, & paucis diebus elapsis, portionem sanguinis secessisse per alvum quum eam deponeret observavit, idque aliquoties. Sed ab hoc tempore protinus omnis evanuit dolor & imi ventris molestia, brevi tamen post cum spasmus ventris alvique strictura percepit dolorem pungitivum in sinistro thoracis latere, cum titillatione in epiglottide tussique valida & sicca, qua demum aliquot sanguinis floridi & coccineo tincti colore extrusit per intervalla cochlearia, & sic iterum cunctæ molestiæ remiserunt. Quum vero talem accessionem quatuor menses circa plenilunium tempus, cum iisdem antecedentibus symptomatibus simili etiam eventu & solutione mali generosissima femina experiretur, metu majoris periculi postulavit meum consilium. Ego igitur tres ante accessionis hætenus consuetum tempus dies venam tali tundendam curavi, & minimum ut tres vel quatuor sanguinis unciae emitterentur jussi, pulverem etiam rhabbari cum lapidibus cancrorum & nitro bis in septimana cum haustu aquæ frigidæ circa lecti introitum, & infusum theiforme mane sumendum suasi, quorum remediorum ope ab omni accessione hæmoptyseos postea libera permansit.

#### *Epicrisis.*

Rectius hæc hæmoptysis pectoralis rheumatica appellari potest, quæ ex palindrome, sive translatione sanguinis affectantis exitum per venas hæmorrhoidales ad pectus, ubi etiam in musculis thoracis pleuritidem spuriam intentavit, fuit profecta, & soluta per apertionem vasorum sanguineorum, quæ

*Hæmoptysis pectoralis rheumatica.*



interius bronchiorum tunicas inve-  
stiunt. Tenuis enim, floridus, &  
spumofus sanguis narium immediate  
ex pulmonum substantia, frequentius  
ex bronchiis & asperæ arteriæ vasis  
fauciatis venit. Quum autem venæ  
sectio validum sit sanguinem a parti-  
bus superioribus ad inferiores revel-  
lens medium, non sine levamine cir-  
ca tempus accessionis instituta fuit.

## C A P U T III.

De vomitu cruento sine, & cum  
secessu Nigro, sive morbo  
nigro Hippocratis.

## Theses Pathologicæ.

## §. I.

*Nomine  
cruen-  
tus quid*

**S**icut in hæmoptysi sanguis subinde  
spumofus, tenuis & floridus cum  
tussi ejicitur; ita ex ventriculo cruor  
concretus, ex atro-rufescente colore  
tinctus, multo cum phlegmate insi-  
pido, acido, aut viscido mixtus, per  
vomitum exturbatur.

## §. II.

*Ejus  
sympto-  
mata &  
signa.*

Antecedit hunc sanguinis vomitum  
ut plurimum punctorius, & tensivus  
hypochondrii sinistri dolor, & ipsa  
eruptio nunquam fere non cum præ-  
cordiorum anxietate, & dolore com-  
pressorio, nec non constrictione in  
hoc latere jungitur; atque etiam nul-  
lum sanguinis profluvium tam faci-  
le ac sæpe lipothymiam habet comi-  
tem, quam hoc præsertim, quando  
cruor graveolens, corruptus exit.

## §. III.

*Sedes in  
ventri-  
culo &  
liene.*

Sed morbi & scaturigo unde san-  
guis venit, est in ventriculo, ita ta-  
men, ut in consortium mali, ceu  
sedes causæ morbi, veniat & ipse  
lien. Id enim aperte monstrant se-  
ctiones cadaverum, hoc morbo de-  
functorum. De liene quidem, quod  
is semper fere, sanguine tumidus,  
infarctus & quandoque plane indu-  
ratus deprehendatur. De ventriculo  
autem, qui copiosis ubique vasis di-

stinctus est, quod breviter potissimum  
sic dicta arteriosa & venosa, quæ in  
superna, & in sinistra tenuiori par-  
te excurrunt, ibique admodum te-  
nera membrana teguntur, si aperiun-  
tur, vel dirumpuntur, sanguinem  
qui vomitu ejicitur, fundant & fude-  
rint, eaque propter varicosa & ni-  
gro sanguine distenta deprehendant,  
corrupta simul ibi ipsius ventriculi  
substantia. Sic *Riolanus anthropolog.*  
*Lib. 2. cap. 17.* vas breve minimo di-  
gito latum deprehendit in rejectione  
sanguinis per superiora & inferiora.  
Idem testatur *Columbus rerum anato-*  
*mic. Lib. 15. de Cardinali Cibo*, nec  
non *Vvedelius in Physiolog. reformat.*  
*Platerus observat. Lib. 2. & Bonetus*  
*medicin. septentrional. Lib. 3. Sect.*  
*5. Cap. 4.*

## §. IV.

Interim non adeo videtur impro-  
babile, licet rarius contingat, quod  
ex aliis etiam stomachi vasis, si a suc-  
cis acido corrosivis, vel etiam a ve-  
nenis, fuerint erosa, vomitus cruen-  
tus succedat. Quod tanto magis fa-  
ctum fuisse concludendum, si dolor  
stomachi præcessit acutus, atque ma-  
teria, quæ vomitu rejicitur cruenta,  
nigra simul est & acida, dentes stu-  
pefacit, fauces ac os adurit, & pavi-  
mento injecta ebullit, qualem de-  
scriptionem *Hippocrates lib. 2. de mor-*  
*bis §. 71.* tradit.

*Non  
semper  
in bra-  
vibus.*

## §. V.

Jam sicuti corpora graciliora & te-  
neriora omnium facillime hæmorrha-  
gias quæ fiunt in partibus internis in-  
currunt, ita idem fieri in ea, quæ  
succedit in ventriculo, testatur expe-  
rientia, præsertim si subjecta sensi-  
bilioris & mobilioris simul sunt ani-  
mi. Ejusmodi enim corpora vasa ut  
plurimum gerunt subtiliora & quoad  
substantiam teneriora, quæ & facile  
distensionem & rupturam, atque  
hinc sanguinis effusionem, admit-  
tunt.

*Quæ ad  
cui di-  
sposta  
corpora*

## §. VI.



§. VI.

Inprimis  
frequens  
uale  
menstru-  
alis.

Potissimum atroci huic malo obser-  
vantur obnoxiae femellae, inprimis  
quae alvi sunt adstrictioris, puberta-  
tis tempore, quo menses primo im-  
minent, nec non quando postea sup-  
pressi sunt, aut parcius succedunt.  
Tum enim, quando gravi ira, vel  
terrore commoventur, & inferiorum  
partium accedit refrigeratio, vel  
etiam Medicus pathemata a regur-  
gitante ab utero ad stomachum san-  
guine orta per emesin excitatam per-  
peram tollere contendit, perquam  
facile sanguinis eructatio procuratur.

§. VII.

Post in-  
termit-  
tentes  
male cu-  
ras.

Pari ratione post intermittentem  
perversa methodo a Medico tracta-  
tam & justo citius cohibitam, in te-  
nerioris texturae feminis novi substi-  
tisse menses. Quos si postea validis  
& calidis emmenagogis iterum enor-  
mem & lethalem cruentam vomitio-  
nem successisse bis observavi.

§. VIII.

Menstru-  
ales em-  
mentibus

Annosiores quoque feminas, defi-  
nente mensium fluxu, graviori &  
diuturniori mœrore confectas, de do-  
loribus pressoriis in sinistro hypochon-  
drio, cum inappetentia & virium  
debilitate, diu conquestas notavi;  
quibus tandem subito impetuosa san-  
guinis per vomitum mortifera eructa-  
tio accidit.

§. IX.

Gravi-  
dis ple-  
thoricis

Neque minus gravidas, si sangui-  
ne nimis redundant, ejusdemque  
missionem intermittunt, cruento vo-  
mitu tentari in experientia est funda-  
tum, praesertim, quando circa me-  
dium gestationis tempus stomachus  
ipsis crebrius fuit subversus. Quia  
tamen is, quae vomitu rejiciunt san-  
guis, parvus est ac tenuis, magis vi-  
detur verosimile, eundem ex arterio-  
larum in oesophago & faucium furcu-  
lis, non vero ex ipsius stomachi vasis  
venire, eaque propter minus periculi  
alere.

§. X.

Contra ea capitale sanguinis obser-  
vari vomitu profluvium, in feminis,  
quae partu difficillimo ex pravo foetus  
litu laborarunt, & immensam san-  
guinis molem cum vita eructarunt.  
Vidi tamen etiam, vomitionem  
cruentam in parturientibus non fune-  
stam; sed in iis parcius secessit san-  
guinis quantitas & puerperae admo-  
dum fuerunt plethoricae, ac ultimis  
temporibus venæsectio male fuit in-  
termissa.

§. XI.

In virili etiam sexu occurrunt sub-  
inde valetudinarii & hæmorrhoidarii,  
qui succedente parcius, vel cessante  
penitus hæmorrhoidali fluxu, de  
præcordiorum anxietatibus, constri-  
ctionibus cardialgicis, cum sudore  
frigido, alternante calore & frigore,  
conqueruntur. Quibus, si tandem  
evacuatio sanguinis foeculenta & ca-  
daver olens per superiora accidit, re-  
currente aliquoties paroxysmo, bre-  
vi post sub animi defectione ipsi pe-  
rire solent.

§. XII.

Minoris periculi fuit ille cruen-  
tus vomitus, quem superiori anno  
Septembris mense Matisburgi fre-  
quenter observari. Licet enim cruor  
bruno-nigricans, ad aliquot mensu-  
ras, in plebeiis maxime feminis  
ac viris, eructaretur, præter virium  
debilitatem, vita tamen fuit super-  
stes. Quin, eodem tempore, occur-  
rerunt in plethoricis maxime hæmo-  
ptyses, quae pariter sine singulari ar-  
tificio iterum discesserunt. Circa æ-  
quinoctiale enim tum tempus, ob  
subitas & multiplices aeris ex cali-  
do in frigidum, & ex frigido in  
calidum vicissitudines, sanguinis æ-  
qualis ac liber circulus turbatur,  
ut hic, maxime ubi redundat, ad  
hanc vel illam partem cum impe-  
tu ruat, & ubi exitum invenit, per-  
rumpat, effuso autem nimio, ite-  
rum cesset.

Partu-  
rienti-  
bus dif-  
ficilliter

Hæmora-  
rhoida-  
riis vi-  
ris

Ex as-  
sis vi-  
tis non  
adeo  
pericu-  
losis



## §. XIII.

*Ab inflammatione ventriculi di-  
stinguendus.* De ipsius morbi decursu porro tendendum, spasticum illum & gravativum ventriculi dolorem, ut plurimum cum ardore sanguinis vomitui jungitur, non pro stomachi inflammatione esse habendum. Inflammatio enim nunquam non extremorum frigore, vehementi circa præcordia æstu, siti, febre, pulsu contracto, debili & celeri stipatur, quæ tamen in cruento vomitu non sic adsunt. Neque ventriculus inflammatus ferre potest calidum potum, nec non exterius applicationem tegularum calidarum, vel calidorum pannorum, quæ tamen vomitu concruento laborantes eximie solantur.

## §. XIV.

*Facile  
recidit.*

Sicut autem omnes hæmorrhagiæ facile recrudescunt & post hebdomadam non modo, sed mensium etiam, quin annorum decursum, revertuntur; sic etiam idem in hac ventriculi hæmorrhagiâ accidit. Nam quia per effusionem partibus inducitur debilitas, minus postea resistere possunt sanguini copiosius & validius affluenti, sed is pristinas servat vias, subsistit ibi tandemque etiam erumpit. Quin ea quandoque observatur naturæ quasi consuetudo, ut locum pristinum exacte repetat, & maxime in narium hæmorrhagiâ, ex nare illius lateris, quo primum successit, postea semper fere succedere soleat sanguinis stillicidium.

## §. XV.

*Quænam  
hic quæ  
minus  
pericu-  
lulosa.*

Periculum quidem, quod morbus hic inducit, non in omnibus idem, id vero certum, vix ullam hæmorrhagiâ periculosiorem esse hac. Interim non tantum discriminis subest, si febris abest, si a suppressis evacuationibus ex plethora oriundis ortus. Contra ea, si febris jungitur, si sanguis corruptus, graveolens & niger prodit, si ex magno & corrupto liene, vel indurato hepate proficiscitur, animique tandem jungitur defectio, summum adest periculum & mortem pro-

ximam jam portendit *Hippocrat. aph. 37. Sect. 6. nec non in prognosticis.*

## §. XVI.

Longe gravius longeque certius est periculum, si, uti subinde accidit, vomitui cruento, nigra & pici similis eaque graveolens alvi dejectio jungitur. Hæc enim subitum ut plurimum denunciat interitum, ipsius *Hippocratis* testimonio, qui sub morbi nigri nomine hanc passionem describit.

## §. XVII.

Proficiscitur cruenta hæc, tam per inferius, quam per superius os ejectio, non immediate ex ventriculi vasis, nec a sanguine in stomachi cavo extravasato, sed potius ex alio viscere, vel intestinis tenuibus, maximeque ileo, & ruptis in ipso mesaraicis, quæ tenuissima tecta sunt tunica vasis. Hæc enim in defunctis sæpe adhuc nigro sanguine valde distentæ deprehendi, simulque totum ventriculum cruenta ejusmodi materia refertum.

## §. XVIII.

Qui autem funestis ejusmodi nigris alvi dejectionibus, cum vel sine vomitu cruento, afficiuntur, vel hypochondriaci sunt, aut hæmorrhoidarii; in quibus sanguinis cursus per mesaraica vasa non recte, sed impeditus succedit, unde dolorifice vasorum sub membranis excurrentium distensiones, spasmi, congestiones & tandem effusiones perniciosæ sequuntur. Quibus optime distingui potest a fluxu sanguinis hæmorrhoidali, qui licet interdum etiam, subnigricans sit; neutiquam tamen tam immenso dolore intestinorum spasmotico stipatur, neque etiam præsentem interitum, sed potius magnum levamen, affert.

## §. XIX.

Materia illa nigricans, quæ sic per alvum exit, solet esse foetidissima, quia sanguis effusus, cum hercoribus in cavo intestinorum quasi confermentatus, exaltato principio sulphureo alcalino, in foetidissimam

*Pericul-  
losissim-  
a cum  
secessu  
nigro.*

*Qui ex  
me-  
raicis  
in ileo.*

*Hæmorrhoida-  
rii &  
hypo-  
chondriaci  
distentæ  
frequenter.*

*Ac præ-  
ter se-  
torem  
ex pa-  
trillagi-  
ne vires-  
cit am-  
que de-  
bit.*



abit putrilagionem. Quæ quia infensissima fluidi nervorum naturæ, hinc mox cito vires deprimit & vitales in corpore motus destruit. Atque adeo summa, quæ fere morbo huic perpetuo jungitur virium dejectio, non adeo ex nimia sanguinis profusione ejusque natura, sed potius ex ipsius corruptione putrida est derivanda.

*Theses Therapeuticae cum Cautelis Clinicis.*

§. I.

Medi-  
catio  
causis  
accom-  
modan-  
da.

**I**N hujus tam horrendi & gravis morbi curatione Medicus utique pro diversitate corporum, causarum & temporis, prudenter & circumspicere sese gerere debet. Etenim alia medendi ratio est in paroxysmo, alia extra eundem; alia, ubi a sola sanguinis abundantia & orgasmo malum suscitatur atque excretio quasi critica est, alia, quando a doloribus & spasmis sanguinem ad interiora urgentibus oritur; rursus vero alia, quando a corrupto aut obstructo viscere, aut a causa externa, veneno vel corrosiva materia, morbus inducitur.

§. II.

In paro-  
xysmo  
vena  
secan-  
da ple-  
thoricis

Ipso in paroxysmo, si corpus est plethoricum, ipseque sanguinis motus ab exterioribus ad interiora præter naturam conversus est, commodissimum locum habet venæsectio in brachio. Tenendum vero est, sanguinis mensuram missionisque repetitionem a petito & circumspecto Medico pro corporis, vasorum repletionis, virium & ætatis ratione, esse præcipiendam.

§. III.

Sanguis  
ne afluat  
ante  
profundam  
refrige-  
rantes  
potus.

Quandocunque sanguis nimium æstuat atque in orgasmo constitutus, & pulsus impetuosus ac validus est, aquæ fontanæ, vel plantaginis potus, in cujus libra nitri puri drachma & sirupi papaveris rhœados uncia dimidia soluta, successive & temperate

*Hoffm. System. T. IV. P. II.*

suntus, egregie conducit. Refrigerans enim hæc potio temperat simul humorum acrimoniam, elasticam partium sulphurearum exæstuationem intra vasa componit, & relaxata vasculorum apertorum orificia ita firmat & roborat, ut postea eo facilius coeant iterumque coalescant.

§. IV.

Porro nunquam non egregiam <sup>spasms</sup> opem præstant emulsiones, imprimis <sup>vigen-</sup> quando præcordialis regio, circa lini- <sup>tibus</sup> strum potissimum latus, <sup>danda</sup> pungitivis <sup>emul-</sup> & vellicatoriis doloribus <sup>siones</sup> spasticisque stricturis affligitur ac sitis cum æstu urget. Possunt autem confici ex seminibus quatuor frigidis & papaveris albi, cum aquis antispasmodicis, florum tilia, liliorum convallium, primulae veris, acaciae papaveris, rhœados, pœoniae, ceraforum nigrorum, admixto nitri momento & convenienti sirupi papaveris albi quantitate.

§. V.

Præterea ad laxandas <sup>Et in-</sup> spasticas <sup>ficiendi</sup> intestinorum stricturas & divertendum <sup>clyste-</sup> impetuosum humorum ad partem af- <sup>res co-</sup> fectam affluxum, desideratum subin- <sup>molli-</sup> de levamen afferunt clysteres emol- <sup>entes</sup> lientes ac demulcentes, stimulo tamen quodam leniori armati, nitro conditi & frequentius injecti.

§. VI.

Neque minus inter externa hujus mali remedia connumeranda ea, quæ <sup>Exte-</sup> spasmos sistendo, ventriculum robo- <sup>rius ad-</sup> rando, nec non discutiendo virtu- <sup>moven-</sup> tem suam exserunt. Hoc nomine ego <sup>da di-</sup> nihil præstantius deprehendi ipso oleo <sup>scuti-</sup> camphoræ, quod paratur, si drach- <sup>ta &</sup> ma una camphoræ solvitur in uncia <sup>robo-</sup> una amygdalarum dulcium & postea <sup>rancia</sup> viginti guttæ olei ligni Rhodii instil-  
lantur. Inungitur hoc oleo tota præcordialis regio cum toto hypochondrio sinistro & postea sacculus, cui species ex floribus chamomillæ Romanæ, sambuci, herba menthæ & absinthio inditæ, in aceto rosaceo, vel vino rubro coctus, subcalide applicatur.

C 3

§. VII.



## §. VII.

*Ligaturæ item & la-  
vuntio-  
nes ma-  
nuum  
pedum-  
que.* Quod si jam enormis cruoris copia profusa cum summa virium jactura, injiciendæ sunt ad compescendum nimium fluxum artuum ligaturæ, quæ postea uti capite antecedente monitum, circumspicte icterum solvendæ. Novi etiam non sine successu fuisse consilium, ut manus & pedes ad malleolos usque, aquæ immitatur frigida, quo frigus sanguinem in minimis valis diutius contineat, & sic ejusdem ad cor refluxus aliquantisper retardetur.

## §. VIII.

*Recur-  
sus qui-  
bus ar-  
cendus* Extra paroxysmum ad arcendum mali recursum eximie conducit rhabbari electi pulvis, ad dimidiam drachmam, vel solus, vel cum cancrorum lapidibus, aut duodecim trochiscorum de carabe granis & dimidio camphoræ grano, bis singulis septimanis, ante lecti introitum, cum haustu aquæ fontanæ sumendus. Est enim rhabbarum quasi specificum ad reservandas paulatim obstructions. Egregia quoque virtus est infusi theiformis ex herba veronicæ, centum-nodii, sumitatibus millefolii, radice glycyrrhizæ & semine fœniculi, ad aliquot patellas quotidie poti. Potui ordinario inservit commode aqua fontana pura & levis in aqua ferrum extinctum, vel etiam serum lactis acidulatum.

## §. IX.

*Si ex  
menstru-  
is sup-  
pressi-  
que fa-  
cienda.* Peculiari ratione huic malo occurrendum, si ex menstruis suppressis, vel obstructis oritur. Tum scilicet vena secanda est in pede, & præterea clysteribus, ex mensibus provocandis idoneis confectis, ut artemisia, pulgio, floribus cheiri, baccis lauri & juniperi alvus frequentius eluenda, vel etiam temperatæ ejusmodi species emmenagogæ in infuso aut decocto simul sunt propinandæ.

## §. X.

*A cor-  
rosivis  
quomo-  
do exci-  
pien-  
das.* Alia quoque ratione medicatio instituenda, quando ab assumptis acris & acidis liquoribus stomachi vasa

erosa & ex sanguine sic effuso vomitus oritur. Tum scilicet ad contemperandam acrimoniam & cicurandam rodentem facultatem, eximie conducunt pulveres absorbentes terreo alcalini, ad consolidanda autem vascula fauciata optimum remedium lac cum amylo coctum.

## §. XI.

In omni, a quacunque causa fuerit producta stomachi hæmorrhagia, *Anody-  
na &  
stiptica  
fugien-  
da.* caute mercandum est cum opiatibus & narcoticis, eo, quod virium dejectionem, quæ nunquam non in hoc morbo est, magis adhuc cum summo detrimento augent. Summo etiam studio cavendum est a validis stipticis, adstringentibus & vitriolaceis pharmacis. His enim sanguinis eruptio quidem sistitur, sed cruor in vasis stagnans putrescit, & gravis inflammatio cum sphacelo metuenda, aut minimum, si cachecticum corpus est, expeditus sit in hydropem transitus.

## §. XII.

Superato vomitu cruento, abstinendum postea omni cura ab emeticis, nec non ab aloeticis, quibus sanguinis orgasmus, ejusdem inordinatus progressus & ad stomachum confluxus inducitur, ac sic facillime malum revocatur. Recte etiam monet *Hippocrates*: fugienda esse oleosa & pingua, quibus addenda etiam dulcia. Nam licet hæc inter alimenta sint præstantissima, recursui tamen & generationi hujus mali favent, quia vascula dilacerati nimium relaxando, sanguinis affluxum potius invitant, quam arcent.

## §. XIII.

Cæterum digna utique sunt, quæ *Hippo-  
cratis  
monita  
practi-  
ca.* subjungatur *Hippocratis* de morbo nigro monito practica, quæ libro 2. de morbis Sect. 5. consignavit & sic habent: Morbo atro laboranti medicamentum purgans crebro propinato & serum & lac, si anni tempus ferat, & cibis abstineat dulcibus, oleosis & pinguibus; utatur potius frigidis & al.



¶ *alvum subducentibus, & nisi debilis fuerit, sanguinem e brachio detrahito. Quod si alvus non deiciat, molli infuso subluo, a crapula & venere abstineant, neque multum exerceatur, neque deambulet, calida non labet, acrida non edat, neque salsa, quæ cum fecerit, cum ætate etiam morbus fugiet.*

*Enarrationes morborum.*

### OBSERVATIO I.

*Vomitus  
cruentus  
in ju-  
vencula  
curatus*

Virgo, decimum octavum ætatis annum agens, corpore procera, macilentata ac tenera, facie pallida, anno ætatis decimo quarto, post vehementissimam iracundiam, tantam cruoris copiam evomit, ut mensuram fere compleret. Subsequuta tum febris assidua, qua discussa, mensium fluxus erupit & in hunc usque diem satis ordinate successit. Interim haud raro emieuit sensus doloris punitivi in sinistro latere & prefforii in ventriculo, quo Medicus consultus inductus cruditates in stomacho subesse suspicatus est, & ob id porrexit vomitorium satis validum antimoniales. Sed inde dolores & pressiones ventriculi mirum exacerbatae & accesserunt præterea stricture præcordiorum anxietas, cum intenso capitis dolore, quin triduo post, sanguis magno cum impetu per os erupit, sub extremorum algore, aponia, animi profunda defectione alvique adstrictione, quæ insequutus æstus ingens, cum magna siti; postero tamen die per vomitum nihil amplius sanguinis, sed tantum ingesta rejecta, & ante meridiem semper ægra melius, post meridiem pejor habuit. Cum demum ego in consilium adsciscerem, his usus sum magno cum fructu remediis. Binis scilicet singulis horis porrexi paulatim sorbendum haustum aquæ fontanæ frigidæ, cum pulvere nitroso absorbente & quindecim liquoris anodynæ mineralis gut-

tis. Deinde ter successive injicere jussi clysterem emollientem domesticum, quo alvus ingentem viscidorum recrementorum colluviem dimisit. His levata quidem ægra, conquievit etiam æstus nimius & urgens præcordiorum anxietas, nihilominus mansit semper conatus ad vomendum, junctus interdum, non cum sanguinis, sed pituitæ vomitu, neque capitis dolores, neque anxietates præcordiorum prorsus cessarunt, sed interjecto aliquo tempore redierunt & vires præterea multum fuerunt dejectæ. Quare emulsionem parare jussi ex decocto cornu cervi & scorzone, aqua mellissæ & menthæ sine vino, cum seminibus quatuor frigidis, papaveris albi & syrupo papaveris, quam ægra insigni sumsit cum euphoria. Præcordiali vero regione, faculum herba menthæ, floribus sambuci & chamomillæ Romanæ plenum inque vino coctum sæpius applicare jussi. Et ad levandum capitis dolorem liquoris anodynæ mineralis guttas quinque, vel sex, frustulo sacchari Canariensis instillatas, sæpius ori indere suasi. Sic demum effectum est, ut & vomitus cruentus, & omnia reliqua pathemata discederent, & ægra pristinam perfectam recuperaret valetudinem.

#### *Epicrisis.*

Quando menses primum instant decimo tertio, vel quarto ætatis anno, & juvenulæ ob id habent male, fortior animi, per mœrorem, aut iram commotio superveniens, sanguinis e stomacho eruptionem perquam facile suscitare potest, idque tanto certius, quando exhibetur emeticum, tum certe veneni vim habens. Quod si etiam semel hæc adfuit hæmorrhagia, post longum annorum decursum, eadem, quavis data occasione, facile redit, uti quidem in nostra factum est per vomitorium validum, quo sanguinis impetus non modo ad ventriculum, sed & ad caput translatus, in illo cruentum



vomitum, in hoc autem gravia pathemata induxit.

## OBSERVATIO II.

*Vomitus  
& se-  
cessus  
niger  
brevis  
hepaticus* Laborabat per longum tempus quartana febre, juvenis, & tandem ab Empirico, nescio quibus curatus, pravum inde corporis contraxit habitum, cum livido ac plumbeo faciei colore, aliquali etiam circa palpebras tumore & virium languore continuo. Præterea sæpius conquestus est, imprimis post usum flatulentorum, vel animi commotionem, de dolore sinistri lateris, alvo simul dura & tensa. Tandem cum pedes iter aliquot miliarium conficiens corpus valide exagitasset & rixas etiam cum sodalibus habuisset, incidit in vomitum nigrum, largius & aliquoties erumpentem; simul secesserunt per alvum feces instar picis nigrae ac foetidissimæ. Sub his æger sæpius animi deliquium, si erigeret corpus, incurrit, & intra viginti quatuor horas plane expiravit. Dissecto altero statim die cadavere, tam inficetus ferit foetor, ut non ferre possent adstantes. In ventriculo vasa brevia nigro colore conspicua & disrupta apparuerunt, & tam in ejus cavo, quam etiam ileo intestino liquamen nigrum foetidum comparuit, vasis ilei simul nigricantibus. Hepar, naturali aliquanto durius visum fuit, sed lien adeo durus, ut pene cartilagineus videretur, atque exterior ejus substantia albescens vix acuto cultro discindi posset; & mollior interior exigua compages superstes, atro sanguine erat plena.

*Epicrisis.*

Subitanæ hoc est exemplum mortis, ex sola sanguinis effusione, memoratu utique dignum. Nam in aliis sanguinis profluviiis, licet is majori copia effundatur, non tamen subito mors, vel etiam animi deliquia accedunt. Quare alia utique subesse

debet hujus eventus causa, quam ego quidem putredini cum intolerabili foetore tribuendam esse censeo. Quæ quia intimæ ad cerebrum nervosæque partes admissionis, inficit subito fluidum illud, quod vires præstat, eodem modo ac in iis qui sphacelo partium tantum externarum afficiuntur, nec non qui cancrum exulceratum gerunt, & eapropter vitam cum viribus subito perdunt. Quoad causam vero hujus mali, febris quartana diuturna & forsân male etiam curata, reliquit insigne vitium in lienis viscere, quo obstructo accedente spastica sua ira strictura, sanguis in progressu magis adhuc impeditus, nec ea propter mirum est, eundem tam brevia vasa quam quæ sunt in ileo, disruptisse & effluxisse.

## OBSERVATIO III.

Femina sexagenaria, plethorica, sedentariæ vitæ & crassiori victui addicta, post perpessam diuturnam mœstitiam, conquesta est aliquamdiu de lassitudine corporis & dolore in sinistro latere. Quum vero curru aliquando veheretur & simul ventro frigidiori corpus exponeret, vomitu ejecit magnam materiæ nigricantis copiam, mox etiam similis coloris per alvum secessit cum foetore ingenti, ipsa autem sub his dejectionibus aliquoties redeuntibus animi semper passa est deliquium. Data fuerunt interne analeptica mixtura, cum aceto destillato & cancrorum lapidibus. Exteriori ventriculi regioni applicatum balsamum nostrum vitæ, ac præterea sedato post vomitu, rhabarbarum in substantia cum manna datum. Videbatur malum hisce mediis aliquantisper inducias dare, & spatium triginta horarum, neque per superiora, neque inferiora, contigit ejectio; nihilo tamen secius rediit postea aliquoties anoterica & catoterica dejectio,

*Vomitum  
cruentum  
secessum  
nigro  
post 14  
dies le-  
thalis*



jectio, cum animi deliquio, appetitus fuit simul prostratus, somnus turbulentus, paucus & nihil reficiens; quibus tandem, elapsis duabus hebdomadibus, consumpta femina occubuit. Tradito ad balsamationem cadavere, inspeximus mortis & morbi causam, ac invenimus, vasa ventriculi brevia tumida & sanguine atrofarta ac in intestino ileo affatim cruorem atrum. Hepar magnum erat valdeque induratum, lien non quidem durus, sed naturali duplo major, adeo mollis, ut ipsius substantia digito pressa mox dehisceret, & sanguis foetidus, obscure nigricans quaquaversum diffunderet.

*Epicrisis.*

Ortus fuit funestus hic morbus procul dubio ex emanante sanguinis per uterum purgatione, qua cessante, in femina plethorica, neglecta praeter ea venesectione, necesse utique fuit, ut sanguis in visceribus stagneret, ea infarciret, & subtracto tandem per animi moerorem eorum robore, mortemque hac ratione inferret. Quod autem diutius malo hoc affecta traxit agra, neque etiam tam ingens adfuit foetor,tribuendum videtur, tum, quod sanguis non simul & semel, sed successive effusus, tum etiam, quod sanguis in aetate senili non adeo periculis sulphureis scatet, quam quidem in aetate juvenili.

## OBSERVATIO IV.

*Secus  
niger ex  
sinistro  
brachio  
profluens  
est* Prodierat in dextro brachio infantis mensis unius uncia nocte tumor insignis, qui mox lividus ac durus cum venis inflatis redditus, tenello, postquam per tres dies, & noctes continuo ejulasset, & per alvum materiam instar picis nigram egressisset, vitam eripuit. Dissecto mali moris tumore, cuncti substrati muscoli, una cum vasis; exesi, corrupti, putrefacti, sanguine foetido infarcti comparuerunt, & exigua admodum

sanguinis quantitas in reliquis corporis canalibus. Illam vero nigricantem materiam per alvum ejectam, partim ex ventriculo, partim ex intestinis venisse, arguebat, quod adhuc ibi non nihil ejus susceperat, & vasa intestinorum nigricante sanguine turgida apparebant.

*Epicrisis.*

Nutricem hujus tam misere per-euntis infantis fuisse impuram & luegallica ante annum laborasse, fuit post fata compertum. Interim non dubium est, quin ob motum sanguinis in parte inflammata, & corrupta interceptum, is alias vias quaesiverit ac demum tenuia ventriculi, & intestinorum vasa per-ruperit, eodem modo ac subinde evenit, a gravibus partium externarum contusionibus, sanguinem e naribus, vel etiam per alvum, aut alias vias prorumpere. Quam in rem consentit peritissimus *Platerus*, qui in *praxi* pag. 326. scribit: *a contusione aliqua facta circa viscera ventriculo vicina sanguis nonnunquam evomitur*. Nigredo autem sanguinis intimam omnino corruptionem ejus indicat, quae sine omni dubio a corrupta illa putrida tumoris materia profecta, & communicata. Neque etiam alia ex causa, nigri & picei coloris cruorem, qui per anum in ejusmodi affectibus fertur, quam ex valde corrupto in viscere quodam sanguine, totius massae instar fermenti texturam invertente, petendam esse arbitror.

## OBSERVATIO V.

Non ita pridem femina Hebraea Amstelodamo meum exquisivit consilium. Agit haec quinquagesimum annum, & ante octo jam fere annos, tribus, vel quatuor, ante mensum fluxum diebus, sanguis e naribus per intervalla notabilem quantitatem profudit, donec prodiret uterina purgatio, & narium stillidium tolleretur. Successit hoc per sexennium, postea vero non amplius e na-

*Vomitum  
cruentum  
moderatum  
mensis  
fluxu  
antece-*



e naribus menstrua periodo sanguis prorupit, sed præcedente leviori tussi, e faucibus aliquot successive cochlearia secreta evacuata. Tum semestri abhinc spatio, circa mensium tempus persensit, vomitu, sine tamen singulari conatu, & ventriculo sanguinem ad aliquot per intervalla, cochlearia protrudi; idque adhuc quotiescunq; redit tributi lunaris periodus, accidit. Ceterum femina est sacci plena, vitæ sedentariæ, lauto victui vini addicta, & ex quo vomitu egressit menstruatim sanguinem, ob periculi metum virium experta est languorem, cum appetitu prostrato, & exiguo somno, quæ tamen post mensium fluxum, & exacto octo dierum spatio, inducias dederunt. Accepit, & conquistavit huc usque multa, & varia medicamenta, sed frustra. Neq; venæsectio, quæ tantum circa æquinoctium fuit celebrata, ullam attulit opem. Ego igitur consilium dedi ut ante imminens mensium tempus, venam pedis aperiendam curaret, & tres tantum uncias sanguinis effluere permetteret: dein ut singulis hebdomadibus bis rhabarbari pulverem, cum lapidibus cancerorum, & nitro permixtum, mane vel vesperi, circa lecti introitum cum haultu aquæ frigidæ sumeret, frequentius infusum theiforme, ex veronica, scabiosa ac summitatibus millefolii mane biberet, a vino & carnibus penitus abstineret, pro potu vero ptisana uteretur, usque ad tempus verum, quo fontis Selterani cum quarta parte lactis mixti potum per quatuor vel 5. hebdomades instituere, & ipsam ceterum hilari animo esse jussi.

*Epicrisis.*

Patet manifestò : hanc sanguinis eruptionem , non symptomata , vel effectum morbi cujusdam in viscere vasculoso obstructo consistentis ; sed salutare opus naturæ esse . Etenim in femina hac valde plethorica , per spasmos , solenniter mensium fluxum præ-

## OBSERVATIO VI.

Triennio abhinc peregre vocatus <sup>Vomitus</sup>  
fui ad generosissimam feminam, de- <sup>cruentus</sup>  
licatæ & teneræ constitutionis, vom- <sup>ab em-</sup>  
itu sanguinolento enormi correptam: <sup>menega-</sup>  
Accedens illico obvium habui mari- <sup>dis le-</sup>  
tum, monstrantem binas argenteas <sup>thalis.</sup>  
pelves, liquamine ex cruore concre-  
to, & phlegmate plenas, quod vo-  
mitu fuerat exturbatum. In ægra  
offendi pulsum valde debilem, &  
vires ita dejectas, ut erecto capite  
in animi incideret deliquium. Quare  
ingens periculum subesse dixi. Dedi  
quidem analeptica, & roborantia,  
sed altero die, post aliquot adhuc in-  
star loturæ carnis, intermixtis sangui-  
nis fusci coloris grumulis, vomitus,  
placide occubuit. Quum in causam  
morbi mortisque inquirerem, rescivi,  
defunctam, post puerperium laborasse  
tertiana, tunc temporis grassante ge-  
nii valde anomali; hanc post 5. ac-  
cessionibus a Medico vicini oppidi,  
missis pulveribus fuisse sublatam, ex  
eo vero per tres menses restitisse flu-  
xum uterinum, & successisse dolo-  
rem hypochondrii sinistri gravati-  
vum. Hinc matrem permotam fuisse,  
ut ab extraneo Medico, & filia mi-  
se-



ferit medicamenta, elixirium scilicet, quod quum explorarem gustu, proprietatis sine acido, cum essentia zedoariæ, & succini erat, de quo terquotidie guttas 50. cum vino Rhenano veteri, & generoso, sumserit ac pro ordinario potu cerevisiam valde lupulata habuerit. Sed elapso vix trium hebdomadam spatio, incidisse ipsam in funestum hunc morbum.

*Epicrisis.*

Tragicus hic casus doceat juniores practicos: quam perniciosum sit, emmenagogis, adjiciendos menses, paulo validioribus uti in subjectis tenerioribus, in quibus post puerperium & febrem magis deficit, quam abundat sanguis: tanto magis, si ex dolore gravativo hypochondrii sinistri, labis in visceribus, post febrem, sine dubio adstringentibus cohibitam, & imprimis lienis, iusta est suspicio. Nam ubi obstaculum ponitur in interaneis transeunti sanguini, is calidioribus medicamentis valde exagitatus, & expansus, venas ventriculi teneriores facile vi perrumpere, & exitum affectare, atque etiam sibi parare valet.

OBSERVATIO VII.

*Malus niger ex bi-patis vicio le. obalis.* Causidicus clarus, quadragenario major, corporis habitu gracilis, & inter labores fori assiduos sedentariam admodum vitam colens, a pluribus jam annis cerevisiam partim, partim vinum, in seram usque noctem bibere consueverat, tam largiter, ut quotidie vix tres, vel quatuor vini mensuræ sufficerent. Dum vero potui sic indulgit, ciborum appetentia cum viribus languescere cepit, corpus quoque marcescere, & sæpius gravativus dextri hypochondrii dolor affligere, facie simul existente plumbea, & coloris ad ictericum vergentis. Venesectionem natura quasi horruit, eandemque vix semel, vel bis, per totam vitam ad-

miserat, in juventute tamen narium stillicidium expertus fuerat frequentius. Quum demum in convivio plus quam tres potentis Hungarici vini mensuras ingurgitasset, saltando quoque corpus valide exagitasset, domum delatus, summam præcordiorum anxietatem persensit ac paulo post iterato per intervalla sanguinis fusci, ex parte concreti, colluviem evomit ingentem. Injuncto ex jure galli, oleo amygdalarum dulcium, nitro & sale aliquoties clystere, ejusdem indolis etiam per alvum secessit liquamen. Ut adeo intra 24. horas plus quam tres sanguinis mensuræ per superius, & inferius os exirent. Vocatus ego, porrexi interius mixturam analepticam leniter adstringentem, ex aqua menthæ, melissæ, theriacali, cinnamomi sine vino, succo citri, cum corallis, speciebus de hyacintho, & sirupo papaveris albi. Exterius præcordiorum regionem inungere jussi linimento ex oleo amygdalarum dulcium, nucistæ, & camphora, & superimponere sacculum herba menthæ, absynthii, floribus rosarum rubrarum, chamomillæ Romanæ plenum, ex vino rubro coctum. Quibus quidem sensim sanguinis per superna eructatio constitit, sed remansit magna virium dejectio, cum ciborum plenaria inappetentia, successit tandem ventris, cum superiorum tabe, tumor, & intra bimestre spatium mors ipsa.

*Epicrisis.*

Cruentam vomitionem ex liene & hepate proficisci, prisca jam fuit Galeni sententia, & ego idem aliquoties experientia habeo confirmatum in iis, qui postquam aliquamdiu de dolore hypochondrii dextri pressorio diuturno conquesti, accedente gravi iracundia, motu corporis impenso vini potentis abusu, aut refrigeratione externa, vomitus, nec non successus alvinos sanguinolentos incurrerunt, tam largos, ut intra exiguum tempus, ejecta plus quam tres



tres vel quatuor mensuras æquarint. Quare mihi omnino videtur verosimile, non tantum ex brevibus ventriculi vasis, uti in sola vomitione cruoris accidit, sive secessum per alvum, verum etiam per epaticos ductus nimium ampliatos, vel plane disruptos venæ portæ ramulos, ad duodenum perrumpere sanguinem ibique effusum, non modo vomitus, sed & dejectiones alvinas sanguinolentas facere. Discant vero etiam ex hac observatione strenui illi spirituosorum inprimis potatores, quam male consulant suis visceribus. Ego enim inde obstructions, indurationes & rupturas in mesaraicis vasis sanguineis & lymphaticis vidi, unde postea ater funestus morbus, cruentus vomitus, hydropes, lentæ & hecticæ febres.

## OBSERVATIO VIII.

Vomitus  
& se-  
cessus  
cruentus  
a men-  
strum re-  
sectione

Percellebatur ingenti terrore femina trigeneria ipso illo tempore quo menstrua purgatio succedebat, & tremens adhuc ingerebat aquæ frigidaë haustum liberalem, eoque in artuum tremorem validum, & inappetentia ciborum delabebatur. Redeunte menstrua periodo, sanguis quidem comparuit, sed justo parcius, ac maximæ præcordiorum anxietates, cum nausea, vomitu, extremorum frigore, & faciei rubore ipsam infestant. Tertio mense priora redierunt pathemata cuncta, & præterea accessit per triduum vomitus largus sanguinis, vires summopere prosterbens.

## Epicrisis.

Nihil certe deterius & feminarum sanitatem magis lædit, quam gravis animi ex iracundia, aut terrore commotio, incidens in illud tempus quo uterina purgatio succedit. Salutaris enim illi motus sueti excretorii, sic statim invertuntur, ad interiora vergunt, ac facile postea in habitum transeunt, nisi cito emendentur ite-

rum. Quare si incidit ejusmodi noxa, quam fieri potest citissime succurrendum congruis auxiliis, inter quæ præter venesectionem, & clysteres demulcentes, quam maxime proficua theiformia infusa, cum iis quæ sanguinis ad exteriora motum rursus revocat, blanda scilicet diaphoretica.

## CAPUT IX.

## De hæmorrhoidali fluxu nimio.

## Theses Pathologicæ.

## §. I.

**N**on omnibus liberalior sanguinis per sedis venas secessus, pro eo, qui præter & extra naturæ legem fit ac nimius est, habendus; sed considerata vasa, corporis habitus, vires, ætas ac temperamentum. Non enim infrequens, quod ea sanguinis effusi quantitas, quæ certis corporibus legitima est ac salutaris, aliis vicissim sit nimia ac perniciofa. Neque enim omnis solito largior, a mole sanguinis valde aucta eaque paullo impensius commota, suscitatus hæmorrhoidalis fluxus, censendus est morbosus, sed is demum, qui diutius insistit, qui vires prosternt, quo appetentia, laudabilis alimentorum digestio, nutritio aliarque functiones leduntur, ac metus tandem est, ne via ad graves, & chronicas passiones pandatur.

Nimius hæmorrhoidū fluxus, quid & qualiter

## §. II.

Nimium hæmorrhoidum fluxum antecedunt ut plurimum, & comitantur hæc: dorsi & lumborum gravativus pressoriusque dolor, interdum crurum stupor, extimarum partium cum levi horripilatione constrictio, vasorum in iis subsidentia, pulsus durior, & constrictior, oris fauciumque siccitas, urina parcius & frequentius pallida, sensus ponderis in podice ad perineum se extendens, ventriculi imbecillitas, flatulentia in imo ventre, fre-

Ejusdē signa.



frequens ad meendum, & desidendum stimulus, subinde cum muci albi, & biliosi exclusione, ac senioribus magisque imbecillis accidit præterea ani pro-cidentia.

§. III.

*Quædam  
guinis  
excreti  
qualitas  
& quæ  
istat* Sanguis in nimia hoc profluvio a-  
ter plerumque in principio excernitur  
valdeque grumofus, interdum etiam  
in frustra quæ palmam manus equant  
coactus e varicosis vasis vacuatur;  
postea sequitur rubicundus, & de-  
mum admodum serofus, quandoque  
pituitosus, sive mucus albuminis o-  
vi speciem habens. Copia sanguinis  
excreti nonnunquam oppido magna,  
ac uti *Montanus* notavit, quotidie  
duas libras, vel uti *Panarollus* vidit,  
quotidie libram, æquat. Diu etiam  
sæpe insistit profluvium, idque per  
integrum mensem, viginti, quin  
quadraginta quinque dies, factum  
esse, observatorum fide dignorum te-  
stimonio constat.

§. IV.

*Ex hæ-  
morrhoi-  
dib. in-  
ternis  
venis.* Sanguinis per intestinum rectum  
excretio omnis fit per vasa sic dicta hæ-  
morrhoidalia. Extremæ tamen hæ-  
morrhoides rarius fluunt, sed in vari-  
ces dolorificas facile abeunt, quæ a-  
pertæ sanguinem plorant, neque ta-  
men crebro nimium fundunt. Ac in-  
ternæ hæmorrhoides, quæ propagines  
sunt splenici rami, & ad intestini re-  
cti interiorem substantiam, quin ani  
usque sphincterem porriguntur, una  
cum arteriis ex mesaraica inferiori  
productis, non modo fluxus effusioris  
fontem præbent, sed & suppressæ,  
morbos, qui ex labe hepatis, lienis,  
pancreatis, mesenterii & intestino-  
rum fiunt, ingenerant.

§. V.

*Arteris  
maxi-  
me, si  
etiam  
venis.* Ipse fluxus immediate proxime ar-  
teriolarum ramos sanguine nimium  
distentos tandemque disruptos contin-  
git. Neque tamen ex toto negandum,  
e vena etiam hæmorrhoidali, propter  
læsam quæ ipsi cum arteria est anasto-  
mosin, multum sanguinis ibi collecti  
& sæpe vitiosi prodire. Patefacta e-

nim sic via valvulæ egressum ibi im-  
pedientes defunt, & si vel maxime  
essent, varicosa tamen venarum ha-  
bitudo multum & valvularum situm  
immutet necesse est.

§. VI.

Salutarem illam per sedis venas  
sanguinis evacuationem, difficiliore *Causa  
impedi-  
tus sã  
guinis  
per hæ-  
morrhoi-  
dal. &  
mesa-  
raica  
progres-  
sus.* per hæmorrhoidales venas, ob situm  
earundem perpendicularem, progres-  
sui & ad portæ venam ipsumque he-  
par reditui, in acceptis ferendum ef-  
se, & quando vasorum in recto ex-  
trema ab accumulato ibi sanguine ni-  
mis diducta aperiuntur tandem atque  
dehiscunt contingere, inter omnes  
constat. Unde qui excedentis etiam,  
& perniciosi hæmorrhoidalis fluxus  
causam atque originem ab impedito  
sanguinis per hæmorrhoidales & me-  
saraicas venas ipsumque hepatis vi-  
scus motu progressivo repetit, is mi-  
nime a vero aberrat. Testatum id  
sane faciunt observationes anatomico-  
practicæ, quibus confirmatur, illum  
venæ hæmorrhoidalis ramum, qui  
juxta coli tractum excurrit ad anum,  
multum quam quidem secundum na-  
turam esse suevit, ac vel triplo am-  
pliores, in iis qui hæmorrhoidum  
excessu perierunt, offendi. Etenim  
quo major sanguinis per arterias est  
affluxus, & segnior per venas refu-  
sus, eo magis a collecto sero & san-  
guine fibræ laxantur, vasorum alvi  
diducuntur, & labefactato sic magis  
magisque partium tono ac robore,  
profluvium diutius durat, facilius e-  
tiam recrudescit.

§. VII.

Quæcunque igitur sanguinem ingi-  
gnunt nimium, ejusdemque per portæ *Ad quod  
concur-  
runt pla-  
res can-  
sa.* ramos commeatum remorantur, aut e-  
tiam copiosiore ad loca hæmorrhoi-  
dalia affluxum invitant, ad hæmorrhoi-  
dalem tam moderatum, quam etiam  
immoderatū fluxum disponunt. Hinc  
est, quod qui laxum, spongiosum, obe-  
sum, plurimis vasis sanguine turgi-  
di distinctum corporis obtinent ha-  
bitum, qui lauto fruuntur victu, vi-



tæ genus colunt sedentarium motusq; expers, & a majoribus hoc morbo affectis prognati, hæmorrhoidum excessui quam maxime sint obnoxii. Eandem quoque ob causam accidit, quod acriora purgantia, aloetica crebrius usurpata, calidorum ciborumq; aromaticorum, nec non potus vini si dulcis atque potentis liberalior usus, omissæ suetæ sanguinis subtractiones, animi affectus, ira potissimum, & tristitia diuturna, & corporis quoque maxime per equitationem commotio impensior, aliaque id genus plura, ut impetat hic sanguinis fluxus præternaturalis, faciant.

## §. VIII.

Pericul-  
osus  
fluxus  
nimius

Ceterum periculosum utique est effusus hoc sanguinis hæmorrhoidalis perfluxum. Inde enim vires convelluntur, corpus macrescit, femora gravantur, somnus fit laboriosus, præcordia gravativo sensu languntur, venter cum borborygmis tumet ac pulsus micat debilis. Urgente postea diutius fluxu, pedes circa malleolos intumescunt, facies item & oculi, color illius fit luridus ac plumbeus, spiritus arctius meat, & postremo in cachexiam, hydropem, lentam & hæcticam febrem fit transitus. Ut adeo pateat: ex defectu etiam sanguinis graves subnasci ægritudines, ac utique vitæ viriumque thesaurum esse sanguinem, nec quantitate, nec qualitate peccantem.

## §. IX.

Ducit  
ad hæ-  
cticam.

Exitialis hæmorrhoidum excedentium eventus certius imminet, si tumor hepatis, vel lienis, hypochondriorum inflammatio, cum alvo adstrictiore, incipiens cachexia, & hydrops, mortuosam hanc sanguinis effusionem induxerunt. Sic enim sub ipsa priora mala ingravescent, obstructions increpant & obfirmantur, ac vitiosa quoque sanguinis & succorum constitutio augetur. Unde profluvium fit chronicum, tandemque in atrophiam lentamque hæcticam fe-

brém, cum extrema virium jactura terminatur.

## §. X.

Frequentioris observationis est, nimias sanguinis per sedis venas profusiones ducere ad hydropem, idque præsertim in phlegmaticis & qui rarum corporis obtinent habitum. Si autem hydropi ex hepate indurato supervenit ejusmodi excessiva hæmorrhagia, certum mox subsequitur mortis præbet indicium.

Et hy-  
dropem

## C U R A T I O.

**V**ariæ & differentis indolis sunt causæ, quæ ad excitandum nimium hæmorrhoidum profluvium faciunt atque concurrunt, ideo variæ etiam medendi sunt indicationes, & varia quoque ac diversæ natura ad arcendum illud ac persanandum remedia.

## §. I.

Non adeo insolens est, ut in corpore plethorico, resistente aliquandiu sueto alias fluxu, a vehementiori corporis, vel etiam animi commotione, a potu spirituoso liberalius assumpto, balneo nimis calido, aut medicamento intestinum sanguinis motum nimium intendente, non modo subito, & confertim fiat, sed & solito diutius insistat sanguinis, cum pulsu magno, & vehementi, per hæmorrhoides profusio. Quod ubi accidit, primo omnium divertendus ac derivandus sanguinis impetus, eumque in finem sanguinis missio in brachio, vel brachiorum in liquorem aquosum-vinosum tepidum immissio, apprimere ex usu est. Dein usurpanda ea, quæ excedentem intestinum partium in sanguine sulphurearum motum componunt, diluentia maxime & refrigerantia, potus aquæ frigida, præsertim chalybeata, vel mineralis temperatæ, feri lactis cum succo citri coacti, aqua plantaginis, fragorum, acetosæ, acetosellæ, decoctum cornu cervi citratum, tinctura rosa.

Sanguis  
co-  
pla mi-  
nuenda



rosarum cum spiritu vitrioli præparata, & confecta ex his cum sirupo rosarum, julapia. Eundem in finem præstans est virtus nitrosorum, nitri tantum purificati, vel artificialis, ex spiritu nitri, & sale tartari parati, vel in pulvere cum absorbentibus, & roborantibus, vel etiam in potu dati. Porro operam locant egregiam quæ impetuosum solidorum, & fluidorum motum placant, simulque dolores & spasmos levant, anodyna, inter quæ spectata virtutis est liquor noster anodynus mineralis, spiritus etiam nitri dulcis ritu paratus, aqua item florum chamomillæ vulgaris, & summitatum millefolii, nec non ex papaveraceis, semen papaveris albi, sirupus papaveris utriusque, aqua & extractum papaveris, aut si fortioribus utendum, semen hyosciami albi.

§. II.

*Humores im-  
puris per  
alvum* Quando cum virium jactura, & nobiliorum functionum læsione effusior fluxus diu persistit, incipiensque viscerum labe subest, & magis serosi aquei, quam consistentis fibrosi sanguinis copia delinquit, conferunt quam maxime ea, quæ succos vitiosos ac biliosos clementer paulatimque per alvum adducunt, simulatque humorum motum a recto intestino ad tunicas, & glandulas reliquorum intestinorum alliciunt, passulis minoribus, & tamarindis, vel quod idem, cum cremore tartari, si corpus est biliosum, in potione elæo-saccharo citri condita. Tum quoque temperatiora diaphoretica, corrigendo, & expellendo acres humores, officium faciunt opportunum, ibi maxime, ubi scorbutici, vel purpuracei aliquid, aut alius exanthematicæ materiæ, sanguinis, & feri contextui altius inhaeret. Horum in numero sunt cornu cervi ustum, vel uti vocant philosophice præparatum, unicornu fossile, diaphoreticum antimonium, acetum vini cum lapidibus cancrorum mixtum, aqua galegæ, florum sambuci, cardui benedicti theriacalis,

simplex mistura, diascordium Fracastorii, quæ in potionem lege artis possunt redigi. Nec proletaria virtus est liquoris anodynus mineralis, cum quarta liquoris bezoardici Bussiani parte nupti, infusi cum theiformis ex millefolio, veronica, pilosella aliisque concinnati, & cum dispositione in lecto aut conclavi ad blandum sudorem, poti. Atque etiam non possumus non hoc loco merito commendare refractam camphoræ dosin, ad granum dimidium, præsertim quando nitrosis, & bezoardicis pulveribus commiscetur. Hac enim ratione acris, & caustica materia, quæ sæpe spasmodum æqualem sanguinis comitum turbantium, & hæmorrhagiam largam inducentium causa est, obtunditur, & foras ejicitur, simul adstringentium, & anodynorum vis, tantisper, ne noceat, refrænatur. Itaque non ineptus censendus ille Veterum mos, quo camphoram præcipuis ad sistendas etiam hæmorrhagias medicinis, commiscuerunt, ut exigua admodum dosi, cujus generis sunt species de hyacintho, diatrion fantali, diatrion Abbatis, trochisci de carabe sperniola Crolii, nec non famigeratissimus *Heurnii* ad sistendum sanguinis fluxum pulvis.

§. III.

In graviore illo, & difficillimæ medicationis fluxu, qui obstructione, vel infarctu moleque adaucta visceris cujusdam, hepatis, lienis, aut in feminis uteri, nititur, etigenda, si medicinæ adhuc locus, ejusmodi auxilia, quæ dum obstructionum repagula solvunt, humores non nimium commovent. Inter hæc a priscis jam temporibus usu, & securitate celebres pilulæ, de bdellio Mesue, a *Foresto*, *Soleandro* & *Riverio* laudatæ. Nec contemnendæ pilulæ Beccheriana methodo ex amaris extractis, & gummatibus temperatioribus concinnatæ, ita tamen ut aloes in locum, rhabarbari extractum, largius paullo commixtum

*obstru-  
ctio  
refræn-  
da.*



tum surrogetur, si hisce nitrosi pulveres pro re nata interponantur. Nil vero ad expedienda obstructa aquis, & diluentibus est præstabilius. Unde quam optime in usum trahuntur minerales aquæ, subtilitate atque temperie nobiles, quarum classem ducunt Antonianæ, VVildungenes, & Selteranæ, vel cum, vel sine lacte potest. Et certe prudens ac moderatus harum aquarum, ad aliquot hebdomades, sub debito regimine, & interpositis pilulis dictis, nec non elixirii balsamici temperati martialis pharmaci mixtura acuti usu, continuatus potus, palmam præripit reliquis cunctis. *Montanus* præterea in consiliis, jus pulli copiose tribus ante prandium horis bibere jubet, eoque plures hoc malo se laborasse testatur. Majoris tamen adhuc efficaciam erit, si jusculo incoquantur acetosæ, cichorii & scorzonæræ radices, aut etiam medicamentum materiale temperatum, cujus generis est illa cum pomorum succo parata martis tinctura cum extracto cascarillæ aquoso, primo mane sumatur, ac postea supra laudatum jus copiose bibatur.

## §. IV.

*Atonia recte in-  
testini  
firmāda.* Demum inter præcipuas copiosi sanguinis affluxus, & effluxus causas referenda merito recti intestini ejus membranarum, & vasorum atonia. Quare adhibenda etiam utique ea, quæ relevatis nimium, & a tono dejectis partibus fœnerant iterum robur. Interius laude sua hoc nomine non defraudandæ sunt species de hyacintho, trochisci de carabe *Mesues*. Ex martialibus est maxime ipse hæmatites in subtilissimum pollinem redactus, tinctura martis cum succo aurantiorum confecta, tinctura martis *Zvvelferi*, crocus martis antimonialis subtilissimus cum conserva rosarum antiqua exhibitus, tinctura item florum salis ammoniaci martialium, cum rectificatissimo vini spiritu parata, & cum æquali portione elixirii amari temperati mixta. Inter resi-

nosa, & balsamica nobilis est virtus succini præparati, vel alcalisati, extracti cascarillæ, & santali rubri. Et hæc omnia cum prudentia convenienti ordine ac dosi usurpata, fructu non destituuntur, si modo malum recipit adhuc sanationem.

## §. V.

Adhibenda præterea etiam sunt topica constringentia, ad obtinendum effectum speratum. Si igitur venæ in ani limbo varicosæ, citra alvi depositionem, magnam sanguinis, non sine syncope, vel mortis metu, fundunt copiam, colcothar vitrioli, vel etiam lupi crepitum, sine noxa admovere licet. Tanto magis, si leniora prius adhibita profecerunt nihil, cujus generis est decoctum ex floribus balaustiorum, rosarum rubrarum, myrtho, plantagine, malicorio, & chinæ cortice cum vino rubro præparatum, & cum spongia recto intestino post dejectionem alvinam applicatum. Ubi autem impetus sanguinis effluentis jam jam compositus, ossi sacro cum perinæo, & pube apponendum crebrius epithema ex herba menthæ, sumach, floribus rosarum rubrarum, hyperici, rasura ligni santali rubri, mastiche cardamomo, & chaccarillæ cortice, in vino rubro coctis. Neque minus ad firmandum intestini recti tonum ex usu est, hoc decoctum ano injicere syringa.

Cautelæ, & observationes  
Clinicæ.

## §. I.

**I**N medicatione effusi hæmorrhoidum ac morborum profluvii hæc servanda methodus: ut præmittatur sanguinis missio, & primarum viarum cum recenti cassia, vel rhabarbaro electo in decocto repurgatio, postea vero roborantia, & leniter adstringentia, & in externa, tutius adhibere licet. Ex nimia enim sanguinis profusione tanta oritur imbecillitas,

Adhibenda  
externaOrdo in  
medicatione  
servandus.



litas, ut medicamenta efficaciora rarius felici cum successu applicare sit integrum. Generalis quippe medendi est regula: quo major naturæ est imbecillitas, eo leniora & diætetica magis remedia minus vero validiora pharmaceutica usurpare decet.

§. II.

*Cautela circa refrigerantia.* Nitrosa, acidula, & refrigerantia, ut in principio, & ubi ingens æstus & orgasmus sanguinis præsto est, usurpantur cum euphoria; ita minus tutus eorundem est usus, sanguine cum viribus jam nimium profuso & ventriculo debilitato, præsertim, ubi ex viscerum obstructione fluxus est symptomaticus.

§. III.

*Venaesectionem.* De phlebotomiæ usu tenendum, eandem non facile in egro absente esse adornandam; eo quod multum refert, ut iusta & conveniens sanguinis quantitas emittatur. Etenim in principio, si corpus sanguine valde turget, major ipsius, ad derivandum e brachii vena, copia, poterit subtrahi. At ubi jam multum cruoris sponte effusum, parcior & partitis potius vicibus, cum prudenti & cauta ratione, instituenda est missio.

§. IV.

*Circa fluxus cohibitionem.* Optime jam monuit *Hippocrates* hæmorrhoidibus nimium fluentibus occlusis reliquis venis, unam servandam esse apertam, ne hydropis, vel tabis fiat metus, facta scilicet sanguinis ad pulmones vel hepar, palindrome. Ut ut vero effatum hoc proxime intelligendum sit de externis venis nimium fundentibus, & per unctionem, vel stiptica occlusis; recte tamen etiam applicari potest, ubi ex internis, uti nostris solenne est regionibus, effusus sanguinis sit profluvium. Tanto magis, quia has occludere, si ve potius fluxum sistere, non ita promtum est ac expeditum, nec nisi per validiora interna perficiendum, quod, si non perite & valde circumspecte adornatur, damnum redundat, estato *Hippocratis* certissime.

*Hoffm. System. T. IV. P. II.*

§. V.

Quæ quum ita sint, valide adstringentium usus utique sit cautissimus. Neque enim in principio multo minus, quando vires cum sanguine jam exhaustæ, utilem locant operam, ac potius in corporibus imbecillis, & exquisitius sentientis naturæ, spasmodica pathemata, convulsiva, animi deliquia, summas præcordiorum anxietates, cum tremore, & palpitatione cordis concitant. Quod si itaque fluxum compescentibus uti necesse, consultum est, non vi, & magnis debilibus id perficere, ne noxam inferant. Oportet quoque subungere diluentia, temperantia, & leniora laxantia, inter quæ præstantissimum est asininum lac, vel serum lactis dulci. Potissimum vero præstat, martialia liquidam cum ipsis diluentibus assumere.

§. VI.

Quando tamen sanguinis ex hæmorrhoidalibus locis fluxum subito sublatum summæ præcordiorum anxietates, inflationes, cum inquietudine, & angustia excipiunt; revocandus is est lenioribus elicientibus, & laxantibus clysteribus quoque emollientibus ac suppositoriis.

§. VII.

Pari ratione cum hypnoticis, opiatidis & narcoticis mercandum est cautissime, quippe quæ, tanto magis intempestive data, insaniam plane inducere apta. Ex optimis, si locus, est illa massa pilularum, a *Vildegansio* nomen gerens, quæ etiam cum fructu exhibetur, quando atrox dolor & spasmus sub prima lumborum vertebra, nimiam sanguinis effusionem movet, eaque propter est placandus.

§. VIII.

Si ullo morbo exquisita vitæ viciusque ratione opus est; in hoc certe id quam maxime necessarium eaque neglecta auxiliis, vel præstantissimis, obtinendum nihil. Quocirca ægris commendanda serio abstinencia a fructibus horæis, leguminibus,

D

acc.



acetariis, lacticiis, carnibus vetustis, induratis fumo atque salitis, ab aromatibus, allio, cepis, vino potenti spirituosisque cunctis. Dissuadenda etiam venationes, omnes impensiores corporis commotiones, per equitationem maxime & vecturam, in locis præsertim lapidosi & inæqualibus, & placidum potius motus genus, supernam magis, quam inferiorem corporis regionem afficiens, sub coelo ameno, sereno, concedendum. Nihil vero sic laborantibus perniciosius animi commotione, ira in primis ac terrore, unde occasio ad eas studiose præsciendendas omnis. Neque minus multum interest, ut congruo potu utatur hemorrhoidibus effusis obnoxius. Nos quidem potum aquæ, vel feri lactis, item decoctum santali rubri cum mastiche & cinnamomo, nec non julepos, ex decocto cornu cervi, sirupo acetositatis citri, additis aliquot guttulis olei de cedro, vel unciis aliquot aquæ florum citri, maxime commendare solemus, tum præservandi, tum curandi scopo.

## §. IX.

Perse-

veratio.

Composito morbo hemorrhoidum profluvio, ne iterum erumpat danda est opera. Obtinendum id exacta vivendi, modo commendata, ratione, sanguinis missione, ter, vel quater quotannis instituta, primæ regionis quovis mense per epicrasin repurgatione, ac dextro aquarum mineralium, vel solo, feri lactis chalybeati usu. Sedulo denique cuncta ex alimentis, & laxantibus vitanda, quæ dolorem excitant quia hæc sequitur desidendi cupiditas.

ENARRATIONES  
MORBORUM.

## OBSERVATIO I.

Hemor-  
rhoidū  
excessus  
herbali-  
post Pyr-  
monta-  
nas.

Celeberrimi nominis vir, corpore plenus atque robustus, sexagesimum tertium ætatis annum egressus, a multis jam annis liberale sanguinis per

venas sedis passus fuit stillicidium, fere menstruum, eodemque rite succedente, valetudinis incommoda sensit nulla. Sed posteaquam diuturno affectus fuerat cum tacita iracundia mœrore, restitit hemorrhoidum fluxus, & facies ante florida, facta flavescens & flaccida, cum oculorum intumescencia. Ob metum igitur cachexiæ Pyrmontanas acidulas easdemque ingenti in copia hausit, neque tamen in, neque post earum usum, conveniens coluit in vita victuque regimen. Inde effusissimus sanguinis puri per anum sequutus est fluxus non compescibilis, licet nitrosis pulveribus Becherianisque pilulis uteretur. Pedes potius facti œdematosi, venter intumuit, vires collapsæ, anhelitus factus difficilis, superiora contabuerunt, tandemque excepit mors.

## Epicrisis.

Nihil certe ex animi etiam commotionibus hemorrhoidariis est perniciosius, quam angor & mœstitia diutius extracta, quæ vires, tonum ac robur partium labefactando, efficiunt primum stagnationes, quæ postea obfirmando in abdominis visceribus infarctus, excessivas inducunt hemorrhagias atque funestas. Pyrmontanæ autem acidulæ, si quis illis uti velit cum fructu, exquisitum postulant regimen, tam sub, quam aliquot hebdomades post usum, tanto magis, si potans jam tum viscerum affectus est labe. Quod quia in nostro non factum, sed potius pro lubitu, sine observatione debita institutus, malum exacerbatum, & ad exitum tristem traductum esse, non est mirandum, nec eapropter dextro usui quicquam detrahendum.

## OBSERVATIO II.

Judæus annorum quinquaginta, natus patre hemorrhoidario, & ipse a prima statim ætate sanguinis stil-

Hemor-  
rhoides  
nimia  
cæpho-  
rata cū-  
posita.



fillicidiis, in variolarum quidem & morbillorum morbo e naribus, ac postea hæmoptysi obnoxius, quadragesimo anno coepit primum pati hæmorrhoidalem fluxum, qui postea singulis fere mensibus, ac nonnunquam sub fortiori in itinere maxime corporis commotione, rediit effusior. Quod quum sine sanitatis detrimento contingeret, tulit patienter; sed quum aliquot abhinc annis insisteret profluvium diutius, idque largum, inde admodum fuit debilitatus, & appetentia cum digestionem labefactat. Quare ut auxilium quæreretur fuit coactus ad moderandum fluxum. Ex variis autem multisque remediis obtinuit nullum. Optimum tamen tulit antimonii tinctura, ex sale tartari & regulo antimonii parata, & non tam acris, quam quæ cum nitro conficitur, in cuius uncia soluta camphoræ drachma dimidia, & mane vesperique cum aquæ frigidæ haustu sumpta ad guttas 20.

*Epicrisis.*

Perperam utique putant præjudiciis toti inherentes, & partum periti, camphoram nimium concitare sanguinis æstuosum orgasmum, eaque propter esse reformidandam, multo minus in immodicis sanguinis fluxionibus in usum trahendam. Alia enim omnia docet experientia, quin camphora, quandoque etiam in majori paullo dosi, ad scrupulum unum sumpta, plus refrigerii sentitur, quam incalescentia. Veteres sane non adeo alieni fuerunt a camphoræ usu, sed eandem præstantissimarum medicinarum compositionibus commiscuerunt multis, ut quidem ex Augustana patet pharmacopœa. Ne dicam, *Riverium* & nos quoque eadem in inflammationibus, in malignis, magno cum emolumento in dosi non exigua fuisse usos. Atque etiam in nimio hæmorrhagiis, roborans simulatque anodyna camphoræ virtus utilitatis est maximæ, in primis si aliis medicamentis sociatur, & parva dosi exhibetur. Cum antimonii potissimum

tinctura mixta camphora, diuresin, neque minus diaphoresin augendo, ac imbecilles partes roborando, sanguinis, & feri affluxum a recto intestino divertit aliorum, ac ob id eximie prodest.

## OBSERVATIO III.

Virgo novem ac decem annos habens, venesectionem nunquam passa, sed nimio mensium fluxui subinde obnoxia, cruentas experta est sedes, sine molestia tamen atque dolore, idque per dies aliquot. At cum gravi perciperetur iracundia, ingentem sanguinis puri ac sinceri alvo exclusit copiam, non sine summa virium jactura. Substitit tamen rursus effusius hoc profluvium, quin penitus. Sed inde ingentes incurrit hausto frigido potu, fluxus restitit præcordiorum anxietates, & constrictiones, quasi convelleretur cor ipsum, *ala menne ihr dar Berg absteffen molte*, extrema facta frigida, facies rubicunda, venæ in capite inflatæ, arteriæ pulsarunt valide ac celeriter cum quadam duritie. Datus ipsi pulvis ex diaphoretico antimonio, cancrorum lapidibus, nitro & cinnabari, cum infuso summitatum millefolii, data quoque simplex mixtura cum croco, & habuit melius.

*Epicrisis.*

Feminas etiam hæmorrhoides pati, non novum est; neque etiam rarum, iræ affectum fluxum earum reddere immoderatum, id vero non adeo obvium, solum frigidum haustum, sub ipso fluxu, tam graviora concitare posse pathemata. At frigus nervosis partibus spasmus jam jam affectis, uti fit sub iracundia, est inimicissimum, & intensiores spasticas constrictiones augendo, tam gravia pathemata inducere valet utique.

*Hæmorrhoides nimie ex terrore in virgine curata.*



## OBSERVATIO IV.

Nimie  
hæmor-  
rhoides  
sanatæ

Præfectus militum quadragenarius major, natura sanguineus atque robustus, a multis jam annis expertus fuerat hæmorrhoidum fluxum cum euphoria. Sed quum a sueto vini Rhenani potu transfret ad vini Gallici Pontack potum, elapso aliquot mensium spatio, hæmorrhoides præter morem sunt retentæ, & successerunt dolores atrocissimi in lumbis, & abdomine, cum virium dejectione, inappetentia, vigilia, pulsuque celeri & frequenti. Exhibita vero ter laxante potione ex tamarindis, rhabarbaro & passulis minoribus, non modo soluta est alvus, sed & ingens nigri, & congrumati sanguinis copia excreta, summo cum levamine. Diutius tamen quam par erat perdurabat fluxus sanguinolentus, quo quia vires, nimium atterebantur, datum est electuarium ex rosarum conserva, speciebus de hyacintho, succino, croco martis tenui, & granatorum sirupo, cujus usu ad hebdomadem continuato, ad sanitatem traductus est eger.

*Epicrisis.*

Vina illa Gallica coloris saturate rubicundi, uti est Pontack atque Vin de Grave, si sine aqua, & liberaliter bibuntur, propter adstrictionem quam alvo præstant, utilia sunt minime, sed experientia teste, admodum noxia. Unde omnibus etiam modis in periodicis, & criticis sanguinis evacuationibus sunt vitanda, atque etiam in ipsis excedentibus hæmorrhagiis provide adhibenda. In omnibus autem hæmorrhoidalibus affectibus, siue sanguis fuerit suppressus, siue fluxerit immoderatus, præstantius non datur atque accommodatius purgans, quam quod nostro datum, quo diuturnum etiam fluxum, a copia serosi ac biliosi sanguinis oriundum, feliciter sanatum fuisse, ego vidi multoties.

## OBSERVATIO V.

Ante 30. circiter annos Secretarius Regiminis quinquagenarius, corpore spongiosus, & carnosus, ob affligendos muneris labores vite sedentariæ deditus, venesectionem tamen natura quasi horrens, & nunquam admittens, ab aliquot jam annis anxiiis cardialgicis doloribus, & circa præcordia constrictionibus, noctu præsertim, subinde fuerat affligens, alvique ordinario erat strictioris, flatulentis ac ructibus obnoxius, dolores quoque lumbarem sæpius arenosa procedente. Hinc calculum subesse renalem judicarunt, & varia ad eum proposuerunt amici domestica remedia, inter quæ etiam fuit spiritus baccarum juniperi, cum earum rob probe subactis, saccharoque edulcoratus. Ab horum vero usu potius ingravescebantur symptomata. Mox enim truculentis spasmis & doloribus inflativis circa hypochondria & abdomen torquebatur, cum partim extremorum frigore, & inquietudine, qui emollientes, & discutiendi facultate pollentes clysteres etiam eludebant. Tandem accedente cum pulsum celeritate internarum partium æstu, mitescebant quidem dolores, remansit tamen inflatum abdomen, quod nec tractum manus tolerare poterat ob dolorem, & appetentia cum viribus persistente per quatuor septimanas affectus, concidebant. Celebris tum Medicus vocatus, causam horum symptomatum hepatis judicans obstructionem, pilulas Beccherianas, & mercurii dulcis aliquot doses præbuit. Sed his omnibus irritis, præter omnem expectationem, alvi fluxus, sine torminibus tamen, foetide corrupte ex atrogryseæ materie erumpebat, quem animi intercurrentis defectio cum extrema virium jactura tandemq; mors excipiebat.

Hæmor-  
rhoides  
nimie  
in by-  
pochondria  
driaco  
sanatæ



*Epicrisis.*

Ex vita sedentaria cum arduis mentis laboribus, ob difficiliorem redundantis in venis mæsaræicis regressum per hepar, hypochondriaca pathemata, sive spasmodico flatulenta, quæ calidiorum & sanguinem exagitantium immodico usu exacerbantur, accedere, non novum est. Hæc autem tempestiva venæsectione corporisque motu, & exercitatione omnino posse averti, experientia confirmat, quæ etiam confesso est, dolores hypochondriacorum diutius perdurantes demum fluxu sanguinis per venas sedales corrupti hæmorrhoidali solvi salutariter. Notavit id jam *Solenander*, & memoratu digna utique sunt ipsius de hoc observato verba, quæ *cons. 7. Sect. 2. p. 121.* sic habent: *Observavimus hypochondriacos aliquot, quibus istæ corporis regiones, & potissimum sinistrum hypochondrium, multo nigro succo, tanquam atro jure distentæ ac repletæ erant. Novimus, quibus similis ex iis locis humor supra infraque obsessit, quod licet cum periculo conjunctum esset, tamen evasisse plures scio, & honesto viro, Johanni Philippo Seidano, fratri, bis illud intra annum accidisse memini, & ante mensem honesta, & nobilis matrona de Luttersdorff, istius atrii succi, & quod mirum est fere insipidi, e dextro hypochondrio, ad libras sex, vel septem, vomitu rejecit, sed hi plerumque ascite moriuntur. Alia vero ratio, & difficilior evadendi modus est, quando pervicacibus ejusmodi in hypochondriacis doloribus assidua lentaque febris jungitur, quæ ab interna visceris corruptione suborta depascens vires, nunquam non periculosa est.*

OBSERVATIO VI.

*Effusa hæmorrhoides soporē discutiētes*

Non ita pridem generosissima in comitatu Mansfeldensi femina vidua, quinquagesimum annum egressa me accivit, quæ ob lautam, & motus

*Hoffm. Syst. T. IV. P. II.*

expertem vitæ rationem, sanguine, succis & pinguedine plena, semel tantum ab eo tempore quo mentes prorsus cessarunt admissis venæsectionem, & ante octo annorum mensium fluxus simul apertas fluentes hæmorrhoides passa fuit. Hæc diu jam de lassitudine corporis & viribus languentibus conquesta, incidit circa æquinoctium autumnalem in gravem morbum soporosum, adeo ut excitari omni sensu penitus privata nullo modo ab eo potuerit. Medicus hujus urbis famigeratus in auxilium vocatus, venam in pede secandam suavit, & potum fontanæ frigida præbuit sat largiter ita ut singulis horis uncias aliquot caperet. Absumptis sic intra biduum 5. vel sex mensuris, post clysterem stimulantem admissum, ingens sanguinis copia, primum crassi, postea tenuioris, per alvum exiit, ita ut intra viginti quatuor horas, plus quam 5. mensuræ profluxerunt. Ex eo illico ægra rediit ad se, sopor discussus, collectæ sensim paulatimque vires, datisque analepticis leniter adstringentibus, injecto etiam clystere ex pura aqua, frigida, pauca tamen, confecto, bene convaleuit.

*Epicrisis.*

In aqua communi pura fontana & pluviali, eaque frigida, summum adversus plures, & magnos morbos repositum esse præsidium, antiqui Medicorum Græcorum, & Arabum satis agnoverunt; recentiorum vero plurimi, qui vulgaria, & simplicia spernere exotica pretiosa magna arte parata tantum in usum vocare solent; tam præstantissimam medicinam, quæ fere universalis est, si cautus & peritus Medicus ea uti scit, hucusque & neglexerunt, & propemodum rejecerunt. Ego vero ante viginti jam annos scripsi dissertationem de aqua medicina universali, nec non de simplicissimo doloris podagrici remedio, & haud ita pridem de salæ



*britate frigidi potus* ; quin propria experientia , & Medici , qui heic in curationibus suis aqua frigida utitur fere semper , convictus testor , quod potus aquæ frigidæ generosum & valde efficax sit remedium ; quo nimia redundantis , & ebullientis sanguinis expansio , motibus vitalibus nunquam non adversa , efficaciter componitur , humores viscidī diluuntur , & acres mordaces demulcentur , & quod præcipuum ipso frigore , partibus a tono , & robore defectis , conveniens elastica systaltica virtus restituitur , adeo ut magnum roborans sit remedium . In nostra ægrotante valde plethorica , præmissa venæsectione in pede , potus aquæ frigidæ immodicam sanguinis ebullientis , & vasa distendentis , quæ etiam causam morbi soporosi dedit , vim compressit , & robur systalticum adducendo ac firmando fibras , sanguinis ad venas ani extremas majorem appulsum eorumque apertionem concitavit . Qua sanguinis effusione , revulsio magna seri stagnantis a capite facta , & tota symptomatum depulsa fuit syndrome . Ex quo intelligitur , arte etiam inductum , immoderatum alias , & nimium hæmorrhoidum fluxum , sub certis , quod bene notandum , circumstantiis , corporis , & causæ morbificæ remedium saluberrimum quandoque esse posse .

## CAPUT V.

De Uteri Hæmorrhagia  
Immoderata .

## Theses Pathologicæ .

## §. I.

*Hæmorrhagie. r. quid. & quæ. ill.* **N**On omnis larga sanguinis per uterum fluxio , quæ in feminis sanguineis subinde ob nimiam redundantiam accidit , ac si nimia , & noxia esset , censenda , sed ea demum , quæ virium imbecillitate stipatur , quam postea aliæ functionum læsio-

nes conspicuæ , ut inappetentia , cruditas ex mala digestionē , gravativus circa ventriculi regionem sensus , fœdus facie color , pulsus languidus , & frequens cum lento astu , pedum œdematosus tumor , turbatus & minus reficiens somnus , insequuntur .

## §. II.

Hæc nimia sanguinis ex utero effusio , ratione temporis quo impetit multum variat . Nimirum quandoque statim quo erumpere solent menses tempore , sanguis copiose , & cum impetu effertur ; quandoque extra illam lunarem periodum , bis vel pluries in mense , redit fluxus ; quandoque ipsa menstrua purgatio solito diutius per complures dies liberaliter succedit . Quæ etiam parturientibus , & abortientibus haud raro accidit hæmorrhagia , aliquando ante , aliquando post abortum vel partum , erumpit .

## §. III.

Sanguis qui utero sic effunditur , tam ratione quantitatis , quam qualitatis , item odoris , & coloris , a Medico probe debet considerari . Interdum cum impetu exit tenuis & sanguis flavidus sanguis , quem vulgo dicunt *bas Dert-Oeblut* , idque frequentius in abortu , vel post eum , a retentis secundinarum frustis , quibus orificia vasorum aperta tenentur . Quandoque cum sanguine copioso coagulata , & carnem referentes massæ , ovi minoris magnitudine , excluduntur , quod fit , ubi uterina purgatio ad duos vel tres menses substitit . Nonnunquam valde grumosus , acer & coagulatus sanguis nigricans erumpit , idque subinde primis puerperii diebus , in gracilioribus & sanguine plenis . In cachecticis sique diutius jam duravit profluvium , sanguis effunditur aut valde aquosus & tenuis , aut mucidus . In scorbuticis corruptus , foetidus cum acrimonia , & dolore . Frequentius etiam , præsertim in junioribus , vel quæ nondum pepererunt immoderatam sanguinis vacua-

*Differe-  
ratione  
tempo-  
ris .*

*Quanti-  
tatis &  
quali-  
tatis  
sanguinis*



uationem, fluor albus, sive stillicidium materiæ mucidæ albicantis, impuræ sequitur.

§. IV.

*Causa* *sauguino.* *progres.* *sut per* *uter. im-* *peditus.* Causa immoderata, & noxiæ ejusmodi hamorrhagiæ, in copiosiori & impetuosiori sanguinis ad uterum per arterias affluxus, & inæquali ac impedito per venas refluxu quærenda.

Hoc enim si contingit a sanguinis turbato motu, vasa uterina nimium distenta, aut relaxata, dehiscunt tandem, vel disrumpuntur, aut eroduntur, ut sanguis liberaliter effluat.

§. V.

*Ca ple-* *thorica.* Sed sæpius plethora adeo exuberat, ut non solum vasa uterina diducat, sed & interdum plane disrumpat. Id vero his fere accidit, quibus menses diu suppressi, postea confertim ac citatius erumpunt; nec non iis, quibus abortus, aut veri, aut spurii foetus, quavis ex causa contingunt. A partu quoque laborioso evenit, vel difficili, quum scilicet vel grandior foetus, vel oblique situs, nimio conatu excludendus, sub quo vasa vel rumpuntur vel nimis dehiscunt.

§. VI.

*Eman-* *tibus* *et* *jam e-* *mansis* *mensibus.* Ordinario fere contingit, feminas circa illud tempus, quo menstrua purgatio sua sponte desinit, ante annum videlicet quinquagesimum, inordinatam diuturnam admodum neque omnis periculi expertem, ex utero sanguinis fluxionem pati, qua cessante, cessat etiam penitus dein per uterum sanguinis menstrualis excretio. Interdum etiam, quod aliquoties observavimus, accidit, feminas anosiores, sexagenarias circiter, subito & ex improvviso, immensam cum malo odore sanguinis utero excernere copiam, quæ juncta tandem febre lenta, interierunt.

§. VII.

*Denm* *per spas-* *mos co-* *geritur* *ut patet* *ex signis.* Immoderatus sanguinis ex utero profluvium, pro tempore, quo incipit, vel per intervalla revertitur, ut plurimum præcedunt, & comitantur

hæc: tensio & inflatio hypochondriorum, circa lumbos dolor gravativus & pressorius, cum sensu refrigerii junctus, extremarum partium refrigeratio, vasorum detumescentia, color faciei pallidus, pulsus citator, cum interiorum ardore, alvi strictura, urinæ parcior fluxus. Hæc omnia autem satis abundeque testantur, non a causa solum passiva, id est nimia debilitate & laxitate uteri, sed ab activa etiam, spasmodicis partium vasculorum & nervarum stricturis, sanguinem ad uterum nimium urgentibus, hoc vitium proficisci. Unde etiam ratio repetenda, quod feminæ hypochondriacæ, hysteriæ, & quæ tenerioris sunt ad animi commotiones proclivioris naturæ, hoc molesto malo frequentius afficiantur.

§. VIII.

Nil frequentius est, quam si in *Agentis in utero.* puerperio salutare negligitur regimen, neque in eo, neque post illud, uterus a sordibus probe expurgatur, elapso aliquot mensium spatio, impetuosæ hamorrhagiæ cum animi sæpius deliquio subsequantur, quæ etiam per intervalla repetunt, & non prius desinunt quam ejecta foras una vel altera massa carnosæ, pugni interdum magnitudine, quam femellæ molam dicunt. Et hæ massæ procul dubio ex laciniis placentæ relictis, & succo nutritio in iis per calorem condensato, non secus ac carnes luxuriantes in faucibus partibus, gignuntur. Dum vero postea mole sua comprimunt venas uteri, sanguinis circulum per eas retardant & ad impetus ejusmodi hamorrhagicos ac motus uteri spasticos, quibus illæ concretiones carnosæ eliduntur, causam præbent sufficientem.

§. IX.

Si corpus est cachochymicum, prævis succis plenum; si scorbutica, vel *Pericula est uteri.* etiam venerea lue infectum, ubi viscera non sunt integra, hepar, lien, aut vala mesaraica sanguine crasso in-



farcta, non caret malum periculo, sed multum negotii Medico facessit. Etenim sub ejusmodi fluxu, succorum labes & cachexia semper incrementum; eo quod quo plus debilitantur vires, eo minus ventriculus bene appetit & digerit, eo magis crudi succi, qui difficilius in sanguinis boni, & liquidi cerebri substantiam transeunt, generantur, eoque minus dein per sueta & congrua emunctoria fit recrementorum excretio.

## §. X.

*Maxime in partu, si est abortivus* Vita valde periclitatur in iis, quæ ante partum, foetu existente mortuo, magnum sanguinis patiuntur profluvium. Nisi enim extraordinario naturæ robore, & præsentaneo Medici auxilio foetus excludatur, vel operatione chirurgica opportune eximatur, mortem sequi certissimum est. Periculosæ etiam eæ uteri hæmorrhagiæ sunt, quæ ex ruptis ob secundinam cum violentia extractam vasis oriuntur, nec non quando frustula retenta, postea in deformes massas, molas dictas, concrescunt, mensium fluxum semper vitiant, & nimium reddunt.

## C U R A T I O.

## §. I.

*Si sanguis abundat, mittendus*

**I**N medicatione dextre adornanda, omnino Medicus ad varii generis causas & alias atque alias circumstantias, & symptomata debet respicere, quo iis removendis idonea, & efficacia convenienti tempore possit remedia. Igitur, ubi nimia sanguinis redundantia, & quidem a retardato sanguinis menstrui consueto fluxu immoderationis hæmorrhagiæ causa est, non melius ac certius ad præservationem ejusmodi mali suppetit præsidium, quam venæsectio, aliquot dies ante fuetum ordinarii fluxus tempus, in partibus superioribus instituta sufficientem sanguinis copiam, ad sex vel octo uncias, evacuando. Rectius

adhuc, si uterinæ purgationis per aliquot menses suppressio impetuosæ hæmorrhagiæ causa est, tempestiva sanguinis missione in pede, hæc ipsa avertitur commodissime. Ubi vero jam multum sanguinis profluxit, ad ejus impetum divertendum, & ad superiora loca revocandum, parcior quantitas est emittenda. Et certe quam præstans sit in venæsectione præsidium adversus hunc morbum, conceptis verbis testatur *Holler. in comment. ad aphor. 1. Hippocr. Sect. 5. vidimus*, inquiens *qui sanguine multo e vena detracto convalescerunt, quum nullis aliis remediis fluxus sanguinis reprimi posset.*

## §. II.

Quando nimius ebullientis sanguinis orgasmus fovet, & auget hoc malum, ob motum intestinum partium sulphurearum concitatiores diluentia, humectantia, refrigerantia auxilio sunt efficacissimo. Atque inter hæc excellit quam maxime sola aqua frigida fontana, modo satis sit pura & subtilis, aut quæ melior adhuc pluvialis, probe conservata & putredinis expers, vel admixta nitri decenti quantitate alterata, vel cum spiritu vitrioli & sirupo papaveris rhæados in julapi formam redacta, & sufficienti copia pota. Etenim simplex hæc medicina, & diluendo spissos humores, & acres contemperando, nimiumque æstum restringendo, fibras quoque relaxatas firmando, plus certe præstat, quam tantopere a Medicis, alia varii generis ad hoc malum domandum laudata specifica. Non tamen postponenda virtus quo pollet hunc in finem serum lactis dulcis, & acidulum, item chalybeatum, nec non aqua Selterana cum lacte asinino, præsertim ubi corpora sunt graciliora, tenerioris & sensibilibioris indolis, & lento calore macerantur, item ubi scorbutica & exanthematica acris materia vitalibus succis immixta, & graviolem hunc, & difficiliorem reddit affectum.

Ubi



§. III.

*Spasmi  
compo-  
nendi  
anody-  
na.*

Ubi spasmodorum & dolorum ferocia, quod subinde in puerperio, item post abortum, atque in hypochondriaca & hysterica passione affectis evenit, sanguinis profluvium ciet, confugiendum utique ad ea, quæ blanda & anodyna vi dolores & motus effrænes solidorum placant atque sedant. Hoc nomine liquorem nostrum anodynum mineralem cum pulvere nitroso simul sumtum, pulveres antispasmodicos, qui ungulæ alcis, dentem hippopotami, lapidem manati, cornu cervi philosophice præparatum; pulverem marchionis, nitrum, cinnabarium, succinum, castoreum recipiunt, merito laudamus, quorum virtus eo fit efficacior, si unum vel alterum granum laudani hysterici, item massæ pilularum de cynoglossa additur ipsis. Papaveracea quoque, anodynorum lenissima, ut folia papaveris rhœados, in infuso theiformi cum summitatibus millefolii, & floribus chamomillæ vulgaris, aqua, sirupus, extractum, papaveris, laudabilem, præsertim ubi simul humorum peccat acrimonia, opem locant.

§. IV.

*Serum  
impu-  
rum a-  
lio, ad  
congrua  
emun-  
datione  
diver-  
sandum*

Quia in hoc affectu frequentius copiosum & vitiosum serum sanguinis se immiscet, opus est, ut ad alias vias id dirigatur & per congrua excretoria evacuetur. Perficitur id optime & efficaciter per epicrasin operantia laxantia, inter quæ manna, rhabarbaro, cassia & tamarindis nihil datur convenientius & præstantius, modo in convenienti & sufficienti quantitate exhibeantur. Nam manna tabulata, ad duas uncias cum drachma una cremoris tartari in infuso ex aqua florum acaciæ cum oleo citri, præscribenda pro dosi, alia non sufficiens, & satis valida fit purgatio. Rhabarbarum optime miscetur cum passulis Corinthiacis in infuso, vel si cum iis in sirupiformem massam redigitur. In paulo robustioribus pulvis mechoa-

cannæ albæ, ad drachmam dimidiam, vel scrupulos duos, cum æquali cremoris tartari parte permixtus, locum perquam commodum invenit. Divertenda vero etiam serosa illuvies ad renale cribrum, quod præter serum lactis, vel aquam Selteranam, terra foliata tartari, solutio oculorum cancri, nitrum antimoniatum, tinctura tartari cum spiritu nitri dulci & spiritu tartari mixta, præstant efficaciter.

§. V.

Impetu sanguinis nimis vehemente ad lipothymiam usque persistente, confugiendum utique demum ad ea, quæ adstrictoria pollent facultate efficaci, cujus indolis sunt species de hyacintho, trochisci de carabe, hæmatites, bolus Armena, essentia terræ catechu, cum liquore anodyno & refracta dosi essentiæ anodynæ remixta, famigeratissima Sylvii mixtura, ad omnes immodicas sanguinis profusione utilis. Externe vero in forma emplastri stercus suillum, aceto forti imbutum, regioni pubis applicatum, sistendi facultate gaudet haud proletaria. Vel concinnandum cataplasma ex foliis plantaginis & polygani, floribus rosarum, balaustrorum, coquendum in aceto rosaceo & sub frigido apponendum. Nec minus præstans hoc nomine est efficacia emplastri spermatis ranarum, cum alumine, oleo hyoscyami & camphora permixti, ac regioni lumbari admoti.

*In res  
belli  
fluxu  
adhibenda  
adstringentia  
interdici*

*Ex ea  
terno.*

§. VI.

Quando fluxio jam per aliquod tempus conquievit, præservandi causa ad arcendam recidivam, præsertim si corpora sint serosiora & cachexia jam adest, aut imminet, robur non modo utero, sed & omnibus visceribus conciliare oportet. Id vero commode & efficaciter præstari potest pilulis methodo Becheriana paratis, aliquoties assumtis; item elixirio nostro balsamico viscerali, cum tinctura mar-

*Ad præ-  
serva-  
tionem  
robur  
visceri-  
bus red-  
dendum*



martis Zvvelfferi, vel etiam Ludovici, permixto. Laudem etiam merentur juscula alterata cum succo plantaginis, cichori acetosæ. Potus sit aqua frigida, in qua aliquoties frustum chalybis candefacti extinguitum. Aquæ quoque Selteranæ solæ per plures dies epotæ, laudabilem præstabunt opem. Contra ea fugienda vina, carnum, ovorumque esus & omnia ea, quæ sanguinem nimium adaugent & exagitant.

## §. VII.

*Ex utero rursus purgandum.* Quia vero experientia multiplici testante, quam maxime abortio & puerperium ad enormes hæmorrhagias, præsertim si uterus postea non bene purgatus fuit, disponere solent; providendum utique omni cura erit, in puerperio, vel etiam post illud ut ipse satis mundificetur. Cui scopo obtinendo feliciter & efficaciter omnino pilulæ Becherianæ, & quæ ad earum imitationem paratæ sunt ex extractis amaris, temperatis, resinoso-gummatibus, extracto rhabarbari & refracta aloes gummosæ dosi, concinnatæ, inserviunt, si non modo duobus aut tribus diebus post partum per aliquot dies sumantur, sed & medio puerperii tempore, simili modo per tres aut quatuor dies ipsarum usu continuetur. Vel pilularum loco infusum ex aqua melissæ, vino, rhabbaro, herba melissæ, roris-marini, radice pimpinellæ, agarico, passulis minoribus, corticibus aurantium & citri per aliquot dies hauriendum. Quibus remediis id efficitur, ut uterus ejusque vasa ab omni succorum vitiosorum illuvie, atque etiam laciniis, quæ ex retenta secunda remanent & rudimentum molarum carnearum præbere possunt, expurgetur ac liberetur.

## Cautelæ &amp; observationes clinicæ.

## §. I.

*Periculis  
gestationis  
notanda  
& cautelæ*

**A**D persanandum aquæ ac prote-  
landum hoc malum, potissi-

mum prudentiæ medicæ momentum in eo repositum, ut pro differente corporum & causarum ratione, mensura, modus, ac tempus, mittendi e vena sanguinis, rite perspiciatur & observetur. Scilicet quæ habitioris sunt corporis & a sola sanguinis abundantia sæpe cum immani hæmorrhagia abortiunt; illæ sola subtractione sanguinis tempestive in brachio celebrata, vel etiam si res postulat repetita, ab incurso hujus morbi possunt vindicari. Contra ea ubi viribus jam valde exhaustis, nimia sanguinis copia profusa, præstat a venæsectione abstinere. Tum vero e re est, brachium utrumque tepidæ aquæ, cui quippiam vini admixtum, per horæ dimidium immittere, quo sanguinis impetus ad exteriora divertatur. Idque remedium longe efficacius est ac utilis ipsis cucurbitis ad mammas applicatis, quas tamen *Hippocrates* passim in scriptis suis in ejusmodi casibus magnopere commendat.

## §. II.

Si diutius hoc malo colluctantur femine, sive sint biliosæ, sive phlegmatico sanguineæ constitutionis, rarius feliciter sine alvum solventibus remediis sanantur. Sunt autem inter hæc optima rhabbarbarina, rhabbarum cum cremore tartari, aut si multum serosæ colluviei evacuandum est, cum tertia parte mechoacannæ albæ acutum. Utiles quoque pilulæ temperatæ balsamicæ, secundum exemplar Becheri, refracta bene præparatæ aloes dosi concinnatæ, vel loco harum aleophanginæ, vel de succino Cratonis, quarum virtus interpositis nitroso-salinis pulveribus utique exaltatur.

*Alvum  
solventia  
nec  
essaria*

## §. III.

In tenerioribus biliosis & cachecticis leniora emetica, cujus generis est radix hypecacuanhæ, singulis mensibus ad arcendum malum exhibita, non male cessisse novi, a qua methodo ipse *Hippocrates* & *Riverius* quoque non alieni. Prima enim regio,

*Quandocumque  
emetica  
lenia.*

ob



ob deperditam digestionem, haud infrequenter multorum chronicorum uteri affectuum causam & fomitem fovet ac præbet, eaque propter ut efficaciter depleatur expedit.

§. IV.

Adstrin-  
gentia  
Orano.  
dyna  
caute  
danda.

Validiora adstringentia caute & provide admodum adhibere oportet, quod etiam de narcoticis tenendum, quæ neque in principio, neque etiam ubi vires a nimia sanguinis profusione penitus jam exhaustæ, imminente fere semper animi deliquio, conducunt. Quin vidi sæpius, ab adstringentibus fluxum exacerbatum fuisse; vidi quoque nonnullas, ab immoderatiore horum usu in immanes & graves chronicas passiones, cachexiam, hydropem lentam & hæcticam febrem, perpetuum lymphæ ex utero stillicidium, cum intumescencia & tumore duro circa dextrum latus inguinalis regionis, fuisse præcipitatas.

§. X.

Etiam  
Heurnii  
pulvis.

Pulvis Heurnii cujus descriptionem in commentario ad aphorismos Hippocratis Lib. 5. aphorism. 50. exhibet, & quem maximo cum successu semper in immoderatiore uteri fluxu se adhibuisse refert, non contemnendus est. Compositio autem ita habet: accipe seminis hyoscyami, papaveris albi ana drachmam unam, hæmatidis, coralliorum rubrorum ana drachma semis, camphoræ scrupulum dimidium M. de quo mane & vespere dimidia drachma pro dosi sumenda. Nos quoque ab ejus usu olim laudabilem effectum vidimus, sed convenit eum exhibere ubi omnia in actuoso sunt motu, arteriarum pulsu celeri & vehementi, cum assidua vigilia, atque tum etiam securius, ut ipsi additur nitrum ad dimidiam drachmam; minime vero ubi vires cum sanguine exhaustæ sunt, & pulsus vix digito tangi potest. Nam a seminis hyoscyami usu paulo largiori, indementiam conjectas fuisse quasdam personas novimus. Idem monitum

etiam tenendum de pilulis de cynoglossa, quæ pariter subactum in exhibitione desiderant judicium practicum.

§. VI.

Mine-  
rales a-  
que ad  
curam  
potissi-  
me.

Quando a viscerum obstructione chronicum malum fovetur, cura sine legitimo aquarum mineralium, vel acidularum, vel thermarum temperantiam usu, rarius ex voto succedit. Expedit vero medicamentis temperate balsamicis hanc curam secundare, & exterius quoque ad roboranda viscera ipsumque debilitatum uterum silente fluxu, balneo aquarum, subadstringenti virtute gaudentium cujus indolis sunt nostræ Lauchsta-dienses, uti.

§. VII.

Potus  
feligen-  
dus co-  
modus

Multum interest, quo potus genere utantur illæ, quæ ejusmodi immodicis sanguinis fluxionibus macerantur. Neutiquam enim ventriculus, in hoc affectu valde imbecillis, omnia æque bene ferre potest. Inprimis abstinendum ab omni cerevisia, a potu quoque vinoso, ac potui in usum vocanda decocta, ex rasura ligni santali rubri, citrini radice cichorei, semine sceniculi & passulis, parata. Quibusdam solus potus aquæ fontanæ frigida, alteratus quodammodo sirupo acetositate citri, vel tantillo nitri injecto, optime cessit Ludovicus Septalius Lib. 6. animadvers. medicar. artic. 144. decoctum corticum aurantium, mane ad octo vel novem uncias potum, tanquam remedium certissimum deprædicat, eoque fere infinitum mulierum numerum ab hoc morbo se liberasse asseveravit, sed inter secreta id servavit. Recepit autem aquæ libras septem, in hac incocxit cortices trium pomorum aurantium, aliquando adhuc viridium, interdum etiam addit in fine aliquid herbæ pilosellæ.

§. VIII.

Uti in omni præternaturali hemorrhagia, ita etiam in hac ipsa ventriculi & exacta vivendi ratio maxime ha-



habenda. Ob vires enim cum sanguine deperditas, ventriculus nec bene appetit, nec decenter digerit, nec recte egerit, sed cruditatum & flatuum copia turgēt ut plurimum venter. Optimus est cibus siccus, modicus & salubris; minime gelatinosus, difficilioris solutionis & qui inflat. Potionibus, si fuerint aquosæ, subinde modicum vini optimi rhenani, vel genuini vini Pontaci, admiscendum est. Ac uti nimium frigus, ita etiam immoderatus æstus aeris nocet. Neque admittenda est nimia corporis quies, neque nimia ejus exercitatio, veneris usus sit parcissimus. Demum si unquam affectus animi præsentaneum damnum inferunt, certissime id contingit in sanguine exhaustis corporibus.

## §. IX.

Quam  
post  
mortem

Multum tandem refert, ut qui extreme immodicis sanguinis fluxionibus debilitati, sedato fluxu, convenienti diætâ pristinam sensim recuperent sanitatem. Nam si repente cibus se replent, quos imbecillis ventriculus non satis digerere potest, facile incurrunt ob cruditates in alias chronicas passiones. Nimirum uti effato *Hippocratis* impura corpora nutrientibus læduntur; ita etiam valde debilitata. Habenda igitur est quam maxime ventriculi ratio, & analeptics ac nutrientibus cibus quidem restaurandæ sunt vires, sed parca manu offerantur necesse est.

*Enarrationes morborum.*

## OBSERVATIO I.

Memoria  
hæmorrhagiae  
uteri  
cum febre  
lenta  
lethali  
in vetula.

Vidua hujus loci honesta, jam septuagenaria, extenuati corporis, sedentariæ vitæ multum addicta, post quinquagesimum annum cessante ex toto menstrua purgatione, assueta fuit singulis annis circa æquinoctia sanguinis missioni, post annum autem sexagesimum ex muliercularum consilio eam omisit. Unde intra se-

xagesimi & septuagesimi anni spatium aliquoties pathematibus spasmodico-flatulentis, tumentibus quoque venis hæmorrhoidalibus externis, interdum etiam sanguinis missione, tentata fuit. Medicus salutari consilio suavit venæsectionem crebrius repetendam, sed ipsa hujus moniti negligentior, incidit tandem in ingentem animi moerorem, eumque diuturniorem, ac paullo post ex improvviso immodice sanguis per uterum effluxit, & frustra datis optimis analeptics & roborantibus per menses aliquot & longius continuavit. Tandem cum intolerabili foetore profluxit ex pudendis cruor, lenta successit febris & summa virium dejectio, donec placide obiret misera.

*Epicrisis.*

Neque ab immoderata uti hæmorrhagia vetulæ immunes, si plethoricæ sunt & sanguinis missionem negligunt. Quin si cum vita sedentaria animi moeror jungitur, quam facile ab abundante sanguine & in visceribus abdominis, præsertim utero, stagnante, sphacelosa corruptio succrescere potest, quam foetor subinde indicat, qui intolerabilis fit, maxime quando hæc corruptio ad ipsum intestinum rectum penetrat. De foetidissimo uteri profluvio historiam quoque refert *Heurnius in notis ad aphorism. Hippocrat.* & quidem 56. Sect. 5. vidi inquit, nobilem matronam, quæ profluvio uteri extabuit & tanto foetore effundebatur, ut nullus non existimaret alvo venire. Sed hic foetor longe alvum superabat. Existimo totum ejus uterum, in teterrimum tabum eliquatum, una effusum fuisse. Languibat hæc mirum in modum, ac quasi lethargo stupebat mente, lente obiit intolerabilibus foetoribus, ego sane nihil foetidius unquam olseci.

## OBSERVATIO II.

Illustris stemmatis femina, florida formæ, sanguine & succis plena, vige-



vigesimo octavo ætatis anno tertium jam mensem gravida, ex uteri sinu sanguinem per duas hebdomades exigua quidem quantitate profluere sensit, vehementioris vero saltationis motumox in talem incidit hemorrhagiam, ut universus propemodum sanguis, usque ad mensuras, vel septem, floridus & fluidus, intra aliquot horas, e corpore promanasse visus fuerit, intercurrentibus subinde animi deliquiis. Nihil auxilii tam intra quam extra ad cohibendum tantum sanguinis impetum prætermisum fuit, sed frustraneo effectu. In tanto itaque vitæ periculo coactus ego fui ad anceps & extremum confugere auxilium, linteum scilicet apte contortum & probe solutione capitis mortui vitrioli imbutum, quod in uteri sinum quousque penetrari potuit, intrudi curavi. Hoc non multo post substitit fluxus, & exhibitis analeptis medicamentis & alimentis erectus quodammodo animus cum viribus. Tertiadie post, tentata est extractio linteï, quæ non fuit sine difficultate, quia illud plane exsuccum & siccatum erat, ipsique superne congrumatus, niger, aridus sanguis adhærescebat. Factum hinc est, ut quum secessum peteret ægra frustum massæ carneæ ex utero simul, cum aliqua sanguinis fluidi portione prolaberetur. Quo excluso, quum nihil amplius exiret, postea per commodam dietam & medicamenta, ventriculi digestionem ac vires restaurantia, generosa hæc femina successive convaluit.

*Epicrisis.*

Non novum est, ab incoercibili sanguinis ex utero profusione in partu laborioso; in abortu etiam, in lethalem syncopem incidere posse feminas. Sub tanto autem mortis periculo, anceps etiam remedium experi non inconsultum est. Et licet tale stipticum uteri internis partibus applicare nunquam antea observatum

vel visum fuerit, tamen hæc observatio docet, stiptica etiam internis uteri partibus non adeo esse inimica, si quidem post hæc femina gratiosa admodum & concepit & peperit feliciter.

OBSERVATIO III.

Judæi uxor annorum sexaginta tenioris & mobilioris naturæ multorum liberorum mater, quum tertio jam mense crederetur gravida, citra ullam manifestam occasionem copiose sanguinem ex uteri sinu prorumperensentit, exclusa simul non ita multo post massa carneæ pugni magnitudine. Hoc facto nihilominus permansit fluxio puri & etiam fibrosi sanguinis cum virium insigni decremento; quin quum gravi terrore percelleretur mox continua ad lipothymiam ingruit proclivitas, cor palpitavit, & tremuit cum magna præcordiorum anxietate spirandique angustia, extrema friguerunt, & quandoque, ut in epilepsia fit, sub animi deliquio, pollices cum reliquis digitis fortiter contracti fuerunt. Atque hæc omnia sub suavi quodam oblato odore, graviora, remissiora vero sub graveolenti adhibito remedio fuerunt. Quum itaque omnia desperata adstantibus viderentur, in consilium vocatus ego, bono animo ipsos esse jussi, ac remotis aliis medicamentis, clysterem injici curavi carminativum, postea ad violentas systematis nervosi illas commotiones sedandas præscripsi pilulas, quæ extractum florum chamomillæ, millefolii, crocum, castoreum, camphoram & asam foetidam habuerunt, quarum singulis tribus horis numero 5. vel 6. deglutitæ fuerunt. Quibus ægrotasuccessisse sanata fuit.

*Epicrisis.*

Uti vehementioris animi commotiones in plethoricis magna, ita in sanguinis defectu longe majora dam-

*Hæmorrhagia uteri antispasmodicis sanata.*



damna procreare possunt, potissimum pathemata spasmodica convulsiva & quæ vulgo in feminis appellari solent hysterica, quibus frequentius puerperæ post lochia infestari solent. Terror vero, si ullus ex animi affectibus, in immodicis hæmorrhagiis perniciosissimus. Nam sistit quidem ipsas, sed postea graviora concitat mala. Imprudentiæ hinc esset, denuo sanguinis missionem tentare. Nihil potius a prudenti Medico aliud agendum, quam ut antispasmodicis convenientibus motus hosce intensiores nervosarum partium componat, & per diaphoretica & analeptica sanguinis liberum cursum, per extima etiam corporis, promoveat.

## OBSERVATIO IX.

*Hæmorrhagia uteri post menses rebellis sanata.* Femina quinquaginta trium annorum, temperamenti colerico-melancholici, in animi commotiones valde prona, ante annum & dimidium incidit in immodicam sanguinis ab utero fluxionem, quæ die nocteque integrum per annum duravit, & subinde parcior, quandoque vero tam larga fuit, ut cyathos aliquot compleret. Inde maxima animi ad lipothymiam usque nec non virium & appetentiæ dejectio sequuta est, intercurrente sæpius, mox singulis, mox tertio die, cum horrore præcedente, febricula. Varia frustrango eventu opposita fuerunt remedia, tandem vero martialium usu cohibita fuit hæc sanguinis profusio, sed in ejus locum fluor albus successit, cum tumore pedum oedematoso, spirandi difficultate, inappetentiâ & alvo adstrictiore junctus. Crebriori tamen pilularum nostrarum, item tincturæ antimonii acri, cum spiritu Bussii & liquore nostro anodyno permixtæ usu, fluor albus cum tumore oedematoso sublatus ad tempus est, licet non ita multo post rursus infestaret, ac tandem suffimigio ex tacamahaca, succino, rasura eboris & floribus sulphuris, ali-

quoties in die usurpato, cum continuatis superioribus remediis, ex toto etiam sanatus est.

*Epicrisis.*

In hac historia venit illud notatu perquam dignum, quod post illud tempus, quo alias ordinario cessat menstrua purgatio, excessiva adhuc tamdiu prodierit ab utero fluxio; id, quod ex parte iracundæ animi affectioni adscribendum. Quoniam autem hic morbus ingentem atoniam viscerum abdominis, præsertim uteri, habuit pro fundamento, ad eam expugnandam & totum restituentum, præter amaram atque memoratam essentiam, quæ simul diaphoresin & diuresin movet, nec non suffimigia, ad sistendum album fluorem nihil unquam inveni præsentius, & hinc quoque in nostra felicitis & saluberrimi fuerunt effectus.

## OBSERVATIO V.

*Hæmorrhagia uteri immodica cum morbo sanata.* Illustris femina, constitutionis tenerioris, triginta & aliquot annorum, inordinatum mensium sæpius experta fuit fluxum, ita, ut ad duos & plures menses retinerentur & postea impetuosius sanguis, primo grumofus, dein tenuis, magna copia profunderetur. Tum quidem remediorum convenientium beneficio malum depulsum, sed sequentibus annis, mensibus præsertim hiemalibus, Januario & Februario, suppresso tributum lunaris in tertium mensem rursus accessit, ac postea fluxus effusissimus rediit exeuntibus simul frustis duris foetentibus, cum magna portione aquæ. Tertio anno species molæ prodit, dura nempe carnea massa pellucula alba cincta, multis cellulis repleta cum excessiva sanguinis profusione, quam magna virium jactura, inappetentiâ, ventriculi imbecillitas, nausea, præcordiorum anxietas, dolor dorsi & artuum, cum paucosomno sequuta. Quare ego in consilium adscitus, hac medicationis me-



methodo, divina favente gratia, ægram a molestissimo hoc affectu liberavi & integre restitui, ita, ut gravida aliquoties facta, singulis binis mensibus misso e brachio sanguine, feliciter liberos sanos pepererit. Methodus vero curationis, quæ tribus vicibus adhibita, in eo consilio consistebat: per tres dies circa somni tempus deglutitæ fuerunt pilulæ balsamicæ nostræ, ad quarum operationem promovendam mane post sumptum drachmam pulveris salini, ex tartaro vitriolato, lapidibus cancrorum, nitro, sale Ebehamentis, æquali pondere permixtorum, post quinque dies descendit mane in balneum, paratum ex aqua pluviali, in qua infusa herba menthæ, melissæ, origani, hormini, salviæ, flores spicæ, adjecta convenienti quantitate aluminis & cinerum clavellatorum.

*Epicrisis.*

Mirum forsan cuipiam videri poterit, quod inter casus nimia hæmorrhagia uteri laborantium etiam abortus recensuerimus; verum cum hi ipsi non aliter fieri possint, nisi præcedente ex utero hæmorrhagia, eaque præternaturali, utique curanti incumbit, convenienti methodo, & foetum in utero servare salvum, & feminam a gravibus & fonticis pathematibus, quæ a nimia sanguinis profusione, seu causa, oriuntur, vindicare. Quæ omnia melius præstari nequeunt, quam methodo jamjam a nobis proposita. Potissimum balnea & infusus ex convenientibus remediis parata, in diuturnis uteri morbis & vitiis corrigendis, si ullum aliud, plurimum valent. Et sic multæ ad foetum vivacem edendum inhabiles ac sæpe abortientes, ad gestationem, partum & grata matrimonii pignora idoneæ redditæ fuerunt.

OBSERVATIO VI.

Generosa femina 40. & aliquot annorum, fluxibus ex utero immo-

dicis sæpius laboravit, tandem a vehementi terrore in immanem hæmorrhagiam incidit, ad quam sistendam, Medicus venæ in brachio sectionem, pilulas Stahlianas, pulverem antispasmodicum, neque minus essentiam millefolii, tincturam martis Ludovici, massam pilularum de cynoglossa, sed omnia incassum, adhibuit. Eruperunt potius frustra sanguinis congruati cum foetore, cui malo mixturis analeptics, item tinctura martis cydonata cum arcano tartari maritata, & alvum pertinaciter constrictam, magnesia alba frustra obviam ivit, & iterata rursus venæsectione in brachio, sanguis serosus lixiviosi saporis, profluxit. Diutius itaque perseverante hoc fluxu, mirum non modo vires languescabant, sed & lipothymia, capitis dolores, vertigo & aurium tinnitus accedebant. Unde ego in auxilium vocatus, sequentem dare jussi mixturam: Recipe aquæ florum sambucitiliæ, liliorum convallium, melissæ, ana unciam semis, theriacalis, cinnamomi sine vino ana unciam semis, aceti destillati unciam, lapidum cancrorum drachmas duas, antimonii diaphoretici drachmam, spiritus nitri dulcis guttas 30. syrupi acetositis citri drachmas sex, M. D. de qua quotidie bis vel ter, duo cochlearia sumere præcepi. Ad regionem pubis vero epithema ex herbis menthæ, melissæ, rorismarini, origani, floribus rosarum rubrarum, & cortice charillæ, cum vino rubro, Pontak, coctum, tepide applicare, manusque sæpius de die in aquam tepidam cum vino rubro mixtam, immittere jussi, pro potu suasi decoctum santali, lentisci & radicis cichorei. Quibus dextre adhibitis remediis, hæmorrhagia uteri cum omnibus symptomatibus cessit, & generosa patiens, recuperatis sensim viribus, optime convaleuit.



*Epicrisis.*

Nimis frequens & repetita uterina hæmorrhagia ingentem uteri ejusque vasorum atoniam subinducat, ad quam removendam, Medicus maxime apta remedia porrigere debet. Huic vero scopo obtinendo, neque adstringentia, neque anodyna, neque nitrofa, aut sola refrigerantia interne sumpta, respondent, sed applicanda etiam ad confirmandum harum partium robur externa idonea remedia. Præterea mixturæ analepticæ & diaphoreticæ, cum conveniente regimine calido, ad transpirationem, si malum urget, & alia, spectatissimæ alias virtutis, remedia respuit, augendam, divertendo non modo sanguinis impetum, sed & acrimoniam, quæ sæpius subest, demulcendo, insigni emolumento sunt.

## OBSERVATIO VII.

*Hæmorrhagia uteri ex infelici secundina extractione.*

Ediderat felici partu gemellos femina fere trigenaria, sed retentis paullo diutius secundinis, extractionem earundem molita est obstetrix. Quod quum non sine violentia perficeret, remanserunt frustula nonnulla, & sequutus tam immodicus lochiorum fluxus, ut aliquoties animi deliquium incurreret puerpera. Quin ex eo per dimidium anni stillicidium successit ex pudendis sanguinolentum, plane refractarium & fere perpetuum vix quandoque ad aliquot dies inducias concedens. Bis etiam interea simul excreta massa ovi gallinacei minoris magnitudinem referens, cuticula obducta pellucida & intus habens liquorem spissiculum turbidum atque foetentem. Pessime eapropter habuit misera, appetitus periit, vires conciderunt, caro contabuit & vix corpus movendi superfuit potentia. Tandem haud ita pridem a me salutare petiit consilium, qui ipsi suasi usum pilularum Becherianarum, cum æquali portione extracti rhabarbari & aliquot granis pulveris antimonii

martialis sic dicti cachectici, mixtarum, & exterius pubis regioni admove- vere, ac si fieri posset, ipsum in uterum injicere jussi, decoctum melissæ, menthæ, caryophyllorum, mastiches, florum rosarum rubrarum & balauisticorum, ex vino Gallico, quod vocant Pontack. Qua methodo quibusque præsidiiis plures sanitati redditas fuisse novi.

*Epicrisis.*

De infelici extractione secundinarum cum vi quadam factæ successu, plures in artis exercitio notavimus observationes. Nam si quando dissiliunt in frusta secundo partu edenda, & ex his nonnulla remanent, in corruptionem ipsa abeunt, & colliquata, ichorosum faciunt fluxum, simul lentum quendam accendunt calorem, vires mirifice deicientem. Quandoque præpostero hoc molimine enormis inducitur hæmorrhagia, cum omnimoda fere virium jactura, quin ipsius vitæ periculo. Nonnunquam etiam ex relictis frustulis succrescunt postea concrementa fungosa, ex membranis in variam formam & magnitudinem contexta, quæ molas dicunt spurias, continuo materiæ sanguinolentæ ferrosæ foetidæ stillicidio stipata. Frustra autem, teste experientia multiplici, pugnatur contra hæc mala internis solis, ac potius locis affectis ipsique utero, nimis partim laxato ac debili, partim læso & exulcerato, admovenda, injectionis, aut epithematis forma, ea, quæ roborant ac putredini resistunt. Interna enim salva sua textura eo pervadere & vitium tollere nequeunt; sed quæ immediate labe affectas partes tangunt operationis sunt & celerioris, & melioris. Unde longe profecto opportunius & efficacius succurri posset gravibus & diuturnis in utero morbis, qui haud raro post partum accidunt, si tam lubenter admitterentur injectiones ejusmodi & topica uterina, quam quidem veteribus pessos admove- re mortis fuit.

OB.



OBSERVATIO VIII.

Ex hæ-  
morrha-  
gia uter-  
i Heurnii  
pul-  
vere sub-  
lata pa-  
rbema-  
ta cura-  
ta.

Adiit Carolinas thermas femina viginti quatuor annos habens, sanguinea, iisdemque ad hystericam qua detinebatur passionem debellandam ex Medici consilio usa est. Sed ipsum inter usum, minus forsan dextrum, experta est inordinatum copiosum sanguinis ex utero fluxum & postea ad aliquot interdum hebdomades durantem. Inde virium debilitatem, appetitus defectum & languorem cum lurido faciei colore incurrit. Medicum igitur vocavit in consilium, qui pulvere Heurnii sanguinis profluvium composuit quidem; at ingens postea præcordiorum anxietas cum cardialgia infestavit, ipsam suffocationem minitans. Unde ad hæc mala depulsanda multis variisque usa est remediis quorum tamen nullum effectum edidit speratum. Sumsit quoque ex alio Medici suasu emeticum, quo multum viscidæ ac viridescens materia exturbatum, & nonnihil levaminis allatum. Nihilominus sanguis paulo post largius profluxit & ægram ut de malo funditus extirpando esset sollicita coegit, id quod etiam fortunate Deo præstitum est his; pilulis nempe nostris balsamicis, quotidie ad aliquot grana, interposito pulvere ex antimonio martiali cachectico, nitro antimoniato & depurato, assumtis, usurpata subinde tinctura martis Zvelferi, & potu cerevisiæ loco decocto ex radicibus & lignis temperato.

*Epicrisis.*

Mineralium aquarum usus non minus nimium fluentibus, quam suppressis ex utero fluxibus, opitulatur; sed prudentem & peritum desiderat Medicum. Nam morbus uterque, inveteratus præsertim, ab obstructione & sæctu vasorum uteri ducit haud raro natales, ea tantum cum differentia, quod nimio profluvio obstaculum liberi progressus sit in va-

Hoffm. System. T. IV. P. II.

lis majoribus venosis, in deficiente vero in vasis minoribus, maxime arteriosis. Minerales autem aquæ utique impedimentum hoc tollere valent, eaque propter præstant utrumque. Id vero tenendum, utendum esse iisdem non ipso sub fluxu, sed extra eum, ad arcendum recursum. Si secus fit, augetur uteri laxitas, augetur affluxus. Tum potius per balsamica roborantia interius & exterius utero remisso robur reddere, ac postea, ne repetat profluvium, minerales aquas ad eluendos meatus eisdemque fervandos apertos, in usum vocare convenit.

OBSERVATIO IX.

Illustrissimi Consilarii uxor, quæ quadragesimum jam compleverat annum, habitus valde teneri ac gracilis, animique admodum mobilis & sensus exquisitissimi, aliquot abhinc annis per semestre fere spatium diuturno & fere assiduo ex utero fluore alternante cruento laboravit. Hinc primum Medicis loci usa, ab eorum medicatione effectum sensit nullum. Unde contulit se ad virum quendam celeberrimum, qui brevi felicem ac certam opem spondens, pilulas suas ipsi commendavit, ut de his quavis hebdomade ter vel quater sumeret, idque aliquamdiu. Sed inde etiam vix quicquam levaminis est experta. Demum meum petiit consilium, quo potum Selteranarum per mensem & ultra in cura cum debito regimine, interposito interdum laxante, suasi. Quod priusquam faceret, B. D. Brunneri iudicium exquisivit, qui meo pariter calculum adjecit consilio. Unde tanto majori fiducia ad usum hujus præsidii accessit; atque etiam ex eo tam salutarem percepit effectum, ut hæmorrhagia sensim remitteret, penitus tandem cessaret, ac ipsa ad pristinam perfectam sanitatem rediret.

E

Epi-



*Epicrisis.*

Concinnatæ illæ ad mentem & methodum Becherianam balsamicæ pilulæ utique in affectibus ex utero præsertim in serosioribus, item puerperii tempore, debita sua non defraudandæ sunt laude. Sed quod Medicus pro lubitu iisdem & inordinatas ac nimias hæmorrhagias moderari ac sistere, & vicissim menses si suppressi sunt, revocare possit, id non sine ratione inter fabellas reponendum. In nostra certe id docuit eventus. Fons autem Selteranus acres & tenues humores diluendo & temperando, eosque per diuresin efficaciter evacuando, sicque causam spasmos hæmorrhagiæ auctores suscitantem tollendo, non potuit non prodesse egregie.

## C A P U T VI.

De hæmorrhagia ex urinariis viis.

Theses Pathologicæ.

## §. I.

*Hæmorrhagia per urinarias vias quid.*

**V**Enit hæmorrhagia in scholis plerumque mictus cruenti nomine, & est sanguinis per urinarias vias, cum, vel sine urina, sive ex renum, sive vesicæ valis, nimium ampliatis, ruptis, aut arrosis, emissio, pro circumstantiarum ratione plus vel minus periculi habens.

## §. II.

*Quomodo dignoscendum an sanguis mictus.*

Haud raro accidit, ut Medici in dignoscendo, utrum sanguis cum urina mictus sit, nec ne? eximie fallantur. Si quidem majori in copia, ut interdum contingit, ad libram & ultra, sanguis sincerus cum urina mictus, vel pars aliqua cruoris sine urinae connubio, prodit per urinarium meatum, res nullo eget discrimine. Si vero cruor urinae fuerit admixtus parcius, tunc paulo curatori opus est scrutinio. Sæpe enim mingitur lotium coloris sanguinei; sepe etiam deponit sedimentum non aliter ac

sanguis solet, nullo tamen præsentente sanguine. Sæpius vicissim bruni, vel nigrescentis coloris urina emittitur, ut nulli suspicio sanguinis, qui tamen mixtus est, in sensus & mentem incurrat. Quare suggerenda utique sunt certa indicia, e quibus hoc tam multiplex discrimen perspicendum. Scilicet si rubedo urinae sanguini æmula a particulis sulphureis, mixtura salium, præsertim alcalinæ indolis, exaltatis, proficiscitur, tunc quamprimum emissa fuit, clara & perspicua apparet, sedimentum vero incarnati & cinnabarini coloris est, quod tamen sufficienti calore admoto, mox in supernatantem liquorem se recipit, ut clara rursus & perspicua ut antea appareat. Contra vero quum urina rubet a sanguine, tunc opaca ac crassicula sine perspicuitate mingitur, sedimentum vero est grumosum, ex rubro nigricans, idque non dissolvitur, aut rursus ab urina absorbetur. Si etiam lotii rubedo est a sanguine, linteam per quod colatur, tingit rubore, quod non fit, quando est a salibus color tantum intensus.

## §. III.

Quia plures urinae secernendæ & excernendæ serviunt viæ, scire refert discrimen: unde profluxerit mictu redditus sanguis. Quod si itaque sanguis sincerus confertim, repente & sine dolore mingitur, ex renum substantia sanguineo vasculosa illum prodisse recte jam judicavit *Hippocrates Sect. 4. aphorism. 78.* Sed ubi parcius sanguinis quantitas obscuri nigricantis coloris, cum vel sine materia purulenta, maxime si cum dolore & ardore in pube sub mictione, vel post eam redditur, tunc ex vesica laesa, aut exulcerata illum stillasse certum. Quod autem renalis sanguinis effluxus sine, & qui ex vesica venit cum exquisito dolore succedat, id diversitati structuræ tribuendum. Etenim renes carent exquisito sensu. Sed quando sanguis per nervosas acutissimæ sensationis vesicæ tunicas viam

*Et unde veniat.*



molitur, dolor non potest non oriri atrocissimus, nec mirum gravissima tum incidere symptomata, animi deliquia, spirationem difficilem, pulsum obscurum, parvum & frequentem nonnunquam, nauseam, animi anxietatem, & frigidum sudorem, de quo mictu etiam conferre meretur, Hippocratis aphorism. lib. 4. aphorism. 80. Si quis sanguinem unaque grumos sepe mingat ac stranguriam habeat, unaque dolor incidat in aqualicum & in interfemineum, huic vesicæ vicinæ partes laborant. Quando porro ex uretheribus, a calculo magno, vel aspero læsis, sanguinis quippiam cum urina miscetur, dolor circa lumbos & ilia acutus, difficilis fabulosa mictio, aliaque calculi in uretheribus hærentis signa id manifestant. Propter læsa a calculo vesicæ ejusque tunicarum sanguinea vascula, si excernitur quippiam cruoris, non modo cum summo dolore & prævia obstructione quandoque urina prodit, sed & grumi interdum cum moleculis crassioribus fabulosis firmiter compacti una cum ea emittuntur, quod etiam interdum accidit, si calculus in rene firmiter impactus eum lauciat.

## §. IV.

*Alia species ex vesicæ ejusque sphinctere.* Alia adhuc mictionis cruentæ species datur, cujus tamen raro mentio fit a scriptoribus medicis, quæ videlicet ex ipsis vasis vesicæ, vel potius ipsius sphincteris contingit, quando nimium hiant & a sanguine distenta aperta fuerunt. De hac mictionis cruentæ specie notatu dignum est *Calii Aureliani lib. 4. tardar. passionum cap. 4.* effatum ita habens: solent, sicut in prodice, vel feminarum sinu, aut matricis collo, etiam in vesicæ, hæmorrhoides generari, quæ fluorem sanguinis præstant, quibusdam intervallis variatum. Quod oportet apprehendere prudentem, cum non coacervata primo fuerit effusio, sed augmentis quibusdam promota, intersectis defectionibus, ac retento

sanguine dolore circa pubem, siquidem aliquando inflata ac tumentes hæmorrhoides difficultatem vel abstinentiam faciunt mictus, dysuriam Græcis vocatam, vel ischuriam. Archigenes vero dicebat, ut statis periodis menses & hæmorrhoides, ita & certis vicissitudinibus interdum plethora se effundit per renes & vesicam. Cui merito addendum *Heurnii Comment. in aphorism. Hippocratis 78.* de signis discriminis loci præceptum: sanguis qui a musculo vesicæ emingitur, non exacte permiscetur urina, sed in fundo depositus grumescit, quin hic grumus, qui interdum citra urinam excidit, dolorem circa vesicæ musculum consistentem facit; a rene vero qui mingitur sanguis & copiosus est, & urinæ exacte miscetur, videturque tota urinæ consistentia nihil aliud esse, quam tenuis ac dilutus sanguis; mox tamen sedet liquidus minimeque concretus & rubicundus.

## §. V.

Non autem confundi debet ipsa sanguinis mictio cum gonorrhœa, *Differre a gonorrhœa* sive seminis fluxu sanguinolento, *sanguinolenta* Non enim adeo est insolens, ut in iis, qui gonorrhœa laborant virulentata, ex glandulis prostaticis, valde relaxatis, ob majorem lymphæ, vel feri affluxum, non modo seminalis liquor, sed & serum mucidum, arenulis etiam refertum, interdum quoque per intervalla plane sanguis ex hiantibus nimium, aut ab acrimonia materiæ effluentis arrosis, vasorum osculis, per urethram, citra urinæ fluxum, emittatur.

## §. VI.

Probe etiam a sanguinis mictu distinguere oportet, illum sanguinis fluxum, qui fit per membri virilis integumenta. Nos aliquot memoria tenemus exempla, ubi certis periodis in viris ex ipso pene fluxit sanguinis per aliquot hebdomades purus, satis largiter, præcedente tensivo quodam in inguine ac fe-



moribus dolore. Collegit etiam ejusmodi exempla *Stalpart van der Vriel*, Cent. 1. observat. 80. Sed tum sanguis non prodit urinæ mixtus, sed stillat serosim guttatim, ex ramo vasorum hæmorrhoidalium exteriorum, qui ad pudenda excurrit.

## §. VII.

Saluta-  
ris est  
quan-  
doque,

Dein tenendum discrimen mictionis cruentæ criticæ & salutaris, a minus tali & morbofa. Illa quippe fit frequentissime per renes magna in copia, rarius & in minori quantitate per sphincterem vesicæ, citra dolorem & magnum incommodum, & redit etiam certis periodis. Contingit hoc maxime per translationem, sive quæ Græcis dicitur *metastasin*, excernendi sanguinis per menses, aut hæmorrhoides, iis vel cessantibus, vel obstructis, aut suppressis. Vidimus nos talem criticam mictionem liberaliorem, in viris, sanguine abundantibus, sive plethoricis, juvenilis, vel etiam senilis ætatis, suppresso, vel etiam penitus cessante hæmorrhoidali fluxu, aut consueta omissa sanguinis missione, periculi tamen prorsus expertem. Vidimus quoque in feminis octogenariis, vegetis & laute adhuc viventibus, præsertim si cessantibus mensibus sanguinis missio vel fuerat neglecta, aut plane omissa.

## §. VIII.

Post  
suppressas hæ-  
morrhoides.

Præterea non semel, sed aliquoties notavimus in senibus, deficiente fluxu hæmorrhoidali, item in viris ætatis consistentis, hæmorrhoidibus cæcis & tumentibus si afflicti fuerint, a motu corporis & animi fortiori, sanguinis portionem non exiguam, bruno colore instar decocti caffèæ tincti, citra urinæ difficultatem cum mictu prodiisse; qui procul omni dubio ex vasis vesicæ sanguineis circa sphincterem ejus tumentibus & apertis profectus fuit. Venæ enim hæmorrhoidales externæ communicant cum vesica & ramos etiam ad eam spargunt; minime vero, ut non-

nullorum fert opinio, de internis id putandum, quorum ramos ad vesicam excurrentes *Anatomicus* huc usque vidit nullus.

## §. IX.

Succedit vero hæc sanguinis cum mictu excretio, ex aliis sanguineis suppressis, hæmorrhoidalibus potissimum, per renes, dum videlicet sanguis accumulatus & per arteriam mesaraicam inferiorem ad tunicas intestini recti adductus, ibi cum exitum non invenit, quasi regurgitat ad truncum arteriæ magnæ, sive potius majori copia, ibi colligitur, & ad vasa renum arteriosa, quæ & copia, & magnitudine, venas, emulgentes superant, delatus, orificia eorum nimis distendendo & aperiendo, ad tubulos urinarios, qui cum arteriolarum finibus connexi sunt, ex his in papillarum oras, in pelvim, inde tandem ad uretheres & vesicam transit. Atque adeo in tali casu nec anastomosis, nec diæresis, nec diapedesis, tantopere ab auctoribus decantata, locum obtinent.

## §. X.

Vesica tamen etiam excretiori sanguinis obnoxia est, quia valde difficilis est, ob perpendiculararem & valde demissum ejus situm, sanguinis per venas ex ipsa regressus. Quo fit, ut sub hæmorrhoidibus externis tumentibus, vel internis obstructis, in plethoricis præsertim, accumulatus & ibi stagnans sanguis, præter naturam orificia vasorum capillarum ipsius vesicæ, vel magis sphincteris, aperiat atque perumpat.

## §. XI.

Maxime omnium fluxus hæmorrhoidalis suppressus, vel ex quacunque alia causa cessans, causam mictionis cruentæ, maxime illius quæ fit per renes, subministrat. Notatu dignum hanc in rem est exemplum, cujus meminit *Hercules Saxoniæ lib. 3. cap. 4.* notabilem Batavum, fluxu hæmorrhoidum suppresso laborantem, per quinque annos, ex intervallo, multum

Quomodo  
do succedat  
ex renibus

Quomodo  
ex  
vesica

Causa  
potissima  
sup-  
pressæ  
hæmorrhoidales







ter motu exercent, sanguinem emittunt urinam. Quomodo vero hoc fiat, vero videtur simillimum, quod calculus mole major ac figura asper, sine dolore quidem intra renes diu delitescere possit, nihilominus haud levem compagi renum vasculosa labem suo affricu ac compressione inducat, eorum quoque functionem naturalem lædat & sic ansam erumpendi sanguini præbeat. Scilicet quando calculus mole & pondere suo ramos venæ emulgentis comprimit, liberiores sanguinis transitum per hos impediendo, efficit, ut per arteriolas emulgentes adductus, nimia copia & impetuearum tenues & capillares ramulos, qui ultimo terminantur in tubulos urinarios, valde distendat & tandem viam sibi faciat in eos, qui secundum naturam tantum urinam vehunt, eosdemque subeat ac urinam transeat. Id quod longe adhuc magis fit, quando in dispositione ad calculum, varii generis remedia, quæ urinam & calculum pellunt, commendantur & applicantur, ut quidem communis & pessima est consuetudo, præsertim si calidiora fuerint, ex terebinthina, succino, vel junipero parata. Fit etiam tali in casu, ut calculus in renalibus tubulis incarceratus, arrosione & excoriatione dilacerando minima renum vascula, sive siphunculos, exulcerationem efficiat. Qua facta, pus cum sanguine per uretheres in vesicam instillat, & sic miſtum valde dolorificum exeunte puris & sanguinis corrupti cum urina portione, producit. Id quod tamen etiam quandoque fieri potest, quamquam rarius, ab uretheris per calculum exulceratione.

## §. XIV.

*A vesicæ  
arrosione  
& ulcere.*

Mictionis quoque cruentæ, copiosæ & valde ancipitis species est, quando ex vesica, ab acriori præsertim ibi stagnante copioso sanguine, exulcerata, mucosa valde, ex parte purulenta & cruenta materia in ejusdem cavitatem descendit. Tum enim cum

intenso ardore, intolerando dolore & difficultate urina redditur, simulque tremores & convulsivæ artuum, cum frigore & tremore stipatæ, motiones, sese jungunt. Vidimus id aliquoties in gonorrhœa desperata & inveterata laborantibus, acri simul & corrosiva materia e genitalibus profluente ac partes vicinas arrodente. Quæ labes interna ubi adest, ac renum, vel vesicæ substantia simul corrupta est, putrida materia copiose secedit, urinæ exeunt furfuraceæ, & parvæ carunculæ, aut corpora, capillos, vel vermiculos æmulantia, in urina conspiciuntur, quæ a vesica nequaquam possunt abscedere. Hæc enim resolvi nequit in ejusmodi filamenta. Sed a contenta mucosa, vel in renibus, vel in vesica, materia, concreſcunt in ejusmodi figuram & consistentiam.

## §. XV.

Accedit aliud cruentæ mictionis genus, a causa videlicet externa, contusione, lapsu in terram, levatione onerum & percussione productum. Hoc quidem in vita civili & praxi sæpius occurrit, causam tamen ipsius reddere non tam promptum ac obvium est. Quod si enim vasorum in renibus ruptio, vel continui solutio, causa foret, non tam subito, uti tamen fit, per venæsectionem & sanguinem dissolventia posset sanari. Nos potius modum ita concipiendum esse censemus, quod a contusione & contorsione vasorum, imprimis sanguineorum, & ibi stagnante sanguine, ejus circulatio per has partes læsas impediatur; hinc crescere impetum & copiam sanguinis in vasis internis; atque hæc nimium inde, præsertim in plethoricis, distenta, ut sanguis locum mutet ac effluat facere. Tale quid enim commode maxime fit in renibus, si ibi facta fuit percussio. Unde sunt inter exempla, ubi etiam a subluxatione vertebrarum, cruenta insequuta fuit mictio. Quin sicuti ex tibia amputata dysenteriam

*A violentia  
externa*



riam *Hildanus Cent. 2. Observ. 10.* sic etiam & nos observavimus, ex ossibus fracto, urinam cruentam redditam fuisse. Ut adeo facile concipiendum sit, a contusione venarum & sanguine sic stagnante alicubi, fieri posse ejusdem per urethram stillicidium.

## §. XVI.

*A torminibus  
& acrioribus.*

A torminibus atrocibus ventris, item a sumptis acrioribus purgantibus, nec non a diureticis acrioribus, ut cantharidibus, urinam reddi posse cruentam, experientia est confirmatum. Debetur autem hoc symptoma spasticis venarum stricturis, quibus liber sanguinis circulus intercipitur. Unde ex facili jamjam ratio reddenda, quare morbillis, & variolis imprimis malignis, funestus ejusmodi affectus interdum associetur. Prostant quidem observationes apud auctores, quod a vesicatoriis quæ habent cantharides, externe applicatis, cruenta fuerit mictio exorta; interim nos fatemur candide, a nobis nunquam tale quid visum vel observatum esse, ut haud injuria hanc operationem in dubium vocare liceat, ac forsan longe ab alia causa in morbo sub applicatione vesicatoriorum hæc cruenta urina excreta fuisse possit.

## §. XVII.

*Mictus  
cruentus  
periculosus.*

Omnis vero cruentus mictus est periculi non expers. Etenim licet etiam in principio salutaris, & criticus, a palindrome facta ob mensium vel hæmorrhidum suppressionem, visus fuerit; tamen quia non modo facile revertitur & vires exhaurit; sed & si error accidit, vel in diæta, aut si imprudenter stipticis tractatur, inflammatur ac corruptio facile ipsis renibus, vel vesicæ induci potest, utique periculum alit. Incidit præterea & hoc frequentissime, quod grumus quidam sanguinis ex renibus descendens, in ea parte, ubi urether ductu obliquo inseritur vesicæ, impæctus, valde infestam & difficulter sanabilem inducat ischuriam. Quan-

doque etiam congrumatur in vesicæ cavo sanguis, & sphincteri firmiter inhærens, implacabilem cum urinæ suppressione præbet dolorem, id quod etiam accidit, quando vasa sphincteris sanguinea, non secus ac hæmorrhoides cœcæ, sanguine crasso admodum turgent.

## §. XVIII.

*Periculosis-  
simus cum  
puris  
mictio.*

Ex periculosissimis mictus sanguinolenti speciebus est, quæ ex rene, vel vesica profundius læsa & ulcerata venit, & junctum habet cum acerbissimo dolore puris mictum. Interim tamen cavendum ne mucosum & glutinosum quod in urina subcruenta subinde conspicitur sedimentum, pro pure habeatur, quod supernatare magis solet. Sedimenti enim hujus sæpe tanta est copia, ut si a renum exulceratione esset, jam centies absumti ipsi fuissent. Est potius mucositas, quæ ex nimis relaxata glandulosa vesicæ & urethræ tunica, aut ex prostaticis læsis exstillat & urinæ permiscetur.

## C U R A T I O.

## §. I.

*Venerabili-  
sectio  
utilissima  
masi a  
sanguine  
abundantia.*

**P**erspectis sic paulo penitius variis excretionis per urinam cruentæ causis & sedibus, prudentis nunc est Medici, tum ad avertendas præservative, tum ad tollendas in cura differentes has causas judicium in propinandis convenientibus remediis paulo exactius adhibere. Igitur, quando ex nimia sanguinis redundantia oritur, vel metuendus est affectus, sanguinis missione nihil tutius & præstabilius est, hac tamen observata cautela, ut ipso in paroxysmo in partibus superioribus, brachio videlicet, sanguis detrahatur, & ejus mittendi copia ex virium & habitus corporis ratione æstimetur. Quod si vero a consueto hæmorrhoidum fluxu suppresso, insolita hæc evacuatio ortum traxerit, ad præservationem tutius est ve-



nam pedis aperire. Idem tenendum est, quando in colica spasmodica & vehementibus ventris torminibus, ut interdum fit, urina cruenta mingitur, ob sanguinem stagnantem & congestum circa intestinorum tunicas, exitumque per venas hæmorrhoidales non invenientem. Quin potius, quia hic affectus per certas etiam periodos reverti solet, tempestiva venæsectione ut ipsi occurramus, eo magis est necessarium.

## §. II.

*Danda  
refrige-  
rantia.*

Si a vehementi, cum, vel etiam sine plethora, orgastica sanguinis ebullitione & expansione, qualis subinde a fortiori corporis, vel etiam animi commotione, vini & calidorum sanguinem nimis moventium remediorum abusu accidere solet, malum hoc ortum suum habet, præter sanguinis per venam sectam subtractionem, nitrosis & intestinum elasticum motum sanguinis refrenantibus, sive refrigerantibus, nihil certius & præstabilius. Hoc nomine depuratum nitrum, vel artificiale, ex spiritu nitri & sale tartari confectum, cum terreis & absorbentibus mixtum, vel in forma pulveris, vel etiam potui inditum, plurimum commendamus. Cui pro vehiculo in hisce casibus serum lactis dulce, & acidulum, aqua decocta hordeacea, & sola aqua pura fontana, vel ad dimidiam partem cum Selterana, aut Tonusteinenfi mixta, decoctum cornu cervi & scorzonera, optime inserviunt, vel etiam cerevisia tenuiores, quibus tinctura rosarum, florum bellidis, cum spiritu vitrioli, minime vero salis, cujus acrimonia volatilis pulmonibus & renibus infesta est, parata, sunt sufficienti quantitate instillandæ.

## §. III.

*Alvus  
servan-  
da aper-  
ta.*

Quum alvi adstrictio, seu tardior fecum secessio, plurimum ad ingerendum, immo ad fovendum & sustentandum hoc malum habeat momenti, partim quod oriundis inde

flatibus & spasmis intestinorum æqualis sanguinis circulus & distributio impediatur, & ad unam, præsertim debiliorem partem, solito plus sanguis feratur, partim etiam, quod multæ impuræ, acres biliosæ ex prima regione particulæ ad sanguinis & humorum massam adducantur; hinc, si quid aliud, ad illud avertendum ejusque recidivum præscindendam, certe alvi laxitas & subductio admodum proficua est ac necessaria. Id vero minime purgantibus, seu acrioribus stimulantibus, vel salibus copiose assumtis, multo minus aloeticis & pilulis quas etiam refracta dosi aloec ingreditur præstandum. His enim exacerbatur malum certissime. Lenientibus potius laxantibus & quæ simul roborante gaudent virtute, id exsequendum, inter quæ, ut in omni immodica & præternaturali sanguinis excretionem, rhabarbarina, imprimis cum passulis mixta, uti sunt passulæ Corinthiæ, solutione rhabarbari per blandam inspissationem laxativæ redditæ, vel pulvis rhabarbari cum cremore tartari remixtus, nec non clysteres emollientes, ita etiam heic primas tenent.

## §. IV.

Ad vasa vero nimium in renibus *Vasa ni-  
mum* deducta & aperta roboranda & leniter adstringenda, vel etiam si eorum *laxata  
ad du-  
cenda.* substantia læsa fuerit, consolidanda, decocta, vel infusa, ex lenioribus vulnerariis & leniter constringentibus, uti sunt agrimonia, hederæ terrestres, equisetum, herba millefolii cum summitatibus, virga aurea, radix consolidæ majoris, cum melle Prussico, renibus mirum amico, quodammodo dulcificata, opem ferunt laudatissimam; quæ decocta pro re nata etiam misceri possunt cum lacte. Neque minus egregii ad demulcendum & consolidandum usus erit lac amygdalinum, præsertim si bolus Armena cum ipso ceu vehiculo sumatur.

## §. V.



## §. V.

*Renibus aut vesi-  
ca exul-  
ceratis  
danda  
acrimo-  
niam te-  
perantia* Si renum, uretherum, vel vesicę, arrosio & exulceratio præsens est, ut sæpius fit in continuo, & diutius cum doloribus vexante malo, ad humorum acrimoniam contemperandam, præcipua medentis debet esse directa intentio, eaque neglecta, nullum doloris levamen, nulla etiam partis sauciata, & læsæ consolidatio, & restitutio speranda, aut obtinenda. Hunc autem in finem nobilis est virtus sirupi dialtheæ Fernelii, item decocti Foresti, nec non ejus, quod *Mysichius* contra mictum cruentum laudat. Facit huc quoque infusum, quod præter jam dictas herbas vulnerarias, corticem radicis acaciæ, gummi cerasorum habet; nec non, pulvis ex radice altheæ, glycyrrhizæ, spermate ceti, feminibus quatuor frigidis, papaveris albi, lycopodii, & croco, cum s. q. sacchari canti conditus.

## §. VI.

*Grumuli  
sanguinis  
dissolventi* Ad dysuriam, immo ischuriam, quæ frequens, & periculosum, renalibus vel etiam vesicalibus hæmorrhagiæ symptoma esse solet, dum sanguinei grumi uretheris principium, ubi inseritur vesicæ, vel ipsum sphincterem vesicæ obstruunt, non certe efficacius, & promptius auxilium, quam aqua pura calida copiose hausta, & exterius balneum applicatum, prostat. Tum quoque præstat aquam tepidam syringa in urethram & vesicam injicere, quo acris humor diluatur, & grumuli hi dissolvantur. Atque etiam ipse *Hippocrates l. c.* eadem hæc remedia commendat, lavacrum nempe aquæ calidæ, & tepesfactoria ad locum affectum apposita. Quod si vero ob grumos sanguineos in ipsa vesica, seu sphinctere ejus obvios, spasmus oriatur, ut inde totalis, & pernicialis ischuria inducatur, interne emulsionem ex feminibus quatuor frigidis, cum lapidibus cancrorum, & antimonio diaphoretico, item pul-

verem ex spermate ceti, lapidibus cancrorum & nitro; externe vero vesicam repletam decocto florum emollientium ex lacte abdomini applicatam, nec non alvi apertionem, cum manna, vel clystere emolliente & oleoso, usus deprehendimus longe præstantissimi.

## §. VII.

Præter hæc autem omnia ad renum & vesicæ vitia detergenda, inveterata etiam sananda, nihil unquam aquis medicatis temperatioribus, ut sunt Selteranæ, Antonianæ, VVildungenes, efficacius, tanto certius si cum lacte, inprimis asinino, fuerint remixtæ. Id enim docent non modo saluberrima ipsarum elementa, sed potissimum multiplex de hoc effectu experientia, de quo omnes, qui de viribus medicatarum aquarum experti scripserunt, testimonium ferunt consensu unanimi.

## §. VIII.

Neque minus egregia virtus, & adversus hunc morbum præsidium est in lacte, nec non lactis sero. Hæc enim jam olim suo tempore in urinæ mictione cruentæ, magni fecit *Hippocrates libr. de internis affectionibus §. 17.* Si, inquit, *urina prodit veluti a bubulis carnibus assatis succus, agrotus pro temporis opportunitate serum & lac bibat; serum quidem ad purgationem, lactis autem potum faciat in tempore, per quinquaginta aut quadraginta dies; hæc si fecerit, morbum in melius vertes.* Lac quoque ovillum vel caprillum laudat *Riverius Obs. 13. Centur. 17.* nec non *Gatinarias* atque *Forestus*, qui hoc solo remedio sanguinis mictum sæpe se curasse gloriatur, ita tamen, ut unicuique dosi, boli Armenæ drachmam unam permiscuerit. Id quod etiam in graviore sanguinis mictu utique convenit, in leviori autem minus faciendum censet idem *Riverius*.

*Optimū  
acidulę  
tempe-  
rata.*

*Egrēgiū  
quoque  
lac e-  
jusque  
serum.*



## Cautela Clinica.

## §. I.

Venge-  
tionis  
causae

**D**E venæsectione in qua præcipuum tam ad curationem quam præservationem, si malum a criticis hamorrhagiis suppressis oritur, repositum est momentum, hæc adhuc tenenda: quod sanguinis missio in principio sit instituenda largior. Sic non modo evacuantis, sed & divertentis remedii vicem gerit. Quando vero sanguinis mictus suas servat periodos, duabus vel tribus ante accessionem horis, vena pertundenda, & prout corporis conditio fert, sanguis emittendus.

## §. II.

In vino  
potus

*Hippocrates l. c.* in mictione sanguinea ab ulcerato rene, vel vesica, vinum album, mellei coloris jucundissimum, probe temperatum, bibendum, peritissime suadet. Nam vina nimium spirituosæ, aut acido abundantia, ut Rhenanum, minime ubi nimia, & dolorifica adest sanguinis mictio, conferunt, sed potius vina dulcia, ut Hispanicum, Canariense, Hungaricum præstant, dum ventriculi digestionem, & simul vesicæ afflictæ favent.

## §. III.

In potu  
ordinatio

Quum porro multum inter sit, quale potus genus in usum ducat renum, & vesicæ vitio laborans; tenendum omnino, ab omnibus cerevisiis crassioribus, & acidis, abstinendum esse, potum eligendum copiosum, ex cerevisia tenui, quippe quæ medicamento aquosi instar, acre & arenosum eluit ac diluit. Testis hanc in rem gravis est *Sydenham*, qui eandem ceu saluberrimam commendat *Libr. de mictu* cruento a calculo renibus impacto pag. 705. adeo, ut ipse, quoties curru vehi debuerit, non prius rhedam ingressus sit, quam haustum cerevisiæ tenuis paulo liberaliorem ingesserit, eundemque pariter itetare ante regressum domum

versus, si forte alicubi diutius fuerit commoratus. Et hoc pacto semper sibi a mictu cruento satis præcautum esse, asserit. Observandum tamen, cerevisiam bene coctam esse debere & fermentatam.

## §. IV.

Utut motus, & exercitatio corporis conveniens magnum sit, tam ad præcavendas, quam persanandas chronicas passionem præsidium, attamen in excretionibus sanguinis, & præsertim quæ fiunt urinarias per vias, res longe aliter est comparata. Etenim vix aliud, motu corporis citiori, præsertim equitatione, ad propagandum hoc malum magis valet, quin solam loquelam paulo elatiorem, & longius continuatam, in mictione dolorifica, & cruenta, quæ per vesicam læsam fit, vidimus damnosam. Jam dudum etiam id notatum fuit ab antiquissimo Medicinæ nostræ parente *l. c. pag. 16.* perhibente: *si quis sanguinem cum urina mittit, & corpus quietum habet, citius sanabitur, si vero laboraverit, dolores multo graviores obtinebit.* Neque minus *Sydenham* in *opp. pag. 700.* suo exemplo rem optime decidit. Nam quoties permultum itineris pedibus confecit, vel in curru per platearum pavimenta vectus est, quantumlibet tardo equorum gressu toties mictum reddidit cum sanguine permixtum, quoties vero per viam regiam lapidibus non stratam, licet perquam longissime, curru vectus est, tale quid ipsi accidit nunquam. De somno etiam peritissime refert, quod ipsi curæ fuerit, ut lectum citius peteret, quo eo magis concoctio recte perficeretur, sicut ex adverso nocturnæ lucubrationes eam imminuant.

## §. V.

Inter ea vero demum, quæ in medicatione hujus mali vitanda, nihil certe esse potest infestius, quam si cruenta hæc mictio, sive ex renibus, sive ex vesica fiat, sive critica, sive symptomatrica sit, remediis ad-

In corpore  
potus  
motusQuæ sunt  
glenda



adstringentibus, fluxum nimis impetuose sistentibus, ut communis fere, & detestabilis medentium error est, excipiat. Hoc enim facto, agumis intra vasa retentis inflammationes fiunt, exulcerationes, & putredines. Sicuti enim hæmoptysis iisdem his remediis tractata, quam facile in inflammationem, & phthisin, vel pulmonum exulcerationem, ita etiam mictus cruentus in inflammationem, exulcerationem, & putredinem abit. Nihilominus tamen, si excretio sanguinea effusissima fuerit, cum summa virium jactura, mixturam, qua *Sylvius* feliciter in cruento mictu usus, ex aquæ plantaginis uncis duabus, portulacæ, cinnamomi, aceti destillati ana uncia una semis, coralliorum rubrorum præparatorum, lapidum cancrorum, terre sigillatæ ana scrupulo uno, laudani liquidi granis tribus, sirupi coralliorum Quercetani, vel de symphito Fernelii, q. s. ad gratum saporem, experientia invenimus olim comprobata.

## §. VI.

Exter-  
na ad-  
hibenda

Externorum quoque non inutilis est ad lumbarem regionem applicatio. Hoc nomine emplastrum spermatis ranarum, quando cum alumine vel saccharo saturni, & pauxillo camphoræ miscetur. Vel meretur etiam commendari albumen ovi cum alumine conquassatum, & subfrigide regione pubis appositum, sub forma epithematis. Nam blanda refrigerante, & adstringente vi, hæc, sanguinis impetum quodammodo refrenant.

## §. VII.

Ad ar-  
cedam  
recidi-  
vā ser-  
vādam

Qui ejusmodi malo subinde conflantur, vel ad illud inclinant, providam omnino, & diætæ, & vitæ regiminis curam habeant necesse est. In victu quam maxime a vini potu, ab omnibus aromatibus, præsertim allio & cepis, radicibus aperientibus, ut petroselini, pestinacæ, selle-ri, asparagi, prorsus abstineant, ne-

que somnum in dorso capiant, atque nimis calidis pannis, seu pellibus illud suffulciant. Vitandus etiam est nimis potus calidus infusi Thee, vel aliarum herbarum, sed potius frigidus, vel subfrigidus concedi debet. Decoctum potissimum cerasorum exsiccatorum in ptisana, non sine euphoria, sæpius pro potu sumendum commendavimus.

ENARRATIONES MOR-  
BORUM.

## OBSERVATIO I.

**F**emina illustrissima 52. annorum, sanguineo-cholerici temperamen-<sup>Mictus  
cruentus  
ex ple-  
thorâ</sup>ti, ab ineunte fere ætate catharris, tussi, cephalalgis, vere præsertim & autumno, fuit obnoxia. Menses semper largiter fluxerunt, qui nunc a biennio penitus cessarunt. Ex quo tempore doloribus ex calculo sæpius conflictata, subinde quoque intensos spasmos, tensiones, & dolores occuparunt abdomen, cum alvi strictura & urina aquosa copiose secedente. Nunc sæpius in extremitatibus manuum, & pedum dolores persentit satis exquisitos, tunc maxime, quando dolores ex calculo conquiescunt. Nam his presentibus protinus artuum dolores evanescunt. Anni vero spatium ferme est elapsum, ex quo mictu cruento, sine omni dolore lumborum vel artuum afflicta, qui potissimum sub motu corporis, qualicunque etiam recrudescit. Originem hujus profluvii derivandum esse arbitratur ex nimio lithontripticorum a Medicis exhibitorum usu; quotiescunque ad cruentam mictionem comprimendam utitur remediis protinus se pejus habet, & de tensivo hypochondrii sinistri dolore, de nausea, de flatibus, capitisque dolore conqueritur. Contra hæc vitia tollenda aliquoties secta est pedis vena, quam in brachio minus belle potuit ferre, invalescentibus inde mox sympto-



ptomatibus . Frequentavit acidulas Selteranas, thermas Emblesenses, sed frustraneo effectu. Exegit a me salutare consilium, imperavi, ut singulis binis mensibus, sanguinis missionem sive per scarificationem, sive per incisionem venæ in pede admittat; secundo, ut loco potus ordinarii utatur sequenti decocto: Recipe santali rubri, radicis scorzonerae, ana unciam, cremoris tartari drachmas duas, sacchari Canariensis unciam, coque in mensuris duabus aquæ communis per horæ dimidium: in fine addantur guttulæ duæ vel tres olei de Cedro, cum saccharo subactæ. Infusum quoque theiforme ordinavi ex summitatibus millefolii, floribus papaveris rhœados, hyperici, herba veronicae, pilosellæ, & semine fœniculi adornandum; & ad singulas lunæ phases, ad alvum laxandam assumere jussi decoctum rhabarbarinomanatum, & circa proximum ver denuo cura fontis Selterani per integros duos menses, cum tripla lactis asinini parte remixti adhibere: Aliquot menses, post relatum mihi est ex Holsatia, insignissimum mali levamen ab hac cura fuisse expertam, feminam illustrissimam.

#### *Epicrisis.*

Sanguineam mictionem infestare quam maxime feminas plethoricas, post cessantem menstruam purgationem, neglecta sanguinis missione, sub victu præsertim lauto, & motu corporis concitatori, multis exemplis id in praxi confirmatum habemus. Nihil vero ad calculi generationem, & mictum cruentum proritandum si dolores jam adsunt lumborum, magis valere, quam inconsulto, & temere, calculum quæ pellunt propinare, etiam nobis comperitum est. Optandum itaque foret, ut omnia lithontriptica, quæ rarissime optatum habent usum, e praxi Medica ejicerentur, præsertim si acriora, & calidiora fuerint; neque enim ante affectum nephriticum; ne-

que in eo, neque post eum, utilitatem quandam habent. Deniq; quam circumspectam, immodicæ omnes sanguinis profusionet, tractandi methodum expostulent, per adstringentia, etiam nostra historia docere poterit, quum represso sanguinis fluxu, mox sæva interna abdominis partes inceserunt symptomata. Venæ in brachio apertio, ubi jam plurimum sanguinis per inferiora profluxerit non semper tuta & utilis: quia largius extracto sanguine partes vitales, cor & cerebrum, eo si deferuntur, tota functionum œconomia labefactatur. Fons Selteranus cum asinino nuptus lacte, in omnibus renum vitiis, & doloribus ac spasmis nervosarum partium in scorbuticis, est præsidium omnibus aliis longe superius.

#### OBSERVATIO II.

Vir 60. annorum, olim hæmorrhoidum fluxui circa æquinoctia obnoxium, per annum iis caruerat & pruriginosa scabie in toto corpore, præsertim circa anum, fuerat vexatus. Ad hanc tollendam variis usus est medicamentis sanguinem purificantibus, ut tinctura antimonii, tinctura sulphuris tartarificata, quam cum decocto temperato ultra mensem assumsit. Externe, unguento ex balsamo sulphuris, cum oleo amygdalarum dulcium, & saccharo saturni parato, frequentius cutem inunxit. Quibus remediis adhibitis feliciter quidem molestum cutis malum evanuit; sed præter omnem opinionem, quum urinam redderet, apparuit illa crassa, sanguineo colore tincta, successitque mox in fundum subnigricans cruor. Sic reddebatur aliquoties lotium, semper fere sine incommodo, sed quando alvum exonerabat, sub illo nisu, immani fere dolore cruciatus fuit, cum magna stranguria. Venæsectione in pede, singulis mensibus instituta, ex-

*Ex re:  
pulsa  
scabie  
cruentus mictus*



hibitis simul infusis ex manna, rhabarbaro, passulis & nitro, laxantibus; ac decocto ex avena, radice cichorii, floribus papaveris rheados, summitatibus millefolii, successive malum discessit.

*Epicrisis.*

Notatu in hoc casu perquam dignum est, quod a retropulsa scabie sanguis cum mictu prodierit. Sed dubio omni procul id factum esse arbitror, quod materia serosa, tenuis, caustica, renum & vesicæ vasis se insinuavit & acrimonia tennes eorum furculos fauciat, non aliter ac id a cantharidibus intro subinde obtingere solet. Notabile etiam hoc est, quod exiguus dolor fuerit, quia sanguis ex renibus promanavit, quando urina copiosa emissa fuit, gravior autem factus sub alvi depositione, quia sub vehemēti nisu falsus sanguis & acris sine dubio ex vesicæ vasculis expressus, dolorem auxit.

OBSERVATIO III.

*Mictus  
cruentus  
venæse-  
ctione  
curata*

Accersitus ante aliquot annos ad Quæstorem, virum quinquagenarium floridi sanguinei, & carnosus habitus, qui semper sanus ac vegetus, nunquam etiam dolore ex calculo vexatus, vel hæmorrhoidum fluxu affectus, & qui nec sanguinis missionem per totam vitam nisi bis, vel ter admiserat; is mane quum surgeret, emisit, præter omnem expectationem, sine magna alteratione, urinam cruentam. Ego quum advenirem, fluxus jam per duos dies durarat, sedimentum erat valde turbidum, crassum, subnigricans. In patina uncias aliquot hujus urinæ probe subactæ super prunas ardentes curavi incoquendas, & vix dimidia parte exhalata, crassamentum instar albuminis ovi coagulatum, nigricantis tamen coloris remansit, non secus ac sanguis quando in cochleari argenteo supra candelam incoquitur. Inquisivi in hujus fluxus, insolentis plane, causam,

nullam tamen aliam afferre potuit, quam quod liberalius potasset vinum in urbe vicina, & post nocte mense maio valde frigida, mane per tria milliaria equo concitatus vectus sit. Altero enim die post, hoc symptomaz fuit sequutum. Quare quum pulsus adhuc satis magnus, & citatior esset venæsectionem in manu, & loco cerevisiæ, quam ordinario bibebat valde saturatam, decoctum avenaceum, radice scorzonæræ, cichorei, floribus papaveris rheados, nitro, & melle paratum; item pulverem præcipitantem cum liquoris anodynii aliquot guttis assumendum; infusum quoque theiforme ex herba veronicæ, polygoni, summitatibus millefolii, floribus papaveris rheados, semine fœniculi sæpius hauriendum suasi, & præcepi, ut a vino abstineret, & singulis anni quadrantibus venæsectionem admitteret. Quo facto, non ulterius missionem cruentam est expertus.

*Epicrisis.*

Non semel sed sæpius observavi copiosi, & sinceri sanguinis mictum ex improvise simul, & semel factam & per intervalla ex levi causa recurrentem sine ullo apparente signo vel vestigio calculi renalis ante & post illum fluxum, idque in corporibus sanguine temperato valde diffluentibus, nullum dubium est quin in plethoricis, præsertim post equitationis motum facto concitatori sanguinis ad renes affluxu, & impeditiori ejus per venas refluxu, extremitates arteriolarum emulgentium, quæ principium canaliculorum hydragogorum constituunt, nimis dilatata & disrupta, eum effuderit in canaliculosam, & papillosam renum substantiam. Tali in casu quies, aquæ frigida potus, abstinētia ab omnibus spirituosiss, venæsectio, omnium optima sunt præsidia.



## OBSERVATIO IV.

Mictio  
cruenta  
cum do-  
lore is-  
chiadico  
extraso

Laboravit ante aliquot annos vir consularis vicinæ celebriſ urbis quin- quagenarius, lautæ & vinoſæ diætæ deditus, tranquillî inſuper vitæ ge- neris, dolore gravativo lumborum, cujus cauſa conſulti Medici judica- bant eſſe calculum renalem. Quidam tincturam *Amelungii* lythontripti- cam, alii baccas juniperi quinque ſingulo mane devorandas ſuaſerunt; ſed nihil inde levaminis conſecutus eſt, ut potus dolores invaluerint, ip- ſum lateris dextri femur in conſen- ſum trahentes. Commendatus ipſi fuit pulvis ſpecificus antinephriticus, cujus baſis millepedes, & ſal ſuccini vola- tile erant quem circa ſingulas lunæ phaſes aſſumſit, urinæ quidem fluxus liberalior inde redditus ſed per men- ſem uſurpato hoc pulvere, obſervavit quum urinam redderet, eam ſanguinolentam, ita ut interdum plus, in- terdum minus cruoris haberet. Me- dicus ordinarius a ſpecifico hoc ut pe- nitus abſtineret ſuaſit, & medicamen- ta ad fluxum ſanguinis reſtringendum dedit, unde mictio reſtincta quidem, ſed non multo poſt ardor in oſſe ſacro ingens cum difficultate magna feces egerendi fuit ſubſequutus, dolore mox totum femur, qui ad pedem uſque ſe protendebat, occupante. Hinc poſtea venæſectione in pede afflicto admiſſa ſatis larga, & deco- cto temperante uſurpato ſuperius a nobis deſcripto convaluit.

*Epicriſis.*

Ex hac conſtat hiſtoria, aliisſque innumeris comprobari exemplis po- teſt, pernicialem admodum eorum quæ urinam, & calculum valide pel- lendi pollent facultate uſum eſſe in plethoricis, & quando de doloribus lumborum conqueruntur. Optandum certe foret, ut acriorum, & nimis calidorum diureticorum, quæ ſale ſubtili cauſtico veſicatorio agunt, ut ſunt quæ ex infectis prodeunt medi-

camina, non ſecus ac aciora & va- lentiora purgantia penitus in praxi & uſu medico exularent, quippe na- tura in excretionibus blande vult duci, non vi cogi; fortiora enim diuretica nunquam non teneram & vaſcuſoſam renum ſubſtantiam læ- dunt, calculoſque ſi non adſunt in- generant, vel ſi adſunt fortiter ex- pellunt, vaſiſque ſauciatis inde cruo- rem educunt aut inflammationes, & exulcerationes contumaces, & exi- tiales relinquunt. Novi a crebriori pulveris millepedum in aſthmate hu- morali uſu corporis atrophiam, & teneſtam renum exulcerationem cum febre hectica ſucceſſiſſe. Si quis au- tem ejuſmodi cauſticis, cujus generis ſunt cantharides, aranearum, ver- mium majalium, & millepedum ſpecies, ut in gonorrhea virulenta nonnunquam accidit, uti velit, ſua- ſor ſum, ut nunquam ſine miſcela- nitri & camphoræ quæ omnium opti- ma eorum ſunt corrigentia, ea ad- hibeat.

## OBSERVATIO V.

Ineunte anno noctu colica præhen- debatur vehementi ſexagenarius vir, qualem jam ante novem etiam men- ſes circiter fuerat perpeſſus, cui nunc acceſſit mingendi difficultas. Poſt aliquot dies remiſit quidem colicus dolor, ſed frequentior ad matulam ſtimulus fuit perpetuus, quin quan- doque ſine cauſa conſpicua, mirum fuit exacerbatus. Interjecto aliquo tempore accedit tertium mictus ſan- guinis, qui quandoque per octo & quatuordecim dies ſuccedit, quibuſ- que elapſis urina iterum quidem tan- tiſper inclareſcit, ſine tamen ægroti levamine. Atque hic mictus cruen- tus citius aut ſerius impetit, quo magis vel minus corpus motus exa- gitavit. Sic miſer jam ſeptem anni quadrantes ſub perpetuis viciffitudi- nibus affligitur, nec unquam penitus ceſſavit dolor, licet interea variæ ad-

De rae  
ra. mto  
ctus  
crueti  
ſpecie  
ex ve-  
ſica e-  
juſque  
ſphina-  
ctis  
vaſis.



adhibitæ sint medicationes, inter quas etiam bis repetitus Egranarum potus. Post emissum in pede sanguinem, & appositos ano hirudines, datisque subinde per epicrasin laxantibus, sincerus sanguis cum lotio non amplius profluxit, sed postquam refrixerat urina, dimisit crassum subrubicundum sedimentum, tandemque planæ moleculæ sanguinis congruati exciderunt, intra aliquot dies, vel viginti, quarum nonnullæ magnitudinem digiti fere auricularis equabant & quasi in carnem videbantur mutatæ. Post aliquot dies ægrum incessit colica nephritica, & lapillos binos miliares elidebat, atque elapsis quatuordecim diebus eodem modo. Ex eo urina aliquamdiu mansit pellucida, neque etiam quicquam ex ipsa ad fundum secessit, sed illud crebrioris mictus malum mansit, ita ut singula hora dimidia, quin quadrante, matulam poscere cogeretur cum ardore in ano, tenesmo & spalmo circa eandem, ac pungente ardore, scindente tam exquisito in glande dolore, ut rigida penis subsequeretur tenio. Interim urina nunquam plane fuit suppressa, alvus autem plerumque officii obliviscitur & flatibus tumet, appetitus quoque vacillat cum ructibus, successorium motum ferre nequit æger & circa lunæ phases tam notabile doloris percipit incrementum ut plane non sese movere ipsi sit licitum. Somnus propter crebram urinæ emissionem interruptus. Vires mediocri adhuc sunt firmitudine. In osse sacro & dorso dolor non sentitur; sed in pubis regione exterius quandoque pruritus, interius pressorius, & tractorius dolor versus dextrum latus, quasi tibi præternaturale quid confiteret, qui sensus, motu, tussi, sternutatione exacerbatur. Urina interdum tanta vehementia exitum molitur, ut vel involuntarie erumpat, vicissim ponnunquam talis in membro est sensatio ac si exstillaret urina, quod tamen non fit. Post a-

liquas vero sanguinolenti mictus inducias, rediit tandem ille eadem vehementia. Quare meum postularunt consilium, qui quidem candide edixi periculo non vacare ejusmodi malum inveteratum maxime & in senili corpore. Ne tamen ex neglectu ejus corruptio & sphacelus lethalis partibus affectis accedat, utique omni cura esse providendum. Hunc in finem suasi ut quotannis minimum ter, vena in brachio pertunderetur, dein ut æger a vini ac cerevisiæ potu abstineat, ac ordinarium habeat decoctum ex radice chinæ, sassaparillæ, ligno santalo rubro, & citrino, nec non radice glycyrrhyzæ, & stomachi causa unicum vini Burgundiaci aut similis vitrum bibat. Tum videndum, ut alvus semper sit aperta, idque ope maxime palliarum rhabarbarinarum, aloetica vero & acria purgantia cum cura esse vitanda. Exterius nihil forte conducibilis aqua sclopetaria, triplicatis linteis pubis, & perinæ regioni noctu maxime admota. Sic me spem fovere haud dubiam fore, ut æger exinde levamen obtineat expectatam.

### *Epicrisis.*

Venit redditus a nostro mictu sanguis, non ut communiter fit, ex renum vitio, aut vasorum emulgentium apertione, sed potius ex ramo venæ hæmorrhoidalis externæ hypogastricæ, quæ in viris præsertim, ad vesicam maximeque ipsius cervicem complures furculos spargit, testantibus Anatomicis oculatissimis, inprimis *Baubino*. Est itaque mictus cruenti genus oppido rarum, non tamen desunt inter observata medica ejus exempla. Sic *Hæchterus*, in *observ. Dec. 1. schol. in cas. 2. fundit sæpius*, ait, hæmorrhoidis externa sanguinem in vesicam, ut absque vitio renum mingatur, quod in nobili quodam licuit videre. Ejusdem indolis, & noster perquam similis casus relatus legitur in *M. N. G. Dec.*



*Dec. 1. Ann. 8. Obs. 23.* Quod autem ex hoc fonte venerit sanguis, testatum faciunt pathemata. Nullum enim in lumbis & renibus adest dolor, sed continuus ad mingendum stimulus, cum doloribus in ano, pube & perineo multis, & variis. Quod si itaq; sanguis, sub vita præsertim sedentaria, accumulatur & circa hæc loca stagnat, vasorum in cervice vesicæ orificia, tandem dehiscunt, & sanguinem in vesicæ cavum fundunt, tumque multum sanguinis illabitur. Quod si vero per tunicas aliquid tantum mora transudat, sensim coagulatum, & cum vesicæ mucosum miscetur, concrescunt inde ejusmodi moleculæ sanguinis congrumati quasi membrana vestitæ, quæ postea excernuntur. Atque idem etiam factum esse habet allegata ex M. N. C. observatio, conceptis sic verbis: *tandem cum maximo cruciatu & ardore vehementi in ima pube, & circa virgam, varios magnos, ac oblongos sanguinis grumos, instar hepatis lucii piscis, mingendo ejaculabatur.*

## OBSERVATIO VI.

*Mitio subatra cruenta instar soffi, nata.* Ante 12. circiter annos, vir generosissimus, aulæ Cellensis minister, meam opem ac consilium requisivit. Is jam septuagesimum, & sextum annum complevit constitutionis, per omnem ætatem validæ, & robustæ, ut nunquam fere ægrotaverit; lautiori quidem gaudebat victu, ita tamen, ut in poculis, & venere modum servaverit. Solitus erat longo abhinc tempore, sub cælo sereno corpus equitatione exercere, idque, quum paulo fecisset validius, mane urinam, quæ antea semper erat naturalis, bruno & sub atro colore tinctam prodisse observavit, aliquot sanguinis grumis urinalis vasis fundo adherentibus, & quotiescunque equitatione vel alio fortiori motu paulo validius corpus agitare, idem expertus est; quamdiu vero corpus perman-

sit quietum, urina & colore & consistentia naturali erat, nihilque vitii habebat. Per aliquot jam menses hoc insolito accedente affectu, de nulla corporis lassitudine, de nulla circa pubis vel lumborum regionem molestia, de nulla dysuria conquirebatur, nulla unquam calculi vestigio apparente, neque ullas unquam molestias ex hæmorrhoidibus percepit: interim bene appetebat, dormiebat. Venæsectionem per totam vitam rarissime admisit. Delectatus multum cibis qui grata acrimonia linguam feriunt Germanice *vom hohen Gout*. Medici ejus loci peritissimi de morbi causa, & effectu nihil certi decernere poterant, & medicamentis, quæ nihil proficiebant exhibitis, per litteras petiit meam opem, & consilium. Judicavi mali originem & causam esse plethoram, quæ etiam senibus bene appetentibus, & lautius victitantibus familiaris esse solet, præsertim si a sanguinis missione, quæ in florida senectute longe utilissima deprehenditur, prorsus abstineant. Suasi itaque singulis mensibus venæsectionem in brachio, parca tamen manu, ad uncias tres vel quatuor administrandam, & ut loco potus ordinarii decoctum ex radice chinæ, scorzonæræ, rasura cornu cervi, santalo rubro, & aniso stellato biberet; subinde quoque pulverem ex lapidibus cancerorum rhabarbaro, & saccharo assumeret, ab omnibus acribus, & spirituosius abstinere, corpusque in quiete fervaret. Quorum remediorum energia ita adjutus est ut generosus ejus gener, exactis aliquot septimanis rescripserit, illum immunem hoc malo fuisse redditum. Post duos vero annos, marasmo eum extinctum esse mihi fuit relatum.

*Epicrisis.*

Binos, quoad omnes propemodum circumstantias, similes casus, olim in praxi mea observavi. Ante 20. annos generosus cameræ consilia-



filiarius octuagenarius mihi aperuit, se ultra decem fere annos, urinam per intervalla, sanguineo colore tinctam grumis interdum prodeuntibus ex ipsa urethra reddidisse, citra ul- lum tamen incommodum sive sani- tatis offensam. Nullam potuit mali hujus causam assignare nisi quod per multos annos, vinum quod in vinea sua rubrum, sive Rosacer fuit natum, in frequentissimo, & quotidiano fe- re usu habuerit. Monui ut abstine- ret ab hoc, sed respuebat hoc consi- lium, eo quod jam per 20. annos, hoc vino fuerit usus. Secuta vero postea est crebrior cruoris mictio, quam lenta excepit febris cum maras- mo. Ante aliquot lustra in femina 70. & aliquot annorum vegetæ e- tiam constitutionis similem urine co- loris observavi per certa tamen in- tervalla apparentem. Colorem u- rinæ bruno nigricantem in senili æ- tate quam maxime familiarem cru- ditatibus acidis, sanguini permixtis, dum facile omnia alimenta in eo- rum ventriculo coalescunt, tribuen- dum esse existimo, quæ humorum a- cida acrimonia plurimorum senilium morborum matrix ad vasorum san- guineorum in renibus referenda ori- ficia etiam multum conferre vi- detur.

## OBSERVATIO VII.

*Hebreus* Hebreus 60. annorum ab aliquot jam annis doloribus ex calculo valde excruciat, tandem ingentis magni- tudinis unum cum cruenta excrevit u- rina, postea immani dolore in regio- ne pubis corripitur, urina penitus sup- pressa, alvoque ita obstipata, ut nec flatus nec quicquam excrementi inde prodiret, quæ per quatuor dies sym- ptomata persisterunt, tormentis ita adauctis ut nec quicquam somni ca- pere neque in uno loco quiete consi- stere potuit. Ad urinam eliciendam catheter sed sine effectu fuit applica- tus, quum vix guttulæ aliquot uri-

*Hoffm. Syst. T. IV. P. II.*

næ profluxerint; hinc non sine ratio- ne judicavimus uretheres ubi vesicam ingrediuntur a grumis sanguinis esse obstructos, quare pubis regioni ve- sicam speciebus emollientibus in la- tæ coctis repletam applicari jussimus: ingentem quoque infusi herbæ vero- nicæ, urticæ mortuæ & radice gly- zirrhicæ quantitatem quotidie ebibe- re debuit, præterea clysteres oleosi e- mollientes in anum injecti plures, & nil levaminis inde fuit consecutus, auctus potius ab urina suppressa fuit dolor in abdomine, & lumbis cum extremorum refrigeratione mortique vicinus in continuo sopore jacebat æger: quando paululum se recollige- bat de summis querebatur anxietati- bus, quæ respirationem demere vide- bantur. Dedi ad alvum quæ erat strictissima laxandam sequentem mix- turam: recipe mannæ electæ uncias duas, solves leni calore in aquæ flo- rum acaciæ uncias sex, adde olei a- mygdalarum dulcium unciam semis, nitri purificati grana 12. essentia corticum aurantium drachmam se- mis, qua duabus vicibus assumpta, atque intra quatuor horas petita, habuit inde octo sedes, quibus copio- sa materia stercorea rejecta, & simul tanta urinæ profluxit copia ut aliquot repleverit matulas, quæ vero pri- mum prodiit instar loturæ carniū erat. Horum remediorum efficacia ex orci pene faucibus ereptus miser, qui postea adhibiti idoneis stomachi- cis, roborantibus, bono vitæ regimi- ne accedente, pristinam valetudinem recuperavit.

*Epicrisis.*

Extra dubium est a sanguinis gru- mis obstructum fuisse introitum ure- theris in vesicam qui transverlim sit per ejus membranas; id vero mi- rum est, per alterum vacuum uri- nam in vesicam non descendisse, quod a spasmodica vesicæ constri- ctione factum credibile est, quia e- tiam vicinum intestinum rectum per



consensum arctissime fuit occlusum . Perquam notabilis etiam est singularis effectus decocti mannati in hoc casu , quod una cum clysteribus , & cataplasmatibus emollientibus , spasmo harum partium relaxato , urinæ liberum iter & fluxum conciliaverit . Neque semel sed iterum a nobis observatum est , quæ alvum blanda virtute solvendi valent , in morbis vesicæ commodum etiam præstare solatium .

## C A P U T VII.

## De hæmorrhagia cerebri.

Theses & Observationes  
Pathologicæ .

## §. I.

Quid in-  
telliga-  
tur per  
hæmor-  
rhag.  
cerebri.

**H**æmorrhagiæ cerebri appellatio-  
ne , nos fortem , & pernicia-  
lem illam apoplexiam sanguineam  
comprehendimus , quæ ab effusione  
cruoris in cerebro , & ruptis ibi , ci-  
tra violentiam externam , vasculis ,  
oritur , & subito functiones anima-  
les & vitales quoque pessumdat atque  
extinguit .

## §. II.

Hæc de-  
monstrat  
defun-  
ctorum  
sectio-  
nes

Hæmorrhagiam cerebri existere re-  
vera , ejusdemque proximam causam  
esse rupturam vasorum in eo , luculen-  
ter monstrant sectiones anatomicæ in  
defunctis institutæ . His enim in com-  
perto est , sanguinem modo inter cra-  
nium & duram matrem , modo inter  
hanc & piam , frequentius hanc in-  
ter & cerebrum , frequentissime in  
hujus anfractus & ventriculorum me-  
ditullium , quandoque in basin ipsius ,  
interdum minori , interdum etiam  
fatis magna copia , effundi . His  
quoque constat : ipsa sanguifera va-  
sa , per cerebri membranas , & cor-  
ticem discurrentia , sanguine nunc  
liquido , nunc concreto turgida , &  
veluti aneurismatica nunc etiam ru-  
pta conspici . Possunt hanc in rem  
legi historicæ apoplecticorum disse-

ctorum a Clarissimo Wepffero con-  
signata .

## §. III.

Pars igitur primario affecta est ce-  
rebrum , quod ad concipiendam san-  
guinis stagnationem , & inde oriun-  
dam hæmorrhagiam admodum dispo-  
situm . Etenim insignis sanguinis  
quantitas , & minimum teste *Malpi-  
ghio* , tertia pars , illius qui ex ven-  
triculo cordis sinistro in universum  
corpus ejicitur , eo per quatuor ca-  
paces satis arterias adducitur . Dein  
arteriosa hæc sanguinem advehentia  
vasa tortuosum admodum ubique ,  
maxime in pia matre , servant tra-  
ctum . Tum quod maximum , ipsæ  
hæ arteriæ , postquam subierunt cra-  
nium , deposita exteriori tendinea ,  
potissimo motus systaltico instrumen-  
to , tunica , tenuiores longe sunt ,  
quam in reliquo corpore , & quasi  
venas referunt . Ne dicam , adeo de-  
mum gracilescere hæc vasa , ut san-  
guinis per ipsarum angustias in venu-  
las socias transitus , sensus plane sub-  
terfugiat . Quæ omnia faciunt utique ,  
ut sanguis heic tardius circumeat , fa-  
cile etiam subsistat , aditu in venas  
expedito facile intercludatur , novi-  
que accessu cumulatus continuo , al-  
veos canalium admodum dilatet &  
ad consequutura plura mala ansam  
præbeat .

Cerebri  
ejusque  
vasa ad  
sangu-  
inis e-  
missio-  
nem  
valde  
dispo-  
sita.

## §. IV.

Inprimis præsentē jam ejusmodi  
dispositione , facilis postea in ruptu-  
ram & effluxus est transitus , tum vi-  
delicet , ubi accesserunt causæ , quæ  
sanguinem majori copia & cum im-  
petu ad caput congerunt , ejusdem in  
ipso stagnationem invitant ac liberum  
per venas recursum valide sufflami-  
nant . Sic enim demum fit , ut vasa  
non modo cruore turgeant , sed &  
ab appulsu jugiter novo nimium far-  
cta , dehiscant , rumpantur , & san-  
guinem effundant . Id quod maxime  
in piæ meningis nec non corticalis  
cerebri substantia vasculis , æque ac  
iis , quæ choroideos plexus consti-  
tuunt ,

Ruptio  
fit in  
mini-  
mis ple-  
gis &  
cerebri  
arteri-  
olis.



tuunt, contingere, cadaverum sectione constat.

§. V.

*Functio-  
nes ani-  
males  
& vita-  
les inde  
ledun-  
tur &  
tandem  
extin-  
guuntur*

Per effusum in cerebro cruorem non modo subtilissimi liquidi, quod motum robur & sensum præstat partibus, secretio & distributio per nervos impeditur sed & totus circularis sanguinis per cerebrum motus turbatur, & intercipitur ubi animales æque ac vitales functiones elanguescunt & tandem penitus extinguuntur. Quæ omnia sic omnino contingere, testatur faciunt pathemata illa truculenta, quibus hæc hæmorrhagia stipatur, & e quibus, ceu dignosticis signis, etiam cognoscenda. Nimirum qui eam incurrun, in terram concidunt subito, omni mentis vi ac cogitatione, sensu quoque ac motu privantur omni, cuncta membra sunt languida & flaccida, lingua obmutescit, palpebræ suspensæ & os hians comparent, deglutitio sublata, & alvus, & vesica, retinenda excrementa, haud raro sponte dimittunt. Atque hæc omnia læsam cerebri functionem, & elanguescens inde musculorum robur produnt luculenter.

§. VI.

*Hæmor-  
rhagia  
cerebri  
effectus  
atque  
sympto-  
mata.*

Difficili autem & intercepto sanguinis per capitis interiora commeari tribuenda reliqua quæ observantur phænomena. Quod scilicet genæ rubicundo admodum & florido colore suffundantur, facies tumeat, vasa per faciem & maxime tempora discurrentia, turgeant, rupta in ore, naribus ac auribus sanguinem interdum, maxime post mortem, fundant, quin accedente putredine, caput in miram distendatur magnitudinem; quod a sanguinis per carotides internas aditu denegato, & eapropter in externas facto impetu, merito derivandum. Quod oculi distendantur, promineant, rigidi & quasi vitrei compareant ac lacrimas uberius fundant; id lymphæ a sanguine stagnante copiosius secedente in acceptis ferendum. Quod cor valide

pulset, arteriarum quoque pulsus in principio magnus postea languidus ac rarus sit. Quod spiritus sit, difficilis cum stertore, & rhoncho, id sanguinis pulmones obruentis moli, eorundemque eapropter intercepto æquali reciproco motui, aerem rite nec expellenti, nec admittenti, imputandum. Quod demum vomitus & convulsiones cum dentium stridore variæ accedant, non aliunde, quam a sanguine in duræ matris vasis herente eandemque ad spasmum sollicitante, deducendum.

§. VII.

Iam sicuti omnis omnino hæmorrhagia supponit ac præviam habet, sanguinis, in illa ubi succedit parte, nimirum ad rupturam usque congestionem; ita quod eadem in hac, quæ in cerebro fit effusione, præsto sit, est utique certum. Evincunt enim id omnes, quæ morbum hunc antecedunt ac prænunciant passionem, quas inter præcipuæ, capitis cum vertigine temulentia, ejusdemque præcipue in occipite, dolor pressorius, & gravativus, fornicationis sensus in artubus, visus modo per caligines, modo coruscationes, turbatio, oculorum humiditas & intumescencia, aurium susurrus atque tinnitus, memoriæ & ingenii aliqualis hebetudo, somnus profundus, incubo & insomniis stipatus, venarum jugularium turgescencia ac faciei præter consuetudinem rubore suffusio.

*Signa  
antecedentia*

§. VIII.

Quemadmodum porro ad inducendam sanguinis in certa parte congestionem, præter ejusdem abundantiam, tum ipsius validior per spasmum in aliis partibus eo suscitatus appulsus, tum etiam partis congestionem admittens, quædam debilitas, concurrunt; ita, quin eadem hæc ad gignendam eam, quæ in cerebri vasis colligitur congestionem, conferant, neutiquam dubitandum. Huc enim redit omnis & efficacia illarum causarum, quas ad ingignendum hunc morbum

*Incessus  
difficilis  
cursus.*



ceu antecedentes , & procatareâicas conferre ratio docet, experientia confirmat.

## §. IX.

*Pletho.* Ut de sanguinis plenitudine primum dicamus, propter eam omnino accidit, quod hæmorrhagia hæc frequentissime incidat in ætatem virilẽ, & juxta *Hippocr. aph. 57. sect. 6.* ab anno quadragesimo usq; ad sexagesimum ubi confecto corporis augmento, succi in vasis plus justo non modo accumulatur, sed & densiores fiunt. Hinc porro fit, quod qui temperamenti, sic dicti sunt sanguinei, nec non obesi, cum iis, qui lautam, otiosam, & sedentariam vitam sectantur somnoque indulgent, perniciali hæmorrhagiæ huic admodum sint obnoxii. Idem accidere iis, qui propter suppressas, aut imminutas spontaneas hæmorrhagias, nec non omissas diu suetas antea artificiales subtractiones, nimiam sanguinis copiam colligunt, & coacervant, uberius testantur Medicorum observata. De neglecta sanguinis missione testes sunt *Acta Medic. Uratislav. 1702.* de narium hæmorrhagia suppressa *Hildanus Centur. III. Observ. XI.* de hæmorrhoidibus retentis *Hippocrates, Amatus & Zacutus Lusitani*, & qui primo loco ponendus fuisset, *Lancisus, de subit. mortib. de mensibus*, & lochiis cohibitis cum *Fontano Acta Natur. Curios.* passim, de vicaria etiam mensium per os, & nares vacatione *Hildanus Centur. III. Observ. XII.*

## §. X.

*Spasmi in remotis partibus multum ad generandum morbum faciunt.* Tanto vero magis tantoque certius hæc sanguinis redundantia ad inferendum quod diximus damnum fit efficax, si accesserit altera illa causa, spasmus nempe in aliis externis remotisque a capite corporis partibus. Hujus enim tam infesta est operatio, ut non tantum sanguinis progressui in ea, quam detinet parte, fibras stringendo & vasa coarctando, obicem ponat, verum etiam eundem

urgeat, ut aliorum cum impetu ruat, ibi vasa oppleat, diducat, tandemque perrumpat. Spasnum autem in hæmorrhagiis ferme omnibus, atque etiam in hac, præsto esse, testatur juncta magnitudini pulsus durities, stricturam nervosarum in arteriis tunicarum prodens. Testatur quoque antecedens extremorum refrigeratio, nec non ille, quem quidam in artubus sentiunt, fornicationis sensus. Atque etiam hanc ob causam fieri censendus est, quod experientia teste, hanc hæmorrhagiam sæpe incurrant, qui spasms, in abdomine maxime, aliquamdiu fuerunt detenti, qui scilicet colicis passionibus, præsertim spasmodicis, hypochondriaco malo, doloribus ex calculo vesicæ item cystidis felleæ nec non diuturna alvi strictura laborarunt.

## §. XI.

Ex quo jam ulterius concludendum, omnia quæ spasmus inducere apta, in numerum causarum hujus mali esse referenda. Conspicuus hoc nomine maxime est animi affectuum effectus, iræ inprimis ac terroris, quæ proximi in nervosas partes agunt, easdemque in anomalos spasticos motus adducendo, inæqualem quoq; faciunt sanguinis circuitum, atque malum hoc sæpius accersunt; uti inter alios *Hildanus, Schenckius* ac *Forestus* fidem faciunt. Idem efficere valet venereum æstrum, quo motuum equilibrio sublato, adeo in quibusdam exagitatum fuisse sanguinem, ut ipso in actu occubuerint attoniti ex *Henrici* ab *Heer Observ. XXIX. Bartholino* & nostra *de morbis ex intempestiva venere oriundis, dissertatione*, constat uberius. Neque tantum impensior animi, verum etiam corporis commotio, ad sanguinem versus caput urgendum multum facit. Nos inter alia novimus a mica panis asperæ arteriæ illapsa, vehementissimam concitatam fuisse tussim, quam excepit hæmorrhagia in cerebro, lethali cum eventu.

*Affectus animi frequentes & potiores sunt hujus mali cause*



## §. XII.

Excre-  
tiones  
que in  
partibus  
externis  
sunt re-  
pulsæ  
sepius  
causam  
præbet  
hujus  
feri of-  
fensum

Magna quoque ad inducendum hoc malum vis est materiæ illi acri, corruptæ & veneni tantum non naturam habenti, quæ a succorum vitalium connubio, salutari admodum consilio segregata, ad corporis ambitum propellitur, quando vel sponte iterum recedit, aut per injurias externas repellitur; quippe quæ nervosis internis membranis illapsa, spasticas atroces suscitatur stricture, per quas sanguis utique etiam agitur cum impetu ad caput ibidemque congeritur. Sic ex ulcerum manantium, & fonticulorum coalitu id factum esse, auctor est *Vvepferus*; ex coryzæ, pedum sudoris catarrhaliumque affectuum suppressione, nec non retrocedente scabie, *Ephemerides naturæ curiosorum*; ex arthritide & podagra emanante vid. *Med. System. rat. tom. 3. pag. 189.* nec non *Vvepferus*. Haud dissimilem perniciosum effectum in internis nervosis partibus edunt adstringentia, præpotere, inprimis in hæmorrhagiis nimis data, de quo notabile exemplum a nobis observatum, & quod pluribus expositum in dissertatione *Altorsii* habita de viro apoplexia ex inconsulta hæmorrhoidum suppressione extincto, cujus auctor est *Clarissimus Schultzius*.

## §. XIII.

Malum  
quædoq;  
fit epi-  
demicum  
a subita  
& inso-  
lita ac-  
tis mu-  
tatione

Merito præterea in numerum causarum hujus mali venit ipse aer, cujus constitutionem insalubrem & præternaturalem, epidemicum prorsus fecisse hunc morbum, *Lomnius* potissimum, *Baglivus*, & *Lancisius* affirmant. Maxime omnium vero generationi ejusdem favet frigus, quod fibras cutaneas stringendo vasaque in ambitu coarctando, ad interiora ipsamque caput urget ac pellit humores. Unde *Hippocrates* jam *Sect. 3. aphor. 23.* hiemalibus morbis annumeravit apoplecticum. Et *Piso* notavit: quod, quando circa solstitium hiernum boreas, corpora valde comprimens, & mercurium eapropter in barometro

*Hoffm. System. T. IV. P. II.*

fursumurgens ventus repente insurgit, dispositos admodum infestare soleat attonitus morbus. Neque minus ad producendum hoc malum multum facit subita aeris mutatio. Nos certe crebrius observavimus, quod, si diurnam aeris intemperiem frigidam humidam, vento diutius ex occidente, & zephyro spirante, subito ventus frigidus valde ex borea excipit aut etiam intemperiem aeris calidam, & humidam, cito sequitur algida, & constringens atmosphæræ constitutio, facilis admodum in hunc morbum dispositis sit lapsus. Quo etiam fundamento nititur illa *Amati Lusitani Centur. I. curat. XXXIV.* observatio, qua admissio liberius corpori ex balneo fervido æstuanti frigido aere, apoplexiam accessisse memorat.

## §. XIV.

Accedit causa, inter præcipuas numeranda, vasorum scilicet & membranarum cerebri imbecillitas, five imminuta potentia motrix systaltica. Sine hac enim nec abundantia, nec appulsus sanguinis, ad excludendum hoc malum sufficiunt; at ubi adest, membranæ sanguinem appulsam minus vegete protendant, vasa eidem cedunt, lentus sit circuitus, stagnatio, sardus, tandemque ruptura. Est autem hæc debilitas quandoque nativa, & a parentibus accepta, qua fit, ut certis familiis, fatalis atque funestus sit hic morbus, uti exemplis *Hoeserus*, *Forestus*, atque *Sennerius* confirmarunt. Alia demum accedit, quod patet in senibus, in quibus, quia partium omnium labascit robur, non mirum est, id etiam contingere in capite, ipsosque eapropter frequentius pati hos manes.

## §. XV.

Inter causas, quæ vasa ac membranas cerebri tono privant debilitato, potissima utique est, ingluvies, intemperantia atque ebrietas, ex cerevisiis lupulatis, vino, maxime sulphuris fumo infecto, nec

Hanc  
morbum  
ut plu-  
rimum  
antece-  
dit im-  
becilli-  
tas cor-  
poris

Ad quæ  
dispo-  
nit in-  
ordina-  
tæ vitæ  
generis



non vini spiritu. Horum enim ea indoles, ut sanguinem exagitent, expandant, eoque simul ipsa vasa per quæ decurrit, distendant. Quod ubi accidit cerebro, manet illa distensio, systaltica vis infringitur, & ad concipiendam morbosam stagnationem sterinitur vita. Unde merito hinc causam repetit *Henricus ab Heer*, quod septentrionalibus populis adeo frequens sit hic morbus, ac uti *Lancius* observavit, nemo fere sobriæ vitæ addictus eodem corripiatur. Nec disparatio eorum quæ capiti stuporem conciliant, opiatorum, absynthii, lupuli, nicotianæ, croci, carbonum vivorum musti & cerevisiæ fermentantis vaporum, quibus dum succi, & canales plus justo rarefiunt ac distenduntur, impeditus utique fit progressus.

## §. XVI.

Status  
cachecti-  
cus &  
polypo-  
sæ con-  
cretio-  
nes.

Non minoris momenti ad funestam in cerebro hamorrhagiam proritandam est habitus corporis cachecticus cum dolore gravativo capitis junctus, sub quo fibrillæ cerebri medullares nervosæ flaccidæ, & nimis lubricæ evadunt, systaltica, & oscillatoria sua virtute privata. Quæ cerebri dispositio quod non modo ad hemiplexiam sed & ad fortem & sanguineam apoplexiam multum conferat nobis compluribus est compertum exemplis. Observavimus etiam asthmaticos, præsertim quando truculentum hoc malum a polyposis: coagulatis intra cordis ventriculos, vel vasa pulmonalia hærentibus fovetur, hoc malo affectos. Observatum quoque frequentius est, non modo grumosas, sed & polyposas massas, sinubus cerebri, præsertim longitudinali, ac venis jugularibus internis inhærentes, lethalem sanguinis in cerebro effusionem produxisse.

## §. XVII.

Apople-  
xia sã-  
guinea  
distin-

Dein hic qui a sanguinis effluxu in cerebro oritur attonitus morbus, probe discernendus ab illo, qui fit a seri ibidem secessu, & quem consequitur hemiplexia & paralytis totius lateris,

ac vita quidem servatur, sed admodum misera. Hæc enim fit quando quidem nimia copia cum impetu congeritur ad caput non tamen vasa perumpit, sed propter diuturnam tantum stagnationem serum per poros secedit, ac descendens vel ad cerebri basin, vel ad spinalis medullæ alterutrum latus, eidemq; incumbens, liquidi subtilioris activi tam secretionem, quam influxum in nervos, intercipit, eoque partes in latere alterutro sensu privat ac motu. Ut prætereamus conspicuam illam differentiam, quæ affectus inter soporosos, & hunc quem delineavimus intercedit, dum illi sensim, non simul ac semel accedunt, neque sensus & motus abolitionem, sed tantum sub somnolentia obnubilationem junctam habent.

## §. XVIII.

Quod ceterum *Hippocrates* de apoplexia *Sect. 2. aphor. 32.* consignavit prognosticon, id utiq; veritati respondet egregie: *vehementiorem*, scilicet qualis est quæ a sanguine effuso, *plane non, debiliorem* autem, siue quam sanguis stagnans, & serum secedens gignunt, *difficulter solvi*. Nisi enim post venæsectionem & congrua adhibita auxilia intra 24. horas sequatur levamen, & symptomata remittant, spes salutis decollavit, & ex observatione *Aureliani*, tertius dies longissimus moriendi terminus. Isque funestus eventus metuendus tanto certius, si senes invasit plethoricos morbus, ubi jam vires fractæ, & cerebrum debile; si inebriationem summam, gravemq; animi affectum iram & terrorem excipit; aut etiam si alii antea perpeffo morbo supervenit. Mortem autem instare concludendum: si stertor magis magisque ingravescit cum respirationis difficultate: si cor palpitat vehementius artiarumque pulsatio admodum magna, dura simulatque inæqualis; si, ubi paulisper ad se redit attonitus, aliena tamen est mens; si convulsivi motus unius lateris ipsiusque

Quæ hęc  
morib.  
cerebri  
sit pe-  
riculo-  
sissima.

pe-



pectoris accedunt, frigidus præsertim in superioribus sudor hæret guttatim, ipsa expiratio frigida est, & urina, & alvi stercora sponte elabuntur.

Theses Pathologicæ cum cautelis.

§. I.

Curatio  
quomo-  
do insti-  
tuenda

**Q**Uum adeo præceptus, & periculosum sit hoc malum, cito utiq; ac tempestive succurrendum, ubi adhuc salutis spes, ac æger in loco temperato & lucido ita collocandus, ut cervice non nimis declivis ac supinus, neque etiam plane erectus cubet, pedesque imprimis, vel plumis, vel integumentis, a frigore defendendi ac fovendi. Ipsa autem curatio respondeat causis. Inter quas quia præcipua, antecedens ipsum effluxum sanguinis redundantis in cerebri vasis congestio eminens, cum imminuta motrice vasorum ibi & membranarum potentia, eo quam maxime medicatio dirigenda: tum ut sanguinis motus & impetus a capite divertatur; tum etiam ut partibus ibi a rosione defectis illud reddatur, ad redigendum iterum in motum, qui subsistit, sanguinem.

§. II.

Principi-  
pe loci  
tenet  
vina.

Ad exsequendum primum, ab omni ævo ceu efficax æstimatum, & ab ipsa natura comprobatum remedium est in sanguinis missione, mox in principio mali, sine mora instituta. Huic merito primas in medicatione detulit cum *Nymanno Dodoneus obs. med. c. 8. exercit. pract. p. 385.* memorabili exemplo vetulæ 72. annorum, per eam ab apoplexia liberatæ, confirmat. Quin ipsam naturam hanc monstrare viam, ex *Lancisii* observatione patet, qua senem fere septuagenarium apoplexiæ prodromis affectum, effusissimum, ad 12. libras hamorrhagias, sanatum esse memorat.

§. III.

In com-  
modis  
Aetis

Quo vero pacto sanguis sit subtrahendus? non omnes eodem modo de-

finiunt. Nonnulli, ac inter hos potissimum *Cathervood*, in libello Anglice edito, arteriotomiam omnibus aliis sanguinem mittendi modis anteponendam esse rationibus & exemplis docet. Cui sententiæ calculum adjecterunt Germani quidam Medici, inter quos etiam *Loeuv* ab *Erlsfeld in Med. pract.* Nec improbandum videtur consilium, ac dolendum modo, nostris in oris, ob Chirurgorum ineptitudinem ac remedii novitatem. illud adhibere non esse integrum. Plurimi venesectionem suadent; sed quo in loco secunda sit vena, iterum in diversum abeunt. Alii venas in brachio, alii in fronte, naribus, nec non sub lingua incidere jubent. *Morgagni* venarum occipitalium incisionem eximie collaudat *Advers. anat. 6. p. 108.* quia hæ venæ intra cranium cum utroque laterali sinu communicant, eaque propter instituta ipsarum sectione, sanguis, quem in sinus convectoræ erant, avertitur, atque hinc reliqui sanguinis, qui per eodem sinus progreditur, copia minuitur aliquantum, motus autem non sine emolumento augetur. Quia vero harum venarum trunci profundius siti & nonnunquam in plures minoresque ramos divisi reperiuntur, cucurbitulas, & crebras altasque incisiones anteferendas putat. Quo quidem modo jam *Zacutus Lusitanus Med. Princ. hist. l. 1. histor. 33.* bis apoplecticos se sanasse refert. Ab exercitatissimis tamen, & numero plurimis Medicis *Severino, Lancisio, Freindio*, a nobis in *Medic. ration. system. tom. 3. p. 608.* venarum jugularium incilio laudatur, quia cerebro valde vicina & quam optime spatium libertatemque fluendi facit sanguini cerebro impacto ibique copiosius conesto.

§. IV.

In sanguinis missione tenenda hæc. *Cautela*  
Instituatur quam potest fieri cito, *circa*  
priusquam ad atoniam usq; dilatata *sanguis*  
arteriolæ, & a sanguine effuso cere- *at m. c.*  
brum inundatum. Foramen infligatur *tenenda*  
satis



satis amplum, ut sanguis citiori, & liberaliori flumine efferatur, quia lentus effluxus juvat nihil. Adornetur in loco parti affectæ proximo, brachio scilicet vel jugularibus. Quantitas sanguinis emittendi, ex vasorum plenitudine, pulsus viriumq; habitudine determinetur, semper tamen fit larga. Si corpus plethoricum, temperamentum sanguineum, morbus a sanguinis evacuatione impedita ortus, iteretur sanguinis subtractio, quin repetatur, quum *Dionis* perhibeat, septies demum incisam venam profuisse. Sed primum celebretur in pede, postea in brachio, seu collo, ne, si secus fit, dato in parte superiore exitu, ex inferioribus & corporis ambitu ad caput major invitetur affluxus.

## §. V.

*Clysteria  
in hoc  
modo  
funt.*

Præter venæsectionem, ad divertendum sanguinis a capite affluxum, præstans virtus eorum, quæ alvum irritant fortius, non tamen drastorum illorum cathartorum, quæ veneni quippiam recondunt, quæ indolis innoxie, nerveas tantum intestinorum tunicas exstimulant efficaciter, & ad motum sollicitant, qualia sunt salia, gemmæ scilicet, Sedlicense & ammoniacum. Hæc indenda paullo liberaliori dosi clysmatibus, ac præterea addendæ species, quibus flatus discutiendi, & roborandi virtus inest, cujus indolis ruta, salvia, majorana, satoreja, thymus, serpillum, flores lavendulæ, liliorum convallium, chamomillæ Romanæ, item semina carvi & anethi, una cum oleis expressis, rutaceo, chamæmelino ac laurino. Et sic confecto enemata non nimia copia, sed crebro injicienda, ne iterum elabantur, & quidem ministerio syringæ, quo eo altius penetrent ac pervadant.

## §. VI.

*Exter-  
porum  
excitantia.*

Quæ vero nervosas robore exutas partes roborant, & ad motum exstimulant eoq; humoris subsistentis discussionem promovent, exterius par-

tim interius admovenda. Exterius præstans virtus volatiliū urinosorum, mixtorum cum cephalicis; inter quæ palmam fert in liquida forma salis ammoniacicum calce viva paratus spiritus, rutæ, majoranæ, vel lavendulæ oleo impregnatus; in sicca forma sal volatile salis ammoniaci siccum, iisdem oleis irroratum. Quæ vel naribus ad odorem admota, vel pluma ad interiora narium admissa, vel etiam per calamum scriptorium insufflata, excitant, efficaciter. Eundem in finem locis exquisitioris sensus, maximeque pedum plantis, ad moveri solent ea, quæ doloris quendam sensum ibi excitant sicq; universum nervosarum partium systema ad contractionem sollicitant. Quo nomine notæ sunt frictiones asperiores cum pannis aut excutia institutæ, nec non urticationes; nota quoque vesicatoriæ ipsaque cauteria actualia, quorum novum, & a *Lancisio* approbatum adhibendi modum, evulgavit *Dominicus Mistichelli* in tractatu Itala lingua de apoplexia edito.

## §. VII.

Interius autem si deglutiendi facultas superest, aut reddita, neutiquam danda spirituosæ, aut volatilia; quippe quæ sanguinem, jam tum estuantem, magis commovent ac rarefaciunt, eaque propter a *Pit. Krino* de *circul. sang.* merito rejiciuntur. Sed propinanda ea, quæ analepticam, excitantem, & simul discutientem virtutem possident, inter quæ spectata virtus diaphoreticorum fixorum, cum cinnabari, succino & nitro, quæ in pulveris forma cum aquis congruis, vel melius adhuc in potionem reducta porrigi possunt. Nobis quidem frequentioris, & probati usus mixtura hæc: recipe aquæ liliorum convallium cum vino, aceti drachmam, antimonii diaphoretici, cinnabaris, lapidum cancrorum ana drachmam semis, sirupi corticum aurantium drachmas duas. M. Cui nonnunquam, ad levem quen-

*Cautissi-  
me in-  
terne-  
danda  
sunt  
spiritu-  
osa.*

dam



dam stimulum nerveis stomachi fibrillis cum omnibus reliquis consentientibus inferendum, tantillum tartari emetici adjicere solemus, ne tamen vomitum moveat.

§. VIII.

Ad ar-  
cendum  
hoc ma-  
lum uti-  
lissima  
V. S. q-  
uino-  
Etatis.

Sed quia hæc cerebri hæmorrhagia non tantum oppido periculosa, verum etiam, licet curata fuerit, facile repetit; haud postrema medentis cura eo utique dirigenda, quo ejusdem tam accessum, quam recursum, arceat. Jam recte utique cum *Martiano & Ballonio*, sensit *Casp. Hofmanus*, lib. 3. instit. med. apoplecticos, quotquot sint, esse plethoricos. Ideo, ut sanguinis redundantia minuatur, danda est opera quam maxime. Hunc autem in finem nunquam non utilis sanguinis missio, maximeque illa, quæ circa æquinoctiale institui solet tempus, quo solennes fere esse solent sanguinis & humorum commotiones, naturæque conatus ad eliminandum id, quod est in corpore superfluum. Saluti ea propter etiam est, vel ipsius *Hippocratis* testimonio, hæmorrhoidum fluxus, maxime iis, qui eundem antea jam experti. Sed eundem sine damno provocare & promovere, est utique artis. Nos ad obtinendum hoc, præter frictiones in ano & admissos fatus, maxime proficuum censemus hirudinum applicationem. Quibus utiliter adjungitur usus elixirii balsamici, ex aloe correctæ, croco, myrrha, & succino, cum menstruo lixivioso-aquoso, non spiritoso parati, nec non pilularum balsamicarum circumspæcte datarum. Quæ tamen hæmorrhoides movent, minime adhibenda, si nulla ad fluxum adest dispositio, sed tum demum, quando emanere, aut parcius fluere incipit, alias, præsentente plethora, plus nocent.

§. IX.

Atoms  
solven-  
da blan-  
dioribus

Dein ad vindicandum ab incurfu hujus mali corpus, maximum utique est præsidium in debito alvi secessu. Etenim generalis fere canon est practicus: neminem facile capitis morbos

incurrere, cui officium rite facit alvus. Interim tamen alvina hæc excretio neutiquam proritanda validioribus drasticeis, quæ nerveas intestinorum tunicas impetuosius aggrediendo, spasmos suscitant in iis, & inæqualem sanguinis circuitum inducunt. Blandioribus potius & naturæ amicis hoc expediendum. Inter quæ commendabilia maxime rhabarbarina cum salinis abstergentibus, nec non pilulæ ac clysteres.

§. X.

Quæ præterea a quibusdam commendantur aquæ & balsama sic dicta apoplectica, tam interne usurpanda, quam exterius temporibus, naribus ac nuchæ inungenda, ad curationem æque ac præservationem hujus mali, nostra quidem sententia, in iis, quibus metus hæmorrhagiæ cerebri, plethoricis, sanguineis, virilis ætatis personis, sunt potius perquam nociva. De quo grave est testimonium *Dodoneæ Stirp. hist. lib. 4.* ita habens: Ubi humorum copia adest, præsertim sanguini permixtorum, non totus hujus (stillatitii lavendulæ liquoris) usus est. Sicuti neque cõpositionis, quæ ex stillatitio vi no, in quo hujusmodi herba, flores, semina, & aromata macerata sunt, conficitur, quam plerique temere & indifferenter exhibent. Nam calidorum hujusmodi caput implentium usu, & morbus intenditur, & eger in periculum inducitur. Tutiora longe infusa theiformia cum aqua, ex herbis cephalicis, melissa maxime, betonica, salvia, cum cardamomo minori condita, quæ frequentius forbillata, sanguinis motum æqualem servant, atque ipsi etiam cerebro nervisque conducunt.

Cautè  
mercand-  
dū cum  
balsa-  
mis &  
aquis de-  
pople-  
cticis.

§. XI.

Nulla vero ab omnibus erit expectanda incolumitas, nisi simul accesserit exactum in vita victuque moderamen. Potissimum autem ad præsertionem momentum fert, quies cum abstinencia, quo *Celsus* magnos morbos curari perhibet. Quare vitanda ciborum repletio immodica eorum-

Sed ex-  
acta us-  
us ra-  
tio tan-  
cenda.

que



que varietas ; vitanda vina dulcia potentia , omniaque inebriantia , valida corporis exercitia , maxime post cibum . Neque is qui malum hoc metuit post cœnam statim eat cubitum : neque etiam capite nimis declivi cubet . Si aer ita comparatus , ut genesi hujus mali sit accommodus , corpus ei non committendum , sed pedes maxime a frigore defendendi , quandoque etiam pediluvio tepido immittendi , & in conclavi temperate calido manendum . Motus subinde institutus est placidus , animus liber servandus atque tranquillus , somnus nec nimis longus , nec nimis accisus sit . Verbo vitentur omnia , quæ supra in causarum procatarcticarum numerum relata leguntur .

*Enarrationes morborum .*

OBSERVATIO I.

*Balnei  
calidi  
Caroli-  
narum  
usus  
valde  
suspen-  
sus .*

**C**omes illustrissimus , fere quinquagenarius , sanguine succisque plenus , aliquot ante annos affectus fuerat aliquoties paralyti , leviori tamen , cum loquendi difficultate . Inde petiit vicinas ditioni suæ Carolinas , iisdemque usus est tam interius , quam exterius . Sed cum inconsulto id fecisset Medico , neque sanguinis missione , neque alvi purgatione , corpus prius rite præparasset , accidit , quum in balneum nimis adhuc calens descenderet , ut subito sensuum tam interiorum , quam exteriorum usu , privaretur omni , sequuta mox respiratio valde citata , cum convulsivo quodam pectus attollente motu , arteriæ pulsarunt valide cum quadam duritie & facies intense rubuit . Secta fuit vena , admodum quoque naribus sternutatorium , quo vehementior pectoris concussio cum summo stertore induta . Latus sinistrum totum omnis motus ac sensus fuit expers , manus tamen in eo convulsa perpetuo agitata . Mens plane non sibi constitit & intra quinque horas excepit mors . Postquam ingens sanguinis ac feri san-

guinolenti copia , per viginti quatuor & longius horas , e naribus manavit .

*Epicrisis .*

Si ullus thermalium aquarum ad balneum usus circumspeditionem poscit ac prudentiam , certe est Carolinarum . Harum enim ea indoles , ut terreo calcareo , nec non martiali quo pollent principio , corporis superficiem constringant valide & sanguinem ac humores ad interiora agant . Atque hinc est , quod œdematosos pedum tumores abigant cito , ac ubi corpus spasmi obnoxium est simulque vasa sanguine turgent , graves passiones , cordis palpitationem vehementem , capitis dolorem acutum , cum virium dejectione & artuum debilitate inducere , quin febrem continuam æque ac intermittentem accendere valent . Ea vero propter etiam non mirandum quod in illustrissima hac persona , sanguine redundante & præsentem jam in capite ad humorum stagnationem dispositione , usu inconsulto , sanguinis cum impetu fuerit congestus ad caput , ac tam in ipsius interioribus , quam exterioribus vasa rupta , lethali cum eventu . Id enim luculenter arguit sanguinolentum illud largum post mortem narium profluvium , quod factam in cerebro hæmorrhagiam , semper prodit . Quod autem sternutatorio admoto increvit spiritus cum stertore difficultas , id utique monet medentes , ut in apoplexia sanguinea parcum eorum quæ sternutamenta movent & circumspectum , sedato prius sanguinis ad caput impetu habeant , ulum , ne sanguis majori cum vehementia ad locum cui stimulus impressus ruat mortemque acceleret .

OBSERVATIO II.

Femina generosa , quinquagesimum ætatis annum agens , constitutionis sanguineæ & texturæ admodum teneræ ac mollis , copiosum semper expecta fuerat sanguinis per menses fluxum . Sed quum is quadragesimo nono anno ob

*Ex pur-  
gante  
acriori  
recidi-  
va le-  
thalis .*



ob ætatis rationem retineretur, ipsa de anxietate & angustia præcordiorum, inflatione in latere abdominis sinistro, gravitate & flacciditate artuum, vertiginoso capitis ac gravativo dolore, cum somno inquieto & interrupto, graviter cœpit conqueri, licet vultum rubicundum admodum exhiberet. Accedente tandem hieme, adeo exacerbata fuerunt hæc omnia, ut Medici auxilium implorare cogeretur, qui ad discutiendos flatus salia dedit volatilia oleosa, itemque carminativas essentias, ac præterea porrexit purgantem pulverem, ex resinæ jalappæ scrupulo dimidio ac tartari vitriolati granis sex. Quo quum sexies non sine acerbis torminibus fuisset purgata, insequenti nocte insultu correpta est apoplectico, pulsu tamen & respiratione adhuc integra. Secta fuit vena protinus & injectus clyster acris; quibus ad se quidem rediit attonita, sed superfuit aponia magnaue capitis debilitas. Hæc ut tolleret & recidivam arceret morbi artifex obtulit de novo purgantem cum aqua liliorum convallium pulverem, ex resinæ jalappæ granis 12. & vitriolati tartari granis 10. Quo assumpto, elapsa vix hora, rediit apoplexia & miseram brevi tempore tradidit morti.

*Epicrisis.*

Inclinant utique in sanguineam apoplexiam sanguineæ femine desinente mensium fluxu, eaque propter venæsectione opus habent quam maxime, ne accedentibus aliis causis, in actum erumpat dispositio. Ad quod si quicquam aliud efficax, est certe usus purgantium validiorum ac tormina inducentium. Quæ inter merito numeranda funestis multis effectibus infamata jalappæ resina in pulvere data; quippe quæ deglutita in stomacho facile coit ac plicis nervæ intestinorum tunicæ adhærescens, spasmos ciet ut oppido dolorosas tensiones, quibus utique sanguis urgetur ad superiora, ibidemque effectus edit exitiales. Quo magis patet graviter peccasse medi-

cantem, qui accedente post oblatum hoc purgans, apoplexia leviori, hac remittente, idem obtulit iterum in tanta copia, eoque recidivam induxit graviolem simulatque lethalem. Ac licet haud adeo incongrua videri possit noxios humores ad inferiora deducendi intentio, clementioribus tamen laxantibus, vel etiam clysteribus id fuisset perficiendum, non iis, quæ intestinis spasmos, & torminibus cognoscendos, inducunt, eoque sanguinem ad caput urgendo, ut ibi perumpat & lethum inferat, faciunt.

OBSERVATIO III.

Theologus celeberrimi nominis, quinquagesimum nondum ingressus annum, floridæ & sanguineæ constitutionis ac vividi ingenii, sanus semper ac vegetus; ob peculiare quosdam ejus famæ ac existimationis infestus casus, in impensam animi perturbationem cum anxio dolore & mœrore conjectus, & valde inquietus sub parco etiam somno, ad levandum animum & supprimendam melancholiam, poculis vini, quæ alias etiam amabat, paulo largius se subinde invitabat. Procedente inde tempore ciborum amittebat appetentiam & vacillante digestionem perpetuis fere vexabatur ructibus sine ullo ex alvo constipata prodeunte flatu; labascere incipiebant vires, ingenti quoque præcordiorum dolore & angustia premebatur, mœstis simul mentem fatigantibus cogitationibus, repentine & inopinato cum omnium sensuum amissione cecidit in terram, pulsus tamen & respiratione manente salva; collectis vero intra bihorium, post remedia idonea data, paululum viribus, ad se rediit, sed inde de genuum imbecillitate, de torpore & languore dextri lateris, nec non de debilitate memoriæ anxias instituebat querelas. Proprio suasu petit Carolinas, non modo ut affectum depulsaret hypochondriacum sed itinere & conversatione

*Apoplexia levior, in graviolem & lethalem mutata.*



tionem mœstas abundas animo excuteret afflictiones. Quum ego jam præsens essem, enixe meum etiam quaesivit consilium, suasi ut moderatius biberet temperatiorem illum fontem vulgo *Muhlen-Brunnen*, quo per viginti dies insigni cum euphoria utebatur. In reditu vero quum celebrem pertransiret urbem, invitatus ab amicis, latisque conviviis exceptus nimium indulgit, genio & vini potui. Sub nocturno frigido coelo in patriam reversus, de spirandi angustia & anxietatibus conquestus sum sit diaphoreticos quosdam pulveres, a quorum usu purpura rubra in universo fere corpore comparere cepit, conquerenti simul de immani capitis dolore suavit Medico in consilium vocatus venæsectionem in pede. Explorans meum de hoc remedio sententiam, prorsus eam dissuasi ob metum recursus purpuræ ad interiora. Medico nihilominus magnum periculum ex neglectu venæsectionis prædicente, admisit eam, quæ in pede satis largiter celebrabatur. Non ita multo post præcordialis anxietas majora sum sit incrementa sub extremorum refrigeratione, & purpura disparente improvise vehemens insultus sequebatur apoplecticus cum omnium sensuum amissione, cum stertore, pulsu valido & inæquali, facie existente tumida & rubicunda. Quo gravi affectu intra octo horas, Vir magnæ doctrinæ & ingenii in meliorem vitam transferebatur.

#### *Epicrisis.*

Plura in hac historia sunt memoratu digna quæ in usum pathologico therapeuticum animadverti possunt; ac primum, quod in homine sangui-

nei temperamenti, quando mœrore diuturno & gravi adjungitur, prava diætæ ratio, inque primis immoderatio vini usus, systema nervorum ita infirmari possit ut pathemata formaliter hypochondriaca progignantur, quæ non facile alias in ejusmodi temperamentum incidunt. Notandum quoque est, quod ob diuturnas mentis fatigationes & labores cum mœrore diutius infestante conjunctos, tam imbecille reddi possit cerebrum nervorumque systema, ut ad insultus apoplecticos evadat dispositum. Insuper nostro in ægro primus insultus fuit levissimus, a sola impetuosiori sanguinis ex imo ventre ad caput per spasmos obortus, qui venæsectione, stagnantem in vasis cerebri sanguinem, resolvente & divertente, brevi potuisset submoveri. Quia vero nullus affectus facilius recurrit, quam apoplecticus, præsertim si non accurata & exquisita vivendi ratione, idoneisque remediis avertatur, factum hinc est, ut post usum Carolinarum quæ magnum quidem hypochondriacorum, præsidium sunt, minus vero morbis capitis favent, non observata accuratiori diætâ, gravior dein insultus subsecutus fuerit & quidem in nostro ægro lethalis, dubio procul, quod a larga venæsectione purpurea materia ad interiora violentia majori conversa, spasmos suscitavit, quibus sanguis impetuosius adauctus ad caput, tandem intus vasa disruperit. Cæterum de apoplexiæ aliis causis, speciebus & observationibus huc pertinentibus, in Parte III. de morbis ex atonia ortis, fusius, volente DEO, agemus.



# SECTIO II.

DE

## DE DOLORIBUS ET SPASMIS

VARIII GENERIS INTERNIS ET EXTERNIS

NEC NON

ARTHRITICIS ET RHEUMATICIS.

### CAPUT I.

#### DE DOLORE CEPHALICO.

##### THESES PATHOLOGICÆ.

###### §. I.

*Defini-  
tio.*

**D**olor cephalicus est valde molesta in membranis capitis nervosis a variis causis distractis suscitata sensatio, quæ pro differenti gradu & loco varia & gravia sæpius post se trahit symptomata.

###### §. II.

*Sedes  
dolorum* Dolor diversa in capite occupat loca, cujus rei nulla alia subest ratio, quam quod diversis intra & extra cranium nervosis membranis illud instructum sit. Extra cranium occurrit tenuis sed satis valida & exquisitæ sensationis membrana, quæ immediate id cingit, & a carotide externa plures accipit in anteriori, media & posteriori parte arteriolas; ramulos vero nervorum e vertebra colli & pari septimo cerebri. Cohæret autem pericranium cum muscolis cranio vicinis ac per futuras cum duræ matris exteriori lamina: in qua membrana fre-

*in peri-  
cranio.*

quentiorem certe doloris cephalici sedem reponimus; quod inter alia, idonea ad leniendum gravem dolorem externe applicata remedia, sub forma emplastri vel epithematis, item ex fonte chirurgico, scarificationes, setacea, cauteria inusta & vesicatoria, clare satis atque perspicue demonstrant. Neque tamen excludere hic volumus ipsam quæ caput tegit cutem, præsertim interiorem ejus partem vicinam pericranio, a qua etiam separari potest, & quam plura sanguifera percurrunt vasa, tunc præcipue doloris sedem constituentem, ubi is magis solet esse obtusus, gravativus & pressorius, cum in pericranio magis sit acutus.

*in cute.*

###### §. III.

Neque immunis a doloribus est interior, quæ cerebrum cingit membrana, sic dicta dura mater, quæ ex fibris valde tendinosi & nervosis contexta atque ex duplici lamina conflata est, & a quinto & septimo nervorum

*in dura  
matre.*



rum pari ramos accipit ; arterioli vero tribus donata : prima oritur a carotide interna , quæ ad anteriorem duræ matris partem abit , secunda , a carotide externa , quæ per foramen proprium intrat cranium & ad mediam partem vergit , tertia a vertebralis internæ ramo externo , quæ per foramen jugularis internæ ingreditur cranium & ad posteriorem duræ matris partem spectat . Rarior quidem ibi dolorum sedes , sed multo periculiosior : nam si sanguis in ejus vasis diu stagnat , vel copia aut acrimonia eorum vim motricem valde lædit , quam facile graviores morborum capitis ; atque in acutis phrenitidem vel convulsionem , præsertim si dolor sit pulsatorius ; in chronicis morbis , paralyfin , hemiplexiam nec non affectus soporosos post se trahit .

## §. IV.

*Reliquæ mem-  
brana  
sedem  
consti-  
tunt .  
ratio .  
Sed rar  
men mē.  
brana  
pitui-  
taria .* Reliquæ tenues illæ membranæ , quæ cerebrum immediate involvunt , utpote pia mater atque arachnoides , quæ posterior tamen potius externæ piæ matris membrana videtur , cellulolum interstitium efformans per quod vasa repunt , nostra quidem sententia minime molestæ sensationis sedem constituere videntur , eo quod careant fibris tensibilibus nervosis elasticis , atque etiam nervulorum ramulis , ibi non conspiciendis . Denique membrana valde exilis & sensibilis quæ ex tunica pituitaria nascitur & sinus ossis frontis investit , non raro præbet acutissimi doloris domicilium .

## §. V.

*Discrimen .* Ingens doloris in capite , ratione loci quem occupat , item ratione vehementiæ ac diuturnitatis discrimen est , quo inde etiam diversa ab auctoribus ipsis imposita sunt nomina . Nam si levior est , & modo partem capitis afficit , dicitur cephalalgia ; si diuturnior & gravior , ac totum caput occupat , cephalææ nomen accipit , quam GALENUS ita optime describit : *p. 3. tr. 2. cap. 25. cephalæa est dolor totius capitis diuturnus ægreque*

*solubilis , qui a parva occasione vehementes habet exacerbationes , adeo , ut neque strepitum , neque vocem violentam , neque luminis splendorem , neque motum tolerare possit patiens , sed tranquillitatem & obscurum cubiculum quærat , idque ob doloris vehementiam ; quippe alii se malleo percuti arbitrantur , alii caput contundi distendique sentiunt , ac paucis ad oculorum radices dolor extenditur : quo in dolore totam capitis membranam vehementer affectam esse non dubitamus .*

## §. VI.

Sæpius fit , ut unum tantum latus *inter  
hemi-  
cranlæ  
& cla-  
vum hy-  
stercio* dolor obsideat , altero salvo & sine dolore ; tunc græce hemicrania vocatur . Interdum etiam in certo tantum verticis loco circumscripto fixus hæret , ita ut vix magnitudine grossum vel imperialem æquet , mulieribus & quidem hysterics familiaris ; qui clavi nomine insignitur . Quandoque dolor frontem & loca supercilia acutissimus obsidet : alius solus synciput , alius occiput , alius verticem prope futuram , alius temporum magis occupat . Neque una eademque solet esse sensatio : nam alius acutus , pungitivus , lancinans dolor est , alius contusivus , gravativus & pressorius , alius rursus constrictorius , quidam æstuosus , & inflammans , alius frigidus est , qualis in mulieribus potissimum verticem ferire solet , ut quasi se glaciem gelidam in ipso gestare conquerantur .

## §. VII.

In genere omnis doloris cephalici *Causa  
ene-  
ralls .* causam , a liberiori & æquali sanguinis per vasa sanguifera , quibus cutis capitis , pericranium , ipsaque dura mater instructa sunt , progressivo & circulari motu impedito , tanquam fonte derivamus . Nullus certe Medicorum exactius , & secundum leges mechanicas , genesis doloris hujus demonstravit , ipso HIPPOCRATE , qui *lib. de flatibus §. 13.* ita rem perbelle exprimit : *sanguinis , inquit , transitus in capite magna angustia coar-*



coarctatur cujus abundantia ac conclusio dolorem excitat. Sanguis enim ipsa natura calidus existens, vi coactus, per angustam viam transire celerrime non potest, cum multa impedimento sint obstacula & oppilationes; quapropter etiam pulsus circa tempora. Qui sane locus, Hippocrati non penitus incognitum fuisse sanguinis progressivum motum ex arteriis in venas, satis abundeque declarat: obstacula enim quæ liberio-rem transitum denegant, vocat oppilationes, quæ in vasis revehentibus, quia carent impulsu, unde tardior & lentior motus, consistunt. Id quod etiam dissectiones ex gravi cephalæa mortuorum confirmare videntur: nam teste BONETO, WEPFERO, PECHLINO aliisque, sinus cerebri, jugulares etiam internæ venæ, sanguine mucoso crasso, imo pseudo-polypis subinde infarctæ fuerunt repertæ: quod etiam nos in malo epileptico demortuis aliquoties observavimus. Si enim major sanguinis copia ad caput fertur, quam ipsæ venæ eadem celeritate reducere possunt, vasa arteriosa, & inter hæc maxime minima & capillaria, a congesto sanguine valde distenduntur & ipsæ membranæ insigniter tenduntur; qua ratione tristis illa sensatio excitatur.

## §. VIII.

Pro conditione  
sanguinis  
varie  
causæ  
species  
nascuntur.

Notandum vero hoc loco est, quod pro conditione, intemperie vel vitio sanguinis, si vel nimia copia peccat, vel nimis spissus & glutinosus, vel sero valde acri refertus est, alia etiam atque alia inde doloris species enascantur. Nam quando is impetuose & nimia copia in membranas irruit, quod præcipue de plethoricis & ubi consue- ta per nares fluxio supprimitur, nec non de adolescentibus valet, dolor totum caput occupare solet quod tunc calet, tumet, dolet, rubet, vasa turgescunt, fortiter pulsant præsertim circa jugulum & tempora, nares aridæ siccæ sunt, fauces ardor & sitis occupat. Talem dolorem veteres a

causa calida suscitari dixerunt.

## §. IX.

Ubi sanguis in vasis capitis collectus multo scatet & mucido sero, vel ex obstructa aut suppressa, quod sæpius accidit, coryza aut gravedine, dolor in capite oboritur, tunc magis gravativus, obtusus, pressorius, maxime in antica parte atque in fronte esse solet, quandoque etiam caput instar ponderis grave est, ut vix in altum possit elevari. Non raro evenit, ut in ipsius capitis cute, in vertice præsertim, tumores quibus digiti imprimi possunt exsurgant, pulsu interea languido, facieque livida existente. Quod inde a longo jam tempore CELSUS notavit, lib. 4. ita differens: præter hæc invenitur genus doloris, quod potest longum esse, ubi humor cutim inflat, eaque intumescit & prementi digito cedit. Veteres hujusmodi dolorem a causa frigida deduxerunt.

Quando  
dolor  
grava-  
tivus,  
obtusus  
& prej-  
sorius?

## §. X.

Deterior doloris & magis pervicacis species est, qui accidit lue vene-rea valde affectis, cum materia serosa, acris, caustica firmitus pericranio insidet & interdum ipsum cranium cariosum reddens difficillime remediis cedit atque sanescit. Ejusdem generis esse solet is dolor, qui a materia salino-causticæ indolis ad habitum corporis propulsa & postea retrocedente nascitur; uti id in arthritide, podagra, scabie, erysipelate capitis, gutta rosacea laborantibus sæpius in praxi observavimus. In variolis & morbillis, antequam peccans materia, naturæ robore ad extimam cutem propellitur, vel quod pejus si repellitur, atrox sæpe cum febre aut delirio, vel infantibus cum epilepsia, dolor caput torquet; quo casu, ubi materia exigua caustica dolorem efficit, præternaturalis & vehemens membranarum potius stricture, quam earundem distensio, quæ a copia feri & sanguinis magnis fit, locum habet.

Qualis  
a lue  
venerea

## §. XI.



Symptoma

ma

doloris

acutissimi.

## §. XI.

Sæpius in capite dolor est acutissimus, fere intolerabilis, fixus & diutius affligens, qualis totius corporis & animi vires pessundat, somnum tollit, concoctionem impedit, nauseam & ciborum fastidium parit, & alios sæpe gravissimos capitis & nervorum morbos, ut sunt vertigo, oculorum caligo, & suffusio, cæcitas, aurium tinnitus, convulsio, epilepsia, post se trahit, atque etiam reliquas nervosas corporis partes in consensum trahendo, vomitum, alvi strictionem, extremorum refrigerationem, faciemque moribundo similem efficit. Id quod a veteribus quoque animadvertimus. CELSUS enim lib. 4. cap. 2. scribit: *cephalæe notæ sunt: horror validus, nervorum resolutio, oculorum caligo, mentis alienatio, vomitus, vocis suppressio, corporis refrigeratio, animæ defectio.*

## §. XII.

A quibus  
causis  
pro-  
ducatur.

Ad genesis doloris cephalici quod attinet, consideratione etiam digna est nativa vel a parentibus tracta nervosarum capitis partium imbecillitas: pars enim quod debilior, id est vitonica & elastica sua naturali valde privata, eo facilius & promptius humorem alienum admittit, recipit ac retinet, atque inde stagnatio, partiumque nervosarum afflictio contingit. Novimus sæpius cephalalgiam hæreditariam a parentibus debilis capitis constitutione præditis acceptam; vidimus etiam a diuturno animi mœrore, a præpostera venere, a nimis lucubrationibus & mentis fatigationibus, item a nimis crebra sanguinis missione, vel effrenibus hæmorrhagiis caput ita debilitatum fuisse, ut graves inde dolores, nec non alii, qui vehementer caput infestant morbi, exorti fuerint.

## §. XIII.

Causa

remota

quoque

frigus.

Neque ex classe caussarum, quæ vocantur remotæ, excludi debet frigus, quod uti omnibus nervosis partibus, si jam dolore premuntur infe-

stum est, & liberam transpirationem per cutim impedit: ita maxime nocet, si capiti denudato admittitur, vel si id non satis contra nocturnum frigus fuerit munitum, vel etiam, si a longo sermone vel motu corporis nimio, aut a sole, aut ab ira, vel ab ingestis largius potibus spirituosus & inebriantibus incalescens pluvioso cælo, nocturno præsertim, repente exponitur.

## §. XIV.

Memorandum id quoque est, cephalalgiam sæpius tantummodo esse symptomata, quod morbo demum accedit. Ita frequentius febribus continuis, intermittentibus quoque, & inter has maxime quartanæ jungitur: atque vix quicquam in praxi crebrius occurrit, quam quod mensibus inordinate prodeuntibus vel imminentibus, caput doleat gravissime; spasticæ videlicet dum ex imo ventre strictionæ, in caput suum effectum exerunt. Digestionis vitio & affectu sic dicto hypochondriaco laborantibus frequenter associatur: nam si prima regio vitiosorum humorum colluvie scatet, & inde oborientes spasmi ac flatus, humores ad caput plus justo urgent; nimia eorum congestio, vasorum distensiones, a quibus tunicarum nervosarum læsio fit, parit. Constat etiam hemicranie causam, a stomachi vitio frequentius oriri, dum hoc non bene coquente, multæ generantur cruditates, quæ cum succo ciborum chyloso permixtæ, per thoracicum ductus ad cor adductæ, ac protinus ad caput delatæ, antequam per congrua corporis emundatoria expurgatæ fuerint, dolores periodicos efficiant; qui absoluta digestionem ut plurimum invadunt.

## §. XV.

Observamus porro ætatem puerilem valde doloribus esse obnoxiam, tum quod in hac ætate minus exacta servetur diæta & ventriculus cibis dulcibus, fructibus horeis, placentis ac lacticiis oneratur; tum quod etiam

Cephalalgia  
symptomata.

Puerilis

ætas,

quare

ceph-

algia

obnoxia

ver-



vermes, quibus gignendis pueri per-  
opportuni sunt, causam hujus mali  
præbent, dum putres & corrupti hu-  
mores ad caput cum chylo dati, mem-  
branis motricibus elasticis tonum &  
robur naturale auferunt. Sciendum  
quoque est non semper & continenter  
dolorem hunc cruciare, sed dilucida  
sua ac definita interdum habere inter-  
valla, ut magno ægrorum solatio sub-  
inde remittat, & ad notabile etiam  
tempus ægros deferat, qui certis ta-  
men postea horis, diebus, imo men-  
sibus & annis revertitur, certo tunc  
indicio, causam magis in remotis par-  
tibus, maxime omnium in ventricu-  
lo ac visceribus imi ventris hære-  
re; quorum vitio sanguinis liber progres-  
sus per universum corpus maxime per  
caput ubi impeditur, dolor excitatur:  
quod in primis in viris, qui fluxui hæ-  
morrhoidali sunt vel fuerunt obnoxii,  
vel malo hypochondriaco affecti,  
observavimus.

§. XVI.

Prognosis.

Neque semper sine periculo cepha-  
lalgia est: nam si causa doloris magis  
intra cranium inque membranis cere-  
bri consistit, sique dolor vehemens &  
assiduus cum febre excruciat & som-  
num pæne omnem adimit, phreniti-  
dem non raro prænunciat; si vero su-  
bito in hypochondriacis vel in melan-  
choliâ pronis, præsertim graviore  
animi affectu præcedente oritur, &  
somnia atque appetentiam aufert,  
ac cum auditus difficultate vasorum-  
que interna pulsatione jungitur; hæc  
vero cuncta sine febre fiunt, furorem  
præfigit. Ubi vero subitum & pera-  
cutum in capite dolorem aurium tin-  
nitus, difficilis incessus, genuum  
imbecillitas, & impeditus tardusque  
sermo sequitur, signum est futuri  
morbi attoniti vel etiam hemiplexiæ,  
qui tamen magis in opposito latere  
quam in affectu excruciat, dum hoc  
percipiendo dolori non amplius par  
est. Neque prætermittendum esse  
censeo, quod in adolescentibus & ju-  
nioribus, frequentiores cephalagiæ,

Hoffm. Syst. T. IV. P. II.

futuræ arthritidis vel podagræ indi-  
cium præbeant.

Indicationes Curatorie.

§. I.

**Q**uod attinet ad curationem hujus <sup>Indica-  
tiones</sup> mali, cum variæ ejus sint causæ, <sup>quatuor.</sup>  
probe eæ debent discerni, quia  
eisdem removendis, omnis medenti  
ratio superstructa esse debet. In gene-  
re tamen omnes scopi hunc morbum  
curandi, sequentibus absolvuntur indi-  
cationibus. Primo sanguis & humores  
impetuose ad caput congesti si fuerint,  
partim ad loca ignobiliora derivandi,  
partim idoneis remediis discutiendi  
sunt. Secundo stricture membranarum  
capitis spasticæ, quarum causa plerum-  
que est acris caustica materia relaxan-  
dæ sunt, ut liberius fluida, quorum cur-  
sus per has impeditus fuit, nunc pro-  
gredi possint. Tertio causa materialis  
vitiosa, peccans intemperie, temperan-  
da & per convenientia emunctoria  
placide subducenda. Tandem ad aver-  
tendas recidivas, capiti & toti nervo-  
rum systemati idoneis remediis præ-  
sertim accurato diætæ & vitæ regimi-  
ne robur conciliandum.

§. II.

Si causa doloris est nimius ex infe-  
rioribus locis ad caput per spasmos ap- <sup>Quando  
P.S. cõ-  
ferat.</sup>  
pulsus & irruens sanguis, non facile præ-  
sentius auxilium quam in ejus missio-  
ne positum erit, quæ in locis non procul  
a parte affecta, melioris derivationis  
causa instituenda est; vid. sub lingua aut  
in fronte, vel venæ jugularis externæ  
incisione, aut hirudinum pone aures  
applicatione; hac tamen adhibita ob-  
servatione, ut si corpus nimis turgeat  
sanguine, primo vena circa pedum ta-  
los pertundatur, postea sequente vel  
secundo die vena circa caput aperiri  
potest. Consultum quoque judicamus,  
ante sanguinis detractionem, alvum  
fordibus deplere, quod commode &  
insigni cum levamine clysteribus fieri  
potest domesticis, vel etiâ per infusum  
mannatum & rhabarbarinum, adjecto

G

fale



fale quodam aperitivo, ut cremore tartari, vel fale Sedlicensi.

## §. III.

Quibus  
erga/-  
mus/-  
dandus

Ad compescendum vero nimium sanguinis abundantis & ebullientis orgasmum, mixturam blandi diapnoicam & temperantem, ex aqua florum tilia, liliorum convallium, sambuci, ceraforum nigrorum, antimonio diaphoretico, nitro purificato, cornu cervi usto, cinnabari & syrupo papaveris albi compositam, dare expedit. Externe vero epithema discutiens & temperans fronti & capiti cum linteo duplicato est applicandum, cujus formula hæc esse potest: Recipe aceti rosacei, rutacei ana unciam & dimidiam, spiritus rosarum drachmas duas in quo camphoræ grana sex soluta, nitri purificati scrupulos duos, olei ligni Rhodii guttas quindecim; vel sequens emulsio cum fructu usurpari poterit. Recipe nucleorum Persicorum, amygdalarum amararum ana unciam dimidiam, seminis papaveris albi drachm. duas, aquæ rosarum, florum sambuci, ceraforum nigrorum dimidiam, camphoræ in oleo amygdalarum dulcium solutæ grana quinque M. D.

## §. IV.

Quid  
facien-  
dum si a  
fero vi-  
scido  
dolor  
oritur.

Alia vero medendi ratione opusest, si a feri visceri & vitiosi intra vel extra cranii membranarum vasa stagnantis copia, dolor cum torpore & gravitate sæpe valde diuturnus innascitur, ubi nec sanguinis missiones, nec leniora laxantia quicquam efficaciter præstare possunt, sed tum dare convenit paulo valentiora, quæ crassos glutinosos humores dissolvendi & simul per alvum expellendi facultate pollent. Id quod utrumque egregie præstant quæ sequuntur pilulæ: Recipe gummi ammoniaci depurati, sagapeni, myrrhæ electæ, aloes rosatæ, extracti hellebori nigri, resinæ jalappæ, mercurii dulcis, cinnabaris præparatæ ana drachmam dimidiam extracti croci, pulveris castorei, salis succini ana grana 15. M. F. pilulæ ex

scrupulo, numero 12. quorum sex vesperi, & sex postero die mane sumi possunt; quo tempore etiam ab omni cibo abstinendum & tenuia tantum juscula ægro præbenda sunt: tribus vero diebus exactis, idem repeti potest remedium. Vacuata sic sufficienter vitiosi feri copia, medicina utendum est tonica roborante & simul diuretica; quo fine ego multoties mixturam, quæ ex tincturæ antimonii acris partibus quatuor, essentiæ succini & spiritus bezoardici Buffii, vel tartari & liquoris nostri anodynii mineralis, singulorum partibus duabus erat composita, summo cum fructu expertus sum; cujus usus, dosin bis vel ter de die sumendo, per septimanam & ultra continuari potest. Nam quæ fibras torpidas roborando earum vim motricem elasticam excitant, simulque urinæ fluxum promovent, ea in hac cephalalgia specie, quæ ab extravasato sero intra cutim & cranium vel etiam in ipso cerebro oritur, valde proficua observavimus. Præter hæc autem cum CELSO, laborem & exercitationem usque ad sudorem, vehementem fricationem & cibos ac potiones quæ urinam movent, in tali doloris genere commendamus.

## §. V.

Si his in usum vocatis dolor non discutitur, confugiendum etiam ad externa, inter quæ vesicatoria virtutis sunt expertissimæ, quia pernicioso stagnanti humori exitum concedunt. Nos in usum habemus emplastrum meliloti, cujus uncia cum drachma cantharidum misceatur, adjectis granis aliquot camphoræ. Hoc magnitudine thaleri nuchæ applicari, & postea renovando illud, per longum tempus continuari potest; quod sine ullo incommodo insignem serosi humoris copiam fundit. In malo graviore autem & ubi a sero sub cute capitis stagnante, tumor visu, nec non ex dolore tactu cognoscitur, B. WEPFERÆS toti raso capiti emplastrum vesti-

Adhibenda  
externa  
prioribus  
in  
cassum  
adhibenda  
sunt.



vesicatorium instar cucuphæ impo-  
suit, cujus effectus hic fuit, ut sine  
obortis vesicis magnam feri visceri  
subtraxerit copiam: quod remedii ge-  
nus jam tum ab ipso RIVERO, vi-  
de ejus observ. in pertinaci capitis do-  
lore summo cum fructu usurpatum  
fuisse animadvertimus.

§. VI.

In do-  
lore fi-  
no quid  
conferat

Interdum fit, ut præter consuetu-  
dinem intensus dolor, certum dun-  
taxat locum occupet, a materia, si  
xius & paulo profundius membranis  
inhærente, oriundus; quo casu Me-  
dicus Gallus cum prudentia doctus &  
in observatione curiosus CHENAU,  
vide sis ejus observationes, miraculo-  
sum plane herbæ ranunculi pratensis  
impositæ vesicantem effectum, non  
satis prædicare potest: de cujus her-  
bæ specie scribit, quod foliis anemo-  
næ affimuletur, & masticata linguam  
mordeat quam maxime; hujus folia  
in mortario marmoreo contusa, &  
simul emplastro perforato appposito,  
parti applicare. Videtur hæc herba  
autem haud dissimilem cum moxa  
possidere effectum, quæ etiam in ejus-  
modi dolore a Medicorum peritissi-  
mis magnopere æstimatur. Ego rebus  
sic stantibus, felici aliquoties cum sue-  
cessu, rasæ prius quam occupavit do-  
lor parti, siccum sal volatile salis am-  
moniaci, cum æquali parte pulveris  
sinapi mixtum imponi jussi, eo quod  
paulo fortiolem discussionem, tam  
profunde inhærens vitiosus humor  
requirat.

§. VII.

Quid in  
grava-  
tione.

Ubi vero dolor a suppressa coryza,  
sive a mucositate, intra narium concame-  
rationes & sinus, detento oritur, ex-  
pedit crebro, sal quod vocatur Angli-  
canum, & nihil aliud est, quam sal  
volatile siccum salis ammoniaci, cum  
oleo cephalico, ut lavendulæ vel ma-  
joranæ exaltatum, naribus admove-  
re, vel etiam errhinum pulverem le-  
niter sternutationem moventem, qui  
ex herba majoranæ, betonicæ, ma-  
ro vero, floribus benzoes & pulvere

caryophyllorum concinnatur, ad in-  
teriora narium admittere.

§. VIII.

Quod si vero causa chronici & im-  
manis doloris, in valde corrupti feri  
& sanguinis massa, ut fit in lue Gal-  
lica & scorbutica, fundamentum  
suum habet, tunc utique necessarium  
est, congruis & specificis remediis  
hiscæ morbis sanandis accommodatis  
causam morbi aggredi; quo faciunt  
quam maxime lignorum decocta cum  
antimonio crudo, si prius humores  
corrupti per alvum probe, per ejus-  
modi quas jam supra dedimus pilulas,  
exclusi fuerint. Multum etiam tunc  
ex diætetis confert abstinentia sive  
inedia per unum vel alterum diem,  
nec non labor & exercitatio corporis  
ad sudorem usque. Utile quoque est,  
in pertinaci tali morbo, ab impuro  
qui nascitur sero, per medicinam,  
sudorem provocare: cui scopo egre-  
gie sequens pulvis satisfacit: Recipe  
cinnabaris nativæ præparatæ, cerussæ  
antimonii sive bezoardici mineralis,  
salis volatilis viperarum vel cornu  
cervi, nitri purificati, singulorum  
grana 10. camphoræ granum dimi-  
dium, pro dosi, desuper bibendo de-  
coctum sanguinem purificans.

§. IX.

Hemicrania & præsertim periodi-  
ca, causam latentem ut plurimum  
prima in regione habet, quando ven-  
triculus cum annexo duodeno, vitio-  
sa humorum colluvie refertus est,  
quam lenioribus tunc emeticis eva-  
cuare proficit: alvum quoque ducere  
& per inferiora sordes expurgare,  
noxiumque humorem a capite deriva-  
re, interdum valde est necessarium;  
id quod optime, per pilulas polychre-  
stas balsamicas, fieri potest. Postea  
elixiria stomachica, tonum ventri-  
culi & intestinorum roborantia, sunt  
subjungenda. Si vero ab inordinato  
mensium vel hæmorrhoidum fluxu,  
causa doloris nascitur, remediis quæ  
salutares excretiones in justum & con-

Quomodo  
do. tra-  
andus  
qui fit  
a sero  
& san-  
guine  
corru-  
pto.

Quid in  
bemi-  
crania  
profi-  
ciat.



venientem ordinem redigunt prudenter est utendum.

*Cautela & observationes clinicae.*

§. I.

*Quemadmodum & quando dolor le-  
gendus.*

**A**bsoluta sic doloris cephalici cura, quasdam necessarias adhuc cautelas, & observationes ad eam spectantes subicere haud erit inutile. Quodcumque dirus & acutus dolor praesertim qui consistit in syncipite & sinibus frontalibus, tanta vi pollet, ut vires mirum in modum frangendo, vitae discrimen minetur, ablatio causae morbi minime erit prius expectanda, sed aegro potius primo omnium levamen quoddam afferendum est; eo quod viribus amissis, Medicus frustra semper laboret. Quin imo ipsa doloris acerbitas saepe tanta est, ut gravior symptomata, vigiliam assiduam, animi deliquia, febrem, inflammationem mentisque alienationem accersere possit. Erunt ergo tum remedia interna, tum externa, ad dolorem servandum primario dirigenda. Ego vero ex internis, primas utique partes massae pilularum VVildegansii, quando cum cinnabari nativa miscetur, nec non pilulis Starekii deferre soleo. Prius vero semper ante usum anodynorum enemate venter subducendus est. Inter externa nec tutius, nec virtute praestantius invenimus remedium, quam linimentum spissius ex sequentibus ingredientibus, sub tali forma paratum. Sumitur nempe olei nucis moschatae expressi uncia dimidia, resinae styracis, resinae corticis thymiamatis aequalis pondere drachma, extracti croci, balsami Peruviani, utriusque drachma dimidia, olei ligni Rhodii guttae 12. M. linimentum fiat spissius, quod corio inductum, magnitudine imperialis temporibus applicetur. Sedato doloris impetu per ante rne & externe adhibita anodyna,

lene catharticum propinare juvat: postea ad alia, causam morbi penitus pro ejus conditione & natura per congrua remedia removendi Medicus confugere debet: Quando dolor acutissimus vixque tolerabilis, cavernis narium, sinibusque osseis capitis diutius infixus haeret, qui ab exigua sanguinis vel humoris extravasati quantitate, sub membrana hos sinus tegente, producit, sedata non modo, per jam dicta remedia, doloris atrociam convenit, sed & laborandum est, ut sanguinis appulsus, sub quo dolor augetur, minuatur; quod commodissime more Aegyptiacorum Medicorum scarificatione facta in naribus, fieri potest, vel compendiosiori modo, si straminis paulo durioris portio valide & subito naribus intrudatur, ut sanguinis inde sequatur profluvium.

§. II.

Si vero sub membrana pericranii extravasatus, mordax & acris humor inclusus, os incipit cariosum reddere, tum omnibus aliis in cassum applicati ad incisionem accedendum est, quae uti in paronychia ex simili fere causa orta, ita hic mirabile ferme auxilium. Si vero jam caries ad diploen ipsamque lamellam inferiorem cranii penetraverit, unicum auxilium in trepanatione provida erit reponendum.

§. III.

Porro in genere sciendum est, in omni, a quacunque etiam causa proficiscatur, dolore cephalico initium curationis ab injectione enematis, item a venesectione, si plethora id exigat, faciendum esse, ita tamen ut alvi apertio huic praecedat. Postea de aliorum congruorum remediorum tam internorum quam externorum usu erit decernendum. Saepius plethora soluta, ad meliorem derivationem causae peccantis a parte affecta frontis venam aperire expedit. Et tunc Clarissimi HEURNII monitum, quod notis in aph. 68. HIPPOCRATIS, Sect. 5. insinuat, dignum utique obser-

*Si dolor ab humore extravasato, vel in sinibus frontis haeret.*

*vel sub membrana pericranii.*

*Cura enemate incipienda.*



observatione est. Suadet nempe, ante sectionem, ut vinculum collo injiciatur, quo intumescat hæc vena quæ oblique erit secunda, cavendo diligenter ne ledatur tunica pericranii.

§. IV.

Arterio-  
comia.

Arteriotomiam in temporibus celebrandam, præsentaneam & pene mirandam, ceteris omnibus inaniter adhibitis, sæpius opem ferre & lenimen, probatissimorum Medicorum fide constat. Neque ego, quanquam nunquam hoc remedio usus sum, detrudere illi quicquam volo. Ita vero de hoc existimo, quod si sanguis ex ramo venæ jugularis externo aperto extrahatur, longe melius retardatum circularem sanguinis motum in capite restitui, humoremque subsistentem vel extravasatum, a quo pendet dolor, felicius dimoveri & excludi posse; dum videlicet sanguis arteriosus, majori ut antea celeritate in spatium venæ ab extractione sanguinis evacuaturn fertur. Si vero, ex consilio & deliberatione Medicorum, temporalis vena pertundi debet, tunc optime hæc operatio juxta aurem prope articulationem mandibulæ, ubi periculo vacat, celebranda erit.

§. V.

Pediluvium.

In omni dolore, ubi vires non fuerunt sanguinis detractionem, neque ejus satis est, pediluvia, quæ nunquam non in hoc affectu utilia, modo sint temperatiora, ut divertendum sanguinis & humorum motum ad partes internas, cum fructu adhiberi possunt; neque pedum frictiones paulo asperiores cum pannis sunt improbandæ; nec rubefacientia, ut taleoli raphani rustici cum sale mixti pedibus imponendi, usu suo destituuntur.

§. VI.

Cautela circa epithemata.

Circa epithemata actu frigida tenendum hoc est, quod cum summa circumspeditione applicanda sunt. Prostant enim exempla nobis etiam cognita eorum, qui in febribus præsertim exanthematicis, variolis, morbilis, purpura ubi natura per extre-

Hoffm. System. T. IV. P. II.

mam cutim peccantem materiam sub specie halituum non sine fructu excludere nititur, per crebrius in dolore capitis applicata frigidiora epithemata, in cœcitatem ad dies vitæ durantem, in epiphoras quoque ac suffusiones oculorum sunt præcipitati. Neque etiam semper confert in hoc dolore profligando, pluribus & variis topicis uti, quorum applicatio interdum plus periculi habet, plus etiam prudentiæ a Medico desiderat, quam internorum usus. Neque omnia, omnibus æque salutariter conveniunt: nam quæ alius ferre potest, ea alteri incommodant.

§. VII.

In ipso paroxysmo ad atrocem dolorem mulcendum, non una sed pluribus vicibus, insignem efficaciam a liquore nostro anodyno minerali aliquot guttulisejus, saccharo in pulverem redacto instillatis & in os sumtis, experti sumus. Extra paroxysmum ad roborandum caput, vel etiam ut illud a recurso mali vindicetur, balsamo nostro analeptico quod vitale audit, si vel exterius temporibus aut vertici applicetur, aut naribus modeste hauriatur, vel ejus aliquot guttula saccharo instillatæ cum infuso theiformi sumantur, peculiare plane, non sine ratione & experientia, virtutes & laudes tribuimus.

§. VIII.

Quandoque nimium ebulliens & variis de causis in motum concitationem actus sanguis, doloris originem præbet, neutiquam purgantia vel evacuantia, sed potius refrigerantia & temperantia locum inveniunt: quo ego nomine plurimum solius aquæ frigida potui atque nitrosi tribuere soleo. Et certe in hac re non est nihilo, eximium nostri HIPPOCRATIS monitum, qui lib. de ratione victus in morbis acutis, sic scribit: *Animadvertere oportet in iis quibus caput, vel ob exercitationes vel cursus, vel iter, venationem, vel alium quendam intempestivum laborem dolet; horum qui-*



quidem nullos purgaveris. Vult enim præclarus Senex, ubi ex calore vel sanguinis fervore oboriatur dolor, purgantibus uti nos non debere.

## §. IX.

Cepha-  
lica hy-  
pochon-  
driaco-  
rum.

Sæpe fit, ut melancholiæ hypochondriacæ cephalæa conjungatur cum digestionem depravata, macie corporis, timore & vultus colore vitiato: quo in casu venarum sectio, balnea aquæ dulcis conveniens, motus corporis, aquarum medicarum prudens usus, juscula medicata, præsertim quæ fiunt cum succo cichorei, serum lactis caprini chalybeatum nec non cichorea cum ceteris omnibus palmam facile dubiam reddant.

*Methodus Præservatoria.*

Uti in omnibus capitis affectibus, ita etiam in dolore ejus hanc vivendi rationem suadet MERCURIALIS Consult. Tom. 1. pag. 104. Consult. 107. cujus integrum textum methodi præservatoriæ loco hic inferere minime tædet. Aerem, enim inquit, inclementem & insuetum quantum fieri potest aut vites aut integumentis, & cubiculis arceas, somno moderate utaris, nec unquam nisi duabus post cibum horis: capite semper elevato dormias: corpus & animum ita exercere oportet ne alterum ab altero labore vel otio vincatur. Neve curæ nimie, nimieque cogitationes & studia calorem nativum hebetent. Alvum præ ceteris lubricam, nisi ita sit, quantum fieri potest serves, siquidem nihil est quod perinde caput afficiat & subinde vertiginosis affectibus occasionem præbeat, ac feces in intestinis diu retentæ. Jam vero repletiones & crapulæ quas interdum istarum plagarum habitatores, etiam si peregrini sint, committere coguntur, maxime omnium tibi inimicæ sint: & idcirco eas ac vinorum generosorum assiduos potus fugias necesse est. Cibi omnes crassi, pingues, flatulenti, cujusmodi legumina & olera, pisces ac fercula mul-

tis aromatibus conferta, qualibus gens germana uti solet, nisi a te vitentur, ne mala tua in dies augeantur metuedum est.

*Enarrationes morborum.*

## OBSERVATIO I.

**S**tudiosus viginti & aliquot annorum gracilis & tenerioris habitus, a studiorum intemperantia & nimis lucubrationibus, dispositionem sibi contraxit hypochondriacam, cum digestionem ciborum vitiata, alvi stricture, spasms, flatulentis, subinde etiam capitis dolore junctam. Invitatus ab amicis in convivium, magna & insolita vini Rhenani sed sulphuris fumo valde infecti copia se replevit, & ebrius factus. Ex hoc tempore gravi & continuo capitis dolore correptus fuit, qui tamen sinistrum maxime latus occupabat, ejusque anticam cum primis partem, frontem, oculum, aurem & dentes ejusdem lateris vehementer interdum stringebat ac obtundebat. Sub notabili vero tempestatis mutatione vel sub profundiori paulo mentis meditatione adeo crescebat, ut vires, somnum, appetentiamque prorsus fere adimeret. Suaserunt Medici crebras venæ sectiones, alvus sæpius polychrestis pilulis subducta, & cephalica tam interne quam externe, neque minus stomachica adhibita, sed citra optatum successum. Ego potius, cum consilium a me peteret, dissuasi ulteriorem sanguinis missionem & medicamentorum frequentem usum. Pediluvia vero & pedum frictiones cum pannis asperis, neque minus caput crebrius perfricandum commendavi, atque ut illud & pedes in æquabili & temperato calore ac transpiratione contineret, maneque quotidie in lecto infusum theiforme ex herba melissæ, salviæ, veronicæ & semine feniculi assumeret, blandum sudorem expectando, auctor fui. Pro potu ordinario,

Contra-  
max ca.  
pitis  
dolor in  
juvene  
hypo-  
chon-  
driaco,  
ex re-  
pletio-  
ne vini  
Rhenani sul-  
phure  
infecti  
crata



nio, loco cerevisiæ, decoctum ordinavi ex speciebus temperatis. Deinceps balsamo nostro liquido vitali sæpe inunctæ, ubi dolor nimis urgebat, nares, nucha, tempora. Quorum remediorum ope insigne levamen æger expertus est.

*Epicrisis.*

Dici vix potest, quam inimicum nervosis capitis partibus sit vinum sulphuratum. Et sicut vinum præsertim potens, & generosum, inque specie vina dulcia ad capitis morbos: ita multo magis quodvis infesto sulphuris vapore refertum vel adulteratum omne disponit. Sulphuris enim particulæ dum altius sese insinuant membranarum poris in stricturas eas adigunt. Vinum vero rarefaciendo sanguinem nimiam fibrarum nervosarum & vasorum efficit expansionem & distractionem: unde dolor oritur. Quod si vero semel & iterum solidis nervosis partibus inducta fuerit ingens infirmitas & earum vis motrix elastica naturalis læsa, affectiones quæ inde prodeunt præternaturales, ex facili causa, in iisdem partibus recurrunt. Deinceps observari quoque velim, in nulla corporis parte nervosas & sensu præditas membranas facilius lædi quam in capite, eo quod liberiori aeris accessui sunt expositæ. Quantum autem vim subitæ aeris & tempestatis mutationes, præsertim quæ ab uno extremo ad alterum vergunt, in mutando & lædendo nervosarum partium tono & elatere habeant: id dolores, spasmi, convulsiones & aliæ partium nervosarum præternaturales affectiones, quæ inde ingravescent, ostendunt luculentissime. Liquor noster balsamicus ex sinceris non adulteratis & temperatis oleis cephalicis confectus, infirmitati nervosarum partium, exterius præsertim si applicetur, mirifice opitulatur; nisi corpus admodum plethoricum sit, & natura prorsus a suaveolentibus abhorreat.

OBSERVATIO II.

Persona quædam splendida annum jam ætatis quadragesimum & tertium agens, validæ a natura constitutionis, a prima statim adolescentia largiori vini potui assueta, cui etiam in hunc usque diem nimium indulget, sub tempestate valde ventosa, humida & frigida, per aliquot septimanas venationibus incumbens, non modo defluxione acri, falsa, dolorifica, & ardente in utroque oculo, sed & gravi & pertinaci cephalalgia cum cutis capitis tumore juncta corripitur. In consilium & ego quoque excitus, fontem Selteranum vino intermiscendum & vesicatorium nostra methodo præparatum nuchæ applicandum suasi; accidulæ quoque Egranæ cum decenti regimine fuerunt usurpatæ. Et dolor inde valde mitescebat. Balsamo vero vitæ cum inungeretur caput, materia ichorosa, qualis ex ulceribus prodit, copiose effluxit: cucupha quoque ex speciebus balsamicis & cephalicis temperatis ad roborandum caput gestata fuit. Qua ratione atrox ille dolor penitus sublatus est.

*Epicrisis.*

In genere hoc attendi velim, eos qui pocula amant & fere quotidie se immergunt vino, ex transpiratione qua differri debent partes nimis calidæ & sulphureæ per auream frigidiorē admissam cohibita, graves in capitis morbos & dolores frequentius incurere, quia in nullo corporis loco immediate & proxime magis quam in capite, præsertim si illud non satis tegumentis munitum sit, tonus vasorum & tunicarum nervearum a vento frigido penetrante læditur. Vesicatoria rite & paulo diutius applicata, ubi materia in partibus capitis externis vitiosa residet, eximiam solent opem etiam in acris falsis & calidis oculorum defluxionibus præstare. Ceterum in ejusmodi morbis, qui a dis-

Cephalalgia  
pertinax cum  
oculorum  
ardente  
& dolorifica  
defluxione  
juncta, in  
Persona  
diutè  
vino  
dedita  
curata.



scrasia calida & sulphurea sanguinis, qualis ab exsurperante vini potu & cuticulari perspiratione prohibita nascitur, aquea diluentia acidulæ immo aqua simplex loco potus ordinarii magno & efficaci sunt præsidio.

## OBSERVATIO III.

*Imma-  
nis ce-  
phalal-  
gia cum  
auditus  
difficul-  
tate &  
tinnitu,  
ex ne-  
glecta  
V.S. san-  
guinis  
missione  
& hy-  
proposti-  
sa curata*

Juvenis spongiosi habitus & sanguineæ complexionis, a longo hinc tempore narium hæmorrhagiis obnoxius ob paulo validiora corporis exercitia & nimiumque veneris usum & potum largiorem, frequentiores & largiores eas passus est: ad quas minuendas & compescendas ter singulis annis admisit in pede venæsectionem. Postea vero eam consueto tempore semel omisit vel potius neglexit. Hinc insanabili corripitur cephalalgia cum auditus difficultate & tinnitu, caput totum rubore intumescit. Venæsectio instituitur in pede & multum sanguinis extrahitur. Mitigatur inde quidem dolor; neque tamen sedem suam penitus relinquere voluit; donec stramine paulo duriori naribus intruso largius sanguinis ex iis stillicidium fuerit procuratum. Inde dolores mitigati fuerunt mirum in modum. Sed cum a supra memoratis causis ex facili dolores recurrerent, nec sola venæsectio iis abigendis sufficeret; & quietam vitam & hydroposiam nec non serum lactis acidulatum frequentius bibendum commendavi, interpolato quandoque pulverum nitroforum usu. Quibus ex toto integram valetudinem consecutus est.

*Epicrisis.*

A sola plethora in junioribus nares crebrius fundere sanguinem, sique hoc non accidit, capitis ægritudines inque primis cephalalgias sequi, per crebram experientiam certissimum est. Quos morbos si natura non sponte per narium hæmorrhagias solvit, Medicus id arte præstare debet, evacuando sanguinem ex venis non procul a capite dissitis, incisione vena-

rum jugularium externarum vel quæ sub lingua positæ sunt: meliori vero adhuc successu per scarificationem in naribus vel apertionem venæ idoneo instrumento factam, non neglecta tamen sed probe observata hac cautela, quod videlicet, si nimia adsit sanguinis exundantia consultius sit, in dissito loco a parte affecta sanguinis missione prius instituere, & postea non procul a morbosa parte; quia dato exitu sanguis ex partibus inferioribus spasmus subinde affectis sæpius cum impetu in læsam partem ruit, non sine gravioris mali metu. In tali cephalalgia specie topica volatilia & suaveolentia calidiora fugienda esse censemus; sed præstat epithematibus paulo frigidioribus sanguinem ebullientem reprimere, quod tamen etiam adhibita prudentia fieri debet, præmissa videlicet venæsectione, pediluviiis, & alvi segnis per clysteres decenti subductione.

## OBSERVATIO IV.

Vir quinquagenarius sacerdotali munere fungens studiis & meditationibus nimium indulgens; ex prava inde sequuta digestionem & ventriculi infirmitate, crebrius catarrhosis defluxionibus, odontalgiis & cephalalgiis obnoxius fit: quæ tamen pathemata, cum plane abstineret a prandio, sumta tantum cæna multum decreverunt. Postea vero dolores capite usque ad colli & thoracis dextrum latus valde molesti exporrecti sunt, diutius perseverantes. Quibus removendis varia a variis præscripta sunt remedium genera, atque inter hæc internæ essentia, & elixiria cephalica, pulveres cinnabariini, fonticulus quoque nuchæ & brachio dextro inustus, celebrata venæ sectio, externe affectæ partes oleis penetrantibus inunctæ: sed sine levamine. Scripsit ad me historiam, adjiciens, quod nares tenacem albicantem mucum sed exili in copia fundant, & sensum se

*Rhe-  
matica  
ceph-  
algia  
in Sa-  
cerdote  
hypo-  
chond-  
riaco,  
Caro-  
lini  
curata*



ponderosi saxi in sinistra capitis parte percipere; caput vix sine dolore inclinari verti posse, ut linguæ etiam usus valde difficilis sit; colli quoque glandulas comparere tumidas. Addidit quod ante biennium febris tertiana ipsum corripuerit, quæ, postquam materia largiter e pectore excreta fuit, levamen quoddam attulit. Mentionem quoque fecit dolor circa ventriculi regionem atque inflationis ventriculi regionem atque inflationis in hypochondriis. Dedi consilium ut thermas Carolinas adiret, & secundum præscriptum a me regimen per mensem & ultra iis uteretur: injunxi demum accuratum vitæ institutum cum motu corporis sufficiente, & animi quiete; suasorque fui, ut præmissis frictionibus in nucha & cervice cucurbitulas cum scarificatione apponendas curaret. Et inde eum melius se habuisse cognovi.

*Epicrisis.*

Non simplex cephalalgia hic affectus sed potius rheumatismus qui totum caput & vicinas partes occupat, meretur appellari: eo quod humor vitiosus non unam partem occupet, sed per porosam substantiam serpendo, in vicinas nerveas partes, eas lancinando, & vellicando delabatur. Causam sine omni dubio discrasia feri scorbutica, ex depravata ventriculi digestionem & hypochondricum vitio nata subministravit. Originem primam vero dedit nimia studiorum cum profundis meditationibus intemperies, juncta cum lucubrationibus: quæ quantam vim, ventriculum & intestina infirmandi, & totum corpus morbidum reddendi habeant, experientia satis apertum ac manifestum est. In tali statu morbi particularia ut ita loquar remedia seu symptomatibus dicata nihil proficiunt, sed, si salus & sanitas speranda est, non ab aliis nisi ab iis quæ vitiis fluidorum amovendi sufficiunt, cujus generis sunt frontes medicati calidi vel frigidi cum regimine diætetico usurpati, peti debent.

OBSERVATIO V.

Femina nobilioris generis septuaginta jam septem annos transgressa sanguinis plena, contumaci a quinquagesimo circiter anno quo menstrualis fluxus valedixit hemicephalea affligebatur. Ex quo tempore, multa licet atque varia ad sedandos & abigendos hos dolores continuo adhibuerit remedia & frequentiores in brachio pariter ac pede venæsectiones instituerit; nullum tamen ex his percepit levamentum. Donec tandem sanguis ex narium venulis ad uncias circiter 6. ope penulæ intrusæ, in eo nimirum latere ubi dolor consistebat, fuerit evocatus. Neque ullum aliud præter aquam frigidam simplicem in usum est vocatum, ita ut non modo externe in duplicato linteo capiti sæpius admota, sed etiam interne ad tres quotidie mensuras triduum sumpta fuerit. Et sic diu exoptatum quæ DEI erat gratia passionis valde dolorificæ persensit levamen. Qua de re simplici hac portione semper loco cerevisiæ est usa, hausto tantum inter prandendum uno exiguo vini cyathos.

*Hemicephalea  
crania  
sanguinis  
evacuatio  
ne narium  
bus  
aqua  
frigida  
curata.*

*Epicrisis.*

Aquam simplicem frigidam puram tamen, tum interno, tum externo usu, in multis & gravibus affectibus valde conducibile & efficacissimum remedium præbere, per paucis quidem cognitum & credibile videtur. Nihilominus & experientiæ, & rationis, & auctoritatis quoque multorum veterum Medicorum suffragio id ipsum est probatissimum. Egimus ex instituto in peculiari dissertatione de salubritate potus frigidi, paulo prolixius: ubi evidentibus argumentis tam aquæ, & frigoris quoque in ea contenti eximias in morbis debellandis vires abunde demonstravimus: nam magna inest vis frigoris elasticam fibrarum, & vasorum corporis nostri vim firmandi roborandi



randi, & virtutem expansivam interni liquidi calidi coercendi, quo vis vasorum a nimia expansione valde debilitata ad statum redeat naturalem, & sanguinis ac fluidorum motus liber, & æquabilis restituatur. Et sicut potus sufficiens aquæ simplicis, & frigida firmando tonum solidorum, humores fluxiles reddendo, & salinas sulphureas partes diluendo ac evehendo, multorum affectuum causam præscindit; ita externe frigore suo etiam succurrit iis morbis qui a nimio vasorum infarctu, & expansione originem suam ducunt. Nihilominus quotidianus aquæ porus non omnibus naturis convenit, sed ejus præscriptum prudentiam medentis requirit.

## OBSERVATIO VI.

*Dolor fixus in vertice capitis ex ira & superingesto cibo a quo fit gilda su- blatus.* Vir erat Hebræus circiter quadragenarius strictioris corporis habitus, qui ab iracundia, & superingesto cibo contraxerat dolorem in vertice capitis fixum, spatium occupans magnitudine imperialis, sensus hujus doloris quidem non adeo erat acutus, vibratorius, lancinatorius aut pulsatorius, uti alias in cephalalgia esse solet, sed magis pressorius & gravativus sub cranio; neque erat perpetuus, sed subinde maxime circa vesperam, & noctem ingravescens. Nihilominus tamen adeo graviter induebat, ut appetitus concideret, somnus abesset, vires mirifice deficerent, pulsus inordinatus, modo celer, modo rarus, & languidus micaret, ipse quoque animus abjectus esset, & sub paroxysmo quandoque plane turbaretur. Pugnatum fuerat adversus hunc dolorem tum a me, tum ab aliis strenue, & efficacissimis alias remediis. Sed licet quandoque inde remittere per aliquot dies videretur, levi tamen accedente occasione ex ira aut aliis externis injuriis iterum vehementia recrudesceret priori similis. Exactis inter hæc duo-

bus circiter mensibus in consilium simul vocatus est civitatis hujus Medicus natione Gallus circa ingeniosa curandi tentamina subinde non infelicer adornans. Is purgato prius per aquam Sedlicensem corpore, dedit consilium, ut æger mane, & post meridiem biberet dimidiam aquæ fontanæ frigida mensuram in lecto. Inde primum quidem factum refrigerium, & symptomata visa exacerbata, sed elapsa hora pulsum magnitudo increvit & sudor largissimus cum doloris levamine. Hinc per septem dies potum continuare præcepit, tam felici successu, ut successive dolor evanesceret omnis. Ac licet elapsis allquot hebdomadibus, post iram dolor hic repeteret, eodem tamen remedio per triduum usurpato iterum feliciter est discussus, & æger sanus jam est ac vegetus.

*Epicrisis.*

Sedem hujus atrocis doloris in eo loco ubi conjunctio est suturarum coronariæ nempe, & sagittalis, qui in infantibus fontanellæ nomine venit, reponendam esse judico: nam ibi est pericranii cum dura matre arcta connexio; & proinde etiam dolor qui externe in illo loco extitit, in consensum trahendo duram cerebri membranam majorem symptomatum exacerbationem, virium prostrationem, animique turbationem, neque minus pulsum in ordinationem effecit. Causam ego mali esse bilem vitiosam ab ira commotam in flexura duodeni stagnantem, & corruptam credidi, cujus vis ebulliens & acrimonia mire a frigida potu coeretur, & reprimatur. Siquidem ego sæpius in praxi mea, ex vehementi ira mox ante cibum sumptum, gravem cephalæam animadverti, quam aliis nihil proficientibus, feliciter a feri lactis aciduli potu quotidie ad mensuram sumpti a me discussam memini. Secutæ inde fuerunt sæpe sex alvi de die dejectiones, & sic



expurgata bilioſorum humorum ſentina, deſiderata convaleſcentia, ſecuta eſt.

## OBSERVATIO VII.

*Cephalica ex quartana cort. china proſt. gata Ca. roſidis diſcuſſa*  
Civis hujus urbis annorum 50. febre per novem meſes laboravit quartana, quæ tribus corticis chinæ doſibus ſumtis præter expectationem evanuit: ſed in ejus locum graviffima cephalæa, quæ mire torſit hominem, vires attendendo ſucceſſit: dolor erat continuus, & valde gravativus qui maxime incrementa ſumſit peracta quatuor vel quinque horis a digeſtione, conjuncti ſimul erant dolor, tumor, imbecillitas manuum cum inſigni corporis debilitate. Poſtquam in caſſum multa fuerant uſurpata, venit ad me auxilium meum rogitans. In ſimilibus caſibus eſſentiæ noſtræ tonicę paulo protractiorem ſubinde convenientiſſimum expertus ſum: quoniam præter vim robꝛantem, ſerum vitioſum, tum per vias urinarias, tum per inſenſibilem tranſpirationem eliciendi efficaciam poſſidet inſignem. Sed ſuaſi thermarum Carolinarum uſum, corpore prius, per ſalia deterſiva, aperientia, interpoſitis noſtris pilulis baſſamicis probe præparato: & ſanatio ſucceſſit auſpicato.

*Epicriſis.*

Quartanæ familiariffimum eſſe cephalicum doloꝛem ſymptoma ſatis conſtat. Cauſam hujus rei inde deducendam eſſe arbitror, quod in hac febre quam maxime humor corruptus, tenacis, fixioris acidæ potiſſimum indolis duodeno, & valvulis tenuium inherens, ſimili charactere præterlabentem chylum inſiciat, qui poſtea ad minima, & capillaria membranarum capitis, vaſa delatus, liberiori fluidorum motui obicem ponens, earum diſtenſionem dolorificam cauſari poteſt. Id vero non modo in capitis ſed, & aliarum nervoſarum partium minimis vaſculis e-

venit. Quamdiu motus febrilis durat, tam diu vaſorum obſtructio, & humorum ſtagnatio neutiquam incrementum capit, propter celerioꝛem ſanguinis per ſolidas partes trajectionem. Quandocunque vero motus febriles corpori ſalutares ſupprimuntur, non mirum eſt majores fieri inſarctus, & obſtructiones vaſculorum, indeque doloꝛes artuum, capitis, tumoresque oedematoſo ſequi, qui non meliori, & tutiori ratione, quam laudatis jam tempeſtively adhibitis remediis poſſunt expugnari. Ejusmodi in caſibus, ubi neque locus neque tempus vel occaſio eſt utendi aquis mineralibus, curam haud infeliciter cum decoctis blande diaphoreticis lignoſis, & pulveribus ex cinnabari, ſale volatili, cornu cervi vel etiam regulo antimonii medicinali, & ſale abſinthii compoſitis, non omiſſis ex manna, & rhabbaro per infuſionem paratis laxantibus, bono cum DEO peregi. Atque inſignis quoque, & expertę virtutis, uſum eſſentiæ noſtræ robꝛantis, cujus mentio ſupra §. 4. p. 197. fit, reperi.

## OBSERVATIO VIII.

Femina tenerioris, & ſanguineo-  
cholericę conſtitutionis annum quæ *Cephalica ex quartana cort. china proſt. gata Ca. roſidis diſcuſſa*  
jam trigefimum complevit, vitæ ni-  
mum quietæ, & inordinate diætę  
indulgens, minus inordinatas nec  
ſufficientes per annum, & ultra ha-  
buit menſtruales purgationes. Exin-  
de de dolore in capite tenſivo, gra-  
vativo, lancinante diu conqueritur,  
qui primum totum occupavit caput,  
nunc vero ad ſiniſtrum latus declinat,  
ubi bregma, tempora, mandibulam,  
dentes, aurem, labia ejuſdem late-  
ris pungitivo, & urentis dolore infe-  
ſtat, ad brachium interdum pertin-  
gens: frequens intercurrit horripila-  
tio cum pulſu inæquali duro & celeri.  
Ab hiſce incommodis ſequentibus li-  
berata eſt. Primo ſingulis diebus pe-  
dilu-



diluvia convenientia fuerunt ordinata : dein venæsectio in pede post menses inordinate & parcius fluentes : tum quotidie infusum loco Thee mane copiose hauritum , quod ex verberna , melissa , summitatibus millefolii , semine fœniculi , cubebis , floribus chamomillæ vulgaris constabat . Pillulæ nostræ balsamicæ cum extracti croci & mercurii dulcis portione remixtæ , alternis diebus circa lecti ingressum , parviori dosi assumptæ fuerunt . Tandem externe balsamum nostrum vitæ sine ambra cum spiritus vini camphorato æqualibus partibus mixtum locis affectibus dolentibus inunctum fuit ; inuncto accuratiori vitæ regimine , motu corporis & ut frigida atque acida vitaret , nec non digestionem vacillanti cum cibis sumendo elixirio nostro stomachico , quod in notis ad Poterium describitur , succurreret . Et ita per DEI gratiam ad valetudinem exoptatam pervenit .

#### *Epicrisis.*

Quando in gravi capitis dolore etiam vicinæ nervosæ partes in confortium trahuntur, cephalalgia rheumatica oritur, quæ a sero acri vellicante, ob interceptum per venas obstructas sanguinis circuitum, secedente ac extra vasa posito, & per poros & loculos ad membranas delato originem suam sumit. Et tales rheumaticæ affectiones ab impuro sero frequentissime in sexu sequiori, ob lunaris tributum minus rectum statum eveniunt. Neque melior ac certior iis medendi ratio suppetit, ac si Medicus operam & studium in ordinem redigendo uterinam excretionem per convenientia remedia adhibet. Nihilominus tamen semper, si talis casus occurrit, ventriculi simul ejusque digestionis habenda est ratio, ut bene temperatus chylus ad sanguinis & humorum massam accedat, qui ejus intemperatam crasim sensim paulatimque successu temporis corrigere valeat. Quod verò dolor sæpius unum

tantum capitis & vicinarum partium latus petat, ex anatomicis repetenda erit ratio: quandoquidem consistat, sicut cerebrum in duo hemisphæria divisum; ita etiam in dextro, & sinistro latere distinctos ramos arteriarum, nervorumque extrare, & communicationem inter se habere, ut licet læsio fiat & circulatio non recte procedat quod vasa in uno latere, salvus tamen, & integer motus sanguinis circularis in altero hemisphærio persistat.

#### OBSERVATIO IX.

Nobilis adolescens qui vix ætatis annum decimum octavum attigit, excitati alia, & prompti in studia ingenii, postquam sanguinis e naribus stillicidium cui frequentius obnoxius fuit nescio ex qua causa præter quod cerebro venationibus sub cœlo frigidiori interfuerat, emanarit, insignem in capite aliquot jam menses torporem, & obtusum ac gravativum dolorem qui ad oculorum radices pertingit, persensit. Periit omnis animi & corporis vigor, ciborum appetentia, placidusque somnus. Facies erat pallida cum extremorum frigore & lassitudine. Opem a me & ipse, & mater ejus efflagitarunt quam sollicitè. Celebrata in pede fuit venæsectio, & quia aliquid hypochondriaci subesse judicavi, præscripsi curam fontis Selterani cum debito regimine: sed effectus plane frustraneo. Postea infusum Theiforme ex temperatis herbis cephalicis mane hauriendum ordinavi: reiterandam quoque jussi venæsectionem & tertio die post, cucurbitulas cum scarificatione nuchæ apponendas; errhinus quoque pulvis naribus frequentius admotus. Et non ita multo post cessavit dolor, rediit appetitus & quietus somnus, omniumque actionum vigor, ac pristinæ valetudini redditus fuit. Stillare quoque rursus sanguis, sed non largo flumine, cœpit e naribus.

*Cephalalgia a coarctatione narium hemorrhagica suppressa*



*Epicrisis.*

Causam hujus gravis doloris, & symptomatum quæ eum subsequabantur, a sufflaminata narium hæmorrhagia deducendam esse, extra dubium positum est. Vasa vero cerebri-mento sanguine plus quam par est fuisse infarcta, testatum faciunt symptomata in nervosis primarum viarum partibus, non secus ac in hypochondriacis contingit, suscitata, idque tantum propter passionem, & consensum nervorum: siquidem ante accessionem hujus doloris, ab ejusmodi pathematibus plane liber fuit, quæ sedato dolore etiam conquieverunt, ut adeo clare pateat, quanta sit capitis cum ventriculo & aliis nervosis corporis partibus consensio. Deinceps illud notari velim, in capitis morbis, quia redundantia sanguinis ortum ducunt, ejus missionem semper observari meliorem in loco capiti propinquiore ac in distitis partibus. Pulveres errhini & cephalici naribus suscepti, vellicando & irritando in cerebri quoque membranas agitationem quandam dum efficiunt, a molesto humorum infarctu eas liberandi vim, & potentiam exferere posse, haud videtur improbabile.

OBSERVATIO X.

*Cephalica, ex gonorrhoea virulenta decocto sudorifero curata.*  
Juvenis vegetæ & robustæ constitutionis, annorum 20. & aliquot, virulenta gonorrhoea binis vicibus affectus; sed nescio qua methodo curatus. Aliquot menses post, ulcerosæ & prurientes pustulæ hinc inde in cute efflorescebant: quarum tamen major copia in dextra quam in sinistra capitis, & reliqui corporis parte conspiciebatur, qua in regione etiam tumor testiculi durus & valde molestus consistebat. Præter languorem universi corporis, immaniter eum dolores in capite præsertim nocturno tempore torquebant; adeo, ut non modo so-

mnium tollerent, sed appetitum etiam & vires imminuerent. Ad sublevandum hoc malum & chirurgorum, & Medicorum opera usus: sed nihil omnia, neq; mercurialis quam adhibuerant salivatio, profecerunt: Ultra anni dimidium atroci hoc malo afflictus & valde extenuatus me quoque in auxilium vocavit. Expurgatis prius lenissimis remediis aliquoties primis viis, decoctum cujus vires in purificando sanguine multoties expertum, tum ad sudorem eliciendum, tum ad corrigendam intemperiem, pro potu ordinario usurpandum, & quidem sequentem in modum imperavi: Sarsaparillæ uncias 4. & antimonii crudi uncia, salis gemmæ, & salis tartari cujusque drachmam adjeci, & cum mensuris quinque aquæ simplicis puræ decocto facta est in vesica stanno obducta, cui alambicus imponebatur. Decenti sic admoto igne, cum propemodum dimidia pars destillata esset liquoris forti odore nares ferientis; destitit ab ulteriori coctione, & destillatum affudi residuo in vesica; facta filtratione, quod filtrum subiit servari pro usu, eo quo sequitur modo. Dimidia ejus pars cum æquali portione decocti scorzonæ, & passularum miscebatur pro potu ordinario; quod remanebat in duas partes divisum fuit, quarum una mane, altera hora quinta pomeridiana calide fuit hausta, sudorem cum debito regimine in lecto expectando. Interpolatus quoque huic decocto interdum fuit usus tincturæ antimonii acris cum spiritus tartari & liquoris nostri anodyno minerali tertia parte permixti. Qua cura per integras sex septimanas usus est. Sed testium dolorifico tumori simul duxi per idonea resolventia, & discutientia topica prospiciendum: inter quæ emplastrum diachylon, emplastro Vigonis cum mercurio permixtum, decima parte florum sulphuris, nec non balsami ful-



sulphuris antimoniatum notabili portione adjecta, cataplasmate superimposito, quod ex radice enulæ, altheæ, iridis nostratis, cucumere asinino, floribus sambuci, semine cymini, earvi, cum aqua florum sambuci, & vino coctis constabat, laudabile levamentum attulerunt, tumore ad dimidium, & ultra discusso. Quibus remediis per DEI gratiam id consecuti sumus, ut ab omnibus incommodis liber, sanitati fuerit restitutus desideratissima.

### *Epicrisis.*

Ex gonorrhœa virulenta, & Gallica lues, ex eorum sunt morborum numero, qui nisi radicitus idonea, & satis efficaci cura extirpentur, ob relictas vel in glandularum tubulosa substantia, veletiam, ut nonnullorum fert sententia in membranis quæ pinguedinem cingunt, altius impaetas particulas, ex facili reviviscunt, dum ex latibulis suis excussæ, & denuo cum lymphæ, & sanguinis massa corruptæ, & perniciali sua vi, instar feminii vel fermenti sese multiplicant, omnis generis fluida inquinando. Cura horum affectuum, quæ per salivationem a mercurialibus excitatam, quasi specificum passim commendatur remedium, si immanis & chronicus capitis dolor fuerit junctus, non semper expectationi respondet; & proinde VVILLISIUS *de anima brutorum cap. 2.* tali in casu eam rejicere, multis exemplis quæ recenset infelicitis successus adductus, non veretur. Addo etiam illud, quod chirurgi quibus vulgo ea committitur, empirice ut plurimum, posthabita & individui, & aliarum circumstantiarum ratione, hanc curam tractare soleant. Ceterum sudorifera quæ antimonium crudum ingrediuntur decocta, si decenti modo & artis lege preparata adhibentur, in hujusmodi Venereis affectibus maxime recrudescuntibus laudabilem opem subinde præstitisse, compluribus exemplis edocti sumus: neque etiam, sine con-

venienti horum usu, testium tumorem curatu non tam facilem, solis externis etiam alias valde efficacibus sanari posse identidem nobis perspectum compertumque est. De usu vero & viribus supra laudatæ tincturæ antimonii acris cum aliis permixtæ illud insinuandum esse duxi, quod morbis, & præsertim capitis doloribus a colluvie serosa ortis magnas vires medendi possideat, eo quod vitiosum serum cum per cutis meatum per renes insigniter educat. Illud enim notatu dignum est, quod cachecticis gravativi dolores noctu maxime infestantes, & per longum tempus durantes admodum sint familiares, atque ægritudines quæ ex vitiosa, & impura lymphâ proveniunt ut plurimum insequi soleant; unde cum VVILLISIO loco citato pag. 202. non semel annotavimus, plures post variolas, morbillos, imo purpuram, cephalalgiam quotidianam fuisse obnoxios, ubi & sanguinem depurantia, quæ feri vitiosi copiam per renes efficaciter educunt, optimam locant operam: nam serum in cachecticis corporibus in cerebri sinuositatibus imo ventriculis stagnans, dolorem illum ponderis instar gravem excitare valde est credibile.

## C A P U T II.

### *De dolore Cardialgico, Spasmodico & Flatulento.*

#### *Theses Pathologicæ.*

#### §. I.

**I**Nter graves & acerbos, qui misere genus humanum torquent, & corpus æque ac animum moleste afficiunt dolores, is qui cardialgiæ nomine venit, non postremum sibi vindicat locum. Neque vero cordis, ut vulgi fert opinio, & germanice *Bergens Ungst* dicitur, dolor est, sed ipsius stomachi, seu partis valde ner-

*Defixio  
tio re-  
alis car-  
dialg.*



vosæ, & exquisitæ sensationis, & præcipue ejus orificiorum, acutus circa scrobiculum cordis consistens, cum ingenti anxietate, spirandi angustia, viriumque prostratione, inquietudine, nisu vomendi, extremarum partium tremore, & frigore, levi animi defectione junctas, a spasmō vel inflatione ortus, totum sæpe nervorum systema in consensum trahens.

## §. II.

*Quomodo do-  
di-  
grosca-  
tur a  
spuria.* Neque vero omnis stomachi dolor, qualis subinde, a crudorum ingestorum copia, & longiori eorum in ventriculo mora, pressorius, & anxius incidit, cardialgia nominanda, quia non est acutus, neque orificia ventriculi tunc valde dolent, neque jactatio corporis ac virium prostratio, quæ propria fere & **formalia** hujus morbi sunt signa, sentiuntur: nisi cardialgiam hanc spuriam vocare velimus. Est vero magnitudine causæ dolor vel vehementior vel mitior, & hinc vel gravioribus vel levioribus stipatus symptomatibus.

## §. III.

*Sedes.* Acerbi hujus doloris sedes, ex communi Medicorum tam veterum quam recentiorum sententia, sinistrum tantum stomachi habetur orificium, quod jam olim HIPPOCRATES & GALENUS **cardiam** vocarunt; unde etiam hic dolor cardialgiæ nomen mutuatur. Nos vero potius dextrum, quod pylorus nominatur, orificium, imo totum ratione tunicæ qua instructus est valde sensibilis **nervoso-fibrosæ**, stomachum adfici, vel ex toto elucescere arbitramur, quia circa cordis scrobiculum, sub mucronata cartilagine ad latus dextrum, ubi consistans pylori sedes est, hic atrox incipit & consistit semper dolor, & inde ad sinistrum, quod in dorso non procul a spinali medulla situm est & diaphragma circa vertebam thoracis undecimam vel duodecimam penetrat, se extendit. In iis quoque qui cardialgia defunguntur dextrum potius quam

sinistrum orificium in sectione affectum fuit inventum, adeo ut in quorundam pyloro, ulcera, abscessus, tumores corruptiones sphacelosæ, quo simul duodenum ipsumque ventriculi fundum affecerunt, annotatæ fuerint.

## §. IV.

Cum autem nunquam tristis, & *Divulsi-  
tur in  
flatulē-  
tam &  
spasmo-  
dicam* anxia in anima excitetur sensatio, nisi a causa violenta partes nervosæ & fibrosæ, vehementi distensione continui dissolutionem minante, vel valida constrictione, sive spastica strictura supra modum afficiantur: ita etiam observamus, cardialgiam aliam esse flatulentam, aliam spasmodicam, adeo ut in illa, ab incarceratis flatibus, totus stomachus violenter distendatur atque distrahatur; in hac vero in arctius potius spatium crispetur, coarctetur atque contrahatur.

## §. V.

Non parum quoque refert discrimina & signa nosse, quibus cardialgia *Signa  
flatu-  
lento.* flatulenta a spasmodica distinguitur: in illa major spirandi juncta est difficultas atque angustia, eo, quod ventriculus inflatus, liberum diaphragmatis descensum, qualis ad faciliorem spiritum trahendum summe necessarius est, intercipiat: dein tumor frequentius ad sensum sat manifestus, instar ovi in scrobiculo cordis ad dextrum latus inclinans, observetur, dum pylorus inflato ventriculo semper attollitur: præter hæc ræctum adsit frequentia, quibus ex ore prodeuntibus, dolor nonnihil levare incipit: denique post cibum, præsertim qui inflat, assumptum dolor ordinario ingravescere soleat. Ubi vero pertinaciori spasmō tota ventriculi substantia affligitur; tunc major circa præcordia anxietas, major virium defectio, corporis jactatio atque extremorum frigus percipi-  
*Spasmo-  
dicæ  
causæ  
venenose.* tur.

## §. VI.

Si ad veneni naturam accedens humor



mor causa est, longe vehementiora & quæ plurimum habent periculi juncta sunt symptomata. Ita subinde in capite dolor, vertigo, scotomia, agrypnia, mentis interdum emotio, & convulsio: in cavitate thoracis, pectoris oppressio, cordis tremor & syncope, pulsus exiguus, debilis, interdum durus & inæqualis, intermittens quoque: in abdomine, ventris tormina, alvi constipatio, urine suppressio: in partibus externis, refrigeratio, tremor, horror, sudor frigidus, facies livida, contracta, fœdi & flavescentis coloris in conspectum prodeunt.

## §. VII.

Pathematum  
ex nervorum  
communica-  
tione cum ven-  
triculo  
explicato

Tam atrocia in universo corpore, a ventriculo male affecto, suboriri posse pathemata, is non mirabitur, qui ex anatomicis didicit, par nervorum octavum, quod ad præcipuas nervosas corporis partes internas fertur, & iis vigorem, robur, motum & sensum largitur, valde notabiles, & insignes duos ramos ad ventriculi sinistri orificium spargere: atque internos per arcum minorem ad pylorum; externos vero ad fundum ventriculi ferri: & hinc consensionis, quam hæc nobilis pars cum systemate nervosarum partium alit, ratio ducitur quam aptissime. Neque enim ulla alia, in universo corpore pars est, quæ similem cum præstantioribus ejusdem partibus alit habeatque consensionem ac mutuam communicationem, præter stomachum; uti id fusius in *Medicina ration. System. Tom. 3. Sect. 1. cap. 5.* a nobis est expositum. Inter alia hujus rei luculenta testimonia, observationes hinc inde in Medicorum, qui casus ad Medicinam Forensensem spectantes ediderunt scriptis, repertæ id exhibent: quibus constat, a forti percussione cum manu vel instrumento duro circa cordis scrobiculum facta, gravissima protinus symptomata, ut quis statim in terram gelidus concidat, epilepsia,

imo morte repentina corripiatur, insequi.

## §. VIII.

Cum duplex sit cardialgiæ non solum ac colicæ species: altera nimirum flatulenta, quæ ab incarceratis fit flatibus, totam ventriculi cavitatem fortiter distendentibus, qualis vocari solet germanice *Dber*, Colic, *Derg*, Colic: altera sit cardialgia spasmodica convulsiva, vulgo *befftiget Magen Rrampff*, sequitur nunc ut inquiramus, qua ratione flatus, cum liberum alias habeant per aperta orificia transitum, firmiter in cavitate ventriculi includi, & detineri possint. Hujus quidem phænomeni ratio vix a Medicis est tacta. Nos ejusmodi vehementem inflationem, quæ incidit in ventriculum, etiam effectum spasmus esse, affirmare nihil dubitamus; qui tamen non totam ventriculi nervoso membranaceam substantiam, sed tantum ejus orificia subtilioris sensationis infestat: unde iis valde coarctatis, & clausis, non mirum est, vapores ex indigesta maxime crudorum ingestorum mole, mediante calore, cum non inveniant exitum, totum ventriculum mire distendendo ac distrahendo, atrocem cum summa anxietate & spirandi angustia dolorem excitare.

## §. IX.

Sunt vero inprimis flatulentæ cardialgiæ obnoxii hypochondriaci, quorum stomachus copiosa colluvie biliosa & acida scatet: ex quo fit, ut a pastu aliquot horas, fortes circa præcordia tensiones, inflationes, gravesque dolores cum difficili spiratione experiantur, qui postea, ructibus ut plurimum acidis prodeuntibus, non nihil remittunt, vel vomitu superveniente acido pituitoso insigniter levantur, & demum paulatim redeunte calore ad ventriculum, & extremas partes, quæ algescebant, solvantur. Vidimus tale quoque vitium sæpius in iis, qui post morbum paulo diuturniorem, magnam sibi ven-

Cause  
infla-  
tionis  
ad pas-  
sum

Subjecte  
cardi-  
algie  
flatu-  
lente.



triculi infirmitatē contraxerunt, quando paulo avidius cibos, præsertim incongruos, ut sunt pingues acidi, & fermentescibiles, fructus quoque horæi, ingerunt, accedentes simul corporis, & aquam maxime pedum vel regionis lumbaris refrigeratione, subortum, & crebrius per intervalla reversum.

§. X.

incedit  
infantes  
lactētes

Vidimus quoque ejusmodi ventriculi, cum dolore & respiratione difficili, inflationem, in infantibus lactentibus, a lacte in ventriculo coagulato, & ibi stagnante acidoque facto, ubi tota præcordialis regio, sub costis spuris, mire flatibus distenta & turgida, visui pariter ac tactui se offerebat. Vulgo id vitium dicitur *bar Berg*, *Oespann*. In mentem nobis etiam incidit exemplum cujusdam juvenis, qui, a nimia recentis, & mollioris casei commestione, & desuper Rhenano non adeo spirituofo sed acidulo vino hausto, in flatulentam & gravem cardialgiā incidebat: quam Medicus colicum dolorem, qui tamen longe inferiorem sedem habeat, neque cum tanta spirandi angustia jungitur, reputabat. Neque hoc loco discrimen illud inter dolorem colicum, qui sub ventriculo in ea parte coli, quæ immediate ipsi substernitur, & inter stomachalem colicam, si ita loqui licet, præterire debemus; quia non semel sed aliquoties, hac in re deceptos fuisse Medicos, animadvertimus. Ut itaque circumstantias loci dolentis, antecedentes causas, notas quoque quæ cardialgiæ propriæ sunt, item faustos remedium successus, probe semper circumspectus Medicus observet, non sine ratione monendum ducimus; nam unico discutiente applicato clystere, colicum sub ventriculo consistentem dolorem sublatum meminimus.

§. XI.

A mēsi-  
bus vel  
hemor-  
roid.  
suppres-  
sis.

Utut vero plerumque flatulenti & tensivi ventriculi doloris causa, vitiosus humor, qui intra duodeni cavitatem paulo diutius retentus, flatus

Hoffm. System. T. IV. P. II.

ventriculi orificia spasmo constringentes, excitat: scimus tamen occurrere exempla mali flatulenti, ubi nullum materiam vitiosam in ventriculi vel duodeni cavitate animadvertimus. Quod vel ex eo dijudicare potuimus, quia tales anxietas & flatulentæ cardialgiæ, feminis præsertim junioribus, restitante mensium fluxu, imo per primos menses gravidis, familiarissimæ observantur, & ructibus doloreque circa cordis scrobiculum & dorsum se manifestant, atque exacte circa mensium tempus revertuntur. Simile quid aliquando in viris, hæmorrhoidibus suppressis qui laborarunt, evenisse notavimus.

§. XII.

Quamvis vero non adeo facile sit, *Causa efficiat* hujus rei invenire causam, nos tamen quodcumque consideramus, a sanguine intra intestini coli vel recti membranarum vasa stagnante, spasmodicum dolorem in iis partibus effici; nullam aliam pariter hic subesse causam judicamus, quam, quod facta palindrome, sanguis ad regionem ventriculi & præcordialem delatus, atque vasa ventriculi infarciens, ejus potissimum orificia spasticis stricturis pariter afficere & infestare possit. Et confirmamur in hac sententia, cum inter frequentes observationes in comperito sit, in iis qui asthmate stomachali flatulento spasmodico, sæpius lethali, & ut plurimum hydropem post se trahente, laborarunt, post mortem infarcta, & obstructa viscera sanguinea, præsertim hepar, vel etiam polyposas concretiones in cordis ventriculo repertas fuisse, quibus, dum obex ponitur sanguinis libero circulo, facile ejus impetus ad præcordia fertur, qui sic causam tam anxii doloris, quem perpetuo ructus concomitari solent, subministrat.

§. XIII.

Cum vero & sine singulari vel *Cardial. spasmo-* plane nulla inflatione, ille acer- *dica* biffi-



ab anti-  
mi affe-  
ctibus.

bissimus & anxius ventriculi dolor, vulgo *Magen Rrampff*, non tantum orificiorum sed etiam totius substantiam, ob tunicam nervosam, spasmorum vehementia affligat, ejus etiam causas paulo exactius investigare oportet. Jam vero nil propemodum in praxi frequentius occurrit, quam quod mox a vehementi iracundia, circa præcordia, & cordis scrobiculum, & magis versus dextram partem, compressorius, & constrictivus dolor cum anxietate & angustia pectoris, nausea, ciborum fastidio, oris amaritie oboriatur. Hujus ergo mali causam non difficulter is reperiet, qui considerat talem esse iræ vehementioris vim atque indolem, ut maxime suum pernicipalem effectum in præcordiis exerat, per quæ, ut bene, explicat FERNELIUS l. 4. de febr. c. 10. regio circa ventriculum, diaphragma, jecoris cavum, & in eo ductus biliarii detenti, pancreas, in specie ventriculus, ejusque superius orificium, & quæ sub costis nothis, anteriora versus & sternum inflectuntur, intelligitur, spasticis constrictionibus ea exercendo. Dein quoque ab ira valde commoveri biliosum succum, & systole canalium, qui bilem vehunt, intensiori reddita, eam copiosius in duodenum effundi constat, ubi postea diuturniori mora, corrosiva fit & corrumpitur, & diarrhœæ, cholere, vomitionis, atque etiam doloris cardialgici causam omnino subministrat, quia acrimonia sua, & pylorum & fundum ventriculi afficit. A terrore quoque paulo graviori cito induci posse cardialgiam multoties experientia docet: & mœrorem etiam sensim sensimque humores corrumpendo ad graves diuturnasque cardialgias disponere PLATERI observ. 2. testimonium exhibet.

## §. XIV.

Symptoma  
ma all.  
quando  
est.

Affectio ventriculi spasmodica est frequenter symptomatrica. Non pauca nobis sunt cognita exempla ubi calculus in principio vel quod pejus me-

dio ureterum hærens, præter alia accidentia, etiam vehementem cum intolerabili anxietate junctam cardialgiam excitavit. Simile etiam quid observavimus a calculis biliaris, si canalem cysticum vel cholidocum pertranseat, vel fixiorem in iis sedem habeant. Qua de re in sequenti Capite fusius agere nobis constitutum est. Luculenter vero etiam hinc apparet, quomodo per consensum a solo motus vitio, pars corporis nostri sensu prædita, absque materiali ibi existente causa graviter affici queat.

## §. XV.

Longe vero atrocior, & plenioris periculi species cardialgiæ est, quæ ab hausto veneno urentis & causticæ indolis inducitur. Vulgatissimum atque innumeris funestis exemplis infamatum illud arsenicum, & ei similia, non alia ratione perimunt, quam quod subtili & penetrante veneni acumine, altius in intima fibrarum nervearum ventriculi, se insinuant, easque discindendo ac arrodendo, ad immanes spasticas stricturas adigunt atque excitulant: quæ postea universum nervosarum partium genus in consensum trahendo, non modo ea symptomata, quæ cardialgiæ sunt essentialia, sed & insuper sæviora & funesta, ut inflammationem sphacelofam, delirium, convulsiones inducunt.

## §. XVI.

Emetica ex stibii regulina substantia petita, si paulo fortiori dosi imprudenter offeruntur, non nisi cardialgica inducunt symptomata, quin aliis etiam intus concurrentibus causis, & ubi præcordia jam spasmoadfecta sunt, lethalem, non secus ac venena, quod multus, proh dolor! constat exemplis, operationem exsequuntur. Id quod etiam de acrioribus & validioribus purgantibus, quæ subtili, caustico, & venenante principio agunt, quorum imprudenti usu, multi pereunt, intelligendum esse existimamus.

ab emat.  
sticis

Ipsam



§. XVII.

*In febrili-  
bus exā-  
thema-  
ticis* Ipsum pestilentiae virus, truculen-  
tam suam vim, primo omnium, in  
ventriculum spasmis atque inflamma-  
tionibus exercere, & graves cardialgi-  
cas passiones, saepe syncopicas indu-  
cere, in propatulo est. Petechiis, fe-  
bribus purpuratis & malignis, si car-  
dialgia succedit, quod maxime in mor-  
bi vigore fit, lethale signum esse so-  
let. Pessimum quoque est, si cardial-  
gia doloribus arthriticis, podagricis,  
quod evenit maxime, retrocedente  
materia ad interiora, item quando  
foedis cutis, & partium externarum  
exulcerationibus supervenit, quod  
frequentius accidere solet. Nam ma-  
teria illa activae causticae indolis, ubi  
a nexu, & implexu humorum seque-  
strata, & ad cutis extimā propulsa,  
relegit sua vestigia, atque nervosis  
tenerioris, & firmioris texturae ven-  
triculi, & intestinorum tunicis se al-  
tius insinuat, non secus ac venenum  
agere solet, sique diutius persistit,  
cardialgicas anxietates inducendo,  
hominem exanimat atque non raro  
interficat.

§. XVIII.

*In dysē-  
teria e-  
pidem.* Dysenteriae epidemicae & malignae,  
quando ea incaute comprimitur, in-  
fausto & periculoso sane omine car-  
dialgia supervenit: dum caustica acris  
materia, ex intestinorum inferioribus  
ad superiora & ventriculum, retrogra-  
do motu & impetu delata, principes  
has partes graviter infestat, subinde  
lethalia accersere symptomata consue-  
scit.

§. XIX.

*a ver-  
mibus* Periculi quoque plena a vermibus  
innascitur cardialgia, quando videli-  
cet, uti bene meminit TRALLIA-  
NUS, ex partibus inferioribus sur-  
sum ad ventriculum ascendunt, ejusq;  
orificiis firmiter inhaerescunt. Me-  
morabile est quod proponit HERCU-  
LES SAXONIAE in praelect. pract.  
p. 2. cap. 7. scribens: ante tres annos  
ego vocatus ad puerum undecim anno-  
rum, vermibus refertum, cui pilu-

las exhibui. Mane cum reverterer,  
erat mortuus. Curavi ventriculum  
aperire, inveni triginta tres vermes  
dodrantonides vivos, ori ventriculi a-  
deo tenaciter inhaerentes, ut vix avel-  
li potuerint. Similia exempla legi  
possunt apud HENRICUM ab  
HEER, & LANCISIUM tract. de  
mort. subitan. nec non apud RIVE-  
RIUM Lib. 9. c. 10. Repentinae ejus-  
modi mortis causam non aliam fuisse,  
quam syncopen invincibilem, a va-  
lidiori cordis seu potius vasorum ip-  
si vicinorum constrictione derivan-  
dam, veri est similitimum. Ex quo in-  
telligitur, quanta sit ad vitam ser-  
vandam stomachi ceu nobilioris par-  
tis praestantia, ut igitur HEL-  
MONTIUS hac causa fuerit addu-  
ctus, animae sentientis ibi sedem  
collocare.

§. XX.

Sunt vero adhuc aliae, atrocis sto-  
machalis spasmi abditae causae. Nam  
ubi dolor indefinens est, & per multos  
trahit menses, ut carnes ac omnes  
demum vires consumat, labem ac  
vitium in partibus recte concluditur:  
quod etiam sectionibus post mortem  
institutis evictum habemus. Ita in  
tali chronico vitio, RIVERIUS,  
vid. cent. 1. observ. 90. scirrhum, to-  
tum pancreas, pylori ac duodeni prin-  
cipium ambientem, invenit. JA-  
COBUS HOLLERIUS, de morbis  
internis pag. 153. de quodam narrat,  
qui febre, cardialgia, vomitu, tor-  
minibus ventris, dejectionibus pici  
similibus diu vexatus, tandem obie-  
rit. In cujus secto corpore inventum  
ulcus postulatum in ambitu, quod tu-  
nicas omnes ventriculi, qua parte in  
pylorum est aditus, excedit.

§. XXI.

Alia adhuc dirum hunc affectum  
generandi ratio ac via, per metastasin  
est. Ita binis exemplis, nobis constat,  
parotidum tumores in sexu muliebri  
non adeo exiguos, externis quidem  
applicatis evanuisse, sed brevi post  
cardialgiam cum angustia spirandi



insecutam fuisse. Observatum quoq; a nobis est, & hemicraniam, & cardialgiā inter se alternasse, ita ut cardialgia sublata hemicrania fuerit secuta, & postea, hac ipsa discussa, cardialgia redierit.

## §. XXII.

Morbi  
decur-  
sus.

Ceterum dolor ventriculi cardialgicus ex iis est morbis, qui, nisi diutius persistant, non facile nocent nisi accedat inflammatio: quare non sine periculo est, si aliis morbis præsertim febribus acutis & malignis superveniat. Perite enim HIPPOCRATES prodidit *Sect. 4. aphor. 65. in febribus circa ventriculum fortis æstus & cordis morsus seu dolor malum est*. Porro etiam hic adfectus inter eos referendus est, qui certis & ordinatis temporum intervallis quandoque etiam inordinatis redit, & vel breviori, vel longiori tempore affligit, ac alio tempore mitior, alio vehementior est. Et uti ordinario fere cum frigore in dorso, horripilatione cutis, non raro etiam oscitatione & pendiculatione ejus accessio est, atque in vigore, extremæ, inferiores maxime partes inalgescunt, adeo ut etiam calidum satis vehemens admotum vix percipiatur: ita hic dolor, non nisi calore redeunte in partibus extremis, calidoque tandem sudore aboriente per totum corpus, solvitur atq; discutitur. Et uti sub frigore pulsus coarctatus & exiguus est, ita major & mollior sub declinatione fit: quod etiam evanescentis mali certissimum est signum.

## C U R A T I O.

## §. I.

Indica-  
tiones  
quæ mor-

**Q**uemadmodum sagax & peritus Medicus, nec certa ad morbum tollenda remedia commendare, nec una eademque semper via ac methodo in curando procedere debet & potest; sed opus habet, ut ad varii generis causas, ægrotantis naturam, & alias atque alias circumstantias, morbos antecedentes & sympto-

mata respiciat: ita etiam in hoc gravi & periculoso morbo sanando, idem fieri debere omnino necesse est. Nihilominus tamen generales has medendi indicationes, pro scopo, per medicamenta succurrendi, tenere debet, quæ hæc sint: primo, ut materia vitiosa vel mole vel acrimonia peccans, circa stomachum hærens temperetur, corrigatur ac demulceatur, blandeque per discutientia vel commoda evacuantia removeatur: secundo, atroces dolores, qui vires mirum quantum deprimunt; ne inflammatio succedat, sopiantur: tertio, si symptomatica est, morbi primarii ratio habeatur, & quarto, ut tonus & robur ventriculi, & intestinorum a dolorum, & spasmorum violentia labefactorum, idoneis remediis restituatur, & confirmetur.

## §. II.

Quia sæpius acidi pontici humores accumulati ac congesti in stomachi regione, bilem in duodeno diuturna mora porraceam, æruginosam, & valde corrosivam reddunt, & arrodendo tunicas nerveas, præbent dolores cardialgici causam, idque non raro in hypochondriacis, nec non a nimia vinorum acidorum ingurgitatione, & fructuum horeorum fermentatione evenit; solis utique absorbentibus, nec non acrimoniam demulcentibus non adeo difficulter curam expediri posse experientiæ conforme est. Quo nomine pulveres qui lapides cancrorum, cornu cervi philosophice præparatum, conchas vel matrem perlarum, crystallum montanam vel melius glaciem Mariæ præparatam recipiunt, commendamus, præsertim si cum aqua carminativa leniter spirituosam exhibentur. Pertinet huc quoque ad infringendam & mulcendam acrimoniam ex rasura cornu cervi gelatinosa decocta probe saturata decoctum avenæ excorticatæ, cum amygdalis dulcibus subactum & syrupo papaveris albi edulcoratum.

Commē-  
dantur  
absor-  
bentia.

demul-  
centia.



§. III.

nitrosa

Ubi vero bilis valde acris sulphurea & calida, ab ira commota, causam hujus mali subministrat, consultum est ejusmodi jam laudatis pulveribus, aliquot grana admiscere nitri purificati pro dosi, atque in decocto eas exhibere. Opus vero interdum est correctam bilem leniter per alvum evacuare. Experientia etiam crebriori didicimus, in hoc atroci adfectu, si a bile nimis calida ebulliente & caustica obortus fuerit, solam aquam puram, & frigidam, per vices, usque ad mensuram dimidiam vel ultra haustam, tecto bene corpore, & imposito stomachali regioni calido fomento, insigniter profuisse, ac subsecuto sudore per universum corpus, dolore summo cum levamine discussum: eoque remedio acrimoniam biliosam non modo dilutam & temperatam, sed & nimium estum depresso, ac denique ipsum robur, quod ingenti calore & dolore dejectum erat, quodammodo restitutum fuisse. Vidimus quoque cardialgiam cum cholericâ passione junctam; hoc unico remedio summo cum levamine conquiesse. Pertinet huc quoque insignissimus feri lactis, item emulsionum usus.

§. IV.

Post tertianam  
et anam  
emetico  
curatur

Non rarum nec insolens quoque est, post tertianam, anxium circa præcordia dolorem, cum insigni virium languore, ciborum fastidio, oris siccitate, & animi leviuscula defectione, lentoque calore interdum observari; quæ cuncta mala a bile acris & vitiosa, copiosius in duodeno, si virtus ejus motrix peristaltica sub morbo valde fracta fuerit, coacervata diutiusque stagnante produci, exinde demum intelleximus, dum leni emetico, verbi gratia, uno vel altero grano tartari emetici, cum sufficiente quantitate aquæ dato, effusa magna saburra, conquiesse protinus hæc omnia mala vidimus. Referrî huc optima ratione HIPPOCRATIS Aph.

Hoffm. Syst. T. IV. P. II.

17. Sect. 4. meretur, qui, non febricitanti, ubi cibi fastidium, cordis dolor, vertigo tenebrosa & oris amaritudo, purgatione per superiora opus esse, significat.

§. V.

Sique cardialgiæ biliosæ quod sæpius fit, vomitio jungitur, liquorem anodynum nostrum mineralem cum aqua frigida fontana, vel aqua florum chamomillæ, millefolii, acaciæ, tiliæ, sambuci, liliorum convallium, primule veris, cum præsentaneo levamine exhibuimus. Sub hoc statu magnopere cavendum est, ne Medicus calidas essentias stomachales vel carminativas porrigat, neque crebriori calidorum infusorum usu, ægrum maceret, quippe hæc omnia dolorem magis augment, quam minuunt.

§. VI.

Ubi vero intensus, pressorius, & gravativus, stomachalem regionem diutius infestat dolor, isque ac cruditatibus acido viscidis, firmiter ventriculi aut duodeni tunicis inhærescentibus oritur, quod frequentissime in iis, qui ex morbo jam convalescerunt, ac qui etiam ab aliis causis infirmam habent ventriculum, evenit, tum utique alia curandi opus est ratione. Nam sub tali casu, medicamenta digestiva, & quæ salino oleoso & aromatico incidente ac roborante principio agunt, necessaria sunt: quo nomine probatæ & expertæ virtutis ea quæ sequuntur, proponere & laudare volumus, ac primo pulverem qui ita habet. Rec. radicis ari, pimpinellæ, zingiberis, galangæ, flavedinis corticum aurantium, seminis cymini, macis, singulorum drachmam, sacchari Canariensis ad pondus omnium M. f. Pulvis, qui convenienti dosi leniter cum vino optimo decoqui, & propinari potest. Dein sequens se commendabit mixtura: Recipe, Essentiæ zedoariæ, carminativæ Vvedelii, spiritus de tribus ana drachmas duas, balsami nostri vitæ guttas XV. Interdum ve-

Vomit.  
ioni  
obvia  
cundit.

Qui ex  
crud-  
tatibus  
oritur  
dolor  
aliter  
tractan-  
dus.



ro opus est, ut ante horum usum, colluvies vitiosorum humorum si nimia est, blande per superiora educatur præsertim si ad vomitum appareat dispositio. Verum tunc non facile ultra radicem ipecacuanne ascendere licet: cum hæc non tam valide nervosas tunicas commoveat atque aggrediatur, nec postea operationem, dispositionem ad vomitum relinquat, sicut ea quæ ex stibio parantur consuescunt.

## §. VII.

aliter  
qui est  
veneno

Ab hausto veneno caustico, item a nimis drastico, purgante & vomitorio, si quis in hoc malum, quod vitæ sæpius præsens minatur periculum, conjectus fuerit, tunc vix efficacius auxilium, ac in usu lactis recentis, item in oleosis, oleo amygdalarum dulcium, olivarum, sufficiente quantitate haustis, addita simul dosi theriacæ veteris expectandum erit. Præstat vero in principio tantum lac solum, sive melius ejus cremorem sine theriaca dare, ne vomitus, & secessus, quo sæpius optime venenum & corrosiva materia simul expellitur, nimis cito sistatur.

## Cautela.

## §. I.

Quomodo  
do tra-  
tanda  
sympto-  
matice

**Q**Uando cardialgia seu symptoma, aliis morbis acutis vel etiam exanthematicis supervenit, quod rarius fit sine periculo exitialis inflammationis, tum pulveres bezoardici, cum aliquot granis nitri & quarta parte vel dimidio grano camphoræ, ob vim blande diapnoicam, & discutientem, non carent usu eximio. Sed consulo ob auspiciatum, & meliorem successum, ut cum emulsione, quæ ex amygdalis dulcibus, seminibus 4. frigidis, & semine cardui Mariæ, cum aquis florum præsertim sambuci concinnata est, pulveres dicti propinentur. Sique materia a superficie corporis retropulsa, veneni propemodum indo-

lem referens, rursus ad extimam cutim releganda censeatur; liquorem nostrum anodynum mineralem, cum quarta parte spiritus Bussii vel tartari inixtum, & per vices pro re nata datum, adhibito simul conveniente, placido regimine diaphoretico, sæpe numero convenientissimum, & proficuum invenimus.

## §. II.

Quando a mensibus subsistentibus, & represso inde sanguinis impetu ad præcordia, mali origo est, tunc utique venæsectio in pede celebrata, modo non fiat in paroxysmo, sed eo remittente, nec sub extremorum frigore præsens & efficax auxilium præstat. Postea reliqua curatio, cum blande anodynis & discutientibus externe adhibitis, erit conficienda. Nos in omni dolore cardialgico, ceu peculiaris virtutis remedium, flores chamomillæ vulgaris, & quæ ex iis parantur, plurimum commendamus; cujus generis aqua florum chamomillæ, oleum destillatum delicatissimum verum, non cum oleo therebinthinæ adulteratum, in oleo saccharum reductum, item Essentia bene saturata cum Spiritu florum chamomillæ non adeo spirituofo, & oleo saccharo ejusdem olei adornata, ad motus spasticos sopiendos, longe efficacissima. Spectat huc quoque extractum, quod cum aliis convenientibus, intra pilulas recipi potest. Vulgatissimum, sed revera valde probatum domesticum est decoctum chamomillæ florum, cum cerevisia vel jusculo avenæ excorticatæ, vulgo *Daber Grub*, addito præsertim oleo amygdalarum dulcium, calide per vices haustum.

## §. III.

Deinde in omni dolore cardialgico, clysteres ano infundere demulcentes, & emollientes, nunquam non proficuum. Quales ex floribus chamomillæ, ex oleo horum cocto & destillato, item seminibus quatuor carminativis parati, si ex lacte

Si a mē-  
sibus de-  
scēda

Laudā-  
tur ex  
chamo-  
mill. pa-  
rata.

Clyste-  
ris usum



coquantur, sunt omnium optimi. Sed opus est, ut bis vel ter quandoque injiciantur, nam blando suo tempore demulcente, nec non rigidas fibras laxante ac emolliente facultate, ut in omnibus fere gravioribus doloribus, ita etiam in hoc, insigne levamen afferunt.

§. IV.

Externa

In præcordiali & gravi dolore quoque, nunquam non exterius epigastri-  
cæ regioni applicata idonea remedia, magnæ observantur utilitatis, & inter plura alia summam & mirabilem efficaciam eorum, quæ sequuntur sæpius experti sumus. Inter quæ primum est linimentum, ita componendum: Recipe theriacæ, olei nucistæ expressi utriusque unciam, castorei, croci, balsami Peruviani ana drachmam, olei de cedro, caryophyllorum ana guttas 20. camphoræ drachmam dimidiam. Alterum sunt species quæ sequuntur. Rec. herbe menthæ, florum chamomillæ vulgaris, Romanæ, sambuci, singulorum manipulum, baccarum lauri, juniperi, utriusque unciam dimidiam, seminis cymini, carvi, caryophyllorum, nucis moschatæ, ana drachmas 2. C. C. D. S. Species quæ sacculo possunt includi, & calide parti affectæ applicari. Calor enim egregiam vim levandi, & discutiendi possidet.

§. V.

Si vermes causam subministrant, <sup>si a ver-  
mibus</sup> tunc utique longe alia curationis est ingredienda via. Minime vero, si hospitium eorum in ventriculo, fortiora anthelmintica, præsertim quæ acri, valida arrodente facultate, operationem suam exsequuntur, ut mercurialium, vitriolum Veneris, vel Martis, purgantia aloetica vel etiam salia alias non inutilia porrigenda; eo, quod hæc malum sæpius exasperent: sed potius lac tepidum, cum oleo amygdalarum dulcium sufficienti quantitate offerendum. Quæ demulcendo, & escam pariter ani-

malculis his, ne arrodant tunicas, præbendo aptissima sunt; maxime omnium vero, eam quoque ob rationem, quia, si tepide lac in magna copia hauriatur, ventriculi inversione facta, ingrati isti hospites per superiora ejiciuntur.

§. VI.

Hypochondriaci spasmodicæ passioni obnoxii, crebro recurrentibus, hisce anxiiis doloribus, per longum tempus premuntur. Quo in casu, omnibus aliis inaniter adhibitis, aquas thermæ, præsertim Carolinas aliquoties usurpatas utilissimas observavi. Sed harum usus interdum reiterari debet. Hemorrhoidalem fluxum inde secutum, maximo cum levamine, non semel experti sumus. Ceterum Elixir balsamicum nostrum quod viscerale audit, item quod in notis ad *Poterium* descripsimus, cum essentia castorei remixtum, nec non pulveres temperati leniter nitrosi, antispasmodici, Venæsectiones æquinoctiales, in chronicis istiusmodi doloribus, magno sunt præsidio.

§. VII.

Qui cardialgicis passionibus sunt obnoxii in & extra accessionem a medicamentis quæ salinæ sunt naturæ provide sibi cavere debent: quo pertinet usus fontis Sedlicensis, quem plus noxæ quam emolumenti attulisse observatum a me est.

§. VIII.

Ad recursum perniciosi hujus mali impediendum, plura occurrunt notatæ digna. Primo, non facile, qui admittere debent; quia hæc natura sua, stomacho ejusque partibus infensa, ingentem, si crebrius usurpantur, infirmitatem relinquunt: qua nihil ad recidivas contrahendas pejus est. Præter hæc, motum humorum, ad primam regionem ex aliis partibus, alliciunt. Videndum tamen nihilominus, ut alvus semper maneat libera atq; aperta, quod multo tutius fit, quando per alimenta id præstare allaboramus. Deinde contra frigus quam maxime

Hypo-  
chōdria.  
cis  
Caroli-  
næ cō-  
ferunt.

Salia  
vitæda.

Metho-  
dus præ-  
serva-  
toria



& præcordialis & dorsalis regio, ubi ventriculus cum orificiis situm suum occupat sufficientium integumentorum ope munienda erit. Quam nocivum enim partibus nervosis, & morbis qui in earum debilitate constitunt, frigus sit, dici non satis potest. Vix autem eo perducere homines possunt, ut veritati huic fidem faciant, eamque intelligant. Denique, victum quod concernit, ab omnibus excessiva qualitate, & intemperie præditis, nimis salitis, fumo induratis, pipere, allio, aceto conditis, raphano rusticano, & huic similibus abstinere oportet. Vicissim maiorem in modum commendamus jura gallinarum, ac carnis vitulinæ; & ut sibi a pingui carne temperent, imprimis quando potio frigida superingeritur, vel externo frigore stomachalis regio tangitur, suademus.

## ENARRATIONES MORBORUM.

### OBSERVATIO I.

*Cardi-  
algia  
spasmo-  
dica, ex  
animo  
affecti-  
bus &  
frigore,  
sepius  
recur-  
rens.*

Femina honesta aliquot supra quinquaginta annos nata, habitu corporis spongiosi, succi, & sanguinis pleni; vitæ sedentariæ addicta, decennio abhinc fluxum uterinum non amplius passa, venæsectionem binis vel ternis quotannis vicibus celebrans, vegeta atque continua sanitate utens; sex ante annos gravi, & diuturno animi mœrore ob luctuosos familiam ferientes casus afficitur. Ab hoc tempore valetudo vacillare, & molestissimus per quinque jam annos crebro redeuntibus paroxysmis infestare cœpit morbus, a levi statim frigore dorso admissio vel ab animi commotione aut terrore originem mutuans. Morbi vero incessus hunc servare plerumque suevit modum. Præcedit nimirum oscitatio, sequente narium, aurium nec non faciei frigore. Stringuntur dein fauces,

tum gelu dorsum, manus ac pedes occupat, postea scrobiculus cordis pressorio fixo, & ardente dolore affligitur, qui extenditur ad ipsum dorsum, ubi ventriculi orificium sinistrum situm est, imperialis tantummodo spatium implens. Adest præterea summa anxietas, inquietudine juncta; pulsus coactus frequens, & debilis micat. In lecto consistere nequit sed exsurgere debet. Ad alvum, & urinam reddendam neque minus ad vomendum stimulum quidem persentit, neutris tamen subsequenter. Inter omnia autem, quæ agram acriter infestant symptomata, animadverti meretur illud, quod frigus quo dorsum corripitur adeo intensum sit, ut nulla, nec a calidissimo admoto lapide, caloris percipiatur sensatio, quin sub brevi temporis delapsu illud frigidum removeatur. Sed ad alvum firmiter clausam subducendam, clysteres emollientes, & oleosi injecti, sine effectu redierunt: neque flatibus per inferiora, neque ructibus per superiora exitus ullus, sive raro illud contigerit, fuit concessus. Tandem elapsis aliquot horis partes superiores primo, dein inferiores sensim incallescere ac madescere incipiunt; donec ultimo largus sudor prolicetur, & paroxysmus, quatuor vel sex interdum horas perstans hoc ipso solvitur. Sub decursu paroxysmi omnia fere remedia, cum primis sub frigore, ægra valde averfatur: conclave autem calidum, regulas calidas, & linteamina calefacta extremis præsertim partibus admota ferre quam optime potest. Calore corpori reddito pocula aliquot infusi Coffee cum liquore nostro minerali anodyno, quarta balsami vitæ, vel dimidia elixirii stomachalis parte remixto assumit, quod unicum fere medicamentum naturæ agrotantis conducibile reperi. Finito morbi impetu virium remanet defectus, & urina quæ modo in paroxysmo, aquæ



aquæ instar lymphida comparebat, rubicunda crassum deponens sedimentum prodit.

*Epicrisis.*

Affectus hic cardialgiæ chronicæ spasmodicæ nomen jure meretur. Neque enim ventriculi inflatio ab incongruis ingestis oriunda, siquidem ægra accuratiorē servare diætā consuevit, dici poterit: sed nervosum maxime genus affici atque compati & ortus & morbi progressus aperte loquuntur. Notatu enim dignum est, moerorem effectui originem dedisse, ac frigus demum & animi affectus eum excitasse. Animadverti quoque morbum hunc paroxysmi febrilis pæne typum æquare, a lumbari regione, ubi magnus mesenterii plexus situm obtinet initium sumere, ac nervosas corporis partes contrahendo, sanguinemque & humores ad cor & vasa majora repellendo tragoediam ludere. Accedit quod acceperim ab honestissima femina, ægritudinem esse hæreditariam, quæ matrem, matrisque sororem corripuerit, easque longo tempore excruciauerit. Ceterum consului, ut frigus omni modo vitaret, atque sedulo caveret, ne illud dorsum tentare possit, calidis idcirco pannis tegendum; ab animi quoque commotione nec non alimentis refrigerantibus quantum fieri possit abstineret, quandoquidem & pulverem nostrum præcipitantem non bene ferre potest; elixirio autem stomachali cum liquore anodyno remixto sæpius utitur, nec non infusum Coffee ter per septimanam bono cum fructu usurpat. Suasi denique ut corpus motu decenti sæpius exerceret, quia tum malum rarius affligere observavi.

*Cardi-  
dialgica  
solica ex  
comestio-  
ne carnis  
assæ  
nervu-  
sine &  
frigore.*

OBSERVATIO II.

Mulier parvæ sed obesæ staturæ atque plethorica, quadragesimum jam annum supergressa, cognatum invivendi gratia cum marito in propin-

quam civitatem iter fecit. Præter alia edulia carnem vervecinam pinguem assatam larga manu assumsit, cerevisiam triticeam, qua neutiquam alias fuerat usa, superbibendo. Vespere sub aura intense frigida domum reversa, conqueri de anxietatibus & vehementi dolore circa præcordia cœpit, concomitante faciei & extremorum frigore, nocteque inquieta. Dolor non perstitit in præcordiali regione, sed per totum abdomen flatibus mire turgens se extendit. Alvus erat adstrictissima. Symptomata non modo nocte affligebant, sed die etiam sequente insisterant. Opponebantur huic malo varia ex domesticorum apparatus petita: panni quoque & tegulæ calidæ in usum extrinsecus tractæ: sed successus sefellit. Accersitus ego, ægram inveni angustiis circa pectus valde molestatam ut spiritum ægre ducere potuerit, abdomine mire turgido, animique leviussculis defectio-nibus intercedentibus. Adstantes catharrum suffocativum trepide metuebant. Ego singulis horis, duo pocula brodii tenuis ex carne gallinarum, una cum cochleare olei amygdalarum dulcium, additis decem liquoris nostri anodynii mineralis & quinque balsami vitæ guttulis præbere jussi: post, enema, ex speciebus carminativis oleis expressis, adjuncto stimulo salino paratum ano injiciendum præcepi. Præstabilem reliquerunt effectum, & flatus ac ructus αἶμα & κατὰ non sine levamine successerunt. Tegulas valde calefactas removi, utpote qui non modo molestiam sed & doloris augmentum ipsa id ægotante asseverante, creabant; ast linimentum, quo inungeretur locus affectus, ex axungia humana, oleo destillato carvi & aliquot granis camphoræ substitui. Ad levandam, qua premebatur, sitim, infusum Theiforme ordinavi. Præterea vini calidi medicati ex infusione absynthii, corticum aurantiorum & macis parati poculum aliquando porrexi.

Po.



Postero die potiunculam mannatam, ex mannæ unciis duabus, cremoris tartari drachma, essentiæ corticum aurantiorum guttis 20. & olei amygdalini dulcis aliquot cochlearibus, paratam propinandam curavi: cujus operatio duas post horas clystere secundata. Quibus id consecuti sumus, ut ingens vitiosorum humorum colluvies, tam per superiora quam per inferiora, fuerit educata. Sudor denique per totum corpus erupit, & symptomatum vehementia DEO adjuvante sensim discussa. Ad recursum vero morbi præscindendum, ventriculi digestionem pilulis nostris balsamicis atque elixirio carminativo adjuvimus.

*Epicrisis.*

Nihil ad ingerendum ventriculi & intestinorum dolores ac flatulentias reperitur valentius, ac caro pinguis vervecina, superingerendo frigidum inusitatum potum, corpusque spongiosum excessive frigide auræ commitendo. Erit autem enarratus affectus cardialgico-colicus recte dicendus, eo quod coagulum pingue in duodeno subsistens, ventriculum & intestina flatibus mire distenderit, atque a transpiratione prohibita serum acre redditum, tunicas earum vellicando & irritando, ad spasticas stricturas magis sollicitaverit. Quæ cum in corpus plethoricum venæsectioni minus assuetum, sed eam maxime abhorrens, inciderint; tam atrocia malo se sociasse symptomata nemo mirabitur. Ceterum ut coagulum in duodeno dissolveretur atque saluberrima transpiratio restitueretur, potus utique calidus erat præbendus; sicut ad discutiendos flatus vivum absynthites non in cassum fuit adhibitum. Hoc quoque instar cautelæ tenendum reputo, quod in abdominis doloribus qui ab inflationibus oriuntur, extreme calida partibus affectis applicare non semper sit consultum; ut autem extremæ partes blando atque temperato calore foveantur, ego quidem auctor sum. In priori enim casu, fla-

tus qui ab aere rarefacto & intestinis incluso nascuntur, a calore externo, ut experimentis physicis edocemur, majorem elasticam & expansivam vim acquirunt. Deinceps annotationem meretur, vitiosam materiam flatuum in intestinorum canali excitantem nunquam felicius ac etiam tutius quam lenioribus convenientibus laxantibus, & clystere una vel altera hora post injecto eliminari posse; siquidem hac ratione privatæ viæ non modo potentius a sordium inquinamento liberantur, sed flatus quoque versus inferiora ducuntur.

OBSERVATIO III.

Quinquagenarius illustris, temperamentum sanguinei & animi excitati, ab anno & quod excurrit crebrioribus itineribus, arduis in officio Regis laboribus animique fatigationibus continuo detentus, sex ante menses febre corripitur continua biliosa. Qua curata, per aliquot vero hebdomades revertente, iterumque depulsa sanus agit atque incolumis. At vero iter denuo in Regia causa suscepit, fame atque vigiliis vexatus domum revertitur. Esuriens inter cibos reliquos halem salitam, cucumeres aceto maceratos nec non fabas coctas liberalius ingessit, melones quoque cum saccharo avidius assumpsit, hausto insuper vino acidulis Tonnsteiniensibus diluto; vesperi cerevisiæ triticeæ vulgo *Brenhan* sat largam copiam, tabaci fumo fauces aridas stimulante, ingurgitavit. Sic lectum ingressus, anxietates circa præcordia persentit, ad est spirandi angustia, inquietudo, virium defectio, cum sudore anxio frigido corpus totum perlucens, adque vomendum stimulus perpetuus. Haussit infusum theæ paulo calidius, atque ingentem crudorum ciborum copiam vomuit, persistentibus nihilominus vix tolerabilibus anxietatibus. Alvus tenaciter adstricta nihil flatuum emittens, ad mingendum quoque stimulus,

*Cardial-  
gia flatu-  
lenta  
ex in-  
congru-  
orum ci-  
borum  
nimia  
ingur-  
glatio-  
ne.*



lus, urina tamen nulla effluente. Partes externas frigus obsidebat, atque pulsus exploratu durus & contractus erat. Vocatus in consilium, liquoris anodynii mineralis 130. guttas cum balsami vitæ guttulis 50. in aqua frigida vini dimidia parte remixta propinavi. Sacculum deinde, avena igne torrefacta repletum, regioni epigastricæ applicare atque in lectum concedere ægrotantem jubeo. Elapsa vix quarta horæ parte per superiora pariter ac inferiora flatus ac ructus in maximum ægri solatium processerunt. Factus quietus, sumtis aliquot infusi Thee poculis, calor in partibus extremis rediit. Anxietas demum evanuit, corpus sudore maduit, ac placido somno inducto, ab omni dolore & morbo liber evasit. Posthæc clysterem carminativum applicandum curavi, a quo ingentem sordium copiam deposuit. Altero die ægrum accessi & faciem flavo colore tinctam inveni, urinamque bruni ictericei coloris deprehendi, parca quantitate emissam. Continuavi usum liquoris nostri anodynii mineralis, sed longe parciori dosi, pulverisque præcipitantis, aliquot olei chamomillæ guttulis adjectis. Quibus sanitati in integrum restitutus, mox rursus iter officii causa suscepit.

*Epicrisis.*

Cardialgiæ huic atrocissimæ flatulentæ ansam suppeditavit nervosarum partium imbecillitas ab animi & corporis defatigationibus, nec non a morbo præcedente contracta. Hinc balsamum nostrum vitæ blanda naturæque amicabili gaudens anathymiasis ad roborandum & ad spasmus relaxandum liquorem nostrum anodynum, successu haud frustraneo porreximus; eo majori quidem dosi, quo morbi vehementia potentioris requisivit resistantiam: semper enim proportio inter vires medicamenti atque obsidentes morbi seu potius causæ morbificæ debet intercedere.

OBSERVATIO IV.

Princeps Serenissimus in quadragésimo ætatis constitutus anno, liberaliori & vinosæ diætæ assuetus ac sanguine turgidus, per aliquot jam annos sanguineam per sedis venas expertus erat excretionem. Instante fluxu quum corpus frigidiori aeri justo diutius exponeret; insequente nocte & postero die, inquietudine, virium languore, æstu, cum pulsum celeri, nec non anxietate cardialgica præmicepit. Jungebantur animi levis defectio, sitis inextinguibilis abdominis tormina, alvusque dura & retinens. Clyster applicatus a flatibus statim & sine effectu repellitur. Obferuntur blande diaphoretica, nitro castorei momento nec non cinnabare permixta, cum aquarum analepticarum vehiculo, sed nihil inde levaminis persensit. Secta in pede fuit vena, sed cum ultra quinque uncias sanguinis non extraherentur, parum inde auxilii consecutus; quin potius symptomata incrementa ceperunt. Nos sanguinis abundantiam manifeste cernentes, ad secundam venæ sectionem transeundam nulli dubitavimus: qua libra pene sanguinis e secta in pede vena fuit emissa. Adeo vero hoc auxilio adjutus fuit, ut mox circa præcordia dolor, ardor, anxietas remitterent, noxque quietior esset. Tandemque exhibitis analepticis diaphoreticis, enemate emoliente, atque interne infuso mannato, ex toto cum sanitate Serenissimus Princeps in gratiam rediit.

*Epicrisis.*

Sanguinem in vasorum intestini recti & coli membranis stagnantem, spasticas stricturas, & facta hinc ad ventriculum translatione orificii ejus vasa infarciens, cardialgicum excitare posse dolorem, enarrata hac morbi historia, quantum ego quidem memini, sufficienter edocemur. Propterea ex curatione a nobis instituta elu-

Cardi-  
algia  
spasmodica  
en  
hemor-  
rhoid.  
frigore  
suppres-  
sis, P. S.  
curata



elucet, in corpore plethorico venæ-sectionem vel binis vicibus cum emolumento posse adhiberi. Postremo id quoque elici poterit salutare porisma: cavendum esse quam maxime iis qui ejusmodi criticis, obnoxii sunt hæmorrhagiis salutem portendentibus, ne circa vel in ipsa excretionem talia admittant, quæ turbare eam vel plane sistere valent; inter quæ animi fortior commotio, terror præsertim, neque minus frigus externum, primas omnino ducunt.

## OBSERVATIO V.

*Cardi-  
algia  
spasmo-  
dica in  
pletho-  
rico sub  
æstuoso  
cælo pro-  
fici V. S.  
ser in-  
stituta,  
curata.*

Serenissima stirpe prognatus Juvenis vigesimum & sextum annum, carnosus & sanguine abundans, ex hæreditate a Serenissimo Parente in eum translata, jam tum hypochondriacis pathematibus ut & quandoque melancholia fuit affectus; a quibus mea opera, per DEI gratiam, binos ante menses immunis degebat. Suasi ut Carolinas adiret, antequam autem iter susciperet, quod hoc anno adhuc erat prætermisum, ut venam secari pateretur. Neglecto a Medico ordinario quod omni diligentia inculcaveram monito, veloci cursu sub sole fervente iter suum perficiens appulit thermas. Egit noctem inquietam, atque expergefactus summa circa præcordialem regionem anxietate ad vomitum inclinante, extremorum frigore, internorum æstu, molesta corporis jactatione torquetur. Accitus ego tum temporis præsens, plethoram solvendam præcipio. Instituta venæ sectio, sed chirurgus exiguam nimis aperturam faciente, sanguinis vix uncia paulatim profluxit: & Princeps novam incisionem admittere noluit. Hinc symptomatibus exacerbat, non in lecto consistere potuit, sed noctem plane insomnem egit. Altero mane, iterandæ venæ-sectionis necessitate multis argumentis demonstrata, eo perventum est, ut aperiri quidem venam sed non ultra quinque

uncias educi permetteret. Verum nec tum symptomata conquieverunt, ut ut remittere visa fuerint. Dedi interea sanguinis impetuosum motum compescencia: quo nomine liquorem meum anodynum, pulverem præcipitantem nitrosum, nec non emulsionem ex seminibus 4. frigidis celebrem deprehendi. Quum vero ex toto cessare malum nollet, pulsus eadem celeritate agigaret, atque nox inquietaperfisteret, multa opera impetravi, ut tertium, quarto videlicet ab invasione die, venam secari concederet. Detractis 8. circiter uncis, præcordiorum anxietas, inquietudo, ac febrilis calor confestim deseruerunt immanibus tot doloribus maceratum principem, non sine insigni ejus, & adfidentium exultatione. Atque appetitu, somno, viriumque augmento redeuntibus, integræ sanitati divinæ bonitatis adjutorio fuit restitutus.

*Epicrisis.*

Circa hunc casum animadvertere quam maxime licet, sanguine nimium abundantibus vehementem & diuturniorem motum subito & præprimis sub cælo æstuoso susceptum valde perniciosum atque insensum esse; siquidem sanguis copiosus intestina agitatione fortiter commotus valde turgescit, vasaque distendens hinc inde stagnat atque subsistit, graves suscitans spasticas stricturas pariter ac impetuosas ad partes congestiones. Similiter fieri observamus, quando corpora plethorica in balneum nimis calidum mittuntur, vel sudorifera fortiora cum regimine calido obtruduntur: nisi enim symptomatibus ingravescentibus mature solvatur plethora, graves & periculi haud expertes scenam ludent, ægri tudines. Porro ex hac morbi historia docemur, quod immanes cardialgicæ passionēs a solo sanguine intra membranas ventriculi stagnante, sine ulla vitiosorum humorum in ejus cavitate stabulante copia, excitari possint, atque unicum



cum auxilium in sufficienti sanguinis detractone repositum sit : qua neglecta vel insuper habita , nec præsentissimæ alias virtutis ad vincendum talem morbum remedia quicquam perficere posse , recte colligitur .

OBSERVATIO VI.

*Cardi-  
algia  
spasmo-  
dica ex  
pletho-  
ra &  
hæmor-  
rhold.  
non rite  
flatulen-  
tibus.*

Duobus abhinc annis ex Anglia hic casus ad nos fuit missus & consilium meum requisitum . Illustrissima femina , triginta annorum , sanguineæ complexionis , ante decem jam annos gravissima laboravit hemicrania , qua usu thermarum Epsoniensium fuit liberata . Postea maritata , in ipso puerperio idem malum rediit , atque identidem ope acidularum post aliquot tempus sublatum fuit . Verum non ita multo post , intolerabilis intestinorum invasit dolor , per decem dies in inferiori eorum parte consistens cum tumore , qui etiam alvi depositionem valde difficilem reddebat . Ubi vero hæmorrhoides fluere cœperunt , sublevatus quidem dolor , sed inferior tumor alvi obstructionem efficiens remansit , atque etiam semper pressione thoracis , quæ fit in feminis per ligacula , increvit , qui tamen applicatione alii cum lacte levatus quodammodo fuit . Ab eo tempore labem contraxit ventriculus , ita ut a cibo minus salubri vel etiam copiosius ingesto , anxia compressio & restrictio circa præcordia fuerit secuta : quæ in puerperio secundo atrocior reddita , licet carminativis & anodynis exhibitis quodammodo remiserit , tamen ex toto vinci non potuit . Hanc Medicus quidam expugnandam vomitorio promisit : sed tantum abfuit ut inde diminuta fuerit , quin potius incrementa majora ceperit . Neque vina medicata , neque laxantia , quæ in usum subjunxit , quicquam profecerunt . Optimum tamen levamen vinum Hungaricum , in quo cinamomum & cariophilli cum saccharo leniter coquebantur , ad duo pocula loco

Thee haustum , præstitit . Inde vero facies valde rubicundo pruriente tædii pleno colore perfusa fuit , qui sub graviditate multum remisit . In ipso vero subsequente puerperio tam atrox spasmus ventriculum & præcordiorum regionem per septem fere hebdomades indefinenter afflixit , ut vires inde mirum in modum fuerint profligatæ , omniaque fere ingesta vomitu rejecta . Sedatus pari modo a vino Gallico Frontiniac vel Hispanico , quodammodo fuit sævus hic dolor . Interea spasmus primarum viarum semper continuat , adeo ut ab omni cibo , sive in cœna , sive in prandio sumto , augeatur : ita , ut interdum caput & pectus constringendo , & abdomen , comprimendo afficiat . In scrobiculo cordis , circa dextrilateris costas spurias , dolor semper magnitudine ovi gallinacei percipitur , qui interdum remittit , sed sub ejus accessione , quam ira facile proritat , dorsum occupat & intensum languorem , externarum quoque partium tremorem inducit . Ceterum , hæmorrhoidum internarum tumor , cum alvi obstipatione , continuus & fere indivulsus mali hujus fuit comes . Cerevisiam si assumit , ardorem semper cum dolore percipit , qui tamen sumta magnesiæ dosi mitescit ; quare decocto ex mastiche & cinamomo parato , pro quotidiano utitur potu .

*Resolutio.*

Meum de hoc affectu ejusque causa & medendi ratione tale judicium fuit . Originem videlicet & causam tum cephalici tum cardialgici atque hæmorrhoidalis tumoris & doloris , a nimia sanguinis spissi & impuri redundancia , vasa sanguinea membranarum capitis , ventriculi & intestini recti , præsertim cum ibi non invenerit exitum , supra modum distendente & distrahente , in persona lautius absque dubio & nimis quiete vivente , ducendam ac derivandam esse putavi . De sanguinis missione nulla



nulla fuit mentio facta, quæ tamen summe fuisset proficua, perinde ac hirudinum ad venas sedis applicatio. Tempore gravidationis semper melius se habuit, quia supervacaneus sanguis in nutrimentum foetus absumtus est. Puerperium exactum, converso rursus per spasmos hystericos puerperis solenne impurius sanguinis motu ac impetu ad consuetas imbecilliores nervosas partes, exacerbatio mali fuit secuta. Nihil omnino ad hanc causam removendam & eradicandam, neque emetica, laxantia, neque potus etiam spirituosus, licet levamen quoddam palliativum præstiterint, conferre potuerunt. Consilium dedi, ut ter minimum quotannis venæsectio in pede administraretur: dein, ut bis in anno curam cum aquis mineralibus institueret, utpote quæ etiam inter initia hemicranicum dolorem sustulerunt felicissime. Ejusmodi enim aquarum subtilium & spirituosarum ope, spissi & impuri humores corriguntur, diluti & fluxiles evadunt, excretionem salutes promovetur & partibus nervosis robur adjicitur, præsertim, si cura debito diætæ moderamine, motuque corporis decenti secundetur. Id quod nos etiam omni diligentia inculcavimus.

## OBSERVATIO VII.

*Cardi-  
algia  
spasmo.  
dica Ca-  
rolina  
& Tœp-  
licen-  
sibus cur-  
ata.*

Tribus circiter abhinc annis, Consiliarius & Nobilis ex Livonia ad me valetudinarium suum statum perscripsit, consilium meum efflagitans. Conquestus nempe est de immani dolore pressorio & spasmo circa præcordia, quo jam per aliquot annos correptus fuit: initium sumens cum extremorum frigore, ab hypochondrio sinistro ad cordis scrobiculum, sternum, pectus, dorsum, immo ad brachia se extendens, cum spirandi angustia, inquietudine, virium omnium dejectione atque anxietate afflixit, quandoque mitiori gradu & haud diu

insistens. Admotis fomentis calidis injectis clysteribus, exhibitisque internis diaphoresin moventibus remediis, sensim redeunte ad partes externas calore, vis mali imminuta quidem vel sopita fuit; attamen ex animi perturbatione aut frigore hyemali ad cutim penetrante, vel incongruo assumpto potu ac cibo, promte & facile recruduit. Originem & causam hujus perquam molesti affectus intempestivis & immodicis venationibus, sub cælo rigido & frigido, susceptis, nec non liberalioribus vini potationibus adscripsit. Nonnulli ex Medicis a defectu hæmorrhoidalis fluxus mali causam accercentes, quem nunquam tamen expertus est, venam pertundi bis vel ter quotannis suaserunt: sed citra omnem salutarem successum. Exquisivit meam de usu Carolinarum sententiam. Ego consilium omnibus modis approbavi, eo, quod plures viderim simili affectu laborantes, qui non nisi interno horum fontium, externo vero Tœplicesium usu, ab atroci malo liberari potuerat. Adjeci illud, quod si stagnatio sanguinis in intestinis crassioribus exitum per venas sedis moliens causam præbeat mali, vix ullum præter has dari neque mihi cognitum esse remedium, quo, si modo natura ad hæmorrhoidalem fluxum inclinet, rectius & facilius promoveri possit. Scripsi quoque post aquarum thermalium potum, balneum Tœplicesense in ejusmodi partium nervosarum affectibus longe utilissimum me observasse. Mira enim est ejusmodi aquarum subtilium in infirmis nervosis partibus roborandis, in spasmo contractis relaxandis, atque in sanguinis & fluidorum motu versus superficiem corporis determinando, efficacia. Auscultavit Generosus & illustris patiens meo consilio: & antequam adiret thermas, direxit ad me iter suum. Ubi præscripto salutari regimine & idoneis atque necessariis medicamentis ipsum instructum dimisi. Quantum



tum levaminis ab hac cura expertus fuerit, revertens dilaudare non satis potuit. Quum postea breviori tempore ac minori gradu accessio facta esset; altero anno, vernali tempore ipse rursus cum uxore petiit has thermas: & utrisque, tam externus quam internus horum fontium usus prospero successu se probavit. Nam, quum per sex annos in sterili pervixerint conjugio, uxor gravida reddita pulchrum & benevalentem filium peperit. Ex medicamentis quæ ipsi suppeditavi atque postea transmisi, elixirii visceralis cum liquore anodyno permixti, nec non pilularum balsamicarum polychrestarum, item pulveris præcipitantis nitrosi cum aliquot guttulis olei macis vel chamomillæ veri conspersi usum & virtutes, non sine singulari commodo atque emolumento expertus est.

*Epicrisis.*

Ejusmodi affectus chronici & inveterati, non tam fluidarum, quam potius solidarum, & nervosarum partium, quæ motu & elatere præditæ sunt, nimix plerumque coarctationi debentur; quæ in habitum & consuetudinem degeneraverit; omnia remedium genera quæ humoribus corrigendis unice dicata sunt pene eludit. Hinc neque venæ sectiones, neque laxantia, purgantia, anodyna, diaphoretica, neque etiam diuretica, tali in casu usi sunt, ut potius malum sæpius adaugeant. Præcipuum vero auxilium in ejusmodi remedio, quod totam sanguinis massam omnesque partes solidas moderate, & blande afficit, cujus generis fontes & balnea, est reponendum.

OBSERVATIO VIII.

Vir triginta annorum, generosa stirpe ortus, robustæ alias naturæ & structuræ corporis; pectus & præcordia vix unquam commodis tegumentis defendit a frigore, sed linteis & levibus vestibus munitum libero aeri

omni fere tempore exposuit. Præterea & ingluviei & poculis deditus, frequentius ad ebrietatem vinis varii generis se immerfit. His de causis acerbissimos sæpe dolores, distensionem, lancinationem cum inappetentia, vomitu, anxietate circa stomachi regionem est expertus. Enixe & anxie remedium a me petiit & quæsivit. Misi identidem multa ad demulcendum dolorem interna & externa alias apta, sed speratus effectus non sequebatur, quia plane omnia diætetica respuebat præcepta. Tandem consilium dedi, ut thermas Carolinas & Thœplices adiret, iisque cum regimine debito uteretur. Et inde etiam levamen, cum ipse ibidem essem, inveniebat præsentaneum. Sed exiguo post curam tempore, inter initia autumnii, venationibus deditus, frequentius pedes & femora in stagna & piscinas dimisit. Inde valde refrigeratus; post varios cibos, vinum in copia ingessit. Recurrit paroxysmus valde acerbus, qui etiam nundinis Lipsiensibus, me tum præsentem tam graviter eum affligebat, ut omnem fere respirationem tolleret & partibus extremis sudore frigido perfusis, crebroque recurrentibus animi deliquiis, morti videretur proximus. Fomenta calida externa & apta remedia interna allevamenti parum attulerunt. Suasi ut in balneum sive potius semicupium ex aqua & lacte paratum descenderet, & per horam immo amplius in eodem moraretur. Quo facto, postea in lecto liquorem anodynum mineralem cum dimidia parte spiritus Bussii remixtum ex aqua florum chamomillæ vulgaris propinavi. Tum sudore prorumpente id consecutus est, ut dolorum vehementia remiserit, alvus per aliquot dies clausa, jam soluta, & calor ad exteriora fuerit reversus.

*Epicrisis.*

Quam infestum sit frigus partibus nervosis, inprimisque regioni stomachali & præcordiali, vix credibile est,

Cardi-  
algia ex  
frigore  
& intes-  
perantia  
Caroli-  
nis, &  
recur-  
rens bal-  
neo cu-  
rata.



est; & plures suo damno id subinde experiuntur. Inde non semel sed sæpius asthma spasmodicum, affectum, spasmodico hypochondriacum & dispositionem ad fluxum hæmorrhoidalem, sed minus rite succedentem, vidi excitatam. Id quod facile ii ex Medicis concipere possunt, quibus multa experientia cognitum perspectumque est, quantam consensionem & consortium inter se partes corporis universi nervosæ alant, adeo ut una læsa ad reliquas facile idem vitium transeat. Deinceps id quoque debet animadverti, quod vitæ aulicæ additæ, Serenissimæ & splendida personæ, præ aliis omnibus, ventriculi & maxime cardialgicis passionibus expositæ sint; quia vitæ illud genus, quod ejusmodi personis est familiarissimum, cum exactam vitæ & diætæ rationem respuant ac perpetuo fere saluberrima Medicorum hoc in genere præcepta iussu habebant, ejusmodi morbis invehendis, materiam, originem & causam subministrat uberrimam. Possem multa recensere exempla illustrium immo Serenissimarum personarum, quæ fervidiore æstate glaciato potu, ita ventriculi & primarum viarum tonum atque inde bonæ digestionis opus destruxerunt, ut per omne pene vitæ tempus multa incommoda, quæ vix ulla medicina poterant tolli, circa præcordia perpessæ fuerint.

## OBSERVATIO IX.

*Cardi-  
algia, ex  
iracun-  
dia, ab  
assumpto  
vomito-  
rio fu-  
nesta.*

Vir in vigore ætatis constitutus, nec tenerioris natura habitus sed satis validi, in iram vero valde proclivis, occasione data, binis mox vicibus gravissima animi incandescencia adeo turbatus, ut frigore & horrore extremæ partes tentarentur; immani mox corripiebatur circa præcordia anxio dolore cum ardore & morsu in scrobiculo cordis, nausea & vomendi cupiditate juncto, totamque noctem transigebat insomnem. Hisce sympto-

matibus intra viginti quatuor horas maceratus, flagitabat a Medico vomitorium & quidem instantissime. Ille pulverem, qui tria grana tartari emetici continebat, porrexit. Inde paucam & mucosam viridiscientis coloris quidem materiam, sed summo labore & anxietate evomuit. Poscebat aliam dosin, quæ ipsi etiam concessa, sed protinus omnia in deterius conversa. Associabantur continui ructus convulsionis quippiam præ se ferentes, sed nihil amplius rejecit. Præbui vocatus liquorem anodynum mineralem, & videbatur symptomatum atrociam mitescere & remittere per noctem. Sed ipse patiens impatientissimus, altero mane, ob alvum firmiter clausam, a flatibus hanc tragœdiam fuisse ortam reputans, petiit a Medico potiori salis Ebsoniensis unciam, quo ad alvum aperiendam alias frequentius fuerat usus; dedit, sed protinus priora symptomata multo atrociora revertebantur, & viribus omnibus collapsis intra tertium ab emetico diem e vita discessit.

*Epicrisis.*

Affectus iræ si vehementior fuerit, quam infestus sit universo generi nervoso maximeque stomacho, eum non modo spastica strictura dum afficit, sed & bilem in duodenum magna in copia effundit, gravissima atque haud infrequenter funesta, præsertim si non ocyus appropriata medicina majorum fomes præscindatur, quæ inde sequuntur pathemata satis abundeque testantur. Et sicut tali in casu, lenissimo emetico, quod ex uncis duabus vel tribus olei amygdalarum dulcium, melle uncia dimidia, & libra aquæ tepidæ paratur, ad spasmum relaxandum & vitiosam bilem vomitu exturbandam, remedium vix datur præsentius; ita vitæ nihil infensus nec perniciosius, præterquam emeticum vehemens e minerali regno petitum excogitari potest, præcipue, si primo statim post iram tempore porrigatur. Plures novi hac ratione



tione mortuos, non aliter ac si verum venenum arsenicale assumsissent. Hac de re etiam peculiarem dissertationem: *de emetico post iram veneno*, ad præcavenda gravissima hinc inde illata damna, conscribere permotus fui. Lethalis enim & cum convulsionibus juncta ventriculi inflammatio, nisi inter initia statim congruis remediis occurratur, insequi consuevit. Postremo ex hac morbi & mortis historia hoc eliciendum duxi, quod, ubi ventriculus spastice afficitur, medicamina salina majori dosi & sine sufficiente diluentium quantitate data, ad augendum potius quam minuendum dolorem & spasmum, stimulando nerveas fibras, sint apta atque disposita. Hinc in omni cardialgicarum affectionum specie, salini generis medicamenta semper dissuadere solitus sum.

OBSERVATIO X.

*Cardialgia ab atonia & inflatione ventriculi in usu pil. de Syr. chronica facta.* Illustrissimus vir tenerioris & paulo sensibilibus naturæ, quinquagesimum ætatis agens annum, a longo inde tempore, cardialgica & fere quotidiana tempore præsertim autumnali & hyemali, ex stomachi inflatione, corripiebatur passione: quæ inde suam trahebat originem. Ipse ob exsuperans prima in regione acidum, avidissime cibos justo majori quantitate in prandio præcipue cepit. Sed alvus semper pigra existens, nunquam recte respondit ingestis. Præter hæc, æstivo tempore fructibus horeis, fragis, cerasis, malis Persicis, præter omnem modum, autumno vero uvis, & hyeme dulcibus se replevit, corpusque tegumentis idoneis minori diligentia a frigore defendit: omni posthabita diætæ ratione, & ex toto dictis Medicorum speretis atque contentis. Post sumtum cibum ad dextrum scrobiculi cordis latus tumor gallinaceum ovum æquans se prodidit: mox sequebantur spirandi angustia cum facie rubicunda & anxiiis

*Hoffm. System. T. IV. P. II.*

stomachi compressionibus, nec non extremorum frigore, ut in lectum concedere teneretur. Admotis ventriculo & extremis partibus fomentis præcalidis, ructibus præcedentibus vomitu rejecit mucidam tantummodo materiam: post aliquot horas, reverso calore madido in superficiem corporis, a doloribus fuit liberatus. Ceterum Illustrissimus hic Vir interdum autumno catharrodis defluxionibus cum gravi tussi & inquiete afficiebatur. Medici tum ad præstandum lenimen, dosim pilularum de styrace cum refracta aleophanginarum dosi, repetitis vicibus porrigebant. Hinc mitiora quidem reddita symptomata; sed postea morbus præcordialis cum inflatione cardialgica, longe majora sumisit incrementa, adeo ut quandoque per integram septimanam graviter in lecto decumbere cogeretur. Opem vero tunc temporis atque levamen sæpius insigne fuit expertus a leni emetico, dum ab uno tantum tartari emetici grano soluto & cum potu diluente sumto, magna saburræ & materiæ pituitosæ copia vomitu fuit rejecta; quæ obscuri bruni coloris, cum esset, metum & suspicionem incussit sanguinis corrupti; cui etiam sententiæ Medici ordinarii suffragabantur. Sed ego postea accersitus cum rem penitus inquirerem, Illustr. Virum sæpius usum fuisse potu succolade reperi. Judicavi inde hunc insolitum colorem accersendum: & obfirmavit me experimentum a me factum, ubi materia incocta & carbonibus injecta, nullum fetidum odorem diffundeat.

*Epicrisis.*

Ex præfata morbi historia id saltem in usum suum Medicæ artis tirones depromere possunt, quod in tali cardialgiæ quæ ab atonia & inflatione oritur specie, doloris levandi causa, minime quæ opium ingrediuntur ut sunt pilulæ de styrace in usum ducenda, præsertim quando causam morbi vitiosæ & copiosæ ex prava digestionem provenientes cruditates



subministrant. Nam utut hæc ipsa cum aliis corrigentibus permixta, in morbis ubi spasmorum atrocia urget circumspēcte data, locum invenire possint; tamen ubi robur ipsius ventriculi & primarum viarum deficit, & cruditatum ingens est proventus, nunquam nisi augere velimus mala præbenda sunt. Ejusmodi potius in casibus, quæ leniter provocant vomitus, educendo saburræ vitiosorum humorum, utilitatem afferunt desideratissimam; quibus demique tonica & temperate balsamica interne & externe substitui possunt. Ceterum illustrissimus viromnia remedium genera aspernabatur, præter lapides cancrorum, quibus cum aqua fontana quotidie fere vespere utebatur, nec non aquam analepticam spirituosam ex corticibus citri, aurantium, pomorum chinæ, cum vino Hispanico destillatam & julepo rosarum dulcificatam, quam nonnunquam assu-  
mebat.

### C A P U T III.

*De Doloribus & Spasmodis præcordiorum a calculo felleo ortis, & de ejus generatione.*

*Theses Pathologicae.*

#### §. I.

*Calculi fellei sæviter satis affligunt* **S**ævissimæ quidem sunt passiones, exque dolorificæ, quæ, universum nervosarum partium systema vel maxime impetentes, totam motuum vitalium œconomiam pervertendo, a calculis in viis & canalibus urinariis suscitantur: sed non minoris sævitiæ, nec minoris periculi sunt illæ affectiones, quæ a calculosis concretis intra canales biliosos contentis proficiuntur. Uti vero interdum ægre admodum in ductibus, qui consistunt urinariis calculi, ita longe difficiliore ratione biliosi dignoscuntur & dijudicantur, adeo, ut demum post sectio-

nem atrocium variorum symptomatum, quibus per longum tempus afflicti fuerunt ægri, incognitæ causæ in sensus incurrant. Hinc quum frequentius, quam Medici communiter existimant, graves, pertinaces & vix explicabiles ab ejusmodi calculis foveantur dolores & spasmi qui præsertim præcordia infestant; e re utique fore duximus, hanc in praxi medica utilissimam materiam speciali capite includere.

#### §. II.

Primo annotare licet, quod in nullo animantium genere crebrius ac in humano corpore folliculus felleus calculis refertur observetur, & quod hi ipsi ratione figuræ, coloris, magnitudinis, consistentiæ, numeri mirifice inter se differant. Vix enim ulla in rerum natura reperitur figura, vix ullus color, qui non in calculis cystidis felleæ conspiciatur. Alii ovalem, & rotundam, alii exacte cubicam, quidam triangularem, sexangularem, octoædram, pyramidalem etiam recipiunt figuram: sunt, qui fabas, phaseolos, lentes, pisa, castaneas, tribulos aquaticos, nucem moschatam referunt. Mirum etiam in modum ratione coloris variare solent: sunt, qui cretacei, gypsei, ex albocinerei, plumbei coloris observantur; frequentius flavescentes vel ex flavo rubicundi bruno nigricantes, nigri, viridescentes etiam interspersis maculis deprehenduntur; alii pluribus coloribus variegati; quidam exterius crusta cretacea & gypsea obducti, interiorius nucleum habent ex bruno-rubicundum.

#### §. III.

Ingens etiam est differentia biliosorum calculorum ratione consistentiæ. Quidam sunt friabiliore & molliore & tales sunt plerumque albi, cineritii & flavescentes valdeque leves: alii sunt magis compacti, solidi & graviores, & tales sunt quam maxime qui saturatiorem colorem habent ex flavo rubicundum nigricantem, & hi sæpe lævigati & politi observantur. Licet vero

*In hoc mine crebrius reperiuntur*

*Figura & color variant.*

*item eod. sistens*



vero ordinario plurimi lapides cystici aquæ injecti supernatant, tamen solidiores & compactiores, quales sunt maxime lævigati & obscurioris coloris, submergi & fundum petere non semel observavimus. Deinde etiam sæpius vidimus, eos, qui leviores aquæ supernatant, si paullo diutius in ea detinentur, descendisse, forsan, quod in ipsis poris successive particule aqueæ sese insinuaverint. Neque hoc præmittendum esse ducimus, quod lapidum qui supernatant fragmenta & minores portiones in fundum secedant, non secus ac in pumice, qui grandioris molis supernatat, in pulverem vero redactus descendit.

§. IV.

Magni-  
tudo &  
nume-  
rus.

Mirum etiam variat cysticorum calculorum magnitudo & numerus. Nam certa Auctorum probatissimorum fide & observatione constat, totam vesiculam a calculo ingentis magnitudinis, qui aliquot uncias pendebat, valde fuisse expansam & totam ejus cavitatem impletam: quin interdum in defunctis numero triginta, quinquaginta, octoginta, immo trecentos, quorum alii sunt majoris, alii minoris, alii mediæ magnitudinis, inveniri experientia docet.

§. V.

In du-  
ctibus  
biliosis  
humani  
corporis  
rarius of-  
fenduntur.

In ductibus biliosis, qui immediate ex hepate vel intra vel extra ejus parenchyma proveniunt, concrementa etiam solida ex bile producta, in animalibus præsertim bovini generis frequentius, in humano vero corpore paullo rarius offendi, ipsa loquitur experientia. Dubio procul ob eam rationem, quia bilis hepatica longe liquidior, dilutior quoque est ac cystica, quæ crassioris consistentiæ & saturatoris etiam coloris, nec non amaricantis saporis observatur: deinde, quia in ductibus hepaticis, ex quibus continuo in satis notabili quantitate ad duodenum biliosus fertur humor, non tam diuturnam quæ requiritur ad fluidi dissipationem & solidescens materiæ concretionem, necesse

re potest moram. Si tamen, ut auctores testes sunt, ibi offenduntur, longe friabilioris & mollioris sunt consistentiæ, asperiores quoque, tubulosi ac flavescentes.

§. VI.

Experimenta, quæ cum calculis felleis ad eorum elementa & ingredientia paullo curatius pervestiganda & discernenda, instituimus, hoc loco recensere operæ pretium videtur. Primo observavimus quod omnes illi, qui saturatoris & obscurioris coloris paulloque solidioris texturæ, sufficienter exsiccati, vel in massa, vel in pulvere candelæ ardenti admoti, mox instar resinæ lucidissimam concipiant flammam, & toti, exigua saltem relicta materia nigra & cineritia fere insipida, comburantur: illos vero, qui albi & cineritii coloris, gypseæ & cretaceæ materiæ erant, flammam respuere, vel leviter saltem eam suscipere & instar ceræ in lamina ferrea ignita fluere vidimus. Deinceps annotavimus, eos, lapides cysticos, qui solidioris fuerunt texturæ & saturatoris coloris, nec a spiritu vini rectificatissimo, nec ab aqua, accedente etiam leni coctione, dissolvi potuisse. Alio vero tempore a nobis animadversum est, lapides cysticos, qui ingentis fuere magnitudinis & mollioris substantiæ, totam fere cystidis implentes cavitatem, ultra dimidium in aqua calida fuisse solutos.

§. VII.

Non indignum porro observatione est, quod qui in hepate ejusque ductibus in bove reperiuntur & eximuntur calculi saturate flavescents & friabiles, difficulter admodum, vel exiguum saltem concipiant flammam, in nigrum vero cum fumo, qui crinium instar combustum refert odorem, redigantur carbonem. Spiritus vini hilce affusus & leniori calore digestus, brevi tempore flavo colore tingitur & saporem valde amaricantem exhibet. In aqua calida horum calculorum fragmenta injecta parumper dissolvun-  
I 2 tur,



tur, sed saltem levis, flava cum amaricante sapore extrahitur tinctura.

## §. VIII.

*cum bile bovina.* Recens bilis ex vesicula bovis desumpta tribus uncis æquans, tam amaricante prædita est sapore ut una guttula unciam aquæ amarore imbueret possit. Hujus uncia in vase stanneo leni evaporatione in extractum resiniforme redacta, drachmam vix unam largitur, cujus portio flammæ admota lucidissime ardet, dimidio præter propter in cineres abeunte. In spiritu vini rectificatissimo ægre solvitur, optime vero in aqua atque etiam spiritu vini aquoso: color est flavus & sapor valde amaricans. Quod si inspissatæ bili bovinae liquidiori tenuissima argillacea & gypseæ materia intime permiscetur, per exiccationem exhibet massam paullo duriorē, quæ flammæ admota æque ac calculus cysticus ardet.

## §. IX.

*Solia non faciunt ad generationem calculi.* His ita constitutis & accurate perpen-  
sionem & concretionem biliosorum calculorum concurrere sed eos ex sulphurea paullo mucidiori bilis portione, intermixta plus minus teneriori glutinosa vel tophacea materia calore successive inspissata in durum quoddam concrefcere mixtum, & variam figuram variumque, pro differenti partium mixtum constituentium positum & situ, recidere colorem. Nam salinus tantummodo haud proprium esse sub variis coalescere & concrefcere formis & figuris, id inter alia varii & elegantissime sæpius figurati lapides ex sola aqua calcarea in cryptis & specubus subterraneis, ut sunt Baumanniana, Scharzfeldiana, guttatim stillante producti, luculenter demonstrant.

## §. X.

*Generatio.* Genuinam autem tam diversæ configurationis & coloris in progignendis calculis cysticis rationem ac modum

expedite concipere atque invenire, non tam explicatu promptum est ac facile, sed tamen possibile videtur. Equidem, si consideramus longe crassiores & saturatiorem, quin etiam amaricantiorem esse, quæ in cystide detinetur, bilem, ac eam, quæ immediate ex ductibus hepaticis ad duodenicavum defertur, utpote quæ longe tenuior, liquidior, minusque amaricans est: sique simul attendimus, bilem, ex qua in ejus folliculo efformantur calculi, ex hepate etiam per minimos ductus, qui recte cystico hepaticis nominantur & in tunicam cellulosa cystidis finiuntur, in ejus cavitate identidem liquidam & dilutam fieri; non aliam possumus durioris consistentiæ reperire causam, quam quod in homine ob situm vesiculæ felleæ erectum biliosus humor non continuo flumine promanet, sed tum demum prorumpat, quando a ventriculo cibus referto ipsa premitur: hinc fit ut vacuo sub longiori inappetentia ventriculo diutius ibi moram necdere & stagnare debeat, atque interea liquidior ejus pars tum per ipsos etiam poros ejus tunicarum, quæ microscopio inspectæ oculis non aliter se objicitur quam pannus Indicus vulgo *Reffel-Euch*, foras propellatur, crassiori quæ facile in coagulum abire potest, remanente parte.

## §. XI.

Prout vero bilis pro diversa indole & constitutione feri excrementitii, quod materiam præbet, in tanta varietate corporum infirmorum, non unius ejusdemque est mixtionis ac crasseos, sed plus minus partibus terrestribus, tophaceis & in coagulum abeuntibus, item sulphureis magis vel minus exaltatis, resultant figuræ & colores. In cachecticis enim sæpius calculi gypsei albicantes inventi sunt, quinimmo in ipsis ictero chronico laborantibus, copiosa cretacea & gypseæ, quæ dubio procul ductibus hepaticis infedit, per alvum dejecta materia, morbum sublatum fuisse binis ob-

*Figura & coloris*



servavimus exemplis. Ita etiam commemorant *M. N. C. Decur. 2. anno 7. obs. 145.* materiam tephaceam in puero atrophica laborante cum alvi dejectione copiose fuisse eductam, quæ instar lateris modo rufo, modo fusco, modo atro prædita fuit colore.

§. XII.

Cause  
proca-  
sæ & lcg

Ad generationem calculorum biliorum complures utique causas concurrere certissimum est. Has inter præcipue sunt ætas inclinans: rarius enim in hominibus ætatis florentis, frequentius vero in senibus decrepitis sexaginta, septuaginta, octuaginta annorum cystidem pluribus & durioribus etiam calculis refertam fuisse, permultis observationibus confirmatur. Qui desidem agunt vitam & parum corpus exercent, præ iis qui mobile semper vitæ genus colunt, ad ejusmodi calculosas concreciones magis idoneos esse videmus. Sic quoque in feminis crebrius quam in viris reperiuntur. Quarum rerum hæ in promptu sunt causæ. Progressus sanguinis per venas meseraicas, per portæ venam & hepar, uti secundum naturam & consuetudinem semper paullo tardior & difficilior est quam in aliis visceribus: ita in iis, qui vitam colunt sedentariam, cujus generis præcipue sunt ætate confecti & sequior sexus, longe segnior & difficilior redditur; unde ob impeditiorem sanguinis per hepar progressum fit, ut partes aqueæ & fluidæ in vasa secedant lymphatico, remanente & sanguinis & biliosi humoris, qui ex eo separatur, crassiori substantia.

§. XIII.

Spiri-  
tiosa.

Porro ad horum calculorum frequentiore proventum immoderatum spiritus vini item cerevisiæ crassioris usum plurimum conferre, non modo auctoritate & fide *Cl. SYLVII* constat, qui *prax. medic. lib. 1. p. 302.* testatur, se ex hujus aliorumque potuum generosiorum abusu aliquoties icterum & huic succedentem ascitem ut plurimum lethalem observasse, he-

*Hoffm. Syst. T. IV. P. II.*

pate scirrhuso multisque calculis & tophis obseffo subinde reperto; sed & ipsa sana ratio id evincit: nam spiritiosa inque primis spiritus vini & chylum & lympham & sanguinem ad coagulum quam facile disponunt. In laboribus enim chymicis ad crystallisationis negotium promovendum spiritum vini mixturæ affusum magnam vim habere, compertissimum est: præterea, potibus vinosis & spiritiosis corpora nimis incalescunt, & dissipato liquido sanguinis & humorum incrassatur massa.

§. XIV.

Deinceps femina post quinquagesimum annum, cessante mensium fluxu, calculis non modo urinariis sed & biliariis atque inde gravibus obortis symptomatibus tentari, identidem experientia docemur; cujus vix alia subest ratio, quam quod succrescente majori sanguinis in vasis copia, hic difficilius moveatur, & hinc inde subsistens secedentibus partibus tenerioribus spissior reddatur. Nec rarius vidimus, ejusmodi feminas inexplicabilibus in epigastrica regione doloribus expositas fuisse, ita, ut morti vicinæ ob vehementes angustias & anxietates vitæ fuerint, superveniente intenso subinde extremorum frigore, dictorumque symptomatum singulis diebus circa mediam noctem recursu, quibus accessit dolor in hypochondrio dextro ad totum abdomen interdum sese extendens, cum fœdo ad flavum accedente, faciem totumque corpus deturpante colore: quæ tamen pathemata exclusis per alvum vel sua sponte vel artis beneficio excrementis argillaceis prorsus quieverunt.

§. XV.

Sunt vero varii & valde acerbi generis, quæ calculos ductibus biliariis inhærentes comitari & insequi solent pathemata, ut etiam collective sumta & considerata eorum præsentiam arguant. Ordinaria fere sunt: non vagus sed in una eademque sede, hypochondrio nempe dextro

In fe-  
minis  
quin-  
quage-  
nariis  
sanguis  
spissus.

Enarratio  
ratio  
pathematum.



circa regionem hepatis defixus & constans, premens, gravativus vel etiam acutus cum fœdo plerumque faciei colore, interdum ad epigastricam regionem & cordis scrobiculum sese extendens dolor; cujus certis interval-  
 list tanta fit exacerbatio, ut tormina ac cruciatus totam abdominis cavita-  
 tem occupent, juncta plerumque in-  
 appetentia, nausea, conatu ad vo-  
 mendum, circa præcordia anxietate,  
 dolore cardialgico, animi defectio-  
 ne, alvo duriori & adstrictiori: qui-  
 bus tandem dira & contumax opti-  
 mis haud auscultans remediis accedit  
 icteritia. Quidam afflictorum conti-  
 nuo ventris torminibus exagitantur,  
 & vitam per multos annos miserrime  
 trahunt; plurima pars hydrope perit.  
 In quibusdam gravativus, obtusus,  
 profundus satisque contumax cum  
 sensu ponderis dolor per sentitur, id-  
 que plerumque fit, quando mollioribus  
 & minoribus calculis felleus valde  
 distenditur.

## §. XVI.

*Dolor acutus quid indicet.* Intensior vero & acutior si per-  
 sistit & universum systema partium ner-  
 vosarum in consensum trahendo ve-  
 hementes spasticas strictiones, non mo-  
 do circa partes vicinas sed etiam re-  
 motas, brachii nempe & artuum di-  
 stensiones, convulsiones epilepticas,  
 neque minus cum pulsu duro & ce-  
 leri febrem efficit; indicium est,  
 calculum & mole & asperitate insi-  
 gnem firmiter ductibus biliariis inhæ-  
 rescere: ex quibus causis tandem fit,  
 ut brevi mortem accersat.

## §. XVII.

*Calculi per alvum secessus.* Inter hæc vere omnia, quæ jam  
 monuimus, signa, nihil datur cer-  
 tius vehementes a calculo felleo pro-  
 gnatas dijudicandi passiones, ac si  
 ipsi cum excrementis per alvum sece-  
 dunt; & tum non secus ac in calculis  
 renalibus, quando hi ex ureteribus  
 in vesicam fuerunt delati, omnes si-  
 mul & semel dolores cum reliquis gra-  
 vibus affectionibus cessant atque ex-  
 spirant, ictero saltim excepto qui

non simul sed seusim tandem evanescit, eo, quod bilis sanguini & lym-  
 phæ intime immixta non tam facile  
 & expedite rursus e totius corporis  
 sphaera discuti possit. Calculi autem  
 hi, qui per alvum deturpantur, non  
 unius ejusdemque coloris, magnitu-  
 dinis & numeri, observantur, atque  
 etiam pro differenti horum ratione,  
 sedem quam occupare solent, subin-  
 dicant. Nam si sunt molliores, dilu-  
 tioris, vel etiam tophacei & gypsei  
 coloris e ductibus hepaticis, quibus  
 inhæserunt profectos esse haud levi  
 argumento est: si vero minores, si  
 asperi, si duriores, angulares & co-  
 loris paullo saturatoris folliculi fellei  
 hospites fuisse & per angustum illum  
 canalem cum acerbissimis symptoma-  
 tibus iter suum confecisse, haud ob-  
 scure colligitur.

## §. XIX.

Ceterum testantur observationes *Nulla*  
 eæque non raræ, post mortem vesi- *seps*  
 culam fellei multis lapidibus refertam *sympto-*  
 inventam fuisse, ubi & corpus a fœdo *mate*  
 flavo colore immune & ab aliis etiam *stipantur.*  
 gravibus passionibus liberum extitit. *clusio.*  
 Cujus rei causam sine ulla dubitatio-  
 ne inde derivamus, quod calculi tam  
 illi qui vesiculam felleam, quam  
 etiam qui renum substantiam obsi-  
 dent, si quiete jacent, nullas valde  
 sensibiles procreant molestias atque  
 incommoda; quodocunque vero ita  
 vel ratione sedis vel ratione molis &  
 figuræ sunt comparati, ut nervosas  
 exquisitæ sensationis membranas vel  
 ductus violenter lancinent aut disten-  
 dant, protinus tota œconomia actio-  
 num vitalium & animalium in uni-  
 verso corpore perturbatur. Idque non  
 tantum fit, quando calculi per du-  
 ctum cysticum ad cholodocum iter  
 suum conficiunt, sed & quando  
 ipsa vesicula fellea, quæ membranis  
 nerveis sensibilibus ob dextri interco-  
 stalis nervi interspersas ramificatio-  
 nes, gaudet, a nimium aucto bilis  
 coagulo vehementer & supra modum  
 distenditur, tunc non secus ac in ve-  
 fica



sica urinaria, si ingentis molis quandoque ad sex vel octo uncias accedens, quale exemplum nuper habuimus, ibi hospitatur calculus, symptomatum acerborum caterva corpus obruitur. Legimus enim apud auctores spectatæ fidei, felleam vesicam tam grandem a copioso intus hærente solido materia fuisse deprehensam, ut naturalem magnitudinem vel triplum superaverit.

§. XX.

*Dolores ex calculo felleo periodici.*

Dantur etiam dolores & spasmi cum consuetis symptomatibus junctis ex calculis felleis oborti, certis periodicis invadentes & repetentes. Ita notabilis est casus, quem B. PETERMANNUS in Dissert. de scrutinio icteri ex calculo vesiculae fellis recenset, ubi quidam ictero annuatim periodico cum doloribus afflictus est, qui vero post evacuationem lapilli baccae lauri similis cessavit: altero anno cum idem morbus rursus invaderet, exhibitis convenientibus remediis rejecti sunt per alvum plusquam sexaginta calculi flavescentes, quorum alii rotundi & lævi, alii angulosi & asperi, alii molliores, alii duriores fuere, magnitudine partim phaseolos & pisas, partim quoque lentes referentes.

*Methodus medendi generalis cum cautelis.*

§. I.

**P**erspectis sic omnibus & singulis quæ ad historiam hujus affectus, tum quoad causas, & prognosin, tum quoad eum dignoscendum faciunt, pertinentibus circumstantiis: sequitur nunc, ut etiam solliciti simus de accommodatis ad eum tollendum vel mitigandum saltim, vel ad eorum generationem præcavendam præsidiiis. Quemadmodum vero duplex semper morbis medendi via est; altera, quæ in paroxysmo, altera quæ extra eum locum invenit, dum

in illo Medici consilium magis ad symptomatum, spasmodorum & dolorum ingravescentium mitigationem & allevamentum: extra paroxysmum vero ad removendas causas directum esse debet; ita etiam hanc in præsentis affectu locum obtinere existimamus.

§. II.

Nihil itaque antiquius esse debet Medico, ac ut sæva illa, quæ a spasticis nervosarum partium stricturis circa præcordia & etiam partes vicinas excitantur, quodammodo leniantur symptomata, cui scopo obtinendo, quæ anodyna, demulcente & fibras nimis strictas relaxante virtute gaudent, egregie serviunt. Hujus generis sunt ex pinguibus interne sumendis oleum amygdalarum tam dulcium, quam amararum, recens sperma ceti: externe ipso pinguedo cati sylvestris, castorei &c. Ex demulcentibus lac, serum lactis dulce, emulsiones ex seminibus quatuor frigidis, infusa vel decocta ex radice altheæ, herba parietariæ, floribus malvæ, papaveris rhæados, sambuci, quibus addi potest syrupus de althea Fernellii. Ex anodynis spiritus nitri dulcis rite præparatus, liquor anodynus mineralis, extractum croci, papaveris rhæados. Ex antispasmodicis pulvis ex lapidibus cancrorum, cinnabari & nitro paratus, cui tantillum extracti croci adjici potest, pulvis antepilepticus Marchionis, pulvis lumbricorum terrestrium, pulvis antepilepticus niger & qui ex rasura ungulae alcis, cranii humani, nec non lepore ex utero secato & exsiccato parari solet, præsertim quando ex iis cum aquis florum blanda anodyna virtute gaudentibus concinnantur mixturæ.

§. III.

Externe epithemata & sacculi ex emollientibus & carminativis speciebus parati, vel etiam vesicæ decoctis florum emollientium & paregoricorum repletæ partibusque affectis applicatæ, plane singulare dolorum & spasmodorum.



spasmodum lenimen afferre solent. Expedit quoque ad dolores sopiendos clysmata ex lenientibus parata ano crebrius infundere, nec non alvum per blandum laxans, quale est, quod ex manna, rhabarbaro, agarico recenter trochiscato, cremore tartari & id genus aliis confici solet, leniter ducere.

## §. IV.

*Extra  
paroxysmū  
causā  
morbi  
evellenda.*

Extra paroxysmum vero quiescentibus spasms & doloribus ad causam mali funditus evellendam, ad obturatos meatus felleos aperiendos & ad calculos, si ipsis firmiter inhærescunt, quantum fieri potest, extra corpus propellendos, utique alia medendi via est ineunda. Ea enim, quæ strenua sua virtute jam dictos effectus præstant, in usum vocanda, cujus generis sunt infusa & decocta ex aperientibus, solventibus, discutientibus & excretionem promoventibus, vel ex aqua sola vel vino permixta parata v. g. radice rubr. tinctor. graminis, asparagi, petroselinis, pimpinellæ, aristolochiæ, curcumæ, cichorei, glycyrrhizæ; additis postea rhabarbaro, trochiscis de agarico, tartaro tartarifato, terra foliata tartari vel sale polychresto & syrupo de althæa Fernellii. Quæ decocta, si convenienti dosi & longo satis tempore in usum ducuntur, in hisce affectibus debellandis magna vi gaudere, experientia & multis observationibus evicti sumus. Clariss. SYLVIUS in *praxi med. lib. 1. cap. 14.* & ex eo celeberrimi nominis Itali Medici LANCISIUS, item BIANCHI inter medicamenta calculos biliosos specifica quadam vi dissolventia, decoctum radices graminis, graminisque succum mirifice laudant atque commendant, hac potissimum ducti ratione, quod boves & oves mense Maji, quo gramine viridi vescuntur, sensim ab omni crusta lapidiosa liberentur, quæ tempore hyemali, ubi fœno nutriuntur, in eorum folliculo fellis concrecere suevit.

## §. V.

Præter hæc radix pareiræ bravæ haud

ita diu ex Brasilia in Europam translata ad drachmas duas in lib. una aquæ leniter decocta, potum admodum salutarem in omni calculo etiam in asthma humida præbet, si tertia ejus pars tribus singulis horis cum pauxillo sacchari tepide bibitur: hac enim ratione icterum felleum cum torminibus & ingenti dolore stipatum intra 24. horas discussum in *l' Acad. Royal. des Sciences Anno 1710 p. 76.* legimus.

## §. VI.

Nonnulli etiam millepedes vivos vino infundendos & siccatos in pulverem terunt & hos ipsos cum salibus neutris, ut sunt terrea foliata tartari, sal polychrestum, tartarus vitriolatus & tartarifatus, solutio oculorum cancri, parca & refracta dosi ad obstructos hepatis meatus expediendos & ab omni biliosa amurca liberandos maximi faciunt. AVICENNÆ vero cura, uti in ictero chronico, a veteribus Medicis magni semper habita est, ita etiam eam in iis, quæ in meatuum biliariorum obstructione & bilis ad concoctionem ciborum necessarii præpedito affluxu, consistunt vitiis, locum habere posse haud dubitandum est. Vetustissimus vero hic auctor lumbricos siccatos, cum vino albo & sacharo ad saporis gratiam sumtos plurimum laudat, vel etiam horum pulverem cum syrupo de byzantiis in pilularem redigit formam & crebrius vesperi propinat, postridie superbibendo serum caprillum, ex lacte a capris, herbis prius aperientibus fœniculo, apio, petroselino, rusco, lupulo, eupatorio, asparago, nutritis desumpto, relictæ ejus caseosa substantia paratum. Ceterum externis quoque leniendis gravioribus symptomatibus occurrere e re erit. Faciunt huc plurimum epithemata hypochondrio dextro applicata, quæ ex floribus chamomillæ vulgaris & Romanæ, herba scordii, absinthii & cardui benedicti, aqua florum sambuci & vino rubro præparantur, si frequentius de die renovata admoveantur.

## §. VII.



§. VII.

*Ultima  
spes in  
aquis  
medica-  
tis.*

Hæc vero omnia quando inaniter , & incassum longo tempore usurpata fuerunt , ultimo tandem spes est sanitatem recuperandi in aquis medicatis naturalibus tam thermalibus quam etiam sic dictis acidulis ; inter quas celebrioris famæ & effectus sunt thermæ Carolinæ , Aquisgranenses , acidulæ Egranæ , Pyrmontanæ , quibus certe magna & efficax virtus inest rebelles chronicas , quæ ab obturatis & crasso humore farctis visceribus præsertim hepate proveniunt , persanandi passionibus , si corpore prius probe præparato , soluta nempe plethora , vel co-chymia attemperata , debito regimine tum interne tum externe adhibentur .

*Cura præservatoria.*

*Præser-  
vatio li-  
bero sã-  
guinis  
circulo  
per vi-  
scera  
obstine-  
tur .*

**C**Um in superioribus dilucide satis ostensum sit , quam gravia , & sæpius funesta calculos felleos , præsertim si exitum per angustos & valde sensiles canales nerveos moliuntur , excitent symptomata ; circumspecti nunc erit Medici , ut , ubi in corpore ad eos progignendos dispositionem invenerit , id omnibus modis impediatur . Quod nostra quidem sententia vix rectius , & meliori successu fieri poterit , ac si diligenter ad progressum , & cursum sanguinis per mesenterium , per viscera abdominis imprimisque per hepar attendat , an liber ille ac integer , an vero difficilis , & præpeditus sit ; quandoquidem ex hoc , tanquam ex fonte sicut plurimi hepatis morbi , ita etiam calculosæ concretiones in hoc viscere proveniunt . Nam quo spissior est sanguis , & serum multis glutinosis partibus refertum , eo bilis ad coagulationem magis prompta atq , proclivis est : & quia graves illæ chronicæ passionibus , cachexia , hydrops , icterus , asthma hydropicum ex retardato sanguinis per hepatis viscus progressu identidem nascuntur , non mirum est

in corporibus quæ ejusmodi morbis defunguntur , passim id testantibus observationibus , concreta calculosa in folliculo felleo vel etiam ductibus biliariis inventa fuisse .

Quicumque itaque ex Medicis hos morbos prudenter avertere vult , is ejusmodi remedia præscribere , & in usum ducere debet , quæ in genere morbis , qui ex vitio hepatis nascuntur præcavendis dicata sunt , cujusmodi sunt fontes medicati & minerales , itè potus diluentes , ut serum lactis cum convenienti regimine , sufficienti motu , & exercitatione corporis usurpatis , nec non medicamenta quæ tenaces viscidos humores dissolvunt , & acidum , quod fere omnis coagulationis principium est , destruunt , uti sunt decocta ex radicibus quinque aperientibus , præsertim si cum sale polycressto , terra foliata tartari , nitro acuntur , item elixir temperatum viscera- le cum æquali parte essentia rhabarbari saturatæ permixtum , cujus frequentem usum in ejusmodi morbis hepatis præcavendis non modo tutissimum sed & efficacissimum semperprehendimus . Præterea tempestive instituta sanguinis missio , potus sufficiens , temperatus & modicus victus , parcior cerevisiæ crassæ , vini , spiritus vini ac calidorum medicamentorum ac purgantium usus , sicuti nunquam non a molestis , & chronicis passionibus , ita etiam a præfatis hepatis morbis corpus egregie vindicant .

*ENARRATIONES MORBORUM.*

*OBSERVATIO I.*

**V**ir generosus sexagesimum & sextum jam supergressus annum , sanguine , & succis plenus , lautæ , & vinosæ diætæ assuetus , jam fere per decem annos dolores modo calculosos , modo podagricos est expertus . Ante aliquot annos imma-  
nes

*Calculi  
fellei  
in ple-  
thorico  
Vena-  
secto-  
perito-*



nes dolores accesserunt circa vesicæ regionem cum ingenti gravitatis ibi sensu, qui suscepto corporis motu augebatur. Aderat simul titillatio circa pubem & perineum, & veluti stillicidium sequebatur urinæ, ut vix potuerit inhiberi: stimulus quoque ad alvum deponendam persentiebatur, atque urina prodibat alba, turbida, cui sedimentum mucosum inerat; interea dolores nephritici, & podagrici conquiescebant. Æger immensis fractus doloribus, & viribus sensim privatus ac emaciatus tandem supremum diem obiit. Dissecto post mortem corpore, lapis in vesica 8. uncias pendens inveniebatur, & pelvis renis sinistri, lapidem firmæ instar marmoris consistentiæ drachmas 6. pondere habentem involvit; in cystide vero felis plus quam 70. minoris vel majoris magnitudinis calculi deprehendebantur, quorum nonnulli tam pulchre lævigati, politi, variegatique erant coloris, ut jaspidium instar nonnullis aureis a curiosis includerentur.

#### *Epicrisis.*

Retulerunt mihi de hujus ægri statu, quod averfatione quadam naturali nunquam venæsectionis remedium passus neque etiam inclinante ætate, sanguinis excretionem natura molita fuerit, quam tamen in juventute per nares frequentius fuit expertus. Relatum quoque accepi, quod pater ejus podagricis, & nephriticis doloribus sæpius fuerit tentatus. Quibus circumstantiis probe animadversis haud sine ratione colligi poterit, minimam sanguinis, & succorum exsuperantiam, in corpore, per nativitatem hæreditario quasi jure imbecillitatem ad calculum trahente, præsertim sub quieto reddito vitæ genere, & intemperantiori vini usu, adeo numerosæ calculorum concretioni non modo qui in vesica, & renibus, sed & fellea cystide delituerant, primam originem, & causam subministrasse. Sententia in hac ego confirmor exem-

plo celeberrimi nominis Archiatri, qui cum per totum vitæ cursum vitæ cursum abstinere ab omni sanguinis missione, per plures annos calculosa nephritide laboravit, cui tandem accessit icteritia; ad quam tollendam dum præscriberentur mixturæ viaperiente, & laxante pollentes, septem per anum calculos exclusit. Ex quibus demum id in usum præservatorium ad dictos morbos avertendos colligere licet, quod venæsectio in statu plethorico neglecta, ad procreandos dictos aditum patefacere possit morbos, tempestive autem admissa, corpus ab iis vindicari queat. Discere etiam id ex commemorata morbi historia licet, plures in fellea cystide calculos sine incommodo, & dolore consistere posse, modo non affectent exitum per angustos canales, quorum nimia, & violenta distensio tot gravissimorum, & pene lethaliū symptomatum vera, & genuina causa unice evadere potest.

#### OBSERVATIO II.

Primarius hujus urbis civis, sexagesimum jam quintum agens annum, ictero & tumore hydropico laborabat. His plura remediorum genera frustra opponerentur. Tandem Medicus hujus loci infusum corticis medii sambuci ex vino, paulo largiori porrexit dosi: inde factum, ut a medicamento & vomitiones, & alvi dejectiones strenue concitarentur, & quod valde erat notabile, per ipsum vomitum successive numero 20. lapides ex flavo viridis coloris, diversæ magnitudinis, valde latæ superficiæ, figuræ tam quinquangularis quam angulosæ, drachmam vel unam, & dimidiam ponderantes, quorum ego adhuc aliquot in rarithecio meo recondo reiecti fuerunt; idque sine præcedentibus lateris dextri torminibus. Cessavit inde quidem icterus, sed remansit tumor hydropicus, qui etiam augmen-

*Calculi  
fellei  
in hy-  
dropico  
& icterico  
vomitus  
reiectione.*



mentum sumens, laborantem e vita sustulit.

*Epicrisis.*

Id maxime præfato in casu memorabile atque consideratione dignum videtur, quod sine atroci dolore cedente, ex tam angusto nerveo canali qualis est cysticus, tot numero lapides tam insignis magnitudinis, & figuræ potuerint propelli. Ego itaque in hanc deveni medicationem vel potius conjecturam, quod in ipsius duodeni flexura ejusmodi lapides a bile crassiori, & terrestriori successive concreescere, & progigni potuerint. Nam quod in ipsis intestinis, præfertim, ubi in flexuram abeunt, varix formæ, & magnitudinis calculi ex præter labentibus humoribus apponi, & compingi possint, id non pauca a fide dignis auctoribus memorata exempla testatum faciunt. Neq; prætereunda hanc in rem est animadvertione dignissima observatio, quam Gel. LUC. SCHROECKIV. M. N. C. Dec. 1. Ann. 4. inseruit, ita se habet: *Mulier annorum septuaginta quinque de ventri torminibus, flatibus, ac aliis pathematibus hypochondriacis sæpius conquerens, respiratione subinde, ad suffocationis metum subsequenteribus animi deliquiis suppressa, ita ut vita ejus actum esse adstantem judicarent, subito in colo obtusos persentiebat dolores, sensim adeo incrementos, ac intestinum rectum lancinantes, ut præ atrocitate doloris disruptarum ani pertimesceret, donec tandem calculum valido conatu, divaricatis cruribus stando deponeret, ponderando unciam cum drachmis duobus, color erat castalinus eleganter levigatus, & potius ex cinereo flavescens variegatus, ex lamellis aliorum calculorum more sensim concrefcentibus constans: interna substantia meros ostendebat circulos striis intersectos; indicio haud obscuro, eum, non facies intestinales esse induratas. Pertinet huc quoque similis observatio FERNELII quam l. 6.*

*cap. 9. de partium morbi symptom. prodidit, calculos in intestini coli, cæci valvulis fuisse repertos referens. In equis grandes lapides libram, & ultra pondere æquantes, instar marmoris duos, & politos, in flexuris intestini coli inferioris, Altenburgi, & nuper in pago Berrn Oofferstadt fuisse repertos, & mihi monstratos testari plena fide possum. Ceterum de calculis in intestinis progenitis SYLVATICUS Cent. 3. Consult. 7. it. ZACUT. LUSITANUS. l. 3. præx. admiranda observ. 131. haud parum luculentum testimonium exhibent. Nihilominus non plane etiam incredibile est, in ductibus biliariis hepatis minimos felleos calculos primum posse herere sensim a præterlabente bile augmentum capere, & successiva horum ductuum ingenti dilatatione facta ibi diutius subsistere, donec per valida medicamenta fortiores systolem ductuum intendentia expurgentur: atque in hanc sententiam ob eam rationem deduci quispiam poterit, quod statum a rejectione lapidum per vomitum icteritia sublata fuerit.*

OBSERVATIO III.

Ante aliquot lustra artifex ensifer, per integrum ante obitum biennium de intolerabilibus, & fixis moribus, doloribus, ardoribus præcordia in dextro hypochondrio, quasi ignitos in corpore aleret carbones, conquestus est, qui totum sæpe abdomen acerbissimis tormentis occupabant, cum foedo faciei colore, animique deliquio intercurrente. Post mortem ejus vesica biliaria tota erat calculis repleta: nam ultra sexaginta sex grana, partim pila partim globulo referentia, bilis coagulata, & lapidescentis continebat. Circumjacentes vero partes præsertim intestinum colon, nec non pars duodeni cum pyloro, item ventriculi fundo foedo flavo colore tincta con-

*Intolerabiles dolores a calculis in cy. stide.*



spiciebantur, earum tunica exteriori corrofa.

*Epicrisis.*

Sævi dolores & tormenta, quæ circa hepatis regionem in dextro hypochondrio fixam sedem habent, non tam a calculo quam potius ipsa bile, poros, cum non liberum habeat exitum, transudante, & partes circumjacentes arrodente. Legi meretur de hac re STALPARTIUS *van deer VVIEL cent. 1. observ. 47.* qui in apertis infantum cadaveribus, ventris doloribus, nausea, vomitu, febre ac convulsionibus nec non cardialgia correptorum ventriculum non intrinsecus sed & extrinsecus bilis flavo colore infectum se reperiisse, fidem facit.

OBSERVATIO IV.

*Sevissimi doloris in hypochondrio dextro ab amurca biliosa.*

Aliquot abhinc annis requirebat a me consilium honesta femina quadraginta, & aliquot annorum, quæ a multo inde tempore pathematibus hysteriis cum suffocatione junctis erat obnoxia, quandoque etiam incidebat in iæterum recidivantem modo longiori modo breviori tempore perseverantem, sub lauto victu, otio quoque maxime vitæ partem transigebat: vacationes mensium, & hæmorrhoidum quibus subjecta erat, parcius & non statim tempore procedebant, corpusque ingravescere subito, & ex improvviso cœpit. Intolerabilem in dextro latere & sub costis spuris persistiebat dolorem cum nausea, vomendi conatu, vehementi præcordiorum anxietate, spirandi; ad suffocationem difficultate: circa scrobiculum cordis persistebat dolor vehemens pressorius, qui etiam ad umbilicalem usque se extendebat regionem. Alvus erat obstructa, urina suppressa, pulsus cum æstu celer, & noctu levi delirio corripiebatur, summaque aderat corporis jactatio, inquietudo cum extremorum frigore: quæ cuncta, per biduum mala, & tormenta

persistebant. Supposito clystere feces instar albi græci secedebant. Datis pulveribus anodyno antispasmodicis, & infuso florum chamomillæ vulgaris, partibus calidis oleo amygdalarum dulcium alteratis, & fetu emolliente in vesica suilla loco affecto appposito, remissio symptomatum sensim sensimq; facta, secesserunt feces naturali colore tinctæ, & abdominis quoque dolorifica distensio atque inflatio, leni oborto sudore interjectis aliquot diebus fuit discussa. Sedato morbi impetu per vices portio, quæ constabat ex rhabarbaro, radicibus quinque aperientibus, radice curcumæ, summitatibus centaurei minoris, agarico trochiscato, terra foliata tartari, semine fœniculi, tartaro tartarifato, & nitro purificato ex aqua summitatum millefolii, & vino propinata. Ita sensim magna copia crassarum biliosarum secum fuiteducta, ægri optata virium cum tolerantia. Quæsitum a me fuit, quænam ad recidivam tam immanis dolorifici affectus præcavendum essent utilia remedia; & num instante verè acidularum potus conveniens sit. In responso ego causam atrocis hujus doloris, & insequentium symptomatum non quidem a lapide solido & compacto, sed amurca biliosa ductum chodochum obdurante, & bilis ad duodenum progressum retardante reponendam esse judicavi, eam ob rationem, quia mihi similes in praxi casus obtigerunt, ut ipsis calculis per sedem rejectis mox omnia gravia conquieverunt symptomata. Ego vero potum acidularum Egranarum, præsertim si calidæ bibantur, summe proficuum judicavi.

*Epicrisis.*

Male affectum in hac nobilissima ægra jecur esse ibique sedem ponendam hujus subitæ, & dolorificæ affectionis, ex hisce causis judicandum censui: quia non semel sed aliquoties iæterum perpeffa; dein quod sub



paroxysmo alvi scybala rejecta fuerint: tum, quod sub otiosa vita, & lautiori victu, præsertim ubi vacuationes per hemorrhoides, & menses non rite succedunt, quam facile obstructions in hepatis vasis, quæ calculorum generationi velificantur, fieri possint. Et utat non semper mitescente malo calculi sub forma ejiciantur duri, & solidi, successerit tamen, quod materia biliosa tenax, ad concrescendum valde apta, similem in obturandis ductibus effectum ac calculus verus, quando exitum per angustos canales molitur producere valeat, quæ si ad cavitatem intestinorum delata cum reliqua vitiosorum saburra rejiciatur, dolor conquiescit. Quod vero hæc affectio morbosa comitem non habuerit icteritiam, inde deducendum puto, quod obstructio illius ductus non diu perseveraverit. Tandem etiam & illud monendum existimo, quod calculi fellei, si minoris fuerint molis cum fecibus insensibiliter sæpius projiciantur.

#### OBSERVATIO V.

*Dolor fixus in regione hepatis excreta materia tephac sedatus* Aliquot ante annos, contumaci icteritia, Vir amplissimus annorum 50. tenerioris corporis, & melancholici sic dicti temperamenti, laborabat. Dolor fixus erat circa jecoris regionem lancinatorius & pressorius. Quotiescunque quippiam ore, sive alimentum, sive medicamentum assumebat, summa circa præcordia insequente anxietate, vomitu mox omnia rejiciebat. Totum corpus flavo fædo colore tinctum conspiciebatur, fæcesque grysei coloris prodibant. Ego in consilium accitus, tum ad componendum, tum ad sedandum dolorem, & spasmus, tum ad roborandum ventriculum efficacia alias remedia præscripsi, sed nihil opis tulerunt. Ex omnibus tamen arcanum duplicatum, minori sed repetita dosi, item liquorem nostrum anody-

num, ex aqua cerasorum nigrorum exhibitum, citra offensam ferre poterat. Extrinsecus jecoris regioni epithema ex vino rubro, in quo torquebantur, herba absinthii, flores sambuci, & chamomillæ vulgaris, ac Romanæ, crebro imponebatur. Interdum emulsio ex seminibus 4. frigidis, amygdalis dulcibus & amaris, semine papaveris albi cum aquis florum confecta, per intervalla frequentius fuit propinata. Ita sensim mitescebant dolores atque symptomata, urina instar crassæ cerevisiæ rubra prodibat & alvus sponte aperiebatur, ac quod valde notabile erat, feces secedebant albæ, tephaceam, & calcaream minus solubilem substantiam referentes, cujusmodi delectiones cum difficultate per septimanæ fere spatium continuabant. Quod naturæ beneficium, leni laxante ex rhabarbaro, manna, & cremore tartari secundavimus, subjunctis postea medicamentis temperate balsamicis. Ita intra mensis spatium cura fuit feliciter absoluta.

#### *Epicrisis.*

Nobilissimus hic tenerioris & melancholicæ constitutionis vir, in officio valde laborioso, quod sedentariam vitam atq; ingentes mentis contentiones & fatigationes exposcebat, erat constitutus; & quum multo jam tempore ventriculi imbecillitate, & ex hac proveniente lenta febre laborasset, ceteris nihil proficientibus, tandem a me leni emetico hæc fuit evicta, quo ingens vitiosæ & corruptæ bilis copiaeducta. Non mirum proinde est eum incidisse in talem hepatis morbum. Illud vero in hoc casu explicatu difficile admodum videtur, unde copiosa illa gypseæ materia alvo exclusa prognata fuerit, ubi sedem habuerit, & unde ejus color albicans subortus? Si conjecturæ rationali tamen locus est, crediderim in ductibus hepaticis tam in principio hæsisse, productam ex bile terrestribus fixioribus



ribus particulis referta, pinguioribus vero oleosis destituta; quæ postea ad ductum cholodochum delata, cum obstruendo memorata concitavit symptomata; quando quidem ego hac in sententia sum, multum biliosum humorem, ratione materiæ, & ingredientium ex quibus componitur, pro corporum dispositione, & maxime statu valetudinario variare, adeo ut varii generis impuritates ipsis sæpius immisceantur: & ab hac causa omni procul dubio etiam, tanta ratione magnitudinis, coloris & consistentiæ in calculis diversitas, & tam valde differens biliosi humoris actio, & operatio nervosis partibus plus minus infesta ducenda, & derivanda. Postremo illi hoc loco inferendum putavi, epithemata ex roborantibus, & leniter discutientibus parata, extrinsecus regioni hepatis in ictero pertinaci, & aliis hepatis vitiis applicata robur, & tonum huic visceri conciliando egregiam opem ac levamen conferre: quod crebriori experientia confirmatus scribo.

## OBSERVATIO VI.

*Acutissimus  
circa hunc  
par do-  
lor ex  
calculo  
fellico.*

Uxor Judæi quinquagesimum, & quintum ætatis agens annum, macilentia & imbecillioris naturæ animiq; diuturno mœrore ob calamitates sæpius perpeffas valde macerata, colicis pariter ac cardialgicis doloribus sæpius obnoxia, derepente a purgante assumpto, in acutum, & vix tolerabilem hepatis regioni firmitus insistentem incidit dolorem, intercurrentibus intestinorum doloribus alvoque adstricta, qui per intervalla remittebant, & quiescebant. Accedebat septimo die icterus, fœdo colore totum corpus perfundens. Quibus symptomatibus per mensem fere jactata, adeo privabatur viribus ut morti propinqua videretur. Nil proficientibus euporistis, & quæ ab aliis præscripta erant Medicis: peti-

tum etiam a me fuit auxilium. Jussi ego primum, decoctum radicis curcumæ cum sale tartari, & aqua paratum valde saturatum, cum cerevisia potui dari. Dein potionem laxantem ex mannæ uncis duabus, cremoris tartari drachma & dimidia, nitri purificati granis 12. olei amygdalarum dulcium uncia una semis paratam, mane per vices hauriendam præcepi. Ita octo sedibus magna viscidorum, & biliosorum humorum colluvieseducta. Tum regioni dolenti vesica fuilla, olei calidi plena, ad demulcendam doloris sævitiam fuit admota. Post aliquot dies dolores sensim mitescebant, & ægra cum sanitate in gratiam redit. Hoc paroxysmo, mitioribus tamen symptomatibus stipato, aliquoties postea per annum cum affligeretur, non præstantius unquam ac in dictis remediis auxilium invenit. Interea retulit mihi ægra, quod inter excrementa sæpius duri globuli pisarum instar in paroxysmo, & extra eum prodirent. Ceterum Halberstadtium se contulit, ibique, ut intellexi, valetudinaria perpetua degit.

*Epicrisis.*

Feminæ cachecticæ quam facile in morbos hepatis icterum flavum, & nigrum incidunt; neque mirum est huic visceri calculos ingenerari, præsertim quando non amplius tributum lunare persolvunt, & mœrore afficiuntur. Ex curcuma petendi auxilium in hoc affectu per motus sui, ob historiam quæ legitur in Clave Pharmaceutica Beati mei Parentis, & sic audit. *Cum Clariss. Dominus Christianus Gueinzius, meritissimus olim Gymnasii nostri Rector p. m. aliquando acutissimis dextri hypochondrii doloribus usque etiam ad Medicorum desperationem de restitutione in sanitatis plenum torqueretur, Medicis reliquis consultantibus ultro citroque de remedio aliquo appropriato huic affectui adhibendo, tandem D. D.*



BENEDICTUS OHEIMIUS Medicus sine pari sexagenarius p. m. semi drachmam radicis curcumæ in haustu cerevisiæ calidæ butyraceæ propinavit, a cuius usu elapso biberio dolores dicti non simul remiserunt, sed & per secessum ipso salvo lapilli aliquot subluteo colore splendentes in pelvim substratam excreti fuerunt; quos quidam Medicorum ex intestinis; ego autem ex fellis folliculo secessisse iudicavi. Elapsis duodecim & circiter annis post eadem perpeffus symptomata sed defuncto tunc laudato D. OHEIMIO p. m. & nullis excretis lapillis, in quos causam mortis refero, hujus iter adiit. Potionem mannata cum oleo amygdalarum dulcium sæpius conducibilem ad calculos etiam renales, si ureteribus firmitus inhærescunt, in vesicam promovendos deprehendi; qua non modo fæces intestinorum, sed & flatus, qui symptomata augent, & iter calculorum præcludunt, bonis cum ægri rebus educuntur.

## CAPUT IV.

## De dolore &amp; Spasmo iliaco.

## §. I.

Evolutio nominum

**I**Nter graves generis nervosi morbos, qui mentem permolesta sensatione, & corpus periculosis pathematibus excruciant, referendi omnino sunt sævi intestinorum dolores, inter quorum numerum primas fere tenet qui in ileo valde teneræ, & sensibilis texturæ consistit, & vulgo passio dicitur iliaca. HIPPOCRATES dolorem ilei, quia causa ibi residet, vocat. Græci chordapson sive morbum chordium appellarunt; quia intestinum ægrotans ad chordæ similitudinem tenditur. Dicitur Latini volvulus, quia intestina ex parte invicem convoluta apparent in defunctis. CORN. CELSUS tenuioris intestini vocat.

## §. II.

Est dolor intestinorum tenuium acutissimus facile in inflammationem transiens, sub quo peristalticus eorum motus secundum naturam ad inferiora vergens violenter invertitur, atque in intestinis contenta atque assumpta vomitu rejiciuntur & extorquentur, ac nihil; neque flatus per alvum fortiter clausam descendere potest, gravia post se trahens, & sæpe funesta symptomata.

## §. III.

Progressus hujus morbi una cum symptomatibus ita adornatur. Præcedunt alvi obstructions, mox acuti, & sævissimi prodeunt dolores, cum inflatione, distensione, duroque ad tactum tumore regionis umbilicalis. Alvus prorsus est constipata, & constricta; adeo ut neque flatus nec excrementa per eam transmittantur; postea superius erumpunt flatus, & primum biliosa ac pituitosa materia, antecedente nausea, crebro vomitu, spiritus est difficilis, & quicquid cibi vel potionis assumitur, tametsi id introdescendat, paulo tamen post quia transire inferius nequit, iterum vomitu redditur, fæces subrubræ, non ab similes stercoribus, cum fædo sæpe halitu ejiciuntur. Summa sequitur virium prostratio, calor præternaturalis, pulsus durus, & contractus cum immodica siti, urina rubra est & difficulter redditur. Cum ad extrema ventum est, accedit singultus, delirium, itemque nervorum distentio, sudore frigido perfunditur corpus, & atroces convulsiones ac lypothymia vitæ sæpius finem afferunt. Ipse HIPPOCRATES lib. 2. de morb. ita exprimit volvuli generationem: *resiccatur intestinum & præ inflammationis caliditate obturatur, ut neque flatus neque cibi pertranseant sed venter durus sit, & quandoque vomant primum mucosa, dein biliosa, postremum stercus.*

Morbi processus.

Per



## §. IV.

Anato-  
mie illo-  
rum

Per dissectionem hoc morbo defun-  
ctorum, ileum inter se convolutum,  
& in una & altera parte, ubi mali se-  
des, inflammatum ac sphacelosa pu-  
tredine corruptum apparet, & supra  
inflammationem ilei pars magna ab  
hac labe libera, flatibus adeo turget,  
ut ipsum colon amplitudine interdussi  
superet.

## §. V.

Ratio  
forma-  
lis.

Ratio formalis hujus mali consi-  
stit in inverso plane tunicarum inte-  
stinalium nerveo-muscolosarum mo-  
tu peristaltico, a fortiori coarctatione,  
angustia, & clausura in inte-  
stino ileo facta, qua nihil ad inferiora  
transmittitur.

## §. VI.

Causam  
præbet  
hernia

Plerumque hujus miseræ ac dolori-  
ficæ passionis causam præbet hernia  
scrotalis vel inguinalis, quando in-  
testini ilei portio intra processus pe-  
ritonei eo impellitur, ubi illi viris  
ad scrotum abeunt, in feminis vero  
uteri ligamenta rotunda penetrant.  
Jam vero notum ex anatomicis est,  
hos processus, dum musculos abdo-  
minis perforant & transeunt, certis  
quasi angulis aut gradibus hanc fa-  
cere penetrationem, ita ut, cum u-  
num musculum perforarunt, intra  
eum, & sequentem aliquantulum  
progrediantur, antequam alterum  
pro ulteriori itinere transeant: sa-  
pienti naturæ consilio, ut eo minus  
promte aliquid ad scrotum vel in-  
guinalem regionem extra abdominis  
cavitatem prorumpat. Si vero cum  
violentia id fiat, ut eo ilei pars di-  
labatur, annulique nimium dilatan-  
tur; facile contingit, accedentibus  
præsertim aliis causis, ut pristinum  
locum repetere nequeat: atque sic fir-  
mius ibi inhærescat & incarcerata sit,  
omnem contentorum transitum pla-  
ne impedit.

## §. VII.

que in  
femina  
pericu-  
losior,

In feminis res est majoris periculi  
cum processus ibi sint angustiores &  
difficilius prolapsa intestini portio  
reponatur, & licet in nonnullis

tam exiguus tumor ut vix fabam æ-  
quet, protrudatur, tamen sævissimam  
hanc passionem invehere. In her-  
niis scrotalibus minus est periculi quò  
major intestinorum est prolapsus.  
Vidimus non semel sed sæpius vel  
tertiam intestinorum partem miro &  
magno tumore in scrotum descendisse,  
sine ullo succedente passionis ilia-  
cæ periculo, quia transitus contento-  
rum commodius & facilius tunc fieri  
potest.

## §. VIII.

Præter hernias, occasionalem huic  
sevo malo producendo dat frequentius  
intestini ilei mutus ingressus sive intus  
susceptio, quæ per sectionem mor-  
tuorum venit in conspectum. Et ut  
ut nonnulli auctores hanc plane ne-  
gare, & pro impossibili habere ve-  
lint, contrarium tamen testantur ex-  
perientia, & observationes: inter  
quas attentione plane digna est Cel.  
PEYERI in tract. de glandulis in-  
testinalibus relatâ de sectione feminæ  
volvulo extinctæ, quæ ita habet:  
*putrefacto abdomine ileum alicubi pla-  
ne constrictum atque veluti injecto la-  
queo str angulatum vidimus; nimi-  
rum portio ejus quatuor digitos trans-  
versos longa, plurimum vero contra-  
cta ac angustata intra proximæ por-  
tionis superioris cavitatem prorsus ab-  
scondita latebat.* Simile quid a Cl.  
SYLVIO in praxi Med. lib. 1. cap.  
15. descriptum est. Et talis ingressus  
in puella simili morbo extincta idem  
PEYERUS tribus distinctis locis,  
præsentibus nobilissimis Medicis Har-  
dero & Brunnero ostendit.

causa  
est  
mutus  
ingres-  
sus

## §. IX.

Genesis hujus phænomeni, licet  
prima fronte paulo difficilior videatur:  
non tamen omnem conceptum  
transcendit; nam si una portio ilei  
vehementer contrahitur, fit ut in  
vicinam flatu distentam cum impe-  
tu intrudatur. Talis ingressus non  
modo maximi doloris sed, & in-  
flammationis esse causa potest, quæ  
compressis, & constrictis vasis ilei  
una

Quomodo  
is  
generetur?



una cum mesenterii portione exoriri debet. Dein etiam sphacelata ejusmodi partes in sectione reperiuntur: & notabilis est casus quem LAZARUS RIVERIUS *Cent. 3. Observ. 26.* prodidit; ubi in dissecto cadavere ileum in fine suo tribus complicationibus convolutum, & quasi compactum in unam massam deprehendit, quæ tota sic convoluta portio gangræne erat affecta, una cum mesenterii proxima parte, reliqua intestina erant amplissima & flatibus mire distenta.

§. X.

que  
ad id  
confer-  
vant.

Ad funestum talem intestinorum ingressum qui causam ileo præbet, plura alia implicita mala conferre possunt: & testantur diversorum Auctorum observationes, a lumbricis in ileo detentis, & dissectis cadaveribus repertis, si morfu dolores efficiant, iliacam passionem fuisse productam. HENRICUS ab HEER *observ. 24. pag. 214.* puellam secuit ab epilepsia iliosam factam vermesque evomentem, in cuius ilei, circa finem, quinque complicationes vermium invenit, aliæ infernæ sursum repetebant, aliæ supra deorsum complicabantur. Et in M. N. C. *Decur. 2. ann. 5. observ. 19.* de femina triginta annorum refertur, quod ileo correpta cum sæce liquida evomuerit 16. lumbricos teretes robustissimos, & animam sub frigido sudore efflaverit. In medio intestini ilei membranæ cuculli ad instar extensæ videbantur, & foramen grossi magnitudine tenuissima membranula exterius tectum. Utrinque vero intestinum unius digiti longitudine, duodenum autem duorum digitorum transversorum latitudine nigrum, & gangræna corruptum visebatur. Eandem morbi causam etiam confirmare, & adstruere videtur LOMMIUS *lib. 2. observ. Medicin.* dum ait: si ad extrema ventum est, subinde lumbrici evomuntur.

§. XI.

Neque inter causas antecedentes, quæ ileum excitare possunt, atque non modo stricturam, & coarctationem ipsis intestinis inferunt, eaque ad inversam peristalticam motionem irritant, excludenda sunt venena, item purgantia acriora nec non emetica, præsertim si jam labe, & vitio quodam intestina laboraverint. Ita CÆLIUS AURELIANUS, qui præter Hippocratem optime de acuto hoc fermento quod Græci ileon appellant scripsit, inter causas, venenum potum aut cibo datum nec non fungos comestos refert. Et ALPINUS *de method. pag. 313.* de Guilandino memorat, quod e colica dolore a devoratis catapotiiis, & hiera ad semiunciam, in ileon, quo extinctus est, inciderit. Neque nos tali in casu largiorem pilularum quæ a loen recipiunt usum probare possumus, utpote quæ post operationem non modo intestina exsiccant, sed & uberiorem sanguinis ad illa affluxum procurant; ut hinc etiam, secundum nostram observationem intestinorum in hac vel illa parte coarctationes, quæ liberum excrementorum transitum inhihent & ad dolores colicos disponunt, efficiant.

Inter  
causas  
venena  
&c.

§. XII.

Neque ex numero causarum passionis iliacæ obturationes intestinorum præsertim tenuium omittendæ veniunt, quas alimenta sicca, constringentia, vel humido non satis diluta excitare consuecunt; inter quæ testantibus observationibus a Medicis passim notatis, frequens panis sicci, & bis cocti, spirarum, castanearumque esus, pira & poma maxime cydoniata, fructus immaturi & acerbi, in magna copia si devorentur, magnum momentum conferunt, præsertim si vita sedentaria, inæror animi, qui omne robur, & totum ventriculo, & intestinorum canali subtrahit, vel parvus potus, accesserint.

Nec vi,  
que in-  
testina  
obtur-  
ant.



## §. XIII.

*aut in*  
*testina*  
*crassa*  
*disten-*  
*dunt.* Præterea intestina crassa a scybalis diutius retentis obstructa & obturata acerbam hanc passionem, dum nihil quod ore assumitur transmittunt, ingenerare possunt, præsertim quando ex pudore aut loci defectu, vel alia ex causa stimulus ad alvum deponendam reprimitur, & cohibetur. Accumulatur hinc maxima excrementorum copia, quæ postmodum tunicas intestinales tam violenter distendunt, ut vis earum elastica, systaltica, & expultrix plane cesset atque deficiat. Hæc dum cogito in mentem mihi venit ante aliquot annos a celebri quodam Archiatro Regio ad me facta relatio, quod nimirum Cellissimus Princeps, ex nimia cohibitione, & retentione fecum, iliacus factus fuerit; in cujus post mortem dissecto corpore intestinum colon scybalis totum repletum & disruptum in una parte inventum est; atque tanta scybalorum moles deducta, quæ pondere circiter 20. libras æquavit. Neque attentione indignum est quod HENRICUS ab HEER in observ. pag. 54. narrat, se præsentem dum ileo demortui abdomen dissecaretur, sponte intestina crepuisse cunctorumque adstantium vestes insigniter commaculasse, cum impetu erumpentibus, & explosis scybalis.

## §. XIV.

*stagnatio*  
*que* Ex ceteris vero omnibus causis antecedentibus, affectus iræ, præsertim si vehementior fuerit, ad iliacam passionem producendam, & quidem facilius in iis, qui vitio quodam intestinorum laborant, aut herniosi sunt, magnam habet potentiam. Neque deficit ratio: nam ea est natura ac indoles hujus affectus, ut nervosas maxime partes spastice convellendo operationem suam exserat, inque partibus etiam imbecillioribus ad quas merito extra abdomen prolapsa intestini portio pertinet, quam facile, ob copiosorem sanguinis affluxum, stagnationem, & stasim,

ex qua demum oritur inflammatio, producat.

## §. XV.

Quæstio nunc occurrit curiosa ac *An Per-*  
*cora e-*  
*vomi*  
*queant* non levis momenti: an nimirum, ut communis fert sententia, & veterum etiam Medicorum assertio est in nostro morbo, præsertim quæ ab incarcerata hernia, vel a mutuo intestini ilei ingressu fit, stercora per os evomi possint? Dubitandi non levis ratio in eo posita est, quod primo per coli valvulam quæ ilei ingressus in cæcum & colon munitus est, fæces non possint relabi, & regurgitare: dein, quod nulla ratione concipi possint, quomodo per constrictam, & firmiter inclusam in hernia tenuem ilei partem stercora penetrare queant. Ego quidem non in totum rejicere volo testimonium Medicorum probatissimæ alias fidei; sed tantummodo id, quod ipse in aliquot vidi, & observavi subjectis hic adducere volo; videlicet rejectam quidem vomitu fuisse materiam, quæ colore subrufo, & externa specie liquidas alvinas fæces referebat: quodcumque vero ipsa rejecta, & collecta materia naribus fuit excepta, nullus plane fœtor vel gravis odor se prodidit, ut potius assumtarum rerum odorem habuerit, præterea, & ipsa quasi ebulliens cum spuma apparuerit. Nihilominus ego haud negaverim, quando nec ab incarcerata hernia, nec a convulsione intestinorum, sed a sola spastica ilei strictura dolor fuerit ortus, intestina vero crassa, rectum, & colon, validissima simul spastica strictura laboraverint, posse hac ratione fæces valde liquidas, & ut alii observarunt, clysteres per coli valvulam ad superiora penetrare. Ceterum hanc de stercoribus vomitu in hoc malo rejectis observationem ulteriori, & accuratiori Medicorum animadversioni atque examini commendatam velim.

Quod



§. XVI.

Prognosis.

Quod attinet ad ipsam prognosin, spes salutis superest, quamdiu non adest inflammatio & clysteres in alvum recipiuntur, & redduntur, dolores quoque locum mutant, neq; dolor & vomitus assiduus est, sed per intervalla urgent, atque malum ab obstructis intestinis a contentis fecibus, enatum fuerit. Major adhuc spes est, si medicamentum ore sumtum laxans alvum perrumpens dejectionis initium facit. Si vero inflammatio jam præsens, quæ ex febre, vehementia torminum, urinæ suppressione, pulsu duro, & celeri, siti inexhausta, jactatione corporis & summa virium prostratione atque extremorum frigore, dijudicatur, parum spei superest. Repentina vero & omnimoda doloris cessatio, summus virium lapsus cum pulsu debili, animi dejectio, fœtor oris, inflammationem abiisse in sphacelum certo denunciant. Quod restat, id sciendum est, quod grave hoc malum, si inter initia, ad avertendam inflammationem & dolorem sopiendum congrua apponatur remedia ad duas vel tres hebdomades, antequam prorsus conquiescat, possit produci.

CURATIO.

§. I.

Tempus attendendum.

Si ullo in morbo temporis momenta attendere & observare juvat, profecto in morbo iliaco sanando id necessarium esse existimo: nam is ipse tantæ est vehementiæ, ut intra tres quandoque dies satis validum hominem, nisi cita ope succuratur, enecare possit. Quando vero quævis momenta temporis præcipiti gradu aufugiunt, subinde juvandi occasionem secum arripiunt; & valet hic egregium illud: HIPPOCRATIS monitum, practicum, quod lib. 1. de morb. medicinam qui faciunt, graviter inculcat, his verbis: Si unquam aliquis in ullo morbo utilitatem attulit, eam justo

tempore attulisse necesse est. Quo circa si ullo in affectu certe in hoc diro præcipiti & periculi plenissimo, Medicus peritus statim accersendus est, cui nihil prius, nihil posterius curæ cordique sit, quam ut sævissimo dolori, qui inflammationi, & mortis etiam causam præbet, sufficientem, per convenientia tam interna quam externa remedia sublevando prospiciat.

§. II.

Qui in veterum Medicorum Græcorum lectione paulum versatus est, is facile deprehendet, eos sollicitè & accurate admodum partium nervosarum affectus inque primis dolores, tum quod ad eorum historiam, tum ad curationum pertinet, descripsisse; non ex alta sine dubio causa, quam quod ob regionum præcalidarum, vitæ, & victus intemperati rationem ejusmodi morbi sæpius occurrant, & opem Medici requirant. Videbimus itaque quomodo & qua methodo HIPPOCRATES hujus mali curationem instruxerit, & adornaverit. Describit hanc ipsam lib. 3. de morb. §. 15. Jubet hoc in affectu alvi apertionem tentandam per glandem satis longam ex melle paratam, quæ anteriori parte felle taurino oblinatur, & bis ac ter submittatur; quo combusta, ut inquit, stercora circa rectum intestinum contenta educantur. Post hæc clysterem adhibendum docet. Et ulterius addit: si minus hæc opem ferant folle febrili in ventrem indito flatus immittatur, a quo & ventrem, & intestini contractionem distendere oportet: dein contracto folle, clysterem applicandum, qui non ex calefactoriis, sed ex his qui stercora dissolvunt ac colliquant parandus est. suadet; postea objurata per spongiam sede in aquam calidam laborans consideat, continens clysteris infusum; & addit: si hoc infusum susceperit, & rursus dimiserit, sanus evadet. Annectimus quæ venerandus Senex alibi scribit: Supernum.



num ventriculum quam citissime purgato, ac sanguinem de capite ac cubitis detrahito, ut superne alvus calefcere desinat, & partes supra septum, transversum frigesfacito, excepto corde. Infernas autem calefacito, homine in folio aquæ calidæ collocato, ac semper oleo illito.

## §. III.

*Metbodus Cælii.* CÆLIUS AURELIANUS præclarus non minus Medicus scriptor l. 3. *Aurelii locut. passion. cap. 22.* in ilei tormento, quæ sequuntur remedia proponit atque commendat. Per clysterem nimirum oleum calidum purum, vel aquam cum æquali parte olei dulcis & cum hybisco, per quem altheæ radicem intelligit, coctam donec aqua fuerit consumpta, ut olei pinguior natura mucilagine radice temperetur, ano infundendum esse proponit. Vesicam quoque calidam ex oleo semiplenam, item mediocrem vaporatorem pro mitigando dolore parti morbosæ applicandam jubet. Præterea si hæc nihil perficiant, *folliculo artis æariæ immittendum*, inquit, *ventum per podicem, quo distantia ventris atque intestinorum replicatis folliculis fiat*: & tunc statim adhibendum clysterem probat. Detraçto supra dicto folliculo, podicem cum spongia deobstruendum præcipit. Ceterum hoc affectu laborantem fovendum esse loco mediocriter calido atque ludico, adhibita requie cum silentio, & abstinentia cibi usque ad triduum, potum quoque parcum dandum imperat; cavendumque esset monet, ne externa, & cataplasmata apponantur, quæ gravitate & pondere dolorem inferant. Nos vero curandi hanc veterum methodum non possumus improbare, sed potius laudamus, modo convenienti tempore & ordine suscipiatur. Directa enim quam maxime est ad alvi secessum procurandum & ad strictionem intestini crassi spasticam quæ huic obicem ponit removendam, pariter etiam ad inflammationem in locis superioribus, a qua

summum imminet vitæ periculum, abarcendam. Nos ante omnia ad primam mali causam & originem in curatione adinistranda respiciendum ducimus.

## §. IV.

Igitur, quando causam mali in- *Stean-*  
carcerata hernia præbet, quot ut *ta ille*  
plurimum fit, prima, & præcipua *hernia*  
cura esse debet, ut prius emollita in- *ea reperi-*  
testini prolapsi portio, si non sponte *enda*  
retrocefferit, in suum locum reponatur. Quod ut facilius ac promptius contingat, primo clysteres applicentur singulis bihoriis, ut flatibus abdomen depleatur: dein pinguibus, & oleosis pars affecta erit emollienda; quo fine vesicæ suilla axungia humana vel canina semiplena, parti affectæ applicari, & totum quoque abdomen ex animante ut vitulo desumpto, vel si non fuerit ad manus, lintheo mundo oleo raparum vel lini calido immerso tegi potest. Postea supinus æger locari debet, ventre & abdomine paulo eminentiori, capite vero decliviori: & sic cruribus ductis, chirurgus manu oleo amygdalarum inuncta, intestinum scroto prolapsum, molli contactu, & intropulsione sensim digitorum adniculo facta, in abdomen reponere tentet, ita tamen ne intestinum complicetur, vel ullo modo lædatur: nisi enim tempestive repositio herniæ fiat, siue sit in inguine, siue in scroto, siue cruralis hernia fuerit, quam facile inflammatio in sphacelum desinens supervenire potest; quando videlicet sanguis, ob coarctati, & occlusi ac quasi a tendinibus abdomini strangulati ilei portionem, per vasa sanguinea compressa regredi nequit, is restagnat atque in sphacelosam putredinem abit.

## §. V.

Præcedenti non posterior in hoc *Dolore*  
affectu esse debet indicatio, ut atro- *scilicet*  
ces, & intolerabiles dolores convenienti medicina sopiti conquiescant.

Nam



Nam ea est doloris vehementissimi vis ac potentia, ut lege confortii quod partes nervosæ inter se habent, gravia illa symptomata, vomitus, singultus, anxietates, assidua vigilia, febris, delirium, virium exolutio, inquietudines neque minus strictura totius canalis intestinalis usque ad inferiora ipsamque anum, tremor quoque extremarum partium atq; urinæ difficultas inde pendeant: quæ cuncta sedato dolore mitescere & placari solent. Ego itaque in ejusmodi præcipiti casu cum singulari fructu, & non sine summo levamine nullo non tempore aquam menthæ leniter spirituosam, quæ etiam seleni vi anodyna gaudet, cochleatim singulis horis cum 10. vel 15. liquoris anodynæ mineralis, duobus vel tribus laudani opiatum juxta Helmontii methodum parati liquidi, guttulis remixti porrigere soleo. Exterius quoque ad singultum, & vomitum compescendum epigastricæ regioni emplastrum ex theriacæ veteris, & olei nucis moschati expressi æquali portione, additis oleo menthæ, & camphora concinnatum, suavi imponendum. Sedato vomitu vel etiam singultu, feliciori cum fructu, & successu clementer laxantia, ex manna, cremore tartari, amygdalarum dulcium oleo retineri, & operationem suam exserere possunt; videlicet quando ex diutius retentis excrementis in intestinorum flexuris, malum oritur.

§. VI.

Inflam-  
matio  
avertenda  
virescit.

Neque inter medendi indicationes neglectui haberi debet, quod inflammatio omnibus modis sit avertenda quia hæc tandem in sphacelum abit & mortem infert: liquide testantibus id passim observationibus, nullus facile absque sphacelatione intestinorum perit, sive illa fuerit ex hernia, sive convoluzione, & mutuo intestinorum ingressu subnata. Ad hanc vero declinandam, præter clysteres & externa momenta, interneque data anodyna, quæ dolores, spasmorum

Hoffm Syst. T. IV. P. II.

non modo, sed & insequentis inflammationis febres egregie sedant & demulcent, venæsectio magnam vim habet; quam ipse etiam HIPPOCRATES ad febrem sedandam, & impediendam loco cit. commendat. Et CÆLIUS AURELIAN. quoq; loco cit. phlebotomiam ad dolorem levandum magni facit. Uterque Auctor in cubitu eam instituendam esse monet. Nos in pede, in sexu præsertim sequiori, etiam utiliter celebravimus. Est vero sanguinis missio eo magis utilis ac necessaria, imo reiteranda, quo major sanguinis abundantia in vasisprehenditur.

§. VII.

Deinceps ad æstum febrilem, & inflammationem reprimendam, sicut nunquam non nitrum depuratum omnia remedium genera exsuperat, ita etiam in hoc morbo locum invenit commodissimum, si pro dosi 6. vel 8. grana cum pulvere Marchionis permixta, addita interdum quarta, pro dosi, camphoræ grani parte, in decenti vehiculo per intervalla porrigantur. Tum quoque quam utiliter pulvis nitrosus antispasmodicus in emulsione ex amygdalis dulcibus & amaris, semineque papaveris albi, & aquis pægoricis composita, potest exhiberi. Exteris ad arcendam inflammationem partes dolentes, linimento, quod ex uncia axungię humanæ, & camphoræ drachma constat, debent inungi.

Si jam  
adfue-  
rit di-  
scutien-  
da.

§. VIII.

Postremo, si malum omnibus jam laudatis, & expertæ virtutis remediis resistat, nec ullo cedere modo velit, ultimum neque contemnendum auxilium in usu argenti vivi repositum est; quo etiam ipse ego, ut in sequentibus docebit observatio, bis feliciter usus sum. Neque etiam ullum facile reperiri hoc ipso præsentius & efficacius, quando mutus intestini ilei ingressus adfuerit, licebit remedium. Plures quidem novi qui in exhibendo hoc re-

Ultimæ  
auxiliū  
in mcr.  
curio  
vivo



medio valde sunt timidi, sed citra metus rationem: modo opportuno, & convenienti tempore id fiat. Sic enim RHODIUS *Observat. Med. cent. 2. observ. 80.* testatur hydragryri uncias 5. cum melle rosaceo solutivo haustas deploratum iliacum sanasse. Libram dimidiam mercurii vivi impune sumtam, iliaco alvum exonerante memorat HENRICUS ab HEER *in Observat. Medicinal. p. 56.* qui plures morti vicinos hujus praesidio restituit. Quid? quod integram ejus libram ZACUT. LUSITANUS *Pr. adm. lib. 2. observ. 35.* cuidam Duci strenuissimo optimo cum eventu praescripserit. Ut taceam ejusdem libras aliquot in aqua sumtas, pluribus iliaca passione periclitantibus, annotante PARÆO *Oper. Chirurg. lib. 20. cap. 38.* vitam servasse.

### Cautela.

#### §. I.

Neque  
purgā-  
tia neq;  
clysteres  
validi  
admit-  
tendi

**M**Emori sane, circa hunc affectum, mente tenendum existimo, quod purgantia validiora alvum ducendi causa exhibere maximo-pere sit insegurum; dolorum enim pariter ac spasmodorum augmentum, nec non symptomatum omnium exacerbationem nunquam non inferunt. Neque clysteres etiam ex valde calidis & carminativis concinnatos in usum trahere conducibile est; multo minus interne essentiae carminativæ, stomachales vel vina medicata, porrigenda: quippe hæc omnia ejus sunt naturæ, ut in colica quidem flatulenta, & quæ a causa frigida, ut cum veteribus loquitur, oritur, levamen afferre possint; minime autem ubi morbus est acutus, & omnia in vehementi motu ac impetu constituta sunt.

#### §. II.

An defi-  
ciant vi-  
rili an-  
replep.

Ubi vero vires deficere incipiunt, & animi deliquia imminet, temperata analeptica omnino possunt usui, &

praesidio esse, quæ videlicet ex aqua ceraforum nigrorum, melissæ Turcicæ, liliorum convallium, menthæ, cinnamomi sine vino paratæ sunt; vel ipsum vinum generosum cochleatim porrigi debet.

#### §. III.

Ubi ple-  
thoræ  
ventis.

Si status plethoricus adest, venæsectio statim instituenda, imo si opus est, reiteranda. Et plurimum quoque attendenda erit docta, & circumspccta observatio Clar. PASCOLII qui *Tom. 2. Oper. pag. 199.* ita eleganter, & prudenter scribit: *Si adsit febris, si viscerum inflammationis indicia tametsi imminetis, vena statim solvenda, in partibus potius infernis quam superis. Hic hirudines intestino præcipue recto admotas, mirum in modum profuisse ad ileum sedandum hætenus pene semper observavimus; quum sanguis qui ex vasis hæmorrhoidalibus profluit, partem affectam proxime oneret.*

#### §. IV.

Quando usus argenti vivi internus utilis ac necessarius judicatur, ipse prius probe depurandus, lavandus, & per corium trajiciendus est; dein non facile ultra libram vel dimidiam offerri decet, quod optime fit cum jusculo pingui; tum, post ejus potum in latus dextrum aliquandiu æger decumbere, ut eo citius ventriculi orificio dextro egrediatur, & insuper, si vires id permittant, corpus ambulatione vel unctione movere debet, ut eo melius ad inferiora descendere possit. Cavendum vero, ne inflammatione lamiam præsentem, & viribus dejectis, hoc medicamento quis utatur, ne vulgus & adstantes, si pereat æger, ab hoc remedio quod ab omnibus fere suspectum habetur periisse sibi vane persuadeant.

#### §. V.

Magna vero salutis, & reconva-  
lescentiæ in miserando hoc malo spes in clysteribus est posita, modo illi convenienti tempore, & quantitate applicentur. Hi enim si vehementi spasmo

Mercurius vi-  
nus rice  
depu-  
ratus

Clyste-  
res pro-  
funt



mo constricta sunt intestina crassa, fibras eorum crebriori injectione relaxatas, & flaccidas reddendo, inversionem peristaltici motus inhihent. Et præstat tantummodo aquam calidam cum syrupo dialtheæ *Fernelii* permixtam non semel sed aliquoties, & si vires patiuntur, una die singulis bihoris, & quidem primo statim die, ano infundere, ut stercora etiam liquidiora fiant.

§. VI.

*Cal. An. rel. circa Topica monitum.* Quoad prudentem topicorum usum, perplacet mihi CÆLII AURELIANI supra jamjam citatum a nobis monitum; qui a gravibus caplasmatibus abstinendum esse docet, ne pondere, & asperitate passio, & dolores incrementum. Sæpe enim tanta est ventris inflatio, & distensio ut nec tantum cum manu paulo validiorem ferre æger possit.

§. VII.

*Alvo si mitter clausa, fetus confert.* Quandoque alvus ob spasticas stricturas ita clausa est, ut nec siphonem, multo minus follem admittere aut recipere possit, tunc præstat fotum temperate tamen calidum applicare & blandam ac successivam puri olei tepèfacti injectionem, subtili syphone tentare, quo tunicæ intestini recti valde coarctati & spasmo constricti hac ratione emollitæ, eo facilius postea, majori quantitate humorum per clystma in se recipere queant.

§. VII.

*In declinatione morbi balnea.* Declinante & remittente morbo; lavacra, quæ etiam si vires ferunt pro circumstantiarum ratione primis morbi diebus adhiberi possunt, convenientissima sunt. Faciant ad passionis solutionem, & ad morbosas reliquias fibris relaxatis facilius expellendas; siquidem iis frequenter admodum & optimo consilio *Methodici* in morborum declinatione utebantur, quemadmodum ex CÆLIO AURELIANO videri licet.

§. IX.

*In dolore cum sævitia, opiata.* Ad mitigandam dolorum sævitiam, quæ fere præcipuum tot gravium sym-

ptomatum & motus inversi peristaltici causam præbet; minime est metendus opiatorum usus, modo fiat statim in principio si vires adhuc integræ, si plethora præsens soluta, & nullam sphacelationis sub fuerit indicium. De quorum insigni usu egregia B. VVEDELLII observatio, quam in M. N. C. Dec. 1. an. 2. observat. 238. communicat, legi meremur.

§. X.

Si causa iliaci mali est hernia cruralis, atque ob non sperandam intestini repositionem sphaceli & mortis periculum imminet, ultimum auxilium, & spes salutis in incisione est, quæ si dextre a perito chirurgo assistente docto Medico administratur, sine omni metu est & ex orci faucibus ægrotantem eripere potest. Talem sectionem non ita pridem in urbe celebri, in illustri femina ex iliaco affectu in summo vitæ periculo versante, felicissime & salutare summa chirurgi dexteritate celebratam esse intelleximus. Sed in ejusmodi casibus, ut operatio mature, & in tempore suscipiatur, ac antequam indicia præsentem sphacelum denuncient, valde necessarium est.

§. XI.

Plurimum etiam scire refert, malum iliacum ex eorum esse numero, quæ facile recidivant. Novi aliquot, qui secunda, & tertia vice recurrente affectu demum extincti fuere, sed hi quod bene notandum hernia laborarunt. Ut itaque corpus a periculi plenissima recidiva vindicetur; opus est, ut sollicita nunquam non hernie habeatur ratio: quæ hæc est, ut beneficio subligaculi intus retineatur vel si id fieri non expedit, omni modo & cura a frigore defendatur, & inter cibos qui inflant, ut sunt fructus horei, pisa, olerum ceparumque species, rapæ, maxime omnium vero quæ adstringendi & siccandi facultate præditæ sunt, evitentur, quo alvus libera & molis servetur. Cumque ex multiplici observatione mihi comper-

Si her-  
nia re-  
poni  
nequit  
incisio.

Recidiva præ-  
va præ-  
scindenda.



tum sit, nihil præter iram, & purgantia acriora herniosasin iliacam passionem vel ejus recidivam præcipitare posse, sedula utique opera danda est, ut hæc ceu valde pernitiola declinentur.

## ENARRATIONES MORBORUM.

### OBSERVATIO I.

*Dolor & spasmi in hernioso sepe recurrentes*  
Ante 30. annos, Vir spectatæ in hac urbe auctoritatis, cognatione mihi conjunctus, sexagesimum jam annum supergressus, a 20. jam annis hernia laborabat scrotali, quæ temporis progressu ita increvit, ut tertia minimum intestinorum pars, extra abdomen in scroto detineretur: si erectus staret, insignis capitis magnitudinem præ se ferebat tumor, qui tamen in supino situ, relabentibus intro intestinis, minuebatur. Periculi quidem honoratissimus vir ab enormi hoc malo nihil passus est, præterquam, quod quinque vel sex ante obitum annos, tarde & parum cum succederet alvus, valde copiosos, & molestos vomitus, aliquot horas perseverantes sustinere debuerit: quibus ingens copia humorum vitiosorum in intestinis collecta dejiciebatur, qui vomitus singulis fere novem vel decem diebus recurrebant, quos futuros tumor grandior, & dolor pressorius in scroto. Excretionem hac exantillata salvus & vegetus perstitit, appetitu bono gaudens.

#### Epicrisis.

De hac affectus historia, hoc nostrum esto judicium, quod tantæ molis tumor intestinalis in scroto, extra periculum mali iliaci sit, quia fæces non possunt ita intercipi, ac id in hernia inguinali, crurali, vel scrotali ubi exigua tantum intestini portio prolapsa, incarcerata & quasi strangulata a tendinibus abdominis hæret, acutissimis doloribus comitantibus, contingit. Dein nihil dubii est, quin in tam enormi intestinorum prolapsu,

non relaxatio tendinum, & annulorum, sed potius disruptio locum habeat: alias enim tam subito in situ supino, tota intestinorum moles intra abdomen recedere non potuisset. Tum in præfata observatione, hoc insignis momenti phenomenon non erit prætereundum, quod videlicet præcedente dolore tensivo in scroto, omnia propemodum quæ ante tres vel quatuor dies assumpta erant, quod ex colore, odore, & consistentia liquefiebat, æger evomuerit, intus remanentibus quæ in prandio tres vel quatuor ante insultum horas comederat. Id nostra quidem sententia ita factum esse judicamus, inversio videlicet motus peristaltici in intestino ileo, in scroto quod detinebatur, incipit, sed non per totum ventriculum penetravit, fundo ejus tantummodo affecto, minime autem arcu majori sive sacco, qui in latere sinistro est locatus.

### OBSERVATIO II.

Honestus hujus urbis civis, satis *Spasmi ilei ex m- A re- pletio- ne in her- nioso* getæ & robuste constitutionis, annorum 30. & aliquot ex hernia per multos jam annos sine offensa vel molestia laboravit: neque sub ligaculo intus eam detinuit. Autumno ingentem quantitatem musti bibit, atque nocte, in somno frigefacto abdomine, dum evigilavit, tumorem valde auctum, & dolorificum per sentit, qui nolebat, ut antea, intra abdomen subire. Dolores succedebant acerbissimi per integrum diem durantes; qui non in scroto tantum partem affectam, sed abdomen, & totum corpus occupabant, cum insigni anxietate, & conatu ad vomitum juncti. Anxie a me petiit auxilium, nisi peritum chirurgum, ut patientem inviseret, & relationem mihi faceret. Ego itaque suasi, ut tumorem inungeret axungia omenti vitulini recenti, & desuper fomentum calidum continuo applica-



caret, quod ex lacte cocto cum floribus malvæ, verbasci, chamomillæ, croco, semine anethi & cymini constabat, & blande ac modeste repositionem manutentaret. Interne per intervalla sola aquam menthæ cum aliquot granis extracti croci & julepo rosarum propinavi. Peracta repositione simul & semel, & omnes dolores & cuncta permolesta symptomata cessarunt & conquieverunt.

*Epicrisis.*

Ex hoc jam clarissime apparet quam caute & provide se herniosi circa dextrum rerum non naturalium usum gerere & custodire debeant; cum levis etiam error funesti affectus causam & originem subministrare possit. Deinceps & hoc notari licet, quod solus acerbus dolor, qui partim nimia ilei intra scrotum detenti distensione, partim etiam ejus intra annulos tendinum strictura & arctatione fit, tam gravium symptomatum quæ iliacum malum formant & quæ sæpenumero lethalia evadunt, vera & genuina causa censenda sit.

OBSERVATIO III.

*Dolor*

*& Spas-  
mus ili-  
ci ex uvis  
comestis  
in her-  
niosis,  
mercu-  
rio vi-  
vo cu-  
ratus.*

Honestæ femina, uxor gravissimi in urbe consulis, cognatione mihi propinqua, annorum 40. in sterili vivens conjugio, utpote cui nunquam fluxere menses, tumore circa femoris curvaturam, in regione inguinali longo abhinc tempore correpta; in vinea ex uvis nimium comestis, & sub cælo frigido ac humido refrigerata, persentit mox tumorem duriores, gravesque & acutos in eo dolores, qui noctu ingravescebant. In consilium accersitus cum jam per biduum nihil per alvum se dejecisse affirmaret; prima statim cura fuit, ut alvus per clysteres iterata vice infusus aperiretur, & tam per externa atque interna remedia dolorum levamen afferretur. Seceserunt quidem excrementa sed non

adeo sufficienti copia: perseverarunt tamen dolores qui abdomen occupabant & somnum pariter ac appetitum tollebant: nec quicquam fomentis cataplasmatibus balneisque proficientibus tumore duro & dolorifico permanente. Nil igitur aliud agendum duxi, quam ut inflammationi verendæ perquam exitiosæ occurrerem: quapropter venam in pede secandam curavi. Interne vero pulverem Marchionis leniter nitrosi ex aqua appropriata menthæ videlicet & cerasorum nigrorum parva & reiterata dosi obtuli. Æstus quidem non adeo intensus erat, ructationes tamen singultuosæ & ad vomendum conamina permanserunt. Tertio ab invasionis die copiosæ infestabant, præcedente anxietate, vomitiones & quidem materiæ, tam subrufo colore quam spumescencia, liquidas quæ alvo deijciuntur feces referentis, conquerente etiam femina de malo odore. Ejusmodi vomitus per tres fere continuabant dies; quibus ingens corruptorum humorum illuvies fuit protrusa. Ego re paulo curatius pensitata, materiam stercoream non habendam esse, ut adstantes volebant, judicavi, ob nimiam ejectorum quantitatem, quæ in intestinis crassioribus non poterat colligi, cum liquidorum descensus, ob incarcerationam ilei portionem prorsus esset interceptus. Cum vero & alvi constipatio, & ventris tormina & vomitiones & vigiliæ assiduæ, vires in dies magis dejicerent, & præsentaneum levamen usque eo usurpata remedia non adferrent, veni in hanc cogitationem, anne argentum vivum intro haustum possit in hoc casu opportunum habere locum? Ego, cum medendi hæc ratio plane extraordinaria & plurimis suspecta sit, nolui solus hoc experimentum facere: ideoque petii ut Medicus, quem ob candorem semper æstimavi, advocaretur. Ille cum meas perciperet rationes, idem sentit, asserens, quod sine omni



omni periculo id fieri & forsan desideratissimo cum successu possit. Mane itaque, dato prius pingui juscule libram dimidiam rite depurgati argenti vivi uno haustu sumendam porreximus, desuper bibendum brodium carnis cum aliquot uncis olei amygdalarum dulcium. Promte ægra assumsit. Post horam, leniorem per conclave deambulationem suasimus. A medicamento sumto omnis prorsus desistebat vomendi conatus, & horas quinque post, in lecto, præter opinionem, alvus solvebatur. Linteis inspectis apparebat mucida grysei coloris materia multis argenti vivi globulis intermixtis, qui diligenter collecti unciam præter propter æquabant. Ex quo factum est, ut afflictionum omnium fere quibus anteangebantur facta fuerit remissio. Alvum semel sponte dejectam postea clysteribus demulcentibus & emollientibus, pauculo stimulo salino addito, eluere & crassa intestina purgare constituimus: interne quoque laxans rhabarbarinum & mannatum cum cremore tartari ex vino dedimus. Ita insignis copia progressu temporis materia excrementitiæ, permixta, nunquam non portione argenti vivi, secessit, idque ultra duas fere hebdomades. Ex quo per DEI gratiam evenit, ut periculose ægrotrans femina meliuscule semper habens ex orci quasi faucibus hoc remedio erepta fuerit. Ultimo vero loco id non prætereundum esse censeo, quod collectis licet viribus somnoque ac appetitu redeunte, tremorem in artubus, atque vacillationem & impotentiam in pedibus ultra mensis adhuc spatium perceperit: quæ permolestæ affectiones, dextro nihilominus balneorum usu prorsus demum sublata & discussæ fuerunt.

*Epicrisis.*

Ex hujus morbi & curationis progressu, id demum in usum practicum depromere licet, quod passio iliaca acuti alias periculi atque exi-

tii, opportune datis medicamentis quæ inflammationem arcent & dolores mitigant, in affectum quasi chronicum minoris periculi possit converti. Deinceps non contemnendum in hoc atroci malo, sed potius incomparabilem usum & efficaciam argenti vivi esse, ex hac curatione intelligi & disci potest, licet modus operandi non adeo explicatu facilis sit. Ego tamen ita rem concipio, argentum vivum intro haustum, dum fundum ventriculi petit, pondere suo resistit ejus subversioni, sive inversæ ejus motioni peristalticæ, ut potius meo quidem judicio, eam ad inferiora, facta in contrarium compressione, rursus dirigat atque convertat: & hinc etiam ratio reddi poterit, quare globuli plumbei paulo majoris molis intus deglutiti, ad curandum hunc difficillimum affectum commendentur; de cujus remedii salutari usu quamvis multa mihi relata fuerint, nunquam tamen me experimentum fecisse ingenue fateor. Tandem hoc addendum esse existimavi, quod dejectiones illæ spumascentes liquidæ & biliosæ, quarum materia partim per assumpta, partim per continuum humoris biliosi & lymphatici per glandulas intestina secreti affluxum, in ileo, progressu temporis colligitur, non modo a vulgo, sed etiam a Medicis pro veris stercoreibus habeatur; licet in totum negare nolim, per vehementiorem intestini coli spasmus quippiam ex eo putridi liquaminis ad tenuia conscendere & ibi contenta inquinare possit.

OBSERVATIO IV.

Infans puer, unius anni, lac adhuc ex mammis sugens, ex terrore nutriticis, continuo ejulatu ac clamore noctem insomnem degebat, absque dubio ventris torminibus, quæ parca alvus & viridescens atque coagulata feces denunciabant per duos dies

*Passio iliaca in infante ex terrore nutriticis & dato anno fulmine.*



dies & noctes immo ultra excruciatas. Medicus ordinarius, cum ex clysterum applicatione & usu pulveris laxantis nullum conspiceret levamen, duo auri fulminantis grana cum pulvere absorbente permixta præbere decrevit. Inde vero nihil secutum levaminis, ut potius sub majori alvi clausura, vomitus & quidem viridescentes insecuti fuerint; quibus demum convulsiones epilepticæ jungebantur. Concessa a parentibus, ad petiitum meum, abdominis apertione, cui etiam Medicus ordinarius interfuit, offendimus in medio ileo mutuum ad articulum digiti, intestini ingressum. Supra quem tenuia intestina ileon, jejunum, imo ventriculus, in quo subviridescens putridus humor inventus, flatibus valde erant turgida.

*Epicrisis.*

Graves & ut plurimum funestæ, quæ per animi affectus inque primis terrorem, a nutricibus in infantibus derivantur, sunt afflictiores. Horum enim ea est indoles, ut pernicialem vim maxime in intestina tanquam partes valde nervosas exerant, quarum tonum & motum penitus subvertendo & pene infringendo, ventris tormina, alvi constipationem, convulsiones & epilepsiam quam facile accersunt. Quibus infantum morbis ordinario fere dejectiones virides conjunguntur, non aliam ob rationem quam quod retenta excrementa acidam corrosivam ob moram induant naturam, ut bilis permixta inde viridem colorem, non secus ac fieri solet, quando spiritus nitricum bile miscetur, contrahant. Uti vero aurum fulminans vel mercurialis prosapiæ medicamentum, ab admixtis salibus valde corrodentem & virulentam indolem acquirit, ita summopere cavendum est, ne infantibus tenerioribus, præsertim si acrium humorum copia obfessa sunt intestina, ejusmodi medicamenta porrigamus.

Illa involutio quæ in conspectum venit ilei intestini, ab atrocibus torminibus & spasticis intestinorum contorsionibus absque omni fuit dubio oborta.

OBSERVATIO V.

Honoratior femina, quadraginta & aliquot annorum, animi in affectus valde proni, corporis gracilioris, vitam sine motu amans quietam, venæsectionem ab aliquot annis, circa tempora æquinoctialia consuetam, vere præteriti anni intermisit, purgans vero infusum, quo post sanguinis missionem circa hæc etiam tempora subinde fuerat usa, per tres dies usurpavit. Interea vehementiori commovetur iræ affectu, quam inappetentia, virium languor ac artuum tremor sequebantur: alvus quamvis esset obstructa, nihilominus ad eam exonerandam ægra sæpius sollicitabatur. Mox acerbis in regione hypogastrica dolores & tormina, cum præcordiorum angustia & crebra flatuum per os eructatione, persentiebat. Ego accersitus, ad alvum referendam, clysterem ordinavi emollientem, cujus tantum levis portio fuit admissa. Interne ad flatum discutiendos, liquorem meum mineralem anodynum cum essentia corticum aurantiorum bene præparata æquali miscui pondere & per intervalla præbui. Externe linteam aqua Reginae Hungariæ & balsamo nostro vitæ ebrium abdomini applicari jubebam. Sedatis doloribus ægra quievit & cenavit; clausa vero permansit alvus. Sequenti ego die rursus vocatus sum, & tum dolores patiebatur prioribus longe acutiores & sæviora tormina, cum ingenti abdominis inflatione, umbilici retractione, extremorum frigore & continuo ad vomendum conatu. Tum mihi aperiebat, quod ex laborioso partu, ante multos jam annos, in inguine sinistro contraxerit tumo-

*Dolore  
& spasma  
mus ilei  
in femina  
pluribus  
rica &  
bernio-  
sa, ex  
tra ve-  
hementi*



tumorem, qui sine singulari sanitatis incommodo modo prodiret modo regrediretur; nunc vero longe major & valde durus sine regressu persisteret. Et quoniam nobilissima patiens omnia quæ ore assumerat, vomitu reddebat, iliacum malum imminere non sine ratione judicavi. Prima itaque & princeps, cum statum animadverterem plethoricum, fuit intentio, inflammationem, qua nihil sane in hoc affectu est perniciosius, avertere. Ad aliquot igitur uncias sanguinem e vena pedis detrahi jussi. Dein ad alvum ante omnia referendam medendi consilium direxi: sed quoniam ob firmam clausuram, clysterem non admitteret, decrevi ut successive leni syphunculo aliquot unciaæ olei raparum & chamomillæ cocti immitterentur, quo postea intestino recto relaxato, eo facilius clysteres infundi possint; quod etiam consecuti sumus, & duo applicati fuerunt, sed nihil educebant. Igitur quum præfatæ afflictiones, vomitus, singultus, inquietudo, vigilia, anxietas cum extremorum frigore persisterent, visum mihi fuit, singulis bihoriis, clysterem ex sola ptisana, oleo olivarum & syrupo dialthea FERNELII infundere & ad potum aquam fontanani puram frigidam, aqua menthæ correctam, cujus libræ salis absynthii drachmam unam & succi citri unciam semis adjeci, commendare: abdomine cum linimento ex axungia humana, camphora, spermate ceti, & oleo hyoscyami quod constabat, calide inuncto. Post sex clysteres injectos, flatus secesserunt copiosi: quibus continuatis, in balneum aquæ dulcis ægram dimitti jubebam. Paulo post egressa, alvum intra horam ter deponebat. Continuatum fuit balneum, & interne infusum mannatum cum aqua foeniculi, addito cremore tartari & nitro antimoniato propinatum: ita ingens mucidæ, crassæ & liquidæ biliosæ materiæ copia alvo fuit edu-

cta. Sequebatur hinc statim singulorum pathematum remissio, largusque sudor cum virium & pulsus augmento, quem promovere, exhibita mixtura sudorifera, ex tinctura antimonii, liquore anodyno minerali & spiritu tartari composita studui. Sic permolesta hæc affectio Divinæ benignitatis adjutorio feliciter fuit depulsa.

#### *Epicrisis.*

Ex præfata historia id animadvertere licet, herniam, quanquam per longum tempus sine valetudinis incommodo geri possit, nunquam tamen tutam sed formidandam esse. Hoc in casu ad iliaci morbi genesin, plethoricus status, assumtus purgans & demum superveniens gravis iræ affectus symbolum suum contulerunt, utpote quæ omnia nervæ intestinorum substantiæ sunt infensissima, naturalem & placidum fibrarum intestinalium, versus inferiora tendentem motum pervertendo & invertendo: quod ex flatuum & excrementorum pertinaci intra intestinalia retentione & inde pullulantibus ceteris symptomatibus judicandum est. Sanguinis missio, quam tanto-pere ceu summum hujus affectus remedium veteres ut HIPPOCRATES, CORNELIUS CELSUS & CÆLIUS AURELIANUS, laudaverunt, in hoc casu summe proficua ac necessaria fuit. Quoniam vero ob spasmus vehementem, intra intestinalia crassa consistentem, superiora summo cum dolore inflantur, ratione utique consentaneum est, hanc stricturam tollere, quod omnium optime fieri potest, per oleosa humida in magna copia injecta, ut strictæ inde fibræ flaccidæ & relaxatæ evadant, placuit mihi præ ceteris cura, quam CELSUS *Lib. 4. cap. 13.* his verbis proponit. *Si dolor non quiescit, etiam in alvum, ex parte inferiores, tres aut quatuor cyathos calidi olei dare convenit.* Et balnei usum HIPPOCRATES ad felicem



cem curam mirifice commendat. Cura absoluta primum quod huic feminae consilium dedi, fuit, ut exquisitam semper habeat vitæ & victus rationem, atque ab omni animi affectu se temperet: multiplici enim experientia edoctus sum, his neglectis, malum quam promte recidivare; id quod præter HIPPOCRATEM ipse CELSUS loco citato notavit: *facile, inquit, id malum redire consuevit, & cum frigus subit, sive aliqua jactatio, nisi bene jam confirmatis intestinis, revertitur.*

## OBSERVATIO VI.

*Iliaca passio ex ingluvie & sumto valido purgante.* Berolini cum olim agerem, vir in Regiis servitiis constitutus, quadraginta & ultra annorum, gracilioris corporis habitus & naturæ cholericæ, ingenti semper gaudebat appetitu & varii generis eduliis ventrem quotidie infarciebat, nec jejunii patiens, vinum liberalius quoque hauriebat; alvus ordinario pigra erat & obstructa; vomitus subinde pituitosi liquaminis matutino præsertim tempore experiebatur. Posteaquam in solennitate quadam, supra modum, placentas, carnes assatas, acetaria, condita mala cydonia devorasset, & alvus per aliquot dies clausa nihil egeffisset, male habuit. Venter enim durus, renitens, rugitibus & borborygmis hinc inde discurrentibus turgidus erat, atque continua ad vomendum aderat proclivitas. Opera Medicastrî usus, pilulas ad alvum aperiendam sumsit purgantes; sed sine successu. Augebantur potius anxietates circa præcordia cum continua nausea. Rursus ab eodem sumsit pulverem purgantem, qui tamen nullam movebat sedem, sed decumbens omnia quæ assumserat ore rejiciebat. Suppositoria & clysteres omni effectû carebant. Uxor vehementer & anxie a me petiit consilium. Ego accedens ægrum per decem dies nihil per alvum emisisse deprehendi. Venter contactu erat durus,

inflatus, & magna inquietudo atque anxietas, vigilia quoque affligebant. Bono vero cum DEO hac methodo miser patiens est sanatus. Primum ad vomitionem componendam præscripsi mixturam Riverianam, quæ componitur ex aquæ communis libra, succi citri uncia & salis absinthii drachma, quam per vices assumsit. Dein ægrum chirurgo commisi, cui injunxi, ut clysteres ex decocto emolliente, in quo sufficiens saponis Veneti quantitas soluta, singulis horis ano infunderet, & postea in balneum ex herbis emollientibus & semine lini paratum dimitteret. Ventri quoque applicare linimentum ex oleis expressis, atque interne, cum juscûlo, oleum amygdalarum dulcium, addito pauxillo vini, præbere jussi: quæ cura alternis vicibus aliquoties fuit repetita, adeo felici cum successu, ut brevi temporis progressu ingens copia fecum conglobatarum durissimarum & pituitæ glutinosæ, quibus postea successerunt liquidiores, multis sedibus intra duos dies fuerit edueta; quam excretionem, semel aperta alvo, feri lactis potu per vices sumto, in cuius mensura cremoris tartari uncia dimidia & mannæ electæ uncia tres solutæ erant, promovendam decrevi: & ita per DEI gratiam a gravi malo æger fuit liberatus.

### *Epicrisis.*

A sola diutina fecum alvinarum retentione, iliacum morbum subnasci posse, præsentî edocemur historia; ex qua animadvertere etiam licet, tali in casu purgantibus præsertim validioribus intro sumtis nihil esse perniciosius, utpote quæ frustra plane dantur, cum summo potius detrimento; nam dum fortiter stimulando intestina, materiam immobilem & feces aridas per inferiora movere & deturpare nequeunt, invertendo potius peristalticum intestinale motum, malum reddunt deterius, atq; anxietates & vomitus augent. Balnea vero temperata, dum externe, & clysteres interne,



ne, fibras tenfas emolliunt, feces dissolvunt & colliquant, non omiffis internis congruis laxantibus, convenientiffimum præbent auxilium, qui ipsam causam & originem mali expugnandi efficaciam fatis præstabilem possident.

## OBSERVATIO VII.

Puer septem annorum spongiosioris habitus & coloris albidioris, dulcibus & fructibus horeis nimium usus, carnes ac panem supra modum appetens, qui aliquot ante menses unum vel alterum alvo dimiserat lumbricum, intormina ventris, alvi obstructionem & inquietudinem incidebat. Frustra applicati clysteres, & data fuerunt carminativa atque laxantia; augebantur potius cruciatus, assidui accedebant vomitus, & interdum per horam semimortuus in syncope miser infans jacebat. Fædos ex ore halitus & feces reddidit: subsequiebantur singultus & epilepsia, tandem mors.

*Epicrisis.*

Minime dubitandum est, affectum hunc fuisse iliacum, a lumbricis vel in intestino vel ventriculo residenti- bus subortum. Ubi vero hi arro- dendo & lancinando tunicas tenerio- rum intestinorum nerveas, graves in universo nervorum systemate con- citant passionem: ita etiam motum intestinorum peristalticum penitus subvertendi utique sufficienti vi ac facultate pollent. Verique omnino simillimum est, lumbricos in ven- triculo existentes hujus mali exitialis causam fuisse. Incidit mihi in con- firmationem hujus rei historia, quam ex relatione BEATI MEIBOMII habeo: Helmadii Studiosus, ante aliquot annos, supra umbilicum ferro vulneratus, continuo vomere cœ- pit primum cibos, dein materiam hæcoris instar; sub finem secundi diei mortuus est. Vulnerata quidem intestina arbitrabatur Medicus, sed

sectio facta plane ostendebat, ven- triculum antrorsum & retrorsum esse læsum, tam late penetrante vulnere. Ex quo discimus, læso tantum ven- triculo, salvis intestinis, totum pos- se intestinorum canalem inverti; nihil juvantibus suppositoriis & cly- steribus. Alias in tali affectu, aqua cum mercurio vivo puro decocta, addita vini quarta parte, remedium nescio præstantius: hac enim & ne- cantur vermes & alvus solvitur: sed tempestive, antequam ventriculi & intestinorum tunicæ sint laceratæ, debet exhiberi.

## CAPUT V.

*De intestinorum doloribus, atque in specie.*

*De colica flatulenta & spasmodica.*

*Theses Pathologicae.*

## §. I.

**I**Nter graves generis nervosi affli- *In dor-  
lore in-  
testino-  
rum  
nervo-  
se par-  
tes pa-  
tiuntur* ctiones, non immerito referri debent vehementes dolores; qui in- testina, ceu partes valde nervosas & sensiles motuque propulsorio præditas obsident, atque per consensum alias etiam nervosi generis partes, in lo- cis remotioribus consistentes, affi- ciendo, perniciosas subinde afflictio- nes pariunt.

## §. II.

Quemadmodum tenuia & crassa *Ratione  
loci &  
vehe-  
mentia  
differt.* intestina, ratione texturæ, capaci- tatis, functionis & situs differunt: ita etiam dolores, prout in iis sedem suam figunt, ratione vehementiæ, periculi & aliorum accedentium affe- ctuum differunt.

## §. III.

Observamus, longe acerbiores & *In se-  
niori-  
bus ac-  
tiores  
Jun-  
ctæ* acutiores oboriri dolores in tenuiori- bus quam in crassis: id quod luculen- ter validiora purgantia & venena cau- stica



Iticæ indolis testatum faciunt, cum tormina supra & infra umbilicum atque in medio etiam hujus compareant sævissima. Et hanc ob causam ab HIPPOCRATE in genere omnes intestinorum dolores, iliaci denominantur; nulla facta in monumentis suis doloris colici mentione: quum nostro tempore omnes fere qui intestina obsident dolores, colici dicantur atque habeantur.

§. IV.

Quinam  
d. con-  
sur illa  
et.

Rectius itaque iliaci censendi erunt illi, qui medium graviter affligunt ventrem, sive spasmodice illum constringendo, sive vehementer inflando; quum contra colici illi obtineant, qui in hypochondrio dextro & sinistro hærent & pressione ac distensione ingentes creant molestias, HOLLERIUS de morb. intern. cap. 39. ita coli dolorem descripsit: *insistit in certo loco instar infixi pali: subinde tamen vagus ad inguina, sinistrum & utrumque renem, sursum aliquando revolvitur, & locum mutat, ut sunt flexus intestini coli, quod relicto recto in sinistram inguen divertit. Ascendit inde ad sinistram renem ubi angustius est, quæ angustia & simul ibi occurrens flexura, causa est, ut hac in parte dolor sit intensior. Hinc ad splenem laxius intenditur, subitque hepar, atque aliquando in cystide fellis hæret; postremo in dextrum ileon descendit, ubi desinit in oleum.*

§. V.

Totus  
intesti-  
norum  
tractus  
subie-  
ctum  
colicæ  
præbet

Nos omnem intestinorum tractum pro subiecto & sede dolorum agnoscimus, ita tamen, ut una ejus parte graviter affecta, totus nervosus canalus a faucibus ad podicem trahatur in consensum, sive rectius præternaturales motiones immo inversiones & læsiones motus peristaltici, reliquis omnibus communicentur, adeo ut si vehementior causa fuerit, etiam totum universi corporis systema nervosum gravius simul afficiatur.

§. VI.

Affectiones & symptomata acerbiora, quæ intestini jejuni, ilei, coli, vel recti, ut apparet in hæmorrhoidibus cœcis, dolores comitantur vel subsequuntur, a spasmo partium nervosarum quam maxime oriuntur & sunt sequentia; horror, tremor partium externarum, sudor frigidus, virium omnium prostratio, inquietudo, corporis jactatio, summa anxietas & interna angustia, singultus, vomitus, alvus constipata, tenesmus, urinæ suppressio, spasmus vesicæ, febris, pulsus contractus, spirandi difficultas, quandoque delirium & convulsionem epilepticam.

§. VII.

Sicut ratio formalis sive proxima causa omnis doloris est nimis vehemens tunicarum & partium nervosarum distensio distractio atque expansio, vel earundem validior & spastica contractio & coarctatio; ita etiam ab iisdem causis intestinorum proficiscitur dolor. Velenim a flatibus retentis, & occlusis, supra modum certi intestinorum tractus distenduntur & divelluntur, ut quasi continui solutionem moliantur; vel ab humore mordaci caustico intra intestina vel etiam in eorum substantia membranacea contento, spasmodica constrictione crispantur, coarctantur, cum valde molesta & sensibili passione: quæ de causa etiam in scholis Medicis distinctio inter dolorem intestinorum, sive colicam flatulentam & spasmodicam, adhuc viget & locum obtinet.

§. VIII.

In dolore tenuium flatulento, mire abdomen inflatur & turgescit; & tanta sæpius flatuum vis est, ut cutem ita distendat, ut dolor ipso tactu exacerbetur: neque exempla deficiunt, a vehementia flatuum herniam umbilicalem fuisse subortam. Dolores sunt acuti, alvus valde

Diffin.  
Ab eo.  
lieæ  
flatu-  
lento



de constipata, summa angustia, si-  
que simul ventriculus inflatur, re-  
spiratio valde difficilis evadi, &  
eructationes cum levi levamine sub-  
sequuntur; accedunt cardialgicæ  
passiones & inanes vomendi cona-  
tus.

## §. IX.

*a colica  
spasmo-  
dica.* In colica sic dicta spasmodica &  
convulsiva, ventris arctior fit com-  
pressio & umbilici introrsum retra-  
ctio, alvus est constipatissima, ut  
neque flatus transmittat, neque cly-  
sterem facile recipiat. Adest simul  
ingens in lumbis dolor, ipsumque  
peritoneum musculique abdominis  
violenter contrahuntur: extremo-  
rum adest refrigeratio, tremor, hor-  
ror, pulsus durus & contractus, sum-  
ma anxietas & quam facile animi  
deliquium supervenit.

## §. X.

*discrim-  
en in-  
ter fla-  
tulent-  
iam &  
dolorē  
flatu-  
lentum* Nos hoc loco monendum duci-  
mus, insignem esse differentiam in-  
ter flatulentiam intestinorum, &  
dolorem intestinorum flatulentum.  
Nam hic a sola atonia, motu &  
robore intestinorum labefactato, in  
senibus potissimum & qui cibis in-  
flantibus frigidis nimium utuntur,  
item in corporibus a prægresso mor-  
bo labefactatis nascitur. Illa vero  
nunquam sine labe intestinorum est,  
neque tam facile tollitur, & gra-  
viora habet accidentia, cum hic per-  
ructus per flatus & alvi solutionem  
facile terminetur.

## §. XI.

*inter do-  
lorem  
nephri-  
ticum  
& co-  
licum.* Illud quoque monitum non est  
prætereundum, dolorem nephriti-  
cum & qui a calculo renali fit, non  
confundendum esse cum eo cujus  
causa in ipsis intestinis residet: de  
qua confusione jam olim a GALE-  
NO & ejus affectis instituta fuit  
querela. Ut ut vero ratione sympto-  
matum & effectuum multum inter  
se conveniant; in ea tamen est dif-  
ferentia posita, quod dolor, si est  
a calculo, in lumbis fixior, perti-  
naciosior & acutior fit quam in colica

spasmodica; in hac alvus longe con-  
stipatiores & fortius occlusa ac in do-  
lore nephritico: dein quod, alvo  
per enema soluta, remissio doloris  
colici fiat, quod non contingit in  
nephritide calculosa: ad urinam  
quoque emittendam major in cal-  
culo adest stimulus, eaque tenuis,  
in paroxysmo, aquosa & subinde  
arenosa apparet. Et postremo, do-  
lor secundum ureterum tractum suc-  
cessive protenditur: id quod in in-  
testinorum non observatur dolori-  
bus. Longe vero facilius est in iis  
qui semel vel bis dolore ex calculo  
laborarunt, notas ejus characteristi-  
cas discernere.

## §. XII.

In theoria vero dolorum intesti-  
norum id maxime attendendum ve-  
nit, quod horum causa, a quo oriun-  
tur, longe aliam sedem fixam ha-  
beat, quam ubi eorum exacerbatio  
percipitur. Ita nunquam fit inflatio  
intestini, nisi in alia parte vel tra-  
ctu, cujusdam intestini strictura spa-  
stica, angustia vel etiam obstructio  
ab excrementis aut alio humore te-  
naci præcedat vel conjuncta sit: si-  
quidem flatus in intestinorum cana-  
le, propter calorem & humorem  
aqueum semper præsentem, nun-  
quam desunt, sed nullam creant  
molestiam, quia liberum habent spa-  
tium & æqualiter se expandere pos-  
sunt; simul ac vero obice posito,  
non possunt transmitti, & interci-  
piuntur, sed in certo loco coacer-  
vantur, occluduntur & quasi incar-  
cerantur, tunc magna vi expansiva  
agunt in intestinorum tunicas, eas  
supra modum distendendo & distra-  
hendo.

## §. XIII.

Quandocunque in tenuioris inte-  
stini quadam parte, sicut in hernia  
scrotali, vel etiam a vermibus aut  
fecibus induratis avenit, spasmus,  
occlusio vel nimia coarctatio produ-  
citur, vel etiam quando in princi-  
pio coli in dextro latere excremen-  
torum

*Causa  
efficiens  
in alia  
parte  
ac do-  
lente  
hæret.*

*Quid  
fiat, si  
tenuia  
spasmo  
effici-  
antur.*



torum copia stagnat, nec loco movetur, ingens & acerbè dolorifica abdominis inflatio, supra, infra umbilicum & in medio ejus, oritur.

§. XIV.

*si rectum  
aut colon.*

Quod si vero intestinum rectum vel inferior coli tractus vehementem patitur spasmus, mire inflatur coli magna flexura in sinistro hypochondrio versus splenem, una cum illo, qui infra ventriculum tractus protenditur & juxta hepar positus est. Quando autem, quod frequentius in malo sic dicto hypochondriaco & hysterico occurrit, principium jejuni, vel finis duodeni spastice afficitur, ob vicinum & supra illud decurrentem raram superiorem mesentericum & intercostalem, ingens in lumbis oritur dolor, ipsumque duodenum & ventriculus flatibus mire implentur, diaphragmatis quoque liber motus impeditur; unde ingens illa præcordiorum anxietas, spirandique angustia, & ructus cum impetu, frequenter & fere sine fine, erumpunt. Non semel ego sed aliquoties observavi in colica spasmotica inferiorem coli partem funis instar contortam & convolutam, tenue vero intestinum ad crassitiem brachii expansum fuisse repertum.

*Colicæ  
subiectum.*

§. XV.

Intestinorum dolores adeo frequentes sunt, nulla ætas, nullus sexus, nullus corporis habitus & nullum temperamentum ab iis sit immune. Infestant autem quam maxime infantes, feminas, atque etiam senes, & quicumque tenerioris, debilioris, & sensibilibioris sunt naturæ.

§. XVI.

*Causæ  
generatio  
colicæ  
flatulentæ.*

Acerbæ & torminosæ hæ intestinorum affectiones diversi generis agnoscunt causas, & pro harum differentiâ natura genio & vehementia, variant symptomata, variat etiam & intenditur subinde periculum. Frequentissimam vero alvi scybala retenta & indurata, in intestinis crassis, interdum in tenuioribus hærentia, cau-

*Hoffm. Syst. T. IV. P. II.*

sam præbent. Atque multum huc cruditarum acido-viscidarum copia, cibi sicci, aridi, adstringentes, diuturnior somnus & vitæ genus motus ac laboris expers contribuuntur. Et quodocunque sed pigra & obstructa alvo, cibi dulces, fermentescibiles, carnes pingues præsertim vervecinæ, cum potu frigido, vel refrigerationes pedum atque abdominis accedunt, inflatio abdominis intenditur & dolor acerbior fit. Atque in eo colicæ potissimum flatulentæ, & quæ veteribus a causa frigida producta dicitur, ratio & genius versatur: cujus generatio & crebra invasio imbecillitatem & atoniam intestinorum eorumque toni ac roboris defectum indicat atque supponit; hinc obesitas, phlegmaticis, senibus debilibus admodum familiaris est, præsertim si frigus improvide ad pedes deorsum & ventrem admittatur.

§. XVII.

Alia colicæ species est biliosa, quæ *biliosa* secundum veteres, a causa calida subnascitur, atque ab humore bilioso, acri, corrupto, in intestinis præsertim duodeno copiosius collecto & stagnante ortum suum trahit, a gravi frequentius ira, præsertim in corporibus calidæ & siccæ constitutionis, sub æstate fervida & ætate juvenili, vel virili, aut ab assumptis potibus nimis spirituosus & calidis proficiscitur, majorique tormentorum, post frigidum sumtum potum vel transpirationem prohibitam, sese prodit sevitia. Symptomata quæ hanc insequuntur potissima sunt vox rauca, cardialgia, continuum ciborum fastidium, vomitus materiæ biliosæ porraceæ, singultus, intemperies æstuosa & febriculosa, inquietudo, sitis intensa, os amaricans, urina pauca & rufa, cui quandoque alvi dejectio biliosa & crebra succedit.

§. XVIII.

Datur quoque valde atrox & tormi-



*in in-*  
*facil-*  
*bus la-*  
*etanti-*  
*bus.* minosus intestinorum dolor in infantibus, a lacte stagnante per miscelam bilis valde corrupto & corrosivo reddito, unde faeces plerumque secedunt virides, paucae & coagulatae & ab arrosione tunicarum intestinalium subinde convulsiones epilepticæ lethiferae tragœdiam ledunt.

## §. XIX.

*in puer-*  
*is.* Pueris valde familiaris & frequens est colica, quæ fit a vermibus si convoluti in intestino ileo hærent, cui sæpe febris continua & syncope, ventrisque lancinatio ac siterebra perforetur, jungitur. Qualia exempla, apud ZACUT. LUSITANUM *Prax. admir. Lib. 2. obs. 33.* & HILDANUM *cent. 1. obs. 57.* legi atque conferri possunt.

## §. XX.

*in puer-*  
*peris.* Neque puerperæ ab immanibus abdominis doloribus immunes degunt, præsertim quando lochiorum fluxus deficit, & post partum abdomen non decenter ligatur, vel partium ventris accedit refrigeratio.

## §. XXI.

*Hippo-*  
*chondri-*  
*acos*  
*sæpe ve-*  
*nat.* Frequentissimum etiam hypochondriacorum symptoma est atrox colicus dolor, isque maxime occupat latera, vel in dextro hypochondrio infra sub osse ilei, ubi principium coli flatibus & stercoreibus infarctum est, vel sub hepate flexura quam colon facit flatibus vel scybalis distenta, maxime omnium vero in sinistro hypochondrio sub diaphragmate & liene, ob maximam coli flexuram, tensivus consistit, cum alvi obstipatione, urinæ difficultate, anxietate, angustia, interna inquietudine, viriumque dejectione junctus. Nam, quia in sic dicto hypochondriaco morbo valde læsus & vitatus est intestinorum peristalticus motus, nec flatus, nec stercorea versus inferiora rite moventur & descendunt; hinc in flexuris maxime intestinorum, ubi diminuta est vis motrix contractilis & elastica, illa morantur, stagnant, & graves ac

dolorificas ejusmodi distensiones pariunt.

## §. XXII.

Alia adhuc ratio & natura est eorum dolorum intestina torquentium, <sup>*Colica*  
*spas-*  
*modica*  
*a sero*  
*acili-*  
*tra tu-*  
*nica*  
*hæren-*  
*te.*</sup> qui fiunt a materia intra tunicas intestinales hærente, sero videlicet impuro & acri. Et talis in corporibus scorbuticis ac purpura scorbutica vel scabie infectis, in arthriticis quoque & podagricis sæpenumero observatur; quando vitiosa materia, deficiente naturæ robore, retinetur, nec ad extremas partes transmittitur, vel etiam ab illis ob varias externas causas, intra corpus per metastasin transponitur. Et hæc species colicæ spasmis maxime se exerens, ad spasmodico-convulsivam spectat & sæva conjuncta habet symptomata, difficilis etiam est curationis, ac inflammationem minatur, neque facile conquiescit, nisi relegata materia ad extimas partes fuerit.

## §. XXIII.

Neque prætereunda erit gravior <sup>*a san-*  
*guine.*</sup> & identidem spasmodico-convulsiva colica, a nonnullis sanguinea vocari solita, a sanguine nimium intra intestinorum, coli præsertim tunicas congesto, stagnante & sensiles nerveas tunicas valde distendente. Et hæc fieri solet in feminis a mensium fluxu suppresso: tunc hysterica vocatur; vel etiam a consueto hæmorrhoidum fluxu deficiente, vel violenter cohibito aut suppresso: tunc recte dici solet hæmorrhoidalis. Quæ sicut sæpius in praxi occurrit, ita etiam ejus causa Medicis ut plurimum incognita est. Hac sæpissime hominis boni, robusti & sanguini, habitus eufarci, qui lautius & liberius, sub meri præsertim potu, degunt, otiosam colentes vitam, afficiuntur. Cujus colicæ sanguineæ multa exempla & observationes Doctissimus CAROLUS PISO in egregio tractatu *de morbis e colluvie serosa oriundis*: vide *Section. 4. cap. 2.* posteritati reliquit.

## §. XXIV.



§. XXIV.

Colica  
satur-  
nina.

Immanis quoque est illa colicæ spasmodicæ species, quæ a fumis saturninis, ore haustis & cum saliva deglutitis ortum suum ducit, atque iis qui mineras Saturni igne tractant & calcinant, vel plumbum ab argento in docimasticis furnis separant, ut in Hercinia sit, familiarissima est, vulgo dicitur *du Gutten Rage*. Dolor est in intestinis intolerabilis, alvus constipatissima, nec clysteribus neque laxantibus facile cedit, umbilici sit introrsum retractio, summa adest inquietudo & artuum tractio, nausea & assiduus ad vomendum conatus, in paresin vel veram paralyzin vel asthma spasmodicum quam facile terminatur, ac diu & misere sæpius ægrotantes torquet. Ejusdem generis dolori, figuli qui vasa figulina vitro ex plumbo obducunt, vulgo *glasiren*, obnoxii sunt. Testantur quoque observationes practicæ, quod medicamenta quæ Saturnus ingreditur, ut tinctura antiphthifica *Garmani* vel magisterium Saturni, quibus Medicastrum in gonorrhœa suppressenda frequentius uti solent, invincibilem alvi strictionem cum immanibus tormentis stipatam relinquunt. Quam gravia & periculosa valetudinis damna atque incommoda, a vinis acidis lythargyrio immisso dulcificatis, ante aliquot annos in Svevia oborta fuerint, id exquisitè & doctè in Dissertatione, Præside Clar. ZELIERO habita, *de noxa vini lithargyrio mangonifati*, est deductum. Inde enim non modo dolores stomachi, abdominis, sinistri hypochondrii cum forti alvi strictione, item colica convulsiva, sed & asthma convulsivum oborta fuere.

§. XXV.

Colica  
endemia  
spasmo-  
dica.

Restat adhuc alia colicæ species, quæ rectius endemia vocari potest, quia certis regionibus familiaris admodum est: ita Moraviæ, Austriæ atque Hungariæ incolæ atrocissimo colico dolore spasmodico, & convul-

sivo creberrime divexantur. Cujus rei nulla mihi alia suppetit ratio ac causa, quam vinorum in hisce regionibus valde spirituosorum largior potus & abusus, præsertim si corporis accedat refrigeratio; ex quo fit, ut sanguis nimium ebulliens, & in concitatiolem motum adactus, si neque per artificialem evacuationem invenerit exitum, in intestina incumbat & ibi accumulatus dira symptomata inferat. Ceterum hæc quoque jure referri ad colicam sanguineam & spasmodicam meretur.

§. XXVI.

Dantur etiam atroces colici dolores, qui alios morbos progressos excipiunt: ita extant passim observationes, & nota mihi quoque sunt exempla ubi ex diarrhœa ab adstringentibus cito suppressa, item post dysenteriam, ab incauta diætâ, & alimentis instantibus & fermentescibilibus copiose admissis, graves & exitiales ventris dolores successerunt. A cydoniato largiori manu in diarrhœa exhibitos, sævissimos ventris dolores atque torsiones, ad stercoris usque vomitiones lethales vidit FERNELIUS *lib. 6. Pathol. c. 10.* quod identidem a fortioribus purgantibus haud raro observavimus. Neque iis qui in artis exercitio frequentius versantur, obscurum esse poterit, post intermittentes, tertianam, quartanam, perperam curatas, prava præsertim diætâ accedente, sævissima subinde in abdomine secuta fuisse tormenta: testante illud BINNINGERO *cent. 3. observ. 33. cent. 4. obs. 41. item lib. 4. observ. 8. & 9.* quibus submovendis non tam facilis conceditur locus; siquidem in modo memoratis morbis ingentem labem & vitium jam contraxit intestinorum canal, ejusque functio, quæ maxima ex parte, a convenienti, ordinata & successiva constrictione & dilatatione, sive peristaltica motione dependet, adeo læsa ac labefactata est, ut dein multo facilius vitiosorum humorum colluvies

Colica  
ex mor-  
bis pro-  
gressis.



ibi consistere, & causam ejusmodi & aliorum pravorum affectuum possit subministrare.

## §. XXVII.

Sympto-  
matica,  
a calculo  
re-  
nali.

Porro colica spasmodica, frequens immo assiduum fere aliorum affectuum & dolorum esse solet symptoma: sic nihil frequentius contingit, quam quod dolori, ex calculo renum per uretheres descendente & ad vesicam iter faciente, gravis sæpius abdominis cruciatus, cardialgia, nausea & vomitio adjungatur: idque maxime fit ob consensum harum partium, quam nervus intercostalis hinc communis præstat. Qua de causa nonnulli Medicorum colicum dolorem cum calculoso sæpe confundere, nec rite discernere solent: cujus jam supra facta mentio. Observamus quoque in praxi, a dentitione infantum dolorifica, convulsivam colicam cum alvi forti adstrictione, quam demum epilepsia sequitur, subortam; idque tantum ob mirificum illum nervosarum partium cum aliis consensum.

## §. XXVIII.

a calculo  
felleo.

A biliario calculo, in cystide fellea detento, ejus ductum lancinante, ventris dolorem subortum, præter alia, defunctorum dissectiones testatum fecerunt. Ita in colicorum cadaveribus vesicam felleam lapidibus refertam BALLONIUS lib. 2. epidem. pag. 253. item M. N. C. ann. 4. & 7. observ. 220. fidem faciunt. Et HORSTIUS lib. 4. observ. 47. colicæ gravissimæ, 233. calculorum mediocris magnitudinis e folliculo fellis rejectione sedatæ meminit. Quo loco non possum non peculiarem doloris colici causam insinuare, quam Clar. NICOL. VULPIUS disertis verbis in observat. lib. 2. cap. 37. prodidit, ita habentibus: *Colicus dolor sæpiissime fit a bile flava, innatante huic intestino, quæ sæpius ab anatomicis cum animadvertatur, verisimile est eam transudare paulatim per tunicas folliculi fellis, huic intestino*

*quam aliis vicinioris. Quapropter male sibi consulunt illi, qui præ nimio studio validius comprimunt jecur: exprimit quippe prona hæc flexi corporis incurvatio bilem.*

## §. XXIX.

Neque absconum sed verisimile potius videtur, ab acri humore tunicas intestinales externe arrodente, dolores in toto intestinorum volumine concitari posse. Quam sententiam clariorem faciunt observationes, quibus per sectionem defunctorum constat, ex abscessu mesenterii rupto, purulentam materiam intestinis inhaerentem ante mortem sævos dolores & tormenta produxisse. Quales VVILLISIUS, BENIVENIUS, & VVARTHONUS scriptis suis passim insinuant.

## §. XXX.

Præter dolores autem intestinorum, qui acutioris sunt indolis & vel in salutem vel in mortem brevi terminantur, dantur etiam chronici qui sunt generis, & diutius insistant, ac per multas hebdomades immo per anni aliquando spatium excruciant, licet per intervalla suas habeant remissiones & exacerbationes. Horum post mortem demum fuit inventa causa, quæ in eo consistit, quod in quadam parte intestinum fortiter angustatum, constrictum, scirrhum vel callosum fuerit deprehensum: quare in totum motus intestinorum æqualis destruitur. Ita KERCKRINCIIUS Spicileg. Anatom. Observat. 50. in puero tormentis intestinorum qui obierat, cuncta flatu distenta, pylorum vero adeo exiguo foramine pervium vidit, ut flatum vix transmitteret; duodeni vero atque recti parietes subsidentes, conglutinatos & quasi filo constrictos, ut nullus flatus ea percurrere potuerit, invenit. Scirrhum coli HOLLERIUS de morb. inter. Lib. 1. cap. 41. & RHODIUS centur. 2. observat 75. describunt. A callo

ab are-  
sione  
intest-  
norum  
externa

quo.



quoque in intestinis colicam produ-  
ctam BENIVENIUS conspexit :  
vid. *Lib. 5. de abdith. cap. 30. & 34.*  
Intestinorum vero coalitum post dy-  
senteriam RHODIUS *cent. 2. obs. 77.*  
*item 82.* annotavit ; de qua re BAR-  
THOLINUS *cent. 6. observ. 2.* item  
M. N. C. *ann. 1672.* conferri possunt .  
Angustati quoque intestini & cartila-  
gine obducti meminit BALLONIUS  
*epidem. Lib. 1. p. 58.* Præterea , de  
angustia intestinorum , perdocta dis-  
sertatio *Clariss. WALTHERI Lipsi-  
ensis Prof. lectu dignissima est .*  
Sæpius quoque in sectionibus cadave-  
rum colica spasmodica demortuorum  
implicatio omenti observatur , mani-  
festo documento , vigere etiam in  
hoc motum quendam spasticum . Ab  
hepate male affecto abdominis dolo-  
res chronicos obortos non raro vidi-  
mus , ita ut illud albicans induratum  
fuerit inventum , & cystis fellea cal-  
culis repleta . Quandocunque enim  
liberior sanguinis per hepar transitus  
impeditur , a biliosis sordibus non be-  
ne depuratur & impetus quoque ejus  
ad intestina ruit ; ubi ob copiam &  
nimiam distensionem vasorum tar-  
dius progrediens , stagnationes dolo-  
rificas in intestinorum membranis ef-  
ficat .

§. XXXI.

Anato-  
mia coli-  
ca de-  
functo-  
rum .

Ceterum qui subito ex acuto inte-  
stinorum dolore pereunt , in iis ple-  
rumque intestina inflammata & spha-  
celosa reperiuntur . Ita SPIGELIUS  
in *lib. de Semitertiana* , in dissectis  
hac febre extinctorum cadaveribus ,  
qui ante immani dolore quasi colico  
fuerant excruciat , intestina inflam-  
mata & erysipelatoza detexit : & ad-  
jicit , his in casibus phlebotomiam  
omittere & purgationem , ut vulgus  
solet , substituere nefas esse . Sphace-  
latum quoque intestinum rectum , ab  
hæmorrhoidibus cæcis male curatis ,  
nos vidimus .

Quando  
dolores  
saluta-  
riter sol-  
vantur .

§. XXXII.

Salutariter vero sæpe numero ho-  
rum dolorum solvi solet atrocitas , per

*Hoffm. System. T. IV. P. II.*

sudorem copiose obortum vel etiam  
per hæmorrhagiam narium , aut hæ-  
morrhoidum fluxum supervenientem ,  
item per expulsionem purpuræ ad ex-  
timas partes aut per arthritidem &  
podagram succedentem , vel macula-  
rum scorbuticarum proventum . Cre-  
bra enim & perquam notatu digna  
hinc inde reperiuntur exempla , ubi ex  
arthritide repulsa factæ fuerunt perti-  
naces colicæ , qua redeunte ubi illa  
cessarunt . Sic colicæ sæpius biliosæ  
diarrhæa superveniente solvantur qua  
putrida & nigra materia evacuatur .  
Spectat huc quoque insignis locus apud  
HIPPOCRATEM *lib. de hum. §. 11.*  
*cui intestinum in dextra parte dolebat*  
*& articulari morbo correptus , quietior*  
*erat .* Neque parum salutis promitti-  
tur , si dolores locum atque sedem  
mutaverint .

§. XXXIII.

Minus salutariter , colicæ inprimis *Quando*  
spasmodicæ & convulsivæ , viribus *minus*  
plane dejectis & dissipatis , ac sudore *saluta-*  
colliquativo suborto , vel in veram *riter*  
paralysin vel in notham sive paresin , *termi-*  
vel in manuum & pedum stuporem *naturæ*  
terminantur ; vel etiam si atrocior  
dolor urget , epilepsia , convulsiones ,  
vel aliæ graves capitis affectiones , ut  
lethargus , carus , apoplexia finem  
vitæ faciunt . Multum vero periculi  
alio colica sive convulsiva sive biliosa ,  
quæ cum actuali invadit horrore &  
atrocius affligit : nam designat inflam-  
mationem , quam , si non succurra-  
mus , sphacelus excipit .

*Curatio cum Methodo medendi .*

§. I.

Sicut ex antecedentibus plenius *Meden-*  
perspicere ac animadvertere licet , *di me-*  
causas dirum hunc affectum excitantes *thodus*  
mirum variare : ita nunc identi- *pro dif-*  
dem colligi poterit , medendi metho- *feren-*  
dum , pro differentia causarum quæ *tia cau-*  
intestinorum dolores fovent , longe *sarum*  
aliam atque aliam esse instituendam . *variato*



## §. II.

Quid a-  
gendum  
si a flu-  
xu san-  
guineo  
critico  
suppres-  
so dolor

Quando itaque a consueto hæmorrhoidum vel mensium fluxu suppressio, in corporibus præsertim sanguine abundantibus, immanis abdomen infestat dolor, cum gravi æstu ac pulsu citatiore junctus, venæsectio in pede instituta, clysmata emollientia, pulveres antispasmodici leniter nitrosi & cinnabarini momento castorei remixti, nec non liquor noster anodynus mineralis, additis essentia castorei & spiritus salis ammoniaci vinosi, neque minus pediluvia, dolorum sævitiam mirifice mitigando, omne curationis in ipso paroxysmo absolvunt punctum. Extra vero illud tempus, & præservationis gratia, laborandum est, ut mensium in feminis & hæmorrhoidum in viris solennis restituantur fluxio; quo maxime omnium faciunt conveniens acidularum, thermarum, balneorum vernali cum primis tempore susceptus usus, præter hunc, pediluvia, motus & exercitatio corporis debito modo instituta, diæta commoda, pilulæ balsamicæ, atque infusa theiformia ex herbis partim carminativis, partim uterinis composita erunt adhibenda.

## §. III.

Stabile  
topiosa  
caustica

Quando dolor intestinorum a copia bilis effera & caustica suam mutuatur causam & originem, eadem prope præcedente §. memorata remedia proficiunt. Palmam vero inter alia, pulvis nitrosus, una vel altera gutta olei millefolii veri destillati commixtus, ex aquæ florum chamomillæ vulgaris unciis 3. vel 4. propinquatus, quæ gratior adhuc & virtute præstantior redditur, adjectione syrupi papaveris albi & spiritus nitri dulcis rite præparati, jure sibi vindicat: sicut autem hæc aqua, in omni abdominis dolore vehiculum remedium præbet convenientissimum; ita multo felicius operationem suam exerit, si ejus destillatio cum cerevisia triticea instituantur. Præstat quo-

que in hac colicæ specie medicamenta in vehiculo subfrigido quam calido exhibere, & abstinere a decoctis & infusis calidioribus pariter, a regimine sudorifero & balneis calidis: eo quod hac ratione biliosus ferocior redditur humor, & partes nervosas intimius penetrat. Hinc observationibus practicis edocemur, hujusmodi in casu, solum aquæ frigida potum, quo ipse GALENUS in colica biliosa usus est, optime profuisse atque malum depulisse. Majorem autem hoc monitum attentionem meretur, si ex ira fuscitata fuerit torminosa affectio.

## §. IV.

Si fixus & tensivus in dextro vel sinistro hypochondrio vel infra ventriculum hæserit dolor, certum indicium est, flatus vel excrementa coliflexuris incarcerata hanc scenam ludere. Tunc præcipuum curationis in eo positum est momentum, ut enemata emolliendi, discutiendi & roborandi virtute prædita injiciantur: non omissis externis linimentis carminativis & emollientibus, parti dolenti applicandis. Aperta sic alvo, flatibusque discussis atque propulsis, pilulæ nostræ balsamicæ ad Becheri exemplar compositæ, interposito sale digestivo, vel decocto mannato, cremore vel terra foliata tartari, & uno vel altero cochleare oleo amygdalarum dulcium permixto porrigi debent.

Si a  
flatibus  
vel ex-  
cremen-  
tis in  
carce-  
ratis.

## §. V.

Ubi rectum & intestini coli portio, in sinistro præsertim latere, fortiori spastica strictura afficitur, ita ut alvus nec flatui, nec excrementis exitum concedat, neque clyster commode ano immitti queat, tunc totum abdomen oleis calidis & pinguibus fovendum est; v.g. oleo chamomillæ, anethi, ruthæ, coctis, pinguedine taxi, canis, vulpis, castorei, humana, quæ etiam per clysterem ad spasticam illam stricturam relaxandam ano infundi possunt; quo facto,

Si a sps-  
tica  
recti &  
coli stric-  
tura.

in-



infusum mannatum, quod supra memoravimus, erit offerendum.

§. VI.

in colica  
flatulenta  
quid  
confere-  
rat.

Colica flatulenta ex atonia & imbecillitate ventriculi & intestinorum, a cibis crudis male digestis & infantibus, enata, carminativa & paullo calidiora admittit, quorum censum fubeunt aquæ carminativæ spirituosæ, ex semine cymini & carvi, corticibus aurantium, floribus chamomillæ vulgaris & Romanæ ac cardamomo cum vino destillatæ, essentia carminativa B. Vedelli, essentiam corticum aurantium probe saturata spiritu salis ammoniaci exaltata, liquor anodynus mineralis cum balsamo nostro liquido, quod vitæ audit, permixtus, vel sequens liquor carminativus: Recipe spiritus nitri dulcis vel liquoris nostri anodynus mineralis, essentia corticum aurantium, tincturæ tartari ana drachmas, 3. spiritu salis ammoniaci drachmam, olei carvi destillati, cymini, de cedro, chamomillæ vulgaris destillati, singulorum guttas 6. M. D. Dosis constituunt guttæ 30. ad 50. Haustus insuper vini sic dicti Hippocratici ex speciebus aromaticis, v. g. corticibus aurantium, citri, macere, caryophyllis, cardamomo & saccharo parati, senibus præsertim & ubi ex refrigeratione abdominis & externarum partium malum traxit originem, insignis & præsentaneum solet levamen præbere. Perutili quoque est, abdominis regionem tegulis & marmoribus calidis, item sacculis avena, sale communi, tostis, semine carvi, milii, baccis lauri atque juniperi repletis, subinde fovere.

§. VII.

quid, si  
a materia  
creta  
propulsa.

Dolores abdominis, ubi a retro-pulsa materia exanthematica vel excretionem critica, scabie, purpura, podagra, arthritide, erysipelate proficiscuntur; nihil aliud agere prudens & rebus suis satagens Medicus debet, quam ut leniter diaphoresin promo-

vere studeat; id quod ego nonnunquam, essentia scordii probe saturata cum spiritu florum sambuci non intense rectificato extracta, liquori anodyno nostro ad dimidiam partem admixta, si ad guttas triginta vel quinquaginta in infuso calido bis de die propinatur, felicissime perfeci: circa lecti vero introitum pulverem meum bezoardicum, pauxillo citri & cinnabaris mixtum, adjecta succi citri recentis portione, in idoneo vehiculo obtuli; non prætermissem emollientibus & demulcentibus clysteribus, atque corporis in blanda diaphoresi constitutione.

§. VIII.

Quando ex vermibus intestinorum dolor in junioribus oboritur, ad dolorem sopiendum primo decoctum ex emollientibus & paregoricis, floribus videlicet sambuci, chamomillæ vulgaris, meliloti, verbasci, semine foenu græci, anethi, anisi, croco & lacte paratum, vel vesicæ suillæ inclusum, vel linteis exceptum abdomini applicari potest. Dein clysteres ex iisdem speciebus in usum frequentiore ducendi sunt, qui etiam ex lacte recenter mulcto parandi. Interne vero tinctura rhabbari & tanaceti, quæ herba vere specificum est anthelminticum, alvus sollicitanda, & quandoque aquæ cum mercurio vivo coctæ usus est interpolandus. Non raro contingit, ut hac ratione vermium glomera, quæ intestina obsesserant & angustarant, ejiciantur, sedatis & placatis mox omnibus symptomatibus & gravissimis abdominis tormentis.

§. IX.

Neque prætereundus est acerrimus ille & prope intolerabilis dolor, qui intestini recti tunicæ nerveæ exquisitissimæ sensationis subinde insidet & universi fere corporis partes in consensum trahit, sanguine hæmorrhoidali minima vascula obsidente ortum ducens, cæcarum hæmorrhoidum nomine potus: is enim peculiar-



re curationis genus expostulat. Venam tunc ego non in pede, sed in brachio secari præcipio, ad meliorem sanguinis a partibus inferioribus ad superiores derivationem. Exterius vero duo remedia expertissimæ virtutis deprehendi, quorum alterum est linimentum, quod ex drachmis ttibus spermatis ceti, olei hyosciami drachma, camphoræ granis 6. & croci granis 10. constat, quo calide inungi tumores debent; alterum est epithema, quod ex aqua calcis vivæ, cuni aqua rosarum & florum sambuci temperata, saturni saccharo & spiritu vini camphorato compositum, linteis tepide applicandum.

## §. X.

*colicæ saturninæ curatio*  
In immani illa colica sic dicta saturnina vere convulsivo-spasmodica, quæ metallurgos afflictim & immaniter excruciare solet, non invenitur præstantius præservativum quam mane sumtum jusculum pingue: in ipsa vero cura clysteres mere oleosi item oleum amygdalarum dulcium in copia haustum, cum vel sine decocto mannato, omne exhauriunt punctum. Ad paresin vero sanandam balnea aquæ dulcis, & post eorum usum, inunctio spinæ dorsi & abdominis cum linimento, quod habet axungiam humanam, oleum nucissæ expressum, hyosciami, crocum & oleum rosmarini, vix datur præsentius & certius auxilium.

*Cautela & observationes clinicae.*

## §. I.

*In colica spasmodica purgantia vitanda.*  
**I**N spasmodico & convulsio intestinorum & abdominis dolore, ubi alvus firmissime est clausa, canepes & angue acria purgantia, & ex iisdem quoque parata clysmata sunt vitanda. Novimus, hac ratione inflammationem & mortem fuisse productam.

## §. II.

Ad alvum longo temporis intervallo clausam, si excrementis & scybalis induratis referta sunt intestina, referendam, non sufficit una clysteris injectio, sed duos vel tres intra horæ sæpius spatium injicere oportet.

## §. III.

Aliquando accidit, ut induratum & compactum excrementum intestinum rectum occupans, flatuum ac scybalorum exitum penitus impediat. Tunc fotibus emollientibus fovenda anus, & suppositoriis pinguibus & salinis stimulanda alvus, nec non uncia aliquot olei lini vel raparum cum decocto emolliente, in quo prius sufficiens saponis Veneti portio soluta, ut durities scybalorum emolliatur, per syphoneum immittebatur.

## §. IV.

Solus tabaci fumus per accommodatam syringam immixtus, ad aperiendam alvum, omnia fere alia remedium genera, testantibus id observationibus, fausto suo effectu superare creditur, utut ego certa de singulari ejus efficacia promittere nequeam. Id vero scio, quod experimentum hoc in equis ad alvum valide adstrictam aperiendam maximæ sit virtutis. Novimus etiam homines quosdam plebejos atroci intestinorum dolore vexatos, fumi tabacini sola deglutitione, ab omnibus cruciatibus in instanti fuisse liberatos.

## §. V.

In omni graviore intestinorum dolore, antequam alvus fuerit soluta, calidiora carminativa & sudorifera, balnea quoque nocentissima sunt. Nam, dum materiam biliosam vel corrosivam invehunt sanguini nec ad partes exteriores præcipitant, anxietates augentur, & paralyse, contracturæ, febres hæcticæ immo convulsiones epilepticæ haud raro inducuntur.

## §. VI.



§. VI.

*Opiata in senibus e-  
xulēt.* In senibus, & imbecillis corpori-  
bus, si infestantur dolore abdominis  
opiata magis adhuc narcotica penitus  
exulent, item quando acerbiores do-  
lores diutius perseverantes vires ad-  
modum fregerunt. Quod etiam te-  
nendum erit, si ex summa debilita-  
te, nimis sudoribus corpora perfun-  
duntur: paralyfin enim tam veram  
quam spuriam inde suscitatum fuisse,  
vel etiam phacelum internarum  
partium inde productum fuisse memi-  
nimus.

§. VII.

*Ubi  
profint* Nihilominus in hypochondriacis,  
& hysterica passione detentis, vel  
ubi simul affligit ferina tussis, cum  
gravibus abdominis doloribus, & e-  
rosionibus; pilulæ balsamicæ no-  
stræ, vel aloephanginæ; extracto  
panchimagogo *Crolii* acuata, uno  
vel altero grano laudani opiatu rite  
parati vel theriacæ cœlestis adjecto,  
interpositis pulveribus nitroso-salinis,  
& absorbentibus, insigne dolorum,  
& spasmodum levamentum afferunt.  
Ita pilulas purgantes cum refracta  
dosi laudani opiatu mixtas, multi  
celebres Medici, nominatim, RI-  
VERIUS, POTERIUS, CRA-  
NIUS, XOLLERIUS, & FORE-  
STUS mirifice in abdominis dolo-  
ribus deprædicant. Neque deficit ra-  
tio utpote remittente dolore, & spas-  
mo, purgantis operatio longe prom-  
tior & felicior sæcum alvinarum deje-  
ctio sequitur.

§. VIII.

*Colica  
pe-  
lodi-  
ca quo-  
modo  
tracta-  
da.* Si atrox intestinorum dolor certo  
temporis spatio recurrit; quod plu-  
ries mensibus *Martio*, & *Octobri* con-  
tingit, flante, & sæviente maxime  
Borea vento, probabile est ejus cau-  
sam sanguinem intra intestinorum  
tunica congestum esse, quia sub tali  
tempestate obregurgitantem sangui-  
nem, ejus in sedis venis sit accumu-  
latio. Qua de causa venæ sectio in  
pede, ad hæmorrhoidum fluxum,  
si natura ejus fuerit assueta, promo-

ventibus, præservationis gratia, com-  
modissime instituitur. Sin vero quis  
criticę hujus sanguinis excretionis fue-  
rit expers, consultius ego semper de-  
prehendi, brachii venam secare, quo  
sanguis a partibus inferioribus derive-  
tur ad superiores, cum, si non inve-  
nit exitum per hæmorrhoides, major,  
per crebras sectiones in pede admini-  
stratas, ad partes inferiores fiat impe-  
tus atque affluxus.

§. IX.

Hypochondriaci, & hæmorrhoi-  
darii flatulentis ac ventriculi, & inte-  
stinorum doloribus perpetuo fere e-  
xercentur. Si itaque malum invete-  
ratum neque domesticis, neque e  
pharmacis petitis obtemperare vult  
remediis; ego sane nec præsentius  
nec efficacius, nisi in thermarum *Ca-  
rolinarum*, vel aquarum mineralium  
temperatarum, ut *Selteranarum*,  
imo *Emblensium*, convenienti in-  
terno, & *Tæplicesium* externo per  
balnea usu, unquam deprehendi au-  
xilium; præprimis, si decente, &  
sat frequenti motu & exercitio corpo-  
ris secundetur, diætę quoque selectę  
habeatur ratio.

§. X.

Puerperis intestinorum, & lum-  
borum dolores sunt familiarissimi,  
præsertim, si lochia non debito mo-  
do, quantitate ac tempore proce-  
dunt, ex quibus postea doloribus fe-  
bres exanthematicæ, quæ si ingrave-  
scunt puerperam tollere consuecunt,  
oriuntur. Qua de re circumspectus  
eo animum advertere debet Medi-  
cus; ut convenienti methodo horum  
dolorum sævitiam componat; quod  
optime fit, sanguinis lochialis pro-  
motione, qui si medicaminibus mo-  
rem gerere recuset, venæ sectio in  
pede tutissime celebratur, postquam  
statim sæpenumero prodeunt lochia,  
& dolores penitus sopiuntur; quod  
crebra me docuit experientia.



## Methodus Præservatoria.

**Q**ui intestinorum & imi ventris doloribus frequenter recurrentibus infestantur; quod ego haud raro, in arthriticis, nephriticis, item hypochondriacis & hæmorrhoidariis animadverti; iis ante omnia exquisita diæta, & accurato vitæ regimine subveniendum est. Id quod in eo maxima ex parte consistit, ut primum sedulo, & omni studio, quascumque occasiones ad nocentissimas animi perturbationes, ut terrorem, iram & tristitiam, fugiant: nihil enim reperitur, quod generi nervoso adeo infensum, & morbos in eo desidentes tam confestim reforescere magis idoneum est, quam vehementior animi commotio. Dein frigus Boreale, cujus ea est natura ac conditio, ut nervosi generis morbos revocandi, & exacerbandi maximam vim habeat, omnimodo vitetur, regio lumbaris, præcordialis, & pedes quoque ab eo diligentius defendantur. Tum prospiciendum est, ne legumina, & inter hæc maxime pisa, fabæ, brassica, caro pinguis vervecina, & frigidus præcipue huic superingestus potus, admittantur. Denique, ut corpus non diu otiosum maneat, sed frequentius exerceatur. Optime enim TRALLIANUS, & etiam rectissime l. 10. in hisce morbis motus commendat remedium, ita perhibens: *motus quicumq; & omnis exercitatio insigniter iis conferunt, qui diutius tali morbo laborarunt & frequentius eo corripiuntur, si pedibus, si per equum, si etiam navigio movere corpus velint, item palæstra, & totius corporis perfrictio, locique mutatio, & longa peregrinatio. Hæc enim omnia extenuant discutuntque, & totum corpus excrementis liberum reddunt, universum habitum corroborantia, ut in posterum affectus partes frigidum humorem colligere nequeant, imo ne*

*aliunde influentem promte in se recipiant. Postremo parciolem potum spirituosorum, & præsertim aque vitæ stomachalis carminativæ omnibus suadeo, utpote qui plus noxæ & incommodi quam fructus, a copiosiori harum rerum usu resultasse, crebro observavi: vulgaris quippe, & damnandus error est, ad meliorem ciborum dissolutionem, & digestionem potus hosce conferre; quum tamen hæc ipsa a latice salivali potissimum dependeat, neque ciborum solutionem ullo modo spirituosas prorsus attingant; sed potius e contrario, partes chylosas in intestinis præcipitando, incrassando, & poros obstruendo, materiam ad ructus & flatus subministrent.*

## ENARRATIONES MORBORUM.

## OBSERVATIO I.

**F**emina nobilioris conditionis erat, quæ quinquagesimum, & ultra jam annum attigerat, staturæ mediocris sanguine & succis plena. Per duos jam annos menstrualis silebat purgatio: ceterum sana & vegeta. Vehementi afficitur ira, & elapsis aliquot horis, ob infortunium quod ipsi nunciatur, summo & panico terrore atque tremore animus, & corpus procelluntur. Nox erat inquietata. Sequenti sensus, & dolor tensivus tam acerbis corripit, ut in erecta statura corpus ægerrime retinere potuerit. Brevi post, horrorem & refrigerationem præsertim partium externarum percipit; quam ventris dolores, & tormina insequiebantur, cum ingenti præcordiorum anxietate. Persuasio fuit, spinam dorsæ passam esse subluxationem. Unde spine facta fuit distractio; sed dolores magis ingravescebant. Die tertio, postquam noctem inquietam transegerat, cardialgicæ accedebant anxietates cum summa spirandi angustia junctæ, inanes-

*Colica  
spasmo  
dico-  
convul.  
sua ex  
ira &  
super-  
veniente  
terrore*



nesque urgebant ad vomendum conatus. Pulsus erat celer & durus, pedes frigidi, alvus obstipata, & ad urinam stimulus, sed ejus parcius fluxus, & dolor lancinans in dorso. In consilium ego vocatus quæsi, quia mater ejus per plures annos obnoxia erat calculo, an nunquam laboraverit affectu? Negavit id ipsum. Porro interrogavi, an sanguinis missionem neglexisset? Respondit annum esse elapsum. Aperuit mihi causam morbi supra tactam. Consultum ante omnia visum fuit, alvum injectis clysteribus solvere, qui parum tamen utilitatis attulerunt. Postea venam pedis secari jussi. Eduximus sanguinem cum virium constantia, & euphoria ad 9. uncias: atque ingens mox dolorum & symptomatum, cardialgiæ præsertim, & vomitionis sequebatur mitigatio; sed dolor circa hypochondrium dextrum lancinatorius cum abdominis inflatione permansit, neque alvus flatuum vel stercoreis quicquam transmissit. Clysteribus carminativis, & emollientibus, ac fermentis ejusdem indolis abdominis applicatis insistere placuit. Interne vero nihil aliud dedimus, quam oleum amygdalarum dulcium in jussculo avenaceo ex quo flores chamomillæ vulgaris decocti, item pulverem marchionis, & bezoardicum, adjecto nitro, cinnabari, & gutta olei chamomillæ veri, it. liquorem anodynum nostrum, cui essentia castorei quarta pars admiscebatur; potum paulo frigidiorum melius tulit quam calidum. Alvus paruit clysteribus: permanserunt dicta symptomata. Memorabile fuit, quod alternatim abdomen mirifice fuerit inflatum cum tenso dolore, adeo ut tactum manus ferre nequiverit. Alio tempore summa fuit umbilici retractio cum spasmodica ventris strictura. Urinæ difficultas permansit: dolor vero in dorso, & hypochondrio dextro, ubi prima lumbaris vertebra est, incipiebat. Hæc symptoma-

ta & meum & cognatorum animum tenuerunt dubium atque suspensum, num morbus ex calculo renali proveniret, an colica convulsiva hysterica sit, quæ tamen nunquam fuit correpta. Die, quæ erat ab invasione septima, mixturam præscripsi sequentem in modum: Rec. tincturæ antimonii acris, liquoris anodynii mineralis; utriusque unciam dimidiam spiritus tartari drachmas duas, essentia anodynæ gr. 12. M. Singulis tribus horis sumsit 30. guttas cum aqua florum chamomillæ vulgaris, florum sambuci & ceraforum nigrorum. Et inde obortus ingens per totum corpus sudor, durans per totam noctem, ut linthea madefacta nimis mutare conveniens visum fuerit: ægra ceterum insignissimum levamen percipiente. Pulsus a naturali vix deflectere cœpit. Appetitus rediit, & somnus: non tamen cedebat dolor in dorso. Urina secedebat naturalis coloris, sed sine ulla arena vel crasso sedimento. Pilulæ datæ polychrestæ, interposito sale digestivo: & alvus etiam respondit; ubi multa foetida & putrida egesta fuerunt. Et ita sensim collectis viribus, adistente Divina benedictione ægra cum atroci hoc morbo rediit in gratiam.

#### *Epicrisis.*

Hic affectus rectissime colicæ convulsivæ titulum meretur, quæ a bile per iram copiosius in intestinum duodenum, cujus situs ad dorsum reflectitur, quod primam causam ipsius morbi sustentabat, effusa ortum duxit. Unde cardialgiæ anxietates, vomitiones & angustia sequebantur. Quia vero a vehementia terroris, mox iram subsequens, sanguis ab exterioribus ad interiora maxime ad mesenterium ipsaque intestina fuit repressus & compulsus, flatulenta illa & spasmodica intestinorum affectio est secuta. Fixus ille in dorso dolor: nostra sententia, ramo mesenterico nervi intercostalis majoris, qui, ut



notum ex anatomicis est, una cum ramo mesenterico arterioso ipsum duodenum supergreditur, ab hujus inflatione & copia sanguinis, distento & compresso debetur. Neque vero hic gravior dolor & spasmus tantum, in intestinorum volumine sedem habuit, sed & peritoneum, ipsius abdominis musculos & lineam albam, ob plexum mesentericum, & intercostales nervos partibus his communes, in consensum traxit: a qua causa retractionem umbilici, & abdominis ducendam esse arbitror. Sanguinis missionem in tali statu plethorico, ubi tanta est spasmorum juncta atrocitas, ad arcendam inflammationem, quæ, nisi sanguine vel sponte vel arte evacuato, promte sequitur, perutilem imo necessariam judicavi: suadente id ipsum HIPPOCRATE in coac. Sect. 3. dolores ubi inquit, in lumbis sanguinis fluxionem inducunt, & spinae distorsionem ac spirandi difficultatem sanguinis fluxio solvit. Præter alia & hoc videtur notatu dignum, quod hic dolor typum febrilem servaverit, horrore & terrore incœperit, & sudore septimo die sublatus fuerit, ut adeo recte dolor intestinorum spasmodicus acutæ indolis nuncupari queat.

## OBSERVATIO II.

*Colica spasmodica chronica beroliana prodicens, Carolinæ & Typographi* Triennium est, & quod excurrit, cum vir honestæ conditionis, mediocris staturæ & strictioris corporis habitus, vitæque sedentariæ, & lubricationibus addictissimus, doloribus in dorso, & abdomine cum inappetentia & virium collapsu torqueretur. Quorum causa Medicus in molimina hæmorrhoidalia rejiciens, ad hunc fluxum movendum varia præscribebat remedia; sed nihil sanguinis, multum autem tenacis & albidæ materiæ, per alvum, alternis vicibus secedebat. Iter cum susciperet Berolinum, exquisitos & pungitivos in dextro hypochondrio subinguine,

alvo simul valde adstricta, patiebatur dolores; quos protuberans tandem tumor excepit, qui procedente tempore ex inguine in ipsum scrotum descendebat, multum ægro molestiarum faciens. Consuluit celebrem in eadem urbe Medicum, qui pilulis suis & aliis adhibitis medicamentis, id quidem effecit, ut semel sanguis per anum cum ægri quodam levamine erumperet. At vero fluxus hic, quum per annum restituisset, nullo medicamento revocari potuit: sed dolores truculenti, quamvis per venam pedis sanguis eductus fuerit, repetebant, & immaniter abdomen cruciabat, ingravescentes quando e lecto surgebat, & leniter obambulabat, vel auræ frigidiori se exponerebat. Acutus in regione umbilici constitit dolor, & permolesta, quasi ingentis globi ibi hærentis, & prementis sensatio, quæ tam graviter sæpe torquebat, ut eger corpus in erecto situ vix servare se incurvare debuerit, lamentabili sæpius voce doloris exprimentis sævitiam: nam tum prolapsum intestinum cum dolore lancinatorio, & ardente valde distendebatur, atque in hypochondriis, dorso, & femoribus tam dolorificæ rosiones, & stricture urgebant, ut rigidum & contractum corpus æger plane e loco dimovere non potuerit. Alvus firmiter erat occlusa, ut nec flatibus exitum concederet, nec clysterem intromitteret. Accessio doloris ab hora octava matutina fuit, qui ad meridiem duravit, vomituque delivit; atque ingenti virium languore, abdominis ad tactum increcente dolore, nausea, ciborum inappetentia, sudore nocturno, tussis sicca, præcordiorum anxietate, marcore, urinæ suppressione comitatus ægrum mire maceravit. Misit ad me historiam morbi. Suasi, ad levandum malum, pulveris antispasmodici usum, qui ex lapidibus cancrorum, nitro, cinnabari & castoreo erat compositus, item liquore anodynum cum refracta dosi spiritus bezoardici *Bussii* remixtum,



rum, nec non elixir viscerale inter cibos assumendum, balneum etiam aquæ dulcis, & hirudinum ad anum applicationem, atque, ut loco cerevisiæ, aquam Selteranam cum paulillo vini vel ptisanam biberet, & alvum clystere oleoso, & emolliente apertam servaret, ordinavi. Proximo autem vere, meo ex consilio, thermas Carolinas adiit; & absoluta cum iis cura, balneo Tœplicensi, optimo & sperato cum successu ac levamine, usus est.

*Epicrisis.*

Dolores intestinorum spasmodici, & flatulenti, si chronici sunt, plerumque originem suam sanguini intra tunicas intestinales nimium congesto & stagnanti, ob impeditionem per mesenterium, & hepar circuitum, sub vita ad otium, & quietem composita, debent. Neque hi corpus facile deserunt, nisi natura sponte sanguinem per sedis venas emittat, si videlicet naturalis quædam ad hunc fluxum adsit dispositio, qua deficiente nil perniciosius est, ac sanguinem commoventibus, aloeticis præsertim, & pilulis balsamicis, cujusque etiam fuerint generis vel Auctoris, ad hunc fluxum naturam cogere velle. Tantum enim abest, ut symptomata inde remittant, quin potius a commoto & ebulliente inter tunicas nerveas stagnante sanguine, spasmi, & dolores exacerbentur, cum tanta sæpius vehementia, ut etiam nervus mesentericus magnus intercostalis & omnes ad quas ille ramos suos dispergit, peritoneum quoque, & musculi abdominis cum intestinis in consensum rapiantur: atque exinde herniam inguinalem, & postea scrotalem fuisse subsecutam aliquoties notavi: quemadmodum similem affectum a validissime operantibus drasticis, & emeticis enatum vidi. Tunc vero semper deterior fit ægrotantium ejusmodi conditio: nam ubi labem notabilem vel vitium quoddam intestinum vel tantum parsejus contraxit, sicut in

herniis contingit, colica non modo affectos, sed hypochondriacos quoque gravissime luere perpetuum fere est; excrementa quippe in ejusmodi tumore intestinali quam facile congeruntur & sistuntur; atque ita totum motus peristaltici adeo necessariæ negotium perturbatur. Per remedia diætetica & accuratum vitæ regimen, moderationem animi affectuum, sanguinis decentem per venas evacuationem, aquarum mineralium quæ temperie gaudent tam externum quam internum usum, melius, & citius, quam per multa medicamina nervina, calefacientia & purgantia ad desideratam sanitatem ægrotantes perveniunt: sicut ego quoque in ejusmodi morbis abstinentionem ab omni cerevisia, & potum quo puriorem & simpliciorum eo præstantiorem commendando.

OBSERVATIO III.

Quadraginta abhinc circiter annis, cum officio Physici Mindæ fungerer, vir honoratior annorum 40. cholericæ, & in iram valde proclivis naturæ, ingenii vero acuti, & vividi, cibos infumatos, & salitos in deliciis habebat, & liberaliter quoque vino, & spiritu vini utebatur. Hyeme, sub aura valde algida, ex itinere domum reversus, de dolore lumbari, acerbis ventris torminibus, alvo dura & constricta, quæ trium clysterum injectionem elusit, conquerebatur. Aderat calor præternaturalis, summa sitis, & vigilia. Admissis clysteribus emollientibus, deinde carminativis, item sumto decocto mannato cum oleo amygdalarum dulcium, & mixtura ex aqua menthæ, spiritu nitri dulcis, syrupo papaveri albi, & pulvere præcipitante nitroso propinata, malum fuit depulsum. At vero elapso vix duarum hebdomadarum spatio in eundem morbum ægrotans incidit, qui profligatus, etiam tertia vice repetiit, tam vehementer.

*Colica biliosa illa in gnotopota, ex frigore, episteme, & c.*



hementi gradu, ut ego, & Medici adstantes. summum timeremus vitæ discrimen. Nam atrox dolor assidue affligebat, cum intenso calore, sui inexhausta, animi defectione, ingestorum, & medicamentorum per superiora rejectione, præter aquæ simplicis frigida potum cui quippiam calidi panis injectum, quem retinebat: alvus nullis clysteribus vinci poterat: iliacum morbum ante oculos conspiciamus; neque ab ullo medicamento tam externo quicquam levaminis recipiebatur. Æger vero, quia per quinque continuos dies, assiduis vigiliis & jactatione corporis detinebatur, in extremum virium lapsum conjectus erat. Igitur, ad somnum conciliandum, sequens excogitavi epithema. Rec. flor. rosarum, sambuci, lavendulæ ana pugillos tres, seminis papaveris albi, hyosciami, anethi, nucistæ, nucleorum Persicorum, singulorum drachmam unam semis, croci drachmam; quæ species concisæ, postquam in lacte ebullierant, applicatæ toti capiti fuerunt. Hujus tam felix erat operatio, ut per totam noctem placide miser ægrotans dormiverit: a quo tempore omnia priora symptomata, conatus vomendi, dolor vehemens, inquietudo, & anxietas conquieverunt, alvus quoque ad motu suppositorio respondit. Datis postea convenientibus, & temperatis stomachum, & intestina roborantibus integre restitutus fuit. Ad præcavendam vero tam atrocis morbi vim & recursionem, consilium dedi, ut, quia non assuetus erat venæ sectioni, eam bis vel ter quotannis admitteret; dein ut duriores victum, & largiorem vini, adhuc magis vero spiritum vini potum evitaret. Mixture quam ad stomachum roborandum præscripsi, ex essentiæ carminativæ *Vedelii* uncia dimidia, essentiæ cascariellæ drachma & dimidia, spiritus oleosi *Sylvii*, guttis 60. constabat; quam ante & post cibum sumtum, per annum usurpavit. Pro potu aquam

simplicem commendavi; cui panis calidus recenter ex furno extractus injiciebatur. Ita a recursu hujus mali plenarie fuit vendicatus.

#### *Epicrisis.*

Ex hac morbi historia, & curatione paulo pensiculatus considerata, evidenter apparet, primo, ab omni graviore dolore in parte quadam nervosa suscitato, universum nervorum systema in consensum rapi, & atrociam in variis partibus induci posse pathemata. Dein quoque ingens illa capitis membranarum cum ventriculo & intestinis consensio, ex ea evincitur; cum capiti ceu parti a dolore valde remoto exterius tantum applicatum sedativum remedium, in distitis partibus affectis, vim suam & efficaciam exeruerit. Sicut vero omnes affectus nervosi generis, ita etiam intestinorum, & ventriculi dolores, facile ex neglecto vitæ regimine, inque primis per affectus animi immoderatos per frigus, & ventum Borealem exterioribus improvide admissum, nec non cibum, & potum minus convenientem, recidivant: id quod facillime, in cholericis, & ad iram proclivis temperamenti corporibus evenit; quibus aquæ frigida potus vino multo est convenientior: docente id ipsum *GALENO Lib. 10. method. capit. 7.* De cujus etiam salutari usa *AMATUS LUSITANUS* testatur, se atrocem intestinorum dolorem, aquæ frigida exhibitione, subito & incantamenti instar sustulisse.

#### OBSERVATIO IV.

Anno circiter supra millesimum sexcentismum, octogesimo quinto, cum Halberstadii Provincialis Medici nomine degerem, ad monasterium Hammersleben, cui Medicus alius ordinarius præerat, ob plures religiosos ibi graviter laborantes, fui vocatus. Offendi ibi numero plures, qui per longum tempus atrocibus ventris

*Colicæ  
sanguineæ ex  
dieta  
luta  
& vini-  
nosa.  
venæ-  
sectio  
qua  
potu  
curata.*



torminibus alvo pigerrima, & constri-  
cta conflabantur, de frigido quod  
sustinere, horas primo mane in templo  
frequentando, debebant, conquesti:  
quidam ex iis herniam inguinalem,  
& scrotalem sibi contraxerant: alii  
qui liberati erant paralyti, & stupore  
manuum affecti. Erant homines  
repleti, eufarci, sanguineæ comple-  
xionis, qui venæ sectionem in anno  
vix semel admittebant, lauteque vi-  
ventes mero non parum indulgebant.  
A dictis vero malis liberi permanse-  
runt, qui tenuiori victu, & cerevi-  
sia simpliciori se sustentabant. Igitur  
cum ex nimia sanguinis abundantia  
ejusque stagnatione per intestina mor-  
bum prognatum judicarem, consi-  
lium dedi, ut impostherum sanguinis  
missionem frequentius celebrarent, &  
ptisanam cum vini portione remix-  
tam biberent: datis medicamentis  
magis refrigerantibus, & leniter car-  
minativis, spiritu nitri dulcis præ-  
sertim, & ipso nitro cum lapidibus  
cancrorum, & croco permixto, quam  
valde calidis, quibus antea erant usi.  
Suasor quoque fui, ut vere approxi-  
mante acidulas Pirmontanas vel Egra-  
nas regimine cum convenienti bibe-  
rent, ad paralytin vero tollendam,  
post balneum aquæ dulcis, linimento  
ex aqua Anhaltina, spiritu, & sale  
volatili lumbricorum terrestrium, o-  
leo nucistæ expresso, camphora, &  
castoreo parato, partes affectas, ut  
probe inungerent suasi & edixi. Ne-  
que exiguum inde levamen consecuti  
sunt.

*Epicrisis.*

Sicut colica vulgo, & in scholis  
Medicis in biliosa, & pituitosa di-  
stingui solet: ita etiam sanguineam,  
in plethoricis præsertim, ab iis rebus,  
quæ sanguinem nimium in vasis accu-  
mulant, excitari posse, experientia  
nos crebrior docet. Nam ex men-  
sium, in feminis, in viris; hæmorrhoidū  
suppresso fluxu, acerbos abdominis do-  
lores gravibus symptomatibus stipa-  
tos oboriri, nostro tempore non no-

vum est; licet veteribus hæc morbi  
species videatur incognita. Equidem  
apud HIPPOCRATEM *Lib. 3. de*  
*morbis* hæmatitis ilei nomen occur-  
rit, sed si pensiculare, quem descri-  
bit morbum consideramus, longe alius  
est quam iliacus, cujus signa in eodem  
loco proponit: adeo ut nihil fere cum  
hoc habeat commune. Nam ileos,  
quo nomine omnes dolores ventris  
complectitur, vera historia *lib. 3. §.*  
*15. cumulate, & perfecte traditur.*  
Rectius, optimus HIPPOCRATIS  
interpretes FOESIUS in *œconomia* sua,  
ac non sine ratione, suspectum esse  
hunc locum, & defectum, atq; men-  
dum subesse judicat. Neque etiam  
in regionibus calidioribus, in quibus  
venerandus Senex egit, tam frequen-  
ter ex plethora vel fluxu hæmorrhoi-  
dali oboriuntur ægriitudines, quam  
in nostris meridionalibus, & tempe-  
ratoribus. Solent vero hujusmodi  
dolores esse & longiores & atrociores,  
maxime quando caco-chymia concu-  
rit: hinc fit, ut, debilitatio valde  
genere nervoso, in paralytin, epilep-  
siam vel alios morbos nervorum &  
capitis terminentur, præsertim, si  
non rite, per calidiora videlicet inter-  
na, & externa, anodyna immode-  
rate sumta, tractentur. In regioni-  
bus præcalidis in Italia, & præser-  
tim Romæ, item in Hungaria, su-  
periori Austria, Moravia, ob abu-  
sum vini generosi, sanguineæ, & bi-  
liosæ colicæ frequentiores sunt. Ne-  
que ibi datur ad eas tollendas, præ-  
ter ab usum refrigerantibus, præser-  
tim aquæ frigidæ, præsidium facile  
convenientius, & efficacius. Et ob  
hanc rationem non AMATUS, sed  
& ZACUT. LUSITANI *hist. 295.*  
*pag. 351.* colicam a bile factam,  
aquæ frigidæ potu, & *Lib. 2. ob-*  
*serv. 25. prax. adm.* nive curatam  
meminerunt. Conf. hac de re M.  
N. C. *cent. 5. p. 193. 194. cent. 9.*  
*p. 273.* item *Decur. 2. An. 8. obs. 13.*  
& *Anno 10. observat. 139.* Vidi quo-  
que in paralyti ab eadem causa exorta,  
bal-



balnea paulo frigidiora , plus efficaciam quam calidæ præstitisse.

## OBSERVATIO V.

*Colleasanguinea, ex mensib. terre suppressis, aqua frigida curata,*  
Anni propemodum sex elapsi sunt, quum Beat. D.D. NOBOTH me Lipsiæ degentem, ad feminam mercatoris primarii viduam, quæ gravissimis abdominis doloribus, ex mensibus per vehementem terrorem suppressis torquebatur, duceret, deliberatione invicem habita, primo sanguinem e vena emittendum, dein clysteres emollientes, & oleosos cum stimulo salino injiciendos curavimus, & mixturas carminativas ac sedativas, quarum princeps ingrediens spiritus nitri dulcis fuit, propinavimus: sed sine effectu. Ipse asseverabat, sed modo in hac ipsa ægrotante, valde sanguinea, quæ ante dimidium anni eodem morbo fuerat correpta, miro cum affectu, & dolorum levamine, solo aquæ frigidæ usum fuisse potu. Nolui prius in ejus descendere sententiam, quum inflammationem vererer: sed ipse cum assertis, & promissis suis insisteret, nolui morosius repugnare: & res etiam feliciter, ac putaram, successit. Hic itaque aquæ frigidæ simplicis potum ad 2. cyathos de die per vices sumendum, recto prius probe corpore, & pedibus, curavit. Subsecuto largo sudore, postea placido somno omnes dolores abdominis conquieverunt. Affirmavit quoque, quod lintea aqua frigida madefacta, felicissimo sæpius cum affectu, in tali casu applicasset.

## Epicrisis.

Quod in aqua frigida summa lateat medicina, ego multa experientia, qui ipse de aqua medicina universalis, dissertationem scripsi, edoctus fui. Sed uti omnia magnæ efficaciam remedia, quæ a Medicis sagacioribus heroica audiunt, exquisitum judicium ac prudentiam; omniumque causarum considerationem desiderant; ita id ipsum de aquæ fri-

gidæ interno, & externo usu, maxime valere existimo. Nam imprudenter, & intempestive data, præsertim ubi metus inflammationis est, non potest non summum periculum, imo necem afferre. Nihilominus ad calidam acrem materiam temperandam, nimium sanguinis ebullientis æstum reprimendum, ad vires ab immodico fervore collapsas restituendas, ad roborandum partium tonum, & systolen cordis, & vasorum augendam, remedium efficacissimum utique præbet. Vidi ab ejus potu in cholericæ passionis miraculosos plañe affectus. Neque indignus animadversione est locus apud LUDOV. SEPTALIUM, quem lib. 7. animadvers. pag. 248. insinuat, & huc integer adduci meretur. Contingit, scribit, aliquando ut colici dolores adeo vehementes sint, ut omnem medicamentorum operam eludant, ac quocunque auxilio adhibito potiusaugeantur. In quo casu erit ad contraria transeundum. Quum enim colici dolores majori ex parte, a materia frigida fiat, ut a flatibus distendentibus; sit aliquando, ut a ratione vigiliarum, dolorem, aut mœroris ob contumaciam aut invalescant nimium, aut intestina, accedentibus etiam calidis, & foris apposis remediis, aut phlogosi quadam tentetur, aut etiam vera inflammatione incipiant affici, aut multa præexistens bilis ibidem transfundatur. Unde ad contraria erit transeundum, & insigniter refrigerandum. Quod mihi præterito contigit, in nobili quodam Hispano, qui cum colicis doloribus per aliquot dies acerrime fuisset conflictatus, ut jam jam mors esset præ foribus, nulli persentirentur, arteriarum pulsus, sudores essent resolutorii, nulla denique superesset spes salutis, ne quidem apud Medicos etiam præstantissimos, accersitus, & ego, cum sitim inextinguibilem, linguæ scabritiem, nigrorem atque duritiem; pertactis autem hypochondriis, & ventre in-

se.



feriori, calorem illum in partibus affluentem adesse observassem, Hispano aquam multam nive etiam refrigeratu, bibendam exhibui, cum natura abstemius esset. Et multa aqua potator in somnum prolapsus est, & quatuor horarum spatio cum dormisset, dolore quodam inferioris ventris, a primo maxime, ut ipse referebat, diverso excitato a somno, miram bilis flavæ copiam evacuavit, & a doloribus liber evasit. Unde collegi, Medicos, qui illius curationem susceperant, in causa morbi illius longe deceptos fuisse, cum calidis remediis curationem instituissent, a frigida materia morbum factum judicantes. Neque in colica flatulenta, a causa calida, frigida exterius applicata penitus improbanda veniunt, qua in re auctoritate eximiorum Medicorum CRATONIS, item VA ESCI de TARANTA niti licet, qui lintea aqua frigida madefacta, & ventri imposita in colicis doloribus sedandis magis faciunt. Cui experientiæ, adstipulantem quoque habemus rationem: nam flatus qui valide, & mirifice tunicas, & partes intestinorum distendunt, nihil aliud sunt ac aer calore rarefactus, elatere ejus valde adaucto: frigida igitur, ut experimentis mechanicis compertum est, cum aere nimis rarefactum condensent, atque in angustius spatium cogant, nec non fibris nimis relaxatis tunicam vim reddant, ut calefacto corpore sanguis majori velocitate propellatur, efficiunt.

## OBSERVATIO IV.

*Colica convulsiva, ex gonorrhæa adstrictis.* Juvenis 22. annorum studiis operam navans, gracilioris corporis staturæ, ex impura Venere, gonorrhæam sibi contraxit; ad quam curandam Chirurgi opera usus est. Hic primum fortiter corpus purgabat, dein adstringentia, tincturam sulphuris viatrioli, antiphthifica Grammanni & pulveres ex magisterio Saturni, terra Hoffm. Syst. T. IV. P. II.

figillata, succino, & osse sepiæ compositos, ad sistendum fluxum copiose adhibuit. A quorum usu per septimanam continuato hæc mala insecta: atroces cruciatus in abdomine, quod durum tensum, & retinens erat, oborti, alvo prorsus obstipata; aderat inappetentia, inquietudo, & tremore attractionibus artus, femora, pertorquebantur. Enixe meum exposcebat auxilium. Neque infeliciter successit curatio, quæ clysteribus emollientibus & oleosis crebrius injectis, infuso mannato, ex fero lactis, quod stimulo salino erat armatum, & pinguioribus jusculis, blandisque internis carminativis, & balneo aquæ dulcis, intra novem dies absolvebatur.

*Epicrisis.*

Quantam noxam improvide data adstringentia, ventriculo & intestinis ceu partibus valde nervosis, & membranosis inferant, tonum, & motum eorum plane turbando invertendo, dici vix potest. Atque innumeris exemplis, quam perniciales ea, in alvi, sanguinis, feminis fluxu sistendo, effectus exerant, confirmare, & illustrare possemus. Ex horum vero numero peioris adhuc notæ sunt, quæ ex Saturno depromuntur. Hæc uti exterius non carent sua laude & virtute: ita interius usurpata, fibras nerveas intestinales constringendo, veri veneni naturam, & vim habent; adeo ut ipsa, ceu per se quidem non damnosa, tamen quoad usum internum damnanda, e re publica medica, jure meritoque exterminari debeant. Memoratus morbus recte dici potest colica convulsiva; quæ ab HIPPOCRATE *libr. de victu acutor. §. 61.* cholæræ siccæ nomine venit, qui hunc in modum ejus naturam, & curationem perite & optime exponit: *In cholera sicca venter inflatus est, & strepitus insunt. Dolor laterum ac lumborum: secedit autem nihil deorsum, sed alvus adstricta est. Talem obser-*



vato, ut ne vomant, sed alvus subeat. Infusum itaque calidum ac pinguius quam citissime per clysterem immittitio, & oleo illitum in aquam plurimam calidam paulatim affundens, & si calescenti ipsi alvus subierit, morbus solutus est, a cibis vero abstineat: sique non remiserit dolor, asinum lac bibendum dato, donec purgatus fuerit.

## OBSERVATIO VII.

*Colica flatulenta ex larum, & sepe ringeret carne suilla*  
Vir quidam plebejæ sortis, robusti & obesi corporis 30. circiter annorum, cerevisia ebrius, rixando in diversorio cum suis similibus, domum brumali tempore revertitur, & carnem suillam pinguiorem cum magna panis copia ingerit. Alvi fluxus cum torminibus in sequebatur; sed, cum sub cælo frigidus alvum deponeret, sistebatur. Unde dolores ævisissimi totum occupabant abdomen, lumbos, hypochondria: atque alvus erat valde obstipata, artus frigidi tremiscebant, summa aderat anxietas, & inquietudo, internaque præcordiorum angustia, & constriction; demum spasmus, & dolor genua infestabat eaque constringebat. Curatus fuit jusculo avenaceo, in quo flores chamomillæ, & sambuci cocti, quod cum salis Ebsoniensis, & nitri dosi atque oleo amygdalarum dulcium per vices sumsit, non omissis clysteribus oleosis & emollientibus, atque internis carminativis & anodynis. Postea crebro balnei aquæ dulcis usu, ad convulsivas artuum tractiones leniendas, sanatus est.

*Epicrisis.*

Ad subitam atrocis hujus ventris doloris generationem, variæ, sed valide concurrebant causæ: ebrietas, affectus iræ, & post hanc ingesta pinguium, & viscidorum ciborum copia, frigus, & ab hoc alvi fluxus suppressio: Non mirum hinc est, ex flatibus intra intestinorum cavitatem excitatis a spasticis tunicarum intestinalium contra-

ctionibus, intus retentis, & incarcerationis, tam atroces dolores & gravissimas nervosarum partium adstrictiones fuisse productas. Et quia obstructio alvi proxima causa horum malorum fuit, eam rursus aperiri expediebat. Quod vero non promiscue per purgantia, & fortiter stimulantia, quæ dolores & spasmos potius excitant, fieri debet, sed per salia oleosis, & demulcentibus mixta, ex quo nomine sal Ebsoniense laudamus, quod ad unciam in aqua solutum & exhibitum, præmissis clysteribus, ad flatum & excrementa provocanda, præ omnibus aliis laudem & commendationem promeretur. Balnea aquæ dulcis ex emollientibus & roborantibus paratis, ad robur partibus externis conciliandum, quod a vehementi dolore, & spasmo plane læditur & destruitur, in fine ejusmodi morborum nil est convenientius, nil efficacius; cum veteres, inter quos HIPPOCRATES, GÆL. AURELIANUS, TRALLIANUS, ARETÆUS, usum eorum mirifice tollant atque commendent.

## OBSERVATIO VIII.

Serenissimus S. R. I. Princeps ante aliquot annos per Archiatrum adversam suam valetudinem, salutare consilium suppeditandi causa, ad me per-  
*Tuta methodus curandi colicæ ex morbis prægravis etiam.*  
scribere jussit. Is cum in florente ætate constitutus, boni & sanguinei corporis habitus, ingenii valde vividi, & alacris narium hæmorrhagiæ in juventute valde obnoxius esset; per integrum ferre annum sævis doloribus, & atrocibus intestinorum tormentis fuit affectus: quo factum est, ut in ingentem virium lapsum atque in corporis tabescentiam conjectus fuerit. Ad fluxum hæmorrhoidalem quædam adfuit suspicio; qui tamen non rite, & ex voto procedebat. Ad hunc promovendum, & dolores mitigandos varia usurpata fuere remedia, & quoque pilularum polychrestarum, & ad exemplar Becherianarum paratarum fre-



frequens usus intercessit: qui parum tamen profecit. Quæsitum itaque a me fuit: utrum thermæ Carolinæ convenienti regimine usurpatæ, tuto & exoptato cum fructu possint adhiberi? Ego responsum dedi, quod tam ad arthritidem, quam ad dolores ventris spasmodicos, nec præstantius, harum thermarum usu, cognitum mihi sit atque perspectum auxilium, quod multis exemplis confirmare valerem. Huic consilio multi, & Medici quoque, ob anceps remedium & verendum periculum, sese opponebant; dubio procul ex hac causa, quod nullam prorsus de hisce salutiferis fontibus, ratione ingredientium, & virium, habuerint notitiam & experientiam. Serenissimus Princeps autem pro eo quo pollebat iudicii acumine, utpote omnis hætenus destitutus fuerat auxilio, sententiam meam amplexus, iter suscepit, per hanc civitatem transiens: & fatigatus ex itinere hic advenit, sed in uno pede tumore erysipelaceo ingenti correptus, qui sano vel triplo grandior erat. Altero die intolerabiles abdomen invadabant dolores, tanta cum ferocia, ut clamores & lamentationes exprimerent, & omnem somnum adimerent. Ad quos sopiendos & ego, & alius loci hujus Medicus accersebamur, sed præter clysteres emollientes, & carminativos, atque linimentum externum, pulverem ex antimonio diaphoretico, nitro, sale absinthii, & lapidibus cancrorum paratum per vices dedimus: sanguinem quoque e pedis vena emittendum curavimus; sed parum inde levaminis persensit. Per tres & ultra dies dolorum persistit atrocitas. Tandem consultum duximus: præmisso fotu, hirudines quinque ano applicare: quæ sanguinis aliquot uncias extrahebant, quo facto insignis dolorum remissio & sensim plenaria sanitatis restitutio, Divino sub adjutorio est secuta. Data instructione de usu harum aquarum decenti, adiit Carolinas & per 4. fere

hebdomades iis interne usus est: balneum quippe interdici: pediluvium vero pro discussione tumoris in dies adhibuit. Quæ cura ex voto successit: & ad nos sanus & incolumis Serenissimus est reversus, non sine insigni comitatus gaudio & applausu. Immunis a truculento affectu tam colico quam podagrico per integrum mansit annum. Altero anno & iter, & curam hanc repetit, majorique virium augmento rediit, integra etiamnum, ut mihi relatum est, valetudine gaudens.

*Epicrisis.*

Quin arthriticus, & colicus spasmodicus dolor nimiam sanguinis abundantiam, ejusque impeditiorem per mesenterium & viscera abdominis transitum, pro vera causa agnoscat, nihil dubitandum est. Minus recte; sed perperam horum malorum, per promotionem fluxus hæmorrhoidalis tentata fuit depulsio. Per multis ego exemplis compertum habeo, quod si natura non inclinet ad hunc fluxum, & meatus ad egerendum sanguinem non satis sint dispositi, ejusmodi calida gummoso-resinosa, & aloetica, urgendo sanguinem ad intestina, colon & rectum, detrimentum potius quam emolumentum afferre. Jam vero ipsa dictitat sana ratio, quod longe tutior, & certior hisce malis medendi sit via, si per viscera abdominis inque primis hepar, liber sanguinis motus & circuitus promoveatur; quod omnino per convenientem aquarum mineralium & maxime Carolinarum usum præstari & confici potest; cum multa mihi hisce sanatorum morborum obvia sint auspiciatissimi successus exempla. De cetero singularis & plane admirabilis, in sedandis ejusmodi doloribus, ex admotione hirudinum effectus meretur animadversionem. Et inde luculenter intelligimus, sanguinis missionem, quæ fit in partibus a loco affecto remotis, non tanti esse momenti, & usus, ac illa, quæ in locis propinquioribus instituitur; quamvis non negaverim, tali etiam



in casu, si corpora sanguine nimium exundant, ante hirudinum applicationem, venæ sectionem sæpe numero utilissimam observari.

## OBSERVATIO IX.

*Tuta metho-  
dus cu-  
rãdico-  
licã ex  
mo. bis  
prægre-  
ssoria* Post crebriores ex calculo renali dolores, post alvi fluxus atque intermit-  
tentes perperam curatas, sæpe numero, ego in praxi, intestinorum tonum & motum naturalem labefactatum & destructum notavi. Nam ab eo tempore, & alvus non rite respondit, & flatulentis, borborygmis, & assiduis eructationibus, concurrente præsertim sedentaria vita, per longum temporis spatium decumbentes affecti fuerunt. Ad quas molestias, & incommoda avertenda & tollenda, sequenti methodo haud infeliciter sæpe numero usus sum. Pilulas meæ compositionis leviter laxantes balsmicas, bis in septimana ad grana 15. vel 20. mane sumendas ordinavi, ubi præcedente die circa lecti introitum, salis aperitivi dosis quod e. g. ex tartaro vitriolato, nitro, sale Ebsonenſi, terra foliata tartari concinnari potest, præmissa fuit. Dein ad labefactatum intestinale tonum & labem restituendum, essentiam carminativam B. *Vedelii*, quæ ob spiritum nitri, ejus compositionem ingredientem, singulari flatus discutiendi facultate pollet, quando cum dimidio essentiaë cascarillaë, item una spiritus de tribus miscetur, ego non satis dilaudare possum: cujus medicamenti conveniens pro circumstantiarum ratione dosis, bis de die, mane scilicet, & finita post prandium concoctione, in idoneo exhiberi potest vehiculo. Sed opera danda est, ut cibi fermentescibiles inflantes, pingues, & qui difficilioris sunt concoctionis, atque ante omnia frigus evitentur. Præterea & id quoque compluries in praxi mea annotavi, quod dolores colici & flatulenti, cum borborygmis & ructationibus, interna

angustia atque gravitatis circa præcordia sensu, a sola sphincteris ani valida constrictione & angustia, hæc vero a copiosiori sanguinis vel feri affluxu ad ejus venas internas vel externas hæmorrhoidales suborti fuerint: ex quo fit, ut nec flatus nec excrementa liberum habeant exitum, sed retenta resiliant & versus superiora ferantur, plurimum molestiaë & incommodi procreando. Tali in casu, quando fortior sit ad exercendum alvum nisus, is plane inanis est: exprimit quippe mucum instar albuminis ovi & quandoq; prolapsum recti efficit; imo vidi herniam inguinalem inde productam, sique hæc, vel scrotalis jam præsens fuerit, longe grandiore factam. Atque hic tenendum, quod suppositoria, præsertim stimulantia, & acriorem dolorem, & majorem affluxum exitando, malum exasperent: quin potius clysteres emollientes, & interne pulveres absorbentes nitrosi; item infusum manatum cum cremore tartari, & interdum si plethora urget, venæ sectionem, commodissimum invenisse locum testari possum.

*Epicrisis.*

Ad tonum & motum intestinorum labefactatum, qui obstructionis, flatuum, dolorum, & multorum aliorum incommodorum causa ac fons est, reparandum & con firmandum, ego non modo remediis internis, sed etiam clysteribus accommodatis & idoneis usus sum felicissime. Et tales sunt, qui ex speciebus, quæ non tam evacuante sed & roborante efficacia pollent, parantur: cujusmodi sunt herba salvia, rutæ, flores chamomilla Romanæ, baccæ lauri, juniperi, semen anethi, carvi, myrrha, quæ leni facta ebullitione, in vini Gallici & aquæ communis æquali portione, extrahantur, & injiciantur. Quandoque portionem balsami nostri liquidi vitæ, clysteribus carminativis adjiciendam curavi. Sed necessarium est, ut ante horum usum, alvus aperta, & a flatibus libera sit. Præterea, & hoc loco id  
mo-



monere consultum duco, quod ubi humor in extremitate intestini recti, flatuum & incommodorum in imo ventre, obstructionis quoque alvinæ causa sit, pilulas purgantes, item quæ aloen recipiunt & motum sanguinis ad intestina crassa dirigunt, nisi malum exacerbare, & revocare velimus, plane non, vel cautissime exhibendas esse.

### OBSERVATIO X.

Curatio  
colica,  
ex mor-  
bis ex-  
terna-  
sitis, vel  
retroce-  
dentibus,  
vel non  
expulsi

Placet in genere quasdam adhuc in-  
sinuare observationes practicas non e-  
xigui momenti, quarum attentior  
consideratio Medicis junioribus haud  
parum utilitatis & adjumenti, in sa-  
nandis intestinorum dolorificis affe-  
ctionibus afferet. Nam sæpius anno-  
tavi, familiarissimo nostro ævo, qui  
feminas præcipue corripit morbo pur-  
puræ videlicet, intestinorum dolorem  
sæpius adjungi, idque maxime eveni-  
re, quando incauta victus ratione, vel  
importuna medicina vitiosa non satis  
ad habitum corporis protruditur, sed  
intus retinetur, aut a superficie cor-  
poris retrocedit: qua ad intestinorum  
tunicas delata, subito tormina, aliaq;  
gravia accidentia incidunt. Neque  
vero tam facilis labor est, peccantem  
humorem ad extimam rursus cutem  
prolicere, sed moderationis, temporis  
& patientiæ beneficio est. Lenissima  
vero & æqualis est procuranda diapho-  
resis, per crebrius datos pulveres dia-  
pnoicos cum tantillo nitri, & cinna-  
bari: liquor etiam anodynus mineralis  
paucioribus liquoris *Bussi* guttulis  
animatus, ad foras excludendam pes-  
simæ indolis materiam, plurimum  
valet. Uti vero in hoc morbo potus  
cerevisiæ nunquam non noxius; ita  
plus detrimenti, si retrocedens mate-  
ria interiores nerveas partes obsidet,  
certo affert. Commodum itaque ex  
demulcentibus, & acrimoniam tem-  
perantibus placideque e diaphoreti-  
cis speciebus decoctum cum aqua pa-  
ratum, per totum morbi decursum  
est offerendum. At vero cum ex fre-

*Hoffm. Syst. T. IV. P. II.*

quenti observatione compertum ha-  
beam dolorem colicum in iis, qui  
purpuræ scorbuticæ sunt obnoxii sæ-  
pius repetere, & gravibus accidenti-  
bus ægrotantes torquere, sine ullo in  
extimis partibus apparente exanthe-  
mate, quidem ad avertenda hæc mala  
non efficacius remedium, præter u-  
sum acidularum temperatarum cum  
tertia lactis vaccini, vel quod ego  
protulerim, asinini parte facta misce-  
la, verno tempore susceptum, repe-  
rire potui.

Deinceps frequentius id in praxi  
mea observavi, quod dolores intesti-  
norum paulo acriores, ubi in extrema  
ætate constitutos adoriuntur, & pau-  
lo diutius insistent, vitalibus viribus  
valde attritis, lethalem plerumque e-  
xitum post se relinquunt. Cujus even-  
tus ratio mihi hæc videtur, quod senes  
ordinario, ob virium languorem, &  
discrasiam humorum intemperatam,  
& scorbuticam, ex levietiam partis  
externa læsione, in sphacelum sint  
proclives. Quod multo magis eveni-  
re puto, quando a dolore, & spasmio  
intestina, velut partes texturæ pror-  
sus nervosæ & fibrosæ, paulo acrius  
infestantur. Ex quo intelligitur, quam  
caute, & provide, circa res diæteti-  
cas infirmi senes se gerere debeant,  
ne quicquam admittant, quod dolores  
& spasmos in intestinis excitare a-  
ptum sit.

Neque dum in hac materia ver-  
samur, quæ non minoris in praxi  
momenti est, hanc observationem  
præterire possum ac debeo, quod  
biliosa colica, ea præprimis quæ ex  
gravi prognascitur ira, tertianæ si-  
ve continuæ sive intermittenti super-  
veniens, magni non exars sit peri-  
culi, utpote quæ perperam a per pur-  
gantia, emetica aut sudorifera, vel  
nimium calorem externum tractata  
quam facile in intestinorum tenuium  
inflammationem lethalem, præcun-  
tibus anxietatibus, & convulsionibus  
transeat, & die paroxysmi mortem  
plerumque accersat. Ex quo disce-



re Tyrones possunt, quam provide, & caute tractare debeat; tertiana alias benigna detentos, tam gravi symptomate incidente, Ego in demulcentibus, & contemperantibus potionibus ac lenioribus laxantibus, cujus generis sunt serum lactis bene depuratum, decoctum avenaceum ex floribus chamomillæ vulgaris, emulsio amygdalarum dulcium, papaveris & feminum 4. frigidorum majorum cum ptisana præparata, pulvis *Marchionis*, vel ex lapidibus cancrorum nitro & rhabarbaro confectus, atque clysteres emollientes, optimum, & præsentaneum auxilium deprehendi.

## CAPUT VI.

*De acuto Dolorē & spasmō ex calculo renali.*

Theses Pathologicæ.

## §. I.

*Dolor ex calculo renali diffici-  
lius dignoscitur*

**D**olor, qui ex calculo renali firmius urinæ meatibus impacto proficiscitur, & omnium quidem passionum, quæ genus humanum misere torquent, acerbissima: ita sæpius fit, ut is, si quis prima præsertim vice ex hoc laboret, difficillime ab aliis, quæ circa regionem lumbarem consistunt dolorificis affectionibus discernatur.

## §. II.

*Nō omnis dolor circa lumbos est ex calculo renali.*

Communis sed pessimus mos invaluit, ut, si quis circa regionem lumbarem doleat, statim ex calculo renali se dolere existimetur; cum tamen ibi complures valde sensilis indolis, & dolori obnoxie sint partes, ut musculi lumborum externi & interni, ligamenta vertebrarum lumbarium nervea, plexus nervorum superior mesentericus, ramus arteriæ meseraicæ superioris, & circa vicinia, flexuosus intestini duodeni finis, neque minus sigmodea coli flexura; quæ singulæ, quando a vitioso ibi sta-

gnante, sive sanguineo sive seroso impuro humore, vel nimis distenduntur, vel comprimuntur, dolorem satis gravem exhibent. Fit etiam quandoque, ut a rheumatismo has partes occupante tantus exurgat dolor, ut quasi lumbis per medium sectis incurvatus incidere debeat æger, nec surgere queat. Quod itidem fieri solet, si a casu, vel a magna oneris levatione, vertebræ cum nervis tantillum a propria sede recedunt. Neq; tam raro evenit, ut a sola sanguinis copia, circa plexum mesentericum, & circa arterias emulgentes stagnante, in plethoricis vel hæmorrhoidariis, vel a neglecta consueta venæ sectione, ingens circa lumbos oboriatur dolor, qui vulgo pro calculoso, sed perperam, habetur: dum vel solius venæ sectionis in pede beneficio, vel pulvere nitroso discutiente subito sæpe definit.

## §. IV.

Id vero frequentius contingit, ut dolor colicus cum nephritico calculoso confundatur: nam quando flexura coli circa lumbos quæ jacet, vel flatibus nimium distenditur, vel spasmodice constringitur, non modo atrox in regione lumbari fit dolor, sed & ipse ad præcordia transit, nauseam ac vomendi conatum efficit, urinæ fluxum impedit, alvum constringit, imo totum abdomen cruciatibus torquet, non secus ac a calculo fieri solet. Sed tamen, quia hic dolor spasmodicus, non assiduus, non fixus, sed magis vagus est, ac clysteribus emollientibus alvo infusis magnopere levatur; hinc peritus utique Medicus, hunc a calculoso, non adeo difficulter distinguere potest: cum hic magis præstorius sit, quod germanice exprimunt: *Es brude sie, als ein Rlos*, atq; vires non tam intense destruat, per intervalla etiam remittat, ut egrotantes sæpius surgere, & ambulare possint; quod in acerbo intestinorum dolore non accidit. Deinceps vomitus & nausea, a calculo si dolor est, jejuno ventriculo magis urget, ac in uretra imo ipsa glande titillatio, & sensus pun-

*Quomodo discerneretur a colica*

cto-



Storius percipitur, urina sabulo re-  
ferta, testiculi quoque retractio ac  
femoris stupor & contractio ejusdem  
lateris fit, quod in dolore intestino-  
rum vix observatur.

## §. IV.

*Calculus* Notabile est, quod a calculi etiam  
*nō nisi a* prægrandis magnitudinis etiam in-  
*sede sua* signibus præditi in renum substan-  
*dimotus* tia, sine ullo doloris incommodo, per  
*atroci-* aliquot annos quieti delitescere pos-  
*ter affli-* sint, simulac vero e sede sua dimo-  
*xito.* ventur, & in angustos nerveo muscu-  
losos canales, uretheres dictos. descen-  
dunt, perque hos in vesicam exitum  
moliuntur, mox gravissima invadunt  
symptomata: adeo, ut hi ipsi canales  
veram & fixam dolorum ex calculo se-  
dem ac domicilium constituent, qui  
tamen pro differente calculi magnitu-  
dine, asperitate, ac figura tunicas ner-  
veas plus minus discindente & lanci-  
nante, vel intensiores vel leviores eva-  
dunt. Quandoque tam crudeles sunt,  
ut præter extremorum horrorem, &  
refrigerationem, nauseam, vomitum,  
spasticam præcordiorum constrictionem,  
difficilem urinæ mictum, alvi  
stricturam, spirandique angustiam  
stuporem cruris, retractionem te-  
sticuli ad os pubis, inquietudinem,  
ingentem virium lapsum, syncopen,  
convulsiones etiam epilepticas conci-  
tent, vel plane fatalem ischuriam in-  
ducant. Vidimus aliquando egrotan-  
tes conquestos fuisse, se non alium  
sensum percipere, ac si quis cultro a-  
cuto vulnus profundum, secundum  
longitudinem spinæ, versus vesicam  
continuo infligeret; ubi in defunctis,  
uretheres instar sarciminum a copia  
urinæ, cujus in vesicam influxum cal-  
culus circa introitum uretheris in vesi-  
cam hærens interceptit, extensi & tur-  
gidi comparuerunt.

## §. V.

*In ure-* Res est experientia confirmata,  
*tere se-* quod interdum longo tempore lapis  
*pe sin-* in urethere, sine singulari dolore, sine  
*gulari* mictus interceptione hære, & con-  
*dolore* quiescere possit, ubi tamen mox subito  
*hæret.* & ex improvise dolor revertitur acer-

bus, tum ciborum subsequente fastidio,  
nausea, vomitu & urinæ interceptio-  
ne; forsan quod ab incommodo motu  
situm suum mutaverit lapis, & sic as-  
peritate, tunice nerveæ fibras magis  
offendat. Neque etiam semper iisdem  
symptomatibus hic affectus stipatur:  
nam, ut ERASMUS de suo calculo  
loquitur in *Epist. ad PercK meyerum*,  
*subinde se novat, ut plane credatur a-*  
*liud esse malum; quod maximam par-*  
*tem inde pendet, quod alia symptoma-*  
*ta sint ab initio, alia in progressu, in-*  
*terdum quiescat, interdum se moveat,*  
*& locum mutet.*

## §. VI.

Atqui etiam illud attentionem ex-  
citare debet, quod calculi sinistrum  
renem, præ dextro, frequentius obli-  
deant; quo fit, ut dolores ex renali cal-  
culo longe crebriores in sinistro, quam  
in dextro latere observentur: id quod  
confirmat CAROL. PISO in *tract. de*  
*morbis ex serosa coluv. oriund. c. 2.* dum  
scribit: *ex centum calculosa nephritide*  
*laborantibus octoginta, & amplius re-*  
*nem sinistrum dolent.* Neque hujus e-  
ventus ratio, adeo in obscuro posita  
est: in rene enim dextro, quia hepatis  
amplo viscere tegitur & majori præ al-  
tero calore fovetur, promptior multo at-  
que expeditior evadit sanguinis per  
hujus renis vasa progressio, seri itidem  
urinosis separatio: hinc non tam facile  
sanguinis & urinæ fieri in hoc possunt  
stagnationes, ac in sinistro, qui coli-  
flexura obsessus, ob frequentem fla-  
tum restagnationem magis premitur;  
ex quo fit, ut liberior sanguinis per va-  
sa compressa interceptus cursus, diffi-  
ciliorem laticis, urinosis per tubulos  
transcolationem, atque promptiorem  
ibi stagnationem & materiæ tartareæ  
secessionem, & concretionem reddat:  
atque efficiat.

## §. VII.

Notabile idque experientia pariter  
suffultum est, quod calculus diutius  
in renum parenchymate vel pelvi de-  
litescens, pluribus modis ac causis, e  
loco suo dimoveri atque in uretheris

*Sinistrum*  
*tamen*  
*præ*  
*dextro*  
*infestat.*

*Causas*  
*cū e re-*  
*ne di-*  
*move-*  
*tes o.*



principium propelli possit : & inter has , primas fere tenent,fortior animi per iram conturbatio, corporis subita , & vehemens per vecturam sive equitationem commotio , inque primis penetrans , quod venti e plaga septentrionali præbent, frigus improvide lumbis admissum , item diureticorum , cujus generis sunt therebinthinacea , juniperina, cetera, quibus subinde sed perperam Medici ad præservationem a calculo uti solent , liberalior usus . Non semel quoque , sed iterum iterumque observavimus , quod dolores colicæ flatulentæ , item spasmi hypochondriacis , hystericis , hæmorrhoidariis familiares, nucleos calculosos papillis renalibus inherentes protrudendo , occasionem ad crudeles istos dolores subministraverint .

## §. VIII.

*Causa  
remota  
calculi  
renalis*

Quod attinet ad causas remotas & sic dictas naturales, quæ ad gignendos in renibus calculos & inde provenientes dolores symbolum suum conferunt; temperamentum sic dictum sanguineum, inter has non ultimum tenet locum. Nam corpora mollioris & spōgiosioris texturæ , feminini præsertim sexus , & quæ copiosum alunt in venis sanguinem, diætâ lauta & vinosa utuntur, otioque & vitæ sedentariæ indulgent, nec non placentis , lacte , caseo delectantur , post quinquagesimum maxime annum, tributo lunari cessante , doloribus ex calculo fiunt obnoxia ; a quibus plerumque libera , & immunia , fluxu mensium rite se habente, persistunt. Ex Viris , ii qui in adolescentia hæmorrhagiis narium, capitis doloribus frequentibus subjecti fuerunt , item qui hæmorrhoidali fluxui sunt assueti, hoc cessante, vel imminuto, calculosis , & podagricis affectionibus, sub provectiori ætate , subinde tentantur . Senilem vero ætatem frequentius , & calculo renum & vesicæ infestari experientia docemur , quia humores fiunt crassiores & cibi in ventriculo acescunt , alvus fit pigrior , & orium quoque calculorum generationi

multum patrocinator . Quo fortasse respiciens ERASMUS de suo malo ipse ita jocatur . *Illud mirum videri potest , cum femina sterile scant ætate , me senectus fecit fecundior : nam in dies crebrius parturio .*

## §. IX.

Accedit etiam hoc , quod vix ulus affectus tam crebro ex parentibus in liberos transmigrare observetur , quam calculus , & podagra , quippe quæ cum illo , ratione dispositionis solidorum , & fluidorum plurimum affinitatis habet , quia uterque adfectus non modo hominibus sanguine plenis , & qui vulgo dicuntur sanguinei , est infestus , sed ambo etiam in quadam nativa debilitate , & atonia solidorum , videlicet in nephriticis , renum ; in podagricis ligamentorum , quæ articulos vinciunt , fundati sunt . Crebrius quoque animadvertimus morbos rheumaticos , arthriticos , podagricos quam facile transmigrare in nephriticos , & hos rursus per metastasin in illos transformari , & transponi , adeo ut etiam , si a dolore ex podagra quis diu immunis fuerit, in calculosam nephritidem facile incidat , & vice versa . Neque raro contingit , utrumque affectum conjunctim , & uno tempore atroci dolore hominem torquere .

## §. X.

Quod attinet ad generationem calculorum in renibus , hanc tali modo concipere licet : quando a nimis vehemente sanguinis appulsu , ejusque regressu per venas difficiliore , vasa renum sanguinea nimium distenduntur , & intarciuntur, fit tandem , ut minima arteriolarum , ubi in papillas , & syphunculos urinosos abeunt , aperiantur ac disrumpantur , & ita stagnante & extravasato sero sanguineo , primum parvi abscessus atque ulculosa , generentur , quæ successive majora fiunt ; in quibus , quando serum urinosum multi tartareis limosis partibus refertum subsistit , par-

*Calculus & podagra sunt morbi maxime hereditarii.*

*Ratio formati calculi renalis*



particulæ graviores & acuminatæ secedunt ac invicem concrescunt, ita quidem, ut materia primo crassior ac rudior sabulosa, dein etiam grana compactiora gignantur, quæ urinæ copiosius secreta beneficio facile eluuntur, & sæpius non sine dolore foras propelluntur: ubi igitur talem crassum ac grave sabulum, in urina subsidet, haud dubium calculosæ nephritidis, indicium præbet. Quando vero hi acini, vel nuclei calculosi, substantiæ renum ulcerosæ insidentes, successiva accretione majores & duriores facti, alluvione feri urinosi tartareis partibus referti, vel aliis ex causis ad pelvim & principium uretherum feruntur, majores utique cruciatus, & atrocior symptomatum concursus omnino metuendi sunt, si videlicet, per angustos hos exquisitioris sensus meatus, iter suum versus vesicam conficere debent; ad quam si fuerint delapsi, protinus omnimoda symptomatum, cum ingenti decumbentis gaudio & virium restitutione, fit sublatio.

## §. XI.

*quæ de-*  
*monstra-*  
*ntur.* Quod calculi autem in ipso renum parenchymate ex ichoreso vel sanguineo purulento quodam stagnante humore generentur; id inter alia vel hæc evincunt, quod in nephriticis sæpe quippiam purulenti vel sanguinei, ut olim a CELSO jam notatum, cum urina secedat, calculosis etiam mictio cruenta familiaris sit, & renes post mortem valde magni flaccidi, atque exulcerati inveniantur: quid non curatio id ipsum testetur, quæ omnium optime, per abstergentia, vulneraria, consolidantia, lenitur constringentia perficitur. Neque vero ego inficias iverim, citra præviam substantiæ renalis læsionem, in pelvi vel majoribus renum syphunculis, ex urina stagnante, materiam etiam tartaream sive arenulas aggeri & concrescere sensim paulatimque in insignis molis lapillos posse. Prout

vero materia illa, sive sit ichorosa; sive tartarea, ratione coloris, crasseos & consistentiæ differt & accretio major vel minor est; varii generis etiam lapilli concrescunt: alii quippe sunt prope saxei, dura constantes substantia; alii friabiles & male compacti, alii pallidi cinerei rubri ac Sanderachini; alii majores, minores, plus minus angulosi & asperi deprehenduntur.

## §. XII.

Omnes morbos nephriticos, ut sunt renum infarctus, inflammationes, exulcerationes, dolores ex calculo, difficilior in senioribus sanari experientia confirmat; quæ etiam HIPPOCRATIS testimonio, quod *aphor. 6. Sect. 6.* extat, ulterius stabilitur. Nam sicut læsiones & exulcerationes internarum partium, propter humorum intemperiem & excrementorum abundantiam, quæ in provectiori ætate increscit; ita etiam quæ renibus & vesicæ inhærescunt, propter urinæ ingentem acrimoniam, difficillime ad sanationem perducuntur.

## §. XIII.

Si quando dolor atrox per plures dies & noctes non remittit, sed assidue torquet, & vires valde atterit ac nullis vult medicamentis experientissimæ alias virtutis cedere, omnimoda quoque urinæ accedit suppressio, cum extremorum frigore & convulsione tandinum, mortem in propinquo esse, indicio est. Maxime vero omnium, dolor ex calculo, iis exitum atque periculum minatur, qui antea diuturno animi mœrore macerati, vires amiserunt: nam major virium mox sequitur dejectio, partiumque internarum sphacelatio. Neque res boni ominis est, quando lapis, longo tempore ureteri continuo inhærescit; perit enim ciborum inappetentia ac digestio, nausea vero & firmiter conatus ad vomendum, anxietasque diutius persistens, tandemque lentus hecticus calor, virium & carnis sub-

*Renum effectus difficilior, in senibus sanantur.*

*Quæ mortem præsentiant.*



substantiam penitus consumens, mortem accelerat.

## §. XIV.

*Tabes  
renalis  
perimie*

Post mortem miræ sæpe magnitudinis valdeque compactus & ramis majoribus instructus, calculus, in renibus, qui toti per exulcerationem consumti & membrana duriore tecti comparuerunt, repertus fuit, cum de dolore per vitam nunquam quis fuerit conquestus: & tali malo adfecti tabe moriuntur, quæ renalis vocatur. Quidam vero ex calculi doloribus, brevi tempore succumbunt, & morbo acuto pereunt, dum acutissimum dolorem, ventriculi vel intestinorum, tandem inflammatio subsequitur; quidam ob totalem urinæ suppressionem, in hydropem pectoris, lethargum vel convulsiones incidunt.

## C U R A T I O.

## §. I.

*Indica-  
tiones  
curato-  
ris.*

**M**Omentum profecto omne curationis positum esse videtur, tum in facili & ab omni molestia immuni calculorum exclusione, tum in impedienda sabuli excrementitii generatione tanquam occasionis & objecti sævissimi doloris & aliorum symptomatum. Longe enim alia medendi via ac ratio est, in ejus accessione: alia extra eam, quæ præservatoria est.

## §. II.

*In pa-  
roxys-  
mo do-  
lor &  
spas-  
mus se-  
dandus.*

In ipso paroxysmo, ubi symptomatum ingens est exacerbatio, & ab atroci dolore tota œconomia functionum vitalium turbatur, primo omnium eo respiciendum est, ut dolorum vehementia, idoneis remediis mitigetur, atque spasticæ stricturæ, quæ non modo partes vicinas, sed totum subinde nervosarum partium systema lege consensionis afficiunt, idoneis remediis componantur ac sopiantur; idque maxime eam ob causam, quia sub tanto spasmorum, qui meatus urinarios constringunt, im-

petu, calculi iter per ureterem in vesicam ægerrime perficitur. Inter probatæ vero & spectatæ virtutis remedia, quæ huic intentioni satisfaciunt, non possum non liquorem meum anodynum mineralem, ob efficacem & securum usum, dilaudare; quippe qui pariori sed repetita dosi sumtus, spasmos circa primas vias sedando, molestam illam sensationem, nauseam ac vomitionem egregie tollit. Qui hujus autem medicamenti copia caret, huic, spiritum nitri, rite, methodo nostra, quam præscripsimus in *Observ. physic. chym.* præparatum, plurimum commendamus; hic enim nullo amplius calore imbutus, blanda sulphurea exhalatione, & flatus discutit, & spasticas stricturas relaxat. Commodissime vero hi spiritus cum aquis sedativis, ut sunt, cerasorum nigrorum, florum acaciæ, sambuci, papaveris rhœados, tilix, primulæ veris, liliorum convallium, ulmarix & præcipue omnium florum chamomillæ & summitatum millefolii, adjecto syrupo papaveris rhœados vel albi: vel etiam in brodio carnis, cum aliquot cochlearibus olei amygdalini recentis & purissimi, sine tostione prævia parati, exhiberi possunt. Spectant huc quoque emulsionibus, ex amygdalis dulcibus, seminibus 4. frigidis, papaveris, milii folis, semine dauci, cum jam dictis aquis præparatæ & syrupi papaveris albi sufficienti quantitate edulcoratæ. Quando vero leniora hæc, dolori mitigando non sufficiunt, ad paulo validiora transeundum, & quidem opiatæ, per aliorum additionem valde correctæ & secura reddita, cujus generis sunt, massa pilularum *Wildegansii*, *Starckii*, laudanum liquidum *Sydenhamii*, & cœlestis theriaca; item trochisci de *Alkekengi*, qui ob virtutis præstantiam & ingredientia dolori mulcendo aptissima, laude omnino dignissimi sunt.

## §. III.



## §. III.

*Laudan.* Præter hæc dicta, nitrosa, & inter hæc nitrum tantum purificatum & crystallisatum, vel artificiale ex spiritu nitri & sale tartari compositum, vel nitrum antimoniatum, in compescendis præcalidis gravibus & acutis doloribus cum sanguinis & humorum exæstuationibus junctis, certe omnibus aliis remediorum generibus, virtute ac securo usu, superiora sunt, atque in morbis nephriticis laudem insignem promerentur. Quam optime vero cum cancrorum lapidibus, cum cinnabari, vel pulvere Marchionis & aliquot granis trochiscorum alkekengi vel massæ pilularum *Vildegansii* miscentur, & cum emulsione vel sero lactis dulcis propinantur.

## §. IV.

*Clysteres* Enim vero, ubi dolorum & spasmodorum vehementia fere intolerabilis est, sola interna huic sedando non sufficiunt, sed externis etiam occurrere oportet. Inter omnia autem desideratissimi effectus, clysteres sunt, ex emollientibus floribus, præsertim malvæ hortensis, sambuci, papaveris rhœados, millefolii, chamomillæ vulgaris, & verbasci, cum sero lactis decoctis, addito syrupo dialthææ *Fernelii*, nitro & sale Ebsoniense coniecti. Quando inferior recti & coli pars constrictissima est, ut flatu transmitti nequeant, sed ad superiora vergentes, anxietates augeant, ementa ex oleis & pinguedinibus, ano injecta, mirabilem attulisse opem, non una sed pluribus vicibus a nobis est observatum. Alvo aperta, flatibusque sic exitu parato, stomachi vomibundæ inversiones, cum anxiis præcordiorum intensiōibus, protinus remittunt.

## §. V.

*ne non balnea magna efficaciter sunt.* Deinceps, in mitigandis hisce doloribus, veterum inque primis HIPPOCRATIS methodum, uti antiquissimam, ita optimam maximique habendam esse censemus, dum *lib. 5.*

de intern. affection. hæc tradit: cum dolor in renibus presserit, multa calida lavato, & tepesactoria, quæ parte maxime dolet, adhibeto. Idem remedium TRALLIANUS *lib. 9. cap. 4.* his verbis valde commendat; omnium optimum est balneum, ut quod non solum mitiget, sed & curare possit: nam colicos frequenter solummodo leniter; nephriticos vero utraque ratione juvat, utantur vero agri loco inunctione, chamæmelo, in balneo & diutius morentur, non semel tantum in die sed bis vel ter lavare expedit. Et profecto, balnea & infusus ex aqua dulci, præsertim pluviali, temperate calida, in sistendis acerbissimis tormentis, vix habent sui similia, si modo crebrius repetantur. Atqui linimenta, ex axungia humana, cati sylvestris, canis, castorei, unguento dialthææ, vel etiam vesicam, decocto florum emollientium antea recensitorum, ex lacte, repletam, ac parti intense dolenti applicatam, singularem plane exercere virtutem & efficaciam, multiplici usu, confirmatum habemus.

## §. VI.

Quandocunque, legitimum horum *Spasmo sedato, calculi protrusio tentanda.* usum, notabilis spasmodorum sequitur remissio, pulsus sedatior & mollior evadit, calor madidus ac æquabilis totum corpus occupat, & flatu probe ex ano descenditur; protrusio calculi idoneis remediis, sub debita tamen adhibita cautione, tentanda venit. Vidimus ad obtinendum hunc scopum varia præsentissimi fuisse effectus, atque inter hæc largissime assumtum infusum herbæ veronicæ & petroselini, vel ex seminibus dauci, selleri, foeniculi, baccis alkekengi, radice glyzirrhizæ, summitatibus millefolii paratum, eximium attulisse levamen, cum primis si potius quodammodo spirituosus, ut malvaticum juniperinum, horum usum exceperit. Mirabilem quoque, in educendo ex viarum angustiis calculo, deco-



decocti antinephritici *Foresti* largiorem potum, adjuncto corporis motu, efficaciam subinde præstitisse, a nobis observatum est. Sed interdum paulo fortioribus pellentibus opus est, quæ inter eminent ac tutissima sunt mater perlarum, vel cochleæ aut testæ ovorum ustæ cum succo citri in convenienti vehiculo exhibitæ.

### Methodus Præservatoria.

#### §. I.

Præservatio  
in pro-  
gressu  
morbi  
difficilis.

**P**ræservatio pernicialis hujus mali, uti in principio quidem facilissima, ita in progressu, si ex renum magno vitio & exulceratione, calculorum prognata fuerit ubertas, dolorumque crebrior recursus, multis sane difficultatibus implicata ac circumspecta est: Nam quia, complures, ut supra exposuimus, ex sanguine vel præter naturam exsuperante, vel multorum incongruorum viscidorum ac acidorum alimentorum assumptione crudiori ac spissiore reddito, quam facile in hoc malum incidunt; certe sanguinis decenti missione, motu & exercitatione corporis sufficiente, nec non potionibus diluentibus aquis medicatis præsertim *Selteranis*, item sero lactis dulci & acidulo, ad arcedum molestissimum hunc & exitialem morbum, nihil facile præstabilius ac efficacius reperire licet.

#### §. II.

Quando  
contram-  
matica  
confe-  
gant.

Ubi vero continuus fit calculorum partus, opus est, ut ea in usum ducantur, quæ virtute traumatica leniter consolidante & adstringente gaudent; quare a multis retro temporibus est observatum, immo plebeiis & domesticis constat experimentis, decoctorum vel etiam infusorum, ex herbis vulnerariis, & aqua vel cerevisia paratorum, ac cum butyro insulso, vel cum melle mixtorum, longiori usu, quosdam penitus a malo hoc calculoso fuisse

liberatos: cujus generis præcipue sunt, equisetum, virga aurea, hederæ terrestris, fragaria, marubium album, veronica, parietaria, millefolium cum summitatibus, malva, cortex radices acaciæ, lycopodium, baccæ juniperi tostæ, fraga exsiccata, acini & fructus cynosbati tostæ, ex quibus speciebus, cum melle Prussico albo, quod identidem consolidante & balsamica sua virtute renum morbis admodum amicum, electuarium paratum & mane ad cochleare dimidium usurpatum, superbibendo infusum Thee, ingens solamen iis, qui per multos annos nephritide calculosa laborarunt, attulisse, observatum est.

#### §. III.

Alia jam, præservandi a calculo, via ac ratio suppetit, per alcalina, quæ acidum & glutinosum tanquam præcipuum calculosæ concretionis fundamentum, domant atque destruunt; & hinc est, quod cancerum lapides, mater perlarum, testæ ovorum, conchæ & cochleæ simpliciter paratæ, vel etiam ustæ, lapis lyncis & judæicus, nec non pulvis famigeratissimus *Volckhammeri*, qui ex lapidibus pretiosis calcinatis concinnatus creditur, vel simplex tantum oleum tartari per deliquium, liquor cinerum clavellatorum, vel nitri fixi, tinctura tartari, antimonii acris, frequentius in usum ducta, calculorum generationem egregie impediunt, & ab atrociori dolorum concursu corpus viadicent.

Quando  
alcalina.

#### §. IV.

Sunt quoque adhuc plura, non minoris ad præservandum efficaciam præsidia, quorum legitimus usus calculosis admodum observatur proficuum. Et hæc sunt quæ oleosis, pinguisculis ac temperatis & quodammodo anodynis, demulcentibus particulis, spiculorum salinorum unionem, quæ ad concretionem solidelcentem est necessaria, impediunt; quan-

Quando  
demulcentia.



quantum enim pingua, exigua etiam dosi admixta, crystallisationis negotium impediunt, ex chymicis perquam notum est. Ad hanc classem merito referre possumus, fructus & semina quæ blando & dulci oleo gaudent, ut sunt semina 4. frigida majora, milii solis, saxifragæ, papaveris albi, cardui maris, amygdalæ dulces & amaræ, nuclei ceraforum & malorum Persicorum, quæ vel in pulverem cum saccharo vel in emulsionem redacta, frequentiusque usurpata, non satis ab iis qui huic adfectui obnoxii frequenter sunt, dilaudari possunt. Neque vero, inter optima & specifica ad renum vitia corrigenda præsidia, radix glycyrrhizæ, silentio prætereunda est, cujus pulvis vel infusum in demulcendis & contemperandis acribus salium particulis, in detergendis mucositatibus, magnæ efficacis est. Atque etiam ex compluribus aliis millefolium ejusque summitates in renum vitiis specificam plane & mirabilem edunt efficaciam, quando ejus infusum vel decoctum per longum satis tempus quotidie usurpatur. Vidimus hoc modo aliquot ab omni calculosa affectione, cui diutius obnoxii erant, prorsus liberatos: nam hæc herba multiplici ratione proficua est, & præter virtutem consolidantem & demulcentem, ob oleum vere anodynum quod exacte cum oleo florum chamomillæ ratione coloris & virtutis convenit, dolores & spasmos sedandi efficacia pollet.

## §. V.

Alvi  
habent.  
da ra.  
sio.

Ante omnia vero, sicut in cunctis morbis chronicis, ita etiam in calculo præcavendo, ventriculi & ejus digestionis, nec non alvinæ excretionis, ut hæc singula se recte habeant, ratio habenda est. Placuit mihi hac in re insignis plane locus ÆTII, quem cap. 16. pag. 177. prodidit, ita se habens: præservat a calculo moderatus cibus bonæ coctionis; nam cruditates non solum

exasperant morbum, sed etiam gignunt; inde abstineant agri a satietate, a cæna, sæpe vomant & absinthium assidue bibant, ac per certum tempus per ventrem se purgent. Cibos sumant, e quibus neque satietates neque cruditates eveniunt. Urinam etiam cientibus utantur, pastinacam in dies edentes valde percoctam, feniculum, pulegium, calaminthen; ex marinis Strombos, locustas, gammaros; per plures autem dies radicis eryngii decoctum bibant, similiter dictamni. Oportet aquam per omnem vitam esse purissimam & percolatam, vinum tenue album, urinam ciens; exercitationibus utendum modicis & frictionibus in balneo, ex nitro astato, ac fece vini usta & pumice. In quo genere TRALLIANUS quoque audiendus, qui l. c. hanc dietæ rationem præscribit: probe faciunt, qui bibunt aquam & evitant omnia quæ ex pipere constant, & non solum acres, sed & crassi succi cibos, ut similaginem, ova dura, placentas & quæ ex lacte parantur, ipsum lac & caseum, item vina admodum nigra & austera. Ad hæc cavendum, ne agri culcitris indorimant ex anserum plumis confectis, hæc siquidem renes valde calefaciunt. Præterea ne multum stent, magis vero studendum, ut vel moveantur vel consideant. Et paulo ante: bibere oportet, ante omnem cibum, aquam tepidam nihil renes enim a recremento magis vacuos temperatosque reddit, ut non amplius calculos procreare possint; nam temporis spatio igneus eorum calor a tepore aque extinguitur. Exinde dubio omni procul prodiit secretum illud eximium ZECCHII relatum in suis Consultation. nempe haustus aquæ calidæ ad libram unam circiter, statim ante prandium. Et CAROL. PISO, multis ante Zecchium annis, hoc idem aquæ calidæ remedium comprobavit, dicens, quod post primum excretum calculum, nunquam in posterum



Iterum alii geniti fuerint, si quis usum hunc aquæ calidæ multo tempore continuaverit.

*Cautela & observationes  
præcticae.*

§. I.

*Respi-  
cien-  
dum ad  
corpus  
ægro-  
tantis.*

**A**T vero, cum ad persanandum æquæ ac protelandum hoc malum potissimum Medici momentum in eo sit repositum, ut pro differenti corporum constitutione, ratione ætatis, temperamenti, læsioni functionum, nec non sensibilitatis aliarumque causarum, alia atque alia medicamenta, debito tempore, & convenienti ordine adhibeat; e re utique duxi, quasdam cautiones & observationes, in praxi utiles atque necessarias hoc loco subnectere. Primo omnium, attente & pensitate considerare oportet: remedia, quæ præservationis vel curationis gratia in usum veniunt, non æque omnibus convenire, neque semper eundem effectum ac levamen præstare, ob differentem valde & mutabilem corporis, ratione fluidorum dispositionem, & solidarum plane peculiarem texturam & inde pendentem sensationem, quæ Græcis idiosyncrasia vocatur; quare interdum variari debent medicamenta, siquidem successu temporis, etiam ipsa natura iis assuescere solet, ut effectum laudato, quem ante ediderunt, nunc carere observentur.

§. II.

*Sæpe  
naturæ  
sponte  
calculum  
protrahit.*

Observatum quoque sæpius est, ex improvviso, naturam nullis remediis coactam, sed sibi relictam, se ad calculum protrudendum accingere & feliciter id præstare. Simile quid subinde in partu animadvertimus, cum non ante facile remedia proficiant aliquid, quam in subsidium venerit natura: qua de causa fit, ut empirici sæpe suis inanibus remediis gloriam reportent. Solers itaque

& in sanandis morbis occupatus Medicus, id probe attendat, quod natura sæpe sola, nulla remediorum ope adjuta, a violentis spasmis, doloribus & motibus remittat & conquiescat; (id quod tamen non intellectui imaginario vitalis adscribendum est; cum causæ ac rationes physicae subsint,) siquidem magna prudentiæ Medicæ pars in eo consistit, ut temporis illud momentum, quo natura se ad agendum & corpus a morbo liberandum armat, sedulo æstimetur. Hinc consultum quandoque est, ubi ad tempus frustra adhibita fuere medicamenta, subsistere ac ferias agere, ut quies quasi naturæ concilietur, quia ipsa sæpius sua sponte & præter omnium opinionem, plus præstat, quam Medicus cogendo & stimulando.

§. III.

Quemadmodum diuretica & urinam pellentia, eaque paulo acriora & vehementiora, ut sunt terebinthinaea, juniperina, succinata, alliacea, porracea, & ex petroselino parata, neque ad præservationem in plethoricis, neque in paroxysmo nephritico, sive is simplex tantum sit, sive simul calculosus, unquam proficiunt, sed malum deterius reddunt atque symptomata exasperant: ita prudens eorum usus non plane dammandus & interdicendus est. Quare in plebeiis, robustioribus, humidioris & segnioris naturæ corporibus, præsertim ubi præservandi fine exhibentur, non modo tonum vasorum renalium roborando, sed & copiam feri impuri tartarei, per renes, ejiciendo, commodam collocare operam possunt.

§. IV.

Ubi tempestiva, modica ac æqualis motio sive vectio naturæ in calculis pellendis admodum idonea, & congruorum pellentium usum diluentia, præsertim quæ mole operantur, ut acidulæ, thermæ, lactis serum egregie secundat, ut celeriter sæpe

*Circum  
motum  
cautelè*



sæpe calculi, e sede sua, quam occuparunt fixam, dimoveantur; ita etiam observatum fuit, intempestivam unctionem vel equitationem, plurimis damnum attulisse, quia e sede sua non incommoda calculum expulsus, in transversum egerunt, ut nunc acutis suis angulis membranæ sensili nervæ magis fuerit elusus; subsequente inde majori spasmodum sævitia, immo lethali quandoque ischuria.

## §. V.

*Venæ-  
sectio  
etiam  
in pa-  
roxys-  
mo non  
inutili.  
ser ce-  
lebra-  
tur.*

Tempestiva & sufficiente venæ sectione non modo ad præservandum a calculo, non facile superius ac efficacius reperitur præsidium, præsertim, ubi corporis natura ad excernendam nimiam sanguinis quantitatem, est disposita; sed ejusdem quoque remedii utilitas, non raro in ipso paroxysmo sese commendat, nimirum, ubi plethora cum pulsu celeri, magno æstu ac intensa siti associata est. Doloris enim vehementioris ea indoles ac vis est, ut, spasmis liberiores sanguinis circuitum per venas maxime impredientibus, cum impetu ad alia incongrua loca copiosum sanguinem adducendo, epilepsiam, convulsiones, lethargum, delirium, apoplexiam sanguineam, mictum cruentum, febres inflammatorias & hujus generis alia, de quibus nobis exempla sunt nota ac obvia, concitet; quæ singula prudenti sanguinis missione averti possunt.

## §. VI.

*In scor-  
buticis  
calculo-  
sis, di-  
luentia  
ac de-  
mulcen-  
tia dan-  
da.*

Quando nephritis calculosa incidit in corpus scorbuticum, sive impuris excrementitiis humoribus refertum, & nostro tempore, purpuræ grassanti chronicæ obnoxium; sub ipso paroxysmo, concurrente simul impuritate scorbutica, varia & terroris plena se immiscent symptomata, quæ insignem, in præscribendis medicamentis, Medici prudentiam requirunt ac desiderant. Neque enim facile alia, nisi diluentia, ac demulcentia, ut serum lactis acidulum, vel dulce,

præbenda sunt; ab omni cerevisiæ & vini potu abstinendum: serum vero calide, vel temperate frigidum sumtum, cum temperatis diaphoreticis, tali in casu maximi usus fuisse observavimus.

## §. VII.

Balnea, utut quandoque præsentissimi levaminis & magnæ necessitatis sint; abstinendum tamen ab iis penitus, in plethoricis nimis repletis & pinguibus corporibus, ubi simul spirandi angustia ac difficultas adest. Ante itaque horum usum, solvenda plethora, alvus laxanda, & dolorum vehementia compescenda.

## §. VIII.

Non raro jungitur affectioni calculosæ colica ex hæmorrhoidum vitio, convulsiva; prudentis hinc Medici est, hæc omnia probe discernere, & caute in prognosi & curatione procedere: maxime omnium vero, ratio est habenda atrocis intestinorum doloris, ut vel venæ sectione, vel hirudinum applicatione, vel alvi, per clysteres commodos, apertione, ei succurramus. Sæpe fit, ut quando calculus uno & maximo impetu fertur per ureteres, intolerabilis per dorsum & totius abdominis regionem, cum magna virium jactura oboriatur dolor, qui tamen protinus uno quasi momento conquiescit, quando videlicet celeri itinere calculus in vesicam delabitur.

## §. IX.

Ubi diutius torquet dolor & virium adest prostratio, ætas quoque senilis vel animi mœror præcessit, pulsuumque observatur debilitas; opiata instar veneni esse fugienda, inter quæ pessima massa pilularum de cynoglossa, & ratione, & experientia multiplici confirmatum habemus. Præstat tunc potius naturam analepticis leniter spirituosius aquis, ut sunt aqua menthæ, melissæ, liliorum convallium, cinnamomi sine vino, addito uno vel altero grano ambre & extracti croci, modico quoque vini usu,

*Pletho-  
rica a  
balneis  
absti-  
neant.*

*Colica  
hæmor-  
rhoida-  
lis su-  
perve-  
niens  
quomo-  
do tra-  
ctanda.*

*In vi-  
rium  
prostra-  
tione  
opiatæ  
fugien-  
dæ.*

eri-



erigere, nec non exterius; nimis debilitatum tonum intestinorum, linimentis spirituosus balsamicis, quantum fieri potest, restituere.

## §. X.

*Inter aquas minerales quas mi- neralis Caroli- nae opti- me sunt* Ex aquis mineralibus & quidem thermalibus, nullæ sunt, quæ, ob calcaream qua pollent terram, potentius calculosam tartaream materiam resolvunt & exturbant, quam ipsæ *Carolinæ*; cum quibus tamen provide agendum. Vidimus, post harum usum internum, intra mensis spatium, quingentos & ultra calculos, leves, qui lentis & ciceris magnitudinem æquabant, successive fuisse excretos. Sed postea blande consolidantibus & temperate balsamicis opus est, ut cavitates renum calculis exclusis exhaustæ, in se coeant & carne repleantur: omnium vero securissimum, & usui tam præservatorio quam curatorio, aptissimum esse fontem *Selteranum*, qui præter subtiliorem aquam, sal alcalinum in sinu suo fovet, neque minus in vitiis & læsionibus vesicæ reliquis omnibus remediis superior est; innumerabili experientia evictum habemus & scribimus. Dein quoque, ubi magna scorbutica humoribus inhæret impuritas, atque simul adest partium exulceratio, dictum fontem cum lacte, debito modo miscere; & sufficienti satis temporis spatio adhibere, consultissimum est.

## Enarrationes morborum.

## OBSERVATIO I.

*Vertigo cum nephritide calculosa ex plethora.*

**V**ir generosus in dignitate Consiliarii Camerae constitutus quinquagenarius, complexionis admodum robustæ, quindecim jam ante annos a tertiana febre, insignem sibi contraxit ventriculi imbecillitatem, cum flatulentia abdominis & crebrioribus ructibus conjunctam. Ante decem annos vertigo caput crebris corripuit, quæ superveniente e naribus hæmorrhagia mox cessavit. Postea-

quam vero circa æquinocetia venæsectionem admittere cœpit, immunis prorsus ob hoc affectu permansit, nisi venæsectio fuerit omissa, ubi brevi post insultum quendam de novo est expertus. Sexennium elapsum est, ex quo graviores sæpenumero a calculo renis sinistri passus est dolores; postquam nempe vitam magis sedentariam coluit. Major doloris atrocitas in regione inguinali sentitur, calculo circa introitum vesicæ persistente, & tunc pauca cum ardore prodit urina: acerbior in lecto dolor est, mitior, si ambulare potest atque etiam sub motu & largiori infusi Thee potu: ita calculi descensum in vesicam cum insigni levamine sæpius procuravit. Clysteribus & linimentis anodynis, item ab oleo amygdalarum dulcium interne sumto, insigne percipit levamen. Si dolor urget, facies flava evadit, corpus sudore frigido perfunditur, adest nausea, vomitus & præcordialis anxietas. Debet sedulo sibi cavere a cibis qui inflant atque etiam a frigore boreali; ab his enim paroxysmus facile resuscitatur. Extra accessionem urina multum semper sabuli continet. Colica etiam flatulenta sæpius ipsum affligebat. Consilium quod a me expetiit, dedi, ut mutaret potum, qui erat domestica crassioris substantiæ cerevisia, & nostram *Loebjunensem* diuretica & antinephritica virtute celebratissimam biberet. Dein suasi ut singulo mane infusum summitatum milefolii cum radice glycyrrhyzæ largius paulo sumeret, & ter in mense pilulas meas balsamicas mane usurparet, sumpta prius, præcedenti die circa somni horam, salis mei aperitivi drachma. Essentiæ quoque carminativæ B. *Wedelii* cum liquore anodino mixtæ usum interpolandum, ad flatuum discussionem ordinavi. Qua methodo per aliquot jam annos a dolore ex calculo prorsus liberatus est: neque a flatibus & ructibus tam molesta, ut antea sentit incommoda.

Epi-



*Epicrisis.*

Et vertiginem & nephritidem calculosam in hoc ægro, tum a nimia sanguinis & humorum exundantia, tum a pravo primarum viarum statu originem suam accepisse, extra omnem dubitationem collocatum est, ubi concurrens vita sedentaria & potus cerevisiæ crassioris & minus diureticæ, ac flatuum in primis viis præsertim quæ hypochondrium sinistrum occupant copia, ad calculorum ortum & generationem, in sinistro præsertim rene plurimum contulit. De cerevisia Lobejunensi, quæ ex aqua, valde levi & subtili, scaturiente ex petroso tractu, coquitur, insuper valde tenuis, minus spirituosæ & alba est, ac cito per urinam decedit, hoc memoratu dignum est, quod & a calculo & a podagra omnes fere immunes sint, qui ordinario eam bibunt. Maximum profecto & curationis & præservationis a calculo momentum, in quotidiano congruo potu positum est: nam qui dispositionem, sive hæreditariam, sive adscititiam ad calculum habent, cerevisias inebriantes & crassiores omni studio vitare debent: laudantur vero cerevisiæ tenues, albæ, valde diureticæ & quæ non flatum ingenerant. Ubi non salubris haberi potest cerevisia, ego decoctum, radicis eryngii, graminis, asparagi, chinæ, fœniculi, cichorei, glycyrrhizæ, addito pauxillo nitri ad potum, non sine insigni subsequente successu commendare solitus sum. Neque omne vinum calculosis utile est: Mosellanum ad præservationem, quia citius per alvum & urinam redditur, omnium est optimum. Ubi autem calculi partus ex labe renum invetavit, vinum mulsum bonæ notæ vel recens Hungaricum moderata dosi sumtum est valde proficuum.

## OBSERVATIO II.

Vir in 50. ætatis anno constitutus lautæ semper ac vinosæ diætæ assuetus, sanguinis ac succi plenus ceterum satis sanus, inopinato in ipso itinere, per aliquot miliaria curru quo vehebatur succussus, dolore in regione lumbari valde acerbo afficitur, domum reversus dolor incrementum, & ad umbilici regionem se protendit. Accedit tussis vehemens, alvus constipata & urina guttatim cum ardore exit. Remittunt per intervalla dolores. Nihil ad sopiendum dolorem & quod ad facilem calculi exclusionem pertinet ex remediis diætetis & pharmaceuticis fuit omissum: sed citra præsentaneum effectum. Ex consilio amici sumsit infusum Thee, cum aliquot olei amygdalarum dulcium uncis, ad mensuram & ultra. Inde excitatus est vomitus & cum magno nisu multa ejecit aquea & pituitosa: non ita multo post, dolores & alia symptomata quieverunt, & altero die insignis magnitudinis calculus cum urina excretus est. Petiit a me ad recidivam præcavendam, remedium. Suasi venæsectionem ter in quovis anno celebrandam & infusum herbæ veronicæ, summitatum millefolii & radicis glycyrrhizæ multa in quantitate sumendum. Et nunquam abhinc rursus a calculo molestias persensit.

*Epicrisis.*

Non semel sed sæpius a motu paulo fortiori per curram vel præequitationem, calculum protrusum, de repente acerbissimas passiones produxisse novimus. Evenit hoc, quando in pelvi concretus calculus latitat, salvo renum parenchymate. Annotavi quoque aliquoties, & a motu corporis validiori, & fortiori in vomitum nisu, lapidem ex angustiis meatuum, insperato in vesicam elicitum fuisse, præsentaneum mox sequente levamento &

*Dolor  
& spæ.  
smus  
ex cal-  
culo re-  
nali la-  
pletus  
risc,*



Symptomatum mitigatione. Venæsectionem, ubi sanguis abundat, ego ad præservandum & calculum arcendum, maximi semper feci & facio: nam sicut hæmorrhoidum fluxus, testante id *Hippoerate* vetustissimo Medicinæ parente, ab hoc malo præservat: ita ubi hic fluxus deficit, vicariam venæ sectionem præstare operam posse, & sanæ rationi & experientiæ consentaneum est.

## OBSERVATIO III.

Dolor  
nephriticus  
notus  
venæ  
sectione  
sublatus

Vir qui vix quadragesimum annum attigit, sanguinæ constitutionis, texturæ mediocris & macilentioris, nullo unquam morbo nedum calculo correptus fuit, commensationibus & poculis sæpius interfuit; de repente in vehementem circa regionem lumbarem incidit dolorem, cum horrore & refrigeratione extremorum. Succedit vehemens æstus cum pulsu celeri & magna siti: alvus est dura & flatibus distenta. Quidam morbum pro subluxatione vertebrarum dorsi, ad quam tamen defuit occasio, existimarunt; alii habebant pro febre ardente. Sed quum conatus adesset ad vomitum, & urina pauca cum ardore proflueret, circa vias urinarias vitium subesse judicavi. Dedi, præmissis clysteribus & fomentis externis, liquorem anodynum, decoctum hordei cum amygdalis dulcibus in emulsionem redactum, cui portio nitri ad æstum restinguendum adjecta fuit. Sed levamenti inde nihil sequebatur. Quum vero sitis, æstus & dolor urgerent, die quæ erat quarta, ad arcendam quam verebar inflammationem, venæ sectionem in pede suasi; & sanguine ad aliquot uncias educto, non ita multo post magna remissio omnium dictorum symptomatum sequebatur. Continuavimus cum ante dictis remediis, alvus clysteribus aperta, urina liberalius profluxit, dolores sopiti, sudor occupabat totum corpus, & septimo ab invasio-

ne die, per urinam, arenacea tantummodo grana, splendida & acuminata, nullus vero calculus prodibant.

## Epicrisis.

Dolores ex lumbis aciores quando repente invadunt, febrilem interdum typum servant: quo sæpe factum est, ut morbus pro febre ardente habitus fuerit; quod maxime fit in sanguine repletis, quando plexus nervi mesenterici vel a flatibus in duodeno vel colo stagnantibus, vel potius ab adjacentē arteria meseraica superiore sanguine valde distenta fortiter premitur, & demum ipsi renes & ureteres nervosi per consensum sive secundario compatiuntur. Rectius vero secundum meam sententiam hic morbus, dolor nephriticus nothus vocari potest, uti videmus in *Riverii observation. 48. centur. 2.* Frustra tunc sola antinephritica opponuntur, quæ nisi per venæ sectionem, sanguinis in locis affectis congestio tollatur, omni propemodum effectu carent. Misso sanguine clysteres carminativos alvum subducentes & quæ nimiam sanguinis ebullitionem sedant, præsentaneam opem tulisse observavi; quin imo in dolore valde acuto a calculo venæ sectionem ad arcendam inflammationem in corpore sanguine pleno salutarem, & feliciorē semper medicamentorum operationem animadverti, quo ex *TRALLIANO lib. 9.* insignis locus respicit: Si sanguinis copiam subesse aut inflammationem una cum calculi obstructione suspicaveris, venæ omnino sectionem prius adhibito: ita nempe hæud delinques, si medicamentum offeras; laxatione enim facta, & meatibus rarefactis multo magis auxilia quæ adhibentur propriam vim ostendunt. Quæ sententia *observatione 15. centur. 2.* a *RIVERO* notata magis adhuc confirmatur: vidua dolore nephritico vehementissimo vexabatur, qui a rene sinistro ad pubem usque, secundum longitudinem ureteris exporrigebatur, cum



cum urinae acrimonia & frequenti micturitione: huic neque clysteres cum aqua benedicta neque cum terebinthina, neque cum laudano, neque vomitus ingens qui sponte veniebat: neque semicupium; neque laudanum assumptum quicquam profuere, dolore clamoso per biduum perseverante. Tandem aperta fuit vena malleoli, & statim sanguine misso dolor ingens quievit, superstita tamen dolore obtusiori.

## OBSERVATIO IV.

*Nephrit.* Femina annos quæ habebat quadraginta a parentibus calculosis nata, ante viginti jam annos, bis minimum in anno tormento hoc cum consuetis symptomatibus comitato, excruciatam fuit. Singulis noviluniis alii quædam frustula cum spiritu vini ad præsertionem sumsit. Venæ-sectione rarius usa; ac jam modo per annum & ultra eam omiserat. Per sex menses permolestus in lumbis sinistro continuo afflixit dolor, qui protensus ad inferiora, ejusdem pedis in eodem latere movendi potentiam & contracturam induxit. Perpetuus in urina emittenda est ardor. Afflictio lateri incumbere ægerrime potest: nam increfcit semper dolor & fit acerbior. Abdomen flatibus turget, appetitus languet, liquida plus justo appetit, pedes semper frigidi, ut ab admotis valde calidis integumentis vix incallescant. Menses quidem tempus suum adhuc fervant. Sed quando imminet, atrox dolor & spasmus totum abdomen pervadit. Quæsitum a me fuit, an hoc malum tolli penitus possit, & an thermæ Carolinæ proficua sint?

*Epicrisis.*

Plura sunt in hoc casu, quæ & observationem & censuram merentur. Primo uti omnes ægritudines, quæ a parentibus ad liberos transmittuntur: ita etiam nephritides calculosæ difficillime evelli & eradicari possunt, &

mox in adolescentiæ vel juventutis annis sese sistunt, atque accuratissimam vitæ rationem expostulant: nam calculosam hereditariam dispositionem, ut eleganter dicit ARETÆUS lib. 2. cap. 3. fecundam, sterilem nemo reddere potest: facilius enim est uterum a pariendo prohibere; quæ si non observatur, & morbus per multos jam annos inveteravit, nulla reconvalescentiæ spes superest; ob hanc potissimum rationem, quia affectuum hereditariorum ratio in solidarum partium nativa labe & vitio posita est: quod in actum deductum crescentibus annis majorem vim acquirit. Quam periculosus sit, in tali affectione hereditaria, pellentium ut alii & aliorum præmaturus usus, exprimere vix potest: nam causticis ejusmodi rebus plus adhuc renum substantia læditur, quam ob rem non mirum est, in valde miserum ægram nostram statum fuisse conjectam, cum procul omni dubio in rene sinistro insignis ulcerosa jam præsens fuit corruptio: ubi ab aquarum mineralium & præsertim Carolinarum potu, qui si proficere debet, largissimus sit necesse est, lubens abstinere, ne subsistentes aquæ solidæ partis corruptionem magis augeant. Ego sub tali statu ad mitigandos dolores balnea aquæ dulcis commendare soleo, sique acerbiores sunt, trochiscos de alkekengi, qui moderatiori, ad scrupulum, dosi, præsens solamen afferunt. Extra paroxysmum decocta & infusa ex mitioribus traumaticis, omnium convenientissima sunt: inter quæ radix alteæ, eryngii, herba hederæ terrestris, veronicæ, virgæ aureæ, urtica mortuæ, summitates millefolii, baccæ alkekengi, cortex radicis acaciæ, semen dauci, foeniculi, item baccæ juniperi tostæ, si ex iis paretur infusum & adjecto melle Prussico albo dulcificetur, longo & præstabili usu & efficacia sese admodum commendant. Huc pertinet etiam decoctum antinephriticum Foresti, quod



ob insignem aptorum ingredientium virtutem, non laude sua defraudandum est, pariter syrupus dialtheæ *Fernelii*, atque decoctum herbæ equiseti ex cerevisia alba, adjecto butyro insulso & melle, plebejura & domesticum quidem, sed non spernendum remedium. Plus enim semper efficaciam & securitatis a temperatioribus istiusmodi Galenicis & simplicibus, quam a pretiosis exoticis, ut sunt acmella, pareira brava & id genus alia, & activioris indolis chymicis sperari potest. Nam, ut ingenue fatear, uti victus quo simplicior, eo gratior & salubrior, ita etiam idem de medicamentis valere existimo. Ego quoque in tam inveterato malo, non sine insigni fructu, medicamentum leniter alvum subducens, ex manna atque rhabarbaro, per infusionem paratum, vel rhabarbarum cum terebinthina in pilulas redactum commendare & usurpare soleo: nam qui calculosos & non integros habent renes, ii quam maxime sibi providere debent, ut intestinalis excretio probe respondeat.

## OBSERVATIO V.

*Dolor nephriticus cum numerosa calculorum excretione.* Illustrissimus Comes, sex supra quadraginta annos natus, sanguineæ & robustæ constitutionis, a primis annis integrâ valetudine gavisus, in deliciis semper habuit venationes; ex quo factum, ut interdum imum usque ventrem in piscinas & aquas stagnantes se demiserit. A longo inde tempore pedes habuit valde frigidos, ut fervidis pannis vix ad calorem naturalem reduci potuerint. Per decem annos usque eo hæmorrhoidalem excretionem passus est, singulis ut plurimum mensibus, quæ vero per duos aut tres quandoque restiterunt, imi ventris doloribus, quos spasmus & flatus excitant, nunquam fere obnoxius fuit: inopinato autem acerbissimi dolores lumbum sinistrum, ubi ren situm obtinet, inva-

dunt, qui interdum ita asperati sunt ut summus hic vir nec ambulare, nec se erigere, potuerit; atqui stationem suam nonnunquam deseruerunt & imum ventrem occuparunt, juncto simul vomitu & ciborum fastidio. Duobus abhinc annis, longinquo itinere peracto, triginta duos calculos cum acutissimis doloribus stipatos, per urinam una vice excrevit; quorum minimi magnitudinem seminis cannabis æquabant. Et ita immanes isti dolores simul & semel expirarunt. Interea dolores circa lumbos in sinistro latere insistebant sæpius, quandoque comite summo cruciatu, qui excretis calculis, cum multa pituita remissior factus. Hoc non obstante fluxus hæmorrhoidalis omni bimestri spatio permansit. Sub equitatione quicquam etiam cruoris mixtu reddidit. Missus est ad Carolinas, a quarum potu per 22. dies sub debito regimine continuato, per vices, decem, viginti & ultra ducenti, cum urina, albi & cinericei coloris calculi emissi sunt; cujus sedimentum erat valde tenax & viscidum, igni injectum odorem fœtidum volatilem & urinosum spargens. Peracta cura, consilium dedi, ut balneum *Toeplitense* per quatuordecim dies in usum duceret: & optime inde se habuit. Petiit a me, ut præservationis gratia curam instruerem, quæ sequens fuit. Ordinavi infusum, ex speciebus leniter traumaticis, quarum in superioribus facta fuit mentio, mane loco Thee sumendum. Dein, ter minimum quotannis, præmisso pediluvio, venam pedis secandam suasi. Tum pro potu ordinario, decoctum ex radicibus scorzonæræ, graminis, chinæ, cortice ligni sassafras, semine feniculi, & passulis præscripti, posthæc, usum pulveris antinephritici bis vel ter in septimana, cum emulsione amygdalina sumendi, commendavi, ex hac formula. Recipe lapidum cancrorum unciam semis, cochlearum ustarum, sem. lycopodii, arcani duplicati, nitri depu-

rati.



rati ana drachmam, olei macis guttas 6. M. f. Pulv. D. Demum, quarumcunque pilularum, quæ aloes ingreditur, quarum insignem antea quantitatem sæpius devoravit, item purgantium usum, studio & non sine fundata ratione, splendido huic viro, non secus ac aliis qui renum vitio laborant, præsertim si sanguine corpora superabundant, penitus interdixi, & clysteres injiciendos esse præcepi. Quorum remediorum diutius continuato usu, & studiose simul servata accurata victus ratione, summus hic vir tortura & tyrannide tam immanium dolorum a tam frequenti calculorum partu provenientium, liberatus, jam sanus & incolumis, per summi Numinis gratiam degit.

*Epicrisis.*

In hac morbi enarratione & ejus curatione, plura occurrunt practica momenta paulo curatius observanda. Primo, quod & fluxus hæmorrhoidalis & calculus simul in uno subjecto obvenire & incidere possint. Quod quibusdam paradoxon videri potest, qui sanguinis per venas sedis profluvium, pro certissimo, adversus calculum & podagram, præsidio ac præservativo agnoscunt. Verum aliquot mihi obvia fuerunt exempla, eorum, (inque primis celeberrimi Medici B. Dolæi recorder) qui nephritici & podagrici, fluxui hæmorrhoidali, his alternatim graviter infestantibus, obnoxii fuerunt. In præsentī casu considerationem meretur, quod refrigeratio, pedibus a longo tempore a descensu in stagnantes aquas induta, sanguinis motum versus abdomen nimium urgendo, in corpore præsertim plethorico stagnationibus cum in renibus tum in intestinorum volumine, a quibus hi dicti morbi propullularunt ansam præbuerit. Secundo, tam copiosa calculorum per unam vicem, exclusio, parenchyma renis sinistri, a copiosiori sanguinis congestione, plane vitiatum, labe factatum & destructum arguit; quan-

*Hoffm. System. T. IV. P. II.*

doquidem sine vasculorum urinariorum ruptura & extravasatione humoris, tam larga accretio lapillorum fieri nequit: sed notandum quod hi calculi minus compacti, valde friabiles & tophacei fuerint, qui longe facilius & citius ex muco quodam viscido terreo, generari possunt, ac duri & compacti. Tertia, mirabilis plane thermarum carolinarum is est effectus, ut mirifice, sale suo alcalino, sordes viscidas resolvant, eluant, exulceratas partes mundent & canaliculos muco obstructos aperiant; quo postea roborantia & traumatica eo meliorem & auspiciorem operationem exercere queant.

OBSERVATIO VI.

Incidit in memoriam casus quoad *Nephritis calculosa cum podagra, in Senex, ex M. P. de cynoglossa usu funesta.* abusum anodynorum memorabilis, qui in principatu Halberstadiensi, olim mihi obtigit. Erat vir venerabilis religiosus, dignitate Abbatis ornatus, 70. & ultra annorum, sanguineo cholericæ complexionis, staturæ macilentioris, ingenii præcellentis, calculi & podagræ doloribus jam diu vexatus. Hic ipse suus erat Medicus. Prædicabat mihi sæpius tum balnearum aquæ dulcis, tum, si nimium urgerent e calculo dolores, pilularum de cynoglossa insignes ad dolorem sopiendum virtutes. Ad excludendum vero calculum, oleum amygdalarum dulcium cum succo citri, item succum citri cum matre perlarum, se usurpasse affirmabat. Extra paroxysmum liberalis infusi Thee erat potator. Per plures annos hisce præsidiis non sine felici successu se usum fuisse memorabat. Sed ob quosdam fortunæ infestos sibi obtingentes casus, & inde consecutum animi mœrorem, vires cum appetitu non parum languescere & corpus cum facie lurida marcescere cœperunt. Post aliquot tempus, calculus consueto more renem sinistram adorie-



batur, & diutius paulo ac ante dolor lumbis & ureteribus inhærens persistebat. Ipse pro more sumebat pilulas de Cynoglossa ad 10. grana, usum earum aliquoties repetendo. Sed in ingentem conjectus virium prostrationem meum consilium requisivit. Ego accedens, ipsum offendi omnibus viribus dejectum, cum pulsu valde debili & formicante, qui proximam mortem significare solet. Analeptica probatissimæ virtutis externe & interne in usum ducebam, sine tamen effectu. Dolorem quippe nullum amplius percipiebat, sopor-que cum extremorum frigore eum opprimebat, ita ut secunda post accessionem meam die placide obiret.

*Epicrisis.*

Quæ dolorum sopiunt atrociam remedia, quæ inter palmam opiata tenent, minime e praxi medica exterminanda esse, ego quidem persuasus sum. Atqui idem nobiscum sentire tenentur ii, qui Medicos opio-utentes imposturæ publice accusare non dubitarunt, cum nihilominus in praxi sua pilulas de cynoglossa, quæ, præter opium, semen hyosciami habent, ad sistendas enormes hæmorrhagias frequentem in usum ducant & plurimi faciant. Ego, antequam liquoris anodynæ mineralis præstantia, quæ vitrioli sulphuri debetur, in componendis & sedandis enormibus hæmorrhagiis & doloribus, mihi innotuit, non infeliciter opiatæ rite correctis me usum fuisse, assevero. Sed uti omnia magnæ activitatis remedia, ita etiam hæc, iudicium & circumspersionem Medici, qui omnes circumstantias probe pensitare & ad rationem subducere didicit, desiderant. Ubi enim ætas juvenilis, satis adhuc adest virium, pulsus magnus, & dolorum ac spasmorum immanitas virium & motuum vitalium destructionem minatur, divinam certe præstant opem: sed ubi præ dolorum atrociam & a morbo præcedente, vel ex mœrore, jam attritæ vi-

res fuerint, in ætate præsertim senili; ipsa sana, qualem omnibus Medicis practicis apprecamur, ratio distat, ejusmodi remedia summe exitialia esse. Neque diffitendum, Medicis sanioris praxeos præceptis destitutos, sæpe numero ingens damnum & periculum miseris ægrotantibus inferre: id quod probe animadvertit CAROL. PISO *loc. cit. lib. 4. cap. 2.* inquit: *incredibile est dictu, quot nimium credulos intemperante vel laudani nostro ævo celeberrimi vel pilularum de cynoglossa usu Themisones & circumforanei mittant in orcum.*

OBSERVATIO VII.

Vir sexaginta & quatuor annorum, ante duos annos, tumore cum dolore, pedis pollicem satis acerbè obfidente corripiebatur, qui venæ sectione admissa atque diapnoicis internis discutiebatur. Post novem dies cruciatus hi lumbos acriter invadebant, cum magna mingendi difficultate & ingenti circa inguinalem regionem pressorio & æstuante dolore, qui invalescens omnem urinæ profluxum plane impediēbat. Ad quod symptoma tollendum, nec balneum aquæ dulcis, nec fomenta externa, neque medicamenta interna antinephritica cum anodynis refractè juncta, quicquam profuerunt. Illa quando manu fortiter comprimebantur, urina effluebat sed parcior, multum tophaceæ albæ & tenacis materiæ continens. Alvus erat obstructa, & sub frequenti desidendi cupiditate nihil reddebat. Aquam *Selteranam* quæ ad manus erat, post aquæ dulcis balneum, in lecto per duos dies largiter bibendam suasi. Postea tres mannæ uncia cum drachma & dimidia cremoris tartari, atque granis sex trochiscorum alhavedal, in infuso ex aqua fuerunt exhibitæ; cujus tam felix est operatio, ut non modo ingens excrementorum copia per aliquot

*Rheumaticorum & venarum affectionum*



quot sedes dejecta, sed & largior urinæ fluxus, non sine insigni levamine, secutus fuerit.

### *Epicrisis.*

Rheumaticam renum & viarum urinarum affectionem, si quis prædictam passionem denominare velit, mea quidem sententia non errabit: nam sæpius observavi, subito eos, qui arthriticis & rheumaticis fluxionibus obnoxii sunt, dolore in lumbis & mingendi difficultate corripitur, cum serum impurum tophacea & tartarea materia refertum, ad renale cribrum copiosius fertur, & in uretere, præsertim ubi introitus est in vesicam, collectum ac stagnans, gravem dysuriam parit: quia propter dolorem, alvi excretio supprimitur, ab intestino recto excrementis farto, magis adhuc vesicam comprimente, & dolor & mingendi impotentia augentur. Sub ejusmodi circumstantiis, utique non convenientius auxilium, præter balnea, aquas medicatas & laxantia, inveniri licet. Ego profecto, si a tali causa ischuria proficiscitur, mirabilem eorum quæ alvum efficaciter aperiunt, sæpius opem expertus sum: nam expedita alvo, & expurgatis foribus, uberius est urinæ ad vesicam aditus, & lege consensionis quam nervosæ partes se alunt, ipsa etiam vesica cum ureteribus simul afficitur, & ad contractionem atque urinæ expulsionem sollicitatur. Neque temni hanc in rem debet monitum CELSI lib. 4. c. 13. *in renum affectibus oportet solvere alvum, si aliter ea non respondeat.*

### OBSERVATIO IX.

*Monita  
quædam  
circa  
antinephriticorum  
usum.*

Cum maximum curationis & medendi methodi modi momentum inconvenienti, ratione temporis & ordinis, antinephriticorum usu repositum sit; non abs re, sed opere prædictum mihi visum est, generalia quædam eximii in praxi usus ex longa experientia mihi enata monita propone-

re atque subungere. Primo omnium, plurimum scire refert temporis rationem: num recens sit malum; num per plures jam annos quis eo laboraverit; an valde inveteratum: item qualis sit renum status & conditio? num saltem flaccidi & a tono & robore naturali dejecti; an eorum substantia corrupta exulcerata; & seri vel urinæ aut etiam sanguinis extravasatio adsit? Facilius curatu est morbus inter initia, præsertim quando a nimia sanguinis ad hoc viscus in plethoricis sit congestio, vel etiam quando rheumatismo renes afficiuntur. Tunc omnia quæ urinam pellendi facultate pollent, & quæ acrimoniam salinam causticam conjunctam habent, vel sanguinem nimium commovent, perniciosissima sunt: sed potius sanguinis missio, per sectionem venæ, hæmorrhoidum apertionem, atque subjunctus diluentium, seri lactis & aquarum medicatarum temperatarum, item nitroforum pulverum usus, omne absolvere curationis punctum possunt. Ubi vero jam malum radices egit in renes, iique late affecti, vel eorumque vascula disrupta, ut latex urinosus subsistens tartaream gravem materiam dimittat, & calculorum frequenter jam fuit exclusio: tunc abstinendum utique est a fortioribus acrioribus & sanguinis massam valde commoventibus diureticis. Nihilominus, quæ urinæ fluxum inter alimenta & medicamenta placide promovent; & majorem materiæ tartareæ in magnæ molis calculos accretionem impediunt, egregio usui sunt: qualia sunt, præter serum lactis dulce & acidulum, præter lac asininum purum vel cum fonte Selterano mixtum, pariter ac acidulas, juscula ex radicibus quinque aperientibus parata, infusum baccarum juniperi & acinorum cynosbati tostorum, ex medicamentis arcanum tartari, liquor nitri fixi, & id genus alia. Profunt tunc etiam, ad ulteriorem corruptionem renis arcendam,



temperatiora traumatica supra recensita, in infuso vel decocto exhibita.

Si vero malum jam inveteraverit, substantia renum valde corrupta & exulcerata, ætas quoque senilis fuerit; abstinere præstat ab omnibus salinis, & potissimum acribus diureticis, item nitrosis refrigerantibus, sanguinis missionibus, fortiori corporis motione, equitatione: sed infusa traumatica, cum syrupo dialtheæ *Fernelii* edulcorata, mel Prussicum cum rob juniperi mixtum, item mel cum pulvere radicis pimpinellæ, si ad illius libram, uncia hujus adjiciatur, malvaticum juniperinum, moderatus vini Hungarici, Canariensis potus, eleosachara terebinthinæ Venetæ, balsami de Mecha, de Capaiva, quando vide licet sachari uncia, horum drachma admiscetur, item balnea temperata ex aqua dulci, omnium tutissima & convenientissima sunt. Malum enim est incurabile & usque ad mortem comitatur; hinc non nisi mitigantia & vires reficientia desiderat.

Cum vero nihil utilius, nihil salutarius nephriticis & calculosis unquam, præservandi in primis scopo, deprehensum fuerit, alvo libera atque aperta, & primis viis a sordibus & excrementis probe expurgatis: præcipua omnino Medici intentio esse debet, ut, si natura hac in re deficiat, commodis & idoneis alvinam excretionem promovere studeat remediis. Sed ego hoc in genere, nec tutius, neque convenientius aut efficacius scio & reperi laxans, ipso rhabarbaro electo & optimæ notæ, quod in pulverem cum absorbente & abstergente sale, vel in pilulas cum terebinthina Veneta redactum & circa lecti introitum usurpatum, leniter & citra virium jacturam, roborando potius renum viscerum & ventriculi tonum, fordes altero die egregie subducit.

Postremo, hanc, circa antinephriticorum & urinam cientium usum, cautelam omnibus medentibus com-

mendatam volo, ut neque nimium urinæ fluxum promoveant, neque etiam eum tardiores & parciores reddant: utrumque siquidem noxium, nam si a sanguine, quod fluidum, tenue & albidum est, in nimia quantitate segregatur, remanet crassius: quod obstructions efficit & facile coit; si vero illud in coagulum redactum non abstergitur & educitur, successive in majorem molem accrescit.

Coronidis loco ad illustranda & confirmanda hæc a me suppeditata non inutilia monita egregium & observatione dignum locum, ex **CASPARO HOFFMANNO**, huic tractationi annexere haud dubitavi: siquidem *lib. 2. medicam. official. cap. 102. p. 483.* ita perite scribit: *in curatione calculi semper bene distinguere opus est remedia: nam ita pauciores haberemus calculosos. Qui enim perpetuo utuntur propriis dictis diureticis, præcipue non purgatis primis viis, ad locum affectum materiam calculosam adducendo, malum faciunt pejus: tanto melius illi faciunt, qui præservationis gratia singulis anni quadrantibus evacuant primas sic dictas vias, dein lacte amygdalino per aliquot dies utuntur. Pro curatione autem ante omnia leniter purgandum; postea utendum domesticis & improprie dictis frigidis, quæ tonum reddunt renibus.* Nam in quovis corpore adest quidem materia calculi, quæ tamen non ita statim coit & concrevit, nisi vitietur tonus & vigor renum expulsivus; unde altero rene bene habente alter calculosus esse solet. Et hanc ob causam **CELSUS** *lib. 4. c. 2. p. 207.* renes ubi affecti sunt, & diu male habent, abstinere etiam ab omnibus falsis, acribus, acidis, & liberaliter bibere & molliter solvere alvum jubet.



C A P U T VII.

De gravi spasmō , & dolore vesicę  
& adjacentium partium.

Theses Pathologicę.

§. I.

Defini-  
tio .

**V**esica, seu pars corporis nervoso-  
musculosa, frequenter & ex  
facili obnoxia est spasmō, per quem  
intensorem & præter naturalem cor-  
poris vesicę, nec non sphincteris con-  
strictionem, sive stricturam, coar-  
ctationem & fibrarum crispaturam in-  
telligimus, & ex quo postea, seu fon-  
te, plures alię morbosę affectiones,  
& symptomata pullulant ac deducun-  
tur.

§. II.

Proces-  
sus mor-  
bi qui  
ex cal-  
culo ve-  
sicę ori-  
tur

Grave illud tormentum, quod vesti-  
cę diu inherens calculus sæpius excitat,  
cum assiduo mingendi stimulo & diffi-  
cillimo ac dolorifico mictu, nonnisi  
spasmodicum seu causam arguit. Propter  
spasticam enim stricturam, quę non  
modo vesicę tunicam musculo-ner-  
veam, sed & ejus sphincterem ipsam-  
que urethram vehementer afficit,  
dolorosum urinę fit stillicidium, &  
tantus nixus in pube ex urina vix co-  
hiberi posse videatur, quę tamen ut  
primum stillare cępit, mox iterum  
penitus retinetur. Accedit dolor in  
toto coli tractu: qui gravissimus sæ-  
pe glandem dumtaxat occupat, ut an-  
notante HILDANO l. 3. de lithotom.  
ves. & BAGLIV. Opp. pag. 343. in-  
gens hic doloris, pruritus & continuę  
irritationis in glande penis, & virgę  
extremitate, in adultis eque ac pueris  
obvius sensu, merito inter pathogno-  
mica calculi signa referendus sit. Jun-  
gitur quoque crebrius desidendi sti-  
mus, sive tenesmus, ob arctam re-  
cti cum vesica connexionem, nervo-  
rumque communionem. Prodit sub  
hac dysuria urina plerumque alba &  
turbida, cum sedimento mucoso, eo

quod spasmus fibrarum muscularium,  
forti strictura, & compressione, ex  
interiori mucosa vesicę tunica copio-  
sius lympham exprimit mucidam,  
glutinosam, quę immixta urinę, se-  
dimentum illud quod fundum petit  
mucidum suppeditat. Sæpe vero te-  
nuis aquosa minus colorata, sub ejus-  
modi gravidolore, & spasmō urina  
emittitur, quia spasmus mutua con-  
sensione, & communicatione etiam  
ad tubulos renum urinarios penetrat;  
ut nonnisi tenue & aquosum ex san-  
guine per emulgentes adducto trans-  
mittant. Præterea æger sub mictu sæ-  
pe gravissimos patitur dolores, crura  
bina transversim complicat, coxas  
comprimit, caput ad terram inclinat;  
manuque altera interdum etiam am-  
babus ventrem juxta pubis regionem  
quantum potest coarctat, & sub ejus-  
modi dolorifica mictione, tremuli  
interdum, & quasi convulsivi totius  
corporis motus, ut probe observavit  
VIEVSSSEN in Neurologia pag. 203.  
concitantur. Nam vesicę nervuli a-  
cerime a quacunque etiam causa vel-  
licati & spasmō affecti, eundem tre-  
mulum, & convulsivum motum per  
nervos intercostales nervis spinalibus  
communicant & sic ceteris omnibus  
partibus inferunt. Observamus etiam  
sub stranguria & vehementi dysuria,  
alvum obserari, & flatum cum facibus  
retineri, quę conquiescente dolore,  
promte iterum succedunt.

§. III.

Constat quoque observatione, hæc  
omnia recensita symptomata, & ad-  
huc acerbiora, non tantum a calculo  
vesicę, verum etiam a sanguinis stasi  
& stagnatione intra vesicę vasa san-  
guifera, quam sæpius sequitur gravis  
inflammatio, fieri. Vulgaris enim  
error est, quo hæc pathemata tan-  
tum vel calculo vesicę, vel urinę  
acrimonię adscribuntur, cum tamen  
observationes, & dissectiones ca-  
daverum abunde doceant, egros non  
modo iisdem symptomatibus, quę  
calculus in vesica hærens profert,  
sed

Qui ibi  
dem a  
stasi  
sangui-  
nis sita



sed & majoribus fuisse affectos cruciatibus, nullo plane post mortem invento calculi vestigio. Nam quemadmodum a mensium vel hæmorrhoidum fluxu sufflaminato, sanguis regurgitans ad vasa ventriculi & intestinorum, & intra eorum tunicas sensibiles stagnans, distractione & compressione vehementia tormina, anxietates, dolores, convulsiones ac spasmos concitat: ita etiam quando vel ex vitio & emansione fluxus hæmorrhoidalis; vel aliis ex causis, sanguis ad vesicæ corpus magna copia delatus ibi stagnat, non mirum est, quod in sensibili parte, spasmos, & quæ ab iis proficiscuntur symptomata producat.

## §. IV.

*sepe vesicæ spasmi & inflammatione suppleto hæmorrhoidum vel mensium fluxu.*

Simili modo a suppresso hæmorrhoidali fluxu nonnunquam fit mitius & cruentus, quo cohibito, dolor, spasmus & inflammatio vesicam infestant; cujusmodi atrox spasmus, qui demum funestam progignit inflammationem, interdum quoque a mensium plenario defectu, & eorum post quinquagesimum annum emansione in feminis plethoricis ortum ducit. Nam qui morbis vesicæ moriuntur, inflammatione & sphacelo, ob sanguinis in vasis pertinacem, & fixiorem stasim, vasa minima nimium distendentem, pereunt, ita plerumque ut hæc inflammatio non modo vesicam, sed & rectum intestinum afficiat, ubi simul hæmorrhoidalia vasa sanguine nigro infracta, cum penis livore, & venæ cervicis sanguine admodum distentæ, & varicosæ comparent, fidem faciente BONETO pag. 673. *Observ. 22. & pag. 664.*

## §. V.

*Causa proxima est spasmus.*

Est vero unica funestæ hujusmodi inflammationis causa, eaque principalis, validus vesicæ spasmus, qui quo validior est, eo vehementius sanguinis stasim, & incarcerationem in vasis auget, & resolutionem ejus ac discussionem impedit, ut tandem vel in abscessum, & ulcus transeat,

& chronicum fiat malum vel in sphacelum brevi tempore perimentem concedat. Et profecto vehemens ille vesicæ spasmus, qui præsentem inflammationem augetur, causa est plurimorum gravium illorum symptomatum, inflammationem vesicæ stipantium, quæ inter teste AETIO & ORIBASIO, referenda potissimum continua febris, magnus estus, dolor, ardor, ac tumor intra perinæum, & supra pectinem atque pubem, urinæ agerrimæ, & cum magno conatu, & dolorifico ejulatu guttatim facta emissio, frequens defidendi stimulus, quibus demum accedunt bilis vomitus, dolor capitis, sitis, difficilis anhelitus, faciei cum oculis rubor, lingua ardens cum nigritie, immodica vigilia, delirium, inquietudo, extremorum frigus ipsaque mors. Dignus memoratu est de funesto morborum vesicæ eventu HIPPOCRATIS locus lib. *prenotion. pag. 464.* ita habens: *Vesicæ duræ, & dolentes penitus quidem horrendæ & perniciosæ sunt, perniciosissime vero quæ cum febre continua fiunt. Etenim dolores (qui uti spasmodorum effectus sunt) ab ipsis vesicis ad occidendum sufficiunt, & alvi non egerunt hoc tempore, nisi durum quoddam, & hoc coactæ. Solvit autem urina purulenta micta, quæ albam ac levem subsidentiam habet. Si vero neque ab urina quicquam remiserit dolor, neque vesica molliatur, & febris continuæ fuerit, in primis circuitibus morbi agrum moriturum esse timor est.*

## §. VI.

Sunt certe hæc vesicæ inflammationem quæ comitantur inque variis corporis partibus conspiciuntur symptomata gravissima; omnia tamen paulo curatius considerata, vix aliam causam, quam vehementem spasmum, qui in vesica, ceu parte affecta, incipit & per universum nervosarum partium genus inde propagatur, agnoscunt. Nam quando fortissi-

*Quod probatur & ulterius explicatur.*



tissima strictura, & crispatura fibras vicinarum partium, intestini videlicet recti, & sphincteris aniprehendit; vel assiduum desidendi calcar, vel adeo impenfa adest ani constrictio, ut nec flatus, nec feces transmittat, neque etiam clysterem admittat. Quumque solenniter validior spasmus partem cui diutius insedit debilitet, demum, & in ea relaxationem relinquat, fit, ut ani etiam procidentia, praesertim in senibus, & infantibus, consequatur. Quodcumque vesicae gravior spasmus ad superiora porrigitur, & quidem ad intestina, borborygmos & tormina causatur, & ubi ad ventriculum pergit, inappetentia, mala digestio & vomitus fiunt: de quo consensu vesicae cum ventriculo praecleara sunt quae habet CELSUS lib. 7. cap. 27. pag. 486. non ignoramus, inquiens, orto vesicae ulcere, saepe affici stomachum, cui cum vesica quoddam consortium est, ex quo eo fit, ut neque retineatur cibus, neque si quis contentus est concoquatur, neque corpus alatur. Idem porro spasmus vesicae sub inflammatione, quum musculum diaphragmatis, & nervos tunicaeque nervosae pulmonum ac bronchiorum afficit, aegram, & difficilem cum anxietate praecordiorum relinquit spirationem: ad cordis vero musculos, & tunicas arteriarum musculofo-nerveas delatus, duriores, contractos, & celeriores efficit pulsum ictus, cum febre continua, & siti inexhausta, quae itidem spastica stricturae molium, & glandulosarum in lingua, & faucibus partium debetur. Majoris vero periculi est, si ad membranas cerebri, & nervorum principia pertingit; tunc enim assiduae vigiliae, mentis alienatio, convulsiones, extremorum frigus ac horror, inaequalis & intermittens pulsus, mortem significat imminentem.

§. VII.

Quamvis vero gravia, & saepius lathalia symptomata sint, quae ex

Inter causas remotas ferum scorbuticum

inflammatoria sanguinis, sive sinceri & puri, sive impuri stasi in vesicae vasculis suboriuntur: nihilominus tamen mitiora minusque funesta sunt illa vesicae vitia; quae a sero falso, impuro, corrupto vesicae tunicis firmitus inhaeresciente, easque lancinante subnascuntur: ejus generis sunt illi dolores cum valde difficili & guttatim succedente mictu. Passim ejusmodi pathematum in observatis Medicorum fit mentio, inprimis tamen memoratu dignus DRAVVITZIUS, qui jam ante seculum omnium fere optime, germanico idiomate de scorbutico integrum scripsit tractatum, in quo pag. 350. & seqq. plures affert observationes, & casus aegrorum, qui de doloribus saevis sub urinae emissionem conquestis, quorum causa non vesicae labes ulla aut calculus fuit, sed humor tantum impurus scorbuticus, e quibus memorabilis maxime quem consignavit de lanione, qui quum nunquam antea ex calculo laborasset, subito atroces in pedibus persensit dolores, qui hinc depulsi, urethram invaserunt, cum intenso ardore, & difficultate guttatim vix mingendi, applicatis tamen discutientibus cessarunt quidem, sed ad pedes redierunt, consequente eorundem tumore.

§. VIII.

Neque minus multoties observavimus in senibus, vesicae vitia, maximeque dysuriam, tum ob vitam sedentariam, tum ob dyscrasiam humorum scorbuticam, quae in hac aetate fere perpetua est, inprimis tamen quod cessantibus rheumaticis, arthriticis, & podagricis doloribus, difficilis accedere soleat mictus, qui repetentibus pristinis doloribus, sponte discedit iterum. Crebrioris quoque observationis est, scorbuticos, quibus purpura chronica nostro jam tempore admodum solennis, hac, ob refrigerationem corporis, vel alias causas, ut venae sectionem crebrius institutam, retrocedente, vel intus reman-

Materia arthritica & podagrica

nen-



nente, experiri ingentem mingendi difficultatem cum præcordiorum anxietate, inquietudine, vigilia & interno æftu, quæ, expulfa rurfus ad fuperficiem corporis purpura, difparent iterum ac evanefcunt.

## §. IX.

a pure  
ex reni-  
bus in  
veficam  
delabē-  
te.

Sed alia adhuc ratione fpafmus, & dolor veficæ introducitur, ex renum videlicet vitio. Interdum enim ex his purulenta, & vifcida materia, interdum calculi per uretheres in veficam delabuntur. In utroque cafu, nifi peregrinus hofpes tempeftive foras ejiciatur, varia fontica mala, & in his vehementiffimum fpafmum ciere valet. Quod fi enim tenacior, & acrior materia eft, parietibus veficæ, inprimis circa collum adheret, & ftanguriam, dysuriam, tenefmum inflammationemque excitat, vel membranas veficæ clandestine ac lente magis erodit, atque ita hanc exulceratam reddit. Si vero aliarum caufarum acceffione in calculum tandem illa transformata fuerit, vel is jam factus in renibus ad veficam migravit, afpredine fua vel pondere hanc continuo laceffit, eademque mala quæ modo recensuimus, producit: in pofteriori autem cafu fundus quoque veficæ, & latera, præfertim ubi calculus fuerit grandior exulcerantur.

## §. X.

a gonorr-  
hæa

Interdum veficæ collum irritant, tendunt ac fpafmo affligunt, diverfe ab iis quas hætenus enarravi caufæ, e.g. quando gonorrhœa, five benigna five maligna fuerit, diutius in hofpicio fuo, hoc eft in glandulis binis proftatis collo veficæ appofitis, commoratur; mora hic Venereis inquinamenti corruptus humor deterior redditus, ulcera nunc leviora nunc graviora, & inflammationes in parte affecta parere, & fi horum quoque vitiorum curatio perverfe peragatur, fimili labe alias fepe partes inprimis proxime adjacentes afficere, fubinde observatur. Mingitur tunc urina purpuracea, & veficæ fcabies, imo

& exulceratio, præfertim circa cervicem frequentius accedit. Atque hinc eft, quod gonorrhœa virulenta laborantes urinam fepius turbidam, & quæ multum vifcidi & faniofi ponit fedi-menti reddant.

## §. XI.

Cauſarum, unde gravior veficæ <sup>ab in-  
flamma-  
tione  
intefi-  
ni recti</sup> fpafmus proficifci nonnunquam folet, cenſum quoque ſubire videntur, inflammatio intefini recti vel ejufdem ulcus, eadem coli vitia, partium omnium interioris abdominis abſceſſus, ex quibus ruptis, pus in abdominis <sup>pure  
etc.</sup> cavitatem effuſum, verſus veficam tandem progreditur; corruptio inprimis omenti longius protenſi, ſanguis quacumque de cauſa in abdomen effuſus, aqua in hydrope ad veficam libere ruens, inflammatio, & ulcus uteri maxime ejufdem cervicis, & id genus alia; quo tum omnium exempla paſſim apud BONETUM & alios occurrunt.

## §. XII.

ab ex-  
ternis

Devolvimur nunc ad cauſas externas a quibus veficæ fpafmus provenire poſſit. Pertinent vero huc contuſiones, & icſtus graviores in pubis, & perinæi regionibus; ſectio calculi imprudenter inſtituta, in qua vela cultri ineptiori adminiſtratione, vel a calculi, præfertim majoris & aſperioris extractione, vulneris a ſectioe facti curatio perverſe inſtituta; catheter ad explorandum calculum vel in urinæ ſuppreſſione vel alia de cauſa incurioſius intruſus, ſphinctero præfertim veficæ arctius conſtricto, aut a tumore, carruncula, ſcirrho vel alio vitio via præcluſa; fiſtulæ in ano exſectio, in qua ani ſphincter arctius cum veficæ collo connexus incaute nimis vulneratus, aut ejufdem vulnus negligentius habitum fuit. In feminis huc referri debet partus difficilis, in quo vefica, & hujus inprimis collum ita ſepe premi afficique, ut inde ulcus & fiſtula proveniant, MAURICEAV *aph.* 285. confirmat. Ceterum hic notari meretur ſingularis can-  
tha-



tharidum malignitas quæ vesicæ infestæ sunt. Eas enim sive intra corpus assumptas sive externe tantummodo applicatas, spasmus, inflammationem, & ulcera interdum ciere satis observationibus constat, quarum exempla exhibentur in M. N. C. Dec. 1. Ann. 2. observ. 105. Ann. 8. observ. 88. Potum denique frigide post sectionem calculi, vehementem spasmus concitare, aut lethali gangrenæ, aut fistuloso ulceri occasionem præbere, ex observationibus practicis constat.

§. XIII.

Cur spa-  
smus  
vesicæ  
per in-  
terven-  
ta in-  
festat

Hisce quoad causas, quæ spasmus vesicæ cient, expositis, ratio porro reddenda peculiaris istius phænomeni, cur symptomata, uti difficilis & dolorifica mictio, & quæ ipsi juncta sunt mala, causa materiali, ut calculo, vel dyscrasia scorbutica, perpetuo præsentæ, per intervalla tantum infestent, & tantopere affligant. Ita vero hoc explicandum videtur: omnes attoces in parte nervosa sensibili dolores, paulo diutius obhærentes, inducunt demum, & relinquunt in ea quam tenuerunt sede debilitatem & atoniam, quæ præsentæ, dolores quidem non amplius percipiuntur, sed propter ipsam hanc imbecillitatem, ibi de novo successive succrescentes in corpore impuri humores colliguntur, stagnant & subsistunt, novaque sic ad resuscitandos paroxysmos gignitur, & coacervatur materia. Debilitas enim, teste CELSO omnibus morbis opportuna; ideoque instar universalis pathologici canonis tenendum, languidas a prægressa morbi violentia partes, quam facile recipere morbificum humorem, qui sensim congestus, vel sponte, vel a levi causa exagitatus, novum adducit insultum; & hinc merito periodicorum affectuum origo repetenda.

§. XIV.

Quomo-  
do si ex  
istat

Pluries observavimus calculum in vesica existentem, per certa tantum intervalla multa incommoda, ut min-

gendi crebrum & difficilem conatum, cum ardore & dolore, ventris torminibus, extremorum frigore & virium languore excitasse, idq; maxime ventis ex borea flantibus, vel si inflantes cibi aut cerevisiæ minus defecata sumt, aut insolita animi commotio præcessit, aut corporis partes extreme nimium refrigeratæ, vel etiam sanguinis consueta missio diutius ommissa, hanc procul dubio ob rationem: quod hæc omnia ejus naturæ ac indolis sunt, ut partim excretiones salutares supprimendo, partim etiam copiam humoris impuri augendo, eum ad vesicam tanquam partem debiliorem propellendo movendis & revocandis novis insultibus occasionem præbeant. Crebrioris quoque observationis est, colicas flatulentas junctas esse vesicæ vitio præsertim ardenti, & dolorificæ mictioni, & omnia alimenta, quæ inflant, hoc quoque exacerbare, & carminativa contra, sive flatus discutientia, optimo esse præsidio.

§. XV.

Ad vesicæ morbos, quis spasmo stipati sunt referri etiam merito debet cruenta mictio, quæ tamen non omnis, ut vulgi Medicorum fert opinio, ex renibus & vasis emulgentibus fit, sed sæpius proxime & immediate ex vesicæ vasis sanguiferis, præsertim ramis venæ hæmorrhoidalis externæ perruptis, succedit. Cognoscitur sanguinolentus ejusmodi ex vesicæ vasis mictus quando difficultas mingen-  
a mi-  
stione  
cruenta

di conjuncta, ardor cum tenesmo circa anum, spasmus circa glandem, & dolor pungitivus a glande ad perinæum affligit, cum rigida penis tensione, nec non ubi simul adsunt borborygmi, & flatulentie in abdomine, inappetentia, ructus quoq; frequentes junguntur; item si mictio cruenta, & stipantia ipsam symptomata post sanguinis missionem in pede, post hirudinum applicationem circa anum, remittunt & cessant. Et quamvis ejusmodi species mictionis cruentæ



ex vesica non adeo familiaris sit, & frequens, annotata tamen nonnunquam fuit, & prostat observatio HOECHSTETTERI *Detur. 1. schol. in cas. 2. M. N. C. Decad. 1. ann. 8. observ. 23.* Mingitur interdum sanguis sincerus unacum urina, vel loco hujus urina bruni coloris, instar coffee, ut vidimus in sene octogenario quotiescumque equo vectus fuerat, frigidata urina sedimentum ponebat densum, rubicundum. Gravissima vero quoque incidere solent ex sanguine intra vesicam concreto, symptomata, quæ recenset LOMMIUS *in observat. pag. 195.* crebro enim anima deficit, ægra fit spiratio, & pulsus obscurus, parvus & frequens oritur multa nausea, animi anxietas, & frigidus sudor: hinc totus homo fit imbecillis & pallet, & extremis partibus refrigerat, quæ quidem omnia vehementi spasticæ stricturæ, quæ per totum systema nervorum propagatur, recte adscribenda. Fiunt tamen etiam a sanguine in vesica condensato maximii cruciatus, & ardores vehementes, qui referente *observ. jam citata M. N. C.* in momento quasi evanuerunt, postquam eger magnos, & oblongos sanguinis grumos, instar hepatis lucii piscis, mingendo rejecerat. Sed de curatione hujus mictionis cruentæ, quæ nascitur ex vesica affecta; recte judicat LOMMIUS *l. c.* quod tardius curetur, quam illa quæ a superioribus locis proficiscitur.

## §. XVI.

*a. Jaro. impuro. scorbutico.* Neque etiam prætereundum, quod vesicæ spasmus, qui stranguriam & dysuriam parit, ab urina etiam, præsertim in senibus, scorbuticis & cacochymicis, valde falsa, acribus, tartareis salino-sulphureis, & limosis excrementitiis partibus referta, nascatur. Tam falsa enim quandoque deprehenditur urina, ut linguam arrodatur, & ex urethra stillans vicinas partes excoriet, quæ utique diutius in vesica stagnans, vellicando

fibras nerveas, sphincterem claudit, urethram angustat, & lancinatione, & arrosione tunicarum ingentes dolores parit. Si vero in urina cum dolore excreta moleculæ furfuraceæ & exilia, ac copiosa filamenta apparent atque subsident, veteres affectum vesicæ scabiem appellarunt, quia mucidam, & villosam tunicam arrosam arguunt.

## §. XVII.

Diximus superius quod quidem calculus in vesica contentus occasionem sæpius præbeat ad vehementes, & dolorificos cum dysuria junctos spasmos, per intervalla infestantes; monendum tamen & illud est: quod spasmus vesicæ, etiam aliis ex causis proficientes; ad ipsius calculi generationem, & concretionem primam originem, & fundamentum frequentius. Contingit hoc quam maxime in senibus plethoricis, vitæ sedentariæ addictis, & qui ob perspirationem languidiorem urinam ordinario valde tinctam, & scoriis tartareis limosis saturatam mingunt. Nam ob spasmum dysuria fit, & liquor urinosus dum paulo diutius retinetur, mora deponit tenacem glutinosam materiam, quæ salibus tartareis involuta, utique principium ad successivam concretionem calculosam suggerit, nisi congruis medicamentis opportune subducatur, & urinæ, sublato spasmo, liber paretur exitus.

## §. XVIII.

Inter morbos vesicæ utique vehementior strictura, gravissima & sæpe mortifera est, præsertim ubi cum vehementiori dolore febris acuta, vesicæ durities juxta pubem observata, alviq; & urinæ suppressio juncta est. De qua in *Prognosticis & in coacis præfag.* ita scribit HIPPOCRATES, *vesicæ duræ ac dolentes omnino male, pessime fere cum febre continua: nam cui dolor inde est, necando homini satis esse potest, atque is alvo non multum dejiciunt.*

Mitis.



§. XIX.

Quando  
mitior,  
varie  
terminatur.

Mitis inflammatio est, si dolor atque durities est moderata, sine acuta febre, Varios vero exitus habere solet, aliquando critice, erysipelate incute oborto solvitur, & sensim hac ratione discutitur, vel in suppurationem vergit; & tunc urina est purulenta quæ album habet, & leve sedimentum: quod si pure ita erumpente, urina in copia profundatur; tumor subsidet, vesica remollescit, febris imminuitur atque excrementorum exitus patet. Pessimum est, quando in sphacelum lethiferum mutatur.

CURATIO.

§. I.

Plethora  
solvenda

**V**Idimus quot, & quam gravia mala atque incommoda, ex dolorifica vesicæ urethræ, & vicinarum nervosarum partium spasmoeaque secundum variæ indolis causas oboriantur. Nunc breviter etiam strictimque explicandum erit, qua opportuna via ac methodo hisce malis per convenientia remedia succurrendum sit. Quod si igitur ex nimia sanguinis copia, vegetæ naturæ senibus præsertim, qui vitam diu sine sufficienti corporis motu egerunt, hic morbus vel ingruit vel saltim verendus est; omnino maxima præsidii, & auxilii spes, intempestiva & sufficienti sanguinis missione, erit reponenda. Idque eo magis, quando ex subsistente mensium vel hæmorrhoidum fluxu, aut omissa, & diutius assueta venæ sectione vel scarificatione, mali causa suborta creditur: nam momenta jam HIPPOCRATE aphor. 36. Sect. VI. in urinæ difficultate secare oportet internas.

§. II.

Dilectibus  
censurandis

Ubi seri impuri, scorbuticis, acrioribus, salinis partibus turgidi, copia peccat, & ab ejus colluvie, &

decubitu in vesicam, & partes pelvi inclusas irruente, aut a scorbutica purpura, quæ nostro tempore frequentior subest, malum suum duxit originem; tunc vigili cura allaborandum est, ut ab istis heterogeneis impuris partibus referta sanguinis & humorum massa depuretur, & nimia seri copia per congrua emunctoria educatur. Cui scopo obtinendo, diluentia temperata, satis larga quantitate, & longiori tempore usurpata, cujus generis sunt acidulæ temperatiores, quæ puriori, & leviori aqua ac tenero sale alcalino imbutæ sunt, qualem prærogativam, præ reliquis omnibus aquæ Spadane, & Selterane sibi vindicant, quippe quæ convenientissimæ sunt, & apprime pectoris, renum & vesicæ vitiis, ubi labem ac vitium hæ partes receperunt, specifica quadam virtute opitulantur, egregie satisfacere possunt. Longe majorem vero utilitatem in purpura scorbutica præstant ac foenerantur, quando, per miscelam cum lacte, præsertim asinino, horum fontium usus suscipitur.

§. III.

Sicuti vero diætæ tam in præservando quam in curando malo primæ sunt partes, adeo, ut, qui leges Medicorum aspernantur atque rejiciunt, & arbitrio suo vivunt, nunquam a calamitosis ejusmodi malis liberari vel saltim levamen recipere possint: ita in tam diuturno morbo, ubi nervosæ & valde sensibiles partes affectæ sunt, maxime id necessarium est; eo quod levem in victu errorem, nervosæ statim partes luere debent. Sedulo itaque monendi ægrotantes ut a cibis salis, acris, acidis, item vegetabilibus quæ inflant, quæ adstringunt, nec non ab omnium cerevicularum & vini acidi posteri prorsus abstineant: moderatus vero dulcium, inprimis Hungarici, usus, non modo non nocet, sed egregie prodest; & meretur hic allegari locus ex AETIO Serm. II. cap. 21. de

Diætæ  
strictæ  
parente  
dum.



de scabiola vesica ; a mordacibus igitur , & quæ humores acres ac saliores reddunt , abstinendum . Exhibenda autem vina dulcia , lac & gallinæ , aut hedorum , aut agnellorum juscula . Et quamvis motus & exercitatio corporis , ad avertendos ejusmodi morbos , dum & nimia sanguinis multitudini resistit , & liberum per vasa humorum transitum conservat , magnam vim habeat ; tamen , si dolore & spasmō affectæ partes nervosæ imi ventris , quies magis quam motus salutaris evadit , qui tunc maxime nocet , præsertim ea motus species , sub qua sanguis magis ad inferiora pellitur , ut nimia vocis elevatio & longior ac intensior oratio , superiorum partium agitatio , gestatio & oneris sublevatio .

## §. IV.

*In paroxysmo spasmus mulcendus.* Porro , ubi passio spasmodica cum ingenti cruciatus , & mingendi difficultate urget , nihil præstantius clysteribus emollientibus oleosis , balneis atque semicupiis esse , crebriori deprehendi experientia ; & idem quoque passim observata Medicorum confirmant ; mereturque hanc in rem legi elegans observatio DRAVVITZI in libro de scorbutico malo pag. 153. Sunt quoque in paroxysmo ex usu vapores , ex floribus emollientibus & anodynis , ut sunt flores chamomillæ vulgaris , meliloti , sambuci , malvæ , verbasci , millefolii in lacte decoctis , debito modo admissi ad partem affectam , quippe qui leniendo & mulcendo , spasmos , & dolores egregie complacant . Interne vero liquor anodynus noster mineralis , sive solus , sive cum carminativis mixtus , nec non pulveres antispasmodici , ex pulvere Marchionis , specifico cephalico Michaelis , nitro purificato , addito pauxillo croci , & castorei , cum emulsione seminum quatuor frigidorum malorum propinati , reliquis certe omnibus palmam præripiunt . Et eadem hæc remedia , etiamsi inflammatio imminet & febris adest , locum

habere possunt , modo dosis nitri adaugeatur .

## §. V. I

Quando denique ex rheumatica quadam partium externarum fluxione retrocedente ad interiora , vesica morbum patitur , vidimus fonticulos brachiis inustus fructum non poenitendum præstitisse . Quo in casu decoctum demulcens ac leniter diaphoresin ciens , ex radice scorzonæræ , sarsaparillæ , chinæ , rasura cornu cervi , radice glyzirrhizæ , graminis , cicchoræ , ac semine fœniculi concinnatum , nec non liquor noster anodynus mineralis cum spiritu bezoardico Buffii permixtus , nunquam frustra adhibentur .

## §. VI.

Si mictus cruentus in vesica ortus , spasticæ vesicæ affectioni inuritur , vel exulceratio supervenit , externe discutendi , & roborandi fine aquam vulnerariam *l'eau d'arquebusade* , vulgo dictam , pubi & perinæo , haud frustraneo sepe effectu , applicari jussim , vel sacculos ex mentha , melissa , floribus rosarum , chamomillæ vulgaris , & Romanæ in vino rubro decoctos crebrius externæ vesicæ regioni apponi curavi . Interne vero ne sanguinis grumi in vesica forte relictæ cum muco tartareo ibi herente coire & calculum producere queant , commodissime , abstergentia , & traumatica leniora , quæ inter eminentes hyperici , millefolii , radix caryophyllatæ , althææ , glyzirrhizæ , ficus , cetera , sub infusi vel decocti forma , cum primis si hæc ipsa , melle Prussico , vel syrupo dialthea Fernelii probe edulcorentur , in usum vocari possunt : sicuti non minus decoctum Foresti , item sperma ceti , sanguinis grumis in vesica hærentibus resolvendis remedia aptissima præbent .

## §. VII.

Quando inflammatio in abscessum , qui ex symptomatum exacerbatione , & fen-



& sensu quasi ponderis in perinæi & pubis regione, dijudicatur, abiit; ut ille mature aperiatur, & pus e vesica derivetur necesse est: diutina enim mora acrius semper hoc redditum, vicinas partes arrodit, similique modo afficit atque exedit, fistulas aliaque pessima symptomata introducit. Ad quod gravius malum averendum, injectio lactis tepidi, cum speciebus emollientibus cocti, tentanda est, ac si parum illa proficiat, ultima spes in operatione chirurgica, quæ per cultrum fit, reponenda, ubi perinæum in eo loco, ubi sectio calculi, cum magno quem vocant apparatu, peragi solet, instituitur. Quam in rem annotationem merentur bina quæ ex RIOLANO desumit exempla BONETUS in *sepulcr. Lib. 3. p. 634. seqq.* In feminis res aliter cedit, neque iis hoc auxilio opus est, eo quod orificium vesicæ amplius possident, & liberior ad ipsam accessus patet. Ulcere autem aperto ac probe expurgato, eadem quæ modo memorata sunt in §. *præced.* remedia, erunt proficua.

Cautela.

§. I.

Sanguinis  
detra-  
ctio, qua  
ratione  
instituitur.  
da.

**Q**Uando multitudo sanguinis, sui depletionem exigit, consuetius est, per venas superiores primo, ob revulsionem sufficientem, ejus copiam detrahere; altero vel tertio die, derivationis gratia aperiendæ sedis venæ, si tumescant, & prominent, vel si id commodè non fieri potest, in malleolo vel poplite sectio potest institui. Sub habitu corporis spongiosioti sanguine ac succis pleno, in sexu præsertim sequiore, ad revocandos versus exteriora sanguinem & humores cucurbitulæ partibus superioribus, & inferioribus applicatæ plurimum utilitatis afferre possunt.

§. II.

quædo  
ea proficit

Sed monendum hoc loco est, quod  
*Hist. Syst. T. IV. P. II.*

hujusmodi sanguinis detractiones ubi plethora urget, in principio, ad inflammationem vel arcendam, vel ubi jam adfuerit, ad eam discutendam, aut majorem impediendam multum valeant, & profint; ubi vero non satis est virium & sanguinis, atque exulceratio præsens, plus noceant: quia virium robur detrahunt, cujus tamen præsentia ad expugnandum, & solvendum morbum impendio est necessaria.

quædo  
noceat.

§. III.

In omnibus vesicæ doloribus, & spasmis; a quacumque etiam causa proficiscantur, validiora purgantia numquam exhibere convenit, neque in principio, neque in progressu: metuendum enim est, ne exagitati humores ad partes afflictas magis impellantur & præcipitentur. Remittente vero dolore & spasmo, atque morbo inclinante, alvum solvere, & intestina a stercoreis sordibus, quæ per dolores & spasmos plerumque retinentur, liberare, utile omnino, imo necessarium subinde est. Sed benignioribus id semper præstandum erit, cujus generis sunt mannata, rhabarbarina, syrupus rosarum sulativus, cum sero lactis vel lacte asinino propinata.

Purgantia  
fugienda.

§. IV.

Ad spasmodum ferociam mitigandam præter externa linimenta, & fomenta, clysteres ex lenientibus, & emollientibus conflati, sunt injiciendi, eo quod blando suo calore ac tepore rigidas spasmis afflictas vicinarum partium fibras moliendo & relaxando, insigne dolorum solatium atque allevamentum afferant, sed exigua quantitate, ne comprimantur inde vesicæ parietes, applicandi erunt.

Clysteres  
usque  
proficiunt.

§. V.

Ubi ingens vesicam, & ei connexas partes corripuit exulceratio, quæ ex copioso viscidæ materiæ sedimento, & lenta quadam vires & carnem depasciente febre apparet; ab interno & largiori *Carolinar.* usu abstinendum esse,

In exulceratione  
vesicæ  
carolinæ  
non nocent.

O

ex



ex damno, quod inde emerfit, maximo didici: ob stagnantem enim aquam, & corruptio, & febris intenditur.

## §. VI.

*Inje-  
ctiones*

Injectionibus anodynis, ad temperandam humorum acrimoniam, neque minus ad efferatos dolores sopiendos, commodus utique locus concedendus. Parari illæ possunt ex albumine ovorum no. 4. conquassato, & in aquam redacto, addendo lactis feminini uncias duas, butyri recentissimi drachmam, vel etiam emulso artificialis ex semine cucurbitæ, papaveris albi, aqua florum sambuci, rosarum, & cerasorum nigrorum concinnari in talem usum, & finem potest.

## §. VII.

*Atria  
vitiada*

Ab omnibus diureticis, acrioribus in spastica hac affectione maxime opere abstinendum: nam ubi viæ urinariæ exulcerationem passæ sunt, ab adhibito eorum usu dolores, & spasmos exacerbari atque longe crudeliores reddi, nullum est dubium.

## §. VIII.

*Anody-  
na.*

Ubi dolores sunt vehementissimi atque exinde gravia metuenda sunt symptomata, anodyna quæ valide dolorum sævitiam compescunt, ne vires nimium frangantur & febris cum urinæ difficultate augeatur, vel amentia provocetur, usui possunt esse. Et vidi a trochiscis de alKeKengi ad drachmam dimidiam pro dosi sumtis, ægotantes insigniter sublevatos. Cavendum tamen maxime ab eorum usu est, ubi ab ætate senili, ab affectu animi, mœrore præsertim, virium adest prostratio.

## ENARRATIONES MORBORUM.

## OBSERVATIO I.

*Spasmus  
vesicæ,  
diurnus  
fœnalis*

**V**Ir circiter quadragenarius, causarum patronus, per aliquot jam annorum spatium immanes plane ac intolerabiles dolorum juxta

pectinem & pubem, cum summa urinæ difficultate & quandoque suppressione, vigilia, virium defectione, extremorum frigore, & tremore, per intervalla passus est cruciatus, ut sæpius ad desperationem redactus, vite sibi finem propter atrocissima tormenta, gladio procurandi satius duxerit. Tormenta hæc per aliquot hebdomades assidue affligebant, postea remittebant, quamvis non prorsus cessarent, ita tamen ut officio suo quodantenus fungi potuerit; dein post unam vel alteram, eodem insultu revertebantur. Urina pauca & turbida effluebat, viscidum deponens sedimentum. Cumque per aliquot annos hoc malo affectus esset, viribus tandem consumptis, in quadragesimo ætatis suæ anno obiit. Omnes per totam civitatem in auxilium vocaverat Medicos: quorum alii causam tam immanis cruciatus in vesicæ calculum; alii in ejus ulcus rejiciebant. Sed aliud longe partis affectæ post mortem docuit scrutinium; vesica quippe integra, omni vacans inflammatione, fuit inventa, nec vestigium sabuli aut calculi in ea repertum. Ipsa vero vesicæ membranacea substantia præter naturam valde crassa, & densa erat, copiosis amplis ac distentis sanguiferis vasis, quorum nonnulla calami scriptorii capacitatem æquabant, obsita, & sanguine crasso, & atro repleta.

*Epicrisis.*

Dolor & spasmus partium nervosarum, atque membranacearum, ab humore vitioso, vel intra cavitatem, vel in ipsa textura & compage tunicarum nerveo fibrosarum herente progignitur. Posterior causa, quamquam minus a Medicis usque eo fere cognita, atque in eorum scriptis detecta sit, frequentissima tamen: testante id firmiter alia, cardialgia, dolore ilei, & coli spasmodico, a sanguine intra tunicas ventriculi & intestinorum nervea stagnante subortis. Simili ratione, in vesica, quæ ex meris tunicis, & membranis ner-



veo musculosis, subtilis sensationis constat, a sanguine intra vasa nimium congesto, & nerveas divellente ac distrahente, vehementem suboriri posse spasmus, non modo vero est simillimum, sed & sectio in presenti casu instituta, id luculenter apertum reddidit. Neque mirandum est, quod calamitosi hi interdum cruciatus inducias egerint, & ad tempus quieverint, hoc videlicet contigit quando ex variis causis sanguinis ad vesicam appulsus, quodammodo diminutus, & retardatus fuit. Medicamenta, quæ ad dolores levandos ad acrimoniam humorum obtundendam, ad exulcerationem mitigandam, ad urinæ fluxum provocandum fuerunt exhibita, supervacanea & nullius usus fuisse, jam quisque sagacioris ingenii & judicii Medicus ex facili intelliget.

## OBSERVATIO II.

*spasmus  
vesicæ,  
ex materia  
podagrica  
retro-  
pulsæ*

Vir generosus, militum præfectus, 60. & ultra annorum, podagricis doloribus subinde vexabatur, & complures ante annos, fluentes habebat hæmorrhoides, quæ tamen per magnum temporis spatium siluerunt. Autumno dolere incipiunt pedes cum spasticis tractionibus: sed is minime hæc curans, iter aliquot milliarium, subcoeli temperie valde humida, & frigida suscipit. Dolores quidem evanescebant, sed postea incidit in mingendi difficultatem cum ardore, & dolore circa pubem, & radicem penis, virium dejectione, & conatu ad vomendum, alvo obstipata, horrore artuum, & æstu intercurrente intensiori junctam. Ego in consilium accitus, venæ sectionem in pede, quum per integrum fere annum eam neglexisset, suasi. Interne pulveres diaphoreticos, nitro-cinnabarinos, item liquorem anodynum cum spiritu Bussii remixtum, ad transpirationem placidam promovendam exhibui. Exterius regioni

dolenti linimentum applicari jussi, ex aqua Anhaltina, camphora, croco, oleo nucistæ expresso, & pauxillo opii compositum, nec non ad alvum aperiendam, clysteres emollientes, ex floribus anodyna quadam virtute imbutis, injiciendos curavi. Et intra septem dies, morbo per copiosorem sudorem soluto, sanitati fuit restitutus.

*Epicrisis.*

Hanc urinæ, cum stranguria, & febricula, difficultatem, ab humore seroso acri, qui pedum digitos obsidebat, retropulso, subortam dijudicavi, & rheumatismum erysipela-ceum vesicæ substantiam occupantem pro causa agnovi. Eaque propter ejusmodi remedia cum intrinsecus tum externe usurpanda duxi, discutien-di quæ pollent facultatem, & quæ cum insigni alias fructu in erysipellate affectis tutissima & convenientissima deprehendi. Ex quo, praxeos Medicæ fundamentis initiati discere possunt, quantum intersit, ad expeditam & felicem sanationem morbi conficiendam, veram ejus causam investigare, & statim inter initia, ad eam amovendam congrua & idonea remedia ad usum vocare.

## OBSERVATIO III.

Theologus magni nominis hujus *spasmus  
vesicæ,  
a materia  
scorbutica  
purpuracea  
retro-  
eunte* loci sexagesimum ætatis annum supergressus, sanguineæ constitutionis, vitæ sedentariæ, lucubrationibus, & mentis fatigationibus nimium de-ditus, doloribus subinde gravativis, & pressoriis circa os sacrum & regionem pubis corripiebatur, atque tum maxime, quando sermonem sacrum alta voce diutius paulo protraheret; qui, corpore quiescente, & sanguine misso, quodammodo remittebant. Purpura scorbutica sæpius afflixit, in gravem primum per intervalla dysuriam incidit, cum horrore & febricula alternante, & ingenti circa pu-  
bem



bem dolore. Demum superveniebat paresis manus dextræ: quæ quamdiu perstitit, remissior fuit dysuria; illa vero evanescente, atrocior vesicæ spasmus & dolor cum assiduo urinam mittendi stimulo illico repetebat. Duravit hoc malum per aliquot septimanas. Varii generis tentata a Medicis remedia. Missus aliquoties intra morbi decursum, e pedis vena, sanguis: sed citra fructum. Tanta enim doloris, & spasmus in pube, & pectine secuta est atrocitas, ut appetentiam ciborum, somnum & vires penitus dejiceret, atque urina pauca & cum summa difficultate efflueret, purulentæ quippiam materiæ continens. Inducias quandoque dolores agere videbantur: sed mox redierunt. Tandem vesicæ inflammatione, ex parte exulceratione, febreque acuta purpuracea supervenientibus, vitam cum morte, non sine summo totius civitatis luctu commutavit.

#### *Epicrisis.*

Quando in hac gravis morbi historia enarrata phænomena, & circumstantias probe rationi subijcimus, & paulo attentius consideramus; abunde constare arbitror, causam funesti hujus malineque in vesicæ calculo, neque in humore acri in cavitatem vesicæ detento, sed in decubitu sanguinis ferofi scorbutici intra membranas ejus delitescantis esse quærendam, & constituendam: quem postea inflammatio cum febre acuta & purpuracea exitiosa insecuta est. Mea quidem sententia nullum dubium superest, quin a purpura retrocedente, ob incautius paulo, intra morbi hujus decursum, subinde admissum frigus, & crebrius celebratam venæ sectionem, quæ difflationem humoris morbifici per extimam cutim valde moratur, via morbi multum increverit. Placet vero hoc loco similem quandam notatu dignam observationem, M. N. C. insinuatam, adjicere, quæ abunde docet, a sero impuriori intra ve-

sicæ tunicas stagnante lethales fieri posse vesicæ inflammationes. Ita enim legimus, *Dec. 2. ann. 7. observ. 143.* quendam fanguineo-cholericæ constitutionis a juventute stranguria afflictum, incrementum ætate commissis in diæta erroribus, frequenti ac dolorifico paucæ & pallidæ urinae, singulis fere vel vix dimidiæ horæ quadrantibus cruciatum fuisse mistu, una cum tenesmo. Quod malum posteaquam ultra annum frustra omnibus datis durasset, octo ante obitum hebdomadibus accessisse in urina reddenda impedimentum, brevi tamen iterum cessans, intumuisse, doluisse pedes, ac erupisse passim in dorso, & pedibus pustulas, cum ardore, subsequente spontanea ruptura, exulceratione, tandemque leniori quasi gangræna. Mature quidem topicis hæc fuisse abacta, in regione pubis autem intensissimum dolorem subsecutum tam incredibilem, ut æger ejularet, mens alienaretur, paralyti latus sinistrum afficeretur, tandemque motibus convulsivis ipsa mors accederet. Exempta post mortem vesica, interior totam nigricantem conspectam fuisse, sphacelatam, sine ullo tam sabulo quam calculo.

#### OBSERVATIO IV.

Honestæ femina, in urbe vicina Dolor vesicæ ab onere elevationis, ex terrore accedente acutissimus redditus. degens, quæ annum superavit quadragesimum, mediocris staturæ, & sanguineæ ut vocant complexionis menstruum fluxum ordinatum persentit, venæ sectionem etiam aliquoties admisit, aliquot abhinc mentes, supra vires aliquoties facta onerum elevatione; insignem gravativum instar ponderis circa regionem pubis & os sacrum percepit dolorem, quo præsentem menstruum etiam fluxus parior. Demum ex terrore accedente; spasmus ad inguina acutissimus redditus est, ita ut, ægra id ipsum fatente, longe superaret dolores, quos



quos femina in partu etiam laborioso sustinere debent , cum summa urinam emittendi difficultate , & continuo mejendi & desidendi desiderio stipatus . Excepta urina crassum semper deposuit sedimentum fibrosis quibusdam moleculis in ea natantibus . Ciborum perit appetentia , atque somnus , ob urgentem urinæ stimulum , difficilis & interpolatus . Auxilium a me petiit . Ego sanguinem ut in brachio mitteret , & loco cerevisiæ decoctum ex speciebus emollientibus , & leniter carminativis biberet , auctor fui . Interdixi autem vinum Rhenanum , & ut in quiete corpus servaret suasi liquorem quoq; anodynum nostrum cum croci essentia mixtum , ad usum internum commendavi : neque minus infusum Theiforme , quod herbam veronicæ , virgæ aureæ , flores malvæ , summitates millefolii , radicem althææ , erygii , glycyrrhizæ , nucistam & semen fœniculi habebat , mane hauriret præcepi . Dedi quoq; consilium , ut vesicæ regioni frequenter epithema , quod ex vino rubro cum floribus lavendulæ , chamomillæ Romanæ , sambuci atque rosarum rubrarum decocto , parabatur , applicaret . Hæc quidem usurpavit ægra : & quamvis nondum ex toto malum fuerit depulsum , levamentum setamen exinde recepisse mihi rescriptum est .

*Epicrisis .*

Affectus qui ex lesa vesicæ substantia oriuntur , præsertim si per aliquod jam duraverint tempus , curatu non tam faciles sunt ac esse forsantur . Possunt tamen opportunis adhibitis remediis mitigari , ut per plures annos trahere adhuc vitam , licet cum molestia , possint hoc vitio laborantes : cum alias incauta victus ratione , vel importuna per medicamina tractatione , lethalem facile eventum sortiantur . Perquam enim ardua , & difficilis res est , vasa vesicæ sanguinea , a fortiori impetu &

*Hoffm. Syst. T. IV. P. II.*

appulsa sanguinis in eadem , nimium relaxata , pristinum tonum reducere , & motus naturæ aliquoties eo directos avertere . Ex hac porro morbi historia illud in usum convertere possumus , quod a sola causa externa , videlicet corporum gravium sublevatione , & gestatione , in sanguine abundantibus , impetuosa ad partes inferiores in abdomine contentas , quæ quo nobiliores , & sensibiliores eo gravius launt , sanguinis enasci queat congestio ; quæ certe multorum , nisi cita ope succurramus , funestorum symptomatum fons atque origo evadit . Neque ullo modo mirandum est , congestionem illam in nostro casu vehementiores turbas excitasse , quum terror supervenerit , cujus ea indoles ac facultas est , ut universam humorum massam , motu vitæ plane contrario atque insensissimo , ab exterioribus ad interiora cogat atque repellat .

OBSERVATIO V.

Vir annorum 37. sanguineo cholericæ temperamenti , habitus corporis macilentioris , prima statim in juventute , Veneri atque Baccho hostias assidue litaverat , lauto insuper usus vitæ , & victus genere : sanus alias atque robustus , nisi quod aliquoties gonorrhœam dignam factis mercedem deportaverit , quæ semper brevi fuit sanata . Ante aliquot annos , improvise quodam horrore , & frigore cum alternante estu corripitur , ac inde in totalem incidit urinæ suppressionem . Medicus calculum vesicæ subesse ratus , suavit balneum , & tincturam ex cantharidibus præbuit ; ac applicato cathetere restitutus urinæ fluxus . Exactis tribus mensibus , idem malum reversum est , idque aliquoties . Postea alterius Medici consilio usus est , qui ordinavit emulsionem refrigerantes , & antispasmodicas , quibus uberius , & liberius

*Urina  
sup-  
pressio  
ex gonorrhœa*



redditas urinæ cursus . Anno abhinc prior morbus denuo cum horrore , frigore , alternante æstu , & totali urinæ suppressione repetiit . Meam vero operam non modo ob præsens malum , sed impotentiam qua laborabat , poposcit . Ego infusum Theiforme , pulverem antispasmodicum , & mixturam ex tinctura tartari , liquore anodyno & balsamo Peruviano commendavi : quibus naturalis urinæ fluxus restitutus . Postea urina non penitus quidem suppressa , sed sili tenuissimi instar , prævio semper horrore per certa intervalla prodiit . Semen quando vult ejaculari , ad orificium urethræ subsistit , postea sensim exstillat , & indusium madefacit . Notabile adhuc , quod urina subsistat prius , dein cum impetu prorumpat , præcedente sonitu , *ald i venn eine Nabe terbrochen ivurbe* . Sanatus fuit , diuturno per aliquot menses fontis *Selterani* usu , pro potu ordinario . Et ad alvum laxandam quæ sæpius erat stricta , pulvis magnesiæ cum arcano duplicato & nitro mixtus conduxit .

#### *Epicrisis.*

A gonorrhœa Venerea perperam , & nimis cito curata , ego in praxi mea , morbos vesicæ , & vicinarum partium post longum sæpius tempus demum successisse , multoties observavi . Et ratio ex anatomicis quam facile petenda est . Notum enim est glandulas prostates , quæ plerumque sedem gonorrhœæ constituunt , collo vesicæ , adeoque ejus sphincteris , & urethræ principio esse annexas . Quod si itaque hæ glandulæ vel nimium relaxatæ , & tumefactæ , aut scirrhosæ , comprimunt vesicæ collum , vel acrem exsudantes humorem sphincterem , & urethram spasmo ac dolore afficiunt , mictum difficilem , ad tempus penitus suppressum , imo interdum cum dolore , & spasmo consequi , minime mirandum est . Et tale vitium quoque in præsentī casu , dictis partibus inherere symptomata satis per-

spicuum reddunt : nam propter compressum vesicæ collum , ejaculatio seminis non modo impeditur , sed & urina tenuis qualis filum prolicitur , & quandoque ejus fluxus penitus intercipitur ; quod si vero ob molem tandem prorumpit , orificium urethræ cum vi aperiturus unde talis sonitus , qualis in casu enarratur , emergit . Ego pro potu ordinario fontem *Selteranum* suasi , cujus eximiam virtutem ac facultatem in renum , & vesicæ morbis , ad leniendos dolores , & spasmos , urinæ fluxum promovendum , canales obstructos aperiendos , atq; mucum viscidum detergendum non satis dilaudare possum . Et quoniam in gonorrhœa inveterata , & in morbis vesicæ , & urethræ ex hac prodeuntibus , per aliquot exempla , mirabilem thermarum Carolinarum potum , & earum aquæ salutiferæ in membrum injectionem crebriorem , deprehendissem ; non dubitavi ejus usum , & fructum de meliori commendare .

#### OBSERVATIO VI.

Quodam in Principatu Halberstadiensi me consulebat magnæ dignitatis vir quinquagenarius , sanguineæ complexionis ac venesectionis osor , ob insanos , & immanes fere spasmos & dolores , quibus , præsertim Borea flante , in pube , perineo , & radice penis torquebatur . Juncta simul adebat urinæ difficultas , stranguria alviq; pigrities , cum horrore extremorum , atque vigilia . Remittebant sæpius hi dolores ad tempus , post revertebantur majori vel minori impetu . Quum morbi hujus pertinacis , & infesti primam investigarem originem , accepi , se aliquoties in juventute laborasse gonorrhœa , quæ quidem a Chirurgis curata , sed ab eo statim tempore , difficultatem in urina emittenda , cum sensu constrictionis circa has partes se percepisse . Ipse jam a multo tempore , pro-

*Vehe-  
mētē ve-  
sicæ do-  
lor . e  
gonor-  
rhœa  
verse  
curata*



propter continuas in officio occupationes, vitæ sedentariæ nimium indulgebat; nihilominus data occasione, qua crebro utebatur, vinum liberaliter bibit, a victu quoque duro & infumatis carnibus, quibus assuetus erat non abstinuit. Ad levandos dolores, se nihil eximius & efficacius inter omnis generis remedia deprehendisse referebat, ac juscula, in quibus herbae emollientes, ut parietaria, malva cum floribus atque althea decoctæ erant; quæ etiam cum aqua calida infusa, & cum syrupo dialtheæ Fernellii edulcorata, insigne allevamentum rulerunt. Ego, morbo & ejus causis probe in examen vocatis, cum vix esse sanabilem, propter magnam læsionem in vesica, & ejus collo, edixi. At quia urina lentum viscidum, ac arenosum deponebat sedimentum, vel jam rudimenta calculi præsentia, vel futura, ipsi præfagium feci. Ut itaque morbi ferociam leniter, & a gravioribus vesicæ morbis se præmuniret, interdixi cibos salios, & infumatos, omneque cerevisiæ, & vini genus; ac ut fontem *Vildungensem*, quem jam olim usurparat, pro potu ordinario biberet, balneis frequentius uteretur ex aqua dulci, decocta memorata ex emollientibus continuaret, ad roborandum vero imbecillum ventriculum, qui perpetuus fere continuorum dolorum comes est, vini Hungarici optimi & recentioris haustulum supra cibos sumeret, at intra mensis spatium, pilulis ex pulvere rhabarbari, extracto rhabarbari, & therebinthina Veneta paratis, alvum ter minimum subduceret, auctor fui suasorque. Quibus monitis, vir summe prudens quum obtemperaret, ad sexagesimum & tertium annum, nunquam tamen ab omnibus doloribus prorsus immunis, vitam protraxit.

*Epicrisis.*

Gonorrhœa ex impura Venere contracta, quo familiarior juvenili ætati est, eo minus recte ejus sanatio susci-

pitur; quia affecti non periti & circumspecti Medici consilio, sed chirurgorum ope uti consuescunt, qui fluxum plerumque adstringentibus nimis cito compescunt; ex quo fit, ut vel statim in graviora incurrant mala, vel dispositio quædam prava in locis affectis relinquatur: quæ demum in proveciori ætate, concurrentibus aliis erroribus sese exerit atque variis pathematibus ac vitiis præsertim circa vesicam manifestat. Nam, post quinquagesimum annum, lentior ac difficilior incipit fieri sanguinis in partibus inferioribus, & extremis, ut sunt, quæ in pelvi jacent, per venas recursus, & reditus; præsertim in sanguinis, qui vitam sine motu, & excretionem, atque in occupationibus agere debent. Quando itaque sanguis non exitum habet, neque per sedis venas, neque per artificialem evacuationem; in vesica, & vicinis partibus imbecillioribus facile subsistit, & nimium ibi collectus, propter vehementem tunicarum nervearum distractionem, & convulsionem, graviores excitat spasmos ac crispaturas sphincteris ac urethræ, qui difficultatem m ejendi relinquunt. Urina, autem mingitur turbida, & viscosa, non aliam ob rationem, quam, quod a stagnante intra vesicæ substantiam sanguine, humor instar albuminis ovi viscidus magno nisu exprimitur, similiratione, ac fieri solet in hemorrhoidibus quæ vulgo vocantur albæ; qui mucus postea cum partibus tartareo terreis urinæ paulo diutius in vesica detentæ commixtus, calculos quod facile in vesica procurat, & non raro ejusmodi affectibus quod laboravit noster patiens adjungitur, nisi congrua vitæ, diætæ, & mendi ratione id præpediatur. Quod vero sevientem Borea spasmi, & dolores partium internarum ingravescere soleant, ventis vero ex contraria plaga flantibus mitescant; id a nobis sæpius animadversum est: &



quanta vis ac potestas sit ambientis atmosphere, quæ, a ventis, testante Barometro, mirifice modulatur, partes corporis nostri maxime nervosas distendendo ac strictiores reddendo, inde luculenter demonstratur.

## OBSERVATIO VII.

*Spasmus vesicæ, in vita sedēta. rla ad dicto, funestus* Clarissimi nominis vir, magnus literator, sexagenario major, sanguineo melancholici temperamenti, qui continuis lucubrationibus, mentis laboribus, & sedentaria vita maximam suæ vitæ partem peregit, ante tres annos mingendi difficultate, cum ponderis cujusdam pressorio sensu in regione inguinali corripitur. Urina non modo viscidum sedimentum, sed multa concrementa calculosa cinericei coloris deposuit. Quæ symptomata succedente tempore, semper propter dolorem & spasmum, ischuriam, dysuriam, urinæ incontinentiam, ani procidentiam & tenesmum, vigiliam quoque, sequentes per annos incrementa, ita vires ejus paulatim attriverunt, ut sexagesimo sexto ætatis anno extremum spiritum reddere debuerit.

*Epicrisis.*

Morbos qui vesicam infestant, ut sunt calculi, exulcerationes, mictus cruentus, dysuria, stranguria, recte & perire satis, primus artis nostræ conditor Magnus Hippocrates inter ætatis senilis affectus retulit. Ad quorum generationem difficilior sanguinis regressus, tum per venas hæmorrhoidales, tum per hypogastricas, sedentaria, & motus expers vita, sanguinis intermissa detractio, & impuri feri visciditæ tantarei, ob excretionem per cutim, urinam, sub hac ætate labescentes, cumulatio multum omnino conferre possunt. Sed hos morbos, si ingruunt, difficilioris sanationisimo insanabiles esse, gravissimus idem Auctor pronunciat. Placet nobis hunc in finem ex M. N. C.

*Dec. 2. Ann. 9.* similis argumenti casum adducere, cui simul anatome eodem morbo defuncti annexa præstat. Fuit autem Matrona sexagenaria, per 20. annos vidua, sanguinei temperamenti, quæ a deambulationibus plane abstinens, sedentariam solitudinem quærens ob mœrorem lacrymis se se fatigans, doloribus ad os sacrum, pariter ac colicis, afficitur, aliquando, & stranguria; deinde etiam pedum tumore: hinc magis motu corpus destituitur. Ingravescente ad os sacrum malo calculos ad pisorum magnitudinem cum sabulo egerebat; tandem viribus fatiscentibus, appetitu debilitato, cruciatibus stranguriæ gravioribus, & accedente tenesmo, parum sabuli cum foetido, & purulento muco excreto, placide animam exhalavit. Aperto corpore intus vesica rugosa, & ad magnitudinem pomi contracta conspiciebatur, & non tantum ulcerata interior ejus tunica, sed vasa etiam nigra in ipsa prominentia se offerebant, urethra nimis ampla ut manubrium cùltri anatomici promte trajici posset, vesica fellis colore instar rob cerasorum cum calculis minutis nigerrimis conspectui se prodidit.

## OBSERVATIO VIII.

Incidit in memoriam casus, quem ante 50. propemodum annos, cum Mindæ VVestphalorum ut Physicus Provincialis Medicinam facerem, annotavi. Vir erat Sexagenarius, qui cum ob copiosi spiritus vini ingurgitationem & victum duriores, vitamque otiosam rheumaticis & nephriticis doloribus plures per annos obnoxius fuisset, tandem in febrem lentam cum mictu difficili quandoque purulento dolore gravativo & ardore in lumbo sinistro stipatam incidebat. Corpus macie erat consumptum, & vires in dies decrescebant. Tandem

*Spasmus vesicæ, ex splenis vitiis.*



intolerabilem circa regionem pubis passus est. cruciatum, cum totali fere urinæ suppressione junctum. Ad quem sublevandum, neque externa neque interna probatæ virtutis anodyna & discutientia remedia quicquam opis contulerunt. Ex quo factum, ut viribus pœne omnibus dejectis, exacto aliquot hebdomadam spatio diem supremum placide subvertit. Concessa a cognatis defuncti corporis sectio, renem sinistram ulcere penitus consumptum & exesum inveni, in pelvi autem insignem, aliquot uncias, crassi, foetidi puris copiam conspexi, vesicæ tunicis valde laceris atque arrosis. Dexter ren satis erat magnus, cujus ureter instar pollicis dilatatus ventriculum valde parvum & contractum, eo quod ultimis diebus nihil assumerat, deprehendi.

#### *Epicrisis.*

Ex dissectione hoc affectu defuncti cadaveris, id discere & animadvertere licet, sævissimum vesicæ dolorem & spasmus cum urinæ suppressione, a causa externa, parulenta nomine materia, quæ ex erosa renum substantia in inferiorem vesicæ sedem descendit, nerveas membranas extrinsecus corrodendo, contingere posse. Lethalis vero ischuria ex eo secuta fuit, quod non modo collum & sphincter vesicæ ab acredine materiæ hujus purulentæ contractus, sed etiam ab urinæ copia compressus fuerit: unde factum, ut usus catheteris immissi plane fuerit frustraneus. At qui hic recorder sectionis nobili aulici ante viginti fere annos institutæ, qui gladio vulneratus ex lethali ischuria, per decem fere dies durante, *Delitii* quæ est civitas Misniensis, sub summis dolorum tormentis animam efflavuit. Reperimus, abdomine aperto, in cavitate pelvis uncias aliquot sanguinis coagulati, qui paulatim sensimque ex vulnere non adeo insigni vasis sanguinei in omento stillavit in ipsam pelvim, & valde compri-

mendo vesicæ collum, non modo vehementissimos dolores, sed etiam urinæ suppressionem insanabilem reliquit.

### C A P U T VIII.

#### *De Doloribus & Spasmodis externarum partium Rheumaticis & arthriticis.*

#### *Theses Pathologicae.*

##### §. I.

**V**eteres Medicorum omnis generis dolores, qui vel externas partes musculosas, vel ossium juncturas & articulationes festabant, arthritidis nomine comprehenderunt, atque sic in eorum monumentis proposuerunt, ignorato vocabulo rheumatismi. ARETÆUS lib. 2. 12. de arthritide ita scripsit: *quibusdam in omnem corporis ambitum vagatur, & deinceps transitus quoque in dorsi thoracisque musculos fit; incredibile est quam late malum serpat: vertebrae dorsi cervicisque dolent & in summo sacri ossis dolor inherescit, & paulo post cum renibus & vesica communicatur.* Superiori vero seculo, Clarissimi Galliarum Medici, quos inter primas omnino partes, CAROL. PISO, RIVERIUS, BALLONIUS, CHE-SNEAU, tenent, dolores, qui medios artus, & musculos cervicis, brachii alterutrius, thoracis antici & postici, humeros, scapulas, femora, manus, obsident atque affligunt, rheumaticos vocarunt. Arthriticos autem dixerunt eos, qui in articulis tantum & juncturis ossium residentiam; ita tamen, ut pro diversitate partium affectarum differentes etiam denominationes factæ fuerunt: si enim dolor in pedum articulis consistit podagra; in manibus chiragra; in cubitu onagra; in dentibus dentagra; in vertebrae dorsi lumbago; in articulationibus ossis ischii, dolor ischia-

*Quid arthritidis vocantur fuerit.*



ischiadicus audit. Verum nostro etiamnum tempore, incipientem & facilius transeuntem arthritidem, chiragram, & podagram, rheumatismi nomine insignire consuecunt.

## §. II.

Cur spe-  
cialiter  
hi affe-  
ctus per  
gratien-  
sur.

Cum vero insignis rationem partium dolentium, causarum, symptomatum & methodi medendi inter rheumaticos & arthriticos dolores sit differentia, cum sufficienti & stabili ratione, Medicorum & sagaciores & peritiores hos affectus specialiter tractationi & explicationi submittere haud dubitarunt. Neque est exigui in ipsa praxi medica momenti, arthritidis recentis & incipientis a vera radicata & inveterata differentia.

## §. III.

Diffe-  
rentia  
rheuma-  
tismi.

In rheumatismo, musculi cum eorum membrana communi & tendinibus, ubi ossibus inferuntur, gravi dolore & spasmo hinc inde in artubus aliisque corporis regionibus afficiuntur, in arthritide vero ipsa ligamenta tendinosa nervea, quibus invicem ossa conjunguntur & combinantur, quatenus illa perioestio coherent vehementius affliguntur. Sed uti in arthritide ac podagra incipiente dolor magis in superficie ligamentorum hæret & urget: ita in inveterata, humor vitiosus, dolorum fomes, profundioris est situs, & spatium magis intercavitates articulorum occupat. Deinceps quoque in eo differentia arthritidis veræ & rheumatismi constituenda venit, quod illa sæpius recurat, homines misere exerceat, atque longiori tempore insistat, difficilioris quoque sit sanationis; rheumatismus vero quandoque semel vel bis tantum per omnem ætatem adoriatur, neque tam diu inhærescat, facilius transeat & sanationem promptiorem admittat. Variat quoque sæpe ipse dolor, nam in rheumatismo magis est tensivus pressorius, gravativus cum frigore junctus, sine conspicuo tumore ac rubore; in arthritide vero lancinatorius, divulsorius,

pungitivus & quasi rupturam minans cum insigni tumore & rubore percipitur.

## §. IV.

Sicut omnis permolestæ sensationis causa est humor sive copia sive intemperie peccans, intra vasa minima tunicarum & membranarum nervosarum stagnans atque congestus, qui violentia quadam eas distendit, vellicat, divellit, arrodit: ita etiam eandem causam in rheumaticis & arthriticis affectionibus locum habere extra omne dubium esse videtur.

## §. V.

Attenta constat experientia, non modo ætate florentes, juniores, sanguineæ, & sanguineo-serosæ complexionis, spongiosioris corporis habitus, ab improvide admissio frigore, vel vento Boreali impetuosius in partem irruente; sed etiam plethoricos sive feminas sive viros vegetæ alias naturæ, ommissa consueta venæ sectione vel scarrificatione, post prohibitam cum primis transpirationem, rheumaticos, e.g. in cervice, scapulis, humero, dorso, sterno, thorace, dolores vel levioris gradus arthritides experiri: cum natura debiles minus fibrosi & laxioris habitus, a parentibus arthriticis & podagricis geniti, & qui immoderato Veneris vel vini usu, commestationibus, mentis fatigationibus & vehementioribus animi commotionibus, tono & robore valde imbecilles redditi fuere, vera profundiori & magis pertinaci arthritide imprimisque podagra gravius afficiantur atque excrucientur.

## §. VI.

Qui graviore præsertim inveterata arthritide laborant, ii conquiescente hac, quam facile in nephritidem calculosam dilabuntur, & cessante hac, in arthritidem alternatim quasi recidunt: insuper quotidiana docemur experientia, arthriticos & maxime podagricos digestionis vitio plerumque laborare, & primas eorum vias ructibus, flatibus, spasmis & illuvie vitio-

Horum  
causa  
proxima.

Dolores  
leviores a  
transpiratione  
prohibita

Et cum  
nephritide  
abstinere



vitiosorum humorum, sub alvo pigriori esse turgidas: quin imo observamus plurimos podagricos esse hæmorrhoidarios, sive insultus ac motus, quamvis inaniter & sine bono successu & exitu, hæmorrhoidales experiri, doloribus in osse sacro pertinacius insistentibus & quandoque venis circa sedem tumescentibus,

§. VII.

*Differunt dolores tam rheumatici quam arthritici, ratione causarum &c.* Quemadmodum non una eademque humorum, qui dolores fovent atque ingenerant, indoles atque conditio est: ita etiam & ipsi dolores ratione gradus, genii, & symptomatum rheumatici & arthritici multum habent discriminis. Nam ubi sanguis tantum copia peccat & nondum multis impuris particulis est inquinatus, mitius solent affligere dolores: id quod in rheumatismo simplici, & incipiente arthritide plethoricorum occurrit. Longe vero gravior horum dolorum species est, quando a feri impuri & excrementitii colluvie foveantur & sustentantur. Siquidem ego multoties observavi, uti in omnibus doloribus, ita etiam in iis qui partes externas & nervosas graviter afficiunt, rarius solum sanguinem bene temperatum & purum peccare, sed sero excrementitio ut plurimum esse stipatum; ita tamen, ut vel nimis sit tenuis & serosus, exigua rubicunda consistente portione refertus, vel sero viscido glutinoso tenaci imbutus delinquat; ipsa etiam excrementitia & impura salia multum ratione acrimoniæ volatilis fixæ falsæ & tartareæ in cruore differunt, quæ diversa hinc symptomata producant: ut adeo pro dissidente inter se harum causarum natura & indole, rheumatismus non male a Medicis exercitatis in sanguineam, in cacochymicum, scorbuticum, fixum & vagum, distinguatur.

§. VIII.

*Hinc e vena missus sanguis differt.* Ex quo fit, ut sanguis in diversi generis doloribus e vena emissus, & ratione coloris & consistentiæ mul-

tum differat. Nam, quandoque in aquam calidam immixtus multo tenaci mucos ex fibris varie inter textis constante abundans conspicitur, interdum serum quod supernatat, mox instar glutinis vel corii concrevit, non secus ac in peripneumonia graviter affectis evenit; alio tempore serum valde tenue est, & sanguis coccynei coloris, quod fit sæpissime in rheumatismo vel arthritide vaga, indicio non incerto sal ad alcalinam volatilem naturam vergens ei admixtum esse. CAROLUS PISO in lib. de morb. ex colluv. seros. oriund. Sect. 5. cap. 3. p. 433. in doloribus externi habitus massam sanguinis tanta serosa colluvie scaturisse observavit, ut seposito in pelvi vigesima vix pars in fundo subsederit, quæ sanguinis colorem & consistentiam retinuit, reliquo liquore supernatante penitus aqueo, sed obducto pellicula viscida & alba. BALLONIUS quoque lib. de rheumatismo, aliquoties sanguinem, quem magna copia e brachio detraxit, impurum & in putridum serum resolutum vidit. Ego vero non semel sed multoties annotavi, quod in principio horum dolorum sanguis bonæ consistentiæ, longiori progressu, vel quando malum altius radices egit, admodum serosus corruptus, & pellicula tenaci imbutus fuerit emissus. Nam sanguis abundans primam quidem causam & originem hisce doloribus præbet, sed sub longiori morbi decursu, motu intestino calido per continuam agitationem in vitiosum serum convertitur: qua de causa ipse modo laudatus CAROLUS PISO eruditissimus scriptor omnes arthritidis & rheumatismi species inter morbos a colluvie serosa ortos retulerit: id quod etiam urinæ copiosæ tenues, neque limosæ & turbidæ, atque copiosi foetidi sudores, qui hisce doloribus adjungi solent, com- monstrare videntur.

§. IX.



## §. IX.

*Ratio  
generi-  
ca ex  
Hipp.*

Quæstio nunc haud exigui in theoria Medica momenti solvenda incidit: quomodo & qua ratione feri vitiosi, a sanguine qui jugi per vasa & tubulos motu circumvolvitur, separatio, stagnatio & decubitus in partibus exterioribus nervosis fieri possit. Utut vero veterum theoria, subsidiis physicis & anatomicis plane destituta, in evolvendis morborum causis ac generatione imperfectissima sit; nihilominus HIPPOCRATES *lib. de flatib.* ratiocinio mere physico mechanico harum fluxionum dolorificarum causas & modum generationis pulchre exponere annisus est; ubi §. 13. 15. 16. meminit: sanguinem ipsa natura calidum vi coactum, per angustam viam, celerrime, propter obstacula & oppilationes, transire non posse, & hinc tenuissimum per venas excludere, atque id ipsum tenuissimum liquidum, cum coacervetur, per alios meatus fluere, & ubi tandem in loco constiterit, fluxiones & dolores in partibus fieri.

## §. X.

*Ex nos-  
tra sen-  
tentia.*

Nos vero, ut genesin horum morborum ad paulo clariorem conceptum redigamus, primo causas occasionales & antecedentes, deinceps modum quo invadere hi dolores solent, spectare debemus. Jam autem per constantem & indubiam experientiam notissimum est, quod dolores artuum rheumatici incidant frequentissime in ea corpora, quæ præcedente intensiori motu, labore & exercitatione aut balneo calido vel aere nimis fervido calefacta, inclementiori frigido cœlo, aut vento boreali subito exposita fuerunt; ubi non ita multo post, cum prævia quadam horripilatione, & lassitudine, dolor gravativus pressorius & contractorius, hinc inde in partibus v. g. in cervice, scapulis, humero, dorso, lumbis, genibus vel in eo latere quod vehementia borealis venti profundius penetravit, interdum etiam in universo corpore obori-

tur: qui eo gravius affligit, quo corpus majori sanguinis copia turget. Ego insuper plus vice simplici observavi, permultos a largiori sanguinis per venam sectam missione, vel feminas post sanguinis menstrui copiosioris profusionem, vel post eandem ex abortu factam, quin etiam post nimias alvi a purgantibus acrioribus vel sponte a natura inductas dejectiones, penetranti frigida boreali vel humido frigida nocturnæ auræ ubi corpora paulo diutius commiserunt, in graves rheumaticas affectiones incidisse: idque non alia ex causa, quam quod frigoris in poros corporis penetrantis vehementia, tubuli minimi venosi, arteriosi, lymphatici, sanguinem revehentes, & ad substantiam partium pro nutritione adducentes compressi coarctati & occlusi fuerint: quo factum est, ut, cum serosus latex vasis suis amplius contineri & circulari non potuerit, instar fluvii sese alveo efferentis, in ipsam partium substantiam modo hic modo illic magis exundaverit, sive extra vasa & circulum positus fuerit. Omnis vero humor extravasatus, cum per ipsam moram, a crasi blanda naturali deficiat & indolem plane alienam acquirat, partimque glutinosus tenax, partim acris salsus evadat; fit, ut partium fibrosarum & nervearum molestissimi & acerrimi dolores sæpissime cum frigoris glaciati sensu oboriantur: sed quandoque etiam accidit, ut serum extravasatum, non secus ac albumen ovi fieri solet, in tenue & corruptum liquamen quod amplius a calore fortiori non admittit coagulum, faceat, & ex uno loco præsertim superiori ad inferiores per porosam partium substantiam & habitum carnosum transeat; nihil enim frequentius in praxi occurrit, quam quod rheumatismus locum suum mutet & ex capite in cervicem, in scapulas, humeros ac petus præsertim in ætate minoribus transeat, in adultioribus vero in dorsum



sum, coxendicam regionem & femora descendat.

§. XI.

Rheu-  
matif-  
mus &  
arthri-  
tis ver-  
nali &  
autum-  
nali te-  
pore af-  
fligunt

Constanti insuper experientia confirmatum habemus, rheumaticas æque ac arthriticas affectiones frequentissime circa vernum tempus & mense Octobris, sub insignibus aeris & tempestatum ex calido in frigidam & ex frigido in calidam mutationibus, ventrisque repente ex contraria plaga se invicem excipientibus, corpora tam sanguine quam sero impuro plena impetere atque laceffere, & quidem cum febriculosa quadam commotione sequentem in modum: Præcedit spontanea lassitudo & gravitas artuum cum extremarum partium refrigerentia horripilatione & quodam rigoris sensu; subsequitur anxius internus æstus præsertim circa præcordia, concitator & strictior pulsus, inquietudo, sitis, inappetentia, alvi obstructio, quandoque spirandi angustia: dolor postea gravis acutus vel gravativus, tensivus, has vel illas partes occupat, qui noctu exacerbatur, non secus ac in febribus catharralibus fieri assolet: & utut febrilis hæc commotio alios gravius alios mitiori gradu affligat & facilius transeat, nihilominus dolor in affectis partibus adhuc relinquitur, easque laceffendo diutius sæpe perseverat. Cum vero omnis febrilis commotio ejus sit genii & indolis, ut partes exteriores & nervosas spasmio afficiat, & tenuissimas vasorum radices & apices coarctando & comprimendo, sanguinem, & humores in vasis majoribus & interioribus accumulet, atque in corde & arteriis celeriores systolen efficiat: fieri aliter vix potest, quin cum magno impetu sanguis in laterales arteriolarum ramos qui sanguinem coloris coccinei non vehunt intrusus, tandem serosam sui extra vasa portionem dimittat: & inde dolorum origo fit. Sed monendum hoc loco est, quod dolorificæ hæ partium sensilium spasticæ stricturæ

non tam a sero tenui in eas irruente, quæ pars maxime diffatur, sed potius a viscidioribus ejus partibus, spiculisque & aculeis salino-acribus relictis & intime earum poris se insinuantibus proficiscantur. Hinc etiam fit ut non tam promte & facile, ob materiam vitiosam partibus altius impactam, hi affectus medicaminibus cedant.

§. XII.

Ex dictis itaque luculenter constare potest, impeditum sanguinis circulum & regressum per minima vasa, proximam & evidentem causam ad generationem ejusmodi rheumaticorum dolorum constituere: id quod clarius elucescere & demonstrari potest exinde, quod, ut ego ipse aliquoties observavi, a paulo strictiori ligatura, post sectam venam, ob inflictum paulo gravius vulnus in pedibus intra 24. horas relictæ, dolor ipsos pedum & maxime pollicis articulos non secus ac in podagra fieri solet, per multos dies cum molestia durans invaserit. Idem non ita pridem continebat celebri Medico, qui in ipsa sura certas forte ob causas venam pertundendam curavit, ubi fortiori ligatura ob profundioris venæ situm opus fuit; sed factum exinde est, ut altero mane, atrox dolor cum tumore non modo suram, sed ipsos quoque pedum articulos infestaverit, cujus per interna & externa remedia discussionem, ne deterius succresceret malum, magna cura & sollicitudine moliri & procurare debuimus. Videmus etiam ex dictis propinqua admodum cognatione rheumatismum cum morbo articulari conjunctum esse, huncque sæpius ita mentiri, ut a quibusdam arthritidis universalis & vagæ nomine insigniatur: nam & hæc quandoque repente in plures irruit articulos & spinæ vertebrae & juncturas ossium gravibus excruciat doloribus. Neque ignotum in praxi est, quod rheumatismus fixus ac

Causa  
proxima im-  
peditur  
circu-  
lus.

vagus.



vagus in iis qui sæpius ac iterum eundem patiuntur, præsertim si aliunde debilitatem contraxerunt, in veram tandem arthritidem transformetur. Et quia hemicrania pleuritis & hepatitis spuria, de quibus supra actum, item odontalgia species rheumatismi sunt, certum ac nihil dubii est, quin etiam earum generatio sub iisdem causis atque eodem modo procedat.

## §. XIII.

Rheumatismus  
in uadit

Ceterum illud crebra animadversione compertum est, nulli ætati, nulli sexui rheumatismum parcere: quos alioquin ab arthritide fere immunes HIPPOCRATES *Sect. 6. aph. 29. & 30.* pronunciat. Maxime vero omnium videmus, eos quibus in juventute hæmorrhagiæ narium frequentiores fuere & dein cessarunt, rheumaticis esse obnoxios doloribus: quod itidem ab *Hippocrate lib. 2. prorhet.* notatum est, ubi nos docet, quod in his, quibus circa articulos tumores & dolores fiunt, viscera plerumque magna subsint, quibus in pueritia & juventute sanguis e naribus fluere desierit: ac proinde interrogandum esse admonet, de sanguinis eruptione, factane in juventute fuerit, item an pruriginosæ, veluti ab urtica puncturæ vel in pectore vel in dorso subsint, utpote quæ impuritatem ferè abunde arguunt. Sed quod *Hippocrates* de hæmorrhagiis narium innuit, id intelligendum quoque esse arbitror de omnibus aliis sanguinis salutaribus excretionibus. Nihil enim magis in praxi occurrit: quam quod femina præsertim sanguineæ complexionis, post quinquagesimum annum prorsus cessante sanguinis fluxu, nisi tempestive venæsectionibus occurratur, vagis & gravibus hinc inde in partes irruentibus dolorum tormentis afficiantur. Neque amplius incognitum esse potest in arte exercitatis, hæmorrhoidalem fluxum consuetum, si debito modo & tempore procedit, a doloribus & rheumaticis, & arthriticis viros immunes præstare posse;

quibus sub ejusdem fluxus defectu vel suppressione tandem obnoxii fiunt. Neque tamen mihi ignota sunt exempla, ubi in debilitatis & cachecticis, præfente hoc fluxu nec dolore arthritici nec nephritici desierint.

## §. XIV.

Denique quod ad generationem horum dolorum pertinet, non prætermittendum esse arbitror, eos qui corpus valide movent & exercent, qui parcius vivunt, & aquam potant, liberos plane ab ejusmodi afflictionibus permanere: cum contra qui vitam agunt otiosam, vinis & spirituosus potibus & commestationibus nimis delectantur ac Veneri intempestive, & nondum matura ætate nimium dediti sunt, gravioribus rheumaticis, & arthriticis doloribus crebrius exerceantur.

Qui ab his afflictionibus lib. 2.

qui his obnoxii?

## §. XV.

Neque hoc loco omittendum est, quod ab aliis præcedentibus & diu inhærentibus morbis febribus maxime intermittentibus, præsertim si male tractatæ fuerint, insignis ad hos affectus dispositio arcessatur. Ita BALLONIUS *lib. de rheumatism.* plurimos vidit, qui, quartana chronica laborantes, sub finem morbi, in graves artuum immo totius corporis dolores inciderunt. Novimus etiam doloribus ventris & colicis diu afflictis artuum dolores vagos certis periodis infestantes satis acerbos successisse.

causæ ad eos disponere.

## §. XVI.

Datur etiam rheumatismus scorbuticus, in quo universa lymphæ & feri massa impuris excrementitiis salino-sulphureis acris particulis, quæ subinde per exanthemata maculas & purpuram sese manifestant, infecta est, atque ex prava dura salsa diætâ, vita otiosa & sedentaria, familiaris aeris gravidæ & vappidi usura, diuturna que tristitia, originem suam ducit, & exinde incolis regionum maritimarum solennis & frequentissimus esse solet.

rheumatismus scorbuticus.

## §. XVII.



## §. XVII.

*Veneris* Gravior vero est rheumatismus Venereus, qui horrendis dolorum tormentis, noctu præsertim intensioribus, certis nervosis partibus pertinaciter inhærescens, eos qui ex impuro coitu, virulento & putrido miasmate universam lymphæ & sanguinis massam contaminarunt, misere excruciat. Quæ omnis commemorata huc usque causæ eo collineare videntur, ut serum sanguinis adaugeant, intemperatum ac impurum reddant, robur ac vires partibus solidis subtrahant, excretiones salutare imminuendo, ut postea ejusmodi feri stagnationes, fluxiones ac acerbæ & dolorificæ passionis inde resultent.

## §. XVIII.

*Solvuntur hi morbi per sudorem &c.* Atqui ex hisce jam clarius patet ratio, quare hi affectus salutariter copiosis urinis & sponte sudoribus obortis, nec non hæmorrhagicis excretionibus solvantur, vel cura variis cutis efflorescentiis multum levaminis ægrotantes accipiant quorum pertinet aphorismus Hippocratis 74. *Sect. 3. quibus spes est ad articulos futurum abscessum, eos liberat urina multa, crassa & alia prodiens, qualis in laboriosis febribus quarto die quibusdam exire incipit. Si vero sanguis e naribus profluxerit brevis admodum fit solutio.* Per laboriosas vero febres nonnulli rectius rheumaticas intelligunt, quæ cum sensu doloris & lassitudinis in toto corpore accidunt. Annotatum quoque a nobis sæpius est artuum dolores, ulceribus sponte subortis in pedibus conquievissæ, qui, postquam arte consolidata fuerunt, mox resuscitati sunt. Novimus pariter, immanes artuum dolores, oborta psoa vel scabie lepræ albæ naturam habente, penitus sublatis. Nam sicut metastasis materiæ vitiosæ a partibus interioribus ad exteriores saluberrima est, ita contra, quæ ab externis ad interiora & ipsa viscera vergit est perniciosissima.

## §. XIX.

Affectus rheumatici, & incipientes podagrici quam diu in externis *atque, si vire tractantur, periculo vacant* partibus versantur, neque perversa tractatione humor vitiosus introrsum ad nobiliores partes repellitur, omni e medio tollunt. Quemadmodum vero in primis annis, atque in adolescentia ejusmodi molestæ ac catharrofæ fluxiones in capite, & rheumaticæ in partibus musculosis cum crebrioribus narium hæmorrhagiis insignem naturæ imbecillitatem sive tonum & robur solidorum dejectum designant; ita plures chronicas in juvenili & virili ætate, ratione causæ & genii cum hisce affectibus correspondentes ægitudines prælagunt, præsertim quando ex parentibus morbosis & hypochondriacis prognati fuerunt.

## C U R A T I O.

## §. I.

Ex hisce omnibus, quæ jam in medium a nobis prolata fuere, satis abundeque intelligi posse arbitror, totum curationis caput & methodum mendendi rationalem in eo consistere, ut probe & perscrutante individui laborantis naturam, differentes causas: num incipiens sit, & a sanguinis copia & nimia mole; num a colluvie impuri feri provenerit, & jam malum radices egerit? consideremus, & secundum has circumstantias, & differentias indicationes therapeuticas primum formemus, apta postea & convenientia remedia in usum proponamus.

## §. II.

Quandocunque igitur corpus evidenter est plethoricum, & rheumatismus universalis omnes propemodum corporis artus cum febriculosa quadam motione graviter impetit atque infestat, adeoque secundum veterum scholas sanguineus est, omnino in venæ sectione & quidem statim in prin-



principio administrata, celerrimum & præsentissimum est reponendum præsidium. Id quod jam olim Medicorum peritiores agnoverunt: quare insignis locus extat apud ALEXAN. TRALLIANUM qui lib. II. ita scribit: *si humerem, qui in articulos confluxerit sanguineum esse suspicemur, ubi quidem nihil prohibet, vacuationem quæ per venæ sectionem adhibetur tentato: hac enim ratione multos novi aut in totum morbo liberatos aut raro fluxionibus correptos; eo, quod non neglexerint, sed veris statim initio sanguinem sibi detrahi curarint, non solum vacuandi sed etiam præservationis causa id facientes.* Id quod etiam nos confirmamus; nam plures novimus, sanguine ac succis plenos, qui a causa externa transpirationem universalem sufflaminante in immanes totius corporis dolores cum stupore & immobilitate partium repente coniecti, unice fere matura sanguinis missione eaque intrepide & tuto, urgente necessitate, circa quartum diem repetita prorsus convaluerunt. Novimus etiam homines sanguineo-cholericæ vel melancholicæ constitutionis, consistentis ætatis, in dolores chiragricos & podagricos mitioris naturæ prolapsos, venæ sectione circa æquinoctia, vel interdum circa solstitium æstivum admissa, ab iisdem & præservatos & immunes redditos fuisse.

## §. III.

Hinc in Gallia etiam valde æstimatur.

Et quia rheumatismus sanguineus in nulla regione familiarior ac in Gallia est, ob sanguineam incolarum complexionem & victum copiosum sanguinem ingenerantem; non mirum est, præstantissimos Galliarum Medicos, qui primum & optime de rheumatismo quicquam solidi & esto dignum literis prodiderunt, hoc remedii generis maximopere æstimare ac collaudare. Ita BALLONIUS lib. de rheumatif. inquit: *Laudamus impendio phlebotomiam in hoc morbo, quam salutare remedium esse te-*

stamur. Pariter ac CAROL. PISO l. c. plurimum momenti tam in curatione, quam in præservatione rheumatismi, in repetita sanguinis missione situm esse affirmat; multaque notatu per quam digna in eam rem exempla subjungit. Riverius cent. 3. obs. 42. & cent. 4. obs. 42. septem vicibus in juvene, atque in alio totidem instituta venæ sectione, adhibitis paucis aliis remediis, contumacem rheumatismum feliciter abactum observavit. Maxime omnium vero spectandus LEONH. BOTALLUS primus ille venæ sectionis in Gallia auctor, qui lib. de curat. per. sanguin. mission. c. 12. pluribus & rationibus & exemplis confirmat, quantum utilitatis & levaminis præsentissimi in doloribus rheumaticis etiam repetita venæ sectio attulerit. Ex Anglis SIEDENHAMUS in oper. p. 170. curationem non aliunde ac a phlebotomia petendam esse asseverat, eamque aliquot dierum spatium repetendam. Lectu quoque dignissima est observatio, quæ in M. N. C. Dec. 2. an. 9. obs. 120. p. 290. extat, de rheumatismo universali, sola venæ sectione reiterata felicissime & brevi tempore curata. Multo vero magis hoc auxilii genere opus erit tam ad sanandum quam ad avertendum hoc malum in feminis mensum defectu vel plenaria emanatione laborantibus vel in viris, quando consueta hæmorrhoidum fluxio fuerit suppressa.

## §. IV.

Præter sanguinis missionem in affectione rheumatica & arthritica calida incipiente & cum febrili æstuatione juncta, temperatoria diaphoretica cum nitrosis moderate mixta, mediocri sed sæpius repetita & continuata per tempus dosi oblata, ad æstus fervorem & orgasmum sanguinis temperandum, atque etiam ad humoris vitiosilenem & successivam discussionem æqualiter per universum corpus promovendam, præsentissimum levamen conferre & ratione & experien-

Pulveres diaphoretici cum aquis diaphoreticis proptinandi.

rien-



rientia suffulti asseveramus : quo in genere ceteris omnibus palmam præripiunt , pulveres ex lapidibus cancorum , unicornum fossili , cornu cervi sive igne vel usto , antimonio diaphoretico vel ejus cerussa , succino , conchis præparatis , cinnabari , adjecta sufficiente quantitate nitri purificati vel melius artificialis confecti , qui cum aquis diapnoicis & leni anodyna virtute conspicuis , ut sunt aquæ florum sambuci , acaciæ , ulmarie , tiliæ , ceraforum nigrorum , cardui benedicti , marie , scabiosæ , propinandi sunt : neque inutile , sed valde commodum erit , ad febriles volaticos æstus melius compescendos succi citri quippiam , vel ad gratiam syrupum acetositatis citri in convenienti quantitate adjicere & hæc singula in mixturam redigere . Pro potu ordinario serum lactis cum succo citri vel cremore tartari acidulatum , aut tamarindinatum , vel aquam decoctam cum rasura cornu cervi , radice scorzonæ , cichorei glyzirrhizæ , graminis , semine fœniculi , commendamus .

## §. V.

Quando  
cum Ve-  
ne secllo  
ne caute  
mercand-  
um?

Quandocunque vero rheumaticæ ejusmodi afflictiones non tam sanguinis puri plenitudinem & colluviem , in corporibus præsertim debilioribus serosæ & phlegmaticæ constitutionis pro causa agnoscunt , tunc omnino cautissime præsertim in ipsa curatione cum sanguine missionibus agendum est . Recte hinc Galenus *lib. 6. aphor. 47.* scribit : illis , qui plenitudinis passionibus subjiciuntur per venæ sectionem succurrendum esse , qui vero corruptos succos in corpore foveant , purgationem exhibendam , seque hac ratione non modo plurimos servasse sanos qui longo ante tempore singulis annis morbis caperentur , sed & podagram & morbum articulare adhuc incipientem ex tali evacuatione multis jam annis fieri prohibuisse . Qui vero jam sæpius cum hisce fluxionibus conflictati sunt , plus noxæ quam auxilii ex sanguinis detractioe sunt

Hoffm. System. T. IV. P. II

consecuti , præsertim , si corpore sint imbecillo & frigido ac in ætate senili constituti .

## §. VI.

Ex quibus jam liquido constare potest , quod veterum Medicorum peritiores , differentiam dolorum maxime arthriticorum secundum causas incurando probe observandam esse animadvertent . Nam alia ratio est curandi rheumatismum vel etiam arthritidem incipientem eumque universalem in corpore plethorico , qui a sanguinis præternaturali redundantia ob transpirationem interceptam proficiscitur ; alia medendi ratio est , ubi atrox dolor certæ tantummodo parti pertinaciter inhærescit , cum ingenti frigoris sensu stipatus & a vehementia hujus imprudenter admissi in corporibus serosioribus excitatus : alia medendi via ineunda , quando status plethoricus longiori sub morbi decursu vel improvida medicatione in statum cachecticum vel cacochymicum degeneravit , & parum sanguinis boni & consistentis , permultum vero liquaminis serosi & excrementitii in vasis continetur : quibus in casibus ea quam maxime remediorum genera indicantur , quæ seri vitiosi illuviem blandè sed sufficienter tamen per congrua emunctoria , per alvum videlicet , per subcutaneum cribrum & per urinam evehunt .

## §. VII.

Quod ad usum evacuantium attinet nullo modo hic vi agendum sed paulatim & successive biliosæ & viscidæ serosæ sordes per mitiora & temperatiora medicamina educendæ . Cui scopo obtinendo , ex nostra quidem experientia , egregie satis faciunt , infusa ex aqua dimidia vini parte remixta , cum radice cichorii , pimpinellæ , polypodii , rhabbaro , foliis sennæ sine stipitibus , herba cardui benedicti , summitatibus centaurii minoris , agarico , corticibus aurantiorum , citri , cortice ligni sassafras , passulis minoribus & tartaro tartarifato leniter decoquenda . Utile quo-

Cura  
pro dif-  
ferentia  
causa-  
rum in-  
staura-  
da.

(1) Bl-  
liosæ  
sordes  
per bl-  
da la-  
nantia  
educen-  
da.

P



quoque est rhabarbarum mansum ad scrupulos duos vel drachmam cum uvis pinguibus vel Corinthiacis: nam nostra certe experientia rhabarbarum in substantia sumtum abundantius multo & duplo plus quam si in decocto & infuso detur, educit, quippe simul tonum intestinorum & viscerum insigniter roborat. Bis autem minimum vel ter in hebdomade ejusmodi evacuans exhibere convenit, ut sordes ex primis viis a prava digestionem relictæ evocentur, quæ alias ad morbum fovendum & sustinendum, ejusque vim augendam per multum conferunt. Atqui hujus generis alterantibus & evacuantibus, in doloribus periodice, siue certis horis irrue- re atque infestare solitis, nunquam carere nos posse multoties edoctus sum.

## §. VIII.

2] Vi-  
tiosum  
serum  
per mi-  
nora  
diapho-  
retica  
evocan-  
dum.

Primis viis sic probe evacuatis, vi- tiosi feri molem, per decocta liberio- rem transpirationem quæ expediunt & leniter sudorem movent, educere & utilissimum & necessarium est: qualia ex radicibus & lignis, ut radi- ce chinæ, sassaparillæ, cichorei, glyzirrhizæ, ligno & cortice sassa- fras, ligno santali citrino, guaiaci, ficubus & passulis minoribus parari possunt. Si malum quodammodo ra- dices egerit & inveteraverit, anti- monium crudum cum dupla portione pulveris bezoardici & diaphoretici su- pra adscripti, convenienti dosi & tempore exhibitum opem non sper- nendam præstitisse a me pluries obser- vatum est. Ceterum liquor qui diure- tica diaphoretica & simul tonica effi- cacia insigniter sese commendat, ex tinctura tartari, antimonii acris cum liquore anodyno minerali & spiritu tartari decenti proportionem permixto componendus, accommodatissimum remedium est, & præsentissimo cum fructu usurpatur.

## §. IX.

Rheuma-  
tismus  
corpus  
scorbu-

Quandocunque rheumatismus siue fixus siue vagus scorbutico corpori in-

sideret, & evidentibus se signis ac sym- ptomatibus prodit, curationi paulo longius insistendum erit. Neque enim tam prompte & facile tota lymphæ & feri massa intemperata corrupta & sa- linis excrementiis partibus deturpata, in nativam & pristinam dulcedinem & consistentiam reduci poterit. Conve- niunt tunc maxime diluentia demul- centia, paulo majori copia & longio- ri tempore exhibita: inter quæ, se- rum lactis dulce mannatum, vel aci- dulum tamarindinatum, aut purum cum succis herbarum antiscorbutica- rum permixtum, item aquæ minera- les temperatiores: *Selteranæ*, *Wilde- dugenses*, *Tœnnsteinenses*, vel in robustioribus, *Pyrmontanæ*, *Egra- næ* cum dimidia lactis asinini vel vac- cini parte maritata, & sub conve- nienti diætetico regimine usurpata, omne fere curationis exoptatæ pun- ctum complent.

## §. X.

Si rheumatismus ex luis Venereæ reliquiis in sanguinis massa contentis, ut non raro evenit, originem suam ducit, duriori cuneo opus est utpote, nisi decocta lignorum sudorifera, per antimonii crudi vel etiam mercurii dulcis additionem armata & nobilita- ta, prudentem in usum vocentur, raro speratus & salutaris effectus ob- tinetur.

## §. XI.

Quod attinet ad ipsa topica, quæ ad humoris certam partem obsidentis placidam & successivam discussionem quidpiam conferre valent, magna etiam cautione in iis eligendis & exhi- bendis opus est, ne plus detrimenti quam emolumenti afferant. Si rheu- matismus est sanguineus, præstat pe- nitus ab iis abstinere, & tantum moderato & æquali lecti & tegumen- torum calore partes dolore affectæ fo- vendæ sunt: siquidem tali modo lon- ge felicius blanda materiæ quæ in vitio est difflatio & exhalatio promovetur, ac si variis externis eam adjuvare ve- linus. Si vero spissus immobilis & fri-

tici in-  
fistant  
diluen-  
tibus  
demul-  
centibus  
abigen-  
dus.

Si ex lue  
Gallica  
prove-  
nerit,  
decocta  
lign. c.  
tim.  
vel mer-  
dul. pro-  
funt.

Topico-  
rum usu  
sit cau-  
tus

Quando  
omit-  
tendus?

Quando  
admit-  
tendus?

fri-



frigidus humor paulo altius & pertinacius cum frigoris sensu ac strictura pororum, partibus insidet: tunc omnino frictiones cum pannis asperis & calidis institutæ, e sedibus suis fixis humorem tenacem potentissime evocant. Post frictionem cucurbitulæ cum vel sine scarrificatione applicandæ: ubi tamen animadverti illud debet, quod cucurbitæ cum scarrificatione dolentibus ejusmodi partibus appositæ cum profundiori etiam vulnusculem inflictione, parum admodum sanguinis eliciant: luculento satis documento, vasorum sanguineorum ramulos a spastica strictura ita coarctatos & compressos esse, ut sanguinis circulem motum respuant; utque adeo non tam a sanguine nimium ibi congesto, quam ab humore viscido & acri stagnante, hos dolorum faces accendi veri sit simillimum.

## §. XII.

Ubi igitur altius insidet humor & immanes artubus dolores inducit, tunc omnino externis præsiidiis ex toto carere vix possumus. Licet vero plura hunc in finem magnis ab Auctoribus hinc inde celebrari soleant laudibus: ego tamen in nullo majorem juvandi efficaciam deprehendi ac in nostræ inventionis nervino linimento, sequenti modo conficiendo: Recipe aquæ analthinæ uncias duas, balsami Peruviani drach. 2. theriacæ vet. drach. Infunde & per digestionem extrahe: colaturæ adde essentia croci, castorei, nucistæ ana drach. 2. camphoræ drachmam. M. f. linimentum, quo dolentes artus sæpius inungi debent. Si vero a diutius partem affligente dolore rigiditas, immobilitas cum stupore remanet, quæ affectio paresis nomine venit, linimentum quod habet axungiam humanam, cujus duæ uncia cum balsami Peruviani & olei caryophyllorum drachmis duabus permisceantur, mirabilem plane præstitisse efficaciam, per crebriorem usum a nobis animadvertum est.

## §. XIII.

Balneorum quoque tam naturalium quam artificialium caute administratorum usus est insignissimus. At vero neutiquam in principio aut in statu morbi, sed in declinatione potius, tum ad reliquias morbi ex intimis sedibus suæ penetralibus moderato sudore eliciendas, tum ad membra per spasticas dolorificas tractiones, & agitationes imbecillia reddita roboranda, & rigida emollienda, usurpari debent. Inter alia vero balneum ex fonte *Lauchstadiensis* in Misnia, qui tenerimum Martis crocum alit, atque naturæ admodum subtilis ac levis est, paratum, innumeris exemplis hoc fine & scopo adhibitum, opem desideratissimam tulisse ego religiose possum asseverare: qua de re dissertationem nostram de hoc fonte germanico & latino idiomate conscriptam ad legendum atque conferendum commendo.

## Cautiones &amp; observationes clinicae.

## §. I.

**Q**uantumvis sanguinis missio etiam paulo largior, in externarum partium doloribus, qui a sanguinis spissioris abundantia & salutaribus excretionibus impeditis proficiscuntur, maxime quando in principio administratur, divinum plane sit remedium: sed tamen, si dolor diutius perseverans, digestionem atque laudabilem chylicationem ipsasque vires destruxerit, ut serosa magis quam sanguinea plenitudo corpori sit infensa, ipsumque corpus annis jam confectum fuerit, provide certe cum ea mercandum est. Quod idem tenendum est, quando ipso in paroxysmo cum febrili commotione affligente, metastases materiæ vitiosæ ad externos artus natura molitur; quo tempore, non aliter ac in erysipelate, negotium naturæ salutare turbare & subvertere minime convenit.



## §. II.

*Præser-* Non semel ego sed aliquoties obser-  
*uative* vavi, venæ sectionem rite ante æqui-  
*celebrā-* noctia institutam corpora strictioris  
*sera* habitus, sanguineo-melancholici & sanguineo-cholericici temperamenti a catharralibus defluxionibus, item rheumaticis & arthriticis passionibus, quibus crebro obnoxia fuerunt, egregie præservasse, adeo ut ad avertendos hosce affectus, præsertim si sufficiens corporis motio ac labor, abstinencia a potibus spirituosus, a diætâ lauta & carnea, accesserit, non facile excellentius detur remedium.

## §. III.

*Cura*  
*lactea*  
*quando*  
*noceat*

Diætâ & cura lactea, utut in doloribus artuum vagis & ubi acrimonia subtilis & biliosa peccat, suo quidem usu & fructu non destituatur: nihilo minus tamen, ubi vasorum, vel a sanguine-consistente, vel a nimis seroso adest plenitudo, & ventriculus cum intestinorum tractu atonia laborant, ne inde viscerum infarctus emergat & ad cachexiam via pandatur, abstinere ab ea cautius erit.

## §. IV.

*si a* Quando sufflaminatus hæmorrhoidum fluxus ejusmodi dolorum causam præbet, consultissimum est opportunè eum procurare. Cavendum tunc, ne venæ sectio in partibus superioribus instituatur, quam in pedibus celebrare expedit. Postea vero, quæ moderate hunc fluxum movere & ciere valent, ad quorum classem referendæ pilulæ *Avicennæ*, *Becherianæ*, nostræ & his similes, interpositis pulveribus temperantibus & nitrosis, qui æstum internum ad supprimendum fluxum multum conferentem infringunt, subjungenda sunt; quæ si non proficiant, & tormina ac vomitiones dolorum externorum comites evadunt, ad applicationem hircinæ, mirabilis nonnunquam efficaciam remedium, omnino confugiendum erit.

## §. V.

Caveant sibi porro studiosissime omnes qui catharrois rheumaticis & arthriticis passionibus tentari & affligi soient, & quorum natura ad motiones spasticas, pariter ac sanguinis & humorum congestiones parata & disposita est, ab omnibus fortioribus, calidioribus, diureticis, sudoriferis, acrioribusque purgantibus, nec non ab omnibus spirituosus balsamicis sic dictis quæ sanguinem in orgasmum concitant medicamentis, item a potibus spirituosus & generosis, post quorum usum urina valde tincta & rubra apparet: caveant quoque sibi, quantum fieri potest, a potu cerevisiæ, nisi ea sit medicinalis, qualis est quæ non caput gravat, bene per urinam secedit & digestionem adjuvat: sed pro potu vel puram aquam fontanam vel mineralem temperatam, aut decoctum gratum nullum pariens fastidium sibi eligant. Idque eo majori sedulitate iis observandum commendamus, qui purpuram scorbuticam nostri ævi quasi endemium & familiarissimum morbum, vitalibus succis immixtam & immensam foveant atque recondunt.

## §. VI.

Quando dolor & atrox & pertinax inferiores corporis partes ut ossa ischii & coccygis diutius obsidet, & individua ægrotantia paulo sunt robustioris ac firmioris texturæ, medicamina potentioris efficaciam & virtutis chymica, ut mercurius dulcis, præcipitatus solaris bene præparatus, regulus antimonii medicinalis, quæ etiam decoctis sudoriferis addi possunt, ad crassum & lentum tartareum & vellicantem humorem e sedibus suis intimis dimovendum, auxilium utique pollicentur spectatissimum.

*Quanta*  
*actio*  
*ra chy-*  
*mica*  
*usur-*  
*panda*

## §. VII.

Quando dolores immaniter urgent, quod in sensibilibus fieri solet, ita ut vires, appetentiam, omnemque somnum adimant, &

ne.



neque sanguinis detractiones, neque nitrosa & temperantia, neque liquor noster anodynus iis mitigandis sufficiant, non inconsultum est, a lenioribus, videlicet emulsione seminis papaveris albi & ejus syrupo, ad fortiora paulo anodyna transire, atqui ad massam pilular. *Vildegansii*, vel pilulas *Starckeii* aut de styrace, immo ad unum vel alterum laudani opiati granum, addendo croci extracti auxillium confugere: cum alias opiata non temere in ejusmodi affectibus usurpanda sint, utpote quæ, ut crebrius observatum, tam contumaces ejusmodi affectus reddunt, ut postea omnia alia remedia etiam efficacissima spernant, efferatiusque inherendo & Medicis & ægrotantibus plurimum negotii facessant.

§. VIII.

*Vesicatoria & cucurbitule quando usurpanda?*

In rheumatismo scapularum incipiente, nihil est præstantius vesicatorio intra scapulas posito. Si vero in plethoricis accidit, quod sæpius observavi in feminis post cessantem circa annum quinquagesimum mensium fluxum, cucurbitulæ cum scarrificatione partibus inferioribus singulis mensibus appositæ, juvamentum attulerunt insignissimum.

§. IX.

*Animus ab omnibus affectibus liber sit.*

Quemadmodum illa corpora, quæ ad anomalas solidorum & fluidorum motiones, & ad eorum translationes sive congestiones a natura disposita sunt, & vulgo sensibilibus indolis vocantur, mobilissimi sunt animi & ab ejus affectibus, qui præcipuam hisce merbis causam ac fundamentum subministrant, facillime offenduntur: ita servata animi quies & tranquillitas, sufficiens etiam corporis motus & abstinencia ab iis rebus quæ multis modis animum turbare atque disponere ad effectus possunt, in iis morbis commendatissima esse debet.

Enarrationes morborum.

C A S U S I.

**F**emina quinquaginta & aliquot annorum, post plenariam menstruum cessationem, ante biennium per uterum æque ac per alvum enormes quandoque sanguinis experta est profusiones: quibus Medicus satis opportune venarum sectione & medicamentis orgasmum sanguinis temperantibus antispasmodicis leniterque diaphoreticis subvenit, infusum insuper ex millefolii comis, quæ herba maxime sanguinis nimis effusionibus compescendis dicata, subjungens. Quibus adhibitis, satis diu hæmorrhagiæ tam uterinæ quam alvinæ disparuerunt: procedente vero tempore dolores valde gravativos circa regionem lumbarem & pungentes tractorios circa ossa coxendicis ægra experiebatur. Ad hos mitigandos, licet præter venæ incisionem & leniter laxantia, temperata diaphoretica & nitrosa usurpata fuerint, nullum tamen levamentum attulerunt; sed perstiterunt dolores, fixum quasi locum occupassent. Postea mox ad scapulas & pectus, mox ad genua, relicta priori lumbari & ossis ischii sede vagabantur, quam tamen expirante superiorum partium cruciatu denuo repetebant. Calculorum quoque interdum excretiones cum urina non sine molestia successerunt, calculosis & rheumaticis doloribus crebrius alternantibus: qui tamen acerbiores semper ab animi affectibus & tempestatum varietate redditi, ægram ita excruciarunt, ut cum viribus penitus omnibus caro quoque consumeretur, præsertim quum jam per annum & ultra cum hisce malis conflari debuerit. Notabile vero quam maxime id fuit, quod quum ægra ad constantem & graviolem dolorem, qui lumbarem & ischiadicam regionem desidenter infestabat, aliquo

*aff. rheumatica calculosa in femina plethorica.*



modo leniendum, situm dorfi curvum sibi felegisset, inferiorum dorfi vertebrarum ligamenta adeo fuerint relaxata, ut e situ suo quodammodo protrusæ prominuerint, & sine dolore erecta incedere vix potuerit. Interea ad dolores tam rheumaticos quam nephriticos sedandos, & sanguinis missiones & anodyna cum diaphoreticis mixta, & antinephritica temperatiora, ast singula irrita plane effectu, præscripta fuerunt. Petiit ergo a me salutare quoddam, adversus pertinacem hunc duplicatum affectum, consilium.

*Resolutio cum consilio.*

**E**X hac morbi descripti historia, plura notatu digna ad usum tam pathologicum quam therapeuticum accommodanda elici possunt. Primo quidem, quod mensium totalem suppressionem, quæ ordinario circa quinquagesimum annum contingit, in feminis plethoricis vitæ sedentiæ addictis & quæ sensibilibus animi atque tenerioris etiam corporis sunt texturæ, graves sæpius hæmorrhagiæ per uterum vel etiam per venas hæmorrhoidales sequantur: ubi summa cura atque cautione in applicatione remediorum opus est, ne forte adhibitis fortioribus stypticis & opiatis plane sistantur, neque etiam modum excedant & sic corpus valde debilitantes aliis ex debilitate oriundis morbis ansam porrigant. Secundo, in nostra ægrotante, effusiones sanguinis per hæmorrhoides, quæ haud infelicitè sæpius mensibus deficientibus secedunt, humorum stagnationes in aliis locis & quidem maxime circa regionem lumbarem & ischiadicam, cum per vicinas alvi venas vitiatus fuerit exitus, exceperunt. Ab ejusmodi vero sanguinis & humorum stagnatione circa majora vasa, & progressu in circulum eunte impedito, feri fit secessio, quod tartareis salibus & rudioribus terreis particulis onu-

stum in tubulosa renum substantia facile concrevit in calculum, atque etiam ad ligamenta tendinosa & glandulosa, quæ ossa coxendicis cingunt atque ligant, delatum, graves atque diuturnos cum impotentia motus efficit dolores. Eadem quoque feri a sanguine in inferioris corporis regione stagnante copiosior secessio, luxationis vertebrarum lumbarium omni procul dubio fuit causa; ad quam plurimum utique situs incurvatus, qui doloribus in hisce partibus leniendis quodammodo inservit, contulit: laxatis enim a feri exundantia ligamenti facili est ossium a sede sua protrusio. Tertio attendi etiam in nostro casu meretur conversio motuum sanguinis & dolorum e regione lumbari & ischiadica ad partes superiores, scapulam, pectus, manus, quandoque etiam genua, quæ ut plurimum aeris & cœli intemperiem & variationem vel gravem animi affectum, iram præsertim & terrorem pro causa agnoscit: quorum utique ea est natura, ut partibus præcipue membranaceis firmiter constrictis motum humorum invertant & ad alia loca transponant. Methodum autem huic malo medendi quod attinet, eam ita instruendam esse arbitrati sumus. Primo omnium sanguinis missionem instituendam curavimus: quippe hæc dolores semper leviores efficit ac priora mala ex sanguinis congestionem in affectibus spasmodicis ad nobiliores partes prodeuntia impedit. Dein infusum Theiforme ex chamomillæ vulgaris floribus, summitatibus millefolii & semine fœniculi compositum, somno peracto satis larga copia mane in lecto hauriendum præscripsi: cujus utique virtus in omnibus affectibus chronicis & spasticis non satis deprædicanda, eo quod humoribus fluxilitatem fœnerando & acrimoniam hostilem, quæ spasmodorum genitrix est, temperando liberiores sanguinis cursum & ab eo depedentes utilissimas sordium excretionem egregie promovet.



vet. Tum pro potu ordinario, ob eandem fere efficaciam, decoctum ex radice scorzonerae, chinae, farfaparillae & rasura ligni sassafras, atque abstinentioniam ab omni cerevisia vel aliorum potulentorum genere, quae sanis & integris quidem corporibus non adeo facile nocent, aut valetudinariis & imbecillis nunquam proficua observantur, impen- se commendavi. Demum, pulveres leniter diaphoreticos absorbentes & qui spasmis resistunt, humorumque acrimoniae temperandae idonei sunt, quorum censum subeunt, qui ex cerussa antimonii sive materia perlata *Crugneri*, lapidibus cancro- rum, cinnabari, adjectis, nitro, pauxillo extracti castorei, vel etiam, nisi alvus obstricta obstat, theria- cae coelestis aut sulphuris nostri an- timonii fixati, conficiuntur praescri- psi: qui vel sub lecti introitum vel etiam mane, adhibito regimine blande diaphoretico, ex aquis an- tispasmodicis ver. grat. florum aca- cia, tiliae, primulae veris, cerafo- rum nigrorum porrigi possunt. In- junxi denique haec medicamina non per saltum sed per gradus & pro- cedente tempore virtutem suam ex- ferere; quare usum eorum diutius protrahendum esse edixi. Et quo- niam alvinæ excretionis semper ha- benda ratio, clysteribus pariter ac alimentis lenientibus ex passulis & pomis Porstorfianis eam expedire convenit. Subluxationi unguento ex axungia humana & oleo lavendulae occurrendum esse statui. Hoc ita- que consilio quum per hebdomadam aliquot spatium aegrotata uteretur; & aquas *Selteranas* postea quoque usurparet, adspirante Divino fa- vore, cum sanitate in gratiam re- diit.

## C A S U S II.

Insignis hujus urbis artifex, in *Rheumatis- mus an- rium ex sup- pressa per fist- gus co- 1724.* re pictoria clarus 39. annorum, vi- ta sedentariae valde addictus & Ve- neri plus justo deditus, ante bien- nium die sereno mensis Septembris iter facit Lipsiam, quum caput co- riza tentaretur. Noctu dum som- num capiebat, ex improvise aperta fenestra, frigidior ventus dextrum capitis latus non satis tectum impe- tit: postero die circa aurem ejusdem lateris persentit dolorem valde acu- tum & aestuantem, ita ut quasi igni- tus clavus aurem transfodere videretur. Is porro ex aure dextra ad si- nistram etiam se protendebat, & plenarium non modo auditus, sed etiam gustus & odoris sensum adime- bat; quo acerbo dolore accedente per duas & ultra septimanas ita ex- cruciatus fuit, ut ob assiduas vigilias in lecto decumbens insania prope- modum correptus fuerit. Accersitus Medicus in Chirurgica arte exerci- tatissimus, causam insolentioris hu- jus affectus, abscessum intra cranium & cutem, vel intra cranium & cere- brum reputans, trepanationem pro- ponebat, quam patiens autem re- spuebat. Ex nostro igitur consilio abrasum fuit totius capitis capilli- tium & applicatum emplastrum leni- ter diaphoreticum & vesicatorium cum refracta cantharidum admixta- rum dosi. Quo effectum est, ut ex aure dextra, ichorosa multa sensim paulatimque effluerit materia, per aliquot dierum intervalla persistens. Unde in hac aure auditus quidem restitutus est, quod postea etiam in sinistra contigit: nihilominus tamen observabat, quod intra hoc tempus dolor ad dextrum humorum, ex eo in ejusdem lateris regionem ischii, postea in ipsum genu & tandem in pollicem pedis descenderit, ut sine baculo vix incedere potuerit; licet nunquam antea podagra fuerit ve-



xatus. Nihil autem amplius ex medicamentorum classe ei, præter infusum theiforme ex speciebus lenem diaphoretin promoventibus, nec non pulveres diaphoreticos cum pauxillo nitri & cinnabari nobilitatos, præscripsimus: quibus per Dei gratiam intra dies octo perfectæ sanitati fuit redditus.

### *Epicrisis.*

Peculiarem fluxionum dolorificarum sive rheumatismum speciem prædictus casus exhibet, atque clarius demonstrat, quomodo humor serosus in capite, ex coryza, ob accessum inclementioris & penetrantioris frigida auræ, spissior, immobilisque redditus, & extra vasa constitutus, hostili subtiliq; per moram acrimonia imbutus, ex partibus superioribus successive ad inferiores ejusdem lateris per porosam membranarum nervosarum musculis communium substantiam descendere, in articulatione partium ad tempus decumbere, graviter affligere & ad extremos usque pedes iter & progressum suum absolute possit. Et quoniam tale quid a Medicis etiam antiquissimis observatum fuit, non mirandum est eos credidisse quod omnes defluxiones serosæ ex capite tanquam fonte proveniant originemque suam trahant, & inde in subjacentes partes deriventur. Commode etiam hic casus ad rheumatismum aurium sive otalgiam referri potest, qui ut sæpius observavi, abscessu salutariter solvitur. Demum, emplastri diaphoretico-vesicatorii operatio animadversionem quandam meretur, quod videlicet hujus efficacia morbidus humor fixiorem sedem occupans, e loco suo in alium demigrare debuerit: id quod facilius in capite quam in alijs partibus, ad quas vix ac ne vix quidem ejus energia pertingere potest, si ejus dolorificis fluxionibus affliguntur, effici & præstari potest.

### C A S U S III.

Judæus habitus corporis spongiosus in quadragesimo ætatis anno constitutus, temperamenti mere sanguinei, affectibus animi parum deditus, temperate semper vixit & binis annuatim vicibus circa æquinoctia sanguinem e brachii vena detrahi curavit. Sex jam præterlapsi erant anni, quibus vere semper & autumnopodagra laborabat, quæ pedum pollices dolore, ardore & intumescencia exagitans, vix ultra decem dies duravit, & nullis in usum vocatis medicaminibus, sponte evanuit. Ab hæmorrhoidali fluxu plane fuit immunis. Mense Augusto alvi fluxu maxima ex parte cruento cum doloribus lancinatoriis circa hypochondria subito corripitur. Adjungebatur tenesmus, ut æger vices sellam petere debuerit, sæpius non nisi muco albo deposito. Decem hic fluxus dies continuavit, sub quibus sinceri quidem sanguinis circiter mensuram dejecit. Licet vero valde debilitatus fuerit, vires tamen non ita multo post recuperavit. Ceterum dolor podagricus in principio Septembris invadere solitus jam penitus siluit: acutus vero dolorificus sensus oculos ita afflixit, ut lacrymas stillare debuerint. Hic quidem intra aliquot dies cessavit, sed ad dextrum ossis ischii latus delatus ad os quoque sacrum & coccygis protensus fuit: qui per mensis fere spatium durans, circa proximum æquinoctium ita invaluit, ut tolerari prorsus, noctu præsertim nequiverit, atque omnem somnum ademerit. Accessit vero hujus doloris vehementia per paroxysmos, & quidem circa horam tertiam pomeridianam cum frigore, subsequente postea pulsu celeri & æstu corporis. In principio hujus affectus ante 5. hebdomades venæ instituta fuit sectio, sanguinis valde crassi & nigri sex uncis emissis: sed in cassum. Accersor in-

*Rheumatismus ossis ischii sacri Coccygis P. S. itera. ta cutanea.*



consilium: ubi egrum vehementi dolore & languore excruciatum inveni, utpote qui nihil ex alimentis expetiit, nec dormire potuit: de nocturno aestu conquerens. Porrexi itaque pulverem præcipitantem nitrosum una cum liquore anodyno minerali: & inde altero die meliuscale se habere coepit, mitigata doloris quodammodo sævitia. Febricula tamen rursus accessit circa tempus consuetum. Sequenti mane quum pulsus validius adhuc micaret, venam pertundi jubeo: quæ secta in pede fuit. Et quoniam sanguis cum impetu profiliret, decem minimum uncia cum virium constantia emissæ fuerunt. Hac autem evacuatione id consecuti sumus, ut simul & semel omnis dolor ex osse sacro & ischii quietiam ad genua sese extenderat, evanuerit; quinimo aestu febrili penitus cessante, nocte insequente placida quiete gavissus est, & abhinc vires amissas rursus colligere coepit.

*Epicrisis.*

Plura notatu digna porismata præctica præfato ex casu eruere non sine fructu possumus. Primo videlicet, quod fluxus qui a Medicis habitus est dysentericus, hæmorrhoidalis potius censendus sit: in dysenteria enim non sic simul & semel feri & sanguinis copia deponitur, neque etiam sine acerbissimo dolore & torminibus abdominis, quibus patiens noster caruit, id contingit, sed dolor magis hypochondriacam regionem fuerit, intra quam, ut notum est ex Anatomicis, intestinum colon situm obtinet: atque hoc per spasmus affecto, sanguinis liber per vasa ejus sanguifera circuitus impeditus, & hinc per minima vasorum hæmorrhoidalium oscula in anum effusus est. Dein etiam notandum est, dysenteriam non adeo cito evanescere, quæ nunquam sine febre affligit: tenesmus vero, ut ego non semel observavi non modo dysenterico, sed hæmorrhoidalibus cæcis quoque laborantes vexare solet. Interea animadversione dignum est,

ægrum, qui numquam alias fluxus hæmorrhoidalis vestigia expertus est, jam modo insigni cum impetu & quidem satis largiter eum passum fuisse. Quod autem quieverit inde dolor consuetus podagricus, id sine dubio ob naturæ imminutum robur factum fuisse judicio, utpote sub quo serum vitiosum ad partes externas cum energia protrudi non potuit. Relicta interim arthritica materia primo oculos invasit, & dein ad ligamenta & membranas ossis ischii, coccygis, & sacri delata est. Ibi vero propter vehementes spasmos liberiores sanguinis circuitum ac progressum quum impediverit, ingens ejus circa has partes stagnatio hoc modo inducta fuit. Quapropter non sine sufficienti ratione, largiorem venæ sectionem in pede instituendam suasi, videlicet ad stagnantem sanguinem a loco affecto derivandum & ejus circulum æquabilem restituendum. Id quod etiam felicissime successit.

C A S U S I V.

Vir generosus gracilioris & sanguineæ constitutionis annum ducens trigessimum, aliquot ante lustra, gravativum circa os sacrum per sentiebat dolorem, qui vero mox sanguinis ex venæ sedis profluxu sedatus fuit. Intra anni spatium, sanguinea hac excretionem propter crebras animum valde exagitandi occasiones cohibita, & neglecto omni remediorum usu, atrox dolor junctus simul cum tussi valida brachium sinistram tam molesto cum sensu lancinabat, quasi acutis cultris caro discinderetur. Exactis aliquot mensibus dextro quoque brachio eundem doloris insultum, & impetum experiebatur, citra omnem salutiferum tot cohibitorum remediorum, venæ sectionis, purgantium, sudoriferorum, vesicatoriorum, cucurbitularum effectum. Nulla præsertim erat contractura, quia brachiorum motus factus rectus remansit, sed talem modo,

*Rheumatismus ex hæmorrhoid. suppressis Carolinis & Tæplices. sibi de-pulsione.*



modo percipiebat sensationem ac si ingens ex plumbo pondus ipsis inhæreret, cum adeo ingenti manuum infirmitate, ut nihil quod grave erat apprehendere vel retinere potuerit. Per intervalla etiam spasmus manus occupabat perquam moleste atque atrociter ut somnum ægre capere potuerit. Hos sat acerbos dolores postea excepit gravior aurium, & fere intolerabilis dolor, qui sensim cum cephalalgia lancinante, valde acuta & vehementi vires, & appetentiam ciborum enervante ipsam corporis carnem consumebat. Hæc symptomata non quidem continuo infestabant sed per intervalla, imo certis periodis præsertim pro atmospheræ dispositione revertebantur, & exasperabantur. Expetiit a me consilium. Suasi, ut rite prius præparato per venæ sectionem in pede, & per nodulum laxantem corpore, thermas *Carolinas* adiret, iisque convenienti regimine uteretur. Quare cura absoluta, ut in usum externum thermas *Tæpliceses*, ac imbecillum partium robur confirmandum, & restituendum duceret, auctor fuit. Cui consilio cum morem gereret, æger, ex voto sanitas successit: nam ab eo tempore hæmorrhoidalis fluxus reversus, corpusque ab huiusmodi doloribus diu immune perstitit.

#### *Epicrisis.*

Quandocumque consuetus hæmorrhoidum fluxus inordinatus sit, vel plane supprimitur, multa non modo valetudinis sequuntur incommoda, sed maxime omnium ad morbos ex corrupto, & vitioso sero qui originem trahunt, corpus disponitur: in quorum classem dolores externarum partium sive dolorificas rheumaticas, & artuum passiones merito referre debemus, utpote quæ ab humore seroso excrementitio hinc inde in partibus sensibilibus, & nerveis stagnante, & sedente oboriuntur. Sanguinis enim quando per vasa mesaraica,

& viscera abdominis inque primis per lienem, & hepar non jugi, & perenni motu ac cursu libere fertur, sed restagnat atque moram necit, intestina & calida agitatione, in liquamen putridum corruptum atiscit; quod dein sanguini permixtum & ad debiliora loca translatum, dolores & ulcerosas sæpe fluxiones efficit. Ex eodem fundamento ac fonte purpuræ scorbuticæ, quæ intus retenta causam sæpissime graviorum in artubus dolorum præbet, genesis derivanda venit; eo, quod consuetas, & salutaris sanguinis in feminis per uterum, in viris per hæmorrhoides vacuationes cohibitas & compressas, hos ipsos presso pede insecutos fuisse, multoties a nobis observatum est.

#### C A S U S V.

Ante aliquot annos, generosus vir in sexagesimo & sexto ætatis anno constitutus, post febrem quartanam, quæ per dimidium anni eum exercuerat, vagis doloribus hinc inde in artubus, & partibus externis quam maxime circa lecti introitum exacerbatis vexabatur. Cum aliquando mense Majo, matutino frigori caput paulo incautius exponeret, durus, & lancinans cervicem ipsasque scapulas dolor invadebat, qui per intervalla adeo efferatus erat, ut nec caput ullo modo flectere potuerit. Nunquam integerrimus vir admisit sanguinis missionem, neque per venarum sectionem neque per scarificationem, quum tamen esset sanguinis & succis plenus, appetitu integro, & pulsu magno gauderet. Suasi venæ incisionem, quam, licet natura non respiceret, omnibus qua fieri potuit rationibus detrectabat. Cum vero gravioribus assidue torqueretur doloribus nullumque a præfidiis exhibitis persentiret levamen, tandem ad instantiam meam Chirurgus accitus, & celebrata venæ sectione, cruoris octo minimum uncias detra-

*Rheumatismus capitis, ex admisso frigore, V. S. curatus*



Etæ fuerunt. Ab eo mox tempore insigne dolorum allevamentum percepit, & quod notabile erat, post sectam venam noctu copiosum semper profudit sudorem præter modum & consuetudinem: quo dolor non modo penitus abactus, sed & omnes corporis vires pristinum incrementum receperunt.

### Epicrisis.

Similem fere historiam apud LEON. BOTALLUM *lib. cit. cap. 12. pag. 201.* legere licet, quam ad verbum huc recensere nobis e re visum est: *Dominum de Varentes*, inquit, *a Regis cubiculo, annos ut minimum quinque & septuaginta natum, dolor assiduus & lentus ad cervicem, & humerum a multis mensibus detinebat, quem Medici frequenti medicamentorum purgantium usu, & calefacientibus litibus curare studuerunt: a quibus ille cum parum aut nihil levaretur nos consuluit, qui salutarem diximus futuram sanguinis missionem. Ille contra obiicit consuetudinem mittendi sanguinis, senilem ætatem, inchoantem hyemem, morbum a frigidis humoribus & flatibus: quæ omnia, testantibus aliis Medicis, tale auxilium dehortabantur, quare non posset intrepide acquiescere nostræ sententiæ. Diebus aliquot post, morbi perseverantia & incremento impulsus, ad nos rediit, sic animi affectus ut polliceretur se post hac nulla in re a nostris consiliis recessurum. Mitti sanguinem iussimus, ex brachio affectæ partis, ad uncias decem: post aliquot dies parum modum ex adverso cum maxima utilitate, tandem iterum ex altero, & sic liberatus est. Non tamen interea contempsimus purgantium, & litum calefacientium, & discutientium usum. Ab eo tempore dictus patiens familiarissime, & cum maxima utilitate pedum, quibus vix poterat insistere, visus & totius corporis, primum bis & ter in anno,*

*postea quinquies & sexies meo consilio sibi sanguinem mittit, firmitus incedens nunc, quam ageret abhinc decennium.*

### C A S U S VI.

Dum hæc scribimus, transmissa <sup>Rheuma chron. superius</sup> nobis est ab Excellenti Uratislaviensi Medico historia, quæ accuratam morbi rheumatici generationem, progressum, & medelam quoque complectitur. Circa cujus ulte- <sup>peccus maxime cum febre affligens.</sup> riorem curam, quum meum consilium requireretur, id ipsum hoc loco recensere non inconsultum mihi visum est. Dominus de H. 68. annos natus, fibra forti atque elastico vasorum robore natura instructus. Olim itinerum incommodis & aeris variis injuriis adfuetus: jam sedentario vitæ generi, in publici, quod obit muneris gratiam, addictus. Ante hos 20. annos apoplexiæ impetum expertus est, cruore ex raninis sponte largiori copia erumpente solutum. Inde aliquoties arthritidem persensit, quindecim posterioribus annis non amplius observatam. Versus autumnum superioris anni irrepsere sensim ventriculi flatuosæ pressiones, thoracis constrictiones, brachiorum, maxime circa cubitum, tensivi dolores. Hæc omnia usque adeo tandem invalere, ut misso licet sub finem Septembris e brachii dextri vena media sanguine (qui tenaxerat, & præpingui mucos abundans, seroque destitutus) die 26. Octobris novum apoplexiæ metum inferrent. Complicari ea die cum febre continua cœpit malum, hac fere ratione, quavis vespere, modo levius, modo gravius affligens: Post repetitam aliquoties oscitationem & perceptum brachii ut plurimum sinistri gravativum dolorem ingruit spasmus dolorificus cubitum utrumque, præcipue sinistram infestans, mox pectoris musculos in consensum trahens, præcordia stringens, suspirio-



sam respirationem produciens, sudorem universalem exprimens, manubus interea algentibus. Remittit, & intenditur per vices talis impetus, donec tandem elapsis aliquot horis cesset pedetentim, lassitudine, torpore, & rheumatici doloris sensu relictis. Hic talis totum thoracem ambiens asthma stipatus rheumatismus, ubi in summo vigore constitutus erat, durum, citatum, febrilem pulsum, aliquoties oculorum hebetudinem, tinnitum, vertiginem, suspectumque soporem comites habebat. Aliquando distentum flatu hypochondrium sinistrum indoluit, sæpius nucha, scapulæ, dorsum. Quandoque in ipso somno ægrum nostrum obruens spasmus, loquelam præpediendo, siderationem comminatus est. Febris socia, in lentam & marasmoden abire visa, sub tertii dierum septenarii finem acquievit, postquam duplex comparuit solutionis modus. Præterquam enim quod lotium primo febrile & biliosum, a quarta febris die turbulentum, sabulosum, pure quasi, & subcruento tabo remixtum vicesima die in naturale mutatum est; copiosa etiam & per totam corporis superficiem diffusæ miliares pustulæ rubræ comparuere. Rheuma interim spasms socium silente febre continuavit, ita tamen ut sensim mitescens, post quadragesimum diem penitus tandem visum fuerit se recepisse. At vero post repetitas per vices intentiones, die morbi octogesimo quarto, novus malorum impetus subite mortis metum omnibus incussit, urgente inter summas præcordiorum angustias extremorum frigore, marcore, stertore, faciei livore, extrusoque cum tussi aliqua spumoso ex aspera arteria & florido cruore ad drachmam fere unam vel alteram. Quod si hæmorrhoidum ulla ante adnotassemus molimina, sanguinis illam per os effusionem, cum Medicis solas hæmorrhoidales venas in deliciis habentibus, pro fluxu hæmorrhoidum anomalo habituri fuisset.

Visus autem potius e glandulis per internam fistulæ spiralis membranam disseminatis, & spasms vi dilatatis, aut etiam miliaribus ibi quoque hærentibus pustulis disruptis extravasatus cruor. Angebamur tunc imminentis vel asthmatis convulsivi vel apoplexiæ, vel denique, fluente iterum tabida, & subcruenta urina, lentæ consummationis metu. Saltim suspicio erat morbum in consuetudinem abiturum virium collectioni obfuturam. Sed & hac vice post sectam altera ab impetu illo die venam (qua sanguis non adeo tenax e brachio educebatur) ita paulatim Divino auxilio adjutus est æger noster, ut non nisi rheumatis illius chronici rudera supersint. Poscunt tamen & hæc quotidie se manifestantia maturum sedulæ experientiæ consilium, ne tertium ferociens malum omni auxilio majus experiamur. Inter remedia quibus obsecutum fuisse visum est rheuma cum asthma complicatum, eminent oleum amygdalarum dulcium, sub emulsionis forma largiori copia propinatum, chamomillæ cohobatum decoctum, frictio, ablutio externa frigida calida & frequens. Nec sine omni effectu in usum vocati, liquor mineralis anodyn. D. Hoffmanni, specificum cephalicum, pulveres solares, lumbricorum succus, pulvis antispasmodicus, & quæ demulcendo malo apta credidimus. Quibus tamen certa & fida magis desiderantes, rescire avemus, quæ cum de morbi, cum de curæ instituendæ ratione Excellentissimo Hoffmanno videantur. Interq; alia præoptamus, ut si forte præparata Viri Practicæ tota ex balsamo Peruviano, ex amaricantibus extractis sub forma Elixirii visceralis, aut genuinus liquor mineralis, tanquam nervis & visceribus amica pharmaca, facere in rem nostram videantur, eorum apparatus simul nobis concedatur.



*Epicrisis cum consilio.*

Accuratius paulo descripta hæc morbi historia, quanta valetudinis incommoda genus vitæ valde mobile & laboriosum subito in quietum mutatum adferat, luculenter satis demonstrat. Vidi sæpissime splendidas personas, venationibus cum celerissima equitatione conjunctis, vulgo *Parforce Saghten*, quotidie fere assuetas, si eas ob urgentes quasdam causas omiserint, in graves diutinas passiones, quæ a stagnationibus intra viscera abdominis, & exinde subortis valde temperatis impuris, & corruptis humoribus, originem suam traxerunt, delapsos fuisse: cujusmodi fuerunt flatulentæ & spasmodicæ intestinorum constrictiones, cum pigra alvo, angustia præcordiorum ac pectoris, dolore & artuum lassitudine, spirandi difficultate, febreq; lenta consociatæ. Non mirum hinc est, idem expertum fuisse præsentem generosum ægrum, in quo, ob inclinatam ætatem, impuriore adhuc redditi humores, fibrosum ac nervosum mobile, & sensibile systema ad spasticas strictiones, atque febriles commotiones sollicitarunt; unde ex nimis hinc ortis ad partes sanguinis congestionibus, in capite insultus apoplectici, in pectore infarctus asthmatici, in artubus dolores vagi tensivi, producti fuerunt. Quam difficulter vero, quando vitium tum solidorum tum fluidorum in habitum quasi degeneravit, ejusmodi chronicæ affectiones, quæ accuratum vitæ regimen & assiduum remediorum valde salutarium per plures fere annos deprecantur usum, senescant, iis qui in artis opere diutius versati sunt quam optime cognitum perspectumq; est. Et quoniam ex intermissione motus laboris, & exercitationis corporis, quæ alias optimum est sanguinis depuratorium, & juxta *Hippocratem* nervosarum, & musculosarum partium cibus ac nutrimentum, præci-

pua horum pathematum causa fuit subnata, utique secundum nostram experientiam, & sententiam, tum ad ejusmodi chronicum affectum mitigandum, tum ad pejora mala avertenda, motus, modo commode hic fieri possit, v. g. per unctionem, vel equitationem, omnibus modis suadendus est. Præterea in talibus casibus ab omnis generis cerevisia abstinendum, potanda decocta ex speciebus demulcentibus parata, vel fontes temperati, ut *Selterani*, aut serum lactis, & quoad cibos, ab omnibus acidis, salis, viscosis, acris est abstrahendum: inter remedia vero solum elixirum temperatum balsamicum, ex amaris temperatis cum menstruo aquoso paratum, sæpius & diutius, moderata tamen dosi usurpatum, spirituscentiam blandam fluidis & tonum solidis conciliando, omnibus aliis medicamentis longissime præferendum esse, experientia fida & crebriori edocti sumus. Deniq; iteratis vicibus, aut per scarificationes aut venarum incisiones, sanguinis nimiam copiam demendo, promptior, & expeditior circulus promoveatur. Et hæc fuit mea de cura hujus mali sententia, quam ad Doctissimum Virum transcribere non dubitavi.

## C. A. S. U. S. VII.

Vir robustus, sanguine, & succis *Rheuma* plenus, annorum quadraginta, a-*scapula* cerbo scapulæ dextræ dolore confli-*ru ca-* ctus, sine præcedente sanguinis *lidior* missione, sine primarum viarum per *pharmas-* laxantia abstersione, a Medico pro *co, exa-* sudore eliciendo bezoardicam tin- *cerbot* cturam, æquali pondere cum spi- *et ad-* ritu cornu cervi succinato permix- *caput-* tam, largiori paulo dosi assumpsit. *delat* Sed ne ullus quidem inde odor, nec nocte nec mane secutus, licet corpus probe stratis munitum, & involutum fuerit. Scapularum vero dolor postmodum non solum longe acerbior fuit redditus, sed etiam col-



li musculos in consensum pertraxit , ut in nullum latus caput flectere æger potuerit . Accedit præterea ingens capitis in latere dextro dolor , quem acris , & calida oculorum defluxio cum rubore diutina excepit . Administrata venæ sectione , & alvo per convenientia remedia successive depleta , usurpatis quoque infulis herbarum Theiformibus atque pediluviiis , hæc symptomata quadantenus quidem remiserunt : ab eo autem tempore defluxio ferosa in palato cum continuo uvulæ delapsu per annum , & ultra permansit . Cui tandem vitio amovendo frequens Tabaci fumus egregie inserviebat ; licet diutius adhuc , tempestate præhumida regnante , in faucibus , & uvula nimia relaxatio observata fuerit .

#### *Epicrisis.*

Ex præsentis casu praxeos Medicæ tyrones discere possunt , quantum detrimenti invehere possint medicamenta alia satis apta , & innocentia , quando non debito ordine , & tempore usurpantur . Nisi enim prius demta fuerit vasorum plenitudo per sanguinis detractio- nem , quæ motum circulatorium liberum , & transpirationem quoque auctiorem impedit : nisi etiam ante horum usum , cruditates copiosæ , & vitiosæ ex prima regione idoneis laxantibus educatæ fuerint , sudorifera positive sic dicta , quæ calida , & expansiva vi agentia , cum impetu quodam crudos , & rudes humores in angustia vasorum , & glandularum protrudunt atque accumulunt , ut inde non tantum dolores in vicinas partes se propagent , sed & acres defluxiones , dum , ubi sanguis stagnat , ferum secedit , & depluit , hinc oboriantur , nunquam qui cum ratione curam suscipere annititur , exhibere debet .

#### C A S U S VIII.

Non ita pridem accessit ad me <sup>Rheuma-  
tismus  
pector.  
ex hæ-  
morib.  
sup-  
pressis</sup> quidam hujus loci causarum patro- nus , trigessimæ ætatis annum superans gracilioris quidem sed fibrosi corporis habitus , qui mihi aperuit , quod per quindecim , & ultra annos singulis fere mensibus sanguinis fluxum per sedem expertus fuerit , ad quem disposita tota ejus familia , quæ in Thuringiæ oppido adhuc degit , ita ut non solum pater & mater continuo hunc fluxum passi fuerint sed etiam in liberos imo ipsas feminas circa annum duodecimum , & decimum quintum , mensibus licet rite fluentibus , idem iste redundaverit . Conquestus hic fuit , quod per quatuor fere menses , ex causis minus sibi cognitis , hæmorrhoides cessaverint . Et ab eo tempore non modo insigni animi , & corporis languore , sed etiam dolore tensivo & constrictivo in sterno , toto thorace , cum frigoris quodam sensu , atque respiratione , præsertim post motum difficiliore alvoque pigriore correptus fuit . Quare ex incisa pedis vena , consilio celebris hujus urbis Medici , sanguis largiter emissus ; sed omnem citra salutarem effectum . Indicavit simul æger , postquam , a fortiori corporis motu ante aliquot septimanas suscepto , hæmorrhoidalis fluxus , sed exigua in quantitate comparuisset , omnem dolorem , & molestiam simul , & semel conquies- visse , & sensum calidioris fluidi a thorace ad ipsam pelvim successive descendens , sese animadvertisse ; sed mox cessante fluxu superiorem pristinum locum dolores repetisse . Ipse quidem non sine ratione affectum hæmoptycum inde metuens , auxilium meum efflagitavit . Ego nihil aliud suasi , quam ut motu moderato primum , dein intensiori , corpus quotidie ad lenioris sudoris eruptionem usque exerceret , & mane

in



in lecto infusum Theiforme, ex herba veronicæ, cardui benedicti, radice glyzirrhizæ, & aniso stellato biberet, neque pediluvia ante lecti introitum negligeret; circa illud vero tempus, quo alias ipse hæmorrhoides pluere solebant, pilularum Becherianarum aliquot doses, præmisso pulvere digestivo nitroso sumeret. Quibus non juvantibus, optimum inter alia esse consilium, hirudines ani venis applicare, edixi.

#### *Epicrisis.*

Rariora certe sunt fluxus hæmorrhoidalis exempla, liberos in primæ ætate per dispositionem parentum hereditariam infestantis: qui uti hoc in genere quasi naturalis salutaris & criticus habendus, ita omni cura, & sollicitudine per paulo exquisitiorem victus rationem conservandus, neq; ullo modo impediendus, nisi mox difficiles, & subitaneas morbosas afflictiones expectare velimus: inter quas sunt illæ præcipuæ, quæ a translatione sanguinis ex partibus inferioribus ad superiores facta pullulant, & rheumatismi nomine veniunt. Sicuti vero effrenem illum, & incoercibilem sanguinis mittendi hodie epidemice quasi regnantem methodum, in sanandis maxime chronicis affectibus valde improbamus: ita etiam ad solennes, & criticas sanguinis evacuationes, per uterum vel per intestini recti venas provocandas, sæpius repetitam venæ sectionem plus damni quam commodi tulisse, certa & multiplici experientia confirmatum habemus.

### C A S U S I X.

Subit jam animum historia femine ad trigessimum annum accedentis, sanguineo-cholericæ complexionis, quæ gravi ira supra modum exasperata, brevi post ingentem anxietatem, & circa præcordiorum angustiam, cum tremore artuum, appetitus dejectione, & ciborum tædio

persensit. Sumsit hac de re ab amico volatilem cornu cervi spiritum liberaliori dosi, & ad eliciendum sudorem corpus in lecto composuit. Incaluit inde quidem fortiter, sed nec odor nec sudor sequebatur. Ab eo tempore in artubus, cruribus, brachiis, scapulis, gravativos pressorios dolores, & in universo corpore languorem cum lento calore perpeffa est: quibus symptomatibus nostra adeo fuit afflictata, ut caro penitus consumta, & hinc phthisi imo hæctica ipsa laborare videretur. Lactis tandem caprini cum infuso veronicæ diluti usu, diutius per septimanas aliquot continuato, infuso ex manna, & cremore tartari interposito, atque etiam pulveribus leniter diaphoreticis ac nitrosis, cum acido citri, & aquis temperantibus analepticis usurpatis, pristinæ valetudini patiens fuit restituta.

#### *Epicrisis.*

Casus recensitus præclarum nobis documentum suppedit, quam perniciosum sit, materiam naturæ prorsus hostilis per minus convenientia loca, contra monitum *Hippocratis aphor. I. Sect. 21.* educere. Per vehementem animi excandescentiam, non modo totum systema nervosum, & vasculosum vehementi præternaturam motu agitur, & concitatur, sed & insuper plane singulari modo ductus, qui in hepate consistunt & ex eo prodeunt biliarii nervoso-fibrosi, convulsivo quodam motu afficiuntur, ut biliosus omnis propemodum humor in duodeni cavum effundatur, qui ibi ob hoc ipsum spasmus identidem per consensum affectum paulo diutius subsistens & retentus, graviorum quæ iræ affectum ordinario insequi solent pathematum causam materialem & fomitem præbet. Ad hæc itaque avertenda prudens, & peritus Medicus iis utitur remediis, quæ motus effrenes nervosarum partium sedandi, biliosas excremen-

Rheumatism.  
ex ira  
& juven.  
per inge.  
sto sp.  
volat.  
C. C.



mentitias sordes contemperandi, & leniter per alvum educendi facultate pollent. Nihil autem a vero medendi scopo magis alienum est, quam medicamento calido & volatili motus solidorum concitiores reddere, illuviemque corruptam biliosam ad sanguinis massam, & ad interiora sensilium, & nervosarum partium invitare atque adducere.

## C A S U S X.

*Rheuma  
in sen-  
tentiis  
impari-  
copla,  
partes  
sã in-  
ternas  
quã ex-  
ternas  
affliges  
in sen-  
tentiis*

Præsenti in opere dum occupatus sum, occurrit mihi casus, dignus qui commemoretur. Quare ipsum huic tractationi subnectere operæ præteritum duxi. Vir erat sexagenario major, firmiore & animo & corpore, atque elastico fibrarum robore instructus, qui raro per vitam adversa valetudine tentatus, biennio abhinc circiter, colicis quidem atque cardialgicis passionibus per vices affligentibus attamen convenienti remediorum usu statim mitigatis atque depulsis correptus est. Mense Januario hujus anni vicinam urbem tendit, judiciales quasdam compositurus lites. Quum autem impetrata judicis sententia voto minus responderet, vehementer, & supra modum animo commotus est, corpus dein multis modo laboribus, & vigiliis fatigatum, inter decursum per plateas, frigoris vehementiæ improvide exposuit. Hinc statim ciborum periit appetentia, & alvus segnior reddita fuit, ita ut perpaucas feces ano protruserit, imo per aliquot dies officii sui oblita fuerit. Domum reversus patiens de languore universi corporis, doloribus abdominis ex uno hypochondrio in alterum divagantibus, nec non de anxiis, & cardialgicis præcordiorum stricturis circa scrobiculum cordis, cum pertinaci alvi clausura stipatis conqueri cœpit. Rebus sic stantibus, mihi in consilium vocato, primo omnium, strictiorem alvum per enema emolliens nec non

infusum mannatum cum oleo amygdalarum dulcium permixtum relaxare fecesque resistentes educere visum fuit. At vero pauca in quantitate durissima scybala nigricantis & quasi adusti coloris secesserunt: doloribus morsibusque in abdomine persistentibus, & per certa intervalla acius affligentibus. Suasi dein, ut lactis serum cum cremore tartari acidulatum atque manna nobilitatum, per aliquot hebdomades mane ad mensuram biberet. Postea quum sanguinem redundantem, & ejus missionem neglectam adverterem, pedis venam pertundendam curavi: ubi emissæ aliquot sanguinis unciae, satis bene quoad cetera constituti, nisi quod permultum lentæ, & viscidæ pituitæ, aquæ calidæ immerfus deponebat. Unde æger parum levaminis persensit. Interim tamen alvus quinquies vel sexies de die fuit soluta, multumque pituitæ una cum durioribus excrementis eductum. Sed dolores cum cardialgicis tum colici, licet aliquando mitigarentur, continuabant, dorsum & lumbos sæpe repetentes. Quibus æger tandem ita enervatus fuit, ut assidue in lecto decumbere cogeretur. Ex medicamentis internis nihil intentatum vel ommissum, quod ad discutiendos flatus, ad sedandas spasticas stricturas, ad acrimoniam temperandam & infringendam, atque æquabilem transpirationem conservandam commodum proficuumque visum fuit: & tandem parum adjuvamenti inde persensit æger, nisi quod observatum sit, dolores hos acerbiores magis ad artus, & externas partes, interiori sede relicta, conversos esse; quandoquidem mox scapulas, mox lumbos, mox pectus, mox præcordia invadebant, capite tamen ab iis libero relicto. Somnum interdum placidum capiebat, cibosque concoctu faciles ingerebat, alvus vero rarissime sponte libera fuit, & urina nunquam non parce profluxit. Interea



terea cum jam per duos, & quod excurrit menses hoc malo conflictatus fuisset æger, non parum vires exhauriebantur. Percipiens vero pulsus adhuc valentem & plenum, pedis venam iterum secandam præcepi, e qua longe alia facie emanavit sanguis quam prior erat: nam vix sexta ejus pars rubicunda erat, quæ fero placentalæ instar innatabat, superius lento, viscido mucro obductus. Sed neque etiam inde adjumentum quoddam percipiebat ægrotans. Hic rebus ita constitutis, meum constantissime cum domesticis suis efflagitavit auxilium, rogans, morbum, ejus naturam, totumque progressum paulo accuratiori medicationi, & acriori judicio subjicerem. Ad hanc itaque rem incumbens, ex inspecto sanguine judicabam; vitium non, ut antea forte existimaveram in solidis esse, ubi angustiam vel scirrhotatam quandam in intestinis præsentem divinaram, sed feri excrementitii colluviem non tam partes internas quam externas affligentem, horum dolorum causam, & fomitem existere. Hanc itaque non commodius nisi per alvinam regionem educi posse credidi. Nolebam vero in corpore viribus valde fracto atque intestinis spasmis & torminibus jam extreme debilitatis acre quoddam purgans per superiora exhibere. Itaque cum in consiliis *Riverianis* me aliquoties legisse meminero, aquam benedictam *Ru-landi* ad aliquot uncias in enemate, optimo cum fructu ad ferofam colluviem educendam adhibitam fuisse, tentare & hoc auxilii genus constitui. Et cum ad manus non esset aqua illa benedicta, tartari emetici solutionem huic substitui, atque in talem formam redegi: Rec. tartari emetici in aqua menthæ soluti grana 8. vini Hispanici uncias sex. M. Hanc mixturam cum clysteris emollientis domestici tribus partibus aequum infundendam juberem, mox

*Hist. Syst. T. IV. P. II.*

inde largissima viscidorum humorum secuta est excretio, magna fecum liquidarum copia stipata, quam postea tres sedes exceperunt, sed cum paucioribus excrementis: quo facto juscula quædam analeptica porrigere jussi. Et bene se habuit æger. Sed tertio die post, cum intolerabilibus per 4. dies abdominis cruciatibus cum diarrhœa & tenesmo copulatis, corripere, interne theriacæ veteris dosin, item oleum amygdalarum dulcium ter, vel quater per diem cum sero lactis, vel infuso veronicæ exhibui, & exterius abdomen inungendum linimentum, ex theriaca in aqua Anhaltina soluta, cum balsamo Peruviano commixta, jussi. Atqui inde & alvi dejectiones, & tormina ex voto conquieverunt ac remiserunt. His peractis mixturam diaphoreticam, quæ ex liquore nostro minerali, syrupo croci saturato & quarta parte spiritus tartari composita erat, propinavi. Unde placido secuto sudore, vique dolorum mitigata sensim paulatimque ad se redire videtur ægrotans.

#### *Epicrisis.*

Chronicus hic gravis morbus, ad dolores rheumaticos ab excrementitii feri copia originem suam trahentes, nervosæque partes internas æque & externas infestantes, referri debet. Senes vero quam maxime ad ejusmodi morbos a sero vitioso oriundos disposita aptaque habent corpora, quia ob bilis lentorem & inertiam, vacillantemque intestinorum tonum alvus pigrior sit, atque adeo a fecibus retentis corruptæ sordes ad sanguinis massam feruntur, quæ ob languidioris perspirationem senili ætati familiarem & communem magis magisque succrescunt. Credibile igitur est, eodem modo hos dolores fuisse excitatos. Et quia per ipsius morbi paulo longiorem decursum, in corpore omni motu, & exercitatione vacante, ipse sanguis, & humores boni atque laudabiles in corruptum

Q

sero.



ferosum liquamen conversi sunt, vero est simillimum contumaciam hujus affectus inde esse petendam. Deniq; notabilis hæc observatio non prætereunda est, quod emetica & paulo fortiora infusa per clysterem, ad copiosas ferositates e corporibus latibulis eliciendas, & exturbandas, tutiori longe modo ac validiora purgantia ore assumenda exhiberi possint.

## CAPUT IX.

## De rheumatismo odontalgico.

## Theses Pathologicae.

## §. I.

Definitio  
generalis  
dentis

**O**dontalgia, sive dentium acutus, gravis & perquam molestus dolor non nisi rheumatismi species est, a feri impurioris decubitu, ligamenta & tunicas nerveo-glandulosas, quibus radices dentium in alveolis maxillarum arctius circumvestiuntur atque obfirmantur, valde lancinantis, & arrodentis subortus; qui varia molestaque post se trahit symptomata.

## §. II.

Sæpe ex  
rheuma-  
tismo o-  
dontal-  
gia ori-  
tur.

Nos non semel sed pluries observavimus, artuum, scapularum, humorumque dolores, in capitis sæpenumero transiisse latus, atque dentes pariter ac maxillas molestissime invalisse. E contra, capitis & dentium dolores, sede sua mutata, in humores, brachia vel scapulas descendisse, identidem a nobis haud raro est animadversum. Quin, per experientiam obvium est, maxillam superiorem cum dentibus suis, dolore, & spasmo frequentius ac inferiorem affici.

## §. III.

Interdum  
in ipsa  
dentis  
cavitate  
residet.

Alia porro sedes est odontalgici doloris, qui in ipsis dentis cavitate, videlicet in funiculo isto vesiculari, ex membrana nervosa, vase arterioso, venoso & lymphatico composito residet, videlicet si is ipse graviter, vel

nimia, a sero stagnante, distensione, vel spastica constrictione affligatur, præsertim ubi dens est cariosus, ipsaque caries ad funiculum modo dictum pertingit: siquidem certa, & quotidiana experientia constat, cariosos dentes rheumaticis affectionibus maxime tentari, eo quod quam facile, ob imbecillitatem hujus partis humores ibi stagnant, atque subsistunt.

## §. IV.

Symptoma  
mata

Quemadmodum in arthritide dolor, rubor, tumor, & febricula præfens est; ita hæc omnia quoque in odontalgia fieri animadvertimus. Jungitur insuper copiosa salivæ ex ore profusio, quæ non aliam agnoscit causam, ac spasmus dolorificum; qui dum vasa lymphatica & venosa constringit, liberum sanguinis, & feri regressum impedit; quam ob rem a subsistente sanguine salivalem illum laticem in glandulosa faucium loca copiosius secedere æquum est.

## §. V.

Rheumatismus intemperati & subito mutati aeris plerumque soboles evadit: atqui non secus res in odontalgia cedit, quæ in corporibus dispositis, præsertim cacochymicis quam facile oritur, si ea ex calida desubito in frigidam auram secedunt, vel si vere, & autumno tempestas per vices austrina calida atque frigida est.

## §. VI.

Uti femina præ sexu virili rheumatismis magis sunt obnoxia: ita etiam odontalgiam frequentius experiuntur. Id quod maxime contingit, quando utero gerunt, vel defectu mensium laborant, aut alimentis acidis, salsis & alvum adstringentibus, item dulcibus plus justo delectatur; quippe quæ etiam externe denti carioso admissa desubito sæpe dolorem proritant. Nihilominus, si viros hic dolor apprehenderit, acerbius multo affligere solet.

Femina  
frequentius  
ac viros  
affligit

Hoc tamen  
acerbius.



§. VII.

*Rarus rheumaticos arthriticos in-festat.* Experientia rursus constat, quod qui rheumatismo vel arthritide laborant, & rarius odontalgia corripiantur, sed dentes integros habeant; cum contra dentium doloribus magis sint expositi, qui huiusmodi artuum & musculorum affectionibus vacent.

§. VIII.

*Facile reuertitur.* Qui dentium doloribus semel iterumque excruciantur, ii rursus ex facili, & leviori causa in eundem incidunt, non secus ac in arthriticis, & podagricis tentationibus id fieri afolet, propter debilitatem quam dolores huiusmodi pariunt atque relinquunt.

§. IX.

*Malum quædoq; exitum fortitur.* Acerbior dentium dolor in corpore sensibili atque impuro gravia inducit symptomata, vigiliam nempe, febrem, appetitum prostratum, delirium, refrigerationem extremorum, imo convulsiones, præsertim in infantibus, propter systema nervosarum partium in consortium sive motuum morbosorum communicationem pertractum.

C U R A T I O.

§. I.

*Indicationes* Quoniam odontalgicus dolor ab illuvie plerumque serosa ortum suum fortitur, utpote quæ a sanguine copiosius ad caput congesto, & lentius in vasis procedente, separata, in ligamenta tendino-nervea depluit; potissimum medendi huic molesto affectui in eo reconditum erit momentum, ut serum scorbuticum impurum primum a capite divertatur & derivetur; dein, ut correctum præparatum atque mobile redditum, per congrua emundatoria e corporis sphaera eliminetur; demum parti affectæ justum robur reconcilietur, & hac ratione materiæ peccantis decubitus atque affluxus præpediatur.

§. II.

Primum quod concernit nostrum propositum scopum, huic clysterum injectiones peccantem humorem divertendi gratia, quam maxime optulabuntur. Ut plurimum enim sub gravioribus quibuscunque dolorum tormentis alvus pertinacius renititur, quam per enema lenitivum, & stimulans salinum emollire atque educere nihil est convenientius: utpote, a cuius applicatione ingens statim dolorum levamentum ægotantes recepisse observavimus. Præstat tamen ea ex domesticis usitatis, quam ex variis purgantium atque emollientium speciebus curiosius conflare. Dein quoque inter ea quæ humorum impetum a partibus superioribus ad inferiores invitant, pediluvio egregiam operam collocant: quæ ex sola aqua fluviali cum fursuribus triticeis, adjecto sapone Veneto decocta præparari atq; circa somni tempus in usum vocari possunt; adhibita tamen hac cautela, ut pedes diutius atque paulo profundius in ea dimittantur, neque nimis calide, sed tepide tantummodo admoveantur.

§. III.

Huic prædictæ intentioni non minus satisfaciunt, quæ leni stimulo alvum clementer subducunt, inter quas, uti in omnibus tam arthriticis quam rheumaticis, ita etiam in odontalgicis affectionibus, mannata, & ex cassia recenti parata, utpote quæ simul acrimoniam humorum contemperandi virtutem possident, præsertim si in sero lactis dulci vel lacte asinino, aut etiam in fonte minerali, v. g. acidulis Schvvalbacensibus dissolvuntur, præcipuas sibi partes vendicant.

§. IV.

In corporibus ætate florentibus, & quorum vasa nimio sanguineurgent, si vel ob transpirationem prohibitam vel aliis demum ex causis, acerbi oboriuntur dentium dolores,

*Humor vitiorum diversus per clysteres.*

*Pediluvio.*

*Operatur.*

*Pene Sect. quando adhibenda.*



primæ æque ac secundæ indicationi therapeuticæ omni ex parte satisfactæ venæ in pede instituta sectio; quæ utique tam humores ad superiora congestos, inferius invitandos, quam ad æquabilem eorum per omnis generis vasa circuitum restituendum ut & materiam hostilem e corpore eliminandam præsidium atque auxilium pollicetur insignissimum, aliis omnibus præferendum.

## §. V.

Diaphoretica.

Quod si materia peccans odontalgicos dolores efficiens, discutienda atque educenda, egregie huc conferunt ipsa diaphoretica, blandiora tamen, & sedativa simul virtute conspicua, e quorum numero electuarium ex rob sambuci, admixtis cornu cervi usto, antimonio diaphoretico, & nitri aliquot granis, cum aqua florum sambuci propinatum, laudem certe meretur amplissimam, præsertim si temperatur, & regimen sudoriferum exactius paulo observetur.

## §. VI.

Acidularum usus.

Non raro evenit, ut horum dolorum sævitia a serosa foveatur illuvie, quod sit cacochymicis scorbuticis, & catarrhosis phlegmaticis corporibus, ubi malum sæpius quoque revertitur. Tunc autem ego ad molestissimum malum præscindendum non certius, tutius nec præsentius, quam in convenienti thermarum vel acidularum usu inveni præsidium, præcipue si in subjectis tenerioribus, & biliosis cum lacte asinino permiscantur.

## §. VII.

Sacculi speciebus emollientibus repleti. suffragia.

Jam quod remedia externa cernit, sacculi ex speciebus paregoricis emollientibus, videlicet ex floribus sambuci, meliloti, chamomillæ vulgaris, baccis lauri, juniperi, semine carvi, milii & sale tosto parati, qui si tepide applicantur, ex omni remediorum genere securissima sunt. A suffimigiis quoque v.g. fumo succini, resinæ, styracis, ben-

zoes, olibani, gummi elemi, per infundibulum vel linteorum ope dentibus affectis admissis, insigne dolorum levamen secutum fuisse novimus. Interea tamen non omnes æque hanc medicationem ferre potuisse, & in quibusdam graves capitis dolores, hemicraniam, vertiginem, oculorum dolore, n. pressorium sic excitatos fuisse observavimus.

## §. VIII.

Quod si vero dolor acerbus maxime in carioso dente consistit, liquor anodynus mineralis vel solus, vel cum balsamo nostro vitæ permixtus, ope gossypii dentibus inditus egregium præstare solet levamen. In corporibus humidioribus una vel altera olei caryophyllorum gutta, item olei origani Cretici, nec non buxi destillati carioso denti instillata vel cum gossypio applicata, opem non contemnendam affert. Mixture ex spiritu vini camphorato cum croco, castoreo, & opio permixta gingivis atque excavatis dentibus admota, non secus ac ejusmodi linimentum in rheumatismo, & arthritide exterius applicatum, insignis per sæpe levaminis esse solet.

## §. IX.

Cererum, uti accuratum vivendi regimen ad præservationem affectuum chronicorum, & etiam dolorum, utile semper ac proficuum est: ita illud ipsum in nostro affectu non minorem adfert utilitatem. Diæta vero primario in eo consistit, ut ægri ab omnibus salis acris induratis, & nimium aromatizatis cibis, vino præsertim acido, & liquoribus spirituosissimis, omnibusque alvum duram, & adstrictam quæ reddunt abstineant, auram frigidiorē, ventum præcipue ex Borea flantem quam sedulo vitent, caputque maxime ab eo arceant. Et sicut in omnibus rheumaticis affectionibus præcavendis nullum præstantius ipso sufficienti motu, & exercitatione corporis datur remedium: ita ad ipsum



lum quoque in chronicis, & sæpe recidivantibus odontalgis commendationem meretur.

*Cautela, & observationes*

§. I.

*Cautela* **Q**Uando atrocior odontalgia a dente carie infecto atq; excavato proficiscitur, si situs id permittat, cauterium ignitum ab exercitato Chirurgo dextre applicatum, omnia decantatissima etiam remedia superat: liquidè funiculo illo nerveo, in quo doloris sedes est, exusto, & putredine, ignis ope, e dente sublata, dolorem non modo penitus expirasse, sed & foetidam cariem prohibitam fuisse, pluries etiam in nobis ipsis observavimus. Quin hac ratione quoque dens servari potest, si modo ejus cavitati postea cera cum mastiche mixta, quo impediatur ciborum, & aeris frigidioris ingressus, intrudatur.

§. II.

*Quæ si non lo- cū in- ventū de- c- wellen- dus* **Q**uod si vero durum illum in dente dolorem excitans caries, cavitatem efformaverit minus idoneam ac cauterium commode non admitti possit: externa tamen, atque interna quoq; in usum vocata remedia nullius efficacæ sunt, nihilominus a diutius affligente dolore gravioris mali periculum imminet; vix datur certius remedium, ac dentis affecti, a circumspecto Chirurgo, idonea encheiresi celebrata evulsio.

§. III.

*Soluta tamen prius plethora* Sed tenendum circa hanc operationem, ne ipso in paroxysmo, ubi dolorum vehementia quam maxime urget, instituatur. Neque facile in plethoricis, ubi capitis temporum, & genarum venæ tument, vasaque arteriosa vehementius pulsant, nisi prius iusta sanguinis extracta fuerit quantitas, dentis evulsionem tentare convenit. Testantur enim prætorum hinc inde recensitæ observationes, lethalem per sepius hemor-

*Hoffm. Syst. T. IV. P. II.*

rhagiam, a dentibus præsertim molaribus improvide extractis excitatam fuisse.

§. IV.

Observationum fide constat, venarum sublingualium incisionem in gravi- *Se. Elio ranina- tione.* viori odontalgia eximiam tulisse opem. Nos etiam hoc medendi genus admittimus, sub hac adhibita tamen cautione, ut incisio venarum paulo subtilior sit, alvusque libera existat: quinimo pediluvia in usum, prius quàm vena secetur ducenda statuimus. Si vero nimia sanguinis copia corpus turgeat, sanguinem e pedis vena detrudere expedit: ubi dolore adhuc persistente, postea forte raninas per- tundere conducibile erit.

§. V.

Peculiare id habent remedia odontalgica externa, ut nunc juvamentum *Externa nō per- pino juvat.* afferant, nunc in eodem corpore nihil efficiant, & nullum adhuc constans, & perpetuum contra dentium *Hinc dis- sentiē- tia scem- rissima.* cruciatus reperiatur remedium. Securissimum itaque est, stagnantium & acrium humorum lenem, & successivam procurare discussionem, & ab aeris frigidi injuria partem affectam quam sedulo defendere: id quod sacculi superius recensiti, mitiora quoque diaphoretica omni ex parte præstant.

§. VI.

In corporibus cachecticis, quorum *Purgā- tia qui- bus co- ducunt.* vasa ingenti vitiosi sericolluvie repleta sunt, & quæ artuum doloribus alias frequenter vexata fuerunt, blandiora evacuantia in cassum exhibentur. Sed duriori cuneo hic opus est, atque ad paulo validiora properandum. Inter plura alia autem, quæ huic scopo inserviunt, pilulæ ex gummi ammoniaci depurato, trochiscis alhandal, extracto fibrarum hellebori nigri, mercurio dulci, cinnabari præparato, croco, & castoreo compositæ eminent, & ob laudatissimum successum expectationi desideratæ respondent.



## §. VII.

*Mixtu-  
ra dolo-  
res ex-  
empla  
sedant.*

Mixtura ex spiritu vini camphorato, essentia croci, nucistæ, & spiritu cornu cervi volatili vinoso concinnata, ad guttas aliquot naribus excepta, admirandum plane in modum acutissimos etiam dentium dolores in momento sedat, atque profligat: cujusmodi effectus a liquore anodyno cum balsamo vitæ liquido n. maritato identidem expectandus. At vero dolendum maximopere est, hanc dolorum expirationem modo ad tempus plerumque persistere. Ratio autem hujus phænomeni in eo posita est, quod nervi qui ad mandibulas, dentes atque nares tendunt, ex uno trunco pari videlicet quinto originem mutantur.

## §. VIII.

*omnibus  
irritis,  
aplata  
corr. pro  
funt.*

Dolores dentium si tanta ferocia insistant, ut cuncta remedium generatim penitus eludant, ego insigni cum fructu porrexi pilulas, ita a me excogitatas. Rec. massæ pilularum aloephan-  
ginarum drachmam, de styrace drachmam dimidiam, extracti croci grana sex. M. f. l. a. Pil. No. LX. D. S. 6. bis 8. auf einmahl.

## ENARRATIONES MORBORUM.

## C A S U S I.

*Odontal-  
gia ex  
vehementi  
et mota,  
sub se-  
vis re-  
pestati-  
bus, se-  
pius re-  
petita,  
suborta*

**S**erenissimus Princeps, firmæ & robustæ quoad fibras & habitum corporis constitutionis, qui inculcata & constanti valetudine quadragesimum jam annum superaverat, continuis venationibus & vehementioribus corporis exagitationibus, sub inclementiori frigido & humido aere, sub solis intensiori æstu, sub ventis sæviter sæpe regnantibus, ita fatigavit vires, ut naturam ad permolestas defluxiones in capite & circumjacentibus partibus frequentius laceffiverit. Quæ non modo in capite sed & maxilla, præcipue in dentibus acerrimum dolorem pariunt, atque per interval-

la ex capite in subjacentia loca col-  
lum, humeros, scapulas delatæ, atroci dolore musculosas ac nervosas has partes affligunt, principium vero asperæ arteriæ obsidentes permolestam cum raucedine tussim inferunt. Ceterum sub quietiori jam corporis statu & vitæ instituto ingravescere hæc symptomata videntur, quippe & ciborum appetentia minuitur, & alimenta minus probe digesta flatibus & borborygmis cum alvo pigriori excitare solent. Ego in consilium accersitus, primum atroci illi dentium dolori, qui valde urgebat, subveniendum esse duxi: quem in finem latus affectum linimento, ex una balsami nostri vitæ, & duabus liquoris anodyni partibus inungere jussi; quod etiam gossypii ope denti qui cariosus fuit, admotum, levamen non mediocre attulit. Postea exquisitam victus rationem imperavi: quæ in eo consistebat, ut omnem aerem inclementem, ventos impetuosos maxime, ac solis æstum evitaret, & exercitationes corporis, equo vel curru vehendo, vel ambulando cum moderatione tamen, quia iis assuetus erat, non intermitteret; loco potus ordinarii decoctum temperatus ex radice chinæ, cortice ligni sassafras, passulis, atque pauxillo cinnamomi paratum bibat, parcius vero vinis spirituosus utatur, vel saltem tenuia Mosellana, & huic similia, aut valde diluta cum aqua hauriat. Præter rectam vivendi rationem, in qua constanter pergere debet, etiam hæc malo expugnando accommodata remedia ad usum proposui. Adeoque infusum Theiforme ex melissa, salvia, veronica, betonica, corticibus citri recentibus, cardamomo, iuxta dosi mixtis, mane sumendum in lecto cum lenioris sudoris expectatione suassi. Ante prandium Elixiri nostri balsamici drachmam cum pauxillo vini, & aquæ caperet, atque ad alvum liberam servandam bis in septimana passulas Corinthiacas rhabarbarinas ad-



unciam ante lecti introitum fumeret, consului: ad tussim vero levandam, oleum amygdalarum dulcium sine igne paratum, cum duabus partibus fyrupi capillorum veneris permixtum, in avenaceo jusclo circa noctem usurparet auctor fui. Præterea frictiones in capite & dolore affectis partibus mane & sero adhibendas, cum panis succini fumo imbutis, calidis, plurimum commendavi, atque ante omnia ut caput, & partes superiores a frigore muniret, suasi. Cucupham quoque in capite gestandam ex herba majoranæ, saturejæ, floribus spicæ, rorismarini, chamomillæ Romanæ, succino, benzoe, styrace, cardamomo præscripsi. Quibus remediis adjutus per divinam gratiam, a molestis istis rheumaticis doloribus immunis redditus, jam sine ullo valetudinis impedimento ex voto vivit Princeps Serenissimus.

*Epicrisis.*

Quemadmodum ad constantem tuendam sanitatem, & ad morbosas a corpore avertendas afflictiones, nihil nec efficacius nec securius conveniente, & sufficiente corporis motu, labore & exercitatione est: ita attenta etiam observatione animadvertimus, non modo ex intermisso corporis motu, sed etiam ex nimis, vehementibus inopportunis, & sub inclementi cœlo institutis exercitationibus viam ad morbos apertissimam sterni: videlicet quodocunque illæ subito omitantur. Nam quo celerior sub ipso motionum impetu, & agitatio fluidorum, & solidorum est motus, & progressus, eo tardior & imbecillior postea evadit, quando prorsus corporis exercitium negligitur. Hinc pressio pede sanguinis, & humorum stagnationes, decubitus, feri separationes, ejus extravasationes atque in subjectas partes defluxiones, præsertim eas, quæ aeris injuriis expositæ imbecilliores, & a naturali tono dejectæ fuerunt, aliaque permolesta accidentia insequuntur; quemadmodum superius

haud ignobile exemplum satis luculenter demonstrat. Ceterum, quoniam natura assiduis, & quotidianis iisque validioribus exercitationibus fuit adsueta, non penitus eas intermittendas sed sub modo, & moderatione continuanda esse censui.

C A S U S II.

Cum nuper ad aulam Serenissimi Principis vocarer, consultum me adiit <sup>Rheuma</sup> femina honesta ante 40. annos <sup>dentit</sup> nata, sanguine, & succis plena, quæ <sup>e collu</sup> sub priori conjugio, & ante illud <sup>vie se</sup> etiam in primis juventutis annis <sup>rosa</sup> largiter semper sanguinis menstrualis <sup>prognat</sup> fluxum experta est, atqui, dum <sup>tū cura</sup> singulis fere annis liberos peperit, <sup>ema-</sup> satis valens & salva permanfit. In altero <sup>ciante</sup> conjugio, quod plane fuit sterile, per aliquot annorum spatium, tempore potissimum vernali, & autumnali, permolestis & gravibus in capite defluxionibus, coryza, gravedine, dentium acerbo dolore, tumoribus faucium, uvulaque prolapsu misere admodum fuit tentata: quæ symptomata duos, quandoque tres menses continuarunt. Tumor internus faucium non mediocris ita sæpius compressit mandibulas; ut os deducere, nisi quantum sufficeret ad forbillanda juscula vel tenuiores cibos capiendos, non potuerit. Multis usa domesticis, & pharmaceuticis remediis: sed cuncta effectu plane frustraneo. Cum in pleniorum morbi statum ejusque causas inquirerem, cognovi eam cum marito inferiorem domus humili loco sitæ stationem inhabitare, & in ipsa dormire, quæ cum minus a ventis perflari queat, aer inclusus quam facile vappidus, & humidus redditur; deinceps in quieto semper vitæ genere versata est: tertio in conjugio sterili vixit, & menses longe parciores quam superioribus annis experta, singulo quoque vere & autumnino venesectionem in brachio admittere con-



luevit. His perspectis, & diligenter expensis, vitiosi feri potius illuviem, in hoc corpore quam sanguinis redundantiam peccare judicavi. Quare non tam ad sanguinis quantitatem detrahendam, quam ad feri intemperati, & impuri nimiam copiam impediendam, imo e corpore exturbandam, & ad robur toti corpori, capiti inprimis, conciliandum medicationis consilium direxi. Suasi igitur, ut mutaret conclave & dormitorium, atque in loco diffabili altiori vitam ageret: dein, ut intermedio tempore quo libera erat ab hoc affectu, a copiosiori cibo, carnibus elixis & pinguioribus jusculis, a cœna etiam abstineat, & corpus labore & motu moderatiori exerceat, præcepi. Loco cerevisiæ crassioris aquam coctam cum cinnamomo, cortice l. saffrafras, passulis & quarta vini parte mixtam bibat; & singulis mensibus, bis vel ter pilulis meis balsamicis polychrestis, & totidem in septimana vicibus elixirio balsamico temperato utatur edixi. Demum balsamo nostro liquido caput inungendum, & aqua cum vino remixta, in qua aliquot guttulæ ballami dicti instillatæ, os frequentius colluendum commendavi.

#### *Epicrisis.*

In ejusmodi diuturnis crebrius recurrentibus rheumaticis affectibus profligandis, Medicus qui consultatur, probe semper prius statum corporis, causas antecedentes & concurrentes investigare debet: siquidem ut plurimum sagax, & circumspectus Philater, permolestas has diuturnas fluxiones seu rheumata, a tenuiore, excrementitioso sero ex atonia solidorum oriundo, potius, quam a sanguinis boni redundantia dependere atque produci deprehendet. Et tunc pessimo consilio largiores sanguinis detractiones proponuntur, quæ naturam imbecilliolem reddunt, & ad morbosas afflictiones disponunt. Ego in doloribus arthriticis neque minus in ca-

tharrosis defluxionibus, singulari semper cum fructu diætam, ut ita loquar, emaciantem commendavi, & imperavi; quæ in detractone copiosi alimenti, abstinentia ab omnibus quæ copiosum alunt nutrimentum tam cibis quam potibus, sufficienti motu, & exercitatione corporis, tenuique ac levi potu consistit; interposito nonnunquam apto balsamico laxante & roborante. A quibus auxiliis, in ejusmodi abigendis & avertendis morbis, ampliorem me semper consecutum fuisse opem, ac ab aliis pharmaceuticis remediis omnibus, sancte adstruere & affirmare possum.

#### C A S U S III.

Juvenis annorum 30. corpore car-  
noso, & boni habitus, sanguine abun-  
dans, hyemali tempore domi bene  
pallus & cibis nutrientibus saturatus,  
vini quoque non raro haustum inter-  
ponens, sub libero vernali, ventoso,  
& humido cœlo, non recto satis &  
munito corpore iter per aliquot mi-  
liaria facere debuit. Hinc domum  
reverso, ingens lassitudo corpus,  
caput, molesta cum vertigine gravitas,  
dentes vero immanis admodum do-  
lor irruebat atque invadebat, qui  
noctu acerbior erat. Quum per an-  
num sanguinis missionem non passus  
fuerat, ex meo consilio venæ circa  
pedis malleolum facta incisio, &  
plus quam decem uncix extractæ;  
quæ vacuatio cum euphoria celebra-  
ta quandam horum pathematum re-  
missionem largita fuit, pulsu inde  
valentiori reddito. Ipse sponte sua  
ante lecti ingressum, quum per sy-  
ringam tabaci hauriret fumum,  
aquæ frigidæ fontanæ mensuram suc-  
cessu temporis epotavit, cubitum-  
que petens corpus stratis probe re-  
xit atque circumvolvitur. Hinc lar-  
gissimus in toto corpore subortus  
tumor per integram noctem mana-  
vit.

*Sanguis  
dentium  
dolor  
ex ad-  
missio  
corpore  
plethora  
frigore  
aqua  
frigida  
curatus*



vit. Inde expergefactus, omnis dolor a capite & dentibus, felicissime fuit abactus.

*Epicrisis.*

Quandocunque dolores gravativi & rheumatici artuum, capitis, a sanguinis *πρὸς ἐξοχὴν* sic dicti consistentis & rubicundi redundantia, quæ impeditionis humorum circuitus & secretionis atque excretionis imminutæ parens est, potius quam a feri impuri copia & decubito in eufarcis & bene pastis corporibus oboriuntur; ipsa ratio sana medico-practica dictitat, ad liberiores circuitum sanguini & humoribus conciliandum, sectionem venæ remedium esse aptissimum. Et tunc ordinario pulsus, major, auctior & fortior post sanguinis vacationem sequitur, qui certe minimeque fallax, ex redundante illo purpureo liquore morbum provenisse, indicium exhibet. Deinceps insignes aquæ puræ fontanæ frigidæ sudoriferas & discutientes virtutes, hic casus magis conspicuas atque illustriores reddit. Ego semper in hac hæresi fui, aquam frigidam fontanam puram, terrestrioris calcareæ vel salinæ materiæ expertem, incomparabilem multis in morbis præbere medicinam, tam ratione frigoris fibras attonitas firmantis & roborantis, tum respectu mineralis ætherei spiritus, quo nulla aqua destituta, viribus identidem amici: quin & ratione fluxilitatis ac tenuitatis, qua crassos humores mobiles fluxiles atque libero progressui aptos reddere valet. Sed hoc remedium, quod utique magnæ utilitatis est, & recte heroicum dici potest, maxima eget cautione & circumspeditione. Quam hisce capitibus includere non dubitamus: quorum primum est, ut imbecillo & tenui corpori, ubi motus languent & venæ sero turgent non exhibeatur: secundum, ut tantummodo corporibus sanguine, calore, & motu vegetiore adhuc plenis præbeatur, quo in totius corporis ambitum actuari &

distribui possit: tertium, ut non uno haustu, sed successive ac per vices ingeratur: quibus addimus quartum, ut corpus post epotationem vel motu ad sudorem usque exerceatur, vel in lecto calidis tegumentis probe foveatur.

C A S U S IV.

Femina triginta annorum, victui <sup>Odor</sup> crassiori salino indulgens & otiosa <sup>salgia</sup> vitæ dedita, sanguine abundans, al- <sup>ex in-</sup> vum patitur crebrius tensam atque <sup>congrua</sup> strictam, mensiumque defectum experitur. Sanguis e vena missus apparuit glutinosus. Autumno gravissimo corripitur dolore circa nucham, qui sese ad aurem extendit, parotidem totamque dextram maxillam cum inflatione atque rubore occupans, in dente carioso ejusdem lateris gravissimum dolorem excitat. Pulsus erat febriculofus, arteriæ fortiter circa tempora pulsabant, somnus inquietus vel plane nullus, & perpetuo salivalis latex ore effluxit. Ut his medelam faceret, externe utebatur linimento camphoræ, a quo dolor minime mitigatus, sed potius exacerbatus fuit, inflammatione in facie aucta. Curata vero est sequentibus. Primum mixturæ, ex liquoris anodynæ uncia dimidia, camphoræ, laudani opiatæ cydoniatæ utriusque granis tribus paratæ, quindecim guttas vel viginti, tribus de die vicibus sumsit. Secundo, loco potus ordinarii decocto hordei, scorzonæræ & rasuræ ligni sassafras, cum semine papaveris albi in emulsionem redacto fuit usa. Tertio Nuchæ & capiti sequens applicatum fuit linimentum: Recipe aquæ anhaltinæ, spiritus florum sambuci ana unciam, spiritus salis ammoniaci drachmas duas, nitri artificialis, quod præparatur ex spiritu salis ammoniaci & spiritu nitri, camphoræ utriusque drachmam dimidiam, opii grana decem, olei nucisæ destillati guttulas.



las quindecim. M. 4. Mitigato paulisper dolore, alvus vacuata fuit cum infuso, quod capiebat folia sennæ, rhabarbarum, agaricum cremorem tartari, & passulas minores, cum aqua & vino. Utut vero dolores ex parte remiserint, remansit tamen fixus in gingiva circa dentis sedem cruciatus, cum insigni inflatione & rubedine, qui ad aliquot menses durabat. Ex consilio itaque Medici, & opera Chirurgi extracto dente, materia ichorosa & putrida in copia successively ex alveolo effluxit, cum plenaria doloris remissione. Foramen vero relictum usu adstringentis medicaminis fuit clausum.

*Epicrisis.*

Ex hac morbi relatione discendum est, quod odontalgia frequentius conjuncta sit cum plegmone seu erysipelacea quadam defluxione; quare etiam eodem modo ac via sanatio utriusque affectus instituenda. Et quemadmodum in erysipelaceis affectibus exterius applicata oleosa nunquam profunt, ita etiam in hoc casu ea non bene ferre potuit ægrotans, sed dolor potius discutientibus temperatis & diaphoreticis auscultavit. In caco-chymicis corporibus, maxime, si humorum adsociatur abundantia, frequentissime gignitur & quidem circa autumnum odontalgia; quo tempore etiam arthriticæ affectiones familiarius occurrunt. Rebus itaque talem eventum sortientibus, ad præservationem venæ sectio, decocta lignorum temperata, convenientia evacuantia, abstinencia a vino, cibisque salitis acrioribus, utilissimam, depurando totam sanguinis massam, locant operam. Porro, cum fistula facile generetur in maxilla, quando in ejus alveolis materia acris putrida stagnat & exitum non invenit, quæ non modo ipsum dentem sed osseam etiam maxillæ substantiam exedit, corrodit & ulcus difficulter sanabile, quod cognoscitur ex dolore, tumore & rubore, nec non putridæ materiæ

post compressam gingivalem carnem effluxione, efficit, ut mature ipse dens extrahatur, quo corrupta illa materia non solum habeat exitum, sed etiam medicamenta proxime ipsi ulceri applicari possint, maxime est necessarium.

C A S U S V.

Femina 30. annos nata, venarum <sup>Odontalgia,</sup> sectioni diu adsueta, quotannis eam, <sup>ex omif. sa con-</sup> quotiescunque uterum tulit, omisit, <sup>sua V. Seft.</sup> ob vanum & nullis rationibus innixum metum, ne hoc evacuationis genus periculum portendat. Sed semper fere affecta est gravi odontalgia, juncta cum tumore faciei seroso. Inter præludia vero hujus recurrentis affectus, ad frequentiam illius præscindendam usa est essentia, quæ constat ex terra catechu, sanguine drachonis, pauxillo aluminis usti & spiritu vini; quæ tam externe, quam interne sumta, mox acerbissimi capitis secuti sunt dolores, cum summa præcordiorum anxietate, insigni virium defectu animique deliquio conjuncti. His cessantibus symptomatibus tumor utramque maxillam occupavit, quem externa applicata cataplasmata non sublevarunt, sed exacerbaverunt, ita ut intensiori febre facta & intercurrentibus animi deliquiis abortum passa fuerit. Tandem emplastro manus Dei pertinax ille in scirrhosam duritiem abiturus tumor fuit depulsus.

*Epicrisis.*

Gravidis familiarissimæ sunt propter plethoricum & caco-chymicum statum; & ob impeditiorem perspirationem, mensiumque defectum, edematosi vel etiam erysipelacei capitis & odontalgici effectus, qui matura venæ sectione, & eorum usu, quæ alvum clementer cum euphoria & per epicrasin movent, motuque insuper & victu moderato præcindi feliciter possunt. Si quis itaque excretionem humoris vitiosi, si jam imminet im-



prudenter velit impedire, quod fit adstringentibus, non potest aliter fieri, quin materia a sanguine jam segregata & corrupta in internas & nobiliores partes irruat, longe graviora symptomata inducendo. Notabile porro est, quod non secuta semper sint cataplasmata ex discutientibus etiam composita, quia sæpius repellendi facultatem, dum videlicet humida non quisque ferre potest, nanciscuntur. Deinceps tumor serosus facile transit in scirrhosam duritiem, præsertim si nimis spirituosis discutientibus fuerit tractatus, qualis diutius inhæret, & difficillime resolvitur, neque facile emollientibus ad suppurationem disponi potest. Egregiam vero virtutem non semel sed aliquoties tali in casu experti sumus, ab emplastro sic dicto Manus Dei, quod maximam partem ex gummatibus compositum, atque in *Coaræ Pharmacopea Regia* descriptum est.

## C A S U S VI.

*Dolor dentium periodicus, ex vini & dulcium intemperantia.*  
Vir sanguineo-melancholicus vino adfuetus & dulcibus ultra modum delectatus, ex carioso dente diræ sæpius tormenta, præcipue autem tempore nocturno passus est. Dolor hic erat periodicus; incipiebat enim circa decimam horam, excrucians usque ad tertiam matutinam, nullo extrinsecus apparente tumore aut calore præternaturali. In cavitate dentis hærebat particula spongiosa exquisitissimo sensu prædita. Hujus foramini intrusa fuit essentia castorei, cui tantillum laudani opii admixtum erat. Ita quidem doloris atrocitas quievit, nec per biduum reversa est; sed tertio die recrudit, & eadem hora rediit: non autem eodem remedio, sed ex camphora indita remisit. Elapsis aliquot diebus, cum idem dolor recurreret, nec camphora, nec prædicta essentia ullum levamen afferebant; sed

potius tunc ad oleum caryophyllorum confugiendum fuit, cujus una & altera guttula denti carioso immissa levamen attulit. Accidit vero, ut, cum sequenti septimana malum eodem modo infestaret, neque unum ex hisce tribus, utut singula applicata fuerunt, quidquam in alleviando malo præstiterint. Suasi, ut interne electuarium superius recensitum, cujus basin constituit rob sambuci, repetitis vicibus sumeret: externe vero balsamum nostrum vitæ naribus susceperet & denti essentiam castorei, inderet: quo dolor etiam mitigatus fuit. Tandem dentis extractione facta, dolor nunquam rediit.

## Epicrisis.

Hæc memoratu digna observatio luculenter docet, quam incerta & infida sint specifica sic dicta antodontalgica externa, idque hanc ob rationem, quod fibrarum & pororum in partibus solidis textura, & ab ea dependens debilitas non semper eadem maneat, sed brevi ab ipsis etiam medicamentis mutari possit: quo fit, ut idem remedium non eundem, sed alienum plane sæpe numero præstet effectum. Parum itaque auxilii cum expectandum sit ab externis, consultius semper procedimus, si curam ejusmodi affectuum congruis internis remediis adgrediamur & prosequamur, affectamque partem tantummodo in temperato calore & in expiratione æquabili & liberiori detineamus.



## CAPUT X.

## De Dolore &amp; Spasmo Otagico.

## Theses Pathologicae.

## §. I.

Defini-  
tio.

**C**irca dolorum & spasmorum do-  
ctrinam dum versamur, ille  
etiam qui ad aures pertingit & non  
minori saevitia ac ceteri affligit, non  
reticendus erit: licet breviter, quic-  
quid de hoc affectu commemorandum,  
dicamus. Est vero otalgia gravis do-  
lor, in aurium gravitate sive meatu  
auditorio consistens, a sero acri ex-  
travasato & subsistente intra membra-  
nam nerveam meatum auditorium  
cingentem exortus.

## §. II.

Genesis  
& cau-  
sa.

Pertinax hic aurium dolor, eos qui  
rheumatismis & catharralibus deflu-  
xionibus sunt obnoxii, frequentius  
adoritur, vel, si sudor consuetus sup-  
primitur, aut caput sudore madidum  
ventis frigidioribus desubito exponi-  
tur, prognascitur. Sæpe causa, in-  
flammatiō vel ulcus aurium est, ubi  
insignis ardor, dolor tensivus, pul-  
satilis, rubor, febris immo delirium  
junguntur: interdum a vermibus ex-  
citatur, & dolor vagus lancinans  
atque rodens percipitur. Præclare  
ARETÆUS lib. 2. cap. 3. de aurium  
dolore sequentem in modum differit:  
*Acusticus porus difficillime sæpe do-  
loribus vexatur; ut etiam occipitium  
teneant & oculos atque buccarum  
musclos, & perseveratione quadam  
tardissima tempora & caput. Ali-  
quando etiam humoris fluor per eas-  
dem cavernas fit, quem græci rheu-  
matismum vocant & ita jugis ut  
sæpe vulneret altiora atque corrumpat,  
& ossa earie inficiat.*

## §. III.

Proef-  
fus &  
sympto-  
mata.

Otalgia tanta sæpius vehementia  
affligit, ut in provectoris atque adul-  
tæ ætatis hominibus delirium exci-

ter, cum summa inquietudine & an-  
xietate conjunctum: quinimo epilep-  
siam sic fuisse introductam nos ob-  
servavimus. Phlegmaticos autem  
licet minori gradu infestet, horren-  
dostamen in cholericis, capitis dolo-  
res cum quadam mentis alienatione  
vigiliis & inquietudine infert.

## §. IV.

Ratio, cur aurium dolores tam  
crudeliter lædant, ut tolerari vix  
possint, in eo potissimum posita vi-  
detur, quod membrana aurea quæ  
investit, osseo illo meatui firmiter  
annectitur, adeoque magis tenditur,  
nec non a dura matre originem for-  
titur, nervorumque irreptatu dives  
est. Quo magis autem membranæ  
nervæ tensæ atque expansæ sunt,  
eo acutioribus doloribus ex sunt ob-  
noxia: quemadmodum id liquido  
apparet in perioestio, intra quod &  
subjectum os contentus sæpe humor  
horrenda symptomata producit, quod  
in panaritio aliisque ossium vitis vi-  
dere est.

## §. V.

Sæpe otalgia symptomata febrium  
acutarum evadit, ubi materiæ mor-  
bificæ ad aurem per metastasin fit  
translocatio; quemadmodum in mor-  
bo Hungarico interdum evenit, ubi  
surditas vel ingens saltim auditus dif-  
ficultas exoritur. Quæ si in declina-  
tione febris accidit, infallibile recon-  
valescentiæ præbet signum, sed tunc  
vitium in auri internæ membrana  
& nerveo acustico hæret. Quando  
vero metastasis ad aurem externam  
pertingit, tunc otalgia suboritur,  
quæ, nisi cito succurramus, ob do-  
loris atrocitatem demere vitam po-  
test. Qui ex lapsu vel casu in terram  
otalgiam patiuntur; ubi materiam  
saniosam per aures reddidere, e me-  
dio omnes sublatis sunt, teste RIVE-  
RIO obser. 18. p. 291. HIPPOCRA-  
TES vero in coac. prænot. p. 538. §.  
58. de exitu hujus morbi sequentia  
habet *auris dolor pertinax, cum febre  
acuta & alio quodam signo aliquan-  
tum*

Hanc  
ratio.Prognos-  
is.



tum maligno juvenes quidem septima die occidit, & citius delirio correptos, si non multum pus effluxerit ex aure, aut sanguis e naribus, neque aliud quoddam bonum signum compareat, Seniores autem tardius & minus tollit: nam & aures suppuratione præveniunt & minus delirant. Verum multi ex his recidivant, atque sic pereunt. Monere autem hoc loco debeo, quod decretum Hippocratis magis de dolore & tumore inflammatorio parotidum intelligendum sit.

Methodus medendi generalis.

§. I.

Dolor  
compr-  
endus

**I**N curatione hujus dira tyrannide aures exercentis affectus, omni ratione annitendum est, ut dolorum illa vehementia, quæ causam interdum gravissimis symptomatibus præbet, componatur vel saltem mitigetur. Id quod variis quidem modis tentari atque obtineri potest. Nos autem aliis cunctis, pulveres nitrosos cinnabarinos, liquorem nostrum anodynum mineralem, nec non emulsiones seminum 4. frigidiorum majorum præferimus. Quibus nihil proficientibus, ad opium rite correctum fugiendum est, quo nomine massam pilularum de styrace Starckeï, VVildegansis, laudanum liquidum Sydenhami, vel cydoniatum Helmontii commendamus.

§. II.

Externa

Externe emplastrum anodynum tempori lateris affecti nec non pone aures applicatum, quod ex mastiche, galbano, croco, oleo nucistæ expresso, castoreo, opio compositum est, desideratissimas fert suppetias. Dein etiam vapor ex lacte & speciebus fragrantibus atque emollientibus auri immixtus materiam peccantem non modo emendat, corrigit, atque ad suppurationem disponit, sed & fibras nerveas nimis tensas relaxando dolorem solvit. Convenit quoque vesicam suillam decocto cum lacte ex floribus

malvæ, verbasci, sambuci, meliloti, chamomillæ vulgaris, nymphæ, papaveris rhœados, semine lini & pauxillo croci repletam exterius adfecto lateri admove. Fumus quoque nicotianæ cum fistula inversa auri immixtus, item millepedes in oleo olivarum vel amygdalarum amararum infusi, nec non oleum scorpionum ad dolorem, si ab inflammatione vel ferro acri provenerit, compescendum, maxime valere creditur.

§. III.

Quemadmodum autem ubicunque humor restagnat atque subsistit, is promovendus atque discutiendus est: ita etiam pulveres diaphoretici, leniter nitrosi, cinnabarini, cum aquis diaphnoicis atque analepticis propinati opportunissimam in hoc affectu locabunt operam. Plethora si urget, vena secanda: atque alvus renitens clysteribus emollientibus, vel internis laxantibus ex manna, cassia & rhabarbaro paratis, ad officium redigenda. Dignus certe est qui hac occasione commemoretur locus apud modo laudatum ARETÆUM, ubi curationem hujus mali pulchre admodum proposuit. Utendum, inquit loc. cit. requie corporis atque abstinentia & silentio summo: etenim organo auditorio accepta voce aures necessario commoventur, & propterea majores dolores efficiunt. Locandi præterea agrotantes calido lecto, & si dolor coegerit, phlebotomandi, atque tertia die levi atque satili cibo reficiendi, & ob mitigationem doloris exterius admovenda vaporatio tepidi liquoris vel sacculi ex polline tenero confecti. Tum cataplasmata laxativa & cum dolor initium sumserit, statim erunt admovenda sanguisuga quas hirudines appellant circa fines auriculæ; vel circa ejus posteriora cucurbita admota, scarrificanda adhibita spongiarum calidarum. Ipsam quoque cavernam involuta lana per specillum oleo calido tinctam, paulatim penetramus, atque illic lana derelicta ferramentum detrahimus.

Humor  
stagnans  
discuti-  
tione

Causa



## Cautelæ &amp; observationes.

## §. I.

Quid  
agendū  
si a cau.  
sa ex-  
terna in  
aurem  
illapsa  
otalgia  
oritur.

**Q**uandocunque dolor aurium a causa externa, immissa v. gr. dura mole in aurem provenit, cujus rei exempla apud HILDA- NUM prostant, tunc in ipsa doloris sævitia neutiquam tentanda erit extractio cum forcipe vel alio instrumento: eo, quod non modo frustra hoc tentamen suscipitur, sed & dolor mirum adauctis symptomatibus intolerabilis redditur. Sub doloris enim impetu nerveus auditorius meatus vehementiori spasmō constringitur, ut adeo, quacunque demum etiam leviori vi externa accedente, dolor exacerbetur & meatu sic angustiore evadente, materiæ exitus eo magis prohibeatur. Rebus ita se habentibus, foris supradicti potius locum invenit applicatio, vel aliquot olei amygdalarum amararum in aurem instillatio; quippe quod præter vim demulcentem, sedativa quoque facultate est instructum: qua ratione, dum membranæ tensæ emolliuntur & relaxantur, sola oborta sternutatio- ne, corpusculum illapsum simul & semel sponte excussum fuisse, novimus. Atqui, cum apprime quadrent, quæ monumentis suis reliquit TRAL- LIANUS, non possumus, quin ejus de hac re sententiam ad verbum recenseamus, quæ lib. 3. cap. 3. ita se habent: *Si lapillus, aut faba, aut aliud quicquam in aurem incidat, specillum lana involutum in resinam terebinthinæ aut glutinosum aliquot intingito, ac ubi in aurem injeceris leniter protrahito & sternutamentum excitans, os & nares obturatu. Nam spiritus intentione, quæ ita fit, id quod intus impactum est, expellitur. Hoc autem continuo facito diligentiam adhibito, ut quamprimum eximatur. Sin autem neque sic excide- rit, inflammatione oboriente, convul- siones sæpe comitantur, ut etiam agri*

de vita periclitentur. Quare oleum quoque tepidum frequenter infunde- re oportet: sic enim locis inflamma- tione liberatis id quod insidet, fa- cile eximetur.

## §. II.

Otalgia plerumque a causa interna solvitur & abscessu finitur, dum ma- teria purulenta ichorosa, ex ipsis glan- dularum meatum auditorium externe obsidentium atque cerumen alias lar- gientium poris & tenuibus canalicu- lis, stillat. Ad aquas etiam in infanti- bus præsertim qui spongiosioris corpo- ris sunt habitus, tantus sæpe humoris serosi fit affluxus, ut ingens foetidi & purulenti humoris copia quotidie exeat. Sub tali morbi statu humorum impetus per laxantia leniora, man- nata, rhabarbarina, passulata, ali- quoties repetita divertendus, vel pe- diluviorum, vesicatoriorum, aut cucurbitularum ope in provectioris præsertim ætatis hominibus, ad infe- riora invitandus est. Hac ratione mo- lestus hic aurium fluxus successive mi- nuitur, & salvo auditus organo sana- tio perficitur.

Materia  
purulē-  
ta diu-  
tius ef-  
fluens,  
diver-  
tenda.

## §. III.

Quando major jam puris copia post inflammationem præcedentem ex au- re effluxit; tunc, præter ea, quæ humorum impetum, a capite & au- ribus divertunt, quæ leniter exsic- cant, putredinique resistunt, exterius admovenda sunt. Veteres eo fine pa- stillos, ex aloë, croco, myrrha, sar- cocolla, confecerunt, & aurium ca- vernis indiderunt vel mulsam ex vino factum cum mali punici cortice, nar- do amygdalis amaris, croco, myr- rha alumine, vel herbarum vulnera- riarum succis coctum, cavernæ au- rium, si humor fortius effluxerit, infuderunt. Qua de re evolvendus CÆLIUS AURELIANUS lib. 2. cap. 3.

Leniter  
exsic-  
canda,

## §. IV.

Cavendum vero est, ne diutino au- rium purulento fluxui a quacunque etiam causa proveniat, externis vali-

Tamen  
non ju-  
bito in-  
bibenda

dio-



dioribus exsiccantibus & fortioribus adstringentibus desubito obex ponatur. Exinde enim ingentem parotidum tumorem, cum summo dolore sævisque symptomatibus stipatum, profectum fuisse, nostra pariter & aliorum fide constat.

§. V.

Parotides in febr. quomodo abigende?

Quandocunque febribus acutis supervenit atrox ille aurium dolor cum intumescencia parotidum; non præsentius auxilium, ac in cucurbitularum cum scarrificatione in nucha appositione, & solius cataplasmatismatis emollientis, ex caricis pinguibus, croco, melle, succo ceparum tostiarum & radice liliorum alborum parati tepido, usu me invenisse plena fide testor.

§. VI.

Vermes vel eliciendi, vel enecandi.

Si dolor a vermibus aurem ingressus ortum traxerit, lacte tepido auribus immisso hi eliciendi, vel oleo absinthii, nucleorum Persicorum aut amygdalarum amararum sunt enecandi.

Enarrationes morborum.

C A S U S I.

Otalgia a suffimigiis & emplastro brachii sumori appli. cati in ducta.

**N**obilissima Virgo quinquagesimum quæ jam complevit annum, activi ingenii, sanguineæ constitutionis, decem abhinc annos dolorificis partium externarum fluxionibus a sanguine nimium abundante, & ob ejus tardiorum progressum impuriore reddito subortis continuo fere fuit obnoxia. Me quum hac de re consuleret, ut ter minimum singulis annis nimiam redundantis sanguinis quantitatem e secta vena detrahi curaret, auctor fui: unde melius etiam se habuit. Consueta vero hac sanguinis educatione æquinoctio autumnali intermissa, atque sudore nocturno usitato, ex improvida brachii dextri refrigeratione, cohibito, postero die ingenti dolore unacum tumore in ejusdem brachii cubitu tentata fuit

qui adeo sensim increfcebat, ut brachium neque flectere neque attollere potuerit. Ad hanc molestiam abigendam, amicarum suasu, frequentius ex gummatibus resinosis, succino, tacamahaca, usa est suffimigio: quo remissior quidem dolor redditus, sed tumor mutata sede superiorem humeri partem invasit, qui insignem in magnitudinem increcebat. Huic cum a Chirurgo emplastrum applicaretur, evanuit ex parte quidem, sed in dextrum capitis latus irruens, in aure potissimum horrendum & acutum dolorem, ut vix ferendo illi pareffet ægrota, introduxit. Totum dein caput insigniter tumefactum comparuit, auditus aderat summa difficultas, atque e naribus aliquot sanguinis guttæ cum mucosis multis humoribus secesserunt. Consilium meum, cum per Medicinæ Candidatum qui mihi ad manus erat exquiret, consultum primo omnium duxi, ut aperiretur vena pedis sinistri, quo abundanti nimium sanguini quodammodo exitus detur; deinceps, ut infuso foliorum fennæ & rhabarbaro cum decocto passularum minorum, fordes e primis viis blande educerentur. Quibus præmissis, tenuem vitum & pro potu decoctum, ex radice sarsaparillæ, glyzirrhizæ & floribus papaveris rhœados sumendum imperavi; atque ad successivam transpirationem & uberiores pravi humoris subsistentis promovendam distillationem, ut æquali lecti calore corpus foveret, & mixturam, ex aqua florum sambuci, cornu cervi usto, antimonio diaphoretico & pauxillo nitri frequentius usurparet, laterique dolenti sacculum supra descriptum leniter calefactum applicaret, suasi. Et ita circa undecimum diem, largo sudore sponte erumpente, totum corpus fuit perfusum, evanescente penitus permolesto accidente. Cum vero auditus gravitas cum dolore pressorio remaneret, consilium dedi, ut panis cum semine fœniculi igne cocti, re-



center ex furno extracti & discissi vaporem meatui auditorio reiteratis vicibus admitteret. Quo pacto expurgata demum pilulis balsamicis & cephalicis nostris, sordium mole, pristinae valetudini sensim sensimque Nobilissima Patiens fuit restituta.

*Epicrisis.*

Ex hujus affectus generandi, pariter ac eum curandi modo, Medicorum juniores plura ad praxin utilia momenta capere & depromere possunt. Primo, quod dolores ejusmodi rheumatici, a venæ sectione neglecta & sudore consueto salutaris cohibito, originem suam ducere possint. Dein, quod ad eos abigendo suffimigia non satis sint secunda remedia, dum tonum cutanearum fibrarum nimium augendo, pravorum humorum motum ad interiora convertunt, quum potius ejusmodi vitiosi humores sensibilibus corporis partibus & poris inhærescentes successive & placide commovendi, & ad liberiores exhalationem incitandi sint. Et quod, tertio, in ejusmodi pertinacibus rheumatibus profligandis longe magis circumspicte & efficaciter agat Medicus, si non multis activioribus sudoriferis naturam lacestat, sed tempus expectando, blandis & temperatis ad diapnoen disponentibus remediis utatur: qua ratione contingit, ut natura sponte sæpe critice & salutariter morbum solvat.

C A S U S II.

*Otalgia  
immanis, ex  
ingesta  
vini copia  
& sequen-  
te refri-  
geratio-  
ne.*

Generosus Senex sexagenario major, macilentioris staturæ sed floridæ faciei, olim cum inter VVestphalos medicinam facerem, consultum me adiit, qui a convivio, in quo vinum liberalius potaverat, sub aura nocturna peregre domum reversus, altero mane de gravativo capitis dolore, sinister præsertim latus affligente conquerebatur. Huic mox dolor auris valde acutus successit, qui tam atrociter intra paucos dies invalesce-

bar, ut non modo omnem somnum adimeret, sed & tremorem partium universi corporis cum frigore excitaret, adeoque non frustraneus esset convulsionum metus. Intolerabilibus plane dolorum tormentis miserrime excruciatum Senem inveni, qui non nisi a globo per sclopetum trajecto levamen optabat: tantæ insanix & desperationi proximus erat. Exterius, dolente in parte nihil præternaturale conspiciendum erat. Itaque alvus aliquoties a clysteribus ut aperiretur, curavi; atque interne non nisi pulveres antepilepticos, cum nitro, cinnabari & pauxillo laudani opiatum remixtos propinavi, vaporem quoque decocti florum chamomillæ cum lacte auri frequentius admovendum præcepi: eo quod intra meatum auditorium consistere dolorem, conquerebatur. Tandem elapso die septimo, mitescente doloris sævitia, corpus madore perfusum, pulsus redditus sedatior & mollior, qui ante contractus & durus erat, urina quoque antea valde tenuis & aquosa, crassius nunc sedimentum deposuit, & denique sponte aperto abscessu, ex aure successive duobus purulentæ materiæ cochlearibus effluentibus, omnia & singula gravia symptomata penitus remiserunt atque evanuerunt.

*Epicrisis.*

Mirari omnino subit, Senem nostrum tam valenti & robusta natura adhuc gavissimum fuisse, ut adeo gravem capitis affectum, qui totum nervosum systema afflixit, feliciter superare potuerit. Atqui in hoc genere hæc ipsa curatio, quæ plus naturæ quam arti debetur, insigne autocratæ naturæ exemplum præbet. Venæ sectionem cui non adsuetus erat, nolui admittere, nec fortioribus, sed lenissimis tantum remediis atrocissimum morbum in sene pertractare æquum duxi. Et hac viri magna auctoritate in principatu Mindenensi pollentis e tam gravi morbo evasio, mihi tum temporis juveni Medico, magnam  
supra



*Epicrisis.*

C A S U S III.

Hoffm. Syst. T. IV. P. II.

C A P U T X I.

Theses Pathologicae.

§. I.

Diff-  
rentia  
poda-  
græ in-  
cipien-  
tis a  
radica-  
ta.

§. II.

Quum nemo ideam, historiam, *Historia*  
ac progressum podagræ melius & *podagræ*  
rectius SYDENHAMO, qui ipse *ex Sy-*  
fuit podagricus, delineaverit; pla- *denhamo*  
cet hoc loco ex ipso Auctore bre-  
viter & concinne eam exponere :  
Podagra exeunte Januario, aut in-  
cipiente Februario derepente & nul-  
la fere præensione antecedente in-  
gruit, nisi quod ventriculi crudi-



tate, aut a peptia ad septimanas aliquot æger laboraverit: corporis interim intumescencia quasi ventosa ex gravitate, quæ in dies augetur, donec tandem detonet paroxysmus, quem paucis diebus præit. tunc & quasi flatuum descensus per femorum carnes cum affectione *ἀναστροφὴ*, tum etiam pridie paroxysmi, appetitus voracior, non tamen naturalis. Sanus lecto somnoque committitur; hora vero secunda post mediam noctem excitatur a dolore, pollicem pedis ut plurimum occupante, quandoque vero calcaneum, suram aut talum: hic dolor eum refert, qui ossium dislocationem comitatur, cum sensu quasi aquæ tantum non frigida partis affectæ membranæ affusæ. Mox sequitur rigor cum horrore, & febricitatione aliquali. Dolor autem hic primo remissior gradatim intenditur (pari passu rigor & horror recedunt) idque in singulis horis, donec tandem sub noctem ad apicem pervenerit, se ad varietatem ossiculorum tarfi & metatarfi, quorum ligamenta obsidet, perbelle accommodans; nunc tensionem violentam, vel ligamentorum istorum dilacerationem, nunc morsum canis rodentis, quandoque pressuram & coarctationem exprimens. Adhæc, ita vivum exquisitumque habet sensum pars affecta, ut nec linteorum super incumbentium pondus, nec cubiculi a fortiori ambulatione concussionem ferre valeat: hinc mille conamina, situs tum ipsius corporis, tum membri affecti mutatione assidua, doloris sedationem incassum exambit; quæ tamen non contingit ante horam secundam tertiamve ac matutinam (decurso scilicet nycthemeri spatio a primo appulsu paroxysmi;) quo tempore æger post materiæ peccantis modicam digestionem & difflationem aliqualem, subito a dolore respirat. Jam leni madore perfusus somno concedit, a quo evigilans, dolore multum imminuto, partem affectam tu-

more recenter occupatam cernit. Intra paucos dies alter pes eodem dolore torquetur, easdemque excitat tragædias; nonnunquam etiam ambos pedes in initio occupat: postquam utrumque pedem exercuerit, qui sequuntur paroxysmi abnormes sunt, tum etiam quoad durationem, hoc tamen ubique servant, quod dolor noctu recrudescat, mane vero remittatur; atque ex serie horum paroxysmorum constat paroxysmus, qui dicitur podagræ, diuturnior breviorve pro ægri ætate, &c. quod in vegetioribus, & iis, quos podagra rarius invisit, diebus sæpe quatuordecim fit; in senioribus, atque iis, quos sæpius afflixit, duobus mensibus; iis vero, qui aliquot annis podagrici fuerunt, non prius valedicit quam ætas adultior eam fugaverit.

## §. III.

Ad quatuordecim primos dies urina coloratior est, quæ post separationem sedimentum rubrum, & quasi arenulis refertum deponit; nec æger ut plurimum nisi tertiam potulentorum quæ assumpsit partem per vesicam reddit; alvus item ad dictos fere primos dies constipata est. Appetitus prostratio, rigor totius corporis sub vesperam, partium etiam non affectarum gravitas & molesta sensatio integrum paroxysmum comitantur. Recedentem paroxysmum excipit pedis affecti pruritus vix ferendus, maxime inter digitos, unde decidunt furfures, & pedes ipsi quasi ab epoto veneno desquamantur.

## §. IV.

Atque hoc modo se habet podagra regularis, cum vero vel indebita medicatione turbetur, vel diuturnior invaserit jam per annos aliquot, phenomena sunt multum diversa a jam descriptis. Jam manus, carpos, cubitos, genua, aliasque regiones occupat, quandoque digitos distorquens, motu paulatim privans, tandemque concretiones, circa articulorum ligamenta, tophaceas generans, cretam

Ultior  
progres-  
sus &  
termina-  
tio.

Symptoma  
mata  
morbi  
post an-  
nos ali-  
quot in-  
festan-  
tis.

vel



vel oculos cancrorum æmulantes ; nonnunquam in cubitis tumorem subalbum ciet , fere ad ovi magnitudinem , qui sensim inflammatur ; nonnunquam femur occupans , sensum exhibet , quasi ingentis ponderis appensi , sine dolore tamen notabili ; ad genu exinde petens , id acrius urget , artus jam habet æger fere undequaque contractos & impeditos , ita ut claudicet , & permolestè prorepat .

§. V.

Descriptio arthritidis ex Aureliano.

Ex veteribus omnium optime historiam arthritidis descripsit CÆL. AURELIANUS *lib. 5. cap. 2. morborum chronicorum* hunc in modum : Sequitur autem passione articulari tentatos torpor, atque formicatio eorum articularum qui tanguntur , & difficilis flexio , atque rursus extensio : item gravedo & vacandi dulcedo , & ad parvum motum vehemens labor , atque dormientibus sensus quidam resonantium articularum , & cum de somno surrexerint , veluti saltu earundem partium afficiuntur : tum horror , vel rigor , atque tremor sine ulla manifesta ratione partium sequuntur : Dehinc cum passio se extollere cœperit , in podagricis dolor alterius pedis , aut utriusque cum punctationibus nascitur , incipiens a vestigio aut plantæ cavitare , vel sæpius a majore digito , attestante torpore , & gravedine , & difficili motu , cum horrore rigido atque inæquali per membra , & aliquando plurimo fervore , aliquando frigore , ut alii refrigerantia , alii calida desiderent ægrotantes , & propterea quidam alteram calidam , alteram frigidam podagram putaverint nuncupandam . Item initio , ut sæpe contingit , similis color patientium atque sanarum videtur partium , attestante æqualitate , nullo emergente tumore . Dehinc inflatio partium fit cum rubore . Quapropter relevatio altiorum sæpe sequitur . Tum pejorante passione arthritica sufficitur passio , cum in unum omnium cogitur articularum consen-

sus , & facile ex articulo in articulum venit dolor , nec desinens priusquam cunctos invaserit nodos . Sepe denique prioris articuli dolore declinante secundus invaditur , atque eodem similiter mitescendo tertius sumit exordium , consentiente etiam vesicâ , atque spinæ majoribus nervis , quos . . . . . appellant : & in stomacho etiam nausea vel vomitu jactantur ægrotantes . Tunc articuli tumentes inflantur , ac deinde durescunt , & solidati faxeam faciunt qualitatem : tum etiam nigriores efficiuntur , atque contorti , ut in obliquas partes digiti vertantur , aut reflexi supinentur , aut vicinis adfixi iucumbant , & aliquando humore purulento vel mucilento collecto , aut viscoso generent poros , quos non transitus dicere poterimus : dehinc etiam lapides sufficiant , qui quidem articulos solvant , & cutem distendant , atque erumpentes promineant , & Chirurgia detrahantur : aut exilientes cyathis , cum ferramento tollantur , quod nos laureolum dicere poterimus , & rursus renascantur . Tum membra dolentium partium , cessante nutrimento , tenuata languescunt , & arida efficiuntur . Erunt præterea ægrotantes parvis ex causis mobiles atque iracundi , siquidem motum vel actum non sine querela accipiant .

§. VI.

Podagræ igitur rationem formalem , si rectius investigare velimus , consistit ea ipsa in vehementi spasmō , quo membranæ ac ligamenta nerveotendinosa , quibus ossa in sedibus suis collocata retinentur & firman- tur , violenter lancinantur , divelluntur , distrahuntur sæpe ad rupturæ usque vel pali infixi sensationem , a sero vitioso acri salso , per minimas arteriolas , & exiles glandulas ligamentorum copiosius advecto suscitatus , cum febrili motione & partis adfectæ inflammatione conjunctus .

Ratio formalis podagræ.



## §. VII.

*Sympt.  
mata  
spasmo  
debea-  
tur.*

In hoc adfectu atrocem spasticum dolorem fibrillarumque & membranarum nervearum stricturam excipiunt atque indicant varia phœnomena & quæ hoc dolore correptis contingunt symptomata: videlicet invadente dolore pori cutis in pede angustantur, influxus sanguinis & refluxus debitus impeditur, sudor ac transpiratio nunc cohibetur, nunc augeatur, membrum rigore ac rubore concutitur, venæ disparent, & valde sensibilis in parte affecta distensio & distractio percipitur, concomitante æstu, rubore & subsequente tumore. Spasmus autem hic non tantum in afflicta parte incipit & subsistit, sed ulterius serpit, inque consensum trahit alias eximioque sensu præditas internas partes, quæ simili spasmo affectæ varia producunt symptomata. Unde non ignota potest esse ratio, quare frequens oscitatio, flatuum descensus per femoris carnes, horripilatio per dorsum ac lumbos; febriculosus pulsus, præcordiorum anxietas, animi defectio, sonni inquietudo, torpor atque vermiculatio articularum, ciborum innappetentia, nausea, in furis quasi convulsio, vomitus ubi imminet paroxysmus vel jam præsens est, ægros infestet? quæ omnia ex spasmodica constrictione & inde resultante sanguinis motione non possunt non originem suam repetere.

## §. VIII.

*Id de-  
monstra-  
tur.*

Hujus argumenti veritas, nimirum quod arthritici & podagrici doloris essentia in spastica fibrillarum nervearum contractione versetur, ulterius exinde clarius demonstrari potest, quod, quodocunque materia serosa acris arrodentis indolis e partibus dolentibus perversa medicatione aut alia fontica causa ad nobiliores internas parter nervosas repellitur, atroces in iisdem dolores & spasmi excitentur. Ita in praxi frequentibus & fere quotidianis constat

observationibus, a materia podagrica retrocedente, si ea fertur in cranii membranas, gravem cephalalgiam in membranas dentium atrocem odontalgiam, in tunica ventriculi ejus spasmus, singultum, vomitus seu cardialgiam, in pulmonum tunicas nerveas, tussim convulsivam & asthma spasmodicum, in membranas costarum pleuritidem spuriam, in tunicas intestinorum, gravissima tormina & colicum dolorem, denique in viis urinariis & vesica ischuriam & spasmus excitari.

## §. IX.

Exposita sic indole podagræ, quæ in spasmo dolorifico, omnium ferme symptomatum parente consistit, excutiendum ulterius remanet, quænam hujus effectus causa, atque in quibusnam partibus genêsis mali existat? Medicorum recentiores ferme omnes in hac sententia videntur convenire, podagram morbum esse metastaticum salinum, a collectione salis fluidi acris stimulantis intra membranas ac ligamenta articularum productum. Cujus generis autem ac ingenii illud sal sit, dissentire videntur. Alii acidum, alii sal tenue corrosivum biliosum, alii austerum & stypticum principium incusant. Nos purum & sibi relictum acidum in animalium corporibus vix reperiri existimantes, tartareum illud esse asserimus, ita tamen, at acidum quoad figuram suam scindentem spiculatam, haud secus ac in tartaro prædominetur. Interim tamen non negamus, pro diversitate morbi atque ægrotantium natura ac temperamento, & pro causarum antecedentium diversa indole, majori volatili acridine biliosa, vel fixiori, serum, quod salium morbosarum est vehiculum, esse imbutum; unde etiam arthritidis variat, & volatilis & fixus exsurgit dolor, magis vel minus ardore atque inflammatione infensus.

*non est  
saluci-  
dum l.  
bille-  
sum,*

*sed tart.  
tarcum*

## §. X.



§. X.

Qua  
senten-  
tia sta-  
bilitur.

Multa autem sunt, quæ peccantem materiam tartaream subinde peccare evincunt. Etenim experientia compertum est, ad calculum dispositos ut plurimum evadere podagricos, & hoc e contrario calculo tentari, ita ut affectus ii invicem sororientur, & unus in alterum facile abeat. Serum autem in dictis morbis tartarea falsedine imbutum esse, nemo qui gnarus rerum medicarum est, ibis inficias. Accedit, quod in consummata podagra vel ischiatide ligamenta juncturarum erosa a sabulo tartareo ibi subsistente reperta in sectionibus fuerint. Quinimo tophacea materia, quæ intra articulos in senum qui acido abundant podagra, copiose quandoque reperitur atque eximitur, manifestissime naturam tartarei salis, quod ex acido & copiosa terra conflatum est, demonstrat. Ita KERCKRINGIUS sub-examine chymico ex ejusmodi tophis sive materia podagrica, elicit spiritum quendam inter spiritum tartari & salis ammoniaci quodammodo medium, hoc nimirum acidio rem; illo vero mitiorem; & oleum, oleo tartari foetido colore, foetore & consistentia in omnibus simile: nec non sal ex capite mortuo quod extraxit, ab eodem sale tartari parum abludens, nisi quod sapore quodam extraneo infestus, ingratam quandam pariebat nauseam, vid. *Spicil. anot. obs.* 28.

§. XI.

Et ulte-  
rius pro-  
bat.

Sic observatum quoque fuit ab Autoribus, podagricorum excrementa, nimirum sputum, urinam, sudorem collecta, prævia evaporatione, præbuisse materiæ candescentis concretæ in tartari consistentiam insignem copiam. Vid. PECHLINUM *obs.* 25. & KERCKRINGIUM *l. c.* Notavi ego in Viro generoso, qui subinde podagra divexari solet, sequentia: hic paroxysmum imminens præsentire solet maxime ex colore annuli, quem digito gerit, ex mercurio me-

Hoffm. System. T. IV. P. II

diante venire ac tutia confecti, qui aliquot dies ante paroxysmum & per totum morbi cursum livorem ac nigredinem contrahit, qui sponte tandem desinit, pristino redeunte colore sub declinationis tempus. Id quod curiosum phænomenon mea sententia effluviis salino-sulphureis per transpirationem prodeuntibus adscribendum venit. Taceo materiam in articulis podagricorum collectam, & quandoque vesicatoriorum vel aliorum remediorum usu effluentem, summe corrosivam, ipso sensu teste, naturam præ se ferre. Confirmare inter alia præsentiam tartarei fluidi salis in podagricis videtur nimia potatio vinorum tartareo talis modi succo scatentium, quæ podagram generare solent frequentissime; item nimia ciborum appetentia & voracitas, maxime ante tempus invasionis, quæ sine dubio lymphæ acidæ abundant in salivali & gastrico fluido debetur.

§. XII.

Congreditur autem tartareum hoc sal cum mucilaginoso ac pingui, quo articuli & juncturæ omnes gaudent, rore ac glutine, quod secundum naturam insipidum, ossa, juncturas, ac cartilagines lævigare & obducere solet. Notabile enim est, sub membranoso ligamento, quo articuli firmari solent extare tunicam mere glandulosam ac vesiculosam, quæ etiam synovix sedes est, in quam terminantur maxime in homine multæ vasorum sanguiferorum ramificationes, hæcque tunica, propter laxitatem suam minime inservit ossium conjunctioni, sed mucilaginem certam instar ovi albuminis, licet non semper adeo claram & limpidam fecernit. Præterea in majoribus articulis exstant quoque corpora glandulosa pinguedine obsita, quæ similem mucilaginem a copiosis sanguineis vasculis ibi fecernunt ad lubricandas juncturas ipsasque ab incallescencia & attritione conservandas, uti

Sal tar-  
tareum  
cum mu-  
cilagi-  
ne gla-  
dulosa  
tum co-  
gredi-  
tur.



copiose pariter ac solide id deduxit celebris Anglus CLOPTON HAVERS, in *Osteologia*. De hoc ipso glutine articulorum jam dudum divus HIPPOCRATES in *lib. de locis in homine*, sequentia pronuntiavit: *Humidum nativum articulorum ubi male valet, male habent articuli; ubi bene, & ipsi articuli.*

## §. XIII.

Exinde  
coagu-  
lum quo  
crucia-  
tum  
causa  
media-  
a est.

Quotiescunque itaque serum salis excrementitium in sanguine superabundans descendit per glandularum poros nimis laxatos ad ipsos articulos, non modo coagulum mucilaginis efficit, quod difficiliter postea resolvitur, vel etiam, si in copia, adfuerit, in gypseum corpus tandem convertitur, verum & intra subtilissimi sensus membranas incarceratum propter angustissimas vias, minus commode propellitur nec evaporat, sed detestabiles cruciatus in parte affecta suscitatur: cujus sapius tanta est sensibilitas ut omnia quantumvis leniter admota tegumenta vel medicamenta officiosamque manum vel e longinquo reformidet. Attentione dignum est, nihil magis mucilaginem articulorum destruere atque coagulare, quam acidum tartareum sal lenius v. gr. acetum vini, vel vinum rubellum album, neque tantam mutationem atque coagulationem ipsi inducere aliud potens, uti oleum vitrioli &c. sicuti id variis experimentis clarissime demonstravit *Clopton Havers l. c. p. 257.* evidenti scilicet documento, vina tartarea aptissima esse ad procurandos paroxysmos arthriticos, ubi tonus glandularum debilitatus est & patiens aliquam ad hunc affectum dispositionem habet.

## §. XIV.

In po-  
dagra  
calida  
serum  
sulphu-  
reum  
aere &c.

Quemadmodum vero in senibus neque minus in hypochondriacis & calculosa nephritide laborantibus podagricis serosa sanguinis pars tartareo fixiori acido referta est: ita in corpore bilioso calidæ temperaturæ virili, ubi arthritidis, & podagra magis cali-

da vaga, dum ex una parte in alteram transit, serum biliosis acribus sulphureis immo alcalinis onustum est. Sic *Acta Erud. Ann. 1698.* referunt Medicum Anglum Colbatch serum podagricum miscuisse cum syrupo violarum, & semper colorem cæruleum in viridem mutatum observasse.

## §. XV.

Deinceps quoque illud animadverti-  
sione dignum est, quod nullus paro-  
xysmus podagricus sine motu febrili  
sit, quem præcedens lassitudo corpo-  
ris inquieta, horripilatio, refrigera-  
tio extremorum, oscitatio, alvi ob-  
stipatio, pulsus citatior, sitis, vigi-  
lia & subsequens æstus, ejusque circa  
noctem exacerbatio, urinæ in princi-  
pio tenues & aquosæ, spasmus vero re-  
mittente crassæ cum sedimento, ne-  
que minus solutio doloris & spasmo-  
rum per sudorem copiosorem satis  
evidenter arguunt: cujus motus fe-  
brilis beneficio fit, ut excrementitiæ  
serosæ salinæ peregrino caractere  
imbutæ sordes, ex parte per varii ge-  
neris in corpore nostro organico con-  
stituta colatoria, & emunctoria foras  
salutariter eliminantur atque excer-  
nantur. Hic motus quoque auctior  
febrilis solidorum & fluidorum, qui  
non actu electivo, multo minus mo-  
rali & rationali fit, genuina causa est  
sævorum dolorum ac spasmodorum in  
partibus extremis, qui paroxysmis in  
podagra nunquam non associantur,  
dum videlicet ad nervosas & valde  
sensilis texturæ articulorum membra-  
nas & ligamenta, quibus complures  
exiguæ glandulæ inhaerent, & quæ  
minus congrua sunt salium excremen-  
tiorum emunctoria, cum impetu  
impurus serosus sanguis advehitur, &  
congeritur; ubi postea ichorosus ille  
latex præter naturæ ordinem separa-  
tus, stagnans & subsistens ejusmodi  
atroces naturæ humanæ plane infen-  
sos spasmos, & dolores concitat; qui  
quo vehementiores sunt, eo plus fe-  
brilem æstum incendunt, atque sym-  
pto-

Paro-  
xysmus  
pod-  
agricus  
febre  
stipatur



ptomata exacerbant. Siquidem id probe tenendum est, duplicem in paroxysmis ejusmodi arthriticis & podagricis observari febrem, essentialem & symptomaticam, illa ad naturam catarrhalis, vel in sanguineis ad synochæ simplicis genium accedit, cum qua paroxysmus incipit & progreditur, noctuque habet suas exacerbationes; altera vero symptomatica doloris acerbioris soboles est, & inflammationem insequitur.

§. XVI.

*Ratio cur materia vitiosa per partes solum occupet*  
 Quod autem humor vitiosus non intra omnes articulos & quidem mediante tunica ligamentorum glandulosa, sed duntaxat certis in partibus separetur, ut videmus in chiragra, gonagra, podagra & affectione ischiadica; id potissimum tono & robori destructo horum ligamentorum, quæ articulos firmant, adscribendum est. Quod vero ad pedes frequentius feratur ac descendat, hæc subesse ratio videtur, quod pedes frigori humido, quod valde eorum naturalem tonum lædit, plus quam aliæ partes expositi sint; deinceps quod a calceorum pressione ac strictura copiosi tubuli arteriosi & venosi minimi, per quos libere humor redire & circulari debet, valde comprimantur: accedit quod lentior & tardior per partes a fonte caloris corde nempe remotas, ob situm etiam perpendicularem, lymphæ ac humorum sit circulatio. Superest adhuc una ratio & quidem præcipua, scilicet quando pedes dolor affligit, cogimur quiescere, ne deterius fiat malum; quies autem ulterius nocet, dum humores ob motum cessantem, ibi magis tenentur subsistere, & ita imbecillitas augetur; sic edocemur familiari exemplo, quando pedem diu in uno situ tenemus, vermiculationis sensum oboriri. Vocanda huc quoque est in auxilium, nativa pedum imbecillitas a parentibus podagricis contracta, quæ partim in spirituscentia humorum deficiente, & inde resultante partium solidarum maxi-

me extremarum debilitate, vel in ipsa prava textura & conformatione, & pororum dispositione consistit. Idem obtinet in aliis artubus, quos occupare solet dictus dolor arthriticus.

§. XVII.

Unde vero tanta seri excrementitii ex parte falsi & tartarei, ex parte etiam acris biliosi colluvies, in arthritidis & podagræ subjectis corporibus ingeneretur, quæ proinde & motuum febrilium podagricorum & acerbissimorum dolorum veram & materiales causas constituit, vix aliam quam naturæ agrotantium debilitatem & vitium in usu rerum non naturalium commissum reperire & incusare licet. Per naturæ debilitatem vero nihil aliud intelligimus, quam talem, a nativitate, solidorum, quæ fluida continent, movent, immo motibus vitalibus secretoriis, excretoriis præsumt, non satis validam & robustam conformationem & stricturam a parentibus potissimum acceptam: hinc natura debiles & morbosæ parentes, ut sunt hypochondriaci, hæmorrhoidarii, podagrici, calculosi, aliisque anomalis motibus obnoxii, etiam liberos in hos morbos proclives generant. Nam quando ipsos podagricos, qui diutius hoc morbo affecti sunt, spectamus ac consideramus, plerique sunt habitus minus fibrosi, spongiosi, tenerioris, qui nervos & tendines habent exiguos, copiosis & valde exilibus vasis donati, qui sanguine multo seroso, qui e vena emissus in oculos incurrit, abundant, & hinc etiam in primis annis narium hæmorrhagiis & in proVectiore ætate hæmorrhoidum fluxui sunt obnoxii & assueti, animi quoque sunt inconstantioris mobilioris, ad omnis generis passiones vitalibus motibus nocivas proclives; quæ cuncta satis totius naturæ microcosmicæ imbecillitatem arguunt atque demonstrent. Accedunt postea satis insignes diætæ atque in regimine vitæ aberrationes & vitia, quæ ita sunt



comparata, ut non modo partium solidarum tonum, robur ac vim systolicam motricem plus debilitent ac labefactent, sed etiam multos crudos, intemperatos, naturæ & succis vitalibus, qui blandi esse debent, plane alienos humores invehant, & ob imminutum salutarium excretionum negotium plus justo in corpore retineant & accumulunt.

## §. XVIII.

Ad quæ conserunt Venus immoderata. Ex iis vero, quæ nervosis & motricibus partibus vires & robur subducunt, primum merito locum Venus immoderata obtinet. Nam semen, uti delibatissimæ & spirituosæ lymphæ in sanguine soboles est, ita si intemperantius exhauritur, non potest aliter fieri, quin & partes fluidæ subtilitatem & blandam spiritualescentiam, solidæ vero vigorem & elatorem amittant, atque adeo omnes functiones corporis non exiguum inde capiant detrimentum. Et hinc potest etiam secundum scripta Hippocratis, ratio repeti, quare pueri, quare mulieres & eunuchi non facile podagram patiantur? Hinc quoque Poetis Bacchi & Veneris filia nuncupata est, unde antiqui versus:

*E solvilumba Venere, solvilumboque*

*Baccho, creata est solvilumba chiragra.*

Et Latini Poetæ carmen:

*Ut Venus enervat vires sic copia vini,*

*Et tentat gressus debilitatque pedes.*

Notabile autem hoc est, quod arthritidis ex abusu Veneris sæpius unice suam originem petat, & quod omnes arthritici & podagrigeni, propter sal illud tenerum stimulant in lymphæ & sanguine contentum, ad Venerem præ aliis magis sint proclives, adeoque magis magisque enervando vires, malum contumacius reddant.

## §. XIX.

Vini potus largior. Præterea spiritus, corporis nostri motores, non parum invertit & nervis

debilitatem addit vini & maxime generosi vel etiam tartarei acidi largior potus, utpote partes vini sulphureæ nimis celeriter per venas rapiuntur ad caput, subeuntque poros nervorum & spiritibus sese associant, quorum crassum ob cruditatem & heterogeneam indolem suam valde invertunt, ut munere suo in regendis machinæ artibus defungi minus recte queant. Experientia multiplici deprehensum est, nihil plus ad tartaream illam, aut quomodocunque appellare libet, materiam podagricam & arthriticam generandam aptum esse, quam vinum; quæ etsi in corporibus quibusdam sequestretur, tamen in illis quæ viscerum debilitate laborant, servatur atque in sanguine accumulatur.

## §. XX.

Datur tamen vinorum magna diversitas. Quæ enim in arenosis terris proveniunt, minus materiæ ejusmodi tartareæ continent. Dixit WEPFERUS Dec. 1. An. 2. c. 39. raros apud Scaffhusanos esse podagricos & calculosos, neque convulsivos motus frequentes, & potissimum id fieri a vino rubello salubri. Sic etiam memini Jenæ, quamvis ab incolis ejus loci satis liberaliter bibantur vina vernacula, non tamen multos esse podagricos. Contra observatum fuit, quæ in terra pingui argillosa & limosa proveniant; ad fovendam podagram esse præparatissima; cujus generis sunt Bohemica, Hungarica, Austriaca &c. Neque obstat, vina magnam quantitatem tartari terrestris, qui sæpius vias urinarias magis detergit, possidere, utut in podagra progignenda minoris efficaciam sint aliis, quæ talem quantitatem non complectuntur, sed forsitan subtiliori ac penetrantiori acido, quod cum succis vitalibus facillimam in it copulam, instructa sunt. Sic vini Teckaviensis libr. 4. destillatæ vix drach. dimidiam; totidem autem libræ Rhenani drach. minimum 5. largiuntur. Multo magis autem talia vina nocent, si ad ebrietatem usque ingurgitantur, quo spirituum

Quod tamen limi tandum



vigor naturalis magis extinguatur & lymphæ tenuis inspissatur, ut deinde viscerum tono debilitato minus commode illa, quæ in vinis nociva atque perniciofa sunt, excludi queant.

§. XXI.

*Affectus animi* Sicut affectuum intemperantia in excitandis & fovendis morbis plurimum valet: ita id maxime in chronicis affectibus, inter quos podagra primas tenet, animadvertimus, & quidem hanc potissimum ob rationem, quod diuturnior tristitia animique angor, intensior cura ac sollicitudo, profundior quoque & haud interrupta meditatio, necessarias corporis vires suffurando & vitales humorum motus, neque minus secretorios, & excretorios imminuendo, exsuperans pabulum atque materiam, impuritates videlicet varii generis salino-sulphureas, ad genesin hujus affectus subministrant. Ita vehementior quoque animi commotio, & ira ipsos arthriticos paroxysmos de subito sæpe cum febrili quodam motu excitat.

§. XXII.

*Luxuria & desidia* Ulterius, luxuria, nimia voracitas, continuæ commensationes, cum vita sedentaria otiosa & desidia conjunguntur, neque minus exercitiorum intermissio, & ex mobiliore vitæ genere quietum & motus expers, & podagra, & aliis pertinacioribus morbis ingenerandis mirifice velificantur. Nihil enim magis, præterquam nimia ingestorum copia cum desidia, magnum illud excretionum, sine quibus sanitas consistere nequit, negotium supprimendo, ad impurorum humorum redundantiam, a quibus deinceps dolores, febri-lesque motiones proveniunt, corpori ingenerandam conferre, attenta consideratione discimus.

§. XXIII.

*Transpiratione* Et quoniam sufficienti, per jugem transpirationem facta, sordium valde activæ indolis aquoso-salinarum halitusorum expulsionem, corpus ab innumeris morbofis afflictionibus nec non a paroxysmis & recidivis immune red-

ditur: ita etiam in rebelli isto podagrico affectu, qui in corporibus gracilioribus minus densi & obesi habitus, perspirabilibus, paulo rarius sedem fixiorem tenet, neque in hominibus opificibus, & qui labore, & motu corpus continuo exercent facile gignitur, id ipsum observamus: quare etiam æstivo tempore arthritici & podagrici paroxysmi silere & conquiescere solent; cum, e contra, qui densi & pinguioris habitus sunt, literati & laboribus corporis & manuum vacantes, crebrius & diutius hoc affectu exerceantur, qui præsertim autumnali humido & frigido aere, subita tempestarum mutatione ingruere & tragediam ludere solet: quinimo sudoris consueti intermissionem, notabilisq; transpirationis, quæ ex induratis inspectis cognoscitur, atque excrementorum inter pedis digitos defectionem, imminentem designare paroxysmum sæpe a nobis observatum est.

§. XXIV.

Inter antecedentes doloris podagrici causas, non exiguum locum fluxuum sanguinis consuetorum, hæmorrhoidum & mensium intermissio vel interceptio tueri videtur: siquidem & firma experientia, & unanimi veterum consensu, & auctoritate confirmatum habemus, feminas, quamdiu menses rite fluunt, & viros in quibus consuetus hæmorrhoidum fluxus rite, ratione modi, quantitatis & temporis se habet, a molestissimis hisce affectionibus immunes degere, imo hos fluxus doloribus istis supervenientes, corpora ab iis præservare: ex adverso vero, si solennes hæmorrhagicæ vacationes, vel ex vacillante naturæ robore, aut ex perversa diætâ, vel importuna & imprudenti medicatione restitant, deficiunt, vel supprimuntur; atroces dolorificas has passiones generari imo recrudescere & ingravescere observatione identidem firma & stabili constat: ut itaq; ex hisce observatis clarissime elucescat, quantum ad depurandum sanguinem & ad morbos ex seri-

*Hæmorrhoidum consuetarum defectio*



vitiosi colluvie succrescentes impediendos, hæc solennes licet præternaturam contingentes sanguinis excretionis valeant. Ex quibus tamen ne utiquam id consequitur, ut nonnullorum nostri *evi* Medicorum & theoreticum & practicum dogma fert, tantum a fluxu hæmorrhoidali, ejus defectu & frustraneis ad eum excitandum naturæ moliminibus, originem hujus truculenti affectus arcessendam esse, & totum curationis opus ad illum provocandum collineare debere; cum hujus hypotheseos patroni, plethoram pro causa proxima materiali potissimum habeant, ut inter remotas locum concedamus. Nos vero vitiosam seri dyscrasiam atque impuritatem potius ad excitandum hunc affectum maximum momentum afferre arbitramur, cum nota nobis sint exempla, sub ipso paroxysmo podagrico, calculoso & arthritico, hæmorrhoides fluxisse: id, quod inter alios, celeberrimi nominis Medicus B. DOLÆUS, crebro per litteras apud nos conquestus est.

## §. XXV.

Prognosis.

Ratione morbi eventus, quoad prognostica hæc observationes rarius fallunt: Podagra non facile e medio tollit, nisi humor vitiosus, ob magnam virium expultricium imbecillitatem, ad summam corporis corticem propelli nequeat, sed intus retineatur; vel ab errore medentis aut ægrotantis ad interiora repellatur, quod HIPPOCRATES *lib. de affect.* affirmat: & tunc gravibus supervenientibus morbis, ut sunt lethargus, hemiplexia, apoplexia, asthma convulsivum, & suffocativus catarrhus, peripneumonia, hydrops, inflammatio ventriculi & intestinorum, extinguuntur.

## §. XXVI.

Juniores podag. rarius diu vivunt.

Quemadmodum, quibus congenita & hæreditaria est arthritis & podagra, & qui ex pravo vitæ genere primis in eam annis incidunt, rarius diu vivunt: ita iis, qui demum provectiori ætate atque in senectute, dolore corripun-

tur podagrico, longævitatē promittit; dum arthriticis & podagricis paroxysmis re vera criticis, humores excrementitii, improprie senectuti familiares corporique infensi, hac ratione expurgantur.

## §. XXVII.

Podagra incipiens præsertim si rheumatismi sanguinei species est, moderata & convenienti diætâ congruisque remediis, sanguinis præsertim missionebus opportune institutis, facile præcaveri & tolli potest: ubi vero jam multoties & singulis ferre annis paroxysmus recurrit, & quos affligit, in articulis tophos habent, sicca alvo vexantur, & senes sunt, ii, testante HIPPOCRATE *l. 2. prorrh.* nulla humana arte sanari possunt: hanc potissimum ob rationem, quia vitium non tam in fluidis sed in solidis eorum tono, robore textura & conformatione naturali destructa, quod facile tollitur, consistit. Hinc vetus dictum enatum: Solvere nodosam nescit medicina podagram. Optime vero HIPPOCRATES *l. c.* ratiocinatur: *juvenes nondum callos habentes curari possunt, si accurate vivant laboribusque sint amantes, alvumque bonam & apertam habeant.*

## Cura præservatoria.

## §. I.

Quamvis valde difficilis eorum morborum, qui congeniti sunt, quorum causa in hac labe tam fluidarum quam solidarum consistit, & quæ a prava vitæ & diætæ ratione fovetur, ac in habitum quasi degenerant, sit curatio; attamen facilius longe & expeditior est eos præservandi, præcavendi, & avertendi via ac methodus. Quam cum Medicus omnino & recte cognoscere & prudenter applicare debeat; nobis eam hic exponere est propositum: utpote quæ potissimum in causis hujus morbi, remotioribus dictis, declinandis & removendis consistit.

Pri-



§. II.

Fugien-  
da autē  
Veneris  
immode-  
rata

Primo omnium, qui vult degere im-  
munis a pertinaci tam podagrico quā  
articulari affectu, temperet sibi, quan-  
tum possibile est, ab usu Veneris maxi-  
me immoderatæ, quam corporis lan-  
guor & dolor sublequitur; subito nam-  
que exhaurit subtiliores spiritus, caput  
debilitat, mentem ac sensus infirmit  
atque convellit. Dein ebrietatem, co-  
piosam vini potationem, & liquorum  
inebriantium ingurgitationem omni  
cura & studio fugiat: quippe hoc pacto  
multos ab arthritide liberatos novi-  
mus. TRINCAVELLUS *de ratione  
cur. particul. hum. corp. affect. l. 12. c. 11.*  
tradit se novisse Medicum Venetiis,  
qui, cum non parum infestaretur a po-  
dagra & ad senium usque, & solum pri-  
mum atque in quinquennium vinum  
interdixisset, liber tandem ab omnibus  
molestiis ita evaserit, ut amplius usque  
ad ultimum senium imo ad mortem  
horum dolorum fieret expers. Id quod  
CELSUS *l. 4. c. 24.* egregie confirmat,  
perhibens: *quidam cum toto anno a vi-  
no, mulso, Venere se temperassent, secu-  
ritatem totius vitæ consecuti sunt.* Et  
SOLENER *S. V. cons. 1.* refert,  
viduam quandam Hispanicam, cum  
usum vini, quod tamen pro more gentis  
paucissimo & dilutissimo usa fuerat,  
omississet, podagra amplius non fuisse  
tentatam. Quinimo plures talismodi  
historiæ notissimæ sunt eorum, qui, vel  
in carcerem coniecti vel ad paupertate-  
m redacti, cum a vino abstinuerint,  
ab arthritide & podagra liberati sunt.  
Hinc præstat ad præscindendum gra-  
vissimum morbum, aquam puram &  
levem quam vinum bibere. Ex hydro-  
potis enim nemo facile est, qui hunc  
in morbum prolabitur: quorum e-  
xempla apud BRUYERIUM *de re  
cibaria l. 16. c. 13.* SCHENCKIUM,  
HERM. *aon Seyden, de podagra,* &  
PECHLINUM legi atque evolvi  
possunt.

§. III.

Quod ta-  
men quā-  
doq; pro-  
curam.

At vero quamvis nonnullis poda-  
gricis vinum admodum sit infensum,

negandum tamen non est, dari casus;  
ubi ventriculi quedam & intestinorum  
imbecillitas a frigido humore, ut cum  
veteribus loquar, orta adest, in quibus  
ad virium refectiōem admitti illud  
debet, maxime si diluatur cum aqua &  
vetus excoctum optimæ notæ assuma-  
tur: quod eo magis locum invenit; si in  
consuetudinem abiit vini potatio, nec  
ad ejus usum ægrotans protinus sen-  
tiat incommodum: de qua re conferri  
meretur PECHLINUS *obs. 37.*

§. IV.

Porro qui vitam a podagra liberam  
ducere, vel ejus dolores lenire atque  
mitigare intendunt, temperent sibi a  
multo cibo tam in paroxysmo, quam  
extra morbi accessum. Vere scribit  
HIPPOCRAT. præcipuum sanitatis  
studium est, non satiari cibis & impi-  
grum esse ad laborem. Sique profecto  
quid est, quod vitam servare potest a  
morbis diuturnis immunem, tempe-  
rantia in victu est: hac enim alacritas  
& ingenio & corpori accedit. Consistit  
autem hæc temperantia in eo, ut vel  
bis de die parum cibi assumamus, nec  
plenarie appetitu satiemus & coenam  
intermittamus: id quod podagricis  
mirifice commendat TAGKIUS p.  
97. item SYDENHAMUS p. 379.  
qui prandium saltem commendat; hu-  
moribus digerendis cum lectus solum  
sic dicatus. Præcipue autem in paro-  
xysmis a cibo abstinendum est. Nam  
ejus accessio, ipso HIPPOCRATE  
teste, damno est: *Eo enim tempore,  
inquit, restitui sunt humores ad centrum  
corporis, unde opprimitur anxique eva-  
dit respiratio, & aliena regio ab impu-  
ris succis occurritur. Si cibum tunc de-  
deris in impuritatem ille abit, ac disten-  
to hypochondrio opprimitur pectus, unde  
anxia respiratio & calor cordis major.*

§. V.

Facile hinc apparet ratio, quare ege-  
ni raro sint podagrici, magis autem o-  
pulenti, voluptuosi, & qui per multas  
horas mensis accumbunt, utriculi in-  
star abdomen distendentes. De opulen-  
to quodā Germano SCHENCKIUS  
apud

Nimis  
cibus

Opulenti  
frequē-  
tius ege-  
ni ra-  
rins po-  
dagrici



apud Casp. de Rejes Camp. elys. juc. quæst. tradit, quod hic, cum otio, deliciis, luxuque circumflueret, familiarem huic vitæ podagram artritidemq; adeo miserabilem contraxerit, ut non nisi duobus suffultus adjutusq; famulis promoveri loco potuisset: verum lapsis sensim rebus ad paupertatem redactus tantam, ut & opibus destitueretur & famulis, nec nisi frugalis mensa ad vitam suppeteret; hoc fretus & poculatim ipse solus incesse, & a podagra prorsus desertus fuerit. Non incommode hinc PETRARCHA: *Si a podagra, inquit, liberari cupis, aut pauper sis oportet, aut ut pauper vivat. Multos ab hac ægitudine liberaſſe traditur paupertas, vera defocatrix corporum: quosdam vero frugalitas, quam voluntariam seu fictam & imaginariam paupertatem dixerim. Vidisti aliquot perpetua vini abſtinentia curatos: ita sit, dolore dolor, clavus clavo pellitur, ut antiquo dicitur proverbio.* Specialiorem autem paulo diætam podagricis commendat atq; præſcribit GALENUS l. 6. de sanit. tuenda, his quidem verbis: *intemperantes in podagram, & alios diutinos morbos incidunt, a quibus tota vita se explicare nequeunt. Cavendum ab eduliis ex pasta, ab acidis fructibus, cepis, allio, salsis, lardo, carne suilla. Ceterum Vinum Mosellanium aut Neccarnium aqua destillata dilutum bibendum. Alvus sollicitanda passulis, prunis Damascenis. A carnibus quoque annosis & pinguibus abſtinentium. Parari debet vestimentum pellibus agninis confutum.*

## §. VI.

Cura &  
medita-  
tiones  
fugienda

Postremo, qui a cruciatibus podagricis & articularibus immunes degere cupiunt, temperare sibi debent ab omnibus gravioribus curis, animi laboribus, meditationibus & perturbationibus. Hæc enim elogio Sydenhami ad dissolvendam spirituum, qui sunt digestionum instrumenta systasin, ac proinde ad podagræ incrementum multum faciunt. Refert PORPHYRIUS in vita Plotini quendam Regulum, quum

captus esset pedibus, sese ab omnibus curis abnegasse, & a podagra fuisse liberatum. Tanti, inquit, in hoc morbo vincendum, animum quietum habere! Ceterum commendandus est podagricis labor ac motus, qui infirmitudinem & robur partibus fœnerat, transpirationem promovet, cruditates dissipat, ad totius corporis habitus immutationem aptissimus, atque optimum sanguinis depuratorium est, dum omnis generis excretiones promovendo, ab ejus naturali temperata crasi sive temperie alienas, impuras salino-sulphureas partes per congrua emunctoria separat. Elegantissime scribit HIPPOCRATES lib. prorrh. n. 162. curari podagricos posse juvenes, in quibus nondum sunt facti calli, qui laborem amant, qui vivunt accurate, & quorum alvus fluida est. Exercitium autem hoc non nimis sit vehemens sed moderatum, quale est vectio in curru, ambulatio, scalarumque repetita ascensio.

## §. VII.

Celeberrimus & maxime circumspectus trium Imperator. Archiater JOH. CRATO cons. 14. cent. 1. hoc pro præſervatione podagræ consilium suppeditavit, dignum quin huic tractationi inferamus: *Primo monendi sunt podagrici, ne ullo modo corpus medicamentis affligat, sed recta victus ratione & mediocri diligentia articulorum dolores vitari posse sibi persuadeant. Abstineant a vinis Moravicis, Austriacis, & Hungaricis, dulcibus & crassis: utantur cerevisia triticea. Ventriculi robur medicamentis purgantibus non debilitetur. Nostris pilulis uti possunt hora dimidia ante cenam, qua sit parcior, singulis septimanis, dosin quæ est scrupulus, capientes. Singulis diebus matutine de nostro stomachali sumat. In lecto matutine sudet quotiescunque poterit: nam quo frequentius hoc fecerit, eo tutiorem se esse putabit. Mundare pedes oportet cum spongia vino rubro, in quo sal fit decoctum. Topicis minus potius quam nimium est faciendum. Aer frigidus & humidus*

Consilium  
Cratonis



midus vitandus est.

§. VIII.

Quibus  
bi esse  
Aus hæ-  
reditarii  
& chro-  
nici sūt  
curatio.  
rem dig-  
tam ser-  
vant.

Præservatoria hæc cura uti univer-  
salis fere est, & ab omnibus ac singulis  
qui a gravibus valetudinis incommo-  
dis immunes esse volunt, servanda :  
ita potissimum quadrat, & necessaria  
admodum est, in affectibus tam arthri-  
ticis quam podagricis, quando a paren-  
tibus liberi seminium quoddam multi-  
plicativum ipsis vitalibus humoribus  
altius insinuat, & quod inter pueri-  
tæ vel adolescentiæ annos jam tum se-  
se exerere incipit, acceperunt; quo in  
prima quasi herba suffocetur. Atq; etiã  
hec ipsa cura diætetica ad eos spectat,  
quos jam per plures annos hoc malum  
& chronicum, & quasi habituale fa-  
ctum exercuit: eo fine & scopo, ut mi-  
nimum dolores ac symptomata levio-  
ra & mitiora inde reddantur, breviores  
quoque fiant paroxysmi, & roborata  
sic quodammodo natura deteriores &  
exitiales affectus, qui excipere nun-  
quam non solent podagram pertina-  
cem & chronicam, corporis vires val-  
de infringentes arceantur.

De Cura Specialiori Podagricorum  
Medica.

§. I.

Podagra  
radicata  
non po-  
est ex-  
surgere

**O**ptandum quidem serio, & vehe-  
menter esset, ut tam efficacia in-  
rerum natura extarent remedia, quæ  
huic difficillimo morbo, ubi longo tē-  
pore in succis vitalibus & nervosis par-  
tibus radices egit, extirpando suffice-  
rent: sed, quoniam talia nondum per  
experientiam cognita atque compro-  
bata sunt; eo tantummodo laboran-  
dum est, ut non modo diætæ præscripta  
servetur, sed & aliis remediis languen-  
ti corpori succurratur, quo recursus hu-  
jus mali, si non prorsus tolli possit, pau-  
ciores tamen & breviores evadant, le-  
vioribusq; symptomatibus stipati ince-  
dant paroxysmi. Et cum ordinario fere  
periodicorum dolorum, sive febris po-  
tius rheumatico, podagricæ incursus

fieri soleat tempore vernali item antè  
& post solstitium hibernum: opus est,  
ut antea congruis evacuantibus, alte-  
rantibus, & massam sanguinis depu-  
rantibus, vitiosos humores doloribus  
istis podagricis pabulum administran-  
tes, quo post eo felicius paroxysmus  
sustineri possit, & corrigamus & eli-  
minemus.

§. II.

Ad hunc scopum, ex voto obtinen-  
dum, ego sanguinis missionem decenti  
tempore & quidem ante æquinoctium  
vernum, ubi malsa sâguinis & feri sin-  
gulari quodam interno ebullitionis  
quasi motu agitur, & sic heterogeneæ  
partes quæ in eorum profundiori ac in-  
timiori nexu tectæ & involutæ hæse-  
runt, extrorsum vertuntur, unde om-  
nis generis febres exanthematicæ, ca-  
tarrhales, rheumatico arthriticæ origi-  
nem suam mutuuntur, celebratam ma-  
gni admodum facere soleo: id quod op-  
time succedit, ubi corpora non adeo  
firma fuerint, quæ bene appetunt, vitæ  
sedentariæ indulgent, lautaque diætæ  
utuntur. Longe vero magis necessa-  
ria est venæsectio in iis, qui ob laxio-  
rem multis exilibus vasculis donatum  
corporis habitum multum sanguinis &  
feri ingenerant, & ad hæmorrhagicas  
excretiones proclives sunt, præcipue si  
hæ resistent vel parciore evadant. Et  
quoniam ante & post solstitium bru-  
male mense Decemb. Januar. Februar.  
plerumq; insolescunt & ingravescent  
podagrici dolores, ego in fine Octobr. si  
res postulaverit & plenitudo vasorum  
evidens fuerit, sanguinis missionem  
suadere solitus sum.

Vene  
sect.

§. III.

Deinceps non possum non ego hoc  
loco candide fateri, quod a cucurbita  
cum scarificatione dorso pedis, singulis  
trimestribus apposita, insignissimum  
allevamentum in pluribus, atque e-  
tiam in me ipso, qui non immunis fui  
ab ejusmodi insultibus podagricis;  
licet obtusioribus, & non diu per-  
sistentibus, expertus fuerim. Ratio-  
nem si quis hujus effectus exposcere

Cucurbi-  
ta cum  
scarifi-  
catione  
dorso  
pedis ap-  
posita.

ve-



velit, hæc satisfacere posse videtur; quod in nulla fere corporis parte, difficilior sanguinis circulus ex arteriis in venas, quam in extremo pede ejus præsertim digitis procedat; nulla etiam pars sit, quæ tanta copia muscutorum, tendinum, membranarum & ligamentorum tendineo-nervorum, vasorum etiam sanguineorum instructa sit, ac extremi ipsius pedis compages. Quandounque itaque hæ partes, ab ipsa natiuitate, imbecillitatis quodam vitio laborant; non mirum est sanguinis circulum siue itum ac reditum in illis ipsis admodum esse segnem, tardum & impeditum, præsertim quando ille copiosiori sero, excrementitiis salinis partibus referto scatet, & tempore paroxysmi, qui semper febrili motione fit & incipit, majori copia ad has partes appellitur: unde non possunt non humores stagnare, & vasa nimium distendendo eorumque nervosas membranas divellendo, dolores cum inflammatione licet leviori producere. Atqui hinc utilissimum omnino est, ut sanguinem superfluum & stagnantes per has partes valde ad circuitum difficilem e vena extrahamus; & sic ejus liberiores progressum promoveamus.

## §. IV.

*Vomitus  
rui sin-  
gulo me-  
se exhi-  
bendum* Quoniam paroxysmorum & rheumatico arthriticorum, & podagricorum evidens & materialis causa, in seri excrementitii abundantia & colluvie consistit, atque huic ingenerandæ vitata prima in regione alimentorum digestio & cruditatum proventus multum velificatur, complures non minus periti ac eruditi Medicorum singulis mensibus vomitum excitandum commendarunt, ut ventriculi, & duodeni cavitas, & qui huc pertingant ex hepate & pancreate canales a sentina crudorum, & vitiosorum humorum expurgentur: vid. HILDANUS cent. 4. obs. 34. MERCATUS de morbis intern. l. 4. c. 18. RIVIERIUS in Praxi l. 6. SYLVIIUS in Pr. pag. 153. Alii vero pro cura vernali vel autumnali, ad primam regionem & totum corpus a lor-

dibus probe expurgandum, infusa ex variis laxantibus roborantibus, & aperientibus concinnata usurpanda suadent.

## §. V.

Ego, ut fidelicet & candide pro more meo dicam, non certius, non efficacius, & magis genuinum in ejusmodi affectibus & avertendis & minuendis, vel, si medicina in opportuna turbatis motibus intro inversa vitiosa materia fuerit, in ordinem redigendis, quam in usu thermarum & quidem Carolinarum inveni remedium: quarum virtus & energia, in calculo, podagra inveterata, & in hac, si fuerit ad interiora repressa, ad partes exteriores revocanda, hæmorrhoidum quoque fluxum, si causam & occasionem malo suggererit, restituendum, incomparabilis est. Cujus veritatis permulta imo millia exempla, adducere integrum esset, ut adeo, qui eam vel in dubium vocare vel plane negare gestiunt, aut improbitatis, aut inscitie sese ipsos accusent. Nam hæ aquæ in larga satis quantitate potatæ, ob spirituosum quo pollent elementum, & ob salia mineralis prosapiæ, quæ in sinu foveant tenues non modo & fluxiles reddunt humores, atque obstructa & infarcta minima vasa aperiunt, sed per omnia quæ evehendis e corpore alienis & morbidis humoribus dicata sunt excretoria, per hepaticos ductus videlicet, per alvum, per subcutaneum emunctorium, per vias urinarias, per mucum bronchiorum & narium, copiosissime & sine ulla virium jactura per multos continuos dies materiam peccantem educunt. Hinc certe universalis morborum chronicorum præservatorii & curatorii nomen; si non altiores malum egerit radices, jure sibi vindicare possunt: siquidem ego, qui has salutiferas aquas 20. circiter vicibus frequentavi, sancte affirmare possum, quod non per artem existat vel inveniri possit tale remedium aut medicina, quæ huic, quam Benignissimi, qui curam etiam corporis nostri habet & semper habuit Creatoris beneficio,

*Thermæ  
Carol.  
omnia  
remedia  
superant*

pien-



Neque acidula-  
landib;  
arent.

pietissimo animo acceptam referre debemus, æquiparari possit. Atqui id etiam observavimus, quod si sub ipsa cura irruat hic affectus, longe mitior brevior & placidior semper procedat & finiatur. Neq; etiam aliis mineralibus fontibus thermalibus & quas acidulas salute vulgo consuecunt, modo pro differentia corporum & naturarum re- & cum debito regimine & convenienti methodo præscribantur, usurpentur, commendentur, laudes & energias suas detrahere volumus, cum passim etiam indubia adsint faustissimi effectus in ejusmodi radicatis & chronicis morbis exempla. Possunt vero temperatiores aque minerales, ad quas pertinent *Vildungenses, Selteranæ, Veteraquenses* in Silesia, loco potus: si tertia admisceatur vini pars, per totum anni decursum in usum duci.

§. VI.

Postremo quoque potibus diluentibus, acrimoniam salisam temperantibus & demulcentibus, leniterq; evacuantibus, ut sunt lac, serum lactis, summam, tum præservandi tum curandi scopo adhibitis, virtutem adscribimus, quippe eam exeruisse multiplici experientia comprobatum est. Id autem remedii genus, in eodem morbo antiquissimos jamjam maximi fecisse, HIPPOCRATES & CELSUS loquuntur. Ille enim passim speciatim in *lib. de aff.* in difficillimis podagricis & articulationum doloribus, lac asininum commendat. Hic vero *l. 4. c. 24.* ita scribit: *quidam cum asinino lacte poto ex toto se eluissent, in perpetuum hoc malo evaserunt.* Præterea quoq; PLINIUS, sunt inter exempla, inquit, *qui lac asininum bibendo liberati sunt podagra, chiragraque.* Novimus nos non paucos lactis bubuli per aliquot annos usu, item aquæ pluvialis pro potu ordinario, per plures a doloribus podagricis annos immunes vixisse. De cura vero lactea prudenter instituenda, infra in cautelis & monitis plura subjiciemus.

§. VII.

Porro, ad methodum tam præservatoriam quam curatoriam, nihil securius, nihil accommodatius, regimine diaphoretico, salutari consilio procurato, inveniri potest. Nam si verum, uti est verissimum, quod sanguis serosus impurius, qualis maxime ex transpiratione prohibita redditur, causa antecedens & materialis paroxysmorum podagricorum sit; ipsa certe sanior dictatur ratio, quæ experientia confirmatur, atrocem hunc morbum, quam optime & tutissime, facta liberiori transpiratione, vel ea quæ secundum naturam fit restituta, esse remedium omnibus aliis superius. Et quoniam hac de re insignissimus, & notabilis admodum locus in CAROLI PISONIS utilissimis observationibus: *de morbis a serosa colluvie oriundis Sect. 5. c. 2.* extat; operæ pretium nos duximus eundem nostræ tractationi subnectere. Verba autem laudati elegantioris Auctoris hæc sunt. „ Deniq; quod spectat ad vacationem feri per cutim, eamque sensibilem, hanc plurimi facio, ut debeo, quia & revulsionis vim habet, & maxime est opportuna in his affectibus, quippe quæ naturæ convenientissima, cum ea feri portio, quæ per cutem insensibiliter ex natutæ instituto continentur, quotidie exspirare debet, suppressa quæcunque ratione & introrsum depulsa materiam præstet arthriticis doloribus, ut ante hac demonstratum. Quamobrem consulo, ut Illustris Præsul sudorem quotidie si fieri potest, aliqua arte promoveat, aut certe insensibilem expirationem: quod ut consequatur, in primis densitati cutis, quam infert inclementia aeris, præsertim hyberno tempore consulere debet, nam quæ a polysarcia aut ætate densitas infertur, de ea nulla providentia haberi potest. Ergo accurate videat, ut bene tectus incedat semper, & de nocte potissimum stragulis levibus quidem sed calidis, pluma videlicet pelle infartis de-



„ desuper superq; stratis opertus dor-  
 „ miat, & ita opertus ut sponte sudor,  
 „ sub diluculum erumpat: quod eve-  
 „ niet, si non ita de mane expergisca-  
 „ tur, sed aliquantisper quietem in le-  
 „ cto longiorem capeſſat; & si sudor  
 „ nihilominus non erumpat, is multa  
 „ longaq; provocetur universis corpo-  
 „ ris, tractione. Quod si eo frustretur,  
 „ aut hisce modis eum provocare te-  
 „ diosum illi est, suadeo certe, ut se-  
 „ mel in hebdomade hypocaustum je-  
 „ junus adeat, ibique per horulā sudet,  
 „ quod primum tentabit, ubi plethorę  
 „ corporis venæsectione prius provi-  
 „ derit, ut avertat cutaneos affectus,  
 „ qui ab insolito hypocausti usu sponte  
 „ emanere solent. Atqui si his artibus  
 „ sudor erumpens minus emendandæ  
 „ colluviei feri in corporis habitu sta-  
 „ gnantis satisfacere potest, certe au-  
 „ ctor sum, ut ineunte vere & autu-  
 „ mno, quibus anni temporibus fluxio-  
 „ nes repetere solent, utatur decocto  
 „ sudorifero sive Zarzæperillæ sive ra-  
 „ dicis Sinarum, idque per unam aut  
 „ alteram septimanam, vel certe *siru-*  
 „ *po Ambrosiano*, si metus sit a visce-  
 „ rum & sanguinis æstu.

## C U R A T I O

## IPSO IN PAROXYSMO.

## §. I.

*Immi-  
 nens pa-  
 roxyf-  
 mo, al-  
 tus sub-  
 ducenda*

**E**Go imminente paroxysmo, qui ex  
 lassitudine insolita & inquieta,  
 appetitu adaucto & gravitate capitis &  
 artuum cognoscitur, primam regionē  
 ante omnia leniter a sordibus alvinis:  
 neque minus a collectis in duodeno &  
 reliquo intestinorum canali vitiosis  
 humoribus deplendam, & expurgan-  
 dam laudare soleo; id quod tutissime  
 tum per clysteres emollientes, & tēpe-  
 rate carminativos, tum interne per in-  
 fusa rhabarbarina & mannata, cremo-  
 re tartari exaltata perfici potest. Me-  
 mini, me olim statim sub initio dolo-  
 ris podagrici & arthritici, insigni sæpe

cum fructu usum fuisse sequenti mix-  
 tura: Rec. aquæ florum acaciæ uncias  
 duas, cinnamomi sine vino unciam di-  
 midiam, pulveres Cornachini drach-  
 mam, syrupi rosarum laxativi, vel ci-  
 chorei cum rhabarbaro unciam semis.  
 Neque instar aphorismi practici medi-  
 corum juniores teneant hoc: mitiores  
 semper dolores evadere in quocunq, e-  
 tiam loco consistent, si prima regio  
 prius sordibus suis, ante usum aliorum  
 medicamentorum, probe fuerit expur-  
 gata: quæ alias migrando in sangui-  
 nem inque partes affectas penetrando,  
 & dolores intensiores reddunt, & gra-  
 viora symptomata producunt. Atque  
 in eo quoque laudandum est SOLE-  
 NANDRI consilium, quod extat *in*  
*Oper. suis p. 78.* ubi scribit, se in paro-  
 xysmi podagrici principio magno cum  
 successu exhibere aliquod purgans so-  
 lere, primum id edoctum ab ALEX.  
 THALIANO l. 2. Et singulares esse,  
 PECHLINIUS *obs. 26.* eruditissime  
 inquit, quod arthritici leniorem ple-  
 rumque experiantur insultum, detra-  
 cta ex primis viis vitiosa materia.

## §. II.

Cum vero omnis doloris articula-  
 ris, & podagrici paroxysmus motum  
 febrilem comitem habeat, cujus etiam  
 beneficio, natura optimā morborum  
 medicatrix, solenniter & felicissimo  
 sæpe cum successu morbum curare, &  
 quæ eum excitat vitiosam & hostilem  
 materiam convenienti tempore, per  
 congrua emunctoria evacuare atque  
 foras rescribere solet: idque in dolori-  
 bus maxime per sufficientem, & au-  
 ctio-rem transpirationem perfici, dum  
 non modo tota sanguinis & feri massa  
 depuratur, sed & ipse dolorem in pedi-  
 bus creans vitiosus humor successiva  
 difflatione & exhalatione excernitur;  
 prima ac princeps medentis debet esse  
 intentio ac cura, ut placidam conti-  
 nuam, & non interruptam diaphore-  
 sin, suo consilio & auxilio procuret &  
 moderetur. Prestare in opportuniſſime  
 possunt ipsa infusa, quæ loco Thee, ex  
 herba scordii, cardui benedicti, veroni-  
 cæ,

*Materia  
 vitiosa  
 podagr.  
 per trā.  
 spiratio-  
 nē au-  
 ctā dif-  
 flanda.*

*Quo / pte  
 fāc in-  
 fusa  
 Thee  
 MR.*



ex radice glycyrrhizæ, corticibus citri recentibus parantur: cui scopo identidem egregie inserviunt mixturæ, ex aquis destillatis, cardui benedicti, galega, scordii, succo citri, lapidibus cancrorum, antimonio diaphoretico, cinnabari, nitro purificato, & syrupo acetositate citri, singulis debita dosi, & proportionem sumtis concinnandæ. Instar omnium vero potest esse liquor noster anodynus mineralis, si cum quarta parte Spiritus *Bussii*, & tartari volatilis roboretur: de quo 30. vel 40. guttæ pro dosi, ex ordinario decocto vel infuso jam laudato propinari possunt. Præstat vero ejusmodi medicamenta manere, cum expectatione lenioris sudoris in lecto exhibere. Vesperi & circa noctem pulveres temperantes bezoardici nitrosi, cinnabarini, cum aquis analeptics, diapnoicis, vel cum emulsione amygdalarum dulcium, aut seminum quatuor frigidorum majorum commodissime porrigi possunt.

§. III.

Neque minus decocta

Expedit etiam pro feliciore sanationis obtinendo scopo in hoc affectu, pro ordinario potu decocti temperantis & diluentis paulo liberaliorem usum commendare, ex quo summum me sæpius fructum percepisse recordor. Species hæ sunt: Rec. radicis chinæ, sarsaparillæ, polypodii ana uncias duas, liquiritiæ, cichorei ana unciam, corticis ligni sassafras unciam dimidiam. Quarum dimidia pars in quinque aquæ mensuris, & una vini coquantur, ad consumptionem septimæ partis: quo decocto non modo pro ordinario potu & ad extinguendam sitim utendum, sed & pro eo medicamenta propinanda sunt, atque insuper singulis duabus horis, octo uncia calide bibendæ sunt, idque statim a morbi insultu faciendum. Inde urina copiose fertur, & corpus in continua perspiratione servatur, alvus quoque fluida & laxa manet; si vero hæc officii sui fuerit immemor, supra propositum laxans exhibendum: abstinere quoque ab omnibus jusculis pinguibus nutrienti-

Hoffm. Syst. T. IV. P. II.

bus expedit. In doloribus autem vagis præsertim a scorbutico humorum inquinamento qui oriuntur, serum lactis dulce vel acidulum, item fons Selteranus cum lacte remixtus utilissime pro potu dantur.

§. IV.

Ad mitigandos artuum, si acerbius affligant dolores, cautissime cum ipsis topicis procedere æquum est; quia multiplici experientia teste, plus damni quam emolumenti attulisse constat. Consultius autem & securius est, partes dolentes culcitris levioribus plumaceis involutas, in quiete & temperato æquabili calore retinere, ut lenis, & successiva humoris vitiosi difflatio procuretur. Ceteris vero externis omnibus minus noxiis, antiquissimum illud cataplasma, ex mica panis albi lacte, vitello ovi, croco, & floribus sambuci paratum, mea quidem sententia præferendum erit. Potest etiam, præsertim in arthritide vaga, succus lumbricorum terrestrium, addi. Novi quoque non sine insigni levamine in acerbioribus doloribus, fructum carnis ex recenti macerato animante parti affectæ applicatum fuisse: quod post viginti quatuor horas amotum, foetidum sparsit odorem. A tinctura sulphuris volatili, quæ ex calce viva, sale ammoniaco, & sulphure paratur, cum charta bibula, membris affectis, non quidem statim in principio, sed circa finem, & ubi topi metuendi, admota, ob fortiorem procuratam discussionem, effectus laudatissimos vidi: sed non omnes hoc medicamentum, ob summum quem spargit foetorem, ferre possunt. Dolore & paroxysmo sublato, quando ingens in partibus affectis imbecillitas movendique impotentia remanet, balsamum nostrum spirituosum liquidum, cum aqua Regiæ Hungar. dilutum, moderate inunctum insigne robur afferre crebro observavimus.

Topica quæ, & ubi cōferantur

S

Cau-



Cautela, & Observationes  
Clinicae.

## §. I.

Vena  
Sect in  
galbu/-  
dam  
cane  
admini-  
stranda

**V**Enæ sectio, utut in corporibus, quæ sanguine plus quam sero abundant, atque in ætate juvenili constituta, diæta simul lauta vinosa deleantur, ad præcavendos paroxysmos podagricos, & arthriticos utilissimam præstet operam, atque etiam, ubi a defectu excretionis hæmorrhoidalis vel menstrualis morbus vel ejus paroxysmus metuendus, plane necessaria sit: neque etiam imminente paroxysmo in arthritide valida & vaga reformidanda, sed intrepide admittenda: nihilominus ubi corpus valde debilitatum, excrementitii seri copia obsessum, ex vitio bonæ digestionis, & excretionis insufficientis prognati, cautius est ab ea abstinere, & quidem hisce de causis quia excrementitio sero, portio etiam consistentis sanguinis non sine virium jactura amittitur, secundo, quia criticus ille naturæ motus ad exteriora, & peripheriam corporis vergens intercipi potest, quod in febribus erysipelaceis sæpius fieri videmus: tertio, quia, candide quod fateri debeo, aliquoties post venam sectam acerbiorum symptomatum impetum animadverti.

## §. II.

Cura  
lactis

Circa curam podagræ per lac, sive potius ejus paroxysmorum ad magnum, & notabile tempus suspensionem, id observavimus: quod si hac finita ad pristinum victum & vivendi genus ægrotantes redierint; vel ipsi paroxysmi bono omine reverti cœperint, vel loco horum, in corporibus pathemata spasmodica, in abdomine colica, ventriculi cardialgicæ inflationes, dolores nephritici cum ischuria, & non adeo longum post temporis spatium mors insecuta fuerit. Insuper etiam circa lacteam curam, quæ alias ad expugnandos at-

que avertendos arthriticos, & podagricos dolores, non destituitur laude & effectu, id monendum ducimus, quod, ubi corpus plethoricum, vel sero abundantiori impuro turget, vel ob tonum ventriculi, & intestinorum labefactatum, prima regio semper ferre cruditatibus vitiosis obsessa est, aut si pathemata hypochondriaca, quod sæpius fit, subsint, atque ipsa natura lacticinia respuat, prorsus hanc damnandam esse judicemus, quippe in viscerum ulteriorem infarctum, in cachexiam, hydropem, & hæticam febrem tali pacto ægrotos præcipitari posse certum est.

## §. III.

Recte monet CRATO l. 5. in consil. quod fortiter, & violento impetu evacuantia, eo quod naturæ, & imprimis ventriculo vim inferant, nequaquam inchoantibus & perseverantibus doloribus exhiberi debeant. Hinc perite TRALIANUS l. II. p. 601. suadet, in podagra talia purgantia esse adhibenda, quæ stomachum non subvertunt, & addit rationem hanc: *nam hujus cura in omnibus affectibus haberi debet, ut ne ventriculi os ab iis quæ adsumuntur offendatur. Ipsi namque infirmanti omnes nervi consentiunt & fluxionibus tentantur.*

Purgan-  
tia for-  
tis ipso  
in dolo-  
re non  
exhiben-  
da.

## §. IV.

Quod attinet ad decoctum Vienne, nostro tempore ad podagram curandam medicamen famigeratissimum, cujus insignes virtutes una cum modo usurpandi in *M. N. C. cent. I. obs.* paulo curatius describuntur, a multis qui eo ipso nisi sunt, magnopere quidem collaudatum memini. quorum autem corpora robustioris paulo constitutionis erant. Neq; prorsus ejus usum improbare velim: sed quoniam plerumque debilioris, tenerioris, & sensibilioris naturæ podagrica affectione laborantes esse solent, ab hermodactylis & a ligno guajaco, quæ istud ingrediuntur, & omnino sale acri stimulante prædita sunt lubens ab-

Decoctum  
Vienne  
nense.



abstineo, qui securiora tantum amo, & approbo, quæ inter hoc quod supra a nobis traditum est decoctum præcipuum locum obtinebit.

§. V.

*Topico- rum cir- ca hunc* Externa remedia partibus dolentibus applicata, utut raro carent noxa, longe tamen periculosiorem in corporibus sanguine vel sero impuro repletis, sive cacochymicis, sensibilibus naturæ hypochondriacis & hystericis, in quibus nervorum & fibrarum systema spasmis jam adfuetum est, sortiuntur eventum: siquidem plurimorum observationum fide constat, lethales horum applicationem excepisse affectus, quos inter apoplexiam, hemiplexiam, memoriæ amissionem, asthma convulsivum, cardialgiam, colicam spasmodicam, ventriculi, & intestinorum inflammationem nominasse sufficiat.

§. VI.

*Spiri- tuosa topica quos cõ- firmat.* Topica spiritiosa ac camphorata in subjectis segnioribus & humidioribus non adeo nocent: in siccioribus vero, si materiam podagricam non retropellant, ad calculum tamen disponunt, vel topicorum generationi velificantur, aut molestissimas partium contracturas relinquunt.

§. VII.

*Paucio- ra & se- cura re- media usurpanda.* Non possumus non, iterumq; monere, in affectibus podagricis & articularibus, paucioribus & fidis remediis tantummodo utendum esse, rejectis, inseguris & ancipitibus, quæ sæpius damna intulisse animadverti. Hinc mihi perplacent, quæ tradit Clariss. Romanorum Medicus ALEX. PASCOLIUS Oper. tom. 3. Sect. 3. cap. 5. p. 220. At enim vero, inquit, ut quicquid in eo morbi genere, quem in publicis nosocomiis non minus, quam in ædibus aliorum privatis, crebro præmanibus habuimus, ad hoc temporis observavimus, ingenue ut nostri moris est fateamur; proferre non dedignabimur eos, quibus aut nihil prorsus, aut nihil propemodum in rheumatismo fecimus, felicius ut plurimum evasisse, quam alii, quos validioribus artis præsidis

subjecimus. Quæ res porro effecit, ut posterioribus annis ejusmodi egrotantes tractando, præter victum tenuem, & congruum, ac uberrimas potiones ex aqua vel simplici vel per levem infusionem sarsaparillæ, glycyrrhizæ, florum papaveris rheados, hisque similium medicatas, nihil aliud præbere consueverimus; quo solo temporis processu, sudores plane criticos, optimo cum successu excitavimus.

§. VIII.

Gallarum Medici celeberrimi, quos *Vene- inter CHENAU, BOTALLUS, sect. re- RIVERIUS, CAROL. PISO, re- pita.* ferendi, in doloribus podagricis & arthriticis crebro repetitam venæsectionem maximopere laudant & commendant, præservandiq; potissimum sine, & scopo celebrant: quæ tamen methodus in nostris septentrioni vicinis hominibus, quorum corpora non tanta sanguinis abundant copia, haud curate quadrat. Nihilominus, si morbus non adeo inveteratus & corpus ad sanguinis abundantiam ingenerandam pronum fuerit, levior & sæpius repetita venæsection, seu singulis potius mensibus in pede admissa scarificatio, præmisso tamen semper leniori laxante non erit infructuosa. Eximius plane est locus, quem de venæsectione utilissime frequentius habet laudatus PISO l. cit. Sect. 5. c. 1. p. 406. hic merito apponendus: Addo autem, inquit, singulis mensibus, quoniam eadem experientia me docuit, quotiescunque per inducias vel paucarum septimanarum eger corpus refecerit, sanguinisque jacturam reparaverit, tum prima quoq; commotione aeris & alteratione sive ad algorem, sive ad astum omnino arthritim recrudescere. Et certe sæpe audiavi magnos viros ex arthriticorum familia, nihil longo usu reperisse retardandis cohibendisque fluxionibus arthriticis, si non prorsus tollendis, ipsa venæsectione, eoque ejusdem usum etiam in affecta ætate non reformidasse, itaque repetita placet venæsection & per epicrasin: quod si probatur, nemo non vivet omnino par-



ea manu esse administrandam, & quantitatis hunc esse scopum, ac providenter duntaxat ne turgeat sanguis in vasis & orgasmo spontaneo commoveatur.

## §. IX.

Tumor  
a sol-  
tione  
morbi  
relictus  
causa  
tracta-  
dum

Paroxysmo finito & morbo soluto, in corporibus spongiosioris habitus & sanguine seroso turgentibus remanet sæpiuscule pedis affecti insignis & valde diffusus, qui impressa digiti vestigia relinquit, tumor, caute profecto tractandus: nam si quis eum pro incipiente hydrope habuerit, & ad hunc præcavendum vel abigendum, validioribus purgantibus uti velit, is non leve sanitati & vitæ damnum infligere poterit. Opus tunc potius est lenioribus laxantibus balsamica virtute eminentibus, ut sunt rhabarbarum in substantia, pilulæ Cratonis, Becheri, nostræ, mediocri quidem dosi, sed crebrioribus vicibus exhibitis uti. Externe autem pulvere, ex farina fabarum, camphora, & floribus sambuci conspergendi pedes, & leniter non autem nimis valide, vinculis, ne uberior feri fiat affluxus & stagnatio, constringendi.

## §. X:

Tophi  
resol-  
vendi

Ad tophos discutiendos & resolvendos in senili & inveterata podagra, ego non præsentius ipso balsamo sulphuris antimoniato, quod ex sale scoriarum reguli antimonii simplicis, superinfuso oleo therebinthinæ & juniperi paratur, me deprehendisse afferre possum.

## ENARRATIONES MORBORUM.

## C A S U S I.

Podagra  
ab empl.  
rico re-  
propul-  
sa fu-  
it.

**V**ir sexagenario major, sanguineo-cholericus, sanguine, & succis plenus, habitus corporis robusti, animique ad iram valde proclivis, per complures annos doloribus convulsivis, colicis, spasticis, nec non podagricis misere divexabatur: quorum tamen

malorum solamen, in usu Carolinar. singulis annis adhibitarum, nunquam non præsentissimum invenit. Nihilominus, nescio sub quo infausto fidere, prudentissimus vir in empiricorum infelices manus irruit, qui, fiduciam addentes amplissimam, nostro pedibus per aliquot dies laboranti pulverem commendarunt, cujus dosi admodum quidem exigua, sed sapor valde constringens, & metallicæ sine dubio mercurialis & vitriolicæ naturæ erat. Oblata duabus singulis horis dosi, hacq; ad duodecimam usque reiterata, omnes dolores & cruciatus simul & semel conquieverunt. At vero altero die, in gravissimas incidit cardialgicas anxietates, cum inquietudine, ventris rormentis, alvi pertinacissima adstrictione, animique intercurrente deliquio, comitatus: insuper nec corpus nec caput erectum detinere poterat: quæ symptomata brevi post, cum insultus apoplecticus exciperet, corpore mirum in modum inflato, capite in imensam molem turgescente, sanguineoque fero ex ore & faucibus effluente, nimix confidentiæ pœnas morte miserrima luere debuit.

## Epicrisis.

Funestæ hujus catastrophes causa, vix alia inveniri vel excogitari poterit ac infesti remedii antipodagrici assumptio: quandoquidem sensibilibus corporibus, si spasmodicis primarum viarum tentantur constrictionibus, ejusmodi mercurialia, & metallica remedia semper nocentissima sunt, eo quod non nisi spastica quadam strictura operationem suam exerunt, & ita universum nervorum genus male afficiunt. Cui etiam in nostro casu repentina dolorum podagricorum remissio adscribenda venit, dum videlicet ob spasticam stricturam partium externarum, materia podagrica intro coacta fuit; qui spasmus simul efficit, ut sanguine plus justo ad pectus, & caput propulso, ex nimia vasorum distensione ejus extravasatio in cerebro oborta fuerit. Hinc omnibus, & singulis



gulis qui praxin exercere sustinent, non sine ratione suademus, ut in quibusvis morbis spasticis, qui in sensibilia præsertim corpora incidunt, cane & angue pejus, cuncta mercurialium, emeticorum atque acriorum purgantium genera fugiant: inter quæ etiam mercurium dulcem, aurumque fulminans, ob inauspicati successus, quæ sæpius sub ejusmodi circumstantiis, observavimus effectum reponere non dubitamus; siquidem a pulveribus sic dictis solaribus non raro maximas præcordiorum anxietates, comite singultu, in podagricis obortas, doloribusque licet mitigatis omnia intus pejora reddita fuisse novimus.

C A S U S II.

*Tumor pedum erysipelaceus retro-pulsus.* Vir Illustris quadraginta & aliquot annorum, rheumatismis scorbuticis crebrius affectus, tumore erysipelaceo in dextro corripitur pede, quem ulcus olim purulentam materiam continenter stillans obsessit. Hic tumor inflammatorius radium rubicundum a glandulis inguinalibus, ad extremum usque pedem emisit. Altero die dolor metatarsum pedisque sinistri pollicem satis atrox cum insigni tumore invasit: unde plane immobiles redditi pedes fuere. Chirurgus in principio statim ad erysipelas profligandum spiritum camphoratum crocatum applicavit, & cum in alterum pedem dolor transiret, spiritum removit, & hujus loco siccos pulveres cum camphora mixtos adhibuit. Inde mox notabilis dolorum levatio, & remissio in utroque pede successit: non ita multo post autem tam gravis circa præcordia anxietas & diaphragmatis constrictio, ut omnem penitus respirationem tolleret, cum æstu & plenaria appetitus prostratione secuta fuit, quibus alvina obstructio, cum inflatione associabatur. Præscriptum quum me consultum adirent, ad alvum leniter educendam decoctum mannatum, & ad flatus discutiendos

Hoffm. Syst. T. IV. P. II.

materiamque retrocessam sudore distillandam, aliquot liquoris anodynini mineralis, cum tertia spiritus Bussii parte remixti doses propinavi. Quin pacto & totum mox corpus largissimo sudore perfundebatur, & ipsæ hæmorrhoides, quibus aliquando assuetuserat, denuo fluere cœperunt, symptomatibus penitus evanescentibus.

*Epicrisis.*

Similis fere casus, qui evidenter camphoratorum externum usum in podagra noxium declarat, aliquot ante annos in Illustrissima femina mihi occurrebat: hæc enim postquam minimum cum camphora remixtum pedibus podagra tentatis applicasset, hæc quidem siluit, ast non multo post cardialgici dolores, summa virium prostratio, vomitus, inquietudo, cum æstu febrili alvus retinens & leve delirium accedebant: quæ symptomata statim ab oblato cum emulsione ex seminibus 4, frigidis, pulvere præcipitante nitroso, cum tertia parte grani unius camphoræ permixto pro dosi, remiserunt, & materia podagrica ad exteriores partes reversa. Siquidem ego passim quoque animadverti, camphoram cum exterius applicata noxam intulisset, interne exhibitam illata damna rescivisse. Memorabilis quoque est observatio, quam recenset HAGENDORNIUS cent. 1. observ. 28. ubi mercator ex dolore & tumore scorbutico laborans, applicato epithemate ex aquis destillatis cum cerussa & camphora, doloribus sedatis, loquelam amisit nec brachium movere potuit. Neque vero in totum camphoram ejusque spiritum in tumoribus, & doloribus partium externarum damnare, & rejicere animus est, sed prudentia, & distinctione naturarum opus est velim: nam qui in artis versantur exercitio, subinde experiuntur, non omnia omnibus promiscue prodesse, atque id maxime valere in topicis, cum quod alterum juvat, idem alteri noceat. Est autem causa non



ram dispositio peculiaris humoris peccantis; sed potius ipsa tensiva tonica fibrarum, pororum & vasorum cutis constitutio: habent enim omnes partes & maxime quæ emunctorii & colatorii vices gerunt, suum peculiare robur, tonum, tensionem nec non suam quoque dilatationem, quæ species motus ad secretiones & excretiones summe necessaria, dependet potissimum a fluidi nervei influxu, & nervearum membranarum tensione: qualis itaque hæc sit in omnibus individuis atque morbis eorumque temporibus, in exhibitione topicorum provide animadvertendum est ipsis medentibus. Quis enim non videt, si pori nimis fuerint constricti a dolore & spasmo, neutiquam tunc spirituosam calidam conferre, sed potius ea quæ blande constrictas partes relaxant; contra, si nimia est post dolorem relaxatio, quod apparet ex tumore, dolore mitiori reddito, omnia unguenta humida unctuosam anodyna valde nocere, & potius tunc linimentis spirituosis nervinis utendum esse. Deinde ut ut quandoque topica egregie mulceant dolores, & febrem mitiorem reddant, nihilominus non semper illud valet, etiam in eodem individuo, paucis: quo robustior in expellendo est natura majorque corpore corporis adest vigor, major quoque motus internus eo minus periculi inducunt externa decenter applicata; quæ tamen, si vigor motuum cesset, si ætas senilis vel status cachecticus supervenerit, plane sunt seponenda. Illud enim unice intendat Medicus necesse est, ut externis non sistat evaporationem materiæ peccantis sed eam promoveat: verum, quoniam magna prudentia in hac re opus est, securius potius est abstinere ab omnibus externis, & totum negotium curandi internis committere, partesque affectas in blando tepore servare. Dein etiam hoc observavimus, tophorum generationem, quæ fit maxime in arthritide fixa, improvidæ

non raro externarum applicationi deberi, stupefacientibus præsertim & in-  
frigidantibus. Meretur hic adduci B. VVEDELIUS qui in *tr. de medicam. facult.* scribit: *Frequenti experientia edocti sumus, plus damni ipsos podagricos inde passos, imo plures ex arthritide vaga hoc modo sibi fixam ac crevisse, plurimos vero tophos, quod usurpaverint unctuosam, & pinguiam emplastica.* Hinc, & ipse Galenus *method. medend. l. 4. c. 3.* tophos in articulari morbo produci recte memorat ex humore glutinoso & crasso, quando is non paulatim digestus, sed violentis remediis totus simul exsiccatus est: & FERNELIUS *conf. 12.* geminari inde dolores observat: Cæterum non omnia topica, plane exterminanda esse in externis articulorum doloribus arbitramur; siquidem quando affectos partium inveteratus cum torpore quodam & insensibilitate relictus, qualis in senili ætate sæpissime evenit, tunc sedata prius interna sanguinis & humorum ebullitione, ad roborandos nervos, & invitandum spirituosum elastici fluidi influxum in imbecilles partes, nervina linimenta balsamica virtute nobilitata, expectationi & Medici & miseri ægrotantis eximie satisfaciunt.

### C A S U S III.

Vir sanguineo melancholicus annum agens quadragesimum quartum, habitus corporis strictioris, a decem annis passus est dolores tarsum pedis obsidentes, qui tamen non adeo vehementes erant, sed diaphoreticis facile cedebant, ut plurimum autem circa mensem Januarii revertebantur. Hi quatuor ante annos acerbiores facti ægrum lecto adfixerunt, ab hinc autem duobus annis prædicto tempore adhuc gravius afflixerunt. His cum ipsis luctaretur ægrotans, ingenti terrore affectus est, quem diuturnior cura & animi angor excepit: quo pacto dolores interiora occupantes, anxios in abdomine crucia-

*Pod. g.  
retroce-  
dens ex  
frigore  
letalis*



tus excitarunt; qui mox remiserunt mox reversi sunt. Elapsis aliquot septimanis sævissimo frigore regnante, iter suscipere honestus vir debuit: a quo tempore dolores longe truculentiores invasere, qui ventrem, brachia, fauciumque interiora aggressi, quandoque in capite subsistebant, atque somnum & quietem admodum turbabant, aliquando etiam effluxum materiæ foetidæ purulentæ ex aure interna egregio cum allevamento excitabant. Mense Junio ejusdem anni aciculas Egranas usurpavit, sub quorum usu quidem dolores siluerunt & cuncta bene successerunt: absoluta vero cura abdomen multo atrocius affligentes, appetitum penitus profligarunt: ubi alvus pigra, urina coloris naturalis sed parcior reddebatur, virium adebat dejectio, & æger de fixo ac duro tumore supra umbilicum conquerebatur. Nausea quoque tremebatur & saliva copiose ex ore sæpius emanavit, vomituque nonnunquam & alimenta & medicamenta rejecta sunt, siquidem dolor superiora petere, fauces constringere atque ad scapulam usque se extendere sæpius solebat. Flatus ventrem distendentes per totum hinc inde intestinorum canalem cum fluctuatione & borborygmo percurrerant, & ad intestinum rectum ubi pervenerunt, mox regurgitabant, cum quasi exitus ipsis præcluderetur. Notatu dignum fuit, quod per periodos dolores hi infestant, quippe hora pomeridiana quarta, media nocte & ante meridiana decima accesserunt. Variis usus est remediis, & præcipua medendi intentio eo fuit directæ, ut ad ipsos pedes rursus derivaretur infesta materia. Hinc frictiones, pediluvia in usum vocata, venæ quoque in pede celebrata sectio, Hirudines tandem applicatæ, nitrosa cum camphoratis sine diaphoretico administrata, nec usus carminativorum, stomachicorum balsamica temperata virtute inclytorum neglectus; alvus quoque clysteribus, lenioribusque laxantibus

ad officium redactus. Sed successus speratus fefellit. A nulla tamen re præsentius levamen ac a potu lactis calidi cum infuso florum sambuci remixti expertus est, quippe per duos quandoque dies ab eo assumpto dolores conquieverunt. Quatuor abhinc septimanas elixir stomachicum ex amaris balsamicis extractis concinnatum exhibui, a cujus frequentiori usu, dolores sopiti, viresque cum appetitu erectæ fuerunt, adeo ut patiens domo egredi functionibusque suis præesse potuerit. Sed inconstans hæc valetudo fuit, siquidem in manu & dorso dolores rursus apparuerunt, somnum impediverunt; tumor vero umbilicalem regionem obsidens, exterius manu percipi potuit. Tandem his malis diutius insistentibus, succumbere noster debuit, documentum sat clarum relinquens, contra mortis atrociam nullum inveniri remedium posse.

*Epicrisis.*

Ex præfata historia liquide apparet, quam contumax morbus sit ille, & quantum negotii creet medentibus, qui ex doloribus podagricis in corpus retrocedentibus ortum suum habet. Singulare illud est, quod materia, absque dubio, vellicans acris, indolis plus minus fixæ & volatilis, si in extremis articulorum membranis subsistat, & ipsi denegetur ibi sedes & exitus, occupet in abdomine viscera membranacea, nempe intestina, quæ maxime ex membranulis tendinoso-nerveis conflata sensu acutissimo prædita sunt, & similis structuræ ac texturæ cum ligamenti articulorum nerveo-tendinosi ac glandulosi sunt, unde etiam propter affinitatem & structuræ communionem materia peccans mox transit ad intestina, mox rursus ex ipsis ad articulos. At vero, quod talem viam ac modum fervet materia podagrica retropulsa, jam HIPPOCRATES suo tempore eleganter notavit *lib.4. epidem. par.4. aph.3. item Sect.2. p. 20.* hisce verbis: *qui articu-*  
lari



lari morbo detentus intestini dolore dextra parte vexabatur, quietior erat; hoc autem curato magis dolebat. Et memoratu hanc in rem digna sunt, quæ tradit SOLENANDER in *Conf. pag. 77.* ubi ait, *in cura habui nobilem inveterato arthritide occupatum, in sexagesimo quinto ætatis anno constitutum, qui colico dolore reprehensus fuit. Auctor eram ut arthritidis revocaretur, pedum lotionibus, frictionibus, venesectione in pede, monitus ab Hippocrate & Benedicto Sylvatico in Consil. Obstitit autem Senior Medicus & æger interiit. Atqui ego, pergit, idem plane observavi in muliere, quæ arthritide fere semper laborabat, quando a doloribus coli liberata erat, & vice versa, cessantibus coli doloribus misere ex juncturis afficiebatur.*

## C A S U S IV.

*Podagra  
funesto  
nemine  
resione  
pulsas.*

Vir staturæ mediocris, circiter septuagenarius, temperamenti sanguinei, habitus corporis spongiosioris & robustioris, podagricis crebrius afflictus doloribus, aliquot abhinc mensibus ad sedandam cruciatuum atrociam, ipsa in paroxysmi accessione, partes dolentes, spiritu quodam a Pharmacopœo sibi misso, inunxit, a cujus crebriori & continuo usu, omnis propemodum dolor evanuit. Exacto aliquot septimanarum spatio sæva in abdomine tormina passus est, juncta cum vomitu & alvo adstrictissima. Medicus in consilium accersitus, ob metum iliacæ passionis, alvum clysteribus aperiri curavit, aliaque interna, quæ inflammationi resistunt & dolorem levant, in usum vocavit. Inde non modo cessavit vomitus, alvusque soluta, sed & sedatus fuit abdominis dolor, ita prorsus, ut æger e lecto surgere & in publicum rursus prodire potuerit. Sed paucis interjecto tempore paroxysmus modo descriptus, quia hæc valetudinis spes non diu perseveravit, rediit, nisi quod vomitus lenior fuerit: & iisdem iterum

in usum vocatis medicaminibus ad sanitatem perductus est. Duabus vero elapsis hebdomadibus idem paroxysmus repetiit, & adhibitis denuo remediis paruit. At vero aliquoties reversus, iterumque depulsus est. Remansit tamen omnium ciborum fastidium, corpusque in dies consumi cœpit. Interea nunquam rursus podagra affectus fuit, octiduoque nulla amplius persensit tormina: appetentia vero omnis periit, nec alvus nisi adjuta respondit, urina rubicunda, & semper adfuit oris siccitas cum humidi desiderio, lectumque perpetuo custodire ægrotus debuit; qui rebus ita constitutis, inter vivos esse tandem desiit.

*Epicrisis.*

Morbi, quem depinximus, decursus atque eventus, plurimos admonere poterit, quam caute & circumspicte cum podagricis senioribus ratione topicorum agendum sit, siquidem ipsa natura, per senium & morbi vim debilitata tandem fatiscit, atque ad ferum acre impurum, quod artuum doloribus materiam subministrat, per criticum & febrilem motum ad extremas partes & ambitum corporis propellendum, redditur inidonea; quare materia peccans in corpore remanens nervosas & membranaceas ventriculi & intestinorum tunicas infestat, ventrisque tormina efficit: quæ si interna inflammatio excipit, ægri vel subito e medio tolluntur, vel successive marasmo aut hæctico calore vires ipsamque carnem defurante consumuntur. Notabile vero in præfata morbi historia fuit, quod podagricus dolor non redierit, sed per paroxysmos, hujus loco, ventris tormina, vomitus, sitis, inappetentia afflictarint; quæ tamen symptomata per clysterum oleosorum medicaminum diaphoreticorum, cinnabarinarum cum castoreo remixtorum usum exspirarunt: unde consensus intestinorum cum partibus nervosis & tendinosis manuum & pedum, quem in podagricis & chiragra affe-



affectis quam maxime observamus, liquido iterum evincitur. Nam in praxi Medica perpetuum fere est, atrociam ventris tormina ut plurimum transmissio ad artus vitioso humore solvi, & retropulsam etiam materiam arthriticam vel podagricam acerbiora ventriculi & intestinorum tormina & spasmos sequi. Alvus ejusmodi incassibus, ob tonum primarum viarum destructum, officii sui nunquam non obliviscitur, atque per clysteres sollicitata parum excrementorum, sed multos foetidos flatus emittit. Ceterum in senibus, appetitus omnimodivirium prostratio; sitis & oris siccitas, lentam febrem, mortemque imminentem indicant.

C A S U S V.

Podagra  
in hæ-  
morrhoida-  
rio,  
ex opia-  
torum  
usu fa-  
usta.

Vir sexaginta annos natus, spongiosus corporis habitus, hæmorrhoidali fluxui adsuetus, dolorum podagricorum utut mitiorum, vere & autumnoincuntibus, tentatus fuit insultibus. Circa æstatis exitum, horeos fructus refrigerantes liberalius paulo ingessit, & contra podagricos dolores panacæam sic dictam ab empirico assumsit; quæ constabat ex opii crudi in frustula dissecti drachma, cui duæ aquæ liliolorum convallium spirituosæ uncia affusæ fuerunt, & ita leni digestionesteterunt. Hujus liquoris cochleare circa lecti introitum Medicaftersumendum jussit: cujus usus, quod placidiorem somnum conciliabat, per aliquot septimanas continuatus est: & paroxysmi, circa consuetum alias tempus infestare soliti, mirum in modum allevati sunt. At vero, elapsis aliquot hebdomadibus, mense Octobris, febris cum totali virium suppressione, extremorum frigore & perpetua somnolentia insecuta, ægrum omnium præter opinionem jugulavit.

Epicrisis.

Dici vix potest, quod tamen quotidiana declarat experientia, quam

perniciosum sit, consuetos podagricorum paroxysmos valentioribus remediis suppressere, & materiam illam aerem causticam, quæ solemni-ter, utut cum dolore, per congruamunctoria protruditur, intus retinere: quippe tali modo partium internarum inflammationes, spasmi vel sphacelationes, quam in nostro ægro præsentem fuisse nulli dubitamus, perpetuo fere subsequuntur. Non potuit autem non, propinata narcotica medicina in corpore laxioris habitus, senio vicino & a refrigerantium fructuum abusu jam jam debilitato, infautum relinquere effectum: quippe Practicorum fide dignorum observationes confirmant, a solo refrigerantium abusu, corpora podagricorum orci faucibus tradita fuisse.

C A S U S VI.

Podagra  
hereditaria in  
hypochondriaco.

Ante quadraginta propemodum annos, cum in principatu Halberstadiensis, provincialis Medici munus obirem, me consulebat Illustris regiminis Consiliarius, qui parente hypochondriaco & podagrigo natus, jam per decem annos & ultra, vix enim tunc trigesimum quartum superavit, & hypochondriacis pathematibus & doloribus podagricis fuit afflic-tus. Vere & autumnopotissimum invadebant paroxysmi, cum gravativa artuum lassitudine, appetituque aucto, quem postea sequebantur horripilatio cum extremorum frigore & tremore, vomitusque crebriores, quibus liquamina pituitosa & valde corrosiva acida, quæ & dentes stupefaciebant, & pavimento immissa ebulliebant, copiose educebantur. Successit dein febrilis æstus, & tertio vel quarto die acerbii dolores pedes oppetebant, qui ad aliquot sæpe septimanas persistebant, & demum fudore foetido acidum spirante, perque plures dies durante solvebantur. Id vero erat memorabile, quod, si vomitus non præcesserint, paro-



paroxyfmi diutius femp̄ & acerbius pedes affligerint. Inter medicamenta quibus per complures annos ufus fuit, non præfentius folamen atq; lenimen, quam in pulvere abforbente nitrofo, & effentia flor. lilior. convalliom, cum fpiritu vini phlegmatico extracta & fexta parte effentia caftorei remixta expertus eft. Tandem Illuftris hic vir 50. ætatis anno, febre acuta Berolini defunctus eft, & diffeâto corpore pancreas totum fcirrhofum, & valde tumentes etiam glandulæ mefenterii repertæ fuerunt.

### *Epicrifis.*

Hypochondriacos procedente ætate demum fieri podagricos experientia teftatur, id quod ratione quoque demonftrari evidenter poteft. Uterque videlicet affectus natura debiles & a parentibus iifdem morbis laborantibus genitos quam maxime infeftat, atque primarium vitium potiffimum in depravata alimentorum digeftione, crudorum fuccorum abundantia, & excretionum quæ fanguinis & humorum depurationi inferviunt defeâto, confiftit. Deinceps aliquot exemplis compertum habeo, in diffeâtis corporibus & hypochondriacorum & podagricorum, ubi ex fuperveniente alio morbo extingta fuerunt, inter alias vifcerum corruptiones, pancreas fcirrhofum maxime deprehenfum fuiffe, & ubi tale quid repertum fuit, ingentem femp̄ acido ponticorum humorum prima in regione colluviem adfuiffe, quæ appetitus præter naturam auâti, cardialgicæ anxietatis, obftructionis alvinæ, ructuum & vomitionum acidiffimorum fuccorum vera caufa exiftit. Quam inimicum vero acidum fit ad fanguinem delatum, dum temperatam ejus & gelatinofam crâfin imo fluxilitatem deftruit, præternaturalem fpiffitudinem ingignit, excretionefq; retardando, cacochymie & vifcidæ & tartareæ genitrix fit; is quam facile, qui fundamentis phyficom mechanicis morborum generationem explicare novit, poterit penetrare. Ego

itaque femp̄ cum fingulari fructu & hypochondriacis & nephriticis & podagricis, tum ad fymptomatum mitigationem, tum etiam ad fanationem, fi adhuc ejus fpecs fuerit integra, medicamenta quæ acidum deftruunt in primis viis, ut funt abforbentia fibi relicta terrea, quæ fubinde, cum in fal neutrum degenerent, alvum largius fæpe ac fi purgans fumtum fuerit, folvunt, exhibeo; atque infuper elixiria amara temperate balfamica, cum lixiviosis menftruis parata frequentius ufurpanda, injungere ac commendare foleo. Tandem in præfata morbi hiftoria id commemoratu dignum eft, quod etiam in aliis fæpe annotavi, leviores femp̄ arthriticos & podagricos paroxyfmos fieri, quando natura vel fponte vel arte adjuta fefe a colluvie vitioforum humorum per vomitus ante accessum liberaverit; manifefto indicio, originem dolorum efle in primis viis: in cujus afferti confirmationem ipfum adduco MARTIANUM qui ita dicit: *in arthriticis doloribus, ob acorem in ventriculo peccantem a doloribus correptos memini, qui ab iifdem liberati vel levati fuerunt, ubi acida evomuiſſent.* Quod idem ntidem comprobât SYLVIUS Oper. p. 786. aperte fcribens, hanc curam per vomitionem utiliffimam arthritidi, multisque a fe confirmatam experimentis. Imo eadem ratione non paroxyfimum tantum imminuentem fublatur, fed & novi impetus femina extingta fuiffe idem eodem loco fcriptum reliquit. Atque ALPINUS de medicina Ægypt. multos fe vidiffe, qui, cum a podagræ calculique doloribus excruciatifuiſſent, crebro ufu vomitorii egregie adjuti fuerunt, affirmit.

### C A S U S VII.

Vir generoſiffimus, ſexagenario major, ob inſignia merita in ſumma dignitate in hac provincia conſtitutus & illuſtris regiminis conſiliarius, tenerioris & ſenſibilioris quoad corpus & ani-

*Podagra hæreditaria in veterata in corpore remanens, Caroli nis expulſa & allevata.*

num



mun constitutionis, a parente qui fere per totam vitam fuit podagricus, & pedetophis obsessos habuit, genitus, ante 30. fere annos pathemata hypochondriaca, rheumatica, & podagrica expertus erat, quæ procedente ætate magis ingravescebant, & utut moderata admodum diata vitæ ratione inculcata usus fuerit, singulis tamen annis vere & autumnis ob podagram affligentem lecto decumbere, mox breviori temporis mox longiori intervallo, cogebatur. Aliquando vero consue- ta podagra, præter morem & consue- tudinem, solito tempore non recurre- bat, sed quia materia vitiosa intra suc- cos vitales retinebatur, multis ac gra- vissimis tentabatur symptomatibus: continuis nempe ventriculi eructatio- nibus, cordis palpitationibus, tremore artuum, inquietudine, dolore capitis acuto, tractorio, lancinatorio, circa tempora, circa nucham, accedente co- gitationum confusione memoriæque debilitate. Consulebat me atque Clar. D. D. *Strauchium* Archiatrum Mar- tisburgensem, qui sæpius frequentave- rat *Carolinas*, atque in primis ex nobis quærebat, num has thermas sanitati suæ profuturas judicarem. Hic lon- giori experientia edoctus, statim con- silium probavit; cui ego quoque facile absentiebam: & ille cum eo ad fon- tes hos salutiferos profectus fuit, a qua- rum interno usu decenti cum regimi- ne instituto, in tertia & ultima cura; vehemens paroxysmus podagricus, qui tamen non nisi per septem dies dura- bat, ipsos pedes corripiebat, remitten- tibus mox omnibus prioribus sympto- matibus. Inde optime quum se ha- buisset, binis adhuc vicibus, aquas hæce thermales cum summo fructu semper usurpavit.

*Epicrisis.*

Ego sane complura possem recense- re & allegare exempla, quæ mirabilem & incomparabilem plane horum fon- tiū virtutem & effectum in atrocibus & contumacibus morbis expugnan- dis, qui ab arthritica & podagrica ma-

teria remanente in corpore vel impro- vide retropulsa oborti fuerunt, de- monstrare valerent, qui potissimum in eo consistebant, quod materiam mor- bificam ad pristina sua loca ex interio- ribus relegaverint, conquiescente mox omnium symptomatum periculosissi- morum syndrome. Vidi colicas spas- modicas, vidi asthmata convulsiva, affectus soporosos, morbos melanco- licos cum sensuum & rationis pertur- batione conjunctos, pertinacissimas- que tussis, atque pulmonum infarctus, qui non nisi a materia podagrica re- manente vel retrocedente originem suam habuere, hac ratione divino ad- jumento felicissime subactos & cura- tos; maxime vero, si non semel, sed bis vel ter in usum decentem fontes ducti fuerint.

C A S U S VIII.

Vir generosus, per strenuus Chiliar-  
cha, non procul ab hac urbe degens,  
corporis macilentioris, fibrosi tamen  
& robusti, superato jam 66. anno, in  
gravem & exitialem incidit morbum,  
cujus profligandi causa, me in consi-  
lium vocavit. Is jam certe 10. annos  
doloribus podagricis, mitioribus ta-  
men & obtusioribus vernali tempore  
fuit obnoxius, neque minus his defi-  
cientibus, acerbis abdominis dolori-  
bus, sive potius intestinorum stricturis  
spasticis vexatus. Ante annum Gene-  
rosus hic vir, sub initium hiemis, præ-  
gressa vehementi corporis refrigera-  
tione, neque minus ingenti animi,  
quam tamen prudenter compressit,  
indignatione, desubito truculento ad  
suffocationem usque asthmate convul-  
sivo corripitur. Ego tertio die accedens  
morti ferme proximum inveni: nam  
sub summa virium prostratione ad  
animi usque defectionem, pulsu duro,  
debili & tremulo, extremorum frigo-  
re, & sub cogitationum ac rationis  
turbatione, ægerrime & cum sonitu  
spiritum ducebat. Primo omnium cly-  
steres injiciendos, ad sordes alvinas  
cum

*Podagra  
levior,  
ex ira,  
& re-  
frige-  
ratione  
facta  
gravi-  
ter &  
meteo-  
statica.*



cum flatibus educendas, curavi: dein mixturas blande diaphoreticas & discutientes, singulis horis sumendas, præscripsi. Factum hinc DEI beneficium est, ut ad omnium adstantium admirationem, intra quinque dies somnum, qui plane fuerat antea sublatus, capere & respirare sine molestia æger cepit, atque successive ingentem viscosæ materiæ copiam tussi ejecerit. Verum non ita multo post, de doloribus ac cruciatibus ipsius abdominis Generosissimus Vir conquerebatur, qui in dies incrementum, intolerabiles evasere. Alvus adstrictissima, præcordiorumque adfuit anxietas atque inquietudo. Sed singula hæc adhibitis idoneis remediis, expulsa e sede sua materia hostili, conquiescere cœperunt: relicta tamen statione sua in regionem inguinalem non procul a virili membro hæc ipsa descendit, atque in musculis ibi conspicuis, præcedente gravi dolore & inflammatione, abscessum efformavit insignis certe magnitudinis, qui post suppurationem factam demum apertus plus quam libram puris per vices fundebat. Dum consolidari cœpit, truculenti dolores pedes infestare cœperunt: quos etiam commoda medicina abegimus, relicta tamen debilitate & tumore œdematoso. Decursus autem hujus morbi valde ancipitis & difficilis trium fere mensium spatium duravit. In retea valetudini perfectæ fuit redditus Generosissimus ægrotans.

#### *Epicrisis.*

Medicamenta, quæ in toto hujus morbi decursu in usum duxi, non alia fuerunt, præter clysteres & cataplasmata, quam mixtura ex ptisana, aqua cardui benedicti, florum sambuci & cerasorum nigrorum, adjectis, pulve-

re meo bezoardico leniter camphorato, succo citri, liquore anodyno minerali, & succo papaveris albi composita: quandoque mixturæ simplicis aliquot guttas pro dosi adjeci. Quæ plus quam vicesies reiterata usus fuit. Præter hæc, infusum Theiforme, ex herba veronicæ, salviæ, floribus sambuci, semine fœniculi, & decoctum nostrum usitatum pro potu ordinario largius sumendum præcepi, interposito interdum electuario vel elixirio pectorali, quia tussis longo tempore insistebat. Ceterum me tam vehementem metastasin in morbo nunquam observasse memini. Atque ex hac morbi historia & curatione, illud curiosi naturæ & Medicinæ scrutatores, meo quidem judicio, addiscere possunt, eam esse materiæ quæ dolores in articulis creat & fovet indolem & crasin, ut vix ab ulla medicina immutari, alterari & ejus pernicialis vis destrui possit: licet enim in præsentia casu reliquerit suam sedem, nihilominus salva hostili indole & crasi permanente, eandem suam vim in aliis & compluribus locis exercuit, ut adeo remediorum, quæ vulgo & a Chymicis atque ac Medicis minus in praxi versatis, tantis laudibus passim venditantur ac celebrantur, & ad aucupandum magis argentum quam salutem afferendam apta sunt, inanis atque plane impotens facultas clare demonstrari possit. Cordatus autem & prudens Medicus in sanando ejusmodi morbo nihil aliud efficere vel præstare potest, quam ut temperiem & texturam earum corporis partium quæ nondum simili vitio affectæ, integram servet, quo morbosa materia successiva & blanda evaporatione & discussione per universale cutis emunctorium feliciter excludatur.



FRIDERICI  
HOFFMANNI  
MEDICINÆ  
SYSTEMATICÆ.

*TOMI QUARTI,*

Quo specialis Morborum Pathologia, & huic superstructa solida  
Therapia cum medendi Methodo cautelis clinicis, &  
Morborum enarrationibus adjuncta  
Epicrisi, exhibentur,

*PARS TERTIA*

DOCTRINAM SPASMODICORUM

*Et Convulsivorum morborum perspicua & demonstrativa  
Methodo tradens.*



VENETIIS, MDCCXXXVII.

EX TYPOGRAPHIA BALLEONIANA.

*SUPERIORUM PERMISSU, AC PRIVILEGIO.*







OMNIBUS ET SINGULIS  
 MEDENDI SCIENTIÆ DEDITIS.  
 Q U I  
 A R T E M  
 HIPPOCRATICAM  
 EXPERIMENTO PERICULOSAM

Et judicio difficilem secura facili & rationali curandi Me-  
 thodo tractare, & continua observatione ac sedu-  
 la meditatione artis incrementa in salu-  
 tem humani generis promo-  
 vere gestiunt,

H U N C T O M U M  
 DE LONGIS ET GRAVIBUS AFFECTIBUS

*Qui agit sacratum & Dicatum Voluit*

A U C T O R :





# P R Æ F A T I O .

**E**Xhibeo nunc candido & erudito Lectori tertium therapeutices tomum, qui ad medicinam systematicam rationalem pertinet. In hoc præcipue atroces convulsivi generis morbos, qui vel universum corpus occupant, vel certis tantum partibus graviter infesti sunt, explicandos & pertractandos sumsi. Videtur quidem horum affectuum æthiologia & rationalis evolutio non adeo facilis, sed valde ardua; eo, quod non ex causis mechanicis, ut febres, hæmorrhagiæ, & spasticæ affectiones, explicari posse videantur, sed altius & eminentius quoddam principium ex parte pro causa agnoscere: nempe animæ voluntatem, utpote in epilepsia, & universalibus istis motibus convulsivis partes voluntati, & animæ imperio subjectas graviter exerceri, atque in cerebro, quod & medicorum, & philosophorum consensu pro sede & domicilio animæ habetur, originem suam petere, constans & rata



rata ab omni ævo medicorum est sententia . At vero quam obscura, abdita, & multis difficultatibus, atque dissensionibus natura animæ humanæ, ejusque potentia, & operandi ratio in corpus sit innexa & implicita; nemo facile inficiabitur : neque doctiores medicorum usque eo inter se conveniunt, an anima immediato & incorporeo actu, membra moveat, & percipiat, an medio quodam materiali, fluido nimirum nerveo mobilissimo, quod veteres spirituum animalium nomine indigitarunt, ad hos actus opus habeat. Ut itaque ego in re difficili & non exigui momenti & considerationis meam, quatenus ad praxin medicam spectat, sententiam proferam; dico primum corpus humanum neutiquam esse puram machinam, ex diversi generis partibus & organis, summa & divina sapientia inter se connexis, ad motus, qui potissimum conservationi ejus vitali inserviunt, constructam; sed cum altioris originis & naturæ, spirituali nempe principio, quod & percipiendi, & intelligendi, & res invicem discernendi, & certos quosdam motus dirigendi potentiam habet, mutua & intimiori unione esse conjunctam . Num vero exquisitior hujus principii incorporei & spiritualis cognitio Medico ut medico summe & absolute scitu sit necessaria, id est, de quo valde dubitamus . Neque aliud HIPPOCRATEM voluisse mihi persuadeo, dum in principio libr. *de nat. hum.* qui genuinus ejus fœtus unanimi Criticorum consensu habetur, ita scribit : *Quicumque de natura humana amplius differentes audire consuevit, quam quod ad medicinam pertinet, huic non est commodum hunc meum sermonem audire .* Jam vero in his, quæ sequuntur, prolixè demonstrat, corpus humanum ex certa & temperata elementorum & humorum proportionè, qui pro differentia ætatum, temporum anni, regionum, victus, & aeris differunt, constare, & ad hanc medicum in morborum causis investigandis, & adpositis ad eas expugnandas inveniendis remediis unice respicere & attendere debere . Quibus certe clare innuit, verum medicinæ objectum esse corporis humani mechanismum, ( neutiquam ve-



ro moralissimum, ut nonnulli nostri temporis Medici opinantur.) illum autem a causis maxime externis & corporeis sustineri, & mutari; & hinc sanitatis, mortis, vitæ, morborum, & sanationis originem & fontem esse. Equidem non negandum, animam ad movenda certa membra, imperium & directorium quoddam habere, uti in voluntariis id clare adparet motibus; neque negandum est, animam humanam motus & animales, & vitales, & naturales turbandi, & invertendi magnam possidere potentiam, ut in gravioribus animi adfectibus, & viribus corruptæ phantasiæ adparet luculentissime. Quod autem anima motuum vitalium, & animalium quoque proxima & efficiens causa sit, in quam medicina vim quandam sanantem exserere possit; ab hac sententia utique me prorsus alienum esse profiteor. Nam rebus paullo altius perpensis, clare intelligimus, animam sine mediis & causis physicis ac mechanicis nihil plane posse in humano corpore, nec intelligere, nec cogitare, nec sentire, nec motus certos dirigere, vel etiam ordinatos immutare, aut inordinatos in ordinem revocare; multo minus motus vitales, cum quibus maxime medico negotium est, ut sunt cordis, arteriarum, & omnium vasorum fibrarumque efficere. Quod assertum, tanquam longe in medicina utilissimum, ut paullo firmiter argumentis corroboretur; operæ fore pretium arbitror. Ecquis doctiorum medicorum ignorat, læso & non integro organo sensorio, ut oculo, aure, vel etiam motorio, ut musculo, animam nec movere, nec sentire, nec videre, nec audire posse; eoque vitio per artem medicam restituto, integros rursus evadere sensus. Videmus quoque organis & sensoriis & motoriis recte, & secundum naturam constitutis, beneque conformatis, animam nihil efficere posse; licet efficacissime velit, nisi affluxu sanguinis arteriosi, vel liquidi nervosi bene constituti illa robur & vigorem accipiant. Neque amplius obscurum esse potest, tota cerebri structura salva, salvis nervis & membranis, salvis etiam sensuum organis, cessante vero vel

defi-



deficiente sanguinis , ob cordis languidiorem systolen  
motu ad caput , omnem sensum , omnem memoriam , o-  
mnem cogitationem , & intellectum simul & semel peri-  
re . Simulac vero hic motus per congrua remedia resti-  
tuitur , ut videmus in syncopticis , illico animæ opera-  
tiones rursus observantur . Sanæ rationis in homine usum  
a placido & temperato sanguinis per cerebri vasa pro-  
gressu dependere , Divus Senex passim in scriptis suis  
docuit ; adeo , ut L. de flat. asserat , sapientiam homi-  
ni per bonam diætam præstari posse . In omni delirio ,  
sive aberratione mentis , vitium & causam vel in ipsius  
cerebri substantia , aut ejus membranis , præsertim dura  
matre , vel in minus temperato vitiosi sanguinis motu  
constare , ex eo satis recte colligitur , quod sublato hoc  
per remedia convenientia , vitio menti restituatur sani-  
tas . Surrexerunt nostro tempore medici quidam , qui  
affirmare ausi sunt , animam sine ope & sine medio flui-  
di cerebri & nervorum omnes motus & sensus in cor-  
pore efficere posse , hoc fundamento maxime innixi :  
quod tubuli & eorum cavitates in nervis non conspici  
possint . Sed qualis hujus argumentationis sit infirmitas ,  
vel ex eo intelligi potest : quod testiculi & hominis & a-  
nimantium nil nisi congeries sint minimorum , subtilissi-  
mum succum vehentium & secernentium vasculorum ; li-  
cet eorum cavitates oculos visumque plane effugiant .  
Plantarum folia & flores , & fructus quoque tenuissimo  
succo per minutissimos canales nutriri , tam certum est ,  
quam quod certissimum . Qualis vero sit usus & cerebri  
& nervorum , ipsi hujus sententiæ auctores ignorant .  
Quum autem in doctrina medica potissimum a postero-  
ri , & per effectus , in rerum & causarum cognitionem  
pervenire liceat ; & quotidiana doceat experientia , a  
tenuissimo fluido , quin a solis effluviis & exhalationi-  
bus , animales actiones plane interturbari , perverti & fi-  
sti posse , uti patet in ebriosis , in iis , qui narcotica me-  
dicamina majori copia sumserunt , vel copiosum carbo-



num accenforum fumum inspiratione hauserunt, dissipatis hinc cunctis & animalibus, & vitalibus viribus, quæ tamen solo sæpius analepticorum remediorum usu, vel naturæ amico & suaveolenti odore protinus resuscitantur: ecquis igitur negare audeat, fluida summæ activitatis & virtutis motricis ad motus & sensus præstandos concurrere debere. Hisce satis solidis argumentis aliud majoris fere ponderis subjungendum esse puto, animam in corpore humano plane nihil posse efficere sine motu vitali: cujus essentia & formalis ratio in alterna & reciproca cordis, arteriarum; ac vasorum & fibrarum systole & diastole, & inde fluidorum sanguinisque pendente progressu & circuitu consistit. Nunc vero celebris oritur quæstio: unde hic vitalis motus causam & originem suam trahat? Recentiores quidam animam, & quidem rationalem, hanc esse, omni modo & labore contendunt. Sed nullo unquam argumento id demonstrarunt. Verum ego cum aliis solertioribus rerum naturalium scrutatoribus primam & veram virtutis motricis & systalticæ activæ vitalis, quæ in fibris, & tunicis musculosis, corde, arteriis, canalibusque viget, causam in parte subtiliori expansiva, elastica spirituosa atmosphærici aeris, cum fluidis corporis nostri intime permixta, rectissime quærendam esse duco. Nec hominem, nec ullum animal sine respiratione, sine aeris in pulmones vel sanguinem ingressu vivere posse, nullus amplius dubitandi locus est; adeo, ut subtracto aere, vel eo non renovato, vita animantis mox pereat. Atque sicut flamma candelæ inclusa vasi aere pleno mox extinguitur; ita etiam id accidit cum omnis generis animantibus: quoniam uti intestinus partium sulphurearum, quæ flammam constituunt, motus eodem modo, intestinus partium sulphurearum sanguinis, ab aeris fluido sustinetur. Ad flammam itaque pariter ac vitam conservandam renovato semper opus est aere, quo vaporibus qui refertus est, expellatur, atque recens & novus in ejus locum succedat. Causam vero respirationis, ad vitam

ne-



necessariæ, si quis inde repetere velit, quod aeris ingressus in thoracem ad expansionem vasorum pulmonalium, & consequenter ad liberiores sanguinis ex uno cordis ventriculo in alterum progressum, tantummodo summæ sit necessitatis, eum valde errare existimo: quia animantium, vel a subtracto aere, vel ab eo vaporibus nimium referto mortuorum pulmones, aperto corpore valde inflati adparent. Ego multos homines, qui suffocatione mortui fuerunt, novi, in quibus post dissectionem tota thoracis cavitas pulmonibus inflatis distenta fuit. In aere itaque, catholico illo summæ activitatis fluido, elastico, vitam seu potius ejus pabulum, imo causam quærendam esse, non sine ratione & fundamento, veteres æque ac recentiores Philosophi affirmarunt. Divus Senex passim in scriptis suis, L. de flat. de morb. sacr. de diæta &c. aerem sensum & motum præstare membris, & maximum in omnibus, quæ corpori accidunt, auctorem, dominum, & morborum quoque causam esse, disertè & expressis verbis asseverat: & hanc ob causam etiam in libris suis Physicis de aere, aquis, natura humana, de locis in homine &c. a natura regionum, locorum, a diversa temporum anni & tempestatum constitutione, prout aere plus vel minus salubri fruuntur, tantas mutationes in corpore humano ratione roboris, sanitatis, morborum, viriumque derivat, & ut ad hæc attendant, medicos monet summopere: quin imo ob eandem causam sapientissimus ille & antiquissimus medicorum ad sanandos longos morbos aeris & locorum mutationem commendat, quod assertum ipsa etiam experientia confirmavit. Vero itaque simillimum est, medicum in doctrina, quæ agit de vita, morbis, eorum causis, iisque sanandis, ad causas maxime physico-mechanicas, evidentes, & rationi sensibusque obvias, sine quibus etiam id, quod præest nostræ machinæ, spirituale principium nihil agere vel operari potest, respicere, & inde demonstrationes & explicationes suorum dogmatum mutuari debere: siquidem is recte suo fungitur munere, qui causis morbo-

bo-



borum continentibus & proximis recte occurrere, & se se opponere didicit, non ad valde remotas, multo minus obscuras, abditas, & incomprehensibiles, quas inter principem anima sibi vindicat locum, attendendo. Et ut hæc exemplo illustremus: omnibus obvium est, a graviore quodam animi adfectu, v. g. ira, terrore &c. gravissimas corpori nostro induci afflictiones, cujus generis sunt epilepsia, motusque convulsivi spasmodici, qui totam naturalem motuum evertunt œconomiam. Nihilominus in cura, non ad ipsam hancce causam remotam, sed ad proximam, quæ effectus est perturbatæ animæ, ut videlicet motus irregulares & inordinati convenienti diætâ & medicina in ordinem redigantur, humorum intemperies corrigatur, & quod vitiatum corruptumque inde fuit, ex sphæra corporis convenienti modo, & per congruas vias eliminetur, respicere oportet rationalem medicum. Hac doctrina, quæ antiquissima & HIPPOCRATICA est, & quæ pure physicis mechanicisque nititur principiis & rationibus, medicinam dogmaticam nostram & systematicam tam docendo, quam scribendo, usque eo pertractavimus, & ea etiam in conscribendo sicuti universo nostro systemate, ita quoque hoc tertio Therapeutices Tomo usi sumus; in quo potissimum de morbis, qui actiones animales lædunt, & convulsivi dicuntur, egimus, eorumque causas & modum, quo functiones secundum naturam pervertunt & turbant, clare & perspicue demonstravimus. Quos inter morbos principem fere epilepsia tuetur locum, cujus origo & genesis, & mali sedes ac causa, ejusque effectus in corpus usque eo valde obscura & perplexa latuit; & quidem ut puto, eam ob causam, quod duræ matris mechanica structura, & usus ad functiones animales, & quæ fiunt in cerebro, & nervorum systemate, nec anatomice nec physice recte cognita perspectaque fuit. Quod videlicet illa, ut VIEUSSENS in *Neurol. L. I. cap. II.* & PACCHIONIUS *tr. de dura matre, & in epist. ad Doctorem Vesti*, Venetum medicum, probe annotarunt ex duplici serie fibrarum musculofo tendi-



dinosarum, obliquo modo sese interfecantium, & decussatim sibi invicem intertextarum composita, musculum sui generis membranaceum constituat; qui dilatatione sua sanguinis introitum in arterias cerebri adjuvat, & qui alternativa sui constrictione, cerebrum ejusque vasa comprimendo, subtilissimum fluidum, e sanguine secretum, in corticalem ejus substantiam, & ab hac in tubulos nervorum medullares exprimit & propellit, adeo, ut dura sic dicta mater cerebrum & nervos involvens sit primarium illud motus progressivi fluidi, quod in nervis est, instrumentum; sicut cor ipsius sanguinis, dum nimirum motu gaudens systaltico & diastaltico sanguinem per totum corpus circumagit. In morbis itaque gravioribus capitis, cerebri & nervorum, hanc partem quam maxime præter naturam & quidem, vel a sanguinis nimia ibidem congesti mole, stagnatione, vel ejus intemperie stimulante salina, acri, caustica affici, certissimum est: unde illius actio & functio naturalis variis modis, sive ab intensione motuum, nimirum spasmus, sive ab atonia, aut remissiori & languescente motu læsa, gravissimos universi corporis spasmodicos ac convulsivos parit morbos. Neque ibimus inficias, graves illas animi perturbationes, ut est vehemens ira vel terror, immediate & proxime in principem hanc actionum animalium partem, duram nempe matrem, hostilem suum effectum & potentiam exserere: unde graves generis nervosi capitisque morbi suam trahunt originem: & sicut per hos affectus systole ejus nimis augetur, seu spasmus inducitur; ita diuturna animi tristitia & angor hanc virtutem systalticam nimium imminuendo, & relaxando fibras, morbis producendis aptissima sunt. Et hoc maxime obtinet in iis morbis cerebri gravioribus, nec non convulsivis, qui universam motuum œconomiam perturbant. Aliter se res habet in motibus convulsivis certarum partium v.g. cordis palpitatione, singultu, vomitu, asthmate convulsivo, tussi &c. ubi ipsæ partes motu systoles & diastoles instructæ immediate a causis

fis



sis materialibus præter naturam læduntur & afficiuntur ; motus vero voluntarii salvi manent ac integri. Horum singulorum morborum & symptomatum generum & rationalem explicationem, summa facilitate & perspicuitate, quantum in nobis fuit, in hoc Tomo persequuti sumus, & secundum causas & naturarum differentiam ex indicantibus, & contraindicantibus, genuinum medendi ordinem, ac convenientem remediorum adplicationem cum necessariis observationibus, & cautelis specialissimis adjunximus : & denique clinicis morborum historiis, candide & ingenue adductis, doctrinam nostram illustrare laboravimus. Quisque hinc diligens & peritus Lector facile perspiciet, quanta observatione, quanta attentione, quantoque judicio opus sit, pro circumstantiarum ratione salubre & appositum remedium invenire & recte adplicare, ne contra nostram voluntatem, quod proh dolor! per sæpe evenit, plus noceamus, quam prosimus. Quemadmodum vero in doctrina medica, ita quoque in medendi methodo, antiquissimum medicinæ parentem sequuti sumus ; quæ, ut rem in compendio proferam, in eo consistit, ut causis evidentibus atque proximis, quæ vel numero, sive quantitate, vel mensura sive qualitate, vel pondere sive motu peccant, probe cognitis circumspectisque, juxta definitionem ab HIPPOCRATE *L. de Flat.* traditam, ratione quantitatis, temperiei atque motus, quæ superflua sunt, auferamus, & quæ in his deficiunt, per congrua adjiciamus medicamina. Recte enim dixit gravis ille auctor, medicinam nihil esse, nisi adpositionem & ablationem : adpositionem quidem eorum, quæ deficiunt ; ablationem, quæ excedunt ; & addidit, illum, qui hoc optime facere potest, optimum censeri medicum ; quantumque quispiam in eo deficiat, tantum ab ipsa arte deficere. Sicut igitur sanitatem, sive integritatem ac vigorem actionum humanarum, in eo potissimum sitam esse observamus, ut novo semper aere, novisque reficiamur alimentis, atque ut excreta ingestis nunquam non respondeant :



deant: ita e contrario ab ingestis vitiosis, & eorum, quæ excerni debebant, retentione, materiales morborum causas progigni tam certum est, quam quod certissimum. Quoties enim cunque sagax medicus primam morborum originem investigare gestit: nullum eorum, nisi a retentis per alvum, per urinam, per transpirationem sordibus excrementitiis, & suppressis inutilium atque superfluum, quin etiam sanguinis excretionibus v. g. per vasa uterina, hæmorrhoidalia, & in juvenili ætate per nares, aut sordibus, quæ per cutim effluerunt, improvide repressis, oriri animadvertet. Præcipuum itaque sicut naturæ, optimæ morborum medicatricis, ita & sequacis artis opus est, ut debito modo, ordine, tempore, congruoque loco excrementitiæ morbosæ quæ materiæ e corporis sphaera per convenientes removeantur medicinas; cujus generis sunt sanguinis detractio per venas & cucurbitulas, aliarumque sordium evacuatio per alvum, per vomitum, per urinas, per sudorem, & transpirationem, per abstinentiam, per motum, per vesicatoria, fonticulos, setacea, & id genus plura: de quibus, eorumque usu, antiquissimi medicorum, & in iis HIPPOCRATES atque CELSUS *Lib. II.* fusius egerunt. Ad hanc salutarem materiæ perniciosæ excretionem juvandam, permultum profecto sic dicta alterantia, quæ mobilem & ad evacuationem opportunam reddunt materiam, viasque simul respiciunt, & has obstructas referant, contribuere deprehenduntur. Et cum motus denique solidarum pariter ac fluidarum partium, qui formale morborum constituunt, vel nimis aucti, vel nimium depressi sunt, eoque ipso curationis successum mirum quantum sæpius remorantur: præbuit quoque ea benignissimum Numen nobis remedia, quæ non modo vires motusque languentes erigendi ac resuscitandi, verum etiam excedentes placide consopendi, reprimendique egregia pollent efficacia. Hac itaque simplici, facillima, antiquissima,

na-



naturali ; & humanæ rationi ac experientiæ convenientissima physico mechanica methodo , nos usque eo , ut in omnibus morbis , ita quoque atrocibus illis & terribilibus generis nervosi , de quibus præsens agit tomus , affectibus sanandis , non sine prospero sub divina gratia successu usos fuisse , attentus , ab omnibus præjudiciis vacuus , & qui veritatem sine ambitione sectatur , lector perspiciet clarissime . Valde , Lector benevole , hisque feliciter fruire : si Deus suppeditabit viam , viresque , hunc Tomum mox sequetur quartus & ultimus .



# CONSPECTUS CAPITUM

Q U Æ

HOC TOMO CONTINENTUR.

Sect. I. Cap. I. de Epilepsia	pag. 1
II. Motibus convulsivis	26
III. Motibus spasmodicis vagis	44
IV. Catalepsi	61
V. Malo Hystetico	71
VI. Malo Hypochondriaco	94
Sect. II. Cap. I. de Palpitatione cordis	128
II. Asthmate convulsivo	146
III. Tussi rheumatico convulsiva	173
IV. Singultu	195
V. Spasmodicis œsophagi morbis	209
VI. Vomitu	224
VII. Dysenteria	245
VIII. Cholera & diarrhœa biliosa	268
IX. Abortu	289



# NOI REFORMATORI D E L L O STUDIO DI PADOA:

**H**Avendo veduto per la Fede di Revisione, & Approbatione del P. F. Tomaso Maria Zennari Inquisitore nel Libro intitolato *Federici Hoffmani medicina rationalis systematica Tomi 4.* non v'esser cos'alcuna contro la Santa Fede Cattolica, e parimente per Attestato del Segretario Nostro; niente contro Principi, e buoni costumi, concedemo Licenza a *Sebastiano Coleti Stampatore*, che possi esser stampato, osservando gl'ordini in materia di Stampe, & presentando le solite copie alle Pubbliche Librerie di Venezia, & di Padoa.

*Dat. 31. Luglio 1735.*

( Zan Pietro Pasqualigo Ref.

( Michiel Morosini Kav. Ref.

(

*Agostino Gadaldini Seg.*

1735. 22. Novembre.

Regist. nel Magist. Eccell: contro la Bestemia.

*Angelo Legrenzi Seg.*



## C A P U T I.

## D E

## E P I L E P S I A .

## §. I.

Ratio  
deno-  
mina-  
tionis  
variæ  
epilep-  
siæ.

**I**nter tot calamitates & afflictiones, quibus genus humanum post tristem & miserum lapsum subinde infestatur, nulla mihi ferocior, nulla tristior, nulla terribilior videtur, quam universalis illa externarum partium præter voluntatem concussio, & vehemens agitatio, cum sensuum tam internorum, quam externorum interceptione stipata, quam vocant epilepsiam. Non enim solum sub hoc diro malo corpus variis, iisque indignis plane deformatur modis: sed etiam ipsa mens ac animæ sede sua quasi dimovetur. Hic quoque horribilis ægrotantium aspectus, & insignis symptomatum vehementia causam quærentibus offert, cur veteres hunc morbum *κατ' ἐξοχήν* dixerint magnum, Herculeum, Divinum atque sacrum. Dicitur enim magnus atque Hercules ob suam vehementiam, & quoniam vix superari arte humana potest; Divinus, quasi a Diis in vindictam missus, & opem humanam eludens; & denique sacer, quod sacram corporis partem, mentisque, quæ sanctissima est, sedem occupat.

## §. II.

Defini-  
tio epi-  
lepsiæ.

Sed ne in nominibus subsistamus, aggrediamur rem, & epilepsiam describimus, quod sit invita, præternaturalis ac summe violenta partium nerveo membranarum, hinc musculorum & totius corporis concussio convulsiva, cum sensuum abolitione stipata, a membranarum cerebrum, spinalem medullam, ac nervos cingentium spas-

modica strictura, & hinc fluidi mobilissimi impetuosiori in organa motoria, pariori in sensoria influxu, natales suos mutuans.

## §. III.

Progressus hujus morbi una cum symptomatibus ita se habet: Interdum subito & præter omnium opinionem invadere solet; unde Græcis epilepsia dicitur; sæpius vero illius accessionem præcedunt, atque significant quædam symptomata. Horum potissima sunt: totius corporis lassitudo, capitis gravativus dolor cum quadam sensuum perturbatione, inquietus somnus, insolitus pavor, visus obtenebratio, aurium tinnitus: in quibusdam cor incipit valde palpitare, præcordia inflantur, respiratio intercipitur, murmura sentiuntur in ventre, alvus emittit foetida; urina mingitur larga, artus refrigerant: in quibusdam a partibus extremis auræ frigida ascensus ad superiora versus cor & cerebrum percipitur. Tum quidam subito in terram concidunt (unde morbus caduci etiam nomine venit) pollices arctissime intra volas manuum includuntur, ut vix magna vi extrahi possint, oculi contorquentur, invertuntur, ut non nisi album conspiciatur, perit omnis sensatio, ut nullo clamore, nullo odore, utut fortiori, nullo tactu acutiori excitari possint; spuma cum sibilo ex ore provenit, lingua dentibus laceratur, artus vehementer tremunt, & succutuntur. Variantur vero & convulsiones, & sensuum læsiones tam gradu, quam specie: nam interdum loco motuum convulsivorum spasmus valde rigidus membra corporis totius prehen-

Morbi  
histo-  
ria.



dit, ut hæc distenta nec per vim explicare liceat, ac totum corpus subinde tam rigidum sit, haud secus, ac si ligneam statuem quis movere velit. E-rigitur quoque penis in infantibus; in adolescentibus semen ejicitur, & sæpius urina ad magnam distantiam prorumpit. Tandem horum symptomatum sequitur remissio; ut longiori vel breviori intervallo ad se redeant; tum vero adhuc de dolore, torpore & gravitudine capitis, omniumque artuum lassitudine conquerantur. Qui ulteriorem symptomatum recensionem cognoscere cupit, adeat inter veteres **COELIUM AURELIANUM Lib. I. Cap. IV. & ARETÆUM Lib. I. Cap. V.**

## §. IV.

Paro-  
xyfmo.  
rum ra-  
tio.

Ipsi hujus mali paroxyfmi, qui pro-  
causarum ac corporum diversitate vel  
crebriores aut rariores, vel longiores  
aut breviores sunt, plerumque certa  
temporis periodo, certis diebus aut ho-  
ris, vel etiam mensibus, circa lunae  
mutationes & quadras, præsertim no-  
vilunium & plenilunium, maxime in  
sequiore sexu circa mensium tempus  
revertuntur; & quod maximum est,  
a levi sæpe causa & occasione, e. g. a  
quavis subita animi perturbatione,  
terrore, iracundia, repentina lætitia,  
a seria animi contentione & medita-  
tione, a potu inebriante, a nimio ca-  
lore vel frigore, vel veneris exerci-  
tio, protinus recrudescent.

## §. V.

Subje-  
cta epi-  
lepsiæ.

Neque vero ignorari oportet, nul-  
lam esse ætatem, in quam frequentius  
epilepticum malum tyrannidem suam  
exerceat, quam infantilem, adeo,  
ut a nonnullis eandem ob rationem vo-  
cetur morbus infantilis ac puerilis. Hinc  
crebrior attestatur experientia, maxi-  
mum numerum, & dimidiam ferme  
infantium partem singulis annis in qua-  
vis urbe convulsionibus vel a dentitio-  
ne difficili, vel a gravibus intestinorum  
torminibus, quæ meconium retentum  
aut lac corruptum produxerunt, subor-  
tis interire. Et omnes ferme infantum

morbos, sive fuerint chronici, sive  
acuti, præsertim vermibus complica-  
tos, plerumque cum epilepticis ac con-  
vulsivis stipari motibus, in propatulo  
est; sicuti vel solo morbillorum aut va-  
riolarum exemplo luculenter patet.  
Præterea nec fugiet eos, qui in fre-  
quenti artis versantur exercitio, fera-  
lem huncce morbum subjectis spongio-  
sioris, mollioris ac succulentioris cor-  
poris habitus, texturæque tenerioris,  
& tam animi quam corporis ratione  
sensibilioris longe esse frequentiore,  
quam iis, quæ robustiorem obtinent  
naturam. Testantur id rusticorum li-  
beri, qui sub variolarum exclusione, a  
lacte per cibos animique pathemata  
corrupto, & sub dentium eruptione  
non tam facile epilepsia corripuntur,  
quam infantes sensibiliores, tenerio-  
res, in urbibus delicatius enutriti.

## §. VI.

Neque est ullus morbus magis genti-  
litius, & qui tam facile a parentibus in  
liberos devolvitur, quam epilepsia:  
cujus fundamentum in partium nervo-  
sarum & membranacearum textura ni-  
mis sensibili & ad motus anomalos su-  
scipiendos admodum apta, hæredita-  
rio jure ad infantes propagata collo-  
candum est. Neque porro minus ii,  
qui caput a natura vel errore in diata  
commisso a primis annis valde debile  
& imbecille habent, atque coryza, o-  
culorum ac aurium defluxionibus,  
glandularum colli tumoribus, achori-  
bus & capitis tinea crebrius divexan-  
tur, vel in puerili ætate frequentes pa-  
tiuntur narium hæmorrhagias, præ-  
aliis insignem ad epilepticas passiones  
obtainent proclivitatem.

## §. VII.

His prælibatis, ad causam atque se-  
dem mali epileptici transgrediendum  
est. Hanc in cerebri læsione sitam esse,  
nemo est, qui in dubium vocabit: in  
quo vero consistat hæc læsio, & quo-  
modo producat, id hætenus minus  
distincte explicitum deprehendi. Qui-  
bus religionis semper placuit prætex-  
tus, illi *to Deo* appellare haud veren-  
tur,

Quæ  
sæpius  
est hæ-  
redita-  
ria.

Aucto-  
rum o-  
pinio-  
nes de  
causa  
epile-  
psiæ.



tur, quasi satis esset in Deum rejicere, quæ intellectui claro ac distincto, vulgarisque principiis haud adeo respondent: alii vero ad venenum inebrians, & narcoticum sive stupefactivum; alii ad fermentum specificum; alii ad materiam acrem nervos irritantem; alii ad violentam spirituum animalium vim explosivam in fibris muscularibus & nerveis existentem confugiunt: quidam in furorem Archæi; alii in turbulentum & confusum principii vitalis seu animæ rationalis motum causam rejiciunt. Sed hi medici fere sunt, qui non res, sed nomina pro causis habere sueverunt, quorum in adplicatione & demonstratione nullus omnino est usus. Qui vero causas sensibus manifestas præ commentitiis allegare amant; illi CAROLI PISONIS doctrinam sequentes, colluviem feri vitiosi poros cerebri vel obstruentem, vel æqualem fluidi nervei in partes influxum remorantem pro vera epilepsiæ agnoscunt causam.

## §. VIII.

Vera  
mali e-  
pilepti  
ei caus-  
sa.

Nos vero ex physico-mechanicis causis gravissimum hunc capitis affectum a fluidorum motu atque circulo per vasa cerebri minus recte se habente derivamus. Quemadmodum enim, si sanguinis temperati per cerebri vasa liber & æquabilis progressus fuerit, & hinc debita lymphæ spirituosæ secretio, & per nervos distributio, omnes utique functiones, quæ animæ imperio subjectæ, & animales vocantur, recto succedunt ordine: ita e contrario in omni, eoque gravi capitis morbo, ubi sensationum & motuum voluntariorum ingens observatur læsio, sicuti quam maxime fit in malo epileptico, sanguinem per caput haud expedite progredi, rectissime colligitur. Atque hoc est, quod jam olim antiquissimus artis nostræ auctor HIPPOCRATES notavit, dum libro de flatibus §. 21. ita scribit: *Sacer morbus fit, cum obstructions multis modis circa venas contingunt, & sanguinis motus prohibetur, atque alio quidem loco consi-*

*stit, alio lentius penetrat, alicubi autem citius: qua sane inæqualitate transitus sanguinis per corpus facta, omnigenæ inæqualitates per omne contingunt corpus.* Quæ sane gravissimi Senis sententia ita est comparata, ut nostro tempore, detecto sanguinis circulo, tanquam scientifico totius medicinæ principio, ex eo non aptius epilepticus morbus, quoad ortum & causam evolvi & explicari possit.

## §. X.

Quum vero circulus humorum per caput atque cerebrum peculiarem præ reliquis partibus obtineat indolem: haud alienum erit, pauca de illo commemorare, ut ipsi innixa epilepsiæ æthiologia eo melius innotescat. Pri-

De circulo  
humorum  
per caput.

mum enim haud ignorari oportet, quod arteriæ, quando caput ingrediuntur, tunicam suam robustiorem deponant; & membrana duntaxat tenui, sensu & motu carente dotata, in intimam corticalem cerebri & cerebelli substantiam distribuuntur, ut scilicet spirituosam lympham ad motum edendum aptam & necessariam, quæ ad nervos & membranas nervosas deferretur, separent; sanguis vero relictus per sinus venosos in dura matre, mediantibus venis jugularibus, ad cor ceu motus circularis fontem revehatur. Deinde vero, notatu digna est singularis plane duræ sic dictæ matris structura; quæ ex peculiari fibrarum nervearum & muscularium apparatu composita est: quarum hæc tam linea recta quam obliqua feruntur, & circa sinus duos laterales magis arcuata & circulares deprehenduntur; illæ vero nerveo carneæ instar columnarum ab uno pariete in tribus sinibus majoribus dissectis ad alterum abeunt, ubi cellulæ quoque ovales secundum venarum seriem, quæ illos ingrediuntur, dispositæ conspiciuntur: quæ fibræ non modo impediuntur, quo minus ab irruente sanguine sinus plus justo dilatentur; sed & id efficiunt, ut cum successive sese contrahant, san-



guinis progressus ad venas jugulares & cor promptior fiat, & expeditior. Columnarum autem officium est, ut sanguis rediens paullo crassior, & subtili lymphæ destitutus melius conquassetur: & cellulae denique sunt instar valvularum, quæ impediunt, quo minus elapsus cruor regredi atque eadem vasa rursus intrare possit. Hæc plane peculiaris & artificiosissima sinuum venosorum fabrica clare satis demonstrat, hos ipsos ad promovendum sanguinis versus cor circulum, eodem ferme systoles ac diastoles motu, haud secus ac arterias vel cordis auriculas omnino gaudere.

## §. X.

*Dura mater gaudet motu systolico ac diastolico.*

Præter hunc singularem sinuum venosorum motum; insignis quoque duræ matri motus tonicus, seu potius elasticus adscribendus est; qui in omnibus reliquis corporis nostri nervo muscularibus tunicis & membranis, quæ influxu liquidæ nervei & arteriosi animantur, viget. Hujus etenim membranæ, quæ non solum cerebrum atque cerebellum, verum etiam medullam spinalem, & omnes machinæ nostræ nervos tegit, ambit & cingit, motus dilatatorius & restrictorius haud tantum ad sanguinis per caput circuitum, sed quoque meliorem fluidi spirituosæ, in nervis undulantis secretionem promovendam, egregium sane confert momentum. Nam quodcumque pulsu arteriarum cerebri hæc membrana elastica elevatur & expanditur; tubuli nervorum ad recipiendum subtilius fluidum magis redduntur idonei: quando vero post expansionem, dum proprio suo elatere, qui per appulsum sanguinis arteriosi, ex tribus insignibus ramis, carotide nimirum interna, externa, atque vertebrali advecti non minus, ac influxu fluidi nervosi adaugetur, rursus sese constringit, corticem cerebri quodammodo comprimit; tum fluidum tenuissimum ex eo in substantiam medullarem, & nervorum principia eo melius propellitur. Hi

ergo tam duræ matris, quam sinuum ejus majorum motus, systaltici & diastaltici reciproci, ubi sunt æquales & convenienti fiunt modo, recte se habet circulus sanguinis per caput, atque ab eo dependentes functiones optime peraguntur: cum contra ab hisce motibus læsis graves capitis morbi propullulent. Quæ omnia apud BAGLIVUM, qui primus solidorum naturam & motum in pathologia introduxit, *Lib. I. de fibra motrice pag. 295.* fusius declarantur.

## §. XI.

Quodsi ergo sanguis crassus vel etiam copiosus intra duræ matris sinus stagnaverit; motus illius systalticus, & ab eo pendens regressus ad cor facile impeditur; & hinc major, quam par est, sanguinis per arterias advecti copia ibidem congeritur, ut nunc non amplius subtilissimæ æthereæ particulæ, sed rudiores, aqueæ & aereo elasticæ magis expansivæ indolis, sensus & motus omnino turbantes, in cerebri ac nervorum tubulos transeant. Ab hoc autem porro sanguine in sinibus duræ matris & venis jugularibus stagnante, vasa nimium dilatantur, hinc nervosæ fibræ comprimuntur, & inde strictura spastica nervosæ huic membranæ infertur, quæ proxima ac principalis mali epileptici causa est. Nam hæc ipsa ejus est indolis, ut tenuissima piæ matris arteriosa vascula, & corticalem cerebri substantiam nimis comprimat: unde præter voluntatis imperium fluidum illud subtilissimum copiosius & majori impetu in cerebrum & nervorum tubulos influit. Quoniam autem dura mater, omnium fere Anatomicorum consensu, & radix & principium est omnium membranarum: aliter fieri nequit, quin arctum cum ipsis foveat consensum, qui in mutua inordinatarum motionum communicatione consistit. Quum autem ex hoc auctiore

*Causa proxima mali epileptici.*

*Ratio symptomatum epilepticorum.*

du-



duræ matris spafmo, nervi potiffimum, qui ad sensoria abeunt, fortiter constringantur, ut omnis fere liquidi tenuiffimi influxus intercipiatur: fit inde, ut in perfecta ac completa epilepsia omnes tam interni, quam externi sensus cessent. Contra vero, ad organa motoria major atque vehementior fluidi hujus mobiliffimi fit impulsio atque influxus: & hinc terribilis illa artuum & musculorum distensio, contractio, succussio & agitatio erit deducenda. Præterea certo constat, par nervorum octavum, quod & vagum dicunt, ex cerebro ad præcipua interna viscera, partesque nerveas, ad motum & sensum præstandum aptas, ramos suos dispergere: in quos dum fluidum nervum majori nisu ac vehementiori impetu influit; partes quoque istæ sub paroxysmo in motuum præternaturalium ac violentorum consensum rapiuntur: hinc cor incipit palpitare, arteriæ celeri & inæquali cientur motu; respiratio fit suspiciosa cum sibilo, salivæ fluunt ex ore, vox perit, murmuraque & borborygmi in intestinis sentiuntur.

§. XII.

Ex his adparebit, in omni epilepsia præsto esse membranæ cerebrum, medullam spinalem, ac nervos investientis stricturnam, seu causfam illius proximam. Prout vero causfæ remotiores, quæ hanc stricturnam inducunt, ac circulum humorum per cerebrum & caput inæqualem reddunt, admodum sunt variæ: ita quoque diversæ species ac denominationes motuum epilepticorum exsurgunt. Hinc innotescit differentia epilepsiae in idiopathicam & symptomaticam: quando enim causfæ intra ipsum cerebrum existunt, nec aliorum proveniunt, tum dicitur idiopathica; contra cujus causfæ ex aliarum partium vitio demum ad caput transferuntur, ea audit symptomatica.

§. XIII.

Idiopathica nascitur sæpius ab externa violentia. Res enim apud medicos æque ac chirurgos notiffima est, quod a gravioribus capitis & cranii per vul-

Hoff. Syst. Tom. V.

nerationem, fracturam, percussione, depressionem inductis læsionibus frequentius graves, quin nonnunquam lethales proveniant epilepsiae. Præcedunt tum plerumque capitis dolor, atque sensuum torpor: & post mortem vel sanguis, vel serum corruptum stagnans inter duram & piam matrem, vel cranium inter & duram matrem, vel fistula duræ matri inflictæ inveniuntur. Sæpius etiam fit, ut epilepsia chronica certa temporis periodo recurrens, a spinis acutis ossibus interne in basi cranii, interdum etiam in sinu falciformi vel lateralibus enatis, quæ curari nequit, excitetur: interea tamen ars impedire potest, ne ex nimio motu sanguinis, cerebrum ita disponatur, ut pressio ejus contra spinam sit tam magna, ut inde oriatur insultus epilepticus.

§. XIV.

Ad causfas epilepsiae idiopathicae atque lethalis referri quoque meretur obstructio venarum jugularium, vel etiam sinuum duræ matris, præsertim falciformis, a sanguine viscido, aut polyposis concrementis enata. Ejusmodi tria mihi innotuerunt exempla, & plura apud BONETUM in sepulchreto anatomico passim occurrunt. Huc etiam spectat observatio a SPONIO in aphor. Lib. II. aph. 19. allegata, qua quidam primum somnolentus, post epilepticus factus, & hinc mortuus, aperto cranio monstravit in variis venarum jugularium ramis obstructions a mucoviscido & tartareo tantas, ut gypso infarcti viderentur; & præterea cruor in ventriculos cerebri fuit extravasatus. Non minus, si capitis morbis vel acutis, ut phrenitidi, vel chronicis, veluti mania & melancholia jungitur epilepsia, tales vasorum infarctus a sanguine subsistente crasso post mortem reperiuntur: qualis epilepsia, mea quidem sententia, rectius refertur ad idiopathicam.

§. XV.

Porro inter causfas idiopathicae epilepsiae, animi affectus, maxime ira at-

violenta  
externa.

Chronica idiopathica.

Ab obstructionibus vasorum, ac polypis.

Ab animi.

Differentia epilepsiae idiopathicae & symptomaticae.

Epilepsia idiopathica a causa



que terror, haud ultimum sibi vindicant locum. Hi enim proxime & immediate in nervosas corporis partes & membranas, eas vel fortius constringendo, vel plus justo dilatando agunt; & in universa machina vitalem motuum œconomiam invertunt. Sed id sane mirabile est, quod a gravi animi affectu vitium in fluidas etiam transeat partes: quemadmodum nutrices suo attestantur exemplo, quæ ira vel terrore graviter commotæ, si statim ubera præbuerint infantibus: hi sæpius haud ita multo post epilepsia corripitur observantur. Quin imo haud rarum est, quod infantes, si matres gravidæ sævioribus indulserint animi commotionibus, primis ætatis annis facillime fiant epileptici. Porro complures hinc inde apud auctores consignatæ reperiuntur observationes, quosdam ex solo aspectu epilepticorum, qui graves passi fuerunt insultus, tanto correptos fuisse terrore, ut mox in eundem inciderint morbum. Vehemens quoque rei venereæ desiderium a semine copioso abortum, ob castitatem tamen suppressum, gravem hunc epilepticum affectum provocandi potentiam habere, plurimis notatu dignis confirmari potest exemplis. Fœminas pariter, alias castissimas ab infano amore in hoc malum incidisse, cuius optimum tam præservatorium, quam curativum remedium conjugium fuit, res identidem per observationes certa atque confirmata est.

## §. XVI.

Sæpissime ortus mali epileptici est sanguinis serosi impurioris nimia & impetuosa translatio ad caput in corporibus cachecticis, hypochondriacis, & ubi ventriculus & intestina spasmodicis ac flatibus sunt repleta, eorumque peristaltis naturalis cum debitis se & excretionibus valde læsa ac perversa est. Quando enim cunque in antecedentes & epilepticæ, & aliarum cerebri graviorum ac inveteratarum passionum causas inquirimus: plerumque ejusmodi ægrotantes vel hypochondriacos, & hæmorrhoidarios vel melancholicos,

vel cachecticos fuisseprehendimus. Tum ut plurimum sanguineas excretiones, quæ in viris per hæmorrhoides, in fœminis per menses fiunt, aut parciore, aut nimias huic diro malo viam stravisse; innumeræ auctorum observationes, & quotidiana experientia attestantur. Qualis epilepsia recte vocatur symptomatice, serosa, hypochondriaca vel cachectica: quæ certis plerumque periodis, sicuti ceterorum ex spasmodicis primarum viarum oriundorum morborum mos fert, adoritur.

## §. XVII.

Ejusmodi symptomatice vero epilepsia non tantum a sanguine vel sero tenaci, copioso, in vasis subsistente, ea obstruente, & totum liquidorum circulum turbante oritur: sed etiam a materia impura, acri, caustica ad duram matrem per sanguinem arteriarum serosum delata, fibras nerveas lancinante, & ad spasmos proritante producit. Hoc contingit in chronicis æque ac acutis ægritudinibus. Quem enim fugit, quod tale acre ac corruptum serum in febribus exanthematicis, petechialibus, variolis, morbillis, purpura, vel ante macularum ad cutim propulsionem, vel post earum retrocessionem, firmiter duræ meningi impactum, durum illud, & in fine morbi funestum plerumque excitet malum epilepticum? Et idem denique fieri a consolidatis antiquis ulceribus, retropulsa scabie, vel alia cutis defœdatione, achoribus & tinea capitis perperam curatis, intus nimirum acta vitiosa materia, innumeris exemplis confirmatum est.

## §. XVIII.

Datur adhuc quædam epilepsie species, quæ vocatur sympathica, & vehementioribus aliarum partium nervosarum doloribus atque spasmodicis, per consensum ad duram usque matrem propagatis supervenit. Quid enim crebrius contigit, quam ut infantes ex dentitione difficili in epilepsiam incidant? quid frequentius, quam ut in personis sensibilibus graviore odontalgia, aut atrociori otalgia superveniat

Species  
epilepsie  
symptomatice.

Epilepsia  
symptomatice,  
serosa,  
hypochondriaca  
atque  
cachectica,

Epilepsia  
sympathica.



niat epilepsia? Ventriculi etiam sævioribus spasmis, præsertim, qui a venenis causticis, emeticis vel purgantibus improvide sumtis, aut immoderatiore ira proficiscuntur, tandem epilepsiam ut plurimum funestam subjungi notissimum est. Talis enim chronica ac periodica epilepsia ortus sæpissime est in ventriculo, vel etiam intestino duodeno: in quibus partibus dum humor biliosus, & salivalis peregrina fermentatione corruptus hospitatur: ille certa temporis periodo in motum actus, primum cardialgiam syncopticam, & demum ipsam epilepsiam, quæ tum ple-

*Epilepsia.* rumque habitualis est, per consensum excitat. Neque minus gravioribus intestini ilei vel coli doloribus atque spasmis associari motus epilepticos, vel infantum lactentium exemplo patet; qui ejusmodi atrox malum ex lacte acido, corrupto, intestinorum membranas arrodente, & fæces alvinas viridi afficiente colore sæpenumero experiuntur. Porro haud exigua sunt exempla, ubi a gravi dolore ex calculo in ureteribus, vel introitu in vesicam hærente, epilepsia in ætate etiam provectiori excitatur: quæ hinc vocari meretur nephritica. Non minus in puerperis ex vitio uteri, aut mensium vel lochiorum retentione, vehementes primum partium vicinarum ac intestinorum spasmus, tum ipsa epilepsia accedere observatur; quæ hinc audit hysterica. Et nihil ferme est frequentius, quam quod ex lumbricis, tunicas intestinorum nerveas vel arrodentibus, vel dum mortui sunt, vaporosa sua putrilagine vellicantibus, in pueris præsertim horrendis motibus complicata suboriatur epilepsia, verminose nomine digna. Talem denique ex morfu canis rabidi quoque concitari, plurimæ docent medicorum observationes.

## §. XIX.

*Causæ epilepsia remotiores.* Quod tandem causas mali epileptici remotiores attinet; ille erunt, fere, quæ insignem debilitatem & atoniam fibræ membranaceæ & nervosæ ingenerant, & tonum ac elaterem vasorum

labefaciunt. Quamvis enim epilepsie causa proxime ac formalis in spasmo magis, quam atonia consistit; attamen quia leges motuum, qui fiunt in machina nostra, ita sunt comparatæ, ut nimiam fibrarum elasticarum contractionem & spasmum, demum nimia atonia, & hanc humorum congestio sequatur, congestionem vero spasmus excipiat iterum: non mirum est, quod causæ tonum & robur partium infringentes, ad spasmodicas strictiones & accessionum frequentiores recursus omnino contribuant. Ad hæc vero causas ex classe rerum non naturalium pertinet, vappidi & præsertim noxiosissimo carbonum fumo repleti aeris usus; aut si quis in locis declivioribus, humilioribus, minus transpirabilibus dormiat: inter cibos, qui inflant, caputque vaporibus replent, ut sunt allii, ceparum, apii species, fructus horrei, item dulcia fermentescibilia: inter potulenta, immoderatio vini, præsertim vaporosi & fumo sulphuris infecti, aut cerevisiarum crassiorum valde lupularum potatio, & inde orta frequens crapula & ebrietas; ex medicaminum autem penu, narcotica, opiata, item valde odorifera, generationi horum morborum mire velificantur. Huc etiam pertinent immoderatiores sanguinis effusiones, sive per nares, sive per venas uteri aut sedis, quæ mire debilitant, & robur partibus subtrahunt, atque adeo corpus multis excrementitiis serosis replent particulis. Ceterum immoderatio & intempestivus, primis in annis celebrata veneris usus, diuturnior quoque tristitia, intemperantia in studiis, feriisque mentem fatigantibus cogitationibus, ob summam debilitatem, quam generi nervoso inferunt, ad hoc malum mirifice disponunt. Vidi juvenem, qui quoties attentius litterarum studiis incumbendo, memoriam & ingenium fatigabat, toties momentanea quasi epilepsia, cordis palpitatione, spirituum distractione ac ecstasi corripiebatur. Ad studiorum vero remissionem placide semper se habebat.



## §. XX.

Pro-  
gnosis  
salu-  
taris.

Missæ vero ulteriori causarum disquisitione; paucis prosequemur mali epileptici prognosin. Et hinc per antiquissimam, & ipsius HIPPOCRATIS *Seet. III. aph. 28.* experientiam cognitum est, quod pueris hic morbus solvatur circa annum septimum, decimum quartum aut septimum, annos nimirum pubertatis; feminis autem circa tempus menstruæ eruptionis, quod est annus decimus quartus: quibus annis ingens in economia vitali deprehenditur mutatio. Non minus epilepsias chronicas non modo mutatione ætatis, sed & locorum, diætæ & vitæ generis, sine remediorum ac medicorum ope sponte sanatas fuisse, crebris constat observationibus. Perite scripsit HIPPOCRATES *Seet. II. Aphor. 45.* Juvenibus comitialium liberationem, mutationes maxime ætatis & regionum & victuum inferre. Huc etiam spectat, quod superveniente quartana febre sicut aliæ graves passionēs, ita etiam convulsivæ ac epilepticæ penitus tollantur; rectissime id observante HIPPOCRATE *Seet. IV. aph. 70. item lib. VI. epid. §. 16.* Intermittentes enim quando rite tractantur, corpus a colluvie vitiosorum humorum liberant & expurgant, & purius ac siccius efficiunt. Id quod etiam congrua medicamenta præstare debent. Neque etiam ignotum est, prodeunte in extimam cutim scabie, vel alia exulceratione; vel aliis exanthematibus, veluti in variolis, morbillis, purpura ad summam cutim propulsis, hoc dirum symptoma remittere, vel plane cessare. Spes ergo sanationis haud penitus est abiicienda, quando malum hoc non diu duravit, ejus insultus haud adeo longi sunt, ipsum malum haud est hæreditarium, ætas potius puerilis; aut si ex vitio primarum viarum, vermibus, malo regimine, vel perperam curato subcutaneo morbo provenit. Neque desperandum est, si levior est epilepsiæ gradus, & æger imminentem accessionem præsentit per sensum auræ frigidæ, ex partibus extremis ad dorsum, præcordia, caput ascendentis,

quem anxietas, virium defectus & stomachi ad vomitum propensio præcedunt: aut quando sub paroxysmo sensus non penitus aboliti, sed semini minuti fuerunt; aut denique matutino nocturno invadit sine pollicum incurvatione.

## §. XXI.

Contra vero per experientiam liquidum est, epilepsiam hæreditariam, licet optimis tractetur remediis, curatu esse difficillimam; nec leve sanationis impedimentum deprehenditur in habitu ali atque chronica, quæ per multos annos duravit, ac crebrioribus, longioribusque accessionibus corpus enervat; atque conformationem vasorum & membranarum cerebri quasi permutavit. Minus quoque auspiciati eventus ac sanationis est ea, quæ non circa annos pubertatis, vel in foeminis ingruente menstrui fluxu solvitur; ut &, quæ demum post hos annos, imo post vigesimum primum accedit: tunc enim plerumque hæreditarium latet vitium, recte id advertente HIPPOCRATE *de morbo sacro*, qui §. 13. ita scribit: *Postquam 21. anni præterierunt, non amplius sacer morbus corripit, præterquam paucos aut nullum, nisi a puero connutritus fuerit.* Pessimum porro signum est, quando accessiones magis frequentant, quam solebant: sic enim functiones animales sæpe destruuntur, ut non tantum memoriæ, ingenii, ac judicii imminutio, sed & stupor & stultitia emergat. Epilepsiam autem in cœcitatem, stultitiam, ac memoriæ amissionem terminari, malum; eandem in paralytin, aut plane apoplexiam transire, mortiferum est. Omnis enim epilepsia desinit tandem in apoplexiam lethalem: & in defunctis iis morbis vel sanguis, vel, quod frequentius evenit, serum in ventriculis aut basi cerebri extravasatum ac corruptum, teste experientia, deprehenditur; quod falso pro causa epilepsiæ venditatur. Porro minor salutis spes est, quando in statu febrium acutarum, phrenitidis, petechiarum, morbillorum, variolarum &c. superveniunt epileptici motus; nec denique sine periculo est infantilis epilepsia, quæ

Signa  
pre-  
gno-  
stica  
mala  
& fu-  
nesta.



quæ ex dentitione difficili, vel intestino-  
rum torminibus accedit, & sine inter-  
missione affligit. Neque novum est, con-  
genitum, idiopathicum & inveteratum  
malum in melancholiam, maniam &  
denique fatuitatem degenerasse, acce-  
dente præsertim plane perverso vitæ re-  
gimine & gravi animi passionum in-  
temperantia.

## C U R A T I O.

### §. I.

Indi-  
catio-  
nes cu-  
rato-  
rie.

**C**urationem morbi comitialis ag-  
gressurum oportet primum caus-  
as materiales remotiores e corpore pro-  
scribere ac emendare: & deinceps vehe-  
mentiore dure matris ac partium ner-  
vosarum spasmus mitigare atque con-  
sopire. Hunc ultimum scopum binis po-  
tissimum remediorum generibus affe-  
qui licet, nimirum vel sedativis, vel ro-  
borantibus: illa motus effrænes & im-  
petuosos componunt, & compescunt,  
hec vero imbecillitatem & atoniam, ab  
atrocia spasmorum relictam, quæ ad  
novos paroxysmos ansam subministrat,  
tollendam, ac elaterem naturalem resti-  
tuendum plurimum conferunt.

### §. II.

Quæ  
sint se-  
dativa  
& sic  
dicta  
ante-  
pile-  
ptica.

Sedativa sunt, quæ blandæ & sulphu-  
reæ indolis vapore & exhalatione ni-  
mium liquidi nervei motum refrænant.  
Huc ex regno vegetabilium pertinent  
herbæ & flores, qui temperatam habent  
fragrantiam, & ex his per distillationem  
eductæ aquæ, veluti sunt aqua ulmarie,  
melissæ, salviæ, basilici, primulæ veris, li-  
liorum convallium, alborum, rosarum,  
tiliæ, acaciæ, pœoniæ, florum aurantio-  
rum, citri, radicis pœoniæ, valerianæ,  
nucleorum cerasorum, persicorum, pru-  
norum &c. quo etiam spectant crocus,  
flores papaveris in formi extracti, se-  
men lycopodii, papaveris albi, & ex aro-  
matibus nux moschata. Ex regno ani-  
mali specifica quasi virtute antepilepti-  
ca celebrantur, quæ vapore quodam sul-  
phureo subtili temperato nervosis par-  
tibus admodum amico pollent: quorum  
classē constituunt ex durioribus rasura  
dentis hippopotami, eboris, cornu cervi

lapidis manati, unicornu veri, cranii hu-  
mani, talorum leporis, sed hæc recens  
esse debet; alias parum proficiet. Spe-  
ctant huc quoque ex mollioribus ani-  
malium partibus & visceribus deprom-  
pta, si leniter exsiccantur & in pollinem  
rediguntur, uti sunt lumbrici terrestres,  
castoreum, secundina humana, sanguis  
humanus sani hominis leniter siccatus,  
cor & hepar ranarum, talparum, pulvis  
exsiccatorum hirundinum, & potissi-  
mum leporis embryonis excisi & exsic-  
cati; quæ sulphure magis vaporoso  
suaveolenti nervosas partes afficiunt,  
earumque effrænes motus compescunt.  
Ex chymicis medicaminibus præ aliis  
spiritum nitri dulcem bene præpara-  
tum, vel potius liquorem meum ano-  
dynum mineralem experientia edoctus  
commendo.

### §. III.

Hæc sunt præcipua pulverum antepi-  
lepticorum specificorum ingredientia, Quæ-  
dam  
com-  
posita  
ante-  
pile-  
ptica.  
que cum absorbentibus misceri possunt.  
Inter ejusmodi celeberrimæ famæ pul-  
veres, draco figens, quem mille expe-  
rimentis a se probatum esse scribit DO-  
LÆUS in *encyclop. med. pag. 156.* di-  
gnus est, qui notetur. Illius hæc est for-  
mula: Recipe nucis moschatæ drach-  
mam unam semis, cinerum talparum  
drachmas duas, talorum leporis no-  
tres, pulveris herbæ cardui benedicti  
scrupulos quatuor, unguarum alcis, suc-  
cini albi, visci quercini ana scrupulos  
duos & dimidium, margaritarum præ-  
paratarum drachmam unam, cornu cer-  
vi usti drachmam semis, unicornu veri  
scrupulum, cranii humani drachmas  
tres, feminis pœoniæ drachmam unam  
& semis, sachari Canariensis uncias  
duas, foliorum auri q. v. M. f. pulvis sub-  
tilissimus, cujus dosis est drachma di-  
midia vel scrupuli quatuor. Non mi-  
noris efficacitæ esse creditur pulvis epile-  
pticus anodynus D. WEISMANNI,  
Phisici Windsheimensis, qui sic se habet:  
Recipe cornu alcis sine igne præparati,  
rasuræ ungulæ alcis, dentis hippopotami,  
unicornu veri, lapidis manati, coralliorum  
rubrorum, succini albi, crystalli mon-  
ta-



tanæ, lapidis smaragdini, pulveris lumbricorum terrestrium, spinarum muſtellarum fluviatilium, sulphuris vegetabilis corallini, vel seminis lycopodii, margaritarum orientalium ana drachmam, cinnabaris nativæ drachmas duas theriacæ cœlestis scrupulum, pulveris castorei scrupulum semis, m. f. pulvis, qui cum aqua florum tilia, liliorum convallium, ceraforum nigrorum, pœoniæ, hirundinum cum castoreo, vel aqua epileptica Langii propinetur. Est mihi quoque familiari in usu, ejusmodi specificum antepilepticum, quo in chronica epilepsia, si debito tempore & ordine usurpetur, singulares plane effectus præstitos interdum vidi.

## §. IV.

Quæ  
robo-  
rantia  
ad epi-  
lepsiam  
pro-  
sunt.

Inter roborantia vero, quæ præ aliis peculiari & speciali virtute se usque eo commendarunt, ex vegetantium classe sunt flores lavendulæ, spicæ, herba melissæ, roris marini, rutæ, majoranæ, succinum, lignum aloes, santalum citrinum, cardamomum, caryophilli, & ex iis varia destillata & præparata olea, essentia, decocta, balsama, linimenta: ex compositis aqua antepileptica Langii, hirundinum, balsamum meum vitæ, & id genus alia. Ambra vero grysea in epilepticis morbis omnium antepilepticorum tum roborantium, tum sedativorum vires superat longissime. Miræ quoque efficaciam sunt spiritus cornu cervi, vel eboris simplex, aut succinatus, spiritus Bussii, oleum cornu cervi, vel eboris per crebram rectificationem in summam redactum subtilitatem. Neque decocta lignorum, maxime Guajaci, Sassafras, santalorum &c. ob principium, quo pollent, resinolum sua laude carent; quorum usus jam apud veteres celebratus est. Ita ALPHONSUS FERREUS, & JACHINUS se plurimos epilepticos simplici guajaci decocto, bis de die ad sex vel octo uncias præscripto, ejusque decocto secundo, vice potus ordinarii assumpto curasse affirmant; præsertim, si tali decocto radix pœoniæ, aliaque specifica addita fuerint; quod vero per 30. vel 40. dies ut conti-

nuetur, singulisq; dosibus aliquot guttule spiritus vitrioli addantur, auctores sunt.

## §. V.

Habent vero etiam tonica ac nervina extrinsecus adplicata eximium usum. Sic pulveris ex herba majoranæ, floribus liliorum convallium, spicæ, maro vero, succino, pulvere caryophyllorum aromaticorum, benzoe & nucista compositi, & capiti crinibusque inspersi usum in epilepsia, aliisque gravioribus capitis morbis deprehendi præstantissimum: quippe qui præter nervinam virtutem, etiam humores viscidos & spissos incidentem possidet efficaciam; unde illius intra nares quoque susceptio ad colliquandam tenacem pituitam egregie convenit. Hæc autem proposita remedia in corporibus serosioribus potissimum, & ad cachexiam proclivibus, inque epilepsia chronica, extra paroxysmum pariter ac ad præservationem, rite adhibita, insigni efficacia sese a longo jam commendarunt tempore.

## §. VI.

Verum enim vero antequam adhibeantur commendata hætenus remedia, necesse est, ut causæ materiales malum sustentantes, quantum fieri potest, removeantur. Quare si sanguinis, in vasis ac membranis cerebri incarcerati, atque stagnantis colluvies malo nostro originem præbuerit; & hinc vasa cruore turgeant, vel ipse impetuosius ad caput rapiatur, quod sæpissime fit in hypochondriacis, melancholicis, fœminis gravidis, vel hysteriis &c. tum sanguinis missiones, detractiones ac revulsiones a capite ad inferiores partes, præsertim circa talum institutæ, nec non hirudinum ad venas, quæ in anum explicantur, appositiones & utilissimæ, & summe necessariae sunt. Hoc in passu consentiunt mecum peritissimi & nostrorum & vetustorum temporum medici; quos inter conferri merentur GALENUS *tr. de curatione per sanguinem*, MERCURIALIS *Tom. IV. consil. 45.* ZACUTUS LUSITANUS *Lib. I. de med. princip. hist. pag. 45.* CELSUS, RHASIS, SCHENCKIUS *Lib. I. pag.*

Nervina  
externa.

Epilepsia a sanguinis vitio curatio.



113. obs. 3. RHODIUS Cent. I. obs. 64.

65. nec non SYLVATICUS Cent. I.

conf. 45. qui pro revulsione & derivatione commendat, ut sanguis singulis mensibus bis ad quatuor uncias ex venis fedalibus educatur. Interdum nec alienum est, venas jugulares externas aperire, & stagnanti in sinibus dure matris sanguini liberiores exitum & motum conciliare: hinc epilepsie sectione venarum jugularium curate exemplum allegatur in *M.N.C. Dec. I. anno. I. obs. 244.* Nec denique sine fructu ipsae cucurbitulae cum scarificatione cervici & partibus capiti vicinis apponuntur; modo, si plethora ad vasa nimium urgeat, ea prius per sectionem venae in inferioribus partibus fuerit imminuta.

§. VII.

Cura-  
tio epi-  
lepsiæ  
a sero  
acri,  
impu-  
ro sub-  
ortæ.

Alia vero curandi ratio est, quando morbus ex sero impuriori in capite, ejusque membranis, & vasis hærente suam traxerit originem; sicuti in corporibus cachecticis, scorbuticis, ab improvide curatis tumoribus pedum edematosis, vel antiquis ulcerationibus, aut fonticulis præmature consolidatis, vel retropulsa scabie, tinea capitis, aut imprudenter abscissa plica polonica &c. contingit: tum curatio feri impurioris discussione, evacuatione & ad alias partes derivatione erit perficienda. Hoc scopo præter idonea serum per alvum educantia, ac humores impuros depurantia pharmaca, veteres eque ac recentiores ad educendam vitiosam materiam commendarunt setacea, fonticulos, cauteria atque vesicatoria. Conf. HIPPOCRATES *lib. de morbo sacro* §. 7. seqq. TULPIUS *Lib. I. cap. 8. in fine.* Sic apud VICTOREM TRINCAVELIUM quinquagenarius per fœdum malignumque exanthema toto corpore exsudans ex caduco morbo convaluit; & apud WILLISIUM *Lib. de morbo convuls. cap. 3.* puella in ignem præcepta facta, totoque capite perusta, ac per accidens cauterisata, tamdiu a morbo suo libera permansit, quamdiu incurata ulcera fuderunt saniem; quibus consolidatis recrudit epilepsia.

§. VIII.

Quandocunque ex gravioribus animi affectibus, præsertim vehementiori iracundia, acrimonia acris, biliosa, caustica, volatilis ex primis viis ad nervorum genus delata produxerit epilepsiam: præter pulveres, qui biliosam hancce acrimoniam attemperant, atque demulcent, serum lactis non minus ac temperate acidule per aliquot menses cum debito regimine usurpate, insignem pollicentur fructum. Inter medicamina egregie sunt virtutis acidula, ut spiritus vitrioli philosophicus, vel spiritus nitri bene rectificatus, atque cum floribus papaveris rhæados & pœoniæ in tincturam redactus, ex aquis temperantibus, diluentibus & antispasmodicis, largius exhibitis datus. Atque profecto in hujusmodi capitis morbis peculiare quid habet aque frigide simplicis fontaneæ, & pluvialis purioris potus paullo largior: quippe quæ præter vim temperantem, humorumque acrimoniam diluentem, partibus etiam relaxatis robur atque tonum restituendi, insigni pollet facultate.

§. IX.

Quando epilepsia oritur ex dolorum vehementia, v. g. ex calculo in uretere hærente, vel gravi odontalgia, vel otalgia, vel ventriculi ac intestinorum spasmo: tum ante omnia clysteres ex meris oleis v. g. amygdalarum dulcium iniiciendi sunt: tum si plethora peccaverit, sanguis mittendus; & interne exhibenda mixtura, quæ ex aquis antispasmodicis, liquore anodyno minerali, pulvere marchionum, cinnabari, aliquot granis massæ pilularum Wildegansii & syrupo papaveris albi composita est. In epilepsia porro infantum, quæ vel ex ventris torminibus, vel lacte corrupto proficiscitur, vel a dentitione difficili producitur, nihil est præstantius, quam idoneis subsidiis acrem ex primis viis saburram eliminare. Huic scopo egregie inserviunt clysteres ex lacte, in quo saponis veneti portio soluta est, ano crebrius infusi; interne vero pulvis marchionum cum pauxillo cinnabaris, vel pulvis epilepticus quidam cum extracto rha-

Cura-  
tio epi-  
lepsiæ  
a ma-  
teria  
biliosa  
ab ani-  
mi af-  
fecti-  
bus  
com-  
mota  
indu-  
cta.

Cura-  
tio e-  
pile-  
psiæ a  
dolo-  
ribus  
pro-  
ductæ.



rhabarbari, & syrupo cichorei cum rhabarbaro & manna in electuarius re-  
 ductus, insigne afferre solet levamen.  
 Neque minus sequens mixtura mira-  
 bilem sæpius præstitit opem: Recipe  
 aquæ liliorum convallium, primulae  
 veris, florum tilia, ceraforum nigro-  
 rum ana unciam, lapidum cancrorum,  
 pulveris marchionum ana drachmam,  
 spiritus Sylvii volatilis oleosus, liquoris  
 anodynæ mineralis ana guttulas decem,  
 moschi orientalis cum saccharo probe  
 subacti grana duo. m. d. Laudatissi-  
 mam enim moschi in compefcendis in-  
 fantum passionibus epilepticis virtu-  
 tem plus simplici expertus sum vice.  
 Quod si denique vermes, nerveas in-  
 testinorum tunicas arrodentes excita-  
 verint epilepsiam: tunc antepilepticis  
 & demulcentibus oleosis præmissis, spe-  
 cifica anthelmintica, & quæ simul fa-  
 cultate innoxia purgante pollent, ad-  
 hibere oportet: inter quæ tanacetum,  
 allium, camphora, asa foetida, se-  
 men fantonici, mercurius dulcis, æ-  
 thiops mineralis, extractum esulæ pri-  
 mastenent.

Cura-  
 tio epi-  
 lepsiæ  
 vermi-  
 nosæ.

### Cautelæ & observationes practicæ.

#### §. I.

Ratio  
 epile-  
 psiæ pe-  
 riodicæ.

**Q**Uando certis periodis, vel lunæ  
 quadris epilepsia recurrit; vi-  
 tium & sedes mali plerumque  
 in ventriculo, vel potius duodeno, &  
 vicinis partibus, ductibus nempe bi-  
 liariis, aut ipso pancreate quæri debet.  
 Et tum aliquot dies ante statum perio-  
 di tempus consultum est, clysterem in-  
 jicere, & vacuationem vomitu tenta-  
 re, quæ accommodata sit his viis ex-  
 purgandis. Est autem efficacissima &  
 securissima, quæ ex drachma dimidia  
 radicis Ipecacuanhæ, recenter pulve-  
 risatæ, in decocto passularum soluta  
 conficitur. Postea subjuncta hisce spe-  
 cifica, longe præstantioris erunt ope-  
 rationis.

#### §. II.

Que no. Sub ipsis paroxysmis probe caven-  
 deant dum est a nimis volatiliis, spirituo-

forum, suave ac grave olentium, quæ in pa-  
 roxyf-  
 mo e-  
 pile-  
 ptico.  
 caput vaporibus replent, usu: nec con-  
 sulta sunt ea, quæ sternutamentum,  
 aut vomitum movent; quippe quæ  
 humorum motus magis ad caput deri-  
 vant, & sæpius ipsos revocant paro-  
 xysmos. Præstat potius ægotantem in  
 recto tenere situ, & pedes, atque ma-  
 nus bene fricare: namque frictiones  
 calidæ ac siccæ insigniter profunt in e-  
 pilepsia ex spasmo artuum provenien-  
 te. Vesicatoria, Setacea, ac inustio-  
 nes cervicis cum ferro candenti in pue-  
 rorum epilepsia, a feri colluvie produ-  
 cta, licet non penitus usu suo careant:  
 attamen aliquando noxam inferunt,  
 & corporis languorem relinquunt at-  
 que stuporem. Contra vero in conta-  
 maci chronica epilepsia, item ubi a  
 lymphæ acri, scorbutica suboritur, ve-  
 sicatoria vel fonticuli cruribus adplica-  
 ti, auspiciatorem spondent effectum.  
 Hinc etiam Indicum non exiguo fru-  
 ctu talum ad tendinem Achillis usque  
 adurunt, & ulcus per semestre servant  
 apertum.

Ufus  
 frictio-  
 num.  
 Vesica-  
 torio-  
 rum ac  
 caute-  
 riorum.

#### §. III.

In qualibet epilepsia præstat ab om-  
 ni vino, atque cerevisia abstinere, ac  
 pura potius aqua uti: de qua sæpius  
 observavi, quod contumacem, imo a  
 parentibus derivatam epilepsiam infi-  
 gniter vel mitigaverit, vel penitus de-  
 pulserit. Circa venæsectionem notare  
 convenit, quod ea in habitu corporis  
 plethorico, & ubi paroxysmi circa e-  
 quinoctia invadunt, vel solstitia, ma-  
 xime in hypochondriacis, hæmorrhoi-  
 dariis, atque melancholicis in talo,  
 præmissis clystere, viscidos humores  
 cum flatibus evacuante, instituenda  
 sit. Quando etiam hypochondriaca  
 passio epilepticum sustentat morbum:  
 tum præmissa pro re nata venæsectio-  
 ne, potum aquarum temperatarum  
 mineralium, minime vero balneum,  
 accessiones mitigasse novi.

Qui po-  
 tus co-  
 ferat  
 in epi-  
 lepsia.

Ufus  
 venæ-  
 sectio-  
 num.

#### §. IV.

Ante specificorum antepilepticorum  
 usum, evacuantia, temperantia &  
 alterantia exhibere oportet: alias enim  
 plus

Quid  
 de an-  
 tepile-  
 ptico-  
 rum usu  
 statu-  
 dum.



plus damni inferunt, quam emolumenti. Quodocunque malum ab externe capiti illata violentia, & hinc suborta stagnatione vel extravasatione humorum in capite originem traxit: tum cinnabarina rite præparata, id est intenuissimum pollinem crebriori trituratione aut lævigatione in marmore redacta, quo ejus particulæ in massam sanguinis abire queant, & interne largius cum aliis cephalicis ac diaphoreticis exhibita, vere specifica etiam pol- lent efficacia; quæ in hoc casu virtu- te, qua gaudent, lympham stagnan- tem resolvente ac discutiente absolvi- tur. Inter externa remedia ad compe- scendos motus effrænes inservientia, nihil deprehendi præstantius Linimen- to ex axungia humanæ, uncia una olei nucis moschatae expressi uncia dimidia, olei rorismarini, lavendulae & rutæ a- nadrachma una composito, ac cervici & spinæ dorsi inuncto. Quando æger eo utitur beneficio, ut imminentem prævideat accessionem: tunc operæ est pretium, malo occurrere clysteri- bus, partium inferiorum frictionibus; ac recto vivendi ordine uti.

§. V.

Opiato-  
rum  
noxæ.

Opiata & nimis vaporosa infantibus & debilioribus cautissime præbenda sunt, utpote quæ ingentem cerebro & nervosis partibus imbecillitatem & a- toniam inducunt. Ex crebro usu syru- pi diacodii in infante lethalem epile- psiam animadverti: vidi quoque men- tis stuporem infantibus remansisse, qui- bus pulveres anodynæ & theriacalia frequentius fuerunt exhibita.

§. VI.

Præfer-  
vatoria  
metho-  
dus.

Quum denique morbi comitialis ea sit indoles, ut a levissimis recidat cau- sis, & a multis pharmacis magis exa- cerbetur: præstat omnino, ab horum multitudine abstinere, ac pertinaci vi- rus observatione, gravem hunc præ- cavere morbum. Hanc paucis verbis, sed satis egregie complectitur COR- NELIUS CELSUS, dum *Lib. III. Cap. 23. pag. 173. dicit: Fugere oportet solem, balneum, ignem; omnia*

*calefacientia, frigus, vinum, vene- rem, loci præcipitis conspectum, om- niumque terrentium, vomitum, lassitudinem, sollicitudines, negotia omnia, & ubi tertio die cibus datus est, inter- mittere quartum.* Vitanda quoque dulcia, fermentescibilia, fructus ho- ræi, præsertim in infantibus: præte- rea adolescentibus maxime abstinend- um est a venere: verissime enim scri- bit MERCURIALIS in *prælect. pa- tav. pag. 372. adolescentes Germanos plurimos a nimia venere fieri epilepti- cos.* Evitandæ porro sunt nimia men- tis fatigationes; siquidem, teste CEL- SO, *quibus caput afficitur, ne cogita- tio quidem tuta est.* Hujus memorabi- le exemplum allegat GALENUS *Lib. V. de loc. affect. c. 3. dum Grammati- cus quidam juvenis, ait, quoties vel nimis vehementer doceret, vel cogita- ret, aut esuriret, comitiali morbo cor- ripiebatur; & hoc ipsum sane est, quod de Francisco Petrarca increbuit, eum post multas profundasque medita- tiones tandem incidisse in epilepsiam.* Maxime omnium vero fugiendæ sunt omnes ad terrorem, metum, & iram occasiones; nam facillime malum in- de revocatur.

Enarrationes morborum.

OBSERVATIO I.

**P**Uella duodecim annorum, habi- tus corporis strictioris, valde ple- thorica, floridoque faciei colore con- spicua, largo adpetitu, maxime panis gaudens, & alvi pigritiæ obnoxia, in- cidit post vehementem terrorem in gravem epilepsiam, cum omnium sen- suum abolitione, ac artuum violenta agitatione stipatam: cujus duo priores paroxysmi ultra binas inhæserant ho- ras, cum insigni vultus rubore, ac vasorum eximia turgescencia. Accer- situs quidam medicus, sub ipso tertio paroxysmo stylum naribus intrudit: quæ cruentata ultra tres sanguinis fu- derunt uncias, cum momentanea pa-

Epile-  
psia ex  
terro-  
re, na-  
rium  
hæmor-  
rhagiæ  
subla-  
ta.



roxysmi remissione. Tum & ego consultus deprehendi pedes adhuc insigniter frigidos; quare ut motum humorum ad partes inferiores derivarem; clysteres injici, & puellam bis quotidie in temperata pediluvia, ex aqua simplici parata descendere jussi. Posthæc, exhibui infusum theiforme ex floribus tilia, & herba melissæ confectum, & quavis vespera pulveris mei antepileptici dosin propinavi: quibus factum est, ut dirum hoc malum penitus omnino depelleretur.

### Epicrisis.

Epilepsia hæc a nulla alia originem traxit causa, quam a sanguinis & humorum vehementi ad caput congestione, per insignem terrorem excitata. Hujus enim ea est vis ac indoles, ut externas corporis partes fortius constringendo, succos vitales majori copia ac impulsu ad interiora, & præcipue caput compellat. Et hanc eo facilius ac violentius terror exserere observatur efficaciam in infantibus ac junioribus; qui gulæ nimis indulgent. Inde enim non solum primarum viarum sordes acida producuntur, quæ fortioris appetitus tantum non semper causæ existunt: verum etiam sanguis copiosus, simul tamen crassus ac viscidus generatur, qui ad caput raptus, membranas cerebri eo facilius ad violentas proritare valet stricturas. Hoc in nostro casu adparet ex vultus rubore & vasorum turgescencia sub paroxysmo: hinc etiam non alienum fuit, sanguinis fluxum per nares promovere, & sic illius progressum per caput reddere liberorem. Sed notari meretur, post ejusmodi vacuationes sanguinis, humorum motum protinus ad inferiora esse revocandum: alias enim facillime recrudescunt epilepticæ agitationes. Quod cum crebris pediluvii ac clysteribus factum fuerit: tum operæ fuit pretium, pulveres epilepticos propinare.

### OBSERVATIO II.

Puella Hebræa, quatuordecim annos nata, corporis strictioris, sed vasis capacioribus instructi, præviis hinc inde spasmodicis stricturis, mensium fluorem primum incidit. His per bi-duum fluentibus, relatum ipsi fuit, patrem peregre factum subito fuisse mortuum. Inde puella, more hisce gentibus consueto, tanto perculsa fuit terrore, ut non solum menses protinus supprimerentur, verum etiam extrema mox refrigescerent, cor palpitare cœperit, vehementes præcordia occuparent anxietates, & denique in ipsam incideret epilepsiam: sub qua corpus violenter agitabatur, pollices contraherentur, dentibus stridebat, eosque adeo commordebat, ut vi effringi debuerint. Quidam mecum consultus medicus suasit iterum, ut stylo in nares protruso, sanguinis effluxus tentaretur: at ego, cum mensium suppressio malum foveret, ne major humorum ad caput fieret affluxus, eorumque per uterum fluor impediretur, dissuasi hoc remedii genus; & potius jussi, ut sub fine paroxysmi, pedibus in aquam missis, sanguis mitteretur. Quo facto statim ad se rediit; & tum injectus fuit clyster oleosus ex floribus chamæmeli, sambuci, malvæ, tilia, oleo lini &c. paratus: recrudit quidem aliquoties paroxysmus, sed erat levissimus: hinc ægram potare jussi infusum calidum ex herba melissæ, floribus tilia, & semine cymini: & quavis vespera dedi pulverem meum antepilepticum. Denique cum instaret menstrua periodus, aliquot ante eruptionem dies propinavi pilulas meas balsamicas, & pulverem præcipitan-tem nitrosum: quibus factum est, ut redirent menses, & ægra a malo suo perfecte liberaretur.

Epilepsia a mensibus per terrorem suppressa orta.

### Epicrisis.

In tali casu, ubi menses sunt suppressi.



pressi, & motus ad superiora vergunt, præstat venam in pedibus incidere, ut motus deriventur ad uterum: neque ideo congrua fuit narium ad hæmorrhagias proritatio. Vocari meretur hæc epilepsia uterina, quoniam ab utero traxit originem. Elucescit simul ex hoc casu, haud prius in usum vocandos esse pulveres sedativos específicos, quam ubi inversi humorum ad caput motus, qui a spasmo & sanguinis plenitudine fiunt, fuerint sedati: tunc enim adhibiti tales pulveres ab ulteriori mali insultu præservant. Nec rari mihi occurrerunt casus, fœminas octavo jam mense gravidas, ab ira, mœrore, aliisque animi affectibus in epilepsiam incidisse: largiori vero sanguinis ex venas in pede tusa missione, ac pulveribus cinnabarinis cum nitro ac succino perfecte convaluisset.

### OBSERVATIO III.

**Epilepsia infantilis a terrore nutricis.** Infans tres anni quadrantes natus, corporis spongiosi ac obesi, qui sæpius ventris torminibus cruciari, & stercore viridia dejicere sueverat, nutricis a spectro sibi videri putato gravi terrore percussæ ubera fugens, protinus corripitur epilepsia. Neque vero ignorari oportet, nutricem hanc jam antea alii infanti ubera præbuisse, & sic per septem jam anni quadrantes muneri huic præfuisse; quod meo quidem arbitrio minus salubre lactantibus est, quoniam diuturna lactatione lac incipit acescere. Protinus ergo infanti injectus fuit clyster emolliens oleosus, & interne data mixtura ex aqua liliorum convallium, florum tilia, ceraforum nigrorum, pulvere marchionis, syrupo de cichorio cum rhabarbaro, liquore anodyno minerali, & unico moschi orientalis grano parata; nutrici vero propinavi pulveres bezoardicos cum acetato destillato, & infuso theiformi cum regimine diapnoico; atque hinc protinus cessavit epilepsia. Verum enim vero aliquot post hebdomades, cum infans achoribus capitis corriperetur, &

hi unguento illiti repellerentur: recruduit epilepsia, & alvus obstructa non nisi virides reddere coepit fæces. Hinc ablactato protinus infanti adplicabantur iterum clysteres, & dabatur paritum pulvis ex rhabarbaro, lapidibus cancrorum, & semine cymini compositus, partim mixtura ex aquis antepilepticis, specifico cephalico Michaelis, liquore anodyno minerali, spiritu ebarris & syrupo pœoniae parata. Effectum etiam hic est, ut restituta alvi libertate, epilepsia remitteret; sed hæc tamen singulis adhuc mensibus bis vel ter recruduit. Ordinatus igitur pulvis antepilepticus mitigavit quidem malum; illud tamen singulis tribus mensibus recidit, & hanc ad annum ætatis quartum egit scenam. Tum denique infans colli tumoribus inflammatoriis, instar carbunculorum infestabatur; quibus exulceratis, ab omni prorsus liber evasit epilepsia.

### Epicrisis.

Ex hoc casu discimus: 1) epilepsiam infantum a matris terrore per lac illis communicato excitari posse. Namque ea est terroris indoles, ut non solum partes solidas afficiat, sed etiam in humores agat, eos fortiter commovendo; qui dum cum lacte ad primas infantum vias pertingunt, ibidem majorem subeunt acrimoniam, & hinc ad cerebrum delati epilepticos inducunt motus.

2) Nihil ad reprimendas capitis ulcerosas efflorescentias reperitur valentius, quam pingua ac oleosa. Ea enim, dum poris cutis se intime insinuant, neque tam facile ex iis evocari possunt; ita salutarem impediunt transpirationem, ut ideo serum acre impurum intra corpus remaneat, & membranis cerebri incumbens, eas graviter afficiat. Præstat potius in tali casu, primas vias blando laxante, vel clystere purgare; & externe caput aqua arquebusadæ abluere; quæ egregie siccant, & labefactatas corroborat partes.

3) Epi-



3 Epilepsia a consolidatis ulceribus facillime recrudescit: quo casu, præsertim in adultioribus, vesicatoriis vel cauterio nihil est præstantius. Hinc etiam in confirmata epilepsia SEPTALIUS *Lib.6. animadv. p.173.* vesicantium usum per universum caput commendat, diutius ulcusculis in cute capitis relictis: contumacissimos enim morbos capitis hac ratione curatos vidit.

## OBSERVATIO IV.

Epilepsia ab externa capitis violentia.

Epilepsia ab externa capitis violentia atque læsione admodum obnoxii sunt metallorum fossiores; præsertim ubi mineras ac saxa metallica, accenso pulvere pyrio diffingunt. Namque tale frustum capiti illisum, tantam ipsi contusionem inferre valet, quanta pro excitanda sufficit epilepsia. Sed in eo casu nihil vidi Clausthali præstantius ac efficacius cinnabari, sive sit nativa, sive antimonii largius exhibita; cujus nimirum ac succini præparati scrupulus unus bis quotidie ex aquis cephalicis melissæ, liliorum convallium, florum tiliæ propinari, & per decem circiter dies continuari debet. Neque vero tum negligenda sunt externa, quæ inter laudem merenter, primum epithema ex caryophyllis aromaticis, floribus chamaemeli Romanæ, herba rorismarini, floribus lavendulæ cum vino decoctis paratum, & affecto loco appositum; deinceps cucupha ex caryophyllis, cardamomo, & cubebis toti capiti adplicata. Quibus denique eo majori fructu adjungitur infusum theiforme ex carduo benedicto, summitatibus millefolii & floribus tiliæ. Hac quoque ratione pristina sanitati olim restitui virum sexagenarium, qui a scala præceps in caput factus, primum omnibus privatus sensibus, mortuusque habebatur: at incisa vena, atrocem incidebat epilepsiam, quæ per octo dies, singulo vel decies invadendo inhærebat, tandemque recensita methodo sublata fuit.

## Epicrisis.

Notabile est, cinnabarin magna, uti hætenus vulgo creditur, vi sedativa ac anodyna non pollere: sede potius, more mercurialibus consueto, discutiendo, coagula humorum resolvendo, ac diaphoresin movendo virtutem suam exferere. Hinc non secus ac æthiops mineralis, præsertim ex antimonio paratus, in omnibus contusionibus ac sanguinis stagnationibus mirificam præstat opem; maxime quando si simul lapides cancrorum cum aceto saturati exhibeantur. Huc pertinent observationes passim in medicorum scriptis occurrentes, de epilepsia salivatione curata: qualem reperies in *M.N.C. cent.4. obs.136.* ubi puella novem annorum, a parente, qui antea lue venerea laboravit, nata, inciderat in epilepsiam sæpius recurrentem: quæ postquam trochiscos Scretæ, qui continent mercurium dulcem, masticando devoraverat, alvum habuit sexies solutam: & tum sequuta salivatione, ab epilepsia facta fuit immunis.

## OBSERVATIO V.

Virgo generosa, XX. annorum, sanguinea-succi plena, acidorum usui nimium indulgens, & multis abhinc annis acetum vini larga copia quotidie ingurgitare solita, incidit forsitan ante aliquot annos in febrem, ex medici sententia ardentem: quæ bezoardicis, maxime volatilibus tractata fuit. Facta quidem hinc est quinto morbi die symptomatum remissio; at vero paroxysmi erant valde irregulares, & mox singulis, mox alternis diebus, sæpius bis uno die cum horrore & insequente æstu invadebant. Alvus subinde, quæ ante morbi invasionem jam pigra fuit, per totum morbi decursum manebat adstrictissima; nec solvi poterat, licet varia eo fine assumserit remedia: clysterum enim infusionem renuebat omnino. Tandem, pulveres purgantes,

Epilepsia post male tractatam febrem.



ex salibus & jalappa confecti, quorum per septem dies, singulis unum adsumebat, aliquantulum ducebant alvum; parum tamen proficiebant; siquidem febris cum symptomatibus persistebat, nec somnus ullus, nec adpetentia ciborum per 15. septimanas aderant. In tali rerum statu præter omnium opinionem circa tempus menstruum e-rumpebant convulsiones epilepticæ: sub quibus facies adparebat rubicunda, membra hinc inde agitabantur, quandoq; fortiter clamabat, & absona loquebatur, ac male cohærentia. Ipso quoque in paroxysmo humidum adpesebat, & oblatam eo fine aquam frigidam copiose bibebat. Hinc laxata alvo, mens ad se rediit; sed posthæc febricula cum languore corporis, adpetitu prostrato, alvo segni; urina crassa, obscuri coloris semper persistebat, & illa perpetuo mœrore & angore infestabatur. Ceterum epilepsia circa tempus mensium, quandoque extra illud, si ira excandesceret, recrudit cum spuma oris, corporis elevatione, artuum agitatione, mentis alienatione, & magna vociferatione. Hæc aliquoties contingebant, & quod notabile est, cum toto morbi tempore nec ederet, nec dormiret ægra, tamen & succulenta mansit & rubicunda. In usum ergo vocabantur omnis generis remedia antifebrilia, laxantia, salia aperitiva, castorina, antispasmodica, venæsectiones; sed nihilominus & febricula & epilepsia per sedecim inhærebant hebdomades. Tandem subiit ægra conjugii leges; & tum melius habere cœpit: cibum appetiit, vires col-legit, menses ordinem servarunt, ac paroxysmi epileptici penitus remiserunt.

Epicrisis.

Fœminæ, præsertim salaciores haud raro partim ob mensium defectum, partim etiam a lymphâ genitali stagnante & corrupta, atrocissimos incurrunt motus epilepticos. Horum in nostro casu antecedens causa fuit acidorum abusus: hæc enim destruunt ventriculi

Hoff. Syst. Tom. V.

ac intestinorum tonum, alvum constringunt, & mensium fluorem impediunt. Hinc sanguis in venis accumulatur, & sic circa menstruum præcipue periodum, ubi ad evacuandum per uterum cruorem solennes spasmi institui solent, cum magno impetu partim ad caput, partim ad pectus compellitur: unde etiam facies rubicunda, ac sanguineturgida, vociferatio, partium agitatio, atque delirium dependent.

Pessime autem in nostra ægrotante egerunt medici, qui ipsi dederunt salia volatilia: hisce enim & alvi constrictione magis firmatur, & intestinorum tonus plus destruitur. Et perpetua sane est regula, quod, quo constrictione est alvus, eo plus sanguinis ad superiora rapiatur, & vehementiores ibi fiant spasmi. Hinc consultius fuisset, clysteribus oleosis alvum moliri; qui præsentissimum adferre solent lenimen. Nec proficua fuerunt in nostro casu anodyna & antispasmodica: quippe quæ, sublata nondum causa, malum reddere solent contumacius: Neque suffecerunt solæ venæsectiones; licet alias usu suo haud destituantur; nec denique utiles fuerunt acidulæ, quibus usa est ægra. Hæc enim frigida nocent nervis; & cum ob debilitatem intestinorum per alvum haud iterum excludantur, sed in intestinis stagnant, spasmos magis adaugent. Hinc præstantissimum mali remedium fuit in conjugio: hoc enim, præsertim si frequentior celebretur concubitus, sanguinis motus invertitur, ad uterum retrahitur; vasa uteri, teste HIPPOCRATE, distenduntur, incalescunt, mensium fluor procuratur, & sic remota causa, ipsum malum debellatur.

OBSERVATIO VI.

Puer quatuordecim annorum, quinta jam a nativitate hora insultu correptus fuit epileptico. Annam nati corpus, post vehementissimam nutricia iram, duris tuberculis undique ob-sidebatur: quæ medicus pro variolis

Epilepsia a lumbricis, aliisque causis.

B

ver.



ventosis habens, lumbis inde valde adfectis adplicat emplastrum. Hinc protinus evanescebant omnia tubercula: at vero in eorum locum succedebat epilepsia cum spuma oris, atque mirificartuum tractione; & per aliquot septimanas quotidie hora circiter pomeridiana prima recurrebat. Posthæc remittebat, nec sub variolis postea accedentibus recrudescerebat; nisi forte semel sub dentium eruptione. Verum enim vero sexto ætatis anno, cum lumbricorum colluvies intestina occuparet, resurgabant graves epileptici insultus; & ad annum usque decimum quartum sæpius, maxime ventis impetuose flantibus, cælo turbido ac pluvioso, & tempestate autumnali invadebant. Præcedunt enim paroxysmum maxima anxietas, pedes, manusque refrigescunt, dentes dolere incipiunt: tum humum prosterinitur, & post paroxysmum capitis dolorem, & corporis totius retinet lassitudinem. Neque minus ante paroxysmum flatulentis imi ventris exercetur; siti vexatur, & urinam reddit albam; sub illo facies fit tumida brunni coloris. Olim quoque pigra fuit alvus, jam expeditior. Neque ulla hæctenus profuerunt remediorum genera: quid? quod salivatione tractatus puer pejus habuit, sanguine potitus est viscido, omni colore destituto.

### Epicrisis.

Epilepticam hancce affectionem ab intestinorum lumbricis ortam esse, certissimum quidem est. Cum autem nervorum genus jam a primis incunabulis, & deinceps a tuberculis retropulsis, hisce motibus jam adsueta fuit: non mirum, si ob hancce dispositionem paroxysmi jam fuerint atrociores & contumaciores. Notatu subinde dignum est, quod ab adplicato ad lumbos emplastro, procul dubio narcotico, tubercula illa protinus evanuerint. Locus enim hicce circa lumborum vertebra, ubi insignes nervorum occurrunt plexus, valde est sensibilis; cui si admo-

ventur narcotica, habitus corporis constringitur, humorum circuitus fit tardior, & noxia materia ad interiora repellitur. Quare magna cum cautione topica ad hæc regiones adplicanda sunt: & nota mihi sunt exempla, quod in foeminis ab emplastris hoc in loco admotis menses adeo cohibiti fuerunt, ut nunquam redierint. Novi etiam plures casus, ubi in viris post impositum ad refrigerandam gonorrhœam, lumbis emplastrum ex spermate ranarum, alumine, saccharo saturni & oleo hyoscyami, ingens testiculorum tumor sequutus fuit.

Neque minus notari meretur, quod malum sub ventosa aeris constitutione fuerit exacerbatum: mirifica enim est aeris in partes nostri corporis solidas, maxime nerveas, & quæ sensibus atque motibus inserviunt, potentia. Et quod denique egrotans noster sanguinem exhibuerit mucidum, rubedine privatum: certo est indicio, ipsum fuisse cachecticum, qualia corpora epilepsiæ chronicæ admodum deprehenduntur obnoxia.

Anbo demum ætatis decimo quarto sublata fuit hæc epilepsia; postquam per semestre fere Elixirium nostrum balsamicum, & sal volatile oleosum ad XXX. guttas sub epulis sunt usurpata. Hæc enim remedia blandam spirituscentiam chylo ac sanguini restitunt; & solidas partes corroborant; sed temporis beneficio ac diuturnitate opus est. Tandem vero hac curatione confirmatur aphorismus Hippocratis, quod epilepsiæ chronicæ non nisi ætatis, aeris, ac victus mutatione curentur.

### OBSERVATIO VII.

Puerpera XX. annorum, sanguineocholerica, constitutionis admodum sensibilis, & ob inordinatum victus regimen hysterici olim obnoxia passionibus, lochiis autem bene succedentibus gavisa, die a partu undecimo ex esu anguillæ corripitur febre tertiana, sub qua more sueto alvi fuit adstrictioris. Consultus medicus dedit primum pulveres ex conchis præparatis, antimonio

Epilepsia puerperæ a certice chinæ improvidè in febre tertiana dagto.

dia-



diaphoretico, nitro, & arcano duplicato confectos; hisque circa quartum paroxysmum corticem chinæ subjunxit. Tertio autem post hujus usum die incidit ægra atrocissimos convulsivos, & epilepticos motus, cum intercurrentibus animi deliquiis, & præcordiorum anxietatibus.

Epicrisis.

Spasmodicarum commotionum causa sæpius in primis viis, saburra acris, caustica refertis residet: quæ, nervosum genus afficiendo, scæminas præsertim in hystericos motus jam proclives, facillime in epileptico convulsivos conjicere potest insultus. Sic etiam nostra ægrotaans ex esu anguillæ, quæ robustiorem ventriculi digestionem exposcit, collegit sibi primarum viarum cruditates, & ex his febrem incidit tertianam. Hunc vero febris fomitem, qui in puerperis magis adhuc variis sordibus adaugeri solet, consultus medicus statim ab initio blando laxante expurgare debuisset. Sed cum partim fixioribus terreis, partim adstringentibus hanc saburram magis compactam reddiderit, ac intus retinuerit: non mirandum, si spasmi, qui semper in febrium principio junguntur, demum in ipsas abierint convulsiones.

Jam ergo eo intendere oportet curationis scopos; ut partim sordes biliosæ, acres corrigantur, & blande educantur; partim etiam motus perversi consopiantur, ne diutius perseverent, & in habitum transeant. Quamobrem in ipso paroxysmo naribus admoveere convenit mixturam ex Spiritu salis ammoniaci vinoso, essentia castorei, & oleo rutæ paratam; cujus virtus in illo, quod nervis est inimicum, discutiendo egregia est.

Sordes primarum viarum optime educunt pilule mee polychrestæ, cum extracto chamæmeli, millefolii & croci mixtæ: cui quoque scopo clysteres emollientes ac oleosi inserviunt, maxime si illis, ad discutiendos flatus, tantillum nitri & camphoræ fuerit additum.

Neque minus ad corrigendam humorum acrimoniam insigniter profunt pulveres ex lapidibus cancrorum, pulvere marchionum, nitro, cinnabari & arcano duplicato compositi; nec non aquæ antepilepticæ cum essentia corticum aurantiorum.

Discimus ceterum ex hac morbi historia, quam perniciosum sit, in puerperis nimis mature, præpostere & ante sordium evacuationem cortice chinæ vel aliis adstringentibus febriles motus suppressere, & noxiam materiam intus retinere. Hinc enim spasmos febriles in epilepsiam degenerare posse animadvertimus: qui tamen alias ad resolvendas viscidas sordes ac viscerum obstructions, ideoque ad epilepsiam quoque curandam ac præservandam admodum sunt idonei. Quare recte scribit Hippocrates, quod quartana epilepsiæ superveniens eam tollat.

OBSERVATIO VIII.

Vir XX. annorum, constitutionis tenerioris, ante tres circiter annos febre tertiana correptus, & ab ea copioso corticis chinæ usu vindicatus est. Ab hinc adpetitus languidior esse cœpit, præcordia ingens pressit anxietas, & insignis spirandi difficultas: febris quoque nonnunquam rediit, sed valde irregularis. Posthæc ex improvviso mentis abalienationem incidit, quæ cum omnium sensuum perturbatione, memoriæ defectu, artuum jactatione, & vultus rubore stipata, brevi quidem tempore transiit: accessionis autem hujus nulla fuit reminiscencia. Hoc denique malum tandem excepit fortis epilepsiæ insultus, qui cum ordinariis symptomatibus sæpius, at incertis periodis rediit, & mentis abalienationem, paroxysmi semper habuit prænunciam. Ceterum color faciei est pallidus, adpetitus mediocris, ventriculi inflatio, intestinorum mura: ab epulis molestus sæpe in ore percipitur ardor, sitis ingens in jejuno, & magna ad sudorem procli-

Epilepsia in viro a tertiana sup. pressa.



vitae. His denique duos ante menses spontaneum, & per tres hebdomades inharens accessit alvi profluvium, sponte remittens. Ipsa epilepsia novissimo anno penitus evanuit; sed eo frequentior est mentis abalienatio, quæ sæpius paroxysmos format, & nonnunquam ter in una recrudescit hora. Consulti & clarissimi medici, & adhibita præstantissima remedia, nullam hæcenus malo opem tulerunt.

### Epicrisis.

Adparet & ex hocce casu, omnem febrium intermittentium, quæ in infimo ventre, ac infarctis primis officinis fomitem suum habent, adstrictionem atque suppressionem, quæ ante viscerum resectionem, & fordium ex primis viis eliminationem fit, esse nocentissimam. In nostro nimirum ægrotante tertiana febris procul dubio ex viscerum infarctu ortum traxit. Cum vero febriles illi motus, qui ad resolvendum illum infarctum destinati sunt, præpostere fuerunt suppressi, hinc factum omnino est, ut & lymphæ gastrica, quæ ex glandulis pancreatis atque duodeni assidue stillat, & bilis, quæ digestionem perficiendæ egregie inservit, a naturali crasi recesserint. Hinc autem turbata digestionem, pessimæ in primis viis cumulatae sunt cruditates; a quibus suborti flatus ac spasmi intestinorum, horum non solum nerveas partes graviter affecerunt, verum etiam totum nervorum genus, capitique membranas in violentorum motuum rapuerunt consensum. Haud enim raro insultuum epilepticorum origo ab intestinorum flatulentia, & spasmodica crispatura natales suos mutuatur.

Curatio vero hujus mali sequentem in modum instituta est: primum singulis septimanis datum fuit Elixirium emeticum, quod placide & sine violentia ventriculum ac superiora intestina a vitiosis liberavit cruditatibus. Deinceps quotidie bis, mane nimirum ac vespere ex aqua liliorum convallium sequens

pulvis sumtus est. Recipe pulveris marchionum, cornu cervi sine igne, matris perlarum, antimonii diaphoretici, lapidum cancerorum, succini præparati ana drachmam unam, cinnabaris drachmam dimidiam, essentia ambrae guttas XX. m. d. dosis est drachma dimidia.

Tum quoque sub epulis adhibuit æger Elixirium stomachicum, ex essentia corticum aurantium, tinctura tartari, oleo macis & cardamomi paratum, & pro potu ordinario decoctum ex radice pæoniæ, visco querno, radice chinæ, scorzonæ, herbæ melissæ, rasura ligni aloes & semine fœniculi confectum usurpavit. Alvus segnis referata est clysteribus emollientibus, oleosis, qui simul herbas cephalicas nervinas, veluti abrotanum, majoranam, origanum, saturiam, rutam, rorem marinum, flores lavendulae, & sal commune habebant; & denique inustus fuit brachiis fonticulus. Ex quibus rite usurpatis, atrox hoc malum, quæ Dei est gratia, debellatum fuit.

### OBSERVATIO IX.

Fœmina XXX. annorum, constitutionis valde sensibilis, affectibus animi, præsertim iracundiæ dedita, a parentibus morbo melancholico affectis progenita, hæcenus sterilis, ex inopinato mariti morbo insigni oppressa fuit moerore. Quo tempore cum ipsi menses fluere, & sub eo fluore nuntius de ipsa mariti morte accederet tristissimus illa vehementi terrore perculsa, mensium suppressionem protinus incidit. Hinc anxia, inquieta, insomnis redita, nullum assumpsit cibum; sed verba sine ordine loqui cœpit. Tum spasmodica primum faciei tortura, quam cynicam vocant, correpta, denique graves, atrocesque toleravit convulsionibus, quibus nec sanguinis missiones, nec ulla remedia opem ferre volebant. Tandem purpura rubra malum quidem mitigavit, illud autem minime remisit penitus; sed circa tempus menstruum pertinaciter recruduit, cum tanta mensis

Epilepsia & terrore, matrimonio de, mum sublata.

per-



perturbatione, ut a multis furori vicina haberetur. Hinc in usum vocavit thermas ac acidulas, coelum saepius mutavit, multorumque medicorum consilia imploravit: sed rediit nihilominus malum, licet minori atrocita. Verum cum denique secundas subiret nuptias; ab effectu suo prorsus fuit liberata; & tum nunciatum est, eam olim venereis ac libidinosis cogitationibus nimium indulsisse, ac hinc violentos hosce motus sibi contraxisse.

Epicrisis.

In subjectis sensibilibus ac imbecillioribus, quæ natura debile nervorum genus habent, & ad irregulares motus obnoxia deprehenduntur, veluti sunt foeminae, maxime salaciores præ viris, nihil magis ad graves cerebri affectus & epilepticos motus inducendos valet, ac si sub ipso hæmorrhagiarum, maxime mensium fluore vel animo compavescant, vel vehementi percellantur terrore. Eo magis hoc contingit, si diuturnus moeror præcesserit, quo nervosæ partes debilitantur, adeo, ut accedente terrore humoribus copiosius suscipiendis, & hinc spasmodicis stricturis subeundis magis reddantur idoneæ. Quo vero celerius hæ adfectiones ex allegatis propullulant causis: eo etiam graviores, contumaciores, ac curatu sunt difficiliiores. Nostra equidem ægrotans ab erumpente purpura omnino mali sui aliquale percepit levamen. Hæc enim, sicuti ex stagnante & corrupto sero, vel lymphæ originem trahere, & ideo puerperis etiam, si lochia haud rite fluunt, familiaris esse solet: ita quoque eadem ad corporis superficiem prorumpente, acrimonia nervis inimica expellitur, & sic pabulum malo epileptico subtrahitur. Optimum autem auxilium ex matrimonio redundavit; quippe quo libido exstinguitur, menses suppressi revocantur, ærumnæ atque sollicitudines depelluntur, & toti corpori ingens accedit mutatio.

OBSERVATIO X.

Tribus circiter abhinc annis ex vicina quadam urbe ad me accessit, meumque flagitavit auxilium, vir quidam rei venatoriæ addictus, quadraginta annos natus, constitutionis valde robustæ, atque musculosi & carnosi admodum corporis habitus. Ille nimirum ante duos menses prævia vertigine, atque sensuum abolitione, subito in terram ceciderat, & per integram horam paroxysmum epilepticum satis gravem toleraverat: quo etiam percellabatur subinde, quoties ira exandescerebat. Quod vitam antea actam, & causas malum illud inducentes attinet: gavissus erat æger vegeta olim ac illibata sanitate, nisi quod per intervalla vertiginem inciderit, atque sensum gravitatis, & ponderis in nucha perceperit. Alvi autem erat segnioris; ad iram facillimus; pro potu ordinario utebatur cerevisia valde lupulata atque spirituosæ; & corpus suum validis ac fortioribus motionibus, in horrida etiam cœli tempestate vi officii subeundis, sæpenumero insigniter defatigabat. Acciderat vero, ut a Præfecto ipsius coram Principe criminum quorundam, falso quidem imputatorum, accusaretur: unde subito tam graviter animo commotus fuit, ut totum fere corpus ad præcordia usque præ frigore riguerit. Haud ita multo post, dejecta prorsus ciborum adpetentia, largam cerevisiæ consuetae hausit quantitatem: postridie rusticulas jussu Principis persequuturus, in locis humidis ac paludosis ad genua usque per octo horas obambulavit; & cum tertia die vehemens accesserit iracundia: repente incidit in dictum superius paroxysmum epilepticum, qui cum spuma oris, corporis vehementi concussione, & subsequente membrorum summa lassitudine stipatus, quater circiter cruduit. Notatu vero dignum est momentum, quod singulas accessiones præcesserit spasmus, tremor ac frigus brachii dextri; quæ sensationes

Notabilis  
Epilepsia ab  
animi  
passionibus  
inducta.



abhinc ad nucham adspirantes, tandem in convulsivos delierunt motus. Pulsus ceterum satis magnus, ac validus erat, & facies florida, tumidaque. Suasi igitur sectionem venæ, quæ primum singulis binis mensibus, deinceps autem quovis anni quadrante celebrata fuit. Ad alvum, quæ vix alternis diebus respondebat, aperiendam commendavi passulas Corinthiacas rhabarbarinas, brevi ante epulas ter in septimana sumendas. Pro potu ordinario loco cerevisiæ ordinavi decoctum ex radice scorzonæræ, graminis, cichorei, & rasura cornu cervi concinnatum: vespere ante lecti introitum ex largo aque frigidæ haustu sumendum præscripsi pulverem, ex lapidum cancrorum, concharum præparatarum ana drachmis duabus, succini præparati, nitri purificati ana drachma una cum dimidia, cinnabaris scrupulo uno confectum; cujus drachmam unam pro dosi, alternis diebus cum triginta liquoris mei anodynii guttulis mixtam adhibuit. Nec spem fefellit hæc curatio: siquidem satis longo tempore a paroxysmo suo liber mansit. Quamobrem continuavit quidem medicinarum usum, sed rarius illas sumsit, atque refractiori dosi: præterea mane infusum theiforme ex herba melissæ ac floribus tiliaë sorbillavit; decoctum commendatum sub prandio, inter cenam vero & vespere cerevisiam potavit: ira percitus illico pulverem nitrosi cum rhabarbaro adhibuit; & sic per illos annos nullum amplius passus est paroxysmum. Quum vero nonnunquam vertiginoso insultu infestari soleat: avertere illum potest, si protinus, percepta quadam accessione balsamum meum vitæ, aliquot guttulis gossypio exceptum naribus intruserit.

Epicrisis.

Docet nos hæc morbi historia: 1) quod homines etiam robusti, succis & sanguine pleni per vehementes animi commotiones, terrorem, iram atque

frigus externum repente, atque simul & semel in gravissimos capitis affectus, ac epilepticos motus incidere queant: quos affectus iracundiæ facillime revocare potest. Illis enim causis succi vitales ex superficie corporis ad caput copiosius compelluntur, ibidemque nervosas partes ad spasmodicas proritant strictiones.

2) Deinceps res notatu digna est, præsens malum absque usu specificorum, cephalicorum, ac antepilepticorum, solis venæsectionibus, alterantibus, diluentibus, laxantibus, & bilem acriorem demulcentibus expugnatum fuisse. Nec cognitu difficilis est ratio: siquidem his remediis humorum moles imminuitur, acrimonia attemperatur, æqualis circulatio restituitur, & sic causa mali removetur. Sed horum medicaminum, utut refractiori dosi postea sumtorum continuatione per satis longum tempus opus est; quoniam motus ejusmodi præternaturales facillime iterum recrudescunt. Quo etiam fine operæ fuit pretium, post quamvis animi commotionem, ac iracundiam, absorbentia blandis evacuanti- bus juncta propinare.

## OBSERVATIO XI.

Virgo generosa, viginti annorum, Epilepsia ex primis viis orta. sanguineo melancholica, cujus mater ex infelici puerperio comitalem sibi et contraxerat morbum, tribus abhinc annis ex mala victus observatione quartanam inciderat febrim; cujus singulæ accessiones nausea, atque inani vomendi conatu erant stipatæ. Accivit igitur medicum, qui præmissis incidentibus, intercalari die lene dedit vomitorium: quod quidem egregium præstiterat effectum; cum autem ægra vix finitis vomitibus, frigido nimium indulisset potui, enormes primum anxietates præcordiorum, & brevi post ipsam passa est epilepsiam. Vocatus iterum Medicus suavit, ut hausta largius tepidiori aqua vomitus cerneretur: quo facto evanuit epilepsia, febris remi-



misit, & menstrua rediit purgatio. Verum enim vero, longo tempore præterlapso nova sollicitari cœpit affectio; qua sæpius nauseam, ac levem animi defectionem, cum sensatione auræ frigida ex infimo ventre per latus dextrum ascendente, spirandi difficultatem inferente, & demum in formicantem manuum sensum, abeunte percipiebat. Hoc vitium versus lunam plenam infestabat vehementius, cum sensuum abolitione, & somni defectu, nunquam vero turbabat appetitum: sed denique frustra datis uterinis, ac epilepticis, frustra quoque sanguine misso, quotidie recurrebat aliquoties. Tandem ex improvviso in horrendam repente incidebat epilepsiam; qua paululum consopita, omnes undique ex vestibus colligebat acus, easque incredibili celeritate ori intrudebat; ut ad illas eximendas magno opus fuerit labore. Abhinc de insigni, atque tanta conquirebatur abdominis tensione, ut cutim externam vix corrugare potuerit, mensibus ceterum rite fluentibus. Consultus ego commendavi, ut præter exactam diætam, quavis septimana vel vomitus emetico ex radice Ypecacuanhæ, lapidibus cancrorum, & tartaro vitriolato confecto moveretur, vel alvus pulvere rhabarbarino subduceretur; porro singulis mensibus binæ cucurbitulae cum scarificatione admovebantur: mane infusum theiforme ex floribus tiliæ ac sambuci forbillaretur, & ex illo liquor meus anodynus nunquam sumeretur. Dedi quoque pulverem meum antepilepticum, pondere scrupulorum duorum sæpius capiendum; & denique ventriculi regionem ac dorsi spinam, nervino inungi iussi linimento. Horum remediorum usum excepit tumor linguæ, gingivarum, & glandularum colli inflammatorius, cum copiosa salivatione, per quatuordecim inhærente dies. His autem ope gargarismatum debellatis, ægrota a malo suo per aliquot dies libera vixit, ac incolumis. Quin licet etiam recrudescerent convulsivæ agitationes: illæ ta-

men pristinis longe mitiores deprehendebantur, & notabile fuit, iis finitis ægram ingenti semper aviditate cibos, minus quidem masticatos devorasse. Inde de acidis ructibus, ac amaro sapore conquesta, incidebat demum in tertianam febrem: cujus horridam accessionem epilepticus semper, utut levior, comitabatur insultus, atque vomendi conatus, sæpius vomitus materiæ mucida ac insipida accidebat. Curata vero congruis subsidiis hacce febre, ægrota absque ullo virium decremento bene habere cœpit.

Epicrisis.

Affectum hunc ex solo primarum viarum vitio, nempe cruditatibus acido viscidis biliosis, in duodeno stagnantibus, quæ etiam quartanam progesserant, ortum fuisse, nullum est dubium; eo magis, cum in nostra ægrota hæreditario jure quædam generis nervosi ad morbos spasmodicos deprehendatur dispositio. Hisce remotioribus causis cum denique accederet aque frigida post sumtum emeticum potus, non mirum, si exinde spasmus ventriculi exacerbat, primum anxietates præcordiorum induxerit, ac in ipsam demum eruperit epilepsiam. Frequentius enim observavi, cardialgiam spasmodicam, si fuerit vehementior, sæpenumero in epilepticos transire motus; quoniam videlicet insignis inter nervosas ventriculi & capitis partes, vi octavi nervorum paris, intercedit consensus. Quemadmodum vero potus ille frigidus tam atrox malum procreavit: ita e contrario tepidior ipsi sopiendo perquam fuit opportunus. Non enim solum calore suo partes nerveas, spasmo tensas iterum relaxavit; verum etiam largiori copia leviolem excitavit vomitum, quo restans adhuc saburra eliminata, atque ideo omnis morbi causa remota fuit. Notatu subinde perquam dignum est, quod sub præsentimalo, & præsertim tensione illa abdominis, quæ spasmodorum est progenies,



menes rite fluxerint. Hunc autem fluxum minime secundum naturam fieri, sed omnino præternaturalem esse credo, qui ex vehementi dolore atque strictione partium in imo ventre sitarum suos mutuatur natales: unde etiam factum est, ut sub hac critica excretionem, spasmodica nihilominus continuaverint symptomata. Tandem vero ex hac morbi historia adparet, quod quemadmodum epilepticum malum ex febre intermittente male tractata suboriri possit; ita illud etiam nova superveniente febre iterum felicissime debellatur, uti in præsentis casu tertiana factum esse deprehendimus. Ratio in aprico est: hæ enim febres, dum obstructionibus ac infarctibus viscerum referendis convenientissimum sint remedium; expugnando causam spasmodicorum motuum, ipsum quoque morbum tollunt.

## OBSERVATIO XII.

Epilepsia ex intermissione venæsectione.

Viginti annorum virgo, corpore strictiori, venis amplioribus ac sanguine plenis, animo autem ad iracundiam ac terrorem admodum proclivi prædicta, per totum quidem vitæ suæ tempus lauto atque copioso indulgit victui; sed parcissimo potu usa fuit, & ab illo per tres sepe numero dies abstinuit. Neque tamen minus justo tempore menses satis largi fluere cœperunt; & tanta insuper humorum abundantia infestavit, ut a decimo septimo anno bis quotannis venam in pede secundam præbere debuerit; haud sine egregio fructu. Sanguis ex vena detractus semper admodum ater, atque exigua feri quantitate præditus adparuit. Sed cum binis abhinc annis solitam sanguinis missionem neglexisset; accidit, ut medio autumno ex improvviso convulsionibus corriperetur epilepticis, cum pectoris, capitis, artuumque vehementiori agitatione, & accedentibus subinde lypothymiis, omniumque virium insigni prostratione stipatis. Verum enim vero aucta successive diaphoresi, citra a-

liorum remediorum usum, hæ molestiæ remiserunt. Interim cum nihilo secius pristinæ vivendi rationi inhereret, solidiores cibos magna cum adpetentia assumeret, potui parcissimo indulgeret: factum est, elapso biennio, ut intermissa denuo circa autumnale æquinoctium venæsectione, post præviam animi vehementiorem excaulescentiam, eodem ac olim mense, atrocem rursus inciderit epilepsiam. Namque per intervalla horarum aut dierum, mox mentis deliquia, cum pulsus ac sensationis cessatione; mox vehementissimæ thoracis & mammarum elevationes, præcordiorum angustię, furibundi artuum, maxime manuum, in abjiciendis corporis integumentis gestus, cum pulsu celerrimo ac fortissimo, sitique ferme inextinguibili, misere discruciarunt egram. His autem post aliquot dies, per congrua antepileptica, præsertim liquorem anodynum, essentię castorei nuptum, consopitis symptomatibus, successerunt capitis dolores, cum febrili pulsum celeritate, æstu atque siti ingenti, pectoris oppressione, tussi sicca, & dolore hypochondrii sinistri atrocissimo juncti. Quamobrem sanguinis sex uncie ex vena in pede tusa detrahebantur; dabantur pulveres rhabarbarini, cum nitro & lapidibus cancrorum permixti; propinabantur post aliquot dies salis Sedlicensis uncia una cum dimidia, purgabatur leniter primę vię, subjungebantur pulveres diaphoretici, & liquor anodynus, ac denique Elixirium viscerale sub epulis exhibebatur. Quibus demum factum est, ut egra pristinæ sanitati perfecte restitueretur.

## Epicrisis.

Docemur ex hoc casu, a sola sanguinis crassi atque glutinosi, ob defectum sufficientis potus, ac motus cumulata mole, præsertim in feminis, quando menses non sufficienter fluunt, venæsectio negligitur, & denique iræ affectus supervenit, epilepticum malum excitari posse. Et a tali causa generatę

epi-



epilepsiæ, longe facilius est curatio. Præterea in nostro casu spasmus primarum viarum, non minus a stagnante ibidem sanguine productus, febrilibus originem dedit commotionibus: quarum demum ope materia nervosa generi inimica penitus discussa, evacuatæ, & ægra denique a malo suo liberata fuit.

## OBSERVATIO XIII.

Epilepsia infantilis ex vitis nutritis.

Uxor viri, cujus observatione X. mentio facta fuit, eo tempore, quo maritus primum epilepsia tentabatur, gravida, peperit quidem justo tempore infantem per omnia sanum; sed postea crebrius vel ex lacte corrupto, vel dentitione epilepticos passum motus. Neque vero tantum illi metum incusserunt, ut mater medicos consuleret; sed ex dato pulvere marchionum, cum rhabarbaro maritato semper remiserunt.

## Epicrisis.

Hic casus confirmat id, quod multoties observavi; infantes nimirum a matribus, quæ gestationis tempore gravioribus animi passionibus indulserunt, aut affectibus hysteris, arthriticis atque spasmodicis nimium excruciatæ fuerunt, natos facillimos esse ad subeundos ex levissima causa motus convulsivos. Simulac enim lac fugunt impurum, ac corruptum, protinus illos incurrunt: quo quidem in casu nihil deprehendi præstantius, quam pulveres ex rhabarbari, lapidum cancrorum ana drachma una, & seminis cymini granis duodecim paratos, si eorum octava circiter pars

bis quotidie propinetur. Hoc loco monendum omnino duxi, ut nutricum recta habeatur ratio; quippe quarum culpa plerique infantum in hos atroces conjiciuntur morbos. Omnem nimirum curam impendere illas oportet, ut lac conservent purum; nec illud, si jam inveteratum fuerit, aut nutrices diu mammas præbuerint, infantibus porrigant. Placent mihi verba, quæ de nutricum regimine habet ALEXANDER TRALLIANUS Lib. I. pag. 63. quæ cum totam ferme rem exhaustire videantur, hic allegare haud alienum credo: *Juvare nos, inquit, curamque habere oportet, ut lac nutritis benignum sit, & recrementis liberum; fiet autem probi bonique succi, si nutrici animum adhibeas, ipsa mediocriter exerceatur, & cibus boni succi vescatur. Si lac fuerit tenue, paullo crassius efficere convenit: sin crassum, extenuare quibusdam, quale est fœniculum, aut anethum, aut anisum, aut erucam, aut rutam: omnia vero hæc, dum viridia sunt, assumantur. Fugiantur cuncta, quæ menses ciunt, his enim fluentibus, necesse est, lac imminui: quare etiam Venus lactentibus est inimica, lac enim tenue & fœtidi odoris inde fit. Si contingat concipere, adhuc multo fit perniciosius, ac cavendum est, ne illa nutrix ulterius mamillam porrigat. Lac si fuerit crassum ac caseosum, excitat infantibus convulsiones: quare opus est, ut nutrix ante cibum corpus moveat.*

Plures de hoc morbo casus legi possunt in consultationibus Medicis, nuper editis Tom. I. casibus XXVIII. ad XXXII.



## CAPUT II.

## D E

## MOTIBUS CONVULSIVIS.

## §. I.

Defini-  
tio Cō-  
vulsi-  
onum.

**S**I ullum morbi genus est, quod immani ferocitate, ac horrendis visu symptomatibus mortales excruciat, certe sunt motus convulsivi. Hi vero, cum a convulsionibus non nisi nomine differunt, sunt præternaturalis, ac summe violenta partium nerveo membranarum & musculosarum, trunci potissimum, ac artuum exteriorum contractio, a membranarum medullam spinalem, & inde prodeuntes nervos cingentium spasmodica strictura, & impetuosiori liquidi tenuissimi in organa motoria influxu excitata.

## §. II.

Diffe-  
rentia  
convul-  
sionum  
ab epi-  
lepsia.

Hinc mox adparet differentia, quæ motus convulsivos ac epilepsiam intercedit. Quemadmodum enim hujus primaria causa in nerveis illis, quæ cerebrum ac reliquas capitis partes sub nomine duræ, piæque meningis inveſtiunt, membranis residet: ita e contrario convulsionum vera sedes in illis membranis, quæ spinalem potissimum medullam, ac inde propullulantes nervos ambiunt, quærenda est. Differunt non minus utriusque affectus symptomata; licet pleraque ob ærctissimum, quo hæ nerveæ invicem gaudent membranæ, consensum, ferme eadem, saltem admodum convenireprehendantur. Enim vero in ipsa epilepsia observantur mentis alienatio, sensuum tam interiorum, quam exteriorum defectio, spuma oris, pollicum in manus compressio, & denique, si malum cessaverit, omnium gestorum ignorantia. Sed hæc fere a

convulsivis motibus aliena videntur: nam nec mentis error incidit, nec os spumam reddit, nec pollices in pugnum colliguntur: quæ si contigerint, hos cum epilepsia complicatos esse indicant, & malum constituunt convulsivo epilepticum.

## §. III.

Proprie malum convulsivum, more spasmodicis motibus consueto, in eas potissimum partes tyrannidem suam exercet, quæ nervosæ, fibrosæ, ac membranaceæ sunt. Sed cum hæ aliis musculosis, glandulosis, cartilagineis, osseisque copiosissime deprehenduntur intertextæ; illas quoque in sævissimarum motionum rapiunt societatem. Atque licet externas potissimum regiones, ac artus excrucient hi violenti motus; attamen ad interiora etiam viscera penetrant, in iisque fontica mala machinari valent.

Obje-  
ctum  
cōvul-  
sionum.

## §. IV.

Variis modis hæc adfectio miseros adoritur: quosdam enim subito absque ullis venturi mali notis prehendit; in aliis autem signis quibusdam sui adventum prænunciat. Horum potissima sunt artuum exteriorum, maxime pedum refrigeratio, vel formicans sensus; qui etiam os coccygis occupat, & instar auræ frigida per spinam dorsi ascendit. Accedunt hypochondrio sinistro tensivi inflativi dolores, & alvi tanta obstipatio, ut nec flatus, nec excrementa exire queant, nec sæpius tenuissima fistula anum intrare possit, aut etiam glandes ac enemata vi spasmodorum per vomitum cum stercore ejiciantur. Vesica constringitur ærctissime, ut urina

Signa  
convul-  
siones  
antece-  
dentia.



næ vel nullæ, vel tenues ac albæ red-  
dantur. In aliis præcedunt oscitatio-  
nes, pandiculationes, totius corporis  
tremores; vel etiam præcordiorum  
anxietates, cum pulsu inæquali duro,  
contracto, cardialgiæ, nausæ, vo-  
mitus, cordis palpitationes, degluti-  
tionis impedimentum, dolores capi-  
tis, dentium, tinnitus aurium, ver-  
tigo &c. & tum excipiunt convulsio-  
nes.

§. V.

**Paro-  
xyfmo.  
rum de  
scri-  
ptio.** In ipso paroxysmo artus potissimum  
externi mirum in modum agitantur,  
huc vel illuc trahuntur, retrahuntur,  
distenduntur, crispantur, jactantur,  
contorquentur, & incurvantur. Mox  
brachia in tergum retorquentur, ut il-  
lis insidere videantur; mox inanibus  
auram verberant ictibus; mox pedes  
in varias plagas abripiuntur; mox va-  
lide terram quatiunt & conculcant;  
mox spina dorsi incurvatur, & velu-  
ti arcum format, pectus attollitur;  
mox totum corpus obrigescit, & sa-  
xo magis immotum tenetur &c. Mul-  
tos hæ agitationes in eo situ, quo sunt,  
occupant, nec in terram prosternunt;  
alii more epilepticorum subito concu-  
dunt, flent, rident, dentes commor-  
dent, ore hiant, linguam exserunt,  
oculos variis modis contorquent, &  
capite circumgyrantur. Quemadmo-  
dum vero gestus ac motus partium,  
quos in hoc morbo deprehendimus,  
mira ac incredibili varietate tristem  
scenam ludunt; cujus singulares re-  
censiones occurrunt in M. N. C. anno  
VI. obs. 23. Dec. 1. anno 9. obs. 64.  
Dec. II. anno 3. obs. 77. anno 7. obs. 135.  
HORSTII epist. 356. &c. ita longe  
majorem admirationem meretur, &  
portento videtur simillimum, tales  
ægros haud raro peregrinas, quas nun-  
quam didicerunt, linguas strepere, &  
instar vatidicorum futura præfagire.  
Unde quoque a veteribus pro dæmo-  
niacis habiti fuerunt. Vid. FORE-  
STUS obs. med. Lib. X. obs. LVI.  
Schol. pag. 486.

§. VI.

Superatis accessionibus plurimi inef-  
fabilem totius corporis, pedumque **Paro-  
xyfmo.  
rum so-  
lutio.** languorem retinent; multi in animi  
deliquia, altumque soporem delabun-  
tur; quibusdam explosione ructuum,  
flatuum, vomitu, copiosa lymphæ ex  
gula rejectione malum solvitur. Sæ-  
pius muci vel sanguinis evacuatio per  
nares, uterum, hæmorrhoides &c. in-  
sequitur: quidam clamore, aliisque  
innumeris modis accessionem finiunt.  
Ceterum in his ægris somnus esse so-  
let turbulentus, terroris, timorisque  
plenus; adpetentia ciborum vaga; al-  
vus plerumque segnis & pigra; ægro-  
ti ad sudorem difficillimi, ad animi  
vero passiones, & præsertim *συμπάθει-  
α* admodum promi observantur. Ac-  
cessiones modo longiores, modo bre-  
viores, per intervalla mox breviora,  
mox longiora recidunt: & lunæ mu-  
tationes sæpe strictissime observant;  
quid? quod nota mihi sint exempla,  
ubi certo anni tempore reversæ, per  
aliquot duntaxat menses sævierunt,  
postea ex toto siluerunt. In sexu se-  
quiori mensium eruptionem vel an-  
tecedunt, vel ipsum fluxum comitan-  
tur: sumtis epulis frequentiores exi-  
stunt ac sæviores; & a levissimis cau-  
sis, præsertim animi affectibus facilli-  
me excitantur.

§. VII.

Ferali huic malo præ aliis obnoxii **Convul-  
sionum  
subje-  
cta.** deprehenduntur, qui genus nervosum  
debile vel ex nativa constitutione, vel  
aliis causis obtinent; eo magis, si suc-  
corum vitalium impura accesserit tem-  
peries. Hinc etiam morbus ille non  
solum per hæreditatem ad liberos tran-  
sit, verum etiam per longam generis  
feriem, quasi per manus posteris tra-  
ditur: maxime si parentes hypochon-  
driaci, hysterici, arthritici, hæmor-  
rhoidarii fuerint, vel mater gravida  
ad graviores animi commotiones in-  
clinaverit. Ex eodem fundamento  
pueri, adolescentuli, præ adultiori-  
bus; foeminae præ viris huic affectui  
sunt expositi: ad quem etiam procli-  
ves



ves reperiuntur, qui animi sensibilibus & ingenii acutiores sunt, veluti cholericis temperamento præditi.

## §. VIII.

**Causa** Sed missa motuum convulsivorum historia, pathologiam aggressuri, causam illorum proximam in membrana-  
**proxima motuum convulsivorum.** rum medullam spinalem cingentium, & inde productarum partium nervosarum valida ac violenta strictura ponimus. Hinc patet, in convulsionibus illas duntaxat partes agitari, quæ ex spinali medulla nervos suos mutuuntur: cum autem dictæ membranæ cum cerebri meningibus, cujus sunt productiones, intima communione gaudeant; cognitu facillimum est, cur convulsivi cum epilepticiis motibus frequentius complicantur; quin & in hos sæpenumero transeant.

## §. IX.

**Structura medullæ spinalis.** Hæc, ut eo clariora fiant, haud ignorari oportet, medullam spinalem esse cerebro similem, ex parte alba seu medullari, & cinerea compositam, cerebro continuam: (*vid. HIPPOCRATES L. de carnibus Sectio III. GALLENUS L. XII. de usu partium Cap. XV. VESLINGIUS Anat. Cap. XIV. pag. 224.*) uno communi membrana-  
**Stru- ræ me- dulle spinalis.** ceo involucro, quod spondylis vertebrarum adhæret, & tribus propriis membranis, intima secundaque a pia cerebri meninge productis, tertia ex dura matre propagata investitam, & intra specum vertebrarum reconditam. VIEUSSENS *Neurograph. Lib. II. cap. 1.* Gaudet illa vasis sanguiferis arteriosis pariter, ac venosis, per ipsam illius substantiam disseminatis. Recipit nimirum arteriosos ramos ex arteriis vertebralibus, & trunco aortæ descendente: ex quibus refluus cruor per venulas primum in sinus vertebrarum venosos, in venas vertebrarum, venam sine pari, aliasque venulas, & tandem in venam cavam ascendentem effunditur *Vid. VIEUSSENS loc. cit. Tab. XVIII. fig. I. II. III.* Denique ea potissimum hujus medullæ videtur esse functio, ut varios e sinu suo nervos

emittat; quorum triginta sunt paria, & duo nervi spinales, accessorii a WILLISIO dicti, qui ad par vagum tendunt. *Ibid. Tab. XIX. fig. 11.* Hi ergo nervi primum ad musculos cervicis, colli, pectoris, dorsi, abdominis, artuum superiorum & inferiorum tendunt, harumque partium motui inserviunt; deinde per interna pectoris ac abdominis viscera distribuuntur, membranas in iis obvias constituunt; & denique varios insignesque ramos ad musculos externos faciei capitique dimittunt, & ad horum motum multum contribunt.

## §. X.

Hanc allegatam causam, quicunque cum omnibus morbi symptomatibus rite comparaverit: facile illorum nexum rationalem invenire, ac causam mechanicam reddere poterit. Sed notandum est, hanc dictarum partium convulsivam irritationem duplici contingere posse ratione: namque vel ipsæ spinalis medullæ membranæ primario irritantur, convelluntur, & in hanc convulsionum societatem alias sibi connexas partes abripiunt; vel harum partium quædam prius spasmodice afficiuntur, & hanc distentionem cum medulla spinali communicant; ex qua ad alias iterum defertur regiones. Hac ratione, quid obstat, quo minus prioris generis convulsiones idiopathicas, posterioris sympathicas adpellemus.

## §. XI.

Inter causas autem mediatas, quæ ad spasmodicam hanc medullæ spinalis constrictionem disponere valent, principem locum occupant graviores animi passiones: quibus ad inducendos non minus, quam fovendos hosce diros motus nihil est efficacius, maxime si externum frigus, & diætæ errores accesserint. Memorabilem de dira convulsione, ex subita animi consternatione ob commissum antea stuprum excitata casum allegat HENRICUS ab HEER *obs. XXIV.* & quid frequentius, quam homines, præsertim juniores ex gravi terrore ac iracundia vehem-

Difference-  
ntia  
convul-  
sionum  
in idio-  
pathi-  
cas, &  
sympa-  
thicas,

Con-  
vulsi-  
ones ab  
animi  
affecti-  
bus,



hementissime convelli? Eximia inprimis in hisce morbis excitandis, nimie libidini, venerisque præmaturo aut immodico exercitio vis est: unde quoque coitus parva epilepsia vocatur.

§. XII.

Con-  
vulsio-  
nes ex  
vitio  
humo-  
rum.

Deinde inter horrendi hujus mali causas materiales recte collocatur fucorum vitalium vitium; eorumque præsertim dyscrasia quædam acris, salina, scorbutica. Hinc sæpenumero nascuntur convulsiones ab arthritide, podagra, scabie, purpura &c. intra corpus retropulsis; & his iterum ad externum habitum, & artus erumpentibus, denuo mitigantur. Quum autem porro impuritati humorum inducendæ nihil magis faveat, quam ipsorum abundantia, vel spissitudo; maxime si excretiones naturales per sudorem, vel alvum, vel etiam sanguineæ hæmorrhoidales, ac uterinæ fuerint imminutæ aut suppressæ: facile patet, cur morbis hypochondriacis, hysteriis, mensium ac hæmorrhoidum obstructione tentati, hisce convulsivis spasmodicis præ aliis observentur obnoxii. Hinc quoque crebra obvium est experientia, quod virgines, menstruum nondum passæ excretionem, sævis convulsivis, spasmodicisque tententur agitationibus; quæ orto mensium fluxu sæpenumero cessare deprehenduntur.

§. XIII.

Con-  
vulsio-  
nes ex  
vitio  
primæ  
viæ.

Si ulterius inquiramus in eas nervosas partes, ex quibus stricturæ convulsivæ ad spinalis medullæ membranas propagari solent: has inter principem locum sibi vindicat membranaceus ventriculi ac intestinorum canalis, cujus vellicationes efficacissimam causam universi generis nervosi distentionibus suppeditant. Ipsæ enim hæ partes vi fabricæ earundem nerveo membranaceæ insignem proclivitatem possident ad suscipiendos motus irregulares, & a levissima causa graviter adficiuntur. Cum autem ventriculus nervos suos primum ab octavi paris ramo externo tam dextro, quam sini-

stro; deinde etiam a nervis ex prima, secundaque dorso vertebra emergentibus, & in costalem ramum abeuntibus mutuatur; & intestina ramos nervos a ramo octavi paris interno, cum intercostali concurrente, & plexum mesentericum formante adipiscantur: ratio in aprico est, cur harum partium stricturæ ad membranas spinalis medullæ, & universum nervorum genus facillime propagentur:

§. XIV.

Tali ratione non frequentiores occurrunt convulsiones, quam quæ in duodeno potissimum intestino primariam agnoscunt sedem: in quo stabulantes cruditates acidæ, atque viscidæ, ob concursum biliosi ac pancreatici succi, promptissime acrem, ac causticam fere indolem acquirunt. Sic notabilem casum de catalepsi cum horrendis convulsionibus, cujus fomes in primis viis hæsit, recensent M.N.C. dec. III. anno III. obs. 138. Hinc etiam remedia acria, caustica, atque venena, rodendo membranas intestinorum, convulsiones universales excitare valent. Sic has a vino lithargyrio dulcificato obortas referunt M.N.C. Dec. III. anno IV. obs. XXX. pag. 81. Et quem fugit, purgantia acriora idem sæpius excitasse malum? Conf. iterum M.N.C. dec. II. anno VII. obs. 162. Hæc omnia eo certius fiunt, faciliusque, si scorbutica concurrat diathesis: hinc de convulsionibus epilepticis violentis ex clystere acriori in doloribus ventris scorbuticis incaute adplicato excitatis notabilem recensent observationem M.N.C. obs. 77. dec. II. anno 3.

§. XV.

Huc etiam pertinent observationes, quarum innumeræ a probatissimis auctoribus proditæ leguntur, de vermicibus in intestinis stabulantibus, admittendas motuum convulsivorum species, ambulatorias, rotatorias &c. maxime in pueris excitantibus: quales notatu dignos casus reperies apud GEORGIUM HORSTIUM epist. medicin. Sect. III. pag. 377. M.N.C. d. I. a.

In duode-  
deno  
latet  
sæpius  
fomes  
convul-  
sionum.

Con-  
vulsio-  
nes a  
vermi-  
bus.



d. I. a. VI. obs. 187. item Dec. III. anno III. obs. XCIX. & FORESTUM obs. med. L. X. obs. 117. Si in causas inquirimus, illæ non solum in rofionibus ac vellicationibus intestinorum, quæ quidem in infantibus locum obtinent, consistunt: verum, ubi in adultioribus contingunt, magis mortuis in intestinis vermibus sunt accensendæ; qui putredinosum vaporem spargunt, ac nervoso generi insinuant: unde in hisce casibus halitus oris sæpius deprehenditur foetidus, ac cadaverosus.

## §. XVI.

Convulsiones ex læsione vesicæ & uteri.

Quum porro vesica urinaria atque uterus ramos suos nerveos accipiunt ab interni octavi paris rami infimis ramulis pariter, ac quibusdam ossis sacri propaginibus: facile judicari potest, cur harum etiam partium vellicationes, spasmi, atque graviores læsiones in convulsiones abeant. Quot innumera sunt exempla convulsionum epilepticarum ex suppressione urinæ productarum? teste celeberrimo ETTMULLERO *Coll. Practic. P. II. Tom. I. pag. 658.* Ut omnia silentio præteream; haud rara sunt exempla, quod peculiare artuum convulsivæ motiones in parturientibus observentur; quando nempe spasmi uterini superiora petunt, & nervos medullæ spinalis invadunt. Unde manus atque collum sæpius hinc inde ex uno latere ad alterum agitantur, pectus valide attollitur, contremiscunt membra, totumque corpus: & nisi conquiescant, & ad foetum expellendum rursus deriventur, infanti non minus ac matri satis grave, ac ipsius vitæ minantur periculum. Quamvis enim notissimum sit, nullum partum absque motibus spasmodico convulsivis obtineri: probe tamen tenendum est, eorum sedem in utero potissimum, osse sacro, vicinisque musculis naturaliter residere debere. Quando vero a variis causis simul ad superiores corporis regiones propagantur; medullæque spinalis superiorem partem oc-

cupant; varias horrendas, tristesque ludunt tragœdias.

## §. XVII.

Non minus externas ipsius medullæ spinalis pariter, ac aliarum remotiorum etiam nervosarum partium læsiones insequuntur horrendæ convulsiones. Fracturis atque luxationibus vertebrarum dorsi, ubi festucae ossæ pungunt spinalem medullam, supervenire motus convulsivos, cuivis chirurgorum notum est. Et quem fugit, quod graviora nervosarum partium vulnera; nervorum vel incauta venæsectione, vel aliis causis inductas puncturas ac vellicationes, gravissimæ excipiant convulsiones? Talem casum de convulsionibus ex nervo in manu puncto subortis annotavit RHODIUS *obs. cent. I. obs. 32. & 50.* ex punctura nervi per venæsectionem male peractam FORESTUS *obs. Lib. X. observ. 118. & 119.* ex vulnere *obs. 120. &c.* quid? quod de motibus hisce violentis ab unguibus incaute resectis casum adferat THODIUS *loc. cit.* Hinc quoque puncturæ, vulnera, atque læsiones quarundam capitis exteriorum partium & musculorum sæpius in convulsivos motus abire deprehenduntur, & hos quidem a læsione muscoli temporalis excitatos vidi. Nec etiam mirum: nam ex nervo secundo verticali rami quidam sursum per aurem externam reflexi, varios ingrediuntur faciei musculos, annotante VIEUSSENS *Neurograph. Tab. XXIV.*

## §. XVIII.

Eidem fundamento innituntur convulsiones ab ictu variorum insectorum productæ. Harum admirandam speciem a morfu muscæ majoris allegant A. N. C. *dec. I. anno IX. ob. 65.* Has præprimis stupendas artuum, dorsi que agitationes, incurvationes, jactationes cum turbata etiam phantasia stipatas, ab ictibus morfibusque ira percitorum insectorum excitari, multæ a probatissimis medicis conscriptæ attestantur historiæ: ex quibus etiam clarissimum fit, valde exilem, & ad-

Convulsiones ab externis læsionibus.

Convulsiones ab ictu & morfu animalium.



modum perniciosam esse illam materiam, quæ tantos tumultus, & irregulares motus in universo nervorum, nervosarumque partium systemate suscitare valet.

§. XIX.

Prognosis morbi convulsivorum.

Quamvis horrendum, terrorisque plenum hoc malum adpareat: ne utique tamen adeo funestum est, ut quos corripuit, subito occidat. Ubi recens est, ætas junior, ac reliqua corporis constitutio integrior accesserint: spes est facilioris ac brevioris curationis. Quod si sanguinis naturales excretionem per uterum aut hæmorrhoides suppressæ hunc affectum foverint; hic illis iterum revocatis omnino mitigatur, ac prorsus depellitur. Contra vero, si humores spissi ac impuri sunt, excretionem suppressæ manent, temperamentum accedit sensibilius, ætasque provectior, ac ipsum malum vel hæreditarium, vel temporis diuturnitate in pertinacem habitum degeneratum est: per arduum omnino videtur, illi penitus mederi. Tum enim non solum fluidæ partes peccant; verum etiam solidæ nerveæ, in quas acris halituo-  
sa materia veluti impacta, ac jus hospitii nata est. Præterea nervi, dum sub violentis concussionibus admodum extenduntur: loco fluidi tenuissimi ac ætherei adimplentur vapore crassiori aereo, & hinc difficillime in naturalem reducuntur statum. Exinde quoque his morbis obnoxiorum hominum insigne, quo sub paroxysmo pollent, robur derivandum est. Haud etiam raro, accidentibus præsertim mala victus observatione, aut perversa medicatione, convulsiones abeunt in veram epilepsiam, vel etiam melancholiam hypochondriacam. Et denique quicunque iis pereunt, apoplexia abripiuntur: hinc in dissectis cadaveribus in ipso cerebro vel vasorum a stagnante in iis sanguine infarctus, ac distensio; vel cruoris aut feri hinc inde in ventriculis cerebri, vel medulla oblongata extravasatio in conspectum veniunt.

CURATIO.

§. I.

Convulsivos motus expugnaturus, tres occurrunt potissimum indicationes, quarum prima est, ut causas materiales malum foventes corrigat, ad exitum præparet, & opportunè e corpore ejiciat: deinde violentas & irregulares partium nervosarum motiones demulceat; ac denique ne more ipsis consueto iterum recrudescent, genus nervosum corroboret. Ante omnia vero, maxime si paululum inveteratus fuerit affectus, monendus est æger, ut curationem summa patientia per aliquod tempus protrahat. Neque enim illam multis ac drasticis remediis perficere, sed magis blandis, ac naturæ congruis instituere convenit præsidii; quæ patientia, ac temporis diuturnitate adjunctæ omne curationis momentum absolvere possunt.

Indicationes curatoriæ.

§. II.

Itaque, circa curandi rationem generatim ita tenere oportet. Quod si malum juxta Hippocratem a nimia humorum repletionem subortum; aut sanguinis justo copiosior moles, aut spissitudo cum pulsu magno fuerit præsto, & præsertim temperamentum accedat sanguineum: a sanguinis detractione auspiciis curationis capiendum est, pertusa vel in brachio, vel pede vena. Neque etiam minus pro ratione plethoræ venæsectiones bis vel ter in hoc morbo iterandæ; vel etiam scarificationes interponendæ sunt. Præstat vero paroxysmo soluto, quam in ejus accessione sanguinem mittere: non semel enim inde longe truculentiora, & diutius perseverantia animadverti symptomata.

Venæsectio ubi celebranda.

§. III.

Deinde vero nunquam fere vidi debellatos motus convulsivos, nisi accedente recta victus ratione. Quamobrem inveteratis potissimum convulsionibus accomodatissimum est, aerem, locumque, præsertim si vappidus nimium

Dietætica ac simplicissima præsidia.



mium ac humidus exstiterit, permutare; atque sub cœlo sereno ac clementiori vivere, itineribus ac crebris exercitiis corpus sedulo movere. Cibi etiam seligantur congrui, molliores, ac concoctu faciliores; omnesque potus calidiores, spirituosi, vinosi ac cerevisiarii evitentur: quorum in locum pro potu ordinario assumenda sunt decocta ex radice scorzonerae, rasura cornu cervi concinnata, aut serum lactis, aut acidulae Selteranae. Tum quoque in usum vocanda sunt pediluvia, quae ex sola aqua fluviali, fursuribus triticeis ac floribus chamæmeli parari possunt. His duntaxat tepidioribus circa lecti introitum pedes paullo profundius immittere, & tum in lecto leniter sudare oportet: sic enim humorum circuitum promovendi, & stricturas spasmodicas consopendi, egregiam possident virtutem.

## §. IV.

Laxantia ubi sint adhibenda.

In primis vero nihil moliendum est, nisi alvus simul conservetur aperta: quo quidem fine, si pigra est, & officio suo haud respondet, conducunt vel pilulae balsamicae, vel infusa ac potiunculae mannatae, vel manna loco sacchari ex infuso calidiori sumpta, vel denique, si plane obstructa fuerit, clysteres emollientes, fortiter oleosi etiam iterandi. Quando vero mali fomitem in primis viis residere, certa sunt indicia; consultum est, praesertim circa lunæ mutationes emeticum cum laxante jungere; & e.g. decocto mannato, quod recipit unam mannæ unciam, grana duo vel tria tartari emetici admiscere: ut per superiora pariter ac inferiora sufficiens humorum vitiosorum fiat evacuatio.

## §. V.

Aquae simplicis usus.

Inter simplicissima, ac diætetica, quae morbis convulsivis incredibilem ferre solent opem, remedia praestantissimum est aqua simplex, naturali frigidity largius hausta: qua sola atrocissimas convulsiones profligatas vidi. Ea namque levitate ac fluiditate sua minima corporis nostri vascula pene-

trat, cruorem magis fluxilem reddit, partes roborat, humores atque vapores acres sulphureos involvit, ac leniorem excitando sudorem, secum e corpore ducit. Id circo etiam congruus, ac bene ordinatus acidularum, ac thermarum temperationum usus insignem in his morbis pollicetur utilitatem.

## §. VI.

Quod si speciatim in pubertatis vel adolescentiæ annis a nimia vel intempestiva venere, aut ira, aliisque animi commotionibus originem traxerit malum: cavendum est ab omnibus, quae commotionem & orgasmum in partibus fluidis concitant, vel solida impetuose movent, & ad graviores stricturas proritant; veluti sunt aromatica, acria purgantia, emetica, calidiora omnia, spirituosia, fortiores corporis & animi motus. Contra vero, major spes in diæteticis, emollientibus, demulcentibus, nutritivis collocanda est: quo fine cura lactis bubuli, vel asinini, vel etiam serilactis, nec non balnea ex aqua dulci, affuso lacte parata insignem merentur commendationem. Non minus conferunt juscula gelatinosa, nutrientia, decocta ex radice Scorzonerae, hordeo, rasura cornu cervi, eboris, & carne viperarum parata, pro potu ordinario usurpanda: decoctum succoladae tenuius, aliaque. Jungenda his denique motus spasmodicos demulcentia remedia, anodyna & specifica: quorum inferius fiet mentio.

## §. VII.

Quandocunque verminosa colluvies ansam, causamque praebet convulsionibus: tunc ad hos expellendos atque enecandos intentio medendi debet ferri. At vero probe notandum, non omnia hic invenire locum anthelmitica specifica, uti alliacea, vitriolacea, venerea, aloetica, acriora purgantia, & mercurialia incaute adhibita: quippe quae vermibus quidem adversantur, simul vero partibus nervosis inimica sunt. Operæ magis erit pretium, exterminis pugnare remediis: quae inter cly-

Cura-  
tio  
mali  
ab a-  
nimi  
affecti-  
bus, vel  
nimia  
venere  
orti.

A ver-  
mibus  
& pri-  
ma-  
rum  
via-  
rum  
vitiis  
induc-  
ti.

ste-



steres ex lacte, ac dulcibus, oleosisque parati; & linimenta purgante prædita virtute, veluti unguentum de artharita, externe umbilico atque abdomini adplicata palmam obtinent. Quæ interne exhiberi possunt anthelmintica, simul roborantem ac nervinam possidere debent efficaciam, uti semen fantonici, vel in pulverem, vel essentiam minus spirituosam redactum; vel mercurius dulcis, si cum duabus cinnabaris medicinalis partibus miscetur, & cum extracto tanaceti, rhabarbari atque centaurii minoris in formam pilularum redigitur. Aliis primarum viarum vitiis, sordibus acidis, biliosis, viscidis opponenda sunt incidentia, resolventia, digestiva, absorbentia, acrimoniam attemperantia, ac leviter evacuantia vel emetica, vel laxantia. Si acriora purgantia, caustica, venenosa remedia malum introduxerint: eorum aculei remediis pinguibus, oleosis, mucilaginosiisque atque lacticiis sunt obtundendi.

§. VIII.

**Ab ex-** Si mensium suppressio horrendum **cretio-** hocce malum sustentaverit: probe cavendum, ne emmenagogis aliisque calidioribus medicinis, & quæ vulgo solent adhiberi, eorum revocationem tentemus. Hoc in casu præstat balneorum naturalium, & aquarum thermalium usu; venæsectionum prudenti administratione; pediluvii tepidioribus, pilulis balsamicis, infusis calidis ex floribus melissæ atque tilia, pulveribusque temperantibus humorum equalem circulum restituere: tum motus partium solidarum irregulares antispasmodicis, ac anodynis, veluti est liquor meus anodynus, cum essentia castorei maritatus, quod præstantissimum omnium est medicamentum, coercere, ac his denique sedatis imbecillas partes corroborare. Quod si vero hæmorrhoidum suppressio, vel imminutio malo dederit pabulum: præter commendatorum remediorum, & venæsectionum usum, hirudines ad anum adplicatæ egregium spondent emolumentum.

Hoff. Syst. Tom. V.

§. IX.

Haud raro contingit, ut sudores re-  
tropulsi, excretiones ulcerosæ, scabio-  
sæ, purpuraceæ repressæ, aut motus  
arthritici vel podagrici intra corpus a-  
sti malum convulsivum inducant. Hoc  
in casu acrimoniæ primarum viarum  
temperandæ, simulque spasmodicis  
stricturis demulcendis egregie conveniunt pulveres absorbentes ex lapidibus cancerorum, pulvere marchionum, succino præparato, cinnabari, nitro, antimonio diaphoretico, & extracto croci castorei confecti. Vesperi assumi potest liquor meus anodynus cum refracta dosi spiritus bezoardici Bussii & castorei remixtus; aut pilulæ antispasmodicæ, quæ ex extracti millefolii, florum chamomillæ, herba cardui benedicti, ana drachma una, theriacæ, succini, cinnabaris, ana drachma dimidia, croci granis duodecim, & olei chamæmeli veri guttis octo parantur: quibus crebra interponi debent laxantia. Tum denique cura lactis asinini cum acidulis Selteranis remixti, aut etiam feri lactis in usum vocanda, & per aliquot hebdomades, interposita quandoque manna, cremori tartari nupta, protrahenda est.

§. X.

Tali ratione remotis causis materialibus, præsertim crassioribus, si adhuc resisterint motus convulsivi: illis obviam eundum est remediis motus effrænes sedantibus atque specificis, quæ vaporis subtili sulphureo, nervis impa-cto, & mali genuino pabulo sunt inimica. Ad eorum censum præprimis pertinent antispasmodica ac antepileptica sic dicta specifica, quæ ex regno animali petuntur: horum enim fragrantia quædam, olfactu mox percipienda, revera halitibus istis graveolentibus, convulsionum nutriticibus adversatur, eosque specifica virtute infringit. Hoc nomine insignem merentur laudem rasura dentis hippopotami, eboris, lapidis manati, ungulæ alcis, cranii humani, item secundina ac sanguis humanus exsiccatus, viscera vipe-

A sup-  
pressis  
sudori-  
bus,  
scabie,  
poda-  
gra.

Speci-  
fica.

C

ra-



rarum & serpentum, eorumque cor, fel & hepar, tali leporum siccati atque pulverisati, aqua hirundinum cum castoreo, maxime omnium pulvis lumbricorum terrestrium majalium. Nequ minus quædam medicamina ex regno vegetabili ac minerali desumpta sunt efficacissima: quæ inter carbones tiliæ pulverisati, extractum croci, flores & radix pœoniæ, papaveris rhæados, cinnabaris medicinalis &c. digna sunt, ut commendentur. Huc quoque spectant, & singulari fructu adhibentur remedia sedativa; ac sic dicta anodyna; veluti sunt liquor meus anodynus, cum essentia castorei mixtus: pillulæ de cynoglossa si cum auro fulminante & cinnabari nativa commisceantur, pillulæ Wildegansii, quæ remota crassiori materia, habituales motus insigniter refranant, ac consopiant. Quorum, ut & roborantium, tertiæ indicationi satisfaciendum, amplior fit mentio præcedente capite de epilepsia.

## §. XI.

Externa  
remedia.

Neque vero negligenda sunt externa remedia, quæ inter unguenta ac linimenta nuchæ & spinæ dorsi inungenda non carent sua laude. Horum præcipua ingredientia sunt axungia humana, taxi, ursi, muris alpini, pinguedo castorei, viperarum; quibus admisceantur olea destillata v. g. rutæ, lavendulæ, majoranæ, rorismarini, nucistæ &c. & ad meliorem penetrationem aliquot spiritus salis ammoniaci volatilis guttulæ. Sed notandum est, olea destillata in subjectis, quæ illa perferre nequeunt, omittenda; & solis axungiis, ac mucilaginosus utendum esse. Tum vero omnibus præferri merentur balnea aquæ dulcis circa tempus invasionis usurpata: a quorum usu lenis provocetur sudor, vel ipsa natura sponte ad hunc inclinante, vel adjuta infuso theiformi ex floribus tiliæ, quæ peculiaris sunt virtutis, primulæ veris, hyperici & radice valerianæ parato: quibus sæpius horrendæ accessiones anticipantur.

## Cautelæ, &amp; monita practica.

## §. I.

**Q**uandocunque in convulsivis motibus, a vermium colluvie productis mercurius dulcis cum purgante exhibetur: probe observandum est, ut ante hujus, aliorumque anthelminticorum usum demulcentia mucilaginosa, ut oleum amygdalarum dulcium ad aliquot cochlearia, vel lac ipsum sumatur, vel etiam superbibatur, quo strictionum intestinorum hisce demulceantur.

Circa  
mercurialia  
in convulsio-  
nibus  
vermi-  
nos.

## §. II.

Quamquam venæsectio sæpissime locum habeat in hisce adfectibus, maxime si plethora, aut humorum spissitudo, dyscrasia, aut mensium vel hæmorrhoidum suppressio præsto fuerit, vel etiam caput adficiatur graviter: probe tamen cavendum est, ne simul & semel larga cruoris detrahatur copia, nec temere ac promiscue adhibeatur. Quum enim malum, si sæpius revertitur, longe frequentius a benigni sanguinis defectu, quam nimia illius mole proficiatur: facile fit, ut ab immoderata illius missione vires imminuantur, stomachus debilitetur, perspiratio retardetur, & præsertim in corporibus haud manifesto plethoricis majus damnum excitetur, quam emolumentum. Neque etiam in latere affecto eam instituere convenit, nec in ipsis æquinoctiis, sed quatuordecim circiter ante, vel post illa diebus: quoniam hisce temporibus mali accessiones plerumque sunt graviores, in quibus nihil moliendum est.

Circa  
venæ-  
sectionem.

## §. III.

Ubi suppressæ hæmorrhoides foverint convulsiones, & jam lienis tumor, ac vasorum obstructions concurrerint; præmissis præmittendis non præstantius quicquam reperitur martialibus. Unde laudem meretur sequens infusum vinosum: Recipe radicis zedoariæ, cichorei ana unciam semis, summitatum centaurii minoris, florum hormi-

Mar-  
tialium  
usus.



ana pugillos quatuor, corticum citri recentium unciam semis, passulorum minorum uncias duas, vini Rhennani mensuram unam: mixta, lenique calore digesta ad usum reserventur.

§. IV.

**Cautela circa volatiliū u. sum.** Nihil deterius est in hisce morbis convulsivis, quam ea remedia exhibere, quæ humores in graviores rapiunt commotiones, utpote, qui ad hasce subeundas tum sunt promptissimi. Quare cane pejus & angue fugienda sunt omnia calidiora, spirituosā, volatilia, tincturæ ac essentia calidiores, nec non crudiora adstringentia, narcotica, opiata: quippe quæ non solum ipsas mali accessiones revocant, verum etiam malum reddunt deterius, ac pertinacius.

§. V.

**Circa balneo. rum ac lactis curam.** Ad balneorum usum non temere statim transeundum est: sed bene providendum, ne repleto sordibus duodeno, vel sanguine nimis copioso, impuroque existente, hocce curationis genus ineamus. Verendum enim est, ne ubi quid ejusmodi vitii in corpore hæreat, materiae malignitas, remedii ope excitata per totum corpus diffundatur. Idem circa lactis curam, in cuius locum subjectis biliosioribus magis convenit serum lactis, præcipiendum est: ad quam non prius accedere oportet, quam si primæ viæ a sordibus purgatæ, usque ac visceribus sua constet integritas. Talis curatio tutissime vel adulto, vel præcipiti vere instituitur.

§. VI.

**Circa laxantia, atque lenimenta.** Alvus in hisce morbis semper existat lubrica, eo magis necesse est, quo vehementius illa existente obstructa, observatur malum. Huic vero scopo inserviunt laxantia blanda, rhabarbarina, passulata, mannata, clysteres, ac victus emolliens. Linimenta autem, licet in demulcendis ac relaxandis spasmodicis sint efficaciora: tamen consultius remittente paroxysmo, quam sub ejus vigore inunguntur; maxime si corpus antea in balneum fuerit ingressum.

§. VII.

De specificis antepilepticis pariter ac spirituosis roborantibus probe tenendum est, ne in mali principio, sed omnino materiali atq; crassiori causa subducta demum exhibeantur. Hac enim remota cessant sæpius convulsivi motus, absque specificorum ope. Et notabile est, horum efficacissimam esse virtutem in malo ab animi affectibus inducto atque sustentato, & si viscera adhuc fuerint integra: tali enim ratione juvenem, qui per sedecim annos diu epilepticis laboraverat motibus, per datum, præmissio vomitorio, pulverem meum antepilepticum, felicissime restitutum vidi.

§. VIII.

Quod denique mali præservationem attinet, illa optime recto rerum non naturalium usu impetrabitur. Æger nimirum aere puro, sereno, ac temperato utatur: & cum Hippocrates Sect. II. aphor. 45. juvenibus per cœli mutationem a convulsionibus liberationem promittat: igitur peregrinatio ex locis præsertim paludosis, frigido humidis, crasso & denso aere stipatis, ad loca altiora, sicca, salubriora plurimum suadenda erit. Vitandus quoque est decubitus in terra humidiori, diuturnior in aere vitioso, vesperi, & circa noctem obambulatio, item die sole fervidiori existente. Victus sit facilis, potui inserviant vel aqua frigida, vel medicata, vel infusa calida; animi conservetur hilaritas; venus sit parcissima, motus corporis exerceatur; somnus plenior capiatur; alvus servetur lubrica, ac ne cumuletur moles sanguinis, congruis venæsectionibus, aut scarificationibus prospiciatur.

Enarrationes morborum.

OBSERVATIO I.

**A** Dolescens octodécim annorum, constitutionis tenerioris, biliosæ, & valde sensibilis, horæis fructibus large indulgens, incidit autumno.



no in scabiem : ad quam abigendam absque proportionata evacuatione, statim utitur externis unguentis ex sulphure ; oleo olivarum & nitro paratis : quibus quidem repellitur scabies, mox autem iterum efflorescit. Paulo vero post, cum brumali tempore sub gelu intensissimo per aliquot horas versaretur, protinus & penitus evanuit scabies, ac æger habuit optime. Tum accidit, ut hausto sub epulis vino Sect, elapsis aliquot horis de summa præcordiorum anxietate, ac atrocissimis imiventris torminibus conquereretur. Advocatus medicus ordinat clysterem oleosum, ac interne essentiam carminativam & antispasmodica præscribit : sed paullo post invadunt egrum violentissimæ convulsiones epilepticæ, cum ejulatu atque clamore maximo, pulsu aucto ac artuum immani agitatione stipatæ. Adstantes, venenum sub vino Sect propinatum fuisse rati, medici opem denuo implorant : qui ob nimiam ingurgitati vini copiam, lenem ex tribus tartari emetici granis concinnatum exhibet emeticum felicissimo successu. Namque redibat quidem malum, sed longe mitius ; & tandem, adhibita convenienti medicatione penitus est debellatum.

#### Epicrisis.

Præsens malum a scabie repulsa originem traxisse, luculenter patet. Ad illam vero intra corpus repellendam nihil magis valet, quam frigus ac purgantia ; quibus motus humorum, qui in scabiosis hisce morbis in corporis potissimum superficie vigent, ad centrum magis convertuntur, transpiratio impeditur, & sic impura salia in massa remanent sanguinea. Hæc naturæ sunt acris, & fere causticæ, atque, si ad internas nervosasque partes cum succis perveniant, illisque firmitus inhæreant, fontica machinantur mala, atque gravissimos motus spasmodicos & convulsivos inducunt. Noxiosissimam hancce efficaciam eo magis exserunt, si hu-

mores vitales vehementius commoveantur ac exagitantur ; uti quidem in præsenti casu nimio vini Sect potu factum est. Curatio igitur binis absolvitur indicationibus, nimirum ut primum, aucta transpiratione, salinæ sordes ad corporis propellantur habitura ; deinceps motus convulsivi consopiantur. Priori scopo satisfacimus pulvere, qui ex pulvere marionum, nitro, cinnabari nativa, succino, antimonio diaphoretico & aliquot theiæ coelestis granis componitur ; atque infuso theiformi, quod habebat radicem chinæ, herbam veroniæ & flores sambuci : alteram vero indicationem mixtura ex essentia castorei & liquore meo anodyno concinnata impetravimus ; & hisce, subjunctis laxantibus ægrum restituiimus.

#### OBSERVATIO II:

Virgo generosa, octodecim annorum, sanguine succisque plena, habitus corporis laxioris, spongiosioris, vitæ sedentariæ addicta, atque cibis horæis, nimioque aceti usu per plures annos delectata, vehementi aliquando brevi ante mensium eruptionem percellabatur terrore. Insequutus uteri fluor erat parcius, atque vehementi præcordiorum angustia, dolore artuum tensivo, ac oscitationibus stipatus. Brevi post extrema frigebant ; thorax horrendis convulsionibus attollebatur, cum molestissima præcordiorum constrictione ; cor palpitabat vehementissime ; dolor tensivus. a cordis scrobiculo ad spinam usque dorsi protensus insigniter affligebat, atque præsertim in faucibus difficilis deglutitio cum sensu infixi pali percipiebatur. Præterea, tussis aderat sicca, nausea, conatus vomendi, vasorum capitis turgescencia, narium siccitas, atque ingens bibendi desiderium ; cum alvo pertinaciter obstipata : quæ symptomata per intervalla recrudescabant, & circa menstruam periodum pertinacius inhærebant. Adhibita fuerunt præter venæsectionem varia remedia antispasmodica tam fi-

Convulsiones ab immixto menses sum fluore.



xa quam volatilia, nec non anodina: quæ quidem malum mitigabant, penitus vero extirpare non poterant. Tandem meæ se tradidit curationi; quare ipsam in balnea crebro descendere iussi, & deinde pillulas meas balsamicas, ac pulverem antepilepticum propinavi: quorum ope perfecte restituta fuit sanitati.

Epicrisis.

Hic affectus spasmodico convulsivus sedem suam potissimum habuit in ea medullæ spinalis parte, quæ intra specum vertebrarum dorsi ac colli continetur. Namque haud ignorari oportet, convulsionum causam non semper in tota spinali medulla hære; sed sæpius unam vel alteram illius partem duntaxat occupare; unde etiam particulares artuum ac corporis agitationes derivandæ sunt. Causam vero materiale sævioris huius affectus suppeditavit humorum vitium; qui per vitam sedentariam, atque diætam crassam acidamque accumulati, spissiores, quin & impuri fuerunt reddit: imprimis vero acidæ ac viscidæ cruditates in intestino duodeno generatæ, ansam dederunt flatulentis ac spasmodicis imi ventris; quibus, accedente vehementi terrore sanguis exitu suo per loca uterina destitutus, ad superiores partes, maxime præcordia regurgitavit; ibidemque stagnans, nervæas membranas vellicavit, & sic continuata ad membranas medullæ spinalis strictura, convulsivum inductum fuit malum. Quare ea fuit medendi intentio, ut imminuta per venesectionem sanguinis mole, menstrua restitueretur purgatio; humores ad peripheriam & inferiores corporis partes revocarentur; ac denique violenti motus consopirentur. Quibus quidem scopis accommodatissima fuerunt balnea temperata; quæ tensas partes relaxandi, ac æquabilem sanguinis circuitum promovendi, egregiam obtinent virtutem; ut tum denique ad sedandos violentos motus, pulvis antepilepticus cum fructu adhiberi potuerit.

Hoff. Syst. Tom. V.

OBSE RVATIO III.

Virgo annorum viginti, & quod excurrit, temperamenti sanguineo-cho-  
lerici, annuo circiter abhinc tempore post cibum ab ira vehementi sumtum, altero die vomitibus afficiebatur per sex integras hebdomades, quibus omnia, quæ assumserat, protinus ore reddebat, & insuper assidua ventriculi pressione, capitisque doloribus infestabatur. Hisce vero symptomatibus improvida curatione per opiata & martialia cum stomachicis elixiriis mixta consopitis, successerunt spasmodico convulsivæ motiones, pedum atque brachiorum, ac si ferram duceret, aut malleo quid percuteret, conjuncta spiratione celerrima. Paroxysmi sæpius redibant quotidie, nec nisi per quædam minuta inhærebant: ac tandem vomitibus iterum complicabantur, & cum hisce per aliquot hebdomades alternabant. Neque tamen minus alvus aperta erat, & menses rite fluebant. In tali rerum statu post remediorum quorundam calidiorum usum, vena in pedibus secabatur: quo facto accedebat febris intermittens, admodum irregularis; sub qua cessabant motus violenti, & datis subinde pillulis balsamicis remittebant quoque vomitus; ventriculi autem pressio, & capitis dolores adfligebant. Verum enim vero uterque affectus brevi post recrudescerebat denuo, & ludebat variam valde scenam: siquidem mox alter, mox uterque evanescebat, mox iterum redibant. Ego tandem consultus, præmissis præmittendis, acidulas Selteranas cum lacte potandas, ac balnea Hirschbergensia commendavi; quibus factum est, ut favente Dei gratia, ægotans pristinam recuperaret sanitatem.

Epicrisis.

Dici vix potest, quam graviter spasmodicis stricturis & pressionibus post vehementiorem iram, si quis statim capiat cibos, ventriculus affligatur. Vehe-

C 3

mens

Convulsiones cum vomitibus alternant.



mens enim hic animi affectus maxime in partes nervosas, ipsumque ventriculum motu quodam strictorio convulsivo agit. Hic si repletur alimentis, non modo ab eorum copia tunica nervosa cum nervis paris vagi magis distenduntur; sed etiam turbata sic digestionem, cruditarum vitiosarum bile acriori permixtarum largior in intestino duodeno generatur colluvies, quæ veram continuam vomitionibus causam præbet. Hinc optimum ab initio fuisset auxilium in blando & accommodato emetico; ut illius ope biliosa saburra ex fundo duodeni penitus expulsa fuerit. Quam diu enim quædam adhuc remanet sentina; hæc novum ex ventriculo affluentem chymum fermenti instar in suam permutat naturam: quare tali in casu veteres jusserunt vomitum vomitu curare. Et imprudenter sane ejusmodi violenti ventriculi motus, relicta causa materiali, sopientibus sistuntur: namque licet exinde motus in stomacho conquiescant; tamen aeris illa ac impura materies, in massam sanguinis atque lymphæ rapitur, & tali ratione universales in artubus musculisque corporis induxit convulsiones. Inde etiam factum fuit, ut reversis propter collectam denuo impuritatem in primis viis molem vomitibus, cessaverint convulsivi motus; præsertim cum accesserit febris tertiana, quæ ordinario a bile impura in primis officinis subsistente, suam trahit originem. Hi enim febriles motus eam obtinent indolem, ut sordes acres, spasmodum nutrices, ex artubus, imo ipsis visceribus optime discutiant, & sic sublato convulsionum pabulo, has etiam tollant. Verum enim vero cum in nostro morbo, humorum massa, morbi diuturnitate plane a naturali temperie recesserit: mirum haud est, si & vomitus & convulsivi motus redierunt: donec tandem nostro consilio tota sanguinis & humorum moles, ipsæque primæ viæ atque viscera a pravis succis per acidulas & balnea depurata fuerunt, & partes nervosæ temperiem suam natu-

ralem ac motum ordinarium recuperaverunt.

## OBSERVATIO IV.

Novemdecim annorum adolescens, melancholici temperamenti, a servitiis Domini cujusdam, scabie diu vexatus, tempore aliquando hyemali circa horam nonam vespertinam in platea circa custodiam, ex qua ante quatuor dies fur quidam in viridi veste ad patibulum deductus erat, obambulans, hunc effrem in spectri forma sibi obversari imaginabatur. Hinc incredibili timore, ac plus quam panico terrore perculsus; pondus spectri humeris suis inhæsisse credens, illudque a semet ad ædes usque Domini deportatum fuisse, pertinaciter existimavit. Domum ingressus insigni horrore, sudore frigido, summaque virium imbecillitate prehendebatur, & abhinc per quatuordecim fere dies, appetitu plane dejecto laborabat. Postea ipsi intra lectum decumbenti idem spectrum visum fuit, quod pollicem dextri pedis quasi extrahere moliebatur. Pollex etiam sequenti die insigni rubore affectus, in ipsam abiit suppurationem: sequebantur brevi post immanes partium nervosarum concussiones ac convulsiones, ita ut nunc instar arcus inflexi corpus in sublimem attolleret, nunc instar globi incurvaret, linguam morficaret, conjuncto calore partium præternaturali, pulsu citioris, siti, & alvi contumaci obstipatione. Mox lingua deficiebat, mox verba sine ordine faciebat, quin etiam per fenestram se præcipitaturum minabatur. Paroxyfmi per intervalla certis redibant temporibus, & æger eorum accessum præsentiebat, dum aura quædam ex inferioribus per dorsum ad superiora ascendere videbatur. Remedia, quorum ope sepe hoc malum fuit depulsum, erant venæsectio in pede administrata; alvi, quæ erat constricta, reseratio per clysteres emollientes & paregoricos; frequens pulveris usus, qui ex antimonio diaphoretico, cornu cer-

Con:  
vulsi-  
nes a  
spectro  
viso.



viusto, radice peoniarum, cinnabari, fucino, singulorum æquis partibus confectus erat. Tibiarum affecti pedis emplastrum vesicatorium admotum fuit, vesicis diutius apertis servatis: pro potu sumsit aquam frigidam; ac denique in capite gessit epithema ex aqua majorana, aceto rosaceo, rutaceo, & aliquot camphoræ granis confectum: quorum ope intra mensis spatium feliciter curatus fuit.

Epicrisis.

Temperamentum hujus ægri fuisse melancholicum, & defectus lymphæ atque sanguinis subtilioris, & tardior humorum spissiorum per caput circuitus indicant. Hoc temperamento præditi ad recipiendas varias impressiones apti sunt; hinc illos etiam sæpius spectris terreri videmus: quæ ut plurimum nihil aliud sunt, quam insomnia vigilantium, ex corrupta phantasia induta, præsertim quando tempore nocturno timore corripiuntur. Vidi plures, passione hypochondriaca flatulenta laborantes, adparentibus spectris, licet sua mutaverint domicilia, diu multumque excruciatos; quos convenientibus remediis, venæsectione, inpede, potu diluente, laxantibus, carminativis ac sufficienti corporis labore, adjuvante divino auxilio restitui. Præterea ad præsentis mali generationem multum contribuit, quod æger diu antea scabiosa cutis defœdatione, quæ impurioris, salinæ, acris lymphæ soboles est, laboraverit. Quum itaque vehementi ob spectrum visum timore ac terrore cutis fuerit constricta, & materia serosa corrupta ac impurior ad nervosas medullæ spinalis membranas, cui firmissime inhæsit, delata fuerit; mirum sane non videtur, tam gravem convulsivam passionem inde prognatam esse. Neque parum ad exacerbationem mali contulit stasis ac corruptio lymphæ in pedis pollice per excitatum, ob iterato adparens spectrum, terrorem induta. Exigua enim sæpius est portio materiæ corruptæ, & malignæ, quæ sola exhalatione nervis & eorum fluido adversa, mali

convulsivi causam præbere potest; dum ascensus auræ ex inferioribus ante paroxysmum percipitur: uti observationes testatum faciunt, quæ exstant apud Zacutum Lusitanum Lib. de praxi admiranda obs. 22. Tulpium Lib. IV. obs. 3. Hœchstederum in obs. part. 2. c. 7. Galenum Lib. V. de locis affectis c. 6. Doctum enciclop. medic. practic. pag. 118. Quando igitur a lymphæ acriori corrupta volatili nervos, eorumque fluidum perturbante malum originem traxit: tum utique diaphoretica ex regno minerali petita, uti cerussa antimonii, bezoardicum minerale, cinnabaris, æthiops mineralis, cum aliis demulcentibus & antispasmodicis sociata, vesicatoria quoque, per quæ lymphæ impurioris exitus paratur, omne curationis punctum absolvere solent.

OBSERVATIO V.

Puer Hebræus duodecim annorum, a terrore & frigore incidit in ingentes præcordiorum anxietates, cum tussi, virium lapsu, extremorum tremore, intercurrente horripilatione & interno æstu. Tertia die post manus & pedes convulsivis motibus, & subsultibus, per horæ diu diu insistentibus agitati sunt. Inde magis magisque increverunt convulsivi hi motus, ut dorsum & collum aspectu horrendis incurvationibus & contractionibus quassaretur, idque aliquoties quotidie. Sub paroxysmo pedes frigebant, thorax elevabatur, respiratio erat crebra, pulsus celer & durus, sensus tamen constabant: post illum corpus languebat universum, adpetitus vero cum somno erat integer. Adhibiti in consilium medici multi, etiam exteri, qui partim verminosam progeniem subesse, partim per terrorem inductum esse malum reputarunt. Sed data, tam ex illorum sententia anthelmintica, quam ex horum præscripto antepileptica, adhibitis simul balneis, fuerunt prorsus frustranea. Malum potius perstitit idem, quin subinde factum acerbius. Tandem

Convulsiones atroces per solam aquam frigidam curatae.



miser, aquam frigidam fontanam, ad unam vel dimidiam mensuram, quotidie cum dosi pulveris antispasmodici bibere jussus est: qua intra quatuordecim dies motus isti convulsivi paulatim compositi, nec in hoc usque tempus iterum infestarunt.

### Epicrisis.

Quandocunque sine singulari humorum vitio, aut dyscrasia precedente, salvisque visceribus, a causa plane immateriali, ut vehementiori terrore, timore, frigore præsertim superveniente, partes nervosæ & musculosæ in effrænes & impetuosas exagitantur commotiones: quotidiana teste experientia, frustra adhibentur evacuantia, alterantia, roborantia, nervina, cephalica, venæsectiones, fonticuli, vesicatoria &c. quorum usu misere plerumque ægrotos cruciari solent medici, & malum exacerbare. Potius specifica, quæ blanda subtili exhalatione sulphurea, membranis nervosis sese insinuant, & motus hosce vitiosos contemperant, omnium sunt præstantissima. Hæc vero potissimum ex regno animali desumantur; utpote quæ natura ac mixtione sua, solidis æque ac fluidis corporis nostri partibus admodum amica, noxiis autem vaporibus plane adversa sunt. Notandum vero, ea omnia recentia, nec ultra aliquot menses asservata esse debere: quoniam alias rancida fiunt, atque suam amittunt fragrantiam. Præter hæc, auxilium magis quærendum est in elementis, quam in ipsis pharmacis, præsertim si malum diutius inhæserit. Quare noster etiam æger, curatus est potu aquæ frigidæ & quidem fontanæ; cujus egregiam virtutem experientia comprobatur. Ea namque, sicuti in peculiari *dissertatione de salubritate aquæ frigidæ* demonstravi, non modo propter fluidum, verum etiam frigidum suum principium ad corrigenda tam fluidorum vitia, quam roborandas partes solidas est aptissima: modo sub certis cir-

cumstantiis, atque debito ordine adhibeatur. Maxime observentur hæc regulæ, ut primum non nimis copiosis atque largis haustibus, sed successive bibatur; & deinde externum corpus, maxime pedes atque ventriculi regio a frigore externo probe muniantur, ut hoc remedii genus auctior subsequatur perspiratio.

### OBSERVATIO VI.

Adolescens sedecim annorum generosus, constitutionis sanguinæ, ac succulentæ, cibos præsertim acidos in deliciis habens, jam decem annorum puer colica convulsiva per duos fere integros menses tam gravi afflictus erat, ut plures incantamentum subesse crediderint. Præterea præmaturam venerem exercere, corpus frigori sæpius exponere, atque passionibus animi, præsertim iracundiæ magis tacitæ indulgere suevit. Hinc tandem ex improvviso inter prandium corripitur primum immani artuum tremore, quem subito excipiebat concussio pectoris convulsiva, cum brachiorum atque pedum agitatione, & omnium sensuum abolitione stipata. Inhæserat jam per duas hebdomades hic gravis affectus; & paroxysmus ad duas vel tres horas durans quotidie ter quaterve redierat. Cum ego ipsum accederem, edixit mihi, quod malum invaderet vehementissimis in epigastrio circa cordis serobiculum doloribus constrictoriis, qui se extendentes ad sinistrum latus, ubi ventriculi situs est, tandem per dorsum intra scapulas ad fauces ascenderent. Sub ipso paroxysmo vehementissima erat pedum ac brachiorum jactatio, agitatio, tremor atque frigus; & alvus plerumque adstricta, quandoque etiam nimis laxa.

Secata fuit vena, infusi clysteres, data antispasmodica, castorina, cinnabarina, sed in cassum. Ordinavi infusum millefolii, & florum chamæmeli, cum cremore lactis miscendum, & pariori, sed sæpius iterata dosi sumendum: balneum aquæ dulcis; pulveres ex lapidibus cancrorum, cum

Convulsiones, quarum fomes in intestino duodenali hæret.



pulvere marchionum & pauxillo succi-  
ni confectos : & denique vesicatorium  
etiam furis pedum curavi adplicandum.  
Sed omnium frustranea erat opera .  
Tandem commendatæ a me sunt aci-  
dulæ Selteranæ cum lacte : & alvus al-  
ternis diebus , drachma una pilularum  
ex sapone veneto paratarum purgata  
est : quo facto malum remisit , & æger  
perfecte convaluuit .

Epicrisis .

Veneris nimius ac intempestivus u-  
sus iis præsertim quam maxime nocet  
corporibus , quæ sunt sensibilibus ac  
debilioris naturæ , aut quæ jam antea  
morbo spasmodico vel alia læsione ca-  
pitis , aut nervosarum partium labora-  
runt . Sic ego sæpius observavi , in ca-  
pitis gravioribus a causa violenta ex-  
terna læsionibus , super coitu funesta  
accessisse symptomata : qua de re con-  
feratur HILDANUS *Gent. 1. obs. XXII*  
& *Gent. IV. obs. XXVI*. Multo magis  
autem inimica est venus , si aliæ cau-  
sæ , quæ nervos debilitant , sanguinem  
commovent , & cum spastica strictura  
in partes solidas agunt , uti sunt ira ,  
externum frigus , & id genus alia ,  
concurrent . Quare nullum est dubium ,  
quin in præsentī casu ira suppressa ad  
crebriores paroxysmos multum contu-  
lerit : quod etiam testatur vehemens  
ille dolor cardialgicus , in epigastrio  
circa cordis scrobiculum se exferens ,  
& ad fauces ascendens , qui plerumque  
corruptum & mordacem in duodeno  
herentem biliosum humorem pro caus-  
sa agnoscit . Quamobrem insigne leva-  
men attulerunt acidulæ Selteranæ cum  
tertia lactis parte ad integram mensu-  
ram per aliquot septimanas usurpatæ ;  
atque pilulæ ex sapone veneto concin-  
natæ : utpote quibus acrimonia biliosa  
non modo temperata , diluta & edu-  
cta ; sed etiam læsio nervearum ventri-  
culi membranarum emollita fuit . A-  
lias in epilepsia & motibus convulsivis ,  
qui a vehementi iracundia fuerunt ex-  
citati , non sine singulari fructu usum

feri lactis aciduli ; vel etiam solam a-  
quam frigidam , tincturæ florum papa-  
veris , quæ cum spiritu vitrioli rectifi-  
catissimo parata sit , nuptam , per vi-  
ces hauriendam suasi .

OBSERVATIO VII.

Ante plures annos contigit , ut a-  
dolescens quidam octodecim annorum  
subito concideret semianimis , cum  
horrore & artuum tremore , facie  
tamen rubicunda & pulsu adhuc mi-  
cante . Et licet elapsa hora , remedio-  
rum ope refocillaretur ; ingentem ta-  
men non solum totius corporis languo-  
rem persensit ; sed etiam haud ita mul-  
to post eodem paroxysmo post gravem  
præcordiorum anxietatem , & artuum  
lassitudinem correptus est ; qui aliquo-  
ties intra hebdomadem repetens , ar-  
dentem intulit in dextri cubiti angulo  
dolorem , tumore & contractura de-  
mum brachii stipatum , & abhinc aug-  
mento suo & exacerbatione mali acces-  
siones prænunciantem . Medici in con-  
siliū vocati modo vermes , modo a-  
liam fonticam causam subesse creden-  
tes ; variis contra atrox hoc malum pu-  
gnabant præfidiis ; sed tantum aberat ,  
illud debellarent , ut potius magis ma-  
gisque exacerbaretur . Ego tandem in-  
auxilium vocatus , solo decocto ex an-  
tispaſmodicis , demulcentibus & ner-  
vino anodynīs parato , & mane ali-  
quamdiu potō ægrum ab immani mor-  
bo liberavi ; cuius causa posthæc in  
apricum producta fuit , dum ancilla  
gravida & partui vicina facta est ; juve-  
nem istum , antequam hoc morbo cor-  
riperetur , singula fere nocte cum ipsa  
concubuisse .

Ita quoque ante annum adolescens  
nobilis , Page in aula propinqua , satis  
alias incolumis , subito præter omnium  
expectationem & opinionem , horren-  
dis prehendebatur convulsionibus , ocu-  
los vehementer contorquebat , vocife-  
ratur , linguam exferebat , caput ad  
parietes violenter allidebat , artusque  
tam superiores , quam inferiores tanta  
con-

Con-  
vulsio-  
nes ex  
nimio  
& præ-  
mature  
veneris  
usu .



concutiebat agitatione, ut vix aliquot viri eum coercere valuerint: spuma vero ante os nulla erat, nec pollicum contractio, nec loquelæ impedimentum. Calefacto per imposita stragula corpore, & data mixtura ex aquis analepticis & antispasmodicis composita, remittebant convulsiones, noctem transigebat somno placido, & in toto corpore apparuit sudor. Expergefactus non nisi de lassitudine corporis conque- rebatur. Causam tam subiti & gravis affectus cum inquirerem, nullam aliam, quam præmaturum & nimium veneris usum, atque detestandam manu- stuprationem explorare potui. Suasi itaque, ægrum in lecto temperate calido ac blanda quiete servare, & non nisi juscu- lis ex carnibus, cancris contusis & ra- fura eboris ac cornu cervi confectis uti. Pro potu ordinavi emulsionem amygdalinam tenuem; dato quoque pulve- re Marchionum ex aqua liliorum con- vallium, florum tilia, primulae veris &c. quorum remediorum ope ab ulte- rioribus mali insultibus liber evasit.

#### Epicrisis.

Quemadmodum intempestiva & ni- mia venus in omni, etiam robusto cor- pore, vires insigniter frangit, atque debilitat: ita eo magis nocent, ætate imbecillibus, pueris, quin & senibus. Recte enim HIPPOCRATES *Lib. de genitura* §. I. scribit: Robustissimum per genituram secernitur, quia a ve- neris usu tam pauca materia emissa im- becilles reddimur; & certe seminis di- spendium plus debilitat, quam largæ venæsectio. Nihil itaque est, quod a- dolescentibus plus noceat, eosque ad graves nervorum morbos, ac ventricu- li debilitatem disponat, quam præma- tura & intempestiva venus. Non enim solum vera sunt, quæ Hippocrates *Li- b. VI. epidemior.* effatur, quod quibus- dam, dum venere utuntur, inflatur venter, & strepitus inde fiant: verum etiam multiplici experientia annotavi, juvenes in academiis, Bacho & venere

vires suas consumentes, quando in- morbum acutum, ut variolas & mor- billos inciderunt, plerumque fuisse mortuos. Neque vero virium dejectio- nes solum, ac morbi ex atonia solida- rum partium natales suos mutuantes, ex abusu veneris inducuntur; sed sæ- pissime etiam spasmodicæ atque con- vulsivæ, eæque gravissimæ subnascun- tur affectiones. Scilicet sub ipso con- gressu, ac fervidiori actu venereo, qui recte a Democrito parva vocatur epi- lepsia, ea animi habitudo, ac corpo- ris conditio est, ut universum nervo- rum genus, & liquidum tenuissimum, in illis contentum, impetum faciens, gravius exagitetur, & in motum ab- ripiantur præternaturalem. Hinc fit, ut sub ipso coitu pulsus valde citatus & vehemens manum vibret, cor palpitet, partes tremant, pedes post actum va- cillent, & omnium humorum gravis præsto sit ebullitio. Ceterum si in ullo morbi genere genuina causa Medico rationali exploranda est; id certe in affectionibus convulsivis ac epilepticis observare oportet. Quando igitur per- spicit sagax medicus, quod motuum ejusmodi insolentium & inopinato ac- cedentium insultuum causa nimia de- bilitati ex excessiva venere inductæ de- beatur; non aliis certe, nisi nutrien- tibus, demulcentibus, vires & succos laudabiles restaurantibus, & denique motus impetuosos refrænantibus pu- gnandum est remediis.

#### OBSERVATIO VIII.

Virgo generosa, tredecim annorum, ingenii alacrioris, menses nondum pas- sa, cujus mater arthriticis atque cepha- licis doloribus admodum obnoxia erat, maculis scabiosis per totum corpus ef- florescentibus corripiebatur, quæ re- mediis, nescio quibus, tractatæ eva- nescebant. Accedente autumnno, cum vespertino tempore sub aere valde hu- mido & frigido in horto obambulet; postridie de languore corporis, dolore capitis, præsertim in sinistro latere, tussi.

Con-  
vulsio-  
nes ex  
absces-  
su cir-  
ca au-  
rem  
fini-  
fram.



russi atque coryza conqueri cœpit. Quæperantibus, integræ sanitati restituta symptomata, æstu præternaturali stituerit ægra.

pata cum singula reverterentur vespera: morbus pro catharrali febre habitus, variisque oppugnatus fuit medicinis. Sed tantum aberat, ut mitigarentur hæ adfectiones, ut potius quotidie invalescerent: namque dolor capitis hemicranicus ita increfcebat, ut omnem somnum, adpetentiam & vires sustulerit. His malis ultra mensis spatium tentata, nulla nec medicamentorum, nec alimentorum, præter aquam frigidam atque lac assumere volebat. Tandem incidebat motus convulsivos, cum spasmo, quem vocant cynico, labiorum orisque distorsione, atque effuso risu junctas: accedebant brachiorum modo unius, modo alterius agitationes; collum variis modis mox antrorsum, mox retrorsum torquebatur; tanta quidem violentia, ut nemo adstantium illam posset coercere, & si hoc fine omnes nervos intendebant, ægra animo delinquebat. Ceterum parum, & non nisi absona loquebatur; assiduæ urgebant vigilæ, & alvus non nisi globulis saccharinis sollicitata respondebat. Hisce malis per duos infestata menses, meum tandem implorabat auxilium. Exploratis ergo cunctis momentis, insignem in sinistro capitis latere, circa parotides glandulas tumorem, rubore stipatum annotabam; quem cum paullo fortius comprimerem, protinus cum ejulatu clamabat ægrota, atrocesque capitis contorsiones incurrebat. Hinc facile judicare potui, ibidem mali sedem herere; & ideo, quoniam omnia interna medicamina respuebat, nihil præter cataplasma ex mica panis similaginei, croco, vitello ovi, cremore lactis, & floribus sambuci concinnatum, repetitis vicibus curavi adplicandum. Quo factum est, ut interjectis paucis diebus, ingens liquoris visceri, flavi & saniosi ex meatu auditorio copia effluerit, & brevi post non solum cuncta symptomata conquieverint; verum etiam, adhibitis tum congruis remediis tem-

Epicrisis.

Genuinam morbi sedem, ejusque originem sæpenumero adeo absconditam esse. ut etiam peritissimus non nunquam falli possit medicus; inter plures historias hæc quoque clarissime docet. Haud enim raro ipsi ægrotantes, præsertim infantes, quando capite affecto mens quoque & functiones animales simul sunt perturbatæ, nihil, ex quo certi quidpiam in dignoscendo elicere possit Medicus, edicere & declarare valent. Quamobrem in tali rerum statu operæ est pretium, ut medicus ipse tangendo, & aspiciendo morbi sedem explorare studeat. Præterea ex nostro casu patet, convulsivas agitationes ex vellatione remotarum partium suboriri posse, præsertim in subjectis constitutionis sensibilioris. Hic enim abscessus circa aurem occultatus, propter vehementes fibrillarum distensiones & distractiones tam graves totius corporis excitavit convulsiones; quæ tamen non ultra caput, ejus integumenta, atque brachia se extenderunt; quia videlicet brachia & externæ capitis partes a nervis cervicalibus suos accipiunt ramulos.

Qui plures de motibus convulsivis ac epilepticis casus, cum mea consultatione legere cupit; eas inveniet in consultationibus ac Responsis Medicis Tom. II. Sect. III. casibus CL. ad CLIX.



## CAPUT III.

## DE

MOTIBUS SPASMODICIS  
VAGIS.

Defi-  
nitio  
affe-  
ctus  
spas-  
modi-  
ci va-  
gi.

**E**st quoddam motuum spasmodico convulsivorum genus, quod cum totis ferme inhærescat corporibus, & mox caput, mox pectus, mox abdomen, mox externos artus molestissime detorquendo, mira volubilitate pervagetur totam machinam; nomen effectus spasmodici vagi, sortitum est; nec incondite a TIMÆO a GULDENKLEE *epistol. IX. Lib. I.* epilepsia miranuncupatur. Re autem vera hoc malum nihil est, nisi violenta, involuntaria, plus minus vaga omnium totius corporis partium, maxime externorum artuum agitatio ac contractio; ex membranarum nervearum, juncturas potissimum investientium vellicatione, per vaporem subtilem, acrem, volatilem facta, & vi consensus ad cerebri ac medullæ spinalis meninges sæpissime propagata, originem trahens.

## §. II.

Diffe-  
rentia  
affe-  
ctus  
spas-  
modi-  
ci va-  
gi ab  
epile-  
psia &  
con-  
vulsio-  
nibus.

Patet erga differentia, quæ motus spasmodicos vagos ab epilepsia distinguit, & convulsionibus. Quemadmodum enim epilepsiæ sedes in membranis cerebri, & convulsionum causa in medullæ spinalis meningibus quærenda est: ita e contrario motus convulsivi vagi a stricturis earum membranarum potissimum, quæ juncturas partium cingunt, natales suos mutuuntur; atque per consensum tantummodo in violentas meningum cerebri ac spinalis medullæ constrictiones transeunt. Quamobrem sæpissime quidem cum symptomatibus convulsionum & epilepticis complicantur: attamen ab iis ita differunt, ut convulsionem ac epilepsiæ totum corpus aut partes quasdam simul & semel invadant, easque in uno pa-

roxysmo solas pertinacius adfligant; contra vero spasmi vagi incerta sede per universum corpus errent, & ex una parte nervosa ad alteram transeant, eam contractionibus, distentionibus, inflammatione, tumore, crispatura mirifice exagitent, ejusque functiones vehementer lædant, atque proster-nant.

## §. III.

Neque porro minus noster affectus insigniter discrepat ab arthritide sic dicta vaga scorbutica. Hæc nimirum incertis quidem locis per totum corpus vagatur, & juncturas artuum potissimum occupat. Sed nunquam est sine doloribus, minime autem artuum concussionibus ac agitationibus sic dictis clonicis stipata deprehenditur: contra vero affectus spasmodicus vagus plerumque doloribus vacuus, at violentis partium vibrationibus, & admirandis gestieulationibus semper conspicuus. Deinceps uterque affectus rationem causarum differt; quæ in arthritide vaga scorbutica humor crassior, acris, salinus existit: in spasmodico autem vago affectu non nisi subtilissimus ac halituosus vapor, nervosas partes repente laceffens & deferens.

## §. IV.

Sciendum igitur est de nostro morbo, quod more convulsionibus solito, suas per intervalla modo longiora, modo breviora formet accessiones, visu sæpius horrendas: atque etiam tempestatum, lunæ mutationum, quin & menstruæ purgationis in sequiori sexu habeat rationem. Expositi sunt huic immani morbo scæminæ præ viris, juniores præ adultioribus, & qui habitu corporis laxo, spongioso, succorum sanguinisque pleno pollent. Deinde hic affectus hyeme præsertim, mensibus Decembri atque Januario circa solstitium hybernium invadere observatur; atque præterea etiam deprehenditur hæreditarius; sic novi quandam in nostra civitate haud incelebrem familiam, cui familiare admodum fuit,

&amp;

Ab ef-  
fectu  
vago  
arthri-  
tico.

Histo-  
ria  
morbi  
spas-  
modi-  
ci va-  
gi.



& in qua omnes liberos sævissimis ac atrocissimis misere cruciavit symptomatibus.

§. V.

**Paroxysmum deferens** Ipse paroxysmus tot, tamque variis modis tyrannidem suam exercet, quot adoritur individua. Frequentissima symptomata hæc sunt: sentiunt ægri sensum formicationis in manibus, vel pedibus; sequuntur oscitationes, pandiculationes, præcordiorum anxietates: tum excipiunt ipsæ volutationes ac agitationes spasmodico convulsivæ, ab uno membro ad alterum ambulantes. Mox enim brachia manusque attolluntur, trahuntur, retrahuntur, jactantur, variisque modis agitantur, ac si tribularent; mox pedes in diversas plagas extenduntur, dextrum erus antrorsum, sinistrum retrorsum, aut vicissim trahuntur, terram validissime quatiant, conculcantque; genua ad corpus retrahuntur; mox totum corpus antrorsum, ad latera movetur, attollitur, circumgyratur, contremiscit, spina dorsi incurvatur, arcum format; mox in terra insectorum instar reptant, ac misere quatiantur; mox ungibus dilacerant vestes, scalpunt parietes. Non minus caput afficitur, torquetur mirifice, in omnes plagas rotatur; oculi violenter aperiuntur, in gyrum moventur; os hiat; mox clauditur, huc vel illuc torquetur; linguam ore exserunt, atque commordent. Sonitus edunt varios, mirificosque, boatus, aliasque animalium voces æmulantes, ut a dæmone videantur obsessi; flent, ridentque sine ratione: & aliorum voces acutissimis auribus excipiunt. Neque vero internæ partes atque viscera a sævis spasminis immunia sunt: qui, quod notatu dignum est, cum externorum artuum stricturis alternant. Hinc respiratio est angustissima cum suffocationis motu; cardialgia vehemens, crudelissima imi ventris tormina; singultus, cordis palpitatio; alvus adstrictissima; urinæ tenuis vel nullius mictio; & verbo: nulla in toto corpore pars est, quam non pervadat truculentum malum.

§. VI.

Finito tandem tristissimo hocce spectaculo, remanent ineffabiles corporis languores, vel alti sopores: haud raro truces articulorum agitationes terminantur in tumores inflammatorios: in quibusdam cutis veluti bile suffusa flavescit; in aliis pustulæ foedæ ulcerosæ, vel vesiculæ magnæ aqua repletæ corpus obsident. Quidam extra paroxysmum bene habent, bene ingerunt, bene egerunt; foeminis nonnunquam menses rite fluunt, interdum parcius. Post mortem in dissectis cadaveribus inflammationes ventriculi, intestinorum, hepatis, lienis, pulmonum observantur; vesicula fellis admodum turgida, & ipsa bilis ad aliquot cochlearia in ventriculum effusa adparet. Conf. **BONETTI sepulchretum anatomicum**, & *Oper. de motibus convulsivis pag. 120.*

§. VII.

Notatu subinde dignum est, quod affectus noster spasmodicus vagus, certo anni tempore, certisque locis ac regionibus grassatus fuerit populariter. Sic junctus aliquando fuit febribus epidemice affligentibus: hinc **HORSIUS** in *Operib. medic. Tom. II. Lib. VIII. pag. 105.* refert historiam febris epidemicæ olim per Hassiam grassantis, cui gravissime junctæ fuerunt convulsiones. Neque minus **SENNERTUS** describit talem febrem epidemicam cum spasmo stipatam, quæ annis 1596. & 1597. in episcopatu Colonienfi, Westphalia, ac comitatu Waldeck, popularem edidit stragem; de qua peculiare Medicorum Marpurgensium existat consilium. Hoc quoque nomine memorabilis est ille spasmodicus morbus, qui superioribus annis incolas Misniæ, Marchiæ atque Lusatiae corripuit, & miris sævisque symptomatibus tragœdiam ludit: idemque ac prior nomen obtinuit. Descriptus est in **ACTIS MEDICOR. BEROLINENS. decad. II. Vol. VI.** & a celebri Budissæ Medico, **D. D. BUDDEO** tractatu peculiari.

§. VIII.

Transco autem ad æthiologiã affectus **spasmodici** **Causa pro-**



xima formamalis affectus spasmodici vagi. spasmodici vagi; & illius causam formalem proximam pono in stricture spasmodica earum potissimum membranarum, quæ juncturas & articulos nostri corporis investunt: ex quibus vero visconsensus ad universum nervorum genus, hinc etiam membranas cerebri atque medullæ spinalis nerveas sapissime propagatur. Inde enim clarissimum fit, cur frequentissime junctura, vel unum alterumque membrum solum afficiatur: non minus ratio patet, cur haud raro totum corpus successively agitetur, atque motus convulsivi & epileptici simul complicantur. Et cum nervorum fere princeps intercostalis, ex variis nervosis ramis non modo ex cerebro proficiscentibus, verum etiam e medulla spinali oriundis, cervicalibus, dorsalibus, lumbaribusque compositus, per omnia corporis viscera, atque partes distribuatur: explicatu facillimum est, cur motus in nostro affectu violenti, nulli ferme regioni parcant, sed pro varia phantasia, quæ tantum non semper in paroxysmis læsa observatur, tam diversas agitationes ac admirandas gesticulationes producant.

## §. IX.

Causæ vellicationum spasmodicarum. Hujus vero vellicationis membranarum nervearum, & insequentis convulsivi motus causæ, vel materiales sunt, vel, quod plerumque fit, innata partium nervosarum debilitate, atque proclivitate ad hos vagos motus resident. Nimirum parentes hisce morbis tentati tantum non semper generant infantes, quorum genus nervosum ad eoldem affectus valde dispositum est. Hæce vero dispositio consistit potissimum in ea particularum minimarum, quæ fibræ ultimam constituent, cohæsiōe, quæ ex levissimo ac vix naturali majori vel fluidorum impulsu, vel alio quodam per animi affectus inducto impetu, in præternaturalem ac violentam agitationem compellitur. Quæ si nativa ac hæreditaria præsto fuerit dispositio; tum accedentes causæ occasionales vel levissime tantos

excitare valent tumultus, quantos in aliis sanis ac robustis subjectis ne quidem gravissimæ prognerare possunt. Et nisi eadem hæc nervosi systematis imbecillitas nativa deprehendatur: tamen, in malo præsertim inveterato, per motuum diuturnitatem acquiritur, causamque quærentibus offert, cur ii morbi tam difficilem admittant curationem.

## §. X.

Ubicunque non adest hæreditaria dispositio: hi motus spasmodicos vagos dispositio: hi semper pro materiali causa agnoscunt dyscrasiam quandam ac impuritatem humorum. Sciendum vero est, eam minime in humore quodam acri, falso, scorbutico crassiori consistere; sed potius in volatili, subtili, sulphureo, halituoso humore, vel vapore, exigua sæpenumero quantitate in massa sanguinea oberrante, qui eo facilius ac intimius minimos partium nervosarum poros subintrare potest, collocandam esse. Et tali ratione morbus noster vagus ab arthritide vaga scorbutica eo melius distinguere poterit; prout jam egregie ostendit JOHANNES DRAWITZIUS in tr. de scorbuto Tit. II. de affectu spasmodico scorbutico pag. 71. Conf. etiam de morbis ejusmodi convulsivis ex scorbutica humorum diathesi subortis SALOMON ALBERTI, WIERUS de scabie, & MOELLENBROECK de arthritide scorbutica &c. Talis halitus atque vapor subtilissimus inhæret potissimum lymphatico latici, qui ob suam viscositatem ad eos recipiendos aptissimus est: cum quo etiam per totum corpus circulatur, & ad nerveas deponitur partes. Hinc propulsis ad habitum corporis pustulis, vel maculis purpuraceis, scabiosis, vel ulcerosis, notabiliter vel imminutas, vel plane sublatas fuisse hæc vagas nervosi generis motiones; neque minus iisdem velicatoria vel cauteria insignem tulisse opem, probatissimorum Medicorum innumera testantur documenta. Quæstio vero est, cur vapor iste inimicus, cum lymphæ oberrans, juncturas par-

Causæ materiales.

tium.



tium potissimum occupet, non æque alias partes? Non difficilis sane responsio. Cum enim in juncturis ac articulis, ad flexilitatem ligamentorum conservandam, insignis lymphaticæ subtilissimæ portionis, cui inhaeret halitus noxius, ex glandulis volatilis acrimonia fecernitur copia: necesse omnino est, ut in istis locis, ubi copiosior est proven- tus, major motuum violentorum de- prehendatur frequentia.

§. XI.

Causæ  
spasmi  
epide-  
mici si-  
ta est  
in aere.

Quæ igitur causæ vaporem ejusmodi volatilem, causticum ferme ingenera- re valent: illæ eminens contribuunt ad producendos motus spasmodicos vagos, & audiunt antecedentes. Has inter se nobis primum offert aer exhalationibus malignis volatilibus repletus, qui et- iam morbo nostro, ante aliquot annos in Lusatia ac Marchia epidemice gras- santi suam dedit originem. Talis enim aer, suas exhalationes in forma rubigi- nis malignæ, vel frumentacæ, vel mellitæ, in fruges campestris, maxi- me secale, eo cum florerent tempore deposuit; & hinc non solum universum fere frumentum coinquinavit, verum etiam ad lolium præsertim frumenta- ceum, fatuum aut temulentum, quod Botanici vocant Zizanium, genera- dum multum contribuit. Fovet autem hoc lolium sulphur quoddam narcoti- cum, vaporosum, nervis admodum inimicum: hinc non solum antiquissi- mis temporibus cerebrum afficere, & oculorum caliginem inducere perhibe- batur, atque ob hanc rationem lolio victitasse myopes atque coecutientes dicebantur; vid. PLAUTUS *mil. glo- rios. Act. 2. Scen. 3. v. 80.* verum etiam vertiginem, temulentiam, vomitum, cardialgiam, soporem, delirium & spasmodicos affectus inde excitari jam annotarunt M.N.C. *anno 3. dec. II. ob- serv. 186. & dec. II. anno 8. obs. 183.* ACTA WRATISLAV. *Tentam. XXIII. mense Januario pag. 38.*

§. XII.

In vi-  
ctu im-  
puro.

Non ergo dubitandum est, quin ta- lis aer non solum per se inspiratus, sit

noxiosissimus; hinc in ACT. MEDIC. BEROLIN. *Dec. II. Vol. VI. pag. 57.* observatur, piscatores, qui mane & sero in navibus suis commorantur, pri- mum omnium hoc morbo correptos fuisse: verum maxime lolium illud fru- mentaceum, pani pisto immixtum, atque comestum, dirum illud malum spasmodicum progeneravit. Namque annotavit celeberrimus BUDDEUS tract. de hoc morbo, pag. 24. quod homines, quibus fuit curta sepellex, & qui hoc frumento vesci debuerunt, longe frequentius motibus spasmodicis correpti fuerint, quam quidem opulen- tiores, qui fruges suas ab intermixto lolio depurandas curare potuerunt. Et sane solus impurus sordidusque victus sufficit omnino generandis malignis humoribus, & hinc inducendo atroci malo: quare etiam illud ea insequi ob- servatur tempora, quibus insignis an- nonæ est caritas, annotante DRA- WITZIO *tr. de Scorbuto Tit. II. circa convulsiones epidemicas anno 1596.* ex eadem causâ per Hassiam grassan- tes.

§. XIII.

Quemadmodum vero affectus nostri spasmodici vagi, epidemice grassantis origo subitanea est; ita e contrario il- lius ex aliis causis producti generatio eo tardior, simulque contumacior du- ratioprehenditur. Sordes primarum viarum, maxime in intestino duodeno stabulantes, acres, biliosas, acidas, malum illud excitare posse, nemo ne- gabit: sed quomodo? Ex acrimonia primarum officinarum, præsertim si excretiones naturales per alvum, cutim ac urinam imminutæ, vel sanguineæ suppressæ fuerint, salia scorbutica fi- xiora in massam sanguineam transmi- grare certum est. Sed hæc nondum sunt spasmodorum vagorum causæ: verum, si temporis diuturnitate, vehementio- ribus humorum commotionibus, aliis- que causis, talia fixa talia sensim re- solvuntur, attenuantur, ac in vapo- rem tenuissimum volatilem commu- tantur; tum nascitur malum nostrum scor-

Affe-  
ctus  
spas-  
modi-  
cus va-  
gus ex  
sordi-  
bus  
pri-  
marum  
viarum



scorbuticum. Inde patet, cur scæmine hystericae, viri hypocondriaci, alique, quibus impuri sunt humores, haud raro morbo nostro afficiantur.

## §. XIV.

A ver-  
minosa  
collu-  
vie.

Eundem porro a verminosa colluvie generari posse, experientia comprobat. Hoc vero incasu non solæ rosiones intestinorum, a vermibus vel vivis, vel eorundem acrimonia productæ suffi- ciunt: sed quodcumque vapores putres, caustici ex verminosa sentina mor- tua, corrupta ac putrefacta exhalantes, in massam humorum abripiuntur, tunc demum efficiunt motus spasmodicos vagos. Tali ratione hi quoque sequun- tur, purpuram, scabiem, achores, arthritidem, podagram, ulcera, & alias cutis efflorescentias: vehementi frigore aut ex aliis causis repressas, ac intra corpus actas: quando nimirum scalia impura fixa, per recensita vitia prius ad cutim depulsa, jam vero intus retenta, commutantur in volatilem, acrem, causticam naturam. Et tum sciendum est, sæpius exiguum valde fer- menti hujus acerrimi molem, tantos, tamque graves excitare posse tumultus.

## §. XV.

Causæ  
occasio-  
nales.

Quando igitur cunque vel nativa ad hosce motus dispositio, vel vapor sul- phureus in humoribus præsto fuerit: tunc facillimum est, ut causæ occasio- nales levissimæ delitescens malum ex- citent. Ad has vero referenda sunt om- nia ea, quæ succos vitales in motum naturali majorem agere possunt: tum enim commovent & exaltant simul ha- litus inimicos, adeoque immanes paro- xysmos inducunt. Hæc inter principem locum obtinent graviora animi pathe- mata, terror, iracundia, mœror, tri- stitia, libido, & immoderatum gau- dium: quippe quæ in motus partium cor- poris nostri & fluidarum & solidarum concitandos magnum habent impe- rium. Ob eandem rationem alimenta, potulenta, quin & medicamenta acio- ra, drastica, purgantia, volatilia, com- moventia &c. efficacissimas ad revocan- dum malum præbent occasiones. Et præ-

fertim huc facit aer, si vel malignis & a- crioribus exhalationibus repletus, vel justo fervidiorem mox frigidior exci- piat: hunc enim insignem in excitandis machinæ motibus possidere efficaciam, neminem fugit: & ex hujus varia con- stitutione ratio reddi poterit, cur affe- ctus spasmodicus vagus per certa tem- poris intervalla revertatur, & cur in lo- cis potissimum paludosis ac humidis grassetur.

## §. XVII.

Quod denique attinet feralis hujus Pro- mali prognosin: dolendum sane est, gnosis. eam plerumque non nisi inauspicatam suppeditari posse. Quamvis enim illud non adeo perniciosum sit, ut protinus jugulet homines: attamen sæpissime tam pertinaciter inhæret, atque adeo firmam sibi vindicant sedem, ut cun- ctam medicationem eludens, per mul- torum annorum seriem persistat, atque tandem in epilepsiam, aut apoplexiam, aut ipsam denique mortem definat. U- bicunque vero hæreditaria abest dispo- sitio, morbus recens, a causâ externa in- ductus, ætas junior: tempestiva medica- tio felicem sæpenumero sortitur even- tum. Verum quando vapores virulenti, nervosas partes jam intimius penetra- runt, & altiores jam egerunt radices: difficillimum est, illos expellere, at- que desideratam restituere sanitatem.

## C U R A T I O.

## §. I.

A Ffectus spasmodici vagi curatio Indica- quatuor potissimum absolvitur tiones cura- indicationibus: quarum prima est, ut toriæ. materiam subtilem venenatam, quæ tantos in systemate partium nervosa- rum ac membranacearum excitat tu- multus, corrigamus, ad exitum dispona- mus, & e corpore proscribamus: altera, ut impetuosas partium solidarum mo- tiones cohibeamus ac sedemus: tertia, ut causas, ac sordes crassiores, quæ ma- lum sustentant, perennemque fomitem subministrant, removeamus ac elimine- mus: ac denique ultima, ut debilitatas par-



partes, ne affectus hi more solito recru-  
descant, corroboremus.

§. II.

Quotum-  
plex sit  
mate-  
ria ini-  
mica,  
spas-  
morum  
caussa. Quod priorem attinet indicationem;  
notandum est, materiam illam inimi-  
cam, quæ hos morbos producit, du-  
plicis maxime deprehendi naturæ. Aut  
enim illa est vaporosa, narcotica, ful-  
phurea, acris; aut magis salina, acris, vo-  
latilis. Prior occurrit in adfectu, a caus-  
sa externa epidemica, frugibus impuris,  
solio temulento, herbis ac seminibus  
venenatis hyoscyami vel daturæ come-  
stis inducto: posterior observatur, si ma-  
luma diathesi scorbutica, putrilagine  
primarum viarum verminosa, vel alia  
quacunque; retropulsis exanthemati-  
bus &c. suos traxerit natales.

§. III.

Quomo-  
do e  
carpo-  
re sit  
pro-  
scri-  
benda. Quemadmodum vero hæc miasmata  
maligna, cujuscunque sint generis, per  
cutis poros, vi remedium diaphore-  
ticorum mitissimorum, quam ocysime  
proscribere oportet: ita illis involven-  
dis, invertendis ac obtundendis non  
præstantiora sunt, quam acidula lenio-  
ra ac subtiliora. Hæc namque omni ve-  
neno narcotico adversantur, ejusque  
virtuti, & texturæ sunt contraria: hinc  
notabilis est observatio, quam LON-  
GOLIUS in judicio medico de grassante  
affectu spasmodico communicat, dum  
refert, plures a solo acido vini in prin-  
cipio morbi sumto sanatos, & a gra-  
vissimis symptomatibus liberatos esse.  
Et præclara etiam est aceti vini, aut  
succu citri efficacia, si cum lapidibus  
cancrorum, & antimonio diaphoreti-  
co exhibeatur. Hoc nomine egregia  
porro virtus debetur mixturæ simplici,  
maxime si juxta Paracelsi mentem pa-  
retur. Ille nimirum spiritum vini re-  
ctificatissimum super vitriolo calcinato  
destillavit, destillatum capiti mortuo  
iterum affudit, & sic aliquoties reite-  
rando, obtinuit spiritum vitrioli, quem  
vocat antepilepticum; cujus tres partes,  
cum spiritus tartari ac theriacalis cam-  
phorati ana una portione permixtæ,  
constituerunt mixturam ejus simpli-  
cem. Ex usu mihi etiam est liquor meus

Hoff. Syst. Tom. V.

anodynus; tribus partibus cum una spi-  
ritus vitrioli, bene præparati ac dimidia  
spiritus tartari volatilis, aut eboris ma-  
ritatus: quibus remediis, mature datis,  
sæpius venenum narcoticum involvi-  
tur, obtunditur, atque tum subjunctis  
diaphoreticis fixis e corpore depellitur.  
Hæc nimirum cum acidis istis alterna-  
tim propinare convenit; & inter ea non  
præstantiora deprehendi pulveribus,  
qui ex lapidibus cancrorum, succi-  
no præparato, pulvere marchionum,  
nitro depurato, antimonio diaphoreti-  
co, cinnabari, & aliquot theriacæ coele-  
stis, quin & camphoræ granis conficiun-  
tur. Nec minorem laudem merentur  
decocta humectantia, infusa tepida di-  
luentia, & quæcunque temperatam  
promovere valent transpirationem.

§. VI.

Prius vero, quam ad horum reme-  
diorum usum accedamus; respiciendæ  
sunt causæ materiales, acrimoniam il-  
lam inimicissimam generantes, & hæc  
quantum fieri potest, removendæ, ut  
malo præscindatur pabulum. Quare si  
morbus sit populariter grassans, & a  
victu impuro, aut externa causa indu-  
ctus: vim ejus insigniter franget lene  
emeticum, mature, primis diebus,  
& sub accessionum intermissione da-  
tum. Quo fine optimi & securissimi ef-  
fectus est radix hyperacuanhæ; de qua  
drachma dimidia, vel in robustioribus  
integra cum pauxillo nitri commixta,  
pro dosi exhibeatur. Eo magis & neces-  
sarius, & fructuosus est emetici usus, si  
morbus sit recens, & ægri adhuc de nau-  
sea, cardialgia, præcordiorum anxietate,  
atque vomendi conatu conqueran-  
tur; claro documento, morbi fomitem,  
maximam adhuc partem in ventriculo  
hærere. Conf. BUDDEI tractatus su-  
pra citatus pag. 44. Tum supra memo-  
ratis remediis diaphoreticis, acidis,  
temperantibus, antispasmodicis, atque  
tandem anodynis & roborantibus infi-  
stere convenit.

§. V.

Quod si malum per periodos invadat;  
certum est indicium, fomitem illius

Mali e-  
pide-  
mici  
cura-  
tie.

Cura-  
tio ma-  
li ex  
fomite



prima-  
riam  
viam  
suborti.

in saburra acri intestinum duodenum occupante residere. Tum præstat pulveribus rhabarbarinis, ac absorbentibus eam acrimoniam exturbare. Quando vero putrilago verminosa in intestinorum canale obhæserit; huic obviam eundum laxantibus, cum extractis amarioris, balsamicis, anthelminticis; uti est extractum Tanacetii, cardui benedicti, centaurii minoris &c. maritatis; aut pulveribus laxantibus, qui habent semen fantonici, corticem chinæ, cinnabarim, & tantillum Jalappæ. Tum primis officinis a saburra omni liberis; humorum etiam massa a miasmate ipsi inhærente, per bezoardica fixiora ac decocta diluentia cum regimine blando diaphoretico repurganda est.

## §. VI.

Curatio  
mali a  
sup-  
pressis  
exan-  
themati-  
bus  
produ-  
cti.

Si motus spasmodici vagi a retropulsis exanthematibus, ulceribus, arthritide, podraga &c. fuerint excitati: omnis primum curatio eo est dirigenda, ut lymphaticus latex, ab iis, quibus imbutus est, impuritatibus liberetur; & retropulsæ efflorescentiæ ad corporis superficiem invitentur. Priori scopo inserviunt pulveres diaphoretici, nitroso cinnabarini, cum extracto croci remixti: infusa calida intra lectum cum regimine pota; mixtura simplex liquor anodynus, & spiritu eboris maritatus; posteriori faciunt satis frictiones, fomentationes corporis externi, tepidiora pediluvia, balnea aquæ dulcis cum lacte, atque laxantia; quæ illum simul habent usum, ut contractas partes blande relaxent. Nec irrita sæpius sunt vesicatoria, fonticuli, setacea.

## §. VII.

Curatio  
mali a  
dyscra-  
sia scor-  
butica  
susten-  
tati.

Quod si quidam, uti plerumque fit, ex prægressa perversa diætâ diu male habentes, successive motibus spasmodicis vagis corripiantur: indicium est, illos a dyscrasia sanguinis ac lymphæ scorbutica fuisse excitatos. Tum aliam curandi viam inire decet: siquidem ea remedia in usum vocanda, quæ corruptam humorum massam emendant, impuros humores per congrua proscribunt emunctoria, ac circulum humo-

rum credunt æquabilem. Hoc nomine præter congrua laxantia, & clysteres præstantissima sunt antiscorbutica, & ex his temperatissima, veluti sunt beccapunga, acetosa, radix chinæ sarsaparillæ, lapathi acuti &c. Hæc vel in decocti forma, vel potius in ipsis succis adhibeantur, maxime si illi cum lacte caprino, vel fero lactis adsumantur. Ipsum etiam serum lactis dulce, ea ratione, quam in *Consult. ac Respons. Medicin. Tom. I. Sect. I. Casu LXIII. p. 279* docui, paratum, aut loco aquæ simplicis, acidulis Selteranis, vel aquis destillatis herbarum antiscorbuticarum, nuptum, ingentem pollicetur fructum. Nec denique alienum erit, ipsis acidulis, cum lacte maritatis uti: & si in ullo morbo, certe in hoc excellentissima est virtus aquæ fontanæ, naturali frigiditate haustæ: quibus omnibus, si nimia sanguinis moles fuerit præsto, congruæ venæsectiones conjungendæ sunt.

## §. VIII.

Quando itaque dicta ratione crassiores fordes atque etiam volatilis venenata acrimonia aliquantulum sopita & expurgata fuerit: tum ea in usum vocanda, quin & priori curationi sunt interponenda, quæ effrænes motus sedant ac compescunt. Repetantur hoc nomine anodyna & antispasmodica, quæ prioribus jam commendavi capitibus. Tali enim ratione & diaphoreticis interponuntur lenia sedativa, v. g. pulveribus bezoardicis addi potest extractum croci; theriaca cœlestis; mixturis ac spiritibus diaphoreticis cum fructu liquor noster anodynus jungitur. In primis vero laudem in hoc morbo merentur lumbrici terrestres recentiores, vel in pulvere, vel succo dati; quippe qui specificam fere in sopiendis motibus hisce spasmodicis vagis obtinent virtutem. Sæpius etiam mali vehementia requirit, ut externis linimentis anodynis atroces motus paullo consopiamus; quo reliquorum remediorum vis eo melior evadat. Inter ea deprehendi præstantissimum, quod sic se habet: Recipe axungię humanæ, olei nucistæ

Quo-  
modo  
motus  
effræ-  
nes  
sint  
com-  
pescen-  
di.



ana unciam semis, olei hyoscyami drachmam unam, balsami Peruviani, croci, ana drachmam semis, olei ligni Rhodii, lavendulae, ruthae, majoranae, ana guttas decem. M.D. Hoc linimentum ad tempora, cervicem, spinam dorsi, applicare convenit. Et ejusmodi remediis, maxime si malum nondum fuerit valde inveteratum, illud saepius profligari potest.

§. IX.

Curatio  
mali  
invete-  
rati.

Verum enim vero longe aliter res se habet, si affectus existat inveteratus, miasma malignum se intimius in partes solidas insinuaverit, ac generis nervosi imbecillitas vel connata, vel per alias causas inducta praesto fuerit. Tali in casu nihil est praestantius subsidiis diæteticiis, parienter, & per longum tempus usurpandis. Quemadmodum scilicet rerum non naturalium usus ita institui debet, ne quid inde detrimenti in sanitatem redundet: ita praesertim in aeris, coelique mutatione magna curandi vis, & unicum fere solatium latet. Sic enim preparato corpore per venæsectionem, blanda laxantia, pulveres diaphoreticos ac temperantes, juvat peregrinationem instituere; & acidulas ad scatebram cum lacte, sub mentis hilaritate, ac congrua vivendi ratione potare; ac eo praesertim respicere, ut intestinum duodenum ab acribiliosa saburra semper maneat vacuum. Præterea in hoc demum casu specifica antepileptica, cum lumbricis terrestribus juncta, balnea quoque aquæ dulcis cum quarta lactis parte remixta egregium operæ faciunt pretium.

§. X.

Robo-  
rancia.

Quod si autem conquieverint motus violenti spasmodici; roborationi partium nervosarum opera danda est; quoniam si hæc maneant debiles, non solum cruditates in primis viis facile colliguntur; verum etiam ipsum malum recidere solet. Quare haud ludetur opera, si in usum vocentur balnea martialia, naturali frigiditate prædita, uti sunt Lauchstadiensia, vel Freyenwaldensia; quæ ad roborandum & confor-

tandum corpus egregiam obtinent virtutem. Sub horum usu pariter ac eo absoluto, adhibenda sunt decocta diluentia, ex radice chinae, scorzonerae, viscoquercino, qui insigne roborans constituit: quo etiam nomine excellentis virtutis est cortex Peruvianus, in pulvere subtilissimo, cum succino, cinnabari, antimonio diaphoretico maritatus. Hic enim cortex blanda sua balsamica vi, humores corruptos, acres, biliosos in duodeno potissimum herentes invertit, ac benignos reddit: atque ventriculum ac primas vias roborando, digestionem egregie adjuvat. Quo etiam scopo Elixir nostrum balsamicum viscerale præstantissimam pollicetur opem: praesertim, si pilulis balsamicis, quandoque devorandis, primæ officinae semper a sordibus liberæ conserventur.

§. XI.

Præter hæc denique præsidia, ad nostri affectus præservationem, sedula causarum huc disponentium evitatio, quam plurimum contribuit. Eugiantur nimirum loca uda, humida, palustria: aer seligatur purus, serenus atque tenuis hinc etiam in malo epidemice grassante domicilia atque conclavia haud sine fructu suffimigiis imbuuntur. Victus porro sit facilis ac conveniens: ne cruditates in prima regione, novum spasmodorum pabulum generentur: quare SEVERINUS EUGALENUS tract. de Scorbuto pag. 119. casum recenset, de convulsionibus scorbuticis in infante, quæ nullis remediis curari prius potuerunt, quam donec nutrix sana fuit quæsita. In primis cane pejus & angue fugiantur alimenta ac potulenta calidiora, commoventia: ut etiam animi pathemata, ira, terror, cura, tristitia: utpote quibus in revocandis motibus spasmodicis & convulsivis nihil est efficacius. Alvus nunquam sit obstructa, nec sanguinis moles justo major: id circo hæc congruis venæsectionibus ac scarificationibus ventilanda, illa victu emolliente, clysteribus, ac pilulis balsamicis lubricanda. His denique omnibus praesertim versus solstitium:

Me-  
thodus  
præ-  
serva-  
toria.



brumale, quo plerumque hi adfectus recrudescere solent, utendum erit.

## C A U T E L Æ.

### §. I.

Cautela circa remedia calidiora.

**S**I ullus est morbus, qui delicatius, ac leviori quasi brachio tractari debet; certe est noster spasmodicus vagus. Respuit ille valida, ac exacerbatur ab omnibus, utut levissimis spirituosissimis, commoventibus, ac calidioribus, bezoardicis, alexipharmacis, volatilibus, essentis, oleis destillatis &c. Materia enim salino sulphurea, quæ hos morbos fovet, tam subtilis existit, tamque volatilis, ut ab ejusmodi remediis admodum exaltetur & exagitetur. Cuncta, quæ exhiberi possunt, medicamina, sint temperata; & in pulverum, mixturarum aquearum, decoctorum ac infusorum forma propinentur.

### §. II.

Circa anti-scorbutica.

Hanc etiam cautelam circa ipsa anti-scorbutica observare oportet; ex quibus non nisi temperatissima seligantur, uti sunt beccapunga, acetosa; & succus nasturtii aquatici, quod præter sal volatile subamaræ & roborantis est virtutis. Optime enim in succis exhibentur; maxime si ille aut sero lactis, aut ipsi lacti nuptus, purgatis antea primis viis propinetur. Si decoctorum formulæ arrideant; illis addere convenit nitrum; quippe quod radicum, herbarumque paullo acriorum vim commoventem insigniter hebetat.

### §. III.

Circa fortiora evacuantia, ac narcotica.

Fortiora purgantia adhibere, maxime, ubi scorbutica præsto est acrimonia; nihil est, nisi oleum camino addere. Narcotica, sulphurea, opiata, adstringentia &c. remota nondum materiali causa, propinata veneni instar sunt. Licet enim prima fronte malum allevare videantur; re tamen vera illud reddunt pertinacius, ac summam nervorum relinquunt debilitatem. Idem de asa foetida, naribus extrinsecus admota, tenendum est; cui substituere præstat eorum illud ex Russia ad nos depor-

tatum. Fonticulos, vesicatoria, setacea &c. non promiscue adplicare decet; sed in certis duntaxat ac reservatis casibus, ubi nimirum exanthemata, aut ulcera ad partes corporis interiores sunt retroacta, & malum sit pertinacius.

### §. IV.

Ubi affectum spasmodicum vagum, præter scorbuticam humorum dyscrasiam, affectus hystericus, aut excretionum sanguinearum suppressio sustentaverit: haud temere ad specifica, aut motus præternaturales sopientia, interna pariter, ac externa confugiendum est; sed antea bene providendum, ut adjuvetur successus excretionum. Hoc sine venæsectiones convenienti tempore institutæ; pulveres temperantes & antispasmodici; pilulæ blande balsamicæ; tepidiora pediluvia, & bonum ab horum usu regimen, quin & balnea temperata, ac denique recta aquarum mineralium potatio utramque paginam absolvunt. Et generatim sciendum est, nihil magis felicem curationis successum adjuvare, quam si pori cutis aperti, & alvus libera fuerint.

### §. V.

Adhuc circa scorbutum, si malo nostro pabulum dederit, tenendum est, quod in illo magis frigido, ut cum veteribus loquar, aut ubi simul pituita mucida, viscida, acida, in subjectis naturæ humidioris ac frigidioris peccat, magis e re sint antiscorbuticæ radices ac herbæ in decoctis adhibendæ. Contra vero, ubi subjecta fuerint strictiora, calidiora, cholericæ, & acrimonia magis biliosa, sulphurea, omnium remedium virtutem antecellit serum lactis.

### §. VI.

Generatim lac, & medicamina ex illo parata, si debito ordine, ac primis viis a biliosa acri saburra repurgatis usurpentur, ad infringendam & obtundendam miasmatum malignorum, in his morbis peccantium, acrimoniam, præstantissimi usus est. Hoc inter alia patet, exemplo venenorum, & drasticatorum purgantium & emeticorum: nihil

Quid faciendum, si subsint affectiones hystericæ.

Cautela circa scorbutum.

Circa lacticia.



hil enim certius & efficacius, ad convulsiones, & alias atrocissimas passiones ab illis excitatas deprehenditur, quam opportunus lactis usus.

§. VII.

Circa remedia Salina ac mercurialia.

Perniciosissimus in morbo nostro spasmodico, ubi jam salia acria, scorbutica præsto sunt, est quorumcunque salium & fixiorum & volatiliū frequens & largior usus; quippe quæ materiam ac causam morbi magis adaugent & symptomata exacerbant. Quare nec cinnabarina, quæ alias cum diaphoreticis ac absorbentibus mixta, securi sunt usus, cum salibus irritantibus combinare decet. Maxime omnium a mercurialibus quibuscunque sedulo cavere expedit: quoniam illa, si cum salina acrimonia permisceantur, causticam ac venenatam obtinent naturam.

§. VIII.

Circa Linimenta.

Sæpius tanta urget motuum violentorum vehementia, ut nulla fere restent intervalla, quibus convenientia propinari possint remedia. Tali in casu nihil est præstantius, quam remediis externis, ac linimentis, cum oleo hyoscyami permixtis, ad tempora adplicandis, blandum conciliare somnum; quæ placantur sævi tumultus, ut deinde reliqua medicamina feliciori successu adhibeantur. Ceterum etiam roborandi sine linimenta vertebris lumbaribus, ventriculi regioni, ac juncturis partium adplicari possunt; ubi loco olei hyoscyami, oleum nervinum & lumbricorum terrestrium substitui debet.

Enarrationes morborum.

OBSERVATIO I.

Motus convulsi vagi scorbutici.

**I**mploravit aliquando opem meam Comes illustrissima, annorum xxxiv undecim liberorum mater, gravibus curis ac terroribus obnoxia, quæ per septem jam annos præter passiones hypochondriacas, convulsionibus vagis per intervalla tam admirandis infestabatur, ut a multis fascino adscriberentur, nec verbis satis potuerint exprimi. Ex-

Hoff. Syst. Tom. V.

tra paroxysmum vaga erat adpetentia: at sitis ut plurimum ardentior, sub qua fauces & oesophagus plorabant lympham, saporem nunc meri piperis, nunc meri salis, nunc cupreum referentem. Præcordia distendebantur mirifice: venter resonabat continuis murmuribus; intestinorum volumen post levissimum motum sæpius occupabat colica convulsiva: alvus mox erat strictissima, mox fluida, nunquam tamen absque tenesmo vel inguinum spasmo reddebatur, in hypochondriis perpetuo sentiebatur inflammatoria quædam & quasi ulcerosa exæstuatio, quæ sæpius sternum invadebat cum sensatione animalculi ibidem oberrantis. Urgebant mentis deliquia, cordis palpitationes, & nocte præsertim tanta spirandi angustia, ut suffocari videretur. Caput crebra vertigine afficiebatur, cum dolore mox unius, mox alterius lateris spasmodico: & tanto sæpius æstu intus & extus exardescibat, ut cerebrum quasi prunis affari, facies mero igne afflari videretur. Somno utebatur turbulento: vigilans metu, tristitia, pavoreque sine causa percellabatur frequenter: ac ipsæ mentis facultates imminui cœperunt. Ceterum partes externas nunc formicationis quidam sensus, nunc motus abolitio, nunc etiam tremor undulans, cum gravitate oppressoria occupabat: interdum tanta pedum urgebat elasticitas, ut perpetuo ambulandi ac salendi adficeretur desiderio: mox ingens rigor totum corpus concutiebat, qui in frigidum desinebat sudorem, interioribus ferventibus. Facies mox sanissima, mox ex nigro fusci coloris adparebat: pedes nunc tumeabant, nunc variis pingebantur maculis: nunc etiam vesiculis, quæ disruptæ lympham stillabant accerrimam, obsidebantur.

Menses rite fluunt: lochia, si foetus enixa fuerit, bene succedunt, & nonnunquam massulas purulentas simul fundunt, acrimonia aquam fortem superantes. Diætæ est studiosissima egra: nec pro potu ordinario nisi aquam simplicem adsumit. Ipsi paroxysmi visu sūt

D 3

hor-



horrendi: namque illustrissima ægra horrendis motibus, nunc tetano, nunc episthotono, nunc emprosthotono convolvitur, tenditur, circumgyratur, in choreas nunc ambobus, nunc uno saltem pede ducendas cogitur, & infusum nullis frenis sufflaminandum rapitur. Nunc super genua, nunc super digitos pedum, nunc super plantas obliquas volutatur, donec in terram concidat, linguam canum more cum sono anhelantium motitat; dentes collisis maxillis conterit; palmas manuum collidit; & tum attonito & quasi moribundo situ detinetur. Sensus interni in convulsivo paroxysmo omnes sunt salvi, & ad unguem novit, quæ sub illo fuerunt acta. At in posteriori accessione veluti cataleptica, oculis licet clausis, carmina concepta, propria manu in charta describit; clausis etiam oculis fila serica artificiosissime contexit; & ante fores stantes, utut sibi ignotos, nullo indicante, ad se vocat. Hi paroxysmi per intervalla redeunt, & prænunciantur somnolentia iusto profundiori, adpetitu & pulsu auctis: tum viscida mucipartícula per screatum ejicitur; aut globiformis septi transversa contorsio sentitur; & hinc subito superveniunt artuum agitationes.

#### Epicrisis.

Notabile hoc est exemplum motuum spasmodicorum vagorum, cum cataleptici symptomatibus & insigni humorum dyscrasia scorbutica complicatorum. Hanc enim significant lymphæ illa acerrima, ex faucibus ac œsophago stillans, variosque sapes referens; dolores rodentes, lancinantes, pungentes totius fere corporis; maculæ ac vesiculæ pedes occupantes, atque moleculæ illæ acerrimæ cum lochiis excretæ. Notabile vero in hoc casu est, quod appetitus, qui extra paroxysmum vagus erat, brevi ante ipsam accessionem admodum auctus fuerit. Namque excitari adpetitum a salibus acidis, tunicam ventriculi vellicantibus, neminem fugit: hæc vero salia, quamdiu

motus spasmodici silent, reliquis viscidis humoribus immixta quasi coercentur; at quando per incipientes violentos motus e suo contextu extricantur, iterum afficiunt nervosas partes; ut adeo causa pateat, cur imminet paroxysmum antecedit auctior adpetitus. Totum vero malum primum habet fundamentum in perverso partium & fluidarum & solidarum motu: quod ex passionibus, quas toleravit hypochondriacis clarum fit. Complicati in his adfectibus intestinorum motus spasmodici in causa etiam sunt, quod alvi negotium succedat admodum inordinatum; & illa, conquiescentibus spasmodis, lubrica, his vero recrudescuntibus constrictissima sit. Tenemus, singulis dejectionibus conjunctus ab humorum acrimonia dependet: & rosionis ille ac æstuationis in hypochondrio dextro sensatio, a bile acriori, stagnante, & per poros vesiculæ felleæ transsudante, vicinasque partes vellicante suos mutuatur natales.

Hujus autem affectionis, quæ adeo inveterata solidas pariter ac fluidas partes prorsus destruxit, curatio difficillima fuit, ut adeo haud mirum, si omnium remediorum, utut præstantissimorum efficacia fuerit irrita. Laxantia vero, diaphoretica, balnea, aquæ minerales, victus ac celi mutatio insignissimum in hoc spinoso morbo levamen attulerunt.

#### OBSERVATIO II.

Celebris vir, triginta annorum, decem abhinc annis mense Martio podagrico corripiebatur insultu, qui pedem sinistrum occupabat, & intra tres hebdomades iterum evanescebat. Post elapsam exinde quinquennium, eodem mense Martio ex improvviso doloribus vagis arthriticis omnium artuum, cum horrendis convulsionibus infestabatur: quibus intra sex hebdomades debellatis, successit tanta totius corporis imbecillitas, ut per tres integros menses obam-

Spasmi  
convul-  
sivi va-  
gi ex  
Podag-  
rica re-  
tro-  
pulsæ.



obambulare ac pedibus insistere nequiverit. Ante binos annos, iterum mense Martio recruderunt iidem motus vagi, spasmodico convulsivi & primum pollicem sinistri, tum dextri pedis prehendebant, ac abhinc per calcaneum, pedes, genua, spinam dorsi, pectus, humeros, brachia, manus, digitos, cervicem & occiput protensi, rationis usum semper tollebant. Sedatæ atroces hæ affectiones, insequente mense Novembri, eadem vehementia, quin convulsionum majori violentia recidebant, & symptomatibus visu horrendis sæviebant. Tum accidit aliquando, ut in ipsa dolorum exacerbatione, illam dorsi regionem, ubi diaphragma vertebra adhæret, manu fortiter percutiendam præberet: quo factò, remittebant quidem artuum externorum tormenta, sed atrociores intestina prehendebant dolores, ut arthritidis retro pulsa videretur. Vix autem una elapsa hora, alvus sponte solvebatur; & tum clysteribus adjuncta, copiosas sordes ac flatus reddebat: quibus excretis cuncta conquiescebant symptomata, somnus & appetitus redibant, & perfecta sequebatur reconvalescentia.

#### Epicrisis.

Plane singularis, & attentione perquam digna est hæ observatio, quod forti facta percussione ejus dorsi regionis, ubi tendines diaphragmatis vertebrae lumborum adhærent, externa artuum tormenta mox remiserint, & ad intestina retrocesserint; tumque secuta crebriori alvi dejectione, & copiosa sordium eliminatione, vis morbi atq; symptomatum mox conquieverit. Nam si nullus in universo corpore locus est notabilis; certe hic ipse, cujus in historia morbi meminimus, attentionem meretur. Ibidem enim septi transversæ tendines vertebrae lumbaribus firmiter junguntur, & orificium ventriculi sinistrum, valde nervosum atque sensibile; porro plexus major mesentericus, cum arteria & vena mesenterica, ac finis duo-

deni, in quo vitiosus morborum spasmodicorum & periodicorum fomes est, situm suum habent. Hinc vero videtur simillimum, a paullo fortiori hujus loci externa percussione, ingentem tam motuum nervosi generis spasmodicorum, quam etiam caussarum, hosce motus sustentantium factam esse mutationem, eorumque ex uno in alterum locum translationem. Hujus externi remedii effectum in puerorum ferina, atque suffocationem minante tussi, aliquoties vidi præstantissimum: neque etiam minus in viro quodam honoratissimo, qui sæpius cruciabatur graviori podagra, adnotavi, quod a partis affectæ per malleum facta, utut dolorifica percussione, insignissimum dolorum perceperit allevamentum. Recte mechanica dici potest hæ curatio; quæ, si tempestive fiat, in certis circumstantiis felici haud carere potest effectu.

Quod autem præfens morbus demum per alvi dejectionem fuerit curatus; certum præbet indicium, causam illius materiales in prima latuisse regione. Hæc ergo idoneis foras ejicienda est subsidiis; cui quidem scopo fortiora purgantia, salina, & stimulantia minime inserviunt; sed quæ leniendo, demulcendo, simulque evacuando agunt, magis conveniunt. Ex horum censu mea experientia omnibus præferri meretur infusum mannatum, rhabarbarinum, tartarifatum, pro re nata cum uno vel altero tartari emetici grano acuatam. Sic citra omnem noxam & tumultum tam per superiora, quam per inferiora saburra primarum viarum, quantitate satis copiosa proscribetur.

#### OBSERVATIO III.

Puer uodecim annorum, strictioris corporis habitus, a teneris vultu pallido ac lurido præditus, & sæpius de imi ventris torminibus conquestus, parentibus tamen sanis natus, obambulavit aliquando hyemali tempore in horto, ibidemque prævio gravativo in pectore sensu, & vomendi conatu incidit in

Motus  
spas-  
modici  
vagi-  
cum  
corru-  
pta  
phant-  
asia.



paroxysmum fere epilepticum; in quo post aliquot horas semianimis, & oculis clausis deprehendebatur. Abhinc malum magis invalescere cœpit, & aliquoties quotidie recurrit, cum tanto membrorum robore, ut vix a tribus coercere potuerit viris. Paroxysmum antecederant angustia præcordiorum, palpitationes cordis, vertigo, tinnitus aurium, & capitis gravitas: tum spasmodicæ agitationes ab umbilico primum ad caput ascendunt, & ex hoc in externos artus diffunduntur. Quamdiu caput afficitur, omnes cessant sensus & rationis potentia hebetatur; quando autem artus concutiuntur, rationis redit integritas. Ipsæ corporis agitationes variis quotidie modis tristem ludunt scenam: mox enim instar galli cucurrit, mox boatum vacarum æmulatur, mox sonitum, quo venatores feras alliciunt, modulatur; mox peregrinas linguas strepit; mox more musicorum, modum cantus manibus moderatur; mox magis mutus est quam piscis, & tum scribendo significat, prohibitum jam sermonem, se intra horæ spatium esse recuperaturum, uti etiam fit. Fingit præterea sibi met non solum varias inanes ideas, ac terrificas imagines, seque spectra videre affirmat; verum etiam prædicit sæpius in paroxysmo res, quæ actu fiunt. Et notatu dignum est, ægrum aliquando, cum accitus verbi divini minister nomen Jesu pronunciaffet, ingentem edidisse clamorem; quo finito tranquillus preces fundere valuit. Ceterum extra paroxysmum fervido fruitur adpetitu, somnoque placidissimo; & urinam mingit aquosam. Ex emeticis lenioribus bene habet; sed post institutam pronuper venæsectionem, exacerbari videbatur malum.

#### Epicrisis.

Prodigiosa utique, & quæ omnem mentis captum superare videtur, est illa vis, quæ in hominis phantasia latet, & quæ in morbis cerebri, atque generis nervosi atrocioribus, quam maxi-

me sese exserit. Quare jam vetustissimi, & Hippocratis tempore viventes Medici, loco naturalium caussarum, quas ignorarunt, τὸ Θεῖον, sive divinum quid in subsidium vocarunt: & ob eandem rationem epilepsiam nomine morbi sacri insigniverunt. Notabilis certe est locus, qui in Libro HIPPOCRATIS de morbo sacro §. II. exstat, dum: *Qui primi, inquit, hunc morbum sacrum esse pronunciarunt, tales homines mihi esse videntur, quales etiam nunc sunt magi, & expiatores, & circulatores, & quidam arrogantes, qui se vehementer pios esse simulant, & amplius quid scire. Hi itaque consilii & mentis inopia obvelantes, ac prætexentes divinitatem, quum nihil haberent, quod exhibitum prodesset, ut ne manifesta fieret ipsorum ignorantia, sacram hanc affectionem esse pronunciarunt, & relictis idoneis rationibus, curationem in expiamentis & incantamentis quæsierunt.* Verum cum causæ, quæ ad turbulentam ejusmodi, ac plane perversam contri- buunt phantasia, omnino sint physicae atque mechanicæ, siquidem anima nonnisi in mechanismo, per mechanicas causas & cum materia apta agere & operari potest, quo immutato, illius quoque operatio mutatur: illæ sane diligentius a Medico sunt corrigendæ, & e corpore proscribendæ. Et ipsi jam veteres, præsertim Hippocrates, talium cum corrupta phantasia complicatorum morborum curationem in remediis dieteticis, cibis accomodatis, salubri aere, atque demum in helleboro dextre præparato quæsierunt, ac invenerunt. Quemadmodum enim a cibis copiosis, flatulentis, & qui crassos viscidosque ingenerant succos, nec non aere nimis denso vappidoque, corpora per se jam imbecilla facillime ad graves generis nervosi ægitudines disponuntur: ita omnino ad has præcavendas pariter, ac sanandas, convenienti vitæ regimine, & victu tenui, qui nec stomachum gravat, nec cruditates relinquit nervis inimicas, & benigno cocto nihil observatur præstantius.

OBSER-



OBSERVATIO IV.

**Morbus** Puer septem annorum, alacris an-  
**spasmo.** tea, & vegetus, ex improvise, capi-  
**dico c6.** tis acuto corripiebatur dolore, qui cum  
**vulsi-** æstu præternaturali, atque pulsucele-  
**vus, ex** ri erat conjunctus. Brevi post superve-  
**nitiis** niebant sævissima circa regionem um-  
**ascari-** bilicalem tormina, crebri vomendi co-  
**dibus** natus, intolerabilis in ano pruritus, al-  
**subor-** vi obstructio per triduum inhærens; &  
**ta.** tandem excipiebant horrendæ ma-  
 num pedumque convulsiones, & agi-  
 tationes, ex uno membro in alterum  
 transeuntes: quibus cessantibus, abs-  
 que sensu & motu, intentis oculis,  
 graviter respirans jacebat. Hæc ergo  
 symptomata præter antispasmodica, li-  
 quorem meum anodynum mineralem,  
 cum tertia parte spiritus vitrioli jun-  
 ctum, & pulverem ex cinnabari, lum-  
 bricis terrestribus, nitro, & pulvere  
 Marchionis confectum, oppugnaban-  
 tur laxante, quod ex Manna, rhabar-  
 baro, semine fantonici, ac sale Sedli-  
 censi erat compositum. Hoc excipie-  
 bant crebræ alvi dejectiones, & cum  
 illis, mirum dictu! ultra millia asca-  
 ridum tenuissimarum, glomeris instar  
 invicem contortarum excernebantur:  
 quo facto cuncta protinus remittebant  
 symptomata.

Epicrisis.

Vermes, intestinis tenuibus, vel  
 ipsi ventriculo incarceratos, horrenda  
 & portentosa in partium nervosarum  
 systemate excitare symptomata, ne-  
 minem fugit. Sed id non adeo obvium  
 atque compertum est, ascarides, qua-  
 rum sedes in recto, tanquam ultimo,  
 & a capite remotissimo intestino est,  
 convellendo universum nervorum ge-  
 nus, totam motuum vitalium, imo  
 functionum animalium turbare posse  
 œconomiam. Verum haud infrequen-  
 ter non tantum in pueris, sed etiam a-  
 dultioribus, præsertim foeminis ob-  
 mensum vitium cachecticis, ex asca-

ridibus varios & mirabiles capitis affe-  
 ctus, aphoniam, profundum soporem,  
 epilepsiam, catalepsin, convulsiones  
 artuum vagas, ac mentis alienationes  
 observavi. Quando vero hi vermes per  
 suppositoria, anthelmintica cum pur-  
 gantibus juncta, ex quibus semen San-  
 tonici cum mercurio dulci ac jalappa  
 mixtum palmam obtinet, non omissis  
 balsamicis, foras pulsi fuerunt, remi-  
 serunt omnes adfectiones. Causam  
 tam gravissimarum passionum non in  
 sola intestini recti vellicatione collo-  
 candam esse arbitror; nam sæpe nec  
 ullus dolor, nec pruritus in ano senti-  
 tur; sed potius in putridis horum ani-  
 malculorum effluviis ac exhalationi-  
 bus, per poros in nervosas ac membra-  
 naceas partes sese insinuantibus ponen-  
 dam esse, certus credo.

OBSERVATIO V.

Vir quidam sexaginta quatuor anno-  
 rum, laborabat affectu spasmodico  
 vago, qui sic se habebat: Ante inva-  
 sionem conquerebatur de pedum &  
 crurum vehementi refrigeratione, ut  
 calore hæ partes foveri debuerint. Ces-  
 sante paullo frigore, tormina atrocia  
 infestabant abdomen, quibus præsen-  
 tibus nec flatus, nec fæces, nec urinæ  
 mitti poterant. Tum excipiebat quæ-  
 dam contractio in medulla spinali circa  
 lumborum vertebra; sub qua venter  
 magis occludebatur, spasmodicus vero  
 dolor ad superiora simul ascendebat,  
 cum junctis ructibus; capitisque dolo-  
 ribus tensivis, gravativis, & quodam  
 stupore. Tandem æstus cum pruritu  
 totum corpus perfundebat, & maxime  
 regionem umbilicalem tanta occupa-  
 bat ariditate, ut cutis veluti torrefa-  
 cta, adpareret. Non etiam minus ex-  
 tra paroxysmum crura semper mane-  
 bant frigida; manus vero notabili lan-  
 guore, stupiditate, tremore, sensa-  
 tionisque pariter ac motus quadam im-  
 potentia adficiebantur: quid? quod  
 denique vera paralytis pedes atque ma-  
 nus obsederit: reliquis symptomatibus  
 spas-

Spasmi  
 vagi ab  
 acrimo-  
 nia lym-  
 phæ &  
 feri.



spasmodicis in uno tenore perseverantibus. In tali rerum statu multa, ac varii generis medicamina, sed frustra fuerant adhibita. Ego tandem consultus, clysteres emollientes ano infundi; & decoctum ex sero lactis, floribus sambuci, & nasturtio aquatico paratum potari jussi; ex quorum usu tormina & dolores abdominis admodum mitigabantur, & conjunctis tandem balneis aquæ dulcis, alvi libertas insequabatur, ægerque habebat melius. Denique in faucibus & labiis, vesiculæ sero aquoso plenæ efflorescebant; atque alvi profluvium satis copiosum accedebat, quo multæ sordes excrementitiæ reddebantur. Et cum abhinc quotidie decoctum chinæ potaret, externasque partes oleo lumbricorum terrestrium sæpius perfricandas curaret; vires sensim collegit, integramque recuperavit sanitatem.

#### Epicrisis.

Notabile spasmodorum vagorum, licet cum violentis convulsionibus haud complicatorum exemplar sistit hic casus. Inceperunt nimirum illi in pedibus, horum refrigerationem inferentes; abhinc per spinam dorsi, nervosas abdominis, maxime intestinorum partes obsederunt, pertinaces alvi constrictiones & tormina excitando, tum petus invaserunt atque præcordia; anxietates, ructus, ardorem ventriculi, & lymphæ ex ore vel potius faucibus stillicidium inducendo. Tandem etiam caput occuparunt, & in illo melancholiam, stuporem, vertiginem, vigilias, dolorem gravativum, tinnitum aurium, spasmum caninum, ac denique paralyticos affectus progenerarunt. Hocce vero malum a dyscrasia lymphæ & sanguinis acri, tenui, caustica, in nostro ægrotante originem traxisse; inter alia exinde patet, quod post æstum, quo ordinario spasmi discutuntur, pruritus, fervor & exsiccatio cutis, & vesiculæ in toto corpore adparuerint. Hinc etiam factum est, ut de-

cocta diluentia, humectantia, & quæ acrimoniam temperant, uti serum lactis, in quo flores sambuci ac herba nasturtii aquatici decoquuntur, clysteres emollientes, decoctum chinæ, atque balnea præstantissimam opem tulerint. Contra vero omnia, quæ intendunt scorbuticam humorum acrimoniam, veluti sunt fortiora purgantia, sudorifera, atque salina plane omitti debent, quoniam iis plus damni excitatur, quam emolumenti.

#### OBSERVATIO VI.

Quadraginta annorum vir, per duos abhinc annos crebris ventriculi inflationibus, ac insigni abdominis tensione divexatus, incidebat aliquando post prævium iter, in vehementissimum dentium sinistri lateris dolorem, adeo, ut per aliquot horas instar apoplectici omni fere sensu ac motu privatus esset. Talis paroxysmus bis adhuc circa novilunium semper recidebat; adhibitis vero vesicatoriis & scarificatione tandem remittebat. Posthæc circa ultimam lunæ quadram, ingentes lancinationes crus sinistram prehendebant, cum totius corporis lassitudine, & quotidianis animi deliquiis stipatæ: quæ subsequente plenilunio in omnes artus diffundebantur, cum rigiditate ac motus impotentia in brachiis, horumque juncturas veluti e sede sua distorquebant. Hinc suasu amicorum, locum mutare, iter ingredi, & corpus movere cœpit: unde accidit, ut aliquando præter opinionem crus sinistram violenter retractum, dextrum vero antrorsum vehementer distentum fuerit. Diu etiam vixit in hoc misero statu, multosque Medicos adhibuit, quorum quidam insultus apoplecticos, alii arthritidem, alii calculum, alii malum hypochondriacum suspicabantur, & variis quidem contra ea mala, sed in cassum pugnabant remediis. Tandem cum atrociam & fere convulsivam intestinorum volumen excruciantur tormina; injecti intra nycthemeron ultra de-

Morbus  
vagus  
scorbuticus  
cum  
sabor-  
ra te-  
nacissi-  
ma, in-  
testinis  
impæ-  
cta.



decem clysteres, materiam compactam ac globosam instar pomorum Borsdorfianorum minorum evacuarunt, quorum globulorum singuli veluti calce erant obducti. Horum dejectioni superveniebant quidem animi defectiones; at elapsis abhinc paucis horis, singulare virium incrementum æger recuperavit. Tum usus est lacte caprino, & ad thermas Tœplices concessit, post illarum usum spinam dorsi & juncturas artuum oleo nucis moschatæ sibi inungi curans: quibus factum est, ut paucis diebus omnia remiserint symptomata, ac tantum pedibus accesserit robur, ut commode ambulare potuerit. Notabile ceterum in hoc morbo fuit momentum, quod manus, utut atrocissimis distractæ doloribus, a paralyti fuerint immunes; quæ tamen crura, a spasmodicis libera, omnino occupaverat. Nec silentio prætereundum est, ægrum sumtis cibis rarissime habuisse animi deliquia, quæ vero in jejuniis fuerunt frequentiora.

Epicrisis.

Luculenter ex hoc casu docemur, quam graves affectiones pertinax alvi obstipatio, & intestinorum a saburra crassa atque compacta oppletio, nisi prognerare, saltem sustentare valeat. Præstat igitur alvum in morbis chronicis, spasmodicis, convulsivis lubricam servare; cui scopo, tantum abest, ut purgantia convenient, ut sæpius etiam blanda laxantia oretenus exhibere haud liceat. In nostro saltem casu omnia purgantia, quin & laxantia non nisi vomitus excitarunt, & spasmos exacerbant. Contra vero consultius est, clysteres ano infundere oleosos, ac emollientes; quibus fæces crassiores diluuntur, & ad exitum disponuntur. Tum quoque jungere licet laxantia, & quidem lenissima, veluti est manna cum oleo amygdalarum dulcium. Hisce itaque subsidiis postquam expurgatæ fuerunt fordes crassiores: reliqua remedia, quæ ad temperanda falsa

scorbutica sunt opportuna, feliciori successu, majorique cum fructu adhiberi potuerunt? quæ inter serum lactis, præsertim dulce est præstantissimum. Tandem ad artus roborandos thermæ Tœplices, & olea juncturis inuncta, utilissimam tulerunt opem.

OBSERVATIO VII.

Puella duodecim annorum, diu male habens, tandem in affectum spasmodicum vagum delabatur, cujus paroxysmi per vices sequentem in modum invadebant: Corripitur primum ægra dolore abdominis atrocissimo; quo cessante maculæ hinc inde per corpus dispersæ efflorescunt, & his demum evanescentibus, spasmodicæ motitationes manuum pedumque succedunt, atque tandem epilepticæ junguntur agitationes. Observatione hic dignum fuit, quod quotiescunque externarum partium dolores ac spasmi remiserunt, illi protinus interiora occupaverint, cum alvi adstrictione contumacissima, & tanta contractione, ut fistulam clysticam ano intrudere, fere impossibile fuerit. Contra vero cessantibus internarum partium motionibus, spasmi iterum ad externas transierunt; & hæc scena per satis longum tempus acta fuit, donec tandem morbus, clysteribus oleosis, sero lactis, decoctis antiscorbuticis &c. feliciter fuerit profligatus.

Spasmi  
vagi  
scor-  
butici.

Epicrisis.

Notari ex hoc casu meretur, quod sub violentis intestinorum tormentis, crassa præsertim atque rectum, circa exitum, adeo constringi soleant ac coarctari, ut nec excrementis, nec flatulentis vaporibus exitum permittant; neque fistulam, qua clysteres injiciuntur, utut tenuissimam recipiant; aut si quoque hanc admiserint, ipsi tamen infusi clysteres, veluti vi quadam statim repellantur. Hujus vero momenti ratio, falso a quibusdam flatibus obicem



cem ponentibus imputatur: siquidem ex physicis liquet documentis, quod fluida, quæ vi quadam ex clysteribus ano impelluntur, resistantiam obstantium flatuum longissime superent. Vera potius causa in ipsa intestinorum pertinacissima constrictione latet, quæ etiam motus eorum peristalticus hæud raro ad superiora convertitur. Hinc sæpissime fit, ut non solum ventriculi inflationes, cardialgiæ molestissimæ, anxietates præcordiorum &c. suboriantur; verum etiam laxantia ore tenus data, per vomitum reddantur, quin nonnunquam ipsi clysteres cum stercoreibus per superiora eructentur. Præstat itaque in tali casu sub ipso paroxysmo, nihil nec laxantibus, nec clysteribus moliri; sed potius partes contractas externis emollientibus relaxare, & extra accessionum tempus blandis vacuantibus saburram acrem eliminare; aliisque antispasmodicis & anodynis irregulares ac inverso motus demulcere.

## OBSERVATIO VIII.

Con-  
vul-  
sio-  
nes va-  
ge ex  
violen-  
ta ossis  
coccy-  
gis per-  
cussio-  
ne.

Puer annorum circiter quatuordecim, inter rixas cum commilitonibus, saxo satis duro circa os sacrum accendicis graviter percutitur; cum subsequuto partis affectæ vehementi tumore ac dolore, somnoque abhinc difficili, ac pavore pleno. Vocatus chirurgus os coccygis tractum dicebat, variaque extrinsecus adplicabat emplastra pariter ac linimenta. Neque tamen minus tertio die post accedebant horrendæ artuum convulsiones, cum vehementi cordis palpitatione, præcordiorum subsultibus, sermonis difficultate, & memoriæ debilitate, ut vix cognosceret adstantes, stipatæ; a pollicum tamen contractione immunes. Datis diaphoreticis ac antispasmodicis medicinis, intra quinque dierum spatium cessabant hæ præternaturales motiones; sed singulis mensibus, secundo vel tertio ante lunam plenam die, quo percussio violenta erat facta, semper redibant. Accessiones flatuum frigidio-

res, ex osse sacro per dorsi spinam ad cerebrum ascendentes antecedeant; tum incomposita loqui cœpit, non dormire, nec domi contineri poterat; oculi sæpius torvi videbantur ac terribiles; & redeuntibus denique sensibus, vaga artuum convulsio sequebatur. Tali malo per anni dimidium cruciatus æger, tandem per balnea aquæ dulcis; per pulveres antispasmodicos, quorum basis erat cinnabaris, ac pulvis lumbricorum terrestrium; decoctum visci querni, radicisque chinæ, cum quarta lactis parte mixtum, atque per linimenta, quæ habebant præter alia oleum hyoscyami ac camphoram, ossi sacro adplicata, quæ Dei est gratia, pristinæ restituebatur sanitati.

## Epicrisis.

Ex hac morbi historia, diligentius pensitata, luculenter patet, quam admirandus sit membranarum, quæ medullam spinalem cingunt, cum aliis nervosis ac membranaceis partibus consensus, qui non nisi in mutua motuum vitiosorum communicatione consistit ac propagatione. Sensatio autem illa frigida auræ ex loco affecto per dorsum ad caput usque ascendens vix ab alia causa dependet, quam a strictura spasmodica, per materiæ subsistentis acris & ichorosa vellicationem inducta, in ossis sacri medulla incipiente, & in forma motus undulatorii successive ad cerebrum usque propagata. In tali casu, ubi etiam ex plantis pedum, ad caput aspirans auræ frigida epilepsiam peperit, non sine fructu adplicare suevi temperatum vesicatorium, quod ex drachma una cantharidum cum emplastri de Meliloto uncia una permixta paratum, per aliquot septimanas parti affectæ impositum servetur. Hoc enim sine dolore operatur, & ingentem feri vitiosi extrahit copiam.



CAPUT IV.

DE

AFFECTU CEREBRI SPASMODICO ECSTATICO, VULGO CATALEPTICO, PERQUAM RARO.

§. I.

**P**ortento similis, & admiratione dignus est nervosi generis affectus qui homines faxis, statuisque marmoris immobiliore reddit, & catalepseos, quam Latini per deprehensionem, detentionem, ac congelationem interpretantur, nomine salutatur. Est illa, si realem spectemus definitionem, spasmodica fibrillarum nervearum, ac nervorum, actibus potissimum voluntariis, & sensationi destinatorum, prope suas origines constrictio, & inde denegatus liquidi tenuissimi, in cerebro secreti, cujus ope sentit ac movet anima, in nervorum canales influxus: unde omnes sensus ac motus voluntarii pereunt, & corpus in eo, quo sub accessione mali est situ, immobile servatur; visque imaginationis magis intenditur.

§. II.

**A**gitatur inter veteres controversia, an catalepsis idem sit cum catochomorbus: necne? Quidam discrepare has adfectiones, & Catochum illum esse perhibent affectum, quem coma vigil adpellant veteres; ubi somno premi videntur ægroti, & tamen vigilant, sed nec fari, nec ullum membrum movere valent, sensu præsertim tactus integro. Contra vero plerique catochum ac catalepsin pro synonymis habent; quos inter HENRICUM ab HEER *obs. III.* & NICOLAUM PISONEM *de morbis cognoscendis Lib. I. Cap. XIII.* allegasse sufficiat. Realis autem est, quæ catalepsin ac tetanum intercedit differentia. Quemadmodum enim in tetano totum corpus, &

cuncta membra tanto rigore distenduntur, ut illa ligno rigidiora nec summa vi flectere aut incurvare valeas; & præterea sensus pariter ac ratio sibi constant: ita e contrario in catalepsi immotum quidem stat corpus, sed flexile manet, & quoscunque artus flectere ac agitare potes; atque sensus omnes pariter ac ratio pereunt.

§. III.

Catalepsis omnium sane morborum est rarissimus; ut ideo HENRICUS ab HEER medico, se plusquam milies vidisse catalepticos jactanti, responderit: *O te infelicem, non puto fuisse mille catalepticos, ex quo morborum terris incubuit cohors.* Quotquot tamen legeris de hoc morbo in libris Medicorum sparsim obvias observationes; invenies illum hyemali potissimum tempestate, & sub frigore intensissimo homines invadere. Quemadmodum enim frigus generatim nervoso generi est inimicum, & ad producendos morbos spasmodicos admodum opportunum: ita vero quoque simillimum est, in nostro morbo nervorum fibrillas ad concipiendam spasmodicam conductionem frigore reddi aptissimas; eo magis, cum solo horrendo frigore prodigiosum hoc malum excitari, plurimæ testantur observationes. Corripuit equidem miseros per intervalla, & paroxysmos, qui sæpius per aliquot horas durant, & juvenem quendam, cujus meminit FORESTUS *Lib. X. obs. 42. pag. 369.* per tres integros dies detinuerunt. Raro quædam præcedunt notæ, mali adventum prænuñtantes; nisi quod sacerdos quidam, de quo FORESTUS loc. cit. agit, obtusum antea in posteriori capitis parte senserit dolorem; & monacho, cujus casum recenset HENRICUS ab HEER *obs. III. pag. XLIII.* ante invasionem mali, collum riguerit.

§. IV.

Plerumque subito invadunt paroxysmi, & sic se habent: In quocunque situ fuerint ægri, in eodem simul ac

Historia catalepticos.

Paroxysmorum descriptio.



ac semel manent rigidi ac immoti; sedentes sedent, stantes stant, cubantes cubant; si clausi fuerint oculi, clausi manent; cum vero malum de die plerumque accedit, oculi tenentur aperti, irretiti, in unum locum fixi, ac si Medusæ caput intuerentur; & licet illos sudario perstrinxeris, inconviventes manent. Interim loco moveri, & artus flecti possunt; sed quocunque inflectantur, illic immoti persistunt; impulsu progrediuntur; & puer, quem ex FERNELIO allegat FORESTUS *Lib. X. obs. 42. Schol.* electulo sublatus consistebat, Neque vero ullus adest sensus, nec vident licet apertis oculis, nec audiunt, nec gravissime compuncti sentiunt. Nihilo tamen minus actus automatici legitime succedunt; pulsus fertur naturalis, spiratio facilis, & adnotante FORESTO loc. cit. quidquid intruseris ori, devoratur. Sæpius abdomen, ac costæ inferiores convelluntur, testantibus eodem FORESTO, SYLVIO, PLATERO & DOLÆO *Encyclop. med. pag. 6.* Hinc alvus simul est adstrictissima, ut nec tenuissima intrudiqueat fistula, observante HENRICO ab HEER *obs. 3. pag. 39.* Color faciei manet floridus, juxta NICOL. PISONEM *Lib. I. Cap. 13. pag. 93.* Tandem inter alta suspiria ad se redeunt; tumque mira, quæ audiverint ac viderint, instar ecstasticorum, narrant. Extra paroxysmum plerumque a cibis vel plane abstinent, vel saltem pauca comedunt.

## §. V.

Subje-  
cta ca-  
tale-  
pseos.

Huic malo, præsertim cum ecstasi conjuncto, foemina præ viris deprehenduntur obnoxia, attestantibus BORRELLO *Cap. XI. histor. 54. & Marco Marci in Philos. rest. pag. 397.* Possident enim illæ fibras molliores, teneriores ac sensibiliores, quarum ratione non solum ad suscipiendos generis nervosi motus inordinatos admodum proclives sunt; verum etiam ad impressiones ac passiones animi fortiores fovendas, & morbos ex corrupta phan-

tasia subortos perquam opportuna existunt. Deinde vero sinit temperamentum melancholicum, & ubi vis imaginationis excellit, facillime suboritur hic morbus; præsertim si juxta NICOLAUM PISONEM loc. cit. & ipsam experientiam, victus frigidior, tempus anni, & regio ad frigidam constitutionem prompta accesserint. Et denique adhuc notari meretur, quod in hoc morbo peremptis vasa, quæ in basi cerebri ad synciput tendunt, sanguine crasso turgida, ac posterior cerebri pars serosa colluvie imbuta, reperiantur. HENRICUS ab HEER *obs. 3. pag. 45.* in tali subjecto cerebrum in anteriori parte durum, in basi mollius ac humidius; nervorum vero origines siccissimas & solito graciliores deprehendit.

## §. VI.

Tradita hac catalepseos historia; ad causam ipsius, atque formalem rationem indagandam progrediemur. Hanc in posteriori capitis parte hæere, non modo defunctorum sectiones, atque dolores in posteriori capite ac nucha, paroxysmos nonnunquam antecedentes testantur; verum etiam omnes unanimi ore adfirmant Medici. Verum in pressius determinanda symptomatum causa, in varias, minus claras abierunt opiniones. Plurimi spiritus animales adeo fixari ac concentrari asserunt, ut in motu suo præpediantur: quod de hisce corporibus subtilissimis ac penetrantissimis nullo modo concipi potest. SYLVIVS PRAX. *Lib. 2. pag. 474.* experimento chemico, quo spiritus urinae volatilis confusus cum spiritu vini rectificatissimo in coagulum spissius concrevit, persuasus, credit in catalepsi spiritus animales, qui ad indolem spiritus vini rectificatissimi accederent, a spiritu volatili urinoso, præternaturaliter in corpore genito congelari, ut immobiles maneat. Verum falsa subest applicatio, & fallacia non causæ ut causæ. Namque primum tantum abest, ut spiritus animales ejusdem cum spiritu vini sint natura,

Senten-  
tiæ Me-  
dico-  
rum de  
causa  
Catale-  
pseos.



turæ, ut potius hic in quantitate affumtus, narcosin inducat. Deinde in allegato experimento spiritus vini neutiquam coagulatur, sed sal volatile, quod in spiritu urinæ, qui nihil aliud est, nisi sal volatile in proprio suo phlegmate solutum, continetur, affusione spiritus vini rectificati præcipitatur.

## §. VII.

Causa  
catale-  
pseos  
proxi-  
ma.

Nos potius causam catalepseos in denegato liquidi tenuissimi in nervos ad motus voluntarios ac sensus destinatos influxu, qui e contrario in nervos actibus vitalibus & automaticis interviennes naturalis, quin ex parte impetuosior est, collocamus: at quomodo ille intercipiatur, jam dispiciendum est. Quod si ergo perpendamus; omnes totius corporis sensationes, omnesque functiones animales in catalepticis penitus cessare, vero est simillimum, fluidi nervosi influxum in eo potissimum loco intercipi debere, ex quo omnes nervorum nostrorum fibræ principium suum, ac primam originem trahunt. Hic locus audit sensorium commune, & ille est, in quo primariam quoque animæ sedem, nos collocare oportet. Quamvis enim illa, tanquam substantia immaterialis, non bene includi queat loco: attamen cum certissimum sit, spiritum hunc immortalem arctissimum cum corpore fovere commercium, & magnum in sensus & functiones, quæ dicuntur animales habere directorium; necesse est, ut ipsi ratione operationum, quas beneficio fluidi tenuissimi, modo nobis incomprehensibili edit, certum utique assignemus spatium, ex quo omnes, quæ in fibris fiunt mutationes sentiat, & actionibus, quæ ipsius voluntati subjacent, commode fungatur.

## §. VIII.

Sensorii  
commu-  
nis de-  
scri-  
ptio.

Commune vero sensorium nec juxta CARTESIUM in glandula pineali; nec ad mentem LANCISII differt. de sede animæ cogitantis in corpore cerebri calloso; sed cum Anatomicorum accuratioribus ac recentioribus, in me-

dulla oblongata, atque ea, quæ basin cerebri constituit, collocamus. Exinde enim egressi canales nervosi, tunicam extimam, a pia meninge, copiosissimis vasis intertexta, ac medullares cerebri tractus ambiente, mutuuntur, & sic ad totius corporis partes, sensui motuique voluntario inservituri abeunt. In hasce vero fistulas nerveas, fluidum, subtilissimum, cum sanguine per arterias carotides ac vertebrales ad caput delatum, resorpta a venosis vasis crudiori substantia, in parte cerebri corticali secretum, & denique per medullarem regionem vi quadam impellitur; ut hujus beneficio certas cogitationes, sequantur certæ motuum in corpore determinationes; & vicissim certas corporis motiones excipiant certæ in anima ideæ.

## §. IX.

Quemadmodum igitur dicto illo fluidi tenuissimi influxu recte, & proportionata quantitate se habente, omnes sensationes, & functiones animales vigent, debitoque peraguntur ordine, nosque tum sani vigilamus: ita si parcius fuerit ille influxus, dormire dicimur, eoque plane intercepto, omni sensu ac motu voluntario destituimur. Omnis vero hujus influxus interceptio, vel fibrillarum nervearum paralyssi, vel spasmodica constrictione fit: namque nervorum obstructionem, quam statuunt, neutiquam locum habere, jam in *Consult. ac Respons. Medic. Sect. 1. Casu XLIX. pag. 247.* demonstratum dedi. Enim vero in catalepsi paralyssi fibrillarum nervearum ea non potest esse causa, quæ remoretur fluidi subtilissimi introitum in nervos; cum paroxysmi per intervalla recurrant, & sub iis facies sit rubicunda; quæ in morbis ejusmodi a causa paralytica inductis, quorsum mea sententia, soporosi spectant affectus, longe aliter sese habent. Ergo in catalepsi fibrillarum nervearum, in sua origine, antequam matrem penetrant, spasmodica constrictione & causam denegati spirituum in nervos influxus; & hinc reli-

Quo-  
modo  
in ca-  
talepsi  
influxus li-  
quidi  
nervi  
inter-  
cipiatur.

quo.



quorum omnium symptomatum verum & amplissimum juxta §. VII. præbet fundamentum.

## §. X.

Ratio  
sympto-  
matum.

Hinc igitur omnes utique sensationes, omnesque animales functiones cessant; cum autem in partibus his inservientibus nullus sit spasmus; ratio patet, cur membra per se immota, flecti queant, ac quocunque illa flexeris, ibidem vi movente carentia, immota rursus quiescunt. Sed dum hæc fiunt, vigent omnes motus, quos automaticos vocant. Namque constat ex Anatomicis, quod sicuti nervi sensibiles, ac motibus voluntariis destinati ex cerebri medullari substantia suam trahunt originem; ita e contrario functiones vitales, quæ animæ imperio neutiquam subjacent, nervis ex medullari ac inferiori cerebelli parte propullulantibus administrantur, testante inter alia experimento a Clarissimo VIEUSSENS *Neurograph. Lib. I. cap. XX. pag. 123. allegato*. Jam vero in catalepsi illas fibrillas, quæ ex cerebro ortæ, nervos dant actibus voluntariis inservientes, constringi diximus; at illæ, quas cerebellum ad vitam conservandam emittit, salvæ manent in statu naturali. Hinc pulsus cordis & articularum viget, facies rubet, respiratio fertur naturalis &c. Interim cum fluidi tenuissimi in organa sensui, & motui voluntario ministrantia denegatur influxus: facile fit, ut illud majori copia ac impetu, in partes actus vitales perficientes ex cerebello impellatur. Hinc pertinacissimæ, quæ alvum occupat, constrictionis, motuumque abdominis & pectoris convulsivorum origo petenda est.

## §. XI.

Ecsta-  
seos dis-  
quisitio.

Restat adhuc illud momentum explicandum, quo cataleptici sæpenumero observantur ecstatici. Plerumque enim finito paroxysmo narrant mirabilia gaudia, aut phantasmata tragica, visiones divinas, consortium angelorum; quin & futura prænunciare videntur, ac vatidicos se simulant. Tales memo-

rabiles casus passim observantur in Medicorum scriptis. Conf. PAULINUS *Cent. IV. observ. 38*. MARCELLUS DONATUS *Cap. I. pag. 91. seqq.* AUGUSTINUS *de civitate Dei Lib. XIV. cap. 23*. ACT. MEDIC. BEROL. *Dec. I. vol. II. pag. 62. A. N. C. dec. III. anno 3. obs. 61. & Volum. I. obs. 250. pag. 563*. Neque vero in hisce casibus diabolo vim quandam adscribere; nec animarum e corpore ad alia loca, quin plane cælum secessum statuere, nec alias præternaturales causas allegare necesse est; nec ad nos pertinent ecstases Paulli, sanctorumque; siquidem de illis duntaxat loquimur, quæ in morbos corporibus fiunt. Et statim ratione consideremus, subjecta catalepticos plerumque esse melancholica, vi imaginatrice fortiori gaudere, ac circa ideas sacras de Deo, angelis, vita æterna tantum non semper esse occupata, deinde, si experientia, ac exemplo insomniorum suffulti supponamus, animam, quo magis a perceptione objectorum externorum, ac motuum vitalium exercitio feriat, eo intensius phantasiæ indulgere: firma sequitur conclusio, visiones ecstasticorum catalepticorum non nisi effectus esse intensioris phantasiæ: dum anima a commercio rerum externarum vacua, præteritas rerum ideas repetit, ex quibus inter se collatis etiam fieri potest, ut futura prænunciet. Sed revertamur, ad causas mediatas, quæ malo cataleptico excitando sunt opportunæ.

## §. XII.

Eminet inter alias vitium humorum crassorum, ac viscidorum, quos veteres dixerunt succos melancholicos; qui in capite ac cerebro difficilius progredientes, & in hujus basi præsertim ac pia meninge stagnantes, efficacissimam constrictioni fibrillarum nervearum suppeditant occasionem. Hinc non tantum sceminæ hystericae, virique hypochondriaci ac melancholici præ aliis catalepsi patiuntur, verum etiam

Causæ  
catale-  
pticos  
media-  
tæ sunt  
humo-  
res  
crassi,  
præ-  
sertim  
com-  
moti.



etiam hoc morbo peremtorum sectio docet, vasa in posteriori cerebri parte crasso & coagulato sanguine repleta fuisse, ac in ipso cerebro extravasatam ferofam hæsse colluviem. *Conf. HOL- LERIIUS Lib. I. de morb. intern. & SCHENCKIUS Lib. 1. obs. 2.* Ex his quoque patet clarissime, quare consue- tas & ordinarias sanguinis excretiones suppressas, nonnunquam subsequatur catalepsis: vide *FONSECAM Lib. 2. Consult. 92.* Neque minus ratio patet, cur puer ille, cuius *AETIUS Tetra- bibl. 2. Serm. 2. Cap. 4.* meminit, per triduum congelatus, tandem effuso per nares copiosissimo sanguine, sta- tim convaluerit. Eo magis a spissis hu- moribus catalepticum suboriri poterit malum, si illorum vehemens expansio ac exæstuatio, & hinc enata fortior vaforum cerebri ac piæ matris disten- sio accesserint. Unde concipi poterit, quomodo illud, ex febribus intermit- tentibus, incongrue suppressis ac vo- latilibus tractatis, juxta *DODONÆ- UM obs. med. 44.* ex nimia vini gene- rosi ingurgitatione, teste *PLATERO Lib. 1. fol. 27.* ex ebrietate ac nimia iracundia, notante *DOLÆO in ency- clop. medic. pag. 96.* prognatum fuit. Nec silentio denique prætermitti de- bent vermes, ac lumbrici intestinorum; qui sicuti gravissimis morbis, ita & cataleptico ansam præbere possunt, te- stante observatione a *MARCELLO DONATO Lib. II. Cap. VII. pag. 186 recensita.*

§. XIII.

Animi  
pathe-  
mata.

Præterea ingens debetur animadver- sio gravioribus animi pathematibus, quibus constrictionem fibrillarum in cerebro nervearum, cum subsequente catalepsi, excitari pariter ac relaxari, in scriptorum monumentis passim re- latum legimus. *TULPIUS Lib. I. obs. cap. 21.* juvenem quendam ex inopina- to matrimonii repudio catalepticum factum, & illo promisso restitutum al- legat. *RONDELETIUS Lib. I. pag. 20.* casum refert de puella, viro, quem insigniter oderat nupta, quæ ex mœ-

*Hoff. Syst. Tom. V.*

rore hunc morbum incidit, ejusque paroxysmis, quotiescunque maritum vel vidisset, vel de eo audivisset, vel etiam cogitasset, protinus correpta fuit, *HENRICUS ab HEER observ. 3.* recenset catalepsin, quam vir qui- dam melancholicus, ex nimio mœro- re toleraverat. Idem malum, nimiam quoque mentis intentionem, ac pro- fundas fixasque meditationes, præfer- tim si temperamentum frigidum, aliæ- que occasionales causæ accesserint, ex- cipere, probatissimorum medicorum documentis confirmatum habemus. Quales casus reperies in *GALENO Comm. in HIPPOCR. 2. cap. 56. ZA- CUTO LUSITANO Lib. 1. histor. 42. FERNELIO in pathol. Lib. V. cap. 2.* Multo magis ad nostrum affectum, cum ecstasi complicatum, meditatio- nes sacræ profundiores contribuunt; imprimis si spiritualis de commissis peccatis supervenerit tristitia. *Conf. SENNERTUS in praxi pag. 598. HERFELT tr. philos. hominis pag. 183. AUGUSTINUS de civitat. Dei L. 14. c. 24. GEIERI præfat. tractat. Liebe Bottes und des Nachsten.*

§. XIV.

Referri quoque ad catalepticos me- rentur, qui nimio atque horrendo fri- gore percelluntur ac veluti congelan- tur. Ratio hæc est: Frigus vim habet externum corporis habitum, quem im- mediate ambit, validissime constrin- gendi: quo constricto, humores ad in- teriora majori copia compelluntur, in capite præfertim cumulantur, in vasis cerebri stagnant, hæc distendunt, & hinc fibrarum nervearum ex cerebro prodeuntium strictionem, catalepticos cum omnium sensationum abolitione stipatæ originem caussantur. Con- tinuante frigore intensissimo, & hinc durantibus jam recensitis illius in cor- pus effectibus, tandem fit sanguinis aut feri in capite extravasatio; qua sæ- pius comprimitur cerebellum, ut nec in organa vitalia influere queat tenuis- simum fluidum, & inde demum mors sequitur. Quales tristissimi casus,

Cata-  
leptis  
ex fri-  
gore  
horren-  
do,

E



casus, sicuti quotidie contingunt, ita præsertim a FORESTO *Lib. X. obs. XLI.* copiosissimi describuntur: ubi sub hyemis asperrimo gelu complures milites in excubiis stantes mortui sunt reperti; alii equis insidentes, ac habenas in manibus adhuc habentes, congelati ex equis sublati sunt, quin & ipsi tandem equi immoti perierunt.

## §. XV.

Causæ  
occa-  
siona-  
les ca-  
talep-  
seos.

Quod si perscrutemur causas, quæ paroxysmos catalepticos revocare solent, occasionales; has inter principem locum sibi vindicant graviores animi commotiones, ira, terror, gaudium, metus, contristatio. Pertinent huc quoque objectorum ingratorum visiones: vid. casus §. XIII. ex RONDELETIO allegatus. Quosdam ex verborum quorundam recitatione, aut psalmodiarum cantu congelari, scriptores perhibent; & ego ægram vidi, quæ auditis verbis, ardentissimum Christi amorem exprimentibus distendebatur; quemadmodum Presbyter ille, cujus morbum recenset AUGUSTINUS loc. cit. ad prolatas lamentantium voces, suo prehensus est paroxysmo. Non minus ad hujus dirimæ generationem contribuunt frigidus aer, habitatio in locis altis, montosis, frigidis, tempus anni hyemale, ac victus crassus; annotante NICOLAUS PISONE *L. I. C. XIII.*

## §. XVI.

Prognosis.

Quod tandem attinet prognosin catalepticos; ea si fuerit ab animi passionibus, aut profundis meditationibus orta, non adeo grave, ac subito lethiferum minatur periculum. Contra vero, quæ a sanguine crasso, viscido, impuro, ac excretionibus sanguineis suppressis fovetur; gravissimum metum incutit. Namque vel in melancholiam definit, sicuti observat NICOLAUS PISO *loc. cit. pag. 93.* vel commutatur in morbum comitiale, uti MARCELLUS DONATUS *Cap. VIII. pag. 186. ex Benivenio allegat;* vel denique in mortiferam subito terminatur apoplexiam, vitam-

que tollit. Nec levioris momenti est congelatio, quæ a frigore inducitur; nisi enim tempestivæ ferantur suppetiæ, mors sequitur repentina.

## C U R A T I O.

## §. I.

Quod attinet spinosi nostri mali curationem; illa duabus potissimum absolvitur indicationibus; quarum est prima, ut spasmodicam, qua fibrillæ nervæ in cerebro detinentur, stricturam relaxemus; altera, ut causas materiales sive mediatas, quæ ad dictam constrictionem inducendam contribuunt, decenter removeamus. Quemadmodum priori indicationi in ipso maxime paroxysmo satisfieri oportet; ita posteriorem potius extra paroxysmum impetrare licet.

## §. II.

Intra ipsum paroxysmum, præsertim si gravior fuerit, parum quidem medicamentis perficere possumus: neque tamen minus omni studio eo respiciendum est, ut excitemus ægros, qui vigilantes dormiunt, & spasmodicas stricturas demulceamus. Quo fine naribus adplicari debent, vel spiritus urinosi volatiles, vel acida penetrantiora, veluti acetum vini, rutaceum forte, aut spiritus crystallorum veneris, qui nihil est, quam concentratus aceti destillati spiritus: hæc enim acida longe penetrantioris efficaciam sunt, quam ullum sal volatile. Neque etiam alienum erit, olea cocta, nervina ac antispasmodica, nuchæ ac posteriori capitis regioni, detonsis præsertim capillis adplicare; quod remedii genus a FORESTO *Lib. X. obs. 42.* commendatur. Non minus clysteres potentiores, si anus non adeo clausa fuerit, ut nihil admittat, infundere licet: ac denique, præsertim si malum a nimia sanguinis mole, ac raptu versus caput inductum, faciesque venis sanguine valde infarctis turgida fuerit, in ipso paroxysmo narium scarificatio, aut sty-

Indica-  
tiones  
cura-  
toriarum

Quid in  
paroxysmo  
cataleptico a-  
gendum.



styli dentati intrusio, eoque facta vel-  
licatio, donec sanguis effluat, insignif-  
simam pollicetur opem.

§. III.

**Catale-**  
**pseos a**  
**melan-**  
**choli-**  
**cis suc-**  
**cis sub-**  
**ante cu-**  
**ratio.**  
Plura in ipsis paroxysmis tentare  
haud licet; sed his finitis, causarum  
materialium ac mediatarum remotio-  
nem, quantum fieri potest, moliri  
convenit. Quod si igitur rarissimus no-  
ster affectus a melancholia, eaque hy-  
pochondriaca, vel hysterica, uti sæ-  
pissime fit, suam traxerit originem,  
ubi spissi ac visceri humores in vasis ce-  
rebri stagnant, ac difficiliter progre-  
diuntur: ea in usum ducere oportet re-  
mediorum genera, quæ huic morbo  
expugnando, sanguinique spisso atte-  
nuando, & æquali circulo restituendo  
sunt idonea. Ad eorum classem præ-  
ter clysteres & blanda laxantia, venæ-  
sectiones debito tempore administran-  
das, motum quoque ac exercitationem  
corporis, ac rectum rerum non natu-  
ralium usum, referri merentur, &  
palmam obtinent pediluvia, balnea,  
& potus aquarum mineralium; vel e-  
tiam loco harum cura cum sero lactis  
& sale Soclicensi instituenda; non o-  
missis illis, quæ tonum partium soli-  
darum labefactatum roborandi facul-  
tate gaudent.

§. IV.

**Excre-**  
**tionis**  
**sangu-**  
**is sup-**  
**pressæ**  
**sunt re-**  
**vocan-**  
**dæ.**  
Quando manifesta malum sustenta-  
verit plethora; aut plane excretionis  
sanguineæ vel naturales, quæ per ute-  
rum aut venas sedales fiunt, suppressæ,  
vel artificiales consuetæ per venæse-  
ctionem aut scarificationem neglectæ  
ac intermissæ fuerint: has extra paro-  
xysmum revocare, aut saltem nimiam  
humorum molem missione sanguinis  
evacuare oportet. Quo fine sectio ve-  
næ in pedibus commendari meretur;  
postquam, si admodum ingens fuerit  
cruoris abundantia, ut apoplexiæ me-  
tus sit, in ipso paroxysmo venæ na-  
rium, stylo intruso, simul aperiendæ.  
Si corpus magis laxum ac spongiosum  
existiterit, scarificationes substitui pos-  
sunt; aut denique, si proclivitas ad  
fluxum hæmorrhoidalem sentiatur, si-

gnificantibus eam doloribus ossis sacri,  
ac intestini recti, aut ille suppressus  
malum foverit: bene monente NI-  
COLAO PISONE *Lib. 1. cap. 13.*  
*pag. 94.* illius revocatio tentanda est;  
quo scopo ano probe fomentato, hi-  
rudines adplicare convenit.

§. V.

Si vermium sit suspicio; anthelmin-  
tica locum inveniunt. Sed ex horum  
classe ea, quæ acri ac intestina jam ir-  
ritata magis vellicante vi pollent, ve-  
luti sunt acriora purgantia, vitriola-  
cea, acida, mercurialia, aloetica,  
multo magis, quæ venereæ existunt  
profapiæ, cane pejus & angue sunt fu-  
gienda. Præstat potius pilulas, quæ  
specificæ minus acria erodentia conti-  
nent, ut extractum tanacetii, semen  
cynæ, rhabarbarum myrrham, asam  
foetidam cum panchymagogo Crollii,  
æquali portione commixta, propinare;  
quæ præstantissimi sunt effectus.

§. VI.

Quandocunque causa passionis cata-  
lepticæ, maximam partem in anima,  
vel gravioribus pathematibus commo-  
ta, vel fixioribus ideis & meditationi-  
bus intentæ, vel plane conscientia tor-  
mentis agitata residet: parum auxilii  
spondent pharmaca. Medico nihil am-  
plius incumbere videtur, quam ut  
causas materiales, si præsto fuerint,  
ac simul concurrerint, congruis subsi-  
diis remove annitatur. Ceterum eo  
ad laborandum erit, ut anima ab an-  
xiis ac tristibus ideis, quæ instar carni-  
ficinæ, ac crudelis tormenti corporis  
sint, per jucunda cum amicis commer-  
cia depellantur; neque otio ac quieti,  
quæ profundarum cogitationum mater  
est, nimium indulgeatur. Nec quo-  
que præstantius subsidium est, aeris  
mutatione; qua sola pertinacissimum  
hoc malum vidi curatum.

§. VII.

Qui frigore sunt congelati, & adhuc  
quasdam vitæ exhibent notas; ad lo-  
ca tepidiora deportentur necesse est.  
Ea tamen caveantur, ne sint justo ca-

**Catale-**  
**pseos**  
**ex ver-**  
**mibus**  
**cura-**  
**tio.**

**Cata-**  
**leptico**  
**ex ani-**  
**mæ vi-**  
**tio pro-**  
**ductæ**  
**tracta-**  
**tio.**

**Frigi-**  
**re con-**  
**gelato-**  
**rum re-**  
**stitu-**  
**tio.**



lidiora; ne sanguis ad interiora compulsum uno impetu exæstuetur, ac ideo extravasationem subeat. Consultum quoque tali in casu est, blandis frictionibus corpus fovere, ut externæ partes, quæ constrictæ sunt, relaxentur, inque eas humores denuo invitentur. Tum excitatis illis personis, pedes in pediluvia imponere licet tepidissima: quæ partim cutim relaxandi, partim æquabilem humorum circuitum restituendi, vim habent excellentissimam: neque minus vires prostratæ cordialibus remediis, ac vini generosi haustu, refocillandæ erunt.

### Cautelæ ac monita Practica.

#### §. I.

Cautela circa volatilia ac acidorum in paroxysmo usum.

**N**Otari probe meretur, in paroxysmo fugienda esse salia volatilia oleosa, balsama apoplectica validiora, & calidiora liquida; si malum catalepticum ab humorum nimio orgasmo, expansione ac stagnatione fuerit subortum; tum enim sanguis magis commovetur, & metus est, ne extravasatio & apoplexia plane superveniat. Consultius est in tali casu acidis fortioribus uti, & externe olea ac balsama nervina, anodyna, ac antispasmodica illinire. Quod si vero spasmodica fibrillarum cerebri constrictio, ab animi pathematibus, metu, tristitia, aut fixioribus meditationibus inducta subsit: tunc salia volatilia oleosa & interno & externo usu juvant.

#### §. II.

Cautela circa narium scarificationem.

Sicuti in omnibus capitis gravioribus affectibus, qui a sanguine copioso, valde commoto, ac largius ad caput rapto suboriuntur; uti sunt cephalalgia, deliria, convulsiones, epilepsie &c. ita quoque in affectu nostro cataleptico, si talem agnoverit causam, præstantissima est sanguinis, intruso naribus stylo facta detractio. Neque vero veteribus ignota fuit hæc operatio; & digna sunt verba ARETÆI, quæ *Lib. VII. pag. 124.* exstant, ut

hic allegentur. Namque *neceſſe eſt*, inquit, in allegatis nimirum casibus, *ut ſanguis e naſi interioribus detrahatur: intro enim perlongum instrumentum immittitur, quod CATEIADION vocant, aut illud, cui STORYNE nomen eſt; aut ſi quis horum copiam non habuerit, pennæ anſerinæ caulem craſſiorem ſumere debet, ejuſque nervoſam partem denticulatim inſtar ſerræ incidere, atque ſic intra naſem uſque ad oſſa, quæ etymoidea obcribri ſimilitudinem vocantur, immittere, deinde utraque manu agitare, quo locus a dentibus inſculpatur, ac vulneretur. Facilis eſt enim ac copioſus ſanguinis curſus: nam venæ graciliores in nares deſinunt, corpora in hac parte mollia ſunt, & ſectioni habilia.*

#### §. III.

Morbus catalepticus, si ab imaginatione sustentatur; spernit & eludit, omnium remediorum opem. Peregrinatio vero ac aeris mutatio optimum spondent auxilium. Dicit enim vix potest, quanta virtus & efficacia ad morbos nervosi generis & spirituum sanandos, insit peregrinationibus in loca præsertim, quæ salubri aere fruuntur, & qui secundum Celsi monitum contrarius est illi, qui morbum fecit. Aer enim est illud elementum præcipuum & tenuissimum, quod portione sua elastica æthereâ cum sanguine & succo lymphatico mixta & sensum & motum motricibus solidis partibus præstat, & secundum Galenum divini quid in se habet in morbis. Præter ea peregrinatio id quoque habet beneficii, quod ideæ consuetæ, quæ mentem turbant, subtrahantur, & jucundioribus anima assuefiat. Quin ipso temporis beneficio sponte debellari hoc malum, haud raro observatur; siquidem progrediente ætate & fibræ nerveæ fiunt robustiores, & anima constantior redditur.

Uſus aeris mutationis.

#### §. IV.

Quod præſervationem attinet; ea præſervatio obtinebitur, ſi cauſſæ occaſionales, ad



ad hoc malum contribuentes probe fugiantur. Et cum has inter frigus insignem efficaciam obtinet; omni studio illud arcere oportet; atque etiam, si rationes domesticæ permiserint, ex habitationibus frigidis, montosisque, ad loca, ubi benignius cœlum est, discedere. Victus sit conveniens, inque eo fugiantur cibi acidi ac qui frigus quoddam ventriculo inferunt. Evidentur solitudines ac feligantur grata consortia, quibus anima a curis, mœroribus ac meditationibus sit vacua. Maximopere versus hyemale tempus probe observetur, ne relinquantur materiales in corpore causæ, quæ malum illud inducere valent: quo fine & primæ viæ a sordibus servantur liberæ, & sanguinis copia, congruis illius missionibus, nec non frequenti corporis exercitatione, imminuatur.

## Enarrationes morborum.

## OBSERVATIO I.

**Catalepticus affectus ex ver. mibus & vitio hysterico pro. genera. tus.** **D**Uodecim annorum puella, temperamenti sanguineo-melancholici, ingenii admodum vegeti ac vivacis, novem abhinc mensibus prima vice uterinæ evacuationis onus subiit. Elapsis inde quatuor hebdomadibus, cum instaret menstrua periodus, multa edulia sacharo condita, cyminique semen, quod semper in delitiis habuerat, ingurgitavit, & brevi post ingentia imi ventris tormina percepit. Datis ergo laxantibus, & anthelminticis remediis, infusisque ano clysteribus, lumbricus per alvum reddebatur longissimus: menses vero hoc tempore silebant, quamvis circa lumbos & ipsum uterum atroces sævissent dolores. Hinc succedebant convulsivi ac epileptici motus, cum delirio furoreque quasi uterino juncti; & frustra misso ex vena in pede tusa sanguine, frustra quoque datis remediis antispasmodicis, uterinis, anthelminticis, carminativis &c. per quinque septimanarum decursum pertinaciter inhærebant. Pa-

roxysmi tam variis modis, tamque mirandis symptomatibus, tristem ludebant scenam, ut vix describi queant. Mox enim inter deliramenta, singultus, ac graves septi transversi concussiones, totum corpus e lecto in altum elevabatur: & remittebant convulsiones, relictis corporis languoribus, ac præcordiorum doloribus. Mox sub deliriis convulsivi motus artus duntaxat misere torquebant; ut omnes manuum pedumque digiti incurvarentur, pollex vero ac medius digitus rigidus extendetur; deinde brachia retrorsum traheret, iisque caput percuteret; tum eadem antrorsum vi quadam raperet, ac pectori validissime allideret. Mox inter has violentas agitationes mentis compos videbatur, sacrosque cantus cum summa devotione per satis longum tempus modulabatur. Tandem accedebat catalepsis, quam vocant, ecstatica; dum per aliquot horas lecto affixa mansit rigida, & nulla arte excitari potuit, oculis apertis, vultuque amœno, ac si de quadam re gauderet, decumbens. Postquam ad se rediit, narravit jucundissimas visiones de Deo, angelis, cœlo, vita æterna; atque vaticinam se gessit. Ceterum per quinque fere hebdomades ciborum nihil plane assumpsit, præter gelatinam cornu cervi, novissimis tantummodo diebus sorbillatam; cerevisiam vero ac vinum quotidie, sed parca quantitate potavit; & quod notabile est, singulis diebus copiosa ac valde dura alvo reddidit stercora. Vultus colore gaudebat floridissimo, qui nec sub ipsis animæ defectionibus, quas crebro patitur, expallescebat, sed roseus manebat. Pulsus ferebatur naturali similis; nec urina, præter largum sedimentum, mingebatur præternaturalis. Noctes, nisi tranquillo somno, attamen ab omnibus symptomatibus vacuas transigit; ac omne tempus piis meditationibus, & sub insigni mentis requie consumit.



## Epicrisis.

Duplicis generis causæ hunc portentosum ac mirabilem sustentaverunt affectum: nimirum partim lumbrici in canale intestinorum hospitantes; partim sanguis in vasis uterinis, ob mensium defectum stagnans, atque corruptus. Hinc non sane mirum, si symptomata fuerint eo graviora, ac atrociora, cum a duabus causis, quarum quævis sola tali morbo inducendo sufficit, sint excitata. Quamobrem in mali hujus curatione, ad hanc duplicem causam directa fuit medendi intentio: præter enim temperatiora, simul tamen efficaciora, anthelmintica, exhibenda curavi congrua antihysterica, ut eorum virtute liber sanguinis per uteri vas circuitus, ejusque superflui per menstruum periodum excretio faciliteretur. Fuerunt ex horum numero pilulæ balsamicæ, ad ductum Becherianarum concinnatæ, cum aliquot granis extracti croci, atque castorei maritatæ, & alternis diebus, maxime circa tempus menstruum propinatæ, mane desuper sorbillato infuso, ex herba melissæ, artemisissæ, floribus cheiri, ac chamæmeli vulgaris. Jussimus præterea ante horum remedium usum, ad relaxandos intestinorum spasmos, durasque fæces emolliendas, ano injici enemata, quæ plurimum olei cocti habebant. Denique præter alia antispasmodica, motum corporis per deambulationem, ac ventilationem in curru sub aere sereno commendavimus: quibus factum est, ut ægra perfectam recuperasset sanitatem.

## OBSERVATIO II.

**Catalepsi ex fixiori.** Persona sequioris sexus vix excedens annum ætatis vigesimum quartum, conditionis vilioris, rudioris minusque exculsi ingenii, aliquando in templo tempore brumali, attentius hauriens sacrum verbum de vera contritio-

ne, ac intimiore cordis inversione, de peccatorum abominanda ac detestanda coram Deo justissimo indole, summo mentis angore afficiebatur; inque dies & horas meditationibus istis anxiiis sacris macerata, mœstissimo semper incedebat vultu. Elapsis abhinc quatuordecim diebus accidit, ut ipsa, audita in templo concione, omni penitus sensu ac motu ex improvviso privaretur: & finito cultu divino, instar statuæ immobilioris, oculis apertis, & cœlo affixis, omnem excitationem eludens, reperiretur. Tandem post horæ spatium sua sponte, emissis aliquot suspiriis ad se redibat, sensumque cum motu recipiebat. Examinata respondebat, se nihil sensit, vel audivisse, bene habere, & quasi altissimo somno se pultam jucundissimas habuisse speculationes, ac contemplationes sui Salvatoris. Hunc accessum, plus centum vicibus intra quadraginta dierum spatium experta est, interdum mitiorem, & brevior, interdum longior & gravior, semper tamen talem, ut omnis tentata excitatio, per fortissimos spiritus volatiles, oculis ac naribus admotos, frictiones, atque punctiones, elusa fuerit, ac frustranea. Ipso in paroxysmo pulsus fuit naturali similis, & respiratio salva, ac integra, præter quod circa declinationem, nonnunquam fortissimas thoracis atque abdominis concussiones, & elevationes, cum palpitante cordis motu toleraverit: quæ tamen simul ac sensus & motus rediit, statim exspirarunt, ægra de nullo dolore vel molestia amplius conquerente: vires etiam post paroxysmum ita sæpissime constabant, ut consueta sua munia subire potuerit, totum corpus calore ac colore naturali erat perfusum; excreta omnia se bene habebant, nec menses sui officii obliviscebantur. Attamen per quatuordecim ferme dies ab omni cibo, potuque abstinebat; & quotiescunque exorata aliquid accipiebat, summa præcordiorum anxietate, cum metu suffocationis juncta infestabatur, somnoque fruebat

tur



tur parcissimo. Et quod notatu erat dignissimum, hi paroxysmi fere semper invadebant post auditam psalmodiam, aut verba ex divino codice potissimum prolata, quæ ardentissimum Christi exprimebant amorem. In tali casu in usum vocabantur multa, varique remediorum genera, alias generosissima, venæsectiones, topica, quæcunque excitantia: sed cuncta eludebat pertinacissimus affectus; donec tandem, mutato aere, ægraque ad alia loca peregrinante, sponte sensim evanuerit.

## Epicrisis.

Insignissimum catalepseos ecstasice exemplar, notabilis hic sistit casus. Nullam iste causam materiale habuisse videtur; sed a solis, pertinaciter animæ infixis ideis originem traxit. Hinc eleganter pariter ac perite Clarissimus MORHOFFIUS in *dissert. de paradoxis sensuum* scribit: *Mirabile præ ceteris, quod tamen vulgatissimum, posse ex auditu verborum, ac orationis elaboratæ homines duci, & quasi extra se rapi.* Atque eo majorem homines afficiendi possidet efficaciam, verbum divinum; ut, si nostri instituti ratio exigeret, dictum PAULLINUM, quod in *Epistol. ad Hebræos Cap. IV. v. 12. exstat*, hoc nostro casu, egregie illustrare possemus. Quod nulla præsto fuerit causa materialis, vel exinde patet, quod paroxysmi, excitatis per psalmodiæ cujusdam aut verborum sacrorum sonitum ideis revocati fuerint; ac præterea ægrotans omnibus functionibus, quas vitales vocant, absque ulla labe gavisa sit. Quod attinet convulsivas nonnullarum partium in ipso paroxysmo agitationes; illæ fluidi tenuissimi impetuosiori ex cerebello, in organa vitalia influxui, qui illius ob denegatum in partes, sensui, motuique voluntario inservientes introitum, abundantia debetur, originem suam petierunt. Ratio dejectæ ciborum adpetentiæ, facile etiam pote-

rit suppeditari; si ex experientia repetatur, illos, qui meditationibus suis intentius in objectum quoddam feruntur, passus oblivisci, ac cibos fere averfari. Tum vero, quo diutius a cibo abstinemus, eo magis perire adpetitum, præter multa documenta, vel ea historia testatur, quam DIEMERBROECK in *sua anatom. pag. 38.* de semet ipso refert: se, postquam cum sociis per sesquidiem jejunasset, non amplius famem sensisse ad tertium usque diem. Hinc vero cognitu quoque facillimum, cur nulla materiali causa præsentē, nulla opem tulerint remedia; sed tandem mutatione aeris, ac ætatis sponte exspiraverit spinosus affectus.

## CAPUT V.

## DE

AFFECTU SPASMODICO-  
CONVULSIVO  
EX UTERI VITIO, SIVE  
MALO HYSTERICO.

## THESES PATHOLOGICÆ.

## §. I.

**M**Orbus ille, aut potius morbo- Defini-  
tio ma-  
li hy-  
sterici.  
rum cohors, quam per vocem  
affectus hystericæ interpretantur ve-  
teres, æquo, quin majori, quam ul-  
lus alius affectus jure, ad passiones ge-  
neris nervosi spasmodico convulsivas,  
& quidem universales, referri mere-  
tur: siquidem nulla fere in tota machi-  
na animali nervosa, ac fibrosa pars est,  
quæ non plane effrenatis spasticis stri-  
cturis, & convulsionibus exagitetur,  
torqueatur, & gravissime distrahatur.  
Hujus ergo ideam suppeditaturi, ipsum  
definimus, quod sit affectus generis  
nervosi spasmodico convulsivus, ex  
utero a lymphæ & sanguine in ejus  
vasis retento vel corrupto proveniens,  
& per nervos ossis sacri, ac lumba-  
res & totam medullam spinalem,



universi corporis partes nervosas plus minus infestans.

## §. II.

Histo-  
ria ma-  
li hy-  
sterici.

Perperam confunditur atrox hoc malum a plerisque nostri ævi medicis, cum sic dicto hypochondriaco; aut si forsan admittitur quædam differentia, ea solummodo sexum respicit, adeo ut passio hypochondriaca ad nobiliorem, hysterica ad molliorem restringatur, utriusque tamen indoles ac natura, pro una, eademque habeatur. Quo vero pateat, longe aliam ac realem hosce affectus intercedere differentiam; operæ erit pretium, primo omnium veram morbi hysterici historiam præmittere. Hoc sine si veterum monumenta paullo perlustremus, & ex iis præsertim HIPPOCRATIS, ARETÆI, FERNELII, DURETI, MONTANI, BALLONII, HOLLERII, MERCURIALIS, JOHANNIS HEURNII scripta consulamus: in eo ad unum omnes convenire videntur, quod faucium strangulatio, intercepta ad suffocationem usque respiratio, animi defectio, vocis privatio, soporque profundus, vera, propria, & essentialia hujus morbi uterini signa, & symptomata habenda sint. In eo etiam plures concordēs deprehenduntur, ante mali hysterici invasionem, motum globi cujusdam e sede inferiore ad superiora ascendentis sentiri: unde etiam figmentum multis mulierculis familiare nascitur, quasi uterus versus superiora feratur.

## §. III.

Paro-  
xyfmo-  
rum de-  
scri-  
ptio.

Hæc præcipua sunt quidem, quæ malum hystericum comitantur symptomata; sed ante eorum invasionem & postea longe alia & plura observantur, quæ successive in paroxysmo miseris invadunt, & nulli corporis regioni parcunt. Nam quod caput attinet, frontis, temporum, vel etiam oculorum cum lacrymarum effusione, visus obnubilatione, dolorem pressorium, sensuumque & mentis torporem, omnium rerum tædio stipatum, utpluri-

mum præcedere adnotamus. Deinde correptæ hoc malo plerumque alvum fortiter adstrictam, & compressam habent, ingentem quoque ad urinam, quæ clara instar aquæ mingitur, stimulum, neque minus anxiam & suppressam spirationem, atque universi corporis languorem experiuntur. Hisce postea gravis dolor lumborum, cum ingenti algore & horrore succedit; venter durus & inflatus est, postea umbilicus retrahitur, adeo ut fovea, cui includi aliquid potest, relinquatur; & tunc globum quendam ex inferiore ventre ad hypochondria & diaphragma adscendere persentiunt; mox cum tremore incipit palpitare, cum pulsu inæquali & duro, quandoque intermittente; extrema algescunt, fauces angustantur, ut fune veluti strangulatæ videantur; facies fit pallida, spiratio valde est difficilis, vox perit, arteriarum pulsationes vix amplius percipiuntur: tanta vero est ventris strictura, ut nec ullus flatus transmitti, nec propter ingentem resistantiam quicquam clysmatis admitti possit. In quibusdam tanta est mali vehementia, ut convulsivæ & capitis & artuum agitationes, cum vel sine pollicum conclusionē deprehendantur. Aliæ in profundo, sine ullo sensu & motu, sopore jacent; quibusdam facies cum collo a sanguine est inflammata, rubicunda, arteriæ fortiter pulsant: aliæ in risu immodicos solvuntur, & restituta voce delira loquuntur.

## §. IV.

Quandocunque vero paroxysmus remittit, & mitescere incipit, quod sæpius certa fit temporis periodo, tum pulsus, qui antea valde debilis, languidus, & absconditus erat, vegetior, mollior & erectior redditur, in partes extremas redit calor, facies contracta & pallida fit explicatior & rubicundior; eructationum per superiora impetus auditur, borborygmi & murmura in ventre oriuntur, & tandem e profundo quasi somno evigilantes, vocem, sensum & motum recipiunt; de dolore



autem capitis gravativo, totius corporis & femorum ac pedum languore, & gravitate conqueruntur. Mirum certe videri potest, quod sæpe tam brevi tempore, ejusmodi perniciofa, atque præsentem interitum minitanti symptomata cessent, & intermittant; adeo, ut quæ pridie morituræ videbantur, nunc sanitate integra frui censeantur. Accidit vero nonnunquam, ut per se veratibus symptomatibus pro mortuis habitæ, sepulchro destinatæ, imo sepultæ fuerint: sed mors in hystericis sæper vel epileptico, vel apoplectico contingit insultu.

§. V.

Differentia mali hysterici & hypochondriaci.

Tradita hac pleniori sævissimi hujus morbi historia, facilius erit, ejusdem a malo hypochondriaco docere differentiam. Quamvis enim horum affectuum symptomata, inter se similia ac utrique valde communia deprehendantur, testante utriusque historia, quæ ratione posterioris mali sequenti Capite explicabitur: attamen plura adhuc restant, quæ cuivis propria, insignem illorum testantur discrepantiam. Namque morbus hypochondriacus est longissimus, atque diuturnam semper exoptat curationem: at hysterica passione gravidas, puerperas, viduas, sanguine turgentes, post gravem animi motum, vel virgines post repentinam fluxus menstrui suppressionem, sæpenumero gravissime infestari: ab ea tamen per rectam medendi rationem ita vindicari, ut nunquam revertatur, experientia docemur. Hæc porro subito, vehementer, & ex improvviso miseras haud raro adortitur, ut omni sensu ac motu privata, repente in terram concidant: quod in hypochondriacis non animadvertitur. Atque etiam peculiare illud hystericae habent, quod maxima symptomatum vehementia, si sensu mentisq; functio intercipitur, vel solo pennarum accensarum suffitu, naribus admoto celeriter diminui, quin & tolli possit. Præterea in paroxysmis hystericis, muscoli abdominis vi spasmorum introrsum contrahuntur, & umbilicus profundius retrahitur: cum in hypochondriacis venter potius

extrorsum distendatur. In illis regio lumbaris acri ac incredibili frigore occupatur, ut manibus percipi, nec calefactis linteis temperari queat; sæpius ingens instar clavi certæ in capitis vertice regioni velut infixi dolor urget, quem nomine clavi hysterici inscruunt; & in multis globi ex imo ventre adscensus versus superiora percipitur: quæ cuncta a malo hypochondriaco sunt longe remota. Nec in hoc tam frequens animi deliquium, & tam subito ad suffocationem usque intercepta respiratio, cum faucium tam forti strangulatione, quam quidem in hysterica affectione observatur. Et deniq; nulli unquam hypochondriaci pro mortuis, ac sepulchro destinatis fuerunt habiti; uti quidem de hystericis fide dignæ testantur historiae.

§. VI.

Differunt porro magni hi duo morbi ratione causarum. Quemadmodum enim mali hypochondriaci pernicialis vis in membranaceo intestinorum, ventriculi, ac oesophagi canale potissimum, per spasmos pariter ac flatus se exferens animadvertitur; & hi spasmi sanguini, ob denegatum per vasculosum hepar, totumque ramificationum venæ portæ systema, æquabilem circuitum, intratunicas intestinorum nerveas stagnanti debentur: ita e contrario prima spasmorum hystericorum origo in utero quaerenda est. Hinc ob arctissimum, quo uterus cum vesica urinaria gaudet, consensum, spasmi uterini ad vesicæ sphincterem propagantur, & hystericae sub morbi accessione continuum ad matulam stimulum persentiunt: quo hypochondriacæ omnino carent. Ex hac causarum diversitate fit etiam, ut quædam symptomata, quæ utrique morbo convenientia videntur, in quovis peculiarem agnoscant causam. Sic spiratio difficilis sollicitat & hystericas, & hypochondriacos; sed in his ab inflato ventriculo, descensum septi transversi impediens; in illis vero magis a vehementi musculorum abdominis contractione & compressione originem ducit. Tandem etiam alia mali

Differentia rationis causarum & eventuum.

hyst-



hypochondriaci, alia hysterici solutio, & alius quoque utriusque in morbos est transitus: namque illud frequentius in melancholiam, corbutum, lentam febrem, morbumque sic dictum nigrum terminatur; hoc infeliciter sæpius in epilepsiam, lethalem syncopen, furorem uterinum, ac acutam febrem transit. Ac denique in corporibus passione hypochondriaca defunctorum, imi ventris viscera, hepar, lien, pancreas indurata, scirrhusa, ac corrupta plerumque offenduntur: cum in hysterici, uti infra pluribus trademus, vitium ac corruptela magis in utero atque ovariis deprehendatur. Et hæc sunt, quæ notabilem inter hos duos morbos intercedere differentiam, satis clare demonstrant: quæ eo plenius commemoranda duxi, quo major de ea error medicorum animis insidet.

## §. VII.

Sed restant adhuc morbi, a quibus probe discernere oportet passionem hysterica. Sic differt a syncope, in qua pulsus penitus cessat, facies est contracta, & moribundo similis, quæ in præfocatione uterina plerumque observatur colorata, tumida, sub pulsu languido: hæc quoque ad duos vel tres dies perdurare potest, quod de syncope dici nequit. Deinceps differt ab apoplexia, ubi sub sensuum & motuum voluntariorum abolitione, stertor cum ægerrima spiratione, & pulsum celeritate est; qui in hysterici minime conspicitur. Differt porro ab epilepsia; quæ sicuti causam proximam in dura matre, & principio spinalis medullæ habet, ex qua spasmi ad universum corpus abeunt; ita hysterica passio in utero primam sedem agnoscit, ex quo spasmi ad medullam spinalem, totumque nervorum genus propagantur. Et symptomatum, quæ hunc utrumque morbum comitantur, differentiam nervose pariter ac eleganter describit CORNELIUS CELSUS Lib. IV. cap. XX. dum: *Vulvæ morbus*, inquit, *interdum sic exanimat, ut tanquam comitali morbo prosternat: distat ta-*

*men hic casus in eo, quod neque oculi claudantur, nec spuma profluant, nec nervi distendantur.* Distat non minus a doloribus ex calculo: nam licet in utroque morbo multa inter se conveniant symptomata; attamen in calculoso affectu deficit faucium strangulatio, animi defectio, respiratio valde intercepta, & quod affecti non a suaveolentibus tam graviter lædantur. Et quomodo denique hysterica passio a flatulentia primarum viarum discrepet; egregie docet BALLONIUS Lib. de virginum morbis pag. 232.

## §. VIII.

Quod attinet mulieres, morbo hysterico præ aliis subjectas & obnoxias; notari meretur, non omnes, cujuscunque ætatis, temperamenti, ac vitæ instituti id genus morbi pati: sed præcipue virgines sensibilibioris & tenerioris naturæ, ante mensium primam eruptionem, viro maturas, item viduas juniores, & scæminas conjugatas, inprimis sanguinis & succi plenas, sine prole tamen viventes, neque minus molliter in otio educatas, texturæ tenerioris, & animi sensibilibioris, frequentius atque gravius illo divexari. Consentunt in eo veteres medici, & GALENUS præcipue viduis, quæ utero purgari, parere, concubituque gaudere desierunt, hysterica passionem evenire testatur. Juxta FORESTUM Lib. XXVIII. obs. 28. mulieres virosæ, jamdiu continentes, aut virgines, sed venerem appetentes, corpulentæ, multo sanguine præditæ, victu calido, humido, & flatulento utentes, in otio viventes, cum ventris irritamentis, vino nempe generoso, multisque delicatis ferculis, venerem excitantibus fruantes, licet non suppressi sint menses, crebrius in hunc morbum incidunt: id quod etiam BALLONIUS lib. cit. & LEVINUS LEMNIUS Lib. de occultis naturæ miraculis Cap. VI. confirmant. Deinceps etiam, teste inter alios Aretæo, juvenes mulierculæ, quæ sunt sensibilibioris generis nervosi, texturæ tenerioris, &

4) a re-  
num  
calcu-  
lo.

Subje-  
cta  
mali  
hyste-  
rici.

Differe-  
ntia  
mali  
hyste-  
rici

1) a  
synco-  
pe.

2) ab  
apople-  
xia.

3) ab  
epilep-  
sia.

ad



ad affectus animi proclives, præ iis, quæ robustæ, plebejæ, animi constantioris, & laboribus deditæ existunt, immanissimo hoc spasmodico morbo agitantur. Nec denique silentio præmittendum est, fœminas, quæ sanguineæ & cholericæ constitutionis, & ad impetuosas & præcípites animi commotiones pronæ sunt, sævas & violentas in partibus nervosis motiones experiri: illas autem, quæ phlegmaticam, & torpidiorem obtinuerunt naturam, non adeo impetuosè convelli, sed potius in crebriora animi deliquia incidere; nullumque nec murmur, nec ventum vel afflatum, nec odorem suavio-rem, nisi ægerrime ferre.

§. IX.

Morbi  
hysterici  
sedes, &  
caussa  
proxima.

His præmissis, ad causas tam diræ affectus transeundum, & antea sedes morbi vel potius causæ morbificæ disquirenda est. Recentiorum medicorum quidam, hystericam ac hypochondriacam passionem pro uno morbo habentes, ut nominatim HIGHMORUS, SYLVIUS & SYDENHAM ventriculum, pancreas, mesenterium, venam portæ, pro genuina sede perpetuam accusant. Minus recte etiam CAROLUS PISO in selectioribus observationibus præcipuam sedem in cerebro, vel potius nervorum principio collocavit: siquidem subjectum causæ morbificæ & mortis invicem confudit. Nos vero cum antiquissimis medicis, symptomatum hystericorum primam originem ab utero, ejusque membranosa & vasculosa substantia & vasis ad illum spectantibus, inprimis spermaticis petendam esse, firmiter persuasi sumus; quarum partium spasmodicæ constrictiones postea in nervos vicinos ossis sacri, & lumborum sese insinuant, & ob consensum totius medullæ spinalis nerveas membranas gradatim occupant, a partibus inferioribus ad superiores sensim paulatimque se propagando. Quamobrem deprehendimus maxime in puerperis, quando hoc malo affliguntur; spasmos in orificio uteri interno, immo in ipsa quoque vagina

incipere; quoniam hæ partes frigida, & arida sunt, & derepente lochiorum, sive ichorosæ materiæ effluxus sistitur, & alvus pertinacissime clauditur. Deinceps spasmi & dolores, cum frigore lumbarem regionem petunt, & in abdominis musculos abeuntes, umbilici retractionem, cum imi ventris duritie junctam efficiunt; tum impetunt diaphragma, & intercostales nervos, ipsamque par vagum, & difficillimam, imo suffocativam spirationem, cum faucium strangulatione causantur; ubi postea intercepto sanguinis per cor circulo, ejus palpitatio, & animi deliquium, atque tandem sufflaminato sanguinis per cerebrum motu, sensuum mentisque subsequuntur abolitiones. Ex quibus omnibus, rite invicem comparatis, non solum reliquorum omnium symptomatum ratio bene suppeditari poterit; verum etiam clarissime patebit, totum hystericum affectum, ad morbos spasmodico convulsivos, qui universum nervorum systema occupant, summo jure esse referendum.

§. X.

Jam ergo causas mediatas ac materiales, quæ ad ingenerandum hoc di-  
Causæ  
materiales  
passionis  
hystericæ.  
rum malum contribuunt, explicaturi; has duplicis potissimum generis esse, nimirum partim semen corruptum, partim cruorem menstruum in utero vitiatum, cum medicis tantum non omnibus statuimus. Utraque harum causarum digna est, ut cujusvis peculiaris, & exactior instituaturs disquisitione. Namque exquisitiori Anatomicorum solertia satis evictum est, in nobiliori quidem sexu peculiaria existere organa, quæ testes vocantur, in quibus liquor subtilis spirituosus seminalis, ex sanguine per arterias spermaticas advecto secernitur, & in certis loculamentis asservatur: in sexu vero sequiori ejusmodi organa secretoria non inveniri, sed ad latera uteri corpora quædam globosa, ex vasis sanguineis, membranis, & vesiculis contexta, quæ ovaria dicuntur, a provida

na-



natura esse posita, spermatica vero vasa innumeris ramificationibus ad uteri substantiam ferri. Quum ergo recentiores Physiologi vesiculas in ovario contentas, in quibus stupendæ ac infinitæ parvæ magnitudinis foetus, spiritu genituræ virilis explicandus ac foecundandus continetur, pro semine muliebri habeant; alium vero liquorem feminalem in hoc sexu plane denegent: dispiciendum jam erit, an & quomodo humor in ovulis contentus corrumpi, corruptusque causam dire nostro malo præbere possit.

## §. XI.

Circa  
puber-  
tatis  
annos  
quæ  
contin-  
gant in  
machina  
hu-  
mana.

Quæ ut rite intelligantur; præmonenda duximus quædam momenta, & præsertim illas mutationes, quæ circa pubertatis annos corporibus humanis eveniunt. Observamus virgines circa decimum quartum ætatis annum coloratiores evadere, vultum fieri pulcriorem, mammaeque intumescere; maribus barbam crescere, vocem reddi magis sonoram, & universi corporis partes majus acquirere robur, atque vigorem: in utroque vero sexu stimulos ac desideria ad venerem excitari. Etenim sicut in maribus major sanguinis ad testes, pro secernendo seminali liquore, atque etiam ad erigenda genitalia fit affluxus: ita in foemellis quoque circa pubertatis annos, major sanguinis copia ad uterum, & ejus vasa, ad ovum, si adest, foecundandum congeritur; & inde menstrui fluxus, si imprægnatio deficit, causa & origo petenda est. Sed idem ille copiosior ad loca uterina humorum affluxus, nos ducit ad considerationem mutui atque mirabilis illius consensus, quem animi desideria cum motu sanguinis vitali & naturali ad certa membra, præsertim generationi destinata habere conspiciuntur. Simulac enim major sanguinis circa pubertatem in utroque sexu ad organa generationi inservientia fit affluxus; statim etiam stimuli & desideria ad venerem ineundam suboriuntur: & vicissim, quando ideæ ab objectis externis venustis in animo desiderium

ad venerem accendunt; protinus ad genitalia major sanguinis & liquidi nervosi congestio insequitur.

## §. XII.

Quando vero cunque copiosior humorum per vasa spermatica ad ovarium, ad uteri quoque fabricam. vel ob ætatis rationem, vel venereas cupiditates fit motus & affluxus: lymphæ nutritia ad dicta loca congeritur, ibidem stagnat, corrumpitur, causamque præbet malo hysterico. Hinc observamus, virgines circa pubertatis annos, foeminas ætate vegetas, viro orbas, veneris igne stimulas, calore multo, ac sanguine vegeto abundantes, dirissimo nostro malo vehementer agitari. Et notabilis est locus, quem ad illustrandum hoc assertum suggerit CHARLETO *exercit. pathol. VII.* & sic se habet: *Mulieres quædam acerbis copiosis spermatis igniculis prurientes, desiderio consuescendi cum viris in sæva hysterica pathemata incidunt; hinc tantus in virginibus juxta ac foeminis salacioribus mali hysterici est proventus.* Qua de causa etiam antiquiores medici permoti fuerunt, ut retentum semen pro principe nostri mali causa habuerint, omnemque medendi scopum eo direxerint, ut vel conjugium commendaverint, vel retento in utero semini variis modis exitum parare studuerint. Quales historias plures invenies in ZACUTO LUSITANO, ac PETRO FORESTO; & addunt finito paroxysmo ex relaxatis muliebribus copiosum humidum exstillasse liquorem. Conf. etiam GALENUS *comment. in HIPPOCRATEM Lib. VI. de locis affectis C. V.*

## §. XIII.

Duplici autem ratione fieri statui-  
mus, ut humor sic dictus seminalis, vel sanguis, circa uterum nimium congestus, & ex diuturniori mora, atque stagnatione vitiatustantas in universo corpore nervosarum partium turbas concitare possit. Primum nempe asserimus, corruptam materiam tetrissimam, quos

A sti-  
mulis  
vene-  
reis o-  
ritur  
malum  
hyste-  
ricum.

Qua  
ratione  
semen  
corru-  
ptum  
hyste-  
rica gi-  
gnat  
sym-  
ptoma-  
ta.

rum



rum & fibrarum fluido infensissimis, ad progignendum id malum paratissimam videri. Magnam enim & suaveolentium vaporum vim & potentiam in invertendis, vel immutandis motibus vitalibus esse; præter narcotica, fumos carbonum noxios, & exemplum ab HELMONTIO *tr. de lithiasi* §. 59. allegatum, quo mulier quædam ex certo suffitu protinus corruit apoplectica: testatur & illud momentum, quo in dispositis paroxysmos hystericos solo moschi vel zibethi odore resuscitari, & rursus etiam solis graveolentibus compesci observamus. Sed alius adhuc modus est, quo circa uterum subsistens ac corruptus humor nocere potest; qui in violenta vasorum & membranarum nervearum, a nimium congesto liquore, distentione ac distractione consistit; ex qua violenti spasmi ad universum nervorum systema propagantur. Et quis de hoc effectu ambigere poterit, qui consideraverit, a sola sanguinis stagnatione intra tunicas ventriculi ac intestinorum, malum hypochondriacum, & sævissimos suboriri posse in colica spasmos?

## §. XIV.

Anatomica consideratio mali hysterici defunctorum. Quæ quod ita se habeant, testantur exempla foeminarum, passione hysterica peremtarum. Sic VESALIUS *Lib. V. de humani corporis fabrica cap. XV.* testes hystericarum pila sæpe grandiores, modo luteo, modo alio graviter olente humore infarctos, se reperisse scribit. RIOLANUS *anthropol. Lib. II. pag. 35.* testem pugno majorem induratum notavit. BINNINGERUS *Cont. II. obs. XC.* testes cum vasis spermaticis, & tubis uteri valde tumidis, & inflatis humore crasso, albo, & ex parte indurato refertos, instar steatomatis dimidiæ libræ vidit. MANAGETA *in M.N.C. D. I. a. I. obs. 32.* uterum cum testibus materia seminali corrupta, quæ caseo recenter coagulato haud absimilis erat, turgidum invenit. Et denique DIEMERBROECK *Anat. Lib. I. de ventre inferiore cap. XXIV.* memoriæ prodidit, se in hysterice plerumque aliquem magnitudinis

circa uterum excessum, in eoque liquorem quandam eruginosum, vel croceum aut flavescentem deprehendisse. Ex quibus demum omnibus luculenter patebit, qua ratione semen circa uterum stagnans corruptumque, mali hysterici causa dicatur.

## §. XV.

Proximum jam est, ut etiam nostram de altera causa, quæ nunc temporis maxime urgetur, vitiato nempe menstrui sanguinis fluxu, sententiam proferamus. Hanc criticam excretionem, præternaturaliter se habentem, semper proximam mali hysterici causam constituere, neutiquam pro rato statoque habendum credimus; siquidem novimus virgines haud secus, ac foeminas annosas, hysterico malo pertinaciter laborasse; quibus tamen menses, vel hæmorrhoides satis liberaliter profluxerunt: qua in re consentientem habemus CAROLUM PISONEM *Lib. cit. Sect. II. Part. II. c. VII.* Interim sæpius observamus, fluorem hunc uterinum sub ipso morbo fieri inordinatum: atque tum pro effectu ac symptomate mali hysterici æstimandum est excretionis istius vitium; siquidem ea est spasmodum indoles, ut omnis generis excretiones turbent ac pervertant. Enimvero ex toto causarum passionis hysterice censu mensium fluxum excludendum esse, minime statuimus. Nam multoties observavimus, virgines, quando mensium fluxus circa pubertatem instat, ob illius impeditiorem per vasa uterina transitum, & subsequentem vasorum distensionem, gravissimas pati hystericas passiones: quæ etiam feminis, in quibus difficilius fluit uterinus cruor, brevi ante ejus eruptionem evenire solent; & in ACTIS WRATISLAVIENSIIUM *anno 1700.* eleganter describuntur. Præsertim notabilis in tali casu est clavus ille hystericus, ubi dolor acerbissimus & penetrantissimus in certo tantum pericranii punctulo hæret, & sæpissime horrendis anxietatibus cardiacis, vomitibusque enormibus stipatur. Conf. SYDENHAM *pag. 487. & 499.*

Altera mali hysterici causa est vitium fluxus menstrui.



Neque porro desunt nobis exempla, ubi repentinam purgationis menstruæ, per vehementem terrorem, præsertim in personis naturæ sensibilibioris suppressionem gravissima mox hysterica, quin & epileptica exceperunt pathemata.

## §. XVI.

Gravi-  
dæ, ac  
puer-  
peræ  
corri-  
piuntur  
passio-  
ne hy-  
sterica.

Neque gravidæ, maxime si sanguineo cholericæ sint constitutionis, a severissimis uteri spasmis sunt immunes: vidimus illas circa tertium, vel quartum mensem, gravi iracundia percussas in præfocationem, summum virium lapsum, imo in syncopen per aliquot horas durantem subinde incidisse; a quibus tamen secta vena, & adhibitis medicinis spasmodicis, nitrosisque feliciter evaserunt. In puerperis vero, ob lochiorum non rite succedentem fluxum hystericas passiones frequentius observamus; quod etiam suo tempore HIPPOCRATES notavit, *Lib. de natura mulierum* §. IX. Novimus puerperas primis sæpenumero a partu diebus, ab aere frigido ad imum ventrem admissa, a levi animi motu, a longiori corporis extra lectum detentione, in sæva symptomata hysterica incidisse; quæ etiam presso insequuntur pede, si lochiis primis statim diebus deficientibus ac cessantibus, sectione venæ tempestiva haud succurratur. Nec denique minus haud raro evenit, ab immodica, & diutius perseverante lochiorum fluxione, leviori externa causa accedente, passiones hystericas, animi præsertim deliquia, cum extremorum refrigeratione insequi; quæ tamen convenienti cura, accommodatisque præsiidiis faciliori negotio discutuntur.

## §. XVII.

Causæ  
mali  
hyste-  
rici oc-  
casio-  
nales.

Quicquid igitur vehementiorem sanguinis, liquorisque genitalis ad uterina loca affluxum concitare; aut mensium eruptionem, atque fluxionem suppressere, vel impeditiorem reddere valet: illud ad classem causarum passionis hystericae occasionalium pertinere videtur. Ex harum censu primum occurrit ipsa ætas conjugio opportuna, aut de-

negatus, antea tamen fuetus, concubitus: unde majorem ad uterum fieri affluxum supra docuimus. Ex eodem fundamento huc pertinent temperamentum sanguineum, atque cholericum, nimia ad libidinem proclivitas, diæta vinosa, exæstuans, opipara, iracundia vehementior, ac graviores animi corporisque commotiones, & agitationes. Deinceps ex altera parte vita sedentaria, victus crassus, acidus, frigidus, intermissæ sanguinis missiones, diuturni mœrores, curæ, solitudines &c. humorum spissitudinem inducendo, partes solidas debilitando, ideoque mensium perruptionem difficiliorem reddendo, ad generationem mali hysterici contribuunt: ac denique terror subitaneus, refrigeratio corporis insignior, maxime ipsi fluxui uterino supervenientes, excretiones sufflammando sanguineas, inducunt spasmos hystericos. Tandem etiam odor suaveolentium, ambræ, zibethi, moschi &c. aut aliorum fragrantium pro peculiari idiosyncrasia, gravissimos revocant paroxysmos.

## §. XVIII.

Circa prognosin id maxime omnium monendum esse duco, quod vera hysterica passio, utut valde dira & terribilis videatur, in se non adeo periculosa sit; nisi præpostera curatio, vel perversum regimen accedat, vel in corpus incidat valde imbecille & valetudinarium. Atque etiam nullus morbus est, cui tam facile epilepsiæ & convulsiones artuum junguntur, quam qui ex uterino vitio pronascitur; ut adeo etiam exinde discrimen mali hypochondriaci & hysterici dijudicare liceat. Rursus haud infrequenti constat observatione, hunc affectum, ubi ab infelici abortu vel gravi puerperio ex culpa sive medici sive ægrotantis progignitur, quam facile recurrere, & ex levi quadam causa nervosum genus affligente, de novo corpus infestare. Neque etiam novum est, sed toto fere die observatur, malum hystericum & hypochondriacum sæpius complicatum esse, & tunc.

Pro-  
gnosis.



tunc morbum valde diuturnum & difficilius sanationis fieri: quod maxime fit in foeminis, quæ vitæ sedentariæ & animi commotionibus nimium indulgent, & perversa diætâ & vite regimine utuntur: hinc excretionem sanguinis menstrui vel hæmorrhoidalis perturbant, de quo complicato affectu, qui sæpius in praxi occurrit, uberior differere sequenti capite constitui-  
mus.

## THESES THERAPEUTICÆ.

### §. I.

Indica-  
tiones  
curato-  
riz.

**E**Xplanatis ergo satis dilucide mor-  
binostri genio, sede, causis, ac  
differentiis; proximum est, ut ad ejus  
curationem nos convertamus. Quum  
vero omnis rectæ curationis ratio, in  
eo potissimum consistat, ut naturam  
egrotantis probe cognitam perspectam-  
que habeamus, atque tum morborum  
causis amoliendis accommodata reme-  
dia inveniamus: eo magis hæc cir-  
cumstantias in nostro adfectu probe  
considerare oportet; cum non modo  
causæ mali non eadem semper sint,  
verum etiam naturæ mulierum, quas  
in cura probe discernendas, jam diu  
HIPPOCRATES inculcavit, valde  
differentes deprehendantur.

### §. II.

Quid de  
venæ-  
sectio-  
ne, sit  
statu-  
endum.

Primum itaque dispiciendum est,  
num foemina, quam curandam susce-  
pimus, sit valde plethorica, vel po-  
tius sanguine & viribus exhaustum cor-  
pus habeat? In priori casu ad spasmo-  
rum, & convulsionum vehementiam,  
quæ in sanguine abundantibus longe  
major est, quam in aliis, minuendam,  
non facile præsentius & efficacius ipsa  
venæsectione remedium invenitur;  
quæ si major sanguinis copia urget, lar-  
gior esse debet, vel etiam iteranda.  
Vidimus foeminas, spasmis uterinis  
crebrius & immaniter cruciatas, sine  
omni sensu & motu, facie rubicunda  
humida, instar apoplecticæ jacentes;  
movimus quoque virgines, sanguine

plenas, spiratione ac loquela fere pri-  
vatas, mensibus repente per terrorem  
cohibitis, vel epileptico insultu corre-  
ptas; quæ venæsectione instituta protin-  
us ad se redierunt. Consentientes et-  
iam habemus permultos veterum me-  
dicorum, qui venæsectionem omnibus  
aliis remediorum generibus præferunt,  
quando malum a sanguinis abundantia,  
& menstruorum retentione fovetur:  
quos inter MERCATUM & RODE-  
RICUM A CASTRO, HOECH-  
STEDERUM *Dec. IV. cas. II.* HI-  
GHMORUM *L. de passione hysterica,*  
PANAROLLIIUM *in iatrológismis*  
*sententia II. obs. 30.* RIVERIUM,  
SEPTALIUM, & M.N.C. D. I. *an-*  
*no 10. obs. 42. & 58.* allegasse suffi-  
ciat.

### §. III.

Ante omnia eo studeat medicus, ut  
in ipso paroxysmo, mali ferociam mi-  
tiget. Sequentes hac in re medicorum  
antiquissimum HIPPOCRATEM,  
graveolentia naribus adplicanda suade-  
mus, qualia sunt castorina, asa fœ-  
tida, fumus plumarum perdicum: quod  
remedium, uti mulierculis familiarissi-  
mum, & domesticum, ita præstantis-  
simum est. Ex compositis aqua hiru-  
dinum acida cum castoreo, spiritus u-  
rinofus volatilis cum oleo rutæ, & ef-  
sentia castorei nobilitatus, extrinsecus  
naribus offeratur. Vidimus ab horum  
remediorum usu, foemellas gravi so-  
pore oppressas, moribundisque similes  
ad se rediisse. Ratio in eo videtur con-  
sistere, quod salini volatiles ejusmodi  
vapores, dum penetrant in nervosas  
cerebri membranas, ipsis novum ro-  
bur, ac vigorem addant, & vim sy-  
stalticam depressam restituant, & san-  
guinem, humoresque ibi subsistentes  
discutiant. In puerperis hoc malo cor-  
reptis, insigne levamen affert com-  
pressio imi ventris cum cingulo, ex  
corio Moscovitico confecto; quod o-  
dore suo & hypochondriacis & hysteri-  
cis valde amicum est. Magnum porro  
si præsens fuerit paroxysmus, in expe-  
dita alvi, ut plurimum constrictissimæ  
aper-

Quid in  
ipso pa-  
roxys-  
mo a-  
gen-  
dum.



apertione est præsidium: qua in re commodam operam præstant clysteres, ex speciebus appropriatis, ut radice, & semine levistici, quæ specifica sunt, floribus chamomillæ vulgaris, sambuci, herba veronicæ & seminibus quatuor carminativis, fero lactis incoctis sunt apparandi; quibus postea sufficiens quantitas, olei ex anetho, vel floribus chamæmeli cocti adici potest. Ubi vero fortior strictura alvi, & intestini recti est, ut clysteres admitti nequeant; longe consultius est, pura olea expressa vel axungias injicere: cujus generis sunt axungia taxi, pinguedo castorei, oleum anethinum &c. a quorum usu mirifice quoque mensium & lochiorum fluxus adjuvatur.

## §. IV.

Remediorum  
exter-  
norum  
in pa-  
roxys-  
mo u-  
sus.

Sunt adhuc quædam, quæ extrinsecus admota, insigne præstant levamen. Ex iis magnam inter veteres ac antiquos medicorum obtinent laudem emplastra, quæ graveolentiam habent, ut sunt ex opoponace, bdellio, galbano, sagapeno, asa foetida parata, si umbilico, vel pudendis adplicantur: qua de re notabile exemplum allegat FORESTUS Lib. 28. obs. 32. Neque vero inter externa, antiquissimorum HIPPOCRATIS & GALENI auctoritate comprobata, silentio sunt prætermittenda suaveolentia; utero immissa. Quamvis vero nostram de singulari eorum effectu non possimus adducere experientiam: tamen cum horum operatio magnæ rationum probabilitati innitatur, nolumus illorum usum penitus repudiare: ob hanc potissimum rationem, quod suaveolentia ut moschus, Zibethum, Styrax, Benzoe, ex quibus suffimigia ad uterum apparari solent, copiosa, & blanda sulphurea exhalatione fibras uteri spasmō valde contractas relaxandi potentia gaudent, ut sæpe ab horum adplicatione, teste superius adducta FORESTI observatione, crassus & putridus humor sensibiliter effluat.

## §. V.

Qualia  
interna

Ad immanes uteri spasmos præter

externa jam recensita, naturæ jam languescenti per appropriata quædam interna succurrendum est: quæ inter principem sibi vindicant locum Ess. castorei cum partibus tribus liquoris anodynæ permixta, item pilulæ antispasmodicæ, quæ ex myrrha, sagapeno, opoponace, asa foetida, castoreo, croco, theriaca, sumtis ad drachmam dimidiam æqualibus partibus parantur; adjunctis interdum sex vel octo granis camphoræ & laudani opiatæ. Ex scrupulo uno possunt formari pilulæ decem, & singulis horis duæ assumi, cum aqua florum chamomillæ: incomparabile sæpe præter omnem spem ac opinionem ex hoc remedii genere observavimus auxilium.

## §. VI.

Hæc sunt, quæ potissimum in ipso paroxysmo conferunt; sequitur, ut circumspiciamus, quæ extra paroxysmum, quiescentibus jam gravioribus spasmis, ad eradicandas causas præcipuum sibi vindicant locum. Quo loco experientia ac ratione ducti asseveramus, primam regionem, quæ vitiosorum humorum colluvie, plerumque valde repleta est, accomodatis remediis esse expurgandam; eo magis, quando in ipso paroxysmo anodyna, graveolentia, & vehementes commotiones sistunt, largius fuerunt adhibita. Ex horum censu pilulæ Becherianæ, sive ad earum exemplum concinnatæ, ob insignem usum laudem merentur; præsertim, si loco stimuli, extractum panchymagogum Crollii, & ex antispasmodicis, cinnabaris præparata, & unum vel alterum granum extracti croci & castorei adjiciatur. Sic primis officinis a saburra vitiosorum humorum sufficienter liberatis, ea in auxilium vocanda sunt; quæ virtute & sedativa, & simul diaphoretica sanguinis & humorum motum ad exteriora dirigunt, atque liberrima perspiratione feri vitiosi difflationem procurant. In horum classe mirabili plane effectu gaudere vidimus, spiritum cornu cervi, vel eboris per rectificatio-

sub pr-  
roxyf-  
mo pro  
sint?

Quia  
extra  
Paro-  
xyf-  
mum  
Primæ  
viæ  
sunt  
expur-  
gandæ.

Diaphoretica.



tionem purificatum, vel etiam spiritum bezoardicum Bussii, spiritum cornu cervi succinatum, spiritum tartari bene præparatum; qui spiritus volatiles commode refracta dosi dari, itemque martari possunt cum liquore anodyno minerali, cum essentia croci, castorei, succini, imo cum laudano liquido; quo medicamento prudenter pro temporis & circumstantiarum ratione usurpato, nihil vidi præstantius. Sicuti enim sponte sæpius solius naturæ beneficio, hæc spasmodicæ affectiones largiore solvuntur sudore: ita eo magis medicum ad hunc finem curationem dirigere oportet.

§. VII.

*Specificum & anodynum.* Hisce ad eundem scopum obtinendum, alia non inferioris facultatis præsidia interponi possunt utilissime; cujus generis sunt pulveres, qui secreta, & specifica quadam qualitate spasmis & convulsivis motibus sopiendis dicati sunt, ut pulvis Marchionum, specificum cephalicum Michaelis, pulvis noster antepilepticus, item qui ex secunda humana siccata, visco quercino, succino, coralliis, croco, & castoreo, & antophyllis paratus est: quorum usu instar incantamenti convulsivas epilepticas motiones, artuumque agitationes filuisse aliquoties observavimus: si modo ejusmodi indolis & virtutis remedia non ante solutam plethoram, nec ante impuriorum humorum sufficientem per alvum evacuationem usurpentur.

§. VIII.

*Menstruus fluxus in ordinem est redigendus.* Præterea, quum hoc malum quam facile, si non perite tractetur, revertatur, vel in alium morbum chronicum, inque primis hypochondriacum degeneret, præcavendum id omni modo ac ratione est: quod fit, si post morbum finitum ad mensium respiciamus excretionem, si hæc irregularis morbum ipsum produxerit; si sub hoc, uti plerumque fit, vitiata fuerit. Ad hunc scopum obtinendum nihil præstantius, nihilque efficacius commendare possum, quam thermarum Carolinarum usum internum, cum convenienti regimine & prudentia administratum: si-

quidem thermæ aquæ semper fere & tutiores & convenientiores ipsis frigidis acidulis in morbis mulierum percurandis observantur. Sed in promptu adhuc sunt alia remedium genera, quæ tonum & robur utero restituendo graves ab eo afflictiones arcent; cujus generis sunt temperata balsamica ex myrrha, succino, extractis amaricantibus & carminativis, præsertim zedoaria, corticibus aurantium cum menstruo minus spirituoso in elixirium redacta, & frequentius usurpata: nam hæc ipsa mensium negotio & ventriculi digestionem egregie velificantur; præsertim, quando temperatis balsamicis, pilulis polychrestis, decenti tempore usurpatis, sordium alvinarum excretio simul adjuvatur.

§. IX.

Supereft adhuc aliud summum auxilii genus, quod ex conjugio expectare licet: cujus incomparabilem vim, ad expugnandum affectum hystericum, præter summorum virorum auctoritatem, & experientia & ratio luculenter suffulciunt. Commendavit illud HIPPOCRATES libro de virginum morbis Cap. 3. VALESCUS de TARANT. philon. pharm. lib. 6. cap. 10. si fiat, inquit, affectus in virgine propter retentionem spermatis, nubat illa, & morbum effugiet. CAPIVACIUS vero, ut efficacius sit hoc remedium, jubet, ut vir penem inungat oleis aromaticis & Zibetho. Notabiles quoque sunt observationes, quas de admiranda conjugii in morbis hystericis virtute, allegant DURETUS in enarratione ad caput LIX. Hollerii, ZACUTUS LUSITANUS 52. prax. med. admirand. obs. 91.

Cautelæ, & monita practica.

§. I.

**Q**Uandocunque hysterica passio ab uterinæ lymphæ orgasmo suboritur; omnia calidiora cane perijus, & angue vitanda sunt: ex his

Cautelæ, circa humorum organum



confo-  
die -  
dam.

his enim magnum infertur damnum , quemadmodum RODERICUS a CASTRO *de morbis mulierum Lib. II.* & LUDOVICUS MERCATUS *Lib. II. de morbis uteri Cap. III.* variis attestantur exemplis . Potius ad temperandam lymphæ acrimoniam , & orgasmum sanguinis & humorum reprimendum , refrigerantibus uti præstat ; ex quorum censu potus aquarum , serum lactis pro potu , atque nitrosa eminent ; quorum virtutem in extinguenda libidine TIMÆUS a GULDENKLEE *Lib. III Cap. LVII.* non satis dilaudare potest .

### §. II.

Pro  
subje-  
ctorum  
ratione  
diffe-  
runt re-  
medio-  
rum o-  
pera-  
tiones.

Quum in hysteriis morbis naturæ individuorum insigniter discrepant : non sane mirum est , si unum remedii genus in uno subiecto salutare , in alio nullum , ac magis nocivum edat effectum . Sic vidimus hoc malo afflictas , quæ nullo modo graveolentia , sive interno , sive externo usu ferre potuerunt ; quæ in aliis præsentissimam opem tulerunt . Vidimus nonnullas , quæ ipso in paroxysmo , graviore Syncope oppressæ erant , sola aquæ adspersione in facie , frustra adhibitis validioribus & spirituosius in vitam revocari fuerunt . Quædam calidioris & sensibilibioris naturæ nulla calida sive extrinsecus , sive intrinsecus adhibita tolerare possunt ; adeo , ut a balneis , fomentis , linimentis , nervinis calidis non parum lædantur : non minus anodyna , ac opiata , quibusdam exoptatissimum afferunt levamen ; quum in aliis , ubi genus nervosum maxime debilitatum est , non minimum excitent damnum . Vidi quasdam solo aquæ potu a gravi paroxysmo liberatas ; qui aliis erat nocentissimus . Tantum refert , naturas foeminarum recte discernere ; quemadmodum jam HIPPOCRATES *Lib. I. & II. de morbis mulierum* sedulo inculcavit .

### §. III.

Quem  
usum  
habeat  
cogni-  
tio dif-

Quam familiare nostris est temporibus , ut nulla fere mali hypochondriaci inter mulierum morbos fiat mentio ; sed potius promiscue & indistincte om-

nis , quæ cum doloribus , spasmodis , flatibus , anxietatibus jungitur passio , pro hysterica habeatur : tam necessarium est genuinam horum morborum cognoscere differentiam ; ex cuius neglectu magnum resultat sæpenumero damnum . Quemadmodum enim in malo hypochondriaco , vehemens corporis motus & exercitatio , medicamenta carminativa , spirituosas , & volatilia , stomachica , & aromatica , salia neutra stimulantia , aquæ minerales , amaræ alvum solventes , inque primis martialia , optima præbent auxilia : ita hysterica foemina his magis læduntur , & potius a venæsectionibus , quiete corporis , anodynis , nitrosis , antepilepticis , refrigerantibus , potu aquæ frigida , sero lactis , exclusis calidis , in ipso vino , summum experiuntur solatium .

### §. IV.

Ad præcavendam recidivam , & ne Diata-  
malum evadat chronicum , & men-  
ratio.  
suum & alvi ratio sollicitè habenda est ; & moderandum , ut convenienti vitæ regimine , commodaque medicina hæc excretiones secundum ordinem fiant . Cavendum autem maxime est , ne aloeticis vel pilulis purgantibus , quæ insignem portionem aloes , & gummata resinosa calidiora recipiunt , utramque evacuationem moliamur . Non leve enim damnum & ingentem symptomatum exacerbationem , vel morbum longius productum , inde me observasse certa fide asseverare possum , & hoc maxime locum habet in plethoricis ac tenerioris & sensibilibioris indolis foeminis . Tutioris effectus sunt passulæ corinthiacæ cum infuso rhabarbari per leniorem incoctionem probe saturatæ . Inter cibos panificia , placentæ , quibus maxime delectantur mulieres , & acetaria penitus proscribi debent . Nam ex nimio harum rerum usu , ac vita otiosa & potu parco & nimis incongruo , accedente simul animi intemperantia , sicuti & hypochondriaci & hysterici spasmi suam originem præcipue petunt , ita majori cura , quæ



quæ hæc vitus jam correptæ sunt, ab his abstinere debent.

## §. V.

De ca-  
stori-  
nis.

Castorina utut & interno, & externo usu in spasmis & hystericis & hypochondriacis mitigandis, teste quotidiana experientia incomparabilem virtutem habeant; tamen iis non nimium fidendum, quoniam ad materiam lædentem submovendam idonea satis non sunt: Non parum quoque nimius eorum usus nocet; dum anodyno illo vapore & capiti & nervosis partibus imbecillitas, quæ nunquam sine periculo est, inducitur.

## §. VI.

Puer-  
peris  
non  
conve-  
niunt  
salia.

In spasmis, hystericis præsertim, qui puerperas exercent, si alvi sunt adstrictioris, hæc fortiori salium neutrorum & sic dictorum digestivorum stimulo minime molienda est: vidi enim a majore & crebriori horum salium dosi periculosa symptomatum incrementa.

## §. VII.

Quid  
prosit  
in suf-  
foca-  
tioni-  
bus hy-  
stERICIS.

In profundiori suffocatione hysteriarum, ad eas excitandas præstat sal volatile ammoniacum cum essentia castorei remixtum, vel aquam hirudinum cum aceto & castoreo naribus applicare, & frictionibus circa præcordia item in pedibus cum panno asperiori institutis, quam nimio fumo foetidorum, aut etiam camphora, quam perpaucæ ferre possunt, uti.

## §. VIII.

Clyste-  
rum ac  
pulve-  
rum  
absor-  
ben-  
tium  
usus.

Ego singularem sæpius effectum in foeminis hypochondriaco hystericis ad præsciendenda spastica symptomata, maxime in cholericæ & sensibilibioris naturæ mulierculis a pulvere nitroso præcipitante, cum æquali succini & parca croci portione mixto, & a frequentiori elixirii visceralis nostræ compositionis, cum æquali liquoris anodynidosi maritatu usu, multa annotavi e molumenta. Ad mitigandos vero paroxysmos, tempore intermissionis clysteribus, qui ex herbis lenioribus paragoricis carminativis parati erant, adjuncta insigni olei expressi quantitate, nihil utilius deprehendi. Blando enim

suo & temperate calido tepore ac vapore proxime & immediate uterum & vicinas partes leniendo & demulcendo afficiunt.

## §. IX.

Pediluvia extra paroxysmum adhibita, si valde temperata fuerint, egregiam habent symptomata allevandi efficaciam; si vero nimis fuerint calida, præsertim ubi corpora sint plethorica, & succiplena, nocentissima sunt, atque ad paroxysmos revocandos aptissima, quod non semel, sed sæpius animadverti.

Pedi-  
luviorum  
usus.

## Enarrationes morborum.

## OBSERVATIO I.

**R** Equirebat aliquando opem meam, virgo octodecim annorum, habitus spongiosi, ac temperamenti phlegmatico sanguinei, sanguine succisque plenissima, ac irregulari per aliquod tempus menstruum fluore adfecta; quæ post præviam refrigerationem, noctu correpta erat vehementi tussi convulsiva. Hac sedata post aliquot dies violenta patiebatur hystericum paroxysmum: sub quo præter atrocissimos vomendi conatus, alvi obstructionem pertinacissimam, urinæque retentionem, extrema algebant, cor vehementer palpitabat, facies tumida rubebat, arteriæ in capite fortiter pulsabant, ut apoplexiæ esset metus. Post horæ quadrantem ad se redibat: sed pharynx manebat constricta, adeo ut nec fluida, nec solida deglutire potuerit, pulsusque ferebatur parvus ac debilis. Ipse vero paroxysmus, singulo horæ dimidio revertebatur: & misso ex vena in pede tusa sanguine, per octo quidem conquiescebat horas: tum autem atrocior, & epilepticis stipatus motibus recrudebat. Consultus ego, cum deglutitio adhuc valde impedita esset, curavi primum, ut clysteribus ano infusis, linimentis nervinis nuchæ spinæque inunctis, atque pediluviiis, partium externarum constrictiones demulcerentur: tum, que internis diaphoreticis, ac antispas-

Passio  
hyste-  
rica  
cum  
moti-  
bus  
con-  
vulsi-  
vis, ac  
epile-  
pticis  
juncta.



modicis malum oppugnabam. Quibus factum est, ut omnes siluerint præternaturales motus; & quum ex levi diætæ errore viderentur reverti, dato blando laxante, ab eorum eruptione non solum præcavebatur, verum etiam perfectæ restituebatur sanitati.

### Epicrisis.

Ad spasmodica, quæ ex uteri vitio proveniunt, pathemata concitanda non opus semper est, ut materia corrupta & vitiosa, utero inhærens proxime & immediate id efficiat; sed crebrius id a causis externis fit, scilicet ab intenso frigore, quod partes inferiores, præcipue vero lumbarem regionem tangit & afficit. Hac enim ratione in foeminis sanguine copioso & impuro scatentibus, is a partibus exterioribus ad interiores impetuose compulsus pro harum differentia varias spasticas movet, imo convulsivas afflictiones. In præsentia casu ex congestione ad pectus facta vehemens & convulsiva tussis orta est; cum postea humor lædens, sedem suam mutavit, & ad nervos præcordiales, item ventriculum ejusque nervos & per consensum ad ipsum caput translatus fuit, ac passiones, quæ hic in hysterica apparuerunt, produxit. In ejusmodi affectibus optimum est, curationem ab externis & internis, quæ spasticas nervosarum partium stricturas blande relaxant, auspicari, & postea temperatis carminativis, diapnoicis & antispasticis curam absolvere, & ad recidivam avertendam menstruaalem excretionem in ordinem redigere; quod optime per commodam diætam, per motum & medicamenta, quæ non modo sordes ex primis viis, sed & ex ipso utero expurgandi facultate instructa sunt. Inter quæ nostro tempore in usu sunt, maxime si cum antispasmodicis & salinis detergentibus pulveribus earum virtus secundetur, principem sibi locum vindicant.

### OBSERVATIO II.

Adolescens nobilis, sedecim annorum, staturæ proceræ, & habitus corporis robusti, atque carnosus, sanguine & succis præter naturæ modum turgens, de gravi circa inguina, ubi vasa spermatica descendunt, dolore pronuper conquerebatur, & quod præter voluntatem ad membri erectionem, variisque ad venerem in animo obversantibus desideriis sollicitaretur. Haud ita multo post in febrilem quendam incidebat insultum, per aliquot dies infestantem, quo remittente post aliquot septimanas, eadem circa inguina passus est molesta incommoda; sed jam longe alia superveniebant accidentia, hysterica plane non dissimilia: nam horribiles spasmi a pubis regione ad dorsum, ad præcordia, ad septum transversum, ad cor, ad fauces, imo ad ipsum cerebrum adscendentes, præcedente cordis palpitatione, strangulationem faucium, spirandi angustiam, animi deliquium, soporem, accedentibus etiam artuum convulsivis tractionibus concitabant, qui paroxysmus singulis fere mensibus repetebat. Hic, quod erat per quam notatu dignum, immani semper ciborum urgebatur adpetentia; alvus autem adstrictior erat, ita, ut fortiora etiam eluderet purgantia. Præter hæc vasa mirum turgebant sanguine; pulsus, qui sub accessione valde erat inæqualis, & depressus, post eam magnus, & concitatus observabatur. Variis usus est & medicis, & medicamentis antispasmodicis, antepilepticis, soteriis quoque fontibus, sed parum inde percepit utilitatis: postquam vero ex nostro consilio, singulis fere mensibus, sanguis ex vena secta sex semper uncis fuit imminutus, & loco potus ordinarii aqua fontana usurpata: nitrosis quoque pulveribus paullo largiori portione ad sanguinis orgasmum deprimendum in usum vocatis; tranquillum corporis motum, & ab arduis meditationibus, quibus excellentis ingenii adolescens nimium semper indub-

Malum  
hyste-  
ricum  
in ju-  
vene.



dulgebat, vacuam servavit mentem; integre sanitati brevi tempore fuit restitutus.

## Epicrisis.

Solvit & explicat peculiaris hic casus nodosam & intricatam admodum questionem: Quare nimirum viri non similibus, vel iisdem symptomatibus affligantur hystericis, qualia in foeminis observantur, eo, quod simili modo, & sanguis, & liquor seminalis in partibus generationi dicatis, nimirum vasis spermaticis, testibus, capsulis quoque; seminalibus stagnare, ibique vitari ac corrumpi possit? Namque non deesse ejusmodi exempla, licet non tam frequentia adolescentum, qui circa, vel etiam post annos pubertatis, ejusdem generis symptomata spastica, & convulsiva cum dolore pressorio, & lancinante circa ilia, & in pubis regione, nec non languorem totius corporis, extremorum refrigerationem, subsequente mox ingenti precordiorum angustia, cordis palpitatione, faucium strangulatione, difficilique ad suffocationem usque spiratione patiuntur: inter alia praesens docet casus. Nec me fugiunt plura exempla non modo adolescentum, sed etiam virorum extra conjugium viventium, qui ex nimia castitate in eadem, quae hysterico affectui propria & essentialia esse solent, pathemata inciderunt: quid? quod nonnullos quoque in convulsiones artuum, inque syncopem prolapsos esse, aliquoties observavi. Si in tam atrocium symptomatum originem inquiramus; varia se offerunt momenta, quae clare monstrant, ea a nulla alia causa, quam a copiosiori sanguinis ad vasa spermatica & testes affluxu, has partes vasculosas & nervosas nimium distendente ac distrahente suborta fuisse. Et eandem in nostro aegrotante causam significant dolores ac tormina circa inguina primum conspicua; atque tum ad alias corporis nervosas partes propagata. Quare etiam sedato per accomodata subsidia humorum orgasmo, ac deri-

vato affluxu, conquieverunt cuncta symptomata.

## OBSERVATIO III.

Honesta, venustaque virgo, annorum octodecim tenerioris quidem constitutionis, sed acutioris ingenii, animique mobilioris, in vicina urbe degens, postquam formoso etiam juveni, qui frequentius eam aegrotantem invisebat, desponsata fuit; valetudinis, quae antea satis firma erat, status plane est immutatus. Ab eo enim tempore variis gravibusque affligebatur passionibus. Namque dolores mox in dorso, mox in abdomine valde torquentes, mox artus tum tremore agitantes experiebatur: virium aderat ingens collapsus, ciborum adpetentia penitus laquebat; alvus constrieta erat, tenesmus tamen, & mingendi desiderium urgebant. Accedebant per vices animi deliquia, cum faucium strangulatione, & semper fere conquerebatur de phlogosi, extremorum frigore, ac horripilatione, ac subsequente calore praeternaturali. Anxietates praecordiorum constrictive, quas aegerrima comitabatur spiratio, nunquam fere non aderant: pulsus ferebatur varius, nunc celer, & debilis, nunc plane exiguus, & inaequalis; urina plerumque instar aquae limpida, interdum pauca, cum rubro sedimento mingebatur: somno saepius plane carebat; & si quidquam cibi, vel medicaminum adsumebat, augebatur circa praecordia anxius ac pressorius dolor. Mensium fluxus erat parcior, serosus, acris; & circa hoc tempus, cuncta exacerbebantur symptomata. Consulti medici in dignoscendo morbo valde hesitabant quidam enim febrim quotidianam, alii hecticam, quia ingens corporis praesto erat contabescencia; alii summam imbecillitatem ventriculi, & imi ventris accusabant flatulentias. Hinc varii generis remedia, stomachica, carminativa, nervina, emmenagoga, laxantia, martialia data fuerunt, ac vena quoque in pede aliquoties secata.

Passio  
hyste-  
rica ex  
occul-  
tato a-  
more.



Cuncta vero tantum aberat, ut levamen inferrent; ut potius symptomata exacerbarent. Postquam igitur ægrota per tres fere menses hoc diro malo infectata, ego quoque accitus fui; exploravi protinus genuinam morbi causam, & consilium dedi, ut a medicamentis fere prorsus abstineret; ac pro potu ordinario lacte asinino, cum æquali acidularum Selteranarum pondere mixto uteretur. Deinceps alvum clysteribus emollientibus, qui ex decocto florum sambuci, chamomillæ, herba majoranæ, melissæ, ac semine cymini, addita semper olei lumbricorum ac liliorum alborum larga quantitate erant parati, subducendam curavi. Tum quoque imperavi, ut licet imbecillis, corpus per vecturam sub temperato ac sereno cœlo sæpius ac blande moveret; & per tempus aliquod ab omni colloquio & consortio cum sponso caveret. Tandem commendavi copulam conjugalem, qua facta sensim, paullatimque vires recuperabat, sine peculiari remediorum ope. Concepit etiam, & anno elapso peperit infantem: at in ipso puerperio pathemata hysterica cum faucium strangulatione experiebatur: sed nostro tandem auxilio, ac consilio restituta, jam laudabili fruitur sanitate.

#### Epicrisis.

Haud exiguos ejusmodi casus in an-  
nosciori mea praxi adnotavi, quod vir-  
gines venustæ, & antea vegetæ a nulla  
alia causa, quam a vehementia amo-  
ris occultati, in miserrimum ægotan-  
di statum fuerint delapsæ; omnibus &  
animi, & corporis functionibus inde  
peffumdatis. Ubi frustra, quin inter-  
dum non sine noxa exhibitis omnibus  
medicamentis pharmaceuticis, opti-  
mum & efficacissimum remedium fuit  
in conjugio, non tamen omissis conve-  
nientibus dieteticis. Tantam vim & po-  
tentiam habent animi passiones diutius  
inherentes, universam motuum œco-  
nomiam, & naturales functiones per-

turbandi! Hinc inter philosophos PLA-  
TO de amore præsertim affirmat: *Non  
solum, inquit, in animum impetum  
facit amor; verum & in corpus sæpenu-  
mero tyrannidem exercet vigiliis, curis.  
macie, dolore, tabitudine, & mille aliis  
affectibus, lethalem noxam inferentibus,  
corpus vexat.*

#### OBSERVATIO IV.

Fœmina, quadraginta annorum, tex-  
turæque tenerioris, ante quinque annos  
febre quartana corripitur sæpius reci-  
dente, & tandem copioso corticis chi-  
næ usu profligata. Ab eo tempore men-  
strua excretio sensim cœpit imminui; &  
quum præterea ad affectus animi valde  
inclinaret, parum biberet, cibisque in-  
fumatis, induratis, concoctuque diffi-  
cilibus maxime delectaretur: varios in-  
cidit hystericos, spasmodicosque affe-  
ctus, qui circa menstruam potissimum  
periodum graviter insistebant. Tum e-  
nim sentit in abdomine gravissimas  
spasmodicas contractiones, cum alvo  
adstrictissima; faucium affligitur stran-  
gulatione, & spiratione ad suffocatio-  
nem usque intercepta; pedes sunt gelu  
frigidiores, cor palpitat, interdum circa  
ventriculi ac septi transversæ regionem,  
tam acuti sæviunt dolores, ut digiti  
quoque attactu exacerbentur. Sæpenu-  
mero sub tali paroxysmo, dextrum capi-  
tis latus, oculusque hemicranico dolore,  
ac intolerabili frigoris sensu afficiuntur,  
cum seri falsissimi ex oculo fluxu. Quan-  
doque in paroxysmo cuncta vomitu  
reddit, & a clysteribus dolorum mayo-  
rem percipit exacerbationem. Ceterum  
remittente paroxysmo sana est, ac be-  
ne appetit.

#### Epicrisis.

Meretur hic affectus nomen hysteri-  
co spasmodici, utut levioris; quem ab  
hypochondriaco alienum esse, vel ex  
eo patet momento, quod ægra extra  
paroxysmos, qui circa menstruam in-  
vadunt periodum, sana videatur, nec ha-

Passio  
hyste-  
rica ex  
mensi-  
bus  
immi-  
nuitis.



Habeat, de quo conqueratur. Originem traxit a sanguinis menstrui circuitu, per vasa uterina impedito; quo factum est, ut partes ac fibræ uteri nervæ ob distenta nimium vasa, ad spasmodicas pruritæ fuerint stricturas; quæ ad nervosas alias regiones, præsertim quæ a pari vago quosdam accipiunt ramulos, propagatæ, præcordiorum, ventriculiq; dolorem, impeditam spirationem, strangulationem, tormenta hemicranica, aliaque pepererunt symptomata. Ad inducendam autem humorum in utero stagnationem, præter inordinatum victum, quam plurimum contribuit, febris quartana, cortice chinæ præpostere tractata: unde etiam viscida ac scorbutica humorum dyscrasia, quæ semper quartanæ febris mater est, magis fuit adaucta; uti inter alia ex feri acrioris ex oculo effluxu patet. In curatione mali igitur, præter ordinatam rectam vivendi rationem, remittente paullisper paroxysmo, clysmata pure oleosa ano sunt injecta; atque linimenta nervina regioni umbilicali adplicata; quæ etiam cum communi quidem, sed minime contemnendo remedio, scilicet avena tosta, sacco calidiori inclusa alternari possunt. Extra paroxysmum ea fuit medendi intentio, ut mitigatis per liquorem anodyno mineralem spasmis, menses debitis venæsectionibus, blandis ac balsamicis laxantibus, ac balneis in ordinem reducerentur: quibus etiam perfectam restituimus sanitatem.

### OBSERVATIO V.

Convul-  
siones  
hyste-  
ricæ.

Flagitavit aliquando meum auxilium virgo quædam, pubertatis annos vix egressa, cui fluor mensium irregularis erat, & quæ ideo per binas circiter septimanas convulsivos patiebatur motus. Hi ipsum quotidie per frequentissima intervalla invadebant, atque dolore lumborum, & abdominis, umbilici retractione, alvo adstricta, tremore, distensione artuum, spirandique difficultate se prodebant, maximeque caput

occupabant, ita quidem, ut oculi in omnes plagas circumrotarentur, ea, quæ vix concipi poterat celeritate, ac vehementia: caput ad latera deorsum traheretur; ejusque arteriæ validissimo pulsu admotam ferirent manum. Neque vero concidebat; sed sub mali invasione sellæ insidens, in medio paroxysmo surgebat, & tum incredibili celeritate in gyrum movebatur: quod etiam fiebat, si inter ambulandum convellebatur. Ipsa accessionem præsentiebat; ac sub illa perfecta loquendi facultate pollebat; nec de ullis capitis conquesta doloribus; finito paroxysmo hilaris, & optime habebat. Remedia tollendo huic malo satis idonea, quæ propinabantur, parum profuerunt; præter commendatos clysteres demulcentes, & linimenta nervina, temperatiora, spinæ dorsali inuncta, quæ levamen præstiterunt. Verum mutatione cœli, & peregrinatione in alia loca, inito quoque alio victu, & adsumto loco cerevisiæ aquæ simplicis potu, insueta & atrocia hæc symptomata sensim, sensimque conquieverunt, & penitus tandem expirarunt.

### Epicrisis.

Id non semel, sed creberrimis vicibus animadverti, morbos nervosi generis, seu, ut alii loqui amant, spirituum, qui horrendis symptomatibus stipari solent, omnia fere respuere ex fonte pharmaceutico petita medicamenta: eo, quod vitium non tam in mole materiæ, sed potius anomalis motibus, eorumque assuetudine consistat. Tunc enim optimum præsidium est, nullo uti remedio: sed præcipuum sanationis punctum in mutatione ætatis, aeris, vitæ generis, victusque consistere, fide experientiæ compertissimum est. Et certe elementa provido & circumspecto usu plus efficiunt, quam medicamenta active indolis. Hoc præclarum præceptum admodum sibi commendatum habeant medici juniores. Namque rarissima profecto sunt ea, quæ nervos, si



læsi, & a naturali tono dejecti fuerunt, blanda, & temperata vi solantur: quin potius plurimarum medicinarum natura ita est comparata, ut vel nimium irritando, vel iusto magis sedando lædant. Deinceps id quoque in persanandis generis nervosi morbis est observandum, quod non omnibus ægris eadem auxilia convenient; neque, quod semel profecit, id alio tempore juvet. Siquidem non ubique & omni tempore eadem est nervosarum partium dispositio, ac constitutio. Hinc naturæ ægrotantium probe sunt discernendæ.

## OBSERVATIO VI.

Hystericæ convulsiones, ex uteri & primarum viarum vitio.

Triginta circiter annorum fœmina, quæ abortiendo concrementum polyposum, utero excernebat, elapso hinc anni spatio, sub ipso mensium fluore poma, ac lactinia comederat, & præterea corpus insigniter refrigeraverat. Quare incidit repente in convulsivos motus, quibus in terram prolapsæ caput præsertim, atque pedes mirifice torquebantur, manibus liberis; commordebant dentes, ac vehementer clamitabat. Talis paroxysmus subinde circa menstruas recurrebat periodos, neque ullas habebat notas prænuncias: post illum urgebant languores universi corporis, gravativus capitis sensus, crebræ vertigines, & alvi obstructions. Tum vero utero cœpit gerere & sub toto gestationis tempore a malo convulsivo hysterico immunis vixit, felicemque tandem habuit partum. Lochia primum rite succedebant, sed die decima imminuta fundebant serum sanguinolentum; alvus etiam per sex a puerperio dies officio nonungebatur. Hinc sensim redibant censiones capitis, vertigines, flatulentia, ac imi ventris tormina; somni ac adpetentiæ defectus, ac tandem accedebant pristini motus convulsivi, sinistrum maxime latus occupantes, sub quibus fluor uterinus sanguine denuo tinctus adparebat. In curatione hujus affectus clysteres car-

minativi, & oleosi; nec non pilulæ temperatæ balsamicæ, cum refracta dosi castorei, & croci mixtæ, fons Selteranus pro potu ac denique internus Carolinarum, & externus aquarum Teplicensium usus, præstantissimæ fuerunt efficaciam.

## Epicrisis.

Nulli morbi tam graviter totum partium nervosarum systema præternaturam afficiunt, nullique universi corporis functiones tam subito ac vehementer lædunt, quam qui ex uteri labe prognascuntur; quæ ut plurimum per infelicem abortum, & malum in puerperio regimen contrahitur. Horum certum indicium præbet, simulque male affectum uterum, & destructam per ejus vasa sanguinis circulationem significat sæpenumero concrementi membranacei, sic dicti polyposi, sive molarum exclusio: unde diuturnas & atroces nasci egritudines manifestum est. Quicumque igitur in persanandis mulierum morbis præ aliis excellere volunt medici, ad fontem horum malorum respiciant, & curationem eo dirigant, necesse est. Neque ego certius & efficacius auxilium, quam in exquisito vitæ regimine, ac circumspecto ac convenienti fontium tam calidorum, quam frigidorum usu, inveniri unquam, maxime, quando temperate balsamicis, uterumque roborantibus & laxantibus curam persequamur.

## OBSERVATIO VII.

Fœmina, vigesimum primum ætatis agens annum, constitutionis tenerimæ, ac biliosæ, binis abhinc annis ex iracundia incidit epilepsiam. Elapso anno contraxit matrimonium, & haud ita pridem peperit infantem: sub quo partu enormis cruoris uterini copia effluxit, sed datis improvide adstringentibus cohibitus est fluor. Nihilominus post duas hebdomadas rediit fluxus menstruus; sed cum denuo

Passo hysterica ex lochiis suppressis.



vehementi percelleretur terrore, mox percepit miros circa lumbos cruciatus, & acutissimos dolores, perpetuum ad alvum & urinam stimulum; urina succedebat cum magno ardore, insigni- que difficultate, deponebatque arenu- las. Solicitabat insuper perpetua vo- mendi cupiditas; dolores mox circa umbilicum torquebant, huncque vio- lenter retrahebant, mox inguina ob- sidebant, cum pertinacissima sphincte- ris vesicæ constrictione; & acutissimis quoque in mammis doloribus. Hisce atrocissimis tormentis per binas ferme adfligebatur hebdomades, adpetitu, somnoque pereuntibus: quin etiam e- pilepticæ superveniebant agitationes, & in paroxysmis delira loquebatur. Grebro fluxit quoque materia alba a- cerrima instar puris ex utero. Adhibi- ta sunt varia remedium genera, cly- steres oleosi, emollientes; unguenta nervina, ac anodyna, pilulæ balsa- micæ &c. sed malum exacerbare vide- bantur. Tum propinabantur & pulvis ex nitro purificato, camphora, & pul- vere Marchionum confectus, & Elix- irium, quod habebat essentiam croci, myrrhæ, tincturam tartari, & extra- ctum castorei. Unde urina deponebat sedimentum, & menses aterrimi, fœ- tidique cœperunt fluere. Tum conti- nuatis his remediis, omissa tantum- modo camphora, conjunctoque infu- so veronicæ, cruor uterinus, naturali- similis, floridiorque ferri cœpit, & ægra intra paucum tempus perfecte convaluit.

### Epicrisis.

Videbatur primum hæc affectio me- dico cuidam calculosa; sed revera non fuit, nisi hysterica, ex lochiis impro- vido adstringentium usu suppressis, o- riginem trahens, & calculum men- tiens. Quum enim in hysterica passio- ne nervi uterini, qui cum nervosa ve- sicæ, maximeque sphincteris fabrica, insignem foveant consensum, spasmo- dice contrahantur; non mirum est, si

illæ stricturæ ad vicinas partes, præ- fertim vesicæ sphincterem transierunt, crebramque mingendi cupiditatem, & urinæ retentionem produxerunt. Quamdiu vero hi spasmi partes infe- riores occuparunt; humor ille, ut ita loquar, corruptus, qui stagnando in uteri cavitatem irrupit, excerni haud potuit; hinc nec siluerunt symptoma- ta. Verum postquam spasmi relaxati, & ope myrrhæ, croci que mensruus fluor promotus fuit, hinc materia fœ- tida effluxit; non fieri potuit, quin remiserint omnes passionēs.

### OBSERVATIO VIII.

Est hic loci affectus quidam, certis <sup>Passio</sup> familiis peculiaris, qui <sup>hyste-</sup> subjecta, in <sup>rica</sup> pubertatis potissimum annis constitu- <sup>spasmo-</sup> ta, magis fœminini sexus, & habitus <sup>dica</sup> spongiosioris, succorumque pleni in- <sup>vaga,</sup> vadit; atque variis in cassum adhibitis <sup>certæ</sup> remediis, tandem post aliquot annos <sup>familiæ</sup> sponte remittit. Adoritur sequenti ra- <sup>pecu-</sup> tione: sentiunt inter morbi initia, sen- sum formicationis in manibus vel pedi- bus; sequitur pandiculatio, oscitatio; dolor fixus, gravisque circa lumborum vertebra; mox agitationes, ac volu- tationes manuum per gyrum, sursum ac deorsum continuæ sunt, & involun- taria: præcordiorum summa urget anxietas, spiratio citatissima, angu- stissima, cum suffocationis metu, pal- pebræ ab uno latere ad alterum trahun- tur, oculi vertuntur in gyrum &c. Sed admodum variant hæc symptoma- ta; nunc alvus suo fungitur officio, nunc pertinaciter clausa est; nunc uri- na fluit, nunc retinetur, cum vehe- menti circa inguina dolore. Interdum collum ab uno latere ad alterum perpe- tuo volvitur; interdum crudelissima infestant tormina intestinorum, cum cardialgia, vomitibusque vehemen- tioribus: mox femora ad anum con- trahuntur, cor violenter palpitat; ac- cedit singultus; mox totum corpus at- tollitur, spina incurvatur; mox ocu- lis apertis, membris rigidis, nullus est sen-



sensus, nulla excitatio &c. Hæc est paroxysmorum descriptio, qui modo sæpius, modo rarius revertuntur: extra quos bene habent, bene adpetunt, dormiuntque. In foeminis menses plerumque recto succedunt ordine, & debita quantitate; quando utero gerunt, morbus quiescit; sub partu vero sæpius revertitur. Nullis curatur remediis, sed mitigatur lumbricalibus & castorinis: tandem vero victus, loci, & maxime ætatis mutatione certissime debellatur.

### Epicrisis.

Rarus & prodigiosus hic affectus, speciatim quidem in numerum morborum, sic dictorum spasmodico vagorum, quos Cap. III. pertractavimus, referri meretur: verum ego, cum jam per quadraginta annos functioni Professoriæ præfui, sæpiusque, si quædam ex hac non incelebri familia hoc malo fuerunt cruciatæ, in consilium accitus sum; omnibus morbi momentis probe exploratis animadverti, obnoxia ei passioni subjecta, sive foeminæ, sive mares fuerint, ad libidinem, reique venereæ adpetentiam valde proclivia, & insuper animi inconstantis, mobilioris, ad tristitiam pariter ac nimium gaudium valde disposita fuisse. Hinc vero videtur simillimum, causam hujus affectionis, quæ commode hysterici adnumerari potest, in uteri vitio collocandam esse plerumque. Adest enim primum hæreditaria ad hos irregulares motus proclivitas; accedunt præterea pubertatis anni, in quibus major, maxime concurrente libidine, ad partes generationi dicatas & seminales fit affluxus; qui denegato exitu, quomodo hystericas spasmodicasque totius generis agitationes excitare valeat, superius sub causis mali hysterici ostensum est. Meretur hæc hysterica passio vocari hæreditaria, ac gentilitia; quæ, quum hæreditarium quid sub sit, omnino discrepat ab ea, quam individua singula patiuntur. Ceterum

periculo fere vacat, & uti jam dictum est, ætatis mutatione, vel nonnunquam etiam conjugio, sponte expirat.

### OBSERVATIO IX.

Virgo annorum octodecim, iracunda, tenerior, diætâ utens irregulari, maxime lacticiniis & acetariis, refrigerationi sæpius ob curas domesticas exposita, & ideo fumo carbonum vivorum, in clauso conclavi frequentius supersedere solita, incidit in mensium suppressionem. Versus tempus illius fluoris patiebatur atroces motus hystericos, cum horrendis lumborum doloribus, crudelibus imi ventris ac capitis tormentis, alvo adstricta, duriori, pedumque refrigeratione. In consilium vocatus medicus ad ciendos menses præscripsit pellentia, nempe essentiam myrrhæ, & croci, spiritui salis ammoniaci nuptam, & pulverem baccharum lauri. Inde evenit, ut misera præter opinionem in atroces epilepticas motitationes inciderit, sub quibus artus non corrugabantur, sed ita potius rigida expandebantur, ut flecti haud potuerint. Incisa protinus in pede vena, mitigabantur quidem hæc symptomata; at paroxysmus neutiquam in totum desinebat, sed quotidie circa meridiem invadebat, adeo ut præviis extremorum frigore, anxietate, dorsi dolore, cordisque palpitatione, totum rigesceret collum, vel etiam hinc inde agigaretur; caput & brachia cum insigni rigiditate expanderentur, spuma os occuparet, ac omnis abesset sensatio. In curatione hujus mali venam in pede incidi jussimus; tumque datis pilulis blande balsamicis, quæ facultate menses ciendi, ac debiles imi ventris partes roborandi pollent, pediluvia ac infusus ex emollientibus paratos ordinavimus, iisque felici cum successu vias uterinas relaxavimus, ac obstructionem reseravimus. Tandem subjuncto interno, recto tamen aquarum Carolinarum usu, ægram pristina restituiamus sanitati.

Motus  
hyste-  
rico e-  
pile-  
ptici  
ex me-  
sum  
sup-  
pres-  
sione

Epi-



Epicrisis.

Malum hoc hysterico spasmodicum primo, & deinde incauta curatione exacerbatum, & in epilepticas commutatum motiones, uterini fluxus cohibitioni deberi, extra omne positum est dubium. Ad hanc vero mensium obstructionem non modo vitium in diætâ, sed maxime externa nimis frigidi aeris ad uterum & partes abdominis admissio quam plurimum contribuit. Sicuti enim perversa diætâ sanguinem & humores valde lentos, crassos, & excretionibus minus aptos peperit: ita frigus vasa ac glandulas nimis constringendi, & angustandi, insignem exseruit potentiam. Non minus ex incongruorum eduliorum justo largiori usu, cruditates in primis viis, maxime intestino duodeno stagnantes sunt procreatae, quæ in causa fuerunt, quod paroxysmus circa meridianum tempus invaserit. Debetur quoque aliqualis animadversio, noxiosissimo carbonum usui; quorum vapor narcoticus partium nervosarum tonum, & elaterem insigniter pessum dedit. Hinc cum accessit inconveniens curatio, qua medicus, ante venæsectionis administrationem, viarumque obstructarum refractionem, calidioribus menses ciere conatus est; non fieri potuit, quin humores magis magisque exagitati, partes nervosas, jam debilitatas vehementer distenderint, affecerint, atque tandem ad spasmodicas & epilepticas concussiones proritaverint.

OBSERVATIO X.

Hysterica  
passio  
hætharica.

Fœmina triginta annorum, temperamentum sanguineo-melancholici, hysterice passionibus in puerperio, & extra illud sæpius obnoxia, tertium gravida, gestationis tempore nec venæsectionem admisit, nec exquisitè servavit præcepta diætetica. Primis post partum diebus non bene purgata est utero: sed de dolore lumborum, tor-

minibus ventris, alvo adstricta, & somno per aliquot noctes inquieto conquerebatur. A Practico, quem in consilium vocavit, validiores essentia ad pellenda lochia fuerunt datae, & ad alvum aperiendam uncia dimidia salis amari Sedlicensis in aqua simplici soluta est oblata. Inde auctis torminibus, nec facta per alvum, nec per uterum excretionem, converso sanguinis versus superiora motu deliravit, & accedentibus convulsionibus extincta est.

Epicrisis.

Ubi natura valde sensibilis, ad motus spasticos hystericos, vel hypochondriacos est proclivis, ad excretionem, si illæ deficiunt, promovendas, summa moderatione opus est, ne per nimium stimulantia, vel purgantia & commoventia id moliamur. Quod monitum semper & ubique in puerperis servandum est, lochiis non rite fluentibus. Nam non modo purgantia fortiora, sed & salina paullo majori dosi data ac digestiva natura tunc minime ferre potest. Multo vero magis a drasticis purgantibus sibi cavere debent puerperæ, quæ a partu laborioso viribus fuerunt exhaustæ, ne illa ad promovenda lochia prioribus sumantur diebus. Tristis ejusmodi casus paucis abhinc diebus in nostro contigit suburbio, ubi fœmina partu valde fatigata, ad ciendum lochiorum fluxum tertia die, loco pilularum polychrestarum, quas sumere volebat, pilulas, contra obstructionem dictas, ex errore numero viginti capiebat, quæ ex æquali parte aloes rosatæ, & extracti panchymagogi Crollii, adjecta limatura martis parantur, & ordinario pondere trium vel quatuor granorum exhibentur. Ab hoc autem pharmaco, sub ingentibus imi ventris torminibus, extremorum frigore, summa corporis jactitatione, atque fluxus uterini plenaria suppressione, mammarumque lacte antea turgentium contractione, præter crebros vomitus, intra tres dies, plus quam

cen-



centies alvum deposuit, & septimo tandem die expiravit. Quæ remedia ad mitigandas, vel compescendas has truculentas passiones adhibita fuerint, mihi incognitum est. Interim ex fatali hoc casu, medicorum juniores addiscere possunt, quam blandis, & temperatis medicamentis puerperæ, primis præsertim diebus, quando per partum laboriosum, & motuum vehementiam vires deperditæ sunt, tractari debeant. Sed iustissime quæritur, quonam convenienti præsidio, si tam perniciose data sit medicina, sagax medicus, summo periculo mature possit succurrere? Responsio patebit ex sequenti observatione, quam cum ante viginti annos in aula Berolinensi degerem, me annotasse, hac occasione memini. Erat nempe Comes duodecim circiter annorum, cui ex tinea capitis laboranti, præscripti pilulas sex dosibus sumendas, quæ drachmam unam extracti panchymagogi Crollii, & drachmam quoque mercurii dulcis, ac trochiscorum Alhandal grana sex habebant. Hæ cum omnes in una scatula ex pharmacopolio essent allatæ, Comes, remoto eo, qui moribus studiisque illius præerat, eas cunctas sua sponte una vice devorabat. Ille accedens obstupuit, & cito hora vespertina nona ad domum meam venit, atque lacrymabundus meam opem imploravit: quia de tota ejus fortuna actum fuisset, si id resciverint parentes illustrissimi. Ego accedens, cum talis casus in praxi mihi nunquam obtigerit, prævia deliberatione constitui, ut aliquot lactis mensuras curaret apportandas. Sumsit etiam Comes lac tepidum larga quantitate: quo facto circa noctem, quæ insomnis erat, quædam tormina expertus est. Mane per vices quatuor sedes habuit copiosissimas, cum imi ventris cruciatu, & excreto simul lumbrico satis lato; tumque nihil mali amplius passus, perfecte convaluit. Ita vero argumentatus eram: si copia lactis assumpti spasmos, quos venenum arsenici inducit, mitigare, & mortem a-

vertere potest; quidni etiam idem remedium, ad infringendam vim purgantium acriorum, & mitigando spasmos atrocissimos posset inservire?

## OBSERVATIO XI.

Fœmina generosa, triginta & sex annorum, temperamenti sanguineo melancholici, habitus corporis nec adeo macilenti, nec nimium pinguis, sed medii, tempus, quo utero gestabat, maximam partem vita desidi sine motu transegit, & plus justo etiam somno indulgit. Post partum satis facilem & felicem, ingentem sanguinis per aliquot dies ex utero profudit copiam, & hinc adeo debilitata fuit, ut sine metu lipothymia corpus atque caput haud diu in erecto situ tenere potuerit. Poterat quoque conclave calidius optime tolerare: nam ab aura paullo frigidiori ad corpus adspirante mox inhorrescebat; hinc potum quoque temperate calidum hauriebat. Septimo & sequentibus diebus, ingens viscidus, impuri, sanguinei que feri copia effluebat: nono die inopinato terrore ex levi tamen occasione afficiebatur. Inde partes extremæ statim algebant, fluxus uteri sistebatur, & genitalia frigida, aridaque evadebant. Accedebat ingens circa præcordia oppressio, & anxietas, cum omnium collapsu virium, corporisque frigido ac tanto sudore, ut ipsa, & omnes adstantes mortem metuerent. Accitus ego dedi liquorem meum anodyno mineralem, cum tertia parte essentia castorei, ac liquoris bezoardici Bussii mixtum, atque tertia quavis hora ad guttas triginta, cum aqua melissæ & cardui benedicti sumendum, haustis desuper aliquot infusi calidioris Thee vasculis. Sequebatur sudor calidus, meliusque habere cœpit. Sed cum per quatuor dies alvus non fuerit aperta, neque clysterem admittere voluerit; tentata est per suppositorium alvina excretio; & cum paullo diutius ad alvum deponendam frustra stimulata, extra lectum



Et cum commoraretur; subito mentis deliquia ad suffocationem usque incidebat. Tandem admissa clystere carminativo & oleoso; datisque postridie pilulis balsamicis, reddidit per alvum insignem stercoris, humorumque putridorum copiam; & denique restituito uteri fluore, perfecte convaluit.

Epicrisis.

Ad pathologiam non minus, quam therapiam hystericæ passionis melius cognoscendam, scire expedit; spasmodicas ejusmodi ex utero passiones, vel a nimia sanguinis, humorumque exsuperantia, quam HIPPOCRATES nomine repletionis notat; vel eorundem inopia, quam verbo inanitionis designat, & cujus indolis præsens est casus, suboriri. Corpus enim sanguine, viribusque exhaustum, non modo a frigore externo, verum etiam a metu vel terrore facillime, & graviter afficitur: quibus causis excretiones sistuntur, & motus spasmodici ad interiora convertuntur; nec prius cessant, quam donec naturæ energia, & artis subsidio excretiones, revocatis motibus, restituantur. Ego non semel, sed sæpius post graves, præsertim ab abortu hæmorrhagias, superveniente terrore, vel inopportuna refrigeratione, non modo syncopes, sed & oppressionem pectoris, spirandi angustiam cum extremorum frigore, imo, quando non mature satis convenienti medicina obviam itum est, ipsas convulsivas ac epilepticas agitationes excepisse adnotavi. Quo casu, nec venesectiones, nec antispasmodica, nitrofa, anodyna, aut vaporosa, vel nimis calida quicquam proficiunt; sed omnis curatio lenioribus analepticiis, temperantibus, spasmos mitigantibus, & iis, quæ excretiones blande procurant, absolvitur felicissime; cavendo, ne fortioribus medicinis collapsæ jam vires prorsus pessum dentur.

OBSERVATIO XII.

Illustrissima vidua, triginta annorum, habitus corporis succulenti, & sanguinei, in puerperio suo ab hysterici symptomatibus non fuit immunis. Mortuo marito, laudæ diætæ indulgit; nimis saltationibus sæpius commovit corpus, illudque etiam intempestiva refrigeratione, dum frequentius nudo podice gramini in hortis insideret, exposuit, neque minus horæos fructus, & acetaria in delitiis habuit, iisque corporis vires, ac ventriculi robur ita destruxit, ut subinde de præcordiorum anxietatibus, spiratione difficili, dorsi dolore, alvoque adstrictiori fuerit conquesta. Præterea loco sanguinis uterini circa tempus menstruum, interdum extra illud, magis serum effluxit viscidum. Et quum aliquando, ab intensa imi ventris refrigeratione, hic fluor etiam sistebatur, apparuit circa inguina tumor durus, dolore pressorio stipatus, latitudinem quatuor digitorum, & longitudinem spithamæ occupans. Atque hunc sequebantur gravissima symptomata: Namque ex improvviso concidebat in terram, omni motu, sensu, ac ratione privata: facies erat inflata, ac valde rubicunda, mammae mirum intumescebant, fundebatque sudorem, rubro-lintea imbuentem colore. Pulsus ferebatur plenus, & magnus, venter turgescebat flatibus, & pedes algescebant. Celebrata sectione venæ mox ad se rediit; atque hunc paroxysmum abhinc intra unius mensis spatium, plusquam quinquaginta vicibus, modo mitiorem, modo graviolem, absque tamen notabili virium jactura, patiebatur; cujus vehementia non nisi sanguinis missione sublevari ac mitigari potuit. Ego tandem vocatus, explorata totius morbi historia, & ægrotantis natura, eam a nimis venæ sectionibus, præsertim in superioribus partibus abstinere jussi; frequentiore autem pediluviorum tepidorum usum.

Passio  
hyste-  
rica ex  
sup-  
presso  
fluore  
albo.



usum commendavi. Et quoniam al-  
vi erat adstrictioris, clysteribus oleo-  
sis, ac carminativis alvum subinde  
ducendam curavi. Interne quoque cre-  
bro, tamen moderate dedi pulveres  
nitroso absorbentes cinnabarinos, pi-  
lulasque nostras polychrestas, inter-  
dum cum grano castorei, interdum  
quoque cum tertia parte extracti pan-  
chymagogi Crollii permixtas. Tu-  
mori porro inguinali vesicam decocto  
emolliente cum lacte repletam adpli-  
cari jussi, & imperavi, ut advocata  
obstetrix in tumorem inguinis, & fla-  
tum genitalium paullo curatius inqui-  
reret. Illa satis perita tumorem il-  
lum a fluore albo cohibito ortum fuisse  
suspiciabatur: quare curationem per  
clysterem uterinum, aliquoties ad-  
missum, instituendam esse judicavi;  
quo ex sero lactis, cum floribus cha-  
momillæ, & semine cymini cocto,  
& infuso ingens mucis, glutinis instar  
ecopia fuit educta cum levamine mo-  
mentaneo. Pro potu sumsit fontem  
Selteranum soterium, cum parciore  
vini portione; & sic paullatim me-  
lius habere cœpit, atque tandem ma-  
ritata plenarie convaluit.

#### Epicrisis.

Non semel, sed sæpius in paro-  
xyfmo hysterico graviore, ubi omnis  
motus & sensus sublatus videtur, in  
valde plethoricis, pullum adnotavi  
magnum; ut ideo affectus magis ad  
apoplexiæ levioris, quam syncopes  
speciem referri mereatur. Quo in ca-  
su sanguinis missio, præsentaneam  
quidem fert opem; sed cavendum  
probe, ne illam nimis crebro iteran-  
do, vires frangamus, malumque red-  
damus pertinacius. Docemur præter-  
ea ex hac morbi historia, quale in-  
commodum, & quæ periculosa sym-  
ptomata, fluoris albi suppressio pro-  
generare valeat; præsertim si laten-  
tes veneri accedant igniculi; quibus  
extinguendis conjugio non præstan-  
tius est subsidium. Simile malum ori-

tur in virginibus, cum cachexia, co-  
lore vultus plumbeo, lassitudine, fe-  
bre lenta, & anxietatibus junctum,  
a suppressione veneris; ubi ex mora  
liquor genitalis vappescens ac corru-  
ptus, succos vitales in mixtura &  
motu suo varie turbat, & alterat.  
His suadendum optimo jure conju-  
gium est; utpote cujus beneficio li-  
quor seminalis excernitur; & motus  
humorum a spiritu genituræ virilis,  
novum veluti robur adipiscitur, ideo-  
que ipsis etiam partibus solidis no-  
vus vigor, novusque color restitui-  
tur.

Plura de malo hysterico exempla  
reperire licet in *Consult. ac Resp. me-  
dicin. Tom. II. Sect. III. casu XLIII.  
& sequentibus & Tom. III. Sect. IV.  
casu XXII.*

## C A P U T VI.

### D E

## AFFECTU SPASMODICO FLATULENTO, SEU HYPOCHONDRIACO.

### THESES PATHOLOGICÆ.

#### §. I.

**N**on ultimum inter morbos ge-  
neris nervosi spasmodicos vin-  
dicat sibi locum passio sic dicta hypo-  
chondriaca; quæ quum sub mucrona-  
ta cartilagine, ac costis spuris, in  
hypochondriorum regione potissimum  
suam exercent tyrannidem, nomen Definitio morbi  
li hypo-  
chondriaci.  
suum ex græca traxit origine. Est il-  
la, si realem spectemus ideam, affe-  
ctus primarum viarum, nominatim  
ventriculi, ac intestinorum spasma-  
tico flatulentus, ab inverso ac per-  
verso illorum motu peristaltico nata-  
les suos mutuans; per consensum ve-  
ro totum nervosarum partium syste-  
ma, in irregulares motus conjiciens  
& totam œconomiam functionum per-  
turbans.

Hu-



## §. II.

Historia  
ma.  
li hy-  
poch.  
driaci.

Hujus aggressuri historiam, præmonendum duximus, quod nulla corporis pars sit, nulla functio, quæ in hoc longissimo morbo non lædatur, ac præter naturam habeat; & symptomata tam gravia, tamque plurima sint, ut vix cuncta recenseri queant: adeo, ut quemadmodum febris inter passiones acutas præ aliis universalis dici potest morbus, ita noster hypochondriacus affectus, hoc nomen inter chronicos iustissime mereatur. Ut autem ordine procedamus, & initia pariter ac incrementa polymorphi huius mali explicemus: ab imi ventris cavitate, quæ omnium primo illius tyrannidi subjacet, ordiendum est.

Sic itaque in primis morbi principiis graves sentiuntur ventriculi ac intestinorum tensiones, ac inflationes flatulentæ, præsertim sub costis spuris in hypochondriorum, maxime sinistri regione; in qua nonnunquam tumor satis durus conspicitur. Speciatim quod attinet ventriculum, ac oesophagum; exserunt se nausea, ciborum fastidium, adpetitus vagus, mox plane prostratus, mox avidior; ingesta male conficiuntur, cruditates acidæ, viscidæque progenerantur; dolor ventriculi pressorius, & gravativus, maxime partum excipiens, spasmodice constrictione gulæ, frequens muci limpidi ex ore rejectio, deglutitionis impedimentum, gravis cardialgia, ardor stomachi, ructus acidissimi, vomendi conatus, ac ipsi vomitus, quibus redditur saburra tam acris, ut inde stupefactos dentes, ac corrosa linteamina observaverint auctores. Annotavi etiam vomitus in hypochondriacis pure sebaeos, *diff. mea de remed. benign. abusu* §. Conf. M.N.C. Dec. I. anno III. obs. 253. Porro in volumine intestinorum, & quidem tenuium, percipiuntur graves circa umbilicum dolores, & cruciatus, torsiones, lancinationes, borborygmi, murmura; crassorum quoque adfligunt graviora tormina; alvi mox est profluvium, mox & quidem

pertinacissima adstrictio, cum flatuum retentione, qui vel per superiora, vel inferiora eructati, reliquas paullulum levant passiones, at mox copiosissimo proventu regenerantur. Contra vero frequentes sæpius urgent desidendi conatus, & non raro tubercula, ac cæcæ hæmorrhoides anum obsident, quin & ipse fluor sanguineus, symptomatice aliquando succedit. Mictio in quibusdam est difficilis, dolorifica, urina redditur tenuis, diluta, alba, largo nonnunquam sedimento, eoque arenario imbuta: quid? quod conspirans in renum regione dolor, calculum sæpenumero mentiatur.

## §. III.

Neque vero solum abdomen diris symptomatibus discruciat passio hypochondriaca; verum etiam alias in consensum trahit regiones. Sic occurrunt in pectore insignes angustiae, constrictiones, vehementes spirandi difficultates, cum oppletionem pectoris nonnunquam junctæ, cordis tremor ac palpitatio. Ingravescente malo caput etiam infestatur; in cujus partibus exterioribus, cephalalgiae, hemicrania, varii dolores tractorii cum rigiditate, & immobilitate juncti, atque sic dictus clavus sentiuntur; in interioribus vertigo, aurium tinnitus, cum auditu difficili se exserit, oculi tristi Scotomia obnubilantur, visio nonnullis fit duplicata, oculi dolent cum siccitate, dolor linguam, sæpius in certo spatio occupat ardens & valde molestus, & saliva fluit uberrime, ut ideo sputatores dicantur hypochondriaci. Tandem animales quoque labascunt functiones; animus vel nulla, vel saltem levissima causa incitatus, ad perversas commotiones, inquietudines, angores, terrorem, tristitiam, iram, metum, diffidentiam abripitur, ad vanas inclinatur imagines, perversamque phantasiam; perit vis memoriae, ratio labascit; somnus est turbulentus, difficilis, terriculamentis plenus. Denique sunt quædam symptomata, quæ totum corpus spectant; illud

Conti-  
nuata  
morbi  
histo-  
ria.



illud enim crebris phlogosis, aut copiosis sudoribus perfunditur, vires prosteruntur, languet totum corpus, & ad omnes torpidum est labores; sensim contabescit; artus dolore contusorio, sæpius lancinatorio distorquentur; ac omnes denique se& excretiones, præsertim sanguineæ pervertuntur. Et quis potest omnia ac singulorum symptomatum recensere; quæ quot adoriuntur individua, tot fere diversas ludunt tragedias.

## §. IV.

Historia  
morbi  
veteri-  
bus de-  
scripta.

Conspirant cum hac recensita morbi historia, vetustissimorum medicorum monumenta; ex quibus GALENUS *Lib. I. de locis affectis pag. 278. edit. Græcæ Basileensis* adducit fragmentum, ex DIOCLIS libro, qui meminit morbi hypochondriaci, flatulenti, & melancholici, a ventriculo suborti. Nec indigna est descriptio, quam refert, ut hic breviter suppeditetur: Nam agro, inquit, ubi cibum assumit, præcipue coctu difficilem, & ardores excitare aptum, eveniunt sputationes humidæ, copiosæ, ructus acidi, inflationes, præcordia æstuant, fluctuationem percipiunt, non illico, sed quando eructationes cohibent. Aliquando etiam ventris vehementes dolores percipiuntur, qui in nonnullis supra diaphragma excurrunt, & concoctis quidem cibis mitescunt: quam primum vero cibum resumunt, eodem modo adfligunt; quin sæpe etiam jejunis, & post cœnam molesti existunt. Quodsi evomant; cruda, & pituitam subamaram, calidam, acidamve rejiciunt, usque adeo, ut & dentes inde stupore afficiantur. Et quia frigida opem adferunt; internarum partium æstu morbum foveri judicat.

## §. V.

Quadã  
momen-  
ta circa  
histo-  
riam  
mali  
hypo-  
chon-  
driaci.

Dum adhuc circa morbi hypochondriaci historiam sumus occupati; monenda sunt quadam momenta, scitu perquam necessaria. Quemadmodum scilicet malum hocce, suos habet gradus, qui in suppeditanda prognosi majorem accendunt lucem: ita etiam ex-

acerbationes involvit, & satis graves format paroxysmos. Quanquam enim nunquam recte habeant hypochondriaci; attamen hyemali ac autumnali, quin quacunque frigidiori tempestate longe vehementiorem symptomatum suorum patiuntur atrociam; contra vero eo, quo calidior ac æstivus est aer, tempore, magis vegetiores deprehenduntur. In foeminis porro, hoc malo infestatis, major illius vehementia observatur circa illud tempus, quo menses debent fluere; qui plerumque quodam laborant vitio. Nec silentio prætermittenda; sed notatu digna est observatio, quod hypochondriacis rarissime febribus continuis, epidemicis, contagiosis, quin ipsa peste afficiantur, & a multis aliis morbis grassantibus immunes maneat. Ratio in eo videtur esse posita, quod in ipsorum primis viis, multæ ordinario cruditates acido viscidæ hæreant: quæ contagiorum, quorum ratio in summa tenuitate partium sulphurearum consistit, efficaciam resistunt, & has partes enervant quasi, atque figunt. Unde etiam fit, quod senes, ac homines melancholici ab ejusmodi morbis acutis, immo contagiosis rarius afficiantur.

## §. VI.

Quod attinet subjecta nostri mali; Subje-  
deprehendimus, illud maxime infen-  
tum esse ætati juvenili, ac virili, a vi-  
gesimo circiter ad quinquagesimum driaci  
annum: quo superato, naturam suam mutat, & in arthritidem, podagram, gonagram, malum ischiadicum, calculum renum, cachexiam, scorbutum, morbum nigrum, obstructions viscerum, hæticam &c. aliosque fonticos morbos transit. Obnoxii porro huic affectui sunt, qui habitum corporis spongiosum, mollem, laxum, & vasa exiliora obtinuerunt, præ iis, quæ corporis strictioris sunt. Non minus eos adoriatur, qui vel natura languidiores existunt, aut jure hæreditario quandam dispositionem foveant; vel qui perverso vivendi genere, aut per-  
lon-



longos morbos, insignem virium ac roboris naturalis sibi contraxerunt, imbecillitatem. Præsertim infestantur hac adfectione, qui vitæ sedentariæ sunt addicti, litterarum studiis nimium indulgent, assidueque vacant meditationibus & lucubrationibus: unde morbus est litteratis familiarissimus, & veluti proprius. Ex eodem denique fundamento, nec sequior sexus ab eo immunis observatur; sed tantum non majori, quam nobilior frequentia ab illo adficitur; licet harum passionum hypochondriacæ perperam cum malo hysterico confundantur, & sub hujus titulo significantur.

§. VII.

**Sedes mali hypochondriaci non est in liene.** Sed accedamus ad indagandam mali hypochondriaci sedem; in qua determinanda veteres non minus, quam recentiorum quidam errarunt. Veteres, cum viderunt, sub costis spuris lateris sinistri, ubi lienis situs est, sæpius percipi tumorem tensivum inflativum, in hoc quoque viscere sedem mali hypochondriaci collocarunt: qualem causam defenderunt RHODIUS atque HEURNIUS. Verum ut taceam, lienis viscus per structuræ suæ rationem, ad recipiendum tam acutum, & lancinatorium sensum, qualis est in hypochondriacis, valde ineptum existere; docet etiam experientia, & cadaverum sectio, in hypochondriacis sæpius nullum post mortem inveniri lienis vitium. Hac in re consentientes habemus SYLVIIUM *diff. de usu lienis*, HOFFERUM *in Hercule medico Lib. 3. cap. 3.* HOCHSTEDE-  
*RUM Dec. V. p. 502. & 588.* Neque vero negandum est, quin nonnunquam lienis infarctus subesse possit: a quo tamen nec dolorem acutum, nec ipsam morbi sedem derivare licet.

§. VIII.

**Sedes mali hypochondriaci non est in vena portæ.** Quidam recentiorum, veram ac universalem passionis nostræ flatulentæ sedem, in vena portæ, ejusque ramificationibus constituunt; atque putant, stagnantem in hisce vasis sanguinem, unicam ac genuinam cunctorum sym-

*Hoff. Syst. Tom. V.*

ptomatum esse causam, quæ semper in viris excretionem hæmorrhoidalem, in foeminis menstruam respicerent; atque hac natura, vel arte procurata, penitus cessarent. Verum enim vero, quamvis non negandum sit, sed infertius quoque allegatum invenietur, quod irregularis harum excretionum successus, & hinc enata cruoris restagnatio, in iis præsertim ramis, qui intra tunicas intestinorum valde nerveas sparguntur, sæpius causam passionis hypochondriacæ mediatam constituat: attamen sciendum est primum, hanc non solum, nec unicam undique esse causam; deinde morbi ac symptomatum sedem minime in ea quærendam esse. Haud enim raro nulla in hypochondriacis adest ad fluxum hæmorrhoidalem dispositio: & sæpius cruor per venas sedales copiosissime profunditur, absque insequente mali levamine; uti attestantur observationes a RHODIO *Centur. II. obs. 93.* CLAUDINO *Consil. 89.* & MONTANO *Consil. 246. &c.* allegatæ.

§. IX.

Ut igitur nostram de sede morbi hypochondriaci sententiam aperiamus; hanc in canale illo alimentari, membranaceo, ac valde nervoso, qui ventriculum, ac intestinorum volumen constituit, collocandam esse censemus. Tubus hic ex quatuor potissimum tunicis constat, intima villosa, villis papillarum instar erectis, ac perviis prædita, altera nervea, tertia musculosa validiori, ex fibris partim longitudinalibus, iisque paucioribus, partim annularibus contexta; atque vasa sanguinea copiosissima continente, & extima membranacea. Hasce tunicas tres intercedunt contextus cellulosi; una inter villosam, & nerveam; altera inter hanc & musculosam, & ultima inter hanc & membranaceam; nomine tunice cellulose Ruyschii insignitam. Vi tunice musculosæ, ejusque fibrarum carnearum annularium, recensitæ partes motu gaudent vermiculari quodam, qui vocatur peristalticus, &

**Sedes passionis hypochondriacæ.**

G

in



in alternante earum, placida tamen constrictione, ac relaxatione, a parte superiori ad inferiorem tendente consistit. In hujus motus vigore naturali, ac integritate magna profecto vis ad sanitatem conservandam latet: hujus enim beneficio ciborum digestio rite conficitur, secretio bilis ac pancreatici succi adjuvatur, chyli præparatio promovetur, ejusque laudabilis, ac generosi propulsio in vasa lactea facilitatur, unde reliqui machinæ nostræ succi benigni fiunt, atque spirituosii. Contra eodem hocce intestinorum motu, cruditates, & inertes sordes, non minus ac flatulenti, aerei vapores, qui ex cibis digestis, ac laudabili succo privatis, relinquuntur, per canalem alimentarem propelluntur, ac per anum eliminantur. Idem porro earum partium tonus, si recte, ac secundum naturam se habet, adjuvat, faciliatque sanguinis liberum & æquabilem circuitum; atque sic præcipuum constituit medium, quo functiones, quas natura intestinorum canali assignavit, rite possunt administrari.

## §. X.

Causa  
proxima  
mali  
hypochondriaci.

His præmissis facilius jam erit, causam morbi nostri proximam, & symptomatum rationem explicare. Illam equidem in dicti motus peristaltici, quo ventriculus, & intestina gaudent, præternaturali constitutione, & quidem tali ponimus; ubi ille partim, ac in uno loco dejectus, atque destructus, partim, & in alio loco intensior, atque passim inversus i. e. ab inferioribus ad superiora tendens existit. Tales enim, & resolutio, & distentio spasmodica, simul præsentis in intestinis, sed diversis locis se invicem excipientes, genuinam mali hypochondriaci essentiam constituunt: & ad explicanda cuncta symptomata, clarissimum præbent fundamentum. Confirmant hancce sententiam, præter ipsam experientiam, doctissimorum virorum testimonia, quos inter ORTLOBIUM, ET TMULLERUM, NEDHAM-UM, WEDELIUM, & CONRIN-

GIUM dissent. de morbo hypoch. §. XI. allegasse sufficiat. Tentemus igitur, an ex hac causa, sævissimarum molestiarum, quarum luxurians in hypochondriacis est progenies, rationalem suppeditare queamus æthiologiam.

## §. XI.

Proximum ergo vitiati ac labefacti motus peristaltici confectarium est, digestio turbata, chylicatio læsa, for-  
diumque excrementitiarum excretio  
impedita. Hinc remanent in canale  
intestinorum, atque præsertim plicis  
& flexuris eorundem sese insinuant a-  
cidæ, viscidæque cruditates: & flatus  
generantur copiosissimi. Quid inde?  
Scordes illæ mora diuturniori a natu-  
rali textura deflectunt, & acrimoniam  
quandam contrahunt, qua nerveam  
intestinorum tunicam vellicant, & ad  
spasmodicas stricturas proritant. Strin-  
gitur itaque tubus ille in nonnullis lo-  
cis arctissime, ut nec flatus transmit-  
tat. Ergo, hi fluctuant in ea canalis  
parte, quæ a spasmis vacua est, eamque  
distendunt mirifice: & sic primum ap-  
paret ratio murmurum, borborygmo-  
rum; ac molestissimarum inflationum.  
Porro flatus, inferius exire nescii, po-  
sito a spasmis obice, ad superiora magis  
compelluntur, & tum præsertim occu-  
pant colon, & in ejus flexuris, quarum  
est plenissimum, incarcerationum. Nam-  
que sciendum est, quod intestinum co-  
lon, præsertim, ubi sub costis spuris in  
utroque hypochondrio flexuras format,  
& cum sacco renum adiposo cohæret,  
media sui parte longe sit angustius: ibi-  
dem vero, maxime in sinistro latere a  
flatibus frequentissime, & violenter  
infarcitur, ac in tumorem elevatur,  
acutissime dolentem; quem falso lienis  
vitio tribuunt. Continuantibus spasmis,  
accedente inversa peristalsi, &  
invalescente malo, halituosii illi vapores  
in ipsam penetrant ventriculi cavi-  
tatem, quam ultra modum distendunt,  
& anxiam inflationem sensibus con-  
spicuum inducunt. Expansus præter  
naturam ventriculus remoratur libe-  
rum septi transversii motum, atque de-  
scen-

Ratio  
sym-  
ptoma-  
tum  
flatu-  
lentia-  
rum.



scensum : unde fit angusta difficilisque spiratio. Et quod pessimum est, stringuntur sæpius vel sinistrum, vel utraque ventriculi orificia ; atque sic in ejus cavitate vapores velut in carcere inclusi tenentur, pariuntq; ineffabiles præcordiorum anxietates, & dolores cardialgicos ; qui, ubi remittunt constrictiones, & eructantur halitus, insigniter mitigantur.

## §. XII.

Ratio  
aliorum  
sympto-  
matum.

Et hæc est tristes tragœdia, quam flatus, ob destructum ventriculi, ac intestinorum motum peristalticum, copiosius generati pariter, ad exitu suo destituti ludunt, & quæ a Græcis per τὰ πρῶτα φασγῶν exprimitur. Videndum jam est, quæ mala pariant, cruditates, quæ ex cibis assumtis, atq; in ventriculo fermentatis, deficiente vegeta peristalsi, intra ventriculum, intestinum maxime duodenum, ac in plicis coli relinquuntur. Hæ videlicet, ob diuturniorem moram, accedente præsertim in intestino duodeno, bilis ac succi pancreatici copia, corrumpuntur, acescunt, & pessimam inducunt acrimoniam. Inde vellicando causam subministrant spasmis, doloribus tensivis, lancinatoriis, torminosis, ac rodentibus, qui ventriculi maxime regionem, & reliquum ventrem, circa umbilicum graviter adfligunt ; atque subinde perpetuum flatuum generationi præbent fomitem. Ex hisce porro sordibus, adpetitus avidior, nausea, cardialgia, vomendi conatus, ructus, & vomitus acidissimi suam trahunt originem : atque, cum sub quavis digestionem in vehementiorem motum fermentativum rapiuntur, ratio patet, cur hypochondriaci, sumtis potissimum epulis, pessime habeant. Et denique, cum ob tam continuum intestinorum stimulum, eorum spasmis, cum flatulentis distensionibus reciprocantes suboriantur : luculenter patet, cur alvina excretio in hypochondriacis sit tardior, quin sæpius, tam pertinax adstrictio, ut nec tenuiores halitus, multo minus fœces transire queant.

## §. XIII.

Adhuc restant ea incommoda recensenda, quæ in sanguinis motum, ex vitiato motu peristaltico redundant. Quemadmodum enim ex hoc naturaliter se habente, liber humorum ac æquabilis per intestina circuitus conservatur : ita hoc e contrario destructo ac labefactato, circulatio quoque redditur tardior, ac inæqualis. Namque in uno intestinorum loco est spasmus, qui constringit comprimitque simul vasa sanguifera : in altero loco flatus latera tunicarum distendunt, expandunt, & ita quoque graviter premunt adjacentia vascula. Eo vero magis retardatur sanguinis per venam hæmorrhoidalem regressus ; cum illa situ prædita sit perpendiculari. Hinc passim suboriuntur humorum stagnationes in tunicis intestinorum ; quæ sicuti ex allegata ratione symptoma flatulenti mali esse possunt ; ita etiam ejusdem sæpenumero mediatam causam præbere solent ; quemadmodum ex infra dicendis clarius adparebit. Inprimis frequentissimum est, ut cruor circa exitum intestini recti cumuletur, & in tubercula, quæ cœcas dicunt hæmorrhoides elevetur, quin sæpius vi perrumpat, & in fluxum hæmorrhoidalem, qui tum est symptomaticus, desinat. Ex dicta non minus humorum stagnatione originem suam petunt, excretionum sanguinearum per uterum æque ac venas sedales suppressiones, quæ malo invalescente nunquam non fiunt : immo ex eodem fundamento derivare licet rationem excretionum cruentarum, atque nigrarum, per mictum, vomitum & alvum ; quas præter naturam in hypochondriacis, malo valde inveterato, contingere, fide dignæ attestantur observationes. De tali excretionem per vomitum, vide RIOLANUM, *anthropolog. Lib. 2. cap. 2.* ADRIANUM SPIGELIUM *Anatom. Lib. 6. cap. 5. per alvum* conf. SOLENANDRUM *consil. 7. sect. 2. pag. 121.* & urinam hypochondriaci, intensa rubedine tinctam ipse vidi.

Sym-  
ptoma.  
ta ex  
vitiata  
peri-  
stalsi,  
in san-  
guinis  
cursum  
redun-  
dantia.



## §. XIV.

Ratio  
sympto.  
matum  
spasmo.  
dicorū.

Hæc in ipso intestinorum canale fiunt; ex quo, malo invalescente, gravissima symptomata, per totum corpus propagantur, omnesque turbant functiones. Fit hoc mediante consensu, quem omnes universi corporis nervi, nervosæque partes invicem obtinent; & cujus causa spasmi intestinorum, ad alias quoque propagantur remotiores regiones. Ubi vero strictura nervorum est spastica; ibi quoque circulus humorum fit inæqualis: hinc adparet ratio, cur in passione hypochondriaca inveterata in toto corpore fiant spasmodicæ stricturæ, & tardior humorum circulatio. Sic primum in ipso abdomine, partes intestinis vicinæ constringuntur: ob vesicam, ejusque sphincterem male affectum, minguntur urinæ tenues, dilutæ, aquosæ: ob membranas nerveas, renes involventes graviter convulsas, suboriuntur dolores calculum mentientes: Spasmi ad pectus devoluti ingentes illius constrictiones, cordis tremores, palpitationes inducunt; ad caput delati, varii generis dolores machinantur; & per corpus denique externum propagati, causæ fiunt, extremorum frigoris, crebrarumque horripilationum.

## §. XV.

Origo  
mali  
hypo-  
chon-  
driaco.  
1) Scor-  
butici.

3) Hy-  
sterici.

Quum itaque in malo hypochondriaco generatur chylus crassus, ac impurus; Spasmi per totum corpus grassantur, ac circulatio humorum fit inæqualis, & denique salutare, quæ per alvum, cutim, ac urinam fiunt excretiones impediuntur: non fieri potest, quin successive scorbutica humorum increseat dyscrasia, atque sic fiat malum hypochondriaco scorbuticum. Quod si porro sanguineæ excretiones, quæ in sexu sequiori per uterum fiunt, sufflamantur, & ideo humores sanguinei vel seminales circa uterum, atque partes generationi inservientes stagnant, accedente præsertim libidinoso temperamento: tunc facillime cum hypochondriacis passionibus compli-

cantur motus hysterici, & malum fit hypochondriaco hystericum. Si denique crassi viscidique humores, vi spasmorum, qui imi ventris partes occupant, ad superiores partes, atque caput majori copia compelluntur, & in cerebri vasis difficiliter progrediuntur: destruuntur etiam animales functiones, languescunt sensationes, vis memoriæ, ingeniique læditur, insignis est ad mœrorem, diffidentiam, atque lacrymas proclivitas; vanæ surgunt imagines, ac inanes ideæ: atque sic lentis tandem passibus appropinquat melancholia hypochondriaca.

## §. XVI.

His ample satis, atque copiose, prout rei necessitas postulavit, deductis, deveniendum jam erit ad recensionem earum causarum, quæ mali hypochondriaci mediatae audiunt. Ex illis præcipua, & satis frequens se nobis offert, sanguinis, humorumque vitalium stagnatio, intra tunicas intestinorum nerveas & musculosas, quæ sæpissime debetur eorundem tardiori per hepar circulationi. Hepar est viscus maxime vasculosum, & plures fovet venas, quam quidem arterias: illarum binæ sunt, cava nimirum & portarum vena; & quem fugit, quod posterior, a qua totum intestinorum volumen, ventriculus, mesenterium, lien, pancreas, quin & uterus, nisi omnes, tamen permultos venosos ramos mutantur, inverso quasi naturæ ordine, sanguinem ex his cunctis imi ventris visceribus refluxum accipiat, eumque officio arteriæ functura, pulsu tamen ac validiori impulsu destituta, intra hepar vehat, ac effundat? Hinc ratio patet, cur etiam in sanissimo statu, sanguinis per dictum hepatis viscus circulatio, longe sit tardior, ac difficilior, quam ejusdem per reliqua universi corporis viscera progressus. Quæ cum ita sint, non difficile erit cognitu, quare in statu præternaturali, humorum per hepar cursus primum omnium impediatur, atque retardetur. Quo retardato, ac difficiliori,

3) Melancholia hypochondriacæ.

Causæ mali hypochondriaci mediatae.



neceſſe eſt, ut vi legum hydraulicarum, menta ſilentio prætermittam.

§. XVIII.

crur regurgitet ad illa denuo viſcera, ex quibus antea ad hepar iter ſuum direxit. Id circo magis diſtendit vaſa diſtarum partium, maxime vero meſaraica, & inteſtinorum, quorum molleſtunicæ non adeo fortem poſſident reſiſtentiam: & tali ratione ex impeditiori ſanguinis per hepar circuitu, ejuſdem ſtagnatio in inteſtinis ſuboritur, quæ tollit ſolidarum, fluidarumque partium æquilibrium, & tanquam mediata cauſſa, deſtruit robur ac totum motus perſiſtaltici naturalem; cuius deſtructi luxurians progenies fit paſſio hypochondriaca.

§. XVII.

ſectio  
anatomica  
hypo-  
chon-  
driaco-  
rum.

Hoc eſt fundamentum, ex quo ratio depromi poterit, cur ex malo hypochondriaco, in alias morborum ſpecies tandem tranſmutato peremtorum cadavera, ea oſtendant phaenomena, quæ partim ex vitiatum humorum per abdomen circulo enata ſunt, partim hunc magis vitiarunt. Sic GUARNONIUS *conſ.* 484. venas meſenteriei obſtructas, & adeo dilatatas in hypochondriaco poſt mortem reperit, ut ſpeciem inteſtinorum præ ſe tulerint. LUDOVICUS MERCATUS *Tom. III. Lib. I. Cap. 17.* vaſa meſaraica admodum varicoſa invenit. BRUNNERUS *Conſil.* 7. ingentem ſanguinis viſcidi ſaburram in venis meſaraicis deprehendit. Porro RHODIUS *Cent.* 2. *obſ.* 76. colon adnotavit ſcirrhoſum; WELSHIUS *diſp. de malo hypochondriaco* obſervavit colon totum a flatibus diſtentum, ſub inſertione vero in inteſtinum rectum adeo contractum, ut coaluiſſe videretur. BLASIUS in *Comment. in Veſlingium* p. 67. memoriæ prodidit, quibuſdam lienis viſcus in immenſam elevatum fuiſſe magnitudinem. Pancreas obſtructum fuiſſe, ipſe quondam in viro celebri, ex hypochondriaca paſſione deſuncto vidi; HIGHMORUS *diſquiſ. anatom.* pag. 47. nec non HARDERUS *obſ.* 59. p. 242. illud ſcirrhoſum ac ulceratum obſervarunt; ut alia auctorum inonu-

Hoff. *Syſt.* Tom. V.

Inter cauſſas vero remotiores, quæ ad tardiorē ſanguinis per hepar progreſſum, & hinc ſubortam ejuſdem intra imi ventris viſcera, & maxime inteſtina ſtagnationem, quam plurimum contribuunt, principem locum obtinent, excretionum ſanguinearum, quæ in ſeminis per uterum, in viris per venas hæmorrhoidales, tanquam venæ portæ, intercedente ramo ſplenico, ſobolem, contingunt, imminutiones atque ſuppreſſiones. Sic enim ex obſervatione conſtat, viros in juventute largum e naribus cruorem fundere ſolitos, ſi poſt hæc ætate provectiori hæmorrhoidalem patiuntur excretionem, quæ tantum non ſemper hæreditariam ſupponit diſpoſitionem, & ad facilitandum ſanguinis per abdomen & hepar circuitum, multum adfert momentum; ex huius irregulari ſucceſſu, aut plane ſuppreſſione, quacunque de cauſſa facta, malum incidere flatulentum. Namque cruor abundans, cuius moles per hanc excretionem ſalutari plane conſilio imminuta fuerat, hæc cohibita, copioſius in abdomine cumulatur, hinc, ob diſtam §. præc. rationem, ægrius per hepar circulatur, adeoque ad inteſtina regurgitans, noxiſſimam ſubit ſtagnationem. Eodem modo res ſe habet cum uterina in ſexu ſequiori purgatione; quæ ſi imminuta, vel ſuppreſſa fuerit, cruor accumulatur in arteria meſaraica, exitum affectat per hæmorrhoides, & hoc denegato, regurgitat ad inteſtina, curſumque humorum per abdomen ſic reddit difficiliorem. Atque adeo in ſequiori ſexu generatur ſæpius malum hypochondriacum, quod facillime cum hyſterico complicatur, ſi ſimul ſanguinis circa ipſum uterum contigerit ſtagnatio. In hiſce caſibus, revocatæ excretionis, ſi tempeſtive fiat, certiffimam in ali hypochondriaci pollicentur ſanationem.

§. XIX.

Verum quam plurimæ adhuc dantur cauſſæ, quæ motum inteſtinorum

Cauſſæ  
remo-  
tiores  
ſunt  
excre-  
tionū  
ſangui-  
nearū  
ſup-  
preſ-  
ſioneſ.

Hære-  
ditaria  
diſpo-  
ſitio.



pervertere, sicq; passionem hypochondriaco flatulentam ingenerare valent. Inter eas præcipua debetur animadversio hæreditariæ dispositioni, quæ consistit in ea partium nervosarum, maxime intestinorum, per nativitatem propagata constitutione debiliori, qua illa ad suscipiendos motus irregulares existunt facillima: ad quam etiam venarum exilitas, ac laxis spongiosusque habitus, quo pollent hypochondriaci, referri merentur. Hæc proclivitas, parentum vitio ad liberos protracta, primum plerumque, sicuti plurimorum morborum, ita præsertim passionum hypochondriacarum, atque fluoris quoque hæmorrhoidalis, præbet fundamentum. Sic parentes hypochondriaci tales generant liberos; atque mater, quæ gestationis tempore, hystericeis motibus cruciata fuit, aut gravioribus animi pathematibus indulsit, parit infantes, qui ætate præceteriores ex levissima causa, in flatulentas ac hypochondriacas delabuntur passiones.

## §. XX.

Aeris  
frigida  
consti-  
tutio.

Næque vero paucae sunt earum rerum, quas non naturales dicunt, quæ ad generandum malum hypochondriacum aptæ existunt. Ipse aer, frigidus maxime, insignem hoc in casu obtinet potentiam; dum externam corporis superficiem constringendo, humores majori copia ad interiora agit; qui, quo magis cumulantur, eo facilius stagnationem subeunt. Humida aeris temperies vi pollet, fibrarum motricium tensionem relaxandi; ex quo hanc ob causam, omnes morbi, qui ex atonia fiunt, & generantur, & incrementa capiunt. Nocet præsertim frigus intestinorum canali, si vel abdomini liberalius admittatur, vel pedibus; quorum intimiorem cum intestinis consensum, illud inter alia docet momentum, quo teneriores, si nudis pedibus stratis, pavimentisque incedunt frigidioribus, mox tormina intestinorum, atque flatulentias patiuntur: quemadmodum FORESTUS *Lib. X. obs. X. de fratre suo refert.* Hinc

ratio patet, cur hypochondriaci æstate longe melius habeant, quam hyeme; nec non cur in regionibus, quæ ad septentrionem vergunt, multo frequentius sit malum, quam in iis, quæ sub cælo sereno ac temperatiori sitæ sunt.

## §. XXI.

Præter aerem, victus quoque crassior, malo hypochondriaco causam præbet antecedentem. Cibi crudiores, acidi, flatulenti, legumina, horæi fructus, lacticia, acetaria, panificia, præsertim recentia, & adhuc calidiora generant chylum crassum, impurum; relinquunt in primis viis multas sordes, atque motum intestinorum peristalticum insigniter pervertunt; præsertim si vita ab omni corporis exercitatione vacua accesserit. Nocent imprimis cibi, aut minus recte masticati, aut ventriculo, a vix superato morbo, vel alia causa valde debili, justo avidius ingurgitati. Ex hoc fundamento BLANCARDUS *P. 2. prax. cap. 61.* morbum hunc Frisii, ob pisorum, lacticianorum & acetariorum abusum pronunciat familiarem, & SIMON PAULI *in quadripart. Botan. pag. 537.* recenset casum, de fœmina a pane, quem adhuc calentem, & vix e fornace extractum comederat, hypochondriaca. Potus duplici ratione malum illud flatulentum inducere valet; vel si largius, ad crapulam usque assumatur, vel si frigidior calenti corpori ingurgitetur. Posteriori casu præsentissimum est malum; in priori diuturniori demum exercitio, tanquam dignum heluonibus flagellum contrahitur. Peccat quoque potus, si adsumatur parcus, aut nimius isque aquosus, aut spissior, crassus ac fœculentus.

## §. XXII.

Frequentissime resultat malum hypochondriacum ex vita otio immersa, quæ unicam sæpius nascentis morbi causam constituit. Quemadmodum enim frequens corporis exercitatio non modo solidarum partium, musculorumque robur ac motum valde promovet, verum etiam humores reddit flu-

Victus  
cras-  
sior.

Vita  
seden-  
taria.



xiores: ita ex hujus intermissione languent vires, prosterntur fibrarum clater, ac humores non vegete circumacti, redduntur spissi. Hæc vivendi ratio eo sit opportunior ad inducendum nostrum morbum, si accedant nimis ac immoderata meditationes, lucubrationes, atque vigiliæ, studiorum causa diutius protractæ. Quodvis horum momentorum insignem obtinet potentiam, ad infringendum partium solidarum elaterem; maxime cum iis indulgentes, curvo, inflexoque corpore libris quasi incumbere solent; ac inter epulas veluti cum cibus litteras devorare volunt. In hac causa situm est præcipuum fundamentum, quod foeminae otio, & parco potui indulgentes, quodque viri, chartis impallescunt, ac inter libros sepulti, plerumque cruciuntur hypochondriacis pathematibus, & hæc constituent morbum litteratorum.

## §. XXIII.

Animi  
pathemata.

Nec negligenda sunt animi pathemata; ex quibus diuturnus moeror, curæ, sollicitudines præcipuam in generando morbo flatulento hypochondriaco vim obtinent. Quanta enim ipsorum sit potentia, in destruendo partium solidarum robore, ac præsertim digestionem pervertenda, quotidiana docet experientia. Ex auctorum medicorum observationibus, huc spectant binæ admodum notabiles; quarum unam HORSTIUS *Lib. IV. pag. 194.* allegat, de viro, quem diuturnus moeror ob obitum filiorum fregerat, hypochondriaco, quin tandem melancholico facto; alteram recenset PECHLINUS *obs. 31. p. 71.* de sartore, ex adversa fortuna adeo contristato, ut immanes flatulentas incideret affectiones. In primis hoc loco commemoranda est extimalis efficacia, quam venerearum cogitationum uberius proventus, & inde natales mutuans immodicum, maxime præmaturum veneris exercitium, in debilitando intestinorum ac ventriculi robore exferunt: unde subortum morbum hypochondriacum sæpius vidi.

## §. XXIV.

Frequentissime non minus hoc morbo conflictantur, qui ex prægressis morbis, præsertim si incongruis medicamentis, veluti adstringentibus, opiatibus, narcoticis, improvide fuerint tractati, aut quæ ex difficiliore partu, male transacto puerperio imbecilla retinere corpora: in hisce enim valde languidus est ventriculi, ac intestinorum tonus, qui ab errore diætetico, aut animi affectu graviore facillime prorsus destruitur. Tali ratione sæpiissime mihi adnotare licuit, homines colicis torminosis, diarrhoea, dysenteria correptos, & non remota materiali causa, crassissimis adstringentibus, tractatos, sensim in molestissimas flatulentas ac hypochondriacas incidisse affectiones. Idem malum a gonorrhoea, fluoreque albo, præmature ac pestifero illo magisterio ac saccharo saturni cohibitis subortum, plus simplici vice adnotavi; talemque casum CONSULT. ac RESPONSIS MEIS MEDIC. *Tom. II. Sect. III. cas. 99.* inferui. Et quid est frequentius, quam ex febrium intermittentium inopportuna suppressione, aut improvido corticis Peruviani in ipsis, maxime si subjecta spissis humoribus prædita, vitæ sedentariæ addicta, spasmiisque primarum viarum obnoxia fuerint, usu, hypochondriacam generari passionem: quam ex febre quartana subortam recenset HORSTIUS *Lib. 10. obs. 28. pag. 189.* & ego ex tertiana natam haud raro vidi. Nec denique infrequens est, foeminas ex difficili partu, ac male administrato puerperio evadere hypochondriacas. Et, ut uno verbo dicam, quicumque morbi, quæcunque curationes, & quæcunque causæ, motum ventriculi ac intestinorum peristalticum lædere valent, ac destruere, inter causas mali hypochondriaci summò jure collocari merentur; ex quibus adhuc commemoranda sunt purgantia, ac fortiora emetica, repetito propinata: præsertim aloetica, & improvidus nimiusque pilularum, quæ aloem fovent, usus; quibus humores ad anum

Prægressi morbi.



invitantur, exituque ob deficientem dispositionem denegato, ibidem stagnant.

## §. XXV.

Mali  
hypo-  
chon-  
driaci  
diffe-  
rentia.

Supereſt, ut paucis mali noſtri flatulenti, differentiam ab aliis quibusdam morbis, ne cum iis confundatur, atque tum prognofin ſubnectamus. Quodnam diſcrimen hoc, & morbum hyſtericum intercedat, priori Capite ſatis monſtratum eſt. Sed diximus ſupra, in noſtro malo inverſum ſimul eſſe motum inteſtinorum perſtalticum: quæ inverſio, cum adhuc quorundam morborum cauſſa ſit; videndum utique, quæ hos intercedat differentia. Sic inverſum deprehendimus motum perſtalticum in vomitu, & paſſione iliaca: ſed in vomitu hæc inverſio incipit a pyloro, aut forſan inteſtino duodeno, & per ventriculum, atque gulam ad fauces uſque propagatur; in iliaca vero paſſione vehementiſſimo ſpſmo, quin convulſione motus univerſi canalis inteſtinalis ac ventriculi, a Sphinctere ani uſque ad oriſcium œſophagi invertitur, cum ſubſequentē demum vomitu ſtercoreo. Verum res aliter ſe habet in malo hypochondriaco: namque inverſio motus illius vermicularis non niſi certa inteſtinorum loca occupat, & ſpatia relinquit libera, quæ ſedem præbent flatulentis vaporibus. Hinc adparet ratio murmurum, ac borborygmore, ſatis magno ſtrepitu in abdomine circumactorum; atque flatuum per omnes abdominis oras, ſuſum, deorſumque, & ad latera ruentium, matutino potiſſimum tempore, vel etiam poſt graves mentis deſatigationes, nullo inſequentē ventris erepitu, vel alvi dejectione favientium. Scilicet mox certis in locis incluſi veluti, ac incarcerati ſunt hi vapores, mox accedentibus ſpſmſ ſummo impetu ad alia devolvuntur, & hinc tantum ſonitum, rugitumque edunt.

## §. XXVI.

Discrepat porro paſſio noſtra a Colicâ, & hæc ſæpiſſime illi ſupervenit.

Namque ſicuti illa eſt morbus longiſſimus, qui ſervata interdum accuratiſſima diætâ invadit; ita colica brevior & magis tranſitoria eſt affectio, quæ ex vitio alimentorum plerumque provenit, & acutiſſimis inteſtinorum torminibus, ac pertinaci alvi conſtipatione ſeſe exſerit, atque hac ſoluta protinus quieſcit; dum in flatulento malo longe plura ac graviora juncta ſunt ſymptomata. Hoc porro probe diſtingui meretur a nephritide calculoſa; licet enim ſæpenumero dolores calculum mentientes, habeat comites; tamen nulla calculorum excretio ſequitur; & ſi forſan in urina cernatur ſabulum, hoc demum poſt diuturnam moram, tanquam ſcorbuticæ dyſcræſiæ ſoboles, ad matulæ fundum ſecedit. Contra vero nephritis calculoſa, urinam oſtendit, mox poſt miſtionem arenulas continentem, & ex calculorum excretionē cognoscitur. Nec denique ſimplex quædam flatulentia, quæ ex alimentis, coctum minus faciliter cito generatur, & ſumto carminativo ſanatur, pro hypochondriaco ſtatim habenda eſt malo: licet hujus prima rudimenta ſignificare poſſit.

3) A nephritide calculoſa.

4) A flatulentia ſimplici.

## §. XXVII.

Devolvimur tandem ad ſuppedi-  
tandam noſtri mali prognofin. Hoc  
vero recens, ac ſibi relictum plus fere  
moleſtiarum, quam repentini exitii  
habet: at inveteratum diſcillimam  
admittit curationem, & accedente  
præſertim mala medicatione, aut per-  
verſo regimine, in graviora tranſit  
ſymptomata, viſcerum obſtructiones,  
ſcirrhus, cachexiam, hydropem, hecti-  
cam, & per metaſtaſin in aſthma con-  
vulſivum, maniam ac melancholiam  
immedicabilem, polypos lethales &c.  
quale notabile exemplum recenset  
ZACHIAS L. III. c. 15. Quod ſi ſu-  
ſtentetur a ſuppreſſis menſibus, vel hæ-  
morrhoidibus; his mature vel natura,  
vel provida arte revocatis, ſæpiſſi-  
me funditus tollitur. Sed magna opus  
eſt circumſpectione, ne fluxum hæ-  
mor-

Prognosis.



morrhoidalem, qui sub ipso morbo, etiam diuturniori symptomatice fit, pro critico ac salutari habeamus: illo enim malum plane non levatur, cum ab hoc magnum redundare soleat emolumentum.

## THESES THERAPEUTICÆ.

### §. I.

Indica-  
tiones  
curato-  
riæ.

**C**uratio mali hypochondriaci recentioris, uti facilior est, ita paucis absolvitur: ubi vero illud altas jam egit radices, adeo ut humorum motus per totum corpus sit perversus ac irregularis, & solidæ nervosæque partes a tono suo prorsus fere dejectæ existant; non modo ipsæ hæ causæ sanationem admittunt difficiliorem, eamque requirunt diuturnam ac constantem; verum etiam ipsa ægrotorum, Pharmaco-mania laborantium constitutio eam reddit intricatiorem. Namque hi ob tardiores sanguinis crassi per caput circuitum, inclinant ad continuum metum atque diffidentiam, ideoque summum periculum, quin ipsam mortem semper anxii verentur, atque propterea inconstantes, mutabiles, ac impatientes multos consulunt medicos, variasque assidue appetunt medicinas, quarum farragine in deteriorem magis delabuntur statum. Medicus igitur aggressurus hanc medicationem, moneat primum, ut æger sit constans, patientisque, atque tum sequentes indicationes exsequi studeat; nimirum 1) ut amurcam flatulentam evacuet, sordesque primarum viarum acres, viscidas, biliosas, malo continuum pabulum suppeditantes, corrigat, temperet, ac sensim eliminat. 2) Spasms consopitis, inversum ventriculi ac intestinorum motum peristalticum, in naturalem reducat ordinem, eundemque languidiorem confortet, ut recta fiat ciborum concoctio, ac chylus; reliquique humores generentur laudabiles ac spirituosi. 3) Stagnantes succos discutiat, circulum sanguinis, uti per abdo-

men, ita etiam per universum corpus reddat æqualem, succosque, facilitatis per urinam ac cutim excretionibus, ab omni acrimonia depuret; 4) ac denique totum partium nervosarum systema corroboret.

### §. II.

Priori scopo, maxime in paroxysmis hypochondriacis, aut ubi symptomata præter suetudinem sunt exacerbata, uti quidem post fortiores animi affectus, errores diæteticos, vel hyemali ac autumnali tempestate contingere solet, faciendum est satis. Tum vero nullum est, quod in motu intestinorum inverso ad inferiora derivando, spasms sedandis, atque flatibus, sordibusque eliminandis præsentio rem, certio rem, ac efficacio rem virtutem præstet remedium, quam clysteres. Hi possunt concinnari ex herbis emollientibus, decocto avenæ, florum chamæmeli, summitatum millefolii, oleisque amygdalarum dulcium, anethi, chamomillæ, lini &c. additis speciebus carminativis ac discutientibus, semine anethi, carvi, inque primis cymini. Ab eorum infusione curam protinus ordiri, eosque, cum spasmi intestinorum irritum sæpe numero reddant effectum, aliquoties iterare juvabit; eo magis, si stercora indurata fuerint: quo etiam casu interne oleum amygdalarum dulcium, aut jusculum avenaceum large potare expediet. Nec negligenda sunt alvum demulcentia, ac blande laxantia, oretenus exhibenda: quæ inter omnibus palmam præripiunt infusa, ex manna, rhabarbaro, cremore tartari, addito roborandi fine, oleo de cedro concinnata. Ita RHODIUS Cent. 2. obs. 2. mali hypochondriaci curationem dato sæpius rhabarbaro, feliciter successisse refert. Præsentaneam quoque ac singularem opem ferunt Salia media thermarum, ut Epsomense, Sedlicense & Carolinum, si nonnunquam ad drachmam vel ultra cum absorbente, rhabarbaro, corticibus aurantiorum, nitro maritata ex aqua pura copiosiori propinentur. Profunt porro insigniter pas-

Priori scopo, maxime in paroxysmis satis faciunt clysteres & laxantia.



passulæ rhabarbarinæ, poma borsdorf-  
fensia, aut cocta, aut si tulerit ven-  
trculus, cruda, ac pruna laxativa,  
quæ in cassum adhibitis variis purgan-  
tibus, ægrotos, aliquoties liquata al-  
vo sublevasse, confirmat THONE-  
RUS *obs. pag. 163.* Nec incongruæ de-  
nique sunt pilulæ blandæ balsamicæ, e.  
g. pilulæ Solenandri, Cratonis, aloe-  
phanginæ, marocostinæ, tartareæ  
Schroederi, vel Becherianæ, Stahlia-  
næ, aut nostræ: interposito pulvere  
aperitivo, vel si acida saburra præsto  
est, soli cancerorum lapides, vel ma-  
gnesia alba, alvum ducere solent. His  
quoque remediis extra paroxysmum,  
alvi lubricitas conservanda, sordium-  
que generatio præpediendæ est, si per  
vices, & mox quovis octavo, mox  
quovis decimo quarto die, prout rei  
necessitas exigit, exhibeantur.

## §. III.

Quæ  
crudi-  
tates  
tempe-  
rant, &  
spas-  
mos  
sedant.

Soluta alvo, ea sit curationis inten-  
tio, ut sordes acidæ, biliosæque, quæ  
in primis viis, præsertim duodeno ho-  
spitantur, corrigamus & attempere-  
mus. Hoc scopo potimur beneficio pul-  
verum absorbentium, præcipitantium,  
antispasmodicorum, simul leniter car-  
minativorum; qui spasmos quoque de-  
mulcent, ac roborando intestina, fla-  
tus potenter evacuant. Tales ex lapi-  
dibus cancerorum, matre perlarum,  
pulvere Marchionis, nitro purificato,  
succino præparato, cinnabari, tartaro  
vitriolato, arcano duplicato, tantillo-  
que castorei &c. parari, & in aquis an-  
tispasmodicis, præsertim ea, quæ ex  
floribus chamomillæ cum cerevisia tri-  
ticea destillatur, propinari possunt.  
Longe vero efficacior eorundem erit  
virtus, si cum ipsis viginti circiter gut-  
tulæ liquoris nostri anodynæ mineralis  
exhibeantur. Præterea hæc quoque fa-  
ciunt, & sordes impuras, quæ in mas-  
sa sanguinea obversantur, per diapho-  
resin e corpore proscribunt infusa Thei-  
formia, matutino tempore in lecto  
forbillanda. Usitatissima, ex quibus  
illa componuntur, ingredientia, sunt  
herbæ melissæ, veronicæ, betonicæ,

agrimoniæ, scordii, cardui benedicti,  
summitates millefolii, flores bellidis,  
chamomillæ vulgaris, semen fœniculi,  
anifum stellatum &c.

## §. IV.

Ut porro ventriculus corroboretur,  
ejusque vis digestiva restituatur; in u-  
sum vocari possunt essentiæ balsamicæ,  
ac leniter carminativæ. Cavendum ve-  
ro, ne nimis sint spirituosæ, ac humo-  
res in orgasmos vehementiores rapiant;  
uti ab aquis vite, essentiisque stoma-  
chicis, quæ vulgo adhiberi solent, cer-  
to est metuendum. Securius effectus  
exsunt essentia corticum aurantiorum  
bene preparata, tinctura tartari, spi-  
ritus nitri dulcis, vel Elixiria ex her-  
bis, ac radicibus balsamicis, cum men-  
struo lixivioso parata, quale est illud,  
quod in Notis ad Poterium descripsi, &  
meum viscerale stomachicum; ejus  
præclara in affectibus flatulentis & hy-  
pochondriacis virtus, a longo se jam  
commendavit tempore: sed notari me-  
retur, horum usum debere esse diutur-  
num. Non minimam denique utilita-  
tem in ipsis paroxysmis hypochondria-  
cis exserunt, pediluvia temperatiora;  
quæ humorum circulo ad externas cor-  
poris partes invitando, relaxandisque  
imi ventris spasms egregie velifican-  
tur. Hæc parari possunt ex sola aqua  
fluviali, cum fursuribus triticeis, flo-  
ribusque chamemeli; nec sint nimis  
serventia, sed temperate calida; qui-  
bus pedes paullo profundius immitti  
debent.

## §. V.

His rite usurpatis, procul omni du-  
bio cessabit ac imminuetur paroxysmo-  
rum vehementia. Quum autem illi fa-  
cile revertantur, extra illos studendum  
est, ut juxta tertiam indicationem  
causæ tollantur, stagnationes humo-  
rum discutiantur, viscerum obstructio-  
nes referentur, humorumque circuitus  
per totum corpus reddatur equalis. Hoc  
nomine felici curationi viam quasi ster-  
nunt, eamque egregie secundant, san-  
guinis missiones per convenientes ve-  
næsectiones administrandæ. Eas raro  
in

Quæ  
vim  
ven-  
triculi  
dige-  
stivam  
restau-  
rant.

Tertiz-  
indica-  
tioni  
infer-  
viunt  
venæ-  
sectio-  
nes.



in superioribus corporis partibus instituere decet, ne tali ratione, motum humorum, qui per se ob stricturas imi ventris ad superiora vergit, magis alluciamus eo. Aptissima est venarum in pede incisio, ex qua pro humorum quantitate, plus vel minus cruoris detrahi oportet. Commodissime vero sanguis mittitur, vernali ac autumnali tempore circa æquinoctia; vel etiam necessitate exigente, circa solstitia, ubi solemniore sunt humorum commotiones. Eo felicius erit earum effectus, si brevi ante alvus blande ducatur, ac adhibitis pediluviiis, humores ad inferiora deriventur. Præterea, si adsit dispositio ad hæmorrhoidalem fluxum, ejusque suppressio malum foverit, singulo mense aliquot hirudines sub debita cautione, ano sunt admovendæ: quo etiam casu, pilulæ blande balsamicæ per aliquot successive dies, cum pulvere antispasmodico nitroso propinare expediet.

§. IV.

Præstantissimum hoc scopo præsidium in aquis mineralibus situm est.

Non vero ad referendas viscerum obstructions, acidos ac impuros humores attemperandos, excretiones per alvum, urinam & cutim, quin etiam sanguineas suppressas promovendas, & sanguinis circulum per totum corpus æqualem reddendum, ex toto remedium tam pharmaceuticorum, quam diæticorum apparatu, certius, præstantius, ac universalius est subsidium, quam quod ex prudenti aquarum mineralium usu recipere, benigna permittit natura. Circa earum potationem notari meretur, ne sit nimia, nec nimis diu protrahatur; quoniam tali ratione tonum ventriculi ac intestinorum magis labefactant, ac destruunt. Corpus quoque probe est præparandum, adeo, ut primarum viarum sordes removeantur, humorumque nimia moles imminuatur: siquidem ipsi quoque potationi interponenda sunt blanda laxantia, & conjungenda corporis moderata exercitatio. Inter ipsas porro hæc aquas selectus institui debet: Fœminis enim, & qui corporis sunt laxi ac spon-

giosi, & spasmis immaniter divexantur, magis proderunt thermæ, inque iis præsertim Carolinæ, aut saltem, si arriserint acidulæ, illæ debent esse calefactæ. Contra vero sanguineo phlegmaticis ac torpidioribus magis præstant acidulæ Schwalbacenses, Egranæ, Pyrmontanæ, & subjectis strictioribus, agilioribus, cholericisque proficua potius sunt acidulæ Selteranæ, Spadanæ, Tœnstadienses ac Wildungenses.

§. VII.

Præterea summum auxilium a recta <sup>victus</sup> vivendi ratione expectari debet: quæ <sup>ratio.</sup> si negligatur, omnis reliqua curatio irrita erit, atque frustranea. Ex iis aer primum seligendus est purior, ac temperatior; evitando frigidum, humidum nebulosumque & minime in tali loco dormiendo: neque tamen propterea, metuendo aeris injurias, corpus penitus ab ejus liberioris usu prohibendum est, ne justo fiat sensibilius, & ex quavis mutatione tempestatis, eaque levissima graviter lædatur. Præprimis autem omne frigus, maxime boreale, præsertim a ventriculo, lumbis, ac pedibus sedulo arcendum est; utpote a quo dictis partibus liberalius admissio, protinus inflatio ventriculi, dolor dorsi circa lumbarem regionem, & intestinorum tormina recrudescent. Porro ciborum sit rectus ac modicus usus; ex illis enim, primis officinis, a saburra, acri, biliosa repletis, nutrientia quoque sunt nocentissima; quoniam juxta HIPPOCRATIS effatum, *Sect. 2. aph. X.* impura corpora, quo magis nutriveris, eo magis læseris. Ceterum ab omnibus acidis, salitis, flatulentis, oleribus, panificiis, pomis, similagineis, calidioribus, aromatificatis &c. probe abstinendum; nec gulæ nimium, maxime in cœna indulgendum erit. Namque temperantia ab illecebris victus summum est morborum chronicorum remedium; quemadmodum rectissime veteres medicorum docuerunt, & CAROLUS PISO



PISO tract. de morbis a serosa col-  
lue pag. 241. præclare docet.

## §. VIII.

Conve-  
niens  
potus.

Magna præsertim efficacia in recto  
potus genere sita est. Onerat ventricu-  
lum; ei que infensa est omnis fere cere-  
visia; omnesque potus spirituosi, ac  
calidiores deprehenduntur noxiosissi-  
mi. Vinum verus generosum Rhena-  
num, vel Burgundiacum bonæ notæ  
cum aqua dilutum, parcissima quan-  
titate sub epulis concedatur, ad robo-  
randum stomachum; reliquo vero tem-  
pore invicem potus ordinarii seligi de-  
bent aut acidulæ Selteranæ vino nuptæ:  
aut hoc nomine præstantissimi usus  
sunt decocta, frigide potanda; quæ ex  
radice Scorzonæræ, cichorei, chinæ,  
sarsaparillæ, rasura cornu cervi, vel  
eboris, radice glyzirrhizæ, herbæ  
cardui benedicti &c. parantur: quibus  
cortices citri, vel aurantiorum addi  
debent. Subjectis sanguineo choleri-  
cis, si tulerit ventriculus, confert so-  
la aqua pura simplex quæ sanguinis or-  
gasmum egregie quoque deprimit.

## §. IX.

Motus  
corpo-  
ris.

Omnia remediorum genera in alle-  
vando malo hypochondriaco, longissi-  
me superat motus corporis; qui nun-  
quam a reliqua curatione excludendus  
est. Hoc enim sanguinis & humorum  
circulus, atque cum eo transpiratio  
saluberrima, & universum se & excre-  
tionum negotium promovetur, humo-  
res redduntur fluxiores, eorumque tran-  
situs per hepar insigniter facilitatur;  
ventriculi & intestinorum motus, cum  
digestione egregie adjuvatur. Insti-  
tuere autem illum oportet moderate,  
atque tum præcipue, ubi digestio ab-  
soluta, ac ventriculus a cibis vacuus  
est; velequitatione, vel vectione in  
rheda, vel obambulatione. Ceterum  
animi pathemata, non minus, ac  
multiplex remediorum farrago, cane-  
pejus & angue vitari debent. Et in hac  
commendata victus ratione, si alvi si-  
mul libertas conervetur, ac statæ re-  
petantur venæsectiones, non modo  
curandi rectissima via, verum etiam

felicissima methodus præservatoria sita  
est.

## §. X.

Verum mitigatis sic mali hypochon-  
driaci symptomatibus, remotis causis,  
liberisque omnium excretionum viis;  
ad præcavendas recidivas, roboratio &  
primarum viarum, & totius nervosi  
systematis adgredienda est. Tum ve-  
ro, præter continuatum Elixirii supra  
memorati balsamici visceralis, usum,  
& observatam rectam victus rationem,  
locum habent, & præstantissima sunt  
martialia: quæ stringendo leniter de-  
bilitatas fibras, pristinum robur illis  
restituunt. Hæc optime in forma liqui-  
da offeruntur, uti est tinctura martis  
tartarifata Zvvœlfferi, Ludovici; vel  
etiam limatura vel crocus martis in  
pulveribus commode exhibetur, qua-  
lis parari potest ex sæcula radicis ari,  
lapidibus cancrorum, succino, cinna-  
bati, arcano duplicato, & croco mâr-  
tis aperitivo, additis olei ligni sassa-  
fras aliquot guttulis. Non minus insi-  
gnem utilitatem præstabit cortex ca-  
scarillæ & chinæ, inter pulveres, mox  
recensitos; potest etiam alius ex radice  
pimpinellæ, ari, cort. cascarill. au-  
rant. succino, macis, semine cymi-  
ni, sale absyntii, parari, qui blanda  
balsamica virtute roborat ventriculum  
& intestina, digestionem adjuvat, &  
crudatum impedit proventum. Nec  
denique parum emolumenti sperare li-  
cet a balneis externis martialibus, ve-  
luti sunt Lauchstadiensia, Freyenvval-  
densia, ac Tœplicensia, potationi Ca-  
rolinarum subjungenda, quippe quæ  
totum corpus mirifice confortant.

## §. XI.

Nec denique silentio sunt prætermi-  
tenda externa remedia: quæ in mole-  
stis inflationibus intestinorum magnam  
vim præstant. Hæc inter multiplici e-  
doctus experientia, commendare pos-  
sum emplastrum saponatum Barbette  
camphoratum, aut antispleneticum  
Hieronymi ab Aquapendente, ad hy-  
pochondria adplicatum. Non minus  
præclarum operæ faciet pretium, bal-  
samum

Robo-  
rantia  
ex-  
plent  
quar-  
tam  
indica-  
tio-  
nem.

Exter-  
na re-  
media.



samum meum vitæ; cum binis aquæ Hungaricæ partibus commixtum; quod bis quotidie, mane pariter ac vespere ventriculo & hypochondriis est inun-  
dam .

Cautelæ, & monita practica.

§. I.

Cur mor-  
bus  
hypo-  
chon-  
driacus  
fere sit  
imme-  
dicabi-  
lis.

**N**Ullus est morbus, qui majorem ægrotanti pariter ac medenti fi-  
git crucem, quam quidem noster hy-  
pochondriaco flatulentus; fitque sæpe-  
numero utriusque culpa; ut ipsius cu-  
ratio vel diutissima sit, vel plane red-  
datur frustranea. Ægri enim varietate  
medicorum pariter ac medicaminum  
delectantur, ut opus haud raro sit, eos  
commonere de MONTANI effato, quo  
dicit: *Fuge medicos & medica-  
menta, facileque convalesces.* Deinceps  
Medicorum quoque pauci sunt, qui  
hujus delicatioris morbi genium probe  
compertum habeant; & ideo quicquid  
continent pharmacopolia, congerunt,  
ac ægro propinant damno vix reparabi-  
li. Profecto ex fonte pharmaceutico  
paucissima sunt, quæ levamen nostro  
morbo afferunt; & fortiora, genero-  
sa, atque quæ dicunt heroica, plane  
veneni instar se gerunt.

§. II.

Vomi-  
toria  
sunt  
noxia.

Ex horum numero primum se offe-  
runt vomitoria; quibus nonnunquam  
ægri, vel sibimet solis sapientes, vel  
sæpius medicorum suasu, sibimet con-  
sulere volunt, maxime, si ingentibus  
præcordiorum anxietatibus, ventricu-  
li inflationibus, nauseis molestissimis,  
vomendi conatibus, obvicatione ac  
constrictione hypochondriorum tanta,  
ut veluti fune compressa, vel pondere  
quodam infarcta videantur, atque eru-  
ctionibus atrociter conflictantur. Ne-  
que negandum est, quin in tali rerum  
statu ex leni emetico, aliquod suorum  
symptomatum levamen persentiscant.  
At vellem, ut a fortioribus stimulan-  
tibus prorsus abstineatur; solamen e-  
nim, quod adferunt, brevissimum est,

& post se trahunt graviora symptoma-  
ta. Interim non penitus prohibere li-  
cet lenissima vomitoria, ex radice Ipe-  
cacuanhæ ac lapidibus cancrorum re-  
mittente: nec reformidandi sunt illi  
vomitus, qui hypochondriacis sæpenu-  
mero sub initio potationis spasmo da-  
ta, thermarum Carolinarum eveniunt;  
continuato enim potu, & evacuato  
ex fundo duodeni mucos sponte cessant,  
& aquarum operatio melior succe-  
dit.

§. III.

Quum porro Medico nihil magis cu-  
ræ cordique esse debeat, quam ut al-  
vum conservet lubricam; caveat, ne  
acriorum fortiorumque purgantium,  
scammoniatorum, Jalappinorum &c.  
usu oleum camino addat. Illa enim in-  
testina ad graves immanesque prori-  
tant spasmos, humores valde commo-  
vent, & relinquunt majorem atoniam,  
ac contumaciorem adstrictionem. Te-  
neriores, ac sensibiliores nec salia me-  
dia magna dosi tolerant; iisque magis  
conferunt alimenta lubricantia, cly-  
steres, mannata ac rhabarbarina. Nec  
pilulæ illæ polychrestæ, balsamicæ,  
quæ aloem fovent, omnibus subjectis,  
nec nimis crebro usu conveniunt; ma-  
xime ubi non adest naturalis ad fluxum  
hæmorrhoidalem dispositio, nec im-  
minuta humorum abundantia; stimu-  
lant enim ad intestinum rectum, va-  
nosque conatus, & pertinaciorem sta-  
gnationem æque ac siccitatem causan-  
tur. Contra ubi suppressus hæmorrhoi-  
dum vel mensium fluor malum fovet,  
præstantis sunt usus, si singulo mense  
per aliquot successive dies exhibeantur:  
nec alienum erit, illis, si humorum  
orgasnum excitare videantur, pulve-  
rem nitroso præcipitantem admiscere.  
In quibusdam, quorum primæ viæ af-  
siduas fovent cruditates acidas, sæpe-  
numero soli cancrorum lapides, aut  
conchæ præparatæ, alvum movent e-  
gregie: dum nimirum cum acido ven-  
triculi coeantes, sal constituunt me-  
dium amaricans, quod leni stimulo  
intestina ad rejectionem sordium exci-  
tat.

Cautelæ  
circa  
pur-  
gantia  
ac la-  
xantia.



tat : saltem meliori cum fructu , quam ut potius motum humorum in iis lo-  
 ipsa magnesia , adhibentur ; quæ ab-  
 sente aciditate , vellicat ventriculum  
 & intestina .

## §. IV.

Circa  
 man-  
 nata  
 & cly-  
 steres .

Quidam occurrunt hypochondriaco-  
 rum , quibus mannata remedia mo-  
 vent & adaugent flatulentiam ; aut  
 etiam vomendi conatus , nauseam , ac  
 vomitus concitant . Tali in casu ab iis  
 abstinere decet , & vel rhabarbarinis ,  
 vel clysteribus succurrendum . Nec pau-  
 cæ inter scæminas præsertim reperiun-  
 tur , quibus clysteres molestias creant :  
 tum vero illos cum larga oleorum quan-  
 titate , componere juvat , & aliquoties  
 iterare , conjunctis oretenus iis , quæ  
 cuicunque pro constitutionis varietate  
 proficua videntur .

## §. V.

Circa  
 venæ-  
 sectio-  
 nem .

Venæsectio prudenter administrata ,  
 sicuti præstantissimi in hypochondriaca  
 passione usus est : ita hac ipsa nihil de-  
 prehenditur perniciosius , ubi inoppor-  
 tuno tempore locoque instituitur . Fal-  
 sum enim est , ac inconueniens , illam  
 nimis crebro ob suppositam undique  
 sanguinis spissitudinem celebrare velle .  
 Sic quidam , qui nimiam virium ja-  
 cturam patiuntur , ex justo copiosiori  
 sanguinis missione , in majorem inci-  
 dunt debilitatem . Contra quorum va-  
 sa sanguine turgent , aut ubi plane san-  
 guineæ excretiones suppressæ sunt ; iis  
 omnino largiores profunt venæsectio-  
 nes ; neque vero , quod probe obser-  
 vari meretur , nisi certis casibus in bra-  
 chiis institui debent . Eo præsertim  
 tempore ab omni refrigeratione , ac  
 victu crassiori cavere expediet ; & men-  
 tis tranquillitati sedulo studere ; ne  
 scilicet ab aere frigidiori salutaris cohi-  
 beatur perspiratio , aut victu crassiori  
 cruditates in primis viis generentur .

## §. VI.

Circa  
 hirudi-  
 nes .

Magna quoque in admovendis hiru-  
 dinibus opus est cautione ; ubi enim  
 nulla existit ad hæmorrhoidalem ex-  
 cretionem proclivitas , aut illa fiat  
 symptomatice , tantum abest , ut illam  
 appositis hirudinibus promovere liceat ,

ut potius motum humorum in iis lo-  
 cis derivare ac revellere oporteat .  
 Verum si cruenta per anum evacuatio  
 præsto fuerit , & cohibita exitum affe-  
 ctet , & dolores in osse sacro , ac inte-  
 stino recto urgeant : aut ubi colica tor-  
 minosa hæmorrhoidalis adfligit : salu-  
 berrimus sanguisugarum est usus . Sæ-  
 pius autem necesse est , ut præmittatur  
 universalis humorum per venæsectio-  
 nem inanitio : nec vana est opera , si  
 loca hæmorrhoidalia fotibus demulce-  
 antur , atque tum eo , quo natura eru-  
 ptionem hæmorrhoidalem molitur ,  
 tempore selectæ hirudines adponan-  
 tur .

## §. VII.

Circa motum corporis , ut desidera-  
 tam præstet opem , notandum est ,  
 quod sub aere sereno , ac amico insti-  
 tuti debeat , ne ab externo frigore plus  
 damni contrahamus , quam ab exerci-  
 tatione emolumenti speramus . Neque  
 sit impetuosus , sed moderatus , per  
 gradus continuatus , ad lenem usque  
 corporis incalescentiam : & probe di-  
 spiciendum , ut tum moles humorum  
 sit imminuta , ac alvus aperta , ne  
 sanguis nimium exæstuet . Nunquam  
 fiat statim a pastu : id quod imprimis  
 de equitatione ac uestione tenendum  
 est : quoniam his succussionibus flatu-  
 lentæ exacerbantur molestiæ . Com-  
 modissimum tempus est vel matuti-  
 num , haustis antea aliquot infusi cali-  
 dioris vasculis , vel vespertinum , si  
 digestio fuerit absoluta .

Circa  
 corpo-  
 ris mo-  
 tum .

## §. VIII.

De potu nihil absolute certi determi-  
 nari potest : sed quilibet explorare de-  
 bet , qualis sibi sit proficiuus . Quidam  
 ex cerevisia leviori , secundaria optime  
 habent : neque ideo ab ejus usu prohi-  
 bendi sunt . Nonnullis aqua pura fri-  
 gida , vel sola , vel cum cinamomo  
 decocta ingentem præstat utilitatem :  
 hinc nec dissuadenda est . Ubi concu-  
 rit scorbutica humorum diathesis , re-  
 purgatis primis regionibus , non mo-  
 do serum lactis , si tulerit ventriculus ,  
 insigniter confert , verum etiam ipsum  
 lac .

Circa  
 potum .



Iac cum acidulis Selteranis commixtum loco curæ adhiberi potest. De acidulis adhuc notandum probe est, quod in iis, qui spasmis vehementioribus agitantur, aut cardialgia gravi laborant, minime potari debeant frigida; quoniam frigus nervis est valde infensum. Præstat tali in casu vel thermis, vel acidulis tepidioribus uti. Inter vina denique cuncta acida, veluti Rhenanum ac Mosellanum recentia aciditatem ventriculi augent: contra vero moderatus veteris Rhenani, aut Bургundiaci, quod bonæ notæ est, aqua diluti usus concedi potest.

§. IX.

Animi pathematum, ac laborum ratio habenda. Quia nunquam fere non corrupta phantasia huic sævo morbi generi conjungitur, & non parum ejus contumaciam auget; prospiciendum est, ut omnis præscindatur occasio, quæ animi turbare queat. Principem hac ratione locum obtinent animi pathemata; quæ nisi temperentur, omnem reliquam curationem reddent frustraneam. Deinceps suadendum est confortium amœnum, & quacunque fieri possit ratione, recreandus est animus. Quare etiam triplici modo hypochondriacos solantur itinera ad thermas potissimum, aut acidulas instituta; dum nimirum exercitationi corporis, mutationi aeris, gratisque confortiis occasionem præbent, & ipsa sui virtute corporis vitiis opitulantur. E contrario dissuadendæ admodum sunt lucubrationes, ac meditationes nimia, quæ præprimis sub pastu, & brevi ab eo fiunt; quoniam certe experientia constat, digestionem ciborum a mentis diuturnis fatigationibus maxime perire prostreri. Litteratis vero, qui penitus a mentis laboribus sibi temperare, vi muneris haud possunt, prætermotum corporis, ad præpediendam flatuum ac crudorum generationem, non præstantius ulla medicina fert auxilium, quam Elixirium nostrum balsamicum, in Notis ad Poterium pag. 86. descriptum vel temperatu nostrum viscerale.

§. X.

Quando Melancholia passioni hypochondriacæ supervenerit, ita ut furibundi etiam immineant impetus, quod non raro evenit: tunc non præsentius, neque certius auxilium est, quam balnea temperate calida, ex aqua dulci paranda. Quemadmodum enim horum affectuum melancholico maniacorum fundamentum, in corporis exterioris ac inferioris spasmodica constrictione, humorumque impetuosiori ad caput raptu potissimum, situm est: ita in spasmis relaxandis & æquali humorum circulo restituendo, nihil superat vim dictorum balneorum. Conjungere etiam juvabit potum acidularum, & sanguinis missionem tam e pedibus, quam subinde ex naribus instituere.

Quid faciendum, si Melancholia accesserit.

§. XI.

Magnæ famæ, laudisque in morbis hypochondriacis sunt martialia remedia: quæ vero sicuti juste adhibita magnam utilitatem inferunt; ita nulla temporis, ac reliquarum circumstantiarum ratione habita, noxam pariunt certissimam. Quod si enim spasmodorum adhuc urgeat ferocia, viscerum præstit obstructio, alvi segnities, humorum abundantia, primarumque viarum cruditates restent; abstinendum ab eorum immoderato usu; quoniam tunc facilis est in cachexiam transitus. Verum quando remiserunt spasmi, moles sanguinis imminuta fuit, tunc excretiones liberiores efficiendo: singularem pollicentur efficaciam; sed cum sufficienti liquidorum diluentium copia offerri, simulque corporis exercitatio imperari debet. Quibus deest occasio acidulis utendi; iis proderunt juscula, ex radicibus aperientibus cum tinctura martis Zvvoelfferi, vel cydoniata, vel pomata commixta, justæ dosi & crebro usurpata.

Cautela circa martialia.



## Enarrationes morborum.

## OBSERVATIO I.

Passio  
hypo-  
chon-  
driaca  
ex sup-  
pressa  
febre  
tertia-  
na.

**V**ir sex & triginta annorum, annuo abhinc tempore incidit in febrem tertianam, quæ usu corticis chinæ sublata quidem, sed decimo quarto die reversa, quinquies hanc scenam luit, ita, ut semper dicto die recideret, semperque dicto remedio supprimeretur. Tum excepit dolor dextri hypochondrii circa costas spurias, ad sinistrum quoque latus excurrens; nec remittebat post varia remedia, etiam martialia ipsi propinata. Accedebant potius cordis palpitatio, spirandi difficultas, inclinatio ad vomitum, maxime post iram, a qua semper pessime habebat; jungebantur porro æstus, vertigo, gravitas in capite, visus obscuratio, præsertim in dextro oculo, qui quasi humore lento obsessus conspicitur, & obversantes cernit imagines. Præterea nares sanguinem quandoque stillant; dolor vehemens cum frigoris sensu, lumbos, spinamque dorsalem vexat; flatulentis plenum abdomen, quarum excretio malo infert egregium levamen: non minus artus, pedes manusque vagis tormentis distrahuntur; saliva est viscosa, ac salsa; & urina, quæ remittente paroxysmo turbida mingitur cum sedimento, sub ejus vehementia fertur alba, tenuis, & clara. Mæ tandem curæ se commisit æger; cui dedi pilulas meas balsamicas, bis quavis septimana sumendas: & sub epulis propinavi essentiam corticum aurantiorum, cum Elixirio nostro viscerali mixtum, ad quinquaginta guttas capiendum. Mane potari jussi infusum theiforme ex summitatibus millefolii, floribus chamæmeli, aniso stellato, corticibus aurantiorum, & ligno sassafras confectum; vesperi circa somni tempus ordinavi pediluvia: & crebrum corporis per equitationes motum. Paroxysmo invalescente exhibui pulve-

rem nitroso temperantem: hisque medicinis æger præsentissimum solamen invenit.

## Epicrisis.

Egregia sunt, quæ ex hac morbi historia in usum medicum trahi possunt, momenta: 1) Febres intermittentes, etiam tertianæ male tractatæ, & inopportune per adstringentia, corticemque Peruvianum suppressæ, post se trahunt malum hypochondriacum, spasmodico flatulentum. In hisce febribus enim, ob sentinam quandam acrem, acidam, biliosam, in duodeno hærentem, jam præsto sunt irregulares partium nervosarum, maxime ventriculi ac intestinorum motiones. Quando vero, non remota, quæ peccat materia, adstringentes propinantur medicinæ: augentur spasmi, noxia saburra, altius ac firmitus in viscera, ac plicas intestinorum impingitur: humorum circulus fit irregularis, hique stagnantes flatulento spasmodicum inducunt malum.

2) Data improvide sub morbi initio, nec liberis excretionum viis, nec eliminata adhuc primarum viarum saburra, martialia, adauxerunt magis partium inferiorum & abdominis spasmos. Hinc succi vitales, majori copia ad partes superiores, pectus atque caput compulsi, irritando nervosum genus, cordis palpitationes, anxietatem, spirandique difficultatem, in capite vertiginem, capitis dolorem, obnubilationem oculorum, ac cruoris e naribus stillicidium produxerunt.

3) Spasmi hypochondriaci, si fuerint recentes, convenienti medicina funditus, brevique tempore expugnari possunt: si nimirum alvum moliamur, flatus discutiamus, æqualem humorum circulum, & salutare excretionum promoteamus, ac robur intestinorum, nervosque generis confortemus. Contra vero si hæc mala, temporis vetustate, in habitum transissent: difficili-  
omni-



omnino ac diuturniori opus est medicatione; quæ vix alia via ac decenti aquarum mineralium tam interno quam externo per balnea usu obtineri poterit.

## OBSERVATIO II.

Passio  
hypo-  
con-  
driaca  
ex gra-  
vi ter-  
rore.

Generosus vir, annorum triginta, temperaturæ sanguineæ, habitusque corporis spongiosi, in aula multis corporis animique fatigationibus adfuetus, animi hilarioris, & ad melancholiam nunquam vergentis, & hætenus sanitate illibata gavissus, incidit aliquando in gravem terrorem; dum scilicet sub venatione, repente ex equo lapsus, vehementique in nucha ac scapulis dolore affectus, sibi persuadebat, exitialem capiti vel cervici illatam esse læsionem. At postquam ad se rediit, seque ab omni labe immunem sensit; venando continuavit sub aere frigidiori, atque redux, vino calidiori Rhenano copiosius indulgit. Ab eo tempore male habere cœpit, & his potissimum angebatur molestiis: languor totum corpus occupat; alvus pertinaciter obstructa, & abdomen continuis flatibus, rutibusque plenum est, vexant vertigo, dolor capitis gravativus, somnus inquietus, anxiusque turbatus insomniis; animus perpetuo angore afficitur; insignis præcordiorum urget anxietas; mane plerumque, post nauseam, ex ore eructatur lymphæ acidissima, dentes stupefaciens; & urina mingitur mox clara, mox saturata. Adhibuit multos medicos, insignemque remediorum hausit farraginem; sumpsit purgantia, martialia sicca pariter ac liquida, quin thermas quoque potavit & acidulas: neque tamen minus in dies exacerbantur symptomata, & ultra annum jam inhæserunt. Tandem nostram imploravit opem; & cum ipsum nimia humorum mole abundare viderem, primum venam in pede curavi secandam; tum crebra commendavi pediluvia; mane potandum dedi infusum aliquod theiforme; sub epulis essentiam corticum

Heff. Syst. Tom. V.

aurantiorum, & vesperi pulverem præcipitantem. Non minus bis quavis hebdomade propinavi pilulas balsamicas; & omnem aliorum remediorum usum interdixi; quibus factum est, ut ad pristinam rediret sanitatem.

## Epicrisis.

Discimus ex hoc casu, quod homines rectissime valentes, sanguinei ac valde hilaris temperamenti, sine ulla præcedente viscerum labe aut obstructione, aut sanguinis excretionē suppressa, ex solo vehementi terrore, & gravioribus diætæ erroribus, in malum hypochondriaco flatulentum repente possint incidere. Nota mihi sunt plura ejusmodi exempla, ubi homines ex sanis vegetisque protinus facti fuerunt hypochondriaci; ob nullam aliam causam, quam si post sumpta fortiora purgantia frigidum potum hauserunt, animi affectibus indulserunt, aut vino farti frigido aeri corpus commiserunt; aut ab hoc crapulis se polluerunt. Horum enim momentorum, maxime si plura simul complacentur, tanta est efficacia, ut unita vis nervorum genus, & maxime delicatissimas ventriculi ac intestinorum tunicas, insigniter lædere, earumque robur destruere valeant. Talis affectus meretur dici idiopathicus; ubi morbus, salvis humoribus pariter ac visceribus, protinus a vitio canalıs alimentaris incipit: qui congruis medicamentis sub initio facile expugnari, & in prima veluti herba suffocari potuisset. At postquam invaluit, atque labes ad solidas & fluidas partes propagata fuit: quorsum purgantia, martialia, intempestive data, aquæ minerales, non habita alvi, plethoræque ratione adhibitæ: aliaque remedia plurimum contulerunt: temporis utique beneficio opus fuit, ut blandis subsidiis atroci huic malo succurrere potuerimus.

## OBSERVATIO III.

Vir nobilis, duos ac triginta annos natus, temperamenti sanguineo

Hypo-  
chon-  
driaca

H

phleg-



passio  
diar-  
rhœa  
opiat  
suppres-  
sa.

phlegmatici, carnis spongiosæ, ac laxioris, tenerrime, & sub delicato vivendi genere educatus, alvi expeditioris, omniumque expers morborum, elapso abhinc anno, per aliquot hebdomades strenuis interfuit computationibus, multumque vini acidi Franconici ingurgitavit. Hinc alvi corripitur profluvio, quod dati a Medico pulveres opiat, quorum viginti quatuor, quavis hora unum capiendo, sumserat, mitigarunt quidem, non vero penitus suppresserunt. Incidit potius in molestias hypochondriacas; quæ ingentibus præcordiorum anxietatibus, pathematibus imi ventris spasmodicis, & flatulentis, borborygmis, inflationibus, mala digestionem, virium languore, somno inquieto, animique perturbationibus, interdum deliris sese exserebant. Consulti sunt plures medici, qui omnes hypochondriacam passionem accusantes, mox martialibus, & calidioribus stomachicis; mox volatilibus ac aromaticis illam oppugnarunt. Sed irrita erat omnis opera; continuabat alvi fluxus, horrendis stipatus doloribus, & dejectiones paucis muco, anum corroden- te permixtæ, quinquies, vel pluries quotidie urgebant, conjunctis ructibus acidissimis, & fere corrosivis. Inestabant insuper tormina intestinorum flatulenta, explosis per anum halitibus paullisper allevata: & hæc scena per binos ludebatur annos. Secata fuit in pede vena; data pilulæ Becherianæ, cum salibus aperitivis, & absorbentibus; potæ quoque acidulæ Schwalbacenses: sed malum eludebat cuncta; nisi quod a novissime dictis acidulis, aliquale, at non diu durans levamen perceperit. Sumebat potius majora incrementa; vigeat quidem appetitus, sed cibi indigesti egeruntur; atque mane pariter ac peracta concoctione post insignem anxietatem, phlogosin, & extremorum refrigerationem, eructatur lymphæ, instar aquæ fortis corrosiva: oris est assidua siccitas, bibendi desiderium: & notabile est, quod interdum circa vesperam, ubi externa

frigent, calor & sudor in dorso observetur. Ceterum scire licet, quod ab usu martialium pessime habuerit; tantam enim exinde spirandi incidit difficultatem, cum extremorum frigore, ut sæpius suffocari videretur. Postquam tandem nostræ tradiderat curæ, ano, ob insignem qui adparebat ibidem tumorem, hirudines adplicari jussimus; tum sub epulis dedimus Elixir nostrum viscerale; peracta digestionem sumendum suavisimam pulverem præcipitantem, cum cortice cascarillæ, ossibusque sepia confectam. Propinavimus insuper infusum theiforme, mane sorbendum; decoctumque conveniens pro potu ordinario; & alternis diebus pilulas antispasmodicas, ex extractis florum millefolii, chamomillæ, sagapeno, opoponace, myrrha, croco, castoreo paratas exhibuimus. Horum usus, adjunctis recta victus ratione, fontiumque Schwalbacensium potatione, cum per aliquod tempus insisteret æger, divina favente gratia insignem mali hujus allevamentum est expertus.

### Epicrisis.

Hoc morbi genus, quod est hypochondriacum cum denteria mixtum, destructum ventriculi ac intestinorum tonum, pro vera ac proxima agnoscit causam. Destructio autem illa primas origines traxit a nimia vini Franconici acidi potatione; & subinde per copiosa ac improvide data opiata majora sumsit incrementa. Omnia vero hæc non obstitissent, quo minus convenienti medicatione malum adhuc recens facillime debellari potuisset: at quum varia, atque incongrua passim remedia, maxime martialia, nimia quantitate fuerint usurpata, non potuit omnino æger cum morbo in gratiam redire: In cura, quum nimium debilitatus esset, nullam venæsectionem instituendam curavi; at, ut humores ob summam intestinorum atoniam in iis stagnantes imminuerem, & tubercula hæmorrhoidalia, quæ fie-

bant



Sunt symptomaticæ, discuterem, iussu sanguisugas adponi; atque tum præcipuam medendi curationem, ad robur intestinis ac nervoso generi restituendum direxi. Docet quoque hæc morbi historia, quod ex sola motus peristaltici intestinalis per causas externas facta destructione hoc malum fieri possit; cum multi nostri temporis sibi persuasum habeant, sanguinem in venis mesaraicis & vena portæ spissum stagnantem, & qui non exitum habet per venas hæmorrhoidales, unicam esse hujus affectus causam; sed, quod sæpius animadverti, conatus ad hæmorrhoidalem fluxum & difficilior sanguinis per hepar transitus perversum intestinorum motum peristalticum demum subsequitur.

OBSERVATIO IV.

Hypochondriaca affectio ex febre acuta ter tolerata.

Judæus quinquagenarius, temperamenti melancholici, elapsis jam quatuordecim annis, febre acuta, ter in uno anno recidente conflictatus, largissimo ferme diffudit sudore. Unde non modo omnium virium insignem passus est jacturam; verum inde in magnam ventriculi ac intestinorum incidit debilitatem. Namque ab eo tempore gravia imi ventris tormenta, atroces sub costis spuris in dextro latere dolores, crebram vertiginem, animi defectionem, visus obnubilationem, anxietatem præcordiorum, tremores & palpitationem cordis, alvi que segnitiam pati cœpit; quæ accedente ob obitum filii, gravissimo mœrore, magis invalescebant symptomata, mentisque angore, ac turbata phantasia stipabantur: atque demum cœcæ jungebantur hæmorrhoides. Contra hæc mala descendebat in balnea frigida; sed quum ex his contumaci afficeretur singultu; ad usum acidularum Schwalbacensium confugiebat; ut reliqua, quibus usus est, medicamina silentio prætermittam. Quæ cuncta, quoniam haud respondebant votis, meam tandem requisivit opem. Omnis ergo cura

fuit, ut universam sanguinis & humorum massam emendarem, chyloque blandam conciliarem spirituascentiam; atque hanc ob causam tonum ventriculi confortarem. Et huic scopo non inveni præstantius medicamen, quam Elixir meum viscerale balsamicum; sed, quod probe notandum, diutissime adhibitum. Præterea vero exactam diætæ, rerumque non naturalium observationem imperavi; ob acrimoniam primarum viarum lapides cancerorum cum aliis præcipitantibus mixtos dedi; alvo prospexi pilulis balsamicis, sanguinis molem per venæsectiones imminui; exercitationem injunxi, & denique thermarum internum pariter ac externum commendavi usum. Quibus cum diu, patienterque uteretur æger, bene valuit.

Epicrisis.

Præsens morbus ex tono ventriculi & intestinorum, totiusque nervosi generis, per febrem acutam, ter recidentem, copiosisque sudoribus stipatam destructo, suam traxit originem. Namque per hanc febrem non modo solidæ partes nimis debilitatæ fuerunt; verum per copiosos sudores fluidior & spirituosæ pars sanguinis deperdita; & reliquus cruor spissior redditus fuit. Inde ob languidiorem intestinorum tonum & motum digestio vitiata, alvi excretio turbata, ac sanguinis per hepar circuitus tardior est factus; quæ vitia, quia non tempestive fuerunt oppugnata, majora sensim ceperunt incrementa, & ob inæqualem per universum corpus humorum cursum, spasmi & distractiones ad omnes fere partes nervosas sunt propagate. In primis hæmorrhoides cœcæ, quæ tandem supervenerunt, non nisi pro symptomaticis, & ex stagnatione sanguinis in extimis vasis propullulantibus sunt declarandæ; neque adeo ad eas promovendas hirudines convenerunt. Neque etiam mirum est, quod ex balneis acidulis frigide, spasmis nondum compositis, nec præparato antea corpore, potius invaluerunt symptomata, & præ-



tertium singultus accessit: omne enim frigus nervis est infensum, & spasmodicas affectiones insigniter auget. Contra, ubi vehementia mali congruis medicinis mitigata, ac corpus probe præparatum; eadem acidulæ, quæ antea nocuerunt, præstantissimum tulerunt levamen. Neque ego, quod bona fide testari possum, in hoc longo & pertinaci malo vel mitigando vel debellando, vel graviori periculo avertendo, securius & præfentius remedium vel auxilium deprehendi, quam post convenientem aquarum mineralium & balneorum ulum in exquisito vitæ regimine, moderata diæta, motu & exercitatione corporis, & temperatioribus stomachicis, quæ virtutem intestinorum peristalticam placide roborant, flatus discutiunt, & alimentorum dissolutionem promovent.

## OBSERVATIO V.

Passio  
hypo-  
chon-  
driaca  
diutur-  
na a vi-  
ta se-  
denta-  
ria.

Vir quadragenarius, melancholicæ constitutionis, ex vita sedentaria, atque continuis & inopportunis lucubrationibus per viginti jam annos contractum patitur malum hypochondriacum: quod ipsum præcordiorum anxietatibus, pectoris & septi transversæ compressione, dolore inflativo hypochondrii sinistri, alvi obstructione contumaci, atque insigni mentis angore primum cruciavit. Accessit ante decennium hæmorrhoidalis fluor, & abhinc sæpius adparuit; nullam vero prorsus malo tulit opem; sed illud potius novis symptomatibus, nimirum cordis palpitatione, dolore capitis, cervicisque, & podagricis demum insultibus fuit adductum. Tempestate horrida existente, flantibusque potissimum ventis septemtrionalibus, cuncta mirum in modum exacerbantur: quando artus extremi, manus atque pedes, succis antea turgidi, horrent, detumescunt, vasaque disparent; certum est indicium, in proximo esse paroxysmum; quod si vero dictæ partes naturalem colorem ruboremque recuperant, protinus remittunt symptomata. Notatu quoque dignissi-

mum est, quod si dolores artus externos vexant, caput pectusque eorum immunitate gaudeant; at si dolor extrema deferit, majori sævitia pectus caputque afficiuntur. Ceterum adpetitus viget, & sæpius justo est avidior.

## Epicrisis.

Exhibet hæc observatio quedam momenta, quibus peculiaris utiq; debetur animadversio. 1.) Nimirum docemur exinde, fluxum hæmorrhoidalem non semper præservare, vel sublevare passionem hypochondriacam, vel podagricam. Enim vero si hic fluor ante malam invasionem rite successerit, & ab hujus suppressione morbus excitatus fuerit; certior spes est, fore, ut ab ejus revocatione morbus mitigetur ac sæpius tollatur. Quod si vero hæc cruenta evacuatio, in subjectis minus dispositis, ex ipsius diuturni morbi causa, symptomatice concitata fuerit, uti in præsentia casu factum est, spes salutis inde expectandæ, relinquitur sane angustissima. Interim ex hæmorrhoidibus vel cæcis, vel fluentibus, malo hypochondriaco supervenientibus, ea semper sequitur certissima conclusio, quod humorum in intestinis stagnatio nimium increverit.

2.) Attendendum quoque illud est momentum, quod Syndrome symptomatum aucta fuerit ab intemperie aeris & cæli frigida: namque in passione hypochondriaca inveterata, tanta adest generis nervosi imbecillitas, ut a quacunque vel levissima externa causa in præternaturales & irregulares conjici possit motus. Sic observamus sæpenumero, a cibo inflante, haustu vini acidi, aere horrido, vel sæpius aura tantummodo frigida, leviori animi motu, vel medicamento nimis activo, protinus recrudescere sopitos hætenus motus. Quare ea probe tenenda est cautela, ut, si causas materiales removimus, ac motus irregulares sedavimus, summo annitamur studio, quo genus nervosum rursus confortemus.

3.) Nec denique illud silentio est præ-



prætereundum, quod, spasmis ac doloribus exteriores corporis partes occupantibus, interiores ab iis sint immunes; his vero spasmis infestatis, exteriores partes, vacuitate dolorum gaudeant. Ex hoc phænomeno illud singularis usus in praxi eliciendum est, quod in ejusmodi hypochondriacis spasmis, artus externos vexantibus, cane pejus & angue vitanda sint omnia ea, quæ facultate ab exterioribus ad interiora repellendi pollent; cujus generis sunt refrigerantia, ipsum frigus, anodyna, narcotica, saturnina, vel etiam spirituosa linimenta exterius applicata; nec non interna, quæ stimulant intestina, eorumque termina inducunt, uti sunt purgantia, emetica, potus frigidus, fructus horæi &c. Contra vero profunt, quæ transpirationem augent, & constrictam cutim relaxant, ejusque spiracula patula servant.

#### OBSERVATIO VI.

**Passio** Per litteras pronuper opem meam  
**Hypo-** requisivit vir quidam litteratus, con-  
**chon-** siliarii munere fungens, annorum tri-  
**driaca** ginta septem, temperamenti choleri-  
**a diu-** co sanguinei, corporis paullo habitio-  
**urno** ris; qui juvenis sæpius, multumque  
**macro-** cruoris e naribus fundere suevit, atque  
**re orta,** ceterum sub lauta diæta, ac intercur-  
**& sup.** rentibus in vini potu excessibus, non  
**pressa** obstante insigni plethora, illibata ga-  
**per ter-** visus fuit sanitate. At per sex circiter  
**rorem** annos, post prægressum diuturnum me-  
**quarta.** rorem, accedente vita sedentaria, pas-  
**na su-** sionibus hypochondriacis affligi cepit,  
**stenta-** quarum hæ potissimæ sunt. Urgent per  
**ea.** intervalla flatulentæ imi ventris disten-  
siones, tanta ferocitate, ut accedant  
vertigines, sudores frigidi, & animus  
ad cuncta negotia reddatur torpidus, &  
anxius. Sub costis spuris in sinistro ma-  
ximè hypochondrio gravativus, mox  
tensivus sentitur dolor, qui sæpius ad  
femur totumque pedem, cum hujus  
quadam stupiditate excurrit, & cal-  
culi renalis suspicionem movet. Jun-  
guntur tinnitus, susurrusque aurium;

Hoff. Syst. Tom. V.

alvus plerumque sicca, & ciborum ap-  
petentia mox dejecta, mox avidior;  
sed a pastu male habet; atque urina  
mingitur pauca, cum crebro stimulo.  
Quatuor abhinc annis asthmate quasi  
convulsivo prehendebatur, in febrem  
quartanam desinente. Ab hac diu du-  
rante, tandem per insignem terrorem  
ob magnum urbis incendium subor-  
tum, liberabatur, & ab eo tempore cun-  
cta symptomata acerbiora sentit. In-  
primis flatus ructusque multam crucem  
figunt; artus externos sæpenumero  
spasmodicè ac fere convulsivè torquent  
agitationes, noctesque somno ideis ter-  
rificis pleno, sudoribusque copiosis sti-  
pato transiguntur. Consuluit varios  
frustra medicos, quorum hi malum hy-  
pochondriacum, illi renum vitium ac-  
cusarunt. Ego vero commendavi, ut  
venæsectiones ter quotannis celebra-  
das curaret; pro potu ordinario deco-  
cto convenienti uteretur; a pastu tin-  
cturam corticum aurantium sume-  
ret; alvum per pulverem rhabarbari-  
num servaret apertam; aurium, ac  
temporum regionem balsamo vitæ in-  
ungeret, ac denique thermas Caroli-  
nas sub debito regimine adhibe-  
ret.

#### Epicrisis.

Viri sanguinei temperamenti, ob  
nimiam sanguinis abundantiam, si nec  
convenienti detractioe per sectam ve-  
nam, nec decenti corporis motu & ab-  
stinencia eam minuunt, quam facile  
gravi & diuturno mœrore animi in  
malum hypochondriacum incidunt;  
Nihil enim est, quod tam subito vim  
ventriculi & intestinorum digestivam  
& peristalticam debilitare & deprimere  
valet, quam gravis in animo conceptus  
dolor & assidua ejus per profundas co-  
gitationes fatigatio. Canalis vero hujus  
nervosi & membranacei atoniam, pro-  
gressus contentorum languidior, humo-  
rum stagnatio, & ex hac propullulan-  
tes flatūs & borborygmi, presso pede  
sequuntur; quippe qui vim suam quam

H 3

ma-



maxime in intestino colo, quod in hypochondriis situm suum habet, ejus tunicas distrahendo, distendendoque exferunt; Flatus vero in intestinorum flexuris incarcerati cum violenter nervosas partes afficiunt, omnino reliquorum acerbiorum in dissitis partibus symptomatum & formalem & materialem, præcipuam etiam in nostro casu causam continent. Quare etiam potissima medendi intentio in eo reposita est, ut omni modo & cura deperditum intestinorum naturalem & saluberrimum motum restituamus, & in hunc scopum omnium remediorum tam diæteticorum, quam pharmaceuticorum virtutem & operationem dirigamus.

## OBSERVATIO VII.

Malum  
hypo-  
chon-  
dria-  
cum  
hære-  
dita-  
rium,  
variis  
causis  
adau-  
ctum.

Comes quidam illustrissimus, annorum quadraginta duorum, habitus corporis spongiosi, ac animi sensibilibus, hilaris, & temperamenti sanguinei, juventutis suæ annos, mobili vitæ genere ac crebris peregrinationibus, sub illibata quidem sanitate transegit; at tamen a flatulentis molestiis, utut levissimis, quas per hæreditatem a matre, iisdem passionibus misere cruciata acquisivit, nunquam prorsus immunis vixit. Verum per aliquot annos, cum vitæ genus sedentarium, crebra exandescencia, plerumque suppressa stipatum agere cœpisset, variis flatulentis ac spasmodicis affectionibus infestatus fuit. Præsertim elapso circiter anno, & quod excurrit, de spasmis in sinistra colli parte, doloribus illius lateris ardentibus, atque stupore paralytodeo, oculorum caligine, molestisque ructibus conquerebatur. Contra hæc mala tandem suavis medicorum, vena in pede sedata est, tam felici successu, ut & oculorum obscuritas, & spasmi colli, sinistrique lateris stupor remitterent; nisi quod sub aspero cœlo interdum recurrerent, & ciborum cupiditas dejecta maneret. Hanc restauraturus, Elixir stomachale adhibuit; sed cum sub hujus usu cœcæ accederent hæmorrhoides, in-

signiter ardentes; illud omisit, & hæc oleo verbasci feliciter expugnavit. Neque tamen minus vehementes ossis sacri dolores, post lapsum in illud os, exacerbati, cum spasmis hypochondriacis, graviter exercuerunt Comitum perillustrem. Usus hinc est acidulis Egranis per octodecim dies; quibus dolores hæmorrhoidales quidem sunt debellati; at hypochondriaca passio ab hinc majora cepit incrementa. Namque a levi animi & corporis motu, multo magis sternutatione, pessime habet, flatus cum sonitu, ac dolore acutissimo ab uno latere ad aliud devolvuntur, & incarcerati summam inferunt anxietatem; adeo ut novissime melancholici quid accedere videatur. In hoc rerum statu commendavi, ut ter quotannis vena in pede, vel si cœcæ forsan adparuerint hæmorrhoides, in brachio tundatur; dein sub epulis octoginta Elixirii visceralis guttæ capiantur; vesperi vero ex haustu aquæ frigida liberaliori, vel pulvis præcipitans, nitrosus, rhabarbarinus & deterisivus, vel liquor anodynus ad quindecim guttas sumatur; & externe hypochondriis emplastrum saponatum Barbette, bene camphoratum imponatur.

## Epicrisis.

Quando hypochondriaci sanguineæ constitutionis, doloribus & spasmis in capite & partibus inferioribus afficiuntur; causa non tam in catharrali defluxione, vel sero acri stagnante, sed potius in sanguine per flatus & spasmos in ventris illibi congesto, querenda est; quo casu omnino, ea quæ sanguinem ad partes inferiores derivant, & copiosiores emittunt: uti est venæ sectio in pede, plus emolumenti afferunt, quam alia interna & externa discussione feri dicata remedia, sicut præsens nos docet observatio. Secundo, quando hypochondriaci de dolore pressorio circa scrobiculum cordis, qui in dorsum usque protrahitur, cum inflatione sinistri



stri lateris, & summa anxietate oppressoria, frequentibus eructationibus, & conatibus ad vomitum conqueruntur, & per consensum in eodem maxime latere sinistro capitis partes nervosæ afficiuntur, ut in presenti casu, certum indicium est, materialem causam flatuum non solum in ventriculo, sed potissimum in duodeno hære. Quare præcipua medentis intentio esse debet, convenientibus remediis & internis & externis, quæ spasmos sedant, flatus discutiant, & naturale robur partibus restituunt, succurrere. Quidam medicorum emeticis curam aggrediuntur; sed hæc licet leniora fuerint, si continuentur, non adeo proficua deprehendi. Nam licet materiam mucidam & biliosam educendo, quodammodo levamen afferant: tamen quia motus intestinorum peristalticus, qui deorsum fieri debet, per hæc remedia, sursum invitatur, firmior convalescentiæ spes in iis minime quærenda erit.

### OBSERVATIO VIII.

Affectio hypochondriaco hysterica singularis.

Illustris matrona florentissimæ ætatis, per aliquod tempus horrendis passionibus hystericis agitabatur: quæ omnes universi corporis tam internas, quam externas partes cum atrocissimo mox dolore, mox tumore discruciant. Præsertim in pede & femore sinistro, circa os ischion dolorem sentiebat fere intolerabilem, cum motus pedis impotentia. Urgebant non minus horrenda capitis æque ac dorsi tormenta, præcordiorum anxietates, & difficultas spirandi suffocativa, vehementissimi singultus, inquietudines, vigiliæ, & artuum externorum dirissimi spasmi. Præterea de insigni in sinistro latere circa regionem lienis conquerebatur dolore, & manifesta erat sub costis illius lateris durities, ad vertebra dorsi extensa; & manu percipienda. Non minus infestant, uteri & abdominis vehementes inflationes, cum rugitibus, borborygmis, vagisque doloribus: & per pudenda flatus interdum cum

impetu erumpunt, spasmodorum, dolorumque levamen inferentes. Alvi tanta est siccitas, & constrictio, ut eam non sine magna difficultate, & crudelissimis tormentis reddere queat: fæces semper duræ, & conglobatæ instar ovorum excrementorum in podice subsistunt, nec egredi possunt, nisi prius intruso in anum digito exitus paretur: qui calloso, vel potius membranaceo præternaturali impedimento videtur occludi. Interdum quoque fit, ut simul cum excrementis filamentum quoddam membranaceum, tenue, latitudine lumbri terestris, vel pennæ minoris extra anum propellatur, cui stercore indurata, veluti vinculo alligata adherent, quod extra podicem propendens non sine magna vi extrahitur. Redduntur simul cum excrementis rotundæ quædam particulae, substantiæ membranosa, duræ, & pellucidæ instar ovorum formicarum. Cuncta, quæ materies medica suppeditat, antihysterica in hoc casu fuerunt, sed in cassum adhibita: potius præter rectam vivendi rationem, aquæ minerales, inque iis primum Sedlitzenses, tumque Carolinæ molares, spinosum hunc penitus expugnarunt affectum.

### Epicrisis.

Est quidem præsens morbus hystericus, sed cum plane singularibus hypochondriacis symptomatibus conjunctus: in quo tria præsertim momenta, notatu dignissima occurrunt. Primum est, tumor ille durus in sinistro hypochondrio circa splenis regionem: cujus sedes minime in liene, tanquam viscere ad dolores tumoresque ejusmodi plane inepto, residet: sed potius in ea coli portione, quæ circa hanc regionem flexuram patitur, collocanda est. Hoc nimirum intestinum, sicuti in tympanitide fieri solet, a flatibus mirum in modum distensum, subjacente quoque partes in tumorem ejusmodi attactu durum elevat. Alterum momentum est flatulentia uterina, quæ in hujus præ-



ternaturali constitutione facile generatur; & afficiendo nervos uterinos, mali hysterici præcipua in nostro casu causa existit. Talis notabilis casus conf. IN CONSULT. MED. Tom. II. Sect. III. Cas. 47. Tertium, cui animadversio debetur, momentum, est exclusio concrementi illius filamentosi, membranacei; quod nihil est, nisi mucus intestinorum glutinosus, ob calorem, ac siccitatem eorundem, nimium induratus; quem veteres non ignorarunt intestinorum affectum, & tale concretum sub nomine pituitæ vitreæ significarunt; quale etiam notabile exemplum in LIPSII *Epistolis* occurrit.

## OBSERVATIO IX.

*Malum hypochondriacum a crebris puerperiis.* Matrona generosa, septem & triginta annorum, victu utens moderate vinoso, nec tamen ratione ciborum, quos valde nutrientes amat, satis accurato, somnum nimis diuturnum capiens, & hinc sanguine succisque, ut ex florido vultus colore adparet, plenissima, crebros partus, eosque singulis ferme annis exclusit. His non modo valde debilitata est; verum etiam gravia a puerperiis semper retinuit incommoda, moxque vomitum cruentum, mox febrem acutam, & elapso abhinc biennio tertianam diuturnam toleravit. Præterea alvi est siccioris; quæ nullis paruit medicinis, clysteres enim prorsus nequit ferre, & suppositoria, aqua Sedlicensis lacti nupta, pilulæ balsamicæ, magnesia alba &c. non nisi momentaneum tulerunt semper levamen; mannatas vero potiunculas vomitu reddit. Acceperunt sensim hypochondriacæ affectiones: siquidem molestissimi ructus, inflationes ventriculi dolorificæ, præcordiorum compressiones, anxietates, spirandi difficultates, ani tenesmus &c. graviter ipsam extra partus periodum exercent; & junctæ vertigines, molestique aurium tinnitus, prohibent, quo minus corpus nec ambulando, nec curru vehendo exercere queat. Ceterum menses rite &

sufficienti quantitate succedunt; neque etiam minus hæmorrhoides gestationis tempore largiores, extra illud parciores, tamen regulares fluunt. Nec negliguntur artificiales sanguinis missiones; siquidem ipsi gravidæ bis vel ter plerumque tunditur vena; extra graviditatem ter quotannis, detractis semper octo uncis inciditur in pede; quoniam in brachio aperta, majorem post se trahit præcordiorum anxietatem. Postquam igitur contra hæc mala permulta adhibuit medicamina; nullo sequuto levamine; abstinuit a cunctis, & per novissimum semestre non nisi liquore meo anodyno, & Elixirio balsamico usa est, atque ex his bene habuit. Sed cum nondum omne malum debellatum sit, meum desideravit consilium, & ut præsertim alvi lubricitatem procurarem, rogavit. Commendavi ipsi clysteres oleo probe imbutos, pediluvia, item fots ex herbis & floribus emollientibus cum lacte decoctis, ad ima ventris admittendos.

## Epicrisis.

Sicuti viri, ita etiam foeminae, sanguineæ a natura complexionis, per inconveniens vitæ & victus regimen, sanguine & succis turgentes, multis & magnis morbis patent: nam accedente virium ex quacunque causa, in foeminis vero per frequentes partus & gravia puerperia dejectione, in pertinaces chronicas, cujus generis sunt hypochondriacæ & hystericae, passionnes incidunt, quas persanare non tam facile est, ut vulgo putatur.

II. Quando a constrictissima alvo, nulla fere medicina vincibili, flatus ad intestina tenuia, & maxime ad ventriculum & duodenum ascendentes, distendendo summas in disitis etiam partibus molestias efficiunt; certissime judicari potest, intestinum rectum vehementissimis spasmis a stagnante ibi & in conterminis partibus sanguine constrictum esse. Quo casu externa unguenta ex a-



xungis, maxime animalium, clysteres quoque oleosi, balnea, pediluvia, fots, & venæsectio in pede instituta præsentissimum allevamentum & auxilium afferre solent.

OBSERVATIO X.

Affe-  
Quis hy-  
poch-  
driaco  
spasmo-  
dicus  
cum sa-  
spicio-  
ne fa-  
cili.  
Vir annorum viginti octo, patre natus phthysico, juvenis sub lauta ac vinosa diata, illibata, præter levem spirationis angustiam, usus est sanitate. At cum Academicam ingressus vitam, crebris feminis profusionibus, ac nimis meditationibus, neglecto corporis motu, indulisset; male habere cœpit, atque præsertim spasmodicis circa pectus stricturis, ac tussi sicca infestatus fuit. Post hæc muneri præfectus ecclesiastico, majus malorum sensit incrementum, & sub levi corporis motu, ipsisque concionibus, tantis subito pectoris compressionibus, ad suffocationem usque, tantisque phlogosis non raro prehensus est, ut a motu pariter ac concionibus abstinere debuerit. Hisce vitiis conjugio consulturus, eodem inito, majora fere incidit; siquidem per intervalla, præter summum mentis angorem, frequentes accedebant sensuum defectiones, ac lipothymia; quas tandem adplicatione frigidissimæ nivis debellabat. Sed succedebant strepitus, tinnitusque in capite, murmura in abdomine, colli sub inspiratione, ac potus assumptione constrictiones, ac ferme strangulationes sudoresque; mox frigidi, mox calidi: interim sanguis ex vena missus, floridus atque fluidus adparebat. Medici consulti diversas fovebant sententias; quidam enim morbum pro hypochondriaco spasmodico, a viscerum obstructione, humorumque dyscrasia suborto habebant; alii vero fascinum accusabant, spasmosque ab immateriali derivabant causâ. Adhibuit ergo varia, quibus crebræ phlogoses ac commotiones sanguinis expugnabantur; at reliquis adhuc per quatuor jam annis affli-

gitur symptomatibus, quorum hæc est idea. Per intervalla, maxime ventriculo jejuno, ac sub concionibus repente corripitur spasmodicis, abdominis, ventriculi ac colli constrictionibus; sub quibus venter atque pectus, veluti fune contracta, ac pondere oppressa, magno impetu ad interiora retrahuntur, angusta fit spiratio, loquelæ interceptio; totumque corpus, sudore perfusum contremiscit. Præterea solita sub veneris exercitio deficit titillatio, unde crebrius repetitur: animus interdum redditur tristis, ac inquietus, atque cum invalescunt spasmodica symptomata. Ceterum integro gaudet appetitu, & pro potu vinis utitur, quoniam cerevisia faucium constrictionem inferre videtur.

Epicrisis.

Quam perniciofa & functionibus æque vitalibus ac animalibus infesta sint intempestiva & nimia præsertim primis adolescentiæ annis veneris exercitia, & quam maxime iis, qui vitæ sedentariæ, lucubrationibus, & profundioribus meditationibus indulgent; id toto pro dolor! die observamus. Vis enim & robur naturæ ac generis nervosita debilitatur, ut corpus inde quam facile ex levi data causâ ad omnis generis motus morbosos & anomalos proclive reddatur. Quando ejusmodi subiecta morbis acutis afficiuntur, summo nunquam non vitæ periculo sunt exposita. Ex chronicis passionibus patiuntur maxime eas, quæ ex irritatōnimiam systemate nervorum proficiuntur; cujus generis sunt epilepsia, motus convulsivi, spasmodici & arthritici vagi, quorsum etiam referri debent spasmi præcordiales strangulantes & suffocatorii, ad quos inprimis concionatores, si hypochondriaco laborant malo, sunt proclives. Hi enim quia cum impetu, vehementi vociferatione sanguinis & humorum motum ad pectus, cor & caput impellunt, non mirum est, quod præ aliis pectoris ad suffo-



locationem usque compressiones, phlogoses, sensuum defectiones ac lypothymias cum strepitu & tinnitu in capite & auribus, constrictiones faucium suffocatorias cum sudore frigido, modo calido experiantur; sanguine tamen existente satis fluido & florido; qualis per respirationem auctam sub celeriori per pulmonum vasa transitu efficitur. Ego in tali casu per longam experientiam non melius & tutius aliquod remedium lacte asinino, convenienti tempore & methodo exhibito, sufficiente motu & analeptics, balneis quoque aquæ dulcis, decenti ratione admissis me unquam deprehendisse, certa fide asseverare possum.

## OBSERVATIO XI.

**Malum hypochondriacum a sup. pressio. ne hæmorrhoid.** Persona quædam illustris, annorum quadraginta octo, temperamenti sanguinei, corporisque robusti, ac proceri, matre nata hypochondriaca, per multos jam annos quotannis fluxum hæmorrhoidalem patitur. Ob varias autem per aliquod tempus res, quæ ipsi obtigerunt, adversas, hæc excretio sensim imminutio facta, & molesto ani ardore semper stipata fuit. Accessit ergo ante septem annos dolor in pede sinistro podagricus; huncque silentem, & non amplius recrudescentem, excepit arthritidis vaga: non minus singulo vere purpuracea efflorescentia, cum catharrali affectione, ardore, ac pruritu cutis, largisque sudoribus totum corpus occupare solvit, sed & sponte sub recta vivendi ratione deficiatur. Tandem hoc novissimo anno prodiit hypochondriacum malum, sævitque symptomatibus atrocissimis. Namque primum insignis est adpetitus prostratio, ut sæpius sub ipso pastu assumpta vomitu reddere teneatur. Adfligunt insuper insignis lassitudo, anxietates præcordiorum, eorumque gravativi ac pressorii sensus, cordis potissimum occupantes scrobiculum, & ad scapula sexcurrentes, vertiginosa capitis perturbatio, tinnitus aurium, som-

nus terriculamentis plenus. Abdomen, & hypogastrica præsertim regio valde inflatur, multisque murmuribus afficitur; ventriculus & gula ingentibus stringuntur spasmis, cum aliquali deglutitionis impedimento. Hæc symptomata vespertino tempore exacerbantur; & calore capitis, manuumque præternaturali complicantur. In hoc rerum statu commendavi potationem fontium Egranorum tepesfactorum; usum Elixirii balsamici, pilularumque balsamicarum; nec non pulveris laxantis rhabarbarini. Pro potu ordinario decoctum quoddam; & ad vertiginem, auriumque tinnitum, balsamum vitæ extrinsecus inungendum suasi; nec rectum vitæ regimen, ac corporis motum negligendum, jussi. Abhinc illustri ægro post primam pilularum dosin, hæmorrhoides, cum insigni levamine fluere cœperunt; ut nullum supersit dubium, quin reliqua curatio recte instituta, malo latura sit suppetias.

## Epicrisis.

Morbum hypochondriacum & fluxum hæmorrhoidalem, sive potius dispositionem ad eum, ingentem inter se habere communicationem & conspirationem, certo certius est: Ita prorsus, ut utraque affectio sit quam maxime hæreditaria, & hæmorrhoidarii quam facile pathematibus spasmodico-flatulentis, & rursus etiam hypochondriaci irregularibus sanguinis per venas sedis commotionibus afficiantur. Nam non raro deficiens & suppressus hæmorrhoidum fluxus causam affectui hypochondriaco subministrat; non raro etiam homines, qui nunquam a natura proclives ad hunc fluxum fuerunt, spasmis & flatulentis intestinorum propter impeditiorem progressum sanguinis per venas mesaraicas & venæ portæ redditum, hæmorrhoidarii fiunt, adeo ut doloribus & spasmis circa os sacrum; hæmorrhoidibusque tam cœcis, quam fluentibus obnoxii reddantur.

De-



Deinceps quoque certæ in praxi medica est experientia, & hypochondriacos & hæmorrhoidarios ex facili fieri podagricos, arthriticos, & scorbuticos, atque silente forsitan altero affectu, ut plurimum succedere ac recrudescere alterum. In ejusmodi intricatis & complexis morbis utique optimum reconvalescentiæ signum est; si & artis & naturæ beneficio per sedis venas fluxus qui & cacochymie & plethoræ optime medetur, procurari & in ordine servari potest.

## OBSERVATIO XII.

**Melan-**  
**cholia**  
**hypo-**  
**chon-**  
**driaca**  
**heredi-**  
**taria.** Vir juvenis, viginti septem annorum, temperamenti sanguineo melancholici, parentibus melancholicis, & patre plane maniaco natus, animi sensibilioris, in prima juventute rachitide laboravit; tumque superatis, cum epilepsia variolis, anno ætatis decimo achoribus capitis infestatus fuit. His remediis mercurialibus, absque recto regimine, sublatis successit, tumor totius abdominis, maxime scroti pelucidus; laxantibus sensim sanatus. Quatuordecim annos natus, crebris masturbacionibus, semen provocare coepit, perque aliquot annos continuavit, cum insequente corporis contabescencia. Insimul ad studia nimium incubuit; & postquam semen turpi manu elicere desit, non modo crebris pollutionibus nocturnis vexatus, verum etiam tantas narium hæmorrhagias passus fuit, ut sæpius animo delinqueret. A decimo nono ætatis anno, Academiam ingressus, Bacho operam non raro dedit; mediocriter valuit; donec quinque abhinc annis sub epulis aliquando subito fieret, ut frustum cibi in faucibus obhæsisse videretur. Spongia intrudebatur gulæ; sed non modo sensus palii pharyngi infixi permanebat; verum etiam uvula prolatabatur; & post multam operam elevata, hoc reliquit incommodum, ut quoties Nicotianam sugat, vel vinum hauriat, protinus faucium ardorem

sentiat, & vel uvulæ prolapsum, vel tonsillarum intumescenciam patiatur. Posthæc vitæ genus iniit valde inordinatum; siquidem degebat in loco, multis stagnis, impuroque aere pleno; sæpiusque corpori calenti, ac fortiori motu commoto aquam frigidam ingurgitavit. Hinc febrem intermittentem incidit, valde irregularem, & mox tertianam, mox quartanam, mox quotidianam: qua tandem, ope electuarii cujusdam sanata, vanis, tristibus, ac meticulosis exerceri coepit cogitationibus. Has expugnaturus, elapso proxime anno, Jenam se contulit; sed ibidem majora incrementa cepit melancholia, cum plenaria appetitus prostratione juncta; ut omnem cum amicis consuetudinem fugere teneretur, gelidisque sæpenumero perfunderetur sudoribus. Curæ medici cujusdam se tradidit primum; a quo martialibus tractatus, cum nullum sentiret levamen; & malum, accedente ob mortem matris, mœrore magis exacerbaretur; acidulas Selteranas adhibuit, conjunctis venæsectionibus, pediluviiis, aliarumque convenientium medicinarum usu. Sed cuncta sunt frustranea; siquidem crebris sollicitatur phlogosis, humorum ad caput congestionibus, fortiori cordis palpitacione; & sub epulis præsertim insigni mentis angore adficitur. In tali rerum statu, consultus ego, primum pro potu ordinario decoctum consuevit; ad alvum ducendam, infusum rhabarbarinum; pro nervis, capiteque confortandis pulverem, ex lapidibus cancrorum, pulvere Marchionis, succino, nitro, oleo cinamomi, macisque confectum ordinavi; pediluvia quoque, & extrinsecus ad splenis regionem, emplastrum spleneticum Aquapendentis commendavi; & præter rectam diætam, longas peregrinationes, aerisque mutationes suasi.

## Epicrisis.

Multa occurrunt in hac morbi historia.



storia momenta, quæ tanquam causa remotiores, ad malum hypochondriaco melancholicam contribuerunt. Primum quidem notandum est, ægrum nostrum jure hæreditario quandam ad melancholiam obtinuisse dispositionem; quæ in tenerioribus ætatis annis in ea potissimum constitit nervosarum partium constitutione, atque debilitate, qua ad subeundos varii generis morbos proclives fuerunt. Hinc enim in prima statim infantia, digestionis, chylicationis, ac nutritionis negotium, minus rite successit; & ideo atrophica corporis consumptio, cum rachitide enata fuit. Qua percurata, restitisse tamen videtur, sanguinis ac lymphæ potissimum quædam acrimonia; quæ tandem salutari naturæ consilio, ad cutis superficiem depulsa, sub achorum forma comparuit. Recte quidem data tum fuerunt mercurialia; at cum inconueniens accesserit regimen; non fieri potuit, quin constrieta corporis superficie, impura exanthemata retrocesserint, tumoremque corporis œdematosum induxerint.

Deinceps quum tantæ nervosi generis debilitati, & per hæreditatem, & graves morbos acquisitæ, sustentatæque, accesserint crebræ manustuprationes: non sane mirum, si partes solidæ tantam ad irregulares commotiones proclivitatem obtinuerunt, ut cessantibus voluntariis feminis profusionibus, illud non modo præter voluntatem sub nocturnis ludibriis promanaverit, verum etiam ipse sanguis, ad animi usque deliquium e naribus eruperit. Tum magis adhuc fregerunt naturæ, nervosique systematis vires, errores diætetici in Academia commissi; quibus in acceptis ferendus est spasmus pharyngis, quo inter epulas, sumto forsan liberaliori vino, correptus est. Hunc, accedente improvida spongiæ in gulam intrusionem excepit tanta atonia partium, in faucibus sitarum, ut ad hunc usque diem, post potum spirituosiores, aut aliud faucium irritamentum, vel uvulæ prolapsus, vel

tonsillarum inflatio subsequantur.

Tandem ex irregulari diætâ ac vitæ regimine in febrem incidit intermittentem, admodum irregularem; quæ ope electuarii, forsanchinati suppressa, primam originem hypochondriaco ac melancholico malo præbuit. Huic subinde majus pondus ac incrementa dedit, partim improvidus martialium usus, partim diuturnus morror ex obitu matris. In hocce igitur morbi genere, ubi cuncta remedia incassum fuere propinata, præter ordinatam vivendi rationem, potum convenientem & balnea aquæ dulcis, non ullum relinquitur subsidium, quam aeris mutationes ac diuturnæ peregrinationes: quæ nisi votis respondeant, omnis fere opera ac oleum perditum est.

### OBSERVATIO XIII.

Matrona triginta annorum, temperamenti sanguineo phlegmatici, <sup>Affectus melan-</sup> elapso abhinc anno, cum ob menstrua <sup>choli-</sup> retenta se gravidam reputaret, ex <sup>co ma-</sup> mariti obitu, vehementi affecta <sup>niaco-</sup> dolore, huic nimium indulgere cœpit, <sup>hypochon-</sup> & solitudinem quæsivit. Erumpens <sup>driaco-</sup> paullo post cum magnis doloribus, <sup>cus.</sup> uterinus, sed parvus cruor, suspicionem graviditatis discutiebat; & illa ab hominum consortio fere remota, in prædio vivebat. Ibi ex improvviso fiebat, ut, prævia raucedine, & ardore faucium, in his sentiret ingens gelu, quod primum parvum spatium occupabat, sed mox per totum perçus, ad utraque hypochondria excurrebat, tandemque in pressorium, tensivumque pectoris dolorem desinebat. Sumto pulvere contra acridinem, largiori quantitate, accedebat tanta spirandi angustia, ut suffocari videretur; & tusa in utroque crurum vena, totius corporis horror, pectorisque oppletio jungebatur; noctem transigebat insomnem, altero die non nisi deliramentis prorsus impos, loquebatur. Accedens medicus deprehendebat pulsum



sum fortem, celerrimumque; urinam intense tinctam, cum sedimento furfuraceo, salibusque scorbuticis; anhelationem gravem, quæ tandem rejectione pituitæ tenacissimæ, fere purulentæ solvebatur; sermonem continuum sine ordine movebat, mox flebat, mox ridebat; alvus erat adstrictissima, somnus nullus, ciborum fastidium, scintillabant oculi; artus insigni pollebant robore, continuisque motitationibus agitabantur; & interdum in cruribus adparebant exanthemata, absq; calore præternaturali. Hæc symptomata, vespertino tempore vehementiora, alternis potissimum diebus exacerbabantur; nec vesicatoriis, camphoratis, anodynis, aliisque remediis obsecundabant. Notari quoque meretur, epidemicam hoc tempore fuisse catharralem febrem, exanthematibus plerumq; complicatam. Consultus ego creberrimum usum pulveris temperantis, ex pulvere Marchionis, antimonio diaphoretico, cornu cervi philosophice præparato, succino præparato, nitro depurato, & cinnabari confecti commendavi; & vesperi liquorem anodynum, ex haustu aquæ frigidæ sumendum suasi. Pro potu ordinavi serum lactis, & ad moliendam alvum, mannam, nitro antimoniato nuptam proposui; non minus emulsionem refrigerantes propinari, capitique epithema ex seminis cucurbitarum uncia dimidia, nucleorum persicorum drachmis binis, aquæ florum sambuci, rosarum, tiliæ, liliorum convallium, papaveris rhæados ana uncis duabus, nitri scrupulis binis, camphoræque in spiritu rosarum solutæ granis tribus, adplicari jussi. Tandem narium hæmorrhagiam, si impetuosior raptus humorum ad caput fuerit, intruso iis stylo, provocandam curavi; ac præter corporis exercitationem, balnea aquæ dulcis ordinavi, & optime habuit.

Epicrisis.

Varia sunt causæ, quæ ad ingenerandum hoc dirum contribuerunt malum; prima est menstruorum retentio, quæ forsan a vita nimis sedentaria originem traxit; & licet sponte revocata sit, parcius tamen fuit; altera debetur diuturno mœrori, ob mariti obitum inducto; & hinc inita vita sedentaria, ab hominum confortio remota; unde imi ventris spasmodicæ stricturæ, humorumque major ad caput raptus, ortum petunt. Debetur insuper animadversio febricitantibus catharrali exanthematicæ, tum temporis grassanti; quæ nostram, spasmodicis motibus obnoxiam, raucedine, fauciumque ardore id testantibus, procul dubio occupare voluit. Gelidus in œsophago sensus, non nisi ex spasmodica illius strictura fortiori, sanguinemque profundius reprimente, natales suos mutuatur; quæ per reliquum corpus, maxime pectus protensa, hujus compressiones, spirandique difficultatem induxit. Quin idem spasmodicus motus per inconsumptam venæsectionem ad totum corpus propagatus, hujus horrorem excitavit: atque sic aucta partium inferiorum, maxime abdominis strictura, humores spissi pariter ac impuri majori copia ad pectus caputque rapti, illius oppletionem, in hoc vero circulum impeditiorem effecerunt; quo tandem factum est, ut turbatis animalibus functionibus, raptus melancholico maniacus exceperit.

In tali igitur casu, non aliæ sunt mendi indicationes, quam ut relaxatis corporis exterioris spasmis, humorum effrænes motus consopiantur, & impetus a capite ad exterius & inferius corpus derivetur. Hinc ex internis prosunt temperantia, lenia anodyna, potusq; aquæ puræ vel feri lactis;

ex-



extrinsecus juvant clysteres, ac epithemata capiti adplicanda. Vix vero operæ pretium faciunt hæc medicamina, nisi accesserint balnea aquæ dulcis, quibus relaxatur constrictum corpus, succique ad inferiora derivantur. His felici cum successu, si ex prioribus malum non remittat, sed magis invaleseat, jungi potest sanguinis e naribus operæ styli ipsis intrusi facta provocatio; cui quidem interdum universalis humorum per venæsectionem præmitti debet inanitio, at quum illa in nostro casu brevi ante morbi invasionem instituta fuit; commode ipsi superfedere potuimus. Nec vero negligendus est corporis motus, quippe qui virtutem reliquarum medicinarum egregie secundat, & tali ratione malum hoc, maxime si fuerit recens, sæpe curatum vidi.

## OBSERVATIO XIV.

Passio  
hy.  
pochondriaca  
stomachica.

Vir generosus, habitus corporis spongiosi, sanguinis humorumque plenissimus, diu jam passionibus flatulentis, ac hypochondriacis, maxime in sinistro latere, cum doloribus colicis fuit discruciat. Præsertim vero per novissimos aliquot menses, cum e mobili vitæ genere, ad magis sedentarium transisset, autumnali hyemaliq; tempore, sumtis epulis, hora circiter tertia vel quarta pomeridiana, sensit molestum & pressorium in cordis scrobiculo, dextroque hypochondrio dolorem, ad dorsum usque procurrentem, atque cum præcordiorum anxietate, pectorisque oppressione ac coarctatione stipatum: pedes insimul algent, vultus sanguine turget, rubetque, pulsus fertur citatior, manusque calent. Sub hoc paroxysmo vexant sæpius conatus vomendi, modo irriti, modo ipsi vomitus, materiam saporis acidissimi, dentes stupefacientem, faucesque arrodentem, licet pariori quantitate eructantes. Levatur malum ructibus copiose explosis, atque sudore, circa vespertinum tempus erumpente pror-

sus solvitur. Eo gravius autem, & frequentius torquet, si æger cibus leguminosis, flatulentis, piscibusque marinis avidius indulserit. Ceterum vires languent, corpus emacrescit, & alvus nunquam sponte suo fungitur officio.

Requisiti medici pugnarunt elixiriis, stomachicis, volatilibus, purgantibus &c. sed frustra, magisque malum exacerbabant. Ego vero, perspecta penitus morbi causa atque sede, pulveres acrimoniam humorum temperantes, leniterque laxantes, ex lapidibus cancrorum, radice ari, croco martis subtilissimo, rhabarbaro, tartaro vitriolato, cinnabari, semineque cymini confectos ordinavi. Præterea, ut abstineret, ab omnibus flatulentis, ac leguminosis cibus, atque vini Rhenani potu, cui hæctenus adlueverat, iussi; cœna quoque parciori uteretur, corpusque sedulo moveret, imperavi. Tum thermas Carolinas commendavi; quibus aliquoties, sub recto regimine usurpatis, optime valere cœpit.

## Epicrisis.

Hæc affectionis hypochondriacæ species, quæ ab antiquis medicorum ad cardialgiam referri solet; nec raro nostris temporibus, sequioris potissimum sexus personis familiaris deprehenditur, commode stomachica adpellari potest. Ego quidem illius sedem, in intestino duodeno collocandam esse cenfeo; cujus tonus atque naturale robur, si fuerit dejectum, facillime in eo stagnat massa alimentorum, in ventriculo minus recte digestorum, & accedente prave bilioso pariter ac pancreatico succo, acriorem subit fermentationem, vaporumque elevationem. Hi vero nimium inflando, ac distendendo ipsum duodenum, atque super hoc situm plexum magnum mesentericum, item arteriam & venam mesaraicam comprimendo, nec non orificia ventriculi, & flexuram, quæ in fine duodeni est, arrodendo, ac clauden-



dendo, omnium recensitarum mole-  
stiarum causam præbent, atque fun-  
damentum. Tam ingens vero succo-  
rum acidorum, qui observantur in hy-  
pochondriacis, proventus, non nisi  
humoribus in ventriculo ac intestino  
stagnantibus debetur; qui sæpenume-  
ro ad corrosivam accedunt naturam,  
testantibus vomitionibus. Vitioso huic  
acido in acceptis quoque ferenda est al-  
vi adstrictio; idemque bilis texturam  
corrumpens, album generat sæcum al-  
vinarum colorem. Inde porro peten-  
da est ratio, cur in tali casu purgantia  
remedia effectum suo destituantur; eo-  
rum enim vim non magis quam ab  
acidis infringi notissimum est. Ego  
vero in hisce adfectionibus ad alvum  
laxandam nihil præstantius mannatis  
passulisque rhabarbarinis, non omis-  
sis motu sufficiente, potuque humectan-  
te, apprehendi; nec minorem virtu-  
tem exserunt absorbentia alcalina,  
cumque illo  
sal quasi medium amaricans consti-  
tuunt, cujus ope vim laxantem obti-  
nent. Præterea thermæ, maxime Ca-

rolinæ, propter copiosam terram al-  
calinam, & sal, quod complectuntur,  
amaricans, omne fere curationis pun-  
ctum absolvunt. Et sane ad acidum  
absorbendum, viscidum incidendum,  
alvum laxam reddendam, cunctas ex-  
cretiones promovendas, viscerumque  
obstructionem referendam, sagaces ac  
periti medici nullam unquam medici-  
nam, hisce thermis pretiosiores inve-  
nerunt, atque judicarunt.

Atque has de passione hypochon-  
driaca allegasse sufficiat observationes:  
plures, qui cognoscere cupit, adeat  
**RESPONSA**, atque **CONSULTA-  
TIONES** nostras medicinales. Sic  
inveniet de malo hypochondriaco ex-  
empla in *Tom. II. Sect. III. Casus  
XXIX. usque ad XXXIII.* hypochon-  
driaco hysterico *Casus XXXIV. ad  
XXXIX.* hypochondriaco spasmodi-  
co flatulento *Sect. IV. casus CXLIII.  
ad CXLVI.* hypochondriaco scorbu-  
tico *Sect. IV. casus CLXX. seqq.* me-  
lancholia hypochondriaca ac hysteri-  
ca *Tom. II. Sectio III. Casus XL. ad  
XLII, casu LII, ad LIV. seqq.*



## S E C T I O II.

## D E

SPASMIS ET CONVULSIONIBUS PARTICU-  
LARIBUS; SPECIATIM

DE PALPITATIONE CORDIS, ASTHMAE SPASMODICO  
ET SUFFOCATIVO; TUSSI CONVULSIVA, SINGUL-  
TU, SPASMO ET CONVULSIONE OESOPHAGI, VO-  
MITU, CHOLERA ET DYSENTERIA, ET DE UTERI  
CONVULSIONE, ABORTU.

## C A P U T I.

## D E

## PALPITATIONE CORDIS.

## THESES PATHOLOGICÆ.

## §. I.

**E**Xpositis iis spasmodico convulsi-  
vis affectibus, qui tanquam uni-  
versales, totum nervorum genus oc-  
cupant, omnesque fere corporis fun-  
ctiones prosternunt: transeundum jam  
ad illos erit, qui certis tantummodo  
partibus inhærescunt, easque magna  
sæpenumero violentia exagitant. Hos  
inter atrox malum est cordis palpitatio,  
quam vere talem definimus, quod sit  
violenta, & perquam molesta muscoli  
cordis subsultatio, ac convulsio, sive  
e naturali sua sede dimotio, ab influxu  
liquidi tenuissimi in nervos cardiacos  
impetuosiori, & cruore justo majori  
copia in dextrum cordis ventriculum  
impulso, vel ab acrimonia, aut alia  
caussa originem petens.

Defini-  
tio pal-  
pitatio-  
nis cor-  
dis.

Differē-

tia ra-  
tione  
graduū,  
& a tre-  
more  
cordis.

## §. II.

Hanc veram esse definitionem, ex  
infra dicendis patefcet: jam vero præ-  
monere conveniet, eam esse intelli-  
gendam de palpitacione cordis vere ta-

li, i. e. quæ morbosa, valde molesta,  
& sæpius satis chronica existit; quæ  
differt a tremore cordis, atque leviori  
illius palpitacione, corporibus etiam  
sanis eveniente, citoque transitoria.  
Tremor nimirum cordis fit a fluidi ner-  
vei in eas nervosas fibras, quæ com-  
muni itinere cum vasis, maximeque  
arteriis coronariis, externam cordis  
ambiunt superficiem, vel celeriori,  
vel impeditiori per nonnullos ramos  
influxu: hinc LOWERUS *de Corde*  
*Cap. II. pag. 91.* adnotavit, quod cor  
canis, ligato octavi paris nervo, pro-  
tinus contremuerit. Inde quoque ra-  
tio patet, cur talis tremor, partim  
post graviores animi affectus, & fervi-  
diorem veneris appetentiam continge-  
re observetur; partim etiam viribus  
amissis accedere soleat, & mox animi  
deliquia prænunciet, mox febres mali-  
gnas comitetur, mox insignius sangui-  
nis profluvium sequatur, mox mori-  
bundos vexet. Datur quoque crebrior  
cordis palpitatio seu motus, qui occur-  
rit in iis, qui celeri cursu, saltatione,  
lusu pilæ, aut balneis nimium calidis  
corpus exagitarunt; vel effusiori gau-  
dio indulserunt, vel fortiori iracundia  
exarserunt; nihilque est, nisi celerior,  
atque velocior cordis & arteriarum sy-  
stole, a commotis nimium, atque ci-  
tius per cordis cava circulantibus succis  
in-



inducta. Hæc eadem celerior cordis systole, dum a pulsus duritie vacat, se se distinguit a febrili pulsu, qui hujus frequentia cum duritie juncta absolvi-  
tur. Distingui porro debet cordis palpitatio ab ea, quæ interdum, maxime in fœminis circa ultimos gestationis menses, in epigastrica abdominis sentitur regione; & nihil est, nisi artieriarum in eo loco sitarum, præcipue coeliacarum, nimia a copioso & in prompto per venas splenicæ regressu præpedito cruore, repletio, validiorque pulsatio: quæ optime sanguinis missione curatur. Tale exemplum prostat in A. N. C. Dec. I. anno VI. p. 261. De his nobis directe non sermo est; sed de ea loquimur specie, quæ ægros non raro sine evidenti, ac externa causa adoritur, & tanta cordis contractione & agitatione perficitur, ut illud etiam naturali sua sede dimoveatur; & vel ad sinistrum magis latus propellatur, vel violenter ad costas, atque sternum allidatur, tantaque vehementia præcordia elevet, ut pulsatio externa tegumenta attollat, & quandoque extra parietes percipi potuerit; testantibus FORESTO *Obs. Lib. XVII. Obs. 10.* & CHRISTOPHORO a V E I G A *Lib. III. de art. med. cap. 8.* Quin RIVINUS *de Cordis Palpitatione §. 13.* memoriæ prodidit, se in ægro cordis palpitatione laborante, in eo pectoris loco, ubi admota manus pulsationem percipiebat, maculam rubicundam; in altero callum deprehendisse.

§. III.

**Historia morbi.** In historica hujus affectus descriptione occurrunt quædam momenta, quæ merentur considerationem. Primum quidem valde obnoxia huic malo deprehendimus subiecta, quæ sunt corporis strictioris, temperamenti sanguineo melancholici, animique sensibilibioris, in terrorem maxime proclivis, ætate juniora, quæ sanguine succis turgent; horum consuetas evacuationes, siue fuerint naturales, siue artificiales suppressas, vel neglectas patiuntur; maximeque sequioris se-

*Hoff. Syst. Tom. V.*

xus personæ, quibus menstrua non rite succedunt, vel narium hæmorrhagiæ suppressæ sunt. Hinc BALLONIUS *Lib. 1. consil. pag. 519.* Uti in juvenibus, inquit, ex ephebis excedentibus, quibus debet esse frequens hæmorrhagia, si ea desit, palpitatio potest contingere; ita etiam virginibus nondum menstruatis accidere potest, recurrente ad partes superiores sanguine. Ipsa palpitatio levior vel gravior est, & per intervalla plus minus longiora invadit; mox noctu ex improvviso adoritur miseros dormientes, ut subito evigilent; mox interdum accedit, sumtisque sæpius epulis invalescit. Antecedunt interdum graves præcordiorum anxietates; sub ipso paroxysmo velox & anhela fertur spiratio; jungitur interdum tremor cordis, & quod probe notandum, pulsus artieriarum, licet sit intermittens, tamen cordis motui sæpe non respondet, sed languidus fertur ac imminutus, quin testante TIMÆO a GULDENKLEE *Epist. 23. pag. 140* prorsus non sentitus fuit in carpo. In gravi paroxysmo percipitur magna molestia in præcordiorum regione, ob septum videlicet transversum vi nervi phrenici, circa cordis sinistrum latus siti, & ab ejus palpitante motu agitati male affectum; non minus insignis corporis languor, artuumque tremor remanet.

§. IV.

Quod attinet ad ipsas mali causas & sedem: formalis causa semper est violenta cordis contractio, atque convulsio tanta, ut e sede sua dimoveatur: materialis proxima vero est quædam cruoris potissimum in dextro cordis ventriculo stagnatio, & nimia ad eum aggestio, propter quam impetuosior fluidi nervei in nervos cardiacos & fibras cordis fit influxus & earum præternaturales contractio. Quæ ut eo facilius intelligantur; operæ erit pretium, quædam de intimiori cordis structura, huc apprime facientia, præmittere.

§. V.

Atque primum ex solertissimi JO-

I HAN-

Sedes  
& caus.  
sa mali  
proxi-  
ma.

Nervo-  
rum



cardia-  
corum  
descri-  
ptio.

HANNIS MARIE LANCISII *tr.* de motu cordis, & aneurismatibus al-  
legandum duximus, quod contra plu-  
rimorum medicorum sententiam, qua  
valde exiles, & vix animadversione  
dignos cordi tribuunt nervos, hos po-  
tius insigniores ac innumeros, cordis  
musculis communicari, penitior do-  
ceat anatomia. Namque in singulo la-  
tere, dextro pariter atque sinistro quin-  
que adnotare licet nervorum paria;  
quorum primum, vagum dictum, in  
cerebro inter nates, testesque subortum,  
& in molli hujus substantia, inter ra-  
musculos carotidum arteriarum pro-  
gressum, communium cum vena cava iti-  
nere ad pericardium fertur, & sparsis  
ad auriculas, arteriasque ramulis, de-  
finit in rete nervosum, inter aortam  
ac pulmonalem arteriam, in postica  
cordis basi reperiendum. Alterum,  
quod intercostale superius vocat, eo-  
dem cum priori principio natum, & e  
capite per foramen ossis petrosi emis-  
sum, supra aortam descendit arteriam,  
inque tres divisum ramos, unum ex-  
terno cordi, reliquos duos dicto reti-  
culari communicat contextui. Ter-  
tium, quod audit vertebrale, adhuc  
intra cerebrum prope decimum nervo-  
rum par erumpens, cum arteria ver-  
tebrali, per osseam viam progreditur,  
& circa septimam colli vertebam e-  
gressum, cordi variis insinuat locis,  
tandemque in memoratum rete distri-  
buitur. Quartum, nomine intercosta-  
lis inferioris, præditum, ex spinali  
medulla inter tertiam, quartamque  
colli vertebam surgit, & missis qui-  
busdam ad auriculas & utrasque venas  
ramulis, ad formandum sæpius allega-  
tum plexum concurrat. Quintum de-  
nique, quod phrenicum vocat, ex ul-  
tima colli, primisque dorsi vertebis  
erumpens, nervos dat auriculis ac ven-  
triculis, atque eundem perreptat ner-  
vosum plexum; ex quo demum innu-  
meri rami per totam cordis feruntur  
substantiam. Hinc docemur, unde  
cordis musculo tanta vis sit, quo om-  
nium totius corporis musculorum ro-

bur longissime superat: curque, uno  
nervo ligato, cor quidem tremat, ob  
irregularem fluidi tenuissimi per reli-  
qua nervorum paria influxum; ejus ve-  
ro motus non prorsus intercipiatur?  
Præterea notari meretur, recensitorum  
nervorum tria esse paria, quæ ganglia  
formant; reliqua duo his vacare. His  
efficitur regularis, ac naturalis cordis  
motus; illis irregularis ac violentior,  
animi pathemata excipiens. Inde patet,  
cur animi affectibus tanta in alterando  
cordis motu sit potentia? Nec ignorari  
oportet, cavam venam præ reliquis va-  
sis, numerosissimam obtinere nervo-  
rum copiam: quoniam illa ad revehen-  
dum totius corporis sanguinem, magno  
opus habet robore.

## §. VI.

Adhuc notatu est dignissimum, cor  
esse musculum, seu potius congeriem  
multorum musculorum. Namq; dum  
docet Anatomes, illud ex innumeris  
fibris, columnisq; carneis constructum  
esse; eadem quoque penitior manife-  
stat, singulam fibram ex quam plurimis  
componi fibrulis; quarum quævis quum  
iterum sit congeries fibrillarum mini-  
marum, musculi nomen meretur, ma-  
xime cum singula tegatur membrana  
tenuissima, ex fibrarum nervearum,  
arteriarumq; contextu apparatus. Hinc  
sequitur, cor undique, interne pariter,  
ac externe, valde nervosum, valdeque  
sensibile esse, & ab omni, quod ipsi  
inhæret, ad contractionem posse vel-  
licari. Deinceps cor est musculus liber,  
a quatuor magnis vasis pendulus: Ergo  
a motu naturali majori ad omnes pla-  
gas rapi, eque consueta sede dimoveri  
potest. Usus cordis est, ut sanguinis  
circulum per totum corpus promoveat;  
de quo ad nostrum scopum hæc nota-  
mus. Sanguis ab omni corporis puncto,  
ope venarum primum exiliorum, mox  
capaciorum, fertur tandem in venam  
cavam, ejusque, quem prope dextram  
cordis auriculam format, sinum am-  
plum, & ex eo in dictam auriculam,  
tanquam cavum intus musculum, sub  
ejus dilatatione ingreditur: simulque  
chy-

De stru-  
ctura,  
atque  
motu  
cordis.



chylus ex subclavia, per descendentem cavam, eandem subintrat auriculam. Hæc igitur humoribus plena, ad sui contractionem sollicitatur, qua facta, cruorem cogit in dextrum cordis ventriculum, vel prorsus laxatum, vel juxta *Lancisii* mentem, in fine diastoles atque principio systoles constitutum. Ille vero cruoris mole, ob fabricam valde nervosam, stimulus valide constringitur; pellitque contentum fluidum, impedito per valvulas tricuspidales ad auriculam regressu, in pulmonalem arteriam, per pulmones undique distributam. Inde liberis undique viis, tendit ad pulmonalem venam, perque hanc iisdem modis, a sinistro cordis thalamo excipitur, & ex eo per aortam arteriam in totum corpus effunditur. Expresso e corde cruore, ejus ventriculi vacui, in situm vere naturalem, qui diastole est, se restituant; & quamprimum cruore implentur, ob mechanicam necessitatem, rursus contrahuntur. Sic alternat systole, atque diastole tam diu, quam diu vita, quæ integro humorum circulo absolvitur, perdurat.

§. VII.

Ratio  
palpi-  
tatio-  
nis cor-  
dis me-  
chani-  
ca.

Ex his patet, ad cordis motum naturalem requiri 1) justam proportionem fluidi movendi, atque solidi, ut scilicet illius ea duntaxat afferatur quantitas, quæ vi cordis naturali possit superari, 2) fluidorum temperiem, ac mixtionem naturalem, 3) cordis justum robur, & hinc sufficientem fluidi nervei, & arteriosi spirituosum influxum; 4) ductuum vasorumque sanguinem ad cordis vasa vehentium, ac revehentium rectam dispositionem, liberamque ab omni præternaturali causa cavitatem. Quæ si minus legitime se habeant, cordis motum variis modis vitiant; sed quum nobis de vera ac violenta duntaxat cordis palpitatione sermo sit: ad eam a reliquis motuum cordis vitiis distinguendam, sciendum est, ad eam perficiendam semper requiri: 1) ut cordis ventriculo dextro infensum quid, quodcunque

fuerit, inhærescat; 2) ut hinc major ac impetuosior fiat fluidi nervei ad nervos cardiacos influxus; & 3) consequenter, naturali major, ac summe violenta musculi cordis subsultatio, atque contractio insequatur, quæ sæpius atque celerrime continuata, non prius cessat, quam donec expulsum fuerit inimicum, ac remotum impedimentum; 4) ut tam violenta agitatione, cor e sede sua, quoniam liberum est, pendulumque, dimoveatur; ac 5) non raro ad sinistram maxime latere protrudatur; quoniam a dextro latere ad sinistram fit impulsus; ut 6) denique humorum per arteriarum vasa irregularis sit progressus, quin interdum plane per aliquot minuta cesset; unde in carpo pulsus percipitur plerumque intermittens, debilis, parvus, vel plane nullus, & non raro mentis junguntur deliquia.

§. VIII.

His præmissis, jam inquirendæ erunt causæ palpitationis cordis medietæ: quo fine præmittendam duximus Sectionum eorum, qui hoc morbo perierunt, historiam. Tacemus polypos, calculos, aliasque res præternaturales; in cordis, vasorumque cavis obvias; de quibus fides sit penes auctores: taceamus quoque aquam, sanguine tinctam, justo majori copia in sacculo pericardii post mortem reperiundam; cujus infra subjungemus explicationem: sed commemorabimus duntaxat; qualis reperta fuerit cordis constitutio. Sic A. N. C. dec. II. anno IX. obs. 44. referunt, aperto tali cadavere, cor mole maximum adparuisse, dextrum ventriculum dilatatum, ac sanguine nigerrimo repletum, arterias conniventes, venamque cavam ascendentem in tumorem ingentem fuisse elevatam. Idem confirmat W. I. L. L. SIUS *tr. de medicament. oper. Sect. VII. Cap. III. pag. 103.* ubi præter infarctum dextri cordis ventriculi, ac dextræ auriculæ, pulmones quoque atro, stagnante, ac extravasato cruore fuerunt infarcti, JOH. COUSIN in

Sectio  
cada-  
verum,  
cordis  
palpi-  
tatione  
extin-  
ctorum.



*Nov. asth. Hist. III.* refert, corda ad illud cordis ad vehementissimam sui  
instar bovis quadrati semet invenisse. concussione, quæ est palpitatione,

## §. IX.

*Causæ mediæ sunt polypus cordis.* Persequuntur igitur causas, quæ ad inducendam cordis palpitationem con-  
tribuunt, mediatas: eas vel intra, ac circa cor ipsum hære, vel in partibus magis remotis residereprehendimus. Ex priorum censu occurrunt primum, atque frequentissime polyposa concre-  
menta, fibrosa semper ac membrana- cea, in cordis potissimum ventriculis, ac auriculis generata, tum in venas protensa, & ex his non raro intra ar-  
terias compulsa. Ubi hæc causam præ- bent cordis palpitationi, has plerum- queprehendimus notas: a motu cor-  
poris validiori, a scalarum adscensio- ne, vel ubi sanguis levissime commo-  
vetur, protinus cordis palpitatione in- va-  
lescit; fit ingens circa præcordia an-  
xietas, cum pulsu debili, & inæquali, quandoque etiam plane intermittente; Spiritus ægre trahitur, ut suffocatio-  
nis non raro sit metus, sæpiusque ani- mi junguntur deliquia: morbus præte-  
rea diutius perseverat, nec ullis cedit medicamentis. Tale concrementum, si cordis thalamis inhærescat, pro va-  
rio, quem format situ, nunc plus, nunc minus, per cavam venam adve-  
sti admittit; hinc pro majori, mino-  
rive cruoris copia pulsus quoque nunc fortis, nunc debilis ac obscurus editur. Quando polypus ejusmodi in eo loco,  
ubi firmiter accrevit, immotus quie-  
scit; nullam observamus palpitatione-  
nem; quod si vero a loco suo avulsus, libere in cordis ventriculis fluctuet,  
hinc forte una cum sanguine in vas san-  
guiferum patulum propellatur, firmi-  
usque in illud adigatur, ita, ut plane occludatur, & hac ratione sanguinis  
transfluxus impediatur tam diu, donec istud repagulum rursus solvatur; tum non modo pulsus arteriarum plane in-  
termittit, atque silet; verum, ob-  
structis sic vasis, & continuante per-  
petuo ad dextrum cordis thalamum af-  
fluxu, stagnat cruor in hoc ventricu-  
lo, ipsum distendit, atque sic muscu-

lum cordis ad vehementissimam sui  
concussione, quæ est palpitatione,  
proritat, non prius cessantem, quam  
donec iter aliquomodo sanguini libe-  
rum restituatur.

## §. X.

Hinc in iis, qui cordis palpitatione, a polypo suborta, extinguuntur, cordis potissimum dextrum ven-  
triculum, una cum auricula, atque vena cava, in stupendam a stagnan-  
te intus cruore elevatumprehendi-  
mus molem. Notabilis hoc nomine est historia, quam de sectione cordis pal-  
pitatione, a polypo enata peremti al-  
legant. *M. N. C. dec. II. anno VI. obs. 233.* & sic se habet: Totum cor,  
quantum possibile, in sinistram pecto-  
ris cavitatem detrusum jecit, dextra  
auricula mire expansa, & spatiosa  
comparente, quippe cujus cavitas ven-  
triculo cordis, ad quem viam pandit,  
longe amplior existit. Pericardio,  
cujus membrana justo crassior fuit,  
aperto, feri libra ad minimum efflu-  
xit. Incisa hinc dextra auricula, flui-  
dus primum promanavit sanguis, por-  
tio major coagulata ibidem hæsit; sub-  
quo crus polypi cujusdam delitescen-  
bat, qui ex sero viscido, & in mas-  
sam tenacem congelato constans, me-  
diam dextri ventriculi cavitatem im-  
plebat, & auriculam transeundo, in  
arteriam pulmonicam, ejusque ramos  
exporrectis pedibus profunde decur-  
rebat; pedes simul varios intra colum-  
nas dicti ventriculi carneas inferebat,  
tenaciter ibidem adhærens. In sinistro  
ventriculo apparuit polypus latus, &  
spissus, pluribus pedibus retro colum-  
nas carneas enatus, pollicis & latitu-  
dine & crassitie; qui ventriculum e-  
gressus, per auriculam sinistram in a-  
ortam, & carotidem, ejusque ramos  
multiplicatis pedibus expandebatur  
&c. De polyporum generatione, cum  
nostri non est instituti, non agemus  
pressius: sed id duntaxat monebimus,  
quod a sanguine crasso, viscidoque  
ejusmodi particulæ in cordis dextro ca-

Polypis  
extin-  
ctorum  
anato-  
mes.



vo relinqui, ac in fibrosam tandem texturam coire possint. Hæc facilius penetrabit, qui consideraverit, in dictum cordis thalamum ferri non modo chylum, adhuc crudum, nondumque cum sanguine mixtum; verum etiam sanguinem, reliquo crassiore, parteque subtiliori ac spirituosiori orbatum; qualis est partim ille, qui a hepate per cavam ascendentem adducitur, partim e capite per cavam descendentem in cordis ventriculum dextrum revehitur. Omnes vero causæ, quæ cruorem copiosius ad præcordia cogunt, de quibus inferius tanquam palpitationis causis agetur, ad polypos generandos contribuunt. Horum, quasi hæreditariorum, cor infantis a primis ætatis annis obsidentium, illudque ad crebras palpitationes irritantium, memorabile exemplar recensent ACTA BEROL. Dec. II. Vol. VII. pag. 99.

§. XI.

Humorum  
abundantia.

Frequens porro morbi nostri causa in ipso partium fluidarum vitio querenda est, & primum quidem nititur earundem insigniori, ac vires solidorum superante mole. Quando enim humores nimia peccant abundantia, non fieri potest, quam ut tam vasa, quibus continentur, quam præsertim cordis thalamos, accedente nimirum vel fortiori eorundem commotione, vel majori ad superiora ob spasmos inferiorum raptu, prægrandi, ac modum naturalem excedente copia irruant, illos vehementer distendant, relaxent, atque tum ad contractionem palpitatoriam proritent. In tali casu vultus est floridus, ac rubicundus, vasa cruore turgent, ac pulsus fertur magnus. Hoc vitii genus a tali causa inductum in juvenibus potissimum locum habet sanguineis, qui pueruli largum e naribus fundere sueverunt cruorem; & his hæmorrhagiis cessantibus, pectoris compressiones atque molestias sentiunt. Idem quoque non raro accidere observamus illis, qui solemnibus sanguinis detractionibus adsueta; eas-

Hoff. Syst. Tom. V.

dem justo tempore non repetunt, sed neglectui habent. Hinc explicanda sunt exempla eorum, qui certis anni temporibus recurrentem cordis palpitationem sola venæsectione prævertere potuerunt. Tale de cordis palpitatione quotannis recurrente, ac tandem venæsectione præservata, exhibet ZACUTUS LUSITANUS M. P. H. Li. 2. histor. 39. pag. 251. id quod affirmat etiam STALPART VAN DER WIEL obser. rarior. Cent. 1. obs. 36. qui casum ex Galeno allegat, quod quidam juvenis per tres successive annos certo tempore palpitatione cordis vexatus, a venæsectione semper sensit levamen; quarto autem & sequentibus, tempestitiva venæsectione se præservavit ab hoc molesto malo.

§. XII.

Longe frequentius est, a sanguinis & feri viscidioris nimia congestione ad cor ejus induci palpitationem. Scien-  
Sanguinis  
crassities,  
dum enim est, spissos ac crassos humores in motu suo circulari primum omnium in hepate perturbari, ob eam, quam Cap. de malo hypochondriaco allegavimus, rationem. Tum vero in imi ventris visceribus, partibusque nerveo membranaceis stagnantes, has ad spasmodicas proritant strictiones. Constricto abdomine cruor majori copia ad præcordia cogitur, & ex vena portæ omnium aterrimus per venam cavam, in dextrum cordis thalamum pellitur, ea quantitate, ut naturalis systole ipsi propellendæ haud sufficiat. Tam crassus vero ac viscidus sanguis non raro relinquit stagnantem in corde portionem, cui expellendæ palpitans motus, ilque sæpe vehementissimus opponitur, & inde quoque prima tantum non semper polyporum ponuntur rudimenta. Hinc ratio reddi poterit cur hypochondriaci, scorbutici, atque cachectici, cordis palpitationem, tanquam gravissimum symptoma non raro experiantur: curque puellæ, ob insignem imi ventris compressionem, vestimentis huic scopo adaptatis factam, eodem facillime corripiantur



malo. Non minus hinc clarum fit, quare viri ex hæmorrhoidum suppressione, gravi hoc symptomate adfligantur, ac quare virgines cacoehymicæ a mensibus incipientibus, haudque regulariter succedentibus; nec non foeminae, tributum lunare solvere desinentes, idem incidant vitium; quo plerumque circa lunæ insigniores mutationes laborant. Hoc in casu, ubi spissi sunt vitales succi, iis qui colica vel flatulenta, vel nephritica discruciantur, familiare symptoma cordis est palpitatio: dum enim & flatus, & spasmus comprimunt distendantque imi ventris vasa, & hinc cruorem majori copia compellunt ad præcordia; facilis est ratio, inde subortæ cordis palpitatio.

## §. XIII.

A materia acris, cordi inhærescente.

Est porro non raro palpitatio causa, materia quædam subtilis, acris ac caustica; quæ non modo nervis præcordialibus ac cardiacis insidens, spirationem difficilem producit; verum etiam cum humorum massa ad cor ejusque vasa coronaria delata, fibris carneis, nerveisque adhærescens, eas graviter vellicando, ad violentos motus disponit concussorios. Sic prostant innumera exempla eorum, qui a scabie retropulsa, purpura, vel non satis ad cutim progrediente, vel plane retrocedente, aliisque exanthematibus improvide retroactis, aut ulceribus præmature consolidatis, cordis passi sunt palpitatioem: quod etiam de materia arthritica, podagricaque intus compulsa statuendum est. Quin notari meretur ille casus, quem de gravi cordis palpitatione, ex foetore pedum suppresso enata refert SIMON PAULI *in quadripart. botan. pag. 215*. Huc & illæ spectant observationes, ubi quidam ex vaporibus tetris, venenatis in hunc dirum morbum inciderunt; qualem ex fumo antimoniali in pulmones suscepto obortum adnotavit GODOFREDUS SCHULTZE *tr. de nat. tinct. bezoard. Cap. V*.

## §. XIV.

Non vero solum a dictis humorum vitiis atrox hoc malum inducitur; sed ad illud ingenerandum, sanguinis quoque defectum contribuere, pluribus compertum habemus exemplis. Sic post enormes sanguinis profusiones, si ve per uterum in abortu, aut puerperio, aut menstruis, si ve e pulmonibus per hæmoptysin, si ve ex aliis locis quadam violentia provocatæ fuerint; non modo cordis tremorem, sed veram quoque palpitatioem insequi, experientia comprobat. Quemadmodum enim ad systolem & diastolem rite perficiendam, liquidi nervei non minus, ac sanguinis arteriosi debitus in cor, & ejus vasa requiritur influxus: ita hoc in dictis casibus imminuto, cordis quoque vigor labefactatur, nec sufficiens fit ejus contractio. Hinc ab irruente sanguine successive grumi & coagula in cordis cavis relinquuntur, quæ tandem cumulata, non modo impediunt regularem sanguinis transitum, lypothymiarum hisce adfectibus plerumque junctarum causam; verum etiam ad eam commotionem ipsum cor proritant, quæ audit palpitatio, sed in hoc casu levior apprehenditur; & simul crebrior.

Ex defectu sanguinis.

## §. XV.

Inter causas nostri mali omnino præcipuum sibi vindicant locum immoderationes animi perturbationes; quarum modus agendi varius; quædam ita sunt comparatæ, ut vel humores celerius commoveant, & a partibus interioribus ad corporis superficiem compellant, veluti ira est, atque gaudium; vel eosdem magis ad interiora restringant, constrictis exterioribus, quemadmodum de metu, terrore, tristitia &c. observamus. Hac ratione & iracundia, & effusum gaudium, rarissime veram inducent cordis palpitatioem; consentiente præter experientiam GABELCOVERO *observat. Cent. IV. Curat. 84*. Sed potius leviozem illum palpitantem motum excitant, quem §. II. non nisi frequen-

Ab animi affectibus.



quentiori cordis & arteriarum systole atque diastole absolvi, & a vera palpitatione probe distinguendum esse docuimus. Metus frequentius efficit cordis tremorem; eundem vero causam palpitationis esse posse, testatur BAGLIVUS *prax. medic. Lib. II. pag. 229.* Omnium autem maxime terrorem ad provocandum hoc malum esse potentissimum, quotidiana confirmat experientia. Ratio in eo videtur posita: dum terroris ea vis est, ut constrictis externis corporis partibus, succos vitales ad interiora magis compellat; ruunt hi majori copia ad cordis machinam; hancque, ultra naturalis dilatationis sphaeram distensam, ad praternaturalem cogunt resistantiam, quæ gignit palpitationem. Non semel quoque observavi, viros ac juvenes hypochondriacos, & qui debiliori nervorum genere sunt instructi, ex acrioribus meditationibus, prævia extremorum refrigeratione, atque vertigine, in cordis palpitationem incidere; quam etiam foeminæ hystericæ ab odore suaveolentium patiuntur.

§. XVI.

**Causæ remotæ sunt cibi flatu-lenti.** Ex causis mali nostri remotioribus huc spectant cibi flatulenti, ab iis præsertim comesti, qui languidam obtinuerunt digestionem, veluti hypochondriaci sunt. Cibi nimirum tales leguminosi, ac oleracei mucosum in ventriculo ac intestinis relinquunt lentorem, ex quo resoluti vapores, non modo intestina distendunt, atque sic liberum sanguinis per abdominis vasa circulum perturbant; verum maxime ventriculum expandendo, debitum septi transversi descensum, cruorisque per pulmones cursum præpediunt, & illius expeditum per cordis cava remorantur iter. Sic de se ipso testatur MALPIGHIUS in *Epistola ad BORCELLUM*, se ab adsumentis leguminibus, palpitationes sæpe molestissimas fuisse expertum. Hinc quoque ratio in promptu erit, cur hypochondriaci a pastu potissimum, palpitationem

cordis patiantur: & quare permulti veterum causam hujus adfectus in flatulentia collocaverint; adeo ut HIPPOCRATES *Lib. II. epid. §. V.* dixerit, quod in omni cordis palpitatione fit flatulentia. Nec negligendæ in classe causarum occasionalium sunt imi ventris, pedum, tibiæque stricturæ, ac vestium justo arctior applicatio: quippe quæ humores ad superiora magis compellendo, in dispositis ad producendum malum plurimum contribuant, quemadmodum GABELCOVERUS *Cent. III. Curat. 114. p. 161.* confirmat; & Forestus notabilem allegat casum, ubi quis propter tibiæ arctius ligatas, dum somno meridiano sedaret, cordis palpitatione prehebatur; solutis vero iis, placide ac suavius quievit. Et denique in iis, qui a nimia sanguinis crassitie, vel polyposis concrementis, cordis palpitationi obnoxii sunt, quam plurimum ad eam revocandam contribuant omnes humorum commotiones, siue flant per fortiora animi pathemata, siue per cibos potusque calidiores, quale exemplum de cibis nimis aromatibus conditis allegant M. N. C. *Dec. I. anno III obs. 134.* siue denique per vehementiorem corporis motum, qui illis subiectis semper observatur noxius.

Stricturæ par-tium inferiorum.

Cūcta, quæ commovent humores.

§. XVII.

Prius quam relinquamus pathologicam nostri mali considerationem, brevibus adhuc tradendum est, quid de aqua pericardii statuamus. Constat nimirum per plures observationes, quod in iis, qui cordis palpitatione extincti perierunt, aqua in pericardio copiosius collecta adparuerit: id quod variis exemplis confirmant CAROLUS PISO *de morbis a serosa colluvie pag. 170.* OLAUS BORICHIUS in *Act. Hassniens. pag. 173.* HOLLERIUS in *Schol. Lib. I. cap. 39.* TULPIUS *Lib. IV. cap. XX.* FERNELIUS *Lib. V. pathol. cap. XII.* Multi dictam pericardii aquam pro causa palpitationis venditarunt; at nos potius cum

De aqua pericardii.



LOWERO *tr. de Corde Cap. II. pag. 104.* statuimus, quod sit effectus palpitationis. Namque sicuti multis observationibus compertum habemus, quod sanguis, si in loco quodam stagnaverit, serosam subtiliorem portionem dimittat, uti in cerebro, intestinis, utero, vesica &c. deprehendimus: ita non minus persuasum habemus, quod a cruore in thalamis ac auriculis cordis stagnante, & summa violentia conquassato, subtilior pars secedat, & in saccum pericardii extravasetur: unde non hujus modo, verum etiam pectoris hydropem generari, ac supervenire cordis palpitationi observamus.

## §. XVIII.

**Prognosis.** Quod prognosin hujus mali attinet; insignis est locus, quem GALENUS *lib. de locis affectis* habet, dum dicit: qui in juvenili vel declinante ætate corripuntur gravi cordis palpitatione; raro ad senectutem perveniunt, sed citius moriuntur. Et AVICENNA *fen. 3. primi l. doct. 5. cap. 1.* cavendum maximopere, ne morte subita intercipiatur, qui sic affectus fuerit; his verbis commonuit: Ille, inquit, cui tremor cordis assidue contigerit, de se ipso sit sollicitus, ne subita intercipiatur morte, quod symptoma hujusmodi, cum principis partis proprium sit, in syncopen, & inde in mortem facile transmutetur; sicut idem auctor *fen. XI. tertii tr. Cap. II.* conceptis verbis affirmavit. Neque profecto parvi habendus ac negligendus est hic affectus, a quacunque demum suboriatur causa: namque non raro contingit, ut ille, si cor ultra sphaeram elasticitatis adeo distendatur, ut se constringi nequeat, in lethalem suffocationem, ac syncopen terminetur. Et facilis quoque illius in periculosam hæmoptysin, phtysin, cachexiam, asthma convulsivum, hydropem pectoris & anasarcam est transitus. Metuendum maxime de infelici est exitu, si palpitatione fuerit frequens, si magna, si cum anhelitu, animi deliquis, &

pulsus inæqualitate contingit. Generationem & in prognosi rite suppeditanda, & curatione mali feliciter absolvenda, adnotare oportet medicum, num cordis palpitatione sit idiopathica, aut, quæ causam intra ipsum cor, aut saltem vasa ipsi vicina agnoscit; anne symptomatice, quæ morbis spasmodicis, convulsivis, hysteris, ac hypochondriacis tanquam molestum jungitur symptoma. Illa curari fere nequit; hæc, sublato primario morbo prorsus cessat.

## C U R A T I O.

## §. I.

**C**uratio affectus nostri convulsivi, quo hic magis inveteravit, eo difficilius redditur: namque cordis fibræ, si tam frequenter præter naturam vellicantur, ac distenduntur, tandem adeo debilitantur, ut morbus fiat habitualis, & a levissima resuscitetur causa. Quare si in ullo, certe in hoc morbo, principiis obstare oportet; quoniam non nisi nascenti morbo, perfecta curatio, ipsi vero invalescenti, præsertim idiopathico, palliativa duntaxat superest medela. Ipsa vero medendi ratio hæc est: 1) adniti oportet, ut nimia commotio partium fibrosarum & nervearum cordis ac vasorum apte sopiatur. 2) Sanguinis stasis circa cor & pulmones impediri debet; ejus adfluxum revocando, ac circulum reddendo liberiores. 3) Causæ, quæ malum excitant, extra paroxysmum sunt removendæ.

## §. II.

Quod paroxysmos attinet, dispiendum est rationali Medico, quæ occasionalis causa ad illum inducendum contribuerit. Si videlicet nimiam humorum ebullitionem subesse cognoverit; præstantissima sunt remedia, quæ temperant illam, simulque vi pollent, præternaturalem partium solidarum motum compescendi. Hoc nomine præclari usus sunt pulveres antispasmodici,

Indicationes curatorie.

Quidnam in paroxysmo sit faciendum.



dici, qui ex lapidibus cancerorum, antimonio diaphoretico, nitro depurato, cinnabari, succino, dente hippopotami philosophice præparato, C. C. sine igne & tantillo extracti castorei apparentur: nec non pulvis noster præcipitans vel solus, vel liquori anodyno minerali nuptus, & ex haustu aquæ frigidæ, quæ in temperando humorum orgasmo, excellentem obtinet virtutem, liberaliori sumtus. Ubi flatulentia intestinorum sustentat malum, alvus adstricta, cutis arida, pedesque frigidi sunt: præter dicta interna temperantia, externis quoque dimicare convenit: & in primis flatuum per inferiora subductioni, alvinæque excretioni succurrendum per clysteres oleosos, leniter carminativos. Pedes quoque in aquam tepidam immittere oportet: sed ea cautione, ut si iusto frigidiores fuerint, prius pannis calidioribus probe fricentur. Quandoque nimix hæmorrhagiæ præcesserunt, virumque insignis prostratio cum crebris animi deliquiis præsto est: temperantibus jungenda sunt analeptica: veluti mixturæ, quæ ex aquis liliorum convallium, mellissæ Turcicæ, cinamomi sine vino, ceraforum nigrorum, pulvere Marchionis, lapidum cancerorum, liquore anodyno, & syrupo quodam analeptico, v. g. florum quatuor cordial. conficiuntur. Et ipsa essentia Ambraë egregia virtute & analeptica, & roborante in hoc casu pollet.

§. III.

Externa in paroxysmis adhibenda.

Neque vere spernendus est externorum remediorum usus: ex quorum numero sunt fofus sacculique discutientes, & balsamici, ad præcordia & cordis scrobiculum adplicandi, qui ex roremarino, mentha, melissa, floribus chamomillæ Romanæ aliisque speciebus, aqua melissæ vinosa, sive l'eau de carme irroratis adparari possunt. FORESTUS melissam viridem cum borragine calefactam, & cum aqua rosacea, ac momento aceti admotam laudare satis nequit: cui scopo etiam balsamum nostrum vitæ, præcordiis

inundatum faciet satis. Denique si sanguis abundaverit, & per satis longum tempus ex vena haud detractus fuerit: nec ex commendatis remediis paroxysmus cedere velit: nihil fere superest, quam ut vena vel in pede, vel etiam, si reliquæ permiserint circumstantiæ, in superioribus corporis partibus tundatur, & sufficiens cruoris detrahatur quantitas. Sic enim liberantur præcordia a nimia humorum mole: ac æquilibrium inter solidas, fluidasque restituitur partes. Hinc HORSTIUS *Lib. III. Obs. XVI.* venæsectionem in ipso paroxysmo ad miraculum profuisse testatur. Quidam facta lateris dextri ad terram inclinatione, paroxysmos levare ac tollere possunt: quales casus ipse vidi aliquoties, & unum in A. N. C. *dec. I. anno II.* relatum legi. Neque obscura est ratio: hoc enim incurvato corporis situ, celerior sanguinis per venam cavam descendentem ad cor affluxus paululum intercipitur.

§. IV.

Extra paroxysmos omnis curandi intentio eo est dirigenda, ut causæ malum foventes tollantur, vel saltem imminuantur. Quo quidem fine impigre invigilandum est, ut quæcunque subsit causa, excepta, quæ defectu sanguinis nititur, humorum incrementum studiose præcaveatur. Sic enim succurrimus plenitudini, ac spissitudini illorum: sic quoque polyporum, si præsto fuerint, retardamus augmentum. Et sane præstantissimum, cuius ope hoc sine potiri licet, remedium est decenter instituta venæsectio: quæ sicuti in ipso paroxysmo insignem fert opem, ita quoque extra illum, ad præcavendas novas accessiones, illustrem exferit virtutem. Hinc GALENUS *Lib. V. de locis affectis Cap. II.* adfirmare non dubitat, omnes palpitatione cordis laborantes, venæsectione, & alimentis, ac medicamentis attenuantibus curatos, fuisse ac liberatos. Consentiant hac in re ANTONIUS ab ALTOMARI

De venæsectionis usu.

Cap.



Cap. XLV. CAPIVACIUS Lib. II. Pract. cap. VIII. VICTOR TRINCAVELIUS in Praelect. de compos. medicament. & Cap. de palpitatione cordis. STALPART VAN DER WIEL obs. rarior. Cent. I. obs. 36. ZACUTUS LUSITANUS M. P. H. Lib. II. hist. 39. pag. 251. & VERZASHE obs. 90

Hoc sane remedii genus, uti in illis, qui ex nimia sanguinis plenitudine, aut etiam spissitudine cordis palpitatione laborant, omnium remediorum vim & superat, & secundat: ita sane unicum fere est subsidium, quo eos, quos polyposa in corde concrementa vexant, solari possumus.

## §. V.

Quomodo oppugnetur sanguinis spissitudo, atque polypus. Præterea pressius ad causarum ablationem accedendum erit; quo quidem nomine, si symptomatrica fuerit cordis palpitatione, ad morbum primarium in medendo respicere oportet. Hic si fuerit hypochondriacus, repetenda & in usum vocanda sunt ea, quæ Cap. de malo hypochondriaco commendavimus. Præsertim vero quædam animadversio debetur humorum spissitudini; quæ sicuti mater est concretionum polyposarum; ita eandem fere cum his requirit curationem, hac differentia, ut ea in simplici humorum spissitudine funditus extirpanda, in polypis vero non nisi ad graviora pericula præpediendi locum habeat. Utroque autem casu hic est curationis cardo, ut & alimentis & medicamentis perpetua humorum fluxilitas conservetur: atque salutarium excretionum successus adjuvetur. Quamobrem præscribenda sunt infusa ac decocta aperientia, attenuantia, ac resolventia; brodia ex jussculis tenuioribus cum radice cichorei, graminis, herba chære folii &c. parata. Commendat quoque in tali cordis palpitatione, quam melancholicam vocat, serum lactis RHODIUS Lib. 2. obs. 40. Omnium vero medicaminum virtutem longissime superant aquæ minerales, inque primis thermæ Carolinæ: quippe quæ humores spissos, coagulatos, viscidosque optime resol-

vunt, attenuant, impuros per excretiones proscribunt, viscerumque infarctus feliciter referant. Et novi profecto quædam subiecta, quæ palpitatione cordis vexata, polyposa in corde fovere videbantur concrementa; & ab usu venæsectionis, thermarumque Carolinarum annuo, se per multos annos in vita conservarunt.

## §. VI.

Quando malum causam & originem habet a mensium, vel hæmorrhoidum retentione: operæ pretium erit, has excretiones in ordinem revocare; id quod medicinis temperantibus, antispasmodicis, diluentibus, blandis laxantibus, venæsectione, pediluviis, balneis, aquis thermalibus, aliisque pro circumstantiarum varietate peragere licebit. Quod si ulcera, scabies, arthritica materia, aliaque exanthemata intra corpus depulsa; evacuatæ per blanda laxantia, quæ in primis viis hospitantur, crassis sordibus, studendum est, ut materiam acrem subtilem in massa sanguinea oberrantem involvamus, ad exitum disponamus, atque tum per cutis spiracula eliminemus. Quem in finem egregiam præstabunt utilitatem absorbentia, ac diaphoretica fixiora, aut acidula: veluti est mixtura simplex cum liquore anodyno primum solo, deinceps spiritui bezoardico Buffii, vel cornu cervi succinato nupto maritata. Hoc etiam sine profunt infusa calida theiformia, mane intra lectum cum regimine diaphoretico, eoque temperatissimo sorbillanda. Ubi denique vitium in ipso corde, ejusque præternaturali constitutione, duritie ossea, excrecentia, abscessu &c. latet: nihil prorsus valet ars medica. Interim ne nihil egisse videamur, eadem via, qua oppugnandos diximus polypos, incedendum erit.

## §. VII.

Præstantissima vero methodus, qua hoc morbi genus præservare licet, in studiosa causarum occasionalium evitacione atque rerum non naturalium re-

Cura-  
tio ma-  
li a re-  
liquis  
humo-  
rum  
vitiis  
orti.

Me-  
thodus  
præ-  
serva-  
toria.



Et o usu consistit. Quamobrem ii præfer-  
tim, qui polypis onerati videntur, sunt  
admonendi, ut motum corporis, maxi-  
me fortio-rem fugiant; ne commotis  
ex eo humoribus, avellantur forsan  
fibrosæ illæ concretiones, & libere in  
vasis fluctuando, celerio-rem ac fune-  
stum producant eventum: bene id mo-  
nente GABELCOVERO *loc. cit. Cent.*  
*III. curat. 114.* qui etiam suadet, ut ve-  
stimenta, præsertim abdomini, femo-  
ribus, ac tibiis, maxime compressoria  
in sexu sequiori, laxiora admovean-  
tur. Hoc non minus, ac alia momen-  
ta egregie explicat CRA TO, *dum*  
*Lib. V. Consil. XII.* dicit: *Adstrictior*  
*vestis circa ventrem improbat, be-*  
*ne ventriculus, & pectus munienda*  
*sunt, ne ulla frigida aura ad ea pe-*  
*netret. Versari etiam in aura frigi-*  
*diori, minime tutum est: nocturnus aer*  
*vitandus, & inchoante palpitatione*  
*subito clyster injiciendus, & manus*  
*ac pedes fricandi.* Victum porro non  
minùs ac potum oportet esse tenuem;  
ac cibi, qui flatus movent, cane pejus  
& angue evitentur. Cum primis vero  
cavendum ab animi affectibus, maxi-  
meque ab ira, atque terrore, ut & a  
voluptatibus venereis & nimis medi-  
tationibus; utpote quæ res ex sua natu-  
ra hunc affectum in scenam producere  
valent. Postremo opera danda est, ut  
excretiones corporis bene respondeant,  
alvus semper officio suo fungatur,  
& transpiratio liberior conservetur.

## CAUTELÆ.

### §. I.

**C**ommendant auctores quidam o-  
piata in cordis palpitatione re-  
media, & de iis magna prædicant.  
Verum cavendum maxime suadeo, ne  
vaporosa & fortiora narcotica, qualia  
sunt opiata, præsertim minus corre-  
cta, in hoc affectu consopiendo in-  
terne adhibeamus; quippe quæ, &  
cum primis, si offerantur iis corpo-  
ribus, quorum vires ab enormioribus

Cautela  
circa o-  
piata.

hæmorrhagiis penitus fere prostratæ  
sunt, potius damnum inferunt, & ma-  
lum deterius reddunt, tantum abest,  
ut solamini sint adflictis. Fœminis au-  
tem hystericis, in paroxysmis, qui  
palpitatione cordis stipantur, non sine  
fructu naribus admove- re licet vaporosa  
foetida ex castoreo, asa foetida, pennis  
ustis &c. parata. Contra vero in hisce  
calibus a suaveolentibus cavendum est:  
quippe quæ non modo ipsum malum  
exacerbare, verum etiam protinus re-  
vocare valent.

### §. II.

Quemadmodum in omnibus spasmo-  
dicis affectibus, tam circa venarum in  
pedibus incisionem, quam pediluvia,  
perpetuæ instar regulæ tenendum est,  
quod hæc medicamina, si pedes frigi-  
di fuerint, minime in usum vocanda  
sint: quoniam malum sic exacerbatur:  
ita præsertim hanc cautelam in cordis  
palpitatione adnotare oportet. Potius  
frictioribus, ac fomentationibus hu-  
morum adfluxus in pedes est invitan-  
dus, & tum ejusmodi subsidia adpli-  
canda.

Pedi-  
luvia-  
rum u-  
sus.

### §. III.

Quandocunque malum ab humorum  
per hæmorrhagias deperditorum ino-  
pia, & virium jactura originem tra-  
xit: analeptica & vires reficientia,  
quæ vero minime nimis calida esse  
debent, ne orgasmum inducant, sunt  
adhibenda: ex quibus instar omnium  
esse potest essentia ambrae cum liquore  
anodyno mixta. Succurrendum porro  
est cibis nutrientibus, lacticiis, e-  
mulsivis, quæ sanguinem cito regene-  
rant: & quo digestio sit vegetior, ea  
sunt conjungenda subsidia, quæ tonum  
ventriculi roborant, veluti est Elixir  
nost- rum viscerale balsamicum. In  
malo chronico commendamus et-  
iam aeris & loci mutationem, pe-  
regrinationem, jucundumque con-  
sortium.

Quæ  
confe-  
rant in  
cordis  
palpi-  
tatione  
ab a-  
nemiâ  
indu-  
cta.

### §. IV.

Emetica, fortiora purgantia, com-  
moventia, volatilia, nimis aromati-  
cata, & acriora, studiose in hoc malo  
sunt

Circa  
emeti-  
ca, pur-  
gantia



afflig; sunt evitanda: ea enim humores ni-  
acriora. mis commovent, & ventriculum spa-  
fmo afficiunt, quem pressio pede hu-  
morum ad præcordia affluxus insequi-  
tur. Ob vini commoventem caute et-  
iam cum balneis aquæ dulcis proceden-  
dum est; illa enim, si adhibeantur,  
tepidissima, & paroxysmo remittente  
ex usu esse debent. Contra blanda dia-  
phoretica, in eo potissimum casu, ubi  
retropulsa sunt exanthemata, insignem  
merentur laudem; quippe quæ lenem  
provocando sudorem, inimicam ma-  
teriam simul expellunt, ac efflorescen-  
tiam ad corporis superficiem revo-  
cant.

## §. V.

Seçtio  
venæ  
jugula-  
ris.

Quando cordis palpitatione ab infi-  
gniori plethora originem traxit, facies  
que cruore valde turgida adparet: præ-  
stat interdum sanguinem, ex tusa ve-  
na jugulari externa detrahare. Sed no-  
tandum circa talem est operationem,  
ut tepidiora pediluvia, & ante, & in-  
ter eam adhibeantur, ne nimius sit ad  
superiora sanguinis affluxus. Nonnun-  
quam quoque necessitas postulat, ut  
præmittatur phlebotomia in pede; &  
ea in collo posthæc instituat.

Enarrationes morborum.

## OBSERVATIO I.

Palpi-  
tatio  
cordis  
a ces-  
sante  
uarium  
hemor-  
rhagia.

**G**enerosa & venusta octodecim an-  
norum virgo, hilari & acuto in-  
genio prædita, succi & sanguinis ple-  
na, lauto vivendi generi adsueta, sin-  
gulis fere pueritiæ annis sanguinis satis  
insigne ex naribus profluvium experta  
est. Quo vero per biennium jam parcius  
succedente, exinde vel acerbiori capitis  
dolore, vel cordis vehementi pulsatio-  
ne, magna cum molestia ad aliquot  
dies interdum perdurante, haud abs-  
que ingenti virium collapsu afficieba-  
tur. Eadem quoque motu paulo vali-  
diori & animi & corporis vel repetebat  
vel ingravescebat, cum pectoris op-  
pressionem & spirandi angustiam, pulsu  
subinde intermittente & inæquali con-

juncta. Neque parum hic affectus ca-  
piebat incrementi, quando ex male  
concoctis alimentis dolore ventriculi  
tensivo & pressorio cum flatibus & ru-  
ctibus ore plurimis emissis angebatur.  
Ceterum vero notatu erat dignissimum  
quod parentes, in adolescentia similes  
plane affectus, nimirum & narium hæ-  
morrhagias, & cordis palpitationem  
fuerant experti. Hi igitur crebrius  
meam requirebant opem & consilium;  
equidem nolui multa fausta promitte-  
re, eo quod polyposi concrementi quid-  
piam jam tum præcordiis inhærescere  
judicabam. Ad levandum tamen ma-  
lum suasi, ut sanguinem, qui ob co-  
piosum mensium successum nunquam  
antea a Chirurgo fuerat detractus, ex  
brachii vena bis vel quater mitteret  
quotannis; a vino, quo una cum pa-  
rentibus, qui in regione vinis abun-  
dante & cerevisiis carente nati ac edu-  
cati erant, liberalius inter cibum uti  
consueverat, impofterum abstinere,  
& loco potus ordinarii aquam puram  
simplicem sumeret. Deinceps quoque  
animi ac corporis quietem commenda-  
vi, quibus effectum est, ut mitioribus  
deinde factis paroxysmis & corpus  
contabefactum & vires collapsæ incre-  
mentum ceperint. Denique vero ela-  
pſis aliquot annis ingenti mœrore ob  
parentis obitum perturbata, gravius  
afflicta & febre tandem superveniente  
hectica e vivis sublata est.

## Epicrisis.

Id non semel, sed sæpius observavi,  
sanguine ob nativam & hæreditariam  
corporis dispositionem abundantes, sub  
primis ætatis annis, quando per nares  
crebrius sanguinem evacuarunt, hoc  
subsistente fluxu, cephalalgias, imo  
cordis palpitationibus valde tentari;  
ita quidem, ut accedente narium hæ-  
morrhagia, cordis tremor desinat, ista  
vero vel imminuta, vel penitus subla-  
ta, invalescat. Et sicuti diætæ, quæ  
succos temperatos copiose ingenerat,  
eorumque ebullitionem concitat, cau-  
sam.



nam omnino huic affectui subministrare valet: ita victus tenuis, potus aquæ simplicis loco vini vel cerevisiæ, sanguinis quoque superabundantis per vices repetita missio, non modo si corpus natura dispositum sit ad tale malum, id præservandi, sed etiam si præsens est, mitigandi vel sanandi insigni omnino energia valent; adeo, ut etiam polyposis in gignendis concretionibus, quæ sanguineæ complexionis hominibus valde sunt familiares, & nostrum affectum incurabilem efficiunt, satis valide resistent.

OBSERVATIO II.

Palpitatio cordis ex sanguinis vitio.

Vir generosus viginti & aliquot annorum, patre aulico mere sanguineo, qui canonicè quasi omnes, qui a sanguinis copia nascuntur, morbos a primis pueritiæ annis passus fuerat, natus, gracilioris sed proceri corporis, validis, cum in Academia degeret corporis exercitiis vacans, postea quoque in aula fortiori pilæ lusui adsuetus, cum aliquando per aliquot dies eidem incumberet exercitio, finito isto omnibus fere viribus collapsis in animi deliquium incidebat; subsequenti insigni cordi tremores, quo eo tempore a levi corporis vel etiam animi motu sæpius fortiter ad aliquot horas correptus fuit. Ipse vero, uti in aula mos est, nulla habita diætæ & regiminis ratione cum liberalius se ingurgitaret vino, factum est, ut subsequenter annis, præsertim verno & autumnali tempore vires sumendo tam graviter sæpe numero priori tentaretur afflictione, ut præsumma spirandi angustia & præcordiali anxietate ferme semianimis jaceret; extremis algescentibus, & facie ac petore sudore frigido perfusis, pulsu languido & inæquali, quandoque etiam intermittente. Ad mitigandos graviores, si forte incidebant paroxysmos, non præsentius inflexione dextri capitis lateris ad terram elevatis cruribus auxilium invenit. Suasi ego potum aquæ frigidæ, crebriores sanguinis e brachio

dextro missiones, a spirituosissimis abstinentiam; atque ut quieti sedaret, & quotannis aquis thermalibus Carolinis, quæ a molendino nomen habent, uteretur. Cui consilio etiam paruit, & rariora inde longeque mitiora expertus est pathemata.

Epicrisis.

I. Sub validissimo ejusmodi & diutius durante exercitio, quia sanguinis ad cor, & omnis generis vasa vehementiore est impulsus; fit inde ut crebrius succedente vehementissima ventriculi cordis dextri, imo arteriæ pulmonalis expansione, robur fibrarum cordis & illius arteriæ, una cum systolica vi maxime imminuatur; ita, ut copiosius aggesto, & difficilius progredienti sanguini, qui convulsivæ cordis motioni causam præbet, rite propellendo non sit æqualis ac sufficiens.

II. Quod vero ab inflexione capitis ad dextrum latus in terram, morbi vis statim remiserit, id inde factum existimo: quia sub tali situ impetuosior sanguinis ad dextrum cordis ventriculum per venam jugularem affluxus impeditur, ut postea eo melius congestum sanguinem per arterias expellere possit.

III. Sectio venarum jugularium, imo earum; quæ in brachio sunt, in hoc morbo majoris est efficacis, quam ea, quæ aliis locis ventilatur, quippe, quo propius ea sit loco affecto, eo præsentius auxilium ferre observatur. Sed videndum maximopere est, ne confestim & semel, sed repetitis vicibus emittatur sanguis; ne impedito legitimo humorum ad cor affluxu, sublataque simul omni systole animi deliquium accersatur.

IV. Ad generationem vel augmentum polyporum in corde ejusque vasis, qui subitum non modo vitæ exitum, sed & funestos & graves morbos, hydropem, asthmata, & id genus alios inferunt, præcavenda, ego simpliciter aquæ



aquæ potu vel etiam thermis Carolinis, quæ sale abundant alcalino, præstantius vix aliquid inveni; sed opus est, ut mature id consilium exsequamur.

## OBSERVATIO III.

Palpi-  
tatio  
cordis  
ex ter-  
rore,  
cum in-  
frequen-  
tæ hy-  
drope  
lethali.

Puer duodecim annorum, constitutionis tenerrimæ, ac macilentæ, temperamenti sanguinei, ob grave domus incendium, ingenti percussus terrore, protinus in cordis palpitationem incidebat; quæ per intervalla longo tempore exercebat illum, & a pastu maxime invalescebat, Dati a medico pulveres antepileptici cum opiatidis remixti, exacerbabant malum; cui post aliquot septimanas, dolor hypochondrii gravativus, interdum tensivus, respirandique difficultas accedebant. Hinc judicatum fuit, palpitationem ex obstructis hypochondriis fuisse subortam; & ideo anthypochondriacis, aperientibus, martialibus, aliisque, sed frustra pugnatum est remediis. Quare, cum nullum fere superesse videretur consilium, per anni dimidium omnem medicinarum usum respuit æger: atque tandem mire extenuatus, pedum primo, mox totius abdominis tumore prehendebatur, cum insigni palpitationis levamine; superiora marcescebant, adpetitus peribat, ingens vexabat tussis, & hoc immedicabili pressus hydrope, diem obiit supremum.

## Epicrisis.

Quod gravis terror cordis palpitationem inducere possit; vel eo tempore docemur, quo periculosa incendia urbis incolas terrent: tum enim plures palpitante tremore infestatos discurre videmus; veluti hoc malum eo in casu esset epidemium. Prout vero subsectorum diversa est constitutio; diversum quoque terror edit effectum, plus minus graviolem. In nostro puero mali vehementiam adauxit opiatorum pulverum usus; quibus sanguis viscidior, & ad subeunda concrementa

opportunior redditur. Atque cum tali ratione, morbus in principio inconvenienter tractatus, dein plane sibi relictus fuit: non fieri potuit, quin humores hinc inde stagnaverint, eorumque serosa portio extravasata, hydropem generaverit. Tum vero, cum nimia succorum moles extra vasorum alveos extravasata, a corde derivata fuit; ejus motus palpitatorius omnino mitior esse debuit.

## OBSERVATIO IV.

Juvenis, annos natus octodecim, temperamenti cholericæ, tenerioris constitutionis, & vivacis ingenii, hausto post vehementem iracundiam copioso potu, eoque frigido, mox ingenti cordis palpitante motu corripitur. Is per integrum vexabat annum, ita ut per intervalla, mox aliquot horarum, mox dierum recrudesceret; & a quavis humorum commotione, vel per vinum calidius, vel fortiolem corporis motum, vel graviolem animi affectum excitata, nec non ab usu ciborum flatulentorum protinus rediret. Interim manebant integræ vires, adpetitus avidior, sanguine vultus, totumque corpus turgebat: quare, in cassum datis varii generis antispasmodicis, succinatis, castorinis, pulveribus antepilepticis, pilulis aperitivis, aliisque, tandem sanguis, ex venâ in pede tusa, singulis detrahebatur mensibus; quo facto, juvenis ille, a malo suo feliciter fuit liberatus.

Palpi-  
tatio  
cordis  
a nimia  
sanguinis  
commotione.

## Epicrisis.

Varia in præsentî casu concurrunt causæ; quarum una alteri manus præbuit auxiliatrices. Juvenis nimirum ille ingenti humorum præditus copia, simulque ad eorum stagnationes dispositus fuit. Accessit iracundia, quæ vim possidet exæstuandi, & ad habitum corporis compellendi sanguinem; potus vero frigidus eundem in orgasmo constitutum ad interiora validius rapien-



piendi, facultate pollet. Quamobrem hujus copia nondum imminuta, in casum utique data fuerunt cuncta, utut præstantissima remedia. Præstat potius in tali casu, sanguinis molem venæsectionibus, sæpius repetitis imminuere; atque tum relaxatis fibris, per congrua subsidia, veluti sunt martialia, pristinum instaurare robur.

## OBSERVATIO V.

Palpitatione cordis a polypo lethalis.

Octodecim annorum adolescens, celeberrimi archiatri filius, constitutionis tenerioris, post corpus pilæ lusu ad calorem, sudoremque commotum, copiosam ingurgitavit cerevisiam; neque vero ullam, præter corporis lassitudinem, inde sensit molestiam. Elapsis duabus septimanis, largius hausit vinum; & insequente nocte protinus insigni capitis dolore, præcordiorum anxietate, vomitu, cordisque palpitatione corripitur. Hanc retinuit per quatuor annos, modo longioribus, modo brevioribus intervallis recurrentem, atque cum gravissimis semper stipatam anxietatibus: notabile tamen fuit, paroxysmos, incurvato corpore, vel reclinato ad dorsum capite, insigniter imminutos ac mitigatos fuisse. Si corpus fortiter commovebat, vinum large bibebat, aut animi quodam affectu exardescibat; veletiam in sinistro decumbebat latere, repente invadebat paroxysmus, sub quo urina ferebatur tenuis & aquosa. Usurpavit varii generis remedia, sed in cassum; quin martialia malum exacerbarunt, sed frictiones pedum, ac clysmata semper levamen ferebant. Tandem se contulit ad Bremenſe Gymnasium; ubi victu falso, ac aere marino usus, pejus semper habere cœpit; donec tandem mortuus in lecto repertus fuit. Cadavere aperto, cor miræ fuit magnitudinis; & dexter maxime ventriculus, cum pulmonibus a cruore valde distentus apparuit; sinistrum autem thalamum, & arteriam aortam polyposa obsidebat concretio.

## Epicrisis.

Mors in hoc casu clarissime ostendit, polyposam concretionem cordis palpitationi causam dedisse: quæ qua potissimum ratione, a haustu potus frigidi, corpori commoto ac calenti ingesto, generetur Obs. II. jam docuimus. Hujus ergo cum prima jam posita fuerunt rudimenta: accedens copiosior vini potatio, adauxit humorum circulum, eosque celerius per cordis movit muscolum: qui, debilitato naturali robore, a nimia sanguinis mole oppressus, & ad validam, palpitantemque incitatus fuit resistentiam.

2) Increſcente sensim polypo, non mirum est, si paroxysmus a quovis humorum orgasmo, per iram, terrorem, motum, vini potum: quin etiam frigus ac martialia, excitatus fuit & adaugetur. Horum enim omnium ea est natura, ut partes externas, constringendo: vel sanguinem nimium commovendo, humores majori nisu ad præcordia compellant, quam quidem cor illud repellere potest. Observamus igitur sæpius, quod in hisce paroxysmis extremorum, & inferioris abdominis adsit quædam constrictio: hinc urinae tum tenues minguntur, & clysteres pariter, ac pedum frictiones, horum spasmodum relaxando, solantur miseros.

3) Quando in sinistro latere decubuit, paroxysmus eam ob rationem revocatus fuit, quoniam polypus liber orificio arteriæ magnæ se tum opponebat. Neque dubium est, quin in somno ex hoc situ fuerit suffocatus.

4) Omnis crassus, marinus, humidus ac frigidus aer, subjectis cordis palpitatione laborantibus infensus est: is enim constringendo externum corporis habitum, succos ad interiora magis cogit, & ad eorum spissitudinem ac dyscrasiam multum contribuit. Neque vero calidior aer, qui humores nimis rarefaciendi vim possidet, iis con-



venit : sed serenus, qui nec justo calidior, nec solito frigidior est.

Epicrisis.

### OBSERVATIO VI.

Palpi-  
tatio  
cordis  
a variis  
caussis  
consti-  
tuta.

Vir generosus, militiæ præfectus, triginta annorum, temperamenti sanguineo cholericæ, post vehementiorem per aliquot milliaria equitationem, paulo liberalius vino generoso indulgit, veneremque simul exercuit immoderata. Nox, quæ sequebatur, erat inquieta, & gravi cordis palpitatione interrupta: quæ per aliquot etiam dies graviter, & per intervalla persistebat. Conquestus insuper de viribus prorsus dejectis, & totius corporis debilitate, ex consilio Medici, aquam melissæ spirituosam, quam l'eau des Carmes vocant, paullo majori copia sumsit. At malum validius, præsertim noctu circa horam matutinam tertiam, summa cum molestia invadebat, ac per aliquot horas, cum copioso sudore, tantaque anxietate adfligebat, ut lectum deserre, & discurrere cogeretur: ceterum alvus non rite respondebat, & hypochondria flatibus distendebantur. Elapso mensis spatio, cum meam quoque flagitaret opem, inquisivi in antea ætate vitæ genus: atque sic percepi, ipsum ante decem annos, sputo cruento, cum hypochondriacis passionibus laborasse: nec non cruorem per venas hæmorrhoidales profudisse: atque elapso abhinc anno, suetam neglectui habuisse phlebotomiam. His exploratis, cum insuper plenum deprehenderem pulsum, dedi consilium, ut detracta protinus ex vena in pede tusa, sanguinis larga portione, loco cerevisiæ, aquam puram fontanam, cum quarta vini parte remixtam biberet: & cubitum iturus pulverem Marchionis, cum nitro, ac succino, nostra methodo præparato, ex aqua Melissæ sumeret. Quibus re-  
cte adhibitis, egregie habuit.

Ad generationem molesti hujus mali, plures utique in hoc casu conspirant causæ: nimirum 1) nimia sanguinis ob vasorum corporis dispositionem, & omissam venæsectionem generata abundantia, 2) vehementior corporis commotio, 3) immoderatio vini ingurgitatio, 4) veneris intemperantia, & 5) remediorum analepticorum abusus. Ex hisce vero momentis prudens medicus, omnino veras medendi indicationes poterit invenire; quippe, quæ in eo consistunt, ut imminuta sanguinis mole, illius nimia expansio ac turgescencia sistatur. Huic autem scopo obtinendo, nihil sane venæsectione, ac aquæ frigidiæ potu, nec utilius, nec convenientius est. Quanto pretio phlebotomiam suo jam tempore habuerit GALENUS in persanando hoc malo; testatur *Lib. V. de loc. affect. Cap. II.* Etenim *palpitatio cordis*, inquit, *pluribus integræ valetudine degentibus, tum adolescentibus, tum adultis, subito sine alio manifesto accidente evenire visa est, atque omnes eos sanguinis detractio juvit: & hoc accidente plane liberati sunt, qui post sanguinis missionem, tenui victu, similibusque medicamentis usi sunt; quos vero hujusmodi accidens rursus infestavit, eadem cura sanatos vidi.* Quod ad potum aquæ frigidiæ, fontanæ simplicis attinet; ego certe eximiam, & plane singularem ad levandum hoc malum, sive a nimia sanguinis exundantia, sive ex nimio illius ac virium defectu obortum fuerit, ab ejusmodi potu, moderatius & crebrius sumto deprehendi; eo quod exastuantem nimis sanguinem deprimat, vires dissipatas colligat, fibrasque relaxatas roboret.

### OBSERVATIO VII.

Dum hæc scribo, requirit meum per litteras judicium, Illustris quidam Transsylvaniæ Liber Baro, anno-  
rum

Palpi-  
tatio  
in sen-  
a ve-



rum sexaginta trium, temperamenti cholero melancholici, continuisque curis ac laboribus implicitus. Hic ante aliquot menses, ceteroquin sanus, ad vicinos iter facturus campos, equo insedit ferociori ac insolentiori; & fortiori molestaque succussatione, corpus ad senectutem vergens, vehementer conquassavit. Descendens equo, protinus in tantam incidit cordis palpitationem; quæ non manus solum pectori admotas valide feriebat, sed vestimenta quoque violenter vibrabat; virumque illustrem per integram ac dimidiam horam adeo premebat, ut loqui haud potuerit. Vena quarto ab hinc die tundeatur: sed nihilominus molesta palpitatione, utut priori levior, per vices recurrebat, & adhuc vexat: junctis animi, qui antea benignior erat, atque hilarior, insigni morositate, continuis vigiliis, & somno, si forsan accederet, multis terriculamentis, innumerisque phantasiæ lulis interrupto.

Epierisis.

Discimus ex hoc casu, quantum detrimenti iis, qui spissis humoribus imbuti, aut polyposis rudimentis præditi sunt, inferat fortior corporis motus. Quemadmodum enim hic, si placidior fuerit, ad resolvendum humorum coagulatum, multum confert: ita sane, si fortior ac immoderatio sit, non modo ad generandos polypos contribuit, verum etiam illos sæpenumero a firmiori cohaesione avellit, & ægros vitæ submittit periculo. Idem occasionalem præbuit causam palpitationi cordis, qua vir illustris premitur: dum humores crassos, viscidosque, quos ille ob vitam laborum ac ærumnarum plenam, sibi contraxit, nimium commovit, vel rudimenta polyposa, quæ forsan obsederunt cor, avulsi. Optassem sane, ut statim incisa fuisset vena; quoniam tali ratione augmenta morbi præpediri potuissent. Interim commendavi, ut eam adhuc, si sanguis abun-

daverit, institui, ac singulis binis mensibus iterari curaret; non minus pediluviiis tepidioribus uteretur; & quum in ea regione vino calidiori Hungarico nimis indulgere solent, hoc vitaret, & potius aquam vel solam, vel cum Cinnamon decoctam potaret: quibus non dubito, quin si nondum polypi firmas egerint radices, morbi sanationem, sub convenienti victus observatione, & motus corporis moderatiori exercitatione, finis impetraturi.

OBSERVATIO VIII.

Illustris fœmina, triginta annorum, teneræ sed vegetæ constitutionis, animi tamen sensibilioris, tertia vice puerpera, quarto post partum die ad lac reprimendum, quod ipsa infanti præbere noluit, usa est epithemate, mammis lacte admodum turgentibus appposito; & ex cicuta aquatica, detestabili obstetricis errore pro herba petroselinii habitata confecto. Sensit mox inde ingentem cum dolore pungitivo, rubore & præcordiorum anxietate ardorem; postridie copiosæ in mammis apparebant vesicæ, satis latæ; quæ remoto epithemate acerrimam effuderunt materiam; sed inde pessime habuit puerpera: summa enim spirandi angustia, & ingenti cordis palpitatione ac tremore vexabatur. Chirurgus ad erysipelaceum tumorem & dolorem levandum adplicabat unguentum de cerussa; quo factum est, ut non priora modo symptomata, sed cordis etiam convulsiivi motus ita invalescerent, ut accedente virium, & adpetentiæ, nec non somni totali defectu, corporisque marcore crescente, data jam a Confessionario benedictione; sæpius animam expiratura videretur. Alvus præterea valde erat adstricta, fitis inexplebilis, ob aphthas, ac pustulas ardentes faucium ingravescentes; quæ symptomata cum cordis palpitatione per tres inhærebant menses. Tandem vero sequuto molestissimo salivæ, per quatuordecim fere dies insistente fluxu, & cordis

Cordis palpitatione ex cicuta aquatica mammis, loco petroselinii ex errore adposita.



palpitatio, & reliqua symptomata sensim sensimque evanescebant. Sed ab eo tempore per tres jam annos conflictata fuit, pathematibus hypochondriaco hysterice cum Melancholia junctis. Atque in hoc affectu meum desiderans consilium, ex Lusatia inferiori huc accessit. Ego per æstatem ordinavi euram fontis Selterani, cum tertia lactis asini parte mixti: qua absoluta, non sine fructu usa est balneo Lauchstadiensi. Neque vero a pathematibus hypochondriacis, autumno, hyemeque maxime adfligentibus plane libera, per aliquot annos magno cum emolumento adhibuit acidulas Selteranas cum lacte, & liquorem anodynum cum pulvere præcipitante, non neglecto decocti temperantis, ac elixirii visceralis usu.

## Epicrisis.

Memorabilis hoc in casu est pernicialis cicutæ aquaticæ, extrinsecus applicatæ effectus, qui a tenuissimo sale acri inflammante, nerveas cordis, & diaphragmatis fibras convellente deduci debet: quippe quod tam firmiter iis inhæsit, ut perseverantem per tres menses cordis palpitationem produxerit. Quemadmodum vero omnium ejusmodi venenorum vis optime liquidis, & acrimoniam demulcentibus infringitur: ita & in hoc casu, a maturo lactis & emulsionum usu optimum sperandum fuisse præsidium certissime persuasus sum.

II. Notatu, imo admiratione dignum est, quod venenum illud vegetabile in excitandis aphthis & largo salivæ profluvio, quo mitigata & suppressa vis morbi est, similem fere indolem ac vim cum mercuriali veneno habuerit.

III. Noxia vero omni procul dubio fuit applicatio emplastri, liberio-rem veneni diffusionem inhibentis, quo magis ad interiora conversum est.

IV. Fœmina nunquam fuit antea in passionem hypochondriacam vel

melancholicam prona: quæ ob summe debilitatum nervosarum partium inque primis ventriculi & intestinorum systema per tam immanem vim morbi demum producta est. Quare etiam ea remedia præscripsimus, quæ blanda & demulcente virtute acrimoniam obtundunt, & nervosis partibus, temperatum motum iis conciliando amica sunt.

## CAPUT II.

## DE

ASTHMA CONVULSIVO,  
ET SPASMODICO FLA-  
TULENTO.

## THESES PATHOLOGICÆ.

## §. I.

**V**etus, sed verissima, & medicorum & vulgi est sententia: Respirationem & vitam pari ambulare passu. Vitam, omnesque, quibus illa conservatur, functiones, magno illo ac universali sanguinis ex corde ad omnes partes, & ex his ad cor circuitu absolvi, certissimum quidem est: nihilo tamen secius hunc, & consequenter ipsam vitam, absque particulari, ea, ac minori, quæ fit ex dextro cordis ventriculo per pulmones ad sinistrum, humorum circulatione, salvum esse ac subsistere neutiquam posse, adeo verum apprehenditur, ut hac cessante, protinus vita, omniumque functionum expiret exercitium. Quum vero hic sanguinis per pulmones circuitus, absque libera respiratione fieri omnino nequeat; facile judicare licet, quantum ad conservandam vitam momentum contribuat facilis, & secundum naturam se habens spiratio; & contra quanto sit damno eadem morbofa, impedita, vel plane intercepta: cujus rei clarissimum documentum illi præbent

Respi-  
ratio-  
nis ne-  
cessitas



bent morbi, qui spirandi difficultatem habent comitem.

§. II.

Asth-  
matis  
defini-  
tio.

Sunt equidem magnæ, & quam plurimæ ægritudines, quibus difficilis ac laboriosa, tanquam molestum symptoma, jungitur spiratio; maximeque tales, quæ in pulmonibus fixam obtinent sedem, veluti pleuritis, peripneumonia, tussis, phthisis, scirrhi, tubercula, & vomica pulmonum: attamen multæ dantur insuper, tam intra, quam extra thoracem causæ, quæ respirationi, & vitali humorum circulationi infensæ, summum minantur periculum, & morbum producant, qui Græcis asthmatis nomine venit. Hoc vero secundum nostram sententiam nihil est, quam impedita, & laboriosa admodum respiratio, cum ineffabili anxietate, & præcordiorum angustia juncta, liberum sanguinis per pulmones circuitum turbans, a variis causis suborta, periculi suffocationis non expers.

§. III.

Diffe-  
rentia  
asth-  
matis  
con-  
vulsivi  
a pi-  
tuitoso.

Quemadmodum variæ sunt causæ, ita varia quoque asthmatum occurrunt genera. Datur dispnoea quædam levior, quæ subjectis succorum plenis, corpulentis, atque pinguibus familiaris est, maxime si corpus valde commoverint; & nititur quoque difficiliori sanguinis per pulmones progressu, & nimia vaporum expansione, aeris ingressum sufficientem præpediente: sed hæc periculo vacat, & transitoria est. Deinceps occurrit asthma pituitosum, quod cum tussi humida, ac rejectione pituitæ viscidæ conjunctum, noctu dieque sub quocunque corporis situ infestat, & copiosiori mucis viscidis, vesiculas pulmonales obsidentis, & aeris liberiores ingressum & egressum præpedientis, ad præcordia aggestioni debetur. De hoc autem Tomo sequenti medic. Syst. differemus, & jam de eo potissimum agere constituimus, quod a spasmodica partium spirationi dicatarum strictura, a diversi generis causis, intra & extra thoracem consistentibus oborta gignitur, & vocatur spasmodico flatulentum, atq; convulsivum.

§. IV.

Hoc vero convulsivum asthma differt omnino a suffocatione convulsiva hysteriarum, quæ non nisi spasmodica constrictione, ac veluti strangulatione summorum faucium, laryngis, atque pharyngis nititur; & arctato laryngis canale, aeri sufficiens liberumque ad pulmones iter præscindit: cum in nostro adfectu transitus per arteriam asperam satis liber sit, & vitium in ipsis potius hæreat pulmonibus, adeo ut nonnunquam sola inspiratio difficilis, expiratio vero legitime succedat; testante casu in CONSULT. MED. Tom. I. Sect. II. casu 91. pag. 414. recensito. Discernere porro oportet asthma convulsivum, a catharro suffocativo, quippe qui cum vultus rubore, stertoreque stipatus, paralytici quid involvit, & intra paucos dies solvitur; cum illud, stertore vacuum, ad morbos pertineat longos.

Diffe-  
rentia  
a suffo-  
catione  
hyste-  
rica-  
rum.

A ca-  
tharro  
suffo-  
cative.

§. V.

Asthmatis incepturi ab notæ optime ARETÆO Lib. III. c. XI. descriptæ, hæ sunt: gravitas pectoris, tarditas ad opus solitum, & ad aliud quodlibet gerendum, in cursu, aut in acclivi itinere difficilis & agra spiratio; rauescunt, ac tussunt, flatus in præcordiis, atque eruptiones præter rationem excitantur, vigilant, noctuque parum & obscure incallescunt, nares acutas ad spirationem paratas habent. Si malum pejus ruat, malæ rubent, oculi prominent, veluti in his, qui strangulantur; stertunt, dum vigilant, multo magis cum dormiunt: humida, obscura, sonoque carens vox est; multum & frigidum aerem cupiunt; sub dio ambulant, quælibet enim domus, ipsis ad trahendum spiritum parva & angusta est. Erecti spirant; tanquam omni aere attracto potiri cupientes; præ aeris autem cupiditate & os aperiunt, patefaciuntque, tanquam eo ampliore indigentes. Ipsorum facies, præter malas, quæ rubent, pallida est; sudor circa frontem & jugula emanat; assidua & aspera tussis infestat, rejiciuntur pauca, tenuia, frigida, veluti quædam spuma efflorescentia;

Signa  
asth-  
matis  
con-  
vulsivi.



inflante spiritu collum intumescit, præcordia revulsa sunt; arteriarum pulsus parvi, crebri, atque depressi, crura exilia. Quod si hæc ulterius incrementa capiant, instar comitialis morbi, nonnunquam hominem strangulant. At si vertantur in melius, tussis longior & rarior fit, plura excernuntur saniosa sputa & humidiora; multa per ventrem aquea exturbantur, urina copiosa excernitur, licet nondum quicquam in ea subsidat, vox sonantior clariorque redditur, somni longiores, quantum satis fuerit, efficiuntur; præcordia remittunt; dolor interdum ad scapulas cum remissione transit, anhelitus rarus, levis, sed cum asperitate fit.

## §. VI.

Ulterior  
morbi  
historia.

Quo magis invaluit ac inveteravit malum, eo acerbiora ac vehementiora hæc omnia fiunt. Alvus ceterum plerumque est adstrictior; & urinæ minguntur tenues ac aquosæ. Accedunt frequentissime pedum, dein manuum, faciei, ac dorsi tumores, brachiorum torpor: facies fit lurida, plumbeoque colore notata, jungitur febricula cum typo irregulari, vespertinis exacerbata temporibus; supervenit cachectica corporis defædatio, cum tumore pedum œdematoso, hydrops pectoris, vel etiam ascites, ac anasarca: atque tandem associatur paralytica alterutrius lateris, vel saltem brachii resolutio: aut loco hujus, quod notabile est, amaurosis, quæ est oculorum paralytica, observata fuit a GOHLIO in Schediasmate, de asthmate convulsivo a polypo cordis. Et quoniam tantum non semper suffocatione finitur hoc asthma: dicitur quoque suffocativum.

## §. VII.

Subiecta  
asthmatis  
convulsivi.

Attenta vero experientia docet, eos potissimum homines, qui sunt temperamenti sanguinei, valis exilioribus, tamen copiosis instructi, obesiores, plethorici, pectoris angustioris: post vehementiorem animi, vel corporis commotionem, quacunque de causa fiat, tempore præsertim vernali, & autumnali in affectum asthmaticum ef-

se proclives. Multo magis eo tentantur, si mensium ac hæmorrhoidum inordinato fluxu, vel plane defectu laborant, aut consuetas sanguinis missiones, per scarificationem, vel venarum incisionem intermiserunt: necnon si fuerint hypochondriaci, & ventriculus ac intestinorum canalis, ob turbatum vel perversum motum peristalticum, flatibus scateant, & spasmis adfligantur. Eo certius hæc incommoda patiuntur, si excretiones feri acris per quasunque vias fuerint suppressæ, aut languide succedant.

## §. VIII.

Si dispiciamus, eorum, qui hoc morbo perierunt, anatomicam Sectionem, deprehendimus plerumque fluctuationes aquarum in pectore, una cum polyposis in corde concrementis; quales casus allegant CAROLUS PISO de morb. ex colluvie serosa pag. 214. SCULTETUS in append. observ. 31. p. 252. ACT. MEDIC. BEROL. Dec. II. vol. VII. pag. 67. In quibusdam sola seri in pectore extravasatio, absque cordis polypo reperitur: qualis est observatio, quam ACT. BEROL. dec. II. vol. VIII. pag. 21. referunt, ubi simul aorta fuit ossea. Contra in aliis pulmones sanguine atro, stagnante, extravasato infarcti reperiuntur, veluti WILLISIUS pharm. rat. Sect. VII. Cap. III. exemplo ostendit: nonnunquam salvis pulmonibus, & bronchiis, polyposa duntaxat in corde concrementa occurrerunt: testantibus observationibus, quas PEZOLDUS obs. 85. pag. 115. M. N. C. dec. III. anno II. obs. 185. & Dec. I. anno IV. obs. XI. memoriæ tradiderunt: ut aliorum, quibus infra passim mentio fiet, exemplorum historiam silentio prætermittam.

## §. IX.

Quo vero eo clarius adpareat, quæ ratione asthmaticus noster morbus generari queat: operæ erit pretium, pauca de respirationis negotio hoc loco præmittere. Ad respirationem

De fun-  
ctorum  
Sectione.

Respi-  
ratio-  
nis ne-  
gotium  
expli-  
catum.



itaque naturalem opus primum est, ut ingens illud pulmonum viscus, quod ex innumeris vasis sanguiferis, arteriosis & venosis, fistulis quoque & vesiculis membranaceis est contextum, a fluido atmospherico, elastico, aereo athereo, ampliata per alleviationem costarum thoracis cavitate, ingrediente, sufficienter expandatur. Hac expansione fit, ut per ramos & arteriosos & venosos, qui antea valde erant complicati, jam expansos, sanguis libero, & minus impedito itinere per pulmones, & ad sinistrum cordis ventriculum progredi queat; quoniam pressio vasorum sanguineorum, a vesiculis aere distentis facta, hunc progressum faciliat. Quum vero aer intra pulmones humidis vaporibus repletus, & elasticitate sua orbat, iterum exire, & loco hujus recens, ac vi expansiva elastica animatus rursus ingredi debet; necesse est omnino, ut thorax concidat, facto ejus cavitationis spatio angustiori. Alternans ergo dilatatio, & constrictio thoracis, expansio & confidentia pulmonum, sufficiens ingressus & egressus aeris, & cordis æquabilis motus, liberam & naturalem efficiunt respirationem, ad vitam sanitatemque conservandam summe necessariam. Quando vero cunque causæ quædam obveniunt, quæ sufficientem aeris in pulmones ingressum & egressum remorantur, vel muscutorum thoracis item abdominis, septique transversum motum dilatatorium ac constrictorium atque ipsius cordis convenientem Systolen, atque diastolen pervertunt: protinus morbus ille, quem explanandum suscepimus, asthmaticus præsens est.

§. X.

**Asthma** Quibus suppositis, facillimum jam **Spasmodico sanguineum.** erit, æthiologiam asthmatis spasmodici ob oculos ponere. Et quoniam variorum illius existunt causæ: primum considerabimus illam, quæ sanguinis vitio debetur. Atque hac ratione observamus, a sanguinis & humorum nimia mole, crassitie, & congestionem ad præcordia, grave generari asthma. Quando

Hoff. Syst. Tom. V.

enim sanguinis & humorum massa majori copia, & impetu ad cordis dextrum ventriculum irruit: majori quoque quantitate ad ramos vasorum pulmonalium congeritur, qua vis aeris inspirati elastica ob sanguinem nimium resistentem imminuitur: & ideo sanguis, qui non satis vegete propellitur per venam pulmonalem, in hujus ramulis stagnat; atque novus ille, quem cordis perpetuus pulsus adfert, vasorum ramos distendit, dilatatque: unde spirandi difficultas, summa anxietas, cordis tremor, ac palpitatio, cum pulsu inæquali, parvo, celeri & frequenti suos mutuatur natales. Hoc asthma sanguineum vocari quoque meretur spasmodicum: quoniam stagnans cruor nimium distendit & vasa, & nervorum ramulos & vesiculas membranaceas comprimit. Jam vero perpetuæ instar regulæ tenendum est, quod nimia tunicarum nervearum a copiosius stagnante in iis cruore expansio, causam præbeat constrictioni spasmodicæ: & vicissim hæc ipsa ad stagnationem & congestionem humorum multum faciat. Huc pertinent exempla eorum, quorum pulmones post mortem, sanguine atro, stagnante, & extravasato infarcti fuerunt reperti: quale de sacerdote (quod hominum genus propter crebriorem sermocinationem, humorum congestionem ad pulmones, præ reliquis obnoxium est) allegat WILLISIUS *pharm. rat. Sect. VII. cap. III.*

§. XI.

Hoc genus asthmatis admodum familiare deprehenditur hypochondriacis; quoniam in iis humores vitales, qui crassiores plerumque sunt, ob inferiorum partium stricturas, majori ad præcordia compelluntur quantitate. Complicantur vero in his subjectis tantum non semper flatulentæ ventriculi, primarumque regionum distentiones; atque malum reddunt longe deterius. Namque dum diaphragma proxime incumbit ventriculo; ab hoc flatibus distento, protinus adficitur; ejusque liberior mo-

**Asthma**  
ma  
spas-  
modi-  
co fla-  
tulen-  
tum.



tus impeditur, atque hinc etiam pulmonum debita expansio coercetur. Preterea scœpius fit, ut spasmò constringatur septum illud nervosum; quo constricto, œsophagus quoque, qui illud perforat, adeo coarctatur, ut nullus erupturis vaporibus pateat exitus. Inde angustia præcordiorum horrendum in modum exacerbantur; & solutis quodammodo vinculis, ructus incredibili & copia, & sonitu exploduntur, malique levamen inferunt.

## §. XII.

Asthma  
convul-  
sivum  
strictè  
sic di-  
ctum.

Quod strictè convulsivi nomen meretur asthma, & satis frequens occurrat, fit absque præsentia crassæ materialis causæ, a spasmodica partium spirationi inservientium, maximeque membranarum cellulas pulmonales investientium constrictione. Dum enim tunica nervosæ septi transversi, dum membranaceæ musculorum intercostalium partes, dum sensibiles, quæ pulmonum cellulas undique cingunt, membranae spasmò constringuntur: arctatur thoracis spatium, coercetur pulmonum expansio, impeditur aeris sufficiens in cellulas pulmonales introitus, & cruoris per pulmones transitus, ac ex uno in alterum cordis ventriculū circuitus mirifice retardatur. Quum vero constrictæ pectoris regiones nervos suos mutuuntur a vertebralibus, atque dorsalibus, qui etiam ad brachia ramos mittunt; facile patet, cur totum pectus cum brachiis grave ac tensum sit, scapulæ, dorsum, ac sternum dolore corripiantur, atque brachia torpore, quin tandem quoque paralyti, ob impeditum a strictura liquidi nervei influxum, adficiantur.

## §. XIII.

Causæ  
asthma-  
tis  
convul-  
sivi.

Hæ spasmodicæ constrictiones pro-ritantur a materia acri, subtili, caustica, quin scœpe virulenta, ad dictas nervosas præcordiorum partes incumbente: quæ generatur, atque originem suam repetit a sudorum, maxime in scorbuticis, repulsione; nec non exanthematum, efflorescentiarum, & quarumcunque feri ac lymphæ acrioris ex-

cretionum, vel ad artus exteriores depositionum, non sufficienti evacuatione, vel improvida adstrictione. Sic testatur multiplex experientia, malum nostrum exoriri ab erysipelate, variolis, maximeque morbillis, purpura, maculis & pustulis quibuscunque scorbuticis, haud satis ad corporis superficiem pulsas, aut crasso adstringentium usu retroactis; a scabie, tinea, vel achoribus capitis, crusta lactea, per oleosa, pingua, aut linimenta sulphurata, præpostere exsiccatis: a pedum foetore represso: a transpiratione totius corporis subito cohibita; qualis casus reperitur in CONSULT. MED. Tom. I. Sect. II. cas. 90. ubi ulceribus chronicis, vel foniculis inopportune consolidatis; qualis observatio de asthma convulsivo ab ulcere scroti serpiginoso, aqua mercuriali exsiccato orto invenitur Lib. cit. Tom. II. Sect. III. casu LXIV. a podagra vel arthritide partim ex defectu virium, partim male feriatis artibus retrocedente; uti quidem de podagra casus CONSULT. Tom. I. Sect. II. 93. de arthritide Tom. I. Sect. II. 92. inserti testantur.

## §. XIV.

Huc fere pertinet asthma illud spasmodicum siccum, quod a fumis metallicis, saturninis, sulphureis, venenatis, arsenicalibus, carbonum fossilium, ac exhalationibus aquæ fortis, iis præsertim evenit, qui in metallis laborant, uti sunt metallicolæ; & quoddam fabrorum genus; Conf. disp. mea de Metallurgia morbifera; & in ACT. MEDIC. BEROLINENS. Dec. I. vol. VI. pag. 31. casus recensetur, de fabro ex attractis cineribus metallicis inter aes malleo tundendum in asthma convulsivum delapso: Tetri namque & virulenti istiusmodi vapores, per inspirationem attracti, incumbunt nervosis vesicularum pulmonalium membranis, hasq; constringendo, libero ac intimiori aeris in eas accessui iter præcludunt, ideoque grave hoc machinantur malum.

Asth-  
ma  
convul-  
sivum a  
fumis  
metal-  
licis.

## §. XV.



§. XV.

**Asthma** Sola diaphragmatis strictura spasmotica, absque ullo pulmonum vitio sufficiens est, totum respirationis negotium perturbandi, & repentinam suffocationem inducendi. In recenti adhuc memoria mihi sunt bini notabiles, sed tristes simul casus, ubi subjecta antehac per omnia sana, ex gravi percussione scrobiculi cordis, & ejus regionis, cui adnexum reperimus septum transversum, subito perierunt suffocata; & post mortem dissecata, nullum ostenderunt in toto corpore vitium, quam levem in tendinea diaphragmatis parte sugillationem, ejusque stricturam. Neque minus observatione constat, vulnera in idem diaphragmatis centrum, punctim inflicta, momentaneam intulisse suffocationem, ut taceam spirandi summam difficultatem, quæ ex nervosi illius septi inflammatione percipitur. Neque obscura est ratio: constrictum enim diaphragma retinet convexum, qui sub inspiratione planus esse deberet, situm; quo thoracis cavitatem adeo coarctat, ut pulmones non satis expandi queant.

§. XVI.

**Asthma** Neque silentio prætereundum est spasmotico cachecticum, asthma illud spasmodicum, quod in cachecticis a tumore oedematoso pedum, quacunque de causa intra corpus repulso, cum gravi pectoris oppressione, & anxietate originem trahit. Ratio fere est eadem cum asthmate sanguineo: Namque serum illud spissum ac vapidum, quod in pedibus stagnavit, dum inducta ipsis strictura sursum repellitur, absorbetur a venis sanguiferis, & ad præcordia fertur. Ibi ex dextro cordis ventriculo cum reliqua humorum massa, in arteriam pulmonalem, ejusque ramulos pulsum, hostanta replet copia, quæ, comprimendo simul vesicas pulmonales, resistit irruenti aeri, ejusque ingressum, ad propellendum per venas cruorem sufficientem remoratur. Ergo stagnat ille sero viscido repletus sanguis in arteriosis ramulis, hos

graviter distendit, & sic summam anxietatem, spirandi difficultatem, ac interdum repentinam suffocationem inducit: quæ fere certissima est, si pedum oedemata repelluntur in iis, quorum corda polypis obsessa sunt. Et observavi in ejusmodi subjectis, quod, si febre intermittente correpta fuerunt, sub frigoris accessione pedum tumores subito evanuerint, ingentem spirationis angustiam, quin tertio semper paroxysmo repentinam sub ipso frigore post se traxerint suffocationem; qualem casum CONSULT. MED. Tom. I. Sect. II. casu LXII. inferui.

§. XVII.

Datur asthma, quod magis suffocativum dici meretur, & a polypis cordis ventriculos obsidentibus suboritur. Hoc non raro in repentinam desinit suffocationem, & post mortem nihil in corpore offendit præternaturale, quam polypos; sicuti testantur observationes a RIVERO Centur. I. obs. 82. TULPIO Lib. I. cap. 27. PEZOLD. obs. 58. pag. 115. A. N. C. dec. III. an. II. obs. 185. allegata &c. Dum enim polyposa concretamenta, maxime si sinistrum cordis obsederint thalamum, præscindunt sanguini e pulmonibus redituro iter, accumulatur ille in pulmonum vasis, distendit ea, impedit accessum aeris; atque non remoto polyposo repagulo, in lethiferam prorsus stasim & suffocationem terminatur.

§. XVIII.

Hydrops denique pectoris, quam plerumque sit perniciosus asthmatis convulsivi effectus, attamen & ab hoc, & ab aliis causis, v.g. pulmonum inflammatione, vel violentia extrinsecus illata &c. ortus, gravi asthmatis suffocativo suppeditat causam. Ubi præsto est; hæ fere sunt notæ: Tumor oedematofus non pedes solum, verum etiam manus occupat; harum enim tumorem, pro pathognomonico hujus affectus signo, solertissimus jam agnoscit BAGLIVUS; dum Prax. Med. Lib. I. dicit: quæ illis, qui pectoris



*Hydrope laborant, manus intumescant, immo totum quandoque brachium ad cubitum usque. Observatur quoque in iis aquarum in pectore fluctuatio, præprimis si corpus ad latera inclinent, tremor cordis, torpor, ac paralysis brachiorum, tussis sicca, interdum serum pellucidum secum duccens, ac febris anomala. Quando cordis polypus complicatur, quod plerumque fit, adsunt cordis palpitatio- nes, & arteriarum intermittens pul- sus.*

## §. XIX.

Hydro-  
pis pe-  
ctoris  
genera-  
tio.

Est vero pectoris hydrope, fluctuatio & extravasatio lymphæ atque feri in cavitate pectoris: & sequentem in mo- dum generatur. Extimam pulmonum tunicam copiosissimis vasis lymphaticis refertam esse, eleganter describit ac delineat Clarissimus NUCKIUS in *adenogr. curios. pag. 141.* Hæc vasa non minus, quam reliqua lymphatica, pec- tus multis in locis obfidentia revehunt laticem suum ad ductum thoracicum, ut ex hoc per venam subclaviam atque cavam, ad dextrum cordis feratur ventriculum. Quando vero huic lym- phæ itineri obex ponitur, ut ad ductum illum pertingere nequeat; vasa lym- phatica nimium infarciuntur, tandem- que ultra sphaeram elasticitatis disten- ta, rumpuntur, laticemque in cavum effundunt pectoris. Quum igitur spas- modicæ partium spirationi dicata- rum, maximeque pulmonum strictu- ræ, quæ asthma convulsivum produ- cunt, cohibeant ac remorentur lym- phæ ad ductum thoracicum iter: fa- cile patet, qua ratione tandem hydro- pem pectoris pariant. Hæc vicissim aquarum in pectore collectio, dum totam thoracis replet cavitatem, & septum quoque adgravet transversum: nullum pulmonibus sese expandendi spatium relinquit, ideoque & sangui- nis, & aeris in illos ingressum, ac li- berum circuitum remorando, asthma inducit suffocativum: quia nimirum suffocando tandem jugulat miseros. Interim extravasata hæc aqua, in-

natantes ipsi pulmones non modo colli- quat: verum etiam mora temporis a- crior reddita, eos arrodit, ac putre- dine fere consumit, adnotante HAR- DERO *Lib. I. obs. 51, pag. 217.* Quod attinet pericardii hydropem; ille non solum eodem modo ex vasis lymphati- cis, cordis superficiem ambientibus con- tingere potest: verum etiam a sero, per auriculas, stagnante cruore infarctas, secedente adangetur.

## §. XX.

Neque vero negligenda est ea hydro- pis in pectore species, quæ hydatidibus veluti sacculo inclusa continetur, ma- ximeque intra ipsam pulmonum sub- stantiam reperiunda est. Multæ oc- currunt observationes de hydatidibus e- jusmodi, non modo in pulmonibus, verum etiam pleura, septo transverso, & cordis externa superficie repertis; quales vide apud OTTONEM HE- URNIUM *obs. 18.* BARTHOLI- NUM *Cent. II. obs. 61.* ACTA HAF- FN. *vol. III. obs. 76.* M. N. C. *Cent. III. & IV. obs. 115.* In ipsis quidem pulmonibus hæc hydatides, a vasis lymphaticis, in eo- rum substantia disruptis, ac laticem suum in cellulas ac vesiculas effunden- tibus, unde hæc in tantam elevantur mo- lem, generari videntur, & vero est si- millimum, quod ex rupta ejusmodi ve- sica, serum in pulmonum substantiam extravasetur, & repentinam inducat suffocationem: unde etiam derivamus materiæ illius limpidæ, quæ cum tussi nonnunquam fit, rejectionem.

## §. XXI.

Si quid ex causis occasionalibus est, quod asthma convulsivum indu- cere potest, certe est externum fri- gus, hostis ille nervoso generi ini- micissimus. Unde hyemali tempore, flantibusque ventis aquilonaribus ingravescit malum; & a frigido quo- que potu exacerbatur. Inprimis ob- servavi, illos, qui pectus non bene te- gunt, illudque frigori, maxime no- cturno exponunt, sæpius hoc malum incurrisse.

De hy-  
datidi-  
bus.

Causa  
remota  
est fri-  
gus.



§. XXII.

**Pro-**gnosis. Ex his adparebit, quam variis modis generetur, ac foveatur asthma convulsivum, ac suffocativum: jam pauca de prognosi trademus. Ubi malum recens est, & sola præcordiorum constrictione spasmodica nititur, spes est salutis; maxime si motus arthritici, podagrici, ulcera, & exanthemata ad sua loca revocentur. Quando supervenit excretionum sanguinearum per uterum, aut hæmorrhoides fluor, iis, qui ex earum suppressione asthma sunt correpti, & passione laborant hypochondriaca, levamen adfert; atque si res adhuc integra fuerit, perfectam reconvalescentiam. Quod si vero inveteravit affectus, aut perversa tractatur medela; transit in pectoris hydropem, viscerum imi ventris obstructiones ac infarctus, pedum oedemata, cachexiam, ac hydropem universalem. Namque constat, quod per diaphragmatis centrum tendineum feratur vena cava, quæ ex imo ventre cruorem ad cor vehit; nec ignotum est, quod liber septi transversi motus, circulum sanguinis per hepar; natura languidiorum adjuvet, atque faciliat. Quando igitur cunque liber sanguinis per venam cavam ascensus impeditur; tardior ejus fit in hepate circulatio; unde humores primum omnium in distitis regionibus, veluti sunt pedes, stagnant; feròsamque portionem, cedematis causam, dimittunt; deinceps quoque per viscera imi ventris difficiliter progrediuntur, inque iis subsistentes, infarctus, scirrhus, cachexiam ac hydropem causantur; quem ligata prope septum transversum vena cava, protinus suboriri, præter LOWERUM, experientia commonstrat. Generatim sciendum est, omne asthma convulsivum, vel præcepse exitum, atque repentinam suffocationem inferre, maxime, ubi subest cordis polypus; vel diutius inhæret, atque hydrope perimit ægrotantes; quo in casu lethiferum est, si patiantur febrem lentam, pulsum inæqualem, ac intermitten-

tem, paralyfin brachiorum, continuam cordis palpitationem, imminutam mictionem, syncopem: tum enim in propinquo mors est. Quidam denique superveniente pulmonum inflammatione extinguuntur, quo gravius malum eo languidior fit pulsus. Asthma in senibus comitatur plerumque usque ad mortem, & quod ex dislocatione vertebrarum fit, non sanatur, nisi hæc reducantur. Quo majori impetu & vehementia accessio & diutius durat & crebrius recurrit, eo plus periculi subest, & suffocatione jugulat.

CURATIO.

§. I.

**G**ravioris nostri mali curatio, his fere indicationibus absolvitur, ut 1.) spasmodicas pectoris, atque partium spirationi ministrantium stricture consopiamus, 2.) humores ad externum corporis habitum, infernasque partes derivemus, & eorum circuitum æquabilem reddamus, 3.) causarum, quæ malum fovent, remotio- ni, pro earum diversitate studeamus. Et sicut binis prioribus scopis in ipso paroxysmo potissimum satisfacere; ita tertium extra hos explere licet.

Indica-  
tiones  
curato-  
riæ.

§. II.

Ipsò in paroxysmo, quoniam ple- rumque alvus strictior est, & humores una cum flatibus ad superiora regurgi- tarunt, non facile quidpiam præsen- tius auxilium fert, quam clysteres e- mollientes, simul carminativi; quos ex floribus sambuci, meliloti, verba- sci, pœoniæ, liliorum alborum, cha- mæmeli vulgaris, feminibus quatuor carminativis, oleo chamomillæ cocto, & una alteraque salis communis vel gemmæ drachma, stimuli loco addita, parare convenit; & exigente neces- sitate, bis vel ter iterare. Deinceps, incredibilem virtutem exserunt, pe- dum, qui tantum non semper frigidi sunt, frictiones, eorumque in aquam tepidam dimissiones. Ubi gravis præ-

Quæ  
confa-  
rant in  
paro-  
xysmo.

cote



cordiorum vexat spasmus; iis foci calidiores, vel etiam vesicæ, lacte calido repletæ, ad mitigandum spasmus admoveri possunt; nec levem in his sedandis opem nonnunquam ferunt linimenta nervina, quæ ex aquæ Anhaltinæ uncis binis, spiritus salis ammoniaci, lumbricorum terrestrium, essentiæ croci, castorei ana drachmis duabus, olei nucistæ vel macis drachma una parare, atque collo, scapulis, musculis, thoracis, spinæque dorsali adplicare soleo. Ex internis laudem merentur antispasmodica, cum blandis diaphoreticis juncta; quæ discutendo peccantem materiam, & relaxando spasmodicas constrictiones, operæ faciunt pretium. Talia sunt mixturæ ex aquis analepticis florum tilia, pæoniæ, primulæ veris, liliorum convallium, acaciarum, ulmaria, pulvere Marchionis, cinnabari nativa, spiritu nitri dulci, vel liquore anodyno minerali, mixt. simpl. & Syrupo papaveris rhæados; quæ crebro repetita dosi offerendæ, aut cum liquore anodyno, qui nuptus sit spiritui bezoardico Bussii, vel cornu cervi succinato, alternandæ. Præterea, quantum fieri potest, corpus in moderato calore conservare oportet: neque enim plura ipsis in paroxysmis moliri licet.

## §. III.

*Cura* Extra paroxysmum, ante omnia eo *asthma* est respiciendum, ut stagnationes hu- *us san.* morum in pectore discutiamus, eo- *guinei* rumque circulum restituamus æquabi- *& hy-* lem: simul vero causas materiales ac *pocho-* mediatas removeamus. Quod si igitur *driaci* sanguinis nimia versus pectus congestio hoc malum induxerit; consopita ejus per pulveres ac mixturas temperantes ebullitione, imminutioni nimia molis studendum est. Quo quidem fine venæsectiones in pede, præsertim vinosæ diætæ addictis, statis temporibus institutæ, eximiam spondent utilitatem; quibus in consuetis interponendæ sunt scarificationes; & iis, qui suppressum hæmorrhoidum fluorem patiuntur, conferunt hirudines venis sedalibus ad-

plicandæ. Non minus blanda laxantia, ad eliminandas primarum viarum sordes; & ad promovendum sanguinis per abdomen, & venam portæ circulum, motus corporis, victus tenuis, potusque levior, sed largus commendari debent. Et si hypochondriaca, & flatulenta præsto sunt symptomata; eo feliciori cum successu adhibentur lenia laxantia ac clysteres, conjuncto Elixirii visceralis usu, & recta victus ratione. In subjectis, maxime ex suppressione vel mensium vel hæmorrhoidum laborantibus; nihil quoque est fructuosius, thermis, interne pariter ac externe usurpandis; aut acidulis Selternis; quæ tepesactæ cum lacte misceri debent. Hæc etiam via est curandi asthma, quod a polypo cordis proficitur.

## §. IV.

Quando malum a materia arthritica, podagrica, scabiosa, purpuracea, *Asth-* vel ulcerosa intra corpus retrocedente, *matris* ac repulsa ortum traxit; translato *ab a-* nempe humore acri, peccante, cau- *crium* stico, ad nervosas pectoris partes: non *sordis* tutius consilium est, ac blandis dia- *repul-* phoreticis, liberam perspirationem *sione* promoventibus, humorem istum ad *suborti-* corporis superficiem, vel ad partes, ex *curatio* quibus repulsus fuit, relegare. Cui scopo cum præsentissimo commodo satisfaciunt liquor noster anodynus, cum spiritu bezoardico Bussii mixtus, aut pulvis bezoardicus, ex antimonio diaphoretico, nitro, pulvere Marchionis, succino præparato, & momento camphoræ compositus; mane potissimum sumendus, desuper bibendo aliquot vascula infusi theiformis, quod ex herba scordii, veronicæ, floribus sambuci, tilia, semine fœniculi, & aniso stellato concinnatur, inde lenem promovendo sudorem. Ubi scabies, vel ulcera retroacta, vel præmature consolidata sunt; insignem laudem merentur remedia ex sulphure parata, quippe quæ has sordes ad cutim revocandi, magnam vim possident. Quemadmodum enim medicamenta

ex



ex sulphure minerali extrinsecus in ejusmodi affectibus valde aliena & noxia sunt; ita contra interne data tonum partium roborando, diffilationem & perspirationem heterogeneæ materiæ adjuvant. Neque vero negligenda sunt leniora laxantia, nec blanda diuretica, sicuti tinctura tartari &c. est; siquidem his & crassæ e primis viis, & reliquæ per vias urinarias excernuntur impuritates. Speciatim pediluvia revocandis ad pedes arthriticis, atque podagricis motibus adprime inferviunt.

§. V.

Curatio  
asthma-  
tis ca-  
checti-  
ci.

Ubi molestissimus hic morbus a tumore pedum œdematoso, per graviores animi affectum, vel terrorem subitum, vel nimiam refrigerationem, vel etiam febrilem accessionem retro pulso nascitur: tunc non leve negotium est, decubitus feri viscerum in pectore discutere, & ad extimas partes revocare. Vidi in tali casu cum fructu adhibitum pulverem diaphoreticum ex cerussæ antimonii, cornu cervi usti ana drachma una, cinnabaris medicinalis scrupulis binis, sulphuris antimonii correcti granis quatuor paratum; quem pondere duorum scrupulorum, desuper bibendo infusum theiforme propinare solitus sum. Fovendi præterea ac sedulo fricandi sunt pedes, ut spasmus eorum relaxetur, & frigus expellatur; nec non injiciendi sunt clysteres, aut laxantia, eaque levissima.

§. VI.

Curatio  
asthma-  
tis sic-  
ci.

In asthmate sicco, quod a causis externis bronchia & pulmonales vesiculas exsiccantibus, ut sunt vapores saturnini, aer exhalationibus calcis vivæ refertus vel vapor carbonum fossilium, nascitur; humectantia & acrimoniam demulcentia & fibras laxantia, ut sunt lac, cremor ejus, oleum amygdalarum dulcium, emulsiones, sperma ceti, pinguedines animantium interno & externo usu omne absolvunt punctum.

§. VII.

Curatio

Quod si pectoris hydrops jam præsto

fuerit, anceps est curatio. Unicum, quod restare videtur remedium, paracenthesis est thoracis, quam multi colaudant auctores, uti CAROLUS PISO, SCULTETUS observ. 31. pag. 252. & SYLVIVS oper. medic. cap. 50. pag. 316. Neque est, quod fugiamus hoc remedii genus; quippe quod provida manu adplicatum, periculi plane expers est: verum alia incidit quæstio, an semper certum inferat auxilium? Perite HIPPOCRATES Lib. 2. de morb. monet, quod instituenda sit hæc operatio, antequam morbus invaluerit, aut labem visceris cujusdam secum traxerit. Et profecto hoc in casu, si viscerum læsio, aut exulceratio præsto fuerit, non temere ad hanc accedendum suadeo curam: iis vero integris, non contemnendam pollicetur opem. Præterea conjungere oportet leniora diuretica, atque laxantia, maximeque ea, quæ per epicrasin agere dicuntur; nimirum si morbus in principio, & ab exacerbatione febrili vacuus adhuc fuerit.

hydro-  
pis pe-  
ctoris.

§. VIII.

Ultimo loco, non incongruum visum est, quæ CELSUS in spirandi difficultate Lib. IV. Cap. IV. in usum commendavit, remedia subnectere; *Auxilium est, inquit, nisi aliquid prohibet, in sanguinis detractione. Neque id satis est, sed lac caprinum calidum jejuno dandum, & si non febrit, venter solvendus est. Liquando alvus, interdum etiam duccenda, quibus extenuatum corpus incipit spiritum trahere commodius. Caput etiam in lecto sublime habendum est; thorax fomentis cataplasmatisque calidis aut siccis, aut etiam humidis adjuvandus est. Præter hæc sorbitio- nibus & lenibus cibis utendum est, interdum vino tenui, nonnunquam vomitu. Prosunt etiam quæcunque urinam movent, sed nihil magis quam ambulatio lenta, pene usque ad lassitudinem, refrigeratio multa præcipue inferiorum partium, vel in sole vel ad ignem*



signem & per se ipsum & per alios usque ad sudorem.

Cautelæ, & monita practica.

§. I.

**Cautela** **P**urgantia acriora, uti sunt ex jalappa, gummi guttæ, colocynthide, elaterio, esula &c. confecta; nec non emetica, maxime, quæ ex fistibio parantur, cane pejus & angue in hoc affectu sunt fugienda; quippe quæ genus nervosum magis ad spasmos disponunt. Verum enim vero in asthmate tali cachectico, ubi pectus humoribus serosis, viscidis plenum est, cum insigni usu tartarum emeticum, refractiori dosi, cum infuso mannato propinare soleo; quo debilitatis pulmonibus aliquale robur instauretur, ut stagnantibus succis resistere possint. In tali quoque casu eximiæ utilitatis est Sulphur antimonii, probe correctum, nec non a veteribus mire commendata Squilla, provide data, quæ incidente non minus, ac resolvente virtute, desideratum edit effectum.

§. II.

**Circa** **Vulgaris**, sed insignis error est, tumores pedum œdematosos, qui frequentissime junguntur affectui nostro, purgantibus drastice profligare velle: neque aliud quidquam inde expectandum, quam ut ægri per compendium ad mortem deducantur: aliena quoque valde sunt emplastra repellentia & ulcera ac fluxiones pedum siccantia & consolidantia. Nec semper tuto sunt adhibenda balnea Laconica cum spiritu vini; quoniam exsiccant nimium corpus, tumoresque repellunt. Proficiunt magis siccæ fomentationes, sacculi discutientes, conjunctis interne diaphoreticis cum antispasmodicis mixtis, nec non usurpatis diureticis, atque clysteribus paullo acrioribus.

§. III.

**Circa** Sanguinis, quæ per venæsectionem fiunt, missiones, nunquam in ipso paroxysmo debent institui, quoniam

malum inde fit deterius ac contumacius. Neque extra paroxysmum quidpiam proficiet in ullo asthmatis genere, quam in eo, quod vel a nimia sanguinis mole, aut crassitie, conjuncto cordis polypo, vel ab excretionum sanguinearum suppressione fovetur: tum sine præservatorio circa æquinoctia eam decet instituire. Monendum vero hoc loco est, majori semper cum fructu clysterem, ad flatum dissolvendos & alvum aperiendam sanguinis missioni præmitti.

§. IV.

Thermæ si in morbi principio in usum trahantur, vel etiam acidulæ, quæ tepesfactæ esse debent; huic malo & ejus generationi, præsertim si ex cachymia scorbutica, viscerum infarctu, vel suppressione criticarum sanguinis missionum pullulaverit, mirifice opitulantur: contra vero si jam inveteraverit malum, cordis polypi præsto fuerint, vel hydrops pectoris fixam occupaverit sedem; harum potus mortem accelerat; quod variis comprobatum habeo exemplis. Namque in his subjectis reperitur partium solidarum mirifica laxitas, ac viscerum obstructio; qua de causa minerales istæ aquæ haud transeunt rite emunctoria, sed hinc inde stagnantes, non modo extravasatum in pectore serum augment, verum etiam novos, variis in locis excitant tumores.

§. V.

Major fere spes salutis collocari potest in externo thermarum usu, præsertim earum, quæ non tam adstringentis, calcareæ & martialis sunt proprietatis, quam potius, quæ valde subtilem & levissimam aquam foveant, & sale quodam alcalino imbutæ sunt: quoniam nomine egregiam vidi efficaciam a Teplicensibus, & Piperanis; siquidem virtute sua laxante ac emolliente fibras densas, rigidas & contractas mirifice demulcent, atque solantur, & simul liberiores reddunt perspirationem. Ubi vero vel polypi vel aquæ extravasatæ suspicio est, prorsus exulare hæc de-

Circa thermas & acidulas.

Balneo. rû mineraliæ usus.



debent. Plus etiam conferunt balnea præservandi quam curandi scopo.

§. VI.

Circa  
diure-  
tica.

In statu cachectico, cui jungitur asthma, magnam opem ferre deprehenduntur diuretica; adeo, ut JOHANNES RHODIUS *Lib. III. obs. 27.* testetur, asthma, evacuatis intra nycthemeron, 37. urinæ libris fuisse sanatum. De hoc medicinæ genere BAGLIVUS *obs. pag. 70.* perite hæc scribit: *Pluries adnotavimus, in pectoris morbis semper ducendam esse materiam ad urinæ vias, natura id demonstrante: quippe magnum consensum esse inter tibras, pudenda & pectus constat. Non vero tuta sunt diuretica, ex salibus lixiviosis & acidis parata in pectoris morbis, nam tussim movent, & morbum exasperant. Contra pulvis millepedum, therebinthina, essentia saccini minus spirituo-  
sa, sed probe alcalisata, item balsamum sulphuris antimonii, nostra methode præparatum, decocta radicum aperientium; Syrupus de althæa Fernelii, urinam potenter movent, nec tenellis pulmonum membranis infensa sunt.*

§. VII.

Circa  
exter-  
na.

In asthma spasmodico cum cardialgia juncto, & quod a spastica septi transversæ strictura prodit, linimenta, quæ ex axungis animalium recentibus parata sunt, demulcentia & anodyna, pinguedinem quoque caponis per solis calorem subtilisatam, neque minus Emplastrum Barbetianum, cum sapone & camphora nobilitatum; plus sæpe effecisse, quam spirituo-  
sa & calidiora observavi.

§. VIII.

Aeris  
usus.

In curatione non minus ac præservatione asthmatis nostri, aliorum remedium vim egregie secundat aer; qui quo lucidior, purior, atque serenior est, eo majorem asthmaticis fert opem. Et quem fugit, quod sola tempestatis mutatio, morbum hunc insigniter adaugeat? Veteres insignem aeris habuerunt respectum; quos inter allegasse

juvat COELIUM AURELIANUM, qui *Lib. II. cap. III.* ita scribit: *Obtinente strictura, convenit agrotos jacere loco lucido mediocriter, atque calido, adhibita abstinentia, usque ad tertium diem, cum requie corporis, atque animi, appositis lanis limpidis, atque mollioribus, oleo dulci atque calido præinctis, colla & thoracem circumdantibus &c.*

§. IX.

Neque minus ad inducendum partibus in pectore nervosis robur naturale, præservandi fine, mirifice præter potum aquæ frigidæ, sed purioris & levioris, confert aeris ruralis usus: quem laudando sane stratagemate, BAGLIVUS *oper. pag. 207.* his verbis commendat: *In diuturno asthma, sive humorali, sive convulsivo, aerem rusticum agrotantibus impero, & potissimum, ut campos habitent, quos arant bubulci. Debet itaque asthmaticus sequi bubulcum, quando terram arat, & incedere per sulcum, sive viam ab aratro recenter in terram factam, & aperto ore inspirare aerem, sive halitus nitroso salinos ac sulphureos, a recenter ruptis terræ glebis prodeuntes. Tonus pulmonum longo morbo relaxatus, nitrosa salina centralis terræ caloris substantia roboratur, confirmatur, & restituitur, eoque restituto, circulus quoque liquidorum per pulmonum telas in libertatem ponitur. morbusque profligatur.*

Aeris  
ruralis  
usus.

§. X.

Multum quoque ad levandum vel sanandum id mali refert, quo potus genere æger utatur. Cerevisiam fere, & quam maxime triticeam improbamus. Vinum meracum spiritu foetum est, ebullitionem sanguinis creans, congestionem humorum & gravitatem in pectore ac spirandi angustiam augebit, præsertim in sanguine abundantibus. Vinum naturaliter aquosum, ut Mosellanum vel Neckarinum recens, fibras ventriculi minus roborando, concoctioni minus aptum, flatum producit præsertim in hypochondriacis. Optimum

Circa  
potum.



mum deprehendi vinum Rhenanum antiquum, cum partibus tribus vel quatuor, aquæ purioris fontanæ vel Selterani fontis permixtum. Ceterum infusa theiformia ex hyssopo, veronica, ranunculo hortensi, sive Tragon, hedera terrestri, radic. glycyrrh. fl. bellidis parata, non satis laudare possumus, a quacunque etiam hoc malum subortum fuerit causa.

## §. XI.

Circa  
dulcia.

Sacharata, nimis dulcia, mellita in omni asthmate, maxime omnium vero in seroso & hypochondriaco canepejus & angue vitare oportet: nam tonum ventriculi lædendo, digestionem destruant, & flatuum generationi multum velificentur.

Enarrationes morborum.

## OBSERVATIO I.

Asthma  
convul.  
sivum a  
materia  
podagrica in  
corpore  
remanens.

**V**ir triginta novem annorum, ante binos annos gravissima pectoris constrictione, ac coarctatione, cum dolore punctorio & lancinatorio, thoracem, scapulas, & superiorem medullæ spinalis partem occupante, corripiebatur, & de cordis vehementi compressione, summaque spirandi difficultate, ac si per angustum duntaxat foramen spiritum ducere deberet, conquerebatur, adeo ut nec stare, nec sedere, nec laterum ulli incumbere potuerit. Duravit malum per sedecim horas, & tum quievit: sed vertente anno, circa idem, quod erat vernale, tempus recrudit hæc truculenta passio cum iisdem symptomatibus. Hac autem vice dolor podagricus, cum tumore calcanei, pedes infestaverat; qui, adplicata in pulvere camphora, evanuerat, & brevi tempore post se traxerat asthmaticum paroxysmum. Redibat ille aliquoties, & longe majori, quam antea ferocitate adfligebat, manus pedesque calore & frigore alternantibus tremabant, & nulla pars corporis erat, quin

in malorum consensum raperetur. Exercebant insuper primam regionem perpetuæ anxietates, ac flatulentia; & quod notari meretur, ipse vir ægrotans nunquam antea sanguinis evacuationes passus erat; Attamen in hoc morbo venam tundendam præbuit, eo effectum, ut cordis constrictione, cum pectoris & scapularum pungitivo dolore remitteret. Præterea externe spiritus vini camphoratus, interne vero pulvis bezoardicus nitrosus, præ aliis levamen ferebant. Consultus ego in paroxysmo commendavi pulveres diaphoreticos, cum nitro, cinnabari, tantillo camphoræ, & extracti croci permixtos: extra hos crebra pediluvia, & vesicatoria cruribus scapulisque adplicanda collaudavi, præservandi scopo utique thermarum Tœplicensium usum suasi; & vere pariter ac autumno, præmissa venæsectione, sal meum aperitivum, pilulas balsamicas, decoctumque temperatum, per unam alteramve hebdomadem usurpanda proposui, cum successu felicissimo.

## Epicrisis.

Ægrotus noster præter nimiam, qua abundavit, sanguinis molem, & hypochondriaca passione, & scorbutica humorum diathesi laboravit: priorem testantur flatulentæ primarum viarum distensiones, posteriorem podagrici pedum dolores significant. Asthma igitur, quo pressus fuit, a materia podagrica, ob naturam languidiorem haud satis vegete ad articulos pedum depulsa; sed retenta in corpore, ac nervosis præcordiorum partibus insidente, suam traxit originem: ab imi ventris vero flatulentia, majora cepit incrementa. Quare eo direxi curationem, ut in paroxysmo motus spasmodicos mitigarem, & aucta transpiratione, hostilem materiam ad corporis revocarem habitum. Deinceps podagram per pediluvia ad pedes invitare volui; & a murcam acrem per vesicatoria expellere.



lere intendi; quæ in illis potissimum casibus, ubi scabiosa, vel ulcerosa materia malum fovet, præstantis sunt usus. Quoniam autem æger scorbutico hypochondriacus fuit: ad mundificandam humorum massam, & corpus ab omnibus liberandum sordibus, singulove ac autumno, curam hisce scopis adprime convenientem ordinavi. Nec alienum in hoc casu fuisset thermis, vel acidulis, iisque tepèfactis uti; quoniam viscera a læsione adhuc immunia videbantur.

2. Discimus præterea ex hac observatione, quod camphora vim motus podagricos repellendi possideat. Multoties enim observavi, eam, sicuti interne data in discutiendis inflammationibus, ac expellenda materia acris, præclara pollet virtute; ita extrinsecus vel in pulvere, vel cum spiritu vini adplicatam, tumoribus inflammatoriis, ac erysipelaceis, præsertim in initio, & si personæ sensibilibus ac calidioris fuerint indolis; plerumque effectum repellentem exserere. Contra vero majori cum fructu in doloribus rheumaticis, & subiectis pituitosis hoc remedii genus adplicare licet.

## OBSERVATIO II.

**Asthma convulsivum a calculo vesicæ felleæ subortum.** Triginta annos egressa mulier, temperamenti sanguineo cholericæ, virgo adhuc, illibata gavisa fuit sanitate. Postquam vero viro nupta, parere cepit; varii generis febribus tam acutis, quam intermittentibus, nec non spasmodicis affectibus obnoxia fuit. Ad hæc ictero contaminabatur, qui cum summa virium dejectione, torpore ac gravitate totius corporis, horrore atque phlogosi, contabescencia, alvo mox fluida, mox adstricta, ac molestissimo pruritu, per octo integros inhæsit menses, omniumque remediorum vim elusit; donec tandem operæ thermarum Carolinarum prorsus cessavit, & ægra optime habuerit. Brevis post vero asthma convulsivum incidit, quod cum atrocissimo constrin-

gente, ac reprimente circa regionem thoracis & diaphragmatis dolore, præcordiorum anxietate, & summa spirandi difficultate, ac suffocationis metu, exacerbata, oscitatione continua, siti inexplebili, vomitu, assiduis vigiliis, virium collapsu, frigore ac tremore corporis stipatum, per paroxysmos rediit; quibus finitis, teterrimam semper cum facibus excrevit materiam. Quo in rerum statu, icterus quoque ter adparuit.

## Epicrisis.

Asthma convulsivum, de quo in præsentia agitur casu, per consensum a calculo vesicæ felleæ ortum est: quale exemplum a WILLISIO de morbis convulsivis allegatur. Subesse calculum vesicæ felleæ, significat frequentior icteri recursus; quem BAGLIVUS pro signo pathognomonico huius affectus agnoscit, dum *Oper. pag. 433. dicit: Si videris icteros sanatos, sed recidivos, eos certe a calculo vesicæ felleæ progigni prædicito.* Namque calculum hunc, si per suos ductus descendit, æque gravem spasmodicam torturam ipsis inferre, quam illum, qui renibus inhæret, non ignotum est: cum autem ductus biliferi nervos suos a plexu hepatico, a pari vago & intercostali oriundo mutuatur; non obscurum est, cur hæc stricturæ ad vicinas quoque partes, ventriculum, intestinum colon, diaphragma, nervos pnevmonicos, aliasque nervosas pectoris partes propagentur. Talis quoque observatio reperitur in CONSULT. ac RESPONS. MEDICIN. Tom. II. Sect. III. Cas. XLIX. Quum igitur hic affectus, more cunctis spasmodicis morbis consueto, per periodos ac paroxysmos recrudescat: eam esse oportet medentis intentionem, ut in paroxysmo violentos motus consopiat, extra illum vero obstructions, quas generant calculi, referare studeat. Priori scopo in nostra ægrotante satisfacimus 1) clysteribus emollientibus, & oleosis, 2) ve-



2) vesica bovina, decocto emolliente tepidiori plena, ad hepatis regionem admota, 3) pediluvii circa somni tempus administratis, 4) pulveribus nitrosis, cinnabari & extracto castorei nuptis, & liquore anodyno interne datis. Neque omittenda tum sunt balnea aquæ dulcis, quippe quæ in relaxandis spasmodis, ac referendis humorum obstructionibus, mirifica gaudent virtute. Ad complendam vero posteriorem indicationem, non præstantius auxilium expectare licebit, quam ex thermarum Carolinarum recto usu. Quo absoluto, insistendum erit infusis aperientibus, interponendo lenia laxantia; ac denique, liberis viis, & quiescentibus spasmodis, ad roborandas, quæ sunt debilitatæ, partes, martialia rite usurpata, vel etiam balnea martialia, omnem curationis paginam absolvunt. Et ita sane graves, qui ex vitio, & obstructione hepatis nascuntur affectus, averti, saltem insigniter mitigari possunt.

## OBSERVATIO III.

Asthma  
spasmodico  
hypo-  
chondriaci,  
ab usu  
radicis  
Squillæ  
egregie  
suble-  
vatum.

Vir quinquagenarius, fluori hæmorrhoidum olim obnoxius, sponte postea cessanti, vinum rubrum, nec non Tabaci fumum in delitiis habens, animique affectibus indulgens, per multos jam annos de spirandi angustia, tussi sicca, & auditus gravitate conqueustus fuit. Per novissimum vero trimestre adeo invaluit hæc spirationis difficultas, ut omnem eripiat somnum, nec ægro nisi in sella prono sedenti illum capere permittat; attamen brevissimus est, & asthmate illo sæpius interrumpitur, cum metu suffocationis. Jungitur præterea tumor pedum oedematofus, & per vices invadunt convulsivi motus; nihilo tamen minus adpetitu fruitur integro; &, quod notabile est, sub præsentia affectione, perfecta gaudet auditus libertate. Sanguis ex vena missus, consistentiæ fuit atræ, ac impurioris. Consultus medi-

cus suppressas hæmorrhoides respiciens, varia ordinabat remedia, resolventia ac discutientia, nec non leniora laxantia; atque pilulas Becherianas; a quarum prima & unica dosi, hæmorrhoides prorumpébant, & per decem dies fluebant. Neque vero levabantur inde pectoris affectiones; tantum aberat, ut adpetitus plane languesceret, tumor pedum incretceret, ad abdomen ascenderet, & mictio fieret impeditior. In tali rerum statu, medicus consilii inops, exhibebat tandem pulverem Squillæ, cum vincetoxico permixtum, ex jusculo quodam: quo sumto, non modo libere per aliquot horas dormire, verum etiam in quocunque corporis situ, absque ulla molestia decumbere poterat æger, quin expergefactus ab omni tussi & asthmate immunis, optime valebat. Abhibita dicti pulveris tertia dosi multum muci tenacis, viscidum evomebat; & sequentibus diebus, continuato isto remedio, eundem mucum copiosius eructabat, sanoque videbatur simillimus. Verum elapsis aliquot hebdomadibus, cum iracundiæ nimium indulisset ægrotans, recidit sensim in priora symptomata, & præter leve cruoris ex hæmorrhoidibus stillicidium, graves in sinistro hypochondrio patiebatur puncturas. Cuncta remedia, clysteres, laxantia &c. in cassum dabantur, adeo, ut oedematosa pedum intumescencia, abdomen quoque obsideret; quin apoplecticus insultus, cum linguæ & dextri lateris resolutione, tandem accederet. Hic quidem medellam admittebat; at asthma insignes sumsit vires; ut ideo ad usum Squillæ rursus deveniret medicus: ex quo, potenti instar, omnia symptomata protinus evanescebant, somnusque cum adpetitu redibat. Sed brevis erat valetudo; siquidem post binas hebdomades, cuncta pathemata revertebantur. Tertium data Squilla, reliquis nihil proficientibus medicinis, omnia consopiebat; & jam per aliquot dies, maiorum vacuitate gavisus æger, meam



ad præservandos ultiores insultus, per medicum requisivit opem.

Epicrisis.

1) Asthma hæc dici meretur hypochondriaco spasmodicum; quoniam constrictione partium spiritalium spasmodica nititur: & ex hypochondriorum vitio primam trahit originem. Testantur id puncturæ sinistri hypochondrii, neque dubium est, quin suppressio fluxus hæmorrhoidalis multum ad generationem mali contribuerit; præsertim cum vini rubelli, quod contrictiva vi agit, forsan nimius accessit usus.

2) Non mirum est, quod hæmorrhoidum fluxus, unica pilularum balsamicarum dosi revocatus, malo nullas suppetias tulerit. Quod si enim hæc excretio morbo recenti supervenerit, illum levasset procul dubio: at quoniam ille per tot annos duravit, partes adeo debilitatæ, & quasi motibus hisce anomalis assuetæ fuerunt, ut difficile sit, iis, licet emendetur humorum vitium, pristinum restituere robur; tantum abest, ut motus vitiosi a qualibet causa, maxime pathematibus animi, facile corrigi potuerint.

3) Attentionem meretur, auditus difficultatem, ingravescente cum asthma pedum tumore cedematoso, prorsus levatam fuisse. Namque dum illa a feri visceri stagnatione in partibus auditui dicatis, omnino sustentata fuit; non mirum, si derivato illo sero ad pedes, organa auditus pristinam constitutionem recuperaverint.

4) Observatione denique dignissima, est mirabilis illa, ac fere stupenda Squillæ in allevando asthmatis immani paroxysmo efficacia. Radix hæc a Medicorum antiquissimis, HIPPOCRATE, GALENO, CELSO, DIOSCORIDE, COELIO AURELIANO, &c. in affectibus chronicis, maxime hydropicis, ob virtutem pituitam lentam viscidamque dis-

solventem, urinam cientem, viscerumque infarctus referantem, magnæ est æstimata. Fovet autem elementum valde subtile, acerrimum, ac fere causticum, atque majori dosi exhibitæ, nervoso generi omnino adversatur; ad quam acrimoniam obtundendam veteres variis usi sunt modis; quidam enim ipsam pastæ ex farina involuebant, in clibano exsiccabant, indeque trochiscos parabant, uti DIOSCORIDES *Lib. II. cap. 202.* vel cum aceto infundebant, uti GALENUS, vel cum aqua decoquebant, uti HIPPOCRATES *de victus rat. in morb. acut.* vel cum vino, ut COELIUS AURELIANUS *Lib. III. Cap. VIII. de morbis chronicis §. 120.* quo nimirum hac ratione sal tenuissimum causticum evaporaret. Præprijis vero habetur veluti pro specifico in chronicis pectoris affectionibus; unde JAUBERTUS *Oper. pag. 476.* dicit: *Ad expectorationem omnium convenientissima est Squilla; quovis modo assumpta, ut cocta & melle excepta, vel quod ex ea conficitur mel & acetum, ac ex utroque compositum oxymel Squilliticum: quo ad crassorum et viscidorum pulmonibus impactorum expurgationem haud quaquam est præstantius aliud genus remedii &c.* Et FERNELIUS *Therap. univers. Lib. V. cap. 20.* Squilla, inquit, *pectus crassis & lentis humoribus infarctum expurgat, tussim veterem & asthma persanat, ac saniem e pectore elicit.* Certe meretur hæc radix inter remedia heroica referri, & nostris etiam temporibus in frequentiore usum trahi: namque exserit non modo virtutem potenter incidentem; verum etiam languentes motus excitat, & quod mirabile est, blande anodynum simul exhibet effectum. Scire vero licet, ante illius usum corpus blandis laxantibus esse repurgandum, illamque ad tria vel quatuor grana, cum radice vincetoxici, & nitro, quod mitigat acriorem ejus vim, exhibendam.



## OBSERVATIO IV.

Asthma  
spasmodicum  
a victu  
postira  
sumto.

Vir generosus, in dignitate constitutus; annorum triginta, constitutionis sanguineæ, habitus corporis spongiosi, & succulenti, post vehementissimam iracundiam, ex qua totum contremiscebat corpus, mox capiebat in convivio cibum, vniique præterea liberaliori potu replebat ventriculum. Insequentem noctem transigebat in somnium, cum anxiiis præcordiorum stridoribus, vomendi conatibus, & totius corporis languores conjunctam. His per aliquot dies adfligentibus, jungebantur sensim, adpetitus prostratio, pulsus debilis & celer, tabes, febris lenta, oris siccitas, sitis, flavus faciei, albique, quod oculis inest, color, mictio parca, urina valde saturata, fusco, rubicundo, prunoque colore imbuta; & alvus dura, tensaque, flatus & stercorea difficiliter transmittens. Adhibuerat in hoc rerum statu a variis Medicis, cujuscunque generis medicamina, aperientia, emetica, amaricantia, stomachica, carminativa, martialia &c. quoniam hepatis obstructionem, & biliosam viscidamque primarum viarum saburram suspicabantur. Verum cuncta erant frustranea; & malo per tres menses in hærente, tandem accedebat asthma spasmodicum, quod nocturno potissimum tempore ita vexabat ægrum, ut in lecto contineri nequiverit, sed per aliquot horas in conclavi obambulare, spiritumque fenestris apertis anhelare debuerit. Sic ergo viribus exhaustus, totoque corpore consumtus, Dresda, ad me accessit, ultra octoginta remediorum, quæ usurpaverat, formulas secum afferens, meumque flagitavit auxilium. Ordinavi liquorem anodynum mineralem; pulverem præcipitantem nitrosum; infusum theiforme ex floribus chamomillæ, summitatibus millefolii, floribus Salviæ, herba veronicæ, semineque sceniculi paratum; pediluvia ex sola aqua dulci confecta; clysteres emollientes, ac

denique Elixir balsamicum viscerale: quibus per mensem usurpatis, pristinam, quæ Dei est gratia, recuperavit sanitatem.

## Epicrisis.

1) Exhibet hic casus, iterum exemplar asthmatis spasmodici, ex constrictione viarum biliferarum suborti. Causa fuit gravis iracundia; quæ quod immediate effectum, in primas potissimum regiones, & præsertim vasa, bilem vehementia, ea spasmodice constringendo, exserat; observatione quidem compertum habemus; Perniciosior iracundiæ est efficacia, si paullo post cibum vel potus capiatur; & quo diutius inhærescit ejusmodi spasmus; eo pertinacior est, & ad vicinas extenditur partes. Quum vero pulmones, eorumque bronchia nervos adipiscantur a pari vago; quod cum ramo nervi intercostalis etiam hepatis, & biliferis ductibus, nec non septo transverso, præbet furculos: unde patescit insignis consensus, quo pectoris partes cum hepate gaudent. Pertinet huc observ. RAYGERI, quæ exstat Misc. N. C. Dec. I. anno IV. obs. XI. cum femina per triennium asthmate periodico detenta & post mortem dissecta fuit, ubi nihil vitii in pulmonibus, nec bronchiis observatum. Viscera etiam salva, sed vesicula fellis magna, nihil bilis sed lapidem magnum inæqualem inclusum 4. drachmarum continuit.

2) Exacerbatum & deterius redditum est malum, a tanta remediorum, maxime inconvenientium copia. Namque notandum est, in iis morbis, qui sola, eaque graviori partium nervosorum constrictione, ab animi affectibus, inducta sustentantur, absente crassa materiali causa, perniciosissimum & veneni instar esse vomitoriorum, purgantium atque spirituosorum & incidentium acriorum usum.

3) Diuturnitas mali maximam partem, minus rectæ causarum per investigationem debetur; quæ, quanta post se relin-



relinquat damna, innumeris pro dolor! innotescit experimentis. Plurimi enim medicorum ad solum humorum vitium, eorumque crassitiem, vel aliam quamcunque qualitatem, & inde factam viscerum obstructionem respiciunt; motumque partium solidarum perversum, in quo sæpius totum morbi fundamentum hæret solo, plane negligunt. Unde remediis suis, quæ ad tollendam humorum labem alias non inepta sunt, plus sane damni excitant. Quare cum, explorata morbi causa, ad relaxandam spasmodicam stricturam, omnem curandi scopum direximus; factum utique est, ut votis non sine singulari existimationis nostræ augmento potiti simus.

OBSERVATIO V.

*Asthma* Senex septuagenarius, obesus, cachecticus, ob pedum femorumque œdematosum tumorem, per quatuor jam annos sedentariam agere debebat vitam: & cum aliquando gelidissima hyeme, templum ingressus esset, ingenti per totum corpus horrore, artuum tremore, dentium stridore afficiebatur. Tum protinus tumor pedum, licet magnus fuerit, evanuit, & ejus loco erysipelacea inflammatio pedem occupavit, tantum vero simul accessit asthma, ut vix spiritum trahere posset, & de suffocatione timeret, cum pulsu intermittente, rubore faciei, ac perpetua in somnum proclivitate. Dabantur pulveres diaphoretici ex antimonio diaphoretico, oculis cancerum, nitro-depurato, & camphora; qui, conjunctis laxantibus id effecerunt, ut tumor pedes rursus occupasset, & cuncta reliqua conquievisent symptomata. Sed præter opinionem repetebatur scena; tumor œdematosus retrocedebat, & sequebatur asthma gravissimum: datis vero prioribus, redibat tumor, remittebant mala. Nihilo minus tertia vice disparebat tumor, denuo gravissimam post se trahens spirandi difficultatem: & jam

iterato priorum remediorum usu ad pedes reverti, contumaciter recusabat. Verum perpetuus accedebat ad maturam stimulus; & quoniam morbum per urinam solutum iri animadvertēbam, hujus fluxum, data tinctura antimonii acri, cum sale nostro volatili oleoso, secundare studebam. Unde factum est, ut urina copiosissima quantitate, & assumptorum proportionem longissime superante, veluti in iis, qui diabete laborant, mingeretur, & ultra tres septimanas insisteret. Tandem vero, commendato alimentorum boni succi usu, mictio fiebat naturalis, & æger perfecte convalescebat, ita quoque, ut nullus amplius pedum adparet tumor.

Epicrisis.

1) Insignis est relatio sive metastasis, quam tumor œdematosus pedum, cum morbo asthmatico habet; adeo, ut illo disparente, hic protinus excutitur, & illo rursus adparente, hic vel plane tollatur, vel insigniter allevetur: cujus ratio supra jam fusius est tradita. Causa repulsi œdematis non alia fuit, quam frigus externum; quod constringendo partes exteriores, & occludendo cutis spiracula, stagnans intus serum, ad pectus ascendens repressit. Sub hoc vero partium externarum, & musculorum spasmio, portio quædam sanguinis stasin concepit, cui supervenit inflammatio erysipelacea.

2) Mira ac fere divina est camphoræ cum nitro, antimonio diaphoretico, cinnabari, interne datæ efficacia, in resolvendo, ac expellendo sero acritam viscido, quam subtili ad externas partes; quam contra medicorum communem sententiam; absq; ullo damno, vel humorum æstu exserit. Quare hoc egregium remedii genus, insigni cum fructu in inflammationibus, etiam internorum viscerum discutiendis; & exanthematibus, febrium malignarum, aliorumque morborum, e corpore proscibendis, adhibere soleo.



3.) Notatu dignissima est solutio asthmatis, ac œdematis pedum, per diuresin copiosiore, veluti diabeticam. Hæc omnino in tali casu pro critica habenda est, nec ullo modo sistenda, tantum abest, ut potius, quacunque ratione eam promovere oporteat: nec obscura est ratio, siquidem serum illud impurum, acre, viscidum, quod stagnando in pedibus, œdema, in pulmonibus asthma progeneravit, ad renes depellitur, & per urinam e corpore penitus eliminatur. Quo in casu, ad promovendam mictionem, tinctura antimonii acris, permagnæ est virtutis.

## OBSERVATIO VI.

*Asthma a retro, pulsa podagra lethale.* Flagitavit aliquando opem meam vir quidam generosus, duobus ab hac urbe milliaribus habitans, habitu alioquin spongioso, lividoque colore præditus: qui, cum podagræ ac calculi sævitiam diu sustinisset, impatiens tandem dolorum, medici ex vicina quadam urbe auxilium imploraverat. Ille ad sopiendos podagræ dolores, linimento ex spiritu vini rectificato, in quo solutum erat satis opii & camphoræ, manuum atque pedum articulos inungere jusserat. Inungit ager totum corpus liberaliter, dolores remittunt, sed horum loco lassitudo, virium languor, & postremo asthma convulsivum corpus occupat: quod cum pedum œdemate, summaque præcordiorum anxietate junctum, perpetuam minabatur suffocationem. Accedens ego, exploratis causis, prædixi ancipitem statum, quin ipsam mortem, quæ etiam non multo post, adhibitis incassum remediis, insequeretur.

## Epicrisis.

1.) Asthmatum illud genus, quod a materia acri ac fere caustica, nervis præcordialibus incumbente, & a podagra, arthritide, aliisque malignis

exanthematibus repulsis, ad pectus delata, suboritur, non raro brevissimi est exitus: siquidem vellicati nervi, maximeque tunicæ bronchiales ac pulmonales, tam graviter constringuntur, ut statim extravasetur lymphæ in pulmonum substantiam, atque repentinam inducat suffocationem. Quo in casu post mortem reperitur summa pulmonum constrictio, modo cum, modo sine aquarum extravasatione.

2.) Summa itaque medentis cura sit, ut motu podagrici ac arthritici ad sua loca revocentur: sic enim protinus remittere asthma, perpetuæ est observationis. Dignus hoc loco est, ut allegetur, casus, quem his verbis recenset DODONÆUS. *Mercator juvenis tam gravi, atque diuturno suspirio vexabatur, ut licet nullum remedium genus intentatum relinqueret, nihil tamen inde allevaretur. Idem tamen invadentibus postremo calculi, & podagræ doloribus ab orthopnœa liberatus fuit, ita, ut cum antea in sedili cibus, somnusque ipsi esset capiendus, jam decumbendi facultas morbi beneficio ipsi concederetur. Adeo, quam frustra a remediis sibi promiserat medicinam, a morbo impetravit!* Similem casum recenset ETTMULLERUS *Oper. præct. pag. 184.*

3) Prudentis tamen est medici, ut in tam ancipiti statu, neutiquam deserat ægotantem. Oportet nimirum ipsum, protinus ano infundendum curare clysterem: purgantia enim, vomitoria, quin & ipsæ venæsectiones, nisi mortem accelerent, summe tamen perniciose sunt. Oportet porro spasmos præcordiorum, adpositis pectori vesicis, decocto emolliente plenis, delinire; & internis diaphoreticis & antispasmodicis pugnare. Nec alienum est, pedes in tepidam immittere aquam; aut si pertinax inhæserit malum, vesicatorium suris pedum admovere.



## OBSERVATIO VII.

Morbus  
asthma-  
ticus, ex  
aeris  
vitio  
subor-  
tus; cū  
pectoris  
hy-  
drope  
letha-  
lis.

Quum aliquot abhinc annis, in Carolinis degerem fontibus; accessit illos vir quidam generosus ex aula Gothana, qui ex intemperantia potus, & frigore intenso, sub quo, pectus ipsi libere exponendo, iter fecerat, ab aeris inclementia, asthmaticum sibi met contraxerat morbum. Erat ipsi habitus corporis cachecticus, facies flava, & plumbea; tantum tamen ipsi virium suppetebat, ut thermas adire posset. Hausta ingenti aquæ quantitate, nihilominus instabat malum, jamque crescebant symptomata, cum maxima anxietate, & suffocationis metu, adeo ut interdum paroxysmi ad octo vel decem horas extenderentur. Quibus compulsus, thermarum potum omittebat: interim alvus erat fluida, & augescente malo levior sinistri brachii paralyxis, & intensissimus scapularum dolor infestabat; aqua in thorace ita crescebat, ut commoto corpore fluctuatio perciperetur in pectore; tumor autem in pedibus, & abdomine nullus; & pulsus in sinistra manu debiliior, in dextra fortior, validiorque emicabat. Postremo cum nihil prodesse optima remedia; animi defectione oppressus in ipsa urbe obiit.

## Epicrisis.

I) Discimus ex hoc casu, quam inopportunus sit aquarum mineralium usus, in asthmate, quod jam inveteravit, & cum extravasatione aquarum in pectore conjunctum est. Plures sane ejusmodi casus mihi occurrerunt, ubi, ad fontes Carolinos degens, hisce subjectis suasi, ut abstinerent a thermarum potu, & prædixi funestum eventum, qui etiam in multis tandem evenit. Dum enim viscera jam sunt obstructa; moles aquarum ea transire nequit, & in vasis subsistit, symptomata mirum in modum exacerbans.

Hoff. Syst. Tom. V.

2) Quemadmodum frigus omnibus nervosis partibus infensum est; ita maxime pectori deprehenditur inimicissimum. Quam plures mihi cogniti sunt casus, ubi ex eo solo, liberalius, atque diutius pectori admissio, tussis, asthmata spasmodica, & cardialgia atrocissimæ propullularunt. Hinc non rarum est, eos, qui venatoriis, aut aulicis muneribus præsumunt, & pectore, uti mos fert, minus tecto incedunt, ejusmodi affectibus infestari. Et si nostrum conferamus casum, non sane ex alia causa originem traxit asthma, quam ex frigore, pectori admissio: siquidem æger venationibus indefessus vacavit, nudoque pectore sub gelidissimo cœlo incessit. Quod cum forsan inconvenienti tractatum sit medela; omnino in hydropem pectoris tandem degeneravit.

## OBSERVATIO VIII.

Laboriosus nostræ civitatis pistor, Asthma a re-  
sex & quinquaginta annorum, robu- presso  
stæ atque corpulentæ constitutionis, pedum  
iracundiæ multum deditus, potui spi- erysi-  
rituoso non minus ac crassiori cerevisiæ pelate.  
adsuetus, nudis a puero per integros  
 sæpe dies pedibus incedere solitus, ante  
 tres annos in dextro pede erysipelas  
 habuit. Quo per spiritum vini cam-  
 phoratum, a chirurgo imprudenter  
 adplicatum, non tam discusso, quam  
 in horrendum pedis tumorem commu-  
 tato, ingentem pectoris oppressionem,  
 cum spirandi haud exigua difficultate  
 junctam, protinus expertus est. Ne-  
 glectum ab initio malum, progressu  
 temporis adeo crescebat, ut æger nec  
 corpus sine molestia movere, præser-  
 tim versus terram inclinare, nec scalas  
 ascendere, nec quidquam portare, nec  
 in lecto sine suffocationis metu jacere,  
 nec nisi sellæ insidens, noctes fere inso-  
 mnes transigere posset. Hinc, acceden-  
 te utriusque pedum œdemate, majori  
 autem dextri, qui olim erysipe-  
 late affectus erat, ab omnibus ne-  
 gotiis abstinere cogebatur. Jun-



gebantur potius sensim ingens virium, & adpetitus prostratio, æstus internus, absque siti, qui vesperi potissimum invadens, & ab ultima dorsi regione incipiens, per spinam ad caput usque pergebat, ibidemque in frigidum erumpebat sudorem; & cum summis præcordiorum anxietatibus, ac ingenti anhelatione stipatus, totam noctem molestam reddebat, somnoque privabat. Neque sub hoc æstu majori quicquam fuit solatio, quam liberior aeris frigidi accessus, quem cupidissimus aperto ore hauriebat. Vacabat tussi; quoties autem cunque quid per os aut nares secederet; sensit insigne levamentum. Alvus erat adstrictissima, & vix quovis quarto vel quinto reddebatur die. Abdomen flatibus fere turgebat, & in eodem fluctuantis quasi aquæ strepitum se sentire affirmabat; urinam vero satis copiose mingebat. Consultus ego, cum ex pulsu tardo, sed magno, & sæpius mutato, sanguinis, qui diu non erat detractus, abundantiam conjicerem, purgato prius ope pilularum balsamicarum, cum sale Sedlicensi alternis diebus sumtarum, intestinorum canale, ex vena in brachio tusa septem cruoris uncias curavi detrahendas. Quo factum est, ut & abdomen detumescere, & spirandi angustia imminui cœperit; accedente præsertim copioso acris materiæ ex utroque pedum effluxu; qui externo sacculorum discutientium, ex floribus chamæmeli, sambuci, camphoræ; & farina fabarum &c. paratorum usu, frictionibus, maxime vero pedum in vase calefacto furfure repletum, crebriori & diuturna ad genua usque immisione adjutus, & affectum œdematosum minuit, & pectori insigne attulit solatium. Præterea ad diluendos viscidos humores, ab omni cerevisia ipsum abstinere, ejusque loco decoctum temperatum, cum quarta vini parte mixtum bibere, mane vero in lecto infusum ex herbarum veronicæ, hyssopi, rorismarini, salviæ, scabiosæ ana manipulo uno, corticis ligni sassafras, ra-

dicis liquiritiæ, feminisque fœniculi ana drachma una sorbillare jussi. Denique ad excretionem mucii, insigni cum fructu usurpavit hanc mixturam: Recipe aquarum hyssopi, veronicæ cum vino ana uncias quatuor, oxymellis Squillitici unciam unam, essentia gummi ammoniaci, glyzirrhizæ, croci ana drachmam unam, syrupi de erysimo Lobelii unciam unam. M. d. de qua singulis diebus, quater tria vel quatuor cochlearia sumsit. Æstus internus, quoties recruduit, vel adhibito cum aqua fontana pulvere nitroso absorbente, vel etiam emulsione, ex seminum quatuor frigidorum, feminis papaveris ana drachmis duabus, aquæ cerasorum nigrorum, florum acaciarum, rosarum, cinamomi sine vino ana unciis duabus, syrupi papaveris albi uncia & dimidia confecta, insigniter mitigatus fuit, subsequente somno tranquillo, & vires haud mediocriter restaurante. His itaque remediis per mensem circiter continuatis, ager non modo liberius, & sine omni molestia spiravit; sed & adpetere, dormire, & vires, miro spectaculo, sensim recuperare cœpit, adeo ut & in publicum denuo prodire, & negotiis domesticis interesse constitueret. At immutato celeriter aere sereno in pluviosum, & accedente graviori ira; omnia pristinam induerunt faciem, vires nimirum fractæ, adpetitus dejectus, somnus inquietus, & asthma fortius revertebantur: sed aliquot circiter dierum intervallo, partim ope descriptæ emulsione, partim ope pulveris ex radicis vincetoxici scrupulo uno, squillæ & nitri ana granis sex concinnati, sublatis omnibus hisce symptomatibus reconvaluit.

#### Epicrisis.

Hujus affectus historiam, cum curatione, & adhibitis remediis, ob juniores medicos practicos, de industria paullo plenior exhibere constitui-  
mus. Ex aliis vero notatu dignis, per-



nicialis spiritus vini camphorati effectus, quem saepius in tumoribus erysipelaceis, arthriticis, podagricis &c. comperi, injungendus mihi videtur. Nam sicuti provida hujus spiritus in tumoribus & doloribus, a lento & stagnante humore abortis, adplicatio non caret sua laude & usu: ita contra in naturis sensibilibus, & mobilioribus, serum vitiosum ad interiora repellendo, vel magis incrassando, non minimam noxam infert.

2 Annotare etiam ex hac morbi historia licet facilem omnium symptomatum, quæ plane quiescebant, a solo iræ motu recursum, & exacerbationem. Unde adparet, causam hujus affectus non tam ab humorum mole, & crassitie; sed a vitioso, & præternaturali nervosarum partium motu foveri; quem blande anodynis, & demulcentibus consultius, quam spirituosus sopire, & delinire præstabit.

3 Præter hæc memorabilis squillæ videtur effectus, aliquot etiam aliis exemplis notatus, in spasmodicis & convulsionibus partium nervosarum præsentissime sopiendis, maxime catharro suffocativo, asthmate convulsivo, quandoque etiam in ipsa epilepsia: qui effectus nostra quidem sententia principio anodyno, sali subtilissimo discutienti ac resolventi intermixto debetur.

## OBSERVATIO IX.

**Asthma**  
**spasmo-**  
**dicum**  
**a retro-**  
**pulsa**  
**podagra.**  
Generosus vir, annorum quadraginta, habitus strictioris, sanguine pleni, temperamentique sanguineo melancholici, vita olim functus valde mobili, iracundiæ deditus, & pro potu ordinario vino rubro, aqua diluto usus, ante aliquot annos cruorem ex venis sedalibus, sed semel tantummodo profudit, & paullo post insultum podagricum, cataplasmatibus profligatum passus fuit. Quatuor elapsis annis vitæ genus plane sedentarium subiit; in quo asthma, quod jam diu utut levissimum sustinuerat, accedente præ-

fertim conjugis carissimæ morte, & inde suborto vehementi mœrore, insigniter increvit, cum gravi cordis palpitatione per intervalla stipatum. Prævia venæsectione, adhibitisque variis medicaminibus, ordinabantur aquæ Sedlicenses: quæ tantum aberat, ut ferrent levamen, ut potius sequuto autumno, ingentem in modum spirandi difficultas, fere suffocativa invalesceret, & maxime versus noctem cum aridissima tussi infestaret. Consultus Medicus, venam tundi jubebat, detracto sanguine aterrimo, cuticula subpingui investito: ordinabatque varia resolventia, incidentia, laxantia, pediluvia, & quoniam flatus simul molestabant, carminativa: a quorum usu per urinam insignis amurcæ tartareæ quantitas reddebatur, & generosus æger egregie habere incipiebat. Verum, cum satis longo interjecto tempore, diætæ regulas transcendisset, & aeri humidiori sese exposuisset; recruduit anhelatio, priori fere gravior; sub qua urina rursus deponebat copiosum sedimentum. Adhibebantur venæsectiones, fontes Selterani, varique remediorum genera, sed in casum; quin tandem accedebat peripneumonia. Huic septimo die vehemens orthopnoea, cum maximo in pectore strepitu, absque omni expectoratione, adeo vexans jungebatur, ut per aliquot dies incurvato pectore, angustum trahere deberet spiritum. Expectorantia exacerbabant malum; ab antispasmodicis vero & infusis calidis solamen percipiebat; junctisque aliis remediorum generibus, ab hac gravi primum febre, & subinde ab asthmate ita restituebatur, ut in publicum quoque prodire potuisset. Verum novissime, sub humidiori versatus aere, illud rursus incurrit, cum pedum œdemate, noctu disparente, corporisque contabescencia stipatum: & in hoc rerum statu meam flagitabat opem. Commendavi itaque præter rectam vivendi rationem, maxime studiosam ab aere humido, frigidoque



abstinentiam, & statas venæsectiones, pulverem meum præcipitantem, liquorem anodynum, & Elixir viscera-  
le balsamicum; vinum rubrum, pro  
potu interdixi, & Selteranas conjun-  
xit; atque pediluvia: quibus factum  
esse percepi, ut egregie valere ceperit.

### Epicrisis.

1) Aeris diversa constitutio, sicut  
ipsum asthma inducere valet, ita quo-  
que varias asthmaticis infert mutatio-  
nes. Quando enim mercurius in baro-  
metro, ob imminutam aeris, vaporibus  
aqueis infarcti, elasticitatem de-  
scendit; autumnali præsertim tempo-  
re ventis ex austro & Zephyro flanti-  
bus: difficilior semper est in asthmati-  
cis spiratio. Quod si vero mercurius in  
barometro ascendit, uti fieri conspi-  
cimus flante Euro, qui valde est tem-  
peratus, ac elasticus, optime habent  
asthmatici. Hinc videmus, quantum  
ad liberam spirationem aeris conditio  
contribuat. Nam si ille nimium levis,  
tenuis, ac rarefactus est; quemadmo-  
dum in altissimis montibus, vel hypo-  
caustis calefactis vel balneis deprehen-  
ditur: tunc nequit resistantiam san-  
guinis & aeris internis in vasis pulmo-  
nalibus contenti superare; neque ideo  
progressum humorum per pulmones ad  
sinistrum cordis ventriculum promo-  
vere; quare etiam sub levissima at-  
mosphæra homines suffocari posse ex-  
perientia docemur. Inde quoque ratio  
patet, cur ab aere vaporibus carbonum  
accensorum repleto, & certo loco in-  
cluso, hi homines suffocentur; quo-  
niam videlicet hi vapores sulphurei,  
aeri demunt vim elasticam expansi-  
vam, ut ille interni aeris & sanguinis  
resistentiæ superandæ impar fiat. Qua-  
re monitum, ab asthmaticis sedulo  
observandum est, ut quemcunque hu-  
midum & nebulosum studiose vitent  
aerem.

2) Sedlicentes aquæ, sale amari-  
cante, quod calcareæ indolis est, val-  
de turgidæ & magna ac crebriori doli

haustæ, in asthma & in omnibus spas-  
modicis affectibus, nisi eos exacerbent,  
saltem sunt inefficaces; & potius pro-  
sunt in morbis sic dictis frigidis, pitui-  
tosis, ubi multum muci, quem inci-  
dunt, resolvunt, ac evacuant, primas  
vias obsidet. Sal enim earum ob ingen-  
tem vellicationem nervis, spasmo af-  
fectis, est infensum.

3) Asthmati spasmodico facile su-  
pervenire potest peripneumonia. Vi-  
enim constrictionum, quæ membra-  
nas pulmonum ac bronchiorum occu-  
pat, sæpius sanguinis vel feri in va-  
sculis minimis stases, & accedentes in-  
flammationes producuntur; quæ peri-  
pneumoniam constituunt. Et tum an-  
ceps sane est rerum status.

4) Quum in nostro ægrotante nulla  
fuerit nec viscerum obstructio, nec pe-  
ctoris hydrops; non mirum est, quod  
meris antispasmodicis hic morbus per-  
sanari potuerit.

### OBSERVATIO X.

Ante decem circiter annos consilium  
a me petiit Theologus quidam, vir  
quingagenarius, temperamenti san-  
guinei, dolore ex calculo, atque po-  
dagrico per intervalla ab aliquot annis  
affectus, qui incidebat in gravem spi-  
randi difficultatem, continuam qui-  
dem, sed sub aeris mutatione admo-  
dum invalescentem. Sub aere enim  
temperate humido, degebat semper  
melius, quam nimis sicco & frigido.  
Mali primam causam tribuebat incu-  
riæ, quod in camera, calce viva recen-  
ter obducta somnum ceperit; quoniam  
ab eo tempore ægrius spiravit. Plures  
consultuit Medicos; sed a nullis reme-  
diis quidpiam opis persensit. Ego lac-  
asminum præbendum suasi; sed ventri-  
culus id ferre recusavit. Successit tan-  
dem atrophia, & tumor pedum œde-  
matofus, cum febre hectica, & inse-  
quuta morte. Aperto post obitum cor-  
pore, hepar repertum est ingentis ma-  
gnitudinis; pulmones mirum in mo-  
dum inflati, distentique, & cor solito  
gran-

Asthma  
ab ex.  
halati-  
onibus  
calcis  
vivæ.



grandius adpareban; ut totam fere thoracis cavitatem replerent. Hæc equidem nullam, pericardium vero insignem extravasati feri fovebat copiam, & intestina erant inflammata.

Epicrisis.

In asthmate demortuis pulmones valde inflatos & expansos fuisse reperi-  
tos, plures docent observationes. Vid. RHODIUS *Cent. II. obs. 22.* COSTÆ-  
US *de potu in morbis Lib. III. cap. 30.* DODONÆUS *observ. 54.* Præsertim RUYSHIUS *obs. anat. chirurg. obs. 19. & 20.* in pulmone invenit acervum vesicularum pellucidarum, ab aere expansarum, & adeo obstructarum, ut levi compressione aerem ex iis evacuare potuerit. A vaporibus calcis vivæ bronchiales ramulos ita posse constringi, ut aer atmosphæricus ob gravitatem & elasticitatem, qua pollet, in vesicularum pulmonalium cellulas impelli, sed non adeo facile exire possit, vero est simillimum. Et inde etiam factum est, ut æger aerem temperate humidum, ob vim fibras & tunicas constrictas relaxantem, melius ferre potuerit, quam siccum & frigidum. Crediderim in tali casu, vaporem ex floribus emollientibus, cum lacte decoctis, ad interiora pulmonum admissum, longe utilissimum fore; neque emplastra demulcentia, nervina ex axungiiis, suo fructu destitui. Interne vero lacticia, & axungiae animalium, sperma ceti, oleum amygdalarum dulcium, in ejusmodi asthmate sicco, neque minus in eo, quod metallurgis ex fumis saturninis, ore haustis, familiare est, optimam pollicentur opem.

Quam perniciosam & virulentam vim, in constringendis faucibus, & viis spiritalibus, exferant effluvia, quæ ex locis calce viva obductis emanant, quotidiana edocet experientia. Ante viginti annos tres filii Consiliarii primarii, qui infra annum decimum erant constituti, in camera dormientes, recenti calce investita, intra a-

liquot dies angina suffocati occubuerunt.

OBSERVATIO XI.

Aliquot abhinc annis, per litteras me consuluit vir quidam generosus, quadraginta annorum, ex Livonia, vehemens asthma per biennium jam passus, docerique voluit, num ipsi sint profuturæ thermæ Carolinæ. Conquereretur vero non tantum de summa præcordiorum anxietate, spirandique difficultate; sed & vehementi ipsius ster-  
ni spasmodica non minus, ac dolorifica strictione, atque thoracis & scapularum compressione, tanta violentia per periodos invadente, ut non raro animi deliquia, cum extremorum frigore, sudore gelido, summaque inquietudine stipata jungerentur: qui patoxyfmi ab ira, & a cribis instantibus, maxime si alvus simul fuerit adstricta, semper erant graviores. Contraxisse sibi mer hoc malum scripsit a vehementia frigoris, sub levioribus veslimentis ad præcordia atque pedes admissi, quos ad genua usque, venationibus indulgens, sæpius in aquarum immisit stagna. Ceterum & hæmorrhoidalis fluxus, & hypochondriacarum passionum vacuitate gaudebat: naturæque robustioris semper fuit: & frustra multis remediorum generibus, sanguinisque missionibus usus est. Ego igitur consultus, suasi utique thermarum Carolinarum internum, peractaque harum potatione, Tæplicesium externum usum. Paruit meo consilio, & corpore viribusque prorsus extenuatus; accessit thermas, easque cum tanto potavit levamine, ut sequenti anno earum potationem iteraret. Conjunxit insuper usum Elixirii visceralis cum tertia parte liquoris anodynii permixti; nec non essentia corticum aurantiorum bene preparata, eidem liquori nuptæ; atque pulverum nitroso temperantium, interpositis pilulis balsamicis. Externe emplastrum nervinum temperatum præcordiis & sterni admo-

ASTH-  
ma a  
frigore  
vehe-  
menti

tum,



tum, egregium tulit allevamentum. Quin brevi abhinc tempore per litteras mihi nunciavit, se a malo suo penitus liberatum, athletice jam valere.

### Epicrisis.

Multa mihi cognita sunt exempla eorum, qui ex sola frigoris ad præcordia admissi vehementia, cardialgia spasmodica cum summa sterni strictura laborarunt; & insigne semper, vel ab emplastro Barbette, vel nervino, quod ex axungia humana, sevo cervino, croco, balsamo Peruviano, myrrha, minio, paratur levamen experti sunt. Vis enim intensi frigoris tanta est, ut non modo, occludendo cutis poros, transpirationem impediat, sed potissimum, ut ipsis partibus solidis, membranaceis & nervosis, earum intimam texturam ac structuram immutando, labem inferat; quæ haud ita facile corrigi potest. Quemadmodum vero in omnibus partium nervosarum morbis, qui a frigore nascuntur, circumspæctum thermarum internum externumque usum deprehendi efficacissimum: ita quoque non dubitavi, quin illum in præsentī morbo commendaverim, cum successu felicissimo.

### OBSERVATIO XII.

Asthma  
rheu-  
maticū  
Caroli-  
nis per-  
fanatū.

Vir generosus, in dignitate constitutus, quinquaginta annorum, plenioris corporis habitus, ex loco quodam, ubi lauto, inordinato, simul autem valde mobili usus fuerat vitæ genere, domum redux indulgit deum vitæ sine motu desidi, multisque occupationibus plenæ: unde protinus de rheumaticis, atque catharralibus in pectore incommodis, coryza, tussi, raucedine, atque spiratione justo difficiliore conqueri cœpit. Ante annum vero, per domesticas calamitates animo non parum fractus, plures noctes inquietas valde, cum molesta hypochondriorum distensione, multoque sudore stipatas transegit. His demum

accessit ægerrima spiratio, tanta quidem, ut vix in lecto contineri potuerit; sed ad capiendum aerem liberiores in conclavi discurrere, & fenestras aperire debuerit; adpetitu tamen semper salvo & integro existente. Progressu temporis, exhaustis viribus, corpus contabuit, & spirandi difficultas adeo increvit, ut ad levem corporis motum, quando vestes vel exuere, vel induere, vel scalas ascendere, vel etiam alvum cum nifu quodam depocere voluit, protinus suffocatoriam fere pectoris compressionem, cum summa molestia passus fuerit. Quin memini, virum illustrem aliquando noctu in gravissimum eumque præfocantem ferme pectoris affectum incidisse, qui a quadam defluxione a capite ad pectus irruente pendebat, & cum tanta spirandi angustia inhærebat, ut ob totius corporis tremorem, faciem rubicundam, extremorum refrigerationem, viriumque lapsum, morti perquam vicinus videretur. Desideravit in hoc paroxysmo haustum aquæ frigidæ, quo sumto mirifice recreatus, & liberiores expectorationem habere, & minus impeditum spiritum ducere cœpit. Ceterum ægotanti nulla nec ad hæmorrhoides, nec ad podagram erat dispositio; at patre, hæmorrhoidum fluori obnoxio, hocque cessante, asthmate hydropico correpto ac denato, natus fuit. Postquam igitur ordinatis a Medico varii generis pectoralibus, & antiasthmaticis remediis, nec non sanguinis missione, exiguo, vel plane nullo fructu usus erat: me tandem accersit, meumque desideravit auxilium. Commendavi quam plurimum thermarum Carolinarum potationem; quam non sine multo levamine instituebat, & sequenti etiam repetebat anno. Præterea tam ante, quam post harum usum suasi, ut a cæna vel prorsus abstineret, vel eam ter minimum quavis septimana intermitteret; non minus loco cerevisiæ saturatoris, tenuiorem, sed satis salubrem Lœbeginensem, ac fontem Selteranum



num cum quarta vini parte biberet; at multa equitatione, vel ambulatione corpus frequenter exerceret. Ad hæc familiariter utebatur essentia corticum aurantiorum, bene præparata, cum essentia carminativa permixta: vinum quoque medicatum, quod ex herba cardui benedicti, comis absynthii, herba ranunculi hortensis, corticibus citri, aurantiorum, agarico, rhabarbaroque confectum erat, singulo mense, alternis diebus hac ratione assumebat, ut quatuor ante prandium horis, forbillato prius jusculo carnis, hauriret sex dicti vini uncias; quod multum mucii pariter, atque flatuum subduxit, cum exoptatissimo mali levamine.

Epicrisis.

1) Quantum detrimenti mutatio vitæ generis mobilioris in immobilis, servata eadem, quæ antea fuerat, victus proportionem, afferre possit valetudini: quam plurimis in praxi compertum habemus exemplis; unde veritas aphorismi HIPPOCRATICI confirmatur, quo, *multi*, inquit, *morbis fiunt, quando cibus superat laborem*. Hac enim ratione nimia feri impurioris copia generatur; ex qua rheumatismi, maxime pectorales, gignuntur: & quoniam in tali vitæ genere digestiva vis languet, cumulantur inde cruditates in primis viis, ex quibus generantur flatulentia, quæ affectus catharrales, & asthmaticos insigniter augent. Quamobrem non sine ratione Viro optimo commendavi, ut, quoniam avidiori fruebatur appetitu, parciori victu, frequentiq; corporis motu uteretur; & accommodato laxante, lentos viscidos humores ex intestinorum canale repurgandos curavi. Quum vero ejusmodi affectus, si vel a parentibus trahantur, vel in habitum degeneraverint, solis istis remediis, non facile cedere solent; ad efficaciora descendere oportet, ex quibus, ob insignissimam, quam inde sepius deprehendi, virtutem, thermæ

Carolinæ, & postea Tœplices, cum illis reliquis palmam eripiunt.

2) Debetur peculiaris animadversio illi effectui, quem aqua frigida in affectu pectoris catharrali, ac pene suffocante, præstitit excellentissimam. Quando enim pulmonum tonus adeo debilitatus est, ut irruentis in illis pituitæ copia haud expectorari possit, tunc aquæ frigida haustus, lene his partibus addendo robur, adjuvat expectorationem; qua facta mitigatur, quin cessat reliquus affectus,

3) Circa potationem non modo acicularum, verum etiam infusorum vinorum, si frigida sint, notari meretur, quod quibusdam subjectis, stomacho existente jejuno, pota molestias creant. In tali casu hisce personis prohibitionem jusculorum calidorum injungere soleo; atque tum potum aquarum vel infusi purgantis concedo: quoniam hac ratione, frigus illorum fluidorum, fibræ ventriculi nerveis non adeo molestum est.

OBSERVATIO XIII.

Vir quinquagenarius, corpore robusto, sanguine, succisque pleno instructus, largis epulis, & sub his vino adulto uti solitus, in ætate juvenili, narium hæmorrhagiis; virili vero dispositioni hæmorrhoidali obnoxius, ante aliquot annos molesto in osse sterni, circa regionem tertiæ costæ corripiebatur tuberculo. Quod, accedente gravi iracundia, inflammatum, tandemque suppuratum, felici quidem sectione extirpabatur; sed insignem spirandi difficultatem, a tussi & excretionem mucii vacuum, relinquebat. Hæc vespertino potissimum invalescebat tempore; & sub inspiratione, in eo, cui tumor insedit, sterni loco, videbatur quoddam hære impedimentum, quod libero aeris ingressui obicem poneret. Ceterum alvi est adstrictioris, neque raro dolores dorsi per sentiscit; & novissime cœcæ adparuerunt hæmorrhoides. Consultus com-

Asthma  
spasmo.  
dicum  
a tuber.  
culo in  
osse  
sterni  
exciso.

men-



commendavi venæsectiones ter quotannis iterandas; cucurbitas cum scarificatione, dorso ac regioni renum quandoque admovendas; &, si recruderint cœcæ hæmorrhoides, sanguisugas ipsis adplicandas. Deinceps, procurata, alternisque diebus ad tempus iterata alvi laxatione, dedi pulverem ex lapidum cancrorum uncia dimidia, solutionis oculorum cancrorum, nitri purificati ana drachma una confectum, ut ejus dimidiam drachmam mane ex aqua racunculi hortensis, sorbillatis desuper aliquot infusi veronicæ vasculis sumeret. Ordinavi quoque, ut rectæ vivendi rationi studeret, maximeque elevatis capite ac pectore cubaret; & denique loco, quem tumor obsederat, adplicandum suasi emplastrum, quod ex gummi ammoniaci, myrrhæ, bdellii ana drachmis tribus, terebinthinæ venetæ, axungia humanæ, ceræ uncia una, florum sulphuris, camphoræ ana drachmis duabus, croci, olei anisi ana drachma una conficiendum docui.

#### Epicrisis.

Asthma hoc spasmodicum natales suos potissimum mutuatur, a tuberculi in sterno suppurati, inopportuna excisione. Quemadmodum enim generatim ulcera, etiam arte concitata, quæ adpellamus fonticulos, præmaturre consolidata, gravissima spirandi difficultate stipari, frequenti comperimus habemus observatione: ita hanc eo facilius comitem habent ulcera, & læsiones ossis sterni, male feriatibus tractatæ. Sternum scilicet, quod est os molle, ac valde spongiosum, in parte interiori, eaque concava, proxime investitur valde nervosa tunica pleura; ejusque mediæ parti per longitudinem adnectitur mediastinum, productio duplicata pleuræ, eique sensibilitate neutiquam cedens, subjectaque insuper arteria aspera. Quare vero est simillimum, exciso illo tuberculo, serum acre, quod illud ploravit, per

perosam ossis substantiam retroactum, mediastino protinus insedisse, ejusque spasmodicam induxisse strieturam; quæ renisus illam sub inspiratione sensationem perfecit. Hinc, testante ET TMULLERO *Oper. Pr. Part. II. pag. 565.* inflammationi mediastini jungitur tam molestus in inspiratione circa sterni regionem renisus.

2 Præterea vero ad generandum in hoc casu asthma contribuit, congestio ac infarctus humorum in pulmonibus. Hinc primario etiam debetur tuberculi illius generatio. Namque dum æger hæmorrhoides fluentes habuit; illæ vero posthæc cessaverunt: vix fieri potuit, quin humorum stagnationes, in vasis imi ventris, maxime intestinorum contigerint: unde repetenda est alvinæ obstructionis origo. Notum vero est, quod ubi circulus humorum in abdomine irregularis fertur, spasmi in hac cavitate protinus excipiant, & flatulentia: hinc cruor majori copia ad præcordia cogitur, pulmones infarcit, spirandi que graviolem parit difficultatem.

3 ) Studio commendavi situm corporis cum elevato capite. Namque notari meretur, quod asthmatici, maxime si a nimia sanguinis mole tales facti fuerint, ex decubitu supino, protinus incurrant gravissimam anhelationem. Ex hoc enim situ, major humorum ad præcordia fit affluxus.

Plures de asthma casus reperies in Consultat. ac Responsis Medicin. Tomo I. Sect. II. casu LXXXVIII. ad XCIII.



## CAPUT III.

D. E.

## TUSSI, INPRIMIS RHEUMATICA ET CONVULSIVA.

## THESES PATHOLOGICÆ.

## §. I.

Definitio tussis.

**V**ix occurrunt morbi, qui tam propinqua cognatione invicem conjuncti, tantaque frequentia complicati sunt; quam quidem asthmatica spirandi molestia, atque tussis; adeo ut vix fieri possit, quin unus alterum post se trahat. Explicato igitur asthmate, ejusque speciebus; de tussi jam agere constituimus. Hæc vero, generatim definiendo, nihil est, quam violenta materiæ peregrinæ, ex pulmonum bronchiis, per horum vim contractilem, intensius auctam, sive convulsivam, cum vehementiori expiratione facta expulsio.

## §. II.

**S**tru-ctura partium spiritalium. Hujus historiam perinde ac pathologiam scripturus, rectissime a descriptione illarum partium incipere posse videor, quæ ad tussim efficiendam proxime concurrunt; quo demum hujus motus; revera convulsivi essentia pateat; ejusque differentia intelligantur. Et hujus quidem primariam sedem atque subjectum constituit magnus iste aereus canalis, cujus ope spiritum trahere benigna nobis permisit natura. Dividitur ille in asperam arteriam, & bronchia; hæc per pulmonum substantiam serpunt, illa a pulmonibus ad fauces tendit. Hujus mirum principium, larynx dictum, est canalis a summis faucibus incipiens; ex quinque cartilaginibus, ope membranarum, externæ nerveæ, mediæ carneæ, & internæ glandulosæ connexis, fabricatus, & superius apertura, glottis adpellata, & operculo cartilaginoso, cui no-

men est epiglottidis, oblecta, perforatus; Sequitur principio capacioritubus, ex cartilagineo membranaceus, quem asperam vocant arteriam; qui angustiori sensim itinere ad pulmones tendens, circa hos in binos primum dividitur ramos; bronchia dictos. Hi in minores, & minimos, eosque innumeros, per pulmonum fabricam distributos dispescuntur, omnes ex segmentis cartilagineis, membranisque contractilibus constructos; & denique in vesiculas minimas, racemorum instar, bronchialibus istis ramulis adherentes, & præcipuam pulmonum partem constituentes desinunt.

## §. III.

**O**mnes hi pnevmonici canales ab initio ad finem cinguntur membrana ex fibris tam longitudinalibus, quam annularibus constructa, & multis glandulis, ductibusque excretoriis spisse obrita; quarum glandularum copiam, situm ac figuram exquisitissime delineavit **MORGAGNUS** *Advers. Tab. 11. fig. 1. pag. 48.* Fundunt illæ, in dictas spiritales vias; humorem tenuem, roscidum, blande lymphaticum; quem etiam ex illis glandulis, quæ extrinsecus epiglottidi, cartilaginibus arytenoideis, bronchiorumque extremitatibus abhærent, stillari, dubium quidem, sed vero videtur simile. Has ostendit **HEISTERUS** *in A.N.C. Cent. VII. & VIII. observ. LXIII.* Tribuit præterea hisce ductibus varii generis vascula provida natura; & quidem primum arteriosa, ab arteria bronchiali. Hæc principium sumit ex trunco arteriæ magnæ descendens, super arcu arteriarum intercostalium superiorum, & in tres dividitur ramos, quorum unus externe super aspera decurrit arteria, reliqui duo per totam substantiam membranarum tracheæ, bronchiorumque pulmonalium multas dispergunt ramificationes. Venosa accipiunt a vena bronchiali; cujus ramuli, simili ac arteriæ modo propagati, magno tandem ramo in truncum venæ caveæ de-

Canalium pnevmonicorum vasa ac glandulæ.



descendentis & azygos abeunt. Utraque vasorum accurate detexit ac descripsit RUYSCHIIUS *epist. VI.* Nervosos denique ramos mutantur hæc spiritales viæ a pari vago, nec non intercostali nervo.

## §. IV.

**Functio viarum spiritalium.** Primarius horum canalium usus, atque functio est, ut aeri externo, ad facilitandum sanguinis circuitum, & conservandam vitam valde necessario, in pulmones ingressuro, pariter ac redituro, commodum iter præbeat. Hunc in finem datæ sunt iis ductibus 1) copiosæ glandulæ, non ut secernant humorem excrementitium; siquidem hic locus excretioni sordium secundum naturam minime dicatus est: sed ut effundant lympham tenuem, quæ membranas tracheæ, & bronchiorum, ne ab aere perpetuo illabente exarescant, blanda continuaque lubricatione fovet, atque tum, suo perfuncta officio, in halitus resolvitur, & cum expirando aere, in morem transpirationis cutaneæ, exhalat. Eodem scopo tributæ sunt hisce viis 2) tunicæ nervæ, ac exquisitæ sensibiles, non minus ac musculosæ, fibræ tam longitudinalibus, quam annularibus præditæ: cujus ope motu gaudet tam constrictorio, quam dilatatorio, quem sapiens natura cunctis nervosis ac membranaceis totius corporis ductibus tribuit, veluti in uretheribus, viis biliferis, & ventriculo ac intestinis deprehendimus. Neque suo insigni fructu vacat hic motus; siquidem non modo ad promovendum aeris ingressum, & exitum, verum maxime ad lymphæ ex dictis glandulis secretionem adjuvandam, quin & sanguinis cursum per vasa bronchialia facilitandum permultum contribuit. Sed quum hi membranacei ductus, ad spirationis negotium soli haud sufficient, ipsi tamen 3) cum reliquis partibus, quæ ad peragendam hanc functionem concurrunt, veluti sunt pulmones, pleura, septum transversum, musculi intercostales, & abdominis, &c. tam arctissimo fruuntur consensu, ut fere

fit impossibile, quin agente una parte, omnes simul agere incipiant.

## §. V.

His recte se habentibus, secundum naturam fit respiratio: ubi vero cunque unicum dictorum momentorum a naturali statu recessit, eadem statim læditur ac pervertitur. Mittimus reliqua spirandi vitia, & de sola jam tussi loquimur, quæ nunquam non dictorum canalium pnevmonicorum præternaturali constitutione absolvitur. Vix profecto dubito, quin, quod in ventriculo est vomitus, id in bronchiis tussim, i.e. inversum eorum motum tonicum esse dicerem. Namque hæc mihi tussis est idea, quod sub ea bronchiales ductus ab infima ad superiorem partem vehementius constricti, contentum aerem cum impetu, & celeritate sursum agant; insimul peregrini quidpiam expulsuri. Quum autem his male affectis; reliquas quoque pectoris partes, spirationi tributas, & quæ cum his porro arctiori nexu cohærent, in favorum motuum societatem, vi intimioris consensus rapi oporteat: facile patet, cur in tussi, tanquam præternaturali expiratione, quo ea est vehementior, eo quoque violentius totum pectus, totum abdomen, & totum corpus concutiat. Vicissim autem ob eandem harmoniam sæpiissime fit, ut, si septum transversum, ventriculus, œsophagus, nervi præcordiales, & qui ab illis dependent, vel etiam membrana narium pituitaria, a quacunque causa vellicentur; affecta simul fistula aerea, tussim post se trahant.

## §. VI.

Si igitur affectio dictorum canalium spasmodico convulsiva, formalem tussis constituit rationem: eorundem vellicatio dictæ convulsioni, hinc & tussis causam proximam præbeat, necesse est. Omnis ergo tussis sedem suam in pectore habet; licet causæ non semper ibidem obhærescant. Et hæc ipsa causarum, quæ ad tussim contribunt, medietarum diversitas, tam varias ejus

Ratio formæ  
lis tussis  
o-  
stendi-  
tur.

Tussis  
causa  
proxi-  
ma.



jus gignit species, quas omnes pertrahere, nostri non est instituti.

§. VII.

Tusses  
sym-  
ptomati-  
cæ. Neque enim agere constituimus de ea tussi, quæ tanquam molestum symptomata variis jungitur ægritudinibus.

Talis est phtyfica, quæ a colliquatione vesicularum, & ramulorum bronchialium per ulcus pulmonum facta suboritur, adeoque continui læsionem profundamento habet. In hac non per pulmonales glandulas, sed ipsam bronchiorum cavitatem exesam, laceratam, ac hiantem, peregrina ac ulcerosa eam subintrat materia, quæ vellicando nervosas membranas, tussientem producit motum. Deinceps ad symptomaticas tusses pertinent, quæ asthmati, peripnevmonia, pleuritidi, scirrhis atque vomicis pulmonum, inflammationi septi transversæ ac jecinoris superveniunt; quæ læso nervo vel tendine circa collum suboriuntur; quæ difficilem dentitionem comitantur; & quæ convulsivos, aut epilepticos motus, aliosque hystericos morbos consequuntur. Hæ maximam partem, a bronchiorum vellicatione, per consensum duntaxat inducta, causa morbi in plus minus remota a præcordiis regione hærente, producantur, claroque sunt documento, tussim pertinere ad affectus nervorum spastico convulsivos.

§. VIII.

Tussis  
a pere-  
grinis,  
asperam  
arteriâ  
illaben-  
tibus. Neque etiam ample tractabimus de ea tussi, quæ proficiscitur a peregrinorum tam solidorum, quam fluidorum insolito in asperam arteriam, per glottidis rimam descensu. Tragici profecto, & sæpe, ob repentinam, quam inducunt, suffocationem, funesti sunt hi casus, quorum notabiles historias recenset MARCELLUS DONATUS in histor. med. mirab. Lib. III. cap. VII.

Huc spectant tusses, quæ a tumoribus, calculis, aliisque rebus præternaturalibus, asperæ arteriæ, atque bronchiis accretis suboriuntur: unde calculos, aliaque corpuscula, grandinibus similia, tussiendo rejecta fuisse, fide digni perhibent auctores. Videas ALE-

XANDRUM TRALLIANUM Lib. V. PAULUM ÆGINETAM Lib. III. cap. 28. & 31. & PETRUM BORELLUM obs. Cent. I. obs. 67.

§. IX.

A nostro quoque scopo alienæ sunt tusses gravissimæ, quas excitant fumi saturnini, metallici, inque primis acidæ minerales, cum aere diutius inspirati, & illi potissimum metallicolæ experiuntur, qui argento per plumbum in magnis catinis depurando student, nec non figuli lythargirio multum utentes: ut & cæmentarii, & qui cum calce viva multum sunt occupati. Evidens earum est ratio: dum enim particulae metallicæ, fere corrosivæ ductus spiritales, insigni sensibilitate præditos ingrediuntur, iisque intimius insinuantur; gravem eorum inferunt constrictionem, tussis siccæ, cum asthmate complicatæ causam.

§. X I.

Nec denique nostræ considerationi pressius subjacet id tussis genus, & levius, & brevius, quod a cohibita transpiratione, in sanis ceteroquin corporibus evenire solet. Fit nimirum ea, si subjecta præsertim pituitosa caput vel pectus, quod antea in calidiori loco leni perspiratione maduit, subito exponunt frigori, & repressum a cute serum acre ad tracheam & bronchia decumbit; aut si fenestras inprimis noctu in loco frigidiori dormiunt, vel in frigido ac hyemali aere liberius obversantur. Jungitur quoque coryzæ; & vel calidiori regimine, vel sumto forsan diaphoretico, brevi tempore cessat. Huc etiam spectant delapsus muci e naribus ad fauces, & laryngem, qui matutino tempore facili conatu perscreatum eliditur.

§. XII.

Sed de ea fusius agemus tussi, quæ primarium constituit morbum, totumque graviter afficit corpus, & tam vehementia, quam diuturnitate est molestissima. Vocamus hanc rheumaticam, eo quod rheumaticis revera absolvitur affectionibus. Namque pro causa

Tussis  
metal-  
licola-  
rum.

Tussis  
cathar-  
ralis  
levior.

Tussis  
rheu-  
matica.



caussa agnoscit, humorum, maxime serosorum inversum, & a superficie corporis, extremisque partibus ad pulmonestendentem motum, atque decubitus; neque unquam a febrilibus commotionibus, vespertino potissimum tempore conspicuis, ac horripilationibus vacua est. Hæc pro subjectorum, quæ invadit, varietate, vel humida, vel sicca est: illa evenit sanguineis, phlegmaticisque, qui præter partium fibrosarum, nervosarum ac musculosarum molliem, serosis ac pituitosis nimium scatent succis, veluti sunt foeminae præ viris, infantes, pueri, atque senes, præ iis, qui in juvenili, vel virili ætate sunt constituti. Sicca vero tussi magis corripuntur hypochondriaci, scorbutici, cachectici, strictiori corporis habitu, & debili, adque spasmodicos motus valde proclivi nervorum systemate, nec non sero acri copioso præditi.

## §. XII.

**Historia** Summum tussis rheumaticæ gradum **tussis** denotamus, per convulsivæ seu ferinæ **convul-** nomen. Hæc tam efferata vehemen- **sivæ seu** tia, tantaque totius corporis concussio- **ferinæ.** ne adfligit, ut ea non raro suffocari credas miseros. Modo, maximeque sub initio sicca est, & vel nullam, vel saltem parcissimam feri tenuioris, plus minus acrioris copiam elidit; modo humida, tumque mucum sublividum, sæpe tenacissimum, præviis laboriosissimis conatibus, secum ducit. Refrigerant simul extrema, alvus est clausa, urinæ minguntur tenues, & succi vitales majori copia & impetu ad superiora, pectus, atque caput compelluntur: unde sub paroxysmo facies sanguine turgēt, rubet, venæ tument, arteriæ fortius, celeriusque moventur, oculi prominent, lacrymas emittunt, palpebræ intumescunt, & interdum ipsæ sanguis, accedente sternutamento, e naribus ejicitur: nonnunquam ipsa pulmonum vascula rumpuntur, sputumque suboritur cruentum. Non raro singultus jungitur, simulque ventriculus adficitur laboriosis vomitionibus,

quibusdam stercora, & urinæ præter voluntatem fluunt; quidam, præsertim infantum, hernias tussiendo sibi contrahunt, aut adnotante jam HIPPOCRATE *aph. 46. Sect. VI.* gibbosi sunt: quin M.N.C. *cent. 1. obs. 1.* notabilem allegant casum, de corpore vertebræ dorsalis, præ tussis vehementia, in medio disrupto. Neque ignorari oportet, a nimia tussis vehementia apoplexiam suboriri posse: & BOYLE *de natur. philos.* observavit, quod ex tali tussi subitanea memoriæ ac ratiocinii jactura, nec non paralytis manuum, & aliorum membrorum enata fuerit.

## §. XIII.

Caussa hujus tussis materialis residet in humore tenui, acri ac fere caustico, ad sensibiles fistularum aerearum tuniceas deposita, easque graviter vellicante. Hæc vel laryngi duntaxat, & arteriæ asperæ insidet, tumque continuam, & molestissimam faucium titillationem habet comitem; vel profundius bronchiis pulmonalibus infixæ hæret, atque tum gravissimum & atrocissimum parit tussendi conatum. Et generatur quidem hic humor a sordibus impuris & acribus, ad superficiem corporis, aut artus exteriores, vel haud satis vegete expulsi, vel quacunque de caussa, maxime frigore, retroactis, & ad pulmones decumbentibus. Hinc docemur, scabiem, tineam, achores capitis, guttam rosaceam, sudorem pedum, aliaque exanthemata repressa, ulcera præmature consolidata, & arthritidem, podagramque intus actam, tussim post se trahere convulsivam. Et quænam quæso alia est caussa, quod morbilli & præcursores, & comites, & pedissequas habeant, ejusmodi tusses diuturniores, quam quod materia acris, morbillacea, ad vias spiritales retrocessit, easque graviter vellicavit. Conf. A.N.C. *Dec. III. obs. XI. pag. 25.*

## §. XIV.

Non raro etiam hæc rheumatico convulsiva tussis, ex communi caussa, aeris nimis demica-

Caussa  
mate-  
rialis  
ferinæ  
tussis.

Tussis  
convul-  
siva epi-  
demica



*Tussis epidemica.* nimirum vitio suborta, epidemicam per multas regiones edit stragem. Occurrit autumnali, ac hyemali potissimum tempestate, si hæc, flantibus antea austris calidior ac benignior fuit, & subito in frigidam, ventis aquilonaribus molestam commutatur. Sed hæc causa impuris duntaxat corporibus rheumaticam tussim infert, cum in aliis non nisi catharralem excitare solet. Quare epidemicæ hujus ferme tussis talem maxime aerem existere causam animadvertimus, qui nebulis pernicialibus, maleque olentibus, aut aliis particulis acribus, ac sæpius venenatis, febrium quoque exanthematicarum causis, prægnans est: hæ enim particulae inspiratae non modo gravissimam tussim, verum & aphthas, illam insigniter exacerbantes progenerant. Præterea vernali quoque tempore, grassantur interdum ejusmodi tusses epidemicæ, cum rauedine junctæ; tumque ab exhalationibus salino acribus, in aere contentis, & calore solis, ex terra hyeme occlusa, evaporantibus, glandulisque per vias spiritales sparsis semet insinuantibus, suam trahunt originem. De malis hisce epidemiis legas HIPPOCRATEM *epidem. VI. Sectio VIII. SENNERTUM de febribus Lib. IV. cap. 17. SYDENHAMIIUM, ET HISTORIAM MORBORUM WRATISLAVIENSIIUM.*

§. XV.

*Tussis rheumatica ex causa interna.* Hæc de summo tussis rheumaticæ gradu, cujus causa plerumque externa est, dicta sunt; dantur vero tusses, proprio rheumaticarum nomine dignæ, quæ internas potissimum agnoscunt causas; & sicut diuturnæ, ita maxime molestæ sunt, cumque rheumaticis capitibus, ac pectoris doloribus, hemicrania, odontalgia, puncturis laterum pleuritidem mentientibus, defluxione materiæ acris a capite ad fauces &c. complantur. Eveniunt imprimis corporibus cachecticis ac scorbuticis, ex suppresso pedum oedemate, alioque tumore; quem tanta ferocitate tussis æque ac spirandi difficultas excipiunt, ut suffocatio in-

*Hoff. Syst. Tom. V.*

flare videatur. Familiares etiam sunt hæ tusses senibus, qui impuris scatent humoribus; & in his a frigore externo, dorso præfertim in ea regione, ubi prima lumborum vertebra, & plexus mesentericus major deprehenditur, admissio. Neque alia est ratio, quam quod serum acre ab externis corporis partibus ad pulmones deferatur. Eadem non raro in subjectis pituitosis, senilibus, qui victu lauto, vitæque sedentaria delectantur, & neglexerunt sanguinis missiones, humidæ fiunt, & effectum habent criticum: tota enim sanguinis & humorum massa hac ratione a copia seri impuri, quamvis non sine molestia, egregie repurgatur, adeo, ut sedata tussi, pristina vires redeant, somnusque cum adpetitu, & integra sanitate instauretur.

§. XVI.

Ad censum tussium rheumaticarum pertinent quoque stomachales & hypochondriacæ; quarum illæ in ventriculo, hæ profundius in hypochondriis ac intestinis causam habent; & partim ob consensum nervorum, partim ob rheumaticum seri ad pulmones decubitum enascuntur. Et stomachalis quidem suis se prodit notis, quæ sunt nausea, cardialgia, adpetitus prostratio, digestionis vitium, sensus in ventriculo gravativus, & quod primus tussiendi stimulus circa cordis scorbiculum sentiatur. In hypochondriaca junguntur flatulentie, spasmi intestinorum; ac symptomata reliqua hypochondriaca. Prior, nempe stomachalis fit a saburra acris, biliosa, acida, ventriculo, ejusque superiori maxime orificio, nec non œsophago inhærente, harumque partium nervosas tunicas, quæ arctissime cum viis spiritalibus nectuntur, vellicante; unde creber comitatur vomitus. Vexat cum primis, ventriculo a cibis vacuo; & familiaris quoque est febre tertiana, præsertim continua laborantibus; testante jam HIPPOCRATE *Lib. 2. epidem.* Posterior, nimirum hypochondriaca generatur, ab humoribus crassis, impuris, serosis, vi spasmorum, ac flatulen-

*Tusses rheumaticæ stomachales ac hypochondriacæ.*

M

tia



tiarum abdominalium, ad pectus & pulmones compulsis; & eo magis infestat, si frigus, aut animi affectus, tanquam occasionales causæ præcesserint. Generatim vero monendum est, quod omnis tussis, quæ est periodica, a saburra in ventriculo, vel potius intestino duodeno stabulante suos mutuetur natales.

## §. XVII.

Tussis  
habi-  
tuali.

Adhuc notari meretur ea tussis, quæ habitualis est, & catarrhalis rheumatica vocari meretur. Ea potissimum dependet a relaxatione glandularum in faucibus, palato, ac larynge sitarum, & multos annos continua excreatione durat. Jungitur digestionis vitium, & successiva totius corporis consumptio. Evenit subjectis serosioribus, vitæ sedentariæ, ac lucubrationibus, nec non vinosis computationibus deditis.

## §. XVIII.

Pro-  
gnosis.

His igitur excussis, deveniemus ad tradendam tussium prognosin. Sicca tussis plerumque transit in humidam; hæc vero nimia vetustate habitum contrahit, atque ventriculi digestionem destruendo, cachecticum statum, lentamque febrem producere valet. Quæ humida fuit, & in siccam transit, ut pectus tamen grave maneat: periculum febris vel putridæ, vel hæcticæ minatur, teste LOMMIO *observ. medic. Lib. II. pag. 120.* Convulsivæ seu ferinæ tussis infantibus periculosa, nam facile reducant suffocationem, idque sit in difficili dentitione atque etiam in morbillis: inque pueris gibbos, & hernias, gravidis abortum, adultis hæmoptysin atque phtysin inducere possunt; quin easdem subita suffocatione stipatas fuisse, testantur WILLISIUS *pharm. ration. P. II. S. I. C. 6. pag. 61.* & HILDANUS *Cent. 2. obs. 68.* Quæ tussis pulmonum aut aliorum viscerum scirrhus insequuntur; omnem plerumque remediorum vim eludunt: & quæ a repressis nascuntur exanthematibus, his revocatis cessant. *Omni tussis mala, qua somnus aufertur: inutilis etiam,*

*quæ longo tempore frequens, gravisque hominem exercet, idque cum destillatione, i. e. habitualis rheumatica, inquit LOMMIUS loc. cit. Tussis denique hydropicis evenientes, infausi sunt præsagii, teste HIPPOCRATE Sect. VI. aphor. 35. Contra moderatior circa tempus nocturnum calor, cum æquabili per universum corpus sudore, vel maiore, largiori urinæ fluxu, alvo simul reddita fluidiore, placidior somnus, & facilior expectoratio, certa sunt morbi in gratiam jam redituri indicia.*

## C U R A T I O.

## §. I.

CURatio tussis rheumaticæ potissimum, quatuor absolvitur indicationibus, nimirum, ut primo materiam peccantem corrigamus, ad exitum disponamus, atque expectorationem, si opus id fuerit, promoveamus; deinceps ad fluxum feri a præcordiis avertamus, & ad alia, magis congrua excretoria organa deriveamus, tum motus, si fuerint effrænes, consopiamus, & denique debilitatum affectarum partium robur instauremus.

Indica-  
tiones  
cura-  
torie.

## §. II.

Si igitur tenax muci coagulum bronchia obsederit, incidendum illud, resolvendum, & emolliendum est, quod præstant radices resolventes: quas inter primas tenent, radix vel fecula Aaronis, iridis Florentinæ, & quæ insigni humores lentos ac tenaces fundendi & expectorandi potentia pollet, radix squillæ, ad quinque vel sex grana, cum pauxillo nitri data; item oxymel Squilliticum; essentia gummi ammoniaci, spiritus salis ammoniaci anisatus, lac & flores sulphuris, & spermaceti:

Tenax  
mate-  
ria in-  
ciden-  
da.

## §. III.

Humor admodum tenuis, falsus, acris incrassantibus, & lymphæ acrimoniam temperantibus ad exitum redditur aptus. Conducunt hoc fine deco-

Humor  
tenuis  
incrassandus,  
& acris



semper-  
randus.

decocta, quæ ex hordeo, rasura cornu cervi, radice scorzonerae, ac glyzirrhizæ parantur; cremor hordei, juscula five decocta avenacea, cum amygdalis, passulisque minoribus; aut decoctum raparum cum saccharo; gelatinæ cornu cervi, & animalium; juscula ex carne cum lacte; loch pulmonum vulpis, syrupi de papavere, de farfara, diacodion Montani, sperma ceti cum lacte datum; & ante omnia oleum amygdalinum recenter sine igne expressum, vel solum, vel syrupo capillorum veneris, aut julepo rosarum nuptum: e. g. in hac formula: Recipe olei amygdalarum dulcium, syrupi capillorum veneris ana unciam unam, spermatidis ceti drachmas tres, croci grana quindecim. M. d. Egregiam quoque opem adferunt infusa sic dicta theiformia, quæ ex herba veronicæ, hyssopi, floribus malvæ, sambuci, papaveris rheados, salviæ, bellidis, radice glyzirrhizæ, semine fœniculi, cortice ligni sassafras & ejus generis aliis paranda sunt. Ubi tussis catharralis in habitum degeneravit, cum adpetitus dejectione, & tabe, cura, quæ cum lacte asinino, vel sero lactis, vel cum fonte Selterano, æquali parte cum lacte permixto fit, præcipuum medendi cardinem absolvet.

§. IV.

Laxan-  
tium  
usus.

Quando nimia congestio, affluxus, & decubitus feri in pectore est, ut fit in tussi valde humida, pituitosa, diutius persistente: præstat illud a præcordiis & viis pnevmonicis derivare, atque partim per alvum, quæ est propria fordium mucosarum latrina; partim per cutim, quæ humorum subtiliorum est diverticulum, expellere. Alvi lubricitas, sicut in omni, ita præsertim in rheumatica, ac convulsiva tussi, magnam profecto fert opem: cui procurandæ, ex laxantium numero, ad acrimoniam demulcendam, & colluviem quoque ferofam blande & benigne, copioseque, sine omni tamen molestia, ac virium lapsu evacuandam, ego non quicquam deprehendi præstantius. quam

ipsam mannam; si non ad drachmas, sed uncias duas, in infuso vel decocto præscribatur, ejusque usus, si res postulat, repetatur. Ego uncias duas, in aquæ veronicæ vel florum acaciæ unciis octo, leni calore dissolvere soleo; adjectis postea terræ foliatæ tartari drachma una, & aliquot guttulis olei de cedro, anisi, vel macis. Consentientem habeo GABELCHOVERUM, qui Cent. IV. obs. VII. & sequentibus eandem ad aliquot uncias pro sananda feliciter tussi commendat: idem etiam laxans, cum infuso veronicæ, vel lacte propinari potest. Præterea syrupus rosarum solutivus, cassia recenter extracta, decoctum laxativum Viennense, passulæ rhabarbarinæ, sique ventriculus hæc ferre nequit laxantia, clysteres, ad copiosi feri & mucii quantitatem derivandam, & per congruum ejus emunctorium, quod in crassis potissimum est intestinis, evacuandam profunt efficacissime.

§. V.

Deinceps æqualem sanguinis per totum corpus restituendo cursum, & serum maxime ad glandulas subcutaneas invitando, inhibetur hujus ad præcordia adfluxus. Eo fine operæ faciunt pretium, infusa calidiora pectoralia, ex floribus malvæ, violarum, foliis hyssopi, salviæ, semine fœniculi, anisi ac cinamomo conficienda. Hæc mane intra lectum potare expediet, cum blando regimine; & præterea in equali calore corpus semper conservare decet. Scopo quoque huic satisfaciunt pulveres diaphoretici ac bezoardici, qui parantur ex lapidibus cancrorum, pulvere Marchionis, succino preparato, antimonio diaphoretico, vel loco hujus, antihectico Poterii, cornu cervi sine igne, cinnabari, additis aliquot granis olei nucis moschatæ expressi, vel etiam croci. Iisdem quoque flores sulphuris addere licet; maxime si achoros, vel scabies retropulsa malum foverit.

Sudo-  
ris pro-  
motio  
con-  
fert.

§. VI.

Tertia indicatio requirit efferato-

Quæ-  
misi-



gent  
effra-  
nes mo-  
tus.

rum motuum sopitionem, quæ sæpius  
mox ab initio curationis, ob gravioris  
periculi metum, suscipienda est. Et  
ex remediis huc facientibus longe emi-  
net crocus, pectori amicissimus, ejus-  
que extractum, pulveribus bezoardicis  
admixtum. Laudant quoque muscum  
quernum, & pulveribus, & decoctis  
additum: nec eo fine sunt inutiles pilu-  
læ de styrace, aloephanginis nuptæ,  
& versperi datæ, conjunctis ceterum  
expectorantibus, oleo amygdalino, ac  
spermate ceti. Haud etiam contemnen-  
dæ est virtutis liquor meus anodynus,  
vel laudanum liquidum SYDENHA-  
MII, cum spiritu cornu cervi marita-  
tum spiritum; quem cum primis depre-  
dicat BOYLE *de util. Philos. pag. 348.*  
Si his haud obsecundet malum, ad for-  
tiora deveniendum anodyna, quæ ma-  
joris sunt energię; veluti sunt pilulæ  
de cynoglossa, Starckeyanæ, Wilde-  
gansii, & theriacalia.

#### §. VII.

Exter-  
norum  
usus.

Neque ad sopiendam tussis vehemen-  
tiam insuper habenda sunt externa: que  
inter phytica præsertim tussi laboran-  
tes, egregie solatur, emplastrum dia-  
sulphuris Rulandi, pectori impositum.  
Tussi convulsiva vexatis insigniter pro-  
dest unguentum rubrum potabile, cum  
spiritu vini, præcordiis illitum: nec  
non unguentum pectorale, in PHAR-  
MACOPOEA AUGUSTANA de-  
scriptum, si thoracis latera eo inun-  
gantur, in sedanda tussi, doloribus pe-  
ctoris mitigandis, & juvanda expecto-  
ratione, magnam præstat opem. Lon-  
go quoque usu in omni tussi rheumatica  
comprobatum habeo, sequens empla-  
strum: Recipe myrrhæ electæ, bdellii,  
succini ana unciam dimidiam, sperma-  
tis ceti, axungię humanæ, ceræ, mi-  
nii ana uncias duas, saponis veneti dra-  
chmas tres, croci drachmam unam,  
camphoræ drachmam dimidiam. M. f.  
emplastrum, quod pectori, collo, spi-  
næque dorsi imponatur.

#### §. VIII.

Quæ  
indica-

In morbi denique declinatione, quar-  
tam indicationem explere, partesque

labefactatas roborare, medentem o-  
portet; quoniam facillimum est, re-  
verti tusses. Commendo imprimis es-  
sentiam succini, spiritum cornu cervi,  
cum tinctura tartari, & liquore meo a-  
nodyno mixtum, additis aliquot olei  
ligni assafras guttulis: nec non essen-  
tiam cascarillæ; & sæpenumero illu-  
strem animadverti effectum, quem ex-  
ferit balsamum vitæ meum, ad aliquot  
guttas cum extracto vel tinctura croci  
datum. In fine ad roborandum ventri-  
culum, electuarium, quod ex conservæ  
rosarum rubrarum uncis duabus, conf.  
anthos uncia una, succini præparati,  
nucis molchatæ drachmis tribus & syr-  
corticum citri vel aurantiorum compo-  
situm est, præscribere & ad usum com-  
mendare solitus sum: CRATO *Lib.*  
*37. consil. pag. 1093.* ambram cum deco-  
cto passularum mirifice collaudat, nec  
sine ratione: vim enim & roborantem,  
& simul alvum liquantem possidet. Sed  
longe præferenda est essentia ambre ge-  
nuina, cujus præparationem in obser-  
vationibus physico chymicis communi-  
cavimus. Tum quoque utile est vinum  
vetus, generosum, Falernum; quod  
veteres, & præsertim PLINIUS SE-  
CUNDUS admodum extulerunt.  
HIPPOCRATES *lib. de victu*, acuto-  
rum usum vini dulcis senibus apprime  
laudat: neque minus aqua veronicæ  
vel hyssopi cum vino destillata & edul-  
corata convenit: addatur tantillum  
croci. Externe ad roborandas nimium  
relaxatas glandulas faucium & bron-  
chiales, ex quibus humor continuo ad  
laryngem, & asperam arteriam defluit;  
insigni cum fructu semper usus sum pul-  
vere, capiti inspergendo, qui ex succi-  
no, benzoe, mastiche, floribus cha-  
momillæ Romanæ, & caryophillis aro-  
maticis compositus est: os quoque gar-  
garismate frequentius colluendum erit,  
cui inserviet vel spiritus vini Gallicus,  
vel decoctum salviæ, hyssopi, florum  
rosarum rubrarum, cum vino rubro  
paratum.

#### §. IX.

Ceterum in omni tussi, & curanda,  
& præ-

tionem  
quarta  
respon-  
deant.

Dirta  
tussien-  
tium.



& præservanda, magna vis in recto vivendi genere sita est. Moderandus cum primis aer, ut talis sit, qui nec frigore, nec nimio calore lædat, sed in quo corpus udore madeat perpetuo: vespertinus ac nocturnus præ aliis nocet; neque aer frigidus, nebulosus, pluviosus, aut præfervidus, maxime omnium vero aquilonaris, nisi noxam parit. Porro catharris & tussi frequenter obnoxii cavere sibi debent, a cibis valde salitis, fumo induratis, & aromatibus nimium conditis, nec non acidis, austeris, utpote qui sanguinem, ejusque serum acre reddunt, & impurum. Deinceps potus ratio habenda: nulla enim convenit cerevisia, multo minus vinum acidum. Majori cum fructu pro potu usurpabitur aqua hordei sive ptisana, vel decoctum quoddam ex radice chinæ, Scorzonæ, passulisque confectum; vel hydromel, quod GABELCHOVERUS hunc in modum parare docet: Recipe mellis despumati uncias quatuor, aquæ fontanæ mensuras tres, liquiritiæ drachmas quinque, ficum numero sex, seminis fœniculi, radice pimpinellæ ana drachmas duas, florum malvæ manipulum unum, florum salviæ, violarum, ana pugillum unum, cinamomi scrupulos duos, m. coquantur ad consumptionem mensuræ dimidiæ. In scorbuticis pro potu conducit aqua sola, pura, fontana, non nimis frigida, & vel amygdalis dulcibus, vel pane similagineo distemperata. Vulgus aquam fervidam affundit triticeis fursuribus & infusum frigide non sine insigni fructu in gravi epidemia tussi bibit.

§. X.

Præservatio-  
nis  
ratio.

Præservationis quoque ratio, maximam partem, in recto rerum non naturalium consistit usu. Qui a tussi convalescentes, vinosis computationibus, corporis refrigerationibus, animi fortioribus adfectibus indulgent: in eandem protinus incidunt longe gravio-rem. Senes sibi caveant a pedum, maxime dorsi refrigeratione. Et quia hye-

Hoff. Syst. Tom. V.

me rigente rheumaticæ adfectiones: quam facile contrahuntur, & caput & cervix & regio præcordialis, lumbaris & pedes in senibus præsertim, quibus tussis admodum est infesta, linteis & integumentis calidis bombycinis maxime a frigore muniendi sunt, ut moderata & æqualis servetur perspiratio: nam quando unam ex hisce nervosis partibus frigus præsertim aquilonare fortiter tangit & penetrat, ob consensum, qui inter has partes viget, reliquæ omnes p. n. adficiuntur. Alvi libertas pariter ac expeditus transpirationis successus nunquam non conservetur, necesse est: quare conferunt moderatæ, sed frequentes, & sub cœlo salubri institutæ corporis exercitationes. Qui succis sunt pleni, hos statim temporibus, & omnino versus æquinoctia, venæsectione, vel scarificatione depleri curent. Eo magis vero recto regimine, tenui victu, conservataque excretionum libertate, a tussi se præcavere decet, quando epidemicam exercet tyrannidem.

Cautelæ, cum cura specialiori.

§. I.

**I**n omni tussi caute mercandum est cum expectorantibus, dulcibus, decoctisque incrassantibus; ne more vulgo solito, nimia, & sola adhibeantur, sicque relaxando magis pulmones, nimium ad illos concitent adfluxum. Eo magis in tussi stomachali, & hypochondriaca ab iis, vel penitus abstinere convenit; pervertunt enim, destruuntque ventriculi vim digestivam, adeoque viam ad cachexiam, & hydropem pandunt.

§. II.

Tussis ferina, quæ a retropulsis exanthematibus suboritur, indicat materię peccantis ad sua loca revocationem. Hoc casu divina ferme est virtus ethiopis mineralis vel florum sulphuris, interne cum antimonio diaphoretico vel pulvere bezoardico; vesperi potissimum exhibitorum. Nec præter

Ferina  
tussis  
a re-  
pressis  
exan-  
thema-  
tibus  
subor-  
ta cu-  
ratio.

M 3

pedum



pedum frictiones, aut pediluvia, præstantius ad detrahendum a pectore serum est vesicatoriis remedium: modo delicatior nostri seculi genius eorundem usum permetteret. In convulsiva infantum tussi, juvat quoque plantas pedum axungia porci inungere.

## §. III.

**Tussis rheumatica a repulso pedum oedemate suboritur ratio.** Quæ a pedum oedemate in cachecticis retropulso generatur tussis, præter clysteres, incidentia, diaphoretica, & quæ motum a pectore derivant, insignioris usus sunt lenia diuretica v. g. tinctura tartari, succini tartarifata, Elixir nostrum viscerale cum Elixirio n. pectorali remixtum: alias acria, falsa, & potenter quæ urinam movent, quia detrahunt dulce serum, exulent; laudata vero serum acre per vias educunt urinarias.

## §. IV.

**Tussis rheumatica scorbutica curatio.** Tussim rheumaticam diuturnam, quæ a scorbutica sanguinis & humorum diathesi originem traxit, non raro curatam vidi, datis interne fero lactis, pulveribusque ex lapidibus cancrorum, pulvere Marchionis, succino præparato, antimonio diaphoretico extracto croci, cascarillæ aquoso, concinnatis; interposito laxante rhabarbarino; propinata pro potu ordinario aqua frigida, amygdalis distemperata, vel Selterana, vino Mosellano nupta; vel decoctum ex speciebus temperatioribus sanguinem depurantibus ex aqua usui erit eximio. Exhibui quoque vesperi pilulas aloephanginas, cum pilulis de styrace mixtas: nec non admovendum iussi pectori emplastrum, quod supra descripsimus.

## §. V.

**Tussis stomachalis curatio.** Si saburra acida, biliosaque ventriculi tussim excitaverit, operæ pretium faciunt absorbentia, lapides cancrorum, succinum præparatum, arcano duplicato nuptum, additis aliquot olei macis guttulis. Jungenda tum laxantia leniora mannata; ac rhabarbarina. Stomachali puerorum, si nihil est, quod prohibeat, succurritur leni emetico.

## §. VI.

**Tussis hypochondriaca curatio.** Intussi, ex viscerum imi ventris obstructione nata, quam vocant hypochondriacam, apprime conveniunt, quæ excretiones sanguineas suppressas revocant: nec aliena pediluvia, & antispasmodica. Omnium vero virtutem, multis parasangis superant aquæ minerales tepesactæ, lacteque caprino, vel melius asinino permixtæ, si sub debito regimine potentur.

## §. VII.

**Tussis habitualis curatio.** Quæ diuduravit tussis, & ad tabem vergit: cura lactis asinini, præparato ad eam corpore, certo profligatur; eo magis, si longæ peregrinationes, aeris mutationes, & roborantia denique conjungantur. Nec, si nimis humida fuerit, fructuosius est convenienti a cibis, præsertim carnibus abstinentia.

## §. VIII.

**Anodynorum usus.** Præstat semper anodyna, ut pillulas de cynoglossa item de styrace cum laxante e. gr. massa pill. aloephanginarum vel Cratonis de succino æquali pondere jungere & circa horam somni præbere: alias ab illis solis exhibitis, animadverti tussim supprimi, succedente a nimia congestione humorum & gravitate circa pectus asthmate.

## §. IX.

**Frigus & nimius calor nocent.** Quemadmodum nimium frigus omnibus, qui tussunt, inimicum est: ita quoque præservidus calor iis nocet. Quare infusa quoque pectoralia, quæ dicunt theiformia, si calidissima fuerint, exasperant tussim. Omnes ergo potus tepidos sorbere convenit.

## §. X.

**Venæsectionum usus.** Venæsectiones illis profunt, qui sanguine nimis turgent, venis prætumidis ac funiculorum instar prominentibus, aut excretiones suppressas habent, maxime præservatoriæ, etiam in senibus septuagesimum jam annum transgressis. Nec iis super sedere possumus, si convulsivæ efferata vexent vehementia; ne rumpantur in quodam loco vasa; in puerili etiam & juvenili ætate. Sydenhamius affirmat,



mat, se convulsivam epidemicam, non nisi venæsectione, iterata catharsi, & vesicatoriis feliciter curasse.

§. XI.

**Celsi metho-  
dus.** Digna, quæ allegetur, est tussi mendendi ratio, quam CORNELIUS CELSUS Lib. IV. cap. IV. sic exhibet, *Oportet hyssopum altero quoque die bibere, ac lectione uti vehementi, quæ primo impeditur a tussi, post eam vincit; tum ambulare, deinde per manus quoque exercere, & pectus diu perfricare; post ficius pingues edere. In tussi humida profunt fricationes validæ, cum calefacientibus, sic ut caput quoque simul vehementer perfricetur, ovum quoque sorbile, sulphure adjecto sorbeatur, in potum vero aqua calida danda. Et ut verum fatear, præstat omnino Galeni in tussi curanda motum sequi, qui levibus simplicibus naturæ maxime familiaribus utendum esse docet: quam multis iisque compositis activis e phar-macia petitis. Ita decocto raparum exsiccatarum, vel caulium rubrorum, vel etiam fursurum triticeorum ex aqua cum saccharo, pertinacem & chronicam tussim in plebeiis sublevatam, quin etiam penitus sublatam meminimus. Si fluxio tenuis copiosior & acris est, quod ex oculorum rubore, titillatione, & morsicatione oris in gutture, sapore falso cognoscitur, succus glyzirrhizæ Hispanicæ, mel despumatum, massa, quæ ex gelatina cornu cervi & decocto glyzirrhizæ inspissatur, oleum quoque amygdal. dulcium cum syrupo papaveris albi mixtum & sensim paulatimque deglutitum præsens adferet levamentum. Neque minus familiaris & egregii usus esse potest ovi luteum recens cum saccharo canto & croco, cum poculo uno vel altero Thee bois leniter deglutitum, item butyrum insulsum cum saccharo, lac cum infuso veronicæ & flor. papaveris rhœados.*

§. XII.

Quando a nimio humorum adfluxu epiglottis, quæ est primum & prima-

rium vocis instrumentum, valde relaxatur & atoniam patitur, indeque vox rauca evadit: gargarismate, quod ex nervinis e.gr. floribus anthos, lavendulæ chamomillæ Rom. summitatibus thymi, origani, salvia, myrrha compositum & ex vino coctum est, frequentius uti convenit. Exterius quoque laryngi sacculum ex supra dictis speciebus addito insuper succino & styrace calamita applicare, non sine egregio fructu consuevi. Raucos non purgari vult Hippocrates, sed horum frigiditatem & humiditatem sanare consuluit capite & reliquis membris, quæ affecta sunt, topicorum usu exsiccandis. Vid. Lib. de victu acutorum.

Enarrationes morborum.

OBSERVATIO I.

**I**mploravit quondam meam opem <sup>De Tussi convul-  
siva e.  
pide-  
mica.</sup> Vir honestus, cujus infantes, quos plures habebat, circa æstatis exitum tussi gravissima, eaque suffocativa ac convulsiva, laborabant. Siquidem hæc tanto invadebat impetu, ut facie ad nigredinem usque tincta, sine sensu, sine motu, atque sine respiratione jacerent. Recurrebat ea per periodos, circa horam potissimum matutinam decimam; junctis febre, pulsu celeri, & aphthodeis faucium vesiculis. Noces erant insomnes, appetitus, etiam humidi dejectus, alvus clausa, crebra sternutamenta, & non modo ipsa tussi mucus cum sanguine elidebatur; verum per os quoque ac nares insignis pituitæ copia reddebatur. Hæc affectio jam per quatuordecim dies duraverat: & his debellabatur medicinis. Anoclysteres ex decocto avenæ, oleo amygdalarum dulcium, floribus chamomillæ, & sale communi infundi jussi: pro potu crebro dedi modo decoctum ex radice chinæ, scorzonæ, altheæ, glyzirrhizæ & semine fœniculi paratum; modo avenaceum, oleo amygdalino nuptum; mox raparum exsiccatarum cum saccharo Canariensi,



& croco permixtum; & pro infuso le constituunt, remorantur sufficientem theisotmi herbam veronicæ, ac hyssopi. Non minus bis terve quotidie nis per pulmones circulum. Congestio propinavi pulverem, ex antimonio humorum maxime feri ad pectus in o-diaphoretico, lapidibus cancrorum, mini convulsiva tussi fit: siquidem in pulvere Marchionis, & nitro composita regulæ perpetuæ est, quod ad debiliorem partem, quales hic sunt pulmones, tussi exagitati, semper majori impetu ruant humores.

### Epicrisis.

1) Tusses convulsivæ epidemicæ, his non raro grassantur temporibus, quibus diarrhœæ vel dysentericæ sunt familiares. Tum plerumque æstatem ferventissimam, frigidiora autumnique deprehenduntur initia: unde, quæ æstate liberior fuit transpiratio, hoc tempore subito cohibetur, & hinc acre impurumque serum ad bronchia decumbit. Sed præterea in ipso aere obversari solent exhalationes fere vcnenatæ; quas in nostro quoque casu tussis & aphtharum causas fuisse, nulum est dubium.

2) In tali aeris constitutione infantes tussi & frequentius, & gravius infestantur. Debile enim ac valde sensibile est, quo pollent, nervorum genus, quod ex facili causa ad motus spasmodicos, convulsivos, & ipsum comitiale morbum disponitur. Deinceps hæc tenella corpora parum curant aeris injurias, sed quacunque occasione semet ipsi exponunt liberalius. Accedit & illud, quod circa dictam autumnalem tempestatem, ob avidius ingestos fructus horæos, uvas &c. multas acidas, biliosas, & actes in primis viis sibi colligant cruditates: quæ ad exasperandam tussis vehementiam non parum contribunt.

3) Quemadmodum tussis asthmatis, ita hoc quoque illi, tanquam symptoma, tantum non semper supervenire solet. Duplex est causa asthmatis, quæ tussis symptoma est: nimirum prima constrictio bronchiorum, altera congestio humorum ad pectus. Constricta quippe bronchia, quæ tussis forma-

4) Dici vix potest, quantum in omnibus spasmodicis ac chronicis morbis, qui soventur ab impuritate humorum, noceat uti cerevisiis; utpote quæ acrimoniam subtiliorem magis alunt, ac exagitant. Soleo in harum locum exhibere decocta, quæ in tussi præsertim temperantia & demulcentia esse debent.

### OBSERVATIO II.

Vir triginta sex annorum, sanguineus, succulentus, in castris, quæ sequutus est, variis molestiis, aeris ventorumque injuriis obnoxius, inordinate vivens, & frigidiori loco somnum capiens, neglecta, cui ante sueverat, per biennium, venæsectione, incidit in tussim vehementem, æque ac diuturnam. Pectus humoribus infarctum turgidumque, cum roncho videbatur. Eiiciebat quoque laborioso ac vehementi pectoris non minus ac abdominis conatu, ingentem mucii viscidii ac flavescientis quantitatem, quæ intra nycthemeron collectim binas adæquabat libras. Et hac molesta tussi per quatuordecim jam laboraverat hebdomades, cum meum quæreretur auxilium, corpus admodum contabescebat: adpetitus tantum erat integer, alvus aperta, urina pauca ac rubicunda, pulsus post paroxysmum celerior, facies rubicunda. Neque ullum levamen perceperat, licet variis remediorum generibus, decoctis, electuariis, essentiis pectoralibus, ac dulcibus fuisset usus. Ego itaque, interdicto cerevisiæ potu, hujus in vicem consuetum decoctum dedi: alternis diebus exhibui pilulas balsamicas: mane pariter ac horis pomeridianis potari.

Tussis humida diu. turna.



tati iussi infusum pectorale, ex radice consolidæ majoris, enulæ, glyzirrhizæ, herba saniculæ, scabiosæ, scorodii, veronicæ, agrimonizæ, urticæ mortuæ, pyrolæ, floribus hyperici, summitatibus millefolii, semineque anisi ac fœniculi paratum. Ex hoc sumendam suasi drachmam balsami pectoralis, quod ex olei hypericonis uncis duabus, spermatis ceti uncia una, balsami de copaiva, Peruviani ana drachma una, croci scrupulo uno, florum sulphuris drachma, olei macis, anisi, ligni sassafras ana guttis quindécim confectum erat. Exhibui quoque pulverem ex magnesia alba, oculis cancrorum, cornu cervi philosophice præparato, ossibus sepiz, & succino præparato concinnatum; ac denique emplastrum superius descriptum thoraci imponendum curavi. Quibus per duos menses usurpatis, in tantum confanescibat, ut nihil equidem esset, de quo conquereretur; attamen quoties vel acida comedebat, vel vinum bibe-  
bat, tussi denuo cum reiectione viscidæ materiæ prehendebatur.

Epicrisis.

1) Ad præsentem tussim generandam plures remotiores concurrerunt causæ. Præter temperamentum enim sanguineum & corporis habitum, succis pituitosis plenum, venæsectionis neglectus, ac frigidius corporis regimen, omnino suffecerunt ad inducendam tussim.

2) Quæ cum forsan ab initio nimis dulcibus, ac expectorantibus tractata fuit: factum est, ut tonus & ventriculi, & pulmonum magis destrueretur. Ventriculo labefactato debetur corporis contabescencia: languente enim digestionem, chylus iners ac impurus, hinc & lymphæ minus laudabilis, & ad nutriendas solidas partes haud idonea generatur.

3) Pulmonum atoniæ in acceptis ferenda est tussis diuturnitas, cum copiosa mucidæ materiæ reiectione.

Namque hi tum fiunt diverticulum humorum serosorum, mucidorumque, qui ex toto corpore eo deferuntur. Distinguenda talis tussis est a phthysica; quoniam rejecta materia nondum purulenta est, nec febris jungitur: pulsus enim celerior, qui paroxysmos sequebatur, dependet a validiori pectoris sub tussiendo concussione, quo sanguis impetuosius, celeriusque per cordis ventriculos, atque arterias propellitur.

4) Et in hoc tussis genere, minus conveniunt sola expectorantia; sed eo dirigenda est curatio, ut affluxus humorum a pectore derivetur; pulmonumque ac ventriculi robur instauretur. His scopis dictorum remediorum ope fecimus satis; e quibus adhuc commemorare juvat Elixir nostrum viscerale, quod ad restituendam digestionem diu adhiberi iussimus.

5) Notabile adhuc est, quod ii morbi, qui atonia partium fulti fuerunt, ex levi causa, ut frigore, cibis acidis, vinosis &c. facile repullulent. Quare longa opus est diatæ curatioris observatione, ac visceralium remediorum continuatione.

OBSERVATIO III.

Studiosus quidam sanguine abundans, vita sedentaria, victuque pleniori uti solitus, meam aliquando implorabat opem, eo, quod sæpius, si malæ corpus exponeret frigori, ventisque borealibus, statim corripere-  
tussi, eaque gravissima, mox humida, mox sicca. Suasi propterea, ut venæsectionem, quam nunquam admiserat, instituendam curaret; eamque ter quotannis iteraret: dein singulis quatuordecim diebus pilulas meas balsamicas sumeret; & infuso veronicæ frequentius uteretur. Dedit aures consilio, simulque motui corporis frequentius studebat, eo effectum, ut a molesta tussi liber in posterum maneret.

Tussis  
catarr-  
halis,  
sæpius  
recidi-  
vans.



## Epicrisis.

1) Plethoricos, non modo senes, verum quoque juvenes, si utantur lauto victu, vitæque sine motu desidi, & sanguinis missiones neglectui habeant, admissio liberalius frigore, catharris, coryza, gravedine, tussi &c. circa æquinoctiorum plerumque tempus infestari, crebra certaue testatur experientia. Cum primis humidam patiuntur ejusmodi subjecta, si serosis turgeant succis; tumque criseos instar se habet hæc evacuatio; siquidem superata hac affectione optime habent.

2 In ciendis fluxionibus ingentem frigus exserit potentiam, in dispositis maxime subjectis; dum constringendo corporis superficiem, venosumque corticem, humores magis ad interiora pellit; ex quibus serosa portio, pulmonales ingreditur vesiculas. Hinc **CAROLUS PISO** tract. de morbis excolluv. serosa observ. 83. pag. 180. de se ipso testatur, quod hyeme verticem capitis, futuramque coronalem nunquam detegere debuerit, quin statim tussim pateretur.

3) Et in tali tussi curanda, testante eodem **PISONE** loc. cit. & suffragante experientia, non præstantius est remedium, quam ab initio statim sudorem movere. Inserviunt huic scopo infusa theiformia mane intra lectum sordillanda; sumto præcedente vespera, pulvillo diaphoretico. Neque enim hoc in casu convenit, statim ab initio laxantia propinare; nisi congestio ad pectus nimia fiat. Anodyna tum exhibere, nihil est, quam oleum camino addere.

4) Præservatorium autem finem, nostra potissimum respicit curatio. Atque sic, præter rectum vivendi genus, præter crebriorem corporis exercitationem, non efficacius commendare potuimus præsidium, quam statis temporibus repetitas venæsectiones, quibus imminuta humorum mole, tanquam remotiori causa, occasionalis,

quæ est frigus, non adeo magnam obtinet efficaciam.

## OBSERVATIO IV.

Juvenis florentis ætatis & vultus, fervidi ingenii & sanguinis, teneræ & cum macilentæ constitutionis, post variorum morbum, quem ante tres annos perpeffus erat, sæpius incidit vere præsertim & autumnis in molestantissimam, plerumque cum hemicrania & interno æstu conjunctam. Ego ad hanc avertendam suasi, ut corpus, præcipue pedes a frigoris vehementia curatius muniret; & quoniam paulo largius bibebat vinum, ut circa æquinoctialia tempora sanguinem emitteret, & infusum veronicæ cum radice glycyrrhizæ singulo mane biberet. Hoc modo per duos annos liber ab hoc malo permansit. Factum vero est, ut neglecta vernali venæsectione & studiis & lubricationibus immoderatus indulgens, & omnes aeris injurias spernens, in catharralem febrem cum vehemente tussi & immani hemicrania sinistri lateris, accurate circa horam vespertinam sextam redeuntem, & per totam noctem perseverantem incideret. Tussis erat initio sicca, postmodum valde humida reddita est. Recusabat fere omnia remedia; fontem vero Selteranum loco cerevisiæ bibebat; sed cum exiguo levamine, ut potius & dolor capitis & rheumatismus pectoris invalescerent. Ego in consilium arcessitus, loco fontis Selterani bibendam suasi emulsionem, quæ ex decocto rasuræ C. C. & amygdalis parata erat; electuarium quoque præbui ex oleo amygdalarum dulcium, syrupo papaveris albi, spermate ceti, croco; vesperi dosim pulveris mei bezoardici & mane infusum veronicæ cum radice liquiritiæ superbibendum ordinavi. Ad aperiendam vero alvum, & sordes viscidas a pectore avertendas, quia decoctum manatum respuebat, alternis diebus sumendum dedi pulverem sequentem: Rec. lap. cancror. cremor. tart. anadrach-



drachmam dimidiam, diagrydii sulphurati, cinnabaris præparatæ ana gr. VI. olei macis guttam unam. Quatuor vel sex a quavis dosi secutæ fuerunt sedes, & post ter reiteratum hunc pulverem & tussis & hemicrania permolesta sensim paulatimque conquieverunt, ac penitus demum cessarunt.

### Epicrisis.

Plura mihi obvia sunt exempla, tussim primo catharralem, postea vero phthisicam redditam post morbillos, imo variolas, quæ valde infestæ sunt pectori, insecutam fuisse, præcipue si iusta vitæ ratio fuerit posthabita, & corpus non ab injuriis tempestatum, quæ catharros & tusses ciere solent, præmunitum. Neque pauca mihi cognita sunt exempla; sola prudenti sanguinis e vena missione una cum debito vivendi regimine in sanguine præservando abundantibus & catharrales tussiculosos insultus, & ipsam veram phthisin, fuisse averruncata. Et quia ex hemicrania periodice redeunte, vitiosam humorum colluviem prima in regione stabulantem & tussis causam foventem judicavi, præbui pulverem egregie & sine noxa primam regionem expurgantem, non sine singulari fructu subsequente; utpote ab ejus usu mox levamen symptomatum insigne egregius juvenis percepit.

### OBSERVATIO V.

**Tussis hypocho-ndriaca.** Vir 50. annorum, cholericæ & macilentæ constitutionis, a tenera ætate, ex diuturnis lucubrationibus hypocho-ndriacus factus, varia & frequentia ad fluxum hæmorrhoidalem sensit molimina; qui cum per vasa sedis nunquam successit, ante decem annos vomitum patitur cruentum, qui tamen instituta mox in pede venæsectione, subjunctoque rhabarbarinorum & pulverum nitroforum ac absorbentium, nec non continuato per aliquot tempus fontis Schwalbacensis cum lacte mixti

& calefacti usu, cohibitus exinde nunquam rediit. Ante annum vero ex domestica calamitate valde contristatus, prævia repentina virium & appetitus, nec non somni prostratione, tussim incidit humidam hypochondriacam adeo quidem vehementem, ut per integras sæpe horas, præsertim nocturno & vespertino tempore, ingentem viscerum ac tenacis cinericei muci copiam non sine molestissimo hypochondriorum & abdominis dolore excreando, æger defatigaretur. Ceterum, pectus omni caruit vitio, nec sputum unquam sanguine apparuit mixtum; Alvus autem non obstante flatuum, qui crebrius per os eructabantur, copia satis superque erat fluida; sub cujus depositione vires aliquantisper decrescere videbantur. Consultus ego in hoc affectu, cum ejus fomitem imprimis viis ac imminuta ventriculi digestionem latitare conjicerem, ad hanc ipsam restituendam primo pulverem ordinavi stomachicam ex radice ari, pimpinellæ albæ, sale absynthii, succino, pulvere cortic. aurant. immat. viridum ad partes æquales sumtis, additisque aliquot guttulis olei macis & ligni sassafras compositum, bis per diem capiendum, cujus loco interdum summo cum fructu adhibui essentiam stomachicam pectoralem ex Essent. gentianæ, succini, cascarillæ, nucissæ, croci, card. bened. myrrhæ & spiritu salis ammoniaci anisato præparatam. Binis quoque vicibus per hebdomadem ad expurgandas leniter primarum viarum cruditates, pilularum Cratonis gr. XV. cum duobus granis extracti croci, assumenda suasi, & loco potus ordinarii aquam fontanam simplicem cum quarta vini parte permixtam commendavi. Quibus effectum est remediis, ut observato accuratiori in diætâ regimine, absoluto mensis unius spatio æger non modo molesta tussi liberatus fuerit, sed & cum appetitu ac somno quietiori, vires sensim recuperare cœperit.



## Epicrisis.

Hæc historia satis abundeque docere potest, tussim & vehementem & diurnam & cum magna viscerum humoris excretionem junctam, ex stomachi & primarum viarum, quæ alimentorum digestionem præsumunt, vitio & dejecto robore, nulla licet pulmonibus inhærente labe, ortum trahere posse, præsertim in hypochondriacis, quibus stomachus semper male affectus est, accedente præsertim gravi tristitiæ affectu, quo nihil ad vim solidarum, imprimis intestinorum & nervosarum partium imminuendam est potentius. Ex quo facile intelligitur, omnem prorsus curandi rationem eo esse dirigendam, ut vires deperditæ & universo corpori & maxime ventriculo per convenientia remedia restituantur. Et hoc præterea annotare licet, quod hypochondriaci & hæmorrhoidarii per graves & diu perseverantes animi affectus, nullis aliis etiam accedentibus causis, quam prompte & facile in multas & varias, easque longas corporis passiones delabi possint.

## OBSERVATIO VI.

Rheumatis-  
mus pe-  
toris. Generosus vir, amplè in dignitate constitutus, sexaginta & ultra annorum, sanguinæ & vegetæ nunquam non complexionis, rarius afflictam habuit valetudinem, & parcius hinc medicorum consiliis & medicamentis usus est, nisi quod bis quotannis circa tempora æquinoctialia venæsectionem admiserit. Hic vir eruditus, si ullus alius, studiis, mentis laboribus, & occupationibus assiduus per longum annorum spatium sub immobili vitæ genere districtus erat, & tamen satis vegete valuit. Ante anni dimidium cum autumno consuetam ex incuria venæsectionem omitteret, & ob metuentum fortunæ suæ detrimentum sub ingenti negotiorum & occupationum mole, animo valde perturbato & me-

sto esset; vigorem & animi & corporis paulisper fractum persensit cum somno parco, interrupto, & crebrioribus sudoribus, maxime frigidis, matutino præsertim tempore stipato. Accidit præterea, ut sub mutatione & inæquali cœli autumnalis statu, auræ frigidiori corpus cum exponeret, prævia horripilatione in catharrum & tussim incideret; quam etiam prodiens in publicum neglexit. Inde vero factum est, ut fatiscentibus viribus & ciborum adpetentia, aucto circa vesperam calore, pulsumque celeritate, in gravem pectoris rheumatismum fuerit conjectus; qui hoc modo se prodebat: Aderat tam violenta tussis sicca in principio noctu maxime infestans, ut omnem respirationem ad suffocationis fere periculum adimeret; cum maxima & intolerabili anxietate conjuncta, ut aliquoties ipse decumbens, ad spiritum liberius trahendum e lecto surgere, non sine molesta sudoris suppressione coactus fuerit. Petiit a me consilium. Ego, cum hujus affectus originem ex primarum viarum & hypochondriorum ob flatulentas abdominis distensiones, alvum strictiorem, & intermissam venæsectionem derivarem; & non pro simplici catharrali, sed rheumatica tussi habendam esse judicarem; sanguinis detractiorem, summo opere suasi, & utut alius medicus, forsitan ob præjudicia sua, quibus circa venæsectionis usum in febrilibus insul- tibus imbutus est, hanc non ratam haberet; me tamen autore ac suasore, decem minimum uncia sanguinis tenaci muco referti fuerunt detractæ. Ex quo mox insignissimum in faciliore respiratione persensit allevamentum. Tussis vero sicca transiit in valde humidam; ita ut miram quantitatem crassi muci quotidie cum valida thoracis commotione ejiceret; quæ tussis maxime cum anxietatibus noctu affligebat, & omnem fere somnum adimebat. Ipse Dominus Patiens pilulas Dn. N. S. assumebat, quas aliquot quidem sedes fuerunt secutæ, sed postea vehe-  
men-



mentiores alvi adstrictiones cum infirmitate anxietate persensit. Substitui ego igitur infusum mannatum ad avertendam a pectore nimii humoris congestionem singulis tribus diebus fumendum; ex quo egregium percepit levamen. Mane infusum veronicæ, & de die ptisanam amygdalinam, circa vesperam, cum pulsus & calor semper esset auctior, pulverem nitrosum cum antimonio & succino mixtum dedi; quibus remediis per Dei gratiam intra duos menses violentia istius rheumatis cessavit. Nihilominus Dominus Patiens adhuc de noctibus insomniis, flatulentis primarum viarum, & anxietatibus, mœstis cogitationibus, & fractis viribus conquestus fuit; & quia judicavi, horum symptomatum fundamentum in prava alimentorum digestionem; propter vim stomachi & intestinorum digesticem, a morbo, & animi affectibus fractam esse positum; sufficientem motum & exercitationem corporis, conversationem cum amicis, potum aquæ simplicis cum quarta parte vini Rhenani dilutæ, & usum elixirii nostri visceralis cum bona corticum aurantium essentia permixti suasi. Quorum remediorum ope etiam integre vir longa vita dignus convaluit.

Epicrisis.

Tussim pure catarrhalem cum febricula quadam, a rheumatica probe ut distinguat Medicus, in praxi valde necessarium duco; quia hæc longe alia remedia & medendi rationem quam illa postulat: Catarrhalis simplex tussis dicitur hæc, quæ cum gravedine capitis, & coryza fit a transpiratione ob inæqualitatem aeris, tempore maxime autumnali & vernali ad interiora repressa oritur, & plures homines simul afficit, unde dici solet epidemia. Rheumaticæ vero natura longe alia est. Nam licet a transpiratione habeat sæpius suam primam originem; potissimum tamen vitiosæ plethoræ & cacochymix, ventriculi prava digestio-

ni & viscerum abdominis vitio causam suam debet, unde etiam graviora juncta habet symptomata, diutius durat, & magis est individualis. Catarrhalis facilius transit, & solius naturæ beneficio, modo non error in diætâ committatur, magno sæpius sanitatis commodo subsequente solvitur; Multo minus vero magnæ efficacix præsidia, uti est venæsectio exigit; quæ tamen in tali tussi, quam nos vocamus rheumaticam, & jam descripsimus, ceteris paribus, locum invenit commodissimum. Præter hæc illud in usum scientiæ medicæ ex relata morbi historia & cura annotandum censeo, quod malum flatulento spasmodicum, quod communi nomine affectus hypochondriaci venit, etiam in vegetioribus subjectis a studiorum intemperantia, vitamotus experte, intermissa sanguinis copiosioris detractio, superveniente diuturniore animi perturbatione suboriri, & leviorum morborum vehementiam exacerbare possit. Denique in gratiam juniorum medicorum non silentio prætereundum esse puto, ad restaurandum robur ventriculi & intestinorum, medicamenta temperata balsamica, sed frequenti & moderatâ dosi sumta, & potum aquæ frigida cum vino spirituofo permixtum egregie conferre. Dicit enim vix potest, quam salutare sit potus genus aqua purior, simplex, cum majori vel minori parte optimi vini permixta, tum ad sanandas præsertim chronicas passionnes, tum etiam ad eas avertendas, & robur per morbi vim amissum recuperandum. Illud adhuc ad complendam superiorem morbi historiam commemorandum est, quod, cum jam in declinatione erat morbus, mitiori & tussi & pectoris oppressione reddita; Domino Patienti ex consilio alterius Medici, me quidem invito, duodecim sanguinis uncia per pedis venam sectam detractæ fuerint, ea medentis intentione, ut affectio molesta sic dicta hypochondriaca averteretur. Verum quam in consulto id factum fuerit, even-



eventus docuit. Vires enim jam tum a præcedente morbo, nimia humorum expectoratione & pariori somno imminutæ, & penitus collapsæ erant; & ciborum adpetentia & virtus ventriculi concoctrix maxime vacillans, ingentem cruditatem peperit proventum; quæ morbum intestinorum, per flatum & spasmos augendo inquietudinem & anxietatem, pectorisque oppressionem. noctu maxime instantem, & vim imaginativam mentis acerbiorum reddiderunt; & curationem haud parum protraxerunt. Ex quo intelligitur, quam noxia sit ex longo morbo convalescentibus largior sanguinis, in quo vis & robur solidorum vitale positum est, detractio; eo quod ejus copia & spirituscentia jam ab ipso morbo satis imminuta fuit.

## OBSERVATIO VII.

Tussis  
ab ede-  
mate  
pedum  
repul-  
so.

Fœmina generosa sexagenaria naturæ alias satis robustæ, gravi haud unquam laboravit morbo, præterquam quod ante duos annos de doloribus artuum vagis, tumidis pedibus, & corporis languore fuerit conquesta. Huic contigit id infortunii, ut incuria ex alto per viginti scalas præceps delapsa fuerit in terram, ubi ex magna consternatione jacuit fere exanimis. Detecto corpore magna in pedibus contusio visa fuit, cum profundo in dextro pede cruento vulnere; cumque graviter terrore perculsa esset, cum ingenti virium lapsu, & internis & externis remediis satis superque ipsi fuit prospectum. Sed tertio mox a lapsu die in immanem tussim ferinam & convulsivam conjecta est, quæ noctu, præsertim, quando claudendo oculos obdormiscere cœpit, omnem adimendo spiritum, suffocationem minabatur. Medicamentis contra hoc symptoma præscriptis nihil proficientibus, & ego vocatus sum. Ordinavi hoc medicamentum: Rec. M. Pil. de styrace, alœphanginarum ana drachm. dimidiam. f. pil. no. quinquaginta, de quibus de-

cem alternis diebus circa somni tempus assumptæ fuerunt. A quibus usurpatis optime habuit, & tussi reddita mitiori & evanescente omni suffocationis metu. Nihilominus cum continua pectoris oppressionem, tussi ejecit insignem pituitæ copiam; languebat diu appetitus, nec somnus adeo fuit placidus. Pedes vero, qui antea fuerunt tumidi, graciliores apparebant, & quod notabile, fœmina per totum fere morbi decursum de ingenti frigoris sensu in pedibus conquerebatur, adeo, ut lagenis fervida aqua repletis eos continuo fovare opus fuerit. Medicamenta, quæ insignem opem in hoc affectu tulerunt, fuerunt mixtura ex aqua hyssopi, veronica, oxymeli squillitico, lapidibus cancrorum, antimonio diaphoretico, spiritu C. C. succinato, syrupo cortic. aurant. debita dosi, & proportionem concinnata; neque minus pulvis ex spermate ceti, floribus sulphuris, sacharo, & pauxillo balsami Peruviani & croci; infusum quoque ex hyssopo, veronica, & cortice ligni sassafras: præterea quoque elixir roborans pectorale & stomachicum ex tinctura tartari, essentia succini, croci, & corticum aurantium recentium; quorum ope intra sex septimanas convaluit.

## Epicrisis.

In hac morbi historia digna sunt, quæ præ aliis observentur, momenta: 1) quod immanis illa consternatio ac terror, vim suam non in totius corporis extremitates, ut ordinario fieri solet, sed tantum in pedes exercuerit: dum illi antea notabiliter tumidi protinus detumescere, ac refrigerare cœperunt. Hinc per metastasin insignis feri impurius, eo usque in pedibus stagnantis copia, ad pectus delapsa, vehementem pectoris rheumatismum, convulsivam fere tussim, qua antea nunquam laboraverat, induxit. Talis consensus pedum cum pectore, aliis quoque exemplis mihi perquam notus est: ex quibus hoc est valde notabile:



Laborabat quondam hujus Academiae Professor, tumore pedum oedematoso, ad abdomen usque ascendente. Hic cum tertiana febre, epidemicam tunc stragem inferente corriperebatur: factum est, ut per ingens cum horrore junctum frigus, sub accessionum initio statim detumescerent pedes. Verum mox successit summa spirandi difficultas, cum insigni pectoris oppressione, adeo ingravescens, ut frustra datis varii generis remediis, sub quarto paroxysmo, accedente catharro suffocativo exstingueretur. Eiusdem tenoris casum, ante aliquot annos adnotavi in generosa quadam foemina; quæ pedum oedemate diu affecta, accedente demum tertiana, fatis cessit. 2) Confirmat quoque hic casus, quod salva ac integra pulmonum substantia existente, ex sola vitiosa materia translatione, gravis pectoris rheumatismus, & diuturna tussis suboriri queat: nostra enim ægrotans nunquam incommoda in pectore ntea senserat.

### OBSERVATIO VIII.

Tussis  
chro-  
nica  
habi-  
tuali.

Vir annorum sexaginta octo, habitus corporis succulenti, constitutionis plethoricæ, lauto victu, vitaque sedentaria utens, meum aliquando requirebat auxilium, eo, quod diuturnis pectoris adfectionibus vexaretur. Retulit scilicet, se juvenem hæmoptysin fuisse passum, & hac congruis medicamentis sedata ac percurata, retinuisse tussim humidam habitualement. Hæc quotannis autumnali ac hyemali potissimum tempore, coryza, aliisque catharralibus defluxionibus stipata infestabat, tanta sæpius ferocitate, ut suffocari non raro videretur. Novissime vero medio hyeme accedebat tussis sicca; qua per aliquot dies insistente, horror atque calor jungebantur, tumque sequebatur liberior expectoratio muci copiosi, sanguine grumoso, subnigricante permixti. Præsens igitur medicus venam in pede tundi iusserat, qua secata levatum fuit pectus, & æger,

usurpatis adhuc variis remediis a malo suo liberatus. Quum autem hujus recursum timeret; ad hunc præcavendum, meam desideravit opem. Quare injunxi rectum rerum non naturalium usum; & præterea ut humorum adfluxus a pectore derivaretur, suavis laxantia ac diaphoretica: illa quidem ex rhabbaro paranda, sæpiusque usurpanda; hæc in forma infusorum mane adhibenda. Cerevisiam quoque pro potu interdixi, & in ejus locum decoctum ex radice scorzonerae, chinae, rasura cornu cervi, radice cichorei, liquiritiæ, semineque fœniculi concinnatum ordinavi. Inde nunciavit mihi, se nihil, de quo amplius conqueratur, habuisse; sed si forsan acidis inter prandium uteretur, recrudescere nonnunquam tussim.

### Epicrisis.

Meretur attentionem in præmissa morbi historia, quod hæmoptysis, quæ in juventute proruperat, post quadraginta demum annos redire possit. Causa in sola plethora accrescente quaerenda est, qua per commodam venæsectionem imminuta, cessavit utique periculosa sanguinis per pulmones ejectio. Neque minus hic casus nos clare docet, quantum vitii & labis, seu potius imbecillitatis in principaliori viscere a morbo diu illud infestante relinquere possit; adeo, ut sanguinis in sene hoc immodica redundantia non aliis interioribus partibus & visceribus, sed pulmonibus infesta fuerit. Videmus etiam habitualement & per multos annos durantem tussim, minus quidem periculosam, ex semel male affecto pulmone suboriri posse. Nam vitium, solidis partibus diutius inhærens, non tam facile ex toto tollitur, minimum, dum debilitatem quandam relinquit, ad plures morbos eorumque recidivas disponit.



## OBSERVATIO IX.

Tussis  
in senes  
saluta-  
ris.

Novi virum literatum septuagena-  
rio majorem, mediocris corporis ha-  
bitus, & moderatioris animi, vitæ &  
victus, qui ob arcendam plethoram,  
quæ multorum etiam senilium morbo-  
rum fecunda genitrix est, singulis fe-  
re annis bis vel ter sanguinem e pedis  
vena mittendum curavit, & inde etiam  
quoad omnes corporis functiones satis  
bene habuit, præterquam quod per  
quindecim fere continuos annos mole-  
sta febre rheumatica tussiculosa, per  
aliquot septimanas sæpius perdurante  
afficiatur; quæ ipsum interdum ex im-  
provviso, vento maxime regnante bo-  
reali, corripit; hanc lassitudo corpo-  
ris, gravitas in capite & pectore, do-  
lor tensivus circa primam lumborum  
vertebram, pedum refrigeratio, alvus  
strictior, urina tenuis, sternutatio,  
appetitus auctior prænuntiant. Sequi-  
tur postea tussis primo violenta & sic-  
ca, cum calore præternaturali anxio,  
& cum alternante horridula & æstuosa  
extremorum alteratione. Elapsis ali-  
quot diebus valde copiosa lenti & visci-  
di muci successive fit excretio. Urina  
quæ primis diebus erat tenuis, jam  
crassa fit, pauca & sedimentum depo-  
nit. Tandem intra duas vel etiam tres  
hebdomades sponte vel per sudorem  
universi corporis, vel per sedes morbus  
solvitur. Redeunt mox & animi &  
corporis vires, redit quoque ciborum  
adpetentia; somnus fit quietior, & re-  
liquo anni tempore a morbis, qui huic  
ætati alias familiares esse solent, im-  
munis vivit. Remediis in hac tussi non  
nisi levibus & simplicibus utitur; præ-  
ter regimen externum conclavis & le-  
cti valde temperatum & abstinentiam  
a consueto cerevisiæ potu, infusum  
Theiforme ex veronica, radice glyzyr-  
rhizæ, lacte, juscula quoque avena-  
cea, cum saccharo canto, & aliquot  
cochlearibus olei amygdalarum dul-  
cium bibit. Circa vesperam dosim pul-  
veris bezoardici leniter nitrosi sumit;

& quando urina incipit deponere sedi-  
mentum, intra quatrimum semel de-  
cocto mannato, ad amurcam a pecto-  
re avertendam & foras ejiciendam,  
summo cum fructu utitur.

## Epicrisis.

Rheumaticæ ejusmodi febres si pla-  
cide tractantur & decurrunt, criticæ  
& medicinales merentur dici rectissi-  
me. Tota enim sanguinis & humorum  
massa ab heterogeneis ipsi immixtis  
succis per congrua emunctoria depura-  
tur; sed hæc depuratio, a natura, ut  
ita loquar, instituta fit per gradus,  
eget tempore, expectatione ac patien-  
tia, nec vult præcipitari multis aut mi-  
nus congruis & validis medicamentis.  
Causam ejusmodi catharralium &  
rheumaticarum febrium, vulgo in  
transpirationem prohibitam tantum  
rejiciunt; ast quando perpendimus,  
raro hyeme, licet frigidissima, sed ve-  
re plerumque & autumnis ejusmodi fe-  
bres, cujus generis etiam sunt, quæ  
variolis, morbillis, doloribus etiam  
arthriticis accedunt, corpora infestare;  
statuendum potius videtur, non solum  
cohibitam perspirationem, causam  
esse sed peculiare vitium in atmosphæ-  
ra nostris succis & partibus solidis ad-  
versum, latitare; quod nos quidem in  
virulentæ & fermentativæ indolis ma-  
teria, ex pravis exhalationibus oriun-  
da collocamus. Præter hæc discere id  
oportet, venæsectionem per se senili  
ætati prorsus non esse adversam; ut po-  
tius ad longam & sanam vitam mul-  
tum conferre possit. De quo argumen-  
to in dissertatione de venæsectionis  
usu ad vitam longam prolixius egimus.  
Illud adhuc subjiendum esse censeo,  
quod Dominus Patiens sedulo observa-  
verit mitissime & optime hunc mor-  
bum in salutem vergere, si mox a prin-  
cipio usque ad finem & plenariam resti-  
tutionem omni studio ac cura tractetur;  
contra vero, si primis diebus negligat-  
ur, nec accuratum regimen observe-  
tur, neq; in rerum non naturalium usu,



vitando aerem frigidum & humidum sibi moderetur, non modo graviolem & diuturniorem fieri; sed etiam scœpius magna cum scævitia & periculo reverti.

OBSERVATIO X.

Tussis  
convul.  
siva in  
tantum.

Tusses convulsivæ, si ullam infestant ætatem, idque non sine periculo, certe id in infantibus & pueris contingere, in praxi observamus; idque maxime quando ex præternaturali temporum constitutione nascuntur, adeoque epidemice grassantur. Vidimus id crebrius & maxime anno 1709. hyeme post hominum memoriam, mense Januarii & Februarii intensissima. Nam principium anni Euro noto spirante erat nebulosum; Postero autem & subsequen-  
tibus diebus Zephyrus vehementer pluvias, & noctu inter d. 5. & 6. Januar. plurimam nivem Eurus, versus aquilonem inclinans, cum intenso frigore adduxerat; quod in dies fere, inter matutinas præcipue nebulas die-  
que & noctes serenas, crescendo ea vehementia nos adflixit, qua de longe lateque querelas multiplicare Europæ contigit; donec d. 20. prægressa nivosa, vesperi auster temperatiorem & pluviosam auram induceret. Quo-  
d intensissimum frigus aliquamdiu quidem remittens, medio tamen Februarii revertens totam gelu terram con-  
strinxit; eo tempore, & etiam sequenti vernali pleuritides spurix & veræ, peripneumonix, graviter affligebant adultiores; tusses vero ferinæ, convulsivæ, cum suffocatione conjunctæ multis & pueris & infantibus erant lethales. Et cum tum temporis in aula Berolinensi in officio Regio ut Medicus versarer, scœpius a me consilium flagitatum fuit. Curam eo direxi, ut ad spasmos pectoris & præcordiales sopiendos accommodata & interna & externa præscriberem. Inter externa unguento pectorali, quod in Augustana Pharmacopœa describitur, cum  
essentiæ croci æquali portione & pau-

xillo camphoræ commixto lintheamina imbui. & regioni præcordiali frequenter imponi jussi. Clystere quoque domestico simplici carminativo venter solutus; interne vero nil nisi electuarium ex oleo amygdalarum dulcium, spermate ceti, item syrupo papaveris albi, in juscule avenaceo datum fuit. Remittente hinc quodammodo vehementia spasmodum, sequenti mixtura ad colluviem vitiosi muci in ventriculi & intestinorum canale, neque minus in bronchiis stagnantem, tam per expectorationem, quam etiam per alvum exturbandam usus sum. Rec. aquæ hyssopi, veronicæ ana unciam unam, essentiæ croci, spiritus salis ammoniaci ana guttas quindecim, syrupi mannæ cum rhabarbaro drachmas duas, tartari emetici soluti granum unum. Hæc mixtura pueris duodecim vel quindecim annos natis, dimidia pars ejus illis, qui sex vel septem vel octo annos habebant, quarta trium annorum infantibus fuit data. Secutus est vomitus cum præsentaneo levamine, & expectoratio etiam melior facta. Alternis diebus repetita hæc est mixtura; reliquo tempore mixturæ ex aqua florum tilix, liliorum convallium, primulæ veris, cerasnig. veron. cum pulvere Marchionis, cinnabari, antimonio diaphoretico, additis aliquot guttulis spiritus cornu cervi succinati, item essentiæ croci datæ fuerunt, & plerique ex his remediis optime se habuerunt.

Epicrisis.

Cum infantes & pueri patientiores habeant cutis poros & vias, facilius etiam aeris intemperatioris & asperioris in eorum corpora est ingressus, adeo, ut ex parte humores tenues lymphaticos inspisset, & transpirationem impediendo, ad interiora ventriculum potissimum & pectus eos compellat. Et quoniam infantes ob satis tenerum, mobile, & sensibile genus nervosum, ad motus spasticos & convulsivos



aspectu sæpe horribiles sunt propensi, mirum non est, eos præ aliis ætatibus, quando ejusmodi tusses regnant, acerbiora experiri symptomata. Videmus enim vehementissime moveri & contrahi pectus, cum omnibus artibus, sub collo & facie mirum intumescere & sanguine suffusa, oculis torvis existentibus, & ob spirationem difficillimam ægros sæpe occluso pharynge pro mortuis haberi. Prima igitur medici sit intentio, ut motus hos enormes quodammodo sopiat, & postea collectam lentam & viscidam tam in pectore quam in ventriculo & duodeno hærentem materiam blande per vomitum & alvum eliminet. Et certe concisa dosi tartarus emeticus solutus in mixtura commoda, ejusmodi in casibus si detur, longe optimum & desideratissimum præstat effectum. Id quod etiam in tussi convulsiva & suffocativa, quæ in variolarum, item morbillorum maxime declinatione infantes infestare solet, summo cum levamine ægrotantis sæpius expertus sum. Vidi etiam non raro tussim convulsivam in infantibus difficili dentitione laborantibus, quæ nullo modo & medicina sopiri potuit, post dentium vero eruptionem sponte cessavit. Adeo, ut ex sola hac observatione recte colligere possimus, motus hos pectoris violentos, non semper pro causa materiam insignis molis habere, sed a sola vellicatione nervosæ cujusdam partis originem suam trahere posse.

## OBSERVATIO XI.

Tussis hypochondriaca. Vir quidam ætatis consistentioris, concionatoris munere fungens, hypochondriacis ob vitam sedentariam passionibus per longos annos obnoxius fuit, nimirum alvi obstructione, dolore sub hypochondriis tensivo, appetitu vago, tinnitu aurium vexatus &c. His tandem vernali tempore, accedente forsan corporis refrigeratione, jungebatur tussis, & per integrum jam inhæserat semestre. Vespertino

præsertim ingravescebat tempore, tumque efferata vehementia infestabat, donec post magnos conatus, mucii admodum viscidii quidpiam excerneretur. Neque tamen minus pectus grave, & spiratio erat difficilis; sumtis epulis magis invalescens.

## Epicrisis cum consilio.

Tussis chronica & pertinacioris indolis est illa, quæ molestissimo intestinorum morbo, qui vulgo hypochondriacus vocatur, laborantibus infesta est. Atque ratio in promptu est: nam quia tussis a nimia congestione humorum ad pectus valde infirmum & atonia affectum accidit, & prima in hypochondriacis regio ob destructam digestionem, vitiosos multos crudos humores suggerit; non mirum est, ejusmodi generis tusses non tam facile sanationem recipere. Accedit & hoc, quod illa convulsiva thoracis & totius abdominis concussio, quæ fit per tussim, digestionis, quæ fit secundum naturam, negotium, in intestinorum canale plus adhuc labefactet & pervertat. Nam plura mihi cognita sunt exempla, quod diu multumque perseverante tussi ob vitiatam digestionem & canalis intestinalis tonum destructum, affectio hypochondriaca demum producta fuerit. Ex quo jam facile intelligitur, difficilem omnino esse tussis hypochondriacæ curam. Neque enim, quæ in simplici & catarrhali epidemia tussi idonea sunt remedia, hic sufficiunt; sed respiciendum quam maxime est, ad digestionem ventriculi juvandam, & destructum intestinorum tonum restituendum, ac circulationem etiam sanguinis per viscera abdominis, quæ in hypochondriacis lentior est, promovendam. Ego itaque in præsentī casu, atque etiam in aliis similibus non sine insigni fructu, præparato prius corpore, ceteris pharmaceuticis alias satis efficacibus remediis nihil proficientibus, curam cum aquis mineralibus, aci-



acidulis veletiam thermis temperationibus, sine vel etiam cum lacte, pro diversa subjectorum & circumstantiarum ratione instituendam suasi. Ante vero, inter & post earum usum elixiriis temperatioribus stomachicis & balsamicis, & ejusdem virtutis pilulis, subjuncto simul loco potus ordinarii decocto temperato ex radicibus & lignis totam curam absolvendam statui; non neglecta etiam accommodata sanguinis vel per venas hæmorrhoidales hirudinum ope, vel per sectionem venæ in pede missione, modo post illam, præsertim autumnò & vere patiens frigidum australem aeris statum evitet. Nam dici vix potest, quam graviter ex hujus rei neglectu luat æger, & quam sæviter inde tota passio ingravescat.

## OBSERVATIO XII.

*Tussis in gravida.* Generosissima fœmina in vicina urbe quartum mensem prima vice gravida, anno 1732. tempore, quo & variolæ & convulsivæ tusses epidemice & sæviter grassabantur, vehementiori etiam infestabatur tussi cum febricula nocturna; appetentia ciborum penitus erat prostrata; siti vero premebatur, ad quam deliniendam decoctum temperatum vino intermixtum bibebat. Deliberatum fuit, num venæsectio ad abortum præcavendum locum habere possit, eo quod dolores quosdam spasticos & tensivos circa lumborum regionem & inguina generosissima fœmina interdum percipiebat. Ego, quia erat plethorica, & venæ præsertim in partibus superioribus, maxime jugularis valde turgebant sanguine, innoxiam eam minimum, sed tentandam potius in manu judicavi. Et sanguis muco crasso tenaci valde oblitus detractus fuit. Tussis hinc & febris longe remissior facta est: Præter venæsectionem infusum quoque rhabarbarinum cum manna, ad lentam pituitam per alvum, quæ erat segnior, subducendam cum fructu datum fuit.

Epicrisis.

Ex vehementiori tussi, præsertim convulsiva abortus fieri posse, non novum, nec inauditum in praxi medica est. Hujus vero causam in sanguine & humoribus impuris & spissis, quia menstrua cessat purgatio, radicari pro statuto & certo etiam habendum videtur. Sanguinis itaque abundantioris ac impurioris per sectam venam detractionem, ipsa sana ratio dicitur & experientia etiam aliorum confirmat.

Plures de tussi casus legantur in Consult. ac Respons. Medicin. Tom. I. Sect. II. casu LXXV. -- LXXVIII. & XCVI.

## CAPUT IV.

D. E.

## SINGULTU.

## THESES PATHOLOGICÆ.

§. I.

**Q**uemadmodum respirationis negotium binis potissimum absolvitur actibus, inspiratione videlicet, ac expiratione: ita utriusque etiam ratione lædi potest. Expirationis quidem vitium, quod tussis nomine venit, superiori capite pertractavimus: ad inspirationis vero læsionem, illa pertinet affectio, quam Græci *λυσμός* seu *λυσγός*, nos singultum vocamus. Hic, si spectemus definitionem, nihil est, quam septi transversi, & annexarum quarundam partium convulsio spasmodico convulsiva, interrupta, molesta, sub inspiratione facta, & cum sonora aeris per os explosione stipata.

§. II.

Hujus naturam explicaturi; quædam de fabrica partium, quæ ad id vitii perficiendum concurrunt, præmittimus. Sic nobis primo se sistit septum

Definitio singultus.

Structura diaphragmatis.

N. 2. trans.



transversum, Græcis diaphragma dictum, quod omnicircumferentia musculosum, fibris a centro ad peripheriam tendentibus, in centro tendineum, mediam corporis cavitatem ab infima, transverso, simul obliquo, antèrius altiori, postèrius decliviori situ dissepiens, versus thoracem convexum, abdomen versus concavum, nervis partim a vertebralibus colli, partim ab intercostali ramo, & vago pari oriundis, satis capacibus instructum; binis foraminibus, quorum dextrum in tendineo circulo cavam venam, sinistrum in musculosa parte œsophagum, ac par nervorum vagum transmittit, pervium, variis undique adhærescit partibus. Nimirum antica parte costis, sterno, & musculis intercostalibus; media per tunicam pleuram, convexam septi superficiem cingentem, mediastino; ventriculo, non solum per nervos, ac exteriorem tunicam, a peritonæo productam, utrique communem, ac concavum septum investientem; verum etiam per stomachum, græcis *ναρδία* dictum, ipsi firmiter adnexum; hepatis, ejusque gibbosæ superficiei per ligamentum latum; & postica regione vertebris lumbis per duas musculo tendineas appendiculas arcto connectitur vinculo.

## §. III.

Dia-  
phrag-  
matis  
usus in  
respira-  
tionis  
nego-  
tio.

Vi hujus dictarum partium mutui vinculi necesse est, ut unius partis in loco mutationem sequatur reliquarum adherentium motus: quod in naturali flatu respirationis docet negotium. Namq; sub hujus priori actu, inspiratione, partim musculis intercostalibus, costas sursum, simulque antrorsum trahentibus, partim ipsis muscoli septi fibris, a centro ad peripheriam contractis, & abbreviatis; hoc ex convexa in magis planam convertitur figuram: protinus hunc motum æmulantur vicinæ partes, & universum sursum antrorsumque trahitur abdomen, stomacho per abbreviatis septi fibras magis coarctato. Omnia hæc pristinam subeunt

conditionem, diaphragmate in expiratione ad convexitatem redeunte. Inde vero sequitur, quod ubicunque thorax & abdomen sursum, antrorsumque tolluntur, & pectoris ampliatur cavitas, ibi fit inspiratio; si contra, expiratio.

## §. IV.

Jam si ad singultum fiat applicatio; hujus primum historiam, quamvis facillima cuivis sit diagnosi, curatius attendentes, sic habere deprehendimus: Concutitur pectus celeri impetu, cum sono acuto; sub qua concussionem thorax & abdomen attolluntur, pectoris cavitas fit amplior, loquentibus sermo intercipitur, quin tanta sæpe numero est vehementia, ut juxta DO-  
LÆUM *Enciclop. medic. Lib. III. cap. II. pag. 174.* totum contremisecat corpus, & costæ frangi videantur. Ipse sonus, qui jungitur, tantus nonnunquam est, ut canis latratus instar a transeuntibus in platea, & ædibus vicinis percipi possit. Conf. LAZARUS RIVERIUS *obs. 1. pag. 302.* THOMAS BARTHOLINUS *histor. anat. rarior. Cent. II. histor. 4. pag. 175.* VITUS RIEDLINUS *obs. 31. pag. 67.*

## §. V.

Hæc cum phænomenis inspirationis collata, luculenter docent, singultum esse inspirationis vitium, saltem sub ea contingere. Quemadmodum vero sub naturali inspiratione antecedere observatur motus musculorum intercostalium; sequitur transversi septi constrictio, & tandem abdominis elevatio; hæcque omnia placido, ac lento procedunt gradu: ita e contrario in singultu, tanquam præternaturali inspiratione, primum observatur septi transversi constrictio, & vi consensus sequitur motus connexarum partium, cuncta vero vehementer, & velocissime fiunt. Concussio sic velocissime septo, concutitur quoque gula & stomachus citissime: hinc aeris, continuo a nobis deglutiti portio, intra gulam comprehensa, magno impetu sursum per integrum pellitur

Historia  
singultus.

Ratio  
formalis  
singultus.

œso-



œsophagum, & tandem in fornicato palato, singultuosum illum efformat clangorem. Conf. LANGII *Pathol. animat. Cap. 36.* Concussum denique septum, producto singultuoso sonitu, plus minus lento progressu rursus convexum redditur: i. e. fibræ musculares iterum prolongantur: hinc quies fit, & per intervalla redit convulsiva concussio.

§. VI.

**Difference-  
rentia  
singul-  
tus a  
conti-  
nuo se-  
pti trās-  
versi  
spasmo.** Dum ergo singultus est convulsio diaphragmatis velocissima, sed mox remittens, & per intervalla recurrens: distinguit sese ab ea spastica detentione, quæ diutius septum tenet rigidum, ac perpetuam spirandi causatur difficultatem. Conf. GASPAR HOFFMANNUS *Instit. med. Lib. III. cap. 86. §. 6.* GALENUS *de sympt. Lib. II. cap. 2.* Hæc accedere observatur colicæ convulsivæ; aut paroxysmis hysterice vehementioribus; & a sonitu, singultientibus familiari vacua apprehenditur.

§. VII.

**Difference-  
rentia  
inter  
singul-  
tum a-  
cutum,  
& chro-  
nicum.** Ad hæc notanda omnino est differentia, quæ singultum chronicum intercedit, & acutum. Hic morbis acutis jungi observatur, ut febribus continuis, malignis, exanthematicis, pestilentialibus, inflammationibus nobiliorum viscerum &c. non modo brevioris exitus, verum ancipitis quoque eventus est. Contra chronicus longas ægritudines comitari solet, ut sunt hysterice, cachectice affectiones, vitiata primarum viarum conditio, mala partium spiritalium conformatio &c. & in hac sua indole ad plures dies, hebdomades, menses, quin integros annos perdurare potest. Sic BARTHO- LINUS *Centur. 3. epistol. 61.* de muliere per biennium adeo graviter singultiente, ut a Dæmone obsessa videretur; & *cent. 2. epist. 4.* de singultu per quatuor annos infestante; alii alia exempla allegant: quorum numerus a MARCELLO DONATO *Lib. IV. hist. med. cap. V.* & SCHENCKIO *obs. L. III.* recensetur.

Hoff. Syst. Tom. V.

§. VIII.

Quod singultus sedem attinet; variae medicorum de ea semper fuerunt opinioniones. Veteres, & antesignanus HIPPOCRATES *Lib. VI. aph. 39.* ventriculū solum accusarunt, & per ejus violentum motum, quo rem sibi infestam expellere conaretur, descripserunt. Verum, ne tali ratione illum cum vomitu vel ructibus confunderent; singultu agitari ea, quæ superiori ventriculi orificio inhærescunt, vomitu, quæ ejus fundum occupant, perhibuerunt. Vid. FORESTUS *obs. XII. Lib. XVIII. pag. 286.* Alii vero, quorum agmen ducit FELIX PLATERUS *Lib. II. de funct. lesion. Cap. V. pag. 476.* sedem in solo septo transverso collocarunt; cum priorem opinionem non omnibus phænomenis satisfacere viderent. Alii denique media incedentes via, primario quidem os ventriculi superius adfici, per consensum tamen semper diaphragma simul agitari autumarunt: quos inter nominandus est DOLÆUS *Eucyclop. Med. L. III. c. II. p. 174.*

§. IX.

Mea vero sententia principalis sedes, ac primarium hujus affectus organon, in diaphragmate collocandum est: siquidem absque hujus musculi transverso, nulla inspiratio, cujus præternaturalis effectus est singultus, fieri potest. Enim vero cum superius ventriculi orificium firmissime adhærescit septo illi; impossibile est quin simul, una cum œsophago in hoc affectu patiatur. Et hinc adparet fundamentum illius divisionis, qua singultus in idiopathicum & symptomaticum recte dispescitur. Ille enim est, si causa ejus materialis, in ipsa transversa septi substantia hæret; hic, si causa in ventriculo residet, & hujus vellicatio ad diaphragma propagatur.

§. X.

Causa singultus proxima est irritatio vel stimulatio aut diaphragmatis, aut stomachi, & hinc inducta harum partium convulsiva concussio. Quamob-

Sedes  
singul-  
tus.

Nostra  
senten-  
tia.

Causa  
proxima.



rem quo debiliore nervorum genere homines sunt præditi, eo facilius hoc affectu corripiuntur: hinc infantes, pueri, ac senes ipsi præ aliis sunt obnoxii, adeo, ut diæteticum quoque ac transitorium illum singultum, de quo nos non loquimur, & qui vel ex stomachi refrigeratione, vel haustu avidiori aut frigidiori, vel etiam risu suboritur, facillime incurrant. Sed & illæ mediatae ac remotiores causæ, quæ morbosum singultum, medentis auxilio dignum, suscitare valent, in his subjectis facilius vim suam exerunt: quas jam ordine suo recensere, animus est.

## §. XI.

Causæ  
singul-  
tus sitæ  
sunt.  
1) in ac-  
re fri-  
gido.

Aeri, eique frigido ac humido, præfertim subjectis antea calentibus admisso, princeps debetur locus. Qui nudo vel leviter tantum tecto pectore, quique nudis præter consuetudinem pedibus, in frigidioribus ambulant pavimentis, quo teneriores fuerint, eo facilius singultum incidunt; & infantes, quorum vertex adhuc palpitans non bene tectus fuit, eodem affectu frequentissime corripiuntur. De tri-duano singultu ex diuturniori in aquis mora, casum refert memorabilem CAROLUS RAYGERUS in M. N. C. dec. I. ann. VI. obs. 211. & majori attentione dignus est ille, cujus meminit RIVERIUS Cent. III. obs. 42. quod quædam puella, per totum hyemem singultu graviter vexata, omni vero æstate ab eo libera fuerit.

## §. XII.

2) in a-  
limen-  
torum  
nimia  
quanti-  
tate,

Ejusdem affectus causam ipsa alimenta præbent, vel nimia quantitate sumpta, vel inimica qualitate prædita. Sola avidior ingurgitatio, qua bolus bolum, haustus haustum trudit, & in superiori ventriculi orificio commoratur; hoc vellicando, singultum, utut leviolem producit: & sic FORESTUS Lib. XVIII. obs. 12. singultum a frusto pulmonis bubuli in œsophago restitante commemorat. Cibi quoque nimia quantitate ventriculum onerantes, eandem pariunt molestiam: id

quod pueri voraciores, & gulæ dediti testantur; & solum panem nimia quantitate ac aviditate ingestum, id vitii concitasse, notat EPIPHANIUS FERDINANDUS hist. med. 43. Potulenta, majori copia ingurgitata, maxime si externa accesserit refrigeratio, aut ipsa nimis frigida fuerint, tussim pariunt, exemplo heluonum, nudo inter pocula pectore versantium, & infantum lactentium, si iis cerevisia frigidior exhibeatur. TIMÆUS A GULDENKLEE exemplum hujus affectus allegat in viro, qui valde calefactus, nimium aquæ frigida cum nitro hauserat Lib. III. Cas. V. pag. 115. & RIVERIUS de morb. infreq. obs. 1. singultum semestrem, a frigido haustu vehementissimum adnotat.

## §. XVIII.

Quæcunque assumptorum vel per se nimis sunt acria, vel ex variis causis intra ipsum ventriculum, in saburram ærem, viscidam, stomachum vellitantem dehiscunt: morbum nostrum plus minus gravissimum inducunt. Quem fugit lactis & lacticiniorum corruptionem in ventriculo, singultientes reddere infantes; quale exemplum funestum narrat BARTHOLINUS Act. Med. Hassn. Vol. II. observ. 28. Idem tenendum est de acribus, causticis, aut plane venenis. De singultu ex cicuta comesta, GULDENKLEE Lib. VII. cas. 4. ex euphorbio ibid. cas. 7. ex cepis, allio, & Zingibere GATTINARIAS de cognit. & cur. agrit. p. 81. ex oleo vitrioli loco balsami sulphuris sumto BARBETTE prax. med. Lib. IV. cap. 2. p. 136. ex nimio usu juleporum acidorum, & emulsionum refrigerantium in acutis SCHENCKIUS Li. III. allegant notatu dignas observationes. Neque minus huc referenda sunt vomitoria ac purgantia drastica, maxime helleborata, quæ rodendo, stimulando, & inflammando ventriculum ac intestina, ad singultuosum disponunt morbum.

## §. XIV.

Citissimas & ut plurimum funestas septi

3) in as-  
sumto-  
rum i-  
nimica  
quali-  
tate.

4) in  
materia



acridia. septi transversa concussiones excitant  
phrag. humores acriores, corrupti, multisq;  
mati in. salinis partibus referti, si incumbant  
cūbete. diaphragmati. Notum mihi est exem-  
plum de homine, qui per decem & tres  
dies vehementissimo afflictus singultu,  
 tandem obiit: cujus in thorace aliquot  
feri acrioris extra vasa natantis unciae  
post institutam cadaveris sectionem re-  
pertae fuerunt. Et huc fere pertinet  
singultus, qui a materia arthritica vel  
podagrica per metastasin ad septum  
transversum decumbente suboritur:  
qualem a retropulsa arthritide excita-  
tum adnotavit GEORG. HIERON.  
VELSCHIUS *Hecatost. II. obs. 54.*  
Idem morbus contingit, si dysente-  
ria vel diarrhoea, praesertim ab initio  
cohibita, & per opiata, vel alia ad-  
stringentia sufflaminata fuerint: quem-  
admodum observavi in *Not. ad Poter.*  
*cent. II. cap. 47.* Neque raro erysipelati  
retropulso, aut in senioribus ac imbe-  
cillioribus haud satis vegete expulso  
jungitur singultus. Quae omnes causae  
nituntur materia acri, ac veluti cau-  
stica, nervosis septi transversa parti-  
bus, vel orificio ventriculi superiori se-  
se insinuante.

§. XV.

Singul. Qui acutus audit singultus, jungi-  
tur acut. tur morbis, qui sunt brevioris exitus.  
Ex iis primas tenent inflammationes  
viscerum nobiliorum, sic malum, il-  
lud sequitur vulnera ac inflammatio-  
nes ipsius septi, ut in paraphrenitide  
adparet; nec non ventriculi & intesti-  
norum, adnotante FORESTO *Lib.*  
*XVIII. obs. 12.* phlegmonem hepatis,  
testibus CELSO *Lib. II. cap. 7.* BAR-  
BETTE *pr. med. Lib. IV. cap. 2.* cu-  
jus pathognomonicum signum, dolor  
ad jugulum ascendens suppeditat. Ipsae  
cerebri, ac meningum inflammatio-  
nes, grave sive vulnerationes, vi con-  
sensus, quem haec partes per nervum  
vagus cum septo stomachoque ha-  
bent, eminus hoc symptoma produ-  
cunt. Conf. HIPPOCRATES *Sect.*  
*VII. aph. 3.* & HEURNIUS *comment.*  
*in hunc aphor. pag. 469.*

§. XVI.

Idem vitii genus sociari solet febris <sup>2) febris</sup>  
bus continuis, malignis, & exanthe- bus ju-  
matis &c. ubi variae remotiores con- aus  
currunt causae. Aut enim junctae in-  
flammationis causa fit singultus; id  
quod cum primis in febre pestilentiali a  
carbunculo, septum, aut ventriculum  
obsidente, evenire asserit DIEMER-  
BROECK *Cap. 13. §. 5.* & *Cap. 15.*  
*annot. 15.* aut si febrium legitimus de-  
cursus praematuris anodynis, piatisque  
turbatus fuerit, qualem memorabilem  
casum recenset RIVERIUS *Cent.*  
*III. obs. 17.* aut sudores repressos, &  
exanthemata resistentia, vel repulsa  
sequitur; aut acrem ventriculi sabur-  
ram comitatur, cujus exemplum in fe-  
bre hemitritaea refert FORESTUS  
*Lib. V. obs. 15.* Hisce in casibus pericu-  
losa simul adsunt signa, sitis magna,  
debilitas insignis, vigiliae, delirium,  
impudentia, ardor inextinguibilis,  
motus maxillae inferioris tremulus,  
nervorum distentio, vocis interceptio,  
urina diluta &c. Contra vero si circa  
dies criticos occurrit, ac reliqua signa,  
maxime coctionis in urina fuerint bo-  
na; nihil mali portendit, sed vom-  
itum criticum, aut alvi fluxum futurum  
praenunciat, & his subsequitis cessat.  
Saepius quoque has acutas febres ita se-  
quitur singultus, ut cum ipsis perma-  
neat, & per totam febrem simul exa-  
cerbetur; quales febres singultuosae,  
aut lyngodes veteribus appellantur,  
earumque exemplum in M. N. C. *anno*  
*4. observ. 48. pag. 43.* allegatur: quor-  
um etiam spectat memorabilis casus a  
POTERIO *Cent. II. cap. 47.* allegatus.

§. XVII.

Ad acutos & ancipites eventus sin- <sup>3) ab</sup>  
gultus referendi quoque sunt, qui se- inani-  
cundum veteres inanitionem, seu ni- tione  
mias humorum excretiones sequuntur.  
Hyperemesin & hypercatharsin hoc  
gravi symptomate stipari, testantur  
praeter experientiam HIPPOCRA-  
TES *Sect. VII. aph. 3.* & *41.* & *Sect.*  
*V. aphor. 41.* & SYDENHAM. *meth.*  
*cur. febr. pag. 61.* Eundem affectum



post se trahunt cruoris vitalis nimiae ac incoercibiles effusiones, vel naturales per uterum, nares, hæmoptysin, vel per vulnera graviora concitatae; sicuti idem HIPPOCRATES *Sect. V. aphor. 3.* significat. Quibus in casibus universales plerumque convulsiones, ac ipsum vitæ finem hæ concussiones singultuosæ, tanquam ultimi naturæ conatus antecedere solent.

## §. XVIII.

**Chronicus** singultus natales suos quandoque debet sanguinis & humorum vitio: quando nempe illi, aut quadam acrimonia imbuti, aut, retentis consuetis excretionibus, ad vasa septi ac ventriculi copiosius congesti sunt. Hinc gravidis per ultimos gestationis menses, & foeminis hystericeis, quarum menstrua non rite fluunt, maxime familiaris est: quo nomine notabilis est casus a SCHURIGIO *parthenol. pag. 213.* allegatus, ubi refert, singultum foeminam quandam ante mensium eruptionem semper occupasse, hac vero facta protinus cessasse. Idem malum chronicum æque ac periodicum affligere solet cachecticos, & hepate affectos: ubi causa in bile, acriori reddita, & tunicas ventriculi ac duodeni nerveas vellicante, quærenda est. Hinc talem affectum in cachectico tam diu durantem, donec vomitus sequeretur, observavit LENTILIUS *in Jatromn. pag. 286.*

## §. XIX.

**Offearum** denique, quæ pectus cingunt, partium, & malæ conformationis vitia, ad chronicum interdum contribuunt singultum. Mucronata cartilago, si laxata, vel ob alias causas magis introrsum reflexa est, ut ventriculum stimulare possit, præsentem adfectum producere, observationibus deprehenditur: qualem a depressa hac cartilagine per tres menses durantem adducit FERNELIUS *Lib. VI. de part. morb. & sympt. cap. 3.* Eundem costarum luxationes, fracturæ atque contorsiones excitasse, docet expe-

rientia. Hinc idem FERNELIUS *loc. cit. pag. 568.* singultum ex luxata costâ ortum, ea reposita conquievissè refert; & RHODIUS *Centur. 2. observ. 61.* ejusdem ex compressione undecimæ dorsæ vertebræ nati ac continui mentionem injicit.

## §. XX.

Quod singultus prognosin attinet; neutiquam periculosus ille, qui visciditates, cruditates, & acrimoniam primarum viarum excipit; nec qui hystericeis accidit, timeri adeo debet. Multo minus periculi habet, si ex refrigeratione vel potu frigido oritur, modo non corpori sudanti, nimius ingeratur: frequens est infantibus lactentibus etiam & nil; plus vero mali in senibus prænunciat. Novi foeminam generosam 40. annorum, quæ viginti annos quotidie adhuc singultu vexatur, sine sanitatis incommodo. Idem vero minus talis per acutas febres, præsertim ardentes, ac pestilentiales incidens, grave ostendit periculum; & si delirium interveniat, aut nervorum distentio, mortiferum est. Qui causa inflammationis, maxime hepatis oritur, vix nisi lethalem præfagit exitum. Æque pertimescendus ille, quem acriora purgantia, emetica, ac venena post se trahunt. Omnis ex inanitione singultus, post alvum citam, largasque vomitiones malus; post sanguinis profusionem, & capitis vulnera, pessimus. Quem accersunt dysentericæ, diarrhœæ adstrictæ, erysipelas, podagra, arthritidis repulsa, periculo non vacat. Singultuosæ senum herniosorum febres, cum nulli ferme medelæ locum relinquant, mortiferæ sunt, teste FORESTO *Lib. XVIII. Cap. 12. Schol.* Sternutamentum autem singultui, maxime qui ex repletionem oritur, accessisse utile est, & hunc cessaturum prænunciat.

Pro-  
gnosis  
singul-  
tus.



## Methodus medendi.

## §. I.

Indica-  
tiones  
curato-  
riae.

**O**Mnis singultus medelam non ex-  
poscit; siquidem levior ille ac  
diæteticus vel inspiratione diutius pro-  
tracta, vel animi quadam distractio-  
ne, per dolorem in quodam corporis  
loco excitatum, aut sedulam alicujus rei  
meditationem, aut terrorem ex impro-  
viso excitatum, facile solvitur. Qui ve-  
ro morbosus est, his non cedit; sed me-  
dica adgrediendus est manu: Tres ve-  
ro potissimum in illo sanando sunt in-  
dicationes; quarum prior motuum præ-  
ternaturalium, spasmodico convulsi-  
vorum mitigationem, altera caussarum  
materialium remotionem, & tertia  
partium affectarum & debilitatarum  
restorationem indicat.

## §. II.

Quæ  
priori  
satis-  
faciant  
indica-  
tioni.

Priori scopo satisfacturi veteres, o-  
pio & inde paratis utebantur medicinis,  
laudano opiato, mithridatio, philo-  
nio, diascordio Fracastorii, Theriaca  
&c. iisque singultum se curasse hinc in-  
de perhibent. Verum præfero leniora  
antispasmodica, & anodyna: ex qui-  
bus sunt succinum, cinnabaris, cro-  
cus, castoreum, quod vehementer  
laudant auctores, adeo, ut ALEXAN-  
DER TRALLIANUS, bonus in-  
primis auctor, illud quoque sub amu-  
leti specie singultum sanare, sibi per-  
suaserit. *Lib. VII. pag. 387.* Ego cre-  
bra doctus experientia, liquorem meum  
anodyno mineralem omnibus longe  
præstantiorem judico, eumque his in  
casibus vel solum, vel tincturæ castorei  
nuptum exhibere soleo. Nec minoris  
efficaciæ est spiritus nitri duleis, cum  
refracta balsami mei vitæ dosi permix-  
tus. Olei amygdalini unam vel dimi-  
diam unciam cum aliquot olei anethi  
destillati guttulis quidam pro secreto  
habent.

## §. III.

Saburra  
acrima-

Cum primis vero, juxta alterius in-  
dicationis tenorem, caussarum mate-

rialium remotioni studere decet. Quan-  
do itaque saburra quæcunque ventricu-  
lo inhærens, ejus orificium superius sti-  
mulando, singultum produxit, ea cor-  
rigenda & blande vacuanda est. Si a-  
cris ac biliosa fuerit, abforbentia citra-  
ta, pulvis noster præcipitans, ex aqua  
frigida operæ facient pretium: viscida,  
plicis ventriculi pertinacius infixa, sa-  
libus digestivis, maxime liquore terræ  
foliatæ tartari, & radicibus, quæ re-  
solvunt, simulque roborant, ut est  
radix vincetoxici, quæ simul anodynæ  
quicquam in recessu habet, angelicæ,  
calami aromatici &c. votis satisfac-  
ciunt. Cōcta materia evacuanda vel  
per vomitum erit, vel per alvum. Il-  
lo ciendo conveniunt radix Ipecacua-  
næ, vel omnium optime pulvis squil-  
læ ad quatuor vel 6. grana cum granis  
tribus nitri purificati. Alvum solvunt  
mannata, rhabarbarina, pilulæ alœ-  
phanginæ; vel marocostinæ aut de  
succino Cratonis aucta succini dosi præ-  
paratæ: commodissime hujusmodi pi-  
lulis aliquot grana massæ pillularum de  
styrace vel de cynoglossa admiscuntur:  
ita duplici effectu satisfaciunt. Tutissi-  
ma quoque sunt enemata, leniter car-  
minativa, maxime infantibus, qui ex  
lacte corrupto id vitii genus incurre-  
runt: quo in casu etiam sulphur anti-  
monii correctum, vel aurum fulminans  
bene præparatum dosi concisa cum fru-  
ctu adhibentur.

## §. IV.

Si a frigore, vel quacunque alia caus-  
sa cohibita transpiratio foveat malum;  
huic revocandæ omne studium impen-  
dere oportet. Conveniunt hoc nomi-  
ne, præter externum temperate cali-  
dum regimen, affectarum partium fo-  
mentationes, potus tepidior, & lar-  
gus, infusa theiformia ex herbis ac ra-  
dicibus solventibus, ac roborantibus  
confecta: ex quibus pulveres bezo-  
ardicos, ex succino, cornu cervi  
usto, antimonio diaphoretico, cin-  
nabari, tantillo extracti croci, ac  
castorei paratos sumere juvabit.

Singultus,  
&  
cohibita trans-  
piratio  
suborti-  
curatio.

Ex-



Excellens quoque hoc in casu remedium constituit spiritus bezoardicus Buffii, si cum liquore nostro anodyno, & essentia castorei permisceatur. In acutis & exanthematicis febribus suppressa transpiratio, præter rectum regimen, frictiones, & fixa diaphoretica votorum explebunt summam. In chronico singultu a refrigeratione suborto, & admodum refractario, potus vini Hippocratici levamentum præstat: præter id divinæ virtutis sunt balnea tepidiora; quæ & diaphoresin revocant, & partes spasmo constrictas emolliunt: quemadmodum exemplo confirmat RIVERIUS *observ. infrequ. I.*

## §. V.

*Exanthematica re-tropulsa sunt revocanda.* Eadem medendi ratio obtinet locum in singultu a materia erysipelacea, arthritica, podagrica retrocedente, aut non satis foras pulsa suborto: in quo scilicet, præter diaphoreses per dicta §. præcedente remedia obtinendam promotionem, materiam acrem ac inimicam a nervis phreniticis ad sua loca revocare expedit. Hoc fine blanda laxantia & clysteres divinæ ferme sunt virtutis: non minus rubefacientia, atque vesicatoria suris vel scapulis adplicata, detrahendo serum acre, magnum ferunt levamen. Nec opera luditur, si in podraga retrocedente pediluvia tepidiora crebro adhibeantur: quare etiam TRALLIANUS *lib. cit. pag. 386.* atque RIVERIUS *prax. pag. 407.* manuum in aquam calidiorem immersionem laudant.

## §. VI.

*Singultus ab acri ac drastico remedio inducti cura.* Quandoque a dato emetico, purgante, caustico remedio, veneno singultus excitatur; ea sunt adhibenda, quæ vim veneni castrant, & enervant. Quæ inter nihil præstantius est pinguius, oleis amygdalarum dulcium, olivarum, mucilaginosi, ipso lacte, ejusque cremore, tempestive, priusquam inflammatio locum occupaverit, propinatis; & sic involuto veneno, effrænes motus dictis superius anodynis compescendi sunt. Si vero malum a

veneno per contagium hausto, uti in peste, vel etiam morfu canis rabidi, ictu, ira effervescentis infecti provenit: tunc theriacalia, ipsa theriacalis aqua, theriaca cœlestis cum antispasmodicis, nitrosis, camphora, cinnabari, diaphoreticis mixta optimum pollicentur levamen. Quæ curandi ratio locum quoque obtinet, quando a materia caustica, exanthematica, maligna, ad interiora a corporis superficie repulsa malum incidit; quo casu pulvis ex camphoræ aliquot granis & nitro compositus; nec non emulsiones ex amygdalis & feminibus quatuor frigidis majoribus, & aquis diapnoicis paratæ, præstantissimam ferunt opem.

## §. VII.

Qui insignes cruoris vitalis effusiones insequuntur singultus; haud prius compescentur, quam donec ipsis inanitionibus obex ponatur. Cohibere vero hæmorrhagias enormes decet internis temperantibus, tonicis, adstringentibus, externisque præsiidiis: quorsum in vulneribus commodæ læsæ partis deligationes pertinent. Sedato fluxu tutis anodynis insistendum, iisque efficacissima antepileptica jungenda, & denique anæmiæ analeptics, & alimentis reficientibus succurrendum.

## §. VIII.

Nec insuper habenda sunt remedia roborantia, maxime sub morbi declinatione. Ex iis eminent olea roborantia macis, menthæ, absynthii cum balsami mei vitæ quibusdam guttulis combinata, ac in aquis spirituosis, tanquam commodo vehiculo exhibita. Tales sunt aqua spirituosæ cinamomi, menthæ, melissæ, aquæ vitæ aromaticæ: nec non essentia carminativa Wedelii, aqua carminativa Dorncrellii, & ipse vini generosi haustus. Hæc remediorum genera in singultu, qui a flatuum retentione, & facta ab iis ventriculi vellicatione proficiscitur, junctis clysmatibus carminativis, utramque curationis absolvunt paginam. Inter topica opem quoque pollicentur linimenta antispasmodica,

*Singultus ex inanitione curatio.*

*Roborantius.*



paregorica & anodyna, præcordiis ad-  
motâ, quæ habeant oleum macis,  
menthæ, absynthii, crocum, casto-  
reum, camphoram &c. nec minus ce-  
rata ac emplastra nervina, scrobicu-  
lo cordis adplicata, ac ipsæ denique  
partium affectarum per accomodata  
vincula constrictiones.

Cautelæ, cum cura specialiori.

§. I.

**Potus tepidioris usus.** **I**N singultu, qui ab acrimonia vel visciditate ventriculi suboritur, sæpius solo potu tepido, copiose sumto, votis potiri licet: hic enim involvit acrimoniam, diluit visciditatem, & causam stimulationis removet. Omnis vero frigidus potus malum exacerbat.

§. II.

**Singultus diarrhœas excipiens.** Pessimi successus est singultus diarrhœis, vel dysenteriiis intempestive cohibitis superveniens: quare ipsi cito succurrendum. Tutissimum & efficacissimum hoc in casu remedium præbent clysteres, ex emollientibus & leniter laxantibus, ipsa videlicet medulla cassiæ, vel extracto rhabarbari adjecto, & crebrius injiciendi: laxantia oretenus exhibere minus consultum est. Præstat potius biliosos acres humores contemperare, quod & magnesia, & alia absorbentia, & inprimis ferum lactis dulce, potui datum efficient; tumque jungere convenit interna anodyna, externaque paregorica.

§. III.

**Singultus febrium acutarum.** Febrium acutarum singultus, morbi primarii curatione, quæ equali diaphoreseos promotione absolvitur, etiam curatur. Tum maximopere cavendam, ne adhibeamus remedia salina, multo minus laxantia, pilulas aloeticas: aut regimen iusto calidius, vel potum calidissimum concedamus: uti enim frigus, ita & excessivus calor nervosis partibus, maxime si morbo affectæ sunt, est inimicus.

§. IV.

Pari ratione in singultu a viscerum inflammatione inducto, huic prospiciendum est; tusa, si recens fuerit inflammatio in corpore plethorico, protinus in pede vena; tumque datis interne discutientibus, aliisque, quæ sudorem movent, stagnantes succos resolvunt; quibus, urgente nimis dolore, blanda conjungere licet anodyna. Cum primis alvus injectis clysteribus, semper lubrica servanda; externe camphorata crocata, sacculique discutientes adplicanda, & prudenti prognosi famæ consulendum.

§. V.

Singultus cachecticis, & hepate affectis superveniens, curatur remediis bilem acrem corrigentibus, infusis resolventibus, hepaticis, attenuantibus, amaris & evacuantibus; hisque nondum satisfaciens, nihil est, quod vim thermarum, aquarumque mineralium superet; de quibus notabilem casum allegat BONETUS *med. Sept. Lib. V. Sect. V. obs. 6.*

§. VI.

Qui accedit hypochondriacis, & ut plurimum suppressis excretionibus sanguineis debetur: non cedit, nisi hoc primario profligato malo. Tum vero, si omnia fallunt, thermæ cum primis Carolinæ, conjuncto ad roborandas partes balneorum Tœplicesium usu, operæ facient pretium. Scorbuticis cura lactis asinini, acidulis Selteranis, iisque tepesactis nupti, egregium pollicetur auxilium: quod jam commendat PAULLINI *Onograph. Cur. Sect. IV. cap. 3. §. I.*

§. VII.

Sicostæ, fractæ, distortæ, luxatæque singultum produxerunt; luxationis repositio, fracturæ consolidatio, ex chirurgico petenda foro, unicum spondent auxilium. Cartilagini eniformi luxatæ, ac intus flexæ optime medebuntur, cucurbitæ cœcæ, scrobiculo cordis adplicatæ: quas cum primis laudat VITUS RIEDLINUS *lin. med. anno 1695. mens. August. observ. 4.*

§. VIII.

Singultus inflammationi accedentis curatio.

Singultus cachectici cura.

Hypochondriaci cura.

Singultus curatio, ab ossa. rum pectoris partium læsione.



## §. VIII.

**Anodynorum** in compescendo singultu cautum oportet esse usum: si multa materia peccat, hujus ante omnia studendum correctioni & eliminationi; præsertim si fuerit acris, caustica, virulenta. Hac enim nondum excussa, anodynis uti, nihil est, nisi oleum camino addere. Sicuti in omni morbo, ubi anodyna & sopiente virtute opus est, ita quam maxime in affectibus spasmodico convulsivis, cujuscunque generis sint, opiata rarissime sola, sed cum accommodatis evacuantibus sociata & tutissima & præstantissima sunt. Et hoc arcanum vehementem opii vim cicurandi re vera est antiquissimum. Testatur id celebre illud medicamentum Asclepiadis, quod recenset **GALENUS Lib. VIII. de compos. medicam. Cap. III.** & **AVICENNA Lib. IV. Fen. XIII. tr. 5. c. 19.** & constat ex costo, croco, spica, asaro, mastiche, aloe, & opio; atque ad ejus imitationem confectæ sunt pilulae **Rondeletii, Poterii, Plateri, Riverii, Wildegansii, Starckii Anglicanæ.** Nos in asthma & tussi convulsiva, singultu & aliis dolorificis & spasmodicis morbis, pilulas aloephanginas, vel etiam nostras polychrestas, cum dupla vel tertia parte massæ pilularum de styrace vel de cynoglossa miscere, & cum fructu insignissimo usurpare consuevimus.

## §. IX.

**Singultus** a leviori causa exortus sine medicamentis sæpius feliciter sistitur, quando videlicet sub motu thoracis magis voluntario ipsum diaphragma cogatur, adeo ut plus fibræ ejus motrices tendantur vel relaxentur. Illud fit fortiori inspiratione, per cursum, per saltum, per vehementem exquitationem; hoc vero per expirationem fortiolem, per vociferationem, & si thorax fascia, seu zona constringatur; quod simplex & extemporaneum sæpe est remedium. Eiusdem generis est sternutatio, quæ uti spontanea, docente id Hippocr. Sect. 17. aphor. 13.

singultum tollit, ita naturæ bene operantis minister, medicus, arte eam provocare debet. Et maxime, quando vel lenta & in flatu abiens materia ventriculi tunicis aut partibus proximis inhærescit, ad eam ipsam per vehementem expirationem, dum viscera abdominis & inprimis ventriculus vehementer conquatur, deiciendam; Minime vero sternutatio arte producta locum habet, ubi inflammatio vel subtilis caustica virulenta materia, altius nervosis partibus sese insinuaverit.

## §. X.

Præservandi sine rectus rerum non naturalium usus, præsertim aeris frigiditatis evitatio, ex omni parte votis respondet. Qui a longo morbo partes solidas debilitatas habent; se præcavebunt, balneorum martialium prudenti usu, nec non remediis martialibus, conjunctis liquidorum potatione, motuque corporis sufficiente, usurpandis.

Præservatio.

Enarrationes morborum.

## OBSERVATIO I.

**V**irgo annorum quindecim, integrociborum appetitu gaudens, & menstruorum fluxum nondum experta, variis autem molestiis illorum causa pressa, per tria anni semestria singultum patitur. Ille vero nocturno duntaxat invadit tempore, & primum vix omni hebdomade semel recurrit. At novissime singula nocte tanta vehementia infestat, ut in vicino conclavi dormientes singultuosam agitationem auribus percipere possint. Notatu etiam dignum est, quod si ipsa ab accidentibus ministris excitetur, & corpus ipsius in lecto loco moveatur, cesset singultus: neque enim per diem incidit, licet sæpius nimium indulserit epulis. Ceterum sana vivit; & quoniam graviora inde pertimescebat pericula, meum flagitavit consilium. Ego rebus probe pensatis, causam hujus peculiaris pathematis plethoram

Singultus chronicus nocturnus.

ex



ex mensium defectu judicans, primo omnium sanguinis per sectionem venæ in pede missionem administrandam duxi; deinde ad salutarem mensium fluxum procurandum laborem & motum corporis sufficientem & frequentem pediluviorum tepidiorum usum, & circa novilunii tempus pilulas nostras polychrestas, & alternative essentiam succini probe tartarifatam, præstantissimi ad hunc scopum obtinendum usus, semel de die assumendam commendavi. Quorum remediorum ope & auxilio etiam, ut audiui, factum est, ut virgo ab hoc malo liberata optime valuerit.

Epicrisis.

Singultus tale est vitium, quod plures & diversi generis agnoscit causas; & compluribus etiam morbis tam acutis, quam chronicis sese associat. Quapropter quando medicus recte & circumspecte vel de ejus eventu aut effectu, magis vel minus periculoso judicare, vel ad hunc morbum, qui nunquam fere non mali quidpiam post se relinquit, amoliendum accommodatam vult medicinam præbere; opus omnino est, ut in ejus causas paulo accuratius inquirat. In casu præsentis secundum Hippocratis sententiam a repletionem, per quam plethoram, sive potius nimium repleta, a copiosius congesto sanguine, diaphragmatis vasa intelligo, originem traxisse censui. Et hæc quoque fuit ratio, quare & venæsectionem, & menstrualeni, per accommodata medicamenta purgationem excitandam suasi; non sine subsequente egregio levamine.

Dignum præterea, quod observetur, in hoc casu est phænomenon, quod per somnum vehementioris hujus insultus facta fuerit accessio, & confestim per vigiliam cessaverit, cum alias singultuosæ & convulsivæ hæc passionem in somno & quiete conquiescere, per motum vero & vigiliam exacerbari consuescunt. Sed cum in convulsionibus

asthmaticis idem sæpius evenire videamus, non sine ratione colligimus, humorum & sanguinis stagnationem, quam somnus procurat, pro vera horum malorum causa habendam esse.

OBSERVATIO II.

Vir quinquagenarius, temperamentum cholericum, a multis annis arthritidi obnoxius, vino fartus aliquando autumnali tempestate peregrinationem instituit; atque domum reversus, præviis totius corporis horrore, ac lassitudine, adpetitusque prostratione, incidit in diarrhœam. Quæ cum multis imiventris torminibus stipata esset; accitus medicus præscripsit pulverem, qui corallia rubra præparata, cornu cervi usum, & laudani opiatum granum unum habebat. Remiserunt equidem intestinorum dolores; at presso pede sequebatur singultus molestissimus; & cum virium insigni jactura, perpetuisque vigiliis, per tres inhærebat dies; adeo, ut mox per dimidiam, mox totam horam, miserrime discrucietur ægrum, sumto vero infuso tepidiori per unum alterumque horæ quadrantem semper conquiesceret. Spernebat quoque cuncta, utut præstantissima remedia; tandem vero, dato, quod ex hordeo & cornu cervi compositum erat decocto, clysterem ex decocto raparum & oleo amygdalarum dulcium ano infundi; & præcordia cum abdomine, linimento spirituosum, ex aqua Anhaltina, theriaca, castoreo, croco, camphora, oleo nucistæ, balsamoque Peruviano confecto inungi, atque ligaturis constringi jussit; eo effectu, ut intra quinque dies æger convalesceret.

Singultus, ex cohibita per opium diarrhœa.

Epicrisis.

I) Discimus ex hoc casu, diarrhœas non solum a colluvie acris, pituitosæ, biliosæque, tunicas intestinorum vellicante suboriri posse: verum easdem non raro cohibitis transpirationi deberi: ubi conversus humorum, maxime sero.



feroform motus, ad intestina potissimum vergit; id quod in nostro casu horripilationes totius corporis præcedentes sufficienter evincunt.

2) Male igitur egit Medicus, quod hanc criticam veluti, & salutarem evacuationem dato protinus opiato remedio consopiverit. Inde enim vix aliter fieri potuit, quia materia acris ac vitiosa per metastasin ad alias nervosas partes, maxime septi transversi transferatur, ibidemque singultientes motus excitet; qui pertinaces, haud exiguum periculum, æqualem sanguinis circulum per partes male affectas impediendo, post se trahunt.

3) Itaque non aliæ sunt indicationes, quam ut primum alvus ad pristinas secessiones invitetur; deinceps liberior perspiratio restituatur, & denique motus convulsivi diaphragmatis compescantur. Priori scopo satisfacimus clysteribus, qui pure demulcentes & oleosi, minime vero salini esse debent, ne villos intestinorum nimis vellicent: alterum explevimus per decoctum tepidius, quo hausto æger sudavit egregie; & tertium obtinuimus illito præcordiis unguento nervino, & adplicatis subinde ligaturis; quas in hisce casibus veteres quoque insigniter collaudarunt.

### OBSERVATIO III.

Singultus lethalis febri ardenti superveniens.

Vir annorum quinquaginta, temperamenti sanguineo phlegmatici, obesus, per longum tempus insigni mœrore confectus, & per anni fere dimidium, nocturno inprimis tempore, magnam extremorum refrigerationem passus est. In hoc rerum statu aliquando, sine causa manifesta, insolita virium prostratione, languore, ciborumque fastidio prehendebatur: & quum insuper conatu vomendi detineretur, dedit ipsi medicus lene emeticum. Quo sumto, septies vomuit; & protinus tanta corporis debilitate, perpetuis vigiliis stipata, prehendebatur, ut lectum petere cogeretur, & quando erigere se

volebat, animi deliquium incideret. Nullo de calore conquerebatur; attamen magnum ardorem circa superius ventriculi orificium persentiscebatur, extrema frigebant, & sitis erat inexplebilis, & hæc ad septimum usque diem, veram febrem ardentem notantia, perdurabant: quo singultus vehementissimus accedebat, & per nycthemeron, paucis intervallis interruptus, inhærebat. Tandem præter omnem opinionem totius corporis convulsivi accedebant motus; hisque vix horæ quadrantem explentibus, frustra datis bezoardicis, confortantibus, & antispasmodicis, ex hac vita discedebat. Dissecto cadavere, totum hepar, cum quadam septi transversi, ac ventriculi parte, nigro colore tinctum, corruptum, & sphacelosum adparebat: in venis & arteriis parum cruoris reperiebatur, lien vero sanguine crasso turgens, & cor penitus erat corruptum.

### Epicrisis.

1) Singultum in hoc casu ab inflammatione hepatis, stomachi & diaphragmatis subortum fuisse, extra omne positum est dubium. Testatur enim hoc dictarum partium fideratio post mortem reperta; quæ semper præcurrentem habet inflammationem. Neque enim febris ardens aliam agnovit causam, quam partium internarum inflammationem; cujus symptomata fuerunt sitis inextinguibilis, & insignis interiorum, extremis frigescentibus, ardor.

2) Docemur ex hac observatione, neutiquam securum esse debere medicum; quando ægri absque causa evidenti de virium prostratione, appetitus jactura, agrypnia, pulsuque debili conqueruntur: hæc enim symptomata plerumque notabilem visceris aliqujus corruptionem, & vehementem indicant malignitatem. Quæ cum in nostro ægrotante præsto fuisse videatur: non dubium est, quin datum emeticum, ad



ad excitandam prorsus inflammatio-  
nem, & sequentem febrim ardentem  
per multum contribuërit.

OBSERVATIO IV.

<sup>Singul-</sup>  
<sup>eus</sup>  
<sup>chro-</sup>  
<sup>nicus.</sup> Vir quinque & sexaginta anno-  
rum, temperamenti phlegmatico me-  
lancholici, obesioris habitus, noctur-  
no tempore corpus sæpius frigori ex-  
ponens, cibis crudis, fumo induratis,  
potuque cerevisiæ frigido uti solitus,  
somno longius, motui corporis vero  
parum indulgens, ante aliquot annos  
singultu per quatuordecim dies duran-  
te, atque per acidulas Egranas remoto  
laboravit. Abhinc de continuo in re-  
gione lienis gravativo dolore conque-  
stus, tres ante menses iterum incidit  
singultum, primum continuum, ac-  
cum vomitu, alviq[ue] fluxu stipatum,  
dein intermittentem, & post usum  
clysterum, fontis Egrani calide hausti,  
anodynorum, maximeque laudani o-  
piati, & massæ pilularum de cynoglos-  
sa, nec non venæsectionis, intra duo-  
decim dies consopitum. Elapso octiduo  
rursus recrudit, itidem cum aliquali  
diarrhœa, & vomitu junctus: & ad-  
hibitis antispasmodicis mox conque-  
vit: remanente quadam inquietudine.  
Verum non ita multo post rediit: acce-  
dentibus præcordiorum anxietate, do-  
lore ischiadico, pulsu mox debili,  
mox forti, & inæquali, urina sedimen-  
tum mucosum, ex albo & rubro mix-  
tum deponente, suffocationibus car-  
dialgicis, atque tussi aliquali. Ordina-  
runt medici acidulas Egranas, cum  
sale Sedlicensi acuatas: elixiria stoma-  
chica, incidentia, resolventia, diluen-  
tia, pilulasque Becheri: nihilotamen  
minus malum eo usque contumaciter  
inhæret: & inde meum quoque con-  
siliu[m] desideratum est. Ego hoc  
malum ex ingenti ventriculi & in-  
testinorum atonia, & depravata al-  
imentorum digestionem, indeque fla-  
tuum prodeunte copia originem tra-  
xisse arbitratus sum: & hinc conjeci  
non adeo feliciter anodyna & opiata

ad delendum singultum fu[er]isse admini-  
strata: cum potius hæc remedia ato-  
niam augendo, malum exasperent: ne-  
que etiam adeo opportunum de acidulis  
bibendis fuit consilium. Ordinavi ita-  
que usum liquoris mei balsamici, vitæ  
dicti, cujus unam cum tribus liquoris  
anodynii partibus miscui, & exterius  
eodem abdomen inungendum curavi:  
quo ægrum insigniter levatum audi-  
vi.

Epicrisis.

In senioribus, & qui sexaginta jam  
annos transgressi sunt, eadem causæ,  
quæ alias in ætate juvenili vel virili  
formaliter sic dictum Hypochondria-  
cum morbum pariunt, qui spasmodum  
& distensionum vehementia hypo-  
chondria, & in iis sitas partes infestat,  
cum alvo strictiori, vim & robur ven-  
triculi & intestinorum magis destruen-  
do agunt, & harum partium atoniam  
efficiendo, ob congestionem vitiosorum  
humorum: flatibus, borborygmis,  
ructibus, alvi nimia laxitate molestias  
creant. Et ob has etiam causas singultus  
senili ætati familiaris est. Nam uti  
omnes convulsiones, ita etiam singul-  
tus vel ex nimia spastica strictura, quam  
Hippocrates inanitionem vocat, vel ex  
nimia atonia sive humorum præterna-  
turali congestionem & infarctu, quæ  
repletionis nomine venit, oritur: ex  
quo intelligitur, perperam convulsio-  
num species, si in senes incidunt,  
narcoticis, & opiatis tractari.

OBSERVATIO V.

Generosus vir triginta & aliquot <sup>Singul-</sup>  
annorum, macilentioris corporis & <sup>eus post</sup>  
sensibilioris animi, patre natus poda- <sup>sup-</sup>  
grico & hæmorrhoidario, ante sex jam <sup>pres-</sup>  
annos doloribus podagricis subinde ve- <sup>sam</sup>  
xatus, superiori æstate ex iracundiæ af- <sup>tertia-</sup>  
fectu & refrigeratione incidit in tertia- <sup>nam.</sup>  
nam cum vomitu & insigni æstu jun-  
ctam; & post quartam accessionem  
transmisso pulvere, qui ex cortice fra-  
xini



xini & chinæ concinnatus videbatur ; paulo largius per vices tamen sumto , febris ex toto fuit sublata . Sex elapsis diebus admissio sub venatione , cui nimium indulget , frigore ; consuetudine die & hora accessionem febrilem rursus habuit , sed sine siti , sine vomitu , sine singulari æstu , sed horripilatione præcedente , de anxietate & dolore gravativo & constrictorio præcordiorum , nausea , cum extremorum frigore & magna inquietudine conquerebatur . Intercurrebant crebri & molestissimi singultus ; alvus per aliquot dies nihil reddebat . Post quartum insultum a me petiit consilium , prostrato valde animo . Ego horum malorum causam , sentinam vitiosorum humorum in duodeno stabulantem iudicans , maxime quia nec ante , nec post sumtum pulverem antifebrilem & cessantem febrem purgatus fuit , clysteribus & infuso mannato rhabarbarino , extrinsecus cataplasmate emolliente & carminativo , præcordiis applicato & spasmos sedare , & alvum aperire necessarium duxi , non omissis balsamicis & stomachicis . Quam methodo feliciter cura expedita fuit .

#### Epicrisis.

Notabile in hoc casu illud fuit phænomenon , quod loco formalis febris tertianæ , spasmi tantummodo sine subsequente æstu circa præcordia , singultu admodum molesto stipati orti fuerunt ; a materia febrili pulvere ejusmodi terreo adstringente , quasi fixata & firmiter duodeni & ventriculi tunicis impacta . Erratum in eo maxime fuit , quod silente febre post sumtum pulverem , per epicrasin purgatio , quæ tum summe est necessaria , fuerit omissa . Nam spasmis febrilibus per ejusmodi artificia sublati , si non accommodata evacuantia , ad fomitem febris , qui tantummodo cicuratus fuit , foras ejiciendum offerantur , necesse est , ut si non redeat ipsa febris , alia per quam molestæ afflictiones inde se-

quantur . Quam observationem juniores practici commendatam sibi habere debent .

#### OBSERVATIO VI.

Vir quadraginta annorum melancholico-cholericæ complexionis , ad animi motus inordinatos valde proclivis , post vehementiorem iracundiam , frigidum assumpsit haustum , & extrinsecus quoque corpus nimium refrigeravit . Incidebat in tertianam continuam , quæ demum in hemitritæam desinebat ; accedebat septimo die singultus , sed lenioris gradus . Vires valde erant prostratæ , adeo , ut etiam animi quædam defectio subreperet , præsertim si erecta erat statura . Pulsus erat debilis & frequens , omnibus remediis & a me & ab alio medico , quem antea consulabat , frustra adhibitis , die decimo quarto obiit .

#### Epicrisis.

Singultum febribus biliosis tam acutis , quam intermittentibus non raro supervenire , haud novum in arte nostra est observatum : Sed hoc forsan non omnibus æque notum , ejusmodi singultuosas affectiones leniter & non sine magna concussionem corporis succedentes admodum periculosas esse . Sphaceli enim circa stomachum & diaphragma præsentiam jam subindicant , qui etiam post sectionem in oculos incurrit . Ita etiam multoties observavi , senibus ex passione cardialgica , vel colica , aut marasmo , decumbentibus , singultum demum accedentem certum mortis esse prænuntium

Singultus in hemitritæa lethalis.



C A P U T V.

D E

MORBIS OESOPHAGI ET  
PHARYNGIS SPAS-  
MODICIS.

THESES PATHOLOGICÆ.

§ I.

**R** Arrior equidem in libris medicorum mentio, de affectu, quem spasmus œsophagi dicimus, injicitur: at ille admodum frequens est, & non modo graviorum egritudinum symptoma, verum etiam principalem, & ut vocant idiopathicum constituit morbum, ut ipsi merito peculiaris debeatur animadversio. Definimus vero illum, quod sit invita ac præternaturalis, vel ipsius cibalis fistulæ, quam Græci οἰσσοφύγιον, nos gulam adpellamus, vel illius principii, pharyngis nomine denotati, vel denique utriusque, & hinc totius œsophagi, late sumti, constrictio, aut rigida distentio a mucō irritante plerumque proficiens.

§ II.

**H**inc mox adparet horum spasmodorum differentia. Quemadmodum enim totus œsophagus ab anatomicis in principium, seu pharyngem, & reliquum canalem dispecitur: ita, consulta experientia deprehendimus, illius spasmus ratione loci diversum esse, & mox pharyngem solum, mox reliquam ac inferiorem gulam obsidere. Quibus tertia species accedit, qua totus ille canalis, una cum principio, ac reliquis vicinis partibus, gravi laborat distentione.

§ III.

**O**mnes œsophagi spasmi, quacunque in regione contingant, hæc & inter se, & cum reliquis partium superiorum distentionibus, communia habent signa. Præsto sunt extremorum, ma-

xime pedum refrigerationes; exter-norum artuum tremores, ac rigores: alvinæ excretionis suppressiones: flatuum ad superiora regurgitationes: imi ventris stricturæ, dolores, murmura: præcordiorum angustia, vomendi conatus, cardialgia, urinæ tenues, aquosæ, pallidæ: pulsus duri ac magni &c.

§ IV.

**S**peciatim vero pharyngis solius spasmi hæc se produnt notis. Deglutitio fit difficilis, dolore stipata, aut plane nulla, & nec solida, nec fluida transmittens: partium pharyngi cohærentium, linguæ, laryngis, atque totius colli rigida constrictio, impeditus motus, ac dolor urgent; vexat suffocativa molestia, ac sensatio palii faucibus infixi, ac si quicquam inde vellet proserpere: vox perit: & hæc omnia sæpenumero per intervalla adfligunt, nec raro in universi generis nervosi convulsiones terminantur.

§ V.

**S**pasmodorum gulæ inferioris signa propria hæc sunt: Alimentorum libere deglutitorum, quædam veluti subsistentia percipitur in ipso gulæ tubo, maxime circa superius ventriculi orificium præsertim potibus frigidis obex quasi in iisdem regionibus videtur positus, majorque insequi observatur eorum haustum constrictio: calidi vero potus sæpenumero absque ullo impedimento canalem illum pervadere, & ventriculum ingredi percipiuntur. Dolor sentitur in spina dorsī inter scapulas: jungitur non raro anxius vomendi conatus mox inanis, mox cum ipso vomitu stipatus: nec infrequens est nausea, ac ructuum molesta explosio: & denique sæpissime muci limpidi per os contingit rejectio, ab ipsa vomitione penitus distinguenda. Quæ symptomata, si cum iis, quæ priori periodo recensuimus, concurrant, totum œsophagi canalem spasmo contractum esse testantur.

§ VI.



## §. VI.

**Diffe-** Quum vero hi affectus, cum aliis œsophagi morbis, ob similitudinem  
**rentia** symptomatum facile confundi possint;  
**spasmi** explicanda erit illorum differentia.  
**pharyngis** Primum quidem, spasmi pharyngis ab  
**ab ejus** ejus atonia & paralyfi sunt distinguen-  
**atonia.** di. Namque in dicta atonia, deglutien-  
di perpetua vexat difficultas, ita tamen,  
ut solida liberius deglutiantur, quam  
fluida: conf: FORESTUS *Lib. XV. ob-*  
*serv. XXX. Schol.* hæc enim sæpius in  
asperam delabuntur arteriam, & per  
os ac nares, summo cum suffocatio-  
nis metu regurgitant. In perfecta  
paralyfi, qualem TULPIUS *Lib. I.*  
*cap. 44.* allegat, omnis deglutitio abo-  
letur, ut ægri fame perire debeant;  
simulque faciei pallor, & partium vi-  
cinarum magna mollities, ac flaccidi-  
tas præsto sunt. Contra vero sub spas-  
mo pharyngis, æqualis & fluida & soli-  
da deglutiendi est difficultas, quæ per  
intervalla remittit; vasorum faciei  
conspicitur intumescencia, vultus ru-  
bor, partiumque affectarum rigor,  
sæpius dolor sentitur.

## §. VII.

**2) a fau-** Facilius pharyngis spasmus discerni-  
**cium** tur ab ejus & faucium inflammatione  
**inflam-** sub angina; ubi fauces internæ tument,  
**matio-** rubent, ardore peracuto uruntur, sitis  
**ne.** est insignior, & gravis plerumque jun-  
gitur febris. Non minus medico impo-  
**3) a fru-** nere valet tumor, excrescentia, aut  
**sto aut** frustum quoddam pharyngi inhærens,  
**tumore** aut laryngis præternaturale vitium, ut  
**pha-** prognatum inde deglutitionis impedi-  
**ryngi** mentum spasmo tribuat: videas FO-  
**in hæ-** RESTUM *Lib. XV. observ. 28.* Hoc in  
**rente.** casu candela cerea faucibus intrusa, aut  
instrumentum ab HILDANO *Cent. I.*  
*observ. 36.* depictum, haud raro rem  
manifestabit: & præterea in spasmo  
pharyngis cuncta signa, collectim sum-  
ta certitudinem parient.

## §. VIII.

**Diffe-** Præterea spasmi etiam gulæ inferio-  
**rentia** ris conveniunt cum aliis ejusdem affe-  
**spasmi** ctionibus, & subsistentiam ciborum,  
**gulæ** cum his commune habent symptoma.

Tales sunt obstructio gulæ a frusto cibi in fere  
solidioris ipsi impacto; Vid. CON-  
SULT. MED. *Tom. I. Sect. II. cas. 63.* &  
FORESTUS *Lib. XV. observ. 28.* dein  
tumores, excrescentiæ, fundi, ver-  
rucæ in canale œsophagi suborientes;  
conf. A.N.C. *dec. I. anno 4. observ. 47.*  
*decur. 2. anno 8. observ. 96.* non minus  
glandulæ dorsales circa quintam dorsi  
vertebram œsophago adnatæ, in præ-  
ternaturalem dolorem elevatae; quem-  
admodum VERHAYEN *anatom. cap.*  
*X. de œsophago,* & HEISTERUS  
*compend. anatom. pag. 184.* adnotarunt.  
Hisce in casibus subsistunt equidem so-  
lidiores cibi, & remonentur; potulen-  
ta vero & calida & frigida plus minus  
libero gaudent transitu. Verum, si sub-  
sit spasmodica constrictio, notabile est,  
quod liberior sit fluidorum descensus,  
frigidorum difficilior; dolor est in sca-  
pulis; & alia concurrunt signa, ab ob-  
turatione œsophagi per quamcunque  
rem præter naturalem facta, utique  
aliena.

## §. IX.

Quo vero causæ & ratio mechanica  
horum symptomatum adpareant: non  
alienum erit, fabricam œsophagi pau-  
cis perstringere. Ab ultimis nimirum  
faucibus incipiens canalis, quem œso-  
phagum adpellant, latius & amplius in  
suo principio fortitur cavum, quod  
græcis pharynx, latinis infundibulum  
audit, & antrorsum linguae radici, os-  
si hyoidi, laryngique, retrorsum colli  
vertebris arctissime connectitur. Mo-  
vetur variis musculis & dilatatoribus,  
qui elevant, dilatantque pharyn-  
gem, & constrictoribus, qui eun-  
dem claudunt. Horum unum reve-  
ra par existit, quod tribus origini-  
bus ab osse hyoide, cartilagine cricoi-  
de, & thyroide exortum, pharyngem  
circum circa amplectitur, & œsopha-  
gei, vel sphincteris gulæ nomine venit.  
Illorum tria potissimum sunt paria, pri-  
mum cephalo-pharyngæum, quod ab  
infima occipitis parte, & prima colli  
vertebra ortum, recta via in tunicas  
laryngis expanditur; alterum sphæno-  
pha-



pharyngæum, quod a processibus ossis sphænoidei alaribus in latera pharyngis abit, & tertium stylo pharyngæum, quod ab apophysi ossium temporalium styliformi, lateribus pharyngis inferitur.

§. X.

Fabrica  
gulæ in-  
ferioris.

Finito pharynge, incipit canalis, inter asperam arteriam, & colli dorſique vertebra primam recto, circa quintam dorſi vertebram dextrorsum, & circa nonam laevorsum flexo itinere; atque per medium thoracem, & musculosam septi transversæ partem progressus, e regione undecimæ thoracis vertebræ, cum orificio ventriculi superiori unitur. Ipse tubus ex quatuor constituitur tunicis: extima membranacea, tenuis, vasculosa, atque cellulosa pleuræ suos debet natales, gulamque vicinis partibus adnectit. Altera carnea sive musculosa, fibris orbicularibus vel annularibus, hisque super longitudinalibus prædita: tertia nervea, ori, faucibusque communis, ac intra ipsum ventriculum, ad trium digitorum spatium extensa, glandulis spissæ obsita, ad quas averſa parte vasa quædam tendunt, ex quibus accipiunt liquorem, saliva pinguiorem, in gulæ cavum stillantem. Quarta denique ac intima, lubrica mucagine obducta, villosa, ac multis emissariis undique cribri instar perforata est. Præterea cibalis hæc fistula innumeras sortitur glandulas, partim illas, quæ bombycum ovis longe minores, nerveam tunicam obſident; facile conspiciendæ, si nervea tunica divulsa, carnea luci opponatur, vel gula in aqua maceretur; partim alias extra tubum positas; e quibus notari merentur dorsales, circa quintam dorſi vertebram gulæ adherentes, & thyroidea, inter cartilagineſ thyro-cricoideam, atque œsophagum sita. Conf. VERCELLONI *dissert. de glandulis conglomeras œsophagi*. Neque vasis destitutus est hic canalis: arteriosa enim superius ab internis carotidibus, media parte ab aorta & intercostalibus, inferius a gastricis

accipit; venas superiori parte a jugularibus, media a ramo sine pari, & interna a coronariis ventriculi mutuatur; nervosa denique a pari vago adipiscitur.

§. XI.

Pharyngis functio est deglutitio: cuius hæc est mechanica. Dum dorſum linguæ ope musculorum myloglossorum, stylo glossorum, & stylo hyoideorum ad palatum adplicatur: radix linguæ, os hyoides, ac larynx musculis huic actioni servientibus antrosum premuntur: pharynx vero posterius a constrictis cephalo-pharyngæis elevatur, antè a stylo, & sphæno-pharyngæis dilatatur. His harum partium actionibus, ante membranas, colli vertebraſ & pharyngem cingentes, sub velo palatino, uvula, tonsillisque, & supra laryngem, atque pharyngem, amplius redditur spatium, majusque cavum: tum vero deglutienda, dorſo linguæ imposita, inter eam, & palati fornicem premuntur: & sic pressa, supra laryngis rimam, operculo cartilagineo seu epiglottide clausam, veluti per subjectum pontem, in cavum illud faucium propelluntur. Tunc actio antagonistarum excipit: namque hætenus elevata, antrorsumque compressa lingua, larynx, os ypsi loides pristina restituantur figuræ: laryngis maxime cartilagineſ explicatæ ad pharyngem premunt, hacque actione deglutienda, in cavo hærentia ulterius pellunt: quæ laxatis simul pharyngis dilatatoribus, constrictoque œsophago magis protruduntur, & sic constricto rursus pharynge, sub hoc in cavo gulæ hærent.

§. XII.

Tum excipit actio fistulæ cibalis; quæ hæc per motum peristalticum, vi tunicæ musculosæ ipsi proprium, & a parte superiori deorsum naturaliter tendentem, assumpta jam deglutita, & sub pharyngis sphinctere hærentia, ad ipsum perducit ventriculum. Namque dum hæc tunica & dilatatione & constrictione alternante, illa vi fibrarum longitudinalium, hac annularium

Fun-  
ctio  
pha-  
ryn-  
gis.

Fun-  
ctio  
gulæ  
inferioris.



peracta, œsophagum mox coarctat, mox dilatat; accedente hujus in hominibus perpendiculari situ, sensim deorsum premuntur, quæcunque assumpta. Descensus hic facilius redditur, rore glandularum, assidue in gulam stillante, eamque lubricante; nec non ciborum resolutionem adjuvante. Protrusus ergo hac ratione ad cavum ventriculi alimentis, caro musculi inferioris diaphragmatis, gulam ibi transeuntem stringens, hac parte stomachum claudit.

## §. XIII.

Ratio  
forma-  
lisQuasmi  
pha-  
ryngis,  
ejusque  
sym-  
ptoma-  
tum.

His præmissis facillimum jam erit naturam ac formalem rationem spasmodicorum œsophagi introspicere. Si pharyngem primum consideremus; mox patet ex ante dicta deglutitionis fabrica, quod ejus musculis constrictis, ea fieri vix possit; quoniam læso organo, ipse actus læditur. Dum porro musculi dilatatores, qui posteriorem potissimum infundibuli regionem occupant, præternaturaliter convelluntur, & antrosum magis in conglobatam figuram trahuntur: resultat sensus infixi faucibus pali. Quando vero musculus œsophageus, una cum cohærentibus laryngis, linguæ & ossis hyoidei musculis constringitur; loquendi fit difficultas, & suffocatoria molestia. Quum vero omnium spasmodicorum indoles sit, ut mox gravius, mox mitius infestent; patet etiam, cur spasmi pharyngis per intervalla exacerbentur.

## §. XIV

Spasmi  
gulæ  
inferio-  
ris, e-  
jusque  
sym-  
ptoma-  
tum  
ratio.

Pari modo, quum spasmus gulæ inferioris, in tunica, quæ ipsam ambit, musculosæ, ejusque fibrarum orbicularium æque ac longitudinalium strictura violenta ponimus; inde omnium, quæ ipsam comitantur, symptomatum rationem reddere poterimus. Dum enim in loco quodam vel pharyngi, vel ventriculo propiori, constrictio obtinet; omnino, deglutita alimenta subsistunt in eo canale; eundemque aggravando, inverso motu peristaltico revomuntur. Si frigidus assumitur potus, mo-

re frigore solemni, spasmus exacerbatur: & aque ut solida, ut ulteriori descensu præpeditur: contra vero tepidiora potulenta, demulcendo fibras spasmo strictas, libero in ventriculum gaudent itinere. Porro œsophagus variis ligamentis, colli dorsique vertebris connectitur; hinc illo constricto, dolor ad membranas dorsi vertebrae cingentes propagetur, necesse est. Inde liquet ratio doloris, qui inter scapulas in nostro affectu sentitur: de quo FORESTUS Lib. XV. observ. XXXI. Schol. dicit: *Omnis œsophagi dolor in spinam dorsi incumbit, in quam gula quoque reclinat & adhærescit.*

## §. XV.

Quæcunque causæ vel pharyngis musculos, vel tunicam œsophagi carneam vellicare ac stimulare valent: illæ horum spasmodicorum mediatae dicuntur. Quemadmodum vero illæ causæ, vel immediate in eas, quæ sedem morbi constituunt, partes: vel in alias remotiores agunt, a quibus illæ per consensum afficiuntur: ita spasmi illi sunt vel idiopathici, vel symptomatologici. Quod si igitur ex larynge primario convulso, ex ventriculo, ex intestinis, aliisque partibus, spasmus ad pharyngem, adque gulæ canalē defertur: audit ille symptomatologicus.

## §. XVI.

Ex causis itaque, spasmos œsophagi idiopathicos inducentibus, præcipuum locum sibi vendicant animi pathemata: inque primis gravis excaecescencia, maxime si paullo post largior potus frigidus adsumatur. Inde convelli pharyngem, & hinc lædi deglutitionem: observatione quadam inferius comprobabimus. Ex eadem vero, præsertim inter pastum, gulam quoque inferiorem constringi, atque deglutitum bolum in ea obhærescere, nec non vomitu sæpius reddi, quotidiana innotescit experientia.

## §. XVII.

Peculiarem in ciendis gulæ, maxime inferioris distentionibus potentiam obtinet fastidium: adeo, ut hoc absque dicto

Diffe-  
rentiæ  
spas-  
modicorum  
œso-  
phagi  
in idio-  
pathi-  
cum, &  
sym-  
ptoma-  
ticum.Causæ  
spas-  
modicorum  
œso-  
phagi  
sunt  
1) ani-  
mi af-  
fectus.2) Spe-  
ciatum  
fasti-  
dium.



dicto œsophagi spasmō contingere ne-  
tquam possit. Quod si enim hujus ef-  
fectus, attentiori animo consideremus;  
docebit observatio, sub ea 1) menti i-  
deam rei alicujus ingratae suboriri, 2)  
ejusque averfationem; 3) hanc in-  
sequi vel deglutitionis impedimentum.  
4) Vel assumtorum in œsophago sub-  
sistentiam, & stricture sensationem.  
5) Deinde jungi nauseam. 6) Haud  
raro accedere vomitum, & 7) ip-  
sam animi defectionem. Si ergo  
fastidium definirem; dicerem, quod  
sit adversa rei cujusdam ingrata idea,  
cum spasmō œsophagi, & ventriculi  
conjuncta.

§. XVIII.

Ima-  
ginatio  
fortior.

Ad pertinaces œsophagi spasmos,  
cum insigni averfatione stipatos, sola  
scœpius imaginatio disponere solet. No-  
tabilis hinc est observatio, quæ in A.  
N.C. centur. VII. observ. 61. pag. 125. le-  
gitur, quod mulier quædam per omnia  
sana, atque robusta, nec hysterica,  
nec spasmodicis afflictionibus obnoxia,  
omnis quidem generis & esculenta, &  
potulenta, absque ulla difficultate as-  
sumere valuerit; simulac vero hostiam  
capere vellet, non solum ab ea insigni-  
ter abhorruerit, verum etiam, licet  
summa vi intrusa ac deglutita fuerit,  
eandem tamen in ventriculum non per-  
tingentem, sed in gula persistentem vo-  
mitu reddiderit. Nec dissimilis casus  
existat in iisdem A.N.C. dec. III. anno I.  
observ. 79. de viro, qui ex nimio Tabaci  
usu, deglutitionis ac descensus cibo-  
rum illud incurrit impedimentum,  
quod pro ratione imaginationis mox  
fuit levius, mox gravius.

§. XIX.

Assu-  
ma acria.

Eundem affectum prognerare valent  
medicamina, ac assumta, acria, plane-  
que venenosa; quæ vellicando eas ner-  
vosas ac musculosas partes, earundem  
stricturas inducunt. Sic HOECHSTE-  
DERUS mentionem facit adstrictio-  
nis gulæ ex potu vini Malvatici, in  
quo radix consolidæ majoris infusa fuit  
obs. dec. III. Eo magis hoc contingit, si  
assumta caustica fuerint, ut adeo non

Hoff. Syst. Tom. V.

mirum sit, quod juxta FORESTUM  
Lib. XV. obs. 30. puer quidam ex aquæ  
fortis hauitu, insignem pharyngis oc-  
clusionem, cum ipso suffocationis me-  
tu inciderit. Præsertim mercurius su-  
blimatus ejus est indolis, ut gravi fau-  
cium constrictione, sui assumptionem  
prodat; vid. FORESTUS loc. cit. pag.  
150. Vellicando quoque gulæ inferioris  
spasmodum excitant insecta deglutita: id  
quod adfirmant, de sanguifugis cum  
potu assumtis RHASES Lib. 9. ad Al-  
manz. cap. 56. & RHODIUS obs. cent.  
2. observ. 72. de lacertis fauces irrepen-  
tibus GESNERUS Lib. 2. de histor. a-  
nim. C. de lacerta. de pediculis devoratis  
HEURNIUS de morb. cap. 7. de an-  
guilla viva deglutita PLATERUS lib.  
2. obs. &c.

§. XX.

Præterea spasmus & pharyngis, &  
gulæ inferioris produci potest, a cruore  
vitali in iis partibus stagnante, vasa-  
que distendente; quarum distentio-  
num, fidissimus comes est spasmus.  
Tali ratione huic morbo obnoxii non  
raro sunt hypochondriaci; in quibus vi  
spasmodum ac flatulentiarum intestina-  
lium, cruor vitalis ad superiora com-  
pellitur, facileque stagnat in œsopha-  
go. Cum primis ex universali humo-  
rum, maxime serosorum dyscrasia id  
vitii contingere potest; si nimirum li-  
quor ille lymphaticus, quem tot glan-  
dulæ in gulam secernunt, fuerit visci-  
dus, & acris: quo in casu multum mu-  
ci visci excreatur, cum mali levami-  
ne. Quorsum pertinere videtur exem-  
plum a WEPFERO observ. medic. pract.  
obs. 117. pag. 531. recensitum, quod vi-  
ro cuidam septuagenario, assumpta in  
media quasi perstiterint gula, & eous-  
que adfluxerint, donec vomitu fuerint  
reddita.

Humor  
vitalis  
vitiatus.

§. XXI.

Vi consensus, quem gula cum ven-  
triculo, & intestinis fovet, ex horum  
vitio, gulæ spasmus suboriri potest.  
Sic ex saburra acris, acida, biliosa ventri-  
culi & intestinorum, id mali facile gene-  
ratur, uti de lacte in ventriculo concre-

Spas-  
mus œs-  
ophagi  
ex  
vitio  
primæ  
viæ  
rum.



te testatur FORESTUS *Lib. XVIII. observ. 13.* Vermes in ventriculo, vel intestinis hospitantes, ad eundem affectum contribuere, auctores sunt HERCULES SAXONIA *præl. pract. Part. II. ca. 7. §. 4.* & HENRICUS ab HEER *obs. 16.* & THONERUS *Lib. 2. obs. p. 94.* In ipsa ructuum explosione, atque vomitu concurrit spasmus œsophagi: nisi enim hic sua actione, & peristalsi inversa, ejectionem humorum ex ventriculo secundaret; fieri nulla ratione posset, ut tanta cum celeritate & impetu per superiora ingens sæpe humorum copia ex ventriculo, imo intestinis exturbaretur.

## §. XXII.

Spasmus œsophagi symptomaticus. Per consensum quoque variis nervosi generis spasmodicis ac convulsivis affectibus jungi observatur spasmus œsophagi. In suffocatione hysterica semper summa colli ac faucium coarctatio, & constrictionis quidam sensus non secus, ac si laqueo injecto fauces præcluderentur, percipi docet experientia. Vid. ETTMULLERUS *Oper. pract. P. II. Sect. III. cap. III. pag. 963.* & HELMONTIUS *tract. de asthmate & tussi §. 31.* Gulæ porro constrictionem viris colica convulsiva, Colique vocant, laborantibus evenire, non rarum est; & notari meretur singularis casus, quem de colica gravem cephalalgiam ac maniam cum coecitate, & impedita deglutitione inducente refert HOEFERUS *in Hercule medic. pag. 185.* Non minus ipsæ epilepticæ ac convulsivæ accessiones hoc secum vehunt symptoma, ut vel difficillima, vel nulla plane soleat esse deglutitio: quemadmodum præsertim in incubo observare licet, ubi præter strangulationis sensum, linguæ impotentia & deglutitionis impedimentum adsunt. Idem vitium opisthotono familiare est; quemadmodum ex casibus de his morbis a FORESTO *Lib. X. observ. 112. & 113.* recensitis liquet. Nec denique omittendi sunt morbi acuti, præsertim febres malignæ; quibus non modo deglutiendi difficultas, verum

etiam gulæ inferioris constrictio jungi solet.

## §. XXIII.

Paucis adhuc meminisse juvat nauseæ, quæ nihil aliud est, quam convulsio œsophagi levior, cum inverso ejus motu peristaltico, & hinc pendente vomituritione, quin vomitu, aut saltem lymphæ plus minus viscidæ ex gulæ glandulis rejectione sæpius stipata. Pro causâ occasionali agnoscit omnino id, quod vel ipsum œsophagum, vel tunicam ipsius nerveam, in ventriculum prolongatam ibidem vellicare potest; ex quo hæc constrictio per consensum ad gulam propagatur. Deprehendimus generatim 1) nauseam plerumque nunciam esse insequentis vomitus, 2) omnem vomendi conatum, ac cardialgiam comitari, 3) absque iis cum frequenti muci limpidi, qui nihil nisi lymphalis ros ex œsophagi glandulis vi spasmorum expressus est, rejectione sæpius occurrere; & non raro vermium in primis viis hospitantium præsentiam indicare. 4) Plerumque alias ventriculi cruditates consequi; quæ cum jejuno ventriculo sint acriores, tunc potissimum nauseam movent, sumto cibo deliniendam. 5) Antecedere graviores capitis affectus, vertigines, apoplexias, animi deliquia, maxime si per consensum ex ventriculi orificio ortum trahunt: ubi quædam veluti aura ex stomacho ad caput adspirare videtur; tumque attoniti concidunt, sensuumque privantur exercitiis. 6) Ex eodem fundamento nausea sollicitat, hypochondriacis, aliisque morbis, quorum fomes in primis officinis existit, laborantes. 7) denique in principio malignarum febrium accedere plerumque solet nausea.

## §. XXIV.

Quod prognosin attinet, haud infrequenter habendi sunt spasmi pharyngis idiopathici; quoniam, accedente præsertim mala medicatione, in contumacem degenerant habitum. Qui ab asumptis acrioribus proveniunt, periculo non

Nauseæ natura.

Prognosis spasmodicorum œsophagi.



non vacant, metumque faciunt inflammationis: & qui hystericas sæpius invadunt, præfagiunt apoplexiam. In vulneribus, si ex convulsione accidat læsa deglutitio, malum, teste ETTMULLERO *Oper. præct. Par. I. pag. 57.* Notabilis quoque est HIPPOCRATIS aphorismus, dum *aph. 35. Sect. IV. Si febre, inquit, detento repente collum intorquetur, ut vix deglutire queat, nullo existente tumore lethale est.* Spasmi gulæ inferioris, ex iracundia inter epulas provocati, viam cholerae, febribusque biliosis facile sternunt; & qui, universali humorum dyscrasia, nervosque generis debilitate nituntur, chronicum malum constituunt, cum insequente corporis tabe. Nausea in malignis sub initio accedens, robur naturæ indicat: in peste vero maxime perniciofa existit, teste FORESTO *Lib. XVIII. observ. 14. Schol.*

## CURATIO.

### §. I.

Indica-  
tiones  
curato-  
riæ.

**Q**UUM spasmi œsophagi, sive in pharynge, sive in media gula obhærescant, neglecta temporis opportunitate, non modo in chronicum statum transeant, verum etiam denegata alimenta capiendi facultate, facile tabem post se trahere possint: digni omnino sunt, qui tempestive congruis adminiculis oppugnentur. Hæc vero ex binis potissimum fontibus desumuntur, quorum alter remedia spasmi sedantia, alter vero talia, quæ causas eo contribuentes remove possint, præbeat.

### §. II.

Exter-  
norum  
usus.

Prior finis obtinetur per antispasmodica, & anodyna, discutientibus nupta, tam interna, quam externa. Quo autem gravior est constrictio, eo consultius est ab externis curam ordiri: quoniam interna sine maxima difficultate, vix deglutiri possunt. Ex iis quedam sunt, quæ adfluxum humorum ad inferiora derivando, & circulum san-

guinis æqualem reddendo, spasmi vim frangunt: quorum pertinent clysteres ac pediluvia. Illi ex emollientibus, additis roborantibus parari, & bis terve iterari, hæc tepidiora, immixtis paullo profundius pedibus, adhiberi debent. Quæ autem localia ad ipsam affectam partem applicari possunt, sunt fere linimenta paregorica, simulque nervina: quæ parari possunt ex aqua Anhaltina, spiritu salis ammoniaci, Essentia croci, nucistæ, castoreo & camphora, balsamum quoque vitæ, idque, vigente morbi impetu, liquore anodyno minerali permixtum est quod egregium. Quod etiam, paucis guttis saccharo exceptum, & in ore detentum, aut lente deglutitum operæ faciet pretium: quo etiam sine the-riaca aliquot granis sub lingua detenta, tumque rursus reddita, laudem meretur. Nec denique in relaxando spasmo destituitur fructu vesica bovina, decocto emolliente calido plena, & affectis locis admo-  
ta.

### §. III.

Ex internis antispasmodicis laude digna sunt olea amygdalarum dulcium, olivarum, cum spermate ceti remixta; pulveres antispasmodici, ex cinnabari, pulvere Marchionis, succino præparato, extracto croci & castorei parati; vel qui habent nitrum, & unum alterumque camphoræ granum; nec non liquor meus anodynus vel solus, vel cum essentia castorei, spiritu bezoardico Buffii, aut cornu cervi succinato remixtus, aut spiritus nitri dulcis, cum paucis guttulis olei chamemeli veri, vel macis maritatus. Quibus in statu magis chronico cum fructu alternis circiter diebus interponuntur pilulæ antispasmodicæ, quas ex extractis millefolii, chamomillæ, hyperici, mithridatio, extracto croci, castorei, oleoque destillato macis vel menthæ parare soleo.

Interna  
antispas-  
modica.

### §. IV.

Sopitis paullulum spasmi, causis Curatio  
materialibus obviam iturus, circum-



Si ab  
assum-  
tit ve-  
nena-  
tis or-  
ti.

spiciat, quænam earum in culpa sint. Quod si enim assumpta acria, venena, purgantia ac emetica drastringa malum produxerint: in principio statim eorum vis obtundenda mucilaginosi, oleosi, ipsisque lacticiniis: quare profunt iuscula valde pingua, aquæ tepidioris haustus ad nauseam continuatus, ut suborto leni vomitu, venenum rursus expellatur. Interdum acida vim veneni castrant; quibus gulæ constrictionem, a sumto vino Malvatico cum consolidâ costâ subortam curasse se perhibet HOECHSTETTERUS *loco supra citato*: eandemque a potu aquæ fortis natam, mucilagine cotoneorum feliciter sanavit FORESTUS *loc. cit.*

## §. V.

Spasmi  
gulæ  
ab ira  
inter  
pastum  
curatio.

Quando vehementior excandescencia inter ipsum pastum, gulæ spasmus infert; bilis plerumque effusio in ventriculum simul contingit. Quo in casu præter motuum sedationem, bilis contemperanda est, ne corrosivam ac virulentam acquirat indolem, tumque blandis emeticis, vel cholagogis exturbanda. Temperant vero bilem absorbentia, ac mucilaginosa, ut decoctum avenæ vel hordei: eliminant optime mannata, rhabarbarinis nupta, vel per vomitum, eadem cum uno alteroque tartari emetici grano acuata, aut radix Ipecacuanhæ. Sed cavendum, ne mox ab ira sumatur purgans, aut emeticum.

## §. VI.

Spasmi  
gulæ ab  
universali  
fati san-  
guinis  
dyscrasia  
nati  
sanatio.

Quod si vel totius humorum massæ dyscrasia, vel maxime primarum viarum colluvies acris ac viscida, diuturniori gulæ spasmo viam straverit: earum impuritatem & correctioni & evacuationi, illi quidem per incidentia, resolventia, digestiva, absorbentia, huic per mannata, rhabarbarina, pilulasque balsamicas peragenda, omnis opera navanda est. Quum autem valde pertinax ac rebelles huic curationi sæpius sit malum; non præstantius aquis medicatis erit medicamen: quas inter Sedlicenses aquæ per quatuor circiter dies potæ, & his subjunctæ Egræ ma-

ximam merentur laudem. Non minus in hypochondriacis, ubi simul sanguineæ excretiones, per uterum, vel hæmorrhoides sunt cohibitæ, præter venæsectiones motum corporis &c. thermæ Carolinæ decenter usurpatæ omnem curandi paginam absolvunt.

## §. VII.

Nausea, quæ ab acris, acidis, viscidis primarum viarum sordibus, originem ducit, eandem, quam brevi ante recensuimus, exigit curationem. Egregiam præsertim utilitatem præstant infusa ex herbis & radicibus, resolventibus, aromaticis, & evacuantibus parata vinosa. In nausea cum oris amaritie stipata, commendat GABELCHOVERUS *Cent. I. cur. 14.* radicem armoraciæ cum vino Rhenano infusam, & omni mane haustam. Si ab assumto foetido, sordidoque cibo nausea cum fastidio surrexerit; aut vomitum ciere juvat, aut cortices citri vel aurantiorum masticare, vel vino generoso uti. Quando inter grassantes febres malignas, quidam citra manifestam causam, nausea corripiatur: tum statim lene vomitorium, ex radicis Ipecacuanhæ granis quindécim propinare convenit: quo sæpius fit, ut exturbato contagio, aut ipsa febris prævertatur, aut saltem in suo decursu redatur mitior atque benignior.

## §. VIII.

Curatio spasmorum œsophagi chronicorum, qui ex nervosi generis debilitate nituntur, ac crebro recurrunt, magis diætetici, ac alimentis, quam pharmacis potentioribus absolvetur. Seligenda scilicet pro potu ordinario sunt decocta, ex scorzonera, cichoreo ac cinamomo parata; vitanda cerevisia omnis; parce bibendum vinum generosum. Victus esse debet facilis, parcus; largior contra exercitatio corporis. Roborando ventriculo inservient Elixiria balsamica, absque spirituoso parata menstruo: sanguinis abundantia, stasis ejus missionibus immi-

Cura  
spas-  
morum  
œsophagi  
chronicorum.



nuenda , & sordium inprimis officinis generatio , blandis laxantibus præpediendi . Cumprimis animi affectus , nutrices spasmodorum , omni studio fugiendi ; & denique fontes Carolini , subjunctis balneis Teplicensibus in usum vocandi .

Cautelæ , practicæ .

§. I.

Cautela circa pediluvia .

**Q**ui in spasmodis œsophagi sopiendis , ad detrahendum a superioribus humorum affluxum , pediluviiis uti velit ; videat , an pedes nimis sint frigidi : tum enim pediluvia ad tempus differre juvabit , atque pedes primum frictionibus , ac subpositis illis lagenis , aqua calida plenis probe fomentare . Quod etiam de venæsectionum usu tenendum est .

§. II.

Circa venæsectionem .

Si faucium constrictioni , robur faciei , vasorum inflationes , & magnæ arteriarum capitis pulsationes junguntur ; ob imminentis apoplexiæ metum , vena est secanda . Ubi porro hysterica vel hypochondriaca symptomata , ac suffocationes veluti sunt præstæ ; itidem sanguis mittendus ; sed ne utique in brachio , siquidem paroxysmi inde exacerbantur ; verum potius in pede .

§. III.

Circa topica in spasmodis gulæ inferioris .

Quando spasmus gulam magis inferioriorem obsidet ; linimenta ac externa reliqua non tam pectori ac præcordiis , quam potius spinæ dorsi sunt adplicanda : id quod præsertim JOHANNES LANGIUS *epistol. medic. Part. II. epistol. 43. pag. 178.* ex Aetio , Galeno , & experientia commonstrat . Namque cum œsophagi canalis , immediate cum spina dorsi connectitur ; vis remediorum , huic illitorum , eo certius ad illum penetrabit .

§. IV.

Topica in suffocationibus hysteriarum .

In paroxysmis suffocativis hysteriarum , ubi semel mortuæ jacent , ad eas excitandas , insignioris usus sunt , præ-

ter clysteres , graveolentia , volatilia oleosa , castorina &c. naribus adplicata , aut plumæ perdicum , aliaque fetida accensa : quippe quæ motus effrænes consopendi , egregiam vim habent .

§. V.

Ad exasperandum , & magis confirmandum tam pharyngis , quam gulæ inferioris spasmodum , nihil magis contribuit , quam vehementiorum purgantium usus . Præstat his semper blanda laxantia , mannata , rhabarbarina , balsamica : aut concurrentibus flatulentis , clysmata oleosa & carminativa subungere .

§. VI.

Quæ febribus acutis supervenit , faucium constrictioni : præter conveniens regimen , medicinis antispasmodicis , & antepilepticis sublevanda erit : quo spectant pulvis Marchionis , nitrum cum camphora mixtum , tinctura bezoardica Michaelis cum mixtura simplici maritata &c. Opiata enim & crassiora adstringentia his in casibus , veneni instar se habent .

§. VII.

Idem symptoma , si vermibus , primas vias obsidentibus , easque vellicantibus jungitur , non cessabit , nisi his eliminatis . Tum vero cum purgantibus caute mercandum est : & si mercurialia exhibeantur , protinus super bibere juvat oleum amygdalarum dulcium , ne intestina ab illis nimium vellicentur .

§. VIII.

Quandocunque adstrictio œsophagi tanta fuerit , ut vel nihil alimentorum transmittat , & justo diutius inhærescat : tunc , ne contabescant ægri , ano infundere convenit clysteres lacteos ac nutrientes , de quibus videas LANGIUM *in epistol. medic. Lib. I. epistol. 80. pag. 361.*

§. IX.

Ad convulsivos œsophagi motus , cumprimis pertinent pectoris clangosæ concussiones , quæ teneris infantibus inter epilepticas affectiones evenire , &

Purgantium noxa .

Cura spasmodorum œsophagi in febribus acutis .

Cura eorumdem , a vermibus inductorum .

Clysterum nutritivum usus .

Clangosæ concussiones infan-

vul-



vulgo pro singultuosis commotionibus venditari solent. Re autem vera nihil sunt aliud, quam convulsivæ œsophagi, & vicinarum partium concussiones; & plerumque tristes sunt nuntii, cum morbo ad extrema ventum esse. Medico tunc nihil superest, quam ut blandis antepilepticis, anodynis, & analepticis pugnet, instantemq; mortem pronunciet.

Enarrationes morborum.

### OBSERVATIO I.

Spas-  
mus to.  
œsopha-  
gi.

**V**erbi quidam divini minister, ab obitu uxoris tristissimus semper olim hypochondriacis spasmodicisque motibus, caput potissimum in consensum trahentibus obnoxius, tanta subito pectoris, gulæ, laryngisque constrictione prehendebatur, ut nec vocem edere, nec spiritum trahere, nec deglutire quicquam valeret, insuperque velut attonitus prosterneretur. Ab hac vero accessione media nocte invadente, per sponte sequutos copiosissimos sudores prorsus liberatus; eandem tamen sequenti mane post assumptum *calidissimum* Theebois potum rursus incidit: & quanquam variorum externorum usu adminiculorum, ad rationis integritatem mox rediret, retinuit tamen & loquendi impotentiam, & deglutiendi, spirandi; summam difficultatem. Adplicatis venæsectione, frictionibus, spiritibus nervinis, theriaca sub linguam posita, mastificantibus, interneque, quantum fieri poterat, datis anodynis, tenacissimus, ac copiosissimus mucus non ore solum reddebatur, verum etiam non quidem vomitu, sed anxio tantum vomendi conatu, eructabatur. Laxatis hinc per septem horas contractis linguæ vinculis, sermonis quædam rediit facultas: ipsaque pharyngis rigida detentio aliquantulum soluta fuit, ut liberius deglutire valeret: spasmus tamen gulæ inferioris, & pectoris angustia adhuc urgebat, adeo, ut deglutita

in ipso œsophago stagnare, nec ad ventriculi cavum pertingere posse viderentur. Nec vero ullæ medicinæ, nec antispasmodici pulveres, nec anodynus liquor, nec pediluvia, nec spermaceti in oleo amygdalarum dulcium solutum, nec aliâ quicquam opis adferre valebant. At enim vero, cum camphoræ duo scrupuli, in oleo olivarum soluti, ex errore uno haustu assumerentur: fontica quidem insequiebantur symptomata: æger vero ab omni constrictione faucium, brevique post a toto morbo liberatus fuit.

Epicrisis.

Ferax est hic casus utilissimis observationibus; quarum has notabimus.

1 Morbus hic generatim apoplexiæ levioris nomen meretur: quæ pro causa nullam nec sanguinis nec feri extravasationem agnoscit, sed sola spasmodica ac rigida detentione, nervosarum in cerebro, & circa nervorum principium sitarum, nec non vicinarum oris, linguæ, faucium, laryngis, œsophagi, totiusque sæpe numero pectoris partium absolvitur. Hæc vero debetur humorum crassorum, plus minus viscidorum ad dictas partes congestionem & stagnationem: quare relaxato spasmō, mucus viscidus exspuitur, ac e gula eructatur. Atque talis apoplexiæ species, hypochondriacis admodum familiaris est; & hinc hypochondriaco-spasmodica appellari meretur.

2) Contracta in hoc affectu fuisse pharyngem, musculos linguæ, ossis hyoidis, ac laryngis, vel loquendi impotentia, spirandi ac deglutiendi difficultas indicant. Constrictio autem canalicularis gulæ inferioris, & ipsius superioris orificii ventriculi, ex assumptorum libere deglutorum in medio œsophago subsistentia patet.

3) Obortis sudoribus, remittuntur spasmodicæ constrictiones, a particulari humorum congestionem factæ. Sub illis enim æqualis succorum per totum corpus redditur circuitus; qui



ſopitis nondum ſpafmis, fieri nequit.

4 Sumto potu calidiſſimo rediit paroxyſmus. Quemadmodum enim magnum frigus nervos vehementer afficit, & ad ſpafmos proritat; ita etiam nimius calor, vellicando nervofas œſophagi ac faucium tunicas, ad eaſdem diſponit moleſtias.

5) Adhibita remedia non contemnendi ſunt uſus: præſertim autem camphoræ tam inuſitata doſi uſurpatæ effectus eſt peculiaris. Illius virtutem antiſpafmodicam, tutam, & ab omni commotione, uti vulgo creditur, vacuam, peculiari diſſertatione de uſu camphoræ interno jam demonſtravi; & aſſeverare certa fide poſſum, quod id remedii genus granis circiter duobus cum nitro permixtum in diſcutiendis humorum ſtagnationibus, ad ſuperficiem pellendis ſudoribus, & exanthematibus, atque relaxandis internarum partium conſtrictionibus divinæ fere fit virtutis.

## OBSERVATIO II.

Spas-  
mus  
Pharin-  
gis.

Vir quidam admodum bilioſæ conſtitutionis, ex nimia iracundia, & perperam inſuper datis medicinis, poſt prævias quaſdam adſiſtiones, in gravem demum incidit pharyngis conſtrictionem, & præſertim diarrhœam hiſce potiffimum notis manifeſtam: Per intervalla acceſſit magna deglutitionis difficultas, & moleſta pali faucibus infixi ſenſatio, qua ſimul percepit, ac ſi quid ex ore foret ejiciendum, ac veluti proſerpere vellet, ut etiam medicus cum ægrotante putaverit, vermem ibi reſidere & ſuum affectare exitum, atque ideo multa anthelmintica, & ſuccum citri ordinaverit, quem æger inſigni quantitate devoravit. In acceſſione partes extremæ, ſub æſtate etiam calidiſſima, valde frigefcebant, & quandoque contremiſcebant: malum ab admiſſo frigore ſemper ingraveſcebat; alvus erat ſicca & obſtructa, abdomen flatibus diſtensum, appetitus & ſomnus valde exiguus, pulſus durus, urina

limpida, inſignis ad iram propenſio; horumque omnium ab aſſumpto quodam purgante ſumma exacerbatio. Conſultus ego, morbum hunc, jam ultra tres meſes durantem oppugnaturus, ordinavi pro potu decoctum temperatum, & in illo nonnunquam cochlear unum olei amygdalarum dulcium ſorberi juſſi. Tum pilulas præſcripſi antiſpafmodicas, quas §. III. ſuperius recensui, eaſque quotidie ſumendas ſuaſi: præbui etiam mixturam ex liquore anodyno, oleo chamæmeli vero, abſynthii, & de cedro, bis quotidie capiendam; nec non pediluvia, & externam faucium & œſophagi cum balfamo meo vitæ inunctionem commendavi: quibus factum eſt, ut intra paucas hebdomades æger convaleſceret.

## Epicriſis.

1) Spasmus pharyngis, quem & deglutitionis impedimentum, & pali faucibus infixi ſenſatio produnt, in noſtro caſu debetur vehementi excandeſcentiæ, & perversæ medicationi: ſiquidem purgantibus vehementioribus, ac ſpirituofis tractatum fuiſſe ab initio morbum percepi. Jam vero notiſſimum eſt, & iracundiam, & purgantia per ſpafmodicas canalis magni alimentaris, qui œſophago, ventriculo, ac inteſtinis abſolvitur, conſtrictiones ſuum edere effectum: qui in preſenti caſu circa pharyngem præcipue ſeſe exeruit.

2) Hunc medicus, vermem, quem ſubefſe putabat, occiſurus, cum multis irritantibus, anthelminticis, ac acidis, magis augeret, ac confirmaret; anſam quoque præbuit, ut per totum corpus propagaretur, & extremorum frigus, alvi adſtrictionem, urinæ limpidx miſtionem, pulſumque durum poſt ſe traheret. Teſtatur quoque hic affectus ſpafmodicam ſuam indolem, 1) eo, quod per intervalla redierit, & 2) ſub illo animus valde ſenſibilis, & ad iracundiam facillimus fue-



fuerit redditus: quæ duo momenta spasmodicis morbis semper fere sunt propria.

3) Meretur hic pharyngis spasmus vocari idiopathicus; quem semper in constrictione musculorum dilatatorum pharyngis, quæ sensum globi in faucibus producit, collocandum esse putamus. Tum enim vicinæ partes, lingua, os hyoides, & larynx spasmi vacuitate plerumque gaudent; quare in ejusmodi casu, nec linguae impotentia, nec suffocationis ac laryngis constrictionis notæ adsunt. Contra vero symptomaticum vocamus, qui has vicinas partes, & in pharynge œsophageum saltem musculus tenet contractum; unde quidem deglutitio æque ac in idiopathico difficilis est, at nulla palisensatio, quoniam dilatatores a constrictione liberi sunt. Quamobrem si hunc casum cum præcedente conferamus, in hoc idiopathico, in illo symptomatico pharyngis spasmus offendimus.

4) Curatio solis antispasmodicis, & stagnantes in pharynge humores discutientibus, ac derivantibus, adornanda est. Prioris generis remedia fuere pilulæ, & mixtura anodyno roborans; alterius balsamum vitæ extrinsecus illitum; & tertii pediluvia: quorum ope in hisce casibus, ubi magis vitium motuum, quam humorum peccat, tantum non semper votis potiri licet.

### OBSERVATIO III.

Spas-  
mus gu-  
læ infe-  
rioris,  
& ven-  
triculi.

Vir quinque ultra sexaginta annos natus, strictioris habitus, & vasis carioris, pacioribus instructus, ex hæmorrhoidum suppressione, aut ad minimum irregulari fluxu, variis hypochondriacis molestiis, per aliquot annos sollicitatus, ventriculi post assumptionem parcissimi etiam cibi inflationem, alvi obstructionem, quandoq; profluvium, adpetentiam fere caninam, dorsi-que cruciatus toleravit. His demum omnibus, ea supervenit afflictio, ut libera quidem deglutitione cibos po-

tumque devoraverit: cum autem ventriculum vellent ingredi, in œsophago quasi vinculis contracto hære, nec ulterius progredi posse viderentur: ea tamen differentia, ut calidi potus libero gauderent transitu, frigidi autem malum exasperarent, & fere regurgitarent; quibus denique sæpenumero muci vomibunda accedebat rejectio. Ego cum ex impedito sanguinis per viscera imi ventris circulo, & hinc facta ejus in canale intestinorum stagnatione, horum, ventriculi, & œsophagi spasmus derivandum esse putarem, ordinavi ad sanguinis progressum æqualem reddendum, infusum theiforme ex herbis salviæ, veronicæ, summatibus millefolii, floribus chamomillæ, semine fœniculi, & anise stellato confectum, maneque bibendum. Præbui pilulas meas balsamicas, quovis tertio die capiendas; atque pulverem, qui habebat radicem ari, pimpinellæ, corticem cascarillæ, cinamomi, succinum præparatum, sal tartari, nitrum depuratum, & oleum de cedro, circa prandendi tempus sumentum dedi, non minus liquorem anodynum, essentia castorei nuptum per vices propinavi: flatulentias clysteribus oppugnavi, rectum vivendi genus, & pro potu decoctum temperatum commendavi. Et denique ad promovendas hæmorrhoides venæsectionem, ac hirudinum adplicationem suasi, co effectum, ut redeunte ab his hæmorrhoidum fluore, sensim cum morbo in gratiam rediret ægrotans,

Epicrisis.

Quicunque symptomata in hoc morbo præsentia, cum signis, quæ supra §. V. spasmi gulæ inferioris propria diximus, rite contulerit: facile deprehendet, pharynge a spasmi libero, inferiorem gulam iis agitatam; quin constrictionem eam per totum ventriculum ac intestinorum canalem fuisse propagatam. Horum vero omnium prima origo debetur inordinato hæ-

mor-



morrhoidum fluori: quo sanguinis primi ventris viscera, maxime intestina circuitus impeditus fuit. Unde exeperunt spasmodici motus; hisque legitima chyli depuratio, & humorum excrementitiorum eliminatio perturbata est: hinc accumulata in ventriculo cruditates acidæ, biliosæque, vellicarunt præsertim tunicam illam nerveam, quæ ab œsophago, per trium digitorum spatium in ventriculi cavum protenditur: ex qua spasmus ad gulam usque propagatus, constrictivum ibidem sensum procreavit; quo assumti cibi in ipso subsistere coguntur, & coacervati per os rursus expelluntur.

Tali igitur in casu sola antispasmodica ac anodyna mali causam non tollunt; licet ad mitigandos motus spasmodicos, multum inserviant. Sed in tali subiecto, quod fluxum hæmorrhoidalem dispositum antea, & huic adsuetum fuit, huic revocando, omnis impendenda est opera. Cui quidem scopo, & hirudines, & venæsectiones, & pilulæ balsamicæ adprime satisfecerunt. Præterea in eundem finem, licet remotius, & proxime magis ad resolvendas & incidendas ventriculi cruditates, & æqualem humorum circulum restitutum, collinearunt reliqua medicamina.

#### OBSERVATIO IV.

Contu-  
macissi-  
mus gu-  
la infe-  
rioris  
spas-  
mus.

Femina, triginta annorum, pallido vultu, ac strictiori corporis habitu prædita, & chlorosi obnoxia, ante tres annos primum gravida, de capitis doloribus, præcordiorum angustiis, & pedum tumoribus conquesta fuit: quorum symptomatum priora duplici venæsectione, hoc sola pedum ligatura debellavit. Deinceps altera vice gravida, iisdem afflicta molestiis, iisdemque liberata remediis, feliciter superavit partum, lochiisque rite succedentibus, per decem abhinc septimanas, ab omni morbo vixit immunis. His elapsis accedere œsophagi distentio-

nes, quibus primum semel bisve duntaxat quavis hebdomade, & quidem post deglutitum ultimum bolum alimentum in gula hæere videbantur, & multo demum potu ad ventriculum deprimi debebant. Sed aucta paulatim est hæc molestia, & sub singulis se exferere cepit epulis, adeo, ut solidis vesci nequiverit, nec nisi liquida assumere potuerit: quin linctibus, gargarismatibus, aliisque medicinis frustra adhibitis, res tandem eo pervenit, ut misera nihil plane nisi calidam cerevisiam deglutire valuerit. Videbarur enim ipsi tuberculum quoddam fauces obsidere, ac ciborum descensum remorari; quod tamen & per intervalla duntaxat, & non eodem semper sensit loco, dum modo in pharynge, modo in media, modo infima œsophagi regione hæere observabatur. Juncti erant ructus, qui ex ventriculo ascendentes, & ad hoc sic dictum tuberculum pertingentes, statim recidebant, neque eructari poterant, denique assidua vexabat nausea. Accitus medicus, spasmus subesseratus, propinavit interne potiunculam laxantem, & cremorem hordei cum oleo amygdalarum dulcium potari iussit: externe cataplasma emolliens, atque discutiens, & linimentum ex balsamo vitæ nostro, & spiritu vini adplicuit. Nec irritus horum fuit effectus, siquidem non solum omnibus liquidis liberum reddebatur iter; verum etiam, postquam absque ulla tussi, insignis viscidæ pituitæ copia vomitu excernebatur; & tuberculi sensatio, & nausea, & ructuum molestia evanescebant. Neque vero minus solidiores cibi adhuc subsistebant, & demum molestia œsophagi constrictio iterum accedebat; cujus adeo conscia erat ægrota, ut non solum clarissime sentiret, num œsophagus constrictus, anne relaxatus fuerit; sed quoque evidenter perciperet, ipsum post assumptos tepidiores potus relaxari: Et hæc afflictio cum copiosissima muci viscidæ excreatione, oris perpetua amaritie, & colli, dorisque magno dolore per-



pertinacissime inhæsit; donec adhibitis ex meo consilio, interne aquis Sedlicensibus, & elixirio viscerali Egranis, externe balsamo vitæ adplicato fuerit debellata.

### Epicrisis.

Quemadmodum omnis spasmus vel in uno loco fixus, stabilis, ac rigidus est, vel per totum membrum decurrit: ita hoc præsertim in œsophago observamus. Ad posteriorem classem pertinent nausea, ructus, vomitus, quin etiam singultus; qui affectus omnes absolvuntur, motu œsophagi peristaltico inverso, & spasmodice aucto, ubi scilicet spasmus ab inferiori parte incipiens, ad fauces usque decurrit. Contra vero rigida œsophagi constriction, in eo potissimum morbo, quem nos spasmus gulæ καὶ ἐξοχὴ vocamus, & supra descripsimus occurrit; atque reliquæ spasmorum species symptomatice sæpius junctæ deprehenduntur.

2) Talis morbus est ille, de quo præfens agit observatio; quæ pro causa agnoscit, cruditates viscidas, acres, biliosas in ventriculo subsistentes, testante oris amaritie, nec non viscidos humores in ipsis œsophagi vasis stagnantes. Quod si vero & in horum causam remotius inquiramus, nulla se offert alia, quam depravata digestio: unde etiam factum esse credo, quod, licet medicus, convenienti medela spasmum gulæ debellaverit, ille tamen recruduit, quoniam ad roborandum ventriculum nulla subinde cura fuit directæ.

3) Tuberculi in œsophago sensatio, nihil est aliud, quam tunicæ musculo-sæ spasmodica conglobatio, quæ propterea mox in hoc, mox altero loco sese exseruit, & per hunc vagum ac incertum circuitum se distinguit a præternaturali tumore, huic canali innato.

4) Videre etiam ex hoc casu licet, quam pertinax ac magna possit esse gulæ constriction, adeo, ut ne vapores

quidem halituosi, per ructus e ventriculo elevati, pervadere potuerint; sed ad locum stricturæ devenientes, iterum relabi debuerint.

### OBSERVATIO V.

Vir quidam, trium & quinquaginta annorum, valde pituitosus, victus exactissimam servans rationem, vitæ vero sedentariæ nimium deditus, nec unquam sanguinis missionibus, per venæsectiones, aut scarificationes adfuetus, & flatulentis admodum obnoxius molestiis, ultra jam triginta annos tussi quadam cum levi asthmate junctæ, singulo mane multum pituitæ excutiente, laboravit; quæ vernali præsertim, & autumnali tempore exacerbata, per aliquot hebdomades, gravius adflixit. Hic ante quatuor circiter menses ex improvviso, eam incidit molestiam, qua summi cibi, utut minutissime concisi, in œsophago, circa superius ventriculi orificium subsistebant, nec nisi hausto potu detrudebantur. Paulo vero post hæc adfectio ita invalescebat, ut cibi æque ac potus in gula, veluti detenti subsisterent, ac coacervati, vomitus quadam specie rursus eructarentur: attamen liquida, si tepida fuerint, parca quantitate assumere valebat. Infestabat hoc incommodum per periodos; adeo, ut interdum etiam cibi ad ventriculum deferri potuerint: prorsus tamen, frustra adhibitis varii generis medicaminibus, cedere recusabat. Verum tribus abhinc hebdomadibus, assumta caro iterum subsistebat, nec cum potu ad ventriculum perducere, nec vomitu reddi poterat, magnamque creans molestiam. Tandem capiebat æger, proprio instinctu oleum olivarum, cum melle; & ab hoc ultra mensuram unam mucii tenacissimi una cum detenta carne eructabat. Inde quidem melius habebat, adeo, ut ad minimum jusculis vesci potuerit; & ubi recidebat malum, eructato sponte mucos, cujus excretionem adhibitus quidam spiritus ani-

Spas-  
mus gu-  
læ in-  
ferio-  
ris, cū  
reje-  
ctione  
multi  
mucii.



anifatus cum saccharo mixtus adjuva-  
bat, rursus remittebat. Verum paul-  
lo post gravior reddebatur status: si-  
quidem constrictio gulæ, ciborum &  
potuum descensum impediens, majores  
capiebat vires, adeo, ut adpetitu  
integro gavifus; nihil fere comedere  
posset; ideoque corpus sensim conta-  
besceret. Accedebat virium collapsus,  
frequens corporis tremor, atque fri-  
gus, maxime si vel aeri liberiori se ex-  
poneret, vel in eructando mucos occu-  
patus esset. Præterea noctu præsertim  
mox in gula inferiori, circa stoma-  
chum, mox in superiori circa fauces,  
sentiebat tuberculum quoddam, instar  
ovi columbini, quod emissis ructibus  
evanescere quidem videbatur, mox  
vero recurrebat. Verum plerumque  
nec ructum edere, nec singultire vale-  
bat: quod si autem hi motus succede-  
bant, non solum levamen totius mali  
inferebant, verum etiam si assumpto-  
rum quidpiam in gula hærebat, illud  
vel per os reddebatur, vel in ventri-  
culum deferabatur. Notabile etiam  
erat, quod quæ jam ingressa erant ven-  
triculum, vomitu nunquam rejice-  
rentur; sed hoc duntaxat mucus, ci-  
bus, vel potus in gula remoratus ex-  
cerneretur. Adfligebat insuper, post  
assumptum nuper purgans, gravis inter  
scapulas dolor; nec molesta erat ulla  
ventriculi gravitas. Quando vel frigi-  
di potus parum ceperit, vel frigidum  
aerem inspiraverit; protinus exacer-  
babantur omnia.

Epicrisis cum consilio.

1) Quantum caussarum cognitio,  
ad curandum morbum, præstet mo-  
mentum; vel hæc docet morbi histo-  
ria. Medici enim, quorum plures con-  
sulebat æger, in varias quidem abie-  
runt opiniones; nulla tamen rei con-  
formis erat. Quidam enim accusabant  
ventriculi atoniam; alii scirrhum  
œsophagi tumorem; alii nimiam pi-  
ruitam ventriculum, & œsophagum  
obsidentem. Priores duæ causæ pror-

sus a veritate sunt alienæ; ut enim alia  
momenta, ipsis contraria taceam, vel  
id eas refellit, quod malum per inter-  
valla revertatur. Tertia est tantum re-  
mota; cui in acceptis ferenda proxi-  
ma, quam non aliam subesse judico,  
quam spasmus œsophagi pertinacem.

2) Testantur hunc cuncta sympto-  
mata. Primum quidem subsistentia  
ciborum in gula, potuum calidorum  
liber transitus, constrictionis remissio,  
& a frigore revocatio, dolor inter sca-  
pulas, sensatio tuberculi in gula, ex-  
tremorum frigus, corporis tremor &c.

3) Notabile est, ructus solvisse con-  
strictionem gulæ. Dum enim hæc in  
uno loco pertinax inhæret, ac fixa est;  
ructus vero non nisi inverso motu per-  
istaltico, totius canalıs absolvitur: fa-  
cile patet, cur illa strictura vehemen-  
tiori existente, & singultuendi, & ru-  
ctus emittendi potentia fuerit prohibi-  
ta; item cur si ructuosi motus major  
vis fuit, hæc resistantiam fixioris stri-  
cturæ superaverit.

Cum hic affectus & huic similes fo-  
mitem & materialem suam, a qua pro-  
gignuntur, causam potissimum in ven-  
triculo, five potius duodeno stabulan-  
tem habeat; videlicet vitiosorum &  
crudorum acido-bilioforum humorum  
saburram, qui continuo pravas exha-  
lationes in superjacentes nervosas par-  
tes emittunt; curandi methodum ego  
ita instituere solitus sum, ut pulvere  
absorbente & salino deterfivo, leni-  
terque nitroso, convenienti dosi &  
tempore, præmissio vel blandiori eme-  
tico ex radice ipecacuanhæ, vel pilulis,  
quæ ex nostris polychrestis & extracto  
panchymagogo Cr. compositæ sunt,  
excretionem sufficientem materiæ pec-  
cantis promoveam, & demum conve-  
nientibus stomachicis roborantibus,  
digestionis negotium in meliorem &  
naturalem statum reducere annitar.  
Quæ remediorum genera si intentioni  
minus respondeant, quod fit, quando  
hypochondriaca vel hysterica sic dicta  
passio hujus morbi fundamentum est;  
tunc omnino ad validiora, usum vide-  
licet



licet aquarum thermalium vel acidularum, ad balnea quoque, ad peregrinationes pro mutando aere & corporis motiones confugiendum erit, qua methodo etiam hic æger convaluit.

## OBSERVATIO VI.

Spasmi  
gule ex  
mucos  
ipsum  
pacto.

Vir illustris, annorum quinquaginta, constitutionis satis robustæ, victui duriori, carnibusque fumo induratis longo abhinc tempore adsuetus, & vini, nec non spiritus vini potui valde deditus, in animi excandescentiam proclivis, parum adpetit, & excusso mane somno, magnam in faucibus & ore percipit ariditatem. Tum e lecto surgens sub cordis scrobiculo quandam perlentiscit molestiam, ab humore glutinoso, ibi firmiter impacto, qui tam vehementem caussatur irritationem, ut illustris æger magno impetu ac labore illum exscreando rejicere anitatur, non sine ingenti thoracis, atque totius corporis concussione, rubore faciei, sudoreque totum corpus occupante. Tandem aliquot cochlearia, modo insipidi, & mucosi, modo biliosi & acidi humoris eructantur, idque jam per aliquot duravit menses. Consultus ego, primum ut a remediis stomachum roborantibus, & aquis vitæ spirituosis, quibus se absque ullo solamine permultis fuisse usum scribebat, nec non omni spiritus vini potu prorsus abstineret, monui; & potius suasi, ut victu molli, tenuique, ac acidulis Egranis, ineunte æstate uteretur; pro potu ordinario aquam thermalem Piperinam, quam in promptu habebat, usurparet, cenam intermitteret, atque pulverem nitrosum præcipitantem, cum haustu aquæ fontanæ, cubitum iturus caperet. Ex quibus consiliis insigne percepit allevamentum.

Epicrisis.

Non pauca in praxi medica occurrunt eorum exempla, quibus nocturne humiditas mucosa, sive pituita in fau-

cibus, ipsoque œsophago concrefcit, & intus firmiter inhærescit; quam deinde magno, & sæpe frustraneo conatu expellere moliuntur. Humor hic non ex aspera arteria, ejusque glandulis, nec ex pharyngis, aut laryngis glandulosa tunica; nec ex pituitaria, quæ basin narium involvit; sed ex glandulis ipsius œsophagi, quæ tunica nervea ablata, in conspectum veniunt, & pressæ per vasa excretoria ac foramina, quibus præditæ sunt, humorem stillant, suam ducit originem. Hæ igitur glandulæ, sicubi a vaporibus acerbis, acidis, vel etiam calidis, ex ventriculi vel duodeni sinu elevatis vellantur, fundunt lympham, quæ facile concrefcit in mucum, qui tam mole, quam qualitate inimica tunicam musculoso nerveam, ad ejusmodi spasmodico convulsivum proritat motum. Hinc facile patet, tali in casu, nec calida & aromatica, nec spirituosaproficere; quippe quæ lympham magis viscosam, & humores biliosos magis acres reddunt & volatiles: quibus temperandis longe majori efficacia potus diluentes, fontesque medicati potius inserviunt.

## CAPUT VI.

DE

MOTU VENTRICULI  
CONVULSIVO,  
SIVE VOMITU.

THESES PATHOLOGICÆ.

§. I.

**V**ix quicquam in humana vita frequentius occurrit vomitu: namque nec ullus hominum erit, quin vomuerit, nec pauci sunt morbi, qui vomitu, tanquam molesto complicantur symptomate. Nihil autem aliud est, quam œsophagi, ventriculi, & maxime duodeni motus persistal-

Definitio vomitus.



stalticus, præter naturam inversus, & ad convulsivam contractionem usque auctus, quo contenta ventriculi, vel intestini simul duodeni per os rejiciuntur.

§. II.

Evome-  
torum  
& Dy-  
semeto-  
rum de-  
scriptio.

Non quidem obscurus est affectus, qui, ut dignoscatur, signis egeat: attamen eo attentius concurrentia symptomata & affectiones observare convenit, quo magis causæ id vitii genus producentes variant. Generatim sciendum est, quosdam ad vomendum valde faciles, a levissima causâ disponi; alios vero minus promptos, atque magis inani, molestoque vomendi conatu urgeri. Illi a schola medica vocantur evemeti, & sunt in primis infantes præ adultis, foeminæ præ viris, & viri laxioris habitus: hi dicuntur dysemeti, & sunt strictioris habitus corporis, brevioris colli, omnesque robustiori nervorum systemate præditi.

§. III.

Histo-  
ria vo-  
mitus.

Vomitum antecedere & comitari sæpius solet molestissima nautica, cum tensione & gravitate in epigastrica regione, oris amaritudine, ardore, morfu, inappetentia: adest quoque magna præcordiorum anxietas, inquietudo; multum salivæ tenuioris in os stillat, multumque spuitur, accedit vertigo, oculorum caligo, & obtenebratio, capitis gravitas, faciei rubor, tremor inferioris labii, & cum primis anxiosa cardialgia; atque tandem post laboriosam, & inanem eructationem, contenta in ventre extruduntur. Quæ affectiones sat luculenter spasticam & convulsivam ventriculi & annexarum nervosarum partium subversionem ostendunt.

§. IV.

Diver-  
sas  
materi-  
e per vo-  
mitum  
exeret.

Materia, quæ per vomitum rejicitur, dum varia est, diversas vomitibus imponit denominationes. Saburra mucosa, chymosa, ciborum nondum penitus dissolutorum reliquiæ rejectæ, vomitum pituitosum constituunt; biliosa colluvies biliosum exhibet; eadem ab admixtione aliorum humorum, vel acidorum & corrodentium subnigricantem corru-

Hoff. Syst. Tom. V.

ptum. viridem, æruginosum, porraceum spargit. Interdum vermes & insecta rejiciuntur; nonnunquam stercorea materia ex imis revoluta intestinis expellitur; quandoque pus redditur & saniosa materia; quin carnosam instar polypi membranousam massam in ventriculo generatam, vomituque expressam fuisse testatur casus *Med. consul. To. IX. p. 207* insertus. Effertur non raro sincerus sanguis, & vomitus tunc dicitur cruentus; & interdum idem ater corruptusque vomitur, tumque morbus audit niger *Hippocratis*; cuius utriusque non faciemus mentionem: quia in parte systematis nostri therapeutica II. id jam factum est.

§. V.

Sedes materiæ, quæ evomitur, proxime quidem ipsi inhæret ventriculo; cuius æque ac vicinarum partium præter naturali motu illa eliditur: at vero ex aliis & remotis etiam partibus, hepate, pancreate, per ductus, ex liene, ex ipsa quoque sanguinis & humorum massa, ex habitu corporis, ut in tumoribus per vasa & glandulas huc adducitur. Causæ quæ sensibilem nervosam ventriculi substantiam ad systalticum & compressorium motum irritant, non tantum in ipso, sed etiam in aliis vicinis & remotis partibus nervosis, querendæ sunt, cum subinde animadvertamus plurimis spasmodicis affectionibus per consensum vomitum accedere. Quæ præcipua momenta ut clarius & rectius intelligantur; e re fore arbitror, ut accuratiorem ventriculi & duodeni fabricam secundum recentiorum & probatissimorum anatomiarum descriptionem præmittamus.

§. VI.

Primum igitur notandæ veniunt tunicæ ventriculi, quarum quatuor ipsi tribuuntur, extima est membranacea, a peritonæo oriunda, & cum tunica concavum diaphragma cingente continua: altera est musculosa, quæ duplici construitur fibrarum serie, externa quæ fibras habet longitudinales, longitudinè ventriculi abbreviantes; interna vero par-

Sedes  
vomi-  
tuum.

Fabri-  
ca ven-  
triculi  
mem-  
brana-  
cea.

P

ren-



rentes, & utraq; orificia ad invicem coarctantes, partim alias circulares, latitudinem ventriculi amplectentes, hancq; contrahentes exhibet. Tertia, quæ huic subjacet, tunica audit nervea, fibris tendineis, oblique per ventriculolum decurrentibus prædita, prioribus amplior, hinc rugas formans, & glandulis multis referta. Quarta dicitur villosa ex papillis nerveis, & extremis vasculis, villorum instar erectis concinnata, & mucagine, quam dictæ plorant glandulæ, obducta. Ceterum inter tunicam exteriorē, & musculosam; hanc & nerveam; atq; hanc & villosam triplex conspicitur substantia cellulosa, vasa sanguifera copiosissima continens.

## §. VII.

**Fabrica ventriculi.** Deinceps considerari merentur vasa ventriculi. Arteriæ sunt duæ gastricæ, dextra, sinistraque & coronaria. Namque postquam arteria aorta inferior, perforato circa spinam septo abdomen ingreditur, protinus spargit arteriam coeliacam, quæ in tres ramos dispescitur: prior est hepaticus, a quo suboritur 1) pylorica, 2) gastrica dextra, 3) duodena arteria: alter est coronarius, qui ventriculolum innumeris ramificationibus amplectitur: tertius est splenicus, qui ad lienem tendens exhibet 1) arteriam pancreaticam 2) gastricam sinistram, quæ cum dextra constituit gastro epiploicam. 3) Ipsam epiploicam, 4) vasa brevía, quorum alterum est venosum. Per hanc arteriarum nexum patet, quantus sit humorum circuli per dictas partes consensus. Venæ sunt coronariæ, gastrica dextra, sinistraque, & alterum breve vas. Omnes oriuntur a vena portarum, cujus truncus sub duodeno ad pancreas tendens, primum venas cysticas, pyloricas, duodenales; dein tres, interdum duos ramos suppeditat, quorum primus splenicus dat coronariam, gastricam sinistram, pancreaticam, epiploicam, & vas breve venosum; alter mesaraicus major intestinales & gastro epiploicam; tertius hæmorrhoidalis internus, gastricam dextram, & duodenalem. Un-

de liquet, præpedito sanguinis in uno viscere circuitu, illum ad alterum regurgitare. Lymphatica vasa comitantur venas; nervi arterias. Hi vero nascuntur partim a pari vago, partim intercostali ramo. Par vagum duobus ramis ab utroque oesophagi latere descendens, toti ventriculo innumeras ramificationes tribuit, tumque ad formandos nervi intercostalis plexus concurrunt. Hic enim perforato diaphragmate, juxta arteriam coeliacam, format ganglia semilunaria; unde in dextro latere surgunt plexus hepaticus, & renalis dexter; in sinistro nascuntur plexus lienaris, stomachicus & renalis sinister: ex hepatico & renali dextro, nec non ganglio semilunari suboritur plexus mesentericus superior; cujus interventu dicti in utroque latere quinque plexus adeo uniuntur, ut partes ab illis suos nervos mutuantes, arctissimo gaudeant cōsēsu.

## §. VIII.

Attendi porro meretur fabrica duodeni: quod cum ventriculo ratione tunicarum, nervorum, vasorumq; convenit; & a pyloro incipiens, tres format flexuras. Prior occurrit, dum a ventriculo oblique, deorsum, simul retrorsum tendit, circa cujus finem inseritur ipsi ductus cholidochus, bilem, succumque pancreaticum secernens. Deinceps cum dextrum ambit renem, alteram exhibet flexuram; qua accumbit pancreati; tandemq; juxta spinam, reni sinistro adpropinquans, tertiam suppeditat, super qua feruntur & arteria, & plexus mesentericus superior: cujus contractio protinus hoc intestinum afficit. Ceterum illud reliqua intestina capacitatis amplitudine, contra communem sententiam, qua angustius dicitur, longe superat.

## §. IX.

Hæ binæ partes, ventriculus nimirum, & intestinum duodenum, quod ventriculus minor non immerito vocari potest, insigni nexu non modo invicem, sed etiam cum aliis nerveo membranaceis gaudent partibus. Connectuntur enim 1) cum oesophago, per ipsarum tunicarum, quæ utrique parti eadem sunt,

**Consensus ventriculi ac intestini duodeni cum aliis partibus.**



sunt, communionem, & hinc cum ipsa fauces, & os cingente tunica coherent. 2) cum toto intestinorum canale, non modo per tunicarum earundem pro- tensionem, verum maxime vi plexus superioris mesenterici, a quo cuncta intestina suos nervos mutuuntur. 3) cum omento, quod ventriculi parti anteriori firmiter annexitur. 4) cum septo transverso, per ramulos e nervo vago & intercostali, nec non tunicam exteriori & septi & ventriculi super- ficiei communem; & illius respectu cum 5) nervosis, ac membranaceis pec- toris partibus; nec non 6) musculis ab- dominis. 6) cum ductibus biliferis, non tantum per cholidochum canalem, duodeno insertum, verum maxime per plexum hepaticum, qui fureulos dat duodeno, ac ventriculo, cumq; plexu stomachico, interventu mesenterici su- perioris communicat. 7) cum pancrea- te, cui firmiter adhærescit duodenum. 8) cum renibus, per plexum renalem dextrum & sinistram, qui cum stoma- chico connectitur; 9) cum capite & ce- rebro, nec non corde per nervum va- gum, qui his partibus communis est.

§. X.

Motus  
peristal-  
tici u-  
sus.

Vi tunicæ musculosæ, ejusque fibra- rum §. VI. superius recensitarum, œso- phago, ventriculo, cunctisque inte- stinis communium, proprius istis par- tibus est motus quidam vermicularis, quem etiam peristalticum vocant. Hic consistit in dictarum partium alternan- te constrictione ac relaxatione; & a par- te superiori deorsum tendit: in ventri- culo, variis modis cum contrahendo, arctando, rursusque dilatando, dia- phragmatis & musculorum continuo, qui sub respiratione fit, motu adjutus, ciborum & digestionem, & per pylo- rum expulsionem secundat: in intesti- nis, humorum laudabilium per chyli- fera vasa resorptionem, & excremen- titiorum ad inferiora protrusionem, & per anum eliminationem peragit.

§. XI.

Forma.  
dis ratio  
vomi-  
tus.

Quandocunque vero hic peristalticus motus, deorsum vergens, ad præter-

naturalem, spasmodicam vel convul- sivam intenditur motionem: oriuntur intestinorum tormina, dolores circa pylorum cardialgici, spasmus sic di- ctus ventriculi, colicæ passiones, & alvi profluvium. Quod si autem idem hic motus, præter spasmodicam con- tractionem invertatur, & ad superiora tendat; cogit primum contenta ex in- testinis in ventriculum; aut si jam in ipso fuerint, ea sursum trudit, tumque fit vomitus. Sub hoc enim pylorus cum adnexo duodeno pariter, ac anterior & inferior ventriculi portio, contra- ctis violenter fibris longitudinalibus, & circularibus, ad superius orificium con- trahuntur; contenta ipsius ad hoc ad- plicantur; continuante a tergo spasmi impetu in œsophagum coguntur; & motu illo inverso per totam gulam pro- pagato, ad os feruntur, & eructantur. Adjuvant hunc motum violenta dia- phragmatis, & musculorum abdomi- nalis per consensum facta constrictione & parietum ventriculi facta inde com- pressio: hinc post singulas vomitiones, difficilem spirationem adhuc continua- re, & abdominis regionem plus minus- gravi dolore affici, in comperto est; quid quod in animalibus post devora- tum emeticum dissectis, pressionem ventriculi a diaphragmate ac musculis abdominis rectis potissimum oculis in- tueri licet. Quidam ex medicis Anglis hac in opinione sunt, fibras stomachi ni- hil prorsus ad vomitionis actum conferre.

§. XII.

Verum quo debiliores sunt ventricu- li fibræ, & quo mobilior, majorique copia rejicienda saburra præsto est, eo facilius fit vomitus. Quod si vero ro- bustiores fuerint fibræ, ut in dyseme- tis; aut causa vomitus in humore te- naci, viscido, plicis ventriculi firmi- ter inhærente, vel materia acri, cau- stica nervis infidente consistat; tum gravis fit vomitio, atque fonticis stipa- tur symptomatibus. Namque antece- dunt primum gravissimæ cardialgiæ, immanes nausæ, præcordiorum an- xietates, inquietudines, laboriosæ,

Sym-  
ptoma.  
tum de-  
scriptio  
& ra-  
tio.



ac inanes eructationes, molestæ abdominis, contentarum partium, maximeque diaphragmatis concussiones, hinc singultuosæ agitationes; claro documento, magnam subesse ventriculi convulsionem, ad expellendam noxiam materiam haud sufficientem. Frequentissimum tunc est, ut convulsio ventriculi ad ductus biliferos propagetur, & hinc fiat effusio bilis ad duodenum, & ventriculum; qua eructata, nihilominus continuat vomitio. Motus ille ascendit per œsophagum, & lympham ex ejus ac faucium glandulis exprimit; cujus multum sputitur. Compressis porro per vehementissimas concussiones ventriculi, & adnexarum partium vasis sanguiferis ibidem sitis; cruor majori copia & impetu ad superiores partes, atque caput compellitur; ejus vasa infarcit, membranas nerveas distendit, & ad similem spasmum proritat. Hinc fiunt faciei rubores, capitis dolores, oculorum caligines, vertigines, tremor inferioris labii, atque non raro totius nervosi generis convulsivæ, ac epilepticæ commotiones.

## §. XIII.

Differē-  
tia vo-  
mitus in  
idiopa-  
thicum  
& sym-  
pathi-  
cum.

Causa, quæ ad vomitum disponit, proxima est vellicatio vel stimulatio fibrarum ventriculi ac duodeni nervearum: vellicans autem materia hæret vel in ipsis illis partibus, vel in remotioribus, vi nervorum cum istis connexis. Hinc resultat differentia vomitus in idiopathicum, & sympathicum; ille causam materialem in ipso ventriculo vel saltem duodeno habet; hic eandem remotius in inferioribus intestinis, ductibus biliferis, renibus, capite &c. hærentem agnoscit, & consensuali magis vitio motuum nititur. Idcirco facile patet, nullam esse monarchialem illam potentiam, quam suo pylori rectori tribuit HELLMONTIUS, a quo semper stricturæ, & inversi motus initium arcessendum esse putat. Quamvis enim nonnunquam illa fiat; attamen non raro ex infimis intestinis constrictionis principium suboriri, vel stercorei testantur vomitus.

## §. XIV.

Inter causas itaque vomitus materiales, in ipso ventriculo hærentes, accusanda primum venit nimia assumtorum quantitas; quæ fibras ventriculi nimium aggravat, & ultra sphaeram elasticitatis distendit, donec, factæ rapidiori fluidi tenuissimi & sanguinis adfluxu, in convulsivum motum actæ, inimicam sibi materiam expellere moliantur. Ex hac causa obnoxii sunt vomitibus 1) heluones ob potum nimis haustibus ingestum; 2) infantes teneri, ob lac copiosius sumtum, vel datos premature solidiores cibos; quo in casu non sine ratione pylori angustiam, solidiora nondum transmittentem accusat KERKRINGIUS *spicileg. anat. obs.* 20. 3) homines a motibus, & tolerata sub iis inedia debilitati; in quibus parrior quoque ciborum, maxime solidorum quantitas vomitum ciere potest; 4) Pueri voraces, qui & crebris vomitionibus, & frequenti singultu vexantur.

## §. XV.

Concitatur deinceps vomitum saburra vitiosa in ventriculo contenta; quæ non raro a cibis crudis, dyspeptis, fumo induratis, salitis, aliisque incongruis non bene concoctis relinquitur. Hinc fiunt vomitus pituitosi, qui eveniunt 1) hominibus, qui debilitate ventriculi præditi sunt, simulque voraces, 2) qui mollioribus cibis adsueti, victum subeunt crassiorem, 3) qui gulæ indulgent, simul vero diuturniori somno, vitæque sine motu desidi sunt dediti. Eadem saburra, mora temporis acida redditur, & accedente ob iracundiam, aliasque forsan causas, ex duodeno bile, acrior evadit; unde ex ventriculo fiunt biliosi vomitus.

## §. XVI.

Omnes vero biliosi vomitus, maxime si vel chronici, vel periodici fuerint, vomitem suum in duodeno habent. Aptissimum fovendæ saburræ hoc intestinum est, propter flexuras, quibus pollet; & quoniam in eo bilis chymoso succo affunditur. Hæc si iners fuerit, vel languente intestinorum tono, sta-

Causæ  
mate-  
riales  
sunt ni-  
mia as-  
sumto-  
rum  
quan-  
titas.

2) Sa-  
burra  
ventri-  
culi.

3) Hu-  
mor bi-  
liosus  
in duo-  
deno,



gnaverit, nec rite cibis permisceatur, aut accedentibus acidis humoribus magis in sua crasi pervertatur; acris ac veluti caustica redditur; & vellicando parit vomitus biliosos, virides, æruginosos, quin & nigros. Namque bilis ab acido forti fit viridis; & si diutius substiterit, nigrum inducit colorem. Inde etiam acidissima evomi solet materia, quæ dentes stupefacit, atque pavimenta, vasaque argentea arrodit. Talem vitriolacæ saporis observavit HENRICUS ab HEER *obs. 29.* & ego in *Not. ad POTERIUM Cent. 2. casu 93.* recensui casum, ubi per vomitum materia instar aquæ fortis corrosiva fuit rejecta, quæ cum limatura martis, in verum abiit vitriolum.

§. XVII.

Vomitus hy-  
pochondriaco-  
rum.

Ejusmodi vomitibus ex duodeno originem trahentibus vexari solent 1) hypochondriaci ac melancholici, in quibus ob languidum intestinorum tonum, non modo cruditates acidæ ac viscidæ ex cibis in ventriculo & duodeno relinquuntur; sed bilis quoque iners est adeo, ut loco chyli generosioris, magnus fiat proventus humorum acrium, acidorum, cum bile corrupta, i. e. temporis mora nigra facta mixtorum, hinc nigrorum, quos veteres a liene proficisci autumarunt. Hi vero humores omnino vellicant duodenum, ac sensibilem pylorum: unde facile subvertitur ventriculus, maxime, cum hæ partes ad inversionem motus peristaltici per se sint pronæ. 2) Scorbutici, quorum tota humorum massa spissa est, ac impura. 3) cachectici, quorum bilis vappida existit, nec dissolvendis penitus cibis sufficit: unde in iis vomitus magis bilioso viscidus fiunt. 4) Infantes, lac impurum, a matris excandescencia acidum factum fugentes; quibus frequentissimi sunt vomitus prassini, æruginosi, virides. 5) Febre quartana affecti.

§. XVIII.

4) assu-  
ta, qua-  
litate  
inimica.

Concitant porro vomitum assumta qualitate noxia. Sic cibi nimium pingues, horæi, fermentescibiles, maxime si saburra quædam biliosa in ventriculo

Hoff. Syst. Tom. V.

scateat, acriorem fermentationem subeundo, vomitum movent. Idem faciunt cibi ingrati cum fastidio assumti; eo magis, si nimium pingues ac oleosi fuerint. Huc quoque pertinent acria, ac principio subtili caustico prædita; sicuti sunt omnia vomitoria; nec non subjecta venenata, ova barbi piscis, de quibus conf. TIMÆUS a GULDENKLEE *Lib. 3. cap. 7.* nec non fungi venenati, quorum mentionem injicit HILDANUS *Cent. IV. obs. 34.* De venenis ipsis, arsenico, mercurio sublimate res notissima est; quippe quæ ob summe causticum principium, præter vomitus gravissima inducunt convulsiva totius corporis symptomata: id quod de vomitoriis atque purgantibus acrioribus etiam est statuendum.

§. XIX.

Non minus humor subtilis acris nervosis ventriculi partibus incumbens gravissimas excitat vomitiones. Transfertur ille nonnunquam per metastasin, a materia arthritica, erysipelacea, podagrica, scabiosa, ulcerosa, purpuracea, topicis intus acta, nec non a diarrhoeis ac dysenteris cohibitis. Sic nati ab ulcere præmature consolidato vomitus, exemplum recenset J. O. H. RHODIUS *Cent. 2. obs. 65.* & de podagra retropulsa, ad id vitii genus disponente casum allegavi in *CONSULT. MED. Tom. II. Sect. IV. cas. CLXX. pa. 690.* Eadem ratio est, quod in variolis, morbillis, febribusque malignis, ac exanthematicis, atrocissimi fiant vomitus: siquidem miasma horum morborum acre, & causticum, obsidendo nerveas ventriculi fibras, id mali infert. Hinc quoque arcessenda est gravissimi vomitus in peste causa; ubi dissecto cadavere HELMONTIUS lib. quem inscribit *tumul. pest. pag. 54.* ventriculum eschara obductum; & DIEMERBROECK *de peste Lib. IV. hist. 15.* eundem carbunculo occupatum, se vidisse perhibent.

1) Ma-  
teria  
acris  
per me-  
tastasin  
ad ven-  
triculū  
delata.

§. XX.

Cruor vitalis ad vasa ventriculi, & 6) San-  
adnexarum partium, majori copia gus



ad ven. congestus, ea graviter distendendo, vomitum producere solet. Hinc illi vomitum patiuntur 1) foeminae gravidæ, 2) primis gestationis mensibus; dum nimis mirum ob retenta menstrua cruor ad superiora regurgitat, qui grandescente foetu, in quibusdam post quartum mensem plerumque cessat: qualem notabilem casum allegat PETRUS LOTICHIUS *Lib. V. obs. 7. pag. 442.*

3) foeminae, quibus non fluunt menstrua. Sic PANAROLLUS *Sect. I. obs. 22.* meminit puellæ, quæ nondum menstruata, per septem integros annos, simulac cibos caperet, illos revomit, prodeuntibus vero menstruis, ab eo malo liberata fuit. 3) viri, quibus suppressæ sunt hæmorrhoides, ubi sanguis ad venam portæ majori copia refluit. Quibus in casibus non rarum quoque est, vomitum cruentum suboriri.

## §. XXI.

An car. dia vi- tiū vo- mitum produ- cat. Ipse ventriculus præter naturam constitutus, vomitum ciet. Primum quidem orificium istius superius, vel spasmus, vel alia causa præternaturali occlusum, similem parit affectum, qui vero non verus vomitus dici potest, & magis ad spasmum gulæ inferioris pertinet: siquidem cibi priusquam deveniant in ventriculum, cum muco in gula contento rejiciuntur. Similes casus videas apud WILLISIUM *pharm. rat. par. 1. sect. 2. cap. 1. pag. 17.* FERNELIUM *Lib. VI. pathol. cap. I. & COITERUM obs. chirurg. pag. 121.* ubi cardia scirrhus, & tuberculo duro obturata fuit.

## §. XXII.

Pylori vitium, fit caus. sa vo- mitus. Aliter se res habet cum pyloro, ex cuius præternaturali constitutione, ac obstructione, chronicæ, perpetuæque propullulant vomitiones: adeo, ut ferè regulæ instar sit, quod qui diu, maxime a sumtis epulis vomuerunt, simulque contabescunt, pylorum habeant male constitutum. Sic ipsum prædurum, ac ita incrassatum fuisse, ut nihil ciborum transmitteret, refert SANCHEZ *L. obs. p. 376.* Eundem scirrhus

sum prorsus describunt SALMUTH *obs. 20. cent. 1.* WILLISIUS *Pharm. rat. P. I. Sect. 2. c. 1. p. 55.* A. MED. BEROL. *Dec. II. vol. III. p. 45.* nigricantem & aromaticum MEIBOM *diff. de vomitu §. 31.* a deglutito nummo obstructum KERKINGIUS *spic. anat. obs. 1.* quibus in casibus ad finem vitæ molestæ vexarunt vomitiones.

## §. XXIII.

Sympathicus vomitus oritur primum ab irritatione tam esophagi, quam intestinorum. Hinc sæpius fit, ut a pluma vel digito, faucibus tantum intruso, & esophagi principium titillante, statim ventriculus, præsertim humorum copia onustus subvertatur. Deinceps conversi motus peristaltici initium profundius ab intestinis ordiri sæpius, & per consensum ad ventriculum propagari, docent vomitus a doloribus intestinorum colicis, torminosis &c. prognati, quo in casu ingens sepe numero humorum varii coloris & consistentiæ copia eructatur. Conf. HILDANUS *cent. IV. obs. 32. & 35.* et MARCELLUS DONATUS *hist. mirabil. Lib. IV. c. 3.* viginti saburræ libras, vomitu quotidie rejectas fuisse asserit. Ipse vidi in senibus herniosis, ubi ingens intestinorum portio prolapsa fuit, per plures annos insignem ac mirabilem amurcæ quantitatem quovis tertio vel quarto die, vomitu redditam fuisse.

## §. XXIV.

Tali ratione intestinorum vitio vomitus superveniunt 1) eorundem distensionibus a flatibus & fecibus, simile exemplum allegante DODONÆO *obs. med. 37. 2)* pertinaci colicæ spasmodicæ, teste experientia. 3) contumaci alvi obstructioni, uti fit in morbo spasmodico vago, in quo clysteres injecti una cum stercoribus per os redduntur. 4) in morbo ileo & herniis, 5) dysenteria, annotante PLATERO *observ. p. 875.* 6) vermibus, intestina ac ventriculum rodentibus. Vid. AMATUS LUSITANUS, *Cent. 1. curat. 5. cent. 3. cur. 20.* Ipse novi puellam septem annorum, quæ de inmanibus cardialgiis, convulsio-

Sympathicus vomitus origo a strictura intestini.

Vomitum a colicâ, ileo, hernia, vermibus.



ſionibus, continuisque vomitionibus conqueſta, tandem grandem per os excrevit vermem, & paullo poſt defuncta eſt. His in caſibus ſepenumero univerſalis motus periltaltici eſt inverſio; quæ ab inteſtino recto incipiens, ad fauces uſq; aſcendit, cunctaque inteſtinorum contenta per ſuperiora vehit, & expellit.

§. XXV.

**Vomitus a vitio ductuum biliferorum.** Per conſenſum quoq; gravis vomitio fit, a vitio ductuum biliferorum in hepate. Quemadmodum vero hi ductus, eodem ac inteſtina modo, & conſtrictivo, & dilatatorio gaudent motu: ita eorundem & præternaturalis conſtrictio, & nimia laxitas ad vomitum contribuit. Priori modo non modo ipſa bilis violenter in duodenum, & ex hoc in ventriculum, retrogado itinere exprimitur, hujus tunicas vellicat, & hinc revomitur; verum etiam ipſe dictorum canalium ſpaſmus, per plexus hepatici, & ſtomachici conſenſum, ad ventriculum propagatur. Poſteriori ratione per laxatos tubulos bilis nimia copia in duodenum effunditur.

§. XXVI.

**Vomitus bilioſus variæ cauſæ.** Reſpectu hujus cauſæ, vomitum movet 1) ipſa emetica, atque purgantia fortiora, quæ tam ventriculum, quam ductus biliferos in ſpaſmum agunt, qui bilem effundit in duodenum. 2) gravis iracundia, præſertim inter ipſum paſtum, quæ etiam ab iracunda matre, ad inſontem infantem, ubera trahentem, pernicioſum edere valet effectum. 3) in ipſa febre tertiana ob ſpaſmum primarum viarum, vomitus bilioſus cum euphoria fit. 4) nec non in cholera, febribuſq; bilioſis. 5) in malo hypochondriaco, ubi ſpaſmi viarum primarum urgent. 6) denique calculi veſicæ felleæ, aut concrectiones bilioſæ in illa, ſpaſmum excitant, bilioſos vomitus producentem: quales notabiles caſus in M.N. C. anno VI. dec. I. obſ. 20. & SCULTE-TO armament. obſ. 61. exſtant.

§. XXVII.

**Vomitus a calculo.** Nihil eſt familiarius, quam quod nephriticos & calculoſos affectus comi-

tentur naſcea, vomitus, & tormina inteſtinorum: eo magis ſi calculi hæreant in ſenſibilibus ureteribus, aut etiam renibus, quales obſervationes legi poſſunt apud BONETUM *ſepulch. obſ. 60.* Ita memini celebrem Medicum & Botanicum hujus loci ſexagenarium ex calculo in medio ureteris ſiniſtri firmiſſime hærente & impacto per trimeſtre ſpatium continuis vomitionibus cum ciborum ſaſtidio perſeſverantibus, ſubſe- quente tandem virium collapſu & corporis contabeſcentia, ante quindecim annos mortuum: aliquot ſeptimanis ante obitum de corrupto & foetido materiæ, quæ ejiciebatur, odore & ſapore querebatur, ipſe exiſtimans, urinum laticem, qui parcius reddebatur, eſſe permixtum. Frequentiſſime etiam fit, ut a ſpaſmo ventriculi & inteſtinorum ſilentes hætenus nephritici paroxyſmi reſuſcitantur. Ratio in promptu eſt: Namque dum ren ſiniſter per ſuum plexum nervoſum, interventu meſenterici ſuperioris cum ſtomachico cohæret; dexter autem per ſimilem plexum immediate cum hepatico, & ſtomachico connectitur; & inſuper duodenum hujus renis involucris firmiter junctum ſit: facile patet, cur quidem utriuſq; renis, dextri tamen præ ſiniſtro ſpaſmi vomitum, ſepenumero bilioſum, tamq; vehementem moveant, quantum vix præſtiterit emeticum. Notabilis hunc in finem eſt obſervatio, quam MEIBOMIUS *diſſ. de vomitu §. XXVII.* recenſet, quod calculi renibus impacti primum horrendos induxerint vomitus, hiſque ceſſantibus tantum œſophagi concitaverint ſpaſmum, ut quaſi exilire ex ore quid videretur.

§. XXVIII.

Vomitum quoque per conſenſum fieri comites affectuum capitis, docuit jam HIPPOCRATES, dum *Lib. VI. aph. 50.* Quibus, inquit, *diviſum eſt cerebrum, hiſ febre, & bilioſum vomitum ſupervenire neceſſe eſt:* & in *Coac. prænot. cap. 3. §. 3. i.* quibus *cerebrum vulneratur, febris plerumque ac bilis vomitus accedit.* Et notum eſt unicuiq; chirurg-



gorum, capitis ac cerebri, hujusq; membranarum, inflammationes, vulnera graviora atque contusiones, vomitum sequi: neque minus idem accidit, gravioribus partium nervosarum capitis spasmis, uti cum primis in atroci illo dolore capitis, quem clavum vocant hystericum; in rebelli cephalalgia, hemicrania, vertigine, apoplexia spasmodica &c. Quæ omnia per consensum, quem ventriculus vi paris nervorum vagi, cum capite fovet, contingunt: cujus etiam cum pari quinto connexio in causa est, quod vomitus excipiant difficilem dentitionem.

## §. XXIX.

Vomitus a causa externa.

Ad externas magis causas, quæ ventriculum comprimendo, ac irritando, vomitum movent, referri meretur mucronata cartilaginis depressio: quales casus BARBETTE *anat. Lib. 1. c. 4.* & DECKERUS *prax. Barbet. p. 126.* recenset. Hanc ob causam virgines etiam, quæ rigidis illis lignis, quæ Planchette dicunt, sua præcordia coarctare solent, ad vomendum sunt faciles. Huc quoq; pertinet vomitus imaginarius, qui ex visis, aut tantum auditu perceptis ingratis rebus suboritur. Non minus hoc loco commemoranda vomitio est, quæ a frigore extrinsecus ventriculo admissa nascitur: item quæ a motu corporis vorticoso, & in navi a non assuetis instituto proficiscitur.

## §. XXX.

Vomitus criticus.

Datur vomitus criticus, quando scilicet causa materialis, quæ ipsum produxit, ipso vomitu eliminatur, qui valde salutaris est, & interdum observatur in iracundis, & cachecticis cholericis; nec non in febribus & intermittentibus & acutis, circa dies potissimum judiciales. Hæc enim ratione ventriculus, duodenum, vasa hepatis biliaria, pancreas & intestinorum canalis atque glandulæ a succis & humoribus vitiose ibidem collectis expurgantur, qui alias massam sanguineam ingredientibus, varia inferre possent mala, quæ ab istis foras projectis timenda non sunt. De tali salutaris vomitu egregia sunt, quæ habet

Celsus *l. 1. cap. 111.* vomitus utilis est plenis & biliosis omnibus, si vel nimium se replerunt, vel parum concoxerunt. Nam si plus est, quam quod concoqui possit, periclitari, ne corrumpatur, non oportet; si jam corruptum est, nihil commodius est, quam id quæ via primum expelli potest, ejicere; itaque ubi amari ructus cum dolore & gravitate præcordiorum adsunt, ad hunc protinus confugiendum est.

## §. XXXI.

Causarum diversitatem produnt concurrentia signa. Pituitosi vomitus, cum dolore circa ventriculum gravati-  
vo, cruditates in primis viis hærentes, indicant biliosi chronici, & periodici, nimiam ductuum biliferorum laxitatem significant: chronici per multos annos durantes, cibos semicoctos simul eructantes, visceris cujusdam læsionem ac scirrhum portendunt. A calculo subortum vomitum colligimus ex juncto in regione lumbari dolore, cum urinæ imminuto fluxu, & sabuli excretionem. Complicati vero vultus pallores, intestinorum dolores ac rosiones, cum frequenti sputatione, nariumque pruritu, vermium suspicionem movent. Ceterum judicio opus est, ut ex aliis, quæ concurrunt, symptomatibus veram vomitus causam exploremus: quoniam hac latente, palliativa tantum conceditur curatio.

## §. XXXII.

Omnis critica vomitio salutaris; symptomatologica, mala, & ab acrimonia subtili caustica, nervos vellicante, pessima. Omnis vehementior vomitus, periculo non vacat: movere enim potest abortum, excitare herniam, & non sine noxa ad retropulsionem materiæ arthriticæ, podagricæ, ac erysipelacæ disponere. Inde ruptum esse omentum perhibent ACT. MED. BEROL. *dec. II. vol. III. p. 33.* ipsumq; ventriculum lacerari, auctor est SANCHEZ *obs. pract. pag. 376.* Biliosus vomitus, maxime virides, porracei, æruginosi, metu periculi terrent, & inflammationem

Prognosis.



minantur. Vomitus qui fit a vermi-  
bus, ventriculum arrodentibus, ple-  
rumque perniciosus: lethum pranun-  
ciat, quando lumbricus mortuus ejici-  
tur & antea gravissima symptomata &  
atroces artuum convulsiones simul &  
semel cessant, quod evenit si sphacelus  
superveniat a quo etiam vermes ene-  
cantur. Omnis quoque foetidus vom-  
itus, quia internam corruptionem in-  
dicat, mali ominis est. Sebaceus corrosi-  
vi acidi humoris copiam, qua pingua  
coagulantur, in ventriculo generari &  
plerumque intolerabilem ardorem seu  
fodam parere indicat.

Ubi ingens crassi instar bovinæ bilis  
bruno colore tincti humoris copia ad  
libram dimidiam vel unam vel sponte  
vel arte evomitur, quod non raro  
in lentis febribus accidit, primum a  
ventriculo intestinum magna atonia  
adfectum esse, certum est indicium.

Vomitus ultra semestre spatium vel  
amplius continuus cum lento æstu &  
corporis extenuatione haud incertam  
ulcerosi ventriculi suspicionem alit, qua-  
lem casum ante quinquaginta annos,  
cum Minde Westphalorum artem exer-  
cerem, vidi & observavi dissecto post  
mortem corpore.

### Methodus Curatoria.

#### §. I.

Indica-  
tiones  
curato-  
ria.

**Q**uemadmodum vomitus criticus,  
quo humores copiosi varii gene-  
ris rejiciuntur, salutaris est, &  
nullam exigit fere curationem, ut po-  
tius promoveri nonnunquam debeat:  
ita symptomaticus, qui removendæ  
causæ scèpius est minus accomodatus  
ac sufficiens, tanto magis sollicitam &  
providam exigit curam. Et hæc binis  
potissimum absolvitur indicationibus,  
ut scilicet primum convulsivam illam,  
ac effrænem ventriculi motionem pro-  
vide consopiamus; & deinceps causas  
materiales oppugnemus, iisque me-  
deamur.

#### §. II.

Primæ indicationi satisfaciunt antif-  
pasmodica, roborantia, anodyna a-  
lenioribus ad fortiora ascendendo. Sunt  
ejusmodi remedia crocus & castoreum  
in pulveris, essentiæ pariter, ac ex-  
tracti forma; theriaca cœlestis, cum  
pulvere succini & absorbentibus, cor-  
nucervi, cancerorum oculis, & coralliis  
rubris maritata. Ex his confecti pulve-  
res, cum aquis spirituosus ac vinosus, qua-  
les sunt aqua florum tilia, liliorum con-  
vallium, chamomillæ, melissæ, men-  
thæ, ceraforum nigrorum, cinamomi  
&c. non sine singulari fructu adhiben-  
tur. Inter roborantia laudem merentur  
nux moschata, flores macis, cardamo-  
mum, cinamomum, costus verus, caryo-  
phylli, cortices citri, & aurantiorum,  
radices gentianæ rubræ, calami aroma-  
tici, galangæ, herba majoranæ, ro-  
rismarini &c. & ex his parata olea pa-  
riter ac essentiæ. Omnibus vero in hoc  
malo appropriatis & specificis mentha  
crispa palmam præripit: nam ex ea  
paratum genuinum oleum mirifice &  
sedandi & roborandi fine omnibus fe-  
re medicamentis potest admisceri. Ex  
anodynis efficacem non minus ac per-  
quam tutam virtutem liquori meo  
anodyno tribuere possum, maxime si  
cum balsamo vitæ meo permisceatur.  
Et si denique potentioribus opus  
fuerit anodynis; in usum vocari pos-  
sunt pilulæ de styrace, Wildegansii  
& Laudanum Sydenhamii liquidum.

Quæ  
motus  
ventri-  
culi  
con-  
vulsi-  
vos so-  
pian-

#### §. III.

Ubi hæc adhibentur, non sine fru-  
ctu conjungi possunt, topica regioni e-  
pigastricæ admovenda, quæ motuum  
ferocitatem aliquantulum coercendi  
vim habent. Quo nomine commenda-  
ri merentur, olea destillata roborantia  
menthæ, caryophyllorum, nucistæ, ab-  
synthii, macis, de cedro &c. cum bal-  
samo Peruviano in unguentum redacta,  
nec non epithemata, ex spiritu matri-  
cali, theriacali, aqua reginæ Hungariæ,  
essentia croci, & cataplasma ex Spiritu  
vini camphorato, fermento panis  
aceto

Exter-  
norum  
usus.



aceto vini acerrimo, balsamico Peruviano additis aliquot olei macis & menthæ guttulis confieri possunt. Non levioris virtutis est emplastrum de crusta panis, cum balsamo Peruviano, & una alteraque olei cujusdam destillati guttula malaxatum: quibus denique superimponere decet sacculos calidos & resolventes & roborantes. Perquam utile etiam est nostrum vitæ balsamum, præcordiis & regioni epigastricæ illitum.

## §. IV.

*Vomitus pituitosus curatio.* At vero ludetur utique omnis opera, si his solum utamur, nec ad causam materiale[m] tollendam simul respiciamus. Vomitus itaque qui dicitur, pituitosus, & a cruditatibus primarum viarum, hisque impacto muco viscido dependet, optime curatur ipso vomitu, maxime si ille ad eliminandam penitus saburram non sit sufficiens, & magis molesto vomendi conatu, nausea ac cardialgia vexat. Tunc enim præmissis incidentibus, ac digestivis, ut salibus neutris, radice ari, & cumprimis squillæ, succurrendum est leni emetico, quale constituit aqua tepida, butryo infuso permixta, & copiose hausta; vel etiam radix hypecacuanhæ in pulvere propinanda. Infantibus vero ex lacte congrumato, vel meconio intra finem ventriculi contento vomituri-entibus, convenit oxymel squilliticum, cum syrupo de rhabarbarino mixtum exhibere.

## §. V.

*Cura vomitus biliosi.* Biliosus vomitus, qui a digestionelabefactata proficiscitur, & fomitem suum in duodeno habet, præter absorbentia & blanda laxantia mannata ac rhabarbarina, perfectam admittit sanationem, ex instauratione roboris ventriculi ac intestinorum: quam remota sensim saburra, Elixir nostrum viscerale, diutius, & cum conjuncta recta vivendi ratione, & corporis exercitatione usurpatum, feliciter præstabit. Et uti hoc biliosi vomitus genus chronicum est; ita magis acuti, & sepius fontici eventus est illud, quod a

vehementiori ventriculi ac ductuum biliferorum spasm[o], ab iracundia concitato, originem trahit. Tum convenit bilis acrimoniam diluentibus, acidulis remediis, spiritu nitri dulci, ac vitrioli, absorbentibus, ebore fassili, cancrorum lapidibus &c. contemperare; spasmodicos vero motus blandis antispasmodicis ac ano-ynis delinire; junctis evacuandi fine, potiunculis rhabarbarinis. Ubi vero subest coagulum aut calculus felleus, ei resolvendo non est præstantius subsidium thermis Carolinis, aut acidulis quibusdam tepide adhibendis. Ubi nimia vasorum biliarium laxitas vomituum chronicorum causa fuerit; conducunt roborantia, ex quibus palmam obtinent cortex chinæ, cascarillæ, essentia gentianæ, & tincturæ martiales, in aquis vinosis propinandæ.

## §. VI.

Qui ab acri materia, nervis ventriculi insidente suboritur vomitus, & a retropulsa podagra, arthritide, aut intus acto erysipelate natales mutatur: præter blanda sedantia, & motus expulsionis materiæ minus proportionatos coercentia, exanthematicæ materiæ revocationem exposcit. Hanc obtinere licet, dato pulvere diaphoretico, qui sanguinis motum una cum peregrina materia foras educit, eo felicius, si refracta camphoræ dosis ipsis addatur, & externe clysteres, frictiones, & pediluvia conjungantur. Ubi venena, vel venenati cibi malum produxerunt, nihil certius auxilium præbet, quam largissimus lactis, & pinguium potus, mox ab initio porrigendus; quo & spicula veneni obtunduntur, & hoc una cum liquido vomitu rejicitur. Hinc multis etiam medicis in more est positum, ut vomitum, qui in peste, febribusque malignis a miasmate, tunicas ventriculi stimulante concitatur, data cum potu tepidiori sufficienti radice Ipecacuanhæ adgrediantur, tumque acida cum diaphoreticis maritata exhibeant; sed cave, ne vomitum hoc in morbo concites, si

*Vomitus ab acri, venenata materia subortitur curatio.*



jam inflammatio ventriculi præsto fuerit.

§. VII.

**Vomitus a faburra** Sæpius faburra acris, acida, biliosa ad intestinorum volumen devoluta cum colicis doloribus vomitum excitat: quo in casu oretenus exhibere convenit 1) diluentia ac demulcentia, decoctum avenæ, cornucervi, serum lactis, vel oleum amygdalarum dulcium ad aliquot cochlearia; 2) antispasmodica, ex quibus liquor anodynus mineralis cum aliquot guttulis olei macis veri maritatus, & cum aqua frigida exhibitus, omnibus palmam reddit dubiam; potest quoque Laudanum Sydenhamii in usum trahi; Atque etiam Spiritus vitrioli rectificatus vel solus vel cum Liq. anodyno mixtus & cum aqua frigida propinatus, idoneum in vomitu, si temperamentum est cholericum, remedium existit: 3) blanda laxantia, quæ inter clysteres cunctis reliquis palmam eripiunt, junctis oretenus manatis, rhabarbarinis, vel etiam salibus thermarum solutis. Clysteres ex solo lacte parati, in vermium præsentia sunt convenientissimi: quibus etiam obviam eundum est solventibus amaris, atque laxantibus mercurialibus, si modo sub horum usu sufficiens lac aut oleum amygdalarum exhibeatur.

§. VIII.

**Præservativa methodus** Præservativa methodus locum habet maxime, ubi ex nimia primarum viarum laxitate, cruditatum perpetuus fit proventus, & inde periodicæ eveniunt vomitiones. Tum regio ventriculi pariter, ac dorsi circa primam lumborum vertebra, cui per ligamentum quoddam annectitur ventriculus, ab omni frigore munienda est. Cibi saliti, acidi, crudi, infumati, dyspepti studiose vitari; nec pro potu cerevisia, sed decoctum quoddam conjuncto vini veteris generosi, potissimum Burgundiaci usu, adhiberi debent. Nocet quoque nimius somnus; magis vero utilis est moderata corporis exercitatio. Ad tempus sub epulis, Elixiriis viscerali-

bis uti; nec non balnea martialia, & remedia liquida ex marte parata usurpare expediet. Et denique per vices blando laxante canalem alimentarem purgare juvabit.

Cautelæ, practicæ.

§. I.

**V**omitiones, materia nondum remota, adstringentibus & anodynis sistere velle, perniciosissimum est; sopitis enim motibus, graviora succedunt symptomata, magnæ præcordiorum anxietates, cardialgiæ, inquietudines &c. Quam obrem roborantibus etiam ante excretionem materiæ datis, plane non cedere solet vomitus. Locum hæc remedia tantum habent, ubi motuum magis vitium subest; nec amplius peccat materia, sive inter motum & materiam nulla est proportio, vel si hæc paulo subtilior, parcaque mole peccaverit, & motus vomibundi sint vehementiores.

§. II.

Hinc si vomitus in infantibus præsertim ac pueris a tussi ferina convulsiva, ob consensum, quo ventriculus cum septo transverso pollet, provocatur: tunc omnino expedit sedantibus ac anodynis illum coercere. Cui scopo serviunt syrupus papaveris albi, & rhæadus, extractum croci, oleum amygdalarum dulcium cum spermate ceti permixtum, nec non pulvis Marchionis, cum succino, cinnabari, & uno alterove grano theriacæ cœlestis datus utilissimus erit. Extrinsecus alvo infundi possunt clysteres; & pectus, atque regio epigastrica inungi linimento, quod habeat butyrum majale viride & rubrum, axungiam taxi, vulpis, pinguedinem castorei, & pauxillum olei hyoscyami.

§. III.

Vomitibus gravidarum ex regurgitatione sanguinis ad ventriculum, qualis etiam in puellis, foeminisque a menstruorum retentione, & in viris ab hæ-

Cautela circa sedantia, & roborantia.

Vomitus a tussi convulsiva provocati curatio.

Curatio vomitus a congestione hæ.



ne fan- hæmorrhoidum suppressione oritur ;  
guinis temperantibus ; blandis laxantibus ;  
ad ven. clysteribus ; roborantibus ; & optime  
tricu- venæsectione , aut excretionum debita  
lum. revocatione , profligari potest . Eme-  
tica his in casibus data veneni instar  
sunt , & vel cruentam movent vom-  
itionem ; vel , uti mihi aliquoties vi-  
dere licuit , inflammationem ventricu-  
li caussantur funestam .

## §. IV.

Emetica Biliosus vomitus , qui post iracun-  
post ira- diam , maxime inter pastum movetur ,  
can- cum spasmo præcordiorum , caute tra-  
diam etandus , curatio potissimum ad rela-  
pessimi xandum spasmum dirigenda est . Multis  
sunt ef- in hoc casu familiare est , vomitoria  
fectus. vel purgantia propinare ; sed etiam at-  
que etiam omnes sinceros hortor medi-  
cos , ut ab his summopere abstineant  
remediis . Funesta enim non raro ex il-  
lis observavi symptomata , ac lethalem  
sæpenumero ventriculi inflammatio-  
nem : quod prolixius olim in disserta-  
tione de vomitorio post iram veneno  
deduxi .

## §. V.

Vomi- Quando conatus ad vomendum , quin  
tionum ipse vomitus circa tempus matutinum  
matu- invadit , qui frequens esse solet iis , qui  
tima- nimis spirituosus potibus , præsertim  
rum circa somni tempus utuntur : tum &  
cura- pulveres præcipitantes , acidam crudi-  
tio. tatem involventes & ea , quæ digestio-  
nem roborant , ut pulvis stomachalis  
BRICKMANNI , conditi cortices  
citri ac aurantiorum &c. conveniunt .

## §. VI.

Vomi- A diuturno mœrore si chronicus ,  
tus quem aliquoties observavi , certis in-  
chro- intervallis enascitur vomitus : præstan-  
nici a tissimum auxilium deprehendi in ana-  
mœro- lepticis & maxime omnium in balsa-  
re cura- mo meo sic dicto vitæ , ejusque inter-  
tio. no pariter ac externo usu , præsertim si  
æquali portione cum liquore anodyno  
combinetur . Non minus proficit bal-  
samum embryonum , aqua cinamomi  
cydoniata , ac vinum generosum .

## §. VII.

Quando vomitus , tanquam sympto-  
ma paroxysmis febrilibus jungitur , Vom-  
tus fe-  
brilis  
cura-  
tio.  
quod pluries evenit in quotidiana &  
simplici & duplici : convenit , si nihil  
contraindicet , lene emeticum propi-  
nare . In variolis & morbillis facta e-  
ruptione critica sponte cessat & mixtu-  
ra ex aquis destillatis , succo limonum  
vel citri , & sale absynthii concinnata  
egregiam quandoque operam præstat ,  
quæ etiam in tertianis , suo usu haud  
caret .

## §. VIII.

Ex calculi dolore obortum vomitum Vom-  
tus a  
calculi  
lo cu-  
ratio.  
instar omnium , liquor meus anodyno  
mineralis , vel spiritus nitri dulcis be-  
ne præparatus sedat ac consopit . Con-  
veniunt quoque clysteres oleosi , balnea  
aquæ dulcis , nec non oleum amygda-  
larum dulcium , interne sumtum ; at-  
que antispasmodica . Vomitus hernio-  
forum , ac iliacorum raro remittit , ni-  
si emolliatur atque reponatur tumor  
herniosus .

## §. IX.

Equidem HIPPOCRATES l. 6. E- Ubi  
pid. vomitum vomitu curari scribit ; vom-  
tus vo-  
mitu  
cure-  
tur.  
quia vero alias contraria contrariis cu-  
rantur , nonnulli medicorum hoc di-  
cto similia similibus curari posse exi-  
stimant . Sed error est : si enim vom-  
itu curatur , etiam per contraria fit sa-  
natio : nam sæpe iste fit a vitiosa hu-  
morum ibi stabulante saburra & male  
concoctis in ventriculo succis , quos na-  
tura extrudere sua sponte molitur .  
Quod si non sufficienter valet præstare ,  
arte adjuvanda . Quapropter monen-  
di sunt tirones practici , ne hoc dicto  
abutantur , vel illud perperam appli-  
cando obsint . Nam pessime peccare  
posset , qui ubi acris caustica materia  
ventriculi tunicis inhærens , vel sanguis  
in vasis stomachi stagnans vomitus  
causa esset , eum vellet arte præsertim  
paulo activioribus proritare .

## §. X.

Ad vomitum nimium sedandum Quies  
sedat  
vomit-  
tum  
plurimum juvat in lecto jacere & quie-  
scere ; nam corporis commotio protu-  
nus



nus cum irritat & auget : quæ observatio in praxi multum usus atque utilitatis adfert .

§. XI.

Vomitus febrilium exanthematicarum.

In febrilium exanthematicarum principio e. gr. pestis, erysipelatis, variolarum natura sæpius molitur vomitum, qui neutiquam sisti vel adstringentibus tractari debet : tum utilia sunt, quæ leniter cuticularem excretionem procurant : nam ubi exanthemata in corporis superficie apparere incipiunt, sponte vomitus cessant.

§. XII.

Vomitus hysteriarum.

Vomitus hysteriarum contumaces non repente debent cohiberi per medicamenta opiata vel adstringentia : vidi vehementes artuum convulsiones & miras præcordiorum anxietates successisse : quibus cessantibus vomitus redibant.

§. XIII.

Vomitus a ventriculi debilitate.

Ubi vomitus frequentiores stomachum infestant, eumque infirmum reddunt, ciborum & diætæ exacta est habenda ratio : præstat parum cibi & tantum idonei, concoctu facilis, sed crebrius assumere : quibusdam lac dulce cum pane candido confert, sed non omnibus : potum aquæ fontanæ purioris & frigida ad firmandum stomachum & a vomendi consuetudine præservandum plus, quam aliud potus genus conferre, experientia edoctus asseverare possum. Vinum Gallicum dictum Pontack generosum & adstringens, item Burgundiacum præ aliis & maxime vino Rhenano, quod hypochondriacis præsertim minus utile, eligendum est : juscula ex carne assa meliora, illis quæ ex elixa parantur.

§. XIV.

Vomitus curatio a repressa arthritide aborti.

In morbis ubi natura motu quodam salutari critico in infesto humore ad corporis superficiem propellendo occupata est ; sicuti evenit in arthriticis, erysipelaccis affectionibus, cautissime externa sunt applicanda, & inter hæc præcipue camphorata. Vidi non semel a spiritu vini camphorato, certis in casibus utilissime applicato, corporibus

infirmis podagra, hepatitide, pleuritide spuria, quæ etiam rheumatismi species sunt, relegata inde materia nocente ad ventriculi & intestinorum nervas tunicas vomitus, & cardialgias singultuosas summe anxias, inde orta fuisse. Quo casu si quis imprudenter adstringentibus & opiatis vomitiones sistere, vel purgantibus vitiosam materiam per alvum depellere velit, is profecto quam facile in corporibus infirmioribus lethalem inflammationem inducere poterit.

§. XV.

Immoderatio & diuturnior gravidarum vomitus, qui prioribus maxime mensibus fit, præsertim in iis, quæ tum veneris usum nimium indulgent, & plethoricæ sunt, sanationem per spirituosam, stomachum roborantia, vel adstringentia, aut opiata minime recipit. Sed iteratas sanguinis missiones intalo & quietem animi & corporis exigit. Ego potu aquæ fontanæ purioris frigida, plus in eo si nimius est, & abortum minatur, sopiendo quam aliis remediis præstiti. Quando vero analepsi opus est, unicum cochlear aquæ cinamomi cydoniatæ a cibo sufficit.

Cura-  
tio vo-  
mitus  
gravi-  
darum.

Enarrationes morborum.

OBSERVATIO I.

**V**ir triginta circiter annorum, iracundia supra modum indulgens, jam aliquot abhinc annis, magnis imiventris torminibus, vomitione plerumque stipatis agitatus fuit. Laxantia, & cum primis pilulæ polychrestæ consopierunt quidem semper hoc malum ; sed ex levi causa iterum recrudit. Et per novissimum semestre sævi in umbilicali regione dolores, cum gravi cardialgia, atque acidis vomitibus quotidie ferme invaserunt ; adeo, ut licet interdum per unum, alterumque diem conquiescerent, paullo tamen, post eo acerbius infestarent. Vomitu primum reddebantur ingesta minus digesta, post vero humores acidi, pontici,

Vomi-  
tus ca-  
checti-  
cus.

flu.



stuporem dentium, ardoremque faucium inferentes eructabantur: quid? quod niger interdum vomitus magna in quantitate exciperet. Cunctis vomitu rejectis, levabantur dolores; hinc vero sumtis iterum cibis, statim redibant cum borborygmis, & fluctuatione abdominis conjuncti. Alvus subinde semper erat clausa, nec nisi suppositoriis laceffita respondebat; & urinæ parum mehebatur. Si vomitio per aliquot successively dies urgebat, lecto prorsus affixus erat miser: contra vero vomitibus per quosdam dies silentibus, mox recuperabat vires, & magno fruebatur adpetitu. Tandem accedebant oedematosi pedum tumores, & abdomen infra umbilicum durum erat tensumque. Quo in rerum statu me accedebat, meamque anxius flagitabat opem. Ego nihil boni suspicatus, præter pulverem absorbentem, ordinavi blanda laxantia, & Elixir viscerale balsamicum: quod, licet primum levamen ferre deprehenderetur, paullo tamen post justo videbatur calidius. Hinc filum curationis abrumpebat, & mali sui majora indies persentiscebant incrementa.

#### Epicrisis.

1) Quoniam in præsentī affectu urina parcius redditur, alvus obstructa est, vires consumptæ, abdomen durum tensumque, & pedes tumidi sunt: justissime accusatur cachexia, in tympanitidem, vel hydropem ascitem vergens, & vomitus conjunctus recte vocatur cachecticus.

2) Tale malum suam originem a tono ventriculi & intestinorum prorsus dejecto & inverso repetit; nec paucam læsi hepatis aut lienis suspicionem movet. Hinc enim fit, ut primum omnium languescat digestio, qua cibi assumti mox indigesti redduntur, aut in cruditates viscidas, acidas, & a permixta bile, quæ stagnando iners redditur, nigras dehiscunt: quæ accumu-

latæ tormina intestinorum pariunt, tumque vomitum rejiciuntur.

3) Neque enim adpetentia, quæ sub vacuitate vomitionum gavifus est eger, a naturali ventriculi robore, atque vigore suos mutuatur natales; sed non nisi ab acidis primarum viarum cruditatibus derivanda est.

4) Si consulamus experientiam, deprehendemus, rarius convalescere cachecticos, vel etiam hydropicos, qui omnia ingesta, sive sint alimenta, sive medicamenta ore rejiciunt. Namque ex alimentis nihil omnino retinetur, aut sane parum, & ne hoc quidem, quod in chylum commutatur, ob bilis ac liquoris fermentativi inertiam, motusque peristaltici debilitatem, in succos generosos ac spirituosos transire potest. Inde vitales humores acres redduntur, ac sicciore, motuque intestino assidue perennante magis atteruntur: quamobrem calor tandem hecticus, ingens languor, & debilitas corporis, tabes, ac ipsa denique mors sequuntur.

5) In tali rerum statu, est quidem omnino medelæ locus, ubi nondum invaluit malum: quando vero atonia nimias jam cepit vires & viscerum quædam læsio accessit, frustranea certe est ac irrita omnium medicaminum efficacia. Tum enim nec thermæ, quæ alias in ejusmodi morbis, adhuc recentibus tollendis sunt efficacissimæ, tuto adhiberi possunt; tantum abest, ut earum usu hydropem, atque mortem magis acceleremus, quoniam debilitas partium solidarum impedimento est, quo minus hausta aquarum moles iterum excernatur.

#### OBSERVATIO II.

Virgo viginti annorum, vitæ sedentariæ addicta, & potu pariori, more <sup>Vomitus post nimias alvi dejectiones.</sup> sequiori sexui solemnī usæ, ob menstruum minus ordinatum fluorem, sumpsit aliquando per quosdam successive dies infusum purgans, quod folia Sennæ sine stipitibus, helleborum nigrum,



grum, polypodium, herbas uterinas, cephalicas, & species aromaticas habebat. Inde alvum quidem copiose deiecit: ut quum absoluta potatione, ira exardesceret, paulloque post fructus horæos ingurgitaret, prehendebatur enormi vomitu. Hic enim per plurimos dies contumaciter insistebat, & assumpta quævis, alimenta pariter, ac medicamenta eructabat; languentibus sensim viribus, & alvo existente obstructa. Quare consultus ego injiciendos curavi clysteres emollientes, cum liberaliori salis communis dosi, stimuli loco remixtos; & regioni præcordiali imponendum chartæ bibulæ, balsamo vitæ mea imbutum frustum. Intrinsecus dedi pulveres temperantes ex lapidibus cancrorum, nitro, pauxilloque theriacæ cœlestis compositos; hosque cum liquore anodyno alterinari jussi: quibus obtinui, ut paucio tempore hæc adfectio molestissima cessaret.

#### Epicrisis.

1) Notari in hoc casu meretur, quod alvi dejectiones a purgante concitatas, enormes exceperint vomitiones. Fieri hoc solet in ejusmodi potissimum subjectis, quæ impuros succos, & præsertim copiosam in hepate collectam fovant bilem; quippe quæ, si vita sedentaria, potus parcior, ac mensium defectus accesserint, ad vehementes tam per alvum, quam vomitum excretiones, valde sunt proclivia; longèque magis si levis irritatio, vel per sumtum purgans, vel vomitorium, vel excandescientiam, vel etiam cibos fermentescibiles facta fuerit. Tum enim fit, ut non modo contenta ventriculo & intestinis actu in hærentia rejiciantur; verum etiam colluvies vitiosorum humorum ex toto corporis habitu, ad adfectam partem ruat, ibidemque subtiliorem ferosam portionem dimittat.

2) Idem contigit in nostro casu: postquam enim infuso laxante alvus nimium irritata fuit; hujus excretionem

cessante, remansit utique aliqualis ventriculi ac intestinorum debilitas. Quam itaque gravis paullo post accessit iracundia, cujus vis in spasmotica primarum viarum strictura consistit; ac subinde fructus horæi assumti fuerint: hi, adaugendo motum fermentativum, stimularunt nervosas ventriculi tunicas. Unde non solum intestinorum peristalsis, testante alvi obstructione, inversa; sed omnis fere ex toto corpore humorum motus ad ventriculum directus est: quare non potuit non contumax ac diuturna insistere vomitio.

3) Quod si igitur tali in casu, injectis clysteribus, & hinc procurata alvi deiectione, humores a ventriculo derivemus; biliosam hujus saburræm datis temperantibus obtundamus; effrænes motus, exhibitis blandis anodynis consopiamus; & adplicato extrinsecus balsamo vitæ debilitatum ventriculi robur instauremus: vix fieri potest, quin brevi tempore nostris votis potiamur.

#### OBSERVATIO III.

Vir obesus, quinquaginta annorum, corpore aliquando insigniter calefacto, frigidum copiose ingerebat potum, ipsumque ventriculum frigidiori exposebat auræ: unde statim vehementer debilitatus, adpetitu dejiciebatur, æstu præter naturali urebatur, & assiduis torquebatur vomitionibus. Has medici coercere molientes, propinabant remedia adstringentia, opiata, & electuaria ex conserva rosarum, hæmatite, spirituque vitrioli parata. Verum crescebat magis malum, & per sex durabat hebdomades; tum enim vires prosternebantur, corpus contabescibat, frigoreque percellēbatur, continuus circa ventriculum vexabat dolor; alvus contumaciter adstricta nihil ferme reddebat, & urina, quæ primum flammea erat, clara limpidaque sine sedimento mingebatur. Data nervina & anodyna ad tempus sistebant vomiti-

Vomit-  
tus in-  
cōgrue  
tracta-  
tus le-  
thalis.



vomitum; sed mox sequebatur insignis præcordiorum anxietas, non nisi a recurrente rursus vomitu mitigata: injecti etiam clysteres hunc revocabant. Quare ad sudorem eliciendum, exhibebatur infusum calidum herbarum mentharum, mastichis, ac cinamomi: at ejus ne guttula quidem promanabat, licet antea magnam sudandi proclivitatem habuerit. Adaugebat potius hoc infusum vomendi vehementiam; accedebat vertiginosa molestia, atque tandem mirum in modum emaciatus, transactis sub hoc malo duodecim hebdomadibus, animam exspirabat.

#### *Epicrisis.*

Nihil est, quod tam vehementer & tam subito naturalem ventriculi functionem, motumque & tonum valet destruere, ac valde frigidus potus, corpori calefacto & sudore diffuenti copiose ingestus; utpote qui sanguinem in ventriculi vasis mox coagulat, ejusque liberum progressum sistendo, per multa & horrenda, quæ innumeris mihi constant exemplis incommoda; producit. Inde enim spastica & anxietas circa præcordia stricturæ & angustiarum, nausea, inappetentia, vomitiones, phlogoses, & exastuationes sanguinis molestæ succedunt; quæ nisi convenienti medicina arceantur, vel cito in inflammationem vel in exulcerationem, in hæcticam febrem transeuntem, uti in nostro casu factum, terminantur. Ex eo jam liquido patet, quam imperite & imprudenter medici illi agant, qui mali originem non attendendo, crebras vomitiones & dolores adstringentibus & opiatis compescere volunt; cum potius, ubi talis subest causa, quæ cruorem fundendo & resolvendo, liberiores sanguinis per vasa circuitum promoveant, convenientia remedia & interne & externe cito admovenda sint. Tanta fuit in nostro agro spasmi in ventriculo violentia, ut valde remotas etiam nervosas partes, vias nempe urinarias, corticem corporis cutaneum

& opticos in cerebro nervos in consensum sive similem spasticum motum pertraxerit. Verissimum enim HIPPOCRATIS est dictum: Ventriculi confusio omnium confusio.

#### OBSERVATIO IV.

Generosus vir triginta annorum, acutioris ingenii & constitutionis cholericæ, profundis mentis meditationibus in Mathesi & Philosophia supra modum inhærens, ingentem toti corpori contraxit imbecillitatem. In regione epigastrica per intervalla tensivas & spasticas constrictiones, & vomendi conatus persensit; quæ pathemata per excessum in vino non parum aucta fuerunt. Aliquot jam per annos de dolore tensivo & ardente in dextro hypochondrio versus scrobiculum cordis conquestus est. Tussi quoque catharali hyemali præsertim humido tempore crebrius est obnoxius. Per annum vero & amplius singulis fere mensibus, vehementi in dextro hypochondrio præcedente dolore & spasmo, vomitus, quibus copiosa & viridis bilis ejicitur, experitur. Postea evacuata biliosa illa saburra appetit, & melius habet. Interdum etiam circa regionem lumbarem persentit dolorem, & post largiorem vini potum multum sabuli per urinam secedit. Petiit nuper hic eruditus vir, cum hanc urbem transiret, a me consilium. Ego suasi ut proximo vere vel acidulas Schwalbacenses vel thermas Emsenses ipsi vicinas biberet, & a feriis ejusmodi & profundis mentis studiis abstraheret, & aquam pro potu ordinario cum quarta parte vini dilutam biberet. Cæterum quia alvi erat adstrictioris, frequentiores passularum rhabarbarinarum usum commendavi.

#### *Epicrisis.*

Causam hujus vomitus biliosi & periodici ego a bile in vesicula fellea nimium congesta & stagnante deducendam

Vomit-  
tus a  
bilis in  
duode-  
mo sta-  
gnatio-  
ne.



dam esse existimo. Mea namque est sententia, in hypochondriacis, in quorum numero etiam præsens æger est, bilem viscosiorem nimia sæpius in quantitate in vesicula fellea colligi, ubi deinde mora acrior reddita, motu peristaltico, quo etiam gaudet hæc capsula, inverso, copiose in cavitatem duodeni effunditur; idque non tantum in vesicula fellea, sed etiam in ductibus hepaticis biliosis fieri, ut nimis infarcti & distenti a stagnante humore bilioso cum impetu & vehementia sese interdum exonerent, autumo. Cumq; sæpe in similibus a copia stagnantis bilis in suis receptaculis enatis affectibus, non sine insigni fructu aquis medicatis mineralibus, utpote quæ hepatis obstructionibus referendis & expediendis aptissimæ sunt, usus sum; ita quoque hic in vomitu bilioso periodico tollendo egregium effectum ab earum usu repetendum fore judicavi.

#### OBSERVATIO V.

**Vomitus diuturni ex atonia primarum viarum.** Splendida persona, annorum quinquaginta, constitutionis tenerioris a multo jam tempore ventriculi inflationibus laboravit, adeo ut circa scrobiculum cordis tumor instar ovi gallinacei conspiceretur; & alvus ordinario esset pigrior. Hic vir magni nominis æstivis mensibus ob loci mutationem & peregrinationes frequentiores satis commode habebat. Cum vero autumno fructibus horæis succulentioribus, præcipue pomis Persicis, & uvis maturis incredibili in quantitate vesceretur, per totam fere hyemem ægrotabat. Aliquot enim a prandio horas tensiones circa præcordia cum vomendi conatu, extremorum frigore & corporis lassitudine experiebatur; postea vomitus successerunt valde pituitosi, qui quando paulo largius vinum Rhenum bibebat, erant acidissimi, ut dentes stupefacerent, & argentea vasa viridi colore inficerent. Nunquam autem vomitus vehementiores fuerunt, ac si alvus adstrictior, & constitutio aeris

aquilonaris esset, aut si cibos induratos, pingues, quibus delectabatur, supra modum assumeret. Vomitus interdum erant nigricantes, qui Medico & adstantibus suspicionem cruoris intermixti afferebant. Sed ego postea in consilium vocatus, cum tales vomitiones & amurcam viscidam ex bruno-nigram observarem, eam ab aqueo phlegmate liberavi, & in cochleari argenteo, facta evaporatione, exsiccavi; quæ flammæ admota ardebat, minime vero foetorem salis volatilis, qualem sanguis accensus spargit, naribus exhibebat. Accuratori itaque facta inquisitione, ante quatuor dies decoctum succoladæ splendidum hunc virum potasse intellexi. Quare ex hoc, vomitus, qui putabatur cruentus, causam clarius aperui; præsertim cum cognoscerem ex familiaribus, crebrius ægrum uti hoc decocto, & vomitus semper esse graviores, quando tussis catharralis infestaret, alvus esset strictior, & ipse ad somnum conciliandum destinatis uteretur pilulis. Ceterum integer erat adpetitus, sed vir splendidus non modo diæteticas leges spernebat, verum nec cujusvis generis medicamina, utut ipsi proficua assumere volebat. Interim optimum levamen a potu aquæ frigida, pulvere lapidum cancrorum, & essentia corticum aurantiorum cum Julepo quodam sumta persentiscebatur; atque etiam a potu thermarum Carolinarum egregium experiebatur auxilium.

#### Epicrisis.

Frequentiorum, quibus hic ægrotans, adfectus est vomitionum origo non nisi magne ventriculi ac intestini duodeni atoniæ, ac debilitati, quam fructus horæi, insigni copia comesti nimium auxerunt, in acceptis est ferenda. Quando enim virtus harum partium peristaltica destructa & labefactata est; stagnant in iis cruditates, ac biliosi humores, & ob eandem diuturniorem moram, corruptionem potissimum



acidam subeunt; Talis itaque mole pariter ac acrimonia nociva colluvies stimulat nervosas tunicas, easque ad motum præternaturalem, vomitus causam proritat. Docemur præterea ex hoc casu, vomitus nigros non semper a sanguine, in ventriculum effuse, suos natales mutuari; nec quovis periculi metu terre- re: sed sæpenumero ab alia causa proficisci, quæ hoc in affectu potui soccoladæ debetur. Quapropter opus utique est, ut ejusmodi amurcam vomitu rejectam, medicus rerum physicarum atque medicarum probe peritus, per commoda experimenta rite examinet, tumque demum judicium de ea ferat.

## OBSERVATIO VI.

*Vomitus diuturni a ventriculi debilitate post febrem ardentem relicta.* Vir annorum quadraginta, arti venatoriæ deditus, naturæ robustioris, ante quadriennium, vehementi motu & cursu diutius continuato defatigatus, sudoreque diffluens, ad restinguendum satis incendium, frigida cerevisiæ haustum largiorem ingurgitavit. Inde vero factum est, ut protinus cunctis viribus dejectus, prævia horripilatione, in continuam ardentemque febrem, assiduus vomitionibus, præcordiorum anxietatibus, atque delirio stipatam incidere- ret; quæ per sex integras perdurabat hebdomades. Quibus elapsis, naturæ magis beneficio, quam remediorum, quorum pauca assumserat, ope, divina favente gratia convaluit. Verum abhinc tanta infirmitate affectus permanfit ventriculus, ut huc usque crebris vomitibus, cum nausea junctis fuerit obnoxius. Hi enim priori biennio, singulis binis hebdomadibus infestabant; post hæc autem quovis mense redibant, & hunc morem adhuc dum servant, instar febrilium semper invadentes accessio- num. Namque primum circa epigastri- cam regionem & hypochondria tensi- vum, atque gravativum perferent dolo- rem, quem horror & refrigeratio pe- dum manuumque, mox totius corporis excipit; hunc sequitur ingens cum vo- mitibus æstus, atque tum magna humo-

rum, & interdum puræ lymphæ copia reiicitur: qualis paroxysmus per duo- decim circiter horas adfligit. Simulac ille invadit, lectum petere tenetur æ- ger, seque quietum continere; quoniam ad levem corporis agitationem, cum crebrioribus vomitibus, majores jun- guntur præcordiorum anxietates. Reli- quo tempore adest quidem aliqualis ad- petitus, sed non nisi cibos coctum facilio- res, juscula, ova sorbilia, pultes ex oryza, milio, & lacte confectos aut fructus ho- ræos & varias olerum species cocta as- sumere potest: contra carnes, cum primis infumatas atque pisces non solum ma- gno averfatur fastidio, verum majores quoque ex illis sentit molestias. Si frigus admiserit corpori, aut vehementiori a- nimi indulserit pathemati, protinus re- vocatur mali accessio; qua finita, satis bene habet, suoque commode fungitur officio. Quum meum peteret consilium, suasi, ut puram aquam simplicem, cum quarta vini parte remixtam biberet, & ob alvi, de qua conquerebatur, segni- tiem, infusum rhubarbarinum cum pas- sulis interdum sumeret; præterea vero Elixirio meo viscerali, cum extracto absynthii, & aliquot balsami vitæ gut- tulis permixto uteretur.

## Epicrisis.

Gravia sunt, & innumera mala, quæ a potu frigido, improvide, & corpori calenti ingesto proficisci deprehendun- tur. In hoc enim ægrotante inde pul- lulavit febris acuta, vomitibus stipata, qui posthæc, sanata febre, certis pa- roxysmis redeunt, per integrum du- rarunt quadriennium.

2) Deinceps ex hac morbi historia ad- notare licet singulare robustioris naturæ exemplum; quo noster ægrotus febrem acutam, cum deliriis, & procul dubio ventriculi inflammatione junctam, perque sex hebdomades in hærentem, adhibitis paucis medicinis superavit; quam vel centum alii, absque vitæ di- scrimine haud potuissent sustinere.

3) Notabilis quoque est, post hunc gra-



gravem morbum relicta febrilis illa periodica affectio, quæ rectissime dici potest emetica. Nam originem suam repetit ex ventriculo, a febre dicta acuta, debilitato, & per periodos spasmodica constrictione, per totum corpus propagata, affecto. Ubi iterum peculiaris, & quasi individualis naturæ vigor est attendendus; quo, salutaris planè consilio, humores vitiosi, ob primarum viarum debilitatem in iis collecti, atque a sanguinea etiam massa ad eas coniecti, per vomitum expelluntur periodicum.

### OBSERVATIO VII.

Vomitus à retro-pulso erysipelate lethalis.

Vir annorum quinquaginta, a continuis mentis laboribus, ac lucubrationibus valde defatigatus, & ad cachecticam fere perductus constitutionem, catharrisq; & rheumatismis crebro obnoxius, novissime elapso autumno, post vehementiorem excandescientiam, præviis horripilatione, præcordiorum anxietate, & febrili æstu, gravi erysipelate, totam dextri pedis tibiam occupante, corripiebatur. Vocatus chirurgus pulverem ex farina fabarum, cerussa, bolo rubro, & camphora paratum, pedi adplicabat; unde æstus tensivusque illius dolor evanescebat quidem; at anxietas præcordiorum constrictiones, summa spirandi angustia, vomendi molesti conatus, ac denique, prævio magno spasmus, humorum limpidorum, ac pituitosorum vomitiones, presso sequebantur pede. Has accersitus medicus speciebus de hyacintho, cum terra Catechu, & aliquot extracti anodynigranis maritatis sopire studebat: sed paullo post accedebat summa virium prostratio, per assiduas vigilias, & inquietudines mirum in modum aucta; mox excipiebat singultus, per biduum inharens, & undecima demum die mors vitæ finem imponebat.

Epicrisis.

Vomitùs hic est symptomaticus a

materia erysipelacea ad tunicas ventriculi retropulsa, easque ad spasmos irritante subortus. Quemadmodum vero natura in rheumatismis arthriticis, ac erysipelaceis, noxium, & economiæ animali infensum humorem, maxime per corporis peripheriam evacuare an nititur: ita quoque ad abigendas, quæ a repulsa tali acri materia proveniunt, molestias, nihil est convenientius, quam per antispasmodica & diaphoretica, eam ex loco, cui insidet, rursus excutere, & ad perspirationem dispo nere. Cui scopo obtinendo ego certe non præsentius liquore meo anodyno, liquori bezoardico nupto, unquam inveni auxilium. Contra vero nihil est perniciosius, quam ope adstringentium pugnare his in casibus, maxime omnium in corporibus, quæ impuris scatent succis, & virium insigni laborant imbecillitate: uti sunt senes, & gravi ac diuturno quodam morbo defatigati. Complures profecto novi, qui per intempestivum externorum usum, præsertim si interne copiosa refrigerantia, salina, purgantia &c. fuerunt adhibita, citra suam & medici opinionem cito occubuerunt. Eandem quoque censuram meretur camphora, ejusque spiritus, in tumoribus erysipelaceis dis cutiendis, tantis nominibus a vulgo chirurgorum pariter ac medicorum undique deprædicatus. Quamvis enim non omnem in ejusmodi affectibus camphoratis derogem virtutem; attamen vel centies observavi, quod si nimis mature, ubi in expellendo noxio humore adhuc occupata est natura, admota fuerint, vim exseruerint repellentem, infelici sæpius successu. Nihilotamen minus concedi optime eorum usum posse censeo, ubi ad exitum prope rat affectus, eo quidem fine, ut partibus per decubitum materiæ debilitatis pristinum reddatur robur. Quod discrimen ut probe observare discant omnes arti navantes operam, diligenter hortor.



## OBSERVATIO VIII.

Vomi.  
tus ex  
angu-  
ſtia  
duode-  
ni le-  
thalis.

Vir ſeptuagenario major, nullis fere ob ſingulare naturæ robur per totam vitam ægritudinibus obnoxius, binis abhinc annis de dolore lumborum, inappetentia & laſſitudine cepit conqueri. Hyemali ſuperioris anni tempore. ob cauſſam coram judicio gerendam, Magdeburgum profectus, ob res ibidem non ex voto ſuccedentes, non modo perturbato fuit animo; ſed accedentibus etiam ſub gelidiſſimo cælo crebris occupationibus, domum redux, ingenti virium languore, ciborum faſtidio, atque anxio & conſtrictorio circa dorſum & cordis ſcrobiculum dolore, cum horridulis & æſtuoſis, quæ alternabant, commotionibus ſtipato prehendebatur. Jungebantur inteſtinorum tormina, & contumax alvi obſtipatio, ac denique vomitio, qua cuncta & alimenta & medicamina reddebantur, accedebat. Dicebat enim æger, ſe intrinſecus infra ventriculum quandam perſentire anguſtiam, quæ liberum ingeſtorum tranſitum impediendo, eorundem ad ventriculum regurgitationem efficeret: quod ſi vero, ex liquidis quædam in inteſtina deſcenderent, protinus imi ventris ſequi tormina. Præterea ſuperveniebat inquietudo continua; nec ulla utut alias efficaciffima remedia, emollientia & antipſmodica, tam interna quam externa, quicquam ferebant levaminis; ſed vomitu ſingultu & aphthis in eſophago & ore ſenſim invaleſcentibus, per quatuor fere menſes preſſus ægrotans, & tandem viribus carneque prorſus exhaustus, diem obierit ſupremum.

Epicriſis.

Gravem hunc & immedicabilem aſſectum medici, vel ex calculo majori renibus inhærente derivabant, vel calculo cſtidi, ac ductui felleo firmius impacto attribuebant, eo potiffimum ſymptomate ducti, quo æger ſpaſmum

& dolorem in dextro latere circa cordis ſcrobiculum percepit. Verum ego neutri harum cauſſarum, deficientibus, quæ illarum præſentiam indicarent, ſufficientibus ſignis, ſubſcribere potui; ſed potius quandam inteſtini duodeni circa flexuram, in fine ejus anguſtiam ac coarctationem, liberum ingeſtis ad inferiora inteſtina tranſitum denegantem, malo cauſſam præbuiſſe autumavi. Hæc autem anguſtia ingenti frigori, ad dorſum penetranti, non minus ac graviore excandefcentiæ deberi videtur. Ubicunque enim continuæ & quotidiane ingeſtorum evomitiones inteſtant, cauſſam harum non tam in humorum intemperie, quam potius in vitio partium ſolidarum, & potiffimum in anguſtia canalıs, ſive in principio, ſive in fine inteſtini duodeni, vel etiam in ileo ponendam eſſe, multis rationibus convictus credo. Neque enim mihi, nec aliis auctoribus deſunt exempla, quod in duodeno, ileo, vel alio inteſtino, diſſectis corporibus, calloſa quædam obturatio fuerit inventa; quæ dum tranſmittendis humoribus obicem ponit, & motus periltaltici inverſioni anſam præbet, atrociffima producit ſymptomata. Quemadmodum vero acre frigus ſenilibus corporibus generatim eſt infenſiffimum; ita præſertim ii, qui valetudinarii, & ſpaſmo obnoxii ſunt, a frigoris & venti aquilonaris ad lumbos accellu ſibi cavere debent. Ex anatomicis enim conſtat, quod circa initium lumborum ſitus & concurſus partium exquisitiſſimo ſenſu præditarum reperiatur; quarum læſio, totam omnino vitalem œconomiam turbare poteſt & pervertere. Occurrunt nimirum ibidem ſita oriſcium ventriculi ſiniſtrum, tendines diaphragmatis, finis & flexura duodeni, flexura coli, plexus meſentericus magnus, & ramus arteriæ meſaraicæ: quorum omnium teneriori ſtructuræ frigus eſt inimiciſſimum.



## CAPUT VII.

D E

## DYSENTERIA.

## THESES PATHOLOGICÆ.

## § I.

**A**D spasmodicos & convulsivos affectus summo jure etiam illa cruenta dejectio est referenda, quam, strictius sumto nomine, dysenteriam vocant medici, & quam per rheumatismum intestinorum cum ulcere COE-  
LIUS AURELIANUS, per febrim ad intestina conversam solertissimus SYDENHAM haud inepte cognominarunt. Ea enim reapse nihil est aliud, quam motus intestinorum peristalticus, ab inhaerente eorundem tunicis humore caustico, exulcerante, ad convulsivum usque gradum auctus, crebram defidendi cupiditatem, ipsamque frequentem sordium mucoso biliosarum, plus minus sanguine, vel sanie tinctarum dejectionem, cum vehementibus tormentis, ac febrili commotione stipatam inferens.

Defini-  
tio dy-  
sente-  
riæ.

## §. II.

**D**istingui meretur hæc adfectio ab aliis alvi fluxibus, utut torminosis, quos vocare solent diarrhœas. Primum enim in his tormina tanta ferocitate incanalem intestinorum nunquam sæviunt, quanta quidem in dysenteria solet esse. Neque in illis cruenti rejiciuntur humores, sed vel pituitosi duntaxat, vel biliosa colluvie permixti: qui a dysentericis cruenti, saniosi, putridi, ac foetidissimi redduntur. Quae deinceps ratione cholera discrepet a dysenteria, sequenti Capite ostendetur.

Diffe-  
rentiæ  
dysen-  
tericæ  
a) a di-  
arrhœa.

## §. III.

**M**ajori opus est judicio ad dysenteriam a fluxu hæmorrhoidali, maxime torminoso distinguendam: Sanguis enim, qui sub hoc effunditur, sincerus

b) a flu-  
xu hæ-  
morr-  
hoi-  
dali.

Hoff. Syst. Tom. V.

plerumque existit, & stercoreum sæpe numero comitatur dejectionem; cujus excretio tantum non semper insigne sanitatis post se trahit allevamentum. Contra vero in dysenteria, sanguis inter atrocissima tormina, ac tenesimum molestissimum exprimitur dilutior, raro sincerus, sed putius cum materia saniosa, spumida, ac foetida remixtus, nec sui reiectione ullum virium relinquit incrementum; tantum abest, ut in pejus sensim ruat valetudo. Raro etiam ab hac cruenta dejectione febris abest rheumatica: & denique peculiare, quo grassari solet, tempus, illam simul distinguit ab hæmorrhoidali fluxu.

## §. IV.

**C**onvenire porro cum dysenteria videtur, attamen ab illa discrepat affectus ille, qui Lutetis Parisiorum endemicus est, & quoscunque fere corripit advenas. Hic enim consistit in crebriori alvi dejectione, primum mucosa, deinceps cruenta; sed in eo differt a fluxu dysenterico, quod ei malignitate longe inferior, nec contagiosa, nec febre stipata sit; quolibet anni tempore invadat, & per longius tempus detineat ægrotantes, ita tamen, ut in publicum prodire, ac suis fungi queant officiis: quæ in dysenteria longe se habent aliter.

3) ab  
affectu  
le mal  
de Pa-  
ris di-  
cto.

## §. V.

**I**psa vero dysenteria dividitur in benignam atque malignam. Illa diutius infestat, mitius decurrit, & minus est periculosa; hæc autem non modo contagiosam præ se fert indolem, verum exitiosa quoque symptomata, ut febrem mali moris, summam virium jacturam, exanthemata maligna &c. habet conjuncta, & ad summum ægros perducit vitæ discrimen. Non minus distinctio dysentericæ in rubram & albam notari meretur; in illa humores cruenti, in hac saniosi, filamentis carnosus, & ulcerosis lineamentis, ab intestinorum tunicis abrasis permixti rejiciuntur.

Dysen-  
tericæ  
disting-  
tio in  
beni-  
gnam  
& ma-  
lignam.2) in  
rubram  
& al-  
bam.

Q 3

§. VI.



## §. VI.

Subje-  
cta dy-  
sente-  
ria.

Peculiaris profecto dysenteria morbus est, quippe qui rarissime sporadicus, sed ut plurimum popularis existit, tumque varios malignitatis gradus exhibet. Neque enim ulli sexui, nec aetati parit; sed tam foeminas, quam mares, tam infantes & pueros, quam adultos & senes infestat, adeo, ut nec teneri lactentes, in ipsis adhuc degentes incunabulis, ab illius tyrannide sint immunes. Cum primis autem malo huic sunt obnoxii plethorici, biliosi, & quorum ventriculus insigniori laborat debilitate; nec non eos gravius vexat, qui inordinata usi fuerunt diæta, fructusque horæos, immaturos præsertim, ac fermentescibiles larga comederunt quantitate. Præ aliis etiam dysenterie ferocitatem experiuntur, qui sese calefactos per noctes potissimum frigidiori exponunt auræ: unde militibus in castris degentibus maxime familiaris est, & audit castrensis; atque cum per Pannoniæ oras, sæpius & atrocius grassetur, quædam Pannonica solet adpellari.

## §. VII.

Tempus  
quo  
grassatur  
dysente-  
ria.

Attentionem quoque meretur ea tempestas, qua dysenteriae stragem edere observantur. De qua si consulamus HIPPOCRATEM; ille *sect. III. aph. 2.* hyemem plus iusto frigidiorē, & sicciorē, ver autem pluviosum & austrinum, æstatis dysenterias præcedere; & *aph. 12.* hyemem admodum austrinam, & pluviosam, ver autem ficcum & aquilonium, iisdem producendis, maxime favere scribit. Æstas huic malo opportuna, deprehenditur ferventissima, sub cuius finem, & autumnii initium, mense nimirum Augusto, & Septembri, ubi post summum solis fervorem, interdiu molestum, noctes frigidiores, ventisque borealibus scætæ sequuntur, malum excipit. Quare etiam, quo calidiores sunt regiones, eo frequentiores & graviores sovent dysenterias: unde eadem Ægyptis, Indis & Arabibus dicuntur endemicæ. Conf. BONITIUS *Lib. II. hist.*

*nat. Ind. orient.* Præterea etiam mali moris dysenteriae solent grassari, quando ingens muscarum, erucarum, araneorum, & aliorum insectorum copia in aere observatur.

## §. VIII.

Qui hoc malo corripuntur, ante plenariam illius eruptionem diu de corporis lassitudine, ventre tumido ac molestis, quibusdam in eo motibus conqueri animadvertuntur. Quin imo jam a COELIO AURELIANO *Lib. IV. morb. chron. cap. 6.* olim observatum legimus, quod dysenterias plerumque vel diarrhœa, vel cholera, vel ventris tumor antecedit. Ipse morbus tantum non semper cum rigore febrili, aut saltem quadam corporis horripilatione incipit, quam calor, plus minus acris ac vehemens, cum pulsu celeri, ac intensa siti sequitur, totumque morbi decursum comitatur. Rigorem febrilem, aut antecedunt, aut certe mox excipiunt atrocia imi ventris tormina; tum alvus fit lubrica; atque primum contentæ in intestinis fæces, cruditates, mucosique humores; paullo post adiposi, ac fere oleaginosi succi, & denique spumescens materia, cum sanguine, vel sanie ulcerosa, ac pelli- culis, filamentisque tunicaceis remixta, mole sæpius exigua rejiciuntur. Quibus sæburra quadam onustus est ventriculus, illi nauseam, vomendi conatum, ipsosque vomitus patiuntur; & multos gravis cardialgia, & præcordiorum anxietas discruciat. Omnes affligit perpetua desidendi cupiditas, & tantus ani tenesmus, ut non raro tardii plena sequatur ejusdem procidentia. Cunctas vero dejectiones, quæ sunt numerosissimæ, & antecedunt, & comitantur, & sequuntur crudelissima tormenta, non in uno loco fixa, sed per totum intestinorum canalem vago itinere progredientia; & sub quavis sede sentitur molestissimus omnium quasi viscerum descensus. Adhuc perit omnis adpetitus, summa urget inquietudo, somnus præ dejectionum frequentia oculis eripitur, atque vi-  
res.

Histo-  
ria  
morbi.



res mirum in modum prosteruntur.

§. IX.

Mali  
gravioris  
signa.

Hæc ordinaria sunt dysentericorum symptomata; quibus malo increbescente, nonnullis longe graviora junguntur. Namque quibusdam extremis frigescentibus, interiora uruntur, ardorisque & pulsationis perpetuus intestina torquet sensus. Accedunt singultus, sudores frigidi, vultus pallor, corporis macies, & inflammationes apophthodæ faucium inquinatio. Quandoque, sed raro indolentium dysenteriarum casus occurrunt, ut in A. N. C. dec. 1. anno 2. obs. 45. & ACT. MED. HAFEN. vol. II. pag. 138. Interdum, ubi ad extrema ventum est, omnis dolor simul & semel cessat, sitis veluti extincta perit, alvus præter voluntatem redditur, cum foetore excrementorum graveolenti ac cadaveroso, pulsus fiunt exiles, tumque mors procul dubio sequitur. Notari adhuc circa dysenteriae historiam meretur, quod sæpenumero contagiosa existat: sic enim ex solo sordium rejectarum odore, malum ad alios propagari, præter communem experientiam, insigni casu testantur A. N. C. dec. II. ann. 6. obs. 25. Quin lac etiam matrum dysentericarum, infantibus eandem labem affricare, perhibent eadem A. N. C. dec. II. ann. 6. obs. 195.

§. X.

Sectio  
dysen-  
teria  
perem-  
torum.

Dum adhuc in historia dysenteriae tradenda sumus occupati; utile erit, quasdam observationes de sectionibus dysenteria peremtorum proponere. Omnes itaque scriptores testantur, in ejusmodi subjectis intestina tam tenuia quam crassa, vel inflammata, vel siderata, vel exulcerata, atque bile suffusa post mortem fuisse reperta: quemadmodum apud BARTHOLINUM Cent. VI. hist. II. & BARBETTE Lib. IV. Cap. III. pluribus videre licet. Speciatim pylorum cum intestinis tenuibus inflammatum vidit JOANNES DE LA MONIERE tract. de fluxu dysenterico pag. 4. Intestina te-

nuia exterius bile suffusa, atque livida, intrinsecus gangrænata, adnotarunt A. N. C. dec. II. ann. VI. obs. 104. crassa vero pari ratione livida, & gangræna affecta, observarunt PLATERUS Lib. III. pag. 875. & RIVERIUS Cent. III. obs. II. Idem PLATERUS mantiss. observ. pag. 25. deprehendit, felleam cystidem bile prorsus vacuum; eadem vero tincta intestina ileon, atque colon, quæ intrinsecus multis scauerunt ulcusculis. BONTIUS loco bilis in fellea capsula reperit liquorem chylo simillimum; bilemque porraceam & fere gramineam in perfunctis hoc malo fuisse, testantur A. N. C. Dec. II. anno VI. obs. 104. Nec denique exempla desunt, quod in quibusdam intestina plane coalita fuerint, instar eorum, qui sumto perierunt veneno.

§. XI.

Ex his autem, cum morbi nostri Dysenteriae symptomatibus rite collatis, statim ad teriæ sedes. parebit, quænam vera illius sit sedes. Hanc enim constituit amplius intestinorum canalis; quæ, notante SYDENHAMIO Sect. IV. Cap. III. seriatiim afficiuntur, donec tandem omnis mali vis in rectum decumbat intestinum. Nam hoc idem præ reliquis, & dolore morsicante, & molestissimo tenesmo, exercetur crudelissime. Neque vero negaverim, quin vicinæ partes, maximeque hepar ac biliferi ductus, per consensum etiam experiantur mali tyrannidem. Ipsa quod attinet intestina; determinari facile potest, quænam eorum potissimum discrucientur. Quod si enim proxime circa umbilicum atrox sentitur dolor; sique hunc tardior sequitur dejectio; certum est tenuia laborare. Quando autem ad epigastricam regionem, ubi colon situm est, aut hypogastricam, atque hypochondriacorum vis incumbit, ipsæque faeces brevi post rejiciuntur; crassa laborare, in aprico est. Ac ubi denique assidua fere, inanitas tamen desidendi vexat cupiditas, aut mucus fere tenax, viscidus, pau-



cus, acer, & virulentus promanat; ulcus in recto consistere intestino, vero videtur simillimum.

## §. XII.

Intest-  
norum  
fabrica.

Intestinorum, quod attinet fabricam, non quidem nostri est loci, eam fusius explicare, multo minus eorundem varium situm, flexuras ac denominationes ample recensere; sed quædam duntaxat momenta, nostro scopo convenientia adnotabimus. Illa igitur tam gracilia, quam crassa componuntur, æque ac ventriculus ex quatuor tunicis, quarum muscosa binis fibrarum, una longitudinali, altera spirali construitur seriebus, earumque ope motum perficit peristalticum. Nervea tunica vasis sanguiferis scatet copiosissimis, adeo ut tunicam constituere videantur peculiarem; interne vero quam plurimis obsita est glandulis, quæ per suos excretorios ductulos, ex massa sanguinea in cavum intestinorum assidue secerunt humorem seroso mucaginosum, non illum modo, qui glutinis instar villosæ adhaerescit tunicæ, eamque pariter, ac substratam nerveam ab assumptorum acrimonia defendit; verum quoque alium, magis excrementitium. Notari enim probe meretur, quod humores, speciatim serosi, pro diversitate consistentiæ, in hoc vel illo loco, qui ratione magnitudinis pororum, magnitudini excernendarum particularum proportionatus est, secernantur. Sic subtilior portio per cutis spiracula exhalat; paullo crudior ad renes defertur; & quæ spissior adhuc est, ad intestina demandatur, tanquam amplam crassarum sordium latrinam.

## §. XIII.

Forma-  
lis ra-  
tio, &  
caus-  
sa  
proxi-  
ma dy-  
sente-  
ricæ.

Quibus expositis, facilius jam erit, verum dysentericæ genium introspicere, atque symptomatum eam concomitantium rationem suppeditare. Formalem illius rationem, motu peristaltico, ad summum & convulsivum gradum adaucto, & exacerbato absolvi, nemo est medicorum, qui negave-

rit; quoniam atrocissima, & horrenda, quibus eo morbo correpti homines agitantur, dolorum tormenta id testantur clarissime. Neque vilius est, qui inficias iverit, quin caussa dysentericæ proxima, in humore quodam acerrimo, caustico, tunicas intestinorum vellicante ac stimulante consistat. Qualis autem hic humor proprie sit, & unde generetur; obscurum adhuc multis videtur, adeo, ut in varias inde abierint opiniones.

## §. XIV.

Veterum quam plurimi humorem illum colocynthidis naturam æmulari perhibuerunt: nec etiam, si effectus, quos sumta colocynthidis poma in corpus humanum edunt, quosque recenset STALPART VANDER WIEL *obs. XLI.* cum symptomatibus dysentericis rite contulerimus, multum a veritate abluere videntur. Deinceps communis plerorumque sententia est, materialem dysentericæ causam semper in cavo intestinorum contineri, & esse humorem acerrimum, ex fructibus horræis, maxime immaturis collectum, cum reliquis succis, præsertim biliosis confermentatum, atque nerveas tunicas vellicantem, arroden-tem, & excoriantem. Verum, licet non negaverim, quin sæpissime hæc concurrat caussa, eandem tamen semper & unice peccare, præter contagiosam dysentericæ indolem, & illi refutant homines, qui nullis omnino assumptis fructibus, eo rapiuntur morbo & teneri infantes, ubera adhuc matrum sugentes. Quamobrem alii ad miasma quoddam confugerunt plane specificum, cujus ea esset indoles, ut in cavitate intestinorum cum bile potissimum confermentaret, tumque aroderet intestina. At nec huic in totum subscribere possum opinioni; si vel id consideravero, quod nonnunquam tam acris per intestina effundatur humor, qui argentea corrodit vasa; inde vero nec tunicæ intestinorum excoriantur, nec tam atrocia, uti in dysentericis, excitentur tormenta. Ne-

Aucto-  
rum o-  
pinio-  
nes de  
causis  
dysen-  
tericæ  
materi-  
ali-  
bus.



Neque enim sufficiens est exceptio, ac si in dysenteria primum villosa abradatur tunica, tumque vellicetur nervea: siquidem id ipsum ab alio quoque acri humore posset fieri, & præterea experientia docet, tormina dysentericorum statim cum morbi initio, priusquam abradi potuit villosum involucrum, invadere.

§. XV.

Causa  
dysen-  
teriae  
mate-  
rialis,  
& sym-  
ptoma-  
tum.  
ratio.

Quamobrem, meo quidem arbitrio vera materialis dysenteriae causa, cui crudelissima intestinorum tormenta, & reliqua symptomata debentur, residet potissimum in vasis sanguineis, tunicam intestinorum nerveam obsidentibus; & est materia quædam seroso lymphatica mucescens, & cum particulis falsis, acribus, ac sulphureis, in massa sanguinea fluctuantibus, in lentum ac causticum magma coalescens; & interdum cum miasmate quodam peregrino, ab extra corpori illato permixta. Hæc enim motu quodam febrili, a constrictione corporis ambitu, ad nerveum intestinorum canale, vasculis sanguiferis plenum delata, partim acrimonia sua tunicas sensibiles nimium vellicat, rodit, & ad torminosas constrictiones proritat, partim lentore suo vasa, quibus inest, insigniter, & ad rupturam usque distendit. Unde patet origo convulsionum, atque torminum; quæ eo redduntur atrociora, quo plus acris saburræ in ipsa cavitate intestinorum simul continetur. Substantis autem illorum contractionibus non fieri potest, quin, quæ intus hærent, omnia effundantur. Postquam enim, quæ ex cibis relictæ adhuc restant cruditates, sunt eliminatæ, continuante spasmo, ipsa mucago, villosam obducens tunicam, vi abraditur, & cum stillante ex intestinorum glandulis humore, plus minus noxio, in subpinguis ac oleaginosi muci forma exprimitur. Dum vero hæc fiunt, & per consensum ductus quoque biliferi, cum cystide fellea vehementer concutiantur: hinc omnem suam bilem ef-

fundunt in canalem intestinale, quæ cum reliquo muco per alvum redditur. Præterea perseverante membranacei istius canalis distentione, comprimuntur vasa sanguifera, cruore eo compulso jam turgida; impeditur sanguinei laticis per venas regressus; ejusdem, perennante a tergo adfluxu, fit stagnatio; & demum vel perruptio, ac extravasatio in intestina, unde stercora cruore tincta adparent, vel periculosa eorundem suboritur inflammatio, ardoris perpetui, ac pulsantis sensu doloris internoscenda. Hæc inflammatio aut in ulcus saniosum abit, ipsam villosam depascens tunicam, tumque sanies ulcerosa cum carneis deicitur filamentis; aut plane in gangrænam, & funestam definit sphacelationem; qua præsentem omnis dolor perit, & dejecta foetorem spargunt cadaverosum.

§. XVI.

Quæ cum ita sint, explorandæ jam veniunt procatarecticæ causæ, quæ producendo noxio humori, dysenteriae causæ, sunt opportunæ. Atque tres earum potissimum classes esse statuo, quarum prior in ipsius tempestatis consistit ratione. Si videlicet æstas antecessit ferventissima ac siccissima; sub ejus finem, ubi plerumque post intensissimum, qui per diem est, solis fervorem noctes sequuntur frigidiores, grassantur dysenteriae; quales a nimia aeris siccitate subortas describunt A. N. C. dec. II. anno IV. obs. 24. Tum vero malum ea potissimum invadit subjecta, quæ per diem justo vehementius calefacta, sudoreque diffuentia, noctu auram frigidiorum, corpori minus tecto liberius admittunt. Cujus rei clarissima quoque est ratio: Per diuturnum enim aeris fervorem ac siccitatem, massa sanguinis insigniter resolvitur, colliquescit, & sudor promanat copiosus, unde tenuiores, fluidiores ac blandi succi dissipantur, quibus orbiati reliqui humores mucescunt, acres, impuri atque sulphurei redduntur.

Causa  
proca-  
tarcti-  
cæ sitæ  
sunt i)  
in tem-  
pestatis  
ratione.



redduntur, & ipsa debilitantur corpora. Quod si igitur corporis, ita qui asperior est, liberalius admittatur; constringitur inde cutaneus cortex: difflatio ulterior sordium adhuc tenuiorum ac sulphurearum præpeditur; hinc illæ cum mucescente lymphæ coeunt, in lentum & acerrimum abeunt crama, quod febrili motu ad intestina, tanquam amplissimum mucidarum sordium colatorium delatum, parit dysenteriam. Tali quoque ratione castrensis generatur dysenteria; & omnino absque miasmatis cujusdam maligni externique concursu evenire potest.

## §. XVII.

2) in  
mias-  
mate  
conta-  
gioso.

Quando vero cunque recensitæ aeris constitutioni accedunt quædam virulentæ indolis exhalationes, quæ alteram causarum procatarcticarum classem constituunt: tunc nascuntur dysenteria epidemica, plus minus malignæ, ac contagiosæ; quales descriptas lege apud BARTHOLI-  
NUM *Cent. II. hist. anat.* 65. AMATUM LUSITANUM *Cent. III. cur.* 90. WILLISIUM *in pharm. rat. P. I. pag. 119.* & la MONIERE *tract. de fluxu dysenterico.* nec non SEN-  
NERTUM *in praxi Lib. III. part. II. Sect. II. cap. VII.* Ejusmodi lues epidemica longe lateque sæpius vagatur, & longum terrarum occupant tractum: quid? quod FERNELIUS *de abd. rer. caus.* L. II. cap. XIII. meminit dysenteria anno 1538. per universam Europam populariter grassantis. Generantur vero talia miasmata vel in ipso aere, ex malignis terrarum effluviis, ac peculiari ventorum constitutione; tumque per inspirationem hauriuntur, & intra corpus suscipiuntur: vel etiam cum cibis, maxime oleribus, ac fructibus horreis, venenata rubigine, vel insectorum, quæ tum temporis copiosissima in aere obversantur, malignis ovulis obductis assumentur, & cum chylo massæ sanguineæ permiscuntur. Notari vero me-

retur, in tali aeris constitutione, suscepta quandoque contagia per aliquod tempus intra corpus delitescere; & expectare duntaxat causam quandam occasionalem. Quamobrem adnotare mihi sæpiissime licuit, quod tum temporis levissima intestinorum stimulatio, vel sumto purgante excitata, protinus efficiat dysenteriam. Debetur porro malignis istis effluviis, ex corporibus dysentericorum vel per stercorea, vel lac, vel sudorem exhalantibus, contagii, causa atque origo.

## §. XVIII.

Tertiam causarum procatarcticarum classem exhibent, largius comestis fructus, maxime si immaturi fuerint, vel potus fermentativi desuper ingerantur. Ex his vi nociva emittunt cerasa dulcia, mala persica, pruna, maximeque flava illa, quorum frequentem noxam præter alios ostendit FORESTUS *Lib. II. obs.* 23. Huc quoque pertinent potus fermentativi, minus defæcati, ut mustum, vel cerevisia, quæ tum temporis ob nimium solis ardorem, plerumque male constitutæ, & vel recentes, impuræ, crassæ, multifque facibus refertæ, vel minimum accrescentes sunt, & copiosius bibuntur. Namque ejusmodi subjecta, acri fermentante succo prædita, si in duodeno cum bile commisceantur, acriorem cum ea subeunt confectionem, ex qua non modo vapores tenuiores acerrimi, intra humorum massam rapti; verum etiam sordes resultant crassiores quidem, sed causticæ indolis, quæ intra canalem intestinorum remanentes, nervosam eorundem tunicam acerbè rodunt, atque tormina mirum in modum exasperant. Huic potissimum saburræ, in ventriculo ac duodeno stagnanti, debentur nausea, vomendi conatus, ipsæque vomitiones, quæ junguntur interdum dysenteria: a quibus symptomati-

bus



bus immunes sunt, qui absque hac concomitante causa hunc morbum incurrerunt; sicuti testantur dysenteria anno 1726. nostris in locis grassata, quæ cum mense jam Junio, ubi nulli nec maturi, nec immaturi adhuc fuerunt fructus, suam tyrannidem exercuerunt, a vomitionibus vacuæ existerunt, quemadmodum in dissertatione de iis conscripta fusius ostendi.

§. XIX.

Momen-  
ta quæ-  
dam  
circa  
hanc  
causâ.

Circa hanc vero causam, notanda adhuc veniunt quædam momenta, nimirum 1) quod omnino solæ sufficiant ad generandam dysenteriam, quando videlicet vapores acriores, ex fructuum dictorum cum bile in ventriculo facta fermentatione resultantes, in massam humorum abripiuntur, qui laudabiles succos corrumpendo, ad producendam materiam, dysenteria genetricem disponant. Hæc vero, concurrente, tanquam occasionali causa, intestinorum a saburra iis infixa stimulatione, motu quodam febrili ex ambitu corporis ad dictum canalem membranaeum devolvitur. 2) quod tali in casu ventriculi ac intestinorum accedere debeat quædam imbecillitas. Hinc enim ratio reddi poterit, cur multi fructivori a dysenteria sint immunes, curque e contrario alii, qui illis fructibus aut plane non, aut saltem parcius vescuntur, eo rapiantur morbo. Quod si enim firmiter fuerit primarum officinarum robur, commissi etiam errores facillime corrigentur, & noxia saburra vegete proscribetur: at, qui debiliori earum partium tono, acidaque jam saburra, istius fidissimo comite, sunt instructi, deliciarum suarum gravissimas utique luere cogentur poenas, 3) scèpissime vero fructuum horraorum, ac potuum fermentescibilium immodicus usus, tanquam concomitans dysenteria causa venit consideranda; ita ut principalis vel a prohibita transpiratione, vel suscepto contagio repeti debeat. Tum vero mali symptomata, unita binarum causarum vi, mirum in modum exasperantur.

§. XX.

Quibus ita præmissis, ad tradendam gravis ac truculenti nostri mali accedamus prognosin. Dysenteria igitur pueris evenientes, sunt periculosæ; iisdemque senes ac pueri frequentius per-eunt, quam qui in media sunt constituti ætate. Vid. HIPPOCRATES *sect. II. textu* 30. SENNERTUS *L. III. pag.* 243. Ubi malum cachecticos, scorbuticos, phthysicos corripit, aut debiliores, & qui diuturnis animi perturbationibus se macerarunt, plerumque conclamatum de iis est: iis quoque periculum minatur, quorum intestina lumbricis obsidentur. Quæ dysenteria cum vomitu se exserit, & cui singultus accedit; magnum metum incutit, & periculo inflammati ventriculi terret: neque minus mali est ominis, ubi excrementa viridia, nigra, & admodum graveolentia observantur, & veluti carunculæ dejiciuntur, notante HIPPOCRATE *sect. IV. aph.* 26. nam ulcus intestinorum designare solent. Quo magis vero, vel minus exulcerata sunt intestina, eo gravior vel mitior est affectus. Pessimum porro indicium est, quando infusa clysmata mox iterum relabuntur, aut anus tam arcte clausa existit, ut nihil possit ingeri: namque illud paralyzin intestinorum, maxime recti; hoc vehementem spasticam ejusdem significat stricturam. Nihil etiam boni expectandum, si pulsu debiliori existente, externa frigent, interna uruntur, aut his nullus inest doloris sensus; mentis alienatio, faucium inflammatio, aphthæ, aut paralytis totius œsophagi præsto est, ut assumpta cum murmure delabantur. Illud quoque scire refert, malum hoc nunc celeriter moveri, & si febris maligna præsertim ingravescat, scèpe intra dies septem vel novem vel quatuordecim necare; modo in plures, & ad quadragesimum, ac ultra produci; longoque tempore, cum inveteravit, aut tollere hominem, aut etiam si finiatur, excruciare, uti observavit CELSUS *Lib. IV. cap.* 15. nec non scèpius in hydro-

Pro-  
gnosis  
dysen-  
teriae.



dropem ac lienteriam abire, adverbentibus permixtum: quippe quod potente HIPPOCRATE *sect. VI. aph.* 63. quin & coeliacam non raro, tabem quoque blande roborante, & leniter ac hecticam insanabilem mutari.

### Methodus medendi.

#### §. I.

Indica-  
tiones  
curato-  
ria.

**V**ix morbus est quidam, ad cujus rationalem curationem, majori opus est medentis judicio, quam quidem noster dysentericus. Quam plurima enim sunt remediorum genera, quæ in illo commendantur; quæ vero non in omnibus subjectis eandem exhibent utilitatem; tantum abest, ut quæ huic profunt, illi graviter nocere non raro deprehendas. Generatim hæc fere sunt medendi indicationes, ut primum materia noxia, acris, caustica, qualiscunque fuerit, attemperetur, ac per emunctoria ipsi convenientia proscribatur; deinceps truculenta intestinorum tormina, ac feroces spasmi consopiantur; & denique ipsi intestinorum substantiæ, vel exulceratæ, vel nimis debilitatæ convenientibus succurratur prædiis.

#### §. II.

Evacu-  
tium ac  
alvum  
purgan-  
tium  
usus.

Quod ad priorem attinet indicationem; circumspicere oportet prudentem medicum, num crassiores in alimentari canale subsistant cruditates, quas partim commissus antea in victu error, & ingesta fructuum horæorum colluvies; partim nausea, cardialgia, & vomendi conatus indicabant. Quo in casu multis laudibus radicem Ipecacuanhæ extollunt medici; si in morbi initio ad scrupulum unum vel drachmam dimidiam, cum lapidibus cancrorum maritata, hausta desuper larga aquæ tepidæ quantitate, exhibeatur, & ejus ope vomitus cieatur, interdum iterandus. Neque vero minus per inferiora educere convenit saburram acrem & crassam; & quidem felicissimo cum successu, per rhabarbarum in pulvere datum, & cum absor-

tonica intestina solatur. Nec parum utilitatis exhibent pilulæ balsamicæ, ad Becheri, Stahlii, vel meam mentem paratæ, cum primis si cum extracto rhabarbari commisceantur.

#### §. III.

Præterea operæ est pretium, saburæ intestina occupantis acrimoniam, & rodentem causticam indolem delinire ac demulcere. Quo quidem fine intus exhibenda sunt mucilaginosæ, oleum amygdalarum dulcium recens & sine igne expressum, sperma ceti recens minus rancidum, decocta hordei, avenæ, rasuræ cornucervi, radicis scorzonæ, chinæ &c. emulsiones ex amygdalis dulcibus, pineis, & aquis diapnoicis paratæ; atque etiam serum lactis dulce ad meam confectum methodum, nec non fons Selteranus, lacti nuptus asinino. Hac enim & acrimoniam involvendo, & lubricas reddendo vias, votis faciunt satis: quem etiam scopum explent, simulqueordes ex crassis potissimum intestinis educunt, clysteres pure emollientes, quos ex aqua hordeacea cum fursuribus decocta, ex sero lactis dulci, vitello ovi, oleo chamæmeli, amygdalarum dulcium, ac sevo hircino parare decet.

#### §. IV.

Insimul quoque ad impuritates subdiles, plus minus malignas ac contagiosas, in massa sanguinis adhuc fluctuantes, attemperandas pariter, ac per corporis peripheriam educendas, febrimque conjunctam mitigandam, multa impendenda est cura; quoniam hac ratione affluxus talium sordium ab intestinis revocatur. Et hoc nomine insignem laudem merentur absorbentia, cum fixis diaphoreticis mixta. Sic parari possunt pulveres ex cornucervi philosophice præparato, usto, ebore fossili, terra sigillata, bolo armena, antimonio diaphoretico, item martialli, succino, lapidibus cancrorum, coral-

Acri-  
monia  
intesti-  
norum  
demul-  
cenda.

Diaphore-  
sis pro-  
moven-  
da.



ralliis rubris, matre perlarum, & præfertim chryſtallo montana; quibus urgente nimio æſtu ac ſiti, nitrum refracta doſi, & ad refrænandum dolorum impetum, cortex caſcarillæ, aut unum alterumve theriacæ cœleſtis granum prodofî unica adjici poteſt. Cumprimis vero in expellendo miasmate maligno, per contagium admiſſo camphora, dimidii duntaxat grani pondere cum nitro & abſorbentibus mixta, præclaram, ac excellentem poſſidet efficaciam.

§. V.

Motus  
effræ-  
nes ſunt  
coer-  
cendi.

Proinde dictis hiſce remediis, ad expiendam ſecundam indicationem, & coercendos motuum nimios tumultus, interponi debent tutiora anodyna, & mitiora ſubadſtringentia. Ex his vulgatiffima ſunt theriaca cœleſtis, aqua theriacalis, diaſcordium Fracaſtorii, pilulæ de ſtyrace, de cynogloſſa, & Wildeganſii, nec non laudanum liquidum Sydenhamii. Longe vero tutiorem & præſtantiorem effectum quam plurimis in caſibus exhibuit liquor meus anodynus, cum refracta baſſami mei vitæ parte remixtus; quem ter vel quater de die ad guttas viginti, ſummo cum fructu porrigere ſuevi. Huc quoque ob antiſpaſmodicam virtutem referri merentur, aquæ deſtillatæ liliorum convallium, florum ſambuci, tiliæ, aurantium, menthæ, ceraſorum nigrorum, & caſcarillæ: ex quibus commendati ſuperius pulveres propinari poſſunt. Neque etiam externorum paregoricorum uſus inſuper eſt habendus, ex quibus, ſi efferata ſit torminum vehementia, linimentum componi poteſt, quod v. g. olei liliorum alborum unciam unam, menthæ deſtillati, abſynthii, quod eſt magnum anodynum, nucifæ, carvi ana-drachmam ſemis, camphoræ ſcrupulum habeat. Quod abdomini inunctum egregia ac ſecura virtute ſiſtet intolerabiles dolores: quo ſubinde reliquis medicaminibus cauſſa materialis eo commodius oppugnari, eoque feliciter debellari queat.

§. VI.

Educta ſic noxia materia, & con-  
quieſcentibus ſpaſmis, ſuccurrendum eſt læſis inteſtinis: quorum ſi quædam adhuc reſtiterit exulceratio, præter internorum abſtergentium continuationem injiciendi ſunt crebro clyſteres ex ſevo hircino, cervino, vitello ovi, terebinthina, & baſſamo Locatelli commixti. Plerumque tamen ſuperato morbo reſtat adhuc inteſtinorum atonia; cui mederi licet exhibitione remedium roborantium: ex quibus eminent cortex caſcarillæ in eſſentia, pulvere, & extracto aquoſo datus, ſive etiam cortex chinæ, cum extractis abſtergentibus ac roborantibus in electuario redactus: aut Elixir noſtrum viſcerale, vel eſſentia corticum aurantium, cum eſſentia gentianæ rubræ & ſuccini permixta. Non contemnendum quoque præſtabit externe uſum Spiritus vini rectificatus, vel aqua Reginæ Hungariæ aut ſpiritus florum chamomillæ Romanæ cum oleo menthæ deſtillato decenter mixtus.

Quæ  
tertiæ  
ſatisfa-  
ciant  
indica-  
tioni.

§. VII.

Vix autem votis respondebunt allegata præſidia, niſi accuratum regimen, victuſque pertinax acceſſerit obſervatio. Cumprimis aeris caloriſque æqualis ſemper temperies conſervari debet: ſicuti enim omnis refrigeratio, ſive per admiſſum ab extra frigus, ſive per ingeſtos gelidiores potus, certiffimum minatur damnum: ita quoque nimius calor & exæſtuatio, & per conclavia valde calefacta, & per multam lectorum, ſtragulorumque impoſitionem, æſtum febrilem & anxietates adaugendo, nunquam noxæ gravioris expers eſt. Quamobrem dyſenterici ſe quietos, animique tranquillitati ſedulo ſtudentes, in temperato & lecti & conclavis calore continere debent. Potus oportet eſſe tepidos; nec convenit ullæ cereviſia, ſed potius decocta gelatinofa, infuſa theiformia, ſerum lactis, & ſub finem morbi, ad inteſtina roboranda, hauſtus vini generoſi. Victus ſit facillimus, cibiſque non niſi molles

Quale  
regimen ſit  
obſervandum.

con-



conveniunt, ex quibus oryza, ac vitelli ovorum merito suo extolluntur. Nec laude carent iuscula, ex carne vitulina, gallinarum, radicibus scorzonerae, cichorei, chinae, succo plantaginis & cancris contusis parata; qui a nonnullis ad consolidanda intestinorum ulcera, magnis extolluntur encomiis.

## § VIII.

Præservatio.

Præservatio hujus mali, ubi illud est epidemicum & contagiosum, fit, quando quis excessus omnes & subitas aeris mutationes effugiat & provide eos qui hoc malo laborant evitet. Certius ab eo, quod ex aliis originem trahit caussis, se omnino præservare poterit; qui aeris injurias vitaverit, a nimio & perverso fructuum horæorum, præsertim immaturorum usu abstinuerit, ac alvi perpetuam libertatem conservaverit. Cum primis eo, quo dysenteria grassatur tempore, noctu corpus in lecto probe tegendum, ne prohibeatur transpiratio: & si corpus purgandum est, caveatur probe, ne id fiat acrioribus purgantibus; quippe quæ, uti superius dictum est, excitando contagio, ipsique morbo producendo, causam sæpenumero præbent opportunissimam.

## Cautelæ &amp; Monita Practica.

## §. I.

Cautela circa opiata & adstringentia.

**O**Mni in dysenteria summa cum cura a crassis opiatis, adstringentibus, & stypticis abstinendum est; quoniam hæc in pejus malum provehunt, tantum abest, ut illud allevent. Namque si in morbi initio dentur, intus retenta caustica materia, summas præcordiorum anxietates, singultus, aphthas, & periculosas inducunt inflammationes; in vigore morbi, & ubi nimium fractæ fuerint vires exhibitæ, facile fiunt necrotica, & præsentem inflammationem in lethalem commutant sphacelum: conf. THOMAS obs. Lib. III. obs. 8. pag. 167.

M. N. C. dec. 2. anno 3. obs. 88. Denique eadem morbo adulto, & declinate propinata, affectus spasmodicos, œdematosos, languores, atque febrim relinquunt: GALENUS 2. simpl. 12. & 14. auctor est, dysenteria intempestive cohibita successisse melancholiam, & quod HOLLERIUS in schol. p. 353. observavit, epilepsiam, pleuritidem, & ut MARTINI de morb. mes. testatur, inflammationes & abscessus mesenterii, ac plura graviora incommoda, mortemque ipsam accelerare, ut multis ostendi exemplis posse scribit CRATO consil. XXII. l. 5. Quo quidem in casu operæ pretium est, infusis ano clysteribus, cohibitas dejectiones revocare, & internis absorbentibus ac diaphoreticis fixis imminentem præcavere inflammationem.

## §. II.

Neque vero intelligi debent ex animali regno deprompta remedia, quæ sedativa & anodyna, eaque tutissima virtute his in morbis se commendant. Ex horum numero sunt spina & hepar viperarum, rasura dentis hippopotami, manati, priapi ceti, pulvis secundinae humanæ exsiccatae: quippe quæ si cum lenioribus bezoardicis combinentur, ad sopiendas spasticas & convulsivas intestinorum stricturas, præclaros edunt effectus.

## §. III.

Quamvis blanda laxantia, & alvum lenientia in dysenterico fluxu egregium levamen ferre deprehendantur: cautissime tamen cum iis mercari oportet. Namque primum acriora purgantia, ex Jalappinis, scammoniatis, colocynthide &c. parata, exacerbando spasmodicas motiones, vim veneni exserunt; id quod etiam de mercurialibus valet. Unde non mirari satis possum, quosdam, & præsertim BOYLEUM de S. M. V. pag. 52. mercurium dulcem in dysenteria commendare: quippe qui ejus est indolis, ut ab admixtione salium acriorum, quæ in nostro morbo larga præsto sunt quantitate, causticus reddatur. Nec etiam

Circa anodyna tutiora.

Circa laxantia, & purgantia.

la-



laxantia, quæ dulcia sunt, & facile fermentationem subeunt, hoc in malo conveniunt: unde omnino a decoctis prunorum, foliorum fenicæ, syrupsisque laxantibus abstinendum erit.

§. IV.

Specia-  
tim cir-  
ca pilu-  
las po-  
lychre-  
stas.

Quamquam pilulæ polychrestæ, & temperate balsamicæ, leniter evacuant & corrigendo, primis morbi diebus, pariori & iterata dosi exhibitæ, egregiam afferant utilitatem; attamen ab iisdem, ubi morbus in plethoricis cum magno æstu, pulsuque celeriori invadit, sæpius notabilem observavi noxam. Tunc enim consultius est, ab omnibus, quæ vel levissime humores commovent, abstinere laxantibus; & potius decocto, quod ex sero lactis, tamarindis, rhabarbaro & manna conficitur, blandam moliri vacuationem. Præterea, ubi morbus statim ab initio, atrocioribus imi ventris cum torminibus incidit; ego solitus sum, anodynum evacuanti nuptum exhibere; eoque nomine pilulas aloephanginas, vel, quod melius, Becherianas æquali pondere cum massa pilularum de styrace remixtas, convenienti dosi bis vel ter intra nycthemeron, summo cum fructu propinare.

§. V.

Circa  
mannâ  
in fine  
morbi  
datam.

Neque raro observavi, infusum laxans mannatum, finito jam penitus, qui diutius adflixit, morbo, sublatisque gravioribus symptomatibus usurpatum, tormina & alia fontica mala revocasse. Causa talis modi catastrophes procul omni dubio in toni intestinalis, qui per violentos spasmos valde dejectus fuit, destructionem collocanda est, qua eadem facile irritari possunt. Ideirco congruis roborantibus deperditum illud robur instaurare convenit.

§. VI.

Circa  
radicem  
Ipeca-  
cuanhæ.

Radix Ipecacuanhæ, quæ pro specifico antidynterico a multis habetur, vid. M. N. C. Dec. II. anno X. obs. 115. non omnino suo caret usu; licet etiam sæpiissime sinistros producat effectus. Utilissime adhibetur in sub-

jectis robustioribus æque ac humidioribus, veluti sequior est sexus; deinceps operæ pretium exhibet, ubi magna cruditatum illuvies primis inhæret regionibus, vel miasma contagiosum recens susceptum est, & hinc nausea, vomendi conatus, præcordiorum anxietas, & dolor gravativus infestant. Tum vero primis statim diebus hoc remedium genus porrigere expediet; & ejusdem usus, si plethora & febris urget, phlebotomiam præmittere. Quod si autem, morbo existente adultiori, post jam factas crebro dejectiones mucidas pariter ac sanguinolentas exhibeatur; sistit quidem eas aliquantulum, sed majores parit circa præcordia anxietates, ut sæpius clysterum emollientium ope alvinam excretionem revocare, necesse sit. Præterea hanc radicem commodissime ad drachmam dimidiam cum decocto laxante, ex manna, rhabarbaro, & tamarindis parato exhibere licet, si magna cruditatum primas vias obsederit copia.

§. VII.

Summo quoque studio fugienda sunt illa remedia quæ intestina magis stimulant; veluti sunt cuncta salia, neutra ac digestiva, tartarus vitriolatus, arcanum duplicatum, salia thermarum &c. Nihilominus nitrum, nec non sal prunellæ, quod præsertim RIVERRIUS magnis extollit laudibus, ob vim refrigerantem atque temperantem quandoque commendari, & absorbentibus immisceri meretur pulveribus, utique, si æstus cum siti nimium urgeant, & subjecta cholericæ, biliosæque sint constitutionis.

§. VIII.

Communis multorum medicorum ipsiusque HIPPOCRATIS & GALILENI it. MARTIANI comment. in libr. HIPPOCRATIS de ratione vitæ in acutis pag. 415. est opinio, alvo fluente non detrahendum esse sanguinem; & pro generali quidem in nostris regionibus monito practico id ipsum haberi potest. Verum ego multiplici ductus experientia statuo, quod

Circa  
salina  
remedia.

Circa  
venæ-  
sectionem.



in subjectis valde plethoricis, diætæ vinosæ adfuetis, si dysenteria cum febre continua corripiantur, omnino perquam sit necessarium, venam ab initio morbi secare. Nam vanus est metus, sanguinis missione vires immi-  
nui; & quum non modo plerique dysentericorum, ex inflammatione intestinorum moriantur; verum quoque plethorici, si continuis infestentur febribus, non nisi ob nimiam sanguinis molem, adstases, gangrænâ, & sphacelum disponentem pereant: non certe convenientius in his periculis antevertendis, venæsectione reperitur præsidium. Neque desunt testimonia scriptorum probatissimorum, qui hoc remedii genus insigniter commendarunt. Sic JULIUS CÆSAR CLAUDINUS *Resp. VI.* se plures dysentericos venæsectione curasse perhibet: quales etiam observationes RIVERIUS *Cent. II. obs. 37. & 44.* AMATUS LUSITANUS *Cent. II. obs. 48.* ALTIMARUS *de medendis hum. corp. malis cap. 74.* BOTALLUS *Cap. IV.* SYDENHAM *Oper. med. Cap. de dysent. pag. III.* & ex recentioribus PASCOLI *in opp. suis pag. 190.* recensent notatu dignissimas.

## §. IX.

Circa  
diapho-  
retica  
præfer-  
vandi  
sine da-  
ta.

In dysenteria per castra maligne grassante a perito castrensi medico relat-  
tum mihi est, præsentis contagii suspi-  
cione, & non ambiguis illius signis, diaphoreticum ex cornu cervi usti, &  
philosophice præparati, antimonii dia-  
phoretici, salis volatilis cornucervi,  
& croci ana granis decem confectum,  
& cum calido sumtum vehiculo, corpus  
ad sudorem disponendo, desideratissi-  
mum & incomparabilem edidisse effe-  
ctum, adeo, ut post repetitas aliquot  
doses in prima, uti dicunt herba per-  
niciæ mali vis fuerit suffocata. Quod  
remedii genus, ubi sordibus primæ viæ  
scatent copiosis, post opportunum e-  
vacuans demum exhibere, mea qui-  
dem sententia longe securius foret.

## §. X.

Communis clinicorum, isque pessi-  
mus hoc loco taxandus est error, cum  
ad atrocis nostri morbi curationem, re-  
mediis alexipharmacis & theriacali-  
bus, veluti sunt electuaria ex diascor-  
dio theriaci Andromachi, mithrida-  
tio, pulvere Pannonico rubro concin-  
nata, essentiæ alexipharmacæ, tins-  
turæque bezoardicæ, immoderati utuntur. Vidi sæpenumero a nimium  
exhibitis in dysenteria populariter  
grassante, ejusmodi remediis calefa-  
cientibus, & exsiccantibus, sympto-  
mata fuisse exasperata, cum auctis in-  
terno æstu, febre & siti. Namque ipsa  
quoque dictitat ratio, ejus generis san-  
guinem commoventia minus conveni-  
re in morbo, qui ab interno diuturnio-  
re æstu, humores dulces ac temperatos  
in biliosos & salino sulphureos commu-  
tante, suam trahit originem.

Circa  
calidio.  
ra alexi-  
phar-  
macæ.

## §. XI.

Plures porro medicorum in dysente-  
ria ad coercendam humorum acrimo-  
niam, ulcerum pravitatem leniendam,  
& corrosam intestinorum substantiam  
consolidandam, remediis glutinosis &  
mucilaginosis, tam interne, quam ex-  
terne per clysteres potissimum nimium  
uti solent: Talia sunt lac variorum ani-  
mantium, decoctiones pedum verve-  
cinorum, solutiones tragacanthæ,  
gummi Arabici, & gelatinæ animan-  
tium, sperma ceti, radix consolidæ  
majoris. Quamvis vero haud in totum  
improbari queant hæc remedia; mo-  
nendos tamen esse duco medicos, ut in  
illis adhibendis cauti procedant, mo-  
dumque servant. Nam fluida hæc glu-  
tinosa per anum admissa faciunt lento-  
rem, ulcera magis fœdant, & cicat-  
rici resistunt; efficiuntque sæpius, ut  
compressio alvi profluvio, ventris col-  
luries magis cumuletur, & fermentando  
graviores spasmos inducat ac  
tormina.

Circa  
mucila-  
ginosa.

## §. XII.

Lac quod attinet, illud solum, ma-  
xime si acida in primis viis abundet sa-  
bur-

Circa  
lac, &



burra, ob coagulum, quod ibidem facile subit; & inde metuenda sympto-  
mata non convenit in dysenteria. Ve-  
rum idem coctum & cum aqua pura  
fluviali vel fontana, vel etiam acidu-  
lis Selteranis mixtum, aut serum la-  
ctis, quod jam HIPPOCRATES  
laudavit, ob vim sitim & æstum tem-  
perantem, & acrimoniam humorum  
aliquantulum obtundentem, multam  
meretur commendationem; id quod  
etiam RAYMUNDUS a FORTIS  
*Consult. cap. II. pag. 245.* & SYDEN-  
HAMIIUS *Oper. med. pag. 115.* egre-  
giis suadent elogiis. Præterea etiam  
aqua pura fontana, cum unicornu,  
aut cornucervi usto, aut boli quadam  
specie cocta, vel chalybeata, junio-  
ribus æque ac adultioribus, ad sitim &  
æstum extinguendum, & acres humo-  
res diluendos, potum præbet omnibus  
præstantiorem. Pertinet huc etiam de-  
coctum SYDENHAMII ex aqua fon-  
tana, cornucervi usto, mica panis si-  
milaginei cum saccharo paratum. vid.  
*opuscul. ejus p. 228.* Nec ignotum est,  
quam celebres, & multis experimentis  
in curanda dysenteria adprobatae sint  
aquæ in Italia, Tutianæ dictæ, item  
Villenses, Montiscadinæ &c. de qui-  
bus legi meretur FALLOPIUS *de*  
*thermis*, & CÆSALPINUS *in quest.*  
*med. 21. l. 2. de medic. facult. cap. X.*  
Præstans porro nostrarum usus est aci-  
dularum, quibus curatam dysenteriam  
vide in A. N. C. *dec. I. anno 2. obs. 213.*

§. XIII.

Quum nullam morbi genus tam fœ-  
tidum, tam sordidum, tam abomina-  
bile, quodque tam putridis exhalatio-  
nibus aerem inficiat, & conspurcet,  
quam ipsa dysenteria sit; videndum  
est, ut non in ipso conclavi, in quo de-  
git æger, verum potius vicino, si vires  
patiantur, moderate calido fiant deje-  
ctiones, hæque statim removeantur.  
Non minus suffragiis ex mastiche, &  
succino, noxia aeris corrigenda est  
qualitas; quo etiam sine in omnibus  
contagiosis morbis appendenda collo-  
camphoram, modo ægrotantes ejus  
*Hoff. Syst. Tom. V.*

odorem ferre queant, admodum com-  
mendare solitus sum. Ubi vero vires  
permittant, e lectis surgere; consul-  
tum erit, vas quoddam, recipiendis  
stercoribus opportunum lecto suppo-  
nere, si prius decocto calidiori ex flo-  
ribus malvæ, sambuci, semineque fe-  
nugræci imbutum fuerit; in quod de-  
cumbentes alvum dejiciant.

§. XIV.

Vix datur ullus morbus, in quo pe-  
dum refrigeratio tam grave, imo mor-  
tis periculum, confirmante id expe-  
rientia, injicit, quam dysenteria. Vi-  
di hac ratione brevi post inflammatio-  
nem intestinorum, quæ in ipsam mor-  
tem transit, esse sequutam: pedibus  
enim refrigeratis, cutaneus cortex con-  
stringitur, & noxii humores majori  
copia ad intestina congeruntur. Quam-  
obrem operæ sapius est pretium, cali-  
dos lateres pedibus supponere.

§. XV.

Nihil gravius affligit dysentefi-  
cos, quam perpetua desidendi cupi-  
ditas, & tenesmus molestissimus,  
quo vel nihil, vel perpauca, plus mi-  
nus cruentus egeritur mucus. Quo  
in casu ex artis præsidis efficacissi-  
mum est socus, qui ex lacte, floribus  
sambuci, & chamæmeli incocto para-  
tur; vel portio mucilaginis psyllii,  
aut cydoniorum; aut olei amygdali-  
ni & vitelli ovorum, croco permixti,  
frequenter ano infusa.

§. XVI.

Qui ex dysenteria diutius protracta  
convalescere, ac vires sumere inci-  
piunt; illis, ut pristinum, & morbo  
labefactatum ventriculi ac intestino-  
rum robur cum vi digestrice, reci-  
pian, exquisita diætæ ac victus ra-  
tio præscribenda est. Quæ si negle-  
ctui habeatur; lenteriam, febres  
lentas, tabem, aliosque chronicos af-  
fectus insequi, plus simplici vice li-  
cuit adnotare.



Enarrationes morborum.

## OBSERVATIO I.

Dysen-  
teria in  
hyste-  
rica.

**J**Uvencula viginti annorum mulier, succiplena, animoque valde sensibilis, menstruum inordinato successui, & hinc pendentibus hysterico spasmodicis ægritudinibus obnoxia, tempore autumnali præscriptum a medico in pilularum forma sumebat purgans, quod præter alia extracti colocynthidis & diagrydii sulphurati aliquot grana habebat. Inde sex vel septem satis copiosæ sequebantur sedes, & paullo post crudeles imi ventris dolores, ac tormina excipiebant. Jungebantur quoque præter vomitiones, creberrimæ dejectiones, quibus excreta sanguine instar loturæ carnis tincta, cum magnis anxietatibus, inquietudine, pulsuque celeriori reddebantur. Ego consultus, quum exacerbatus motus magis, quam sordium crassarum præsentiam suspicarer, interne non nisi pulveres absorbentes, cum theriaca cœlesti, castoreo, & nitro mixtos exhibui, & pro potu ordinavi decoctum ex rasura cornucervi, radice scorzonerae, pentaphylli, & cinamomi paratum: extrinsecus vero abdomini imponendum suasi sacculum, qui species carminativas, spiritu vini cum oleo menthæ & chamomillæ vero saturato, imprægnatas habebat; quorum ope convaluit ægra.

## Epicrisis.

1) Præsens dysentericus fluxus, uti principalem causam in contagio, tum temporis epidemico agnoscit; ita a dato acriori purgante, tanquam a procatartica causa excitatus fuit. Notari enim probe meretur, quod testante crebra experientia, suscepta maligna miasmata nonnunquam diutius sine noxa in corpore possint tolerari, tumque quandam dispositionem ægotandi generare, quæ accedente occasione in actum deducitur.

2) Cumprimis viri hypochondriaci, foeminæque hystericae ad affectum dysentericum valde proclives sunt, & ex dato purgante facillime illum incurrunt. Quum enim eorum ventriculus ac intestina jam antea spasmodicis contractionibus obnoxia reperiantur: eo magis ab acri purgante adeo irritari possunt, ut præsentis dispositione, humores noxii, constricto corporis ambitu, ad ea compellantur, atque vera generetur dysenteria.

3) Vomitus dysentericorum non eandem semper præbet prognosin: mox enim salutaris ac velut criticus existit, si nimirum largior cruditatum in primis regionibus copia præsto fuerit; mox vero malæ est notæ, & periculosa intestinorum significat inflammationem. Hoc posteriori casu ardens pulsansque dolor, enormes anxietates, & pertinaces extremorum refrigerationes comitantur vomitiones; a quibus immunes sunt, si a solis proveniunt cruditatibus. In nostro casu non æque saburra quædam, nec inflammatio ventriculi, vomibundæ ipsius inversioni causam præbuit; sed spasmodicarum motionum vitium venit accusandum: id circo nec aliis, quam quæ hos præternaturales motus delinire, & humores ad cutem revocare, perque sudorem expellere valent, remediis opus fuit.

## OBSERVATIO II.

Generosa mulier, quadraginta annorum, corporis tenerioris, diuturno mœrore obingens per incendium domus inductum damnum, agitata, tempore, quo dysenteria in pago, in quo degebat, sæviter grassabatur, nullo quidem victus errore prævio, primum mucoso, post cruento ac dysenterico alvi fluxu corripiebatur. Frequentissimæ erant dejectiones, adeo ut intra nycthemeron tricesies & ultra alvum deponere cogeretur, non sine gravissimis torminibus, inquietudine, pulsu febrili, & insigni virium languo-

Dysen-  
teria  
feliciter  
sana-  
ta.



guore. Sordes excretæ per primum septiduum mucosæ, deinceps cruentæ, mox viridi, mox ex flavo pruno colore tinctæ adparebant, & sic per quatuordecim dies large fluebant. Sitis urgebat ingens, sed simulac potus quidpiam assumsisset, statim alvum reddere tenebatur: præterea tussis vexabat sicca, & corpus absque ullo madore ac sudore aridissimum erat. Adhibuerat variæ medicus, pulveres absorbentes cum chrystallo montana, elixiria stomachica cum essentia terræ Catechu mixta, nec non oleum camphoræ, quod ex camphora in oleo amygdalarum dulcium soluta constabat, ac decocta varia; sed in cassum. Post hæc ad cohibendum quodammodo fluxum ordinaverat infusum theiforme, ex herbis vulnerariis, & adstringentibus, consolidæ saracenicæ, vincæ per vinca, faniculæ, agrimonix, veronicæ, millefolii, menthæ, melissæ &c. concinnatum: sed ab ejus usu pessime habuit ægrotans, & ingentes circa præcordia anxietates, inflationem ventriculi, ructus, extremorum frigus, animique defectiones, non multum imminuta desidendi frequentia, passa est. Id circo me vocavit in consilium, & anxie flagitavit opem. Dedi mixturam, quæ habebat aquarum florum acaciæ, sambuci, cardui benedicti ana uncias tres, olei amygdalarum dulcium uncias binas, pulveris mei bezoardici drachmas duas, liquoris anodynii guttas triginta & balsami vitæ guttas duodecim, syrupi cydoniorum unciam semis: atque jussi, ut hujus mixturæ, probe agitæ singulis binis horis vasculum, quoad sorbillandum potum Thee utimur, assumeret. Toti abdomini aquam reginæ Hungariæ calefactam, in cujus uncia guttæ octo olei menthæ, & viginti balsami vitalis solvebantur, pannis calidis inungendam curavi. Pro potu dedi lac vaccinum, cum infuso theiformi ex seminibus carminativis, aque incoctis maritatum. Ab horum usu intra unius diei spatium, insigniter fracta fuit

symptomatum vehementia, & imminuta dejectionum frequentia. Quare propinavi remedium anodyno alexipharmacum, quod ex liquoris anodynii uncia una, salis volatilis cornucervi drachma, ejusdemque olei probe rectif. guttis octo erat compositum. Cujus cum quindecim guttas per aliquot vices assumsisset, redibat somnus, sudor per totum corpus erumpebat, & alvus vix bis vel ter de die reddebatur. Hinc ejus usum continuavit, sumsitque crebrius pulverem ex bezoardico meo, & sex corticis cascarillæ granis confectum: unde brevi tempore felicissime consanuit.

### Epicrisis.

Cruentæ alvi fluxiones optimo jure cum affectibus catharralibus, & rheumaticis comparari posse videntur: quam plurima quippe sunt momenta, quæ hanc convenientiam demonstrant. Quemadmodum enim primum in coryza serum pituitosum ad glandulosam faucium, atque narium tunicam copiosius defertur, ibidemque secernitur: ita in dysenteria serum sanguinis biliosum, sulphureumque ad primas regiones demandatur, auctaque intestinorum, & ductuum biliferorum peristalsi evacuatur: id quod, si absque læsione intestinorum fieri posset, in maximum sanitatis cederet emolumentum. Deinceps sicuti affectus catharrales plerumque a communi aeris vitio, & prohibita transpiratione originem ducunt; & nunquam fere non febriculam quandam, utut mitem, & noctu præsertim exacerbata, habent comitem: ita quoque utrumque momentum circa fluxus dysentericos observari mereatur. Ut porro in rheumate perniciosum est consilium, excretionem seri vitiosi mox ab initio morbi improvide cohibere: ita illud idem in dysenteria exitiale est, & fontica post se trahit symptomata; testante inter alia, & præsentis exemplo. Quemadmodum coryza, si quæ jam adsit dispositio, da-



to errhino, vel ptarmico, facile excitatur: ita idem fit in cruento alvi fluxu post datum acre purgans. Et denique utrumque malum eandem requirit præservandi rationem; quæ in eo consistit, ut tempore, quo grassantur ejusmodi affectus, omnium cura atque studio salutaris transpiratio, non est præsertim conservetur.

## OBSERVATIO III.

Dysenteria  
in juvene,  
nebre,  
vi curata.

Generosus juvenis, viginti circiter annorum, teneræ, ac macilentæ corporis constitutionis, Augusto mense per quadraginta milliaria noctu dieque continuatum fecit iter, sub quo corpus diurno solis calore, qui erat fervidissimus, valde calefactum, noctu vero eximio frigore affectum fuit: simulque varios potus, mox cerevisias lupulatas, mox recentes, dulces, atque triticeas assumpsit. Domum redux conquerebatur de magnis imi ventris torsionibus, virium languore, & inappetentia stipatis, quas inter primo triduo parciore ac moderatas sedes habebat. At quarta die, auctis mirum in modum circa umbilicum torminibus, copiosissimæ sequebantur dejectiones cum sincero permixtæ sanguine. Ille sibi solus consulturus, non nisi panem tostum, cum nuce moschata, & vino calefacto, sacharo remixto capiebat; sed cum nihil inde commodi sentiret, meam invocabat opem. Deprehendi ipsum valde languentem, inquietum, miris tormentis obnoxium, pulsūque debiliorem & celeriore: & quum obnixè rogaret, ut quanto citius profligarem molestum malum, hac usus sum medicatione. Præscripsi pulverem, qui corticem cascarillæ cornucervi philosophice præparatum, lapides cancrorum, matrem perlarum, antimonium diaphoreticum, & terram sigillatam habebat; eumque pondere unius drachmæ, una cum triginta liquoris anodynæ mineralis, quindecim balsami vitæ guttis, & binis olei amygdalarum dulcium cochleari-

bus, ex decocto avenaceo pro una dosi capiendum curavi; utque singulis quatuor horis iteraret, suasi. Venti præterea aquam reginæ Hungariæ calidam cum linteis duplicatis imponendam jussi: unde intra tres dies, imminuta torminum ac dejectionum frequentia, somnum, adpetitum atque vires recuperavit, prorsusque convaleuit.

## Epicrisis.

Præsens morbus citra contagii, aut miasmatis cujusdam concursum, suppressæ sub itinere transpirationi, & usui potuum fermentescibilium unice debetur. Quemadmodum enim ex illa impuritates sulphuræ, acres, biliosæ in massa sanguinea cumulata, & congesto corporis cortice, ad intestina compulsæ fuerunt: ita ex hoc similis acris, caustica, ac fermentescibilis saburra in ipsa ventriculi ac intestinorum cavitate est generata. Jam quidem vetustissimum est monitum, ut medicus morbos non tuto & jucunde solum, verum quoque cito curare annitatur. Quod ultimum momentum licet non semper citra manifestum noxæ metum a medico peragi possit: attamen certis in casibus locum omnino invenit. Et in præsentis quidem casu sic sum ratiocinatus: Medendi indicationes in eo curando erant, ut acrimonia humorum acidobiliosorum corrigeretur, dolores ac tormina intestinorum blande consopirentur; humorum affluxus ad ambitum corporis revocaretur, & tonus intestinorum restitueretur. His vero indicationibus recensitum remedium, quod ex temperantibus, diaphoreticis, antispasmodicis & roborantibus confectum erat, omnino responderebat: quod cum primis morbi diebus, ubi nondum læsio intestinorum invaluerat, repetitis sæpe vicibus adhiberetur; factum utique est, ut brevi tempore morbi vis felicissime

me



me expugnaretur. Monendi vero hoc loco sunt juniores practici, ut non putent, profligatum penitus esse malum, si forsan cessaverint tormina, dejectiones, ac æger melius habere videatur: sæpius enim anguis sub herba adhuc delitescit. Sed tum demum certa reconvalescentiæ spes foveri potest, si consopitis omnibus symptomatibus, somnus ac appetitus redeant, & vigor naturalis, viresque cito restaurentur.

## OBSERVATIO IV.

Dysen-  
teria  
cito cu-  
rata.

Generosa scemina triginta & ultra annorum, teneræ & macilentæ sed vegetæ constitutionis, in vicina urbe, anno 1719. quo in hisce tractibus populariter grassabatur dysenteria, ingentia simul & semel ventris tormina cum magno virium lapsu, extremorum refrigeratione, inquietudine, & alvi fluxu copioso & per vices etiam cruento experiebatur. Summo a me petiit opere, ut, quam fieri posset brevissime ipsam sanarem; quia Regia solemnia tunc temporis Dresdæ, ubi pater mariti magno officio admotus erat, celebranda visere animo valde gestiebat. Ego opem omnem possibilem pollicitus, ita eam tractavi: Præscripsi nempe hanc mixturam: Recipe aquæ florum chamomillæ, millefolii, cum cerevisia triticea destillatæ, florum sambuci, menthæ & cinamomicydoniatæ ana uncias quatuor, liquoris anodynii, spiritus cornucervi bene præparati ana guttas quadraginta, pulveris bezoardici drachmas tres, syrupi papaveris albi drachmas sex; de qua bene agitata, sumtæ fuerunt uncia duæ singulis tribus horis. Desuper vero haustis aliquot vasculis infusi Thee, semine carvi & cymini nobilitati, corpus in lecto ad æqualem & placidum sudorem disponendum suasi. Pro potu ordinario adhibitum decoctum hordei cum emulsione amygdalina mixtum. Externe vero fermentum panis cum aceto forti & spiritu chamomillæ Romanæ subactum, calide regioni epi-

Hoff. Syst. Tom. V.

gastricæ fuit applicatum. Inde optimus secutus est sudor, qui continuat a hac cura per biduum & ultra probe successit, & tertio die, symptomatibus fere omnibus evanescentibus, vis morbi remisit. Nihilo tamen minus suasi, ut non modo adhuc corpus a liberiori aere domi defenderet, sed & insisteret usui mixturæ & elixirii mei stomachici. Sed hæc die post reconvalescentiam tertio suscepit iter, & neglecta diætâ Dresdæ recidivam cum cruentis fluxibus per aliquot dies perseverantibus passa est, a qua tamen ope medicorum præstantissimorum quarta demum septimana liberata fuit.

## Epicrisis.

Optime nos docet hic casus, tempestive & mature oblata convenienti medicina, grave hoc & periculi plenum malum cito posse supprimi, & huic scopo obtinendo medicamenta demulcentia, diaphoretica ac roborantia præ omnibus aliis velificari. Nam sicut dysenteria, ubi paulo subtilius ejus genium explorare volumus, non nisi rheumatismus intestinorum est, a decubitu & congestione seri salii biliosi, ob transpirationem prohibitam ad intestina, eorumque ductus ac glandulas conversi oriundus; ita & in profligando eodem rationi & experientiæ convenientissima methodus hæc est: ut motum humorum ex interiore ventre rursus ad peripheriam corporis & pristinum subcutaneum emunctorium congruis & naturæ amicis remediis revocemus; qualis curandi via in catharosis etiam & rheumaticis affectionibus semper observata est optima: sed si in ullo affectu, certe hic opus est, ut rectæ huic medendi rationi justo tempore per diætetica æque ac pharmaceutica remedia insistamus; nisi, quæ omnibus in principio neglectis rheumaticis affectionibus familiaris valde est, hujus diri mali recidivam, præcedente morbo semper gravio-



curatuque longe difficiliorem velimus expectare.

## OBSERVATIO V.

*Dysen-* Generosus juvenis duorum & vigin-  
*teria ex* ti annorum, constitutionis cholericomelancholicæ, propensus ad iram &  
*magi-* animi affectus, inter studia & lucubra-  
*natio-* tiones poculis interdum deditus, anno  
*ne.* 1726. cum populariter hic grassaretur dysenteria, ex terrore, cum conspiceret funus juvenis hoc morbo sublato e domo sua deportari, eo ipso etiam corripiebatur. Brevi enim post invadebat eum præcedente horripilatione ingens circa præcordia anxietas, cum nausea & virium debilitate magna conjuncta; nox erat inquieta, & vehementibus venter torminibus una cum stimulis ad alvum deponendam frequentioribus afficiebatur. Ego postero die consultus cum ex pulsu sanguinis nimiam judicarem affluentiam, ægrumque sanguinis hoc tempore missionibus assuetum esse intelligerem, neque ipse in principio, de morbo, qualis evaderet, satis essem certus; ut vena brachii secta sanguis, qui satis erat crassus, detraheretur, consilium dedi. Mitigatæ inde anxietates præcordiales, & liberius transpiravit æger. Alvi tamen fluxus semi cruentus sequebatur & in dies crescebat. Cui vero nullis aliis remediis obviam ivi, quam pulvere meo bezoardico cum sexta parte corticis Cascariellæ & nitri permixto; quem singulis quatuor horis exhibendum jussi cum decocto, quod ex radice chinæ, Scorzoneræ, ras. C. C. santalo rubro & semine fœniculi paratum erat. Externe linimentum ex olei amygdalarum dulcium uncia una, olei menthæ & camphoræ ana drachma dimidia conflatum applicandum curavi. Clysteres repudiabat, quos nec ego in hoc affectu valde necessarios judicavi. Et ita intra decem dies optime convaleuit.

Eodem tempore in vicinia alius studiosus, sanguineo-cholericus, iræ, am-

bitioni, & studiis deditissimus, sanguine turgentibus venis præditus, in eundem ex contagio incidebat morbum. Consulebat hujus urbis Medicum non incelebrem, qui singulis tribus prioribus diebus bis pilulas polychrestas ad exemplar Becherianarum confectas ad usum commendavit. Cum omnia in pejus ruerent, me quoque, ut consilio succurrerem, rogavit. Invisi ipsum, & cum pulsum tangerem, illum valde magnum & celerem quadam duritie junctum deprehendi. Æger erat valde inquietus, somno penitus carebat, & de doloribus in epigastrio & umbilicali regione ardentibus cum continua nausea & propensione ad vomitum conquerebatur. Dejectiones erant creberrimæ, æque semper aliquo sanguine permixtæ. Rebus ita constitutis nolui quidquam ad medendum proponere; nec venæsectionem, quam in initio morbi utilissimam habueram, admittendi jam tempus judicavi. Sed nono die, doloribus simul & semel ipsum deserentibus, moriebatur.

## Epicrisis.

Quam securum & minus noxium venæsectio sit remedium, ex priori casu addiscere licet. Ego tamen nolim hoc præsidii genus generatim in hoc morbo commendare. Sed credo potius plus detrimenti quam emolumenti ab hac promiscue admissa esse expectandum. Nam ubi vigenz succorum impurorum in sanguine abundantia, & intestinorum canalis magna vitiosorum colluvie humorum scatet, insuperque corpora sunt humidiora & spongiosiora, neutiquam venæsectione opus est. Sed aliter sentiendum in præsentī casu, ubi ex animi affectu in homine plethorico, nullo notabili in primis viis existente vitio, malum obortum fuit.

In altero casu hæc non omittenda videtur observatio, pilulas istas leniter balsamicas & ex extractis amaris concinnatas, in alvi fluxibus etiam cruen-



eruentis in principio præsertim exhibitas, non suo fructu carere; verumtamen in subjectis sanguine plenis, & calidioribus, ubi vitium plus est in sanguine, quam in succorum pravorum primis in viis abundantia, nullas video eas usurpandi indicationes. Cum ratione potius & experientia ducere ea sint ipsis commendanda, quæ intestinum sanguinis motum temperandi & transpirationem promovendi polleant efficacia, & quæ liberiores circulationes procurando inflammationes, & interna, quæ diutius hunc morbum trahunt, ulcera abarcent: in quorum censu tempestiva & ægri naturæ conveniens primum omnino locum occupat venæsectio, quæ deinde aliis idoneis auxiliis potest secundari. Ad fordes vero mucidas et acres biliosas ex intestinorum canale leniter evacuandas, serum lactis cum manna, cum rhabarbaro & tamarindis permixtum & primis diebus decenter usurpatum omnibus reliquis evacuantibus est præferendum.

## OBSERVATIO VI.

Dysenteria  
an. 1684  
epidemica.

Quum sub primis præseos Medicæ annis Mindæ Westphalorum Provincialis Medici munere fungerer, graviter anno 1684. ob plane insuetam & extraordinariam siccitatem & præcalidam cœli constitutionem & quartana & dysenteria graviter grassabatur. Ver erat siccissimum, & tota æstas sicca & calidissima, adeo ut intra quatuor mensium spatium nulla pluvia observata fuerit. Malum vero his modis se prodebat: Præcedentem horripilationem dolores atroces modo infra, modo supra umbilicum sequebantur. Dejectiones interdum carniū loturæ similes, interdum sanguinolentæ, quandoque etiam purulentæ erant, mucum & intestinorum ramenta secum ferentes, cum frequentissima & fere intolerabili ad secessum cupiditate. Plures in una domo serpente contagio ægrotabant,

ita tamen, ut pro diversa corporum constitutione, robore etiam & regimine, nonnulli facilius & intra quatuordecim dies, alii vero intra quadraginta dierum spatium majori cum molestia imo periculo evaderent. Nam in quibusdam erat morbus acutus, in aliis valde longus. Memini enim septimo & nono die quosdam mortuos robustos viros, sanguine turgentes, & qui in vita vino ejusque spiritu paulo largius se ingurgitarant, præsertim quando sub ipso morbo corpus refrigeraverint, vel gravis quidam animi affectus accesserit. Qui ad malignitatem arcendam & stomachum roborandum alexipharmacis, theriacalibus & stomachicis calidioribus spirituosiss atque etiam adstringentibus utebantur, ii rarius evadebant, vel gravius & longius ægrotabant. Remedia, quæ tum desideratum ediderunt effectum, erant rhabarbarina, in principio duobus vel tribus prioribus diebus data, una cum clysteribus emollientibus & demulcentibus, deinceps potiones concinnatæ ex pura aqua fontana, menthæ, chamomillæ vulgaris, admixtis pulveribus ex cornucervi usto, philosophice præparato, bolo Armena, lapidibus cancrorum & syrupo cydoniorum, quales pulveres etiam frequentius usurpati fuerunt; quibus interdum quoque unum vel alterum granum theriacæ cœlestis admiscebatur. Rustici lacte cum aqua fontana mixto, vel sero lactis per totum morbi decursum non sine singulari fructu utebantur. Grassabatur etiam hæc lues inter milites præsidarios, quibus præerat Chirurgus, qui in India orientali per aliquot annos vixerat; cujus methodus hæc erat: Plethoricis & robustis in principio, interdum etiam in statu morbi venam secabat. Aliis, quibus vitiosorum humorum in primis viis colluvies infesta erat, vomitorium exhibebat: Aliis, ubi malignitas aderat, electuarium, quod arcani instar habebat, & cujus ingredientia erant roob sambuci, theriaca, pulvis pyrius, cornucervi ustum, & quidquam



quam camphoræ porrigebat : Pro potu nil nisi aquam fontanam leniter frigidam concedebat. Qui non respuebant medicinam, & patienter sub æquali calore se continebant, in iis benigne & optime morbus decessit.

### Epicrisis.

Diuturnas veris & æstatis siccitates & nimios calores, accendendo nimis sanguinem & ex humoribus blandis intemperatos & sulphureos falsos gignendo, accedente postea aere paulo frigidiori & humidiori, liberam perspirationem intercipientem, epidemice grassantes varii generis ægitudines, maxime omnium vero dysenterias & intermittentes anomalas, pleuritides quoque & alias rheumaticas affectiones producere, experientia per multa secula in historia Medica confirmatum habemus. Id quod etiam ab ipso HIPPOCRATE *l. III. aph. 16.* observatum legimus. Ex hac inordinata & præternaturali temporum constitutione, supra modum sicca & præcalida, Medicus rationalis, & qui non pure empirice una eademque methodo morbum tractat, facile perspicit, ad ejusmodi dysenteriam epidemiam tum avertendam tum curandam, medicamenta calidiora, sudorifera, & alexipharmaca minus proficua, sed magis noxia esse; contra diluentia, temperantia, demulcentia, blande laxantia, & diaphoretica convenientissima, non sine insigni fructu propinari. In ejusmodi morbis a vulgo sæpius ex longa experientia meliora & commendantur & petuntur remedia, quam a magnificæ famæ Medicis, qui sufficienti peritia destituti & insufficienti morborum theoria instructi sunt. Cum anno 1726. hic & in vicinis urbibus maxime Altenburgi sæviter dysenteria, qua multi perierunt, grassaretur, ipsi rustici spretis omnibus pharmaceuticis, quæ maxima ex parte erant calidiora, sero lactis item lacte ebutyrato per totum morbi decursum utebantur; &

præ aliis felicissime evaserunt. Est dysenteria medendi hæc ratio antiquissima. Nam ipse HIPPOCRATES *libro de affect. sect. V. it. l. VII. epidem. §. 6.* in quo historiam dysenteria notatu dignam cum cura præter morem prolixius recenset, lac bubulum, ejus serum, asininum quoque coctum & ad laxandam alvum & ad temperandos humores mirifice commendat.

Mentio quoque fit in historia nostra venæsectionis, & quod in pluribus robustis & sanguine plenis, ubi neglecta hæc ipsa fuit, acutis & lethalis fuerit affectus. Ego certe sanguinis missionem cum judicio & discrimine in hoc morbo & præcavendo & curando institutam, tanquam remedium & necessarium & saluberrimum, certa experientia & ratione sufficienti fultus censeo. Miror hinc indistincte a nostri seculi medicis hoc auxilii genus in hoc malo sperni & contemni; cum tamen peritissimi etiam antiquiores Medici, ut sunt SYDENHAMIUS *vid. ejus opp. p. III. RIVERIUS cent. II. obs. 37. 44. AMATUS LUSITANUS cent. II. obs. 48.* & plures alii de summa venæsectionis in hoc morbo utilitate posteritati observationes reliquerint præstantissimas.

### OBSERVATIO VII.

Quum æstas anni millesimi septingentesimi decimi noni per totam fere Germaniam & fercissima, & calidissima esset: mensibus Augusto potissimum & Septembri popularem stragem dysenteria pariter, ac febres intermittentes, incertæ tamen, & ad semitertianarum, quas hæmitritæon dicunt Græci, naturam accedentes ediderunt. Et dysenteria quidem sic habebant: Invadebant magis puerilia ac juniora corpora, & ex adultis eos, qui inordinatum vivendi genus egerunt, fructibus horreæ, atque cerevisiæ minus defæcatis, nimium indulserunt, & aeri

Historia  
dysen-  
teriae  
an. 1719  
epide-  
mica.



& aeri vespertino, qui humidus, nebulosus ac frigidus erat, se liberalius exposuerunt. Deinceps in illis regionibus, ac urbibus, quæ multa stagna, paludesque, ac flumina ipsas alluentia & pervadentia foveant, veluti est Lipsia, Berolinum &c. maximeque in illis domibus, quæ proxime ad flumen sitæ erant, majorem ac crudeliorem exercebant tyrannidem: Contra vero urbes ac regiones in locis altioribus, & montosis sitæ, vel prorsus immunes ab hoc diro malo fuerant, vel saltem illud mitissimum sunt expertæ. Qui præservandi sine acriora purgantia vel multa salina sumebant remedia, prorsus incidebant fluxum dysentericum; qui plerumque æstu febrili, tussi, quin & spirandi difficultate, in infantibus præsertim junctus observabatur. Non minus lumbrici sæpius cum stercoribus reddebantur, & infaustum exhibebant omen: tenesmus vehementer urgebat, & licet fæces cruentæ esse desinrent, nihilominus molestissime continuabat. Quibusdam cruentæ quidem, & copiosissimæ, æque summa virium prostratione, continuisque vigiliis stipatæ erant dejectiones; sed omni dolore, cunctisque torminibus si carebant, his præceps exitium, ipsaque mors certe imminebat. Data sub morbi initium adstringentia, vel opiata, magnas inducebant noxas, & singultum, vel inflammationes oris, faucium & œsophagi, sedato fluxu, movebant. Quosdam malum per integrum imò ultra cruciabat mensem; & denique, cum Octobris accederet mensis, omnino sævire desit. In hoc morbi genere præstantissimam deprehendi hanc medendi rationem. Primis morbi diebus ad temperandam & evacuandam saburram biliosam acrem causticam non sine fructu dedi laxantia demulcentibus nupta, vel etiam radicem Ipecacuanhæ, repetitis vicibus nonnunquam exhibitam. Ex laxantibus opere pretium fecerunt vel rhabarbarina, vel etiam pilulæ nostræ balsamicæ; quas numero novem bis de die, interposito pul-

vere bezoardico nitroso, ac jusculi avenacei usu, propinavi. Non minus clysteres oleosi egregiam tulerunt opem, nec non pulvis meus bezoardicus, cortici cascariillæ, æquali pondere nuptus. Quibusdam cum insigni, & subitaneo levamine præscripsi mixturas, quæ ex aqua fontana, chamomillæ, menthæ, ceraforum compositæ, insuper continebant pulverem meum bezoardicum, corticem cascariillæ, species de hyacintho, theriacam cœlestem, oleum amygdalarum dulcium, ac liquorem anodynum. Abdomini adplicandum curavi spiritum vini, in quo oleum menthæ erat solutum; & morbo diutius protracto, feliciter cum successu, potiones æque ac emulsionem analepticas subjunxi. Horum ope, si accedebat rectum & moderatum caloris regimen, plurimi convalescerunt: nisi quod senibus infensum ac mortiferum fuerit malum.

Epicrisis.

Plura in hac epidemica constitutione occurrunt momenta, quæ aliquam omnino merentur attentionem. Primum notabile est, quod cum ineunte mense Octobri morbus plane exspiraverit; licet hic mensis fructuum, pomorum, & uvarum sit feracissimus. Ex quo adparet, causam hujus epidemici stragis in miasmate quodam maligno, ex peculiaribus terrarum effluviis, ac ventorum constitutione generato, maximam partem fuisse quærendam.

2.) Docemur porro ex præmissa historia, nimium æstum & fervorem solis mortalium corporibus longe majores & magis perniciosas inferre noxas, quam quidem frigus, utut sit intensissimum. Hinc anno 1709. & 1715. ubi gelidissimæ erant hyemes, longe mitiores hominibus incumbabant ægritudines. Præterea vero dignum est observatione, quod ingens solis ardor in locis paludosis ac humidis, majorem edat stragem, quam quidem in altioribus & montosis: in illis enim eo ipso



calore multa effluvia, plus minus putrida ex aquis & stagnis generantur, quæ copiam miasmata malignorum insigniter augent.

3) Occurrunt etiam in hac strage epidemia exempla dysenteriarum, quas cum dolore careant, indolentes vocare solent. Pessimi sunt illæ moris & eventus; siquidem sphacelum partium internarum, maximeque intestinorum significant. Sic etiam WEDELIUS in dysenteria, anno 1669. per regionem Gothanam populariter grassante, aliquot casus adnotavit, ubi ægrotantes ab ipso invasionis momento per totum morbi decursum, non de minimo quidem dolore sunt conquesti, nihilominus statim ab initio cruenta dejecerunt, & certissime perierunt, vid. A. N. C. dec. I. anno II. obs. 43. & dec. III. anno I. obs. 60. His in casibus maxima miasmatis contagiosi accusanda venit malignitas; & insuper ipsa ægrotorum constitutio consideranda, qui plerumque insigni humorum labe ac scorbutica dyscrasia laborare deprehenduntur. Unde fit, ut succi vitales protinus emortualem in intestinis subeant stasim & corruptionem.

#### OBSERVATIO VIII.

Dysenteria  
anno  
1726.  
epidemi-  
ca.

Postquam in his nostris regionibus anno millesimo septingentesimo vigesimo sexto hyems antecessit sicca & aquilonia, ver autem pluviosum & austrinum, & denique æstas excepit sicciior iterum ac calidissima: factum est, ut hæc dysenteriarum ferax fuerit, quæ vero binis potissimum momenti a fluxu dysenterico, alias epidemico sese distinxerunt. Primum enim contra morem solitum cum in eunte æstate mense Junio invaserunt, & per sequentes Augustum, Septembremque sævierunt: deinceps etiam contra consuetum ordinem in montosis ac celsioribus locis, majorem ac graviolem, quam quidem in planis & campestribus exercuerunt tyranni-

dem. Ipse morbus sic habebat: Ægri statim appetitus jactura, & summa virium prostratione correpti, atrocissima tormina, & acutissimos in imo ventre persentiscebant cruciatus; quibus accedebant insignes præcordiorum anxietates, graves cardialgiæ, atque vomendi conatus: raro enim ipsæ incidebant vomitiones. Tum inter vagas horripilationes atque phlogoses, molestissimus jungebatur tenesmus, & frequens desidendi cupiditas, siquidem quadragesies, quinquagesies, & ultra fiebant quotidie dejectiones primum mucosæ, post sanguine paullulum tinctæ, dein carneæ, tandemque cruentæ. Adhæc tres potissimum mali classes vel gradus adnotare licebat: prior admodum benigna, nec nisi vagis horripilationibus & caloribus stipata erat, ubi ægrotantes non semper in lectis decumbere debuerunt: altera minus maligna comitem habebat febrim vel quartanam, eamque continuam, vel semitertianam: tertia vero maligna, cum acuta, & veluti inflammatoria febre conjuncta, efferata symptomatum ferocitate affligebat, magnumque in alias propagabat contagium, & tantum non semper brevi lethaliqve solvebatur eventu. Præterea sicuti potus frigidus noxam inferebat insignem; ita præsertim cerevisia, utut calida fuerit, majores anxietates & dolores, ac acerbiora in abdomine excitabat tormina. Refrigeratio quæcunque malum gravius, fomentationes vero, cum primis regionis umbilicalis dolores reddebant mitiores. Appetitus porro dejectus gravem hunc affectum esse, gravio-rem vero, imo malignum, febris complicatio significavit: non minus virium cum prima mali accessione summa prostratio, ut plurimum funesta fuit. Illi, qui hausto dysentericæ contagio, atrocibus mox torquebantur cruciatibus, erumpente postea largissimo sudore, sub eadem torminum atrociam, & excretionum per inferiora pariori successu, nausea vero, & vo-

men-



mendi conatu majori, vix evaserunt. Tandem quæ dysenteria antea cum febre continua, deinceps febris hæmitritea, vel corrupta alia stipabatur, funestum ut plurimum sortita est eventum, vel saltem in lentam hæticodeamque febrim, cum tumoribus œdematosis transit. Qui medicorum, vel potius empiricorum, materiæ noxiæ & contagiosæ excretionem, datis improvide adstringentibus & opiatis sistere studuerunt; in præceptis vitæ periculum conjecerunt ægrotantes. Curationem quod attinet; ea prout vel benignum, vel magis malignum fuit malum, duplici ratione instituta. Benignum dicta jam in præcedentibus observationibus ratione oppugnavimus; ubi autem oleum amygdalarum dulcium, aut olivarum, multo magis, si illud more communium spiritu vini, & aceto destillato mixtum fuerit, non sine gravi noxa datum meminimus; illud enim solum adauxit intestinorum atoniam, cum spiritu vini maritatum, majores excitavit dolores. In maligna dysenteria cum vehementi febre conjuncta, principalissima cura febris tributa fuit, quam pulveres absorbentes, ac fixi diaphoretici, nitro nupti, & vel soli, vel ex aquis diaphnoicis propinati, non neglectis reliquis egregie mitigarunt: neque minus venæsectio sub morbi initio administrata, plethoricis mitiorem reddidit morbum; Vomitoria autem, & purgantia, ipsæque polychrestæ pilulæ, ob aloem, quam fovent, magis exasperarunt. Pro potu ad sitim, quæ vehemens erat, extinguendam, egregie inservierunt, vel emulsiones ex amygdalis dulcibus, cum juscule avenaceo paratæ, vel serum lactis dulce, vel etiam lac cum fonte Selterano maritatum. Denique declinante morbo roborantia, & ex his vinum Gallicum Bontac operæ fecerunt pretium. Ad molestissimum illum tenesimum sublevandum foci & vapores ex decocto lactis cum floribus sambuci, malvæ, chamomillæ vul-

garis ad posteriora admissi, & mucilagines feminis cydoniorum, psyllii, convenienti dosi ano crebrius inditæ omnium optime profuerunt.

## Epicrisis.

1) Quod si originem dysentericæ hujus epidemicæ inquiremus; eam a vitio quodam, in aere obversante repetendam esse, tam late grassans illius impetus significat. Verum non neglectui habendæ sunt aliæ causæ, & quidem primum tempestati animadversio debetur. Namque sub hyeme sicca, & aquilonia fibræ musculares strictiores ac rigidiores factæ, impuritibus per cutis spiracula excludendis exitum denegarunt; quæ insequente vere pluvioso nimium relaxatæ, apertis iterum cutaneis poris, varias ex atmosphæra susceperunt impuritates. Hæ demum accedente æstate calida atque sicca valde expansæ, commotæque, reliquos etiam succos in fermentativam indolem simul abriperunt: unde accedente quadam occasionali causâ, vel stimulo intestinorum, facile fuit, suboriri dysenteriam.

2) Has vero inter procatacticas causas vitiosa ingestorum, ac fructuum horreorum illuvies nullum habet locum: quoniam hoc tempore, cum Junio jam mense, malum grassari cœperit, eorundem nulla fuit copia. Sed potius quicunque menses tempestatem fovent dysentericæ opportunam; in iis, quamvis raro, grassatur etiam ille morbus. Sic ACT. WRATISL. Tent. VII. pag. 288. dysenteriam mense Martio, & DIEMERBROECK obs. med. VI. pag. 593. eandem per Januarium & Februarium grassantem memorant. Nihilominus tamen minus haud a veritate me aberraturum credo, si potulentorum vitio in nostro casu multum tribuam. Quum enim per tempestates justo calidiores ipsæ fontium aquæ putridæ soleant fieri; illæ præbent cerêvisias minus salubres & ac-



scientes, quæ ab hominibus id temporis vehementer sitientibus, copiosius haustæ, aerem ac biliosam in primis viis relinquunt saburram, mole sæpenumero paucam, eo vehementiori tamen stimulo intestina afficientem.

3 Communiter dysenterix locis in planis ac campestribus graviores esse solent, quam in montosis; eo quod atmosphæræ impuritates in planitie non æque ac in celsis locis aeris liberioris transitu, & ventorum multiplicato spiramine dissipari & removeri possint. In nostra dysenteria contrarium observare licuit, nec obscura est ratio. Quod si enim verum est, aeri inesse, eoque inspirari contagium epidemicum, & pro varia ventorum natura atmosphæræ insinuari; veritati quoque respondet ratio, quam asserimus, contagium recensiti mali epidemicum, ventis fuisse adductum, & magis celsioribus, utpote ventorum flatibus admodum expositis, quam campestribus regionibus, eorum infultui non ita subiectis, fuisse insinuatum.

4) Notari hoc loco meretur, dysenteriam interdum absque tempestatis vitio, popularem stragem edere, ex solo miasmate maligno per aerem obversante. Tum vero certis terrarum tractibus quasi inclusus observatur affectus; tum quoque multa infectorum copia in aere cernitur; & tum in montosis magis tyrannidem exercet malum locis; quemadmodum, quod ex sola tempestatis subita mutatione suboritur, campestribus ac planis regionibus infensus est.

## CAPUT VIII.

D E

CHOLERA ET DIARRHOEA  
BILIOSA.

## THESES PATHOLOGICÆ.

§ I.

**V**alde conveniens cum dysenteria morbus est, quem a copiosa biliosæ saburræ per os pariter ac anum facta excretionem, Græci choleram vocant, CÆLIUS vero AURELIANUS per fellisfluam passionem interpretatur, & WILLISIUS *Pharm. rat. Part. I. sect. 3. c. 3.* dysenteriam incurantam adpellat. Ea autem est motus ventriculi ac intestinorum peristalticus, ab inhærente varii generis materia acerrima & caustica, ad convulsivam contractionem proripatus, ex parte præter naturam inversus, & cum immoderatis biliosæ saburræ tam per superiora quam inferiora reiectionibus conjunctus.

§. II.

Cujus ante omnia differentiam a fluxu dysenterico notare convenit. Illa enim ad acutissimos referri meretur morbos; & intra paucos dies, ad summum septimo finiri solet, cum dysenteria, nisi fuerit summe maligna, diutius durare deprehendatur. Neque subinde dysenterico fluxui semper conjunguntur vomitiones, nisi forsan in principio, aut vigente mali impetu, si accesserit ventriculi inflammatio, illæ nonnunquam occurrant: at cholera nunquam sine vomitu est; sed nec tam molesto, uti dysenteria, tenesmo stipatur, nec tam frequentes cruoris dejectiones exhibet, nec denique contagium, uti dysenteria spargit.

§. III.

Non minus discrepat cholera a diarrhœa biliosa. Quamvis enim utriusque affectus eadem ferme deprehendantur causæ

Definitio cholerae.

Differentia cholerae a dysenteria.



arrhea caussa: attamen & diversa exhibent  
biliosa, symptomata, & diversam præbent  
prognosin. Nam sicut diarrhœa bi-  
liosa nihil est aliud, quam copiosa sa-  
buræ biliosæ, vi motus peristaltici in-  
testinorum in suo naturali, vel deor-  
sum tendente itinere, spasmodice con-  
stricti per anum facta excretio: ita e  
contrario hæc diarrhœa nunquam in  
cholera quidem abest: sed præter eam  
adhuc inversio quædam peristalseos,  
ventriculi potissimum ac duodeni ac-  
cedit, & ideo conjunctæ semper sunt  
vomitiones.

§. IV.

Distin-  
ctio  
chole-  
ræ in  
siccam  
& hu-  
midam.

Distinctio cholerae ipsius in siccam &  
humidam non insuper habenda est: il-  
la dicitur, si flatulentis vaporibus ven-  
tricus ac intestina adeo distenduntur,  
ut illi non sine summis anxietatibus,  
copiosa quantitate supra infrave eru-  
tentur: cujus notabile exemplum re-  
censetur in ACT. MED. BEROLIN.  
dec. II. vol. III. pag. 73. de quo nobis  
sermo non est: Humida vero vocatur,  
qualem §. 1. descripsimus: quæ iterum  
vel cum febre, eaque gravi inflamma-  
toria complicatur, quam medici ar-  
dentem seu caupon appellat, & nos  
Tom. IV. med. Syst. P. 1. descripsimus;  
vel sine regulari febre, licet non sine o-  
mni horripilatione, ac incerto æstu  
deprehenditur. Hæc plerumque est  
idiopathica: licet etiam symptomatice  
nonnunquam accedat dentitioni diffici-  
li juxta SYDENHAMIIUM *prax. med.*  
pag. 754. febribus malignis, secundum  
RIVERIUM *Cent. III. observ. 78.*  
& febris leipyriæ, quæ absque super-  
veniente cholera non cedere scribi-  
tur ab HIPPOCRATE in *Coac. aph.*  
123. & DURETO in *Holler. de*  
*merb. int. L. I. Cap. 31. pag. 235.*  
quibus etiam morbis, non raro bi-  
liosum duntaxat alvi profluvium jungi  
solet.

§. V.

Subjecta Eadem fere utriusque morbi sunt  
cholera subjecta, nimirum juniora, quæ bi-  
& diar- liosa, sicciori & cholericæ gaudent con-  
rhœa stitutione, conf. HIPPOCR. *Sect. III. aph. 30.*  
biliosa.

liquidem succulentiora, phlegmatica,  
& sanguinea, alvi magis pituitoso la-  
borare solent profluvio. Cum primis  
cholerae observantur expositi, qui suc-  
cos vitales acrimonia quadam scorbuti-  
ca contaminatos possident, aut sabur-  
ram acidam in primis fovent viis, ut  
fere sunt hypochondriaci, scorbutici, &  
cachectici, indole simul iracunda præ-  
diti. Æstivo quoque & fervidiori exi-  
stente tempestate, morbus hic potissi-  
mum infestat: & quo calidiores sunt  
regiones, eo frequentior & gravior  
occurrit: unde incolis Indiæ, Mauri-  
taniæ, Arabiæ, Americæ endemius  
scribitur a BONTIO *hist. nat. Ind. Lib.*  
*IV. cap. 6.* & THEVENOT *Itiner. par.*  
*II. Lib. II. cap. 20.*

§. VI.

Quod morbi historiam attinet: Histo-  
ria morbi  
scire refert, choleram plerumque uno  
impetu invadere. Quamvis enim se-  
pius ructus acidi, nidorosi, dolores  
ventriculi ac intestinorum pungentes,  
ac cardialgici, & præcordiorum an-  
xietates antecedant: tamen paullo  
post uno impetu & tempore sequun-  
tur vomitiones æque ac dejectiones.  
Et primum quidem ciborum ejiciuntur  
reliquiæ, post humores biliosi, plus  
minus mucos permixti, mox flavi,  
mox æruginosi, mox nigri, plerum-  
que acidissimi ac fere corrosivi, una-  
cum copiosis ructibus & flatibus,  
nec non ipso nonnunquam sanguine,  
repetitis frequentissime vicibus red-  
duntur. Præterea acutissimi dolores,  
torsiones, rosiones, morsicationes,  
inflationes, ac borborygmi sentiuntur  
in intestinis, maxime supra umbili-  
cum: & vehementissimæ adfligunt  
cardialgiæ. Malo ingravescente, si-  
tis accedit magna, extrema refrige-  
scunt, cor palpitare ineipit, septum  
transversum singultuosis agitur suc-  
cussionibus, urinae fluxus cohibetur,  
corpus gelidis perfunditur sudoribus,  
& non raro graves animi defectio-  
nes, sæpius syncopiciæ, quin hor-  
rende totius corporis conjunguntur  
con-



convulsiones. Brevis quoque mali est exitus: interdum enim tertio, vel quarto, vel, quod rarius est, septimo die solvitur; nec unquam diutius protrahitur, nisi in alium transeat morbum.

## §. VII.

Historia  
morbi  
juxta  
veteres.

Ex veteribus cholericæ passionis historia accuratè delinearunt ARETÆUS & COELIUS AURELIANUS: Hic enim *Lib. III. cap. XX.* ita describit morbum: præcedit frequenter cholicos stomachi gravedo, tensio, anxietas, jactatio, vigiliæ, tormentum intestinorum cum sonitu, ventris dolor; atque per podicem ventris fluor nihil relevans; ructationes fumosæ; nausea, salivarum fluor; gravedo thoracis. Surgente passione jugis vomitus, & primum corrupti cibi, & humoris atque fellis flavidi; dehinc vitellis ovorum similis; tum præsii ac æruginosi; ultimo nigri; ventris turbatio cum dolore, & egestio vomitorum similis, hoc est spumosa & acerrima, cum frequenti delectatione vomendi. Crescente passione aquatratque tenuis liquoris fit egestio, & aliquando similis loturæ carnis. Feruntur etiam cum his humoribus plerumque subalbida, desputa; sequitur densitas pulsus, & articularum frigus, atque vultus nigrore fuscatus; ardor atque sitis insatiabilis; spiratio celerrima; contractio membrorum, cum nervorum tensione, ac surarum & brachiorum. Præcordiorum ad superiora raptus, cum dolore iliaco simili: aliquando egestio ventris sanguinolenta: vultus in maciem deducti, oculi rubri & in ultimo singultus &c. ARETÆUS autem *Lib. II. cap. V.* ita scribit: Cholera est vitium acutissimum: supra enim per vomitum erumpunt, quæ in ore ventriculi, & gula congesta fuerant; infra deliciuntur humores in ventriculo, & intestinis natantes. In primis quæ evomuntur, aquæ similia sunt: quæ anus effundit, stercorea, liquida, tetrique odoris sentiuntur, quod si per clysterem hæc eluantur, primo pituitosa, mox biliosa feruntur.

Initio facilis morbus, dolore vacans; postea vero tensiones in ore ventriculi & gula: tormina in ventre nascuntur. Si magis seviat morbus, anima deficit, membra resolvuntur, cibos exhorrent, animus consternatur: nervi tenduntur, tibiæ brachiorumque musculi convelluntur, digiti incurvantur, vertigo, oboritur: singultiunt, ungues livent, algent extrema, totum corpus rigore concutitur. Si ad ultimum venit malum, tum ægrotus sudore perfunditur, bilis infra suprave prorumpit, convulsione impedita, vesica lotium cohibetur, voce privantur: arteriarum pulsus minimi. Mors demum sequitur doloribus plena & miseranda, per convulsionem, strangulatum & inanem vomitum.

## §. VIII.

In cholera peremptorum cadaveribus, post mortem dissectis, intestina præcipue gracilia, speciatim duodenum, cum dextro ventriculi orificio intus gangrenata, extrinsecus bile suffusa ac flava, ductus vero biliferos nimium relaxatos inveniri, perhibent observationum medicarum scriptores, quos inter DOLÆUM *enciclop. med. Lib. III. cap. IV. pag. 418.* & BARTHOLI-  
NUM *hist. amat. Cent. II. obs. 81.* allegasse sufficiat. Præsertim RIOLANUS *anthropol. Lib. II. cap. 20.* cystidem felleam amplam, ductumque cholidochum insigniter distentum adnotavit: & A.M. BEROL. *dec. II. Vol. VIII. pag. 80.* ejusmodi lethalem cholere casum allegarunt, ubi duodenum cum pyloro interne gangrenatum, ac materia ex fusco nigra (qualis vomitu rejecta, & examinata, non nisi bilis sanguine permixta fuit) repletum: vasa venosa ventriculi cruore turgida, fellea cystis valde flaccida, & omentum versus ventriculum revolutum, conspectui sese obtulerunt.

## §. IX.

Quis inde non videt, sedem cholere, sicuti generatim in toto ventriculi ac intestinorum volumine: ita speciatim in duodeno, atque viis biliferis querendam esse? unde læpenumero uni-

Sectio  
anato-  
mica  
cholera  
perem-  
torum.

Sedes  
& caus-  
sa ma-  
terialis  
chole-  
ræ.



versum nervorum genus in tristem malorum rapitur societatem. Neque enim ratio aliam determinare potest sedem, si causam affectus nostri spectemus materialem. Nam vomitibus æque ac alvo quæ redditur materia, tantum non semper biliosa, licet non æque sincera ubivis bilis, existit; & modo humoribus acidis, pituitosis; salinis, aliisque peregrinis, nec non ipso cruore permixta cernitur: unde etiam varios colores modo flavum, modo viridem, modo nigrum, & alios sortitur. Ejusmodi vero bilis commixtio non in alio loco, quam intestino potissimum duodeno fieri potest: quippe quod partim ob sinuosum situm ac flexuras, partim affluentem ex ductu cholidocho, bilem æque ac pancreaticum succum, producendæ & fovendæ saburræ istius modi acerrimæ est opportunissimum.

§. X.

Causa proxima, & ratio symptomatum.

Et inducta quidem ab ejusmodi caustica materia vellicatio tunicæ, quæ ventriculum & intestina cingit, nervæ, causam cholæræ præbet proximam; siquidem hanc statim excipit convulsiva eorundem constrictio, qua morbus absolvitur. Hæc enim, accedente materiæ peccantis rosione, dolores tendentes, pungentes, lancinantes, rodentes, morsicantes, ac cardialgicos producit; atque in ventriculo, ac duodeno contra naturæ ordinem sursum tendit; in reliquis vero intestinis deorsum procedit: unde vomitiones atque dejectiones simul fiunt. Quemadmodum vero perpetuæ instar regulæ habendum est, quod ad vellicatas in corpore partes, major fiat humorum affluxus: ita quoque in nostro morbo succi vitales copiosius ad vasa ventriculi ac duodeni, tanquam primario affecta, ruunt. Dum autem hæ partes spasmò constringuntur; non possunt allati succi liberius per venas refluere; hinc eas infarciunt, ac primum subtiliores particulas, quæ ut plurimum sunt acres, serosæ, sulphureæ ac biliosæ, in affectæ partis cavitatem plorant: unde mira excretorum in cholera hu-

morum copia derivanda erit. Ulteriori mora ipsa vasa vel rumpuntur, cruoremque exstillant, cum saburra biliosa in nigrum crama coeuntem; vel statim subeunt, ac lethalem inflammationem & gangrænam. Interim spasmorum tyrannis ad vicinas quoque regiones vi consensus nervorum propagatur; & sic omnium maxime ductus biliferi sævis agitantur motitationibus, ut bilem suam effundant in duodenum, accessante cum morte spasmorum impetu, flaccidi ac relaxati adpareant. Porro si transeunt violenti motus ad cordis fabricam, ejus palpitationes; si ad diaphragma, singultus; si ad vesicam urinariam, mictus difficultas; si ad cutis ambitum, extremorum refrigeratio; si denique ad membranas cerebri & medullæ spinalis, epileptici ac convulsivi suboriuntur motus.

§. XI.

Quibus explicatis perscrutandæ jam mediatae veniunt causæ, a quibus producit materia, tantis tumultibus excitandis opportuna: quæ sive mole paucæ, sive major fuerit, semper summe causticæ & acerrimæ debet esse indolis, ut morbum distinguat ab aliis excretionum per vomitum & alvum generibus. Atque hanc primum inferunt venena, quippe quorum perniciosus in corpora effectus non alio, quam cholæræ significari potest nomine; adeo ut cholera, & toxico interire, idem fere sit. Cuncta vero venena sale caustico acerrimo operari, notum est; quod licet parcissima sæpenumero quantitate corpus intret, vehementissimam tamen ventriculi ac duodeni, hinc & reliquorum intestinorum vellicationem ac convulsionem infert: unde non ex sanguinis solum massa humores serosi ad eas partes fecernuntur, verum cystis quoque fellea, violenter concussa, effundit biliosum suum liquorem; qui prout hic vel ille jam præsto sit in primis viis humor, vario colore tinctas & vomitiones & dejectiones exhibet. Quam igitur tristissimam & plerumque terribilem tragoediam, a summo potissimum

Causæ cholæræ mediatae sunt: venena.



arsenico, quin etiam mercurio sublimato, ludi, quotidie proli dolor! observamus; & præsertim HILDANUS, DECKERUS *in not. ad Barbette*, & SALMUTH *Cent. I. obs. 10.* exemplis illustrarunt. Et quæ ab auctoribus de dysenteria a sumtis venenis excitata referuntur observationes; eas ad choleram omnes adplicandas esse puto.

## §. XII.

2) Purgantia & emetica acriora.

Similem venenis vim possident purgantia & emetica acriora, majori dosi, aut minus opportune propinata, quippe quæ sal quoque foveant acerrimum. Effectus eorundem perniciosi vulgo hypercatharsee, vel hyperemeseos nomine exprimuntur; quæ si conjunguntur, uti plerumque fit, choleram omnino constituunt. Ejusmodi sunt esula, cataputia, semen Mezerei, vitrum antimonii &c. Ex antimonialibus haud rite præparatis, choleram vehementissimam notavit RHODIUS *Cent. II. obs. 73.* ex helleboro albo, FORRESTUS *Lib. XXVIII. obs. 44.* ex colocynthide *idem obs. 42.* & STALPARTUANDER WIEL *Cent. I. obs. 41.*

## §. XIII.

3) Cibi nimium dulces pingues ac fermentescibiles.

Præterea cibi nimium fermentescibiles, dulces, pingues, & qui facilius sunt corruptionis, choleram excitare possunt, si vel cerevisia minus defæcata, aut etiam aqua his superingeratur, & illi ab impuro corpore, cujus in ventriculo biliosa jam latet saburra, assumentur. Hæc enim subjecta cum bile coeuntia, & confermentata, generant acrimoniam veneno magis causticam: quo pertinent melones, pepones, cucumeres, fructus indorum ananas, mala persica, pruna, maxime ceræ, uvæ, ceræsa, panificia, cum multo butyro frixa, placentulæ mellitæ, fungi, ova piscis barbi, mustum, vinum ac cerevisia recens, carnes nimium pingues &c. Sic cucumeres, posita desuper cerevisia, a vetula comesti, lethalem peperisse choleram, testis est FONTANUS *analect. Cap. 21. exemplo 12*, eandem a malis persicis excita-

tam recenset GULDENKLEE *Lib. III. cap. VIII.* quid? quod a lactis inopportuno usu productam refert HENRICUS AB HEER *obs. XV. pag. 149.*

## §. XIV.

Nec excludenda sane ex causis cholerae est gravis iracundia; quæ cum primis ipsi prognerandæ potentissimam vim obtinet, si inter ipsum pastum, comestis cibis fermentescibilibus quis exarserit, aut statim post iram potest vel cibum, vel, quod pessimum est, emeticum, aut purgans aliquod sumserit. Namque neminem fugiet, iræ efficaciam primis potissimum, atque biliferis viis esse infensissimam; utpote non solidas ac motrices has solum commovet partes; verum eo ipso orgastice bilis cum alia, quæ forsan adest, saburra effervescentiæ, amplam præbet causam. Tali ratione cholerae ex ira, sumpta desuper brassica subortæ exemplum allegant ACT. MED. BEROL. *dec. II. vol. I. pag. 36.* eandemque a vehementiori ira lethalem recensent eadem ACTA *vol. VIII. pag. 80.* nec non PLATERUS *observ. Lib. III. pag. 754.* & BORELLUS *Cent. II. obs. 27. pag. 121.* Atque non alius, quam cholera morbus est, quem teneri infantes, ex matrum ira excandescens culpa, sæpe numero patiuntur, nunquam sine vitæ periculo. Provenit ille ex lacte, per iram matris orgastico facto, & insensibili infantis ventriculo cum bile effervescente, intestina arrodente, ac plerumque in lethalem inflammationem abeunte.

4) Gravis iracundia.

## §. XV.

Quæ quidem hætenus recensite causæ, si acrimonia gradu benignior fuerit, & profundius intestinis inhæserit, solam diarrhœam efficient biliosam. Hæc vero alias adhuc agnoscit causas, quæ quidem haud facile cholicam excitare solent passionem. Et cum primis notari meretur, critice nonnunquam fieri biliosam alvi fluxionem, in subjectis biliosis, si vel levis in victu error, vel iracundia, vel transpirationis

Causa mediata diarrhœæ biliosæ.



his cohibitio præcesserit; quin eadem non raro sponte suboritur, idque æstivo potissimum tempore, & rite tractata in corporis vergit salutem. Non minus sæpissime fit, ut ejusmodi diarrhœa biliosa, critico motu per febres intermittentes biliosas, quales sunt pleræque tertianæ, incidat, corpusque insigniter sublevet.

## §. XVI.

Causæ  
proca-  
ræti-  
cæ.

Sunt etiam causæ quædam præcætar-  
clia, quæ si concurrerint cum media-  
tis, & cholera & diarrhœam bilio-  
sam eo certius generabunt. Ejus-  
modi sunt primum aeris fervidior con-  
stitutio, quæ uti omnes totius corpo-  
ris succos, ita præsertim bilem in or-  
gasticam deducere valet commotio-  
nem. Hinc derivandum esse credo,  
cur Indis, & Arabibus endemiæ di-  
cantur cholera; præsertim cum acces-  
serit frequentior fructuum Ananas,  
qui iis in locis reperiuntur, & succo fer-  
mentante noxiosissimo præditi sint, u-  
sus. Deinceps corporis quoque nimia  
refrigeratio, reprimendo serum acre  
biliosum, ad cholera disponit: unde  
SCHENCKIUS *Lib. III. obs.* cholera  
meminit, quæ ex pedum refrigeratio-  
ne, accedente musti & fungorum  
usu, suborta fuit. Et denique cum  
SYDENHAMIO, gravi scriptore,  
*Oper. med. pag. 216.* frequentes cra-  
pulas tam vinosas, quam cerevisiarias,  
tanquam occasionalem cholera caus-  
sam, in subjectis choleris, omni ju-  
re accusamus: quippe quibus robur  
ventriculi, & intestinorum debilita-  
tur, variæque cruditates acidæ in pri-  
mis viis generantur; quæ accedente  
vel leviori bilis commotione, gra-  
vissimas in œconomia vitali producant  
turbas.

## §. XVII.

Progn. Si denique prognosin recensitarum  
eo usque ægritudinum spectemus;  
ea in cholerica passione plerumque  
feralis est. Nullus enim, nisi forte  
pestem, & febres pestilenciales exce-  
peris, brevioris est exitus, tamque  
cito homines jugulat morbus, quam

Hoff. Syst. Tom. V.

cholera; cum primis si vel senes, vel  
infantes, vel longo morbo debilitatos  
invaserit. Quo magis caustica est re-  
jecta materia, quo intensior sitis &  
æstus; eo certius periculum; & si bi-  
lis atra, sanguineque atro permixta  
dejiciatur, præfigit inevitabile exi-  
tium juxta HIPPOCRATEM *Lib. IV. aph. 22.* Non minus mortem si-  
gnificant, juncta animi deliquia,  
singultus, convulsiones, extremorum  
frigus, & sudores gelidi; nec boni  
quidpiam expectare licet, si compres-  
sis excretionibus reliqua persistant sym-  
ptomata. Verum salutis affulget spes,  
si conquiescant vomitus, cum inse-  
quente somno, & levamine; sique ul-  
tra septimum morbus protrahatur  
diem. Diarrhœa biliosa, si brevis sit,  
& sine magnis torminibus affligat,  
salutariter decurrit; eandemque fini-  
ri, erumpentes denuo flatus indicant;  
nec non in tuto fere est, quæ siti & æ-  
stu caret. Contra vero fusa sub alvo ci-  
bi cupiditatem perire, malum; utique  
si acutiora simul urgeant tormina,  
somnia eripiatur oculis, & vires insi-  
gniter prosterantur. Quandocunque  
sive dysentericæ sive cholericæ passioni  
aut diarrhœæ biliosæ, vel biliosis vo-  
mitionibus febris semitertiana, quæ  
Græcis hemitritæa dicitur, & ex fe-  
bre acuta inflammatoria & intermit-  
tente tertiana alternante sic paroxys-  
mo est composita, jungitur; affectus  
hi non summi sunt expertes periculi:  
optimum vero dictis in morbis signum  
præbent flatuum per inferiora eruptio-  
nes, ex quibus motus intestinorum pe-  
ristaltici quodammodo restituti non  
facile fallax indicium potest sumi. In  
dysenteria ructuum eruptionem jam  
tum suo tempore HIPPOCRA-  
TES pro convalescentiæ signo co-  
gnovit.



## Theses Therapeuticæ.

## § I.

Indica-  
tiones  
curato-  
ris.

**S**I in omnibus morbis, certe in cholera nunquam locum habebit cura per expectationem: siquidem juxta CORNELIUM CELSUM *Lib. IV. 2.* nulli morbo minori succurritur momento, & secundum TRALLIANUM *VII. 4.* exigua levisque curandi mora in eo est pessima. Quo igitur citius, & in principio succurritur cholerae, eo felicior evadit curatio. Hanc vero adgressuro tres potissimum occurrunt indicationes; nimirum ut ante omnia peccans & noxia materia corrigatur, attemperetur, ad exitum disponatur, & si opus fuerit, arte proscribatur; deinceps effrænes motus apte & convenienter sopiantur, & denique labefactatum nervosarum partium robur instauretur.

## § II.

Curatio  
cholerae  
ex illu-  
vie ci-  
borum  
fermen-  
tescibi-  
lium.

Prima igitur cura esto, noxii humoris attemperatio, & adjuvanda excretio. Prout autem illi sunt varii, & vel magna cruditarum biliosarum copia, vel pauca nonnunquam materia subtilis, ejusque causticae moles, tantorum tumultuum causa deprehenditur: ita paullo diversa exigitur medendi ratio. Quod si igitur ab assumptorum nimia quantitate, cibis fermentescibilibus, cum bile in acerrimum magma abeuntibus, malum propullulaverit; promovenda erit vacuatio, si impeditior fuerit, nec quod probe notandum, vires nimium prostratae sint. Neque vero emetica vel purgantia positiva hoc fine propinare convenit; sed vomitum hausta copiosius aqua tepida, butyro infuso, vel oleosis ac mucilaginosi, large imbuta adjuvare; alvi vero succellum; infusis ano clysteribus oleosis, & emollientibus, quibus serum lactis egregie inserviet; promovere expediet. Non minus egregiam merentur laudem juscula pulli junioris, copiosius hausta, quæ a SYDENHA-

MIO potissimum commendantur. His, oretenus jungenda absorbentia, terrea, noxiamque acrimoniam temperantia: veluti sunt pulveres ex lapidibus cancrorum, conchis citratis, matre perlarum, terra sigillata, coralliis preparatis, succino, pulvere Marchionum, speciebus de hyacintho, terris bolariibus, cornucervi ulso, spodio fossili, chrystallo montana, quam multi habent pro specifico, addito theriacæ celestis tantillo confecti. Ipsum quoque serum lactis, egregia temperandi, sitimque, qua crudeliter sæpius vexantur, extinguendi virtute pollet. Et veteres quidem, sicuti COELIUS AURELIANUS *morb. acut. Lib. III. cap. 21.* & TRALLIANUS *Lib. VII. p. 376.* multis laudibus commendarunt potum aque temperate frigide; de cujus utilitate recentius exemplum allegat BORELLUS *Cent. 2. obs. 27. p. 131.* & ego multis observationibus convictus sum.

## § III.

Ubi vero ex sumpto veneno, vel mota hypercatharsi vel hyperemesi, in subjecto alias sano, cholericus emergit morbus; causaque ipsius in pauca materia acerrimæ fibræ ventriculi nervis inhaerentis mole consistit: non quidem cohibere, neque vero adjuvare decet vacuationes. Omni potius studio in id erit incumbendum, ut causticus ac tenuis humor involvatur: quo quidem fine larga quantitate oleosa, mucilaginosa, & pingua sorbere juvat; veluti oleum amygdalarum dulcium, decocta cum rasura cornucervi, avenæ, hordei, ipsumque etiam lac, quod eo præstantiorem vim exferet, si cum absorbente quodam fuerit remixtum. Præterea quoque pulveres absorbentes exhiberi, & cum acidulis remediis, quæ ad castrandam veneni vim mirifice inserviunt, alternari possunt: quæ inter eminent mixtura simplex, spiritus vitrioli dulcis, nitri dulcis &c.

## § IV.

His interponenda pariter, ac post Motu præter.  
evacuata peccantem materiam sub-  
jun-

Cura-  
tio  
chole-  
rae a  
mate-  
ria cau-  
stica,  
mole  
pauca  
subor-  
tae.



natura-  
lium  
impe-  
tus so-  
piendus.

jungenda, præsertim si collabi ni-  
mum videantur vires, sunt remedia  
antispasmodica, imo analeptica speci-  
fica ex animali potissimum regno de-  
sumpta, cujus generis sunt, hepar lupi  
exsiccatum, rasura priapi cervi, cra-  
nii humani, ungulæ alcis, cancri usti  
fluviatiles, ossa humana calcinata,  
quæ ad convulsivas spasticas nervosa-  
rum fibrarum constrictiones æque in  
cholericæ ac dysentericæ affectione mi-  
tigandas non carere egregio suo fructu,  
plures medicorum peritissimorum con-  
firmant. Et sicuti semper, ita in hoc  
præsertim morbo anodynus tutissime u-  
timur, si vacuantibus decenter sunt  
nupta: quemadmodum sunt pilulæ de  
styrace, de cynoglossa, WILDEGAN-  
SII, STARCKEGANÆ, quæ va-  
cuantia simul foveant ingredientia, &  
si suspicio de præsentē adhuc materia  
fuerit, motus tamen efferati nimis  
sint, illæ cum pilulis aloephanginis,  
vel nostris quoque balsamicis permi-  
sceri possunt. Pulveribus absorbenti-  
bus theriaca coelestis, extractum ca-  
storei, cinnabaris addi merentur;  
& cumprimis operæ pretium faciet,  
liquor noster anodynus, quem cum  
oleo macis, vel etiam tinctura ca-  
storei maritatum vehementer laudo.

§. V.

Exter-  
norum  
usus.

Neque sua laude carent externa pa-  
regorica, & anodyna; quo fine ce-  
lebrantur emplastrum de crusta pa-  
nis, ceratum stomachale mastichinum  
Galenii, balsamum embryonum, spi-  
ritus theriacalis, linimenta ex oleis  
nervinis, absynthii, nucistæ, men-  
thæ, balsamo Peruviano, castoreo,  
camphora parata, cataplasmata ex  
fermento panis, aceto rutaceo, &  
spiritu vini, nec non sacculi discu-  
tientes, & paregorici. Ubi quoque  
motus insigni ferocitate urgent, nec  
moli materiæ ullo modo respondent;  
non præstantius, nec efficacius, ad  
eos placide sistendos, & reliquam cu-  
rationem facilitandam est præsidium  
oleo nucistæ expr. cum linimentis ner-  
vinis ad ventriculi regionem adplican-

do. Non minus commendationem me-  
retur balsamum nostrum vitæ dictum,  
cum linteis duplicatis affecto loco ad-  
movendum.

§. VI.

Horum ope excreta, quæ malum  
fovebat, materia noxia, & consopitis  
motibus; eo fructuosius erit, partes  
sub hoc morbo labefactatas convenien-  
tibus corroborare medicinis, quo ma-  
gis eorundem tonus destructus esse so-  
let. Et huic scopo eadem conveniunt  
subsidia, quæ præcedente Capite com-  
mendavimus. Cumprimis vero supe-  
rato morbo victu facili utendum, &  
ab animi pathematibus abstinendum:  
ne debiliori adhuc intestinorum ro-  
bore existente, nova producat cho-  
leræ recidiva. Cuncta ciborum gene-  
ra virtute præstanti longissime supe-  
rant juscula, ex carnibus vitulinis,  
gallinaceis, radicibus cichorei, pe-  
trofelini, asparago, chærefolio, can-  
cris contusis, succo citri parata: cum  
quibus etiam tincturæ martiales robo-  
randi sine sumi poterunt.

Tertiæ  
iudica-  
tioni  
satis-  
faciunt  
robo-  
rantia,  
cum fa-  
cili vi-  
tu.

§. VII.

Quod curationem diarrhœæ biliosæ  
attinet, ea si moderatior, viribus  
integris fuerit, vix eget medicatione.  
Si impeditior successerit, clysterum ex-  
terno, rhabarbarinorum interno u-  
su, adjuvari desiderat. Si modum  
denique excesserit: ad acrimoniam  
temperandam pulveres absorbentes  
cum crytallo montana, ad spasmos,  
sedandos, liquor anodynus ex aqua  
menthæ capiendus, extrinsecus bal-  
samum vitæ abdomini imponendum,  
operæ facient pretium.

Cura-  
tio di-  
arrhœæ  
biliosæ.

CAUTELÆ.

§. I.

Potus aquæ frigidæ in passione cho-  
lericæ, quo calidior tempestas, re-  
gio, ipsaq; egrotantis constitutio fuerit,  
eo salubrior existit. Præter ejus internū  
autem usum, gelidam quoque aquam

Caute-  
la circa  
potum  
aquæ  
frigide.



extrinsecus ventriculo admoveere vel-  
le; sicut a quibusdam veterum factum  
legimus: minus tutum ac periculosum  
censemus, eo quod hac ratione præma-  
tura vacuationum cohibitio induci po-  
test. Ex hoc etiam fundamento deri-  
vanda est virtus, quam acidulæ in cho-  
lera potæ, præstant: de quibus lectu  
digna est observatio in SPINDLERI  
*obs. med. not. ad obs. 42.*

## §. II.

Circa  
lac, &  
ejusdem  
serum.

Quemadmodum lac, iis in casibus,  
qui a sumto veneno, vel acri purgante  
natales mutantur, involvendo prin-  
cipium causticum, ac secum educendo,  
insignioris utilitatis deprehenditur: ita  
illud, ubi vel nimis acida saburra præ-  
sto, vel ejus excretio impeditior fue-  
rit, cautissime propinari, vel ad mini-  
mum absorbente quodam permisceri  
debet. Contrà vero, serum lactis vi-  
ceni potus ordinarii & commodissime,  
& utilissime explebit; neque in siti tan-  
tum extinguenda, verum acrimonia  
quoque temperanda usum exhibebit  
desideratissimum.

## §. III.

Circa  
laxan-  
tium u-  
sum.

Laxantia oretenus data rarissime in  
cholera morbo exposcuntur; quod si  
autem vacuandi per alvum sit indica-  
tio, eam optime clysteribus, vel in-  
ternis rhabarbarinis explere licebit.  
Dulcia enim, mannata, syrapi la-  
xantes, utut alias lenissima sint,  
hoc in affectu nunquam adhibere con-  
venit.

## §. IV.

Circa  
roboran-  
tia &  
anody-  
na.

Roborantia & spirituosà ante peccan-  
tis materiæ sufficienter factam excre-  
tionem, ad cohibendas forsan vom-  
itiones usurpata, ipem fallunt, tantum  
abest ut vomitus sistant, ut eosdem po-  
tius cum reliquis symptomatibus exa-  
cerbent. De anodynis quoque, & spe-  
ciatim oleo hyoscyami notari meretur,  
quod ubi fractæ nimium sint vires, ac  
intestinorum inflammatio locum occu-  
pavit, neutiquam sint adhibenda; quo-  
niam tunc lethalem soporem atque ne-  
crosin inferre possunt.

## §. V.

Sicuti venæsectio in dysentericis, Circa  
venæ-  
sectio-  
nem.  
sanguinis nimia simul mole laboranti-  
bus, ad præcavendam inflammationem  
& mitiganda symptomata egregium  
confert momentum: ita sub iisdem cir-  
cumstantiis eadem in cholera quoque  
administranda venit, præsertim si vi-  
rium sit integrum robur: Multis enco-  
miis illam commendat in hoc morbo,  
felix ille medicus RIVERIUS *pr. med.*  
*cap. IX. pag. 345.*

## §. VI.

Diarrhœa biliosa uti alia omnis non  
statim sisti debet, sed pedetentim hu-  
mores temperandi sunt; quo in casu  
rhabarbarum leviter tostum ad scrupu-  
lum unum vel drachmam dimidiam  
cum aliquot granis nitri perquam utile  
est; dum humores vitiosos leviter edu-  
cit, & postea intestinorum tunicas ro-  
borando leviter constringit. Nam par-  
tibus subtilioribus laxat, terrestrioribus  
adstringit, quæ prævalent in tosto.

Circa  
laxan-  
tium in  
diar-  
rhœa  
usum.

## §. VII.

In cholera æque ac diarrhœa biliosa  
ad temperandam humorum acrimoni-  
am oleum nucistæ expressum ad drach-  
mam dimidiam sive solum sive cum  
grano uno laudani opiatî Helmontiani  
permixtum & cum jusculo exhibitum  
magnæ est efficacîæ. Emulsionem quo-  
que ex amygdalis, semine papaveris  
albi, addito ejusdem syrupo, & a-  
qua pura fontana paratæ dilutiores,  
eidem scopo obtinendo feliciter infer-  
viunt.

Quæ bi-  
lis a-  
crimo-  
niam  
tempe-  
rante.

## §. VIII.

Quando diarrhœa valde pertinax est,  
præmissis semper rhabarbaro tosto per  
aliquot dies, sudoriferum ex theriacæ  
recentis drachma una cum cornu cervi  
ulso, antimonii diaphoretici & nitri  
purificati granis duodecim exhibere  
convenit. Extrinsecus vero calide ap-  
positum præcordiali regioni cataplas-  
ma ex fermento panis, aceto & spi-  
ritu vini, additis aliquot guttulis olei  
menthæ & caryophyllorum, egre-  
gie non modo roborat subjacentes  
partes, sed & motum humorum ad

Diar-  
rhœa  
contu-  
macis  
cura-  
tio.

pe-



peripheriam convertit, & cuticularem excretionem secundat.

§. IX.

**Cholera  
ab ar-  
senico  
subor-  
ta cu-  
ratio:**

Quando cholera ab arsenico excitata fuit, sine mora pingua, ut oleum amygdalarum dulcium, oleum lini, butyrum infusum, oleum olivarum cum aqua tepida exhibere oportet. Hæc enim præsentissimam operam ferunt; eo quod non modo vomitum procreant, quo ipsius magna arsenici pars foras eicitur, sed quod inde etiam caustica acrimonia quæ fibras ventriculi nerveas vellicat, obtunditur, & spastice contractæ partes relaxantur.

§. X.

**Victus  
salu-  
brioris  
utili-  
tas.**

Superato cholæræ vel diarrhœæ biliosæ morbo expedit adhuc diætæ emolliente ad tempus uti, ut nimium vellitæ & sauciata ventriculi & intestinorum nerveæ fibræ quodammodo demulceantur; quo fine lac dulce, butyrum recens, hordeum excorticatum cum jure pulli aut lacte coctum, item serum lactis dulce optime conveniunt.

§. XI.

**Lac in  
cholera  
cum fe-  
bre no-  
cet.**

Quando cholera est cum febre conjuncta, non tam facile lac dandum est. Nam facile ex calore in caseum coalescit, unde majores cruciatus, viscerum tensiones, capitis dolores & cibi fastidium excitantur. Quare ut citra noxam febricitantibus exhiberi queat, præsertim pueris, magisque juvenibus quam ætate provectis, TRALLIANUS l. VIII. jubet lacti miscere aquæ fontanæ bonam partem, & ter quaterque ebullire, & tunc ab igne tolli. Atque ita lac dysentericis quoque febricitantibus non nocere ait.

§. XII.

**Sudori-  
ferarum  
noxæ.**

In cholera & diarrhœa biliosa præsertim quæ ab ira excitata fuit, maxime perire a sudoriferis, & regimine sudorifero præsertim in principio cavendum est. Graves enim rheumatici vel arthritici inde oriri solent affectus.

§. XIII.

**Cautela  
circa  
nitri  
usum.**

Perquam memoratu digna est observatio, quam RIVERIUS c. i. obs. 33. tradit his verbis. *Vir robustus & biliosus* Hoff. Syst. Tom. V.

temperamento præditus, correptus est diarrhœa biliosa valde urgente, cum siti intensissima: vocatus ad eum præscripsi sal prunellæ in potu ordinario: tum etiam in julepis ox aqua lactucæ & portulacæ paratis, ter in die sumendis, & intra 24. horas convaleuit. Et profecto insignis est nitri, aut salis prunellæ in ejusmodi affectibus efficacia, siquidem non modo æstum contemperandi, verum inflammationes quoque præcavendi, vi pollet excellenti.

Enarrationes morborum.

OBSERVATIO I.

**V**ir quidam sex ultra quinquaginta annorum, ad iracundiam proclivis, nec ullis præter eructationes acidas, & flatulentias obnoxius morbis, equo aliquando facturus iter, hora prius matutina quarta, paratum sibi a filia, quæ justo familiarius cum servo vixerat, decoctum succoladæ, cum lacte, & cinamomo sorbebat. Quo sumto mox de nausea conquestus, inceptum prosequitur iter, sed hora septima reversus, viribusque prorsus dejectus, mortuo similis in lectum deferatur. Tum vero horrendis protinus cruciari incipiebat vomitibus, quibus inter summas præcordiorum anxietates, & ineffabiles in ventriculi regione dolores, primum mucosam ac biliosam, paullo post viridescentem reiciebat saburram. Accedebant subinde frequentes dejectiones, cum horrendis imi ventris torminibus stipatæ; summum ciborum fastidium urgebat; extrema perfrigescebant, pulsuumque inter sensim evanescebant. Tandem inter frigidòs sudores, ac spasmodicas præcordiorum revulsiones, singultus, hisque junctæ totius corporis convulsiones jungebantur; vultus cruore turgidus rubebat; vox peribat; ipsaque hora pomeridiana secunda, & a sumto potu nona, inter crudelissimos cruciatus mors sequebatur. Cadaver neutiquam intumescebat,

**Chole-  
ra ex  
sumto  
procul  
dubio  
arseni-  
co bre-  
vi tem-  
pore  
letha-  
lis.**



nec vultus colorem, nisi vivo similem exhibebat; sed ungues cœruleo colore suffusi, scapulæ ac dorsum lineis ejusmodi notata, pectusque in latere sinistro punctis hinc inde ex atro rubicundis distinctum cernebantur.

### Epicrisis.

Quæstio ex hac tristissima morbi historia resultat, num defunctus cholera ex sumto veneno, anne potius aliis magis naturalibus causis suborta perierit. Ardua sane provincia ei imponitur; cui determinandæ ejusmodi quæstiones exhibentur, a quarum affirmatione, vel negatione fama, quin vita hominum dependet. Valde ancipites enim plerique de veneficiis sunt casus: cum primis si anatomica defuncti corporis sectio deficiat. Hac facta, si venenum in substantia adhuc intra ventriculum reperitur, res est clarissima: ubi vero illud haud deprehenditur, res adhuc dubii plena existit. Inflammationes enim ac lacerationes intestinorum, in omni cholera, sive a veneno, sive aliis causis enata, quin & in aliis morbis, dysenteria, colica convulsiva &c. vitæ imponunt finem: nec ideo certi quidpiam ostendunt. Nec ex omni dubio extricamur per intumescientiam externi cadaveris, aut maculas cœruleas ac livescentes hinc inde in corpore efflorescentes: quippe quæ phœnomena in plerisque corporibus, quæ sanguine turgent, ac subitanea abripiuntur morte, videre licet. Quamobrem in tali casu præter symptomata, & externas notas, ad morales quasdam circumstantias respiciendum est: unde BOHNIUS *tr. de offic. med. dupl. pag. 652.* rectissime scribit: *Si externa dati veneni indicia, odium subdolum, & veneni emtio concurrunt, & cuncta veneni ab extra admissi signa, aut plura horum conspirant, hæc evidentem & certam veneni dati notitiam conciliare possunt.*

Quod si igitur præsentem curatius examinemus casum: vero fit simillimum,

defuncto ex potu Succoladæ venenum quoddam, & quidem arsenicum fuisse exhibitum. Nam 1) valde imbecilla est assertio, ac si lac cum Succolada assumptum, in ventriculo cum saburra acidâ, qua illum fuisse occupatum eructationes acidæ significant, coivisset, & sic, accedente sub pluviosa tempestate equitatione, ideoque transpirationis cohibitione, causam materialem cholerae absque concursu veneni præbuisset. Cholera enim ex dietæ vitio producta, nec tam cito generatur, nec tam subitaneum fortitur eventum: qualis hoc in casu intra novem horas accidit.

2) Adsunt subinde ea symptomata, quæ datum arsenicum insequuntur, & hæc potissimum ab auctoribus perhibentur: 1) insignis post sumtum venenum nausea, 2) enormes vomitiones cum summo vultus pallore, ut videantur moribundis similes, 3) refrigeratio extremorum, & subita virum prostratio. 4) horrendi in imo ventre dolores tendentes, pungentes ac lancinantes, 5) pulsus cessatio, proxime mortem antecedens, & 6) convulsiones: quæ omnia brevi temporis spatio, eoque nunquam ultra nycthemeron protenso, mors excipit. Conf. ZACHIAS *in quæst. med. leg. Lib. 2. Tit. 2. qu. 7. n. 23.* AMMANNUS *in praxi vuln. p. 344.* & *de med. crit. pag. 303.* FORESTUS *Libr. XXX. observ. 5.* & *diff. quam de erroribus circa venena vulgaribus conscripsi pagin. 37.*

3) Quæ si ad præsentem casum applicemus, simulque conferamus, quod filia, quæ potum Succoladæ paravit, uti relatum mihi fuit, odio parentem habuerit, arsenicum emerit, & familiaris servo usa fuerit: nullum est dubium, quin ea dato in potu Succoladæ arsenico patrem interfecerit.



## OBSERVATIO II.

## Epicrisis.

Cholera  
falso a  
veneno  
deriva-  
ta.

Vir quidam consistentioris ætatis, hausto aliquando ab uxore parato jusculo, incipit statim male habere, nauseare, spiritum difficilius trahere, liquida averfari, terno ardore cruciari, & inter summas præcordiorum anxietates, perpetuo vomendi conatu urgeri. Vomuit quoque, sed parum æruginosæ bilis; & demum transacto inter dirissima dolorum tormenta biduo animam efflavit. Tertio post mortem die sepultum, sed quarto ob veneni suspicionem rursus effossus cadaver, exhibuit foetorem intolerabilem. Corpus intumefactum, & undique putredine fuit adfectum. Intestinum jejunum, mesenterium, hepar ac pulmones sphacelo penitus corrupta; cor flaccidum, atroque cruore infarctum; ventriculus undique inflammatus, prope pylorum sideratus, & intus materia viridescente plenus adparuerunt. Unde vir veneno, ab uxore cum jusculo ipsi propinato extinctus judicabatur. Verum explorata curatius morbi historia, hæc adnotare licuit momenta: Defunctus ille vir per integrum ante mortem annum morbofo corporis habitu, livido foedoque vultus colore, & adpetitus prostratione præditus fuerat; inque primis pridie ante sumtum jusculum de ventris torminibus conquestus, ea ipse a gravi iracundia, qua aliquot ante diebus exarserat, & ab hausto desuper spiritu vini derivaverat. Quibus molestiis consultura uxor, dictum cum melle confecerat jusculum, ex quo pejus habens defunctus, potu spiritus vini, philonio Romano, remedioque succinato calidiori se levare putabat. Verum exacerbatis magis magisque symptomatibus, supra recensitis, tandem diem obierat supremum.

Quum symptomata in hoc casu præsentia ita quidem comparata sint, ut sumti toxici effectibus consentiant; morales vero circumstantiæ refragentur huic suspicioni, nec in dissecto cadavere veneni ullum adparuerit vestigium: minus æquum esset uxorem veneficii ream agere. Vero potius similimum videtur, quod affectus cholericus, quo vir ille extinctus fuit, ab aliis præter venenum extrinsecus illatum causis, suam repetierit originem. Bilis in causticam & acerrimam indolem conversa, quam veteres internum vocabant venenum, magis malo causam præbuit: de qua REYES in camp. Elys. jucund. quæst. qu. 64. pag. 856. scribit: *Quid ergo similius inveniri poterit aliis symptomatibus, quæ de veneno intoxicato describuntur? siquidem ea in cholera morbo, nimirum a bile orto, fere omnia observavi.* Nam defunctus corpus impuris succis refertum præ se diutius tulit, testante malo habitu, foedoque vultus colore. Juxta ZACHIAM vero *cons. XII. n. 6. ex corporis impuritate facile evenire potest, ut humores intantum corrumpantur, ut ex ipsis sic corruptis generetur in corpore vivente venenum aliquod, afferens omnia symptomata veneni assumti & externi.* Quum ergo noster ita constitutus, vehementi exarserit iracundia: commota & in orgasmum acta fuit bilis; quin accedente vini adusti potu, nocivam subiit acrimoniam, tormina imi ventris, quibus pridie ante mortem cruciatus est, inducentem. Hæc vero mala uxor sedatura, bona intentione jusculum melitum dedit; sed non nisi oleum camino addidit: siquidem bilis commota, si cum dulcibus permisceatur, acerrimam acquirit indolem: qua etiam in nostro casu imbuta, choleram induxit; cui jusculum illud procatarcticam præbuit causam. Excitata sic cholericam passio, vomitibus potissimum crebris, ac alvi dejectionibus se exferere



debuisset ; sed iis per datum philonium Romanum cohibitis , inanes tantummodo vomendi conatus , & summæ præcordiorum angustiae , una cum horrendis doloribus miserum crudeliter affecerunt . Retenta insuper intus acerrima materies ventriculi arrosit , ejusque inflammatio produxit ; quæ intolerabili interiorum ardore se prodidit . Hæc vero in putredinem denique sphacelosam abiit , quæ ob impuritatem totius humorum massæ , citius ac latius diffusa , pleraque vitæ penetralia sphacelo infecit . Quæ cum ita sint ; *frustra minus evidentem ac magis dubiam quærimus causam* ( quæ in nostro casu esset venenum ) *ubi evidentem & manifestum habemus* , secundum ZACHIAM *loc.cit. n. 8. & 9.*

## OBSERVATIO III.

Cholera  
a sumto  
arsenico  
conata .

Vir quidam gregarius viginti sex annorum , robustus & illibata semper sanitate gavisus , sumto circa horam undecimam meridianam jusculo , vehementissimis subito corripiebatur vomitionibus ; quas protinus atrocissima imi ventris tormina , nulla vero subsequente dejectione , excipiebant . Jungebantur insuper ineffabiles præcordiorum anxietates , ardoris circa ventriculum acutissimi sensatio , inexplebile bibendi desiderium , ac perpetuæ inquietudines ; quibus symptomatibus per triginta horas miserrime cruciatus obiit . Dissecto post mortem cadavere , ventriculus circa sinistrum orificium inflammatus , tunica villosa abrafa , & in ejus , ut & intestini duodeni cavitate ultra tres mensuræ feri viridescens biliosi , una cum pulvere albicante , & magna mercurii vivi quantitate adparuerunt . Reliqua intestina hinc inde gangrenata , & tribus in locis contorta convolutaque in conspectum prodierunt . Uxor , veneficii rea ; se non nisi mercurium vivum ad excitanda tormina marito exhibuisse fatebatur : requisitus vero

medicus putabat , defunctum accepisse mercurium sublimatum , qui in ventriculo , ejus calore solutus , in sua rediisset principia ; unde mercurius vivus , & pulvis albicans , tanquam salinum illud mercurio adhærescens , in conspectum prodiiisset .

## Epicrisis.

Occurrunt in hoc casu momenta , insigni observatione digna : quorum primum est , num defunctus dato veneno perierit ? Neque vero ullum hujus rei est dubium : si consideremus 1 ) virum juvenem robustum , per omnia sanum repente forbillato jusculo , horrendis vomitionibus , torminibus , aliisque sumtum toxicum plerumque consequentibus symptomatibus correptum , ac intra triginta horas extinctum fuisse . 2 ) factam corporis sectionem , non modo eam ventriculi constitutionem , quæ exhibita venena sequitur , verum etiam ipsum in natura venenum ostendisse .

2 ) Deinceps , cum nullæ in nostro casu fuerint dejectiones , quæ ordinario ut ab omni cholera , ita præsertim ea , quam venena excitant , nunquam abesse solent ; ipsa quoque sectio hujus phænomeni causam præbet clarissimam , quæ nulla est alia , quam convolutio intestinorum tribus in locis facta . Hinc vero simul patet , quanta torminum spasmorumque intestinalium fuerit , in nostro defuncto vehementia ; quippe cui soli convolutio illa debetur , qua fœcibus per alvum nullus exitus fuit permissus ; & ideo symptomatum ferocitas acerbior red-dita .

3 ) Determinandum verò est , qualem exstiterit assumtum venenum ? Mercurium vivum solum velle reum agere , absurdum est . Quamvis enim mercurius ille vivus in subjectis , quorum primæ piæ impuris ac biliosis scatent succis , gravia symptomata , faucium erosiones , copiosorem sali-



salivæ fluxum, tormina intestinorum excitare, quibusdam observationibus deprehendatur; ex illo tamen ipsam mortem tam brevi tempore subsequutam esse, nemini hætenus adnotare licuit. Nec in præsentī subjecto recensita incommoda inde expectari poterunt, quum illud per omnia sanum ac robustum fuit: & per experientiam constat, ileo morbo laborantibus, mercurium illum librarum pondere citra noxam propinari.

4) Neque vero probabile est, mercurium sublimatum defuncto exhibitum fuisse. Hoc enim veneni genus, adstringente, quem faucibus infert, effectu se facile prodit; & raro tam atroces vomitiones excitare deprehenditur. Inepta quoque est assertio ac si ille calore ventriculi a salibus corrosivis liberatus, inque currentem redactus fuisset formam: hi enim effectus, non nisi per summam ignis torturam, & aliorum subjectorum additionem obtineri potest.

5) Quamobrem iustissima remanet suspicio, defunctum non nisi arsenico vita privatum fuisse. Nec falsa fuit: siquidem uxor, torturæ subjecta, post hæc falsa est, se marito arsenicum, & paullo post mercurium vivum exhibuisse. Cujus rei medicus statim certior potuisset fieri, si inventum in ventriculo pulverem, quem pro salibus mercurii sublimati corrosivis habuit, recto subjecisset examini, illumque carbonibus injecisset: tum enim, sicuti posthæc factum fuit, foetorem alio similem sparsisset, qui arsenico proprius est.

#### OBSERVATIO IV.

**Chole.** Communicavit ante aliquot annos  
**ra a co.** mecum notabilem de cholera casum,  
**mestis** Archiater quidem celeberrimus; qui  
**pastil.** sic habebat: Comederat futor quidam  
**lis ve-** cum uxore, & binis infantibus pastil-  
**lenatis.** los, qui ab illius fratre, insperso arsenico venenati fuerunt, & cani posthæc exhibiti, intra tres horas mortem in-

tulerunt. Exinde omnes protinus nauseæ, vomendi conatibus, vomitionibus quoque ac dejectionibus violentis ac copiosissimis, præcordiorum anxietatibus, atrocissimis torminibus, animi deliquiis, tremore artuum, ac summa virium prostratione infestati sunt. Sumtis contra hæc symptomata, quas Pharmacopæus enormes excretiones sedaturus dederat, medicinis sudoriferis volatilibus, cum theriacalibus maritatis, remiserunt quidem & vomitus, & alvi fluxus; sed reliqua symptomata, accedente summa spirandi angustia, eo atrocius insistebant. Uxor tandem efflorescentiam, purpuræ similem, cum insigni ardore prurituque junctam, per totum corpus experta, una cum marito, & altero infantum, utut longo tempore convulnerunt. At horum natu major, duodecim annorum, in horrendas incidit convulsiones, & has inter vigesima quarta a comestis pastillis hora obiit. Secatum cadaver sequentia exhibebat: Externum corpus undique tumidum, & colore cœruleo viridescente suffusum, inque dextro hypochondrio gangrænatum erat, ungues livescebant, & fauces inflammatae adparebant. Pulmones colore cinereo imbuti, sphaceloque corrupti cernebantur: ventriculus mirum in modum expansus, tunica villosa prorsus orbatus, tenuissimus, ac fere pellucidus, & variis hinc inde sugillationibus notatus, continebat amurcam ex atro brunnam, foetidissimam, eique intermixtum lumbricum mortuum. Cystis fellea bilem fovebat æruginosam, & reliqua denique viscera omni præternaturali vitio carebant, nisi quod intestina æque ac ventriculus insigniter fuerint expansa.

#### Epicrisis.

Ferax hic est casus utilissimarum observationum; quas ad illustrandum ulterius cholerae genium paucis proponemus. Primum quidem docet constans



flans experientia, veneno peremptos, ad sanguineam massam, cumque hac brevi tempore insignem totius corporis sphacelosam subire corruptionem; quam celerrima ipsius post mortem intumescencia, unguium livor, cutis cæruleus, viridescens & foedissimus color, & intolerabilis foetor significant. Neque obscura hujus rei est causa: venenorum enim, præsertim quæ ex minerali regno desumuntur, corrosivorum ea est indoles, ut non in ventriculo ac intestinis solum, sed aliis quoque partibus, ipsoque cutaneo ac musculofo corporis cortice vehementissimam excitent constrictionem; qua fit, ut sanguis in liberiori suo cursu retardetur, hinc subsistat, stagnet, & more ipsi consueto in sphacelosam abeat putredinem. Quod plerumque in externis quidem; quandoque vero in internis quoque contingit partibus; velut in præsentis casu pulmones sphacelati ostendunt.

2 Notari porro meretur, in veneno defunctis ventriculum ac intestina mirum in modum sæpius deprehendi expansa. Namque quemadmodum omnibus spasmodicis morbis familiare est, ut partium quas adfecerunt, atoniam relinquant: ita fit quoque in cholera a veneno, ut finitis per mortem ventriculi ac intestinorum convulsivis motitationibus, summa eorundem relaxatio, ac velut paralyxis excipiat. Qua quidem præsentem, vapores ac halitus ex restitantes ibidem humoribus pullulantes, liberam obtinent facultatem sese expandendi, simulque latera dictarum partium, mirum in modum dilatandi.

3) Venena varios edunt effectus ratione doseos, qua assumuntur: unde petenda quoque erit ratio, quod in nostro casu solus puer perierit, & reliqui evaserint omnes; quoniam ille sub pastillis majorem forsan veneni, quam hi accepit quantitatem. Si ejus dosis ad necandum minus sufficiens, ac incompleta fuerit: atrocissima nihilominus symptomata, & diuturnam parit ægritudinem. Namque, nisi tempestivæ ferantur suppetiæ, rapitur venenum

ad sanguineam massam, cumque hac per omnes nervosas corporis partes vehitur: unde salutari consilio in fœmina, cujus præmissa historia fecit mentionem, ad cutim in forma exanthematum purpureorum devolutum fuit. Quo in casu perniciose sunt calidiora, volatilia, ac sudorifera remedia, quippe quæ exagitando humores, & venenivim exaltando, cuncta reddunt ferociora. Præstat tum potius ubi nimirum venenum jam introivit humores, acidulis medicaminibus, quæ virulentiam toxici castrant, ut est mixtura simplex, uti, & cum iis alternare fixiora bezoardica, blandis anodynis nupta.

## OBSERVATIO V.

Vir quidam robustus, quadraginta & quod excedit annorum, militiæ editus, post vehementiorem aliquando iracundiam, insignem multam, sub aere quidem nimis humido frigidoque ingurgitabat. Postridie de ciborum fastidio, vomendi conatu, & dolore totius corporis contusorio querulus, subito vomitionibus & copiosissimis & vehementissimis, biliosis ac viridescens, inter summas inquietudines & præcordiorum anxietates corripiebatur; quas dejectiones cum crudelissimis imi ventris torminibus presso pede sequebantur. Vocatus medicus varii generis remedia stomachica, anodyna, roborantia ac diluentia, sed in cassum præscribebat: adeo ut æger per quatuor jam dies violentis doloribus confectus, dejectionibus cunctis viribus, pro deplorato haberetur. Quo in rerum statu desideravit ad delendam vehementem sitim ab amico aquam frigidam, eamque successivis haustibus, magna assumebat quantitate. Hæc ad intestinorum delata canalem cum magnis primum tormentis per alvum secedebat; continuato autem illius potu, tormina sensim conquiescebant, dejectiones fiebant rariores, & cutis, quæ antea aridissima erat, mollior reddebatur

Cholera per potum aquæ frigidae curata.



tur & humidior: æger quoque somnum capiebat, vires recuperabat, & sic unico hoc, quamvis simplicissimo remedio, a mortis faucibus ereptus convalescebat.

Epicrisis.

Veteres, quos inter CORNELIUS CELSUS, COELIUS AURELIANUS, TRALLIANUS, ARETÆUS, GALENUS, & AMATUS LUSITANUS eminent, aquæ frigida circumspæctum usum in magnis morbis, nominatim cholera, dysenteria, colica biliosa, convulsiva & sanguinea &c. miris extulerunt elogiis. Acerbe vero dolendum est, quod recentiorum medicorum plurimi, veterum vestigia deferentes, simplicia ejusmodi ac domestica remedia, altis veluti superciliis spernant; iisque longissime præferant exotica, specifica, pretiosa ac pharmaceutica præsidia: quibus dictis in morbis plus damni afferunt, quam adjumenti. Paucissimi enim sunt, qui agnoscunt, quantam & quam incomparabilem ad arcendos pariter ac sanandos graves morbos vilissimis ac simplicissimis rebus, ut sunt elementa, maximeque aer & aqua, tam frigida, quam calida, divina clementia indiderit virtutem. Ego certe pluribus in ægitudinibus, ad eas rite debellandas, ad veterum placita recurrendum esse statuo; nec id ipsum sine singulari fructu me fecisse, candide testor.

Quod præsertim usum aquæ frigida in cholera ac dysenteria attinet; audiamus veteres, quos inter CORNELIUS CELSUS *Lib. IV. XV. in dysenteria*, inquit, *si pluribus diebus alia remedia non juverunt, vetusque jam vitium est, aquæ bene frigida potio assumpta astringit, & initium secundæ valetudinis facit.* AETIUS *tetr. 3. serm. 1. cap. 45.* scribit: *in potu a principio quidem pluvie aqua utendum est, quod si pluvia optima non adsit, fontana utemur.* Et AMATUS LUSI-

TANUS *Cent. II. curat. 56.* copioso frigida potu dysenteriam biliosam observavit curatam. Non minus utilitatem aquæ frigida in cholera, egregie testatur descriptus supra casus; cui similem mihi, olim Mindæ medicinam facienti, licuit adnotare; quem in *MED. SYSTEM. Tom. IV.* recensitum legas. Virtutes autem, quas aqua in nostro morbo exserit, in eo potissimum consistunt, ut per illam ingens ardor, qui a vehementiori attritu & motu intestino partium sulphurearum suboritur, attemperetur & exstinguatur; deinceps biliosa humorum in primis viis contentorum acrimonia diluatur, & infringatur; & denique tonus, atque robur partium solidarum, a vehementia morbi insigniter labefactarum, rursus erigatur, instaureturque.

OBSERVATIO VI.

Vir generosus, quadragenarius, Chole-  
bono & robusto corporis habitu præ-  
ditus, ad iram proclivis, sanguinis ra po-  
missionibus nunquam adsuetus, sed tu seri  
vinosis comotationibus data occasio-  
ne supra modum deditus, & hinc fe-  
bribus tertianis, nariumque hæmor-  
rhagiis frequenter olim obnoxius, per  
aliquot jam annos circa vernale æqui-  
noctium vel febre tertiana, vel ad mi-  
nimum erysipelaceo dextri pedis tumore ardoreque cruciari cœpit. Præterea  
familiaris ipsi per multos annos fuit  
passio cholericæ, quam æstate potissi-  
mum, si a sumto cibo graviore exar-  
desceret forsan iracundia, protinus si-  
bimet contraxit. Hunc valetudinis  
statum mihi, fontes aliquando Lauch-  
stadiensis frequentanti, quos ipse, di-  
ctos morbos præservandi fine accesse-  
rat, referebat, simulque indicabat,  
quod cholera affectus, omissis tandem  
omnibus, a peritioribus passim medi-  
cis commendatis remediis, cum velut  
semianimis jaceret, non præstantius,  
quam a fero lactis perceperit auxilium.  
Se enim hoc, ad sitim tantum exstin-  
guen-



guendam laudatum, tam præsentem semper cum levamine potare consuevisse, ut mitescentibus sensim per superiora ac inferiora vacuationibus, ejus solius ope intra paucos convalesceret dies. Petiit ergo a me consilium, quod ab erysipelacea, tertiana, & hac cholericæ febris se præcavere posset: quod suppeditaturus suasi, ut bis quotannis venam præberet secandam; potibus spirituosus, ipsoque vino moderatius uteretur, & loco cerevisiæ aquam puram, cum quarta vini parte mixtam biberet. Præterea auctor fui suæque, ut dum serum lactis ipsius constitutioni convenientissimum judicarem, illud jam ad ipsum fontem per quatuor hebdomades, curæ loco, interposito quavis quarta die pulvere ex duobus rhabbari unoque tartari vitriolati scrupulis confecto, adhiberet, & vesperi in balneum temperate calidum descenderet: atque hæc singulis annis continuaret. Cui cum aures dederit consilio, factum est, ut ab illo tempore nec febre tertiana, nec erysipelate, nec hæmorrhagiis amplius corripere-  
 tur.

#### Epicrisis.

Ostensum jam in superiore est Capite, quam incomparabili in fluxibus dysentericis ac cholericis; & serum lactis, & lac aquæ nuptum, polleat virtute; quod eo nomine non solum a vetustissimo HIPPOCRATE, nec non ab Italis medicis, maxime SYLVATICO, FORTIS, BAGLIVO, item celebri Angliæ practico SYDENHAMIO; verum etiam nostris temporibus ab illustri Batavorum medico, BOERHAVIO, multis in gravissimis morbis, magnis commendatur laudibus. Optassem vero, ut nostræ quoque Germaniæ medici id attendere velint; ita enim futurum esse sperarem, ut in sanandis & præcavendis chronicis passionibus, præsertim quæ a copia feri impuri scorbutici proficiscuntur, & subjecta biliosæ ac sensibilibioris naturæ invadant, plus in-

de levaminis experiremur, quam quod hætenus ab aliis, utut magni nominis remediis expectare licuit. Illi enim liquores naturæ nostræ sunt amicissimi; sed notari meretur, curam per illos institutam, conjuncto regimine prudenti, per mensem & ultra esse protrahendam: cujus rationem, qui amplius scire desideraverit, adeat binas dissertationes, quarum unam de utilitate feri lactis, alteram de connubio lactis cum fontibus medicatis conscripsimus.

#### OBSERVATIO VII.

Quum ante quindecim annos in thermis Carolinis, Principem quendam ferentissimum comitatus degerem; accidit, ut illustrissima Comes, quæ ibidem commorabatur, ex improvviso in cholicam incideret passionem, tanta quidem vehementia, viriumque jactura adfligentem, ut intra octo horas plus quam triginta per alvum dejectiones, & viginti vomitus, iique viridescentes numerarentur. Tum ego vocabar, qui cum in causam indagarem mali, percepi, quod propter menstruorum defectum per quinque jam dies thermæ potasset aquas; pomeridie vero fraga hortensia paullo majori copia assumsisset, & inde statim nauseam, murmura imi ventris, & inquietudinem noctu persensisset; subsecutis, quæ præsentibus adhuc erant, affectionibus. Ego ipsam, & illustrissimum maritum, qui valde dolebat, bono esse animo jussi, & mox hunc ordinavi pulverem: Recipe lapidum cancrorum, concharum præparatarum, cornu cervi philosophice præparati, unicornu fossilis, succini ana drachmas duas, cynamomi acuti drachmam unam, olei nucis moschatæ expressi grana decem: cujus drachmam singulis horis cum mensura dimidia lactis vaccini sumsit. Ad sitim præterea, quæ vehementer premebatur, me incio frigidam bono cum levamine potavit aquam: & extrinsecus ex meo consilio spiritum vini re-

Chole-  
ra per  
fraga  
copio-  
sius as-  
sumta  
produ-  
cta.



rectificatissimum cum oleo menthæ calide, quavis altera hora renovando, abdomini adplicuit. Sub hujus curationis initium, invalescere primum anxietates videbantur, & ea evomebat humores viridi bile tinctos, & in mucum quasi coeuntes; sed continuatis remediis, sensim remittebant vomitus cum reliquis symptomatibus, & illustrissima Comes intra viginti quatuor horas recuperatis viribus perfecte convalescebat.

Epicrisis.

Sœpissime mihi licuit adnotare, assumptis sub potu acidularum, vel etiam thermarum Carolinarum, fructibus horraïis, vehementissima symptomata, cardialgias, vomitiones, alvi fluxus cum summa virium prostratione fuisse subsequuta. Hæc omnia a flatibus per fermentationem inductis æque ac inde oriunda humorum in primis viis stabulantium acrimonia, quam viridescentes etiam produnt vomitiones, suos mutuuntur natales: quare his in casibus congruis demulcentibus, ac acrimoniam involventibus, quale est lac, & ejus serum, una cum absorbentibus acidum, & roborantibus internis & externis, vix inveni præstantiora subsidia.

OBSERVATIO VIII.

*Cholera*  
*secca*  
*cum*  
*humida.* Quum ante aliquot annos in aulam Guelpherbytanam pro valetudine serenissimi Ducis restauranda vocarer; accidit, ut generosus, & maxime reverendus Canonorum Præfectus, sexagenario major, me in reditu ad ipsum invisendum, consilium periturus invitaret. Laborabat enim gravi, eoque duplici morbo, uno oculorum; quorum hic gutta serena, ille cataracta incipiente affectus erat; altero imi ventris, quo per intervalla, crebris ructibus, & dejectionibus sursum deorsumque vehementissimis vexabatur. Ad sanandum oculorum affectum conquistata permulta peritissimorum & medi-

corum, & Chirurgorum, etiam Gal-  
lorum responsa consiliaque mihi mon-  
strabat, affirmans, quod frustra per  
aliquot annos varii generis remediis;  
quæ maximam partem erant purgantia  
valde acria, mercurialia, cephalica  
cinnabarina, nervina &c. usus fuerit,  
sed inde potius ratione morbi postero-  
ris pejus habuerit. Hic vero in eo con-  
sistebat: Tertia post prandium hora  
præviis hypochondriorum tensionibus,  
borborygmis totum abdomen occupan-  
tibus, lumborum dolore, & alvo ad-  
strictiore, quæ familiaris ipsi erat, ac-  
cedebant anxietates cardialgicæ, cum  
sudore frigido, & tumore circa pylori  
regionem eminente stipatæ: quæ per  
flatus inagno cum impetu primo sur-  
sum; dein deorsum prorumpentes sol-  
vebantur. Interdum vero, quando vi-  
num Rhenanum, aut quandoque ru-  
brum Gallicum solito largius potave-  
rat, & cibos duriores infumatos assu-  
merat, aut animi adfectui, tristitiæ cum i-  
racundiâ junctæ indulserat; in vomitus  
atque dejectiones tam copiosas simul  
incidebat, ut per viginti sedes, totidem-  
que fere vomitiones, valde acidas ac vi-  
scidas, viribus mirifice fuerit exhaustus.  
Ego candide mentem ipsi meam ape-  
riens declaravi, quod adhibitis ad affe-  
ctum oculorum penitus desperatum tot  
variis, ventriculo ac generi nervoso in-  
sensis remediis, id grave malum sibi met  
accerferit, saltem insigniter auxerit; a-  
deoq; ad hoc potius vel abigendum, vel  
ad minimum sublevandum omnem cu-  
randi nervum dirigendum esse duxi.  
Inter alia ipsum potu vini rubri Galli-  
ci quod adstringentis, & in ejusmodi  
affectibus valde noxiæ est facultatis,  
interdixi; a crassiori quoque victu eum  
abstinere, & cibis, qui essent facilis  
concoctionis, & jusculis humectanti-  
bus frequenter uti, jussi. Pro potu lo-  
co cerevisiæ commendavi aquam fon-  
tanam cum quarta parte vini Rhena-  
ni mixtam; vel si hanc ventriculus  
ferre non posset, eandem cum semi-  
ne anisi leviter coctam; & deni-  
que, ut inter prandium ac cenam eli-



xirium meum balsamicum viscerale;  
singulis autem septimanis pulverem  
ex lapidibus cancrorum, rhabarbaro,  
& semine cymini confectum fumeret,  
suasi.

Epicrisis.

Morbus hic paullo rarior, cholera  
sicca cum humida maritata adpellari  
meretur. Sicca equidem cholera ideam  
HIPPOCRATES. *Lib. de victu*  
*acutor.* §, 61. ita nobis proponit, quod  
nimirum venter admodum inflatur,  
strepitus insint cum laterum lumbo-  
rumque dolore, & postea flatus per os  
& alvum importune, & maxima vi  
erumpant. Quando vero ventriculus,  
& intestinum duodenum maxime ac  
ileon crudorum & vitiosorum humo-  
rum colluvie premitur, sicca tunc cho-  
lera in humidam transit. Noster qui-  
dem Reverendissimus æger jam olim  
hypochondriaca passione infestatus  
fuit, quæ ventriculum ac intestina pro  
objecto spasmodum potissimum habet:  
quare nihil restat dubii, quin remediis  
ad sanandum oculorum vitium usurpa-  
tis minus aptis, & vehementioribus  
naturale robur dictarum partium, a  
quo præcipuum valetudinis dependet  
momentum, magis labefactatum  
fuerit, atque destructum. In ejusmo-  
di vero intricata ægritudine nihil aliud  
agendum statui, quam ut idoneis diæ-  
teticis ac pharmaceuticis subsidiis, hu-  
moribus blanda reddatur temperies, &  
peristaltica canalis alimentaris virtus  
roboretur ac confirmetur. Et quamvis  
vini Gallici, Pontac dicti, si bonæ  
fuerit notæ, ea est natura, ut parcius  
sumtum, & cum aqua dilutum ad con-  
ciliandum ventriculi robur admitti  
queat: attamen multiplici quoque e-  
doctus sum experientia, ejus usum ob  
principium, quod fovet valde adstrin-  
gens, largiorem ad graves & spasticas  
nervosi generis disponere ægritudines,  
vel eas jam præsentis augere: adeo,  
ut cum magna cautione id vini genus in  
usum, præsertim quotidianum duci de-  
beat.

OBSERVATIO IX.

Vir viginti sex annorum, per omnia  
sanus, binis abhinc annis post gravem  
excarescentiam in diarrhœam inci-  
dit biliosam, per tres hebdomades cum  
copiosissimis dejectionibus, & magna  
virium prostratione infestantem. Con-  
sultus medicus dabat adstringentia; &  
quum eorum usum, cohibito alvi flu-  
xu, vehementiora tormina, & pun-  
gentes præcordiorum dolores excipe-  
rent; venam in brachio tundi jubebat,  
promanante pauco, eoque aterrimo  
cruore. Facta venæsectione, animi  
deliquium patiebatur æger, & ad se  
rediens, spiritum difficilius trahere in-  
cipiebat: sed dato laxante, melius ite-  
rum habebat, nec nisi de prostrato con-  
querebatur adpetitu. Quem ut instau-  
raret, ex præscripto medici acidulas  
Pyrmontanas per quatuordecim potare  
debebat dies; & ante pariter ac post  
earum usum pilulas purgantes, poten-  
ter alvum moventes assumebat. Ve-  
rum abhinc cum sicca tussi, cruento  
alvi prehendebatur profluvio; quo in-  
ter atrocissima circa umbilicalem po-  
tissimum regionem tormina, & ardo-  
ris sensationem, quotidie sexagesies &  
ultra desidere cogebatur. Et hæc san-  
guinea diarrhœa per integrum jam du-  
raverat annum, nullisque obsecunda-  
verat medicaminibus. Dejectiones  
enim frequentissimæ, & singulo die  
trigesies, & ultra repetitæ, semper  
sanguineæ vexabant; tenesmus simul  
urgebat molestissimus; adpetitus quo-  
que avidissimus, & vix satiabilis erat,  
& corpus denique perpetuo frigoris  
sensu, sub calidissima etiam æstate,  
afficiebatur, sæpiusque contremisce-  
bat. Æger itaque meam imploravit  
opem.

Epicrisis cum consilio.

Non adeo vulgaris præsens est affe-  
ctus, sed paullo rarior, & diarrhœa  
hæmorrhoidalis chronica, ab erosio-  
ne

Diarrhœa  
biliosa  
mala  
medi-  
catione  
in san-  
guineâ  
chroni-  
cam  
permutata.



ne tunicarum intestinalium, coli præfertim & recti dependens vocari meretur. Cujus si primos natales consideremus; illi a gravi iracundia, cui indulgit, sunt repetendi. Hac enim factum est, ut commotis biliosis humoribus, istiusmodi quoque diarrhœa suboriretur; quæ si remediis temperantibus, acrimoniam demulcentibus, & leniter evacuantibus fuisset oppugnata, facile perfanari potuisset. At male administratæ medicationes tam levem affectum, in gravissimum, & fere immedicabilem conjecerunt. Namque primum magnam merentur censuram data protinus adstringentia; quibus factum fuit, ut intus retenta acri biliosa materia, spasmi simul ad superiora sint revocati, & hinc præcordiorum anxietates, atque puncturæ excitatæ.

Deinceps perverso sane consilio sanguis ex tusa in brachio vena est educitus: unde evenit, ut præcordiales spasmi & angustia, invitatis magis ad superiora humoribus, increverint, & ipsas animi defectiones habuerint comites; id quod in cardialgicis doloribus, ubi vena in brachio tunditur, foepissime notare licet. Laxans subinde datum, revocando humorum liberam per alvum excretionem, operæ fecit pretium: & tum fuisset facillimum, resistentem inadpetentiam, datis roborantibus, & continuato leniorum laxantium usu, profligare, sanitatemque restituere.

Verum hanc adhibitæ demum aquæ Pyrmontanæ una cum fortioribus purgantibus prorsus pessumdederunt. Nam illæ acidulæ frigore suo ad spasmodicas totius cutanei corticis constrictiones disposuerunt; & purgantia tunicas intestinorum nervosas violenter vellicarunt. Unde congesti ab ambitu corporis constrictione, ad intestina humores, acres, biliosi ac impuri, vascula sanguifera intra tunicam nervosam latitantia ad rupturam usque impleverunt; illa perruperunt, & ipsam denique tunicam arroserunt; ejus

erosioni, diarrhœa chronica cruenta cum tenesmo debetur.

Si itaque quicquam auxilii in ejusmodi contumaci & gravi morbo reliquum est; id certe unice in iis remediis, quæ acrimoniæ humorum deliniendæ, & erosioni tunicarum intestinalium consolidandæ dicatæ sunt, consistit. Quum vero præterea motus sanguinis & humorum ab ambitu corporis ad intestina tendunt; non præstantius perspirationis restitutione erit subsidium, quam balneorum vaporosorum frequenti & convenienti usu obtineri posse confido. Interne olei olivarum cum Spiritu menthæ æquali parte permixti frequentem usum, neque minus pulverem ex bolo armenia p. iii. & corticis cascarillæ p. i. compositum item infusum theiforme ex mentha crispa: & pro potu decoctum sassafras & santali rubri usurpandum commendavi.

#### OBSERVATIO X.

Est in nostra civitate matrona quædam honesta, quadraginta sex annorum, temperamenti sanguineo phlegmatici, obesa, valisque exilioribus instructa, quæ per octo jam annos menstruorum inordinato successu, atque hinc pendentibus hystericis & hypochondriacis laborat affectionibus. Nata nimirum est matre nephritica; victu longo abhinc tempore utitur lauto, ac pleno, ac præter aquam puram, cum pomis citri, & sacharo distemperatam, pro ordinario potu vino Gallico Pontac; venam ter secandam quotannis præbet; sed vitæ genus motus prorsus expers agit. Ante octo igitur annos suppressus primum per aliquot vices mensium fluxus, graviditatis suspensionem ipsi pariter ac consulto tum medico movebat; sed mox evanescebat illa spes, & nascebatur febris intermittens contumacissima, nullis cedens remediis, donec tandem sumta per octiduum, corticis chinæ larga quantitate cohibe-

Diar-  
rhœa  
cum  
variis  
sym-  
ptoma-  
tibus  
stipata.



heretur. At succedebant dolores lumborum & ossis sacri, ingens corporis languor, capitis dolores, aurium suffusus, atque tinnitus, oculorum caligo, & angustiae præcordiales. Datis purgantibus, & instituta venæsectione, anxietates quidem cum capitis doloribus remittebant, & menstrua rursus profluere incipiebant: at reliquorum symptomatum vehementia persistebat; & quovis mane largi promanebant sudores. Me tandem consuluit, qui præparato per laxantia & antispasmodica corpore, usum balneorum Teplicensium commendavi: quibus usa egregium sensit levamen; sed gravi terrore commota, priorem & gravio-rem incidit sanitatis labem. Domum redux febre biliosa cum purpura alba prehendebatur, qua percurata, ex meo consilio per duos successive annos balnea adhibuit Lauchstadiensia, egregio cum fructu. Sed accedentes crebri animi adfectus sanitatem, quæ imminabat, semper iterum destruxerunt; donec ante semestrem demum tempus, prævia excandescencia, graviora incideret symptomata, dolores dorsi ac lumborum invalescerent, & sudores matutini magis inerescerent. In tali rerum statu sumsi ad referendam, quæ obstructa erat, alvum, salis Sedlicensis unciam dimidiam: unde factum est, ut alvus vigesies & ultra dejiceretur, & præterea graves præcordiorum anxietates, capitis & dorsi dolores, sanguinis ebullitiones, pulsusque celeres cum duritie juncti accederent. Suasi venæ in pede sectionem; sed eam in brachio, detracta sanguinis parca quantitate, institutam, major æstus, tantæque humorum ad caput exceperunt congestionibus, ut in propinquo essent deliria. Adhibitis igitur temperantibus, venam iterata vice in pede tundendam, & largam cruoris copiam detrahendam curavi: unde remittebant congestionibus ac æstus, sed dolor in dorso invalescebat, & septimo morbi die vehemens accedebat diarrhœa, cum perpetuo sudore & languore stipata.

Hæc adhibitis intus temperantibus, ac mixturis analepticis, externe emplastro saponato cum oleo hyoscyami & camphora malaxato, nono die conquiescens, undecimo præter opinionem recrudescerebat; & dato cum pulvere præcipitante liquore anodyno; extrinsecus admoto balsamo vitæ dicto, iterum feliciter expugnabatur. Sed dolores dorsi tantas sumebant vires, ut per viginti septem dies, omnem oculis eriperent somnum: qui tandem, continuatis interne anodynis & antispasmodicis, externe dicto emplastro, cum oleo hyoscyami, nucis, camphora, & balsamo Peruvianæ permixto, debellabantur. Felicissimum etiam effectum in moderanda diarrhœa & mitigandis doloribus pulvis ex bolo Armeniæ, succino, & pulvere cascarillæ compositus, sed parca & repetita dosi, & cum aqua menthæ exhibitus præstabat: Præterea consilium dedi, ut accedente vere lacte asinino cum fonte Selterano permixto, interposito balneo aquæ dulcis, utatur.

#### Epicrisis.

Omnia illa mala, quibus cum usque eo per longum tempus honesta illa femina conflictata est, nullam certe aliam causam, si primam originem spectemus, quam immoderatum vini adstringentis Gallici, & potus dicti Limonade acidi, & postea perversum ad longam & quotidianam febrem expugnandam corticis chinæ usum agnoscunt. Nam uti in totum, acida, quæ incrassant humores, & adstringentia, quæ minimos tubulos quam facile constringunt & obstruunt, vitalibus motibus, qui in libero per partes humorum progressu & convenientibus independentibus se & excretionibus consistunt, valde sunt inimica; ita infaus- tum & noxium eorum effectum in sexu maxime sequiori, qui hisce rebus delectari solet, quotidie fere conspici- mus; dum mensium negotium mi-  
nuen-



nuendo & turbando ad innumeras graves & diurnas ægrotudines disponunt, præsertim si foeminae complexionis phlegmaticæ & sanguineæ fuerint, & plus iusto desidæ, vitæque sedentariæ atque inordinatis affectibus deditæ; quale exemplum præsens morbi historia exhibet: Continuus ille lumborum primam vertebam, ubi plexus magnus mesenterius situm habet, occupans dolor non nisi spasmi, qui sese diffundit per totum intestinorum canalem, ejus functiones secundum naturam pervertentis species est. Crebrior ille & sæpius recurrens alvi fluxus intestinorum motus naturalis destructi & humorum vitiosorum maxime acidorum ibi congestorum indicium est, utpote qui & mole sua naturam ad excretionem stimulant, & acrimonia mucilaginem, qua tunica nerveæ intestinales tectæ sunt, detergendo, easque ex parte arrodendo malo diurnitatem & contumaciam adjiciunt.

## CAPUT IX.

### DE

### CONVULSIONE UTERI SIVE ABORTU.

#### THESES PATHOLOGICÆ.

##### §. I.

**A**Rvum muliebre, omnium officina mortalium, non modo, si sterile, fructuque vacuum exstiterit, spasmorum tyrannidi obnoxium est, sicut in malo videre licet hysterico: verum etiam foecunda prole præditum, gravissimos sæpenumero spasmodicos ac convulsivos patitur motus, vique horum non raro fructu subimet concredito spoliatur; quem valetudinis statum abortus nomine significare solet schola medica. Est enim

Hoff. Syst. Tom. V.

abortus spasmodico convulsivus uteri motus, quo foetus immaturus & mortuus, præcedente ut plurimum enormi sanguinis profluvio, violenter excernitur.

Abortus definitio.

##### §. II.

Dum immaturum, nondumque vitalem per abortum excerni diximus foetum, illum a partu septimestri, vel octimestri distinguimus. Hic enim utique vitalis existit, & ego ipse aliquot novi exempla, ubi editi fuerunt infantes, septimanis adhuc quinque vel sex deficientibus, imbecilliores quidem, sed qui conveniente per calorem, somnum, quietem & tenerius alimentum regimine, non modo ad debitum robur & perfectionem, sed etiam ad longam pervenere vitam. Notanda subinde hæc abortum inter, & partum septimestrem est differentia, quod in hoc uteri hæmorrhagia factam demum fetus exclusionem sequatur; in illo vero antecedit, tumque embryo, isque mortuus excernatur.

Abortus differentia a partu septimestri.

##### §. III.

Abortus plerumque fit inter secundum & tertium, interdum etiam inter tertium & quartum, rarius inter quintum & sextum prægnationis mensem. Nam post quartum mensem, ubi fetus incipit moveri, ad verum partus tempus fetus dicitur mortuus, & majori semper cum difficultate fit; ut plurimum circa id tempus, quo alias menstrua fluere consueverunt. Nota sunt mihi plurima exempla, ubi tertio mense circa tempus menstruum foeminae abortum passæ fuerunt. Nunquam porro, sed rarissime contingit, ut circa septimum mensem a violentia externa placenta ab utero fiat avulsio, quam larga sanguinis ex utero profusio sequitur, sub qua infans moritur, & nisi naturæ robore cito expellatur, ipsa mater in summo vitæ versatur discrimine.

Abortus iudicandi tempus.

T

§. IV.



## §. IV.

Signa  
abortus.

Signa imminentis abortus, & legi-  
timi partus magna ex parte sunt com-  
munia; nam in utroque casu cum  
quadam præcedente horripilatione,  
& partium extremarum refrigeratio-  
ne, dolor pressorius in lumbis, qui  
se se extendit ad imum ventrem, per-  
cipitur; postea ad os sacrum, coxen-  
dicem, & inguina descendit cum pul-  
su arteriarum auctiori: os uteri fit  
humidum, & relaxatur, & evacua-  
tio aquæ instar loturæ carniū proce-  
dit. Speciatim vero in abortu ante ex-  
pulsionem fœtus sanguis purus cum  
grumis sat larga sæpius copia cum  
summa debilitate, & frequentius ani-  
mi deliquio ejicitur, & tertio demum  
die fœtus expellitur. Præcedit utpluri-  
mum subitaneus corporis rigor & hor-  
ror cum lassitudine, inappetentia,  
nausea, cordis palpitatione, lumbo-  
rum dolore; circa pubem gravativus  
dolor atque in partibus genitalibus fri-  
gus: Quo grandior autem & adultior  
est embryo, eo acerbiores spasmi,  
dolores ac majora symptomata non  
sine periculo observantur. Signa abor-  
tus futuri HIPPOCRATES *l. I. de morb. mulierum* §. 6. ita propo-  
nit; Ruber fluxus fuit talis, qualis  
sanguis victimæ recens mactatæ, &  
grumi pellucens. Aliquando vero  
etiam fluxum rubrum emittit, & venter  
imus attollitur & attenuatur, & im-  
potens fit & indurescit, & ad conta-  
ctum dolet, velut ulcere præsentē &  
febris habet & dentium fremitus: &  
dolor ad ipsa pudenda, & pubem &  
lateris mollitudinem, & lumbos &  
tendinē & ventrem & pectus & sca-  
pulas irruit. Et alias omnes partes  
dolor & impotentia ac pusillanimitas  
occupat; & color mutatur.

## §. V.

Differē-  
tia hæ-  
mor-  
rhagiæ  
aborti.  
væ a  
minus  
tali.

Ab abortiva vero hæmorrhagia pro-  
be ille cruentus ex utero fluxus, qui  
multis prægnantibus femellis citra no-  
xam, & abortus metum contingere  
solet distinguendum est. Nam sæpissi-  
me fit, ut quæ sanguine abundant fœ-

minæ, secundo & tertio graviditatis  
mense sanguineum experiantur flu-  
xum, citra dolores & spasmos in re-  
gione lumbari & abdomine, citra  
debilitatum, & præcedentem horro-  
rem & rigorem partium extremarum.  
Hoc autem in casu sanguis non ex uteri  
cavitate, sed potius ex vasculis vaginæ  
uterinæ cum euphoria profluit. Atque  
nota nobis sunt exempla, ubi a medio  
gestationis tempore usque ad ipsum  
partum sanguis ex genitalibus effluit,  
salvo nihilominus & vivaci fatis pro-  
deunte fœtu. Quare fallit *aph. 60. Sect. V.*  
HIPPOCRATIS: Si mulier gra-  
vida sit menstrualis, non potest sanus  
esse fœtus.

## §. VI.

Refert porro scire, non omnes fœ-  
minas ad abortiendum proclives esse;  
& quibusdam nec violentissimis reme-  
diis abortum provocari posse. HIP-  
POCRATES quidem *l. I. de morb. mulierum* asserit abortum sive medica-  
mento, sive potione vel cibo vel alia  
re quapiam contingere, & §. 42. sunt  
quæ fœtum corrumpant, si acre quid  
aut amarum ederint aut biberint præ-  
ter consuetudinem, dum adhuc par-  
vus intus est puerulus. Is enim mori-  
tur & turbatur gravidæ venter, & flu-  
xiones concitantur. Verum in nostris  
regionibus ubi corpora sunt robustiora  
& minus sensibilia, id ipsum non ob-  
servatur. Sic GUARENONIUS  
*Consult. 636.* ait: vidi multas utero ge-  
rentes, fortissimisque medicamentis,  
& multis venæsectionibus cruciatas, &  
nulla fecit abortum. PLATERUS  
*prax. pag. 113.* in mulieribus diar-  
rhæa laborantibus abortum minime  
factum fuisse testatur. ZACUTUS  
LUSITANUS *in praxi admir. obs. 43. 44.* refert, per vehementissima  
purgantia, per sexies, imo octies re-  
petitas venæsectiones, unguenta for-  
tissima & pessaria utero adplicata,  
per longam inedia, nullos procu-  
ratos fuisse abortus. Spectat huc quo-  
que notabilis illa observatio D. D.  
SOMMERI, quam *Dec. 1. anno VI.*

Abor-  
tū non  
facile  
provo-  
cari  
posse,  
proba-  
tur 1)  
testi-  
monio  
aucto-  
rum.



VI. obs. 106. M. N. C. inferuit, mulierem quandam, centum guttas olei destillati juniperi per viginti dies, omni mane ad menses provocandos usurpasse, postea tamen filium peperisse. Qua de re fusius agit, ALBRECHTUS *decad. 1. anno VIII. obs. 165.* & recenset, fortissima emmenagoga, ut olea destillata sabinae, succini, myrrhata, crocata, aloetica ad fetum expellendum frustra fuisse propinata. Singularis etiam observatio est, quam habet BARTHOLINUS *M. N. C. anno 1. dec. 1. obs. 52.* de geminis gravidis, lue venerea laborantibus, quæ a chirurgo, eas esse prægnantes, nesciente, mercuriali salivatione curatæ, & nihilo minus salvos fetus enixæ sunt.

§. VII.

2) Variis observationibus.

Ipsæ ego non semel, sed aliquoties observavi, gravidas quasdam vehementibus acutis febribus, nec non variolis, morbillis, diarrheis, imo dysenteris laborasse, & fetum in utero vivum salvumque retinuisse. Novi etiam aliquot exempla feminarum generosi stemmatis, quæ, quia non putarunt, se gravidas esse, ad mitiganda pathemata hypochondriaco hysterica integram curam Carolinarum per aliquot septimanas absolverunt, & postea Teplicensi balneo per septimanam & ultra usæ, elapsis tribus vel quatuor mensibus, felici partu benevalentes & robustos excluderunt infantes, cum tamen ejusmodi curandi ratio gravidis minus tuta censetur. Neque pauca mihi prostant exempla, quod utero gerentes per acclivia & declivia loca sine ulla noxa per dies noctesque fecerint itinera & nimis saltationibus immensum in modum se fatigaverint. Nec omnibus imprægnatis terror nocet: alias ob campanarum suborto incendio sonitum inopinatum plures in amplis civitatibus deberent abortire, quod tamen rarius accidit.

§. VIII.

Quibus præmissis, eas mox subjungere observationes consultum erit, quas de subjectis abortus, attenta præbet experientia. Sic adnotamus, mulieres succulentas, pinguiore, mollioris & subtilioris corporis habitus, otiosas, opiparo lautoque vitæ genere utentes, naturæ imbecillioris ac sensibilibioris, pathematibus hystericis obnoxias, quæ ordinario menstrua vel copiosiora, vel inordinata fuerunt expertæ, quæ semel abortum passæ, aut quarum matres ad abortiendum proclives fuere, longe faciliores ac opportuniores ad abortum esse, quam feminas musculosas, duriori fibrarum compage donatas, robustiores, plebejas, minus pingues, & quæ valido exercentur labore, neque terrori & aliis animi intemperatis motibus nimium indulgent. Constat quoque experientia, illas feminas, quibus per priores prægnationis menses sanguis ex uteri vagina profluxit, quibus ciborum adpetentia languet, & quæ odontalgias, defluxionibus tussiculosis, nariumque hæmorrhagiis subinde expositæ sunt, vel sanguinem semel bisve tempore graviditatis e vena mittunt, ad abortiendum minus promptas esse. Ceterum de differenti mulierum natura ad uteri morbos & ad proclivitatem abortus insignis locus HIPPOCRATIS qui constat *de morbis mulierum l. II. §. V.* meretur considerari.

Subiecta abortus.

§. IX.

Hinc autem, cum in quibusdam vel levissimæ causæ abortum movent, quem in aliis nulla ars excitare valet, certissima sequitur conclusio, peculiarem uteri in facile abortientibus esse debere dispositionem. Quæ ut innotescat, de uteri structura & usu quædam præmonere, haud alienum erit. Scire igitur refert, 1) quod nulla in toto corpore pars tam numerosa vasorum copia sit instructa, quam ipse uterus, quippe qui,

Strutura uteri vasculosa.



restante injectionum artificio totus ferme est vasculosus. Accipit enim vasa sua & arteriosa & venosa partim a spermaticis, partim hypogastricis, partim etiam ab iliatis. 2) quod in nulla corporis parte venæ pariter ac arteriæ tam copiosis, quam in utero, gaudeant anastomosis: nam inflatus per spermaticas ventus mox in hypogastricas penetrat. 3) quod vasa uteri in virginibus valde exilia, facta imprægnatione adeo distendantur, ut minimi eorundem ramuli acquirant eam capacitatem, quæ majorem admittit stylum. 4) quod non recto, sed valde anfractuoso, tortuoso, & velut serpentino flexu per uteri substantiam discurrant; 5) quod venæ arteriis longe sint capaciores, ac 6) valvulis plane destituantur. His ex novissimis tribus momentis clarissime patet, circulum & cum primis refluxum sanguinis per venas uteri valde tardum in statu etiam naturali esse; & hinc uterum præ aliis partibus, nimis humorum congestionibus, vasorum infarctibus, distensionibus & hæmorrhagiis obnoxium existere ac aptissimum.

## §. X.

De cel-  
lulis, &  
forami-  
nibus  
uteri.

Id vero peculiare sibi servat exquisita vasorum uteri connexio, quod in plurimas cavernulas sive cellulas mutuo communicantes canalium alvei definant, & sinus ovalis figuræ efforment, quæ substantiam ipsius uteri spongiosam & fungosam reddunt, atque in gravidis mire ampliantur: quo fit, ut uterus præsertim prægnans, transversim sectus, ampla & innumera fere exhibeat foraminula. Hac sinuosa & cavernosa vasorum commissura efficitur, ut non ipse solum uterus in prægnantibus a sanguine contento mirifice dilatetur, ejusque tensa & stricta antea compages laxior atque mollior reddatur; sed orificia extremitarum vasculosarum, quæ in cavo oblique sub membrana uteri hiant, & per quæ aer, canali cuidam inflatus, in ipsam cavitatem

haud difficulter transmittitur, magis diducantur, sicque perforata vasculosa chorii membranæ filamenta excipiant, quo per illa sanguis, ex utero ad foetum, hunc nutriturus transire possit.

## §. XI.

Deinceps notari meretur, uteri membranam fibris carneis esse præditam, earumque ingentem congeriem orbiculatim, imo instar retis contextam, in uteri potissimum fundo conspici. Harum ope peculiarem tonum, seu motum systolicum & diastolicum obtinet, quo sese constringere, rursusque dilatare alternis valet vicibus. Et hoc motu recte, secundumque naturam sese habente, liber & expeditus sanguinis per uterum fit circuitus, omnesque illius functiones legitime succedunt. Sed simul observatione dignum est, quod uterus vi dicti hujus motus mirifica & vix comprehensibili potentia gaudent elastica, qua ejus fibræ & vasa incredibilem in modum distendi & explicari, sicut fit in graviditate; ac excreta sarcina, sicque cessante distensionis causa, sponte rursus contrahi, coarctari, & ad pristinum statum, ac spatium redigi possunt.

Stru-  
ctura  
uteri  
fibro-  
ejus-  
elast-  
virtu-

## §. XII.

His expositis, porro haud ignorari oportet, foetum libere in cavitate matricis fluctuantem, & ab umbilicali duntaxat funiculo pendentem, vi placenta uterinæ, quam secundinas vocant, cum utero ita cohærere, ut illius extrema vascula, tanquam minimi villi in foraminula atque ductus uteri §. X. descriptos inferantur, & cum iis laxè uniantur. Jam ex supra dictis repetimus, quod fœtus in abortu sit mortuus, illumque tantum non semper hæmorrhagia antecedit. Moritur autem fœtus in utero, si succi vitales, unicum illius nutrimentum non amplius ex orificiis vasorum uteri ad villos secundinarum feruntur; quod fit, si placenta uterina, membranosa valde ac vasculosa ab

Causa  
proxi-  
ma a-  
bortus.



uteri vasorum orificiis avellatur. Ergo præter naturalis placentæ avulsio perpetuam abortus causam constituit. Avulsis enim secundinis non aliter fieri potest, quin vasa uterina cruore turgida distentaque copioso, hunc per hiantes ductus & patula orificia in matricis effundant cavitatem; qui una cum cadavere, latera arvi muliebris premente & molestante, (mortua enim corpora semper graviora sunt viventibus) carneas ad motus spasmodico convulsivos proritat fibras, aut eos jam præsentis adauget; quibus constrictus, & ab omni latere pressus uterus, aperto interno orificio, expellit primo contentum cruorem & fluidum, & stagnando in grumos concretum, ipsamque tandem, ampliora facta apertura cadaveris sarcinam.

§. XIII.

Causæ abortus mediata sunt  
1) externa violentia.

Hæc dicta vero secundinarum avulsio, spasmodorum abortivorum immediata causa, a variis induci deprehenditur mediatis; quas inter primum locum occupant illatæ extrinsecus violentiæ; quippe quæ graviter concutiendo abdomen, rupturam cohærentium laxevillorum facillime inferunt. Hinc per gravem imi ventris percussione, vel contusionem, sive per ictum & lapsum, sive vehementem corporis exercitationem, saltationem, vecturam fiat, vel nimiam abdominis in allevatione brachiorum, aut gravioris ponderis elevatione factam extensionem, provocari abortus, multis observationibus & exemplis habemus comprobatum. Eidem fundamento innitur abortio, quæ per frequentem & immoderatum coitum excitatur; cujus mentionem injicit GUILLIELMUS FABRITIUS Cent. II. obs. 80.

§. XIV.

2) Defectus sanguinis.

Deinceps dicta separatio fit ab inopia succi & sanguinis nutritici, per orificia vasorum uteri in apertos secundinarum villos instillari soliti. Nam si orificia vasorum uterinorum ob defi-

Hoff. Syst. Tom. V.

cientem sanguinis adfluxum exarescunt; foetus nutrimento destitutus perit & corrumpitur, qui hoc in casu sæpenumero absque spasmis & doloribus ejicitur. Hinc dispositæ 1) in morbis gravioribus, febribus acutis malignis, nimis diarrhœis, maxime dysentericis, & quidem frequentes circa declinationem abortiunt; 2) ex eodem fundamento abortum provocare valent immoderatæ sanguinis missiones, in subjectis sanguine non adeo abundantibus institutæ, cum primis in regionibus calidioribus: unde HIPPOCRATES aph. XXX. sect. V. recte dicit, quod venæsectio ad abortum disponat; siquidem ejus tempore ad animi usque deliquium sanguis mitti solitus est.

§. XV.

Frequentissimam autem abortuum causam exhibet nimia sanguinis moles, quam Plethoram vocant. Constat nimirum ex supra dictis, progressum sanguinis per vasa uteri venosa in statu naturali esse difficiliorem ac impeditiorem. Quod si igitur illa a copioso humorum affluxu ultra modum distenduntur, & sanguis in sinibus stagnat; sequitur spasmodica fibrarum uterinarum constrictio, tanquam perpetuus distensionis vasorum comes; qua fit, ut sanguis cum impetu ex orificiis arteriolarum eructetur, uterus flaccescat, placenta secedat ab ejus filamentis & vasorum hiatibus, ac demum foetus ut plurimum secundo vel tertio ab hæmorrhagia die excludatur. Hinc cum SYLVIO Cap. VI. prax. med. observamus, foeminas gravidas nona decimaque post cessantem menstruorum eruptionem hebdomade fluxum subinde pati sanguinis satis magnum, & una cum ipso excernere aliquid coagulati carneique; quæ educto circa hebdomadem octavam post cessantia menstrua sanguine, nil simile in se animadvertunt, verum gravidæ manent, atque circa nonum mensem, vivum & vitalem pariunt foetum. Unde recte concluditur, has prioribus

2) Nimia sanguinis abundantia.



bus quoque mensibus fuisse gravidas; posthabita vero redundantis sanguinis imminutione abortum fuisse passas, & hoc præsertim foeminis largo mensium fluxui obnoxiiis evenit; nam quia foetus tenerior est, facillime cum uteri hæmorrhagia profunditur. Hinc recte dicit HIPPOCRATES *Lib. de partu octimestri*, plurimas primis quadraginta diebus fieri abortiones.

## §. XVI.

4) Omnes res, quæ uterum ad spasmos proprios præcitant.

Soepius quoque abortionum causæ sunt omnes illæ res, quæ uterum ad spasmodicas concitare valent stricuras; quibus si præsertim robusta illa fibrarum series, in fundo uteri obvia, afficitur, secundinarum inducitur avulsio. Hoc nomine abortum provocandi potentia pollent 1) vehementiores animi affectus, præsertim gravis iracundia atque terror, præsertim si hæc graviora pathemata invicem jungantur, & unum alterum excipiat, maxime eo tempore quo menses olim fluere consueverant. 2) remedia ad pellendum foetum destinata, quæ nimium sanguinis orgasmum incitando, & solidas commovendo partes, votis nonnunquam satisfaciunt: quo quidem fine omnia calidiora emmenagoga, ac diuretica celebrantur, cum primis oleum succini, & sabinæ; radix filicis, conf. SCHROEDERI *pharmac. med. chym. Lib. IV.* 3) fortiora purgantia, scammoniata, colocynthiaca, jalappina, aloetica, quæ spasmum intestinorum & totius nervosi systematis non raro inducunt. 4) vehementiora emetica, siquidem sub ipso diuturniori ac violento vomitu soepe fiunt abortiones. 5) tussis ferina ac convulsiva, nec non omnes convulsivi, ac epileptici morbi, 6) fluor denique albus, qui non modo humore acri vellicante, verum etiam relaxando uteri fibras ad abortum disponit. Ex classe rerum non naturalium cibi & potiones adstringentes & maxime omnium, ex nostra observatione vina Gallorum rubra immoderatus assumpta, liberiores sanguis cur-

sum impediendo, ad largas hæmorrhagias & abortum quoque disponunt,

## §. XVII.

Verum enim vero, quum omnes hæc causæ a multis impune ferantur, & hinc semper dispositio quædam ad abortiendum supponatur: quæstio incidit, in quo potissimum consistat illa dispositio. Hanc vero in nimia fibrarum musculosarum, & vasorum uteri elasticorum relaxatione, remissione & atonia collocandam esse, statuo. Namque sub tali insigni toni dejectione libera sanguinis & humorum progressio intercipitur, vasa venosa a nimio sanguinis confluxu valde distenduntur, fiunt varicosa, uterus ad spasmos enormes irritatur, quibus mediantibus extremitates vasorum aperiantur, nutritio foetus perit, atque avulsis secundinis, foetus præmature expellitur. Et hæc omnia eo certius fiunt, si quædam causarum mediatarum, brevi ante recensitarum accesserit: quæ, si debitum uteri robur, ac legitimus per illum sanguinis circuitus præsto fuerit, nihil ferme valebunt, testantibus §. VI. adductis exemplis. Hæc ipsa etiam humorum in relaxatis, ac distentis uteri vasis stagnatio causa est, quod foetus primis illico mensibus vitiatus atque corruptus in carneam soepe massam variæ figuræ atque consistentiæ, quam molam dicere solent, degeneret, cujus ab utero avulsio & excretio cum magna symptomatum exacerbatione fieri observatur.

## §. XVIII.

Ad ejusmodi præternaturalem a copia humorum uteri relaxationem, tantquam veram abortus causam, antiquissimum nostræ artis Professore respexisse, testatur *sect. V. aphor. 45.* ita se habens: quæcunque moderate corpus habentes, abortiunt bimestres & trimestres, sine causa manifesta; his uteri acetabula muco sunt plena, & non possunt foetum continere præ gravitate, sed abrumpitur. Conf. *etiam aph.*

In quo consistat abortiendi proclivitas.

Confirmatur ex Hippocrate.



*aph. 62. ejusdem sectionis*, in quo uteri intemperaturam, si nimis siccus sit, accusat, quod ad fecundandum & nutriendum fœtum plane sit ineptus: laudat vero ejus temperatum & moderatum statum, quo nihil aliud, quam tonus & robur uteri æquabile, moderatum, & ad liberum sanguinis circum aptissimum subintelligitur.

## §. XIX.

*Dispositio ad abortiendum acquiratur modis.* Vel enim nativa fibrarum uteri debilitas quiritur subest, adeo, ut matres, quæ frequenter abortiverunt, filias generent, ad idem vitium proclives: vel etiam consuetudo meretur accusari, qua fœminæ, quæ semel vel bis abortivere, crebrius in id malum incidunt, idque non raro eodem tempore: licet non semper fœtus, sed loco hujus informis ex sanguine mucoso concreta massa prodeat. Per hanc vero consuetudinem nihil aliud intelligo, quam pravam vasorum uteri laxitatem, & inde proveniente humorum stagnationem, ex abortiendi labore sæpius repetito inductam; ex qua subinde uterus in spasticos & convulsivos motus ex facili ac levissima causa conjicitur.

## §. XX.

*Malum puerperarum regimine.* Relinquitur etiam utero abortiendi proclivitas, ex præpostero puerperarum regimine. Quod si enim post puerperium uterus non rite a lochiis & stagnante sanguine viscido mucoso liberatus, neque per convenientia remedia colluvies feri impuri e corpore per alvum vel alia excretoria detracta fuerit, neque hinc ad pristinum & naturalem tonum & constrictionem ipse pervenerit: relinquitur ingens atonia, & imbecillitas vasorum, menses non procedunt legitime, non fiunt fecundi conceptus, fœtus non debite nutritur, sed ante tempus ejicitur immaturus.

## §. XXI.

*Tempestivum.* Ipsa denique tempestivum vitiosa

constitutio ad abortum disponere, & nunc epidemicum reddere valet. Unde *HIPPOCRATES sect. III. aph. 12.* asserit, per hyemem pluviosam ac clementem, si ver sequatur aquilonare, mulieres ex facili occasione abortire, vel imbecillos, ac morbosos pueros parere: quia scilicet plethora in gravidis serosa, quæ fere ordinaria est, per præcedentem autumnum humidum & pluviosum, & succedentem ejusdem naturæ hyemem, immensum in modum increfcit; superveniente autem aeris statu aquilonari, quo a superficie ad interiora pelluntur humores, necesse est, ut ad ipsum uterum nimia & impetuosa fiat feri excrementitii conflatio, fecunda abortionis genitrix. Cui quidem observationi hanc subiiciendam reor cautelam, quod talis aeris status non omnes gravidas, sed eas potissimum, quæ sanguinei & humidioris temperamenti sunt, afficiat.

## §. XXII.

Omnis abortus est periculosus, eo magis, quo adultior fœtus existit. Cum primis ille periculo non vacat, si mola cum ipso fœtu præsens est; quippe quæ, hoc excluso, utero firmiter alligata remanet, nec tam facile eliditur. Tunc nimirum dolor dorsi & ossis sacri semper urget, abdomen intumescit, vires consumuntur, lenta est febris, & pravus ex utero promanat humor, vitalesque universi corporis fatiscere incipiunt functiones. Multum sane hoc vitium medentibus facessere solet negotii, præsertim, quando ipsæ femellæ sensibilibus naturæ, ad animi commotiones valde proclives, & pathematibus hysteriis obnoxie fuerint. Pathemata quæ abortum sequuntur, *HIPPOCRATES l. II. de morbis mulierum §. V.* ita describit: Si fluxus ex utero abortus fuerit, sanguis multus fluit, & grumi compacti excidunt: & dolor occupat lumbos, & laterum multitudinem, ac imum ventrem & durus est venter, & ad contactum do-



let; & rigor ac febris acuta corripit; debilitas oboritur; & omnia præter humeros ad scapulas dolent; & calor invadit; & rubescit, & venæ duræ fiunt ac renitentes.

### Theses Therapeuticae.

#### §. I.

Indica-  
tiones  
curato-  
riae.

**O**Mne plerumque consilium & auxilium, quod in abortionis negotio, a medente sperari & promitti potest, in eo duntaxat consistit, ut præcaveat imminens abortum. Quod impetrare licet, si ope remedium ex diætetico, pharmaceutico, & chirurgico fonte petitorum, eas causas, quæ pravam abortiendi dispositionem utero inducere possunt, omni cura ac studio amovere nitatur; debitumque utero robur restituat.

#### §. II.

Venæ-  
sectio.  
nis ne-  
cessitas  
& uti-  
litas.

Quum igitur ex supra dictis per- spectum habeamus, vasorum uteri a copiosiori sanguinis adfluxu infarctum primam & præcipuam abortionum causam constituere: facile patet, non certius, nec efficacius ad præcaven- dum id vitii genus tempestiva sangui- nis missione dari præsidium. Hoc & experientia, & creber usus peritissi- morum medicorum a longo jam tem- pore stabilitum confirmatumque de- dit; & nos eo solo complures femel- las, quæ crebrius abortum perpessæ sunt, ad statum pariendi tempus de- ductas novimus. Sed primo quidem notari meretur, quod, cum creber abortus ut plurimum circa finem ter- tii ab imprægnatione mensis, pro- pter largiorem sanguinis ad uterum affluxum, quem fœtus ad sui nutritio- nem tunc nec requirit, nec ferre po- test, incidat, tutissime circa id tem- pus, præsertim abortui jam adsueta vena in brachio secetur: ea enim hoc in loco, suffragante omnis anti- quitatis testimonio, securior, quam in locis inferioribus habenda est. Ni- hilominus in totum non negari po- test, quin venæsectio etiam in pede

gravidarum, præsertim ultimis circa partus tempus mensibus commodissi- me possit institui. Deinceps vero cir- cumspecto præsentis medici judicio committendum est, quantum sangui- nis emittere, & quoties ejus missio- nem iterare conveniat. Nam eam pro diversitate plethoræ, majorique vel minori sanguinis ad uterum con- gessione ter sæpe, vel quater intra graviditatis tempus esse repetendam, crebra nos docuit experientia. Vid. AMATUS LUSITANUS cent. II. curat. 95. it. MISC. NAT. CUR. Dec. I. A. VI. obs. 204. A. IX. X. obs. 48. ubi refertur, Medicum foeminam, quæ octies abortiverat, repetitis ve- næsectionibus circa initium quarti mensis, item circa septimum ab ulte- riori abortu præservasse. Nec defi- ciunt exempla, ubi singulis mensibus ex venæsectione petendum fuit auxi- lium: cujusmodi observationes apud STALPART VANDER WIEL, HILDANUM, BILLINGERUM, RIVERIUM Cent. I. obs. 53. VER- SAZAM Cent. I. obs. 82. aliosque non sine fructu legi possunt. Cum primis ve- ro tunc opportunissime detrahitur san- guis, si naturam in movendo abortu ef- se occupatam, ex doloribus modicis, lumbos potissimum infestantibus, & ad ossa ischii, nec non os sacrum descen- dentibus, colligitur. Cujusmodi moli- mina ad abortum quoties occurrunt, toties, monente Clariss. BOERHAVE, sanguis e partibus superioribus mitten- dus est. Utilissimum hanc in rem FER- NELII monitum, quod habet l. II. me- th. med. c. 12. inferiores prægnantium ve- nas, scribentis, incidere minime tutum, quod impetu deorsum converso menses procedant, præcipiteturque fœtus.

#### §. III.

Quum porro gravidæ, quibus alvi Alvi  
constipatio familiarior est, & quæ in- lubrici-  
super pathematibus hypochondriacis, tas præ-  
vel hystericis obnoxia sunt, ad abor- cavet  
tiendum admodum pronæ deprehen- abortū.  
duntur: eo respicere debet medicus, ut per totum gestationis tempus maxime prio-



prioribus mensibus, apertam convenientibus remediis fervet alvum. Ego non semel quidem, sed sæpius observavi, quod, uti a sanguinis abundantia in gravidis, vasorumque imi ventris nimia repletionem difficillime succedit alvinæ excretionis negotium; ita eadem, subtracta legitima sanguinis quantitate, ad pristinum mox redeat officium. Inter pharmaca vero, quæ hic alvinam excretionem tuto adjuvant, eminent passulata, manna, inque primis rhabarbarina. Probata præ ceteris fidei est sequens electuarium: Recipe rhabarbari pulverisati unciam unam, mannæ uncias duas, cremoris tartari drachmas duas, solvantur leni calore in aquæ veronice libra dimidia; colaturæ addatur passularum minorum libra una, & inspissetur leni calore in vase stanno, adjecta sub finem pulveris cinnamomi drachma una; cujus duo vel tria cochlearia circa prandium, vel somni tempus capiantur. Iis vero, quæ magis sero, quam sanguine abundant, proficua potius sunt pilulæ BECHERIANÆ, vel ad earum exemplar paratæ; quarum eo tutior erit virtus, si ad infringendam, quam in nonnullis excitare solent ebullitionem, cum ipsis pulvis quidam absorbens, deterisivus & nitrosus exhibeatur. His etiam commodissime substitui possunt pilulæ marocostinæ pariter ac de succino Cratonis.

§. IV.

**Dispositio ad abortum ex malo post partum regimine quomodo tollenda.** Sæpius fit, ut neglecta uteri post partum a sordibus ipsi inhærentibus purgatione, remaneat ad abortum proclivitas, quam quidem præcavere licet per convenientia laxantia, balnea & tonica. Ex laxantibus præter dictas pilulas, usurpari potest infusum, quod paratur ex radicis aristolochiæ rotundæ, Zedariae, pimpinellæ, rhabarbari ana uncia dimidia, herbe melissæ manipulo uno, florum cheiri, anthos, salviæ ana pugillis quatuor, feminis levistici, cumini, cardamomi, corticum aurantium, baccarum lauri ana drachmis

duabus, fibrarum hellebori nigri, agarici trochiscati ana uncia semis, passularum minorum uncias tribus, quæ affusa vini Rhenani mensura una & dimidia, leni extrahantur calore. Deinceps balnea aquæ dulcis convenient, in quibus, ad roborandum uterum, sacculos speciebus nervinis repletos ventri adplicare juvabit, quales sunt herbarorismarini, pulegii, marrubii, artemissæ, salviæ, majoranæ, summitates origani, serpilli, menthæ, flores chamomillæ vulgaris & Romanæ, & semina quatuor carminativa. Ubi vero balnea locum non habuerunt, summo cum fructu adplicatum vidi Emplastrum Rostingii, vix satis commendatum, quod ex lithargyrio, oleo olivarum, cera, therebinthina, oleo laurino, gummi galbano, opoponace, ammoniaco, bdellio, olibano, mastiche, myrrha, aloë & camphora, debita dosi permixtis componitur, & ossi sacro, nec non regioni pubis diutius adplicatur.

§. V.

Quoniam denique secundum aph. 12. **sect. III. HIPPOCRATIS** australis, aut pluviosa diuturna hyems, epidemici abortus causam ac occasionem subministrat: providere oportet medicum, ut non modo victus & vitæ regiminis ejusmodi temporibus exquisita habeatur ratio; sed & corpus liberetur a sordibus copiosis, servata liberiori perspiratione, & alvo aperta: unde ne frigide aeris tempestati corpus exponatur, nec acida aut adstringentia ingerantur alimenta, probe cavendum est. Abstineret etiam tunc præstat a coena largiori, carnibus, placentis, omnibusque esculentis pinguioribus, quippe quæ gravidarum appetitui quidem, minime vero sanitatis integritati tunc temporis respondent.

§. VI.

Quod si vero, post prævium terrorem, aut alias violentas causas, abortum imminere, ex dolore lumborum, spasmus ad uterum tendentibus, extremorum frigore, & præcordiorum constrictione.

Abortus ex tempestatum vitio, quomodo præcavendus.

Imminens abortus quomodo tractandus.



ctione cognoscatur: vena protinus in brachio secanda est, tumque spasmorum violentia demulcenda. Huic scopo inserviunt mixturæ analepticæ, blande diaphoretica & antispasmodica virtute præditæ; quales confieri possunt ex aqua melissæ turcicæ, li-  
 hiorum convallium, florum tilia, primularum veris, aqua cinamomi, pulvere marchionis, cornueervi philosophice præparato, tinctura coralliorum, liquore nostro anodyno minerali, & syrupo acetositis citri. Extrinsecus balsamum vitæ dictum, nec non embryonum, pani tosto infusum umbilicali regioni admovere juvat.

## §. VII.

*Hæmorrhagia abortiva quo modo tractanda.*  
 Quod si porro enormis jam facta hæmorrhagia fuerit; illa nunquam adstringentibus ac narcoticis sistenda est; quoniam ea remedia vel adstringentibus ac narcoticis sistenda est; quoniam ea remedia vel adstringendo, vel relaxando nimis uteri fibras, ad abortum magis disponunt. Potius, si ab ullo remedio auxilium sperandum est, id a venæsectione in brachio instituta, vel medicamentis nitrosis, leniter papaveraceis, antepilepticis, nec non liquore nostro anodyno, præ omnibus aliis expectari potest. Præterea dantur etiam casus, ubi abortus, & ejus procuratio, valde salutaris, imo necessaria est, ad vitam gravidæ servandam: quando nempe enormis hæmorrhagia, mense septimo vel octavo ex utero prodit, nulla ratione sistenda, cumque animi deliquis juncta, quam demum ipsa mors sequitur. Tunc est consultissimum, foetum, qui plerumque mortuus est, vel medicamentis, vel manuali operatione cito expellere; qua de re perdocta BOHNII disputatio de abortu salubri legi mereatur.

Cautelæ, & monita practica.

## §. I.

*Quomodo abortus in morbis acutis sit præcavendus.*  
 SI morbus acutus, continua febris exanthematica, variolosa, aut etiam intermittens abortum in gravidis minatur: instituta in principio venæsectio magnam spondet utilitatem; adeo, ut, si negligatur, dolores, spasmus, & vehementes sanguinis commotiones quam facile abortum provocare queant. Insuper summopere animis calido regimine est abstinendum, & ea præbenda remedia, quæ nimiam humorum ebullitionem deprimunt. Ne etiam in declinatione horum morborum, quod non raro contigisse visum est, foetus ob alimenti inopiam expellatur; consultum est, deficientes succos nutritios jussulis carniū juniorum animantium, præsertim vitulinarum, quibus incocta sunt hordeum, radix scornozeræ, & vitelli ovorum, reparare; & pro potu aquam hordei, cum aqua cinamomi, succo citri, sacharo & vino permixtam exhibere. Hoc in casu, sanguinem velle detrudere, foret perniciosissimum.

## §. II.

*Curatio specia-  
 lior puerperarum.*  
 Puerperas, ad repurgandum uterum, hac potissimum ratione tractare consuevi, vel infusum laxans uterinum evacuatione, eas per triduum in balnea descendere jusserim; tum rursus repetita purgatione, pari modo balnei usum subjunxerim; ac denique eandem methodum, si opus fuerit, tertia vice iteraverim. Ego profecto hac ratione plures, quæ ex abortu steriles fuerunt redditæ, vel informes polyposas carneas massas, vel concrementa ex sanguine & pituita coagulata, variæ figuræ in figuræ in utero progenita aliquot vicibus excluderunt, per Dei gratiam ad pristina sanitatis vigorem optime reduxi.

## §. III.

*Abortus, qui po-*  
 Quum in dysenteria abortus propter tenesmum continuum ac vehementem



in dy-  
fente-  
ria sub-  
oritur,  
tracta-  
tio. potissimum fit; huic primum omnium  
aptis remediis occurrendum, fortibus  
nimirum emollientibus, vel injectio-  
ne clysterum, qui ex meris mucila-  
ginosis sunt compositi v.g. ex semine  
psylli, scœnu græci, cydoniorum;  
vel suppositoriis ex spermate ceti, se-  
vo hircino, cera alba, croco, & tan-  
tillo olei hyoscyami.

§. IV.

Abor-  
tus in  
hysteri-  
cis præ-  
serva-  
tio. Quando pathemata hypochondria-  
ca, vel hysterica frequentioribus caus-  
sam præbent abortibus: non facilis re-  
stitutionis spes est per remedia phar-  
maceutica; sed omne auxilium a con-  
venienti tam interno, quam externo  
aquarum thermalium usu, quo etiam  
sterilitas nonnunquam sanatur, expe-  
ctari debet.

§. V.

Cautela  
circa  
venæ-  
sectio-  
nem. Quando post vehementem terrorem  
metus abortionis imminet, præser-  
tim in sanguine plenis, & quæ jam  
olim huic malo fuerunt obnoxia, ve-  
nam quidem secare convenit; sed ca-  
vendum simul, ne venæsectio statim  
a terrore instituat, si extrema ad-  
huc refrigerata, & præcordia constri-  
cta fuerint; sed expectandum, do-  
nec natura remotis spasmis, incepe-  
rit, sanguinem citiori motu cordis  
ad extimas rursus propellere partes:  
alias constans docet experientia, san-  
guinis sub ipso motuum vigore factam  
detractionem, ad promovendum po-  
tius, quam coercendum disponere a-  
bortum.

§. VI.

Mola-  
rum  
præser-  
vatio. Nonnunquam secundo vel tertio  
post partum mense fit, ut massæ in-  
formes membranaceæ, cum præce-  
dente enormi hæmorrhagia & lipo-  
thymis utero excludantur, idque de-  
cima vel duodecima septimana repeta-  
tur; unde omnis conceptionis perit  
spes: quamobrem opus est, ut post  
abortum balnea ac pilulæ balsamicæ per  
aliquod tempus adhibeantur, iisque u-  
terus a sordibus ipsi inhærentibus,  
quæ molarum generationi causam præ-  
bent, probe purgetur.

§. VII.

Quæ gravidarum se ab abortu præ-  
munire cupiunt, cavere sibi debent  
ab acidis; a frigore, a vino, nimia-  
que carniū copia. Fugere etiam de-  
bent adfectuum intemperantiam,  
præsertim subitum terrorem; nec  
non cuncta foetida, maxime extin-  
ctarum candelarum fumos. Quæ alvi  
obstructione laborant, eam, vitatis  
purgantibus, per supra dicta laxantia  
lubricare debeat; quo nomine cly-  
steres etiam laudari merentur.

§. VIII.

Quandocunque jam facta est se-  
cundinæ ab utero separatio, testante  
id sanguinis ex uteri cavo grumosi  
profusione, imprudenter ad abortum  
præcavendum ageret Medicus, si in-  
terne adstringentia propinare vellet;  
siquidem foetus jam separati vel et-  
iam mortui retentio, & hinc ejus  
vel secundinarum orta putredo, at-  
que etiam cruoris retenti coagulatio  
& corruptio gravia & periculosa mi-  
natur symptomata. De quibus docte  
egit B. SLEVOGT in *progr. de par-  
tus retardati nocuementis*, dissertationi  
de restitutione in vitam suffocatorum,  
præmisso Jen. 1705. Sed præstat tunc  
circumspecte & prudenter foetus ex-  
cretionem promovere. Quo nomine  
laudatissima efficacia pilulæ tempe-  
ratæ balsamicæ, cujus generis sunt  
BECHERIANÆ, marocostinæ,  
aloephanginæ, item Cratonis, mo-  
do aloes succotrinæ dons imminuta  
fuerit compluribus memorabilibus e-  
xemplis se usque eo commenda-  
runt.

§. IX.

Ego non semel sed iterum foemi-  
nis sanguineo-phlegmaticis, a potu la-  
cerevisiæ spirituosæ & saturarioris val-  
de nutrientis & nimias uteri hæmor-  
rhagias & frequentiores abortiones  
cum observaverim; insigni cum fru-  
ctu & felicissimo successu, potum a-  
quæ simplicis vel ptisanæ quotidianum  
ad præcavenda hæc mala suasi su-  
mendum.

§. X.

Regi-  
men  
gravi-  
darum.

Ad-  
strin-  
genti-  
noxa.

Caute-  
la circa  
potum.



## §. X.

**Abortus** Ubi ex nimia & orgasmica sanguinis ebullitione in gravidis dolores in lumbis cum pulsum celeritate, inquietudine, & vehementiori infantis in utero motu, abortum indicare videntur, præter quietam corporis continentiam, cum tranquilla mente & tenui diætâ junctam pulveres temperantes, qui matrem perlarum, pulverem Marchionis, nitrum purificatum, solutionem oculorum cancri cum acido citri factam recipiunt, & cum aquis leniter analepticiis & antispasmodicis, cujus generis sunt aqua nucistæ, florum chamomillæ, liliorum alborum, convallium, melissæ, rubi Idæi, cerasorum nigrorum exhibitæ auxilium ferre solent promptissimum.

## §. XI.

**Cautela** Quamvis validior & diuturnior corporis motio & succussatio e. g. per vecturam in non assuetis ad abortiendum occasionem non raro præbeat; attamen in assuetis id minime locum habet, ut potius frequentior & moderatior vectura circa octavum mensem nunquam non proficua sit, etiam iis, qui in proximo parturiendi studio versantur. Nam externo corporis motu motus sanguinis progressivi vitales promoventur, humores evadunt fluidiores, & superflui ac impuri per auctam spirationem excluduntur, obstructi quoque tubuli referantur, ut deinde & facilior partus & felicior valetudinis in puerperio status inde fiat. Exempla etiam in vulgus nota sunt quod scæminæ, quæ laboroso motu vitam sustentant, semper fere felicius & partum & puerperii tempus peragant præ iis, quæ vitæ sedentariæ nimis deditæ sunt.

## §. XII.

**De Ve.** Quoniam in fine tertii mensis solènter fere scæminæ abortire consue-  
**næse-** scunt, præsertim quæ extra graviditatem menstruis temporibus copiose

per plures dies expurgantur; ad præoccupandum ejusmodi malum sanguinis missiones sunt utilissimæ. Neque ab hac sententia alienus est FERNELIUS qui l. II. meth. med. cap. XII. scribit: Multæ, nisi vena circa quartum mensem referetur, abortiunt; sed tale remedium etiam circa initium tertii mensis, si abortuum prodromi adfuerint, locum obtinet commodissimum. Accedit, quod cum ratione & prudentia; in gravidis, quæ plerumque in statu plethorico versantur, administrata venæsectio etiam saniores & vividiores fœtus reddat. Quod si auxilii genus omittatur, & debiliores & ad epilepsiam & ventris convulsiva tormina proniores sæpe numero infantes observavimus, cujus rei facilis potest reddi ratio: quia impuriori lymphæ, quæ ex plethora salutare excretionem impediendo gignitur, eorum corpus nutritur.

Enarrationes morborum.

## OBSERVATIO I.

**F**œmina quinquaginta annorum, macilentæ ac tenerioris constitutionis aliquot liberorum mater, tertio novissimæ imprægnationis mense ob vehementiorem terrorem, & intensus, cui se exposuit frigus, junctâ enormi hæmorrhagia, & insigni virium prostratione abortivit. Ab hoc tempore perenne sanguinis ex utero continuavit profluvium, quod, licet interdum conquiesceret, mox tamen recrudit. Præterea ingens imi ventris intumescencia, multis palpitationibus ac volutationibus intus perceptis stipata remanebat; quæ primum novæ graviditatis suspicionem movebat; dein vero, cum ultra annum inhæreret tempus, ea spes evanescebat. Tumor ille potius mox tensus atque durus, mox vero mollis ac suppressus erat; pedes leviter, vespertino potissimum tempore intumescabant, & in hypogastrica regione perpetuum gra-  
vi.



vitatis ac ponderis sensum percipiebat, persistente sanguinis continuo fluxu. Quo in rerum statu, cum varia carminativa, laxantia, clysteres, ac leniter constringentia in cassum fuissent adhibita, thermas tandem Carolinas adiit; quibus per triduum usurpatis, cruenta mox conquievit fluxio, & quum, continuato aquarum potu, copiosa viscida materia per alvum eque ac urinam redderetur, brevi tempore, abdominis subsedit tumor. Quamobrem ad balnea descendebat, hisque vix semel utebatur, cum vehementissimis doloribus ac spasmis, parturientium similibus corriperetur ac sub iis aliquot concrementa carnea & membranacea, quę molas dicunt, excernerentur. Ex quo perfecte convaluit.

Epicrisis.

Abortum naturali partu periculosiorem esse, & gravissimos ex utero morbos post se trahere, indubia constat experientia. Hujus autem rei hæc mihi videtur ratio, quod in partu ejusmodi immaturo, secundinarum quedam portio, plerumque remaneat in utero; quę ad varia mala, inflammationes ventris, dolores, mensium suppressiones, vel perpetuum fluxum, exulcerationes, molas, concretiones membranaceas, & polyposas, materialem causam subministrat & occasionem; quin & ipsam interdum inferat sterilitatem. Quod etiam in nostro factum fuisse casu, nullum est dubium. Quare ad avertenda ejusmodi vitia, non præstantius est consilium, quam ut aliquot post abortum diebus, ea propinemus remedia, quę facultate roborandi, & uterum, ab inheretibus ipsi sordium reliquiis purgandi pollent. Hęc inter principem locum occupant pilule BECHERIANÆ; quippe quę continuato usu magnam in præcavendis uteri vitis, & abortionibus præstant utilitatem. Ubi vero hæc negliguntur,

& enata vitia diutius trahuntur; non certius ac præsentius illis tollendis præsidium, quam ex decenti interno pariter, ac externo thermarum usu reperitur; quę eo insigniorem exhiberunt efficaciam, si pilulis balsamicis secudentur.

OBSERVATIO II.

Fœmina adhuc junior sanguine plena, stature brevioris, habitus laxioris & spongiosioris, alvi ordinario adstrictioris, per quatuor jam vices, si gravida esset, semper inter tertium quartumque mensem passa est abortum. Cujus præcavendi causa, medicus consultus, circa tertium quintę impregnationis mensem, venam in brachio secandam, & quinque cruoris uncias detrahendas curavit. Quum ordinarium abortiendi tempus, quartus nimirum mensis accederet; sensit spasmodicos motus, flatulentias, & compressiones in lumbis & abdomine, adeo, ut iterum immineret abortus. Verum datis interne analepticis cum antispasmodicis mixtis, & exterius regioni umbilicali adplicato pane tosto, balsamo vitę meo irrorato, retinebatur fœtus. Accedente subinde septimo mense, denuo atroces circa lumborum regionem percipiebat dolores; quos medici a calculo renum derivabant, sed remediis ad calculum pellendum destinatis frustra pugnabant. Octavo mense pedes & femora mirum in modum intumescabant, & nono partus vivus excludebatur felicissime, subsequente copiosissimo lochiorum & aquarum effluxu. Paulo post iterum concepit, durante graviditate bis, tertio nimirum, & septimo mense, venam tundendam præbuit; unde factum est, ut licet dolores reverterentur, illi tamen mox conquiescerent, & illa legitimo tempore partum ederet felicem.

Abortus venæ sectione præservatus.



## Epicrisis.

Spasmi, sicut generatim omnes, ita etiam illi, qui in gravidis, tanquam abortuum causæ occurrant, monente jam HIPPOCRATE, vel ex repletionem, vel inanitione proficiuntur. Priori casu abortus fit ex copia sanguinis in uteri vasis, & circa lumbos stagnantis; & subiecta tum plerumque deprehenduntur spongioso corporis habitu, venisque turgentibus prædita, bene adpetunt, sed parum moventur, & ex ipsa sanguinis in imo ventre stagnatione, alvi sunt segnioris. His, præsertim si jam passa fuerint abortum, ad hunc præcavendum, summo cum fructu vena, iterato secari potest; cujus operationis excellentem effectum, & præsens casus testatur, & RAYGERUS in M. N. C. anno IV. obs. 204. illustri confirmat exemplo. Aliter se res habet, si ab inanitione, i. e. defectu sanguinis & nutrimenti producat abortio; ubi corpus est gracilius, vasa minora, pulsus frequens & debilis, internus calor, appetitus jactura, viriumque imbecillitas. Hoc in casu minime secanda est vena; tantum abest ut proficit, ut potius inde ad ipsam abortionis provocationem multum contri- buat. Præstat potius alimentis nutritivis & analepticis medicinis, & matris viribus succurrere, & foetui nutrimentum suppeditare.

## OBSERVATIO III.

Partus septimestris post hæmorrhagias abortivas rariores. Juvenula mulier, unius & vigin- ti annorum, temperamenti sangui- neo cholerici, præter variolas sexto ætatis anno feliciter superatas, inte- gra sanitate gavisa, obesa subinde san- guineque plena, menstrua ab anno decimo sexto justo tempore copiosa reddidit. Viro nupta bis felici cum successu peperit; sed post primum puerperium corpore magis extenuata, post alterum mensium inordinatum,

mox nimium, mox parciorem exper- ta fuit fluxum. Paulo post mense Martio tertium utero concepit, te- stantibus mensium suppressione, nau- sea, vomitu, ciborumque fastidio; & circa finem Junii foetus motitatio- nem in utero sentiens, se ad dimi- dium gestationis tempus pervenisse pu- tavit. Tertio post perceptum motum die, nocturno tempore ex improvise citra ullam causam præviam uno im- petu integra cruoris mensura ex utero profluebat; quamobrem postridie ve- na in brachio secabatur conjuncto con- fortantium, temperantium, & præ- cipitantium interno, nervinorum ex- terno usu, cum egregio levamine. Verum, novem elapsis diebus, ea- dem recidebat hæmorrhagia, & sic continuabat, ita tamen, ut per diem ab ipsa immunis existeret, noctu ve- ro, prævio tensionis in capite & bra- chiis, atque formicationis in pedibus sensu, dorisque dolore, uno impetu sanguinis quidpiam promanaret; tum- que simul & semel usque ad futuram noctem conquiesceret hæc cruenta flu- xio; & ceterum somnus pariter ac adpetitus essent integri. Adhibitis pulvere antispasmodico, pilulisque balsamicis STAHLII intra aliquot hebdomades cessabat ea uteri hæmor- rhagia, & ægra habebat optime. Sub finem Augusti mensis vero citra opinionem pedum spasmi, horrendi in dorso ac lumbis dolores, hypoga- stricæ regionis tormina, & adfirman- te obstetrice, pariendi tempus immi- nebat. Hæc spes vota fallebat; si- quidem perseverantibus per aliquot dies doloribus, excludebatur tandem vivus partus; sed uti ex calculo æ- grotantis pariter ac ipsa tenelluli de- bilitate adparebat, septimestris, qui post unam alteramque horam ex- spirabat; matre salva manente, & ad pristinum sanitatis vigorem rede- unte.



Epicrisis.

Attentione certe perquam digna est hæc observatio, quod medio gestationis tempore, foetu manente vivo & sine abortu uno impetu, integra sanguinis mensura ex uteri cavo profluxerit. Quæ subita & grandis hæmorrhagia sine secundinæ ab utero minimum partiali avulsione & ruptura vasis sanguinei contingere non potuit. Quamvis autem idoneis ad abortum promovendum remediis iisque præstantissimis datis foetus salvus manserit: tamen quia vas sanguineum ruptum, sub utero extenso non coalescere vel consolidari potuit, factum est, ut elapsis novem diebus hæmorrhagia licet non tam enormis iterum secuta fuerit. Et quoniam ob profusionem sanguinis debito nutrimento foetus fuit destitutus, septimo demum mense valde extenuatus & imbecillis exclusus est, & post horam expiravit.

Res est alias periculi plenissima, quod multis possem confirmare exemplis, quando septimo vel octavo mense ex vase sanguineo rupto tam copiosa & effrænis hæmorrhagia uterina fit. Nam nisi natura partum mox acceleret, vel circumspecta arte, quoad fieri potest, foetus ex utero expellatur vel manibus extrahatur, de vita non modo infantis sed & ipsius matris actum est. Ceterum in valde plethoricis foeminis tempestitiva circa finem tertii mensis instituta sanguinis missio ejusmodi periculosis hæmorrhagiis præcavendis convenientissima est. Cavendum vero in ejusmodi casibus est, a fortioribus ad cohibendas hæmorrhagias stipticis tam internis quam externis; quorum ope reprimatur quidem cruor, quia abit in massam coagulata, sed horripilatio, dolor circa uterum & dorsum vagus, cum animi inquietudine, ac pavore succrescit, & nisi natura ipsa resurgens validior propulsionem foetus mo-

liatur, exitiosa inde consequi symptomata, non mirum videtur.

#### OBSERVATIO IV.

Fœmina viginti octo annos nata, Abor-  
temperamenti cholericæ sanguinei, <sup>tus cum</sup>  
tenerioris strictiorisque corporis habi- <sup>sym-</sup>  
tus, ante quinquennium prævia ve- <sup>ptoma-</sup>  
hementi excandescencia septimestrem <sup>tibus</sup>  
enixa est partum. Lochia sub puer- <sup>hypo-</sup>  
perio fluebant parciora, & hinc ab <sup>chon-</sup>  
eo tempore hypochondriacæ accesse- <sup>driacis.</sup>  
runt passionēs, velut capitis dolores, vomitiones, vomendi conatus, gravativus in ventriculo sensus, tormina imi ventris, alvi segnities, extremorum frigus, gelidaque in certo capitis spatio sensatio. Hæc symptomata per intervalla invadebant, nec prius remittebant, quam donec bilis æruginosa vomitu redderetur. Binis post annis utero rursus coepit gerere, atque circa medium gestationis tempus recensitorum malorum vacuitate gaudere. Sed hoc tempore successit febris tertiana, & per novem inhæsit menses. Neque tamen minus sub ea ipsa partum feliciter debito tempore edidit, lochia sufficienter fluxerunt, & subinde menstrua quoque legitime promanarunt. Tandem sublata febre, pristina hypochondriaca recruderunt pathemata, cum perpetuis vigiliis, & mentis insigni contristatione stipata: & a commendato sub paroxysmo aquæ frigida potu, datisque pilulis aloeticis, magis invaluerunt. Neque remiserunt per insequentem graviditatis statum: tantum abest, ut novissime tres menses gravida, post gravem animi commotionem abortiret, & posthæc malo suo ad hanc usque diem vehementius adfligeretur. Appetitus ceterum iusto est avidior: & a suaveolentibus male habet. In hoc rerum statu meum implorabat auxilium. Ego re paulo solertius excussa judicavi internum Carolinarum usum & postea balneum Tœplicesen-  
utilissimum tum ad obstructions &

in-



infarctus viscerum, unde mali hysterici & hypochondriaci origo, submovendos, tum ad uteri tonum valde debilitatum restituendum, absoluta vero hac cura præter exactam diætam, & abstinentioniam per aliquod tempus a coitu, elixir meum viscerale cum essentia succini & rhabarbari mixtum singulis diebus bis sumendum una cum decocto pro potu ordinario ex raspato ligno sassafras & passulis composito commendavi.

## Epicrisis.

Pathemata hypochondriaca & hysterica a fibrosa uteri quoad ejus tonum, robur, & elaterem substantia læsa, quæ post partum & abortum fit, nisi congruis remediis cito restituatur, originem suam subinde ducere, non novum est, sed quotidianis exemplis confirmatur. Nam naturalem sanguinis per vasa uteri circuitum inordinatum & læsum, per nexum qui est inter vasa sanguinea universi corporis, mox inordinatus & turbatus sanguinis motus per universas & maxime nobiliores partes subsequitur. Inde fit, ut affectiones hypochondriacæ & hystericae sint systematicæ, in quibus omnes partes a naturali sua functione desciscunt. Et inde etiam accidit, ut quæ vehementiori gradu hysterici & hypochondriaci mali laborant, foetum vivum & sanum debito tempore vix parere queant, & ad abortiendum valde sint proclives. Sed quoniam febris tertiana & quartana rite succedens & tractata, virtutem sæpius medicinalem habet a multis impuritatibus, obstructionibus & infarctibus corpus liberandi, factum inde etiam est, ut præsens foemina sub febre & foetum retinuerit, & feliciter pepererit. Postquam vero febris in nostra ægra forsan per incongrua artificia sublata fuit, non modo affectio hypochondriaca recrudit, imo exacerbata, sed immatura etiam foetus expulsio secuta est. Dici enim vix

potest, quantam in curando prudentiam & judicium intermittentes febres, præsertim si chronicæ in foeminis factæ fuerint, desiderent. Quares si negligitur, statum perpetuo valetudinarium inde sæpius animadverti. Neque vero ego præsentius unquam auxilium quam in tempestivo & prudenti externo & interno aquarum thermalium usu me deprehendisse, ingenue profiteor.

## OBSERVATIO V.

Triginta annorum foemina, robustior, & sanguinea, præter binos infantes, quos sub conjugii auspiciis feliciter exclusit, bis septimestres, quater quinquimestres passa est abortus, qui hunc in modum tristem luserunt scenam. Graviditate ad mensem tertium protracta, in dorso & sinistro hypochondrio tendentes ac lancinantes persensit dolores, qui sensu ponderis cujusdam stipati, ad regionem pubis excurrerant, cum ani tenesmo, alvi obstructione & flatulentis. Tum copiosus, & enormis sanguinis ex utero fluxus excepit, qui per certa intervalla continuavit ad abortionis supradictæ usque tempus. Foetum, qui plerumque sanguine totus suffusus fuit, excluso, dolores in sinistro hypochondriaco nihilo fecius per aliquod adhuc tempus continuarunt. Quo in rerum statu novissime rursus concepit & cum tertium imprægnationis mensem explevit, recrudit uterinus fluor: qui licet iterum evanesceret post tusam in brachio venam, adfligebant tamen dolores hypochondrii sinistri, decubitus ponderis ad pubis regionem, obstructio alvi, flatulentia, tenesmus, & mammae lacte turgabant. Ceterum extra prægnationis statum non habebat, de quo conquereretur; & quamprimum conceptio facta est, crebris vexari solebat sternutamentis. Ut igitur hac vice foecunda gaudere prole posset, meam petiit opem.

Epi-



Epicrisis cum consilio.

Prima quam huic ægræ de sua valetudine me consulenti proposui, hæc fuit quæstio: Quo potus genere huc usque usa fuerit. Dixit, coqui in loco, ubi degebat, cerevisiam valde saturatam & spirituosam adeo, ut ex haustu duarum mensurarum homines inebrientur. Tetigi pulsum, qui valde erat magnus; conquerebatur de perpetuis fere lumborum doloribus, & a gravi terrore primum abortum excitatum esse edixit. Ego aquam puram fontanam, quam maritus asseveravit ibi esse saluberrimam, pro potu ordinario assumendam suasi. Deinceps dedi pulverem ex conchis præparatis, Cornu cervi philosophice præparato & nitro, singulis æquali pondere mixtis, cujus drachmam quotidie circa lecti introitum usurpandam commendavi. Dedi quoque emplastrum, quod erat saponatum BARBETTE cum oleo hyoscyami malaxatum, lumbis dolore & spasmo affectis applicandum. Demum ut elapso mensis spatio rursus venæsectionem admitteret, suaserui. Quæ præcepta & monita cum accuratius observavit, factum est, ut feliciter consueto tempore pepererit. Ex quo clarissime apparere arbitror, ad plethoram, si hæc vel ad vires vel ad vasa frequentioris causa abortus fuerit, minuendam non tantum venæsectionem in auxilium vocandam, sed & aliis remediis ex diæta desumptis præcipue congruo potu opus esse.

OBSERVATIO VI.

**Abortus frequens.** Fœmina recens nupta sanguineæ & vegetæ constitutionis, prima vice per duos menses gravida, inopinato eoque fat vehementi percellitur terrore, quo fit, ut præmaturis gravibus abdominis correpta spasmis, foetum excluderet & per tres hebdomades ægre habuerit. Tempore, quo menses fluere consueverant, loco sanguinis

neæ excretionis fluor successit albus, qui nullis obtemperavit remediis. Nihilo tamen minus iterum gravida facta, diu non modo ad terrorem & affectus animi proclivis, sed & de lumborum atroci dolore, qui plerumque animi turbas sequebatur, conquesta fuit. Non ita multo post ex improvviso valde terrefacta iterum abortum passa est; qui nec venæsectione nec aliis convenientibus remediis arceri potuit. Ex quo tempore valde debilitata, levi ex causa in terrorem rapitur, qui dormientem maxime exagitat, cum anxietate & interno ardore molestissimo.

Epicrisis cum consilio.

Magna certe motuum & affectionum animi cum ipso utero communicatio & mutua conspiratio observatur. Cujus rei luculentum, quæ in utero gerunt fœminæ, testimonium præbent. Nihil enim frequentius contingit, quam, quod gravi quadam in animo ex causa externa oboriente motione uterus cum adnexis partibus nervosis ad similes motus foetui & ejus nutritioni ac retentioni in utero minus amicos proritetur; adeo ut abortionis etiam unicam causam ejulmodi animi pathemata constituent. Vicissim etiam observamus, quando vitium hæret in utero gravidarum, quod liberiores sanguinis per ejus & infantis vasa impedit, animum ad plures inordinatos affectus, cujus generis sunt meticulositas, pusillanimitas, animi defectio, ex levi causa terror, frequentissime disponi. Ex quo clarissime patet, Medicum qui fœminarum ex utero morbos recte curare velit, non modo ad corporis vitia, sed etiam ad animi inordinatos motus compescendos enram dirigere debere. Cum vero multoties experientia attentior doceat, frequentiores abortionis recidivas inde suam causam & originem petere, quod uterus cum annexis partibus & vasis post abor-



tum a sordibus stagnantibus non recte expurgatus, nec pristinum robur ac tonus ipsi restitutum fuerit; ideo Medico incumbit perito & solerti, ut id convenientibus & efficacibus remediis recte perficiat. Jam vero non diffitendum est, pilulas illas, quas BECHERUS fortuito certe, quia artem Medicam vix calluit, invenit, & ex extractis amaricantibus & temperatioribus balsamicis gummatibus, atque refracta gummosa aloes portio- nis dosi composuit, & quæ ad harum exemplar a clarissimis nostri ævi Me- dicis, inter quos primus fuit L. L. HERMARNUS, Professor olim ex- traordinarius, a CL. STAHLIO, nobis aliisque præparatæ sunt, ad præcavendos posteriores abortus præ aliis specificam sibi efficaciam vindica- re; Modo non empyrice, sine habita subjecti vel circumstantiarum ac cau- sarum ratione in usum ducantur. At- que ego plura innumera possem alle- gare exempla, complures ad abortum valde proclives recto harum pilula- rum, neque minus post factam uteri purgationem, convenienti thermarum & balneorum artificialium usu, sub legitimo vitæ regimine felicissime fuisse restitutas.

## OBSERVATIO VII.

Abortus  
cum va-  
riis  
sym-  
ptoma-  
tibus.

Judæa foemina triginta trium anno- rum ante aliquod tempus, tertio gra- viditatis expleto mense, ob vehemen- tem terrorem abortivit; larga simul uteri hæmorrhagia, violentis vomiti- bus, & crebris animi deliquiis solici- tata. Paulo post iterum concepit, u- teroque per decem circiter hebdoma- des gerens, rursus abortum, pristinis symptomatibus stipatum, passa est. Quo excluso male cœpit habere; to- tum enim corpus insigniter languebat, animus valde sensibilis, & ad pathe- ticas commotiones nimium pronus e- rat, omnemque graviolem excande- scentiam gravativus abdominis lumbor- umque dolor excipiebat. Alvus,

quod notabile erat, suo nunquam non respondebat officio; digestiva autem ventriculi vis laborabat vitio, & va- ria ad hæmorrhoides molimina, nul- lo accedente fluxu, urgebant. Nota- tu porro est dignum, ægram per qua- tuor jam annos perpetuo ciborum fa- stidio fuisse sollicitatam; & præcordio- rum quandoque torqueri anxietatibus. Quo in rerum statu meam implora- bat opem, idque auxilium, quo ab abortu præcaveri posset, desiderabat. Foemina hæc quia valde plethorica ac admodum spongiosi & repletioris e- rat corporis, parum levaminis atque emolumenti a pilulis temperatioribus supra laudatis percepit, sed modera- tiores & frequentiores sanguinis mis- siones & repetitum thermarum Ca- rolinarum usum magna cum euphoria ferre potuit.

## Epicrisis.

Utut pilulæ sic dictæ BECHERIA- NÆ insignissimi in morbis mulierum sint usus, tamen ubi nimia sanguinis in corporibus præsertim, quæ mino- ribus vasis sunt donata, abundantia difficiliorem per totum corpus progres- sum efficit, & ubi simul in foeminis ad fluxum hæmorrhoidalem dispositio adest, circumspicte eas adhibere oportet; quia sanguinis & humorum mas- sam in præternaturalem orgasmum quam facile conieciunt, & deteriora reddunt symptomata. Tutiora hinc rhabarbarina cum salibus nitrosis & de- tersivis juncta deprehendi. Et quia in hoc subjecto ingens motuum vitalium & animalium, item excretionum ataxia præcipua symptomatum causa & fons fuit, atque remedia obvia hisce tollen- dis non sufficiunt, tutum omnino & certum auxilium contra ejusmodi mor- bos in prudenti & rationali thermarum Carolinarum usu sæpius me invenisse obtestor.



## OBSERVATIO VIII.

Molæ  
excre-  
tio.

Fœmina quadragenaria, sanguinei temperamenti, habitus spongiosi, ob menstruorum defectum, & abdominis intumescantiam per quinque menses habebatur gravida. Quibus elapsis præter opinionem corripiebatur doloribus circa lumbos & inguina, & mox sequente copiosissimo sanguinis profluvio: cum quo secunda die concrementum carneum, ex membranis conflatum, rubicundum insignis molis excernebatur. Neque tamen minus sanguinis fluxus, utut parcior, ad aliquot perseverabat septimanas. Transacto mense eadem ludebatur scena, præviis enim & doloribus, & hæmorrhagia, excretio molis carneæ denuo sequebatur. Abhinc cruentum profluvium ex toto non conquievit, sed modo parcius, modo copiosius inhæsit; donec post sex hebdomades, iterum carneæ utero excluderetur moles, quæ intra octo menses septies reddebatur. Notari autem meretur, post quartam ejectionem loco sanguinis, serum purum limpidum magna copia quotidie effluxisse. Et hic lymphatici laticis fluore jam ultra annum dimidium perdurat; cui jungitur gravativus dolor, tumor atque durities quædam in sinistro hypochondrio; & ejus lateris femur cum toto pede, œdematosum exhibet tumorem. Ceterum ægra expallescit, emacrescit, cibos averfatur; pulsus fertur frequens & debilis, horror quandoque corpus percutit, subsequente calore; & sanguinis grumosi ejectionem plerumque antecedit ejusmodi horror.

## Epicrisis.

Molæ, sub quarum nomine concrementa veniunt carneæ, a veteribus dividuntur in molas generationis & nutritionis. Hæ suboriuntur ex vi-

tiosa nutritione, & succi sanguinei chylosique stagnatione intra extremas uteri membranas; quæ plerumque Lochiorum vel menstruorum per male feriatas artes suppressioni debetur. Rariores profecto sunt, & nisi statim ab initio congruis debellantur subsidiis, incrementum in prægrandes tumores; qui supra intestina porriguntur, & imprægnationem vel hydropem mentientes, nullam admittunt sanationem. Talem casum videas in CONSULT. MED. *sect. III. cas. LXXI.* pag. 318.

Contra vero generationis molæ in ipsius uteri cavo producuntur, ubi loco veri conceptus moles carneæ indigesta, vasculis, membranis, & fibris carneis prædita generatur: sicut fere fit in fœminis conjugatis, cachexiæ obnoxiiis. Simulat veram imprægnationem ejusmodi concrementum; siquidem menstrua silent, venter grandescit, mammae turgent lacte, donec tandem circa quartum plerumque mensem cruor ex utero prorumpat, secumque scœpius vehat talem informem massam. Interdum hæmorrhagia sola continuat per aliquot menses, absque molæ istiusmodi rejectione, quæ longo demum post redditur tempore.

In nostro casu mola fuit generationis; quæ prima reliquarum generationi ansam præbuit. Ut plurimum enim hæ concretiones quasdam in utero relinquunt sui partes; quæ facile in novam coeunt & attolluntur excrementum. Videtur etiam in hoc casu quædam læsio adesse, cui febris lenta est juncta, testante pulsu frequentiori. Et quoniam circulus sanguinis per uterum, & vicinas partes simul est turbatus; compressis illiacis vasis, enatus est pedum œdematosus tumor: ex quo cachexiæ metus imminet, & inauspicata resultat prognosis.



## OBSERVATIO IX.

Nimia ad abortum proclivitas cum molarum excretionem. Requirebat aliquando opem meam generosa mulier, triginta octo annorum, quæ abortum passa, utero subinde non rite expurgato, quater adhuc, quovis mense ab imprægnatione tertio abortiverat. Quam abortiendi proclivitatem ut tollerem, hac usus sum medendi ratione: Per triduum quotidie quindecim pilularum balsamicarum vesperi deglutiendas, mane sal aperitivum, quod cremorem tartari, lapides cancrorum, tartarum vitriolatum, sal Epsomense, & nitrurum depuratum habebat, propinavi: deinceps, ut per quinque dies balneis ex aqua fluviali, cineribus clavellatis, mentha, melissa, salvia, floribus chamomillæ paratis insideret, & ab his leniter sudaret jussi; atque hanc curationem alternando ter repeteret commendavi. Præterea, quum utero rursus concepisset, alternis mensibus, venam in brachio tundendam curavi, hisque obtinui, ut valeret optime, & debito tempore felicem excluderet foetum. Verum enim vero post aliquot annos, neglecta venæsectione, rursus abortivit; & abhinc non modo hystericis obnoxia pathematibus, verum etiam menstrua primum parciora, deinde immo dica fuit passa; quibus tandem animi deliquia, ac vomitus accesserunt; & denique moles carnea, membrana cea, aspera, intus cellulosa prorupit, qua excreta nimium sanguinis profluvium conquievit. Quum vero majora inde mala timeret; me rursus consuluit. Ego itaque suasi, ut commendata brevi ante curatione iterum uteretur, eamque ob inveteratam uteri malam dispositionem, ad ejus robur instaurandum, quovis vere & autumno per aliquod tempus repeteret. Ceterum dedi infusum theiforme ex melissa, scolopendria, salvia, betonica, floribus millefolii, hyperici & aniso stellato paratum, singulo-

que mane sorbillandum, & easdem species cum cerevisia fermentatas, ad potum ordinarium præscripti.

## Epicrisis.

Concrementorum, quæ utero excluduntur, varia sunt genera: primum audiunt molæ; quas & generationis & nutritionis superiori pertractavimus observatione. Alterum est cruor congrumatus, in magnis frustis, excretus; cujusmodi observationem allegat RUYSCHIIUS *obs. chir.* 29. Datur quoque concrementum, quod, licet improprie, ferosam vocant molam, & nihil est aliud, quam ferosa colluvies peculiari membrana inclusa; de qua & RUYSCHIIUS *l. c. obs. 33.* & HILDANUS *Cent. II. obs. 53.* iniiciunt mentionem. Nostra ægrotans exclusit tam molas veras, quam cruorem congrumatum, quem magnis in frustis conspiciere licuit.

Hoc loco vero adhuc commemorare juvabit, quod ad excretorum, quæ ex utero fiunt genera, referenda sint ossa & partes integræ infantum intra uteri cavum putrefactorum. Contingit id vitii genus, ubi avulsis secundinis foetus grandior fuerit, aut ejus abortiva exclusio adstringentibus impeditur: & videtur scemellis, si sub alvi exoneratione egerantur ejusmodi frusta, ac si ex ipsis exirent intestinis. Qui de iis plura nosse cupit, adeat SENNERTUM *prax. lib. IV. part. 2. sect. 6. cap. 7.* TULPIUM *observ. Lib. IV. cap. 39.* & THOMAM BARTHOLINUM *hist. med. 14. Cent. IV.* Mihi ipsi licuit ejusmodi casum haud ita pridem in scemina annotasse; cui præter alias convenientes medicinas, pilulas ac balnea ex aqua dulci, nec non thermas subinde Carolinas commendavi fructu cum felicissimo.



OBSERVATIO X.

Epicrisis.

De fre-  
quenti  
abortu  
cū per-  
petuo  
vomitu.

Femina triginta annorum, habitus corporis pituitosi, mediocriter pinguis, septimo decimo ætatis anno viro nupta, peperit in tempore fetum vivum. Deinceps abortum passa fuit trimestrem; tumque successively tres aut quatuor vivos fetus in lucem edidit, quorum quemvis trium, aut ad summum quatuor mensium abortus subsequutus est. Hos abortus semper excepit admodum molesta per octiduum uteri hæmorrhagia; qua cessante fluor albus accessit, ad hanc usque diem inhærens. Præterea supervenit nausea atque vomitus, tantaque inhæsit pertinacia, ut nullis hucusque remediis debellari potuerit, eoque non solum omnes cibi, maximeque solidi protinus rejiciantur, verum etiam sub jejuniopituita insipida quotidie eructetur. Quo in rerum statu per annum novissimum bis iterum abortivit; persistente vomitu, aliisque hypochondriacis symptomatibus subinde cruciata. Consultus ego commendavi primo balneum aquæ dulcis, cum origano, calamintha, balsamina, mentha cataria, melissa, floribus chamomillæ vulgaris & Romanæ illis incoctis, eaque ut per aliquot hebdomades, extra graviditatis tempus, in usum vocaret, suasi. Verum triduo ante eorum usum pilulas balsamicas propinavi; easque singulis septem diebus balneis interposui. Præterea vesperiliquorem meum anodynum; atque sub epulis essentiam corticum aurantiorum exhibui. Non minus vehementer laudavi rectam vivendi rationem, atque convenientes Venæsectiones; ac denique thermarum Carolinarum tam internum quam externum usum commendavi.

Præsens affectus spasmodico est convulsivus, qui eas potissimum nervosas partes, quæ ad uterum atque ventriculum pertingunt, occupare videntur. Quod si illius causas, & ex his remotiores, perscrutemur; ipsa se offert agrotantis constitutio atque temperies. Ea enim habitum corporis præ se fert spongiosum, subpinguem; qui copiosis quidem, sed exilioribus instructus solet esse vasis. Horum autem angustia, & fibrarum nativa laxitas id secum vehunt incommodi, ut humorum vitalium progressus difficilior sit ac languidior: cui si vel mediocris animi juncta fuerit sensibilitas, facillimum est, ut distentis a mole sanguinis ductibus, spasmodici ac convulsivi accedant motus. Ejusmodi vero subjecta, si puerperiis fungantur, & uterus posthæc non rite purgatus sit, ad convulsivas sub nova imprægnatione uteri stricturas, abortuum causas proclivia esse, ex supra dictis patebit. Inde quoque ratio peti debet, cur in nostra tot & puerperiis & abortibus fatigata, fluor accesserit albus. Hic enim primario uteri atoniæ, & inde cumulatæ in ejus cavo sordibus debetur; nec cessat, nisi restituto uteri robore, tantum abest, ut ipse posthæc secundæ conceptioni impedimento, & causa abortuum fiat. Sub tanto partium solidarum languore, sanguinis & humorum dyscrasiam generari, testatur & experientia, & confirmat ratio: quam in nostro casu fuisse præsto, docent hypochondriacæ passionnes, & vomitus. Hic nihil est aliud, quam ventriculi convulsivus motus; qui sicut a repletionem, id est, sanguinis in ejus vasis stagnatione subnasci potest; uti videmus in gravidis, circa tertium vel quartum potissimum ab imprægnatione mensem vomentibus; ita etiam ab inanitione suboritur; & ideo profuso copiosius sangui-



ni supervenit. Causa hoc in casu in tam firmiter radicata partium solidarum atonia perpetuæ instar regulæ habendum est; quod quo magis diæteticiis, minusque pharmaceuticis utamur subsidiis, eo feliciori semper potiamur effectu. Et præterea opus est patientia: quo enim diuturnior fuit morbus, eo diuturniorem oportet esse blandam, naturæque convenientem curationem. Hæc igitur in præsentis casu vix aliis, quam quas proposuimus, medicinis obtineri potest; adeo ut illæ, non in nostra solum, verum quoque pluribus, quæ nostræ se tradiderunt curæ, ægrotantibus, nunquam non optatum ediderint effectum.

non videtur alia, quam quod loco generosi sanguinis, humores impuri, falsi & acres ad membranas ventriculi deferantur, easque stimulando, fibras nerveas ad vomibundam subversionem proritent. Neque enim inventu hinc difficilis est ratio, cur tam vomitus diuturnior existat, quam abortus frequentius redierit. Quamvis enim ægrotans nostra multis variisque medicaminibus usa fuerit; ea tamen pleraque cognovi esse talia, quæ vel nimis calidiora ac spirituosiora, velut sunt vulgaria carminativa, vel plane adstringentia, vel saltem vivendi recta ratione neutiquam adjuncta fuere. At enim vero

F I N I S.























